


Fúka Moodaanaki Kira  
Ufa Afaqínaasa Ufa



Portions of the Holy Bible in the Binumarien language of  
Papua New Guinea

**Fúka Moodaanaki Kira Ufa Afaqínaasa Ufa**  
**Portions of the Holy Bible in the Binumarien language of Papua New Guinea**  
**Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

---

PDF generated using Haiola and XeLaTeX on 18 Apr 2025 from source files dated 31 Aug 2023  
4a891130-f25d-5e30-a81c-882b2e037698

## Contents

FRT . . . . .	1
OOSANA . . . . .	2
RAFUDOO AKARAFa . . . . .	99
ESTA . . . . .	178
IDI UFA . . . . .	193
AAQUQIRA UFA . . . . .	342
MATAIOO . . . . .	386
MAREEKOO . . . . .	473
RUKA . . . . .	523
YOOHANEe . . . . .	604
NIQIQOO FASIQAUSA . . . . .	665
ROOMMA . . . . .	744
1 KOORINTI . . . . .	783
2 KOORINTI . . . . .	821
KARATIA . . . . .	845
EFEESUSA . . . . .	859
FIRIPI . . . . .	872
KOOROOSee . . . . .	881
1 TEESARoonIKA . . . . .	891
2 TEESARoonIKA . . . . .	898
1 TIMOOTI . . . . .	902
2 TIMOOTI . . . . .	913
TITUSA . . . . .	920
FIREEMOONA . . . . .	925
HEEBURU . . . . .	927
YAMEESA . . . . .	955
1 PEETooroo . . . . .	964
2 PEETooroo . . . . .	975
1 YOOHANEe . . . . .	981
2 YOOHANEe . . . . .	990
3 YOOHANEe . . . . .	991
YUDEESA . . . . .	993
UQAFIQOO UFafa . . . . .	996

## **Anutuna Ufa**

First Edition of New Testament published 1983 400 copies

This revised edition plus 5 Old Testament books published 2017 450 copies

© 2017 Wycliffe Bible Translators, Inc.

This book is a translation of the New Testament and five Old Testament books into the Binumarien language which is spoken by approximately 1000 people who live 20 nautical miles east of Kainantu in the Eastern Highlands Province of Papua New Guinea.

For this edition, a minor revision was done on the 1983 Binumarien New Testament and the 2003 publication of Genesis, Exodus, and Psalms. Proverbs and Esther, which were translated since then, are also included. In the revision process, tone markers and dashes were removed from most words for easier reading and some long words were broken into shorter words. In addition, the text has undergone minimal revisions of various kinds. New maps, illustrations, and pictures were included to aid understanding. A topical index was included for Bible study.

To date the Binumarien people continue their efforts towards completing their translation of the full Bible.

## **Amuaqira Ufa**

Ooqeenaa tamummaqarausa ufa akara rusa Heebeeru ufakiqari akara riqau. Yisufa aqbee nari ufa Arammaika ufakiqari qimarufaqa Fuka Moodaanaki Kirana akara rusa Kirika ufakiqari akara riqau. Magee kaqi Kirika ufaki marifaqa aiqama maqannaasa nari ufakiqari quandasee akara ridaqa. Afaqinnaasa ufakiqari faqa indaaruu akara rumasoona 1984 aukuanaki maraqau. Tamummaqarausa ufa moodaannai qisauku (5) buka faqa akara rumaqaafanoo maridanoo. Mifa inni dadaaqinaqa, innee Anutufa Isaraee maqannaasaki auqoo ainainausara amiqimmasee irifaranoo.

Aiqama fookufa taikeenoo, qoodaa kai kaqi uqaqaafanoo maridanoo. Maaqira ququsaki mari ufafa ( ) inni irirana dadaaqianifeera papiqa akara rimariasa uqaidaqa. Kaifaa maaqira ququsaki mari ufafa [ ] ooqai indaaruu maa papiqana akara rusa kooroo ira ufa maaqira ququsaki akara rumaqoofanoo marinuu. Kirika ufaki sia amiqimmasee koorooina faqa mi ququsanaki kooroidaqa. Maa bukana atinni weesa nambaqa faqa buka auqu qusa uqaqaafanoo maridanoo. Mataioona qusa auqu Mat miqirafauqa faqa piksaauqa faqa Isaraee maqannaasa maqa maaqa faqa inni dadaaqianifeera akara rumaqaafanoo maridanoo.

## OOSANA AROO UFAFA

*Maa maqa maaqana faqa faiqi faqa auqu ufafa.*

<sup>1</sup> Oosana kuradoo aukuanna Anutufa sia maru ainainannai mirisin-naarunna faqa maa maqana faqa oosana arasee auqinau.

<sup>2</sup> Mi aukuanna maa maqafa fifau faafau inoo marufanoo, asukuna firaafa rafaafanoo marufanoo Anutuna maraana fannoo nammari amuaqumau ufaira foora uqidanoo oonuree aniree imarinau.

<sup>3</sup> Mi faasaanna Anutufa qinau, kaaqa qaranara marianne qufanoo kaaqa qarafa kambiqanau.

<sup>4</sup> Kambiqafufanoo qafamaseenoo amiqimambinoo qimaseenoo kaaqa qarana faqa asukuna faqa aadu aadu rakeemma quqanau.

<sup>5</sup> Rakeemma quqaseenoo qafamaseenoo Anutufa kaaqa qaranara faasaanee qinau, asukunara eendaki fee qinau. Miqi qimasoofanoo mikari indaaru oosana araseenoo eendirafa naaree anireenoo aiqarofanoo iaqarafa aniroofanoo mifa mi iaqarafa faqa mi eendirafa faqa indaaruqaa faasaana marinau.

<sup>6</sup> Mina inaaqianaa faasaana Anutufa kaifaa qinau. Innaaruna kaqi saqanna rainafinanoo nammari mirinni faqa mianni faqa aadu aadu rainanoo marianifeera qufanoo miqimminau.

<sup>7</sup> Miqi qimaseenoo Anutufa innaaruna kaqi saqanna auqu quqaseenoo nammari raina mianni faqa mirinni faqa quqanau. Quqasoofanoo doo miqinoo marinau.

<sup>8</sup> Anutufa mi kaqi saqanna auqureenoo innaarunee qinau. Miqimmasoofanoo eendirafa aiqarofanoo iaqarafa aniroofanoo mi iaqarafa faqa mi eendirafa faqa inaaqianaa faasaana marinau.

<sup>9</sup> Qaaramoo faasaanaikufanoo Anutufa kaifaa qinau. Maqasaa nammari suqufinoo moodaanaki mandi finanoo maqa aadana koorooianifeera qimasoofanoo miqimminoo marinau.

<sup>10</sup> Anutufa aadanaikunara maqa fee qinoo auquranau. Nammari moodaanaki suqunara ooruku nammari fee qinoo auquranau. Miqi qimaseenoo doo andeeqafiifoo qimaseenoo asasinau.

<sup>11</sup> Asasammaseenoo fuka maqasaara Anutufa qinau. Andanda oosana oosana kambiqaani, oosana oosana andanda neemaru ainainna aqama faqa kambiqaanni, oosana oosana aqama ireemari saqarisa faqa kambiqaanee qufanoo miqimminau.

<sup>12</sup> Maqa fannoo, oosana oosana andanda faqa saqari faqa maqanau. Maqasoofanoo Anutufa aiqumamaseenoo doo amiqimminoo fee qimasee asasinau.

<sup>13</sup> Miqimmasoofanoo eendirafa aiqarofanoo iaqarafa aniroofanoo mi iaqarafa faqa mi eendirafa faqa qaaramookinau.

<sup>14</sup> Anutufa kaifaa qinau. Innaarunai qooma oosana oosana kambiqafinana, suani faqa quqoona faqa fasau faqa iaqarana faqa asukuna faqa rainaanifeera qinau, iaqarafa faqa aukuna faqa amaana suqirana oosana areemariana uqannifiqaani fee qinau.

<sup>15</sup> Mi qoomausa innarunaindari maqasaa kaaqa qamannimaqaani qufanoo miqimminau.

<sup>16</sup> Miqi qimaseenoo Anutufa firaa qoomatiaqara suani faqa quqoona faqa miqanda quqanau. Firaa qooma suaniara anee faasaana rakisinnimaqaanee qinau. Kaqikaa qoomara quqoonara anee eendaki rakisinnimaqaanee qinau. Fasau namu faqa auqu quqanau.

<sup>17</sup> Anutufa mi qoomausa innaarunaindari maqasaa kaaqa qaanifeera quqanau.

<sup>18</sup> Eendaki faqa faasaana faqa rakisidanoo asukuna faqa kaaqa qarana faqa rainaanifeera quqanau. Anutufa quqaseenoo aiqumqummaseenoo doo amiqimmafinoo fee qimasee asasinau.

<sup>19</sup> Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa qaara faqa qaara faqaikinai.

<sup>20</sup> Anutufa kaifaa qinai. Aiqama nammariki maria ainainausa oosana oosana kambiqaaani, maqa mirinni kaqi saqanna oosana oosana ufinuqa qumbiqaaqaa maridaqa qaqaqa nuaqa.

<sup>21</sup> Miqi qimaseenoo Anutufa ooruku nammariki maria firaa aandausa faqa oosana oosana ainaina faqa auqu quqanau. Ufinuqa oosana oosana faqa auqu quqanau. Auqu quqaseenoo aiqumqummaseenoo amiqimmiifoo qimasee asasinai.

<sup>22</sup> Miqi qimaseenoo Anutufa nari afaaqooqa qimannimaqeenoo qinai. Inni asumu moomoo kambiqafiqa ooruku nammarki qumbiqaaqaa mariaqa. Mifa ufinuqara faqa moomoo kambiqafi mariaqee qinai.

<sup>23</sup> Miqi qimasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa moodaannai qisaukukinai.

<sup>24</sup> Miqimma fufanoo Anutufa qinai. Maqa fannoo oosana oosana kasirana faqaa aandauga maqaani. Maaqeenaa aadau faqa kaasau aandau faqa firaana faqa kaqikaana faqa maqa fannoo maqaani qufanoo miqimminai.

<sup>25</sup> Miqimaseenoo Anutufa mi aiqama ainainausa auqu quqaseenoo amiqimmafinoo qimaseenoo asasinai.

<sup>26</sup> Miqimaseenoo Anutufa kaifaa qinai. Maasa faiqi naanna faqaasa auquanaura, maasa qimana kai maasa qeeqa fooqaana auquanaura. Misa ooruku nammariki noodaanna ainaina faqa sandaaqai qaqaqamaree nimaria ufinisa faqa maaqeenaa aandauga faqa kaasau aandauga firaanauga saa faqa kaqikaanauga saa faqa rakisianifeera auquanaura.

<sup>27</sup> Miqi qimaseenoo Anutufa faiqi nari fooqaa irana kai auqinai. Faiqi faqa anaasee faqa naumoo faqaa qanda auqinai.

<sup>28</sup> Auquseenoo Anutufa nifaaqooqa qinoo qinai. Inniqara asumu moomoo kambiqeeqa maa maqa maaqanaki qumbiqafiqa rakisiaqa. Qinee inniqara mareeqee ooruku nammariki noodaanna faqa ufinuqa faqa aiqama kaasau aandauga rakisirausaika mannimaqaanaura.

<sup>29</sup> Anutufa kaifaa qinoo qinai. Inni narana sakummara foora ireemarina oosana oosana faqa oosana oosana saqari aqama faqa naaqeera nimidaqa.

<sup>30</sup> Doo qinee aiqama kaasau aandauga faqa ufinuqa faqa andanda faqa nariqa neemaria saqari amaneesa faqa naaqeera qinee nimidaqa. Miqi qimasoofanoo miqimminoo marinai.

<sup>31</sup> Doo Anutufa nari auqu quqasoo aiqama ainainauqa qafamaseenoo firaqoo asasinai. Miqimaseenoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa moodaannai qisauku taikasee dinni moodaa marasee 6 faasaanaikinai.

## 2

<sup>1</sup> Miqimaseenoo Anutufa aiqama innaaruna faqa maqa faqa auqu taikanau.

<sup>2</sup> Dinni taikasee dinni oonu qaaraqanda marasee 7 faasaana Anutufa narí ainainirana taikanau.

<sup>3</sup> Dinni taikasee dinni oonu qaaraqanda 7 faasaanara Anutufa afaaqooqa qimasee, aaduma naaquqara faasaanee qinau. Narí kadaapirirana mi faasaanna taikoonara mi faasaannara naaquqara faasaanee qimasee idooanau.

*Adamafa faqa Eewafa faqa.*

<sup>4</sup> Miqimmaseenoo Anutufa innaaruna faqa maqa faqa auqinau.

<sup>5</sup> Indaaru karaambaiqa Anutufa maa maqana faqa miri innaaruna faqa auqu aukuanna aaku sia maqasaa quqoonara oosana oosana andanda qaqama sia kambiqanau. Faiqí maqa apaurirafa faqa sia marinau.

<sup>6</sup> Mikamuqoo nammari fannoo maqakiqari urureenoo aiqama maqa maaqa uqeena amaqaanau.

*Eedeena saqama ufa.*

<sup>7</sup> Mikari karaambaiqa Anutufa maqa qumareenoo faiqí minannoo auqinau. Auquseenoo marirana nimi maru aidoona aikaamarai fuaqa-soofanoo mi fasiqafa kasirana maranau.

<sup>8</sup> Mi fasannai Anutufa suani afu oosanai Eedeena maqa maaqaki kadiqa fraana auquseenoo narí auquqoo fasiqana minaki quqanau.

<sup>9</sup> Anutufa oosana oosana amiqira saqariara qufanoo minaki kambiqafufaqa amiqira aqama iraqau. Kadiqa qambaana saqari qaaraqanda marinau. Moo saqari fannoo marirana nimi maru saqarifa marinau. Kafaa moo saqari fannoo mandainainara faqa amiqira ainainara faqa irimaria iriranna nimirufa marinau.

<sup>10</sup> Nammari moo fannoo Eedeena maqa maaqakiqari qumureenoo kadiqa qambaana maqa uqeena uqeena ianifeera qumiqareenoo qaara faqa qaara faqaki raina fufanoo ooqufinau.

<sup>11</sup> Moo amara auqu Pisona nammari fee qiqau. Mifa Qafiraa maqa maaqa atindannai ooqu finau.

<sup>12</sup> Miqoo koora amiqirafa maridanoo, amiqira afundi maru saqari anoonafa faqa miqoo marinau. Firaa feefauru aqimaria oonifa faqa miqoo marinau.

<sup>13</sup> Kafa moo amara auqu Kiqoona nammari marinau. Mifa Kusa maqa maaqa atindanai qumifi marinau.

<sup>14</sup> Kafa moo amara auqu Taikirisa nammari marinau. Mifa Asiria maqa maaqa suani oosana qaannai atindanai qumi marinau. Moo amara auqu Eufarateesa nammari marinau.

<sup>15</sup> Karaambaiqa Anutufa narí auquqoo fasiqana mareegee Eedeena kadidakina quqanau. Kadidaki maqa apauridanoo aiqama ainainasaa mi kadidanaki rakisianifeera quqanau.

<sup>16</sup> Anutufa quqaseenoo mi fasiqana maaqi qimaseenoo aakapanau. Anee kadidakina aiqama saqari qaqama diqisee naannee qinau.

<sup>17</sup> Moodaa saqariara kai qinee qaoo qidaqa. Manda ainainara irirana faqa amiqira ainainara irirana faqa nimi mari saqarina kai sia naa. Anee namaseenana mikari kai kuqinnaranoo.

<sup>18</sup> Mi fasannai karaambaiqa Anutufa mi fasiqanara qinau, maa fasiqafa naríaraa marifanoo siamma andeeqaidanoo. Qinee mina aqoonnana auqusaananoo mina dadaaqiannoo.

<sup>19</sup> Anutufa maqa qumareenoo minannai aiqama aandau faqa ufiniuqa faqa auqinau. Auquseenoo aiqama naarammeeqeenoo faiqí maruqoo

nuquraanifeera quqasoofanoo nana ainainee auquuroofa doo mi nuquna faqaasa mariqau.

<sup>20</sup> Miqimmaseenoo faiqí fannoo kooqikinaa aandauqa faqa kaasau aandauqa faqa ufiniuqa faqa nuqu rama quqanau. Miqiga marufanoo Anutufa mi fasiqana aqoonnanaikiranara misaki randeenoo sia paqurinau.

<sup>21</sup> Minara faiqarana faiqí aminau. Faifufanoo Anutufa mina aqaasana moodaa tatuseenoo mina amaqqinnai minaki ititanau.

<sup>22</sup> Ititaseenoo karaambaiqa Anutufa mina aqaasanannoo anaasee auqinau. Auquseenoo faiqí maruqoo afigee finau.

<sup>23</sup> Quqasoofanoo faiqí fannoo qafamaseenoo qinau.

Doo maqee uqanna qini fooqaairafa uqanna maridanoo,

amudaani qini qimudaani kinaafa,

amaqi qini qimaqqinnai auqirafa,

qinee minara anaasee fee qimasee auquraanaura,

mifa faiqí kinaafa marinara miqi qimasee auqu raanaura.

<sup>24</sup> Minara kai faiqí narí anoona akoona minnisee narí anaqa faqa moodaanaki mafi moodaara foora maridaqa.

<sup>25</sup> Mi fasiqafa narí aanaaqandiri kaqisamu maruqanda mariqau, sia nariara nariara nisauri mariqau.

### 3

#### *Faiqi anaasee Anutuna ufa rukiqoo ufafa.*

<sup>1</sup> Karaambaiqa Anutufa aiqama aandauqakina auquqoona qambaanaindari sakani mifa nikaru qira ufa akoofasa marinau. Mifa anaasee iramirinoon qinau. Kuqaa fee Anutufa saqariuqaki aiqama qaoo qinoo fee sia naaqee qinoo fee.

<sup>2</sup> Mi anaaseefa minara iriseenoo qimaminau. Eeo aiqama maa afuqanakinaa saqari naaqee qifaqa naidaqa.

<sup>3</sup> Kadiqa qambaanai moodaa saqariara sia naaqee sia auqaqee qifaqa sia naidaqa. Maasa namaseeqa kuquanauranoo.

<sup>4</sup> Sakani mina ufa iriseenoo anaasee akaru qinoo qinau. Namasee sia kuqqinnara unnaqqidanoo, anee sia kuqqinnaranoo.

<sup>5</sup> Anutufa minara iridanoo qaoo qinoo. Innee mi saqari aqamana namasee Anutufara foora maridaqa manda ainainara faqa amiqira ainainara faqa irifoora.

<sup>6</sup> Anaasee sakani ufa iriseenoo mi saqarina afu qafamasoofanoo amiqirafa marufanoo aqama faqa qafoofanoo idaaqirafa marufanoo amiqira ainainara iriranara faqa manda ainainara iriranara faqa irufanoo amiqufanoo mi saqari aqamana diqiseenoo neenoo narí afaaqi faqa amufanoo nanau.

<sup>7</sup> Miqanda namasoofanoo mikari miqanda nifusaa irirafa kambiqoofaqa nári nifaaqa qafamasee kaqisamu maridee qimaseeqa nisauruseeqa saqari amanee didiqi amanee fooqaana qumaree akunuseeqa nári nifaaqasaa ititaqau.

<sup>8</sup> Mi faasaanna eenaanianna asooaa asooaa imarufanoo Karaambaiqa Anutufa kadidai nimarufaqa faiqí faqa anaasee faqa iriqaqara saqariuqaki nisaurusee kukeeqaqau.

<sup>9</sup> Karambaiqa Anutufa faiqí aaramasee anee yaiffee qufanoo mifa qinau.

<sup>10</sup> Anee kadidai nuanaqa qinee iriseeqa kaqisamu mariunausa rufiaseeqa saqariuqaki kukeeqaidaqa.



<sup>11</sup> Miqi qufanoo Anutufa qinau, yafee ani kaqisamu mariannanara qimaminoo fee. Anee saqari aqama qinee qaoo qunnana neenanee.

<sup>12</sup> Faiqí iriseenoo narí qimaminoo qinau. Maa anaaseefa qini faqa marifa anee qimunafa mifa qimifaqa neeqa.

<sup>13</sup> Miqi qufanoo karaambaiqa Anutufa mi anaaseena iramirinoo qinau. Anee nanaree maa oosanna mareenanee. Mi anaaseefa iriseenoo qinau. Sakani fannoo anireenoo qini qikaru qifaqa neeqa.

*Anutufa manda afaaqooqa faiqí faqa anaasee faqa sakani faqa nimirau.*

<sup>14</sup> Karaambaiqa Anutufa mina iriseenoo quandafinoo mi sakanina manda afaaqooqa qimamaqeenoo qinau.

Anee maa anaaseena akaru qiannanara mina akiiqara aiqama aandauqak-  
iqari anee kai maa manda afaaqooqana mareennaranoo.

Anee maqamau amuaqundari nidana kookoomma nananua.

<sup>15</sup> Qinee qianaqa maa anaaseefa faqa anee faqa nariara nariara fidiqaqa ifaranoo.

Inniqara faiqinamu naaruara namuqaa marifaranoo.

Mi anaaseena asumu kiqari moodaa fannoo ani akiiqa radamuannoo. Anee  
mina asumu kinaana aiku ataa ukaqa aminnaranoo.

<sup>16</sup> Anutufa maaqi qimasee anaasee afaaqooqa qinoo qinau.

Anee amuaquqa faqa marinaqa umaara firaanaikamma amaqaanaura.

Miqimmaseeqa faiqi maqaraqoo faqa aupurarana amianaura. Ani aundura  
fannoo aneenna afaaqiara rida marinnaranoo.

Ani afaaqi fannoo ani uri aaqararafa marinana anee mina ureeqarafa  
marinnaranoo.

<sup>17</sup> Miqi qimaseenoo Anutufa quandafinoo faiqi afaaqooqa qinoo qinau.

Anee aneenna anaqa ufa iriseena qinee qaoo qunna saqarina qaqama  
naanano.

Minara maa maqana aqurarasaanana anee kadaapi ridana arirana rakee-  
dana maa maqanaki ummaqusee naida maria.

<sup>18</sup> Nimmuru faqa amuka faqaa ainaina faqa maqakiqari kambiqaanoo.  
Anee kaasau andanda neennaranoo.

<sup>19</sup> Anee tooqaamu arimarinana kadaapirumasaidana maa maqanasaa  
narana kambiqasaidana nana fifinana kuqinana maqaki ani  
auquafannanaki finnaranoo.

Ani maqannai auquqaafanafa marianafa mariananoo. Anee maqa mari-  
ananoo kaifaa maqaikamma finnaranoo.

<sup>20</sup> Faiqí fannoo narí aanaaqara maqasaa qaraa fasiqa anaasee ninoo fee  
qimaseenoo auqu Eewanee qinau. (Mi auquna oosana aiqama faiqí faiqi  
ninoo fee qidanoo.)

<sup>21</sup> Karaambaiqa Anutufa aandau apata qumareenoo minannai qa-  
munnara foora auqeeqeenoo Adamana faqa narí anaqa Eewana faqa  
nimirau.

*Anutufa Adamasa Eewasa kadidakiqari niqiqanau.*

<sup>22</sup> Miqimmaseenoo Karaambaiqa Anutufa qinau. Maqee faiqí faiqi maafa  
maasara foora maridaqa aaqara oosanara faqa andeeqara oosanara faqa  
iridaqa. Maasa sia miqandara qianaqa naaru marirana nimimari saqari  
aqamana diqisee neefaranoo. Diqisee namaseeqa naaruara marifoora.

<sup>23</sup> Karaambaiqa Anutufa minara iriseenoo Eedeena kadidakinaana doo  
miqanda nifaqaseenoo qinau. Inneeqara inni auquafanna maqanasaa  
maridaqa maqa auqamasaidaqa narana paquriaqa.

<sup>24</sup> Anutufa Eedeenna kadidakiqari Adamasa Eewasa niqiqoofaqa fufanoo suani oosana qaannai kadida atinni naaru marira saqari fainnai fimaru aannanasaa angiroouqa quqasoofofaqa ida auru arira paipana uaqeeidaqa faiqí minni fifoora ruki tataaka imariqau.

## 4

### *Kainasa Abeerasa ufa.*

<sup>1</sup> Adamafa narí anaqa Eewana faqa aana numasoofanoo amuaqu qaiki-noo faiqí maqaseenoo mina auqu Kainafee qinau. Maqaseenoo Eewafa qinau, Anutufa dadaaqifaqa qinee faiqí akoonaiqi maqeeqa.

<sup>2</sup> Kafa mariufanoo faiqí moo maqaseenoo mina auqu Abeerane qinau. Abeerafa innooqafinoo kooqikinaa aandausaa rakisirafa marinau. Mina afasaafa Kainafa innooqafinoo afuqakina ainaini marufa marinau.

<sup>3</sup> Mariufanoo moo kari Kainafa narí afuqakinaa ainaina maraseeoo Anutuna tatufirana suqa aminau.

<sup>4</sup> Abeerafa mifa faqa Anutuna tatufu amiraree qimaseenoo narí firimaru aandausakinaana ooqasaa maqarana afaaqafaqaana aruseenoo amiqira afaqa kai tatufirana suqa aminau. Abeerana tatufirana Anutufa qafeenoo amiqira fee qimasee asasinau.

<sup>5</sup> Kafa Kainaindi qafamasee minnisana. Kainafa mina qafoofofanoo firaqoo arana qoofanoo oori runinau.

<sup>6</sup> Anutufa Kainana qafamaseenoo qimaminau, nanaree ani arana qaidanoo fee. Nanaree ani oori mianni qumidanoo fee.

<sup>7</sup> Anee amiqira ainaina auqeenanau asasa mianaiqini. Anee mandainaina auqaannanara numoo fannoo ani kooqiki ani amaara usinoo maridanoo. Mifa ani rafaqa firarinana anee mina uraaqaraa.

<sup>8</sup> Miqi qimasoofofanoo Kainafa narí akaqa Abeerana qimaminoo qinau. Aninaqa aana fua. Miqanda moosaa oonureeqa Kainafa narí akaqa Abeerana kuqa arinau.

<sup>9</sup> Arusoofanoo Anutufa Kaina iramirinoo qinau, ani akaqa Abeerafa yaifee maridanoo fee. Qufanoo Kainafa qinau, Abee qinee sia iridaqa, anee qiniara narí akaqasaa rakisimarifee fee qidanee.

<sup>10</sup> Anutufa mina iriseenoo qinau. Kaina anee nanee mareenee. Anee iria, aneenna akaqa fidika maqasaa teeqiananoo. Mi fidikafa mina akiiqara iannee qimasee maqakiqari qini daaraifaqa iriqa.

<sup>11</sup> Anee aneenna akaqa fidika maa maqanasaa teeqiananoo maqa qoo raqafinaki ani akaqa fidika minaki keeqeenoo. Minara qinee ani aqurara ufa ameemaana quqaidaqa. Anee sia kaifaa maqaki narana ummaqusaida neennaranoo.

<sup>12</sup> Anee narana ummaqusainanoo maqa fannoo sia ani narana amiannoo. Minara anee maaqa siainafa maridana aiku quqirafa maaqa maaqa kaqi ninnaranoo.

<sup>13</sup> Kainafa minara iriseenoo Anutuna qimaminoo qinau. Anee qummaara firaana qini qimiananoo sia qinee amana uqeeraanau.

<sup>14</sup> Qinee maa maqanasaa ani afusaa marunnana anee diqqaanaqa qinee qiku quqirausa aiqamatina nuanau. Qinee maaqanna maaqanna dapikiqa nuananoo yafee qini qiqafainafa mifa kuqa daruannoo.

<sup>15</sup> Karaambaiqa minara iriseenoo qimaminoo qinau. Sia miqifara, faiqí moo fannoo yafee ani arinnana qinee mina akiiqara dinni taikasee dinni ani qaaraqanda marasee naruana. Miqi qimaseenoo karaambaiqa Kaina afaaqasaa sia aruaqee akara quqanau.

<sup>16</sup> Miqooqari Kainafa Anutuna oorisaaqari finoo Eedeena kadida aaqaaqari suani oosana qaannai moo maqa maaqai mina auqu niku quqirausa nua maqusa fee qimarunnai finau.

*Kainana aiku asauku nuqu.*

<sup>17</sup> Miqoo oonureenoo Kainafa narí anaaga faqa faiqi moo akoonaiqi maqaseenoo mina auqu Eenookanee qinau. Kainafa narí anaaga faiqi maqoo kari maqusa moo auquseenoo mi maqusana auqu narí amaaku amaranaikinoo Eenooka maqusa fee qinau.

<sup>18</sup> Eenookafa faiqi kammafinoo akoonaiqi Iradana maqanau. Iradafa faiqi kammafinoo akoonaiqi Meequyaerana maqanau. Meequyaerafa faiqi kammafinoo akoonaiqi Metusaeerana maqanau. Metusaeerafa faiqi kammafinoo akoonaiqi Rameekana maqanau.

<sup>19</sup> Rameekafa faiqi kammafinoo qaara anaasee maranau, moonaa auqu Adaa nammarifa moonaa auqu Siraa nammarifa mariqau. (Adaa nammarina auqu oosana amiqira fee qimaqoofa marinau. Siraa nammarina auqu oosana auqaana fee qimaqoofa marinau.)

<sup>20</sup> Indaarugaana anaasee auqu Adaa nammarifa faiqi moo Yabarana maqasoofanoo findifinoo aanda apatannai uiqaana maqa usakasaida nimarusa nikoofa marinau.

<sup>21</sup> Yabarafa firimaru aandausasa rakisi marusa nikoofa marinau. Yabarana akaqa Yubarafa marinau. Mifa findifinoo qufireena fuaqee marusa faqa piripunna arimarusaa faqa nikoofa marinau.

<sup>22</sup> Rameekana inaaqiana anaasee moo Siraa nammarifa marinau. Mifa akoonaiqi Tubarakaina maqasoofanoo findifinoo koopaannai faqa qainnannai faqa ainaina auqimarufa marinau. Tubarakainana auna auqu Naammaa nammarifa marinau.

<sup>23</sup> Rameekafa narí aanaaqaaqara maaqi qimasee qimanniminu.

Adaa nammarisa Siraa nammarisa qini ufa iriaqa,

Qinee Rameekausa qini qinaaqaaqara ufa qianaqa amiqimmasee iriaqa.

Faiqi moo fannoo kaakadi darifaqa qinee mina kuqamma ariqa.

Asauku samu qini darina akiiqara mi kumaaraana kuqamma ariqa.

<sup>24</sup> Moo fannoo Kainana arinnana akiiqara Anutufa dinni taikasee dinni ani qaara marasee 7 fasiqa naruannoo. Moo fannoo qini Rameekausa darinnana akiiqara Anutufa fiqaramasee 77 fasiqa naruannoo.

*Seetana aiku asauku nuqu.*

<sup>25</sup> Adamafa kaifaa narí anaaga faiqi mara amisoofanoo amuaqu qaikinoo akoonaiqi moo maqaseenoo mina auqu Seetanee qinau. Miqi qimaseenoo mina anoofa qinau. Anutufa qini qimaaku moo qiminoo narí afasaana Abeerana amaaqa maqaanifeera qiminoo mifa Kainafa aruna amaaqa maqaannoo.

<sup>26</sup> Seetafa innooqafinoo akoonaiqi Eenoosana maqanau. Eenoosafa maru kamuqooqari oosana arasee misa Anutunara innaaru qidaqa minara naaqura Karaambaiqee Yaawee fee qidaqa innaaru qimariqau.

## 5

*Adamana aiku asauku nuqu.*

*(1 Stori 1:1-4)*

<sup>1</sup> Adamana aiku asauku misa oosana maqimmasee akaraki marinau. Anutufa indaaruu narí amana kai faiqi anaasee auqinau.

<sup>2</sup> Naumoo faqaa qanda auquseenoo nifaaqooqa qima nimaqaseenoo faiqi anaasee fee qimasee nuqu ranau.

<sup>3</sup> Adamafa aukwana 130 marasoofanoo mina amaaku Seetafa kambiganau. Narí akoona fooqaafa mina amana kai marinau.

<sup>4</sup> Seetana maqookari oosana araseenoo Adamafa 800 aukwana maranau. Mi kamuqoo akoonaiqi maanaaqa faiqi namu moomoo Adamafa maqanau.

<sup>5</sup> Adamana aukwana aiqama 930 maraseenoo kuqinai.

<sup>6</sup> Seetafa 105 aukwana maraseenoo akoonaiqi Eennoosana maqanau.

<sup>7</sup> Eennoosana maqoo kamuqooqari Seetafa 807 aukwana maraseenoo mi kamuqoo akoonaiqi maanaaqa faiqi namu moomoo maqanau.

<sup>8</sup> Seetana aiqama aukwana 912 maraseenoo kuqinai.

<sup>9</sup> Eennoosafa 90 aukwana maraseenoo akoonaiqi Keennana maqanau.

<sup>10</sup> Keennana maqoo kamuqooqari Eennoosafa 815 aukwana maraseenoo mi kamuqoo akoonaiqi maanaaqa faiqi namu moomoo maqanau.

<sup>11</sup> Eennoosana aukwana aiqama moodaanaki 905 maraseenoo kuqinai.

<sup>12</sup> Mina amaaku Keennafa 70 aukwana maraseenoo akoonaiqi Maqarareerana maqanau.

<sup>13</sup> Maqarareerana maqoo kamuqooqari Keennafa 840 aukwana maraseenoo mi kamuqoo akoonaiqi maanaaqa faiqi namu moomoo maqanau.

<sup>14</sup> Keennana aukwana aiqama moodaanaki 910 maraseenoo kuqinai.

<sup>15</sup> Mina amaaku Maqarareerafa 65 aukwana maraseenoo akoonaiqi Yareedana maqanau.

<sup>16</sup> Yareedana maqooqooqari 830 aukwana maraseenoo mi kamuqoo akoonaiqi maanaaqa faiqi namu moomoo Yareedafa maqanau.

<sup>17</sup> Maqarareerana aukwana aiqama moodaanaki 895 maraseenoo kuqinai.

<sup>18</sup> Mina amaaku Yaareedafa 162 aukwana maraseenoo narí amaaku Eennookana maqanau.

<sup>19</sup> Eennookana maqooqooqari Yareedafa 800 aukwana maraseenoo akoonaiqi maanaaqa faiqi namu moomoo maqanau.

<sup>20</sup> Yareedana aukwana aiqama moodaanaki 962 maraseenoo kuqinai.

<sup>21</sup> Mina amaaku Eennookafa 65 aukwana maraseenoo akoonaiqi Meetuseerana maqanau.

<sup>22</sup> Eennookafa 300 aukwana Anutuna agoondikiranaki maridanoo akoonaiqi maanaaqa faiqi namu moomoo maqanau.

<sup>23</sup> Eennookana aukwana aiqama moodaanaki 365 aukwana maranau.

<sup>24</sup> Eennookafa sia kuqinai. Kaaqa Anutunara rimarufa marufanoo Anutufa kaqimma afigasoofanoo sia sia inau.

<sup>25</sup> Eennookana amaaku Meetuseerafa 187 aukwana maraseenoo akoonaiqi Rammeekana amarana maqanau.

<sup>26</sup> Rammeekana maqooqooqari mina akoofa Meetuseerafa 782 aukwana maraseenoo akoonaiqi maanaaqa faiqi namu moomoo maqanau.

<sup>27</sup> Meetuseerana aukwana aiqama moodaanaki 969 aukwana maraseenoo kuqinai.

<sup>28</sup> Meetuseerana amaaku Rammeekana amarafa 82 aukwana maraseenoo akoonaiqi maqaseenoo qinai.

<sup>29</sup> Anutufa maa maqa maaqana aquraraqoofaqa maasa kadaapi ridaqa. Maa faiqifa kadaapiriranaki marunnana asoarana qimiannoo fee qimasee mina auqu Nooa nee qinai.

<sup>30</sup> Nooana maqooqooqari mina akoofa Rammeekafa 595 aukwana maraseenoo akoonaiqi maanaaqa faiqi namu moomoo maqanau.

<sup>31</sup> Rameekana aukwana aiqama moodaanaki 777 maraseenoo kuqinai.

<sup>32</sup> Mina amaaku Nooafa 500 aukuana maraseenoo miqooqari akoonaiqi qaaramoo maqanau. Misa nuqu Seemmana faqa Qammaana faqa Yafeetana faqa maqanau.

## 6

### *Faiqi anaasee manda ainaina mareeu ufafa.*

<sup>1</sup> Mi fasannai faiqi anaasee moomoo kamambufaqa maqa maaqa itita fiqa maridaqa misa maanaaqauqa moomoo maqaqau.

<sup>2</sup> Maqasaa fasiqauqa Anutuna faiqi namu mi manaqausa nindafoofaqa nifu noori amiqirausauqa kai marufaqa nari nidimarusa maree mariqau.

<sup>3</sup> Miqi marufanoo Anutufa qinau. Qini maraquna naaru naaru sia faiqiki mariannoo. Misa fifau faiqi faiqi marianara kisaqa aukuana ateekeese qusa aukuana nimianaura, 120 aukuana kai nimianaura.

<sup>4</sup> Mikari faqa kasooqagee faqa maqasaa fasiqauqa Anutuna faiqi namu faiqi niraamuna maraqa ninii soofaqa faiqi maqee mariqau. Mi faiqisa nimudaani faqaasa murusaqa arirausa maa maqanasaa maridaqa nuqu faqaasa mariqau.

<sup>5</sup> Anutufa aiqama maqasaaqaraasa nindafoofaqa misa marirafa faqa irirafa faqa mandaika uqanna inoo marinau.

<sup>6</sup> Miqiga marufanoo Anutufa firaqoo misa mi manda oosannara irinau. Mifa faiqi auqu maqasaa quqoonara irufanoo aundura mandaikufanoo akooqoofanoo qinau.

<sup>7</sup> Maa oosanausa qinee auquafanausa maa maqanasaa qaraana qinee aiqama ruka aqusaanaura. Faiqi faqa ufini aandau faqa aiqama ruka aqusaanaura qinee misa auquafannanara qikooqaidanoo.

<sup>8</sup> Anutufa Nooanara kai asasinu.

### *Nooafa firaa sipa auqu ufafa.*

<sup>9-10</sup> Nooana oosana maaqimminoo marinau. Nooafa kai sia aaqarana marufa marinau, nari faqa marusakiqari nariara andeeqarafa marinau. Mifa kai Anutuna aqoondikiranaki marinau. Mina amaaku qarammoo namu mariqau. Misa nuqu Seemafa faqa Qammafa faqa Yafeetafa faqa mariqau.

<sup>11</sup> Aiqaamausa Anutuna afusaa mandainainaki mariqau. Faiqi narari nararirafa aiqama maqa maaqaki qumbiqanoo marinau.

<sup>12</sup> Anutufa aiqama maqa maaqaki qafoofanoo mandaika uqannamminoo marinau. Faiqi anaasee aiqama mandainainaki kai mariqau.

<sup>13</sup> Miqiga marufanoo Anutufa Nooana qimaminoo qinau. Faiqi narari nararirafa qumbiqanoo marinara qinee aiqama fasiqa anaasee naru taikaanauree qidaqa.

<sup>14</sup> Nooa, anee amiqira saqarinnai firaa sipa auqua. Mina aunduraki moomoo rumma auqua. Aunduraki faqa adisaa faqa koorootaqa qumaree akusainanoo ititaani.

<sup>15</sup> Anee sipa maaqimasee auqua. Mina kisaqa fannoo Aarinnoonna nam-marikiqari Siara Doona nammariki amanasaa 130 metres mina kisaqa mariani. Mina qusa fannoo 22 meters sia kisaqa uqanna marinau. Mi sipana maqasaqari maaqa akiiqa amanasaa 13 metres mariani.

<sup>16</sup> Asaana qumeeqarana ameemaanai apootaana kaqi mariani 0.5 metre mariani. Sipa qaqaasanai firaa kooqi auquseenana sipa aunduraki maqasaa tida rua, mina murufi qambaana mo tida rua, mina maariqoo mo tida rua.

<sup>17</sup> Anutufa kaifaa Nooana qimaminoo qinau. Qinee nammari mareeqee quqasaanoo firaqoo aafinoo aiqama kasimari ainainausa naru taikaanoo. Aiqama maqasaa maria ainainausa faqa kuqu taikeefaranoo.

<sup>18</sup> Ani faqa kai moodaanaki kira ufa qianauro. Aneenna anaqa faqa aneenna faiqi namu faqa misa ninaaqmaaka faqa sipaki keeqafi mariaqa.

<sup>19</sup> Anee aandau oosana oosana mareeqee sipaki quqaa. Oosana oosana qaara kai qaara kai akoona faqa anaasee faqa apammasee sipaki quqasainaqa ani faqa asumu mariaqa.

<sup>20</sup> Oosana oosana ufini faqa qaara kai qaara kai mara quqasainaqa ani faqa asumu mariaqa.

<sup>21</sup> Anee oosana oosana narainaina misaindi faqa aneennaindi faqa mara sipaki quqaa.

<sup>22</sup> Nooafa Anutuna ufa iriseenoo mifa qundee kai inau.

## 7

### *Nammari auflu ufafa.*

<sup>1</sup> Karaambaiqa Nooana maaqi qimasee qimaminau. Anee aneenna aiku asauku faqa sipaki keeqaa. Maqa saaqaarasakiqari anee kai aneennaraa andeeqarafa mariana qafaidaqa.

<sup>2</sup> Innee qini qifusaa anukara aandau fee qimariana qisauku dinni taikasee dinni oonu qaara marasee 7 akoona faqa anaasee faqa ani faqa sipaki mareeqee quqasainaqa asumu mariaqa. Innee qini qifusaa sia anukara aandau oosana oosana akoona faqa anaasee faqa moodaa kai mareeqee minaki asumu quqasaina mariaqa.

<sup>3</sup> Aiqama ufini oosana oosana dinni taikasee dinni oonu qaara marasee 7 akoona faqa anaasee faqa mareeqee sipaki quqaa. Miqimmasainaqa aiqama aandau ufini kaifaa maa maqanasaa moomoo kiaqa.

<sup>4</sup> Dinni taikasee dinni oonu qaaraqanda marasee 7 faasaana aiqarainaqa miqoo aaku maqasaa quqaanura. Qaara fasiqa niku nisauku taikasee 40 faasaana faqa eendaki faqa aaku rida mariannoo. Miqi marinaqa qinee maqasaa aiqama naanna faqaasa qeeqa auqu nisaafanausa taika nisaanura.

<sup>5</sup> Nooafa aiqama ainaina Anutufa qimamundee kaimminau.

<sup>6</sup> Nooafa 600 aukuna marasoofanoo mi aukuannasaa nammari aufirafa aninai.

<sup>7</sup> Nooafa Anutuna mi ufausa iriseenoo rufiaseenoo nari faqa nari anaqa faqa nari amaaku qaaramoo namu faqa minamusa ninaaqmaaka faqa sipaki keeqaqau.

<sup>8-9</sup> Oosana oosana aandau ufini akoona faqa anaasee faqa Anutuna afusaa anukaraura faqa sia anukaraura faqa aiqama Nooana faqa sipaki keeqaqau. Anutufa ufa qumau kai keeqaqau.

<sup>10</sup> Dinni taikasee dinni oonu qaara marasee 7 faasana marinoo nammari aafinai.

<sup>11</sup> Mi aukunna Nooafa 600 aukuna maranau. Qaara quqoonasaa qiku dinni taikasee dinni oonu qaaraqanda marasee 17 faasaanasaa mi faasaanna kai nammari radiqinai. Mi faasaanna kai maqa ameemaanaindari nammari radiqisee urureenoo innaaruna kooqiara foora atuqoofanoo aaku firaafa nammariara foora adianau.

<sup>12</sup> Qaara fasiqa niku nisauku taikasee 40 eendaki faqa faasaana faqa aaku firaafa nammariara foora adianau.

<sup>13</sup> Nammari radiqu faasaanna mi faasaanna kai Nooafa narí aanaaqandiri faqa narí amaaku namu Seemafa faqa Qammafa faqa Yafeetafa faqa minamusa nári ninaaqmaaka faqa sipaki keeqafiqa mariqau.

<sup>14</sup> Kaasau aandau oosana oosana faqa maageena aandau oosana oosana faqa ufini oosana oosana faqa firaa aandauqa faqa kaqikaa aandauqa faqa Nooana aiku asauku faqa sipaki keeqaqau.

<sup>15</sup> Aiqama oosana oosana kasimaru aandau ufinisa akoona faqa anaasee faqa Nooana faqa sipaki keeqaqau.

<sup>16</sup> Anutufa Nooana qimamu mau kai keeqa fufanoo Anutufa narí kai kooqi itita nimaqanau.

<sup>17</sup> Qaara fasiqa niku nisauku taikasee 40 faasana aaku nammariara foora adianau. Miqi ufanoo nammari qumbiqeenoo sipa uqeereeqeenoo murusaqa quqanau.

<sup>18</sup> Nammari fannoo firaaqoo innooqoofanoo sipa fannoo mina amuaqumau nimirinai.

<sup>19</sup> Nammari fannoo moo faqa innooqeenoo aiqama kisaqa aqana dukuninai.

<sup>20</sup> Kaifaa innooqeenoo kisaqa aqana oori aaqaramaseenoo 7 meters amana ooru marinai.

<sup>21</sup> Miqinoo marufanoo maqasaa maru ainainausa aiqama kuqiqau. Aiqama ufiniuqa faqa aiqama andauqa faqa aiqama fasiqa anaasee faqa kuqu taikaqau.

<sup>22</sup> Aiqama aandau faqa doodaani faqa maa maqanasaa marusa kuqu taikaqau.

<sup>23</sup> Karaambaiqa aiqama ainaina maqasaqarara ainaina taika uqanna sanau. Faiqí anaasee faqa aandau faqa ufini faqa taikannisanau. Nooafa kai narí aiku asauku faqa narí sipakinaa ainainauqa faqa misa kai asumu mariqau.

<sup>24</sup> Dinni qisauku taikasee dinni oonu qaara fasiqa maraseenoo moodaa fasiqa asaukuqara 150 faasaana nammari kaqi auginoo marinai.

## 8

### *Nammari aufrafa taikoo ufafa.*

<sup>1</sup> Marufanoo Anutufa Nooanara faqa narí aiku asauku faqa aiqama aandau mina faqa marusara faqa iriseenoo qufanoo ufai uqufanoo nammari fannoo qumi marinai.

<sup>2</sup> Maqa ameemaanindari nammari ururee maruna rafaqa finau. Rafaqafuseenoo innaaruna kooqiara foora ititasoofanoo innaarunaindaraa nammari faqa sia quminai.

<sup>3</sup> Itita fufanoo maqasaa nammari fannoo ireeda kai ireeda kai ooru maree ooru maree qumiqumii ufanoo maqa kooroinai. 150 suanisaa nammari qumimarinai.

<sup>4</sup> Dinni taikaseenoo dinni oonu qaaraqanda marasee 7 quqoonasaa miqi mandee quqoonna qambaana qisaukuqara faqa dinni qiku taikaseenoo dinni oonu qaara marasee 17 faasaana Nooana sipa fannoo Ararata aqanasaa muqufi quqasoofanoo marinai.

<sup>5</sup> Miqooqari nammari uru maree ooqinufanoo qisaukuqara taikasee 10 quqoonasaa indaruqaa faasaanasaa aqana atiuqa kooroinai.

<sup>6</sup> Qaara fasiqa niku nisauku taikasee 40 faasaana aiqaroorfanoo Nooafa winduqa atuaseenoo ufini kaammeesa fooqaana mara aqinai.

<sup>7</sup> Ufini fannoo sia kaifaa aninai. Kaqi kai qaaganoo nimirinai.

<sup>8</sup> Nooafa mi ufininara rakisusia sia anufanoo nakipuruna mara aquseenoo nammari qafaanifeera aqiganau.

<sup>9</sup> Aqusoofanoo nakipuruna maqara randoosianoo nammari kaqi marufanoo mi eendanaki kai kaifaa Nooafunnai sipaki aninai. Nooafa narí asauku madaanai quqaseenoo qumara sipaki quqanau.

<sup>10</sup> Qisauku dinni taikasee dinni oonu qaara marasee 7 faasaana afeesida mariufanoo Nooafa nakipuruna kaiqaa mareeqeenoo madaanai aqinai.

<sup>11</sup> Eenee marufanoo nakipuruna fannoo oorifa saqari amanee ammunirana rakeemma aaku maree aninai. Nooafa mi saqari amaneena qafamaseenoo doo nammari ooqi maridanoo fee qinai.

<sup>12</sup> Miqooqari kaifaa dinni taikasee dinni oonu qaara marasee (7) faasaana aiqaroo fanoo Nooafa nakipuruna kafaa mara quqasoofanoo doo funnai fifinoo doo sia kafaa aninai.

<sup>13</sup> Nooafa 601 aukwana marasoofanoo indaaruaqaa quqoona indaaruaqaa faasaanasaa nammari tukaqnanau. Nooafa sipa ataufakaaqaa akua-maqaqoona rafaammasee qafoofanoo maqa aadana usimarinai.

<sup>14</sup> Namba 2 quqoonasaa 27 faasaanasaa aiqama nammari tukaqnamafufanoo maqa maaqa aadana uqanna marinai.

<sup>15</sup> Miqimmafufanoo Anutufa Nooana qimaminoo qinai.

<sup>16</sup> Doo sipakiqari anee faqa aneenna anaaqa faqa aneenna faiqi namu faqa misa ninaaqmaaka faqa raudaaqa.

<sup>17</sup> Aiqama ufiniuqa faqa aandauqa faqa nifiqee raudaaqa. Raudamafiqa maqa maaqaki daraaniga asumu moomoo kambiaqa.

<sup>18</sup> Miqi qimasoofanoo Nooafa faqa narí anaaqa faqa narí faiqi namu faqa misa ninaaqmaaka faqa sipakiqari raudaaqau.

<sup>19</sup> Aiqama aandauqa faqa ufiniuqa faqa narí oosana narí oosana kai moodaanaki suqufufaqa raudamaki daraaniquau.

### *Nooafa karaambaiqa tatufirana suqa aminai.*

<sup>20</sup> Nooafa rafudamafufanoo karaambaiqa tatufirana suqarara ooni qumareenoo aaku aakummaseenoo Anutuna afusaa anukara aandau faqa ufini faqa maraseenoo muduka Anutuna tatufirana suqa aminai.

<sup>21</sup> Suqoofanoo mina afunda karaambaiqa aikiambu ufanoo udirama qafeenoo asasinai. Asasammaseenoo maaqi qimasee qimminoo qinai. Sia qinee kaifaa faiqi inni mandainaina akiiqara aiqama maqa maaqa niquraraanuranoo. Inneeqa faiqi saaqari irirana faqa marirana faqa mandaika kai imarunara sia kaifaa unandee iqa maqa maaqa afaaqasasa maria fasiqa aanaaseesa faqa aandau doodaani faqa naru taikaanaura.

<sup>22</sup> Anutufa minara maaqi qimasee qinai.

Maa maqafa kaqi marinaqa  
qummaqira aukwana faqa narana nara aukwana faqa  
suara faqa aiqaiqa faqa aaku aukwana faqa  
suani aukwana faqa faasaana faqa eendaki faqa  
sia taika nimaqaanaura, kaqi marifaranoo.

## 9

### *Anutufa Nooana faqa moodaanaki kinai.*

<sup>1</sup> Anutufa Nooana narí faiqi namu faqa nifaaqooqa qinoo qinai. Inni asumu moomoo kambiqafi aiqama maqa maaqa amana kai mariaqa.

<sup>2</sup> Aiqama aandauqa faqa ufiniuqa faqa noodaanna faqa inniara rufi-aranaki mariaqa. Misa inni afeeka ameemaanai mariaqa.



<sup>3</sup> Innee maaqooqari sia andanda kai naaqa mi aandausa namu faqa naaqa. Innee naranara foora naaqeera nimidaqa.

<sup>4</sup> Innee moodaa ainaina kai sia naaqa, fidika amaqiki marinnana kai sia naaqa. Mifa marirana nimimarifa marinara sia naaqa.

<sup>5</sup> Faiqí moo fannoo faiqí faiqi fidika ruqiqainaqa qinee mina akiiqara ummaara amianauroo. Aandau moo fannoo faiqí faiqi kuqa narinaqa qinee mi aandauna kuqa aruanaura.

<sup>6</sup> Anutufa faiqí faiqi narí fooqaasa auquqoonara yafee moona auqu qimasee kuqa arinnana akaqausa mina akiiqara narí arifaranoo.

<sup>7</sup> Innee moomoo faiqi maqasaifaqa aiqama maqa maaqaki amanaikam-mafi mariaqa.

<sup>8</sup> Anutufa Nooana faqa narí faiqi namu faqa kaifaa qimanniminoo qinau.

<sup>9</sup> Maqee qinee inni faqa innisaaqari kasooaqee kambiqainausa faqa moodaanaki kira ufa qidaqa.

<sup>10</sup> Aiqaama ainaina ufiniuqa faqa aiqama aandauqa faqa ani faqa sipakiqari anusa faqa moodaanaki kianaura.

<sup>11</sup> Maa ufausannoo qinee moodaanaki kira ufa inni faqa qidaqa. Qinee kuqaa qima afeekaika qidaqa sia kaifaa nammari aufirafa faiqí faqa aiqama ainaina faqa naruannoo. Sia uqanna kafaa nammari aufirafa maa maqa maaqana mandaikiannoo.

<sup>12</sup> Qinee naaru marira moodaanaki kira ufa ani faqa aiqama aandauqa faqa doodaaniuqa faqa qunafa maaqi qimasee uqannifiqaanaura.

<sup>13</sup> Qinee qeeqa oondanda oonnamuki quqaanaura. Mifa qinee maa maqanasaaqaraasa faqa moodaanaki kirana uqannifiqaannoo.

<sup>14</sup> Yairee fee qinee oonnamunnai innaaruna itita saananoo miqoo oondanda kambiqaanoo.

<sup>15</sup> Oonnamuki oondanda rafeeqna finaqa qafeeqa qinee ani faqa aiqama aandau doodaani faqa qima afeekaikira ufara irisee sia kaifaa nammari aufirafa naruannoo.

<sup>16</sup> Oondanda oonnamuki rafeeqnainaqa qafamaseeqa naaruara qinee inni maqasaaqaraasa faqa naaru marira moodaanaki kira ufa qiafannanara irianaura.

<sup>17</sup> Minannai qinee aandauqa faqa doodaaniuqa faqa qima afeekaiki-afanna ufana kooroo idaqa.

*Nooana faqa narí faiqi namuara faqa qidanoo.*

<sup>18</sup> Nooana faiqi namu sipakiqari anusa nuqu maaqimminoo marinau. Seemmafa faqa Qammafa faqa Yafeetafa faqa mariqau. Qammafa Kannaana akoofa marinau.

<sup>19</sup> Nooana mi faiqi qaaramoo namusa aiqama maa maqanasaaqaraasa nikeeku nikaaku mariqau.

<sup>20</sup> Nooafa afuqaki ainaini marufa marinau. Mifa indaaru oosana arasee afuqa augusee uainna sanda moomoo ummaqinau.

<sup>21</sup> Mifa uainna aqama tatiseenoo moomoo neeneeseenoo furufara maseenoo narí qamunna raipaquseenoo narí uiqaana maqaki kaqi samu faiqanau.

<sup>22</sup> (Yafeetafa indaaruqaafa Seemafa mina aanaaqianaafa marinau Qammafa inaaqianaafa marinau.) Qammafa Kannaana akoofa maridanoo anireenoo narí akoofa kaqi samu faiqaqee ufanoo oonu qafeenoo narí akaqaafasaaqara naaramaseenoo qimanniminau.

<sup>23</sup> Seemafa faqa Yafeetafa faqa minara iriseeqa qaoo qimasee qamunna marasee moo fannoo dinni ati narí aururusaa quqasoofanoo moo fannoo

dinni ati narí aururusaa quqaseeqara ninaaqianaindari uiqaana maaqaki keeqa fiqaqara nári nikoona afaaqa itita amaqaqau. Miqanda noori kaqinni quqasee nisauruanoo qimasee sia nári nikoona qafaqau.

<sup>24</sup> Nooafa kasooqagee irirafa kambiqafufanoo narí inaaqianaa faiqi mifa auqoo ainainnara irinau.

<sup>25</sup> Iriseenoo maaqi qimasee aquraranau. Qinee ani amaaku Kannaanasaa aqurara ufa quqaanaura. Anee aneenna akaqaafasaa uqa saika faiqi maria.

<sup>26</sup> Miqi qimaseenoo Nooafa quandafinoo Qammana akaqaafasaa qarara maaqi qinau.

Karaambaiqa Seemana Anutuna amooqirana amia.

Kannaafa Seemana ainainira faiqi mariannoo.

<sup>27</sup> Anutufa qinanoo Yafeetanakiqari moomoo kambiqafiqa mina faiqi namu Seemana faiqi namu faqa moodaanaki marifaranoo.

Miqiqa marifanoo Kannaafa Yafeetana ainainira faiqi mariannoo.

<sup>28</sup> Nammari aufirafa taikoofanoo miqooqari Nooafa 350 aukwana maraseenoo kuqinau.

<sup>29</sup> Mina aukwana aiqama moodaanaki 950 aukwana maraseenoo kuqinau.

## 10

### *Nooana faiqi namu ninaiqimara nuqu.*

<sup>1</sup> Nooana faiqi namu nuqu maaqimminoo marinau. Seemmafa faqa Qammafa faqa Yafeetafa faqa mariqau. Nammari aufirafa taikooqooqari misasaaqari kambiqaransa nuqu maaqimminoo mariqau.

<sup>2</sup> Yafeetana faiqi namu nuqu maaqimminoo marinau. Koommafa faqa Makookafa faqa Madaifa faqa Yafanafa faqa Tubanafa faqa Meeseekafa faqa Tirasafa faqa mariqau. Mi fasiqausa ninaiqimara nisaifaqausa nariqa ninaakusa nuqu maree mariqau.

<sup>3</sup> Koommanasaaqari kambiqoo maqannaasa nuqu Asakeenasa maqannaasa faqa Rifata maqannaasa faqa Tookaramma maqannaasa faqa mariqau.

<sup>4</sup> Yafatanasaaqari kambiqoo maqannaasa nuqu Eerisa maqannaasa faqa Sipainna maqannaasa faqa Sipurusa maqannaasa faqa Roodeesa maqannaasa faqa mariqau.

<sup>5</sup> Misa ooruku nammari afaiqara marusa faqa kaqikaa afumaki marusa faqa misa ninaakusa mariqau. Misauqa Yafeetanakiqari kambiqaransa maridaqa naadu naadu maqa maaqaki maridaqa naadu naadu ufa qimariqau.

<sup>6</sup> Qammana faiqi namu nuqu maaqimminoo marinau. Kusafa faqa Isipafa faqa Ribiafa faqa Kannaafa faqa mariqau. Mi fasiqausa ninaiqimara nisaifaqausa nári ninaakusa nuqu maree mariqau.

<sup>7</sup> Kusana faiqi namukiqari kambiqoosa Seebaa maqannaasa faqa Qafiraa maqannaasa faqa Sabataa maqannaasa faqa Rammaa maqannaasa faqa Sabateeka maqannaasa faqa mariqau. Rammanasaaqari kambiqoosa Seebaa maqannaasa faqa Deedana maqannaasa faqa mariqau.

<sup>8</sup> Kusafa akoonaiqi Nimaroodana maqanau. Nimaroodafa findifinoo maa maqa maaqanaki indaaruaa rakira karaambaiqa marinau.

<sup>9</sup> Karaambaiqa dadaaqufanoo mifa amudaanai qimasee uaqee marufa marinau. Miqi marunara faiqi anaasee maaqi qimasee akaqausara qimariqau. Karaambaiqa fannoo ani Nimarooda fara foora kaaqa amudaanai qimasee uaqee mari fara foora maisaannoo.

<sup>10</sup> Nimaroodafa Baabeera maqusa faqa Eereeka maqusa faqa Akada maqusa faqa mi maqusa namuna indaaru rakisimarinau. Mi maqusa namusa Babiroonia maqa maaqaki mariqau.

<sup>11</sup> Miqoo mariufanoo Nimaroodafa Asiria maqa maaqai oonureenoo Ninifee maqusa faqa Reehoobootaira maqusa faqa Karaa maqusa faqa Reeseena maqusa faqa auqinau.

<sup>12</sup> Reeseena maqusa fannoo Nineefee maqusa dinni marifanoo Karaa firaa taunna dinni marifanoo qambaana maridanoo.

<sup>13</sup> Isipana saaqari aruakusa Ridiaa maqannaasa faqa Anamma maqannaasa faqa Reehaba maqannaasa faqa Nafatuqa maqannaasa faqa

<sup>14</sup> Patarusa maqannaasa faqa Kasaru maqannaasa faa Kareetee maqannaasa faqa mariqau. Firistia maqannaasa Kareetee maqannaasakiqari kambiqarausa mariqau.

<sup>15</sup> Kannaana faiqi namu nuqu maaqimminoo marinau. Indaaruqaafa Sidoonafa marinau. Mina aanaaqiannaafa Heetafa marinau. Miqanda nari ninaakusa nuqu marasee mariqau.

<sup>16</sup> Kannaafa Yeebusa maqannaasa faqa Amooru maqannaasa faqa Kirakasa maqannaasa faqa ninaakufa marinau.

<sup>17</sup> Hifita maqannaasa faqa Akaa maqannaasa faqa Sinita maqannaasa faqa mariqau.

<sup>18</sup> Arafada maqannaasa faqa Seemara maqannaasa faqa Qamata maqannaasa faqa mariqau. Kanna maqannaasa moomoo oosana rainafuqa aiqama maqa maaqaki daraanimambi mariqau.

<sup>19</sup> Mariufuqa Kannaana saaqari kambiqarausa misa maru maqana dinni ati Sidoona maqusaki marufanoo suani dinni ataaqeenni Keeraa maqusa Kasaa maqusa aaqa maruna raquru aminoo marinau. Miqooqari suani oosana qaannai Soodoomma maqusa faqa Koomooru maqusa faa Adama maqusa faqa Seeboima maqusa Rasaa maqusa aaqa marunnai dinni ati marinau.

<sup>20</sup> Doo Qammaana saaqari kambiqarausa naadu naadu maqusakiaqa rainafuqa naadu naadu ufa qimariqau.

<sup>21</sup> Seemmafa Yafeetana afasaafa Heeburu maqannaasa ninaakufa marinau.

<sup>22</sup> Seemana faiqi namu nuqu maaqimminoo marinau. Eerammafa faqa Asurafa faqa Arafakadafa faqa Rudafa faqa Arammafa faqa mariqau. Mi fasiqausa ninaiqimara nari ninaakusa nuqu maree mariqau.

<sup>23</sup> Arammaana faiqi namu Qusa maqannaasa faqa Huraa maqannaasa faqa Keeteera maqannaasa faqa Meeseekaa maqannaasa faqa mariqau.

<sup>24</sup> Arafakadafa Seeraana akoofa marinau. Seeraafa Eebeereena akoofa marinau.

<sup>25</sup> Eebeerafa akoonaiqi qaaraqanda maqanau. Indaaruqaana auqu Peereekafa marinau. Mina auqu oosana rainara fee qinoo marinau. Mifa maru aukuanu maqa maaqa rainanoo marufuqa minara Peereekanee qinau. Peereekana akaqa auqu Yookatanafa marinau.

<sup>26-29</sup> Yookatana faiqi namukiqari maaqimmasee maqannaasa mariqau. Aramooda maqannaasa faqa Seerefaa maqannaasa faqa Asammafee maqannaasa faqa Yeeraa maqannaasa faqa Adooramma maqannaasa faqa Qusaraa maqannaasa faqa Dikaraa maqannaasa faqa Oobara maqannaasa faqa Abimaera maqannaasa faqa Seebaa maqannaasa faqa Oofira maqannaasa faqa Qafiraa maqannaasa faqa Yoobabaa maqannaasa faqa mariqau. Aiqamusa Yookatana anaiqimara mariqau.

<sup>30</sup> Misa maru maqa maaqafa dinni ati fannoo Meesaa maqa maaqaindari Seefaraa maqa maaqai suani oosana qaannai aaqana maqa maaqa dinni ati fannoo raquru aminoo marinau.

<sup>31</sup> Seemana faiqi namu miqimmiqa mariqau. Naadu naadu maqa maaqaki maridaqa naadu naadu ufa qimariqau.

<sup>32</sup> Aiqama misauqa Noanasaaqari kambiqarawsa mariqau. Moo maqanna moo maqanna nariqa oosana amana kai mariqau. Nammari aufirafa taikafufaqa aiqama maa maqanasaaqaraasa Noana faiqi namukiqari kai kambiqafi mariqau.

## 11

### *Babiroonnia maqusasa kisaaga maaqa usakoo ufafa.*

<sup>1</sup> Indaaru nammari taikoo kamuqoo aiqama maqasaa qaraasa moodaa ufa faqaasa maridaqa moodaa ufa kai qimariqau. Aiqama ainainara moodaa auqu kai ree mariqau.

<sup>2</sup> Misa suani oosana qaannai oonuree aniree iqa niniufaqa Babiroonnia afaasa paqurimmasee miqoo mariqau.

<sup>3</sup> Misa miqoo maridaqa maaqi qimasee nari qimami nari qimami qidaqa qiqau. Anifaqa innisaimbaqa maqa qumareeqa atakuseeqa idara saananoo afeekaikamma finaqa minannai maaqa usakaa. Maasa miqimmaseeqa aaku aakummaseeqa koorootaqa mina apootaanaki akusaananoo atukaraani.

<sup>4</sup> Miqi qimaseeqa maqee innisaimbaqa fuka maqusa indufusee kisaaga maaqa auqiqa ooru finaqa innaaruna amana kai ooruraanaura. Miqimmasee maasa duqu faqaasa moodaanaki maridaqa sia aiqama maqa maaqaki daraanianaura. Miqi qimaseeqa doo miqimmiqau.

<sup>5</sup> Mi maqusana auquseeqa kisaaga maaqa faqa usakasoo fanoo Karaambaiga qumu nindafeenoo maaqi qinau.

<sup>6</sup> Maqee maasauqa moodaa maqannaasa maridaqa moodaa ufa qidaqa. Misa nari auqararee qia ainainna oosana araidaqa. Qusasaa misa nari nidimari ainainna auqee faranoo.

<sup>7</sup> Doo anifaqa inni saimbaqa ooquree misa ufa furufaramma nimaqasaanaqa sia nari ufa nari ufa iriaqa.

<sup>8</sup> Anutufa miqi qimasee misa ufa furufaramma nimaqasoofaqa misa mi maqusana auquanee quna minniseeqa maqa maaqaki daraaniqau.

<sup>9</sup> Mi maqusana auqu Babiroonnia fee qimariqau. Miqoo karaambaiga fannoo misa ufa furufaramma nimaqoonara miqi qimasee auqu raqau. Miqoo maruna Karaambaiga furufaramma nimaqasoofaqa aiqama maqa maaqaki daraaniqau.

### *Seemana aiku asaku nuqu.*

#### *(1 Stori 1:24-27)*

<sup>10</sup> Seemana saaqari kambiqoosa maaqimmiqa mariqau. Nammari aufirafa taika fufanoo miqooqari qaara aukwana aiqarama fufanoo Seemafa 100 aukwana maraseenoo akoonaiqi Arafasadana maqanau.

<sup>11</sup> Arafasadana maqooqooqari Seemafa 500 aukwana marinoo akoonaiqi maanaqa moomoo maqanau.

<sup>12</sup> Arafasadafa 35 aukwana maraseenoo nari faiqi Seeraana maqanau.

<sup>13</sup> Seeraana maqooqooqari Arafasadafa 403 aukwana maraseenoo akoonaiqi maanaqa moomoo maqanau.

<sup>14</sup> Seeraafa 30 aukwana maraseenoo nari faiqi Eebeerana maqanau.

<sup>15</sup> Eebeerana maqooqooqari Seeraafa 403 aukuana maraseenoo akoon-aiqi maanaaqa moomoo maqanau.

<sup>16</sup> Eebeerafa 34 aukuana maraseenoo nari faiqi Peereekana maqanau.

<sup>17</sup> Peereekana maqooqooqari Eebeerafa 430 aukuana maraseenoo akoon-aiqi maanaaqa moomoo maqanau.

<sup>18</sup> Peereekafa 30 aukuana maraseenoo nari faiqi Reeuna maqanau.

<sup>19</sup> Reeuna maqooqooqari Peereekafa 209 aukuana maraseenoo akoonaiqi maanaaqa moomoo maqanau.

<sup>20</sup> Reeufa 32 aukuana maraseenoo nari faiqi Seerukana maqanau.

<sup>21</sup> Seerukana maqooqooqari Reeufa 207 aukuana maraseenoo akoonaiqi maanaaqa moomoo maqanau.

<sup>22</sup> Seerukafa 30 aukuana maraseenoo nari faiqi Naqoorana maqanau.

<sup>23</sup> Naqoorana maqooqooqari Seerukafa 200 aukuana maraseenoo akoon-aiqi maanaaqa moomoo maqanau.

<sup>24</sup> Naqoorafa 29 aukuana maraseenoo nari faiqi Teeraana maqanau.

<sup>25</sup> Teeraana maqooqooqari Naqoorafa 119 aukuana maraseenoo akoon-aiqi maanaaqa moomoo maqanau.

<sup>26</sup> Teeraafa 70 aukuana maraseenoo Abarammana faqa Naqoorana faqa Qarana faqa maqanau.

### *Teeraana aiku asauku nuqu.*

<sup>27</sup> Teeraana faiqi namu mi oosanausa maaqimmiqa mariqau. Teeraafa Abarammana faqa Naqoorana faqa Qarana faqa nikoofa marinau. Qaranafa Rootana akoofa marinau. \*

<sup>28</sup> Qaranafa Babiroonia maqa maaqaki nari maqusa Uraa maqusaki mina akoofa faqa kaqi marufanoo kuqinau.

<sup>29</sup> Abarammafa Sarai nammarina maranau. Naqoorafa Mirakaa nammarina maranau. Mirikaa nammarifa Qarana araamuna maranau. Qaranafa Isakana akoofa marinau.

<sup>30</sup> Sarai nammarifa sia faiqi maqoofa aafa anaasee marinau.

<sup>31</sup> Teeraafa nari amaaku Abarammana faqa Qarana amaaku nari anaiqi Rootana faqa Abarammana anaaga nari aanaakuqu Sarai nammarina faqa Babiroonia maqa maaqaki Uraa maqusaindari nifiqeenoo Kannaana maqa maaqai fiqau. Teeraafa nari aiku asauku faqa Kannaana maqa maaqai fuanee qimasee Qarana auqu amarana maqusai oonu aana kasaqai mariqau.

<sup>32</sup> Miqoo mariiufanoo Teeraafa miqoo kuqinau. Teeraana aukuana aiqama moodaanaki 205 maraseenoo kuqinau.

## 12

### *Anutufa Abarammana aaroo ufafa.*

<sup>1</sup> Abarammana akoofa Teeraafa kuqufanoo Karaambaiqa Abarammana qimaminoo qinau. Aneenna maqa faqa aneenna aiku asauku faqa aneenna akoona maqa maaqakinaa ainaina faqa quqasee minniseenana maqa maaqa moo uqafiqaanana miqoo fua.

<sup>2</sup> Miqoo oonu marinaqa ani faiqi moomoo amiananoo maqa maaqa qumbiqafi marifara.

Qinee ani amiqi amiqimma amaqaasaanana anee auqu faqaafa marinnaranoo.

Miqimma finaqa anisaaqaraa amiqi amiqirana faiqi anaasee mareefaranoo.

<sup>3</sup> Aniaro amiqi amiqi mariasa qinee faqa quandafiqa misa faqa amiqi amiqi ianaura ani aqurarainausa qinee faqa quandafiqa misa faqa niquraraanaura.

Aniaroo qimasee misa aiqama maqasaaqaraasa amiqi amiqimma ni-maqaanaura.

<sup>4</sup> Abarammafa 75 aukwana maraseenoo Qarana maqusa minniseenoo Kannaana maqa maaqai Karaambaiqa qimamundee inoo fufanoo Rootafa mina faqa finau.

<sup>5</sup> Abarammafa nari anaqa Sarai nammarina faqa nari akaqa faiqi Rootana faqa nari moomoo qumiasana ainainira faiqiuqa faqa nifiqeenoo Arana maqasaa mariuna nifiqeenoo Kannaana maqa maaqai finau.

<sup>6</sup> Misa Kannaana maqasaa oonuroofanoo Abarammafa oonuree aniree inoo niniufanoo Seekeemma maqa maaqaki naaquqara maqusasaa tatufirana suqee maruqoo Mooree maqa maaqaki naaquqara saqari atukaki aniranau. Mi aukwana Kannaana maqannaasa mi maqa maaqanaki kaqi mariqau.

<sup>7</sup> Abarammafa mi maqusanai oonu marufanoo Karaambaiqa akooqoo mina afusaa kooroomafinoo qimaminau. Qinee maa maqa maaqanara ani qimamunnana ani aiku asauku nimianaura. Miqi qimasoo fanoo Abarammafa miqoo mina afusaa kooroo Karaambaiqana tatufirana suqa amira qainda auqusee tatufirana suqa aminau.

<sup>8</sup> Suqa amiseenoo Abarammafa findifinoo aqana maqa maaqai ooru finau. Beeteera maqusa fannoo suani keeqoo qaannai marufanoo suani oosana qaannai Ai maqusa marufanoo qambaana nari uiqaana maqa usakanau. Usakaseenoo miqoo Karaambaiqa aadau tatufira ooni qainda faqa auquseenoo Anutuna aaramaseenoo innaaru qimarinau. <sup>9</sup> Miqinoo faiqanoo fifiufanoo suani afu dinni ataageenni Kannaana maqa maaqa dinni atinni Isipa maqa maaqa oosira qaannai ooquranau. Neekeefa maqasaa ooqu finau.

*Abarammafa Isipa maqa maaqai ooqu fu ufafa.*

<sup>10</sup> Miqoo marufanoo aandaroo firaafa Kanna maqannaasa narinau. Abarammafa mina qafoo fanoo mandaikufanoo nari aiku asauku faqa nari ainaina namu faqa Isipa maqasaa ooqu finau.

<sup>11</sup> Isipa maqa maaqa adeedi rama soofanoo Abarammafa nari anaqa Sarai nammarina qimaminoo qinai. Ani afaqa amiqirafa mariananoo.

<sup>12</sup> Isipa maqannaani qafamasee, oo mina aanaaqammi maqi qimasee qini darusee ani maree foora.

<sup>13</sup> Anee aneennara qiniara auna fee qinaqa sia darifaqa anindiri kaqi marianau.

<sup>14</sup> Abarammafa Isipa maqa maaqai aniroofaqa Isipa maqannaasa Sarai nammarina qafamasee boo amiqira fee qiqau.

<sup>15</sup> Isipa maqannaasa rakisirafa Faraona mina faiqi namu Sarai nammarina qafamaseeqa Faraona qimamiqa qiqau, qoo amiqira manaqa fee qufanoo Faraofa qimannimufaqa Sarai nammarina ani mareeqee Faraona kinna maaqaki quqaqau.

<sup>16</sup> Mina akiiqara Faraofa Abarammana amiqi amiqimmaseenoo sipsipauqa faqa mimmiuqa faqa burimakauqa faqa doonkiuqa faqa kammeeruqa faqa ainainira faiqiuqa faqa maanaaqauqa faqa feefaru Abarammana aminau.

<sup>17</sup> Faraofa Sarai nammarina maroonara Karaambaiqa fannoo oosana oosana manda aurirana Faraona faqa mina maaqaki marusaki faqa quqanau.

<sup>18</sup> Faraofa mina qafamaseenoo Abarammana aaramaseenoo aqinoo qinau. Anee qini naqaa fee maqimaqeennee. Anee nanaree sia qini qinaaqa fee qimasee qimaqiminanee.

<sup>19</sup> Anee nanaree qini dauna fee qianaqee qinee qeeqara qinaaqara mareeqee qeeqa maaqaki quqee fee. Maa ani anaqa marinoo, doo ani afigee fifua.

<sup>20</sup> Faraofa miqi qimaseenoo narí sundiauqa niqiqoofaqa Abarammana faqa narí anaqa faqa narí aiqama ainaina faqa nifiqa maree nári maqa atinni munusoofaqa fiqa.

## 13

### *Abarammasa Rootasa naadu naadu fu ufafa.*

<sup>1</sup> Abarammafa Isipa maqa maaqakiqari suani afu dinni ataaqeedari dinni ataaqeenni Kannaana maqa maaqai qumurandee narí anaqa faqa Rootana faqa narí aiqama qumiasana faqa maree finau.

<sup>2</sup> Abarammafa ainaina faqaafa marinau. Sipsipa faqa mimmi faqa burimakau faqa siruaa faqa koora faqa faqaafa marinau.

<sup>3</sup> Mifa miqooqari quqasee fifiufanoo Beeteera maqusa amummaqa fi-marinau. Mifa ooqai narí Beeteera maqusa faqa Ai maqusa faqa qambaana uiqaana maqa usakaqooqoo ooqu ranau.

<sup>4</sup> Ooqai mifa miqoo tatufira qainda auquqoo ooqureenoo Karaambaiqa innaaru qimamaqanau.

<sup>5</sup> Rootafa faqa sipsipauqa faqa mimmiuqa faqa burimakauqa faqa faiqi anaasee faqa narí ainainira faiqiuqa faqa maanaqauqa faqa Abarammana faqa nimariqau.

<sup>6</sup> Miqanda moomoo aandau ainaina faqaqanda maridaqa aandauqa neemaru andandafa sia amanaikufaqa sia amana moodaanaki mariaqa inoo marinau.

<sup>7</sup> Miqifa marufanoo Abarammana andausaa rakisi marusa faqa Rootana andausaa rakisi marusa faqa andanda narana saara tinooriqau. Mikari Kannaana maqannaasa faqa Peerisa maqannaasa faqa mi maqanasaa kaqi mariqau.

<sup>8</sup> Abarammafa mina qafamaseenoo Rootana qimaminau. Maasa moodaa oosana maridaqa anee faqa qinee faqa sia tinooria, ani faiqi namu faqa qini faiqi namu faqa sia tinooriaqa.

<sup>9</sup> Maqa maaqa fraatiamma maridanoo ania, anindiri rainaa, anee aninna aidimari maqana qafamasee utaaqamasee mi tinai finaqa qinee moo tinai fuanaura.

<sup>10</sup> Miqi qimasee qimamufanoo Rootafa afu maqaidanoo Yooradanna noopundu dinni marufanoo Sooara maqusa dinni marufanoo mi qambaanna nammari moomoo marinau. Karaambaiqa kadidakiara foora moomoo nammari marinau. Amiqinoo maridanoo Isipa maqa maaqara foora marinau. Mi aukuanai Karaambaiqa Soodoomma maqusa faqa Koomoora maqusa faqa sia naru kammuqoo Rootafa mi maqa maaqana qafanau.

<sup>11</sup> Rootafa qafamaseenoo aiqama Yooradanna afaasasaa ooqu mariraree qimaseenoo suani oosana fimaruu aatata finau. Miqi mandeeqara rainaqau.

<sup>12</sup> Abarammafa Kannaana maqa maaqai kaqi marufanoo Rootafa Soodoomma maqusa aaqa maqusauqa dinni dinni marufanoo qambaana noopunduki narí uiqaana maqa usakanau.

<sup>13</sup> Soodooma maqannaasa kaaqa mandainaina maree marusa maridaqa. Karaambaiqa afusaa oosana oosana mandainaina uqanna auqee mariqau.

*Abarammafa Heebaroona maqa maaqai finau.*

<sup>14</sup> Rootafa fifufanoo Karaambaiqa Abarammana qimaminoo qinau, anee mariannaqooqari amiqimmasee aiqama atinai aiuqia.

<sup>15</sup> Anee qafaanna maqa maaqana ani faqa anisaaqari kambiqainausa faqa nimisaananoo naaruara naaruara innindi kamminoo mariannoo.

<sup>16</sup> Qinee ani aiku asauku asumu moomoo kambiqana nimaqaanaura. Sia amana moo fannoo asaana rirana amanaikiannoo. Nukuda aiqama amana asaana rifaranoo, ani faiqi namu kai sia amana nisaana rifaranoo.

<sup>17</sup> Doo maqee oonuree aiqama maqa maaqa qinee ani amiannana aiuqia.

<sup>18</sup> Abarammafa minara iriseenoo narí uiqaana maaqa rapeemma mareenoo Heebaroona maqa maaqaki Mamareena saqariuqa atukaki ooqureenoo miqoo Karaambaiqa tatufira qainda ooninnai auquseenoo tatufirana suqa aminau.

## 14

*Rootafa namuqaaki marufanoo Abarammafa afiqoo ufafa.*

<sup>1</sup> Mi fasannai Amarafeerafa Babiroonia maqanna karaambaiqa marinau. Mi aukuanai Eerasaa maqanna karaambaiqa Ariookafa faqa Eeramma maqanna karaambaiqa Keedooroomafa faqa Kooimma maqanna karaambaiqa Tidarafa faqa minamusa aiqama narí sundiauqa moodaanaki nifiqeeqa Soodooma maqannaasa narirara fiqau.

<sup>2</sup> Misa moodaannai qisauku karaambaiqauqa faqa rakiraree qimaseeqa fiqau. Soodooma maqanna karaambaiqa Beerana faqa Koomoora maqanna karaambaiqa Birasana faqa Adama maqanna karaambaiqa Sinabana faqa Seeboyima maqusanaasa karaambaiqa Seemebeerana faqa Beeraa moo auqu Soora maqanna karaambaiqa faqa mi moodaannai qisauku karaambaiqausa faqa rakiraree qimasee qumiqau.

<sup>3</sup> Mi moodaannai qisauku karaambaiqausa rufiasee Sidimma noopunduki suqiqau. Maqee mi noopundunaki ooruku nammari rafaqa finoo marifaqa mina auqu raidaqa Kuqira Nammari fee qidaqa.

<sup>4</sup> Qisaukuqara taikasee qikunni ooqu qaara marasee 12 aukuanaki Keedooroomana asauku ameemaanai mariqau. Qisaukuqara taikasee qikunni ooqu qaaramoo marasee 13 aukuanaki mina ufa rukiee mariqau.

<sup>5</sup> 14 aukuanasaa Keedooroomafa findifinoo aqoonna karaambaiqauqa faqa narí rakira fasiqauqa faqa findifiqa ooqu fiqau. Ooqu fiu faqa moo maqannaasa ooqi naru maree fiqau. Reefaimma maqannaasa Asetaroota Karanaimma maqusaki nariqau.

<sup>6</sup> Naruseeqa Susima maqusanaasa Qamma maqa maaqaki faqa nariqau. Naruseeqa Eemimma maqanna faqa Kiriataimma afaasa maqa maaqaki marusa nariqau. Miqooqari ooquree Qoora maqannaasa Eedoonaa aqanasaa marusa nariqau. Misa naru mareeqa Eeraparanna aadana maqa maaqa atinni munu quqaqau.



<sup>7</sup> Miqooqari oonu randeeqa Kadeeasa maqusai ooqeenaa auqu Eenamisapatee qimaru maqusaanaasa faqa nariqau. Amareekana aiku asauku misaqa maru maqusausa aiqama rafaafa fiqau. Rafaafafusee Amoorana aiku asauku Qasasoon Tamara maqusaki marusa faqa rafaafafu nimaqafau.

<sup>8</sup> Miqimmasoofaqa Soodooma maqannaa karaambaiqa faqa Koomoora maqannaa karaambaiqa faqa Adamma maqannaa karaambaiqa faqa Seebooyima maqannaa karaambaiqa faqa Beera moo auqu Sooa maqannaa karaambaiqa faqa mi maqusa namusa karaambaiqauqa faqa nari rakira fasiqauqa faqa moodaaqoo Sidima noopunduki suqifau.

<sup>9</sup> Suqufufaqa Eeramma maqannaa karaambaiqa faqa Kooimma maqannaa karaambaiqa faqa Babiroonia maqannaa karaambaiqa faqa Eerasara maqanna karaambaiqa faqa rakirara deedaqifau. Moodaanai qisauku karaambaiqauqa qaara faqa qaara faqa karaambaiqauqa faqa rakirara deedaqifau.

<sup>10</sup> Sidima noopunduki koorootaqa madika moomoo marinau. Soodooma faqa Koomoora maqannaa karaambaiqauqa rakiranakiqari quqasee sandaani quna mi madikausaki aqufiqau. Qaaramoo karaambaiqauqa sanda maqaraasiqa aaqanai akaraqau.

<sup>11</sup> Qaara faqa qaarafaqa karaambaiqauqa Soodoomma maqannaasa faqa Koomoora maqannaasa faqa aiqama ainaina uqanna maraqau. Afuqakinaa nara ainaina faqa maree fiqau.

<sup>12</sup> Rootafa Abarammana akaqa amaaku fannoo Soodooma maqusai marufaqa mina faqa mina qumiasana faqa maraqau.

<sup>13</sup> Faiqi moo fannoo rakiranakiqari sandeenoo Abarammafa Qeeburu maqannaa fasiqa fannoo Amooru maqannaa fasiqa Mamareena saqariuqa atukaki marufanoo ooru qimaminau. Mamareefa nari akaqafara Eesakoorana faqa Aneerana faqa minamusa Abarammana aqoondi mariqau.

<sup>14</sup> Abarammafa Rootana mara maree funara iriseenoo nari ainainira faiquqaki nimudaanai qimarusu nari uqaana maqusakinaasa 318 fasiqa nifiqanau. Nifiqaseenoo qimannimufaqa qaara faqa qaara faqa karaambaiqauqa nifaqamaree Danna maqa maaqai nianai fiqau.

<sup>15</sup> Ooruree namuqaa nindafamaseenoo nari faqa fusa rainaseenoo eendaki namuqaa maruqoo oonureeqa naru nindaqaaqa qiqau. Mifa misa nifaqa maree suani afu dinni ataaqeeni Damasakusa maqusa fiaaqaree Hoobaa maqusaki munusaqau.

<sup>16</sup> Ooru randee qumureeqa Abarammafa Rootana faqa mina qumiasana faqa aiqama aanaaseeuqa faqa rumbree fusauqa faqa aiqama nifiqee aniqau.

*Meerakiseedeekafa Abarammana amiqi amiqira ufa qimamaqanau.*

<sup>17</sup> Abarammafa Keedooroommana faqa mina aqoonna karaambaiqauqa faqa naruseenoo aniroofanoo Soodooma maqanna karaambaiqa fannoo mina qafarara Saavee noopunduki moo auqu Kinna noopunduki fee qimaruqoo paqurinau.

<sup>18</sup> Sareema maqannaasa karaambaiqa auqu Meerakiseedeekafa uriqarara Anutuna aanaiqikirafa marufa feemu faqa uainna nammari faqa Abarammana mini aminau.

<sup>19</sup> Meerakiseedeekafa amiseenoo maaqi qimaseenoo amiqi amiqira ufa qimamaqanau.

Uriqarara Anutufa innaaruna faqa maqa faqa auqufa mifa kai Abarammana amiqi amiqiannoo.

<sup>20</sup> Kaaqa uriqarara Anutufa kai namuqaa mareeqee ani asaukuki quqeenoo miqinara Anutuna amoo qiaqa.

Miqi qimasee amiqi amiqira ufa qimasoofanoo Abarammafa namuqaa ainaina maraqaona qisaukuqaraki rainaseenoo moodaaki Meereekiseedeekana aminau.

<sup>21</sup> Amisoofanoo Soodooma maqanna karaambaiqa Abarammana qimaminoo qinau. Anee rakiranaki maraanna ainainausa aneennara mareenana qini faiqi anaasee kai qimia.

<sup>22</sup> Miqi qufanoo Abarammafa asauku uqeeraseenoo qinau. Qeeqa qisauku uqeerreeqa, kaaqa uriqarara Anutuna innaaruna faqa maqa faqa auquna afusaa uqeerasee qimamidaqa.

<sup>23</sup> Sia uqanna ani ainaina kaqikaa ainaina maraanaura tiriti faqa niku aanaamu sanda faqa ririmma sia maraanaura. Anee qiniara maasa ainaina maraseenoo moomoo ainaina faqaasee qidanoo mifoo qinoora. Sia uqanna maraanaura.

<sup>24</sup> Qinee sia uqanna moo ainaina qeeqara maraanaura. Qini faqa rakiranaki fuasa misa namasaa ainainnara kai doo maree fee qidaqa. Qini qiqoodi namu Aneerafa faqa Eesakoorafafa faqa Mamareefa faqa misa kai nari nimanasaa maraqa.

## 15

### *Anutufa Abarammana faqa moodaanaki kira ufa qinau.*

<sup>1</sup> Rakirana taikaseenoo marufanoo Yaaweefa Abarammana afu pisipasa mandeenoo qimaminau.

Abaramma anee sia rufiaa.

Qinee ani saqariara foora anisaa ititafuananoo sia moo fannoo ani aruanoo. Qinee mina akiiqara firaa ainaina ani amianaura.

<sup>2</sup> Abarammafa mi ufana iriseenoo nari qimaminoo qinau. Oo uriqarara karaambaiqa anee nana qumiasanee qini qiminnaree qinee faiqi siaisa maridaqa. Maa qini ainainira faiqi auqu Eerieseerafa Damaskusa maqusaindaraafa mifa kai maridanoo qinee kuquananoo qini ainaina maraannoo.

<sup>3</sup> Anee faiqi asumu sia qini qimiananoo qini ainainira faiqi uqakiqari moo fannoo qini qumiasana maraannoo.

<sup>4</sup> Miqi qimaseenoo Abarammafa irufanoo kafaa Karaambaiqa qimaminoo qinau. Maa ani ainainira faiqi Eerieseerafa sia ani qumiasana ainaina maraannoo. Aninna faiqi uqanna fannoo ani ainaina maraannoo.

<sup>5</sup> Miqi qimaseenoo Karaambaiqa Abarammana afigee madaanai muquseenoo qinau. Innaarunai qafamaseenana fasau amanee anee asaana rinnaree. Aniki ani aruakinausa miqimmasee kambiqeefara.

<sup>6</sup> Abarammafa Yaaweena mi ufana iriseenoo nari saqarikirana mi ufanasaa rusisee marinau. Miqunara Karaambaiqa اساسammaseenoo Abarammana mareeqee nari agoondikiranaki quqanau.

<sup>7</sup> Miqi qimasee Karaambaiqa Abarammana qimaminoo qinau, qinee Karaambaiqa ani Ura maqusakinaana Babiroonia maqa maaqaindaraana afigee minisee maa maqa maaqana amiananoo anindikianifee qimasee afigee aniqiafana.

<sup>8</sup> Miqi qufanoo Abarammafa iramirinoo qinau. Oo uriqarara Karaambaiqa qinee naqi fee masee qinindi kammiannoo fee qimasee irianauree.

<sup>9</sup> Miqi qufanoo Karaambaiqa nari qimaminoo qinau. Anee burimakau faqa mimmi faqa sipsipa faqa qaaramoo aukwana mararaisa faqa nakipurunna faqa kukuma faqa maree mini qimia.

<sup>10</sup> Miqi qimasoofanoo Abarammafa mi aandausa Anutufa maruqoo marree mini quqaseenoo minauqa qambaana kai afoommaseenoo dinni moo afooirana dinni moo afooirana qaaramau irasasaa quqanau. Ufaniqara kai sia afooinau.

<sup>11</sup> Meemoonauqa mi aandausa narara aniroofanoo Abarammafa ni-  
iqaqinau.

<sup>12</sup> Suani keeqarana namu faqa eenoofanoo Abarammafa afuki qaunduarufanoo faiqaqeeidanoo qaini marufanoo firaa rufiarafa faqa maparaairafa faqa Abarammana afaaqai aqufinau.

<sup>13</sup> Miqida rufiee marufanoo Karaambaiqa Abarammana qimaminoo qinau. Anisaaqari kambiqainausa aanaamuruara foora moo maqannaasa maqasaa oonu maridaqa ainainira faiqikiqa marifaqa 400 aukuanaki manda fitiqnarana nimifaranoo.

<sup>14</sup> Miqi marifaqa qinee mi maqannaasa mi fitiqnarana nimimariana akiqara aupurarana nimianaura. Misa mi maqa maqana minnisee oonurandee aniqaa moomoo qumiasana maree anifaranoo.

<sup>15</sup> Aniara maaqi qiqa anee asooaqeenana asooaranaki kuqufinaqa akundaqa.

<sup>16</sup> Ani aiku asauku qaara faqa qaara faqa oosana mi rumbaranakiqari oonu randee anifaranoo. Qinee sia Amooraa maqannaasa dauni naru taikaanaura. Misa kaaqa mandaika uqanna ifaqa miqoo misa naru nindaqaaqa masee ani aiku asauku miqoo quqaanaura.

<sup>17</sup> Suani keeqoofanoo eendirara mammandufanoo Abarammafa qafooofanoo qafeeki idamuna namu faqa qooma namu faqa akooqoo nari kai kambiqafinoo aandau afoomma dinni dinni quqaqoona qambaana runna finau.

<sup>18</sup> Doo aaqee mikari kai Yaaweefa Abarammana faqa moodaanaki kira ufa qinau. Qinee maa maqa maqana ani aiku asauku nimianauranoo. Isipa maqannaa nammari dinni oosirafa ani rameeqeenoo firaa nammari dinni Eeufarateesa nammari mariannoo.

<sup>19-21</sup> Keenaa maqusanaasa maqa faqa Keennisa maqusanaasa maqa faqa Koodamoonaa maqusanaasa maqa faqa Qeeta maqusanaasa maqa faqa Peerisa maqusanaasa maqa faqa Reefaimma maqusanaasa maqa faqa Amooraa maqusanaasa maqa faqa Kannaana maqusanaasa maqa faqa Kirakasa maqusanaasa maqa faqa Yeebusa maqusanaasa maqa faqa miqimmasee maqannaasa maqa faqa ani aiku asauku nimianaura.

## 16

### *Qakaarafa nari amaaku Isamaeerana faqa ufa qu ufafa.*

<sup>1</sup> Abarammana anaqa Sarai nammarifa mifa qaafa anaasee marinau, sia faiqi maqanau. Mina ainainira maanaqa Isipa maqannaa maanaqa marinau. Mina auqu Qakaara nammarifa marinau.

<sup>2</sup> Sarai nammarifa nari oosana maraseenoo Abarammana qimaminoo qinau, anee iria, Anutufa sia faiqi qini qiminoo. Minara maa qini ainainira maanaqa mara sainanoo mifa ani faqa finoo aqbee faiqi maqa sainaqa qinee qeeqara maraanaura. Miqi qufanoo Abarammafa eedoo qimaseenoo maranau.

<sup>3</sup> Abarammafa qisaukuqara taikasee aukuaana Kannaana maqa maaqai marufanoo Sarai nammarifa nari ainainira maanaqa Qakaara nammarina Abarammana aminau.

<sup>4</sup> Abarammafa Qakaara nammarina faqa aana fufanoo faiqi maranau. Qakaara nammarifa amuaquqaika mafufanoo nasuridanoo nari aqoon-nana Sarai nammarina ramoo ramaa ira ufa qimamaqanau.

<sup>5</sup> Miqufanoo Sarai nammarifa Abarammana qimaminoo qin角度. Ani oosanasaa Qakaara nammarifa qini fidiagaamma qimaqaidanoo. Qinee qeeqa kai mina ani amisaafananoo amuaquqaika mafinoo qini uridaaqa raidanoo. Karaambaiqa fannoo kai anindiri ufa rainaannoo. Anee fee, qinee fee andeeqee fee.

<sup>6</sup> Abarammafa kafaa nari qimaminoo qin角度. Doo amana ani ainainira maanaqa ani ameemaanai maridanoo. Naqaamma amaqararee fee qimasee iridanee, doo miqia. Sarai nammarifa Akaara nammarina maqee maqee oofana qaidanoo ari aqimarunara quqasee sandanau.

<sup>7</sup> Qakaara nammarifa amaaqa firaree qimasee Suraa maqa maaqaki fimaru aatata sandee fiifiufanoo aadana maqa maqa qambaana nammari kaqikaafa ururee maruqoo Karaambaiqa angiroo fannoo Qakaara nammarina paqurimmasee qimaminoo qin角度.

<sup>8</sup> Qakaara nammari, Sarai nammarina ainainira maanaqa, anee yaindari fee anidanee maaqooqari yai fee fidanee. Miqi qufanoo Qakaara nammarifa qin角度, qeeqa rakisirana Sarai nammarina aaqu rufiee sandaidaqa.

<sup>9</sup> Angiroo fannoo minara iriseenoo maaqi qimasee qimaminoo, doo findi finana aneenna rakisira anaasee marinnai kafaa anirandee oonureenana mina ainainira manaaqaikia.

<sup>10</sup> Angiroo fannoo kafaa qimaminoo qin角度. Qinee moomoo asumu ani amianaqa sia amana asaana rifaranoo.

<sup>11</sup> Maqee ani aranandaki faiqi rinoo anee akoonaiqi maqeenaranoo anee mina auqu Isamaeera nee qia.

Karaambaiqa fannoo anee aupuraranakiqari mina aaramasee faaqa ruanana irinara minara mi faiqina auqu Isamaeera nee qia.

<sup>12</sup> Mi faiqifa kaasau fainiara fooru mariannoo.

Mifa aiqamausa namuqaakamma nimaqainaqa misa faqa nari namuqaakamma amaqeeffaranoo.

Mifa nari ainaina rakeemasee aaduma mariannoo.

<sup>13</sup> Qakaara nammarifa nari kai qimirinoo qin角度. Qinee kuqaa fee Anutuna qafamasee fee sia kuqirai kaqi maridee qimannimianauree. Miqi qimasee mina qimamu karaambaiqanara niqafee mari Anutu fee qin角度.

<sup>14</sup> Miqooqari misa mi nammari dikaandana auqu reeqa kaqi marira Anutufa qini qiqafai nammari dikaanda fee qiqau. Mi nammari dikaandafa Kadeesa maqusa dinni Beereeda maqusa dinni qambaana marinou.

<sup>15</sup> Qakaara nammarifa kafaa anirandee oonureenoo faiqi maqasoofanoo Abarammafa mina auqu Isamaeera nee qin角度.

<sup>16</sup> Mi aukuanna Abarammafa 86 aukuana faqaafa marufanoo mina faiqi kambiganau.

## 17

*Anutufa Isaraee maqannaasara nifaaqa ati aukirafa moodaanaki kira ufa kooroo imarifa maridanoo.*

<sup>1</sup> Abarammafa mariufanoo 99 aukuana marasoofanoo Karaambaiqa mina afusa kooroo mafi qimaminou. Qinee aiqama afeeka faqaa Anutusa maridaqa. Anee aiqama kari qini ufa qainusidana andeeqara ainaina kai auqaa.

<sup>2</sup> Qinee ani faqa qeeqa moodaanaki kira ufa qimasee anisaaqari asumu moomoo kambiqā nimaqaanāura.

<sup>3</sup> Abarammāfa mi ufana iriseenoo oorindari maqasaa mapamufufanoo Anutufa maaqi qimasee qimamināu.

<sup>4</sup> Qinee maa moodaanaki kira ufana ani faqa qidaqa. Qinee kuqaa qima afeekaikidaqa. Anee moomoo maqannaasa ninaakufa marinnaranoo.

<sup>5</sup> Doo maqee ani auqu Abarammāfa marina maqee fuka auqu amiqa. Abaraqaammanee qianaura. Qinee ani moomoo maqanna ninaakufaika maisaannanara ani auqu Abaraqaammanee qianaura.

<sup>6</sup> Qinee ani faiqi asumu moomoo amianaqa misakiqari akaqausa karaambaiqa marifara. Ani asaifaqausa moomoo maridaqa moomoo maqanna marifaranoo.

<sup>7</sup> Qinee qeeqa qima afeekaikira ufa ani faqa ani asaifaqausa naaru kambiqaināusa faqa qiafannana naaru marira moodaanaki kira ufara foora rakisianāura. Qinee ani faqa ani asaifaqausa Anutusa marianaura.

<sup>8</sup> Anee asaqiraa faira foora maa maqanasaa mariannana qinee ani faqa ani asaifaqausa faqa nimianaura. Nimiananoo aiqama Kannaana maqa maqa fannoo ani asaifaqausaindi kamminoo naaru naaru marinaqa qinee misa Anutusa marianaura.

#### *Abarammana fuka auqu.*

<sup>9</sup> Miqi qimaseenoo Anutufa kaifaa Abaraqaammana qimaminoo qinau. Anee faqa eedoo qimasee qini qima afeekai kira ufamau aneenna asaifaqausa naaru kambiqaināusa faqa fuaqa.

<sup>10</sup> Anee faqa ani asaifaqausamara faqa aiqama eedoo qimasee akoonaiqi faiqiuqa nifaaqa ati aukuaqa.

<sup>11-12</sup> Maaqooqari aiqama akoonaiqi faiqiuqa maqasaifanoo 8 faasaana aiqaramafinaqa nifaaqa ati aukuaqa. Ainainira faiqiuqa inniki mariasa faiqi namu faqa nianaindaraasa feefaurumma quqagaafaqa inniki mariasa faiqi namu faqa nifaaqa ati aukuaqa. Miqimmasaifanoo mifa qinee faqa inne faqa moodaanaki kirana uqannifiqaannoo.

<sup>13</sup> Aiqama uqanna nifaaqa ati aukuaqa. Aukusaifanoo mifa inni nifaaqai qini moodaanaki kira ufa naaruara marianinnanara koorooiannoo.

<sup>14</sup> Inniki qari akoonaiqi moo fannoo sia afaqa ati aukinafa marinaqa sia qini faiqi aanaaseeki mariannoo fee qianaura. Mifa qini qima afeekaikira ufamau sia finara sia inniki mariani.

<sup>15</sup> Kafaa Anutufa Abaraqaammana qimaminoo qinau, sia aneenna aanaaqara Sarai nammarinee qia. Maqee mina auqa Saraqa nammarifa mariannoo.

<sup>16</sup> Qinee Saraqa nammarina amiqi amiqi maisaanano faiqi akoonaiqi ani maqa amiannoo. Mifa moomoo maqannaasa ninoofa marinaqa mina faiqi namukiqari akaqausa karaambaiqauqa marifaranoo.

<sup>17</sup> Abaraqaammana mi ufana iriseenoo maqasaa mapamu finoo naanaidara qidanoo qinau. Amanee 100 aukuaana marara fasiqa fannoo faiqi maqaannoo fee Saraqa nammarifa faqa 90 aukuaana mararafa amanee faiqi maqaannoo fee.

<sup>18</sup> Miqi qimaseenoo Abaraqammana Anutuna qimaminoo qinau. Naqaa saina Isamaerafa qini ainaina maraqaana ifanee.

<sup>19</sup> Miqi qufanoo Anutufa qimaminoo qinau. Ani anaqa Saraqa nammarifa ani faiqi akoonaiqi maqasainana mina auqu Isakee nee qia. (Maasa ufakiqari Isakeena auqu naanaidara qiranee qimaqoofanoo.) Qinee ani

faqa moodaanaki kira ufa quqaunafa Isakeenasaa faqa minasaaqari naaru naaru kambiqainausasaa faqa mariannoo.

<sup>20</sup> Isamaeerana faqa anee qianandee, mina faqa amiqi amiqi ianaura. Mina faiqi namu moomoo uqanna kambiqeefara. Akoonaiqiuqa qisauku gara taikasee qikunni ooqu qaaraqanda 12 marasee uriqararausa marifara. Mina saaqari kambiqainausa firaa maqannaa marifaranoo.

<sup>21</sup> Moo aukuaana maa quqoonnasaa kai Saraqa nammarifa ani faiqi Isakeena maqannoo. Qinee qeeqa moodaanaki kira ufa minasaa quqaqaana mariannoo.

<sup>22</sup> Anutufa aiqama maa ufana Abaraqaammama qimamiseenoo doo quqasee finau.

<sup>23</sup> Fifufanoo Abaraqaammama Anutuna ufa mau finoo mi faasaana kai nari faqa nari amaaku Isamaeerana faqa nari ainainira faiqiuqa faqa nari ainainiranaki marida maqaqoo faiqisa faqa aiqama nifaaqa ati aukinau.

<sup>24-25</sup> Abaraqaammama 99 aukuaana marinoo nari afaaqa ati ateeka aqinau. Isamaeerafa 13 aukuaana marasoofanoo mina afaaqa ati ateeka aqinau.

<sup>26-27</sup> Moodaa faasaana kai Abaraqaammama faqa nari amaaku Isamaeerafa faqa nari ainainira faiqiuqa aiqama nifaaqa ati ateekaqau.

## 18

### *Anutufa Abaraqaammama faiqi amirara qima afeekaiku ufana.*

<sup>1</sup> Abaraqaammama Mamareena arookasa atukaki suani gambaana aiqaiqa ufanoo nari uiqaana maqa kooqiki ooqu faaqee marufanoo karaambaiqa maaqimmasee mina afusaa kooroo inau.

<sup>2</sup> Ooqufaaqee marufaqa faiqi qaaramoo namu anufanoo Abaraqaammama niqafamaseenoo nari oosana mareenoo findimeeqeenoo misa anuqoo sandee oonureenoo oorindari maqasaa kummarama finoo qimanniminoo qinau.

<sup>3</sup> Oo uriqararausa, qinee inni dadaaqirausa maridaqa sia qini aidaaqa raaqa.

<sup>4</sup> Qinee qianaqa nammari minisaifaqa inneeqa niku nammari uqu seeqa maa saqarina atukaki adooaqa.

<sup>5</sup> Qinee akaqa narana nimiana namaseeqa afeeka mara mareeqa fuaqa. Qinee inni dadaaqianeera maaqoo aniafanoo. Innee mai anianannai qini duqu uqeeraafanoo. Minara eedoo qifaqa narana nimia. Miqi qufaqa misa qiqa. Dufi dufi doo nimina naanee qiqa.

<sup>6</sup> Abaraqaammama iriseenoo uiqaa maaqaki sandeenoo oonureenoo Saraqa nammarina qimaminau. Anee kai kaqi parauaqa amiqirana moodaa beeka marasee feemu suqa.

<sup>7</sup> Miqi qimaseenoo raudamaki sandeenoo burimakau maruqoo oonureenoo burimakau aanaaqi amiqirana amaqi qumooqu kirana mara rumba mareenoo nari ainainira faiqi amisooofanoo kai kaqi ufanoo arusee suqana.

<sup>8</sup> Abaraqaammama burimakau naamma anoona faqa naamma anoona fadameena faqa feemu faqa burimakau suqarana faqa mara maree mini nimufaqa naqau. Abaraqaammama saqari atukaki misa faqa maridanoo narana nimufaqa naqau.

<sup>9</sup> Misa namaseeqa Abaraqaammama maaqi qimasee iraqau. Ani anaqa Saraqa nammarifa yai fee marinoo fee qufanoo mifa qinau. Maa uiqaana maqaki maridanoo fee qinau.

<sup>10</sup> Miqi qufanoo misakiqari moo fannoo qinau. Moo aukwana maa quqoonnasaa kai qinee kafaa aniraananoo ani anaafa Saraqa nammarifa akoonaiqi faiqi maqaannoo. Miqi qimarufanoo Saraqa nammarifa uiqaana maqa kooqiki mi fasiqana aanaaqiannai ooqu faaqee idanoo irimarinau.

<sup>11</sup> Miqi qufanoo Saraqa nammarisa Abaraqaamasa asooqa uqanna marufanoo Saraqa nammarifa faqa faiqi maqara aukwana ooqai taikanau.

<sup>12</sup> Saraqa nammarifa minara iriseenoo narí kai naanaidara qidanoo qinau. Qinee faqa qeeqa nauraiqindiri asooqa marida. Naqimmasee fee qeeqa qifaaqi faqa aana fuanauree.

<sup>13</sup> Miqufanoo karaambaiqa Abaraqaammama qimaminoo qinau. Naqaa fee ifanoo fee Saraqa nammarifa naanaidara qinoo fee. Maana qinee asooqa maridaqa naqimandee faiqi maqaanauree qinoo fee.

<sup>14</sup> Nana ainainee moo ainaina Yaaweefa sia amana auqaannoo fee mifa amana aiqama ainaina auqaannoo. Qinee anoona ufa qidaqa, moo aukwana maa quqoonnasaa qinee kafaa aniraananoo Saraqa nammarifa akoonaiqi faiqi maqaannoo.

<sup>15</sup> Saraqa nammarifa mina iriseenoo rufia mareenoo unna qimasee qaoo qinau, Qinee sia naanaidara qiqa. Miqi qufanoo misa uriqararafa Karaambaiqa qimaminoo qinau. Anee naanaidara qianaqa iriqa.

*Karaambaiqa Soodooma maqusa aruaninnanara qinau.*

<sup>16-17</sup> Mi fasiqa qaaramoo namusa Abaraqaammama faqa ooqu fiufaqa Soodooma maqusai qafee maruqoo muqunnisoofanoo Karaambaiqa narí kai qimasee irinau. Qinee auqararee qunna ainaina sia Abaraqaammama umeerama amaqaanura.

<sup>18</sup> Mina saaqari kambiqainausa firaa maqanna marifaranoo. Aiqa maqannaasa Abaraqaammama saqaraanannai amiqi amiqimma ni-maqaanura.

<sup>19</sup> Abaraqaammama narí faiqi namu faqa misasaqari kambiqainausara faqa andeeqara oosanamau kai fuaqera fuki faaki ianifeera rusandeesa-mummasee maraqiafana. Misa miqi faqa qinee qima afeekaikiafanna ainainausa aiqama miqimma nisaanura.

<sup>20</sup> Miqi qimiriseenoo Yaaweefa Abaraqaammama akooqoo kooroom-masee qimaminau. Soodooma maqusanaasa faqa Koomoora maqusanaasa faqa manda oosana fiqaranoo marifaqa akaqausa minara nikoo uqanna qaifaqa qimaqimiafaqa iriqa.

<sup>21</sup> Qinee ooqureeqa mi fasiqa anaaseesa mi oosanna auqee mariana qafaanura kuqaa fee unna fee maridanoo fee.

<sup>22</sup> Mi qaaramoo fasiqa namusakiqari qaara qanda Soodooma maqusai ooqu fimarufanoo Karaambaiqa Abaraqaammama faqa marinau.

<sup>23</sup> Abaraqaammama Karaambaiqa oorinni oonu reenoo iramirinoo qinau. Kuqaa fee anee andeeqaraura faqa aaqee mariasa faqa aiqamee naru taikeennaree.

<sup>24</sup> Qaara fasiqa niku nisauku taikasee qini qisauku qara taikasee 50 andeeqaraura mi maqusanaki marifana anee aiqamee naru taikeennaree. Kafaa 50 andeeqaraura marifana mi maqusanasa asumu quqeenaree.

<sup>25</sup> Sia amana andeeqaraura faqa mandaikirausa faqa moodaanaki narinnaanoo. Mifa sia andeeqanoo maridanoo. Andeeqaraura faqa aaqee mariasa faqa sia amana moodaa oosana kai niminnaranoo. Aiqa maa maqanasaa mariasa siaasa marianafa andeeqara oosana kai maraa.

<sup>26</sup> Karaambaiqa Abaraqaammama ufa iriseenoo qimaminau. Qinee qaara fasiqa niku nisauku taikasee qini qisauku qara taikasee 50 andeeqaraura mi maqusanaki paquriqa sia mi maqusana kuridianaura.

<sup>27</sup> Abaraqaammama mina iriseenoo kafa qimaminau. Oo karaambaiqa qinee qifaaqa quqasee ani qimamunna ufana mi numoona minni qisaa. Qinee faiqi faiqi maridaqa aqaqamamasee ani faqa moomoo kari ufa qidaqa.

<sup>28</sup> Amanee 50 sia marifana 45 kai andeeqaraura marifana moodaanna qisauku 5 minaki sia marinnanara irisee narinnaree. Karaambaiqa nari qimaminoo qinau. 45 andeeqaraura mi maqusanaki marifaqa sia kuridi taikaanaura.

<sup>29</sup> Abaraqaammama mina iriseenoo kafa qimaminau. Oo karaambaiqa qaara fasiqa niku nisauku taikasee 40 andeeqaraura marifana aiqama narinnaree. Karaambaiqa mina iriseenoo qimaminau. Qinee qaara fasiqa niku nisauku taikasee 40 andeeqaraura paquriqa mi maqusana sia kuridianaura.

<sup>30</sup> Abaraqaammama iriseenoo kafa Karaambaiqa qimaminau. Qinee kaifaa ani qimamianana anee sia qiniara aanoo qia. Moodaa fasiqa aiku asauku taikasee qini qisauku qara taikasee 30 andeeqaraura marifana naqaa fee innaree. Yaaweefa iriseenoo qinau. Qinee 30 andeeqaraura paquriqa sia miqianaura.

<sup>31</sup> Abaraqaammama kafa qimaminau. Qinee qifaaqa quqasee ani faqa moomoo ufa qimarunnana mi numoona minni qisaa. Mi maqusanaki moodaa fasiqa 20 kai marifana naqaa fee innaree. Karaambaiqa iriseenoo qinau. Qinee 20 andeeqaraura paquriqa sia mi maqusana kuridianaura.

<sup>32</sup> Abaraqaammama kaifaa qinau. Oo karaambaiqa sia aanoo qia. Qinee moo ufa kafa qianaura. 10 andeeqaraura paqurimasee naqi fee innaree. Miqi qufanoo Karaambaiqa qinau. Qinee qisauku qara 10 kai andeeqaraura paquri mandee sia kuridi nimaqaanaura.

<sup>33</sup> Karaambaiqa Abaraqaammama faqa ufa qimaseenoo doo ooqu finau. Ooqu fufanoo Abraqaammama quqasee anirandee amaqa finau.

## 19

### *Soodoomma faqa Koomoora faqa manda oosanna maraqau.*

<sup>1</sup> Abaraqaammama muqunnisoo qangirooqanda Soodoomma maqusai ooquree maqusa kooqiki qafuofanoo Rootafa miqoo ooqu faaqee marinau. Maridanoo Rootafa miqanda nindafeenoo maqeenoo oonu miqanda noorinni oorindari maqasaa rupaitama fufanoo maaqi qimasee qimannim-inau.

<sup>2</sup> Oo qini uriqarara qanda qinee inniqara dadaaqirara maridaqa. Innee qara qini maaqaki aniree niku nammari uqusee qini maaqaki faiqaaqa. Faiqee duna kananaana findi finaqa inneeqa finnannai fuaqa. Miqi qima-soofaqa miqanda qaoo qida qiqau. Saina maa qanda maqusa qambaana faiqaanaura.

<sup>3</sup> Rootafa sandanainai qimaseenoo ufaqa miqanda mina faqa maaqaki keeqaqau. Ooru roofanoo Rootafa nari ainainira faiqiuqara qufaqa misa ooruku anoona sia qai feemuna faqa amiqira narana faqa suqasee nimu-faqa naqau.

<sup>4</sup> Namaseeqa faiqarara imarufaqa mi maqusaanaasa faiqi kumaaraa nau-raiqi aiqama aniree Rootana maaqa fuseemma dati mambufaqa Rootana maaqi qimasee aaraqau.



<sup>5</sup> Mi faiqi qanda faasai ani maaqaki keeqaa qanda yai fee maridaqee. Anee miqanda maasa qiminaqa mi qanda manda oosana nimia.

<sup>6</sup> Rootafa misa ufa iriseenoo rauda mafinoonari aanaaqianaindari kooqi ititasee qimanniminau.

<sup>7</sup> Qinee qaoo qira ufa inni qimannimidaqa. Sia uqanna maa manda oosanna maraaqa.

<sup>8</sup> Iriaqa, qeeqa qiraamuna qaara qanda sia faiqi faqa nuaqanda inni nimisaanaqa inneeqa iriranannai kai maraaqa. Maa fasiqa qanda qini maaqaki ani raafaqa aqoondi kammaqauna mariafaqa qinee amiqimmasee miqandasaa rakisidaqa.

<sup>9</sup> Miqi qimasee qimannimisoofaqa misa aiqama maaqi qiqau. Anee moo maqannaafa maasaki ani marianafa. Yafee qifanee anee maasara qaoo qidanee. Anee nimaaraa. Sia nimaarainaga sia ani aqoondiqara kai mandaikamma nimaqaanaura, ani faqa firaqoo mandaikamma amaqaanaura. Miqi qimaseeqa misa Rootana afeeqa aquseeqa mina kooqi rufadaairara iqau.

<sup>10</sup> Maaqakiqari Rootana aqoondiqara Rootana qumu rarisameeqee maaqaki aqusee kooqi ititaqau.

<sup>11</sup> Ititaseeqa mi fasiqausa madaana marusa aiqama nifu qimbasoofaqa kooqiara randoosia minnisaga.

*Rootafa Soodoomma maqusakiqari finau.*

<sup>12</sup> Minni soofaqa Rootana aqoondi qara iramiriqa qiqau. Maa anee marianna maqusanaki ani ati akaqausa maridee. Kai kaqi aneenna araamuqmaaka faqa airaamaku oondamara faqa aneenna atiuqa faqa aiqama nifiqee moosaa fua.

<sup>13</sup> Maasa maa maqusana damunamma aquanaura. Karaambaiqa maa maqusanakina oosana oosana mandainaina kambiqaifanoo mi ufana iriseenoo maaqanda diqiqaiifaqa maa maqusana kuridirara qumidaqa.

<sup>14</sup> Rootafa iriseenoo nari araamuna qara nifaaqi qarara qutaqamaqoo fasiqa qanda faqa qimanniminau. Doo anifaqa innisaimbaqa mootinai fuaqa. Anutufa maa maqusana damunirara qinoo. Miqi qufaqa mina airaamaku qara sia iriqau. Quteeti qidanoo mifoo qimasee kaqi mariqau.

<sup>15</sup> Iaqoo faqa kananaana angirooqara Rootana kafa fuki faaki qiqau. Doo kai kaqinana aneenna anaqa faqa aneenna araamuna qara faqa nifiqee fua. Innee faqa maa maqusana namu faqa kuridifaara.

<sup>16</sup> Rootafa iriseenoo onauqee anauqee imarufanoo mina aqoondiqara mina asauku faqa mina anaqa asauku faqa mina araamunaqara faqa qumaree rarisameeqee aanai ubeekaqa. Yaaweefa Rootanara amuqusu-fanoo miqinai.

<sup>17</sup> Nifiqa quqasoofanoo angiroo moo fannoo qimanniminoon qinai. Innee sandamafuaqa kuqifaara. Fidaqa sia quanda fi qafaqa. Afaasaa faqa sia kasooiaqa. Innee kuqifaara, aqanai sandee ooru fuaqa.

<sup>18</sup> Rootafa iriseenoo maaqi qimasee qimaminai. Sia aneenna qiannannai diiqaa.

<sup>19</sup> Anee firaqoo qiniara amuqusifana qini kuqiranakinaana maraananoon. Aqana nianai marifaqa minni fimariananoon mi narirafa qini faqa darinaqa kuquanoora.

<sup>20</sup> Anee kaqikaa maqusa muqunni qafaidanee. Mifa adeedi marifaqa amanee qinee minni sandaanauree. Kaqikaa maqusa uqanna maridanoo qinee minni oonureeqa asumu marianaaura.

<sup>21</sup> Miqi qimasoofanoo angiroo moo fannoo qimaminau. Doo amana qinee minara eedoo qidaqa. Sia qinee mi maqusana kuridianaura.

<sup>22</sup> Doo kai kaqi sandaa. Anee oonu rainaqa miqoo qeeqa qunna ainaina auqaanaura. Rootafa mi maqusanara kaqikaa maqusee qunara misa mi maqusana auqu Sooara fee qidaqa.

*Karaambaiqa Soodoomma maqusa faqa Koomoora maqusa faqa kuridinau.*

<sup>23</sup> Mi kananaanna suani afu maqee uri marufanoo Rootafa Sooara maqusai oonu ranau.

<sup>24</sup> Oonuroofanoo Karaambaiqa ida namu faqa koorootaqasaaqari qeemari idanara foora irana namufaqa quqasoofanoo aakuara foora Soodoomma maqusasaa faqa Koomoora maqusasaa faqa aqufinau.

<sup>25</sup> Aqufinoo mi arumunaki maru maqusausa faqa aiqama faiqi anaasee faqa andanda faqa naru taikanau.

<sup>26</sup> Rootana anaqa nari afaaqi faqa sandee fidanoo oonu quandafinoo afu maqeenoo doo miqoo ooruku kammafi kisaqa saqariara foora rakiqanoo marinau.

<sup>27</sup> Moo kananaana Abaraqaammafa findimeeqeenoo Karaambaiqa faqa ufa quqoo ooqu finau.

<sup>28</sup> Miqooqari Abaraqaammafa mara muami qafoofanoo Soodoomma faqa Koomoora faqa mi afaasanasa maru maqusausaki ida muna fannoo firaafa uqanna ooru fufanoo qafanau.

<sup>29</sup> Anutufa mi afaasanasa maru maqusausa faqa maqa maaqa faqa kurididanoo Abaraqaammanara iriseenoo Rootafa mariu maqusausa nari-danoo Rootana kai mareeqee kaqinni quqanau.

*Mooabana faqa Amoona faqa niku nisauku kambiqoo ufafa.*

<sup>30</sup> Rootafa Sooara maqusara rufiaseenoo nari araamuna qara nifiqeenoo amuaqu namusaa ooni aamara marunaki ooru marinau.

<sup>31</sup> Mariufanoo mina araamuna indaaruaafa inaaqianaana maaqi qimasee qimaminau. Doo maasa qikoofa asooqa maridanoo. Sia maa saqanna anindiri marasee faiqi mara qimifaqa maqara fasiqauqa mари-daqa. Aiqaama faiqi auqeeu oosanafa sia anindiriki maridanoo.

<sup>32</sup> Doo aninaqa anindiri uainna nammari auquseeqa nari nikoona amiananoo moomoo namaseenoo furu farinaqa anindiri mina faqa sakasee faiqaa. Miqi masaifanoo anindiri nikoofa anindiri faiqi mara qiminaqa anindiri faiqi namu findifiqa mariaqa.

<sup>33</sup> Miqi qimaseeqa mi eendanaki miqanda uainna nammari moomoo nari nikoona amisoofanoo neeneeseenoo furufara masoofanoo anasaafa naaree nari akoona faqa sakasee faiqanau. Uainna nammari fannoo mina furu fara masoofanoo nari araamuna auqoo ainainara sia irinau.

<sup>34</sup> Kananaana anasaafa nari auna qimaminoo qinau. Faasai eendaki qinee qeeqa qikoona faqa sakasee faiqeeqa. Doo fafaa eendaki anindiri uainna moomoo kaifaa amiananoo namaseenoo furu farinana anee faqa mina sakasee faiqaa. Miqimasee anindiri qeeqa qikoona faiqi maqasaana faiqi asumu kaqi mariaqa.

<sup>35</sup> Miqi qimasee doo mi eendanaki miqanda uainna nammari moomoo nari nikoona amisoofanoo furu faramma soofanoo auna fannoo nari akoona faqa sakaseenoo faiqanau. Rootafa uainna nammari namseenoo furu faridanoo nari araamuna auqoo ainainara sia irinau.

<sup>36</sup> Miqimasee Rootana araamuna qara nari nikoona faqa faiqoonannai nimuaqu qaikiqau.

<sup>37</sup> Miqimasee marufanoo indaaruga araamana fannoo faiqi akoonaiqi maqaseenoo mina auqu Mooaba nee qinau. Mariu fanoo Mooabafa findifinoo Mooaba maqannaasa nikoofaikamminoo marinau.

<sup>38</sup> Auna fannoo mifa faqa faiqi akoonaiqi maqaseenoo mina auqu Beenaami fee qinau. Mariu fanoo Beenaamifa findifinoo Amoonaa maqannaasa nikoofaikamminoo marinau.

## 20

### *Abaraqaammama faqa Abimeereekana faqa ufa.*

<sup>1</sup> Abaraqaammama Mamareena maqusa minni seenoo Neekeefa maqa maaqakina ooqu finau. Mifa Kadeesa maqusa dinni Sura maqusa dinni qambaana ooqu marinau. Marikino kafa Keeraara maqusaki ooqu marinau.

<sup>2</sup> Keeraara maqusaki kaqi maridanoo Abaraqaammama nari aanaaqara Saraqa nammarinara qini dauna fee qinau. Keeraara maqanna karaambaifa mina auqu Abimeereekafa marinau. Mifa Abaraqaammama ufa iriseenoo Saraqa nammarinara mina auna fee qimaseenoo nari ainainira faiqiuga niqifoofaqa Saraqa nammarina mareeqeega Abimeereekana amiqau.

<sup>3</sup> Miqoo marufanoo Anutufa Abimeereekana qaina saa kooroo qimasee qimaminau. Anee kuqinnaranoo maa anaaseena anee maraannana moo fasiqa anaqa maridanoo.

<sup>4</sup> Abimeereekafa Saraqa nammarina sia sakasee faiqanau. Minara iriseenoo Anutuna qimaminoo qinau. Oo karaambaifa qinee andeeqaraura maridaqa anee qini faqa qini faiqi anaasee faqee narinnaree.

<sup>5</sup> Abaraqaammama nari kai Saraqa nammarinara qini dauna fee qifaqa qinee iriqa. Kafa maa anaaseefa faqa nari afaaqiara qinoo qini qifasaa fee qinoo. Miqi qifaqa qinee mina irunanoo qini daakirafa qimaqiminoo sia aqaqara aniki mariannoo fee qifaqa maraunanoo sia aqaqara qiniki maridanoo.

<sup>6</sup> Anutufa iriseenoo kafa qainasaa qimaminoo qinau. Eeo qinee iridaqa kuqaa ani aakirafa qimamifana andeeqaananoo. Qinee kai ani qumee rafaqafunana anee sia qini mandaikamma qimaqeenana mi anaaseena faqa sakasee faqaananoo.

<sup>7</sup> Doo findi finana mi fasiqana anaqa kaifaa nari afaaqinnai aiqainanoo fuani. Abaraqaammama qini tamumqara fasiqa maridanoo. Mifa aniara innaaru qinaqa iriseeqa siamma ani aruanauranoo. Anee sia mi anaaseena aiqainaqa ani faqa ani maqannaasa faqa aiqama naruanauranoo.

<sup>8</sup> Abimeereekafa mina iriseenoo Kananaana eendai findifinoo nari maqanna uriqararaura naaramaseenoo Karaambaifa qu ufana qiman-nimisoo faqa firaa qoo rufiaqau.

<sup>9</sup> Abimeereekafa kafa Abaraqaammama aaramaseenoo iramirinau. Anee nana oosanee maasa qiminanee. Nana manda ainanee maasa ani amunanee anee qini faqa qini qiku qisauku faqa firaa ummaara qiminanee. Sia auqaqaa ira oosana maasa qimiananoo.

<sup>10</sup> Nana irirafee marifanee maaq inanee.

<sup>11</sup> Abaraqaammama mina iriseenoo maaqi qimasee Abimeereekana qimaminoo qinau. Qinee maaqi qimasee qimiriga maa maqannaasa sia Anutunara rufiqee mariafaqa qini daruseeqa qini qinaqa maree maqi qimaseeqa miqi qiqa.

<sup>12</sup> Qini qinaqa kuqaa qini dauna maridanoo qini qikoona araamuna maridanoo moo anaasee faiqi marifaqa maraqaunafa maridanoo.

<sup>13</sup> Anutufa qiniara aneenna akoona maqusa minnisee anaamurinni nu-  
annee qufaqa qinee Saraqa nammarina qimamiqa maaqi qiqiafana. Anee  
qiniara qini uriqarara fee qinana qiniara qini qifasaa fee qia.

<sup>14</sup> Miqi qufanoo iriseenoo Abimeereekafa Saraqa nammarina kafa  
Abaraqaammama aminau. Mikari mifa sipsipauqa faqa burimakauqa faqa  
ainainira maanaqa kumaarauqa faqa Abaraqaammama aminau.

<sup>15</sup> Amiseenoo maaqi qimasee qimaminau. Qini maqa maaqa maridanoo.  
Aneenna kai aidinnaqoo maria.

<sup>16</sup> Miqi qimaseenoo quanda finoo Saraqa nammarina maaqi qimaseenoo  
qimaminau. Doo ani afasaana siruaa munnimma wan tauseenna (1,000)  
amiqa, maa ummaarafa taikainaqa ani faqa mariasa ani aaqarana sia  
mariifoo qiaqera. Kafa aiqamausa aniara sia mandoosana auqee maqi  
qiaqa.

<sup>17-18</sup> Yaaweefa Saraqa nammarinaki kambiqoonara iriseenoo  
Abimeereekana, na aiku asaukukinaa aanaaseeuqa faiqi maqara aana  
ititasoofaqa faiqi maqarara sia amanaikiqau. Miqiga marufanoo  
Abaraqaammama Abimeereekanara Anutufinnai innaaru qufanoo Anutufa  
Abimeereekana faqa nari anaqa faqa nari ainainira maanaqauqa faqa  
misa aurirana taikannisoofaqa kafa faiqi maqarana amanaikiqau.

## 21

### *Isakeena maqoo ufafa.*

<sup>1</sup> Karaambaiqa nari qimaqoondee inoo Saraqa nammarina amiqi  
amiqimma maqanau.

<sup>2</sup> Miqimmasoofanoo Abaraqaammama nauraiqi marufanoo Saraqa nam-  
marifa amuaqu qaikino Abaraqaammama faiqi Anutufa qimaqooqoo  
maqanau.

<sup>3</sup> Maqasoofanoo Abaraqaammama mina auqu Isakeenee qinau.

<sup>4</sup> Auqu ramaseenoo qisauku dinni taikasee dinni ani qaaramoo  
maraseenoo 8 faasaana aiqarama fufanoo Abaraqaammama Anutufa qima-  
munde inoo Isakeena afaqa ati ateeqa qinau.

<sup>5</sup> Abaraqaammama uan handereeta 100 aukuaana faqaafa marufanoo  
Isakeena maqanau.

<sup>6</sup> Saraqa nammarifa Isakeena maqaseenoo maaqi qinau. Anutufa asasi-  
ana faqa naanaidara qirana faqa qiminoo. Aiqamausa minara irinausa qini  
faqa naanaidara qifaranoo.

<sup>7</sup> Miqi qimaseenoo Saraqa nammarifa maaqi qinau. Yafee moo fannoo  
Abaraqaammama qimaminoo Saraqa nammarifa nari faiqi maqasee amana  
naamma amiannoo fee qiannoo fee, sia amana moo fannoo miqi qiannoo.  
Miqi qimariafaqa qinee asooqa namuki Abaraqaammama faiqi akoonaiqi  
maqeega.

<sup>8</sup> Isakeefa aaqoo irinoo naamma minnisoo faasaana Abaraqaammama  
qoomaqa firaaqoo suqananau.

### *Abaraqaammama Qakaarana faqa Isamaerana faqa niqiqoo ufafa.*

<sup>9</sup> Miqimmasee mariufanoo moo kari Isipa maqanna anaasee Akaara  
nammarina amaaku fannoo Saraqa nammarina amaaku Isaakeena faqa  
sarari marinau.

<sup>10</sup> Sararimarufanoo Saraqa nammarifa mina qafamaseenoo Abaraqaam-  
mana qimaminoo qinau. Maa ainainira manaqana faqa nari faiqi faqa  
niiqainaqa fuaqa. Maa anaaseena faiqi fannoo sia ani qumiasana qini faiqi  
mararee qinnana maraannoo.

<sup>11</sup> Isamaeerafa faqa Abaraqaammama faiqi marunara Abaraqaammama mi ufana irufanoo aundura ummaara ranau.

<sup>12</sup> Miqufanoo Anutufa Abaraqaammama qimaminoo qinau. Sia faiqi aanaaqi qisanoosara amuqusiani. Anee Saraqa nammarifa qimamindee ia. Isakeena saaqari kai qinee qima afeekaikafannandee inoo moomoo asumu kambiqeefaranoo.

<sup>13</sup> Ani ainainira anaasee faiqi faqa qinee dadaaqiananoo moomoo faiqi maqasainaqa moo maqannaasara foora marifaranoo. Mifa faqa ani faiqi kai maridanoo.

<sup>14</sup> Abaraqaammama mi ufana iriseenoo moo kananaana findifinoo feemu aafaqa faqa aandau apata taquki nammari sakaseenoo Akaara nammarina uqaruma amiseenoo faiqi aakuamaqaseenoo aiqanau. Akaara nammarifa nari amaaku afiqeenoo Beeraseeba maqa maaqaki aadana maqa maaqaki ooqu maridanoo oonuree aniree ida marinau.

<sup>15</sup> Aandau apata taqukinaa nammari aiqama taikafufanoo Akaara nammarifa nari faiqi kaqikaa saqari atukaki aisanau.

<sup>16</sup> Aisaseenoo kaqikaqoo kisaqasaa oonu ooqufaqee idanoo nari kai qimirinai. Qinee sia amana qeeqa faiqi kuqirana qafaanauranoo. Miqi qimaseenoo miqoo ooqufaaqee maridanoo iki raqee marinai.

<sup>17</sup> Miqi marufanoo Anutufa mi faiqina iki raqarana irufanoo in-naarunaindari Anutuna angiroo moo fannoo Akaara nammarina qimaminoo qinau. Akaara nammari anee nanaree ummaara maraidanee. Sia rufiaa. Ani amaaku iki raqarana Anutufa doo irinoo.

<sup>18</sup> Doo findi finana oonu faiqi rafususee amiqi amiqia. Qinee mina saaqari kambiqainausa firaa maqannaasaika mannisaanaura.

<sup>19</sup> Miqi qimaseenoo Anutufa Akaara nammarina afu maqa amufanoo nammari madika qafanau. Qafamaseenoo aandau apata taqu mara ma-reenoo ooqu saka nari faiqi amufanoo nanau.

<sup>20</sup> Anutufa Isamaeerana rakisi amaqee marufanoo innooqanau. Innooqafufanoo mifa Paraana aadana maqa maaqaki maridanoo uaqarana akoofasa marinai.

<sup>21</sup> Paraana aadana maqa maaqaki marufanoo mina anoofa Isipa maqusaindaraa maanaaqa mara aminai.

*Abaraqaammama Abimeereekana faqa moodaanaki kira ufa qinau.*

<sup>22</sup> Mikari Abimeereekafa Pikoarana nari rakira fasiqauqa uriqararana afiqeenoo Abaraqaammama maruqoo oonu reeqa maaqi qimasee qimamiqa qiqau. Anee aiqama ainaina auqaannanaki Anutufa dadaaqidanoo.

<sup>23</sup> Doo maqee Anutuna afusaa qima afeekaikammasee qini faqa qini faiqi namu faqa qini saaqari naaru kambiqainausa faqa sia mandaikamma nimaqaa. Qinee ani amiqimma amaqaqiafana anee faqa miqi kai inana qima afeekaikammasee qini faqa maa maqa maaqana anee marianna maqa maaqana faqa amiqimma qimaqaa.

<sup>24</sup> Abaraqaammama minara iriseenoo qimaminai. Qinee miqimmianau-ree qimasee qima afeekaikinai.

<sup>25</sup> Miqi qimaseenoo Abaraqaammama Abimeereekana oori kandara ufakiqari qimaminai. Ani ainainira faiqiuqa qini nammari madika rakirara maseeqa mareea.

<sup>26</sup> Abimeereekafa iriseenoo qimaminai, Qoo qinee sia mina iridaqa, yafee miqinoo fee. Anee minara sia qima qimunaqa sia iriqaifana. Maqee kai iridaqa.

<sup>27</sup> Abaraqaammafa minara iriseenoo burimakauqa faqa sipsipauqa faqa mareeqee Abimeereekana aminau. Amisee miqanda moodaanaki kiqau.

<sup>28</sup> Abaraqaammafa sipsipa aanaaqiuqa dinni taikasee dinni ani qaara marasee 7 naadumasaa raina quqanau.

<sup>29</sup> Abimeereekafa mina qafamaseenoo Abaraqaamma iramirinau. Anee nanaree miqidanee.

<sup>30</sup> Miqi qimasee iroofanoo Abaraqaammafa qin角度. Anee maanaqa maraa. Anee marainnanannoo qiniara maa nammari dikaandana indu finafoo qinnaranoo.

<sup>31</sup> Misa miqoo qima afeekaika maseeqa mi maqusana auqureeqa Beeraseeba fee qiqau.

<sup>32</sup> Miqanda Beeraseeba maqa maaqaki moodaanaki kira ufa qima-soofanoo Abimeereekafa narí rakira fasiqauqa uriqararana Pikoorasandiri narí maqusai Firistia maqa maaqai fiqau.

<sup>33</sup> Miqanda fufanoo Abaraqaammafa tamarisika saqari Beeraseeba maqusai ummaquseenoo naaru naaru marira Karaambaiqa Anutunara innaaru qimarinau.

<sup>34</sup> Mi kamuqoo Abaraqaammafa kisaagasaa Firistia maqa maaqakina marinau.

## 22

*Anutufa Abaraqaammanara aneenna amaaku Isakeena tatufirana suqa qimianne qu ufafa.*

<sup>1</sup> Mariiufanoo Anutufa Abaraqaamma amanammasee qafaanee qimasee innaarunaindari aaramasee qin角度. Oo Abaraqaama qufanoo Abaraqaammafa qin角度 qinee maaqoo maridaqa. Miqi qufanoo Anutufa qimaminau.

<sup>2</sup> Aneenna amaaku Isakeena ani amaaku moodaa, kaaqa amuqusa imariannana afiqeenana Mooraa maqa maaqai ooru rainaqa qinee aaqana moo uqafiqaanau. Anee mi aaqannanasaa aneenna amaaku arusee qini tatufirana suqa qimia.

<sup>3</sup> Miqi qimasoo fanoo kananaana findifinoo narí dookisaa ida rufariseenoo minasaa quqaseenoo narí ainaini maru faiqi qanda faqa narí amaaku Isakeena faqa nifiqeenoo findimeeqee Anutufa qimamunnai finau.

<sup>4</sup> Qaara afuru aanai fi faiqau. Qaaramoo kufanoo Anutufa qimaqoo aaqannafa nianasaa marufanoo qafanau.

<sup>5</sup> Qafamaseenoo Abaraqaammafa narí ainaini maru faiqi qanda qiman-niminoo qin角度. Inneeqara maaqoo marida doonkisaa rakisiaqa. Qeeqa qimaakundiri miqoo ooru Anutunara innaaru qimasee inneeqara iannai qumuanaura.

<sup>6</sup> Miqi qimaseenoo Abaraqaammafa tatufirana suqaaninna idana mareeqeenoo Isakeenasaa soofanoo maroofanoo narí ida qeemaruna akuru mandeenoo mina qumareenoo musuka faqa qumareenoo doo narí faiqi afiqeenoo Anutufa qimaqoo aaqanna kaaqa ooru finau.

<sup>7</sup> Aanai ooru fimarufanoo Isakeefa narí akoona aaramaseenoo qin角度, Qipoo qufanoo Abaraqaammafa maqi qimasee qin角度. Nanaree qidanee qufanoo Isakeefa qin角度. Qinee qafaunana anee idati faqa ida rumbarana faqa maree fimarinanoo, yaafee tatufirana suqee fandinna sipsipafa maridanoo fee.

<sup>8</sup> Abaraqaammafa maaqi qimasee narí amaaku qimaminau. Anutufa narí kai sipsipa aanaaqi moodaa qiminaqa tatufirana suqamiana. Miqi qimaseeqa miqanda moodaanaki ooru fiqau.

<sup>9</sup> Miqanda Anutufa qimaqoo aaqannasaa ooru reeqa Abaraqaammafa oniuqa mareeqee aaku aakummaseenoo ida mina amuaaqa quqaseenoo narí faiqi Isakeena rumbeeqeenoo rafusu idasaa rusinau.

<sup>10</sup> Rusiseenoo musuka qumareenoo narí faiqi kuqa arusaaneera inau.

<sup>11</sup> Karaambaiqa angiroo innaarunaindari aaramaseenoo qinai, Abaraqaamma, Abaraqaamma, miqi qufanoo Abaraqaammafa qinai. Qinee maa maridaqee qufanoo Karaambaiqa qinai.

<sup>12</sup> Sia faiqi arua, sia mandaikamma amaqa. Sia aneenna asaukukoo aneenna faiqi arua. Doo maqee qinee iridaqa anee Anutuna ufa qaindusidana mina ufa afaqee mariananoo. Anee aneenna amaakuara aneenna amuqusa uqannara sia qaoo qiananoo eedoo kai qiananoo.

<sup>13</sup> Miqi qufanoo Abaraqaammafa uqerafinoo qafoofanoo andandaki sipsipa akoona saqari aanaaqiki aanai rutaqusee marufanoo qafanau. Qafamaseenoo Abaraqaammafa narí amaaku amaqa maqeenoo sipsipa akoona aruseenoo Anutuna tatufirana suqa aminau. <sup>14</sup> Miqooqari Abaraqaammafa mi aaqanna auqu reenoo, Karaambaiqa nimira aaqanee qinai. Minara maqee mindaraasa maaqi qidaqa, Yaaweefa narí aaqanasaa nimidanoo fee qidaqa.

<sup>15</sup> Karaambaiqa angiroo innaarunaindari kaifaa Abaraqaammama aaramaseenoo qinai.

<sup>16</sup> Karaambaiqa aniara maqi qidanoo. Qinee qeeqa duqusaa qima afeekaikammasee qidaqa. Qinee firaaqoo ani amiqimma amaqaanau. Anee aneenna amaaku moodaa sia qaoo qiannanara qinee miqiana.

<sup>17</sup> Qinee kuqaa qima afeekaikammasee anisaa ani aruakinausa ani aiku asauku innaarunai fasaura foora moomoo marifaranoo nukudara foora ani amianauranoo. Ani aiku asauku namuqaa rafaqa fusee misa ainaina maree marifaranoo.

<sup>18</sup> Aiqaama maqannaasa qiniara ani aiku asauku amiqi amiqimma ni-maaqaafanandee masee maasa faqa amiqi amiqimma qimaqaannee qifaranoo. Anee qini aakapara ufa qaindusuannanara miqiqa.

<sup>19</sup> Abaraqaammafa miqooqari narí faiqi Isakeesandiri narí ainainira faiqi qara qumi nifiqee narí maru maqusanai Beeraseeba maqusai ooqu marinai.

### *Naqoorana aiku asauku nuqu.*

<sup>20</sup> Mariiufanoo Abaraqaammafa irufanoo Mirikaa nammarifa Naqoorana Abaraqaammama akaqa faiqi qisauku dinni taikasee dinni oonu qaarammoo marasee 8 maqee foo qiqau.

<sup>21</sup> Usafa indaruqaafa Busafa mina aanaaqiannaafa marinai, mina aanaaqiannaafa Keemueerafa mifa Arammama akoofa marinai.

<sup>22-23</sup> Mina aanaaqiannaafa Keeseedafa marinai, mina aanaaqiannaafa Qasoorafa marinai, mina aanaaqiannaafa Piradasafa marinai, mina aanaaqiannaafa Didarafa marinai, misa ninaaqiannaafa Beetueerafa marinai. Mifa Reebeeka nammarina akoofa marinai. Mirikaa nammarifa mi faiqi namusa Naqoorana Abaraqaammama akaqasaa maqanau.

<sup>24</sup> Reumma nammarifa Naqoorana inaaqiannaanaasee fannoo Teebana faqa Kaqammama faqa Taqasana faqa Maakaana faqa maqanau.

## 23

*Saraqa nammarifa kuqufanoo Abaraqaammafa akundara maqa feefauru ufafa.*

<sup>1</sup> Saraqa nammarifa 127 aukuna marasee kuqinau.

<sup>2</sup> Kannaana maqa maaqaki Qeeboorona maqusaki kuqufufanoo Abaraqaammafa mina kuqiranara soofaari marinau.

<sup>3</sup> Abaraqaammafa nari anaaga kuqirana mafi quqasee Qeetana aiku asauku maruqoo oonureenoo maaqi qimasee iramirinoo qinau.

<sup>4</sup> Qinee moo maqannaasa inni qambaana ani maridaqa. Amanee qini maqa moo qimifaqa feefauru nimiseeqa qeeqa qinaaqa minaki akundaanauree.

<sup>5</sup> Qeetana aiku asuku irisee Abaraqaammama qimamiqa qiqau.

<sup>6</sup> Anee maasa ufa iria, maasa ani qafaunana anee afeeka rakisirafa marianafa mariananoo. Aneenna anaaga maasa amiqira madikaki akundaa. Maasa aiqamausa mi madikanaki akundaranara اساسيداqa.

<sup>7</sup> Miqi qufanoo Abaraqaammafa misa noorinni kumma ramafinoo qiman-niminoo qinau.

<sup>8-9</sup> Innee eedoo qiafaqa amanee innee Eefarona, Sooqarana amaaku iramirifanoo inni nifusaa Makapeera maqa maaqaki nari anaadoo atinni ooni aamara marina qiminaqa feefauru amana kai amiseeqee mi maqa maaqana qeeqaindi kammasee qeeqa qiku qisauku nikundee marianauree.

<sup>10</sup> Eefarooka nari Qeetana aiku asauku faqa faandaamura kooqiki ufa suqiranaki maridanoo iriseenoo aiqamausa iramirufanoo Abaraqaammama qimaminoo qinau.

<sup>11</sup> Oo uriqararafa iria, qinee aiqama mi maqana faqa ooni aamara minaki marina faqa ani amianaura. Maaqoo qeeqa faiqi anaasee nifusaa ani amianana aneenna anaaga minaki akundaa.

<sup>12</sup> Miqi qufanoo Abaraqaammafa Qeetana aiku asauku noorinni kumma ramafinoo Eefarona aiqamausa iriaqeeru firaqoo qimaminoo qinau.

<sup>13</sup> Amanee qinee iramiriananee irinnaree. Qinee mi maqana atisaa aiqama feefaurianaura. Qinee feefauru amianana anee eedoo qimasee marainaqa qinee qeeqa qinaaqa miqoo akundaanaura.

<sup>14</sup> Eefaroonafa minara iriseenoo maaqi qimasee Abaraqaammama qimaminau.

<sup>15</sup> Oo uriqararafa, maqa feefauru 400 siruaa maridanoo, mi feefauruna maasa qeeqa qambaana naqa fee masee rainaanauree. Anee aneenna anaaga kaqi minaki akundaa.

<sup>16</sup> Abaraqaammafa iriseenoo eedoo qimaseenoo sikeera maraseenoo 400 qummaara ainaina dinni quqaseenoo siruaa dinni quqasoofanoo amana kai ufanoo aminau. Eefaroonafa aiqamausa nari maqannaasa Qeetana aiku asauku nifusaa qufanoo iriseenoo miqi kai minau. Nari sikeera qummaara amana kai Eefarona aminau.

<sup>17</sup> Miqimmasee Abaraqaammafa Eefarona aiqama ainaina Makapeeraa maqa maaqaki suani oosana qaannai Mammareena maqusa adeedi maruna feefaurummasoofanoo Abaraqaammanaindi kinau. Mi feefaurirafa maqa faqa ooni aamara minaki maruna faqa aiqama saqariuqa mi maqana atisaa maru saqarisa faqa aiqama moodaanaki rafaafinau.

<sup>18</sup> Aiqama Qeetana aiku asauku miqoo suqiranaki mariusa mi maqa maaqanara Abaraqaammanaindi fee qiqau.

<sup>19</sup> Miqimmaseenoo Abaraqaammafa nari anaaga Saraqa nammarina mi ooni aamaranaki Kannaana maqa maaqaki akundanau.



<sup>20</sup> Miqimmasoofanoo mi maqafa faqa ooni aamara minaki marufa Qee-tana aiku asaukundi mariufa Abaraqaammanaindi kufanoo mi maqana nikundara maqaikinau.

## 24

### *Isakeena anaaqa mara amu ufafa.*

<sup>1</sup> Doo Abaraqaammafa kaaqa nauraiqi marinau. Karaambaiqa Abaraqaammafa aiqama auqoo ainainna amiqi amiqimma amaqee marinau.

<sup>2</sup> Abaraqaammafa nári oosana maraseenoo nári ainainiranasaa kisaaqasaa rakisi maruna aaramaseenoo qimaminoo qinai. Anee aneenna asauku qifundana ameemaanai aususee afeekaika masee qima afeekaikia.

<sup>3</sup> Qinee aniara Karaambaiqa innaaruna faqa maqa faqa auqu Anutuna auqusaa qima afeekaikamasee sia qini qimaaku Kannaana maqanna anaasee mara amiannee qidaqa.

<sup>4</sup> Anee qinee kambaiqaafanna maqusanai oonuree qini atikinaa maanaaqa mara maree Isakeena muqu amia.

<sup>5</sup> Miqi qimasoofanoo mi rakisirafa maaqi qinai. Doo amana, ooru raanaqa mindaraa maanaaqa irai fanoo narí maqa maaqa minnisee mai qumirara ititinaqa amanee qinee ani amaaku aiqaananoo anee qumunna maqa maaqanai ooru fuannoo fee.

<sup>6</sup> Miqi qufanoo Abaraqaammafa qinai. Oo sia uqanna anee qini qimaaku aiqainanoo minni oorufuani.

<sup>7</sup> Yaaweefa innaarunaindaraa Anutufa qeeqa qikoona maqusaindaraana faqa qeeqa ainaina maqasaaqaraana faqa mara mareenoo maa maqa maaqanasaa quqaqoosa maridaqa. Mifa qima afeekaikammasee qini faqa qini qiku qisauku faqa maa maqa maaqana nimianauree qinai. Mifa narí angiroo aiqainanoo ani afunni finana ooru qini qimaaku anaaqa afigee qumi naranoo.

<sup>8</sup> Mindaraa maanaaqa fannoo sia mai qumiraree qinana miqoo kai qima afeekaika maqaanna ufanakiqari idukuananoo. Qini qimaaku sia minni afigee ooru fua.

<sup>9</sup> Miqi qimasoofanoo mi ainainira fasiqafa narí asauku Abaraqaammana narí uriqararana afundana ameemaanai quqaseenoo qinai, doo qinee anee qianandee ianaura.

<sup>10</sup> Miqi qimaseenoo raudama kinoo Abaraqaammana kammeera, qoosa fooqaana, mina qisauku qara maraseenoo narí uriqararana ainaina amiqirana kai maraseenoo kammeerasaa quqaseenoo mareenoo finai. Abaraqaammana akaqa Naqoorafa Mesopotamia maqusai suani dinni ataaqeenni marunnai ooru finai.

<sup>11</sup> Aanai faiqanoo fifiu fanoo eenee marufanoo aanaaseeuqa nammari sakee maruqoo oonu ranau. Oonuree qafoofanoo maqusa adeedi nammari sakee maruqoo oonu reenoo miqoo narí kammeerauqa quqasoofaqa mariqau.

<sup>12</sup> Narí kammeerauqa quqaseenoo mi fasiqafa Yaaweenara innaaru qinoo qinai. Oo Anutu qini uriqararana Abaraqaammana Anutufa anee qini faqa maridana maqee qini dadaaqa. Anee qini uriqararana Abaraqaammana faqa qima afeekaika maqoonafa maqee anoonaikiani.

<sup>13</sup> Qinee nammari sakee mariana aaqa adeedi marunaqa, aanaaseeuqa nammari ani sakee mariafaqa maridaqa.

<sup>14</sup> Moo maanaaqa anirainaa qinee maaqi qimasee qimamiana. Amanee aneenna taquki nammari saka qiminaa naanauree. Mifa qiniara namasainaa ani kammeeraa faqa nimianauree qinnanara minara aneenna ainainira faiqi Isakeena utaaqama amaqaqaanafee qiana. Mi ainainafa kambiqainaa anee qini uriqararanasaa qima afeekaikunna ufanara iriana.

<sup>15</sup> Mifa miqi qimasee innaaru qimarufanoo moo maanaaqa Reebeeka nammarifa nammari taqu akumaaqa aku maree aniranau. Mifa Abaraqaammanna akaqa Naqoorana faqa mina anaqa Mirikaa nammarina faqa faiqi Betueerana araamuna marinau.

<sup>16</sup> Mina oori afiri amiqi amiqi irafa sia auqu marufa aniroofanoo qafoofoanoo ooqu nammari saka maree urinau.

<sup>17</sup> Ururoofanoo Abaraqaammanna ainainasaa rakisira fasiqa fannoo mi funnai sandee oonureenoo maaqi qimasee qimaminau. Amanee aneenna taqukinaa nammari kaqikaana qini qiminaa naanauree.

<sup>18</sup> Miqi qufanoo mi manaqafa qinau, eoo faiqi firaafa, doo naa qimaseenoo nammari taqu afiqu quqasoofanoo doo nanau.

<sup>19</sup> Namasoofanoo mi manaqafa nari kai qinau. Qinee nammari moo faqa sakasee ani kammeeraa nimii saanaa nama saifanoo nimuaqu iannoo.

<sup>20</sup> Miqi qimaseenoo nari nammari taqu kai kaqi difaaniki adiaseenoo sandeenoo ooqu moo faqa saka mareenoo muru adia soofaqa kammeeraa naqa.

<sup>21</sup> Kammeeraa nammari nimi marufanoo Abaraqaammanna ainainira fasiqa fannoo ireeda kai kasooinoo maridanoo qafaidanoo maaqi qimirinau. Doo fee Yaaweefa qinee kisaqaasaa anunnanara anoonai kidanoo fee.

<sup>22</sup> Kammeeraa nammari neeneese nimuaqummasee marufanoo Abaraqaammanna ainainira fasiqa fannoo koorannai auqira qimmusa mi manaqana aikiki qusamaqaseenoo kafa koorannai auqira isaaqama qaaraqanda asaukuki usamaqaseenoo iramirinoo qinau.

<sup>23</sup> Anee yana araamunee maridane amanee qini qimaqimia. Amanee maasa namu aneenna akoona maaqa kina nifiqee finaqqee faqaanauree.

<sup>24</sup> Reebeeka nammarifa mina iriseenoo nari qimaminoo qinau. Qini qikoofa Beetueerafa Naqoorana faqa Mirikaa nammarina faqa faiqi maridanoo.

<sup>25</sup> Maasa maaqa narana amana maridanoo ani faqa aniasa faqa ani kammeeraa faqa narana maaqa faqa nimifaranoo.

<sup>26</sup> Miqi qimasoofoanoo Abaraqaammanna ainainira fasiqa iriseenoo maqasaa oorindari mapamu finoo Karaambaiqa nari uriqararana Abaraqaammanna Anutuna amooqidanoo maaqi qinau.

<sup>27</sup> Oo Anutu Abaraqaammanna Anutufa, anee amiqi amiqi uqanna mi-anano. Anee Abaraqaammanna amiqi amiqi imariannanara sia taikkeenoo kaqi fidanoo. Karaambaiqa fannoo qini uriqararana atiuqa iannai andeeqasee qifiqee aninoo.

<sup>28</sup> Miqi qimasee innaaru qimasoofoanoo Reebeeka nammarifa sandeenoo nari anoona maaqi oonureenoo aiqama mi ufausa qimaminau.

<sup>29-30</sup> Reebeeka nammarina afasaafa Rabanafa Reebeeka nammarina ufa iriseenoo koorannai auqira qimmusa qusamaqoona faqa koorannai auqira isaaqama qusamaqoona faqa qafamaseenoo raudamaku fannoo ooqureenoo nammari sakee maru madikana afainni qafoofoanoo Abaraqaammanna ainainira fasiqa miqoo nammari afainni nari kammeeraa naqa kikiqinoo marinau.

<sup>31</sup> Marufanoo qafamaseenoo qimaminoo qinau. Qini faqa aninaqa maaqai fua. Karaambaiqa fannoo ani amiqi amiqimma amaqqee marifa mariananoo. Nanaree anee maaqoo maridanee. Qinee ani faiqara maaqa doo deedaqammasee ani kammeerauqa marirana faqa deedaqiqa.

<sup>32</sup> Abaraqaammanna ainainira fasiqa fannoo mina iriseenoo narí faqa marusa faqa narí kammeerauqa faqa nifiqeenoo doo maaqai finau. Maaqai onu roofanoo Rabanafa kammeera saaqqaraa qumaara mara maqasaa qugaseenoo narana nammari nimiseenoo Abaraqaammanna faiqi namu nammari nimufaqa niku nammari uqiqa.

<sup>33</sup> Niku nammari uqu soofanoo Rabanafa narana nimiranoo. Nimufanoo Abaraqaammanna ainainira fasiqa fannoo qaoo qimasee qinau. Sia qinee kaqi naanura. Qinee qiraree qunna ufana qima nimiseeqa miqoo naanura. Rabanafa minara iriseenoo qinau. Doo qinaqa maasa iria.

<sup>34</sup> Miqi qimasoo fanoo Abaraqaammanna ainainira fasiqa qima nimiranoo qinau. Qinee Abaraqaammanna ainainira fasiqa maridaqa.

<sup>35</sup> Karaambaiqa firaaqoo qini uriqararana amiqi amiqimma amaqqaseenoo ainaina faqaafaikamma amaqqeenoo. Karaambaiqa sipsipauqa faqa burimakauqa faqa siruaa faqa koora faqa ainainira fasiqauqa faqa maanaaqauqa faqa kammeerauqa faqa doonkiuqa faqa moomoo aminoo.

<sup>36</sup> Qini uriqararana anaqa Saraqa nammarifa asooqasaa faiqi akoonaiqi maqasoofanoo qini uriqararafa narí aiqama ainaina mina kai aminoo.

<sup>37</sup> Qini uriqararafa qifaqa qinee afeeka ufannai qima afeekaikammaseeqa mina aamuqira ufa qaindusunauree qiafananoo qinau. Anee maqoo qaraasa Kannaana maqanna kinaa anaasee sia uqanna mareeqee qini qimaaku amia.

<sup>38</sup> Anee ooru qini qikoona maqannaasaki qini atikinaa maanaqa mara maree muqusee qini faiqi amia.

<sup>39</sup> Qinee mi ufana iriseeqa narí maaqi qimaseeqa qimamiqa. Mi manaaqafa sia qini faqa quminaqa naqaa fee ianauree.

<sup>40</sup> Qunanoo mifa qinoo, qinee Karaambaiqa ufa aiqama kari afaqqee marunusa maridaqa, mifa narí angiroo aiqainanoo ani faqa fidanoo dadaaqinanoo anoona kambiqaanoo. Anee qini faiqi anaqa qini maqannaasakinaana qini qikoona atikinaana mareennaranoo.

<sup>41</sup> Moodaa aana kai anee idukinna aanafa maridanoo. Ooru rainaqa misa maanaqa moo sia qimifanoo ani qima afeekaikirafa taikainana idukira fasiqaikinnaranoo.

<sup>42</sup> Qinee Abaraqaammanna mi ufana iriseeqa nammari dikaanda mariqoo ururee maaqi qimasee innaaru qiqa. Oo Karaambaiqa qini uriqararana Abaraqaammanna Anutufa mariananoo, qinee auqaunna ainainna anoona kambiqaani.

<sup>43</sup> Qinee nammari dikaanda mariqoo mariana. Mariananoo maanaqa moo fannoo nammari sakarara anirainaa qinee nammari innaaru qiana.

<sup>44</sup> Mifa eedoo qimaseenoo qini faqa qini kammeerauqa faqa nammari nimiranoo mifa anee qini uriqararana amaaku utaaqama amaqaqaanafa mariannoo.

<sup>45</sup> Qinee qireeda kai innaaru qimarunanoo Reebeeka nammarifa maqusaindari nammari taqu akumaaqa akumareenoo aiqareenoo nammari sakararee qimasee fifaqa qinee maaqi qimasee qimamiqa. Amanee anee nammari qimina naanauree.

<sup>46</sup> Miqi qunanoo mifa kai kaqi narí nammari taqu akumaaqa qaraana afaimma quqaseenoo qinoo. Namasainaqa ani kammeerauqa faqa nimi-anaura. Miqi qifaqa qinee namasaunanoo mifa kammeerauqa faqa nimi-faqa neea.

<sup>47</sup> Namaseeqa qinee maaqi qimasee iramiriqa ani akoofa yafee, qunanoo mifa qimaqiminoo qinoo. Qini qikoofa Beetueerafa Naqoorasa Mirikaa nammarisa faiqi maridanoo. Qinee mi ufana iriseeqa koorannai auqira qimmusa usuamaqaseeqa kafa koora isaaqama asaukuki usuamaqeeqa.

<sup>48</sup> Usuamaqaseeqa doorindari maqasaa kummarama fifaqa qeeqa uriqarana Abaraqaammama karaambaiqa Anutuna amooqiqa. Mifa qini qifiqamareenoo andeeqasee qini uriqararana atiuqa iannai murusaifaqa qinee misa niraamuna qeeqa uriqararana amaaku anaqa marianinnana paquriqa.

<sup>49</sup> Doo maqee uqanna Rabanna anee qima qiminaqa iria. Anee qini uriqararana andeeqa amaqaararee qinana qima qimia. Anee sia andeeqa amaqaararee qinana minara faqa qima qiminaqa qinee qeeqa ianna ainainara oonu mafi irianaura.

<sup>50</sup> Rabanafa faqa mina akoofa Beetueerafa faqa narí qimamiqa qiqau. Maa ufafa Karaambaiqinaindari ani marifaqa maasa naqiffee masee minara ufa qinauree.

<sup>51</sup> Maa Reebeeka nammarifa marinoo. Afiqamaree fua. Munusainanoo mifa ani uriqararana amaaku aanaqaikinoo, Karaambaiqa narí qindee iani.

<sup>52</sup> Abaraqaammama ainainira fasiqa mi ufana iriseenoo oorindari maqasaa aqufinoo Karaambaiqa amooqimamaqanau.

<sup>53</sup> Amooqimaseenoo findifinoo qamunna faqa siruaa faqa koora faqa firaa feefauru aqimaru oonisa Reebeeka nammarina aminau. Mifa firaa munnimma aqimaru ainainausa mina afasaana faqa mina anoona faqa niminau.

<sup>54</sup> Nimi seenoo narí faqa anusa saimbaqa narana faqa nammari faqa neenee seeqa faiqaqau. Faiqee iaqoofanoo kananaana Abaraqaammama ainainira fasiqa Reebeeka nammarina afasaana faqa anoona faqa qima niminau. Amanee qinee maqee qeeqa firaa finnai fuanauree.

<sup>55</sup> Miqi qufaqa miqanda qiqau, saina Reebeeka nammarifa maasa faqa moodaa amaanaki fee, qisauku qara taikaseenoo afuru fee faiqeenoo fuani.

<sup>56</sup> Miqi qufanoo Abaraqaammama ainainira fasiqa fannoo qinai. Doo sia maasa rafaqa fua. Doo qinee maqee fidaqa. Karaambaiqa fannoo qinee kisaqasaa anunna saikana anoona doo kambiqasaifaqa qafamaseeqa sainaqa qeeqa uriqarara finnai fua.

<sup>57</sup> Miqanda minara iriseeqa qimamiqa qiqau. Saina Reebeeka nammarina aaramasee qifanoo naqaa fee qiannoofee.

<sup>58</sup> Miqi qimaseeqa Reebeeka nammarina aaramaseeqa iramiriqa qiqau. Anee maa fasiqana faqa maqee fee finnairee. Miqi qufanoo doo maqee fuanauree qinai.

<sup>59</sup> Misa mi ufana iriseeqa Reebeeka nammarifa faqa minasaa rakisi maru anaaseefa faqa Abaraqaammama ainainira fasiqa faqa mina faqa anusa faqa doo niqiqoofaqa fiqau.

<sup>60</sup> Reebeeka nammarifa firarufaqa maa ufanannoo mina afaaqooqa qiqau. Oo maasa qisooki anikiqari aruakinausa moomoo uqanna firaaqoo uqanna kambiqeefara ani aiku asauku marinausa namuqaa narí nifaqaqa mandaida misa maqa maaqa namu faqa misa ainaina faqa maree marifaranoo.

<sup>61</sup> Miqi qimasee afaaqooqa qimasoofanoo Reebeeka nammarifa faqa ainainira maanaaqauqa faqa kammeerasaa akaree fufaqa Abaraqaammana ainainira fasiqa namu faqa fiqau.

<sup>62</sup> Isakeefa Neekeefa maqa maaqakiqari aadana maqa maaqai nammari dikaanda maruqoo ooqu marinau. Mi nammari dikaandana auqu kaqi marirafa qini qiqaaidanoo fee qimariqau. Mifa Kannaana maqa maaqa qaannai suani afu dinni ataaqeeni marinau.

<sup>63</sup> Miqoo maridanoo Isakeefa moo eenonnai aatata nidanoo uqeera fufanoo mirinni qafoofanoo kammeerauqa qumiqau.

<sup>64</sup> Reebeeka nammarifa kammeera saaqari uqeera finoo Isakeena qafanau. Reebeeka nammarifa qafamaseenoo nari kammeera saaqari maqasaa aqufinau.

<sup>65</sup> Aqufufanoo Abaraqaammana ainainira faiqi iramirinau. Ya fasiqa fee maasa unannai anidanoo fee. Miqi qufanoo Abaraqaammana ainainira fasiqa qinuu. Qini uriqararafa anidanoommi qufanoo Reebeeka nammarifa nari oosana mareenoo qamunna mafi oorisa ititanau.

<sup>66</sup> Isakeefa uru paqurimmasoofanoo Abaraqaammana ainainira fasiqa fannoo aiqama ainaina auqoonara Isakeena qimaminau.

<sup>67</sup> Qimamisoofanoo Isakeefa Reebeeka nammarina mareeqeenoo nari maaqaki Saraqa nammarifa mariunaki quqasoofanoo mina aanaaqai kinoo marufanoo Isakeefa Rebeeka nammarinara aidi marufanoo mi aidirafa Isakeefa nari anoofa kuqunara amuqusiufa doo asooanau.

## 25

### *Abaraqaammafa moo aanaasesaa faiqi maqoo ufafa.*

*(1 Stori 1:32-33)*

<sup>1</sup> Abaraqaammafa anaasee moo maranau. Mina auqu Keeturaa nammarifa marinau.

<sup>2</sup> Minasaa faiqi moomoo maqanau. Faiqi moo indaarugaana auqu Simaramafa marinau mina aanaaqianaafa Yookasanafa marinau mina aanaaqianaafa Meedanafa marinau mina aanaaqianaafa Midaanafa marinau. Mina aanaaqianaafa Isabakafa marinau ninaaqianaafa uqanna Suaafa marinau.

<sup>3</sup> Indaarugaana aanaaqianaafa Yookasanafa mifa Seebabana faqa Deedana faqa nikoofa marinau. Deedana aiku asuku Asuraa maqannaasa faqa Reetusimma maqannaasa faqa Reummimma maqannaasa faqa mariqau.

<sup>4</sup> Midaanama amaaku indaarugaana faiqi Eefaafa marinau, mina aanaaqianaafa Efeerafa marinau, misa ninaaqianaafa Qannookafa marinau misa ninaaqianaafa Abidafa marinau, misa ninaaqianaafa uqanna Eeradaafa marinau. Minamusa Abaraqaammana anaqa Keeturaa nammarina saaqari kambiqaransa mariqau.

<sup>5</sup> Abaraqaammafa nari aiqama ainaina Isakeena kai aminau.

<sup>6</sup> Amiseenoo nari kaqi maridanoo moo anaasee faiqi namu faqa amiqira ainaina oosana oosana Abaraqaammafa kaqi nimiseenoo Isakeefa maruqooqari suani oosana qaannai maqa maaqai nianai niigoofaqa mitinai oonu mariqau.

### *Abaraqaammafa kuqufufaqa akundoo ufafa.*

<sup>7-8</sup> Abaraqaammafa asooqaqeenoo kuqinuu. 175 aukuaana marasee kuqinuu.

<sup>9</sup> Kuqufufaqa mina amaaku qara Isakeesa Isamaeerasa miqanda nári nikoona iri mara maree Makapeeraa maqa maaqaki Mamaree maqusa suani oosana qaannai ooni amaraki akundaqau. Mi maqana Eefarona Sooqarana amaaku Heetana aiku asaukundi feefaurummaqoonaki Abaraqaammama akundaqau.

<sup>10</sup> Abaraqaammama kaqi maridanoo Qeetana aiku asauku feefauru maqoonakina Saraqa nammarina faqa Abaraqaammama faqa nikundaqau.

<sup>11</sup> Abaraqaammama kuqufufanoo mina amaaku Isakeena Anutufa amiqi amiqi imarinau. Isakeefa kaqi marira nammari dikaanda qini qiqaaidanoo fee qimaru nammari dikaandana aaqa marinau.

*Isamaeerana aiku asauku nuqu.*

*(1 Stori 1:28-31)*

<sup>12</sup> Qakaara nammarifa Saraqa nammarina ainainira maanaaqa Isipa maqanna maanaaqa marufa mifa Abaraqaammama amaaku Isamaeerana maqoofa marinau.

<sup>13-15</sup> Isamaeerana faiqi namu maaqimmiqa mariqau. Indaruqaafa Neebaiotafa marinau, mina aanaaqianaafa Keedarafa marinau, misa ninaaqianaafa Adabeerafa marinau, misa ninaaqianaafa Mibasamafa marinau, misa ninaaqianaafa Misammama marinau, misa ninaaqianaafa Dummaafa marinau, misa ninaaqianaafa Masafa marinau, misa ninaaqianaafa Qadadafa marinau, misa ninaaqianaafa Teemafa marinau, misa ninaaqianaafa Yeeturafa marinau, misa ninaaqianaafa Nafisafa marinau, misa ninaaqianaafa uqanna Keedeemaafa marinau.

<sup>16</sup> Misa qisaukuqara taikasee qikunnooqu qaara marasee maqannaasa nikausaikiqa mariqau. Miqiqa maridaqa nariqa nuqu nariqa maqusa faqa nariqa uiqaana maqusa faqa qafaafauree mariqau.

<sup>17</sup> Isamaeerafa 137 aukuna maraseeno kuqinau.

<sup>18</sup> Isamaeerana aiku asauku Isipa maqusaindari suani oosana qaannai Sura maqa maaqa faqa, Qafiraa maqa maaqa faqa qambaana Asiria maqa maaqai fimaruqoo mariqau. Misa Abaraqaamama aiku asauku akaqausa maruqooqari naaduma mariqau.

*Eesausa Yookooboosa maqoo ufafa.*

<sup>19</sup> Moo ufa Abaraqaammama amaaku Isakeena ufa maridanoo.

<sup>20</sup> Isakeefa qaara fasiqa niku nisauku taikasee 40 aukuna maraseeno Beetueerana araamuna Reebeeka nammarina maranau. Rabannana asookina maranau. Beetueerafa Arameeannaindaraafa Meesoopotamia maqa maaqaki ani marinau.

<sup>21</sup> Reebeeka nammarifa sia faiqi maqanau aafanaasee marinau. Isakeefa minara iriseeno Yaaweenara innaaru qimarinau. Yaaweefa mina ufa iriseeno dadaaqufanoo Reebeeka nammarifa amuaqu qaikinai.

<sup>22</sup> Amuaqu qaikufanoo faiqi qaara qanda mina aranandaki maridaqa raki mariqau. Raki marufanoo Reebeeka nammarifa qinau, maa ainainafa nanaree qiniki kambiqaidanoo fee qimaseeno karaambaiqunnai oonuree anoonufa qimamianifeera innaaru qinau.

<sup>23</sup> Innaaru qufanoo Yaaweefa qimaminoo qinau.

Qaara maqannaasa ani aranandaki maridaqa.

Anee nariara nariara rairai qimariasa nikooqanda maqeennaranoo.

Moo fannoo moo uriqarara afeeka faqaafa marianno.

Akaqa fannoo afasaana rafaqa fuaninafa marianno.

<sup>24</sup> Reebeeka nammarina faiqi maqarafa aniroofanoo qaara qanda maqanau.

<sup>25</sup> Indaaruqaana afaaqa kaaqa taatuqee arinoo marinau, mina afaaqasasa asausi aanaaqi marinau. Mina auqu Eesau nee qiqau. (Mina auqu oosana asausi fee qiqau).

<sup>26</sup> Inaaqianaafa indaaruqaana aiku ataa rakisisimma uqirafa quminau. Minara mina auqu Yakooboo nee qiqau. (Mina auqu oosana aiku ataa fee qiqau.) Isakeefa qaaramoo fasiqa niku nisauku taikaseenoo 60 aukwana maraseenoo miqanda maqanau.

*Eesaufa nari indaaruqaa faiqi ainaina mina akaqa aminau.*

<sup>27</sup> Miqanda innoqafufaqa Eesaufa uaqarana akoofasa maridanoo sia ooqu marufa kaqi niranara aidimarufa marinau. Miqi marufanoo Yakoo-boofa sia miqi marinau. Fifirafa maridanoo maqusasaa marufa marinau.

<sup>28</sup> Isakeefa Eesaunara aidi marinau. Mifa aandau arusoofanoo nee marunara minara aidi marinau. Reebeeka nammarifa Yakooboona rimarinau.

<sup>29</sup> Moo kari Yakooboofa narana suqasee auqee marufanoo mina afasaafa nandaki niniuufa aararofanoo anireenoo qinai.

<sup>30</sup> Anee taatuqee narana auqee mariannana doo mina mara qiminaqa naa daarandee marifaqee qinai. Miqi qimasooafaqaa misa minara iriseeqa Eesaunara Eedoomee qimariqau. Mi auquna oosana taatuqee fee qimariqau.

<sup>31</sup> Yakooboofa iriseenoo qinai, aninidiri qikoofa anee indaaruqaa faiqi mariananoo ani afaaqooqa qima amaqee marina qiminaqa narana ani amianauroo.

<sup>32</sup> Eesaufa qinai. Saa qinee daararai faqa kuqua qaammidaqa qini mi ainainausa sia qini dadaaqifaranoo.

<sup>33</sup> Yakooboofa iriseenoo qinai, aneenna ufa qima afeekaika mandee qiminaqa qinee narana ani amianauroo. Qimasoofanoo Eesaufa Yakooboona qima afeekaika mandee indaaruqaa qutaqaqama amaqqoo ainainna amiraree qinai.

<sup>34</sup> Miqi qima afeekaika masoofanoo Yakooboofa quanda fufanoo feemu faqa nara ainaina faqa nammari faqa Eesauna amufanoo namasee doo finai. Miqi maseenoo Eesaufa nari indaaruqaa faiqi marunara akooqoofanoo nari akaqa amisee quqasee finai.

## 26

*Isakeefa Keeraa maqa maaqai faqa Beeraseeba maqa maaqai faqa mariu ufafa.*

<sup>1</sup> Abaraqaammafa maru aukwana aandaroo firaafa narufanoo Abaraqaammafa Isipa maqa maaqai ooqu finai. Kafa minna amaaku Isakeefa maru aukwana aandaroo narufanoo Isakeefa Keeraa maqusai Abimeereekana maqusai finai. Abimeereekafa Firistia maqannaasa uriqararafa Keeraa maqusai marunnai finai.

<sup>2</sup> Isakeefa Keeraa maqusai oonu marufanoo Karaambaiqa maaqi qimasee qimaminoo qinai. Anee sia Isipa maqa maaqai ooqu fua. Maaqqoo qinee aniara marianne qunnaqqoo kai maria.

<sup>3</sup> Maaqqoo kai marinaqa qinee ani faqa marida amiqi amiqida dadaaqianauroo. Maa maqa maaqana faqa anisaa ani aruakinausa faqa nimianauroo. Qinee minara Abaraqaammana ufa qima afeekaika masee amianauroo qiafannana doo ani faqa qima afeekaika amianauroo.

<sup>4</sup> Qinee anisaa ani aruaki kambiqainausa fasaura foora moomoo ami-  
anaura. Qinee maa maqa maaqana misa nimianauro. Aiqama maqan-  
naasa aniree maaqi qimasee innaaru qifaranoo. Oo Anutu anee Isakeena  
aiku asaku amiqi amiqimma nimaqoonandee inana maasa faqa amiqi  
amiqimma qimaqaa.

<sup>5</sup> Abaraqammafa ani akoofa qini sandufa faqa aamuqira ufa faqa  
afaqee marunara qinee ani amiqi amiqimma amaqaanaura.

<sup>6</sup> Isakeefa Anutuna mi ufana iriseenoo eedoo qimaseenoo Keeraa maq-  
sai maridanoo Isipa maqa maaqai sia ooqu finau.

<sup>7</sup> Keeraa maqannaa fasiqauqa mina aanaaqara iramirufanoo Isakeefa  
qini qisooki fee qinau. Isakeefa nari anaqa Reebeeka nammarifa oori  
amiqirafa marufanoo qini darusee qini qinaqa marefoo qimaseenoo  
rufia mareenoo qini qisooki fee qinau.

<sup>8</sup> Isakeefa kaqi kaaqoo marinoo moo kari nari anaqa Reebeeka namma-  
rina faqa madaanai ooqu faqee narisaa narisaa mundaqa marufanoo mi  
maqannaasa uriqararafa nari maaqaki ooqufaaqee maridanoo qafanau.

<sup>9</sup> Qafamaseenoo Abimeereekafa Isakeena aaramaseenoo qinau. Maa  
anaaseefa ani anaqa uqanna maridanoo. Anee nanaree qini qisooki fee  
qinane. Isakeefa qinau. Qini qinaqa fee qianaqa darifoora miqi qiga.

<sup>10</sup> Abimeereekafa iriseenoo qinau. Anee maasa naqaa fee maqimaqee-  
nee. Qini maqannaa moo fannoo ani anaqa sakasee faiqafana anee mi  
ummaarana maasa qimianaiqini.

<sup>11</sup> Miqi qimaseenoo nari maqannaasa aiqama naarama quqaseenoo  
maaqi qimasee qima nimirau. Yafee maa fasiqanee mina aanaaqee  
mandaikamma nimaqai faqa qinee kuqa kai mina aruanauranoo.

<sup>12</sup> Mi aukuanai Isakeefa narana ummaqusoofanoo kambiqafufanoo  
amiqimmasee anoona mafufanoo unakira aukuaana moomoo uqanna un-  
akinu. Karaambaiga amiqi amiqimma amaqaqasee dadaaqunara miqinau.

<sup>13</sup> Karaambaiga dadaaqufanoo mina ainaina rairaaufanoo kaaqa ainaina  
faqaafa marinau.

<sup>14</sup> Mifa moomoo sipsipa faqa burimakau faqa ainainira faiqiuqa faqa  
marunara Firistia maqannaasa niraanaqee marinau.

<sup>15</sup> Ooqai Abaraqammafa kaqi maridanoo indufuqoo nammari dikaan-  
dausa Firistia maqannaasa aiqama rafaqa fiqau.

<sup>16</sup> Moo kari Abimeereekafa Isakeena aiqama ainaina tia qafamaseenoo  
rufia seenoo qimaminu. Doo anee maasa uridaaqarana mariananoo. Anee  
maasa maqa maaqa quqasee moosaa fua.

<sup>17</sup> Isakeefa mi ufana iriseenoo mi maqa maaqana minniseenoo nari  
uiqaana maaqa Keeraa noopunduki usakasee miqoo kisaagasaa marinau.

<sup>18</sup> Miqoo ooqu Isakeefa nari akoona nammari madikauqa Firistia maqan-  
naa rafaqa fuqoona paqurimmaseenoo kafa indufuseenoo nari akoofa  
auguroo auquna kai kaifaa auquranu.

<sup>19</sup> Isakeena ainaini maru fasiqausa mi arumunaki fuka madika indufiu-  
faqa nammari paquriqau.

<sup>20</sup> Paquri masoofaqa Keeraa maqannaa sipsipasaa rakisi marusa mi  
nammarina qafamasee Isakeena sipsipa rakisirausa faqa rakirarida qiqau.  
Maa nammarifa maasaindi maridanoo. Miqi qufanoo Isakeefa mi nammari  
madikana auqu Tinoorira nammari madikee qinau.

<sup>21</sup> Miqi qimasoofaqa mina ainainira fasiqa namu kafa moo indufiqau.  
Keeraa maqannaasa minara faqa miqi kai iqau. Isakeefa mina iriseenoo  
minara faqa niraanaqara nammari fee kai qinau.



<sup>22</sup> Miqi qimaseenoo kafaa quqasee moosaa oonureenoo miqi kai minoo moo nammari madika indufinuu. Miqoo minara sia tinoo taanoo rirafa marufanoo mi nammari madikana auqureenoo nifaaqa quqasee mana manira nammari madikee qinuu. Maqee Karaambaiqa fannoo mana manirana maasa qimifaqa maridaqa maaqoo aiqama ainaina masaananoo rairaaiannoo.

<sup>23</sup> Doo miqoo mariufanoo miqoo minni seenoo Beeraseeba maqa maaqai finuu.

<sup>24</sup> Miqoo marufanoo moo eendaki akooqoo Karaambaiqa maaqi qimasee qimaminuu. Qinee ani akoonaa Abaraqaammanna Anutusa maridaqa. Sia anee rufia rufiaqaa. Qinee ani faqa nidaqa. Qeeqa ainainira fasiqa Abaraqaammanna faqa qima afeekaikifannanara iriseeqa ani amiqi amiqi ianaura anisaa ani aruakinausa moomoo kambiqeefaranoo.

<sup>25</sup> Isakeefa Karaambaiqa mi ufana iriseenoo ooninnai qainda auquseenoo Karaambaiqa aandau tatufirana minasaa suqa amiseenoo innaaru qinuu. Miqoo Isakeeefa nari uqaana maqa burimakau apatannoo usakaseenoo marinuu. Minaki maridanoo nari ainainira fasiqauqa niqoofaqa moo nammari madika indufiqau.

*Isakeesa Abimeereekasa eedoo qimasee moodaanakiku ufafa.*

<sup>26</sup> Abimeereekafa Keeraa maqa maaqaindari Ausafatana nari irirana amimaru fasiqana faqa nari sundiauqa uriqararana Pikooraana faqa Isakeena qafararee qimasee Beeraseeba maqusai aniqau.

<sup>27</sup> Aniroofanoo Isakeefa iramirinoo qinuu. Naqi fee qifaqee qiniara nikoqoofaqa diiqamasoosa marunnannai kafaa anidane.

<sup>28</sup> Miqi qufanoo Abimeereekafa faqa mina faqa anusa qiqau. Karaambaiqa ani faqa marinara maqee maasa iridaqa. Ani faqa maasa faqa gambaana kuqaa qima afeekaikirafa marianifeera iridaqa.

<sup>29</sup> Maasa aniara qima afeekaikammasee sia maasa mandaikamma qimaqaannee qidaqa. Maasa sia ani mandaikamma amaqaafannandee inana maasa faqa sia mandaikamma qimaqaa. Maasa ani amiqi amiqimma aisaafanana anee asoaranaki finuu. Maqee akooqoo uqanna Karaambaiqa fannoo ani amiqi amiqimma amaqaaidanoo.

<sup>30</sup> Miqi qimasoo fanoo Isakeefa qoomaqa deedaqinuu. Deedaqamma-soofaqa misa narana namaseeqa faiqaqau.

<sup>31</sup> Kananaana findi fufaqa nari qimami nari qimamimma afeekaikamasee firaa ufannai qima afeekaikamma rafaafiqau. Miqimaseenoo Isakeefa nimandara ufa qimasoo faqa aqoondi kammasee quqasee fiqau.

<sup>32</sup> Doo mi faasaanna Isakeena ainainira fasiqa namu nammari madika indufu qoonaki nammari paqurimmasee Isakeena qimamiqa qiqau. Doo maasa nammari paquriqa.

<sup>33</sup> Miqi qimasee qimamufanoo Isakeefa mi nammari madikanara qima afeekaikira madikee qinuu. Miqi qimaseenoo nari ufakiqari Beeraseeba maqusa fee qimasee auqu ranuu.

*Eesaufa aanaamuru aanaaseeqara maroo ufafa.*

<sup>34</sup> Isakeena faiqi indaaruuqaafa mina auqu Eesaufa marinuu. Mifa qaara fasiqa aiku asauku taikasee 40 aukuaana maraseenoo Qeetaa maqannaa aanaaseeqara maranuu. Moo anaasee auqu Yuditi nammarina Beerina aramuna maranuu. Moo anaasee auqu Baseemata nammarina Eeroona aramuna maranuu.

<sup>35</sup> Miqanda nari ninaakuquqara Isakeesa Reebeeka nammarisa sukaqara oosana nimufaqa nikooqanuu.

## 27

### *Yakooboofa Eesauna afaaqooqa ummuaru ufafa.*

<sup>1</sup> Isakeefa mariiufanoo doo asooqaqoofanoo afu mandaikinau. Mariiufanoo moo kari narí indaarugaa faiqi Eesauna aaroofanoo Eesaufa maqi qinau.

<sup>2</sup> Foo qimasoofanoo Isakeefa Eesauna qimaminoo qinau. Doo qinee asooqa marida, qeeqa kuqira aukwana sia qafaida, minara ani qimamiqa.

<sup>3-4</sup> Aneenna duru feefa mareenana nandaki aandau aru maree qini didi marina mini suqa qiminaqa namseeqa ani afaaqooqa qimamaqaseeqa kuqua.

<sup>5-6</sup> Isakeefa Eesauna faqa ufa qiqiisooofanoo Reebeeka nammarifa iriseenoo qafooofanoo Eesaufa nandakinai uqarara fufanoo quanda fufanoo Yakooboona qumee kai qimaminoo qinau.

<sup>7</sup> Doo maqee ani akoofa Eesauna maaqi qimasee qimaminoo, anee aandau arumaree mini suqa qiminaqa qinee namasee Karaambaiqa afusaa ani afaaqooqa amisee kuqua.

<sup>8</sup> Qini qimaaku doo anee qini ufa irisee qinee qianandee ia.

<sup>9</sup> Anee doo fua oonu mimmi aanaaqiuqa marianakinaana afaaqa faqaana qaaraqanda mini sainaqa qinee ani akoona aidi marina suqa saanana munu amia.

<sup>10</sup> Munu aminano namaseenoo narí afaaqooqa amiseenoo kuquani.

<sup>11</sup> Yakooboofa iriseenoo narí anoona qimaminoo qinau. Qini qifasaafa asausi faqaafa maridanoo asausi aadaiki marifa maridanoo. Qini qifaaqa qisausi sia maridanoo umooqu kammidanoo.

<sup>12</sup> Abee qini qikoofa qini qifaaqa duqama qafamaseenoo iriannoo. Qiniara qikaru qidanoo fee qiannoo. Miqiga qinee rairaiqirana qeeqa qifaaqai qifaaqooqara foora mara quqaanaura.

<sup>13</sup> Mina anoofa mi ufana iriseenoo qinau. Ani aqira ufa fannoo qinisaa kai mariannoo, sia anee minara iria, sandeenana oonu mimmi aanaaqi kaqi maree mini qimia.

<sup>14</sup> Miqi qima soofanoo Yaakooboofa eedoo qimasee mara maree mini soofanoo mina anoofa maraseenoo narí afaaqi Isakeena aidira narana suqanau.

<sup>15</sup> Reebeeka nammarifa aandau suqaseenoo Eesauna amiqira qamunna narí maaqaki quqaqoona maraseenoo Yakooboona afisu amaqaanau.

<sup>16</sup> Afisu amaqaaseenoo mimmi aanaaqi apata qumareenoo Yakooboona afaarinni faqa asauku faqa asausi sia maruqoo afisu amaqaanau.

<sup>17</sup> Miqi mandeenoo mi adiafaaira naranna feemu namu faqa suqaqoona amufanoo narí akoo funnai maree finau.

<sup>18</sup> Oonureenoo narí akoona maaqi qimasee qimaminau. Qipoo doo qinee anireeqa, qufanoo Isakeefa qinau. Qini faiqi namukiqari anee yafee maridanee qinau.

<sup>19</sup> Yakooboofa qinau. Qinee ani indaarugaa faiqi Eesauna maridaqa. Doo anee aandaara qiannana arusee suqamaree anireeqa doo anee findi finana namasee qifaaqooqa qimia.

<sup>20</sup> Miqi qufanoo Isakeefa qinau. Oo qini qimaaku anee naqaa fee maseenane kai kaqi paqurinee qufanoo Yakoobofa qinau. Karaambaiqa ani Anutufa qini dadaaqi paqurimma qiminoo.

<sup>21</sup> Isakeefa minara iriseenoo Yakoobona aaramaseenoo qinau. Anee qini daaqa adeedi ani rainaqa qinee ani auqama qafaa. Kuqaa anee Eesau fee maridanee.

<sup>22</sup> Miqi qufanoo Yakoo boofa narí akoona oorinni oonu kikiqamma fufanoo Isakeefa auqama qafamaseenoo qináu. Qinee irunanoo anee ufa qianafa ani Yakoo boona aunda maridanoo ani asauku auqamasee qafaunanoo Eesauna asauku maridanoo.

<sup>23-24</sup> Yakoo boofa mimmi asausi afisuqoofanoo Eesauna asaukuara foora asausi aanaaqi marufanoo Isakeefa sia irináu. Isakeefa narí afaaqooqa mina amirarammaseenoo kaifaa iramirinoo qináu. Anee kuqaa Eesau fee maridane. Miqi qufanoo Yakoo boofa qináu. Eeo qinee Eesausa maridaqa.

<sup>25</sup> Miqi qufanoo Isakeefa qináu. Doo aneenna aandau mini qiminaqa namaseeqa afaaqooqa qimamaqaanaura. Yakoo boofa irinoo aandau aina faqa uainna nammari faqa mini amufanoo nanau.

<sup>26</sup> Namaseenoo Yakoo boona maaqi qimasee qimaminoo qináu. Qini qimaaku maaqoo adeedi ani reenana qini qimooqaa.

<sup>27</sup> Qufanoo Yakoo boofa adeedi aaqa ani reenoo narí akoona amooqee marufanoo andanda unda afaaqaindari ufanoo udirama qafamaseenoo maaqi qimasee afaaqooqa qináu. Qini qimaaku afaaqai amiqira unda fannoo Karaambaiqa afaaqooqa qimamaqaqai maqana afundara foora idanoo.

<sup>28</sup> Anutufa innaarunaindaraa qifi faramu quqasainanoo ani maqa ainoo ainommaseenoo moomoo narana amiani.

<sup>29</sup> Moo aanaamuru marinausa ani ainainira faiqi kammambi faranoo. Maaqanna maaqanna mariasa misa ani ani qafeeqa noorindari maqasaa kummaree faranoo.

Anee aneenna akaqaafasaa uqa firaafai kina marinnaranoo.

Ani anoona faiqi namu ani ani qafeeqa noorindari maqasaa kummaree faranoo.

Moo fannoo ani aqinafa mi ufafa nariki kai mariannoo.

Moo fannoo ani amiqi amiqimma amaqa inafa nariki faqa mariani.

*Eesaufa narí akoona afaaqooqara qiaaqee qu ufafa.*

<sup>30</sup> Miqi qimasee Isakeefa Yakoo boona afaaqooqa qimami soofanoo Yakoo boofa narí akoona maaqakiqari raudamakufanoo dindanai fufanoo doo Eesaufa dindanai uqaanoo niniuufa aniranau.

<sup>31</sup> Eesaufa anireenoo adiafaa ira aandau aina suqa mareenoo narí akoofuqoo oonu reenoo qináu. Qipoo doo findi finana namasee qifaaqooqa qimia.

<sup>32</sup> Mina akoofa qináu. Anee yafee. Miqi qufanoo mifa qináu. Qinee Eesausa indaruqaa faiqi maridaqa.

<sup>33</sup> Isakeefa minara iriseenoo boo qimasee tautu maseenoo aindiri aindiri imarufanoo qináu. Yafee moo fannoo aandau arusee mini qimifaqa, namasaunana anee aniraananoo. Qinee namaseeqa doo qeeqa taikara afaaqooqa qimamaqasaunanoo naaru naaru minaindi mariannoo.

<sup>34</sup> Eesaufa mina iriseenoo firaqoo aundurái suqaqoofanoo qináu. Oo qipoo qini faqa qifaaqooqa qimia.

<sup>35</sup> Qufanoo Isakeefa qináu. Ani akaqa fannoo qikaru qimaseenoo doo ani afaaqooqa maree fifinoo.

<sup>36</sup> Eesaufa minara irufanoo Yaakooboonara arana qoofanoo qináu. Oo mina auqu Yakoo boofa maridanoo narí auqu mau kaimbinoo qini ainaina qaara kari qini qikaru qimasee mareenoo. Indaaru mifa qinee indaruqaa faiqi uriqararasa maraani qiafanna ainaina maroofa maqee miqi kai inoo

qini qifaaqooqa qirana doo maree finoo. Miqi qimaseeno Eesaufa narí akoona qimaminoo qinau. Anee afaaqooqa sia fee qini faqa qiseenanee.

<sup>37</sup> Miqi qufanoo Isakeefa qinau. Doo qinee ani uriqararafa marianifee afaaqooqa amiseeqa. Kaifa mina ainaina mina ainainira faiqi kiaqee afaaqooqa faqa amiqa. Qinee oosana oosana narana faqa nammari faqa amiqa. Qini qimaaku, maqee sia moo ainaina marinaqa ani amianauranoo.

<sup>38</sup> Eesaufa narí akoona kafaa kafaa iki raqaidanoo iranau. Moodaa afaaqooqa marinee aminanee sia fee moo qini faqa qiminnaree.

<sup>39</sup> Isakeefa minara irinoo maaqi qimasee Eesauna qimaminau.

Sia innaarunaindaraa qifi faramu anindi mariannoo.

Sia ainoo faqaa maqa anindi mariannoo.

<sup>40</sup> Anee duru saamu uqeerasaidana aneenna amiqira marirana paqurinnaranoo.

Miqidana anee aneenna akaqa ainainira faiqikina mariinana rakeemmaki aaduma finnaranoo.

### *Isakeefa Yakooboona Qaraana maqusai aqiqoo ufafa.*

<sup>41</sup> Yakooboofa Eesauna afaaqooqa maree fifufanoo Eesaufa narí akaqara akoo qaidanoo fidiqaammi marinau. Miqi marufanoo maaqi qimasee narí kai oonu mafi iriseenoo qinau. Kaqi kaaqoo maasa qikoofa kuqu finaqa soofaara taikaseeqa mikari qeeqa qikaqa kuqamma aruanaura.

<sup>42</sup> Reebeeka nammarifa mi ufana iriseenoo Yakooboona aaramaseenoo aaqu qimamaqeenoo qinau. Iria ani afasaafa Eesaufa afaaqooqara qimam-mareenoo ani aruannoo.

<sup>43</sup> Qini faiqi qinee qimamianandee ia. Anee quqasee sandeenana Qaraana maqusai qini qisookifa ani anaufa Rabannafa marinnai fua.

<sup>44</sup> Anee ooru miqoo marinanoo ani afasaana arana qarafa asooainana qumua.

<sup>45</sup> Anee mina mandaikamma amaqaannanara qaunusainaqa qinee akaqausa niqaanaqa ani ooru afigee qumuqa. Qinee qikoo inneeqara moodaafa kuqiranara irunanoo qaifaqa doo quqasee fua.

### *Isakeefa Yakooboona aiqoofanoo Rabana funnai ooru finau.*

<sup>46</sup> Miqanda ninoofa Reebeeka nammarifa oonu reenoo narí afaaqi Isakeena qimaminoo qinau. Qinee maa Qeeta maqanna anaasee qandara Eesauna anaqa qarara qikoo uqanna fidiqaammidaqa. Yakooboofa Qeeta maqanna anaasee maaqirana moo marainaqa qinee kuquanauranoo.

## 28

<sup>1</sup> Isakeefa minara iriseenoo Yakooboona aaramaseenoo amandaidanoo qinau. Oo Yakooboo sia uqanna Kannaana maqanna anaasee maraa.

<sup>2</sup> Doo findi finana ooru fua. Aneenna aanaakuna Beetueerana maqa maqa Meesopootamia maqa maaqaki ooruree aneenna anauna Rabannana araamuna maraa.

<sup>3</sup> Aiqama afeeka faqaa Anutufa ani faqa ani anaqa faqa amiqi amiqimma nimaqaseenoo moomoo faiqi nimisainana anee moomoo maqannaasa nikoofa marinnara.

<sup>4</sup> Anutufa Abaraqaammana amiqi amiqimma amaqoondee inoo ani faqa amiqi amiqimma aisainana anee aneenna marianna maqa maqana Anutufa Abaraqaammana amiqoonakinaa qumiasana maraa.

<sup>5</sup> Miqi qimaseenoo Isakeefa Yakooboona aiqoofanoo findifinoo Meesopootamia maqa maaqai Rabanafa Beetueerana amaaku Arameea maqannaafa Reebeekaa nammarina asookifa marunnai oorufinau. Rebeekaa nammarifa Yakooboosa Eesausa ninoofa marinau.

*Eesaufa anaasee moo maranau.*

<sup>6</sup> Isakeefa Yakooboona afaaqooqa amiseenoo Meesoopootamia maqa maaqai anaasee maraanifeera aqiqoonara Eesaufa irinau. Isakeefa afaaqooqa Yakooboona amiseenoo Kannaana maqanna anaasee sia maraanee qunara faqa irinau.

<sup>7</sup> Yakooboofa narí anaukoo ufa irisee Meesoopootamia maqa maaqai funara faqa Eesaufa irinau.

<sup>8</sup> Isakeefa Kannaana maqanna aanaaseera akooqee marunara Eesaufa irinau.

<sup>9</sup> Iriseenoo Isamaerafa Abaraqaamma anaaku marunnai oonuree mina araamuna auqu Maqarata nammarina maranau. Maqarata nammarina asookifa Neebaiootafa maranau.

*Yakooboofa Beeteeree maqa maaqaki ooni qunu rumasee faiqaqee qainin.*

<sup>10</sup> Kaifa Yakooboofa Beeraseeba maqusaindari Qaraana maqusai firaree qimasee faiqanoo ooru fimarinau.

<sup>11</sup> Fimarufanoo eendufanoo moosaa uiqaana araseenoo faiqanau. Faiqararinoo ooni fraana marasee qunu rumasee miqoo faiqanau.

<sup>12</sup> Faiqaqee idanoo qaina moo inau. Aana kisaqa maqasaqari innaarunai ooru marufanoo angiroouqa mimau ooruree qumuree imariqau.

<sup>13</sup> Karaambaiqa Yakooboona aakaarinni kikiqinoo maridanoo maaqi qimasee qimaminau. Qinee Karaambaiqa maridaqa, ani aanaakuna Abaraqaamana Anutusa maridaqa, ani akoona Isakeena faqa Anutusa maridaqa. Qinee maa maqa maaqana anee faiqaannana ani faqa ani aiku asauku faqa nimianauna.

<sup>14</sup> Ani aiku asauku anisaa ani aruakinausa faqa nukudara foora maa maqanasaa marifaranoo. Misa miqooqari kambiqamaree suani oosana qaannai finanoo aramareenoo keeqee mari qaannai finanoo dinni dinni ataaqeeni finanoo miqi mambi amana kai marifaranoo. Ani faqa ani aiku asaukuaroo qiqa aiqama maqannaasa amiqimma nimaqaanauna.

<sup>15</sup> Karaambaiqa kafa qimaminoo qinai. Iria, qinee ani faqa maridaqa aiqamai finnannai anisaa rakisiauna. Rakisidaqa kaifaa ani mareeqee maa maqanasaa quqaanauna. Qinee sia ani minnisaanauna, qinee qeeqa qima afeekaikiafanna ufafa anoona kambiqainaqa quqaanauna.

<sup>16</sup> Miqi qimsoofanoo Yakooboofa tautinoo findifinoo qinai. Karaambaiqa maaqoo maridanoo. Mifa maaqoo marinara qinee sia iridaqa.

<sup>17</sup> Yakooboofa Anutuna ufa iriseenoo rufia rufia idanoo qinai. Maa maqa maaqafa daaquqara maqa maqaa maridanoo. Abee Anutuna maaqa mariannoo innaarunai fimarina kooqifa uqanna mariannoo.

<sup>18</sup> Kananaana Yakooboofa findifinoo narí ooni qunu qumareenoo daaqoo auqaanifee qimasee maqasaa rakiqaseenoo Anutunaindi fee qimasee oorifa fadameena akuamaqanau.

<sup>19</sup> Akuamaqaseenoo mi maqanara Beeteera fee qinai. (Mi auquna oosana Anutuna maaqa fee qinai.) Ooqai miqoora misa Rusa maqusa fee qimariqau.

<sup>20-21</sup> Yakooboofa mi maqana auqu ramaseenoo Karaambaiqara qima afeekaikinoo qinai. Qinee fimarinaana anee qini faqa marida qinisaa rakisidana narana faqa qamunna faqa qiminaqa qinee amiqimmaseeqa qeeqa qikoona maaqai qumu raanana anee qini Anutufa marinnaranoo.

<sup>22</sup> Maa daaqoo auqara oonina rakiqaunnana ani naaru amooqi fandin-naqoo mariannoo. Anee aiqama ainaina qiminaqa qinee qisaukuqaraki-naana aninna amianaura.

## 29

### *Yakooboofa Rabanana maaqai ooruranau.*

<sup>1</sup> Miqi qimaseenoo innaaru qimaseenoo Yakooboofa suani oosana qaan-nai mariasa, misa maqa maaqai oonu ranau.

<sup>2</sup> Oonureenoo qafuofanoo nammari madika qusau saqanna marufanoo qaaramooki sipsipauqa mi nammari madikana afainni faiqaqeeufaqa misasaa rakisirausa miqoo rakisimariqau. Sipsipauqa mi madikanakinaa nammari neemariqau. Fira ooninnoo mi madikana rafaafuqoofanoo marinau.

<sup>3</sup> Sipsipauqa aiqama moodaa qoo aniroofaqa sipsipasaa rakisirausa mi oonina quanda quandamma aqusee nammari nimisee kaifaa mi oonina quanda quandamma mafi rafaafafi mariqau.

<sup>4</sup> Yakooboofa sipsipasaa rakisi marusa oonu nindafeenoo qin角度. Qini qikaqaafasaa, innee yaindaraasee maridaqee. Misa qiqau, maasa Qaraana maqusaindaraasa maridaqa.

<sup>5</sup> Yakooboofa iriseenoo qin角度. Innee Naqoorana anaiqi Rabannanara iridee qufaqa misa qiqau. Eeo maasa minara iridaqa.

<sup>6</sup> Miqi qufanoo Yakooboofa qin角度. Rabannafa amiqisaa fee maridanoo fee. Misa qiqau. Eeo amiqisaa maridanoo. Mina qafaa, doo mina araamuna Raseera nammarifa mina sipsipauqa nifiqee anidanoo.

<sup>7</sup> Yakooboofa misa sipsipa oosana qafeenoo qin角度. Innee naqiffee ifaqee sipsipa suani qambaana mara quqaqaafaqee maridee. Dauni nammari nimiseeqa mara quqasaifaqa misa fida qusau neeqa nifaaqa maraaqa.

<sup>8</sup> Mi maqannaasa iriseeqa qiqau. Maasa sia miqianaura. Aiqa sipsipa maaqoo aniraifaqa ooni quanda quandamma aqusee nammari nimifaranoo.

<sup>9</sup> Yakooboofa misa faqa ufa qimarufanoo Raseera nammarifa narí akoona Rabanna sipsipauqa nifiqee aniranau.

<sup>10</sup> Yakooboofa narí anoona Reebeeka nammarina asookina araamuna qafamaseenoo Rabanna sipsipa faqa qafamaseenoo findifinoo nammari madikaki rafaafuqoo oonina quanda quandamma mafi quqaseenoo Raseera nammarina sipsipauqa nammari nimiranau.

<sup>11</sup> Nammari nimiseenoo Raseera nammarina ooriki amooqaidanoo asasirafa firaafa minaki marufanoo iki raqanau.

<sup>12</sup> Iki raqaseenoo Raseera nammarina qimaminoo qin角度. Qinee ani akoona ati Reebeeka nammarina amaaku maridaqa. Raseera nammarifa mina ufa iriseenoo sandeenoo oonuree narí akoona qimaminau.

<sup>13</sup> Rabannafa narí anauqi Yakooboona ufa iriseenoo sandeenoo oonu mafi kaqaramma qumareenoo amooqaseenoo sukudaakutamasee afiqeenoo narí maaqai anin角度. Miqoo oonu maridanoo Yakooboofa Rabanna aiqama ainaina kambiqoonara qimaminau.

<sup>14</sup> Rabannafa iriseenoo maaqi qimasee qimaminoo qin角度. Anee qini moodaa fidika mariananoo. Miqi qimasooofanoo Yakooboofa moodaa uqoona mina faqa miqoo marin角度.

*Yakooboofa Rabannana araamuna qara mararee qimasee mina ainaina imarin角度.*

<sup>15</sup> Rabannafa maaqi qimaseenoo Yakooboona qimaminoo qinau. Kuqaa anee qini qinauqi mariananoo, sia fifau qini ainaina kai innaranoo. Maqee oosana araseeqa feefauru amiqambuanaura. Ani naqiffee mandee feefauru amianauree.

<sup>16</sup> Rabanna araamuna qara qaaraqanda mariqau, indaarugaafa Reea nammarifa marinau inaaqianaafa Raseera nammarifa marinau.

<sup>17</sup> Reea nammarifa indaarugaafa amiqira oori afiri faqaafa marinau. Raseera nammarifa mina faqa arusee kaaqa amiqirafa uqanna marinau.

<sup>18</sup> Yakooboona irirafa Raseera nammarinara kai iri marufa marinau. Minara iriseenoo Yakooboofa Rabannana narí ainaini maruna akiiqara qimaminoo qinau. Amanee qinee Raseera nammarina maraanauree. Anee eedoo qinaqa qinee mina akiiqara qisauku dinni taikasee dinni ani qaara marasee 7 aukuaana ani ainaina ianaura.

<sup>19</sup> Qufanoo Rabannafa qimaminau. Qinee amana ani amianauree, moo oosana nimiranara qikooqaidanoo. Doo anee qini faqa maridana ainainia.

<sup>20</sup> Rabannafa miqi qimasoo fanoo Yakooboofa Raseera nammarina marararee qimaseenoo qisauku dinni taikaseenoo dinni ani qaara maraseenoo 7 aukuaana mina ainaina maisee marinau. Yakooboofa Raseera nammarinara aidi marufanoo mi aukuaana namufa qaaramoo faasaanara foora aiqaranau.

<sup>21</sup> Dinni taikasee dinni ani qaara marasee 7 aukuaana taikasoo fanoo Yakooboofa Rabanna qimaminoo qinau. Doo qini maanaqa qimiraree qunna aukuanafa aiqareenoo. Doo Raseera nammarina qiminaqa maraa.

<sup>22</sup> Rabannafa eedoo qimaseenoo narí araamuna amundaida oomaqa sakasee aiqama naarooqafa ani naqau.

<sup>23</sup> Mi eendanaki Rabannafa narí araamuna indaarugaana Reea nammarina qumee Yakooboona maaqaki quqasoofanoo Yakooboofa auna Raseera nammarifa mifoo qimaseenoo mina faqa sakasee faiqanau.

<sup>24</sup> Rabannafa miqoo qaraasa oosana mareeno narí ainainira maanaqa moo minauqu Siripaa nammarina mareeqee narí araamuna Reea nammarina ainaina maisaanifeera aminau.

<sup>25</sup> Iaqqoo fanoo findifinoo Yakooboofa qafamaseenoo, boo Reea nammari fee qinau. Yakooboofa Rabanna funnai oonureenoo aqinoo qinau. Anee naqiffee ifanee qini miqimma qimaqeennee. Qinee Raseera nammarina marararee qimasee ani ainaina maiseeqa. Anee nanaree qini qikaru q inanee.

<sup>26</sup> Rabannafa qinau. Maasa maaqoo qaraasa oosana sia miqinoo maridanoo. Indaarugaana naaree amundaseeqa inaaqiannaana kasooaqee inaaqianna amundaidaqa.

<sup>27</sup> Anee Reea nammarina faqa kaqi marinanoo mina oomaqirafa 7 faasaana mariannoo. Taikainaaqa miqoo kafaa Raseera nammarina faqa amianauree. Amianana miqooqari mina akiiqara anee oosana araseenana kaifaa dinni taikasee dinni ani qaara marasee 7 aukuaana qini ainaina innaranoo.

<sup>28</sup> Yakooboofa minara iriseenoo eedoo qimaseenoo Reea nammarina faqa mariufanoo qoomaqa narana taikoofanoo Rabannafa narí araamuna Raseera nammarina faqa aminau.

<sup>29</sup> Kafaa Rabannafa narí ainainira maanaqa mina auqu Biriqaa nammarina mareeqeenoo Raseera nammarina ainainianifeera aminau.

<sup>30</sup> Amufanoo Yakooboofa Raseera nammarina faqa sakasee faiqanau. Yakooboofa Raseera nammarinara aidi marufanoo Reea nammarinara sia amiqimma aidi marinau. Miqidanoo Rabannana ainainiranaki kafaa qisauku dinni taikasee dinni ani qaara marasee 7 aukuanaki marinau.

*Yakooboona faiqi namu ufa.*

<sup>31</sup> Yakooboona irirafa Raseera nammarinasaa kai mundinoo marunara Reeaa nammarinara akoo akaa mimarinau. Miqi marunara Karaambaiga qafeenoo dadaaqufanoo Reeaa nammarifa amuaqu qaikinai.

<sup>32</sup> Reeaa nammarifa amuaqu qaikinoo mariiufanoo faiqi akoonaiqi maqanau. Maqaseenoo qinau. Karaambaiga qiniara qimudao qinara qini qifaaqi fannoo maqee qinisaa atooqeenoo fee qianaara. Mi irirana iriseenoo mi faiqina auqu Reeubeena fee qinau.

<sup>33</sup> Reeaa nammarifa marikinoo kaifaa amuaqu qaikinoo mariiufanoo faiqi akoonaiqi moo maqanau. Maqaseenoo qinau. Qini qifaaqi qini ameesuqi marinara Karaambaiga irinoo qiniara qimudao qimaseenoo maa faiqina qiminoo. Minara mina auqu Simeeona fee qinau.

<sup>34</sup> Reeaa nammarifa marikinoo kafaa amuaqu qaikinoo mariiufanoo faiqi akoonaiqi moo maqaseenoo qinau. Doo maqee uqanna qini qifaaqi fannoo doo qinisaa atooqaannoo, qinee qaaramoo akoonaiqi maqaseeqa. Minara iriseeqa mi faiqina auqu Reefi nee qiqa.

<sup>35</sup> Reeaa nammarifa marikinoo kaifaa amuaqu qaikinoo mariiufanoo faiqi akoonaiqi moo maqanau. Maqaseenoo qinau doo maqee qinee Karaambaiga amooqidaqa, maa faiqina auqu Yuda fee qidaqa. Reeaa nammarifa Yudana kai maqaseenoo mi kamuqoo kisaagasaa marinai.

## 30

<sup>1</sup> Raseera nammarifa narí anasaana faiqi namu nindafeenoo Yakooboona aqinoo qinau. Anee faiqi sia qini mara qimianaqa qinee kaqi marianabaqa kuquanauranoo.

<sup>2</sup> Yakooboofa minara irufanoo arana qoofanoo qinau. Qinee Anutusau maridau. Anutufa kai ani itita amaqaiddanoo.

<sup>3</sup> Miqi qimasooфанoo Raseera nammarifa qinau. Maa qini ainaini mari manaaqafa Biriqaa nammarifa marinoo qinee mina ani amiqa. Anee mina faqa faiqeenana faiqi mara amia. Aminanoo faiqi maqasainanoo qinindi kammiannoo. Miqimasee qinee faqa faiqi anausa marianaara. (Mi aukuanai mi maqannaasa oosana miqi marusa mariqau.)

<sup>4</sup> Raseera nammarifa miqi qimasee narí ainaini maru manaaqana mina auqu Biriqaa nammarina Yakooboona amisooфанoo mina faqa sakasee faiqanau.

<sup>5</sup> Miqimmasooфанoo Biriqaa nammarifa amuaqu qaikinoo mariiufanoo Yakoboona faiqi akoonaiqi maqanau.

<sup>6</sup> Maqasooфанoo Raseera nammarifa qafamaseenoo qinau. Doo maqee Anutufa qini oosanara andeeqara oosana fee qimasee qini innaaru qirana iriseenoo doo akoonaiqi qiminoo. Miqi qimaseenoo Raseera nammarifa mi faiqina auqu Dannaa nee qinau.

<sup>7</sup> Mi manaaqafa Biriqaa nammarifa marikinoo kaifaa amuaqu qaikinoo mariiufanoo akoonaiqi moo maqanau.

<sup>8</sup> Raseera nammarifa mina qafamaseenoo qinau. Qinee qeeqa qinasaana faqa firaqoo rairai qimasee qinee uriaaqareeqee qimaseenoo mi faiqina auqu Napatari fee qinau.

<sup>9</sup> Reeaa nammarifa faiqi maqarana taikaseenoo narí ainaini maru manaaqana auqu Siripaa nammarina narí afaaqi Yakooboona mara aminai.

<sup>10</sup> Amufanoo minasaa faiqi akoonaiqi moo maqanau.

<sup>11</sup> Reeaa nammarifa qafamasee qinau. Oo qini amiqimma qisainara mi faiqina auqu Kadafa nee qinau.



<sup>12</sup> Siripaa nammarifa marikinoo kafaa akoonaiqi moo Yakooboona faiqi maqanau.

<sup>13</sup> Reea nammarifa mina faqa nariara maraseenoo qinau. Doo qinee fraaqoo اساسیداقا. Maqee aanaaseeuqa qiniara اساسیراfee qimasee duqu reefaranoo. Minara iriseenoo mi faiqina auqu Aseera fee qinau.

<sup>14</sup> Reea nammarina amaaku Reeubeenafa sakumma neemaru kamuqoo andanda kinai nidanoo faiqi maqee maru andandana qaqaama paqurinau. Mi aqamana auqu mandareeka marinau. Mina paqurimaseenoo mara mareenoo mini nari anoona Reea nammarina aminau. Raseera nammarifa mina qafamaseenoo Reea nammarina qimaminoo qinau. Amanee mandareeka qaqaama akaqana qini faqa qiminnaree.

<sup>15</sup> Miqi qufanoo Reea nammarifa nari qimaminoo qinau. Anee qini qifaaqi marasaanafa kaifaa qini qimaaku mandareeka qaqaama marararee fee qidane. Miqi qufanoo Raseera nammarifa qinau. Ani amaaku marai mandareekana qaqaama qini qiminaqa doo Yakooboona ani amiananoo ani faqa faqaannoo.

<sup>16</sup> Eene marufanoo Yakooboofa ainainindari aniroofanoo Reea nammarifa aanai oonu aqeenoo anidanoo qimaminau. Doo qinee mandareeka qaqaama Raseera nammarina amiqa. Mifa mina akiqara maqee eendaki aniara qini faqa faqaannee qinoo. Miqi qufanoo Yakooboofa eedoo qimasee Reea nammarina faqa sakasee faqana.

<sup>17</sup> Anutufa Reeaana innaaruqirana iriseenoo dadaaqufanoo Reea nammarifa kafaa amuaqu qaikinoo faiqi akoonaiqi maqanau. Moodaannai qisauku namu Yakooboonaasaa maqanau.

<sup>18</sup> Reea nammarifa maqaseenoo qinau. Qinee qeeqa ainainira maanaqa qeeqa qifaaqi amiafannanara maa faiqina Anutufa qini qiminoo. Mifa minara iriseenoo mi faiqina auqu Isakaranee qinau.

<sup>19</sup> Reea nammarifa marikinoo kafaa amuaqu qaikinoo akoonaiqi moo maqanau. Dinni ani moodaa maraseenoo Yakooboonaasaa maqanau.

<sup>20</sup> Maqaseenoo qinau. Anutufa idaaqira ainaina kaqi qiminoo. Maqee dinni qisauku taikasee dinni ani moodaa 6 maraunnaara qini qifaaqi qiniara aidiannoo. Mifa minara iriseenoo mi faiqina auqu Seeburuna fee qinau.

<sup>21</sup> Mina aanaqianna Reea nammarifa maanaqa maqaseenoo Dinnaa nammari fee qinau.

<sup>22</sup> Miqooqari Anutufa Raseera nammarina innaaru qirana iriseenoo dadaaqufanoo faiqi maqarana amanaikinau.

<sup>23</sup> Mifa amuaquqaika mafufanoo faiqi akoonaiqi maqaseenoo qinau. Anutufa qini qisaurirana taikeneenoo qini faiqi akoonaiqi qiminoo.

<sup>24</sup> Raseera nammarifa minara iriseenoo qinau. Karaambaqa qini faiqi moo akoonaiqi qimiani. Miqi qimaseenoo mi faiqina auqu Yoosefaa nee qinau.

*Yakooboofa Rabannana faqa mina ainaini marunara ufaqu ufafa.*

<sup>25</sup> Raseera nammarifa Yoosefaana maqasoo kamuqoo Yakooboofa Rabanna maaqi qimasee qimaminoo qinau. Anee amanee qini quqasainaa qeeqa maaqai fua.

<sup>26</sup> Qinee ani ainainammasaunana qimianna anaaseesa nari faiqi namu faqa qiminaqa maree fua. Qinee amiqimmasee ani ainaina iunnaara anee minara iri mariananoo.

<sup>27</sup> Rabannafa minara iriseenoo qinau. Qini afunee fannoo aniara qima qimifaqa iriseeqa anee qini faqa marunnaqoo Anutufa qini ainaina amiqi amiqifanoo firaa qoo kambiqafinoo maridanoo.

<sup>28</sup> Qinee minara iridaqa anee aneenna feefauruara qinaqa qinee ani amianauro.

<sup>29</sup> Yakooboofa mina iriseenoo kafaa qimaminau. Anee qini ainainirana oosana amiqimmasee irimariananoo. Qinee ani aandau ainasaa rakisi mariafananoo qini rakisirana ameemaanai marida moomoo kambiqee irairaa imariqau.

<sup>30</sup> Qinee aniafanna kari ani ainaina oodaa kai marinau. Qinee maaqoo ani maridaqa ani ainaina aiqamai auqaunanoo Anutufa dadaaqifanoo fraanaikinoo maridanoo. Qinee maqee qeeqaree qianna ainainausa maraanauro.

<sup>31</sup> Miqi qima soofanoo Rabannafa irinoo nari qimaminau. Doo anee qiananoo naqifee masee feefauru ani amianauree. Miqi qufanoo Yakoo-boofa qinau. Sia anee feefauru munnimma aina qini qimia. Qeeqa qiannana kai qimia. Qinee kaqi ani sipsipasaa rakisi marianana qini maa iriranara anee eedoo qinaqa ani sipsipasaa rakisianaura.

<sup>32</sup> Qinee maqee ani sipsipauqa mariannai oonuree aiqama takoosa takoosira sipsipauqa faqa mimmi miqiranauga faqa sipsipa aanaaqi ruduqariranauga faqa maraanauro. Mi feerunara kai qini dididanoo.

<sup>33</sup> Qinee andeeqasee maraanauro anee kasooaqee aneenna oonu reenana qafaa. Eekara arira sipsipa qinindiki marinana eekara fee dunduqarira mimmi fee qinindiki marinana qiniara qumuara miaanoo qia.

<sup>34</sup> Rabannafa mina iriseenoo asasa mandee qinau. Eeoo maasa anee qianandeemmianauro.

<sup>35</sup> Mi faasaanna qumee kai mimmi akoona takoosa takoosa iranauqa faqa mimmi anaasee miqiranauga faqa eekarasai runduqasai irana faqa runduqarira sipsipauqa faqa moodaanaki quqaseenoo nari faiqi namuara qufaqa misasaa rakisiqau.

<sup>36</sup> Rabannafa Yakooboona maraandoo qimasee nari mimmi sipsipa mara mareenoo nari faiqi namusaa quqasoofaqa nianai qaaramoo afuru aanai faiqee oonuraaqaa irannai munu quqasee rakisi mariqau. Maree fifufanoo Yakooboofa akaqa sipsipauqa mafisoosasaa kai rakisi marinau.

<sup>37</sup> Rabanna sipsipasaa maqusai rakisida maridanoo saqari amimiuga ateekaseenoo moodaa mau apata ruata aquseenoo eekara ari marutinai quandaseenoo sipsipa nammari nee maruqoo rakiqanau.

<sup>38</sup> Sipsipa mimmi nammari naidaqa miqoo ani raidaqa naafeeqaambaqaa rimariqau. Yakooboofa mi saqarisa sipsipauqa difaaniki nammari neemaruqoo rakiqaqoofanoo marufaqa sipsipauqa nammari narara anireeqa mi saqarina qafaidaqa akoonauqa anaasee naafeeqaambaqaa riqeera rakianau.

<sup>39</sup> Mimmiuqaindi miqoo mina qafaidaqa akoonauqa anaasee naafeeqa-soofaqa akaraurira aanaaqiuga maqaqau.

<sup>40</sup> Yakooboofa sipsipauqa nifiqeenoo akaraurira mimmiuga maruqoo munusaina sipsipa akoonauqa akaraurirana qafaidaqa anaasee sipsipa naafeeqasaifaqa miqirana maqaqeera nifiqee finau. Miqi marunanoo Yakooboofa akaraurira aanaaqiuga narindiki mareeqaida aaduma quqee marufanoo moomooki marinau.

<sup>41</sup> Nifaagauqa faqaa sipsipa faqa mimmi faqa naafee qaambaqaa rirara ufanoo Yakooboofa mi saqari asaanausa mareeqee nammari neemaruqoo rakiqeesoofaqa minakiaqa nidaqa naafeeqee mariqau.

<sup>42</sup> Nimudaani aanaaqi ummooqukiqa nusa naafeeqara rufanoo Yakoo-boofa sia mi saqarisa rakiqanau. Miqimmasee maru fanoo Rabananaindi amudaani aanaaqi ummooqukirafauqa kai marufanoo Yakooboonaaindi nifaaqauqa faqaasa amiqiraua kai mariqau.

<sup>43</sup> Mi oosannannai Yakooboofa moomoo akinaina faqaafa marinau. Mina sipsipa mimmi moomoo uqanna mariqau. Mina ainainira fasiqauqa faqa aanaaseeuqa faqa kammeerauqa faqa doonkiuqa faqa moomoo qumbiqauqa mariqau.

## 31

### *Yakooboofa Rabanna sia qimamirai sandoo ufafa.*

<sup>1</sup> Yakooboofa irufaqa Rabanna faiqi namu misa Yakooboona ainaina moomoo qafamaseeqa aqidaqa qiqau. Yakooboofa maasa qikoonaindi aiqama mareeqee narinni quqeenoo. Yaindaraanee maa firaa qumiasanna mareenoo fee. Maasa qikoonaindi kai mareenoo.

<sup>2</sup> Yakooboofa mi ufana iriseenoo quanda fufanoo Rabanna oori qafoo fanoo sia ooqai undee oori runinoo marufanoo qafanau.

<sup>3</sup> Mi kamuqoo Karaambaiqa Yakooboona qimaminoo qinau. Doo findi finana aneenna akoona faqa aneenna ainaina maqai fua. Anee finaqa qinee ani faqa marianaaura.

<sup>4</sup> Yakooboofa mi ufana iriseenoo sipsipa rakisi marunnaindari Raseera nammarina faqa Reea nammarina faqa naaroo faqa oonu roofanoo qima nimirau.

<sup>5</sup> Ooqai inni nikoona oori sia runinoo mariufa maqee oori runifaqa qafaidaqa. Sia qiniara amiqi amiqidanoo. Miqimmi marifaqa qini qikoona Anutufa qini faqa mariufa maridanoo.

<sup>6</sup> Inneeqara irimariafanoo, qinee qeeqa afeekannai inni nikoona ainaini mariqiafana.

<sup>7</sup> Miqi mariafanano mifa qini qikaru qimaseenoo qisauku qara 10 kari qini feefauru quandaqaandinoo. Miqi marifanoo Anutufa qifanoo sia qini mandaikamma qimaqeenoo.

<sup>8</sup> Inni nikoona ainaina iafannana feefauru mina sipsipa nifaaqa takoosa takoosa irana kai mi aukuanna maqee marufaqa qinee mareeqee qee-qaindiki quqee mariqiafana. Inni nikoofa qini feefauruara nifaaqa akara kau riraua kai maraannee qufaqa mina sipsipauqa mi aukuannai miqi ranauqa kai maqee marufaqa mareeqee qeeqara qeeqaindiki quqee mariqiafana.

<sup>9</sup> Miqimma saafananoo Anutufa inni nikoona aandau aina mareeqeenoo qinindiki kai quqaqiseenoo.

<sup>10</sup> Mimmi sipsipa nariqa araraiki maru anaana qinee qaina qafaafananoo mimmi akoonauqa aanaaseeuqa naafeeqee marufaqa qafaqiafana. Mi akoonausa aiqama akarakau riraua faqa nifaaqa takoosa takoosa iraua faqa anaasee naafeeqee mariqau.

<sup>11</sup> Qinee qainasaa qafaafananoo Anutuna angiroo moo fannoo qini daaroo faqa qinee maqi qiafana.

<sup>12</sup> Foo qiafanano qinau. Qafaa maa nifaaqa takoosa takoosira akoonauqa naafeeqaidaga. Qinee Rabanafa ani mandaikamma amaqee marina qafamasee qunanoo maa ainainafa kambiqaidanoo.

<sup>13</sup> Qinee ooqai Beetera maqa maaqai ani afusaa koorooiafanna Anutusa maridaqa. Miqoo anee aaqoo auqara ooni rakiqasee oorifa fadameena

minasaa adiasee qiniara qima afeekaikinau. Doo maqee indaammamaree aneenna maqusai anirandee anee kambiqoonna maqanasaa fua.

<sup>14</sup> Raseera nammarisa Reea nammarisa qimannimi soofaqa Yakooboona ufa iriseeqa qimamiqau. Sia maasa qikoona qumiasana aina kaqi marinaqa maasa maraanaura.

<sup>15</sup> Mifa maaqandara aanaamuruara foora midanoo. Doo mifa maaqandasa feefauru mara mareenoo doo nariki kai taikkeenoo.

<sup>16</sup> Anutufa maaqanda qikoona kinaana mareeqee maaqanda faqa maaqanda faiqi namu faqa nimifanoo maasaindi kamminoo maridanoo. Anutufa ani qimamindee ia.

<sup>17</sup> Yakooboofa misa ufa iriseenoo nari akoona maqai Kannaana maqasaa firara deedaqinau. Mifa nari aanaaqmaaka faqa nari faiqi namu faqa kammeerauqa saa quqasee ooqu mari fufanoo finau.

<sup>18</sup> Yakooboofa nari mimmi sipsipa doonki kammeera aiqama Meesopootamia maqusai marida maroo ainainausa aiqama mareeqee oorinni quqaseenoo doo nari inaaqianna Kannaana maqa maaqai finau.

<sup>19</sup> Rabannafa nari sipsipa asaasi moosaa oonu aukirara fifufanoo Raseera nammarifa nari akoona maaqaki keeqa fufanoo nari akoona afunee ainaina maaqaki quqaqoonna qumee kai mara mareenoo kukeeqa mareenoo Yakooboona faqa sia qimamirai doo mara mareenoo nari afaaqi faqa finau.

<sup>20</sup> Yakooboofa Rabannana akaru qimasee sia qimamirai quqasee finau.

<sup>21</sup> Yakooboofa nari ainaina namu faqa mareenoo kai kaqi ufanoo finau. Fifi ufanoo Eeufarateesa nammari taqa mareenoo dinni afainni oonu ranau. Doo miqooqari Kiriata aaqana qaannai oori ubeekamafi finau.

### *Rabannafa Yakooboona afaqeefu ufafa.*

<sup>22</sup> Qaarammoo faasaana aiqarofanoo Yakooboofa sandoonara Rabanna qimamiqau.

<sup>23</sup> Rabannafa minara iriseenoo nari aiku asauku aiqama nifiqee Yakooboona aanaaqiana afaqee finau. Dinni taikasee dinni oonu qaara marasee 7 afuru aanai fi faiqeenoo afaqee finoo oonu Yakooboona paqurinau. Kiriata aaqana moo amuaqu namusaa paqurinau.

<sup>24</sup> Rabannafa aanai faiqaqee ufanoo mi eendanaki Anutufa qaina afunna-reenoo qimaminau. Anee sia Yakooboona manda ufa amia.

<sup>25</sup> Yakooboofa aaqanasaa nari uiqaana maqa usakaseenoo marufanoo Rabannafa nari ainaina faqa oonu reenoo mifa faqa nari uiqaana maqa Kiriata amuaqu namusaa usakanau.

<sup>26</sup> Usakaseenoo Rabannafa oonu reenoo Yakooboona qimaminoo qinai. Naqi fee ifanee qini qikaru qimaseenee qini qiraamuqmaaka rakiranakiara foora rarisammamaree sandeenee.

<sup>27</sup> Naqi fee ifanee sia qima qimirai qikaru qimasee qumee quqasee sandeenee. Anee qini qima qiminaqau qinee idi namu faqa asasirana namu faqa piripunna faqa dukaanaa faqa aridaqau aiqani.

<sup>28</sup> Anee sia qini qima qimianaqa qeeqa qinaiqi mara faqa qeeqa qiraamuna qara faqa nimooqa saanana nifiqee aniaqaana. Anee furufarira ainaina auqaananoo.

<sup>29</sup> Qinee ani mandaikamma amaqara afeeka marifaqa marunanoo eenda eendaki ani akoona Anutufa qini rafaqaqafu seenoo qinoo. Anee sia uqanna Yakooboona mandaika mamaqaa qifaqa sia mandaikamma amaqaanauara.

<sup>30</sup> Qinee iridaqa anee aneenna akoona maqa maaqara oonu mafi iri-ananoo aundura dapikifana qini qisee sandaananoo. Naqaa fee ifanee qini maaqaki rakisi maria anutusa ummuara mamaree aninane.

<sup>31</sup> Yakooboofa iriseenoo qimaminoo qinau. Qinee aniara narí araamuna qara rafiqaandoo qimasee rufisee sandeeqa.

<sup>32</sup> Ani maaqaki rakisi maria anutusa marainnana paqurimmaseenana kuqa arua. Doo qini qiku qisauku nifusaa qini ainaina moodaa moodaa mara quqaseenana aneenna ainaina paqurimmasee maraa. Yakoo-boofa Raseera nammarifa narí akoona Rabannana unnaqira anutusa ummuarunara sia irirai miqi qinau.

<sup>33</sup> Rabannafa Yakooboona uiqaana maqaki keeqa fufanoo randoosia sia paqurinau. Miqooqari Rabannafa Reea nammarina uiqaana maqaki keeqafi randoosia. Kafaa miqooqari ainainira maanaaqaqara uiqaana maaqaki faqa keeqafi randasee sia paqurinau. Miqooqari Rabannafa Raseera nammarina uiqaana maaqaki keeqafinoo randanau.

<sup>34</sup> Raseera nammarifa Rabannana maaqasaa rakisi maru anutusa mareeqeenoo kammeera saririqa maaqaki quqaqoona uqeeriseenoo minaki kukeeqaseenoo minasaa ooqu faaqee marinau. Rabannafa Raseera nammarina uiqaana maqaki aiqama ainainaki randasee qafoofanoo sia marinau.

<sup>35</sup> Rabannafa randeemarufanoo Raseera nammarifa narí akoona qimaminoo qinau. Oo qipoo sia qinee findi fuanana sia qini diqia. Qinee qimaaqai qafaidaqa sia findi fidaqa. Miqi qufanoo Rabannafa aiqama ainainaki randoosia sia paqurinau.

<sup>36</sup> Sia paqurufanoo Yakoobofa amambaina qimasee aanoo qidanoo qinau. Qinee nana aqarane maree fee. Nana sandufee rukiasaunana aranaqai fanee qiniara randamaree qumidane.

<sup>37</sup> Anee qini ainainaki randeese doo fee aneenna ainaina paqurinee. Doo mina mareeqeenana aneenna faiqi namu nifusaa faqa qini faiqi namu nifusaa faqa quqasee ufa qida qafaa, yafee andeeqeenoo fee.

<sup>38</sup> Qinee moodaa fasiqa aiku asauku taikasee 20 aukuaana ani ainaina imariqiafana. Mi kamuqoo ani sipsipa ani mimmi sia moo fannoo dapi maqee mariqau, amiqi kai mimariqau. Sia ani sipsipa akoona moo arusee naqiafana.

<sup>39</sup> Kaasau faini ani sipsipa arusoofaqa qinee mina amudaani apata siamma ani uqafiqee mariqiafana qeeqaindi kai moo mareeqee mina amaaqa maqeeqa anindiki quqee mariqiafana. Ummuara fasiqa eendaki fee faasaana fee ummuara masoofana anee qiniara qunaqa qinee qeeqaindi mareeqee anindiki quqee mari qiafana.

<sup>40</sup> Qinee moomoo kari ani ainaina imariafananoo suani darinoo eendaki suara darinoo miqi marufaqa sia faiqee mariqiafana. Miqidaqa ani ainainasaa rakisi mariqiafana.

<sup>41</sup> Yakooboofa qimamidanoo qinau. Qinee moodaa fasiqa aiku asauku taikasee 20 aukuaana ani ainaini mariafanansa marida. Qisauku qara taikasee qikunooqu qaara faqa qaara faqa marasee 14 aukuaana ani araamuna qara mararara ani ainainiaafanansa maridaqa. Dinni taikasee dinni oonu moodaa marasee 6 aukuaana ani sipsipa mimmi mararara kaifaa ainaini qiafana. Miqi mariafanana anee qisauku qara taikasee 10 kari anee qini feefauruara qikaru maakaru qimarinau.

<sup>42</sup> Abaraqaammana Anutufa qini qikoona Isakeena Anutufa sia qini dadaaqinanau anee qiniara kaqi samu fua qinaqau qinee kaqi samu

fini. Anutufa qini ummaara faqa qini kadaapirirana faqa qiqafamaseenoo eenda eendaki narí ufa irirana ani aminoo.

*Yakooboosa Rabannasa moodaanakiku ufafa.*

<sup>43</sup> Rabannafa Yakooboona mi ufana iriseenoo qinau. Maa ani anaaqa qara qini qiraamuna qara maridaqa maa ani faiqi namu qini qinaiqi mara maridaqa maa ani sipsipa qinindi uqanna maridanoo, maa aiqama ainaina anee marana nuanafa aiqama ainaina maaqoo marifa qinindi kai maridanoo. Qinee sia amana qeeqa qiraamuna qara faqa qinaiqi mara faqa rafaqa fuanaura.

<sup>44</sup> Doo maqee ani faqa moodaanaki ufa qirara deedaqidaqa. Anindiri ooni aaku aakumasaanoo mifa maasa moodaanaki kira ufara daaqoo auqaannoo.

<sup>45</sup> Yakooboofa minara iriseenoo eedoo qimaseenoo ooni firaatia qumaree kuradama seenoo daaqoo auqara ooni fee qinau.

<sup>46</sup> Miqimmaseenoo Yakooboofa narí ainainira faiqiuqara qufaqa ooni moomoo suqusee aaku aaku iqau. Miqimmasee mi ooni aaku aaku irana aakaarinni ooqumarifi narana naqau.

<sup>47</sup> Namaseeqa Rabannafa mi oonisa auqureenoo Yageer Sahadutaa fee qimasee narí ufakiqari auqu ramasoofanoo Yakooboofa narí ufakiqari Gareeda fee qinau. (Mi nuquna oosana daaqoo auqara ooni fee qimasee narí ufakiqari auquraqau.)

<sup>48</sup> Rabannafa Yakooboona qimaminoo qinau. Maa ooni aaku aaku irafa anindiri daaqoo auqarafa mariannoo. Minara mi maqusana auqu Gareeda fee qianaura.

<sup>49</sup> Rabannafa kafaa maaqi qinau. Karaambaiqa fannoo maaqanda daraaniananoo mina afu fannoo maasasaa mariani. Miqi qimaseenoo mi maqusana auqureenoo Misipaa fee qinau.

<sup>50</sup> Rabannafa maaqi qinau. Anee qini qiraamuna qara mandaikamma nimaqeenaree moo anaasee fee mareennaree, qinee sia minara iriananoo Anutufa anindirisa rakisidanoo.

<sup>51</sup> Maaqoo qinee ooni aaku aaku maqaunanoo anindiri qara qambaana maridanoo. Maaqoo daaqoo auqara ooni rakiqarafa faqa maridanoo.

<sup>52</sup> Maa ooni aaku aaku irafa faqa rakiqarafa faqa anindiri daaqoo auqarafa maridanoo. Qinee sia mina fiaqaree ani aruanaura. Anee faqa sia mina aiaaqaree qini darua.

<sup>53</sup> Abaraqaamma Anutufa faqa Naqoorana Anutufa faqa maasa qambaana andeeqa qisaannoo. Rabannafa miqi qufanoo Yakooboofa qinau. Qini qikoofa Isakeefa innaaru qimamaqee mari Anutuna auqusaa qimasee afaqaanauree qimasee qima afeekaikinau.

<sup>54</sup> Miqi qimaseenoo Yakooboofa aandau aruseenoo mi aaqannasaa Anutuna aandau tatufusee suqaminau. Suqa amiseenoo Yakooboofa narí aiku asaku naaramasoofaqa moodaaqoo ooqu mari fufaqa mi andauna ataraasa naqau. Namasee mi aaqannasaa faiqaqau.

<sup>55</sup> Kananaana findifufanoo Rabannafa narí anaiqimara faqa araamuna qara faqa nimooqa namasee nimandamasee amaaqa finau.

## 32

*Yakooboofa Eesauna oori qafarara deedaqu ufafa.*

<sup>1</sup> Yakooboofa miqooqari findi fufanoo narí anaukoo unnai aanai fimaru fanoo Anutuna angiroouqa aanai ani paquriqau.

<sup>2</sup> Yakooboofa nindafamaseenoo qinau. Maa maqa maaqafa Anutuna uiqaana maqusa maridanoo. Miqi qimasee mi maqusana auqureenoo Maqannaimmee qinau.

<sup>3</sup> Yakooboofa narí faiqi namu qaaramoo ufa maree narí afasaafa Eesau funnai fuageera niiqoofaqa Eedoomma maqa maaqai fiqau.

<sup>4</sup> Miqoo qini qifasaana paqurimmasee qini maa ufana qimamiqa. Qinee Yakooboosa ani ainainira faiqi maaqi qimasee ani Eesauna qini uriqararana qimamidaqa. Qinee Rabannana faqa maridaqa anirara ma-saidaqa mariifaqa maqee anidaqa.

<sup>5</sup> Qinee burimmakau faqa doonkiuqa faqa sipsipa faqa mimmiuqa faqa ainainira faiqiuqa faqa faqaasa maridaqa. Qinee aniara ufa quqaidaqa qini uriqararafa qini maa ufafa ani asooamamaqaanifeera qidaqa.

<sup>6</sup> Ufa mareefu fasiqausa oonu randee aniree Yakooboona maaqi qimasee qimamiqa qiqau. Doo maasa ani afasaana qimamisauanoo mifa narí ainainira fasiqauqa maqi handareeta 400 namu faqa maasa inaaqianna anidanoo.

<sup>7</sup> Yakooboofa mi ufana irufanoo aaququqoofanoo moomoo irirana maranau. Miqufanoo narí sipsipauqa faqa mimmiuqa faqa burimakauqa faqa kammeerauqa faqa qaaraki raina quqanau.

<sup>8</sup> Maaqi qimasee qimirinai. Eesaufa anireenoo moo usiranaki narinaqa moo usiranakiqari amana sandeefaranoo.

<sup>9</sup> Miqimmasee Yakooboofa maaqi qimasee innaaru qinai. Oo Anutu, qini qinaakuna Abaraqaamma Anutufa qini qikoona Isakeena Anutufa qini innaaru iria. Karaambaiqa anee qini qima qimiananoo aneenna maqa maaqai aneenna ainainiannai finaqa qinee aiqama ainaina andeeqa aisaanauranoo fee qinai.

<sup>10</sup> Oo Anutu anee qini amiqi amiqimma qisarana faqa ani mapukira dadaaqiranara faqa irunanoo uriqaraiifaqa qinee oorudupiqa maridaqa. Qinee ooqai Yooradanna nammari qeeqa saunu kai uqirausa taqaqiafana doo maqee qinee qaaraki rainarousa faqa anidaqa.

<sup>11</sup> Qinee qeeqa qifasaana Eesauna asaukukinaana asumu mara quqaqisaanneera innaaru qidaqa. Qinee minara rufiidaqa. Mifa anireenoo maasa faiqi anaasee faqa aiqama daru taikaandora rufiidaqa.

<sup>12</sup> Anee maaqi qimasee qiniara qima afeekaikinai. Ani aiqama ainaina andeeqamma aisaanauranoo fee qinai. Ani moomoo faiqi asumu amianaqa sia amana moo fannoo asaana ruannoo, nukudara foora sia kasoo uqanna marifaranoo fee qinai.

<sup>13</sup> Yakooboofa miqi qimaseenoo innaaru qimaseenoo mi eendanaki miqoo faiqeenoo iaqoofanoo narí aandau Eesauna amiraree qimasee raina quqanau.

<sup>14</sup> Mifa mimmi anaasee 200 faqa mimmi akoona 20 faqa sipsipa anaasee 200 faqa sipsipa akoona 20 faqa raina aaduma quqanau.

<sup>15</sup> Miqimmaseenoo kaifaa kammeera anaasee 30 faqa narí aanaaqi naamma neemarsa faqa burimakau anaasee 40 faqa akoona 10 faqa doonki anaasee 20 faqa akoona 10 faqa raina quqanau.

<sup>16</sup> Yakooboofa raineeqeenoo aandau oosana oosana naadu naadu kai quqaseenoo narí ainaini maru faiqisa moodaa moodaa mareeqeenoo minauqasaa rakisiaqeera quqanau. Quqaseenoo maaqi qimasee qiman-niminoo qinai. Innee qini qifunni fidaqa adaaraika masaidaqa niana niana maridaqa fuaqa.

17-18 Miqi qimaseenoo Yakooboofa indaarufu faiqina qimaminoo qinau. Qini qifasaafa Eesaufa paquri maseenoo irainana yafee ani uriqararafa maridanoo fee yaifee anee fidanee yana aandauqee anee maree fidanee, qinana anee maaqi qimasee narí qimamia. Maa ainausa ani ainainira faiqi Yakoobofoonaindi maridanoo. Mifa narí uriqararana Eesauna ami-annee qimasee quqasaifaqa maree anidaqa. Yakooboofa narí inaaqianna anidanoo mifoo qia.

19 Yakooboofa indaarufu faiqina qimamundee kai minoo mina aanaaqiana fusa faqa miqi kaimmasee qimanniminu. Innee Eesauna paqurimmasee miqi kaimmasee qimamiaqa.

20 Innee maaqi qiaqa. Eeoo ani ainainira faiqi Yakooboofa inaaqianna anidanoo mifoo qiaqa. Yakooboofa narí kai oonu mafi irinoo qinau. Qinee maa ainainausa amiannanannoo mina irirana quandasanaanoo qiniara amiqi amiqiani. Qinee mina paqurimasaanoo aqbee mifa qini numoo minniqisaannoo.

21 Eesauna amaqqoo ainainausa indaarufu fifufanoo doo narí miqqoo mi uiqaana maqusanaki faiqanau.

*Yakooboofa Peenieera maqa maaqai angiroo faqa narí qumaree narí qumaree qu ufafa.*

22 Mi eenda amuqusanai Yakooboofa findi fufanoo narí anaqa qara faqa narí ainainira anaasee qanda faqa narí faiqi namu qisaukuqara taikasee qikunni ooqu moodaa marasee 11 nifiqamareenoo Yabooka nammari fitaqamareenoo muqu afainai munu nisanau.

23 Munusee niqamasoofaqa fufanoo narí aiqama aandauqa faqa mara quqasoofaqa misa faqa taqaqau.

24 Taqa nimaqaseenoo naríara dinni afainni kaqi marinau. Marufanoo faiqi moo fannoo anireenoo aitata fufanoo Yakooboona qumaranau. Uaqeeidanoo narí rudammiqi narí rudammiqi idamarufanoo iaqarafa adeedi ranau.

25 Sia mi fasiqafa Yakoboona uraaqaranau. Miqi usianoo asauku samu Yakooboona upisuna aranaiqi arinau. Miqubaqa Yakooboona upisuna arufanoo amudaani ootuparafa aikatamafufanoo raaqee raaqee inoo ninau.

26 Iaqqofanoo mi fasiqafa Yakooboona qimaminau. Doo qini quqasainaqa fua, doo iaqarafa adeedi reenoo. Yakooboofa iriseenoo qinau. Sia ani quqaanaura. Anee qini qifaaqqooqa qima qimaqasainaqa quqaanaura.

27 Mi fasiqafa Yakooboona qimaminoo qinau. Ani auqu yafee. Aneenna auqu rainaqa iria. Yakooboofa qinau. Qini duqu Yakooboosa maridaqa.

28 Miqi qufanoo mi fasiqafa qinau. Maqee maaqqooqari Yakooboofa taikaannoo ani auqu Isaraeerafa marinnaranoo. Anee Anutuna faqa faiqi faqa aitatafi qumaraanannoo uriqararafa marianaqa minara ani auqu Isaraeera fee qidaqa.

29 Miqi qimasoofanoo Yakooboofa mi fasiqana qimaminoo qinau. Aneenna auqu qimaqimia. Miqu qufanoo mi fasiqafa qinau. Nanaree anee qini duqu irirara iraidanee. Miqi qimaseenoo Yakooboona afaqqooqa qimama qaseenoo doo quqaseenoo finau.

30 Mi fasiqafa fifufanoo Yakooboofa qinau. Qinee Anutuna oori qafamaseeqa sia kuqiqa kaqi maridee qimaseenoo miqqoo auqureenoo Peenieera fee qinau.

31 Suani afu ururoofanoo Yakooboofa Peenieera maqa quqaseenoo upisuna aidafi marufanoo reetaa reetaa qinoo finau.



<sup>32</sup> Miqooqari oosana arasee Isaraee maqannaasa sia aandau upisunakinaa amaqi neemariqau. Maqee faqa sia naidaqa. Anutuna angiroo fannoo Yakooboona upisunaki arunara iridaqa sia naidaqa.

### 33

#### *Yakooboofa Eesauna paqurinau.*

<sup>1</sup> Yakooboofa qafoofanoo Eesaufa 400 fasiqa faqa aninau. Yakooboofa mina qafamaseenoo narí faiqi namu rainasee Reea nammarina faqa Raseera nammarina faqa ainainira anaasee qaaraqanda faqa niminau.

<sup>2</sup> Nimiseenoo indaaruu narí ainainira anaasee qara faqa nári faiqi namu faqa niqoofaqa fiqau. Misa ninaaqianna Reea nammarifa narí faiqi namu faqa finau. Inaqianna uqanna Raseera nammarifa narí faiqi Yooseefaana faqa finau.

<sup>3</sup> Yakooboofa misa noorinni indaaruu finau. Oonu reenoo dinni taikasee dinni oonu qaara marasee kari maqasaa mapaminoo fifufanoo narí afasaafa maruqoo oonuranau.

<sup>4</sup> Eesaufa Yakooboona oori qafamaseenoo sandamammareenoo ani kaqaramma qumaraseenoo amooqananau. Miqanda aiqama qara qiki raqaaqau.

<sup>5</sup> Qiki raqaseenoo Eesaufa quanda fufanoo Yakooboona faiqi anaasee nindafamaseenoo qinau. Maa ani faqa aniasa yausee maridee. Qufanoo Yakooboofa qinau. Oo uriqararafa maa faiqi anaaseesannoo Anutufa qini amiqi amiqimma qimaqeenoo.

<sup>6</sup> Miqi qimarufanoo Yakooboona ainainira aanaaseeqara nári faiqi namu faqa Eesauna oorisaani ninuka tuqu naumoo amisee reendeeniqau.

<sup>7</sup> Miqanda ninaaqianna Reea nammarifa narí faiqi namu faqa anireenoo miqinau. Mina aanaaqianna uqanna Raseera nammarifa narí faiqi Yooseefaana faqa anireenoo miqikai inau.

<sup>8</sup> Miqima soofanoo Eesaufa Yakooboona maaqi qimasee qimaminau. Faasai qafaunna andausa oosana naqaa fee inoo maridano fee qufanoo Yakooboofa qinau. Ani aqoondikiraree qimasee kaqi ani amidaqa.

<sup>9</sup> Miqi qufanoo Eesaufa narí qimaminoo qinau. Qinindi moomoo maridanoo aneenaindi anenna kai maraa.

<sup>10</sup> Miqi qufanoo Yakooboofa qinau. Qinee ani aqoondikiqa amunna ainainausa kaqi maraa. Anee qini kaaqa aqoondi kiannanara qinee ani oori Anutuna ooriara foora qafaidaqa.

<sup>11</sup> Qinee ani amiraree qimasee maree anunna ainainausa maraa. Anutufa qini amiqi amiqimma qiseenoo qini didimari aiqama ainainausa qiminoo. Yakooboofa maraanifeera afeekaiki marufanoo Eesaufa maranau.

<sup>12</sup> Eesaufa Yakooboona qimaminau. Doo uqeeraina anindiri fua qinee ani oorinni fuanana anee qini qinaaqianna ania.

<sup>13</sup> Qufanoo Yakooboofa qinau. Oo qini uriqararafa anee iria, qini faiqi namu ummooqukiqa mariafaqa qinee sipsipa faqa misa aanaaqiuqara faqa iridaqa. Misa moodaa faasaana rarisqa fimarianaqa aiqama aandauqa kuqifaranoo.

<sup>14</sup> Anee indaaruu finaqa qinee ani afaqee kasooaqee qeeqa aandauqa faqa faiqi namu faqa fifinaqa Eedoomma maqa maaqaki ani paqurianauroo.

<sup>15</sup> Miqi qufanoo Eesaufa qinau. Doo amana qini faiqi namu akaqausa ani dadaaqi fifaranoo. Qufanoo Yakooboofa qaoo qinoo qinau. Qinee ani aqoondikunnanara minara kai firaa ainainee qidaqa. Doo amana qeeqa kai fuanauranoo.

<sup>16</sup> Eesau fa mi ufana iriseenoo doo mi faasaanna kai anirandee narí maqa maaqai Eedoomma maqa maaqai finau.

<sup>17</sup> Miqufanoo Yakooboofa Sukoota maqa maaqai oonureenoo narí maqa faqa narí aandau auqaana faqa usakanau. Minara mi maqusana auqureenoo Sukoota fee qinau.

<sup>18</sup> Yakooboofa Meesoopootamia maqa maaqaindari oonurandee amiqim-maseenoo Kannaana maqa maaqai Seekeemman maqusaki anireenoo narí uiqaana maqa mi maqusana adeedi usakanau.

<sup>19</sup> Usakaseenoo Yakooboofa mi maqana Amoorana Seekeemana akoona aiku asaku unnai wan handareeta 100 siruaa munnimmannoo feefaurinau.

<sup>20</sup> Feefauru maseenoo tatufirana suqara qainda auquseenoo mi kaqikaa maqusana auqureenoo Eeraa fee qinau. Mi auquna oosana Isaraee maqannaasa Anutu fee qinau.

## 34

### *Seekeemmafa Dinnaa nammarina mandaikamma amaqanau.*

<sup>1</sup> Moo kari Dinnaa nammarifa Yakooboosa Reea nammarisa niraamuna fannoo Dinnaa nammarifa Kanna maqanna aanaaseeuqa nindafaanee qimaseenoo finau.

<sup>2</sup> Seekeemmafa Amoorana amaaku Qifina aiku asaukukinaafa mi maqa maaqanakinaasa uriqararafa Dinnaa nammarina aanai paqurimaseenoo rarisanau.

<sup>3</sup> Mifa qafuofanoo Dinnaa nammarifa kaaqa amiqirafa marufanoo amuqusa mandaikufanoo amiqira ufannoo mi manaqana amuqusa reen-deeniane qimasee amiqira ufauqa qinau.

<sup>4</sup> Seekeemmafa narí akoona Qamoorana qimaminau. Anee maa manaaqana feefaurumma qiminaqa qinaaqara maraa.

<sup>5</sup> Yakooboofa narí araamuna Dinnaa nammarina rarisoonara iriseenoo kasoo inoo marinau. Narí faiqi namu narí aandausaa rakisi marusa nianai marufanoo nifeesi marinau.

<sup>6</sup> Seekeemmana akoofa Ammoorafa Yakooboona faqa ufa qirara finau.

<sup>7</sup> Oonuroofaqa kai Yakooboona faiqi namu aandausaa rakisiusa aniraqau. Misa Dinnaa nammarina rarisoonara irufanoo sia faiqi auqaqaa ira ainaina marufaqa kaaqa niraqaqeenoo nifai sandurinau. Seekeemmafa Yakooboona araamuna rarisoonannoo Isaraee maqannaasa nuqu mara maree quminau.

<sup>8</sup> Qamoorafa maaqi qimasee Yakooboona qimaminau. Qini qimaaku Seekeemmana irirafa ani araamunara firaqoo aqufifaqa ani qimamidaqa. Amanee mina maraannoo fee.

<sup>9</sup> Sainaaqaa maasa moodaanaki kira ufa qimasaanaqa kaqi ani maqanna faqa qini maqanna faqa kaqi narí maree narí maree iaqa.

<sup>10</sup> Miqi mandaanaqa innee maa maqanasaa maridaqa kaqi dapi maa maqa maaqanaki oonuree aniree idaqa maqa akausa mariaqa.

<sup>11</sup> Seekeemmafa Dinnaa nammarina akoona faqa asooqmaaka faqa qimannimino qinau. Innee qini didi marindee masaifaqa inni nidi mari ainaina nimianaaura.

<sup>12</sup> Inni nidi mari ainainnara qimaqimifaqa nimianaaura. Fira feefauruara qifaqa nimianaaura. Innee qiniara mina maraannee qimasee innee irafandinna ainainna kai nimianaaura.

<sup>13</sup> Miqi qimasoofaqa Yakooboona faiqi namu nári nisookina rarisoona iriseeqa akaru qira ufa Seekeemmana faqa mina akoona Amoorana faqa qimannimiqau.

<sup>14</sup> Maaqi qimasee qimamiqau. Maasa sia amana qeeqa dauna nifaaqa ati sia aukirausa nimianauna. Miqiga maasa firaqoo qisauruanoora.

<sup>15</sup> Innee maasa daanna reeqa inneeqa faiqi namu nifaaqa ati aukusaifaqa minara kai maasa eedoo qianaunoo.

<sup>16</sup> Miqimmasaifaqa maasa inniara eedoo qimasee inni faqa narí maree narí maree ifaranoo. Maasa inni qambaana maridaqa inni faqa moodaa maqanna marianaunoo.

<sup>17</sup> Innee sia mi ufanara eedoo qimasee nifaaqa ati ateekaifaqa maasa qeeqa dauna afiqamaree doo fuanaura.

<sup>18</sup> Mi ufausara Qamoorafa faqa mina amaaku Seekeemmana faqa iriseeqa amanee qiqau.

<sup>19</sup> Seekeemmana kai kaqi uqanna inoo misa qimamundee inau. Mifa Yakooboona araamunara aidi marunara miqinau. Seekeemmana narí aiku asaukukiqari kaaqa uriqararafa marinau.

<sup>20</sup> Amoorafa narí amaaku Seekeemmasandiri ufa suqimaru maqusanasaa faandauna kooqiki oonuree nári maqusanaki marusa maaqi qimasee qimanniminu.

<sup>21</sup> Maa fasiqausa aqoondiuqa maridaqa. Saifaqa maa maqanasaa maridaqa mana mana iqa nuaqa. Maa maqafa firaafa maridanoo. Misa faqa amana marifaranoo. Maasa misa niraamuqmaaka maraanaqa misa faqa maasaindi mareefaranoo.

<sup>22</sup> Maa fasiqausa maasa qambaana marirara eedoo qidaqa moodaa mariranaki mariranara eedoo qidaqa. Maasa misa naanna reeqa qeeqa faiqi namu akoonaiqiuqa nifaaqa ati ateekaaqeera qidaqa.

<sup>23</sup> Maasa miqianaqa misaki sipsipa burimakau aina marifa maasaindi kammiannoo. Anifaqa eedoo qianaqa maasa qambaana mariaqa.

<sup>24</sup> Aiqama mi maqusanakinaasa Qamoorana faqa Seekeemmana faqa ufa iriseeqa eedoo qimasee aiqama akoonaiqi qisakoosa nifaaqa ati auku aqiqau.

<sup>25</sup> Qaarammoo faasaana aiqaroofaqa nifaaqa ati aukuqoosa firaqoo nammuana nidafi marufaqa Yakooboona amaaku qara Simeeoonafa faqa Reefifa faqa miqanda Dinnaa nammarina asooki qanda nári faaqaana qara mara maree umee kai Seekeemmana maqusai ooru reeqara aiqama faiqi kumaaraa naru taikaqau.

<sup>26</sup> Qamoorana faqa Seekeemmana faqa narusee Dinnaa nammarina Seekeemmana maaqakinaana afiqamaree doo quqasee fiqau.

<sup>27</sup> Narusoofaqa Yakooboona faiqi namu akaqausa inaaqianna oonu reeqa nári nisookina rarisoona akiiqara mi maqusanakina aiqama ainaina maraqau.

<sup>28</sup> Misa sipsipauqa faqa burimmakauqa faqa doonkiuqa faqa aiqama ainaina mi maqusanaki maruna faqa mi maqusana atiqara maru ainainausa aiqama maraqau.

<sup>29</sup> Misa aiqama amiqira ainaina kai maraqau. Aiqama faiqi anaasee faqa maraqau. Aiqama maaqakinaa ainainauqa faqa maree fiqau.

<sup>30</sup> Yakooboofa miqunara irinoo Simeeoonna faqa Reefina faqa maaqi qimasee qimanniminu. Inneeqara qini ummaaraki quqaqisaafanoo. Kannaa maqannaasa faqa Peerisaa maqannaasa faqa aiqama maa maqa maaqanaki mariasa qiniara fidiqaammifaranoo. Qini faiqi sia moomoo

mariafaqa, misa aiqama moodaanaki aniree qini dariqa aiqama maasa faiqi anaasee kuridi nimaqeeffaranoo.

<sup>31</sup> Yakooboofa miqi qufaqa miqanda narí qimamiqa qiqau. Maasa sia geeqa qisookina quqaqaanaqa aanasaa aanaaseera foora kaqi maraqa nifaranoo.

## 35

### *Anutufa Beeteera maqusaki Yakooboona amiqira afaaqooqa aminau.*

<sup>1</sup> Mi fasannai Anutufa Yakooboona qimaminoo qinau. Anee doo findi finana Beeteera maqa maaqaki oonu maria. Anee aneenna afasaana Eesaunara rufisee sandoonaqa ani afusaa kooroo iafanna Anutusa tatufirana suqaqimira qainda miqoo oonuree auqua.

<sup>2</sup> Yakooboofa iriseenoo narí aiku asauku faqa narí faqa marusa faqa qimannimino qinau. Moo maqannaasa unnaqira anutusa uaqeeianauga mara aquaqa. Mara aquuseqa inneqa nifaqa anukamasee amiqira qamunna afisuaqa.

<sup>3</sup> Maasa maaqooqari quqasee Beeteera maqa maaqai oonureeqa qini ummaara aukwana dadaaqi mari Anutuna qinee aiqama atinai nunanoo qini faqa mari Anutuna tatufirana suqara qainda auquanauranoo.

<sup>4</sup> Miqi qimasoofaqa misa aiqamausa iriseeqa nariqa moosaaqaraa unnaqira anutusa maraqa nuna faqa naaqooki quqee maru fidinaanuna faqa Yakooboona amufanoo umareenoo Seekeemma maqusaki arookasa aaqa maqa indufusee minaki akundanau.

<sup>5</sup> Akundamaseenoo Yakooboofa faqa narí faiqi namu faqa doo quqasee fufanoo firaa rufiarafa mi saqanna maru maqusausaki maru fasiqausa rafaqaqafufaqa sia nifaqasee nariqau.

<sup>6</sup> Yakooboofa aiqama narí faiqi namu faqa fifufanoo Rusa maqusa ki Kannaana maqa maaqaki oonuranau. Maqee mi maqusana auqu Beeteera fee qidaqa.

<sup>7</sup> Mifa miqoo oonureenoo tatufirana suqara ooni qainda auquseenoo mi maqusanaki Anutufa uainaina afaafau reenoo Beeteera fee qinau. Yakooboofa ooqai narí afasaanara rufisee sandeenoo miqoo aniroofanoo Anutufa miqoo mina afusaa koorouqoo marunara auqureenoo Beeteera fee qinau.

<sup>8</sup> Miqi qimasee miqoo marufanoo Reebeeka nammarina ainainira maanaaqa Deebooraa nammarifa kuqufufaqa arookasa ameemaanai suani afu ataaqee qaannai Beeteera maqusa dinni atinai akundaqau. Akundamasee mi maqusana auqureenoo ikiraqara saqari fee qiqau.

<sup>9</sup> Yakooboofa Meesooootamia maqa maaqaindari oonu randee ani marufanoo Anutufa kaifaa mina afunni kooroommafufanoo amiqira afaaqooqa qimamaqanau.

<sup>10</sup> Miqimmaseenoo Anutufa qimaminau. Ani auqu Yakooboofa maridanoo, maqee maaqooqari oosana arasee Isaraeerafa marinnaranoo. Miqi qimaseenoo Anutufa mina auqureenoo Isaraeeranee qinau.

<sup>11</sup> Miqi qimaseenoo Anutufa kafa Yakooboona maaqi qimasee qimaminau. Qinee aiqama afeeka faqaa Anutusa maridaqa qimamidaqa. Anee moomoo faiqi faqaafa maria. Akaqa maqannaasa ani aiku asaukukiqari marifaranoo. Anee karaambaiqauqa ninaakufa marinnaranoo.

<sup>12</sup> Qinee Abaraqaamma faqa Isakeena faqa nimiafanna maqa maaqana ani faqa ani aiku asauku kasooqaqee kambiqainausa faqa nimianauro.

<sup>13</sup> Anutufa miqi qimaseenoo Yakooboona qimamiseenoo doo quqaseenoo finau.

<sup>14</sup> Yakooboofa mi maqusana Anutufa qimamuqoo miqoo ooni marasee daaqoo auqaanifee qimaseenoo rakiqaseenoo uainna nammari qumareenoo mi oonina adia amaqaseenoo oorifa fadameena faqa adianau.

<sup>15</sup> Miqimasee mi maqusana auqu Beeteera fee qinau.

*Raseera nammarifa eeraqanu ufafa.*

<sup>16</sup> Yakooboofa nari faiqi namu faqa Beeteera maqusa quqasee Eefarataa maqusai fuanee qimasee aanai fimarufanoo Raseera nammarina faiqi maqarafa arinau. Arufanoo firaaqoo uqanna aupuranau.

<sup>17</sup> Raseera nammarina aidafirafa kaaqa mandaika uqanna ufanoo mina dadaaqi maru aanaaseefa qinau. Raseera sia rufiaa, moo akoonaiqi maqaananoo.

<sup>18</sup> Maqaseenoo Raseera nammarifa doo kuqiraridanoo aanna taikee marufanoo mi faiqina auqureenoo Beenooni fee qinau. Mina akoofa auqu reenoo Beensaminna fee qinau.

<sup>19</sup> Raseera nammarifa kuqufufaqa Eefarataa maqusai fimaru aannana afainni akundaqau. Maqee miqoo Eefarataa maqusara Beeteereeqemma maqusa fee qidaqa.

<sup>20</sup> Yakooboofa aaqoo auqaanifeera ooni miqoo rakiqanau. Maqee kaqi mi onifa Raseera nammarina madika mariuqoo maridanoo mi madikanara kooroidanoo.

<sup>21</sup> Miqooqari Isaraeerafa findifinoo moo maqa maaqai Eedeera kisaqa ooni maaqa usakaqoona dinni atinni nari uiqaana maaqa usakanau.

*Yakooboona faiqi namu nuqu.*

*(1 Stori 2:1-2)*

<sup>22</sup> Isaraeerafa mi maqa maaqanaki marufanoo Reeubeennafa nari akoona anaaqa Biriqaa nammarina nari ainainira maanaaqa maraqoona sakasee faiqanau. Isaraeerafa mi ufana irufanoo arana qanau.

Isaraeerana faiqi namu qisauku qara taikasee qikunni ooqu qaara marasee 12 mariqau.

<sup>23</sup> Reea nammarina faiqi namu maaqimmiqa mariqau. Reeubenafa indaaruaafa Yakooboona ooqa faiqi marinau. Mina aanaaqianaafa Simeeonafa faqa Reefifa faqa Yudafa faqa Isakaarafa faqa Seeburunafa faqa mariqau.

<sup>24</sup> Raseera nammarina faiqi namu Yooseefaasa Beensaminna mariqau.

<sup>25</sup> Raseera nammarina ainainira maanaaqa Biriqaa nammarina faiqi namu Dannaafa faqa Napatarifa faqa mariqau.

<sup>26</sup> Reea nammarina ainainira maanaaqa Siripaa nammarina faiqi namu Kadafa faqa Aseerafa faqa mariqau. Mi faiqi namusa aiqama Meesoopotamia maqa maaqai kambiqaqau.

*Isakeefa kuqu ufafa.*

<sup>27</sup> Yakooboofa nari akoofa Isakeefa unnai finau, Mamareena maqusaki Qeeboorona maqusa aaqa Abaraqaammafa faqa Isakeefa faqa mariuqoo finau.

<sup>28</sup> Isakeefa 180 aukwana maranau.

<sup>29</sup> Maraseenoo kuqufufaqa mina faiqi qara Eesausa Yakooboosa akundaqau.

## 36

*Eesauna aiku asauku nuqu.*

*(1 Stori 1:34-37)*

<sup>1</sup> Eesauna aiku asauku marusa maaqimmiqa mariqau. Mina moo auqa Eedoomma fee qimariqau.

<sup>2</sup> Eesaufa Kannaana maqannaa anaaseeuqa maranau. Indaaru maroo anaaseena auqu Adaa nammarifa marinau. Mifa Qeeta maqannaa fasiqa Eeroona araamuna maranau. Mina aanaaqiana maroo anaaseena auqu Ooqooribammaa nammarifa maranau. Mifa Qifita maqannaa fasiqa Sibeeona amaaku Annaana namarina araamuna maranau.

<sup>3</sup> Mina aanaaqianna maroo anaaseena auqu Baseemata nammarifa marinau. Mifa Isamaeerana araamuna Neebaiotana asookifa marinau.

<sup>4</sup> Eesauna indaaruqaa anaasee Adaa nammarifa faiqi Eerifasana maqanau. Moo anaasee Baseemata nammarifa Reeueerana maqanau.

<sup>5</sup> Moo anaasee auqu Ooqooribammaa nammarifa Yeeusana faqa Yaramana faqa Koorana faqa maqanau. Eesauna mi faiqi namusa miqimmasee Kannaana maqasaa kambiaqau.

<sup>6</sup> Eesaufa nari aanaaqmaaka faqa nari faiqi namu faqa nari araamuqmaaka faqa aiqama mina maaqaki mariusa faqa aiqama nari aandauqa faqa aiqama nari qumiasana Kannaana maqusai maridanoo maraqoona aiqama mara mareenoo Yakooboofa maruqoo qari nianasaa moo maqa maaqai finau.

<sup>7</sup> Eesaufa faqa Yakooboofa faqa maru maqafa sia amana misa dadaaqi-aqaa qufaqa Eesaufa quqasee moosaa finau. Misa kaaqa moomoo andau ainaina marufaqa minara sia amana moodaanaki mariqau.

<sup>8</sup> Eesaufa Eedoomma maqa maaqakina amuaqu namusaa marinau.

<sup>9</sup> Eesauna aiku asauku maaqimmiqa mariqau. Misa Eedoomma maqannaasa ninaakusa marinau.

<sup>10-13</sup> Eesauna anaqa Adaa nammarina amaaku moodaa Eerifasafa marinau. Eerifasafa moodaannai qisauku faiqi maqanau. Teemmanafa faqa Oommarafa faqa Seefoofa faqa Katammafa faqa Keenasafa faqa mariqau. Moo anaasee Timinaa nammarinasaa moodaa akoonaiqi Amareekana maqanau. Eesauna moo anaasee Baseemata nammarifa akoonaiqi moodaa Reeueerana maqanau. Reeueerafa qaara faqa qaara faqa faiqi akoonaiqi maqanau. Naqatana faqa Seeraana faqa Sammaana faqa Misana faqa maqanau.

<sup>14</sup> Eesauna moo anaasee Ooqooribammaa nammarifa Anaana araamuna marinau. Anaafa Sibeeona amaaku marinau. Mi anaaseefa faiqi qaaramoo maqanau. Yeeusana faqa Yaramana faqa Koorana faqa maqanau.

<sup>15-16</sup> Miqimmasee Eesaunakiqari aruaki kambiqarusa mariqau. Eesauna ooqa faiqi Eerifasafa maa maqannaasa ninaakufa marinau. Teemanaa maqannaasa faqa Oomaraa maqannaasa faqa Seefoo maqannaasa faqa Keenasaa maqannaasa faqa Kooraa maqannaasa faqa Katamaa maqannaasa faqa Amareeka maqannaasa faqa ninaakufa marinau. Misa aiqamausa Eesauna anaqa Adaa nammarinakiqari kambiqarusa mariqau.

<sup>17</sup> Eesauna amaaku Reeueerafa maaqimmasee maqannaasa ninaakufa marinau. Naqataa maqannaasa faqa Seeraa maqannaasa faqa Sammaa maqannaasa faqa Misaa maqannaasa faqa ninaakufa marinau. Aiqama misauqa Eesauna anaqa Baseemata nammarinasaaqari kambiqarusa mariqau.

<sup>18</sup> Kaifaa maa maqannaasa Eesauna anaafa Ooqooribamma nammarina araamuna Annaa nammarinasaqari kambiqaqau. Yeesa maqannaasa faqa Yamma maqannaasa faqa Kooraa maqannaasa faqa mariqau.

<sup>19</sup> Aiqama mi maqannaasa Eesaunakiqari kambiaqa mariqau.

*Seeirana aiku asauku nuqu.*

*(1 Stori 1:38-42)*

<sup>20-21</sup> Eedoomma maqannaasa miqoo maridaqa rainasee qaara maqannaasaikammiga mariqau. Misa ninaakufa Seirafa Qoora maqannaafa marufaqa minasaa aruaki maaqimmasee kambiaqau. Rootanafa faqa Soobarafa faqa Sibeeoonafa faqa Annaafa faqa Disoonafa faqa Eeseerafa faqa Disanafa faqa minamusa Eedoomma maqannaasa ninaakusa mariqau.

<sup>22</sup> Rootanafa Qoorina oosana faqa Qeemmana oosana faqa ninaakufa marinau. (Rootanana auna Timinaa nammarifa marianau.)

<sup>23</sup> Soobarafa Arafana oosana faqa Manaqatana oosana faqa Eebarana oosana faqa Seefoona oosana faqa Oonamana oosana faqa ninaakufa mariqau.

<sup>24</sup> Sibeeoonafa akoonaiqi qaaraqanda maqanau. Miqanda nuqu Aiaafa faqa Anaafa faqa mariqau. (Anaafa nari akoonna Sibeeoonana doonkiuqa mareenoo andanda naaqeera kaasau maqa maaqaki munusoofaqa neemarufanoo rakisidanoo ida qeemaru nammarifa maqakiqari ururee maruna paqurinau.)

<sup>25-26</sup> Anaafa Disoonafa faqa mina auna Ooqooriba nammarina faqa nikoofa marinau. Disoonafa Qeemadana oosana faqa Eesabana oosana faqa Itarana oosana faqa Keerana oosana faqa ninaakufa marinau.

<sup>27</sup> Eeseerafa Biriqana oosana faqa Saafana oosana faqa Akana oosana faqa ninaakufa marinau.

<sup>28</sup> Disanafa Usana oosana faqa Arana oosana faqa ninaakufa marinau.

<sup>29-30</sup> Maaqimmasee Qooranasaqari kambiqoo maqannaasa Eedoomma maqa maaqaki mariqau. Rootanana maqannaafa faqa Soobara maqannaafa faqa Sibeeoonafa maqannaafa faqa Annaa maqannaafa faqa Disoonafa maqannaafa faqa Eeseera maqannaafa faqa Disana maqannaafa faqa mariqau.

*Eedoomma maqannaafa karaambaiqa nuqu.*

*(1 Stori 1:43-54)*

<sup>31</sup> Isaraee maqannaafa karaambaiqa sia maru kamuqoo maa fasiqausa Eedoomma maqa maaqaki karaambaiqauqa mariqau.

<sup>32</sup> Eedoomma maqannaasa indaaru rakisi nimaqoo karaambaiqana auqu Beerafa marinau. Beeorana amaaku marinau. Mifa Dinabaa maqusanaasa karaambaiqa marinau.

<sup>33</sup> Beerafa kuqufanoo Seeraana amaaku Yoobabafa karaambaiqa marinau. Mifa Boosaraa maqusanaafa marinau.

<sup>34</sup> Yoobabafa kuqufanoo Qusamafa Teemana maqa maaqakinaafa karaambaiqaikinau.

<sup>35</sup> Qusamafa kuqufufanoo Beedadana amaaku Adadafa karaambaiqaikinau. Mifa Midianna maqannaasa Mooaba maqa maaqaki naru nifaqaaqa maseenoo Adadafa Afitaa maqusaki karaambaiqa marinau.

<sup>36</sup> Adadafa kuqufufanoo Samarafa karaambaiqaikinau. Mifa Masareekaa maqusakinaafa marinau.

<sup>37</sup> Samarafa kuqufufanoo Saurafa Reeqooboota maqusakiqari Eeufara-teesa nammari adeedi marufa karaambaiqaikinau.

<sup>38</sup> Saurafa kuqufufanoo miqooqari Akaboonana amaaku Baaraqanafa karaambaiqa marinau.

<sup>39</sup> Baaraqanafa kuqufufanoo Qadarafa karaambaiqaikinau. Mifa Pau maqusanaasa karaambaiqa marinau. Mina anaaqa auqu Meeqetabeera nammarifa Maatareeda nammarina araamuna marinau. Maatareeda nammarifa Meesaqabana anaiqi marinau.

<sup>40-43</sup> Eesaufa Eedoomma maqa maaqakina maru maqusausa kinaasa ninaakufa marinau. Timina maqannaasa faqa Arafaa maqannaasa faqa Yee-teeta maqannaasa faqa Ooqooribammaa maqannaasa faqa Eeraa maqannaasa faqa Pinoona maqannaasa faqa Keenasa maqannaasa faqa Teemana maqannaasa faqa Mibasara maqannaasa faqa Makadieera maqannaasa faqa Iramma maqannaasa faqa ninaakufa mariqau. Misa maru maqusausa nariqa ninaakusa nuqu nifaafau ramaqoofaqa marinau.

## 37

### *Yooseefaana faqa mina afasausamara faqa ufa.*

<sup>1</sup> Yakooboofa nari akoofa Isakeefa mariu maqa maaqana Kannaana maqa maaqaki miqoo kai marinau.

<sup>2</sup> Maa ufafa Yakooboona faiqi namu ufa maridanoo. Yooseefaafa ku-maaraa maridanoo qisauku qara taikasee qiku dinni taikasee dinni oonu qaara marasee 17 aukwana faqaafa maridanoo nari afasausa faqa sipsipauqasaa faqa mimmiuqasaa faqa rakisimarinau. Nari akoona ainainira anaasee qara Biriqaa nammarisa Siripaa nammarisa faiqi namu faqa nidanoo rakisi marinau. Mina afasausamara manda oosana auqoonara nari akoona qimami marinau.

<sup>3</sup> Yakooboofa aiqama nari faiqi namuara aidimaruna uraaqaramaseenoo Yooseefaana aidi marinau. Mifa asooqa namuki maqoonara kaaqa minara aidi marinau. Mifa kisaqa qamunna kisaqa asauku faqaana auqu aminau.

<sup>4</sup> Mina afasausamara qafuofanoo misa nikoofa Yooseefaana aidi marufa uriqaranoo marufaqa misa firaqoo uqanna naundura mandaiki marufaqa mina faqa ufa qimariqau.

<sup>5</sup> Moo eendaki Yooseefaafa qainammaseenoo qafanau. Minara nari afasausa mara qimannimufaqa firaqoo uqanna fidiqaamma amaqaqau.

<sup>6</sup> Yooseefaafa maaqi qimasee nari afasausamara qimanniminu. Qini maa qainnana iriaqa.

<sup>7</sup> Maasa aiqamausa qafuqaki maridaqa raisa fooqaairana ateekeese rumbasee narisaa narisaa mundiiqaunanoo innindi fannoo maqasaa aquifanoo qinindi fannoo andeeqasee kikiqinoo mariinoo. Innindi fannoo qinindi oosanaki aquifanoo fiqumma datimafinoo ammuqu namu rambaqaki oosanai quminoo.

<sup>8</sup> Miqi qimasoofaqa mina afasausamara aqiqa qiqau. Kasooaqee anee karaambaiqaika mafi maasa rakisiqimaqeenaree. Miqi qimaseeqa mifa qainunara faqa misara qunara faqa iriseeqa firaqoo fidiqaamma amaqaqau.

<sup>9</sup> Moo kari mifa kafa qaina maseenoo nari afasausamara qima niminu. Innee iriaqa qinee qaina moommiqa. Qinee qafaunanoo suani faqa uqoonu faqa qisaukuqara taikasee qikunni ooqu moodaa marasee 11 fasau namu faqa qini daumooki aniree ninuka tuqu naumoo amisee mariafaqa niqafeeqa.



<sup>10</sup> Mifa narí akoona faqa mi gainufana qimamufanoo mina akoofa aqinoo qinau. Naqaa ira qaina fee inanee. Anee aneenna anoonara faqa aneenna afasausa marara faqa qiniara faqa ani aramandunnai ninuka tuqu naumoo amisee mariaqee fee qidane.

<sup>11</sup> Yooseefaana afasausa mara narí nikaqara nirana qeemarinau. Miqi marufanoo mina akoofa aiqama ufara kaqi kai irimarinau.

*Yooseefaana Midianna maqannaasa nimisee feefauru maroo ufafa.*

<sup>12</sup> Moo kari Yooseefaana afasausa mara narí nikoona sipsipa mara maree Seekeemma maqusai karasa naaqeera nifiqee fiqau.

<sup>13</sup> Oonu marufanoo Yakooboofa Yooseefaana qimaminoo qinau. Ani afasausa mara Seekeemma maqusai mariannai fua. Miqi qufanoo Yooseefaafa qinau. Qinee firara deedaqidaqa.

<sup>14</sup> Mina akoofa maaqi qimasee qimaminau. Anee oonureenana qafaa. Ani afasausa mara kaqi fee maridafee. Aandauqa faqa amiqiga fee maridee. Nindafamasee anireenana qimaqimia. Mina akoofa Heeboorona noopundukiqari aiqoofanoo finau. Yooseefaafa doo findifufanoo fifiufanoo Seekeemma maqusai oonuranau.

<sup>15</sup> Oonureenoo narí afasausa mararara randanoo nidanoo oonuree aniree inoo nufanoo faiqi moo fannoo qafamasee mina iramirinoo qinau. Anee nanaree randaidanee.

<sup>16</sup> Miqi qufanoo Yooseefaafa qinau. Qinee qeeqa qifasausa mara sipsipasaa rakisi mariasara randaidaqa. Amanee anee misa mariannaira qini qima qiminnaree.

<sup>17</sup> Miqi qufanoo mi fasiqafa qinau. Misa doo quqasee fiqau. Misa Dootana maqa maaqai firaree qufaqa iriqiafana. Yooseefaafa mi ufana iriseenoo narí afasausa ninaaqianna fifiufanoo Dootana maqa maaqai misa oonu paqurinau.

<sup>18</sup> Mifa nianai ani marufaqa mina afasausamara qafamaseeqa mina arirara tipundaariqau.

<sup>19</sup> Misa maaqi qimasee narí qimami narí qimami qimariqau. Doo gaininoo nifa anidanoo.

<sup>20</sup> Anifaqa mina aruseeqa mina iri mareeqee maa soorausaki mooki aqua. Miqimmaseeqa maasa minara kaasau aandau ariifoo qianauro. Maasa miqimasaanoo mina qaina fannoo naqaa fee iannoo.

<sup>21</sup> Reeubeenafa misa ufa iriseenoo Yooseefaana saa ititaidanoo qinau.

<sup>22</sup> Kaqi maa kaasau maqa maaqanaki maa nammari madikanaki aqua. Sia aidafirana amia. Mifa miqi qimasee narí kai qimiriseenoo qumee afigamaree narí akoofunnai munu aisarara miqi qinau.

<sup>23</sup> Yooseefaafa narí afasausamara maruqoo ururoofaqa qumarasee mina kisaqa qamunna kisaqa asauku faqaana raipaqiqau.

<sup>24</sup> Miqimmaseeqa nammari aadana usufu madikanaki aqiqau.

<sup>25</sup> Aquseeqa miqoo ooqu faqee narana naidaqa tautummasee qafoofaqa Isamaeerana aiku asauku aniqau. Misa Kireeata maqa maaqaindari Isipa maqa maaqai fimariqau. Misa adiafaa imarufaqa neemaru ainainna faqa afundimaru saqari anoonnana faqa mara kammeerasaa quqeesee Isipa maqannaasa feefauriaqera maree fiqau.

<sup>26</sup> Yudafa narí akaqaa fasaauqa qimanniminoo qinau. Inni saimbaga qeeqa qikaqa arusee mina fidika rafaafusee nana dadaaqiranee maraanauree.

<sup>27</sup> Anifaqa Isamaeerana aiku asauku maa aniraasa nimianaqa feefauru qimiaqa. Mifa maasa qikaqa maridanoo maasa moodaa fidika marinara sia mina aidafirana amia. Miqi qufaqa misa eedoo qiqau.

<sup>28</sup> Eedoo qimarufaqa Midianna maqusanaasa ainaina feefauri marusa aniroofaqa misa nári nikaqa Yooseefaana madikakinaana qubaqeeqee misa nimisoofaqa siruaa munnimma moodaa fasiqa aiku asauku taikasee 20 nimisee doo Yooseefaana maree Isipa maqa maaqai fiqau.

<sup>29</sup> Misa Yooseefaana nimuna Reeubeenafa sia qafanau. Mifa anireenoo madikaki ooqu qafofanoo sia marufanoo narí qamunna anaqaana qinau.

<sup>30</sup> Miqimmaseenoo Reeubeennafa narí akaqaafasaaauqa unnai oonuree qimanniminau. Yooseefaafa sia maridanoo qinee naqi fee ianauree.

<sup>31</sup> Miqi qufaqa misa mimmi arusee Yooseefaana kisaqa qammunna mina fidikaki raaraa iqau.

<sup>32</sup> Miqimmasee misa mi qammunnana mara maree nári nikoofunnai oonuree qimamiqau. Maasa maa qamunnana moosaa paquriqa, qafaa, ani amaakundi fee maridanoo fee.

<sup>33</sup> Yakooboofa mi qamunnana qafamaseenoo qinau. Qini qimaaku qamunna maridanoo. Kaasau aandau fannoo qini faiqi Yooseefaana arusee rakeekaammaseenoo fee qinau.

<sup>34</sup> Miqi qimaseenoo Yakooboofa narí qamunna anaqana qiiseenoo soofaara qamunna afisuseenoo kisaqasaa narí faiqira soofarida marinau.

<sup>35</sup> Marufaqa mina faiqi namu faqa araamuqmaaka faqa anireeqa nári nikoona aundura reendenira ufa qufanoo misa nikoofa qaoo qidanoo qinau. Qinee qeeqa faiqira iki raqaqa fuannaqbaqa kuqiqa kuqirausa mariannai fuanaura.

<sup>36</sup> Yakooboofa miqi marufaqa Midianna maqannaasa Yooseefaana afiqamaree Isipa maqa maaqai Pootifaana ainainira faiqi kianifeera amiseeqa feefauru maraqau. Isipa maqanna kinna maaqasaa rakisi marusakiqari Pootifaafa uriqarara oofisaa marufaqa amiqau.

## 38

### *Tamaara nammarifa Yudana akaru qinau.*

<sup>1</sup> Mi aukuanna Yudafa narí ainaina minniseenoo Qiraana faqa Adu-ramma maqusai ooqu marinau.

<sup>2</sup> Miqoo Yudafa Kannaana maqanna fasiqa Suana araamuna qafamasee maranau.

<sup>3</sup> Mariufanoo mi anaaseefa amuaqu qaikinoo akoonaiqi maqasoofanoo Yudafa mina auqu Era fee qinau.

<sup>4</sup> Kafaa mariufanoo mi anaaseefa amuaqu qaikinoo faiqi moo maqaseenoo mina auqu reenoo Oonanee qinau.

<sup>5</sup> Kaifaa amuaqu qaikinoo akoonaiqi moo maqaseeoo mina auqu Seeraa fee qinau. Yudafa Keesiba maqusai marufanoo mina anaqa fannoo Seeraana maqanau.

<sup>6</sup> Yudafa narí indaruqaa faiqi auqu Eerafa innooqa fufanoo anaasee Tammaara nammarina mara aminau.

<sup>7</sup> Eerana marirafa Karaambaiqa afusaa mandaika uqanna ufanoo kuqarinarinau.

<sup>8</sup> Kuqufanoo Yudafa mina akaqa Oonana qimaminoo qinau. Anee maasa oosana mareenana aneenna afasaana anaqa faqa aana finanoo faiqi maqasainanoo ani afasaana auqu sia taikaani.

<sup>9</sup> Oonanafa mina iriseenoo maaqi qimirinau. Qinee faiqi maqasaanoo sia qinindi kiandoo qimaseenoo narí afasaana anaaqa faqa aana nidanoo kaqinni kai nammari adiee marinau. Narí afasaana faiqi asumu sia marianifeera miqi marinau.

<sup>10</sup> Oonanafa mi oosanna maroofanoo Karaambaiqa qafoofanoo mandaika uqanna ufanoo mina kuqamma arinau.

<sup>11</sup> Kuqufufanoo Yudafa narí aanaakuqu Tammaara nammarina qimaminoo qinai. Aneenna akoona maqa maaqai oonu adeedaana kai marinaqa Seeraafa innooqa finaqa mina faqa ani kai amianaaura. Seeraafa faqa narí afasaqanda undee inoo mi anaaseena marasee kuquandoo mina akoofa miqiqinai. Miqi qufanoo Tammaara nammarifa narí akoona maaqai finai.

<sup>12</sup> Mariufanoo Yudana anaaqa Suana araamuna kuqinai. Kuqufufanoo soofaara taikaseeoo Yudafa narí aqoondi Aduramma maqusanaana mina auqu Qiraana faqa Timinaa maqusai narí sipsipa asaasi aukimaruna niqafarara ooru finai.

<sup>13</sup> Faiqi moo fannoo Tammaara nammarina qimaminai. Ani aanaakuqu Timinaa maqusai narí sipsipa asaasi ateekarara ooru fidanoo fee qinai.

<sup>14</sup> Tammaara nammarifa mi ufana iriseenoo adeedaana marida afisiu qamunnana raipaquseenoo moo qamunna afisumareenoo narí oori kaqikaa qamunnannai ititaseenoo Eenaimma maqusaki fimaru aannanasaa ooq-ufaaqee marinai. Tammaara nammarifa Seeraafa innooqanoo marifanoo sia qimiannoo fee qimasee miqinai.

<sup>15</sup> Yudafa ani qafoofanoo qamunnannai oori rafaafusee marufanoo dapi maraqa nua anaaseefa mifoo qinai.

<sup>16</sup> Miqi qimaseenoo aana afainni mi anaaseefa marufanoo oonuree qimaminai. Ani rarisama saana mina akiqara naqumma feefauru fee maridanoo fee. Yudafa mi anaaseenara sia narí aanaakuqu fee qimasee miqi qinai. Miqiqufanoo mi anaaseefa qinai. Mina akiqara nanee qiminnaree.

<sup>17</sup> Miqi qufanoo Yudafa qinai. Qinee mimmi moo timmusa ani amaqaanaura. Miqi qufanoo mi anaaseefa qinai. Anee moo ainaina qimiqaina uaqeeiana kasooaqee mimmi qiminna kari aninna amianaaura.

<sup>18</sup> Miqi qufanoo Yudafa qinai. Nana ainainee amianauree. Miqi qufanoo mi aneeseefa qinai. Aneenna asaukukinaa isaaqama faqa aneenna saunu faqa qimia. Miqi qufanoo Yudafa minauqa amiseenoo mi anaaseena faqa aana numasoofanoo amuaqu qaikinai.

<sup>19</sup> Tamaara nammarifa findi fufanoo narí maqusai oonureenoo dapi anaasee maraqaanu qamunnana raipaqusee adeedaana qamunna kaifaa afisinai.

<sup>20</sup> Yudafa narí qaqoondi Qiraanasaa mimmi aanaaqi timmusa quqaseenoo munu mi anaaseena amisee narí ainaina uaqeeuna oonu mini qimianne qufanoo oonu randoosiaa sia mi anaaseena paqurinai.

<sup>21</sup> Mifa oonureenoo Eenaimma maqusanaa fasiqauqa iramirinoo qinai. Yaiffee dapi maraqaanu aanaaseefa maa aannana afainni ooqufaaqeeiufa maridanoo fee. Miqi qufaqa misa qiqau. Sia maa maqusanaki dapi maraqaanu aanaaseefa maridanoo.

<sup>22</sup> Miqi qufanoo mi fasiqafa kafa anirandeenoo Yuda funnai oonureenoo qimaminai. Oo qinee sia mi manaaqana paquriqa. Mi maqusanakinna fasiqauqa faqa qiqaa, sia ooqaindari maasa maqusaki dapi maraqaanu anaaseesa marida miaafoo qia.

<sup>23</sup> Miqi qufanoo Yudafa qinau. Saina mi anaaseefa mi ainainausa uaqee iani. Faiqi maasara naanaidara qifooro qikooqaidanoo. Minara qinee mi anaaseena feefauru amirara qunana anee oonuree sia paquriananoo.

<sup>24</sup> Qaarammoo quqoona aiqaramafufanoo Yudana qimamiqa qiqa. Ani aanaakuqu fannoo dapi maraqanua aanaaseesara foora numaseenoo maqee mifa amuaqu qaikinoo maridanoo. Yudafa mi ufana iriseenoo qinau. Mi anaaseena maree munusee idarasaifanoo qaani.

<sup>25</sup> Misa afiqee fimarufanoo narí aanaakuqu Yudanara ufa quqanau. Qinee maa ainainausa faqaa fasiqa faiqi uqa faqa maridaqa. Qafamasee iria, yana ainainauqee maridanoo fee. Maa qisaaqamafa faqa mina sanda faqa saunu faqa yanaindi fee maridanoo fee.

<sup>26</sup> Yudafa qafamaseenoo qinau. Maa anaaseefa andeeqanoo maridanoo. Qinee kai aaqeeqa. Qinee qeeqa qimaaku Seeraana amiaqaana. Miqi qimaseenoo Yudafa sia kaifaa mi anaaseena faqa aana finau.

<sup>27</sup> Mi anaaseena faiqi maqarafa aniroofaqa qafeeqa qiqa. Maa anaaseefa qaara faiqi maqaannoo fee qiqa.

<sup>28</sup> Faiqi maqarara aupuree marufaqa moo fannoo naaree asauku quqasoo qumuroofanoo mina innaammuna afeesu aanaaseefa asauku qumaraseenoo taatuqee sanda rumbaseenoo qinau. Maafa indaaruaafa maridanoo.

<sup>29</sup> Miqi qimasoofanoo asauku raqandaamma maroofanoo moo kaiqeena naaree maqanau. Maqasoofanoo innaamunai afeesu aanaaseefa qinau. Anee naqaa fee ifanee kaqinnaindari anee naaree qumidanee. Minara mina auqureenoo Peereesanee qinau.

<sup>30</sup> Mina inaaqianna mina akaqa taatuqee sanda asaukusaa rumberana maqanau. Maqaseenoo mina auqu Seeraa fee qinau.

## 39

### *Pootifaana anaaqa faqa Yooseefaana faqa ufa.*

<sup>1</sup> Isamaerana aiku asauku Yooseefaana afiqamaree Isipa maqa maaqai muqusoofanoo Isipa maqanna karaambaiqa Faraona sundiauqa rakisirafa Pootifaafa Yooseefaana feefaurinau. Pootifaafa Faraofa maruqoo rakisi maru sundiasa uriqararafa marinau.

<sup>2</sup> Karaambaiqa Yooseefaana faqa maridanoo dadaaqi marufanoo aiqama ainaina auqoofanoo anoona kai kambiqee marinau. Mifa narí Isipa maqanna uriqararana maaqaki marinau.

<sup>3</sup> Pootifaafa qafuofanoo karaambaiqa Yooseefaana faqa maridanoo aiqama ainaina auqoofa anoona kambiqee marinau.

<sup>4</sup> Pootifaafa Yooseefaana arasammaseenoo uriqarara ainainira faiqikammaqoofanoo marinau. Miqimmaseenoo mifa Yooseefaana mareeqee narí maaqasaa faqa narí aiqama ainainasaa rakisirafaikamma qoofanoo marinau.

<sup>5</sup> Miqooqari Yooseefaana kai qidanoo karaambaiqa fannoo Isipa maqannaasa maaqakinaa aiqama ainaina faqa Pootifaana maaqakinaa ainaina faqa mina maqakinaa nara ainaina faqa amiqi amiqimma nimaqee marinau.

<sup>6</sup> Pootifaafa mana mana kaimmi marinau. Sia narí ainainara irimarinau, naranara kai irimarinau. Yooseefaafa amudaani tiafa amiqirafa uqanna mariau.

<sup>7</sup> Kaqi kaaqoo marinoo mina uriqararana anaaqa fannoo Yooseefaana aidufanoo qimaminau, aniree qini faqa faiqaa.

<sup>8</sup> Miqi qufanoo Yooseefaafa qaoo qimaseenoo qimaminoo qinau. Qini uriqararafa sia maaqaki quqaqai ainainausara iridanoo. Qinee marunanoo sia iridanoo. Mifa narí aiqama ainainasaa qini quqaqaiifaqa rakisidaqa.

<sup>9</sup> Qinee maa maaqanaki rakisira afeeka mifa uaqeindee kai masee uaqee idaqa. Mifa sia moo ainaina qini kukeeqa qimaqa qaifanoo maridanoo aiqama ainaina qimiqaifanoo, ani kai sia qimiqaifanoo. Naqi fee mandee fee qinee maa manda oosanna auqamasee fee Anutuna mandaikamma amaqaanauree.

<sup>10</sup> Pootifaana anaqa fannoo aiqama faasaana Yooseefaana qini faqa faiqaanee qimarufanoo Yooseefaafa sia mina faqa faiqanau.

<sup>11</sup> Moo faasaana Yooseefaafa naríara maaqaki ainaina auqanoo nufanoo sia moo ainainira faiqi minaki marinau.

<sup>12</sup> Nariaraa marufanoo mi anaaseefa mina siuta ani qumareenoo qinau. Doo ania. Aniree qini sakasee faiqaa. Miqi qimaseenoo Yooseefaana siutandauru qumaroofanoo mifa narí siuta kai raipaqueegee mina asaukuki quqaseenoo rafudamakufanoo madaanai sandanau.

<sup>13-15</sup> Madaanai sandoofanoo Pootifaana anaqa fannoo qafamaseenoo narí maaqaki ainaini maru faiqisa naaramaseenoo qinau. Innee maana qafaqa. Maa Qeeburu maqannaa fasiqana qini qifaqi fannoo maaqaki miniqaifa maasa mandaikamma qima qaidanoo. Mifa qini rarisara rifaqa qinee firaaqoo faaqa runanoo mifa narí siuta qini daaqa quqasee sandeenoo.

<sup>16</sup> Mifa miqi qimasee qimannimiseenoo mi siutana kaqi uaqeufannoo Yooseefaana uriqararafa aniranau.

<sup>17</sup> Aniroofanoo mi ufana kai qimaminau. Maa Qeeburu maqannaa anainira faiqina anee miniqaanafa qini maaqaki keeqafi qini faqa manda oosana auqarara inoo.

<sup>18</sup> Miqifaqa qinee faaqa runanoo narí siuta qini daaqa raipaqu quqasee madaanai sandeenoo.

<sup>19-20</sup> Yooseefaana uriqararafa mina irufanoo aranaqoofanoo Yooseefaana qumareegee uriqararausa rumbara fasiqauqa marunaki quqanau. Quqa-soofanoo minaki marinau.

<sup>21</sup> Marufanoo karaambaiqa Yooseefaana faqa maridanoo dadaaqida amiqi amiqimma amaqee marufanoo karabusasaa rakisi marufa Yooseefaana qafamaseenoo asasinau.

<sup>22</sup> Karabusasaa rakisi marufa Yooseefaana mareegee karabusauqasaa rakisiranaika minau. Miqimmasoofanoo Yooseefaafa karabusa maaqaki aiqama ainaina auqee maruna rakisirafa marinau.

<sup>23</sup> Karabusasaa rakisirafa Yooseefaafa rakisi maru ainainausara sia amiqimmasee iridanoo. Sia rakisi marinau. Karaambaiqa fannoo Yooseefaana faqa marunara aiqama ainaina mifa auqoofa anoona kai kambiqee marinau.

## 40

### *Yooseefaafa karafusaki marusa qainuna kooroo qimaru ufafa.*

<sup>1</sup> Kaqikaqoo marinoo Isipa maqannaa karaambaiqa uainna anoona tatimaru fasiqafa faqa mina feemu suqee marufa faqa nariqa uriqararana mandaikamma amaqaqau.

<sup>2</sup> Mandaikamma amaqasoofanoo mi qandara aranaqoofanoo narí sundi-auqara qufaqa qumaraqau.

<sup>3</sup> Qumaraseeqa sundiauqa uriqararana karabusa maqaki Yooseefaafa maru maqanaki quqanau.

<sup>4</sup> Mi qanda kisaaqasaa karabusaki marufanoo karabusasaa rakisirafa qufanoo Yooseefaafa misasaa rakisi marinau.

<sup>5</sup> Miqoo karabusaki maridaqa moo eendaki uainna tati marufa faqa feemu suqee marufa faqa qainiqau. Uainna tati marufa mina qaina oosana aaduma marinau. Feemu suqee marufa mina qaina oosana aaduma marinau.

<sup>6</sup> Mi kananaanna miqanda noori runusee marufanoo Yooseefaafa ani nindafeenoo iramirinoo qinau.

<sup>7</sup> Inneeqara nanaree kaaqa moomoo irira irida maridee.

<sup>8</sup> Qufaqa miqannda qiqaau. Maaqanda qaina maqaqee idaqa qaina oosana qimannimi marifa sia marifaqa maaqanda minara oonu mafi irida maridaqa. Yooseefaafa miqanda ufa iriseenoo qima nimiranau. Anutufa kai qaina oosana qimannimirana nimidanoo. Inneeqa qaina qima qimifaqa iria.

<sup>9</sup> Miqi qimasoo fanoo Faraona uainna nammari tati maru fasiqafa narí qaina maaqi qimasee Yooseefaana qimaminau. Qinee qafaunanoo uainna sanda qini doorinni marifaqa qafeeqa.

<sup>10</sup> Qaarammoo asaana minasaa marifaqa qafeeqa. Amanee ifaqa qafau nanoo afufeenaarifafa qafaunanoo qaqaama irafi akuqeenoo.

<sup>11</sup> Qinee karaambaifa Faraona kaafa uaqeeidaqa akuqamafina minaki anoona tatiisee munu amiqa.

<sup>12</sup> Yooseefaafa mina iriseenoo maaqi qimasee qimaminau. Sanda qaarammoo asaana qafaannana mina amana qaaramoo faasaana marinara.

<sup>13</sup> Qaaramoo faasaana taikainanoo Faraofa ani iduku aisainana kafa aneenna saikaki finnanoo. Anee ooqai mina uainna tatira faiqi maridana mina uainna kaafa amiunnandee inana kaifaa aminnanoo.

<sup>14</sup> Anee miqimma finana qiniara qimudao qimasee karaambaifa Faraona qimaminanoo qini dadaaqinoo iduku qisaani.

<sup>15</sup> Misa ooqai qini Qeeburu maqusaindaraana ummuara mamaree aniqau. Qinee maaqoo Isipa maqa maaqaki marida sia moo manda oosana mareeqa. Misa fifau qini karabusaki quqaqaafaqa maridaqa.

<sup>16</sup> Feemu suqee marufa narí aqoonnana qaina oosana qimamuna irufanoo amiqufanoo Yooseefaana qimaminoo qinau. Qinee faqa moo qainammifa. Qinee qaarammoo feemu difaani qumbiqarana qikiiaaqa akuqee idaqa qafeeqa.

<sup>17</sup> Meeraqooqaraa difaaniki oosana oosana feemu ainaina uriqararanaindi marifanoo ufiniuqa nee mariafaqa qafeeqa.

<sup>18</sup> Yooseefaafa mina qaina oosana iriseenoo maaqi qimasee narí qimaminau. Qaarammoo difaani qafaanafa qaarammoo faasaana maridanoo.

<sup>19</sup> Qaaramoo faasaana amana mina qaaramoo feemu difaani marifana qafaananoo. Qaaramoo faasaana aiqarainanoo Faraofa ani ani qumareenoo munusee anuka atekasee ani iri saqarisaa dirisainaqa ufiniuqa ani amaqi neefaranoo.

<sup>20</sup> Miqiqimasee qima nimisoo fanoo miqooqari mi qaaramoo faasaana aiqaroo fanoo mikari Faraona maqoo aukuanafa aniroo fanoo narana firaqoo suqaseenoo narí ainainasaa rakisi marusa nimiranau. Mifa narí uainna tati maruna faqa feemu suqee maru fasiqana faqa idukumaree mini narí ainainasaa rakisi marusa nifusaa quqanau.

<sup>21</sup> Idukuseenoo uainna tati maru fasiqana mareeqee ooqai mareeu saikanaki kafa quqasoofanoo uainna tatimarinau.

<sup>22</sup> Feemu suqee maruna idukuseenoo anuka atekasoofaqa sandannai mina qiri saqarisaa diriqau. Aiqama ainaina Yooseefaana ufamau andeeqaseenoo mimau kaimbinau.

<sup>23</sup> Uainna tati marufa kafaa Faraona ainainidanoo Yooseefaanara siamma irinau. Qaunusee marinau.

## 41

### *Yooseefaafa Faraona qaina oosana kooroou ufafa.*

<sup>1</sup> Qaara aukwana aiqaroofanoo moo eendaki Isipa maqannaa karaambaiqa Faraofa moo qaina maaqimmasee qafee fee qinau.

<sup>2</sup> Qinee Niru nammari afainni kikiqiga marida qafaunanoo qisauku dinni taikasee dinni ani qaara marasee 7 burimakau nifaaqa faqaasa urureeqa andanda nee mariafaqa qafeeqa.

<sup>3</sup> Neemarufaqa dinni qisauku taikasee dinni oonu qaara marasee 7 nimudaani aanaaqi nammariqari urureeqa indaaru qaasa naaqa nammari afainni kikiqamma fuafaqa qafeeqa.

<sup>4</sup> Nimudaani aanaaqiuqa nifaaqa faqaasa aiqama nambiqama saafaqa qafeeqa. Mi ainainausa qainasaa qafamaseenoo karaambaiqa Faraofa tauti findifinau.

<sup>5</sup> Mifa kaifaa afuki qaunduarufanoo faifufanoo moo qaininau. Sakumma moodaa oosana saa dinni qisauku taikasee dinni oonu qaara marasee 7 iranoo marufa aiqama anoona qumbi qumbiqirafa marufanoo qafanau.

<sup>6</sup> Kafaa mina aanaqianna moo qaina qafuofanoo dinni taikasee dinni ani qaraqanda marasee 7 sakumma moodaa oosanasaa iranoo marinau. Anoona siaifa narana maaqina kinaafa mandaikirafa sia anoona marufa, ufai fannoo raudaqoo fara foora marufanoo fifau akee kai marinau.

<sup>7</sup> Anoona siai sakummafa quandaku fanoo anoona faqaa sakumma aiqama namasanau. Mi qainna maseenoo Faraofa tauti findi fufanoo Boo moo gainammidaqee qinau.

<sup>8</sup> Mi kananaanna Faraofa findi fufanoo moomoo irirana maroosia Isipa maqannaa irirana faqaasa faqa afunee fasiqauqa faqa naaranau. Naaramaseenoo nari qainuna qimannimufaqa sia moo fannoo amana mina oosana nari qimamiqau.

<sup>9</sup> Minara tutu qidaqa randee marufanoo Faraona uainna tati maru fasiqafa Yooseefaanara iriseenoo Faraona qimaminoo qinau. Oo karaambaiqa maqee kai qeeqa furufariafanna oosanna oonu mafi iriseeqa kooroommasee qimamidaqa.

<sup>10</sup> Ooqai anee aanoo qimaseenana qini faqa feemu suqee maruna faqa aneenna sundia rakisirana maaqaki quqaqisanau.

<sup>11</sup> Moo eendaki maaqanda qaina qiqaafana. Mi qaina qanda naadu naadu oosana faqaa qaina qiqau.

<sup>12</sup> Minakina Qeeburu maqannaa kumaaraa moo fannoo, sundia rakisirana Pootifaana ainainira faiqi marufa maasa faqa marinau. Maasa qeeqa qaina qimamifananoo mifa mina oosana maasa qimaqiminau.

<sup>13</sup> Mifa gundee kaimminau. Anee qini saikaki kaifaa mara quqaqiseenana feemu suqee maruna d irinau.

<sup>14</sup> Faraofa mi ufana iriseenoo niqigoofaqa Yooseefaana karabusa kinaana aaqee uqanna afiqee aniqau. Mifa oosau suqaseenoo nari qamunna fuka afisumareenoo Faraona afusaa aniranau.

<sup>15</sup> Aniroofanoo Faraofa qimaminau. Qinee qainammasaunaqa sia moo fannoo mina oosana qimaqimia faqa iriqa. Anee qaina oosana kooroo qimarianafa mariannanara qimaqimiafaqa aaraidaqa.

<sup>16</sup> Miqi qufanoo Yooseefaafa qinau. Oo qini uriqararafa amiqirafa qinee qeeqa kai sia amanaikianauranoo. Anutufa kai qaina oosana qimannimira qiminaqa qimamianaaura.

<sup>17</sup> Miqi qimasoofanoo Faraofa narí qaina oosana Yooseefaana maqi qimasee qimaminau. Qainunnana qinee Niru nammari afainni kikiqiqa maridaqa qafeeqa.

<sup>18</sup> Qafaunanoo burimakau nifaaqa faqaasa dinni qisauku taikasee dinni oonu qaara marasee 7 nammariqari urureeqa andanda neemariafaqa niqafeeqa.

<sup>19</sup> Misa ninaaqianna miqi kaimmaseeqa dinni qisauku taikasee dinni oonu qaara marasee 7 misa nimana kai nimudaani aanaaqi urureeqa kikiqamma fuafaqa nindafeeqa. Miqira mandaikira burimakauqa sia ooqai Isipa maqa maaqaki mootinai mariafaqa qafeeqa.

<sup>20</sup> Nimudaani aanaaqi burimakauqa nifaaqa faqaasa namataikeea.

<sup>21</sup> Nambiqamaseeqa sia moo fannoo nifaaqa mareea, ooqai mariundee kai miqa mariafaqa qafeeqa. Nindafamaseeqa tauti findi fiqa.

<sup>22</sup> Qinee moo qaina faqa masee qafaunanoo dinni qisauku taikasee dinni oonu qaara maraseenoo 7 sakuma aiqama qumbi qumbiqirafa moodaa saqarisaa marifaqa qafeeqa.

<sup>23</sup> Mina aanaaqianna qafaunanoo kafaa moo sakuma saqarisaa dinni qisauku taikasee dinni oonu qaara maraseenoo 7 iranoo marifaqa qafeeqa. Mifa anoona siaifa ufai uqinoo rauda quqaqai fara foora marifaqa qafeeqa.

<sup>24</sup> Ira fifaqa qafaunanoo anoona siaifa indaaru iraina anoona sakumma nambiqamasaafaqa qafeeqa. Qinee mi qainnana afunee fasiqauqa qima nimunaqa sia moo fannoo mina oosana qimaqimia.

<sup>25</sup> Yooseefaafa mina qaina ufa iriseenoo Faraona qimaminoo qinau. Anee qainiannana oosana moodaara qaaraqanda qaina iananoo. Anutufa auqaaninna ainainnara qainasaa ani qimaminoo.

<sup>26</sup> Dinni qisauku taikasee dinni oonu qaara marasee 7 burimakau afaaqa faqaana qafaannana oosana dinni qisauku taikasee dinni oonu qaara marasee 7 aukuaana qafaananoo. Sakumma dinni qisauku taikasee dinni oonu qaara marasee 7 sakuma anoona qumbi qumbiqirana faqa qafaanafa mifa faqa miqikai inoo dinni qisauku taikasee dinni oonu qaara marasee 7 aukuaana maridanoo. Mi qaina qanda oosana moodaa maridanoo.

<sup>27</sup> Dinni qisauku taikasee dinni oonu qaara marasee 7 burimakau nimudaani aanaaqi nammariki ururaasa faqa dinni qisauku taikasee dinni oonu qaara marasee 7 sakuma anoona siaina qafaannana oosana 7 aukuanaki aandaroo firaafa mariannoo.

<sup>28</sup> Qinee qimamunandee kaimmiannoo. Anutufa narí auqaaninnanara ani uqafiqeenoo.

<sup>29</sup> Dinni qisauku taikasee dinni oonu qaara marasee 7 aukuanaki Isipa maqa maaqaki narana firaaqoo rairaa iannoo.

<sup>30</sup> Mina aanaaqianna kafaa miqi kai inoo dinni qisauku taikasee dinni oonu qaara marasee 7 aukuaana aandaroo naruannoo. Mi aandaroonaki mi rairaaira narannara qaunifaranoo. Aandaroo fannoo maqa maaqa mandaika uqanna masaannoo.

<sup>31</sup> Mi aandaroo aukuanai faiqí anaasee doo rairaaira aukuanara qaunu uqannaseefaranoo. Aandaroo firaafa mandaika uqanna irafa marianinnana miqifaranoo.

<sup>32</sup> Anee kaifaa kaifaa qainiannana oosana Anutufa mi ainainna ka-sooqee kuqaa miqiannoo.



<sup>33</sup> Minara anee aneenna maqannaasakina moo qafamaseenana irirana faqaa fasiqa mara quqasainanoo mifa Isipa maqa maaqasaa rakisiani.

<sup>34</sup> Anee akaqa rakisirausa quqasainaqa moodaannai qisauku taikasee dinni oonu qaara marasee 7 rairaaira aukuanakina oosana oosana narana moodaannai qisauku namu kinaana moodaa moodaa mara afeediaqa.

<sup>35</sup> Anee qimanniminaqa aiqama narana rairaaira aukuanakinaana suqu quqaaqa. Anee afeeka ufa nimisainaqa narana maqusa maqusaki suqu quqasee minasaa rakisiaqa.

<sup>36</sup> Mi narannafa dinni qisauku taikasee dinni oonu qaara marasee 7 aukuaana aandaroo firaafa anianinnanaki mi afeediranakinaana neefaranoo. Miqidaqa sia faiqi anaasee kuqifaranoo.

*Yooseefaafa Isipa maqannaasa uriqararafaikinau.*

<sup>37</sup> Faraofa faqa nari uriqarararusa faqa Yooseefaana iriranara eedoo qiqau.

<sup>38</sup> Miqi qimaseenoo Faraofa qimanniminoo qinau. Maasa sia amana moo fasiqa Yooseefaana uraqararana paqurianaura, Anutuna maraquna minaki marifa marinara saifanoo mifa kai mariani.

<sup>39</sup> Miqi qimaseenoo Faraofa Yooseefaana qimaminoo qinau. Anutufa kai maa aiqama ainainna ani uqafiqeenoo. Anee aiqamausa urinnaaqara masee firaa irirana faqaafa akooqoo mariananoo.

<sup>40</sup> Qinee ani quqasaanana qini maqa maaqasaa rakisinnaranoo. Aiqama qini faiqi anaasee ani ufa mau kai fifaranoo. Ani afeeka fannoo qini afeeka ameemaanai mariannoo.

<sup>41</sup> Miqi qimaseenoo Faraofa kafa Yooseefaana qimaminau. Qinee maqee ani mareeqee Isipa maqannaasa uriqararafai kammiga.

<sup>42</sup> Miqi qimaseenoo Faraofa nari asauku amukakinaa rinna firaa uriqarararusa rinna maruna raduku Yooseefaana asaukuki quqanau. (Yooseefaafa mi rinnanannai peennakina raaraa maseenoo papiqasaa atooqasoofaqa maaqanna maaqanna mina qafeeqa Faraona rinna akara fee qimaseeqa kaaqa rufieeqa mi papiqana saaqaraa ufara eedoo kai qimariqau.) Faraofa amiqira qamunna afisu amaqaaseenoo koorannai auqira kukukakana faqa rufu amaqaanau.

<sup>43</sup> Miqimmasoofanoo Faraofa uriqarararusa nifiqanoo nu qoosa karana Faraofa Yooseefaana amisoofanoo minasaa rakisira sundiauqa mina afunni fidaqa maaqi qimasee faaqaridaqa qiqau. Amaaraaqa amaaraaqa. Mi oosannannai Yooseefaana aiqama Isipa maqannaasa uriqararanaikinau.

<sup>44</sup> Faraofa kafa Yooseefaana maaqi qimasee qimaminau. Qinee uriqarararusa Faraosa qimamidaqa. Sia amana Isipa maqannaasi fasiqa moo fannoo nari aidiranannai moo ainaina auqaannoo. Mifa anisaa naaree iraannoo.

<sup>45</sup> Miqi qimaseenoo Faraofa Yooseefaana fuka auqu reenoo Safeenata Paneeanee qinau. Miqi qimasee mifa Yooseefaana anaasee aminau. Mi anaaseena auqu Aseenata nammarifa Pootifeerana araamuna marinau. Pootifeerafa Qeerioopoorisa maqusanaasa suani afuara innaaru qimarusa aanaiqikirafa marinau.

<sup>46</sup> Yooseefaafa moodaa fasiqa faqa moo fasiqa asaukuqara taikasee 30 aukuaana marasee Faraona ainainirana oosana aranau. Oosana araseenoo Faraona aiseenoo Isipi maqa maaqaki oonuree aniree idanoo aiqama atinai ninarinau.

<sup>47</sup> Qisauku dinni taikasee dinni ani qaara marasee aukuanaki Isipa maqa maaqaki narana moomoo kambiqafi rairaa inau.

<sup>48</sup> Mi aukuanna namunakinaa narana irairaa una Yooseefaafa maree-geenoo maqusakiaqa afeedinau. Mi moodaa moodaa maqusanaki mi maqusana fiq u fiqinoo maru maqanakinaa naranna marasee mi maqusanaki afeedinau.

<sup>49</sup> Mi naranausa unakiisoofanoo ooruku nammari afaiqaraa nukudara foora moomoo uqanna marufanoo Yooseefaafa asaana rusia minnisanau.

<sup>50</sup> Aandaroo aukuana sia ani marufanoo Yooseefaana anaqa Aseenata nammarifa akoonaiqi qaara qanda maqanau.

<sup>51</sup> Maqasoofanoo Yooseefaafa qinau. Anutufa qini dadaaqifaqa qeeqa aupurarana faqa qeeqa qikoona atiara iriranara faqa auniqa. Miqi qimaseenoo mifa narí indaaruaqa faiqi auqureenoo Mannasee nee qinau.

<sup>52</sup> Kafaa Yooseefaafa akoonaiqi moo maqaseenoo qinau. Anutufa maa maqa maqanaki qinee aupurarana maree marunnanaki faiqi qiminoo. Miqi qimaseenoo mifa narí inaaqianna faiqi auqureenoo Eefaraimmanee qinau.

<sup>53</sup> Qisauku dinni taikasee dinni oonu qaara marasee 7 aukuanaki narana irairaa imarufaqa Isipa maqannaasa asasiufa taikanau.

<sup>54</sup> Yooseefaafa undee kai inoo qisauku dinni taikasee dinni oonu qaara marasee irairaa ira aukuana aiqarroofanoo aandaroo kambiqanau. Aiqama maqa maaqaki aandaroo narinau. Isipa maqa maaqaki kai narana kaqi marinau.

<sup>55</sup> Mariufanoo Isipa maqa maaqaki faqa aandaroo narufaqa faiqi anaasee Faraoo funnai oonuree naranara faaqarida innaaru qufanoo mifa qinau. Innee Yooseefaa finnai oonu raifanoo mifa innandee innandee kai iaqa.

<sup>56</sup> Aandaroo firaafa Isipa maqa maaqaki aiqama atinai firaqoo narufanoo Yooseefaafa aiqama afeedira maqauqa atuqasoofaqa Isipa maqannaasa narana feefauri mariqau.

<sup>57</sup> Aiqama maqa maaqaki maru fasiqa aanaaseesa aandaroo firaafa naru faqa aiqama atinaindari narana feefaurirara Yooseefaa funnai Isipa maqa maaqaki aniqau.

## 42

*Yooseefaana afasausamara narana feefaurirara Isipa maqusai ooqu fu ufafa.*

<sup>1</sup> Yakooboofa Isipa maqa maaqai narana moomoo marunara narí faiqi namu qimanniminoo qinau. Innee naqaa fee ifaqee narana minni ooqu maraaqaana maridee.

<sup>2</sup> Isipa maqa maaqai narana maridanoo mifoo qiafaqa iriqa. Miqoo ooqureeqa akaqa narana feefaurumma maree murusaifaqa namasee sia kuqua.

<sup>3</sup> Miqi qufaqa Yooseefaana afasausa mara moo anaasee faiqi namu qisauku qara taikasee marusa narana feefaurirara Isipa maqa maaqai ooqu fiqau.

<sup>4</sup> Yakooboofa Yooseefaana akaqa uqanna Beensaminna sia aiqanau. Moo ainaina mina afaaqai kambiqaandoo qimasee rufiasee sia aiqanau.

<sup>5</sup> Aandaroo firaafa Kannaa maqa maaqaki narí marunara Yakooboona faiqi namu faqa moomoosa faqa narana feefaurirara ooqu fiqau.

<sup>6</sup> Yooseefaafa Isipa maqa maaqakinaasa uriqararafa maridanoo aiqama maqa maaqakinaasa feefauriaqee qimasee quqaqoofaqa feefauri mariqau. Yooseefaana afasausa mara ooquree Yooseena oorinni noorindari maqasaa kummaraqau.

<sup>7</sup> Yooseefaafa narí afasausa mara noori nindafoofanoo Yooseefaana irirafa kambiganau. Kambi qoofanoo sia misara iridanoora foora aranaiqi iramirinoo qinau. Innee yaindariffee anidee. Qufaqa misa qiqau. Maasa Kannaana maqusaindari narana feefau rirara qumidaqa.

<sup>8</sup> Miqi qufanoo Yooseefaafa misara iri marufaqa mina afasausa mara minara sia iri mariqau.

<sup>9</sup> Yooseefaana irirafa kambiga fufanoo mifa ooqai narí faiqi saa qain-unara oonu mafi irinau. Innee nipuraraa fasiqauqa mariafaqa nindafaida. Innee mai qumuree maasa aandaroo darifaqa ummooqukida mandaiki marunausa qumu qiqafararee qimasee qumuafanoo.

<sup>10</sup> Miqi qufaqa misa maaqi qimasee narí qimamiqau. Oo uriqararafa sia maasa miqianaura. Maasa ani ainainira faiqiara foora narana feefaurirara qumidaqa.

<sup>11</sup> Maasa moodaa fasiqa faiqi namu kai maridaqa. Maasa kuqaa ufa kai qimarunausa maridaqa. Uriqararafa maasa sia nipuraraa fasiqau maridaqa.

<sup>12</sup> Miqi qimasoofanoo Yooseefaafa nariqa qima niminoo qinau. Innee unna qimariafanoo. Maasa maqa maaqa mandaikinoo sia afeekaikinoo marina qafarara qumuafanoo.

<sup>13</sup> Misa mi ufana iriseeqa kafaa narí qimamiqa qiqau. Uriqararafa, maasa aiqama qisaukuqara taikasee qikunni ooqu qaara marasee 12 maridaqa. Kanna maqa maaqaki moodaa fasiqa faiqi namu mariafannanakiqari moodaafa kuqinau. Maasa ninaaqiannaafa maasa nikoona faqa maqusai kaqi maridanoo.

<sup>14</sup> Yooseefaafa mina iriseenoo kafaa qima niminoo qinau. Doo qinee qidaqa, innee nipuraraa fasiqauqa mariafanoo.

<sup>15</sup> Qinee maaqimmasee inni nimanammasee qafaanaura. Qinee Faraona auqusaa inni qima nimidaqa sia innee ooru fifaranoo maaqoo marifanoo inni nikaqa qumurinaqa oorufifaranoo.

<sup>16</sup> Innikiqari moo fannoo ooru inneeqa nikaqa afiqee qumuqa. Innee akaqausa sundiauqa faqa marifaqa innisaa rakisi marifaqa maasa innee qia ufana qimasee qafamasaana oorufifaranoo. Innee unna qifaqa kuqaa Faraona auqusa qimannimidaqa innee nipuraraa fasiqa marifaranoo.

<sup>17</sup> Miqi qimasee Yooseefaafa qufaqa misauqa rumbeegee karabusa maqaki quqasoofaqa qaaramoo faasaana mariqau.

<sup>18</sup> Qaaramoo faasaanasaa marisoofanoo Yooseefaafa maaqi qimasee qima niminau. Qinee Anutunara rufiee marunna fasiqausa maridaqa. Innee qini ufa mau fiqa amiqimmasee marifaranoo.

<sup>19</sup> Inniara kuqaa qira fasiqauqee qiaqeeera innikiqari moodaafa innee maria karabusanaki marinaqa innee akaqausa narana feefauru maqaana muru inneeqa faiqi anaasee nimifaqa naaqa.

<sup>20</sup> Innee ooruree inneeqa nikaqa inaaqianaana afiqeeqa qumuqa. Qumu raifaqa qinee inniara kuqaa ufa kai qimariasee qimasee sia kuqa narua-naura. Miqi qufaqa misa aiqamausa mina ufara eedoo qiqau.

<sup>21</sup> Eedoo qimasee narí qimami narí qimami qiqau. Innisaimbaqa kuqaa geeqa qikaqa mandaikamma amaqa qiafana. Mifa firaa ummaaraki maridanoo dadaaqiaqee qimarufaqa innisaimbaqa sia iriqiafana. Minara maasa maqee maa ummaaranaki maridaqa.

<sup>22</sup> Reeubeenafa misa ufa iriseenoo maaqi qinoo qinau. Qinee qaoo qiafana innee sia iriqau. Mifa kuquna akiiqara maasa maqee ummaara maraidaqa.

<sup>23</sup> Yooseefaafa misa qimaru ufana umee kai irimarinau, miqi marunara misa sia iriqau. Misa Yooseefaana faqa ufa qianee qimasee qimarufanoo moo fasiqa fannoo misa ufa quandee marinau.

<sup>24</sup> Yooseefaafa misa ufa iriseenoo quqasee umeenni oonureenoo ikiraqa seenoo oonu randee aninai. Iki raqarafa taikoofanoo ufaqirana amanaikufanoo oonu randee aninai. Anireenoo misakina Simeeoonnana qumarasee misa nifusaa rumbanau.

*Yooseefaana afasausa qumumaree Kannaana maqusai ooru fu ufafa.*

<sup>25</sup> Yooseefaafa narí ainainira faiqiuqa qimannimufaqa narana mina afasausamara uqa umbiqaseeqa misa munnimma kaifaa nariqa uqa adianai uqarumasee nimiaqa, aanai fida neefandinna narana faqa nimiaqa qufaqa eedoo qimasee miqimma nimiqau.

<sup>26</sup> Mina afasausa mara feefaurummasoo naranna nariqa doonkisaa quqasee maree ooru fiqau.

<sup>27</sup> Yooseefaana afasausa mara narana nári doonkisaa quqasee maree fifi ufaqa eendufaqa aanai uiqaana arasee faiqarara imarufanoo mina afasaafa moofannoo narí doonki narana amirara narí uqa ooraqasee qafuofanoo mina munnimma uqa adianai marufanoo qafanau.

<sup>28</sup> Qafamasee narí ainaina naaramaseenoo qinai. Innee aniree qafaafa qini munnimma kaifaa qiga qimianfanoo qini uqaki maridanoo. Miqi qufaqa misa nimuqusa mandaikufaqa rufiadaqa qiqau. Anutufa maasa naqaa feemma qimaqeenoo fee maaqinoo fee.

<sup>29</sup> Miqi qimasee faiqagee mariufaqa iaqoo kananaana nári nikoofa Yakooboofa marunnai Kannaana maqusai ooruree aiqama mi ainainausa kambiqoonara qimamiqau.

<sup>30</sup> Isipa maqannaa karaambaiqa fannoo aanoo qira ufa kai maasa qima qimaqeenoo. Mifa maasara innee qini maqa maaqaki nidaqa nipuree mariafanoo fee qimasee rairai qinoo.

<sup>31</sup> Miqi qifaqa maasa maaqi qimasee narí qimamiqa. Oo maasa sia nipuraraa fasiqau maridaqau. Maasa kuqaa ufa qimarunausa maridaqa.

<sup>32</sup> Maasa moodaa fasiqa faiqi namu qisauku qara taikasee qikunnooqu qaara marasee 12 maridaqa. Maasa gikaqa moo fannoo narí akoona faqa Kannaana maqusai maridanoo, moo fannoo kuqinai.

<sup>33</sup> Maasa miqi qimasee qimamianfanoo mifa mina iriseenoo qinoo, qinee maaqi masee inni nimanida qafaanauree qinoo. Innikiqari moodaafa qini faqa marinaqa innee akaqausa sakumma aina maree muru faiqi anaasee nimiaqa.

<sup>34</sup> Nimiseeqa narana taikainaqa kafa qumiqa inneeqa nikaqa faqa afigee qumuaqa. Muqusai faqa qinee mina qafamaseeqa inniara kuqaa sia nipuraraa fasiqauqee kuqaa ufakai qimariasee qimaseeqa inni faiqi iduku nimianaqa innee maqee maqee narana aina feefaurida ooruree qumuree qiga nuagee qinoo. Misa miqi qimasee nári nikoona qimamiqau.

<sup>35</sup> Qimamiseeqa nári uqauqa idukusee ooraqasee qafuofanoo aiqamausa munnimma kaqi marinai. Misa qafamasee nári nikoona Yakooboona faqa rufiaqau.

<sup>36</sup> Yakooboofa rufiaidanoo maaqi qimasee narí faiqi namu niqinai. Innee qini faiqi namu mandaika maqimaqee mariafanoo. Yooseefaafa doo taika fufaqa, Simeeoonafa faqa taika fifaqa kafa innee Beensaminnaana faqa afigee firaree qidee. Qinee ummaaraki kai maridaqa.

<sup>37</sup> Reeubeenafa narí akoona ufa iriseenoo maaqi qimasee narí akoona qimaminai. Oo qipoo, qinee Beensaminnaana rakisianaara. Qinee sia

mina afiqee ururaanana mina akiigara qini qimaaku qara narua. Anee qini qisaukuki quqasainaqa qinee amiqi masee afiqaqa niniinaqa afiqee uruanaura.

<sup>38</sup> Miqi qimasoofanoo Yakoofoofa qinau. Qini qimaaku sia uqanna inni faqa fuannoo. Mina afasaafa doo kuqu fufaqa mifa nariara maridanoo. Aanai mandainaina paqurinaqa qinee maaqirausa asooqa inni mi ummaarafa darinaqa kuquanoora.

## 43

*Yooseefaana afasausamara Beensaminna uru afiqee kaifaa Isipa maqa maaqai ooqu fu ufafa.*

<sup>1</sup> Kannaana maqa maaqaki aandaroo firaafa narinoo mandaika uqanna inau.

<sup>2</sup> Isipa maqa maaqai feefaurummamaree murusoo naranna Yakoofoofa aiku asauku nama taikasoofoofa Yakoofoofa nari faiqi namu qimannim-inau. Kaifaa ooquree kaqikaa narana feefaurumma murusaifaqa naa.

<sup>3</sup> Miqi qimasoofanoo Yudafa qinau. Mindaraa uriqararafa maasa oori runusee qimaqimifaqa iriqa. Innee inneeqa nikaqa sia afiqee qumiqa sia qini qifusaa nifaranoo fee qinoo.

<sup>4</sup> Anee qini qikaqara eedoo qinaqa maasa afiqee ooquree ani narana feefaurianaura.

<sup>5</sup> Anee sia eedoo qinanoo maasa qikaqa sia ooqu finaqa sia amana fifau ooqu fuanaura. Mi maqannaasa uriqararafa qinoo inni nikaqa sia quminaqa sia qini qifusaa nifaranoo fee qinoo.

<sup>6</sup> Yakoofoofa mi ufana iriseenoo qinau. Innee nanaree moomoo ummaara qini qimidee mi uriqararana qimamiqa maasa qikaqa maridanoo fee qifee.

<sup>7</sup> Misa iriseeqa kafa qimamiqa qiqau. Mi uriqararafa maasara faqa maasa faiqi aanaaseera faqa iréeno. Inni nikoofa kaqi fee maridanoo fee qinoo. Kafa inni nikaqa moo maridanoo fee qinoo. Miqi qimasee maasa iraiifaqa qimamiqa. Maasa naqaa fee masee maasa qikaqa afiqee qumuqaqee qianinnanara irianauree. Sia maasa iriqa.

<sup>8</sup> Miqi qimasee Yudafa nari akoona maaqi qimasee qimaminau. Qipoo anee maasa qikaqa qini qisaukuki quqasainaqa maasa doo findifi ooqu fuanauranoo. Miqinaqa maasa sia daara rainaqa kuqunauranoo.

<sup>9</sup> Qinee qeeqa marirana mina amaaqa maqaanaura. Anee minara qini kikiqaqaa usua. Qinee sia afiqee andeeqasee anee iannannai iriqa qinee ani nifairirana maraanaura.

<sup>10</sup> Maasa sia ani faqa kisaqasaa ufa qifau, maasa amana qaara kari ooquree ururee unaiqini.

<sup>11</sup> Miqi qufanoo misa nikoofa qimanniminau. Doo amana inneeqa miqiga miqiaqa. Innee maa maqa maaqana kinaana amiqira ainaina inneeqa uqaki rumammareeqa kaqi nimi maria ainainnara foora muqu mi maqannaasa uriqararana amiaqa. Saqari anoona qoodaa faqa ookasaasa anoona qoodaa faqa adiafaa imari saqari qaqaamana anoona faqa oofauna fooqaa ira ainaina anoona faqa kasa fooqaana anoona faqa maree ooqu fuaqa.

<sup>12</sup> Innee moomoo munnimma qaara kari afaqamaree ooqu fuaqa. Innee ooqai munnimma inni uqa adianai marufaqa qafaqau. Abee, aaqamasee munnimma inni uqaki kafa quqaqau.

<sup>13</sup> Inneeqa nikaqa afiqee ooqurandee kai kaqi uruaqa.

<sup>14</sup> Aiqaama afeeka faqaa Anutufa dadaaqinanoo mi fasiqafa inniara qimudaoo qiani. Qimudaoo qimaseenoo Beensaminna faqa inni nikaqa moo faqa kafaa nimiani. Qinee qini faiqi namu kakasifanoo doo saina kakasiani.

<sup>15</sup> Miqi qimasoofaqa Yakooboona faiqi namu mi saqari anoonausa faqa munnimma moomoo qaara kari mara maree Isipa maqa maaqai Beensaminna faqa afiqeeqa ooqu fiqau. Miqoo misa Yooseefaafa maruqoo ooqu kikiqa mambufanoo Yooseefaafa misa nindafanau.

<sup>16</sup> Yooseefaafa Beensaminna qafamaseenoo nari maaqakinaa ainainasaa rakisi maru fasiqana qimaminoo qinau. Anee maa fasiqausa nifiqeenana qini maaqaki munu quqaa. Misa suani qambaana qini faqa narana neefaranoo. Anee aandau aruseenana deedaqia.

<sup>17</sup> Ainainira faiqi fannoo mifa qimamundee inoo misauqa nifiqee Yooseefaana maaqaki munu quqanau.

<sup>18</sup> Yooseefaana maaqai nifiqee munu quqarara fimarufaqa misa rufi-aidaqa oonumafi irimariqau. Indaaruu narana feefauriafanna munnimmana maasa mara mareeqa qimaqai murusee mi munnimmana maasa uqaki paquriafannana akiqara maasa mai qifiqee anidanoo. Misa kai kaqi maasa darusee maasa doonkiuqa marasaifaqa maasa misa ainainira faiqikianaura.

<sup>19</sup> Misa miqi qimiriseeqa mina ainainasaa rakisi maru faiqina maaqa kooqiki oonuree qimamiqau.

<sup>20</sup> Oo uriqarara amanee maasa ufa irinnaree. Ooqai maasa qeeqa maaqaindari mai qumuree narana feefauru iqiafana.

<sup>21</sup> Maasa mai feefauru mamaree ooru fiufaqa aanai ooru faiqarara uiqaana arasee maasa qeeqa sakuma uqa sanda idukusee qafaafananoo maasa aiqamausa aquafanna munnimmafa aiqama maasa uqauqa adianai marinau.

<sup>22</sup> Maasa mi munnimmana fabaqa maasa qeeqaindi moo faqa fiqaramasee narana feefaurirara maree qumidaqa. Yafee moo fannoo maasa uqakiaqa maasa narana feefauriafanna munnimmana kafaa uqarinau fee.

<sup>23</sup> Miqi qimasoofanoo Yooseefaana ainainasaa rakisi maru faiqifa iriseenoo qinau. Doo innee nifaaqa quqaaqa. Sia rufia rufia iaqa. Inni Anutufa inni nikoona Anutufa mifa kai inni munnimma inni uqaki rinau. Doo qinee inni munnimma mareeqa. Mifa miqi qimaseenoo Simeeonna karabusaki maruna iduku eeqeenoo misaki quqanau.

<sup>24</sup> Quqaseenoo misa nifiqa mareenoo Yooseefaana maaqaki munu quqaseenoo nammari nimufaqa niku nammari uqusee mariqau. Misa doonkiuqa faqa narana nimufaqa naqau.

<sup>25</sup> Miqimmasee misa nari maree qumu ainainausa Yooseefaafa suani qambaana anirainaga amiraree qimasee deedaqiqau. Yooseefaafa suani qambaana inni faqa narana naanauranoo fee qimasee qimannimunara irisee deedaqiqau.

<sup>26</sup> Yooseefaafa maaqai aniroofaqa misa nari maaqaindari maree qumu ainainausa mara maree maaqaki mifa marunnai ooruree mina oorinni noorindari maqasaa aqufiqau.

<sup>27</sup> Miqimmasoofanoo Yooseefaafa misara amiqi fee masee maridee qimasee iramirinau. Inneeqa nikoona nauraiqiara qima qimufaqa iriafanafa maqee kaqi fee maridanoo fee.

<sup>28</sup> Qufaqa misa iriseeqa qiqau. Eeoo ani ureeqara ainainira faiqi maasa qikoofa kaqi maridanoo. Miqi qimaseeqa misa kafaa Yooseefaana oorinni noorindari maqasaa aqufiqau.

<sup>29</sup> Miqimmasoofanoo Yooseefaafa narí akaqa Beensaminna qafamaseenoo qinau. Maana inneeqa nikaqara qima qimufaqa iriafanafee. Qimaseenoo Yooseefaafa qinau. Qini qimaaku Anutufa ani amiqi amiqimma amaqaani.

<sup>30</sup> Miqi qimaseenoo kai kaqi findifufanoo quqasee finau. Mina amuqusa firaqoo narí akaqara mandaikufanoo finau. Yooseefaafa misa nifusaa iki raqaaqaa ufanoo quqasee narí faiqee maru rummanai oonuree iki raqanau.

<sup>31</sup> Iki raqeeseenoo nammariinnai aukunu nammari uquseenoo narí aukunu afeekaika mandeenoo doo misunnai qumureenoo narí suqee maruna qimaminau. Doo narana rakiqaannee qinau.

<sup>32</sup> Miqi qufanoo suqee marufa narana naadu naadu rakiqanau. Yooseefaana aaduma teeboorasaa rakiqa amaqaanau. Kafaa mina afasausa mara naaduma teeboorasaa rakiqa nimaqaanau. Isipa maqannaasa minaki nee marusa naaduma moo teeboorasaa rakiqa nimaqaanau. Isipa maqannaasa Qeeburu maqannaasa faqa narana narara nikooqee marusa marunara naadu naadu naqau.

<sup>33</sup> Yooseefaafa narí narana suqee maru faiqina qumee kai qimamufanoo mi faiqifa misa nifasaana indaaru mara ooqu mara amaqaseenoo mina aanaaqiannaana mina muqufi ooqu mara amaqasee miqimmamaree inaaqiana nikaqa fannoo atinni ooqu marinau. Misa nári ooqufaaqeeuna qafamasee tautumasee narí qafee narí qafee iqau.

<sup>34</sup> Yooseefaafa narí qufanoo mina difaanikinaa narana mareeqaida misa piritakiaqa quqa mareenoo Beensaminnaidiki fiqaramasee moodaannai qisauku 5 kari narana quqanau. Quqasoofaqa narana faqa uainna nammari faqa neeneesoofanoo doo nifaaqa iduku fufaqa qufaina qiqqa asasiqau.

## 44

### *Yooseefaafa narí kaafara randoo ufafa.*

<sup>1</sup> Namasoofanoo Yooseefaafa narí maaqakinaa ainainasaa rakisi maru fasiqana qimaminoo qinau. Anee misa uqa maraseenana minakiaqa narana uqa ruma qumbiqasainaqa maree fuaqa. Moo uqa sia apeequniani. Amana kai marinaqa maree fuaqa. Misa munnimma faqa narana feefaurina nariqa uqa adianai rumasainaqa maree ooru fuaqa.

<sup>2</sup> Miqidana inaaqiannaana uqakina narí munnimma narana feefaurina namufaqa qini siruaa kaafa faqa mina uqa adianai rua. Miqi qimasoofanoo mifa qimamundee inau.

<sup>3</sup> Kananaana keekoo qufaqa doo misa nári doonkiuqa namufaqa niqiqoofaqa oorufiqau.

<sup>4</sup> Doo mareeqa kaqi kaaqoo maqusa quqasee nianai fufanoo Yooseefaafa narí ainainasaa rakisi maru faiqina aiqeenoo qinau. Anee kai kaqi misa ninaaqianna fua fidana oonu misa rafaqaqafusee maaqi qimasee qimannimia. Innee naqi fee ifaqee qinee amiqimma nimaqaunnana akiqara mandaikamma qimaqee fee. Miqi qimasee qimannimia.

<sup>5</sup> Nanaree innee qini uriqararana kaafa qummuari fee, mifa minaki kai nammari neemarina. Mifa minaki afunee qafeemari kaafana qummuari-afanoo, innee manda ainaina uqanna auqaafanoo fee qia.

<sup>6</sup> Miqi qimasoofanoo mina ainainira faiqi fannoo iriseenoo nifaqee finau. Misa oonu paquri mandeenoo Yooseefaana ufa kai misa qimannimau.

<sup>7</sup> Qimannimisoofaqa misa qiqau. Oo uriqararafa maasa ani ufa oosanara randaidaqa. Sia uqanna maasaki maaqira manda oosana maridanoo.

<sup>8</sup> Maasa ooqai indaaru narana feefauriafanna munnimmafa maasa uqaki maruna mina maasa sia gumuariqa mina Kannaana maqusaindari mara maree kafa muqu ani amiqa. Maasa miqi marunaua maridaqa naqi maseeqee ani uriqararana maaqakinaa siruaa faqa koora faqa maraanau-ree.

<sup>9</sup> Anee maasa uqa kiaqa randasee qafa. Yana uqakiffee mi ainainafa mariannoo fee doo mifa kai kuquannoo, maasa ani ainainira faiqi kamambi marianaaura.

<sup>10</sup> Yooseefaana ainainira fasiqa fannoo misa ufa iriseenoo qima niminau. Doo amana inni ufa mau kai fuanaura. Ya fasiqana uqaki fee marinafa mifa kai qini ainainira faiqi mariannoo. Innee aiqama nimaqaq fifaranoo.

<sup>11</sup> Miqi qimasoofofaqa misa kai kaqi nári uqauqa afiqu maqasaa quqasee iduqiqa.

<sup>12</sup> Yooseefaana ainainasaa rakisirafa indaruqaanaindi naaree qafamaseenoo miqooqaraanaindiki miqoo qafamaseenoo kafa miqoo qaraanaindiki qafamaseenoo miqi kai mamaree aiqamausa uqakiaqa amiqimmasee qafanoo finau. Miqi mamareenoo misa ninaaqiannaana Beensammina uqaki qafoofanoo kaafa minaki marinau.

<sup>13</sup> Beensaminnana uqaki paquri masoofofaqa mina afasausa mara aiqamausa nimuqusufaqa nári qamunna aiqamausa rakeekaa iqau. Miqooqari nári ainaina doonkisa qaqasee oonu quandakufaqa maqusai aniqau.

<sup>14</sup> Yudafa narí auna akaqa faqa Yooseefaana maaqai oonuree qafoofanoo Yooseefaafa kaqi maaqaki marinau. Marufaqa misa anireeqa noorindari maqasaa aqufiqau.

<sup>15</sup> Aqufuma fufanoo Yooseefaafa qinau. Innee naqi fee ifee. Innee sia fee iridee, qinee maaqira uriqararaua qeeqa afuneenoo inni ummuarirana paquriranara, sia fee irifee.

<sup>16</sup> Miqi qimasoofofanoo Yudafa qinau. Oo uriqararafa maasa nana ufa fee ani qimamianauree. Maasa naqi mandee fee maasa qeeqa andeeqaranara qianauree. Anee maasa kikiqa qusimariannana naqimmasee fee qaoo qianauree. Anutufa maasa aaqarana koorooinoo. Sia kaafa maraifa kai ani ainainira faiqi mariannoo, maasa aiqamausa ani ainainira faiqi marianaaura.

<sup>17</sup> Miqi qimasoofofanoo Yooseefaafa nariqa qimanniminoo qinau. Oo sia uqanna qinee miqianauranoo. Kaafa maraifa kai qini ainainira faiqi kiannoo. Innee akaqausa nimaqaq ooruree ineeqa nikoona qimamiaqa.

*Yudafa Beensaminna amaaqa maqarariu ufafa.*

<sup>18</sup> Yudafa Yooseefaafa maruqoo oorureenoo qimaminoo qinau. Oo uriqararafa, anee qiniara eedoo qinaqa ani faqa qifaqa quqasee ufa qia. Anee sia qiniara aanoo qia. Anee Faraona miqirafa mariananoo, uriqararafa mariananoo.

<sup>19</sup> Oo uriqararafa, oqai maasa umuraafanana anee maasa iramirinana inni nikoofa maridanoo fee inni nikaqa maridanoo fee qinau.

<sup>20</sup> Miqi qunaqa maasa maaqi qimasee aninna qimamiqiafana. Maasa qikoofa asooqa maridanoo. Maasa qikaqa faqa maridanoo. Mifa asooqa namuki mi faiqina mageenoo. Mi faiqina afasaafa kuqufufanoo naríara marifanoo maasa qikoofa kaaqa minara amuqusidanoo.

<sup>21</sup> Maasa miqi qimasee indaaru ani qimamiqiafana. Uriqararafa anee maasara afiqee muqusaifaqa qafaanee qinau.



<sup>22</sup> Miqi qunaqa maasa maaqi qimasee aninna qimamiqiafana. Oo mi faiqifa sia amana narí akoona quqaannoo. Mina faiqi fannoo miqinanoo mina akoofa kuquannoo fee qiqiafana.

<sup>23</sup> Maasa miqi qimasee ani qimamiamafana anee maaqi qinau. Innee inneeqa nikaqa sia afiqee qumiqa sia qini qifusaa anifaranoo fee qinau.

<sup>24</sup> Maasa ani ufa iriseeqa qeeqa qikoo finnai oonuree anee qunna ufana qimamiqiafana.

<sup>25</sup> Qimamiseeqa mariafanano maasa qikoofa maasara kaifaa ooqu narana feefauriaqee qiqau.

<sup>26</sup> Miqi qufaqa maasa maaqi qimasee narí qimamiqiafana. Maasa qikaqa ooqu finaqa maasa ooqu fuanaura. Sia maasa qeeqaraa uriqararana afusaa ooqu fuanaura.

<sup>27</sup> Miqi qufanoo maasa qikoofa maaqi qimasee maasa qima qiminau. Innee irimmariamafano qini qinaaqa Raseera nammarifa qini faiqi qaaraqanda kai maqanau.

<sup>28</sup> Moo fannoo fifufaqa qinee minara kaasau aandau fannoo qini faiqi arusee rakeekaamma namaseefoo qiqiafana. Mi fasannai sia kafaa mina qafeeqa. Doo mifa taikafinau.

<sup>29</sup> Innee maana qinee unnannaindaraana afiqee fifanoo moo ainaina mina afaaqai kambiqainaqa qini minara qimudao qirafa asooqa marunnaqoo qini daruannoo fee qinau.

<sup>30</sup> Yudafa Yooseefaana kaifaa qimamidano qinau. Maasa qeeqa qikaqa quqaseeqa oonuraanano maasa qikoofa maasa qiqafamaseenoo doo narí faiqiara amuqusinano kuquannoo.

<sup>31</sup> Maasa qikoona amuqusirafa firaaqoo maa faiqinaki maridano. Mifa asooqa uqanna maridano maasa maaqaamma saanano mi ummaarafa mina kuqa aruannoo.

<sup>32</sup> Qinee qeeqa qikoona maaqi qimasee qimami qiafana. Qinee qeeqa qikaqa akiiqara ummaara maraanauree qiqiafana. Qinee sia mina afiqee uriqa ani nifairira ufa qinee maraanaurano fee qiqiafana.

<sup>33</sup> Miqi qimasee qinee qeeqa qikoona qimamiqiafana. Maqee qinee qeeqa qikaqa amaaqa maqeeqa ani ainainira faiqi kianano qini qikaqa fannoo narí afasausa faqa ooru fuannoo.

<sup>34</sup> Qinee naqimmasee fee maa faiqifa sia qini faqa ooru finaqa qeeqaraa qeeqa qikoo finnai ooru fuanauree. Qini qikoofa manda ummaara marainaqa qafaanano sia amiqiannoo, mandaikammiannoo.

## 45

### *Yooseefaafa nariara kooroou ufafa.*

<sup>1</sup> Yooseefaana aundura dapikufano narí ainainira fasiqauqa nifusaa ikiraqararusia minnisee sia amanaikufano niqi qamasoofaqa madaanai fiqau. Fifufano Yooseefaafa narí ainaina faqa kai maridano qimanniminu. Qinee inni nikaqa Yooseefaasa maridaqa.

<sup>2</sup> Yooseefaafa firaaqoo iki raqaida qufaqa Isipa maqannaasa madaanai maridaqa iriseeqa onu Faraona qimamiqau.

<sup>3</sup> Yooseefaafa narí afasausa mara maaqi qimasee qimanniminu. Qinee maana Yooseefaasa maridaa. Kuqaa fee qini qikoofa kaqi fee maridano fee. Miqi qufaqa mina afasausa mara tautu maseeqa naquqoofaqa sia ufa qiqau.

<sup>4</sup> Yooseefaafa kafaa qimanniminoo qinau. Doo innee qini daaqa aniaqee qufaqa misa mina aaqa aniroofano kafaa qimanniminoo qinau. Qinee

inni nikaqa mariafanaqa innee feefauruara mamaree qini quqasoofaqa qini qifiqamaree Isipa maqa maaqaki ainainira faiqi kamma qisaqau.

<sup>5</sup> Doo maqee innee sia qini qimu oosannara inneeqa kikiqusifanoo nimuqusiani. Anutufa kai qini diiqoofaqa innee kuqi foora indaarunni kamma nimaqasee inni dadaaqianeera qufaqa qumiqiafana.

<sup>6</sup> Fira aandaroo narirafa maa maqanasaa qaara aukwana marasee aiqaraifanoo moodaannai qisauku aukwana kaqi maridanoo. Mi kamuqoo fuka narana ummaqirafa faqa unakirafa faqa sia mariannoo.

<sup>7</sup> Anutufa kai qini mareeqee inni indaarunni kamma saifaqa inni asumu marasainaqa sia kuquaqeera, mi mookira oosannananai kuqaa mifa inni faqa inni niku nisauku faqa marasainaqa asumu marifaranoo.

<sup>8</sup> Minara sia innee fau qini diiqoofaqa maa maqa maaqanaki ani maridaqau. Anutufa diiqoofaqa ani maridaqa. Mifa kai qini mareeqee Faraona oofisaauqa uriqarusaikamma qaiifaqa maridaqa. Miqimmasaifaqa qinee mina aiqama maqa maaqasaa rakisirausa maridaqa. Aiqama Isipa maqa maaqasaa rakisirausa maridaqa.

<sup>9</sup> Innee kai kaqi qini qikoo finnai ooruree ani amaaku Yooseefaafa maaqi qinoofee qimasee qimamiaqa. Anutufa qini mareeqeenoo aiqama Isipa maqa maaqasaa rakisira faika maqaiifaqa maridaqa. Sia kisaqasaa maria, kai kaqi qinee unnannai qumua.

<sup>10</sup> Anee faqa aneenna faiqi namu faqa aneenna anaiqi mara faqa inneeqa sipsipa faqa inneeqa mimmiuqa faqa inneeqa burimakau faqa inneeqa aiqama ainaina faqa indaa mamaree qumuraifaqa Kooseena maqa nimitanaqa qini daaqa mariaqa.

<sup>11</sup> Innee Kooseena maqa maaqaki innisaa rakisianaura. Moodaannai qisauku aukwana kaqi maridanoo, mi aukwana namunaki aandaroo ida mariannoo. Innee faqa ineeqa faiqi anaasee faqa inneeqa aandaufa faqa naararaina kuqifoora qikooqaidanoo.

<sup>12</sup> Yooseefaafa kaifaa nari afasausa mara qima nimidanoo qinau. Innee nifu maqasee qini qiqafaqa sia moosau maridau qinee Yooseefaasa uqanna maridaqa. Doo qini qikaqa Beensaminnafa mifa faqa qini qiqafaani.

<sup>13</sup> Qinee Isipa maqasaa firaqoo uriqararausa marunnaana qini qikoona qimamiaqa. Aiqama ainaina qafaanara faqa qimamiaqa. Qimamiseeqa doo dauni dauni afiqee mai qumuqa.

<sup>14</sup> Miqi qimaseenoo nari akaqa Beensaminna oonu mafi anukaki difaa difamma qumareenoo iki raqoofanoo Beensaminnafa faqa iki raqanau.

<sup>15</sup> Yooseefaafa quandaku fanoo nari afasausa mara aiqamausa nimooqaseenoo naiki raqanau. Naiki raqasoofaqa mina afasausa mara mina faqa ufa qiqau.

<sup>16</sup> Isipa maqannaasa misa miqi unara oonu Faraona qimamisoofanoo Faraofa faqa mina uriqararausa faqa iriseeqa asasammiqau.

<sup>17</sup> Faraofa Yooseefaana maaqi qimasee qimaminoo qinau. Anee maaqi qimasee aneenna afasausa qimanniminaqa nari ummaara doonkisaa mara quqasaifaqa maree Kannaana maqusai ooru fuaqa.

<sup>18</sup> Miqoo oorureeqa nari nikoona faqa nari faiqi anaasee faqa nifiqee mai qumuqa. Qumuraifaqa Isipa maqa maaqaki qafamasee amiqira maqa nimianaqa miqoo narana fiqaranoo moomoo marinaqa marifaranoo.

<sup>19</sup> Faraofa kafa Yooseefaana qimaminou. Anee qinee ufa qunnana qimanniminaqa Isipa maqusaindaraa qoosa rarisee mari karausa faqa daraiwaa faqa mara maree ooru fuaqa. Minakina nari ninaaqmaaka faqa

nári faiqi aanaaqiuqa faqa nári nikoona faqa mara quqasai ooqu marifiqa qumuaqa.

<sup>20</sup> Misa sia nári umiasana aina mafi quqasee quminnanara oonu mafi iriaqa. Isipa maqa maaqa amiqirafa aiqama misaíndikammiannoo.

<sup>21</sup> Yakooboona amaaku mara Faraofa qimannimundee kai iqau. Yooseefaafa Faraona ufa iriseenoo qoosa rarisee maru karausa mara quqasoofaqa daraiwaa namu faqa aatata neefandinna narana faqa nimufaqa maree ooru fiqau.

<sup>22</sup> Yooseefaafa narí afasausa mara qamunna moodaa kai moodaa kai nimana nimana kai nimirau. Beensaminna moodaanai qisauku qamunna faqa siruaa munnimma 300 faqa aminau.

<sup>23</sup> Yooseefaafa Isipa maqanna amiqira ainaina suquseenoo qisauku qara taikasee doonkisa oorumusasa amaqoofaqa mara maree muru mina akona amiqau. Kafaa aatata qumidanoo naaninna narana sakumana faqa feemu faqa narana oosana oosana faqa anaasee doonki qisauku qara taikaseesaa oorumusasa quqasoofaqa maree ooru fiqau.

<sup>24</sup> Yooseefaafa narí afasausa mara Kannaana maqusai niqamasoofaqa fufanoo qima niminoo qinau. Innee aatata fidaqa sia qiniara qimasaida narí aqi narí aqiqa fuaqa.

<sup>25</sup> Misa Isipa maqa maaqa quqasee nimaqa nári nikoofa Yakooboofa marunnai Kannaana maqa maaqai ooru fiqau.

<sup>26</sup> Ooruree nári nikoona qimamiqau. Yooseefaafa sia kuqinoo kaqi maridanoo, misa miqi qimasee nári nikoona qimamiqau. Mifa Isipa maqanna aiqamausa uriqarafa maridanoo fee qiqau. Yakooboofa mi ufana irufanoo amuqusa kaqinnaindari ufanoo misa ufara sia kuqaa fee qinau.

<sup>27</sup> Yooseefaafa qimannimu ufausa nári nikoona qimami marufanoo Yakooboofa qafuofanoo qoosa rarisee maru karausa Yooseefaafa quqasoosa Yakooboona aqiqee Isipa maqa maaqai ooqu firara ururaqau. Yakooboofa mi karausa qafuofanoo aundura idukinau.

<sup>28</sup> Idukufanoo qinau. Qini qimaaku Yooseefaafa kaqi maridanoo. (Qinee kaqi maridaqa ooqu mina qafarafa mifa kai aiqama ainaina arusee uriqararafa maridanoo.) Qinee ooqu mina qafamasee kuquanauree qinau.

## 46

*Yakooboofa narí aiku asauku faqa Isipa maqusai ooqu fu ufafa.*

<sup>1</sup> Yakooboofa narí ainaina indaai mareenoo Beeraseeba maqusai ooqureenoo miqoo narí akona Isakeena Anutuna aandau tatufirana suqaminau.

<sup>2</sup> Miqoo eendaki faiqagee ufanoo Anutufa qainasaa afu nareenoo qinau. Yakooboo Yakooboo qufanoo Yakooboofa maqi qimaseenoo qinau qinee maaqoo maridaqa.

<sup>3</sup> Qufanoo Anutufa qimaminoo qinau. Qinee Anutusa ani akona Anutusa maridaqa. Anee sia Isipa maqasaa ooqu firaranara rufiaa. Mi maqanasaa ooqu marinaqa ani aiku asauku firaa maqanaasaikamma nisaanura.

<sup>4</sup> Qinee ani faqa Isipa maqasaa ooqu fuanura. Yooseefaafa ani faqa Isipa maqa maaqaki marinana mariinana kuqinnaranoo. Mariinaqa kasooaqee kafaa ani aiku asauku mareeqee kafaa Kannaana maqasaa quqaanura.

<sup>5</sup> Beeraseeba maqusa Yakooboofa quqasee Kannaana maqa maaqai ooqu finau. Mina faiqi namu Yakooboona faqa nári faiqi aanaaqiuqa faqa nári

ninaaqmaaka faqa mareeqee qoosa rarisee maru karana Isipa maqannaa karaambaiqa Faraofa nimaqoonasaa quqasee nifiqee ooqufiqau.

<sup>6</sup> Misa nari aandau aina faqa nariqa umiasana faqa Kanna maqasaa maridaqa maqeeiunauqa aiqama maree ooqu fiqau. Yakooboofa nari aiku asauku aiqama nifiqee ooqu finau.

<sup>7</sup> Yakooboofa nari faiqi namu faqa nari anaiqi mara akoonaiquqa faqa nari araamuqmaaka faqa nari anaiqi mara maanaaqauqa faqa aiqama nifiqee ooqu finau.

<sup>8</sup> Yakooboona faiqi namu Isipa maqasaa ooqu fusa maaqi miqa mariqau. Yakooboona ooqa faiqi Reeubeenafa marinau.

<sup>9</sup> Reeubeena faiqi namu Qanookafa faqa Parufa faqa Qeeseeroonafa faqa Karamifa faqa mariqau.

<sup>10</sup> Simeeona faiqi namu Yeemueerafa faqa Yaminafa faqa Ooqadafa faqa Yakifa faqa Soogarafa faqa mariqau, misa aiqamausa moodaa anaasee faiqi namu mariqau. Moo anaasee faiqi Saurafa marinau. Mina anoofa Kannaana maqannaa anaasee marinau.

<sup>11</sup> Reefina faiqi namu Keerasoonafa faqa Kooqafa faqa Meerarifa faqa mariqau.

<sup>12</sup> Yudaana faiqi namu Seeraafa faqa Peeresafa faqa Siraafa faqa mariqau. Yudaana faiqi qaaraqanda Eerafa faqa Oonanafa faqa mariiufafa Oonanafa Kannaana maqasaa kuqinau. Peeresana faiqi qara Qeesaroonafa faqa Qamurafa faqa mariqau.

<sup>13</sup> Isakarana faiqi namu Toorafa faqa Puaafa faqa Yasubafa faqa Simaroonafa faqa mariqau.

<sup>14</sup> Seeburuna faiqi namu Seeredafa faqa Eeroonafa faqa Yareerafa faqa mariqau.

<sup>15</sup> Miqimmaseenoo Reeaa nammarifa Yakooboona faiqi namu Meesapotamia maqusai maridanoo maqanau. Maanaaqa moodaa auqu Dinnaa nammarifa mina faqa miqoo maqanau. Doo Reeaa nammarina faiqi namu maanaaqa akoonaiqi aiqamausa 33 mariqau.

<sup>16</sup> Kadana faiqi namu Seefoonaa faqa Qakifa faqa Sunifa faqa Eesaboonafa faqa Eerifa faqa Aroodifa faqa Areerifa faqa mariqau.

<sup>17</sup> Aseerana faiqi namu Iminaafa faqa Isauaafa faqa Isififa faqa Beeriaafa faqa misa nisookifa Seera nammarifa faqa mariqau. Beeriaana amaaku qara Qeebeerafa faqa Marakieerafa faqa mariqau.

<sup>18</sup> Doo miqimmasee Yakooboona aiku asauku 16 nari ainainira maanaaqa Rabanafa Reeaa namarina amuna Siripaa nammarinasaa maqanau.

<sup>19</sup> Yakooboona anaqa Raseera nammarifa faiqi qaaraqanda maqanau. Yooseefaafa faqa Beensaminnafa faqa mariqau.

<sup>20</sup> Yooseefaana faiqigara qaaraqanda Isipa maqasaa kambiqaqau. Miqanda nuqu Mannaseefa faqa Eefaraimmafa faqa mariqau. Miqanda ninoofa Aseenata nammarifa marinau. Aseenata nammarina akoonaa auqu Pootifeerafa marinau. Mi fasiqafa Qeerioporisa maqannaa amaana maqasaa rakisi marufa marinau.

<sup>21</sup> Beenasamina faiqi namu maaqimmiqa mariqau. Beerafa faqa Beekeerafa faqa Asabeerafa faqa Keerafa faqa Naamanafa faqa Eeqifa faqa Roosafa faqa Mupimafa faqa Qupimafa faqa Aratafa faqa mariqau.

<sup>22</sup> Doo miqimmasee 14 Yakooboona aiku asauku Raseera nammarinasaa qari kambiqaqau. (Rabanafa Biriqaa nammarina nari ainainira maanaaqa Raseera nammarina nari araamuna amufanoo mifa mareeqeenoo nari afaaqi Yakooboona amufanoo faiqi maaqi mandee maqanau.)

<sup>23</sup> Biriqaa nammarina indaruqaa faiqi Dannafa marinau. Dannana faiqi moodaa marinau mina auqu Qusimafa marinau.

<sup>24</sup> Biriqaa nammarina faiqi moo Nafatarifa marinau. Nafatarina faiqi namu maaqi miqa mariqau. Yaqaseerafa faqa Kunifa faqa Yeeseerafa faqa Sireemafa faqa mariqau.

<sup>25</sup> Doo miqimmasee Yakooboona aiku asauku 7 nari ainainira manaaqa Rabanafa Raseera nammarina amunasaa Biriqaa nammarinasaa maqanau.

<sup>26</sup> Yakooboona aiku asauku uqanna Isipa maqasaa ooqufusaa aiqama moodaanaki 66 mariqau. Misa ninaakuqmaaka sia nisaanariqa.

<sup>27</sup> Yooseefaana faiqi qara Isipa maqasaa kambiqaqau. Miqanda faqa Yooseefaana faqa Yakooboona faqa moodaanaki ootupamasee 70 fasiqa ooqu fiqau.

*Yakooboofa nari aiku asauku faqa Isipa maqusai maru ufafa.*

<sup>28</sup> Yakooboofa Yudana aiqoofanoo indaaru ooqu Yooseefaana qimaminoo Kooseena maqasaa misa paquriani feera aiqanau.

<sup>29</sup> Yooseefaafa nari qoosa rarisee maru karanaki akarama fufanoo Kooseena maqa maaqai nari akoona paqurirara finau. Oonu paqurimaseenoo Yooseefaafa nari akoona anukaki oonu mafi kaqaramma uma-reenoo kisaagasaa iki raqee marinau.

<sup>30</sup> Iki raqee marufanoo Yakooboofa Yooseefaana qimaminoo qinai. Doo qinee kuqiraridaqa qinee maqee ani qafeeqa anee sia kuqina mariana kaqi mariana.

<sup>31</sup> Yooseefaafa iki raqaseenoo nari afasausa mara faqa nari akoona aiku asauku aiqama faqa qimanniminoo qinai. Qinee Faraofa mariqoo ooruree inniara qimamiana. Qini qikoofa faqa qini qifasausa faqa Kannaana maqusaindari qinee marunnannai qumureeaa maqi qiana. Kannaana maqusaindari qinee marunnannai qumureeaa maqi qiana.

<sup>32</sup> Qinee inniara sipsipasaa rakisi mariasa maridaqa nariqa sipsipa faqa burimakau faqa nariqa aiqama ainaina faqa maree qumiaa maqi qimasee qimamiana.

<sup>33</sup> Qinee miqi qimasee qimamisaananoo Faraofa inni naaramasee innee ainaini marianara irainaqa maaqi qimasee qimamiaqa.

<sup>34</sup> Oo maasa uriqararafa maasa qikeeku qikaaku ooqai sipsipa kai rakisi marusa marufaqa maasa faqa maqee minasaa kai rakisidaqa. Innee miqi qimasee Faraona qimamifanoo mifa Kooseena maqa inni nimiannoo. Isipa maqannaasa sipsipa rakisiranara nikoo uqanna qaidanoo. Minara inni naaduma saa Kooseena maqa nimiannoo.

## 47

<sup>1</sup> Yooseefaafa nari afasausa moodaannai qisauku namu nifiqeenoo Faraoo fuqoo ooru finau. Oorureenoo qimaminoo qinai. Oo Faraoo qini qikoofa faqa qini qifasausa faqa Kannaana maqusaindari nari sipsipa burimakau aiqama faqa nari ainaina faqa maree qumidaqa. Maqee misa Kooseena maqasaa qumu maridaqa.

<sup>2</sup> Miqi qimasee nari afasausa mara Faraona oorinni murusoofanoo niqafanau.

<sup>3</sup> Faraofa Yooseefaana ufa iriseenoo mina afasausa mara iramirinoo qinai. Innee nana ainaini mariasee. Miqi qufaqa misa iriseeqa qiqau. Uriqararafa, maasa sipsipasaa rakisira ainaina imarunausa maridaqa. Maasa qikeeku qikaaku auqeeu saikana kai maasa faqa maraidaqa.

<sup>4</sup> Aandaroo firaafa uqanna Kannaana maqasaa darifanoo maasa sipsipauqa nara andanda sia marifaqa maasa maa maqa maaqanaki marirara

umidaqa. Amanee eedoo qirana qiminaqa maasa Kooseena maqa maaqaki marianauree.

<sup>5</sup> Faraofa misa ufa iriseenoo Yooseefaana qimaminoo qinau. Doo ani akoofa faqa ani afasausa faqa ani faqa mariraree qidee.

<sup>6</sup> Isipa maqa maaqa misaindi maridanoo. Sainaqa Kooseena maqa maaqaki mariaqa. Kooseena maqa maaqa amiqirafa maridanoo. Ani afasausa kinaana moo qafainanoo sipsipa burimakau amiqi mandee rakisi marinnana mina mareeqeenana quqasainanoo mifa qini sipsipa buri-makausaa rakisiani.

<sup>7</sup> Miqi qimasoofanoo Yooseefaafa nari akoona afiqeenoo Faraoo fuqoo minisoofanoo Yakooboofa miqoo anireenoo Faraona afaaqooqa qimama qanau.

<sup>8</sup> Miqi qimasoofanoo Faraofa Yakooboona aukuanara iramirinau. Ani aukuaana naqumme maridanoo fee qufanoo Yakooboofa qinau.

<sup>9</sup> Qinee 130 aukuaana kai maa maqanasaa maridaqa. Sia kisaagasaa fau qinee moomoo ummaara paquriqa. Qini qikeeku qikaaku kisaagasaa uqanna mariqau. Misa aukuaana fannoo qini aukuaana fiaaqaranoo maridanoo.

<sup>10</sup> Yakooboofa miqi qimaseenoo kafaa Faraona afaaqooqa qimama qaseenoo doo raudamaki finau.

<sup>11</sup> Yooseefaafa nari afasausa mara faqa nari akoona faqa Faraofa uqoo Isipa maqa maqaki Rameeseesa maqusa aaqa soofaqa mariqau.

<sup>12</sup> Miqiga miqoo marufanoo Yooseefaafa nari akoona faqa nari afasausa mara faqa nari akoona aiku asauku marusa faqa kaaqa aanaaqi faiqiuqa faqa narana nimi marinau.

*Aandaroo fraafa Isipa maqannaasa naru ufafa.*

<sup>13</sup> Aandaroo firaafa uqanna imarufanoo sia uqanna aiqama tinai narana marinau. Isipa maqannaasi fasiqa anaasee faqa Kannaana maqannaasi fasiqa anaasee faqa naararoofaqa ummooquka iqa nimariqau.

<sup>14</sup> Misa narana feefauri marufanoo Yooseefaafa mi munnimmana mara maree Faraofa maruqoo munusee mina ami marinau.

<sup>15</sup> Isipa maqannaasa faqa Kannaana maqannaasa faqa narana feefaurida aiqama nari munnimma taikaqau. Miqi maseeqa Isipa maqannaasa anireeqa Yooseefaana qimamiqa qiqa. Maasa munnimma doo taikaseeqa anee sia maasa afu kai qiqaqaa kuquana faara narana niminaqa naa. Sia maasa narana qiminaqa maasa ani afusaa kuquanaura.

<sup>16</sup> Misa miqi qufanoo Yooseefaafa maaqi qimasee nariqa qimanniminau. Inni munnimma taikainaqa inneeqa aandau aina maree mini qimidaqa narana mina akiiqara maraqa.

<sup>17</sup> Miqi qufaqa misa nariqa aandau aina Yooseefaana mini amufanoo misa goosauqa faqa sipsipauqa faqa mimmiuqa faqa burimakauqa faqa doonkiuqa faqa mina akiiqara narana nimimarinau. Doo mi aukuaana misa nari aandau aina akiiqara Yooseefaafa narana nimi marinau.

<sup>18</sup> Mi aukuaana taikoofaqa kafaa moo aukuanaki Yooseefaafa fuqoo anireeqa maaqi qimasee qimamiqau. Maasa naqi fee mandee moo ainaina ani afusaa kukeeqaanauree, sia. Doo maasa munnimma taika fifaqa maasa aandau aina faqa anindika kai mambifaqa kaqi maridaqa. Sia ani amira ainaina moo marifaqa. Maasa qiqa qifaaqa faqa maasa maqa faqa kai maasaki maridanoo.

<sup>19</sup> Maasa ani afusaa kuquaqaa midaqa doo saina maasa qeeqa faiqi faqa maqa faqa mina kai amisaidaqa feefauru marasaidaqa narana naa. Miqimmaseeqa maasa qeeqa faqa Faraona anainira faiqi kakai iqa maria.

Maasa moodaa ainainara kai iridaqa. Narana faqa narana asumu faqa niminaqa maasa qummaqua. Narana qummaquseeqa maasa sia kuqua.

<sup>20</sup> Yooseefaafa misa ufa iriseenoo aiqama Isipa maqa maaqa feefaurumma Faraona aminau. Aiqama Isipa maqannaasa aandaroo firaafa uqanna narunara nariqa maqa amisee feefauru marasee minannoo narana feefaurumma neemarufanoo aiqama maqa maaqa Faraonaindika minoo maarinau.

<sup>21</sup> Miqi marufanoo Yooseefaafa Isipa maqa maaqa dinni atindari dinni atinni marusa mareeqee ainainira faiqika kai masanau.

<sup>22</sup> Isipa maqannaama anaana maqasaa rakisirausa maqa kai Yooseefaafa sia feefaurinau. Faraofa maqee maqee munnimma nimi marufaqa narana feefaurummasaida neemarufaqa sia misa maqa feefauriqa.

<sup>23</sup> Yooseefaafa faiqi anaasee qimannimino qinau. Doo innee qafaidee qinee maqee inni faqa inniqa maqa faqa feefaurumma Faraona amiqa. Maqee narana asumu nimianaqa inneeqa maqa Faraona amu maqanaki kafa qummaquaqa.

<sup>24</sup> Narana anoona mambinaqa moodaaqoo unaku quqaseeqa aiqama moodaannai qisaukukinaana moodaa moodaa Faraona amisee akaqana inneeqa faiqi anaaseera faqa asumuara faqa quqaaqa.

<sup>25</sup> Faiqi anaasee Yooseefaana maaqi qimasee qimamiqa qiqa. Oo Yooseefaafa anee aneenna kai maasa manda ainainasaa itita qisaananoo. Anee kai maasa amiqimma qisaananoo. Uriqararafa maasa amana Faraona ainainira faiqi mariana.

<sup>26</sup> Miqoo qari Yooseefaafa afeeka sanda ufa quqanau. Mi sanda ufana oosana maaqi minoo maridanoo. Aiqama Isipa maqa maaqakinaa narana unakusee moodaannai qisauku kinaana moodaa Faraona amiqa. Mi ufafa maqee kaqi afeekaikino maridanoo. Anaana maqasaa rakisi marusa maqa kai sia Faraonaindikino marinau.

*Yakooboofa inaaqianna moodaa ufa iramirinau.*

<sup>27</sup> Isarae maqannaasa Isipa maqasaa Koosena maqa maaqaki mariqa. Miqoo maridaqa moomoo ainaina faqaasa marufanoo misa faiqi namu faqa moomoo kambiqaqau.

<sup>28</sup> Yakooboofa qisauku qara taikaseenoo qiku dinni taikaseenoo dinni oonu qaara maraseenoo 17 aukuna Isipa maqasaa marinau. Mina aukuna aiqama moodaanaki 147 aukuna marasee kuqinau.

<sup>29</sup> Mina kuqirafa adeedi rama fufanoo Yakooboofa Yooseefaana aaramaseenoo qimaminau. Anee aneenna asauku qini qifundana ameemaanai quqaseenana sia Isipa maqasaa akundaanauranoofee qimasee qimafeekaikia.

<sup>30</sup> Qini qiqa qikausa mara nikundoonaki qikundaa. Qini Isipa maqasaaqari mara maree misa nikundooqoo qikundaa. Miqi qufanoo Yooseefaafa nari qimaminoo qinau. Anee qianandee miana.

<sup>31</sup> Yooseefaafa nari akoona ufa iriseenoo eedoo qufanoo mina akoofa qinau. Saa sia kaqi eedoo qia, kuqaa qima afeekai kinana eedoo qia. Miqi qimasoofanoo kuqaa Yooseefaafa eedoo qima afeekai kinau. Qima afeekai kamasoofanoo Yakooboofa nari qarisaa ooqu marifi Anutunara dufi dufi qinau. Innaaru qimasoofanoo Yooseefaafa nari ainainai finau.

## 48

*Yakooboofa Eefaraimana faqa Mannaseena faqa nifaaqooqaqu ufafa.*

<sup>1</sup> Kaqikaaqoo mari kufaqa misa Yooseefaana qimamiqau. Ani akoofa doo amiqimma auridanoo. Yooseefaafa mi ufana iriseenoo narí amaaku qara Mannaseesa Eefaraimasa nindiqeenoo narí akoofunnai ooqu finau.

<sup>2</sup> Misa Yakooboona qimamiqau ani amaaku Yooseefaafa ani qafarara qumidanoo fee qufanoo Yakooboofa afeekaikammasee findi fufanoo narí qaarisaa ooqu marinau.

<sup>3</sup> Ooqu mari fufanoo Yakooboofa Yooseefaana qimaminoo qinau. Ooqai qinee Kannaana maqa maaqaki nuafannana kinai Rusa maqa maaqaki mariafananoo Anutufa aiqama afeeka faqaafa akooqoo kooroomma fufanoo qini qifaaqooqa qima qimaqanau.

<sup>4</sup> Mifa maaqi qimasee qini qima qiminau. Qinee moomoo faiqi asumu amiana anisaaqari ani aruakinausa moomoo maqannaasaika mifaranoo. Qinee maa maqana ani aiku asauku nimiananoo naaru naaru misaindika minoo mariannoo.

<sup>5</sup> Ani amaaku qara Isipa maqasaa kambiqara qanda qinee Kannaana maqasaa kaqi marunaqa kambiqaa qanda Mannaseesa Eefaraimasa qini faiqi qara Reeubeenasa Simeeoonasara foora marifaranoo.

<sup>6</sup> Anee akaqa faiqi namu maqa sainausa misa anindika mambi marifara. Misa narí nifasaa qanda Mannaseesa Eefaraimasakinaa qumiasana ainaina maree faranoo.

<sup>7</sup> Qinee ani anoona Raseera nammarinara iriqa miqi qidaqa. Mifa qini firaa qimudao qiranaki Kannaana maqa maaqaki kuqinau. Qinee Meesapootamia maqa maaqaindari ani mariafananoo aanai Eefarataa maqusa aaqa kuqinau. Qinee mina iri Eefarataa maqusai fimaru aanna afainni akundaqiafana. (Maqee Eefarataa maqusara Beedeeree maqusee qidaqa)

<sup>8</sup> Yakooboofa miqi qimaseenoo Yooseefaana amaaku qara nindafeenoo qinau. Maaqanda yana faiqi qaree.

<sup>9</sup> Qufanoo Yooseefaafa qinau. Qini faiqi qara Anutufa Isipa maqasaa mariafananoo qimu qanda maridaqa. Yakooboofa mi ufana iriseenoo qinau. Doo miqanda nifiqee mai qinee unnaqoo adeedi minisainaqa nifaaqooqa qima nimaqaa.

<sup>10</sup> Yakooboofa nauraiqi marunara sia amiqimmasee afu maqee marinau. Yooseefaafa narí amaakuqara minisoofanoo oonu mafi kaqaramma qumareenoo nimooqanau.

<sup>11</sup> Nimooqa namasee Yakooboofa Yooseefaana qimaminoo qinau. Qinee sia kaifaa ani qafaanauree qunanoo Anutufa kai qifaqa ani faiqi namu niqafaidaqa.

<sup>12</sup> Miqi qimasoofanoo Yooseefaafa narí akoona afundana saaqaraana narí faiqi qara qumareeqeenoo narí akoona afunni oorindari maqasaa aqufinau.

<sup>13</sup> Yooseefaafa narí akoona afusaa kummarama fufanoo Eefaraimmana mara munu Yakooboona asaaqai quqaseenoo Mannaseena mina asaukuan-nai quqanau.

<sup>14</sup> Quqasoofanoo Yakooboofa asauku qara fiqaree aiqaree mambufanoo akaqa Eefaraimana saa asauku uqanna qiqeenoo afasaana Mannaseena saa asaaqai asauku quqanau.

<sup>15</sup> Miqi mandeenoo Yooseefaana afaaqooqa qimamaqeenoo qinau. Qini qikausa mara Abaraqaammanna faqa Isakeena faqa nikoofa Anutufa maa faiqisa amiqi amiqimma nimaqaani. Qini qifiqamaree maaqoo maqee miniqaiqaqa marunna Anutufa misa amiqi amiqimma ni-maqaani.



<sup>16</sup> Qini oosana oosana madainaina kinaana itita qimaqoo qangiroofa misa amiqi amiqimma nimaqaani.

Qini duqu faqa qini qikooqanda Abaraqaamma Isakeesa nuqu faqa maa faiqi qandasaa mariani.

Miqanda moomoo faiqi maqasaifanoo moomoo miqanda kiqari kambiqafi mariaqa.

<sup>17</sup> Yooseefaafa nari akoona asauku qafofanoo aundura mandai kufanoo nari akoona asauku qumareenoo afasaanasaa asaaqai asauku quqaqoona mareeqee akaqasaa quqasee akaqasaa asaukuannai asauku quqaqoona mareeqee afasaanasaa quqarara qinau.

<sup>18</sup> Oo qipoo anee sia andeeqaananoo indaruqaafa mai maridanoo aneenna asauku uqannai asauku mina akiiqasaa quqaqaana.

<sup>19</sup> Miqi qufanoo mina akoofa qaoo qida qinau. Qini qimaaku qinee iridaqa miqidaqa. Indaruqaafa mifa faqa mina aiku asauku moomoo marifaranoo. Inaqaianaana aiku asaukuqaa firaa afeeka maqannaauqanna marifaranoo nari afasaana ooraqaranoo mariannoo.

<sup>20</sup> Miqi qimaseenoo mi faasaana nifaaqooqa qima nimaqeenoo qinau. Isaraee maqannaasa nifaaqooqa qiqa anisaa qimasaida qifaranoo. Misa maaqi qifaranoo Anutufa Eefaraimmana faqa Mannaseena undeemma amaqaani. Miqunannai Yakooboofa Eefaraimmana uqeerasee Mannaseena rafaqa finau.

<sup>21</sup> Miqi qimaseenoo Yakooboofa Yooseefaana qimaminoo qinau. Qinee kuqirara midaqa Anutufa ani faqa maridanoo ani afixee aninna akeeku akaaku maqasaa ooru fuannoo.

<sup>22</sup> Seekeemma maqa maqa amiqirafa maridanoo. Qinee ooqai qeeqa duru feefannoo Amooraa maqannaasa faqa rakusee maraafanna maqana ani amianaara sia ani akaqaa fasaauqa nimianaara.

## 49

*Yakooboofa nari aiku asauku taikara qafaaqooqa qimannimu ufafa.*

<sup>1</sup> Yakooboofa nari faiqi namu naaramaseenoo qima nimaau. Innee aiqama maaqoo aniraifaqa kasooqee inni kina kambiqaaninna ainainara qima nimiana iriaqa.

<sup>2</sup> Innee qini Yakooboosa faiqi namu innee qini fiq fiq mambifaqa inneeqa nikausa qini Isaraeerasa ufa iriaqa.

<sup>3</sup> Reeubeenafa anee qini ooqa faiqi mariananoo.

Anee qini afeeka indaruqaafa mariananoo.

Anee aiqama qini faiqi namu kiqari uriqararafa kaaqa afeekaiki marianafa mariananoo.

<sup>4</sup> Anee nammari afindee imarianafa kaaqa afeekaiki marianafa mariananoo.

Anee sia uriqarana marinnaranoo.

Anee qini qaarisa qini ainainira anaasee sakasee faiqannanara miqin-naraano.

<sup>5</sup> Simeeonasa Reefisa innee qara moodaa fidika mariafanoo.

Innee qara inneeqa rakira duru saamunoo faiqi mandaikamma nimaqaqau.

<sup>6</sup> Qini irirafa sia misa kukeeqara ufaki ootupanoo maridanoo.

Qinee sia miqanda ufa suqiranaki marianaara.

Misa nirana qoofaqa faiqi anaasee narusee miqooqari nasuridaqa buri-makau akoonauqa naununu ateekaqau.

<sup>7</sup> Inniqara aannoo qiranasaa niqirafa mariannoo.

Innee kaqi fifau nárí marianara minara niqirafa mariannoo.  
Isaraee maqa maaqakina inniqara faiqi namu furufaramambuaqa.

<sup>8</sup> Yakooboofa miqanda nifaaqooqa qimaseenoo quanda finoo Yudana afaaqooqa qinau.

Yuda, ani akaqaafasaa ani amooqifara.

Anee aneenna namuqaa ninukasaa reenana rafaqa finafa mariananoo.

Ani akoona faiqi namu ani oorinni niqoori saunu areefaranoo.

<sup>9</sup> Yuda anee kaasau aanda foorai faiqi nárí marianafa mariananoo.

Anee firaa kaasau ainaina mariana, anee aanda arusee namasee faiqaaqee inanoo moo fannoo sia ani afauriannoo, rufiaannoo.

<sup>10</sup> Yudafa karaambaiqa duru feefa uaqeeiannoo.

Minasaa ani aruakinausa uriqaraqa maridaqa rakisi nimaqeeffaranoo.

Mifa uriqarara auqu marasee rakisi nimaqanoo fifinoo Siroo maqusaki oonuraannoo.

Miqoo maridanoo aiqama maqannaasa mina ameemaanai marifanoo rak-  
isinnimaqaannoo

mina aiku oosana maridaqa mina ufa mau kai fifaranoo.

<sup>11</sup> Mifa nárí doonki timmusa uainna sandasaa rumbeenoo.

Uainnauqakiqari kaaqa amiqiranasaa rumbeenoo.

Mifa nárí qamunna fidika arira uainna anoonaki nammaruqinoo.

<sup>12</sup> Mifa uainna neemarifanoo mina afu fidikandanda inoo marifanoo mimmi naamma anoona neemarifanoo afai eekara aridanoo.

<sup>13</sup> Miqi qimasee Yudana qimamiseenoo Seeburunana quanda fii afaaqooqa qinau.

Seeburuna, anee ooruku nammari afainni marinaranoo.

Sipauqaindi nammariara rufisee ani mandaaqasee marifara.

Ani maqa maaqa oosu Sidoona maqa maaqa ati raquru aminoo mariannoo.

<sup>14</sup> Miqi qimasee Seeburuna qimamiseenoo Yakooboofa quanda finoo Isakaana afaaqooqa qinau.

Isakaa anee afeeka doonkiara foorai mafinana narana uqauqa amuaaqa faiqaaqeeia.

*Yooseefaafa nárí akaqaa fasaauqa aqoondikira ufa nimirau.*

<sup>15</sup> Isakaafa idooara maqusa qafoofanoo amiqinoo marufanoo kum-  
marama fufanoo ataufakaaqa firaa ummaara quqasee maranoo nimirau.  
Mifa ainainira faiqiara foorai ainainiannoo.

<sup>16</sup> Yakooboofa Isakaana qimamiseenoo quanda finoo Dannaana afaaqooqa qinau.

Dannaafa nárí maqannaasa uriqararafa mariannoo.

Misa Isaraee maqanna foorai marifaranoo.

<sup>17</sup> Anee ukadiqara foorai aana afainni marinanoo qoosa fannoo aatata  
finana aiku raquraminanoo maqasaa aqufinanoo faiqi minasaa marina  
afiqu aqusainanoo aanaaqiannaindari aqufuani.

<sup>18</sup> Yakooboofa Dannaanara miqi qimaseenoo Anutunara innaaru qinoo qinau.

Oo Yaawee qinee ani dadaaqiranara afeesidaa.

<sup>19</sup> Miqi qimaseenoo Kadannana afaaqooqa qinau.

Kada nipuraraa fasiqauqa ani arifaranoo.

Miqifana anee quandaki nariqa nifaqee finnanoo.

<sup>20</sup> Miqi qimaseenoo Yakooboofa Aseeranara qinau.

Ani maqa maaqaki narana moomoo amiqirafa kai mariannoo.

Anee kinna ami mariandee ira narana kai neemarinnaranoo.

<sup>21</sup> Napatari anee kaasau aandaara fooqaana maridana aneenna aidi-ranasaa sandana nua.

Anee amiqira faiqi moomoo maqeenaranoo.

<sup>22</sup> Yooseefaafa anee irumu miqirafa maridana nammari afainni kam-biqafi aqama moomoo ireennaranoo.

<sup>23</sup> Ani namuqaa nimudaanai qimasee nári duru feefannoo ani arirara afaqeefaranoo.

<sup>24</sup> Miqifanoo Yooseefaana duru fannoo sia paruparuqiannoo tipu kai qinoo mariannoo. Yakooboona Anutufa aiqama afeeka faqaafa mina afeeka aminanoo mina asauku fannoo afeekaikiannoo. Mi Anutufa Isaraee maqannaasa rakisirafa misa afeeka kukeeqara maqusa maridanoo.

<sup>25</sup> Ani akoona Anutufa ani dadaqiannoo.

Aiqama afeeka faqaa Anutufa ani amiqi amiqiani.

Innaarunaindaraa aakunnoo ani amiqi amiqimma amaqaannoo.

Maqakiqari ururainna nammarifa ani amiqi amiqirana amiani.

Ani burimakau aandau faqa faiqi aanaaqiuqa faqa amiqi amiqimma nimaqaani.

<sup>26</sup> Moomoo taatuqeenauqa faqa sakummauqannoo faqa ani amiqi amiqimma amaqaani.

Ooqeenaa aqanasaaqaraa amiqi amiqirafa ani amiqi amiqiannoo.

Naaruara marira aqanasaaqaraa amiqi amiqirafa ani amiqimma amaqaani.

Oosana oosana ainaina qinee qunna amiqi amiqirafa ani Yooseefaanasaa mariannoo. Anee aneenna afasausa kiqari uriqararafa marinnanasa mi ainainausa anisaa mariannoo.

<sup>27</sup> Miqi qimasee Yooseefaana qimamisee quandafinoo Beensaminna qimaminau.

Beensaminna anee kaasau fainiara foora marinaranoo.

Anee kananaana faqa eendimarinana faqa aandau arusee neennaranoo.

<sup>28</sup> Doo miqimasee Yakooboofa narí faiqi namu indaaruuqaana saa oosana araseenoo aiqama mafi nifaaqooqa qimasana. Miqimasooqa misa qisauku qara taikasee qikunooqu qaara marasee oosana faiqi namu Isaraee maqanna mariqau.

### *Yakooboofa kuqufuqa akundoo ufafa.*

<sup>29</sup> Yakooboofa nifaaqooqa qimannimaqaseenoo maaqi qimasee narí faiqi namu qimaniminau. Qinee kaqi kaaqoo kuqiqa qeeqa qikeeku qikaaku marianaki oonu ootupaanaura. Innee sia maaqoo qikundaqa. Ooqai Abaraqaammafa nikundara maqa feefauru maqooqa maridanoo. Qeeta maqanna Eefaroonaa maqaki qini qikausa nikundoonaki qini faqa qikundaqa.

<sup>30</sup> Kannaana maqa maaqaki Makapeera maqusa Mamareena maqusa suani afu oosana qaanai maridanoo. Abaraqaammafa Eefaroonafa unnai mi maqana feefaurummaseenoo nikundanau.

<sup>31</sup> Miqoo misa Abaraqaammafa faqa mina anaaqa Saraqa nammarina faqa nikundaqau. Minakikai Isakeena faqa mina anaaqa Reebeeka nammarina faqa nikundaqau. Qinee minaki inni ninoona Reeaa nammarina akundeeqa.

<sup>32</sup> Mi maqana faqa minakinaa ooni aamara faqa Qeeta maqannaasa unnai feefauriqia. Qini minaki qikundaqa.

<sup>33</sup> Yakooboofa narí faiqi namu qimannimi taikasee aiku raqandaam-masee doo kuqinoo narí akeeku akaaku unnai finau.

## 50

*Yooseefaafa narí afasausamara asoora ufa qimannimu ufafa.*

<sup>1</sup> Yakooboofa kuqu fufanoo Yooseefaafa aundura mandaikufanoo narí akoona qirisaa roofeebaaqa mambufanoo narí akoona oori amooqeenoo qiki raqanau.

<sup>2</sup> Qiki raqaseenoo Yooseefaafa Isipa maqanna oosana mareenoo tu-taqausa qimannimufaqa anireeqa sia kai kaqi mandaikianifeera marasinna oosana oosana akuamaqee mariqau.

<sup>3</sup> Misa Isipa maqannaasa oosana maraseeqa qaara fasiqa niku nisauku taikasee 40 faasaanasaa marasinna Yakooboona qiri akuamaqaaqau. Isipa maqanna qaaramoo fasiqa faqa qisaukuqara taikasee 70 faasaanasaa Yakooboona iki raqaida soofaari mariqau.

<sup>4</sup> Soofaarirana taikasooofanoo Yooseefaafa Faraona aaqa marusa uriqararaura qimannimino qinau. Innee maa ufana mara maree munu karaambaifa Faraona qimamiaqa.

<sup>5</sup> Qini qikoofa kuqirara idanoo qima afeekaikammasee qini qima qimino qinau. Qinee kuqanana qini qiri mara maree Kannaana maqa maaqaki ooni aamara deedaqamma qaafannanaki qikundaa. Minara amanee qinee oorureeqa qeeqa qikoona minaki akundamaseeqa qumunauree.

<sup>6</sup> Minara Faraofa irisee qimaminau. Doo ooruree aneenna qima afeekaikianandee inana aneenna akoona akundamasee qumua.

<sup>7</sup> Yooseefaafa narí akoona akundarara oorufufaqa Faraona aaqa uriqararaura marusa faqa Faraona koota irimarusa uriqararaura faqa Isipa maqannaasa indaarunniki imaru fasiqausa faqa Yooseefaana faqa ooru fiqau.

<sup>8</sup> Mina aiku asauku faqa mina afasausa mara faqa mina akoona aiku asauku akaqausa faqa aiqamausa Yooseefaana faqa ooru fiqau. Misa aandau faqa faiqi aanaaqiuqa faqa kaqi kai Kooseena maqa maaqaki mariqau.

<sup>9</sup> Akaqausa qoosasa ooru fiqau. Akaqausa qoosa rariseemaru karanaki ooru fiqau. Yooseefaana faqa faiqi tatufufaqa ooru fiqau.

<sup>10</sup> Misa aiqamausa suani oosana qaana Yooradana nammari afainni sakuma faqa raisa adiuqa mara qaqimaru maqusanasaa ooruree misa firaqoo kisaqasaa soofariqau. Yooseefaafa narí akoonara qisauku dinni taikasee dinni ani qaara marasee 7 faasaana soofarinu.

<sup>11</sup> Kannaana maqusanasaa miqoo marusa iki raqoona qafamasee qiqau. Nindafaaqa Isipa maqanna firaqoo faaqa rumasaida iki raqaida. Miqi qimaseeqa misa mi maqusana auqu Abeera Misaraima fee qimariqau. Mi auquna oosana Isipa maqanna soofaarira maqusa fee qiqau.

<sup>12</sup> Yakooboona faiqi namu nári nikoofa qimannimundee iqau.

<sup>13</sup> Misa nári nikoona qiri mara maree Kannaana maqa maaqai ooruree Makapeeraa maqa maaqaki Mamaree maqusa suani oosana qaannai marufaqa miqoo ooni amaraki akundaqau. Qeeta maqanaa fasiqa mina auqu Eefarona Abaraqaammafa feefauru maqoonaki quqaqau.

<sup>14</sup> Yooseefaafa narí akoona akundamaseenoo narí faqa fusa narí akaqaafasaaqau faqa moosa faqa kafa anirandee Isipa maqusai fiqau.

*Yooseefaafa narí akaqaa fasaauqa aqoondikira ufa niminau.*

<sup>15</sup> Yooseefaana akaqaa fasaauqa misa nikoofa kuqufufaqa Yooseefaana rufieeqa narí qimami narí qimami qiqau. Ooqai maasa Yooseefaana mandaika mamaqaafanausa marida. Mina akiiqara iannoofee.

<sup>16</sup> Misa miqi qimaseeqa Yooseefaa funnai ufa quqaseeqa maaqi qimasee qimamiqau.

<sup>17</sup> Oo Yooseefaa maasa qikoofa kuqiraridanoo aniara maaqi qimasee maasa qimaqiminau. Yooseefaa ani akaqaafasaa ani mandaika mamaqoonara doo qinee mi ufana oosana iriqa. Maasa qikoofa miqi qunara minara maasa ani qimamidaqa. Ani akoona Anutuna ainainira faiqiuqa maasa ani mandaikamma amaqaafanna numoona minni qisaa. Miqi qufanoo Yooseefaafa minara iriseenoo iki raqanau.

<sup>18</sup> Mina akaqaa fasaauqa minara iriseeqa anireeqa nariqa Yooseefaana oorinni maqasaa kummarama fufaqa qiqau. Maasa ani ainainira faiqi kakai mambi marianaaura.

<sup>19</sup> Yooseefaafa iriseenoo qinai. Innee sia qiniara rufiaaqa. Sia qinee qeeqa qifaaqa Anutuna amaqa maqaanaura.

<sup>20</sup> Kuqaa innee qini mandaikamma qimaqaaneera tipundaarufanoo Anutufa mina mara quandasoofanoo amiqinai. Moomoo maqee kaqi mariasa marirana dadaaqianifeera miqinai.

<sup>21</sup> Sia rufiaaqa. Qinee inni faqa inni faiqi anaasee faqa narana nimida rakisi nimaqaanaura. Miqi qimasee Yooseefaafa nari ainaina nifaaqa quqaaqeeera qima niminai.

*Yooseefaafa kuqu ufafa.*

<sup>22</sup> Miqoo Yooseefaafa Isipa maqannai nari ainaina faqa kaqi marinai.

<sup>23</sup> Mifa wan handereeta faqa qisauku qara faqa 110 maraseenoo kuqinai. Yooseefaafa miqoo maridanoo nari amaaku Eefaraimmana faiqi faqa qafanau nari anaiqi faqa nari afaqnausa faqa nindafanau. Yooseefaafa Mannaaseena faiqi Makirana faiqi namu nari afaqnausa marasee f irinai.

<sup>24</sup> Kuqiraridanoo Yooseefaafa maaqi qimasee nari ainaina qimanniminai. Qinee kuqirarammidaqa. Qinee kuqu fuananoo Anutufa innisaa rakisidanoo inni indaarunnikinaga ooqai Abaraqaammanna faqa Isakeena faqa Yakooboona faqa qima afeekaika mandee nimiqoo maqanasaa inni nindiqamaree miqoo munu quqaannoo.

<sup>25</sup> Yooseefaafa minara kai kafa qimanniminai. Anutufa inni nifiqee finaqa qini qimudaani faqa mara mareeqa miqoo munu madikama qisaaqa. Innee minara qima afeekai kifaqa qinee iria. Misa irisee qima afeekaikammasoofanoo Yooseefaafa kuqinai.

<sup>26</sup> Yooseefaafa Isipa maqa maaqaki maridanoo wan handereeta faqa qisauku qara faqa 110 aukwana maraseenoo kuqinai. Kuqufufaqa misa sia kai kaqi putaa ianifeera mi marasinna aku amaqaaseeqa bukisaki quqaqoofanoo marinai.

## RAFUDOO AKARAFÁ

*Isipa maqannaasa Isaraee maqannaasa mandaikamma nimaqaqau.*

<sup>1</sup> Yakooboona amaaku oondamara misa faqa Isipa maqusai ooqu fusa misa nuqu maaqimminoo maridanoo.

<sup>2</sup> Reeubeenafa faqa Simeeonafa faqa Reefifa faqa Yudafa faqa

<sup>3-4</sup> Isakarafa faqa Seeburunafa faqa Beensaminafa faqa Dannaafa faqa Napatarifa faqa Kadaafa faqa Aseerafa faqa minamusa faqa misa faiqi-namu faqa nári nikoona ninaakuna faqa Isipa maqa maaqaki ooqu fiqau.

<sup>5</sup> Moodaanaki ruqauifa ooqu fusa qaaramoo fasiqa niku nisauku taikasee moo fasiqa asaukuqara kai taikasee 70 Isipa maqa maaqaki ooqu mariqau. Yooseefaafa ooqai miqoo maruqoo marinau.

<sup>6-7</sup> Miqoo mariiufaqa Yooseefaafa faqa narí afasausamara faqa aiqama mi akiiqausa kuqu taikafufaqa misa faiqi namu niku nisauku findifufaqa faiqi moomoo uqanna maqasoofaqa kambiqaqau. Kambiqafiqa Isipa maqa maaqa umbiqamma aqiqa mariqau.

<sup>8</sup> Faraofa Isipa maqanna rakisirafa kuqufufanoo kisaagasaa marinoo fuka moo Faraofa kambiqanau. Mifa Yooseefaanara faqa aandaroo aukwana rakisiiunara faqa mina aiku asaukuara faqa sia irinau.

<sup>9</sup> Faraofa narí maqannaasa qimannimino qinau. Isaraee maqannaasa moomoo uqanna maqa maaqa umbiaqa mariafaqa maasa uridaaqaramaseeqa maasa rafaafafu qimaqeefaara.

<sup>10</sup> Rakirafa kambiqainafa misa maasa namuqaa faqa moodaanaki kam-mafi maasa darusee quqasee sandee foora. Inni saimbaqa naqifee mandee oonumafi irisee misa rafaafafusaanaqee misa sia moomoo kambiqeefaree.

<sup>11</sup> Miqi qimasooafa Isipa maqannaasa Isaraee maqannaasa karafusa saika nimiqa. Afeeka rakisirausa misasaa rakisi mariqau. Isaraee maqannaasa karafusaki maridaqa qaara maqusa auqiqau. Moo maqusa auqu Pitoona maqusa auqusee moo maqusa auqu Raqamaseesa maqusa auqiqau. Mi maqusa qanda narana afeedimaru maqusa qanda mariqau. Qafee maqannai kai maaqa usakeemariqau.

<sup>12</sup> Isipa maqannaasa Isaraee maqanna kafa kafa ummaara nimufaqa moomoo kambiqafiqa maqa maaqa qumbiaqa. Isipa maqanna misa nindafeeqa kaaqa rufiee mariqau.

<sup>13</sup> Miqunara sia moomoo asumu kambiqaaqera firaa kadaapi uqanna misa nimuaqa quqasoofaqa misa manda marira mariqau.

<sup>14</sup> Isipa maqannaasa qufaqa Isaraee maqanna qafee maqa qumaree ausirira onnara foora moomoo auquseeqa minannai maaqa usakeeqa kafa afuqaki ainaina faqa imariqau. Miqi marufaqa sia Isipa maqannaasa misara qimudaoo qimariqau.

<sup>15</sup> Faraofa mi kadaapirirana Isaraee maqanna nimiseenoo quandafino Isaree maqanna anaasee qaaraqanda Sifaraa nammarisa Puaa nammarisa inaanunai fusasaa rakisimaru anaasee qanda qimannimino.

<sup>16</sup> Inneeqara inaanunai fidaqara dadaaqiqa faiqi maqaseeqa akoonaiqi aiqama aqee uqanna rutukuqa, maanaqa kai kaqi mariaqa.

<sup>17</sup> Mi anaaseeqanda Faraona ufa iriseeqara Anutuna ufara rufiseeqa sia akoonaiqiuqa nári mariqau, kaqi mariqau.

<sup>18</sup> Faraofa akoonaiqi moomoo kambiqoofanoo nindafamaseenoo innaa-munai nifiqaqanu aanaaseeqanda naaramaseenoo niqinoo qinau. Innee-qara naqaafee ifaqee sia akoonaiqi naridee qini ufa rukiaafanoo.

<sup>19</sup> Miqanda mina ufa iriseeqa qiqau. Heeburu anaasee sia Isipa anaasee naannaraidaqa misa kaqi kaqi faiqi maqaidaqa. Maaqanda oonu raunaqa faasai faiqi maqaqaafaqa oonu nindafaidaqa.

<sup>20</sup> Anutufa mi anaaseeqanda oosana nindafamaseenoo amiqi amiqi-masooafaqa Isaraee maqannaasa moomoo kambiqafiqa afeeka maqanna mariqau.

<sup>21</sup> Miqanda Anutunara rufioofanoo mina akiiqara Anutufa miqanda faqa faiqi asumu niminau.

<sup>22</sup> Faraofa misa nindafeenoo narí maqanna Isipa maqanna aiqamausa naaramaseenoo ufa afeeka ufa qimanniminau. Heeburu anaasee akoonaiqi maqasaifaqa innee mina mareeqee nammari firaana Niru nammariki aqu-saifaqa kuquaqa. Aiqama kuquaqera maanaqauqa kai kaqi mariaqera qinau. Miqi qimasooafaqa miqimmi mariqau.

## 2

### *Misa sia Mooseena faiqi aanaaqi ariqau.*

<sup>1</sup> Mi kamuqoo mi aukuanna Reefina atikiqari kumaaraa moo fannoo findi finoo maanaqa Reefina oosanaki maranau.

<sup>2</sup> Maraseenoo faiqi moo akoonaiqi maqaseenoo mina anoofa qafoofanoo amiqira faiqi marufanoo Isipa maqannaasa arifoo qimaseenoo qaaramoo quqoonasaa kukeeqa amaqaqoofanoo marinau.

<sup>3</sup> Qaaramoo quqoona aiqaroofanoo faiqi aanaaqi kaqikaqoo aaqoo irufanoo mina anoofa akoofa rafaqaqafirara oonumafi irusia mina anoofa furaa amanee uqa kisaqa difaaniara foora auqinau. Mifa koorootaqa qumareenoo furaa uqamau sia nammari ruqiqaki keeqaanifeera akinau. Uqa auguseenoo mina anoofa faiqi aanaaqi uqaki rumaseenoo furaa moomoo nammari ammausai marunaki kukeeqaqoofanoo minaki marinau.

<sup>4</sup> Nammariki marufanoo mi faiqina anasaafa nianaindari kukeeqanoo maridanoo rakisi marinau. Nanee kambiqaannoo qimasaidanoo rakisi marinau.

<sup>5</sup> Faraona aramuna nammari auqaaneera narí rakisimaru manaaqausa faqa mi nammarinai quminau. Mifa nammari auqaidanoo furaaki qafoofanoo uqa marinau. Marufanoo qafamaseenoo narí ainaini maru manaqana qimamufanoo mi uqana nammarikinaana maranau.

<sup>6</sup> Marasoofanoo Faraona aramuna asaukukinaana maraseenoo uqa oo raqasee faiqi aanaaqi qafanau. Faiqi aanaaqi ikiraqoofanoo mina irufanoo amuqusufanoo qinau. Maafa Heeburu maqannaasa faiqi akoonaiqi maridanoo fee qinau.

<sup>7</sup> Mifa miqi qimarufanoo mi faiqi anaaqina anasaafa anireenoo Faraona aramuna maaqi qimasee qimaminau. Amanee Heeburu anaasee moo ooru afiqee muqusaananoo fee naamma amiannoo fee.

<sup>8</sup> Faraona aramuna eedoo qufanoo mi faiqi anaaqina anasaafa ooru narí ninoona uqanna afiqee quminau.

<sup>9</sup> Qumuroofanoo Faraona aramuna fannoo maaqi qimaseenoo mi anaaseena qimaminau. Anee maa faiqi anaaqina naamma amidana rakisi marinaqa qinee maqee maqee feefauru ani ami marianauranoo. Mi anaaseefa eedoo qimaseenoo narí faiqi aanaaqi uqanna narí maaqai munu qaqqee idanoo rakisi marinau.

<sup>10</sup> Mi faiqi anaaqifa kaqi kaaqoo innooqafufanoo nari anoofa afigeenoo Faraona araamuna maruqoo minisoofanoo nari faiqi kamambinuu. Fuka anoofa auqu rarara maaqi qinuu. Qinee nammarikinaana maraunnaara auqu Mooseenee qianaara.

*Mooseefa Midianna maqusai sandanuu.*

<sup>11</sup> Mariiufanoo Mooseefa innooqafufanoo moo kari nari maqanna Isaraee maqannaasa oonu nindafoofaqa firaa kadaapi rimariqau. Isipa maqanna moo fannoo Heeburu maqanna Mooseena aqoonnana arimarufanoo Mooseefa qafanuu.

<sup>12</sup> Aranaqoofanoo faiqia dinni dinni munu afu maqee mini afu maqee ufanoo faiqi sia marufanoo Isipa maqanna fasiqa Mooseefa kuqa aruseenoo mina iri nukuda afaqaseenoo minaki kukeeqasee akundanuu.

<sup>13</sup> Iqaqoofanoo kananaana rafudamakufanoo Mooseefa nari maqanna nindafarara kafaa finuu. Oonuree nindafoofaqa Heeburu fasiqa qaaraqanda rakiqau. Mooseefa aqoonnana arimaruna qimaminoo qinuu. Anee naqaafee ifanee aneenna aqoonnana oosana siainaki fifau aridanee.

<sup>14</sup> Miqi qufanoo aru fasiqafa qinuu. Yafee aniara karaambaiqee qifanee anee maasa ufa irisee andeeqaidanee. Eenda anee Isipa maqanna aruanafa kafaa maqee qini faqa darinnaree qufanoo Mooseefa tautinuu. Tautumandee qinuu. Doo eenda arunnaara aiqama kooroomminoo maridanoommifoo qimaseenoo rufianuu.

<sup>15</sup> Faraofa minara iriseenoo Mooseena kuqa aruaneera ufanoo Mooseefa minara rufiamareenoo Isipa maqa maqa quqasee Midianna maqa maaqi nianai sandanuu.

<sup>16</sup> Sandee oonureenoo nammari madika afaisaa ooqu marinuu. Midianna maqanna amaana maqaki aanaiqikirana mina auqu Yeetarona aramuqmaaka dinni qisauku taikasee dinni oonu qaara marasee 7 mariqau. Mooseefa nammari madika afaisaa marufaqa mi manaaqausa nari nikoona sipsipauqa faqa mimmiuqa faqa nammari saka nimianee qimasee aniraqau.

<sup>17</sup> Faiqi akaqausa nari sipsipasaa rakisimarusa mi manaaqausa niqiqoofaqa anirandee fufaqa misa nari sipsipa naaree nammari nimianeera qufanoo Mooseefa findifinoo misara qaoo qimaseenoo maanaaqauqa naarooafaqaa aniroofanoo Mooseefa nari kai misa sipsipauqa faqa mimmiuqa faqa nammari saka nimanuu.

<sup>18</sup> Mi manaaqausa sipsipauqa nammari neeneesoofaqa nifiqee maaqi fiqau. Oonu roofanoo misa nikoofa iramirinoo qinuu. Innee naqiffee ifaqee maqee faasaanasaa anidee.

<sup>19</sup> Miqi qufaqa misa qiqa. Isipa maqanna fasiqa moo fannoo faiqi sipsipasaa rakisi mariasa oonu raafanoo misara qaoo qimaseenoo maasa sipsipauqa nari kai nammari saka qumaree nimiisaifaqa dauni anidaqa.

<sup>20</sup> Misa nikoofa mina irinoo qinuu. Mi fasiqafa yaiffee maridanoo fee. Nanaree innee minni aisee anidee. Doo sandee oonu afigaifanoo narana ani naani. Miqi qimasooafaqa oonu Mooseena afigee aniqau.

<sup>21</sup> Yeetaroofa Mooseenara qini faqa marianne qufanoo eedoo qimasee marinuu. Marufanoo Yeetaroofa nari araamuna Sipooraa nammarina Mooseena amufanoo maranuu.

<sup>22</sup> Maraseenoo faiqi akoonaiqi maqanuu. Maqaseenoo Mooseefa nari faiqi auqureenoo qinee aanaamuru maqusaki maridee qimaseenoo Keerasoomma nee qinuu.



<sup>23</sup> Mooseefa miqoo moomoo aukuanaki marufanoo Isipa maqanna karaambaiqa Faraoofa kuqinai. Kuqufufaqa Isaraee maqannaasa Isipa maqannaasa afeeka rumbarana ameemaanai kaqi kai annadannada qidaqa maridaqa Anutufinnai dadaaqianifeera innaaru qimariqau. Misa innaaru qirafa Anutufinnai ooru finau.

<sup>24</sup> Anutufa misa qiki raqarana iriseenoo Abarahaamana faqa Isakeena faqa Yakooboona faqa moodaanaki kira ufa qimaqoofa misa faiqinamu faqa dadaaqianifeera oonu mafi irinai.

<sup>25</sup> Anutufa misa mandainainaki marufanoo misara oonu mafi irufanoo amuqusinai.

### 3

#### *Anutufa Mooseena aaranau.*

<sup>1</sup> Moo kari Mooseefa narí airaamaku Yeetaroonna Midianna maqanna amaana maqaki aanaiqi kirafa maruna sipsipasaa faqa mimmisaa faqa rakisi marinai. Moo kari Mooseefa narí airaamaku sipsipauqa faqa mimmiuqa faqa nifiqa mareenoo aadana maqa maaqa figareenoo Hooreeba naaquqara aqanasaa muruqoofaqa andanda neemarufanoo rakisi marinai.

<sup>2</sup> Miqi marufanoo Anutuna qangiroo Mooseena afusaa tautumma amaqaaseenoo kooroomafinoo saqari amimikiqari idauru kambiqanau. Mooseefa mina qafuofanoo idauru firaafa qaidanoo sia mi saqari amimina qanau.

<sup>3</sup> Mooseefa mina qafamaseenoo moo ainainammifoo saina aaqa oonuree qafaa, nanaree saqari amimi sia qaidanoo fee qimasee aaqa finau.

<sup>4</sup> Mooseefa quandakinoo aaqa oonu roofanoo Anutufa minikiqari Mooseena aaraidanoo qinai. Moosee Moosee qufanoo Mooseefa iriseenoo maqi qimaseenoo qinai. Qinee maa maridaqa.

<sup>5</sup> Miqi qimasoo fanoo Anutufa kafaa qimaminai Moosee sia anee adeedi ania. Aneenna aiku aanaamu raipaqusee miqoo maria. Naaquqara maqa maaqa marinara aneenna aiku aanaamu mara aqua.

<sup>6</sup> Miqi qimaseenoo Anutufa kafaa qimaminai. Qinee ani akoona Anutusa maridaqa. Abarahaamana faqa Isakeena faqa Yakooboona faqa Anutusa maridaqa. Mooseefa mi ufana iriseenoo Anutuna qafaanoo qimaseenoo rufiaseenoo oorisa ititanai.

<sup>7</sup> Anutufa kaifaa Mooseena qimaminoo qinai. Qini faiqi anaasee Isaraee maqannaasa Isipa maqasaa fira aapurarana nima mariafaqa nindafaidaqa. Misa qiniara maasa afeeka rakisira rakisi mariasa nisaukukinaana rafia quqaannee qimasee qini daaree mariafaqa iridaqa. Qinee misa aiqama aapurarana maree marianara iridaqa.

<sup>8</sup> Qinee innaarunaindari qumuree Isipa maqannaasa nisaukukinaana mareeqee fira maqa maaqa ainoo faqaa maqa aiqama ainaina rairaa imariqoo quqaanau. Mi maqanasaa Kannaana maqannaasa faqa Heeta maqannaasa faqa Amooraa maqannaasa faqa Peerisita maqannaasa faqa Hifita maqannaasa faqa Yeebusa maqannaasa faqa misauqa mariaqoo quqannisaanau.

<sup>9</sup> Isipa maqanna Heeburu maqanna radami mariafaqa misa qiki raqee mariafa doo qini daaqoosaa rifaqa niqafaidaqa.

<sup>10</sup> Qinee ani Isipa maqanna karaambaiqa Faraoo finnai aiqaanana oonureenana qini faiqi anaasee indaarunni kamma nimaqainaqa Faraona maqa maaqikiqari quqasee aniaqa.

<sup>11</sup> Mooseefa mi ufana iriseenoo Anutunara qaoo qidanoo qinau. Akasaa qinee maaqirausa naqimaseeqee Faraoo finnai oonuree fee Isaraee maqannaasa Isipa maqa maaqaki mariana nifiqaanauree.

<sup>12</sup> Anutufa iriseenoo qinau. Qinee anifaqa marianana anee Isaraee maqannaasa Isipa maqasaa qaraana nifiqamaree maa aaqannasaa aniree qini qimoo qifaranoo. Miqinna oosanafa qinee ani aiqaafannanara kooroo iannoo.

<sup>13</sup> Mooseefa iriseenoo kafaa Anutuna qimaminoo qinau. Anee qini diqiqaanaqa qinee Isaraee maqannaa innannai oonu reeqa maaqi qianauro. Inni nisaifaqausa ninaakusa Anutufa qini diqiqaifaqa inni qimannimirara anidaqa. Miqi qianaqa misa maaqi qimasee qini ireefaranoo. Mina auqu yafee maridanoo fee qifaqa qinee naqiffee qimasee qimannimianauree.

<sup>14</sup> Anutufa iriseenoo Mooseena qimaminoo qinau. Qinee qeeqa marunausa qidaqa. Anee maaqi qimasee qimannimia. Nariara qinee qeeqa marunauree qimarifa diqiqaifaqa innee iannai anidaqa.

<sup>15</sup> Maaqi qimasee kafaa moo faqa qimannimia. Inni nikausa Abarahaammana faqa Isakeena faqa Yakooboona faqa Anutusa Yaaweesa maridaqa ani Isaraee maqannaa iannai ani aqiqaidaqa. Qini mi duqufa naaruara mariannoo. Kasooaqee kambiqainausa qini mi duquna reefaranoo.

<sup>16</sup> Anutufa kaifaa Mooseena qimaminoo qinau. Anee ooquee Isaraee maqannaa uriqararaisa suqusee maaqi qimasee qimannimia. Yaaweefa inni ninaakusa Abarahaammana faqa Isakeena faqa Yakooboona faqa Anutusa qini qifusaa kooroo mafinoo qimaqiminoo. Misa qimannimia, qinee misa iannai aniree qafaunaqa Isipa maqannaasa qumaara moomoo nimimariafaqa qafaidaqa.

<sup>17</sup> Qinee Isipa maqa maaqakinaana maraanauree qimasee iridaqa. Misa firaa aupurarana kinaana nifleeqee ainoo faqaa maqasaa irairaa ida reemindeemiri mariqoo Kannaa maqasaa faqa Heeta maqasaa faqa Amooraa maqasaa faqa Peerisita maqasaa faqa Hifita maqasaa faqa Yeebusa maqasaa faqa quqannisaanaura.

<sup>18</sup> Moosee anee Isaraee maqannaasa mi ufana qimanniminaqa irifara. Anee Isaraee maqannaa uriqararaisa faqa nifiqamareenana Isipa maqannaa karaambaiqa marinnai oonuree maaqi qimasee qimamia. Maasa Heeburu maqannaasa Yaaweefa maasa Anutufa maasa qifusaa kooroo mafinoo qimanniminoo. Maqee anee maasara eedoo qinaqa qaaramoo faasaana aadana maqa maaqaki oonuree maasa Yaaweena maasa Anutuna tatufirana suqa amianee qia.

<sup>19</sup> Qinee iridaqa anee qimaminoo Isipa maqannaa karaambaiqa fanoo sia inni niqainaqa fifaranoo. Qinee mina aidafirana amianoo miqoo inni niqaannoo.

<sup>20</sup> Qinee qeeqa afeekannai Isipa maqannaasa oosana oosana naaquqara ainainannai fitiqnarana nimianauro. Nimianoo Faraofa miqoo inni idukuannoo.

<sup>21</sup> Qinee Isipa maqannaasa inniara naaquqarana nimianaqa innee Isipa maqasaaqari sia kaqi fifaranoo. Ainaina nimifaqa maree fifaranoo.

<sup>22</sup> Innee firarifaqa inni ninaaqmaaka Isipa maqannaa aanaaseeuqa nári naqa maria aanaaseesa faqa nariqa maaqaki mariasara faqa qifaqa qamunna faqa koora faqa siruaa faqa nifaaqa auqi maria ainainausa faqa nimifaqa inneeqa faiqi namu niraamuqmaaka Isipa maqannaa amiqira

gamunna ainaina kai afisunnimaqai faqa maree fuaqa. Miqinnanannai innee Isipa maqannaasa ainaina maree fiara fooro ifaranoo.

## 4

*Anutufa Mooseena oosana oosana kudifaanna auqaani feera afeeka aminau.*

<sup>1</sup> Mooseefa Anutuna ufa iriseenoo kaifaa iramirinoo qinau. Misa Israaee maqannaasaa sia qini ufa qaindusaa, sia qini ufa iria qiniara unna fee qimasee Yaaweefa sia ani afusaa kooroo ifana unna qiaanoo qifaqa qinee naqifee ianaaree. Naqifee ianaqee misa qini oosana qafee fee kuqaa fee qifaree.

<sup>2</sup> Miqi qufanoo Anutufa qinau. Ani asaukuki anee nanee uqirafa nidanee, qufanoo Mooseefa qinau. Saunu uqirausa nidaqee qinau.

<sup>3</sup> Anutufa iriseenoo qinau. Doo mina maqasaa aqua qufanoo maqasaa aqusoofanoo mi saunufa sakani kambiqaa fufanoo Mooseefa mina qafamaseenoo rufisee sandanau.

<sup>4</sup> Anutufa kafaa qimaminoo qinau. Aneenna asaukunnai mara miami ameesa qumaraa qufanoo qumaroo kafaa asaukuki saunu kammafinau.

<sup>5</sup> Miqooqari Yaaweefa Mooseena qimaminau. Anee ooqu Israaee maqannaasaa nifusaa miqinaqa misa qiniara Abarahaamana faqa Isaakeena faqa Yakooboona faqa misa Yaaweefa misa Anutufa kuqaa ani afusaa kooroo iifoo qifaranoo.

<sup>6</sup> Yaaweefa kafaa Mooseena qimaminau. Anee aneenna siutaki asauku upeekaa. Miqi qufanoo Mooseefa miqimminau. Asauku upekaseenoo radukusee qafoo fanoo asaukumau aiqama namuandaundau inoo marufanoo qafanau.

<sup>7</sup> Anutufa kafaa qinau aneenna asauku kafaa upeekaa qufanoo upekaseenoo radukuseenoo qafoo fanoo asauku mau namuandaundau irafa sia marinau. Dinniara fooro kai marinau.

<sup>8</sup> Anutufa kafaa Mooseena qimaminoo qinau. Anee indaaru saunu uqannifiqaina sia irifana innaaqiana asauku uqannifiqaina qiriyaqa.

<sup>9</sup> Misa ani mi ainaina qanda qafamasee sia ani ufa irifana anee Niru nammari saka qumareenana aadana maqasaa adiasainanoo fidika kai mandifinaqa qafaqa.

<sup>10</sup> Mooseefa Yaaweena ufa iriseenoo qimaminau. Oo Yaawee sia qini diiqaa. Qinee ooqaindari sia amiqimmasee faiqi nifusaa ufa qunausa maridaqa. Maqee anee qini qima qimiannaqooqari sia mifa qini mareeqee ufa qimarunusaikamma qiseenoo. Qinee sia ufa qunausa ufara mamma qimarunusa maridaqa.

<sup>11</sup> Miqi qufanoo Anutufa Mooseena qimaminoo qinau. Yafee nifauru nimidanoo fee. Yafee sia ufa qiasaika faqa naaqoo qaunirausaika faqa mannisaidanoo fee. Yafee nifu maqarana faqa nifu dimbarana faqa nimidanoo fee. Qinee Yaaweesa kai miqidaqa.

<sup>12</sup> Moosee anee doo fua. Qinee ani ufa dadaaqi aakapaanana qinnaranoo.

<sup>13</sup> Mooseefa kaifaa Yaaweena qimaminoo qinau. Oo Yaawee anee moo aqiqainanoo fuani.

<sup>14</sup> Yaaweefa mina iriseenoo aranaqoofanoo qinau. Doo amana ani afasaafa Aaroonafa Reefina atikinaafa andeeqasee ufa qimarifa marifaqa qinee iridaqa. Mifa maqee aniara randanoo anidanoo. Mifa ani paqurimandee asiannoo.

<sup>15</sup> Anee mina qimaminanoo mifa misa qimannimiani. Qinee inniqara dadaaqianaqa ufa qimannimifaranoo. Qinee inneeqara ifandinna ainaina qimannimianaqa auqeeffaranoo.

<sup>16</sup> Anutufa kafa mooseena qimaminau. Aaroonafa ani ufa mareeqee faiqi anaasee qimannimiannoo. Mifa ani oora foora marinana anee mina Anutufara foora maridana mifa auqaaninna ainaina anee aakapeennaranoo.

<sup>17</sup> Anee aneenna saunu faqa uqirafa fua. Minannai oosana oosana ainaina faiqi sia amana auqaaqaa ira ainaina auqeennaranoo.

*Mooseefa Isipa maqusai kafa anirandee finau.*

<sup>18</sup> Mooseefa Yaaweena ufa iriseenoo nari airaamaku Yeetaroo funnai oonureenoo qimaminoo qinuu. Amanee qinee Isipa maqusai kafa anirandee oonuree qeeqa ainaina niqafaanauree. Misa kaqi fee maridee doo fee kuqia. Miqiqufanoo Yeetaroo iriseenoo eedoo qimasee aiqanau.

<sup>19</sup> Mooseefa Midianna maqa maaqai kaqi marufanoo Anutufa kafa qimaminoo qinuu. Doo findi finana kafa Isipa maqusai fua. Ani arirari marusa doo kuqia.

<sup>20</sup> Mooseefa irisee eedoo qimaseenoo nari anaqa faqa faiqi namu faqa mareeqee doonkisa quqaseenoo finau. Anutufa maree fuannee qu saununa faqa maree finau.

<sup>21</sup> Anutufa Mooseena qimaminoo qinuu. Anee Isipa maqa maaqai oonureenana misa karaambaqa afusaa faiqi sia amana auqaaqaa ira ainaina qinee amiafanna afeekanannoo auqaa. Miqi marinaqa qinee Faraona kaukaata qira irirana amiananoo sia eedoo qinaqa Isarae maqannaasa fifaranoo.

<sup>22</sup> Anee maaqi qimaseenana Faraona qimamia. Yaaweefa maaqi qidanoo. Isarae maqannaasa qini ooqa faiqiara foora maridammiaafoo qia.

<sup>23</sup> Qinee ani qimamidaqa. Anee qini ooqa faiquqa Isarae maqannaasa quqasainaqa misa oonuree qini qimooqiaqa, qunana anee qaoo qianaqa doo maqee ani ooqa faiqi aruanaura.

<sup>24</sup> Mooseefa nari faiqi anaasee faqa fidanoo eendufanoo aanai faiqanau. Eendaki Anutufa anireenoo Mooseena kuqa arirara inau.

<sup>25</sup> Miqifanoo Mooseena anaqa Sipooraa nammarifa ooni raiqarana qumareenoo nari amaaku afaqa ati aukuseenoo minannoo Mooseena aiku auqamaseenoo maqasaa quqanau. Quqaseenoo qinuu. Anee qini qifaaqi fidika aanaaqi fasiqa mariananoo fee qinuu.

<sup>26</sup> Miqimmasoofanoo Yaaweefa Mooseena sia arinuu.

<sup>27</sup> Miqi qimarufanoo Yaaweefa Aarona qimaminoo qinuu. Anee aadana maqa maaqai fidana Mooseena paquria. Aaroonafa eedoo qimasee Anutuna naaquqara aqanai ooru Mooseena paqurinuu. Paqurimasee amooqa nanuu.

<sup>28</sup> Amooqasoofanoo Mooseefa Isipa maqa maaqai fuanifeera Yaaweefa qimamuna faqa oosana oosana ainainara faqa Aarona qimaminuu. Yaaweefa faiqi sia amana auqaaqaa ira ainaina auqannee quna faqa Aarona qimaminuu.

<sup>29</sup> Mooseesa Aaroonasa Isipa maqa maaqai ooqureeqa Isarae maqanna faiqi firaasa naarama quqaaqau.

<sup>30</sup> Quqaseeqa Yaaweefa Mooseena qimamu ufausa aiqama Aaroonafa qimannimisoofanoo Mooseefa faiqi sia amana auqaaqaa ira ainainauqa misa nifusaa auqanuu.

<sup>31</sup> Isaraee maqannaasa Aarona mi ufana iriseeqa kuqaa mifoo qiqau. Misa Yaaweefa misa unnai anunara nariqa firaa aupuraranara irisee kumma ramafufaqa innaaru qiqau.

## 5

### *Mooseesa Aarona Isipa maqannaasa kinna oonu qafaqau.*

<sup>1</sup> Innaaru qimasooafa Mooseesa Aarona Faraoo funnai oonuree qimamiqa qiqau. Oo Faraoo, Yaaweefa maasa Isaraee maqanna Anutufa aniaara maaqi qinoo. Anee qini faiqi namu idukusainaqa aadana maqa maaqaki oonureeqa oomaqa mandee qiniara innaaru qidaqa qimooqiaqee qinoo.

<sup>2</sup> Faraofa miqanda ufa iriseenoo qinau. Yaaweefa yafee. Nanaree mina ufara eedoo qimasee Isaraee maqannaasa niqaana fifaree. Sia qinee Yaaweenara iridaqa. Minara qinee sia uqanna Isaraee maqannaasa niqaanaura.

<sup>3</sup> Mooseesa Aarona kafa Faraona qimamiqa qiqau. Maasa Heeburu maqannaasa Anutufa maasa qifusaa kooroinoo. Anee maasara eedoo qinaqa qaaramoo faasaana aadana maqa maaqaki oonuree Yaaweenaa maasa Anutuna tatufirana suqa amianaura. Maasa sia miqiananoo mifa firaa manda auriranannai fee firaa dariranannai fee maasa aiqama daruannoo.

<sup>4</sup> Faraofa iriseenoo Mooseesa Aarona qimannimino qinau, innee qara nanaree faiqi anaasee qini ainaini mariasa nifiqee fuafaqee minnisee fidee. Saina kafa anirandee ainainiranaki fuaqa.

<sup>5</sup> Innee Isaraee maqannaasa maqee moomoo kammafi qini ainainirana minnisararee fee qidafee.

<sup>6</sup> Mi faasaana kai Faraofa Isipa maqanna karabusasaa rakisi marusa faqa Isaraee maqanna niqoonausasaa rakisi marusa faqa qimannino qinau.

<sup>7</sup> Innee maqee sia kafa uita asaki atekasee Isaraee maqanna nimifaqa minannoo maaqa usakee maria simmeerana auquaqa. Sai faqa nari kai maraqa.

<sup>8</sup> Maraseeqa sia oorudupi masee auquaqa. Aiqa kari auqi mariana amana kai auquaqa. Misa kudiki mariasa maridaqa qiniara maasa idukusainaqa maasa oonuree Yaaweenaa nari Anutuna tatufirana suqa amianee qidaqa.

<sup>9</sup> Miqi qidaqifaqa innee firaa kadaapi nimifaqa misa oonaqee anaqee idaqa Mooseesa Aarona qinna unnufausa sia iriaqa.

<sup>10</sup> Miqi qufaqa karabusasaa rakisi marusa faqa Isaraee maqannaasa nari niqoonausasaa rakisi marusa oonuree maaqi qimasee Isaraee maqannaasa qimannimiqa. Faraofa maasara sia uita asaki raku mini nimiaqee qidanoo.

<sup>11</sup> Mifa inniara inneeqa kai minakinai randasee maree miniseeqa ooqai auqiu simmeerana amana kai auqaqee qinoo.

<sup>12</sup> Miqi qufaqa misa Isipa maqa maaqaki aiqamatina nidaqa uita asaki randasee suqimariqa.

<sup>13</sup> Isipa maqanna karabusasaa rakisi marusa fuki faaki qidaqa qiqau. Innee ooqai maasa uita asaki nimiafana auqeeundee masee mina amana kai simmeera auquaqa.

<sup>14</sup> Miqi qimaseeqa karabusasaa rakisi maru Isipa maqanna fasiqausa Isaraee maqannaasa nari niqoonausasaa rakisiaqera mara quqaqoosa

naruseeqa qiqau. Innee nanaree simmeera ooqai auqiuna amana sia auqidee.

<sup>15</sup> Qufaqa Isaarae maqanna rakisirausa Farao funnai oonuree qimamiqa qiqau. Oo uriqararafa. Anee naqaa fee ifanee maasa maaqimma qimaqaidanee.

<sup>16</sup> Misa sia uita asaki nimiseeqa kaqi maasara simmeera auquaqee qidaqa. Mina saara maasa daria. Sia maasa oosanasaa fau. Inneeqa oosanasaa fifau miqiafanoo.

<sup>17</sup> Faraoofa iriseenoo qimannimianu. Innee kudiki mariasa ainainiranara nikooqafaqa qiniara maasa idukuqisainaqa Yaaweena tatufirana suqami- anee qimariafanoo.

<sup>18</sup> Doo kaqi kaqi anirandee inneeqa ainainai fuaqa. Misa sia inni uita asaki nimifaranoo. Inneeqa kai uita asaki maree miniseeqa ooqai iundee kai moomoo simmeera auquaqa. Doo fuaqa.

<sup>19</sup> Isarae maqannaasa nari niqoonausasaa rakisi marusa Faraoofa ooqai auqiundee kai masee auquaqee qunara irisee doo maasa ummaaraki maridee qiqau.

<sup>20</sup> Farao funnaindari quqasee anidaqa Mooseesa Aaronasa misa nifeesidaqa marufaqa ani paquriqau.

<sup>21</sup> Ani paqurimmasee qimannimiqa qiqau. Yaaweefa inniqara oosana qafamaseenoo mina akiiqara nimiannoo. Inneeqara oosana arasaafanoo minasaara Faraoofa nari rakisirausa faqa maasa daruannoo. Inneeqara Faraoofa maasa daruanifeera andaana rumasaafanoo daruannoo.

*Mooseefa aundura ummaara roofanoo Anutu funnai anunu rinau.*

<sup>22</sup> Mooseefa misa ufa iriseenoo quandakufanoo oonureenoo Yaaweenara innaaru qinau. Oo Yaawee, anee naqaafee ifanee Isarae maqanna maa mandaikana mannimaqaidanee. Anee naqi fee ifanee qini mai diiqeenee.

<sup>23</sup> Qinee Farao funnai oonureeqa ani ufa qimamiafanna qooqari Faraoofa Isarae maqannaasa mandaika kai mannimaqaidanoo. Anee sia uqanna dadaaqira kari mariananoo.

## 6

<sup>1</sup> Yaaweefa Mooseena ufa iriseenoo qimaminu. Amana doo anee maqee qini oosana qafeennaranoo. Qinee Faraoona afeekaikammasee qimaminanoo qini faiqi anaasee idukusainaqa fifaranoo. Sia kaqi idukuannoo qinee qiananoo idukuseenoo fuki faaki qinaqa mina maqasaaqari quqasee fifaranoo.

*Anutufa kafa Mooseena aaranau.*

<sup>2</sup> Anutufa kafa Mooseena qimaminoo qinau. Qinee Yaaweesa maridaqa.

<sup>3</sup> Qinee Abarahaamana faqa Isakeena faqa Yakooboona faqa misa nifusaa aiqama afeeka faqaa Anutusa qeeqa duqu kooroo iqiafana. Qinee sia qeeqa fuka naaquqara duqu Yaaweesee qirana qimannimi qiafana.

<sup>4</sup> Qinee qeeqa moodaanaki kira ufa misa faqa qidaqa Kannaana maqa maqa misa nimirree qima afeekaikiqiafana. Misa minaki asaqiraa faira foora mariunaki quqannisaanauranoo fee qiqiafana.

<sup>5</sup> Qinee maqee Isarae maqannaasa Isipa maqanaasa karafusaki maridaqa aupuraida annada annada imarianara iriseeqa qinee qeeqa moodaanaki kira ufara oonu mafi iriqa.

<sup>6</sup> Moosee anee Isarae maqannaasa maaqi qimasee qini ufa qimannimia, qinee Yaaweesa maridaqa. Innee Isipa maqanna rumbaranaki mariana qinee inni idukeeqee asumu mariranaki quqannisaanau. Qinee

afeeka qisaukunnai manda aupurarana Isipa maqannaasasaa quqaanaura. Quqaseeqa inni Isaraee maqannaasa asumu maraanaura.

<sup>7</sup> Qinee inni qeeqa faiqi aanaaseekammaseeqa qinee inni Anutusa marianaura. Qinee inni Isipa maqannaasa karabusa kinaana iduku nisaanaqa miqoo innee qini Anutusara irifaranoo.

<sup>8</sup> Qinee inni niffeegee kuqaa qima afeekaikammasee Abarahaamma faqa Isakeena faqa Yakooboona faqa nimianauree qiafannaqoo quqanisaanaura. Qinee inni nimiananoo mi maqafa innindi kammiannoo. Qinee Yaaweesa qidaqa.

<sup>9</sup> Mooseefa Isaraee maqannaasa qima nimufaqa misa sia mina ufa iriqau. Misa firaa ummaara maree marufa mifa misa naaqoo nifu furufara masoofaqa sia iriqau.

<sup>10</sup> Anutufa kafaa Mooseena qimaminoo qinau.

<sup>11</sup> Anee Isipa maqannaasa karaambaiqa Faraoo finnai oonuree Isaraee maqannaasara qimamia. Misa karafusaki mariana idukusaina fuuqa.

<sup>12</sup> Mooseefa mi ufana iriseenoo Yaaweena qimaminoo qinau. Isaraee maqannaasa ririmma sia qini ufa iria naqaa fee masee Faraoofa iriannoo fee. Qinee ufa qirara mamma qimarunau maridaqa.

<sup>13</sup> Yaaweefa Mooseena faqa Aaroona faqa qimanniminoo qinau. Inneeqara Isaraee maqannaasa faqa Faraona faqa maaqi qimasee qimannimiaqa, qinee ani Mooseenara Isaraee maqannaasa Isipa maqa maaqaindaraana niffee fuannee qunnanara qimannimia.

*Mosseesa Aaroonasa niku nisauku nuqu.*

<sup>14</sup> Yakooboona indaaruuqa faiqi Reeubeenafa qaara faqa qaara faqa 4 faiqi maqanau. Misa nuqu Hanookafa faqa Paruafa faqa Heesaroona faqa Karamifa faqa minamusa mariqau. Misa nari nifaafaurara maqa maaqakina marusa ninaakusa mara mariqau.

<sup>15</sup> Simeeonafa qisauku dinni taikasee dinni ani moodaa marasee 6 faiqi maqanau. Misa nuqu Yeemueerafa faqa Yaminafa faqa Ooqadafa faqa Yakinafa faqa Soogarafa faqa Sauroofa faqa mariqau. Sauroona anoofa Kannaa anaasee marinau. Misa nari nifaafau rara maqa maaqakina marusa ninaakusa mara mariqau.

<sup>16</sup> Reefifa qaara moo faiqi maqanau. Misa nuqu Keerasoonafa faqa Kooqatafa faqa Meerarifa faqa mariqau. Misa nikoofa Reefifa 137 aukuaana maraseenoo kuqinau. Misa nari nifaafaurara maqa maaqakina marusa ninaakusa mara mariqau.

<sup>17</sup> Keerasoonafa qaara faiqi maqanau. Miqanda nuqu Ribinifa faqa Simeeifa faqa mariqau. Miqandasaaqari moomoo kambiaqau.

<sup>18</sup> Kooqatafa qaara faqa qaara faqa 4 faiqi maqanau. Misa nuqu Amarammafa faqa Isaqaranafa faqa Heebaroonafa faqa Usieerafa faqa mariqau. Misa nikoofa Kooqatafa 133 aukuaana marasee kuqinau.

<sup>19</sup> Meerarifa qaara faiqi maqanau. Miqanda nuqu Maqarifa faqa Musaqifa faqa mariqau. Reefina faiqi namu anaiqi mara miqimmiqa mariqau.

<sup>20</sup> Amarammafa nari akoona auna nari amaamuna Yookebeeda namarina maraseenoo Aaroona faqa Mooseena faqa maqanau. Amarammafa 137 aukuaana maraseenoo kuqinau.

<sup>21</sup> Isaqarafa qaaramoo faiqi maqanau. Misa nuqu Koorafa faqa Neefeekafa faqa Sikirifa faqa mariqau.

<sup>22</sup> Usieerafa faqa qaaramoo faiqi maqanau. Misa nuqu Misaeerafa faqa Eerasafanafa faqa Sitorifa faqa mariqau.

<sup>23</sup> Aaroonafa Aminadafana aramuna Nasoonaa asookina Eeriseepa nam-marina maraseenoo minasaa Nadabana faqa Abiquna faqa Eeriasarana faqa Itamarana faqa maqanau.

<sup>24</sup> Kooraafa qaaramoo faiqi maqanau. Misa nuqu Asirafa faqa Eerakanafa faqa Abiasafa faqa mariqau. Misa Kooraanasaa ani aruaki kambiqainausa ninaakusa mara mariqau.

<sup>25</sup> Aaroonaa amaaku Eeriasarafa Putieerana aramuna maraseenoo Fineeasana maqanau. Miqimmasee doo Reefinakiqari ani aruaki faiqi oosana oosana mariqau.

<sup>26</sup> Yaaweefa Aaroonasa Mooseesara kai qufaqa Isaraee maqannaasa Isipa maqannaasa rumbarana kinaana nifiqa maree aniaqee qimaqoo qanda mariqau.

<sup>27</sup> Miqanda kai Isipa maqanna karambaiqa Faraona Isaraee maqannaasa idukuanifeera qimamiqau.

*Yaaweefa Mooseena faqa Aaroonaa faqa ufa nimaau.*

<sup>28</sup> Yaaweefa Isipa maqa maaqaki maaqi qimasee Mooseena qimaminau.

<sup>29</sup> Qinee Yaaweesa maridaqa. Anee Isipa maqanna kaarambaiqa Faraona aiqama qinee qunnufana qimamia.

<sup>30</sup> Mooseefa iriseenoo Anutuna qimaminoo qinau. Qinee ufa qirara mamma qimarunausa maridaqa. Faraofa naqiffee masee qini ufa iriannoo fee.

## 7

<sup>1</sup> Yaaweefa Mooseena qimaminoo qinau. Qinee ani aiqaanana anee Faraona afusaa Anutufara foora marinnaranoo Aaroonafa ani afasaafa ani tamummaqara fasiqara foora mariannoo.

<sup>2</sup> Qinee aiqama ufa qimamunnana anee Aaroonaa qimaminanoo mifa Faraona qimaminanoo Isaraee maqannaasa Isipa maqa maaqaki rumbaqa mariana idukusainafa mi maqa maaqana quqasee fuaqa.

<sup>3</sup> Inneeqara Faraona qimami marifaqa qinee kaukaata qimasee qaoo qira irirana amiananoo sia inniqara ufa iriannoo. Qinee moomoo naaquqara ainaina Isipa maqa maaqai auqaananoo sia inni ufa iriannoo.

<sup>4</sup> Qinee firaa aupurarana uqanna Isipa maqannaasa nimisee qeeqa faiqi anaasee aiqama faiqi oosaa indaarunni kiqa nifiqee fuanaura.

<sup>5</sup> Qinee Isipa maqannaasa naruseeqa Isaraee maqannaasa misa maqa maaqaki mariana nifiqee fuanafa Isipa maqannaasa qinee kai Yaaweesa marunannara misa irifaranoo.

<sup>6</sup> Mooseesa Aaroonasa Yaaweena ufa iriseeqa doo miqimmiqau.

<sup>7</sup> Mooseefa Faraona faqa ufa quu kari Mooseefa 80 aukuaana faqaafa marufanoo Aaroonafa 83 aukuaana faqaafa marinau.

*Aaroonaa saunu.*

<sup>8</sup> Yaaweefa Mooseesa Aaroonasa qimanniminoo qinau.

<sup>9</sup> Faraofa inni qarara moo naaquqara ainaina auqamasafaqa kuqaa anoonee qianee qinaqa Moosee anee Aaroonaa qimaminanoo mifa nari asaukukinaa saunu maqasaa Faraona afusaa aqusainanoo sakanikiani.

<sup>10</sup> Mooseesa Aaroonasa Faraoo funnai oonuree Yaaweefa qimannimundee qiqau. Aaroonafa nari saunu Faraona faqa mina uriqarara fasiqauqa faqa nifusaa aqusoofanoo sakani kinau.

<sup>11</sup> Faraofa mina qafamaseenoo nari irirana faqaa fasiqauqa faqa nari afunee fasiqauqa faqa naarofaqa anireeqa nari afuneenoo Aaroonafa auqoo ainaina auqaqau.



<sup>12</sup> Mi afunee fasiqausa faqa nariqa saunu maqasaa aqusoofanoo sakanikinau. Sakani kamafufanoo Aaroonasa saunu fannoo misaindi nambiqamasanau.

<sup>13</sup> Faraofa mina qafamaseenoo Yaaweefa qundee inoo kaukaata qira irirafa kaqi minaki marufanoo sia Mooseesa Aaroonasa ufa irinai.

*Mandainaina Isipa maqannaasaki kambiqanau.*

<sup>14</sup> Sia irufanoo Yaaweefa kafaa Mooseena qimaminoo qinai. Faraofa kaaqa kaukaata qira irirafa minaki marifanoo idukirara akooqaidanoo.

<sup>15</sup> Duna kananaana Faraofa Niru nammari auqarara ooqufinaqa innee-qara mina minni ooqu paquriaqa. Sakaniki mari saununa faqa mara maree nammari afainni ooqu marida minara rakisiaqa.

<sup>16</sup> Paquri maseeqa maaqi qimasee qimamiaqa. Yaaweefa Heeburu maqanna Anutufa maaqanda diqifaifaqa Isaraee maqannaasa anee idukusainaga aadana maqa maaqai oonureeqa qiniara innaaru qiaqee qifaqa ani qimamidaqa. Anee sia iri mariananoo.

<sup>17</sup> Maqee Yaaweefa aniara maaqi qidanoo. Anee qinee auqaana ainaina qafamasee anee qiniara Yaawee fee qimasee irinnaranoo. Anee qafainaga qinee nammari amuaqu maa saununannoo rukamu amiananoo nammari fannoo fidikaika miannoo.

<sup>18</sup> Miqinanoo noodaanna minakinaafauqa aiqama kuqu taikainanoo nammari faqa manda unda inaga Isipa maqannaasa sia amana mi nammarina neefaranoo.

<sup>19</sup> Yaaweefa Mooseena kafaa qimaminoo qinai. Anee Aaroonasa maaqi qimasee qimaminanoo nari saunu qumaree aiqama nammariuqa faqa oorakinaa nammariuqa faqa akammandira nammariuqa faqa aiqama nammari amummaqa uqeeraani. Nammari fannoo aiqama fidikaika kai mafuannoo. Aiqama Isipa maqa maaqakinaa nammariuqaki fidika kai mariannoo. Difaaniki faqa afeeki faqa sakaqainafa faqa kai fidika aruannoo.

<sup>20</sup> Mooseesa Aaroonasa Yaaweefa qima nimundee iqau. Faraona faqa mina uriqarara rakisiraua faqa nifusaa Aaroonafa nari saunu uqeeraseenoo nammari amuaqu arufanoo aiqama mi nammarisa fidika kai arinai.

<sup>21</sup> Noodaanna aiqama nammarikinaafa kuqu taikafufanoo nammari kaaqa manda undufaqa Isipa maqannaasa sia mi nammarisa nee mariqau. Aiqama Isipa maqa maaqakinaa nammariuqaki fidika kai arinoo marinai.

<sup>22</sup> Faraona afunee fasiqauqa nariqa afuneenoo Aaroonafa undee iqau. Miqufanoo Faraofa Yaaweefa qundee inoo kaukaata qinoo Mooseesa Aaroonasa ufa sia irinai.

<sup>23</sup> Faraofa mina qafamaseenoo nari maaqai oonureenoo sia mi ainainausara irinai.

<sup>24</sup> Isipa maqannaasa nammariara randoosia Niru nammari afaiqara nukuda indufusaida amiqira nammari sakasaidaqa neemariqau. Anoonaa nammari mandaikinoo marunara sia neemariqau.

<sup>25</sup> Qisauku dinni taikasee dinni ani qaara marasee 7 faasaana nammari kaqi fidika arinoo marinai.

## 8

*Eeqamoosauqa kambiqaqau.*

<sup>1</sup> Yaaweefa kafaa Mooseesa Aaroonasa qimanniminoo qinai. Inneeqara Faraoo finnai oonuree maaqi qimasee qimamiaqa. Yaaweefa aniara maaqi

qidanoo. Anee qini qiku qisauku idukusainaqa misa qiniara innaaru qidaqa qimooqiaqee qinoo.

<sup>2</sup> Anee qaoo qinaqa qinee eeqamoosa moomora qianaqa anireeqa ani maqa maaqa qumbiqeefaranoo.

<sup>3</sup> Niru nammariki faqa eeqamoosa kai qumbiaqa marifaranoo miqooqari anee kooti marianna firaa maaqanaki faqa keeqeefaranoo. Anee faiqee mariannanaki faqa keeqeefara. Ani qaari qamunnasaa faqa qumbiqeefaranoo. Ani faiqí firaa faqa ani maqannaasa faqa misa oonidaki faqa afeeki faqa qumbiqeefara.

<sup>4</sup> Eeqamoosa fannoo urureenoo ani faqa ani ainainirausasa rakisi mariasa faqa ani maqannaasa faqa nifaaqai akareefaranoo. Miqi qufanoo Faraofa sia mi ufana irinau.

<sup>5</sup> Yaaweefa kafaa Mooseena qimaminau. Anee Aarona maaqi qimasee qimamia. Doo aneenna saunu uqeeraseenana aiqama nammari faqa oorakinaa nammari faqa aka mandira nammariuqa faqa uqeera uqafiqasainanoo eeqamoosa fannoo moomoo urureenoo Isipa maqa maaqa rafaqa fuani.

<sup>6</sup> Aarona ufa iriseenoo saunu uqeeraseenoo aiqama nammariuqa nimummaqa uqeeranau. Uqeerasoofanoo eeqamoosauqa moomoo nammarikiqari urureeqa maqa maaqa rafaqa fiqau.

<sup>7</sup> Isipa maqannaafunee fasiqauqa misa faqa nári afunee auqusoofanoo eeqamoosa moomoo nammarikiqari Isipa maqa maaqaki qumbiqaqau.

<sup>8</sup> Faraofa eeqamoosara akooqoofanoo Mooseena faqa Aarona faqa naaramasee qimanniminau. Inneeqara oonu Yaaweenara innaaru qimaisaifanoo kafaa eeqamoosa niqaani. Eeqamoosa aiqama niqamasainaqa qinee Isaraee maqannaaf karabusakinaana idukusaanaqa oonureeqa Yaaweenara aandau tatufirana suqa amiaqa.

<sup>9</sup> Mooseefa Faraona ufa iriseenoo qimaminau. Qinee inniara innaaru qirara asasammidaqa. Aneenna kai yairee fee innaaru qiannee qinaqa qinee aniara faqa ani ainainirausasa rakisirausara faqa ani maqannaara faqa innaaru qianaara. Mi faasaana kai inni maaqakiaqa qari eeqamoosauqa quqasee Niru nammariki kai ooqu marifaranoo.

<sup>10</sup> Faraofa iriseenoo duna kai innaaru qiannee qufanoo Mooseefa iriseenoo qimaminau. Anee qianandee ianaara. Miqianana anee mina qafamaseenana sia moo maqasaa anutufa Yaaweenara maasa Anutuna fooqaafa maridanoo fee qimasee irinnaranoo.

<sup>11</sup> Aniki faqa ani ainainiranasaa rakisirausaki faqa ani maqannaasaki faqa maria eeqamoosausa taika fuannoo. Sia uqanna moodaa faqa kaqi mariannoo. Niru nammariki kai marifaranoo.

<sup>12</sup> Mooseefa faqa Aarona faqa Faraona maaqakiqari raudeeqa oonuroofanoo Mooseefa Yaawe funnai eeqamoosa Faraona faqa nári maqannaasaki faqa quqaqoona taika nisaanifeera innaaru qinau.

<sup>13</sup> Yaaweefa Mooseefa iroondee inau. Aiqa maaqakinaa eeqamoosauqa faqa maaqa naambeeqa qara maru eeqamoosausa faqa maaqa saqama atiqara marusa faqa aiqama qufaqa kuqu taikaqau.

<sup>14</sup> Isipa maqannaasa mi eeqamoosausa kuqiranauqa mareeqaida moodaanaki quqeesoofaqa putaa iqa aiqama maqa maaqaki putaa undi marinau.

<sup>15</sup> Eeqamoosa kuqu taikafufanoo Faraofa qafamaseenoo Yaaweefa gundee inoo kaukaata qimaseenoo sia Mooseena faqa Aarona faqa ufa irinau.

*Aakukauqa kambiqaqau.*

<sup>16</sup> Yaaweefa Mooseena qimaminoo qinau. Aarona maaqi qimasee qimamia. Aarona anee aneenna saunu qumaree maqa rupeemma aminanoo kookooma fannoo quandaki aakukaikamafi Isipa maqa maaqaki umbiqaani.

<sup>17</sup> Aarona nari saunu samu kookooma rupeema amufanoo aiqama Isipa maqa maaqakinaa kookooma fannoo aakukaikinau. Mifa faiqi anaasee faqa aandaufa faqa nifaagasasa qumbiaqa marida ukaqa nimi mariqau.

<sup>18</sup> Isipa maqanna afunee fasiqauqa Aarona oosana qafamaseeqa misa faqa nari afuneennai aakuka amanammasee qafaanee qimasee amanufanoo sia ufaqa minnisauqa. Minnisoufaqa aakukauqa aiqama atinai amanaikiqa mariqau.

<sup>19</sup> Afunee fasiqauqa Faraona qimamiqa qiqau. Anutufa maa ainaina auqaidanoo. Faraofa misa ufa iriseenoo Anutufa qundee inoo kaukaata qimasee Mooseesa Aarona ufa sia irinau.

*Faufaariuqa kambiqaqau.*

<sup>20</sup> Yaaweefa Mooseena kafa qimaminoo qinau. Duna kananaana uqanna Faraofa nammari auqarara ooqu fuannoo. Anee kananaana findifinana ooqureenana paqurimasee maaqi qimasee qini ufa qimamia. Faraoo Yaaweefa aniara maa ufana qinoo. Anee qini qiku qisauku idukusainaqa qini qimoo qiaqee qinoo.

<sup>21</sup> Qinee ani aaqu qimama qaidaqa anee sia idukinaqa qinee ani faqa ani ainainiranasaa rakisiraua faqa ani maqannaasa faqa faufaarinnoo aupurarana nimiana. Isipa maqannaasa maaqauqaki faufaari kai qumbiqaannoo. Aiqa misa maqa maaqa faqa rafaqa fuannoo.

<sup>22</sup> Miqi mafinaqa qinee Kooseena maqa maaqaki qini faiqi anaasee mariasasaa ititasaana sia faufaari iannoo. Qinee miqianana anee qini Yaaweesara mi maqa maaqanaki maridanoo fee qinnaranoo.

<sup>23</sup> Qinee ani faiqi anaasee faqa qeeqa faiqi anaasee faqa rainaanaura. Mi rainarafa naaquqara ainaina duna kambiqaannoo.

<sup>24</sup> Kananaana Yaaweefa qufaqa faufaari moomoo uqanna nukudara foora anireeqa Faraona ufa irira maaqaki faqa mina ainainiranasaa rakisi marusa maaqakiaqa faqa aiqama Isipa maqa maaqaki faufaari fannoo mandaika uqanna masanau.

<sup>25</sup> Miqimmasoofanoo Faraofa Mooseesa Aarona naaramaseenoo qimannimau. Innee maaqoo Isipa maqa maaqaki moo atinai inneeqa Anutuna tatufirana suqasee innaaru qiaqa.

<sup>26</sup> Mooseefa nari qimaminoo qinau. Maasa sia amana miqianaura. Isipa maqannaasa Yaaweenaa maasa Anutuna tatufirana suqa amiranara nikooqaandora. Maasa maa aandausannoo tatufirana suqarafa Isipa maqannaasa nikooqarana nimianaqa maasa qiqafamaseeqa oonisamu maasa kuqa darifoora.

<sup>27</sup> Maasa qaaramoo faasaana aadana maqa maaqaki oonuree aandau tatufirana Yaaweenaa maasa Anutuna nari qimannimundee kai iqa suqa amiana.

<sup>28</sup> Faraofa iriseenoo qinau. Doo amana innee aadana maqa maaqai oonu maridaqa aandau tatufirana suqasee Yaaweenaa inneeqa Anutuna amiaqa. Sia nianai fuaqa, adeedi maridaqa innaaru qidaqa qiniara faqa innaaru qiaqa.

<sup>29</sup> Mooseefa Faraona ufa iriseenoo qimaminau. Ani maaqakiqari raudeeqa qumureeqa innaaru qianaara. Duna kananaana faufaari taikaannoo. Ani maaqaki faqa ani ainainiranasaa rakisirausa maaqaki faqa ani maqannaasa maaqaki faqa duna kananaana taikaannoo. Faraoo sia kaifaa unna qimaseenana qaoo qia. Isaraee maqannaasa Yaaweena tatufirana sugamiranara sia kafaa qaoo qia.

<sup>30</sup> Miqi qimaseenoo Mooseefa Faraona maaqaki aiseenoo raudamafinoo Yaaweenara innaaru qinau.

<sup>31</sup> Yaaweefa Mooseena irara ufa iriseenoo faufaari Faraona maaqaki-naana faqa mina ainainiranasaa rakisi marusa maaqakinaana faqa mina maqannaasa maaqakinaana faqa aiqama taikannisanau. Sia moodaa faufaari kaqi marinau.

<sup>32</sup> Miqi marufanoo Faraofa kafaa kaukaata qimaseenoo sia Isaraee maqannaasa idukusoofaqa fiqau.

## 9

### *Isipa maqannaasa firimaru aandausa kuqiqau.*

<sup>1</sup> Anutufa kaifaa Mooseena qimaminau. Anee Faraoo finnai oonureenana maaqi qimaseenana qimamia. Oo Faraoo, Yaaweefa Heeburu maqanna Anutufa aniara maaqi qidanoo. Anee qini qiku qisauku idukusainaqa qiniara innaaru qimaseeqa qimooqiaqee qinoo.

<sup>2-3</sup> Anee kaifaa qaoo qimasee Isaraee maqannaasa sia idukinaqa, qinee manda auriranara qiananoo ani aanda qoosauqa faqa doonkiuqa faqa kameerauqa faqa burimakauqa faqa sipsipauqa faqa mimmiuqa faqa mi aurirana nimianauranoo.

<sup>4</sup> Qinee aanda rainaauranoo Isipa maqanna aadau aurirana nimanauranoo. Isaraee maqannaasaindi sia aurirana nimianaqa sia misaindi kuquannoo.

<sup>5</sup> Qinee Yaaweesa duna faasaana miqianauranoo fee qidaqa.

<sup>6</sup> Iaqqoo kananaana Yaaweefa narí qundee inau. Isipa maqannaasa aanda aiqama kuqu taikaqau. Isaraee maqannaasa aanda sia moo kuqinau. Kaqi mariqau.

<sup>7</sup> Faraofa minara iriseenoo narí maqannaasa niqiqoofaqa oonu qafamasee aniree Faraona qimamiqau. Isaraee maqannaasa aanda sia uqanna moodaafa kuqinoo. Miqi qufanoo Faraofa kaukaata qimasee sia Isaraee maqannaasa idukusoofaqa fiqau.

### *Isipa maqannaasa nifaaqai abeemaqa kambiqanau.*

<sup>8</sup> Yaaweefa kafaa Mooseena faqa Aarona faqa qimanniminoo qinau. Moosee anee danda qoodaa asaukunoo afaqamaree Faraona oorinni oonuree innaarunai aqua.

<sup>9</sup> Miqimmasainanoo mi dandafa kookoomara foora aiqama Isipa maqa maaqakinai aqufinoo aandaqa faqa faiqi anaasee faqa nibeema naruani. Naru finoo radiqinoo namuana firaafa kambiqani.

<sup>10</sup> Mooseefa faqa Aarona faqa Yaaweena ufa iriseeqa danda afaqamaree Faraoo funnai fiqau. Faraona oorinni oonu kikiqa mafufaqa Mooseefa mi dandana innaarunai aqinau. Aqusoofanoo maqasaa aqufinoo mi dandafa aandaqa faqa faiqi anaasee faqa abeema nimanau. Nimisoofanoo mifa radiqinoo namuana firaafa narí marinau.

<sup>11</sup> Isipa maqanna afunee fasiqauqa sia amana Mooseena afusaa anirana amanaikiqau. Misa faqa aiqama Isipa maqanna undee kai inoo abeema narí marunara sia Mooseefa maruqoo aniqau.

<sup>12</sup> Miqufanoo Yaaweefa qufanoo Faraofa kaukaata qimasee Yaaweefa qundee inoo sia Mooseesa Aaroonasa ufa irinau.

*Firaa aaku faqa pupusamu faqa aqufinau.*

<sup>13</sup> Yaaweefa mina qafamaseenoo kafa Mooseena qimaminoo qinau. Inneqara duna kananaana findifiqa oonureeqa Faraona maaqi qimasee qimamiaqa. Heeburu maqanna maasa Anutufa Yaaweefa aniara maaqi qidanoo. Anee qini faiqi anaasee idukusainaqa misa qini qimooqiaqee qidanoo.

<sup>14</sup> Anee sia miqinaqa mikari qinee sia ani ainainiranasaa rakisirasa faqa ani maqannaasa faqa kai naruanauranoo, ani faqa aupurarana amianauranoo. Miqianana anee irinnaranoo, sia moo fannoo qini daanna rarafa aiqama maqa maaqaki maridanoo.

<sup>15</sup> Qinee ani faqa ani maqannaasa faqa manda auriranannai amana naru taikaunaiqini.

<sup>16</sup> Qinee inni qeeqa afeeka uqannifiqarara inni minni nisaunaqa kaqi marianara qini afeeka duqu aiqama maqa maaqaki daraaniannoo.

<sup>17</sup> Faraoo, anee kaqi kai ramoo ramaa idana sia qini faiqi anaasee idukusaanaqa fidammia.

<sup>18</sup> Duna suani afu maa maqee marina amanasaa ururainaqa qinee qiananoo aaku firaa pupu samu namufaqa aqufuannoo. Miqira pupu samu Isipa maqannaasa ooqai faqa maqee mariaqooqari faqa sia qafoo ainainafa maqee kai kambiqaanoo.

<sup>19</sup> Doo aneenna maqannaasa qimanniminaqa nariqa aandauqa faqa aiqama ainaina madaana mari ainainausa faqa mareeqee maaqaki quqaaqa. Madaana marinna andausasaa faqa faiqi anaaseesaa faqa firaa pupusamu aqufinoo kuqa naruannoo.

<sup>20</sup> Kinna Faraona ainainasaa rakisi marusa uriqararasa akaqausa Karaambaiqa mi ufanara rufisee nariqa ainainira faiqiuqa faqa aandauqa faqa mareeqee maaqaki uqaqau.

<sup>21</sup> Akaqausa Yaaweena ufa irisee nikooqoosa misa nariqa ainainira fasiqauqa faqa nariqa aandauqa faqa kaqi madaana quqaqooqari mariqau.

<sup>22</sup> Iaqoofanoo Yaaweefa Mooseena qimaminoo qinau. Aneenna asaku innaarunai uqeraa. Uqeerainanoo pupu samu aiqama Isipa maqa maaqakinaa fasiqa anaaseesaa faqa aandauqasaa faqa aiqama afuqakinaa naranauqasaa faqa aqufuani.

<sup>23</sup> Miqi qufanoo Mooseefa nari saunu innaarunai uqerasoofanoo Yaaweefa innaarunai qirana faqa aakuasaa faqa pupusamu faqa quqa-soofanoo maqasaa quminau.

<sup>24</sup> Yaaweefa aaku faqa pupu samu faqa quqaseenoo aakuasara qufanoo aiqama atinai uqi marinau. Ooqai Isipa maqannaasa miqirana sia qafaqau. Mikari kai firaa uqanna kambiqooqari qafaqau.

<sup>25</sup> Pupu samu fannoo aiqama Isipa maqanna maqusai quqaqoo ainainausa faqa aiqama faiqi anaasee faqa aandauqa faqa narinu. Mifa aiqama afuqakinaa narana faqa saqari qaqama nee marunauqa faqa itairi aqinau.

<sup>26</sup> Koosena maqa maaqaki Isarae maqanaasa maruqoo kai pupu samu sia aqufinoo narinu.

<sup>27</sup> Faraofa mina qafamaseenoo Mooseena faqa Aarona faqa naaramaseenoo qimanniminu. Maqee qinee aaqamamma seeqa. Yaaweefa andeeqarafa maridanoo. Qinee faqa qeeqa maqannaasa faqa aqee marunausa maridaqa.

<sup>28</sup> Innee qara oonuree Yaaweenara innaaru qiaqa. Maasa innaarunai qiranara faqa pupu samuara faqa qikoo uqanna qeenoo. Qinee inni idukusaanaqa fifaranoo fee qimasee qima afeekaikidaqa. Innee sia maaqoo kisaagasaa marifaranoo.

<sup>29</sup> Miqi qufanoo Mooseefa qimaminau. Qinee ani maqusa naambeeqai oonureeqa qisauku Yaawee finnai uqeerasee innaaru qiananoo innaarunai qirafa faqa pupu samu faqa taikaannoo. Miqimasaanana anee maa maqa maaqanara Yaaweenaindi fee qimasee irinnaranoo.

<sup>30</sup> Qinee iridaqa anee faqa ani ainainiranasaa rakisirausa faqa sia Yaaweenaa maasa Anutunara rufiee mariafanoo.

<sup>31</sup> Mikari Isipa maqannaasa reepaa faqa raisa fooqaa ira ainaina baari faqa mandaikinau. Baari fannoo akuqamafufanoo reepaa qaqama irarara deedaqa mafufanoo pupu samu fannoo aqufinoo mandaika masanau.

<sup>32</sup> Sia moodaa uita fannoo mandaikinau. Mifa inaaqianna ummaqirafa maridanoo maqee uri marunara sia mifa mandaikinau.

<sup>33</sup> Mooseefa Faraona maaqakiqari raudeenoo naambeeqai qumureenoo asauku innaarunai uqeerasee Yaaweenara innaaru qinuu. Innaaru qufanoo innaarunai qirafa faqa pupu samu faqa aaku faqa aiqama taikanau.

<sup>34</sup> Taikafufanoo Faraofa qafamaseenoo kafaa aqaanau. Mifa faqa nari ainainiranasaa rakisi marusa faqa kaqi kai kaukaataqiqa ani mariqau.

<sup>35</sup> Ooqai Yaaweefa Mooseena qimamundee kai inoo Faraofa kaukaata qimaseenoo sia Isaraee maqannaasa idukusoofaqa fiqau.

## 10

### *Pandaaqauqa moomoo kambiqaqau.*

<sup>1</sup> Yaaweefa kafaa Mooseena qimaminoo qinuu. Anee kafaa Faraoo finnai fua. Qinee Faraona faqa mina ainainiranasaa rakisirausa faqa kaukaataqira irirana nimiseeqa qeeqa faiqi sia auqaaqaa ira ainaina misa qambaana auqarara miqianaura.

<sup>2</sup> Innee inneeqa faiqi namu faqa ninaiqimara faqa, qinee Isipa maqannaasa faiqi sia auqaaqaa ira ainainannai misa mara furufarirausaika mannimaqaafannanara qimannimia. Innee aiqamausa qini Yaaweesara irifaranoo.

<sup>3</sup> Mooseefa faqa Aaroonafa faqa Faraoo funnai oonuree maaqi qimasee qimamiqa qiqau. Yaaweefa Qeeburu maqannaasa Anutufa aniara maaqi qidanoo. Kisaagasaa fee anee qaoo qidaneesia fee aneenna auqu mara maree muqufisee qini qimeemaanai marinnaree. Anee qini faiqi anaasee idukusainaga oonureeqa qiniara innaaru qiaqee qidanoo.

<sup>4</sup> Anee kaqi kai qaoo qimarinaqa qinee duna pandaaqa moomoo mara quqasaanaqa ani maqa maaqaki qumbiqaanoo fee qinoo.

<sup>5</sup> Pandaaqa moomoo uqanna kambiqafi maqa ititafinaqa sia maqa qafeefaranoo. Puposamu fannoo naridanoo mafisai andandausa aiqama nama taikeefaranoo. Saqari mafisainauqa faqa neefaranoo.

<sup>6</sup> Mi pandaaqausa ani ufa irira maaqaki faqa ani ainainiranasaa rakisi mariasa maaqakiaqa faqa ani maqannaasa maaqakiaqa faqa qumbiqeeffaranoo. Ani akeeku akaaku maruqooqari faqa maqee anee mariannaqooqari faqa sia qafaa ainainafa mandainaina uqanna mariannoo. Miqi qimaseenoo Mooseefa raudamaki finuu.

<sup>7</sup> Faraona ainainirana saa rakisi marusa Faraona qimamiqa qiqau. Maa fasiqafa Mooseefa kisaagasaa maasa ummaara qimidanoo. Isaraee

maqanna idukusainaqa oonuree nári Anutuna Yaaweenara innaaru qiaqa. Anee sia fee qafaidanee Isipa maqa maaqa doo mandaikidanoo.

<sup>8</sup> Miqi qufaqa Mooseesa Aaroonasa nifiqee Faraofa maruqoo minisoofanoo Faraofa qimanniminoo qinau. Innee oonureeqa inni Anutuna Yaaweenara innaaru qiaqa. Inneeqa firanara faqa amiqi masee qimaqimi-faqa iria. Yauyausee fifaranoo fee.

<sup>9</sup> Miqi qufanoo Mooseefa narí qimaminoo qinau. Maasa aiqamausa fuanauranoo. Maasa qeeqa faiqi asooqa faqa fuanauranoo. Maasa qeeqa sipsipauqa faqa mimmiuqa faqa burimakauqa faqa aiqama oonuree Yaaweena oomaqa suqamianauranoo.

<sup>10</sup> Miqi qufanoo Faraofa qinau. Qinee Yaaweena auqu ramasee qeeqa qimana aiqamasee maaqi qidaqa. Qinee sia eedoo qianaqa innee inneeqa faiqi anaasee nifiqee fifaranoo. Innee akooqoo maasa mandaikamma qimaqarara tipundaara maqagee miqi mariafanoo.

<sup>11</sup> Minara qinee inniara faiqi kai oonureeqa innee iri mariandee Yaaweenara innaaru qimaseeqa amooqiaqa. Miqi qimasee narí sundi-augara qufaqa Mooseesa Aaroonasa niiqoofaqa raudee fiqau.

<sup>12</sup> Yaaweefa mina qafamaseenoo Mooseena qimaminoo qinau. Aneenna asaku Isipa maqa maaqa amummaqa uqeerasainaqa pandaagauqa aniaqa. Anireeqa misa Isipa maqannaasa narana amanee aiqama naaqa. Pupu samu aridanoo mafisoona namataikaqa.

<sup>13</sup> Mooseefa iriseenoo narí saunu uqeerasoofanoo Yaaweefa ufaira qufanoo suani oosaindari mi faasaana faqa mi eendanaki faqa uqinau. Kananaana ufai fannoo pandaagauqa moomoo maree urinau.

<sup>14</sup> Pandaaga moomoo nukudara foora urureeqa aiqama Isipa maqa maaqaki amanaikiqa mariqau. Moomoo indaaru ooqbiqasee urufaqa kfaa inaaqiana akaqausa ooqbiqasee urufaqa, miqi kai masaida moomoosa uru maqa maaqa qumbiaqau. Ooqai sia miqirana qafaqau, naaru faqa sia qafeefaranoo.

<sup>15</sup> Mi pandaagausa aiqama maqa rafaagafusoofanoo sia maqa ati faqa kooroo inau. Maqa faqa kai kudima arinoo marinau. Pupu samu fannoo aridanoo mafisoo andandausa faqa aiqama saqari qaqama faqa nasaqau. Sia saqari amanee arira ainaina, saqarisaa faqa ummaqira ainainasaa faqa Isipa maqa maaqaki marinau.

<sup>16</sup> Faraofa Mooseesa Aaroonasara aniaqee qufaqa aniroofanoo qimanniminu. Qinee Yaaweena inni Anutuna faqa inni faqa mandaikamma nimaqeeqa.

<sup>17</sup> Inneeqara qini aqarana akiiqara kfaa maqee kai minni qisaqa. Minni qiseeqa Yaaweena inneeqa Anutufinnai innaaru qifanoo maa kuquaqaa ira aupurarana mara aqu qisaani.

<sup>18</sup> Mooseefa iriseenoo raudamaku fanoo oonureenoo Yaawee funnai innaaru qinau.

<sup>19</sup> Yaaweefa qufanoo ufai fannoo suani afu oosana qaannaindari uriufa mara quandasee suani afu keeqee marunnaindari afeeka ufai uqanna uqinoo aiqama pandaagauqa fuaqa Taatuqee ooruku nammarrinni aqinau. Sia uqanna moodaa pandaaga Isipa maqa maaqaki kaqi marinau.

<sup>20</sup> Yaaweefa qufanoo Faraofa kaukaata qimasee sia Isaraee maqannaasa idukusoofaqa fiqau.

*Asukuna firaafa narinau.*

<sup>21</sup> Yaaweefa kfaa Mooseena qimaminoo qinau. Anee aneenna asaku innaarunai uqeerasainanoo asukuna fannoo aiqama Isipa maqa maaqa

rafaaqafuani. Asukuna firaafa misa nifaaqai atooqanoo maridanoora foora inoo mariannoo.

<sup>22</sup> Mooseefa nari asaku innaarunai uqeerasoofanoo Isipa maqa maaqa asukuna firaafa qaaramoo faasaana ititannimaqanau.

<sup>23</sup> Isipa maqannaasa mikari sia nari qafee nari qafee imariqau. Sia aana nimariqau, maaqaki kai mariqau. Isaraee maqannaasa maruqoo kai kaaqa qee marufaqa marinau.

<sup>24</sup> Faraofa Mooseena aaramaseenoo qimaminau. Aneenna maqannaasa faqa doo oonureeqa Yaaweenara innaaru qimaseeqa amooqiaqa. Innee inneeqa faiqi anaasee faqa aiqama nifiqee fuaqa. Inneeqa aandaufa maaqoo quqasee inneeqa kai fuaqa.

<sup>25</sup> Miqi qimasooofanoo Mooseefa qinuu. Maasa nariqa aandaufa faqa maree oonureeqa Yaaweena maasa Anutuna tatufirana suqa amianaaura.

<sup>26</sup> Maasa qeeqa aandaufa maree fuaaura. Sia moodaa maaqoo kaqi mafi quqaanaura. Maasa qeeqa kai nana aandaufee aruseeqa Yaaweena maasa Anutuna tatufirana suqa amianauree. Maasa maqee sia iridaqa. Miqoo oonuree irianaaura. Nana aandaunoo fee tatufirana suqaanauree.

<sup>27</sup> Yaaweefa qufanoo Faraofa kaukaata qira irirana maraseenoo ititamaseenoo Isaraee maqannaasa sia idukinau.

<sup>28</sup> Miqi qimaseenoo Faraofa Mooseena qimaminau. Doo qinee qafee mariana qini qifusaaqari fifua. Qinee sia kaifaa ani qafaanaura. Ani qafaanana kuqinnaranoo.

<sup>29</sup> Mooseefa mina ufa iriseenoo Faraona qimaminau. Anee kuqaa qiananoo. Anee sia kafaa qini qiqafeennaranoo.

## 11

### *Akoonaiqi ooqa faiqiuqa kuquaqee qiqau.*

<sup>1</sup> Miqi qimasooofanoo Yaaweefa Mooseena qimaminoo qinuu. Qinee moodaa ummaara kai Isipa maqannaasa karaambaiqa faqa mina maqannaasa faqa nimianaaura. Miqimmasaanoo mifa inni idukusainaga fifaranoo. Kuqaa uqanna mifa sia reendeenasaa inni niqaannoo. Kaukaata qidanoo niqaannoo.

<sup>2</sup> Moosee anee aneenna maqannaasa maaqi qimasee qimannimia. Misa aiqama Isipa maqannaasa nari naaqa mariasa iramirifaqa nifaaqa auqi maria ainainna siruaannoo faqa koorannoo faqa auqirana nimiaqa.

<sup>3</sup> Yaaweefa qufaqa Isipa maqannaasa Isaraee maqannaasara uriqararausee qiqau. Isipa maqannaasa Faraona ainainiranasaa rakisi marusa faqa aiqama faiqi anaasee faqa Mooseenara kaaqa uriqarara fee qimasee ainaina nimiraree qiqau.

<sup>4</sup> Mooseefa Yaaweena mi ufana iriseenoo oonu Faraona qimaminoo qinuu. Yaaweefa aniara maaqi qinoo. Eendamuqusai uqanna qinee Isipa maqa maaqaki nuanaura.

<sup>5</sup> Isipa maqannaasa akoonaiqi ooqa faiqiuqa aiqama kuqifaranoo. Ani Faraona faiqi ani amaaqa maqaaninnana saaqari oosana arasee miqooqaraasa ooqa faiqiuqa faqa kaaqa ureeqarasa ooqa faiqiuqa faqa aiqama naru taikaannoo. Aiqama burimmakauqa ooqa aanaaqiuqa faqa kuqifaranoo.

<sup>6</sup> Aiqama Isipa maqa maaqaki ikifaafau qirafa firaafa mariannoo. Ooqai sia miqira iki raqarafa marinau. Kasooqafee faqa sia miqira qikiraqarafa mariannoo.



<sup>7</sup> Miqi marifanoo sia uqanna faini fannoo Isaraee maqannaasa faqa misa aandauqa faqa nindafeenoo kau kau qiannoo. Miqinana anee qinee Yaaweesa Isaraee maqannaasa faqa Isipa maqannaasa faqa rainee marunnanara irinnaranoo.

<sup>8</sup> Mooseefa kafa Faraoona qimamidanoo qinau. Ani ainainiranasaa rakisi mariasa aiqamausa qinee iannannai anireeqa qini doorinni niqoori saunu arafiqa qiniara doo aneenna maqannaasa nifiqee fuannee qifaranoo. Miqi qifaqa qinee doo fuanauranoo. Mooseefa miqi qimasee aranaqoofanoo aanoomaseenoo raudanau.

<sup>9</sup> Raudamafufanoo Yaaweefa Mooseena qimaminoo qinau. Faraofa ani ufa sia uqanna iriannoo. Miqi marinaqa qinee faiqi sia auqaqaa ira ainaina moo faqa moo faqa auqaanaura.

<sup>10</sup> Mooseefa faqa Aaroonafa faqa Faraoona oorisa mi oosana oosanna ainainna auqoofanoo mifa sia irinau. Yaaweefa qufanoo kaukaata qira irirana maraseenoo sia niqiqoofaqa mina maqa maaqakiqari fiqau.

## 12

### *Ainnaaqarara qoomaqa oosana arasee naqau.*

<sup>1</sup> Mooseena faqa Aaroonafa faqa Isipa maqa maaqaki Yaaweefa kafa qimanniminoo qinau.

<sup>2</sup> Innee aiqama aukuanaki maa quqoonnara maasa indaaruaqa quqoona fee qifaranoo.

<sup>3</sup> Anutufa Mooseena qimaminoo qinau. Aiqama Isaraee maqannaasa maa ufana qimannimia. Maa quqoonnasaa qisaukuqara taikasee faasaanasaa moodaa moodaa fasiqa oonu sipsipa aanaaqi fee mimmi aanaaqi fee nari maaqaki mariasa naaqeera maraqa.

<sup>4</sup> Mi maqanakinaasa ooda maridaqa sia mi andauna nama taikaqaa inaqa misa naqa marinausa naaramasee misa faqa amana rainasee naqa. Faiqi anaasee nimana nimana kai aukusee niminaqa naifanoo taikaani.

<sup>5</sup> Innee sipsipa aanaaqi fee mimmi aanaaqi fee akoona kai moodaa aukuna marasainnana, sia moo nammuana faqa aurirana faqa marinnana maraqa.

<sup>6</sup> Mi quqoonnasaa qisaukuqara taikasee qikunni qaara faqa qaara faqa marasee 14 faasaana eenee marinaqa kai aiqama Isaraee maqannaasa mi andauna aruaqa.

<sup>7</sup> Sipsipa arusaifaqa mina fidika sakaseeqa maaqa kooqiuqa dinni dinni afaimau faqa mirinni auni riranasaa faqa akuqa. Innee mi andauna neefandinna maaqana kooqi aku amaqaqa.

<sup>8</sup> Mi eendanaki kai mi andauna amaqa idasaa kasooqammasee sukaqee mari adasana namufaqa naqa. Sia innooqee mari pauraqana aqira bereeta suqasee sipsipa amaqa namufaqa naqa.

<sup>9</sup> Sia fuka naqa. Nammariki faqa sia suqasee naqa. Idaki kai akiiqa faqa aiku faqa arada faqa suqasee naqa.

<sup>10</sup> Eendaki mina aiqama taikaqa. Mina ataraasa sia kananaana kaqi mariani, ida qarasinanoo taikaani.

<sup>11</sup> Innee maaqimmasee mi andauna naqa. Amunnanda maraseeqa niku aanaamu afisuseeqa, saunu nisaukuki qumareeqa doo kaqi kaqi naqa. Namaseeqa maaqooqari innee mi narannara Yaaweefa ainnaaqaroo narana fee qiaqa.

<sup>12</sup> Mi eendanaki qinee Isipa maqa maaqa aiqamai oonuree aniree idaqa aiqama ooqa akoonaiqi faqa ooqasaa andau akoonauqa maqarana faqa

kuqa naruanaura. Qinee Yaaweesa Isipa maqannaasa unna anutusa faqa aupurarana nimianaura.

<sup>13</sup> Fidika kooqi afaisaa aku amaqarafa mifa kai innee maria maaqana koorooiannoo. Qinee Isipa maqannaa aiqama nariqa fidaqa inni maaqa kooqisaa fidika qafamasee ainaaqaraanaura sia inni naruanaura.

<sup>14</sup> Innee mi faasaanna amaana qoomaqa faasaanara foora marinaqa qinee Yaaweesa auqaafanna ainainara naaqoo auqainaqa irisee asasifaranoo. Innee aiqama kari mi faasaannara asasifaranoo.

*Pauraqa sia quqara bereeta neemaru firaa faasaanafa.*

<sup>15</sup> Yaaweefa kaifaa maaqi qinau. Qisauku dinni taikasee dinni ani qaara marasee 7 faasaana innooqee mari pauraqana aquqaa bereeta sia naaqa. Sia pauraqa aqira bereeta kai naaqa. Oomaqa indaaruaqa faasaana inneeqa maaqakiaqa aiqama innooqee mari pauraqana mara aqusaqa. Oomaqaki faiqi moo fannoo innooqee mari pauraqana aqira bereeta nainna fasiqanara sia Isaraee maqannaa fee qiaqa.

<sup>16</sup> Oomaqa indaaruaqa faasaana faqa qoomaqa taikara faasaanara faqa naaquqara faasaanee qimasee suqufi innaaru qiaqa. Sia moo ainainirafa mi faasaana qandasaa mariani. Narana deedaqirafa kai mariani.

<sup>17</sup> Innee miqimmasee qoomaqa naida mariaqa. Mi faasaanna qinee inni faiqi oosana faiqi oosana Isipa maqa maaqaindaraana nifiqee aniqiafana. Innee aiqama kari mi faasaannasaa qoomaqa sakeera foora mi faasaannara asasiaqa.

<sup>18</sup> Indaaruaqa quqoonasaa 14 faasaanasaa eenee marinaqa oosana arasee fiinaqa mi quqoonnana 21 faasaanasaa innee sia innooqee mari pauraqana aqira bereeta naaqa.

<sup>19</sup> Innee 7 faasaana qoomaqa nara faasaana innooqee mari pauraqafa sia inni maaqakiaqa mariani. Innikiqari faiqi moo fannoo fee moo aanaamuru ani marina fee innooqee mari pauraqana aqira bereeta nainaqa innee sia minara Isaraee maqannaa fee qiaqa.

<sup>20</sup> Innee yai yai fee maridaqa sia innooqee mari pauraqana aqira bereeta kai naaqa.

*Indaaruaqa ainnaaqarara qoomaqa.*

<sup>21</sup> Anutufa Mooseena mi ufana qimamisoofanoo Mooseefa Isaraee maqannaasa uriqararasa qimannimino qinau. Innee moodaa moodaa sipsipa akoona fee mimmi akoona timmusa fee inneeqa faiqi anaasee nimana kai mara minisee aruseeqa ainnaaqaroo qoomaqa suqasee naidaqa asasiaqa.

<sup>22</sup> Aandau aruseeqa fidika difaaniki sakaqa. Innee hisoopa saqari amanee raudasee minannoo fidika difaaniki raaraammasee kooqi afai dinni dinni faqa mirinni faqa akuaqa. Akuseeqa innee sia raudaaqa, maaqaki kai marifanoo iaqaani. <sup>23</sup> Fafaa eendaki Yaaweefa Isipa maqannaasa ooga faiqi narinoo fidanoo inni kooqi mirinni faqa dinni dinni faqa fidika qafamaseenoo narinoo nimari qangiironara qinanoo sia mi maqanaki keeqaannoo.

<sup>24</sup> Innee faqa inneeqa faiqi namu faqa naaru naaru maaqi kai iqa fuaqa.

<sup>25</sup> Innee Yaaweefa qima afeekaikamasee nimiraree qimaqoo maqannaasa oonureeqa maaqimmiqa fuaqa.

<sup>26</sup> Kasooaqee inni faiqi namu mi qoomaqa qafamaseeqa mina oosanara irifaqa innee maaqi qimasee qimannimiaqa.

27 Maa qoomaqafa Yaaweefa ainnaaqaroo qoomaqafa maridanoo fee qimasee qimannimiaqa. Ooqai mifa Isipa maqa maaqaki maasa ainnaaqareenoo Isipa maqannaasa ooqa faiqiuqa narinoo maasa sia darinau maqi qiaqa. Mooseefa miqi qimasooafa Isaraee maqannaasa iriseeqa aiqama kumma ramafi Anutunara susuiqau.

28 Susummaseeqa misa daraanimafiqa Yaaweefa Mooseesa Aaronasa nimu ufa mau fiqa aiqama ainaina andeeqasee deedaqiau.

*Isipa maqannaasa akoonaiqi ooqa faiqiuqa kuqiau.*

29 Mi eendanaki kai eenda amuqusai Yaaweefa Isipa maqannaasa ooqa akoonaiqiuqa narinau. Faraona amaaku nari akoonaa ainaina maraaninana saaqari oosana arasee rumberanaki mariasa faiqi namu faqa aiqama narinau. Aandau aanaaqiuqa akoonaa ooqasaa maqaranauqa faqa Yaaweefa narinau.

30 Narusoofaqa mi eendanaki Faraofa faqa nari ainainasaa rakisi marusa faqa aiqama Isipa maqannaasa faqa aiqama tauti findifiqau. Iki faafau qirafa firaafa Isipa maqa maaqaki marinau. Sia moo maqaki kaqi mariqau, aiqama maaqaki kuqirafa marunara iki raqee mariqau.

31 Mi eendanaki kai Faraofa Mooseena faqa Aarona faqa naaramaseenoo qimanniminu. Inneeqara faqa inneeqa maqannaasa Isaraee maqannaasa faqa qini maqa maaqakiqari quqaseeqa inneeqa qiannai oonureeqa Yaaweena amooqiaqa.

32 Inneeqa sipsipauqa faqa mimmiuqa faqa burimakauqa faqa doo fuaqa nani. Oonuree qini faqa amiqi amiqimma qimaqaanifeera innaaru qiaqa.

33 Isipa maqannaasa faiqi anaasee misa faqa Isaraee maqannaasa niqiqeeqa qiqau. Innee kai kaqi fuaqa. Innee kaqi marifaqa maasa aiqama kuqu taikaanoora. Innee doo fuaqa.

34 Miqi qimasooafa Isaraee maqannaasa innooqee maru pauraqana sia aqira bereeta sia suqarana difaaniki qamunnasaa kukuqamma quqasee nikumaaga akumaree fiqau.

35 Isaraee maqannaasa Mooseefa qundee kai iqa Isipa maqannaasa nifaaqa auqimaru ainainara siruaara faqa koorara faqa qamunnaara faqa iraqau.

36 Yaaweefa qufaqa Isipa maqannaasa Isaraee maqannaasara uriqarausee qimasee misa iroo ainainna kaqi nimiqau. Miqunannai Isaraee maqannaasa Isipa maqannaasa aiqama ainaina maree fiqau.

*Isaraee maqannaasa Isipa maqa maaqa minnisee fiqau.*

37 Isaraee maqannaasa sandeeqa Ramaseesa maqusa quqasee Sakoota maqusai fiqau. Misa nambaqa maaqimminoo marinau, 600,000 faiqi kai mariqau, sia faiqi anaasee nisaana riqau.

38 Moomoo maqusanaasa Isipa maqa maqaki ani marusa misa faqa nari burimakauqa faqa sipsipauqa faqa mimmiuqa faqa maree fiqau.

39 Misa aanai fidaqa fuka bereeta innooqee mari pauraqana sia aqirana maree funa suqa naqau. Isipa maqannaasa Isaraee maqannaasa nifaqasonara aqmquriga bereeta innooqee maru pauraqana sia aqirana maree fiqau.

40 Isaraee maqannaasa 430 aukwana Isipa maqa maaqaki mariqau.

41 430 aukwana taikarana namu faqa faiqi aiqama oosana Yaaweena aiku asauku Isaraee maqannaasa Isipa maqa maaqa quqasee fiqau.

42 Eendaki Yaaweefa Isaraee maqannaasa qumee rakisidanoo nifiqee finau. Aiqama aukuanaki mi eendiranara kai Yaaweenaindi fee qimasee innaaru qidaqa rakisi mariqau.

*Ainnaaqaroo oomaqana suqara naakaparufa.*

<sup>43</sup> Yaaweefa Mooseena faqa Aarona faqa qima nimirau. Ainnaaqaraafanna oomaqana suqara naakapara ufa maaqimminoo marianoo. Moo maqanaindari ani marinafa sia amana mi oomaqana naannoo.

<sup>44</sup> Inneeqa munnimmannai feefaurummaqoo ainainira fasiqausa fainanduqu saifaqa misa amana neefaranoo.

<sup>45</sup> Ufaasu ani mariasa faqa feefauruara ainaini mariasa faqa sia neefaranoo.

<sup>46</sup> Aiqaama mi aandau naranna deedaqia maqanaki kai nama taikaqa. Sia uqanna madaana maree fuaqa. Sia aandau amudaani itairiaqa.

<sup>47</sup> Aiqaama Isaraee maqannaasa mi oomaqanara asasiaqa.

<sup>48</sup> Sia fainanduqira fasiqa fannoo sia amana naannoo. Anaamuru fasiqa inni qambaana marinafa ainnaaqaroo oomaqanara asaidanoo Yaaweena auqu uqeerararee qinaqa innee mina maaqaki mariasa akoonaiqiuqa fainanduqu saifaqa misa faqa mi oomaqanara asasiaqa. Miqi masaifanoo mifa Isaraee maqannaasaki kambiqara fara foora maridanoo mifa faqa oomaqa naranaki mariani.

<sup>49</sup> Innee faqa moo maqanna inniki ani marinafa faqa moodaa sanda mau kai fuaqa.

<sup>50</sup> Yaaweefa Mooseesa Aarona qima nimundee Isaraee maqannaasa iqau.

<sup>51</sup> Mi faasaana Yaaweefa Isaraeerana aiku asauku Isipa maqasaa qaraana nifiqee finau.

**13***Isaraee maqannaasa akoonaiqi ooqa faiqiuqara Yaaweena amiqau.*

<sup>1</sup> Yaaweefa Mooseena qimaminau.

<sup>2</sup> Innee aiqaama akoonaiqi ooqa faiqiuqara qini kai qimia. Aiqaama Isaraee maqannaasa ooqa faiqiuqara faqa aiqaama aandau ooqasaa maqarana akoonauqa faqa qinindi marinara qini qimiaqa.

*Innooqee maru pauraqana sia aqira bereeta suqoo oomaqafa.*

<sup>3</sup> Mooseefa Isaraee maqannaasa qima niminoo qinau. Innee maa faasaannara iriaqa. Innee karabusakiqari maa faasaana Yaaweefa nari afeekannoo nifiqee anunara innooqee mari pauraqana aqira bereeta sia naaqa.

<sup>4</sup> Innee maqee Abiba quqoona indaruqaa faasaana marifaqa Isipa maqa maaqa quqasee ani mariafanoo.

<sup>5</sup> Yaaweefa inni nikaaku faqa oori kandamasee qima afeekaika masee Kannaana maqa maaqa faqa Heeta maqa maaqa faqa Amooru maqa maaqa faqa Hifita maqa maaqa faqa Yeebusa maqa maaqa faqa misa maqa maaqa inni nimiraree qinau. Mifa inni nifiqeenoo ainoo faqaa maqa ainaina rairaa imariqoo munu sainaqa innee aiqaama aukuaana indaruqaa quqoonasaa maa oomaqana sakasee naidaqa asasiaqa.

<sup>6</sup> Dinni taikasee dinni ani qaara qanda marasee 7 faasaana innooqee mari pauraqana sia aqira bereeta naaqa. Innee miqimmaseeqa naidaqa mi 7 faasaanafa taikainaqa miqoo innee Yaaweenara uriqarara fee qimasee firaa oomaqa sakasee naaqa.

<sup>7</sup> Dinni qisauku taikasee dinni ani qaara qanda marasee 7 faasaana innooqee mari pauraqana sia aqira bereeta kai naaqa. Mi kamuqoo inni maaqaki faqa inni maqa maaqaki faqa innooqee mari pauraqafa faqa innooqee mari pauraqana aqira bereeta faqa sia uqanna mariani.

<sup>8</sup> Mi oomaqana nainna kari inneeqa faiqi namu maaqi qimasee qiman-nimiaqa. Maasa Isipa maqa maaqakinaana Yaaweefa nifiqee anunara maa oomaqana sakasee naidaqee qiaqa.

<sup>9</sup> Mooseefa kafa Isarae maqanna qimannimidanoo qinau. Maa oomaqana narafa inni naaqoo auqaannoo. Nisaukuki sanda rumbeera foora faqa niqinaaqa rumbeera foora inoo maridanoo, mifa inni naaqoo auqainaqa innee Yaaweena sandufa qirana faqa mina ufa asaana rumasee irirana faqa naaqoo auqaannoo. Yaaweefa nari afeekannoo inni Isipa maqa maaqaindaraana nifiqee anunara miqiaqa.

<sup>10</sup> Aiqama aukuanaki maa faasaana maa oomaqana sakasee naidaqa asasiaqa.

### *Akoonaiqi ooqa faiqiuqa.*

<sup>11</sup> Yaaweefa ooqai inni faqa inni nikaaku faqa nimirara qima afeekaikammasee Kannaana maqa maaqa nimianauree qimaqoonnai nifiqee fuannoo.

<sup>12</sup> Mifa inni mi maqana niminaqa innee ooqa faiqi akoonaiqiuqa Yaaweena amiaqa. Aiqama aandau ooqasaa maqarana akoonauqa Yaaweenaindi mariani.

<sup>13</sup> Doonki ooqasaa maqarana aanaaqi minisee sipsipa aanaaqi moodaa maraseeqa doonki aanaaqi amaaqa maqasaifanoo doonki aanaaqi kaqi mariannoo. Innee sia moo andaunnai doonki aanaaqi amaaqa maqaani qimasee doonki aanaaqiuqa ninuka qumaree kuridiaqa. Innee inneeqa ooqa faiqiuqa faqa Yaaweenaindikinoo marina kafa inneeqa feefauriaqa.

<sup>14</sup> Kasooqagee inni faiqi namu mi suqanara oosannara inni irifaqa innee maaqi qimasee qimannimiaqa. Yaaweefa nari firaa afeekannoo maasa Isipa maqa maaqai rumbaranakinaana qifiqee aninau maqi qiaqa.

<sup>15</sup> Faraofa kaukaata qimasee sia maasa idukiraree qufanoo Yaaweefa ooqa faiqiuqa akoonaiqiuqa Isipa maqa maaqakinaana aiqama narinu. Aiqama aandau akoona ooqasaa maqaranauqa faqa narinu. Minara maasa aiqama ooqasaa maqara aandau Yaaweena tatufirana suqa amiseeqa nari faiqi namu kafa maraidaqa.

<sup>16</sup> Maa oomaqana narafa maasa daaqoo auqaannoo. Nisauku sanda rumbeera foora faqa niqinaaqa rumbeera foora inoo maridanoo, mifa maasa daaqoo auqainaqa Yaaweefa maasa Isipa maqa maaqaindaraana nari firaa afeekannoo nifiqee anunara irianaara.

### *Anutufa qasuruki faqa idauruki faqa maridanoo misa nifiqee finau.*

<sup>17</sup> Faraofa Isarae maqanna idukusoofaqa fimarufanoo Anutufa Firistianni qusa aatata sia nifiqee finau. Isarae maqannaasa Firistia maqannaasa faqa rakiqa anirandee kaifaa Isipa maqa maaqai fifoo qimaseenoo nifiqee moo aatata finau.

<sup>18</sup> Minara iriseenoo Anutufa misa nifiqeenoo aadana maqa maaqai fiqinoo taatuqee nammari fimarunnai nifiqee fiqinuu. Fidaqa Isarae maqannaasa rakira ainaina deedaqa muqirausa fiqau.

<sup>19</sup> Ooqai Yooseefaafa kaqi maridanoo maaqi qimaseenoo Isarae maqannaasara qufaqa noori kandamasee mina amudaani maree firara qima afeekaikiqau. Yooseefaafa maaqi qimasee qimannimianu. Kasooqagee Anutufa inni nifiqee finaqa innee qini qimudaani faqa maa maqusanakinaana maree fuaqa. Mooseefa minara iriseenoo Yooseefaana amudaani faqa mareenoo finau.

<sup>20</sup> Isaraee maqannaasa Sakoota maqusakiqari fifiufaqa aadana maqa maaqa atinni Eetama maqusai oonuree miqoo uiqaana maqauqa usakasee faiqaqau.

<sup>21</sup> Yaaweefa faasaana oonnamuki marufanoo oonamu fannoo nifiqee fimarinau. Eendaki mifa idauruki marufanoo idauru fannoo kaaqa qamanimaqee marufaqa eendaki faqa faasaana faqa kaqi kai fimariqau.

<sup>22</sup> Aiqama faasaana oonnamu misa noorinni fimarinau. Aiqama eendaki idauru faqa miqikai imarinau.

## 14

### *Misa Taatuqee ooruku nammari taqaqau.*

<sup>1</sup> Yaaweefa Mooseena qimaminoo qinau.

<sup>2</sup> Anee Isaraee maqannaasa qimanniminaqa misa oonurandee quandaki Piqaqiroota maqusa oorinni Mikadoora maqusa dinni taatuqee ooruku nammari dinni mina qambaana Baa Seefoona maqusa aqa uiqaana maqauqa usakaaqa.

<sup>3</sup> Faraofa maaqi qimasee iriannoo, Isaraee maqannaasa aadana maqa maaqaki firanara rufiqaidaqa maqa maaqaki oonuree aniree idammiaafoo qiannoo.

<sup>4</sup> Qinee Yaaweesa kaukaata qira irirana Faraona amiananoo mifa inni ninaaqiana nifaqee fuannoo. Qinee Faraona faqa mina rakira fasiqauqa faqa urinnaaqararanannai firaa duqu maraanaura. Miqimmasaanaqa Isipa maqannaasa qini Yaaweesara irifaranoo. Miqi qimasooafaqa Isaraee maqannaasa Yaaweena ufa mau fiqa anirandee fiqau.

<sup>5</sup> Isipa maqannaasa karaambaiqa Faraofa nari ainainiranasaa rakisirausa faqa Isaraee maqannaasa quqasee funara kaifaa oonu mafi irufanoo sia andeeqoofanoo qinau. Maasa nana furufaree qimarunaqee Isaraee maqannaasa idukuaki quqasee fidaqee. Maasa Isaraee maqannaasa quqasaafaqa fuafanoo yafee maasa ainainira faiqi kiannoo fee.

<sup>6</sup> Miqi qimasooofanoo Faraofa nari qoosa rarisee maru rakira karana faqa nari rakira fasiqauqa faqa deedaqinau.

<sup>7</sup> Faraofa qoosa rarisee maru rakira karausa amiqiranauqa kai sikis handareeta 600 faqa Isipa maqa maaqaki maru qoosa karausa faqa minasaa rakisi marusa faqa mara quqasoofaqa Isaraee maqannaasa nifaqee fiqau.

<sup>8</sup> Yaaweefa kaukaataqira irirana Faraona Isipa maqannaasa uriqararana amufanoo Isaraee maqannaasa idukuakiqa fidaqa nasuriqa fimarufanoo Faraofa nifaqee finau.

<sup>9</sup> Isipa maqannaasa sudiaauqa nariqa qoosauqa faqa nari qoosa rarisee maru karausa faqa daraiwaaauqa faqa Isaraee maqannaasa nifaqeeqa Taatuqee ooruku nammari aqa Piqaqiroota maqusa dinni Baaraseefoona maqusa dinni qambaana uiqaana maqa usakasee marufaqa oonu paquriqau.

<sup>10</sup> Oonuroofaqa Isaraee maqannaasa Faraona faqa mina rakira fasiqauqa faqa niqafamaseeqa tautumaseeqa rufiidaqa Yaaweefa dadaaqianifeera faaqariqau.

<sup>11</sup> Faaqaridaqa Mooseena qimamiqa qiqau. Isipa maqasaa madika sia amanaikifanee anee maasa qifiqeenanee maa aadana maqa maaqanaki kuquaneera aninanee. Anee maasa Isipa maqa maaqakinaana qifiqee anianafa quandafina qafaa.

<sup>12</sup> Ooqai maasa ani ufa qimamiqiafana maasa Isipa maqa maaqaki kaqi maridaqa maa ainainafa kambiqaanoo fee qiqiafana. Maasa ani qimamiqiafana saina maasa kaqi Isipa maqannaasa ainainira faiqi kiqa

marianee qiqiafana. Miqoo maridaqa misa ainainira faiqikirafa amiqirafa mariqini anee maa aadana maqa maaqanai fifau qifiqee minisaanaqa kuqanaura.

<sup>13</sup> Mooseefa misa ufa iriseenoo qimanniminoo qinau. Innee sia rufiaaqa, kaqi nimatautasee maridaqa Yaaweefa innee asumu mariaqeera itita nimaqainaqa qafeefaranoo. Maqee innee Isipa maqannaamiqimasee nindafaaqa. Innee maaqooqari sia kafa nindafeefaranoo.

<sup>14</sup> Yaaweefa inni rakirana nimaqa maqa finoo misa saimbaqa rakuanoo. Miqinaqa innee sia moo ainaina auqaaqa, kaqi kai mariaqa.

<sup>15</sup> Miqi qimasoofanoo Yaaweefa Mooseena qimaminau. Anee nanaree qiniara dadaaqiannee qimasee faaqaridane. Anee Isaraee maqannaasi qimanniminaqa noori munduqaannai fuaqa.

<sup>16</sup> Anee aneenna saunu nammari amummaqa uqeeraa. Miqimma sainaqa nammari raina finaqa Isaraee maqannaamaana aadana maqasaa taqaqa.

<sup>17</sup> Qinee Yaaweesa Isipa maqannaasara qianaqa kaaqa firaqoo kaukaataqira irirana marasee Isaraee maqanna ninaaqianna nifaqee fifaranoo. Qinee Faraona faqa mina sundiauqa faqa mina qoosa rarisee mari karausa faqa daraiwauqa faqa rakirana urinnaaqararanannai firaqoo maraanaura.

<sup>18</sup> Qinee misa urinnaaqarama saanaqa misa qiniara Yaawee fee qifaranoo.

<sup>19</sup> Anutuna qangiroo fannoo Isaraee maqannaasi noorinni mariufa aiqareenoo ninaaqiannai finau. Oonnamu faqa miqi kai inoo aiqaree ninaaqiannai finau.

<sup>20</sup> Mi oonnamufa Isipa maqannaasi dinni Isaraee maqannaasi dinni qambaana marinau. Mi oonnamufa Isipa maqannaasi asukuna nimisee Isaraee maqanna kaaqa qamannimaqanau. Miqinoo marufaqa mi eendanaki Isipa maqannaasi faqa Isaraee maqannaasi faqa sia nari aqa nari aqa fiqau.

<sup>21</sup> Mooseefa asauku nammari amummaqa uqerasoofanoo Yaaweefa suani afu urimarunnaindaraa afeeka ufainnoo ooruku nammari rainanau. Mi ufaifa mi eendanaki uqidanoo mariufanoo ooruku nammari rainsoofanoo aadana maqa kooroinau. Miqimmafufanoo nammari rainanau.

<sup>22</sup> Miqimmafufaqa Isaraee maqannaasi ooruku nammari qambaana aadana maqasaa taqaqau. Dinni dinni nammari fannoo safasara foora inoo marufaqa fiqau.

<sup>23</sup> Isipa maqannaasi misa niqafamaseeqa misa ninaaqianna nifaqeeqa nammari qambaana oquraqau. Isipa maqannaasi nariqa qoosauqa faqa nariqa qoosa rarisee maru karausa faqa nariqa daraiwauqa faqa Isaraee maaqanaasi nifaqee nammariki ooqu raqau.

<sup>24</sup> Ia qarooka Yaaweefa oonnamuqiari faqa idauruqiari faqa Isipa maqannaasi nindafamaseenoo maparaa irana nimanau.

<sup>25</sup> Yaaweefa qufanoo qoosa rarisee maru karausa misa niku utusamafufaqa firara firaqoo anuqi mariqau. Miqufaqa Isipa maqannaasi qiqau. Yaaweefa Isaraee maqannaasi saaroo qinoo maasa daridanoo. Maraifaqa quqasee fua.

<sup>26</sup> Miqimasoofanoo Yaaweefa Mooseena qimaminau. Aneenna asauku nammari amummaqa uqerasainanoo kafa nammari fannoo quminoo Isipa maqanna nari qoosa rarisee maru karausa faqa daraiwauqa faqa rafaqa fuani.

<sup>27</sup> Mooseefa iriseenoo asauku nammari amummaqa uqeeranau. Miqimma soofanoo iaqarooka nammari fannoo kafa oonurandeenoo ooqai mariundee kai mafinau. Isipa maqanna sandeeqa fuaneera qufanoo Yaaweefa misa mareeqee nammari aqinau.

<sup>28</sup> Nammari fannoo kafa quminoo Faraona rakira fasiqauqa faqa qoosa kara faqa daraiwauqa faqa aiqama Isaraee maqannaasa nifaqee nammari ooquroosa aiqama rafaqa finau. Sia uqanna moodaafa kaqi marinau.

<sup>29</sup> Isaraee maqanna ooruku nammari qambaana aadana maqasaa taqau. Nammari dinni dinni safasara foora inoo maruqa fiqau.

<sup>30</sup> Mi faasaana Yaaweefa Isaraee maqannaasa Isipa maqannaasa nisaukukinaana maranau. Marasoofaqa Isaraee maqannaasa quanda niqafuofaqa Isipa maqanna nammari afaiqara kuqiqeeqee mariqau.

<sup>31</sup> Isaraee maqannaasa Yaaweena moo ainaina afeeka eeraarirana raki-ranaki Isipa maqannaasa urinnaaqaroonara irufanoo naaquuofaqa nari saqarikirana Yaaweenasaa faqa mina ainainira faiqi Mooseenasaa faqa mundiqau.

## 15

### *Mooseena Idi.*

<sup>1</sup> Mikari Mooseefa faqa Isaraee maqanna faqa maaqi qimasee Yaaweena amooqira idi raqau.

Qinee Yaaweenara idi raanuranoo.

Mifa rakiranaki uriqarainara miqianauna.

Mifa qoosauqa faqa qoosasa marusa faqa ooruku nammari mara aqinara idi raanauna.

<sup>2</sup> Yaaweefa qini afeeka ititarafa maridanoo.

Mifa qini asumu maroofa maridanoo.

Mifa qini Anutufa marifaqa qinee mina amooqianauna.

Qini qikoono Anutunafa marifaqa qinee mina afeekara idi raanauna.

<sup>3</sup> Yaaweefa afeeka rakira fasiqa maridanoo.

Mina auqu Yaaweefa maridanoo.

<sup>4</sup> Mifa Isipa maqanna sundiauqa faqa misa qoosa karauqa faqa rafusu ooruku nammari aqinoo.

Mina uriqarara sundiauqa Taatuqee Ooruku Nammari ukuqneea.

<sup>5</sup> Ooruku nammari faruma fannoo misa rafaqa fusaifaqa misa oniaro foora meemaqoo maqasaa ooqu maridaqa.

<sup>6</sup> Oo Yaawee ani asauku uqannai asauku fannoo naaquqara afeeka maridanoo.

Mi asaukufa namuqaa naruseenoo utitiqeenoo.

<sup>7</sup> Aneenna firaa uriqararanannai aneenna namuqaa rafusu aquananoo.

Ani aanoo qirafa ida duduqasaaqari qeera foora mannimaqaananoo.

<sup>8</sup> Anee ooruku nammari fuaqasaanoo nammari mandi mareenoo aqa-nara foora ooru finoo.

Nammari dinni dinni innoqa maree safasara foora ooru finoo.

Nammari dinni dinni raina fufanoo maqa meemaqoo afeekaika minoo.

<sup>9</sup> Namuqaauqa maaqi qiqau.

Maasa misa nifaqasee qumaraanuranoo.

Misa qumaraseeqa misa amiqira ainaina maasa didimarina aiqama maraanauna.

Maasa qeeqa rakira paipanannai naruseeqa misa aiqama ainaina mararee qia.



10 Miqi qiafana anee Yaaweefa moodaannai aidoo fuaqasaanoo Isipa maqannaasa ukuqneea.

Miqimma saifaqa misa ooniara foora firaa difukunaki ooqu fia.

11 Yaawee, yafee unna anutusakiqari ani fooqaafa maridanoo fee. Sia moo fannoo.

Yafee ani amana maridanoo kaaqa naaquqara andeeqarafa maridanoo fee. Yafee faiqi sia amana auqaqaa ira ainaina faqa afeeka ainaina anee imarianandee masee auqaannoo fee.

12 Aneenna asauku uqannannai uqeera saananoo maqa fannoo namuqaa nambiqeenoo.

13 Aneenna qima afeekaikiranasaa mapukusee maridana faiqi anaasee mandainainaki mariusa nifiqa maree fimariananoo.

Aneenna afeekannoo misa indaarunni kamma nimaqa maree aneenna naaquqara andeeqara maqasaa quqanni seennaranoo.

14 Anaamuru minara irifanoo naaquqeenoo naindiri raannoo, Firistia maqannaasa iriafanoo maparaairafa misa qumareenoo.

15 Idooma maqanna karambaiqauqa faqa iriafanoo naaquqeenoo.

Mooapa maqanna afeeka fasiqauqa faqa naindiri raidanoo.

Kannaana maqannaasa afeeka faqa nammari kidanoo.

16 Maparaa irafa faqa firaa rufiarafa faqa misaki maridanoo.

Misa ani Yaaweena afeeka qafamasee naaquqaiifaqa kaqi muquriqa marifaqa ani faiqi anaasee karabusakinaana iduku saanausa misa nifusaa fiqaraidaqa.

17 Anee misa nifiqa maree aneenna aaqanasaa munuseenana asumu ainainara foora ummaqu saananoo.

Anee Yaaweefa aneennara utaaqama qaanna maqusanaki munusaananoo.

Amaana maqa aneenna usakaqaanna maqusanaki munusaananoo.

18 Anee Yaaweefa naaru naaru uriqarara karaambaiqa marinnaranoo.

### *Miriamma nammarina idi.*

19 Isaraee maqannaasa ooruku nammari qambaana aadana maqasaa taqaqau. Fitaqafufaqa Isipa maqannaasa qoosa kara faqa nari qoosauqa faqa nari daraiwaaauqa faqa mi ooruku nammarinaki ooqu roofanoo Yaaweefa kaifaa nammariara qufanoo quminoo misa rafaqa finau.

20 Aaroona anasaafa Miriama nammarifa Anutuna tamummaqara anaasee marufa marinou.

Isipa maqannaasa nammariki kuqutaika fufanoo dukaanaa qumareenoo aridanoo idi ranau.

Anaasee aiqama qafamaseeqa nari dukaanaa maree mina faqa oonuree aridaqa niqoori raqee mariqau.

21 Miriamma nammarifa maaqi qimasee idi ranau.

Yaaweenara idi raaqa.

Mifa rakirana firaaqoo uraaqareenoo,

mifa qoosauqa faqa qoosasa nimariasa faqa ooruku nammariki rafusu aqinoo.

### *Sukaqee mari nammarifa.*

22 Mooseefa Isaraee maqanna taatuqee ooruku nammarindaraana nifiqeenoo Suraa aadana maqa maaqaki quqanau. Qaaramoo faasaanasaa aadana maqa maaqaki fidaqa sia nammari paquriqau.

23 Misa Maraa maqa maaqaki oonureeqa nammari moo paqurimasee noofanoo suka narufaqa sia naqau. Minara mi maqa maaqana auqu Maraa fee qiqau. Mi auquna oosana sukaqee mari fee qiqau.

<sup>24</sup> Isaraee maqannaasa Mooseena aanoo qimamaqaidaqa qiqau. Maasa nana nammari fee naanauree.

<sup>25</sup> Mooseefa iriseenoo afeekaika maseenoo Yaaweenara innaaru qinau. Innaaru qufanoo Yaaweefa Mooseena saqari moo uqafiqoofanoo Mooseefa mi saqarina nammariki agusoofanoo nammari amiqinau. Miqoo Yaaweefa nari sanda ufa mi mau fuaqeera nimiseenoo miqoo misa nimana masee qafanau.

<sup>26</sup> Yaaweefa qimanniminoos qinau. Innee qini ufa qaidusiqa qinee andeeqara ainainee qimarunnana auqeega kafaa qini sanda ufa mau fifaqa qinee sia manda aupurarana Isipa maqanna nimiafannandee iqa inni nimianaaura. Qinee Yaaweesa inni aurirana taikannisee marunausa maridaqa.

<sup>27</sup> Miqooqari Isaraee maqannaasa fifiufaqa Eerimma maqa maaqaki oonuraqau. Miqoo qisaukuqara taikasee qikunni ooqu qaara marasee 12 nammari maqakiqari ururee maruna faqa fasaafana fooqaa ira saqari moomoo 70 marinau. Miqoo nammari afainni misa uiqaana maqa usakasee mariqau.

## 16

### *Isaraee maqannaasa mannaa faqa ufini faqa mara naqau.*

<sup>1</sup> Isaraee maqannaasa Isipa maqa maaqaindari quqasee anuqooqari inaaqiannaa quqoona 15 faasaanasaa Sinai aaqana dinni Eerimma maqa maaqa dinni qambaana Sinnaa aadana maqa maaqaki oonuraqau.

<sup>2</sup> Misa aiqamausa aadana maqa maaqai funara Mooseesa Aaroonasa kaukaata qimannimaqasee qiqau.

<sup>3</sup> Maasa Isipa maqa maaqaki mariafannaqoo Yaaweefa daruaqaana. Miqoo maasa maridaqa aandau faqa akaqa narana maasa didi maruna maasa qimana kai neemariqiafana. Innee qara miqooqaraana maasa qifiqeeqeeqa maa aadana maqa maaqanaki quqasaafaqa aandaroo darinaqa kuqu taikaanaura.

<sup>4</sup> Yaaweefa misa ufa iriseenoo Mooseena qimaminoo qinau. Qinee maqee inni aiqamausa naranara qiananoo innaarunaindari aakuara foora aqufina mara neefaranoo. Faasaambaasaana narana quqasaanaqa faiqi anaasee raudamafiqa moodaa faasaana amanakai maree marifaranoo. Qinee miqimmasee misa nimanamasee qafaanaura. Misa qini ufa irifaree sia fee irifaree.

<sup>5</sup> Moodaannai qisauku taikasee dinni ani moodaa marasee 6 faasaana qaara eenda narana amanasaa mara deedaqamma quqaaqa.

<sup>6</sup> Mooseesa Aaroonasa Isaraee maqanna aiqama suqusee qimannimiqa qiqau. Maqee eenee marinaqa innee Yaaweenara Isipa maqa maaqaindari nifiqee anunara irifaranoo.

<sup>7</sup> Kananaana innee Yaaweefa maasaki maridanoo daroo daraa ida kaaqa qeemarina qafeefaranoo. Innee minara aanoo qimariana doo mifa irinoo. Innee sia maaqanda rau qimariafanoo fau. Maaqanda faiqi faiqi kai maridaqa mina naakapurufa mau fidaqa mina kai qimannimidaqa.

<sup>8</sup> Mooseefa kafaa qimanniminoos qinau. Eendinanoo Yaaweefa aandau niminaqa neefaranoo. Kananaana bereeta fooqaana inni nimana kai nimiannoo. Innee mina firaqoo aanoo qimarianara miqiannoo. Innee maasara aanoo qimariana sia maasarau miqi mariafanoo, Yaaweenara aanoo qimariafanoo.

<sup>9</sup> Mooseefa Aarona qimaminoo qinau. Anee Isaraee maqanna aigama qima niminaqa Yaaweena oorinni ani kikiqiaqa. Mifa misa aanooqira ufa irinara miqiaqa.

<sup>10</sup> Aaroofa faiqi anaasee ufa qimannimi marufaqa quandafi aadana maqa maaqai qafuofanoo oonamuki Yaaweena daroo daraa ira kaaqa qarafa koorooinau.

<sup>11</sup> Yaaweefa Mooseena qimaminoo qinau.

<sup>12</sup> Qinee Isaraee maqanna aanoo qira ufa doo iriqa. Maaqi qimasee qimannimia fafaa eendinoo mammandi marinaqa misa aandau nimi-anaura duna kananaana uqanna bereeta fooqaana nari narana nimana kai nimianaura. Nimisaanaqa innee qini Yaaweesa inneeqa Anutusara irifaranoo.

<sup>13</sup> Miqi qimasoofanoo eendi marufanoo afidauqa moomoo qaqama-raidaqa anirameeqee uiqaana maqusa amanaikiqau. Kananaana qififaramu uiqaana maqa aigama fiqiu fiqiu inoo marinau.

<sup>14</sup> Qififaramu taikafufanoo adamanna ainaina kaqikaafauqa aadana maqa mau marinau. Mi ainainafa pupusamuara foora kaqikaafauqa marinau.

<sup>15</sup> Isaraee maqannaasa mina qafamaseeqa mina oosanara randeeqa nari qimami nari qimamiqa qiqau. Maana nana ainaina fee maridanoo fee qiqau. Miqi qufanoo Mooseefa maaqi qimasee qimanniminau. Yaaweefa narana naaqeera nimidannoo.

<sup>16</sup> Yaaweefa maaqi qimasee qimanniminau. Innee inneeqa faiqi anaasee faqa inneeqa nimana kai maraqa. Inneeqa maaqaki mariasa nimana nimana kai susufinna qumbiqa quqaqa.

<sup>17</sup> Isaraee maqanna irisee miqimmiqau. Akaqausa moomoo maroofaqa akaqausa goodaa maraqau.

<sup>18</sup> Aiqamausa suqusee nari amani nari amani masee qafuofanoo akaqausa moomoo suqufanoo akaqausa oodaa suqiqau. Moomoo suqusa namasoofanoo nimuaqumminau. Oodaa suqusa misa faqa namasoofanoo nimuaqu kaimminau. Aiqamausa nari nimana kai suqiqau.

<sup>19</sup> Mooseefa qimannimino qinau. Sia ataraasa duna nararee qimasee quqaqa. Aiqama naaqa.

<sup>20</sup> Miqi qufaqa akaqausa Mooseena ufa rukiasee duna kananaana nararee qimasee quqasoofanoo putaa undufanoo qimi kai qumbiqoofanoo Mooseefa aranaqoofanoo aanoomannimaqanau.

<sup>21</sup> Aiqama kananaana nari nimana kai suqusaida neemariqau. Kaqi mafisoofauqa suani urureenoo ididiufanoo nammari nammarmima taikanau.

<sup>22</sup> Dinni ani moodaa marasee 6 faasaanasaa qaara kari suqarana amana kai maraqau. Miqi masoofaqa Isaraee maqannaasa uriqararaisa aniree mi ainainnara Mooseena qimamiqau.

<sup>23</sup> Mooseefa iriseenoo moo ufa maaqi qimasee qimanniminau. Duna Yaaweena naaquqara idooara faasaana mariannoo. Mi faasaana minaindi mariannoo. Innee nana ainainee suqararee qinnana maqee suqaqa. Kaqi marina narana aaduma quqaqaifanoo marinaqa duna suqa naaqa.

<sup>24</sup> Misa Mooseefa qimannimundee iqa dunaindi kaqi maaqaki quqaqau. Iqaqoofaqa qafuofanoo sia putaa inoo qimi marinau amiqinoo marinau.

<sup>25</sup> Mooseefa minara qimannimino qinau. Doo maqee mina naaqa. Maqee Sabata idooara faasaana Yaaweenaindi maridanoo. Minara innee fuka narana uiqaana maqusa naambeeqara mararafa sia mariannoo.

<sup>26</sup> Innee qisauku dinni taikasee dinni ani moodaa marasee 6 faasaana narana suqu quqaaga. Qisauku dinni taikasee dinni ani qaara marasee 7 faasaana idooara faasaana marinaqa sia miqoo narana mariannoo.

<sup>27</sup> Qisauku dinni taikasee dinni ani qaara marasee 7 faasaanasaa akaqausa narana suquanee qimasee oonu qafoofanoo sia marinau.

<sup>28</sup> Anutufa mina qafamasee Mooseena qimaminau. Innee kisaaqasaa fee qini ufa rukiaidaqa sia qini sanda ufa afaqeefaree.

<sup>29</sup> Innee iriaqa. Qinee Yaaweesa idooara faasaana nimiqa. Miqunannara qinee dinni taikasee dinni ani moodaa marasee 6 faasaanasaa qinee qaara faasaana narana amana kai nimianaura. Aiqaamusa mi faasaana inneeqa mariaqoo kai mariaqa, sia kasiaqa.

<sup>30</sup> Faiqi anaasee minara iriseeqa dinni ani qaara marasee 7 faasaanaiku-faqa sia ainaini mariqau.

<sup>31</sup> Isaraee maqannaasa mi narannara mannaa fee qimariqau. Mifa ooroora qaqaama fooqaafa eekara arirafa marinau. Mina namasoofofanoo mina adiafaa irafa ookasaasa anoonannai auqira biskitara foora imarinau.

<sup>32</sup> Mooseefa Yaaweena ufa iriseenoo maaqi qimasee qimanniminau. Yaaweefa inniara maaqi qidanoo, qinee mannaa nimmunnana akaqana afeeki mara quqaqai marinaqa inneeqa ninaiqimara nikeeku nikaaku uqannifiqaidaqa maaqi qimasee qimannimiaqa. Yaaweefa Isipa maqasaaqari maasa aadana maqasaa nifiqee anireenoo qimufaqa naafannanee qimasee uqannifiqaaqa.

<sup>33</sup> Miqi qimasee qimannimiseenoo Mooseefa Aaroonaa qimaminau. Anee qafee moo mara maree mannaa suqeeqee Anutuna afusaa quqasainaqa kasooaqee kambiqainausa qafaqa.

<sup>34</sup> Yaaweefa Mooseena qimamundee inoo Aaroonafa mi naranna mara mareenoo moodaanaki kira bookisa aaqa quqasoofanoo marinau.

<sup>35</sup> Isaraee maqannaasa 40 aukuanaki mannaa neemariqau. Mi naranna naga fifiufaqa Kannaana maqasaa nariqa mariraree quqoo oonuraqau.

<sup>36</sup> Mikari misa ummaara amana masee qafee marufa qaaraqanda marinau. Moo fannoo moodaa kaqikaa susufinna amana marinau. Moo fannoo qisaukuqara 10 kaqikaa susufinauqa amana marinau.

## 17

### *Oonikiqari nammari quminau. (Namba 20:1-13)*

<sup>1</sup> Yaaweena ufa mau fiqa Isaraee maqannaasa Sinnaa aadana maqa maaqakiqari quqasee fiqau. Fidaqa misa maqusa maqusa faiqaqa fi-mariqau. Misa Reefidimma maqa maaqaki nammari sia maruqoo oonu mariqau.

<sup>2</sup> Sia marufaqa misa Mooseenara kaukaata qidaqa qiqau. Anee nammari nimina naanee qufanoo Mooseefa qimanniminoo qinuu. Innee nanaree qini aanoo qima qimaqaidee. Nanaree innee Yaaweena amanammasee qafaidee.

<sup>3</sup> Isaraee maqannaasa nammariara kaqa nidufaqa Mooseena kaqi kai aanoo qimamaqee mariqau. Misa maaqi qiqau. Nanaree anee maasa Isipa maqa maaqaindaraana qifiqee mini saananoo fee nammariara didirafa maasa faqa maasa faiqi namu faqa maasa aandauqa namufaqa kuqa daruannoo fee.

<sup>4</sup> Miqi qufanoo Mooseefa afeekai kammaseenoo Yaaweenara innaaru qidanoo qinau. Oo Yaawee qinee maa fasiqa anaaseesa naqifeemma nimaqaanauree. Misa qusasaa oonisamu qini darifaranoo.

<sup>5</sup> Yaaweefa Mooseena qimaminoo qinau. Moosee anee Isaraee maqannaasa uriqararawsa nifiqee indaaru fua. Ooqai anee Niru nammari arunna saununa faqa maree fua.

<sup>6</sup> Qinee Sinai aaqanasaa inni noorinni oonisaa kikiqiga marianaara. Aneenna saunu samu ooni arusainanoo nammari minakiqari quminaqa faiqi anaasee naqa. Miqi qufanoo Mooseefa Isaraee maqanna uriqararawsa nifusaa miqimandoofanoo nammari quminau.

<sup>7</sup> Misa mi maqa maaqana auqu qaara auqu raqau. Masaa faqa Meeribaa faqee qiqau. Mi auqu qanda oosana amana masee qafarafa faqa aanoo qirafa faqee qiqau. Aanoo qidaqa qiqau. Yaaweefa maasa faqa maridanoo fee sia fee maridanoo fee. Misa mi ufanannai Yaaweena amana masee qafaqau.

*Isaraee maqannaasa Amareeka maqannaasa faqa rakiqau.*

<sup>8</sup> Isaraee maqanna Reefidimma maqa maaqai marufaqa Amareekana aiku asauku anireeqa misa nariqau.

<sup>9</sup> Mooseefa misa nidafamasee Yoosuaana qimaminoo qinau. Anee akaqa fasiqauqa mara quqasainaqa duna kananaana Amareekana aiku asauku faqa oonu rakuqa. Qinee aaqanasaa Anutufa marana nuannee qimasee qimaqimu saununa uqusee kikiqiga marianaara.

<sup>10</sup> Yoosuaafa eedoo qimasee kananaana iqaqoofanoo doo Amareekana aiku asauku faqa rakirara nifiqee finau. Fufaqa Mooseefa faqa Aaroonafa faqa Hurafa faqa aaqanai ooru fiqau.

<sup>11</sup> Mooseefa aaqanasaa kikiqamambufanoo asaukuqara uqeerasoofaqa Isaraee maqannaasa rakiranaki afeekaikiqau. Kafaa nari asauku muqufisoofaqa Amareekana aiku asauku rakiranaki afeekaikiqau.

<sup>12</sup> Mooseena asauku anuda qoofaqa Aaroonasa Hurasa ooni ufiqisoofanoo Mooseefa minasaa ooqu marifufanoo Aaroonasa Hurasa Mooseena asaukuqara uaqeeufanoo kisaqasaa marufanoo suani keeganau.

<sup>13</sup> Miqimmasee uaqeeunara Yoosuaafa faqa nari rakira fasiqauqa faqa Amareekana aiku asauku amiqimmasee naruqaraasiqau.

<sup>14</sup> Miqimmasoofanoo Yaaweefa Mooseena qimaminau. Anee papiqaki maa rakiranara akararumma quqaa. Miqinoo marinaqa kaqi iriqa nuaqa. Yoosuaana qimamia. Qinee Yaaweesa Amareekana aiku asauku kuridi taikasaanaura.

<sup>15</sup> Rakirafa taikafufanoo Mooseefa ooniuga qumareenoo mi maqa maaqanaki qainda auquseenoo mi qaindana auqureenoo Yaaweefa qini rakira saqari fee qimasee mi qaindana auqu ranau.

<sup>16</sup> Mooseefa kafaa qinau. Innee Yaaweena rakira saqari uqeeraaqa. Yaaweefa kaqi kai Amareekana aiku asauku faqa naaruara rakida mari-annoo.

## 18

*Yeetoroofa Mooseena ani qafanau.*

<sup>1</sup> Yeetoroofa Midianna maqannaasa aanaiqikirafa Mooseena airaamaku marinau. Aiqaama ainaina Anutufa Mooseena faqa Isaraee maqannaasa faqa dadaaqi marunara faqa Isipa maqa maaqakinaana nifiqee anunara faqa Yeetoroofa irinau.

<sup>2</sup> Iriseenoo mifa faqa Mooseena anaaqa Sipooraa nammarina maqusai quqasee anuna afiqee aninau.

<sup>3</sup> Mina faiqiqara Keerasoommana faqa Eerieesarana faqa nifiqee aninau. Mooseefa maaqi qinau. Qinee aanaamuru maqa maaqaki asaqiraafai ani maridee qimasee narí amaaku auqureenoo Keerasoommanee qinau.

<sup>4</sup> Mooseena inaaqianaa faiqi auqu Eerieeseerafa marinau. Mina anoofa maqasoofanoo Mooseefa qinau. Qini qikoona Anutufa qini dadaaqinoo Faraona duru feefa ookinaana qini ititaqisainaree qinoo mina auqu Eerieesaranee qinau.

<sup>5</sup> Yeetaroofta Mooseena anaaqa faqa mina faiqi qara faqa nifiqeenoo aadana maqa maaqaki naaquqara aaqana aaqa Mooseefa uiqaana maqa usakasee maruqoo aniranau.

<sup>6</sup> Yeetaroofta Mooseenara ufa quqaidanoo qinau. Oonuree maaqi qimasee qimamiaqa. Ani airaamaku faqa ani faiqi anaasee faqa anidammiaafoo qia.

<sup>7</sup> Mooseefa mi ufana iriseenoo narí airaamaku oonu aanai paqurimaseenoo mina oorinni aqoori saunu arafufanoo mina amooqa nanau. Miqi masoofaqa nári mariranara narí iree narí iree maseeqa doo Moosena uiqaana maqaki keeqaqau.

<sup>8</sup> Minaki ooru maridanoo Mooseefa narí airaamaku oosana oosana aupurarana Yaaweefa Faraona faqa Isipa maqannaasa faqa nimiseenoo Isaraee maqannaasa maroonara qimaminau. Mifa Isaraee maqannaasa aanai anidaqa moomoo ummaara maree marufanoo Yaaweefa dadaaqunara faqa qimaminau.

<sup>9</sup> Yeetaroofta mi aiqama ufana iriseenoo asasinau.

<sup>10</sup> Asasammaseenoo qinau. Yaaweefa Faraona asaukukinaana faqa Isipa maqannaasa nisaukukinaana marainara mina amooqia. Yaaweefa narí faiqi anaasee rumberana kinaana idukunara mina amooqiaqa.

<sup>11</sup> Doo maqee qinee iridaqa, Yaaweefa aiqama unna anutusa urinnaaqararafa maridanoo. Isipa maqannaasa inni mandaikamma nimaqee marufanoo inni idaaqamma nisoonnai mifa aiqama unna anutusa urinnaaqararafa maridanoo.

<sup>12</sup> Miqi qimaseenoo Yeetaroofta aandau marasee aruseenoo muduka ida aiqama qama taikara tatufirana Anutuna suqa aminau. Kafaa mifa akaqa tatufirana faqa Anutuna suqa aminau. Aaroonafa faqa Isaraee maqanna uriqarararasa faqa anireeqa Mooseena airaamaku faqa Anutuna amooqidaqa mi naaquqara qoomaqana naqau.

*Misa akaqa siaasa mara quqaqau.*

*(Lo 1:9-18)*

<sup>13</sup> Iaqqoo kananaana Mooseefa findifinoo narí maqanna qambaanaai oonureenoo misa kootauqa irinau. Kananaana oosana arasee kootinoo fifii ufanoo eenda kai masanau.

<sup>14</sup> Yeetaroofta Mooseena kadaapirirana qafamaseenoo maaqi qimaseenoo Mooseena qimaminau. Anee nanaree aneennaraa maa saikausa auqaidanee. Faiqi anaasee kananaana kootirara ani marida rakisi mariafanoo eendidanoo.

<sup>15</sup> Mooseefa iriseenoo qimaminoo qinau. Qinee miqianaqa faiqi anaasee qinee unnannai aniree Anutuna aidiranara irifaranoo.

<sup>16</sup> Qaara fasiqa qara ufa rainaida narí afu mau narí afu mau maseeqa qinee unnannai aniraafaqa qinee andeeqai fasiqanara maafa andeeqee maqi qimaseeqa Anutuna sanda ufa naakapidaqa.

<sup>17</sup> Yeetaroofa Mooseena qimaminoo qinau. Anee sia andeeqee mari-ananoo.

<sup>18</sup> Anee miqidana aneenna afeeka taikainaqa maa fasiqa anaaseesa faqa miqi kai ifaranoo. Aneennaraa sia amanaiki mariananoo.

<sup>19</sup> Anee maqee qini ufa iria. Qinee amiqira aakapara ufa ani amianauro. Anee irinanoo Anutufa ani faqa marida dadaaqiannoo. Anee andeeqaseenana Anutuna afusaa aanaiqikina maridana faiqi anaasee ummaara Anutuna qimami mariananoo.

<sup>20</sup> Anee Anutuna sanda ufa qimannimisee andeeqara marirana oosana naamua qimasee misa ifandinna ainainara faqa qimannimia.

<sup>21</sup> Qima nimiseenana anee mina amuaaqa irirana faqaa fasiqauqa mara quqasainaqa Isaraee maqannaasa uriqararusaikiqa mariaqa. Akaqausa wan tauseenna (1,000) fasiqa anaaseesaa rakisifaqa akaqausa wan handareetasaa 100 rakisifaqa akaqausa fiftisaa 50 rakisifaqa akaqausa teennasaa 10 rakisifaqa. Misa Anutunara rufiee mariasa maridaqa misa andeeqara oosana faqaasa maridaqa sia umee raqee munnimma maree marinausa mariaqa.

<sup>22</sup> Mi fasiqausa aiqama kari faiqi anaasee koota ufa irimarinausa mariaqa. Moo afeeka ainaina firaa ainaina kambiqafinaqa maree mini ani amifana anee mina andeeqaa. Kaqikaa ainaina nari kai andeeqaaqa. Misa miqimandee ani qummaara raina maraifanoo ani afaqa aufadaani.

<sup>23</sup> Anutufa eedoo qinana qini ufa mau finana sia kudoosaapeennaranoo. Miqinaqa maa fasiqa anaaseesa aanoo qirafa taikafinaqa quqasee nimaqa fifaranoo.

<sup>24</sup> Mooseefa Yeetaroono ufa iriseenoo mi mau kai finau.

<sup>25</sup> Mooseefa irirana faqaasa Isaraee maqannaasa kinaana mara quqasoofaqa uriqararusaikiqau. 1,000 fasiqasaa rakisiraua faqa 100 fasiqasaa rakisiraua faqa 50 fasiqasaa rakisiraua faqa 10 fasiqasaa rakisiraua faqa mara quqasoofaqa rakisimariqau.

<sup>26</sup> Misa aiqama kari siaasara foora naaruara mariqau. Maridaqa kaqikaa kootauqa misa andeeqee mariqau. Firaa koota Moosee funnai maree fimariqau.

<sup>27</sup> Miqimmasee Mooseefa Yeetaroono amandama soofanoo amaaqa finau.

## 19

### *Isaraee maqannaasa Sinai aaqana aikunni ani mariqau.*

<sup>1-2</sup> Isaraee maqannaasa Isipa maqa maaqakiqari Reefidimma maqa maaqaki ani mariufaqa miqooqari qaaramoo uqoono indaruqaa faasaanasaa Reefidimma maqa maaqaindari Sinai aadana maqa maaqai oonu mariqau. Miqoo misa Sinai aaqana aikunni uiqaana maqa usakasee mariqau.

<sup>3</sup> Mooseefa miqooqari Sinai aaqanasaa Anutuna faqa ufa qiraree qimasee ooru finau. Yaaweefa aaqana saaqari Mooseena aaramaseenoo qimaminau. Anee Yakooboona aiku asauku Isaraee maqannaasa maaqi qimasee qimannimia.

<sup>4</sup> Innee qini oosana qafee mariafanoo. Qinee Isipa maqanna narunnana innee qafaafanoo. Qinee inni quqaumu anaqaqara foora itateeqeeqa qiqaosasaa quqaseeqa uqeereeqee qeeqa marunannai quqaqauqa mariafanoo.

<sup>5</sup> Innee qini ufa iriseeqa qini moodaanaki kira ufa mau fiqa qini faiqi anaasee marifaranoo. Aiqaama maa maqa maaqafa faqa faiqi anaasee faqa qinindi kai maridaqa innee qinee qeeqara utaaqama qaunasa mariafanoo.

<sup>6</sup> Innee qinindi uqanna maridaqa qini aanaiqi kirausa mariafanoo.

<sup>7</sup> Mooseefa irisee ooqureenoo Isaree maqanaa uriqararawsa suquseenoo aiqama Yaaweefa qimamu ufana qimanniminau.

<sup>8</sup> Faiqí anaasee Yaaweena ufa iriseeqa aiqamausa moodaa kari noo raqa maree qiqau. Yaaweefa aiqama ufa qinnana maasa irianauree qiqau. Miqi qufanoo Mooseefa misa ufa iriseenoo Yaaweena qimaminau.

<sup>9</sup> Yaaweefa misa ufa iriseenoo Mooseena qimaminoo qinai. Qinee amatooki arira oonnamukiqari anee iannannai qumuree ani faqa ufa qianaqa faiqí anaasee iriseeqa miqooqari ani ufara kuqaa fee qifaranoo. Miqi qimasooфанoo Mooseefa faiqí anaasee quu ufana Yaaweena qimaminau.

<sup>10</sup> Qimamisooфанoo Yaaweefa kafaa Mooseena qimaminoo qinai. Anee kafaa ooquree faiqí anaasee maaqi qimasee qimannimia. Misa aiqama maqee faqa duna faqa nári qamunna nammari uqusee nári nifaaqa anukamasee qini qimooqirara deedaqiaqa.

<sup>11</sup> Deeda qimarifaqa duna kaqi mari moona qinee Sinai aaqanasaa qumuraanaqa aiqama faiqí anaasee qini qiqafeefaranoo.

<sup>12</sup> Anee aaqana ameemaanai fiqumma oosumma sainaga sia faiqí anaasee mina fiaaqaraaqa. Miqimmaseenana qimanniminaqa sia aaqanai ooru fuaqa, sia uqanna mina aaqa fuaqa. Minasaa aiku rainafa kuquannoo.

<sup>13</sup> Innee miqinna fasiqana sia uqanna nisaukunnai aruaqa, ooni samu fee feefannai fee kuqa aruaqa. Maa ufana faiqí faqa aandauree faqa qidaqa. Miqinna fasiqa fee aandauree fee kuquannoo. Ukeena fuaqifaqa kai faiqí anaasee aaqana aikunni ooru fuaqa.

<sup>14</sup> Mooseefa aaqanaindari qumureenoo faiqí anaasee Yaaweenara deedaqa masee amooqiaqeera qimanniminau. Miqi qufaqa faiqí anaasee nariqa qamunna nammari uqiqau.

<sup>15</sup> Miqi marufanoo Mooseefa qimanninai. Duna kaqi mari moona deedaqiaqa. Maqee oosana arasee sia anaasee sakasee faiqaaqa.

<sup>16</sup> Qaara afuru faisoofanoo qaaramookufanoo kananaana aaqanasaa ukeena firaana fuaqarana namu faqa qamatooki kira oonnamu namu faqa aakuasaa innaarunai namu faqa ufaqa faiqí anaasee uiqaana maqaki mariusa aiqama naindiri roofaqa rufiaqa.

<sup>17</sup> Mooseefa faiqí anaasee aiqama uiqaana maqakinaana nifiqeenoo Yaaweena paqurirara aaqana aikunni oonu kikiqino marinai.

<sup>18</sup> Yaaweefa idauruki qari Sinai aaqanasaa qumu marunara ida muna fannoo aaqana aiqama rafaqafinoo marinai. Mi munafa firaqa ida munara foora ooru fufaqa faiqí anaasee qafooфанoo firaqoo naindiri ranau.

<sup>19</sup> Ukeena feendundaanai qimarinai. Miqi qimarufanoo Mooseefa Yaaweena qimamufanoo Yaaweefa kafaa innaarunai darara qiranakiqari nari qimaminai.

<sup>20</sup> Yaaweefa Sinai aaqanasaa qumureenoo Mooseena aarooфанoo ooru-finai.

<sup>21</sup> Ooru roofanoo Yaaweefa Mooseena qimaminoo qinai. Anee ooquree faiqí anaasee qimanniminaqa sia oosu aiaaqaree qini qiqafarara aniaqa. Misa miqifaqa moomoosa kuqifaranoo.

<sup>22</sup> Aanaiqikirausa faqa qini daqa aniani qimasee anukamafiqa aniaqa. Sia miqifaqa misa aupurarana nimianauree.

<sup>23</sup> Mooseefa Yaaweena ufa iriseenoo qimaminoo qinai. Faiqí anaasee sia amana Sinai aaqanasaa urifaranoo. Anee aneenna kai maasa daakapama seenana naaquqara aaqana fiqumma amusa arasaanaqa sia urifaranoo.



<sup>24</sup> Yaaweefa iriseenoo Mooseena qimaminau. Ooqureenana Aarona faqa afiqee urua. Qini aanaiqikirausa faqa faiqi anaasee faqa sia qini qiqaqararee qimasee amusa rapeemmasee uruaqa. Miqifaqa qinee misa ummaara nimianauro.

<sup>25</sup> Mooseefa iriseenoo ooqureenoo faiqi anaasee aiqama Yaaweefa quu ufana qimanniminau.

## 20

*Anutuna qisauku qara sandufa.*

*(Lo 5:1-21)*

<sup>1</sup> Anutufa maaqi qinoo.

<sup>2</sup> Qinee Yaaweesa inni Anutusa maridaqa. Qinee Isipa maqasaa rumbaranaki maruna inni mareeqee mai quqaafanausa maridaqa.

<sup>3</sup> Innee sia moo anutuna amooqiaqa, qini kai qimooqiaqa.

<sup>4</sup> Innee sia innaarunai mari ainainausa faqa maqasaa mari ainainausa faqa nammari mari ainainausa faqa nimana auqusee maasa anutufee qiaqa.

<sup>5</sup> Minara sia moo ainaina amana auqirana oorinni mapamufida innaaru qidaqa amooqiaqa. Qinee Yaaweesa inni Anutusa marunnanara sia mi ainainausa nimooqiaqa. Qinee sia uqanna moo anutunara qiananoo qini qimaqa maqaannoo. Faiqi qiniara fidiqaa inausa aupurarana nimiananoo misasaa faqa misa faiqi namu saa faqa misa ninaiqimara saa faqa nisaifaqausa saa faqa mariannoo.

<sup>6</sup> Moomoosa qiniara ridaqa qini sanda ufa mau finausa qinee misa faiqi namu kasooaqee nukudara foora kambiqainausa qeeqa didirana uqannifiqaanauro.

<sup>7</sup> Innee sia qini duqunnai manda oosana auqaaqa. Qinee Yaaweesa inni Anutusa qini duqa fifau fafau inausa aupurarana nimianauro.

<sup>8</sup> Innee Sabata faasaanara naaquqara faasaanee qimasee iriqa fuaqa.

<sup>9</sup> Dinni taikasee dinni ani moodaa marasee 6 faasaana inni ainainira faasaana mariani.

<sup>10</sup> Dinni ani qaara marasee 7 faasaanasaa qini Yaaweesa adoora faasaana maridanoo. Mi faasaannasaa sia uqanna moodaafa faqa ainaini-ani. Innee faqa inni faiqi namu faqa inni ainainira faiqiuqa faqa inni aandauqa faqa aanaamuru inniki ani mariasa faqa sia uqanna ainainiaqa.

<sup>11</sup> Dinni taikasee dinni ani moodaa marasee 6 faasaana qinee Yaaweesa innaaruna faqa maqa faqa ooruku nammari faqa minauqaki mari ainainausa faqa auqi qiafana. Dinni ani qaara marasee 7 faasaanasaa qinee qidooa qiafana. Minara qinee Yaaweesa Sabata faasaana afaaqooqa qimasee naaquqara faasaanee qidaqa.

<sup>12</sup> Inneeqa ninausa nikausara qeerairidaqa misa ufa qaindusuaqa. Innee miqifaqa qinee nimianna maqanasaa kisaqasaa marifaranoo.

<sup>13</sup> Innee sia faiqi anaasee nuqu qimasee naruaqa.

<sup>14</sup> Innee faiqi anaasee sia nari ummuari nari umuariaqa.

<sup>15</sup> Innee sia moona ainaina umuariaqa.

<sup>16</sup> Innee sia akaqausara unna qimasee misa kikiqa ususee ufa nimia.

<sup>17</sup> Sia moona maaqa umiasanara amuqusiani. Sia moona aanaqara amukaani mina ainainira fasiqa anaaseera faqa misa aandau ainainara faqa mina aiqama ainainara faqa sia amukaani.

*Faiqi anaasee Anutunara rufiaqau.*

*(Lo 5:22-23)*

<sup>18</sup> Faiqí anaasee aiqama innaarunai qirana faqa aakuusaa faqa ukeena firaana faqa aaqanasaa idamuna namu faqa qafoofanoo naindiri reenoo naaquqoofaqa nianasaa marida qafee mariqau.

<sup>19</sup> Miqi masee misa rufiasee Mooseena qimamiqa qiqau. Anutufa maasa qimaqiminaqa maasa irisee kuquanoora rufiidaqa anee kai maasa qimaqiminaqa iria.

<sup>20</sup> Mooseefa iriseenoo qimanniminai. Innee sia rufiaaqa Anutufa inni nimanamasee qafainaqa aiqama kari minara rufiasee mina ameemaanai maridaqa numoo ainaina sia auqaqeeru.

<sup>21</sup> Miqi qimasoofaqa faiqí anaasee nianai marufanoo Mooseefa kai Anutufa asukuna arira oonamuki maruna aqa finau.

### *Aidaraindaraa sandufa.*

<sup>22</sup> Yaaweefa Isaraee maqannaasa qimannimianifeera maaqi qimaseenoo Mooseena qimaminai. Qinee innaarunaindari inni faqa ufa qimarunaqa innee inneeqa nifunnai mina qafaafanoo.

<sup>23</sup> Innee sia siruaannai faqa koorannai faqa unna anutuna amana auqusee qini Yaaweesa faqbaqa masee amooqiaqa.

<sup>24</sup> Innee maqannai qainda auqusee minasaa inneeqa sipsipa faqa buri-makau faqa miniseeqa ida qama taikara tatufirana suqasaifaqa faiqí anaasee qini faqa moodaanaki kiaqa. Aiqaama maqusa innee qini qimooqi-aqeeru utaaqama qaunna maqusanaki oonureeqa miqifaqa qinee innee iannai qumuree amiqi amiqimma nimaqaanaura.

<sup>25</sup> Innee ooninnai qini aidara auqiraree qimasee sia faiqí rukamuqaa ooninannai auqaqa. Innee faiqí rukamuqaa ooninannai auquseeqa minasaa tatufirana suqa qimirafa sia amanaikiannoo.

<sup>26</sup> Innee sia aidara auqusee minni akarara irirasu auqaqa. Innee miqiqqa umee nifaaqa kooroo ifaqa qafeefoora.

## 21

### *Fifau ainainira faiqi kiqa mariasasaa rakisira oosana.*

*(Lo 15:12-18)*

<sup>1</sup> Anutufa Mooseena qimaminoo qinau. Anee maa sandufana Isaraee maqannaasa qimannimi.

<sup>2</sup> Innee Heeburu maqannaasa ainainira faiqi munnimmannai feefaurumasaifanoo mifa inni faqa moodaannai taikasee dinni ani moodaa 6 marasee aukwana ainaina masainaqa dinni ani qaaraikinaqa 7 doo quqasaifanoo kaqi fuani. Idukinnana akiiqara sia feefauriani.

<sup>3</sup> Mifa adeedaana maridanoo ani ainainira faiqikinoo mariinafa amaaqa firarinoo sia anaasee maree fuannoo. Kafaana anaasee faqaafa inni ainainira faiqi kinoo mariinafa amaaqa finoo amana nari anaqa aqee fuannoo.

<sup>4</sup> Mina feefauru mina rakisiiifa anaasee aminanoo mifa faiqi maqaseenoo mariinanoo mina aukwana taikainanoo anaasee faqa faiqi faqa miqoo quqaseenoo kaqisamu amaaqa fuani. Mi anaaseena faqa mina faiqi faqa rakisiranaindi kai marifaranoo.

<sup>5</sup> Ainainira fasiqa fannoo nari faiqi aanaaseera amuqusinanoo sia amana uqaanauree qimaseenoo

<sup>6</sup> qinee qeeqa rakisiranara didimarifaqa qimaseenoo sia qinee taikasee fuanaura kaqi rumberanaki marianauree qimasainanoo mina rakisirafa mina qumareenoo amaana maaqaki munuseenoo quka qumareenoo kooqi mammaaqai aaqoo ruqiaani. Ruqiasainanoo mi fasiqafa naaruara ainainira faiqi mariinanoo miqoo kuquannoo.

<sup>7</sup> Faiqí moo fannoo narí araamuna ainainira maanaaqaikianifeera ami-sainanoo sia ainainira fasiqauqa iduku nisaandee masee idukusaina fuanoo.

<sup>8</sup> Mi manaaqana ainaina faqaafa feefauru meegeenoo narí ainainiranaki quqasee qinaaqara maraanauree qimasee mariinoo akooqaiifanoo sia mareenoo. Miqinannai mi manaaqana mandaikama amaqaaseenoo sia aanaa-muru nimisee feefauru maraannoo. Narí akoofa kai kaifaa feefauriannoo.

<sup>9</sup> Faiqí moo fannoo narí faiqi amiraree qimaseenoo ainainira maanaaqa feefauru maseenoo narí araamunara foora rakisiani.

<sup>10</sup> Faiqí moo fannoo anaasee faqaafa moo maraseenoo indaarugaana narana faqa qamunna faqa mina ainaina dadaaqirana faqa sia minnisaani, ooqai iundee kai iani.

<sup>11</sup> Mi fasiqafa indaarugaana sia mi ainainausa andeeteqa amaqaenoo mi fasiqafa mi anaaseena aiqainanoo finanoo sia feefauru maraannoo.

*Rakirana andeeqara sandufa.*

<sup>12</sup> Faiqí moo fannoo moo fasiqa kuqarusainaga narí faqa kai kuqaruaga.

<sup>13</sup> Faiqí moo fannoo sia moo fasiqa auqu qimasee arinafa mifa amana qinee inni utaaqama nimaqa qaunna maqusanaki keeqafinoo asumu mariannoo.

<sup>14</sup> Yafee moo fannoo moonara aranaqainanoo auqu qimasee arinafa mifa faqa kuquani. Qini aidarai mifa oonu kukeeqafi asumu marianauree qinaqa innee mindaraana rarisamasee kuqa aruaqa.

<sup>15</sup> Yafee moo fannoo narí anoona akoona narinaqa innee mina kuqa aruaqa.

<sup>16</sup> Faiqí moo fannoo moo fasiqa mareeqeenoo narí ainainira faiqi kee iannoo fee moo atinai nimisee feefauru fee marainnana kuqa aruaqa.

<sup>17</sup> Yafee moo fannoo narí anoona akoona manda ufa qimannimaqainnana mina kuqamma aruaqa.

<sup>18-19</sup> Faiqí misa tinooramamaree fidaqa faiqí moo fannoo moonaa ooni samu fee saamu samu fee arusainanoo sia kuqirai aurida mariinannoo findifinoo nimarinaqa innee mina akiiqara ari fasiqana sia aupurarana amiaqa. Arinna fasiqafa narí qaarisa mariinannoo findifinoo madaana saunusaa ooquree ururee irana amanaikinannoo ari fasiqafa mina feefauru auriranaki mariinna faasaana amana kai feefauru amisee minasaa rakisi marinannoo findi fuani.

<sup>20</sup> Faiqí moo fannoo narí feefaurummaqai ainainira fasiqa nee maanaaqa nee saamu qumaree arusainanoo aaqee kuqinaqa innee mina akiiqara narí faqa moo aupurarana amiaqa.

<sup>21</sup> Mi ainainira fasiqa nee manaaqa nee sia aaqee kuqirai moodaa eenda fee qaara eenda fee kaqi mariinannoo kuqinaqa innee sia mina uriqararafa mina arinnana akiiqara amiaqa. Narí ainainira faiqiara aupurama amaqaifa narí ariranasaa ititeenoo.

<sup>22</sup> Faiqí rakinnanaki moo fasiqa fannoo amuaqu faqaa anaasee arusainannoo kuqira faiqi maqaaseenoo mina anoofa kaqi marinannoo mi anaaseena afaaqi fannoo nana feefauruaree irainannoo mi fasiqafa feefauriannoo. Siaasauqa eedoo qinna feefauruna kai amiannoo.

<sup>23</sup> Mi anaaseefa moo aupurarana marinaqa mina arinna fasiqana faqa mi aupuraranna kai amiaqa. Kuqa arinaqa narí faqa kuqa aruaqa.

<sup>24</sup> Nifu dimbasainaga narí afu faqa dimbaaqa. Nifai itairisainaga narí afai faqa itairiaqa. Nisauku raudasainaga narí asauku faqa raudaaqa. Niku itairisainaga narí aiku faqa itairiaqa.

<sup>25</sup> Idati raquru niminaqa narí faqa idati raquru amiaqa. Kaakadi narinaqa narí faqa kaakadi aruaqa. Saamu narinaqa narí faqa saamu aruaqa.

<sup>26</sup> Faiqí moo fannoo narí ainainira maanaqa fee fasiqa fee arumareenoo afu qimbaseenoo mina akiiqara idukusee aiqainanoo amaaqa fuani.

<sup>27</sup> Kafa mifa narí ainainira fasiqa fee maanaqa fee arumaree afai itairiseenoo mina akiiqara idukusee aiqainanoo amaaqa fuani.

*Burimakau fannoo aaqama sainnana andeeqara ufa.*

<sup>28</sup> Burimakau akoona fannoo faiqí fee anaasee fee kuqa narusainaqa ooni samu mi burimakau akoonna kuqa aruseeqa mina amaqi sia naaqa. Mi burimakau akoona arusaifanoo mina akoona aupurarana amirafa sia mariannoo.

<sup>29</sup> Mi burimakau akoonnafa ooqai faiqí narí marifa maridanoo kafa moo fasiqa kuqa arinaqa mina akoofa sia ququsaki mara quqainanoo kafa narinaqa mina akiiqara ooni samu mi burimakauna kuqa aruseeqa mina akoona faqa kuqa aruaqa.

<sup>30</sup> Kuqina akiiqara aqira feefauruara ooqai auqu ramaqaana amana kai aquseenoo narí kuqiranasaa ititaannoo.

<sup>31</sup> Burimakau akoona moo fannoo maanaqa fee akoonaiqi fee narusainaqa innee ooqai qimaqaa ufa mau kai fuaqa.

<sup>32</sup> Burimakau akoona moo fannoo ainainira kumaaraa fee maanaaqee narusainaqa mi burimakauna akoofa ainainira faiqi uriqararana firaa feefauru amiannoo.

<sup>33-34</sup> Faiqí moo fannoo madika indufuseenoo rafaqafu qainanoo moo fannoo oonu mina rafaqamma sainanoo burimakau fee doonki fee minaki aqufiqa kuqifanoo, madika afu rafaqaa ifa mi aandauna akiiqara feefauru maseenoo nariara mi aandauna maraannoo. Faiqí moo fannoo madika indufusee sia rafaqaq finanoo aandaqa minaki aqufiqa kuqifanoo mi fasiqafa aanda akoona feefauru amiseenoo nariara mi aandauna maraannoo.

<sup>35</sup> Moo fasiqa burimakau akoona fannoo moona burimakau akoona arusainaqa burimakau akooqanda kaqi mari burimakauna mareeqee moosaa quqasee feefauru marasee miqanda mi munnimmana rainaqaraasa mandee kuqira burimakau qambaana aukuqaraasa masee moo fannoo dinni maraina moo fannoo dinni maraqa.

<sup>36</sup> Mi burimakau akoonafa ooqai narí maru burimakaufa marifanoo mina akoofa sia ququsaki quqainanoo moona burimakau kuqa arusainanoo mina akiiqara moo kaqi mari burimakauna amiseenoo kuqirana nariara maraannoo.

## 22

*Aaqarana andeeqara sandufa.*

<sup>1</sup> Faiqí moo fannoo burimakau fee sipsipa fee qummuara mamaree munu moona amisee feefauru maraina fee arusaina fee mi fasiqafa moodaa burimakau akiiqara moodaannai qisauku burimakau mina amiannoo. Moodaa sipsipa qummuarinnana akiiqara qaara faqa qaara faqa sipsipa amiannoo.

<sup>2-4</sup> Mi fasiqafa narí qummuarirana akiiqara feefauriannoo. Moo ainaina sia marinaqa mi fasiqana mareeqee moo maqannaa nimisee mina feefauru mareeqee mifa qumuarina akiiqara nimiaqa. Mi fasiqafa burimakau fee doonki fee sipsipa fee maraqainafa kaqi riri marinanoo qaaraqanda mina akiiqara nimiani. Eendakinai qummuarira fasiqa fannoo maaqa ruiqasee keeqainaqa mina qumarasee kuqa arusainafa sia mina akiiqara

ufa maraannoo. Faasaana miqi marinaqa kuqa arinna fasiqafa mina akiiqara ufa maraannoo.

<sup>5</sup> Faiqí moo fannoo narí burimakau fee sipsipa fee andanda nee marinana sia amiqimmasee rakisinanoo moona afuqaki keeqafi narana nainanoo mina akiiqara narana faqaana narí afuqakinaana amiqirana kai unaku maree munu amiannoo.

<sup>6</sup> Faiqí moo fannoo narí afuaki ida arasainanoo qamammareenoo moona afuqa qeenoo narana unaku quqaqainnana qamasainanoo mina akiiqara idarai fasiqafa mina amiannoo.

<sup>7</sup> Faiqí moo fannoo munnimma moo fasiqasaa quqasaina marinanoo moo fasiqa fannoo qummuari marinaqa paquri masaifanoo mina akiaqara qaara kari feefauru amiannoo.

<sup>8</sup> Qummuari fasiqana innee sia paquriqa munnimmasaa rakisii fasiqana afixamaree innaaru qimaria maqusanaki munusee irairanoo mifa narí amana afixamasee kuqaa sia qinee maree fee qiannoo.

<sup>9</sup> Aiqama ainainara aanooqiranaki burimakaura faqa doonkiuqara faqa sipsipauqa faqa qamunnara faqa akaqa ainainara faqa qinindi kai fee qimasee aanoo qinna fasiqa qanda nifiqamaree innaaru qimariaqoo nifiqee aniaqa. Anutufa yanaree unnaqiifoo qinafa mifa mina akiiqara qaara kari feefauru amiannoo.

<sup>10</sup> Faiqí moo fannoo moona doonki fee burimakau fee sipsipa fee moo aandau fee rakisi marinanoo moo aandau fannoo kuqinoo fee nana afaaqee mandaikinoo fee namuqaa fee mara maraafanoo moo fasiqa fannoo sia minauqa qafeenoo.

<sup>11</sup> Mi aandausa saa rakisirafa innaaru qimariaqoo oonureenoo amana afixamaseenoo qinee sia uqanna mi aandausa ummuari fee qiani. Mi aandausa sia ummuarifanoo aandau akoofa minara amanammifoo qimasee sia mina akiiqara rakisiinainnai feefauru maraannoo.

<sup>12</sup> Kuqaa mi fasiqafa ummuarinoo mifa aandau akoona mina akiiqara feefauru amiannoo.

<sup>13</sup> Kaasau faini mi aandauna aruneenoo fee mina rakisi mari fasiqafa mina asausifee amudaani fee mara mina akoona uqafiqaseenoo sia mina akiiqara feefauriannoo.

<sup>14</sup> Faiqí moo fannoo moona aandau akaqa ainainirana dadaqianifeera marasainanoo kuquannoo fee amudaani itairinoo fee mi aandauna akoofa uqanna sia marinanoo ufaasu marai fasiqafa feefauriannoo.

<sup>15</sup> Mi aandauna akoofa uqanna mina afusaa miqifanoo sia mina akiiqara feefauru aandau akoona amiannoo. Ufaasu feefauru masaafanoo ainainirana dadaaqi mari aandaufa kuquannoo fee amudaani itairiannoo fee feefauru maqaiifa miqiannoo.

### *Akaqa sandufauqa.*

<sup>16</sup> Faiqí moo fannoo maanaqa moo faiqí moo sia utaaqama amaqqarana sararamma amaqqaseenoo mi fasiqafa mararara mina akoona feefauru amiseenoo marasainanoo mina aanaaqaikinoo mariannoo.

<sup>17</sup> Mi manaqana akoofa mi fasiqanara akooqainanoo sia narí araamuna maraanee qinanoo mi fasiqafa fuka maanaqa feefauri mariana amana kai mina akoona amiannoo.

<sup>18</sup> Aukainaina maraqanua aanaaseesa kuqa naruaqa.

<sup>19</sup> Faiqí moo fannoo aandau amuaqa akarainnana mina kuqa aruaqa.

<sup>20</sup> Qini Yaaaweesa kai aandau tatufirana suqa qimiaqa. Moo unnaqira anutuna tatufirana suqa aminnana kuqa aruaqa.

21 Innee ooqai Isipa maqasaa aanaamuru marunaki mandainainaki marunnara irisee sia aanaamuru inniki marinausa mandaikamma ni-maqaqa.

22 Innee adeedaana anaasee fee faiqi faiqi fee sia mandaikamma ni-maqaqa.

23 Innee miqifaqa misa qini daaraifaqa qinee Yaaweesa irianaara.

24 Qini qirana qainaqa rakiranaki inni kuqa naruanara. Narusaanaqa inni ninaaqmaaka adeedaana marifaqa inni faiqi namu faiqi marifaranoo.

25 Inniki qari qini Yaaweesa faiqi anaasee moo fannoo munnimara sarau imarinnana ufaasu munnimma aminana sia ufaasu munnimma nimimariasa naanna raaqa. Misa nimiseeqa narindi akiiqara maraseeqa aabaa faqa maridaqa. Innee inneeqaindi akiiqara kai maraqa.

26 Innikiqari faiqi moo fannoo ani ainaina ufaasu maraseenoo kafa amianauree qimasee narí suara siuta amiseenoo minannoo narí amianinna ainainara kooroo idanoo kuqaa amianauree qidanoo. Miqi qinana anee suani afu sia keeqanoo marinana mina suara siuta kai kaqi narí amia.

27 Mi suara siutafa tootooqirana amianifeera quqaqaina marifanoo nanee moo ainaina akusee faqaannoo. Anee sia aminanoo suara arinanoo qinee unnannai innaaru qinaqa qinee mina ufa irianaara. Qinee kaaqa faiqiara qimudao qimarunausa maridaqa miqianaara.

28 Innee sia qini Anutusara manda ufa qiaqa. Inniqa rakisirausara faqa sia miqi qiaqa.

29 Innee fuka narana afiana neeqa sakuma faqa uainna faqa oorifa fadameena faqa inneeqa ooqa faiqi faqa qini Anutusa naaree qimiaqa.

30 Inneeqa burimakau sipsipa ooqasaa maqarana akoonauqa dinni taikaseenoo dinni oonu qaara marasee 7 faasaana narí anoona faqa mariseenoo dinni oonu qaaramoo 8 faasaanaikinaqa mina arusee tatufirana suqa qimiaqa.

31 Innee qini faiqi anaasee marianara kaasau faini fannoo aru quqaqainna aandauna amaqi sia suqasee naaqa. Faini mara nimifaqa naaqa.

## 23

### *Isarae maqannaasa andeeqara oosana auqaqa.*

1 Innee aatata qaraa unna ufa iriseeqa sia moona munu qimamia. Innee sia aaqee mari fasiqana unna ufannai mina dadaaqa.

2 Kootaki oonureeqa moomoosa unna ufa qifana anee sia misa dadaaqa. Misa ufaki kikiqa mafi andeeqara ufa mara furufarifana sia misa dadaaqa.

3 Kudi fasiqa moo fannoo kootaki kikiqa mafinana sia kudi marinnana roo qimasee dadaaqa. Andeeqara nara kai qiaqa.

4 Innee inneeqa namuqaa burimakau fee doonki fee furufariqa nifaqa innee qafamaseeqa maree narí akoonu munu amiaqa.

5 Mi fasiqana doonki fannoo ummaara mara maree fidanoo aanai saamurinoo marinaqa innee oonu qafee sia fiaaqaraaqa dadaaqa uqeera aisaqa.

6 Kudi fasiqa fannoo kootaki marinaqa innee sia minara manda fasiqee qimasee andeeqara oosana sia mina amiaqa.

7 Innee sia unna qimasee kootaki aqoonnana kikiqa usua. Sia andeeqara-rausa numoo siaisa fifau kuqiranaki mara quqannisaa. Qinee Anutusa mi manda ainainna auqainnana kuqa aruanauranoo.

8 Moo fannoo maqandanai kootaki minasaa roo qiannee munnimma aminana sia uqanna maraa. Miqira munnima fannoo faiqí nifu dimbarau-saikamma saifaqa sia andeeqarana qafaidaqa. Andeeqara fasiqa faqa mara furufaramma aisaidanoo.

9 Innee ooqai Isipa maqasaa maridaqa aanaamuru aapurarana qafeeusa mariafanoo minara innee sia quandafi aanaamuru inni faqa marinausa mandaikamma nimaqaqa.

*Qisauku dinni taikasee dinni ani qaara marasee 7 aukuanara faqa sabatara faqa qira sandufa.*

10 Inneeqa maqa ummaqu nee maria maqanaki minaki dinni qisauku taikasee dinni ani moodaa marasee 6 aukuaana ummaqusaidaqa unaku-saidaqa naaqa.

11 Miqifa fiifi inafa qisauku dinni taikasee dinni ani qaara marasee 7 aukuanasaa saifanoo maqa fanoo idooaani. Mi maqanasaa moo ainaina kambiqainnana sia unaku naaqa. Kudi fasiqauqa mina naaqa. Misa naidaqa andaanauqa mafi sainnana kaasau aandaufa naaqa. Inneeqa uainna afuqa faqa oorifa saqari faqa miqi kai iaqa.

12 Innee moodaannai qisauku taikasee dinni ani moodaa marasee 6 faasaana ainainiaqa. Ainainiaqa fiifi inafa dinni taikasee dinni ani qaara marasee 7 faasaanasaa sia ainainiaqa. Inni ainainira faiqiuqa faqa aanaamuru inni ainaini marinausa faqa inni aandaufa faqa aiqama idooaqa.

13 Qinee Yaaweesa aiqama ufa qimarunnana iriaqa. Innee maa amaana ufausa amiqimasee irimaree fuaqa. Sia unna anutusara innaaru qiaqa. Sia uqanna misa nuqu raaqa.

*Qaaramoo uriqarara faasaana amaana qira faasaana.  
(Raf 34:18-26; Lo 16:1-17)*

14 Aiqaama aukuanaki qaarammoo kari oomaqa sakasee naidaqa qini Anutusara innaaruqiaqa.

15 Innee Isipa maqa maaqaindari anu quqoonnana Abiba quqoonasaa qinee qimannimafannandee iqa innooqee mari pauraqana sia aqira bereeta naidaqa asasiaqa. Mi oomaqanaki 7 faasaanasaa sia innooqee mari pauraqana aqira bereeta naaqa. Innee qini qimooqiraree qimasee sia kaqi aniaqa. Qini tatufirana suqara ainaina faqa maree aniaqa.

16 Fukakinaana unakusee oomaqa sakasee asasidaqa namaseeqa inneeqa narana ummaquqaana oosanarasee unaku naaqa. Saqari aqama akuqainafa innee mina tiqisee auqaanai maridaqa moo oomaqa sakasee naida asasiaqa.

17 Aiqaama aukuaana mi qaaramoo oomaqiranakina aiqama Isaraee maqannaasi fasiqauqa anireeqa qini Yaaweesa inneeqa Anutusa qimooqiaqa.

18 Innee aandaunoo qini tatufirana suqa qimiraree qimasee sia innooqee mari pauraqana aqira bereeta namu faqa moodaanaki suqaqa. Tatufira aandaufadameena fannoo sia faiqee kananaana kaqi mariani aagee kai aiqama idaki aqusaifanoo qama taikafuani.

19 Aiqaama aukuaana innee fukakinaa narana unaku maree qini Yaaweesa inneeqa Anutusa amaana maqaki maree aniaqa. Innee sipsipa aanaaqi fee mimmi aanaaqi fee arusee sia narí anoona naamma anoonannai suqaqa.

*Anutufa Isaraee maqannaasaa naamuqira ufa faqa qima afeekaikira ufa faqa nimaau.*

<sup>20</sup> Anutufa kafa qinau. Qinee qeeqa kai qeeqa Qangiroo aqqaananoo mifa qumuree inni indaaru nikidanoo innisaa rakisi marinaqa qinee inni deedaqamma nisaafanna maqa maaqanaki fifaranoo.

<sup>21</sup> Innee mi qangiroofa qinnandee iaqa. Sia mina ufa rukiaaqa. Qinee mina aiqaunanoo qumu marinara sia mina ufa rukiaaqa. Mifa sia inni manda oosana akiqara nifauaannoo.

<sup>22</sup> Innee mina ufa irisee andeeqasee qinee qunnufa mau kai fifaqa qinee inni namuqaauqa faqa rakuanaura.

<sup>23</sup> Qini qangiroo fannoo inni indaaru nikinoo nifiqee Amooraa maqa maaqa faqa Heeta maqa maaqa faqa Perisita maqa maaqa faqa Kannaana maqa maaqa faqa Hifitana maqa maaqa faqa Yeebusa maqa maaqaki mariasa faqa naru taikaseenoo inni miqoo quqannisaannoo.

<sup>24</sup> Innee miqoo oonu maridaqa sia misa unna qira anutusara niqoori saunu arafi innaaru qiaqa. Sia misa innaaru qimariandee iaqa. Innee misa unna anutusa turi taari maseeqa ooni rakiaaqee minara innaaru qimariana raudaandammeeqee aqusaqa.

<sup>25</sup> Innee qini Yaaweesa inneeqa Anutusa qimooqifaqa qinee narana faqa nammari faqa inni nimiseeqa inni auriranauqa mara aqunnisaanaura.

<sup>26</sup> Innee Yaaweena kai amooqifaqa sia aanaaseeuqa eedada faiqi maqee faranoo. Sia moo aafa anaasee mariannoo. Innee sia dauni kuqifara, kisaagasaa marifaranoo.

<sup>27</sup> Qinee inni nifiqee fidaqa inni namuqaa qiniara rufiarana nimiseeqa inni faqa rakinausa furufarirana nimianaura. Nimiseeqa qianaqa inni namuqaauqa quqasee sandeefara.

<sup>28</sup> Qinee ukaqa nimimari doodaanina inni namuqaaki quqasaana ukaqa niminaqa naaqoo nifu furufarinaqa sandee faranoo. Innee fimarifaqa qinee Hifita maqannaasa faqa Kannaana maqannaasa faqa Heeta maqannaasa faqa nifaqasaanaqa innee miqoo oonu marifaranoo.

<sup>29</sup> Qinee sia moodaa aukuanaki inni namuqaa rapatutumma aquanaura. Qinee miqimma saananoo naakunduka mafinaqa kaasau aandauqa moomoo mi maqa maaqanaki maridaqa inni narifoora.

<sup>30</sup> Qinee misara qianaqa misa moodaa kai qaara kai idaqa taikafifaqa innee moomoo kammafi amana mi maqa maaqana maree faranoo.

<sup>31</sup> Qinee inni oosu maaqimasee oosumma nisaanaura. Dinni taatuqee nammari mariannoo. Dinni Firistia ooruku nammari mariannoo, dinni aadana maqa maaqa mariannoo, dinni Eufarateesa nammari mariannoo. Qinee inni afeeka niminaqa innee mi maqa maaqanaki fimarifaqa qinee inni namuqaa rapatutu iqa fimarianaqa innee misa maqa maaqa maree faranoo.

<sup>32</sup> Innee sia uqanna misa ufara eedoo qimasee moodaanaki kira ufa qiaqa. Misa unna anutusara faqa sia uqanna moodaanaki kiaqa.

<sup>33</sup> Mi maqannaasa sia inni maqa maaqaki mariaqa. Innee miqifaqa misa inni mareeqee qini numookamma qimaqara tinai quqee faranoo. Innee misa unna anutusa nimooqifanoo mifa inni ninuka ufanara foora fufinoo mariannoo.

## 24

*Yaaweefa Isaraee maqannaasa faqa moodaanaki kinau.*

<sup>1</sup> Anutufa aiqama ufauqa Mooseena qimamiseenoo kafa maaqi qinau. Moosee anee faqa Aarona faqa Nadabana faqa Abiquna faqa Isaraee



maqanna rakisirausa 70 uriqararusa faqa nifiqa maree urureeqa nianasaa kummaramafinaqa qiniara innaaru qidaqa qimooqiaqa.

<sup>2</sup> Moosee anee kai adeedi ania. Sia akaqa rakisirausa qini daaqa aniaqa. Faiqi anaasee faqa sia uqanna aaqanai uruaqa.

<sup>3</sup> Mooseefa ooqureenoo faiqi anaasee Yaaweena sandufa aiqama qimannimisoofaqa misa maaqi qimasee moodaa kari noo raqamaree qiqa. Yaaweefa qindee iqa maasa aiqama ainaina auqaanaura.

<sup>4</sup> Miqi qimasoofofanoo Mooseefa Yaaweena sandaufa aiqama akara rinau. Akara rumaseenoo kananaana iaqoofanoo aaqana aikunni aandau tutufira qainda auqinai. Auquseenoo ooni qisaukuqara taikasee qikunni ooqu qaara marasee 12 ooni maraseenoo qainda fiqumma Isaraeena faiqi namu nimana kai rakiqanau.

<sup>5</sup> Rakiqaseenoo kumaaraauqa qimannimufaqa burimakau arusee muni Anutuna tatufirana suqaaqau. Mi tatufira andauna Isarae maqannaasa faqa Anutuna faqa moodaanaki suqira tatufirane qiqau.

<sup>6</sup> Misa arusoofanoo Mooseefa burimakau fidika akaqana difaanikiaqa sakaseenoo kaqi maruna qumarenoo aidarai rurufinai.

<sup>7</sup> Rurufa maseenoo Akiiseenoo Mooseefa Anutufa moodaanaki kira ufa qimaqoo bukana akara rumaqoona maree findifinoo aiqama minakinaa ufa asaana rumasee firaqoo faiqi anaasee qimanniminai. Misa iriseeqa qiqa. Maasa Yaaweena mi sandaufana aiqama irisee afaqaanaura.

<sup>8</sup> Mooseefa misa ufa iriseenoo difaanikinaa fidika kaqi maruna indaku faiqi anaasee kiaqa aqidanoo qinai. Anutufa maa sanda ufausa nimuqooqari maa fidikafa Anutufa inni faqa moodaanaki kuna afeekaikamma nimaqaidanoo.

<sup>9</sup> Miqi qimaseenoo Mooseefa Aarona faqa Nadabana faqa Abiqufana faqa Isarae maqanna uriqararusa 70 faqa nifiqeenoo aaqanasaa oorufinai.

<sup>10</sup> Oorureeqa miqoo misa Isarae maqanna Anutuna qafaqau. Mina aiku ameemaanai innaaruna kudimandara foora ira ooniuga mina auqu safiree fee qimaru oonisa ausirirafauqa marinai.

<sup>11</sup> Misa Anutuna qafoofofanoo sia misa narinai. Misa miqoo moodaanaki suqufu faqa narana nammari naqau.

### *Mooseefa Sinai aaqana saa oorufinai.*

<sup>12</sup> Misa namasoofanoo Anutufa Mooseena qimaminai. Anee aaqanai qinee marunnannai urua. Ururinaqa qinee qeeqa sandufa anee faiqi anaasee naakapaanneera qaara oonisa akara ruma amianaura.

<sup>13</sup> Mooseefa mina iriseenoo nari dadaaqimaruna Yoosuaana faqa deedaqamma seeqa Mooseefa aaqanai Yaaweefa marunnai oorufinai.

<sup>14</sup> Ooru fidanoo Mooseefa Isarae maqanna uriqararusa maaqi qimasee qimanniminai. Innee maaqoo uiqaana maqusaki maridaqa maaqanda qifeesiaqa. Aaroonafa faqa Hurafa faqa inni faqa maaqoo marifaranoo. Akaqausaki ufa rainarafa kambiqainaqa miqanda andeeqa nimaqeeffaranoo.

<sup>15</sup> Miqi qimasee qimannimiseenoo Mooseefa aaqanai oorufufanoo qasuru fannoo aaqana rafaqa finai.

<sup>16</sup> Yaaweefa kaaqa qarafa aaqana aaqa qumuroonara Sinai aaqana saa qasuru quminai. Isarae maqannaasa mi kaaqa qaranna qafoofofanoo aaqanasaa firaa ida qeera foora qimarinai. Dinni ani moodaa marasee 6 faasaana qasuru fannoo aaqana rafaqa finoo marinai. Dinni ani

qaara qanda marasee 7 faasaanna Yaaweefa qasurukiqari Mooseenara mai uruannee qinau.

<sup>17</sup> Faiqí anaasee afaasasaa marusa aaqana qafeeqa naaquqara kudifaan-nammiifoo qiqau. Anutuna kaaqa qarafa aaqana saa firaqoo idauruara foora imarinau.

<sup>18</sup> Mooseefa aaqanai ooru fidanoo qasuruki keeqakufanoo aaqanasa ooru qaara fasiqa niku nisauku taikasee 40 eendaki faqa faasaana faqa marinau.

## 25

*Faiqí anaasee Anutuna naaquqara uiqaana maqa usakara ainainauqa amiaqa.*

*(Raf 35:4-9)*

<sup>1</sup> Mi aaqannanasaa Yaaweefa Mooseena qimaminoo qinau.

<sup>2</sup> Anee Isaraee maqannaasa qimanniminaqa misa oosana oosana ainaina qini qimiani qinnana qimiaqa. Faiqí anaasee qini qimirara nidinaqa minisainna ainaina anee mara quqaa.

<sup>3-5</sup> Maa ainainausa maree anifaranoo. Koora faqa siruaa faqa booroosa faqa amiqira qamunna faqa dirindaasi akira sipsipa asausi faqa pannoona akira sipsipa asausi faqa faeena akira sipsipa asausi faqa mimmi asausinnai auqira qamunna faqa sipsipa akoona apatasaa faeena akirana faqa ooruku nammariki mari firaa noodaana apata faqa akasia saqari amiqira saqari faqa maree minisaifana mara quqaa.

<sup>6</sup> Qooma qumbi maria fadameenna faqa aanaiqikirausa aki maria oosana oosana fadameenna faqa moo pauraqa ida arasaafanoo muninoo amiqira afundi mari pauraqana faqa mini amiaqa.

<sup>7</sup> Firaa feefauru aqi maria oonisa faqa aka amiqira ooniuqa faqa aanaiqikirausa eefooda qamunnasaa faqa nimuqusasaa rumbee mari-anasaa faqa atooqaaqa.

<sup>8</sup> Isaraee maqannaasa qimanniminaqa qini naaquqara uiqaana maqa usakasifaqa qinee misa qambaana marianaura.

<sup>9</sup> Innee uiqaana maqa faqa minakinaa aiqama ainaina faqa qinee naaka-paunandee miqi kai masee auquaqa.

*Innee moodaanaki kira bukisa auquaqa.*

*(Raf 37:1-9)*

<sup>10</sup> Innee akasia saqari marasee minannai moodaanaki kira bookisa auquaqa. Mina kisaqa 110 centimetres amana auquaqa. Mina qusandanai faqa mina kuradarafa faqa amana amana kai 66 centimetres amana auquaqa.

<sup>11</sup> Innee amiqira koora marasee turimmasai ausi rumafinaqa minannai kai bookisa adisaa faqa aundurari faqa ititaaqa. Mi bookisana afaimau koorannai amatookika masee rafaqaqaaqa.

<sup>12</sup> Innee koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaaqa. Dinni aikusaa qaara qanda dinni aikusaa qaara qanda quqaaqa.

<sup>13</sup> Akasia saqari qaindusi fandinna qanda koora turimandee ausiruma qumaree minannai kukuqaaqa.

<sup>14</sup> Kukuqa maseeqa dinni dinni amaaqa auquqainnanaki ausuaqa.

<sup>15</sup> Miqimmaseeqa sia radukuaqa, saifanoo miqinoo mariani.

<sup>16</sup> Miqimma saifaqa kasooaqee qaara oonisaa qeeqa sanda ufa akara ruma nimianaqa minaki quqaaqa.

<sup>17</sup> Bukisa afu faqa Koorannai kai auquaqa. Mina kisaqa 110 centimetres amana mariani. Mina qusa 66 centimetres amana mariani.

<sup>18</sup> Innee koora turimmaseeqa bukisa afu auquseeqa minannai kai dinni dinni qangiroo qaara qanda nimana auquaqa.

<sup>19</sup> Afu dinni atinni moo qangiroo amana auqusee dinni moo qangiroo amana auquaqa. Afu faqa mi qangiroo qanda nimana faqa moodaa koorannai kai auquaqa.

<sup>20</sup> Mi qangiroo qanda bukisa afusaa quqasaifaqa noori narí qafee narí qafee iaqa. Miqanda niqoosa uqerasaifanoo bookisa afusaa ititanoo mariani.

<sup>21</sup> Qaara oonisaa sanda ufa marina mi bukisanaki quqasee afu rafaqa-fuaqa.

<sup>22</sup> Qinee inni faqa miqoo moodaanakika mafiqa bukisa afusaa qaara qangiroo qambaana maridaqa qeeqa sanda ufa inni Isaraee maqannaasa nimianaara.

*Innee aiku faqaa teeboora auqusee Yaaweena aminna feemuna miqoo quqaaqa.*

*(Raf 37:10-16)*

<sup>23</sup> Innee akasia saqarinnoo teeboora auqauqa. Mina kisaqa 88 centimetres mariani. Mina qusandanai 44 centimetres mina kuradarafa 66 centimetres mariani.

<sup>24</sup> Innee amiqira koora marasee turimmasaifanoo ausiruma finaqa minannai teeboora rafaqa fusee kafa moonnai teeboora atiqara fiqumma rafaqa fuaqa.

<sup>25</sup> Innee teeboora atiqara fiqumma 8 centimetres amana ititasee mina afaimau koorannai rafaqa fuaqa.

<sup>26</sup> Innee koorannai qaindusifandinna amaaqa 4 auqusee teeboora aiqama aiku namusaa quqaaqa.

<sup>27</sup> Teeboora afai ameemaanandanai qaindusirana amaaqa auquaqa.

<sup>28</sup> Qaindusifandinna saqari qanda akasia saqari ateeqasee koorannai mina kuku iaqa.

<sup>29</sup> Amiqira koorannai kai teeboorasaa quqeefandinna pirita kaafausa faqa kisaqa kaafauqa faqa uainna adiara pirita uqnaurirana faqa auquaqa.

<sup>30</sup> Qini qimifandinna bereetana mi teeboorasaa quqaaifanoo aiqama kari qini moodaanaki kira bukisa aaqa mariani.

*Innee qooma qumbifandinna aikana auquaqa.*

*(Raf 37:17-24)*

<sup>31</sup> Innee qooma qumbifandinna aikana amiqira koorannai auqua. Innee koora turiiseeqa minannai kai qooma aika oosana faqa adaka faqa asaanauqa faqa auquaqa. Mi asaanausa saa mi koorannai kai taatuqee aqama afufeenaari marindee maseeqa auqusaifanoo kaafara foora afisu amaqqanoo mariani. <sup>32</sup> Mi qooma aikausa qisauku dinni taikasee dinni ani moodaa marasee 6 mariani. Dinni qaaramoo dinni qaaramoo mariani.

<sup>33</sup> Aiqa mi asaana namuna atimau koorannai taatuqee aqama afufeenaari marindee masee afaqa auquaqa. Mi afufeenaarirafa teeqnoorina aqamara foora marufaqa mi asaana namuna saa auquaqa.

<sup>34</sup> Mina adakasaa qaara faqa qaara faqa 4 saa taatuqee aqama teeqnoorina aqamara foora auquaqa.

<sup>35</sup> Moodaa aqama indaaruga asaana qara ameemaanai mariani. Kafa min murufi asaana qara ameemaanai moo aqama mariani. Kafa min murufi asaana qara ameemaanai moo mariani.

<sup>36</sup> Amiqira kora turiiseega minannai kai oosana faqa asaanuqa faqa afufeenaarirana faqa auquqa.

<sup>37</sup> Miqimmaseenana dinni taikasee dinni ani qaara qanda marasee 7 qooma auqusee mi asaanuusa ati mau quqaa. Quqaseenana mara quandasainano mi qoomausa kaaqa qarafa sia kaqinni fuani. Maaqa aundurai kai kaaqa qaani.

<sup>38</sup> Mina ufaqa faqa futufita faqa amiqira koorannai kai auquqa.

<sup>39</sup> Qooma quqara aika amiqira koorannai 35 kilogram ummaara amana kai marasee auquqa.

<sup>40</sup> Moosee qinee aqanasaa ani qimamunandee aiqama ainaina miqikaimmasee andeeqasee auqua.

## 26

### *Innee Anutuna uiqaana maqa usakaaqa.*

*(Raf 36:8-38)*

<sup>1</sup> Innee qini naaquqara uiqaana maqasaa akifandinna qamunna kisaqa maaqimasee auquqa. Sipsipa asausi dirindaasi akirana faqa pannoon akirana faqa faena akirana faqa sufusee amiqira qamunna auqusee aqoosa faqa aanda amana auqusee minasaa atooqasee akuniaqa. Miqimmasee minauqannai innee qisauquqara taikasee 10 fira qamunna auqusee moodaanaki akuniaqa.

<sup>2</sup> Mi aiqama qamunnausa amana amana kai 12 metre kisaqa mina qusa 2 metre mariani.

<sup>3</sup> Mi qamunnausa moodaannai qisauku 5 marasee moodaanaki ootupamasee akuniaqa. Dinni qisauku taikasee 5 faqa miqi kai iqa.

<sup>4</sup> Miqimmaseega mi qamunna qanda atiqara dirindaasi arira qamunnannai anaanu auqusee moodaanaki ootupaaqa.

<sup>5</sup> Fira qamunna atimau anaanu 50 auquqa. Moo qamunna faqa miqi kai iqa moo qamunna saaqaraa anaanu amummaqa kai auquqa.

<sup>6</sup> Kora qumaree turimandee qusa tafara foora saaeemma qumaree dinni dinni anaanuki upeekasaifano mi qamunna qanda moodaara maqi inoo mariani.

<sup>7</sup> Uiqaana maqa saa akira qamunna firaana mimmi asausinnai 11 auquqa.

<sup>8</sup> Innee aiqama moodaa karirana kai auquqa. Mina kisaqa 13 metres amana mariani. Mina qusa fannoo 2 metres amana mariani.

<sup>9</sup> Mi qamunnausa moodaannai qisauku taikasee 5 qamunna akunusainano moodaa qamunnaika mafuani. Kafa moodaannai qisauku taikasee dinni ani moodaa marasee 6 narisaa narisaa akuniisaifano firaafaikiani. Miqimma finaqa uiqaana maqa kooqindaraana murufi tukaanda quqaaqa.

<sup>10</sup> Qamunna atimau anaanu 50 akuniaqa. Moo atimau faqa mina amummaqa kai akuniaqa.

<sup>11</sup> Booroosannai tafara foora ati saaeemmasee 50 auqusee minannoo dinni dinni anaanuki aususee ootupama saifano moodaa qamunnara foora mariani.

<sup>12</sup> Mi fira qamunnana uiqaana maaqa akuumaqa saifano mina ati fiqaramasee akunirafa uruanatinai naambeeqai qumiqaranoo mariani.

<sup>13</sup> Aabaa akunira qamunna fannoo uiqaana maqa ati fiqaree aiqaree inoo mariani. Dinni dinni amana amana kai 50 centimetre kai mariani.

<sup>14</sup> Mina taikasee mina amuaaqa qaara qanda faqa auquaqa. Moo sipsipa akoona apata faeena akiranannai auquaqa. Auquseeqa moo ooruku nammarikinna aandau kuara fooqaa irana apatannai auquseeqa minannoo meeraqoo amuaaqa akuaqa.

<sup>15</sup> Innee akasia saqarinnai kai naaquqara uiqaana maqa atuna auqusee kuradaaqa.

<sup>16</sup> Maaqi mandee maaqa atuna auquaqa. Saqari dinni dinni kuradarafa 4 metres mariani. Mina ausana qusa 66 centimetres amana kai auni ruaqa.

<sup>17</sup> Aiqama atuna maqaki rakiqaranara irisee ati ooqiqa masee ateekaqa. Aiqama maaqa atuna miqi kai masee ateekaqa.

<sup>18</sup> Innee suani afu ataaqeenni south kisaqandannai maaqa atuna 20 narisaa narisaa apamandee kuradaaqa.

<sup>19</sup> Maaqa atuna oosana sia maqaki kaqi rakiaaqa. Siruaannai amaaqa auqusee minaki maaqa atuna kuradaaqa. Siruaannai 40 maaqa atuna oosana amaaqa auqusee minaki kuradaaqa.

<sup>20</sup> Uiqaana maqa suani dinni ataaqeenni north kisaqandannai maaqa atuna 20 narisaa narisaa apamandee kuradaaqa.

<sup>21</sup> Maaqa atuna sia maqaki kaqi rakiaaqa. Siruaannai 40 amaaqa auqusee minaki maaqa atuna kuradaaqa.

<sup>22</sup> Suani keeqee mari qaannai (west) uiqaana maaqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auquaqa.

<sup>23</sup> Maaqa dinni dinni munu raqaranaki kafa qaaraqanda auqusee kuradaaqa.

<sup>24</sup> Raudaranaki maaqa atuna oosanaki apammasee kuradama saifanoo amiqimasee narisaa narisaa apinoo mariani. Maaqa atuna rakiqarana oosanaki rumba atukarasee miqi kai mamaree mirinni murufisaaqa. Dinni dinni munu raqaranaki miqi kaimmiaqa.

<sup>25</sup> Miqimmaseeqa maaqa atuna 8 oosanaki siruaannai qaaraqanda qaaraqanda amaaqa auqusaifanoo 16 mariani.

<sup>26-27</sup> Innee qauniri fandinnana akasia saqari 15 maraaqa. Uiqaana maqa ataaqee dinni dinni faqa uruanai faqa faifa faifannoo auni rumasaifanoo maaqa atukarama qumaraani.

<sup>28</sup> Mi maaqa atunna qambaana aunirira saqari fannoo maaqa amana kai dinni dinni ati mariani.

<sup>29</sup> Maaqa atuna aiqama koorannai kai rafaqa fuaqa. Maaqa atuna mau aiqama koorannai kai anaanu mamaree fuaqa. Aunirifandinna saqarisa faqa koorannoo rafaqaafusee mi anaanusaki ausuaqa.

<sup>30</sup> Doo Moosee qini uiqaana maqa aaqanasaa qinee qimamifanandee masee usakaa.

<sup>31</sup> Innee sipsipa asaasi dirindaasi akirana faqa pannoona akirana faqa faeena akirana faqa sufusee minannai amiqira qamunna auquaqa. Miqim-masee mi qamunnana saa qangiroo qaqaosa faqaana amana auquaqa.

<sup>32</sup> Akasia saqari qaara faqa qaara faqa 4 marasee koorannai aiqama rafaqa fusee mina atisaa mirinni qamunna dirifandinna amaaqa auquaqa. Miqimmasee mina kuradee fandinnana amaaqa 4 oosanaki siruaannai auqusee minaki kuradaaqa. Kaaqa naaquqara oosirana ititaanifeera kuradaaqa.

<sup>33</sup> Miqimmaseeqa mi qamunnana amaaqa auquqaanasaa dirisaifanoo amaaqa auqirana ameemaanai qamunna ati ooreeqanoo mariani. Miqim-

masaifanoo mi qamunnana ititarafa ataufaka ameemaanai ooreeqanoo mariani. Mi qamunnafa ititaranaki moodaanaki kira bukisaki qaara oonisaa sandufa marina quqaaqa. Mi qamunnafa naaquqara oosirana faqa kaaqa naaquqara oosirana faqa rainaannoo.

<sup>34</sup> Moodaanaki kira bukisa kaaqa naaquqara oosiranaki quqasee koorannai mina afu auqusee rafaqa fuaqa, nifauara afu minasaa rafaqa fuaqa. Dirira qamunna fannoo raina nimaqaidanoo kooqi kinaa oosiranara naaquqara maqa fee qimasee kukeeqara oosiranara uriqaramasee naaquqara maqa fee qiaqa.

<sup>35</sup> Teeboora mareeqee naaquqara oosirana maaqoo oonumafi kooqiki suani afu dinni ataaqee qaannai (north) mafi quqaaqa. Qooma saqari suani afu dinni ataaqee qaannai (south) mafi quqaaqa.

<sup>36</sup> Uiqana maqa kooqiki ititee fandinna qamunnana sipsipa asaasi dirindaasi akirana faqa pannoona akirana faqa faeena akiranannai faqa marasee auquaqa. Oosana oosana sandannai mooka maakira ainainauqa mi qamunnanasaa auquaqa.

<sup>37</sup> Mi qamunnana dirifandinnana moodaannai qisauku 5 akasia saqari marasee koorannai mina atimau rafaqafusee qamunna dirifandinnana anaanu auqusee quqaaqa. Miqimmasee booroosannai moodaannai qisauku 5 atuna oosana amaqa auqusee minaki kuradaqa.

## 27

### *Innee aandau tatufi fandinna qaindana auquaqa.* (Raf 38:1-7)

<sup>1</sup> Innee akasia saqari marasee minannoo tatufirana suqara qainda auquaqa. Mina kisaqandanai faqa qusandanai faqa amana amana kai mariani 2.2 metres. Maqasaaqari urirafa qaara faqa qaara faqa aiku 4 amana 1.3 metres mariani.

<sup>2</sup> Mina qaara faqa qaara faqa atisaa aanaira foora auqinoo mariani. Tatufira qainda moodaa saqari fannoo kai atimau faqa qambaannai faqa aanai faqa moodaa saqarinnai kai auqusaifanoo mariani. Mi aiqama ainainausa booroosannai rafaqa fuaqa.

<sup>3</sup> Mi tatufirana suqemaria qaindanasaa suqee maria ainainausa booroosannai kai auquaqa. Fadameena dandaki aqufinnana afaqee maria futufitaua faqa savoorauqa faqa uqnaurira piritauqa faqa tafa fooqaa irana ati saae irana faqa ida auni afaqee maria futufitaua faqa aiqama booroosannai kai auquaqa.

<sup>4</sup> Innee fukaa asaana booroosannai auqusee booroosannai kai anaanu faqa auqusee qaara faqa qaara faqa atinni quqaaqa.

<sup>5</sup> Mi fukaa asanafa tatufira bukisa aundurani kasaqai ooqeeqanoo qambaannai mariani.

<sup>6</sup> Akasia saqari tatufira qainda qaindusi fandinnana qaaraqanda maraseeqa booroosannai miqanda rafaqafuaqa.

<sup>7</sup> Mi qaindana maree fuaqee qifaqa kai mi saqari qanda dinni dinni anaanuki aususaifaqa maree fuaqa.

<sup>8</sup> Tatufira qainda indooira saqarinnai kai aundura faqaana auquaqa. Qinee aqanasaa ani uqafiqaa fanandee masee auquaqa.

### *Innee Yaaweena uiqana maqa fiqqu fiqqu dapu rakiaaqa.* (Raf 38:9-20)

<sup>9</sup> Innee amiqira sanda sufusee auquqaa qamunnaannoo uiqaana maqasaa ququsara foora auqu ititaaqa. Suani afu dinni ataaqeenni South mina kisaaga 44 metres mariani.

<sup>10</sup> Mi qamunnana dirifandinnana booroosannai dapu 20 auqusee mina kuradee fandinnana amaaqa miqi kai masee 20 auqusee siruaannai tafara foora mina amana kai auqusee auniri fandinna saqarina faqa minannai kai auquaqa.

<sup>11</sup> Suani afu dinni ataaqeenni iandee kai iqa dinni ataaqeenni faqa miqi kai iqa.

<sup>12</sup> Suani keeqee mari qaannai dapu qusandanai 22 metres mariani. Mina dapu saqari 10 faqa mina amaaqa auqirafa faqa 10 kai mariani.

<sup>13</sup> Kafaa suani oosana qaannai kooqi maru tinai faqa uruanai inoo marina amana kai 22 metres mariani.

<sup>14-15</sup> Suani oosana qaannai East kooqi mariani. Mi kooqina dinni dinni diri fandinna qamunnafa 6.6 metres mariani. Mi kooqina dinni dinni qaarammoo dapu faqa mina amaaqa faqa dinni dinni qaarammoo kai mariani.

<sup>16</sup> Kooqiki dirira qamunna 9 metres kisaaga amiqira sipasipa asaasi dirindaasianda faqa pannoonanda faqa faeenanda faqa marasee mi qamunnaasaa oosana oosana amiqira akara ruaqa. Mi qamunnana quqee fandinna saqarina qaara faqa qaara faqa 4 mariani. Mina rakiqee fandinnana qaara faqa qaara faqa ki mina amaaqa auquaqa.

<sup>17</sup> Aiqaama dapu fiq fiq qirafa siruaannai rafaaga fuqaa saqarinasaa ootupanoo mariani. Minasaa qamunna diri fandinnana tafara maqi iranauqa siruaannai auquaqa. Mi saqarisa rakiqee fandinnana amaaqauqa booroosannai auquaqa.

<sup>18</sup> Ququsa afuqai kisaaga kamu 44 metres mariani. Mina qusa kamu 22 metres mariani. Ququsasaa dirira qamunna mina oorufirafa 2.2 metres maqasaaqari oorufuannoo. Mi qamunnana amiqira qamunna kaqikaa sandannai sufirafa afeeka mariani. Mina dapu oosanki booroosannai amaaqa auqirafa maqaki mariani.

<sup>19</sup> Uiqaana maqaki oosana oosana ainainira ainainauqa aiqama booroosannai auqirafauqa kai mariani. Uiqaana maqa ati mau apupuka arifandinna aikausa booroosannai kai auquaqa. Uiqaana maqa dapu rakiqarana qumaraanifee qimasee apupuka aqoosai faqa afuqai faqa arifandinafa aiqama booroosannai auqira apupuka kai mariani.

*Qoomauqasaa rakisira saika.*

*(Wok Pris 24:1-4)*

<sup>20</sup> Moosee anee Isaraee maqannaasa qimanniminaqa oorifa saqari qaqa-makinaa fadameena amiqirana kai minisaifana aiqama eendirana minannoo qooma qumbia.

<sup>21</sup> Aaroonafa nari faiqi namu faqa qini Anutusa naaquqara uiqaana maqaki moodaanaki kira bukisa ititee maria qamunna naaquqara oosiranaki qoomauqa quqaaqa. Miqoo qini qifusaa eendi marinaqa qumbisaifanoo qamammareenoo iaqarana kai raquru amiani. Maa naamuaqira ufana Isaraee maqannaasa faqa misasaa ani arua kinausa faqa naaru naaru afaqaqa.

## 28

*Innee aanaiqi kirausa qamunna auquaqa.*

*(Raf 39:1-7)*

<sup>1</sup> Yaaweefa kaifaa Mooseena qimaminoo qinau. Anee aneenna afasaana faqa mina faiqi namu Nadabana faqa Abiuna faqa Eeriasana faqa naara masee Itammarana faqa Isaraee maqannaasa kinaana raina naaduma quqasainaqa qini aanaiqi kira saika maraaqa.

<sup>2</sup> Aneenna afasaana Aaroona misakina uriqarara aanaiqikira qamunna auqu amia. Miqimmasainanoo mi qamunnafa amiqirana faqa uriqararausee qirana faqa amiani.

<sup>3</sup> Moosee anee Aaroona qamunna akunifandinna fasiqausa irirana fiqararaura qinee irirana nimaqausa misa kai suqusee qimanniminaqa mina qamunna akuniqa. Akunusaifanoo mina afisusee miqooqari qini aanaiqikira saika maraani.

<sup>4</sup> Anee qimanniminaqa nimuqusasaa rufi maria ainainna faqa eefooda qamunna faqa kisaqa qamunna aikusaa faqa ititeemari qamunnana faqa akara faqaa siuta faqa akiiqa rafaqa fimari qamunna faqa arandanauqanna rumbarana faqa minamuna auquaqa. Misa miqimmaseeqa uriqarara aanaiqikira qamuna ani afasaana faqa mina faiqi namu faqa auqu nimisaifaqa misa qini aanaiqi kira saika maraaqa.

<sup>5</sup> Akunirana akoofasauqaindi sipsipa asaasi dirindaasi akirana faqa pannoona akirana faqa faeena akirana faqa koora tiritanda faqa amiqira tiritanda faqa mi ainainausannai aanaiqikirausa qamunna auquaqa.

<sup>6</sup> Misa sipsipa asaasi dirindaasi akirana faqa pannoona akirana faqa faeena akirana faqa koora tiritanda faqa amiqira tiritanda faqa aiqama mi ainainausannai eefooda qamunna auquseeqa minasaa oosana oosana akara ruaqa.

<sup>7</sup> Eefooda qamunna anaanu qaaraqanda aururusaa aakandianinnana auqusee eefooda qamunnasaa dinni dinni rumbaqa.

<sup>8</sup> Mina ooqanda ianinnana amiqira qamunnannai eefooda qamunna auquandee kai masee auquaqa. Mifa eefooda qamunnasaa akunirafa mariani.

<sup>9</sup> Eefooda anaanusaa akumaqa ooni qaaraqanda pupuooni marasee dinni anaanusaa moo dinni anaanusaa moo quqasee Yakooboona faiqi namu qisauku qara taikasee qikunni ooqu qaara marasee nuqu mi ooni qandasaa akara ruaqa. <sup>10</sup> Dinni pupu oonisaa dinni taikasee dinni ani moodaa marasee 6 nuqu akara ruani, dinni pupu oonisaa miqikai mandee 6 akara ruani. Aiqama nari kambiqoona amana kai nuqu akara ruaqa.

<sup>11</sup> Oonisaa akara rirana akoofasa marina afiqasaifanoo mifa qaara oonisaa Yakooboona faiqi namu nuqu akara ruani. Akara rumaseenoo mi ooni qanda koora qambaana quqasainanoo atukaranoo mariani.

<sup>12</sup> Miqimmasee aururusaa eefooda qamunna aakandammasainanoo Yakooboona faiqi namu qisauku qaara taikasee qikunni ooqu qaara marasee 12 Isaraee maqannaasa kikiqusinoo mariani. Miqimasaifanoo Aaroonafa misa nuqu nari aururusaa maranoo nimarinaqa qinee Yaaweesa qeeqa faiqi aanaaseera aiqama kari irianaara.

<sup>13-14</sup> Aururusaa qaara ooni atukaramma qumaree mari kooranasaa qaara qanda amiqira koora sainanda sufirana moo ati moo oonisaa moo ati moo oonisaa ootupaaqa.

*Innee aanaiqi kirausa uriqararana amuqusa saaqaraa qamunna auquaqa.  
(Raf 39:8-21)*

<sup>15</sup> Innee nimuqusa saa rufi mariana aanaiqikirausa auqu nimisaifaqa minannoo misa Anutuna iriranara aidiranara irifaranoo. Eefooda qamunna auqu ainainausannoo kai auquseeqa moodaa karira akara kai ruaqa.



<sup>16</sup> Qambaana tukaandasai fanoo aiqama ati amana amana kai 22 centimetres mariani.

<sup>17</sup> Innee ooni amiqirana firaa feefauru aqi mariana kai marasee qaara faqa qaara faqaki mi qamunnnanasaa padiaqa. Indaaruuqaa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiaqa.

<sup>18</sup> Mina aanaaqiannaa padiranaki moo ooni auqu eemeerara faqa moo ooni safairee faqa moo ooni daimanna faqa minamunannai padiaqa.

<sup>19</sup> Mina aanaaqiannaa padiranaki moo ooni auqu teerakoosa faqa moo ooni agatee faqa moo ooni auqu ametisa faqa minamunannai padiaqa.

<sup>20</sup> Mina aanaaqiannaa padiranaki moo ooni auqu beerira faqa moo ooni kanirianna faqa moo ooni yasapaa faqa minamunannai padiaqa. Mi oonisa koorandannai amuqusa saa ititanoo mari qamunnnanasaa isooqa araaqa.

<sup>21</sup> Mi oonisa moodaa moodaa ooni fannoo Yakooboona faiqi namu qisauku qara taikasee qikunni ooqu qaara marasee 12 Isaraee maqannaasa kikiqa usinoo mariani.

<sup>22</sup> Innee nimuqusasaa rufirana anaanu amiqira koorannai auqira sanda seenandara foora auquseeqa afundasee dinni dinni atisaa qusuaqa.

<sup>23</sup> Koorannai anaanu qaaraqanda auqusee amuqusa saa rufinna qamunnana mirinni atisaaqara qusuaqa.

<sup>24</sup> Qaara qanda seennanda koorannoo afundaranannai mi anaanu qandaki qusuaqa.

<sup>25</sup> Mi sandana ati qarannai aururusaa koorandannai ooni isooqa aruqaanaki ootupaaqa. Miqimmasai fanoo aururusaa eefooda qamunnasaa rumbaaqa.

<sup>26</sup> Kafaa nimuqusa saa rufi mariana anaanu qaara qanda koorannai auqusee aunduraindari ati saa mi anaanuna rumbasai fanoo eefooda qamunna mammaaqai mariani.

<sup>27</sup> Kafaa qaaraqanda anaanu koorannai auqusee afunni qumu mari eefooda qamunnana saa aqaasanai amiqira qamunnannai sufirana ooi qandianinnana aaqa rumbaaqa.

<sup>28</sup> Nimuqusa saa diri maria qamunnana saa anaanuki dirindaasiandannai sufira sanda qusuaki eefooda qamunna saaqaraa anaanuki qususee rumbaaqa. Miqimmasai fanoo amuqusa saa ititara qamunna sia kasi kasiani.

<sup>29</sup> Aaroonafa naaquqara maaqaki keeqafinoo mi qamunnana Isaraee maqannaasa nuqu akara rirana afisusainaa qinee Yaaweesa aiqama kari qeeqa faiqi aanaaseera irianauranoo.

<sup>30</sup> Amuqusa ititara qamunna raqandaamasee uqara foora akunusai mariani. Mi uqanaki ooni qaaraqanda miqanda nuqu Urimma faqa Tumimma faqa Aaroonafa mi uqanaki uqarumasee qini uiqaana maqaki aniani. Miqiraree qimaseenoo aiqama kari nimuqusa saa diri maria qamunnana rufu maree anireenoo mifa qini irirana iriseenoo Isaraee maqannaasa qimannimiannoo.

*Akaqa aanaiqikirausa qamunna auquaqa.*

*(Raf 39:22-31)*

<sup>31</sup> Innee eefooda qamunna meeaaqoo qaraana auqirara dirindaasi akira sipsipa asausinnai kai auquaqa.

<sup>32</sup> Anuka amaaqa auquaqa. Qamunna raqandaammasee akunusaifanoo anuka upeekaina sia anaqiani.

<sup>33-34</sup> Mina atimau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusuaqa. Dirindaasi

akira sipsipa asausinnai faqa pannoona akiranannai faqa faeena akiranannai faqa mi saqri aqamana amana auquaqa. Auquseeqa mi saqari aqamana faqa koorannai auqira biru faqa qamunna atimau moo mafi quqee moo mafi quqee iaqa.

<sup>35</sup> Aaroonafa aanaiqikira saika auqararee qimasee mi qamunnana afisuani. Mifa naaquqara maaqaki qinee umee marunnana qifusaa aninanoo fee quqasee finanoo fee mi birusa narisaa narisaa ariqa ufa qifanoo Aaroonafa sia kuquanno.

<sup>36</sup> Innee amiqira koora marasee aqiniandirana auqusee mina saa akara rumaasee Yaaweena ainainira faiqi fee qiaqa.

<sup>37</sup> Akiqqa aanaamu qusirana aqini saa quqasee dirindaasiandannoo rumbaqa.

<sup>38</sup> Aaroonafa mina aqinaqa rumbasainaqa qinee Yaaweesa aiqama Isaraee maqannaasa aaduma qini qimiraree qinna ainainausara eedoo qimasee maraanaura. Misa akaqa aaqarana auqamasee qimifaqa qinee Aaroonafa mi aqiniandiranara irisee sia minni saanaura. Kaqi maraanaura.

<sup>39</sup> Innee amiqira sanda sufuseeqa Aaroonafa siuta auqusee mina akiqqa aanaamu faqa auqusee minannoo kai aranandauga rumbarana faqa auquseeqa minasaa oosana oosana akarannoo afaqa auquaqa.

<sup>40</sup> Aaroonafa faiqi namu siutauga faqa niranandauganna rumbaa mariana faqa nikiiqa aanaamu faqa kaaqa amiqiranauga auqu nimiaqa.

<sup>41</sup> Moosee anee maa qamunnausa mara maree aneena afasaana Aaroonafa nari faiqi namu faqa afisu nimaqaa. Oorifa fadameena misa nikiiqa amoonduuna adia nimaqasee naaduma mara quqasee mi saikana nimia. Miqimmasainaqa misa qini aanaiqikira saika maraqa.

<sup>42</sup> Innee qusa karaisisa nooiqakiqari nifundana saa ooqeeqarana auqu nimiaqa. Miqimmasaifaqa misa sia nari nifaqa kooroo iaqera.

<sup>43</sup> Aaroonafa nari faiqi namu faqa qinee umee marunnanaki qini uiqaana maqaki keeqafinoo qini qaindasaa naaquqara qoo aanaiqikira ainaina auqararee qimasee aiqama kari mi karaisisana afisuaqa. Miqiqqa sia nari nifaqa kooroo iqa sia kuqifaranoo. Maa ufafa Aaroonafa faqa mina saa ani aruakinausa saa faqa naaruara mariannoo.

## 29

*Aanaiqi kirausa fukasaa mara quqasee naamuaqira ufa.*

*(Wok Pris 8:1-36)*

<sup>1</sup> Maaqimmasee Aaroonafa faqa mina faiqi namu faqa naaduma mara quqasaifaqa qini saikaki aanaiqikirausa mariaqa. Innee burimakau akoona timmusa faqa sipsipa akoona qaaraqanda dinee teeroo siaina kai maree aniaqa.

<sup>2</sup> Amiqira parauqa qaindirirana innooqee mari pauraqana sia aqirana oorifa fadameennannai suqaaqa. Akaqana sia oorifa fadameennannai suqaaqa. Akaqana ausirira femu auqusee oorifa fadameena akusee suqaaqa.

<sup>3</sup> Mi ainainausa nafisaa amanee uqa fooqaa iranaki rumaseeqa innee burimakau akoonannoo faqa sipsipa akoona qaara qandannoo qini taturirana suqa qimiraree qimasee mi ainainausa namufaqa qimiaqa.

<sup>4</sup> Moosee anee Aaroonafa nari faiqi namu faqa nifiqamaree qinee umee marunna uiqaana maqa kooqiki minisee qimanniminaqa amiqimmasee nammari auqaaqa.

<sup>5</sup> Miqimmasaifana anee uriqarara aanaiqikira qamunna Aaroona afisua-maqa. Siuta faqa kisaqa qamunna aiku ataa dukunirana faqa eefooda qamunna meeago afisirana faqa mina amuaqa eefooda faqa nimuqusa saa rufi maria qamunnana faqa nooiqandi mariana faqa aiqama mi ainainausannoo afisu amaqaqa.

<sup>6</sup> Nikiiqa aanaamu afisu amaqaasee naaquqara kooroo ira fee qimasee rumbaa. Maaqi qimasee minasaa akara ruaqa. Yaaweena saikaki marifee qimasee akara ruaqa.

<sup>7</sup> Rumba amaqaasee Yaaweenaindi fee qimasee utaaqama amaqara fadameena akiaaqa adiaqa.

<sup>8</sup> Anee Aaroona faiqi namu nifiqa quqasaina mi siutausa afisuaqa.

<sup>9</sup> Niranandauganna rumbee mariana rumbasee nikiiqa aanaamu faqa afisu nimaqaqa. Miqimmaseeqa Aaroona faqa mina faiqi namu faqa mi saikana nimia. Misa faqa misa saa aniaruakinausa qini aanaiqikira saikaki naaru naaru marifaranoo.

<sup>10</sup> Moosee anee Aaroona nari faiqi namu faqa qamunna afisu nimaqa-sainaqa burimakau akoona timmusa mara qinee umee marunna uiqaana maqana kooqinni minisaifana Aaroona nari faiqi namu faqa qimannimi-naqa mina akiiqasaa nisauku quqaqa.

<sup>11</sup> Miniseeqa mi burimakau akoonnana qinee umee marunna naaquqara uiqaana maqana kooqiki aruaqa.

<sup>12</sup> Aruseeqa mina fidika marasee aneenna asauku amukasaa raaraam-masee qaidara qaara faqa qaara faqa atisaa aanai fooqaa iranasaa akua. Miqimmasee akaqa fidika kaqi marinauqa mara maree qaidara qainda oosnaki adiaqa.

<sup>13</sup> Miqimmasee kafa aradanda saaqaraa ainoo aiqama maraqa. Mina annaama faqa mina atakisa qara faqa ainoo minasaa marina faqa amaandamoona saaqaraa karoo karoona faqa marasee tatufira qaindasaa quqasee suqa qimia.

<sup>14</sup> Burimakau akoona maqi faqa apata faqa arada faqa inneeqa naam-beeqai aqoosai ida arasaifanoo qaani. Mifa aanaiqikirausa numoo maraqa niseenoo taika nimaqaannoo.

<sup>15</sup> Sipsipa akoona moodaa marasee Aaroona faqa mina faiqi namu faqa qimanniminaqa nisauku mina akiiqa saa quqaqa.

<sup>16</sup> Miqimmasaifana mina arusee mina fidika marasee qaidara qaara faqa qaara faqa atinni mi fidikana adiaa.

<sup>17</sup> Miqimmasee mi sipsipa akonnana kaqikaana kaqikaana auku quqasee mina aunduraindaraa ainaina faqa aikuqara faqa nammari uqusee minauqa mareeqee mi sipsipana akiaaqa akaqa aukiranauqa namufaqa quqaqa.

<sup>18</sup> Mi sipsipa akonna aiqama afaqa qaidarai quqasee qini tatufiranara foora ida araqa. Mina afundara qinee asasianaura.

<sup>19</sup> Mina ida arasee sipsipa akoona moo aanaiqikira saikaki quqee mariana mara minisainanoo Aaroonafa nari faiqi namu faqa mina akiiqasaa nisauku quqaqa. Quqasaafana arua.

<sup>20</sup> Aruseenana mina fidika afeeriqiseenana Aaroona nari faiqi namu faqa nisauku uqannai naaqoosaa akusee nisauku uqannai nisauku akonnanasaa akusee, nisauku uqannai niku akonnana saa faqa akua. Akusee fidika kaqi marina qumaree qaidara qaara faqa qaara faqa atinni adia aquaqa.

21 Qaindasaaqaraa fidika akaqana qumaree nikiiqaki aki maria fadameena namu faqa marasee Aaroonan nari faiqi namu faqa nifaaqai faqa gamunnasaa faqa rurufida akunnimaqaaqa. Miqi masai faqa Aaroonafa nari faiqi namu faqa misa fuka gamunna faqa qinindi kiani.

22 Mi sipsipana ainoo ameesa saa qaraana faqa audurakinaa afaaqa saa qaraa ainoo faqa annaama ati amiqirana faqa qaara atakisa mina saa ainoo marina faqa asauku uqannai afundana faqa ateeka aqua.

23 Qini qimia nafisa amanee uqana kinaana oosana oosana narana moodaa moodaa maraaqa. Oorifa fadameenannai suqarana moodaa faqa moo sia oorifa fadameenannoo suqarana moodaa faqa ausirira feemu moodaa faqa maraa.

24 Mi naranausa Aaroonan faqa mina faiqi namu faqa nisaukuki quqa-sainaqa uriqarara kaqi nimirafa qini Anutusaindi fee qiaqa.

25 Miqi maseenana kafaa nisaukukinaana mareegeenana qaindasaa sipsipa akoona auku quqaqaana amuaaqa quqasee ida arasaifanoo qaani. Qini qimira naranara foora ida araaqa. Mina afundara qinee asianaaura.

26 Moosee anee mi sipsipa akonnana marasee qini Yaaweese qifu saa uqerese qini Yaaweese uriqarara qimira ainanee qimasee aneenna mi andauna naa.

27 Innee faiqi aanaiqi kirausaikamma nimaqararee qimasee qini qimia narannakinaana sipsipa akoona ameemmeeqana marasee qini qifu saa uqereseqa mina asaukuqannai afundana uqaqifiqaaqa. Miqimmaseeqa mi andauna aanaiqikirausa naaqa.

28 Mi ufafa qini ufa marinaqa naaruara naaruara qini faiqi anaasee qini faqa moodaanaki suqira tatufirana suqaaqa. Mi andauna ameemmeeqana faqa asaukuqannai afundana faqa aanaiqikirausaindi mariani. Faiqi anaasee qini Yaaweese kaqi qimira ainaina miqimminoo mariannoo.

29 Aaroonafa kuqinaqa mina uriqarara aanaiqikira gamunna mina faiqi namu maraaqa. Mi saikana oosana arainna faasaana mi gamunnana afisusaifaqa fadameena nikiiqa amoondunna adiaaqa.

30 Aaroonan amaaku nari akoona amaqa maqainafa uiqaana maqaki qinee umee marunnnanaki keeqafinoo naaquqara oosiranaki ainainiraree qimaseenoo mi uriqarara qaanaiqikira gamunnana afisusee moodaannai qisauku taikasee dinni ani qaara marasee 7 faasaana saa mi naaquqara oosiranaki ainainiani.

31 Yaaweefa kafaa Mooseena qimaminoo qinau. Anee Aaroonan faqa mina faiqi namu faqa nikiiqa amoodunna fadameena adia nimaqaidana suqeenna sipsipa akonnana ameemmeeqana faqa asaukuqannai afundana faqa marasee qini naaquqara oosiranaki afeeki quqasee nammari namufaqa suqaaqa.

32 Qinee umee marunna uiqaana maqana kooqiki mina naaqa. Nafisa amanee uqaki kaqi mari feemusa namu faqa naaqa.

33 Misa namasaifana aanaiqikira saikaki keeqarana fadameena nikiiqa amoondunna adiasainanoo misa numoo akiiqara mininnisarafa marianoo. Mi narannafa naaquqarafa marinara aanaiqikirausa kai naaqa.

34 Akaqa aandau faqa feemu faqa nimuaquinaqa sia naifandinnana kananaana kaqi marinaqa ida araseeqa minaki aqusaifanoo amiqimmasee qama taikaani. Mi narannafa naaquqarafa marinara sia naaqa.

35 Aaroonan nari faiqi namu faqa aanaiqikira saika oosana arainna qooqari qinee ani aamua qunandee iqa moodaannai qisauku taikasee dinni ani qaara marasee 7 faasaana uqanna kai mi ainainausa auqaaqa.

<sup>36</sup> Mi moodaa moodaa faasaannasaa anee burimakau akoona tatufirana suqa qiminanoo aiqama numoo taikaannoo. Miqinanoo qini qaidara fannoo anukarafa mariannoo. Miqimmafinana oorifa fadameena qaidarasaa adiasainanoo naaquqanoo mariyani.

<sup>37</sup> Aiqama kari moodaannai qisauku taikasee dinni ani qaara marasee faasaana saa miqia. Miqinanoo qini qaidara fannoo kaaqa uqanna naaquqarafa mariannoo. Moo fannoo fee moo ainaina fee mina auqainafa mina naaquqara afeeka fannoo aruannoo.

*Aiqama faasaana tatufirana suqara oosana.*

*(Namba 28:1-8)*

<sup>38</sup> Yaaweefa kafa Mooseena qimaminoo qinau. Innee sipsipa aanaaqa qaaraqanda moodaa aukuaana marara qanda marasee qaidarai tatufirana suqaaqa. Naaru naaru aiqama faasaana miqi kaimmiaqa.

<sup>39</sup> Moo sipsipa kananaana tatufuaqa moo eendimarina tatufuaqa.

<sup>40</sup> Kananaana suqainna sipsipana namu faqa amiqira sakumannoo qaindirira parauaqa mina ummaara fannoo 1 kilogramme ooda namu faqa amiqira oorifa fadameena namu faqa quandasee suqa qimia. Uainna nammari ooda 1 litre amana kai qinee Anutusa naannana adiaaqa.

<sup>41</sup> Eendi marinaqa suqainna tatufirana kananaana suqaandee kai iqa sakuma qaindiriranannoo faqa oorifa fadameenannoo faqa uainna nammarinoo faqa suqaaqa. Mifa qini Yaaweese qimira narana maridanoo. Mina afunda fannoo qini asasirana qimidannoo.

<sup>42</sup> Naaru naaru kasooqee maa tatufira suqarafa qinee umee marunna uiqaana maqa kooqiki qini qifu saa tatufu qimiaqa. Miqifaqa miqoo qinee inni qeeqa faiqi anaasee faqa moodaanaki maridaqa ufa qima nimianaaura.

<sup>43</sup> Miqoo qinee Isaraee maqannaasa faqa mariananoo qinee umee marunna maqaanakiqari daroo daraa ira kaaqa qarafa mi saqanna naaquqainafa sia faiqi anaasee kaiqeesa miqoo fifaranoo.

<sup>44</sup> Qinee qeeqa uiqaana maqa faqa qaidara faqa naaquqara faika masaanaura. Qinee Aarooni nari faiqi namu faqa qini ainainirausa mariafaqa naaduma misa aanaiqikira saikaki quqaanaura.

<sup>45</sup> Qinee Isaraee maqannaasa qambaana maridaqa misa Anutusa marianaaura.

<sup>46</sup> Misa qini Yaaweese nariqa Anutusa Isipa maqa maaqaindaraana nifiqee aniafannanara iri marifaqa qinee misa qambaana marianaaura. Qinee Yaaweese misa Anutusa marianaaura.

## 30

*Amiqira undimari ida munana suqara qainda auquaqa.*

*(Raf 37:25-28)*

<sup>1</sup> Yaaweefa kaifaa Mooseena qimaminoo qinau. Moosee innee akasia saqari marasee amiqira afundi mari ida munana aree fandinna qaidarana auquaqa. <sup>2</sup> Mi qaidarafa dinni dinni amana kai mariyani. Mina kisaqaqandanai 45 centimetres mariyani. Mina qusandanai miqi kai inoo 45 centimetres mariyani. Maqa saqari ooru firafa 90 centimetres mariyani. Mina qaara faqa qaara faqa ati moodaa saqarinoo kai burimakau aanaira foora auquaqa.

<sup>3</sup> Mina afu faqa aanai fooqaana faqa ataaqeeqara faqa amiqira koorannai kai rafaqaqafusee koorannai mina fiqumma auquaqa.

<sup>4</sup> Koorannai qaara qanda aanaanu auqusee dinni moo dinni moo quqa-saifanoo qaindusi fandinna saqarina atukaramma qumaraani.

5 Mi qaindusira saqari qanda akasia saqarinnai auqusee koorannai rafaaga fuaqa.

6 Mi qaidarana mara maree naaquqara oosirana dinni qini moodaanaki kira bukisa marina oorinni quqaaqa. Miqoo qinee inni faqa moodaanaki kianaura.

7 Aiqama kananaana Aroonafa qoomauqa andeeqarara anireenoo mifa mina saa amiqira adiafaa ira afundi marina suqaani.

8 Mifa kaifaa eendi marinanoo qoomauqa qumbiseenoo amiqira adiafaa imari afundana imarina suqaani. Mi oosanafa naaru naaru sia uqanna taikaannoo kaqi kai mariannoo.

9 Innee sia moo mi qaidarana saa qinee qaoo qima qaunna afundirana suqaaqa. Aandau tatufiranee sakuma qaindirira tatufiranee uainna nam-mari adiasee suqara tatufiranee sia minasaa suqaaqa.

10 Aiqama aukwana moodaa faasaana kai Aaroonafa mi qaidaranasaa ainaininanoo qini qifusaa amiqiannoo.

*Yaaweena uiqaana maqanara takisa aqira oosana.*

11 Yaaweefa kafa Moosena qimaminau.

12 Moosee anee Isaraee maqannaasa nuqu marasainaga moodaa moodaa fasiqa nariqa mariranara qini feefauru qimiaqa. Miqimmasee nuqu maree marinaqa moo ummaara sia misa saa aqufuannoo.

13 Aiqama nuqu akaraki marisa uriqararasa auqu ramaqaa munnimmana amana kai quqaaqa. Aiqamausa mi feefauruna aqiqa qini qimira ainaina qimifaranoo.

14 Faiqi moodaa fasiqa aiku asauku taikasee 20 aukwana faqaasa faqa mina fiqarara aukwana faqaasa miqimmasee qini feefauru qimiaqa.

15 Misa nariqa marirana maaqimmasee feefauriaqa. Ainaina faqaasa sia fiqaramasee aqifaranoo. Ainaina siaisa sia oorudupi masee aqifaranoo. Aiqama amana amana kai aqifaranoo.

16 Mi munnimmana Isaraee maqannaasiannai marasee qinee umee marunna uiqaana maaqafa mandaikinana minannoo itipia. Misa nariqa mariranara mi takisana aqusaifaqa qinee misa saa itita nimaqaranara irianaura.

*Booroosannai firaa difaani auquaqa.*

17 Yaaweefa Moosena maaqi qimasee kafa qimaminau.

18 Moosee anee nammari auqemaria difaanina firana auqa. Booroosannai auqusee mina aiku faqa booroosannai kai auqa. Auqusee nammari minaki adiasee qini uiqaana maaqa dinni marinana qaidara dinni marinana qambaana quqaa.

19 Aarona faqa nari faiqi namu faqa minaki niku nisauku nammari uqimarifaranoo.

20 Misa qini ufa suqira maaqaki keeqaane qimasee niku nisauku minaki mafi nammari uqusee qini qimifandinna narana qaidarasaa suqa qimiaqa. Miqiqa sia kuqifaranoo.

21 Misa nari niku nisauku nammari uquseeqa sia kuqifaranoo. Maa sanda ufana Aaroonafa nari faiqi namu faqa kasooqaqee misa saa aniaruakinausa faqa maa sanda ufana afaqee faranoo.

*Aanaiqi kirausa utaaqara fadameena auquaqa.*

22 Yaweefa kaifaa Moosena qimaminoo qinau.

<sup>23</sup> Moosee anee makaqa anoona moomoo 6 kilograms faqa isaaqa anoona moomoo 3 kilograms faqa amiqira undi mari innupina anoona moomoo 3 kilograms faqa maraa.

<sup>24</sup> Saadapu moomoo 6 kilograms faqa maraa. Aiqama ainaina uiqaana maqa sikeera amana kai mariani. Oorifa fadameena 4 litres amana minaki adiaaqa.

<sup>25</sup> Mi naaquqara fadameena Yaaweenaindi fee qimasee nikiiqa amoon-dunna adiee fandinnana auqusee amiqira afundi marina namufaqa quan-daaqa.

<sup>26</sup> Anee mi fadameenaua auqu maree qini uiqaana maqasaa akuseenana qini moodaanaki kira ufa mari bookisanasaa faqa akua.

<sup>27</sup> Aiku faqaa teeboora faqa minasaa qaraa ainainauqa faqa qooma saqari faqa minasaa qaraa ainainauqa faqa amiqira afundi mari pauraqana ida qee mari qaidarana faqa akuamaqaa.

<sup>28</sup> Tatufirana suqee mafia qaidarana faqa minasaaqaraa ainainauqa faqa akuamaqasee nammari difaani faqa mina aiku faqa akuamaqaa.

<sup>29</sup> Miqimmasee mi ainainausa aaduma saa mara quqasainanoo kaaqa naaquqanoo mariani. Moo fannoo fee moo ainainee mi ainainausa auqainafa mi ainainausa naaquqara afeeka fannoo naruannoo.

<sup>30</sup> Miqimmasee Aaroonu nari faiqi namu faqa mi fadameenna aku nimaqa sainaqa qini aanaiqikira saikaki mariaqa.

<sup>31</sup> Moosee anee Isaraee maqannaasa maaqi qimasee qimannimia. Maa naaquqara fadameenna nikiiqa amoondunna adiee fandinnana qini ainainiranaki naaru naaru quqaaqa.

<sup>32</sup> Maa fadameennafa sia kaiqee fasiqa adiannimaqee mariafa maridanoo. Innee sia moo fadameena miqirana auquaqa. Mifa naaquqara ainaina marinara innee minara naaquqara fee qimasee eerairiaqa.

<sup>33</sup> Yafee moo fannoo maa fadameennara foora auqusee moonu akiiaaqa adiainafa qini faiqi aanaaseeki sia mariannoo.

*Amiqira undimari munana auqimaria pauraqana oosana.*

<sup>34</sup> Yaaweefa kaifaa Mooseena qiminoo qinau. Moosee anee oosana oosana amiqira undi mari pauraqana sitakatee pauraqa faqa oonikaa pauraqa faqa karabanumma pauraqa faqa amiqira makaqa anoona faqa aiqama amana amana kai maraa.

<sup>35</sup> Maraseenana amiqira afundi marifaqa nifaaqai aki marianara foora auqamasee ida arasainanoo qeenoo amiqira muna afundiani. Ooruku faqa oodaa quqasainanoo amiqinoo naaquqara faikiani.

<sup>36</sup> Anee mina atiuqa maraseenana kaada ririisainanoo kookoomaika mafinana mara maree qinee umee marunna maqanaki muruseenana moodaanaki kira bukisa oorinni quqaa. Mi amiqira undana imarinara kaaqa naaquara fee iaqa.

<sup>37</sup> Innee sia moo miqira afudimarinnana auquaqa. Innee minara naaquqara andeeqara ainaina Yaaweenaindi fee qiaqa.

<sup>38</sup> Yafee moo fannoo miqirana amiqira undi marina afaaqai akiraree qimasee auqinafa sia qini faiqi aanaaseeki mariannoo.

## 31

*Yaaweefa uiqaana maqa kinaa ainaina auqifandinna fasiqausa mara quqanau.*

*(Raf 35:30-36:1)*

<sup>1</sup> Yaaweefa kafa Mooseena qimaminoo qinau.

<sup>2</sup> Moosee qinee innikinaana Beesareerana utaaqeeqa. Mifa Urina amaaku Hurana anaifi Yudana oosanakinaafa maridanoo.

<sup>3</sup> Qinee qeeqa maraquna afeeka aaku amaqqeeqa. Qinee irirana faqa aiqama ainainirana akoofasaikira saika amiqa. Aiqaama amiqira ainaina auqirana akoofasaikirana faqa amiqa.

<sup>4</sup> Mifa koorannoo faqa siruaannoo faqa booroosannai faqa oonu mafi irisaidanoo oosana oosana ainaina akoofasauqa akara rimaria irirana faqa auquani feera amiqa.

<sup>5</sup> Qinee firaa feefauru aqi maria oonina atekara oosana faqa saqarinnai ainaina amana auqirana akoofasaikirana faqa Basareerana amiqa.

<sup>6</sup> Qinee moo fasiqa Ooqooriabana Aqisamakana amaaku Dannana oosanakinaana mara quqasaanoo Beesareerana faqa ainainiannoo. Qinee akaqausa faqa firaa irirana oosana oosana ainaina auqirana akoofasaikirana nimiqa. Miqimma saanaqa misa qinee qimannimianna aiqama ainainna auquaqera.

<sup>7</sup> Qinee umee marunna uiqaana maaqana faqa moodaanaki kira bukisa faqa mina afu numoo taikannisarana faqa aiqama uiqaana maqakinaa ainainauqa faqa auquaqa.

<sup>8</sup> Teeboora faqa minasaa mari ainainausa faqa ramma dirirana amiqira koorannoo auqirana faqa minasaa mari aiqama ainainausa faqa amiqira afundi mari tatufirana suqara qainda faqa auquaqa.

<sup>9</sup> Tatufirana suqee maria qaindana faqa mina suqee maria ainainausa faqa niku nisauku nammari uqimaria difaanina faqa mina oosana faqa auquaqa.

<sup>10</sup> Misa amiqira qamunnauqa Aaroona faqa mina faifi namundi faqa aanaifi kira saikaki maridaqa afisifandinnana faqa auquaqa.

<sup>11</sup> Qinindi fee qimasee akunnimaqee fandinna fadameenna faqa adiafaa ira amiqira afundimarina naaquqara oosiranakinaana faqa auqua. Misa auqidaqa qinee qunandee kaimaseeqa auquaqa.

### *Sabata idooara faasaana maridanoo.*

<sup>12</sup> Yaaweefa Mooseena qimaminoo qinau.

<sup>13</sup> Moosee anee maaqi qimasee Isaraee maqanna qimannimia. Sabata qini idooara faasaana amiqimandee ireedakai mariaqa. Mi faasaanafa qini faqa inni faqa qambaana naaru naaru maridanoo qinee Yaaweesa inni mara qeeqa faifi anaasee kunnanara quqannifiqaannoo.

<sup>14</sup> Innee qini idooara faasaana naaquqarafa marinara ireeda kai mariaqa. Faifi moo fannoo sia ireeda marirai mi faasaana ainaininnana kuqa aruqa.

<sup>15</sup> Qisauku dinni taikasee dinni moodaa marasee 6 faasaana innee inneeqa ainainiaqa. Qisauku dinni ani qaara marasee 7 faasaana firaa idooara faasaana qini naaquqara faasaana maridanoo. Yafee mi faasaana ainaininnana innee mina kuqa aruqa.

<sup>16</sup> Isaraee maqannaasa innee faqa qinee faqa moodaanaki kunnanara mi faasaanafa uqannifiqaani.

<sup>17</sup> Mi faasaanafa inni Isaraee maqanna faqa qini faqa naaru naaru aqoondikirana koorooi mari faasaanafa mariannoo. Qinee Yaaweesa dinni taikasee dinni ani moodaa marasee 6 faasaanasaa maqa faqa innaaruna faqa auqusee dinni ani qaara marasee 7 faasaana ainainirana quqasee idooafannanara mi faasaanafa idooara faasaana mariannoo.



<sup>18</sup> Anutufa aiqama ufa Mooseena Sinai aaganasaa qimami taikaseenoo qaara ooni ausiriranasaa Anutufa narí asaukunnai sanda ufa akara ru-maqoona aminau.

## 32

*Faiqí anaasee koorannai burimakau akoona aanaaqi auqiqau.*  
(Lo 9:6-29)

<sup>1</sup> Mooseefa aaganai kisaagasaa ooru marufaqa Isaraee maqanna faiqí anaasee Aaroonafa maruqoo suqumaree aniree Aaroonaa maaqi qimasee qimamiqau. Maa fasiqafa maasa Isipa maqa maaqaindari qifiqee anufa naqaafee imari faqee maasa sia iridaqa. Minara anee moo anutuna auqusainanoo maasa indaarunnikamma nimaqaani.

<sup>2</sup> Aaroonafa misa ufa iriseenoo qinau. Inneeqa faiqí anaasee naaqookinaa koora faqa fidinaanu faqa tatuseeqa mini qimiaqa.

<sup>3</sup> Miqi qufaqa aiqama faiqí anaasee nári naaqookinaana raduku maree mini Aaroonaa amiqau.

<sup>4</sup> Amisoofanoo Aaroonafa mina qumareenoo idannai tasirisiri mandeenoo maqasaa burimakau akoona aanaaqi amana auqu qoonaki adisoofanoo burimakau amana auqinau. Auquseenoo paipanannai mina atiuqa andeeqanau. Miqimmasoofaqa faiqí anaasee qiqau. Isaraee maqannaasa maafa maasa Anutufa maridanoo. Maafa kai maasa Isipa maqannaindari nindiqee anufa maridanoo.

<sup>5</sup> Aaroonafa misa ufa iriseenoo burimakau akoona amana auqirana aaqa tatufira qainda auquseenoo faiqí anaasee qimannimino qinau. Duna aiqama suqumaree aniraifaqa oomaqa sakasee naidaqa Yaaweena auqa uqeeraa.

<sup>6</sup> Miqi qimasoofaqa iaqoo kananaana faiqí anaasee akaqa aandau mara maree minisee qaindasaa tatufirana faqa Yaaweena faqa moodaanaki kira tatufirana faqa suqaqau. Suqamiseeqa ooqu marifiqa afeeka nammari faqa narana faqa namaseeqa findifiqa aanaaseeuqa faqa manda oosana maraqau.

<sup>7</sup> Yaaweefa misa nindafeenoo Mooseena qimaminau. Anee kai kaqi ooqufua. Faiqí anaasee anee Isipa maqannaindari nifiqee anianausa qini minnisee aqara oosana maraidammia.

<sup>8</sup> Misa doo qinee fuqee qimasee naamuaqiafanna aana minnisee. Misa koorannai burimakau akoona aanaaqi amana auqusee mina tatufirana suqamiseeqa minara innaaru qidaqa. Misa maaqi qidaqa Isaraee maqannaasa maasa Anutufa maafa maasa Isipa maqannaindari nifiqee anufa maridanoofee qidaqa.

<sup>9</sup> Minara qinee Yaaweesa Isaraee maqannaasa kaaqa ramoo ramaa imariafaqa iridaqa.

<sup>10</sup> Doo firaaqoo qini qirana qaifaqa misa kuridi taikasaanura. Anee sia qiniara qaoo qia. Miqimmaseeqa ani faqa anisaa ani aruakinausa faqa kai amiqi amiqimma nisaanaqa firaa maqanna marifaranoo.

<sup>11</sup> Mooseefa irinoo Yaaweena aanoo qiranara innaarukiqari qaoo qidanoo qinau. Oo Yaawee nanaree anee aneenna faiqí aanaaseera arana qaidanoo fee. Anee firaa afeekannai misa Isipa maqannaindari nifiqee aniana faqa naqaafanee aanoo qima nimaqaidanee.

<sup>12</sup> Anee miqinaqa Isipa maqannaasa aniara nári kai qimirisee Isaraee maqannaasa nifiqee aqana aikunni munusee naru taikarara nifiqee fiifoo

qifaara. Sia arana qaani aneenna arana qara irirana quandasee sia ummaara aneenna faiqi anaasee nimia.

<sup>13</sup> Anee aneenna ainainira faiqiuqa Abarahammana faqa Isakeena faqa Yakooboona faqa kuqaa qima afeekaikira ufa qunnaara oonumafi iria. Anee misara fasaura foora mafifaqa qinee qima afeekaikifanna maqa maaqana inni nimianauree qinau. Nimisaananoo mi maqa maaqafa innindikamminoo naaru naaru mariannoo fee qinau.

<sup>14</sup> Mooseefa miqi qufanoo Yaaweefa nari aranaqara irirana quandasee sia ummaara nari faiqi anaasee niminau.

<sup>15</sup> Yaaweefa Mooseena qaara oonisaa akara rumamufanoo mareenoo aaganaindari afaasai nari maqanna marunnai ooqu finau. Ausirira ooniqandasaa Anutufa sanda ufa dinni dinni akara rumaqoona uqirafa ooqu finau.

<sup>16</sup> Anutufa nari kai mi oonina auquseenoo minasaa sanda ufa akara rinau.

<sup>17</sup> Yoosuafa irufaqa faiqi anaasee nariqa uiqaana maqusakiqari faaqa fuisee qida qufanoo iriseenoo Mooseena qima minoo qinau. Qinee raki-daqia ufana iridaqa.

<sup>18</sup> Miqi qufanoo Mooseefa qinau. Sia qufoona rira ufa fau maridanoo fau. Sia qiki faafau qirufa fau maridanoo. Idi rarana kai iridaqa.

<sup>19</sup> Mooseefa uiqaana maqusa adeedi ooqureenoo nindafoofaqa buri-makau aanaaqi amana auqirana faiqi anaasee fusakidaqa idi ree mariqau. Miqi marufanoo Mooseefa nindafoofanoo aranaqoofanoo akara rira ooniqara aqana aikunni maqasaa aqusoofaqa miqanda rukamiqau.

<sup>20</sup> Mooseefa aranaqoofanoo burimakau aanaaqi amana auqirana qumareeqeenoo idaki aqusoofanoo tasiris irinau. Tasirisiri maseenoo andaana rumeeqee nammariki aqusee naaqee qufaqa Isaraee maqannaasa mi nammarina naqau.

<sup>21</sup> Miqimandeenoo Mooseefa quandakufanoo Aaroona qimaminau. Maa fasiqa anaaseesa ani naqi fee mamaqaafanee anee maa manda firaa aaqarana misa nifaaqai quqeenee.

<sup>22</sup> Miqi qufanoo Aaroonafa Mooseena qimaminau. Oo qini uriqararafa anee sia qiniara aanoo qia. Anee maa fasiqa anaaseesa oosana iri-mariananoo. Misa kaaqa mandoosana auqarara sandanainai qimariasa maridaqa.

<sup>23</sup> Misa qiniara maaqi qia. Maasa maa fasiqafa Mooseefa maasa Isipa maqa maaqaindaraana qifiqee anunaki kambiqai ainainnara sia iridaqa. Anee moo anutuna auqu sainanoo maasa indaarunnikamma qimaqaani.

<sup>24</sup> Miqi qiafaqa qinee qimannimiqa koori faqaasa qimiaqee qunaqa uaqee iasa akaqana qimia. Qimiafaqa idaki aqusaunanoo burimakau aanaaqi kambiqeenoo.

<sup>25</sup> Mooseefa qafoofaqa Aaroonafa eedoo qufaqa faiqi anaasee nariqa namuqaa nifusaa oosana oosana manda oosana maroofaqa namuqaa misara uteetiqa.

<sup>26</sup> Minara Mooseefa arana qoofanoo uiqaana maqusa kooqiki kikiqamma fufanoo maaqi qimasee nammeera qinau. Aiqaqama yafee Yaaweenaindi kiani qinafa maaqoo aniaqa. Miqi qufaqa aiqama Reefina aiku asauku kai suqumaree miqoo ani mina fiqumamma fiqau.

<sup>27</sup> Aniroofanoo Mooseefa maaqi qimasee qimanniminau. Isaraeerana Anutufa Yaaweefa maaqi qimasee aiqaqama inni naakapaidanoo mifa inneeqa rakira paipana mara maree innee uiqaana maqusa dinni kooqindari dinni kooqinni oonuree aniree idaga unna anutuna amana auqi mariana

akiiqara inneeqa nikaqaafasaauqa faqa inneeqa niqoondiuga faqa inni naaqa mariasa faqa aiqama kuqa naru taikaaqa.

<sup>28</sup> Miqi qufaqa Reefina aiku asauku eedoo qimasee mi faasaana 3,000 fasiqa nariqau.

<sup>29</sup> Narusoofanoo Mooseefa kafaa qimanniminau. Innee inneeqa faiqi namufaqa inneeqa nikaqaa fasaauqa faqa naruanara innee Yaaweena aanaiqikirausai kiqa mariafanoo. Miqi mariafanoo Yaaweefa nari amiqi amiqirana inni niminoo.

<sup>30</sup> Iafoofanoo kananaana Mooseefa faiqi anaasee qima niminau. Innee firaa manda aaqarana marasaafaqa aqbee qinee aaqanai kaifaa ooruree inniara Yaaweena iramiriananoo inni aaqarana akiiqara minninsaannoo fee.

<sup>31</sup> Miqi qimaseenoo Mooseefa Yaawee funnai aaqanai ooruree qimaminoo qinau. Maa fasiqa anaaseesa firaa manda aaqarara marasee unna qira anutuna koorannai auqusee minara innaaru qiqiiaafanoo.

<sup>32</sup> Amanee misa aaqarana akiiqara minninnisaa. Sia minninniseenana qini duqu ani faiqi anaasee faqa ani bukaki akararinoo marina kai rukaa.

<sup>33</sup> Yaaweefa iriseenoo qinau. Sia kaiqeesa nuqu qeeqa bukakinaana rukaanaura. Qini ufa rukiee mariasa nuqukai rukaanaura.

<sup>34</sup> Doo oonuree faiqi anaasee nifiqamaree qinee qimamiafanna maqa maaqanai fua. Anee iria, qini qangiroo fannoo inni indaarunni kamma nimaqaannoo. Mi fasiqa anaaseesa aaqarana akiiqara ummaara nimianna aukuanafa anidanoo.

<sup>35</sup> Miqi qimaseenoo Yaaweefa manda aurirana mi fasiqa anaaseesa niminau. Misa Aaroonara qufanoo koorannai burimakau akoona aanaaqi auqunara miqinau.

### 33

*Yaaweefa Isaraee maqannaasara Sinai aaqana aikunni maruna minnisee fuaqera qimanniminau.*

<sup>1</sup> Yaaweefa maaqi qimasee Mooseena qimaminoo qinau. Anee faqa Isipa maqa maaqaindari nifiqee anianna fasiqa aanaaseesa faqa maa maqana quqasee qinee qima afeekaikammasee Abarahaamana faqa Isakeena faqa Yakooboona faqa misasaa ani aruaki kambiqainausa faqa nimiraree qifafanna maqanasaa fua.

<sup>2</sup> Qinee qeeqa angiroo aiqaananoo inni nifu uqi marinaqa fimarifaqa qinee Kannaa maqannaasa faqa Amooraa maqannaasa faqa Heeta maqannaasa faqa Peerisa maqannaasa faqa Hifita maqannaasa faqa Yeebusa maqannaasa faqa naru nifaqaaqa ianaura.

<sup>3</sup> Innee ainoo faqaa maqasaa ainaina ummaqasaa fanoo reemindeemiri mari maqanasaa fifaranoo. Qinee qeeqa sia inni faqa fuanaura. Innee ramooramaa imariasa mariafaqa qinee inni faqa fidaqa aanai inni naruanoora.

<sup>4</sup> Isaraee maqanna Yaaweena mi ufana iriseeqa nifaaqa auqira ainaina aiqama raipagu quqasee soofara maridara foora mafiqau.

<sup>5</sup> Yaaweefa maa ainaina auqaqera qimannimufaqa miqiqau. Maaqi qimasee Yaaweefa Mooseena qimaminau. Innee kaaqa ramooramaa imariasa mariafanoo. Qinee inni faqa maqee fiqa inni kuridi nimaqaunaiqini. Doo maqee inneeqa nifaaqa auqirana raipagu quqasee kaqi marifaqa qinee inni naqaafee mannimaqaannanara oonumafi irianaura.

<sup>6</sup> Miqi qimasoo faqa Sinai aqana quqasee fidaqa Isaraee maqannaasa sia nári nifaaqa auqirana afisiqau.

*Yaaweefa Mooseena faqa ufa qimaru uiqaana maqafa.*

<sup>7</sup> Isaraee maqannaasa nariqa uiqaana maaqauqa usakasoo fanoo Mooseefa naaquqara uiqaana maaqa naambee qai nianasaa usakanau. Usakasee mina auqureenoo Yaaweefa umee mari uiqaana maaqa fee qinau. Faiqi anaasee moo fannoo Yaaweena iriranara irianee qimasee mi maaqana kooqinni fimariqau.

<sup>8</sup> Mooseefa nári uiqaana maaqai fufaqa faiqi anaasee nári uiqaana maqa kooqikiaqa kikiqamafi qafee maru fanoo keeqanau.

<sup>9</sup> Mooseefa uiqaana maaqaki keeqafufanoo asuru qumureenoo mi kooqinaki marufanoo Yaaweefa minakiqari Mooseena faqa ufa qimarinau.

<sup>10</sup> Asuru uiqaana maqa kooqiki qumu kasoo inoo marufaqa faiqi anaasee mina qafamasee ninuka tuqu naumoo amisee Yaaweena amooqi mariqau.

<sup>11</sup> Yaaweefa Mooseena faqa nári oori nári oori qafaida ufa qimarinau, faiqi nári aqoondi faqa ufa qimarindee inau. Ufa taikaseenoo Mooseefa anirandee faiqi anaasee maru uiqaana maaqanai finau. Kumaaraa moo mina dadaaqi marufa Yoosuafa Nunnaana amaaku naaquqara uiqaana maaqaki kaqi marinau.

*Yaaweefa nári faiqi anaasee faqa marianauree qimasee qima afeekaikinau.*

<sup>12</sup> Mooseefa Yaaweena qimaminoo qinau. Oo Yaawe kuqaa anee qiniara maa fasiqa anaaseesa indaarunnikamma nimaqainaqa mi maqanasaa fuagee qinau. Anee sia qini faqa fidanoo qini dadaaqianinna fasiqanara qimaqimiananoo. Anee qiniara amiqimmasee iridana qiniara asasidaqee qiananoo.

<sup>13</sup> Anee kuqaa qiniara miqidana anee qimirianana qimaqiminaqa qinee ani ainainiranaki maridqa maqee maqee ani asasamma amaqaanaura. Anee maanara faqa iria, maa maqannaasa ani faiqi anaasee anee utaaqama qaanausa maridaqa.

<sup>14</sup> Yaaweefa mina iriseenoo Mooseena qimaminau. Qinee ani faqa fidaqa adoarana inni nimianaura.

<sup>15</sup> Mooseefa iriseenoo Yaaweena qimaminoo qinau. Anee sia maasa faqa finana sia maasa maaqooqari diqiqaa.

<sup>16</sup> Anee sia maasa faqa finaqa naqaafee masee akaqausa anee qiniara faqa aneenna faiqi aanaaseera faqa rimariannanara irifaranoo fee. Anee maasaki marinaqa maa maqa maaqana kinaasakiqari naaduma moo kirausa marianauree.

<sup>17</sup> Yaaweefa Mooseena mi ufana iriseenoo qimaminau. Doo anee qianandee kaimmianaura. Qinee amiqimmasee aniara irimarunannara faqa aniara asasi marunannara faqa miqianaura.

<sup>18</sup> Mooseefa mi ufana iriseenoo kaifaa Yaaweena iramirinoos qinau. Amanee aneenna oori daroo daraa irana uqaqifiqasainaqa qafaanauree qufanoo Yaaweefa qinau.

<sup>19</sup> Amana qinee qeeqa amiqira areenarana quqasaanoo ani aiaaqaree afunni fuannoo. Qinee ani afusaa qeeqa naaquqara duquara koorooianaura. Qinee Yaaweesa qeeqa nifauarana faqa qeeqa qimudaoos qirana faqa qinee utaaqama qaanausa nimianaura.

<sup>20</sup> Moosee anee qini doori sia qafeenaranoo moo fannoo qini qiqafainafa sia amana kaqi mariannoo kuquannoo.

<sup>21</sup> Moosee anee qini daakaarinni oonisaa kikiqina maria.

<sup>22</sup> Qini doori areenarafa finaqa qinee ani ooni afoo iranaki quqaseeqa qeeqa qisauku anisaa ititaseeqa fiqaramafiqa qisauku maraanaura.

<sup>23</sup> Qinee qisauku mara maraana anee qini itaufaka kai qiqaqa. Sia doori qiqafeennaranoo.

## 34

*Mooseefa kafa inaaqianna sandufa maranau.*

*(Lo 10:1-5)*

<sup>1</sup> Yaaweefa Mooseena qimaminoo qinau. Moosee anee maa aaqan-nasaaqari ooquree ooni ausiqara atekasee maree urua. Anee indaaruga qanda amana kai atekasee maree urua. Murusainaqa indaaruru rukamunnanasaa akara ruafannufana kafa akara ruanaura.

<sup>2</sup> Anee maqee deedaqamaqai marinana duna kananaana eendai mara maree Sinai aaqanasaa ururee qini paquria.

<sup>3</sup> Faiqi moo fannoo sia ani faqa uruannoo. Sia uqanna moo fannoo aaqana fee aaqana aqa fee mariani. Sia misa burimakau sipsipa faqa aaqana aikunni andanda naqa.

<sup>4</sup> Mooseefa iriseenoo ooni ausirirana qaara qanda atekamaree kananaana Yaaweefa qimamundee inoo Sinai aaqana oorufinau.

<sup>5</sup> Yaaweefa asurukina qumureenoo Mooseena faqa kikiqa mafino nari auquara koorooinoo qinee Yaaweese qinau.

<sup>6</sup> Yaaweefa Mooseena oorinni fiqaree oonuree maaqi qimasee firaaqoo qinau. Qinee Yaaweese maridaqa. Qinee qimuqusirana faqa qimudao qirana faqa umbiqaransa maridaqa. Qinee sia kai kaqi aanooqunansa maridaqa, qinee kaaqa faiqi anaaseera qimuqusi marunansa mardaqa, qinee ooqai marunnaqoo kai marunansa maridaqa.

<sup>7</sup> Qinee qeeqa qima afeekaikira ufa kasooaqee nukudara foora kambiqainausara qima qaafanna ufana kaqi kai iridqa, numoo faqa manda oosana akiiqara faqa minninsanaura. Qinee numoo auqainna fasiqa anaaseesa faiqi namu faqa mina anaiqi mara faqa mina asaifaqausa faqa afaqausa faqa sia sia naruanaura, naruanaura.

<sup>8</sup> Mooseefa mi ufausa iriseenoo kai kaqi maqasaa oorindari mapamufufanoo Yaaweena amooqinau.

<sup>9</sup> Amooqidanoo maaqi qimasee Yaaweena qimaminau. Yaawe anee kuqaa uqanna qiniara asaidana qinee aniara maasa faqa fuanneera iridaqa. Maa fasiqa anaaseesa ramooramaa idaqa anee maasa numoo akiiqara minniqiseenana maasara aneenna faiqi anaasee fee qia.

*Anutufa faiqi anaasee faqa kafa moodaanaki kinau.*

*(Raf 23:14-19; Lo 7:1-5; 16:1-17)*

<sup>10</sup> Yaaweefa Mooseena qimaminoo qinau. Maqee qinee Israaee maqannaasa faqa moodaanakikira ufa qidaqa. Qinee misa nifusaa firaa ainainauqa sia maa maqanasaa moo atinai faqa moo maqanna qambaana faqa auqaafanna ainainansa auqaanaura. Aiqama faiqi anaasee qinee Yaaweese firaa ainaina auqaanaqa qafaifanoo naaquqaannoo. Inni dadaqianifeera miqianaura.

<sup>11</sup> Qinee maqee qimannimianna sandufana amiqimasee irisee mimau fuqa. Qinee Amooraa maqanna faqa Kannaana maqanna faqa Heeta maqanna faqa Peerisa maqanna faqa Hifita maqanna faqa Yeebusa maqanna faqa inni noorinni fidaqa misa nifaqasana fifaranoo.

<sup>12</sup> Innee fuka maqasaa oonuree sia mi maqannaasa faqa kaqikaa ainaina ree firaa ainaina ree sia misa faqa moodaanaki kira ufa qiaqa. Misa ufaanara foora fufusaifaqa innee minaki arifoorra, minara qeerairiaqa.

<sup>13</sup> Misa tatufirana suqee maria qaidarana misa ooni atekarana rakiaaqee maasa naaquqara anutunee qimariana innee mina rukamu aquaqa misa saqari ateesa rakiqasee maasa anaasee anutufa Aseeraafee qimariana minauqa faqa ateesaateekamma aqusaaqa.

<sup>14</sup> Innee sia moo unna anutunara innaaru qiaqa. Qinee Yaaweesa unna anutufa qini qimaaqa maqaranara rairai qimarunausa maridaqa.

<sup>15</sup> Innee fuka maqasaa oonuree sia uqanna misa faqa moo ainainara moodaanaki kira ufa qiaqa. Misa nariqa unna anutuna innaaru qidaqa tatufirana suqami mariana inniara naaqee qifaqa nee foora.

<sup>16</sup> Inni faiqi namu mi anaamuru anaaseesa maraseeqa qini minnisee moo unna qira anutusara innaaru qifoorra. Mi oosanafa qini qifusaa dapi nua aanaaseesara foora maridaqa.

<sup>17</sup> Innee sia moo ainaina tasirisiri masee unna anutuna amana auqusee minara innaaru qiaqa.

<sup>18</sup> Ooqai innee Abiba quqoonasaa Isipa maqasaaqari anusa mariafanoo. Minara Abiba quqoonaa anirainaaqa maqee maqee innee sia yis mari feemuna oomaqa sakasee maqee maqee naqa. Dinni qisauku taikasee dinni oonu qaara marasee 7 faasaana mi oomaqana sakasee naqa. Isipa maqasaaqari anu quqoonafa marinara miqiaqa.

<sup>19</sup> Aiqama ainaina ooqasaa aanaaqi qinindi maridanoo. Innikina ooqasaa akoonaiqi maqainafa faqa aiqama maaqeenaa aandaauqa ooqasaa akoonaa maqainafa faqa qinindi kai mariannoo.

<sup>20</sup> Innee inni doonki aanaaqi ooqasaa maqarafa kaqi marianifee qimasee sipsipa aanaaqi mina amaaqa maqasee tatufirana suqa qimiaqa. Innee sia miqiaqa mina anuka kuridiaqa. Innee aiqama inneeqa ooqa faiqiuqa feefauru masaifaqa kafaa inniqaindi kiaqa. Sia moo fannoo tatufirana suqara ainaina sia uqirafa qini Yaaweesa qifusaa aniannoo.

<sup>21</sup> Dinni taikasee dinni ani moodaa marasee 6 faasaanasaa inni ainainira faasaana maridanoo. Dinni ani qaara marasee 7 faasaanasaa sia ainainiaqa. Umaqira aukuanee aiqira aukuanee anirainaaqa sia mi faasaanna ainainiaqa, idooaaqa.

<sup>22</sup> Innee unakirana oosana arasee miqoo afiana nara oomaqa suqaaqa. Innee asumu aiqum quqara oomaqa faqa sakasee naidaqa mina auqu reeqa asumu aiqum quqara oomaqa fee qiaqa.

<sup>23</sup> Moodaa aukuanaki qaarammoo kari aiqama Isaraee maqannaasa moodaaqoo suqufi qini Yaaweesa Isaraee maqannaasa Anutusa qimooqi-aqa.

<sup>24</sup> Qinee aanaamuru innee finnatina nifaqaseeqa misa maqa maaqa inni nimisee inni mi maqa maaqana firaanaikamma nisaanaqa innee aiqama aukuaana qaarammoo kari moodaaqoo suqufi inneeqa Anutusa qini Yaaweesa qifusaa marifannoo sia moo aanaamuru aniree inni maqa maaqa mareefaranoo.

<sup>25</sup> Innee aandaau arusee tatufirana suqa qimiraree qimasee sia innooqeemari pauraana namufaqa feemu suqaaqa. Ainnaaqarara oomaqaki arusainna aandauna ataraasa fannoo sia akaqafa kaqi marinannoo faiqee iaqaani.

<sup>26</sup> Aiqama aukuaana indaaruuqaa narana afiana nararee qinnana Yaaweenaa naree maree munu amiaqa. Innee sia mimmi fee sipsipafee arusee nari anoona naamma anoonannai suqaaqa.

<sup>27</sup> Yaaweefa mi ufanara Mooseena qimaminoo qinau. Anee aiqama maa ufausa akara rua. Maa ufausa qinee ani faqa Isaraee maqannaasa faqa moodaanaki qima afeekai kamma qaunna ufana oosana maridanoo.

<sup>28</sup> Miqi qimasoofanoo Mooseefa aaqanasaa Yaaweena faqa kisaagasaa marinau. Qaara fasiqa niku nisauku taikasee 40 faasaana faqa eendaki faqa nammari faqa narana faqa sia neemarinau. Yaaweena moodaanaki kira sanda ufa ooni qarasa akara rinau.

*Mooseefa Sinai aaqanaindari quminau.*

<sup>29</sup> Mooseefa Sinai aaqanaindari Yaaweena sanda ufa akara rira ooniqara uqirafa quminau. Mifa Yaaweena faqa ufa qi qiunara mina oori afiri daroo daraa imarufanoo nari sia minara irinau.

<sup>30</sup> Aaroonafa Isaraee maqannaasa faqa Mooseena oori afiri daroo daraa imaruna qafamaseeqa rufiida nianasaa mariqau.

<sup>31</sup> Mooseefa misa nindafamaseenoo Aarona faqa faiqi firaasa faqa naarama quqasoofaqa aiqama aniroofanoo ufa qima niminau.

<sup>32</sup> Adeedi aniroofanoo Yaaweefa Sinai aaqanasaa aiqama sandufa Mooseena qimamu ufana qimanniminau.

<sup>33</sup> Mooseefa qimannimi taikaseenoo karoo karoonakira qamunna qumaree oorisa rafaafinai. Mina oori qafee rufieefoora miqinai.

<sup>34</sup> Mooseefa aqoosai kaqikaa uiqaana maqaki keeqafinoo qamunna uturuquseenoo Yaaweena faqa ufa qimarinai. Qimaseenoo madaana raudamafinoo faiqi anaasee Yaaweefa qimamu ufana qima niminai.

<sup>35</sup> Qima nimi marufaqa misa mina oori qafuofanoo daroo daraa ufanoo Mooseefa nari oorisa qamunannai ititaseenoo qima nimi taikaseenoo quandaki Yaaweena faqa ufa qiraree qimasee uiqaana maaqaki keeqafinoo kaifaa qamunna uturuqinai.

## 35

*Idoora faasaanara qira sandufa.*

<sup>1</sup> Mooseefa Isaraee maqanna faiqi anaasee aiqama suquseenoo qima niminai. Yaaweefa inniara maa ufamau fuaqee qidanoo.

<sup>2</sup> Qisauku dinni taikasee dinni ani moodaa marasee 6 faasaanasaa ainainiaqee qinoo. Dinni ani qaaraikinoo 7 qini firaa naaquqara idoora faasaana mariannoo. Faiqi moo fannoo mi faasaana ainainiaqa innee mina kuqa aruaqa.

<sup>3</sup> Innee sia Sabata faasaannasaa inneeqa maaqaki suqa naaqa.

*Mooseefa Yaaweena uiqaana maqa usakara ainaina amiaqee qinau.  
(Raf 25:1-9)*

<sup>4</sup> Mooseefa Isaraee maqanna aiqama kafa maaqi qimasee qimanniminai. Yaaweefa maaqi qimasee naamua qidanoo.

<sup>5</sup> Innee Anutuna amiraree qimasee nifaaqa asasinna kooro faqa siruaa faqa booroosa faqa maree aniaqa.

<sup>6</sup> Amiqira qamunna faqa sipsipa asausi dirindaasi akirana faqa pannoona akirana faqa faena akirana faqa mimmi asausinnai auqira qamunna faqa maree aniaqa.

<sup>7</sup> Sipsipa akoona apata faena akirana faqa ooruku nammarikinaa aanda apata faqa akasia saqari faqa maree aniaqa.

<sup>8</sup> Qooma qumbi maria fadameena faqa amiqira afundi mari ainainna andaana rirana idaki adiasaafanoo adiafaa ira undi marina faqa mi

ainainna kai nikiiqa amoondunna adiee maria fadameenaki quqarara faqa maree aniaqa.

<sup>9</sup> Pupu ooniuga faqa akaqa amiqira ooniuga faqa aanaiqi kirausa uriqararasa afisi maria eefooda qamunnnasaa faqa amuqusasaa ititara qamunna saa faqa quqeehindinna oonisa maree aniaqa.

*Mooseefa Anutuna uiqaana maqa kinaa ainaina auquaqera qimannim-inau.*

*(Raf 39:32-43)*

<sup>10</sup> Inni kiqari oosana oosana ainaina auqarana akoofasauqa kai anireeqa Yaaweena uiqaana maaqaki ainaina mifa naamua qimaqaimau kai auqaqa.

<sup>11</sup> Misa uiqaana maqa faqa mina rafaqaqi maria qamunnana faqa mina anaanu faqa mi maqana usakara atunauqa faqa aunirira saqari faqa oosuki faqa kooqiki faqa rakiqee fandinna saqarisa faqa saqari maqaki rakiqarana amaaqa auqirana faqa auqaqa.

<sup>12</sup> Moodaanaki kira bookisa faqa mina qaindusira saqari qara faqa mina afu faqa minasaa ititara qamunna faqa auqaqa.

<sup>13</sup> Aiku faqaa qainda faqa mina aindusira saqari qara faqa minasaa quqee maria ainainna faqa auqaqa, Anutuna amifandinna feemuna faqa uqaqa.

<sup>14</sup> Qooma saqari faqa mina qoomauqa faqa mina oosana oosana ainaina faqa mina qeemari fadameenna faqa auqaqa.

<sup>15</sup> Afundi marina andaana rirana suqee maria qaidarana faqa mina qaindusi maria saqari qanda faqa faiqi nikiiqa amoondunna adieemaria fadameenna faqa afundimarina andaana rirana faqa uiqaana maaqa kooqi qamunna faqa auqaqa.

<sup>16</sup> Aandau tatufirana suqee maria qaidarana faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari auqara difaani faqa mina oosana faqa auqaqa.

<sup>17</sup> Dapusaa diri maria qamunnana faqa dapu saqari faqa saqari kuradee mariana oosana amaaqa auqiranauqa faqa dapu kooqiki keeqee maria qamunnana faqa auqaqa.

<sup>18</sup> Kafaa dapu faqa uiqaana maaqa apupukauqa faqa mina rumbee maria sanda ainaina faqa auqaqa.

<sup>19</sup> Aaroonaa idaaqira qamunna faqa mina faiqi namu qamunna faqa uiqaana maaqaki naaquqara oosiranaki aanaiqikira saika maraidaqa afisifandinna qamunnana faqa mi aiqama ainainna auqaqa.

*Faiqi anaasee Yaawee finnai oosana oosana ainaina maree aniqau.*

<sup>20</sup> Mooseefa mi ufana qima nimisoofaqa faiqi anaasee irisee daraaniqau.

<sup>21</sup> Nifaaqa asasusa mi ainainausa Yaaweena mini amisoofaqa mi ainainausannai Yaaweena uiqaana maqa usakaqau. Yaaweena amooqifandinna ainainausa faqa aanaiqikirausa afisifandinna qamunnausa auqifandinna ainainausa faqa maree aniqau.

<sup>22</sup> Faiqi anaasee Yaaweena amirara nidimarusaa misa kai nifaaqa auqimaru ainainausa nikiiqa asaasi rumbee maru pinnana faqa naaqoo kinaa fidinaanu faqa nisaukuki quqee maru isaaqamana faqa ninukaki rufi maru kukukakana faqa oosana oosana ainaina nifaaqa auqi maruna koorannai auqiranauqa mini Yaaweena amidee qiqa mini quqaqau.

<sup>23</sup> Akaqausa amiqira qamunna maqeeusa faqa sipsipa asaasi dirindaasi akiranees pannoona akiranees faena akiranees maqeeusa faqa mimmi



asausinnai auqira qamunna maqeeusa faqa sipsipa akoona apata faena akirana maqeeusa faqa ooruku nammariki maru aandauna apata maqeeusa faqa maree aniqau.

<sup>24</sup> Siruaa faqa booroosa faqa Yaaweena amirara amanaikusa maree aniqau. Akaqausa akasia saqari Yaaweena uiqaana maqa usakarana amana maqeeusa maree aniqau.

<sup>25</sup> Akoofasa anaaseeuqa oosana oosana amiqira sanda sipsipa asausinnai dirindaasianda faqa faenanda faqa pannoona ariranda faqa sufirana mini quqaqau.

<sup>26</sup> Misa mimmi asausinnai faqa sufimariqau.

<sup>27</sup> Faiqi firaasa aanaiqikirausa uriqarana qamunnasaa faqa amuqusasaa faqa quqaqeeera faraafana ooniuga faqa firaa feefaura aqimaru amiqira oonisa faqa maree aniqau.

<sup>28</sup> Kafaa misa adiafaa imaru ainainausa oosana oosana faqa qooma gumbi maru fadameennana faqa nikiiqa amoondunna adiee maru fadameennana faqa adiafaa ira afudimaru ainaina aindirirana idaki tee-qimmasoofanoo adiafaa ira afundi maruna faqa maree aniqau.

<sup>29</sup> Israaee maqannaasa faiqi anaasee Yaaweena amirara nidimarusa Yaaweefa Mooseenara auqaanifeera aakapoo ainainausa maree aniqau.

*Yaaweena uiqaana maqa usakaqeeera mara quqanau.*

*(Raf 31:1-11)*

<sup>30</sup> Mooseefa kaifaa Israaee maqanna maaqi qimasee qima nimirau. Yaaweefa faiqi moo mina auqu Beesareerana Urina amaaku Hurana anaiqi Yudana atikinaana mara quqeenoo.

<sup>31</sup> Yaaweefa Beesareerana aiqama amiqira ainaina auqaanifeera nari maraquna afeeka umbiqa amaqeenoo. Aiqama ainaina auqirana akoofa-saikirana faqa amanaikirana faqa oosana oosana ainaina amana auqira irirana faqa aminoo.

<sup>32</sup> Yaaweefa Beesareerana oonu mafi irisee auqara irirana amisaifanoo mifa koorannai faqa siruaannai faqa boroosannai faqa oosana oosana ainaina auqirana akoofasa maridanoo auqaannoo.

<sup>33</sup> Kafaa mifa amiqira ooni ateekeemaria irirana faqa koorannai mi onina quqarana amaqa auqira irirana faqa saqarisaa oosana oosana ainaina amana auqira irirana faqa amiqaifanoo auqaannoo.

<sup>34</sup> Ooqooriabana Aqisamakana amaaku Dannana oosanakinaana faqa Yaaweefa inniki quqaqaiifanoo mifa faqa Beesareerana dadaaqianifeera maridanoo. Yaaweefa miqanda akaqausa uqannifiqaqee irirana faqa nimirau.

<sup>35</sup> Yaaweefa oosana oosana ainaina nisaukunnai auqarana akoofasaikirana nimiqaifaqa maridaqa. Oonisaa akararirana faqa oosana oosana amiqira akara rira irirana faqa amiqira qamunna afundara irirana faqa sipsipa asausi dirindaasi akiranannoo faqa pannoona akiranannoo faqa faena akiranannoo faa akaqa qamunna auqira irirana faqa nimirau. Nimisaiifaqa miqanda oosana oosana ainaina auqira irirana akoofasa qara maridaqa.

## 36

<sup>1</sup> Mooseefa Israaee maqannaasa qima nimidanoo qinau. Beesareerana faqa Ooqooriabana faqa miqanda dadaaqi marusa oosana oosana ainaina auqirana akoofasaikira irirana Yaaweefa nimiqaosa aiqama ainaina Yaaweefa naamua qundee kai masee naaquqara uiqaana maqa auqaqa.

*Faiqí anaasee moomoo ainaina maree aniqau.*

<sup>2</sup> Miqi qimaseenoo Mooseefa Beesareerana faqa Ooqooriabana faqa Yaaweefa aiqama ainaina auqira irirana akoofasaikirana nimimaru fasiqausa faqa naarama quqaseenoo qimanniminau. Doo innee oosana arasee auqaaqa.

<sup>3</sup> Isaraee maqannaasa Yaaweena amideequu ainainausa mini soo fanoo Mooseefa mi ainainira fasiqausa nimufaqa auqimariqau. Faiqí anaasee eedoo qimasaida aiqama kananaana Anutuna amidee quu ainainausa kaqikai maraidaqa Mooseefunnai munu quqee mariqau.

<sup>4</sup> Naaquqara maqa usakee marusa moomoo ainaina qafamasee nariqa ainainirana minnisee Moosee finnai oonuree qimamiqa qiqau.

<sup>5</sup> Faiqí anaasee moomoo ainaina aabaa faqa maree anidammia. Yaaweefa maasara auqaaqee qimaqaina amana minisee aabaa faqa minisaafannoo kaqi fifau mariannoo.

<sup>6</sup> Mooseefa mina iriseenoo ufa quqasoofaqa aiqamausa qimannimiqa qiqau. Faiqí anaasee sia moo fannoo kafaa moo ainaina naaquqara uiqaana maqa usakaqera maree aniaqa. Miqi qimasee qimanimufaqa faiqí anaasee mina iriseeqa sia kafaa maree aniqau.

<sup>7</sup> Indaaruu mini qoo ainainausa aiqama ainaina taikarana amana faqa fiqaramasee aabaa faqa maree aniqau.

*Misa Anutuna uiqaana maqa usakaqau.*

*(Raf 26:1-37)*

<sup>8</sup> Irirana kaaqa fiqararausa kai indaaruuqaa qamunna uiqaana maqasaa akirana auqiqau. Sipsipa asausi dirindaasi akirana faqa pannoona akirana faqa faena akirana faqa sufusee amiqira qamunna auqusee aqoosa faqaa aandau amana auqusee minasaa atooqasee akuniqau. Miqimmaseeqa minauqannai qisaukuqara taikasee 10 firaa qamunna auqusee moodaanaki akuniqau.

<sup>9</sup> Mi aiqama qamunnausa amana amana kai 12 metres kisaqa mina qusa 2 metres mariani.

<sup>10</sup> Mi qamunnausa moodaannai qisauku 5 marasee ootupamasee akuniqau. Dinni qisauku taikasee 5 faqa miqikai iqau.

<sup>11</sup> Miqimmaseeqa mi qamunna qanda atiqara dirindaasi arira qamunnannai anaanu auqusee moodaanaki ootupaqau.

<sup>12</sup> Firaa qamunna ati mau anaanu 50 auqiqau. Moo qamunna faqa miqi kai iqa moo qamunna saa qaraa anaanu amummaqa kai auqiqau.

<sup>13</sup> Kooru qumaree turimmandee qusa tafara foora saaeemma qumaree dinni dinni anaanuki upeekasoofannoo mi qamunna qanda moodaaraa maqi inoo marinau.

<sup>14</sup> Uiqaana maqasaa akira qamunna firaa mimmi asausinnai 11 auqiqau.

<sup>15</sup> Misa aiqama moodaa karirana kai auqiqau. Mina kisaqa 13 metres amana marianoo mina qusa fannoo 2 metres amana marinau.

<sup>16</sup> Mi qamunnausa moodaannai qisauku taikasee 5 qamunna akunusoofannoo moodaa qamunnaika mafinau. Kafaa moodaannai qisauku taikasee dinni ani moodaa marasee 6 narisaa narisaa akunusoofannoo firaaikinai.

<sup>17</sup> Qamunna atimau anaanu 50 akuniqau. Moo atimau faqa mina amummaqa kai akuniqau.

<sup>18</sup> Booroosannai tafara foora ati saaeemmasee 50 auqusee minannoo dinni dinni anaanuki aususee ootupamasoofanoo moodaa qamunnara foora marinau.

<sup>19</sup> Kafaa misa uiqaana maqa akuumaqara qamunna sipsipa akoona apata faena akiranannai moo auqiqau. Inaaqianna amuaaqa akirana ooruku nammarikinaa aandau apatannai auqirafa marinau.

<sup>20</sup> Misa akasia saqarinnai kai naaquqara uiqaana maqa atuna auqusee kuradaqau.

<sup>21</sup> Maaqi mandee maaqa atuna auqiqau. Saqari dinni dinni kuradarafa 4 metres marinau. Mina ausana qusa 66 centimetres amana kai auniriqau.

<sup>22</sup> Aiqama atuna maqaki rakiqaranara irisee ati ooqiaramasee ateeqaqau. Aiqama maaqa atuna miqi kaimasee ateeqaqau.

<sup>23</sup> Misa suani afu ataaqeenni south kisaaqandanai maaqa atuna 20 narisaa narisaa apamandee kuradaqau.

<sup>24</sup> Maaqa atuna oosana sia maqaki kaqi rakiqau. Siruaannai amaaqa auqusee minaki kuradaqau.

<sup>25</sup> Misa uiqaana maqa suani dinni ataaqeenni north kisaaqandanai maaqa atuna 20 narisaa narisaa apamandee kuradaqau.

<sup>26</sup> Maaqa atuna sia maqaki kaqi rakiqau. Siruaannai 40 amaaqa auqusee minaki maaqa atuna kuradaqau.

<sup>27</sup> Suani keeqeemari qaannai west uiqaana maqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auqiqau.

<sup>28</sup> Maaqa dinni dinni munu raqaranaki kafaa qaaraqanda auqusee kuradaqau.

<sup>29</sup> Raudaranaki maaqa atuna oosanaki apammasee kuradama soofanoo amiqimasee narisaa narisaa apinoo marinau. Maaqa atuna rakiqarana oosanaki rumba atukarasee miqi kai mamaree mirinni murufi saqau. Dinni dinni munu raqaranaki miqi kaimmiqau.

<sup>30</sup> Miqimmaseeqa maaqa atuna 8 oosanaki siruaannai qaaraqanda qaaraqanda amaaqa auqusoofanoo 16 marinau.

<sup>31-32</sup> Misa aunirifandinnana akasia saqari 15 maraqau. Uiqaana maqa dinni dinni ataaqee faqa uruanai faqa faifa faifannoo aunirumasoofanoo maaqa atukarama qumaranau.

<sup>33</sup> Mi maaqa atunna aunirira saqari fannoo maaqa amana kai dinni dinni ati marinau.

<sup>34</sup> Maaqa atuna aiqama koorannai kai rafaqa fiqau. Maaqa atunamau aiqama koorannai kai aanu mamaree fiqau. Aunirifandinna saqarisa faqa koorannoo mi anaanusaki rafaqa fiqau.

<sup>35</sup> Misa sipsipa asausi dirindaasi akirana faqa pannoona akirana faqa faena akirana faqa sufusee minannai amiqira qamunna auqiqau. Miqimasee mi qamunnanasaa angiroo niqoosa faqaasa nimana auqiqau.

<sup>36</sup> Mi qamunnana dirianee qimasee qaara faqa qaara faqa 4 atuna akasia saqari ateeqasee koorannai rafaqaqafusee kuradaqau. Mina atimau koorannai qamunna dirifandinna aanusa auqiqau. Mi saqarisa oosanaki siruannai amaaqa auqusee minakiaqa kuradaqau.

<sup>37</sup> Uiqaana maqa kooqiki ititeefandinna qamunnana sipsipa asausi dirindaasi akirana faqa pannoona akirana faqa faena akiranannai faqa marasee kooqiki dirifandinna amiqira qamunna auqiqau. Oosana oosana sandannai mooka maakira ainainauqa mi qamunnanasaa auqiqau.

<sup>38</sup> Mi qamunnana dirifandinnana moodaannai qisauku 5 akasia saqari marasee koorannai mina atimau rafaafusee qamunna dirifandinnana anaanu auqusee quqaqau. Mi atunnana qumaraanifeera koorannai saqari kukuqamasee atimau auniriqau. Miqimmasee booroosannai moodaannai qisauku 5 atuna oosana amaaqa auqusee minaki kuradaqau.

## 37

*Innee moodaanaki kira ufa mari bookisana auquaqa.  
(Raf 25:10-22)*

<sup>1</sup> Beesareerafa nari dadaaqi marusa faqa akasia saqari marasee minannai moodaanaki kira bookisa auqiqau. Mina kisaqa 110 centimetres auqiqau. Mina qusandanai faqa mina kuradarafa faqa amana amana kai 66 centimetres amana auqiqau.

<sup>2</sup> Misa amiqira koora marasee turimmasoofanoo ausirumafufaqa minannai kai bookisa adisaa faqa aundurari faqa ititaqau. Mi bookisana afaimau koorannai amatookika masee rafaafiqau.

<sup>3</sup> Misa koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaqau. Dinni aikusaa qaara qanda dinni aikusaa qaara qanda quqaqau.

<sup>4</sup> Misa akasia saqari qaindusi fandinna qanda koora turimmandee ausiruma qumaree minannai kukuqiqau.

<sup>5</sup> Kukuqammaseeqa dinni dinni amaaqa auquqoonaki ausiqau.

<sup>6</sup> Bookisa afu faqa koorannai kai auqiqau. Mina kisaqa 110 centimetres amana marinau, mina qusa 66 centimetres amana marinau.

<sup>7</sup> Misa koora turimaseenoo bookisa afu auquseeqa minannai kai dinni dinni qangiroo qaaraqanda nimana auqiqau.

<sup>8</sup> Afu dinni atinni moo qangiroo amana auqusee dinni moo qangiroo amana auqiqau. Afu faqa mi qangiroo qanda nimana faqa moodaa koorannai kai auqiqau.

<sup>9</sup> Mi qangiroo qanda bookisa afusaa quqasoofaqa noori nari qafee nari qafee iqa mariqau. Miqanda niqoosa uqerasoofanoo bookisa afusaa ititanoo marinau.

*Misa aiku faqaa teeboora auqusee Yaaweena amiraree qu feemuna miqoo quqaqau.*

*(Raf 25:23-30)*

<sup>10</sup> Beesareerafa akasia saqarinnoo teeboora auqinau. Mina kisaqa 88 centimetres marinau. Mina qusa 44 centimetres marinau. Mina kuradarafa 66 centimetres marinau.

<sup>11</sup> Mifa amiqira koora marasee turimmasoofanoo ausiruma fufanoo minannai teeboora rafaafa fusee kafa moonnai teeboora atiqara fiqumma rafaafa finau.

<sup>12</sup> Mifa teeboora atiqara fiqumma 8 centimetres amana ititasee mina afaimau koorannai rafaafa fiqau.

<sup>13</sup> Mifa koorannai qaindusifandinnana amaaqa 4 auqusee teeboora aiqama aiku namusaa quqanau.

<sup>14</sup> Teeboora afai ameemaanandanai qaindusirana amaaqa auqinau. Mifa mi anaanusa afai ameemaanai ququseenoo atukaranau. Atukarasainaqa aindusira saqari minaki ausuaqera atukuranau.

<sup>15</sup> Mifa akasia saqari qaindusifandinna qanda koorannai kukuqinau.

<sup>16</sup> Mifa amiqira koorannai kai teeboorasaa qugeefandinna pirita kaafausa faqa kisaaga kaafauqa faqa Yaaweena amifandinna uainna adiaara pirita uqnaurirana faqa auqiqau.

*Misa qooma qumbifandinna aikana auqiqau.*  
(Raf 25:31-40)

<sup>17</sup> Misa qooma qumbira aika amiqira koorannai auqiqau. Misa koora turiiseega minannai kai qooma qumbira aika oosana faqa adaka faqa asaanauga faqa auqiqau. Mi asaanausa saa mi koorannai kai taatuqee aqama afufeenaari marindee maseega kaafara foora afisu amaqaqau.

<sup>18</sup> Mi qooma aikausa qisauku dinni taikasee dinni ani moodaa marasee 6 marinau. Dinni qaaramoo dinni qaaramoo marinau.

<sup>19</sup> Aiqama mi asaana namuna atimau koorannai taatuqee aqama afufeenaari marindee masee afaaga auqiqau. Mi afufeenaarirafa teeqnoorina aqamara foora marufaqa mi asaana namuna saa auqiqau.

<sup>20</sup> Mina adaka saa qaara faqa qaara faqa 4 saa taatuqee aqama teeqnoorina aqamara foora auqiqau.

<sup>21</sup> Moodaa aqama indaaruga asaana qara ameemaanai marinau, kafaa mina murufi asaana qara ameemaanai moo aqama marinau. Kafaa mina murufi asaana qara ameemaanai moo marinau.

<sup>22</sup> Amiqira koora turiiseega minannai kai qooma oosana faqa asaanauga faqa afufeenaarirana faqa auqiqau.

<sup>23</sup> Misa amiqira koorannai qoomauqa dinni taikasee dinni ani qaara marasee 7 qooma auquseega mi asaanausa atimau quqaqau. Mina ufaqa faqa danda afaqee mariana faqa auqiqau.

<sup>24</sup> Qooma quqara aika amiqira koorannai 34 kilogram umaara amana kai marasee auqiqau.

*Amiqira undimari munana suqara qainda auqiqau.*  
(Raf 30:1-5)

<sup>25</sup> Misa akasia saqari marasee amiqira afundi mari ida munana areefandinna aidarana auqiqau. Mi aidarafa dinni dinni amana kai marinau. Mina kisaagandanai 45 centimetres marinau. Mina qusandanai miqi kai inoo 45 centimetres marinau. Maqasaa qari ooru firafa 90 centimetres marinau. Mina qara qaara faqa qaara faqa ati moodaa saqarinnai kai burimakau aanaira foora auqiqau.

<sup>26</sup> Mina afu faqa aanai fooqaana faqa ataaqee qara faqa amiqira koorannai kai rafaafusee koorannai mina fiqumma auqiqau.

<sup>27</sup> Koorannai qaaraqanda anaanu auqusee dinni moo dinni moo quqa-soofanoo qaindusifandina saqarina atukaramma qumaranau.

<sup>28</sup> Mi qaindusira saqari qanda akasia saqarinnai auqusee koorannai rafaafiqau.

<sup>29</sup> Misa naaquqara fadameenna Yaaweenaindi fee qimasee nikiiqa amoondunna adiee fandinna auqiqau. Idaki quqasaafanoo adiafaa ira undimari pauraqara amiqira undimari fadameennara foora auqiqau.

## 38

*Misa fadameena faqa pauraq faqa amiqira ida muna undianifeera auqiqau.*  
(Raf 27:1-8)

<sup>1</sup> Beesareerafa akasia saqari marasee minannai tatufirana suqara qainda auqinau. Mina kisaagandanai faqa qusandanai faqa amana amanakai 2.2

metres marinau. Maqa saaqari kuradarafa qaara faqa qaara faqa 4 amana 1.3 metres marinau.

<sup>2</sup> Mina qaara faqa qaara faqa 4 atisaa aanaira foora auquqoofanoo marinau. Tatufira qainda moodaa saqari fannoo kai atimau faqa qambaana faqa aanai faqa moodaa saqarinnai kai auquqoofanoo marinau. Mi aiqama ainainausa booroosannai rafaafa finau.

<sup>3</sup> Mi tatufirana suqee maria qaindanasaa suqee maria ainainausa booroosannai kai auqinai. Danda afaqara futufitauqa faqa savoorauqa faqa uqnaurira piritauqa faqa tafa fooqaa irana ati saae irana faqa ida qauni afaqee maria futufitauqa faqa aiqama booroosannai kai auqinai.

<sup>4</sup> Mifa fukaasaana booroosannai auquseenoo tatufira bookisa aunduray kasaagay ooqeeqasee qambaana qunanau.

<sup>5</sup> Tatufira qainda atiqara anaanu qaara faqa qaara faqa 4 auquseeqa bookisa atiuqasaa rumbaqa. Misa aindusi fandinna saqari qanda upeekaageera rumbaqa.

<sup>6</sup> Mifa akasia saqari tatufira qainda aindusifandinnana qaraqanda maraseenoo booroosannai miqanda rafaafinai.

<sup>7</sup> Mifa akasia saqari marasee anaanu auquqoonaki ausinai. Tatufira qainda indooira saqarinnai kai aundura faqaana auqinai.

*Firaa pirita nammari auqee fandinnana auqinai.  
(Raf 30:18)*

<sup>8</sup> Uuqaana maqa kooqiki dadaaqi maru aanaaseesa nariqa booroosannai auquqoo tanukana Beesareerana amufanoo minannai nammari auqara difaanina faqa mina oosana faqa auqinai.

*Yaaweena uuqaana maqa dapu auqu fiq fiq iqu.  
(Raf 27:9-19)*

<sup>9</sup> Amiqira sanda sufusee auquqaa qamunnannoo uuqaana maqasaa ququsara foora auqu ititanau. Suani afu dinni ataaqeeni (south) mina kisaafa fannoo 44 metres marinau.

<sup>10</sup> Mi qamunnana dirifandinnana booroosannai dapu 20 auqusee mina kuradeefandinnana amaaqa miqi kai masee 20 auquseeqa siruaannai tafara foora mina amana kai auqusee aunirifandinna saqarina faqa minannai kai auqigau.

<sup>11</sup> Suani afu dinni ataaqeeni undee kai iqa dinni ataaqeeni faqa miqi kai miqau.

<sup>12</sup> Suani keeqee maru qaannai dapu qusandanai mina kisaafa 22 metres marinau. Mina dapu saqari 10 faqa mina amaaqa auqirafa faqa 10 kai marinau. Qamunna dirifandinnana tafarafoo iranauqa faqa aunirifandinna saqarisa faqa siruaannai kai auqigau.

<sup>13</sup> Suani oosana qaannai kooqi marutina aqa uruanai inoo maruna amana kai 22 metres marinau.

<sup>14-15</sup> Mi kooqina dinni dinni dirifandinna qamunnafa 6.6 metres marinau. Mi kooqina dinni dinni qaaramoo dapu faqa mina amaaqa faqa dinni dinni qaaramoo faqa mina amaaqa faqa marinau.

<sup>16</sup> Aiqaama qamunna dapusaa dirinoo marufa amiqira qamunna kai auqirafa marinau.

<sup>17</sup> Aiqaama dapu fiq fiq irafa siruaannai rafaafa fuqaa saqarinasaa ootupanoo marinau. Minasaa qamunna dirifandinnana tafara maqi iranauqa siruaannai kai auqigau. Mina dapu atimau faqa siruaannai kai rafaafa fiqau. Mi saqarisa rakiqeebandinnana amaaqauqa booroosannai auqigau.

<sup>18</sup> Kooqisaa ititara qamunna amiqirafa marinau. Misa sipsipa asausi dirindaasi akirana faqa pannoonna akirana faqa faeena akiranannai faqa sufusee mi qamunnana auqiqau. Auquseeqa amiqira sandannai oosana oosana ainaina amana auqiqau. Mi qamunnana kisaaga fannoo 9 metres marinau. Mina qusa fannoo 2.2 metres marinau. Mi kooqina qamunna dapu rakiqarana amana kai marinau.

<sup>19</sup> Misa mi qamunnana dapu saqari qaara faqa qaara faqa kooqiki rakiqaranasaa diriqaau. Mi dapusa oosanaki booroosannai amaaqa auqusee minaki rakiqaau. Mi dapusa ati rafaafaqirana faqa auni rumaqaa saqarisaa faqa tafara foora iranauqa faqa siruaannai kai auqiqau.

<sup>20</sup> Uiqaana maqa atimau apupuka arifandinna aikausa booroosannai kai auqiqau. Uiqaana maqa dapu rakiqarana qumaraaniffee qimasee apupuka aqoosai faqa afuqai faqa aruqaafa aiqama booroosannai auqira apupuka kai marinau.

*Misa koorra faqa siruaa faqa booroosa faqa marasee Yaaweena uiqaana maqaki minannai ainaini mariqau.*

<sup>21</sup> Yaaweena uiqaana maqaki qaara oonisaa qisaukuqara 10 sanda ufa akara rirafa marinau. Mi maqanaki ainaini maruna koorra faqa siruaa faqa booroosa faqa marinau. Aanaiqikirana Aaroonna amaaku Itamarafa Reefina aiku asauku qimannimi marufaqa misa mi koorra ainainausa asaana rumasee akara rimariqau.

<sup>22</sup> Beesareerafa Urina amaaku Hurana anaifi Yudana ati marufa mifa aiqama ainaina Yaaweefa Mooseena qimamundee kai masee auqinau.

<sup>23</sup> Mina dadaaqa marufa Ooqooriabafa marinau. Mifa Aasamakana amaaku Dannana ati marinau. Mifa oonisaa oosana oosana ainaina amana auqi marufa marinau. Mifa sipsipa asausi dirindaasi akiranannai faqa pannoonna akiranannai faqa faeena akiranannai faqa amiqira sanda sufusee amiqira qamunna auqimarufa marinau. Kafaa mifa oosana oosana ainaina amana auqirana akoofasa marinau.

<sup>24</sup> Aiqaama koorauqa naaquqara uiqaana maqa usakarara Yaaweena amidee qufa mina ummaara uiqaana maqakinaa ainainauqa amana masee qafee maru sikeerana amana 998 kilogram maree aniqau.

<sup>25-26</sup> Aiqaama fasiqauqa 20 aukuna faqaasa nuqu marasoofaqa misa nabaqa 603, 550 fasiqauqa takisa munnimma aqi mariqau. Mi takisana aqusoofaqa mi siruaana qumaree uiqaana maqa sikeerasaa diriseeqa qafoofanoo 3,430 kilograms marinau.

<sup>27</sup> Maaqa atuna oosana amaaqa auqirafa 100 marinau. Mi siruaana moodaanaki asaana rumasoofanoo 3,400 kilograms marinau. Naaquqara uiqaana maaqaki qamunna diri maru saqarisaa rakiqarana amaaqa faqa maaqa atuna rakiqarana amaaqa aiqama moodaa moodaa 34 kilograms kai marinau.

<sup>28</sup> Miqimmaseeqa akaqa siruaa 30 kilograms amana kaqi marunannoo aunirira saqari faqa atuna rakiqarana ati mau faqa qamunna dirirana tafara maqi irana faqa auqiqau.

<sup>29</sup> Yaaweena amu booroosana umaara fannoo 2,425 kilograms marinau.

<sup>30</sup> Mi booroosanannai Yaaweena uiqaana maqa kooqiki saqari rakiqarana amaaqauqa auqiqau. Aandau tatufira qainda faqa mina fukaa asaana faqa minaki suqee maru ainainausa faqa minannai kai auqinau.

<sup>31</sup> Dapu saqari rakiqarana amaaqauqa faqa kooqi saqari rakiqarana amaaqauqa faqa uiqaana maaqa apupukauqa faqa dapu fiqqu fiqqu irana apupukauqa faqa aiqama mi booroosanannai kai auqiqau.

## 39

### *Aanaiqi kirausa qamunna auqiqau.*

*(Raf 28:1-14)*

<sup>1</sup> Misa sipsipa asausi dirindaasi akirana faqa pannoona akirana faqa faena akirana faqa marasee aanaiqikirausa naaquqara oosiranaki ainaini-aqera amiqira qamunna auqiqau. Aaroonna aanaiqikira qamunna faqa Yaaweefa Mooseena qimamundee masee auqiqau.

<sup>2</sup> Misa sipsipa asausi dirindaasi akirana faqa pannoona akirana faqa faena akirana faqa koora sanda faqa sufuseeqa eefooda qamunna auqiqau.

<sup>3</sup> Misa koora turiisoofanoo adamanaika mafufaqa tiritandara foora aukiiseeqa sipsipa asausi dirindaasi akirana faqa pannoona akirana faqa faena akirana namu faqa sufuseeqa amiqira qamunna auqiqau.

<sup>4</sup> Eefooda qamunna anaanu qaaraqanda fannoo aururusaa aakandianin-nana auqusee eefooda qamunnasaa dinni dinni rumbaqa.

<sup>5</sup> Mina ooiqanda ianinnana amiqira qamunnannai eefooda qamunna auqundee kai masee auqiqau. Mifa eefooda qamunnasaa akunirafa marinau. Yaaweefa Mooseena qimamundee kai iqau.

<sup>6</sup> Eefooda anaanusaa akumaaqa ooni qaaraqanda pupu ooni marasee dinni aanaanusaa moo dinni aanaanusaa moo quqasee Yakooboona faiqi namu qisaukuqara taikasee qikunni ooqu qaara marasee nuqu mi ooni qandasaa akara riqau.

<sup>7</sup> Miqimmasee aururusaa eefooda qammunna aakandammasoofanoo Yakooboona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

### *Nimuqusasaa rumbara qamunna auqiqau.*

*(Raf 28:15-30)*

<sup>8</sup> Eefooda qamunna auqu ainainausannoo kai amuqusasaa rumbara qamunna auquseeqa moodaa karira akara kai riqau.

<sup>9</sup> Mi qamunnana tukaandasoofanoo aiqama ati amana amana kai 22 centimetres marinau.

<sup>10</sup> Misa ooni amiqirana firaa feefauru aqimariana kai marasee qaara faqa qaara faqaki mi qamunnanasaa padiqau. Indaaruuqaa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiqau.

<sup>11</sup> Mina aanaaqianna padiranaki moo ooni auqu eemeerara faqa moo ooni auqu safairee faqa moo ooni auqu daimanna faqa minamunannai padiqau.

<sup>12</sup> Miqanda muqufi padiranaki moo ooni auqu teerakoisa faqa moo ooni auqu agatee faqa moo ooni auqu ameeetisa faqa minamunannai padiqau.

<sup>13</sup> Inaaqiana atimau padiranaki moo ooni auqu beerira faqa moo ooni auqu kanirianna faqa moo ooni auqu yasapaa faqa minamunannai padiqau. Mi oonisa koorandannai amuqusasaa maru qamunnanasaa isooqa araqa.

<sup>14</sup> Mi oonisa moodaa moodaa ooni fannoo Yakooboona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

<sup>15</sup> Misa nimuqusasaa rumbarana anaanu amiqira koorannai auqira sandannai seenandara foora auquseeqa moodaanaki quqasee afundasee dinni dinni ati saa qusiqau.



<sup>16</sup> Koorannai anaanu qaara qanda auqusee amuqusasaa rufuaninna qamunnana mirinni atisaa qara qusiqau.

<sup>17</sup> Qaaraqanda seenanda koorannoo afundaranannai mi anaanu qandaki qusiqau.

<sup>18</sup> Mi sandana ati qarannai aururusaa koorandannai ooni isooqa aruqaanaki ootupaaqa. Miqimmasoofanoo aururusaa eefooda qamunnasaa rumbanau.

<sup>19</sup> Kafaa nimuqusasaa rufimariana anaanu qaara qanda koorannai auqusee aunduraindari atisaa mi anaanuna rumbasoofanoo eefooda qamunna mammaaqai marinau.

<sup>20</sup> Kafaa qaaraqanda aanaanu koorannai auqusee afunni qumu maru eefooda qamunnanasaa aqaasanai amiqira qamunnannai sufirana ooiqandi maruna aakaariqara rumbaqaau.

<sup>21</sup> Nimuqusasaa diri maria qamunnanasaa anaanuki dirindaasiandannai sufira sanda usuaki eefooda qamunnasaa qaraa anaanuki ususee rumbaqaau. Miqimmasoofanoo amuqusasaa ititara qamunna sia kasi kasinau. Yaaweefa Mooseena qimamundee kai iqau.

*Innee akaqa qamunna aanaiqi kirausaindi auquaqa.  
(Raf 28:31-43)*

<sup>22</sup> Misa eefooda qamunna meeago qaraana auqirara dirindaasi akira sipsipa asausinnai kai qamunna kisaaga auqiqau.

<sup>23</sup> Misa anuka amaaqa auqiqau. Qamunna raqandaammasee akunusoofanoo anuka upeekoofanoo sia anaqinau.

<sup>24-26</sup> Mina ati mau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusiqau. Dirindaasi akira sipsipa asausi faqa pannoona akiranannai faqa faena akiranannai mi saqari aqamana amana auqiqau. Auquseeqa mi saqari aqamana aaqa koorannai auqira biru faqa qamunna atimau moo mafi quqee moo mafi quqee iqau.

<sup>27-29</sup> Misa sipsipa asusi dirindaasi akirana faqa pannoona akirana faqa faena akirana faqa tiritu uqanna namu faqa sufusee Aaroona narí faiqinamu siutauqa faqa Aaroona uriqarara qata faqa mina faiqinamu kaqikaa qatauqa faqa auqiqau. Auqusee ooiqanda ianinnana minannai kai auquseeqa oosana oosana akarannoo afaaqa auqiqau. Miqimmaseeqa misa tarasisa tiritu uqannannai auqiqau. Yaaweefa Mooseena qimamundee kai iqa aiqama ainaina auqiqau.

<sup>30</sup> Misa amiqira koorannai niqinaaqa rumbeemaru doodapaaninara foora auqusee minasaa Anutunaindi fee qimasee akara riqau.

<sup>31</sup> Misa doodapaani dirindaasiandannai auqirana marasee qatasaa quqasee akuniqau. Yaaweefa Mooseena qimamundee kai iqau.

*Doo aiqama saika taikanau.  
(Raf 35:10-19)*

<sup>32</sup> Miqimasee Yaaweena uiqaana maqa taikaqau. Isaraeena aiku asauku Yaaweefa Mooseena qimamundee kai aiqama ainaina iqau.

<sup>33</sup> Misa uiqaana maqa faqa mina rafaqa fimaria qamunnana faqa mina anaanu faqa mi maqana usakara atunauqa faqa aunirira saqari faqa oosuki faqa kooqiki faqa rakiqee fandinna saqarisa faqa saqari maqaki rakiqarana amaaqa auqirana faqa maree Mooseefa marunnai munu quqaqau.

<sup>34</sup> Sipsipa akoona apata faeena akirana minannai uiqaana maaqasaa akirana faqa ooruku nammari kinana aandau apata uiqaana maqasaa akirana faqa kaaqa naaquqara oosiranaki ititara qamunna faqa maree munu quqaqau.

<sup>35</sup> Misa moodaaniki kira bookisa qaara ooni minaki maruna faqa mina afu faqa mina qaindusira saqari qara faqa maree munu Mooseefa unnai quqaqau.

<sup>36</sup> Misa aiku faqaa qainda faqa minasaa mari ainainausa faqa Anutuna afusaa quqara feemu faqa maree munu quqaqau.

<sup>37</sup> Misa amiqira koorannai auqira qooma saqari faqa mina qoomauqa faqa mina oosana oosana ainainauqa faqa mi qoomausa fadameena faqa maree munu quqaqau.

<sup>38</sup> Koorannai auqira aidara faqa Yaaweenaindi fee qimasee utaaqama amaqaasee adia nimaqee maria fadameenna faqa afundi mari pauraqana faqa uiqaana maqaki kooqi ititara qamunna faqa maree munu quqaqau.

<sup>39</sup> Booroosannai auqira aidara faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari adiee maria difaanina faqa mina oosana faqa maree muna Mooseefa unnai quqaqau.

<sup>40</sup> Dapu qamunna faqa dapu faqa dapu oosana amaqa auqirana faqa dapu kooqi qamunna faqa dapu sanda faqa apupuka faqa aiqama ainaina naaquqara uiqaana maaqa aundurau auqee maria ainainausa faqa maree munu Mooseena uqafiqaqau.

<sup>41</sup> Minauqa munu uqafiqaseeqa Aarona naaquqara qamunna faqa narí faiqi namundi faqa naaquqara maqaki ainainidaqa afisifandinna qamunnana amiqirana munu Mooseena uqafiqaqau.

<sup>42</sup> Isaree maqannaasa Yaaweefa Mooseena qimamundee kai masee aiqama ainaina auqaqau.

<sup>43</sup> Mooseefa aiqama ainaina aikuqu masee qafamaseenoo Yaaweena irirana mau kai auqeeaafoo qimaseenoo amiqi amiqimma nimaqana.

## 40

### *Uiqaana maqa usakasee Yaaweena utaaqama amaqaqa.*

<sup>1</sup> Yaaweefa Mooseena qimaminoo qinau.

<sup>2</sup> Indaaruaqa quqoonasaa indaaruaqa faasaana innee qini naaquqara uiqaana maqa oosana arasee usakaqa.

<sup>3</sup> Moodaanaki kira bookisaki qisaukuqara taikasee 10 sanda ufa marina kaaqa naaquqara oosiranaki quqasee ititee fandinna fira qamunna marasee minasaa ititaqa.

<sup>4</sup> Aikufaqa qainda maree mini quqaseeqa minasaa ainainifandinna ainainausa minasaa mini quqaqa. Qooma saqari faqa mini quqaseeqa mina qoomauqa mina ati mau quqaqa.

<sup>5</sup> Quqaseeqa koorannai auqira aidara amiqira afundi mari pauraqana suqee mariana mareeqee maamiqoo oosiranaki moodaanaki kira bookisa amummaqa quqaqa. Quqaseeqa kooqiki ititee maria qamunnana maraseeqa kooqiki diriaqa.

<sup>6</sup> Qaidara firaana aandau tatufirana suqee mariana uiqaana maaqa kooqi amummaqa ququsaki quqaqa.

<sup>7</sup> Kafa nammari difaani mareeqee maaqa kooqi dinni fira qaidara dinni qambaana quqasee nammari adia umbiqaaqa.

<sup>8</sup> Ququsa dapu uiqaana maaqa aru fiqumma datimasee kooqiki qamunna diriaqa.

<sup>9</sup> Yaaweefa Mooseena kafa qimaminoo qinau. Qini naaquqara fadameena maraseenana uiqaana maaqa faqa minakinaa aiqama ainaina qini utaaqama qimaqaranasaa rurufa masainanoo naaquqanoo mariani.

<sup>10</sup> Miqimmaseenana firaa aidara aandau tatufirana suqee mariana faqa minasaa qaraa ainainauqasaa faqa mi fadameenna rurufa masainanoo kaaqa naaquqanoo mariani.

<sup>11</sup> Nammari difaanisaa faqa mina oosanasaa faqa miqi kai iaqa.

<sup>12</sup> Miqi masee Aarona nari faiqi namu faqa nifiqamaree uiqaana maqa kooqiki munusainaqa nammari auqaqa.

<sup>13</sup> Auqamasafana aanaiqikirausa qamunna marasee Aarona afisu amaqaasee qini utaaqama qimaqara fadameena akiiqa amoondunna rurufammasainanoo naaquqanoo maridanoo qini aanaiqikira saikaki mariani.

<sup>14</sup> Mina faiqi namu nifiqee miniseenana aanaiqikirausa qamunna afisu nimaqaa.

<sup>15</sup> Miqi maseenana Aarona ianandee inana mina faiqi namu faqa fadameena nikiiqa amoondunna rurufamma nimaqaa. Miqimmasainaqa qini aanaiqikira saikaki mariaqa. Mi fadameenafa misa naaruara qini aanaiqikira saikaki marirana nimiannoo.

<sup>16</sup> Mooseefa aiqama ainaina Yaaweefa qimamundee kai masee auqanau.

<sup>17</sup> Isipa maqa maaqa kiqari anukari moo aukuana aiqarooqaa moo aukuana indaruqaa uqoona mina indaruqaa faasaanasaa Yaaweena naaquqara uiqaana maaqa usakaqau.

<sup>18</sup> Mooseefa qufaqa uiqaana maaqa atuna amaqaauqa maqaki quqaseeqa maaqa atuna minakiaqa kuradamasee ausana auni rumasee kooqindanai atuna faqa rakiaqau.

<sup>19</sup> Rakiqaseeqa indaruqaa qamunna qairi akuseeqa mina amuaaqa qaaramoo mina rafaafufanifeera qairi akiqau. Yaaweena ufamau kaimbiqau.

<sup>20</sup> Mooseefa sanda ufa akararira oniqara bookisaki quqaseenoo mina aindusira aikaqara anaanuki upeekaseenoo mina nifauara afu rafaafufinai.

<sup>21</sup> Rafaafufuseenoo mi bookisana mareeqeenoo uiqaana maqaki quqaseenoo qamunna qumareenoo dirisoofanoo minasaa itita amaqaanau. Yaaweena ufamau kai miqinai.

<sup>22</sup> Mooseefa aiku faqaa teeboora mareeqeenoo naaquqara oosiranaki suani afu dinni ataaqeenni North quqanau.

<sup>23</sup> Quqaseenoo mi teebooranasaa Yaaweena amiraree qu feemuna quqaqoofanoo marinai. Yaaweena ufamau kai finai.

<sup>24</sup> Miqi maseenoo Mooseefa qooma saqari uiqaana maqaki suani afu dinni ataaqeenni (South) maaqa atuna mammaaqai quqanau. Dinni taatatai aiku faqaa teeboora quqasee dinni taatatai qooma saqari quqanau.

<sup>25</sup> Yaaweefa qumi maru uiqaana maqanaki qooma saqari quqasee qumbisoofanoo qanau. Yaaweefa qimamundee kai inai.

<sup>26</sup> Miqi maseenoo Mooseefa koorannai auqira qaidara mareeqeenoo uiqaana maqa maamiqoo oosiranaki ititaqoo qamunnana aaqa quqanau.

<sup>27</sup> Quqaseenoo mifa amiqira afundimaruna andaana rirana quqaseenoo idaranai. Yaaweena ufamau kai finai.

<sup>28</sup> Mifa uiqaana maqa kooqiki qamunna d irinai.

<sup>29</sup> Diriseenoo tatufirana suqee maru qaidarana uiqaana maqa kooqi amummaqa madaanai quqanau. Quqaseenoo Mooseefa aandaui tatufirana faqa sakuma fooqaa irana qaindi rirana faqa tatufinau. Yaaweena ufamau kai miqinau.

<sup>30</sup> Miqi maseenoo Mooseefa nammari difaani madaanai qaidara mianni marufanoo uiqaana maqa kooqi murunni marufanoo qambaana quqanau. Quqaseenoo nammari minaki adia qumbiqanau.

<sup>31</sup> Mi nammarinaki Mooseefa faqa Aaroonafa nari faiqi namu faqa mi nammarinaki niku nisauku nammari uqi mariqau.

<sup>32</sup> Misa uiqaana maqaki keeqararee qimasee fee tatufira qaidara aaga firaree qimasee fee mi nammarinaki niku nisauku nammari uqusee fi-mariqau. Yaaweena ufamau kai miqi mariqau.

<sup>33</sup> Miqimma taikaseeqa Mooseefa qufaqa uiqaana maqa faqa firaa qaidara faqa ququsa dapu fiqumma rakiqaaqau. Rakiqaseeqa dapu kooqiki faqa qamunna ititaqau. Miqimmasee misa Mooseena faqa aiqama ainainirana taikaqau.

*Qasuru fannoo Anutuna uiqaana maqa akiiqa amummaqa marinau.  
(Namba 9:15-23)*

<sup>34</sup> Miqi masoofanoo qasuru fannoo uiqaana maqa dukunimambufanoo Yaaweena kaaqa qara daroo daraa irafa uiqaana maqaki qumbiqa finau.

<sup>35</sup> Miqimmafunara Mooseefa sia uiqaana maqa keeqanau.

<sup>36</sup> Qasuru fannoo uqeeree fukari kai Isaraee maqannaasa nari uiqaana maqa faqa Yaaweena uiqaana maqa faqa aiqama ainaina faqa tatu maree fiqau.

<sup>37</sup> Qasuru fannoo kaqi miqoo marufaqa misa faqa kaqi miqoo mariqau.

<sup>38</sup> Isaraee maqannaasa fida marufanoo qasuru fannoo aiqama faasaana Yaaweena uiqaana maqa akiaaqa marinau. Aiqama eendaki idauruara foora mina akiaaqa marufaqa qafee mariqau. Miqinoo marufaqa fiifiufaqa Yaaweefa nimiraree qu maqa maaqanaki oonu raqau.

## ESTA Estaana ufa

*Kuinna Wasti nammarifa kinna Serkisisana mandaikamma amaqaanau.*

<sup>1-2</sup> Serkisisafa Peereesia maqa maaqaki kinna maru aukwana mifa Susa maqusaki nari kinna siaqa ufiqiseenoo ooqu marifinoo 127 maqa maaqa rakisi marinau. Suani afu uri maru qaannai India maqa maaqaki oosana araseenoo suanafu keeqee maru qaannai Itiopia maqa maaqaaki dinni ati oonu marinau.

<sup>3</sup> Mifa qaarammoo aukuanaki kinna maridanoo aiqama kiapausa faqa kaammanna uriqararausa faqa aiqama maqa maaqaki marusa faqa firaa omaqa sakasaida nee marinau. Peereesia maqa maaqaki faqa Midia maqa maaqakinaa ammiuqa faqa mi firaa omaqaanaki ani mariqau. Rakisirausa faqa firaa fasiqauqa faqa aiqama maqa maaqaki marusa misa faqa mariqau.

<sup>4</sup> Mi naranafa qisauku dinni taikasee dinni oonu moodaa marasee 6 uqoonaki marinau. Marufanoo kinna fannoo nari aiqama munnimma faqa nari maaqa afaqa auqirana faiqi anaasee quqannifiqanau. Quqannifiqasoofaqa misa mi ainainausa qafoofanoo kaaqa amiqirafa uriqaranoo uqanna marinau.

<sup>5</sup> Mina anaqiana kinna fanoo moo firaa omaqa nari uqusaki nari maaqa adeedi sakanau. Mi omaqafa aiqama Susaa maqusaki maru fasiqausa ainaina faqaasa faqa ainaina siaisa faqa misaindi marinau. Marufaqa misa moodaa amaana aundurari naida mariqau.

<sup>6</sup> Mitinai misa narana nee marunnai amiqira tida marinau. Ooqai faiqi misa taatuqee ooninnai faqa eekara ooninnai faqa dirindaasi arira ooni faqa kinnaa ooniuqa misa rarai fee qimasee auqu ree maruna mookira ooni tanukaida qeemaruna faqa maqasaa padimmaseeqa minasaa tida auqiqau. Misa mi tidanasaa omaqa naani qimasee eekara arira qamunnainnai faqa dirindaasi arira qamunnannai faqa afaqa auqusee amiqira sandannai rumbaqoofanoo marinau. Misa mi sandannannai siruaannai auqira rinna amiqira ooni pausasaa rumbaqau. Misa miqoo koorannai faqa siruaannai faqa auqira kisaqa siaqauqa ufiqisaidaqa minasaa ooqu marifidaqa narana nee mariqau.

<sup>7</sup> Faiqi misa mooka maakira kooraa kaafaki nammari nee mariqau. Nee marufanoo kinna fannoo moomoo uainna mi fasiqausa nimi marinau.

<sup>8</sup> Sia misa neefandinnana asaana riqau. Kinna fannoo nari maaqaki ainaini maru faiqisa qimannimufaqa misa nari nidiranasaa moodaa moodaa fasiqa nammari nimi mariqau.

<sup>9</sup> Mikari Kuinna Wasti nammarifa aiqama anaaseeuqa faqa kinna maaqaki firaa omaqa sakasee nee mariqau.

<sup>10</sup> Qisauku dinni taikasee dinni oonu qaaraqanda marasee 7 faasanasa mi firaa omaqaanaki kinna fannoo kaqi kaaqoo uqanna uainnasaa furufarinau, furufarinoo mifa nari maaqaki ainaini maru faiqisa qisauku dinni taikasee dinni oonu qaaraqanda marasee 7 naarofaqa aniqau. Misa nuqu maaqimminoo marinau. Meehummafa faqa Bistaafa faqa Aboonnafa faqa Bitaafa faqa abaktaafa faqa Seetarafa faqa Karkasaafa faqa mariqau.

<sup>11</sup> Kinna fannoo misara kuinna Wasti nammarina afiqee aniaqee qimaseenoo qimanniminau. Kuinna Wasti nammarifa nari kuinna qafee

afisu maree aniani. Kuinna Wasti nammarifa amiqira manaaqa uqanna marufanoo minara kinna fannoo kiapausa faqa aiqama mina firaa oomaqaki ani marusa uqannifiqarara aaranau.

<sup>12</sup> Mi ainainira faiqisa oonu kuinna Wasti nammarina kinna qu ufana qimamufanoo kuinna fannoo sia anufanoo minara kinna firaaqoo uqanna aranaqanau.

<sup>13</sup> Mifa irirana faqaa fasiqauqa narooafa anireeqa kuinna faqa auqaaninna ainainara qimamiqau. Kinna fannoo irirana faqaasa iramiriseenoo misa qimamundeemmasee narí sandufaki ainaini maruna faqa faiqi anaasee ooqu marirana faqa andeeqanau.

<sup>14</sup> Mi fasiqausa nuqu maaqimminoo marinau. Kareesanafa faqa Seetaraafa faqa Atmataafa faqa Tarasisaafa faqa Meeresafa faqa Maraseenafa faqa Meemukanafa faqa mariqau. Misauqa qisauku dinni taikasee dinni oonu qaaraqanda marasee 7 nikiqqa fasiqauqa Peereesia maqa maaqaki faqa Midia maqa maaqaki faqa aiqama kinna rakisi maru maqa maaqanaki misa uriqarara kaammanna mariqau.

<sup>15</sup> Mifa mi fasiqausa maaqi qimasee qimanniminau. Qinee kinna Seerkisisasa eeqa maaqaki ainainimaru faiqisa niiqaafanaqa oonu kuinna Wasti nammarina qimamifanoo qinee qimamianna ainainausa auqaanifee qiafananoo mifa qini ufa rukioofanoo qirana qanau. Sandufa fannoo minara naqaa fee qidanoo fee. Innisaimbaqa kuinna naqaa feemma amaqaanauree.

<sup>16</sup> Meemukanafa kinna narí oofisaa faqa maaqi qimasee qimanniminau. Rakisirafa anee iria, kuinna Wasti nammarifa sia anikai fau mandaikamma amaqaenoo fau. Mifa aiqama uriqarara fasiqauqa faqa aiqama ani maqa maaqaki maria fasiqausa faqa mandaikamma nimaqaenoo.

<sup>17</sup> Qusasaa uqanna aiqama anaaseeuqa anee rakisi marianna maqa maaqanaki mariasa misa kuinna mi oosanna auqainara irifaranoo. Iriseeqa misa maaqi qifaranoo, kinna Seerkisisafa kuinna Wasti nammarifa oonu mina qafaanifeera qufanoo kuinna fannoo kinna ufa rukieefaranoo. Miqi kai iqa anaaseeuqa faqa nári nifaaqmaaka ufa rukieefaranoo.

<sup>18</sup> Mi faasanna kai uriqarara fasiqauqa Peereesia maqa maaqaki faqa Midia maqa maaqaki faqa marusa ninaaqmaaka kuinna mi oosanna auqoo ufana irisee misa mi ainannara nári nifaaqmaaka qimannimisee mi anaseesa moomoo mandoosana faqa mandufa faqa qifaranoo.

<sup>19</sup> Rakisirafa anee irinanoo amiqinana, anee moo ufa maaqi qimasee faiqi anaasee iannai uqaa. Wasti nammarifa sia kaifaa ani ani qafaani. Mi ufana Peereesia maqa maaqakinaasa faqa Midia maqa maaqakinaasa sandufa mari papiqanaki akara ruaqa. Akara rumasaifanoo mi sandufafa sia amana taikaannoo. Minara anee Wasti nammarina mara aqusee moo amiqira manaaqa mara uqasainanoo mifa kuinna mariani.

<sup>20</sup> Mikari ani mi ufafa aiqama anee rakisi marianna maqa maaqausaki daraani mafinaqa aiqama anaaseeuqa nári nifaaqmaaka nuqu faqaasa faqa nuqu siaisa faqa misa ufa amiqimmasee irifaranoo.

<sup>21</sup> Kinna narí uriqarara fasiqauqa faqa misa mi ufanara nidufanoo kinna fannoo Meemukanafa qundee inau.

<sup>22</sup> Kinna fannoo narí rakisi maru maqa maaqausakiaqa papiqa quqa-soofanoo fifaininai, mifa aiqamausa nári ufakiqari papiqa akara ruma nimaqanau. Akara ruma nimaqaseenoo mifa maaqi qinai, faiqi fannoo kai narí faiqi anaasee rakisiannoo.

## 2

### *Eestaafa nammarifa kuinnaikinau.*

<sup>1</sup> Mikari kinna aranaqarafa kaqikaagoo taikoofanoo mifa kaifaa Wasti nammarifa mandaikamma amaagoo oosannara oonu mafi irinau. Iriseenoo mifa Wasti nammarina aiqamasainanoo mifa sia kaifaa kuinna mariannoo fee qu ufanara oonumafi irinau.

<sup>2</sup> Akaqa fasiqauqa mina amiqira irirana amimarusu mina aaqa oof-  
ufaageeidaqa maaqi qimasee mina qimamiqau, rakisirafa anee akaqa  
amiqira manaaqauqa sia faiqi faqa faiqama qaasara randaannee qiqau.

<sup>3</sup> Anee rakisi marianna maqa maaqanakinaa fasiqauqa mara uqasainaa  
misa amiqira manaaqauqa sia faiqi faqa faiqama qaasa nifiqamaree  
kaammanna uriqarara taunna Susaa maqusaki minisee anee manaaqauqa  
sugu uqee marianna maaqanaki misauqa mini uqaqa. Uqasaifanoo  
Eekaifa ani ainainira faiqi ani anaqmaakasaa rakisi marifa mifa misaa  
rakisiani. Rakisi marinaqa anaaseeuqa misa fadameena akunnimaqaseeqa  
misa nifaaqa auqusaifaqa misa kaaqa amiqirauqa uqanna mariaqa.

<sup>4</sup> Marifana anee mi manaaqausa kinaana moodaa ani aidi marinnana ma-  
reeqee uqasainanoo mifa kuinnaika mafinanoo kuinna Wasti nammarina  
amaqa maqaani. Miqi qufanoo kinna fannoo iriseenoo mi ufanara eedoo  
qimaseenoo afaqanau.

<sup>5</sup> Susaa maqusaki Yuda maqanna fasiqa moo marinau, minauqu Mood-  
eekaifa marinau mina akoona auqu Yairafa marinau. Yairafa Kisaana  
amaaku Simeena anaiqi Beensamina atikinaafa marinau.

<sup>6</sup> Ooqai Babiroonnia maqannaasa kinna Neebukatneesafa Yuda maqan-  
naasa kinna Yeeoiakina faqa Yuda maqannaasa akaqausa faqa nifiqeenoo  
Babiroonnia maqusai mariaqera finau. Mifa Moodeekaina aiku asauku  
faqa nifiqoo faqa misa faqa fiqau.

<sup>7</sup> Moodeekaifa moo manaaqa rakisi maruna minauqu Eestaa nammarifa  
marinau. Minauqu Heeburu ufakiqari Adasane qimariqau. Eesta nam-  
marifa Moodeekaina akoona akaqa araamuna marinau. Mina akoofa nari  
anaqa faqa kuqufufanoo Moodeekaifa Eestaa nammarina maraseenoo  
nari faiqira foora rakisi marinau. Rakisi marufanoo Eestaa nammarifa  
kaaqa amiqira manaaqa uqanna findifi marufaqa qafoofanoo amiqirafa  
uqanna marinau.

<sup>8</sup> Kinna Seerkisisafa nari oofisaauqara moomoo amiqira manaaqauqa  
nifiqamaree Susaa maqusai aniaqee qimasee ufa quqanau. Ufa uqasoofaqa  
misa manaaqauqa nifiqee anidaqa misa Eestaa nammarina faqa afiqee  
aniqau. Miniseeqa misa Eeataa nammarina kinna uqusaki manaaqauqa  
maru maaqanaki uqaqau. Uqasoofanoo Eekaifa mi manaaqausasaa rakisi  
marinau.

<sup>9</sup> Eekaifa Eesta nammarina qafoofanoo amiqira manaaqa marufanoo  
minara aidi marinau. Aidufanoo mifa kai kaqi ufanoo Eestaa nammarifa  
afaqa auquaninna fadameena mainainausa faqa oosana oosana amiqira  
narana faqa aminau. Amiseenoo mifa kinna maaqaki marusara Eesta  
nammarinasaa amiqimmasee rakisiaqee qimaseenoo mara uqanau.

<sup>10</sup> Indaaruu Moodeekaifa Eesta nammarina qimaminau, anee sia aneenara  
Yuda maqanaa manaaqa maridee qimasee koorooianne qu ufana Eesta  
nammarifa nari rakisi maru akoona mi ufana afaqeenoo sia qimaminau.

<sup>11</sup> Aiqaama faasaana Moodeekaifa anaaseeuqa maaqa maru uqusana  
kooqindanai onuree aniree inoo nimirinau. Mifa Eesta nammarifa naqaa

fee masee marinaḡee irianauree misa Eesta nammarina naḡi feemma amaḡaifagee irianauree qimasaidanoo oonuree aniree imarinau.

<sup>12</sup> Moodaa aukuana aundurai misa manaaḡauḡa rakisi marufaḡa amiḡi-rausa uḡanna kambiqee mariḡau. Kambiqee marufaḡa misa qisauku dinni taikasee dinni oonu moodaa marasee 6 uḡoonaki misa meea saḡari anoonnai auḡuḡoo fadameena amiḡira afundi maruna mi manaaḡausa nifaaḡai akunnimaḡee mariḡau. Akunnimaḡasee moo 6 uḡoonaki misa fadameena faḡa ainoo faḡa amiḡira afundi maruna akunnimaḡee mariḡau. Miḡimmasee inaaḡianna misa aiḡama manaaḡauḡa moodaa moodaa nifiḡa maraida kinna Seerkisisafa marunnai fimariḡau.

<sup>13</sup> Manaḡa moo fannoo kinna maaḡai fuani qimaseenoo narí aidiranasaa afaaḡa auḡu mareenoo fimarinau.

<sup>14</sup> Manaḡa fannoo eendi marufanoo kinna marunnai oonu mariinoo iaḡee marinau. Iaḡasoofaḡa kananaana mina aḡiḡamaree anaaseeuḡa maaḡa mooki munu Saskasana asaukuki uḡaḡau. Mi moodaa fasiḡafa kai kinna inaaḡianna anaaseeuḡasaa rakisi marinau, rakisi marufaḡa mi anaaseesa sia kaifaa kinna oonu ḡafee mariḡau. Kinna fannoo moonara aidinanoo mina auḡuramasee aarainanoo mifa amana fuannoo, sia moo aana maridanoo.

<sup>15</sup> Eesta nammarifa kinna ḡafaaninna faasaanafa aniranau. Eesta nammarifa Moodeekaina akoona akaḡa Abiairana araamuna marufanoo Moodeekaifa Eesta nammarina maraseenoo narí araamunara foora rakisi marinau. Rakisi marufaḡa aiḡama fasiḡauḡa Eesta nammaria ḡafee marufanoo kaaḡa uḡanna minara nidi marinau. Mikari Eesta nammarifa kinna ḡafarara fino sia narí aidiranasaa ḡamunna afisinau. Manaḡauḡa rakisirafa Eekaifa ḡimamundeemmasee ḡamunna afisinau.

<sup>16</sup> Mikari Seerkisisafa ḡisauku dinni taikasee dinni oonu ḡaara marasee 7 aukuanaki kinna marinau. Mi aukuananaki ḡisauḡara taikasee 10 uḡoona misa auḡuree Teebeeta uḡoonafee ḡimariḡau. Mi uḡoonnanaki misa Eesta nammarina aḡiqee kinna marunnai fiḡau.

<sup>17</sup> Munusoofanoo kinna fannoo firaḡoo uḡanna Eesta nammarinara aidinai. Mifa sia akaḡa manaaḡauḡara aidi marundeemmaseenoo Eesta nammarinara aidinai. Mifa Eesta nammarina ḡafoofanoo akaḡa manaaḡauḡa urinnaḡaramaseenoo kaaḡa amiḡirafa uḡanna marinai. Sia moo manaḡa fannoo Eesta nammarifa kinna aḡaararana amundee iannoo. Minara kinna fannoo mina akiiḡaki kuinna ḡafee afisu amḡanau. Afisu amaḡasoofanoo Eesta nammarifa Wasti nammarina amaḡa maḡaseenoo kuinnaikinai.

<sup>18</sup> Kinna fannoo Eesta nammarinara asaidanoo firaḡa oomaḡa sakaseenoo nanau. Mifa aiḡama uriḡarara fasiḡauḡa faḡa kiapausa faḡa naarooḡaḡa mi firaḡa oomaḡanaki aniḡau. Aniroofanoo mifa ḡinau aiḡama fasiḡa anaasee ḡini maḡa maaḡaki mariasa misa maa faasaana idooaidaḡa. Miḡi qimaseenoo kinna fannoo moomoo amiḡira ainaina faiḡi anaasee nimirau.

*Moodeekaifa kinna dadaaḡufanoo mifa sia kuḡinai.*

<sup>19</sup> Mikari kai kinna fannoo Moodeekaina mara uḡasoofanoo mina maaḡasaa rakisira fasiḡaikinai.

<sup>20</sup> Ooḡai Moodeekaifa Eesta nammarinaa ḡimaminai, anee sia aneennara Yuda maḡanna manaaḡa maridee qimasee faiḡi qimannimia. Miḡi qimaḡoona Eesta nammarifa mi ufana afaḡanai. Mina oosana mifa aiḡama kari Moodeekaina maaḡaki maridanoo mina ufa afaḡee marinai.



<sup>21</sup> Mikari Moodeekaifa kinna Seerkisisana saika maroofaqa qaara fasiqa gara kinnara aanoo qimasee miqanda mina kuqa arirara ufa tipundaari mariqau. Mi fasiqa qanda nuqu Biktanafa faqa Teereesaafa faqa marinau. Mi fasiqa qanda kinna faiqee maru maaqana kooqiki rakisimaru qanda mariqau.

<sup>22</sup> Moodeekaifa miqanda ufa iriseenoo mifa oonu kuinna Eesta nammariina qimaminau. Qimamufnoo Eesta nammariifa Moodeekaina faqa mi fasiqaqanda faqa ufa iruna kinna qimaminau.

<sup>23</sup> Misa mi ufana oosana randaseeqa iriseeqa mi ufanara kuqaa fee qiqau. Kuqaa fee qimaseeqa misa mi fasiqaqanda saqarisaa dirisoofaqa kuqiqau. Kuqufufanoo kinna fannoo nari oofisaauqa qimanniminoo qinai, mi ainainafa kambiqaina innisaimbaqa kaammanna papiqaki akara rua qufaqa misa miqimmiqau.

### 3

#### *Amannafa Yuda maqannaasa naru taikarara ufa rumbanau.*

<sup>1</sup> Kaqikaqoo marinoo kinna Seerkisisafa moo fasiqa mina auqu Amaannana mara uqasoofanoo mifa uriqarara kaammanna marinau. Amannafa Hammeedatana amaaaku Akakana anaiqi marinau.

<sup>2</sup> Kinna fannoo aiqama kiapausara Amaannanara niqoori saunu arasee mina firaa auqu amiaqee qufaqa misa aiqamausa kinna qundee ufanoo Moodeekaifa kai sia miqinai. Moodeekaifa Amannanara aqoori saunu arara akooqanau.

<sup>3</sup> Inaqaiana akaqa kiapausa mina qafamasee mina iramiriqa qiqau anee nanaree kinna ufamau sia finanee.

<sup>4</sup> Moomoo kari Moodeekaina mi oosannanara qimami mariqau. Miqi marufanoo Moodeekaifa misa ufa irirara akooqanau. Miqufanoo Moodeekaifa misa qimanniminoo qinai, qinee Yuda maqannaasa maridaqa minara qinee Amannanara sia qiqoori saunu araidaqa. Miqi qufaqa kiapausa Moodeekaifa qu ufana Amannana qimamiqau. Misa Moodeekainara kaqi mi oasanna maree marinanoo Amannafa qafamasee arana qaannoo fee sia fee arana qaannoo fee qimasee qafee mariqau.

<sup>5</sup> Amannafa qaqfoofanoo Moodeekaifa sia minara aqoori saunu araseenoo mina amooqinai, miqufanoo mifa minara firaaqoo aranaqanau.

<sup>6</sup> Miqi marufanoo mifa mina paqurimmaseenoo qafuofanoo Moodeekaifa Yuda maqannaasi fasiqa marunara mifa Moodeekaina mandaikamma amaqarara irinai. Sia Moodeekaina kai fau miqinai. Amannafa Yuda maqannaasa Peereesia maqa maaqaki marusa aiqama naru taikarara oonu mafi irinai.

<sup>7</sup> Qisauqara taikasee qikunni ooqu qaara marasee 12 aukuanaki Seerkisisafa kinna marinai. Indaaruaqa uqoona auqu nisaana fee qimarunasaa Amannafa purimma fee qimaru sararana masee qafaqee qinai. Ya uqoonnanaki fee ya faasaanee Yuda maqannaasi kuridi nimaqara amiqira faasaana mariannoo fee. Miqi qufaqa misa sarara masee maaqimmasee paquriqau. Adara 12 uqoona fee qimaru uqoonnanaki 13 faasaana Amannafa misa kuridi nimaqaannoo.

<sup>8</sup> Amannafa oonureenoo rakisirana qimaminoo qinai. Aiqama anee rakisi marianna maqa maaqaki maria fasiqa anaaseesa akaqausa sia maaqoo mariasa naanna raidaqa, misa mooka uqanna midammia. Minara anee misa afu kai niqafee marinaqa marifanoo mifa sia ani faqa ani maqa maaqa faqa dadaaqaannoo.

<sup>9</sup> Minara rakisirafa ani aidinana anee aiqama faiqi anaaseera qinaqa mi fasiqa anaaseesa kuqa naruqa. Anee miqinaqa qinee maqee aniara kuqaa idaqa qinee siruaa munnimma moomoo uqanna 50 mirioonna anee munnimma afeedi marianna maaganaki uqaisaaura. Miqimmaseenana anee minannai kaamaanna saika mareenaranoo.

<sup>10</sup> Kinna fannoo nari sandufauqa qimasainnana afeekaikiani feera mina rinnasaa mina akara maridanoo. Kinna fannoo mi ufana iriseenoo asaukukinaa rinna radukuseenoo Amannana Ammeedatana amaaku Akakana atikinaana Yuda maqannaasa namuqaa aminau.

<sup>11</sup> Amiseenoo kinna fannoo Amannana maaqi qimasee qimaminau sia munnimara iria, anee nana ainainee maa fasiqa anaaseesaki auqararee iridane kaqi auqaa.

<sup>12</sup> Indaaruaqa uqoona 13 faasaana Amannafa kinna kuskusauqa aiqama naarofaqa aniqau. Aniroofanoo mifa nari ufauqa qimanniminaqa akara ruaqera naarofaqa aniqau. Misa anireeqa aiqama moodaa moodaa maqannaasa nari ufakiqari akara ruma nimaqau. Miqimmasoofanoo mifa mi papiqana aiqama rakisirausa faqa aiqama kaammnauqa faqa aiqama kiapausa faqa nimaqanau. Aiqaqa papiqa Seerkisisana rinna saaqaraa akara marinau. Kinna fannoo nari uqanna papiqa akarariifoo qirana kooroinau.

<sup>13</sup> Pasa maraqa nu fasiqausa mi pasausa mara maree kinna maqa maaqakinai aiqama maqanna rakisirausa nimaqau. Aiqaqa pasauqa kiaqa maaqi qinoo marinau Adara uqoona 13 faasaana innee Yuda maqannaasa aiqama kuqa naruqee qinoo marinau. Kumaara fasiqa anaasee faqa asooqauqa faqa faiqi anaaiqauqa faqa aiqama mi faasaana kai naru taikaaqa qiqau. Sia misara qimudao qiaqa aiqama naru taikaseeqa misa ainainauqa faqa maraqa.

<sup>14</sup> Rakisirausa aiqama oosana oosana fasiqa anaasee aiqama maqa maaqaindari ani mariasa nifusaa mi pasana asaana ruaqa. Asaana rifaqa iriseeqa mi faasaanafa kambiqainaqa misa Yuda maqannaasa narirara deedaqaa.

<sup>15</sup> Pasa maraqa nu fasiqausa misa kaunna qimasee pasa maree aiqamai fifainiqau. Misa maa ufana faqa Susaa maqusaki faiqi anaasee iriaqera qimannimiqau. Kinna faqa Amannafa faqa miqanda kai nimuqusa amiqi marufaqa oogu faaqee maridaqa uainna nee mariqau. Miqi marufaqa Susaa maqusakinaa fasiqa anaasee mi ufana irisee tautufanoo misa irirafa furufara uqanna minau.

## 4

### *Moodeekaifa Eesta nammarinara nari dadaaqianifeera qimaminau.*

<sup>1</sup> Moodeekaifa mi ufana iriseenoo firaqoo qimudao qinau. Mina amuqusa ummaara uqanna roofanoo nari qamunna rakeekaammeeqee aqinau. Miqimmaseenoo mifa soofara qamunnanda rumbaseenoo akiqaki danda afaqa teeqinau. Mifa miqimmaseenoo maqusaki oorureenoo firaqoo faqa rumasee ikiraqanau.

<sup>2</sup> Mifa kinna maaqaki kooqiki oonureenoo mifa sia maaqaki keeqanau. Faiqi kinna maaqaki keeqararee qinausa sia soofara qamunna afisu mareeqa keeqefaranoo.

<sup>3</sup> Mikari misa kinna ufa aiqama maqa maaqaki qimannimufaqa Yuda maqannaasa irufanoo naundura ummaara roofaqa firaqoo faqa riqau.

Misa sia narana naqau qimudao qira idi ramasaídaqa iki faafau qimariqau. Yuda maqannaasa moomoo soofaara qamunna rakeekaa irana afisuseeqa dandaki noorindari aqufiqa mariqau.

<sup>4</sup> Eesta nammarina ainainira manaqauqa faqa minasaa rakisi maru fasiqausa faqa Moodeekaifa auqoo oosanara qimamufanoo Eesta nammarina amuqusa firaaqoo uqanna ummaara ranau. Mifa Moodeekaifa qamunna anaqirana raipaqusee amiqirana afisuani feera amaqaanau. Amaqa-soofanoo Moodeekaifa akoo marara qanau.

<sup>5</sup> Miqufanoo Eesta nammarifa Atakana aaranau. Atakafa manaqauqasaa rakisirafa marufanoo kinna fannoo Eesta nammarina ainaini-ani feera utaaqama amaqaanau. Miqufanoo Eesta nammarifa Moodeekaina oosana paquriani feera nana oosanaree mifa mi ainaina auqeenoo fee qimaseenoo Akatana aiqanau.

<sup>6</sup> Akatafa suqira maqusaki keeqafufanoo kinna firaa maaqa kooqiki oonu Modekaina paqurinau.

<sup>7</sup> Oonu paqurimma soofanoo Moodeekaifa aiqama ainaina nariki kambiqoonara Akatana qimaminau. Amanafa faiqi Yuda maqannaai aiqama kuqa narusaifanoo mina akiqara kinna fannoo munnimma uqeemaru maaqaanaki mifa naqumma munnimmee uqaaninnanara faqa qinau.

<sup>8</sup> Moodeekaifa Amannana ufa maru pasausa kinaana moo maraseenoo Akatana aminau. Mi pasanaki faiqi anaasee Yuda maqannaasa aiqama kuqa naruaqee qinoo marinau. Moodeekaifa Akatanara mi pasana mara maree Eesta nammarifinnai munusee aiqama ainaina kambiqaaninnara qimamianne qinau. Akatafa Eesta nammarina qimaminanoo Eesta nammarifa kinninnai oonureenoo mifa Yuda maqannaara qimudao qimasee amuqusiani feera qimaminau.

<sup>9</sup> Miqi qufanoo Akatafa oonu Eesta nammarina qimaminau.

<sup>10</sup> Qimamufanoo Eesta nammarifa Moodeekaina qimamiani feera moo ufa Akatanasaa uqanau.

<sup>11</sup> Mifa maaqi qinau sia amana qinee oonu kinna qafaanauranoo. Kinna fannoo faiqi moo aarainanoo mifa amana mina maaqaki keeqaannoo. Sia riri aarainanoo narí iriranasaa keeqainnana misa kuqamma arifaranoo. Moodaa aana kai mi sandufana aiaaqararafa maridanoo. Faiqi moo fannoo kinna innannai kaqi fifau oonurainanoo kinna fannoo narí koor saununnai mina afaaqai mundusainafa mifa sia kuquannoo. Aiqaama kinna ainainira faiqiuqa faqa kinna rakisi maru maqa maaqaanaki maru fasiqausa aiqama mi sandufanara iridaqa. Minara moodaa uqoona taikarara imarufanoo kinna fannoo sia qini daaranau.

<sup>12-13</sup> Moodeekaifa Eesta nammarina ufa qimamufanoo iriseenoo mifa narí maaqi qimaseenoo qimaminau. Kuqaa anee kinna maaqaki mariananoo anee sia Yuda maqannaasakiqari aneennara kinna maaqaki marunannara sia ummaaraki kuquanauree qimasee iria.

<sup>14</sup> Anee miqinna kari aneenna oo qumarainanoo akaqa ainaiana innisaimbaqa dadaaqirafa kambiqaanoo. Anee kuqinaqa ani ainaina aiqama kuqu taikeefaranoo. Minara innisaimbaqa sia iridaqa. Manda aukwana innisaimbaqa Yuda maqannaasa dadaaqirara anee kuinnaika mafuananoo.

<sup>15</sup> Eesta nammarifa Moodeekaifunnai kaifaa maaqi qimasee ufa uqanau.

<sup>16</sup> Anee oonu Susaa maqusaki aiqama Yuda maqannaasa suqu uqasee qimannimia innee qaarammoo faasaana faqa eendaki faqa narana faqa nammarifaqa auramasee sia naaqa. Kaifa qinee faqa eeqa ainainira manaqauqa faqa miqi kai iqa narana faqa nammari faqa auramasee sia

naanauranoo. Miqimmaseeqa inaaqianna qinee kinna innai fuanauranoo. Kaqi qinee sandufa rukiaanauranoo. Qinee miqimmasee kuquananoo sia ufa mariannoo kaqi qinee kuquanaranoo.

<sup>17</sup> Moodeekaifa Eesta nammarina ufa iriseenoo mifa kinna maaqa kooqi uqaseenoo oonureenoo Eesta nammarifa qimamundee maseenoo auqanau.

## 5

*Eesta nammarifa kinna faqa Amannana faqa firaa oomaqaki aniaqeera naaranau.*

<sup>1</sup> Eesta nammarifa qaarammoo faasaana narana auranau. Mifa qaarammoo faasaanasaa kuinna qamunna afisu mareenoo kinna maaqa maru uqusanaki keeqanau. Kinna firaa oosiranaki maruna aaqa oorufinai. Kinna fannoo nari siaqasaa ooqu faaqeeidanoo kooqinni afu maqanau.

<sup>2</sup> Kinna fannoo Eesta nammarifa maqusai kikiqinoo marufanoo qafuofanoo mina amuqusa fannoo Eesta nammarinara amiqufanoo mifa kooru saunu uaqee mariiu asaukuna afaaqai mundinai. Miqufanoo Eesta nammarifa mina aaqa anireenoo mi saununa ati auqanau.

<sup>3</sup> Kinna fannoo qinai, kuinna Eesta nammarini ani nanaree aididanoo fee. Qinee ani eeqa firaa maqa maaqa dinni ati ani amianeera aidi marinaqa qinee ani amianaara.

<sup>4</sup> Miqi qufanoo Eesta nammarifa maaqi qinai. Rakisirafa amanee anee faqa Amannafa faqa maqee eendaki firaa oomaqaki anifaree.

<sup>5</sup> Miqi qufanoo kinna fannoo mi ufanara eedoo qimaseenoo mifa Amannanara kai kaqi anirinaqa anindiri Eesta nammarifinnai fuanee qinai. Miqi qimaseeqa kinna faqa Amannafa faqa miqanda Eesta nammarina oomaqai fiqau.

<sup>6</sup> Misa oonu maridaqa uainna nee marufanoo kinna fannoo Eesta nammarina iramirino qinai. Anee nana ainainaree aidinnanara qinaqa amia. Aiqama ainainara anee irainnanara qinee eedoo qianaara. Anee qini maqa maaqa dinni ati mararee qinaqa qinee ani amianana anee rakisinnaranoo.

<sup>7</sup> Kinna fannoo miqi qufanoo Eesta nammarifa kinna nari qimaminoo qinai, qinee maaqi qimasee ani iramiridaqa.

<sup>8</sup> Anee qiniara firaaqoo asasinana qini irara ufara faqa asasinaga duna qinee moo oomaqa deedaqamma saanaqa anee faqa Amanafa faqa ani naaqa. Nee marifaqa miqoo qinee eeqa didirana ani qimamianaauranoo.

*Amannafa Moodeekaina arira ufa tipundaarinai.*

<sup>9</sup> Amannafa narana neeneeuqooqari amuqusa amiqufanoo firaaqoo asasinai. Miqimmaseenoo oonuree qafuofanoo Moodeekaifa kinna maaqa kooqi aaqa ooqufaaqee marinai. Moodeekaifa maridanoo Amannana qafamaseenoo sia findifi amandanai. Miqufanoo Amannana firaaqoo arana qanai.

<sup>10</sup> Amannana aranaqarafa suka uqanna qoofanoo mifa nari amuqusa muqufiseenoo mifa sia moo ainaina auqanai.

Mifa nari maaqai oonureenoo nari aqoondiqa naarooafaqa aniroofanoo nari anaqa Seereesa nammarina misa faqa mariani feera qimaminai.

<sup>11</sup> Misa maaqaki aniroofanoo Amannafa misa nifusaa nari auqu uqeeranai. Mifa nari munnimma moomoo marunara faqa umiasana faqa mina faiqi namu akoonaiqiuqa moomoo marunara faqa qimanniminai. Kinna fannoo mina firaa saika faqa firaaq auqu faqa amiqoonara qimanniminai. Qimannimufaqa kinna oofisaauqa akaqausa mina ameemaanai mariqau.

<sup>12</sup> Amannafa kaifaa maaqi qinau, kuinna Eesta nammarifa moo firaa oomaqa qinindi faqa kinnaindi faqa kai suqanau. Mifa sia moo fasiqa aaranau. Mifa maaqi qinau duna maaqandara kaifaa mina faqa oonu narana naaqee qinoo.

<sup>13</sup> Qinee Moodeekaina qafaunanoo mifa Yuda maqanna fasiqa maridanoo. Mifa kinna kooqiki ooqufaagee marifanoo qini qimuqusa ummaara raifaqa qinee mi amiqira ainainausara fifau ainainee qimasee iridaqa.

<sup>14</sup> Seereesa nammarifa Amannana anaqa mifa nari aqoondiqa faqa misa maaqi qimasee mina qimamiqau. Anee sia minara iria. Faiqi qimanimifaqa misa kisaqa saqari 26 mita amana rakiqasee duna kananaana oonu kinna iramirisee Moodeekaina diriaqa. Anee miqimma sainanoo ani amuqusa amiqinana anee oonu narana naa. Amannafa mi ufanara اساسمaseenoo faiqi qimannimufaqa misa Moodeekaina dirifandinn a saqarina rakiqau.

## 6

### *Kinna fannoo Moodeekaina uriqarara auqu aminau.*

<sup>1</sup> Miq u eendanaki kinna fannoo sia faiqanau. Minara mifa mina maqa maaqaki aiqama ainaina kambiqoonara akara rumaqoo papiqanara maree minisaifaqa misa minaki akara ufa qafaagee qinau.

<sup>2</sup> Minisoofaqa misa Biktana faqa Teereesaana faqa ufa asaana rumasee qafoofaqa miqanda kinna maaqa oosiranauqaki rakisi mariqau. Mi fasiqa qanda kinna kuqa arira aanara randee mariqau. Randee marufanoo Moodeekaifa miqanda kukeeqara irirana qafamaseenoo miqanda koota nimirau.

<sup>3</sup> Minara rakisirafa qinau, innisaimbaqa nanee moo amiqira ainainannai Moodeekaifa auqai oosana akiiqara amianauree. Miqi qufaqa faiqi maaqi qimasee mina qimamiqau, innisaimbaqa sia moo ainaina mina amiqa.

<sup>4</sup> Kinna fannoo misa iramirinoo qinau, qini oofisaauqa mi maqanaki mariiaafanoo fee sia fee. Maqee Amannafa kinna irara anidanoo, mifa Moodeekaina saqari rakiqasee deedaqamma qaanasaa diriaqeera qimamirara anidanoo. Minara Amannafa nari uqanna kinna maaqa mari uqusanaki keeqarara anidanoo.

<sup>5</sup> Ainainira faiqiuqa mina qafamaseeqa kinna qimamiqa qiqau, Amannafa ani maaqai maridanoo ani afeesidanoo. Mifa ani qafarara maridanoo ani afeesidanoo. Miqi qufanoo kinna fannoo qinau mina afiqee maaqaki uruaqee qinau.

<sup>6</sup> Amannafa maaqaki ooruroofanoo kinna fannoo qimaminoo qinau, qinee faiqi moo firaa auqu amirara iridaqa. Qinee sia iridaqa nanee moo amiqira ainainannai fee mina andeeqa amaqaanauree. Anee iria, qinee naqaa fee ianauree qufanoo Amannafa nariara maaqi qimasee oonu mafi irinau. Aqbee kinna fannoo yana miqimma amaqraree qidanoo fee sia moo fannoo maridanoo qinee kai maridaqa.

<sup>7-8</sup> Amannafa miqi qimiriseenoo kaifaa rakisirana nari maaqi qimasee qimaminau. Aneenna afisi marianna qamunnana minisee mi fasiqana afisu amaqa. Anee qoosasa uqeemaria sandiriqana faqa bakarainna faqa amiqimmasee afaqa auqusee aneenna qoosaa uqaa. Miqimmaseenana kaifaa qoosa akiiqa faqa afaqa auqusainanoo mifa kinna qoosa fee qirana koorooiani.

<sup>9</sup> Anee aneenna oofisaauqa kinaana moo misa uriqararana mara uqasainanoo mifa ani qamunnannai mina afaqa auquani. Miqimma sainanoo

mi fasiqafa qoosasa ooqu marifinanoo oofisaa fannoo mina afiqeenoo firaa suqira maqusaki fuani. Afiqee fidanoo mi oofisaafa maaqi qimasee nammeera qiani, maa fasiqana qafaaqa kinna fannoo mina firaa auqu amiseenoo mina amiqimma amaqaenoo.

<sup>10</sup> Kinna fannoo mi ufana iriseenoo Amannana qimaminoo qinau anee kai kaqi oonu qamunna faqa qoosa faqa maraseenana qini saika faiqi Moodeekaina Yuda maqannaasi fasiqa firaa auqu amia mi fasiqafa qini maaqa kooqiki ainaini marifa maridanoo. Aiqama ainaina maqee aneenna qiannandee masee auqaa.

<sup>11</sup> Miqi qufanoo Amannafa iriseenoo qamunna faqa qoosa faqa maraseenoo Moodeekaina afaaqa auqinau. Auqusoofanoo Moodeekaifa qoosasa ooqu marifufanoo Amannafa qafamaseenoo suqi maru maqusanai afiqee finau. Afiqee fidanoo Amannafa nammeera qimasee maaqi qimasee faiqi anaasee qimanniminau. Maa fasiqana qafaaqa kinna fannoo firaa auqu amiseenoo amiqimma amaqaenoo.

<sup>12</sup> Miqi qimasoofanoo Moodeekaifa kaifaa anirandee kinna kooqinni finau. Fufanoo Amannafa asaurirana maraseenoo aundura ummaara-roofanoo mifa oorisa itita mareenoo kaifaa anirandee narí maaqai finau.

<sup>13</sup> Oonureenoo mifa moo anaasee faqa narí aqoondiuqa faqa aiqama ainaina minaki kambiqoonara qimanniminau. Mi anaaseefa faqa mi aqoondisa faqa irirana firaana faqaasa maridaqa misa mina maaqi qimasee qimamiqau. Maqee ani afeeka faqa ani auqu faqa quminanoo Moodeekaifa ani uriaaqaranoo. Mifa Yuda maqannaafa marinara anee sia mina aana titara aana maridanoo, anee ummaara kai mareennaranoo.

<sup>14</sup> Misa ufa qida marufanoo kinna ainainira faiqiuqa aniraqau. Misa Amannana kai kaqi afiqee Esta nammarina oomaqai firara aniqau.

## 7

<sup>1-2</sup> Minara kinna faqa Amannafa faqa kaifaa oonu Estaa nammarina faqa narana naqau. Nasmaseeqa misa uainna nammari naida marufanoo kinna fannoo Estaa nammarina iramirinoo qinau, kuinna Esta nammari ani nana ainainaree aididanoo fee anee qinaqa qinee ani amianauranoo. Ani aidinaqa qinee eeqá maqa maaqa faqa ani amianauranoo.

<sup>3</sup> Qufanoo kuinna Estaa nammarifa qimaminoo qinau. Rakisirafa anee kuqaa anee qiniara aidinana qini amiqimma qimaqararee qimaseenana kaqi miqia. Qinee ikoo eeqá faiqi anaasee faqa kuqirara qaidanoo.

<sup>4</sup> Faiqi moo fannoo qini faqa qini faiqi anaqasee faqa kuqa nariraree qimasee doo ufa rumbaqaifanoo maridanoo. Misa maasa aiqama mandaikamma qimaqararee qidaqa. Misa maasa mandaikamma qimaqasee rumbara saika maasa qimisee fifau ainainira fasiqa anaaseeki-aqee qifaqa qinee sia ufa qianauranoo. Qinee ikoo ani ummaara amirara qaifaqa misa maasa taikararee qianara minara qinee kooroidaqa.

<sup>5</sup> Kinna Serkisisafa mi ufana iriseenoo kuinna Estaa nammarina iramirinoo qinau. Ya manda fasiqafee sia miqirara rufieenoo fee, yaa fee mi fasiqafa maridanoo fee.

<sup>6</sup> Qufanoo Estaa nammarifa narí qimaminoo qinau. Qinee Amannanara qidaqa. Mifa manda fasiqa maasa namuqaa maridanoo maasa darirara deedaqidanoo. Qufanoo Amannana firaqoo aindiri roofanoo rufianau.

<sup>7</sup> Kinna fannoo mi ufana irufanoo arana qoofanoo uainna neneuna minniseenoo aqoosai narí afuqai ooqufinau. Ooqufufanoo Amannafa kinna ooqufuna qafamasee mifa maaqi qimasee irinau kinna fannoo qini daruanoo, qimaseenoo Amannafa maaqaki maridanoo kuinna Estaa nammarifa

minara qimudao qimasee kinna qimaminanoo sia mina mandaikamma amaqaanifeera iree marinau.

<sup>8</sup> Kinna fannoo qafuqaindari kaifaa oonurandee narana nee maruqoo anireenoo mifa Amannana qafuofanoo Estaa nammarifa ooqumarifida narana nee maru qaindanasaa faiaqee ufanoo qafamaseenoo tautinau. Faiaqee idanoo Amannafa minara qimudaoo qianifeera iree marinau. Iree marufanoo kinna mina qafamaseenoo faaqa rumasee qinau, aqbee maa fasiqafa kuinna qini maaqaki qini qifusaa mandaikamma amaqaararee qidanoo fee, qimaseenoo kinna fannoo qufaqa misa kaunna qufaqa qamunnannai Amannana akiiqa kinna fannoo (faiqi kuqa narirara rumba nimaqee marundeemmasee rumba amaqaanau).

<sup>9</sup> Ainainira faiqiuqa moo auqu Aboonafa maaqi qinau, iridafee Amannafa narí maaqa adeedi narí rakiqoo pausafa mina kisaqa fannoo 20 mita marinau. Mifa Moodeekaina minasaa diriraree qimasee rakiqanau. Kinna Moodeekaifa ooqai ani dadaqufaqa namuqaauqa sia ani kuqa ariqau. Qufanoo kinna fannoo qinau, innee Amannana narí mi pausanasaa dirisaifanoo kuquani.

<sup>10</sup> Qufaqa misa Amannafa Moodeekaina diriraree qimaseenoo rakiqoo pausanasaa narí diriqau. Misa miqimmasoofanoo kinna aranaqarafa taikanau.

## 8

### *Kinna fannoo Yuda maqannaasa namuqa faqa rakuaqera qimanniminau.*

<sup>1</sup> Mi faasaanna kai kinna Serkisisafa Yuda maqannaasa namuqaa Amannana maaqa faqa aiqama mina ainaina faqa kuinna Estaa nammarina aminau. Amisoofanoo inaaqianna Moodeekaifa qini moodaa fidika maridanoo qufanoo kinna fannoo Moodeekainara qufanoo aiqama kari ani kinna qafee marinau.

<sup>2</sup> Kinna fannoo Amannafa unnai narí rinna maraseenoo kaifaa narí asauku amukaki uqaqoona Moodeekaina aminau. Mi rinnafa kinna nambaqa faqaafa marinau. Marufanoo Estaa nammarifa Moodeekaina mara uqasoofanoo Amannana aiqama ainainasaa rakisi marinau.

<sup>3</sup> Rakisi marufanoo inaaqianna Estaa nammarifa kinna marunnai oonureenoo mina aikuki aqufinoo maridanoo iki raqee marinau. Mifa kinna qimaminanoo mifa faiqi mi manda oosanna auqeefoora rafaqafu sainaqa Amannafa Akakana atikinaafa Yuda maqannaasaki auqaararee qimasee ufa rumboondee sia iaqa.

<sup>4</sup> Kinna fannoo narí kooru saunu Estaa nammarinasaa mundusoofanoo findifinoo qinau.

<sup>5</sup> Rakisirafa anee qiniara aidinana qini ufa irinanoo amiqinana ufa uqasainanoo fifaininaqa misa sia Amannana Ammeedatana amaaku ufa afaqaqa. Amannafa aiqama Yuda maqannaasa fasiqa anaasee ani maqa maaqaki mariasa aiqama naru taikaqee qimaseenoo qimanniminau.

<sup>6</sup> Qinee mi mandafa qini faiqi anaaseeki sia kambiqaanifee qimasee iridaqa. Misa qini moodaa fidikauqa kuqa narusaifaqa qinee naqi fee masee amiqiga marianauree.

<sup>7</sup> Qufanoo kinna Serkisisafa Estaa nammarina faqa Moodeekaina faqa maaqi qimasee qimanniminau. Iridaqee qinee iriafananoo Amannafa Yuda maqannaasa mandaikamma nimaqaararee qufaqa minara qinee mina saqarisaa diriseeqa mina aiqama ainaina Esta nammarina kai amiqa.

<sup>8</sup> Papiqa qini duqusaa akara rumasee qini nambaqa minasaa uqaqaana mina kai sia mara aquanauranoo. Inneevara nana ufa fee Yuda maqannaasara akara ruani qimasee kaqi akara ruaqa. Akara rumaseeqa inneevara mi papiqanasaa qini duqu uqasee qini nambaqa faqa uqaqa.

<sup>9</sup> Misa miqimmasee Siwa uqoona 23 faasaana Moodeekaifa aiqama kinna kuskusauqa naarooafa aniqau. Aniroofanoo misa ufa qimanimufaqa misa mi ufausa papiqaki akara riqau. Misa mi pasana Yuda maqannaasa uriqararasa faqa kiapasa faqa aiqama oofisaauqa faqa 127 maqa maaqaki marusa faqa India maqa maaqaki oosana arasee Itioopia maqa maaqai dinni ati oonuroofanoo misa akara ruma nimaqaqau. Misa mi pasana aiqama mi maqa maaqausaki marusa ufakiqari faqa Yuda maqannaasa ufakiqari faqa akara riqau.

<sup>10</sup> Moodeekaifa misa kinna Serkisisana auqusaa pasa akara rumasee mina nambaqa faqa mi pasanasaa uqaqeera qimannimino. Mi pasana maree firaree qu fasiqausa misa amiqira qoosa kinna ququsakinaana kaaqa sandee maruna maree minisee minasaa oogu marifufaqa pasauqa maree aiqama maqusakiaqa fifainiqau.

<sup>11</sup> Pasaki maaqi qimasee akara riqau. Kinna fannoo qidanoo, Yuda maqannaasa misa aiqama maqusakiaqa mariasa misa nari faiqi anaasee namufaqa nariraree qu fasiqausa misa ruqaummafi nari faqa naruqa. Moo maqusakinaa fasiqauqee moo maqannaasi fasiqauqee misa mandaikamma nimaqararee qusa, Yuda maqannaasa aiqama ruqaummafi misa naru taikasee misa aiqama ainaina mareefaranoo.

<sup>12</sup> Mi faasaana Yuda maqannaasa aiqama Peeresia maqa maaqaki mi ainainausa auqee faranoo. Misa 13 faasaana Adara uqoonaki auqee faranoo.

<sup>13</sup> Misa kinna maa sandufa aiqama fasiqauqa aiqama maqa maaqaki mariasa qimannimiaqa. Qimannimi marifaqa Yuda maqannaasa mi faasaanafa anirainafa nari namuqaa faqa rakirara deedaqifaranoo.

<sup>14</sup> Kinna fannoo qufaqa faiqi ufa maree fusa qoosasa oogu mari kai kaqi sandee akaqa maqusakiaqa fiqau. Susa firaa maqusaki mi ufana oosana arasoofanoo aiqamai fifainino.

<sup>15</sup> Misa kinna qamunna eekara faqa panoona arirana faqa Mood-eekaina afisu amaqaqau. Afisu amaqasee dirindaasi arira qamunna moo marasee mina aku amaqaqau. Aku amaqasee inaqianna misa kinna kooraa qafee firana amiqira afaqa auqirana akiaqa afisu amaqasee afaqa auqusoofanoo mifa kinna maaqakiqari raudee maqusai oogu finino. Ooquroofaqa Susa firaa maqusakinaa fasiqa anasee mina qafamasee firaaqoo faaqaridaqa asasiqau.

<sup>16</sup> Yuda maqannaasa nimuqusa amiqi uqanna ufaqa misa nimuqusa asoarana faqa mariqau. Maridaqa misa firaaqoo asasidaqa nariara maaqi qimasee iriqau. Maas doo uriqarama fiqa sia amana kaifaa oorudupianauranoo.

<sup>17</sup> Aiqa maqa maaqaki faqa maqusaki faqa Yuda maqannaasa kinna ufa marasee moodaa faasaana utaaqamasee misa firaa narana naidaqa minara asasi mariqau. Asasi marufaqa moomoosa akaqa fasiqauqa Yuda maqannaasara rufisee misaki ootupaqau.

## 9

*Yuda maqannaasa nari maqannaasa mandaikamma nimaqaqau.*

<sup>1</sup> Mikari Adara uqoona 13 faasaana aniroofanoo indaaruaqa kinna fannoo qinno, mi faasaana kai namuqaauqa Yuda maqannaasa



mandaikamma nimaqasee naru taikeefaranoo. Miqi qufaqa Yuda maqannaasa findifufaqa misa rafaafufusee aiqama naru taikaqau.

<sup>2</sup> Yuda maqannaasa kinna fannoo rakisi maru maqusausakiaqa faqa maqa maaqanaki marusa misa namuqaauqa misa faqa rakirara anufaqa rakirara deedaqigau. Aiqama fasiqa anaasee aiqama tinaindaraasa Yuda maqannaasara rufiasee misaki sia moo ainaina augeefaranoo.

<sup>3</sup> Aiqama maqa maaqakinaa kiapausa faqa kaammannaauqa faqa aiqama kinna ainainasaa rakisi marusa faqa Yuda maqannaasa dadaaqigau. Misa Moodeekainara rufiasee miqigau.

<sup>4</sup> Aiqama fasiqauqa kinna rakisimaru maqa maaqanakinaasa irufanoo kinna fannoo firaa afeeka faqa uriqarara auqu faqa Moodeekaina aminau. Amisofanoo mina afeeka aiqama kari uriqaranoo uqanna marinau.

<sup>5</sup> Marufaqa Yuda maqannaasa nari namuqaauqa nariqau. Misa kisaqa paipanannai rakidaqa nariqa namuqaauqa naru taikaqau.

<sup>6</sup> Susa firaa maqusaki Yuda maqannaasa 500 fasiqa kuqa nariqau.

<sup>7-10</sup> Amannana faiqi namu qisaukuqara taikasee 10 mariqau. Yuda maqannaasa namuqaauqa nuqu maaqimminoo maridanoo. Parasadataafa faqa Darfoonafa faqa Asbatannafa faqa Pooratanafa faqa Adarianafa faqa Aridatanafa faqa Parmastanafa faqa Arisainafa faqa Aridainafa faqa Uaisa-taanafa faqa minamusa ainaina kai Yuda maqannaasa sia maraqau.

<sup>11</sup> Mi faasaana kai Yuda maqannaasa naqumma fasiqa Susa maqusaki narunara kinna qimamiqau.

<sup>12</sup> Marikinoo kinna fannoo kuinna Estaa nammarina qimaminau. Yuda maqannaasa 500 fasiqa Susa maqusakinaasa kuqa nariaafoo qinau. Misa Amannana faiqi namu qisaukuqara 10 faqa kuqa nariqau. Qinee iruna misa akaqa maqa maaqaki moomoo fasiqa faqa kuqa naria. Anee maqee nana ainainee akaqa ainaina mararee qinaqa, qinee amana ani amianauranoo. Esta anee nana ainainaree aidinna ainaina kaqi maraa.

<sup>13</sup> Estaa nammarifa kaifaa kinna qimaminoo qinau. Rakisirafa ani aidinana duna Susa maqusaindaraa Yuda maqannaasara qinaqa namuqaauqaki duna faqa maqee iandee kai iaqa. Misa Amannana faiqi namu qisaukuqara taikasee 10 mariasa mi faakannanasaa diriaqa.

<sup>14</sup> Doo kinna fannoo misara miqiaqee qimaseenoo mifa mi ufana Susaa maqusaindaraa fasiqauqa unnai afeeqoofanoo fufaqa misa Amannana faiqi namu qisaukuqara taikasee 10 marusa faakana rakiqoonasa dirimar-ufaqa aiqama fasiqauqa qafaqau.

<sup>15</sup> Adara uqoona 14 faasaanasaa Susa maqusai maru Yuda maqannaasa kaifaa ruqaumma fufaqa 300 fasiqa mi maqusanaki kuqa nariqau, narusee sia misa ainainauqa maraqau.

<sup>16</sup> Yuda maqannaasa akaqa maqa maaqaki marusa misa faqa moodaanakika mafiq afeekaika masee misa narusee misa amiqimmasee marifaranoo. Misara nikooqee maru namuqaasa 75,000 fasiqa anaasee kuqa nariqau. Narusee sia misa ainaina maraqau.

<sup>17</sup> Mi rakirafa maqa maaqaki 13 faasaana Adara uqoonaki kambiqanau. Kafa 14 faasaana misa sia nari namuqaa nariqau. Mi faasaana misa idooaidaqa firaa qoomaqa sakasee naidaqa firaaqoo asasi mariqau.

<sup>18</sup> Misa miqi marufaqa Yuda maqannaasa Susaa maqusaki marusa misa 15 faasaanara idooaidaqa اساسا faasaanee qimasee utaaqau. Misa namuqaauqa 13 faasaana faqa 14 faasaana faqa narusee 15 faasaana misa sia rakiqau.

<sup>19</sup> Minara kai Yuda maqannaasa kaqikaa maqusauqa uqusa sia auqiranakiaqa mariusa misa Adara uqoona 14 faasaana firaa oomaqa naidaqa ainaina narami naramira faasaanee qimasee utaaqau.

*Misa firaa oomaqa auqureeqa Purimma oomaqa fee qimariqau.*

<sup>20</sup> Moodeekaifa mi faasaana aiqama ainaina auqoo ainaina akara ru-maseenoo Yuda maqannaasa nianai marusa faqa adeedi marusa faqa kinna Serkisisafa rakisi nimaqee maru maqa maaqanakinai marusa nimaqanau.

<sup>21</sup> Misa Adara uqoonaki 14 faasaana faqa 15 faasaana faqa aiqama aukuanaki asasira faasaana utaaqaaqee qimaseenoo qimanniminau.

<sup>22</sup> Mi qaara faasaana Yuda maqannaasa nari maqannaasa niaqau. Mi uqoonnaki kai misa naundura ummaara reereufa faqa aiaaee qiqiufa faqa taikoofaqa Yuda maqannaasa nimuqusa amiqinau. Miqufanoo Moodeekaifa mi qaara faasaanara firaa oomaqa sakasee aqoondiufa faqa kudi fasiqauqa nimiaqeera qimanniminau.

<sup>23</sup> Miqi qimasoofaqa Yuda maqannaasa Moodeekaina ufa afaqeeqa aiqama aukuanaki mi oosannana auqaidaqa asasi mariqau.

<sup>24</sup> Ooqai Amannafa Ameetatana amaaku Akaakana faiqi anaiqi maridanoo mifa Yuda maqannaasa namuqaakamma nimaqaseenoo mifa misa aiqama kuqa nariraree qimaseenoo satu sararidanoo misa narira faasaanara randee marinau. Misa Heeburu maqannaasa ufakiqari satura rarisaidanoo fee qimasee auqu ree mariqau. Amannafa aiqama Yuda maqannaasa naru taikaani qimasee ufa rumbee marinau.

<sup>25</sup> Ufa rumbee marufanoo Estaa nammarifa kinna unnai oonuroofanoo kinna fannoo maaqi qimasee papiqa akara rinau. Ooqai Amannafa Yuda maqannaasa kuqa nariraree qinau, maqee nari kuqa aruaqa qufaqa misa mina diriseeqa inaaqianna mina faiqi namu faqa misa mi poosanasaa kai diriqa.

<sup>26</sup> Mi oosannara kai misa mi idooqara faasaana qandara maaqi qimasee auqu raqau. Purimma faasaanee qiqau. Misa purimma fee qimaru auquna oosana satu maridanoo. Misa mi oosanna auqaidaqa mi ainainausa misaki kambiqoonara oonu mafi irimariqau. Irimarufanoo Moodeekaifa misa unnai papiqa afeeqaseenoo misa mi faasaana idooaaqeera qimanniminau.

<sup>27</sup> Yuda maqannasa mina mareeqee nari faqa misa ninaiqi mara inaaqianna kambiqainausa faqa aiqama fasiqa minaki ani keeqainausa faqa sandufaika maqoofanoo marinau. Aiqaama aukuaana misa mi qaara faasaanafa aniroofaqa misa Moodeekaifa qufanoo mi ainainafa kambiqoonara oonu mafi irimariqau.

<sup>28</sup> Misa maaqi qiqau aiqama Yuda maqannaasa moodaa moodaa oosana kasooaqee inaaqianna kambiqainausa faqa aiqama maqa maaqaki faqa aiqama maqusaki faqa maru fasiqa anaaseesa misa mi firaa masisa aqira faasaanara oonu mafi irisaidaqa aiqama aukuanaki miqoo kai idooaidaqa asasiaqa.

<sup>29</sup> Kuinna Estaa nammarifa Abiaina araauna Moodeekaisandiri miqanda Yuda maqanna qanda miqanda moo papiqa mi qaara faasaana masisa sararu ufana akara riqau mi oosannannai kuinna fannoo indaruqa papiqa Moodeekaifa nariara akara rumaqoona afeekaikinau.

<sup>30</sup> Miqanda mi papiqana uqasoofanoo Peereesiaa maqa maaqaki 127 (provinsaki) Yuda maqannaasa marunakinai papiqa maaqi qimasee akara rumasoofanoo fifaininau. Inni nimuqusa ireeda marinaqa innee amiqira ooqu marirana maraqa sia rakirafa maridanoo.

<sup>31</sup> Innee faqa inni ninaiqi mara kasooaqee kambiqainausa faqa innee afeekaikammasee inneeqa mariaqoo mi firaa masisa sararira faasaannana umaraaqa. Innee narana aurarana faqa nimuqusa ummaarara oosana afaqararana faqa iki raqarana faqa mi sandufana uaqeeufaqa qinee Moodeekaisa kuinna Estaa nammarisandiri maaqanda maa sandufana inni nimiqa.

<sup>32</sup> Estaa nammarina mi sandufana masisa sararira sandufauqa afeekaika masoofaqa misa moo papiqasaa akara rumasee uqaqoofanoo marinau.

## 10

*Kinna Serkisisafa faqa Moodeekaifa faqa firaa nuqu faqaa qanda mariqau.*

<sup>1</sup> Kinna Serkisisafa faiqi ooruku nammari afaiqara marusa faqa nari maqa maaqaki marusa faqa nifiqasoofaqa misa mifa rakisi maru maqanasa dadaaqira saika auqee mariqau.

<sup>2</sup> Aiqaama amiqira ainaina faqa firaa ainaina faqa kinna fannoo auqaidanoo mifa Moodeekaina firaa auqu amimarufaqa aiqama mi oosannara ufa qimariqau. Aiqaama mi ufana misa Peereesiaa maqannaasa faqa Midiannaa maqannaasa faqa kinna papiqaki akara riqau.

<sup>3</sup> Mi Yuda maqannaasa fasiqafa Moodeekaifa kinna Serkisisana namba 2 marinau. Yuda maqannaasa minara firaaqoo uqanna nidimarufaqa misa mina firaa auqu amimariqau. Amimarufanoo mifa misa dadaaqinaqa amiqimmasee ooqu mariaqeera ainaini marinau. Mifa miqimma sainaqa misa niku nisauku kasooaqee kambiqainausa misa sia moo ainainara rufieefaranoo amiqimmasee marifaranoo.

## IDI UFA Samma Papiqa

### 1

*-41 Indaaruaafa (Book 1)  
Idi Ufa 1-41*

*Kuqaa qira asasirafa.*

- <sup>1</sup> Manda oosana maree mariasa iriranamau sia  
fimariasa faqa Anutuna ufa rukiee mariasa faqa  
sia moodaanaki kimariasa faqa andeeqara  
oosanara fidiqaa imariasa faqa sia ooqu maria  
fasiqausa mi manda oosanausara rufiee  
mariasa misa asasiranaki maridaqa.
- <sup>2</sup> Miqi maria andeeqara fasiqa anaaseesa Anutuna  
sandufamau fuanara asasirana maridaqa.  
Misa faasaana faqa eendanaki faqa mi sandufana  
asaana rumasee irimaree fidaqa.
- <sup>3</sup> Miqi maria fasiqa anaaseesa saqari nammari aaqa  
ummaqirafara foora iqa mariasa maridaqa nari  
qanaa mina aqama amiqimmasee iraidanoo  
mina amanee sia kakasidanoo.  
Miqira fasiqa anaasee nana ainainee auqaafanoo  
anoonaikidanoo.
- <sup>4</sup> Manda oosana maree marisa sia miqidaqa.  
Misa anaaqmaarara foora ufai uqinoo fuaqaqidanoo.
- <sup>5</sup> Yaaweena ufa rukiee marisa Anutufa nari ufannai  
rumbannimaqaseenoo nari faiqi anaasee  
mariaqooqari nianai naaduma mara  
quqannisaannoo.
- <sup>6</sup> Yaaweefa andeeqarausea nirana mariranasaa  
rakisidanoo itita nimaqaidanoo.  
Manda oosana maree mariasa kuridiranaki maaniki  
fifaranoo.

### 2

*Anutufa utaaqamaqoo karaambaiqafa.*

- <sup>1</sup> Nanaree aiqama maqannaasa fifau suqufiqa manda  
oosanara tipundaarammasee aanoo qidee.  
Nanaree faiqi anaasee anoona siai ainainara  
tipundaaridee.
- <sup>2</sup> Misa karaambaiqauqa faqa misa rakisi nimaqee  
mariasa faqa Yaaweefa rakisi nimaqee marinakiqari quqasee kaqinni  
firara tipundaaridaqa.  
Yaaweefa utaaqamaqai rakisirana rakisi nimaqaranakiqari faqa quqasee  
kaqinni firaree qimasee tipundaaridaqa.
- <sup>3</sup> Misa maaqi qidaqa anifaqa maasa misa rakisi nimaqaranakiqari qeeqa  
qifaaqa idukua.  
Anifaqa misa qimaqimira ufa aqusaanee qidaqa.
- <sup>4</sup> Yaaweefa innaarunai marifa naanaidara qimasee misa oosana siai tipun-  
daariranara ataasa ataasa qimannimaqaidanoo.

- <sup>5</sup> Miqimmaseenoo narí aanooqiranakiqari aauqima nimaqasee narí idara fooira aanooqirana kiqari rufiarana nimidanoo.
- <sup>6</sup> Mifa maaqi qidanoo qinee Yaaweesa inni karaambaiqa marianinnana qeeqa naaquqara aaqana Sioona aaqanasaa quqeeqa.
- <sup>7</sup> Maqasaa karaambaiqa maaqi qinau, qinee Yaaweefa qima qimu ufana kooroo ianauree qinau.
- Mifa qiniara maaqi qinau.
- Anee qini qimaaku mariananoo maqee faasaana ani akausaikammiqa.
- <sup>8</sup> Anee qini iramirinaqa qinee aiqama maqannaasa ani amianauro.
- Aiqama maqa maaqa anindi kai mariannoo.
- <sup>9</sup> Anee qainna samu misa narusee nimudaani itairi nimaqeenaranoo.
- Anee qafeera foora misa rukamusee andaana rumaseennaranoo.
- <sup>10</sup> Innee maa maqanasaa karaambaiqauqa maa aauqira ufana iriaqa.
- Maa maqa maaqanakinaa rakisirausa maa irirana maaqimmasee iriaqa.
- <sup>11</sup> Innee naaquqee marinaqa Yaaweena ainaina mamaqaaqa.
- <sup>12</sup> Naindiri ree marinaqa mina oorinni niqoori saunu araaqa.
- Innee sia miqifanoo mifa aanoo qinaqa innee kuqifaranoo.
- Mifa itita qimaqaanifee qimasee mifinnai fimariasa asasi mariasa maridaqa.

### 3

#### *Kananaana dadaaqiani fee innaaru.*

- <sup>1</sup> Oo Yaawee qini namuqaa moomoo maridaqa, qini qiqaondikiqa mariusa quandaki qini namuqaakidaqa.
- <sup>2</sup> Misa qiniara maaqi qidaqa.
- Anutufa sia mina dadaaqiannoo fee qidaqa.
- <sup>3</sup> Miqi qimariafana oo Yaawee anee qini aiqama kari mandainainaki itita qimaqee marianafa mariananoo.
- Anee rakiranaki uriqararana qimiseenana qini paasoosirafa taikanoo marina kaifaa qimiananoo.
- <sup>4</sup> Qinee Yaaweena dadaaqianifeera aaree marunanoo narí naaquqara aaqanasaaqari iriseenoo dadaaqirana qiminoo.
- <sup>5</sup> Qinee maqasaa faiqaqee unaanoo aiqama eendirana Yaaweefa qini itita qimaqaidanoo.
- <sup>6</sup> Namuqaauqa nukudara foora qini fiqum fiqum iqa marianara sia qinee rufiidaqa.
- <sup>7</sup> Qini Anutu, qini Yaawee anireenana qini mandainainaki marunnana dadaaqia.
- Anee qini namuqaa aiqama aupurarana nimiseenana misa afeeka siai-saikamma sainaqa maridaqa sia qini daruaqa.
- <sup>8</sup> Oosana oosana ummaarakiki uriqararafa ani Yaawee finaindari anidanoo.
- Mifa narí faiqi anaasee amiqi amiqimma nimaqaani.

### 4

#### *Eeneemari dadaaqiani fee innaaru.*

- <sup>1</sup> Oo qini itita qimaqee marianna Anutufa qinee innaaru ufakiqari ani aaraanana qini ufa iria.
- Qinee manda qumaarakiki mariafannana anee dadaaqinau.
- Qiniara maqee qimudao qimisee qini innaaru qirana iria.
- <sup>2</sup> Kisaqasaa fee innee aasaandaana ufa qima qimaqee faree.
- Kisaqasaa fee innee anoona siai ainainnara ridaqee

unnaqira ainaina afaqaqa fifaree.

<sup>3</sup> Innee iriaqa. Yaaweefa andeeqarausa nariara utaaqama qaifaqa mari-  
daqa.

Qinee mina aaraunanoo qini ufa iridanoo.

<sup>4</sup> Innee naindiri ree marinaqa rufiidaqa aaqee maria oosannana min-  
nisaqa.

Anee aneenna qaarisaa ireeda faiqaqee idana firaqoo minara oonu mafi  
iria.

<sup>5</sup> Anee Yaaweefa aidimari andeeqara tatufirana kai suqa amia Anutuna  
suqa amiseenana mina kai saqarikia.

<sup>6</sup> Moomoosa maaqi qimasee innaaru qidaqa.

Oo Yaawee moomoo amiqi amiqirana maasa qimia.

Maasa qiqafamasee qimudao qimasee qimia.

<sup>7</sup> Misa miqi qimariafana anee qini asasirana qimi marianafa mifa misa mi  
ainainausa uriqararafa maridanoo.

<sup>8</sup> Oo Yaawee anee kai amiqimmasee ititaqisaanaqa amiqimmasee  
faiqaidaqa.

Qinee qeeqa qaarisaa qifaaqa quqasee asoaranaki faiqaidaqa.

## 5

*Manda ainainaki rakisi amaaqaani fee innaaru.*

<sup>1</sup> Oo Yaaweefa qini ufa iria.

Qini innaaru annada annada qiranakiqari qimarunnana iria.

<sup>2</sup> Oo qini Anutufa, qini karaambaiqa qinee dadaaqianne innaaru qimarun-  
nana iria.

Oo Yaawee qinee aniara innaaru qidaqa.

<sup>3</sup> Oo Yaawee aiqama kananaana kananaana qini ufa iriananoo.

Suani afu ururaifaqa qeeqa innaaru qirana amiseeqa ani dadaaqiranara  
afeesidaqa.

<sup>4</sup> Anee aaqara oosanara sia asasimarianna Anutufa mariananoo.

Aaqara oosana maree mariasa sia eedoo qinaqa ani afusaa marifaranoo.

<sup>5</sup> Nári nimoo naamoo qimariasara misa noori niqafarara ani akooqaidanoo.

Anee aiqama manda oosana maree mariasara fidiqaa imariananoo.

<sup>6</sup> Unnufa qimariasara kuridiranaki anee quqannisee mariananoo.

Faiqi fidikanauqara faqa nikaru qimariasara faqa Yaaweefa fidiqaaamma  
nimaqaidanoo.

<sup>7</sup> Ani firaa amuqusirafa marinara qinee kaqi ani naaquqara maaqaki  
keeqaanaura.

Qinee kaqi ani naaquqara amaana maqaki keeqafi qeeqa mara maree  
muqusee qiqoori saunarafi innaaru qianaura.

<sup>8</sup> Oo Yaawee qini namuqaa moomoo maridaqa. Aneenna aidi mari  
ainainnara kai qimaqiminaqa auqaa.

Aneenna aana uqaqifiqainaqa mimau kai fua.

<sup>9</sup> Qini namuqaauqa ufa sia anoona mari ufana qidaqa.

Misa kuridiranara kai nididanoo.

Misa nári ufannai unna qimasee fadameenara foora akusaafanoo faiqi  
narirafa qumbiqanoo maridanoo.

<sup>10</sup> Oo Anutu anee misa ufa nimisee aupurarana faqa nimia.

Misa nariqa manda tipundaarirafa nári kuridirana nimiannoo.

Misa moomoo aaqarafa marinara faqa misa ani ufa afaqaranara ititam-masee qaoo qimarianara misa aiqama aneenna afusaaqari futeeqee-gee nianai aqusaa.

<sup>11</sup> Miqimmasainaga aiqama ani saqariki mariasa اساسيفارانoo.

Misa aiqama kari ani amooqira idi raaqa.

Aniara rimariasa ititannimaqaa.

Anee mariannanara misa kuqaa uqanna اساسيداqa.

<sup>12</sup> Oo Yaawee ani ufamau fimariasa amiqi amiqimmannimaqaa.

Ani amuqusirafa rakira saqariara foora misa itita nimaqaidanoo.

## 6

### *Ummaara aukwana dadaaqiani fee innaaru.*

<sup>1</sup> Oo Yaawee aneenna aanooqiranaki qari sia qiniara qaoo qimasee minni qisaa.

Aneenna aanooqiranannai sia qini aupurarana qimia.

<sup>2</sup> Oo Yaawee qinee kudoosaapidaqa anee qiniara qimudao qia.

Qini afeeka taikee marifaqa kudoosaapida marunnanara anee afeeka qimia.

<sup>3</sup> Qini marirafa mudukatia firaqoo ummaaraki maridanoo.

Oo Yaawee kisaagaasafee kaqi fifau maridaneesia qini dadaaqidanees.

<sup>4</sup> Oo Yaawee anee aniree mandaki marunnana uqeereeqeena amiqiraqoo quqaqisaa.

Aneenna nifauaranakiqari qinee kuqiranaki marunnana dadaaqia.

<sup>5</sup> Kuqirausa sia aniara iridaqa.

Sia moo fannoo amana miqoo ani amooqiannoo.

<sup>6</sup> Qinee firaa ummaaraki maridaqa firaqoo qimudaani rimarifaqa kudoosaapidaqa.

Aiqama eenda qini qaari faiqee marunnasasaa daukunu kai nammariara foora aufidanoo.

Qiqaukunu fannoo qini qunusaa aqufidanoo putaa idanoo.

<sup>7</sup> Qini namuqaa darirari marianara qiki raqee marunanoo firaqoo qifukaumuqa innooqaiifaqa qifu maqarara anuqidaqa.

<sup>8</sup> Innee manda oosana maree mariasa qinee marunnaqooqari nianasaa fifuaqa.

Yaaweefa qini qiki raqarana iridanoo.

<sup>9</sup> Mifa qinee dadaaqianifeera nammeera qunnana irisee qini innaaru qirana akiiqara dadaaqiannoo.

<sup>10</sup> Qini namuqaauqa manda nisaurirafa tautummasee rafaqafu nimaqainaqa furufariqa quqasee daraanifara.

## 7

### *Andeeqasee raina nimaqaranara innaaru qirufa.*

<sup>1</sup> Oo Yaawee qini Anutu qinee ititaqimaqaanneera anee iannannai anidaqa. Qini qifaqaaqaa nimarianakinaana qumareeqee amiqirannai kaqinni quqaqisaa.

<sup>2</sup> Anee sia qini dadaaqinaqa misa kaasau fainiara foora qini daaku mareeqa fifaranoo.

Qini dadaaqirausa sia maria maqa maqaanaki munusee miqoo misa qini qipata anaqifoora.

<sup>3</sup> Oo Yaawee qini Anutufa qinee moona mandaikamma amaqaasaanoo fee qeeqa qiqoondi oosana siainaki ueeqasaanoo fee.

- 4 Qeeqa namuqaa oosana siainaki aupurarana amiananoo fee qinee mi ainainausa akaqana auqamasaanaqau qini namuqaa qini qifaqasee gumarani.
- 5 Qini qumaraseefau kuqa darusee ateeakaateeka masaifaqau kasirana siai ainainnara fooru maqasaa qisaifaqau marini.
- 6 Oo Yaawee aneenna aanooqiranakiqari findifua.  
Qini namuqaa aanoo qirana firaanara irinana findifinana ititaqisaa.  
Anee andeeqaranara rimarianafa mariannanara findifinana qini dadaaqia.
- 7 Aiqama fasiqa anaasee aneenna aaga moodaanaki suqu quqasee innaarunai mirindari rakisi nimaqaa.
- 8 Anee aiqama fasiqa anaasee ufa andeeqannisee marianafa mariananoo.  
Qinee aaqarana siaisa marunnanara anee irimmariananoo.  
Minara anee qini ufa irisee qiniara andeeqara fee qia.
- 9 Anutu anee andeeqarafa maridana maasa irirana faqa maasa qimuqusa faqa aiqumasee qafee marianafa mariananoo.  
Anee manda oosana maree mariasa aaqara oosana taikasainaqa mariaqa.  
Andeeqaraura amiqimasee dadaaqinaqa mapukusee mariaqa.
- 10 Anutufa qini ititaqimasee marifa maridanoo.  
Mifa nari ufa mau fimariasa dadaaqidanoo.
- 11 Anutufa andeeqara ufasaa rakisirafa maridanoo.  
Aiqama faasaambaasaana nari aanoo qiranara manda oosana maree mariasa qimannimidanoo.
- 12 Misa sia naundura quandaifanoo Anutufa nari rakira faaqaana aaruqianoo.  
Mifa nari duru fufuseenoo deedaqiannoo.
- 13 Mifa nari kuqa nari maria duru saamuna deedaqammasee maridanoo.  
Nari idaqqemari feefana faqa deedaqammasee maridanoo.
- 14 Manda oosana maree mariasa firaqqoo aaqara oosana auqarara qimiriidaqa.  
Misa unna qimasee ummaara oosana uqeerarara tipundaaridaqa.
- 15 Misa akaqausa nimaara ufaana fufusee nari minaki aridaqa.
- 16 Nariqa aaqara oosaa fannoo nariqa aupurarana nimidanoo.
- 17 Qinee Anutuna andeeqaranara irisee dufi dufi qidaqa.  
Qinee firaqqoo uriqarara Anutuna amooqira idi raidaqa.

## 8

### *Anutuna qareenaranara faqa faiqi faiqi mariranara faqa qirufa.*

- 1 Oo Yaawee maasa Yaaweefa, ani uriqararana aiqama maa maqa maaqanaki mariasa qafaidaqa.  
Ani amooqirafa innaaruna amana kai ooru maridanoo.
- 2 Miqi qimasee faiqi aanaaqiuqaindi faqa naqqoo iriasa faqa ani amooqira idi raidaqa.  
Anee amiqiranaki marianaqa ani namuqaa sia ani arifaranoo.  
Nariara uriqararausee qimariasa anee misa aana ititannimaqee mariananoo.
- 3 Qinee anee auqu quqaqoonnana quqoona faqa fasauqa faqa innaarunai qafaidaqa.
- 4 Qinee mi ainainausa qafaidaqa maaqi qidaqa,  
Faiqi nanee mariafanee anee misara iridane.  
Fifau kaqikaa ainaina maridanoo.  
Faiqi faiqi faqa nanainainee mariafanee anee misa rakisidane.



- <sup>5</sup> Anee Yaaweefa faiqí faiqí mareeqee aiqama ainaina urinnaaqaramasee aneenna ameemaanai quqaseenana miqoo qareenarana faqa nuqu firaana faqa qatara foora afisu nimaqaananoo.
- <sup>6</sup> Anee faiqiara aiqama anee auquqoonna ainainausasaa rakisiaqee qimasee qinau.  
Anee aiqama ainaina auquqoonnana uriqararausa mariaqeera quqanau.
- <sup>7</sup> Sipsipauqasaa faqa burimmakauqasaa faqa kaasau aandausaa faqa rakisiaqeera quqanau.
- <sup>8</sup> Innaarunai qaqaamaree nimaria ufinisa faqa ooruku nammariki maria noodaannausa faqa minaki maria aandausa oosana oosana saa rakisiaqeera faiqí quqanau.
- <sup>9</sup> Oo Yaawee maasa Yaaweefa ani uriqarara afeeka aiqama maqa maaqaki mariasa qafaidaqa.

## 9

### *Anutuna amana amana kai andeeqaranara dufi dufi qirufa.*

- <sup>1</sup> Oo Yaawee qinee qeeqa qimuqusa aiqamannoo ani amooqianaaura. Anee aiqama naaquqara ainaina auqoonnana qimannimianaaura.
- <sup>2</sup> Qinee aniki marunnanara اساسیداقا idi raanaura.  
Aiqama afeeka faqaa Anutunara qinee amooqira idi raanaura.
- <sup>3</sup> Qini namuqaa ani qafamasee quandaki fuani qiana saamuriqa kuqidaqa.
- <sup>4</sup> Ani ufa iriranaki kuqaa qirana faqa amana amana kai ira oosanannoo raine marianafa marianannoo.  
Anee qini ufa irisee qiniara andeeqara fee qimarianannoo.
- <sup>5</sup> Anee ani ufa rukiee marusa ufa nimiseenana kafa manda oosana maree marusa kuridi nimaqasoonaaqaa naaru naaru sia kaifaa misara irifarannoo.
- <sup>6</sup> Anee maasa namuqaa aiqama taikaseenana misa maqusauqa faqa kuridi nimaqanau.  
Miqimma soonaaqaa misara kaaqa qaunuqanna saqau.  
Misara irirana faqa kaaqa qaunuqanna seefarannoo.
- <sup>7</sup> Miqiga mariafanoo Yaaweefa kai naaru naaru karaambaiga maridanoo.  
Nari ufa irira qaari deedaqamma quqaseenoo ufa andeeqa nimaqaranara rakisidanoo.
- <sup>8</sup> Mifa nari andeeqaranannai maa maqa maqanasaa mariasa rakisini-maqaidannoo.  
Mifa aiqama maqannaasa amana amana kai ufa irinnimaqaidannoo.
- <sup>9</sup> Oorudupirausee qimannimaqee mariasa Yaaweefa misa afeeka ititara maqusara foora maridanoo.  
Ummaara aukwana kukeeqee maria maqusafa Yaaweefa maridanoo.
- <sup>10</sup> Oo Yaawee ani oosana irimariasa ani saqarikifarannoo.  
Anee sia anee iannannai ani mariasa moonna minnisaanafa marianannoo.
- <sup>11</sup> Sioonna maqusai marida rakisinnimaqee mari Yaaweena amooqira idirama amaqaqa.  
Mifa auqoo ainainnara aiqama maqannaasa kooroommasee qimannimaqaa.
- <sup>12</sup> Anutufa aupuraranaki mariasara sia qaunidannoo iridanoo.  
Mifa sia misa nammeera qiranara qaunidannoo.  
Mifa misa mandaikamma nimaqee mariasa aupurarana nimidanoo.
- <sup>13</sup> Oo Yaawee qini namuqaauqa ummaara qimimariana qafamasee qiniara qimudaoo qia.

Oo Yaawee qini kuqiranakinaana ititaqisaa.

<sup>14</sup> Miqimmasainaa qinee Yeerusaree maqannaa fasiqa anaasee nifusaa kikiqammafi ani amooqimarunnaara qimannimianaura.

Anee qini asumu mariranaki quqaqisaannanara asasianaura.

<sup>15</sup> Anutunara sia iri mariasa maasa qimaara madika indufusee nári kai minaki aqufidaqa.

Misa maasa qimaara ufaana fufusee nári kai minaki aridaqa.

<sup>16</sup> Yaaweefa andeeqasee ufa raina nimaqaranannai nariara kooroo idanoo. Manda oosana maree mariasa nári auqee maria ainainafa quandakinoo ufaanara foora nariqa qumaraidanoo.

<sup>17</sup> Aiqaama manda oosana maraqaanuusa faqa aiqama Anutuna ufa minnisee nári irirana mau nimariasa faqa kuqirafa misa maqusara foora maridanoo.

<sup>18</sup> Kudi fasiqa aanaaseera Anutufa sia aiqama kari qaunuannoo.

Ainaina siaisa sia kisaagasaa rafaqafu nimaqaqaiifaqa marifaranoo.

<sup>19</sup> Oo Yaawee anee findifua sia faiqi faiqi ani afusaa aanoo qimasee ani ufa rukiaannoo.

Ani ufa sia irimariasa aneenna afusaa quqasee ufa nimia.

<sup>20</sup> Oo Yaawee anee misa rufiarana nimia.

Aiqama maqannaasa nariara faiqi faiqi kai maridee qimasee iriaqa.

## 10

### *Andeeqara oosanara innaaru qirufa.*

<sup>1</sup> Oo Yaawee anee nanaree nianai maridanee.

Maasa qummaarakii marunana anee nanaree kukeeqana maridanee.

<sup>2</sup> Aaqee mariasa misa nári nimoo namoo qidaqa ainaina siaisa narunnindaqaa idaqaa.

Misa kai indufuqaa dikaandanaki ainaia siaisa aqufidaqa.

<sup>3</sup> Manda oosana maree mariasa nariqa manda oosana maree marianara nári nimoo naamoo qidaqa.

Ainainara kaaqa rimarifa Yaaweenaa aquraraseenoo mina ameesa ubeekama amaqaaidanoo.

<sup>4</sup> Manda oosana maree mariasa sia Yaaweenara qeerairidaqa.

Nári nasuriranakiqari Anutunara sia anoonee qidaqa.

<sup>5</sup> Manda oosana auqee mariasa aiqama ainaina auqaafa anoona kambiqaaidanoo.

Misa sia Anutuna iriranara iridaqa.

Misa nári namuqaa uqmairaaqmairamma nimaqaaidaqa.

<sup>6</sup> Misa náriara maaqi qidaqa.

Maasa sia aqufuanauree qidaqa.

Sia maasa moo ummaarakii marianauree qidaqa.

<sup>7</sup> Misa ufa qirafa niqurara ufa faqa unna ufa faqa naaquqara ufa faqa kai umbiqanoo maridanoo.

Misa kai kaqi fidaqaa ira manda ufauqa qidaqa.

<sup>8</sup> Misa aiqama maqusakiaqa kukeeqa maridaqa andeeqara fasiqauqa kuqa narirara nimaarusidaqa.

Misa afeeka siaisa nimaara kukeeqaidaqa.

<sup>9</sup> Misa kaasau fainiara foora kukeeqa maridaqa rakisidaqa.

Misa miqimandee ainaina siaisara rakisidaqa.

Misa ufaana fufuqaanaki arufuafaqa oonu rarisammaree fidaqa.

<sup>10</sup> Misasaaroo qirausa sia marisa narusaafaqa maqasaa aqufuafaqa nikunnai radamuqaafaqara foora maridaqa.

- 11 Manda oosana maree mariasa maaqi qimasee nariqakai qidaqa.  
Anutufa qini manda oosanara fifau ainainee qidanoo.  
Mifa afu tautasee sia qini qiqafaannoo fee qidaqa.
- 12 Oo Yaawee, miqira manda oosana maree mariasa aupurarana nimia.  
Kafaa aupuraranaki mariasara sia qaunua, misa faqa dadaaqia.
- 13 Manda oosana maree mariasa naqimmasee fee Anutunara unnaqimasee maaqi qidee.  
Mifa sia maasa aupurana qimiannoo fee qidee.
- 14 Oo Anutu anee niqafee mariananoo, anee ummaaraki mariasa faqa aupuraranaki mariasa faqa niqafaidana aiqama kari dadaaqirara deedaqi marianafa mariananoo.  
Misasaaroo qirausa siaisa aniki nári nifaaqa quqaidaqa.  
Anee ooqaindari sarau imariasa dadaaqi marianafa mariananoo.
- 15 Manda oosana maree mariasa faqa aaqee mariasa faqa misa afeeka qumaree raqurusaa.  
Anee misa manda oosana auqaana akiiqara aupurarana niminaqa sia kaifaa miqiaqa.
- 16 Yaaweefa naaru naaru uriqarara Karaambaiqa maridanoo.  
Aiqama unna anutusa nimooqi mariasa mina maqa maaqakiqari taikafifaranoo.
- 17 Oo Yaawee anee oorudupirausa innaaru irinnaranoo.  
Anee misa paasoosirana niminnaranoo.
- 18 Anee fiaiqi faiqi faqa rafaqaqafu nimmaqee mariasa faqa iki raqarana irinnaranoo.  
Anee misa ufa irinnisainna kari misa dadaaqinnaranoo.  
Miqinaqa maqasaa fasiqa rufiarana fraana nimimariasa sia kafaa miqifaranoo.

## 11

### *Yaaweenaki afaaqa uqara ufa.*

- 1 Qinee Yaaweena saqarikiananoo mifa qini ititaqimaqaannoo.  
Anee nana furufaree inanee qiniara ufiniara fooru qaqaamaree aqaanai ooru fuannee qidannee.
- 2 Misa maaqi qimasee kaifaa unna qimasee qima qimidaqa.  
Manda oosana maree mariasa nári duru rambaqa fufusee, dindaramasee andeeqarausa qumee kukeeqaindari nariraree qidaqa.
- 3 Maa maqanasaa aiqama maasa dadaaqi maria ainainausa mandaikinaqa andeeqara fasiqauqa naqaa fee ifaree.
- 4 Yaaweefa nári naaquqara amaana maqaki maridanoo, mina ufirira qaari innaarunai ufiqinoo marifanoo minasaa maridanoo.  
Miqooqari mina afu fannoo aiqama fasiqa anaasee aiqamatinai nindafaidanoo.  
Misa auqee marianara iridanoo.
- 5 Yaaweefa andeeqee mariasa faqa aaqee mariasa faqa amana amana kai niuqidanoo.  
Sia mina sandufa afaqee mariasara Yaaweefa nári amuqusa aiqamannoo misara fidiqaammidanoo.
- 6 Mandoosana maree mariasa Yaaweefa ida qauni namufaqa idauru fasafasi marina namufaqa nammariara fooru teeqimma nimaqaidanoo.  
Mifa ididimari ufainannoo misa aupurarana nimidanoo.

<sup>7</sup> Yaaweefa andeeqarafa maridanoo.  
Mifa andeeqaranara aididanoo.  
Miandeeqara oosanna maree mariasa misa Anutuna oorisaa marifaranoo.

## 12

### *Dadaaqiani fee innaaru.*

- <sup>1</sup> Oo Yaawee maasa dadaaqia, sia uqanna moodaa andeeqara fasiqa maridanoo.  
Kuqaa kai qimari fasiqanara randeenana sia paqurinnaranoo.  
<sup>2</sup> Misa nári niqoonausara unnufa kai qiyanuasa maridaqa.  
Misa fadameena akusee nikaru qidaqa.  
<sup>3</sup> Oo Yaawee anee fadameena akira ufa qimaria nifauruna ititannisaa.  
Nári nimooqida nári nuqu uqeeree maria nifauruna faqa ititannisaa.  
<sup>4</sup> Misa maaqi qidaqa maasa qeeqa ufannai maasa didimari ainaina maraidaqee qidaqa.  
Maasa didimari ufana kaqi qianaara, sia moo fannoo maasa doo ititaannoo fee qidaqa.  
<sup>5</sup> Yaaweefa maaqi qidanoo. Kudi fasiqauqa rafaqafi marianara faqa aupurarana nimiafaqa  
anaadannada qimarianara faqa qinee maqee aniree misa dadaaqianauree qidanoo.  
Qinee anireeqa nifaaqa quqasee mariranara rakisimariana nimianaara.  
<sup>6</sup> Yaaweena qima afeekaikira ufasaa nifaaqa quqee mariafa maridanoo.  
Mi ufafa amiqira siruaa qisauku dinni taikasee dinni  
ani qaara marasee <sup>7</sup> kari tisirisiri maqaafara foora kaaqa amiqirafa maridanoo.  
<sup>7</sup> Oo Yaawee anee maqee maqee maasa ititaqisaa.  
Mi manda fasiqausasaa ititasainaqa sia maasa mandaikamma qimaqaqa.  
<sup>8</sup> Manda oosana maree mariasa aiqamatinai maridaqa.  
Aiqama fasiqa anaasee mandoosanara amiqira ainainee qimasaida asasi-daqa.

## 13

### *Dadaaqiani fee innaaru.*

- <sup>1</sup> Oo Yaawee kisaagasaa fee anee qiniara qauninnaree.  
Naaruara naaruara miqi fee imarinnaree.  
Anee kisaagasaa fee qini qifusaqari kukeeqana marinnaree.  
<sup>2</sup> Kisaagasaa fee qinee aupurarana uaqee maridaqee.  
Daunduraki rairai qimari umaaranara oonu mafi irianauree.  
Aiqama eendaki faasaana kisaagasaa fee qini aiaaee qirafa mariannoo fee.  
Kisaagasaa fee qinee namuqaa nimeemaanai marianuree.  
<sup>3</sup> Oo Yaawee qini Anutu anee amiqimasee qini qiqafamasee qini ufa anoona qimaqimia.  
Anee kafa qini afeeka qiminaqa sia kuqua.  
<sup>4</sup> Oo Yaawee anee sia qini namuqaara qinaqa qiniara mina doo rafaqa-fusee fee qiaqa.  
Anee sia qini namuqaara qinaqa qinee saamuruannanara nasuriaqa.  
<sup>5</sup> Anee maqee maqee qiniara aidimariannanasaa qinee mundidaqa.  
Anee qini asumu marainnanara qinee asianaara.  
<sup>6</sup> Oo Yaawee anee qini amiqi amiqimma qimaqoonnanara ani amooqira idi raanara.

## 14

### *Faiqí faiqi mandoosanara qirufa.*

- <sup>1</sup> Furufari mariasa nári nimuqusakiqari maaqi qidaqa sia Anutufa maridanoo fee qidaqa.  
Miqi qimariasa furufarira oosana maridaqa.  
Misa kaaqa aaqara oosana uqanna auqee mariasa maridaqa.  
Sia moo fannoo andeeqara oosana maraidanoo.
- <sup>2</sup> Yaaweefa innaarunaindari maa maqanasaa faiqí faiqi mariasa niuqidanoo.  
Mifa irirana faqaasara randaifaqa sia maridaqa.  
Akaqausa qini Anutusara inaaru qidafee qimasee randaidaqa.
- <sup>3</sup> Aiqamausa quandaki kaqi runna fidaqa.  
Misoo maasoo amana amana kai mandaiki marunausa maridaqa.  
Sia moo fannoo andeeqaraura maridaqa. Sia uqanna.
- <sup>4</sup> Anutufa maaqi qimasee iraidanoo, misa sia fee iridafee.  
Aiqama maa aaqara oosanna maree mariasa irirana siaisee maridee.  
Misa qini faiqí anaasee feemuara foora nama taikaidaqa.  
Misa sia qiniara aiqama kari innaaru qimariasa maridaqa.
- <sup>5</sup> Miqi mariasa firaqoo rufiee faranoo.  
Anutufa narí ufamau fimariasa faqa maridanoo dadaaqidanoo.
- <sup>6</sup> Narí mara maree qumimarifa moo ainaina auqarara  
oonu mafi irifaqa aaqemariasa itita amaqaafanoo Yaaweefa mina  
dadaaqidanoo.
- <sup>7</sup> Qinee maaqi qimasee firaqoo innaaru qidaqa,  
Isaraee maqannaasa dadaaqirafa Sioonna maqusakiqari anianifee qidaqa.  
Yaaweefa Isaraee maqannaasa nári maqa maqa  
faqa qumiasana faqa kafa rairaamma saina misa firaqoo asasifaranoo.

## 15

### *Anutuna aidi mari marirafa.*

- <sup>1</sup> Oo Yaawee, yafee ani amaana maqaki keeqaannoo fee.  
Yafee Sioonna ani naaquqara aaqanasaa marida innaaru qiannoo fee.
- <sup>2</sup> Aiqama ainainaki ani ufa mau fimariasa faqa  
andeeqara oosana auqee mariasa faqa nári nimuqusa ookiqari anoona ufa  
kai qimariasa  
faqa ani naaquqara aaqanasaa marida innaaru qifaranoo.
- <sup>3</sup> Sia aqoonnana manda auqu amifa faqa sia narí  
aqoondi mandaikamma amaqaifa faqa sia nári  
niqoonausara munuqi miniqiasa faqa mi  
naaquqara aaqannasaa marida innaaru qifaranoo.
- <sup>4</sup> Anutufa ameesuqu nimaqaqaisara andeeqaraura faqa misara fidiqaa  
idaqa.  
Yaweena ufa mau fimariasara uriqararausee qidaqa.  
Moo fannoo narí amana aiqamasee moo ainaina auqararee qima-  
saifanoo mi faasaanna moo  
ummaara kambiqaiifanoo afai riqiseenoo oonu  
mi ainainna auqeenoo narí qima afeekaikira ufa taikaidanoo.
- <sup>5</sup> Faiqí moo fannoo narí ufaasu munnimma nimiseenoo  
aabaa munnimma siaina naríndi amana kai maree  
marifa faqa, aaqarana siai fasiqana mara ufaki

quqaaniffee qimasee munnimma amiafanoo  
 qeerairi mari fasiqafa faqa ani naaquqara aaqanasaa marifaranoo.  
 Mi aiqama ainainausa auqee maria fasiqausa misa naaruara mapukusee  
 marifaranoo.

## 16

*Afaaqa uqasee mariranara innaaru qirufa.*

- <sup>1</sup> Qinee ani saqariki marunнанara ititaqimaqa.  
 Oo Anutu, anee qini ititaqimaqaa.
- <sup>2</sup> Qinee Yaaweena maaqi qimasee qimamiqa. Anee qini Yaaweefa mari-  
 ananoo.  
 Aiqama ainaina anee iannannaindari kai qiniki anidanoo.
- <sup>3</sup> Faiqi anaasee Yaaweenaki mapukusee mariasa kaaqa andeeqarusa  
 maridaqa.  
 Qini firaa irirafa misa faqa marirara dididanoo.
- <sup>4</sup> Unna anutusa iannai sandee mariasa oosana oosana ummaara nari  
 nifaagai mara quqaidaqa.  
 Qinee sia misa faqa aandau tatufirana suqaanaura.  
 Qinee sia misa faqa misa unnaqira anutuna amooqianaura.
- <sup>5</sup> Oo Yaawee, anee kai qini aiqama ainainara foora mariananoo.  
 Qini didimari aiqama ainainna anee qimimariananoo.  
 Qini marirafa ani asaukuki maridanoo.
- <sup>6</sup> Anee qimimarianna ainainausa amiqirafa kai maridanoo.  
 Mi ainainausa aiqama kaaqa amiqirafa kai maridanoo.
- <sup>7</sup> Yaaweefa qini aana muquni marinara mina amooqidaqa.  
 Eendaki qini daakirafa daakapaidanoo.
- <sup>8</sup> Qinee aiqama kari Yaaweena afusaa marunнанara iridaqa.  
 Mifa qini faqa marinara sia moo ainaina fannoo qini kasi kasimma  
 qimaqaannoo.
- <sup>9</sup> Minara qinee dufi dufi qidaqa اساسidaqa.  
 Qinee kaaqa amiqiranaki marunнанara miqidaqa.
- <sup>10</sup> Anee kuqira afeeka ameemaanaindaraana ititaqimaqaannanara miqi-  
 daqa.  
 Anee aneenna aidimarina sia minnisainanoo mifa kuqufinoo putaaianoo.
- <sup>11</sup> Anee kisaagasaa maa maqanasaa marira aana qini uqafiqeennaranoo.  
 Ani afusaa marunafa اساسirana qumbiqa qimaqaidanoo.  
 Mifa naaru naaru marira اساسirana qimidanoo.

## 17

*Aaqarana siai fasiqana innaaru.*

- <sup>1</sup> Oo Yaawee andeeqaranara innaaru qimarunnana iria.  
 Qinee dadaaqianneera innaaru qimarunnana faqa iria.  
 Qini kuqaa qira innaaru iria.
- <sup>2</sup> Anee andeeqaranara irimariannanara qini qifairi mariana dadaaqia.
- <sup>3</sup> Yaawee anee qini qimuqusara irimariananoo.  
 Anee eendaki qinee unnannai anireenana qini  
 qimanammasee qafaananoo sia manda irirafa qiniki maridanoo.
- <sup>4</sup> Qinee sia akaqausa naannareeqa manda ufa qidaqa.  
 Qinee ani naakapara ufa qaindusidaqa sia faiqi narimariasa fimaria aatata  
 fidaqa.

- 5 Qini qiku fannoo ani aatata kai fida sia munuree miniree unausa maridaqa.
- 6 Oo Anutu anee qini inaaru irimariannanara qinee aniara innaaru qidaqa. Minara anee aneenna aaqoo rammatinimambi qini innaaru qirana iria.
- 7 Oo Anutu aneenna firaa amuqusirana maasa uqaqifiqaseenana anee maasa asumu maraqisaa. Maasa ani mandaaqaqa maridaqa sia namuqaa dariratinai marianaaura.
- 8 Anee aneenna afu rakisianandee kai masee qini faqa rakisia. Anee aneenna aumooki quqaseenana rakisi qimaqainaqa qini namuqaa sia daruqa.
- 9 Qini kuqa darirara imariasa qini fiqum fiqum iqa maridaqa.
- 10 Misa qimudao qirana siaisa, nári nimoo naamoo kai qimariasa maridaqa.
- 11 Misa qini itita qimaqaqaafaqa qinee firannai anirannaira idaqa. Misa qini qumara rudammiqi qaqeeidaqa rakisidaqa.
- 12 Misa kaasau fainiara foora qini qimaara usidaqa. Qini qumarasee rakeekaa irara miqiqqa maridaqa.
- 13 Oo Yaawee anireenana qini namuqaa noorisaa oonureenana misa narusee urinnaaqaraa. Anee aneenna rakira paipanannai mandoosana maree mariasa narusee misa nisaukukinaana qini maraa.
- 14 Oo Yaawee maa maqanasaaqaraa aiqama ainaina náriara kai maree mariasa nisaukukinaana qini mara qisaa. Anee misa narirara nimaara usuqaanna samu misa narua. Naridana mina atisamu kaqi marinana misa faiqi namu faqa ninaiqimara faqa kasooqaqee kambiqaiifana misa faqa narua.
- 15 Qinee sia aaqara ainaina auqaunnanara qinee ani qafaanaura. Qinee faiqaqee iinaqa findi fuananoo ani afusaa marira oosana fannoo qini asasirana qumbiqa qimiannoo.

## 18

### *Rakirana Uriaaqarara idi Dafidifa ranau.*

- 1 Anee qini itita qimaqee marianafa mariannanara ani Yaaweenara firaaqoo dididanoo.
- 2 Yaaweefa qini itita qimaqee marifa maridanoo. Mifa qini afeeka faandaamurara foora maridanoo. Qini Anutufa qini itita qimaqee marifa maridanoo. Minaki marunnanara asumu maridaqa. Mifa qini rakira saqariara foora maridanoo. Mifa qinisaa ititaseenoo qini asumu mara quqaqisaidanoo.
- 3 Qinee Yaaweenara innaaru qunanoo qini namuqaauqa darirari mariana kinaana asumu mara quqaqiseenoo. Minara Yaaweena amooqiaqa.
- 4 Manda kuqirafa qini fiqum fiqum inoo marifanoo, darirafa ooruku nammari amakauriara foora inoo qini rafaqaafidanoo.
- 5 Manda kuqirafa qini fiqum fiqum inoo marifanoo, faiqi madika fannoo ufaanara foora qini qimaara fufinoo maridanoo.
- 6 Qeeqa ummaarakiqari Yaaweena aareeqa. Qinee qeeqa Anutuna dadaaqianifeera aareeqa. Narí amaana maqakiqari qini nammeera qirana irinoo.

Qinee dadaaqianifeera nammeera qiqa.

<sup>7</sup> Anutufa qini namuqaara aranaqainara maqa kasifanoo aaqanauqa doori doorifanoo firaa ooniuga faqa kasi kasidanoo.

<sup>8</sup> Ida muna fannoo Yaaweena aikaamaraindari anifanoo aiqama ainaina qama taikara ida faqa ida qauni namufaqa mina ookiqari anidanoo.

<sup>9</sup> Yaaweefa innaaruna rakeemmafufanoo quminau.

Mina aiku ameemaanai asukuna arira oonnamu marinau.

<sup>10</sup> Yaaweefa aqoosa faqaa ainainasaara foora ooqu marifinoo qaqamaree ufaimau quminau.

<sup>11</sup> Mifa asukunannoo nari kukeeqasoofanoo, amatooki oonnamu aaku suqirafa mina fiq fiq inoo marinau.

<sup>12</sup> Pupusamu faqa idauru fasafasirafa faqa mina oorinni aakuasaa iranakiqari qumureenoo asukuna arira oonnamu rakeeinau.

<sup>13</sup> Yaaweefa innaarunaindari innaarunai qiara foora qufaqa kaaqa uriqarara Anutuna ufa iriqau.

<sup>14</sup> Yaaweefa miqi qidanoo nari feefauqa qumaree aquseenoo namuqaa narufaqa daraaniqau.

Mina aakuasaa fannoo feefara foora aqusee narufaqa quqasee sandaqau.

<sup>15</sup> Anee aneenna namuqaauqa niqiseenana aranaqoofana rairai qimanni-maqee marinau.

Miqunanoo ooruku nammari ameemaanaindaraa maqa koorooinau.

Maqa ameemaanaindaraa ooniuga faqa koorooinau.

<sup>16</sup> Yaaweefa innaarunaindari qini nammari farumakinaanara foora qisauku qumaree uqeera quqanau.

<sup>17</sup> Mifa qini afeeka namuqaauqa nisaukukinaana mara kaqinni quqaqiseenoo, qiniara fidiqaa imariasa qini uridaaqarara afeeka faqaasa nisaukukinaana faqa mara kaqinni quqaqisanau.

<sup>18</sup> Qinee ummaarakiki mariafanaqa qini namuqaauqa qini darirariqau.

Miqufanoo Yaaweefa qini ititaqimaqanau.

<sup>19</sup> Mifa qiniara asasi marunara qini manda ummaarakinaana dadaaqamma qisanau.

<sup>20</sup> Qinee andeeqee marunnana akiiqara amiqi amiqimma qimaqeenoo.

Qiniki sia aaqarafa marinara miqimma qimaqaidanoo.

<sup>21</sup> Qinee Yaaweena sandufamau fimarunausa maridaqa.

Sia qeeqa Anutuna qimeesa uqusee mandoosana maridaqa.

<sup>22</sup> Qinee mina aiqama sandufamau fimarunausa maridaqa.

Qinee sia mina naamuaqira ufa rukiqaunausa maridaqa.

<sup>23</sup> Qinee aaqarana siaisa marunannara mifa iridanoo.

Qinee kaqi runna fuanoora qeeqa mariranasaa rakisidaqa.

<sup>24</sup> Qinee miqunnana akiiqara faqa andeeqara oosana maraunannara faqa mifa amiqimma qimaqaidanoo.

Qinee aaqarana siaisa marunannara miqimma qimaqaidanoo.

<sup>25</sup> Oo Yaawee aniki mapukusee mariasa anee misa mapukunnimaqee mariananoo.

Kaaqa andeeqee mariasa anee amiqi amiqimma nimaqee mariananoo.

<sup>26</sup> Anee kaaqa anukarausa andeeqa nimaqee mariananoo.

Mandoosana maree mariasa mandaikamma nimaqee mariananoo.

<sup>27</sup> Nari mara maree qumi mariasa anee asumu maree mariananoo.

Nari nuqu uqeeree mariasa anee mara maree qumimariananoo.



- 28 Oo Yaawee anee kaaqa qarana qimiananoo asukuna rakeemma qi-saidanoo.
- 29 Anee qini afeeka qimianaqa qeeqa namuqaauqa naru nindaqaaqa idaqa. Miqimmaseeqa misa afeeka faandaamura aafeeqaramaki aqufiqa naru nindaqaaqa idaqa.
- 30 Mi Anutuna oosana fannoo andeeqanoo maridanoo. Mina ufasaa faiqi mundimaria ufafa maridanoo. Mifa nari mandaagee mariasa rakira saqariara foora maridanoo, ititanni-maqaidanoo.
- 31 Yaaweefa kai Anutufa maridanoo. Anutufa kai maasa faandaamura maridanoo.
- 32 Mi Anutufa kai qini afeeka qimiseenoo, rakisiqimaqee marifaqa qifaaqa quqasee aana nidaqa.
- 33 Mifa qini qiku afaidama saifaqa kaasau aandaaura foora sandaidaqa. Qinee aaganauqakiaqa nimarunanoo mifa qini rakisi qimaqaidanoo.
- 34 Mifa qini rakira oosana uqaqifiqasaifaqa qinee afeeka duru uqanna rakisidaqa.
- 35 Oo Yaawee anee qini itita qimaqaseenana asumu mara quqaqisaananoo. Ani rakisi qimaqarafa qini duqu uqeereenoo. Ani afeeka fannoo qini ititaqimaqaseenoo asumu marirana qiminoo.
- 36 Anee qini aana amiqimmasaanaqa sandaidaqa sia qiku qamaki saamurunaqa namuqaa qini qumareea.
- 37 Qinee qeeqa namuqaa sia minniseeqa nifaqaqa fififaqa oonu qumarasee naruseeqa kai seeqa.
- 38 Qinee oonu misa naru quqasaunaqa qini qikuki aqufiqa sia findifirana amanaikidaqa.
- 39 Oo Anutu anee rakira afeeka qini qimiseenana qeeqa namuqaa raki-ranaki urinaaqarara afeeka qimianaqa misa urinnaaqareeqa.
- 40 Anee qini namuqaara qianaqa misa qini daaqu rufisee sandeea. Sandaafaqa akaqausa qiniara fidiqaa imariasa naru taikееqa.
- 41 Misa akaqausara dadaaqiaqeera faaqaruafaqa sia dadaaqirausa maridaqa sia dadaaqia.
- Misa Yaaweenara faqa dadaaqianifeera aaraafanoo sia misa innaaru qirana irinoo.
- 42 Qinee misa radamusaunaqa misa kookoommaika mafuafanoo ufai fannoo misa fuaqa aqinoo.
- Misa aatataqarara doonara foora mariafaqa qinee misasaa qiku reeqa.
- 43 Anee qini aanoo qimaqimaqee mariasa nisaukukinaana asumu mara quqaqiseenana moomoo maqannaasa rakisirausaikamma qisaananoo.
- Miqimma saanaqa qinee sia irunna fasiqa aanaaseesa qini qimeemaanai maridaqa.
- 44 Anaamuru qini qikuki niqoori saunu araidaqa Misa qini ufa irisee qini ufamau fidaqa.
- 45 Misa afeeka taikafifaqa nariqa afeeka faandaamura minniseeqa naindiri raifaqa qinee unannai anidaqa.
- 46 Yaaweefa kaqi marifa maridanoo. Qini ititaqimaqee marina amooqiaqa. Qini namuqaa nisaukukinaana asumu mara quqee mari Anutuna uriqararanara kooroo iaqa.
- 47 Mifa qini namuqaauqa urinnaaqarara afeeka qiminoo. Mifa moomoo maqannaasa qini qimeemaanai mara quqeenoo.

- 48 Miqimmaseenoo qini namuqaa nisaukukinaana asumu mara quqaqiseenoo.  
Oo Yaawee, anee qini namuqaa urinnaaqarara afeeka qimiseenana faiqi kuqa narimariasasaa ititaqisaananoo.
- 49 Miqiannanara qinee moomoo maqannaasa qambaaindari ani amooqidaqa.  
Qinee ani amooqira idi raidaqa.
- 50 Anee qini Dafidisa utaaqama qaanausa aneenna sia taikaaninna amuqusirana qinisaa faqa naaru naaru qinisaa ani aruakinausaa faqa quqaananoo.  
Minara Anutufa rakira afeeka qini Dafidisasaa quqeenoo.

## 19

*Oosana aroonaki Anutufa auqu quqoo ainainafa mina qareenarana kooroidanoo.*

- 1 Innaaruna fannoo Anutuna qareenaranara firaqoo kooroidanoo.  
Innaaruna fannoo kaifaa Anutufa auqoo ainainausara kooroo idanoo.
- 2 Maqee faasaana fannoo Anutuna areenaranara duna faasaana qimamidanoo.  
Eendirafa miqikai qimasee moo eendirana qimamidanoo.
- 3 Ia qarafa faqa eendirafa faqa sia noo mari faqa sia ufa qidaqa.  
Minara maasa misa ufa qirana sia iridaqa.
- 4 Miqinoo marifaqa aiqama maqa maaqaindari misa Anutunara kooroimariana qafaidaqa.  
Maa maqana ati munu taikee mini taikee irannaindari misa ufa iridaqa.  
Innaaruna Yaaweefa uiqaana maaqara foora usakasaifanoo suani minaki maridanoo.
- 5 Suani fannoo minaqari nari fuka anaasee amundara anaasee mararara foora asaidanoo suani qaidanoo.  
Mifa sandaranaki amani mariasara foora sandarara deedaqidanoo.
- 6 Suani fannoo innaaruna atisaqari urureenoo fiififanoo meeqai dinni keeqaidanoo.  
Sia moo ainaina fannoo mina ididiranara rufiasee kukeeqaanoo.

*Yaaweena sandufara qidanoo.*

- 7 Yaaweena sanda ufa andeeqarafa uqanna maridanoo.  
Mifa fuka afeeka nimidanoo.  
Yaaweena naakaparufa minasaa mudi mariafa maridanoo.  
Mifa irirana siaisa irirana nimidanoo.
- 8 Yaaweena sandufa andeeqarafa marifaqa mi ufamau fimariasa asasidaqa.  
Yaaweena naamuaqira ufa fannoo amana amana kai andeeqa nimaqaseenoo maasa qitikuraki irirana moo faqa moo faqa qimidanoo.
- 9 Yaaweena oorinni nisaurusee madoodonnara oosana fannoo kaaqa anukarafa maridanoo, naaru naaru kaqi kai mariannoo.  
Yaaweena ufa irirafa andeeqarafa marifanoo aiqama kari amana amana kai rainannimaqaidanoo.
- 10 Yaaweena ufa irirafa amiqira koora uqanna uriaaqararafa maridanoo.  
Mina adiafaairafa ookasaasa anoona adiafaairana faqa arusee uriaaqaranoo maridanoo.
- 11 Mi ufausa qini Dafidisa ani ainainira faiqi irirana qimidanoo.  
Qinee mi ufamau fimarunnana akiiqara anee Yaaweefa amiqi amiqimma qimaqaananoo.

- 12 Sia moo fannoo narí aaqara oosanara iridanoo.  
Oo Yaawee, qinee kukeeqara aaqaranaki marunnana mara kaqinni quqaqisaa.
- 13 Qinee iridaqa faqa aaqee marunnanasaa ititaqisaa.  
Sia mi aaqarafa qini rakisi qimaqaani.  
Miqimma qisainaga andeeqafuananoo mandoosana fannoo sia rumba qimaqaani.
- 14 Oo Yaawee, anee qini afeeka kukeeqara maqusa faqa qini asumu maree marianafa faqa mariananoo.  
Amanee qini ufara faqa qini iriranara faqa amiqira fee qimasee eedoo qia.

## 20

### *Rakiranaki uriqarara innaaru.*

- 1 Anee ummaaraki maridana Yaaweenara innaaru qinanoo ani dadaaqiani.  
Yakooboona Anutufa ani itita amaqaani.
- 2 Mifa Sioonna aaqanasaa narí naaquqara amaana maqakiqari ani dadaaqiani.
- 3 Mifa anee aminna ainainara eedoo qimasee ani aiqama aandau tatufiranara faqa asasiyani.
- 4 Anutufa ani aidimari ainainna amiani.  
Anee oonu mafi irinna ainainafa anoona kambiqaani.
- 5 Anee rakiranaki urinnaaqaraannanara asasida faaqa ruanaura.  
Anee rakiranaki urinnaaqaraannanara maasa qeeqa Anutuna idi raidaqa amooqianaura.  
Anee aiqama ainainara irainnana Yaaweefa iriani.
- 6 Doo maqee qinee iridaqa Yaaweefa rakirana uriqarara afeeka narí utaaqamaqai karaambaiqana qini Dafidisa qiminoo.  
Mifa narí amiqira maqusa innaarunaindari qini innaaru qirana irinoo.  
Yaaweena afeeka fannoo firaa rakiranaki uriqarara afeeka qiminoo.
- 7 Rakiranaki akaqausa nári qoosa rarisee mari karana saqarikidaqa, akaqausa nári qoosa saqarikidaqa.  
Miqi mariafaqa maasa Yaaweena maasa Anutuna mina afeeka saqarikidaqa.
- 8 Maasa namuqaa mi rakira ainainausa saqariki mariasa niku amaki saamurifaqa maasa kaqi afeekaikammasee kikiqqa marianaura.
- 9 Oo Yaawee anee rakiranaki uriqarara afeeka qini Dafidisa qimia.  
Maasa ani aaraanana maasa dadaaqia.

## 21

### *Rakirana urinnaaqararanara Yaaweena amooqira idi.*

- 1 Oo Yaawee anee Dafidina afeeka amiannanara asasidanoo.  
Anee mina dadaaqiananoo rakirana uriaaqarainara firaaqoo nasuridanoo.
- 2 Anee mina amuqusaki aidimari ainainna amiananoo.  
Anee mifa irai ainainna faqa amiananoo.
- 3 Anee mifinnai anireenana firaaqoo amiqi amiqimma amaqaananoo.  
Miqimmasee anee uriqararaisa qata koorannai auqirana afisu amaqaananoo.
- 4 Mifa mariranara irairana anee amiseenana mina marirana kisaqaikamma amaqaananoo.
- 5 Anee Yaaweefa dadaaqiannanara mifa uriqarara auqu mareenoo.

- Anee mina afeeka faqa uriqarara auqu faqa amiananoo.  
<sup>6</sup> Ani amiqi amiqirafa naaru naaru mina faqa mariannoo.  
 Ani afusaa marirafa mina asasirana qumbiqa amidanoo.  
<sup>7</sup> Dafidifa Yaaweena aiqama afeeka faqaana saqarikidanoo.  
 Yaaweena kaqi marira adirafa marinara mifa aiqama ainainaki  
 afeekaikammasee mariannoo.  
<sup>8</sup> Dafidifa nari aiqama namuqaa rumbannimaqaannoo.  
 Mifa nariara fidiqaa imariasa faqa rumbannimaqaannoo.  
<sup>9</sup> Mifa anireenoo idaurunnoo nari namuqaa aiqama kuridi nimaqaannoo.  
 Yaaweena arana qarafa misa nambiqamasaannoo.  
 Ida fannoo misa qama taikaannoo.  
<sup>10</sup> Sia uqanna misa atikiqari moo fannoo kaqi mariannoo. Dafidifa aiqama  
 naru taikaannoo.  
<sup>11</sup> Misa mina ariraree qimasee tipundaaramma saifanoo sia misa tipun-  
 daarirafa anoona kambiqaannoo.  
<sup>12</sup> Mifa feefa niiqamasainaqa quqasee sandeefaranoo.  
<sup>13</sup> Yaawee maasa ani firaa afeekara amooqidaqa. Maasa idi raidaqa ani  
 afeekara amooqianaura.

## 22

*Ummaara faqaana iki raqarafa faqa Anutuna amooqira idi faqa mari-  
 danoo.*

- <sup>1</sup> Oo qini Anutu, qini Anutu, naqiffee ifanee anee qini minniqiseenanee.  
 Anee naqaa fee ifanee aadumai nianasaa maridana sia qini dadaaqidanee.  
 Anee naqaa fee ifanee sia qini ikiraqarana irinanee.  
<sup>2</sup> Faasaana ani qeeqa Anutuna aaraunana sia maqi qiananoo.  
 Eendaki faqa aaraida maridaqa sia idooeeqa.  
<sup>3</sup> Anee naaquqarafa andeeqara oosana faqaafa mariananoo.  
 Isaraee maqannaasa ani amooqi mariafa mariananoo.  
<sup>4</sup> Maasa qikeeku qikaaku ani saqariki mariqau.  
 Misa ani saqari kammasoofana anee misa asumu mariaqeera maranau.  
<sup>5</sup> Misa manda ainainakiqari ani auqu roonannai asumu mariqau.  
 Misa ani saqarikida sia nisaurirana mareea.  
<sup>6</sup> Qinee oorudupirausa fifau doodaaniara foora maridaqa.  
 Qiniara nikooqaiqa fidiqaa midaqa.  
<sup>7</sup> Misa qini qiqafeeqa uteeti qimasee nimaakiri rummiqi qimaqidaqa.  
 Miqimmasee misa ninuka aqidaqa maaqi qidaqa.  
<sup>8</sup> Anee Yaaweenasaa mundi mariananoo nanaree mifa sia ani dadaaqi-  
 danoo fee.  
 Yaweefa aniara aidi marifanoo nanaree mifa ani sia itita amaqaidanoo fee.  
 Nanaree sia ani dadaaqidanoo fee.  
<sup>9</sup> Oo Yaawee anee kai qini qinoona aranandakinaana amiqimmasee qini  
 mara akoonnai quqaqisaananoo.  
 Qinee aanaaqi maridaqa qeeqa qinoona naamma  
 neemariafanana anee qini amiqimmasee rakisi qimaqee marunaqa  
 mariqafana.  
<sup>10</sup> Qinee qeeqa qinoona aranandakiqari  
 kambiqaafannaqoo qari anisaa mundiqa maridaqa.  
 Miqiqqa marunana anee qini Anutufa mariananoo.  
<sup>11</sup> Ummaara qiniki maridanoo, sia nianai maria. Sia qini dadaaqirausa  
 maridammia.  
<sup>12</sup> Namuqaa moomoo kaasau aandaura foora qini fiq fiq iqa maridaqa.

Misa Basaana maqa maaqakina afeeka kaasau aandaure foora qini fiqum fiqum iqa maridaqa.

13 Misa kaasau fainiara foora nooraqasee qini qipata anaqirara rairai qidaqa.

14 Nammari maqasaa adiasaafanoo dadasindee inoo qini afeeka taikeno.

Qini qimudaani aiqama radukino maridano.

Qini qimuqusaki daaquqarafa maridano.

15 Qini qimaqaara aadana usidano.

Qini qimaakiri qimaqaarai atooqano maridano. Anee qini kookoom-maki rumaqimaqa qaanaqa kuqirara midaqa.

16 Manda oosana maree mariasa aano qimaria fainisara foora qini fiqum iqa maridaqa.

Misa qini qiku qisauku aakumaree rakee iraridaqa.

17 Qini qimudaani akooqoo marifaqa misa qini kaaqa tataqaidaqa.

18 Misa qini qammunna marasee rainaidaqa.

Qini siuta raipaqusee kaatara foora sarammasee maree.

19 Oo Yaawee sia anee nianai maria qini daqa ani maria.

Kai kaqi aniree qini rukia qisaa.

20 Oo Yaawee misa nookinaana qini mareeqee asumu quqaqisaa.

Maa fainisa nookinaana qini mareeqee kaqinni asumu quqaqisaa.

21 Kaasau fainiuga nookinaana mara kaqinni quqaqisaa.

Qinee kaasau aandauga nifusaa ititarausa sia mariafaqa maridaqa.

22 Miqimma sainaqa anee auqaanna ainainnara qinee qeeqa maqannaasa qimannimiana.

Qimannimisee qinee misa suqiranakiqari ani amooqiana.

23 Innee Yaaweenana ainainira faiqiuga mina amooqiaqa.

Innee Yakoobona aiku asauku mariasa mina auqu uqeeraaqa.

Innee Isarae maqannaasa mina kai amooqiaqa.

24 Yaaweefa sia kudi fasiqauqa sarau imarianara irisee ameesuqu ni-maqaidano.

Sia oori rafusu kaqinni aqidano, mifa misa innaaru qirana iriseeno dadaqidano.

25 Qinee firaa suqiranaki anee auqaanna ainainnara ani amooqiana.

Ani amooqirara suqiga mariasa nifusaa ani amooqiana.

Qinee qima afeekaikammasee suqa amianauree qiafanna tatufirana suqa amiana.

26 Sarau iranaki mariasa narana namasaifanoo nimuaqu imarina marifaranoo.

Yaaweeфинnai anirainausa mina amooqifaranoo.

Miqi mariasa naaru naaru aiqama ainaina amanaikirausa mariaqa.

27 Aiqa maqannaasa Yaaweenara irifaranoo.

Aiqama maqa maaqakinaasa mifinnai ubeekeefaranoo.

Aiqama fasiqa anaasee mina amooqifaranoo.

28 Yaaweefa karaambaiqa maridano aiqama maqannaasa rakisinni-maqaidano.

29 Aiqa ramoo ramaa imariasa mina oorinni niqoori saunu areefaranoo.

Aiqama faiqi faiqi mina oorinni niqoori saunu areefaranoo.

30 Naaru kambiqainausa mina ainainira faiqiuga marifaranoo.

Misa kasooaqee kambiqainausa Yaaweenara qimannimifaranoo.

31 Yaaweefa narí faiqi anaasee maroonara naaru kambiqainausa qimannimifaranoo.

## 23

*Yaaweefa maasasaa sipsipasaara foora rakisirafa maridanoo.*

col <sup>2</sup> Yaaweefa qini sipsipasaara foora rakisi qimaqee marifaqa qinee sia moo ainainara sarau ianaura.

Mifa qini mareeqeenoo sipsipara foora quqeenara andandaki quqasaifaqa namasee faiqaidaqa.

Mifa qini qifiqeeqee amiqira nammari reendeenammasee ooqu fimarina afaisaa quqaqisaifaqa namasee idooaidaqa.

<sup>3</sup> Mifa qini fuka afeeka qimidanoo.

Mifa nari qima afeekaika maqoomau finoo qini andeeqara aatata kai qifiqee fidanoo.

<sup>4</sup> Yaawee anee qini faqa mariannanara qinee kuqira ummaaraki asukuna titunaanu qiranakiara foora fidaqa sia moo mandainainara rufiaanaura.

Ani saunu faqa unnaana samu faqa qini itita qimaqeenoo.

<sup>5</sup> Anee qini namuqaa nifusaa firaa oomaqa qini qimiananoo.

Qinee uriqarara fasiqara foora marunana qini daarama quqaananoo.

Anee amiqi amiqira ainaina namariara foora qini kaafaki adia afairaqaramma qimiananoo.

<sup>6</sup> Ani amiqi amiqirafa faqa amuqusirafa faqa qini faqa mariinoo kuquanoo kai taikaannoo.

Ani amaana maqa fannoo qini maaqara foora marinaqa qinee minaki keeqee raudee iika kuquanoo taikaannoo.

## 24

*Uriqarara karaambaiqa.*

<sup>1</sup> Maa maqa maaqafa faqa aiqama minakinaa ainaina faqa Yaaweenaindi kai maridanoo.

Maqa faqa minasaa maria fasiqa aanaaseesa faqa minaindi kai maridaqa.

<sup>2</sup> Mifa maa maqana ameemaanai maru nammarina amuaaqa auqu quqanau.

Quqaseenoo mina faakanauqa maqa ameemaanaindaraa nammariki rakiganau.

<sup>3</sup> Yafee amana Yaaweena aqanasaa oorufuannoo fee.

Yafee amana mina naaquqara amaana maqaki keeqaannoo fee.

<sup>4</sup> Andeeqara oosana auqee marifa faqa amiqira amuqusa faqaafa faqa sia unna anutusa nimooqi mariasa

faqa sia unna qimasee nimana aiqee mariasa kai minaki keeqefaranoo.

<sup>5</sup> Yaaweefa misa asumu mara quqasee amiqi amiqimma nimaqaannoo.

Miqimmaseenoo Anutufa misara aqarana siasee qiannoo.

<sup>6</sup> Miqira fasiqauqa Anutufinnai anidaqa.

Misa Yakooboona Anutuna oorinni fidaqa.

<sup>7</sup> Innee faandaamura kooqiuqa firaaqoo atua aquaqa.

Innee ooqeenaa amaana maqa kooqiuqa faqa atusaifanoo uriqarara karaambaiqa keeqaani.

<sup>8</sup> Yafee mi uriqarara karaambaiqafa maridanoo fee.

Mifa Yaaweefa afeeka faqa eeraara faqa faqaafa maridanoo.

Mifa Yaaweefa aiqama rakiranaki uriqaree marifa maridanoo.

<sup>9</sup> Innee faandaamura kooqiuqa firaaqoo atua aquaqa.

Innee ooqeenaa amaana maqa kooqiuqa faqa atusaifanoo uriqarara karaambaiqa keeqaani.

<sup>10</sup> Yafee mi afeeka karaambaiqafa maridanoo fee.  
Yaaweefa aiqama maqannaa uriqarara afeeka faqaafa, afeeka karaambaiqa maridanoo.

## 25

*Rakisinnimaqaranara faqa itita nimaqaranara faqa innaaru qirufa.*

- <sup>1</sup> Oo Yaawee qeeqa innaaru qirana ani amidaqa.  
<sup>2</sup> Oo qini Anutu, qinee ani saqarikidaqa.  
 Namuqaa darifaqa qisauruanoora anee mi dariranasaa ititaqisaa.  
 Anee dadaaqinaqa qini namuqaa sia qiniara ataasa ataasa qiaqa.  
<sup>3</sup> Ani saqariki mariasa namuqaa rafaafafu nimaqarafa sia maridanoo.  
 Qusufa qimasee ani Yaaweenara kaukaata qimariasa namuqaa misa rafaafafu nimaqaidaqa.  
<sup>4</sup> Oo Yaawee anee fimarianna aanna qini uqaqifiqaina fua.  
 Anee fimarianna aannara qini daamuqinaqa iria.  
<sup>5</sup> Anee qini Anutufa qini asumu maree marianafa mariannanara ani anoona ufa mau firana daakapa.  
 Qinee aiqama kari ani saqarikidaqa.  
<sup>6</sup> Oo Yaawee aneenna qimudao qirana faqa aneenna naaru marira amuqusirana quqannifqoonnana oonu mafi iria.  
<sup>7</sup> Qinee kumaarasaa auqaafanna aaqarana akiiqara minniqisaa.  
 Oo Yaawee, aneenna naaru marira amuqusiranannoo faqa aneenna amiqi amiqiranannoo faqa qiniara oonu mafi iriqisaa.  
<sup>8</sup> Yaaweefa andeeqara marirana faqaafa marinara aqee mariasa andeeqara aanara naamua qidanoo.  
<sup>9</sup> Nári nifaaqa mara maree qumi mariasa Yaaweefa andeeqara aatata nifqee fidanoo, nari aidiranara qimannimidanoo.  
<sup>10</sup> Mina moodaanaki kira ufa faqa mina sandufa faqa afaqee mariasa Yaaweefa nari mapukusee marira oosanannoo faqa nari amuqusiranannoo faqa nifqee fidanoo.  
<sup>11</sup> Oo Yaawee, aneenna qima afeekai kiranara oonumafi irisee qini moomoo aaqarana akiiqara minniqisaa.  
<sup>12</sup> Yaaweenara naaquqee marisa mifa amiqira aanara qimannimiannoo.  
 Qima niminaqa mi mau fifaranoo.  
<sup>13</sup> Misa aiqama ainaina amanaikiranaki amiqiranaki marifaranoo.  
 Misa faiqi namu maqa maqa mareefaranoo.  
<sup>14</sup> Yaaweefa mina ufa qaindusi mariasa niqoondi maridanoo.  
 Mifa nari moodaanaki kira ufa qimaqoona kafa qimannimidanoo.  
<sup>15</sup> Qinee aiqama kari dadaaqianifeera Yaaweefinnai qifu maqaidaqa.  
 Miqi marunanoo mifa qini manda ainainakinaana itita qisee marifa maridanoo.  
<sup>16</sup> Qinee qeeqaraa marida ummooquki marunnanara Yaawee anee qinnee unnannai quandafi qiniara qimudao qia.  
<sup>17</sup> Qini qimuqusakina oosana oosana ummaarauqa maraqu qisasee qini oosana oosana ummaarakinaana mara kaqinni quqaqisaa.  
<sup>18</sup> Oo Yaawee, qini aiqama aaqarana akiiqara minni qiseenana aupurarana faqa fitinnarana faqa dadaaqia.  
<sup>19</sup> Oo Yaawee anee qafaa qini namuqaa moomoo uqanna maridaqa.  
 Misa firaqoo uqanna qiniara fidaqaa idaqa.  
<sup>20</sup> Qini ititaqisaidana qini marirana mara afeedamma qisaa.  
 Anee itita qimaqaanneera qinee anee iannannai anidaqa.

Namuqaa qini rafaagafu qimaqee marianasaa itita qisaa.

<sup>21</sup> Qinee ani mandaaqee marunnanara qini andeeqarafa faqa anoona qiramau firafa faqa qini rakisiqimaqaani.

<sup>22</sup> Oo Anutu, Isaraee maqannaa aneenna faiqi anaasee nariqa oosana oosana ummaara kinaana mara kaqinni quqannisaa.

## 26

### *Andeeqara fasiqa innaaru qirufa.*

<sup>1</sup> Oo Yaawee qinee andeeqara oosana maree marunnanara faqa firaaqoo ani saqariki

marunnanara faqa iriseenana qiniara aaqarana siai fee qinaqa iriaqa.

<sup>2</sup> Oo Yaawee, anee qini diuqummasee qimanammasee qafaa.

Qini didirana faqa qini irirana faqa rainasee iria.

<sup>3</sup> Ani aiqama kari mari amuqusirafa qini indaarunnikamma qimaqaidanoo. Aniki mapukusee marira oosana fannoo qini dadaaqidanoo.

<sup>4</sup> Qinee sia fifau aatata nimariasa saimbaqa nidaqa.

Qinee sia qaaraiki mariasa faqa moodaanaki kianaara.

<sup>5</sup> Qinee aaqee mariasa faqa moodaanaki nirara fidiqaammidanoo.

Manda oosana auqee mariasa finnaaqa raidaqa.

<sup>6</sup> Qinee qeeqa qisauku nammari uqusee qeeqara aaqarana siaisee qidaqa.

Miqimmasee qinee ani aidara fiq fiq idaaqani amooqidaqa.

<sup>7</sup> Qinee aniara dufi dufi qira idi raidaqa anee firaa ainaina auqoonnanara qimannimidaqa.

<sup>8</sup> Oo Yaawee qinee anee marianna maaqanara firaaqoo dididanoo.

Ani qareenarafa mariqoora firaaqoo dididanoo.

<sup>9</sup> Sia aaqee mariasa namufaqa qini kuridi qimaqaa.

Faiqi nari mariasa darirana kinaana qini mara kaqinni quqaqisaa.

<sup>10</sup> Miqi mariasa aiqama kari manda oosana faqa umeeramaisaaniffee munnimma maqee maqee maree mariasa faqa nariranakinaana qini mara kaqinni quqaqisaa.

<sup>11</sup> Qinee qeeqaraa andeeqara oosana auqaidaqa.

Anee qiniara qimudao qimasee qini asumu mara quqaqisaa.

<sup>12</sup> Qinee aiqama manda ainainakiqari kaqinni maridaqa.

Qinee Yaaweenaa faiqi anaasee suqiranaki mina amooqidaqa.

## 27

### *Anutuna amooqira innaaru.*

<sup>1</sup> Yaaweefa qini qoomara foora maridanoo qini asumu

maree marifa marinara qinee yanaree moonara rufiaanauree.

Qini marirana nirana afeeka Yaaweefa kai marinara qinee yanaree maparaa ianauree.

<sup>2</sup> Manda oosana maree mariasa aanaamuru qini

namuqaauqa qini makuruaanee qimasee anireeqa niku amaki saamurifara.

<sup>3</sup> Qini namuqaa moomoo aniree qini maqusa uqusaifaqa sia qinee misara rufiaanaura.

Rakiranaki misa aniree darirarifaqa sia qinee maparaa ianaura qifaaqa quqasee marianaura.

<sup>4</sup> Qinee moodaa ainaina kai Yaaweenasaa qaraana marararee qidaqa, qinee minara kai randaanaura.



Qinee maa maqanasaa marunna kamuqoo Yaaweena uiqaana maqaki marianauree qidaqa.

Minaki maridaqa Yaaweena qareenarana qafamasee asasianauree qidaqa. Mina uiqaana maqaki mina iriranara mariranara randaanauree qidaqa.

<sup>5</sup> Manda aukuana kambiqainanoo nari mari maqanaki kukeeqa qimaqaanoo.

Nari uiqaana maqaki qini kukeeqaqisaanoo.

Mifa qini uqeereeqee aqanasaa oonisaa amiqiraqoo quqaqisaanoo.

<sup>6</sup> Doo miqoo qini namuqaa qini uqusaafanoo Yaaweefa qini mareeqee misa urinnaaqarama saifaqa marianaura.

Miqimmasainaqa qinee nari Yaaweena naaquqara uiqaana maqaki faaqa quqasee اساسمasee aandau tatufirana suqamianaura.

Qinee idi namu faqa ufireena namu faqa Yaaweenara amooqira idi raanaura.

<sup>7</sup> Oo Yaawee qinee qeeqa ufannai aniara nameera qimasee aaraanana iria. Anee qini qifauarana qimisee kafaa anoona ufa qimaqimia.

<sup>8</sup> Anee qiniara aniree qini qimooqiannee qianaqa Yaawee, qinee eedoo qimasee anianaura.

<sup>9</sup> Oo Yaawee aneenna oori afiri sia qini kukeeqa qimaqaa.

Sia qiniara arana qaani. Sia aneenna ainainira faiqi qiniara anirandee fuannee qia.

Anee qini dadaaqa marianafa mariananoo.

Oo qini Manika Anutu anee qini asumu maree marianafa mariananoo, sia qini minniqisaa sia qini quqaqisaa.

<sup>10</sup> Qini qinaukoo qini minniqisaifanoo Yaaweefa qinisaa rakisiannoo.

<sup>11</sup> Oo Yaawee anee qiniara auqaannee qimarianna ainainnara daamuqia. Qini namuqaa moomoo marianara irisee andeeqara aatata amiqiraqoo qifigee fua.

<sup>12</sup> Sia anee qini mareeqee qini namuqaa marianaki quqaqisaa.

Misa naaquqara ufannai faqa unna ufannai faqa qini daridaqa.

<sup>13</sup> Qinee maa ainainnara amiqimmasee iridaqa, qinee kasooaqee kaqi mariasa faqa maridaqa Yaaweena amiqi amiqirana qafaanaura.

<sup>14</sup> Yaaweena saqarikia.

Sia ani amuqusa ummaara raani, afeekaikammasee mina saqarikia.

## 28

### *Dadaaqiani fee innaaru.*

<sup>1</sup> Oo Yaawee anee qini dadaaqida ititaqimaqee marianaqa minakiqari qinee ani aaraanana qini nammeera qirana iria.

Anee sia qini anoona ufa qima qiminaqa qinee kuqira maqa maaqaki kuqufida fimariasa qambaana marianaura.

<sup>2</sup> Qinee qeeqa qisauku ani naaquqara amaana maqa maritina uqeerasee dadaaqianneera innaaru qianana iria.

<sup>3</sup> Oo Yaawee anee sia manda oosana maree mariasa faqa aqee mariasa faqa amiqira adiafaa ira ufa

qimaria fanoo misa nimuqusaki manda irirafa umbiqarausa namufaqa qini rafaqafu qimaqaa.

<sup>4</sup> Oo Yaawee misa auqee mariana akiiqara aupurarana nimia.

Nisaukunnai manda oosana auqee mariana amana kai aupurarana nimia.

Misa aiqama manda oosana maree mariana amana kai aupurarana nimia.

Misa aaqarana akiiqara amanaikamma nimia.

<sup>5</sup> Miqi mariasa Yaaweefa auqoo ainainnara sia iridaqa.

Mifa narí asaukunnai auqu quqoo ainainara sia misa  
iridaqa mina akiiqara Yaaweefa misa aupurarana nimiseenoo kuridi  
nimaqaannoo.

<sup>6</sup> Yaaweefa qinee dadaaqiani feera nammeera qunnana irinara mina  
amooqidaqa.

<sup>7</sup> Yaaweefa qini itita qimaqaseenoo qini dadaaqi marifa maridanoo.

Qinee mina saqarikidaqa.

Mifa qini dadaaqirana faqa asasirana faqa qimisaifaqa asasidaqa.

Minara qinee mina amooqidaqa asasira idi rama amaqaيداqa.

<sup>8</sup> Yaaweefa narí faiqi anaasee itita nimaqaيدanoo.

Mifa narí utaaqamaqai karaambaiqana itita  
amaqaseenoo mina manda ainainakinaana mara kaqinni quqaisaidanoo.

<sup>9</sup> Oo Yaawe aneenna faiqi anaasee manda  
ainainakinaana mara kaqinni quqasee anindikiqa mariasa amiqi  
amiqimma nimaqaa.

Anee misasaa sipsipasaa rakisirafara foora maridana naaruara misasaa  
rakisia.

## 29

### *Aakuasaa ufai uqirafa Yaaweena ufara foora maridanoo.*

<sup>1</sup> Innee innaarunai mariasa mina amooqiaqa.

Mina afeekara faqa qareenaranara faqa amooqiaqa.

<sup>2</sup> Yaaweena qareenara auqu uqeeraaqa.

Yaaweefa naaquqarafa kooroinaqa mina oorinni niqoori saunu arafi  
naaquqamafi mina amooqiaqa.

<sup>3</sup> Yaaweefa ufa qifaqa ooruku nammariki aiqamaindari mina ufa iridaqa.

Uriqarara qareenarana faqaa Anutufa innaarunaira

foora darara qifanoo ooruku nammari aiqamai daraanifaqa iridaqa.

<sup>4</sup> Yaaweefa aiqama afeeka faqa eeraarirana faqaana ufa qirana irisee  
aiqamausa rufiidaqa.

<sup>5</sup> Yaaweena ufa fannoo firaa saqari raudee marifa maridanoo.

Yaaweena ufa fannoo Reebanoona maqa maaqaki

mari saqarisa sidaa saqariuqa raudee marifa maridanoo.

<sup>6</sup> Yaaweefa qifaqa Reebanoona aaqanauqa kasidaqa aandau aanaaqiara  
foora rafusaki rafusaki idaqa.

Qeeramoonna aaqana faqa miqi kai idanoo

burimakau aanaaqi timmusara foora rafusaki rafusaki idanoo.

<sup>7</sup> Yaaweena ufa fannoo aakuasara foora pananana qidanoo.

<sup>8</sup> Yaaweena ufa fannoo aadana maqa maaqa kasidanoo.

Mifa qifanoo Kadeesa aadana maqa maaqa faqa kasidanoo.

<sup>9</sup> Yaaweena ufa fannoo aakuasara foora pananana qinoo saqari amanee  
rauqu aqidanoo.

Yaaweena maaqaki mariasa firaaqoo faaqa rumasee Yaaweefa uriqarara  
qareenarana faqaafee qidaqa.

<sup>10</sup> Yaaweefa naaruara uriqarara karaambaiqa maridanoo aiqama nammar-  
iuqasaa rakisidanoo.

<sup>11</sup> Yaaweefa narí aiku asauku afeeka nimidanoo.

Amiqi amiqimma nimaqasee asoaranaki quqannisaidanoo.

## 30

### *Dufi dufi qira innaaru.*

- <sup>1</sup> Oo Yaawee, ani auqu qinee uqeeraidaqa.  
Qini namuqaauqa qini darusee ataasa ataasa qidaqa  
nasuriraree qianakinaana kaqinni mara quqa qisaannanara ani auqu  
uqeeraidaqa.
- <sup>2</sup> Oo Yaawee qini Anutufa qinee ani dadaaqiranara aaraunana anee qini  
dadaaqiananoo.
- <sup>3</sup> Oo Yaawee anee qini madikakinaana qumbaqi  
qisaananoo, qinee kuqira madikaki ooqu raunana anee qumbaqisee kaqi  
marirana qimiananoo.
- <sup>4</sup> Oo innee Yaaweenaki mapukusee mariasa, innee mina amooqira idi raaga.  
Innee mifa auqoo ainainara oonu mafi irisee mina dufi dufi qima  
amaqaaga.
- <sup>5</sup> Yaaweena aanooqirafa qusakamu marinoo taikaannoo.  
Mina amiqirafa maa maqanasaa kisaagasaa mariannoo.  
Eendaki qusasaa qikiraqarafa mariannoo, iaqainanoo kananaana asasirafa  
mariannoo.
- <sup>6</sup> Qinee afeekaikammasee mapukiqa maridaqa qinee aaqamasee qeeqara  
maaqi qiqiafana.  
Qinee naaruara naaruara sia kasianauree qiqiafana.
- <sup>7</sup> Oo Yaawee anee qini amiqimma qimaqaseenana  
aaqana saaqaraa maaqara foora mariafanana qinisaa itita qimaqanau.  
Anee aneenna oori kaqinni quadoonaqa qinee maparaa iranaki mariqi-  
afana.
- <sup>8</sup> Oo Yaawee qinee ani aareeqa anee dadaaqirana qimianneera aareeqa
- <sup>9</sup> Qini kuqirafa sia kaqikaagoo faqa ani amooqirafa mariannoo.  
Qinee madikaki oquraananoo qini mi kuqirafa sia amana moo ainaina  
auqaannoo.  
Kuqirauasa amanee ani amooqifaree. Sia amana.  
Amanee misa anee kisaagasaa amiqimma nimaqee mariannanara kooroo  
ifaree. Sia amana.
- <sup>10</sup> Oo Yaawee, anee qini innaaru irisee qimudao qimasee qini dadaqia.
- <sup>11</sup> Qinee soofaarakii marunnana anee quandasee idi rarana qimiananoo.  
Anee qini ikiraqarana mara aquseenana asasirana qini fiqumma  
datimma qimaqaananoo.
- <sup>12</sup> Miqimma qisaannanara qinee sia ufa siaina qireeda mariana qinee  
ani amooqira idi raanura.  
Oo Yaawee anee qini Anutufa qinee naaruara naaruara ani dufi dufi qima  
amaqaanaura.

## 31

### *Anutuna saqarikira innaaru.*

- <sup>1</sup> Oo Yaawee qinee itita qimaqaanneera anee iannannai anidaqa.  
Naaruara sia qini qisauriranaki quqaqisaa.  
Anee andeeqara Anutufa mariananoo qini kuqiranakinaana mara kaqinni  
quqaqisaa.
- <sup>2</sup> Qini ufa irisee maqee uqanna qini kuqiranakinaana mara kaqinni  
quqaqisaa.  
Anee qini faandaamura ooniara foora maridana qini itita qisaa.  
Anee qinisaa ququsara foora auqu ititaseenana qini kuqiranakinaana mara  
kaqinni quqaqisaa.

- <sup>3</sup> Oo Yaawee anee qini faandaamura ooniara foora faqa ququsara foora faqa mariananoo.  
Aneenna qima afeekaikunadee inana qini qisauku qumaree aana muquni-naqa fua.
- <sup>4</sup> Anee qini dadaaqinaqa qini qimaara fufuqaa ufaannanaki sia arua.  
Manda ainainasaa auqaanara foora qinisaa mandaaqa qimaqaa.
- <sup>5</sup> Ani asaukuki geeqa qimana quqaidaga.  
Oo Yaawee anee qini kuqiranakinaana mara kaqinni quqa qiseennaranoo.  
Anee mapukusee marirana faqaa Anutufa mariananoo.
- <sup>6</sup> Anee unnaqira anutusara innaaru qimariasara fidiqaa imariananoo.  
Misa miqi mariafaqa qinee ani kai saqarikidaqa.
- <sup>7</sup> Ani maasara kisaaqasaa amuqusiranara qinee asasidaqa nasurianaura.  
Anee qini aupurarana faqa ummaara faqa qafaannanara miqianaura.
- <sup>8</sup> Anee sia qini mareeqee namuqaa nisaukuki quqasaanaqa qini qumaree.  
Qinee qifaqa quqasee geeqa didimarinnai firana anee qimiananoo.
- <sup>9</sup> Oo Yaawee qinee qummaaraki maridaqa qiniara qimudao qia.  
Qinee kaaqa moomoo kari iki raqee saunanoo qifukaumu innooqafinoo.  
Qini qimudaani firaqoo ummooqukidanoo.
- <sup>10</sup> Qini ummaara fannoo qini afeeka taikaidanoo.  
Qini iki raqarafa qini marirana qusa raidanoo.  
Qini ummaara fannoo qini afeeka taikasaifanoo qini qimudaani ummooqukidanoo.
- <sup>11</sup> Qini namuqaa faqa qini qiqoonausa faqa qiniara uteeti amara auqidaqa.  
Minara kai qiniara irimariasa naaquqafaqa qini daaqu rufiqaidaga.  
Aana qini paquri masee quqasee sandaidaqa.
- <sup>12</sup> Qinee kuqira foora iqa marunaqa qiniara qaunidaqa.  
Qinee rukamufifaqa aqusaa qafeesara foora maridaqa.
- <sup>13</sup> Qini namuqaauqa maqandanai narí qimami narí qimami masaidaqa  
uteeti qimariafaqa iridaqa.  
Rufiarafa firaafa qini fiq fiq inoo maridanoo.  
Misa moodaanaki suqufiqa qini marirana taika qimaqaaneera tipundaaridaqa.
- <sup>14</sup> Miqi mariafaqa Oo Yaawee qini Anutu qinee ani kai saqarikidaqa.
- <sup>15</sup> Qinee aiqama kari ani rakisi qimaqaranaki maridaqa.  
Qini namuqaa qini darirara qifaqaqa nuanakinaana qini mareeqee amiqiraqoo quqa qisaa.
- <sup>16</sup> Qini aneenna ainainira faiqira qimudao qidana qiqafaa.  
Aneenna sia takee mari amuqusiranaki qini mara quqa qisaa.
- <sup>17</sup> Oo Yaawee, qinee ani aaraunnaara anee qinaqa  
qini namuqaauqa sia qini qisauriranaki quqaqisaaqa.  
Manda oosana maree mariasa kai nisauriranaki mariaqa.  
Misa ufa taikafinaqa madikaki kuqirausa faqa mariaqa.
- <sup>18</sup> Unna ufa qimariasa noo qummuna mannisaa.  
Misa nári nifaqa uqeerasee akaqausa mara maree  
qumimariasa misa andeeqarausara manda ufa qidaqa.
- <sup>19</sup> Ani ameemaana maridaqa ani ufa mau fimariasa  
afeedamma nimaqaqaanna ainainausa kaaqa amiqirafa maridanoo.  
Anee firaqoo amiqimma nimaqee mariannanara aiqamausa iridaqa.  
Ani saqariki mariasa anee firaqoo rakisi nimaqaidana itita nimaqee mariananoo.
- <sup>20</sup> Ani saqariki mariasa narirara tipundaari mariafana

anee mareeqee aneenna afusaa amiqiranaki quqannisee marianafa mari-  
ananoo.

Misa namuqaa nifairirankinaana mareeqee amiqira auqaanai quqannisee  
marianafa mariananoo.

<sup>21</sup> Yaaweena amooqirana amiqa.

Qini namuqaa qini fiqumma datimmafi  
daruaneerufanoo qiniara firaqoo aidufanoo itita qimaqoonara  
amooqiaqa.

<sup>22</sup> Qinee rufiidaqa maaqi qimasee iriqa, doo Yaaweefa  
qini narí afusaa marunnana mareeqeenoo kaqinni quqaqee maqi  
qimasee irunanoo,

Yaaweefa qini innaaru qirana irisee dadaaqinoo.

<sup>23</sup> Innee Yaaweena faiqí anaasee innee Yaaweenara firaqoo nidiani.

Yaaweefa narí ufaki mapukusee mariasa itita  
nimaqaseenoo, narí nuqu uqeeree mariasa narí manda oosana akiiqara  
nimimarifa maridanoo.

<sup>24</sup> Innee Yaaweenaki mapukusee mariasa inni nimuqusa fannoo aiqama  
kari afeekaikinoo mariani.

## 32

### *Numoo koorooirana faqa numoo akiiqara minninnisara ufa.*

<sup>1</sup> Inni numoo minninsaisa faqa inni numoo rafaqafu nimaqasaisa faqa  
asasiaqa.

<sup>2</sup> Yaaweena nifairiranki sia mari fasiqafa asasiranaki maridanoo.

Sia unna qimasee nikaru qimari fasiqafa faqa asasiranaki maridanoo.

<sup>3</sup> Qinee qeeqa numoo sia koorooiqa iki raqaida marunanoo suani afu  
keeqaidanoo.

Miqunanoo qini qimudaani ummooqukidanoo.

<sup>4</sup> Eendaki faqa faasaana faqa Yaawee aneenna  
asaukunnai fannoo qini aupurarana qimimariananoo qini afeeka  
taikkeenoo.

Aiqaiqa aukuana suani firaafa qeenoo maqa aadana ususaifanoo  
taadairindee idanoo.

<sup>5</sup> Qinee miqiga maridaqa qeeqa aaqarana ani Yaaweena afusaa akooqoo  
koorooiqa.

Qeeqa manda oosana sia kukeeqeeqa kooroommasee ani qimamiqa.

Qinee maaqi qiqa, qeeqa aaqarana Yaaweena afusaa

kooroo qianauree qimasee kooroomma saunana

anee Yaaweefa qini mandoosana faqa qini aaqarana akiiqara faqa min-  
niqisaananoo.

<sup>6</sup> Miqiannanara aiqama ani ufamau fimariasa aiqama ainainara randeeqa  
aniara innaaru qidaqa.

Firaa ummaara nammari aufiara foora inoo sia misa rafaqa fuannoo.

<sup>7</sup> Anee qini kukeeqara maqusa mariananoo.

Anee ummaara aukuana qinisaa rakisinnaranoo.

Anee qini maree marianafa mariannanara firaqoo idi raidaqa.

<sup>8</sup> Yaaweefa maaqi qidanoo.

Qinee anee finna aannanara qima amianaaura.

Qinee ani aakapamasee aamuqianaaura.

<sup>9</sup> Anee sia qoosa doonkiara foora furufaria. Misa irirana siai ainainara foora  
maridaqa. Anee qainna

misa nooki quqasee rarisee mariandee inaqa irifaranoo.

Anee nookinaa qainna sia quqainaqa sia ani ufamau fifaranoo.

<sup>10</sup> Manda oosana maree mariasa moomoo ummaara oosana oosana misaki maridanoo.

Yaaweena saqariki mariasa mina naaru marira amuqusirafa misa kukuqinoo maridanoo.

<sup>11</sup> Innee andeeqarause Yaaweefa auqoo ainainausara asasida nasuriaqa. Innee mina ufa qaindusi mariasa faaqa ridaqa asasiaqa.

### 33

#### *Amooqira Idi.*

<sup>1</sup> Innee andeeqarause Yaaweefa auqoo ainainnara faaqa ridaqa asasiaqa.

Mina ufa mau fimariasa mina amooqiaqa.

<sup>2</sup> Innee piripuna aridaqa Yaaweena amooqiaqa.

Qisaukuqara taikasee sandafaqaa piripuna aridaqa Yaaweena amooqira idi raaqa.

<sup>3</sup> Innee Yaaweenara fuka idi ridaqa amooqiaqa.

Innee amiqimmasee akoofasara foora piripuna aridaqa faaqa fuisee qidaqa amooqira idi raaqa.

<sup>4</sup> Yaaweena ufa fannoo kuqaa anoona kai maridanoo.

Aiqama ainaina auqee marina mi mau kai uqee marifa maridanoo.

<sup>5</sup> Yaaweefa andeeqara marirana faqa andeeqasee amana amana kai rainee marianara faqa aididanoo.

Maa maqa maaqanaki Yaaweena sia taikara amuqusirafa qumbiqanoo maridanoo.

<sup>6</sup> Yaaweefa ufannai qufanoo innaaruna kambiqanau.

Nari ookinaa aidoonnai qufanoo suani faqa quqoona faqa fasau faqa kambiqanau.

<sup>7</sup> Yaaweefa ooruku nammari susufinnaki saka quqaandee inoo moodaannai suqu quqanau.

Ooruku nammari faruma meemai uqanna quqasee afeedinau.

<sup>8</sup> Minara maa maqa maaqanasaaqaraasa aiqama Yaaweenara innaaru qiaqa.

Maa maqa maaqanasaa mariasa minara naaquqee marina mina ameemaanai mariaqa.

<sup>9</sup> Yaaweefa qufanoo maa maqa maaqafa kambiqanau.

Mifa afeeka ufa qufanoo aiqama ainaina kambiqanau.

<sup>10</sup> Yaaweefa maa maqana saaqaraasa manda ufa tipundaariafanoo titanni-maqaidanoo.

Maa maqana saa mariasa auqararee qia ainainna itita nimaqaidanoo.

<sup>11</sup> Yaaweena qimirirafa miqinoo maridanoo naaruara naaruara afeekaikamminoo maridanoo.

Mina amuqusakinaa qimirirafa naaruara naaruara mariannoo.

<sup>12</sup> Aiqama maqannaasa kiqari ya maqannaasee misa Anutufa Yaaweefa maridanoo fee asasiaqa.

Yaaweefa nariaree qimasee utaaqama qaisa asasiaqa.

<sup>13</sup> Yaaweefa innaarunaindari maqasaa mariasa aiqama niuqidanoo.

<sup>14</sup> Nari maridanoo rakisi nimaqee mariqooqari aiqama maqasaa mariasa niqafaidanoo.

<sup>15</sup> Yaaweefa aiqama maqannaasa nimuqusa auqunisaidanoo.

Misa auqee maria aiqama ainainnara iridanoo.

<sup>16</sup> Sia moo karaambiqa fannoo nari rakira fasiqa moomonnaifau raki-ranaki uriqaraidanoofau.

Afeeka sundia sia narí amudaanai qiranannai fau rakiranaki namuqa  
urinnaaqaraidanoo fau.

17 Rakiranaki maraqa nua qoosausa sia sundiauqa dadaaqifaqa rakirana  
urinnaaqareefaranoo.

Mi qoosausa firaa nimudanai qiranannai sia amana moonna kuqirana  
titaqamaqaannoo.

18 Yaaweena afu fannoo nariara rufiee mariasa dadaaqirara misasaa mari-  
danoo.

Yaaweena naaru marira amuqusiranasaa  
mundimariasa misasaa Yaaweena afu fannoo rusinoo maridanoo.

19 Mifa kuqiranasaa itita nimaqaidanoo.

Mifa aandaroo aukuana faqa rakisi nimaqaidanoo.

20 Maasa qimana Yaaweenaki kai quqaidanoo.

Mifa kai maasa dadaaqirafa maasa saqari maridanoo.

21 Maasa mina naaquqara andeeqara auqu saqarikunnanara firaaqoo  
asasidaqa.

22 Oo Yaawee ani naaru marira amuqusirafa maasa faqa mariani.

Maasa anisaa mundiqa maridaqa.

## 34

### *Anutuna amiqirana amooqira idi.*

1 Qinee aiqama kari Yaaweenara dufi dufi qianaura.

Qinee sia mina amooqirana munu quqaanaura.

2 Qinee mifa auqoo ainaina irisee mina amooqianaura.

Ummaaraki mariasa minara irisee asasiaqa.

3 Innee aniraifaqa maasa Yaaweena auqu gareenaranara koorooia.

Doo aniraifaqa innisaimbaqa mina auqu uqeeraa.

4 Qinee Yaaweenara innaaru qunanoo mifa qini dadaaqinoo.

Qini rufiaranakinaana iduku qiseenoo.

5 Ummaaraki mariasa Yaawee finnai ubeekamafuanara misa asasidaqa.

Minara misa saqarikirafa sia kuridiannoo.

6 Kudi fasiqauqa Yaaweenara innaaru qiafanoo dadaaqidanoo.

Mifa misa aiqama ummaarakinaana mareeqee kaqinni quqannisaidanoo.

7 Yaaweenara rufiee mariasa mina angiroouqa misa

fiqufiquqa maridaqa mandainainakinaana maraqunnisaidaqa.

8 Aneenna kai Yaaweena firaa amiqiranara oonu mafi iria.

Yaaweena itita nimaqaranaki kukeeqa mariasa asasiranaki maridaqa.

9 Innee Yaaweena faiqí anaasee innee Yaaweena ameemaanai mariaqa.

Mina ameemaanai mariasa sia sarauirafa misaki mariannoo.

10 Kaasau faini narana sia amanaikianara naara raifaqa kudoosaapaidaqa.

Yaaweena ufa mau fimariasa sia moo amiqira ainainara sarauifaranoo.

11 Innee qini faiqinamu mai aniree qini ufa irifaqa qinee Yaaweenara  
rufiara oosana qimannimianaura.

12 Yafee moo fasiqa fannoo kaqi mariranara ridanoo fee.

Anee kisaagasaa maridana asasiranara aididanoo fee.

13 Aidinana anee sia manda ufa qia.

Anee sia unna ufa qia.

14 Manda oosana ameesuqusee amiqira oosana maraa.

Aneenna aiqama amuqusannoo asoaranara randasee faiqí anaasee faqa  
moodaanaki maria.

- 15 Yaaweena afu fannoo andeeqarausasaa mundinoo marifanoo rakisi nimaqaidanoo.  
Mina aaqoo fannoo misa nammeeraqiana iridanoo.
- 16 Yaaweefa manda oosana maree mariasara akooqaidanoo.  
Misa kuquafaqa miqoo kai misara qaunidaqa.
- 17 Andeeqara oosana maree mariasa Yaaweena aaraafanoo iridanoo.  
Mifa misa oosana oosana ummaarakinaana dadaaqidanoo.
- 18 Yaaweefa ummaaraki mariasa dadaaqirara naaqa maridanoo.  
Mifa kudoosaapee mariasa dadaaqinoo mara amiqiraqoo quqanni-saidanoo.
- 19 Andeeqara fasiqa anaasee ummaara oosana oosana fannoo aupurarana nimifanoo,  
Yaaweefa minakinaana aiqama mareeqee amiqiraqoo quqannisaidanoo.
- 20 Yaaweefa misa aiqama nimudaanisaa rakisidanoo, sia moodaa nimudaani faqa raqanoo mariannoo.
- 21 Manda oosana fannoo manda oosana maree mariasa kuqa naruannoo.  
Andeeqara oosana maree mariasara fidiyaqa  
imariasaa Yaaweena narira ufa ameemaanai marifaranoo.
- 22 Yaaweefa nari ainaini maria fasiqausa feefaurummasee kafa maraidanoo.  
Mifa innai itita qimaqaaniffee qimasee fimariasaa sia kuridifaranoo.

## 35

### *Dadaaqiani fee innaaru.*

- 1 Oo Yaawee qini rairai qimaqimaqee mariasaa anee misa faqa rairai qimannimaqaa.  
Qini darimariasaa nariqa faqa narua.
- 2 Aneenna rakira saqari faqa rakira ainainauqa namufaqa maree aniree qini dadaaqia.
- 3 Aneenna duru feefa faqa saasuna faqa mara maree aniree qini darirara qifaqaqanuusa narua.  
Anee qini dadaaqiraree qimasee qima qimia.
- 4 Qini darirari mariasaa anee rafaqaqafu nisainaaqaa nisauriranaki mariaqa.  
Qini mandaikamma qimaqarara tipundaari mariasaa mara quanda sainaqa furufariranaki mariaqa.
- 5 Yaaweena angiroo fannoo misa nifaqaseenoo oofaafanaumuura foora utitiqameeqee aqusaina ufai fannoo aanaaqmaara fuaqa aqindee iannoo.
- 6 Misa nimaria aanafa asukuna faqa farindarafa faqa mariani,  
Yaaweena angiroo fannoo misa nifaqaani.
- 7 Qini namuqaauqa oosana siainaki qini qimaara qufaana fufuseeqa qini qimaarusidaqa.  
Misa fifau qini qimaara madika indufia.
- 8 Oo Yaawee anee dadaaqinaqa qini namuqaauqa sia iri marifanoo ummaara fannoo tautummaki misasaa aqufuani.  
Misa nariqa fufuqaa ufaanaki arufi nariqa ummaaraki aqufifaranoo.
- 9 Miqimma fifaqa qinee Yaaweenara asasianauranoo.  
Mifa qini asumu marainara nasurianauranoo.
- 10 Qinee qeeqa qimuqusa aiqamannoo Yaaweenara maaqi qianaara.  
Sia moo fannoo ani fooqaafaa maridanoo.  
Aniara afeeka siaisa afeekaikimariasaa nisaukukinaana rafiaana fee qianaara.



Kudi fasiqauqa mandaikamma nimaqee mariasa  
nisaukukinaana faqa maree marifee qianaara.

11 Manda fasiqauqa qinee sia qafaunna ainainara faqa  
sia irunna ainainara faqa fifau qini rairai qima qimaqaidaqa.

12 Qinee amiqi amiqimmannisaunnana akiiqara mandaikamma qimaqeea.  
Miqiafanoo qini qimuqusa firaqoo ummaarareenoo.

13 Qini oosana moomau fidanoo.

Qini namuqaauqa auriranaki mariafaqa qinee  
misara soofaarira qamunna afisusee qeeqa mara  
maree qumureeqa daararee marufaqa misara findifuaqeera innaaru qi-  
mariqiafana.

Qinee inuka tuqu daumoo amisee findifuaqeera innaaru qimariqiafana.

14 Qini namuqaauqa auriranaki marufaqa qini marirafa maaqimminoo  
marinau.

Qinee misara qini qiqaondifaqa qini qikaqaafasaa  
faqa qini qinoofa faqa kuqiara foora iafaqa soofaarida kummaaraqa  
mariqiafana.

15 Qini namuqaauqa oosana misa sia qini daanna raidaqa.

Qinee ummaaraki aqufunaqa misa qiqaamaseeqa  
asasammasee aiqama qini fiqummafi uteeti qidaqa.

Qinee aanaamuru misara sia irimarunausa qini dariqa kai maridaqa, sia  
idooaidaqa.

16 Qinee qiku qisauku mandaikirausara foora marunaqa misa qiniara uteeti  
qidaqa.

Misa qiniara fidiqaa imarifaqa qini qiqaafaidaqa.

17 Oo Yaawee, kisaagasaa fee anee kaqi nindafaida marinnaree.

Misa qini kuridi qimaqarara imarianasaa itita qimaqaa.

Anee maa kaasau fainisa nookinaana qini mareeqee amiqiraqoo kaqinni  
quqaqisaa.

18 Miqimma sainaqa ani faiqi anaasee moomoosa

suqirana qambaaindari findifi ani Yaaweenara dufi dufi qianaara.

Moomoo fasiqa anaasee fira suqiranaki noorinni oonuree ani  
amooqianaara.

19 Fifau unna qimariasa qini namuqaa qini tataqaida asasifana Yaawee  
anee titaqisaa.

Qini qumaara qafamasee fidiqaaidaqa noorinnai

nifunnai unnamaanna qimariasa anee misa faqa rafaqafunni-  
maqasaa.

20 Misa nifauru fannoo sia asoora ufa aqoondikira ufa

qimarisa, misa oosana oosana unna ufauqa faqa ida qai ufana faqa kai  
qimariasa maridaqa, misa

unnamaanna qiranara randasee mareeqee asoaranaki mariasa nimuaaqa  
aqidaqa.

21 Qini namuqaauqa fifau firaqoo noo raqasee qini

kikiqususseeqa qiniara eoo eoo maasa qifu

fannoo mina aaqarana qafee fee qidaqa unnaqidaqa.

22 Misa miqi qimariafana, oo Yaawee, anee misa unnaqirana qafaananoo.

Anee sia ufa siaina maria, anee sia nianai maria, daaqa ani marida dadaqia.

23 Oo Yaawee, anee faiqara see findifi qini itita qisaa.

Oo qini Anutu findifinana qini ufa afeekaikamma qimaqaa.

- 24 Oo Yaawee, qini Anutu, anee andeeqarafa, anee qiniara sia aaqarana siai fee qia.  
Anee qini dadaaqinaqa qini namuqaa qiniara ataasa ataasa qiaqa.
- 25 Anee qinaqa qini namuqaauqa sia nári nimuqusakiqari maaqi qimasee qiniara qiaqa.  
Eeoo maasa qunnandee kai qinoo mina mandainaina doo kambiqeenoo fee qiaqa.
- 26 Qini ummaara qafamasee nasuri mariasa anee misa aupuraranaki quqannisaa.  
Anee misa nisauriranaki quqasee furufaramma nimaqaa.  
Anee misa nisauriranannoo faqa noori runiranannoo faqa qamunnara foora dukunimma nimaqaa.
- 27 Qini andeeqaranara irisee qini iduku qimaqarara irimariasa kaifaa kaifaa maaqi qimasee faaqaridaqa asasiaqa.  
Yaaweefa kaaqa uriqararafa maridanoo.  
Yaaweefa qini narí ainainira faiqi qinee auqaunna ainainafa anoona kambiqainara iriseenoo asasidanoo.
- 28 Miqinaqa qinee ani andeeqaranara kananaana oosana arasee ani amooqianafa eedirana kai raquru amianaaura.

## 36

### *Faiqí faiqi mandoosanara qirufa.*

- 1 Numoo fannoo manda oosana maree mariasa nimuqusaki maridanoo akaqa aaqara oosanara naakapaidanoo.  
Anutuna minnisee sia minara rufiee marianara manda oosanara irirafa nimuqasaki kambiqaidanoo.
- 2 Miqi mariasa nári kai náriara kaaqa uriqararausee qidaqa,  
Anutufa maasa aaqarana sia amana qafamasee maasa ufa qimiannoo fee qidaqa.
- 3 Misa nookinaa ufa fannoo manda ufa faqa unnufa faqa kai maridanoo.  
Misa sia iriqaraasammasee auqara oosanara faqa andeeqara oosana faqa auqaidaqa.
- 4 Misa nári qaarisaa faiaqee idaqa manda oosanara oonumafi irida maridaqa.  
Misa sia moo andeeqara oosana auqaidaqa, misa manda oosanara faqa sia qaoo qidaqa.

### *Anutuna Andeeqara Oosana.*

- 5 Oo Yaawee, ani sia takaaninna amuqusirafa innaaruna amana kai ooru maridanoo.  
Ani mapukusee marira oosana fannoo oonnamu amana kai ooru maridanoo.
- 6 Ani Yaaweena andeeqarafa firaa aaqananamuara foora uriqaranoo maridanoo.  
Anee maasa ufa irisee andeeqasee raina qimaqara oosana fannoo ooruku nammari farumara foora meemai uqanna maridanoo.  
Faiqí faqa aandau faqa ani rakisinnimaqarana ameemaanai maridaqa.
- 7 Oo Yaawee ani maasara amuqusirafa firaa feefauru aqimaria ainainna-fara foora maridanoo.  
Maasa ani aqoosa ameemaanai keeqafi mandaaqaidaqa.
- 8 Oo Yaawee anee rairaamma nimianna naranna oomaqa sakasee naidaqa.  
Anee qinaqa maasa ani andeeqara oosana nammariara foora naa.

- <sup>9</sup> Anee aigama marirana oosana mariananoo.  
Anee kaaqa qarafa mariannanara maasa kaaqa qarana qafaidaqa.
- <sup>10</sup> Oo Yaawee anee aneenna amuqusirana aniara irimariasa kaifaa kaifaa nimida kai maria.  
Anee aneenna andeeqarana andeeqara aatata fimariasa nimidana kai maria.
- <sup>11</sup> Anee qinaqa nári nimoo naamoo imariasa sia nikunnai qini rafaqaqafu qimaqaqa.
- Anee qinaqa manda oosana maree mariasa sia qini daru qifaqaqa iaqa.
- <sup>12</sup> Niqafaa, manda oosana maree mariasa doo saamuriqa maridaqa.  
Misa maqasaa aqufiqa sia amana kafaa findifaaranoo. Miqoo kai marifaranoo.

### 37

#### *Andeeqara fasiqa faqa manda fasiqa faqa mariranara qidanoo.*

- <sup>1</sup> Anee aaqara oosana maree mariasa nindafamasee sia minara aiaaqee qimasee sia qinee misa dadaaqunoo sia qia.  
Manda oosana maree mariasa nindafamasee sia minara qinee faqa sia maraunoo qimasee arana qaani.
- <sup>2</sup> Misa miqi marianara amukafaqaa sanda miqirausa qusasaa ateeqa saifaqa gammundeefaranoo, misa andanda miqirausa maridaqa qusasaa aadanusifaranoo.
- <sup>3</sup> Yaaweena saqarikida andeeqara oosana kai maraida maria.  
Anee miqidana maa maqa maaqanaki kisaqaqasaa kaqi marinanoo sia moo ainaina fannoo ani mandaikamma amaqaanoo.  
Anee aneenna maqa maaqaki kai marida asoaranaki maria.
- <sup>4</sup> Yaaweenaki asasamasee marinanoo ani amuqusaki aidimari ainainna ani amiannoo.
- <sup>5</sup> Anee aneenna marirana nirana Yaaweena amisee mina saqarikammasainanoo mifa maa ainainna ani amiannoo.
- <sup>6</sup> Mifa ani andeeqara oosana dadaaqinanoo suani qambaanara foora amiqimmasee kaaqa qaano.
- <sup>7</sup> Anee Yaaweena oorinni afaqa quqasee ireeda maria.  
Manda oosana maree mariasa aaqara oosanara tipundaarifanoo anoona kambiqainana sia qeeqara faqa miqianee qia.  
Sia moomoo qumiasana faqaasa niqafamasee sia qinee faqa miqiunoo qia.
- <sup>8</sup> Anee mina qafamasee sia moomoo irira iria.  
Sia aanoo qia.  
Mi oosanafa ummaaraki nifiqee fidanoo.
- <sup>9</sup> Manda oosana faqaasa Yaaweefa misa aigama taikannimaqaannoo.  
Irirana Yaaweenasaa mundimariasa maa maqanasaa amiqimmasee marifaranoo.
- <sup>10</sup> Kaqikaqoo marikinanoo doo miqoo mandoosana maree mariasa taikeefaranoo.  
Anee misara randeenana sia paqurinnaranoo.
- <sup>11</sup> Nári mara maree qumi mariasa Yaaweefa aigama maqa nimiannoo.  
Misa miqoo aigama ainaina rairaa imarinaqa asoaranaki maridaqa asafaranoo.
- <sup>12</sup> Manda oosana maraqanuusa andeeqarausa nariraree qimasee tipundaaridaqa.  
Miqidaqa misa andeeqarausara fidiqaaira noori nifiri maraidaqa.

- 13 Yaaweefa qusasaa misa mandaikamma nimaqaaninnanara iriseenoo naanaidara qidanoo.
- 14 Manda oosana maree mariasa kudi fasiqa anaasee faqa sarauiranaki mariasa faqa andeeqara aatata fimariasa faqa nariraree qimasee nári faaqaana mai qumaree duru rakisisee nimaarusida maridaqa.
- 15 Misa nariqa rakira faaqaana fannoo nári nimuqusa raquru nimiannoo. Misa duru faqa raudaannoo.
- 16 Andeeqee mari fasiqana ainaina oodaa mariannoo, Anutuna afusaa uriqaranoo maridanoo. Manda oosana maree mari fasiqana ainaina moomoo maridanoo, Anutuna afusaa ureeqanoo maridanoo.
- 17 Minara manda oosana maree mariasa Anutufa misa afeeka mara maraannoo. Andeeqee mariasa Yaaweefa itita nimaqaannoo.
- 18 Yaaweena ufa mau fimariasa Yaaweefa misa marirana niranasa rak- isidanoo. Maa maqa maaqafa misaindikinoo naaruara mariannoo.
- 19 Miqi mariasa manda aukuana anirainaqa sia aupurarana mareefaranoo. Aandaroo aukuana misa narana moomoo mariannoo.
- 20 Mandoosana maree mariasa kuqifaranoo. Yaaweena namuqaauqa taatuqeena kakasindee ifaranoo. Misa ida muna qusasaa marinoo taikaindee ifaranoo.
- 21 Manda oosana maree mariasa moosa ainaina ufaasu maraseeqa sia kafa nimidaqa. Andeeqaraura oosana moo maridanoo, misa afaarida kaqi nimimariasa maridaqa.
- 22 Yaaweefa amiqi amiqimmanimaqee marisa misa nári maqa maaqaki amiqimmasee marifaranoo. Yaaweefa niquraree marisa mina maqasaa mariana mara qaqusainaqa quqasee fifaranoo.
- 23 Andeeqara fasiqa niranara Yaaweefa asaidanoo dadaaqidanoo. Yaaweefa asasi maria fasiqa anaaseesa itita nimaqaidanoo.
- 24 Mi andeeqara fasiqafa saamurinoo maqasaa aqufinoo sia miqinoo mari- annoo findifuannoo. Yaaweefa uqeerainara miqiannoo.
- 25 Qinee kumaaraa mariiafanausa doo maqee asooqa maridaqa, Yaaweefa andeeqaraura minninnisoona sia qinee mi kamu qafaqafana. Mina faiqi namu naranara sarauida innaaru qirana faqa sia qafaqafana.
- 26 Andeeqaraura aiqama kari afaari mariasa maridaqa. Sarau imariasa irafaqa eedoo qimasee kaqi ufaasu nimidaqa, misa faiqi namu faqa amiqi amiqiranaki marifaranoo.
- 27 Anee manda oosanaqiri quandakinana andeeqara oosana maraa. Miqinaqa ani faiqi namu ani maqasaa naaruara marifaranoo.
- 28 Yaaweefa andeeqara oosana maree mariasara aididanoo nári ufamau mapukusee fimariasa faqa sia minninnisaannoo, misasaa naaruara titannimaqaannoo. Manda oosana maree mariasa faiqi namu mara aqusaannoo.
- 29 Andeeqaraura nári nikausa ninaakusa maqa maaqa umiasanara foora maraseeqa, minaki naaruara marifara.
- 30 Andeeqaraura nifauru fannoo irirana faqaasa ufa kai qidanoo. Mina afauru fannoo qambaana andeeqara ufa kai qidanoo.

- 31 Anutuna sanda ufa andeeqarausa nimuqusaki maridanoo.  
Minara misa sia quqasee moosaa fifaranoo.
- 32 Manda oosana maree mariasa andeeqarausa nipuraida narirara ni-  
maarusidaqa.
- 33 Yaaweefa sia andeeqarausa manda oosana maree mariasa nisaukuki  
quqasaifaqa naridaqa.  
Manda oosana maree maria fasiqausa andeeqarausa  
ufaki quqasaifanoo Yaaweefa misa titannimaqainaqa sia narifaranoo.
- 34 Anee aneenna irirana Yaaweenaki quqasee mina ufa mau kai andeeqasee  
fua.  
Anee miqimarinanoo Yaaweefa ani firaa auqu  
amiseenoo ani aanaakusa akausa maqa maaqa amiannoo.  
Mifa minaki manda oosana maree mariasa mara aqusaina qafamasee  
kuqaa fee qinnaranoo.
- 35 Qinee Dafidisa, mandoosana maree mari fasiqana  
qafaafananoo firaa saqari miqirafa Reebanoona  
amiqira maqasaa kambiqafi ititanoo mariara foora inoo marinau.
- 36 Mifa qusasaa marinoo doo taikafifaqa qinee  
qafaunanoo sia marifaqa randeeqa sia uqanna paquriqa.
- 37 Anee ufa siai fasiqana faqa andeeqara aatata fimari fasiqana faqa  
niuqummasee qafaa.  
Asooara oosanaki reendeennammasee mariasa maa  
maqanasaa misa saqari kambiqainausa faqa kisaaqasaa marifaranoo.
- 38 Aaqee mariasa Yaaweefa aiqama uqanna kuridi nimaqaannoo.  
Manda oosana maree mariasa niku nisauku marirana Anutufa ateekasaina  
sia marifaranoo.
- 39 Ummaara aukwana Yaaweefa andeeqarausa itita nimaqasee asumu  
maraidanoo.
- 40 Yaaweefa andeeqarausa dadaaqinoo manda mariranakinaana uqeeran-  
nisaidannoo.  
Aaqee mariasa nisaukukinaana asumu mareeqee  
kaqinni quqannisaidannoo. Misa Yaaweena mandaaqee marianara  
asumu maraidanoo.

## 38

### *Ummaaraki mari fasiqana innaaru.*

- 1 Oo Yaawee, aneenna aanooqiranakiqari sia qiniara aanooqia.  
Aneenna aranaqaranakiqari sia qini ummaara qimia.
- 2 Anee feefara foora amiqimmasee qini tapooqaananoo.  
Ani asauku fannoo firaaqoo qini radamimarifaqa ummaara maraidaqa.
- 3 Anee qiniara aanooqiannanara qini qifaaqa firaaqoo didafidanoo.  
Qini numoo marinara qini qimudaani umooqukinoo marifaqa sia  
afeekaikidaqa.
- 4 Qini aaqara ummaara fannoo qini rafaqaqafu qisaidanoo.  
Mifa firaa ummaara maridanoo, sia qinee amana akuanaura.
- 5 Qini furufarirafa marinara qifaaqa ateekeeqaafanoo adiaru usufifanoo  
afundida putaidanoo.
- 6 Qinee ummaaraki maridaqa maqasaa aqufiqa  
maridaqa, aiqama faasaana suani afu ururarana  
namu faqa soofaarida kummaraqa maridaqa iki  
raqaida marunanoo suani afu keeqaidanoo.
- 7 Qini qifaaqa idara foora qaidanoo.

- Qinee kuqirana adeedi raqa maridaqa.  
<sup>8</sup> Qini qimudaani raqanoo mariara foora qumooqukiqa nidaqa.  
 Qini qimuqusa firaqoo didafi marinara annadannada qida maridaqa.  
<sup>9</sup> Oo Yaawee qini didimari ainainausa ani afusaa akooqoo marifana iri mariananoo.  
 Qini didafi marifaqa annadannadirafa ani afusaa sia kukeeqanoo maridanoo.  
<sup>10</sup> Qini qimuqusa rundurundi marifanoo qini afeeka taikkeenoo.  
 Qini afeeka doo quminoo, qini qifusaa mari kaaqa qarafa doo taikafifanoo asukuna kai titeenoo.  
<sup>11</sup> Qini qiigoonduqa faqa qini faqa nimariasa faqa qini nammuana qafeeqa rufiasee niana tatutatuidaqa.  
 Qini qiigoonauusa faqa miqikaimmidaqa rufiqa rufiqa idaqa.  
<sup>12</sup> Qini darirara randee mariasa qufaana fufidaqa.  
 Qini mandaikamma qimaqarara ufa qimariasa maridaqa.  
 Suani afu ururarana namufaqa tipundaarida mariafanoo suani afu keeqaidanoo.  
<sup>13</sup> Qinee daaqoo qaunirausara foora sia misa ufa iriqa doo qummunirausara foora sia qimannimidaqa.  
<sup>14</sup> Qinee sia ufa irimaria fasiqausara foora maridaqa, qeeqa dookiqari qimannimirara sia amanaikidaqa.  
<sup>15</sup> Oo Yaawee qinee ani kai saqarikidaqa.  
 Oo Yaawee qini Anutufa anee qini ufa qima qiminnaranoo.  
<sup>16</sup> Oo Yaawee qini namuqaa sia qini mandaikamma qimaqasee nasuriaqa.  
 Qini qiku farindamaki aqufuanaqa sia nasurida asasiaqa.  
<sup>17</sup> Qinee saamuruqaammidaqa.  
 Qini didafirafa kisaaqasaa qini faqa maridanoo.  
<sup>18</sup> Qinee qeeqa aaqarana akooqoo kooroomasaunanoo, qini numoo fannoo qini qummaara qimidanoo.  
<sup>19</sup> Qini namuqaauqa moomoosa nimudaanai qimariasa maridaqa.  
 Qiniara fifau fidiqaa imariasa moomoosa maridaqa.  
<sup>20</sup> Qini amiqira oosana akiqara mandaikammaqimaqee mariasa misa qinee andeeqaramau fimarunaqa misa qini namuqaakamma qimaqaidaqa.  
<sup>21</sup> Oo Yaawee qini Anutu, sia qini minniqisaa, sia nianai maria, daaqa ania.  
<sup>22</sup> Oo Yaawee qini asumu maree marianafa kai kaqi aniree qini dadaaqa.

### 39

#### *Ummaaraki mari fasiqana numoo koorooira ufa.*

- <sup>1</sup> Qinee Dafidisa qeeqara maaqi qiqa, qinee qeeqa nirana mariranasaa rakisianaura.  
 Qini qifauru fannoo sia aaqara ufa qiannoo.  
 Manda oosana maree mariasa qini daaqa marifaqa sia qinee moo manda ufa qianaura.  
<sup>2</sup> Qeeqa ufa rafaqa fusee doo qummunimmasee marunanoo mifa sia dadaaqinoo.  
 Doo qummunimmasee sia amiqira ufa faqa qimarunanoo qini daundurakinaa ummaara firaanaikinoo.  
<sup>3</sup> Doo qummunimmasee marunanoo qini daundurai qimuqusaki idara foora aurinoo.  
 Qinee firaqoo oonumafi irimarunanoo qini daundurai firaqoo idaqaenoo.  
 Idaqee marifaqa qinee sia doo qummunimmasee marianaura.

- 4 Oo Yaawee qinee taikaanna aukuannara qinaqa iria.  
Yairee fee qinee kuquanauree.  
Qini marirafa munu taikaaninnanara faqa qima qimia.
- 5 Anee qini marirana gusa uqanna ramasaanoo.  
Qini marirafa ani afusaa fifau ainainara foora sia maridanoora foora maridanoo.  
Aiqama fasiqa fifau naidoora foora kai maridaqa.
- 6 Aiqama fasiqauqa nimanandara foora marida nidaqa.  
Miqi mariasa aiqama ainaina fifau kai kadaapi ridaqa.  
Maaqoo maridaqa qumiasana suqu quqaseeqa  
kuqifanoo yafee maraannoo fee qimasaida sia iridaqa.
- 7 Oo Yaawee qinee nana moo ainainara afeesianauree.  
Qini irirafa aniki maridanoo.
- 8 Qini aiqama numoo kinaana mareeqee kaqinni quqa qisaa.  
Miqimma sainaqa furufarirausa sia qiniara naanaidara qiaqeera.
- 9 Anee kai maa aupurarana qimi marianafa  
mariannanara qinee doo qummunimmasee  
qireeda kai maridaqa sia ufa qianaara.
- 10 Sia kaifaa qini mandaikamma qimaqaa.  
Anee qini daruanaqa kuqirara miqidaqa.
- 11 Faiqi aaqara oosana maraasara anee Anutufa  
afeekaikaqmmasee aanoo qima amaqaasee mina  
idi mari ainainna kuridi aisee marianoo.  
Qumura mandaikindee idanoo.  
Aiqama fasiqauqa ani afusaa aidoora foora qusasaa fuaqaki taikaidaqa.
- 12 Oo Yaawee qini innaaru qirana iria.  
Qini dadaaqianneera aaraunnana aaqoo rammatinimmasee irisee qini dadaaqa.  
Qinee ani dadaaqiranara qiki raqaidaqa nammeera qianana dadaaqa.  
Qinee qusasaa maa maqanasaa ani faqa mariqa,  
qeeqa qikeeku qikaaku naanna reeqa qusasaa kai maridaqa.
- 13 Oo Yaawee ani oori afiriara kaaqa daaquqaidanoo  
anee kaqinni anneenna oori ubeekamasainaqa  
qinee qusasaa asasiranaki mariqa kuqua.

## 40

### *Anutuna amooqira idi.*

- 1 Qinee Yaaweenara deendeena mandee afeesida  
marunanoo, mifa quandafi qini nammeera qirana  
amiqimmasee irisee qimudao qimasee dadaaqinoo.
- 2 Qinee qeeqa aaqaranaki doona doona imarina kiara  
foora faqa faurima saara foora faqa farindamaki  
kuqira madikaki faqa afundimari doonna kiara  
foora faqa marunanoo minakinaana mifa qini  
uqeereeqeenoo oonisaa kikiqammaqiseenoo.
- 3 Miqoo mifa fuka idi qini qima qiminoo mi idifa maasa Anutuna amooqira  
idi maridanoo.  
Moomoosa mina qafamasee rufiasee Anutuna saqarikifaranoo.
- 4 Yaaweena saqariki mariasa asasiaqa.  
Tumunnai auqira anutufinnai sia ubeekkee mariasa  
faqa unnaqira anutusa sia nimooqi mariasa faqa asasiaqa.

- 5 Oo Yaawee qini Anutufa anee moomoo afeeka naaquqara ainainannoo maasa dadaaqinuu.  
Sia moo fannoo ani fooqaafa maridanoo.  
Anee moomoo amiqira irirausa maasara aneenna iriranaki qimirisaidana dadaaqi mariananoo.  
Qinee minauqara ufa qianee qimasee sia amana aiqamara ufa qianaura.  
Mifa moomoo maridanoo.
- 6 Andau tatufirana faqa oosana oosana ani amira ainainara faqa anee akooqananoo.  
Anee aneenna aidimarianna tatufiranara ani ufamau firana qini daaqooki quqasaana iriaa.  
Aandau ida tatufirana faiqi aaqarana akiiqara amiranara faqa anee sia qimianne qiananoo.
- 7 Qinee minara iriseeqa maaqi qiqa.  
Doo qinee anireeqa.  
Anutuna akarakinaafa qinee aniannanara qifaqa anidaqa.
- 8 Oo qini Anutu, ani aidirana mau firara firaqoo dididanoo.  
Ani sanda ufa qini qimuqusaki maridanoo.
- 9 Qinee ani faiqi anaasee moomoosa suqiqa mariana gambaana anee maasa asumu maraannanara andeeqara ufa kai qimannimidaqa.  
Oo Yaawee qinee sia qeeqa doo qummunianaura, kaqi qimannimianaura.  
Anee minara irimmariananoo.
- 10 Qinee sia anee qini dadaaqinana qini asumu maraannanara qeeqa qimuqusaki rafaqa fiqa, kooroomasee qimannimiqa.  
Ani mapukusee marira oosanara faqa ani asumu nimirana faqa kooroomasee qimannimiqa.  
Faiqi anaasee moomoosaki anee misara amuqusirana faqa ani kuqaa anoona ufa qirana faqa sia rafaqa fiqa, kaqi qimannimiqa.
- 11 Oo Yaawee qinee iridaqa ani qiniara qimudao qirafa sia taikaannoo.  
Ani amuqusirafa faqa ani kuqaa anoona ufa qira oosana faqa qini itita qimaqeenoo.
- 12 Qini mandoosana moomoo sia asaanarirana amana qini Dafidisa fiq fiq inoo maridanoo.  
Qini aaqarafa doo qini rafaqafusaifaqa sia qifu maqaidaqa.  
Qini qikiqa qisau si moomoo maridanoo, qini aaqarafa mina faqa uriaaqaranoo sia asaanarirana amana maridanoo.  
Minara qini qimuqusa ummooquki fanoo qini afeeka taikaidanoo.
- 13 Oo Yaawee anee qini mandainainakinaana mara quqaqisaa.  
Oo Yaawee kai kaqi aniree qini dadaaqia.
- 14 Qini marirana taika qimaqarara randeemariasaa rafaqafu nimaqasee mareeqee furufariranaki quqannisaa.  
Qini aupuraranara asasimariasaa mara quandasainaqa nisaurusee quqasee sandaaqa.
- 15 Qiniara uteeti qimariasaa misa nariqa nisaurirana firaafa marina qafeeqa firaqoo tautiaqa.
- 16 Oo Yaawee anee iannannai ani mariasaa asasida nasuriaqa.  
Ani asumu mariranara dufi dufi qimariasaa aiqama kari maaqi qiaqa Yaaweefa kaaqa uriqararafa maridanoo fee qiaqa.
- 17 Qinee Dafidisa qimudaani radukirausa sarau



marunna fasiqausa marunnanara oo Yaawee anee sia qiniara qaunua-  
nanoo.  
Anee qini asumu maree marianafa faqa qini Anutufa  
faqa mariannanara kai kaqi aniree qini dadaaqla.

## 41

### *Aurira fasiqa innaaru.*

- <sup>1</sup> Kudi fasiqa aanaaseera irisee dadaaqla mariasa asasiqa.  
Ummaara aukuanaki Yaaweefa miqimariasa uqeera kaqinni quqannisaan-  
noo.
- <sup>2</sup> Kudi fasiqa anaasee dadaaqimariasa Yaaweefa  
ititannimaqaseenoo misa maa maqanasaa  
marirana afeekaika masainaqa kisaqasaa marifaranoo.  
Maa maqa maqanasaa marirana mifa amiqi amiqimannimaqaannoo.  
Sia mifa misa namuqaa nisaukuki quqaannoo.
- <sup>3</sup> Miqi maria fasiqa aanaaseesa auriranaki marifanoo Yaaweefa misa  
dadaaqaannoo.  
Misa aurida marifanoo Yaaweefa misa aurirana taikannimaqaannoo.
- <sup>4</sup> Qinee maaqi qidaqa, oo Yaawee qinee ani mandaikamma amaqqeeqa.  
Anee qini qifauamasee qini auriranara foora taikaqisaa.
- <sup>5</sup> Qini namuqaa qiniara nimuqusa ummaara reemarifaqa maaqi qidaqa.  
Yaireefee mi fasiqafa kuqinaqa maasa minara qaunuaauranoo.
- <sup>6</sup> Qinee aurimarunaqa akaqausa ani qiqafeeqa qisee ufoo qidaqa unnaqi-  
daqa miqidaqa.  
Misa unna ufa irisee raudamaki oonuree aiqama tinai qini qifasaasa qidaqa  
qimannimidaqa.
- <sup>7</sup> Aiqaama qiniara fidiqaqa imariasa nupiqnupita kiqari nari qimami nari  
qimami qidaqa.  
Qini mandainaina daruani fee qidaqa miqi qidaqa.
- <sup>8</sup> Misa qiniara manda aurirafa aukainaina aurirafa mina arifanoo amiqi-  
mandee auridanoo mifoo qidaqa.  
Doo mifa rinoo maridanoo, sia findifuannoo, kuquannoo fee qidaqa qi-  
matundaqidaqa.
- <sup>9</sup> Qini qifaaqasaa qiqoondi, qinee minasaa  
mundimarunna fasiqafa, qini faqa neeneeu  
fasiqafa, mifa nari aiku qumbaqi uqeera qumaree aiku ataannai qini  
darinoo.
- <sup>10</sup> Oo Yaawee, anee qiniara amuqusinana qini  
uqeeraqisee afeeka qiminaqa mina akiiqara mannimaqaa.
- <sup>11</sup> Oo Yaawee qini namuqaa sia qini uridaaqaree  
mariafaqa qinee mina qafamasee oo Yaaweefa  
qiniara aidimarifanoo miqidanoo fee qidaqa qimiridaqa.
- <sup>12</sup> Anee qini andeeqara mariranara irisee qini uqeera qisainaqa naaru  
naaru ani oorisa maria.
- <sup>13</sup> Yaaweena Isaraee maqannaasa Anutuna amooqia.  
Maqee faqa naaru naaru faqa amooqima amaqaqa.  
Kuqaa uqanna kafaqa kuqaa fee qidaqa.

## **Mina Anaqianaa Papiqa (Book 2)**

## 42

*Asaqi moosaa oonu maru fasiqana innaaru.*

- <sup>1</sup> Aandau nammariara aidifanoo maqee maqee aannanai aannanai qidanoo.  
Qini maraquna fannoo misa naanna raida maqee maqee oo Anutu ani aaqa mariranara didimarifaqa daannanai daannanai idara foora maridaqa.
- <sup>2</sup> Qini nammariara foora kaqi marira Anutunara dididanoo.  
Yairee fee qinee oonuree minara innaaru qianaara.
- <sup>3</sup> Qini namuqaauqa moomoo kari qiniara yaqoo fee ani Anutufa marifanee qiafaqa qinee mina iriseeqa qikiraqaidaqa.  
Faasaana faqa eendaki faqa qeeqa daiqunu daukunu naidaqa.
- <sup>4</sup> Qinee ooqai iafannanara irunanoo qimuqusa mandaikidanoo.  
Ooqai qinee moomoo fasiqa anaasee indaarunnikiafanaqa Anutuna amaana maqaki fimariqau.  
Oonuree faaqa fuisee qida asasida Anutunara dufi dufi qira idiuqa reemariqau.
- <sup>5</sup> Nanaree qini daundura kaaqa ummaara raidanoo fee, nanaree qinee kaaqa ummaaraki maridee.  
Qinee Yaaweenasaa kai irirana mundusee kaifaa mina amooqianaara.  
Mifa qini asumu maree marifa faqa qini Anutufa faqa maridanoo.
- <sup>6</sup> Oo qini Anutu, qinee ummaaraki maridaqa Yooradanna maqa maaqaki faqa  
Qeeramoona aaqanasaa faqa  
Misaraa aaqanasaa faqa maridaqa aniara irianaara.
- <sup>7</sup> Qini ummaara firaafa ooruku nammariara foora mandinoo maridanoo.  
Mi nammariina qamakaurirafa narisaa narisaa arinoo sandaaqai ooru fidanoo aiai qidaoo.  
Mifa innaarunaindari oondaindariara foora aaku quminoo maqasaa aqufifanoo firaqoo aiai qidanoo.  
Ani mi nammari amakaurirafa qini uridaaqaramafi rafaafu qimaqaidanoo.
- <sup>8</sup> Faasaana Yaaweefa nari sia taikara amuqusirana aiqainanoo qinisaa qumuani.  
Miqinaqa eendaki qinee minara dufi dufi qira idi raanaara.  
Qinee Anutufa qini mariranasaa rakisi marina innaaru qima amaqaanaara.
- <sup>9</sup> Anutufa qini itita qimaqee marinara qinee minara maaqi qidaqa.  
Nanaree anee qini qaunuqiseenanee.  
Naqiffee ifaqee qini namuqaa aupurarana qimi mariafaqee oonuree aniree iqa nidee.
- <sup>10</sup> Qini namuqaa qini ataasa ataasa ufa qima qimaqee mariafaqa kuqirafa qusaree marifaqara foora aupuraidaqa.  
Faasaambaasaana qiniara ani Anutufa yaiffee maridanoo fee qidaqa.
- <sup>11</sup> Nanaree qini daundura kaaqa ummaara raidanoo fee.  
Nanaree qinee kaaqa ummaaraki maridee.  
Qinee Yaaweenasaa kai irirana mundusee kaifaa mina amooqianaara.  
Mifa qini asumu maree marifa faqa qini Anutufa faqa marinara mina amooqianaara.

## 43

*Asaqi moosaa oonu maru fasiqana innaaru.*

- <sup>1</sup> Anutu ani ufa sia iri mariasa qini rafaafa fidaqa,

anee qini dadaaqinaqa qifairi mariasa ufa  
 urinnaaqarama saanaqa qiniara andeeqara oosana faqaafee qiaqa.  
 Ueeqee mariasa faqa mandoosana faqaasa faqa nisaukukinaana qini  
 maraquqisaa.

<sup>2</sup> Oo Anutu anee qini titaqimaqee marianafa mariananoo.  
 Nanaree qini minniqiseenanee.  
 Nanaree qini namuqaa aupurarana qimi mariafaqee oonuree aniree iqa  
 nidee.

<sup>3</sup> Oo Anutu anee aneenna kaaqa qarana faqa anoona ufa qirana faqa  
 niqiqainaqa qini aana muquniaqa.  
 Mi irira qanda qini mareeqee Sioona ani naaquqara  
 aaganasaa, mari amaana maqanaki anee mariannaqoo quqaqisaaqa.

<sup>4</sup> Qinee miqoo maridaqa Anutuna qaidara mariqoo mina amooqirara  
 fuanaura.  
 Kaaqa asasirana faqa kaaqa nariara didirana faqa qimimari Yaaweefa  
 miqoo maridanoo.  
 Oo Anutu qini Anutufa qinee piripuna aridaqa ani amooqianaura.

<sup>5</sup> Nanaree qinee kaaqa doori runusee maridee.  
 Qinee Yaaweenasaa kai irirana mundusee kaifaa mina amooqianaura.  
 Mifa qini asumu maree marifa faqa qini Anutufa faqa marinara mina  
 amooqianaura.

## 44

### *Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, maasa qikeeku qikaaku ooqai anee auquqoonna ainainnara  
 qimaqimiafaqa iridaqa.  
 Maasa qeeqa daaqoonnai misa marukamuqoo auqoonna firaa ainainnara  
 qima qimiafaqa iriqa.

<sup>2</sup> Anee aneenna kai aanaamuru niqiqamasoona  
 amaaramafufana maasa qikeeku qikaaku maa maqa maaqanaki mara  
 quqanau.  
 Anee aanaamuru aupurarana nimisee Isaraee maqannaasa maa maqanasaa  
 mara quqasoonnaqa  
 faiqi moomoo kambiqafi maa maqa maaqana amanakai maridaqa.

<sup>3</sup> Isaraee maqannaasa sia nari rakiranannaifau maa maqa maaqana  
 maraqa.

Sia nari afeekannaifau maraqa.  
 Anee aneenna afeekannai faqa eeraariranannai faqa  
 oori inaa inaa iranannai maa maqana mara nimanau.  
 Anutu, anee misara ani aidi marunara miqinai.

<sup>4</sup> Anee qini karaambaifa qini Anutufa mariananoo.  
 Anee aneenna maqannaasara rakiranaki namuqaa urinnaaqaraaqee  
 qiananoo.

<sup>5</sup> Oo Anutu ani afeekannai maasa qeeqa namuqaa rafaqaafi marunasa  
 maridaqa.  
 Akaqausa findifi darirariafana anee maasa faqa marianaqa maasa rakirana  
 uraqa raidaqa.

<sup>6</sup> Qinee sia qeeqa duru saqarikidaqa qini rakira paipana faqa sia qini  
 dadaaqidanoo.  
 Anee kai.

<sup>7</sup> Anee kai maasara fidiqaaimaria namuqaasa  
 nisaukukinaana doo rafiamaree nisaurirana misa nimiananoo.

- 8 Maasa aiqama kari Anutuna kai amooqidaqa.  
Naaru naaru minara dufi dufi qianaara. Kuqaa.
- 9 Anee maasa rakira fasiqauqa faqa nidana dadaaqiunafa maqee sia nidana,  
sia dadaaqimariananoo.  
Oo Anutu, anee maasa minniqiseenana maasa ooru muqufi qisaananoo.
- 10 Anee miqiannanara namuqaa maasa nifaqasaafaqa sandaunaqa maasa  
aiqama ainaina mareea.
- 11 Anee maasa mareeqee namuqaa nimianaqa misa maasa sipsipara foora  
kuqa darirara idaqa.  
Anee maasa aanaamurukiaga doo daru qifaqaa qianaqa moodaa moodaa  
iqa maridaqa.
- 12 Oo Anutu anee aneenna faiqi anaasee kaqikaa  
munnimma aqusee maree maria ainainnara foora mariafana namuqaa  
nimiananoo.  
Anee nimisee aabaa munnimma sia maree marianara foora nimiananoo.
- 13 Anutu anee miqi marianaqa maasa qiqaonaua maasara naanaidara  
qidaqa.  
Maasa daaqa mariasa ataasa ataasa maqimaqaidaqa.
- 14 Anee sia maasa dadaaqiannanara aiqama maqannaasa maasa qisauri-  
rana qimidaqa.  
Akaqa maqanna maasa Israaee maqannaasa qiqafeeqa uteeti qima-  
saidaqa ninuka aqidaqa.
- 15-16 Qini namuqaa faqa qiniara fidiaqaa imariasa qini  
ataasa ataasa qima qimaqaafaqa qinee aiqama  
kari ummaarakiki maruna qisaurirafa qini rafaqa fidanoo.
- 17 Oo Anutu, anee fifau maasa dari mariananoo.  
Maasa aniara sia qauniqa sia ani qima afeekaikira ufa rukieeqa san-  
danainai qidaqa.  
Maa manda oosanafa fifau maasa rafaqaqafu qimaqaidanoo.
- 18 Maasa nimuqusa sia qikooqaifaqa andeeqara  
oosanaaaqari moosaa quandeeqa, kaqi mariaqoo kai maridaqa.  
Maasa qiku faqa maasa firana faqa sia ani minnisee qiku munuree miniree  
idaqa.
- 19 Anee fifau maasa qimudaani tureeraummasee  
mareeqee kaasau faini ooki quqeenanara foora masaanaqa maridaqa.  
Anee firaa asukunannoo maasa rafaqaqafu  
qimaqaananoo oosana sia marinaki fifau miqiananoo.
- 20 Maasa Israaee maqannaasa Anutuna auqu qaunusaananoo fau mifa  
iriqini.  
Maasa unna anutunauqa uqeeraananoofau Anutufa minara faqa iriqini.
- 21 Anutufa maasa qimuqusaki kukeeqara ainainara  
irimarifa marinara mi aiqama ainaina qafaiqini.
- 22 Faasaambaasaana misa ani auqusaara maasa daruqifaqaaidaqa.  
Misa maasara kuqifandinna sipsipausee qimasaida maasa daruqi-  
faqaaidaqa.
- 23 Oo Yaawee findifua nanaree faiqaidanee.  
Findifua sia kisaqaasaa maasa minniqisaa.
- 24 Anee nanaree aneenna oorisa ititasee sia maasa qiqafaidanee.  
Yaawee anee nanaree maasa aupurarana faqa ummaara qimiranara faqa  
qaunidanee.
- 25 Maasa maqasaa aqufunaqa nikusamu radamu saafaqa maqasaa riqa  
maridaqa.

26 Oo Yaawee anee findifi maasa dadaaḡia.  
Aneenna maasara naaruara aidiranara irisee maasa mareeqee amiqiranaki quqaḡisaa.

## 45

### *Maḡasaa karaambaiḡa amundara idi.*

- 1 Amiḡira irirafa ḡini iriranaki umbiḡanoo marifaḡa  
karaambaiḡa irianifeera maa idi ufana akara ruma amidaḡa.  
ḡini ḡifauru fannoo paḡiḡa saiki marina amiḡira kirifiara foorā maa idina  
akara ridanoo.
- 2 Oo maasa maḡasaa Karaambaiḡa ani afaaḡa aiḡama faiḡi faiḡikiḡari  
amiḡirafa mariananoo.  
Ani afauru deepimaseera foorā amiḡira ufa adiafaa ira ufa kai ani ookiḡari  
ururaidanoo.  
Minara naaruara naaruara Anutufa ani amiḡi amiḡimma amaḡaidanoo.
- 3 Oo uriḡararafa ani afeeka faḡa ani ḡareenarafa faḡa  
ani uriḡararafa faḡa marinara doo aneenna duru feefa deedaḡinana  
rakiranaki fua.
- 4 Anee aneenna uriḡararana namu faḡa doo rakiranaki finana uriḡaraa.  
Fimarinaḡa ani anoona ufa ḡirana faḡa andeeḡarana faḡa sia rafaḡa  
fuaḡeera rakiranaki fua.  
Ani rakirafa afeekaikinaḡa manda oosana maree mariasa aniara firaaḡoo  
rufieefaranoo.
- 5 Ani duru feefa aaruḡirafa namuḡaaḡa nimuḡusaki kai naruannoo.  
Miḡiannannai moomoosa ani aikuki aḡufifana radamu nimaḡeennara-  
noo.
- 6 Anutufa anee naaru naaru uriḡarana maridana  
aneenna faiḡi anaasee andeeḡara oosanannoo rakisi nimaḡaa.
- 7 Ani andeeḡaranara aidinoo mandainainara fidiḡaa inoo imarifa mari-  
ananoo.  
Minara kai ani Anutufa ani utaaḡamaseenoo  
asasirana ani akiiḡa amoondunna akaḡa uriḡararāusa adia nimaḡaina  
faḡa uraaḡa ramasee adia amaḡeenoo.
- 8 Ani ḡamunna makaḡa mandeefana undidanoo ani  
karaambaiḡa amiḡira maaḡakina aiḡama  
ainainauḡa eereefanta aanainnai auḡira  
ainainauḡa kai maridanoo.  
Minaki piripunna oosana oosanannai auḡaafana anee asasimariananoo.
- 9 Akaḡa karaambaiḡa niraamuḡmaaka uriḡarara aanaaseeḡa kai ani  
maaḡaki maridaḡa.  
Ani karaambaiḡa asauku uḡannai ani anaḡa uriḡarara  
anaasee amiḡira ḡamunna afisimarufa Oofiraa  
maḡusaindaraa koorannoo afaaḡa auḡusee ani asauku uḡannai kikiḡi-  
noo maridanoo.
- 10 Oo fuka amundara anaasee anee aneenna aaḡoo ramatinimmafi ḡini ufa  
iria.  
Aneenna maḡannaa faḡa aneenna ainainara faḡa  
ḡaunuseenana aneenna afaaḡi maḡa maaḡaki kai maria.
- 11 Miḡimarinanoo ani afaaḡi karaambaiḡa ani amiḡira oori afiriara fi-  
raaḡoo aidiannoo.  
Mifa ani karaambaiḡa maridanoo anee minara kai qeerairidana mina ufa  
ḡaindusua.
- 12 Tiree maḡusaindaraasa moo amira ainaina

- nisaukuki uqirausa aniree asasidaqa amifaranoo.  
 Faiqí aanaaseeqari ainaina faqaasa aniree ani aqoondikifaranoo.  
<sup>13</sup> Moo maqannaa karaambaiqa araamuna fannoo narí afaaqauqira maqaki maridanoo narí afaaqinnai firaridanoo.  
 Mi manaaqana qamunna koorannai auqirafa idaaqirafa kai maridanoo.  
<sup>14</sup> Misa mina afaqamaree narí qamunna oosana oosana akararirana namufaqa karaambaiqa munu amiafaqa qafeeqa.  
 Aqoonna maanaaqauqa mina dadaaqi marusa mina afaqee fia.  
<sup>15</sup> Misa asasirana namufaqa nasu nasurirana namufaqa aana muquniqa karaambaiqa amiqira maaqaki keeqaafaqa niqafeeqa.  
<sup>16</sup> Maa anaaseena afaaqi karaambaiqa, ani faiqi namu kambiqainausa ani amaaqa maqee findifi karaambaiqaiqiqa fifaranoo.  
 Aneenna faiqi namu anee kaqi maridana aiqama maqa maaqai uriqararusaika mannimaqasaina rakisi nimaqefaranoo.  
<sup>17</sup> Qinee ani auqu uqeerasaanaqa naaru naaru aiqama kambiqeefandin-  
 ausa minara irifaranoo.  
 Miqiannanara faiqí anaasee naaru naaru ani amooqifaranoo.

## 46

### *Anutufa maasa faqa maridanoo.*

- <sup>1</sup> Anutufa maasa kukeeqara maqusa faqa maasa afeeka faqa maridanoo.  
 Maasa aiqama kari ummaaraki aqufunanoo dadaaqi marifa maridanoo.  
<sup>2</sup> Maasa minara irisee sia rufiaanaura.  
 Maqa firaqoo kasinaqa sia maasa minara rufiaanaura.  
 Aaqana namu mareeqee ooruku nammari qambaanai uqasaina aqufinaqa maasa sia minara maparaa ianaura.  
<sup>3</sup> Aiqama nammari auginoo firaqoo narisaa narisaa arinoo qaqaara qaqaarinanoo firaqoo ufaqinaqa sia rufiaanaura.  
 Aaqana namu kasinaqa nammari fannoo aaqana ammitu ammitu inaqa sia rufiaanaura.  
<sup>4</sup> Anutuna maqusa aqaq mari nammarifa qumidanoo raina rainidanoo Anutuna maqusaki mariasa mi nammarifa asasirana nimidanoo.  
 Mi maqusafa naaquqarafa marifanoo uriqarara Anutufa mi maqusanaki maridanoo.  
<sup>5</sup> Anutufa mi maqusanaki marinara sia kasinoo sia aqufuannoo.  
 Namuqaa aniraifanoo mi kananaanna kai Anutufa dadaaqiannoo.  
<sup>6</sup> Aamina maqannaa tautummasee aanoo qimasee faqa fuisee qiafaqa akaqa maqannaasa kurididaqa.  
 Misa miqi mariafanoo Anutufa narí ufa firaqoo uqeraifanoo aiqama maqa tasirisirinoo nammarikidanoo.  
<sup>7</sup> Karaambaiqa aiqama afeeka faqaafa maasa faqa maridanoo.  
 Yaakooboona Anutufa maasa afeeka kukeeqara maqusa maridanoo.  
<sup>8</sup> Oo aiqamausa aniree Yaaweefa auqamasai ainaina qafaa.  
 Maa maqa maaqana aiqama naaquqara ainaina auqaina qafaqa.  
<sup>9</sup> Mifa maa maqa maaqanasaa aiqama atiqara mari rakirana taikanni-  
 maqaidanoo.  
 Mifa duru feefa itairaatairidanoo.  
 Rakira saqari faqa idaki aqusaifanoo qama taikaidanoo.  
<sup>10</sup> Oo innee kasoomafinaqa qinee Anutusa marunnanara oonumafi iriaqa.  
 Qinee moomoo maqannaasa qambaanai uriqaraqa marianaura.

Qinee aiqama maa maqa maaqanaki uriqaramafuanaura.

<sup>11</sup> Karaambaiqa aiqama afeeka faqaafa maasa faqa maridanoo.

Yakooboona Anutufa maasa afeeka kukeeqara maqusa maridanoo.

## 47

*Anutufa aiqama maqannaasa karaambaiqa maridanoo.*

<sup>1</sup> Oo innee aiqama maqannaasa nisauku aridaqa asasiaqa.

Innee Anutunara idi rama amaqaيداqa asasiaqa.

<sup>2</sup> Kaaqa uriqarara Yaaweefa naaquqarafa maridanoo, minara rufiaaqa.

Mifa aiqama maqa maaqasaa uriqarara karaambaiqa maridanoo rakisi nimaqaidanoo.

<sup>3</sup> Mifa aiqama maqannaasa mareeqeenoo maasa Isaraee maqannaasa niranandunnai quqanau.

Aiqama maqannaasa oonu mafi maasa qiku ameemaanai quqasanau.

<sup>4</sup> Maasa maqa maaqa qimiraree qimasee utaaqama qimaqoona nari kai qiminau.

Anutufa mi amiqira maqa maaqana maasa Isaraee

maqanaasa nari aidi marusa qimufaqa maasa mi maqa maaqanara asasidaqa.

<sup>5</sup> Anutufa nari ufa irira qaari maruqoo ooru

fimarufaqa mina fiq fiqiuqa marusa faaqa ridaqa asasi mariqau.

Ukeena fuaqarana namufaqa Yaaweefa ooru finau.

<sup>6</sup> Amooqira idi Anutuna ramamia. Doo ramamiaqa.

Maasa karaambaiqa amooqira idi ramamiaqa. Doo kafa idi ramamiaqa.

<sup>7</sup> Anutufa aiqama maa maqanasaa mariasa karaambaiqa maridanoo.

Doo innee mina amooqira idi ramamiaqa.

<sup>8</sup> Mifa nari naaquqara qaarisaa ooqu marifi aiqama maqannaasasaa rakisi nimaqaidanoo.

<sup>9</sup> Aiqa maqannaasa uriqarararusa moodaaqoo

Abarahaammana Anutuna ufa iri mariasa namufaqa suqidaqa.

Misa aiqamausa Anutunaindi maridaqa.

Mifa firaqoo uriqarara afeeka faqaafa maridanoo.

## 48

*Sioona Anutuna maqusa maridanoo.*

<sup>1</sup> Yaaweefa firaafa uqanna maridanoo.

Maasa Anutuna maqusaki mina naaquqara aqanasaa mari maqusanaki maasa Anutuna amooqidaqa.

Mina firaqoo uqanna amooqiaqa.

<sup>2</sup> Sioona aqana Anutunaindi kaaqa uriqararafa amiqirafa maridanoo.

Mifa uriqarara karaambaiqa maqusa maridanoo.

Mi aaqanafa maa maqa maaqanakinaa fasiqa anaasee asasirana nimidanoo.

<sup>3</sup> Anutufa mi maqusanaki maridanoo faiqi anaasee

dadaaqidanoo, mifa rakira aukuna faiqi anaasee

mi afeeka faandaamura ququsanaki dadaaqidanoo ititannisaidanoo.

<sup>4-5</sup> Moomoo namuqaa karaambaiqauqa suqufi mi

maqusana ooru qafuofanoo naindiri ree naaquqoofaqa quqasee doo sandamafiqau.

<sup>6</sup> Naindiri rarafa misa naakufufaqa anaasee innaamunara auruandee miqau.

- 7 Namuqaa nariqa rakira kannuqaki oobiqasee urufanoo  
suani oosanaindari ufai firaafa urinoo nammari  
amakaurufanoo misa kannuqa Tarasisaa maqusanaasaindi teeqindee man-  
nisanau.
- 8 Maasa oogai Yaaweefa rakisi marunara iriafannana maqee maasa qeeqa  
qifunnoo qafeeqa.  
Yaaweena aiqama afeeka faqaana maqusa marinara  
nari Anutufa mi maqusanaki amiqimmasee  
ititaqai fanoo naaru naaru afeekaikinoo maridanoo.
- 9 Oo Anutu, ani naaquqara amaana maqaki keeqafiqa  
ani maasara firaqqoo aidi marinara oonumafi iridaqa.
- 10 Oo Anutu, aiqama maqa maaqaki mariasa ani amooqidaqa.  
Ani firaauquara aiqama maa maqa maaqanakinaa fasiqa anaasee asasi-  
daqa.  
Anee andeeqara oosanannoo rakisi nimaqee mariananoo.
- 11 Oo Anutu, ani rainara ufa andeeqarafa marinara,  
Sioona aaqanasaa mariasa asasiaqa.  
Yuda maqa maaqakinaa maqusakiaqa mariasa faqa nasuriaqa.
- 12 Innee Anutuna faiqi namu Sioona aaqana fiqumummasee qafaaqa,  
ooni faandaamura auquqoona amiqimmasee qafeeqa asaanaruqa.
- 13 Mina faandaamura ooru ree qumuree qiranakiaqa qafamaqaraasam-  
masee kasooaqee inaaqianna  
kambiqa inausa mi faandaamuranara qimannimiaqa.
- 14 Maa Anutufa naaru naaru innisaimbaqa Anutufa maridanoo.  
Mifa naaru naaru maasa qifiqee aana uqaqifiqanoo fuannoo.

## 49

### *Munnimma qumiasana saqarikirafa furufarira oosana maridanoo.*

- 1 Maa ufana aiqamausa iriaqa.  
Aiqama maa maqa maaqanaki mariasa amiqimmasee iriaqa.
- 2 Aiqaamausa uriqararawsa faqa ureeqarawsa faqa  
ainaina faqaasa faqa kudi fasiqa faqa, aiqama iriaqa.
- 3 Eeqa dookiqari irirana faqaasa ufa kai qianaara.  
Qini daunduraindaraa irirafa andeeqara irirana maree maria irirana  
nimiannoo.
- 4 Eeqa naamuaqira ufa quandasee qianaara.  
Qini quandara ufa piripuna aridaqa idinnai qimannimianaara.
- 5 Manda aukwana aninaqa qinee sia fifau rufiaanaara.  
Mandoosana maree mariasa qini fiqum iqa  
maridaqa mandaikamma qisararifaqa sia qinee minara rufiaanaara.
- 6 Mi aaqara fasiqausa nari ainainasaa kai mundidaqa,  
nari moomoo munnimma ainaina faqaasa marianara nari nimoo  
namoo qidaqa.
- 7 Maasa sia amana qeeqa maa maqanasaa kisaqaasaa marirana feefauri-  
anaara.  
Maasa sia amana Anutuna munnimma amisee qeeqa marirana feefauri-  
anaara.
- 8 Faiqi marirana feefaurirafa firaafa fiqaranoo maridanoo.  
Firaau feefauru tia aqinanoo faqa sia kai amanaikiannoo.
- 9 Sia amana feefauru Anutuna amisaifanoo maa  
maqanasaa kisaqaasaa marida sia kuquanee qiannoo.
- 10 Aiqaamausa maa ainainna qafaidaqa.



Irirana faqaasa misa faqa kaqi kuqifaranoo.  
 Irirana siaisa faqa furufarirausa faqa aiqama amana  
 amana kai kuqiqa nári ainaina mafi quqasaafaqa akaqausa maraidaqa.  
<sup>11</sup> Ooqai maqa misaindi marinau.  
 Maqee faiqi madika fannoo misa maqusa maridanoo.  
 Naaruara naaruara misa mi madikanaki kai marifaranoo.  
<sup>12</sup> Maasa uriqarara duqu fannoo sia amana kuqirana itita qimaqaannoo.  
 Maasa kaqi aandaura foora kuquanauranoo.  
<sup>13</sup> Faiqi náriara uriqararausee qimasee náriara kai  
 irimariasa, miqira fasiqa irirafa sia andeeqanoo maridanoo.  
 Misa fifau nariqa ainainara asasiidaqa misa faqa aandaura foora kai  
 kuqidaqa.  
<sup>14</sup> Misa sipsipauqara foora kuqifaranoo.  
 Misa kuqu fifanoo kuqirafa misa sipsipasaa rakisirafara foora misa rakisi  
 nimaqaannoo.  
 Andeeqara oosana maree mariasa doo misa  
 kanaanaanara foora findifiqa manda oosana maree mariasasaa rakisi-  
 faranoo.  
 Manda oosana maree mariasa kaqi maridaqa amiqira  
 maaqaki mariinaqa kuqiqa sia minaki marifaranoo nianai madikaki  
 maridaqa kai kaqi putaa ifaranoo.  
 Misa miqiqa mariafaqa qinee sia misa naanna raidaqa.  
<sup>15</sup> Anutufa qini kuqira afeeka ameemaanaindaraana feefauru masainaqa  
 asumu marianaara.  
<sup>16</sup> Faiqi moo fannoo firaaqoo ainaina moomoo faqaafaikinnanara sia  
 minara irinanoo amuqusiani.  
 Mina maaqa amiqirana firaana usakainara sia anee qinee faqa miqiaqaa-  
 nee qia.  
<sup>17</sup> Mi ainainna faqaa fasiqa kuqinoo sia moo ainaina maree fuannoo.  
 Mina qumiasana sia mina faqa madikaki ooqu fuannoo.  
<sup>18</sup> Mi fasiqafa kaqi maru kamuqoo moomoo amiqira  
 ainaina faqaafa maridanoo mifa fifau nariara amiqi amiqiranaki  
 maridee qimarinau.  
 Mifa moomoo amiqira ainaina faqaafa marufaqa aiqamausa mina amooqi  
 mariqau.  
<sup>19</sup> Ainaina faqaafa kuqinoo mifa faqa narí akeeku akaaku kuqiqa oonu  
 mariaqoo fuannoo.  
 Mifa miqoo oonu maridanoo sia kaifaa kaaqa qarana qafaannoo.  
<sup>20</sup> Maasa uriqarara duqu fannoo sia maasa kuqiranasaa itita qisaannoo.  
 Maasa aandaura foora kaqi kai kuquanaura.

## 50

### *Kuqaa qira innaaru.*

<sup>1</sup> Afeeka faqaa Anutufa Yaaweefa maa maqa  
 maaqanakinaasara nammeera qifaqa suqufuafanoo qimannimi marifa  
 maridanoo.  
 Suani oosanaindari faqa suani keeqee marinnaindari faqa nammeera  
 qifaqa suqidaqa.  
<sup>2</sup> Sioonna maqusa kaaqa amiqirafa qareenarafa  
 marifanoo Anutufa mi maqusanaki maridanoo  
 akooqoo kaaqa qaidanoo rupannoo imarifa maridanoo.  
<sup>3</sup> Maasa Anutufa anireenoo sia ufa siaina marifa maridanoo.

- Ida fannoo mina afunni fidanoo fasafasimarifanoo fidanoo.  
 Misaqa mina fiq u fiq inoo mari ainainausa ufai  
 aakuasaa innaarunai qirafa mifauqa kai firaaqoo ufa qidanoo.
- <sup>4</sup> Anutufa aiqama maqannaa suqu quqaseenoo misa  
 ufa andeeqaani qimasee innaaruna faqa maqa faqa naaramasainaqa  
 anireeqa Anutufa narí  
 faiqí anaasee raina nimaqaaninna ufana irifaranoo.
- <sup>5</sup> Anutufa qidanoo, qiniki mapukusee maria fasiqa anaaseesa suqumaree  
 moodaaqoo aniaqa.  
 Aandau tatufiranannai qini faqa qima afeekaikirana  
 qimimariasa misa qinee marunnannai moodaaqoo suqumaree aniaqa.
- <sup>6</sup> Innaaruna fannoo Anutunara maaqi qimasee kooroo idanoo.  
 Anutufa narí kai andeeqarafa ufa raina nimaqee marifa maridanoo.
- <sup>7</sup> Anutufa kafa maaqi qidanoo.  
 Oo Isaraee maqannaa qini maqannaasa irifaqa inni mandoosanara  
 kooroommasee qimannimianaaura.  
 Qinee Anutusa inni Anutusa maridaqa qimannimianaaura.
- <sup>8</sup> Innee qimi maria ainainna faqa aandau tatufi  
 mariana faqa maqee maqee qimimariana sia minara aanoo qidaqa.
- <sup>9</sup> Qinee sia inni aandauqa kinaana burimmakau akoonara dididanoo.  
 Sia inni mimmi ququsakinaana moora dididanoo.
- <sup>10</sup> Nandaki maria kaasau aandausa aiqama qinindi kai  
 maridanoo, maaqeenaa aandau aiqama aaqanasaa  
 faqa maqa maaqaki mariasa qinindi kai maridanoo.
- <sup>11</sup> Aiqama ufiniuqa faqa qinindi kai maridanoo.  
 Aiqama maqa maaqaki maria aandausa aiqama qinindi kai maridaqa.
- <sup>12</sup> Qinee Anutusa aandaura didi marinaqau sia inni qimannimunaiqini.  
 Maa maqa maaqana faqa aiqama minaki mari ainainausa qinindi kai  
 maridanoo.
- <sup>13</sup> Innee qiniara burimmakau akoona amaqi neemarifee fee qidaqee.  
 Innee qiniara mimmi fidika faqa neemari fee fee qidaqee.  
 Sia mina naidaqa.
- <sup>14</sup> Innee dufi dufi qirana kai tatufiranara foora qini Anutusa qimiaqa.  
 Innee qini uriqarara afeeka faqaasara qima afeekaikammaqaa mau kai  
 fuaqa.
- <sup>15</sup> Ummaara inniki kambiqafinaqa qini daaraifaqa qinee inni dadaaqianaqa  
 innee quandakina qini qimooqiaqa.
- <sup>16</sup> Aaqara oosana maree mariasa Anutufa maaqi qimasee qimannimidanoo.  
 Innee nanaree qini naamuaqira ufa nikaru qimasee naakapaidee.  
 Innee nanaree qini moodaanaki kira ufa unnaqimasee inni nifaurusaaqari  
 uridanoo fee.
- <sup>17</sup> Qinee andeeqa nimaqararunaqa nikooqee mariasa.  
 Aiqama kari qini naamuaqira ufa rukiee mariasa mariafanoo.
- <sup>18</sup> Innee qummuari mari fasiqana qafamasee mina aqoondiki mariafanoo.  
 Innee faiqí anaasee qummuari mariasa niqafamasee innee faqa minaki  
 ootupee mariasa mariafanoo.
- <sup>19</sup> Inni noo fannoo manda oosanara qiranara kai rakisidanoo.  
 Inni nifauru fannoo unna ufa qirara sia marammara ridanoo kaqi qimari-  
 afanoo.
- <sup>20</sup> Innee inneeqa nikaqaafasaa unnufannai misa ufa nimi mariasa mari-  
 afanoo.  
 Innee oosana siainaki misara manda ufa qimariasa mariafanoo.

21 Innee mi manda oosana oosanausa auqee mariafaqa  
qinee Anutusa kaqi kasooiqa marunaqa innee qiniara Anutufa maasa  
daanna raidanoo manda  
oosanara sia ufa qidanoo fee qimariafanoo.

Innee miqi qidaqa aqee mariafanoo.

Inni nifusaa akooqoo inni aaqaranara kooroomma nimianaaura.

22 Innee qini Anutusara nikooqee mariasa maana iriaqa.

Qinee inni mandaikamma nimaqaanaura.

Sia moo fannoo amana inni dadaaqiannoo.

23 Qini Anutusa dufi dufi qirana tatufiranara foora  
suqa qimimariasa faqa qini ufamau fimariasa faqa  
qinee Anutusa qeeqa asumu marirana nimianaaura.

## 51

### *Numoo akiiqara mininnisaani fee innaaru.*

1 Oo Anutu aneenna sia taikaaninna amuqusirafa marinara irisee qini  
qifauama qisaa.

Aneenna firaa nifauarafa marinara irisee qini aaqarana akiiqara rukaqisaa.

2 Qini manda oosana findaukamaqisaa.

Qini aaqarana nammari uqu taika qisaa.

3 Qinee qeeqa aaqaranara iridaqa.

Qini manda oosana fannoo naaruara doorinni marinaqa sia qaunuanaura.

4 Oo Anutu qini aaqarafa ani kai mandaikamma amaqqeeqa.

Ani afusaa kai maa manda oosanna auqqeeqa.

Oo Anutu akooqoo ani qimamidaqa.

Anee qini ufa qimiannana anee kuqaa andeeqarafa mariananoo.

Anee ufa qimiannanannai qini aaqarana akiiqara iananoo.

5 Qini qinoofa qini maqa qisooqooqari numoo aanaaqi mariafanausa  
maridaqa.

Qeeqa qinoona amuaquki mariafananoo aaqarana asumu qiniki marinau.

6 Oo Anutu faiqi naundarai anoona ufa kai marianifee qimarianafa mari-  
ananoo.

Qini daundurari kukeeqaranaki aneenna irirana daamuaqia.

7 Anee qini anukama qisainaqa qinee anukaqa maria.

Qini nammari uqusainaqa qinee eekara arira qasuruara foora qiqa maria.

8 Oo Anutu anee qini aaqarana akiiqara qini qimudaani raqera foora  
maqaanaqa maridaqa.

Anee qini aaqarana minni qisainanoo qini qimudaani kaffaa ootupeera  
foora inaqa qinee asasianaura.

9 Aneenna afu tautasee qini aaqarana sia qafaa.

Qini manda oosana aiqama rukaqisaa.

10 Oo Anutu qini qimuqusa fuka amiqira qimuqusa auqu qisaa.

Qini daunduraki naaruara ani ufamau fira maraquna quqaqisaa.

11 Sia qini mareeqee aneenna mariannaqooqari aquqisaa.

Aneenna naaquqara andeeqara maraquna qiniki marina sia maraqa.

12 Qinee ani asasira asumu mariranaki mariufaqa  
kaqinni ubeekaqa marunnana kaifaa mina qiminaqa asasia.

Miqianana anee kaifaa ani ufamau fira didira

maraquna qiminanoo qini dadaaqinaqa ani aidirana mau fua.

13 Anee miqinaqa qinee aqee mariasa ani andeeqara aana uqan-  
nifiqaanaura.

Manda oosana maree mariasa faqa irisee anee innannai quandaki ubeekeefaranoo.

<sup>14</sup> Oo Anutu qini asumu marirana qimianna Anutufa mariananoo.

Anee sia qini kuqa darua, anee ititaqisainaqa qinee fraaqoo اساسida ani andeeqaranara idi raanaura.

<sup>15</sup> Oo Yaaweefa anee qini doo raqasainaqa qinee qeeqa dooqiğari ani amooqiranara kai koorooianaura.

<sup>16</sup> Qinee ani Anutuna aandau tatufirana amianee runana anee sia didiifoo qianaqa minniseeqa.

Qinee tatufirana ani amianee runana anee minara sia asasiananoo.

<sup>17</sup> Anutufa narí amira ainainara akooqaidanoo.

Qini tatufirafa qeeqa mara maree qumirafa maridanoo.

Anee nariqa mara maree qumira oosana faqa faiqí narí mandainainakiğari quandara oosanara faqa sia akooqaidanoo.

<sup>18</sup> Oo Yaawee aneenna amiğira iriranannai Sioona mağusanaasa amiqi amiğimmannimağaa.

Anee Yeerusaree faandaamura kafa auqu uqeerasaa.

<sup>19</sup> Auqu uqeerasainaqa miqooğari ani aminna ainainafa ani aidimarifa mariannoo.

Aandau muduka tatufirana suğarafa oosana oosana ani aidirafa kai mariannoo.

Miqoo misa burimmakau akoonauqa arusee tatufirana suğasee ani amifaranoo.

## 52

### *Anutuna raina nimaqaranara faqa amiğiranara faqa qidanoo.*

<sup>1</sup> Oo amudaanai qimarianna fasiqa, anee nanaree aneenna manda oosana amooqidanee.

Anee nanaree faasaambaasaana anee Anutufa aidimari fasiqa aanaaseesa mandaikamma nisaidanee.

Anutufa mapukusee marira oosana fannoo naaruara marifa maridanoo.

<sup>2</sup> Manda fasiqa anee mandaikamma nimaqarara kai tipundaari marianafa mariananoo.

Afai keedaira foorai raqarafa unna ainaina kai inanuanafa.

<sup>3</sup> Ani manda oosanara rirafa amiğira oosanara rimariannana uriğaranoo maridanoo.

Ani unna ufa qiranara aidirafa anoona ufa qira aidirana uriaaqaranoo maridanoo.

<sup>4</sup> Anee unna ufa qirara kai aidi marifa mariananoo.

Anee faiqí mandaikamma nimağara ufara kai aidi marianafa mariananoo.

<sup>5</sup> Anutufa kuqaa uqanna anee mariannaqoo qaraana ani rarisameeqee naaru naaru kuridiranaki quqasaannoo.

Mifa ani maaqakinaana qumara rarisameeqee ummaaraki quqaisaannoo.

Mifa maa maqa maaqakinaana ani umareeqeenoo kuqiranaki quqaisaannoo.

<sup>6</sup> Anutufa manda fasiqauqa kuridinnimağainaqa andeeqee mariasa qafamasee rufieefaranoo.

Misa mi manda fasiqausara naanaidara qifaranoo.

<sup>7</sup> Misa mi manda fasiqanara maaqi qimasee uteeti qifaranoo.

Maa fasiqafa sia Anutunasaa mundidanoo. Sia mina dadaaqianiffee qidaqa.

Narí moomoo ainainasaa mundinoo maridanoo,

mifa narí firaa qumiasanara qini dadaaqiannoo fee qidanoo.

Mifa narí manda oosanara qini itita qimağaanoo fee qianoo

- <sup>8</sup> Qinee Davidisa sia miqimarunausa maridaqa.  
 Qinee Anutuna amaana maqaki fuka oorifa saqariara foora ammunidaqa.  
 Qinee naaru naaru Anutuna sia taikaaninna amuqusirana saqarikidaqa.  
<sup>9</sup> Qinee anee auquqoonna ainaina oosana qafamasee  
 naaru naaru ani faiqí anaasee nifusaa dufi dufi qianaaura.  
 Qinee ani andeeqaranara kooroommasee qimannimianaaura.

## 53

### *Faiqí faiqi manda oosanara qidanoo.*

- <sup>1</sup> Furufari mariasa nári nimuqusakiqari maaqi qidaqa sia Anutufa mari-  
 danoo fee qidaqa.  
 Miqi qimariasa oosana mandaika minoo maridanoo.  
 Misa manda ainaina kai auqee mariasa maridaqa.  
 Sia moo fannoo andeeqara oosana maraidanoo.  
<sup>2</sup> Yaaweefa innaarunaindari maa maqanasaa faiqí  
 faiqi mariasa nindafaidanoo maaqi qimasee qimannimidanoo.  
 Akaqausa amiqira irirana faqaasa maridee sia fee maridee.  
 Akaqausa qini Anutusara randaidee sia fee randaidee qidanoo.  
<sup>3</sup> Aiqamausa quandaki kaqi runna fidaqa.  
 Misoo maasoo amana amana kai mandaikiqa maridaqa.  
 Sia moo fannoo andeeqarafa maridanoo. Sia uqanna.  
<sup>4</sup> Anutufa maaqi qimasee iraidanoo.  
 Manda oosana maree mariasa irirana siasee maridee.  
 Misa qini faiqí anaasee ainaina qumuaramasaida minasaa maridaqa.  
<sup>5</sup> Miqi mariasa firaaqoo rufiee faranoo.  
 Ooqai rufioona arusee maqee firaaqoo rufiqeefaranoo.  
 Anutufa narí faiqí anaasee namuqaauqa naruseenoo  
 misa nimudaani aiqama tinai modaa moodaa aqusaannoo.  
 Anutufa mi namuqaasa ameesuqinaqa Isaraee maqannaasa misa naru  
 nifaqaaqifara.  
<sup>6</sup> Qinee maaqi qimasee innaaru qidaqa Isaraee  
 maqannaasa asumu marirafa Sioona maqusakiqari aniani.  
 Anutufa Isaraee maqannaasa nári maqa maaqa faqa  
 qumiasana faqa kafa rairaamma niminaqa misa asasidaqa idireefara-  
 noo.

## 54

### *Namuqaasaa itita amaqaannee innaaru.*

- <sup>1</sup> Oo Anutu aneenna afeekannai qini mara amiqiranaki quqaqisaa.  
 Aneenna firaa afeekannai qini rumberanakinaana iduku qisaa.  
<sup>2</sup> Oo Anutu, qini innaaru qirana iria, qini dookinaa ufa iria.  
<sup>3</sup> Ramoo ramaa imariasa aniree qini dariraridaqa.  
 Faiqí kuqa narimariasa qini marirana taika qimaqarara midaqa.  
 Anutu ani ufara sia irimariasa qini dariraridammia.  
<sup>4</sup> Kuqaa Anutufa qini dadaaqi marifa maridanoo.  
 Qini mariranasaa rakisi marifa Yaaweefa maridanoo.  
<sup>5</sup> Anutufa qini namuqaa qini mandaikamma qimaqee  
 maria oosannana quandasee nariqa faqa mandaikamma nimaqaani.  
 Oo Yaawee aneenna mapukusee mariranara irisee misa kuridinnisaa.  
<sup>6</sup> Oo Yaawee qinee aandau tatufirana ani suqa amirara dididanoo.  
 Oo Yaawee ani auqu amiqirafa marinara ani amooqianaaura.

<sup>7</sup> Anee qini dadaaqiananoo aiqama ummaara fannoo sia qini rafaafafinoo. Miqimma saanaqa qeeqa qifunnai qeeqa namuqaa aqufuana niqafeeqa.

## 55

*Faiqí moo fannoo mina aqoondi fannoo ueeqasoofanoo Anutufa dadaaqianifeera innaaru qinau.*

<sup>1</sup> Oo Anutu qini innaaruqirana iria.

Qinee ani iramirianana sia aqoosaa ititasee kaqinni oori rafusu aqua.

<sup>2</sup> Anee qini ufa irisee dadaaqinnanara qima qimia.

Qini ummaara irirafa qini daruaqaa midanoo.

<sup>3</sup> Qini namuqaa qini mandaikamma qimaqarara sandanainai qidaqa.

Mi manda oosanna maree mariasa qini rafaafafu qimaqaidaqa.

Misa ummaara mareeqee qinisaa quqaidaqa.

Misa qiniara aanoo qimasee fidiqaamaqisaidaqa.

<sup>4</sup> Qinee firaqoo rufiee marunanoo mi irirafa qini kuqirafa qimaqaa idanoo.

Kuquanna daaquqarafa firaafa daakinoo maridanoo.

<sup>5</sup> Firaqoo rufiee marunanoo daindiri raidanoo.

Kuqira daaquqarafa qini rafaafafinoo maridanoo.

<sup>6</sup> Qinee nakipuruna miqirausa qiqaosa faqaasa

maridau qaqaamaree moosaa oonuree idooaranaki marini.

<sup>7</sup> Qinee qaqaamaree nianai faiqí sia mariannai maaqa marunaiqini.

<sup>8</sup> Ufainamu faqa aakuasaa namuqarafa foora

namuqaa darimariafaqa ufini maridau kai kaqi mooatinai auqaanaira foora asooarannai fini.

<sup>9</sup> Oo Yaawee anee qini namuqaa ufa qirana furufaramma nimaqa.

Narirafa faqa aanooqirafa faqa qini maqusaki

marinara miqimmannisaaneera qinee ani iraidaqa.

<sup>10</sup> Eendaki faqa faasaana faqa maqusa faandaamura

afaimau oonuree aniree idaqa manda ainaina faqa ummaara faqa uqeeraidaqa.

<sup>11</sup> Kuridinnimaqara oosana fannoo maasa maqusaki aiqama tinai maridanoo.

Narira ufa faqa unna qira ufa faqa maasa maqusaki aiqama tinai qumbiqanoo maridanoo.

<sup>12</sup> Qini namuqaa qifasaasa ufa qimi naqau kaqi maraunaiqini.

Qini namuqaa darirari faqau qinee miqooqari kukeeqafini.

<sup>13</sup> Sia qini namuqaa fau miqidau anee qini fooqaa ira

fasiqa qini qifaaqasaa qiqaondi fannoo qini qiqaonafa qiniara ueeqee mariananoo.

<sup>14</sup> Maaqanda moomoosa faqa moodaanaki Anutuna

amaana maqaki keeqafiqa amiqira ufa narí qimami narí qimami qimari qiafana.

<sup>15</sup> Kuqirafa qini namuqaauqa tautumasee naruani.

Misa kaqi marifaqa misa mareeqee kuqirausa marianaki quqaqa.

Aaqarafa misa maaqaki faqa misa nimuqusaki faqa marinara miqiaqa.

<sup>16</sup> Qinee Anutuna aaraanoo mifa qini asumu maraannoo.

<sup>17</sup> Eeneemarinaqa faqa kananaana faqa faasaana

gambaana faqa qinee qeeqa aupuraranakiqari aaraanoo mifa qini ufa iriannoo.

<sup>18</sup> Rakiranaki moomoo namuqaa darirariafanoo

Yaaweefa minakinaana amiqimmasee qifiqaiifaqa oonurandee qi-maaqa anianaaura.

- <sup>19</sup> Misauqa nári manda nirana sia minnisee andeeqarannai quandaídaqa. Misa Anutunara rufiarafa sia maridanoo. Anutufa naaru mariranakiqari uriqararafa marifa qini innaaru iriseenoo misa aupurarana nimiannoo.
- <sup>20</sup> Qini ooqeenaa qigoondi fannoo narí aqoondiuqa naridanoo. Narí aqoondikira qima afeekaikira ufa rukiasee naridanoo.
- <sup>21</sup> Mina afaurusaa ufa fannoo fadameenara foora amiqi amiqi qimarifanoo mina amuqusaki qari rakirafa kai kambiqee marifa maridanoo. Mina ufa fannoo fadameenara foora farindaidanoo mi ufana anoona aseema miqirafa maridanoo.
- <sup>22</sup> Aneenna ummaara Yaaweenasaa quqasainanoo mifa aufadama amaqaannoo. Yaaweefa andeeqarausa mandainainaki aqufifanoo irinoo siamma mininnisaannoo dadaaqammiannoo.
- <sup>23</sup> Oo Anutu anee faiqí kuqa nári mariasa faqa unna ufa qiqanuasa faqa sia asooqa qeefaranoo, fukasaa kuqifaranoo. Misa miqifaqa qinee ani kai saqarikinaura.

## 56

### *Anutuna saqarikira innaaru.*

- <sup>1</sup> Oo Anutu, anee qiniara qimudao qia. Faiqí moomoo nimudaanai qimasee qini daru qifaqaa qidammia. Qini namuqaa aiqama kari qini qifaqasee dariraridammia.
- <sup>2</sup> Qiniara atasataasa qimariasa faasaambaasaana qini daru qifaqaa qidammia. Moomoosa qini dariraridaqa.
- <sup>3</sup> Qinee rufiaunna kari Oo Yaawee, qinee ani kai saqarikidaqa.
- <sup>4</sup> Qinee Anutuna saqarikdaqa sia moo ainainara rufiidaqa. Mina qima afeekaikira ufara irisee mina auqu quqeeridaqa. Faiqí faiqi nana mandaikee maqimaqaiifaqa sia qinee rufiaanaura.
- <sup>5</sup> Aiqama faasaana qini namuqaa ummaara qimidaqa. Misa maqee maqee qini mandaikamma qimaqarara kai iridaqa maridaqa.
- <sup>6</sup> Misa qini marirana nirana qiqafamasee qini darirara kukeeafa maridaqa.
- <sup>7</sup> Oo Anutu, anee misa manda oosana akiiqara aupurarana nimia. Anee aneenna aanooqiranannai mimaqannaasa muqufisee rafaqafun-nisaa.
- <sup>8</sup> Oo Anutu qini qiki raqarana aneenna papiqaki akararua. Qini daukunu quminara papiqaki padimmasee akara rua.
- <sup>9</sup> Qinee ani aaraanana anee irisee qinaqa namuqaa sandeefaranoo. Anee miqinaqa qini Anutufa qini saaroo qidanoo fee qianaaura.
- <sup>10</sup> Qinee Anutuna saqarikidaqa mina qima afeekaikira ufara amooqidaqa.
- <sup>11</sup> Qinee mi Anutunasaa kai qeeqa irirana rusidaqa. Faiqí faiqi nana mandaikee maqimaqaiifaqa sia qinee rufiaanaura.
- <sup>12</sup> Oo Anutu qinee qima afeekaikiafanna ufanara irisee dufi dufi qirana aandau tatufiranara foora suqamianaaura.
- <sup>13</sup> Oo Yaawee, qinee madika afaisaa oonuraunnana uqeera qisaannanara dufi dufi qira tatufirana suqamianaaura. Qinee farindamaki saamurirara unana qini mara findifuma qisaananoo.

Qinee ani Anutuna afusaa kaqi marira kaaqa qaranasaa nuaneera mara findifuma qisaananoo.

## 57

### *Dadaaqiani fee innaaru.*

- 1 Qiniara qimudao qimisee dadaaqiannee qidaqa.  
Oo Anutu qiniara qimudao qimasee dadaaqia.  
Qinee anee iannannai dadaaqianeera  
animarunannara irisee qimudao qia.  
Qinee ani aqoosa ameemaanai itita qisaina kuqirafa aiqaramafinaqa  
akoonnai anianaara.
- 2 Qinee Anutuna aiqama afeeka faqaana aaridaqa.  
Qini didimari aiqama ainainna qimimari Anutuna aaridaqa.
- 3 Mifa innaarunaindari qini innaaru qirana iriseenoo qini asumu maraan-  
noo.  
Mifa qini mandaikamma qimaqee mariasa rafaafidanoo.  
Anutufa narí sia taikaaninna amuqusirana faqa narí  
mapukusee marira oosana faqa qini uqaqifiqaidanoo.
- 4 Qinee kaasau aandau raioonnara foora fiqú fiqú iqa mariana qambaanai  
maridaqa.  
Misa nifai fannoo feefara foora faqa faaqaanara foora faqa kaaqa aaruqi-  
rausa qambaanai maridaqa.  
Misa nifauru fannoo aseemara foora raiqarafa faiqí ateekee marisa qam-  
baanai maridaqa.
- 5 Oo Anutu, aneenna uriqararana innaarunai uqannifiqaa.  
Aneenna qareenarana aiqama maqa maaqaki mariasa uqannifiqaa.
- 6 Qini namuqaa qini qiku ufana fufidammia.  
Qini daundurái rufiarafa marinara mapamidaqa.  
Misa qini qimaara madika indufuseeqa nariqa sia  
irirai nári indufuqaanaki nári kai doo aqúfia.
- 7 Oo Anutu miqíqa maridaqa aniara irunanoo qini qimuqusa mapukinoo  
maridanoo.  
Minara qinee idi raidaqa ani amooqianaara.
- 8 Qinee findifiqa.  
Qinee piripuna faqa ufireena faqa arimariananoo iaqainanoo suani afu  
uruani.
- 9 Oo Yaawee qinee moomoo maqannaasa qambaanai kikiqamafi  
amooqianaara.  
Qinee moomoo fasiqa anaasee qambaanai idi raida ani amooqianaara.
- 10 Oo Yaawee ani maasara amuqusirafa firaatia innaaruna amana kai ooru  
maridanoo.  
Ani mapukusee marira oosana fannoo kudimanda mariqoo ooru mari-  
danoo.
- 11 Oo Anutu, aneenna uriqararana innaarunai uqannifiqaa.  
Aneenna qareenarana aiqama maqa maaqaki mariasa uqannifiqaa.

## 58

### *Anutufa manda oosana maree mariasa aupurarana nimiani fee innaaru.*

- 1 Innee uriqararansa andeeqasee ufa nimidee.  
Innee anoona ufannai faiqí amana amana kai fee andeeqannimaqaidee.
- 2 Innee sia miqí mariafanoo.  
Inni nimuqusaki innee aaqaranara indeeindee imariafanoo.



Innee maa maqa maaqanaki faiqí narira oosana kai nimi mariafanoo.  
<sup>3</sup> Aaqee mariasa maqannimaqoona kiqari kaqi runnai ubeekaqa maridaqa.  
 Misa maqannimaqoona kiqari aaqaranaki kai fidaqa unnufa kai qidaqa.  
<sup>4</sup> Misa aaqara oosana fannoo ukadiqara foora faiqí anaasee ukaqa nimifaqa kuqidaqa.  
 Misa moo sakani sia ufa irimari sakani fara foora ufa sia iridaqa.  
<sup>5</sup> (Akaqa maqannaasa sakani rakisi mariasa ufireena fuaqaafaqa misa ninuka aqidaqa.  
 Davidifa faiqí sia ufa irimariasa mi sakanina kikiqa ususee niqinoo maqi qinau.)  
 Innee faiqí sakaniara foora ufireena fuaqaifaqa sia ufa irifaranoo.  
 Ufireena akoofasa amiqimasee fuaqaifaqa mina faqa siamma irifaranoo.  
<sup>6</sup> Oo Anutu aaqee mariasa kaasau fainiara foora mariasa anee misa nifai rufidia.  
<sup>7</sup> Anee aaqara oosana maree mariasa nammari akooqoo qumida muqufi dadasindee mannisaa.  
 Aanasaa mari ainainna nikunnai radamuandemma nimaqaa.  
<sup>8</sup> Oo Anutu saina aaqee mariasa qoofi kuqufi putaa iandee iaqa.  
 Kuqira faiqí maqasaasa sia kaaqa qarana qafaandee iaqa.  
<sup>9</sup> Faiqí kaqikaa saqari atekaindee inoo kai kaqi Anutufa misa mandaikamma nimaqaannoo.  
 Misa kaqi marifanoo Anutufa narí firaa arana qaranakiqari misa ufaira foora fuaqa aquannoo.  
<sup>10</sup> Misa manda oosana akiiqara Anutufa niminaqa, andeeqee mariasa mina qafamasee اساسammifaranoo.  
 Andeeqee mariasa misa fidikaki niku nammari uqifaranoo.  
<sup>11</sup> Faiqí mina qafamasee maaqi qifaranoo.  
 Andeeqara marirana maree mariasa mi andeeqarana akiiqara nimirafa kuqaa maridanoo.  
 Maa maqanasaa qaraasa andeeqasee rainee mari Anutufa kuqaa maridanoo, sia sia maridanoo.

## 59

### *Namuqaa sia mandaikamma amaqaqee innaaru.*

<sup>1</sup> Oo Anutu qini namuqaauqa nisaukukinaana maraquqisaa.  
 Aiqama qini darirari mariasasaa ititaqisaa.  
<sup>2</sup> Manda fasiqa nisaukukinaana maraquqisaa.  
 Faiqí kuqa nári mariasa nisaukukinaana qini soodaqammaqisaa.  
<sup>3</sup> Oo Anutu anee qafaa.  
 Misa kukeeqafi qini darirara qipuraidaqa.  
 Misa kaaqa aanoo qimariasa qini darirara suqidaqa.  
 Oo Yaawee sia qini manda oosana akiaqarau dariraridau, kaqi fifau nariqa kai dariraridaqa.  
<sup>4</sup> Qinee sia aaqara oosanau maree fau.  
 Misa sia minara irirai kaqi fifau qini darirara deedaqidaqa.  
 Oo Yaawee, misa kai kaqi qini darirara deedaqidaqa rakisidaqa.  
<sup>5</sup> Oo Yaawee, aiqama afeeka faqaa Anutufa findifinana qini dadaaqia.  
 Isaraee maqanna Anutufa anee qumuree misa manda oosana aneenna afunnai qafaa.  
 Findifinana Anutuna ufa sia iriasa ummaara nimia.  
 Qini ueeqee mariasara sia qimudao qia, kaqi ummaara nimia.

- <sup>6</sup> Misa eendifaqa fainiara foora rairai qidaqa, manda  
ainaina uqeerarara qini maqusamau fiqumai fiqumai nidaqa.
- <sup>7</sup> Misa nookiqari nanee fididee.  
Misa nifauru nimaakiri qaseema miqirafa kai maridanoo.  
Misa nári manda ufara maqumai qidaqa. Yafee iriannoo fee qimasaidaqa kaqumai  
fifau qidaqa.
- <sup>8</sup> Oo Yaawee, anee misa ufa irisee misara naanaidara qimariananoo.  
Anee aiqama mi manda maqannaasa ataasa ataasa qira ufa nimimariananoo.
- <sup>9</sup> Oo Yaawee, anee kai qini afeekaikamma qimaqasee rakisi qimaqee  
mariananoo.  
Anee Anutufa qini kukeeqara maqusara foora mariananoo.
- <sup>10</sup> Qini Anutufa qiniara amuqusi marifa qinee unnannai anireenoo  
dadaaqiananoo.  
Mifa qini namuqaa rafaafu nimaqainaqa qeeqa qifunnai niqafaanura.
- <sup>11</sup> Oo Yaawee maasa ititaqisee marianafa qini maqannaasa mi manda  
maqannaasara qaunifoora minara sia aiqama naru taikaa.  
Aneenna afeekannai mi manda fasiqausa  
narunnifaqaaqumai masainaqa auqeera foora aiqama  
maqumai maqumai oonuree aniree iqumai nuaqa.
- <sup>12</sup> Misa nookinaa ufa faqumai nifaurusaaqarara ufa faqumai aaqarafa kai mari-  
danoo.  
Misa aaqarara ufa faqumai unna ufa faqumai qimariana akiiqara mandaikiaqa.  
Misa nári noori uqeere maria oosanafa ufaanara foora misa ninuka  
qumaraani.
- <sup>13</sup> Oo Anutu aneenna aanooqiranaki qari misa kuridi nimaqaa.  
Amiqimmasee kuridi taikasaa.  
Miqinaqa maa maqumai maqumai atinni atinni mariasa  
minara iriseeqa oo Anutufa Isaraee maqannaasa rakisidanoo fee qi-  
faranoo.
- <sup>14</sup> Eendifaqa namuqaa kafa aniree fainiara foora  
rairai qidaqa mandainaina uqeerarara fiqumai fiqumai idaqa maqusamau  
nidaqa.
- <sup>15</sup> Misa nári naranara randaida oonuree aniree iqanida  
sia nimuququmai imarifaqa firaaqoo faqumai riqanidaqa.
- <sup>16</sup> Misa miqi mariafaqa qinee ani afeekara irisee idi raanura.  
Oo Anutu, qinee firaa unmaarakumai marunnana anee  
qini afeeka kukeeqara maqumai mariannanara  
qinee kananaana findifi ani maasara  
amuqusiranara idi raanura.
- <sup>17</sup> Qinee qini Anutuna qini itita qimaqee mariannana amooqianura.  
Anutufa firaaqoo qiniara aidi marifa qini afeeka  
kukeeqara maqumai maridanoo.

## 60

*Manda ainainakinaana mara kaqinni quqaqisaanee innaaru.*

- <sup>1</sup> Oo Anutu, anee maasa minniqisaananoo. Anee maasa rafaafu qi-  
maqaaananoo.  
Anee maasa aanoo qima qimaqaananoo.  
Oo Yaawee, kafa maasa iannai quandaqumai maasa dadaqumai.
- <sup>2</sup> Anee maqumai kasiananoo maqumai fannoo oo raqaidanoo.  
Anee maqumai oo raqafina kafa mafi titaa.

- <sup>3</sup> Anee maa aukuanna maasa afeeka ummaara doo uqaqifiqaananoo.  
Mi ummarana manda nammariara foora nimianaqa  
namasaafanoo narifanoo nifuai nifuai inoo.
- <sup>4</sup> Oo Anutu maasa aniara daaquqee marisa namuqaa  
maasa daru qifaqaa ifaqa anee firaka uqeerainnannai sandaifanoo  
namuqaa duru  
feefa nammari araannoo, miqifaqa maasa sia kuridianaura kaqi mari-  
anaura.
- <sup>5</sup> Oo Yaawee maasa innaaru qirana irisee aneenna afeekannai maasa  
asumu maraqisaa.  
Miqimmaseenana ani aidi maria fasiqa anaaseesa  
mandainaina kinaana asumu mariaqeera maraa.
- <sup>6</sup> Anutufa narí naaquqara uiqaana maqakiqari maaqi qinau.  
Qinee ufoona ridaqa Seekeemma maqa maaqa rainasee qeeqa maqannaasa  
nimianaura.  
Qinee Sukoota noopundu faqa miqi kai iqa qeeqa maqannaasa rainasee  
nimianauree qinau.
- <sup>7</sup> Kireeata maqa maaqa faqa Mannaseena maqa maaqa faqa qinindi  
maridanoo fee qinau.  
Eefaraimma maqa maaqa qeeqa qikiiqa afisi marunna afeeka qafeefara  
foora maridanoo.  
Yuda maqa maaqa fannoo qini uriqararausara  
uqannifiqee mari saunu fara foora maridanoo.
- <sup>8</sup> Qinee Anutusa Mooaba maqa maaqa mareeqee  
nammari difaanirara foora masee ooru dupimma nisaanaura.  
Qinee Eedooma maqa maaqa qiku aanaamu raipagu  
quqee marunna maqa maaqafa ooreeqarafa  
mariannoo, miqiannanannoo qeeqaindika masaunnana kooroo  
ianaura.  
Qinee Firistia maqannaasa urinnaaqaramasee faaqa rumasee ufoona rua-  
naura.
- <sup>9</sup> Oo Anutu, yafee qini aana muquninaqee Eedooma maqannaasa afeeka  
faandaamuraki keeqafi naruanaree.
- <sup>10</sup> Oo Anutufa kuqaa fee anee maasa ameesa uquqiseenanee.  
Anee sia fee ooqai unnandee inana maasa rakira fasiqauqa faqa oonuree  
dadaqinnaree.  
Anee sia maasa rakira fasiqa namufaqa fidana dadaaqi mariananoo.
- <sup>11</sup> Anee maasa dadaaqinaqa maasa nári namuqaa narua.  
Faiqí faiqi dadaaqirafa sia amanaikiannoo.
- <sup>12</sup> Anutufa maasa dadaaqinaqa rakiranaki oonuree uriqaraanaura. Mifa  
maasa namuqaa rafaqafu nimaqaannoo.

## 61

*Isarae maqannaasa Anutufa dadaaqianifeera innaaru quu ufafa.*

- <sup>1</sup> Oo Anutu, qini iki raqarana iria, qini innaaru qiranara aaqoo rammatinia.
- <sup>2</sup> Qinee moo maqa maaqai nianai oonu marunanoo  
qini qimuqusa mandaikimarifaqa ani aaraidaqa.  
Anee qini mareeqee afeeka kukeeqara maqusaki quqaqisaina asumu  
maria.
- <sup>3</sup> Nnaree anee qini faandaamurara foora qini ititaqimaqee marianafa  
mariananoo.  
Anee qini faandaamura marianaqa namuqaa sia amana qini rafaqafifara-  
nnoo.

- 4 Qinee naaru naaru ani uriqarara naaquqara uiqaana maqaki marirara dididanoo.  
Ani aqoosa ameemaanaira foora mandaqaanauree qidaqa.
- 5 Oo Anutu, qinee qima afeekaikira ufa ani qimamiananara anee irimmariananoo.  
Anee iriseenana ani auquara rufiee mariasa nimiraree qianna ainainna qini Dafidisa faqa qimiananoo.
- 6 Qinee Isaraee maqannaa karaambaiqa marunausa Anutu anee qini aukwana moomoo ootupamasainaqa qeeqa qinaiqimara qisaifaqausa nindafaanaura.
- 7 Oo Anutu anee qiniara naaruara qini qifusaa maridana Isaraee maqannaasa rakisi nimaqaannee qia.  
Anee aneenna amuqusirana faqa aneenna mapukusee marira oosanannoo faqa ititaqimaqaa.
- 8 Miqimarinaga qinee naaru naaru ani auquara amooqira idi raanaura.  
Qinee ooqai aiqama faasaana ani amianauree qimasee qima afeekaika maqaafannamau fuanaura.

## 62

### *Anutuna rakisinnimaqaranasaa munduaqa.*

- 1 Qinee Anutufa qini asumu maraani feera kai afeesida maridaqa.  
Mifa kai qini asumu marirana qimidanoo.
- 2 Mifa kai qini itita qimaqaseenoo qini asumu marirana qimidanoo.  
Mifa qini afeeka kukeeqara maqusara foora marinara naaru naaru sia qini rakiranaki rafaqa fifaranoo.
- 3 Oo qini namuqaauqa, naqumma kari fee qini darida marifaree.  
Innee qiniara nauraa ququsa rafaurinoo fifaiqanoo marindee irafee qimariafanoo.
- 4 Innee qinee uriqararaqoo marunnana qifeeqa maqasaa aqirara ufa qimariafanoo.  
Inni unnufara kai nididanoo.  
Inni nookiqari unna qimasee Anutuna amooqira ufa qimariafanoo, inni naunduraki manda niqurara ufa kai umbiqanoo maridanoo.
- 5 Qinee Anutuna kai mandaqaidaqa.  
Qeeqa irirana minasaa kai munduqaqee maridaqa.
- 6 Mifa kai qini itita qimaqaseenoo qini asumu marirana qimidanoo.  
Mifa kai qini afeeka kukeeqara maqusara foora marinara sia qini rakiranaki rafaqa fifaranoo.
- 7 Qini asumu marirafa faqa qini uriqarara duqu faqa Anutunakiqari kai qiniki anidanoo.  
Mifa kai qini itita qimaqee marifa maridanoo, mifa kai qini auqaana maridanoo.
- 8 Innee qini qiku qisauku aiqama kari Anutuna kai saqarikiaqa.  
Inneeqa aiqama ummaarara mina qimamiaqa. Maasa mifinnai oonuree kai asumu marianaaura.
- 9 Aiqama faiqi faiqi fifau naidoora foora maridaqa.  
Nuqu faqaasa faqa ooreeqarausa faqa moodaakarirausa fifau ainainara foora maridaqa.  
Anee misa uqaki rumaseenana sikeerasaa dirisee qafa, siara foorammiqa maridaqa.  
Naidoo ummaara fannoo misa ummaara uraaqaranoo maridanoo.

10 Innee sia rakirana faqa moonna ainaina ummuara mararana faqa saqarikiaqa.

Inni ainaina moomoo kinaqa sia irirana minasaa rusiaqa.

11 Moomoo kari Anutufa maaqi qifaqa iriqa.

Qinee Anutusa firaa afeeka faqaasa maridaqee qinoo.

12 Kafaa moo ainaina anee Yaaweefa maasara amuqusi marianafa mariananoo.

Oo Yaawee anee kuqaa aiqamausa ainainirana

akiiqara feefauru amana kai rainasee nimimarianafa mariananoo.

## 63

### *Anutufa dadaaqianifeera indee indee idaqa.*

1 Oo Anutu, anee qini Anutufa mariananoo.

Qinee doori kandamasee aniara randaida innaaru qidaqa.

Qinee aadana maqa maaqai marunanoo nammariara didiara foora aniara dididanoo.

Miqikaimmasee qini maa qifaaqafa faqa aniara nammariara foora aidi-danoo.

2 Ani naaquqara uiqaana maqaki ani qafaanaura, ani afeeka faqa ani qareenarana faqa qafaanaura.

3 Oo Anutu ani amuqusirafa maa maqee marunna marirana uriaaqaranoo marinara qinee ani auqu uqeeraanaura.

4 Qinee maaqoo kaqi marianna kamu aniara dufi dufi qianaura.

Qinee qeeqa qisauku uqeeraseeqa ani innaaru qima amaqaanaura.

5 Qeeqa qimuqusannai amiqira naranara foora namasaanoo qini qimuaqu inaqa qinee asasira idinnai ani amooqianaura.

6 Anee ooqaindari qini dadaaqi marianafa mariannanara qinee qeeqa faiqara qaarisa maridaqa aniara iridaqa.

Eendamugusai faiqarara andee qumooridaqa aniara kai iridaqa.

7 Qinee ani aqoosa ameemaanai maridaqa aniara asasira idi raanaura.

8 Qinee anisaa atooqaidaqa.

Ani asauku uqannai asauku fannoo qini asumu maraidanoo.

9 Qini kuqa darirara imariasa aiqama kuqufi kuqirausa maria maqa maaqaki fifaranoo.

Misa maqa ameemaanai kuqirausa faqa marifaranoo.

10 Misa duru feefa ooki keeqaifanoo kaasau aandau misa nipata neefaranoo.

11 Qinee Isaraee maqannaasa karaambaiqa rakiranaki uriqararana qimimarinara. Anutunara asasianaura.

Aiqama Anutuna auqusaa kuqaa qima afeekaiki mariasa mina amooqifaranoo.

Unna ufa qimariasa noo Anutufa ititannimaqasainaqa sia ufa qifaranoo.

## 64

### *Isaraee maqannaasa Anutufa dadaaqianifeera innaaru quu ufafa.*

1 Oo Anutu, qinee ummaaraki maridaqa, qini innaaru qirana iria.

Qini namuqaa dariranara rufiidaqa, anee qini marirana dadaaqia.

2 Manda oosana maree mariasa tipundaari mariasakinaana qini mareeqee kukeeqaqisaa.

Aaqee mariasa faaqa fuisee qida qini darirari marianasaa faqa ititaqisaa.

3 Mi fasiqausa nári nifauru nimaakiri faaqaanara foora aaruqu maqaafanoo maridanoo.

Misa ufa fannoo feefa dindasaa quqasee rakisiandee qini rakisi qi-maqaidaqa.

<sup>4</sup> Miqi maria manda fasiqausa qumee ooqa andeeqara fasiqa naridaqa. Misa rufiarana siaisa kaqi tautumaki naridaqa.

<sup>5</sup> Misa nariqa suqufifaqa manda oosanara nari pooduqee nari pooduqee idaqa.

Misa kukeeqara ufaana fufira oosanara amiqimmasee iriqaraasammasee maaqi qidaqa, sia moo fannoo maasa ufaana qafaannoo fee qidaqa.

<sup>6</sup> Misa manda ainaina auqarara tipundaaridaqa.

Misa nariqa tipundaariranara andeeqanoo maridanoo fee qidaqa.

Faiqi faiqi kukeeqara irirafa farumara foora meemai uqnaurinoo maridanoo.

<sup>7</sup> Anutufa mi manda faiqausa nari feefannai naruannoo.

Dauni misa naru quqasaannoo.

<sup>8</sup> Misa manda ufa akiiqara kuridi nimaqaannoo.

Aiqamausa misa mi narirana niqafamasee boo firaa ainaina kambiqee maqi qifaranoo.

<sup>9</sup> Misa aiqamausa misa narirana qafamaseeqa rufieeqa

misa Anutuna ainainiranara iridaqa kooroommasee mina ainainiranara qimannimifaranoo.

<sup>10</sup> Andeeqarausa Yaaweefa auqoo ainainara irisee asasifaranoo.

Misa Yaaweenaki amiqimmasee marirana paqurifaranoo.

Aiqama andeeqarausa mina amooqifaranoo.

## 65

*Anutuna amooqirafa faqa dufi dufi qira innaaru maridanoo.*

<sup>1</sup> Oo Anutu, anee maasa innaaru irimariannanara

maasa Sioona maqusaki andeeqasee oonuree ani amooqidaqa ani amianauree qima afeekaika maqaafanna ainainauqa ani amianaura.

<sup>2</sup> Faiqi anaasee aiqama maqa maaqaindari nari manda oosanara iriseeqa anee Anutufa iannannai ani faranoo.

<sup>3</sup> Maasa mandainaina fannoo maasa dukunimma saifana anee Anutufa mina taikaqisaananoo.

<sup>4</sup> Anutu anee rusandeesammasee maraqaanausa ani asasiranaki maridaqa.

Anee aneenna naaquqara maaqaki mariaqeera nifiqa quqasainausa asasiqa.

Maasa mi amaana maqanaki marunanoo ani amiqi amiqirafa maasaki qumbiqanoo marifaqa maridaqa.

Ani naaquqara amaana maqaki marunanoo ani

amiqi amiqirafa minaki marifa maasaki qumbiqanoo maridanoo.

<sup>5</sup> Oo Anutu, anee maasa asumu qimi marianafa mariananoo.

Anee maasa aneenna naaquqara andeeqara ainaina

auqee mariannannai maasa qimaqimi marianafa mariananoo.

Aiqama maqannaasa nianai atinni atinni mariasa

faqa ooruku nammari dinni afainni mariasa faqa ani kai saqarikidaqa.

<sup>6</sup> Anee aaqanauqa aneenna afeekannai auqu eeqee nari maqee mariaqoo quqanau.

Miqunnaanannoo aneenna afeeka uqannifiqanau.

<sup>7</sup> Ani afeeka fannoo ooruku nammari kasinoo amakaurirana faqa rafaafaq-fusaifanoo mina kasirana faqa ufaqirana faqa daimafinoo.

Faiqí anaasee tutuqirana faqa taikannimaqaananoo.

<sup>8</sup> Aiqama maqannaasa anee auqee marianna ainainna qafaafanoo naaquqaidanoo.

Suani ururee marinnai mariasa faqa suani keeqee marinnai mariasa faqa aiqama ainaina auqee marianna ainainna qafamasee mi aiqama maqannaasa naaquqaiifaqa faaqa rumasee aniara اساسیداقا.

<sup>9</sup> Oo Anutu anee maa maqa maaqana rakisidana uqeenaa uqeenianifeera aaku firaana teeqiananoo.

Anee miqiannanannai maa maqana ainookamma saananoo.

Anutu ani nammariuqa qumbiqanoo maridanoo.

Mi nammarifa maqa maaqa amiqimma saifanoo amiqira narana faíqí anaasee nimidanoo.

Anee miqimmasee auqinau.

<sup>10</sup> Oo Anutu, anee qiananoo aaku firaafa rinoo maqa uqeenaa uqeenaa masaifanoo afuqaki narana kambiqaidanoo.

Anee aaku dunoonnannai maqa uqeenaa saananoo narana kambiqaidanoo.

<sup>11</sup> Ani amiqirafa narana rairaamma qimaqee marifa maridanoo.

Anee finnatinai miqikai inoo narana rairaa iannoo.

<sup>12</sup> Andandaki aiqamatina burimakau faqa sipsipa faqa umbiaqa maridaqa. Aaqanauqa faqa kaqikaa amuaqu namuqa faqa aaku rifaqa firaaqoo اساسیداقا.

<sup>13</sup> Firaa afaasasaa burimakau sipsipa moomoo qumbiqaidanoo.

Noopunduki faqa sakumma ainaina moomoo kambiqeenoo aiqama noopundu titaidanoo.

Aaku rifanoo aiqama ainaina اساسیداقا idi raidaqa.

## 66

*Anutuna amooqira idi faqa dufi dufi qira idi faqa maridanoo.*

<sup>1</sup> Aiqama maqa maaqaki mariasa اساسیداقا firaaqoo Anutunara faaqrarumasee amooqiaqa.

<sup>2</sup> Idi raidaqa mina auqu qareenaranara kooroo iaqa.

Qareenara amooqirana mina amiaqa.

<sup>3</sup> Innee Anutuna maaqi qimasee qimamiaqa.

Anee auqu quqoonna ainainafa kaaqa naaquqarafa maridanoo.

Ani namuqaauqa ani uriqarara afeeka qafamasee

aniara firaaqoo rufieeqa ani oorinni niqoori saunu araidaqa.

<sup>4</sup> Aiqama maa maqa maaqanasaa qaraasa ani amooqidaqa.

Misa ani amooqira idi raidaqa ani auqu uqeeraidaqa.

<sup>5</sup> Innee aiqamausa aniree Anutufa auqeeu ainaina qafaaqa.

Mifa naaquqara ainaina faiqí anaasee qambaana auqanau.

<sup>6</sup> Mifa ooruku nammariara qufanoo aadanusufufaqa

maasa qikeeku qikaaku maqamau aandanasaa funara Anutunara اساسیقای.

<sup>7</sup> Anutufa naaru naaru narí afeekannai aiqama maqannaasa rakisinni-maqaidanoo.

Mina afu fannoo aiqama maqannaasa auqee maria ainainna niuqidanoo.

Ufa rukiee mariasa sia Anutuna aana itita amaqaqa.

<sup>8</sup> Innee aiqama maqannaasa maasa Anutuna amooqiaqa.

Innee mina amooqirana firaaqoo uqeeraifaqa nianaindari faiqí anaasee iriaqa.

- 9 Mifa maasa marirana afeedammaqisaifaqa kaqi maridaqa.  
Mifa maasa mandainainaki aqufuanoora itita qimaqaiifaqa sia aqufidaqa.
- 10 Oo Anutu, anee maasa qimanammasee qafaananoo.  
Siruaa tasirisiri masee apaapu maraquandee iananoo.
- 11 Oo Anutu, anee maasa mareegee ufaanaki aruqisasee  
fira ummaara tia maasa qitaufakaaqa daaku qimaqaananoo.
- 12 Anee namuqaara qianaqa misa nikunnai maasa qikiqa radamia.  
Maasa ida qambaanaira foora faqa nammari aufi marinakiara foora faqa  
oosana oosana ummaaraki  
fimariafanana anee maasa mareegee amiqiraqoo quqaqisanau.
- 13-14 Qinee ummaaraki maridaqa ani Anutuna oosana  
oosana qima afeekaikira ufa qimamiqiafana.  
Doo maqee mi qima afeekaikira ufana qimamiafannandee ianaura.  
Doo maqee qinee qima afeekaikifanna ufanara qianaura.  
Qinee aandau tatufirana mara maree ani amaana maqaki minisee suqa  
amianaura.
- 15 Qinee sipsipa tatufirana suqamianaura.  
Qinee burimmakau akoona faqa mimmi faqa tatufirana suqa amianaura.  
Miqiananoo muna fannoo innaarunai ani aikiambu iannoo.
- 16 Innee Anutunara qeerairi mariasa mai aniraifaqa qini dadaaqinara  
qimannimia.
- 17 Qeeqa dookiqari dadaaqianifeera aareeqa, idinnai mina amooqiqa.
- 18 Qinee mandainainara fifau ainainee qimasee kaqi  
auqaunanoo Anutufa sia qini innaaru qirana iriqini.
- 19 Kuqaa Anutufa qini ufa irinoo, qini innaaru qirana faqa irinoo.
- 20 Anutufa sia qini innaaru qirana minniseenoo.  
Sia narí aiqama kari amuqusiranara qao qinoo.  
Minara mina auqu uqeerasee mina amooqiaqa.

## 67

### *Anutuna dufi dufi qimamaqara idi.*

- 1 Anutu anee maasara qimudao qimasee amiqi amiqimmaqisaa.  
Aneenna oori afiri kaaqa qarana maasiannai ubeekamasee dadaaqia.
- 2 Miqinaqa ani oosana aiqama maqa maaqakinaasa iriaqa.  
Aiqama maqannaasa ani asumu mariranara faqa iriaqa.
- 3 Oo Anutu aiqama faiqí anaasee ani amooqiaqa.  
Aiqama faiqí anaasee ani amooqiaqa.
- 4 Oo Anutu, anee faiqí anaasee aiqama amana amana kai andeeqasee rakisi  
mariannana faqa amiqimmasee naamua qimasee nifiqee fimarian-  
nanara faqa aiqama maqannaasa اساسammasee idi raidaqa.
- 5 Oo Anutu faiqí anaasee ani amooqiaqa.  
Aiqama faiqí anaasee ani auqu uqeeraaqa.
- 6 Miqifanoo maqakiqari aiqama narana kambiqanoo.  
Kambiqainanoo Anutufa maasa Anutufa amiqi amiqimma qimaqaannoo.
- 7 Anutufa maasa amiqi amiqimma qimaqanau.  
Aiqama maa maqanasaaqaraa fasiqa anaasee minara uriqarara fee qi-  
masee qeerairiaqa.

## 68

### *Isarae maqannaasa Anutufa misa dadaaqunara asasiqau.*



- 1 Anutufa findifinoo narí namuqaauqa mara furufaramma saifaqa daraania.  
Anutunara fidiqaqa imariasa mina oorisaaqari nisaurusee quqasee sandaaqa.
- 2 Aneenna namuqaauqa ufai idamuna fuaqa aqindeemma saina fifuaqa.  
Mandainaina maree mariasa ainoo ainaina idaki  
quqasaafanoora foora iqa Anutu ani afusaaqari tasirisirimma taikafuaqa.
- 3 Andeeqee mariasa asasidaqa ani Anutuna afusaa nasuriaqa.  
Misa faaqa rumasee asasiaqa.
- 4 Innee Anutunara idi raida mina auqu amooqirana amiaqa.  
Oonnamusaa ooqumarifi nimari Anutuna aana andeeqaa.  
Mina auqu Yaaweefa maridanoo. Mina afusaa asasiaqa.
- 5 Anutufa narí naaquqara amaana maqaki marifa  
faiqi faiqi rakisi nimaqaidanoo, adeedaana aanaaseeuqa faqa ummaarakí itita nimaqaidanoo.
- 6 Anutufa náriaraa mariasa mareeqee moo fasiqa anaasee nári faiqi kiqeerá nimidanoo.  
Mifa rumberanaki mariasa idukusee nifleeqee amiqiranaki quqannisaidanoo.  
Anutuna ufa rukiee mariasa sia miqidaqa, misa manda maqa maaqaki marifaranoo.
- 7 Oo Anutu, anee ooqai Isaraee maqanna aadana maqa maaqaki nifiqee finau.
- 8 Sinai aaqanasaa marunna Anutufa, Isaraee maqanna  
Anutufa, anee ooqai Isaraee maqannaasa nifiqee funanoo maqa kasiinoo aaku nammariara foora adianau.
- 9 Oo Anutu anee qunanoo aaku firaafa rufanoo ani maqa Isaraee maqa maaqa mandaikinoo marufa amiqinau.
- 10 Ani maqannaasa mi maqa maaqanaki oonu marufaqa akaqausa kudi marufana Anutu anee afaaridana misa narana niminau.
- 11 Yaaweefa faiqí anaasee naamua qufaqa aanaaseeuqa  
mi ufana mara maree aiqama maaqi qimasee qimannimiqau.
- 12 Kannaa maqanna karaambaiqauqa faqa sundiauqa faqa anirandee sandama qaraasidammiaafoo qiqa.  
Miqi qufaqa Isaraee maqanna aanaaseeuqa oonu misa rakiranaki maraqoo ainainausa marasee rainaqa.
- 13 Mi anaaseesa siruaannai faqa koorannai faqa nifaaqa auqusoofanoo amiqira ufiniara foora inoo marinau.  
Misa nifaaqa fannoo siruaara foora daroo daraa ufanoo misa niqoosara foora koora fannoo kaaqa qee marinau.  
Miqi marufaqa akaqausa nanaree kaqi nariqa sipsipasaa rakisi mariqau.
- 14 Mi rakiranaki aiqama afeeka faqaa Anutufa karaambaiqauqa Saramoona aaqanasaa naru nindaqaqa ufaqa fifainufanoo fira oonnamuara misaqa aiqamai itita aqufinau.
- 15 Basana aaqana kaaqa uriqarara aaqana maridanoo.  
Miqoo moomoo kaqikaa aaqanauqa mina aaqa maridanoo.
- 16 Innee Basana aaqanasaa maria aaqanauqa nanaree innee Sioona Anutufa mari aaqannara fifau ainainee qidee.  
Yaaweefa narí kai mi aaqannana utaaqamaseenoo naaruara mi aaqanasaa mariannoo.

- 17 Anutufa narí sundiauqa moomoo tauseenna afeeka rakira karauqasaa ooqufaqqee marusa faqa Sinai aaqanaindari qumuree Sioona aaqanasaa narí uiqaana maaqaki keeqanau.
- 18 Anutufa Sioona aaqanasaa ooru fidanoo rumbarausa aana muqunufaqa ooru fiqau.  
Mifa miqoo ooru marufaqa faiqí anaasee akaqa ainaina Yaaweena mini amiqau.  
Yaaweena ufa ooqai rukieeusa misa faqa akaqa ainaina amiqau. Mifa miqoo mariannoo.
- 19 Yaaweena amooqimamaqaa.  
Maasa Anutufa maasa asumu maree marifa marina amooqiaqa.  
Mifa aiqama kari maasa ummaara dadaaqi marifa marinara mina amooqiaqa.
- 20 Maasa Anutufa asumu marirana qimimari Anutufa maridanoo.  
Yaaweefa maasa kuqiranakinaana asumu maree mari Karaambaiqafa maridanoo.
- 21 Anutufa narí namuqaauqa nikiqqa kuqaa uqanna radandamumma saannoo.  
Nári aaqara oosanki afeekaikammandee fimariasaa faqa radandamumma saannoo.
- 22 Yaaweefa maaqi qinau, inni namuqaa Basana maqa maaqaki mariana nifiqqee anianaura.  
Ooruku nammari farumakiara foora mariana oonu nifiqqee anianaura.
- 23 Innee inneeqa namuqaa narusaifaqa inni maqannaasa misa fidikaki niku reefaranoo.  
Fainiuqa nári nidiranasaa misa fidika neefaranoo.
- 24 Oo Anutu qini karaambaiqa.  
Anee moomoo fasiqa anaasee aana muqunimma maree aneenna amaana maqaki keeqararee qimarianaqa doo aiqamausa misa nindafaidafa.
- 25 Idi ree mariasa indaaru fimarifaqa piripunna ari mariasa inaaqianna fuafaqa qambaana temberinna ari maria manaaqausa fidaqa.
- 26 Innee Isaraee maqannaasi fasiqa anaasee suqiqqa marianakiqari Anutuna amooqiaqa.  
Innee Yakooboona saaqari kambiqarausa innee Anutuna amooqiaqa.
- 27 Isaraee maqannaasa Beensamina akeeku akaaku qoodaa marusa indaaru fimarufaqa Yudana akeeku akaaku marusakiqari uriqararausa moomoosa faqa Seeburuna akeeku akaaku kiqari faiqí uriqararausa faqa Napatarina akeeku akaaku kiqari faiqí uriqararausa faqa misa ninaaqianna amaana maqai suqirannai ooru fiqau.
- 28 Oo Anutu anee aneenna afeeka maasa uqaqifiqaa.  
Oo Anutu, anee ooqai aneenna afeeka uqannifiqoonnandee kai inana maqee faqa uqannindiqa.
- 29 Anee aneenna uriqarara amaana maqaki Yeerusaree maqusai mariannanara, moomoo maqanaa karaambaiqauqa kaqi nimimaria ainainnaa maree mini ani amifaranoo.
- 30 Firaa doona aqmauraqmauri marinaki mari kaasau aandaufa Isipa maqannaasi karaambaiqa Faraoofa maasa darirarinana Anutu anee minara aanoo qimasee qaoo qia.  
Faraoona dadaaqimaria uriqarara fasiqausa aanoo qimaria burimmakau akoonausara foora kaiqeesa qambaana oonuree narirara ifana anee misara faqa aanoo qimasee qaoo qia.  
Anee misa mara muqufisainaqa misa siruaa mara maree mini ani amiaqa.

Aiqama rakiranara rimaria maqannaasa anee misa naru nindaqaaqa masainaqa daraaniaqa.

<sup>31</sup> Isipa maqanaa uriqararausa Anutufinnai ubeekarara anifaranoo, Eetooopia maqannaasa nisauku uqeerasee Anutunara innaaru qifaranoo

<sup>32</sup> Oo innee maa maqanasaa mariasa innee Anutuna idi ramamaqaaqa. Yaaweena amooqira idi raaqa.

<sup>33</sup> Anutufa ooqaindari mari innaarunasaa nimari Anutunara amooqira idi ramamaqaaqa.

Mi Anutuna ufa firaafa innaarunai qiara foora qimarifa maridanoo.

<sup>34</sup> Innee Anutuna afeekara koorooiaqa.

Mina amiqira uriqararafa Isaraee maqannaasa rafaafafu nimaqaidanoo.

Mina afeeka innaarunai maridanoo.

<sup>35</sup> Isaraee maqannaasa Anutufa nari amaana maaqaki marifa kaaqa naaquqarafa marinara rufiaaqa.

Mifa uriqarara afeeka faqa eeraarirana faqa nari faiqi anaasee nimidanoo. Anutuna amooqiaqa.

## 69

### *Isaraee maqannaasa Anutufa dadaaqianifeera innaaru qiqau.*

<sup>1</sup> Oo Anutu anee uqeeraqisaa.

Nammariara foora qini ummaara fannoo rafaafafinoo qinukaki ururaifaqa kaqi kaaqoo kuqanaura.

<sup>2</sup> Qinee firaa doona poopoo qimarinakiara foora qiku utusaqa maridaqa sia afeeka maqasaa qiku raidaqa.

Qinee nammari difukunaki aniraunanoo nammari aufirafa qini dukuniqaa idanoo.

<sup>3</sup> Qinee Anutufa dadaaqianifeera aaraida afeesida marunanoo qini daunda aadana usufifanoo qini ufa akieenoo.

Aniara rakisida marida qifuanda rakee iqa.

<sup>4</sup> Qiniara fidiqaa imariasa qini qikiqqa asaasi faqa arusee fiqaramasee maridaqa.

Qini kuqa darirari mariasa fifau qini oosana siainaki namuqaakamma qimaqaidaqa.

Misa qiniara moo ainaina fifau unnaqimasee ummuariaanoo qimasee mina akiiqara nimianne qimasee sandanainai qiafaqa rufiaseeqa fifau qeeqa ainaina nimiqa.

<sup>5</sup> Oo Anutu qini furufarira oosanara anee irimmariananoo, qini aaqarafa sia ani afusaa kukeeqanoo maridanoo, akooqoo maridanoo.

<sup>6</sup> Oo Yaawee, anee qini dadaaqinaqa sia moo aaqaranaki aqufuanaqa ani ufamau fimariasa nisauruaqa.

Oo uriqarara Yaawee aiqama afeeka faqaafa anee qini dadaaqinaqa aniara innaaru qimariasara sia manda ufa qimannimaqaaqa.

Oo Isaraee maqanaasa Anutufa miqimma qimaqaa.

<sup>7</sup> Oo Anutu, ani auqu raunnanara aasaandaana ufa qimi mariafaqa qini qisaurirafa qini rafaafafuqaiifaqa maridaqa.

<sup>8</sup> Qinee ani auqu raunnanara qeeqa qikaqaafasaa nifusaa aanaamuruara foora maridaqa.

Qeeqa qinoona faiqi namu nifusaa moo aanaamuruara foora maridaqa.

<sup>9</sup> Qinee ani Anutuna amaana maqara didirafa firaqoo idara foora qaidanoo.

Ani Anutuna aquraree maria aqurararafa qinisaa faqa aqufinoo marifaqa maridaqa.

<sup>10</sup> Qinee qeeqa mara maree muqusee narana auramasee marunaqa faiqi anaasee qini qiqafamasee aasaandaana ufa qimaqimaqaidaqa.

<sup>11</sup> Qinee manda gammunna soofaara gammunnara foora afisuqau-naqa faiqi anaasee qiqafamaseeqa qiniara ataasa ataasa qimasee naanaidara qima qimaqaidaqa.

<sup>12</sup> Aatata oonuree aniree idaqa qini qiqafee mandufa qidaqa.

Afeeka nammari namasee furufari mariasa faqa qiqafeeqa manda idi qiniara raidaqa.

<sup>13</sup> Qinee sia misa ufa irianaaura aniara kai innaaru qianaaura.

Oo Yaawee, aneenna qinna kari qini innaaru akiiqara kafaa qiqa qimaqimia.

Anee qima afeekaikammasee qini asumu maraanauree qunнанara irisee miqia.

Anee sia unna qimarianafa mariananoo.

<sup>14</sup> Doona poopoo qimarinakiara foora utusaqa maridaqa Oo Anutufa anee qini qumaree tatu qisainaqa sia minaki ooqu keeqafi minaki kuqua.

Qini namuqaa nisaukukinaana maraquqisaa.

Faruma firaanaki uqnauriranakiara foora aqufiqa marunnana umbaqa afainni quqaqisaa.

<sup>15</sup> Oo Anutu anee qinanooo sia nammari qini dukuniani.

Faruma uqnauriranaki sia qinee aqufiqa ukuqnaanaura.

Sia qinee madikakiara foora aqufuana maqa fannoo mafi titaqisaani.

<sup>16</sup> Oo Yaawee, anee aneenna amiqiranakiqari qini innaaru iria.

Anee aneena firaa nifauaranakiqari qinee unnannai oori ubeekaa.

<sup>17</sup> Oo Anutu, qinee ani ainainira faiqi marunnanara sia anee oori rafusu kaqinni aqua.

Qinee firaa ummaaraki marunnanara dauni dauni qini irara ufa anoona qima qimia.

<sup>18</sup> Oo Anutu, anee qini daaqa aniree qini namuqaa nisaukukinaana mara asumu quqaqisaa.

Qini namuqaauqa darirarifana qini mareeqee kaqinni qisaa.

<sup>19</sup> Oo Anutu, qini namuqaauqa anee niqafee mariana qiniara aasaandaana qirana faqa mandaikamma qimaqarana faqa qisaurirana faqa qimi mariafana anee iri mariananoo.

<sup>20</sup> Qini aasaandaana ufa qimiafa qini qimuqusa raquruqiminoo marifaqa qini qifaaqaki aiqama ummooqukinoo marifanoo qini qifaaqa dadaaqirafa sia maridanoo.

Qinee nimuqusiranara randauna sia moo fannoo qiniara amuqusirafa maridanoo. Qinee qimudao qira ufa qima qimaqarausara randauna sia uqanna maridaqa.

<sup>21</sup> Qini daararaifaqa misa qini naranaki qumee adudu fooqaana minaki quqasee qimiafaqa nauna suka darifaqa minniseeqa.

Qini nammariara didifaqa misa sukaqee mari nammarina qimiafaqa namasee qafeeqa minniseeqa.

<sup>22</sup> Mi manda oosanna qimimarias nariqa narana difaani fannoo nari quandaki kuridi nimaqaani.

Misa nariqa mi firaa naaquqara oomaqafa nikuqamasaina aqufuaqa.

<sup>23</sup> Misa nifu asukunaarusaina mikiqmakiqa nuaqa.

Misa nitaufaka faqa rambaqasaina naaruara miqiqa mariaqa.

- 24 Oo Anutu, aneenna aranaqarana nammariara foorā misasaa adiasaa.  
Ani aanooqirafa idara foorā misa qama taikaani.
- 25 Misa maqa maaqa naakundu kai saaeemasaa.  
Sia moodaafa faqa nariqa uiqaana maaqaki mariaqa, naakundu kai mari-  
ani.
- 26 Anee Yaaweefa ani ufa rukiee mariana akiiqara anee maasa kaakadi  
darusaanausa namuqaa anireeqa aaqaidaqa misa kaaqmukaidaqa.  
Kaaqmukamaseeqa misa nāri maqusai oonureeqa anee Yaaweefa maasa  
daruannanara aupuraunaqa ataasataasa qidaqa.
- 27 Oo Yaawee anee misa aaqarana akiiqara sia qaunua amiqimmasee iria.  
Misa ani Anutuna asumu marirana sia uqanna kaqikaana faqa maraaqa.
- 28 Oo Yaawee ani naaru marira papiqaki misa nuqu marina rukaa.  
Aaqee mariasa nuqu sia andeeqee mariasa nuqu namu faqa moodaanaki  
akara rua.
- 29 Qinee Dafidisa firaa didafirana faqa ummaara faqa maraidaqa.  
Oo Anutu, anee qini uqeerasee asumu marirana qimia.
- 30 Qinee dufi dufi qira idinnai mina auqu qareenaranara koorooianaara.
- 31 Mina mi dufi dufi qirafa burimakau sipsipannoo tatufirana suqami  
mariana uriaaqaranoo maridanoo.  
Muduka burimakau faqa sipsipa faqa aiku namufaqa  
aanai namu faqa tatufirana suqarana faqa uriaaqaranoo maridanoo.
- 32 Kudi fasiqauqa mina qafamasee asasammifaranoo. Innee Anutunara  
randeemariasa inni irirana afeekaikamma nimaqaannoo.
- 33 Yaaweefa kudi fasiqauqa innaaru qiana iridanoo.  
Isaraee maqannaasa namuqaa rumberanaki mariafanoo Yaaweefa misara  
sia qaunidanoo misara faqa iridanoo.
- 34 Innaarunai mariasa faqa maqasaa mariasa faqa ooruku nammariki  
nimaria ainainausa faqa Yaaweena amooqiaqa.
- 35 Anutufa Sioona maqusa moo auqu Yeerusaree maqusaki mariasa misa  
namuqaasaa ititannimaqaannoo.  
Yuda maqa maaqakinaa maqusauqa rapeepaa inoo marinauqa kaifaa  
itipiannoo.  
Itipammasainaqa faiqi anaasee miqoo kaifaa maridaqa aiqama maqa  
mareefaranoo.
- 36 Isaraee maqannaasa Anutuna ainainira faiqiuqa,  
misa faiqi namu kambiqafinaqa mi maqusausa marasaifanoo maa-  
saindi kamminoo marinaqa minaki marifaranoo.  
Mina auquara rimariasa faqa minaki marifaranoo.

## 70

### *Dadaaqiani fee innaaru.*

- 1 Oo Anutu, anee qini mandainainakinaana mara aquqisaa.  
Oo Yaawee, kai kaqi aniree qini dadaaqia.
- 2 Qini marirana taika qimaqarara randeemariasa rafaqafu saina nisauri-  
ranaki faqa furufariranaki faqa mariaqa.  
Qini ummaarara irisee asasamariasa mara quandasainaqa nisauruqa
- 3 Qiniara uteeti qimariasa nariqa nisaurirana firaafa marina qafaifanoo  
firaqoo naaquqaani.
- 4 Oo Yaawee anee iannannai ani mariasa asasidaqa nasuriaqa.  
Ani asumu mariranara nidimarisa, maaqi qiaqa.  
Yaaweefa uriqararafa maridanoo fee qiaqa.

<sup>5</sup> Qinee Dafidisa qimudaani radukirausa marunausa sarau marunna fasiqausa marunnanara oo Yaawee anee sia qiniara qaunuananoo. Anee qini asumu maree marianafa faqa qini Anutufa faqa mariannanara kai kaqi aniree qini dadaaqa.

## 71

### *Faiqí fraana innaaru.*

- <sup>1</sup> Oo Yaawee, anee itita qimaqaanneera anee iannannai anidaqa.
- <sup>2</sup> Anee andeeqarafa mariannanara qini dadaaqinana mareeqee kaqinni quqaqisaa.  
Aneenna aaqoo qinee iannannai rammatinimmandee irisee qini asumu maraa.
- <sup>3</sup> Oo Anutu, anee qini ooni faandaamurara foora faqa auqaanara foora faqa auquqisaina qinee minaki keeqafi asumu maria.  
Anee qini ititee marianna oonifa faqa qini afeeka kukeeqara maqusa faqa mariananoo.  
Anee qinaqa qinee amiqimmasee marianaaura.
- <sup>4</sup> Oo qini Anutu, manda oosana maree mariasa nisauku kinaana faqa eendaandi mariasa nisauku kinaana faqa fitiqnarana qimimariasa nisauku kinaana faqa maraquqisaa.
- <sup>5</sup> Oo uriqarara Yaaweefa, qinee aniara kai aambeembesida marunausa maridaqa.  
Kumaaraasaa qari ani kai saqarikii aafanausa maridaqa.
- <sup>6</sup> Qini maqoonakiqari qinee anisaa mundaqa mariafanausa maridaqa.  
Qini qinoofa maqaqisooqooqari anee kai qinisaa rakisina aniifana maqee aniraananoo, minara qinee maqee maqee ani amooqianaaura.
- <sup>7</sup> Moomoosa qini faqa qiniki kambiqoo ainainna faqa qafamasee iriqau.  
Minara anee kai qini afeeka kukeeqara maqusara foora mariananoo.
- <sup>8</sup> Aiqama faasaambaasaana qinee ani amooqidaqa ani qareenaranara kooroidaqa.
- <sup>9</sup> Oo Anutu, qinee asooqa qaanana sia qini maraquqisaa.  
Qini afeeka taikainana sia qini minniqisaa.
- <sup>10</sup> Qini namuqaauqa qini darirarammidaqa.  
Qini dariraree qimasee ufa suqidaqa tipundaaridaqa.
- <sup>11</sup> Misa qiniara maaqi qidaqa.  
Anutufa mina minnisaifanoo sia moo fannoo mina dadaaqirafa maridanoo, anifaqa mina afaqaseeqa qumaraanee qidaqa.
- <sup>12</sup> Oo Anutu, sia nianasaa maria.  
Oo qini Anutu dauni aniree qini dadaaqa.
- <sup>13</sup> Qini darirari mariasa anee Yaaweefa misa rafaqaqafu nimaqasee kuridi taikannisaa.  
Qini aupurarana qimirari mariasa nisauriranaki faqa aupuraranaki faqa mariaqa.
- <sup>14</sup> Qini irirafa naaru naaru aniara kai aambeembesida marianno.  
Qinee kaifaa kaifaa ani amooqima amaqaanaura.
- <sup>15</sup> Qini doo fannoo ani Anutuna andeeqarana faqa asumu mariranara faqa faasaambaasaana kooroo ianaura.  
Qinee mi andeeqarafa faqa asumu marirafa faqa fiqaranoo marifaqa ati kai iridaqa mina oosanara faqa ammuquara faqa sia iridaqa.
- <sup>16</sup> Oo uriqarara Yaaweefa qinee anee amudaanai qimasee auqunna ainain-ausara kooroo ianaura.  
Qinee ani andeeqaranara kooroo ianaura. Anindiara kai kooroo ianaura

- 17 Oo Anutu, anee qini kumaaraasaaqari oosana arasee aneenna oosana uqaqifiqana ani mariananoo.  
Qinee miqooqari anee firaa ainaina auqoonnanara faiqí anaasee kaqi kai qimannimiqa fidaqa.
- 18 Oo Anutu maqee qinee nauraiqi aandau aanaaqi maridaqa sia qini minniqisaa.  
Anee qini faqa marinaqa qinee naaru kambiqainausa faqa qimanimia.
- 19 Oo Anutu, ani andeeqarafa maqasaaqari innaaruna auqanoo maridanoo.  
Anee firaa ainaina auqunafa mariananoo.  
Oo Anutu yafee ani fooqaafa maridanoo fee.
- 20 Oo Yaawee, anee oosana oosana ummaara faqa aupurarana faqa qimi-mariananoo.  
Kasooqagee anee kaifaa qini marirana ooqai mariundeemma qiseennaranoo.  
Anee qini kuqa dariranasaa itita qimaqeennaranoo.
- 21 Anee qini firaaqoo uqeera murufi qiseennaranoo.  
Anee kaifaa qini amiqi amiqimma qima qeennaranoo.
- 22 Oo qini Anutu, ani mapukusee marira oosanara piripunna aridaqa ani amooqianaura.  
Oo Isaraee maqannaasa naaquqara Anutufa, qinee piripunna aridaqa ani amooqira idi raanaura.
- 23 Qinee piripunna arida ani amooqira idi raidaqa firaaqoo asasianaura.  
Anee qini mandainainakinaana kaqinni mara quqaqisaannanara asasi-daqa.
- 24 Qinee faasaambaasana ani andeeqaranara qimannimianaura.  
Qini didafirana qimirari mariasa anee rafaqaqafu nimaqasee mandaikamma nimaqaannanara irisee ani andeeqaranara qimannimianaura.

## 72

### *Maqasaa karaambaiqa fannoo dadaaqianifeera innaaru qinau.*

- 1 Oo Anutu anee Isaraee maqannaara karaambaiqa aneenna amiqimmasee ufa irira oosana amia, aneenna andeeqara oosana faqa mina amia.
- 2 Mifa andeeqaranannai ani Anutuna faiqí anaasee ufa andeeqannisaani.  
Nari maqannaara nuqu siai fasiqa anaaseesa faqa amana amana kai andeeqasee ufa raina nimaqaani.
- 3 Miqi marinaqa misa maqa maaqa ainoo kinoo aiqama ainaina rairaaiani.  
Mi maqanasaa mariasa andeeqara oosana mareefaranoo.
- 4 Mi karaambaiqafa kudi fasiqa anaasee amana amana kai raina nimaqaani.  
Ainaina siaisa faqa ummaaraki marianasaa ititannimaqaani.  
Mifa nariara uriqararausee qimasee akaqausa rafaqaqafi mariasa radamusaani.
- 5 Ani faiqí anaasee suani afu kaqi qeemarinaqa ani amooqiaqa.  
Quqoona faqa kaqi qeemarinaqa ani amooqiaqa.
- 6 Mi karaambaiqafa aakuara foora fuka afuqaki rifanoo aiqama andanda afu amifanoo raambandaariara foora iani.  
Mifa aakuara foora rinoo maqa uqeenuqeeniani.
- 7 Mi karaambaiqafa marianinna aukuna faiqí anaasee andeeqara oosana kai maraaqa.  
Quqoona kaqi qeemarinanoo reemindeemirirafa kai mariannoo.
- 8 Mina rakisinnimaqarafa dinni ooruku nammarinni oosanarasee dinni ooruku nammarinni amanasaa rakisinnimaqaani.

Dinni ati fannoo Eeufarateesa nammarindari maqa maaqa atinni amanasaa rakisinnimaqaani.

<sup>9</sup> Aadana maqa maaqaki mariasa karaambaiqa aninaqa mina oorinni kummarama fifaranoo.

Mina namuqaa faqa mina qafamasee maqasaa aqufifaranoo.

<sup>10</sup> Sipeena maqannaa karaambaiqauqa faqa kaqikaa afuma kiaqa maria karaambaiqausa faqa amiqira ainaina mara maree Isaraee maqannaasa karaambaiqa mini amifaranoo.

Seebaa faqa Sibaa maqannaa karaambaiqauqa faqa amifaranoo.

<sup>11</sup> Aiqama maqannaa karaambaiqauqa maasa uriqarara fee qimasee mina oorinni niqoori saunu areefaranoo.

Aiqama maqannaasa mina ainainira faiqikamma fifaranoo.

<sup>12</sup> Mifa kudi fasiqauqa nammeera qiafanoo iriseenoo dadaaqidanoo.

Kudiki mariasa faqa dadaaqirana siaisa faqa misauqa aiqama dadaaqianoo.

<sup>13</sup> Mifa kudiuqa faqa ainainirana sia amanaiki marifaqa ummooquki mariasara faqa qimudao qimasee dadaaqi marifa mariannoo, sarau imariasa nimana faqa kuqiranakinaana maree marifa mariannoo.

<sup>14</sup> Mi karaambaiqafa mi kudi fasiqausa faqa ummooquki maria fasiqausa faqa kuqa narirari maria fasiqausa nisaukukinaana mara kaqinni quqannisaannoo.

Mifa misara uriqarara ainainee qimasee miqidanoo.

<sup>15</sup> Mi karaambaiqafa kisaagasaa mariani.

Seebaa maqannaasa nariqa koora mi karaambaiqana amiaqanani.

Aiqamausa maqee maqee Anutufa mi karaambaiqana dadaaqiani feera innaaru qimamaqaaqanani.

Aiqama faasaana Anutufa mina amiqimma amaqaani.

<sup>16</sup> Mi karaambaiqafa marinna kamuqoo mi maqa maaqanaki sakuma faqa uita faqa moomoo rairaa inoo mariani, kaqikaa amuaqu namuqasaa faqa narana kai itita fuani.

Mina qaqama fannoo Reebanonna maqa maaqakinaa saqari aanna reenoo moomoo qaqama ireenoo rairaaiani.

Mi maqusausa kiaqa faiqi qumbiaqa mariaqa.

Mi sakummana qaqama faqa uita qaqama faqa andandara foora sia kasoo mariani.

<sup>17</sup> Mi karaambaiqana auquara naaru naaru sia aunuaqa.

Mina uriqararafa aiqama kari suani afuara foora uridaa kai mariani.

Aiqama maqannaasa mi karambaiqana amiqa amiqimma amaqoonandee inana maasa faqa amiqi amiqimma qimaqaannee qimasaidaqa qifaranoo.

<sup>18</sup> Isaraee maqannaasa Anutufa moo auqu Yaaweefa, mina amooqima-maqaaqa.

Mifa nariara maa idaaqira ainainausa auqee marifa maridanoo.

<sup>19</sup> Mina areenara auqu naaru naaru amooqiaqa.

Maa maqa maaqanakina aiqamai mina qareenarafa qumbiqanoo mariani. Kuqaa uqanna.

<sup>20</sup> Qini Dafidisa Yeeseena amaaku marinausa doo qini innaaru qirafa taikkeenoo.

### **Mina Anaqiannaa Papiqa (Book 3)**



*Anutuna andeeqannimaqarafa.*

- <sup>1</sup> Oo kuqaa Anutufa Isaraee maqannaasa amiqi amiqi marifa maridanoo. Anukara nimuqusa faqaasa amiqi amiqimma nimaqaannoo.
- <sup>2-3</sup> Manda oosana maree mariasa aiqama ainaina amiqifaqa nári nimoo naamoo qiafaqa qinee qafaunanoo qirana qaiifaqa Yaaweenana min-nisaaqaa unanoo Yaaweenaki mapukiqa marunafa taikaaqaammidanoo.
- <sup>4</sup> Miqi mariasa sia nidafrana maridaqa. Misa nifaaqa afeeka marifaqa sia dinee teeroo maridaqa. Amiqirausa maridaqa.
- <sup>5</sup> Misa sia akaqausa naanna raidaqa, sia ummaara oosana oosana faisa maridaqa.
- <sup>6</sup> Misa noori uqeerasee ramooramaairafa misa ninukakinaa kukukakanara foora maridanoo. Faiqi narirana misa qamunnara foora nári nifaaqai afisuaqee maridaqa.
- <sup>7</sup> Misa nimuqusa kiqari oosana oosana manda oosana kambiqaidanoo. Misa iriranaki oosana oosana manda ainainara oonu auqee ani auqee idanoo.
- <sup>8</sup> Misa akaqausara naanaidara qidaqa mandainainara ufa qidaqa. Misa nári nimoo naamoo qidaqa akaqausa uriqaramafi rakisi nimaqaanau-ree qimasee tipundaaridaqa.
- <sup>9</sup> Misa innaarunai mari Anutuna manda ufa qimamaqaidafa. Misa nári ufamau fuaqera aanoommasee maqasaa fasiqauqa qimannimidaqa.
- <sup>10</sup> Minara Anutuna faiqi anaasee misiannai quandafiqa aqaidafa misa ufara anoonee qidaqa.
- <sup>11</sup> Mi manda oosanna maree mariasa maaqi qimasee unnaqidaqa. Anutufa maasa oosana sia iriannoo. Uriqarara Anutufa sia manda oosana paquriannoo fee qidaqa.
- <sup>12</sup> Doo qafaa. Mi manda oosanna maree mariasa oosana miqimminoo maridanoo. Misa maaqimmiqa maridaqa misa moomoo ainaina faqaasa maridaqa aiqama kari moo faqa moo faqa mara usidaqa.
- <sup>13</sup> Qinee misa nindafamaseeqa maaqi qimasee manda irirana qiqa. Fifau qinee andeeqaidee qidaqa. Qinee fifau aaqara oosanara qeerairi marunausee qidaqa.
- <sup>14</sup> Oo Anutu anee faasaambaasaana qini aupurarana qimimariananoo. Aiqaama kananaana kananaana ummaara kai daridanoo.
- <sup>15</sup> Qinee mi manda aaqara ufana qidaqau ani Anutuna faiqi anaasee naanna sia raunaiqini.
- <sup>16</sup> Qinee mi oosana oosana marirana oosanara irianeera oonu mafi irunanoo kadaapi daridanoo.
- <sup>17</sup> Miqiqa maridaqa ani Anutuna amaana maqaki keeqafifaqa mi manda oosanausa maree mariasa nifaaqai kambiqaaninna ainainara iriqa.
- <sup>18</sup> Oo Anutu, anee mi manda oosanna maree mariasa mareeqee farindara maqasaara foora quqeenaranoo. Anee qinaqa misa mareeqee kuridiranaki aqifaranoo.
- <sup>19</sup> Misa tautummaki mandainainaki kuridiranaki aqufidaqa. Miqi mariasa manda kuqiranaki ooqu fidaqa.
- <sup>20</sup> Aaqee mariasa qainammasee findifinana qaunuannandee inoo misa marirafa kai kaqi taikaanoo.

- Oo Yaawee aneenna mariannaqooqari findifuañaqa misa mina qafamasee miqooqari doo sia siammafia.
- 21 Qinee manda oosana maree mariasa moomoo qumiasanara irunanoo qini irirafa suka qaifanoo qini qimuqusa mandaikinoo.
- 22 Qinee kaasau aandaure foora ani afusaa irirana siaisa furufariraua maridaqa.
- 23 Miqiqqa maridaqa ani aaqa aiqama kari marunana, anee qini qisauku uqannai qisauku qumaree qisaadaku imarianafa mariananoo.
- 24 Anee aneenna aamuqira ufannai qini daamua qimaseenana qini itita qisammaree munusee kasooqee innaarunai qifiqa quqaseenana uriqarara duqu qimisainaqa ani faqa marianaure.
- 25 Yafee moo fannoo innaarunai qini qiqaondi maridanoo fee, sia moo fannoo maridanoo, anee kai.
- Qinee ani Yaaweena maraafannaqooqari nannee moo maa maqa maqaanasaaqaraa ainainara didiannoo fee.
- Aniara didirafa aiqama minauqa uriaaqaranoo maridanoo.
- 26 Qini irirana faqa qini qifaaqa faqa ummooquki marifanoo Anutufa qini afeeka maridanoo.
- Mifa qini faqa marifaqa qinee aiqama kari amanaikidaqa.
- 27 Ani nimeesa uqusee kaqinni fimariasa anee mandaikamma nimaqeen-naranoo.
- Ani ufaki sia mapukusee kisaqaasaa mariasa anee misa aiqama kuridi nimaqeenaranoo.
- 28 Qinee sia miqidaqa, Anutuna aaqa mariranara qinee kaaqa amiqira fee qidaqa.
- Qinee uriqarara Yaaweena mara qeeqa afeeka kukeeqara maqusaikam-miqa. Anee auqonna ainainara aiqama kooroommasee qimannimi-anura.

## 74

*Anutufa Isaraee maqannaasa manda ainainakinaana dadaaqiani fee in-naaru.*

- 1 Oo Anutu, anee nanaree maasa maaqi uqanna masee minniqisaidanee. Anee kisaqaasafee aneenna faiqi aanaaseera aanooqinnaree.
- 2 Oo Anutu, anee ooqai Isaraee maqannaasa rusandeesammasee maroonasara, misara amiqi mandee oonumafi iria.
- Anee maasa feefaurummasee aneenna maqannaasaika maqoona marianara oonumafi iria.
- Sioona aqaanasaa anee marunafa mariananoo, minara faqa oonumafi iria.
- 3 Anee mai aniree Yeerusaree maqusa rapeepaa iranauqa qafaa.
- Maasa namuqaauqa ani amaana maqa faqa rapeepaammasee.
- 4 Namuqaauqa aniree kaasau fainiara foora faaqa ridaqa aiqama ainaina auku usidaqa.
- Misa ani biraka raipagu quqasee nariqa biraka uqera quqasee nariara uriqararausee qirana kooroo ianifeera miqiqu.
- 5 Namuqaa ani Anutuna amaana maqaki anireeqa nandakinaa saqari ateekeera foora ani amaana maqa ateekaateekamma quqasee.
- 6 Misa saasuna qamma firaana faqa mara mareeqa ani amaana maqaki keeqafifaqa aiqama amiqira akara mari saqarisa ateekaa teekamma aquseeqa.
- 7 Misa ani naaquqara amaana maqa ida arasaafanoo aiqama qama taikeno.

Misa ani Anutuna innaaru qimamaqee mariana faqa, rapeemmasaafanoo mandaika mafinoo.

<sup>8</sup> Mi manda fasiqausa nariqa maaqi qimasee qimiriqa qiqau.

Doo maasa misa amiqiuqanna masee radamusaanaura.

Aiqama maqusa maqusa Anutuna amooqi maria amaana maqusa misa idarasoofanoo gama taikanau.

<sup>9</sup> Maasa Yaaweenara daaqoo auqee mari ainainausa aiqama mandaikamma aqusaqau.

Tamummaqara fasiqauqa qima qimirusa faqa sia maridaqa aiqama taikafia.

Minara maasakiqari sia moo fannoo maa manda aukuanafa taikaaninnana iridanoo.

<sup>10</sup> Oo Anutu, kisaagasaa fee namuqaa aniara naanaidara qifaree.

Naaru naaru namuqaa ani auquara manda ufa kai fee qimarifaree.

<sup>11</sup> Oo Anutu, nanaree anee maasa dadaaqirara akooqaidanoo fee.

Nanaree aneenna asauku raqandaammasee maridane.

<sup>12</sup> Oo Anutu anee maasa ooqeenna karaambaiqa mariananoo.

Anee maa maqa maaqanaki maasa moomoo kari mandainainakinaana mareeqee amiqiraqoo quqaqisee marunafa mariananoo.

<sup>13</sup> Oo Anutu, anee aneenna afeekannai ooruku nammari qambaana rakee-unafa mariananoo.

Ooruku nammari mari firaa andauna akiqauqa anee rukaminau.

<sup>14</sup> Anee ooruka nammarikinaa firaa andau mina auqu Reefiatanee qimaruna mina aiqama akiqauqa rukamuseenana aadana maqa maaqaki maru andauna mina amaqi nimunaqa naqau.

<sup>15</sup> Anee qunanoo maqakinaa nammari faqa nammariuqa faqa quminau.

Anee aneenna afeekannai firaa nammariuqa aadanusunafa mariananoo.

<sup>16</sup> Asukuna faqa faasaana faqa auqunafa mariananoo.

Suani faqa quqoonafa faqa anee kai quqoonafa mariananoo.

<sup>17</sup> Oo Anutu anee maqa maaqaki aiqama oosiranauqa quqanau.

Aiqaiqa dumudumu qira aukuna faqa suara aukuna faqa anee kai auqu quqasoonafa maridanoo.

<sup>18</sup> Oo Yaawee namuqaa aniara uteeti naakada qimarianara iria.

Kisaagasaa furufari mariasa aniara fifau ainaina fee qimasee ani auqu aquraraidaqa.

<sup>19</sup> Oo Anutu, aneenna faiqi anaasee sia minninnisainaqa fitiqnarana nimiria namuqaasa maasa daruaqa.

Aneenna faiqi anaasee namuqaa nimimaria ummaaranaki kisaagasaa mariasara sia misara qaunua.

<sup>20</sup> Aneenna ooqai qima afeekaikunnanara minara maqee irisee maasa dadaaqia.

Maa maqa maaqanaki narari nararirafa aiqama amannaunai faqa asukuna arirannai faqa qumbiqanoo maridanoo.

<sup>21</sup> Oo Anutu anee ummaara ameemaanai mariasa dadaaqinaqa sia nisauriqa oofikiaqa.

Kudi fasiqa anaasee faqa sarau imariasaa faqa ani auqu amooqiaqa.

<sup>22</sup> Oo Anutu, findifinana aneenna auqusaa titaa.

Furufari maria fasiqausa faasaambaasaana ani oosanara uteeti naakada qidaqa.

<sup>23</sup> Sia anee aneenna namuqaa ani auquara fidiqaammasee faaqa fuisee qimarianara irisee qaunua, amiqimmasee iria.

Ani namuqaauqa aniara tutuqirafa kaqikai fida marinara sia qaunua, amiqimmasee iriaa.

## 75

### *Anutuna raina nimaqarafa.*

- <sup>1</sup> Oo Anutu, maasa aniara dufi dufi qidaqa ani auqu uqeeraidaqa. Maasa anee uriqararafa mariannanara kooroommasee qimannimisee kaifaa anee naaquqara uriqarara ainaina auqoonnanara faqa aiqamausa qimannimidaqa.
- <sup>2</sup> Anutufa maaqi qidanoo. Qinee ufa irira faasaana utaaqamaqaunanoo maridanoo, qinee andeeqasee amana amana kai raina nimaqara oosanannoo raina nimaqaanaura.
- <sup>3</sup> Maa maqa maaqanakinaa aiqama ainaina rufieeqa naindiri raifanoo maqa faqa kasiqa qinee Anutusa kai mina oosana atukaramma qumaraananoo sia kaaqa mandaikiannoo.
- <sup>4</sup> Qinee manda oosana maree mariasa sia ramoo ramaa iaqeera qimannimidaqa.
- <sup>5</sup> Qinee maaqi qimasee qimannimidaqa. Innee sia inneeqa nuqu uqeeraseeqa qiniara sia fee qiaqa.
- <sup>6</sup> Raina nimaqara oosana fannoo sia suani oosanaindari fau sia suani keeqee marinnaindari fau sia dinni dinni ataaqeendari fau anidanoo fau. Sia moo fannoo suani dinni dinni ataaqeendari amana faiqi raina nimaqaannoo.
- <sup>7</sup> Anutufa kai faiqi rainee marifa maridanoo. Mifa kai moo mara maqasaa muqufi quqaidanoo, moo uqeerasaifanoo uriqaraidanoo.
- <sup>8</sup> Yaaweefa nari asaukuki nari aanooqira nammari taqu uaqee idanoo. Mi taqufa afeeka wainna mina aanooqirafa qumbiqanoo marina uaqee idanoo. Mifa mi nammarina adiasaifaqa aiqama manda oosana maree mariasa namaseeqa mandainainaki maridaqa. Misa aiqama nama taikaidaqa, sia atiti taquki kaqi mariannoo.
- <sup>9</sup> Qinee Yakooboona Anutunara naaruara naaruara koorooiqa fuanaura. Qinee Yakooboona Anutunara idi raidaqa amooqianaura.
- <sup>10</sup> Mifa manda oosana maree mariasa afeeka aiqama rauda nimaqaannoo. Andeeqara oosana maree mariasa afeeka moo faqa moo faqa nimiannoo.

## 76

### *Anutufa rakirana uriqaree marifa maridanoo.*

- <sup>1</sup> Yuda maqannaasa Anutuna auquara iridaqa, Isaraee maqa maaqakina mariasa mina auqu uqeeraidaqa.
- <sup>2</sup> Anutuna uiqaana maqa Yeerusaree maqusaki maridanoo. Mifa Sioona aaqanasaa maridanoo.
- <sup>3</sup> Miqoo Yeerusaree maqusaki Anutufa namuqaa duru feefa saqari raudaandamma aqinau. Mifa saqari faqa saamu faqa oosana oosana rakira ainaina faqa aiqama itairaatairamma aqinau.
- <sup>4</sup> Oo Anutu, anee firaqqoo qareenarafa mariananoo. Anee aaqanasaa aneenna namuqaa rafaqaafuseenana aneenna uriqarara rupannoo irana namu faqa oorurandee qumuananoo.

- 5 Oo Anutu, anee ufa qunaqa sundiauga nimudaanai qimarusa doo kuquf-  
uفاa akaqausa misa aiqama ainaina raipagu maraqau.  
Misa aiqama doo saara faiqaidaqa sia kafaa findi fifara.  
Misa aiqamausa rakira afeeka faqa akoofasaikirafa faqa sia nariqa dadaaq-  
uفاa kuqigau.
- 6 Oo Yakooboona Anutu, anee aanoo qianaqa rakira qoosauqa faqa  
qoosasaa ooqu marifi nimariasa faqa rakira afeeka taikafifaqa  
maqasaa aqufi kuqiga maridaqa.
- 7 Oo Anutu, aiqamausa aniara rufiee mariafa mariananoo.  
Anee aanooqinaqa sia amana moo fannoo ani afusaa kikiqiannoo.
- 8 Oo Yaawee, anee innaarunaindari andeeqa nimaqara ufa qunaqa  
maqasaa fasiqauqa rufiasee ufa sia qirai madoodoonnama fiqau.
- 9 Akaqausa uriqararanannai rafaafafu nimaqaafaqa aiqama maa  
maqanasaa anee misa dadaaqiraree qimasee findifi andeeqara  
ufa qunaqa aiqama irisee daimmafiqau.
- 10 Faiqi faiqi aanoo qirafa quandaki ani Yaaweena amooqirana moo faqa  
moo faqa amidanoo.  
Akaqausa mi rakiranaki sia kuqinausa ani ufa suqiranaki ani amooqifara-  
noo.
- 11 Innee inneeqa Anutuna Yaaweena amiraree qimasee qima afeekaika  
maqaa ainaina sia minnisaa, kuqaa mina amia.  
Adeedi maria anaamurusa innee faqa aqoondikira ainaina mina amiaqa.  
Anutufa qifaqa aiqama faiqi anaasee minara rufiidaqa.
- 12 Mifa nari nuqu uqeere maria uriqararawsa mara muqufi rafaafafi-  
danoo.  
Mifa maa maqanasaa maria uriqarara karaambaiqausa naindiri rarana  
nimidanoo.

## 77

### *Ummaara aukwana Anutuna dadaaqiranara innaaru qirafa.*

- 1 Qinee Anutunara dadaaqianne qimasee faaqa riqa.  
Qinee faaqa rimarunanoo mifa iridanoo.
- 2 Qinee ummaaraki maridaqa Yaaweenara innaaru qidaqa.  
Eendaki kisaagasaa qisauku uqeerasee innaaru qidaqa, sia daundura  
asooarana mareeqa.
- 3 Qinee Anutunara iridaqa aiaaee qidaqa.  
Qinee minara oonu mafi irunanoo qini daundura ummaara reenoo.
- 4 Eendaki Anutufa sia qini faiqarana qimifaqa qinee oonu mafi irunanoo  
ummaararafaqa sia qini ufa qirafa maridanoo.
- 5 Qinee ooqai mariaafannanara iridaqa, mi aukwana amiqimmasee mari-  
aafannanara oonu mafi iridaqa.
- 6 Eendaki qinee iriqaraasida maridaqa.  
Qinee maaqi qimasee oonu mafi iriranakiqari qeeqa iridaqa.
- 7 Anutufa naaruaree maasa minniqisaannoo fee.  
Sia fee kafaa naaruara mifa maasara aidiannoo fee.
- 8 Kuqaa fee maasara adirafa taikennoo fee.  
Mina maasara qima afeekaikirafa doo fee taikennoo fee.
- 9 Anutufa nari nifauaranara doo fee qaunuseenoo fee.  
Mina aanoo qirafee mina maasara amuqusirana amaaqa maqanoo mari-  
danoo fee.
- 10 Qinee mina iriseeqa maaqi qimiriqa.  
Maa ainainafa qini daundura ummaara qimidanoo,

Yaaweena afeeka doo taikanoo mariifoo qidaqa.

- <sup>11</sup> Anee firaa ainainauqa auqoonnara qinee oonu mafi irianaurea. Qinee mifa faiqí sia amana auqaaqaa ira ainaina auqoonara irianauree qidaqa.
- <sup>12</sup> Oo Anutu, qinee anee aiqama ainaina auqoonnara indee indee ianauranoo. Anee amudaanai qimasee auqoonnara qinee oonumafi irianaurea.
- <sup>13</sup> Oo Anutu, ani oosana fannoo kaaqa naaquqarafa andeeqarafa maridanoo. Unna anutusa sia maasa uriqarara Anutufara foora uriqaraqa maridaqa.
- <sup>14</sup> Oo Anutu, anee faiqí sia amana auqaaqaa ira ainaina auqunafa maridanoo. Anee aneenna afeeka aiqama maqannaasaki uqeera akooqoo kooroommasaanaqa qafeea.
- <sup>15</sup> Aneenna afeekannai aneenna aiku asauku ummaarakinaana maraananoo. Anee Yakooboosa Yooseefaasa nikeeku nikaaku maraananoo.
- <sup>16</sup> Oo Anutu, nammari fannoo ani qafamaseenoo rufiaseenoo, rakeeinoo. Ooruku nammari faruma meemai ooqu marifa faqa ani qafamasee aindirireenoo.
- <sup>17</sup> Oonnamu fannoo ani Anutunara rufiasee maqasaa aaku nammariara foora adianau. Innaarunai qirafa firaaqoo darara qufanoo aakuasaa fannoo idauruanda kai qifuki munu raqee mini raqee inoo.
- <sup>18</sup> Ufai namufaqa aaku namu faqa ifanoo ani Anutuna innaarunai qirafa minaki kambiqaiifaqa iriqa. Ani aakuasaa fannoo aiqama maqa maaqai kaaqa qamannimaqeenoo, maqa fannoo aindiri raifanoo kasinoo.
- <sup>19</sup> Anutu ani aana firaa nammari ameemaanai maridanoo. Ani aana firaa nammari ameemaanai marifana mi aatata fuaanaqa sia ani aiku amaaqa qafeeqa.
- <sup>20</sup> Mooseesa Aaroonasa rakisiraqanda maridaqa ani Anutuna faiqí anaasee sipsipasaa rakisirausara foora iqa nifiqee fiqau.

## 78

*Anutuna faqa narí faiqí aanaaseera faqa qidanoo.*

- <sup>1</sup> Oo qini maqannaasa, innee amiqimmasee qini ufa iriaqa. Amiqimmasee naaqoo quqasee qini ufa iriaqa.
- <sup>2</sup> Qinee quandara ufannai inni qimannimianaurea. Qinee ooqeennaasa ufa oonukeeqee anikeeqee qirana qimannimianaurea.
- <sup>3</sup> Maasa ooqai iriafanna ufana maasa qikausa qimaqimu ufana qimannimianaurea.
- <sup>4</sup> Yaaweefa amiqira ainaina auqoonara faqa mina afeeka faqa mina naaquqara ainaina auqoona faqa maasa faiqi namu naaru kambiqainausa faqa qimannimianaurea sia kukeeqaanaurea.
- <sup>5</sup> Yaaweefa narí sanda ufa narí faiqí anaasee Isaraee maqannaasa nimisee, Yakooboona aiku asauku narí aauqira ufa niminau. Miqimmaseenoo maasa qikeeku qikaaku afeekaikammaseenoo qimanniminoo qinau. Innee inneeqa faiqi namu sanda ufa qimannimiaqa.
- <sup>6</sup> Innee inneeqa faiqi namu qimannimifaqa misa inaaqiana kambiqainausa quandafi qimannimiaqa, kafaa misa miqi kai iqa nári ninaaqianna

- kambiɓainausa quandafi qimannimifaqa, misa aiqamausa qini sanda ufa iriaqa.
- 7 Miqinnanannai nári irirana Anutunasaa kai mundifaranoo, misa Anutufa auquqoo ainainnara sia qaunuaqeera mina sanda ufa kai afaqaqeera.
- 8 Miqidaqa sia nári nikausa naanna raaqeera.  
Misa nikausa ufa rukiasee ramoo ramaa imarusa mariqau.  
Sia misa nári irirana Anutunasaa mundiqau.  
Misa sia Anutuna ufaki mapukusee mariqau.
- 9 Miqimarunara Eefaraimmana akeeku akaaku duru feefa mareeqa raki-ranaki oonureeqa, fifau rufiasee oonurandee sandaqau.
- 10 Misa Anutuna moodaanaki kira ufamau sia andeeqasee fiqau.  
Mina sanda ufara nikooqoofaqa minnisee kaqi runna fimariqau.
- 11 Anutufa auqoo ainaina qaunuseeqa, mifa naaquqara ainaina uqannifiqoonara faqa qaunusaqau.
- 12 Misa nikaaku nikausa noorisaa faiqi sia amana auqaqaa ira ainaina uqannifiqanau,  
Isipa maqa maaqaki moo maqusa auqu Soona mi maqusanaki maru afaanasaa uqannifiqoonara faqa qaunusaqau.
- 13 Anutufa taatuqee ooruku nammari rakeemasee misa nifiqee aadasaa finau.  
Mifa nammari rakeemandoofanoo, dinni dinni aaganara foora inau.
- 14 Faasaanasaa mifa asurukiqari misa nifiqee finau.  
Eendaki ida fannoo kaaqa qamannimaqee marufaqa fiqau.
- 15 Misa nammari siaisaqa fimarufanoo Anutufa ooni afoommandeenoo nammari farumakinaanara foora moomoo nimufaqa naqau.
- 16 Anutufa oonikiqari nammariara oqufuannee qufanoo nammari quminau, firaa nammari anoonara foora quminau.
- 17 Misa sia minara irirai kaqi kai aqara oosana Anutuna afusaa maree mariqau.  
Misa aadana maqa maaqaki fidaqa uriqarara Anutuna afusaa ititammasee nári iriranamau mandainainaki kaqi fimariqau.
- 18 Misa Anutuna amanamasee qafaanee qimasee nariqa nidimari naranara innaaru qimariqau.
- 19 Sia mina kai, misa Anutunara firaaqoo amanammasee qafaidee qimasee maaqi qiqau.  
Amanee maa aadana maqa maaqanaki Anutufa narana qimiannoo fee.
- 20 Kuqaa Anutufa ooni arufanoo nammari firaaqa quminau.  
Mi nammari firaa nammariara foora quminau.  
Kafaa amanee mifa narana faqa aanda faqa maasa narí maqannaasa qimiannoofee.
- 21 Yaaweefa misa ufa iriseenoo firaaqoo aanoo qinau.  
Aanooqidanoo ida radiqisoofanoo Yakooboona faiqi namu narinau.  
Mina aanooqirafa firaaqanau.
- 22 Misa Anutunasaa sia nári irirana rusiqau.  
Misa Anutunara sia amana mandainainakinaana maasa asumu maraannoo fee qiqau.
- 23 Mifa sia minara irinau kaqi qasuru qimamufanoo innaruna kooqi atuanau.
- 24 Atuaseenoo mannaa feemu innaarunaindaraa narana sakuma fooqaana aakuara foora teeqimasoo faqa naqau.
- 25 Mikari Anutufa angiroouqa neemaru naranna nimufaqa naqau.

Anutufa misa sia amana nama taikaaqaaira narana nimirau.

<sup>26</sup> Anutufa narí afeekannai qufanoo suani afu oosanaindari faqa dinni ataaqendari faqa ufai uqinau.

<sup>27</sup> Mifa ufiniuqa kookoommara foora misa teeqimma nimirau.

Ooruku nammari afaiqaraa nukudara foora ufini misa nimirau.

<sup>28</sup> Anutufa qufanoo ufiniuqa misa uiqaana maqusa qambaana faqa naam-beeqaqaara faqa teeqi teequfaqa naqau.

<sup>29</sup> Teeqi teeqimmasoofaqa marasee noofanoo moomoo uqanna kaqi marinau.

Misa faaqa rimarufanoo Anutufa moomoo uqanna nimufaqa misa nama-soofanoo nimuaqu inau.

<sup>30-31</sup> Mi ufini naranausa neemarufanoo sia nimuaqu inau, kaqi naida marufanoo Anutuna arana qoofanoo misa afeeka fasiqauqa kuqa narinau.

Mifa Isaraee maqannaa amiqira kumaaraauqa narinau.

<sup>32</sup> Misa mi aiqama ainaina tianaki Anutuna afeeka qafamasee sia mina saqari kiqau,

kaqi aaqaranaki fimariqau. Misa Anutufa sia faiqí auqaaqaa ira naaquqara ainaina

auqoonara irisee sia misa irirana Anutunasaa rusimariqau.

<sup>33</sup> Mina akiiqara misa maa maqanasaa marirana naidoora foora fuaqa-soofaqa kai kaqi taikaqau.

Misa mandaikamma nimaqasoofaqa kuqirafa tautummasee misa qumaroofaqa kuqiqau.

<sup>34</sup> Anutufa misa kuqa narufaqa kaqi marusa misa quandaki Anutufinnai ubeekaqau.

Mifa misa kuqa narufaqa kaqi marusa noori runusee mifunnai ubeekamafi innaaru qimariqau.

<sup>35</sup> Anutufa misa kuqa narufaqa nári oonu mafi iriseeqa, kuqaa Anutufa maasa ititaqimaqee mari fee qiqau.

Uriqarara Anutufa maasa mandainainakinaana feefaurummasee dadaaqi marifammifoo qimariqau.

<sup>36</sup> Misa sia nimuqusa ookiqarifau miqi qiqau.

Misa fifau nookiqari kai Anutuna amiqi amiqidaqa miqi qimariqau.

Misa nári nifaurunnai unnufa kai qimariqau.

<sup>37</sup> Misa sia kuqaa uqanna Anutuna ufa afaqee marinau.

Misa sia Anutuna faqa moodaanaki kammaqoo ufanasaa mapukusee mariqau.

<sup>38</sup> Anutufa misa manda oosana qafamaseenoo, mina amuqusirafa qumbiqanoo marunara misa manda oosana akiiqara minnisanau, sia narinau.

Moomoo kari narí aanooqirana rafaafuseenoo sia narí aanooqirana aiqama uqeeranau.

<sup>39</sup> Mifa misara faiqí faiqi kai fee qimaseenoo irinau, misara kaqikaa ufai fuaqaifaqa kai kaqi taikee mariasee qinau.

<sup>40</sup> Misa aadana maqa maaqaki naqumma kari fee naakapara ufara nikooqoofaqa aanooqimariqau, moomoo kari miqimariqau.

Naqumma kari Anutuna amuqusa mandaikirana amimariqau fee. Moomoo kari miqimariqau.

<sup>41</sup> Misa moomoo kari Anutuna amanammasee qafaqau.

Misa Isaraee maqannaa naaquqara andeeqara Anutuna amuqusa mandaikirana kaifaa kaifaa amimariqau.



- 42 Misa Anutuna afeekara qauniqau.  
Mifa misa firaa ummaara ameemaanai mariuna kinaana maroonara faqa qauniqau.
- 43 Anutufa Isipa maqa maaqaki narí oosana uqannifiqoofaqa qafaqau.  
Moo maqusa auqu Sooana mi maqusanaki maru afaasanasaa faqa narí oosana uqannifiqoofaqa qafaqau.
- 44 Anutufa qufanoo nammari uqanna fannoo quandaki fidikaikinau.  
Miqimmafufaqa Isipa maqannaasa nammari naranara randoosia minnisaqau.
- 45 Mifa qufanoo faufaari oosana oosana kambiqafufaqa Isipa maqannaasa ukaqa nimidaqa aupurarana nimimariqau.  
Mifa eeqamoosara qufaqa anireeqa misa maqa maaqa mandaikamma nimaqau.
- 46 Anutufa qufanoo pandaaga moomoo aniree misa ainaina aiqama nama taikaqau.  
Mifa qufanoo misa kadaapi rirafa aammaadi oo aamarai kaimbinau.
- 47 Anutufa qufanoo pupusamu aqufinoo misa waina sanda afuqakinaana ariisoofanoo aiqama aadana usu taikanau.  
Firaa suara namu faqa pupusamu namu faqa aninoo misa saqari qaqaama neemaruna faafisa fooqaa irana aiqama mandaikammasanau.
- 48 Mifa qufanoo misa burimakau aina pupusamu aqufinoo aiqama narinau.  
Kafaa aakuasaa fannoo aiqama firimaru aandausa oosana oosana narinau.
- 49 Anutufa narí aanoo qirana faqa narí kaukaata qirana faqa narí aranaqaranara faqa faiqí nári maru qangiroosa faqa idara foora niqiqoofaqa qumuree Isipa maqannaasa nariqau.
- 50 Mifa narí aanoo qirana sia rafaaga finau.  
Misa nimana kuqiranaki firarufanoo sia rafaaga finau.  
Mifa Isipa maqannaasa manda auriranaki quqasoofaqa kuqi mariqau.
- 51 Mi angiroofa Isipa maqanna ooga faiqiuqa aiqama naru raurukanau.
- 52 Anutufa narí maqanna Isaraee maqannaasa sipsipara foora nifiqee finau.  
Mifa sipsipara foora aadana maqa maaqaki misa andeeqasee indaarunnikamma nimaqanau.
- 53 Anutufa amiqimmasee rakisi nimaqee marufaqa sia narira ainainara rufiaqau.  
Taatuqee nammari fannoo misa namuqaa aiqama dukuninau.
- 54 Anutufa misa nifiqamaree Kannaa maqa maaqai narí naaquqara maqa maaqai nifiqee oonuranau.  
Narí afeekannai maroo aaqannasaa quqannisanau.
- 55 Mi maqa maaqanakinaa aanaamuru damunamma aquseeqa maqa maaqa oosuseeqa Isaraee maqanna faiqí oosana faiqí oosana rainannimufaqa maqa maaqa marasee nariqa maqasaa ooqu mariqau.
- 56 Misa mi aiqama ainainna qafamaseeqa quandakiqa uriqarara Anutunara amanammasee qafaqau.  
Misa sia mina naamuaqira ufa afaqaqau.
- 57 Misa quandaki nári ninaakusa naanna raida ufa rukiee mariqau.  
Misa eendaandira feefaraa foora aqusoofanoo fuadakamaki kaqinni fi-mariqau.
- 58 Isaraee maqannaasa unnaqira anutusa tatufirana suqa nimidaqa minannai Anutuna uqanna arana fundakiqau.  
Náriqa tumunnai auqira unna anutunannai mina arana qarana amiqau.

- 59 Anutufa misa oosana qafamasee misa aanoomma nimaqasee misa miniseenoo ameesa uqunnisanau.
- 60 Rakeemmeeqee aquseenoo Anutufa narí naaquqara uiqaana maaqa Siroo maqusaki maruna faqa minnisanau.  
Narí maasa qambaana mariu maqana minnisanau.
- 61 Mifa narí qima afeekaikira bookisa narí afeeka maruna namuqaa nisaukuki quqasoofaqa maree fiqau.  
Mifa narí bookisa narí afeeka areenarafa maruna mareeqeenoo namuqaa nisaukuki quqasoofaqa maree fiqau.
- 62 Mifa narí maqannasa Isaraee maqannaasa aanoomannimaqaseenoo misa namuqaara qufaqa akaqausa kuqa nariqau.
- 63 Misa kumaaraauqa rakiranaki kuqufufaqa maanaaqauqa marara fasiqa sia mariqau.
- 64 Misa amaana maqasaa anaikirausa duru saamu ookina keeqafufaqa misa ninaaqmaaka rakirafa kaqi kai marufaqa náriara faqa rufiasee sia iki raqee mariqau.
- 65 Miqooqari Yaaweefa faiqaranakiara foora tautuma findifinau.  
Mifa afeeka fasiqa wainna nammari namasee afeeka marasee findi fuandee inau.
- 66 Findifinoo narí namuqaauqa narunifaqaaqa masoofaqa fiqau.  
Anutufa naru nifaqasoofaqa naaru marira nisaurirana marasee sia kafia rakiqau.
- 67 Yaaweefa Yooseefaana narí amaaku Eefaraimmana faqa misa nikeeku nikaaku sia rusandeesamummasee maranau.
- 68 Yudana akeeku akaaku rusandeesamummasee maranau.  
Anutufa misa maqa maaqaki maru aaqanna misa auqu faqaa aaqanna Sioona aaqana narí aidi maru aaqanna faqa maranau.
- 69 Miqoo Sioona aaqanasaa Yaaweefa narí innaarunai maru naaquqara amaana maqana fooqaairana usakanau.  
Maa maqanara foora naaruara mapukusee marira maaqa usakanau.
- 70 Anutufa narí ainainira faiqi Dafidina rusandeesamummasee maranau.  
Mifa sipsipasaa rakisi marunakinaana maranau.
- 71 Anutufa Dafidina sipsipasaa rakisi marunakinaana mareeqeenoo Isaraee maqannaasa karaambaiqaika masanau.  
Anutu faiqi aanaaseesa sipsipara foora faqa rakisianifeera mara quqanau.
- 72 Miqooqari Dafidifa narí andeeqara iriranannai faqa narí akoofasaiki-ranannai Isaraee maqannaasa sipsipara foora indaarunnikamma nimaqanau.

## 79

*Anutufa Isaraee maqannaasa manda ainainakinaana dadaaqiani fee innaaru.*

- <sup>1</sup> Oo Anutu, aamina maqannaa aniara sia iri mariasa maasa maqa maaqaki doo aniree maasa ani faiqi anaasee faqa rakidaqa.  
Misa ani naaquqara amaana maqa putaammamaqeea. Yeerusaree maqusa rapeepaammasee.
- <sup>2</sup> Misa ani aiku asauku aiqama narusee quqasoofaqa ufiniuqa aniree misa iri naqau.  
Kaasau aandau faqa ani maqannaasa naru quqasoosa nipata naqau.
- <sup>3</sup> Misa fidika Yeerusaree maqusamau nammariara foora umbiqanau.  
Misa nikundara fasiqa sia mariqau.

- 4 Maasa daaqa mariasa faqa maasa fiqumma mariasa faqa mina qafamasee maasara ataasataasa qimaseeqa naanaidara qidaqa.
- 5 Oo Yaawee, ani aanoo qirafa naaruaree mariannoo fee.  
Ani rairai qirafa naaru naaru idara fooree qaannoo fee.
- 6 Oo Yaawee, aneenna aanoo qirana aamina maqannaasa, sia ani auqu amooqi mariasasaa teeqia.  
Akaqa maqannaasa sia aniara innaaru qimariasa misasaa teeqiaqaana.
- 7 Misauqa maasa ani faiqi anaasee kuqa daridaqa.  
Misa ani maqa maaqa furufaridaqa.
- 8 Oo Yaawee, sia maasa qikeeku qikaaku aaqarana akiiqara maasa aupurarana qimia.  
Aneenna nifauara reendeeniranannoo kai kaqi maasa dadaaqa.  
Maasa oonumafi irirafa oorudupinoo marinara maasa dadaaqa.
- 9 Oo Anutu maasa asumu maree marianafa anee aneenna auqu qareenara-nara irisee maasa aaqarana akiiqara minniqisainaqa maasa ani amooqianaura.
- 10 Nanaree akaqa maqanaasa maasara yaiffee inni Anutufa maridanoo fee qifoora.  
Aneenna aiku asauku fidika akiiqara qimasee maasa qifusaa aupurarana niminaqa maasa qafaa.  
Misa ani ainainira faiqiuqa naruana akiiqara miqia.
- 11 Oo Yaawee, maasa qiku qisauku namuqaa rumberanaki mariasa faaqari mariana iria.  
Namuqaa naruaneera ifana anee aneenna afeeka asaukunnai misa ititan-nimaqasee mara asumu mariranaki quqannisaa.
- 12 Oo Yaawee maasa daaqa mariasa ani manda ufa ami mariasa anee mina akiiqara dinni taikasee dinni ani qaaraqanda marasee kari misa nimia.
- 13 Anee miqimmasainaqa maasa ani faiqi namu, ani sipsipara foora aniara naaru naaru dufi dufi qianaura.  
Naaru kambiqainausa faqa ani amooqirana amifaranoo.

## 80

### *Isaraee maqannaasa kaifaa sooqbaandumma moodaaqoo uqara innaaru.*

- 1 Oo Yaawee, anee Isaraee maqannaasa sipsipasaa rakisirafara foora mariananara maasa ufa iria.  
Anee maasa sipsipara foora rakisi marianafa mariannanara maasa ufa iria.  
Anee angiroouqa niqoosa faqaasa mariaqoo seerubimma mariaqoo miqoo anee Yaaweefa ooqu marifi marianafa mariannanara anee maasa ufa iria.
- 2 Eefaraimmana akeeku akaaku faqa Beensaminnana akeeku akaaku faqa Mannaseena akeeku akaaku faqa nifusaa koorooia.  
Aneenna afeekannai findi finana mai aniree maasa ummaarakii marunnana uqeeraqisaa.
- 3 Oo Anutu, anee kafaa maasa uqeera quqaqisaa.  
Anee maasara qimudao qinaqa maasa kaqi asumu marianaura.
- 4 Oo Yaawee, aiqama afeeka faqaa Anutufa, anee kisaqasaa fee aneenna faiqi anaasee innaaru qiranara aanoo qinnaree.
- 5 Anee maasa naukunu kai naranara foora nimianaqa neeqa.  
Anee naukunu qumbiqanoo mari difaanina qimianaqa nammariara maqi neeqa.

<sup>6</sup> Anee qianaqa maasa daaqa mariasa faqa maasa maqasaara tinoo taanoo ridaqa.

Maasa namuqaa maasa qiqafeeqa atasataasa qima qimaqaidanoo.

<sup>7</sup> Oo Anutu anee kafa maasa uqeera quqaqisaa.

Anee maasara qimudao qinaqa maasa kaqi asumu mariana.

<sup>8</sup> Oo Anutu, anee maasa Isaraee maqannaasa wainna sandara foora Isipa maqa maaqakinaana maasa asumuanara mamaree anireenana maaqoo aiqama maqannaasa futeeqa aqusee misa maqasaa ummaqoonausa maridaqa.

<sup>9</sup> Anee saikammasee miqoo ummaqusoona mariifanoo kambiqafinoo maa maqa maaqana amanaikinoo.

Mina atuka fannoo maqaki meemai uqanna keeqeenoo.

<sup>10</sup> Mi sandafa firaanaikufanoo amuaqu namuqa faqa mina auqaanai mariqau.

Firaa sidaa saqariuqa faqa mi sandana auqaanai kai mariqau.

<sup>11</sup> Mi sandana dinni asaana fannoo firaa ooruku nammari mediteereenia afainni ooqu finau.

Dinni asaana fannoo firaa nammari Eufarateesa nammari afainni amana kai finau.

<sup>12</sup> Oo Anutu, anee nanaree mina ququsa rakeemmasaanaqee aatata fiqaree aiqaree inausa mina qaqaama tiqinfaree.

<sup>13</sup> Kaasau kuara fannoo nandakiqari aniree mi sandana nikunnai radamuseea.

Kaasau aandau faqa aniree mina naidaqa.

<sup>14</sup> Oo aiqama afeeka faqaa Anutufa, anee maasa iannannai quanda.

Innaarunaindari maasa qiqafaa. Ani wainna sanda marunausa qiqafamasee dadaaqa.

<sup>15</sup> Anee qummaqoonna afuqana qumuree qafaa.

Ani wainna sanda anooka aneennara ummaqoonaafa afeekaikinoo maridanoo, qumu qafamasee dadaaqa.

<sup>16</sup> Maasa namuqaa maasa Isaraee maqannaasa ani wainna sanda asaanara foora mariafaqa ateekeese idara saafanoo doo qamafinoo.

Anutu anee aanoo qimasee misa kuridi nimaqaa.

<sup>17</sup> Anee rusandeesamummasee maraqoonausa aneenna asaukunnai misa ititannimaqaa.

*Isaraee maqannaasa anee afeeka nimisoonaaqaa namuqaa mandaikamma nimaqasoona anee kaifaa uqeerasee afeekaikamma nimaqaa.*

<sup>18</sup> Miqimmandaina sia maasa anikiqari quandaki kaqinni sandaauranoo. Anee marirana qiminaqa maasa kafa findifi ani auqu ramasee ani amooqiana.

<sup>19</sup> Oo Yaawee aiqama afeeka faqaa Anutufa, anee kafa maasa qifiqee aneenna iannannai ania.

Anee maasara qimudao qinaqa maasa sia kuqua kaqi asumu maria.

## 81

*Asasira qoomaqa sakasee nara idi.*

<sup>1</sup> Anutufa maasa dadaaqa marifa marinara faaqa rumasee asasida idi rama amaqaqa.

Yakooboona Anutuna amooqira idi raaqa.

<sup>2</sup> Idi oosana arasee, temberinna namu faqa piripuna namu faqa ufireena namu faqa marasee aridaqa asasira idi raaqa.

- <sup>3</sup> Fuka quqoona anirainaqa sipsipa aanainnoo ufireena fuaqaaqa. Kafaa mi quqoonafa rufatee fatinaqa oomaqa sakasee naida ukeena fuaqaaqa.
- <sup>4</sup> Mi qoomaqa sakarafa Isaraee maqannaasa sanda ufara fooraa marinaqa aukuana aukuana naaru naaru miqifaranoo. Yakooboona Anutufa maasa qimu sanda ufafa maridanoo.
- <sup>5</sup> Anutufa Isipa maqannaasa naruseenoo mi sandufana Isaraee maqannaasa niminau. Qinee sia qafeemarunna fasiqana aunda irida.
- <sup>6</sup> Mifa maaqi qimasee qimanniminau. Qinee inni Isaraee maqannaasa nikumaaqa firaa ummaara akunni-maqaqoona afaimееее quqeeqa. Qinee inniara qunaqa inneeqa ummaara maqasaa afaimma quqaafanoo.
- <sup>7</sup> Innee manda aupuraranaki maridaqa qini Anutusa daaroofaqa qinee minakinaana inni mareegee kaqinni quqannisa qiafana. Qinee qeeqa kukeeqara maqusa oonnamukiqari inni dadaaiqiafana. Innee Meeribaa nammari maruqoo marufaqa qinee inni nimanammasee qafaqiafana. (Meeribaa mi nammarina auqu oosana tinoo taanoo rira nammari fee qinau.)
- <sup>8</sup> Oo qini maqannaasa qinee inni aauqira ufa qimannimianaqa iriaqa. Oo Isaraee maqannaasa innee qini aauqira ufa iriaqa.
- <sup>9</sup> Innee sia moo unna anutuna amooqiaqa. Qini kai qimooqiaqa.
- <sup>10</sup> Qinee Yaaweesa inni Anutusa maridaqa. Qinee inni Isipa maqa maaqaindaraana nifiqee aniafanausa maridaqa. Innee minara iriseeqa qinee unnannai kai noo raqasaifaqa qinee kai inni narana nimianaara.
- <sup>11</sup> Qinee mi ufana amiqimasee qeeqa maqannaasa qimannimiafanaqa sia mi ufana iriqau. Isaraee maqannaasa sia qini Anutusa ufamau fiqau.
- <sup>12</sup> Qinee misa mumuqira oosana qafamaseeqa misa rafuseegee nári nidi-maru mandoosanaki aqiafana. Doo miqooqari misa nári nidimaru manda iriranamau fiqau.
- <sup>13</sup> Oo qini maqannaasa naqaa qini ufa iriaqaana. Isaraee maqannaasa qini aatata fuaqaana.
- <sup>14</sup> Misa miqifaqau qinee kai kaqi misa namuqaa rafaafufusani. Misa qini ufa irifaqau misa namuqaauqa narini.
- <sup>15</sup> Isaraee maqannaasa qini ufa irifaqau qini Yaaweesara fidaqaa imariasa qini doorinni firaaqoo rufaidaqa niqoori saunu araaqini. Miqoo misa narirafa naaruara mariqini.
- <sup>16</sup> Innee Isaraee maqannaasa qini Anutusa ufa amiqimmasee irifaqau qinee amiqira narana sakumma ainaina nimunaiqini. Innee qini ufamau fifaqau qinee oonikinaana ookasaasa anoona adiafaa imarina nimunaiqini.

## 82

### *Anutufa uriqarara rakisirafa.*

- <sup>1</sup> Anutufa innaarunai suqiranaki uriqaranoo maridanoo misa ufa andee-qannimaqaidanoo. Oosana oosana rakisirausa suqiranaki Anutufa narí irirana misa qiman-nimidanoo.

- <sup>2</sup> Innee Isaraee maqannaasa manda rakisirausa innee manda koota ma-saida sia amiqimmasee ufa raineeta maria oosanna miqoo taikaaqa. Innee sia manda oosana mareeta mariasa manda oosana auqaaqeerata fadameena akuaqa, miqi mariana taikaaqa.
- <sup>3</sup> Innee sarau imariasa faqa faiqi faiqi faqa ititannimaqaaqa. Sarau imariasa faqa aupuraranaki mariasa faqa misa amiqimmaseeta mari-aqeerata dadaaqaqa.
- <sup>4</sup> Manda oosana mareeta mariasa nisaukukina mariana mara kaqinni quqan-nisaqa.
- <sup>5</sup> Maa maqanasaa maria siaasausa innee irirana siaisa eendaandirana oosana uqanna maridaqa asukunakiara foora kai nimariafanoo. Inni mi manda oosannara andeeqara oosana fannoo maa maqa maaqanaki taikanoo maridanoo.
- <sup>6</sup> Qinee Anutusa misara maaqi qidaqa. Innee faiqi anaaseesaa rakisira saika auqee mariasa Anutusara foora maqasaa uriaqa maridaqa faiqi anaaseesaa rakiseta mariafanoo. Innee aiqamausa qini uriqarara Anutusa faiqi namu mariafanoo.
- <sup>7</sup> Innee faiqi faiqi naannareeta kaqi kuqifaranoo. Inni marirafa maqasaa karaambaiqauqa faiqi namu kuquafanoo misa marirafa taikaindee inoo inni marirafa taikaannoo.
- <sup>8</sup> Oo Anutu, aiqama maqannaasa ani faiqi anaaseeta marianara anee anireeta misasaa rakiseta nimaqaa.

## 83

*Anutufa Isaraee maqannaasa namuqaauqa rafaqaqafu nimaqaani fee in-naaru.*

- <sup>1</sup> Oo Anutu, sia ufa siaina kasoo ina maria. Sia anee kaqi muqurina maria.
- <sup>2</sup> Qafaa ani namuqaa rakirana uqeeraidaqa. Ania fidiqaa imariasa ninuka uqeeraseeta ani ramoo ramaamma amaqaaidaqa.
- <sup>3</sup> Misa umee tipundaarammaseeta ani faiqi anaaseeta nariraridaqa. Anee itita nimaqee marianausa narirara tipundaaridammia.
- <sup>4</sup> Misa maaqi qidaqa. Anifaqa Isaraee maqannaasa naru raurukamasaanaqa sia mariaqa. Sia moo fannoo misara kaqikaqoo iriaqeerata doo naaruara misara qaunu saqa.
- <sup>5</sup> Misa tipundaarammaseeta moodaa iriranasaa maridaqa. Misa ani Anutuna futeeqa aqirareeta qimaseeta moodaanaki kidaqa.
- <sup>6-7</sup> Maaqimmaseeta maqannaasa suqu fifaqa namuqaakidaqa. Eedooma maqannaasa faqa Isamaeera maqannaasa faqa Mooaba maqannaasa faqa Hakari maqannaasa faqa Keebara maqannaasa faqa Amoonna maqannaasa faqa Amareeka maqannaasa faqa Firistia maqannaasa faqa Tireeta maqa maaqaki mariasa faqa moodaanaki kammafifaqa misa Isaraee maqannaasa futeeqarareeta qidaqa.
- <sup>8</sup> Asiria maqannaasa Amoonna maqannaasa faqa Moaba maqannaasa oqeenaa niqoolndi mariusa anireeta misaki ookaammafiqa Rootana aiku asauku dadaaqaqa Isaraee maqannaasa namuqaa kamma ni-maqau.
- <sup>9</sup> Oo Anutu, anee Midianna maqannaasa faqa Siseera maqannaasa faqa Yabina maqannaasa faqa Kisoona nammari afainni narunnandee maseenana misa aiqama naru taikaa.

- 10 Misa Eendoora maqa maaqaki fufana anee Isaraee maqannaasara gunaqa nifaqasee narusee sia nikundaqau.  
Doo kaqi miqoo quqasoofaqa putaa iqa madaapee kammafiqau.  
Oo Anutu, maqee maasa darirari mariasa miqi kai mandee narua.
- 11 Midianna maqannaasa Isaraee maqanna narirarufanoo Gideeoonafa misa naru nifaqasee misa karaambaiqaqara Ooreebana faqa Seepana faqa miqanda narundee kai inana maqee maasa darirari mariasa Anutu anee narua.  
Mi maqannaasa uriqarara karaambaiqaqara Seepana faqa Saramuna faqa narundee kai masee maasa darirari mariasa narua.
- 12 Misa maaqi qimasee manda ufa qiqau.  
Maasa Anutuna aiku asauku Isaraee maqannaasa maqa maqa qeeqara maraanauree qimasee oonuroofana anee misa uriqararaura naru-taikanau.
- 13 Oo maasa Anutu, maasa darirara imariasa kookoommara foora fuaqa aqusainaqa nianai fuaqa. Ufai fannoo andanda fuaqa aqindee masaa.
- 14 Ida fannoo nanda qaindee inana maasa darirari mariasa nifaqasaina sandaaqa.  
Usau aaqana qumbiaramasaafanoo akara qaindee inana maasa namuqaa nifaqasainaqa sandaaqa.
- 15 Oo Anutu, anee aakuasaa faqa innaarunai darara qirana namu faqa nifaqasaina sandaaqa.  
Firaa ufai uqiranannai rufiarana niminaqa rufiasee sandamafuaqa.
- 16 Oo Yaawee, anee nisaurirana fraana naaku nimaqainaqa mina qafamasee quandaki ani afeekara anoonee qiaqa.
- 17 Maqee maasa darirari mariasa naaru naaru rafaafu nimaqasee rufiarana misa nimia.  
Misa firaa nisauriranaki maridaqa kuquaqa.
- 18 Oo Yaawee anee miqinaqa maasa darirari mariasa anee kai Yaaweefa mariannanara iriaqa.  
Aniara maa maqa maaqana firaa uriqarara rakisirafa maridanoomifoo qiaqa.

## 84

### *Anutuna maaqara indee indee ira innaaru.*

- 1 Oo aiqama afeeka faqaa Yaaweefa, ani amaana maqara kaaqa dididanoo.  
2 Qinee ani Yaaweena amaana maqaki marirara dididanoo.  
Qinee Yaaweena amaana maqaki marirara indee indee idaqa.  
Qini qimuqusa faqa qifaaqa faqa ani kaqi marira Anutunara اساسira idi raidaqa.
- 3 Oo aiqama afeeka faqaa Yaaweefa qini karaambaiqa qini Anutufa ufini moo fannoo saanoona fooqaafa ani Anutuna amaana maqaki keeqafinoo ani aandau tatufira qainda aaqa aanaamu usakaseenoo anaqi maqaidanoo.
- 4 Oo Yaawee ani amaana maqaki mariasa firaaqoo اساسidaqa aiqama kari ani amooqima amaqaqidaqa.
- 5 Oo Anutu, anikinaa afeeka maree maria fasiqa anaseesa اساسiranaki maridaqa.  
Ani amooqirara Sioonaa aaqanai ooru firara nidi marisa misa اساسiranaki maridaqa.

- 6 Yeerusaree maqusai ooru firaree qimasee afeeka aatata aadana aatata  
Bakaa noopundu runna ooru fufanoo mi maqa maaqafa moomoo  
nammari maqakiqari ururee marufaika mafinau.  
Aaku dunoonna ufanoo madikaki nammari mandi marinau.
- 7 Miqimmasee fimariasa afeekaika mafiqa Sioonna maqusa moo auqu  
Yeerusaree maqusai Anutufa aiqama unnaqira anutusa uriqararafa  
marina qafeefaranoo.
- 8 Oo Yaawee Anutufa, aiqama afeeka faqaa Anutufa, qini innaaru qirana  
iria.  
Oo Yakoo boona Anutu anee aaqoo quqasee iria.
- 9 Oo Anutu, anee maasa Isaraee maqannaasa karaambaiqa maasa raki-  
ranaki saqariara foora ititaqimaqee mari fasiqana amiqi amiqimma  
amaqaa.  
Anee mina rusandeesammasee maraqoonafa maridanoo.
- 10 Moodaa faasaana ani amaana maqaki marirafa uriqararafa maridanoo.  
Wan tauseena faasaana kaqinni marirafa oorudupirafa maridanoo.  
Qinee qeeqa Anutuna amaana maqa kooqiki keeqarara dididanoo.  
Manda oosana maree mariasa maaqaki mariranara qikooqaidanoo.
- 11 Yaaweefa qareenara karaambaiqa maasa itita qimaqee marifa mari-  
danoo.  
Mifa nari amiqira dadaaqirana faqa maasa duqu uqeerarana faqa mi  
qandannai amiqimma qimaqaidanoo.  
Andeeqara aatata fimariasa moo ainainara irai fanoo sia amiqira ainaina  
nimiranara qaoo qiannoo.
- 12 Oo aiqama afeeka faqaa Yaaweefa ani saqariki mariasa firaa asasiranaki  
maridaqa.

## 85

### *Nari maqannaasa rakisinnimaqaani fee innaaru.*

- 1 Oo Yaawee, ani maqa maaqara ani amuda qanau.  
Anee Isaraee maqannaasa kafaa reemindeemirimma nisanau.
- 2 Anee aneenna maqannaasa mandoosana akiiqara minninnisanau.  
Misa aaqarana akiiqara aiqama rukannisanau.
- 3 Anee ooqai aanoo qiqiunnana faqa aneenna qarana qarana idara foora  
qeeqeeuna faqa maqee minnisaananoo.
- 4 Oo maasa asumu marirana qimi marianna Anutufa, anee kaifaa  
maasa sooqbaandumeeqee quqaqiseenana aneenna oori runirana  
maasasaa marina taikaa.
- 5 Anee naaru naaru maasara aanoo qinnaree.  
Ani aanoo qirafa sia fee dauni taikaannoo fee.
- 6 Anee maasa kafaa afeekaikamma qimaqasainaqa maasa ani maqannaasa  
ani amooqianaara.
- 7 Oo Yaawee, aneenna maasara naaru naaru aidirana uqaqifiqaseenana  
aneenna dadaaqirana qiminaqa asumu marirana maraa.
- 8 Qinee Yaaweena Anutuna ufa iridaqa.  
Mifa maasa nari aiku asaukuara sia inneeqa ooqeenna furufarira aatata  
kafaa fifaqa qinee qeeqa asoosana inni nimianauree qidanoo.
- 9 Yaaweefa nariara naaquqai faqa qeerairi mariasa kuqaa asumu mararara  
deedaqinoo maridanoo.  
Miqinoo marifanoo mina dadaaqira marirafa maasa maqa maaqaki aiqama  
atinai mariannoo.



- 10 Miqimmafinanoo Anutufa maasara aidirafa faqa maqasaa qaraa fasiiqaa mapukusee marira oosana faqa moodaanaki kifaranoo.  
Yaaweena andeeqara oosana faqa maqasaaqaraasa asooarafa faqa nari difaa difaa nari difaa difaa ifaranoo.
- 11 Maqasaaqaraasa Anutuna ufasaa nifu mundusee firafa innaarunai ubeekaifanoo innaarunaindari Anutuna andeeqarafa qumuree misa dadaaqiannoo.
- 12 Miqimmafinanoo Yaaweefa maasa amiqi amiqimmanimaqaannoo.  
Maasa maqa maaqaki nara ainaina rairaa inoo reemindeemiriannoo.
- 13 Andeeqara oosana fannoo faiqi moora foora Yaaweena afunni fidanoo mifa fuaninna aana afisidanoo.

## 86

### *Dadaaqiani fee innaaru.*

- 1 Oo Yaawee, qinee afeeka siaisa, dadaaqirana siaisa marunnanara anee qini innaaru qirana irisee dadaaqinnanara anoona ufa qimaqimia.
- 2 Qinee qifu mundusee ani ufamau kai fimarunaua marunnanara kuqiranakinaana mara kaqinni quqaqisaa.  
Qinee ani ainainira faiqi ani saqariki marunnanara qini asumu mara quqaqisaa.
- 3 Anee qini Anutufa mariananoo, anee qini qifauama qimaqaa.  
Qinee faasaambaasaana aniara innaaru qimamaqaidaqa.
- 4 Qini innaaru qirafa anee iannannai kai oorufi marinara oo Yaawee, aneenna ainainira faiqi qini asasirana qimia.
- 5 Oo Yaawee, anee maasa amiqimma qisaseenana maasa numoo minni qisee mariananoo.  
Aniara innaaru qimariasara ani misara amuqusirafa firaafa maridanoo.
- 6 Oo Yaawee, qini innaaru qirana iria.  
Dadaaqianeera nammeera qimarunnana irisee dadaaqia.
- 7 Anee qini innaaru iri mariannanara qinee ummaaraki maridaqa ani aaraidaqa.
- 8 Anaamuruki unna anutusa moomoosa maridaqa sia moo fannoo misa qambaanaani ani fooqaafa uriqararafa maridanoo.  
Sia moo unnaqira anutufa anee auqoonna ainainausa auqaannoo.
- 9 Oo Yaawee, aiqama maqannaasa anee auqu quqoonna maqannaasa, aiqamausa aniree ani afusaa niqoori saunu arafi ani amooqifaranoo.  
Misa ani auqu gareenarana amooqifaranoo.
- 10 Anee kai firaa afeeka faqaafa mariananoo naaquqara ainaina auqee marianafa mariananoo.  
Aneennaraa kai Anutufa mariananoo.
- 11 Oo Yaawee, anee qiniara auqaannee qimarianna ainainna qima qimia.  
Miqimma sainaqa qinee ani ufamau mapukusee fua.  
Qini daamua qinaqa kaaqa andeeqasee ani ainainiranaki maria.
- 12 Oo Yaawee, qini Anutufa, qinee qeeqa qimuqusa aiqamannai ani amooqianaaura.  
Qinee naaru naaru ani auqu gareenarana amianaaura.
- 13 Anee qiniara amuqusirafa firaafa maridanoo.  
Anee qini maqa ameemaanaani faiqi madikakinaanara foora marunnana mareeqee kaqi mariranaki quqaqisaananoo.
- 14 Oo Anutu, ramooramaa imariasaa qini dariraridaqa.  
Kaaqa fidika ruqiee mariasa suqufifaqa qini kuqa darirara randaidaqa.  
Miqi mariasa sia ani Anutunara iridaqa.

- 15 Oo Yaawee, anee kaaqa amuqusi marianna Anutufa faqa kaaqa afaari marianafa faqa mariananoo.  
Anee sia dauni aanoo qimarianafa mariananoo. Ani maasara amuqusirafa faqa aniki mapukusee marirafa faqa fiqaranoo maridanoo.
- 16 Oo Anutu, qinee unannai quandafi qifauarana qimia.  
Qini qinoofa iundee kai iqa qinee faqa ani ainainira faiqi marunnnanara aneenna afeeka faqa asumu marirana faqa qimia.
- 17 Oo Yaawee, anee qini amiqi amiqimma qimaqee mariannanara moo ainaina auqainnanannai uqaqifiqainaqa qafaa.  
Anee qini amiqi amiqirana faqa dadaaqirana faqa qiminaqa qiniara fidiqaa imariasa nisaurifaranoo.

## 87

### *Yeerusaree maqusa amooqiqau.*

- 1 Sioona aqanasaa naaquqarana saa Yaaweefa narí maqusa auqusee maridanoo.
- 2 Yaaweena Yeerusaree maqusara aidirafa aiqama Isaraee maqa maaqakinaa maqusauqara aidirna uriaaqaranoo maridanoo.
- 3 Oo Anutuna maqusa iria, mifa aniara amiqira ufa kai qidanoo.
- 4 Qinni ufa irimariasa nisaanariqa Firistia maqannaasa faqa Tiree maqannaasa faqa Eetioopia maqannaasa faqa mara Yeerusaree maqannaasa namufaqa moodaanaki quqasee nisaana ruanaura.
- 5 Sioona maqusara maaqi qifaranoo.  
Aiqama maqannaasara mi maqusaanaasee qifaranoo.  
Miqi qifanoo uriqarara afeeka faqaafa mi maqusana afeekaikamma saannoo.
- 6 Anutufa aiqama fasiqa anaasee nuqu narí papiqaki akara ruannoo.  
Misakiqari akaqausara narí ufa irimariasa Sioona maqusanaasa namufaqa nisaana ruannoo.
- 7 Sioona maqusaki maria fasiqa anaaseesa maaqi qimasee idi reefaranoo.  
Maasa aiqama amiqi amiqirana oosana Sioona maqusa maridanoo.

## 88

### *Isaraee maqannaasa Anutufa dadaaqianifeera innaaru qiqau.*

- 1 Oo Yaawee, anee qini asumu maree marianna Anutufa mariananoo.  
Faasaana anee dadaaqianneera innaaru qidaqa iki raqaidaqa. Eendaki faqa aniara innaaru qidaqa.
- 2 Qini innaaru qirana iria.  
Dadaaqianneera innaaru qimarunnana iria.
- 3 Qini oosana oosana ummaara darimarifaqa qusasaa kuqanaura.
- 4 Qinee kuqirari mariasa naanna raidaqa.  
Qini afeeka aiqama taika finoo.
- 5 Qini kuqirausa namu faqa rarisameeqee quqaqaafaqa maridaqa.  
Qinee faiqi kuqa naruqaasara foora madikaki maridaqa.  
Anee faiqi kuqufuasara sia iridana sia dadaaqi mariananoo.  
Qinee misara foora maridaqa.  
Ani rakisi qimaqaranakiqari nianai maridaqa.
- 6 Oo Anutu, anee qini mareeqeenana meemaqoo maqa ameemaanai madikakiara foora aqu qisaananoo.  
Asukunaki meemai uqanna aqu qisaananoo.

- <sup>7</sup> Ani aanooqirafa firaaqoo qini radandamu masaanano, ooruku nammari amakau rinoora foora qini rafaafinoo.
- <sup>8</sup> Anutu anee qini daaqa qiyoondiuqara qianaqa qini minniqiseea. Anee qini mandaika uqanna maqisa saanaqa qini qiyoondiuqa qiniara rufieea. Qinee rumbaranakiara foora maridaqa sia amana idukuaki sandaanaura.
- <sup>9</sup> Aupuraidaqa qiki raqee marunano qifu mandaikidano. Oo Yaawee, aiqama kari qinee qisauku anee iannannai uqeerasee dadaaqianeera innaaru qidaqa.
- <sup>10</sup> Oo Anutu, aneenna naaquqara ainaina naqimmasee kuqirausa uqan-nifiqeenaree. Kuqirausa amanee findifi ani amooqifaree. Sia miqifaranoo.
- <sup>11</sup> Madikaki mariasa ani naaru marira amuqusiranara ufa qida fee. Sia ufa qidaqa. Maaniki mariasa ani mapukusee marira oosanara ufa qidee. Sia ufa qidaqa.
- <sup>12</sup> Ani naaquqara ainaina asukunaki mariasa qafaidee. Sia qafaidaqa. Kuqiranaki finausa ani andeeqarana qafeefaree. Sia qafeefaranoo. Minara anee qini titaqisainaqa sia kuqua.
- <sup>13</sup> Oo Yaawee, anee qini dadaaqianneera aaraidaqa. Aiqama kananaana qinee aniara innaaru qidaqa.
- <sup>14</sup> Oo Yaawee nanaree anee qini minni qisaidanee. Nanaree aneenna oori afiri qini qiqaafanoo qimasee kukeeqaidanee.
- <sup>15</sup> Qinee kumaaraasaaqari manda ummaara darinoo aniifanoo maqee doo kuqirana afaisaa minisaifaqa maridaqa. Anee moomoo aupurarana qimiananoo mifa qini qimudaani ummooquka maseenoo.
- <sup>16</sup> Ani firaa aanooqirafa doo qini rafaafinoo. Ani manda darirafa qini mandaikamma qimaqeenoo.
- <sup>17</sup> Anee miqi mariana aiqama faasambaasaana manda fasiqauqa qini fiq fiq tookusiqa maridaqa nammari mandino maridanoora foora iqa maridaqa. Mi ummaaraura firaa nammari amakauriara foora inoo firaaqoo qini rafaafu qimaqeenoo.
- <sup>18</sup> Qini qifaaqasaa qiyoondiuqara anee qianaqa qini minniqisaafanoo asukuna fannoo kai qini daaqa qaraa qikaqaafasaara foora maridanoo.

## 89

### *Aiqama maqa maaqaki ummaara kambiqaiifaqa ree maria idifa.*

- <sup>1</sup> Yaaweena naaru naaru maasara firaa amuqusiranara qinee faqa naaru naaru idi raanaura. Qinee ani mapukusee marira oosanara naaru naaru koorommasee qimannimianaaura.
- <sup>2</sup> Qinee aniara maaqi qimasee iridaqa. Ani maasara amuqusirafa naaru naaru afeekaikinoo mariannoo. Ani mapukusee marira oosana fannoo innaarunara foora atukaranoo marinara qimannimianaaurano.
- <sup>3</sup> Anee Anutufa maaqi qinau qinee qeeqa moodaanaki kira ufa qinee rusandeesamu masee maraafanna fasiqanasaa Dafidinasaa quqeefee qinau. Qinee qeeqa ainainira faiqi Dafidinara qima afeekaikiqa.

- 4 Mifa maaqi qinau. Qinee anisaaqari rakisira saika oosana arasaanaqa naaru naaru ani aiku asauku kambiqaainausa miqikai iqa fifaranoo. Naaru naaru ani aiku asauku kai rakisirausaikamma nimaqaanaura.
- 5 Oo Yaawee, innaarunai maria angiroosa ani amiqira ainainiranara idi raidaqa amooqidaqa. Innaarunai naaquqaraura mariasa faqa ani mapukusee marira oosanara idi raidaqa amooqidaqa.
- 6 Sia moo fannoo innaarunai marifa ani Yaaweena fooqaafa maridanoo. Sia innaarunai mari ainainausakiqari moo ainaina fannoo ani fooqaafa maridanoo.
- 7 Innaarunai suqiranaki mariasa aniara firaagoo rufiidaqa. Mina fiqumma mariasa firaagoo minara naaquqaiifaqa rufiidaqa.
- 8 Oo Yaawee, aiqama afeeka faqaa Anutufa mariananoo. Sia moo fannoo ani afeeka fooqaafa maridanoo. Oo Yaawee anee aiqama ainainaki afu munduqaannaqoo kai fimarianafa mariananoo.
- 9 Oo Anutu, anee ooruku nammari aanooqira amakaurirana rakisi marianafa mariananoo. Ooruku nammari firaagoo aanoo qinoo amakaurifana anee Yaaweefa rafaqafi marianafa mariananoo.
- 10 Anee ooruku nammari mari firaa naaquqara andauna radamunafa mariananoo. Anee aneenna afeeka asaukunnai aneenna namuqaa furufara mandaana rakee mafiqa moodaa moodaa mafia.
- 11 Innaaruna anindi maridanoo. Maa maqa maaqafa faqa anindi kai maridanoo. Maa maqa maaqafa faqa minaki mari ainainausa faqa anee kai quqaqoonafa maridanoo.
- 12 Anee Yaaweefa suani afu dinni dinni ataaqeenni auqu quqaqoonafa maridanoo. Qeeramoonna aaqana faqa Taboora aaqana faqa faiqiara foora ani Yaaweena auqu irisee asasira idi raidaqa.
- 13 Oo Anutu, anee firaa afeeka faqaafa marianafa mariananoo. Anee uriqarara afeeka faqaafa mariananoo.
- 14 Ani rakisinnimaqarafa andeeqaranasaa faqa amana amana kai raina nimaqaranasaa faqa mundinoo maridanoo. Faiqi aanaaseera nimuqusirafa faqa mapukusee marira oosana faqa anee Anutufa auqaanna aiqama ainainnaki maridanoo.
- 15 Faiqi anaasee ani Yaaweenara idi raranannai ani amooqimariasa misa firaagoo asasiranaki maridaqa. Oo Yaawee misa ani afusaa ani eedoo qiramau fimariasa misa asasiranaki maridaqa.
- 16 Misa faasaambaasaana ani auquara asasidaqa. Misa ani andeeqaranara irisee firaagoo nasuridaqa.
- 17 Anee kai maasa afeeka qimianaqa maasa firaagoo aniara asasidaqa. Anee aneenna aidiranannai maasa firaa afeeka nimianaqa maasa qeeqa namuqaa urinnaaqareeqa.
- 18 Oo Yaawee, anee maasa ititaqimaqaaninna fasiqana rusandeesamum-masee mara qiminai. Anee Isaraee maqannaasa naaquqara andeeqara Anutufa maasa maqasaa karaambaiqa qimunafa mariananoo.

- 19 Oo Yaawee ooqai anee qainasaa aniki mapukusee maru ainainira faiqisa maaqi qimasee qimannimainau.  
Qinee moo amudaanai qimari rakira fasiqana dadaaqirana amiqa.  
Qinee mi kumaaraana faiqi anaasee qambaanaindaraana rusandeesamum-masee marasee Isaraee maqannaasa rakisira afeeka amiqa.
- 20 Qinee qeeqa ainainira faiqi Dafidina naaquqara fadameenannai akiiqa amoondunnai adiaunнанannai uriqararanaikamma amaqqeeqa.
- 21 Qini Yaaweesa afeeka fannoo aiqama kari mina faqa mariannoo.  
Qini afeeka fannoo mina afeekaikamma amaqaannoo.
- 22 Mina namuqaauqa sia uqanna rakiranaki mina rafaafafu amaqqefarannoo.  
Manda oosana maree mariasa faqa sia amana mina ooru muqufi seefarannoo.
- 23 Qinee Yaaweesa mina namuqaa radamusaanaura.  
Minara fidiqaa imariasa qinee kuqa kai narusaanaura.
- 24 Qinee minara didimarinaga mina faqa naaruara marianaura.  
Rakiranaki qinee mina dadaaqiananoo uriqaraanoo.
- 25 Mina maqa maqa dinni oosu Mediteranea ooruku nammari mariannoo,  
dinni oosu Eufarateesa firaa nammari mariannoo.
- 26 Mifa maaqi qimasee qini Yaaweesa qimaqimiannoo.  
Anee qini qikoofa mariananoo.  
Qini Anutufa mariananoo, anee qini asumu qimi marianafa, qini ititee marianna ooni faandaamura fara foora mariananoo.
- 27 Qinee mi fasiqana Dafidina utaaqama saananoo qini ooqa faiqiara foora mariannoo.  
Aiqama maa maqa maqanakinaa karaambaiqauqa uriqarara karaambaiqa mariannoo.
- 28 Qinee qeeqa qima afeekaikira ufa mi fasiqana Dafidinasaa quqasaanoo naaru naaru mariannoo.  
Qini moodaanaki kira ufa mina faqa naaruara mariannoo.
- 29 Innee Dafidinasaa aruaki oonu marinausa naaruara karaambaiqaiiki faranoo.  
Misa innaarunara foora naaruara maridaqa Isaraee maqannaasa rakisi nimaqqefaranoo.
- 30-31 Dafidina faiqi namu qini sanda ufa minnisee qini irirana mau sia fiqa misa qini naakapara ufa rukiasee, sia qumaraifaqa aupurarana nimianaura.
- 32 Qinee misa aaqarana akiiqara aupurarana nimianaura.  
Qinee qianaqa misa nari aaqarana akiiqara nidafirana mareefaranoo.
- 33 Qinee misa aaqarana akiiqara ummaara nimiqa sia qini Dafidinara qimuqusirana taikaanaura, kaqi mariannoo.  
Qinee qeeqa qima afeekaikirana sia minnisaanaura kaqi kai mariannoo.
- 34 Qinee moodaanaki kira ufa mina faqa qiafannana sia aikatamasee kaqinni fuanaura.  
Qeeqa dooqiari qiafanna ufana sia moo mafi quqaanaura, miqoo kai marianaura.
- 35 Qinee moodaa kari qeeqa naaquqara andeeqara oosanara iriseeqa qinee minara kuqaa fee qimasee maaqi qiqa, sia unnufa Dafidina qimamianauree qiqa.
- 36 Miqianaqa Dafidinasaa aru akinausa naaruara marifara.  
Qinee misasaa naaruara suaniara foora qaida rakisi nimaqaanaura.

- 37 Quqoona fannoo miqoo naaru naaru maridanoo, qinee auquafanna ainainara kooroo imarindee inoo qinee Dafidinara qima afeekaiki-afanna ufafa miqinoo mariannoo.
- 38 Oo Yaawee, anee miqi qimasee qima afeekaikammaseenana kafaa aneenna rusandeesamummasee maraqoonna fasiqausa qini Dafidis-ara arana qaifana minni qisaananoo.  
Anee qini firaqqoo ameesuqu qimaqaananoo.
- 39 Anee aneenna ainainira faiqi qini faqa moodaanaki kira ufa qimaqoon- nana rukiaananoo.  
Anee qini uriqarara qafee qimunnana qumareeqee kookoomaki aqusaananoo ikairi reenoo.
- 40 Anee qini faandaamura aiqama rakeekaa iananoo.  
Anee qini afeeka maaqauqa rapeemma saananoo naakundu kammafinoo.
- 41 Akaqausa qinee marunnaqoo aiqaree fidaqa qini ainaina ummuarama- maree fidaqa.  
Qini qiqoonausa minara uteeti qidaqa.
- 42 Yaawee, anee qini namuqaa dadaaqianaqa misa rakiranaki uriqareea.  
Anee namuqaa dadaaqianaqa misa asasidaqa.
- 43 Anee qini duru saamu nammari arasaananoo.  
Anee qianaqa rakiranaki misa qini rafaqa fia.
- 44 Anee qini karaambaiqa duqu marina mara maraananoo.  
Miqimmaseenana anee qini ufa irimarunna qaarina maqasaa aquseenana utitiqaananoo.
- 45 Anee qini kumaaraa marirana ateeka qusaramasaanaqa dauni asooqaikunana qisaurirana qamunnara foora dukunimma qimaqaananoo.
- 46 Oo Yaawee, kisaaqasaa fee kukeeqana marinnaree.  
Ani aanooqirafa kisaaqasaa fee idarafoora qaida mariannoo fee.
- 47 Qini marirafa qusaranoo maridanoo anee minara iria.  
Anee maasa aiqama kuquanausa auquqisaannanara iria.
- 48 Yafasiqa fee sia kuquannoo fee.  
Yafasiqa fee kaqi maridanoo narí afeekannai narí madikaki firanara qeerairiannoo fee.  
Sia moo fannoo miqirafa mariannoo.
- 49 Oo Yaawee, yaafee anee ooqai qiniara aidimariannana kooroo imari ainainafa maridanoo fee.  
Anee Dafidinara qima afeekaikammaqoonafa yaifee maridanoo fee.
- 50 Oo Yaawee, ani ainainira faiqi ataasa ataasa qimamaqee marianara anee sia qaunua.  
Aiqama maqannaasa manda aasaandaana ufa qimimariafaqa marunna- nara, anee minara faqa sia qaunua.
- 51 Oo Yaawee anee rusandeesamummasee maraqoonna karaambaiqanara aasaandaana ufa qidaqa.  
Mifa aiqama tinai nifaqa qafamasee ataasa ataasa qidaqa.
- 52 Naaru naaru amooqirafa Yaaweenaindi mariani. Kuqaa kafaa kuqaa.

## **Mina Anaqiannaa (Book 4)**

- 1 Oo Yaawee, ooqai uqanna maasa qikeeku qikaaku qifaqnausa faqa maasa faqa maaqara foora ina marunafa mariananoo.
- 2 Ooqai aaqana faqa maa maqa maaqafa faqa sia marufana anee marinau. Anee ooqai mariunna Anutufa kafaa naaru faqa marinna Anutufa mari-ananoo.
- 3 Anee Yaaweefa faiqí mareeqee kafaa maqaiki marianafa mariananoo. Anee qinana faiqí faiqi kafaa quandaki maqaikammiaqee qimarianafa mariananoo.
- 4 Anee wan tauseenna aukuanara moodaa faasaanee qimariananoo. Anee minara eenda faasaana aiqaree maqi qimariananoo.
- 5 Anee Yaaweefa nammari auginoo faiqí maree findee imariananoo, misa qainasaara foora qusasaa mariqa kai kaqi taikaidaqa. Faiqí nimmuru kananaana amiqi amiqindee iifanoo eendifanoo am-mundaidanoo.
- 6 Kananaana kambiqafinoo amiqi amiqidanoo. Eendimarifanoo doo aadanusinoo rooraiqidanoo.
- 7 Ani Anutuna aanooqirafa maasa faiqí faiqi turaurinoo. Ani tikoora maasa firaaqoo rufiqaidaqa.
- 8 Maasa aagarana aneenna afusaa aiqama quqasee qafee marianafa mari-ananoo. Maasa kukeeqafi maraunna mandoosanafa ani afusaa kaaqa qaranaki akoosaqa maridanoo.
- 9 Ani aanooqirafa maasa marirana qusarama qimaqaidanoo. Maasa qeeqa maa maqanasaa marunna aukuanana moodaannai daan-amma neera foora iqa taikaidaqa.
- 10 Maasa marianna aukuanafa qaaramoo fasiqa niku nisauku taikasee qisaukuqara taikasee 70 aukuana kai marianaaura. Afeekaikiasa ootupamasee qaara faqa qaara faqa fasiqa niku nisauku taikasee 80 aukuana maraidaqa. Maasa miqimmasee aukuanaki maridaqa ummaaraki faqa kadaapiki faqa maridaqa. Maasa miqimmasee aukuanaki marunanoo mi aukuanafa kai kaqi taikaifanoo maasa marirafa faqa kai kaqi taikaidanoo.
- 11 Oo Anutu, yafee ani firaa aanoo qira afeekana oosana iriannoo fee. Sia moo fannoo iriannoo. Yafee faiqí anaasee anee aanoo qimariana rufiee marianara irianno fee. Sia moo fannoo iriannoo.
- 12 Oo Yaawee, maasa qeeqa maa marirafa qusaranoo marinara qima qiminaqa iria. Miqimmasainaqa maasa irirafa irirana faqaasa iriranara foora mariani.
- 13 Oo Yaawee, anee maasara aanooqirafa kisaagasaa fee mariannoo fee. Maasa aneenna ainainira faiqiuqara amuqusiani.
- 14 Oo Yaawee, aneenna naaru naaru marira amuqusirana aiqama kananaana maasa umbiqa nimia. Miqimma niminaqa maasa kaqi marianna aukuana asasira idi raidaqa nasurianaura.
- 15 Oo Yaawee, anee moomoo aukuana dariunnana amana kai asasirana maqee qimia. Mandaikamaqimaqee unna aukuana amana kai asasirana qimia.
- 16 Oo Yaawee anee kaaqa idaaqira ainaina auqu quqoonnana maasa aneenna ainainira fasiqauqa nifusaa kooroommasee uqannifiqaa. Aneenna areenara afeeka faqa maasa faiqinamu qinaiqi mara uqannifiqa.
- 17 Yaaweefa anee maasa Anutufa, ani amiqi amiqirafa maasasaa mariani. Maasa aiqama ainaina auqee marunnana anee anoonaiqa maqisaa.

Eeoo, maasa ainainirana mapukunnisaa.

## 91

### *Anutufa maasa itita qimaqee marifa maridanoo.*

- <sup>1</sup> Yafee Yaaweefa itita qimaqaani fee qimasee fimarifa faqa yafee aiqama afeeka faqaa Anutuna itita nimaqaranaki maridafee.
- <sup>2</sup> Misa Yaaweenara maaqi qifaranoo, mifa maasa afeeka kukeeqara maqusa maridanoo fee qidaqa.  
Mifa maasa Anutufa marifaqa minakai saqarikidaqa.
- <sup>3</sup> Mifa namuqaa umee mandainainakinaana ani asumu maraannoo.  
Manda kuqira auriranakinaana mareeqee kaqinni quqaannoo.
- <sup>4</sup> Mifa kookooraanara foora nari aqoosannai ani itita amaqaannoo.  
Anee mina aqoosaki keeqafinana itita amaqarana paqurinnaranoo.  
Mina mapukusee marira oosana fannoo ani saqari kamma amaqaenoo ani faandaamurara foora mariannoo.
- <sup>5</sup> Anee miqina maridana eendaki rufiee maria ainainausara sia rufieennaranoo.  
Faasaana tautummasee ani mandaikamma amaqara ainainnara faqa sia rufieennaranoo.
- <sup>6</sup> Eendaki faiqi narimari auriranara faqa sia rufieennaranoo.  
Faasaana narimari manda ainainnara faqa sia rufieennaranoo.
- <sup>7</sup> Ani aaqa wan tauseenna fasiqa kuqaki aqufifaranoo kafaa ani asauku uqannai maria fasiqausa ten tauseenna kuqiranaki fifaranoo.  
Mi narirafa faqa sia uqanna ani aaqa aniannoo.
- <sup>8</sup> Aneenna afunnoo manda oosana maree mariana akiiqara narirana qafeennaranoo.
- <sup>9-10</sup> Anee uriqarara Anutunara itita qimaqee mari fee qiannanara faqa Yaaweenara qini afeeka kukeeqara maqusa fee qimasee keeqa-fuannanara sia moo manda ainaina anisaa aqufuannoo, sia moo ummaara ani maaqa aaqa aniannoo.
- <sup>11</sup> Anee miqinanoo Anutufa nari qangeeroouqara qinaqa misa ani marirana niranasa rakisi amaqaefaranoo.
- <sup>12</sup> Mi qangiroosa nari nisaukunnai ani qumaraifana sia oonisaa aiku rupaurinnaranoo.
- <sup>13</sup> Anee raioona faqa manda sakani faqa nimuaaqa aiku reennaranoo.  
Raioona firaana faqa ukadiqa faqa aikunnai radamusainaqa sia ani arifaranoo.
- <sup>14</sup> Anutufa maaqi qidanoo, qinee qiniara nidimarisa manda ainainakinaana qumareeqee kaqinni quqaanaura.  
Qiniara karaambaiqee qimasee irimarisa qinee itita nimaanaura.
- <sup>15</sup> Misa qini daaraifaqa maqi qimasee kaifaa qimamianaura.  
Misa ummaaraki marifaqa misa faqa maridaqa dadaaqammianaura.  
Qinee misa mandainainakinaana uqeerasee uriqarara nuqu nimianaura.
- <sup>16</sup> Qinee misa marirana kisaqaikamma nimaqasee manda ainainakinaana mareeqee kaqinni quqaanaura.

## 92

### *Anutuna amooqira idi.*

- <sup>1</sup> Oo Yaawee ani amooqirafa firaqoo uriqararafa amiqira oosana maridanoo.  
Ani uriqarara auquara irisee idinnai ani amooqirafa amiqira oosana maridanoo.



- <sup>2</sup> Aiqama kananaana ani amuqusirana kooroo irafa amiqira oosana maridanoo.  
Ani mapukusee marira oosana faqa aiqama eendaki kooroo irafa amiqira oosana mariannoo.
- <sup>3</sup> Piripunnannai ani amooqira idi rarafa amiqirafa maridanoo.  
Ufireena fuaqaida amiqira naundasaa idi raidaqa ani maasara amuqusirana kooroo idaqa.
- <sup>4</sup> Oo Yaawee, anee auqoonna afeeka ainainausa qini asasirana qimidanoo.  
Qinee anee asaukunnai auqoonna ainaina qafamasee ani amooqira idi raidaqa.
- <sup>5</sup> Oo Yaawee, anee auqoonna ainainafa firaafa uqanna maridanoo.  
Ani irirafa firaafa farumara foora meemai maridanoo.
- <sup>6</sup> Irirana siaifa maa ainainnara sia iridanoo.  
Furufari marifa mifa faqa sia iridanoo.
- <sup>7</sup> Maa ainainnara faqa sia iridaqa. Aaqara oosana maree mariasa amiqira andandara foora dauni kambiqaيداqa.  
Manda oosana maree mariasa reemideemiriranaki maridaqa.  
Misa miqiga mariinaqa naaru amiqi uqanna masee kuridifaranoo.  
Irirana siaisa minara sia iridaqa.
- <sup>8</sup> Oo Yaawee anee naaru naaru kaaqa uriqararafa mariannanara kuridi nimaqeennaranoo.
- <sup>9</sup> Oo Yaawee maasa iridaqa ani namuqaauqa kuqaa uqanna kuqifaranoo.  
Aiqama manda oosana maree mariasa anee rafaqafu nimaqeennaranoo.
- <sup>10</sup> Kaasau burimakau akoona afeeka amana kai qini faqa qimimariananoo.  
Anee asasiranannai qini amiqi amiqimma qimaqaananoo.
- <sup>11</sup> Qini qifu fannoo qini namuqaa rafaqafu nimaqarana qafeenoo.  
Manda oosana maree maria namuqaasa qeeqa daaqoonnai misa faaqa rirana iriqa.
- <sup>12</sup> Andeeqee mariasa asumu saqari kambiqaenoo amanee muna munindee idaqa.  
Misa innooqa fiqa. Rebanonna maqa maaqakina mari sidaa saqariara foora kisaqa marifaranoo.
- <sup>13</sup> Mi andeeqara fasiqausa Yaaweena amaana maqa naambeeqaqaraa saqariara foora amiqimmasee kambiqaيداqa.  
Misa Anutuna amaana maqa naambeeqaira foora kambiqaifi moomoo kidaqa.
- <sup>14</sup> Mi andeeqara fasiqa anaaseesa asooaqeeqa saqariara foora kaqi qaqama ireefaranoo.  
Misa fuka saqariara foora afeekaikiqa maridaqa amanee muna muna ifaranoo.
- <sup>15</sup> Miqianannoo Yaaweefa andeeqarafa marinara kooroo idanoo.  
Yaaweefa qini afeeka itita qimaqee mari ooni fara foora maridanoo.  
Sia moo aaqarafa minaki maridanoo.

## 93

### *Anutufa karaambaiqa maridanoo.*

- <sup>1</sup> Yaaweefa karaambaiqa maridanoo.  
Mina afeeka faqa kaaqa uriqarara andeeqara oosana faqa mina qamunnara foora afisinoo maridanoo.  
Maa maqa maaqafa mapukinoo maridanoo sia amana furufariannoo.
- <sup>2</sup> Oo Yaawee, ani ufa irira qaari ooqai oosana arooqooqari afeekaikinoo maridanoo.

Maa maqa maaqafa sia marunaki anee ooqai naaru naaru mariranaki marunafa mariananoo.

<sup>3</sup> Oo Yaaweefa, ooruku nammari fannoo amakauridanoo firaqoo ufa qidanoo.

Mi amakaurirafa firaqoo narisaa narisaa arinoo darara qidanoo.

<sup>4</sup> Uriqarara Yaaweefa firaa afeekannoo innaarunaindaraa ainaina rak- isidanoo, ooruku nammari amakaurirana faqa arusee uriqararafa uqanna maridanoo.

Ooruku nammari firaqoo amakauri mari afeekana Yaaweefa uraaqararafa maridanoo.

<sup>5</sup> Oo Yaawee, ani sanda ufa naaruara marifa maridanoo.

Ani amaana maqa naaquqarafa naaru naaru marianinafa maridanoo.

## 94

### *Anutufa aiqamausa raina nimaqee marifa maridanoo.*

<sup>1</sup> Oo Yaawee, anee manda oosana akiiqara imarianna Anutufa mariananoo. Anee miqi mariannanara anenna arana qarana kooroommasainaqa qafaaqa.

<sup>2</sup> Oo Yaawee, maasa maa maqa maaqanasaaqaraasa ufa rainee marianafa, anee findi fua.

Doo findi finana nári noori uqeeree mariasa miqi mariana akiiqara nimia.

<sup>3</sup> Oo Yaawee, kisaagasaa fee manda oosana maree mariasa اساسida marifa-ree.

Kisaagasaa fee misa nasu nasurifaree.

<sup>4</sup> Ummuari mariasa kisaagasaa fee ramoo ramaa ida nári manda oosana maree mariana amoo aamoo qifaree.

<sup>5</sup> Oo Yaawee, miqi mariasa ani faiqi anaasee radamidaqa.

Ani aiku asauku mariasa nári uriqararanannai misa rafaafa fidaqa.

<sup>6</sup> Mi manda oosanna faqaasa adeedaana faqa asaqaafai faqa narimariasa maridaqa, faiqi faiqi maasa maqa maaqaki ani mariasa faqaa kuqa nári mariasa maridaqa.

<sup>7</sup> Miqi mariasa Yaaweenara quandaki maaqi qidaqa.

Yaaweefa sia maasa qiqaafaidanoo.

Isaraee maqannaasa Anutufa sia minara iridanoo, mana mana kai mi- danoo.

<sup>8</sup> Qini faiqi anaasee naqaa fee ifaqee maa furufarira oosana auqee fee.

Innee furufarira irirana faqaasa mariasa mariafanoo.

Yairee fee innee irirana maree faree.

<sup>9</sup> Naaqoo auqu quqoo fasiqanara Anutunara innee minara sia ufa irimariffee fee qidafee.

Inni nifu auqu quqoo fasiqanara Anutunara innee minara sia qafee mariffee fee qidafee.

<sup>10</sup> Aiqaama maqannaasa Anutufa rakisi nimaqaidanoo innee minara sia misa andeeqaannoo fee fee qidafee.

Mifa irirana uqanniffee mari fasiqafa maridanoo Anutunara innee minara sia irirana faqaafee fee qidafee.

<sup>11</sup> Yaaweefa aiqamausa umee irirana iridanoo.

Misa irirafa dapikira irirafa kai marinara faqa mifa iridanoo.

<sup>12</sup> Oo Yaawee anee irirana maraanifeera qima ami marianna fasiqafa اساسiani.

Anee anenna sanda ufa uqafiffee marianna fasiqafa mifa faqa اساسiani.

<sup>13</sup> Anee misa ummaara maraafana asoarana nimimariananoo.

- Miqidana anee manda oosana maree mariasara madika deedaqi mari-ananoo.
- 14 Yaaweefa narí faiqí anaasee sia ameesuqu nimaqaannoo.
- Mifa sia uqanna narindikiqa mariasa ameesuqu nimaqaannoo.
- 15 Mikari ufa andeeqa nimaqee mariasa kaifaa andeeqa nimaqeeffaranoo.
- Aiqama andeeqara marirana faqaasa misa mi andeeqa nimaqara ufana qafamasee amiqirafee qimasee pooduqeeffaranoo.
- 16 Qinee findifiqa manda oosana mareeusa qini darirarufaqa itita nimaqaaneera iafanaqa yafee moo fannoo qini dadaaqinau. Sia moo fannoo qini dadaaqinau.
- Qinee findifiqa aaqee mariasa qaoo qianee riefanaqa yafee moo fannoo qini dadaaqinau. Sia moo fannoo qini dadaaqinau.
- 17 Yaaweefa sia qini dadaaqinaqau qini darusaifaqau qinee kai kaqi kuqirausa ufa siaisaki marunaiqini.
- 18 Qinee aqufuanauree qunana Yaawee aneenna naaru marira amuqusiranannai qini qumaraanano.
- 19 Qini daunduraki ummaara darimarifaqa moomoo irirana irimarunana anee Yaaweefa qini daundura uqbiqasee asasirana qimi mariananoo.
- 20 Oo Yaawee anee eendaandira siaasauqa faqa sia amana misa faqa moodaanaki ainaini mariananoo.
- Misa aaqee maria sandufausa marasee unna qimasee maasa andeeqara sanda ufee qianara aaqaidaqa.
- 21 Miqi maria manda siaasausa moodaanaki suqufiqa andeeqarausa mandaikamma nimaqarara tipundaaridaqa.
- Mi manda siaasausa aaqarana siaisa mara kuqiranaki quqaidaqa.
- 22 Misa miqi marifanoo Yaaweefa qini afeeka kukeeqara maqusa maridanoo.
- Qini Anutufa qini itita qimaqara ooniara foora marifaqa qinee minaki kukeeqaidaqa.
- 23 Yaaweefa mi manda siaasausa nariqa aaqarana akiiqara nimiannoo.
- Misa aaqarana akiiqara Yaaweefa kuridi nimaqaannoo. Yaaweefa maasa Anutufa misa kuridi nimaqaannoo.

## 95

### *Anutuna amooqira idi.*

- 1 Doo aniaqa, aniraifaqa Yaaweena amooqira idi ramamaqaa.
- Mifa maasasaa ititee marifa marinara firaqoo asasira idi raaqa.
- 2 Doo aniaqa, aniraifaqa dufi dufi qirana namu faqa mina afusaa oonu raa.
- Asammasee amooqira idi namu faqa mina afusaa oonu raa.
- 3 Yaaweefa afeeka faqaa Anutufa maridanoo.
- Mifa aiqama unna anutusa rafaafafu nimaqaseenoo afeeka karaambaiqa maridanoo.
- 4 Mifa aiqama maa maqa maqana rakisirafa maridanoo.
- Mifa maqa ameemaanai ooni amarauqa faqa kisaqa aaqanauqa faqa rakisi marifa maridanoo.
- 5 Mifa ooruku nammari faqa maqa faqa narí auquqoona minaindi marifanoo minasaa rakisidanoo.
- 6 Doo aniaqa, aniraifaqa mina oorinni kummara mafi amooqia.
- Yaaweefa maasa auqunara maasa mina oorinni qiqoori saunu arafi mina amooqia.
- 7 Mifa maasa Anutufa maridanoo.
- Maasa mina sipsipara foora maridaqa.

Maasa mina sipsipara foora mina rakisi nimaqaranaki maridaqa.

Oo maqee uqanna mina ufa iriaqa.

<sup>8</sup> Inni nikeeku nikaaku Meeribaa maqasaa undee sia iaqa.

Innee sia misa naanna ramasee inneeqa nimugusaki qini ufara ititiaqa.

Inni nikeeku nikaaku Masaa aadana maqasaa qini Anutusa kafaa kafaa qimanammasee qafoondee sia iaqa.

<sup>9</sup> Misa miqoo aadana maqa maaqaki marida qinee firaa ainaina auqaafanana qafamasee sia iriqau, kaqi qimanammasee qafaqau.

<sup>10</sup> Qaara fasiqa niku nisauku taikasee 40 aukuanaki qinee Isaraee maqannaasara qikoo uqanna qoofaqa qinee Anutusa misara maaqi qiqi-afana.

Maa maqannaasa kaaqa qaara irirana mau fimarisa maridaqa.

Misa qini sanda ufa minnisee moosaa fimariasa maridaqa.

<sup>11</sup> Minara qinee Anutusa qeeqa aanoo qiranakiqari maaqi qimasee qima afeekaikiqa.

Misa qini idooara maqusaki sia uqanna keeqeefaranoo.

## 96

### *Anutufa uriqarara karaambaiqa maridanoo.*

<sup>1</sup> Innee fuka idi Yaaweena rama amaqaqa.

Aiqama maa maqanasaaqaraasa Yaaweena idi rama amaqaqa.

<sup>2</sup> Innee Yaaweenara idi raaqa. Mina auqu amooqiaqa.

Mifa maasa kuqiranakinaana asumu marainara aiqama faasaana mi amiqira fasaasa ufana koorooiaqa.

<sup>3</sup> Mina areenaranara maa maqanasaa mariasa qimannimiaqa.

Mifa firaa afeeka naaquqara ainaina auqoonara aiqama faiqi anaasee qimannimiaqa.

<sup>4</sup> Yaaweefa firaafa uriqararafa marinara mina amooqirafa faqa miqikai masee uriqararafa mariannoo.

Aiqama fasiqa anaasee unnaqira anutusara naaquqee marina minisee Anutuna uqannara firaaqoo naaquqaani.

<sup>5</sup> Anaamuru mariasa unnaqira anutusa fifau nariqa auqusee amooqidaqa.

Miqi mariafanoo maasa Yaaweefa innaaruna faqa minakinaa ainaina faqa auqu quqoofa uriqaranoo maridanoo.

<sup>6</sup> Kaaqa qara areenarafa faqa uriqararafa faqa mina fiq fiq iqa maridaqa. Amudaanaiqirafa faqa kaaqa idaaqirafa faqa mina amaana maqaki qumbiqanoo maridanoo.

<sup>7</sup> Innee aiqama maqannaasa Yaaweena afeeka faqa areenarana faqa amooqima amaaqa.

<sup>8</sup> Yaaweena areenara auqu amooqiaqa.

Innee amaana maqaki keeqaani qimasee dufi dufi qima amaqee fandinna ainaina uqirafa keeqaa.

<sup>9</sup> Naaquqara karaambaiqa kooroo inaqqa aiqama maa maqanasaaqaraasa mina oorinni naindiri reemariinaqaniqoori saunu araaqa.

Aiqama maqannaasa mina afusaa rufiida naindiri raani.

<sup>10</sup> Innee Yaaweefa uriqararafa marinara aiqama maqannaasa qimannimiaqa.

Maa maqa maaqafa afeekaikamma mapukinoo marinara sia amana run-doorundiannoo.

Mifa aiqama maqannaasa andeeqasee amana amana kai andeeqa ni-maqaannoo.

- 11 Innaarunai maria ainainausa Yaaweenara asasiaqa.  
Maqa faqa minakinaa ainainauqa faqa asasiaqa.  
Ooruku nammari anee faqa minakinaa noodaanna ainaina faqa  
Yaaweenara faaqa ridaqa amooqiaqa.
- 12 Usau maqa maaqa faqa minaki maria ainainausa faqa aiqama asasiaqa.  
Nandaki saqariuqa faqa nasuridaqa asasifaranoo.
- 13 Yaaweefa maqasaaqaraasa rakisi nimaqarara anireenoo andeeqaranan-  
nai faqa amana amana kai ira oosanannai faqa rakisi nimaqaannoo.

## 97

### *Anutufa uriqarara rakisirafa.*

- 1 Yaaweefa karaambaiqa marinara maa maqa maaqafa asiasiani.  
Ooruku nammari mari afumausa faqa asasiaqa.
- 2 Eekara onnamu faqa asukuna faqa Yaaweenana fiqum fiqum inoo maridanoo  
mina kukeeqa amaqaaidanoo.  
Mifa andeeqaranannai faqa amana amana kai raina nimaqararannai faqa  
faiqi anaasee rakisi nimaqaaidanoo.
- 3 Ida fannoo mina oorinni fidanoo mina namuqaa mina fiqum fiqum imariasa  
qamataika nimaqaaidanoo.
- 4 Mina aakuusaa fannoo aiqama maqa maaqaki kaaqa qamanni-  
maqaiifanoo, maa maqafa qafeenoo rufiaifanoo aindiri raidanoo.
- 5 Aiyama maqa maaqa quqoo Karaambaiqana Yaaweenana afusaa aaqanauqa  
tasirisirimma taikaidaqa.
- 6 Innaaruna fannoo Yaaweenana andeeqaranara kooroo ifaqa aiqama maqan-  
naa mina areenarana qafaidaqa.
- 7 Nisaukunnai auqimaria unna anutusa nimoo qimariasa Anutufa uqanna  
misa mareeqee nisauriranaki quqaaidanoo.  
Unna anutusauqa aiqama quandaki Yaaweenana oorinni kummarama fuaqa.
- 8 Yaaweenana andeeqa nimaqara ufa marinara Sioona maqusanaasa faqa  
Yuda maqannaasa faqa asasidaqa.
- 9 Oo Yaawee, anee aiqama afeeka faqaafa aiqama maqa maaqaki mariasa  
rakisi nimaqee marianafa mariananoo.  
Aiqama unnaqira anutusa faqa firaqoo urinnaaqararafa uqanna mari-  
ananoo.
- 10 Yaaweefa mandoosanaa fidiqaa imariasara aididanoo.  
Mifa nari ufamau fimariasa misa mariranasaa rakisida ititannisaaidanoo.  
Mifa manda oosana maree mariasa nisaukukinaana mara kaqinni quqan-  
nisaidanoo.
- 11 Kaaqa qarafa andeeqararasaa kaaqa qaidanoo.  
Andeeqara marirana faqaasaki asasirafa maridanoo.
- 12 Innee andeeqaramau fimariasa, Yaaweefa auqoo ainainara irisee asasi-  
aqa.  
Naaquqara Anutufa auqoo ainainara oonumafi irisee dufi dufi qima  
amaqaaqa.

## 98

### *Anutufa maa maqa maaqakinaa fasiqa anaasee rakisirafa.*

- 1 Yaaweefa moo kamaakira amiqira ainaina auqoonara innee fuka idi rama  
amaqaaqa.  
Mifa nari afeekannai faqa kaaqa naaquqara afeekannai faqa nari na-  
muqaauqa naruseenoo urinnaaqarama finau.
- 2 Miqimmaseenoo Yaaweefa rakiranaki nari uriqararana koorooinau.

- Aiqama maqannaasa nifusaa Yaaweefa mandainainakinaana mara kaqinni quqeemari afeekana kooroo inau.
- <sup>3</sup> Yaaweefa Isaraee maqannaasara sia taikaaninna amuqusirana faqa mapukusee marira oosanara faqa nimianauree qimasee qimaqoona sia qauninau kaqi afu mundusee fimarinau.
- Aiqama maqa maaqa ati ati marusa rakiranaki maasa Anutuna afeeka doo qafaqau.
- <sup>4</sup> Maa maqa maaqanaki mariasa innee aiqama Yaaweena asasira idi ramamaqaaqa.
- Innee firaaqoo asasira idi faqa amooqira idi faqa ramamaqaaqa.
- <sup>5</sup> Innee amooqira idi Yaaweena ramamaqaaqa.
- Piripunna aridaqa mina amooqiaqa.
- <sup>6</sup> Ufireena faqa sipsipa aanainnai auqira ukeenannoo faqa fuaqaidaqa, Yaaweenara maasa karaambaiqa fee qidaqa mina oorinni mi namunannai اساسamma amaqaqa.
- <sup>7</sup> Ooruku nammari faqa minakinaa aiqama ainaina faqa Yaaweenara irisee faaqaruqa.
- Maqa maaqa faqa minakina maria fasiqa aanaaseesa faqa aiqama ainainauqa faqa faaqa fuisee iqa asasiaqa.
- <sup>8</sup> Nammari uqanna faqa Yaaweena oorisa nisauku aridaqa asasiaqa.
- Amuaqu namuqa faqa moodaanaki kammafi Yaaweena oorisa susumma-maqaqa.
- <sup>9</sup> Yaaweefa maa maqa maaqanaki mariasa ufa andeeqa nimaqarara quminara اساسamma amaqaqa.
- Nari andeeqaranannai faqa amana amana kai andeeqaranannai faqa maqasaa qaraasa andeeqannisaannoo.

## 99

### *Anutufa uriqarara karaambaiqa.*

- <sup>1</sup> Yaaweefa karaambaiqa marifaqa aiqama fasiqa anaasee rufiaafannoo naindiri raidannoo.
- Mifa angiroouqa oorinnaaqaree meeraqoo nari ufa irira qaarisa oofu-faaqee marifannoo maqa kasidannoo.
- <sup>2</sup> Yaaweefa Sioona maqusaki afeeka faqaafa maridannoo.
- Aiqama maqannaasi fasiqa anaasee urinnaaqaramafi maridannoo.
- <sup>3</sup> Minara aiqamausa mina firaa uriqarara auquara amoo qifaranoo.
- Mifa kaaqa naaquqarafa maridannoo.
- <sup>4</sup> Afeeka faqaa karaambaiqa anee andeeqaranara kai aidimarifa mariannoo.
- Anee andeeqarana kai Isaraee maqa maaqaki quqaannoo.
- Anee andeeqarana faqa amana amana kai rainannimaqarana faqa maree mini quqaannoo.
- <sup>5</sup> Yaaweena maasa Anutuna amooqiaqa.
- Mina ufa irira qaari aaqa oonuree minara innaaru qiaqa.
- Mina andeeqarafa naaquqarafa maridannoo.
- <sup>6</sup> Mooseesa Aaronasa mina aanaiqikira fasiqaqara mariqau.
- Samueerafa faqa Anutunara innaaru qimarufa marinau.
- Minamusa Yaaweena innaaru kiqari aarofannoo iriseenoo nari qimanniminnau.
- <sup>7</sup> Yaaweefa oonnamuqiqari misa ufa qimanniminnau.
- Misa mina naamuaqira ufa faqa sanda ufa faqa iriseeqa mimau kai fimariqau.

<sup>8</sup> Oo Yaawee maasa Anutu ani faiqí anaasee aniara innaaru qiafana anee qimannimiananoo.

Anee aaqarana akiiqara minninnisee marianafa mariannana misa uqannifiqaa. Anee misa aaqarana akiiqara aupurarana nimi mariannana faqa uqannifiqaa.

<sup>9</sup> Minara innee Yaaweenana maasa Anutuna amooqiaqa.

Mina naaquqara aaqanasaa mina amooqiaqa.

Yaaweefa maasa Anutufa andeeqarafa naaquqarafa maridanoo.

## 100

### *Anutuna amooqira idi.*

<sup>1</sup> Aiqama maa maqanasaa mariasa Yaaweenara asasira idi ramamaqaaqa.

<sup>2</sup> Asasirana namufaqa Yaaweenana amooqiaqa.

Innee asasira idi ramammaree mina oorinni aniaqa.

<sup>3</sup> Innee sia Yaaweenara aunuaqa, mifa kai Anutufa maridanoo.

Mifa kai maasa auqinau, maasa minaindi maridaqa.

Maasa mina faiqí anaasee mina sipsipara foora maridaqa.

<sup>4</sup> Innee mina amaana maqa faandaamura kooqiki oonuree dufi dufi qimammareeqa keeqaaqa.

Oorureeqa amaana maqa kooqiki faqa dufi dufi qidaqa amooqiaqa.

<sup>5</sup> Yaaweefa andeeqarafa maridanoo, mina faiqí aanaaseera amuqusirafa naaru naaru marifa maridanoo.

Mina mapukusee marira oosana naaru naaru marifa maridanoo.

## 101

### *Karaambaiqa Dafidina qima afeekaikira ufa.*

<sup>1</sup> Ani sia taikara amuqusira oosanara faqa amana amana kai nimira oosanara faqa idi raidaqa.

Oo Yaawee, ani idi rama amaqaidaqa.

<sup>2</sup> Qini marirafa andeeqasee ufa siaisa marianaura.

Miqiqa marianana oo Yaawee anee yairee fee qinee marunnannai qumuree dadaaqinnaree.

Qinee anukara marira qeeqa maaqaki marianaura.

<sup>3</sup> Sia qinee naaruara moo manda aaqara oosanara eedoo qianaura.

Anutuna ufara nimeesa uqimariasa oosanara qinee fidiqaammidaqa.

Sia misa manda oosanaki kaqikaaqoo faqa keeqaanaura.

<sup>4</sup> Qinee unna oosana faqaasa futeeqa nianai auqanaura.

Qinee sia manda oosana maree mariana kaqikaaqoo faqa dadaaqianaura.

<sup>5</sup> Nári niqoonausara unnufa qimasaida nupiqnupita qimaria fasiqa anaaseesa qinee misa taika nimaqaanaura.

Nári noori uqeeree mariasa faqa aanoo masee nári iriranamau fimariasa faqa sia qini daaqa marifara nianasaa futeeqa aquanaura.

<sup>6</sup> Anutuna ufasaa nifu mundusee fimariasa qinee misara didiannoo.

Misa qini faqa qini maaqaki marifaranoo.

Aaqarana siaisa andeeqara mau kai fimariasa misa qini ainainira fasiqa anaasee marifaranoo.

<sup>7</sup> Unna ufa qimariasa sia uqanna qinee marunnanaki marifaranoo.

Qaara iriramau fimariasa faqa sia qini qifusaa marifaranoo.

<sup>8</sup> Qini maqa maaqaki aaqara oosana maree mariasa qinee aiqama kari randasee misa taika nimaqaanaura.

Anutuna maqusaki manda oosana maree mariasa qinee niqiqaanaura.

## 102

### *Ummaaraki mari kumaaraana innaaru.*

- <sup>1</sup> Oo Yaawee qini innaaru qirana iria.  
Qini qikiraqarafa anee dadaaqianneera anee marianannai fimarina iria.
- <sup>2</sup> Qinee mandainainaki marianana sia aneenna oori kaqinni rafusu aqua.  
Aneenna aaqoo rammardini mambi iria.  
Qinee ani aaraanana dauni maqi qimasee qimaqimia.
- <sup>3</sup> Qinee auriranaki faqa namuqaa dariranaki faqa marunanoo qini marirafa  
munara foora dauni taikararidanoo.  
Qini qifaqa idara foora muqurinoo maridanoo.
- <sup>4</sup> Qinee aadana andanda maqamau faiqeera foora maqasaa aqufiqa, qinee  
naranara qikooqaiifaqa daarara fidaqa.
- <sup>5</sup> Daarara marunanoo qini qifaqa asaqufifaqa qimudaani aanaaqi mari-  
daqa, firaqoo annadannada qidaqa maridaqa.
- <sup>6</sup> Kaasau ufini faiqi sia maria maqa maaqanaki marindee qinee iqa mari-  
daqa.  
Qinee karoondara foora ooqeenna naakunduki kukeeafa maridaqa.
- <sup>7</sup> Qinee qeeqaraa ufini maqa ataufakaafa mariara foora iqa ummaaraki  
maridaqa.  
Sia faiqeefa kaqi andeequmoorida maridaqa.
- <sup>8</sup> Qini namuqaauqa faasaambaasaana manda ufa kai qimidaqa.  
Qini ataasa ataasa qima qimaqee mariasa qini duqunnai akaqausa  
niquraraidaqa.
- <sup>9-10</sup> Anee qini aanoo qima qimaqee mariananoo qini narana fannoo dan-  
dara foora marifaqa naidaqa.  
Qeeqa daiquni daukunu namu faqa nammari naidaqa.  
Anee qini mareeqee nianai aqu qisaanaqa maridaqa.
- <sup>11</sup> Qini maqee marirafa nimanandara foora mariifanoo eendifanoo taikeera  
foora qinee iqa maridaqa.  
Qinee nimmuruara foora aadanusiqa rooraiqidaqa.
- <sup>12</sup> Kafa anee Yaaweefa, naaruara uriqarara karaambaiqa marianaqa  
naaru kambiqainausa kaqi aniara iriqa fifaranoo.
- <sup>13</sup> Anee findifinana Sioonna maqusanaasara qimudao qinnaranoo.  
Mi maqusanara qimudao qira aukwana doo anireenoo.  
Maa maqee uqanna nari aukwana maridanoo.
- <sup>14</sup> Ani ainainira fasiqauqa Isaraee maqannaasa Sioonna maqusara ridaqa.  
Mandaikinoo naakundukinoo marifaqa kaqi minara qimudao qidaqa.
- <sup>15</sup> Aiqa maqannaasa Sioonna maqusa dadaaqirana qafamasee Yaaweena  
auquara rufieefaranoo.  
Aiqa maa maqanasaaqaraa karaambiqauqa misa Yaaweena mi areenara  
afeekanara naaquqaannoo.
- <sup>16</sup> Yaaweefa Sioonna maqusa kafa usakasee miqoo nari uriqarara afeeka  
koooro iannoo.
- <sup>17</sup> Mifa qumureenoo Isaraee maqannaasi faqi anaasee sarauirusara irinoo  
misa innaaru qirana faqa iriseenoo dadaaqiannoo.
- <sup>18</sup> Yaaweefa auqoo ainainara papiqasaa akara rumasainaga naaru anisaa  
ani aruaki kambiqainausa qafamasee mina amooqiaqa.
- <sup>19</sup> Yaaweefa nari sandaaqai naaquqarannai marunnaindari maqasaa mara  
miami qafanau.  
Mifa innaarunaindari maqasaaqaraasa mara miami niuqinau.



- 20 Kuqiranaki fuaqera karabusaki quqaqoosa annadannada qimarufanoo mifa iriseenoo iduku nisanau.
- 21 Miqinaqa Sioonna maqusaki misa Yaaweena auqu kooroommasee qimannimifaranoo.  
Sioonna moo auqu Yeerusaree maqusaki misa mina amooqifaranoo.
- 22 Moomoo maqannaasa moodaanaki Yeerusaree maqusaki suqufiqa Yaaweena amooqifaranoo.
- 23 Qinee kumaaraa fasiqa marunanoo Yaaweefa qini afeeka taika qiseenoo qini marirana mara qusa reenoo.
- 24 Miqimmasaifaqa qinee maaqi qiqa.  
Oo qini Anutu qinee kumaaraa fasiqa maridaqa, sia qini mara aquqisaa.  
Oo Yaawee, anee naaru naaru marianafa mariannoo.
- 25 Ooqai kuradoo aukwana anee maa maqa maqana poosauqa faakanara foora atukaranau.  
Aneenna asaukunnai innaaruna auqu quqoonafa mariananoo.
- 26 Anee aiqama ainaina auquqoonafa taikafuannoo.  
Aneenna kai kaqi marinnaranoo.  
Mi aiqama ainainausa nauraa qammunnara foora anaqi anaqiannoo.  
Anee mi nauraa ainainausa ooqeenna qamunnara foora aqusainaqa taikafifaranoo.
- 27 Anee Yaaweefa naaru naaru miqi kai ina marinanoo ani marirafa sia taikarafa mariannoo.
- 28 Maasa ani ainainira fasiqauqa marunaqa maasa faiqi namu ani asumu mariranaki marifaranoo.  
Misasaa ani aruakinausa ani ititannimaqarafa misa fiqum fiqum inoo mariananoo.

## 103

### *Anutuna aidirafa.*

- 1 Oo qini qimana, Yaaweena amooqia.  
Qini daunduraki marianna aiqama ainainafa Yaaweena amooqia.
- 2 Oo qini maraquna, Yaaweena amooqia.  
Mifa paapaa qida qimimarinara sia qaunua.
- 3 Mifa aiqama qini aagarana akiqara minni qisee marifa maridanoo.  
Mifa qini aurirana aiqama taikaqisee marifa maridanoo.
- 4 Yaaweefa qini madikakinaana uqera qiseemarifa maridanoo.  
Mifa amuqusiranannai faqa narí qimudao qiranannai faqa qini amiqi amiqimma qimaqaidanoo.
- 5 Yaaweefa qini mariranaki amiqira ainainannai qumbiqa qimaqaidanoo.  
Miqimmasaina qini marirafa aneesara foora fuka qisau si kambiqaqinaqa kumaaraa foora kafa mariana. (Dafidifa quqaumuara qifaqa maasa ufa sia miqinoo marifaqa aneesara kai qiqa.)
- 6 Uriqararansa nimeemaanai ummaaraki mariasa Yaaweefa misa ufa irisee dadaaqiannoo.  
Mifa misa narí ainaina andeeqasee nariqa kai nimidanoo.
- 7 Yaaweefa narí qimiruna Mooseena kooroommasee uqa fiqanau.  
Narí firaa afeeka ainainna auqoona Isarae maqannaasa uqannifiqa-soofaqa qafaqau.
- 8 Yaaweefa qimudao qirana faqa amuqusirana faqa faqaafa maridanoo.  
Mifa sia kai kaqi aanooqidanoo.  
Mina naaru marira amuqusirafa firafa qumbiqanoo maridanoo.
- 9 Yaaweefa sia kisaqasaa inni manda oosana nifairiannoo.

Kafaa mina aanooqirafa sia naaruara mariannoo.

<sup>10</sup> Mifa sia maasa aaqarana amana kai daridanoo, oorudupimasee dari-danoo.

Sia maasa aaqarana akiiqara mina amana kai daridanoo, ureeqasee dari-noo.

<sup>11</sup> Maqasaaqari innaarunai kisaagasaa marina amana kai Yaaweefa nari amuqsirana nariara rufiee mariasa nimidanoo.

<sup>12</sup> Suani ururee marina faqa keeqee marina faqa nianasaa marifanoo mina amanasaa Yaaweefa maasa mandainaina mara aqu qisaidanoo.

<sup>13</sup> Faiqi nikausa faiqiara firaagoo nimuqusidaqa.

Miqikai inoo Yaaweefa nariara rufiee mariasara firaagoo amuqusidanoo.

<sup>14</sup> Yaaweefa maasa auqunara iridanoo, maasa maqannai taikaaninna ainairannai auqunara iridanoo.

<sup>15</sup> Maasa faiqi faiqi marirafa maaqimminoo maridanoo.

Maasa fifau adandara foora maridanoo.

Maasa marirafa andandara foora urureenoo afufeenaara mafifanoo amiqi amiqinoo

<sup>16</sup> marifanoo ufai fuaqasaifanoo kai kaqi taikaidanoo.

Taikafinana sia kaifaa qafeennaranoo.

<sup>17</sup> Yaaweenara eerairida mina ufa qaindusi mariasasaa mina amuqusirafa naaru naaru mariannoo.

Mina andeeqarafa misaki faqa misa faiqi namuki faqa misa ninaiqimaraki faqa misa nifaqnausaki faqa mariannoo.

<sup>18</sup> Yaaweena moodaanaki kira ufamau fimariasa faqa sia mina sandaufa minnisee kaqi mi sanda ufamau fimariasa faqa, misasaa faqa mina andeeqa nimaqarafa mariannoo.

<sup>19</sup> Yaaweefa nari rakisi nimaqara qaari innaarunai quqaqaifanoo afeekaikinoo maridanoo.

Mifa aiqama maqannaasa uriqararafa maridanoo.

<sup>20</sup> Yaaweena afeeka qangeeroouqa mina ufara eedoo qimariasa innee Yaaweena qimannimira ufa irimariasa innee Yaaweena amooqiaqa.

<sup>21</sup> Innee innaarunai angeeroouqa moomoo maridaqa mina ainaini mariasa mina aidiramau fimariasa innee aiqamausa Yaaweena amooqiaqa.

<sup>22</sup> Yaaweefa auqu quqoo ainainausa, mifa aiqama atinai rakisi nimaqee marisa innee faqa mina amooqiaqa.

Qini maraquna anee faqa Yaaweena amooqia.

## 104

### *Aiqama ainaina auquna amooqirafa.*

<sup>1</sup> Oo qini qimana anee Yaaweena amooqia.

Oo Yaawee, qini Anutu, anee firaafa uqanna mariananoo.

Anee qammunnara foora kaaqa qareenarana faqa uriqararana faqa afisirafa mariananoo.

<sup>2</sup> Yaaweefa anee kaaqa qarana qumaree qamunnara foora afisi marianafa mariananoo.

Kafaa anee innaaruna qumareeseera maaqara foora usakaananoo.

<sup>3</sup> Yaawee anee aneenna maaqa innaaruna maarinni mari nammariinasaa usakaananoo.

Asuru fannoo ani rakira karara foora marifana anee minaki nimariananoo. Anee ufai qaqaosasaa ooqu marifi nimarianafa mariananoo.

<sup>4</sup> Anutu anee ufai faiqiara foora niqqaanaqa ani ufa mara maree fidanoo. Aakuasaa faqa ani ainainira faiqiara foora maridanoo.

- 5 Yaawee anee maa maqa maaqana maqa poosara foora rusisoonanoo afeekaikinoo maridanoo naaruara sia kasiannoo.
- 6 Oo Yaawee, ooqai anee ooruku nammari quqasoonanoo aiqama maqa maaqa qamunnara foora dukuninau.  
Aiqama aaqanauqa faqa rafaqa finau.
- 7 Anee aanoo qimasee qaoo qunaqa nammariuqa rufiasee sandaqau.  
Ani innaarunai qirana iriseeqa doo sandamaqaraasa mafiqau.
- 8 Mi nammarisa anusaa qari qumuree anee mariaqee qimaqoonna noop-undunaki kai maridaqa.
- 9 Oo Anutu, anee oosuqoonnamau nammari fannoo marida naaru naaru sia flaaqararana amana mariannoo.  
Mi oosirafa nammari ititasainanoo sia kafaa maqa maaqa rafaqa fuannoo.
- 10 Yaawee anee qunaqa maqakiqari nammari uqa urureeqa noopundu runna qumidaqa.  
Mi nammarisa aaqana aikundanai fiqum aiqumidaqa ooqumidaqa.
- 11 Oosana oosana aandaqa faqa mi nammarisa naaqeera qumidaqa.  
Kaasau doonkiuqa faqa mi nammarisa nimaqaara aadanusi marina quqeenaaqee qumidaqa.
- 12 Ufiniuqaindi mi nammarina afaiqara saqariki aanaamu usakasee minaki maridaqa ufa qidaqa.
- 13 Anutu anee aneenna oonnamukiqari aaku adiaananoo aaqanauqa saa aqufifanoo ani amiqi amiqirafa maqa maaqaki qumbiqaidanoo.
- 14 Anutu anee aaku adiasaanoo aandaqa neefandinna andandausa kambiqaidanoo.  
Mi aakufa faiqi neemaria narannana afu amifanoo kambiqaidanoo.  
Miqimasafanoo faiqi nari nara ainaina ummaqidanoo.
- 15 Faiqi fannoo wainna qaqaama ummaqusee tiqisee tatisee wainna anoona naifanoo mina amuqusa fannoo asaidanoo. Mifa oorifa fadameena ooriki aku usaifanoo oori amiqi amiqidanoo.  
Mifa feemu uquseenoo naifanoo amuaquinoo afeekaikidanoo.
- 16 Yaaweefa Sidaa saqariuqa Reebanoona maqa maaqaki ummaqusoofanoo maruqaqa Yaaweena saqari fee qimariqau.  
Aaku moomoo mi saqarisasaa aqufifaqa amiqi amiqidaqa.
- 17 Mi saqarisaki ufiniuqa aniraida aanaamu usakaidaqa.  
Noonaafeesoona fooqaa ira ufi faqa miqoo moo saqari tookuseena fooqaa ira saqariki aanaamu usakaidaqa.
- 18 Kaasau mimmiuqa uriqarara aaqanasaa misa quqaqoo qoo maridaqa.  
Mi aaqannasaa mataqooma fooqaa ira aandaqa ooni afooiranauqa aundurari maridaqa.
- 19 Anee Yaaweefa quqoonna auqu quqaqoonanoo aukwana rainaidanoo.  
Suani faqa auqu quqaqoonanoo aiqama kari nari keeqaaninnanara iridanoo mimau kai fidanoo.
- 20 Oo Yaawee, anee eendirafa marianne qunanoo eendirafa anifanoo nandakinaa kaasau aandau aina aana nidaqa.
- 21 Kaasau aandau auqu raioona Anutufa amu narannara faaqariqanidaqa randaidaqa.
- 22 Suani ururifaqa mi andausa oonu maree ani maree nari faiqee mariana kiaqa faiqaidaqa.
- 23 Faiqaafaqa faiqi anaasee kafaa findififaqa nari ainainirannai oonuree ainainiqa fima riafanoo eendidanoo.
- 24 Oo Yaawee, anee moomoo ainainatia auqu quqoonafa mariananoo.

- Aneenna amiqira iriranannai kai aiqama ainaina auqu quqoonafa mari-ananoo.  
 Anee moomoo kasi mari ainainna auqu quqaqoonafa maa maqa maaqana qumbiqanoo maridanoo.
- <sup>25</sup> Ooruku nammari dinni dinni fiq̄u fiq̄u firaana quqaqoonafa maridanoo. Minakinaa aandau ainaina kasimarina firaana faqa kaqikaana faqa moomoo uqanna usidaqa sia amana nisaana rirana amana maridanoo.
- <sup>26</sup> Miq̄iqa mariafaqa sipauqa mi nammarina amuaqumau oonuree aniree idaqa.  
 Moo firaa aandau anee auqusee ooruku nammariki sararianee qimasee auquqoonafa maridanoo.  
 Mina auqu Reeviatanna maridanoo.
- <sup>27</sup> Mi aiqama ainainausa ani Yaaweenara narana nári nee marianara qiafana nimimariananoo.
- <sup>28</sup> Anee Yaaweefa misa narana nimianaqa mara naidaqa.  
 Anee nimianaqa naafanoo nimuaqu idanoo.
- <sup>29</sup> Oo Yaawee anee misa ameesa uqunnimaqasaanaqa misa rufiidaqa.  
 Anee misa naidoo taikannimaqaanaqa misa kuq̄iqa kafa maqaikidaqa.
- <sup>30</sup> Anee aidoo aiqama ainaina nimianaqa misa kasirana maraidaqa.  
 Maa maqa maaqanasaa aiqama atinai mari ainainausa fukaikamanimaqee mariananoo.
- <sup>31</sup> Yaaweena areenarafa naaru naaru marida kai mariani.  
 Narí auqu quqoo ainainausara asasiani.
- <sup>32</sup> Mifa maqasaa mara miami qafainara maqa fannoo rufiasee kasidanoo.  
 Asaukunnai aqana ati auqainara idamuna ururaidanoo.
- <sup>33</sup> Qinee Dafidisa kaqi marunna kamuqoo Yaaweenara idi raanaura.  
 Qini daanna kaqi mari kamuqoo qeeqa Anutuna amooqira idi raanaura.
- <sup>34</sup> Qini asasirafa Yaaweefa marinnaindari qumi marinara qinee idi raannanara mifa asasiani.
- <sup>35</sup> Aaqee marinausa maa maqa maaqanakiqari taikaaqanani.  
 Manda oosana faqaasa sia mariaqanani.  
 Oo qini maraquna Yaaweena amooqia.  
 Yaaweena amooqia.

## 105

### *Anutunara faqa narí faiqí aanaaseera faqa qidanoo.*

- <sup>1</sup> Oo innee, Yaaweena dufi dufi qimamaqaa.  
 Mina uriqararanara kooroo iaqa.  
 Innee mifa auqoo ainainnara aiqama maqannaasa kooroomma nimiaqa.
- <sup>2</sup> Innee Yaaweena idi ramamaqaida mina amooqia.  
 Mifa idaaqira ainaina auqoonara qima nimiaqa.
- <sup>3</sup> Maasa Yaaweenaindi marunnaara asasiaqa.  
 Innee minara amooqi mariasa asasiaqa.
- <sup>4</sup> Innee dadaaqiranara Yaaweena qafaifanoo nimiani.  
 Innee maqee maqee mina amooqiaqa.
- <sup>5-6</sup> Innee Yaaweena ainainira fasiqa Abarahaamana akeeku akaaku mariasa mariafanoo.  
 Anutufa rusandeesamummaqaisa Yakooboona faiqi namu mariasa, innee mifa amiqira ainaina auqoonara faqa sia faiqí auqaaqaa ira ainaina auqoonara faqa mina naamuaqira ufara faqa iriaqa.
- <sup>7</sup> Yaaweefa maasa Anutufa maridanoo.

- Mina naamuaqira ufa aiqama maqa maaqaki mariasa iriaqeera maridanoo.
- <sup>8</sup> Yaaweefa narí moodaanaki qima afeekaikira ufa sia aunuannoo, kaqi mina naaru naaru irinoo fuanoo.
- Wan tauseenna oosana kambiqainausara Yaaweefa narí qima afeekaikira ufa sia aunuannoo naaru naaru misasaa mariannoo.
- <sup>9</sup> Yaaweefa nari moodaanaki kira ufa Abarahaamana faqa qimasee amuna sia minnisaannoo mimau kai fuannoo.
- Isakeena faqa qima afeekaikira ufa amuna faqa sia minnisaannoo kai mimau fuannoo.
- <sup>10</sup> Yaaweefa Yakooboona moo auqu Isaraeerana moodaanaki kira ufa amufa naaru naaru mariannoo.
- <sup>11</sup> Yaaweefa misa faqa moodaanaki kira ufa maaqi qinau, qinee Kannaana maqa maaqa ani amiananoo mifa ani faiqi namu anaiqimaraindi kammiannoo.
- <sup>12</sup> Ooqai Yaaweena aiku asauku Isaraee maqannaasa oodaa maridaqa Kannaana maqa maaqaki anaamuruara foora misa qambaana mariqau.
- <sup>13</sup> Isaraeerana akeeku akaaku maaqa maaqa aiqama maqusa maqusa oonuree aniree iqa nimariqau.
- <sup>14</sup> Miqi marufaqa qinee Yaaweesa qumee misa rakisi nimaqee mariafana sia moo fannoo misa ummaara niminau.
- Qinee misa saara karaambaiqauqa aanoommasee qaoo qimannimaqaqifana.
- <sup>15</sup> Qinee Yaweesa maaqi qimasee mi karaambaiqausa qimannimiqa.
- Innee sia qini qisauku munduqaunausa nuqaaqa.
- Sia qini tamummaqara fasiqauqa faqa mandaikamma nimaqaa.
- <sup>16</sup> Yaaweefa qufanoo aandaroo firaafa inoo misa narana aiqama taikanau.
- <sup>17</sup> Yaaweefa Isaraeena aiku asaukukinaana mina auqu Yooseefaana misa noorinni aqiqoofanoo Isipa maqa maaqai finau.
- Misa Yooseefaana Midianna maqannaasa nimisee feefauru mara maroofaqa mina afigamaree Isipa maqa maaqai quqaqoofanoo moo fasiqa ainainira faiqikinau.
- <sup>18</sup> Isipa maqannaasa karabusa maaqaki quqasee sainnandannai aikuqara rumbaqa.
- Misa qainnannai faqa mina anukaki rumbaqa.
- <sup>19</sup> Yooseefaafa karabusaki kaqi maridanoo qaina oosana qimannimufa anoona kambiqoofaqa qafamasee Yooseefaana idukiqau.
- Yaaweena ufa fannoo Yooseefaafa miqunara kuqaa fee qinau.
- <sup>20</sup> Isipa maqannaasa uriqararafa qufaqa Yooseefaana idukiqau. Moomoo maqannaasa uriqararafa maridanoo idukinau.
- <sup>21</sup> Faraofa Yooseefaana qumareenoo narí uriqararausa nikiiqa fasiqaikino maridanoo mina maqa maaqa faqa rakisianifee qimasee karaambaiqaikinau.
- <sup>22</sup> Miqimmaseenoo Faraofa Yooseefaanara anee qini uriqararausa nikiiqa fasiqaikina maridana qini irirana qimi mariasa anee naakapaa.
- <sup>23</sup> Miqimmasoofanoo Yakooboofa Isipa maqa maaqai oonuree miqoo marinau.
- <sup>24</sup> Miqoo marufanoo Anutufa moomoo faiqi asumu narí faiqí anaasee Isaraee maqannaasa nimiseenoo misa nári namuqaa urinaaqarara afeeka faqaasaikamannisanau.
- <sup>25</sup> Miqiqqa marida mikamuqoo Anutufa qumee misa iriranaki naakapoofaqa Isipa maqannaasa Anutuna ainainira faiqiuqa Isaraee maqannaasara fidiqaaidaqa nikaru qi mariqau.

- 26 Miqıqı marufanoo Anutufa narı ainainira fasiqa Mooseena misunnai aiqanau.  
Anutufa rusandeesamumaqoo fasiqana Aaroona mareeqee seenoo Mooseena faqa niqıqoofaqa isipa maqusai fiqau.
- 27 Oonuree miqanda Isipa maqa maaqaki maridaqa Anutuna naaquqara uqannifiqara ainaina Isipa maqannaasa Anutuna moo kira ainaina uqannifiqau.
- 28 Mikari Anutufa Isipa maqa maaqaki asukuna quqasoofanoo asukuna misa rafaafinau.  
Sia fifau miqinau. Misa mina ufara aanoommasee rukiqoonara miqinau.
- 29 Mifa Isipa maqannaasa nammari fidikaikamandoofaqa misa noodaanna aiqama kuqu taikaqau.
- 30 Misa maqa maaqaki eeqamoosa moomoo misa uriqarusa maaqakiaqa faqa qumbiqaiqau.
- 31 Anutufa qufanoo faufaari sia kasoo anireenoo maaqa maqusa ititanau.  
Nunuka faqa miqikaimminoo misa maqa maaqa aiqama atinai qumbiqanau.
- 32 Anutufa kafaa qufanoo aaku rirara foora mandee pupusamu qumuroofanoo aakuasaa quqasoofanoo aiqama atinai daraaninau.
- 33 Mi ainainna qandannai Anutufa Isipa maqannaasa wainna sanda faqa saqari qaqa faqa nee maruna faqa misa fifau saqariuqa faqa aiqama raudaandammanau.
- 34 Yaaweefa kafaa qufanoo aammaadi moomoo nukudara foora teeqima-fufaqa sia amana nisaanarirana amana, maqa maaqa umbiqaqau mariqau.
- 35 Aammaadi misa andanda faqa qafuqakinaa narana faqa aiqama nama taikaqau.
- 36 Doo mi ainainausa taikaseenoo Anutufa quandakufanoo Isipa maqannaasa ooqa faiqi akoonaiqiuqa aiqama narinau.
- 37 Yaaweefa Isipa maqannaasa ooqa faiqi akoonaiqiuqa naruseenoo Isaraee maqannaasa nifiqamareenoo misa Isipa maqannaasa kooru siruannai auqira ainainauqa mara maroofanoo Isipa maqa maaqakiqari nifiqee finau.  
Sia moo fannoo teeroo quqoofa mariqau aiqamausa amiqirauka kai fiqau.
- 38 Isipa maqannaasa Isaraee maqannaara rufiarafa firaaqoo marunara misa fufaqa Isipa maqannaasa minara asasiqau.
- 39 Anutufa Isaraee maqannaasa nifiqee fidanoo asurunnai faasaana auqaana aru nimaqeenoo eendaki idauru miqirafa kaaqa qamanni-maqee marinau.
- 40 Nifiqee fimarufaqa Isaraee maqannaasa Anutunara naranara iroofanoo afida faqa innaarunaindaraa narana manna feemu faqa naaqeera niminau.
- 41 Mifa ooni afoomandoofanoo nammari radiqisee firaafa quminau.  
Mi nammariifa aadana maqa maaqaki firaamammariara foora ooqu finau.
- 42 Yaaweefa misa nifiqee fidanoo narı ooqai qima afeekaikira ufa narı ainainira faiqi Abarahaammaana amu ufanara irinau.
- 43 Isaraee maqannaasa narı rusandeesamu mandoosa nifiqee fidanoo asirana nimufaqa mina namufaqa fidaqa faaqa rumasee asasiqa fimariqau.  
Anutuna rusandeesamu iranaki maridee qimasee idi ramasee fiqau.

<sup>44</sup> Yaaweefa moomoo maqannaasa maqa maaqa Isaraee maqannaasa mara nimisoofaqa misa miqooqaraasa naru nifaqasee misa narana andanda aiqama ainaina neemariqau.

<sup>45</sup> Yaaweefa sia fifau miqinau.

Isaraee maqannaasa mina aamuaqira ufa faqa sanda ufa faqa maraaqee qimasee miqinau.

Innee aiqamausa Yaaweena amooqiaqa.

## 106

### *Anutufa narí faiqí anaasee amiqimma nimaqaidanoo.*

<sup>1</sup> Yaaweenara amooqiaqa.

Innee Yaaweefa amiqirafa marifanoo mina amugusirafa naaru naaru marinara mina dufi dufi qimamaqaqa.

<sup>2</sup> Yafee moo fannoo mifa firaa ainaina auqoonara amana kooroommasee qiannoo fee.

Sia moo fannoo amanaikiannoo.

Yafee moo fannoo mina amana kai amooqirana amiannoo fee.

Sia moo fannoo amanaikiannoo.

<sup>3</sup> Mina naamuaqira ufa qaindusi mariasa faqa aiqama kari andeeqara oosana maree mariasa faqa misa asasidaqa.

<sup>4</sup> Oo Yaawee, anee aneenna maqannaasa dadaaqidana qiniara faqa iria.

Anee misa mara niseenana qini faqa mara qisaa.

<sup>5</sup> Miqimasainaqa ani faiqí anaasee ainaina rairaa inaqa qinee kaqi maridaqa qafamaseeqa misa saimbaqa asasidaqa ani aiku asauku mariasa faqa nasu nasuriqa nua.

<sup>6</sup> Maasa qeeqa qikeeku qikaaku naannaa reeqa aaqara oosana maree marunausa maridaqa.

Maasa aaqara oosana faqa firaa manda aaqara oosana faqa maree marunausa maridaqa.

<sup>7</sup> Ooqai anee Anutufa Isipa maqa maaqaki naaquqara ainaina auqamasoon-aqa maasa qikeeku qikaaku qafamasee sia ani oosana iriqau.

Anee misa moomoo kari amugusamma nimaqoonnanara sia misa minara iriqau, qaunuseeqa misa Taatuqee nammari afaisaa oonuree ani aiqama afeeka faqaanara nimeesa uqusee nári nidiramau fimariqau.

<sup>8</sup> Yaaweefa narí amudaanai qimaru afeekanara kooroo ianifeera narí qima afeekaikira ufa mau finoo misa ummaarakinaana uqeera nisanau.

<sup>9</sup> Yaaweefa Taatuqee nammariara qufanoo aadanusinau.

Aadanusufufanoo mifa misa aana muqunufaqa aadana maqasaa taqaqau.

<sup>10</sup> Yaaweefa Isaraee maqannaasara fidiqaa imarusa nisaukukinaana rafiqanau.

Mifa namuqaa nisaukukinaana maranau.

<sup>11</sup> Miqimmasoofaqa Taatuqee nammari fannoo misa namuqaa rafaqaq-finau.

Sia moodaa kaqi mariqau, aiqama taikaqau.

<sup>12</sup> Miqimmasoofaqa Isaraee maqannaasa mina qafamaseeqa Yaaweena qima afeekaikiranara kuqaa fee qimasee mina amooqira idi raqau.

<sup>13</sup> Miqidaqa misa Yaaweefa auqoo ainainnara kai kaqi auniquau.

Misa sia mina naakapara ufara afeesiqau.

Nári iriranamau kai fiqau.

- 14 Oonureeqa misa aadana maqa maaqaki nidaqa nári Isipa maqa maaqai maru narana ainainausara firaqoo nári nidi maru narannara aiaaee qimariqau.  
Miqidaqa misa firaqoo Yaaweena akooqara oosanannai amanammasee qafaqau.
- 15 Miqiufanoo Yaaweefa misa amanira osana iriseenoo akooqoofanoo misa qu ainaina eedoo qimasee nimiseenoo manda aurirana namu faqa nimufaqa auri mariqau.
- 16 Misa Isaraee maqannaasa miqoo aadana maqa maaqaki maridaqa Mooseenara rairai qimariqau.  
Misa Aaroonara Yaaweena naaquqara ainainira fasiqara faqa rairai qi-mariqau.
- 17 Misa miqi qimarufanoo Yaaweefa qufanoo maqa fannoo oo raqafufanoo faiqi moo auqu Datannana nambiqanau.  
Abirammana faqa mina aiku asauku namu faqa nambiqama rafaqa finau.
- 18 Rafaqafusooofanoo Yaaweefa qufanoo manda oosana auqee mrusa akaqausa kaqi marusa idauru fannoo misakiaqa fasafasufanoo mi manda fasiqa qanda ufa iri marusa idauru fannoo aiqama qama taikasanau.
- 19 Isaraee maqannaasa Sinai maqa maaqaki oonureeqa koorannai tasirisir-immasee burimakau akoona aanaaqi amana auqiqau.  
Misa mina auqu quqaqagee Yaaweenara foora amooqimamaqee mariqau.
- 20 Misa Yaaweena amiqira areenarana faqaana mafi nimeesa uquseeqa fifau andanda neemaru ainaina burimakau akoona aanaaqi amana auqirafa marunnai ubeekamafiqa amooqi mariqau.
- 21 Isaraee maqannaasa Isipa maqa maaqaki marufanoo Yaaweefa naaquqara ainaina firaa ainaina auqamaseenoo Isaraee maqannaasa rafioo Anutunara misa qauniqau.
- 22 Misa miqimmasee Isipa maqa maaqaki marufanoo Yaaweefa mookira ainaina firaatia auqamasoofaqa qafaqau.  
Taatuqee nammari aqa marufanoo Yaaweefa kaifaa naaquqara ainaina auqamasoofaqa misa minara faqa qauniqau.
- 23 Yaaweefa misa manda oosana nindafamaseenoo qinau.  
Qinee misa aiqama kuridi taikasaanauree qinau.  
Mooseefa Anutufa qutaqamaqoofa maridanoo Yaaweefa arana qoofanoo nariraree qunasaa ititasoofanoo sia narinau.
- 24 Misa aadana maqa maaqaki kaqi maridaqa Isaraee maqannaasa fuka idaaqira maqa maaqara Kannaa maqa maaqaki fifandinnanara fidi-aqaammasee Yaaweena qima afeekaikira ufara faqa unna fee qiqau.
- 25 Nári uqiqaana maqakiaqa maridaqa ninunu ridaqa Yaaweena ufa rukiee mariqau.
- 26 Miqufanoo Yaaweefa narí asauku uqeeraseenoo maaqi qimasee qiman-nimaqanau.  
Qinee qianaqa innee aiqama maa aadana maqa maaqanaki kuqu taikeefaranoo.
- 27 Misa niku nisauku marinausa naru nindaqaaqa ianaqa aanaamurukinai furufariqa moodaa moodaa ifaranoo.  
Qinee aiqama niana maqa maaqakiaqa quqannisaanaqa miqoo kuqifaranoo.
- 28 Isaraee maqannaasa aqamasee Peeora maqannaasa unna qira anu-tuna Baarana amooqi marunaki ootupaqau.



Peeroora maqannaasa andau tatufirana nári unnaqira anutusa suqasee nimisee naríara faqa akaqana neemarufaqa Isaraee maqannaasa aagamasee misaki ootupaqau.

<sup>29</sup> Misa nári manda aaqara oosanannai Yaaweena arana fundakiqau.

Misa miqi marufanoo Yaaweefa qufanoo misaki manda aurirafa kambifa-fufaqa moomoosa kuqi mariqau.

<sup>30</sup> Miqiqa nufanoo misakiqari faiqí moo andeeqara fasiqa mina auqu Fineeqasafa findifinoo Isaraee maqanaasa manda oosana akiqara narufanoo mi manda aurirafa taikanau.

<sup>31</sup> Doo miqooqari Fineeqasanara andeeqara fasiqa fee qiqa, maqee faqa naaru naaru faqa minara andeeqara fasiqee qifaranoo.

<sup>32</sup> Isaraee maqannaasa Meeriba maqa maaqaki maru nammarinaki maridaqa Yaaweena amanammasee qafaidaqa arana qarana ami mariqau.

Miqiufanoo Mooseefa misa aaqaranasaa qaraana maraseenoo narí faqa moo aaqarana maranau.

<sup>33</sup> Isaraee maqannaasa Mooseena qarana fundakufanoo Mooseena ookiqari aaqara ufa kambiqanau.

<sup>34</sup> Yaaweefa Isaraee maqannaasa qimanniminau.

Innee Kannaa maqannaasa manda oosana maree mariasa naru taikaaqee qufaqa sia misa miqiqa.

<sup>35</sup> Misa Yaweena ufa rukiaseeqa sia narirai misa faqa maanaaqa narí ami narí ami idaqa misa saimbaqa moodaanaki kammafi maridaqa misa manda aaqarana faqa mara nári nifaaqai quqee mariqau.

<sup>36</sup> Anutuna faiqí anaasee unnaqira anutuna amana auquqoonauqa ni-mooqimannimaqee mariqau.

Misa miqiqa nidaqa nári ufaanaki ninuka nári nári mariqau.

<sup>37</sup> Misa moo manda oosana maraqau.

Misa nári faiqi namu akoonaiqi faqa manaaqa faqa marasaidaqa Kannaa maqannaasa unnaqira anutusa noorinni munusaida tatufirana suqa nimimariqau.

<sup>38</sup> Isaraee maqannaasa nári faiqi aanaaqiuqa qikairi nisakadiki sia marusa nariqau.

Narusoo fanoo mi fidikafa fifau teeqinoo mi fuka maqa maaqana putaa inoo maridanoo manda afundi marinau.

<sup>39</sup> Misa mi oosanna maroo mandoosanafa nári putaa mannimaqee marinau.

Misa Anutuna uqanna minniseeqa moo unnaqira anutusasa mundidaqa sia Anutuna uqanna saa mapukusee mariqau.

<sup>40</sup> Miqunara Yaaweefa narí faiqí aanaaseera arana qoofanoo fidaaqa uqannamminau.

<sup>41</sup> Yaaweefa misauqa mareeqee moo maqanna aaqee marusa nisaukuki quqanau.

Quqasoofaqa misa namuqaa misasaa manda rakisi rakisinnimaqee mariqau.

<sup>42</sup> Mi namuqaasa nisaukuki marufaqa misa nariqa uriqararanannai rafaafuqoofaqa misa niramundunai ummaaraki mariqau.

<sup>43</sup> Miqi marufanoo Yaaweefa moomoo kari narí faiqí anaasee ummaaraki-naana mareeqee kaqinni quqanau.

Miqidaqa nariqa kai qimasee Yaaweena naakaparanara aanoo qimasee ititiqau.

Miqidaqa misa mandainainaki keeqa qaraasaa mafiqau.

- 44 Misa mi mandainainaki maridaqa quandaki Yaaweenara iki raqoofanoo Yaaweefa misa iki irinau.  
Iriseenoo Yaaweefa misa aupuraranaki maruna amiqimmasee irisee niqafeenoo dadaaqinau.
- 45 Niqafamaseenoo misara qimudao qimaseenoo nari moodaanaki kira ufara iriseenoo nari firaa amuqusirafa marunara faqa iriseenoo nari aanooqirana minnisanau.
- 46 Yaaweefa misa rumbannimaqee marusa naundura quandasoofaqa qimudao qimasee reendeenammasee rakisinnimaqee mariqau.
- 47 Oo Yaawee maasa Anutufa anee maasa ummaara mariranakinaana mara kaqinni quqannisaa.  
Maasa aiqama maqannasa qambaana moodaa moodaa iqa marunnana sooqbaandummeeqee kaifaa qeeqa maqasaa quqaqisaa.  
Miqi mannisainaqa maasa kaifaa ani naaquqara andeeqara auquara maasa dufi dufi qimamaqaqeeera miqimma qimaqaa.  
Maasa ani amooqimamaqaidaqa maasa daundura areenee marinaqa asasianaura.
- 48 Isaraee maqannaasa Anutuna Yaaweena amooqiaqa.  
Maqee faqa naaru naaru faqa mina amooqiaqa.  
Faiqi anaasee aiqama minara kuqaa fee qiaqa.  
Yaaweena amooqiaqa.

## Mina Anaqianna Book 5

### 107

*Idi Ufa 107–150*

*Anutuna amiqira oosana amooqia.*

- 1 Yaaweefa andeeqarafa marinara mina dufi dufi qima amaqaqa.  
Mifa maasara amuqusirafa naaru naaru marifa maridanoo.
- 2 Yaaweefa inni namuqaa nisaukuki umaaraki maruna maroosa innee kafaa kafaa dufi dufi qimasee amooqiaqa.
- 3 Mifa inni aanaamuru maqa maaqakinaana nifiqee aninau.  
Suani afu dinni dinni ataaqendari faqa suani ururee marinnaindari faqa keeqee marinnaindari faqa nifiqee aninau.
- 4 Akaqausa aadana maqa maaqanaki aana sia marunakinai auiqaq ni-mariqau.  
Misa nariqa marifandinna maqusanara randasee sia paquriqau.
- 5 Misa miqiga nimarufanoo naarareenoo nammariara nidufaqa misa nari mariranara sia kaqi marianauree qiqaq.
- 6 Misa nariqa ummaaraki maridaqa Yaaweena aaraqau.  
Aaroofanoo mifa iriseenoo misa ummaarakinaana mareeqeenoo amiqira goo uqannisanau.
- 7 Yaaweefa misa andeeqara aatata nifu uqu mareenoo misa mari fandinna maqusanaki quqannisanau.
- 8 Miqi marisa Yaaweena sia taikaaninna amuqusiranara dufi dufi qimamaqaqa.  
Mifa faiqi sia auqaqaaira ainaina dadaaqinoo auqoonara faqa dufi dufi qimamaqaqa.
- 9 Mifa nammariara nidimarisa amanaikamma nimaqaseenoo naararee marisa amiqira nara ainainannai nimuaqumma nimaqainara dufi dufi qimamaqaqa.

- 10 Akaqausa rumbaranaki marufaqa niku nisauku sainnandannai rumbaqoofaqa aupuraidaqa asukunaki firaa ninunuriranaki mariqau.
- 11 Misa aiqama afeeka faqaa Anutuna ufara aanoommasee ititunara faqa mina naamuaqira ufa minnisoonara faqa mi mandainainaki mariqau.
- 12 Misa minaki marufanoo Anutufa firaa kadaapi rirana nimufanoo misa afeeka taikanau.  
Minaki maridaqa misa niku amaki saamu rufanoo sia moo fannoo misa uqeerarafa miqoo marinau.
- 13 Misa mi aupuraranaki maridaqa misa quandafiga Yaaweena aarofanoo misa aupurarana kinaana uqeerannisanau.
- 14 Yaaweefa misa niku nisauku rumbara sainnanda rakeemma aanaaqi aanaaqimmaqusee asukunaki faqa firaa ninunuriranaki faqa maruna mareeqee kaaqa qaraqoo quqannisanau.
- 15 Miqi marisa Yaaweena sia taikaaninna amuqusiranara dufi dufi qimamaqaaqa.  
Mifa faiqi sia auqaaqaaira ainaina auqoonara faqa dufi dufi qimamaqaaqa.
- 16 Yaaweefa namuqaauqa karabusa kooqiuga koopaannai auqira kooqiuga rakeemmasee qainnannai auqira kairi kooqi ititee maruna qumaree itairi andaanandaana rumuqusanau.
- 17 Akaqausa nari ufa rukiqaranannai aupuraidaqa furufarirausaikiqa mariqau.  
Nariqa aqarana akiiqara mi aupuraranaki mariqau.
- 18 Misa mi aupuraranaki maridaqa nikoo nikaaidaqa narana faqa sia neemariqau.  
Misa miqidaqa kuqirana afaisaa mariqau.
- 19 Misa miqiqa maridaqa nari aupuraranakiqari Yaaweena aaramasaidaqa innaaru qimariqau.  
Miqi qimarufanoo Yaaweefa nariqa aupuraranakinaana uqeereeqee amiqiraqoo quqannisanau.
- 20 Mifa nari ufannai misa aurirana taikannimaqanau.  
Mifa madika afaisaaqaraana uqeereeqee kaqini quqannisanau.
- 21 Miqi marisa Yaweena sia taikaaninna amuqusiranara dufi dufi qimamaqaaqa. Mifa faiqi sia auqaaqaa ira ainaina dadaaqinoo auqoonara faqa dufi dufi qimamaqaaqa.
- 22 Miqidaqa misa Yaaweenara dufi dufi qira aandau tatufirana suqa amiaqa. Amiseeqa misa asasira idinnai Yaaweefa amiqira ainaina auqoonara aiqamausa qimannimiaqa.
- 23 Doo akaqausa sipaki ooruku nammari amuaqumau nidaqa aanaiqiara foora nidaqa ainaina munu nimi mini nimi idaqa feefauru maree mariqau.
- 24 Misa ooruku nammari farumaki fidaqa Yaaweefa faiqi sia auqaaqaa ira ainaina auqamaqoona qafaqau.
- 25 Yaaweefa qufanoo ufai fraafa aniree uqufanoo nammari amakau rinoo aaganara foora inau.
- 26 Amakaura fraaqoo idanoo misa sipa uqeera innaarunai seenoo muqumi maqai rumaseenoo imarinau.  
Miqi marufaqa minaki marusa misa paasoosirafa taikafufaqa naaquqeenoo naindiriranau.
- 27 Misa sipa teeqi taaqufaqa minakinaasa firara munari minari idaqa nammari namaqaaqee furufari mariasa naannaree mariqau.

- Misa miqíqá nufanoo misa sipa akoofasaikirafa sia nimanaikufaqa furu-fariqau.
- <sup>28</sup> Misa miqíqá maridaqa nári aupuraranakiqari Yaaweena aaramasaidaqa innaaru qimariqau.
- Miqi qimarufanoo Yaaweefa nariqa aupuraranakinaana uqeereeqeenoo amiqiraqoo quqannisanau.
- <sup>29</sup> Yaaweefa amakauriranara qaoo qufanoo daimafinau.
- Firaa amakaura rirafa taikafufanoo reendeeninau.
- <sup>30</sup> Ooruku nammari fannoo kasoo inoo dai qimafufaqa sipaki mariusa nimuqusa uqbiqafufaqa asasiqau.
- Miqi marufanoo Yaaweefa misa mareeqeenoo nári fuanee qunnai ubeekamasoofaqa fiqau.
- <sup>31</sup> Miqi marisa Yaaweena sia taikaaninna amuqusiranara dufi fufi qima-maqaqa.
- Mifa faiqí sia auqaaqaa ira ainaina dadaaqinoo auqoonara faqa dufi dufi qimamaqaqa.
- <sup>32</sup> Misa faiqí suqiranaki maridaqa Yaaweena uriqararanara kooroo iaqa. Faiqí rakisirausa suqinnanaki mina faqa amooqiaqa.
- <sup>33</sup> Yaaweefa qufanoo nammari amiqimmasee aadanusinau. Kaqikaa nammariuqa faqa maqakiqari ururee marifauqa faqa tukaq-nanau.
- <sup>34</sup> Mi maqa maaqanaki mariusa mandoosana akiiqara Yaaweefa misa maqa ainoo faqaana kafaa mara indiri maqaika masanau.
- <sup>35</sup> Kafaa Yaaweefa aadana maqa maaqa mareeqeenoo nammari namu faqa uqeená uqeenira maqaikinau.
- Mifa aadana maqa maaqa mareeqeenoo nammari aanaaqi aanaaqi moomoo qumi maru maqanaikinau.
- <sup>36</sup> Miqiuqanoo Yaaweefa naranara sarauimarusa nifieeqeenoo miqoo uqannisanau.
- Misa miqoo maridaqa maqusa indufusee miqoo mariqau.
- <sup>37</sup> Misa miqoo maridaqa oosana oosana narainaina faqa wainna sanda faqa ummaqimariqau.
- Ummaqusoofanoo aiqama narainaina fannoo kambiqeenoo, rairaa rairaa inoo didisamu rimarinau.
- <sup>38</sup> Yaaweefa mi fasiqa anaaseesa narí aiku asauku amiqi amiqimma ni-maqoofaqa misa miqoo moomoo kambiqeeqa aramaree fimariqau.
- Misa firinee maru aandausa mifa dadaaqufanoo sia oodaa mariqau.
- Misa faqa moomoo kambiqeeqa aramaree fimariqau.
- <sup>39</sup> Misa miqi marufaqa namuqaa manda fitiqnarana nimufaqa firaaqoo aupuraqau.
- Miqimmasee Yaaweena faiqí anaasee rafaqafusee nisaurirana nimiqau.
- <sup>40</sup> Yaaweefa misa rafaqafu nimaqee marusara fidiqaammaseenoo misa aadana maqa maaqakinai aana sia marunnai aqusoofaqa nimariqau.
- <sup>41</sup> Mifa narí aiku asauku ainainara sarau imarusa nári noori runiranakinaana uqeereeqee amiqira qoo quqannisanau.
- Kaifaa misa faiqi namu kambiqeeqa sipsipara foora moomoo kambiqafi aramaree fiqau.
- <sup>42</sup> Andeqara oosana maree marusa mina qafamasee asasufaqa manda oosana maree marusa mina qafamaseeqa noo qumunamasee mariqau.
- <sup>43</sup> Naaqoo fainausa Yaaweena mi oosanna qafamasee amiqimasee iriaqa. Yaaweena naaru marira amuqusiranara oonumafi iriaqa.

## 108

*Namuqaa sia dadaaqiani fee innaaru.*

- 1 Oo Anutu qini qimuqusa aiqama anisaa mapukusee mundinoo maridanoo.  
Minara qinee idi raidaqa ani amooqianaaura.  
Qini qimana anee findifua.
- 2 Qini piriipunna faqa ufireena faqa findi fifaqa inniqarannai suani afu ooqu findifumaisaanaura.
- 3 Oo Yaawee qinee aanaamurukiaqa ani dufi dufi qimamaqaanauranoo.  
Qinee faiqí anaasee qambaanai ani amooqianaaura.
- 4 Ani aiqama kari amuqusirafa inaaruna ooraqaqaranoo maridanoo.  
Ani mapukusee marira oosana fannoo qasuru ooru auqanoo maridanoo.
- 5 Oo Anutu, aneenna uriqararana innaarunaki uqannifiqainaqa maasa qafa.  
Aneenna areenarana aiqama maqa maaqaki quqasainaqa qafaaqa.
- 6 Oo Yaawee qini innaaru qirana irisee aneenna afeekannai maasa asumu maraqisaa.  
Miqimmaseenana ani aidi maria fasiqa aanaaseesa mandainaina kinaana asumu mariaqeera maraa.
- 7 Anutufa narí naaquqara uiqaana maqakiqari maaqi qinau.  
Qinee ufoona ridaqa Seekeemma maqa maaqa rainasee qeeqa maqannaasa nimianaaura.  
Qinee Sukoota noopundu faqa miqi kai iqa qeeqa maqannaasa rainasee nimianaaura.
- 8 Gireeadana maqa maaqa faqa Mannaseena maqa maaqa faqa qiqaindi maridanoo.  
Efaraimmana maqa maaqa faqa qeeqa qikiiqa itita qimaqee mari ainaina fara foora maridanoo.  
Yuda maqa maaqa fannoo qini uriqararausara uqannifiqee mari saunu fara foora maridanoo.
- 9 Qinee Anutusa Mooaba maqa maaqa mareeqee qeeqa qiku nammari uqi marunna difaaniara foora masee ooru dupimma nisaanaura.  
Qinee Eedooma maqa maaqa qiku aanaamu raipaqu quqee marunna maqa maaqafa ooreeqarafa mariannoo.  
Qinee Firistia maqannaasa urinnaaqaramasee faaqa rumasee ufoona ruanaura.
- 10 Oo Anutu, yafee qini aana muquninaqee Eedooma maqannaasa afeeka faandaamuraki keeqafi naruanauree.
- 11 Oo Anutu kuqaa fee anee maasa ameesa uquqiseenanee.  
Anee sia fee ooqai unnandee inana maasa rakira fasiqauqa faqa oonuree dadaaqinnaree.
- 12 Anee maasa dadaaqinaqa maasa nári namuqaa narua.  
Faiqí faiqi dadaaqirafa sia amanaikiannoo.
- 13 Oo Anutu anee maasa dadaaqinaqa rakiranaki fuanana aneenna kai maasa namuqaa rafaqafu nimaqaa.

## 109

*Ummaaraki maru fasiqana anunurira ufa.*

- 1 Oo Yaawee, qinee ani amooqi marunafa mariananoo anee sia kaqi muqurina maria.
- 2 Manda oosana maree maria fasiqausa faqa nikaru qimaria fasiqausa faqa qini namuqakamma qiaidaqa.

Misa qiniara unna ufa qimariasa maridaqa.

<sup>3</sup> Misa qini fidiqaamma qimaqee maria ufanannai qiniara qidaqa.

Misa sia oosana marifaqa kaqi fifau qini namuqaakamma qimaqaidaqa.

<sup>4</sup> Qinee misara rimarunnana akiiqara misa fifau qini qifairidaqa.

Qinee misara innaaru qimarunaqa misa sia minara iridaqa kaqi qifairidaqa.

<sup>5</sup> Qinee misa amiqi amiqimma nimaqee marunnana akiiqara misa manda oosana qini qimidammia.

Qinee misara didi marina akiiqara qini fidiqaamma qimaqaidaqa.

<sup>6</sup> Oo Yaawee aaqee mari siaasana utaaqamasainanoo qini namuqaa koota amiani.

Anee qinanoo mina moo namuqaa fannoo mina kikiqa usuani.

<sup>7</sup> Mi kootanaki mi fasiqanara aaqee mari fasiqafee qiaqanani.

Mi manda fasiqana innaaru qiranara faqa aaqara oosana fee qiaqanani.

<sup>8</sup> Mi manda fasiqana marirafa qusasaa taikainanoo moo fannoo mina amaaqa maqafinoo mina saika maraani.

<sup>9</sup> Mi fasiqana faiqi namu faiqi marifanoo mina anaaqa faqa adeedaana mariani.

<sup>10</sup> Mina faiqi namu maaqa siaisa naranara aiqama maaqakiaqa innaarumma naqanuasa mariaqanani.

Misa miqiga nidaqa ooqeenna naakunduki rambairira maaqaki mariana, nifaqasaifaqa fifuaqanani.

<sup>11</sup> Mi manda fasiqafa ufaase munnimma marasee mariufa kuqufinanoo ufaasu munnimma amu fasiqafa anireenoo mina ainaina aiqama nariara maraani.

Moo maqannaasa anireeqa mifa kadaapi ririqoo ainainna nariara maraaqanani.

<sup>12</sup> Sia moo fannoo mi manda fasiqanara amuqusiani.

Sia moo fannoo mina faiqi faiqiara amuqusiani.

<sup>13</sup> Saifaqa mina faiqi namu anaaiqimara aiqama kuquaqanani.

Akaqausa faqa sia mina auquara iriaqanani.

<sup>14</sup> Mi manda fasiqana akeeku akaaku manda oosanara Yaaweefa oonumafi iriani.

Mi manda fasiqana maqoo aanaaseena aaqarana akiiqara naaru naaru sia minnaisaani.

<sup>15</sup> Mi manda fasiqana akeeku akaaku aaqarana akiiqara Yaaweefa aiqama kari iriani.

Aiqamausa misara qaunuqanna saaqanani.

<sup>16</sup> Mi manda fasiqafa faiqi anaaseera qimudao ira irirafa sia mina iriranaki maridanoo.

Mifa ainaina siaisa faqa sarau imariasa faqa naundura ummaara reemariisa faqa oosana oosana ummaara niminoo kuqa narinau.

<sup>17</sup> Mi manda fasiqafa niqurara ufa qiranara kai aidimarifa marinara anee mina akiiqara aqurara ufa kai amia.

Mi manda fasiqafa amiqi amiqimma nimaqaranara fidiqaa imarinara sia moo fannoo mina amiqi amiqimma amaqaqanani.

<sup>18</sup> Mi manda fasiqafa niqurara ufa afaqa quqasee qamunnara foora afisirafa nidanoo.

Mina nari niqurara ufa fannoo nari nammari naindee inoo nariki kai keeqaani.

Mina niqurara ufa fadameenara foora nifaaqasaa akusaafanoo keeqaindee nari mi manda fasiqanaki keeqaani.

- 19 Mi manda fasiqana niqurara ufa fannoo oonurandeenoo qamunnara foora narikai kukuqinoo mariani.  
Pikapara foora mina niqurara ufa fannoo aiqama kari narí kai rumba-maqanoo mariani.
- 20 Oo Yaaweefa qini namuqaa miqimmasee aupurarana nimia.  
Mi namuqaasa qiniara manda ufa qimariasa aupurarana nimia.
- 21 Oo uriqarara Yaaweefa aneenna qima afeekaikiranara iriseenana qini dadaaqia.  
Aneenna sia taikaaninna amiqira amuqusiranannai qini namuqaa nisaukukinaana mara aquqisaa.
- 22 Qinee Dafidisa ainaina siaisa sarau irausa maridaqa.  
Qini qimuqusaki dariara foora aupuraidaqa.
- 23 Suani afu keeqaifanoo qini qimananda taikaindee inoo qini marirafa taikararamidanoo.  
Qini marirana aammaadiara foora ufai fuaqa aqindee qusasaa taikararidaqa.
- 24 Narana sia naunnnanara qini qikuqara indindidanoo doori ummooqukidanoo.  
Qinee qifaaqa asaqinoo marifaqa qimudaani aanaaqi maridaqa.
- 25 Faiqi anaasee qini qiqafamasee uteeti naakada qidaqa.  
Misa qini qiqafaidaqa ninuka aqidaqa ataasataasa qidaqa.
- 26 Oo Yaawee qini Anutufa anee qini dadaaqammaqisa.  
An i sia taikaaninna amuqusirafa marinara qini mareeqee asumu mariranaki quqaqisaa.
- 27 Oo Yaawee anee miqinaqa qini namuqaa iriqa ani Yaaweenara qini dadaaqidanoommifoo qimasee iriaqa.
- 28 Qini namuqaauqa qini diqurara ufa qimifana anee amiqi amiqimma qimaqeennaranoo.  
Qini aupurarana qimimariasa anee misa rafaqaqafu nimaqaa.  
Miqimmasainaqa qinee ani ainainira faiqi asasianauranoo.
- 29 Qini namuqaa nisaurirana dukunimma nimaqaa.  
Misa nisaurirana qamunnara foora kukuqiaqanani.
- 30 Qinee Dafidisa qeeqa dooqi qari Yaweenara firaaqoo dufi dufi qianaura.  
Faiqi moomoosa suqi marinnanaki mina amooqimamaqaanaura.
- 31 Yaaweefa mifa ainaina siaina itita amaqaaseenoo mina kuqa arirari mariasa nisaukukinaana marainara dufi dufi qianaura.

## 110

### *Yaaweefa faqa mifa utaaqamaqoo karaambaiqafa Dafidifa faqa.*

- 1 Yaaweefa maaqi qimasee qini karaambaiqa qimaminau.  
Anee qini daaqa qisauku uqannai ooqu mari finaqa qinee ani namuqaauqa mareeqeeqa ani aramandunnai quqasaanaura.
- 2 Yaaweefa ani urinnaqarara rakisirana Sioona maqusasaqari firaanaikamasainana aiqamatinaai rakisi nimaqeennaranoo.  
Mifa qinoo anee aneenna namuqaauqa faqa rakisi nimaqeennaranoo.
- 3 Anee nammeera qimasee namuqaa faqa rakuanauree qinaqa ani rakira fasiqauqa ani ufara eedoo qimasee afeekaikammasee rakifaranoo.  
Kananaana suani oosana qaannaindari ani kumaaraauqa sia kasoo, qifi faramu andandasaa mandinoo marindee moomoo aaqana uqasaa suqifaranoo.

- 4 Yaaweefa qini karaambaiqara (Yisunara) qima afeekaikuna sia amana kaifaa moosaa fuannoo.  
Mifa maaqi qimaseenoo qima afeekaikinau.  
Anee naaruara naaruara aanaiqikirafa marinnaranoo.  
Anee Meerakiseedeekafara foora maridana naaru naaru aanaiqikina marinnaranoo fee qinau.
- 5 Qini karaambaiqa Yaaweena asauku uqannai maridanoo, mifa aanoo qinanoo maqasaa karaambaiqauqa urinnaaqa raannoo.
- 6 Mifa maa maqanasaaqaraasa urinnaaqaramasee moomoo narueeqaida quqaannoo.  
Mifa aiqama maa maqanasaa uriqararawsa rafaafuannoo.
- 7 Mifa rakiranaki maridanoo kaqikaa nammari aana afainni qumi marina namasee rakiranaki afeekaikamasee urinaaqaraannoo.

## 111

### *Yaaweena amooqia.*

- 1 Yaaweena amooqiaqa.  
Qinee qeeqa qimuqusannai mina faiqi anaasee suqiranaki Yaaweenara dufi dufi qianaara.
- 2 Yaaweefa auqoo ainainausa naaquqarafa maridanoo.  
Mifa auquqoo ainainausa qafamasee asasi mariasa mi ainainausa oosanara iriraree qidaqa.
- 3 Aiqama ainaina Yaaweefa auqoo ainainafa areenarafa faqa uriqarara amiqi amiqirafa faqa kai maridanoo.  
Mina andeeqarafa naaru naaru marifa maridanoo.
- 4 Yaaweefa nari naaquqara ainaina auqamasee maasara sia qaunuaqee qidanoo.  
Mifa paapaa idanoo nifauee marifa maridanoo.
- 5 Yaaweenara qeerairida mina ufa qaindusi mariasa mifa narana nimidanoo.  
Mifa nari moodaanaki kira ufa sia qauni marifa naaruara irimarifa maridanoo.
- 6 Mifa anaamuru maqa maaqa nari faiqi anaasee nimirannai nari afeeka uqannifiqanau.
- 7 Mina aiqama ainaina auqaranaki mifa nari mapukira oosana faqa Yaaweefa nari asaukunnai auqai ainainafa mapukirafa faqa andeeqarafa amana amana kai rainara oosana faqaafa maridanoo.  
Mina aiqama naamuaqira ufa fannoo anoona ufa faiqi minasaa mundufi mariaqee ufa maridanoo.
- 8 Mi naamuaqira ufausa anoona ufa qiranasaa faqa andeeqara mariranasaa faqa mundinoo maridanoo, naaru naaru afeekaikinoo mariannoo.
- 9 Yaaweefa nari faiqi anaasee rumararakinaana idukuseenoo naaru marira moodaanaki kira ufa misa faqa qinau.  
Kaaqa naaquqara andeeqarafa faqa uriqarara afeeka faqaafa faqa marifa maridanoo.
- 10 Irirana faqaafa mariraree qimaseenana Yaaweenara eerairida mina ufa qaindusua.  
Mina naamuaqira ufara eedoo qimasee mi mau fimariasa mifa andeeqasee rainara oosana nimidanoo.  
Naaru naaru amooqirafa minaindi mariani.



## 112

### *Andeeqara fasiqa anaasee asasirafa.*

- 1 Yaaweena amooqiaqa.  
Yaaweenara eerairammasee mina ufamau fimarifa faqa mina sandufara  
asasammasee afaqee marifa faqa asasiranaki maridanoo.
- 2 Andeeqara fasiqa faiqi namu nariqa maqa maaqaki nimudaanai qimarin-  
ausa marifaranoo.  
Minasaa aruakinausa amiqi amiqiranaki marifaranoo.
- 3 Mi andeeqara fasiqana faiqi namu ainaina faqaasa arifaranoo.  
Mina ainaina faqa naaruara rairaammida mariannoo.
- 4 Andeeqarause faqa nifauee mariasa faqa qimudao qimariasa faqa  
asukunaki kaaqa qaranakiara foora miqi mariasa maridaqa.
- 5 Eedoo qimasee ufaasu munnimma nimirifa faqa nari bisinisa kuqaa  
qira irirana mau kai auqee mari fasiqafa faqa asasiranaki mari-  
danoo.
- 6 Andeeqee marifa sia kuridiannoo.  
Faiqi anaasee minara naaruara irifaranoo.
- 7 Mi andeeqara fasiqafa manda ufauqaindi irinoo sia rufiannoo.  
Mifa Yaaweena saqarikirafa afeekaikinoo marinara sia rufiaannoo.
- 8 Miqi marifa sia kaaqa amuqusifanoo rufiaidanoo.  
Mifa mariinoo nari namuqaa rafaafu nimaqainnana qafaannoo.
- 9 Mi andeeqara fasiqafa afaaridanoo sarauimariasa nimidanoo.  
Mina qimudao qirafa sia taikaannoo mi fasiqafa afeeka faqaafa marinaqa  
mina ufa ameemaanai keeqee faranoo.
- 10 Miqi marifaqa manda oosana maree mariasa mina qafaafanoo ni-  
ranaqaidanoo.  
Misa noori kandamasee fidiqaamma amaqaasee quqasee fidaqa.  
Manda oosana maree mariasa misa mi andeeqara fasiqana andaikamma  
amaqarara tipundarimariafa naaruara taikafuannoo.

## 113

### *Anutuna andeeqara oosanara amooqia.*

- 1 Yaaweena amooqiaqa.  
Innee Yaaweena ainainira faiqiuqa mina amooqiaqa.  
Yaaweena auqu amooqiaqa.
- 2 Maqee faqa naaru naaru faqa Yaaweena auqu amooqirafa kai mariani.
- 3 Suani ururee marinnai mariasa faqa suani keeqee marinnai mariasa faqa  
aiqamausa Yaaweena auqu amooqimamaqaaqa.
- 4 Mifa Yaaweefa aiqama maa maqa maaqanaki mariasa urinnaaqaranoo  
maridanoo rakisi nimaqaidanoo, mina qareenarafa innaaruna uri-  
aaqaranoo maridanoo.
- 5 Sia moo fannoo Yaaweena maasa Anutuna fooqaafa maridanoo.  
Mifa meerai innaaruna uraaqaranoo maridanoo.
- 6 Miqooqari mifa mara miami innaaruna faqa maqa faqa qafaidanoo.
- 7 Yaaweefa ainaina siaisa nikuqara madaanai marisa uqeereeqeenoo amiqi-  
raqoo quqannisaidanoo.  
Mifa sarau imariasa nari aupuraranakinaana uqeerannisaidanoo.
- 8 Uqeeraseenoo misa mareeqee uriqararause faiqi namu aqoondikamma  
nimaqaidanoo.  
Uqeerasaifaqa Yaaweena faiqi anaasee (Isaraee maqannaasa) uriqararause  
misa aqoondi kidaqa.

<sup>9</sup> Aafaikinoo marinna anaaseena Yaaweefa amiqimma amaqaseenoo.  
Faiqi aanaaqi aranandaki rumasaifanoo minara asacidanoo.  
Yaaweena amooqiaqa.

## 114

*Ainnaaqarara qoomaqa suqa naidaqa ree maru idifa.*

- <sup>1</sup> Isaraee maqannaasa Yakooboona akeeku akaaku aanaamuru maqa maaqa Isipa maqa maaqakiqari quqasee aniqau.
- <sup>2</sup> Miqiga ani marufanoo Yudana akeeku akaaku Yaaweena naaquqara fasiqa anaasee kammiqa mariqau.  
Isaraee maqannaasa Yaaweenaindi kammiqa mariqau.
- <sup>3</sup> Yaaweenaindi kiqa marufanoo Taatuqee Nammari misa nindafamasee quqasee sandanau.  
Yooradanna nammari faqa misa nindafeenoo kasooinau.
- <sup>4</sup> Maqa kasufanoo aaqanauqa faqa mimmi aanaaqiara foora kooripoo kooripoo imariqau.  
Kaqikaa amuaqu namuqaindi faqa sipsipa aanaaqiuqara maqi rafusaki rafusaki imariqau.
- <sup>5</sup> Oo maa Taatuqee nammari naqaa fee ifanee quqasee sandeenanee.  
Oo Yooradanna nammari anee faqa naqaa fee ifanee kasoo inanee.
- <sup>6</sup> Oo aaqana namuqa naqaa fee ifaqee mimmi aanaaqiara foora kooripoo kooripoo ifee.  
Oo amuaqunamuqaindi innee faqa naqaa fee ifaqee sipsipa aanaaqiara foora rafusaki rafusaki ifee.
- <sup>7</sup> Maa maqa maaqafa mina quqoofa qumiranara aindiri raani.  
Yakooboona Anutufa qumu marinara aindiri aindiri raani.
- <sup>8</sup> Mi Anutufa ooniara qufanoo quandaki nammari farumaikinau.  
Mifa qufanoo afeeka ooniuga aanaaqi nammariuga kammafi qumi mariqau.

## 115

*Anutufa kai kuqaa qirafa.*

- <sup>1</sup> Oo Yaawee sia maasa duqusaa qareenarafa mariani.  
Ani auqusaa kai qareenarafa marani.  
Ani sia taikaanina amuqusirafa faqa ani mapukusee marira oosana faqa marinara qareenarafa ani auqusaa mariani.
- <sup>2</sup> Aiqama maqannaasa nanaree maasara inni Anutufa yaiffee maridanoo fee qimasee iraidee.
- <sup>3</sup> Maasa Anutufa innaarunai maridanoo.  
Mifa nari aDIRAMAU fidanoo nari aidi ainanna auqaidanoo.
- <sup>4</sup> Misa aiqama anaamuru mariasa unnaqira anutusa faiqi faiqi nisaukunnai koori faqa siruaannoo faqa auquqaafa maridanoo.
- <sup>5</sup> Misa noo aamara marifaqa sia ufa qidaqa.  
Misa nifu faqa marifaqa sia qafaidaqa.
- <sup>6</sup> Misa naaqoo faqa marifaqa sia ufa iridaqa.  
Misa naikaamara faqa marifaqa sia udi ramasee qafaidaqa.
- <sup>7</sup> Misa nisauku faqa marifaqa sia auqama qafaidaqa.  
Misa niku faqa marifaqa sia nidaqa, sia kasi kasidaqa.  
Misa nisananda faqa marifaqa minakiqari sia ufa qidammia.
- <sup>8</sup> Mi ainainausa auqusee mina saqariki mariasa nariqa sia kasi mari anutuna aannaraqa mariaqanani.

- 9 Oo Isaraee maqannaasa innee Yaaweena mandaaqaqa.  
Mifa inni dadaaqinoo itita nimaqaidanoo.
- 10 Oo Isaree maqanna aanaiqikirausa nikeeku nikaaku mariasa innee Yaaweena mandaaqaqa.  
Mifa dadaaqinoo itita nimaqaidanoo.
- 11 Aiqama innee Yaaweena amooqi mariasa mina saqarikiaqa.  
Mifa inni dadaaqinoo itita nimaqaidanoo.
- 12 Yaaweefa maasara iridanoo amiqi amiqimma qimaqaannoo.  
Mifa Isaraee maqannaasa amiqi amiqimma niseenoo.  
Kafaa mifa aiqama nari aanaiqikirausa faqa amiqi amiqimma nimaqaannoo.
- 13 Yaaweenara naaquqaiifaqa mina ufa ameemaanai keeqee mariasa mifa amiqi amiqimma nimaqaannoo.  
Mifa uriqararasa faqa oorudupirasa faqa amana amana kai amiqi amiqimma nimaqaannoo.
- 14 Yaaweefa ani faqa ani akeeku akaaku faqa faiqi asumu nimiani.
- 15 Yaaweefa maa maqa maaqana faqa innaarunna faqa auqu quqaqoofa mifa inni amiqi amiqimma nimaqaani.
- 16 Innaaruna Yaaweenaindi kai maridanoo.  
Maa maaqana Yaaweefa faiqi faiqnimufa maridanoo.
- 17 Kuqufuasa sia Yaaweena amooqidammia.  
Ufa taikafifaqa madikaki kuqiqa mariasa sia Yaaweena amooqidaqa.
- 18 Maasa kaqi marunasa Yaaweena dufi dufi qimamaqaanaura.  
Maqee faqa naaru naaru faqa miqianaura.  
Yaaweena amooqiaqa.

## 116

### *Kuqiranakinaana mara asumu quqasoofa Anutuna amooqinau.*

- 1 Yaaweefa qini innaaru qirana iri marinara qinee minara ridaqa.
- 2 Mifa qini ufa aaqoo rammatinimmasee irimarinara qinee kaqi marunna kamu minara innaaru qianaura.
- 3 Kuqirafa qini fiqumma datinoo marinau.  
Kuqiranara rufiarafa qini qumara kuqiranaki quqararinau.  
Qini rufiarafa faqa qinunurirafa faqa qumbiqanoo marinau.
- 4 Qinee miqiqa maridaqa Yaaweena qeeqa qimuqusiranakiqari maaqi qimasee innaarukiqari qimamiqiafana.  
Oo Yaawee anee qini asumu mara quqaannee qidaqa.
- 5 Yaaweefa mifa nifauara oosana faqaafa faqa andeeqara oosana faqaafa faqa maridanoo.  
Maasa Anutufa faiqi faiqiara amuqusirafa qumbiqanoo marifa maridanoo.
- 6 Soodaa qirasa siaisa Yaaweefa ititannimaqaidanoo.  
Qinee kuqaqaa ira ummaaraki marunanoo Yaaweefa qini mareeqee amiqiraqoo quqaqiseenoo.
- 7 Yaaweefa qini amiqimma qimaqainara qini qimuqusa anee kafaa paa-soosida afaqa quqasee maria.
- 8 Yaaweefa qini kuqiranakinaana kaqinni mara quqaqiseenoo qini daukunu aadanusu qimaqaseenoo qini rafaqafu qimaqarariana ititaqimaqeenoo.
- 9 Miqimmasainara qini aiqama marirafa maa maqanasaaqaraasaki mariasa faqa maridaqa Yaaweena afusaa kai maridaqa.

- 10 Qinee qeeqara namuqaa kaaqa qini radamuseeafoo qimasee kaqi kai Yaaweena saqarikidaqa.
- 11 Qinee qeeqa rufiaranakiqari maridaqa maaqi qiqa. Sia faiqi faiqi moo saqariki mariafa maridanoo.
- 12 Yaaweefa qini amiqimma qimaqaina akiqara nana ainainee amianau-ree.
- 13 Yaaweefa qini asumu marainara dufi dufi qimamaqara wainna nammari tatufiranara foora amianaaura.
- 14 Mina faiqi anaasee suqirana qambaana qinee amiraree qimasee qima afeekai kammaqaafannana amianaaura.
- 15 Yaaweena ufamau fimariasa kuquafanoo Yaaweefa firaqoo aiaaeeqidanoo.
- 16 Oo Yaawee qinee ani ainainira faiqi maridaqa. Qinee qini qinoofa undee kai iqa ani ainainira faiqi maridaqa. Anee qini kuqiranaki quqaqoona mara qisoona maridanoo.
- 17 Qinee dufi dufi qirana faqa qeeqa innaaru qirana faqa aandai tatufiranara foora amianaaura.
- 18-19 Ani faiqi anaasee nifusaa ani naaquqara maaqa maqusasaa Yeerusa-ree maqusa qambaana Yaaweena amirara qima afeekaikiafanna ainaina amianaaura. Yaaweena amooqiaqa.

## 117

### *Yaaweena amooqia.*

- 1 Innee aiqama maqannaasa Yaaweena amooqiaqa. Innee aiqama fasiqa anaasee mina amooqiaqa.
- 2 Mina maasara adirafa afeekaikinoo maridanoo. Mina mapukusee marira oosana naaru naaru marifa maridanoo. Yaaweena amooqiaqa.

## 118

### *Rakirana uriaaqaroonara dufi dufi qira innaaru.*

- 1 Yaaweefa andeeqarafa marinara mina dufi dufi qimamaqaaqa. Mina faiqi aanaaseera adirafa naaru naaru marifa maridanoo.
- 2 Isaraee maqannaasa maaqi qiqa. Yaaweena faiqi aanaaseera adirafa naaru naaru marifa maridanoo.
- 3 Anutuna aanaiqikirausa mariasa maaqi qiqa. Yaaweena faiqi aanaaseera adirafa naaru naaru marifa maridanoo.
- 4 Aiqaama mina amooqimariasa maaqi qiqa. Yaaweena faiqi aanaaseera adirafa naaru naaru marifa maridanoo.
- 5 Qeeqa teerookiqari Yaaweena aaraafanoo mifa iriseenoo qini oosana oosana teerookinaana idukuqisanau.
- 6 Yaaweefa qini faqa marinara sia qinee rufiaanaura. Moo fannoo sia amana mandaikamma qimaqaannoo.
- 7 Yaaweefa dadaqi marifa marinara qinee Yaaweefa qini namuqaauqara faaqafu nimaqee marina qafaanaura.
- 8 Yaaweena saqarikirafa amiqirafa uriqarafa maridanoo. Faiqi faiqisaa mundirafa ureeqanoo maridanoo.
- 9 Yaaweena saqarikirafa amiqirafa uriqararafa maridanoo. Faiqi faiqi uriqararausasaa mundirafa ureeqanoo maridanoo.
- 10 Moomoo namuqaauqa qini darirara fiqumma fufaqa qinee Yaaweena afeekannai misa naru taikaqafana.

- 11 Misa qini fiqumma aiqamai datimma fufaqa qinee Yaaweena afeekannai misa naru taikaqiafana.
- 12 Qini namuqaauqa nunukara foora qini fiqumma faifu idafa qausana qoomara foora fasa fasi marufaqa qinee Yaaweena afeekannai misa naru taikaqiafana.
- 13 Qini namuqaauqa qini darusee rafaqa firarufanoo Yaaweefa qini dadaaqa uqeeranau.
- 14 Yaaweefa qini afeekaikirana faqa nimudaanai qirana faqa qimidanoo. Mifa qini mandainaina kinaana uqera qiseenoo.
- 15 Yaaweena rakira fasiqauqa uqaana maaqaki اساسida qufoona rida qiana iriaqa.
- Yaaweena uriqarara afeeka fannoo miqidaqinoo iriaqa.
- 16 Yaaweena afeeka fannoo rakiranaki uriqararana maasa qiminou. Mina uriqarara afeeka maasa dadaaqifaqa rakirana uriqareeqa.
- 17 Qinee sia kuquanaura.
- Qinee kaqi maridaqa Yaaweefa dadaaqa oosanara koorooianaura.
- 18 Yaaweefa qini firaa ummaara qimiseenoo qini kuqiranasaa ititaqiseenoo.
- 19 Naaquqara amaana maqa kooqiuqa atuqisaqa.
- Qinee minaki keeqafi Yaaweenara dufi dufi qianaaura.
- 20 Mi kooqifa Yaaweefinnai fimaria kooqifa maridanoo. Andeeqarusa kai minaki keeqefaranoo.
- 21 Anee qini innaaru qirana irisee dadaaqa mariannanara ani Yaaweena amooqidaqa.
- Anee rakirana uriqararana qimiannanara ani amooqidaqa.
- 22 Maaqa usakee mariasa afeeka sabeena minnisooqa innaaqianna aiqama sabeenauqa uriqararafa marinou.
- 23 Yaaweefa kai mi ainainna auquqoofaqa qafaidaqa idaaqira ainainee qidaqa.
- 24 Yaaweefa maa faasaanna rakiranaki uriqaree mari faasaanafa maridanoo.
- Miqunara maasa اساسidaqa idi raaqanani.
- 25 Oo Yaawee maasa mareeqee amiqira qoo quqaqisaa. Anee qiqama ainaina anoonaikamma qimia.
- 26 Yaaweena auqusa animari fasiqana Yaaweefa amiqi amiqimma-maqaani.
- Maasa Yaaweena naaquqara amaana maqakiqari inni amiqi amiqimma nimaqaidaqa.
- 27 Yaaweefa mifa Anutufa maridanoo. Mifa maasa amiqimma qisee marinou.
- Innee aiqamausa suqufiqa saqari amanee raudasee uqirauasa اساسamma-maree amaana maqaki keeqafi aidara fiqumma iafa.
- 28 Oo Yaawee anee qini Anutufa marianaqa minara qinee ani dufi dufi qimamaqaidaqa.
- Qinee ani uriqararanara kooroo ianaura.
- 29 Yaaweefa andeeqarafa marinara mina dufi dufi qimamaqaaqa. Mina faiqi anaaseera aidirafa naaru naaru marifa maridanoo.

## 119

### *Yaaweena sandufa.*

- 1 Aaqara oosana sia mari marirana faqaasa اساسidaqa. Yaaweena sanda ufamau fimariasa faqa اساسidaqa.

- 2 Yaaweefa naamuaqira ufamau fimariasa اساسیداقا.  
Nariqa nimuqusannai mina ufa afaqee mariasa اساسیداقا.
- 3 Miqi marinausa sia moo aaqara oosana maraidammia.  
Misa Yaaweena aatata fimariasa maridammia.
- 4 Oo Yaawee anee aneenna sanda ufa maasa qimiseenana mapukusee  
andeeqasee aiqama afaqaaqee qimasee qimannimianau.
- 5 Qinee ani naamuaqira ufa afaqaidaqa mapukusee marianauree qidaqa  
iridaqa.
- 6 Qinee ani sanda ufa aiqama kasoommafi iriaraasidaqa.
- 7 Qinee ani andeeqara rainannimaqaranara iriseeqa qeeqa anukara  
qimuqusannai ani amooqianauranoo.
- 8 Qinee ani naamuaqira ufa mau fuanaura.  
Anee Yaaweefa sia qini minniqisaa.
- 9 Naqi masee fee kumaaraa fannoo nari marirana maqee maqee anukaida  
mariannoo fee.  
Ani Yaaweena ufamau fimarianannai miqiannoo.
- 10 Qinee qeeqa qimuqusannai ani ufa qaindusiraree qidaqa amanidaqa.  
Ani sanda ufa rukiaranasaa anee qini ititaqisaa.
- 11 Qinee ani naamuaqira ufa qumareeqa qeeqa qimuqusaki quqaseeqa sia  
ani mandaikamma amaqaanaura.
- 12 Oo Yaawee qinee ani amooqidaqa.  
Aneenna oosanara qimaqimia.
- 13 Anee qimunna sanda ufausa kafaa kafaa firaaqoo nameera qidaqa  
qimannimianaura.
- 14 Qinee ani sanda ufamau firanara didimarifaqa asasi marunafa moomoo  
umiasana ainainara اساسimarunnana faqa uraaqaranoo maridanoo.
- 15 Ani naakapara ufa qinee aiuqimarunausa maridaqa.  
Ani qimannimira ufauqa amiqimmasee asooki rimarunausa maridaqa.
- 16 Qinee ani sanda ufara اساسیداقا.  
Qinee ani naamuaqira ufara sia qaunusee mana mana ianaura.
- 17 Qinee kaqi maridaqa ani qimannimira ufamau fuaneera aneenna  
ainainira faiqi qini amiqimma qisaa.
- 18 Oo Yaawee ani naaquara anoona ufa qirana ani sanda ufaki marina  
irianeera qini irirana atuqasainaqqa irianaura.
- 19 Qinee maa maqanasaa qusasaa marianauranoo.  
Sia aneenna sanda ufa qini kukeeqa qimaqaa.
- 20 Qinee qinunu rimarunanoo didafidanoo.  
Ani rainannimaqara ufara aiqama kari iriraree qimasee aupuraidaqa.
- 21 Oo Yawee nari nimoo naamoo qimariasa anee aanoommasee qaoo  
qimarianafa mariananoo.  
Ani naamuaqira ufa rukiasee kaqi runna fimariasa ani niqurara ufa  
ameemaanai maridaqa.
- 22 Qinee ani sanda ufauqa afaqee marunausa marunannara misa ataasa  
ataasa qima qimaqaranakinaana faqa aasaandaana ufa qima qi-  
maqaranakinaana faqa iduku qisaa.
- 23 Uriqararausa moodaanaki suqufiqa qini mandaikamma qimaqarara  
tipundaari mariafaqa qinee sia minara irianaura kaqi ani naakapara  
ufa asaana rumasee irianaura.
- 24 Ani naakapara ufauqa qini didirana qimidammia.  
Mi ufausa qini daakapee mariasa maridaqa.
- 25 Qinee kookoommaki rafaqa fusaafaqa kuqiraridaqa.

- Anee aneenna qima afeekaika maqoonandee inana qini uqeera qisaa.
- <sup>26</sup> Oo Yaawee qinee qeeqa mariranara kooroommasee qimamunana anee iriseenana qima qimiananoo.  
Aneenna oosana qima qimia.
- <sup>27</sup> Qini dadaaqinaqa ani sanda ufa oosanara amiqimasee iria.  
Anee miqinaqa qinee ani naaquqara naakapara ufara indee indee ida marianaaura.
- <sup>28</sup> Oo Yaawee qiqa qimudao qirafa qiqa rafaafidanoo.  
Aneenna qima afeekaikamma qoonandee inana afeeka qimia.
- <sup>29</sup> Anee unnaqira aatata fira oosana ititaqisaa.  
Aneenna amiqi amiqira nakiqari aneenna sanda ufa daamuaqia.
- <sup>30</sup> Qinee andeeqara aatata kai fuanaree qimasee utaaqeeqa.  
Qinee ani rainannimaqara ufa amiqimmasee iriqa.
- <sup>31</sup> Qinee ani Yaaweena naakapara ufa afaqee marunausa marunnanara anee sia qisauriranaki quqaqisaa.
- <sup>32</sup> Anee irirana moo faqa moo faqa qimiannanara ani naamuaqira ufa mau asasamasee fidaqa.
- <sup>33</sup> Oo Yaawee aneenna sanda ufa oosana daamuaqinaqa qinee naaru naaru mi mau kai fuanaura.
- <sup>34</sup> Anee irirana qiminaqa ani sanda ufa oosana irisee mi mau fuanaura.  
Qeeqa aiqama qimuqusannoo afaqaanaura.
- <sup>35</sup> Anee dadaaqinaqa ani sanda ufa kooroo imari aatata fua.  
Qinee minaki asairana paquri marunnanara minaki fuanaura.
- <sup>36</sup> Anee qini didirana mareeqeenana aneenna sanda ufamau firatinai ubeekama qisaa.  
Moomoo qumiasana faqaasaikiqa marira oosanai sia ubeekama qisaa.
- <sup>37</sup> Oo Yaawee anee qini dadaaqinaqa anoona siai ainainaki sia fua.  
Anee qima afeekaikunandee inana amiqi amiqimma qisaa.
- <sup>38</sup> Oo Yaawee ani ufa mau fimariasara qima afeekaikunandee kai inana qini aneenna ainainira faiqi mi qima afeekaikirana qinisaa faqa quqasainanoo anoonaikiani.
- <sup>39</sup> Qini aasaandaana ufa qimi mariafaqa rufiaqa nimarunnanakinaana anee uqeereeqee kaqinni quqaqisaa.  
Ani andeeqara rainannimaqara ufa naaquqarafa maridanoo.
- <sup>40</sup> Oo Yaawee ani naamuaqira ufa mau firara dididanoo.  
Anee andeeqarafa mariannanara fuka marirana qimia.
- <sup>41</sup> Oo Yaawee ani qiniara firaqoo aidi marina uqaqifiqainaqaa qafaa.  
Aneenna qima afeekammaqoonandee inana qini mandainainakinaana uqeera amiqiraqoo quqaqisaa.
- <sup>42</sup> Miqimma sainaqa qini aasaandaana ufa qimimariasaa qimannimianaaura.  
Qinee ani ufa saqariki marunnanara qimannimianaaura.
- <sup>43</sup> Anee afeeka qiminaqa anoona ufa kai aiqama kari qia.  
Qini irirafa ani rainannimaqara ufasaa mundinoo marinara miqianaaura.
- <sup>44</sup> Aiqama kari qinee ani sanda ufamau naaruara naaruara fuanaura.
- <sup>45</sup> Qinee ani naakapara ufamau firara amanamasee qafee marunnanara qinee adaarasaqanna idukiranaki marianaaura.
- <sup>46</sup> Qinee ani naamuaqira ufa uriqararawsa kooroommasee qimannimianaaura.  
Qinee miqi qimasee qimannimidaqa sia qisauruanauranoo.
- <sup>47</sup> Qinee ani naamuaqira ufara didimarinara mimau fidaqa asairana paquridaqa.
- <sup>48</sup> Qinee ani naamuaqira ufara didi marifaqa qeerairidaqa.

- Qinee miqidaqa ani naakapara ufara maqee maqee indee indee idaqa.
- <sup>49</sup> Anee qini aneenna ainainira faiqiara qima afeekaika maqoonnara oonumafi iria.  
Mi ufafa qini pooduqama qimaqeemarifa maridanoo.
- <sup>50</sup> Ani qima afeekaikira ufa fannoo qini kaqimarirana qimi marinara qeeqa aupuraranaki maridaqa qifaaqa asooarana mareeqa.
- <sup>51</sup> Nári nimoo naamoo qimariasa aiqama kari ataasa ataasa ufa qima qimaqaidammia.  
Miqi mariafaqa qinee ani sandufa sia minnisee moo saa fiqa.
- <sup>52</sup> Oo Yaawee oogai aneenna rainannimaqara ufara qunaqa kaqi iridaqa.  
Mi ufafa qini qifaaqa asooarana qimidanoo.
- <sup>53</sup> Mandoosana maree mariasa ani sanda ufa rukiaafaqa qinee niqafau-nanoo qirana qarafa qiniki qumbiqaidanoo.
- <sup>54</sup> Qeeqa qusasaa maa maqanasaa mariranaki ani naamuaqira ufasaa quandasee idiridaqa.  
<sup>55</sup> Oo Yaawee eendaki aniara iridaqa.  
Ani sanda ufara faqa iridaqa.
- <sup>56</sup> Ani naamuaqira ufamau funnanannoo اساسirana paquridaqa.  
<sup>57</sup> Oo Yaawee qini aiqama didirafa anee kai mariananoo.  
Qinee ani sanda ufa afaqaanauree qimasee qima afeekaikiqa.
- <sup>58</sup> Qinee qeeqa aiqama qimuqusanoo anee qima afeekaikunandee inana qifauama qimaqaanneera iridaqa.
- <sup>59</sup> Qinee qeeqa marira oosana oonumafi iriseeqa quandaki anee qiman-nimira ufa mau firaree qimasee qima afeekaikidaqa.
- <sup>60</sup> Qinee ani naamuaqira ufamau firaree qimasee sia manoo maanaa idaqa kai kaqi idaqa.
- <sup>61</sup> Manda oosana maree mariasa qini qiku ufana fufusee qiniara minaki aruanifee qiafaqa qinee ani sanda ufa sia qauniqa mimau kai fidaqa.
- <sup>62</sup> Enda amuqusai qinee findifiqa ani andeeqara rainannimaqara ufara amooqidaqa.
- <sup>63</sup> Qinee ani ainaini mariasa faqa ani sanda ufamau fimariasa niqoondi maridaqa.
- <sup>64</sup> Oo Yaawee ani sia taikaaninna amuqusirafa maa maqa maaqana qumbiqanoo maridanoo.  
Miqinoo marinara anee aneenna naamuaqira ufa daamuaqia.
- <sup>65</sup> Oo Yaawee anee aneenna qima afeekaikira ufa mau finana qini amiqi amiqimma qimaqaananoo.
- <sup>66</sup> Qinee ani sandufa saqariki marunnanara anee oosana oosana irirana rainara iriqaraasirana faqa oonumafi irirana faqa qimia.
- <sup>67</sup> Qinee indaaruu kaqirunna fimariafanana anee Yaaweefa anee firaa ummaara qimunaqa maqee qinee quandaki ani ufamau fidaqa.
- <sup>68</sup> Anee kaaqa andeeqarafa mariannanara aiqama ainaina imarianna ainainafa faqa kaaqa andeeqarafa mariananoo.  
Aneenna naamuaqira ufa daamua qia.
- <sup>69</sup> Nári nimoo naamoo qimaria fasiqausa qiniara unna ufa qimariafaqa qinee qeeqa aiqama qimuqusanoo ani qimannimira ufa mau fidaqa.
- <sup>70</sup> Mi fasiqausa irirana siaisa mariafaqa qinee ani sanda ufaki اساسirana paquridaqa.
- <sup>71</sup> Oo Yaawee dufi dufi qiqa manda oosana akiiqara darimarianafa mifa qini dadaaqinara ani naamuaqira ufa oosana iridaqa.
- <sup>72</sup> Anee qimianna sanda ufanara didirafa oosana firaafa fiqarara fee qidaqa.



- Maa maqanasaa aiqama munnima marina uraaqaranoo maridanoo.
- <sup>73</sup> Anee qini auquseenana qini afeedamma qisaananoo.  
Anee irirana oosana qiminaqa ani sandufa irianaaura.
- <sup>74</sup> Qinee ani qima afeekaikira ufa saqariki marunannara aniara qeerairida ani ufa qaindusi mariasa qini qiqaqamasee asasifaranoo.
- <sup>75</sup> Oo Yaawee ani rainannimaqara ufa andeeqarafa marifaqa qinee iridaqa. Anee mapukusee marira oosana faqaafa mariannanara anee aupurarana qini manda oosana akiqara qimiananoo.
- <sup>76</sup> Aneenna ainainira faiqi qinisaa qima afeekaikamma qoonnamau finanoo ani sia taikaaninna amuqusirafa qini qifaaqa asoama qimaqaani.
- <sup>77</sup> Qinee ani sanda ufara asasimarunannara qifauama qimaqaa.
- <sup>78</sup> Nári nimoo naamoo imariasa unna qimasaida qini kiki qusi marianara nisauriranaki mariaqanani.  
Qinee qeeqaraa ani qimannimira ufara indee indee ianaura.
- <sup>79</sup> Ani Yaaweenara qeerairida ani ufa qaindusi mariasa faqa ani naamuaqira ufa irimariasa faqa qinee unnannai aniaqanani.
- <sup>80</sup> Qinee andeeqasee ani naamuaqira ufamau fuaqaana, miqi mariaanoo aaqara qisaurirafa sia qini rafaqaqafu qisaani.
- <sup>81</sup> Oo Yaawee qinee ani dadaaqiranara kisaagasaa rakisunaisia kudoosaa-paidaqa.  
Qinee qeeqa saqarikirana ani ufasaa rusidaqa.
- <sup>82</sup> Ani qima afeekaikiranara qinee rakisida marunanoo qifu anauru idaqaenoo.  
Qinee iraanana anee yairee fee qini dadaaqinnaree.
- <sup>83</sup> Qinee mimi apatannoo nammari sakee mariana auquqaafa anaqinoo mandaikinoo marindee irausa maridaqa.  
Qinee miqiqa maridaqa sia ani naamuaqira ufa aunidaqa kaqi maraqa fidaqa.
- <sup>84</sup> Qinee kisaagasaa fee rakisianauree.  
Yairee fee anee qini dari mariana akiqara ummaara niminnaree.
- <sup>85</sup> Nári nimoo naamoo imaria fasiqausa sia ani sanda ufamau fimariasa qini qumararara dikaanda indufidaqa.
- <sup>86</sup> Ani aiqama naamuaqira ufa nifaaqa quqee maria afeeka ufafa maridanoo.  
Faiqi misa unna qimasee darirari marianara anee qini dadaqia.
- <sup>87</sup> Misa qini darirara qimeekaidaqa.  
Misa miqi mariafaqa qinee ani naamuaqira ufa sia minnisaidaqa.
- <sup>88</sup> Ani sia taikaaninna amuqusirafa marinara anee amiqi amiqimma qi-maqaa.  
Qinee ani sandufamau fuaneera miqimma qimaqa.
- <sup>89</sup> Oo Yaawee ani ufa naaru naaru marifa maridanoo.  
Innaarunai faqa naaru naaru marifa maridanoo.
- <sup>90</sup> Ani mapukusee marira oosana fannoo miqikai inoo naaru naaru marianoo.  
Anee maa maqa maaqana quqaqoonnaqoo kai maridanoo.
- <sup>91</sup> Ani naamuaqira ufa marinara aiqama ainaina maqee kaqi maridanoo.  
Mi aiqama ainainausa ani ainainira faiqiara foora marianara maqee kaqi maridaqa.
- <sup>92</sup> Ani sanda ufa sia qini asasirana oosana marinaqau qinee qeeqa umaara ameemaanai kuqunaiqini.
- <sup>93</sup> Qinee sia ani naakapara ufa qaunuanaura.

- Mi ufafa marinara minannai qini kaqi marirana maa maqanasaa qimi-  
ananoo.
- 94 Oo Yaawee qinee anindi maridaqa, qini dadaqia.  
Qinee ani naamuaqira ufamau firaree qidaqa amanidaqa.
- 95 Mandoosana maree maria fasiqausa qini darirara qimaarusidaqa.  
Misa miqi mariafaqa qinee ani sanda ufara kai indee indee idaqa.
- 96 Oosana oosana aiqama ainaina taikaaninafauga kai marifaqa iridaqa.  
Miqinoo marifanoo ani naamuaqira ufa andeeqarafa sia taikaaninafa  
marifa maridanoo.
- 97 Oo Yaawee ani sandufara qinee firaqoo ridaqa.  
Qinee faasaambaasaana minara kai iridaqa.
- 98 Ani naamuaqira ufa fannoo qini faqa aiqama kari maridanoo.  
Qini amiqira irirana qimiseenoo qini namuqaa irirana uriqararau-  
saikamma qimaqaidanoo.
- 99 Qinee ani qimannimira ufa indee indee imarunnnanara qeeqa daakapee  
mariasa faqa urinnaaqaramasee iridaqa.
- 100 Qinee ani Yaaweena naamuaqira ufa mau fimarunnnanara qini irirafa  
faiqi firaasa irirana urinnaaqaraidanoo.
- 101 Qinee ani ufamau firaree qimaseeqa aiqama mandainainara qeerairam-  
masee amaaridaqa.
- 102 Oo Yaawee anee aneenna kai qini daakapee marianafa mariannanara  
qinee sia ani naakapara ufa qimeesa uqidaqa.
- 103 Ani naakapara ufa kaaqa adiafaaimarifa maridanoo.  
Mi adiafaairafa ookasaasa anoona kaaqa adiafaa imarina faqa arusee  
uriqaranoo maridanoo.
- 104 Qinee ani sanda ufa irisee minannai amiqira irirana maraidaqa.  
Miqinoo marinara aiqama kaqi runna fimaria aanausara qini fidiqaamma  
qimaqaidanoo.
- 105 Ani ufa fannoo qini qikuki qoomara foora kaaqa qee marifaqa fidaqa.  
Ani mi ufafa kai qini aana kaaqa qama qimaqee marifaqa fidaqa.
- 106 Qinee ani andeeqara sandufara doori runusee qima afeekaikammasee  
naaru naaru mimau fuanauree qiafannana, maqee kuqaa mi mau  
kaimbuanaura.
- 107 Oo Yaawee qinee firaa aupuraranaki maridaqa anee aneenna qima  
afeekaikunnandee inana maa maqanasaa kaqi marirana qimia.
- 108 Oo Yaawee, qini dufi dufi qira innaaru qiranara eedoo qimasee aneenna  
naamuaqira ufa qima qimia.
- 109 Qinee aiqama kari kuqirana afaisaa maridaqa taikaranara deedaqidaqa.  
Miqiqa maridaqa qinee sia ani sanda ufara qaunidaqa.
- 110 Mandoosana maree mariasa misa qini qimaara ufaanara foora fu-  
fusaafaqa qinee sia rufiamaree ani naamuaqira ufasaqari kaqini  
fiqa.
- 111 Ani naamuaqira ufa qini naaru marira qumiasanara foora maridanoo.  
Mi ufausa qini qimuqusa asasirana qimi maria ufausa maridaqa.
- 112 Qinee ani sanda ufa mau fuanauree qimasee iridaqa.  
Ani sandufa mau fifi inaqa qeeqa kuqiranaki munu taikaanaura.
- 113 Ani sandufamau sia aiqama kari fimariasara qinee fidiqaammidaqa.  
Miqidaqa ani sandufara kai qinee ridaqa.
- 114 Oo Yaawee anee qini itita qimaqee marianafa mariananoo.  
Minara qinee qeeqa irirana ani qima afeekaikiranasa rusisee maridaa.
- 115 Innee mandoosana maree mariasa qini daaqaqari nianasaa fifuaqa.  
Qinee qeeqa Anutuna naamuaqira ufamau fuanaura.

- 116 Oo Yaawee anee qima afeekaikunandee qinana afeeka qiminaqa kaqi maa maqanasaa marianauro.  
Anee dadaaqinanoo qini daundura anisaa mundirafa sia taikaannoo.
- 117 Anee qini qumaree uqeera qisainaqa qinee amiqiraqoo marianauro.  
Anee miqimma qisainaqa qinee aiqama kari ani naamuaqira ufasaa irirana rusianauro.
- 118 Ani sanda ufa rukiee mariasa anee mininnisee mariananoo.  
Misa ueeqarara tipundaarirafa fifau sia anoona marifa maridanoo.
- 119 Anee maa maqanasaa mandoosana maree mariasa madaapeera foora damunamma aqi marianafa mariananoo.  
Qinee minara ani naakapara ufara dididanoo.
- 120 Qinee aniara rufiidaqa.  
Qinee ani andeeqasee rainannimaqaranara irunanoo rufiarafa qini qumbiqa qimaqaidanoo.
- 121 Qinee andeeqara oosana faqa amiqira oosana faqa maree marunausa maridaqa.  
Anee minara iriseenana sia qini minni qisainaqa namuqaa qini mandaikamma qimaqaaqa.
- 122 Anee kuqaa qima afeekaikammasee aneenna ainainira faiqi qini dadaaqia.  
Ramoo ramaa imariasa sia qini nari uriqararanannai rafaqafu qimaqaaqa.
- 123 Oo Yaawee qinee ani asumu mara qimaqaranara kisaqasaa rakisidaqa marunanoo qifuki qaunduaridanoo.  
Anee qini namuqaa nisaukukinaana rafiaranara qima afeekaikamma goonnanara afeesi marunanoo qifuki qaunduaridanoo.
- 124 Oo Yaawee aneenna sia taikaaninna amuqusirana amana kai qini amiqimma qimaqasee aneenna naamuaqira ufa daamua qia.
- 125 Oo Yaawee qinee ani ainainira fasiqa maridaqa anee irirana oosana qiminaqa qinee ani naamuaqira ufa oosana irianauro.
- 126 Oo Yaawee faiqi anaasee ani sandufa rukieemarianara anee oosana uqannifiqara aukwana doo kambiqaidanoo.
- 127 Ani naamuaqira ufara qini didirafa koora uraaqaranoo maridanoo.  
Kaaqa amiqira koora uqanna faqa uraaqaranoo maridanoo.
- 128 Minara qinee ani aiqama naakapara ufa afaqaidaqa aiqama aaqara oosanara fidiqaa idaqa.
- 129 Ani naakapara ufa kaaqa amiqirafa marifaqa qinee qeeqa qimuqusa aiqamannoo afaqaidaqa.
- 130 Ani naakapara ufa oosana qimannimirafa kaaqa qarana nimidanoo.  
Mi ufafa sia iri mariasa irirana nimidanoo.
- 131 Ani naamuaqira ufa aniranara kisaqasaa rakisidaqa doo raqasee daannanai daannanai qida maridaqa.
- 132 Anee aniara rimamasara misa nifauee marianafa mariananoo.  
Anee qinee unnannai quandafi qini faqa qifauama qisaa.
- 133 Aneenna qima afeekaikunandee qinana qini saamuriranasaa itita qisaa.  
Anee qinanoo aaqara oosana fannoo sia qini rafaqaa fu qimaqaani.
- 134 Faiqi misa nari uriqararanannai qini rafaqafidammia, anee minaki-naana qini mara qisaa.  
Miqimma sainaqa qinee ani naamuaqira ufa mau fuanaura.
- 135 Anee aneenna oori afu amiqi amiqiranannai qini amiqimma qimaqasee aneenna sanda ufa daamuaqia.
- 136 Faiqi anaasee ani sandufa mau sia fuanara qini daukunu fannoo nammariara foora adiaidanoo.

- 137 Oo Yaawee anee kaaqa andeeqarafa mariananoo.  
Ani sandufa faqa aiqamausa amana amana kai andeeqa nimaqee marifa maridanoo.
- 138 Ani aataata fuaqee ufa fannoo kaaqa amana amana kai andeeqa nimaqee marifa maridanoo.
- 139 Qini namuqaa ani naamuaqira ufa minnisee mana mana imarianara qini aanoo qirafa idara foora qini qitaku qidanoo.
- 140 Ani qima afeekaikira ufa kaaqa mapukirafa maridanoo.  
Minara qini kaaqa dididanoo.
- 141 Qinee oorudupirauusa marunaqa misa qiniara fidiqaaidaqa.  
Miqi mariafaqa qinee sia ani naamuaqira ufara mana manamasee qau-nidaqa.
- 142 Oo Yaawee ani andeeqarafa naaru naaru mariannoo.  
Ani sandufa faqa aiqama kari kuqaa anoona maridanoo.
- 143 Ummaara faqa inunurirafa faqa qiniki qumbiqaidanoo.  
Miqi marifanoo ani naamuaqira ufa fannoo اساسirana qimidanoo.
- 144 Ani naakapara ufa aiqama kari amana amana kai andeeqannimaqee marifa maridanoo.  
Minara iriseenana anee irirana oosana qiminaqa maa maqanasaa kaqi marianaaura.
- 145 Oo Yaawee qinee qeeqa qimuqususannai ani aaraidaqa.  
Qini nammeera qiranara qima qiminaqa qinee ani naamuaqira ufa mau fuanaura.
- 146 Qinee ani aaraidaqa qini mandainainakinaana uqeera qisainaqa qinee ani sanda ufa afaqaanaura.
- 147 Suani afu maqee urimarinana, anee qini dadaaqianneera aaraidaqa.  
Qinee qeeqa irirana ani qima afeekaikira ufasaa quqasee maridaqa.
- 148 Maqee eendirana namu faqa kaqi marunanoo qifu faqbaqa iaqaqai faqa ani naakapara ufauqara oonu mafi iridaqa.
- 149 Oo Yaawee ani sia taikaaninna amuqusirafa marinara qini innaaruqirana iria.  
Aneenna nifauarana uqaqifiqasee qini marirana afeedamma qisaa.
- 150 Nidafirana faqa narirana faqa qimi mariasa adeedi anidaqa.  
Misa ani sanda ufa sia afaqee mariasa maridaqa.
- 151 Miqi mariafana anee Yaaweefa qini daaqa mariananoo.  
Ani aiqama naamuaqira ufauqa naaruara marifa maridanoo.
- 152 Qinee ooqai ani naakapara ufa iriqiafana.  
Mi ufausa anee qunaqa naaru marira ufauqaika mafiqau.
- 153 Qini aupurarana qafamasee minakinaana qini maraqisaa.  
Qinee sia ani sandufa qaununnanara miqimma qisaa.
- 154 Qinee ufaki marunnana ititaqimaqasee qini idukuqisaa.  
Anee aneenna qima afeekaikunandee inana qini amiqiraqoo mara quqaqisaa.
- 155 Manda oosana maree mariasa misa ani sanda ufa mau sia fimariasa anee sia mareeqee amiqira qoo quqanniseennaranoo.
- 156 Miqi mariafana oo Yaawee anee qiniara amudaaoo qirafa firaqoo marinara aneenna nifauarana uqaqifiqasee mareeqee amiqiraqoo quqaqisaa.
- 157 Qini namuqaauqa ummaara qimi mariasa moomoo maridaqa.  
Misa miqiqa mariafaqa qinee sia ani sandufasaaqari quandaki moosaa fiqa kaqi mi mau kai fidaqa.

- 158 Ani sanda ufa minnisee ueeqee mariasa qinee niqafamasee fidi-aqaamma nimaqaidaqa.  
Sia ani naamuaqira ufa mau fimarianara miqidaqa.
- 159 Oo Yaawee doo qafaa, ani naakapara ufara firaaqoo dididanoo.  
Ani aidirafa sia moosaa fimarinarara mariqoo kai marinara qini marirana afeedamma qisaa.
- 160 Ani sanda ufa oosana anoona maridanoo.  
Marifanoo ani aiqama andeeqara rainannimaqara ufafa naaru naaru marirafa maridanoo.
- 161 Misa faiqi uriqararawsa misa fifau qini mandaikamma qimaqaidaqa.  
Misa miqi mariafaqa qinee ani sanda ufara kai qeerairammasee qainusidaqa.
- 162 Qinee ani qima afeekaikira ufara firaaqoo asasidaqa.  
Mee faiqi moo fannoo koorara paqurimmasee asasindee qinee faqa miqi kai masee ani ufara asasidaqa.
- 163 Qinee aiqama unna ufara qikooqeenoo fidiqaa uqanna qidaqa.  
Miqi marunanoo ani sanda ufara kai dididanoo.
- 164 Qinee aiqama faasaana moodaanai qisauku taikasee dinni oonu qaaraqanda marasee kari ani andeeqara rainannimaqaranara dufi dufi qimamaqaidaqa.
- 165 Ani sandufara nidi marisa asoaranaki maridaqa.  
Sia moo ainaina fannoo nikuama nimaqaa saamurifaranoo.
- 166 Oo Yaawee anee qini asumu mara qisaanneera afeesidaqa anee daamuaqianna mau kai fidaqa.
- 167 Qinee ani naakapara ufa mau fidaqa.  
Qinee qeeqa aiqama qimuqusanoo minara dididanoo.
- 168 Qinee ani naamuaqira ufa faqa ani naakapara ufa mau fidaqa.  
Qinee aiqama ainaina auqee marunnana anee qafee mariananoo.
- 169 Oo Yaawee qini nammeera qirafa anee iannannai oorufuani.  
Aneenna qima afeekaikunandee inana irirana oosana qimia.
- 170 Qini innaaruqirana irisee aneenna qima afeekaikammaqoonnana amana kai mara amiqira qoo quqaqisaa.
- 171 Anee aneenna sanda ufa qima qimiannanara qinee aiqama kari ani amooqianaura.
- 172 Ani naamuaqira ufa aiqamausa andeeqasee raina nimaqee marifa marinara ani sanda ufara idi raanaura.
- 173 Qinee ani naamuaqira ufa afaqee marunnanara aiqama kari qini dadaaqirara deedaqina maria.
- 174 Oo Yaawee qinee ummaaraki marunnanara firaaqoo ani afeedamma qimaqaranara rakisidaqa.  
Qinee asasirana ani sandufaki paquridaqa.
- 175 Anee maqee marirana qiminaqa amana qinee ani amooqianaura.  
Ani naakapara ufa fannoo qini dadaaqamma qimaqaani
- 176 Qinee auiara sipsipara foora auiqa nidaqa.  
Qinee sia ani sandufa qimeesu uqimarunnanara anee aniree qini aneenna ainainira faiqi randasee paquria.

## 120

### *Dadaaqiani fee innaaru.*

- <sup>1</sup> Qinee manda ummaaraki maridaqa Yaaweena aaraunanoo mifa eedoo qimasee dadaaqinoo.

- 2 Oo Yaawee unnaqimariasa faqa ueeqee mariasa faqa nisaukukinaana mareeqee kaqinni quqaqisaa.
- 3 Innee unna qimariasa Anutufa inni naqaa fee mannimaqaannoo. Mifa naqimmaseenoo fee inni aupurarana nimiannoo fee.
- 4 Sundia rakira feefannoo faqa fidika arira idaurunnai faqa naruannoo.
- 5 Inni qambaana marirafa kaasau maqanna aamina maqannaasa qambaanara foora mandaikiqa maridaqa.
- 6 Qinee asoaranara fidiqaa imariasaki kisaagasaa uqanna mariaafanausa maridaqa.
- 7 Qinee asoaranara qimarunaqa misa rakiranara kai qidaqa.

## 121

### *Yaaweefa maasa itita qimaqee marifa.*

- 1 Qinee aqaanai qifu maqasee, qini dadaaqirafa yaindari fee aniannoo fee qidaqa.
- 2 Qini dadaaqirafa Yaawee finaindari kai aniannoo. Maa maqana faqa innaaruna faqa auqu quqoo finnaindari kai aniannoo.
- 3 Mifa sia aniara qinana aqufinnaranoo. Ani rakisi amaqee marifa aiqama kari afu maqaida maridanoo.
- 4 Isaraee maqannaasasaa rakisinnimaqee marifa sia moo kari qaunduari-noo sia faiqaidannoo.
- 5 Yaaweefa ani rakisi amaqaannoo. Mifa ani itita amaqarara ani aqa maridanoo.
- 6 Suani fannoo faasaana sia naruannoo. Kafaa eendaki quqoona fannoo sia naruannoo.
- 7 Yaaweefa aiqama mandainainaki innisaa ititamma nimaqaannoo. Mifa inni nariranasaa itita nimaqasee innisaa rakisianoo.
- 8 Mifa kai inni firannai anirannaira rakisi nimaqaannoo. Maqee faqa naaru naaru faqa rakisi nimaqaannoo.

## 122

### *Yeerusaree maqusa amooqia.*

- 1 Yaaweena amaana maaqai firaree qimasee qimaqimiafaqa qinee asasiqa.
- 2 Maqee maasa maaqoo Yeerusaree faandaamura kooqiki keeqafi afuqaki maridaqa.
- 3 Yeerusaree maqusa usakasoo fanoo kaaqa amiqirafa atiuqa amana amana kai inoo maridanoo.
- 4 Isaraeena akeeku akaaku miqimmasee aniree Yaaweena naamuaqira ufa amana kai dufi dufi qirana amidaqa.
- 5 Maaqoo Yeerusaree maqanna karaambaiguqa nariqa faiqi anaasee ufa andeeqa nimaqararee qimasee ooqu mariqau.
- 6 Yeerusaree maqusa asoaranaki marianifeera innaaruqiaqa. Yeerusaree maqusara rimariasa aiqama ainaina rairaa iani
- 7 Oo Yeerusaree maqusa ani faandaamura afuqaki asoarafa kai mariani. Ani karaambaiguqa nari maaqaki amiqimmasee mariaqa.
- 8 Qeeqa ainainara faqa qeeqa qiqoondiugara faqa irisee Yeerusaree maqusara maaqi qidaqa. Asoarafa aniki mariani.
- 9 Yaaweena maasa Anutuna amaana maaqara irisee inni Yeerusaree maqannaasee irairaamma nimaqaranara innaaru qidaqa. Anutufa qimudao qirana amiani fee innaaru.

## 123

- 1 Oo Yaawee qinee anee iannannai qifu maqaidaqa.  
Innaarunai anee rakisi nimaqee mariannannai qifu maqasee dadaaqianneera innaaru qidaqa.
- 2 Ainainira faiqi nariqa rakisiranasa nifu mudi mariandee iqa kafa faqa ainainira maanaqa miqikai inoo nari rakisira aanaaseesaa mundidanoo.
- Oo Yaawee maasa Anutufa maasa miqi kai iqa ani qafaqa maridaqa anee maasara qimudao qirana qimianneera afeesidaqa.
- 3 Oo Yaawee maasara qimudao qimasee qifauama qimaqaa.  
Maasa moomoo aasaandaana ufa qima qimaqaidaqa.
- 4 Ainaina faqaasa kisaagasaa maasara uteeti qidaqa.  
Kafa nari nimoo qimariasa nari mara maree uriranannai maasa rafaafa-fusee ataasa ataasa qima qimaqaidaqa.

## 124

*Anutufa nari faiqi anaasee itita nimaqee marifa maridanoo.*

- 1 Yaaweefa maasa sia dadaaqinaqau naqaa fee unaiqini.  
Oo Isaraee maqannaasa minara qima qimifaqa iria.
- 2-3 Yaaweefa maasa sia dadaaqinaqau namuqaa nari aanoo qiranannai maasa qumarasee kaqi kasi marunaqa nambiqaa qini.
- 4 Miqinanoofau nammari aufirafa maasa maree fiqini.  
Kaifaa nammari maasa rafaafu qisaiqini.
- 5 Nammari aufinoo firaqoo aiai qimarifa maasa ukuqnama qimaqaiqini.
- 6 Yaaweefa maasa namuqaara qifaqa sia maasa mandaikamma qimaqaanara maasa mina dufi dufi qimamaqaa.
- 7 Maasa ufiniara foora faiqi ufini ufanaki arurudukaki fiara foommiqa.  
Mi fasiqana ufaana raudafifaqa maasa qifaqa quqasee mana mana idaqa.
- 8 Maasa dadaaqirafa Yaawee finnaindari anidanoo.  
Maqa faqa innaaruna faqa auqu finnaindari anidanoo.

## 125

*Anutuna faiqi aanaaseesa rakisirafa.*

- 1 Yaaweena saqariki mariasa Sioona aaganara foora maridaqa.  
Sia amana kasi annoo sia moo fannoo mina mareeqee moosaa quqaannoo.
- 2 Aaganauqa Yeerusaree maqusa fiqumma datinoo marindee inoo  
Yaaweefa nari faiqi anaasee fiqumma ititannimaqasee maqee faqa naaru faqa rakisi nimaqaidanoo.
- 3 Mandoosana maree mariasa sia amana andeeqarusa maqasaa aiqama kari rakisifaranoo.  
Misa miqifaqa andeeqarusa misasaqaraa aqara oosana maree foora.
- 4 Oo Yaawee andeeqara oosana maree mariasa amiqi amiqimannimaqaa.  
Ani naamuaqira ufamau fimariasa amiqi amiqimma nimaqaa.
- 5 Miqidana anee manda oosana maree mariasa aupurarana nimidana ani ufa minnisee kaqi runna fimariasa faqa aupurarana nimia.  
Asoarafa Isaraee maqannaaki mariani.  
Manda ainainakinaana mara kaqinni uqannisaani fee innaaru.

## 126

- 1 Yaaweefa maasa Yeerusareenni qifiqee anufa qainasaara foora marinau.
- 2 Maasa firaqoo naanaidara qida asasida idiree mariqau.

Miqi mariafanaqa akaqa maqannaasa maasara maaqi qiqau.  
Yaaweefa firaa ainaina dadaaqinoo fee qiqau.

- <sup>3</sup> Kuqaa mifa firaa ainaina maasa dadaaqufaqa maasa minara firaaqoo asasiqiafana.
- <sup>4</sup> Aadaturunna aaku rifanoo nammari qumi marindee inana kaifaa maasa amiqi amiqimma qimaqaa.
- <sup>5</sup> Naukuna namu faqa ummaqi mariasa اساسira idi namu faqa unakuaqanani.
- <sup>6</sup> Asumu ainaina ummaqiraree qimasee naukunu namufaqa maree munu ummaqusee mariifaqa nara aukuana unaku maree اساسira idi namu faqa maree anifaranoo.

## 127

### *Anutuna amiqira oosana amooqia.*

- <sup>1</sup> Yaaweefa sia maaqa usakaifanoo, usakara saika fannoo anoona siaifa mariqini.  
Yaaweefa sia maqusasaa ititee marifanoo aufari mari fasiqafa kikiqinoo marida rakisi mari oosanafa sia amanaikiqini.
- <sup>2</sup> Fifau kananaana eendai uqanna findifi ainaina kadaapirina fifina eendi mariananoo.  
Yaaweefa nari aidi marisa faiqagee iafanoo narana nimidanoo.
- <sup>3</sup> Faiqi asumu Yaaweefa kaqi nimi mari ainainafa maridanoo.  
Mifa kaaqa afaaramasee amiqi amiqimma qimaqaidanoo.
- <sup>4</sup> Kumaaraasaa maqainna faiqisa nari nikoona asaukuki rakira fasiqauqa duru feefara foora maridaqa.
- <sup>5</sup> Miqira fasiqa moomoo faiqi duru feefara foora mina asaukuki karariqa mariafanoo اساسidanoo.  
Mifa ufa iriranaki mina namuqaauqa sia mina rafaqa fifaranoo.

## 128

### *Yaaweena ufa qaindusi mariana akiiqara nimirafa.*

- <sup>1</sup> Yaaweena ufamau fimariasa اساسidaqa.  
Mina naamuaqira ufasaa mariasa faqa اساسidaqa.
- <sup>2</sup> Anee miqi marianafa aiqama kari ani kadaapirirafa narana ainaina amiannoo.  
Ani ainaina reemindeemirinoo marinana اساسinnarannoo.
- <sup>3</sup> Ani anaqa fannoo wainna sandara foora maaqaki mariranaki moomoo qaqama iraannoo.  
Ani akoonaiqi faiqiuqa oorifa amiqira saqariara foora ani narana nee marianna difaanina fiq fiqiuqa marifaranoo.
- <sup>4</sup> Faiqi Yaaweena ufamau fimarifa miqimmaseenoo kaaqa amiqi amiqianoo.
- <sup>5</sup> Yaaweefa Sioonna maqusakiqari inni amiqi amiqimma nimaqaani.  
Inneeqa kaqi marinna kamu Yeerusaree maqusaki aiqama ainaina reemind ee mirirana qafaaqanani.
- <sup>6</sup> Innee kisaagasaa marida inneeqa ninaiqimara niqafaaqanani.  
Asoarafa Isaraee maqannaasaki mariani.

## 129

*Isaraee maqannaasa nariqa namuqaauqa mandaikamma nimaqaani fee innaaru qiqau.*



- 1 Innee Isaraee maqannaasa innee kumaaraasaa maruqooqari inni namuqaa ummaara nimi maree ani marianara qima qimiaqa.
  - 2 Qinee kumaaraa mariafannaqooqari qini namuqaauqa niranaqee maru-faqa qini mandaikamma qimaqee mariqau.
- Miqidaqa sia qini uridaaqaree mariqau.
- 3 Maqarumasee afuqaki oora ateekee mariandee iqa namuqaauqa qini kaakadi qitaufaka runna oorara foora meemai uqanna ateekee mariqau.
  - 4 Miqi marufanoo Yaaweefa andeeqarafa maridanoo rumbaranakinaana iduku qisanau.
  - 5 Aiqama Sioonna maqusara fidiqaa imariasa rafaqa fusaifaqa anirandeeqa sandeeфарannoo.
  - 6 Misa maqasaa ururee mari andanda fara foora urureenoo aadana usidanoo.
  - 7 Sia moo fannoo mina suqu moodaanaki quqaidaqa sia rumbamaree fidaqa.
  - 8 Aiqaree fimariasakiqari sia moo fannoo Yaaweefa amiqi amiqimma amaqaaniffee qifaranoo.
- Maasa Yaaweena auqusaa amiqi amiqimma amaqaidee qidaqa.

## 130

### *Dadaaqiani fee innaaru.*

- 1 Qini qimuqusa mandaikirafa faruma uqnauriara foora inoo marifaqa oo Yaawee qinee ani innaaru kiqari aaraidaqa.
  - 2 Oo Yaawee anee qini nameera qirana iria.
- Anee aaqoo rammatinimmaseenana qini qiki raqarana iriseenana dadaaqia.
- 3 Oo Yaawee anee maasa aaqarana papiqaki kaqi akara rumasaina mari-nanoo yafee ani ufa nimiranaki fiqaraannoo.
  - 4 Maasara anenna afusaa naaquqamasee mariaqeera maasa manda oosana akiiqara minninnisee marianafa mariananoo.
  - 5 Qinee Yaaweena dadaaqiranara asasida afeesidaqa. Mina ufa saqariki-daqa.
  - 6 Qinee Yaaweena dadaaqiranara asasida afeesi marunafa aufari maria fasiqausa suani afu uriranara rakisi mariana uraaqaranoo mari-danoo.
  - 7 Yaaweena sia taikaaninna amuqusirafa marinara faqa mifa maasa mandainainakinaana dadaaqirara aidi marinara faqa irisee, Isaraee maqannaasa Yaaweena saqarikiaqa.
  - 8 Mifa narí faiqí anaasee Isaraee maqannaasa nári aiqama aaqaranaki-naana dadaaqiannoo.

## 131

### *Anutuna saqarikammasee innaaru qira oosana.*

- 1 Oo Yaawee qinee qeeqa qimooqirana minniseeqa.
- Qeeqa ramoo ramaa irana faqa minnisee qimeesa uquseeqa.
- Qinee sia firaa ainainauqara oonu mafi iridaqa, qinee sia amanaiki marunna ainainara faqa sia iridaqa.
- 2 Qinee sia miqidaqa, qinee asoaranaki qifaaqa quqasee maridaqa.
- Faiqi aanaaqi nári ninausa nifundanasa ireeda faiqagee iandee iqa marunanoo qini qimuqusa fannoo ireeda qiniki maridanoo.

<sup>3</sup> Oo Isaraee maqannaasa maqee faqa naaru faqa Yaaweena kai saqari kiaqa.

## 132

### *Anutuna amaana maqara amooqia.*

- <sup>1</sup> Oo Yaawee anee sia Dafidinara qaunua.  
Mifa oosana oosana aupurarana maroonara faqa sia qaunua.
- <sup>2</sup> Oo Yaawee Dafidifa qima afeekaikunara iria.  
Mifa ani afeeka faqaa Anutuna Yakooboona Anutuna faqa qima afeekaikunara iria.
- <sup>3</sup> Qinee sia qeeqa faiqara maaqai fuanaura.
- <sup>4</sup> Qinee sia idooeeqa faiqeeqa ianauranoo.
- <sup>5</sup> Qinee afeeka faqaa Anutuna Yakooboona Anutuna maqusa deedaqam-maseeqa inaaqianna faiqaanaura.
- <sup>6</sup> Maasa Beeteereeqeemma maqusaki maridaqa moodaanaki kira bookisara irisee Yeearimma afaasasaa paqurimmasee qafaqiafana.
- <sup>7</sup> Maasa maaqi qiafana. Anifaqa maasa Yaaweena amaana maqai oonuree mina ufa irira qaari oorinni oonuree amooqiaqa.
- <sup>8</sup> Oo Yaawee moodaanaki kira bookisa namu faqa mara maree aneenna naauqara uiqaana maaqaki ania.  
Mi moodaanaki kira bookisafa ani afeekara kooroo imarina faqa maree aniree maaqoo naaruara maria.
- <sup>9</sup> Ani aanaiqikirausa aiqama kari andeeqara ainaina kai auqaaqanani.  
Ani faiqi anaasee faaqa fuisee qidaqa asasiaqanani.
- <sup>10</sup> Oo Yaawee aneenna ainainira faiqi Dafidinara qima afeekaikinau.  
Sia aneenna utaaqamaqaanna karaambaiqana minni aisaa.
- <sup>11</sup> Anee oori kandamasee Dafidinara qima afeekaikinau.  
Sia kaifaa mi qima afeekaikirana rukaanauranoo fee qimasee qima afeekaikamasee maaqi qinau.  
Qinee ani faiqi namukinaana moo karaambaiqaika masaananoo anee kuqu finanoo mifa Isaraee maqannaasasaa rakisiannoo.
- <sup>12</sup> Ani faiqi namu qini moodaanaki kira ufamau andeeqasee fiqa qini naa-muaqira ufa nimunnana mau andeeqasee fifanoo misa faiqi namu faqa anee kuqinaqa ani amaaqa maqasee karaambaiqa marifaranoo.
- <sup>13</sup> Yaaweefa nari faiqara maaqaikianifeera Sioona maqusa utaaqanau.
- <sup>14</sup> Maaqoo qinee naaruara maridaqa rakisinnimaqaanaura.
- <sup>15</sup> Qinee Sioona maqusanaasa nidi mari ainainausa aiqama nimianaura.  
Mi maqusanakinaasa kudi mariasa naranannoo amiqimma nimaqaanaura.
- <sup>16</sup> Qinee mi maqusanakina aanaiqikirausa mariasa auqainna aiqama ainainna amiqi amiqimma nisaanaqa minakinaa fasiqa anaasee asasira idi raidaqa faaqa fuisee qifaranoo.
- <sup>17</sup> Mi maqusanaki qinee Dafidina akeeku akaakukinaana afeeka karaambaiqaika masaanaura.  
Mi maqusanaki qinee qeeqa utaaqamaqaunna karaambaiqana rakisinni-maqarana afeedamma aisaanaura.
- <sup>18</sup> Qinee mi karaambaiqana namuqaauqa nisauriranannoo rafaafu nisaanauranoo.  
Mina rakisinnimaqaranaki mariasa amiqiranaki marifanoo aiqama ainaina irairaa iannoo.

## 133

### *Akaqaafasaara rira oosanara aidia.*

- 1 Anutuna faiqí anaasee moodaanaki marida narí amiqi narí amiqirafa kaaqa amiqirafa maridanoo.
- 2 Mi amiqi amiqirafa Aaroonaa akiiaaqa oorifa fadameena amiqirana adia-soofanoo qumu rameeqee oosaumau qumundee ira amiqi amiqirafa maridanoo.
- 3 Mi amiqi amiqirafa Qeeramoona aaqanasaaqaraa qifi faramu Sioona aaqanasaa aqufinoo aiqama ainaina asoama nimaqaindee idanoo. Yaaweefa miqi qimasee narí amiqi amiqirana nimiraree qimasee qima afeekaikinau. Mi amiqi amiqirafa kisaaga marirafa maridanoo.

## 134

### *Anutuna amooqira nameera qirafa.*

- 1 Innee Yaaweena naaquqara amaana maqaki eendaki ainaini mariasa innee aiqama aniree Yaaweena amooqiaqa.
- 2 Amaana maqaki inneeqa nisauku uqeerasee innaaru qidaqa Yaaweena amooqimma amaqaqa.
- 3 Yaaweefa maa maqana faqa miri innaarunna faqa auqu quqoofa Sioona maqusakiqari inni amiqi amooqimma nimaqaani.

## 135

### *Anutuna amooqira idi.*

- 1 Yaaweena amooqiaqa. Yaaweena auqu mina ainainira faiqiuqa amooqiaqa.
- 2 Innee Yaaweena naaquqara amaana maqaki ainaini mariasa innee Yaaweena amooqiaqa.
- 3 Yaaweefa andeeqarafa marinara mina amooqima amaqaqa. Mifa maasara qimudao qimarinara mina auquara amooqira idi rama-maqaqa.
- 4 Mifa nariara Yakooboona utaaqanau. Mifa mina akeeku akaaku Isaraee maqannaasi fasiqa anaasee naríndi ki-aqeeru utaaqanau.
- 5 Maasa Yaaweefa aiqama unna qira anutusa firaaqoo uriqararafa marinara iridaqa.
- 6 Innaaruna ameemaanai faqa maqasaa faqa ooruku nammariki faqa mina aundurari faqa Yaaweefa narí aidiranannai kai imarifa maridanoo.
- 7 Mifa narí kai qifanoo asuru nannamu ira oonamu maqa dinni atindari uridanoo. Asukuna arira oonamuki Yaaweefa aakuasaa quqasaifanoo aaku namu faqa qumidanoo. Mifa narí afeedira maaqaki qariara foora ufaira qifanoo uqidanoo.
- 8 Yaaweefa Isipa maqannaasa ooqa faiqiuqa faqa misa aandau ooqa anaaiqiuqa faqa moodaa kammasee narinau.
- 9 Miqoo mifa misa karaambaiqa faqa misa faiqí firaasa faqa aqarana akiiqara aupurarana nimiraree qimasee misaki faiqí sia auqaaqaa ira ainaina faqa naaquqara ainaina faqa auqanau.
- 10 Mifa moomoo maqannaasa mandaikamma nimaqasee misa afeeka karaambaiqauqa kuqa narinau.

- 11 Amoorā maqannaasa karaambaiqa mina auqu Sioonana faqa Basanna maqannaasa karaambaiqa mina auqu Ookana faqa Kannaa maqannaasa karaambaiqauqa aiqama faqa kuqa narinau.
- 12 Naruseenoo misa maqa maaqa rafieeqeenoo narí faiqí anaasee Isaraee maqannaasa niminau.
- 13 Oo Yaawee faiqí anaasee aiqama kari aniara Anutu fee qimasee koorooifaranoo.  
Aiqama naaru kambiqainausa aniara irifaranoo.
- 14 Yaaweefa narí faiqí anaasee ititannimaqasee narí ainainira faiqiuqara qimudao qianoo.
- 15 Anaamuru mariasa misa unna qira anutusauqa koorannai faqa siruaannai faqa faiqí nisaukunoo auquqoofauqa maridanoo.
- 16 Misa noo aamara marifaqa sia ufa qidaqa, nifu marifaqa sia qafaidaqa.
- 17 Misa naaqoo marifaqa sia ufa iridaqa.  
Misa naikaamaraindari sia uqanna kaqi kaaqoo naannamma naidaqa.
- 18 Mi unnaqira anutusa auqu quqoosa faqa mina saqariki mariasa faqa mi sia kasi mari ainainnara foora mariaqanani.
- 19 Oo Isaraee maqannaasa innee Yaaweena amooqiaqa.  
Innee aanaiqikirausa Aaroonā faiqi namu innee faqa Anutuna amooqiaqa.
- 20 Innee Reefina aiku asauku mariasa Yaaweena amooqiaqa.  
Aiqama innee minara innaru qimariasa Yaaweena amooqiaqa.
- 21 Sioonā maqusaiqari Yaaweena amooqiaqa.  
Yaaweena amooqiaqa.

## 136

### *Anutuna dufi dufi qimamaqara idi.*

- 1 Yaaweefa andeeqarafa marinara dufi dufi qimamaqaaqa.  
Mina amuqusirafa naaru naaru marifa maridanoo.
- 2 Aiqama unnaqira anutusa uriqararana dufi dufi qimamaqaaqa.  
Mina amuqusirafa naaru naaru marifa maridanoo.
- 3 Aiqama karaambaiqauqa afeeka urinnaaqararana dufi dufi qimamaqaaqa.  
Mina amuqusirafa naaru naaru marifa maridanoo.
- 4 Mifa kai firaa naaquqara ainaina auqi marifa maridanoo.  
Mina amuqusirafa naaru naaru marifa maridanoo.
- 5 Mifa narí amiqira iriranannai innaaruna auqufa maridanoo.  
Mina amuqusirafa naaru naaru marifa maridanoo.
- 6 Mifa maa maqana auqeeqee nammari faruma amuaaqa quqanau.  
Mina amuqusirafa naaru naaru marifa maridanoo.
- 7 Mifa suani faqa quqoona faqa auqinai.  
Mina amuqusirafa naaru naaru marifa maridanoo.
- 8 Mifa suaniara anee iaqaranasaa rakisiannee qimasee auqinai.  
Mina amuqusirafa naaru naaru marifa maridanoo.
- 9 Mifa quqoona faqa fasauqara faqa eendirana saa rakisiaqee qinai.  
Mina amuqusirafa naaru naaru marifa maridanoo.
- 10 Mifa Isipa maqannaasa ooqa faiqiuqa narinai.  
Mina amuqusirafa naaru naaru marifa maridanoo.
- 11 Mifa Isaraee maqannaasa Isipa maqusaindaraana aana muqunufaqa fiqau.  
Mina amuqusirafa naaru naaru marifa maridanoo.
- 12 Mifa misa narí afeeka asaukunni nifiqee finai.

Mina amuqusirafa naaru naaru marifa maridanoo.

<sup>13</sup> Mifa Taatuqee nammari qambaana rakeeinou.

Mina amuqusirafa naaru naaru marifa maridanoo.

<sup>14</sup> Mifa narí faiqí anaasee minaki aana muqunufaqa fiqau.

Mina amuqusirafa naaru naaru marifa maridanoo.

<sup>15</sup> Fitaqa fufanoo Isipa maqannaasa karaambaiqa narí rakira fasiqauqa faqa oonuroofanoo ukuqnama nimaqanau.

Mina amuqusirafa naaru naaru marifa maridanoo.

<sup>16</sup> Mifa narí faiqí anaasee nifu uqufaqa aadana maqa maaqaki fiqau.

Mina amuqusirafa naaru naaru marifa maridanoo.

<sup>17</sup> Mifa maqasaa afeeka faqaa karaambaiqauqa narinau.

Mina amuqusirafa naaru naaru marifa maridanoo.

<sup>18</sup> Mifa firaa nuqu faqaa karaambaiqauqa narinau.

Mina amuqusirafa naaru naaru marifa maridanoo.

<sup>19</sup> Amooraa maqannaasa karaambaiqa mina auqu Siqoonnana arinau.

Mina amuqusirafa naaru naaru marifa maridanoo.

<sup>20</sup> Basanna maqannaasa karaambaiqa mina auqu Ookana faqa arinau.

Mina amuqusirafa naaru naaru marifa maridanoo.

<sup>21</sup> Yaaweefa mi maqannaqanda maqa maaqa rafieeqeenoo narí faiqí anaasee Isaraee maqannaasa niminau.

Mina amuqusirafa naaru naaru marifa maridanoo.

<sup>22</sup> Narí ainainira faiqiuqa Isaraee maqannaasa niminau.

Mina amuqusirafa naaru naaru marifa maridanoo.

<sup>23</sup> Maasa namuqaa rafaqafu qimaqoofanoo mifa maasara sia qauninau.

Mina amuqusirafa naaru naaru marifa maridanoo.

<sup>24</sup> Mifa maasa namuqaa rumbaranakinaana idukuqisanau.

Mina amuqusirafa naaru naaru marifa maridanoo.

<sup>25</sup> Mifa kai faiqí faqa aiqama aandau auqu rarana faqa doodaani auqu rarana faqa narana nimidanoo.

Mina amuqusirafa naaru naaru marifa maridanoo.

<sup>26</sup> Anutufa innaarunai marina dufi dufi qimamaqaaqa.

Mina amuqusirafa naaru naaru marifa maridanoo.

## 137

*Isaraee maqannaasa Babilonia maqa maaqaki maridaqa iki raqoo ufafa.*

<sup>1</sup> Maasa Yuda maqannaasa Babiroonia maqannaasa rumbaranaki maridaqa Babiroonnia nammariuqa afainni ooqufaaqee idaqa Sioonna maqusara irisaidaqa iki raqee mariqiafana.

<sup>2</sup> Maasa miqoo maridaqa doori runusee nariqa piripunna saqari asaanasaa diri qiafana.

<sup>3</sup> Maasa rumbaqaqee marusa maasara qidaqa idi raqee qiqau.

Idi raidaqa maasa asasirana qimiaqee qiqau.

Sioonna maqusara rara idi rama nimiaqee qiqau.

<sup>4</sup> Misa miqi qufaqa maasa maaqi qiqiafana.

Maasa naqimasee fee aanaamuru maqa maaqakiaqa Yaaweena amooqira idi raanauree. Sia amana.

<sup>5</sup> Qinee Yeerusaree maqusara qaunusefau qinee sia kaifaa naaruara piripunna amana aruanaura.

<sup>6</sup> Qinee ani Yeerusaree maqusara sia aiqama kari irifau sia amana kaifaa naaruara idi raanaura.

Anee qini uriqarara asasirafa mariannanara qaunusee sia amana kaifaa idi raanaura.

<sup>7</sup> Babiroonnia maqannaasa Yeerusaree maqusa faandaamura rakeem-masee keeqoo faqa Eedoomma maqannaasa namuqaa fuki faaki qidaqa Yeerusree maqusa rapeepaa iaqera qunara Yaawee anee iriseenana mina akiiqara ia.

Oo Yaawee anee misufara iriqaraasammasee sia qaunua.

<sup>8</sup> Oo Babiroonnia maqannaasa innee kuridi fifaranoo.

Maasa Isaraee maqannaasa saaroo qinana Babiroonnia maqannaasa narinafa asasiannoo.

<sup>9</sup> Inni Babiroonnia maqannaasa faiqi aanaaqiuqa qumaree maasa Isaraee maqannaasa saarooqi oonisaa rutukinafa asasiannoo.

## 138

*Anutunara dufi dufi qira innaaru.*

<sup>1</sup> Oo Yaawee qinee qeeqa qimuqusa ookiqari dufi dufi qimamaqaidaqa.

Unna anutusa nifusaa ani Yaaweena amooqira idi raanaura.

<sup>2</sup> Qinee ani naaquqara amaana maqa maritina ubekamafi qiqoori saunu arafi ani auqu amooqianaura.

Ani sia taikaaninna amuqusiranara faqa ani mapukusee marira oosana faqa marinara ani amooqianaura.

Anee aneenna auqu faqa aneenna naamuaqira ufa faqa aiqama ainaina urinnaaqararana uqannifiqoonnanara ani auqu amooqianaura.

<sup>3</sup> Oo Yaawee qinee aaraunana iriseenana anee qimaqimiananoo.

Aneenna afeekannai qini afeekaikamma qimaqaananoo.

<sup>4</sup> Aiqama maa maqa maqaanaki maria uriqararaura ani Yaaweena ufa irianara ani amooqifaranoo.

<sup>5</sup> Misa anee auqonna ainainara faqa ani firaa afeekara faqa irisee idi reefaranoo.

<sup>6</sup> Anee kaaqa mirinni uriqarana maridana ureeqarausasaa rakisinimaqee mariananoo.

Faiqi nari nimoo naamoo qimariasaa sia amana ani afusaaqari kukeeqeefaranoo.

<sup>7</sup> Manda ummaara qini fiqumma datinoo marifana anee minakinaana qini amiqimma qimaqaananoo.

Qini namuqaauqa aanoo qiafana aneenna afeekannai misa nindaqaa qimarianafa mariananoo.

<sup>8</sup> Anee aiqama ainaina qima afeekaikamma qoonnandee innaranoo.

Oo Yaawee ani amuqusirafa naaru naaru marifa maridanoo.

Anee maasa Isaraee maqanaasara dadaaqiraree qunnana sia qaunusee minnisaa.

## 139

*Anutufa innisaimbaqara amiqimmasee iriseenoo amiqimmasee rak-  
isidanoo.*

<sup>1</sup> Oo Yaawee anee qini qimuqusaki diuqummaseenana qiniara irimariananoo.

<sup>2</sup> Qini ooqu marirana faqa findifrana faqa aiqama ainaina auqee marun-  
nanara faqa anee irimariananoo.

Anee nianaindari qini

Anee nianaindari qini qitikurakin

Anee nianaindari qini qitikurakinaa

Anee nianaindari qini qitikurakinaa iriranara irimariananoo.

<sup>3</sup> Anee qinee ainaini marunnana faqa idooee marunnana faqa diuqimariananoo.

Anee qinee aiqama ainaina auqee marunnanara irimariananoo.

<sup>4</sup> Oo Yaawee qinee moo ufa qianeerunana anee faasai mi ufana aiqama irimarianafa mariananoo.

<sup>5</sup> Anee qini fiqum fiqum ina datina aiqamatinai mariananoo.

Anee aneenna afeekannai qini itita qimaqee mariananoo.

<sup>6</sup> Ani qiniara irirafa kaaqa firafa uriqaranoo maridanoo.

Ani mi irirafa qini irirana faqa fiaqaranoo maridanoo.

<sup>7</sup> Qinee ani Yaaweena maraquna minnisee yaifee moosaa fuauree.

Qinee ani afu saaqari yaifee moosaa fuauree.

<sup>8</sup> Qinee innaarunai ooru firaree qianana anee minni faqa marinnaranoo.

Qinee kuqirausa mariannai firaree qianana anee minni faqa marinnaranoo.

<sup>9</sup> Qinee qaqaamaree suani afu ururee marina ooqiaaqarama fuanana anee minni faqa marinnaranoo. Suani keeqee marina fiaqaraanana anee miqoo faqa marinnaranoo.

<sup>10</sup> Qinee mitinai marianana anee miqoo maridana qini aana muqunimma qisarara faqa miqoo marinnaranoo.

<sup>11-12</sup> Qinee asukunara kukeeqa qimaqaannee qimasee kaaqa qarafa qini fiqum fiqum inoo marifa quandaki asukunaikiannee qiananoo asukuna fannoo sia ani afusaa asukunara foora maridanoo.

Asukuna fannoo faasaanara foora kaaqa qaannoo.

Asukuna faqa kaaqa qarafa faqa ani afusaa amana amana kai maridanoo.

<sup>13</sup> Anee Yaaweefa kai qini daundurakinaa ainaina aiqama auqunafa mariananoo.

Anee qini qinoona aranandaki qini qifaaqa moodaanaki ootupama qisaananoo.

<sup>14</sup> Aniara rufiee mariafa mariannanara ani amooqidaqa.

Anee aiqama ainaina auqee marianafa mookira ainaina naaquqara ainaina auqee marianafa mariananoo.

Qinee minara qeeqa aiqama qimuqusanoo iridaqa.

<sup>15</sup> Qini qimudaani moodaanaki ootupee marufana anee ireeda qini qinoona aranandaki moodaanaki quqaqisanau.

Qinee miqoo kukeeqaranaki innooqee mariafanana anee qinee mariafananara iri marinau.

<sup>16</sup> Anee sia kambiqaaq mariafana qiqafanau.

Qinee naaru moodaa moodaa faasaana auqaanna ainainara ani papiqaki akara rinoo maridanoo.

Mi moodaa moodaa faasaanafa sia kambiqanoo marufanoo miqoo ani papiqaki akararinoo maridanoo.

<sup>17</sup> Oo Anutu ani iriranara irunanoo firaaqoo ummaara darinoo.

Moomoo uqanna maridanoo.

<sup>18</sup> Qinee asaana ruananoo nukuda faqa arusee fiqaranoo mariannoo.

Qinee faiqaqee marii findi fiqa ani mi iriranara kaqi kai irimaree fidaqa.

<sup>19</sup> Oo Anutu anee mandoosana maree mariasa narinnaranoo fee qidaqa.

Faiqi fidika ruqiqee mariasa qini quqasee fifafa qeeqaraa marianauree qidaqa.

<sup>20</sup> Misa manda ufa ani qimamaqaidaqa.

Misa oosana oosana manda ufa ani auquara qidaqa.

<sup>21</sup> Oo Yaawee aniara fidiqaaq imariasa qinee misa fidiqaaqmma ni-maqaidaqa.

Ani ufamau firanara ititammasee aanoo qimariasara qinee firaaqoo qikooqaidanoo.

<sup>22</sup> Qinee miqimariasara kaifaa firaaqoo uqanna fidiqaamma nimaqaidaqa. Qinee misara qini namuqaauqee qidaqa miqidaqa.

<sup>23</sup> Oo Anutu qini diuqummasee qini iriranara iria.

Anee qini qimanammasee qini irirana oosanara iria.

<sup>24</sup> Qini daunduraki manda ainaina qafamaseenana naaru marira aanaindari qinisaa rakisiqisaa.

## 140

*Isaraee maqannaasa Anutufa dadaaqiani fee quu ufafa.*

<sup>1</sup> Oo Yaawee mandoosana maree mariasa nisaukukinaana qini maraquqisaa.

Faiqí nariqanuwasaa faqa ititaqisaa.

<sup>2</sup> Misa aiqama kari mandainainara tupundaaridaqa.

Misa aiqama kari aanoo qirana kai uqeeridaqa.

<sup>3</sup> Misa nifauru nimaakiri kuqimaria sakanifara foora maridanoo.

Misa nookinaa ufa fannoo ukadiqa manda marasinnara foora maridanoo.

<sup>4</sup> Oo Yaawee manda oosana maree mariasa afeeka ameemaaindaraana qini ititaqisaa.

Faiqí nariqanuasa qini qiku qama qimifaqa aqufuaneera misa tipundaridaqa.

Minara anee misa saa ititaqisaa.

<sup>5</sup> Nári nimoo naamoo imariasaa qini qimaara ufaanara foora fufidaqa.

Misa nári ufaana aatataa qini qimaara fufidaqa.

<sup>6</sup> Oo Yaawee qinee maaqi qimasee aniara qidaqa.

Anee qini Anutufa mariananoo.

Oo Yaawee anee qini dadaaqianneera aaree marunnana iria.

<sup>7</sup> Oo qini uriqarara Yaaweefa, anee qini amudaanai qimasee itita qimaqee marianafa mariananoo.

Rakiranaki anee qini ititaqimaqaananoo.

<sup>8</sup> Oo Yaawee sia anee mandoosana maree mariasa nidi mari ainaina nimia.

Anee misa tipundaarirana ititannisainanoo sia anoonaikiani.

<sup>9</sup> Anee qinaqa qini namuqaauqa sia rakiranaki uriqaraaqa.

Anee qinanoo misa darirari maria ufafa quandaki nariqa naruanii.

<sup>10</sup> Miqi mariasasaa fidika arira ida auru adia nimaqaa.

Misa dikaandaki aqusaina sia kaifaa minakiqari uruaqa.

<sup>11</sup> Niqoonausara unna qimasee misa kikiqusi mariasa aiqama ainainirafa sia anoonaikiani.

Mandainaina fannoo faiqí kuqa nariqanuasa rafaafuseenoo mandaikamma nimaqaani.

<sup>12</sup> Oo Yaawee anee kudi fasiqa anaasee kootaki itita nimaqaannanara qinee iridaqa.

Anee sarau imariasaa amana amana kai itita nimaqaannanara faqa iridaqa.

<sup>13</sup> Andeeqaransa kuqaa uqanna ani amooqifaranoo.

Misa ani afusaa marifaranoo.

## 141

*Eendaki innaaru.*

<sup>1</sup> Oo Yaawee qinee ani aaraidaqa qini maqee dadaaqia.

Qinee ani aaraanana iria.

<sup>2</sup> Qini innaaru qirana amiqira afundimari ida munanara foora maraa.



- Qinee qisauku uqeerasee innaaru qirana eeneemari sugee maria tatufira-nara foora maraa.
- <sup>3</sup> Oo Yaawee anee qini doosaa rakisianinna quqasainanoo rakisi marinanoo qini dooqiğari sia manda ufa ururaani.
- <sup>4</sup> Qini mandainaina auqarara didi marina ititaqisaa.  
Manda fasiqauqaki ootupamafi misa manda oosana mararanasaa ititaqisaa.
- Qinee sia misa qoomaqa dadaaқи naanaura.
- <sup>5</sup> Andeeqara fasiqa fannoo qini aaqarana akiiqara qini dadaaqianifee apurarana qiminaqa qinee minara qini amiqi amiqimmidanoo fee qianaura.
- Aaqee mariasa qiniara uriqarara fee qifaqa qimooqirana sia maraanaura.  
Qinee maqee maqee misa manda oosannara taikaannee qimasee innaaru qimarunnanara misa qimooqirana sia maraanaura.
- <sup>6</sup> Andeeqara uriqararawsa manda oosana maree mariasa misa uriqararawsa rafuseeqee maaninni aqusaifaqa faiqi anaasee qini ufara kuqaa anoonee qifaranoo.
- <sup>7</sup> Mi manda uriqararawsa nimudaani saqari araira foora moomoo madika afaiqara irairaa inoo mariannoo.
- <sup>8</sup> Oo Uriqarara Yaawee qinee kaqi ani saqarikidaqa.  
Qinee ani itita imaqaranara randaidaqa.  
Anee qiniara qaoo qinaqa sia kuquanaura.
- <sup>9</sup> Qini qimaara qinukufana fufuqaanasaa ititaqisaa.  
Manda oosana maree mariasa qiku ufana fufuqaanasaa ititaqisaa.
- <sup>10</sup> Manda oosana maree mariasa nariqa ufaanaki aru fifaqa qinee amiqim-masee fuanaura sia minaki aruanaura.

## 142

### *Dadaaqiani fee innaaru.*

- <sup>1</sup> Qinee dadaaqianifeera Yaaweena aaraidaqa.  
Qinee qiki raqaidaqa minara innaaru qidaqa.
- <sup>2</sup> Qinee qeeqa aiqama inunu rira ufauqa mina amidaqa.  
Qinee qeeqa aiqama ummaara mina qimamidaqa.
- <sup>3</sup> Qinee minnisara runanoo qinee andeeqasee qianna ainnainnara mifa iridanoo.  
Qinee fimarunna aannanasaa qini namuqaa qini qimaara kukeeqasee ufaana fufidaqa.
- <sup>4</sup> Qinee qeeqa inaaqiannai dadaaqiranara qafaunanoo sia maridanoo.  
Sia moo fannoo qini ititaqimaqaaninafa maridanoo.  
Sia moo fannoo qiniara qimudaoo qidanoo.
- <sup>5</sup> Oo Yaawee anee dadaaqianneera aaraidaqa.  
Anee Yaaweefa qini itita qimaqee marianafa mariananoo.  
Maa maqanasaa mariranaki maridaqa aniara kai ridaqa.
- <sup>6</sup> Oo Yaawee qinee dadaaqianneera qiki raqee marunnana iria.  
Manda ummaara fannoo qini nammariara foora ukuqnama saifaqa kuqiraridaqa.  
Qini namuqaa kaaqa afeeka faqaasa marianara qini misa nisaukukinaana mara kaqinni quqaqisaa.
- <sup>7</sup> Qini teerookinaana iduku qisainaqa ani faiqi anaasee suqiranaki ani amooqianaura.  
Anee qini amiqimma qimaqaannanara ani amooqianaura.

## 143

### *Dadaaqiani fee innaaru.*

- <sup>1</sup> Oo Yaawee qini innaaruqirana iria.  
Aneenna andeeqaranakiqari qini afeeka innaaruqirana iria.  
Aneenna mapukira oosanakiqari qini ufa anoona qima qimia.
- <sup>2</sup> Sia moo fannoo maa maqanasaa qaraafa ani afusaa andeeqarafa mari-  
daqa.  
Minara anee sia qini aneenna ainainira fasiqa mareeqee aneenna kootaki  
quqasee qimanammasee qafaa.
- <sup>3</sup> Qini namuqaa qini qifaqasee firaqoo uqanna qini rafaqa fidaqa.  
Mifa qini asukuna rumbaranaki quqasaifaqa qinee ooqai kuqusara foora  
maridaqa.
- <sup>4</sup> Miqimmasaifaqa qinee minnisarara deedaqidaqa.  
Qini qimuqusa fannoo munara minari marifaqa kaaqa kuquaqa idaqa.
- <sup>5</sup> Qinee indaaru mariaafanna mariranara oonu mafi iridaqa.  
Qinee anee aiqama ainaina iannanara iridaqa.  
Anee aiqama ainaina auqaannanara qeeqa iriranaki minisee iridaqa.
- <sup>6</sup> Qinee innaarukiqari qeeqa qisauku anee iannannai uqeeraidaqa.  
Aadana maqara foora qini qimana fannoo aniara nammariara foora aidi-  
danoo.
- <sup>7</sup> Oo Yaawee qini marirafa taikaaqaammidanoo.  
Qini ufa irisee mina anoona qimaqimia.  
Sia qini qiqafamasee kukeeqaa.  
Anee miqinaqa qinee kuqirausa fimariannai fuanaura.
- <sup>8</sup> Aiqama kananaana anee daaqoo auqainaqa ani sia taikaaninna amuqusir-  
anara irisee qeeqa saqarikirana aniki quqaanaura.  
Qini innaaru qirafa anee iannannai ooru fidanoo.  
Anee qiniara fuannee qinnaqoo uqaqifiqainaqa fua.
- <sup>9</sup> Oo Yaawee ititaqimaqaanneera anee iannannai fidaqa.  
Qini namuqaa nisaukukinaana mara kaqinni quqaqisaa.
- <sup>10</sup> Anee qini Anutufa mariannanara aneenna aidira ainaina qima qiminaqa  
auqaa.  
Qini amiqimma qisaseenana amiqira aanasaa ititaqimaqainaqa fua.
- <sup>11</sup> Oo Yaawee aneenna qima afeekaikunandee inana qini namuqaa  
nisaukukinaana mara quqaqisaa.  
Aneenna andeeqaranakiqari qini ummaarakinaana mara quqaqisaa.
- <sup>12</sup> Anee qiniara aidi mariannanara qini namuqaa kuqa narua.  
Qinee ani ainainira fasiqa marunnanara nári uriqararanannai qini  
rafaqafi mariasa aiqama kuridi nimaqaa.

## 144

### *Davidifa rakirana uriaaqaroonara Anutunara dufi dufi qinau.*

- <sup>1</sup> Qini itita qimaqee marina Yaaweena amooqia.  
Mifa rakira oosana uqaqifiqaseenoo qini rakiranaki firana deedaqamma  
qisaidanoo.
- <sup>2</sup> Mifa qini aiqama kari itita qimaqee marifa maridanoo.  
Mifa qini auqaanara foora qini asumu maree marifa maridanoo.  
Qini amiqimma qisaanifeera mina saqarikidaqa.  
Mifa faiqí anaasee mareeqeenoo qini qiramandunnai quqaidanoo.
- <sup>3</sup> Oo Yaawee faiqí anaasee nana ainainee mariafanee anee misara iridane.

- Faiqí anaasee nana ainainee fifau ainaina mariafanee anee misa rakisi nimaqaidanee.
- <sup>4</sup> Faiqí misa naidoora foora fuaqasaafanoo dauni taikeera foora irausa maridaqa.
- Mina marirafa nimanandara foora kaqi kaqi mandaagee marifa maridanoo.
- <sup>5</sup> Oo Yaawee anee innaaruna rakee maseenana gumureenana aaqanauqa auqamasainanoo ida muna minakiqari ururaani.
- <sup>6</sup> Miqimmaseenana aneenna aakuasaa panana qirana quqasainanoo gumureenoo ani namuqaauqa furu faramma nimaqaannoo.
- Aakuasaa aneenna feefara foora dindai qinaqa quqasee sandaaqa.
- <sup>7</sup> Oo Yaawee anee innaarunaindari qini mara miami anaamuru nisaukuki nammari faruma kiara foora marunnana uqeereeqee kaqinni quqaqisaa.
- Anaamuru afeeka ameemaanai marunnana mareeqee kaqinni quqaqisaa.
- <sup>8</sup> Mi anaamurusa nifaurusaa unnufa kai qumbiqanoo marifaqa misa kuqaa ufa qiraree qimasee nimana aiqamasee unna ufa kai qidaqa.
- <sup>9</sup> Oo Anutu qinee aniara fuka idi ramamaqaanaura.
- Qinee piriipunna aridaqa ani idi ramama qaanaura.
- <sup>10</sup> Anee kai karaambaiqauqa rakirana uriqarara afeeka nimimarianafa mariananoo.
- Anee aneenna ainainira fasiqa qini Davidisa namuqaa nisaukukinaana maree marianafa mariananoo.
- <sup>11</sup> Anee fitiqnarana qimi maria namuqaasa nisaukuki marunnana anee mara kaqinni quqaqisaa.
- Anaamuru afeeka ameemaanai marunnana mara kaqinni quqaqisaa.
- Mi anaamurusa nifaurusaa unna ufa kai qumbiqanoo maridanoo.
- Misa kuqaa ufa qiraree qimasee nimana aiqamasee unnufa kai qidaqa.
- <sup>12</sup> Maasa faiqi namu aanaaqisaaqari findifiqa ummaqira saqariara foora afeekaikammasee ururaqa.
- Maasa qiraamuqmaaka faqa maqasaa karaambaiqa maaqakina amiqira afaqa auqira sapatariara foora maridaqa maasa asasirana qimiaqa.
- <sup>13</sup> Maasa afeedira maaqaki oosana oosana nara ainaina qumbiqanoo mariani.
- Maasa maaqeena aandau sia kasoo anaaqiuqa uqanna maqaqa.
- <sup>14</sup> Maasa maaqeena aandauqa kaifaa moomoo kiqa faiqi maqasaifanoo sia eedadaikinaqa kuquqa.
- Maasa maqusaki sia teeroo faqa qiki raqarafa faqa mariani.
- <sup>15</sup> Miqi maria fasiqa anaaseesa amiqiranaki asasiranaki marifaranoo.
- Yaaweefa maasa Anutufa marifaqee qimaria fasiqa aanaaseesa asasiranaki maridaqa.

## 145

### *Anutuna amooqira idi.*

- <sup>1</sup> Qini Anutu qini Karaambaiqa, qinee anee uriqararafa mariannanara kooroo ianaura.
- Qinee ani naaruara naaruara dufi dufi amooqianaura.
- <sup>2</sup> Aiqama kari ani dufi dufi qimamaqaanaura.
- Qinee naaruara naaruara ani amooqianaura.
- <sup>3</sup> Yaaweefa uriqararafa marifaqa mina uriqaramasee amooqi mariafa maridanoo.
- Mina uriqararafa firaafa irirafa munu taikarana fiqaranoo maridanoo.

- <sup>4</sup> Anee auqoonna ainainnara maqee mariasa faqa naaru kambiqaingausa faqa ani amooqifaranoo.  
Misa anee auqoonna afeeka ainainnara kooroo ifaranoo.
- <sup>5</sup> Misa ani qareenaranara faqa ani afeekara faqa ufa qifaranoo.  
Qinee ani naaquqara ainaina auquqoonnanara maqee maqee indee indee iqa fuanaura.
- <sup>6</sup> Faiqi anaasee afeeka ainaina anee auqee mariannanara ufa qimariafaqa qinee ani uriqararanara kooroo ianaura.
- <sup>7</sup> Misa ani andeeqaranara qima nimisee ani amiqi amiqiranara idi reefaranoo.
- <sup>8</sup> Yaaweefa aidi marifanoo nifauaidanoo.  
Mina aranaqarafa kasooaqee kasooaqee qimarifanoo mina sia taikaaninna amuqusirafa qumbiqaidanoo.
- <sup>9</sup> Mifa aiqamausa amiqi amiqimma nimaqaseenoo nari aiqama auqu quqaqoo ainainausara amuqusi marifa maridanoo.
- <sup>10</sup> Oo Yaawe anee aiqama aandau doodaani auquqoonausa ani amooqifaqa aiqama ani faiqi anaasee dufi dufi qirana ani amifaranoo.
- <sup>11</sup> Misa ani karaambaiqa afeeka areenaranara ufa qidaqa ani amudaanai qiranara qifaranoo.
- <sup>12</sup> Miqimmasaifaqa aiqamausa anee afeeka ainaina auqoonnanara irifaranoo.  
Misa ani afeeka areenara ququsara faqa irifarannoo.
- <sup>13</sup> Ani rakisi nimaqarafa naaru naaru marifa marifana anee naaruara karaambaiqa mariananoo.  
Yaaweefa nari qima afeekaika maqoo ufanasa mapukinoo marifa maridanoo.  
Nari aiqama ainaina imarina nifauarana namu faqa idanoo.
- <sup>14</sup> Mifa ummaaraki mariasa dadaaqidanoo.  
Mifa rafaqaqafu nimaqee mariasa uqera nisaidanoo.
- <sup>15</sup> Aiqama kasi maria ainainausa narana nimianneera nifu mundusee ani kai qafaafana narana nimi mariananoo.
- <sup>16</sup> Anee misa nimana kai niminana aiqamausa nidirana amanaikiananoo.
- <sup>17</sup> Yaaweena aiqama ainaina auqaranaki andeeqarafa maridanoo.  
Nari aiqama ainaina imarina nifauarana namu faqa idanoo.
- <sup>18</sup> Mifa nari aaree mariasa naqa maridanoo.  
Mifa nariqa nimuqusa ookiqari aaree mariasa naqa faqa maridanoo.
- <sup>19</sup> Mifa nariara naaquqee marifaqa mina ufa qaindusi mariasa dadaaqira ainainauqa nimidanoo.  
Mifa misa qiki raqarana iriseenoo misa ummaarakinaana mara kaqinni quqannisaidanoo.
- <sup>20</sup> Mifa nariara rimariasa itita nimaqasee mandoosana maree mariasa kuridi nimaqaannoo.
- <sup>21</sup> Qinee aiqama kari Yaaweena amooqianaura.  
Mifa auqu aiqama ainainausa mina naaquqara andeeqara auqu naaru naaru amooqima amaqaqa.

## 146

### *Dadaaqira fasiqa Anutuna amooqia.*

<sup>1</sup> Yaaweena amooqia.

Oo qini qimana Yaaweena amooqia.

<sup>2</sup> Qinee kaqi marunna kamuqoo Yaaweena amooqianaura.

- Qeeqa aiqama kari maa maqa maaqanasaa mariranaki qeeqa Anutuna idi ramamaqaanaura.
- <sup>3</sup> Sia aneenna saqarikirana maqasaa qaraa uriqarararasasaa quqaa. Sia faiqí faiqi amana ani dadaaqiannoo.
- <sup>4</sup> Maqasaa uriqarararasa kuqufiqa kookoommaika mafidaqa. Mi faasaannasaa misa oosana oosana ainainara tipundaarammaqaafa taikaidanoo.
- <sup>5</sup> Yakooboona Anutunara dadaaqirana qimianne qimari fasiqafa faqa Yaaweena nariqa Anutunasaa mudi mariasa faqa asasidaqa.
- <sup>6</sup> Innaaruna faqa maqa faqa ooruku nammari faqa minaki maria ainainausa faqa auqunasaa mudi mariasa asasidaqa.
- Mifa aiqama kari narí qima afeekaikiranasaa afu rusisee maridanoo.
- <sup>7</sup> Mifa uriqararanannai rafaafa fuqaasa narí ufa iriranaki dadaaqidanoo. Naararee mariasa faa narana nimidanoo. Yaaweefa fifau rumbaranaki mariasa iduku nisaidanoo.
- <sup>8</sup> Iduku nisaseenoo nifu imbarausa nifu maqa nisaidanoo. Mifa aqufiqa mariasa uqeera nisaidanoo. Mifa narí andeeqara fasiqa aanaaseera aididanoo.
- <sup>9</sup> Yaaweefa asaqiraafai maasa maqa maaqaki mariasasaa itita nimaqaidanoo. Mifa adeedaana anaaseeuqa faqa fiaiqi faiqiuqa faqa dadaaqidanoo. Kafa mifa manda oosana maree mariasa nariqa kuridiranaki quqa nisaidanoo.
- <sup>10</sup> Yaaweefa naaruara uriqararafa maridanoo. Oo Sioona maqusa ani Anutufa aiqama kari rakisi amaqaannoo. Yaaweena amooqia.

## 147

### *Anutuna aiqama afeeka faqaana amooqia.*

- <sup>1</sup> Yaaweena amooqia. Maasa Anutuna amooqira idi rarafa amiqira oosana maridanoo. Mina amooqirafa andeeqarafa adiafaairafa maridanoo.
- <sup>2</sup> Yaaweefa Yeerusaree maqusa kaifaa usakaidanoo. Isaraee maqannaasa narufaqa anaamurukiaqa moodaa moodaa iqa mariusa Yaaweefa kafa suqeeqee quqaidanoo.
- <sup>3</sup> Mifa nimugusa mandaiki marusa amiqimma nisaidanoo. Misa kaakadi narirana rumbannisaidanoo.
- <sup>4</sup> Mifa aiqama fasauqara iriseenoo asaana rirana amana kai quqaseenoo naadu naadu nuqu ranau.
- <sup>5</sup> Maasa Yaaweefa firaafa marida amudaanai qimarifa maridanoo. Mina amiqira irirafa sia oosana faqa ammuqu faqa marifa maridanoo.
- <sup>6</sup> Mifa nári mara maree qumi mariasa uqeerannisaidanoo. Kafa mandoosana maree mariasa maqa mammaaqai radamidano.
- <sup>7</sup> Amooqira idi Yaaweenara rama amaqaafa. Piriupunannai aridaqa maasa Anutuna idi rama amaqaafa.
- <sup>8</sup> Mifa oonnamu innaarunai rainaidanoo. Mifa aaku quqasaifanoo rifanoo amuaqu namusaaqaraa andandauqa ururaidanoo.
- <sup>9</sup> Mifa aandauqa narana nimisee ufini aanaaqiuqa naranara qiafanoo misa faqa nimidanoo.
- <sup>10</sup> Mifa qoosauqa afeekara sia ridanoo.

- Mifa afeeka sundiauqa rakiranaki paasoosi mariasa afeekara faqa sia ridanoo.
- 11 Mifa nariara naaquqaifaqa rufiee mariasara aididanoo.  
Misa nári irirana Yaaweena sia taikaaninna amuqusiranasaa rusimariasa misara aididanoo.
- 12 Oo Yeerusaree maqusaki mariasa innee Yaaweena amooqiaqa.  
Oo Sioona maqusaki mariasa inneeqa Anutuna kai amooqiaqa.
- 13 Mifa inni maqusa faandaamura kooqi afeekaikammasee ititaidanoo.  
Mifa minaki maria fasiqa anaaseesa amiqi amiqimma nimaqaidanoo.
- 14 Mifa inni Isaraee maqanna oosusaa rakisidanoo amiqira narana inni nimana kai nimidanoo.
- 15 Mifa narí naamuaqira ufa maa maqana qimamisaifanoo mifa qii ainainafa kai kaqi kambiqaidanoo.
- 16 Mifa qaisara qifanoo aqufinoo qamunnara foora maqasaa rafaqa fidanoo.
- 17 Mifa innaarunaindari pupusamu oonisamuara foora aqidanoo.  
Sia moo fannoo mifa nimi mari suaranaki amana kikiqiannoo.
- 18 Mifa pupusamuara qifanoo tasirisirinoo nammarikidanoo.  
Kafaa mifa ufaira qufanoo ufai uqufanoo qaisa fannoo firaa nammari kammafi ooqu finau.
- 19 Mifa narí ufa narí faiqi anaasee nimidanoo.  
Mifa narí sandufa faqa narí naakaparufa faqa Isaraee maqannaasa nimidanoo.
- 20 Mifa mi ainainna auqoona sia moo maqannaasa mina sanda ufa sia iri mariasarau auqinoo fau.  
Yaaweena amooqia.

## 148

*Aiqama innaarunaindaraa ainaina faqa maqasaaqaraa ainaina faqa Anutuna amooqidaqa.*

- 1 Yaaweena amooqia.  
Innaarunai mirinni mariasa Yaaweena amooqiaqa.
- 2 Mina aiqama qangeeroouqa mina innaarunaindaraa rakira fasiqauqa mina amooqiaqa.
- 3 Innee suani faqa quqoona faqa aiqama fasau firaaqoo kaaqa qeemariasa faqa aiqama mina amooqiaqa.
- 4 Innaaruna meerai uqanna marianafa anee faqa Yaaweena amooqia.  
Innee mirinni innaarunai maria nammarisa innee faqa mina kai amooqiaqa.
- 5 Misa aiqamausa Yaaweena amooqiaqanani.  
Mifa qufaqa misa kambiqaqau.
- 6 Mina ufannoo misa kambiqafi nariqa mariaqoo naaru naaru maridaqa sia amana Yaaweena ufa rukieefaranoo.
- 7-8 Maqasaaqaraa ainainauqa faqa ooruku nammariki maria firaa aandausa faqa nammari ameemaanai mariasa faqa aakuasaa faqa pupusamu faqa qaisa faqa oonnamu faqa afeeka ufai Yaaweena naakapara ufa mau fimari ufai faqa innee aiqamausa Yaaweena amooqiaqa.
- 9-10 Innee aaqanauqa faqa amuaqu namuqa faqa qaqama iree maria saqarisa faqa aiqama nandauqa faqa aiqama aandau maaqeena faqa kaasau faqa nimuaqundari nimariasa faqa qaqamaree nimaria ufinisa faqa innee aiqama mina amooqima amaqaqa.

- 11-12 Aiqama maqasaaqaraa karaambaiqauqa faqa aiqama maqannaasa faqa uriqararawsa faiqi namu faqa aiqama maqanna rakisirawsa faqa kumaaraauqa faqa maanaaqauqa faqa asooqa fasiqa anaasee faqa faiqi uqaindi faqa innee aiqamausa Yaaweena amooqiaqa.
- 13 Misa aiqama misoo maasoo Yaaweena auqu amooqiaqa. Mina auqu fannoo aiqamausa nuqu uriqararafa maridanoo. Mina areenarafa maa maqa maaqana faqa innaaruna faqa urinaaqaranoo maridanoo.
- 14 Mifa Yaaweefa narí maqannaasa afeekaikamma nisaifaqa mina faiqi anaasee mina amooqiaqera. Isaraee maqannaasa mina afaaqasaa aqoondiuga maridaqa mina amooqidaqa. Yaaweena amooqia.

## 149

### *Anutuna amooqira idi.*

- 1 Yaaweena amooqia. Yaaweena fuka idi ramamaqaaqa. Mina ufa mau fimariasa ufa suqiranaki mina amooqimamaqaaqa.
- 2 Isaraee maqannaasa inni auqu nisoona irisee asasiaqa. Sioona maqusaki mariasa inneeqa karaambaiqara susumma amaaqaaqa.
- 3 Innee idi raida niqoori raqaranannai faqa dukaanaannai faqa piripunnannai faqa mina auqu amooqiaqa.
- 4 Yaaweefa narí faiqi aanaaseera asaidanoo. Nári mara maree qumimariasa rakirana uriqararanannai amiqimma ni-maqaidanoo.
- 5 Yaaweena faiqi anaasee nariqa rakiranara qufoonaridaqa asasira idi eendaki raqa fifi iaqaaqa.
- 6 Misa firaqoo faaq rumasee Anutuna amooqiaqa. Misa nisaukuki dinni dinni raqarana rakira paipana kaqi marinaqa mina namu faqa amooqiaqa.
- 7 Kaqi marifaqa misa minannai aanaamuru rafaqa firara uaqee idaqa. Anaamuru fasiqa anaasee narirara uaqee idaqa.
- 8 Misa karaambaiqauqa sainandannai rumbarana uaqee idaqa. Misa karaambaiqauqa qainna sainandannai rumbarara uaqee idaqa.
- 9 Anutufa naamuaqundee iqa moo maqannaasa narirara uaqee idaqa. Anutuna faiqi anaasee rakirana uriqararafa miqimminoo maridanoo. Yaaweena amooqia.

## 150

### *Yaaweena amooqia.*

- 1 aaweena amooqia. Anutuna naaquqara amaana maqaki mina amooqiaqa. Mina uriqarara afeeka innaaru nai marina amooqiaqa.
- 2 Mifa afeeka ainaina auqoo nara amooqima amaaqaaqa. Mina amiqira uriqararanara amooqiaqa.
- 3 Ukeena fuaqaidaga minannai mina amooqiaqa. Kaqikaa piripunnannai faqa firaq piripunnannai faqa mina amooqiaqa.
- 4 Dukaanaannai faqa idi raida niqoori raqaranannai faqa mina amooqiaqa. Piripunnannai faqa ufireenannai faqa mina amooqiaqa.

<sup>5</sup> Innee qumiandau qaƣama kaƣikaa ƣanda faƣa firaa ƣanda faƣa qumaree narisaa narisaa ramoo ramoo idaƣa Yaaweena amooƣiaƣa.

<sup>6</sup> Aiƣama naanna faƣaa ainaina Yaaweena amooƣiaƣa. Yaaweena amooƣia.



## AAQUQIRA UFA

<sup>1</sup> Maa aaquqira ufafa Soroomoonna ufa maridanoo. Dafidina amaaku Isaraee maqannaa karaambaiqa ufa maridanoo.

<sup>2</sup> Maa aaquqira ufafa ani dadaaqinana amiqira irirana faqa andeeqara naamuqira ufa faqa irisee mina oosana farumara foora meemai uqanna marina faqa irinnaranoo.

<sup>3</sup> Irirana faqaa nira marirana uqannifiqara ufa maridanoo. Anoona ufa kai qira oosana faqa andeeqara oosana amana amana kai raina nimaqara oosana faqa nimianifeera maa ufafa maridanoo.

<sup>4</sup> Maa ufafa irirana siaisa irirana nimidanoo kumaaraa maanaaqa irirana naakapama saina amiqira nira marirana faqaasa mariaqera maa ufafa maridanoo.

<sup>5</sup> Maa aaquqira ufafa irirana faqaasa irirana moo faqa moo faqa nimimarifa maridanoo. Amiqira irira aanara randee mariasa nimirifa maridanoo.

<sup>6</sup> Uqannifiqaafaqa aaquqira ufa oosana kukeeqarana faqa irirana faqaasa kukeeqara mariranauqa faqa irifara.

<sup>7</sup> Anee irirana faqaafa mariraree qimasee Yaaweena ameemaanai maria. Furufari mariasa sia iriranara naaquqaidanoo irirana mararanara faqa nikooqaidanoo.

*Kumaaraa maanaaqa naakapara ufa.*

<sup>8</sup> Qinee qimaaku anoofakoona ufa iria.

<sup>9</sup> Ani anoona akoona aamuqira ufa fannoo ani amiqira fasiqaikamma amaqaannoo, amiqira sarandaraqara foora aqinaaqa rumbasee kukukakana anukaki rufu amaqera foora masainana amiqirafa marinnaranoo.

<sup>10</sup> Qini qimaaku manda oosana maree mariasa ani amanifana sia misa ufa iria.

<sup>11</sup> Misa aniara maaqi qifaranoo. Anee maasa faqa anirainaga maasa faiqi kuqa narua. Aninaqa kukeeqafi qeeqa didirana taikeeqa oosana siaisa kuqa narua.

<sup>12</sup> Misa kaqi marida amiqiqa marifaranoo maasa misa paqurim-masaanaqa kuqifaranoo. Amiqira fasiqa faqa manda fasiqa faqa dapi naruanauranoo.

<sup>13</sup> Misa naruseeqa misa qumiasana oosana oosana mareeqee maasa nári maaqaki quqasaanoo maasa maaqa qumbiqaani.

<sup>14</sup> Anee maasa faqa aninaqa maasa ummuara masainna aiqama ainaina ani faqa naida amianaura.

<sup>15</sup> Qini qimaaku sia miqira fasiqa faqa fua. Misa mariaqooqari nianai maria.

<sup>16</sup> Misa mandainaina auqarara sia anuqidaqa. Misa aiqama kari fidika ruiqaranara deedaqiqa maridaqa.

<sup>17</sup> Anee ufina ufana fufinana sia aruani qinna ufinina afusaa fufua. Mifa qafamasee rufiaannoo.

<sup>18</sup> Miqi maria fasiqausa nári nimaara ufaana fufidaqa. Nariqa ninuka arusee kuqifandinna ufanna fufidaqa.

<sup>19</sup> Faiqi nári marusa mi oosanafa nariundee inoo ummuari mariasa mi ummuarira oosanafa nári naruannoo.

*Amiqira irirafa naaraidanoo.*

<sup>20</sup> Iriaqa, amiqira irirafa irirana faqaa anaas eera foora aana kindooraki faqa faiqí suqi mariaqoo maridanoo nammeera qidanoo.

<sup>21</sup> Faandaamura ququsa kooqiki faiqí suqi mariaqoo maridanoo firaaqoo nammeera qidanoo.

<sup>22</sup> Innee furufarirausa innee kisaaqasaa fee furufarida marifaree, innee kisaaqasaa fee irirana faqaasa iriranara uteeti qifaree. Sia fee innee minara irifaree.

<sup>23</sup> Innee qini aaquqira ufa amiqimmasee iriaqa. Qinee qeeqa amiqira naakapara ufa faqa qeeqa irirana faqa inni nimianaura.

<sup>24</sup> Inni naarauna sia irimariafanoo. Aniaqee qunaqa innee qini ufa irisee mana mana imariafanoo.

<sup>25</sup> Innee qini naamuaqira ufa nimeesugusee qini andeeqa nimaqaranara sia nididanoo.

<sup>26</sup> Qinee irirausa innee umaaraki aqufi saamurifaqa qinee inniara naanaidara qianaaura. Innee mandainainaki aqufifaqa qinee ataasa ataasa qima nimaqaanaura.

<sup>27</sup> Mandainaina fannoo firaa aaku ufaira foora anireenoo inni nifu mara ookeendaandaa meeqeenoo aqusaannoo. Nidafirafa faqa ummaara faqa inni rafaqaqafu sainaqa qinee naanaidara qianaaura.

<sup>28</sup> Innee mi mandainainna kiqari iriranara qini irirana faqaasa daaraifaa qinee sia irianaaura. Innee firaaqoo qiniara aiqamai randeeqa sia paqurifaranoo.

<sup>29</sup> Innee iriranara mandainainee qimasee sia Yaaweena ufa qaindusi mariafanoo.

<sup>30</sup> Innee qini naamuaqira ufara sia nididanoo. Qini andeeqa nimaqaranara sia nididanoo.

<sup>31</sup> Innee inneeqa mandoosana akiiqara feefauru marasaifanoo inni auri-ranara foora nimiannoo.

<sup>32</sup> Irirana siaisa amiqira irirana nimeesa uqaanara kuqidaqa. Furufari mariasa amiqira irirafa sia marinara mandaikidaqa.

<sup>33</sup> Yafasiqa fee qini irirausa ufa irinanoo mi ufafa minasaa rakisi amaqaanoo. Mifa asumu marinanoo sia mandainainara rufiara oosana mariannoo.

## 2

<sup>1</sup> Qini qimaaku iria qinee auqaannee qimasee qimamianna ufana sia qaunua.

<sup>2</sup> Amiqlra ufa amiqimmasee iriseenana minara oonumafi iria.

<sup>3</sup> Eeoo amiqira irirafa anee iannannai anianinnanara iramirisee iria.

<sup>4</sup> Amiqlra iriranara siruaa maqaki marifaqa randee mariandeeemmasee randaa. Kukeeqara amiqlra iriranara akaqa ainaina maqaki kukeeqaqaafaqa randee mariandeeemmasee randaa.

<sup>5</sup> Miqlnana anee Yaaweenara rufiara oosanara iriseenana Anutunara irinnaranoo.

<sup>6</sup> Yaaweefa kai amiqlra irirana nimidanoo. Mifinnaindari kai irirafa faqa oonumafi irirafa faqa anidanoo.

<sup>7</sup> Kuqaa anoona ufa kai qimariasa faqa andeeqara oosana maree mariasa faqa Anufufa dadaaqida itita nimaqaaidanoo.

<sup>8</sup> Anutufa faiqi amana amana kai amiqlmma nimaqee mariasa faqa mina ufa mau maqee maqee fimariasa faqa Anutufa itita nimaqaaidanoo.

<sup>9</sup> Qini qimaaku anee qini ufa irinana amiqlra ainainara faqa andeeqara oosanara amana amana kai rainara oosanara faqa irinnaranoo. Anee aneenna auqainna amiqlra oosanara faqa irinnaranoo.

<sup>10</sup> Anee moomoo amiqira irirana marasainanoo mi irirafa ani اساسirana amiannoo.

<sup>11</sup> Ani amiqimmasee marirafa faqa amiqira irirafa faqa anisaa itita amaqaannoo.

<sup>12</sup> Mifa kai anee manda ainaina auqaranasaa itita amaqaannoo. Ummaara kambiqaanifeera qimariasa ufasaa itita amaqaannoo.

<sup>13</sup> Miqi maria fasiqausa andeeqara marirana minnisee numoo asukunaki maridaqa.

<sup>14</sup> Oosana oosana manda oosanara nidi marisa faqa amiqira irirana sia mari manda oosanara اساسimariasa faqa furufara foomboo rimaria fasiqausa ufara faqa eerairiaqa.

<sup>15</sup> Miqi maria fasiqausa oosana sia andeeqanoo maridanoo. Misa eerairi mariasa maridaqa.

<sup>16</sup> Anee qini andeeqara ufa irinanoo moo fasiqa anaqa fannoo narí fadameena akira ufannai aniara anirinaqa manda oosana auqaanee qinanoo mi amiqira irirafa ani itita amaqaannoo.

<sup>17</sup> Miqira anaasee fannoo narí afaaqiara sia irirai Anutuna afusaa naaquqara qima afeekaikirufa qimaqoonara qaunuseenoo narí afaaqi minnisaidanoo.

<sup>18</sup> Anee miqi mari anaaseena maaqai finana anee kuqirannai fimaria aatata finnananoo. Minni finana kuqirausa maria maqa maaqanakiara foora finnananoo.

<sup>19</sup> Mi anaaseefinnai finafa sia kafa oonurandee aninnaranoo. Anee sia kafa oorurandee kaqi marira aanasaa aninnaranoo.

<sup>20</sup> Anee amiqira irirana marirana mareenana andeeqara fasiqauqa naanna reenana amiqira marira marinnaranoo.

<sup>21</sup> Andeeqara fasiqa anaasee faqa oosana siai fasiqa anaaseesa maqa maaqanara maasaindi fee qimasee minaki marifaranoo.

<sup>22</sup> Miqiga marifanoo Anutufa mi maqa maaqanaki manda oosana maree mariasa ummaqira ainainara foora raraku aquannoo.

### 3

#### *Kumaaraa maanaaqa naakapara ufa.*

<sup>1</sup> Qini qimaaku qinee qimamianna ufana sia qaunua. Qinee qimamianna ufana aiqama kari iridana qinee qimamunnandee ia.

<sup>2</sup> Qinee qimami marunna ufafa ani kuqirana kisaagasaa sainana maridana amiqiranaki reemindeemi riranaki marinnaranoo.

<sup>3</sup> Mapukusee marirana faqa fisoo fisoo irana faqa mi ainainna qanda mareeqee saufauruara foora rumbasaina anukaki mariani, aneena amuqusaki akara rumaqaina mariani.

<sup>4</sup> Anee miqinnanannai faiqí faqa Anutufa faqa aniara nidifaranoo.

<sup>5</sup> Aneenna amuqusa aiqamannai karaambaiqa saqarikia. Sia anee aneenna iriranara amanammifoo qimasee minasaa mundua.

<sup>6</sup> Anee aiqama ainaina auqeenanana Yaaeenara ani aaqooki marinana kai auqaa. Miqimmasee finanoo mifa andeeqara aana ani uqafiqaannoo.

<sup>7</sup> Sia anee aneennara irirana faqaasee qimasee mana mania. Karaambaiqa ufa mau fidana manda oosana auqarara qeerairia.

<sup>8</sup> Anee miqinnanannai amiqira marasinnara foora ani afaaqai namuana qunuseenoo aidafirana taika sainana amiqirafa mariannandee ina marinnaranoo.

<sup>9</sup> Anee aneenna nara ainaina amiqirana kai aneenna maqakinaana unakuseenana Anutuna tatufirana suqa amia.

<sup>10</sup> Anee miqinanoo Yaaweefa ani ainaina moomoo afuqaki rairaamma amiannoo. Anee miqinanoo Yaaweefa quandaki ani narana nammari moomoo rairaamma aminana afeedira maqaki quqararee qimasee sia amanai kinnaranoo.

<sup>11</sup> Oo qini qimaaku Yaaweefa ani andeeqainana sia anee minara akooqaani, Yaaweefa aaquqira ufa qimidanoo fee qimasee amiqimmasee iria.

<sup>12</sup> Yaaweefa narí aidi marisa aaqee foora andeeqa nimaqaidanoo. Faiqi anoofa akoofa narí faiqi andeeqaindee inoo miqidanoo.

<sup>13</sup> Amiqira irirana faqaasa faqa andeeqara irirana faqaasa faqa asasi-daqa.

<sup>14</sup> Irirafa siruaa faqa koora faqa uriaaqararafa maridanoo.

<sup>15</sup> Mi irirafa firaa feefauru qusee maree maria oonina faqa ani kaaqa aidi mari amiqira ainaina faqa uraaqararafa maridanoo.

<sup>16</sup> Irirafa kisaagasaa marirana ani amidanoo. Mi irirafa ainaina faqaa-saikirana faqa uriqarara auqu aniamiannoo.

<sup>17</sup> Amiqira irirafa ani marirana amiqimma amaqaaseenoo ani amiqimmasee afiqee fuannoo.

<sup>18</sup> Amiqira irirana faqaasa asasi-daqa, amiqira irirafa misa marirana nimiannoo.

<sup>19</sup> Yaaweefa narí amiqira iriranannai innaruna faqa maqa faqa auqinau. Oonumafi iriranannai innaaruna murufi atukaranau.

<sup>20</sup> Yaaweena amiqira irirafa qufanoo nammari quminau, kafa oonamuara qufanoo aaku suqufufanoo maqasaa aqufinau.

<sup>21</sup> Oo qini qimaaku anoona ufa faqa amiqira irirana faqa sandee foora atukaramma qumarasee sia uqaa.

<sup>22</sup> Anee miqinanoo mi ainaina qanda ani marirana amisee ani amiqira doodapaaniara foora marifaranoo.

<sup>23</sup> Anee miqinana aneenna aatata amiqimmasee finnaranoo sia aiku rupauraki saamurinnaranoo.

<sup>24</sup> Anee faiqeenana sia rufieennaranoo amiqimmasee afu rirainana faiqeenaranoo.

<sup>25</sup> Manda oosana maree mariasasaa tautummasee kambiqara ummaara firafa firaa aaku oonamuara foora kambiqoondée iranara sia rufieennaranoo.

<sup>26</sup> Yaaweefa ani ummaarasaa itita amaqaannoo. Mifa anisaa rakisina sia ufaanaki arinnaranoo.

<sup>27</sup> Oo qini qimaaku faiqi moo fannoo moo ainainara dadaaqiannee qinana sia qaoo qia. Mi ainaina marinana kaqi dadaaqia.

<sup>28</sup> Sia aneenna aqoonnanara finana duna ani maraanee qia. Aniki marinana aaqee kai amia.

<sup>29</sup> Aneenna aqoonnanara sia oonumafi manda irirana iria mifa ani aaqa marifa narí afaaqa aniki quqee marifa marinara sia manda irirana minara iria.

<sup>30</sup> Ani sia mandaikamma amaqaainnana sia fifau aanoo qima amaqaa.

<sup>31</sup> Anee sia faiqi narimarasa naanna raa. Misa oosana qafammasee sia qinee faqa miqunoo qia.

<sup>32</sup> Manda oosana maree mariasara Yaaweefa fidiqaa midanoo. Andeeqara oosna faqaasa Yaweena afaagasaa aqondi mariafanoo misara aididanoo.

<sup>33</sup> Yaaweefa narí manda niqurara ufa manda oosana maree maria fasiqausa maaqasa uqaidanoo. Andeeqara oosana maree maria fasiqausa maaqasaa narí amiqi amiqirana uqaidanoo.

<sup>34</sup> Faiqí nári nifaaqa nári nuqu uqeeqee fasiqausa Yaaweefa misara akooqaidanoo. Fisoofisoo idaqa nári mara maree qumi mariasara Yaaweefa aididanoo.

<sup>35</sup> Irirana faqaasa nuqu uqeerarana mareefaranoo. Furufari mariasa nári mi furufarirafa nári nisaurirana nimiannoo.

## 4

### *Amiqira irirafa amiqira dadaaqirara nimidanoo.*

<sup>1</sup> Oo qini faiqi namu inneeqa nikausa qini naamuaqira ufasaa irirana rusisee oonumafi irira oosana mareefaranoo.

<sup>2</sup> Qinee qimannimianna ufafa amiqira ufa maridanoo. Minara aiqama aiqamara iria.

<sup>3</sup> Qinee faqa ooqai kaqikaa faiqi mariaafanausa maridaqa. Qinee qeeqa qinaukoo moodaa faiqi mariaafanausa maridaqa.

<sup>4</sup> Qini qikoofa maaqi qimasee qini qimaqiminau. Qinee qimamianna ufana sia qaunua aiqama kari iria. Qinee auqaannee qianna ainaina augeenana sia kuqinnaranoo.

<sup>5</sup> Anee amiqira iriranara faqa oonumafi iriranara faqa randasee maraa. Qinee qimamianna ufana sia irisee qaunua.

<sup>6</sup> Sia amiqira irirana minnisaa minara rinanoo ani faqa maridanoo mifa anisaa rakisiannoo. Anee minara rinanoo mifa anisaa itita amaqaannoo.

<sup>7</sup> Irirafa kuqaa firaa ainaina maridanoo mina kai randasee maraa. Anee nana oosana oosana ainainee maraseenana oonumafi irirana sia aunua mina faqa maraa.

<sup>8</sup> Anee amiqira iriranara aidinana rakisi qumarainanoo mifa ani firaa auqu amiannoo. Anee irirana oonumafi rakisi qumarainanoo ani auquara naaquqarana faqa qeerairirana faqa nimiannoo.

<sup>9</sup> Anee irirana marasainanoo ani aqinaaqa amiqira faini afaira foora mariannoo. Mifa uriqararausa qafeera foora ani akiiqa afisu amaqaanoo mariannoo.

<sup>10</sup> Oo qini qimaaku anee oori kandamasee qini ufa irisainanoo ani marirafa kisaagasaa mariannoo.

<sup>11</sup> Qinee amiqira iriramau fimaria aanna aamuqaqi marunausa maridaqa.

<sup>12</sup> Anee mimau finanoo sia moo ainaina fannoo ani aana ititaannoo. Anee mimau finana sia aiku rupaurinnaranoo.

<sup>13</sup> Anee aamuqaqira ufa rakisi qumaraa. Sia uqaa. Aneenna ufa minasaa atukarama qaina mariani ani marirafa maridanoo.

<sup>14</sup> Aaqee mariasa fimaria aatata sia fua. Sia manda oosana maree mariasa naanna raa.

<sup>15</sup> Anee misa aatata faqa sia fua. Minniseenana aneenna aatata kai fua.

<sup>16</sup> Mandoosana maree mariasa akaqausa mareeqee sia nári mandoosanaki uqaseeqa sia maqasaa faiqeeffaranoo. Misa akaqausa rarisameeqee minaki uqaseeqa maqasaa faiqeeffaranoo.

<sup>17</sup> Misa manda oosana faqa faiqí kuqa narirafa faqa misa narana nam-mariara foora maridanoo.

<sup>18</sup> Andeeqarausa nimari aanafa kaaqa qara aana uqanna maridanoo.

<sup>19</sup> Manda oosana maree mariasa aana asukuna miqirafa maridanoo. Misa nanasee fee niku amaki saamrida fee, sia qafaidaqa.

<sup>20</sup> Oo qini qimaaku amiqimmasee qinee qunna ufana iria. Qini ufa amiqimmasee iria.

<sup>21</sup> Sia amiqira irirana minnisaina fuani. Aneenna amuqusaki quqasaina mariani.

<sup>22</sup> Amiḡira irirafa faḡa oonumafi irirana faḡa sia kuḡirana faḡa nifaaḡa amiḡi amiḡirana faḡa nimidanoo.

<sup>23</sup> Maa firaa ainainnara ḡimamianauro. Aneenna amuḡusasa rakisia. Aiḡama marirana oosana amuḡusaki ḡari ururaidanoo minara aneenna amuḡusa amiḡimmaseenana rakisia.

<sup>24</sup> Sia unna ufa ḡia. Unna ufa faḡa eendaandira oosanrafa faḡa sia ḡia.

<sup>25</sup> Aneenna firaree ḡinnaḡoo amiḡimmasee aiuḡummasee kuḡaa ḡi-maseenana fua. Sia aneenna akiḡa asauriranaki ḡuḡaa.

<sup>26</sup> Aneenna nimarianna aannana andeeḡasainanoo amiḡinoo marinana nua.

<sup>27</sup> Anee aneenna aatata fidana sia dinni ḡandee dinni ḡandee ia. Andeeḡasee manda oosanara ḡeairammasee ani aiku fannoo ani aatata kai fuani.

## 5

### *Sia moona anaaḡa ummuaria.*

<sup>1</sup> Oo ḡini ḡimaaku ḡini aakapara ufa amiḡimmandee aaḡoo uḡasee iria. ḡinee amiḡira irirana faḡa aakapara ufa faḡa ani ḡimamidaḡa.

<sup>2</sup> Anee andeeḡara oosana mau finanoo ani aiḡama ufaḡirafa irirana faḡaasa ufara foora mariannoo.

<sup>3</sup> Moo fasiḡa anaaḡa ufa fannoo kaḡa adiafaa iannoo. Ookasaasa anoona adiafaa imarina faḡa uriaaḡaranoo mariannoo. Mina ookinaa ufa fannoo fadameena miḡirafa maridanoo.

<sup>4</sup> Mifa taikainanoo mifa ani ḡuḡasee finanoo ḡisaaḡa suka miḡirafa faḡa aidafirafa faḡa mariannoo. Aseema miḡirafa afai raiḡarafa ani afaaḡa ateeḡaanoo.

<sup>5</sup> Mi anaaseefa ani afiḡeenoo kuḡira maḡa maaḡaki fidanoo. Mina nira aana kuḡirafa maridanoo.

<sup>6</sup> Mifa sia kaḡi marira aatatau fidanoo fau. Mifa fimari aanafa eendaandirafa maridanoo sia minara irimarifa kaḡi mi aatata fimarifa maridanoo.

<sup>7</sup> ḡini faiḡi namu ḡini ufa iria sia ḡinee ḡimannimianna ufana ḡaunuaḡa.

<sup>8</sup> Anee mi anaaseefa mariḡooḡari nianai maria. Sia mina kooḡi aaḡa faḡa fua.

<sup>9</sup> Anee mina kooḡi aaḡa finana aneenna andeeḡaree auḡu aiḡamausa nifusaa maḡasaa uḡaminanoo aḡufuannoo. Anee nimudaoo ḡirana siaisa nisaukuki oonu rainaḡa kuḡa arifaranoo.

<sup>10</sup> Anaamuru anireeḡa ani ainaina kaḡi mareefaranoo. Ani kadaapi rirafa moosaindika miannoo.

<sup>11</sup> Anee aneenna faiḡara ḡaarisa annadannadidana kuḡina marinaḡa ani amaḡi faḡa aununu faḡa fifau ainainauḡa namaseefaranoo.

<sup>12</sup> Miḡidana annadannadidana maaḡi ḡinnaranoo. Oo ḡinee nanaree aaḡuḡira ufasa fidaḡaa iḡiafanee. ḡini ḡimuḡusa fannoo aamuaḡira ufara fidaḡaa imariafanausa maridaḡa.

<sup>13</sup> ḡinee sia ufa ḡima ḡimusa ufa iriafanausa maridaḡa. ḡinee aaḡafana andeeḡa ḡimaḡoosa ufa sia iriafanausa maridaḡa.

<sup>14</sup> ḡinee maḡee aiḡamausa nifusaa tautummasee ḡisauriranaki firaridaḡa.

<sup>15</sup> Anneenna nammari kai naa. Aneenna taḡuki kai sakasee naa.

<sup>16</sup> Moomoo aanaaseesa faiḡi maḡasainausa sia ani andeeḡa amaḡeefaranoo.

<sup>17</sup> Anee moo aanaaseesa maḡasainna faiḡifa mi anaaseena oosanaki mariannoo. Sia ani faḡa mariannoo.

<sup>18</sup> Aneenna anaaqa kumaaraasaa maroonnana mina faqa amiqidana اساسammasee maria.

<sup>19</sup> Mina afaaqa amiqirafa eeqaku miqirafa ummooqukirafa maridanoo. Mina faqa maqee maqee maria. Anee maqee maqee mina naammara kai aidiani. Mina aidirafa maqee maqee ani qumaraani.

<sup>20</sup> Oo qini qimaaku nanaree anee moo aanaaseera ridanee. Anee nanaree moo fasiqa anaaqa naammara ridanee.

<sup>21</sup> Anee aiqama ainaina auqaannana Yaaweefa qafaidanoo. Anee yaiffee fuananoo Yaaaweefa anisaa rakisidanoo.

<sup>22</sup> Manda oosana maree mariasa nári mandainaina fannoo ufaanara foora nári ninuka qumaraidanoo.

<sup>23</sup> Mi fasiqausa sia nariqa nirana mariranasaa rakisira irirafa marinara kuqidaqa.

## 6

<sup>1-2</sup> Oo qini qimaaku akaqausa dinnaa munnimma maraifana misa faqa qima afeekaika maseenana qinee mina akiiqra ianauree qimasee sia miqinana aneenna qima afeekaikianna ufanaki ufaana kiara foora aruananoo.

<sup>3</sup> Oo qini qimaaku anee maaqi qimasee mi fasiqana ufaanakinaana aneenna faaqa mara kaqinni quaa. Doo anee aneenna afaaqa aneenna aqoonnana asaukuki quqaananoo kai kaqi moodaaqoo oonureenana mi ufana taikasaa.

<sup>4</sup> Anee sia faiqaa sia kisaaqasaa adooaida maria.

<sup>5</sup> Anee kaasau kuara miqirafa maria ufaanaki arufinoo munari minarindee dauni ratoofusee mina faqa ufa qima taikaa. Ufini ufaanaki aiku arindee ia, dauni aruratoofua.

<sup>6</sup> Oo kudi fasiqauqa tarika mariqoo oonuree mina oosana qafaaqa. Innee mina oosana qafamaseeqa oonumafi iriseeqa irirana faqaasaikifaranoo.

<sup>7</sup> Sia tarika rakisirafa moo maridanoo sia misa fukifaaki qimarifa moo maridanoo, sia moo fannoo misa aranaiqi qimannimifaqa ainainai fidaqa.

<sup>8</sup> Suani aukwana misa nári kai nári narana moomoo afeedidaqa. Aaku aukwana narana taikainaqa nararee qimasee miqidaqa.

<sup>9</sup> Oo kudi fasiqa kisaaqasaa fee innee miqoo faiqaqee ifaree. Yairee fee innee findi fifaree.

<sup>10</sup> Innee maaqi qimariafanoo maasa qusasaa faiqaanauree qimariafanoo. Maasa qeeqa qisauku raqandaammasee kaqikaqoo idooaanauree qimariafanoo.

<sup>11</sup> Innee faiqaafanoo inni faiqarafa ummuara fasiqara foora inni aiqama ainaina ummuara maraanoo.

<sup>12</sup> Mana oosana maree mariasa unnufa qiqa nidaqa.

<sup>13</sup> Nikaru qiraree qimasee nifu quandaqaandi mariasa misa niku munuree miniree imariasa maridaqa.

<sup>14</sup> Misa nimuqusaki nikaruqirafa qumbiqarausa maridaqa. Maqee maqee mandainainara kai ufa qimariasa maridaqa. Misa aiqamatina nidaqa ummaara kambiqaanifeera kai andaana riqa nidaqa.

<sup>15</sup> Miqi marianara firaa ummaara sia aaquqima nimaqarai tautummasee misa naruannoo.

<sup>16</sup> Yaaweefa qisauku dinni taikasee dinni oonu qaara marasee ainaina auqaanara kaaqa fidaaidanoo.

<sup>17-19</sup> Maa ainainnara fidaqaa idanoo. Oori uqeeraranara faqa unna qimari afaurunara faqa fifau fidika ruiqee marinara faqa manda oosanara nári iriranaki tipundaari mariana faqa mandainainaki dauni niku ree

mariana faqa kootaki unnufa qimariana faqa nári nikaqaafasaa ummaara nimimaria oosannara faqa Yaaweefa fidiqaa idanoo.

<sup>20</sup> Oo qini qimaaku ani akausa qimamunnandee inana aneenna anoona ufa sia qaunua.

<sup>21</sup> Aiqama kari aneenna anaukoo ufa sia quqaa, aneenna amuqusaki quqasee atukaraa.

<sup>22</sup> Misa qimaminna ufafa ani indaarunnikamma amaqaanoo. Eendaki anisaa itita amaqaaseenoo faasaana niranaki ani aakapaanoo.

<sup>23</sup> Ani anaukoo aakapara ufa qoomara foora kaaqaqaidanoo. Misa andeeqara ufa fannoo ani maa maqanasaa marirana andeeqa amaqaaidanoo.

<sup>24</sup> Mi ufafa dapi maraqa nua anaasee finnai firanasaa itita amaqaanoo. Akaqa fasiqauqa ninaaqmaaka fadameena akira ufasaa itito amaqaanoo.

<sup>25</sup> Sia anee misa amiqira nifaqara rua. Afunnai ani mareeqeenoo ufaanaki aruaneera quqainana sia minara iria.

<sup>26</sup> Dapi maraqa nua aanaaseefinnai finana kaqikaa feefauru narana maree mariana amana kai aqinnaranoo. Faiqí moo anaqa faqa finana firaa feefauru faqa aneenna aiqama ainaina faqa aqinnaranoo.

<sup>27</sup> Amanee anee ida auri marina qumaree amuqusasaa uqasainanoo qamunna sia qaannoo fee. Ani qamunna faqa afaqa faqa aiqama ida qaannoo.

<sup>28</sup> Amanee anee ida auruki aiku reennaree sia amana reennaranoo. Aiku turuquanoo.

<sup>29</sup> Doo miqi kai inoo faiqí moo fannoo narí aqoonnana anaqa faqa sia faiqaanoo. Miqinafa aupurarana maraanoo.

<sup>30</sup> Faiqí moo fannoo aararainanoo ummuara masainanoo sia minara firaaqoo ufa qifaranoo.

<sup>31</sup> Akaqausa mifasiqana paqurimmasaifanoo moodaa ainaina ummuarinana akiiqara dinni taikasee dinni ani qaara marasee 7 ainaina amiannoo. Mifa narí uaqeei ainaina aiqama amiannoo.

<sup>32</sup> Narana ummuari fasiqanara miqimminoo marifanoo anaasee ummuari marinara maqimminoo maridanoo. Moo fasia anaqa faqa manda oosana auqee marifa narí kai narí kurididanoo.

<sup>33</sup> Mi fasiqafa arirana faqa aqirana faqa maraidanoo. Mi fasiqafa naaruara asauriranaki mariannoo.

<sup>34</sup> Mi anaaseena afaaqi paqurinanoo rairai qirafa idara foora atakuquanoo. Minara ufa qifanoo sia kaqi irinoo minnisaanoo, arana qarafa kisaqasaa mariannoo. Sia kai kaqi taikaanoo.

<sup>35</sup> Sia mifa feefauruara iriannoo munnimma ainaina oosana oosana aminanoo siamma iriannoo sia doo fee qiannoo.

## 7

<sup>1</sup> Oo qini qimaaku qinee qimamianna ufana iria. Qinee auqaannee qianna ainainnara sia qaunua.

<sup>2</sup> Anee qinee qunnandee inana amiqimmasee marinaranoo. Qini aamuaqiira ufa aneenna afu rakisinnandee amiqimmasee rakisia.

<sup>3</sup> Qini aakapara ufa aiqama kari uaqeeina ani faqa mariani. Aneenna amuqusasaa akara rumasaina mariani.

<sup>4</sup> Oo qini qimaaku anee amiqira iriranara qini qisookifee qia. Oonumafi iriranara qifaaqa saa qiqaondi fee qia.

<sup>5</sup> Anee miqinanoo mi irirafa moona anaqa faqa firanasaa aitita amaqaanoo. Mi anaaseesa fadameena akira ufasaa itita amaqaanoo.



6-9 Qinee qeeqa maaqaki ooqufaḡee qeeqa kooqirunna qafaunanoo dapi kumaarauqa marianakiqari moo furufarira kumaara fannoo um-muarimari anaaseena maaqa marindanai ubeekaidanoo mina kooqindanai fidanoo doo mina naambeeḡandanai finoo suani keeqaifanoo sisiasa qeenoo fee eendaki fee asukunai fee doo mifinnai fidanoo.

10 Mi anaaseefa doo oonu aḡararee qimasee anidanoo. Aatata nua aanaaseesa qamunna afisusee anidanoo.

11 Mi anaaseefa kambaaramasee ufa qimarifa asaurirana siaifa maridanoo. Mifa aiqama kari fifau aatata oonuree aniree inoo nifa maridanoo.

12 Anee aanai finana miqoo qafeennaranoo. Anee maqusa qambaanaai finana mina miqoo qafeennaranoo. Mifa aiqama aana kindooraki oonureenoo afu munu maḡee mini maḡee iannoo.

13 Mi kummaaraana paqurimandee asauku qaqusee qumaseenoo amooqa namaseenoo afuki kai qafanoo maridanoo qiannoo.

14 Doo qinee maḡee amaana maqaki keeqaḡiqa tatufirana suḡeeḡee qiannoo. Doo qinee tatufirana suḡaidaḡa aandau ati maree mini quḡasee anidaḡee qiannoo.

15 Qinee qeeqa maaqakiqari raudamaki aniara randamaree doo ani paquriqa.

16 Doo qinee qeeqa qaari amiqirana uḡiqiseeḡa. Isipa maḡanna qamunna amiqirananoo minasaa uḡiqiseeḡa.

17-18 Qinee minasaa fadameena afundi marina adieesee makaqa anoona faqa saadapu anoona faqa adieeseeḡa doo anee aniraina maaqooqari oosana arasee nariara nariara nidira nammari neenee iaḡasaa.

19-20 Qini qifaaqi sia maridanoo nianai fifinoo mifa munnimma moomoo maree finoo mifa qaara amaana minni maraannoo sia kai kaqi aniannoo.

21 Mi aanaaseefa narí naammannai mina qumaraseenoo ummooqifira ufannai mina rarisaidanoo.

22 Mi anaaseena ufa fannoo mi kumaaraana afu dapikammasaifanoo aandau miqirafa sia irirai kuqiranaki kaqi fidanoo.

23 Kaasau kuara ufaanaki arinoo marifanoo faiqí oonu qafeenoo doo amuḡusa arifanoo kuqidanoo. Mifa uḡiniara foora sia irirai uḡini ufanaki keeqafinoo kuquannoo. Mifa narí marirafa manda marinara sia iridanoo.

24 Oo qini faiqi namu innee amiqimmasee qinee qianna ufana iriaqa.

25 Inni nimuḡusa fannoo sia mi anaaseena faqa firara findifuani. Sia kambaaramasee mi anaaseefa marinnai fuaqa.

26 Mifa moomoo fasiqa mandaikamma nimaḡaseenoo kuqirana niminoo. Sia amana nisaana rirana amana kuqa narimarifa maridanoo.

27 Anee mi aanaaseena maaqai finana anee kuqira aatata fimariananoo. Mi aanafa kuqirannai fimaria aanafa qusa aana maridanoo.

## 8

1 Iriaqa, amiqira irirafa irirana faḡaa aanaaseera foora nammeera qidanoo. Oonumafi irirafa dadaaqinoo firaḡoo naaraidanoo.

2 Amiqira irirafa aaqana namusaa fee aanasaa fee aana kindooraki fee kikiqinoo maridanoo nammeera qidanoo.

3 Maaḡusa kooqiki fee maḡusa atinni fee kikiqinoo maridanoo maaqi qimasee nammeera qidanoo.

4 Inni aiqamausa qimannimidaḡa, inni aiqama maa maḡa maaḡana saaqaraasa naaraidaḡa.

<sup>5</sup> Innee irirana siaisa irirana maraaqa. Furufarirausa inneeqa furufarirana kiqari nifu maqasaa qafamasee iriaqa.

<sup>6</sup> Qini amiqira ufa iriaqa, aiqama qinee qimannimi marunna ufafa kuqaa kai maridanoo.

<sup>7</sup> Qinee qimarunna ufafa kuqaa anoona maridanoo. Qinee unna ufara fidiqaa midaqa.

<sup>8</sup> Qini aiqama ufa kuqaa kai maridanoo. Sia unna qirafa faqa eendaandirafa faqa minaki maridanoo.

<sup>9</sup> Irirana faqaafa qini ufara aiqama iriannoo kaaqa qara ufa fee qiannoo. Irirana faqaasa qini ufara kuqaa anoonee qifaranoo.

<sup>10</sup> Innee siruaa minnisee qini naakaparanara amiqira ainainee qimasee maraaqa. Innee koora munnimmara rimariana minnisaqa, irirafa mifa naaru naaru marirafa maridanoo mina maraaqa.

<sup>11</sup> Qinee amiqira irirausa maridaqa qinee nifaaqa auqi maria amiqira ainainausa faqa uriaqararausa maridaqa. Sia moo ainaina innee rimariafa qini qimana maridanoo.

<sup>12</sup> Qinee irirausa ufa raina nimaqarana akausa maridaqa. Qinee irirausa akooqoo irirana auqi marinausa maridaqa.

<sup>13</sup> Yaaweenara qeerairida mina ufa qaindusiraree qimasee manda oosana fidiqaa ia. Qinee ramoo ramaa iranara faqa nári nuqu uqeerara oosana faqa manda oosana faqa unnufa qiranara faqa fidiqaamidaga.

<sup>14</sup> Qinee ainaina auqararee qimasee qeeqa iriranaki qima irisee auqaanura. Qinee oonu mafi irirana faqaasa maridaqa qinee afeeka maridaqa.

<sup>15</sup> Qinee uriqararausa faqa rakisirausa faqa dadaaqunaqa amiqira irirana qimasee maqa maaqaki rakisi nimaqaidaga.

<sup>16</sup> Aiqama maa maqanasaa qaraa rakisirausa qini dadaaqirananoo rakisi nimaqaidaga. Uriqararausa miqi kai idaga.

<sup>17</sup> Qiniara rimariasara qinee faqa misara ridaqa. Nimudaanai qimasee qiniara randee mariasa misa qini paqurifaranoo.

<sup>18</sup> Qinee moomoo munnimma faqa uriqarara auqu faqa uaqeeidaga nimianaura. Aiqama ainaina auqainafa anoona kambiqarana faqa reemindeemirirana faqa nimianaura.

<sup>19</sup> Qini ainaina maraafa koora uraaqararafa maridanoo. Mina amiqirafa kaaqa amiqira siruaa faqa uriaqararafa maridanoo.

<sup>20</sup> Qinee andeeqara aatata kai fidaqa. Qinee ufa amana amana kai raina nimaqara aatata fidaqa.

<sup>21</sup> Qiniara rimariasana moomoo qumiasana nimidaqa misa maaqaki qumiasana qumbiqannisaidaga.

<sup>22</sup> Ooqai Yaaweefa aiqama ainaina auquanee qimaseenoo qini irirana naaree auqinau.

<sup>23</sup> Ooqai uqanna aiqama ainaina sia auquqoo qini irirausa naaree auqinau. Maa maqa maaqana sia auquaqee idanoo qini naaree auqinau.

<sup>24</sup> Ooqai ooruku nammari sia maruqoo qinee naaree kambiqaafanausa maridaqa. Maqakiqari nammariuqa sia ururee marufaqa qinee naaree kambiqaqafana.

<sup>25</sup> Aaqanauqa faqa amuaqu namuqa faqa sia maruqoo qinee naaree kambiqaafanausa maridaqa.

<sup>26</sup> Yaaweefa maqa maaqa faqa kookoomma faqa sia auqu aukwana qinee irirausa naaree mariafanausa maridaqa.

<sup>27</sup> Qinee faqa mariafananoo Yaaweefa innaaruna auqu quqanau. Qinee faqa mariafananoo Yaaweefa ooruku nammari fiqufiqumma auqu quqanau.

<sup>28</sup> Qinee faqa mariafananoo Yaaweefa oonnamu auqu quqanau. Qinee faqa mariafananoo Yaaweefa ooruku nammari maqakiqari ururee maruna auqu quqanau.

<sup>29</sup> Qinee irirausa Yaaweena faqa mariafananoo Yaaweefa ooruku nammari mandiranara maa oosirana amana kai mandianne qufanoo miqininau. Qinee faqa mariafananoo Yaaweefa maa maqana maaqa atunara foora rakiasoofanoo maridanoo.

<sup>30</sup> Yaaweefa mi ainainausa auqi marufaqa qinee amiqira irirausa mina aafa faiqi aanaaqiara foora mariaafanausa maridaqa. Qinee mina afusaa maridaqa aiqama kari اساسirana amimariqiafana.

<sup>31</sup> Aiqa maqa maaqai asasiqa niniaafanausa maridaqa. Qinee faiqi faiqi faqa asasiqa niniaafanausa maridaqa.

<sup>32</sup> Doo maqee kumaaraa fasiqa anaasee qini ufa iriaqa. Qinee qiannandee iqa innee اساسifaranoo.

<sup>33</sup> Innee qini naakapara ufa iriaqa, sia minnisaaqa. Iriseeqa irirana faqaasa mariaqa.

<sup>34</sup> Qini ufa irimariasa اساسifaranoo. Qini kooqiki aiqama kari mariasa faqa eeqa maaqai fimarunna aanna afainni maridaqa qiniara rakisi mariasa اساسifaranoo.

<sup>35</sup> Faiqi moo fannoo qini irirausa paqurinafa kaqi marirana faqa paqurinnoo.

<sup>36</sup> Faiqi qini irirausara sia randee mariasa nariqa kai nariqa mandaikamma nimaqaidaqa. Qini irirausara fidiqaa imariasa kuqiranara nididanoo.

## 9

<sup>1</sup> Irirafa nari maaqa atuna qisauku dinni taikasee dinni ani qaara marasee 7 pausasaa usakaseenoo.

<sup>2</sup> Irirafa nari aandau arusee suqeenoo. Narana faqa uainna nammari faqa deedaqamma narana neemaria qaindanasaa oomaqa saka quqanau.

<sup>3</sup> Mifa nari ainainira maanaaqauqa niqiqoofaqa maqusasaa aaqanaikiraqoo ooruree nammeera qiaqera niqiqoofaqa fiqau.

<sup>4</sup> Innee ooruree maaqi qimasee nammeera qiaqa. Innee irirana siaisa mai aniree qoomaqa naaqee qiaqa. Furufarirausara maaqi qimasee nammeera qiaqa.

<sup>5</sup> Mai aniree qini narana nammari naaqee qiaqa.

<sup>6</sup> Inneeqa furufarirana minnisee kisaaqusaa mari faranoo. Amiqira iriranamau fuaqa.

<sup>7</sup> Anee nariara maasa amiqirausee qimaria fasiqausa qaoo qinaqa misa ani namuqaaka mifaranoo. Nariara andeeqarausee qimariasa aaqaranara qaoo qinaqa misa ani arifaranoo.

<sup>8</sup> Anee ufa rukiee maria fasiqausara qaoo qinaqa misa aniara fidiqaa mifaranoo. Anee irirana faqaa fasiqa andeeqa amaqaainanoo ani ufara eedoo qimasee ani ameemaanai keeqaannoo.

<sup>9</sup> Nana ainainaree irirana faqaana qimaminanoo mifa misa kaaqa firaaqoo irirana faqaasaikamma nimaqaannoo. Andeeqara fasiqauqa qimanniminaqa misa moo faqa moo faqa irirana mareefaranoo.

<sup>10</sup> Yaaweenara rufieenana irirana faqaafa mariannaranoo. Anutuna naaquqara ainainara irinanoo mifa ufa irirana oosana amiannoo.

<sup>11</sup> Amiqira irirafa faiqí marirana maa maqanasaa kisaafa kamu rarisama nimaqaidanoo.

<sup>12</sup> Anee irirana faqaafa marinanoo mi irirafa ani moomoo amiqirana amiannoo. Anee mi irirana minnisainanoo aupurarafa aniki mariannoo.

<sup>13</sup> Furufarirafa asaurirana siai anaaseefara foora maridanoo. Firaqoo faafa quqasee ufa qimari anaaseefara foora maridanoo.

<sup>14</sup> Miqira anaasee fannoo narí maaqa kooqi afaisaa ooqumarifinoo aiqama maqusa mirinni urinnaaqaramafa maridanoo.

<sup>15</sup> Akaqausa nári qimaqaannai nári ainainai aiqaree fimariasa misa naarama narí maaqaki quqaidanoo.

<sup>16</sup> Mi aanaaseefa maaqi qimasee furufarirausa qimannimidanoo. Irirana siaisa doo mai aniaqee qidanoo. Furufarirausara maaqi qidanoo.

<sup>17</sup> Ummuarira nammari adiafaa irafa maridanoo. Ummuarira feemu narafa adiafaa midanoo.

<sup>18</sup> Mi anaaseefinnai fimariasa kuqimarianara furufarira fasiqa fannoo sia iridanoo. Mi anaaseena maaqaki keeqoosa maqee kuqira maqa maaqaki maridaqa.

## 10

<sup>1</sup> Maana Sooroomoonnana aaquqira ufa maridanoo. Irirana faqaasa nári rukausa mara asasirana nimidaqa. Furufarirausa nári ninausa nisaurirana nimidaqa.

<sup>2</sup> Unna qira aatata marainna ainainafa sia ani dadaaqiannoo. Anoona qira aatata marainna ainainafa ani marirana dadaaqiannoo.

<sup>3</sup> Anutufa sia andeeqara fasiqauqa naarararana nimiannoo. Manda oosana maree mariasa nári nidimari ainainna mararanasaa Anutufa itita nisaidanoo.

<sup>4</sup> Kudoosaaparafa kudikirana amiannoo. Kadaapi rirafa ani ainaina faqaa faikamma aisaidanoo.

<sup>5</sup> Irirana faqaafa narana qaanaakifaqa afeedidaqa. Moo fannoo narana unnakara aukwana faiaqee idanoo sia narana deedaqafi asauriranaki mariannoo.

<sup>6</sup> Andeeqara fasiqa anaasee amiqi amiqirana mareefaranoo. Manda oosana maree marina ufa fannoo mina manda irirana kukeeqasaifanoo akaqausa mandaikamma nisaidanoo.

<sup>7</sup> Amiqira fasiqa kuqufinaqa amiqira ainainara foora iriranaki kaqi minara oonu mafi irifaranoo. Manda oosana maree mari fasiqafa kuqufinaqa misa mi fasiqanara kai kaqi qaunuseefaranoo.

<sup>8</sup> Irirana faqaasa amiqira naamuaqira ufa iriseeqa nári nimuqusaki mara quqaidaqa. Fifau faafau iqa nuasa kuridifanoo.

<sup>9</sup> Kuqaa qira oosana fannoo faiqí mareeqeenoo andeeqaranaki quqaannoo. Unna qira oosana fannoo faiqí mareeqeenoo maaniki aquannoo.

<sup>10</sup> Noorinnai nifunnai imariasa ummaara kambiqaanifeera miqidaqa. Aiqama nifufsaa paasoosammandee manda oosanara qaoo qinafa mifa asoarana nimidanoo miqidanoo.

<sup>11</sup> Amiqira fasiqa ufa fannoo nammariara foora, maqakiqari urureenoo kaqi marirana nimidanoo. Mandoosana maree mari fasiqana ufa fannoo narí irirana kukeeqa saifanoo narí aqoonausa mandaikamma nimaqaidanoo.

<sup>12</sup> Faiqí aanaaseera fidiqaa ira oosana fannoo ummaara kambiqaidanoo. Faiqí aanaaseera nidira oosana fannoo aiqama misa aaqarana minninnisaidanoo.

<sup>13</sup> Irirana faqaa fasiqa afaurusaa amiqira ufa kai ururaidanoo. Furufarira fasiqa arirafa kai maridanoo.

<sup>14</sup> Irirana faqaasa irirana oosana oosana moodaasaqa maridanoo. Furufarira fasiqa ufa qinanoo ummaara sia nianai mariannoo aaqa uqanna mariannoo.

<sup>15</sup> Ainaina faqaana narí ainaina fannoo itita amaqaaidanoo. Kudi fasiqa fannoo ainaina sia marinara kuridiannoo.

<sup>16</sup> Ami qira oosana auqaana akiqara kaqi marirafa maridanoo. Numoo fannoo nifiqeenoo firaa numooki kai fidanoo.

<sup>17</sup> Naakapara ufa iri mariasa sia kuqifaranoo. Naakaparanara nikooqee mariasa manda aatata fifaranoo.

<sup>18</sup> Faiqí moo fannoo faiqí aanaaseera ookiqari amiqi amiqidanoo umee fidiqaa imarifa unnaqi marifa maridanoo. Munuqi miniqinoo nifa furufari marifa maridanoo.

<sup>19</sup> Ufa moomoo qinana moomoo aaqarana mareennaranoo. Anee irirana faqaafa maridana qireeda marinnaranoo.

<sup>20</sup> Amkiqira fasiqa ufa fannoo amiqira siruaara foora maridanoo. Mandoosana maree mari fasiqana irirafa maannukuara foora maridanoo.

<sup>21</sup> Ami qira fasiqa ufa fannoo moomoosa dadaaqidanoo. Furufari marifa narí furufariranannai narí kai aridanoo.

<sup>22</sup> Anutuna amiqi amiqiranannai kai ainaina faqaafaikinnaranoo. Ani kadaapirirafa sia amana minaki ookaa iannoo Anutufa kai amiannoo.

<sup>23</sup> Furufarirafa manda oosana auqarara kai asaidanoo. Ami qira irirana faqaafa amiqira oosana auqee marinara kai asaidanoo.

<sup>24</sup> Andeeqarusa nári nidimari ainainna mareefaranoo. Mandoosana maree mariasa kaaqa rufiee maria ainainna mareefaranoo.

<sup>25</sup> Deedeefaa ufai firaafa uqinanoo mandoosana maree mariasa fuaqamma aqusaannoo. Andeeqarusa sia fuaqa aquannoo. Misaki kaqi marifaranoo.

<sup>26</sup> Anee kudoosaapara fasiqa sia anenna ainainiani feera afiqaa. Afiqasainanoo kudoosapee marinana afai sandurinafaara. Ida muna aninna afuki keeqeenoo foora iandoora sia afiqaa.

<sup>27</sup> Yaaweena ufa qaindusinana sia dauni kuqinnaranoo kisaagasaa marinnaranoo. Manda oosana maree mariasa kuqirafa kisaagasaa mari faqa kasaaqai kuqidaqa.

<sup>28</sup> Andeeqara fasiqa anaasee nidimari ainainafa kuqaa kambiqainafa asafaranoo. Manda oosana maree mariasa sia moo ainaina mareefaranoo.

<sup>29</sup> Kuqaa qira oosana faqaasasaa Anutufa faandaamurara foora misa itita nimaqaidanoo. Miqimmaseenoo quandaki mandoosana maree mariasa kuridi nimaqaidanoo.

<sup>30</sup> Andeeqara oosana maree mariasa sia amana atoosaa ususee kumbaimmaqifaranoo, misa doo miqoo mapukiqa maridaqa. Manda oosana maree mariasa sia mi maqa maaqanaki marifaranoo.

<sup>31</sup> Andeeqara oosana maree mariasa amiqira ufa kai qidaqa. Manda ufa qimari fasiqana afaurusaa ititeefaranoo.

<sup>32</sup> Andeeqarusa ufa qimannimidaqa narí oonu mafi iriseenoo mina ookiqari amiqira ufa kai qidanoo. Manda oosana maree mariasa aiqama kari narira ufa kai qidaqa.

## 11

<sup>1</sup> Sia andeeqara sikeerara foora imariasara Yaawefa fidiqaa midanoo. Mifa andeeqara sikeerara aidifanoo asaidanoo.

<sup>2</sup> Faiqí moo fannoo narí afaaqa amooqi marifa qusasaa asauriranaki aqufuannoo. Moo fannoo narí afaaqara reendeeni marifa irirana faqaafa mariannoo.

<sup>3</sup> Ainainara kuqaa qimariasa misa nári kuqaa qira oosana fannoo manda ainainasaa itita nisaidanoo. Sia Yaaweena saqarikinausa nariqa unnaqira oosana fannoo nariqa kuridi nimaqaidanoo.

<sup>4</sup> Ani moomoo ainaina fannoo sia ani kuqiranasaa itita amaqaanoo. Aneeqara oosana fannoo ani itita amaqaanoo.

<sup>5</sup> Kuqaa qira oosana fannoo andeeqara fasiqa marirana amanaikamma amaqaaidanoo. Sia saqariki mariasa nariqa mi oosanafa nári nikuqama nimifaqa aqufidaqa.

<sup>6</sup> Andeeqarausa nári andeeqarafa idukunnisaidanoo. Sia saqariki mariasa nári mi manda oosanafa nári ufaanara foora ninuka aridanoo.

<sup>7</sup> Manda oosana maree mariasa nári kuqira faasaana nári nidi marifaqa mararee qimaria ainainafa mi faasaanna taikaannoo. Manda oosanannai ainaina marararee qimariasa mi faasaanna nári ainaina mararafa taikaannoo.

<sup>8</sup> Amiqira oosana maree marina mandainaina anifanoo Anutufa itita amaqaifanoo mi mandainainafa aiqareenoo mandainaina maree mariasa nifaaqai aqufidanoo.

<sup>9</sup> Anutunara nikooqee mariasa ufa fannoo ani mareeqee mandaki quqaisaannoo. Andeeqara oosana maree mariasa irirafa ani mareeqee amiqiraqoo quqaanoo.

<sup>10</sup> Andeeqee maria misa aiqama ainaina andeeqaiifaqa faiqí anaasee mina qafamasee asasidaqa. Manda oosana maree mariasa kuridifaqa asafaranoo.

<sup>11</sup> Andeeqee mariasa maqusa amiqi amiqinoo maridanoo. Manda oosana maree mariasa ufa fannoo nári maqusa naakunduka midanoo.

<sup>12</sup> Irirana siaifa narí aqoonausa raiqara ufa qimannimaqaidanoo. Irirana faqaafa sia miqira ufa qidanoo oo qummunimmasee maridanoo.

<sup>13</sup> Munuqi miniqimarifa aaqaidanoo kukeeqarana kooroo imarifa maridanoo. Amiqi mari fasiqafa mifa kukeeqarana rafaqaqidanoo.

<sup>14</sup> Moomoo irirana faqaasa marinna maqusafa sia aqufuannoo. Irirana sia marinna maqusafa aqufuannoo.

<sup>15</sup> Anee moo maqannaa dinnaakira munnimmara dadaaqianee qinana dadaaqinanoo doo ani munnimma kuridiranaki finanoo ani afaaqa mandaika uqanna iannoo. Anee aanaamuru feefauru dadaaqiranara akooqee marinanoo ani munnimma kaqi mariannoo anee amiqiraqoo kaqi marinnaranoo.

<sup>16</sup> Afaaridanoo fifamari anaaseefa amiqirafa aiqamausa mi anaaseena amooqi mariafa maridanoo. Manda oosana maree mari anaaseenara fidiqaa midanoo. Kudoosaapee maria fasiqa anaaseesa sia ainaina moomoo mareefaranoo. Nimudaanai qimaria fasiqa anaaseesa ainaina qumiasana moomoo marisa maridaqa.

<sup>17</sup> Afaarimari fasiqafa narí afaarimarifa nariki kai maridanoo narí dadaaqidanoo. Kaqi narimari fasiqafa mi narirafa quandaki narí aridanoo.

<sup>18</sup> Manda oosana maree mariasa maree maria qumiasana ainainafa sia misa dadaaqidanoo. Andeeqara oosana maree mariasa maree maria ainainafa akooqoo afeeka ainaina mariannoo.

<sup>19</sup> Yafee andeeqara oosana aiqama kari auqae marifa sia kuquannoo kaqi mariannoo. Manda oosanara sandanainai qimarifa dauni kuqirana paquriannoo.

<sup>20</sup> Yaaweefa manda irirana faqaasara fidiqaa midanoo. Andeeqee mariasara Anutufa ridanoo.

<sup>21</sup> Anee irimmariananoo manda oosana maree maria fasiqa anaaseesa aupuraranaki fifaranoo. Andeeqara oosana maree mariasa sia mi aupuraranaki marifaranoo.

<sup>22</sup> Amiqira afaaqa faqaa anaasee maridanoo irirana furufari marifa kuara aanna raidanoo. Amiqira afaaqa faqaafa fifau maridanoo.

<sup>23</sup> Andeeqara oosana maree mariasa moo ainainara nidifaqa marasaafanoo amiqirafa maridanoo. Manda oosana maree mariasa nári nidi mari ainainna marasaafaqa aiqamausa aanoo qidaqa.

<sup>24</sup> Faiqí moo fannoo afaarinoo nimi marifanoo mina ainaina marirara kai idanoo. Faiqí moo fannoo manda fasiqa kaaqa ainainara tatamaqidanoo rakisi qumaraifa sia mina ainaina moomoo kidanoo.

<sup>25</sup> Afaarinanoo ani ainaina moomoo mariannoo. Anee aneenna ainaina akaqausa dadaaqinana niminaqa ani faqa dadaaqiqa amifaranoo.

<sup>26</sup> Faiqí moo fannoo aandaroo narimarifanoo narí narana moomoo marifanoo saina munnimma nambaqa meeraqoo auqu ramasaanaqa qimiagee qimarinarai faiqí anaasee mi fasiqa anaaseena aquramma araidaqa. Kaqi feefauriaqee qimari fasiqana amooqidaqa.

<sup>27</sup> Fainqi moo fannoo amiqira oosanara afeekaikammasee randainafa mi fasiqafa narí amooqirana faqa paquriannoo. Faiqí moo fannoo manda oosanara randanoo fimarifa mi manda ainaina paquriannoo.

<sup>28</sup> Nári qumiasanasaa mundi mariasa ufai firaafa uqnoo saqari amanee rauqu aqusaifafanoo maqasaa aqufindee mifaranoo. Andeeqara oosana maree mariasa misa sia fuka saqari amanee rafoora amiqi amiqi faranoo.

<sup>29</sup> Faiqí moo fannoo faiqí aanaaseera manda ufa qimarinaqa faiqí anaasee findimeeqee daraani mambifanoo nariara quanda quandidanoo. Furufarira fasiqauqa irirana faqaasa ainainira faiqi marifaranoo.

<sup>30</sup> Andeeqee maria oosanafa kaqi marirana nimidanoo. Mandoosana maree mariasa kasaqanda midaqa.

<sup>31</sup> Amiqi maria fasiqausa maa maqanasaa nári andeeqasee marinnana akiqara mareefaranoo. Manda oosana maree mariasa misa faqa maqee kamuqoo nári manda oosana akiqara firaqoo aupurarana mareefaranoo.

## 12

<sup>1</sup> Faiqí moo fannoo aqamasainanoo moo fannoo qimaminanoo eedoo qimasee irinafa irirana faqaafa mariannoo. Aakapara ufara akooqee marifa furufarira fasiqa maridanoo.

<sup>2</sup> Yaaweefa andeeqara fasiqa aanaaseera asaidanoo. Manda iriranara tipundaari mariasara akooqaidanoo.

<sup>3</sup> Mandoosana fannoo sia amana itita nimaqaannoo. Andeeqaraisa sia amana kasi kasifaranoo atuka araqa marifaranoo.

<sup>4</sup> Irirana faqaa aanaase afaaqi fannoo mina amooqida asaidanoo. Manda oosana maree mari anaaseefa narí afaaqi asaurirana amisaifanoo amudaani rumafifanoo aurinoora foora inoo maridanoo.

<sup>5</sup> Kuqaa anoona ufa qimariasa aiqama ainaina andeeqa nimaqeeefaranoo. Manda oosana maree mariasa inni nikaru qiranara kai iridaqa.

<sup>6</sup> Manda oosana maree mariasa misa ufaana fufidaqa ufannai faiqí naridaqa. Faiqí andeeqee mariasa misa ufaana kinaana andeeqara ufannai idukidaqa.

<sup>7</sup> Manda oosana maree mariasa kuqifanoo misasaa ani aruakinausa sia marifaranoo. Andeeqara fasiqa aiku asauku sia dauni kuqifaranoo kaqi marifaranoo.

<sup>8</sup> Anee irirana faqaafa marinaqa faiqi anaasee ani amooqifaranoo. Anee irirana siaifa marinaqa faiqi anaasee noori runifaranoo.

<sup>9</sup> Kaqi fifau fasiqa nari ainainiranannai narana naidanoo amiqiranaki maridanoo. Moo fannoo nariara unnaqimasee karaambaiqee qimasee oonuree aniree inoo nidanoo naranara sia, marifanoo aarara nidanoo.

<sup>10</sup> Andeeqara fasiqauqa nari aandau kuara faini nimuqusi marifaqa rakisidaqa. Manda oosana maree marifa kuara faini kaukaata qimanni-maqaidanoo.

<sup>11</sup> Kaaqa ainaini mari fasiqana narana moomoo marifanoo naidanoo. Fifau unnaqira ainaina auquanoo nifa narana sia marifa maridanoo.

<sup>12</sup> Manda oosana maree mariasa manda ainainara kai randaidaqa. Andeeqee mariasa misa atukaraqa maridaqa.

<sup>13</sup> Mana oosana maree mariasa nari ufaki ufaanakiara foora aridaqa. Anoono qira oosana maree mariasa misa rakeemmaki kaqinni maridaqa.

<sup>14</sup> Aneenna ufa qimariannana akiqara faqa aneenna asaukunoo auqee mariannana akiqara faqa mareennaranoo. Aneenna auqaannana amana kai aigama ainaina mareennaranoo.

<sup>15</sup> Furufarira fasiqauqa aigama kari nariara amiqimmidee qidaqa. Irirana faqaasa naamuqia ufana amiqimmasee iridaqa.

<sup>16</sup> Irirana siaifa kaqikaa ufa iriseenoo tautummeeqeenoo aanoo qidanoo. Irirana faqaafa iriseenoo mafi rafaqafusee mana mana fidanoo.

<sup>17</sup> Faiqi moo fannoo andeeqarafa anoono ufa kai qidanoo andeeqara ainaina uqeeraidanoo. Unnaqi mari fasiqafa unna qira ainaina kai uqeeraidanoo.

<sup>18</sup> Sia irirana irisee qimaria ufafa aseemara foora faiqi atekaidanoo. Irirana faqaasa nifauru fannoo ufaanakuru ununnisaidanoo.

<sup>19</sup> Kuqaa anoono ufa qimari afai afaurufa kisaqasaa maa maqanasaa mariannoo. Unna qimari afai afaurufa qusasaa taikaannoo.

<sup>20</sup> Manda ainainara tipundaari mariasa naundurui suka sanda itaranda maridanoo. Faiqi anaasee amiqiranaki mariaqeeere qimasee ainaini mariasa asasifaranoo.

<sup>21</sup> Andeeqara fasiqa afaaqai sia mandainaina auqufuannoo. Mandainaina maree mariasa sia moo ainaina uqeeidaqa misaki ummaara kai qumbiqanoo maridanoo.

<sup>22</sup> Yaaweefa unnaqi maria afauru afainara fidiqaa midanoo. Andeeqara ufa mau fimariasara Yaaweefa asaidanoo.

<sup>23</sup> Irirana faqaasa nari iria ufana rafaqafusee maridaqa. Furufariraua nari furufarirana faqa quqasaida nimidaqa.

<sup>24</sup> Kadaapi rumasee ainainirafa ani afeeka amiannoo. Kudoosaaparafa ani moonu ainainira faiqika maisaannoo.

<sup>25</sup> Moo ainainara amukee marifa ani asasirana aruannoo. Reedeenira ufa fannoo ani asoama amaqaannoo.

<sup>26</sup> Andeeqee mari fasiqafa nari aqoondiuqa amiqira aana uqan-nifiqaidanoo. Manda oosana maree mariasa nari mandoosana fannoo nari mareeqee kaqirunna ubeekaidanoo.

<sup>27</sup> Anee ainainirara kudoosaapeenana sia aneenna masaree qimarianna ainainna mareennaranoo. Anee amudaanai qimasee ainaininana aneenna aiki mari ainainna mareennaranoo.



<sup>28</sup> Kaqi marirannai fimaria aanafa andeeqara oosana maridanoo. Kuqirannai fimaria aanafa mandoosana maridanoo. Aaquqira Ufa.

## 13

<sup>1</sup> Irirana faqaa faiqiuqa nári ninausa nikausa ufa amiqimmasee iridaqa. Ufa rukiee mariasa sia moo fannoo qaoo qinnana iriannoo.

<sup>2</sup> Amiqira fasiqa fannoo amiqira ufa qinnana akiqara maraannoo. Kaqi runna fimariasa nariranara kai naararaidanoo.

<sup>3</sup> Aneenna ufasaa rakisinana aneenna mariranasaa faqa rakisinna anoo. Fifau faafau ufa qimarifa narí kai narí aridanoo.

<sup>4</sup> Kudiki maria fasiqausa ainainara firaqoo amuqusi marifanoo sia maraannoo. Amudaanai qimasee ainaini marifa aiqama ainaina narí aidi ari ainainausa maraannoo.

<sup>5</sup> Andeeqara fasiqauqa unna ufara fidiqaa midaqa. Mandoosana maree mariasa marirafa nisaurirana faqa manduqarana faqa nimidanoo.

<sup>6</sup> Andeeqara oosana fannoo aaqarana siasa itita nimaqaidanoo. Manda oosana fannoo mandoosana maree mariasa mandaikamma nimaqaidanoo.

<sup>7</sup> Akaqausa ainaina siasa ainaina faqaasa naanna raidaqa sia ainaina marifaqa fifau miqidaqa. Akaqausa ainaina siasa naanna raidaqa noori kandamasee nidaqa misa moomoo ainaina faqaasa maridaqa.

<sup>8</sup> Ainaina faqaafa arirariafanoo narí ainaina moomoo nimifaqa sai aridaqa. Ainaina siasa sia minara rufiidaqa manoo manaa idaqa.

<sup>9</sup> Amiqira oosana maree mariasa qoomara foora kaaqa qaidaqa. Manda oosana maree mariasa qimbarari mari qoomafara foora maridaqa.

<sup>10</sup> Narí amoo kai qidanoo mandufa kai uqeeree marifa sia moo ainaina auqaidanoo ummaara kai uqeeraidanoo. Reedeeni mariasa misa irirana nimiaqeera kai iridaqa.

<sup>11</sup> Unna iriranannai maree maria ainainafa kai kaqi taikaannoo. Kadaapi rumasee marainafa moomooka miannoo.

<sup>12</sup> Faiqí mo fannoo moo ainainara kisaagasaa afeesida marifanoo sia anifanoo amuqusa mandaikifanoo akooqaidanoo. Aidi mari ainainnara afeesida mariifanoo aniraifanoo asasidanoo.

<sup>13</sup> Faiqí moo fannoo naamuaqira ufara fidiqaa imarifa mandainaina ummaara aaraidanoo. Naamuaqira ufa reendeena mandee irimari fasiqa anaaseefa asairana maraidanoo.

<sup>14</sup> Irirana faqassa naamuaqira ufa fannoo kaqi marirana nimira nam-mariara foora maridanoo. Ani kuqiranakinaana dadaaqifana kaqinni ubeekennaranoo.

<sup>15</sup> Irirana faqaana aqoonausa mina ufa qaindusidaqa minara ridaqa. Unna ufa qida mandaiki mariasa kuridira aatata fidaqa.

<sup>16</sup> Amiqira irirana faqaa fasiqa anaasee andeeqara irirana iriseeqa mimau kai fidaqa. Furufarira fasiqa anaasee faiqí nifusaa nári furufarirana uqeera uqannifiqaidaqa.

<sup>17</sup> Aanaiqi fannoo unna ufa aatata qinoo nifa faiqí anaasee manda ummaaraki mara quqaidanoo. Kuqaa ufa qimarina ufa fannoo asoosama nimaqaidanoo.

<sup>18</sup> Aakapara ufa sia irimarifa kudikinoo asauruannoo. Aakapara ufa irimari fasiqafa uriqaraidanoo.

<sup>19</sup> Moo ainainara kisaagasaa rakisiinanoo anirainanoo amuqusa amiqiannoo. Irirana siai fasiqa anaaseesa manda ainaina minnisee amiqira ainaina auqarara nikooqaidanoo.

<sup>20</sup> Anee irirana faqaasa faqa finana irirana mareennaranoo. Anee furufarirausa aqoondikinana kuridinnaranoo.

<sup>21</sup> Manda oosana maree mariasa fimariafanoo ummaara fannoo misa nifaqanoo nidanoo. Andeeqara oosana maree mariasa mi andeeqarana akiiqara amiqira ainaina mareefaranoo.

<sup>22</sup> Andeeqara fasiqauqa kuqifaqa misa faiqi namu ninaiqi mara misa qumiasana mareefaranoo. Mandoosana maree mariasa qumiasana andeeqarousa iannai kai fuannoo.

<sup>23</sup> Fuka maqaki kudi fasiqauqa narana ummaqusaafanoo moomoo marifa sia andeeqee mari siaasafa mi kudi fasiqausa ufa sia irinoo sia mina narana andeeqaisaifaqa fifau dapi mara taikaidaqa.

<sup>24</sup> Anee sai aneenna faiqi aaqarana akiiqara arinana sia aneenna faiqiara aidinnaranoo. Anee aneenna faiqiara aidinana saamu qumasee arusee andeeqaa.

<sup>25</sup> Andeeqarousa narana moomoo marifaqa naidaqa. Manda oosana maree mariasa aiqama kari naararaidanoo.

## 14

<sup>1</sup> Amiqira irirana faqaa aanaaseeuqa maaqa usakaseenoo amiqimmasee rakisidanoo. Furufari maria anaaseesa mi maaqana rapeepamma aqidaqa.

<sup>2</sup> Andeeqara aatata fimariasa Yaaweenara qeerairidaqa miqidaqa. Manda aatata fimariasa Yaaweenara nikooqeemari faqa miqidaqa.

<sup>3</sup> Narí amoo aanoo qida kaaqa ufa qimarina ufa fannoo saamu kamambi narí aridanoo. Irirana faqaana afauru fannoo narí itita amaqaaidanoo.

<sup>4</sup> Tarakasaa siai fasiqana narana oodaa mariannoo. Taraka faqaasa narana moomoo maridanoo.

<sup>5</sup> Ainaina qafamasai fasiqafa kuqaa anoona ufa qimari fasiqafa kootaki sia nikaru qiannoo. Ainainara unna qimari fasiqafa unna ufa kai mina ookiqari ururaidanoo.

<sup>6</sup> Kaukaata qimaria fasiqausa iriranara randaasia sia paquridaqa. Irirana faqaasa sia kadaapiridaqa dauni paquriqa irifaranoo.

<sup>7</sup> Anee sia furufarira fasiqauqa naaqa maria qeerairamandee nianai maria. Misa sia amiqira irirana ani qimamifaranoo.

<sup>8</sup> Nanaree aiqama ainaina akoofasa fannoo irirana faqaafaikidanoo fee. Mifa ainaina auqarana iri marinara miqidanoo. Nanaree irirana siai fasiqafa furufarira fasiqaikinoo fee. Mifa iridamunoo qinara miqidanoo.

<sup>9</sup> Furufarirousa sia aaqaranara qeerairidaqa. Andeeqarousa aaqamaseeqa mi aaqarafa kai kaqi taikaanifeera oonu mafi iridanoo.

<sup>10</sup> Ani asasirafa anindi kai maridanoo. Ani sukaqarafa anindi kai maridanoo. Sia moo fannoo mina maraannoo.

<sup>11</sup> Manda oosana maree mariasa maaqa rapeemma fuannoo. Andeeqarousa maaqa sia rapeeiannoio kaqi mariannoo.

<sup>12</sup> Faiqi moo aana qafamaseeqa amiqira aanee qimariana aaqaidaqa sia qafaranaki kuqira aana marifaqa miqi qidaqa.

<sup>13</sup> Akaqausa naanaidara qimariafanoo misa naunduraki kaqi rumbanoo maridanoo. Asasirafa taikaifanoo noori runirafa kambiqaidanoo.

<sup>14</sup> Manda aatata fimariasa miqi mariana akiiqara mareefaranoo. Andeeqara oosana maree mariasa miqianannai nári feefauru mareefaranoo.

<sup>15</sup> Furufari mari fasiqafa unnufara faqa anoona ufara faqa kuqaa fee kai qidanoo. Irirana faqaafa sia miqidanoo mifa narí aiku amarususee reemarifa maridanoo.

<sup>16</sup> Irirana faqaafa mandainaina ummaaraki marirara qeerairidanoo. Irirana siaifa mifa furufarinoo aanoommasee kaqi pasoosammasee fidanoo.

<sup>17</sup> Qusa ufa qimaseea kai kaqi aanoo qimarifa furufarira ainaina kai auqaidanoo. Irirana faqaasa qireeda kai maridaqa.

<sup>18</sup> Irirana siaisa misa aiqama ainainirafa furufarirafa kai maridanoo. Irirana akoofasauqa mariana akiqara feefauru amiqira irirafa maridanoo.

<sup>19</sup> Mandoosana maree mariasa andeeqarasa noorinni kumma ramafi nári mara maree qumuree qimudao qima nimaqaqeeera iridaqa.

<sup>20</sup> Kudi fasiqa sia aqoondi faifa maridanoo, mina aqoonausa faqa miqi mariasara nikooqaidanoo. Ainaina faqaafa moomoo aqoondi faqaafa maridanoo.

<sup>21</sup> Faiqí moo fannoo moonara akooqainafa aqaidanoo. Anee asasiraree qimaseenana kudi fasiqa idaaqamma amaqa.

<sup>22</sup> Manda oosana randee marifa aqaidanoo. Anee amiqiranara randeenana ufa qaindusiranara faqa saqarikirana faqa paqurinnaranoo.

<sup>23</sup> Kadaapi rinana amiqira marirana mareennaranoo. Ufa kai qina nidana fifau ooqumarindundina nidana kudi marinnaranoo.

<sup>24</sup> Irirana faqaasa mariana akiqara moomoo qumiasa maraidaqa. Irirana siaisa furufarira oosana aiqamausa iridaqa.

<sup>25</sup> Kootaki narí afu qafai ainainara andeeqasee quqaa kai qimarifa faiqí mariranasaa itita nimaqaidanoo. Unna ufa qimarifa faiqí ueeqaidanoo.

<sup>26</sup> Yaaweenana ufara rufiarafa ququsa kiara foora maridaqa. Miqira fasiqa fannoo narí faiqi anaasee faqa ququsaki maridanoo.

<sup>27</sup> Anee kuqirana aiaaqarareefee fee qidanee. Yaaweenana rufiarafa kaqi marirana nimi marifa maridanoo.

<sup>28</sup> Karaambaiqa uriqararafa mina aiku asauku moomoo mariafanoo raikisi nimaqee marinara miqidanoo. Mina aiku asauku sia marifanoo mina karaambaiqa auqu fifau mariannoo.

<sup>29</sup> Anee sia dauni aanoo qinana reedeeni marinafa firaa irirana faqaafa marinnaranoo. Qusa ufa qimari fasiqafa narí furufarirana kai uqeeera uqannifiqee marifa maridanoo.

<sup>30</sup> Asooara irirafa mina afaaqa amiqirana amidanoo. Rairai qira oosana fannoo manda auriranara foora maridanoo.

<sup>31</sup> Kudi fasiqara kaukaata qinana mina auqu fasiqana Anutunara faqa kaukaata qimariananoo. Kudi fasiqara amuqusinana dadaaqinna anee Anutuna amooqidana mina auqu uqeeere mariananoo.

<sup>32</sup> Manda ainaina kambaiqafa mandoosana maree mariasa kuridiranaki fidaqa. Andeeqara fasiqauqa nariqa andeeqarafa misa itita nimaqaidanoo.

<sup>33</sup> Irirana fannoo irirana faqaasa iriranaki maridanoo. Furufariraua irirafa sia kaifaafa faqa maridanoo.

<sup>34</sup> Andeeqara oosana fannoo mi maqannaasa nuqu uqeeera firanaikidanoo. Nári eendaandira mandoosana fannoo mi maqannaasa mareeqee nári nisauriranaki aqidanoo.

<sup>35</sup> Kaiqee fasiqa irirana faqaa fasiqa maridanoo. Karaambaiqa minara aidiannoo. Mi kaiqee fasiqafa asaurirana karaambaiqa amimari fasiqafa aanoo qirana kai maraanoo.

## 15

<sup>1</sup> Reedeenira ufa aminanoo aanooqirafa taikaani. Raiqara ufa fannoo aanooqirana uqeeere marifa maridanoo.

<sup>2</sup> Irirana faqaasa ufa qiafaqa akaqausa mina iriseeqa irirafa amiqira ainainee qidaqa. Irirana siaisa nooqiari furufarira ufa kai fididaqa.

<sup>3</sup> Yaaweefa aiqamai kambiqee mari ainainna qafaidanoo. Maasa andeeqara ainainee mandainainee auqaunanoo mifa maasasaa afu rusisee maridanoo.

<sup>4</sup> Nifaaqa amiqianiffee ufafa marirana nimidanoo. Aanoo qimaria nifaurufa faiqi naunduraindaraana narimarifa maridanoo.

<sup>5</sup> Nari anoona akoona ufara fidiqaa imaifa furufarirafa maridanoo. Naakaparufa irimarifa irirana faqaafa maridanoo.

<sup>6</sup> Andeeqara fasiqa anaasee maaqaki qumiasana oosana oosana maridanoo. Manda oosana maree mariasa munnimma marasaafanoo mifa misa mareeqee mandainainaki quqaidanoo.

<sup>7</sup> Irirana faqaasa irirana aqamara foora doo aiqamai aqaqidaqa. Sia furufari mariasa miqidaqa.

<sup>8</sup> Mandainaina maree mariasa aandau arusee tatufu amiafanoo Yaaweefa qafamaseenoo misa tatufiranara fidiqaa midanoo. Aneegee maria fasiqa anaaseesa innaaru qiranara Yaaweefa aididanoo.

<sup>9</sup> Yaaweefa manda oosana maree mariasa niqafamasee misa oosanara fidiqaa midanoo. Andeeqara oosanara rimariasara Yaaweefa aididanoo.

<sup>10</sup> Anee aqara ainaina auqeenana afeeka nariranaki finnaranoo. Anee aakapara ufara qidoo fee qinana kuqinnaranoo.

<sup>11</sup> Kuqirausa mariannai ririmma Yaaweenana afusaa akooqoo maridanoo. Kaqi mariasa naqi fee masee fee Anutuna afusaa nari irirana kukeeqeefaree akooqoo qafaidanoo.

<sup>12</sup> Kaukaata qimari fasiqafa aakapara ufara akooqaanoo. Mifa sia irirana faqaasiannai oonuree iriranara iraannoo.

<sup>13</sup> Faiqi anaasee asasiafanoo noori inaa inaa idanoo. Nimuqusa ummaara raifanoo nifaaqa faqa rumbaidanoo.

<sup>14</sup> Irirana faqaasa irira ainainara kai randaidaqa. Furufarirausa sia miqidaqa. Nari furufariranara maasa qimana maridanoo fee qidaqa.

<sup>15</sup> Kudi fasiqa marirafa naaruara ummaaraki kai maridanoo. Asasi mariasa aiqama kari misa marirafa nasunnasura kai midaqa.

<sup>16</sup> Kudi fasiqa maridana Yaaweenara aaquqee marinana marinafa moomoo qumiasana nari ummaara namu faqa uraaqarana marinnaranoo.

<sup>17</sup> Ani aidi mariasa saimbaqa aadana adasa naidana anee amiqira aandauree nikooqee marisa saimbaqa neemarina uraaqararafa mariananoo.

<sup>18</sup> Qusufa qimasee aano qimari fasiqafa aano qirana uqeeraidanoo. Reendeenimari fasiqafa asooarana nimidanoo.

<sup>19</sup> Ainainirara nikoo nikaa imariasa misa aiqama niranaki ummaara paquridaqa. Anee kuqaa qira oosana auqeenana sia ummaara mareenaranoo.

<sup>20</sup> Irirana faqaa faiqiuqa nari nikausa nifaaqa اساسirana kai nimidaqa. Furufarirausa nari ninausamarana fidiqaammidaqa.

<sup>21</sup> Irirana siaisa nari furufariranara asasa midaqa. Irirana irimari fasiqafa andeeqara ainaina auqaidanoo.

<sup>22</sup> Anee moo ainaina auqararee qimasee aakapara ufa marasee auqainanoo anoona kambiqeenoo andeeqaannoo. Aakapara ufa mau sia finana sia mina anoona paqurinnaranoo.

<sup>23</sup> Moo fannoo ufa qinnanaki anoona ufa irisee qimarifa nari ufara اساسidanoo.

<sup>24</sup> Irirana faqaasa ameemaira foora ooru fidaqa naaru marirannai ooru fidaqa. Misa kuqirannai ooqufirara nikooqaiifaqa miqidaqa.

<sup>25</sup> Nári nifaaqa amooqi mariasa Yaaweefa misa maaqa rapeeiannoo. Adeedaana anaasee aiqama ainainasaa Yaaweefa rakisi nimaqaidanoo.

<sup>26</sup> Manda oosana maree mariasa oonu mafi iriranara Yaaweefa fidiaga midanoo. Anukara irirana faqaasara mifa asaidanoo.

<sup>27</sup> Aiqama ainaina nariara kai fatusi marifa narí faiqi anaasee ummaaraki quqaidanoo. Manda oosana maraagee qimasee feefauru nimiafaqa qaoo qimariasa kisaagasaa maa maqanasaa marifaranoo.

<sup>28</sup> Andeeqara oosana maree mariasa moona ufa iriseeqa andeeqara ufara oonu mafi iriseeqa narí qimamidaqa. Manda oosana maree mariasa moona ufa iriseeqa kai kaqi narí qimamidaqa ummaara uqeeridaqa.

<sup>29</sup> Andeeqee mariasa innaaru qirana Yaaweefa iridanoo. Manda oosana maree mariasara Yaaweefa akooqaifanoo nianasaa maridanoo misa innaaru qirana sia iridanoo.

<sup>30</sup> Moo fannoo ani qafamasee naanaidara qimasee amandaifanoo ani amuqusa amiqidanoo. Moosaaqari amiqira ufa aninana irinanoo ani amuqusa amiqi miannoo.

<sup>31</sup> Qaoo qira ufa irisee eedoo qimari fasiqafa irirana faqaafa maridanoo.

<sup>32</sup> Anee aakaparufa irirara akooqainafa aneenna kai aupurarana aneenaki mara quqee mariananoo. Anee faiqí aakapara ufa aminnanara eedoo qimasee qaindusinanoo ani irirafa uriqaraannoo.

<sup>33</sup> Yaaweenara qeerairirafa amiqira irirana ani amiannoo. Reendeenira oosana naaree maraseenana inaaqianna uriqarafaikinnaranoo.

## 16

<sup>1</sup> Faiqí ainaina auqarara tipundaaria fannoo Yaaweefa minara irisaiifaqa kai auqaidaqa.

<sup>2</sup> Faiqí nári mariranara andeeqaidee qifanoo Yaaweefa aiqamausa naundurairirana oosana rainasee qafaidanoo.

<sup>3</sup> Aneenna tipundaarianna ufana Yaaweenara amiqi amiqimma qi-maqaannee qinanoo anoona kambigaannoo.

<sup>4</sup> Yaaweefa aiqama ainaina auqufa taikeefandinnanara iridanoo. Manda oosana maree mariasa inaaqianna kuqiranaki taikee fandinnanara faqa iridanoo.

<sup>5</sup> Ramoo ramaaida nári nifaaqa mara maree uri mariasara Yaaweefa fidiaga midanoo. Misa narirafa sia niaqaannoo kaqi naruanno.

<sup>6</sup> Anee aiqama kari Yaaweena ufasaa mapukusee marinanoo mifa ani nu-moo taikaannoo. Yaaweena ufasaa mundufi finanoo sia moo mandainaina aniki kambigaannoo.

<sup>7</sup> Ani marirafa nirafa andeeqanoo marinanoo Yaaweefa minara asasinoo ani namuqaa aqoondi kamma amaqaannoo.

<sup>8</sup> Anee goodaa qumiasana andeeqara aatata maraseenana andeeqara oosana mau finanoo ani marirafa firaa qumisana faqaana marirana uri-aqaranoo mariannoo.

<sup>9</sup> Anee moo ainainara aneenna iriranaki qimirinanoo Yaaweefa narí irimarinnai ani mara ubeekaannoo.

<sup>10</sup> Yaaweefa maqasaa uriqararana dadaaqifanoo andeeqara ufa nimidanoo. Mina ufa qirafa aiqama kari kuqaa kai marirannoo.

<sup>11</sup> Yaaweefa aiqama sikeerara andeeqara sikeera kai marinaqa aiqama feefauru faqa andeeqarafa kai mariani fee qidanoo.

<sup>12</sup> Uriqararansa manda oosana fidiagaammidaqa. Kaamanna fannoo andeeqara oosana marainnana mi andeeqara oosannannai mina ma-puku amaqaannoo.

<sup>13</sup> Uriqararafa kuqaa anoona ufa qimariasara aididanoo. Kafa mifa anoona uf qimariasara اساسمasee dadaaqidanoo.

<sup>14</sup> Uriqararafa aanoo qimasee kuqaa naruannoo. Irirana faqaafa narí irira ufannai mina aanooqirana asoosama amaqaannoo.

<sup>15</sup> Uriqararafa naanaidara qinanoo aiqamausa nimuqusa amiqimma nimaqaannoo. Uriqararana asasirafa aukuanai aakuara foora aiqama amiqi amiqimma nimaqaidanoo.

<sup>16</sup> Anee amiqira irirana marasainafa mifa koorra faqa siruaa faqa uraaqaranoo mariannoo.

<sup>17</sup> Andeeqara aatata fimariasaa misa manda oosana maree mariasaa aanara qeeraira midaqa. Niku raanaki qafamasaida nimariasaa misa kaqi marifaranoo.

<sup>18</sup> Narí nifaaqa mara maree uri mariasaa kuridiranaki ooqu fidaqa. Ramoo ramaa imariasaa aqufi marianaki aqum fidaqa.

<sup>19</sup> Sarauidaqa nári mara maree qumi mariasaa misa uriqararanaki maridaqa. Kafa manda oosana maree mariasaa ramoo ramaairana faqa moosa ainaina ummuura marasee raina nimimariasaa ureeqarawsa maridaqa.

<sup>20</sup> Ani aakapainna ufana amiqimmasee irinanoo ani marirafa amiqianoo. Yaaweena saqarikinana anee اساسننارannoo.

<sup>21</sup> Irirana faqaa fasiqara amiqirafa irirana faqaafee qifaranoo. Irirana faqaa fasiqa ufa fannoo adiafaa inoo irirana pooduqaidanoo.

<sup>22</sup> Faiqí moo fannoo amiqira irirana faqaafa marifanoo mi irirafa maqakaqari ururee mari nammari fara foora amiqira irirana mi fasiqana amidanoo. Furufari mariasaa nári furufarirafa nári naridanoo.

<sup>23</sup> Irirana faqaa fasiqa ufa qirara oonumafi irisee ufa qidanoo. Mi ufana iriafanoo adiafaa inoo iriaqaa kai midanoo.

<sup>24</sup> Amiqira ufa fannoo adiafaa ira ainainara foora faiqí naundurái adiafaa irana faqa amiqi amiqirana faqa nimidanoo.

<sup>25</sup> Faiqí anaasee moo aanara andeeqara aanammifoo qimariafanoo mifa kuqi maria aanafa maridanoo.

<sup>26</sup> Ainaini mari fasiqafa daara raandoo qimasee ainainidanoo. Narí aarararanara iriseenoo ainainidanoo.

<sup>27</sup> Manda oosana maree mariasaa akaqawsa mandaikamma nimaqara aanara kai randaidaqa. Misa ufa fannoo idara foora nitakuqidanoo.

<sup>28</sup> Manda oosana maree mariasakiqari munuqi miniqirafa kambiqafi daraanidanoo. Miqi mariasaa mi ufanannai amiqira aqoondi rakeemma aqidaqa.

<sup>29</sup> Faiqí narimari asa nári niqoondi nikaruqimasee rarisameeqeenoo mandainainaki quqaidanoo.

<sup>30</sup> Afu atindari magee marifa mandoosana kambiqaanifeera miqidanoo. Afauru uqmairí marifa mandainaina kambiqaanifeera miqidanoo.

<sup>31</sup> Aandau akiiqa faqaana akiiqa fannoo uriqararawsa qatara foora maridanoo. Andeeqara mariranannai kai mi ainainna paquridaqa.

<sup>32</sup> Moo fannoo narí aanoo rafaafusee reendeenira ufa kai qimarifa maqasaa karaambaiqa uraaqaranoo maridanoo. Narí mariranasaa rakisi marifa moo maqannaasa narusee misa maqa maaqa maree marina uraaqaranoo maridanoo.

<sup>33</sup> Kaatara foora sararammasee Anutuna aidiranara iriraree qiafanoo Anutufa narí kai akooroomma nimidanoo.

## 17

<sup>1</sup> Aadana narana narí aqoondi faqa reendeenammasee neemarifa uriqararafa maridanoo. Firaa qoomaqa sakasee nári tinoo taanoo rirana namu faqa nee mariasa oorudupiraua maridaqa.

<sup>2</sup> Moo fasiqa ainaina faqaana faiqi fannoo narí akoona asaurirana ami marinanoo mina amiqira ainainira faiqi fannoo mi faiqina iraaqaranoo maridanoo rakisi amaqaannoo. Kaasooaqee mi fasiqana faiqi namu nári nikoona qumiasana rainaidaqa mina andeeqara ainainira faiqi faqa raina amifaranoo.

<sup>3</sup> Kooru faqa siruaa faqa tasirisiri mandee qafaandee inoo Yaaweefa faiqí nimuqusa nimanammasee qafaidanoo.

<sup>4</sup> Manda oosana maree mariasa manda ufauqa kai iridaqa. Unnufa qimariasa unnufa kai iridaqa.

<sup>5</sup> Anee kudi fasiqauqara uteeti qinana mi kudi fasiqausa auquna Anutunara faqa uteeti qinnaranoo. Moo fannoo moo mandainainaki aqufinana anee minara naanaidara qinana sia kaqi marinnaranoo Anutufa ani aruanoo.

<sup>6</sup> Ninaaku nitaatoosa nári ninaiqimarara nasuriandee iqa faiqiuqa nári ninausa nikausara nasuridaqa.

<sup>7</sup> Amiqira fasiqa anaasee sia unnufa qidaqa. Kuqaa ufa sia furufarirau-saindi maridanoo.

<sup>8</sup> Umee raqeera nimimaria feefaurufa fadueera foora dadaaqifaqa auqararee qiana kaqi auqefaranoo fee qidaqa.

<sup>9</sup> Anee faiqí anaasee aniara ruaqeera ani mandaikamma amaqaifana minninnisaa. Misa ani mandaikamma amaqaifana kaqi mina irina fidana anee aqoondikirana rakeeminnaranoo.

<sup>10</sup> Anee irirana faqaa fasiqa moodaannai qimaminanoo mifa kai kaqi iriannoo. Anee quandakinana furufarira fasiqa saamu qumaree moomoo wan handeereeta kari arusee qimaminanoo mifa siamma qiriannoo.

<sup>11</sup> Kuqirafa faiqí narimari fasiqafara foora aiqama kari mandainaina uqeeree maria fasiqa anaaseesa naridanoo.

<sup>12</sup> Anee kaasau faini aanaaqi rausumaree aanai oonu mina anoona paquri masainanoo ani rufiarafa mariannoo. Furufarira fasiqa narí furufarira aatata fimarina paquri maseenana firaa mandainainaki marinnaranoo.

<sup>13</sup> Moo fannoo amiqira ainaina moona amifanoo qumareenoo mina akiqara manda ainaina amifanoo minara mandainaina kai mi fasiqana maaqaki naaruara mariannoo.

<sup>14</sup> Tinoo rira oosana fannoo andaani tatiara foora idanoo. Tinoo rirafa kambiqainana kai kaqi rafaqafu sainanoo sia kambiqaini.

<sup>15</sup> Manda oosana maree mari fasiqana idukiranara faqa andeeqara fasiqa fifau rumberanara faqa Anutufa mi oosana qandara fidiqaa midanoo.

<sup>16</sup> Faiqí moo fannoo irirana sia maraifa nanaree fifau sukura feefauridanoo fee mina irirafa sia maridanoo.

<sup>17</sup> Amiqira aqoondi fannoo aiqama kari aniara aididanoo. Faiqí ani ainaina sia fifau maridaqa anee ummaaraki aqufinaqa ani dadaqirara maridaqa.

<sup>18</sup> Akaqausa amiqira irirana siaisa kai moona aaqarana akiqara idaqa.

<sup>19</sup> Faiqí moo fannoo numoo kambiqara oosanara aidi marifa mifa rakinana kambiqaranara faqa aididanoo. Aneenna afaqa amooqinana anee ummaarara randaida miqimariananoo.

<sup>20</sup> Manda irirana faqa mandufa faqa kai qimarifa sia amiqirana paquriannoo kuridirana kai paquriannoo.

<sup>21</sup> Moo fasiqa faiqi namu furufarira ainaina auqaifaqa misa ninaukoo naundura ummaara faqa aiaaee qirana faqa kai maraidaqa.

<sup>22</sup> Anee asasi mariananoo mifa anee marasinna namasaananoora foora maisaidanoo. Faiqí moo fannoo afaaqa rumbanoo marifa aiqamausa nifaaqa rumbaidanoo.

<sup>23</sup> Manda oosana maree mari siaasafa umeenni umeereemaria feefauruna maraseenoo sia amiqimmasee ufa rainaidanoo.

<sup>24</sup> Irirana faqaa fasiqa fannoo irirana narí oorisa kai quqaqaifanoo maridanoo. Irirana siai fasiqafa aiqama aanai afu munu maqee mini maqee ifanoo sia amanaikidanoo.

<sup>25</sup> Furufarira faiquqa nári nikoona oori runirana amidaqa. Nári ninoona sukaqarana amidaqa.

<sup>26</sup> Andeeqara fasiqa fifau arirana rumberana amiafanoo sia andeeqaidanoo. Andeeqara rakisirausa narirafa aaqara oosana maridanoo.

<sup>27</sup> Irirana faqaasa moodaa moodaa ufa kai qidaqa. Uqbiqasee mariasa irirana faqaasa maridaqa.

<sup>28</sup> Furufarira fasiqa narí ooki kadara masainaqa faiqí anaasee minara irirana faqaa fee qifaranoo. Mi fasiqafa narí ooki amiqimmasee ititasaiifaqa misa minara akeepamasee irimari fasiqa fee qifaranoo.

## 18

<sup>1</sup> Faiqí sia nári niqoonausa faqa moodaanaki kiasa náriara kai iridaqa. Nana ainainaree aiqamausa andeeqarafee qimasee irimarianara mi fasiqausa sia asasidaqa.

<sup>2</sup> Furufarira fasiqa amiqira oosanara sia irinara sia minara iridanoo. Mifa aiqama kari narí amiqirafa marina uqannifiqarara kai aididanoo.

<sup>3</sup> Numoo faqa nisaurirafa faqa moodaanaki fidaqa. Ummuarira oosanaki keeqafinara asaurirafa mina afaaqasaa kambiqaidanoo.

<sup>4</sup> Faiqí ookinaa ufa faruma firaafara foora mandinoo maridanoo. Mina irirafa qumi mari nammarifara foora asooaidanoo rukukuqnama amaqaaidanoo.

<sup>5</sup> Manda oosana maree mariasa kootaki dadaaqinana aaqara oosana mareennaranoo. Andeeqara oosana maree marina fifau kootaki quqeenana mina faqa aaqara oosana kai mareennaranoo.

<sup>6</sup> Furufarirausa aanoo qirana oosana arasee nariqa nariranara innaaru qidaqa.

<sup>7</sup> Furufarira fasiqa ookinaa ufa fannoo narí kuridi amaqaaidanoo. Mifa narí ufaki ufaanakiara foora aridanoo.

<sup>8</sup> Munuqi miniqira ufa fannoo kaaqa adiafaaira narana miqirafa maridanoo maasa kaaqa mina nambiqarara dididanoo.

<sup>9</sup> Ainainiafanoo raindaani mari fasiqafa ainaina deedeepinoo turitaari marina aanna reemarifa maridanoo.

<sup>10</sup> Yaaweefa afeeka faandaamurara foora maridanoo. Andeeqara fasiqa anaasee minaki kukeeqafi sia kuridifaranoo.

<sup>11</sup> Ainaina faqaasa nári qumiasanara maasa kisaqa faandaamura fee qimasee fifau nári ainaina saqarikidaqa.

<sup>12</sup> Sia kaqi moona ameemaanai keeqeefara mifa narí mara maree quminaqa mina ameemaanai keeqeefaranoo. Nári nimoo qimariasa kuridira aataa fidaqa.

<sup>13</sup> Moona ufa amiqimmasee irisee ufa qia, sia miqinana furufariranaki faqa manda asauriranaki aqufinnaranoo.



<sup>14</sup> Ani kaqi marira aidirafa anee aurinanoo ani pooduqaannoo. Anee sia miqinanoo ani mi oosanafa taikafuannoo.

<sup>15</sup> Irirana faqaasa maqee maqee fuka irirana irirara deedaqidaqa.

<sup>16</sup> Anee uriqarara fasiqa qafaanee qimasee moo ainaina mina amira ainaina mara maree finanoo amanaika miannoo.

<sup>17</sup> Faiqi kootaki qimannimisaafaqa irisee kuqaa fee qidaqa. Moo fannoo mi ufana quandafi qimanniminaqa indaaruuqaa ufara boo narí kai narí amooqidanoo mifoo qifaranoo.

<sup>18</sup> Afeeka fasiqauqa moo ainainara aanooqidaqa narafumau narafumau idaqa masisara foora quandasee qafeeqa doo dinni dinni asooqaidaqa.

<sup>19</sup> Aneenna akaqaafasauqa dadaqinaqa misa afeeka faandaamurara foora anisaa itita amaqqeefaranoo. Anee misara aanoo qinaqa misa narí kooqi itita saifana sia keeqeennaranoo.

<sup>20</sup> Faiqi moo fannoo narí ookinaa ufannai narana paqurinanoo amuaqu ianno. Narí afauru saaqaraa ufa fannoo amuaqu iannoo.

<sup>21</sup> Afai afauru qaaraiki marifa maridanoo mifa kai faiqi narirdanoo kafa faiqi dada qidanoo. Aneena ufa qimaseenana mi ufafa qiqa fawa qumaraannoo fee qimaseenana iria.

<sup>22</sup> Adeedaana kumaara fannoo adeedaana maanaaqa paqurimmasee marainanoo Yaaweefa irinoo asasa miannoo.

<sup>23</sup> Ainaina siaifa kudi fasiqa fifimmasee ufa qimari fasiqafa maridanoo. Qumiasana tiafa kaukaata ufa kai qimarifa maridanoo.

<sup>24</sup> Moomoosa aqoondiki marinafa sia kisaagasaa mi aqoondikirafa mariannoo. Moodaa moodaa amiqira aqoondi afaagasaa aqoondi marifa mi fasiqana mi amiqira aqoondina oosana fannoo narí moodaa fidika faqa amiqi marina arusee uraaqaranoo maridanoo.

## 19

<sup>1</sup> Kudi fasiqa fannoo andeeqara aatata fimarifa maridanoo mifa uriqararafa maridanoo. Ufa rukiee marifa furufari marifa ureeqanoo maridanoo.

<sup>2</sup> Sia oonu mafi irirana maraifa aaqamaki kaqiruna ubeekaidanoo. Kai kaqi fimarifa kaqi runna fiaikatee finoo aaqaidanoo.

<sup>3</sup> Akaqausa sia irirana maraa oosanafa kai nariqa mandaikamma ni-maqaiifaqa fifau quandaki Anutuna qoomma amaqaqidaqa.

<sup>4</sup> Qumiasana faqaana aqoondiuga moomoo maridaqa. Kudi fasiqa aqoondi moodaafa ani qafeenoo ainaina siai fee qimasee anirandee fuanoo.

<sup>5</sup> Kootaki unna ufa qinana rumbaranaki finnaranoo. Unnufa qinana sia unmaara fiaqareennaranoo.

<sup>6</sup> Aiqamausa uriqarara fasiqa aqoondikiranaki keeqeefaranoo. Ainaina nimi mari fasiqanara aiqamaus minara unna qimasee qini qiqaondi fee qidaqa amooqidaqa.

<sup>7</sup> Kudi fasiqa aiku asauku mina minnisaidaga mina aqoondiuga faqa firaqoo minara nikooqaidanoo. Narí nammeera qimasee naaraifaqa sia iridaqa.

<sup>8</sup> Faiqi moo fannoo irirana maraifa amiqi amiqidanoo. Amiqira iriranara aidi mari fasiqafa aiqama ainaina auqainafa anoonaikammianoo.

<sup>9</sup> Kootaki unnufa qimari fasiqafa sia rumbaranaki sia fuannoo fuannoo. Unnufa qimarifa narí kuqirana paquriannoo.

<sup>10</sup> Furufarira fasiqa qumiasana qambaana maridanoo manda marira maridanoo. Faiqí moo fannoo ureeqararafa faiqí firaasa uriqararafaikinoo maridanoo mandaikamminoo maridanoo.

<sup>11</sup> Amiqira irirana faqaafa sia qusufa qimasee aanoo qidanoo narí aanoo qirana rafaafa fidanoo. Miqi mari fasiqafa moo manda ufa qimamafanoo sia irinoora foora inara narí afaafa gareenarane qidanoo iridanoo.

<sup>12</sup> Karaambaiqa fasiqa aanoo fannoo kaasau fainiara foora rairai qifaqa faiqí anaasee rufaidaqa. Mina asarafa qifi faramuara foora asoama nimaqaidanoo.

<sup>13</sup> Furufarira fasiqauqa nári ninaukoo nisauriranaki quqannisaidaqa. Anaasee moo fannoo mina aanoo qirafa namudisaa kapatuara foora kapi kapida maridanoo.

<sup>14</sup> Qumiasana saqama nári nikausa saaqaana maraidaqa. Yaaweefa kai irirana faqaa anaasee faiqí nimidanoo.

<sup>15</sup> Kudoosaapee maria oosana faiqarana kai amidanoo. Ainaina sia inafa aandaroo aruannoo.

<sup>16</sup> Anee Anutna aakapara ufa mau finana kisaagasaa marinnaranoo. Anee aakapara ufara qikoofee qinana kuqinnaranoo.

<sup>17</sup> Anee kudi fasiqa anaasee narana aina nimidana Yaaweena amiara foora imariananoo kasooqee Yaaweefa mina akiiqara ani faqa amiannoo.

<sup>18</sup> Aneenna faiqi namu ufa irirana amanasaa marifana miqoo naakapaa anee sia miqinana anee misa dadaqianaqa mandaki aqufidaqa.

<sup>19</sup> Qusufa qimasee aanoo qimari fasiqafa ariranaki aqufuannoo. Anee minakinaana feefauru masainanoo mifa kafa kai mi ummaarana auqaannoo.

<sup>20</sup> Aakapara ufa faqa iria. Anee miqinana kasooqee irirana faqaafa marinnaranoo.

<sup>21</sup> Faiqí atikuraki irirana oosana oosana marifanoo firannaira iridanoo. Yaaweena irirafa kuqaa anoona kambiqannoo.

<sup>22</sup> Faiqí moo kaaqa ainainara rimaria oosana faqaafa asaurirana maraidanoo. Qumiasana siaifa andeeqara fasiqa fannoo unna ufa qimari fasiqana uraaqaranoo maridanoo.

<sup>23</sup> Yaaweenara rufieenana maa maqanasaa kisaagasaa mainnaranoo. Yaaweenara rufainanoo sia mandainaina ani afaaqai aqufuannoo.

<sup>24</sup> Akaqausa kaaqa kudoosaapee mariasa difaaniki narana qumaraseeqa nooki quqarara nikooqaidanoo.

<sup>25</sup> Aanoo qimari fasiqana arinanoo irirana siaisa mina qafeeqa irirana mareefaranoo. Irirana faqaana aakapainanoo dauni irirana moo faqa moo faqa maraannoo.

<sup>26</sup> Manda irirana faqaa faiqi fannoo kai narí akoona mandaikamma amaqeenoo narí anoona aiqamasaifanoo fifaqa mi oosanausa nisaurirana firaana maraidaqa.

<sup>27</sup> Oo qini qimaaku naamuaqira ufa iriseenana akooqafana finana anee irisaana ufana minnisee furufara minnaranoo.

<sup>28</sup> Ufa qimarianaki unna quandara ufa qimarifa andeeqara koota oosana akooqaidanoo. Manda oosana maree mariasa aaqara oosana adiafaa iranara ridaqa.

<sup>29</sup> Andeeqaranara nikooqee marisa sandufa misa nimaarusirafa maridanoo. Qunnaana samu furufari mariasa narirafa maridanoo.

## 20

<sup>1</sup> Moomoo biaqa nammmari neemarianafa ani fufufarirana faqa faaqa fuisee qirana faqa amiannoo. Nammari moomoo narana irirana sia marifa maridanoo.

<sup>2</sup> Karaambaiqa aanoo qirafa kaasau fainiara foora rairai qidanoo. Faiqí moo fannoo mi karaambaiqana aranaqarana amirafa kuquannoo.

<sup>3</sup> Faiqí moo fannoo narí maraqunara irisee tinoorirana faqa rakiranara faqa qeerairidanoo. Furufarirausa qusufa qimasee rakiranaki faqa aanooqiranaki faqa aqufidaqa.

<sup>4</sup> Kudoosaapee mari fasiqafa saikira aukwana sia ainainifa aiqira aukwana naranara randainanoo aararaannoo.

<sup>5</sup> Faiqí irirana faqaana irirafa faruma difukunara foora maridanoo. Faiqí irirana faqaafa kai mi fasiqana irirana meemaindaraana uqeera koorooiannoo.

<sup>6</sup> Faiqi moomoosa fifau náriara faiqiara nimuqusirana faqaasa maridee qidaqa moodaa moodaa kai miqirausa maridaqa.

<sup>7</sup> Andeeqara fasiqa amiqira oosana auqaifaqa mina faiqí namu asasidaqa.

<sup>8</sup> Kaaraambaiqa fannoo narí qaarisaa ooqumarifi faiqí anaasee andeeqa nisaidanoo narí afunnoo kai mandainaina qafaidanoo.

<sup>9</sup> Yafee faiqí moo fannoo kuqaa qinee anukarausee qiannoofee. Yafee faiqí moo fannoo qini mandainaina ruka taikeenoo fee qianno fee. Sia moo fannoo kuqaa miqi qiannoo.

<sup>10</sup> Furufarira sikeera faqa furufarira amanira taqu faqa maridanoo. Yaaweefa aiqamaqarara fidiqaa midanoo.

<sup>11</sup> Faiqiuqaindi nári auqee maria oosnafa nári marirana kooroo idanoo. Anee misa andeeqaranara faqa amiqiranara faqa iri mariananoo.

<sup>12</sup> Aaqoo irimarina faqa afu qafeemarina faqa Yaaweefa maasa auqu nimaqanau.

<sup>13</sup> Anee faiqarafa faiqarafa ina nidana kudi marinnaanoo. Ainaina inanoo moomoo narana marinana neennaranoo.

<sup>14</sup> Ainaina feefauru firaafa marinara feefauri mariasa moomoo ufa qidaqa. Mifa mi ainainna feefaurummasee doo oonu dupira feefauru aqusee marainara narí amooqidanoo.

<sup>15</sup> Amiqira irirana faiqí anaasee qimannimi marifa koora faqa siruaa faqa uraaqaranoo maridanoo.

<sup>16</sup> Anee moo maqannaana ufaasu ainainee feefauru aminana anee furufarirafa maridana amiananoo. Miqimari fasiqafa moo anaasee aanai paquri masainanoo anianne qinanoo mifa furufarira oosana faqaafa maridanoo kaqi fuannoo.

<sup>17</sup> Qunna qimasee maree mari ainainafa aaqee adiaafa irafa mariannoo inaaqianna oommaaniara foora ooki kammu kammu qiannoo.

<sup>18</sup> Anee amiqira aakapara ufa iriseenana ainaina auqainanoo anoona kambaiqanoo. Anee rakiranaki finana irirana faqaasa ufa iriseenana fua.

<sup>19</sup> Munuqi miniqi marifa kukeeqara ainainara mandaika midanoo kooroo idanoo. Anee kaaqa ufa qimariasara qeerairia sia misa naaqandandia.

<sup>20</sup> Faiqi moo fannoo narí anoona akoona aqurarainafa qausana qoomara foora dauni dimbaannoo.

<sup>21</sup> Maqa fee qumiasana fee kai kaqi marainafa aaqee amiannoo marikinoo doo mandaika miannoo.

<sup>22</sup> Faiqí moo fannoo mandoosana ani aminana anee sia narí miqianauree qia. Ani irirafa Yaaweenasaa mundusainanoo mifa ani dadaaqiannoo.

<sup>23</sup> Unnaqira amanira ainainara Yaaweefa fidiqaa midanoo. Unnaqira sikeerara faqa mifa akooqaidanoo.

<sup>24</sup> Yaaweefa maasa qiku amaaqa uqaqifiqaidanoo daamua qidanoo. Faiqí naqimmasee narí aiku amaaqara iriannoo fee sia amana.

<sup>25</sup> Faiqí moo sia oonumafi iriranaki moo ainaina Anutuna auqu ramasee asauku uqeerasee tatufirana amianauree qimarifa mandaika midanoo. Kasooaqee irisee narí aaqaranara oonumafi iriseenoo akooqaannoo.

<sup>26</sup> Irirana faqaa karaambaiqa fannoo aiuqummasee yafee aaqainnana qafamasee mina rumbaidanoo sia minasa qimudao qidanoo.

<sup>27</sup> Faiqí maraquna Yaaweena qooma maridanoo. Faiqí naundurairi qaidanoo narí mariranasa niranara randaidanoo narí amanidanoo.

<sup>28</sup> Uriqararafa faiqí aanaaseera amuqusirana faqa anoona ufa qirana faqa mi oosana qanda fannoo mi uriqararana mapuku amaaqaannoo.

<sup>29</sup> Kumaaraauqa nári nimudaanai qiranara nári nimooqidaqa. Nauraiqi-uqa nári aandaunamu qafaida nári nimooqidaqa.

<sup>30</sup> Aaqee mari fasiqa anaaseena arinana afaaqa ateeqa seenana aakirana afaimma sainanoo andeeqasee mariani. Ariisainafa mina aunduraki faqa amuqusaki faqa findaukama saannoo.

## 21

<sup>1</sup> Yaaweefa maqasaa karaambaiqa irirana kaikaa nammariara foora ireeda kai minni fua mai ania qifanoo miqidanoo.

<sup>2</sup> Anee aneenna marirana niranara andeeqanoo maridanoo fee qinanoo Yaaweefa ani qafamaseenoo ani amanammasee qafaannoo.

<sup>3</sup> Faiqí anaasee amiqira oosana auqaranafa tatufirana suqa amirana umaqqaranoo maridanoo.

<sup>4</sup> Manda oosana maree mariasa nári noori uqeerarafa faqa nári nimooqirafa faqa misa nifiqee fimarifafa misa aaqaidaqa.

<sup>5</sup> Amiqimmasee oonumafi irisee ainaina auqeenana moomoo ainaina faqaafa marinnaranoo. Aaqmura aamura inana sia moomoo ainaina faqaafa marinnaranoo.

<sup>6</sup> Unnaqira aatata marasainna ainainafa sia kisaagasaa ani faqa marianoo. Mi ainainafa kai kaqi ani kuqiranaki quqaannoo.

<sup>7</sup> Manda oosana maree mariasa nári faiqí narirafa nári rarisameeqee nári nariranaki quqaidanoo. Misa amiqira oosana auqarara nikooqaidanoo.

<sup>8</sup> Aaqara oosana faqaa fasiqa aana eendaandiraa aana maridanoo. Aaqarana siaisa andeeqara oosana auqaidaqa.

<sup>9</sup> Tigeera maqaki maridana amana marinnaranoo. Firaa maqa amiqira maqa tiaki rairai qimari anaaseena faqa maridana manda marira marinnaranoo.

<sup>10</sup> Manda oosana maree mariasa aaqara oosana auqarara naararee rafoora idanoo. Akaqausara faqa niqoonausara faqa sia nimudao idafa.

<sup>11</sup> Ufa rukiee mari fasiqana arifaqa irirana siaisa mina qafamasee irirana mareefaranoo. Aamuqira ufa irirana faqaana qimaminanoo irirana moo faqa moo faqa maraannoo.

<sup>12</sup> Andeeqara Anutufa manda oosana maree mariasa nári maaqaki auqee maria ainainara iridanoo. Mifa manda oosana maree mariasa kuridiranaki quqannisaannoo.

<sup>13</sup> Kudi fasiqa fannoo dadaaqiaqeera nammeera qinana anee sia irinana kasooaqee anee faqa nammeera qinaqa sia moo fannoo iriannoo.

<sup>14</sup> Faiqí moo fannoo ani faqa aanoo qimarina anee kukeeqasee ainaina amisainanoo mina aanoo qirafa taikaannoo.

<sup>15</sup> Amiqira ainaina kambiqai faqa andeeqara fasiqa anaasee asasidaqa. Manda fasiqa anaasee mina qafamasee ummaara maraidaqa.

<sup>16</sup> Amiqira irirana minnisee auianoo nifa kuqirafa mina afeesidanoo.

<sup>17</sup> Faiqí moo fannoo amiqira ainaina faqa amiqira mariranara faqa rimarifa sia ainaina marifa mariannoo.

<sup>18</sup> Andeeqara fasiqauqa ummaaraki aqufirara iafaqa manda oosana maree maria fasiqausa misa nimaqa maqaidaqa.

<sup>19</sup> Aadana maqa maqaki aneennaraa maridana amana marinnaranoo. Aanoo qida rairai qimari anaaseena faqa maridana mandaika minnaranoo.

<sup>20</sup> Irirana faqaasa maqaki moomoo amiqira ainaina faqa fadameena faqa maridanoo. Irirana siaisa nárindi aaqee nama taikasee kaqi maridaqa.

<sup>21</sup> Kuqaa qira oosana faqa amuqusira oosana faqa auqeenana maa maqanasaa kisaqasaa marinnaranoo. Akaqausa aniara andeeqara fee qimasee uriqarara auqu amifaranoo.

<sup>22</sup> Irirana faqaa karaambaiqa fannoo nimudaanai qimariasa faandaa-mura narisaa ititaqaana ooruree rapeepammasee narunifaqaaqa iannoo.

<sup>23</sup> Anee sia ummaaraki aqufiraree qimasee aneenna afaurusaa amiqim-masee rakisia.

<sup>24</sup> Aanoo qimarifa faqa ufa itairi marifa faqa faiqí moora uteeti qidaqa. Mifa narí amooqiranara kai afeekaiki marifa maridanoo.

<sup>25</sup> Aininirara raindaani marifa ainainirara akooqaidanoo. Narí mi oosanafa narí kuqaa aridanoo.

<sup>26</sup> Miqira fasiqauqa ainaina qimiaqee kai qimasaida iridaqa. Andeeqara-sia miqidaqa afaarida kaqi nimidaqa.

<sup>27</sup> Manda oosana maree mariasa tatufirana suqaranara Yaweefa fidiqaa midanoo. Manda iriranannai tatufirana suqaa fanoo Yaaweefa fidiqaa idanoo.

<sup>28</sup> Kootaki unnufa qimarifa narí kuridiannoo. Anoonu ufa kai andeeqasee qimarina ufa asammasee iridaqa.

<sup>29</sup> Manda oosana maree mariasa fifau andeeqaraura naanna raqa nidaqa. Andeeqaraura nári marirana niranara oonumafi irisee nidaqa.

<sup>30</sup> Faiqí faiqi irirana faqa amiqira irirafa faqa sia ani dadaaqiannoo. Anee Yaaweena namuqaakiannanara sia dadaaqiannoo.

<sup>31</sup> Misa fifau rakiranaki firara qoosauqa deedaqidaqa. Yasaweefa narí kai rakirana uri qararana nimidanoo.

## 22

<sup>1</sup> Andeeqara auqu amirafa moomoo ainaina faqa munnimma faqa uriqararafa maridanoo. Siruua faqa koora faqa ureeqarafa maridanoo.

<sup>2</sup> Ainaina faqaafa faqa kudi faqa amanaqarakai maridaqa. Yaweefa miqanda auqu quqanau.

<sup>3</sup> Irirana faqaafa moo ummaara anifanoo qafeenoo amaanaidanoo. Irirana siaifa kaqi minaki fidanoo mi ummaarana maraidanoo.

<sup>4</sup> Yaaweena ufa mau fidana aneenna mara maree quminana moomoo qumiasana munnimma faqa uriqarara auqu maraseenana kisaqasaa marinnaranoo.

<sup>5</sup> Aneenna mariranara amuqusinana anee manda oosana maree mariasa nári aatata fidaqa arimaria ufaannaki aruanoo qimasee rufia.

<sup>6</sup> Faiqi aanaaqisaa amiqira aana aamuqaqinanoo mifa faiqí firaanaikinoo mimau kai fuani.

<sup>7</sup> Kudi fasiqa fannoo ainaina faqaana ainainira faiqi maridanoo. Dinnaa munnimma maree marifa munnimma nimi marina ainainira faiqi maridanoo.

<sup>8</sup> Anee unnaqira oosana ummaqusainanoo mandainaina minakiqari kambiqa finoo quandaki ani aruannoo. Anee sia kaifaa faiqi mandaikamma nimaqeennaranoo.

<sup>9</sup> Afaarinana aneenna narana kudi fasiqauqa naiad nimia. Miqinana anee amiqi amiqirana mareennaranoo.

<sup>10</sup> Andeeqara oosanara fidiqaa imari fasiqana mara aqusainanoo aanooqirafa faqa rairai qirafa faqa taikaannoo.

<sup>11</sup> Anee anukara amuqusara faqa amiqira ufa qiranara faqa rinanoo maqasaa ani uriqarafa ani aqoondi mariannoo.

<sup>12</sup> Yaaweefa amiqira iriranara faqa anoona ufa qiranara faqa rakisida nindafaida maridanoo. Unna qimariasa ufa Yaaweefa akooqoo kooroomma sainaqa aiqamausa irifaranoo.

<sup>13</sup> Ainainirara raindaani marifa maaqaki ooqufaaqee maridanoo fifau unna qimasee kaasau faini madaana marida ooquraana daruandoo qimasee maaqaki kai maridanoo.

<sup>14</sup> Aatata nimari anaaseena maraqa nirafa ufaanara foora maridanoo. Yaaweefa arana qeemarisa mi ufaannanaki aridaqa.

<sup>15</sup> Faiqi aanaaqiuqa furufammasee nari aatata fifana unnaana samu narinanoo misa furufarirafa taikaannoo.

<sup>16</sup> Ani ainaina moomoo kianifeera kudi fasiqauqa mandaikamma nimaqeenana kafa ainaina moomoo faqaana munnimma aminana anee faqa kudi marinnaranoo. Moodaa fasiqa aiku asauku taikasee moo fasiqa asauku qara taikasee 30 irirana faqaa ufa.

<sup>17</sup> Irirana faqaasa ufa qimannimiana iriaqa. Misa qimannimira ufa amiqimmasee iriaqa.

<sup>18</sup> Mi ufafa ani iriranaki marinana afaurusaaqari moona qimamidana asasia.

<sup>19</sup> Yaaweena saqarikiageera maa ufana inni qimannimidaqa.

<sup>20</sup> Qinee moodaa fasiqa aiku asauku taikasee moo fasiqa asauquqara onu marasee 30 amiqira naamuaqira ufa faqa irirana faqa akara ruma nimaqeeqa.

<sup>21</sup> Miqimmasee anee anoona ufara amiqimmasee irinnaranoo. Faiqi aniara anoona ufara randaannee qifana anee amiqimmasee paqurimmasee qimanniminaranoo.

<sup>22</sup> Sia kudi fasiqeee qimasee mina ainaina kaqi maraa. Sia kootaki mina rafaafua.

<sup>23</sup> Yaaweefa kudi fasiqa dadaaqinoo misa ufa iriannoo. Misa mandaikamma nimaqainausa nariqa faqa mandaikamma nimaqaannoo.

<sup>24</sup> Anee sia qusufa qimasee kai kaqi aanoo qimari fasiqana aqoondikia.

<sup>25</sup> Anee mina oosana irisee sia amana mi oosanna minniseennaranoo, arinnaranoo.

<sup>26</sup> Moo fannoo ufaasu munnimma maraseenoo sia amana mina akiiqara feefauru iraree qinana sia anee amana aiqamasee mina akiiqara ianauree qia.

<sup>27</sup> Anee faqa mina akiiqara sia amanaikinana sia feefauru niminaqa misa aniree ani aiqama ainaina marasee faiqara qaari faqa mareefaranoo.

<sup>28</sup> Inni nikeeku nikaaku ooqai maqa oosummaqoona sia rapatutumma mafisaa.

<sup>29</sup> Amiqira ainaina imarifa karaambaiqa ainainiranaki mariannoo. Miqira fasiqa fannoo sia oorudupira fasiqa auqu siaina ainainira faiqikianoo.

## 23

<sup>1</sup> Anee uriqarara fasiqa faqa ooqu marifi narana naidana aneenna iriranaki mifa narana aminara iria.

<sup>2</sup> Anee moomoo narana neemarianafa maridana aneenna aidirana rafaafua.

<sup>3</sup> Anee sia mina amiqira naranara aqaara raani. Mifa ani akaru qiandoora sia irimariananoo.

<sup>4</sup> Anee sia moomoo munnimma ainaina mararee qimasee afeeka taikaa.

<sup>5</sup> Anee moomoo munnima marasainanoo kai kaqi taikaannoo. Mi munnimmafa aqoosa arufinanoo uqaumuara foora aqamaree sandaannoo.

<sup>6</sup> Anee tatamaqimari fasiqana narana sia naa. Sia mina amiqira naranara amukaani.

<sup>7</sup> Miqira fasiqa fannoo unna qimasee fifau aniara moo faqa moo faqa naannee qidanoo. Aunduraki aniara qoodaa naannee qidanoo fifau afauru fannoo kai miqi qidanoo.

<sup>8</sup> Anee mina narana namaseenana raudamaki finana fidinnaranoo. Anee fifau mina faqa amiqira ufa qiananoo.

<sup>9</sup> Anee sia furufarira fasiqa ufa amia. Mifa ani ufara sia asasiannoo.

<sup>10</sup> Sia maqa ooqai oosu maqoona mafi moosaa quqaa. Fiaiqa faiqi maqa faqa sia maraa.

<sup>11</sup> Yaaweefa misa afeeka itita nimaqarafa maridanoo. Mifa misa saaroo qinoo ani ufa amiannoo.

<sup>12</sup> Ani qimami mari fasiqafinnai aaqoo quqasee amiqimmasee iria.

<sup>13</sup> Faiqi aanaaqi ariranara sia amuqusinana minnisaa. Saamunnai kaqi arua sia kuquannoo.

<sup>14</sup> Miqiannannai anee misa marirana asumu mara quqaananoo.

<sup>15</sup> Qini qimaaku anee irirana faqaafa marinaqa qinee asasianaura.

<sup>16</sup> Anee irirana faqaasa ufa qinaqa qinee iriqa nasurianaauranoo.

<sup>17</sup> Anee sia manda oosana maree mariasa oosanara aidiani. Anee aiqama kari Yaaweena ameemaanai kai maria.

<sup>18</sup> Anee miqinana kasooaqee ani marirafa amiqimmiannoo.

<sup>19</sup> Qini qimaaku qini ufa iriseenana irirana faqaafa maria. Aneenna nirana mariranara amiqimmasee iria.

<sup>20</sup> Sia moomoo nammari neemariasa faqa moomoo narana neemariasa faqa moodaanakikia.

<sup>21</sup> Nammari moomoo neemariasa faqa moomoo narana neemariasa faqa qusasaa ainainara sarau ifaranoo. Narana namasee faasaana faiqaqee marifa qusasaa qamunna anaqi anaqirana afisusee mariannoo.

<sup>22</sup> Aneenna akoona ufa iria. Sia mina ufa irinana sia amanaikinnaranoo. Ani anoofa asooaqainana amiqimmasee rakisaa, sia akooakaa ia.

<sup>23</sup> Kuqaa anoona qira ufa faqa amiqira irirana faqa afeekaikammasee maraa. Firaa ainaina marinara sia uqasaina moo fannoo feefauriani.

<sup>24</sup> Irirana faqaa faiqi anoofa akoofa firaaqoo asasidaqa. Misa asasirana oosana maifaqa asasidaqa.

<sup>25</sup> Miqinaqa ani anoofa faqa akoofa faqa aniara asasiaqa. Aneenna anoona afaqa amiqirana aminanoo asasiani.

<sup>26</sup> Qini qimaaku qini ufa amiqimmasee iria. Saina qini marirafa ani quqafiqaani.

<sup>27</sup> Dapi maraqa nua aanaaseefa faqa moo fasiqa anaqa faqa dikaanda miqirafa meemaqoo maridanoo. Faiqí minaki kuqira ufaanakiara foora aridaqa.

<sup>28</sup> Misa ummuarira fasiqara foora maridaqa aniara rakisidaqa. Mi anaaseefa moomoo fasiqa furufara masaifaqa nariqa faiqí anaasee faqa mariana rakeeidaqa.

<sup>29</sup> Yausee noori runusee marifaree. Yausee aanooqiranaki numudaqee marisa maridee. Yausee muamunda faqaasa maridee. Yausee fidika nifu namu faqa maridee.

<sup>30</sup> Uainna nammari kisaagasaa neemariasa kai mi ainainausa maraidaqa. Osana oosana nammari amanammasee qafeemariasa mi mandainainausa qafaidaqa.

<sup>31</sup> Sia mi nammarina kaafaki adiasaina taatuqee arinanoo qaqaara raani. Mi nammarifa qaqarinnanara sia ani qaqaara raani. Asanandai adiasaina fadameenara foora farindeenoo oogu finanoo sia qaqaara raani.

<sup>32</sup> Mi nammarina nama taikasainanoo ukadiqara foora ani ukaqa amianoo.

<sup>33</sup> Anee namasainanoo ani afu mookamma finana sia ainaina amiqimmasee qafeennaranoo. Ani atikuraki irirafa furufara mafinana sia amiqimmasee irirafa aniki kambiqainana sia amiqimmasee ufa qinnaranoo.

<sup>34</sup> Anee namaseenana sipakiara foora ooruku nammariki fimariandee idana teeqe taqimminaranoo. Sipa faakanasaara foora faiqararidana meemai nammari qafainanoo amuqusammiannoo.

<sup>35</sup> Amuqusinana anee maaqi qinnaranoo. Misa qini daruafaqa sia aupuraidaqee qinnaranoo. Misa saamu samu qini daruafanoo sia didafinoofee qinnaranoo. Qinee faisee findifinaqa moo faqa naanauree qinnaranoo.

## 24

<sup>1</sup> Sia manda oosana maree mariasa oosanara rua. Sia misa aqoondikia.

<sup>2</sup> Misa iriranaki faiqí mandaikamma nimaqarara kai randaidaqa. Misa aiqama kari ummaara kambiqaanifeera kai ufa qidaqa.

<sup>3</sup> Amiqira iriranannai faqa oonu mafi iriranannai faqa maaqa atunara foora aruseeqa usakaidaqa.

<sup>4</sup> Amiqira irirafa mari maaqanaki amiqira ainainauqa qumbiqanoo maridanoo.

<sup>5</sup> Irirana faqaa marirafa afeeka faqaa marirana uriaaqaramasee maridanoo. Amiqira irirafa afeeka faqaasa kaaqa urinnaaqaranoo maridanoo.

<sup>6</sup> Anee moo maqannaasa faqa rakirarinana irirana faqaasiannai irirana mara mareenana rakirannai fua. Moomoo irirana faqaa fasiqa ufa iriseenana rakirana uriqareennaranoo.

<sup>7</sup> Amiqira irirafa firaa farumara foora marifaqa furufarirausa sia iridaqa. Misa firaa ufa suqiranaki oonuree sia ufa qiaqaa ifaqa noo qumunimmasee maridaqa.

<sup>8</sup> Maqee maqee mandainainara randee mari fasiqanara ummaara oosana aree marifee qidaqa.

<sup>9</sup> Furufarirausa mandainaina auqarara kai iridaqa. Aiqama misa auqee maria ainainausa numoo ainaina kai maridanoo. Faiqí ramoo ramaa imari fasiqanra manda fasiqee qimasee qafaidaqa.

<sup>10</sup> Ufarurira aukwana anee kudoosaapeenana anee afeeka siaifa marinanaroo.

<sup>11</sup> Kootaki faiqí quqasee fifau kuqa ariraree qifana anee minakinaana mareeqee kaqini quqaa.



<sup>12</sup> Sia ani ainaina marida fee qia. Anutufa iridanoo mifa kai ani marirana rainaannoo fee qia. Mifa anisaa rakisidanoo, mifa iridanoo anee auqee mariannana akiiqara mifa amiannoo fee qia.

<sup>13</sup> Oo qini qimaaku anee ookasaasa anoona naa. Mifa amiqirafa maridanoo afaurusaa quqasainanoo adiafaa iannoo.

<sup>14</sup> Anee maana faqa iria. Amiqira irirafa ookasaasa anoonara foora adiafaa irafa maridanoo. Anee mina qumareenana kasooaqee amiqiranaki marinnaranoo.

<sup>15</sup> Sia manda oosana maree mariasa naanna reenana andeeqarausa maaqa rapeemmasee minakinaa ainaina ummuarirae qimasee tipundaa ria.

<sup>16</sup> Andeeqarausa moomoo kari aqufiqa misa amana findififaranoo. Mandainaina fannoo manda oosana maree mariasa narusainaqa kuridifaranoo.

<sup>17</sup> Ani namuqaa mandainainaki aqufifana sia asasia. Mifa aiku rupauraki saamurinana sia nasuria.

<sup>18</sup> Anee asasinanoo Yaaweefa ani qafainanoo akooqaannoo narí aranaqarana rafaafusee sia naruannoo.

<sup>19</sup> Anee sia manda oosana maree mariasa marirana qinee faqa miqiraree qimasee iria. Sia misa mariranara rua.

<sup>20</sup> Manda oosana maree mariasa sia misa kasooaqee marirafa mariannoo. Misa qausana qooma dauni maqa raquraminoo dimbaannoo.

<sup>21</sup> Oo qini qimaaku, anee Yaaweena ameemanai faqa (maqasaa karaambaiqa nimeemaanai faqa maria). Ufa rukiee mariasa faqa sia moodaanakikia.

<sup>22</sup> Miqi maria fasiqausa kai kaqi uqanna mandaikifaranoo. Moo mandainaina Anutufa faqa maqasaa rakisirafa faqa misasaa quqefaranoo. Akaqa amiqira ufa maaqoo maridanoo.

<sup>23</sup> Irirana faqaasa maa ufana faqa qimannimiqa. Siaasa fannoo kootaki akaqausa dadaaqinoo akaqausa rafaafaq finanoo sia andeeqaannoo.

<sup>24</sup> Siaasa fannoo aqee mariasara sia aaqarana marisee qinaqa faiqí anaasee aiqamausa mi siaasanara fidiqaa ifaranoo.

<sup>25</sup> Siaasa fannoo aqee mariasara sia rufiarai kaqi ummaara niminafa reemindeemiriranaki maridanoo amiqira mariranaki asasida mariannoo.

<sup>26</sup> Kuqaa anoona ufa qimaminafa ani aqoondi uqanna maridanoo.

<sup>27</sup> Anee ququsa auquseenana ainaina masainanoo anoona koorooanana miqoo kai maaqa usakasee maria.

<sup>28</sup> Anee kootaki oonuree sia aaqarana siaisara unna qimasee rafaafa fua. Sia ani afauru fannoo unnufa qiani.

<sup>29</sup> Sia maaqi qia, mifa ummaara qimindee kai iqa narí faqa ummaara amianee qia. Sia maaqi qia, qinee maa fasiqana narí mandainaina akiiqara kai aruannauree qia.

<sup>30</sup> Qinee furufarira fasiqa ainainirara raindaani mari fasiqana afuqaki nidaqa qafeeqa.

<sup>31</sup> Amuka faqaafa faqa firaa andanda faqa mina rafaafafinoo marifaqa qafeeqa. Ooni faandaamura mi afuqanasee auquqaafa rapeemmaki aqufino marifaqa qafeeqa.

<sup>32</sup> Qinee mina qafaidaqa oonu mafi iriqa. Oonu mafi iridaqa irirana mareeqa.

<sup>33</sup> Ainainirara raindaani mariasa maaqi qidaqa. Maasa kaqikaaqoo faiqararee qidaqa. Maasa kaqikaaqoo idooamasee findifuauree qidaqa.

<sup>34</sup> Doo misa miqianara misa aiqama ainaina fannoo taikafuannoo. Sarau irafa faiqí nári mari fasiqafara foora ani aruannoo.

## 25

<sup>1</sup> Maa aaquqira ufafa Sooroomonna akaqa aaquqira ufa maridanoo. Yuda maqannaa karaambaiqa Heeseekaiiaafa fuka bukaki akara rumaqoofa maridanoo.

<sup>2</sup> Maasa Anutuna auqu uqeeree marunafa mifa moomoo ainaina narí iriranaki kukeegee marinara miqidaqa. Minara maasa mina uriqarara auqu amidaqa. Maqassaa karaambaiqauqa mina oosana maasa qima qimianara maasa misa firaa nuqu nimidaqa. Miqi kai masee maqasaa karaambaiqa irirafa firaafa marinara sia amiqimmasee iriranaura.

<sup>3</sup> Maasa sia innaarunai mari ainainnara faqa ooruku nammari meemai mari ainainnara faqa irianaura.

<sup>4</sup> Faiqí siraa tasirisirimmasee apaapa mara aqusee anoona amiqirana kai uqasaifanoo ainaina akoofasa fannoo mara maree munusee auqidanoo.

<sup>5</sup> Maqasaa karaambaiqa manda ufa aakapee mariasa mara aqusaifanoo mina rakisi amaqarafa afeekaikiannoo.

<sup>6</sup> Anee maqasaa karaambaiqa afusaa oonuree sia aneennara faiqí firaasee qia. Sia aneennara uriqararausee qia.

<sup>7</sup> Anee sia faiqí firaasa nimaqa maqasee misa qannusaa ooqu maria narí anirainaqa ani aiqaifanoo sia andeeqaannoo. Minara anee kaiqeese faqa marinaqa nariqa kai ani aaraifana oonu faiqí firaasa faqa ooqu maria.

<sup>8</sup> Anee aneenna aqoonnana moo ainaina qafamasee sia aaqmuraaqmura inana kootai munu koorooia. Moo fasiqa mi ainainnara amiqimmasee irimarifa aniree ani ufa rafaafafu sainana anee naqaa fee innaree.

<sup>9</sup> Anee aneenna aqoonnana faqa ufa rainaidana kai kaqi mi fasiqafinnai oonuree mi ufana andeeqa taikaa. Anee moo kukeeqara ufa iriseenana sia mi ufana koorooia.

<sup>10</sup> Anee minauqa kooroo inanoo mi fasiqafa asaurinaqa faiqí aniara sia umee ufa kukeeqaiffee qimasee asaurirana amifarahnoo.

<sup>11</sup> Faiqí moo fannoo amiqira ufa qinafa amiqira ainaina koorannai auqusee siruaannai afaqa auquqaafara foora mina ufa maridanoo.

<sup>12</sup> Faiqí moo fannoo irirana faqaa fasiqa aauqima nimaqara ufa irisee eedoo qinafa koorannai auqira fidinaanu naaqooki uqee mariana faqa uraaqararafa maridanoo.

<sup>13</sup> Ufa maree fuani feera aiqainafa andeeqasee narí rakisirafa qinna ufana qimanniminanoo misa mi ufafa asasirana nimiannoo. Faiqí afuqaki narana unaki marifanoo suani arifanoo fuka nammari naindee iannoo.

<sup>14</sup> Faiqí moo fannoo moo ainaina nimiraree qimasee qima afeekaikam-maseenoo sia nimifa aadana oonnamuara foora maridanoo. Mifa ufai uqinoo oonnamu rakee ifanoo aaku sia rindee idanoo.

<sup>15</sup> Reendenira ufa fannoo amudaani raqa ummooquka midanoo, miqim-masainaqa rakisirausa faqa ani ufa irifaranoo.

<sup>16</sup> Anee ookasaasa anoona kaaqa adiafaa imari ainainna paqurimmasee aneenna amana kai naa. Moomoo namasee fidinafaara.

<sup>17</sup> Sia aneenna aqoonana maaqai maqee maqee namummaqaa, miqinanoo mifa aniara akooqainanoo fidiqaammiannoo.

<sup>18</sup> Narí aqoonnana unnufa qimarifa qaseemara foora faqa aaruqira feefannaira foora narí aqoonnana aridanoo.

<sup>19</sup> Anee manda aukwana unna qimari fasiqanasaa dadaaqiani fee qimasee mundinana anee afai rufidira fara foora narana neemariananoo. Anee aiku pipisaaga usirafara foora aana fimariananoo.

<sup>20</sup> Oori runusee marina aaqa oorureenana اساسira idi rainanoo akooqaanoo. Suaraki faiqí moo fannoo qamunna akusee marifana rafaqamma maraana suara arindee innaranoo. Moona afaaga aurimarinaki ooruku anoona adieera foora iananoo.

<sup>21</sup> Ani namuqaa aararainana narana amia. Nammariara aidinana nammari aminanoo naani.

<sup>22</sup> Anee miqinanoo mina asaurirafa idara foora qaannoo. Yaaweefa mina akiigara ani amiannoo.

<sup>23</sup> Munuqi miniqirafa noori runirana maree anidanoo. Suani ataaqeen-dari ufai fannoo aaku maree anindee idanoo.

<sup>24</sup> Tigera maqaki maridana amana marinnaranoo. Fira maqatiaki rairai qimari manda anaaseena faqa maridana mandainainaki marinnaranoo.

<sup>25</sup> Nianaindari aninna amiqira ufana asoora nammariara foora nainanoo rukukuqama amiaqaannoo.

<sup>26</sup> Manda oosana maree mariasa andeqara fasiqara anee maa manda oosanna maranee qimasee sandanainai qifanoo eedoo qimasee auqeenoo mifa faqa mandaikammiannoo. Amiqira nammari mookoofa amanee kai randaida qumimarina neemarianaki dumuna kai qumbiqanoo mariannoo andeqara fasiqa mandaikirausa ufara eedoo irafa miqinoo maridanoo.

<sup>27</sup> Anee adiafaa ira ainaina neeneesainanoo mandaika miannoo. Anee aneennara uriqararanara randainanoo mifa faqa mandaika miannoo.

<sup>28</sup> Faiqí moo fannoo narí aranaqarana sia qumaraiqa maqusa faandaa-mura rapee inoo marifaqa akoosa mariafaqa namuqaa keeqaaqaa inoo mariara foora inoo maridanoo.

## 26

<sup>1</sup> Furufarira fasiqa mareeqee uriqararafaikinanoo sia andeqaannoo. Suani aukwana aaku riarra foora midanoo. Nandi aiqira aukwana aaku rindee midanoo.

<sup>2</sup> Aaqarana siai fasiqafa unna qimasee aqurarainna ufafa sia mina qumaraannoo. Mi ufafa ufiniara foora kaqi aqanoo oonuree aniree inoo nidanoo, sia saqariasaa uqaidanoo.

<sup>3</sup> Qoosa sana samu aridaqa. Qainna doonki ooki quqasee mi sanda atina qumaraafanoo nifiqee fidanoo. Miqi kai iqa furufari mari fasiqana unnaanna samu arinanoo iriannoo.

<sup>4</sup> Sia anee furufarira fasiqa fannoo ani manda ufara irainana mina faqa ufa qia. Ani faqa mi furufarirafa aaku finana miqinafaara.

<sup>5</sup> Furufarira fasiqa fannoo furufarira ufa ani qimaminana anee mina ufa rukiasee saa manda ufa qiaanoo qia. Anee sia miqinanoo mifa nariara irirana faqaasee qinoo narí amooqiandoora.

<sup>6</sup> Anee furufarira fasiqa moo ufara aiqeenana aneenna aiku ateekeera foora innaranoo. Anee ummaarara randee mariananoo.

<sup>7</sup> Furufarira fasiqa ookiqari irirausa ufa qinafa sia mi ufafa narí dadaaqiannoo, aiku mandaikirafara foora maridanoo.

<sup>8</sup> Anee futufetiki ooni quqasee aqusainanoo sia mariannoo fuanoo. Anee furufarira fasiqa mareeqee uriqararanaika masainanoo futufetikiara foora aqinnaranoo.

<sup>9</sup> Faiqí moo biaqa nammari amiqimma namasainnana amukafaqaa ainaina asaukuki quqasainanoo kaqi qumarainanoo asauku

tapooqainanoo sia iriannoo. Anee irirana faqaasa ufa furufarira fasiqa qiaminanoo mifa miqi kai inoo narí afaaqa aruannoo.

<sup>10</sup> Faiqí moo fannoo furufarira fasiqa fee kaqi nimari fasiqanee mareeqee narí ainainiranaki quqainafa aiqamausa naridanoora foora idanoo.

<sup>11</sup> Furufarira fasiqa fannoo ooqai furufarira ainaina auqeeundee inoo kaifaa auqaidanoo. Fainiara foora fidisee quandafi kaifaa naidanoo.

<sup>12</sup> Furufarira fasiqa kaqikaqqoo amanaikianoo. Nariara irirana faqaasee qimarifa sia amnaikiannoo. Furufarira fasiqa ooreeqarafa uqanna maridanoo.

<sup>13</sup> Ainainirara raindaanimari fasiqana unna irirafa maaqimminoo maridanoo. Kaasau faini aanai maridanoo kaaqa ukaqee marifa marifaqa daruandooree qidanoo sia ainainai fidanoo.

<sup>14</sup> Ainainirara raindaanimarifa narí qaarisaa faiaqeeidanoo quanda qaandida maridanoo. Mifa kooqi qainnara foora quanda qaandida maridanoo.

<sup>15</sup> Kudoosaapee marifa narana mareeqee ooki quqarara akooqaidanoo.

<sup>16</sup> Ainainirara raindaani marifa narí iriranara uriqarara fee qidanoo. Qisauku dinni taikasee dinni qaaa marasee (7) irirana faqaasa irirana urinnaaqaraqa maridaqee qidanoo.

<sup>17</sup> Sia tinooriranaki aqufua. Anee miqinana faini aaqoora foora qumarainanoo ukaqa amiannoo.

<sup>18-19</sup> Faiqí moo fannoo unna qinanoo moo fannoo kuqaamifoora mandainainaki aqufuannoo. Aqufifanoo mifa maaqi qiannoo oo qinee fifau unna qiqa uteeti qunnanara anee mandainainaki aqufuananoofee qiannoo. Miqi mari furufarira fasiqafa ida qemari duru feefana indamma uqirafa nidanoo narinaa nidanoo.

<sup>20</sup> Ida ati taikaifanoo doo ida imbaidanoo. Munuqi miniqirufa miqi kai inoo taikainanoo aanoo qirafa taikaannoo.

<sup>21</sup> Ida kudima idaunisaa quqasainanoo dauni atoogafinoo qaannoo. Ida aadana faqa idaki quqasainanoo firaqqoo qaannoo. Manda ainaina oosana areemarifa ummaara kambiqaaani feera miqidanoo.

<sup>22</sup> Munuqi miniqirufa fannoo adiaafaa ira narana miqirafa mina arandanaki maridanoo.

<sup>23</sup> Amiqira ufa qimari fasiqafa aundurai mandaikirafa maridanoo, mi fasiqafa qafee miqirafa apatasaa anukarafa akara faqaafa aundurai kudima arirafa maridanoo.

<sup>24</sup> Qaara irirana mau fimarina ufa fannoo amiqirafa maridanoo. Aundurakiqari nikaru qidanoo miqidanoo.

<sup>25</sup> Mi fasiqafa amiqira ufa ani qimaminana sia mina ufa iria. Mina aunduraki manda ufa oosana oosana qumbiqanoo maridanoo.

<sup>26</sup> Mi fasiqafa narí fidiqaa ira mandufa amiqira ufannai dadapaani maseenoo mimau amiqi amiqi marinaqa aiqamausa mifa manda ainaina auqee marina qafeearanoo.

<sup>27</sup> Faiqí moo fannoo madika indufuseenoo moo fannoo minaki aqufuani fee qimarifa narí aqufidanoo. Faiqí moo fannoo oonitia umbaqi aminanoo moo fasiqa aruani fee qifanoo oonu aruakinanoo narí aruannoo.

<sup>28</sup> Unna qimari afaurufa kuqaa anoona ufara fidiqaa midanoo. Unna qimasee amiqi amiqi marifa mifa mandaikamma nimaqaidanoo.

## 27

<sup>1</sup> Anee duna auqararee qinna ainainnara sia qimasee aneenna amooqia. Anee maqee kambiqaaninna ainainnara sia irimariananoo.

<sup>2</sup> Sia aneenna amooqia, saina moo aanaamuru fannoo ani amooqiani.

<sup>3</sup> Furufarira fasiqa fannoo firaa umaarara ainaina auqaidanoo. Mi umaarafa ooni umaara faqa nukuda umaara faqa uriaaqaranoo maridanoo.

<sup>4</sup> Aanoo qirafa faqa aranaqarafa faqa mandainaina maridanoo. Aqoonnanara rairai qirafa misa firaafa maridanoo.

<sup>5</sup> Manda ainainaki mari fasiqanara qaoo qirafa minara aidirana uriaaqaranoo maridanoo. Mifa sia ani aidirana qafaani.

<sup>6</sup> Anee aaqamasainanoo ani aqoondi fannoo ufannai aidafuma aminafa mifa andeeqara aqoondi mariannoo. Namuqaa fannoo unnaqimasee amooqira ufa moomoo anisaa quqaannoo.

<sup>7</sup> Faiqí moo fannoo amuaqu inoo marinanoo kaaqa adiafaa imarina ookasaasa anoona aminanoo minnisaannoo. Faiqí moo fannoo aarara marifa sukaqee mari narannara adiafaa irafee qimasee kaqi naannoo.

<sup>8</sup> Faiqí moo fannoo narí maaqa quqasee aiqama tinai nimarifa ufini aanna raidanoo narí aanaamukiqari quqasee furufara inoo aiqamai nidanoo.

<sup>9</sup> Afundimari ainainna afaaqai akusaananoo afunda afaaqai ifanoo aundura asaidanoo. Aneenna aqoondi amiqira aamuaqira ufa qiaminanoo mi aamuaqira ufafa amiqira afundara foorá ani rafaqaqafuannoo.

<sup>10</sup> Aneenna aqoondi faqa aneenna akoona aqoondiara faqa sia qaunua. Anee umaaraki aqufinana sia aneenna nianai mari akaqaafasaanara dadaaqiannee qia. Aneenna adeedi mari aqoondifinnai oonurainanoo mifa ani dadaaqiannoo.

<sup>11</sup> Qini qimaaku anee irirana faqaafa marinaqa qinee asasianaura. Yafee aniara qini diqifaqa ani irirana mau fiqa misa rafaqaqafuanauree qinanee.

<sup>12</sup> Irirana faqaafa mandainaina anifanoo iriseenoo amaaraidanoo. Irirana siaifa kaqi oonurama minaki aqufinoo ummaara maraidanoo.

<sup>13</sup> Anaamurundari sia irimarinna fasiqafa aniree qinana munnimma aminana anee furufarirafa mariananoo. Miqimari furufarira fasiqafa dapi maraqa nua aanaaseena munnimma amisee maraanoo.

<sup>14</sup> Anee aneenna aqoondi kananaana afaurirna findifinana firaqqoo faqa rumasee amandeenana mina aquraree mariananoo.

<sup>15</sup> Aaku rikari kapatu fannoo aqufidanoo sia taikaidanoo. Manda anaasee fannoo mina kaukaata qirafa kapatu aanna raidanoo.

<sup>16</sup> Anee ufai qumanee rafaqa fidanee anee fadameena aki mariana asaukuki qumaraidanee, sia. Miqi kai inana sia amana mi aanaaseena kaukaata qirana rafaqa finnananoo.

<sup>17</sup> Qumi faqa saasuna faqa marasee narisaa anrisaa anainanoo afaidaanoo. Faiqí moo fannoo narí aqoondi faqa moodaaqoo marida narí qimami narí qimamiafanoo ufa fannoo narí dadaaqi narí dadaaqinoo andeeqaannoo.

<sup>18</sup> Anee murisaa amiqimmasee rakisinanoo irainana anee tiqisee neenarananoo. Miqi kai inoo ainainira faiqi fannoo narí uriqararana ainainasaa amiqimmasee rakisinafa uriqarafa mariannoo.

<sup>19</sup> Faiqí moo fannoo nammari afainni kikiqammafi narí oori afiri nammari qafaidanoo. Mifa narí mariranara faqa iriranara faqa iriseenoo miqirafa maridanoo fee qiannoo.

<sup>20</sup> Faiqí moo moo kuqimariafanoo sia kuqira maqa maaqa umbiqaidanoo, kaqi kai kuqida maridaqa. Miqi kai inoo sia amana faiqí narí aidirana aiqama afaqanoo munu taikaannoo.

<sup>21</sup> Idannai koorá faqa siruaa faqa tasirisirimmasee amanammasee qafaidaqa. Miqi kai iqa faiqí marirafa kai faiqiara kooroo idanoo.

<sup>22</sup> Anee furufarira fasiqa kuqa ariara foora masainanoo sia mina furufarirafa minaki marifa taikaannoo kaqi mariannoo.

<sup>23</sup> Anee aneenna sipsipasaa faqa burimakausaa faqa amiqimmasee rakisia.

<sup>24</sup> Ani munnimma fannoo sia kisaagasaa mariannoo. Maqasaa karaambaiqa aiku asauku sia kisaagasaa marifaranoo.

<sup>25</sup> Ani andanda kisaagaikinana ateekasainanoo fuka andanda kambigaani.

<sup>26</sup> Anee aneenna sipsipa asausinnoo aneenna qamunna auqua. Anee aneenna mimmi akaqana nimisee minasaaqaraa munnimma marasaananno maqa feefauria.

<sup>27</sup> Aneenna mimmi akaqafa kaqi marina naamma anoona tatisee anee faqa aneenna faiqi namu faqa aneenna dadaaqi maria manaaqausa faqa naaqa.

## 28

<sup>1</sup> Manda oosana maree marifa sia moo arirafa marifanoo kaqi fifau sandaidanoo. Andeeqara oosana faqaafa kaasau faini raioonnara foora pasoosidanoo.

<sup>2</sup> Ufa rukiee maria maqanaasa misa uriqararausa qusasaa mariqa moo fannoo mina maraqusee kikiqidanoo. Irirana faqaafa irirana rainee marifa mifa andeeqa nimaqaidanoo kisaagasaa mariannoo.

<sup>3</sup> Kudi fasiqauqa manda rakisira rakisi nimaqee marifa aaku firaafara foora rinoo narana aina madaikamma aqimarifa maridanoo.

<sup>4</sup> Andeeqara ufara nikooqee marisa ufa rukiee mariasa dadaaqidaqa. Andeeqara ufa mau fimariasa ufa rukiee mariasa itita nimaqaidanoo.

<sup>5</sup> Manda oosana maree mariasa sia andeeqara oosanara iridaqa. Yaweenara inaaruu qimariasa misa andeeqara oosanra amiqimmasee iridaqa.

<sup>6</sup> Moonoo ainaina faqaafa eendaanidira aatata nimarifa ureeqarafa maridanoo. Kudi fasiqa andeeqaraqoo kai nimarifa mina urirarafa maridanoo.

<sup>7</sup> Sanda ufamau fimarifa kumaaraafa iriana faqaafa maridanoo. Moo kumaara fanoo kaaqa narimari fasiqana aqoondiki marifa narí akoona asaurirana amidanoo.

<sup>8</sup> Faiqi moo fannoo narí munnimma ufaasu nimiseenoo mina akiiqara firaqoo ootupamasee maree marifa sia mi munnimmana uaqeeiannoo. Mi munnimmafa aiqaree kudi fasiqauqara amuqusi mari fasiqafinnai fuannoo.

<sup>9</sup> Faiqi moo fannoo Yaaweenana sandufa ameesuqinafa Yaaweenara inaaruu qinanoo Yaaweefa mina inaaruu irinoo fidiqaammianoo.

<sup>10</sup> Andeeqaraura rarisameeqee manda ainaina auqarafaki uqeemarifa narí ufaanaki narí aridanoo. Asakadiki ikariri sia marifa Anutufa mina akiiqara amiannoo.

<sup>11</sup> Ainaina faqaafa unnaqimasee nariara irirana faqaasee qidanoo. Kudi fasia fannoo kuqaa irirana faqaafa maridanoo mifa misa oosanara amiqimmasee iridanoo.

<sup>12</sup> Andeeqara fasiqa uriqarafaikinaqa faiqi anaasee aiqamausa firaqoo asasifaranoo. Manda oosana maree marifa uriqararafaikifaqa faiqi anaasee rufiasee kukeeqeefaranoo.

<sup>13</sup> Faiqi anaasee moo fannoo narí aaqarana kukeeqee marifa sia amiqirana maraannoo. Kooroommasee minnisainnana Anutufa afauaannoo.

<sup>14</sup> Aiqamakari Yaaweenana ufa mau finana asasiranaki marinnaranoo. Ufa rukieenana mandainainaki marinnaranoo.

<sup>15</sup> Manda oosana maree mari karaambaiqafa kudi fasiqa anaasee manda rakisira rakisinnimaqee marifa kaasau kuarara foora faqa kaasau fainiara foora faqa maridanoo.

<sup>16</sup> Narí maqannaa mandaikamma nimaqee mari urirqararafa irirana oorudupirafa maridanoo. Unna qira oosanara akooqee marifa kisaqasaa rakisi nimaqaannoo.

<sup>17</sup> Faiqí kuqa arinafa narí madika indufidanoo. Sia moo fannoo mina dadaaqiannoo.

<sup>18</sup> Kuqaa qira oosana mareenana amiqimmasee marinnaranoo. Sia kuqaa qifa oosana mareenana kai kaqi tautummaki manda ainainaki aqufinnaranoo.

<sup>19</sup> Maqa auqee mari fasiqafa mina narana moomoo maidanoo. Fifau faafau inoo nifa kudi mariannoo.

<sup>20</sup> Kuqaa qira oosana faqaasa Anutufa firaqoo amiqi amiqimma amaqaanoo. Kai kaqi moomoo munnimma ainaina faqaasa mariraree qimariasa aupuraranaki aqufifaranoo.

<sup>21</sup> Kootaki moo fasiqa dadaaqinara moo fasiqa mandaikamma amaqarafa manda oosana maridanoo. Akaqa siaasauqa noo rafaqafia munnimma maraseeqa miqidaqa.

<sup>22</sup> Kaaqa ainainara tatamaqi mari fasiqafa kai kaqi moomoo ainaina maranaa qidanoo, miqi marifanoo sia irirai miqi mari kudikirafa doo mina amaarusinoo maridanoo.

<sup>23</sup> Anee faiqí moo manda oosana marainara qaoo qinanoo mifa minara kasooaqee dufi dufi qinanoo mina dufi dufi qira ufa fannoo fadameena akira ufa uraaqaranoo maridanoo.

<sup>24</sup> Faiqí moo fannoo narí anoofa akoona ainaina ummuarammasee sia manda oosana maree fee qinafa mifaa faiqí ainaina mandaiki mariasa naanna raidanoo.

<sup>25</sup> Ainainara tatamaqi mari fasiqafa ummaara uqeeraidanoo. Yaaweenasaa mundi mari fasiqafa moomoo ainaina faqaafa maridanoo amiqimmasee mariannoo.

<sup>26</sup> Faiqí moo fannoo narí irirana mau fimarifa fufufarirafa maridanoo. Faiqí moo fannoo irirana faqaasa aatata fimarifa asoaranaki maridanoo.

<sup>27</sup> Faiqí moo fannoo kudi fasiqauqa nimimarifa mifa sia sarau iannoo. Kudi fasiqauqa sia nimimarina faiqí aquraraidafa.

<sup>28</sup> Manda oosana maree mariasa uriqararaisai kiafaqa faiqí anaasee kukeeqaidaqa. Mi manda oosana maree mariasa kuqifanoo andeeqaraisa kaifaa rakisi nimaqeeffaranoo.

## 29

<sup>1</sup> Kaukaata qimari fasiqana moomoo kari andeeqaafanoo sia irimarifa qusasaa radamu saifanoo mina andeeqara aana sia mariannoo.

<sup>2</sup> Andeeqaraisa rakisiraisaikiafaqa aiqama fasiqa anaasee asasidaqa. Manda oosana maree mariasa rakisiraisaikiafaqa aiqama faiqí anaasee ummaara maraidafa.

<sup>3</sup> Irirana faqaafa marinanoo ani anoofa akoofa asasiannoo. Dapi maraqa nua aanaaseefinnai fimarifa narí munnimma aiqama aqu taikaidanoo.

<sup>4</sup> Maqasaa karaambaiqa fannoo andeeqara oosananoo maa maqa maaqana rakisifanoo afeekaikinoo maridanoo. Munnimmara iridanoo rakisifanoo mifa rakisimari maqa maaqafa maaniki aqufidanoo.

<sup>5</sup> Faiqí moo fannoo narí aqoonnana fadameena akira ufa ami marifa narí mina ufaana fufidanoo.

<sup>6</sup> Manda oosana maree mariasa nári aaqarafa nári ufaana fufufifaqa aridaqa. Andeeqee mariasa اساسammasee idiana faqa fidaqa.

<sup>7</sup> Amiqira fasiqa fannoo kudi fasiqa ummaarara faqa iridanoo. Manda oosana maree marifa sia miqira ainainara iridanoo.

<sup>8</sup> Ufa rukiee mariasa nári maqannaasa nirana fundakida aanooqirana uqeera nimidaqa. Irirana faqaasa aanooqirana asoama nimaqaidaqa.

<sup>9</sup> Irirana faqaafa furufarirana afiqee kootai munusaifanoo furufarirafa aanooqimasee uteeti qidanoo.

<sup>10</sup> Faiqí fidika ruiqarara rimariasa andeeqara fasiqara fidiqaa midaqa. Andeeqara fasiqauqa misa mariranasaa itita nimaqaidaqa.

<sup>11</sup> Irirana siaisa nariqa aanooqirana akooqoo kooroidaqa. Irirana faqaasa nári naundurái kai nári ufa rafaqa fidaqa.

<sup>12</sup> Uriqararafa unna ufa irimarifa marinaqa aiqama mina dadaaqimari-asa unna ufa qimariasa kai marifaranoo.

<sup>13</sup> Kudi fasiqa faqa minasaa rakisi marina faqa Yaaweefa kai nifu nimiqaifanoo.

<sup>14</sup> Uriqararafa kudi fasiqa andeeqaranara qimarifa naaru naaru rakisi nimaqaannoo.

<sup>15</sup> Faiqi aanaaqi arusee andeeqainafa amiqiannoo. Faiqi aanaaqiuqa nári irirana mau fiqa nári ninausa nisaurirana nimifaranoo.

<sup>16</sup> Manda oosana maree mariasa uriqararausai kifanoo mandoosana fannoo firaafaikiannoo. Andeeqarausa manda oosana maree mariasa saamurifaqa qafeefaranoo.

<sup>17</sup> Aneenna faiqi namu andeeqara ufa naakapainaqa misa andeeqara aatata fifana anee اساسinnaranoo.

<sup>18</sup> Anutuna itita nimaqarafa sia mari maqa maaqanaki sia mina sandufa maridanoo. Anutuna sandufa mau fimariasa اساسiranaki maridaqa.

<sup>19</sup> Anee ufannai kai ainainira faiqi ufa qimaminanoo siamma iriannoo. Mifa ani ufa amiqimmasee irisee sia mimau fuannoo.

<sup>20</sup> Irirana siaifa kaqikaqoo amana maridanoo. Sia irirana irisee ufa qimarifa mandaika uqanna inoo maridanoo.

<sup>21</sup> Anee aneenna ainainira faiqi faiqi aanaaqisaaqari aidi maru ainainna amisainanoo kaqi kaaqoo marinoo mi ainainira faiqifa ani aiqama ainaina maraannoo.

<sup>22</sup> Qusufa qimarifa moomoo aanoo qirana faqa ummaara faqa uqeeraidaqa.

<sup>23</sup> Narí auqu uqeeree marifa asauriranaki aqufuannoo. Narí mara maree qumi marifa uriqarara auqu maraannoo.

<sup>24</sup> Ummuarira fasiqa dadaaqinara aneenna kai aneenna namuqaakin-naranoo. Kootaki oonuree anoona ufa qinaqa mina akiiqara misa aupur-rarana amifaranoo. Mifa kukeeqainanoo Anutufa mina aqurara ufa qiannoo.

<sup>25</sup> Anee faiqirara rufieenana aneenna ufaana fufi mariananoo minaki aneenna arinnaranoo. Yaaweena saqariki marifa amiqiranaki maridanoo.

<sup>26</sup> Aiqamausa maqasaa uriqararana oorisa oonuree andeeqaranara iridaqa. Sia minannai nári andeeqarana mareefaranoo Yaawee finnain-daraana mareefaranoo.

<sup>27</sup> Andeeqarausa manda oosana maree mariasara fidiqaa midaqa. Manda oosana maree mariasa andeeqarausara fidiqaa midaqa.



## 30

<sup>1</sup> Maa ufana Akurafa Yakeena amaaku fannoo Itieerana faqa Ukarana faqa akararuma nimiru. Mifa maaqi qinau, Anutufa sia qini faqa maridanoo, Anutufa sia qini faqa marifaqa sia qini dadaaqirausa maridaqa.

<sup>2</sup> Qinee aandaara foora maridaqa. Faiqi irirafa sia qiniki maridanoo.

<sup>3</sup> Qinee sia amiqira iriranara iridaqa. Qinee sia uqanna Anutunara iridaqa.

<sup>4</sup> Yafee innaarunai oorureenoo fee uminau. Yafee ufai nari asaukunoo afapita qumareenoo fee. Yafee nammari qamunnasaa sakasee qumaraanoo fee. Yafee aiqama maqa atiuqa auquseenoo fee atukaramma quqanau. Mina auqu yafee. Yafee mina amaaku auqu. Anee iridana qimaqiminaqa iria.

<sup>5</sup> Anutuna ufa aiqama anoona kai kambiqaidanoo. Mifa qi ufafa anoona kai kambiqaidanoo. Mifinnai fimariasa mifa rakira saqariara foora itita nimaqaidanoo.

<sup>6</sup> Sia innee mina iriranasaa inneeqa irirana ootupaaqa. Mifa inni ootupara ufara unna fee qimaseenoo niqiannoo.

<sup>7</sup> Qinee qaara ainainara Anutuna iridaqa. Qinee kaqi maa maqanasaa marunaqoo qiminaqa marasee kuqaa.

<sup>8</sup> Nikaru qirana faqa unnufa faqa nianai futeeqa quqaa. Kaaqa kudikirana sia qimia, kaaqa moomoo ainaina faqa sia qimia. Qiqa qimana kai qimia.

<sup>9</sup> Qinee moomoo ainaina faqaasa maridaqa aniara sia irianoora. Qinee ainaina siaisa maridaqa moosa ainaina ummuariqa qeeqa Anutuna auqu rafaqa fuanoora.

<sup>10</sup> Innee moo fasiqa ainainira faiqiara sia mandufa qiaqa. Mina rakisirafa irisee quandafi inni niqinaqa manda mareefaara.

<sup>11</sup> Akaqa fasiqa anaasee nari nikausa manda afaaqooqa nimisee nari ninausa sia amiqimma nimaqaidaqa.

<sup>12</sup> Akaqausa nariara ikairi siaisee qidaqa. Misa numoo marifaqa misa Anutuna afusaa ikairi faqaasa maridaqa.

<sup>13</sup> Akaqausa nariara amiqirausee qidaqa. Misa nariara kaaqa amiqirausee qidaqa.

<sup>14</sup> Akaqausa nifauru keedai miqirafa maridanoo. Misa nifauru musuka miqirausa maridaqa, minannai ainaina siaisa nambiqeefaranoo. Minanna kai kudi mariasa rukeefaranoo.

<sup>15</sup> Tumooka qaara manaaqa faqaafa maridanoo. Aiqama qara moodaa nuqu faqaasa maridaqa. Miqanda nuqu Qini Qimia. Qaara faqa qaara faqa ainaina fannoo sia doo amanee qidanoo. Kaqi moo faqa moo faqa qimiaqee qidanoo.

<sup>16</sup> Moo kuqirausa maqa maaqara qidanoo, Moo anaasee nari afaaqi faqa moomoo kari faiqeenoo sia faiqi maraidanoo. Moo aadana maqa maaqa fannoo aakuara aididanoo. Moo ida fannoo fifau faafau qaidanoo.

<sup>17</sup> Faiqi moo fannoo nari akoonara uteeti qimaseenoo nari anoona asooqa ufa rukiainafa duee dueena fannoo mina afu qimbaannoo. Mina maaqi meemoonauqa rapeefaranoo.

<sup>18</sup> Qinee qaara faqa qaara faqa ainaina oosannara randaidaqa sia iridaqa.

<sup>19</sup> Moo meemoona fannoo innaarunai qaqqanoo nimari oosanna faqa moo sakani fannoo oonimau nimari oosanna faqa moo oosana sipa fannoo nammari amuaqumau nimari oosanna faqa moo faiqi faqa maanaqa faqa nariara nariara rimaria oosannara sia iridaqa.

<sup>20</sup> Dapi maraqa nua aanaaseesa maaqimidaqa moo ainaina qumee namaseenoo oorindanaindaraana rukaseenoo sia qinee ummuari marunausee qidanoo.

<sup>21</sup> Qaara faqa qaara faqa ainaina maqa fannoo akooqainara maa maqafa kasidanoo.

<sup>22-23</sup> Moo ainainira faiqi fannoo karaambaiqaiki marina faqa moo furufari mariasa moomoo narana neeneesaafanoo nimuaqu imarina faqa moo fidiyaqa imaria aanaaseefa faiqi maree marina faqa moo ainainira maanaaqa fannoo nari rakisira aanaaseena uriqararafaikirana mi ainainausara maqa fannoo akooqafanoo kasidanoo.

<sup>24</sup> Maa maqanasaa qaara faqa qaara faqa ainaina kaqikaa ainaina maridaqa misa irirafa firaafa maridanoo.

<sup>25</sup> Moo ainaina tarika mifa afeeka siai ainainafa maridanoo. Suani aukwana narana suqu quqasee aaku aukana mina naidaqa.

<sup>26</sup> Moo ainaina qiroosa maridaqa misa faqa afeeka siaisa maridaqa. Misa nari maaqa fira oniuqa qambaana usakaidaqa.

<sup>27</sup> Moo ainaina pandaqa maridaqa misa uriqararafa sia maridanoo sia qimannimidanoo misa nariqa kai andeeqasee irasasaa kai fidaqa.

<sup>28</sup> Moo ainaina rufeeka maridaqa. Mifa kaqikaa ainaina maridanoo amana asaukunnai qumareennaranoo. Faiqi firaasa uriqararawsa maaqaki kaqi nimarifa maridanoo.

<sup>29</sup> Kafaqa qaara faqa qaara faqa ainainausa amiqimmasee nimariasa maridaqa.

<sup>30</sup> Moo raioonaa aiqama aandau urinnaaqarara afeeka faqaafa sia moo andaura rufiee maridanoo.

<sup>31</sup> Moo ainaina kookooraana akoona fannoo anaasee kookooraana qambaana kaqi sumoosumidanoo. Moo ainaina mimmi akoona fannoo moomoo indaaru nifiqanoo nidanoo. Moo ainaina maqasaa karaambaiqa fannoo ufa nima marifa maridanoo.

<sup>32</sup> Anee furufarammasee aneenna auqu uqeereenana kafaqa oonu mafi iriseenana aneenna oo rafaqa fua. Anee manda oosana tipundaarinana aneenna oo rafaqa fua.

<sup>33</sup> Anee burimakau naamma anoona tatisee minannai adiafaa imari ainainna pataqa auqinnaranoo. Anee faiqi aikiru rumasainanoo fidika qumuannoo. Miqi kai masee aanooqirana uqerasainanoo rakirafa kambigaannoo.

## 31

<sup>1</sup> Maa ufausa karaambaiqa Reemueerana anoofa qimaqoofa maridanoo.

<sup>2</sup> Anee qini didira qimaaku qinee aniara innaaru qiafana kambiqoonafa mariananoo. Qinee nana ufa fee ani qimamianauree.

<sup>3</sup> Sia aneenna afeeka aanaaseesaa taikaa. Sia aneenna munnimma aiqama aanaaseesaa taikaa. Anaaseeuqa karaambaiqauqa faqa narimaria ainainausa maridaqa.

<sup>4</sup> Reemueera maa ufana iria. Karaambaiqauqa sia uainna nammari naqa. Sia afeeka nammariara indaandi qiaqa.

<sup>5</sup> Misa mina nammasee sandufa qaunifoora. Faiqi nimeemaanai oorudupiqa mariasa ufa sia irisee mandaikamma nimaqeefoora.

<sup>6</sup> Afeeka nammari faiqi qusasaa kuqifaninausa ainaina maridanoo. Firaqa ummaarakii mariasa ainaina maridanoo.

<sup>7</sup> Kuqifandinausa amana namaseeqa nari kudikiranara aunuaqa. Misa namaseeqa noori runiranara aunuaqa.

<sup>8</sup> Anee ufa qiranaki ufa mammaqi mariasa aneenna kai dadaaqi andeeqannisaa. Anee dadaaqirana siaisa ufa qiranaki dadaaqiaqa.

<sup>9</sup> Anee ufa qiranaki misa dadaaqira ufa qinana andeeqara rakisirafa marinnaranoo. Anee kudi fasiqauqa faqa ainaina siaisa faqa itita ni-maqainaqa andeeqaranaki mariaqa.

<sup>10</sup> Amiqira anaasee andeeqara irirana faqaa anaasee mararafa kaaqa kadaapi maridanoo. Mina feefauru amiqira oonda faqa uraaqararafa kaaqa firaa feefauru maridanoo.

<sup>11</sup> Mina afaaqi irirafa mi aanaaseenasaa kai mundinoo marifanoo sia moo ainainara sarau iannoo.

<sup>12</sup> Mi anaaseefa mari kamuqoo narí afaaqi amiqi amiqi kaimma amaqaiddanoo.

<sup>13</sup> Mi anaaseefa sipsipa asausinnai faqa amiqira sandannai faqa moomoo qamunna auqidanoo.

<sup>14</sup> Mi anaaseefa sipara foora nianaindaraa narana maree anidanoo.

<sup>15</sup> Kananaana eendai findinoo narí maaqaki mariasa narana suqasee narí ainainira maanaaqauqa auqee fandinna saikanara qimannimidanoo.

<sup>16</sup> Mi anaaseefa amiqira maqa qafamasee feefauridanoo. Narí ainaina nimisee maraqai munnimmanannai feefaurummaseenoo narí asaukunnai anukamasee adiafaa ira ainaina uainna ummaqidanoo.

<sup>17</sup> Mi anaaseefa oori minaki munduseenoo amudaanai qimasee ainainidanoo. Mifa afeeka anaasee kaaqa amudaanai qimarifa maridanoo.

<sup>18</sup> Mi anaaseefa narí ainainara anoona kai fee qidanoo. Qooma qumbiqaidanoo qeemarifanoo ainaininoo fiifiifanoo eenda amuqusai munu taikaidanoo.

<sup>19</sup> Mi anaaseefa narí sanda sufuseenoo narí qamunna auqidanoo.

<sup>20</sup> Mi anaaseefa kudi fasiqauqa faqa ainaina siaisa faqa afaarinoo nimidanoo.

<sup>21</sup> Suara aaku aukwana mi anaaseefa faasai deedaqammaqaina asausi faqaa qamunna narí maaqaki mariasa aiqama nimifaqa afisusee amiqim-masee maridaqa.

<sup>22</sup> Mi anaaseefa faiqara qaarisaa ufiqira qamunna auqidanoo. Mifa aakianda amiqira sandannai auqira qamunna kai afisidanoo.

<sup>23</sup> Aiqama uriqararausa mina afaaqiara uriqararafee qidaqa. Mi fasiqafa maqusa qambaanai faiqí firaasa faqa marida ufa qimarifaqa aiqamausa mina ufa iridaqa.

<sup>24</sup> Mi anaaseefa qamunna faqa nooiqandi mariana faqa auqi marifaqa ainaina faqaasa ani feefauridaqa.

<sup>25</sup> Mi anaaseena afeeka faqa andeeqarana faqa mifa qamunnara foora afisino maridanoo. Mifa kasooaqee kambiqaaninna mandainainnara sia rufaidanoo paasoosidanoo.

<sup>26</sup> Mina ookiqari firaa amiqira irirafa kai uridanoo.

<sup>27</sup> Mi anaaseefa narí faiqi namu faqa narí afaaqi faqa ainainasaa rak- isidanoo. Sia kudoosaapaidanoo.

<sup>28</sup> Mi anaaseena faiqi namu nári ninoonara asasiafanoo mina afaaqi fannoo faqa mina amooqidanoo idiki keeqaidanoo maaqi qidanoo.

<sup>29</sup> Moomoo anaasee amiqira ainaina auqee mariasa maridaqa, anee misa narusee uriqararafa mariananoo.

<sup>30</sup> Moo anaasee fifau reendeenirafa maridanoo. Amiqira afaaqa faqaafa mina amiqirafa dauni taikaannoo. Yaaweena ufa mau fimari aanaaseena kai amooqiaqa.

<sup>31</sup> Mifa auqai ainaina akiiqara uriqarara auqu amia. Mifa auqai ainainna fannoo mina auqu uqeerarana amidanoo.

## MATAIOO

### Yisuna amiqira fasaasa ufa Mataioofa akara rinau.

*Yisuna akeeku akaaku marusa.  
(Ruk 3:23-38)*

<sup>1</sup> Maa akarafa Anutuna asauku mundirana Abarahaamana ati Yisunara qidanoo. Karaambaiqa Dafidina ati maridanoo. Mina akeeku akaaku mina oosana maqimminoo maridanoo.

<sup>2</sup> Abarahaamafa Isakeena akoofa marinau. Isakeefa Yakooboona akoofa marinau. Yakooboofa Yudana faqa mina akaqaafasaa faqa nikoofa marinau.

<sup>3</sup> Yudafa faqa Peeresana faqa Seeraana faqa nikoofa marinau. Miqanda ninoofa Tamaafa marinau. Peeresafa Qeeseerona akoofa marinau. Qeeseeronafa Aramana akoofa marinau.

<sup>4</sup> Aramafa Aminadafana akoofa marinau. Aminadafa Naasoona akoofa marinau. Naasoofa Saramoona akoofa marinau.

<sup>5</sup> Saramoonafa Boosina akoofa marinau. Boosina anoofa Raqabafa marinau. Boosifa Oobeetana akoofa marinau. Oobeetana anoofa Rusioofa marinau. Oobeetafa Yeeseena akoofa marinau.

<sup>6</sup> Yeeseefa karaambaiqa Dafidina akoofa marinau. Dafidifa Sooroomoona akoofa marinau. Sooroomoona anoofa Quriana anaqa Dafidifa rafiaqoofa marinau.

<sup>7</sup> Sooroomoonafa Reeqooboamana akoofa marinau. Reeqooboanafa Abisaana akoofa marinau. Abisaafa Asaana akoofa marinau.

<sup>8</sup> Asaafa Yeeqoosafatana akoofa marinau. Yeeqoosafatafa Yooramana akoofa marinau.

Yooramafa Usiana akoofa marinau.

<sup>9</sup> Usiafa Yootamana akoofa marinau. Yootamafa Aqasana akoofa marinau. Aqasafa Qeeseekiana akoofa marinau.

<sup>10</sup> Qeeseekiafa Manaseena akoofa marinau. Manaseefa Amoona akoofa marinau. Amoofa Yoosiana akoofa marinau.

<sup>11</sup> Yoosiafa Yeekooniaana faqa mina akaqaafasaa faqa misa nikoofa marinau. Babiroonia karaambaiqa fannoo nari maqusaindari anireenoo nari sundiauqa qimannimufaqa Yuda maqannaasa akaqausa naru taikeenoo akaqausa Babiroonia maqa maaqai nifiqasee karabusaki quqasoofaqa Yeekooniaana faqa mina akaqaafasaa faqa karabusa marunaki kambiqaqau.

<sup>12</sup> Babiroonia maqusaindaraa karabusa taikaseeqa nari maqusai anireenoo Yeekooniaafa Seearatieena maqanau. Seearatieefa Seerubaabeerana akoofa marinau.

<sup>13</sup> Seerubaabeerafa Abiutana akoofa marinau. Abiutafa Eeriakimana akoofa marinau. Eeriakimafa Asoorana akoofa marinau.

<sup>14</sup> Asoorafa Sadookana akoofa marinau. Sadookafa Aakimana akoofa marinau. Aakimafa Eeriudana akoofa marinau.

<sup>15</sup> Eeriudafa Eeriasarana akoofa marinau. Eeriasarafa Matana akoofa marinau. Matanafa Yakooboona akoofa marinau. (Mi Yakooboofa moo marinau.)

<sup>16</sup> Yakooboofa Yoosefaana akoofa marinau. Yoosefaafa Mariana afaaqi marinau. Mariafa Anutuna asauku mundirana Yisuna anoofa marinau.

<sup>17</sup> Maaqimmasee Abarahaanasaqari qisaukuqara taikasee qikunni ooqu qaara faqa qaara faqa marasee oosana kambiqafufanoo Dafidinaki ootupanoo maridanoo. Dafidifa misa Isaraee maqannaasa karaambaiqa marinau. Karaambaiqa Dafidinasaaqari oonu arufufanoo miqi kai inoo

qisaukuqara taikasee qikunni ooqu qaara faqa qaara faqa marasee oosana kambiqafufanoo minakiqari Babiroonia karaambaiqa fannoo karabusa mareenoo narinoo inau. Babiroonia karaambaiqa karabusa oosana raquramifufanoo miqooqari kafa miqikai inoo qisaukuqara taikasee qiku qaara faqa qaara faqa ooqu marasee oosana kambiqafufanoo misaki Anutuna asauku mundirafa ootupa mafi kambiqanau.

(Yisufa kambiqoo aukuana faiqi anaasee siara irannimimarufa maaqimminoo marinau. Kumaaraa maanaaqa ninausa nikausa utaaqama ni-maqaqoofaqa marida nariara nariara nianasaa rufiasee mariqau. Miqiga maridaqa maanaaqa faqa akoonaiqi faqa innooqafufaqa misa ninausa nikausa narana suqasee naidaqa susumasee doo firaqoo kooroomasoofaqa miqanda kaqi naadu naadu mariqau. Miqimmasooqooqari doo moodaa aukuana aqaramafufanoo doo moo aukuanasaa amundeeqee faiqi faqa moodaanaki quqasoofaqa mariqau. Yooseefaasa Mariasa miqim-masee firaqoo kooroomasoofaqa naadu naadu marunakina Anutuna maraqunannai Yisufa Mariana aranandaki kambiqanau.)

*Yisufa kambiqoo ufafa.*

*(Ruk 2:1-7)*

<sup>18</sup> Ooqai Anutuna asauku mundirafa Yisufa mina maqoo ufafa maaqimminoo maridanoo. Mina anoofa Mariafa faqa mina aqoonafa Yooseefaafa faqa qutaaqama amaqaqara mariqau. Miqanda naadu naadu mariqau. Miqinoo maridanoo Mariafa amuaquqaikinai. Anutuna kaaqa areenara maraquna fannoo Mariana aranandakina anoonaikufanoo amuaquqaikinai.

<sup>19</sup> Yooseefaafa andeeqara faiqi Anutuna ufa irimarufa marinau. Sia Mariana mifa faiqi mara aminai. Minara iriseenoo Yooseefaafa Marianara amugusufanoo ufa firaana qiqa Mooseena sandufamau fiqa Mariana arifoo qimasee qumee kai minnisararee qinai.

<sup>20</sup> Miqi qimaseenoo Yooseefaafa irisee fimarufanoo karaambaiqa qangiroo fannoo qainasaa akooqoo qimaminai. Yooseefa, anee Dafidina mi oosanafa mariananoo. Anee aneenna aqoonnanara sia rufia, sia qumuari-mari manaaqafa maridanoo mifa amuaquqaiki ainainafa Anutuna kaaqa areenara maraquna fannoo quqasaifanoo anoonaikinoo. Sia minnisaa kaqi maraa.

<sup>21</sup> Mariafa mari inanoo faiqi akoonaiqi maqaannoo. Maqasainana anee mina auqu Yisunee qia. Mina auqu oosana maaqimminoo mariannoo. Furufariranakinaana qumbaqi uqeerannisaaninafa mariannoo. Mifa kasooqaqee nari maqannaasa nariqa mandainaina numookinaana qumbaeeqeenoo amiqiraqoo quqaannoo. Minara anee Yisu nee qia.

<sup>22</sup> Qangiroo miqi qufanoo ooqai Anutufa tamummaqara fasiqa qiman-nimu ufafa anoonaikinai. Mi tamummaqara fasiqafa maaqi qimasee qimaqoofa.

<sup>23</sup> Maanaaqa moo fannoo mari inanoo amuaquqaikiannoo. Amuaquqaiki-noo faiqi maqaannoo. Mina auqu Imanueera nee qifaranoo.

Mi auquna oosana maasa ufakiqari maaqimminoo maridanoo. Anutufa doo maqee maasa faqa maridanoo.

<sup>24</sup> Miqi qimasoofanoo qainasaa Yooseefaana afunni aroofanoo tautinoo findifinoo karaambaiqa qangiroo ufa kai maranau. Minara misa amundeeqee nari afaaqi amufanoo doo nari anaukoo maaqaki mara quqanau.

<sup>25</sup> Mara quqaseenoo amuaquqaiku kamuqoo sia ameesaaqusinoo ninau, kaqi marinau. Miqi marufanoo Mariafa nari amaaku maqasoofanoo Yooseefaafa mina auqu Yisu nee qinai.

## 2

### *Suani oosanaindari anu fasiqausa.*

<sup>1</sup> Eeroodeefa rakisimaru aukuanai Yisufa Yuda maqa maaqaki moo maqusaki Beetareeqeemma maqusai kambiqanau. Yisufa kambiqoofaqa irirana faqaasa fasau asaana rimarusa, fasau asaana rumasoofanoo uqan-nifiqoofaqa suani afu oosana qaanaindari nianaindari faiqaqa aniufaqa Yeerusareenni aniqau. Misa aniree Yeerusaree maqannaasa irammiriqa qiqau.

<sup>2</sup> Inni Yuda maqannaaka karaambaiqai kianinafa kambiqaina, yamaqusanaki fee maridanoo fee maasa qeeqa maqusai nianai maridaqa nari karaambaiqa maqooqoo fasau irafufaqa qafamaseeqa mi faiqinara dufi dufi qimamaqarara anidaqa.

<sup>3</sup> Miqi qufanoo rakisirafa Eeroodeefa mi ufana iriseenoo maa fuka karaambaiqafa qini maqa maaqa maraandoo qimaseenoo aranaqoofanoo tautinai. Tautumasoofofaqa Yeerusaree maqannaasa misa aiqama naaquqanau. Misa Eeroodeenara rufiaqau. Fuka karaambaiqa namufaqa maasa faqa daruandoo qimasooofanoo naaquqanau.

<sup>4</sup> Eeroodeefa tautumaseenoo aiqama amaana maqasaa rakisimarusa misa uriqarararusa kai Anutuna sandufara irimarusa faqa aiqama suqu quqaseenoo irammirinoo qinai. Tamummaqararusa akarakinaana yamaqusanai fee Anutuna asauku mundirafa kambiqaannoo fee qufaqa misa qiqau.

<sup>5</sup> Yuda maqa maaqa Beetareeqeemma maqusaki kambiqaannoo. Anutuna tamummaqara fasiqa ooqai maaqi qimasee qimaqoofa Beetareeqeema maqusara akara rumaqoofa maridanoo.

<sup>6</sup> Inni Yuda maqannaaki kaqikaa maqusa auqu Beetareeqeemma maridanoo kasooqagee auqu firaa maqusa uriqarara maqusa mariannoo. Mi kaqikaa maqusanakiqari karaambaiqa firafa kambiqafinoo mariannoo.

Mifa qini Anutuna faiqi anaasee Isaraee maqannaasa rakisinnimaqaannoo.

Mi ufana Anutuna tamummaqara fasiqa qimaseenoo akara rinai.

<sup>7</sup> Eeroodeefa mi ufana iriseenoo fasau asaana rimarusa qumee naaramma quqaseenoo irammirinoo qinai. Mi fasauna innee indaaru qafooofanoo kambiqoo kamuqoo mina oosanara idaaqamasee andeeqasee qimaqimiaqee qinai.

<sup>8</sup> Irammiriseenoo misa niqiqaidanoo unna qimaseenoo qimanniminoo qinai. Innee Beetareeqeemma maqusai oonu mi faiqinara amiqiuqanna masee randasee paqurimasee oonurandee aniree qini faqa qimaqimifaqa qinee faqa miqi kai iqa oonu amooqianaara.

<sup>9</sup> Mifa miqi qufaqa misa findimeeqee Beetareeqeemma maqusai fiqau. Aanai fimarufanoo fasau fannoo aana amummaqa uqannifiqanau. Mi fasaufa misa nariqa maqusai suani oosanaindari maridaqa qafoo fasaufa kai mi fasaufa kai nifiqanoo fifiufanoo faiqi aanaaqi maruqoo mina amummaqa kasoo inoo marinai. <sup>10</sup> Misa mi fasaufa faiqi aanaaqi maruqoo kasoo inoo marufaqa qafamaseeqa nimuqusa idaaqufaqa nimudaani itairi fufaqa susumamaqau.

<sup>11</sup> Misa oonureeqa maaqaki keeqafufaqa faiqi aanaaqi kaqikaqoo afeekaikinoo narí anoona Mariana faqa marufaqa ireeda rufia rufia idaqa ooru keeqafi qafaqau. Mi fasiqausa naaquqoofaqa oqumarifufaqa noorindari maqasaa kummara mafufaqa amooqimamaqaida susumamaqau. Misa Yisunara amooqimaseeqa karaambaiqa nimimaru ainaina minammamiqau. Sia kaiqeesa nimimaruna Yisuna amiqau. Amiqira ainaina idukusee koora munnimma aabaa kai amiqau. Kaifaa afundimaru saqari anoona makaqa anoona fooqaana misa mina faqa aabaa amiqau narí maqusai firaa feefaurummamaree anuna maree mini aabaa amiqau. Kaifaa moo saqari anoona afundi maruna faqa, mandefana anoona fooqaafa miqi kai iqa aabaa mina amiqau.

<sup>12</sup> Miqimmasee marufanoo qaina nifu naroofofaqa Eeroodeefa marinnai sia kafa anirandee fuaqa. Anutufa miqi qufaqa misa moo aatata qumee nimaqa fiqau.

*Eeroodeena asaukukiqari Isipa maqusai sandanau.*

<sup>13</sup> Fasau asaana rimarusa misa fufanoo Anutuna qangiroo moo fannoo Yooseefaana qainasaa afunnareenoo qinau. Eeroodeefa faiqi aanaaqiara randasee rutukirara qidaqinoo. Anee faiqi qisanoosa nifiqeenana Beetareeqeemma maqusara rufisee Isipa maqusai oonu marinaqa kasooqae qinee qianana ooqurandee urua.

<sup>14</sup> Miqi qufanoo Yooseefaafa findifinoo eendamuqusai faiqi qisanoosa nifiqeenoo sandeenoo Isipa maqannai ooquree marinau.

<sup>15</sup> Eeroodeefa kaqi marufanoo minni marinau. Maaqi qimasee Anutuna ooqeenaa ufa narí tamummaqara fasiqasaa qimaqoofa anoona kambiqanau. Maaqi qimasee mi fasiqafa qinau. Qinee qeeqa qimaaku Isipa maqanaindaraana aaraanauranoo qinau.

*Eeroodeefa faiqiuqaindi rutukinau.*

<sup>16</sup> Eeroodeefa fasau asaana rimarusa nifeesida marusianoo akaru qimasee moo aatata fifufanoo Eeroodeefa minara irinoo aranaqeenoo sia kaiufanoo narí firisuaiqauqa niqiqoofaqa misa Beetareeqeemma maqusa faqa dinni dinni marusa faqa akoonaiqi aanaaqi kai aiqama rutuku taikanau. Eeroodeefa fasau asaana rimarusara mi fasaunara irammirusara minara oonu mafi iriseenoo faiqi naridaqa Yisuna faqa aruaqera minaramma irinau. Minara irisee qaara aukua mararusa faqa qambaana aukua mararusa faqa aanaaqi maqee maqarusa faqa minara iriseenoo akoonaiqi kai aiqama rutuku taikanau.

<sup>17</sup> Faiqi aanaaqi aiqama rutuku taikasoo fanoo Anutuna tamummaqara fasiqa auqu Yeereemaia mina ufa anoona kambiqanau. Mifa qinau.

<sup>18</sup> Innee iriaqa, Ramma maqusai aanaaseeuqa ufa anoona kambiqanoo. Ikifaafau faqa faaqa fuisee faqa mariannoo. (Yuda maqanna anaaseera Raseerana araamummaakee qimariqau.)

Raseerana araamummaaka narí faiqi aanaaqiara ikiraqee fara moosa aniree nuqa maseeqa idaaqidaqa maseeqa misara doo taikaaqee qifaqa siamma irifara.

Misa nimuqusa mandaiki marifaqa miqifa maridaqa misa faiqiuqaindi sia mariafaqa miqidaqa.

Tamummaqara fasiqa ufa miqi qimasee akara rinau.

*Isipa maqusaindari oonurandee aninau.*



<sup>19</sup> Yooseefaafa Isipa maqusai kaqi marufanoo Eeroodeefa kuqufufanoo Anutuna qangiroo moo fannoo Yooseefaana qainasaa afunnareenoo akooqoo qimaminau.

<sup>20</sup> Findifi doo fua. Faiqi qisanoosa nifiqee kaifaa Isaraee maqusai ooru fua. Ooqai faiqi ariraru fasiqafa doo kuqinoo.

<sup>21</sup> Miqi qufanoo Yooseefaafa irinoo faiqi qisanoosa nifiqeenoo kaifaa anirandeenoo Isaraee maqasaa ooru finau.

(Isaraee firaa maqa maaqa marunaki minaki dinni atinai Yuda maqa maaqa marinau.)

<sup>22</sup> Yuda maqasaa oonureenoo Eeroodeena mina amaaku auqu Aakeerausifa doo mifa nari akoono ainaina afapita qumareenoo rakisirafa marinau. Yooseefaafa minara iriseenoo rufiee marinau. Qainasaa afunnaroonoo Isaraee maqa maaqa dinnatinni Kariree maqa maaqaki onu marinau.

<sup>23</sup> Miqoo kaqikaa maqusai Nasareeteenni naaruara marinau. Miqi qunara Anutuna ooqai maru tamummaqara fasiqauqa misa ufa kambiqanau. Yisufa sia kambiqoo kamuqoo ooqai maaqi qimasee minara akara riqau.

Misa minara Nasaretee fasiqa fee qifaranoo fee qiqau.

### 3

*Yoothaneefa nammari nimimarufa qimannimi ufana.*

*(Mak 1:1-8; Ruk 3:1-18; Yoh 1:19-28)*

<sup>1</sup> Yisufa kumaaraa marufanoo mi fasannai Yoothaneefa nammari nimimarufa kooroomafinoo afeekaikamaseenoo Anutuna ufa faiqi anaasee maqusa maqusa qimanniminoonin nau. Yuda maqannaasa aadana maqannai faiqi oodaa marunnai Yoothaneefa miqoo oonureenoo qimannimimarinau.

<sup>2</sup> Mifa maaqi qimasee fuki faaki qidanoo qimannimimarinau. Anutuna ququsa qusasaa innisaa ititafuannoo. Minara innee aiqamausa inneeqa mandainainara quqasee quandafina Anutufinnai noori ubeekaaqa.

<sup>3</sup> Yoothaneefa miqi qimasee qimannimimarufanoo ooqai Anutuna tamummaqara fasiqa Eesaia mifa qimaqoo ufafa anoona Yoothaneenaki kambiqanau. Mifa maaqi qimasee akara rinau.

Faiqi moo fannoo faiqi sia marunnaindari aadana maqannaindari ufa fifi qimasee faiqi anaasee maaqi qimasee qimannimidanoo.

Karaambaiqa anianifeera mina aana afisuaqa. Aana eendirana andeeqasaifanoo karaambaiqa fuani.

Miqi qimasee akara rinau.

<sup>4</sup> Mi fasiqafa Yoothaneefa qamunna sia amiqirana afisimarinau. Aadaika aadaikirafa kammeera kisaqa asausinnai auqirana afisirafa nimirinai. Tamummaqara fasiqa naanna ramasee miqimmasee marinau.

(Kammeera fannoo firaa aandau qoosara foora maridanoo. Asausi kisaqandauqa maruna mina marasee sufusee qamunna auquqaqee afisimariqau.)

Yoothaneefa aandau apatannai qamunanda rafaqafu rumbanau. Mina narana sia narana uqanna. Ookasaasa anoona faqa kaasau oofaafana faqa mina auqu pandaqa oofaafana mina kai neemarinau.

<sup>5</sup> Misa Yeerusaree maqusanaasa faqa Yuda afumakinaasa faqa Yooradanna nammari dinni dinni afainni marusa faqa aiqama Yoothaneefa maruqoo suqiga marida Yoothaneena ufa irimariqau.

<sup>6</sup> Suqumaraidaqa misa nári mandainainara akooroomaseeqa minnisarara kooroo qimarufanoo Yoohaneefa nammariki rafusu ooqu marinni-maqasee marufaqa rumannimaqoofaqa nammarikiqari findifiqau.

<sup>7</sup> Farisai amaana ufa qimariasa faqa Sadikai amaana ufa qimariasa misa faqa nammari mararara aniroofanoo Yoohaneefa niqidanoo qiman-niminau. Innee sakani faiqi ukadiqa faiqi namuara foora nári nari-ranara rufiamaree sandee mariafanoo. Yafee innee qumee aaquqima nimaqaifaqee innee Anutuna aranaqaranara rufiamareeqa unna qimasee nammari rumannimaqaannanara qinisaa mandaaqeefaree.

<sup>8</sup> Innee kuqaa naundura quandarausee maridaqee. Unna qimariafanoo. Andeeqara oosana maraifaqa qafeeqa inniara kuqaa naundura quandarausee qianauro.

<sup>9</sup> Yoohaneefa kaifaa qimanniminau. Innee inneeqara maasa Abarahaana aiku asauku maridaqee sia Anutufa daruannoo fee qimariasa. Maasara amiqirausee qimariasee qimariafanoo. Miqi qimaria ufana sia qiaqa. Qini ufa iriaqa Anutufa maa fifau ooniugara qinanoo amana Abarahaana aiku asauku kambiqeefaranoo. Nanaree innee fifau maasa Abarahaana aiku asauku maridee qida fee. Fifau faafau ufa dapi ufa qimariafanoo.

<sup>10</sup> Doo Anutuna saasunara foora saqari atuka ateeqarara rauqiaqee idanoo. Sia naundura quandainausa Anutufa narirafa qusandaannoo. Yasaqari fee sia andeeqasee qaamma irainafa kudi saqari Anutufa mina ateeqa idaraannoo.

<sup>11-12</sup> Kuqaa qinee Yoohaneesa nammari kai inni rumannimaqaida. Inniqa mandainaina minnisee Anutuna ufamau firanara kooroianifeera fifau nammari kai rumannimaqaida. Kasooqaqee qini qinaaqiannai moo fannoo kambiqaanoo. Mifa qini uridaaqaraannoo. Qinee ooreeqarausea mina ameemaanai marianauro. Naqimmasee fee qinee mina dadaaqianauree mifa firaafa qini faqa uridaaqararafa maridanoo. Mifa sia fifau nammariinnai kai inni oqumarinimaqaannoo. Mifa Anutuna kaqa areenara maraquna inni naakunnimaqaannoo. Mifa kudimakirana idaqaanifeera idannai faqa inni rumannimaqaannoo Yoohaneefa oofaafana kikiqa usuna maa maqanasaaqaraasara qidanoo qinau. Innee Yisuna asaukuki faiqi anaasee oofaafanara foora doo maridaqa. Kaqikaqoo utitiqamanniseenoo mina adi fuaqa aquannoo. Anoona narí mareeqeenoo narí maaqaki quqaseenoo aanaaqmaara mandoosana maree mariasa idaraannoo. Ida firaana sia dimbeemari idanaki araannoo.

*Yisufa nammari maroo ufafa.*

*(Mak 1:9-11; Ruk 3:21-22)*

<sup>13</sup> Mi fasannai Yisufa Karidaiaandari qumureenoo Yooradanna nammari afainni Yoohaneefa nammari rumamaqaanifeera quminau.

<sup>14</sup> Qumuroofanoo Yoohaneefa saa qimaseenoo Yisuna qimaminau. Qinee ani nammari rumamaqaananoo siamma amanaikiannoo. Anee qini rumaqimaqainanoo amana mariannoo.

<sup>15</sup> Miqi qufanoo Yisufa maaqi qimasee qimaminoo qinau. Maqee kaqi rumaqimaqaa, Anutuna ufamau kai fidaqa maaqanda andeeqaanauranoo. Miqi qufanoo Yoohaneefa irinoo eedoo qimaseenoo Yisuna nammariki ukunqamaseenoo mara uqeeranau.

<sup>16</sup> Yoohaneefa Yisuna nammariki keeqa amaqasoofanoo findifufanoo mikari kai innaaruna rakeeufanoo Anutuna naaquqara andeeqara maraquna fannoo Yoohaneefa qafoofanoo nakipurunara foora mambufanoo qumureenoo Yisunasaa quqanau.

<sup>17</sup> Quqamafufanoo innaarunaindaraa ufa maaqi qimaseenoo akooqoo Yisunara qinau. Maa fasiqafa kaaqa qini qimuqusira qimaaku marifaqa minara qini qimuqusa asooaifaqa susuidaqa.

## 4

### *Sadannafa Yisuna amanufafa.* (Mak 1:12-13; Ruk 4:1-13)

<sup>1</sup> Miqooqari nammari mara mareenoo Anutuna mara quna fannoo Yisuna rarisameeqeenoo fifau saqanna aadana maqasaa oonikinai quqasoofanoo marinau. Sia fifaufau. Afaannauqa firaafa amanammasee qafaanifeera quqasoofanoo marinau. Oonu marufanoo afaannauqa firaafa Yisuna amanammasee qafaanee qimaseenoo anireenoo maaqi qimaseenoo amanammasee qafanau.

<sup>2</sup> Yisufa sia narana marufanoo, qaara fasiqa niku nisauku taikasee eenda faqa faasaana faqa aiqarooranoo aararanau. Miqimmasee faasaana taikoofanoo firaqoo aararooranoo kudoosaapanau.

<sup>3</sup> Kudoosaapee marufanoo afaannauqa firaafa mandainainara amanammasee qafarara anireenoo Yisuna qimaminoo qinau. Anee kuqaa Anutuna amaaku mari inana maaqi qimasee kooroo inaqa qafaa, maa oonisara qinanoo feemu kamambinana nainanoo amuaqu inaqa qafaa.

<sup>4</sup> Yisufa iriseenoo afaannauqa firaana qimaminau. Anutuna akarakina minara maaqimminoo maridanoo. Faiqi narana kai namasee sia amana marifara. Anutuna ookinaa ufa namufaqa namaseeqa neeqa amana marifaranoo. Qinee mina Anutuna ufamau kai fuanaura. Ani ufa siamma irianaura.

<sup>5</sup> Miqi qufanoo afaannauqa firaafa Yisuna afiqeenoo Yeerusareenni amaana maqa, Isaraee maqannaa naaquqara firaa amaana maqa meer-aqoo sandaaqai maruna mina ataufakaaqa faakana kisaqa atisaa muru quqasee qimaminau.

<sup>6</sup> Kuqaa anee Anutuna faiqi fee sia fee. Kuqaa Anutuna faiqi mari inana maaqooqari rafusakinana maqasaa meemai aqufinaqa aiqamausa ani qafaaqa Anutuna akara moo minara maaqimminoo maridanoo. Anutufa nari qangiroouqa niqiqainaqa misa nisauku qufiqisaifana minasaa aqufinaqa rafusifaranoo, sia oonisaa aiku rupaurin-naranoo.

Minara anee maaqooqari rafusaki aqufinaqa misa ani dadaaqifana sia maqasaa arinnaranoo. Faiqi anaasee qafamasee kuqaa anee Anutuna asaaku mundira fee qifaranoo.

<sup>7</sup> Afaannauqa firaafa miqi qimasooranoo Yisufa qimaminau. Anutuna akara kafa maaqimminoo maridanoo.

Anee aneenna karaambaiqa Anutuna sia amanammasee qafeennaranoo. Sia uqanna.

<sup>8</sup> Yisufa miqi qimasooranoo afaannauqa firaafa mina iriseenoo kaqi afeekaikamaseenoo Yisuna kafa afiqamareenoo aqana kisaqasaa afiqee muruseenoo aiqama maqa maaqa maqusa maqusa misa nari areenaranaki marina Yisuna uqafiqaseenoo qimaminoo qinau.

<sup>9</sup> Anee maqasaa oorindari rupaitamafinana qini Anutusara foora qimooqinaqa qinee maa aiqama ainainna uqafiqasaunnana ani kaimmami-anaura.

<sup>10</sup> Yisufa mi ufana iriseenoo kaifaa qimaminoo qinau. Sadanna see maree fua. Anee iria. Anutuna akara moo maaqimminoo maridanoo. Innee

inneeqa Anutuna kai amooqiaqa. Karaambaiqa Anutufa mifa qinnandee kai iaqa. Qinee mina ufa kaimma irianauroa.

<sup>11</sup> Yisufa miqi qimasooфанoo Sadannafa quqasee finau. Fufanoo qan-giroouqa Yisufinnai qumureeqa narana aina amidaqa amiqi amiqiaqu.

*Yisufa narí saika oosana aroo ufafa.*

*(Mak 1:14-15; Ruk 4:14-15)*

<sup>12</sup> Mi kamusaqa rakisirafa Eeroodeefa Yoohaneena nammari rumanni-maqee maruna karabusakina rumba quqanau. Yisufa minara iriseenoo Karidaia maqusai finau. Miqoo oonureenoo kaqikaa maqusa moo auqu narí maqusai Nasareete, miqoo oonu marinau.

<sup>13</sup> Kaqikaaqoo miqoo marinoo quqaseenoo Kapeeranauma maqusai Karidaia faruma atinni mi maqusanai ooqu marinau. Kapeeranauma maqusai Seepuruna maqa maaqa faqa Napatari maqa maaqa faqa miqoo Kapeeranauma maqusa maridanoo.

<sup>14</sup> Yisufa Kapeeranauma maqusai ooqu marufanoo Anutuna tamum-maqara fasiqa auqu Eesaia, mina ooqeenaa ufa anoona kambiqanau.

<sup>15-16</sup> Mifa qinau.

Seepuruna maqa maaqaki mariasa faqa Yooradanna nammari dinnafai mariasa faqa faruma dinni, ooruku nammari dinni qambaana maqa maaqaki mariasa faqa Kariree maqa maaqaki aanaamuru oosana oosana mariasa faqa innee aiqama faiqí anaasee asukunaki mariasa maqee kaaqa qarana qafeefaranoo. Kuqiranakiara foora asukunaki mariasa inniki maqee kaaqa qarafa radiqifinoo mariannoo.

Tamummaqara fasiqa miqi qinau.

<sup>17</sup> Yisufa Kapeeranauma maqusai ooqu maridanoo maa ufana oosana arasee faiqí anaasee maaqi qimasee qimannimimarinau. Innaaruna ququsa adeediranoo maridanoommi, innee inneeqa mandainaina kiqari quandasee Anutufinnai noori ubeekaaqa.

*Noodaanna maree marusa naaroo ufafa.*

*(Mak 1:16-20; Ruk 5:1-11)*

<sup>18</sup> Yisufa Kapeeranauma maqusai maridanoo moo faasaana Kariree faruma afaiqara fidanoo qaara fasiqa narí qisafasaasa paqurinau. Miqanda nuqu Peetooroosa Andurusa mariqau. Miqanda firaa pateeuqa nammariki aqimariqau. Misa noodaanna kai arimarusu mariqau. Misa ainaina doo mi ainainna faqaasa mariqau.

<sup>19</sup> Yisufa miqanda paqurimasee qimanniminoo qinau. Inneeqara qini faqa aniaqa. Inneeqara maqee maqee noodaanna maree mariaqanda mariafanoo qini faqa anireeqa faiqí noodaannara foora mareeqee Anutuna ququsaki quqeefaranoo.

<sup>20</sup> Miqanda mi ufana iriseeqa nári pateeuqa ainaina faqa quqasee find-imeeqee Yisuna faqa fiqau.

<sup>21</sup> Yisufa miqanda nifiqeenoo miqooqari faruma afaiqara fidanoo kaifa qaaraqisa fasasa paqurinau. Miqanda nuqu Yameesa Yoohaneesa miqanda nikoona auqu Seebeedi. Sia nammari nimimaru Yoohaneefa marinau, mina amarafa marinau. Miqanda nári nikoona faqa kanuqaki oqumaridaqa fafaa eendaki nári pateeuqa nammariki aqusee noodaanna maraanee qidaqa deedaqimariqau. Misauqa faqa noodaanna ainainirana faqaasa mariqau.

<sup>22</sup> Yisufa naaramasooфаqa miqanda findifufaqa nári kanuqa faqa nári nikoona faqa minnisee Yisuna faqa fiqau.

*Kariree maqannaasa aurirausa andeeqannisoo ufafa.*  
(Ruk 6:17-19)

<sup>23</sup> Mifa Karidaia maqa maaqa aiqama fiqumma inoo nidanoo innaaruna ququsara fuka ufa qimanniminoo ninau. Aurimarusa faqa oosana oosana ainaina maree marusa faqa teeroouqee marusa faqa idaaqamannimaqee marianu.

<sup>24</sup> Miqi marufanoo mina auqu aiqamai daraaninau. Siria maqannaasa faqa aiqama iriqau. Iriseeqa amiqi marusa misa aiqama oosana oosana aurirana maree marusa faqa kaaqa nidafi marusa faqa faiqi fueena naundurani keeqeemarusa faqa fuseenasana nari marusa faqa niku nisauku aadanusi marusa faqa aiqama Yisufinnai maraida munu quqee marufanoo Yisufa andeeqannisee marinau.

<sup>25</sup> Mifa maqusa maqusa fimaru faqa faiqi anaasee moomoo suqumaree mina faqa fimariqau. Karidaia maqa maaqaindaraasa faqa qisaukuqara taikasee maqusa marunaki marusa faqa Yeerusaree maqannaasa faqa Yuda maqa maaqa afumaki marusa faqa Yooradanna nammari dinnafai marusa faqa suqu maree mina faqa fiqau.

## 5

*Amuaqunamusaa maridanoo qimannimu ufafa.*

<sup>1-2</sup> Mi fasannai mi aukuanu Yisufa faiqi anaasee moomoosa nari faqa fimarusa niqafamaseeno qufafa kaqikaa amuaqunamusaa ooru nari faiqi namufaqa faiqi anaasee faqa fiqumma ooqu marifufanoo ufa maa qimaria amaana ufana qimanniminoo.

*Anoona asasirafa.*  
(Ruk 6:20-23)

<sup>3</sup> Faiqi moo fannoo nariara qinee qeeqara sia amanaikidee qimasee dadaaqi marifa dadaaqinaqa minannai kai andeeqasee marianauree qimarifa mifa uqanna anoona asasiranaki maridanoo. Innaaruna ququsara Anutufa amianinnanara asasidanoo.

<sup>4</sup> Noori runusee soofari mariasara foora marifa nari aaqaranara faqa faiqi aanaaseera faqa irisee oori runusee marifa mifa uqanna anoona asasiranaki marianno. Anutufa amiqi amiqirana amianinnanara asasidanoo.

<sup>5</sup> Reendeeni mariasa misa uqanna anoona asasiranaki marifaranoo. Anutufa nari innaarunai qumiasana nimianinnanara asasidaqa.

<sup>6</sup> Faiqi anaasee andeeqasee Anutuna iriranamau firaa iriranara aiqama irirana arusee uriqarara irirane qimasee mi mau fimariasas misa uqanna anoona asasiranaki maridaqa. Anutufa misa dadaaqinaqa mi mau kai fifaranoo. Minara asasidaqa.

<sup>7</sup> Niqoonasara qimudao qimasee nifauwe mariasas misa uqanna anoona asasiranaki maridaqa. Anutufa misara faqa qimudao qimasee nifauama nimaqaaninnanara asasidaqa.

<sup>8</sup> Anaqi faiqirara foora nisakadiki sia ikairi marisa misa uqanna anoona asasiranaki maridaqa. Anutufa nari oori faqa nari marirana faqa uqan-nifiqaaninnanara asasidaqa.

<sup>9</sup> Tinoo taano rirana uqeraafaqa asoaranu nimida faafa qimariasas misa uqanna anoona asasiranaki marifaranoo. Anutufa misara qini faiqi namu fee qianinnanara asasidaqa.

<sup>10</sup> Anutuna iriranamau firana akiaqara narinausa misa firaa asasiranaki marifaranoo. Anutufa nari innaaruna ququsa nimianinnanara asasidaqa.

<sup>11</sup> Faiqí anaasee qini duqu saara inniara fidiqaidaga naridaqa mandaikamma nimaqaidaga oosana oosana mandainainara inniara unna qimarifaranoo. Miqifaqa innee anoona اساسيرانaki mariaqa.

<sup>12</sup> Qini ufa saara arirana akiaqara Anutufa innaarunnai firaa feefaurutia quqannimaqaifanoo maridanoo. Minara irisee sia noori runuaqa, firaaqoo asasiaqa. Sia inni kai narirafa maridanoo. Ooqai Anutuna tamummaqara fasiqauqa faqa miqi kaimmidaqa narimariqau.

*Ooruku anoona faqa kaaqa qarana faqa mi ufafa.*  
(Mak 9:50; Ruk 14:34-35)

<sup>13</sup> Qinee sia fifau inni maa ufana qimannimidaqa. Innee qini ufa irimariasa maa maqa maaqanasaa oorukuara foora mariafanoo faiqí anaasee aiqama adiafaamma nimaqaanifeera. Innee qini maa ufana rukiaifaqa faiqí anaasee yai fee adiafaairana paqurifaree. Ooruku indeemariasa amiqira ooruku indasee maaqaki quqaidaga. Manda ooruku indasee qafaafanoo mandaikifaqa doo aqusaafanoo madaapeekammidanoo. Innee qini maa ufana rukieeqa manda oorukuara foora marifara, manda oorukuara foora madaapeeki aqusaifaqa marifara.

<sup>14</sup> Innee qini ufa irimariasa maa maqa maaqanasaa qoomara foora mariafanoo. Maqusa moo fannoo aqaanasaa maridanoo faiqí anaasee aiqamausa arumundari qafaqa sia kukeeqanoo maridanoo, akooqoo maridanoo. Innee qoomara foora miqikai iqa, kaaqa qaidaga akooqoo mariafanoo, qaidaga arumuki faqa kaaqa qeemariafanoo.

<sup>15</sup> Faiqí moo fannoo rambi qumbiseenoo sia kukeeqarannai quqaani, uqeeraraqoo quqaqainanoo aiqama maaqakinaasa faqa kaaqa qamanni-maqaannoo.

<sup>16</sup> Innee miqi kai iqa rambi fooqaana niqoonausaki kaaqa qamanni-maqaiifaqa misa inni andeeqaranara qafamasee quandafinaqa inneeqa innaarunnai nikoonara susuiaqera.

*Mooseena sandufa kooroou ufafa.*

<sup>17</sup> Innee iriaqa. Mooseena sandufa irimariafa faqa nikoona tamummaqara fasiqauqa ufa irimariana faqa, sia mina rukiarrarau qumidau. Mi ufafa anoonaikianifeera qinee qumidaqa.

<sup>18</sup> Simai, qini ufa iriaqa innaaaruna faqa maqa faqa firaa ainaina maridanoo. Mooseena sandufa faqa firaa ufa maridanoo sia dauni taikaannoo. Ati faqa kaqikaafa faqa sia uqanna taikaannoo kaqi uqanna mariannoo. Mooseena sandufa fifi inoo anoonaikinnaqoo miqoo innaaaruna faqa maqa faqa mi sandufana faqa doo miqoo kai taikaannoo.

<sup>19</sup> Faiqí moo fannoo Mooseena sandufa aiqama muduka uqeeraidanoo ati kai rukiainafa faiqí moo aakapeenoo anee faqa miqianne qinafa mifa innaaaruna maqusa ureeqarafa mariannoo. Faiqí moo fannoo Mooseena sandufamau fidanoo naakapainafa mifa innaaaruna maqusa uriqararafa mariannoo.

<sup>20</sup> Innee iriaqa Mooseena sandufa akoofasauqa faqa Farisai amaana ufa qimariasa faqa misa irirafa sia andeeqanoo maridanoo sia uqanna innaarunnai fifaranoo. Innee faqa inneeqa andeeqara oosana misa nimana kai ooreeqaqa maridaqa sia amana innaarunai fifaranoo. Inni andeeqara marirafa misaindi firaaqoo oorinaaqaramasee marinaqa innee amana innaaaruna ququsaki fifaranoo.

*Aanoo iranara Yisufa qimannimu ufafa.*

<sup>21</sup> Yisufa kaqi qimannimidanoo qinau. Maasa Yuda maqannaasa qikeeku qikaaku ufa maaqimminoo maridanoo. Sia innee faiqi naruannee qimasee kuqa naruaqa. Ya fee faiqi moo fannoo faiqi naruannee qimasee kuqannarinafa kootai maridana ufa mareennaranoo.

<sup>22</sup> Mi ufafa miqimminoo marifaqa qinee minara maaqi qidaqa. Ya fee faiqi moo fannoo sia firaa ainaina kaifau koota maridanoofau, fifau nari akaqaafasara aanoo inafa maqusai kootaki ufa maraannoo. Ya fee faiqi moo fannoo fifau nari akaqara furufara midanoo mifoo qinafa mifa firaa kootaki maridanoo ufa maraannoo. Ya fee faiqi moo fannoo fifau nari akaqara manda ufa qimamaqainafa karaambaiqa marinannai oonuraina ani idaki mara aquandoora.

<sup>23</sup> Yisufa moo ufa qimanniminou. Innee inneeqa Anutuna amira ainaina aandau fee ooni fee nana ainaina fee Anutuna amianauree qimasee amaana maqaki munuseeqa inniqa nikeeku nikaaku Mooseena sand-ufa afaqaidee qimasee imarundee iqa, Anutuna amianee qimaseenana aneenna akaqaafasaa faqa ani aqiranara irisee sia kaqi Anutuna amiaqa.

<sup>24</sup> Aandau aina mina quqaseeqa oonurandee inneeqa nikaqaafasaa faqa moodaaqoo ufa qimaseeqa reendenamma finaqa doo miqoo kai aandau aina Anutuna qaindasaa quqaa.

<sup>25</sup> Yisufa moo ufa maaqi qimasee qimannimidanoo qinau. Faiqi moo fannoo aniara mandaikamma qimaqaannee qimasee ani kootai afigee finana aanai munu dauni andeeqa taikeenana aqoondikia. Sia andeeqa taikainanoo ani mareeqeenoo kiapana munu amiannoo.

<sup>26</sup> Mifa ani mareeqee frisuaiqa aminanoo ani rumbaannoo. Simai, qini ufa iriaqa. Anee rumbaranaki marinanoo ani numoo akiaqa aiqama uqanna taikafinana mikari kai misa ani iduku aiseefaranoo.

*Faiqi anaasee ummuarira ufa.*

<sup>27</sup> Maasa Yuda maqannaasa ufa maaqimminoo maridanoo. Innee sia moo fasiqa anaqa ummuariaqa. Mi ufafa miqinoo marifaqa qinee minara maaqi qidaqa Maasa Yuda maqannaasa qikeeku ufa maaqimminoo maridanoo. Innee sia moo fasiqa anaqa ummuariaqa. Mi ufafa miqimminoo marifaqa qinee minara maaqi qidaqa.

<sup>28</sup> Qine e kuqaa ufa qimannimidaqa faiqi moo fannoo moo anaasee qafamasee iriranakiqari umee kai mina mararee qinafa anee doo aqamaseenana mina faqa aneenna amuqusakiqari manda o osana auqaananoo.

<sup>29</sup> Ani asaukuannai afu fannoo ani aaqaranaki quqaisainana mi afuna pitaqima aqua. Moodaa afaqa taikafinanoo amiqirafa mariannoo. Anut-ufa aiqama afaqa idaki aqusainanoo manda mariannoo.

<sup>30</sup> Ani asaukuannai asauku fannoo ani aaqaranaki quqaisainana mi asaukuna ateeka aqusaa. Moodaa afaqa taikafinanoo amiqirafa mariannoo. Aiqama afaqa Anutufa idaki aqusainanoo manda mariannoo.

*Faiqi anaasee minnisara ufa.*

*(Mat 19:9; Mak 10:11-12; Ruk 16:18)*

<sup>31</sup> Maasa Yuda maqannaasa qikeeku qikaaku ufa maaqimminoo maridanoo. Faiqi moo fannoo nari anaqa minnisaanauree qimasee sia fifau minnisaannoo. Papiqasaa maa anaaseefa qini qinaqa mariuna doo minniseeqa miqi qimaseenoo mi papiqanasaa akara rumeeqeenoo mi anaaseena amiannoo. Amiseenoo doo aqiqaannoo.

<sup>32</sup> Mi ufafa miqimminoo maridanoo, qinee Yisusa minara maaqi qidaqa. Faiqi moo fannoo nari anaqa aqiqee mariana sia ummuari mari

anaaseena amiqimari anaaseena fifau aqiqee marifa mi fasiqafa narí anaaga mareeqeenoo ummuariranaki quqaidanoo. Quqasaifanoo faiqí moo fannoo mi anaaseena maraifa mifa faqa ummuarammidanoo.

*Ufa rukiarana faqa nimana aqiqaranara faqa mi ufafa.*

<sup>33</sup> Maasa Yuda maqannaasa qikeeku qikaaku ufa maaqimminoo maridanoo. Faiqí moo fannoo Anutuna afusaa ainainiani qinafa kuqaa mi ainainna ia. Sia Anutuna afusaa unna qia.

<sup>34</sup> Mi ufafa miqimminoo maridanoo, qinee minara maaqi qidaqa. Sia Anutuna afusaa ufa afeekaikamandee asauku uqeeraaqa. Sia mi oosanna araaqa.

<sup>35</sup> Sia innaarunaira qimasee amana aqiqaa. Miqoo Anutufa ufaqira qaari miqoo ufiqinoo maridanoo. Sia maa maqa maaqanara qimasee nimana aqiqaaqa. Maa maqa maaqanakina Anutufa aiku ramaqai maqa maaqafa maridanoo, naaquqaani sia nimana aqiqaaqa.

<sup>36</sup> Sia Yeerusareera qimasee nimana aqiqaaqa. Yeerusaree firaa karaambaia Anutuna maqusa maridanoo, qimasaida qimariana minnisaaqa. Inneeqa nikiaqa kikiqa ususaida nimana aqiqee mariana sia miqiaqa. Innee amanee inneeqa kai moo fannoo eekara nikiaqa auqida fee moo fannoo dunduqarira nikiaqa auqida fee, sia amana auqifara. Anutufa kaimmauqinau. Naaquqaani sia nimana aqiqaaqa.

<sup>37</sup> Minara innee eedoo qiaqeera eedoo kai qiaqa. Innee qaoo qiaqeera andeeqasee qaoo kai qiaqa. Anee moo ainaina kikiqa usinana aneenna amuqusa ookiqari mandainaina marinakiqari moo ainaina kikiqa ususee unna qiananoo.

*Akiazara akiazara qira ufa.*

*(Ruk 6:29-30)*

<sup>38</sup> Ooqeenaa Mooseena sandufa maaqi qimaqoofa marida qinee iridaqa. Faiqí moo fannoo moonaa afu dimbaqai faqa, faiqí firaasa ufa qimasee mina aru fasiqana narí afu dimbeefara. Kafaa moo fannoo asaukusamu moo oori arifanoo afai rufidifaqa faiqí firaasa ufa qimasee aru fasiqana narí afai rufidifaranoo.

<sup>39</sup> Mi ufafa miqimminoo maridanoo, qinee Yisusa minara maaqi qidaqa. Moo fannoo mandaikammamaqainana anee sia kaifaa quandafi narí mandaikammamaqaa. Moo fannoo ani aapaasa arinana sia aanoo ia, sia qaoo qia, dinni faqa kai quandasainanoo dinni faqa aruani.

<sup>40</sup> Faiqí moo fannoo kootai ani afiqee munuseenoo kootammaqaseenoo ani siuta raipagu marainnana sia oori runua, moo faqa amiqirana raipaueeqee kaqi aabaa mina faqa amia.

<sup>41</sup> Faiqí moo fannoo qafee faqaa fee sundia fee kiapa fee aniara qini faqa qini ainaina faqa sia feefauru amianaura kaqi qifiqeenana moo maqusai munuqisaannee qinana anee oori quqaseenana sia feefauruara iriseenana oori runua, mi maqusana fiaaqaree moo maqusai eedoo qimasee munaisaa.

<sup>42</sup> Faiqí moo fannoo munnimma fee qamunna fee qinana kaqi amia. Sia qaoo qia. Faiqí moo fannoo ani moo ainaina ufaasu qimiannee qinana sia qaoo qia, kaqimmamia.

*Namuqara sia fidiqaaiani, nimuqusiani.*

*(Ruk 6:27-28,32-36)*

<sup>43</sup> Misa ufa maaqinoo maruna iridaqa. Inneeqa niqoondiara nimuqusaki nidiani. Inneeqa namuqara fidiqaaamiani. Misa ufa miqimminoo marifaqa minara qinee iridaqa maaqi qidaqa.



<sup>44</sup> Inneeqa namuqaara faqa nimuqusaki nidiani. Innee qini ufa irinausa mina saara narifaqa misara faqa quandafi innaaru qiaqa. Anutufa misa amiqi amiqianifeera innaaru qimannisaaqa.

<sup>45</sup> Miqiga kai Anutufara foora marifaranoo. Mifa Anutufa miqiranara kai mifa qifanoo suani fannoo aiqamausa Anutuna namuqaaki mariasa faqa aqoondiki mariasa faqa aiqamatinai kaaqa qamannimaqaidanoo. Miqiranara kai Anutufa qifanoo aaku ridanoo andeeqarausea faqa sia andeeqarausea faqa ainaina ummaquusaafanoo kambiga nimaqaidanoo.

<sup>46</sup> Innee inni nidinausa kai nidinaqa innee naqimmasee Anutufa mina akiaqara maasa feefauru qimiannoo fee qifaree. Sia nimiannoo. Innee miqinaqa unna qira takisa maree mariasa naanna reemariasa mariafanoo.

<sup>47</sup> Innee inni nidirausara kai nidinaqa amana amana kai mariafanoo. Innee sia aanaamuru urinaaqaraida. Misa faqa narí aidi narí aidirana amana amana kai mariafaqa minara qinee inni qimannimiqa. Inni namuqaara faqa nimuqusaki nidiani sia aqoondiarara kai nidiani.

<sup>48</sup> Inni innaarunnai nikoofa andeeqarana fiqararafa maridanoo. Sia namuqaa fee qidanoo, sia maana qini qiqaondi fee qidanoo aiqamausa amiqi amiqimannimaqaidanoo. Innee faqa miqi kai iqa mina aanna raaqera qidaqa.

## 6

### *Amuqusinana qumee nimira ufa.*

<sup>1</sup> Yisufa narí faiqi namufaqa faiqí anaasee faqa maaqi qimaseenoo qimannimino qinau. Innee qini ufa irimariasa Anutunara iriseeqa moo amaana saika fee aqoonausa dadaaqira fee mina auqarara sia aiqamausa nifusaa auqaaqa. Kukeeqasee reendeenamasee auqaaqa. Aiqamausa nifusaa mi ainainna auqainafa minara faiqí anaasee aiqamausa qiqafaaqera miqinnaranoo. Miqinana Anutufa siamma innaarunai mina akiaqara ani feefauru amaqaannoo. Qumee kai aiqama ainaina narí Anutuna afusaa kai dadaaqinanoo Anutufa doo narí qafaida mina akiaqara ani feefauru innaarunai quqammamaqaannoo.

<sup>2</sup> Qaaraiki mariasa misa moo amiqira ainaina dadaaqinoo aqoonausee Anutunee nimiani qimaseenoo maqusa qambaana oonuree ukeena fuaqasee faiqí anaasee nifusaa dadaaqinaqa qiqafamaseeqa qimooqi-aqera qimariasa doo nariqa miqoo taikaida miqidaqa. Innee sia misa naanna raaqa.

<sup>3</sup> Innee moo amiqira ainaina dadaaqammamianeera qumee kai maqandana amia, faiqí nifusaa qafee foora.

<sup>4</sup> Qumee kai amimarinanoo inni nikoofa aiqama qumee ainaina qafee marifa mina akiaqara ani feefauru quqammamaqaannoo.

### *Innaaru qira ufa oosana iroo ufafa.*

*(Ruk 11:2-4)*

<sup>5</sup> Innee innaaru qidaqa misa qaaraiki mariasa naanna sia raaqa. Misa amaana maqaki kikiqamafidaqa qimariasa maqusa qambanai kikiqama fidaqa qimariasa innaaru qidaqa. Faiqí anaasee aiqama qiqafaaqee qidaqa miqidaqa. Qinee anoona ufa uqanna inni qimannimidaqa. Doo misa miqiana akiaqara doo faiqí nimooqirana kai maraidaqa. Miqoo taikaida miqidaqa.

<sup>6</sup> Innee innaaru qidaqa inneeqa maaqaki inneeqa kai keeqafinana kooqi ititaseenana qumee kai inneeqa nikoonara innaaru qifanoo, aiqama

ainaina kukeeqarana faqa qafee marifa ani qafamaseenoo mina akiaqara amaqaannoo.

<sup>7</sup> Innee innaaru qidaqa aanaamuru mariasa naanna sia raaqa. Misa sia ufara randaidaqa ufa fannoo urirara kai urirara kai qidaqa. Misa Anutufa maasara amiqimmasee irianifeera qimasaida miqidaqa.

<sup>8</sup> Misa naanna sia raaqa. Inni nikoofa sia innee irammiriaqoo kai iridanoo. Ooqai mifa irimarifa maridanoo. Minara fifau ufa urirara kai urirara kai qidaqa sia innaaru qiaqa.

<sup>9</sup> Innee innaaru qirara maaqi qimasee innaaru qiaqa. Oo innaarunai qikoofa faiqi anaasee aiqama ani auquara uriqaramasee naaquqaani.

<sup>10</sup> Ani innaarunai ququsa maa maqanasaa kambiqaaani, innaarunai ani aiku asauku mariasa ani iriranamau kai andeeqasee fimariasa maridaqa maasa maa maqanasaa qaraasa misa naanna ramasee mi iriranamau kai fuaqaana.

<sup>11</sup> Anee magee faasaana maasa qimanasaa narana qimia.

<sup>12</sup> Akaqausa maasa manda ainaina qimimariana maasa minnisaanana miqikai inana anee faqa maasa manda ainaina akiaqara maraqu qisa.

<sup>13</sup> Sia anee maasa rarisameeqeenana afeeka nimaniraqoo quqaqisaa. Manda fasiqa asaukuki marunnana anee Anutufa uqeereeqee kaqinni amiqiraqoo quqaqisaa.

<sup>14</sup> Yisufa mi ufanara kaifaa maaqi qimasee qimannimino qinau. Innee inneeqa niqoonausa faqa aanaamuru faqa manda oosana akiaqara mininnisaifanoo innaarunai nikoofa inni manda oosana akiaqara faqa minnisaannoo.

<sup>15</sup> Innee inneeqa niqoonausa faqa aanaamuru faqa manda ainaina sia mininnisaifanoo inni nikoofa miqi kai inoo sia innindi faqa mara aqunnisaannoo.

*Aararee marina innaaru qira oosana mi ufafa.*

<sup>16</sup> Innee narana minnisee naararee marinaqa innaaru qidaqa qaaraiki-mariasa naanna sia raaqa. Misa narana minnisee innaaru qiaqeera noori runusee doona akiiseeqa maridaqa faiqi anaasee sia narana naidammiafoo qiaqeera miqidaqa. Qinee anoona ufa uqanna inni qimannimidaga. Misa miqoo kai taikaida miqidaqa.

<sup>17-18</sup> Innee narana minnisee innaaru qiaqeera sia miqi iaqa. Innee nammari auqamasee qamunna amiqirana afisusee nikiaqa auqamaseeqa naanaidara qidana faiqi anaasee ani qafamasee maaqi qifara, maafa sia narana minnisaidanoo innaaru qidanoo miqi qiaqeera miqinnaranoo. Anutufa kai inni nikoofa aiqama qumeendaraa ainaina faqa qafee marifa mifa kai qafamasee mina akiaqara animmamaqaannoo.

*Oosana oosana qumiasana innaarunai kai afeedira ufa.  
(Ruk 12:33-34)*

<sup>19</sup> Innee maa maqa maaqanasaa sia aiqama qumiasana oosana oosana mareeqee quqaseeqa afeediaqa. Taafi aruani, atauku aruani, qooqoosa aukuanu, ummuara fasiqa aniree ummuara mareefaara.

<sup>20</sup> Innaarunai kai qumiasana oosana oosana afeedi iseenana miqoo marinanoo sia taafi aruannoo sia qooqoosa aukuanoo sia ummuara fasiqa mareefara amiqira qoo kaqi mariannoo.

<sup>21</sup> Inni irirafa inni nimuqusa inniqa qumiasana mariqoo kai miqoo kai irirafa mariannoo. Minara innaarunai kai qumiasana afeediaqeera qidaqa. Inni irirafa miqoo kai mariannoo.

*Afu afaaqa qoomarifoora maridanoo.*

*(Ruk 11:34-36)*

<sup>22-23</sup> Faiqí nifiriki niqafeemarifa afaaqa kaaqa qarafa maridanoo narí ainainara sia tatamaqifa kaqi paapaa idanoo nimimarifa. Faiqí moo fannoo oori akooqarafa narí ainaina kaaqa tatamaqimarifa maridanoo. Inni noori nifu miqifaqa innee asukunakinai mariafanoo.

*Nifaaqasaaqaraa ainainara indee indee irana qaoo qira ufa.*

*(Ruk 16:13; 12:22-31)*

<sup>24</sup> Moodaa fasiqa fannoo sia amana qaara rakisiraqanda moodaa kari ainainamma nimaqaannoo. Mifa indaaruaa rakisiranara akooqaannoo moo rakisiranara aidiannoo. Sia miqinoo mifa moo rakisiranasa atooqaannoo moo rakisirana minnisaannoo. Innee miqi kai iqa mariafaqa sia amana Anutunara faqa maqasaa qumiasanara faqa moodaanaki sia amana ainainamma nimaqeennaranoo.

<sup>25</sup> Minara qinee qimannimidaqa. Innee sia inneeqa kaqi mariranara nimuqusiqa. Inni narana neemariana faqa nammari neemariana faqa qamunna afisimarianara faqa sia minara yai fee maraanau yai fee maraanau qiqaqa. Qamunna narana oorudupirafa marinara sia minara irinanoo umaara raani. Anee sia kuqimariananoo kaqi mariannanara minara kai asasiqaqa. Aneenna kaqi mariannanara mina akiqara firaa ainaina maridanoo narana faqa nammari faqa qamunna faqa oorudupirafa maridanoo.

<sup>26</sup> Innee kaaqa qamunna naranara rimariasa qinee nindafaidaqa. Qufini sia narana ummaqidaqa sia aiqidaqa, sia afeedidaqa, kaqi narana naidaqa. Anutufa misa nimidanoo. Anutufa ufini ririmma kaqikaa ainaina dapi ainaina narana niminoo inani. Innee faiqí firaa ainaina mariafanoo uriqaraqa mariafanoo inni faqa nimiannoo.

<sup>27</sup> Amanee anee aneenna kuqirana amuqusiranannai aneenna marirana firarisamasee kisaqasaa marinnaree. Sia amana. Doo nanaree fifau naranara ummaara raidanoo fee.

<sup>28</sup> Nanaree fifau qamunnara yai fee maraanau yai fee maraanau qidanee. Innee nandaki kaasau taatuqee tamookeena qafamasee minara iriaqa sia ainainidaqa sia qamunna akunusee afisidaqa. Anutufa taatuqee qamunnara foora afisuamaqaidanoo.

<sup>29</sup> Ooqai Sooroomoonafa mifa amiqira qamunna qaeesa reemaru qamunnana afisimarufa, kooraa ainaina faqa afisimarufa, sia mifa maa kaasau taatuqeena afufeenaara imarindee sia mina qamunna uriqararafa marinau, mina qamunna ureeqarafa marinau, doo saa qamunnara ummaara raranara doo minnisaqa.

<sup>30</sup> Kaasau qusau ainaina Anutufa qamunnara foora nimidanoo. Sia mina kisaqasaa marira ainainau nimidanoofau. Maqee kasidanoo duna ateekeesee ida araseefandinna ainainafa maridanoo. Innee faiqí sia miqirau. Innee kisaqasaa inni aukwana marifara. Anutufa qusau ainaina ririmma qamunna nimidanoo inni faiqí fiqaramasee nimiannoo. Innee faiqí qamunna ainara kai nimuqusimarianara Anutunara kaqikaqoo kai irirana Anutunasaa rusi mariafanoo, aqaqida miqimariafanoo.

<sup>31</sup> Innee sia nimukaina maaqiaqa nana qamunnee afisunauree nana naranee naanauree, nana nammari fee naanauree. Sia miqi qiqaqa.

<sup>32</sup> Anutuna ufa sia irimariasa misa miqi qidaqa. Innee sia misa naanna raaga. Innee inni innaarunai nikoona kai iriaqa. Mifa faasai inni narana inni qamunna ainainara faasamma iridanoo.

<sup>33</sup> Innee Anutuna ququsara faqa inni andeeqarafa Anutuna andeeqara fara foora marinaqa mi irirafa kai marinanoo niqinaaqa mara quqaseeqa fifanoo maasa narana aina faqa qamunna ainaina faqa Anutufa qimiannoo.

<sup>34</sup> Minara qinee inni qimannimidaqa maqeera kai iriaqa. Duna faasaana ainainara sia irinanoo ummaara raani. Duna narí kai narí aiqama kambiqaaninna ainainara rakisiannoo. Faasaambaasaana maqee ainainara kai iriqa fuaqa qidaqa.

## 7

*Niqoonausa fifau nimanira oosanara qaoo qira ufa.*  
(Ruk 6:37-38,41-42)

<sup>1</sup> Yisufa qinau sia inneeqa niqoonausa aaqaranara maqee maqee misa niqiaqa. Anee miqinanoo Anutufa miqi kai inoo ani aaqaranara ani faqa aqiannoo.

<sup>2</sup> Anee mi aikana kai raquru niminaqa Anutufa mi aikanannai kai ani faqa raquru amiannoo. Anee nana aqira ufa faiqi anaasee akaqausa nimiranoo Anutufa mi ufanannai kai aninna rafaqaqafu amaqaannoo.

<sup>3</sup> Anee nanaree aneenna akaqaafasaa afuki saqari arai marifanee ufa qidanee. Mee ani afuki muduka saqari akatia marinara anee sia fee iridanee.

<sup>4</sup> Aneenna akaqaafasaa nana oosana maraidanee mai anirainaqa mee ani afuki saqari arai marina mara aquanee qidanee. Aneenna afuki firaa saqari akatia marinara siamma iri mariananoo.

<sup>5</sup> Qaaraiiki marianafa mandaiki marianafa. Aneenna naaree aneenna afukina mee firaa saqari akatia marina mara aquseenana andeeqaseenana afu maqaseenana miqoo quandafinana aneenna akaqaafasaa afuki kaqikaa saqari arai marinnana mara aqinanoo andeeqara oosana mariannoo.

<sup>6</sup> Innee amiqira narana faini nimidee. Sia nimimariafanoo. Faini sia mi amiqira naranna aminnanara iriannoo amina namaseenoo kaqi quandafinoo ani ukaqa amiannoo. Aneenna afaaqa auqira ainaina kuarauqa nimidee, sia nimi mariafanoo rakeekaamminoo doona ramasaannoo. Miqi kai masee innee furufarira fasiqa anaasee irimari ainainna sia nimiaqa. Sia irifaranoo. Faini kuara rakeekaa inoo doona ramasaani.

*Sarauqimaria ainainara innaaru qinanoo amiannoo mi ufafa.*  
(Ruk 11:9-13)

<sup>7</sup> Anee ainainara sarauqinana Anutunara innaaru qinanoo ani amianoo. Ainainara sarauqinana Anutufinnai randainanoo mifa uqafiqaa. Ainainara sarauqinana Anutuna kooqi arinanoo mifa kooqi rafaqaamasee ani amiani.

<sup>8</sup> Aiqaama ireemariasa mareefaranoo. Randeemariasa paqurifaranoo. Kooqi arimarifa mifa kai kooqi paqurinoo maaqaki keeqafinoo irai ainaina maraannoo.

<sup>9-10</sup> Innee faiqi nikausa qimannimidaqa inneeqa nimaaku aniara narana innaaru qifaqa ooni nimifaree. Sia ooni nimifaranoo inneeqa nimaaku noodaannara innaaru qifaqa amanee innee manda sakani nimifaree. Sia sakani nimifaranoo.

<sup>11</sup> Innee manda oosana maree mariasa mariafanoo inneeqa faiqi namu innaaru qifaqa amiqira ainaina kai nimimariafanoo. Innaarunai nikoofa

amiqirafa uqanna maridanoo minara innaaru qimarinausa minara narí firaqoo amiqirana amana kai amiqira ainaina kai nimiannoo.

<sup>12</sup> Anee nana oosanaree aididanoo fee faiqí anaasee ani amifaree, anee amiqira oosana kai qimia qee qimariananoo. Doo anee naaree miqira amiqira oosanna kai faiqí anaasee maqee maqee kaqi nimia. Mooseena sandufa faqa tamummaqarausea ufa faqa misa ufa anoona mi ufanaki kooroo inoo maridanoo.

*Tiqeera kooqiara faqa fira kooqiara faqa minara qirafa.*  
(Ruk 13:24)

<sup>13</sup> Innee innaaruna aatata fiqa tiqeera kooqiki keeqafi fuaqa. Idaki fimaria kooqifa firaafa maridanoo. Mi aanafa faqa firaafa kai maridanoo. Nianasaa mafi aqirafa firaqoo maridanoo. Faiqí anaasee moomoosa maqee maqee miqoo fimariaqoo maridanoo.

<sup>14</sup> Kaqi marira kooqi tiqeeraikinoo maridanoo, mi aanafa faqa tiqeeraikinoo maridanoo, afeeka aatata maridanoo. Faiqí anaasee moodaa moodaa mi tiqeera kooqina paqurida fimariafa maridanoo. Innee miqoo kai fuaqa.

*Unna amaana ufa qimariasa oosana qira ufa.*  
(Ruk 6:43-44)

<sup>15</sup> Innee unna qira amaana ufa qimannimira fasiqauqara eerairiaqa. Misa maageena faini reendenira faini apata afisirafa aniraannoo, minara rufiaaqa. Aundurái kaasau faini miqirafa maridanoo. Ukaqa nimiandoora minara rufiaaqa.

<sup>16</sup> Maaqimmasee misa oosana iriaqa. Naqimmasee saqari qafararee. Anee oonureenana qaqamma kai qafaa. Moo saqari qafainanoo qaqamma iranoo marinara amiqira fee qinnaranoo. Moo saqari fannoo amiqira amanee maridanoo qaqamma siaifa, adusa maridanoo. Unna amaana ufa qimannimimaria fasiqausara miqi kai inoo saqari kikiqa usirafa maridanoo. Kamukamuna qaqamma fannoo amuka faqaa sandasaa iranoo marinanee diqinnaree. Sia miqoo iranoo mariannoo. Faafisa qaqamma fannoo reereeroondaanasaa iranoo marinanee tiqinnaree. Sia miqoo iranoo mariannoo.

<sup>17</sup> Amiqira saqari fannoo amiqira qaqamma kai iraidanoo. Mina dinni manda saqari fannoo manda qaqamma kai iraidanoo.

<sup>18</sup> Amiqira saqari fannoo sia amana manda qaqamma iraannoo. Kafaa mina dinni manda saqari fannoo sia amana amiqirana iraannoo.

<sup>19</sup> Saqari moo fannoo manda qaqamma adusa irifaqa ateeka idaraidaqa.

<sup>20</sup> Amaana ufa qimannimimaria fasiqausa saqariara foora mariannoo. Minara qinee inni qimannimida. Amaana ufa qimannimimaria fasiqausa naaqa oonuree misa marinna oosana nimarinna oosana qafaa. Qafamasee andeeqee mari fasiqanara amiqira amaana ufa qimari fee qiaqa. Mina dinni aaqee mari fasiqanara manda amaana ufa qimari fee qiaqa.

*Fifau Yisunara karaambaiqee qimariana.*  
(Ruk 13:25-27)

<sup>21</sup> Yisufa kafaa maaqi qimasee qimanniminu. Faiqí fifau misa nookiqari qiniara karaambaiqee karaambaiqee qimariasa sia innaaruna ququsaki fifaranoo. Qini innaarunai qikoona iriranamau fimariasa misa kai innaaruna ququsaki keeqeefaranoo.

<sup>22</sup> Innaarunai keeqeemaria aukuanafa kambiqafinaqa moomoosa maaqi qimasee qimaqimifaranoo. Oo karaambaiqa karaambaiqa. Maasa maqasaa maridaqa aniara maasa ani amaana ufa qimannimiaafanusa

maridaqa. Maasa fueenasana aruna ani auqu ramasaida innaaru qimasee mara aqunniseeunausa maridaqa. Maasa miqi mariafanausa maridaqa. Doo maasa ani auqu ramaseeqa moomoo firaa afeeka ainaina auqi-mariafanausa maridaqa, doo anee minara irisee maasa faqa innaaruna ququsaki mara quqaqisaa.

<sup>23</sup> Misa miqi qifaqa qinee maaqi qimasee misa nifusaa qimannimiana. Qinee sia uqanna inniara irimariafanausa. Doo qini qifusaaqari fuaqa. Inni oosana eendaandirafa maridanoo. Doo fuaqa.

*Qaara maqara quandara ufa.*

*(Ruk 6:47-49)*

<sup>24</sup> Faiqi moo fannoo qini dookinaa ufa iriseenoo sanafaunaana anoona qinee qimaqaunamau kai andeeqasee fimarifa, mifa nana ainaina fooqaa fee maridanoo fee. Mifa amiqirafa irira fasiqa fooqaafa maridanoo. Nari maaqa atuna meemai ooniki mapukusee arusaifa maridanoo.

<sup>25</sup> Mi maqafa marifanoo aaku firaafa riri ifanoo nammari maaqa ameemaanai taatarunna mandi maree ooqufinoo ufai firaafa uqinoo sia mi maqana rapee inoo. Ooniki maaqa usakaqoonara sia rapeeinau. Faiqi moo fannoo qini ufa irimarifa mi maqana akoofara foora mariannoo.

<sup>26</sup> Faiqi moo fannoo maa ufana maa qinee qunnufana qini dookinaana iriseenoo minnisee marifa mifa nukudasaa maaqa usakeemari fasiqafara foora maridanoo.

<sup>27</sup> Mi maqafa marifanoo aaku firaafa riri ifanoo nammari aufinoo maaqa ameemaanai taatarunna mandinoo ooqufinoo ufai firaafa uqinoo maaqa arinoo rapeepaa inoo maqasaa pauta qifanoo maqa rakeemaseenoo aqufinoo. Qini ufa irisee minnisee reereeroondaana arakana afeena faiqi mariasa mi maqana akoofara foora marifaranoo.

*Yisufa nariara Anutufara foora qimannimi ufafa.*

<sup>28</sup> Yisufa mi ufausa qimaqoosa faiqi anaasee moomoosa irufanoo naaquqee marufaqa qiqau.

<sup>29</sup> Maa fasiqafa sia maasa uqannifiqee mari fasiqausara foora maridanoo. Maafa nariara Anutufara foora maridee qidanoo qimannimidanoo.

## 8

*Yisufa karoora arimaru fasiqana andeeqanau.*

*(Mak 1:40-45; Ruk 5:12-16)*

<sup>1</sup> Yisufa amuaqu namusaa faiqi anaasee ufa qimannimiseenoo qumuroofaqa faiqi anaasee moomoo anireeqa Yisuna faqa aanaqiana rumbarausa fimariqau.

<sup>2</sup> Fimarufanoo faiqi moo fannoo karoora arimarufa Yisuna oorinni ani mapamufufanoo Yisuna qimaminau, oo maasa rakisirafa ani afeeka amana maridanoo qinee minara iridaqa. Aneenna irirafa eedoo qimaseenana qini karoora rukaqisaa.

<sup>3</sup> Yisufa mi ufanara iriseenoo nari asauku minasaa munduseenoo asasamasee qinau. Eoo doo qiananoo amana qiqa irirafa eedoo qidanoo rukammaisaanau.

Miqi qimasoofanoo miqoo kai mina karoora taikanau.

<sup>4</sup> Mina karoora taikasoofanoo Yisufa qimaminau. Simai sia uqanna moodaa fasiqa qimamia. Findifinana munu amaana maqasaa aanaiqikirana aneenna afaaqa karoora arimaruna uqafiqainanoo aikuqumasainana Mooseefa ufa qimaqoomau ainaina mara maree amaana maqaki qaindasaa

sugarana tatufinana Anutuna amia. Faiqí anaasee qafamasee doo mina karoora taikeefoo qimasee sia aniara eerairiaqeera.

(Ooqai Mooseefa karoora narinausa sia maqusai aniaqee qimaqoofa. Andandakinai kai nuagee qimaqoofa. Faiqí moo fannoo narí karoora taikaseenoo amaana maqaki ani kikiqamafufanoo amaana maqasaa rakisirausa qafamasoofanoo doo maqusai fuannee qufanoo doo kaifaa maqusai finau. Kaqikaa ainaina amaana maqaki Anutunara dufi dufi qimasee nimiseenoo doo maqusai kaifaa finau.)

*Roomma maqannaa Saideena ainainira faiqi andeeqoo ufafa.*  
(Ruk 7:1-10)

<sup>5</sup> Yisufa miqooqari Kapeeranauma maqusai finau. Miqoo oonu marufanoo Roomma maqannaa sundia saideena moo fannoo Yisu finnai anireenoo dadaaqiranara irammirinau.

<sup>6</sup> Oo rakisirafa qini ainainira fasiqa maaqaki faiqagee aurimarifaqa, minara ani qimamidaqa. Mifa aiku asauku pipisaaqa usufifanoo kuqiaara foora inoo marifaqa. Aurirafa firaafa arimarifaqa, aupuree marifaqa. Amanee anee qini ainainira fasiqa idaaqamaqisaa.

<sup>7</sup> Miqi qimasoofanoo Yisufa qinau. Amana qinee minni oonureeqa idaaqammianauro.

<sup>8</sup> Roomma maqannaa sundia saideena fannoo Yisuna findifinoo mina maaqai franara iriseenoo qaoo qinau. Sia fua. Sia qini manda maaqaki anee keeqaanneera. Qinee aanaamuru fasiqa ooreeqarausa maridaqa. Anee qini uriqararafa qini maaqaki keeqafinaqa qisauruanoora.

<sup>9</sup> Qini uriqarara sundiaura moomoosa mariafaqa qinee misa nimeemaanai maridaqa misa ufamau fidaqa. Qinee akaqa sundiaura rakisirausa maridaqa. Qinee ufa kai moora fuannee qimarunanoo mifa doo fidanoo. Moora ufannai kai qimamimarunanoo mi ainainna auqaidanoo. Anee Yisufa faqa maqasaa ainaina faqa aurirana oosana oosana ainaina faqa uriqararafa marianaqa qimamidaqa. Minara anee miqooqari kai maridana ufannai kai aurirafa taikaannee qinanoo qini ainainira fasiqa aurirafa taikaannoo.

<sup>10</sup> Yisufa mi ufana iriseenoo tautufanoo aaquqoofanoo faiqí anaasee mina faqa rumberausa fifusa qimanniminu. Qini ufa iriaqa. Maa Roomma maqannaa fasiqafa firaqoo qini saqarikidanoo qinee Isaraee maqannaasaki qeeqa maqannaasaki maqusa maqusa nidaqa sia moo maaqira amiqira fasiqa paquriqa, aanaamuru maridanoommi.

<sup>11</sup> Kaifaa minara qianauro qini ufa iriaqa. Suani oosaindari faqa amuqundari faqa nianaindari faiqí anaasee moomoo aanaamuru aniree innaaruna ququsaki keeqafi Abarahaamana faqa Isakeena faqa Yakooboona faqa ooqumarifi Anutuna qoomaqa sakasee neefaranoo.

<sup>12</sup> Maa Isaraee maqannaasa innee Abarahaamana aiku asauku marinausa kaqi innaarunai keeqaanauree qimariasa maqee sia keeqeefaranoo Anutufa inni nifaqeeqeenoo madaanai asukunaki aqunnisaannoo. Miqoo innee niranaqainaqa firaqoo faaqa quqasee nifai sandurifaranoo.

<sup>13</sup> Miqi qimaseenoo Yisufa faiqí anaasee qimanniminoo quandafinoo sundia saideena qimaminu. Doo aneenna maaqai fua. Aneenna irirana qinisaa rusisaannanara doo ani ainainira faiqi andeeqafinoo. Doo anirandee amaaqa fua.

Miqi qimasoofanoo mi kamuqoo kai mi aurira fasiqafa moosaa mariufa doo findifinau.

*Yisufa faiqí anaasee moomoo andeeqannimaqoo ufafa.  
(Mak 1:29-34; Ruk 4:38-41)*

<sup>14</sup> Yisufa miqooqari Peetooroona maaqai finau. Oonuree qafoofanoo Peetooroona airaamaku anaasee aurimarinau. Afaaqa ididi marufanoo aurida faiqagee marufanoo.

<sup>15</sup> Yisufa mina qafeenoo asauku qumaranau. Asauku qumaroofanoo aurirafa taikanau. Taikafufanoo mi anaaseefa aaqee findifinoo narana aina Yisuna aminau.

<sup>16</sup> Mi eenonnai mi maqusaanaasa nári aurimarusa faqa fueenaiki-marusa moomoosa faqa nifiqee Yisufinnai minni quqee mariqau. Minni quqasoofanoo Yisufa ufannai fueena niqiqoofaqa quqasee fiqau. Aurusa Yisufa misa aurirana faqa taikannisanau.

<sup>17</sup> Taikaseenoo ooqeenaa tamummaqara fasiqa moo auqu Eesaia mina ufa anoona kambiqanau. Mifa ooqai Yisufa sia kambiqooqoo maaqi qimaseenoo Yisunara akara rinau.

Mifa maasa auriranara faqa maasa kudoosaaparana faqa mara aquannoo.

Maasa aurira ummaara narí kai mina uqeera qumaraannoo.

Miqi qimasee akara rinau.

*Yisuna faqa fifandinausara maa ufana qinau.  
(Ruk 9:57-62)*

<sup>18</sup> Moo faasaana nammari afainni marufaqa faiqí anaasee aiqama suqu maree Yisuna qafaanee qimasee ani marida qafee mariqau. Yisufa faiqí anaasee moomoo tatusee animarufanoo nindafeenoo narí faiqí namu qimanniminu. Doo uqeeraaqa doo inni saimbaqa kanuqaki keeqafi nammariki fitaqa maree muqafainai nianai fida innisaimbaqa kai mariaqa.

<sup>19</sup> Misa findifi uqeeree marufanoo faiqí moo fannoo Mooseena sandufa irimarufa Yisufuqoo anireenoo qimaminoo qinau. Oo qini karaambaiaqaa anee yatinai fee maqusa maqusa finaqa qinee faqa ani faqa fuanaura, sia minnisaanaura.

<sup>20</sup> Miqi qufanoo Yisufa narí maaqi qimasee qimaminau. Anee qiniara amiqira maaqaki faiqee mari fee qidanee qini faqa firaree qidanee. Kaasau fainiuqa oonaamarai faiqee mariasa maridaqa ufiniuqa aanaamuki faiqeemariasa maridaqa. Qinee faiqí nimaaku yai fee qeeqa qikiaqa rumasee fee faiqaanauree sia faiqara qoo marisa maridaqa. Doo qini faqa finnaree.

<sup>21</sup> Miqi qimasooofanoo Yisuna faiqí namuqiqari moo fannoo anireenoo qinau. Qinee ani faqa fuanaura kaqikaa qoo mariseeqa qini qikoofa kuqirarammi marifaqa. Mifa kuqufinaqa akundamasee ani faqa fuanaura. Amanee qinee miqianauree.

<sup>22</sup> Yisufa mina ufa iriseenoo maaqi qimasee qimaminau. Maqee uqanna qini faqa ania. Naaruara kuqiranaki fifandinausa misa kai nári niqoonnana akundeefaranoo.

*Yisufa ufai faqa nammari faqa qaoo qufanoo taikanau.  
(Mak 4:35-41; Ruk 8:22-25)*

<sup>23-24</sup> Yisufa miqi qimaseenoo kanuqaki akaramafufaqa mina faiqí namu mina aanaaqiana akaraqau. Akaramafufaqa kanuqaki nammari amuaqumau fimarufanoo Yisufa minaki afaaqa umooqukufanoo faifufanoo nammari qambaanai oonuroofanoo ufai firaafa uqinoo nammari amakaurinoo kanuqa aundurai keeqanau. Kanuqa teeqi taaqufaqa Yisuna faiqí namu mina qafamasee kanuqa namufaqa nammariki ukuqnaana



qimasee kaaqa rufiaqau. Yisufa sia minara irinau mana mana faiqaqee marinau.

<sup>25</sup> Mina faiqinamu rufiamaree Yisufinnai oonuree afauramasee faaqa ridaqa qimamiqau. Oo maasa karaambaiqa maasa nammari ukuqnaidaqa kuqirarammidaqa. Anee maasa qumaree qumbaqqinnisaa.

<sup>26</sup> Yisufa misa ufa iriseenoo qimanniminai. Oo kaaqa innee fifau rufiee mariasa. Sia qinisaa irirana rusimariasa mariafanoo. Miqi qimaseenoo findifufanoo ufai faqa nammariara faqa qaoo qufanoo nammari faqa ufai faqa kasoomafinoo dai qimafinai.

<sup>27</sup> Miqi qufaqa ufai faqa nammari faqa firaqqoo uqiufa kasoomafufaqa mina faiqinamu naaquqoofaqa qiqau. Maa fasiqafa naqira fee maridanoo fee. Ufai faqa nammari faqa mina ufa irisee eedoo qidaqa.

*Faiqi aunduraindaraa afaannauqa niqiqoofaqa kuarauqa naundurai keeqaqau.*

*(Mak 5:1-20; Ruk 8:26-39)*

<sup>28</sup> Miqooqari nammari dinnafainai nianai Kadareenee maqa maaqa munu kanuqa fannoo raquraminai. Maqasaa aqufufaqa mi maqusanaindari faiqi qaaraqanda aniqau. Faafasaaqa fueena miqanda naundurai maruqanda, faiqi madikee marunnai maruqanda, faiqi anaasee aiqama miqandara rufiee maruqanda mariqau. Faiqi narimaruqanda mariqau. Faiqi anaasee miqanda maruqoo sia fimarusa, kaaqa miqandara rufiee mariqau.

<sup>29</sup> Miqanda Yisufunnai aniroofanoo naundurakiqari afaannauqa fannoo maaqi qimasee faaqa rumasee Yisuna qimamiqau. Anee Anutuna amaaku marianafa anee nanaree anidanee anee nanaree maasa soodaaidanee anee nanaree kaqiqoo kasaaqai anireenane maasa idaki aquqiseennaree.

<sup>30-31</sup> Kaqikaaqoo nianai akoosaqa kuarauqa eemani naida moomoosa misaqa naidaqa mariqau. Afaannauqa faiqi naundurakiqari kuarauqara Yisuna qimamiqau. Anee maasa diqiqainaqa amanee kuarauqaki keeqaanauree.

<sup>32</sup> Miqi qufanoo Yisufa qinoo. Eeoo amana, doo innee misaki keeqafuaqa. Yisufa niqiqoona iriseeqa aiqamausa mi fasiqaqanda naunduraindari rafudamakufaqa doo kuarauqaki keeqafiqau. Keeqafufaqa kuarauqaindi munari minari ufaqa ameemai sandee ooqu fiqa nammari farumaki bururu qufaqa aqufufaqa aiqama kuqu taikaqau.

<sup>33</sup> Kuarasaa rakisimaru fasiqausa mina qafamaseeqa naaquqoofaqa quqasee sandamaqaraasiqa maqusai kaimbiqau. Maqusai anireeqa Yisunara faqa afaanna naundurai keeqeemaru faiqi qandara faqa kuarauqara faqa faiqi anaasee aiqama qimannimiqau.

<sup>34</sup> Misa iriseeqa mi maqusaanaasa faiqi anaasee aiqama tatufaqa nammari Yisufuqoo ooqureeqa Yisuna qafamaseeqa qiqau. Doo maasa maqa maaqaki sia ania. Doo see moosaa fua. Maasa aniara rufiidaqa.

## 9

*Yisufa aiku asauku pipisaaqa usirana andeeqa aisanau.*

*(Mak 2:1-12; Ruk 5:17-26)*

<sup>1</sup> Miqi qufanoo Yisufa nari faiqi namufaqa sipaki kafa keeqafufanoo nammariki fifufanoo nari maqusai Kapeeranauma nammari amuaqumau oonuranau.

<sup>2</sup> Oonuroofaqa faiqi mi maqusanaindari moo auruna aiku asauku pipisaaqa usufufanoo maruna aindusu mareeqa Yisufuqoo maree aniqau. Misa irirafa Yisunaki marunara Yisufa mina qafamaseenoo quandaqinoo

aurira faiqi qimaminau. Sia rufiaqa rufiaqa ia. Afaaqa quqaa. Doo qinee ani mandainaina numoo minnaseeqa.

<sup>3</sup> Mooseena sandufa irimarusa miqoo marusa mi ufana iriseeqa maaqi qimasee narí qimami narí qimami qiqau. Maafa nariara Anutusa maridee qidanoo. Akasaa. Maasa faiqi firaasa faiqi miqi qiasa kuqa narí marunasa maridaqa.

<sup>4</sup> Yisufa misa ufa iriseenoo quandafinoo maaqi qimasee qimanniminau. Naqi fee qifaqee mi manda irirana inneeqa nitikuraki maraqa nidee.

<sup>5</sup> Innee qiniara maa fasiqafa sia numoo taikarana amana fee qidee. Qinee moo firaa afeekainaina inni nifusaa iananoo anoona kambiqainaqa qafamaseeqa qiniara kuqaa faiqi numoo taikarana amanammifoo qifaranoo sia kambiqainaqa unnammifoo qiaqa.

<sup>6</sup> Anutufa kuqaa uqanna numoo taikarana qini qiminoo. Miqi qimaseenoo quandafinoo pipisaqa qusirana qimaminoo qinau. Aneenna qaindasaqari findifinana aneenna qaari qamunna raqandaammamaareenana doo akumaree amaaqa fua.

<sup>7</sup> Miqi qufanoo mi aurira fasiqafa findimaqee narí amaaqai doo finau.

<sup>8</sup> Faiqi anaasee misa mina qafamaseeqa niminaandi raqeeqa nisausi kambiqoofaqa nimudaani qumooqukamambufaqa miqoo Anutufa narí afeeka Yisuna amunara minara oonumafi irisee amooqidaqa asasiqau.

*Mataioona aarofanoo Yisuna faqa finau.*

*(Mak 2:13-17; Ruk 5:27-32)*

<sup>9</sup> Yisufa miqooqari moosaa fimarufanoo faiqi moo fannoo mina auqu Mataioo narí oopisaki marufanoo Yisufa qafanau. Mi oopisana takisa aqimaru oopisanaki marinau. Takisa maree maru fasiqausa ummuari marusa misa moomoo maraseeqa akaqana naríara quqasee dinni ati kaamanna amimariqau. Minara faiqi anaasee kaaqa nikooqee marinau. Mataioofa mi munnimma ainainna maree marufa marinau. Yisufa Mataioona qafeenoo aaramaseenoo qinau. Doo qini faqa ania. Mataioofa Yisuna ufa iriseenoo findimeeqeenoo mina faqa finau.

<sup>10</sup> Yisufa marikinoo Mataioona maaqai mina faqa narana narara finau. Yisufa narí faiqi namufaqa mina maaqaki ooqumarifi narana neemarufaqa faiqi maqusa maqusa munnimma takisa maraqanusa faqa oosana oosana mandainaina maraqanusauqa faqa Mataioona faqa ani ooqumarifufaqa narana naqau.

<sup>11</sup> Ooqumarifufaqa narana nee marufanoo Farisai amaana ufa qimarusaqa anirama qafamasee Yisuna faiqi namu qumee naaramasee qimannimiqau. Naqi fee qifanoo fee inni rakisirafa manda fasiquaqa faqa ummuariqanuasa faqa naidanoo fee.

<sup>12</sup> Yisufa misa ufa iriseenoo quandafinoo maaqi qimaseenoo narí qimanniminau. Sia amiqiraua tutaqa finnai fidaqa aurimariasa kai tutaqa finnai fidaqa. Maa namusa auruasara foora maridaqa qinee tutaqausara foora maridaqa.

<sup>13</sup> Innee tamummaqara fasiqa akara anoonara oonu randasee qafaaqa. Mifa maaqi qimasee akara rinau. Qinee Anutusa sia tatufira aandau aina fee oosana oosana ainaina fee qimiranara dididanoo, faiqi anaasee nariara nariara nimuqusifaqa nifauee mariana minauqara qini dididanoo, Anutufa miqi qimaqoofaqa qinee Yisusa mimau fidaqa maaqi qidaqa. Sia qinee andeeqee mariasa naarararee qimasee qumu maridaqa innee manda fasiqa anaasee fee qimasee nifaqee mariasa misa Anutufinnai ubeekaaqera naarararee qimasee qumuafanusa maridaqa.

*Naarara maridaqa innaaruqira oosanara irammiriqau.  
(Mak 2:18-22; Ruk 5:33-39)*

14-15 Mi kamusaqa Yoohaneefa nammari nimimaruna faiqinamu Yisufinnai anireeqa irammiriqa qiqau. Maasa Yoohaneefa nammari nimimarina faiqi namufaqa Farisai amaana ufa irimariasa misa faiqi namufaqa nári narana minniseeqa naararee marifaqa Anutunara innaaru qidaqa. Ani faiqi namu naqi fee ifaqee sia miqidee kaqi narana naidee qufanoo Yisufa iriseenoo qimanniminau. Amundara fasiqa faqa aqoondi namufaqa maqusai ani marinaqa naqimasee naararee marinee kaqi marifaree, sia miqifaranoo اساسammasee narana sugasee neefaranoo. Minara qini faiqi namu qini faqa amundara fasiqara fooqaasa maridaqa اساسammasee qini faqa naidaqa maridaqa. Kaqikaa qoo mi anaaseena afaaqi qini rumbamaree munu darusaifaqa mikari kuqaa nimuqusa mandaikinaqa naararee marinaqa innaaru qifaranoo. Yisufa Yoohaneena faiqi namu kaqi qimannimidanoo qinau.

16 Ooqeenaa qamunna anaqinoo marina fuka qamunna ati qumaree sia nauraa qamunnasaa akunirafa maridanoo. Fuka qamunna ati fannoo nauraa qamunna doo firaaqoo anaqiannoo.

(Yisufa maqasaa maru aukuaana misa uainna nammari tatisee aandau apatannai auqira taquki adiasee kisaagasaa maaqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammarifa marinau. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

17 Yafee faiqi moo fannoo nauraa tunda taqu maraseenoo fee fuka nammari adiaannoo fee. Sia miqiannoo. Ruqia finanoo aiqama nammari qumiqaraandora. Fuka taqu andasee fuka nammari minaki adiasainanoo mina amana mariannoo.

(Yisufa narí fuka ufa fuka taquara faqa qamunnara faqa mina kikiqa usinau. Farisai amaana ufa faqa Yoohaneena amaana ufa faqa amana maridanoo ooreeqanoo maridanoo. Qini fuka ufa uriqararafa maridanoo. Misaindi sia amana qinindi fabaqa irafa mariannoo.)

*Yuda maqannaa uriqararana araamuna andeeqaisanau. Kisaaqandaika imaru anaasee Yisuna qamunna ati auqanau.*

*(Mak 5:21-43; Ruk 8:40-56)*

18 Yisufa Yoohaneena faiqi namu ufa qimannimi marufanoo amaana maqasaa rakisirafa moo fannoo Yisufinnai anireenoo oorindari mapamufufanoo Yisuna qimaminau. Doo qini qiraamuna maqee uqanna doo kuqinoo. Anee anireenana aneenna asauku minasaa mundusainanoo mifa findifuani.

19 Miqi qufanoo Yisufa findifinoo narí faiqi namufaqa mina faqa finau.

20 Fimarufanoo anaasee moo fannoo aanaaqianaindari oonureenoo mina qamunna ati ireeda auqanau. Mi anaaseefa kisaaqandaikufa qisaukuqara taikasee qikunni ooqu qaaraqanda aukuaana marasoofa marinau.

21 Mi anaaseefa narí kai qimmirinau. Qinee oonuree mina qamunna atikai umee auqamasanaanoo qini fidika taikaannoo. Miqi qimasoofa maridanoo oonuree mina aanaaqianaindari faiqi anaaseekiaqa qumee oonuree mina qamunna ati kai ireeda auqanau.

22 Mina qamunna auqamasoofanoo Yisufa quandafinoo qafamaseenoo qinau. Qini qiraamuna sia rufia afaqa quqasee maria anee aneenna

irirana qinisaa rusiranannai kai ani aurirafa doo taikkeenoo, mifa kai. Miqi qimasoofanoo miqoo kai mi anaaseena aurirafa taikanau.

<sup>23</sup> Taikafufanoo Yisufa miqooqari fifufanoo amaana maqasaa rakisirana maaqa marunnai mina araamuna kuqinoo maru maqanaki oonureenoo faiqí anaasee moomoosa tutuqidaga ikifaafau qidaqa ufireena aina fuaqaidaqa iki raqeemarufanoo Yisufa oonu nindafanau.

<sup>24</sup> Oonurama nindafeenoo qimanniminau. Doo raudamaki fuaqa, aiqama fifainiaqa maa manaaqafa sia kuqinoofau faiqaqee idanoo. Miqi qimaseenoo quandara ufa qimannimisoofaqa misa quandafiqa naanaidara uteeti qidaqa qiqau. Unna qia. Doo kuqinoo maridanoo.

<sup>25</sup> Yisufa misa aiqama niqiqamaseenoo mina maaqaki keeqafinoo mi manaaqana asauku qumarooofanoo doo findifinau.

<sup>26</sup> Miqooqari aiqama maqusa maqusa fiqú fiqú iqa marusa Yisufa mi manaaqana findifumasoo ufafa aiqamai daraanufaqa iriqau.

*Nifu qimbaraqanda andeeqannisanau.*

<sup>27</sup> Mi manaaqafa findifufanoo Yisufa moosaa fimarufanoo faiqí qaaraqanda nifu dimbaraqanda aanaaqiana fidaqa faaqariqa fida qiqau. Oo Dafidina ati anee maaqanda qiqafainanoo ani amuqusinana maaqanda dadaaqia.

<sup>28</sup> Yisufa maaqaki keeqafufaqa mi fasiqaqanda mina aanaaqiana keeqaqau. Keeqafufanoo Yisufa irammirino qinau. Inneeqara qini afeekara nanee fee qidee. Inniqara nifu andeeqaranara qiniara amaneefee fee qimasee anidee, sia amanaikiannoo fee qidee qufaqa miqanda qiqau. Eeo maaqanda aniara amanafee qidaqa.

<sup>29</sup> Yisufa mi ufana iriseenoo qimanniminau. Inneeqara qiniara amanafee qianara miqi qianara sia nipatiani andeeqannisaanau.

<sup>30</sup> Miqi qufanoo mikari kai miqanda nifu andeeqannisanau. Miqanda nifu maqasoofanoo Yisufa maaqi qimasee qimanniminau. Nimambaina qimaseenoo qimanniminau. Doo inneeqara sia uqanna faiqí anaasee akaqausa qimannimiaqa. Maa ufana kukeeqammaasaqa.

<sup>31</sup> Miqanda mi ufana iriseeqa minufa rukiasee maqusai oonureeqara faiqí anaasee aiqama atinai qimannimiqaniqau.

*Ufa ititarana ufa rakeemma aisanau.*

<sup>32</sup> Miqanda fufanoo mi maqusanaasa moo fasiqa afiqee aniqau. Ufa sia qimaruna aanna apeequnirana afaanna faqa mina aundurai maruna afiqee aniqau.

<sup>33</sup> Minisoofanoo Yisufa mina aundurakinaa afaanna aqiqamasoofanoo afaanna fannoo raudamakufanoo mi fasiqafa ufa andeeqasee qinau. Miqi-ufaqa faiqí anaasee mina qafamasee nimudaani qumooqukammafinoo nifaaqa sia qumarooofaqa mina qafeeqa qiqau. Isaraee maqanna sia ooqai maa ainainafa maruna, maqee kai.

<sup>34</sup> Miqi qufaqa Farisai amaana ufa irimarusa minara kaukaata qimaseeqa qiqau. Yisufa afaannauqa firaanannai faiqí naundurakinaa afaannauqa niqiqaidanoo.

*Maqusa maqusa nidanoo Anutuna ququsara qimanniminau.*

<sup>35</sup> Miqooqari Yisufa maqusa maqusa kaqikaa maqusa firaa maqusa amaana ufa innaaruna ququsaki fimaria ufana qimanniminooninai. Kaqikaa aurirana faqa firaa aurirana faqa andeeqannisanooninai.

<sup>36</sup> Yisufa faiqí anaasee nindafamaseenoo firaqoo amuqusufanoo qinau. Boo faiqí anaasee sia rakisirafa marisa, kaqi fifau tia maridaqa. Sipsipauqa

fooqaasa rakisirana siaisa maa fasiqa anaaseesa maridaqa. Kaasau fainiara foora marida, aukuaana aukuaana sia amiqimmasee marida, mi manda kaasau faininara rufiaqa rufiaqa kaimmidaqa, aukuaana aukuaana miqi kaimmida marida, dadaaqirana siaisa rakisirana siaisa maridaqa.

<sup>37</sup> Yisufa mi ufana qimaseenoo quandafinoo maaqi qimaseenoo ufa qinau. Doo afuqakinaa narana tatafinoo rairainoo maridanoo. Dadaaqi aiqira fasiqa sia amanaiki mariafaqa.

<sup>38</sup> Minara innee suana akoofinnai innaaru qiaqa. Innaaru qifanoo Anut-ufa aiqifandinausa niminaqa dadaaqiqa suana aiquaqeera. Dadaaqifaqa innaarunai ufa qimannimifaqa innaaruna ququsaki fuaqeera suana kikiqa usuqoofanoo maridanoo.

## 10

*Qisaukuqara taikasee qiku qaaraqanda marasee naaramammareem-  
binau.*

*(Mak 3:13-19; Ruk 6:12-16)*

<sup>1</sup> Yisufa nari faiqinamu qisaukuqara taikasee qikunni ooqu qaaraqanda naaramma quqaseenoo Anutuna afeeka nimufaqa faiqi anaasee naunduraki maru afaannausa faqa misa aurirana oosana oosana faqa teeroougee marusa faqa aiqama aiqaraaniffee qimasee afeeka niminau.

<sup>2</sup> Mina faiqi namu qisaukuqara taikasee qikunni qaaraqanda ooqu marasee misa nuqu maaqimmasee mariqau. Indaaru Simoona mina auqu moo Peetooroofa faqa mina akaqa Andurufa faqa moo fasiqa Yameesafa faqa mina akaqa Yoohaneefa faqa miqanda nikoofa Seebeedifa marinau.

<sup>3-4</sup> Moo fasiqa Firipifa faqa moo fasiqa Paatooroomaiufa faqa, moo fasiqa Toomasifa faqa moo fasiqa Mataioofa faqa mifa takisa maree marufa faqa moo fasiqa Yameesana amarafa mifa Arifaiusana amaaku faqa moo fasiqa Tadiusafa faqa, moo fasiqa Simoonafa sia indaaruqaa Simoonafa mina amarafa (mifa nari Isaraee maqanna nari kaamanaikiaqeera qimaru fasiqafa) mifa faqa moo fasiqa Yudasifa faqa, mifa Keerioota maqusaindaraafa mifa kai Yisunara qumee queeqaaninafa maridanoo.

*Yisufa niqiqoofaqa maqusa maqusa qimannimiqa fiqau.*

*(Mak 6:7-13; Ruk 9:1-6)*

<sup>5</sup> Maa namusa qisaukuqara taikasee qikunni ooqu qaaraqanda marasee Yisufa Isaraee maqa maaqaki minakina niqiqeenoo qimanniminu. Anaa-muru maqusai sia fuaqa. Samaria maqusai faqa sia fuaqa.

<sup>6</sup> Isaraee maqannaaki kai fuaqa. Misa sipsipara foora fifau faafau qiqanuasa misaki kai fuaqa.

<sup>7</sup> Innee fidaqa maaqi qimasee qimannimiaqa. Innaarunai ququsa fannoo adeediranoo maridanoo.

<sup>8</sup> Miqi qimasee qimannimiseeqa misa aurirana taikannisaqa misa kuqir-  
rausa findifumannisaqa karoora faqaasa rukannisaqa afaanna naun-  
duraki marisa afaqannisaqa. Sia innee feefaurummasee maraasa. Kaqi  
maraasa. Doo miqi kai iqa kaqi nimiaqa.

<sup>9</sup> Munnimma sia aakauqaki rua. Kaqi fua.

<sup>10</sup> Sia uqa tafu maree fua. Sia qaara siuta maraqa. Sia niku aanaamu maraqa. Sia saunu maraqa. Ainainira faiqiuqa ainainidaqa minakinaa narana marasee naidaqa. Minara innee ainaini mariafanoo minakinaanaqa. Sia narana ainaina maree innee faqa fuaqa. Kaqi samu fuaqa.

11 Innee moo maqusai oonureeqa irammiriaqa yafasiqa fee amana maridanoo maasa mina faqa marianauree qiaqa. Misa qimannimifaqa mi maqusanaki marinna kamuqoo mi fasiqana faqa kai mariaqa.

12 Mi fasiqana maqaki keeqafinana qimamia. Anutuna amiqi amiqira asoarafa inni faqa mariani.

13 Mi maqanakinaasa amiqi amiqifana ani ufa sainanoo misa faqa mariani. Sia amiqi amiqifana aneenna afaaqooqa qira ufa oonurandee maree ania.

14 Yamaqusanai fee yamaqannaaki fee sia inni ufa irisee sia inni amiqi amiqifaqa innee mi maqusanakiqari raudamaki fiqa kookooma afaqa qumaree ninaamarasee fuaqa.

15 Qinee mi maqusanaasara anoona ufa qimannimidaqa. Numoo aukuana aninaqa inni ufa sia irifandinna maqusanaasa Anutufa naridanoo sia nifauaannoo firaqoo naruannoo. Soodooma maqusa faqa Koomooro maqusa faqa misa naridanoo kaqikaaqoo nifauaannoo narirafa ooreeqanoo mariannoo.

*Yisuna ufasaara narirana faqa rumberana faqa kambiqaaani fee ufa.  
(Mak 13:9-13; Ruk 12:12-17)*

16 Iriaqa, qinee inni niqigaanaqa innee sipsipara foora kaasau faini qambaana inni niqiqaidaqa. Faiqi oodaa mariafanoo faiqi moomoosa inni narusee naaqaammidammia. Minara innee sakani maasoo aanna reeqa reendeenamasee nuaqa. Nakipurunara foora kaqi muquriqa marida, reendeenammidata mariaqa.

17 Innee qini ufa maraqa nidaqa faiqiara rufiaqa. Misa qini ufasaara innikinaana akaqausa mara maree Kansooro marinnannai munu quqasee inniara manda fasiqa fee qimaseenoo kootamannimaqeefera. Akaqausa amaana maqaki inniara Anutuna ufa rukiee mariafaqee qimasee sandasamu moomoo kari inni nifaaqa ateekeefaranoo.

18 Misa inni akaqausa kiapafinnai maree fifaranoo, mandaikammida ufa rukiee marifaqee unna qimasee nifiqee kiapafinnai fifaranoo, karaambaiqa marinnai kootara inni maree fifaranoo. Qini duqusaara miqifaranoo. Misa oosana oosana mandainaina qini ufa taikaanifeera miqimma nimaqeeferanoo. Anutufa qumee misa faqa aanaamuru mariasa faqa qiniara iriaqeeera miqimannimaqaannoo.

19 Misa inni rumbamaree nári mariannai nifiqee fifaqa naqi fee qianau naqi fee qianau sia qiaqa. Mikari kai qini qikoona maraquna fannoo qimannimina ufana mi ufana kai qimannimiaqa.

20 Nana ufa fee innee miqoo qifaree sia innindi inni nikoona maraquna fannoo innikiqari ufa qiannoo.

21 Misa inniara qinisaa atoaranara fidiagaammifaranoo. Nári nikaqaafasaauqa kuquaqeeera narí uqeeqee narí uqeeqee ifaranoo. Nári qisakoosa faqa narí uqeeqee narí uqeeqee ifaranoo. Faiqiuqaindi quandasee nári ninausa nikausa kuquaqeeera uqeeqeeferanoo.

22 Qini duquara aiqamausa inni fidiagaama nimaqaannoo. Yafa yafee kaqi maraqa fifi iqa taikara aukuana paqurinausa, qinee mikari misa qumara asumu mariranaki quqaanaura.

23 Misa inni moo maqusaki narifaqa innee moo maqusai sandeeqa qiniara miqoo qimannimiaqa. Qinee anoona ufa qimannimidaqa. Innee Isaraee maqusa maqusa aiqama qiniara qimannimimarifaqa sia aiqama qimannimi taikainnaqoo qinee faiqi nimaaku kaifaa innaarunaindari qumuanaura.

<sup>24</sup> Faiqí moo fannoo sia narí uqannifiqeemaria fasiqana amana maridanoo sia mina uriqararafa maridanoo ureeqarafa maridanoo. Ainainira fasiqa faqa sia mina rakisirana uriqaranoo maridanoo ureeqanoo maridanoo.

<sup>25</sup> Faiqí qinee uriqararausa ufa qimannimi marunausa daruseeqa miqi kaimmiqa qini faiqi namu qini ureeqarausa inni narifaranoo. Faiqí misa rakisirana arusee mina faiqi namufaqa miqi kai iqa narifara. Misa nikoona afaannee qimasee faiqi namuara faqa miqi kai iqa afaannee qifaranoo. Misa mi manda ainainna oosana oosana qini qimifara, miqi kai iqa inni faqa nimifaranoo.

*Sia nifaaqa arimariasara rufiaaqee ufafa.*

*(Ruk 12:2-7)*

<sup>26</sup> Minara sia misara rufiaaqa. Aiqaama ainaina maqee rafaqaafinoo marifa kasooqaqee Anutufa innaarunai aiqama kooroo iannoo. Aiqaama kukeeqara ainaina faqa kasooqaqee Anutufa aiqamausa nifusaa kooroo iannoo. Minara sia maqee faiqí anaasee inniara mandufa qifandinnanara rufiaaqa.

<sup>27</sup> Qinee asukunai kukeeqafi qimannimunnana mi ufana faasaana paasoosamasee qimannimiqa. Nupinupi qimasee qimannimunnana findi fiqa mi ufana fifi qimasee firaagoo qimannimiqa. Sia faiqiara rufiaaqa.

<sup>28</sup> Faiqí nipata kuqa narifandinausa sia misara rufiaaqa. Misa inni naunduraindaraa nimana sia amana kuqa narifaranoo. Moo fannoo Anutufa inni nipata faqa nimana faqa amana idaki kuqa narirana amanaiki marifa minara kai rufiaaqa. Faiqí nipata kai narifandinnanara sia rufiaaqa.

<sup>29</sup> Manda ufini ririmma moomoo maridanoo. Kaqikaa ainaina fifau ainaina maridanoo. Mina feefauru sia maridanoo. Mi kaqikaa ufinifa sia fifaufau maqasaa aqufidanoofau, innaarunai nikoofa irimarifanoo maqasaa aqufidanoo.

<sup>30</sup> Innee sia fifau rufiaaqa. Inni nikiqa asaasi ririmma Anutufa nisaana rumaqaisa mariafanoo.

<sup>31</sup> Minara sia rufiaaqa. Inni feefauru uriqaranoo maridanoo. Dapi ufini feefauru sia maridanoo.

*Yisunara faiqí nifusaa kooroo imariasara qinau.*

*(Ruk 12:8-9)*

<sup>32</sup> Yafa yafee qini Yisusara faiqí nifusaa sia rufieenoo qinee Yisunaindi fee qinafa qinee minara innaarunnai qikoona afusaa qinindi fee qianaaura.

<sup>33</sup> Yafa yafee qiniara faiqí anaasee nifusaa asaurusee sia qinee Yisunaindi fee qimasee kukeeqainafa qinee minara faqa innaarunnai qikoona afusaa kukeeqamma amaqaanaura.

*Asooarafa sia mariannoo aanoo irafa mariannoo.*

*(Ruk 12:51-53; 14:26-27)*

<sup>34</sup> Innee qiniara tinoorirana asooarana mara maree maasa maqasaa fasiqa anaasee qimiannoo fee qida fee. Qinee sia tinoorirana asooararau qumidau duru feefara qumidaqa.

<sup>35</sup> Faiqi namu nári nikoona ameesa uqiranara qumidaqa. Fuka anaaseeuqa nári ninoonara ameesa uqiranara qumidaqa. Fuka anaaseeuqa nári ninaakuquara nimeesa uqiranara qumidaqa.

<sup>36</sup> Narí faqa moodaa maqaki mariasa narí mi fasiqana firaamuuqa marifaranoo.

<sup>37</sup> Yafa yafee mina anoona akoonara firaagoo aididanoo fee qiniara ooreeqara fee qidanoo fee, mifa sia qini qimanasaa, sia amana qini faqa

fifaranoo. Yafa yafee mina amaaku faqa araamuna faqa firaaoqoo aididanoo fee qiniara ooreeqara fee, mifa faqa sia qini qimanasaa sia amana qini faqa fifaranoo.

<sup>38</sup> Kasooqaqee misa aunirira saqarisaa qini darifaranoo. Yafee qini ufasaara qini dariranaki paasosamandee fuaninafa, mifa qini qimanasaa mariannoo, qini faqa fuannoo. Faiqí anaasee moo fannoo qinee kuquan-nanaki rufiasee sia finafa, mifa sia qini qimanasaa mariannoo sia qini faqa fuannoo.

<sup>39</sup> Faiqí anaasee moo fannoo narí kaqí mariranara tatamaqamandeenoo rakisi qumarainafa mi marirafa kai kukupamaki aqufuannoo. Faiqí anaasee moo fannoo qiniara iriseenoo narí maqee marirana aquaninafa narí maqee marirana maraannoo.

*Niqoonausara nimuqusimariana akiaqara Anutufa quqannimaqaannoo.  
(Mak 9:41)*

<sup>40</sup> Faiqí anaasee yafee moo fannoo inni dadaaqinafa mifa qini faqa qiqoondikidanoo. Qini dadaaqinafa qini qikoona qini diqiqoona mina faqa aqoondikidanoo.

<sup>41</sup> Faiqí anaasee yafee moo amaana ufa nimimarinna fasiqanara oo Anu-tuna ufa qimannimimari fee qimaseenoo dadaaqinafa Anutufa amaana ufa nimimarina akiaqara innaarunai feefauru amiannoo. Faiqí anaasee yafee moo fannoo andeeqara fasiqara oo andeeqara fasiqa mari fee qimasee dadaaqinafa Anutufa minara andeeqara fasiqa mina feefauru innaarunai amaqaannoo.

<sup>42</sup> Faiqí anaasee yafee moo fannoo maa faiqí anaqisa asoosara nammari neemariana niminaqa qinisaa atooemariasaa minara irisee amiqi amiqim-masee niminaqa, kuqaa anoona ufa qimannimidaqa, mifa sia uqanna mina akiaqara sia maraannoo. Anutufa amiannoo.

## 11

*Yoohaneefa nammari nimimarufa nári faiqi namu Yisufinnai niqiqanau.  
(Ruk 7:18-35)*

<sup>1</sup> Yisufa mina faiqi namu qisaukuqara taikasee qikunni ooqu qaaraqanda marasee mi ufana oosana oosana qimannimiseenoo miqooqari misa maqusa maqusa nidanoo qimannimimarinau.

<sup>2</sup> Yoohaneefa nammari nimimarufa karabusaki maridanoo asauku mundirana oosana oosana irinai. Iriseenoo amiqimmasee irianau qimaseenoo narí faiqi namu Yisufinnai niqiqanau.

<sup>3</sup> Yoohaneena faiqi namu Yisufa maruqoo oonuree irammiriqa qiqau. Anee ooqai tamummaqara fasiqa kambiqaanoo fee qimaqoofa anee mifee maridane. Anee Anutuna asauku mundira fee maridane. Maasa mooree afeesianauree.

<sup>4</sup> Qimasoofanoo Yisufa qinai. Maaqoo innee animariaqoo ainaina auqaunnaara faqa ufa qimannimunnanaara faqa minara kai oonuree Yoohaneena qimamifanoo mifa qiniara iriannoo.

<sup>5</sup> Nifu dimbarausa maqannisaidaga, niku eendirausa amiqimman-nisaunaqa nidaqa. Karoora narimariasaa rukannisaidaga. Naaqoo auni-rausa ufa iridaqa. Kuqimariasaa findifumannisaidaga. Kudi fasiqauqa qinee amiqira fuka ufa innaarunai ququsa ufa misa qimannimidaqa. Mi ufana oonuree Yoohaneena qimamifanoo mifa qiniara iriannoo.

<sup>6</sup> Moo fannoo sia qiniara qaara irirana irimarifa mifa asasimarifa marian-noo. Qinisaa mikimmaki marifa sia asasiannoo. Mi ufana faqa Yoohaneena qimamiaqa.



<sup>7</sup> Yoohaneena faiqi namu fifufanoo Yisufa faiqí anaasee Yoohaneenara qimannimainau. Fifau maqa maaqa kaasau aadana maqa maaqa innee Yoohaneena qafarara fiqa innee nana qafararee fiqee iqau. Fifau andanda kasinaree fiqee iqau. Sia uqanna minara fiqau.

<sup>8</sup> Innee nana qafararee andandai fiqee iqau. Faiqí amiqira qamunna afisimarina mina qafararee fee qimasee fiqee iqau. Oo sia uqanna minara fiqau. Miqirausa sia kaasau maqa maaqaki maridaqa karaambaiqa maaqaki amiqiranaki maridaqa.

<sup>9</sup> Nana qafararee innee fiqee iqau. Anutuna tamummaqara fasiqa qafararee fee qimasee fiqee iqau. Kuqaa Yoohaneefa Anutuna tamummaqara fasiqafa marufa ooqu qafaqau. Sia misa kai, Yoohaneefa tamummaqarausa uriqaramasee tamummaqarafa marifaqa innee qafaafanoo.

<sup>10</sup> Ooqeenaa akara minara kai qidanoo. Mi akaranaki Anutufa maaqi qimasee Yoohaneenara qidanoo.

Iriaqa. Qinee qini ufa maree marinnana ani Anutuna asauku mundirana ani oorinni aqiqaanauranoo mifa ani aana ani oorinni afisumaree finana anee mi mau fuanneera.

<sup>11</sup> Akarakinaa ufa miqi qinoo marinara qinee Yisusa anoona ufa qimannimidaqa. Anaasee faiqiuqaindi moomoo maridaqa. Yaanaasee fee Yoohaneena uriqararana maqanoofee inau. Sia moo fannoo mina uriqararana maqanau. Innaaruna ququsa mariasa ureeqarausa misa kai Yoohaneena uriqararausa maridaqa.

<sup>12</sup> Qinee anoona ufa qimannimidaqa. Yoohaneefa nammari nimimari aukuanaindari faiqí anaasee rakiranannoo maqusa maree mariandee miqi kaimasee nimudaanai qimasee innaaruna ququsaki keeqarara qimasee innaaruna ququsa maree mariasa maridaqa.

<sup>13</sup> Anutuna ooqeenaa tamummaqeemaru fasiqausa faqa Mooseena sandufa faqa misa ooqai oosana arasee kasooqagee kambiqaaninnanara tamummaqasee fifufanoo Yoohaneenasaa taikaqau.

<sup>14</sup> Misa Eeriaafa anirarammifoo qufanoo doo Yoohaneefa mifa ani maridanoo, innee mi ufanara nidinaqee irifaree sia fee nidinaqee sia irifara.

<sup>15</sup> Aaqoo fainafa iriaqa, sia aaqoo fainafa sia iriaqa.

<sup>16</sup> Maqee marunausa nanara foora maridaqee fee qianauree. Misa maqusaki faiqi uqaindiara foora maridaqa. Misa moosara maaqi qimasee naraqí naraqí qidaqa.

<sup>17</sup> Maasa ukeena fuagaunaga innee faqa sia dadaaqi idi ree mariafanoo. Kaifaa maasa quandafiqá iki anai fakiki raunaqa sia mina faqa dadaaqi mariafanoo. Innee dapikammi mariafanoo.

<sup>18</sup> Misa miqi qimasee miqi qiafaqa qinee Yisusa minara maaqi qidaqa. Maa maqee marunausaki miqimminoo maridanoo. Yoohaneefa anireenoo uainna nammari faqa narana uqanna faqa sia nanau, dapi narana kai noofaga innee minara afaanna keeqafifanoo miqidanoommifoo qiqau.

<sup>19</sup> Qinee faiqí nimaaku anireeqa narana faqa nammari faqa nau-naqa innee qiniara manda fasiqa marida, kaaqa neemarifa, kaaqa nammari neemarifa, kaaqa ummuarimaria takisa munnimma mareemariasa niqiqeemariasa aqoondiki marifa, mandoosana mareemariasa aqoondiki marifa. Innee qiniara miqi qimariafaqa qinee minara maaqi qidaqa. Yoohaneefa nammari nimimarifa faqa qinee faqa maaqanda Anutuna iriramau andeeqasee fimarunanoo mina anoona kooroidanoo. Innee maqee mariasakiqari sia inni ufa fannoo anoonaidanoo, qaaraikammida miqimariafanoo.

*Qaara maqusanaasa sia ufa irimarunara niqinau.*  
(Ruk 10:13-15)

<sup>20</sup> Mifa miqi qimaseenoo mi maqusa maqusana misaki nimarufaqa misakina aurirana andeeqannisanoo nidanoo firaa naaquqara ainaina firaa ainaina auqeeamarufaqa qafeemariqau. Qafamasee irisee sia naundura quandaqau. Mi maqusa maqusanara maaqi qimasee Yisufa nuqu ramasee niqinau.

<sup>21</sup> Koorasinna maqannaasa maqusa maaqa namufaqa qinee inniara qimudaqoo qidaqa inni narirafa firaa mariannoo. Beetasaida maqannaasa maqusa maaqa namufaqa inniara faqa qimudaqoo qidaqa. Inni narirafa faqa firaa mariannoo. Taia maqusa faqa Sidoonna maqusa faqa aanaamuru aamina mariasa qinee misakina miqimandee faiqi sia amanaiki maria ainaina misakina auqaanaqau naundura dauni quandaqini. Misa danda doona nifaagai nikaqaki akuseeqa nari mandoosanara ikiraqasee minniseefau dauni quandasee qini ufamau fini.

<sup>22</sup> Qinee kuqaa anoona ufa inni qimannimidaqa. Firaa numoo aukuaana anirainanoo Anutufa Taia maqusanaasa faqa Sidoonna maqusanaasa faqa naridanoo kaqikaqoo afauaanno. Innee Koorasinna maqusanaasa faqa Beetasaida maqusanaasa faqa sia afauaanno firaaqoo inni naruaanno.

<sup>23</sup> Kapeeranaumma maqusanaasa innee inneeqara uriqararausee qimasee inni maqusara faqa unna qimasee innaaruna amana kai maridee qimariasa. Kasooqagee Anutufa ani mindari rarisammeeqeenoo idaki aqunnisaanno. Soodooma maqusanaasa mandoosana maree marufanoo Anutufa narinau. Qinee Soodooma maqusaki faiqi sia amanaiki mari ainaina inni Kapeeranaumma maqusaki auqaafanandee iananoofau maqee mi maqusafa kaqi mariqini.

<sup>24</sup> Firaa koota aukuaana Soodooma maqusanaasa narirafa mariannoo kaqikaqoo rauqi nimaqaanno. Kapeeranaumma maqusanaasa inni narirafa firaatia uqanna sia rauqi nimaqaanno. Qinee inniki maridaqa qinee qunnufana sia irimarianara inni narirafa firaa mariannoo.

*Naundura asooarana faqa idooarana faqa nimiraree qinau.*  
(Ruk 10:21-22)

<sup>25</sup> Mikari Yisufa innaaru qimasee qinau. Qini qikoofa, maa maqana faqa innaaruna faqa rakisirafa dufi dufi ani ufa qinee maqee maqee maa ufana qimannimimarunnaara irirana faqaasa nifusaa rafaafun-niseenana kaiqeesa nifusaa kooroo mannimaqee mariananoo.

<sup>26</sup> Eedoo dufi dufi anee qini qikoofa ani aidirafa miqimminoo maridanoo.

<sup>27</sup> Aiqaama ainaina qini qikoofa qiminau. Yafa yafee amaakuara iridanoo fee sia moo fannoo. Akoofa kai minara iridanoo. Yafa yafee akoonara iridanoo fee, sia moo fannoo amaaku kai minara iridanoo amaaku fannoo nari kai irisee uqannifiqaraisa misa minannai qini qikoonara iridaqa.

<sup>28</sup> Aiqaama kadaapiri mariasa faqa naudura qumaara firaa maree mariasa faqa, qinee unnannai aniraifaqa qinee naundura idooarana nimaauranoo.

<sup>29</sup> Qini qumaara qainda dinni qumaree nifaariki rusisee qini dookinaa ufa maraaqa. Qinee reendenirausa qimuqusa muqufi ubiqaraisa maridaqa innee qini ufa oosana marasaifaqa naundura asooarana adooarana nimianaara.

<sup>30</sup> Qini qumaara qainda siamma akumu aruaanno sia qumaara marinara asooarana adooarana paqurifaranoo.

## 12

*Nári amaanasaa Yisuna faiqi namu sakuma ruqoosasee naqau.*  
(Mak 2:23-28; Ruk 6:1-5)

<sup>1</sup> Mi aukuanna moo Saririqasaa Yuda maqannaasa amaana faasaanasaa Yisufa narí faiqi namu faqa maqusamau uita ququsa qambaanaí fimaruufanoo mina faiqi namu naararee marusa nári oosana marasee uita ruqoosasee rafarisee fuka naqa fimariqau. Miqunara sia ummuarammidammiafoo qimariqau, aiqamausa nári sandamau fida miqimmi mariqau.

<sup>2</sup> Farisai amaana ufa qimarusa misa nindafamasee Yisuna ufa amianneera ufa quandasee qimamiqa qiqau. Qafaa ani faiqi namu Saririqa sandufa rukiaidaqa narana unaku naidaqa Mooseefa minara qaoo qinau. Naqi fee ifaqee miqi fee.

<sup>3-4</sup> Yisufa iriseenoo qinau. Innee aqaaida miqi qimariafanoo Dafidina akara sia fee asaanari fee. Mifa faqa mina faiqi namu faqa naararofaqa misa Anutuna amaana maaqaki Nooba maqusai marunaki keeqafufaqa amasarara feemu Anutuna amimaru feemuna naqau. Misa miqi mandee sandufa rukiaqau. Mi feemuna Anutuna maaqaki rakisirausa kai naaqee qimaru feemuna marasee naqau. Innee sia fee mina asaanari fee.

<sup>5</sup> Innee ooqeenaa sandufa moo sia fee asaanari fee. Anutuna maaqaki aanaiqi mariasa misa Saririqa sandufa maqee maqee rukiaidaqa amaana maqaki ainainidaqa mariasa numoo siaisa maridaqa miqidaqa.

<sup>6</sup> Qineemma ufa qimannimidaqa. Qinee Anutuna amaana maqa uriqararausa maaqoo maridaqa. Misa qini ufa irisee sakuma ruqoosasee naifanoo amana mariannoo.

<sup>7</sup> Akara moo maaqimminoo maridanoo. Qinee Anutusa inniara inneeqa niqoonausara nimuqusinaqa nifauaaqa minara qini didiannoo. Qaindasaa maqee maqee aandau tatufirana qimiranara qini qikooqaidanoo.

Mi akarana miqi qimasoo faqa qinee Yisusa maaqi qidaqa innee mi akarana oosanara irifaqau qeeqa faiqi namuara naararee marinara innee nimuqusifaqau sia niqini.

<sup>8</sup> Qinee faiqi nimaaku amaana faasaana faqa mina sandufausa faqa uriqararausa maridaqa. Qinee amaana faasaana sandufa sia rukiaaqee qunaqa sia rukiaidaqa. Qinee qunaqa naidaqa numoo sia maridanoo.

*Nári amaanasaa asauku sufirana andeeqanau.*  
(Mak 3:1-6; Ruk 6:6-11)

<sup>9</sup> (Mooseena sandufa nári amaana Saririqa sia kaqikaaqoo ainainiqee qinau. Yisuna aukuan misa mi mau kai fimariqau.) Yisufa sakumara qimannimiseenoo miqooqari Yisufa misa faqa misa amaana maqaki keeqanau.

<sup>10</sup> Minaki asauku sufirafa misa faqa keeqafi marinau. Farisai amaana ufa irimarusu mi asauku sufiranara Yisuna irammiriqa qiqau. Maasa amaana Saririqa sandufa amanee amaana Saririqasaa faiqi moo fannoo mandaikirana andeeqaanauree aqaaida miqianauree. Misa Yisunara eedoo qinaqa Mooseena sandufa rukiaidanoo fee qimasee qumarasee aruanee qimaseeqa miqi qiqau.

<sup>11</sup> Yisufa minara iriseenoo qimanniminu. Saririqasaa firira aandau madikaki aqufifaqa innee umbaqidee sia fee umbaqidee. Sia amaana irisee kaqi umbaqi mariafanoo.

<sup>12</sup> Nana fannoo fee uriqaranoo maridanoo fee. Aandau fee faiqi fee. Aandau sia uriqaranoo maridanoo, faiqi kai uriqaranoo maridanoo. Minara

maasa sandufa fannoo mandaiki marifa aurimarifa Saririqa amaanasaa amiqi amiqimannimaqarana amana maridanoo qidanoo. Miqi qimaseenoo asauku sufirana qimaminau. Asauku uqaa.

<sup>13</sup> Miqi qufanoo mi fasiqafa asauku uqinau. Uqusoofanoo asauku amiqinau, dinni asaukuara foora amiqinau.

<sup>14</sup> Farisai amaana ufa qimarusa qafamaseeqa misa aanoomandee raudamafufaqa suqufi narí qimami narí qimami qiqau. Naqimmandee maasa Yisuna aruanauree qimariqau.

*Anutufa rusadeesamumasee maroo fasiqanara qidanoo.*

<sup>15</sup> Yisufa mi ufana iriseenoo findimeeqee moosaa finau. Faiqi anaasee aiqama mina faqa fufanoo aurimarusa mandaikimarusa aiqama andeeqan-nisanau.

<sup>16</sup> Andeeqanniseenoo aranaiqi qimaseenoo qimanniminau. Qumee uqan-nandaaga kukee uqanna saaqa sia qinee andeeqasaunnaara kooroo qiaqa.

<sup>17</sup> Miqi qimasoofanoo tamummaqara fasiqa Eesaia mina ufa anoona kambiqanau.

<sup>18</sup> Mifa ooqai maaqi qimasee Yisunara akara rinau.

Qafaa, qini dadaaqira faiqi, qinee mina utaaqamamaqaunafa. Qinee minara qimuqusidanoo qini daundura minara asacidanoo. Qini maraquina mina aakufuannoo. Mifa aanaamuru mariasa faqa kipa-sara foora andeeqannisaannoo. Sia Isaraee maqanna kai.

<sup>19</sup> Mifa sia dapi ufa oosana oosana firaqoo qiannoo. Sia faaqa rumasaida qiannoo. Maqusaindari sia mina ufa irifaranoo.

<sup>20</sup> Mifa eendira saka sia ramooramaa mamaree raudaannoo. Aman-naikiasa mandainaina rafaaga fimarina sia mifa aanoommasee qimannimifa fifimandee reendeenamandee naakapee marifa. Mifa miqimmamaree reendeenammamaree fifi inanoo numoo aukuaana raquramiseenoo miqoomma uriqaraannoo.

<sup>21</sup> Minaki maqusa maqusa aanaamuru mariasa minaki doo irirana rusifaranoo.

Eesaiafa miqi qimasee Yisufa sia qumu maru aukuaana Yisunara akara rumaqoofa maridanoo.

*Unnaqimaseeqa Beeraseeburanannai afaanna afaqaidee qiqau.*

*(Mak 3:20-30; Ruk 11:14-23)*

<sup>22</sup> Faiqi moo faafasaaqa aundurari marufanoo afu dimbeegeenoo ufa faqa sia qimaruna faiqi anaasee afieeqa Yisufinnai minisoofanoo andeeqanau. Andeeqasoofanoo mi fasiqafa afu maqeenoo ufa qinau.

<sup>23</sup> Faiqi anaasee aiqama qafamasee naaquqoofaqa qiqau. Maanaree maasa afeesi marunafa mifee. Dafidina atikiqari findifuanina fee qi-maqoofa doo maana mifee.

<sup>24</sup> Farisai amaana ufa qimarusa mi ufana iriseeqa qiqau. Maafa afaanna rakisirana Beeraseebura minannai afaanna faiqi naunduraki ma-rina aqiqaidanoo.

<sup>25</sup> Yisufa misa ufa iriseenoo qimanniminau. Moo maqusanaasa furu-fariqa raina rainirausa, doo mi maqa maaqafa dapikammianoo. Moodaa oosana mariasa mi oosanausa rainarainiqa maqasaa aqufifaranoo.

<sup>26</sup> Sia Sadannafa narí kai quandaki narí aqiqaannoo. Miqidanoofau narí raineenoofau mina afeeka fannoo maqasaa aqufiqini. Miqinanoo naqim-masee mina aiku asauku afeekaikamandee marifaree. Sia afeekaikifara furufariqa dapikammifaranoo.

<sup>27</sup> Innee Farisai amaana ufa qimariasa inni faiqinamu Sadannanannai fee afaanna aqiqaida fee Anutunannai fee afaanna aqiqaida fee. Anutunannai kai afaanna aqiqeemariafanoo. Inni faiqi namu miqianannai inni manda ufa qaoo qidanoo. Qinee Beeraseeburanannai quandafi afaanna nari niqoonausa niqiqaananoo siammamanaikiannoo. Qinee Anutuna maraqunannai kai afaanna aqiqeeqa.

<sup>28</sup> Qinee Anutuna maraqunannai afaanna aqiqaananoo doo Anutuna amiqira ququsa fannoo doo innisaa radiqiseenoo ititannimaqeenoo.

<sup>29</sup> Naqimandee moo fannoo Sadanna maaqakinaa ainaina indaa iraree. Maaqa akoona naaree rumbasee mina ainaina indaa ia. Maa aaqoo afu furufarirana maaqa akoona doo qinee rumbaseeqa mi maqanakinaana doo qinee mareeqa.

<sup>30</sup> Faiqi moo fannoo sia qini qiqaondi marirafa mi fasiqafa qini namuqaa maridanoo. Sia qini dadaaqida oonu suqu ani suqu imarifa mareeqaida aquraaruki marifa maridanoo. Miqi kai inoo faiqi moo fannoo innaaruna ququsara sia faiqi anaasee suqu quqainafa, mifa furufarammida nifaqanoo nidanoo. Qinee suqu quqaunaqa innee Farisai amaana ufa irimariasa furufaramida nifaqee mariafanoo.

<sup>31</sup> Misa Yisunara Sadannanannai afaanna niqiqeefoo qunara, Yisufa minara iriseenoo qimannimidanoo qinau. Oosana oosana manda marirana faqa manda ufa faqa Anutufa amana mina numoo faiqi mininnisaannoo nari maraqunara aqirana minara kai sia mininnisaannoo.

<sup>32</sup> Anutuna maraquna aqira ufa mina akiaqara Anutufa sia mininnisaannoo. Maa kamusaqa marira aukuaana faqa naaru kamusaqa marira aukuaana faqa sia uqanna amana Anutufa mina akiaqara mininnisaannoo. Qinee faiqi nimaakuara diqira ufara minara Anutufa amana mininnisaannoo.

*Faiqi ufa fannoo naundurakinaa oosana kooroo idanoo.*

*(Ruk 6:43-45)*

<sup>33</sup> Saqari amiqirafa maridanoo mina qaqamma faqa amiqirafa kai maridanoo. Saqari mandaikirafa maridanoo mina qaqamma faqa mandaikirafa kai maridanoo. Saqari qaqamma fannoo kai saqari anoona kooroo idanoo. Miqi kai iqa inni Farisai amaana ufa qimariasa inni manda ufa oosana manda saqari qaqamara foora maridanoo.

<sup>34</sup> Innee sakaní faiqi miqirausa inni naundura mandamuqanoo maridanoo. Inni naundurai moomoo ainaina marinakiqari ufa uridanoo. Minara naqi fee mandee inni naundurakiqari amiqira ufa uruannoo fee. Sia amana miqirafa. Faiqi afauru fannoo nari amuqusaki mari ainainara kai ufa qidanoo.

<sup>35</sup> Amiqira fasiqa mina amuqusa qumiasanakiqari amiqira ainaina maree uridanoo. Manda fasiqa mina amuqusa ookiqari mandainaina oosana oosana kambiqaidanoo.

<sup>36</sup> Qinee qimannimidaqa numoo aukuaana anirainaqa faiqi misa nariqa aiqama dapi ufa oosana oosana Anutuna afusaa kooroommasaifanoo minara ufa qiannoo.

<sup>37</sup> Maqee marira aukuaana ookinaa ufa Anutufa iridanoo. Numoo aukuaana anirainanoo inni maqee maria aukuaana ufa fannoo inni mareqeenoo amiqiranaki fee quqaannoo fee Anutuna nariranaki fee mara quqaannoo fee.

*Yisunara misa faiqi sia amana auqaaqaa ira ainaina auqaina qafaa.*

*(Mak 8:11-12; Ruk 11:29-32)*

<sup>38</sup> Miqi qimasoofaqa Mooseena sandufa irimarusa faqa Farisai amaana ufa qimarusa faqa misa Yisuna akaru qiraree qimasee qimamiqau. Ufasaa rakisirafa anee moo ainainara qinanoo mookinaqa maasa mina qafeeqa aniara kuqaa Anutuna asauku mundira fee qianaaura.

<sup>39</sup> Yisufa quandafi qimanniminou. Innee maqee mariasa manda oosana maree mariasa Anutunara nikooqaifaqa minnisee mariasa innee kai moo ainainara qifanoo kambiqaina qafaanee qidaqa. Sia qinee moo fuka ainaina auqaana qafeefara. Nauraa ainaina Yoonaafa tamummaqara fasiqa ooqai firaa noodaanna aranandaki marunara foora miqirana maqee qafeefaranoo.

<sup>40</sup> Yoonaafa firaa noodaanna aranandaki qaaramoo faasaana faqa eendaki faqa marinou. Miqi kai iqa qinee faiqi nimaaku qaaramoo faasaana faqa qaaramoo eendaki faqa maqa aundurái madikaki marianaaura.

<sup>41</sup> Nineefa maqusa marusa numoo aukuaana anirainaqaa misa findifi inni maqee mariasa niqifaranoo. Misa Yoonaana ufa iriseeqa nári mandainaina maqasaa quqasee quandafufaqa Anutuna afusaa reen-deenammiqau, maqee qinee Yoonaana uriqararousa inniki maridaqa innee sia inneeqa mandainaina minnisaidaqa minara misa inni niqifaranoo.

<sup>42</sup> Seebaa maqusaindari anaasee rakisirafa moo fannoo numoo aukuaana anirainanoo mifa faqa Nineefa maqusanaasa faqa findifiqa maqee mariasa niqifaranoo. Mifa nianaindari Sooroomoona mina irirana irianne qimasee aninou. Maqee qinee Sooroomoona uriqararousa animaridaqa innee sia qini ufa irimariafanoo, minasaara mi anaasee rakisirafa numoo aukuaana anirainanoo inni niqiannoo.

*Faiqi naundurakinaa afaanna oonu aqoonousa nifiqamareenoo kaiqaa ani keeqanau.*

*(Ruk 11:24-26)*

<sup>43</sup> Maa maqee mariasa kaifaa maaqimminoo mariannoo. Innee manda faafasaaqa faiqi naunduraki marifara foora marifara. Mi faafasaaqafa mi fasiqana aundurakiqari raudamakinoo fifi inoo fiqiu fiqiu inoo aadana maqa maqa oombura maqa maaqaki aakaaqaki adooaranara randaisianoo fiqiu fiqiu imarinou.

<sup>44</sup> Fiqiu fiqiu idanoo sia paqurinoo narí kai oonumafi iriseenoo qinou. Qinee qeeqa ooqeenaa maaqaki kaifaa keeqaanou. Qinee qeeqa ooqai mariafanna fasiqana aunduraki kafa keeqaanou. Miqi qimaseenoo mi fasiqa finnai anireenoo qafanou. Fifau maaqara foora maridanoo, damunaminoo maridanoo, rapeiranaki ititanoo maridanoo aiqama ainaina andeeqanoo maridanoo.

<sup>45</sup> Mifa mina qafamaseenoo oonureenooafaanna moodannai qisauku dinni oonu qaaraqanda maraseenoo narí manda oosana uriqararousa kai nifiqee anireenoo mi fasiqana aunduraki aiqama keeqafufaqa minaki mariqau. Mi fasiqana inaaqiana manda marirafa fiqaramaseenoo firaaqoo mandaikinoo marinou. Ooqai mi fasiqafa moodaa manda faafasaaqa maru aukuaana kaqikaqoo mandainainaki marinou. Innee maqee manda marira mariasa miqikai mandee marifaranoo.

*Narí ufa irimarusera qini qinausa qikaqaafasaa fee qinou.*  
*(Mak 3:31-35; Ruk 8:19-21)*

46-47 Yisufa miqikaimmasee faiqí anaasee ufa qimannimi marufaqa Yisuna narí anoofa faqa mina akaqaafasaa ufa faqa aniree naambee qai kikiqamafufaqa qimamianee qufanoo faiqí moo fannoo mina irisee maaqaki oonu Yisuna qimaminau.

48 Mifa iriseenoo mi fasiqana qimaminau. Naqi fee ifanee anee qini qinoofa faqa qini qikaqaafasaa ufa faqa madaanai mariaafoo q inanee.

49 Maa mariaa qimaseenoo narí faiqí namu asauku mundinoo qinau. Maaqaimmee mariaa misa qini qikaqaafasaa qini qinausara foora maridaqa.

50 Faiqí anaasee yausee innaarunai qini qikoona iriranamau fimariaa misa kai qini qikaqa faqa qini dauna faqa qini qinausa faqa maridaqa.

## 13

*Qaqama aaqasoofanoo kambiqoonara qinau.*

*(Mak 4:1-9; Ruk 8:4-8)*

1 Mi faasaanna Yisufa mi maqanakiqari raudamakufanoo firaa taatarunna afainni ooqu reenoo miqoo ooqu marinau.

2 Ooqu marifufaqa faiqí anaasee fifau andandara foora ruqufu aqufi ititafufanoo mifa kanuqaki akaramafinoo ooqu marifinoo minakiqari qimannimufaqa faiqí anaasee nammari afainni maridaqa mina ufa irimariqau.

3 Mifa kanuqakiqari oosana oosana quandara ufa qimanniminau. Mifa maaqi qinau. Faiqí moo fannoo Yuda maqannaafa narí oosana maraseenoo raisa fooqaana ummaqirara maqa rumaqoonaki qaqama kaqi aqee marinau.

4 Mi fasiqafa aqee marufanoo qaqamma akaqafa aanasaa niku ree maruqoo faqa aaqamaki aqufufanoo ufiniuqa aniree mina kai naqau kaqindaraana sia naqau.

5 Akaqafa aaqamaki oonisaa aqufinau. Maqa sia moomoo marufanoo maqa tootooqi marunara dauni kambiqanau.

6 Kambiqafufanoo suani urureenoo arusoofanoo maqa eeraqoo marufanoo atuka sia meemai keeqoonara suani arufanoo aadanusinoo kuqinau.

7 Akaqafa amuka faqaa ainaina marunaki aqufufanoo amuka faqaa ainaina fannoo urureenoo rafaqaqafinoo arusanau.

8 Akaqafa amiqira maqasaa aqufufanoo qaqamma moomoo iranau. Akaqafa urureenoo qambaana irara iranau. Akaqafa urureenoo ooda iranau.

9 Aaqoo faqaafa irinana anee kai andeeqasee iria.

*Yisufa narí quandara ufa oosana narí faiqi namu qimanniminau.*

*(Mak 4:10-12; Ruk 8:9-10)*

10 Yisuna faiqi namu mina ufa iriseeqa mariufaqa mifunnai anireeqa irammiriqau. Naqaafanee quandara ufa kai qimannimidanee, akooqoo kooroomasee qimannimiaqaana.

11 Yisufa iriseenoo qinau, innee innaaruna maqusa qumee irirana iriaqera, misa sia iriaqera quandara ufa qimannimidaqa.

12 Faiqí anaasee moo fannoo innaaruna maqusa irirana irinanoo Anutufa moo faqa mina amifanoo minaindi moomoo kammianoo, faiqí anaasee moo fannoo innaaruna maqusa irirana siaifa moodaa marinnana Anutufa mina aiqama maree finanoo kaqisamu mariannoo.

13 Misa nifu maqaidaqa sia qafaidaqa, misa naaqoo marifaqa sia iridaqa, minara qinee quandara ufa qimannimidaqa sia iriaqera qimannimidaqa.

<sup>14</sup> Misara tamummaqara fasiqa Eesaia mina ufa anoona kuqaa kam-biqeenoo. Minara qimasee akara rumaqoona anoona kambiqanau. Mifa minara maaqi qimasee qinau.

Kuqaa innee naaqoonnai qini ufa iriseeqa naunduraki sia irifaranoo.

Kuqaa innee nifunnoo qinee auqee marunna ainaina tataqafi qafamaseeqa naaqoonnai siamma irifaranoo.

<sup>15</sup> Maa maqannaasa nimuqusa kudoosaapanoo maridanoo. Misa naaqoo auninoo maridanoo, misa nári nifu nári tautasee maridaqa. Misa nifunnai qafamasee irifooro misa naaqoonnai irifooro. Misa naundura iriaraasi-foora. Misa quandafinaqa qinee ianannai anifaqa qinee misa amiqianoora.

Tamummaqara fasiqa ufa miqimminoo maridanoo.

<sup>16</sup> Innee qini faiqi namu inneeqa nifu qafee mariana inniqa naaqoo irimariasa marianara asasiaqa, inneeqa kai qafaidaqa, inneeqa اساساناکي mariafanoo inneeqa qini ufa oosana iridaqa.

<sup>17</sup> Qinee anoona ufa inni qimannimidaqa. Tamummaqara fasiqauqa faqa reendeenirafa andeeqara fasiqauqa faqa misa ooqai maridaqa innee maqee maqee qafeemarianara kaaqa nimuqusufaqa minara qafaaqaa kaimmasee sia qafaqau. Misa innee maqee qini ufa irimariana kaaqa nimuqusifaqa iriraree qimasee iriaqaa kai qimariqau. Sia iriqau.

*Yisufa aaqee maru qaqaamara oosana kooroo inau.*

*(Mak 4:13-20; Ruk 8:11-15)*

<sup>18</sup> Qaqamma aaqee mari fasiqana quandara ufa oosana irisaifaqa qimannimianaura.

<sup>19</sup> Moo fannoo qini ququsakinaa ufa iriseenoo sia irinoo manoo manaa imarifa, qaqaamma mina amuqusaki kakasammasaifanoo manda faiqi fannoo animaree fifinoo. Maafa qaqaamma fooqaana aanasaa kukupee marifanoo siara foorammidanoo.

<sup>20-21</sup> Oonisaa kukupanoo marifa mina oosana maaqimminoo maridanoo. Misa Anutuna ufa irisaidaqa اساسمامسهه mi ufana maraifanoo sia atuka misaki amiqimmasee ausinoo kaqi meeraqoo rusinoo maridanoo, qusasaa qimasee minnisaidaqa. Mi ufanasaara narirafa kambiqaiifaqa misa quqasee fuaniqiana saamuridaqa.

<sup>22</sup> Amuka faqaanaki aqufu qaqaammafa moo fasiqara foora maridanoo. Mifa Anutuna ufa irinoo maqasaa kadaapirirana faqa kaaqa ainainara munnimmara amuqusirana faqa mi ainainafa mi ufana anukaki kukuqinoo sia qaqaamma iraidanoo, sia anoona kambiqaidanoo.

<sup>23</sup> Qaqamma amiqira maqasaa kakasinoo moo fasiqara foora maridanoo. Mifa mi ufana iridanoo oosana amiqimandee iridanoo. Mifa kuqaa qaqaammara foora iraidanoo. Moo uriqararafa amiqimma qaqaamma irafinoo irairaammidanoo. Moo qambaanai marifa narí amanasaa iraidanoo. Moo ureeqarafa miqi kaimidanoo narí amanasaa iraidanoo.

*Namuqaa moona afuqaki manda qaqaama aaqee marunara qinau.*

<sup>24</sup> Quandara ufa moo Yisufa faiqi anaasee noorinni mara quqanau. Manda oosana maree marusara faqa amiqira oosana maree marusara faqa misauqara quandasee qimanniminau. Innaaruna maqusai faiqi moora foora maridanoo. Mifa narí ququsaki amiqira qaqaamma ummaqinau.

<sup>25</sup> Faiqi misa faiqaqeeufanoo mina namuqaa fannoo anireenoo kukura asumu sakuma maruqoo ummaquseenoo finau.

<sup>26</sup> Sakuma urureenoo uri rupipoosufaqa kukura faqa qafaqau.



<sup>27</sup> Mina dadaaqira faiqiuqa ququsa akoona oonu qimamida qiqau. Rakisirafa, anee kuqaa fee ani amiqira qaqamma kaifee ummaqinee. Nanaindari fee kukura kambiqaidanoo fee.

<sup>28-29</sup> Mifa iriseenoo qinau. Imboo namuqaa fannoo kai ummaqinoo. Qimasoofaqa mina faiqi namu qiqau. Amanee maasa oonuree rarakuanau-ree qimasooфанoo mifa qinau. Sia innee kukura rarakuaqa, sakuma faqa rarakifoora.

<sup>30</sup> Saina kaqi mariani. Miqanda moodaa karammiqa mariafaqa. Aiqaama akuqamafinaqa qinee qimannimianaqa innee kukura indaaruu ateeka rum-basee ida araaqera. Inaaqiana sakuma atekasee qini maaqaki quqaaqa.

*Yisufa kaqikaa qaqama kikiqammusinau.*

*(Mak 4:30-32; Ruk 13:18-19)*

<sup>31</sup> Yisufa moo quandara ufa misa noorinni quqanau. Innaaruna ququsaki fifandinausa qumini qaqama miqirausa maridaqa. Faiqi mina qaqama nari ququsaki ummaqinau.

<sup>32</sup> Mina qaqama kaqikaana uqanna maridanoo. Mifa urureenoo qambaanai oorufinoo firaa saqariara foora aiqama aakaaqakinaa andanda uriqararafa maridanoo. Miqinoo marifaqa ufiniuqaindi anireeqa mina asaanai aanaamu usakaidaqa.

*Yisufa ooruku anoona kikiqammusinau.*

*(Ruk 13:20-21)*

<sup>33</sup> Mifa quandara ufa moo qimanniminau, Anutuna ufa aiqamai daraaniranara qimanniminau. Innaaruna ququsaki fimariasa ooruku anoonara foora maridanoo. Anaasee mina marasee feemuki adiasaafanoo aiqama ati qaidanoo.

*Yisuna ufa mina kikiqa usira ufa oosana.*

*(Mak 4:33-34)*

<sup>34</sup> Maa ufana faiqi anaasee moomoo marufanoo Yisufa quandara ufakiqari kai qimanniminau.

<sup>35</sup> Yisufa maaqi qimannimisoofanoo ooqeenaa tamummaqara fasiqa mina ufa anoona mikari kambiqanau. Tamummaqara fasiqa qinau.

Qinee doo raqasee quandara ufa kai qianaara. Maqa quqoo aukuana kukeeqoo ufana kukeeqanoo mariifa qinee mi ufana maqee quandara ufakiqari kooroo qimannimianaara.

Tamummaqara fasiqa ufa miqi qimaqoo ufafa maridanoo.

*Yisufa manda qaqama kikiqa usira ufa oosana kooroo inau.*

<sup>36</sup> Yisufa faiqi anaasee qimannimiseenoo minniseenoo maaqaki keeqanau. Mina faiqi namu mifunnai oonureeqa qiqau. Kukurara quandara ufa qimannimianaqa iriaqa.

<sup>37</sup> Miqi qufanoo mifa qinau. Faiqi nimaaku qinee amiqira qaqamma ummaqari marinausa maridaqa.

<sup>38</sup> Ququsaki maa maqanasaa mariasa maridaqa. Amiqira qaqamma karaambaiqa aiku asauku mariasa maridaqa. Kukura manda faiqi mina aiku asauku mariasa maridaqa.

<sup>39</sup> Namuqaa kukura ummaqinafa Sadannafa kai maridanoo. Sakuma atekara aukuana, maa maqee marira kamuqoo taikara aukuana maridanoo. Sakuma atekara fasiqauqa misa qangiroouqa maridaqa.

<sup>40</sup> Kukura atekasee rumbeeqee idaki aqifanoo taikara aukuana miqiminoo mariannoo.

<sup>41-42</sup> Mi aukuanna qinee faiqí nimaaku qeeqa qangiroouqa niqíqanaqa misa Anutuna ququsakinaana manda findi fira findi fimariasa narí oosana uqannifiqanoonifa faqa manda oosana mariasa faqa maramaree auru firaafa imarinnanaki minaki aqifaranoo. Miqoo faiqí misa qikindaqeebara nifai riqifaranoo.

<sup>43</sup> Miqooqari andeeqaraisa suaniara foora kaimmifaranoo. Innaarunnai narí nikoona maqusaki maridaqa kaaqa qeebaranoo. Naaqoo faqaasa mariafanoo inneeqa kai andeeqasee iriaqa.

*Koorakinaa maqa feefaurira ufa quandara ufa.*

<sup>44</sup> Innaaruna ququsaki keeqeemaria ufafa koora miqirafa maqaki kukeeqanoo maridanoo. Faiqí moo fannoo paqurimasee qafeenoo kaifaa kukeeqaannoo. Kukeeqaseenoo اساسammaseenoo narí ainaina oosana oosana akaqausa nimiseenoo mina akiaqara munnimma maraseenoo quandaki koora mari maqa maaqana feefaurummasee mi koorana indufuannoo.

*Oonda feefaurimaruna quandara ufa.*

<sup>45</sup> Kafaa innaaruna ququsaki keeqeemaria ufafa faiqí moora foora maridanoo. Mi fasiqafa koora aina feefaurimarifa koorara maqusamau randanoo nidanoo.

<sup>46</sup> Oonda firaa feefaurimaria oondana paqurimaseenoo narí ainaina aiqama moosa nimiseenoo minasaaqaraa munnimma maraseenoo nariara mi firaa oondana maraannoo.

*Noodaanna reemaria rainara quandara ufa.*

<sup>47</sup> Kaifaa Yisufa minara qinau. Innaaruna maqusa pateeree maria uqara foora maridanoo. Misa mi pateeuqana nammariki ramasee noodaanna oosana oosana minaki uqaridanoo.

<sup>48</sup> Pateeuqa qumbiqafifaqa uqeereeqee afainni quqaidaga. Quqaseeqa misa ooqu marifiqa amiqira noodaanna taquki mara upeekasee manda noodaanna mara teeqimmaqidaqa.

<sup>49</sup> Maa marira aukuanna taikafinanoo miqimminoo mariannoo. Qangiroouqa rafudamafiqa manda oosana maree mariasa faqa amiqira oosana maree mariasa faqa raineefara.

<sup>50</sup> Misa mandaikirausa ida firaa auruki mara aqifara, minaki iki raqaidaga nifai riqifara.

*Ooqeenaa anoona ufa faqa fuka ufa faqa mina akoofasara qinau.*

<sup>51</sup> Miqi qimaseenoo Yisufa narí faiqi namu irammirinau. Innee maa ufana oosana irida fee. Miqi qufaqa misa eedoo qiqau.

<sup>52</sup> Yisufa iriseenoo kaifaa maaqi qimasee qimanniminau. Mooseena sandufa irimari fasiqafa moo fannoo Anutuna ququsaki mariranara irimarifa maridanoo mifa faiqí firaafara foora maridanoo narí maaqakiqari ooqeenaa amiqira irirana faqa fuka amiqira irirana faqa marasee ani uqafiqaannoo.

*Nasareetee maqannaasa Yisunara nikooqanau.*

*(Mak 6:1-6; Ruk 4:16-30)*

<sup>53-54</sup> Yisufa maa quandara ufausa taikaseenoo mi maqusana minniseenoo narí maqusai uqanna oonureenoo misa amaana maqaki keeqafinoo qimanniminau. Misa mina ufa irisoofanoo naaquqoofaqa qiqau. Yai fee maa fasiqafa maa irirana faqa maa idaaqammannisarana faqa irinoo fee.

<sup>55</sup> Maa fasiqafa kamundaa amaaku maridanoo. Mina anoofa Mariafa maasa faqa maaqooqaraafa maridanoo. Mina akaqaafasaa Yameesana

amarafa faqa Yooseefaana narí akoona amarafa faqa, Simoonafa faqa, Yudasina amarafa faqa maasa faqa maridaqa.

<sup>56</sup> Mina asooqmaakamara faqa kaqi misa maaqoo maridaqa. Maa fasiqafa yai fee maa amiqira irirana mareenoo fee. Maasa minara qikooqaidanoo.

<sup>57</sup> Miqi qimasoofaqa misa minara oonumafi irisee ooimariqau. Yisufa misa ufa iriseenoo qimanniminau. Tamummaqara fasiqa maqusa maqusa mina fidanoo faiqí anaasee minara naaquqaiifaqa ufa iriaqaa kai idaga. Narí maqusanaasa uqanna faqa narí ainaina faqa sia irifara nikoo nikaa ifaranoo.

<sup>58</sup> Yisufa miqi qimasoofaqa misa sia minaki irirana rusiqoonara Yisufa sia moomoo firaa ainaina naaquqara ainaina miqoo auqinau.

## 14

### *Eeroodeefa Yoohaneena akiaqa tuqinau.*

*(Mak 6:14-29; Ruk 9:7-9)*

<sup>1</sup> Mi aukuanua Eeroodeefa Karidaia maqannaa uriqararafa fraafa marinau. Roomma maqannaa kiapana ameemaanai ureeqanoo marida rakisinoo marinau. Faiqí anaasee misa Yisuna amooqimammaree anufanoo Eeroodeefa irinoo narí aiku asauku maaqi qimasee qimanniminau.

<sup>2</sup> Maafa Yisufa Yoohaneefa nammari nimirufa kuqiranakiqari findifinoo Yisunaikinoo maridanoo, maa afeeka firaa ainainna auqaidaqinoo fee qinau.

<sup>3-4</sup> Eeroodeefa narí akaqa anaqa auqu Eeroodia nammarina maroofa mi anaaseefa qufanoo iriseenoo Yoohaneena rumbeegeenoo karafusaki quqasoofanoo marinau. Yoohaneefa Eeroodeena narí akaqa anaqa Eeroodia nammarina maroonara aqinoo qinau. Anee sandufa rukieenana mi anaaseena maraanano. Miqi qufanoo mi ufanara aranaqoofanoo Eeroodia nammarina ufara karafusaki rumba quqanau.

<sup>5</sup> Eeroodeefa Yoohaneenara kuqaruani qinaqa faiqí anaasee minara irifoora. Misa aiqama Yoohaneenara Anutuna tamummaqara fasiqa fee qufanoo Eeroodeefa minara oonumafi iriseenoo minara rufieenoo sia arinau minnisee kaqi rumbanau.

<sup>6</sup> Eeroodeena maqoo aukuanafa kindaaramambufanoo miqoo faiqí anaasee suqu maree oomaqammanee mariqau. Eeroodia nammarina araamuna fannoo sukuraki maridanoo aaduma idi rama akoofasa quqamaqoofa maridanoo qoomaqammanee maruna qambaanai faiqí anaasee nifusaa findifi idi ranau. Eeroodeefa mi manaaqafa idi roona qafoofanoo kaaqa amiqi amiqinau.

<sup>7</sup> Afaqa amiqi amiqufanoo narí amana aqigeenoo mi manaaqana qimaminoo qinau. Anee nanaree aidinana qimaqiminaqa qinee minakaimmianiaura idi raannana akiaqara amianaura.

<sup>8</sup> Mi manaaqafa Eeroodeena ufa iriseenoo sandeenoo narí anoona Eeroodia nammarina oonu qimamisoofanoo irinau. Yoohaneefa Eeroodeena faqa mi anaaseena faqa niqunara mi manaaqana anoofa aranaqee marufanoo mariufa mari maridanoo narí araamuna fannoo oonuree narí anoona qimamufanoo mina anoofa mikari Yoohaneena arira irirana paqurinau. Oo doo maqee mifa qini diqufa kuquannoo. Miqi qimaseenoo Eeroodia nammarifa narí araamuna qimaminau. Anee oonuree qinanoo Eeroodeefa Yoohaneena akiaqa ituqu piritasaqa saka amiani qufanoo mi

manaqafa mi ufana iriseenoo ani randeenoo Eeroodeefinnai oonureenoo narí anoona ufa kai qimaminau.

<sup>9-10</sup> Eeroodeefa mi ufana irisooфанoo aundura mandaikinai. Faiqí anaasee nifusaa qeeqa qimana aqíqamasaunnaara oonumafi iriqa qisauruanoo qimaseenoo eedoo kai qinau. Eedoo qimasee narí frisuaiqauqa niqíqanau, oonuree Yoohaneena akiaqa tuqumaree mina amiaqee qufaqa frisuaiqauqa misa iriseeqa karafusa maaqaki keeqafiqa Yoohaneena akiaqa tuqíqau.

<sup>11</sup> (Mi maqannaasa mina fidika maqasaa aqufuandoo qimaseeqa piritaki sakaqau sia nararau miqíqau. Kaqi fifau fidika aqufuandoo qimasee miqíqau.) Yoohaneena akiaqa misa tuqu piritasaqa sakamaree mi manaaqana mina amiqau. Amisoofanoo mifa maree munu narí anoona aminau.

<sup>12</sup> Yoohaneena faiqinamu mifa kuqunara iriqa ani karafusa maqakinaana ani mina iri mara mareeqa munu madikaqau. Madikamaseeqa misa Yisufunnai oonureeqa mi ufana qimamiqau.

*Yisufa feemu faqa noodaanna faqa moomoosa niminai.*

*(Mak 6:30-44; Ruk 9:10-17; Yoh 6:1-14)*

<sup>13</sup> Yisufa mi ufana Yoohane arunara iriseenoo ummaararooфанoo nammariki ooquree kanuqaki narí faiqí namufaqa akaramafufanoo nariara faiqí sia marutinai finau. Faiqí anaasee Yisuna sipa fannoo nammariki fimarufaqa qafamasee faiqí anaasee maqusa maqusa tatufufaqa maqamau afaindanai miqoombiqau.

<sup>14</sup> Yisufa kanuqakiqari maqasaa aqufinoo nindafoofaqa moomoosa ani marufanoo. Oonureenoo misara amuqusufanoo misaki aurimarusu aurirana taikannisanau.

<sup>15</sup> Eendi marufaqa mina faiqinamu mina ufa irimarusu anireeqa Yisuna qimamiqau. Maa maqa maaqanaki faiqí siai maqa maaqaki, suani doo keeqaidanoo. Anee faiqí anaasee niqíqainaqa maqusa maqusa narana feefaurummasee namasee faiqaaqa.

<sup>16</sup> Yisufa iriseenoo maaqi qimasee narí faiqí namu qimanniminai. Innee fifau niqíqeefaara. Inneeqa kai narana nimiaqa.

<sup>17</sup> Miqi qimasooфаqa misa qíqau. Maasaki feemu rumbarafa moodaannai qisauku kai maridanoo. Noodaanna qaaraqanda kai maridanoo.

<sup>18</sup> Yisufa iriseenoo qinau. Doo mina kai qini qimiaqa.

<sup>19</sup> Miqi qimaseenoo faiqí anaasee aiqama qimanniminai. Aiqama andanda rasonookammasee ooqumariaqa.

Miqi qimaseenoo mifa feemu moodaannai qisaukunamu faqa noodaanna qaaraqanda faqa qumareenoo innaarunnai oori uqeeraseenoo Anutunara dufi dufi qimaseenoo feemu ruqi ruqimaseenoo narí ufa irimarusu nisaukuki quqasoofaqa misa qumareeqa faiqí anaasee nimiqau.

<sup>20</sup> Faiqí anaasee aiqama namasooфаqa nimuaqufaqa Yisuna ufa irimarusu uqa qumareeqa misa ooqu maruqoo fiqú fiqú idaqa narana andaanauqa uqariqau. Qisaukuqara taikasee qikunni qaaraqanda uqa qumbiqasee maraqau.

<sup>21</sup> Mi naranna noosa faiqí kai ooni saqari maqusa manda samu muquiqa mariqau. Faifa tauseenna mariqau. Anaasee faqa faiqi faqa ootupa mafufaqa maaqa maaqa qumbiqa maqíqau.

*Yisufa nammari amuaqumau aiku ramasee finai.*

*(Mak 6:45-52; Yoh 6:15-21)*

<sup>22</sup> Namasoofanoo Yisufa narí ufa irimarusa niqiqeenoo qinau. Innee sipaki qini doorinni nammari dinni afainni fimarifaqa qinee faiqí anaasee niqiqamasee kasoo fuaaura.

<sup>23</sup> Mifa faiqí anaasee niqiqamaseenoo nariara aaqanai innaaru qiraree qimasee akaramafinoo innaaru qinau. Mi eendanaki aaqanai naríara marinau.

<sup>24</sup> Yisufa aaqanai marufaqa mina faiqi namu sipaki faruma qambaana oonuroofanoo ufai firaafa noorindari uqinoo nammari amakaurinoo mina ufa irimarusa sipaki kadaapirida fimariqau.

<sup>25</sup> Iqaqarafa qusaramafufanoo Yisufa nammari amuaqumau aiku ramammaree misa unnai finau.

<sup>26-27</sup> Nammari amuaqumau fimarufaqa mina faiqi namu qafamasee afaanna fee qimaseeqa kaqa rufiamaree faaqariqau. Yisufa iriseenoo qimanniminu. Sia rufiaaqa. Inneeqa nimuqusa ubiqaaqa. Qinee maridaqa.

<sup>28</sup> Peetooroofa Yisuna ufa iriseenoo qinau. Karaambaiqa kuqaa anee maridana qinaqa anee ianannai nammari amuaqumau qinee faqa fua- naura.

<sup>29</sup> Yisufa iriseenoo qinau. Doo ania. Peetooroofa iriseenoo sipakiqari raudamakufanoo nammari amuaqumau Yisufunnai finau.

<sup>30</sup> Fimarufanoo ufai firaafa uqufanoo rufiamareenoo doo nammariki ukuqnanau. Nammariki ukuqnaidanoo faaqarumaseenoo Yisuna aaraidanoo qinau. Karaambaiqa qini qumaraa.

<sup>31</sup> Yisufa iriseenoo dauni mina asauku qumareenoo qinau. Anee nanaree qaara aundura irinane. Anee sia qinisaa irirana rusi mariananoo.

<sup>32</sup> Miqi qimaseenoo miqanda sipaki akaraqau. Akaramafufanoo ufai taikanau.

<sup>33</sup> Sipaki kaqi marusa misa mina qafamaseeqa naaquqoofaqa Yisuna oorinni anireeqa noorindari mapamufufaqa Yisuna amooqiqa qiqau. Kuqaa anee Anutuna amaaku mariananoo qiqau.

*Keenesareeta maqannaasa auriraua andeeqannisanau.*  
(Mak 6:53-56)

<sup>34</sup> Misa sipaki nammari dinni afainni taqakufaqa Keenesareetee maqu- sai oonu raqau.

<sup>35</sup> Mi maqusaanaa fasiqauqa oonuree mina oori qafamaseeqa maafa auruasa andeeqee marifa qimaseeqa ufa quqasoofanoo maqa maqa maqusa maqusa ufa finau. Aurimarusa aiqama suqeeqeeqa Yisufunnai quqau.

<sup>36</sup> Aurimarusa misa anireeqa maasa moomoosa marida Yisufa sia maasa aiqama andeeqaqisaandora qamunna atikai amanee maasa kaqi auqaananoo aurirafa taikaannoo fee qufanoo Yisufa eedoo qimasooafaqa mina qamunna ati auqamasoosa aurirafa aiqama taikkeenoo amiqi uqan- nammannisanau.

## 15

*Sia nisaauqirai narana noonara ufa kambiqanau.*  
(Mak 7:1-13)

<sup>1</sup> Farisai amaana qimarusa faqa Mooseena sandufa irimarusa faqa Yeerusareendari Yisufa maruqoo irammiriqau.

<sup>2</sup> Nanaree ani faiqi namu ooqeenasa faiqí firaasa sandufa rukiee fee sia narana nisaauqusee nee fee.

<sup>3</sup> Yisufa iriseenoo qimanniminau. Innee faqa nanaree Anutuna sandufa rukiassee fee inneeqa sandufa kai afeekaikidee.

<sup>4</sup> Anutufa maa sandufana quqanau. Inneeqa ninausa nikausara اساساماندهه امیقیداقا میسا نوقو ۇقەرااقا. Kaifaa moo quqanau, faiqí moo fannoo narí anoona akoonara manda ufa qinanoo arusaina kuquannoo.

<sup>5</sup> Anutufa mifa miqi qimasoofaqa innee maaqi qimasee mi ufana moomau fimariafanoo. Faiqí moo fannoo mina anoofa akoofa sarauida mandaikida amiqiannee qinna sandufanara doo qinee Anutuna amiseeqa sia ani amana amianaaura. Miqi qimaria fasiqa aanaaseesara innee doo andeeqaidammi- afoo qimariafanoo mifa narí anoofa akoona sia dadaaqianifeera qidaqa aagee mariafanoo.

<sup>6</sup> Miqi kai mandee fifau inniqa ufa fannoo Anutuna sandufa arimari- afanoo.

<sup>7</sup> Innee kaaqa ufa qimannimisaida maqandanai manda oosana maraqan- uasa. Anutuna tamummaqara fasiqa Eesaia, kuqaa uqanna inniara qi- masee akara rinau. Mifa maaqi qinai.

<sup>8</sup> Maa maqannaasi fasiqa anaaseesa nifauru fannoo kai unnaqimasee qini duqu uqeereemariasa, nimuqusa kaqinni ubeekaraura mariafanoo.

<sup>9</sup> Misa faiqí qimaria sandufana qumaree unnaqimasee Anutuna sandu- fammifoo qimaseeqa faiqí anaasee naamuqaqidaqa. Miqi qimasaidaqa Anutunara innaaru qifanoo siammiriannoo.

Tamummaqara fasiqa Eesaiaafa inniara miqi qimasee akara rinau.

*Nookiqari urimari mandufafa faiqí putaamma nimaqaidanoo.  
(Mak 7:14-23)*

<sup>10</sup> Miqi qimaseenoo Yisufa faiqí anaasee aiqama naaramaseenoo qiman- ninimau. Farisai amaana ufa qimariasa narí faiqí namuara sia nisaaqusee neeafoo qunara qimanniminau. Iriaqa, innee maa ufana oosana iriaqa.

<sup>11</sup> Nooki fimari naranainainafa sia faiqí putaamma nimaqaidanoo. Nooki qari urimari mandufafa mifa faiqí putaamma nimaqaidanoo.

<sup>12</sup> Miqi qimasoofaqa mina faiqí namu anireeqa qimamiqau. Sia fee iridanee. Farisai amaana ufa qimariasa misa ani ufa iriseeqa noori runidammia.

<sup>13</sup> Misa miqi qufanoo Yisufa qimanniminau. Aiqama ainaina innaarunai qikoofa sia ummaqu ainaina moo fannoo qummaquqaifanoo Anutufa rarakuannoo. Sia misara rufiaaqa, Anutufa rarakuannoo.

<sup>14</sup> Saina misa kaqi mariaqa. Misa nifu qimbarausa nisaadaki mariasa. Afu qimbarafa kai afu qimbarana asaadakinoo fifi inoo aiqamaqara kai madikaki aqufifaranoo.

<sup>15</sup> Peeteeroofa qinai. Maa quandara ufana qiannana qimaqiminaqa irianaaura.

<sup>16</sup> Yisufa iriseenoo qimaminau. Aneenna faqa irirana siai fee maridanee.

<sup>17</sup> Aiqama ainaina ooki quqasaanoo aranandaki ooqureenoo umiqaree fimarinara sia fee iridanee.

<sup>18</sup> Aiqama ookiqari urimari mandufafa amuqusakiqari uridanoo. Mi mandufausa kai faiqí anaasee putaamma nimaqaidanoo. Mi ufanara qidaqa.

<sup>19-20</sup> Amuqusakiqari manda irirana faqa faiqí narirana faqa moona anaasee maree mariafa faqa maanaaqa kumaara rarisee mariafa faqa um- muari mariafa faqa fifau akaru qimasee quandasee qimariafa faqa aqoon- nanara manduqaqiranara faqa mifauqa kai faiqí putaamma nimaqaidanoo.

Sia nisaaqumaseeqa narana neemariafa sia mifa faiqí anaasee putaamma nimaqaidanoo.

*Anaasee moo fannoo narí araamunara andeeqaqisaaniffee qimaseenoo sandanainai qimarinau.*

*(Mak 7:24-30)*

<sup>21</sup> Yisufa miqooqari Taia maqa maaqa faqa Sidoonna maqa maaqa faqa marutinai finau.

<sup>22</sup> Miqooqari Kannaana maqannaa anaasee fannoo aanaamuru anaasee anireenoo Yisuna qimaminau. Anee Dafidina ati karaambaiqa mariananoo. Anee qiniara amuqusiani. Qini qiraamuna ooqeena aakinoo marifaqa ooqeena fannoo maqee maqee qini qiraamuna mara furufari marifaqa aurirana amimarifaqa minara ani qimamidaqa.

<sup>23</sup> Yisufa iriseenoo sia irinoora foora kaqi finau. Mina faiqi namu anireeqa Yisuna fukifaaki qiqau. Anee mina aqiqaa maqee maqee mifa maasara faaqari marifanoo qikooqaidanoo.

<sup>24</sup> Misa maaqi qimasoofanoo Yisufa qimanniminau. Dapikamambiqa Isaraee maqannaa sipsipara foora mariasa, misara kai dadaaqirara qumidaqa.

<sup>25</sup> Qimasoofanoo mi anaaseefa mina oorinni ani ooqumarifufanoo qiki raqaida qimaminau. Karaambaiqa anee qini dadaaqia.

<sup>26</sup> Yisufa iriseenoo qimaminoo qinau. Kamaa suqasee faiqiuqaindi nimiraree qimasee sia quandaki faini nimia, sia mi oosanafa miqinoo maridanoo.

<sup>27</sup> Qimasoofanoo mi anaaseefa qinau. Kuqaa qiananoo. Kuqaa ani dadaaqira ainaina Isaraee maqannaasaindi maridanoo. Kuqaa qinee moo maqannaasa fainiara foora maridaqa. Anee iria, faini fannoo narí akoofa kamaa naida kakasamasaina andaana suqunaidaqa. Anee andaana kai qiminanoo qini qiraamuna dadaaqiani.

<sup>28</sup> Yisufa mi ufana iriseenoo qimaminau. Imboo maa anaaseeqo Anee qinisaa irirana rusirana firaafa marianafa. Anee aneenna innainaina mifa kai kambiqaanoo. Miqi qimasoofanoo mi anaaseena araamuna mikari kai nianai marunnai ooqeena taikasoofofanoo mi manaaqafa amiqinoo marinau.

*Yisufa moomoo aurirausa andeeqannisanau.*

<sup>29</sup> Yisufa miqooqari findimeeqeenoo Kariree nammari afaiqara ooru finoo aaganai akaranau. Akaramafufanoo ooqu marinau.

<sup>30</sup> Faiqí anaasee qafamasee moomoosa mina afaqee ooru fiqau. Misa niku arirutimarusa faqa misa nifu qimbarausa faqa niku eendirausa faqa sia ufa qusa faqa oosana oosana teeromaree marusa faqa maree oorureeqa Yisuna aikusaqa quqasoofanoo mifa aiqama misa aurirana andeeqa taikan-nisanau.

<sup>31</sup> Faiqí anaasee mina qafamaseeqa naaquqanau. Sia ufa qusa ufa qufafa niqafamaseeqa arirutimarusa nimarufaqa niqafamaseeqa nifu qimbarausa faqa nifu maqasoofaqa niqafamaseeqa maa faiqi anaaseesa ooqai mandaikimarusa maqee amiqiqa maridaqa misa niqafamaseeqa naaquqoofaqa misa aiqama Isaraee maqannaa Anutunara asasiqau.

*Faiqí anaasee kafaa moomoosa narana niminau.*

*(Mak 8:1-10)*

<sup>32</sup> Yisufa narí faiqi namu naaramasee qimanniminau. Qinee maa maria fasiqa anaaseesara qimuqusifaqa narana sia marifaqa qaaramoo faasaana mariaasa. Qikoo misa fifau niqiqarara aanai kudoosaapee foora.

<sup>33</sup> Mina faiqinamu iriseeqa qimamiqau. Yaqoo fee narana marinaqee misa nimianauree andandakinai marifaqa moomoosa mariafaqa.

<sup>34</sup> Yisufa iriseenoo irammirinau. Naquma feemu fee innee maqee idee qufaqa misa qiqau. Qisauku dinni taikasee dinni ani qaaraqanda marasee feemu marifaqa noodaanna faqa kaqikaafa qaaraqanda marifaqa.

<sup>35</sup> Mifa iriseenoo faiqí anaasee aiqama maqasaa oqumariaqee qufaqa oogu mariqau.

<sup>36</sup> Ooqu marifufanoo Yisufa feemu dinni qisauku taikaseenoo dinni ani qaaraqanda maraseenoo (7) mi feemuna faqa noondaana faqa maraseenoo Anutuna dufi dufi qimaseenoo ruqi ruqi maseenoo narí faiqí namu nisaukuki quqasoofaqa qumareeqa faiqí anaasee nimiqau.

<sup>37</sup> Faiqí anaasee noofanoo nimuaquqinau. Nimuaqumambufaqa Yisuna faiqí namu andaanauqa suqeeqee uqaki riqau. Dinni qisauku taikasee dinni oonu qaara marasee uqa (7) qumbiqaqau.

<sup>38</sup> Faiqí neemarusana ooni saqari auqiga maqi tauseena (4,000) mariqau. Anaasee faqa faiqí faqa ootupamafufanoo meeraqoo marinau.

<sup>39</sup> Yisufa misa niqiqamaseenoo sipaki keeqafinoo Makadana moo maqusanai finau.

## 16

*Yisufa faiqí sia amana auqaaqaa ira ainainara qaoo qinau.*

*(Mak 8:11-13; Ruk 12:54-56)*

<sup>1</sup> Farisai amaana ufa qimarusa faqa Sadikai amaana ufa irimarusa faqa misa Yisunara kuqaa Anutuna amaaku fee maridanoo fee qianeera uneemaana qimasee amanammasee qafaaneera qiqau. Fira ainaina mookira ainaina innaarunaindaraa ainaina uqaqifiqasainaqa qafamasee kuqaa aniara Anutuna faiqí fee qianauranoo.

<sup>2</sup> Yisufa minara iriseenoo qimanniminau. Eendifanoo innaaruna taatuqeendifaqa duna ufidaannoommifoo qidaqa qimariafanoo.

<sup>3</sup> Iqaqai fanoo kananaana asukuna arifaqa aaku rirarammifoo qimariafanoo. Innee innaaruna qafaidaqa irimariafanoo maqee maa aukuanne qinee marunna aukuanne innee mina qafamasee sia irimariafanoo. Innee nanaree miqi qimariafaqee.

<sup>4</sup> Mandainaina mareemariasa faqa maqee maqee inneeqa Anutuna minnisee mariasa miqi mariasa innaarunaindaraa ainaina faiqí sia amanaiki maria ainaina auqamasee uqaqifiqainaqa aniara kuqaa mindaraa fee qianauree qimariafanoo. Qinee fuka innaarunaindaraa ainaina sia uqanifiqaanaura. Nauraafa ooqai kuqu fasiqafa Yoonaanaindi mifa kai kaqi maridanoo mifa qaaramoo faasaana faqa qaaramoo eendaki faqa noodaanna firaana aranandaki marinau. Mi ufana qimaseenoo quqasee finau.

(Yisufa narí kuqufinoo qaaramoo eenda faqa faasaana faqa madikaki marianinnanara quandaseenoo miqi qinau.)

*Unna ufara manda ooruku anoonara foora eerairiaqa.*

*(Mak 8:14-21)*

<sup>5</sup> Yisufa narí faiqí namufaqa nammari faruma dinnafainni kanuqaki oonu raqau. Mina faiqí namu feemuara randoosia qiqau. Oo doo aunusee kaqi samu aniqau.

<sup>6</sup> Miqi qimasoo fanoo Yisufa qimanniminau. Innee Farisai amaana ufa qimariasa faqa Sadikai amaana ufa irimariasa faqa misa atiqee mari ooruku anoonara foora rufieeqa eerairiaqa.



<sup>7</sup> Misa iriseeqa narí qimami narí qimamimasee qiqau. Oo maasa feemuara randaunanoo mifa ooruku anoonara qidaqinoo.

<sup>8</sup> Yisufa mi ufana iriseenoo qimanniminau. Innee qinisaa irirana rusirana sia amana maridanoo. Innee nanaree sia feemu maraanara narí qimami narí qimami qidee.

<sup>9</sup> Innee sia fee iridee. Moodaannai qisauku (5) feemu faqa faifa tauseena (5,000) fasiqa noonara, doo aunidee sia fee iridee. Mikari naquma ataraasa uqa fee riqau.

<sup>10</sup> Kafaa moo kari moodaannai qisauku taikasee dinni oonu qaaramarasee (7) feemu faqa maqi tauseena (4,000) fasiqa faqa noonara doo innee mina faqa aunidee sia fee iridee. Mikari naquma ataraasa uqa fee riqau.

<sup>11</sup> Innee nanaree sia qini oosana iridee, sia qinee feemuara qunaqa. Farisai amaana ufa irimariasa faqa Sadikai amaana ufa qimariasa faqa misa manda oosana rufiaaqee qimasee ooruku anoonara qiga.

<sup>12</sup> Misa mi ufana iriseeqa mi ufa oosana doo naaqooki iriqau. Mifa sia ooruku anoonara eerairiranara qinau. Farisai amaana ufa qimariasa faqa Sadikai amaana ufa qimariasa faqa misa manda irirana uqannifiqaranara quandasee ooruku anoona kikiqa usinau.

*Peetooroofa Anutuna asauku mundiranara kooroinau.  
(Mak 8:27-30; Ruk 9:18-21)*

<sup>13</sup> Yisufa Seeseria Firipai maqa maaqaki oorureenoo narí faiqi namu irammirinau. Faiqi misa faiqi nimaaku qiniara nana fasiqee fee qidee.

<sup>14</sup> Misa iriseeqa qimamiqau. Moo fannoo aniara Yoohaneefa nammari nimimarufa kuqiranakiqari findifinoo marifa maridanoommifoo qidaqa. Moo fannoo tamummaqara fasiqa Eeriaa fee qidaqa. Moo fannoo tamummaqara fasiqa Yeerimaiaa fee qidaqa. Moo fannoo Anutuna tamummaqara fasiqauqakiqari moo fannoo fee qidaqa.

<sup>15-16</sup> Yisufa misa ufa iriseenoo quandafinoo narí faiqi namu iramman-nimaqanau. Innee qiniara yafasiqanee fee qidee qimasoofanoo Simoona moo auqu Peetooroofa Yisuna qimaminau. Anee ooqai Anutuna asauku mundirafa mariananoo anee kaqi marira Anutuna amaaku mariananoo.

<sup>17</sup> Yisufa iriseenoo narí qimaminau. Oo Simoona Yoonaana amarana amaaku, maqasaa fasiqa sia miqi qimasee ani qimamiaqini. Innaarunai qini qikoofa mifa kai ani aqoosaa rinoo. Minara anee asasimarianafa mariananoo ani qimaminoo.

<sup>18</sup> Qinee ani qimamidaqa. Anee Peetooroofa ani auqu oosana oonifa mariananoo. Qini qikoofa qiniara uqafiqainasaa mi ufafa firaa ooniar foora marinara qinee mi firaa ooninasaa qini amaana maqa usakaanaura. Qini saqariki mariasa qumareeqa qeeqa amaana maqaikamandaanaura. Mi ooninasaa qini maaqa usakaanaura. Kuqirafa sia amana mi amaana maqana rafaqa fuannoo.

<sup>19</sup> Peetooroofa, qinee innaaruna kooqi atuasee keegeemariana kiqa anoonara foora ani amianaura. Anee maa maqanasaa moo ainainara anee iriseenana mandaikammi ifoo qinaqa qinee faqa innaarunnai miqi kai iqa mandaikammiifoo qianaura. Anee amiqi ifoo qinaqa qinee faqa innaarunai miqi kai iqa amiqimmi ifoo qianaura.

<sup>20</sup> Miqi qimaseenoo Yisufa narí faiqinamu qimanniminau. Afeekaikamasee qumee uqannandaqa. Qinee ooqai Anutuna asauku mundira fasiqa marunasa minara sia moosa qimannimiaqa, kukeeqaqa.

*Yisufa narí kuquaninnanara kooroo inau.*  
(Mak 8:31–9:1; Ruk 9:22–27)

<sup>21</sup> Mikari oosanarasee miqooqari narí kuquaninnanara qimannimi maree finau. Mifa Yeerusareenni ooru firanara faqa qimanniminau. Faiqí firaasa faqa amaana maqasaa rakisimarusa faqa Mooseena sandufa uqanifiqee marusa faqa misa fira dinee miqoo narí Yisuna amiranara qimanniminau. Kuqariranara faqa qaaramoo faasaana findi fuaninnanara faqa qimanniminau.

<sup>22</sup> Peetooroofa maa ufana iriseenoo Yisuna kaqinni mareeqee quqaseenoo aqooki qaoo qinoo qimaminau. Oo karaambaiga, saa. Ani kuqiranara Anutufa qaoo qiannoo maa ainainausa siamma ani arifaranoo.

<sup>23</sup> Yisufa iriseenoo quandaseenoo Peetooroona qimaminau. Sadanna see maree fua, qinaaqiannai aiqaree fua anisaa qikuamaki aqufuanoo. Anee sia Anutuna irirana maree marianafa, fifau faiqí irirana maree marianafa.

<sup>24</sup> Qinee aunirira saqarisaa kuquanaura. Faiqí anaasee moo fannoo qini iriranamau finafa miqi kai iannoo. Narí marira ainaina mai uturuqu quqaseenoo qiqa duqusaara qiqa ufasaara, qiqa daanna ramasee kaqi kuqariranaki keeqaani.

<sup>25</sup> Moo fannoo narí kaqi mariranara tatamaqianinafa narí kaqi marirana taikaannoo. Moo fannoo qiniara narí maaqoo marirana minnisainafa mifa narí kaqi marirana kasooqagee paquriannoo.

<sup>26</sup> Faiqí moo fannoo aiqama maqa maaqa nariara maraseenoo aiqama minaki mari ainaina nariara kai afapitee marifa kuqinoo narí aunduraindaraafa kuridiranaki finanoo narí uriqaraidanoo fee. Oo sia uqanna uriqaraidanoo. Kuqiranakiqari mi fasiqafa nana feefauru Anutuna amiseenoo kaifaa narí ainainannoo fee narí aunduraindaraana idakinaana kaifaa maraannoo fee. Sia amana maraannoo.

<sup>27</sup> Minara qinee faiqí nimaaku qumuanaura, qini qangiroo namufaqa qini qikoona kaaqa arenaranaki qumuanaura, aiqama faiqí anaasee misa saika augee mariana akiaqara nimirara qumuanaura.

<sup>28</sup> Kuqaa anoona ufa qinee qimannimidaqa innikiqari faiqí qaaramoo sia kuqirai kaqi marifaqa qinee faiqí nimaaku qeeqa innaaruna ququsa uriqarara ququsa namufaqa inni nifusaa qumuanaura.

## 17

*Aaqanasaa Yisuna afaaqa mookinoo kaaqa qamaqinau.*  
(Mak 9:2–13; Ruk 9:28–36)

<sup>1</sup> Miqi qimaseenoo qisauku dinni taikaseenoo dinni oonu moodaa marasee faasaana taikaseenoo Yisufa Peetooroona faqa Yameesana faqa mina akaqa Yoohaneena faqa minamusa nifiqeenoo aaqanai náriaraa naadumai ooru fiqau.

<sup>2</sup> Miqoo misa ooru roofanoo Yisufa moo afaaqa amiqira afaaqa maranau mina afiri suaniara foora kaaqa amaqinau mina qamunna faqa eekara aruqinau nifu qafoofanoo nifu faqa daroodaraa inau.

<sup>3</sup> Miqi masoofanoo ooqai taikaseeqa Anutuna faqa innaarunai maruqanda Mooseefa faqa Eeriaafa faqa akooqoo maqasaa misa nifusaa anireeqa Yisuna faqa ufa fiqau.

<sup>4</sup> Peetooroofa qafamasee Yisuna qimaminau. Karaambaiga, dufi dufi anee maasa qifiqee adiafaa irannai mai uruananoo. Anee qinaqa kaqikaa uiqaana maqa qaaramoo auquanaura. Anindi moo, Mooseenaindi moo, Eeriaanaindi moo.

<sup>5</sup> Peetooroofa kaqi qimarufanoo kaaqa qarana asuru fannoo aiqama rafaaga finau. Ufa moo, asurukiqari Yisunara qimanniminau. Maafa qini qimaaku qini kaaqa minara qimuqusidanoo. Qini didirafa minasaa maridanoo, mina ufa iriaqa.

<sup>6</sup> Yisuna faiqi namu mi ufana iriseeqa kaaqa rufieeqa noorindari maqasaa aqufiqau.

<sup>7</sup> Maqasaa mapamiqa marufanoo Yisufa anireenoo asauku misasaa mundinoo qinau. Findi fuaqa sia rufiaqa.

<sup>8</sup> Miqi qufaqa misa kaqi kaaqoo uqeerafufaqa murufi Yisuna kai qafaqau sia faiqi moo marinau.

<sup>9</sup> Misa miqooqari Yisuna saimbaqa aaqanaindari qumimarufanoo Yisufa maaqi qimasee afeekaikamasee qimanniminau. Innee aaqanasaa mee qafaa ainaina sia innee moosa qimannimiaqa. Qinee faiqi nimaaku kuqiranakiqari findi fuaqa miqoo kai qimannimiaqa.

<sup>10-11</sup> Miqi qimasoofaqa mina faiqi namu iraida qiqau. Maasa Mooseena sandufa uqannifiqee mariasa ooqeenaa tamummaqara fasiqauqa akara asaanarumasee moo fasiqara Eeriaana aanna ree marifa Anutuna asauku mundirana afunni aniannoo fee qidaqa. Misa yafasiqanaree miqi qidee qufanoo Yisufa qimanniminoo qinau. Misa kuqaa qidaqa. Eeriaana aanna ree marifa asauku mundiraua qini qifunni aiqama ainaina andeeqaani-feera indaaruu aniannoo.

<sup>12</sup> Qinee qimannimidaqa, iriaqa. Kuqaa Eeriaana aanna ree marifa qini qifunni doo aninoo. Aniroofaqa misa minara sia irirai nari iriranannai kai dapikamasoofanoo kuqinuu. Miqi kai mandee qinee faiqi nimaaku kaqikaqoo misasaa farindamaki aqufuanaura.

<sup>13</sup> Miqi qimasoofaqa mina faiqi namu iriseeqa Yisufa Yoohaneefa nam-mari nimimarunara Eeriaana kikiqa ususeenoo qidaqinoo qiqau.

*Yisufa qumureenoo kumaaraa aunduraki afaanna maruna afaqanau.  
(Mak 9:14-29; Ruk 9:37-43a)*

<sup>14</sup> Misa aaqanaindari qumureeqa faiqi anaasee suqiqa maruqoo qumuroofanoo faiqi moo fannoo Yisuna oorinni rufaidanoo ani aqoori saunara finoo tootoonasaa ooqu marifinoo qiki raqaidanoora foora Yisuna qimaminuu.

<sup>15</sup> Oo karaambaqa, qini qimaakuara amuqusinana dadaaqa. Mifa fuseenasana arimarifaqa amiqimmasee auri marifaqa. Maqee maqee kaqi idaki aqufidanoo maqee maqee nammariki aqufidanoo.

<sup>16</sup> Qinee qeeqa qimaaku afiqeeqa ani faiqi namu mariaqoo munusaunaqa sia amana misa mi aurirana taikaafaqa, minara ani qimamidaqa.

<sup>17</sup> Yisufa mina iriseenoo aiqamausa qimanniminuu. Innee qini ufasaa irirana rusirafa siaisa mariafanoo kaaqa foomboo rimariasa mariafanoo. Qinee kisaagasaa inniki marunaqa innee sia dauni irimariafaqa. Kisaagasaa fee ubiqafi inni manda oosana ummaara maraqa fuanauree. See mi kumaaraana maree mai aniaqa qufaqa miqimmiqau.

<sup>18</sup> Yisufa mi afaannana aqiqoofanoo fufanoo mi kumaaraana mikari kai miqoo kai andeeqa aisanuu.

<sup>19</sup> Yisuna faiqi namu kaqikaqoo marikiqa oonurandee qumee kai anireeqa Yisuna qimamiqau. Maasa nanaree afaanna aqiqaunanoo fee sia finoo fee.

<sup>20</sup> Yisufa qinuu. Innee qinisaa irirana rusirafa kaqikaafa marinara kai miqiafanoo. Qinee kuqaa anoona ufa qimannimidaqa. Inneeqa irirana rusirafa maqana qaqaama miqirafa kaqikaafa marinaqau maa aaqannara

qifanoofau meeqai fini. Innee miqi marifaqau aiqama ainaina amanammi-foo qini.

*Yisufa kafa nari kuquaninnanara qimanniminau.*  
(Mak 9:30-32; Ruk 9:43b-45)

<sup>22</sup> Yisuna faiqi namu Kariree maqa maaqai moodaarunna moodaasaa suqiga maridaqa nimarufanoo Yisufa maaqi qimasee qimanniminau. Faiqi nisaukuara qinee faiqi nimaaku fuanaura.

<sup>23</sup> Misa qini kuqa darifaqa qaaramoo faasaana kaqi mariqa findi fuanaura. Miqi qimasoofaqa Yisuna faiqi namu minara oonumafi irufanoo nimuqusa mandaikinau.

*Amaana maqa takisa nimimariana noodaanna ookinaana marasee niminau.*

<sup>24-25</sup> Misa Kapeeranaumma maqusa oonuroofaqa amaana maqa takisa maree marusa misa Yisunara nisauruseeqa Peetooroofa maruqoo oonuree iraidaqa qiqau. Ani firaafa amaana maqa takisa sia fee aqidanoo fee qimasoofanoo Peetooroofa eeo aqidanoo qinau.

Miqi qimaseenoo kaqikaqoo maaqaki keeqoofanoo Yisufa mina moo auqu ramasee qimaminoo qinau. Simoona maa maqanasaqaraasa misa oosana maaqimminoo maridanoo. Moo maqannaasa namuqaa afeekaikamasee narirarammasaida namuqaandi kai fee takisa maraida fee, narinidi nari maqannaasaindi fee kai maraidee qufanoo Peetooroofa mina iriseenoo qinau.

<sup>26</sup> Namuqaandi kai maraidaqa. Nari maqannaasa uriqararausa mari-afanoo sia uqanna misaki maraidanoo.

Yisufa iriseenoo qinau. Kuqaa qiananoo, miqi marifaqa uriqararausa niku nisauku nifaaqa quqasee maridaqa. Maasa uriqararana Anutuna aiku asauku marunasa marida. Nanaree fifau Anutuna amaana maqa takisianaree.

<sup>27</sup> Sia niminaqa maasara noori runifoora. Saina anee tafa mara maree nammariki ooquree aquseenana indaaruaqa noodaanna rarisamaseenana oo raqaseenana qafaa. Moodaa munnimma minaki mariannoo. Anee qiniara faqa aneennara faqa mi munnimmana mareeqeena amaana maqa takisa maree mariasa niminanoo ufa taikaani.

## 18

*Faiqi aanaaqiara maqi reendenirafa innaaruna ququsaki uriqararafa mariannoo.*

(Mak 9:33-37; Ruk 9:46-48)

<sup>1</sup> Mi aukuanna mina faiqi namu Yisufuqoo aniree irammirida qiqau. Innaaruna ququsaki yafee uriqararafa maridanoo fee.

<sup>2</sup> Mifa iriseenoo faiqi aanaaqi moo miqoo maruna aaroofanoo aniroofanoo mareeqeenoo nari faiqi namu qambaana qiqaseenoo qimanniminau.

<sup>3</sup> Qinee kuqaa anoona ufa inni qimannimida. Innee sia oonu quandakinaqa sia kafa aanaaqi aanaaqi kammafinaga innaaruna ququsaki sia fifaranoo.

<sup>4</sup> Moo fannoo nari kai maa kaqika faiqiara foora fifimandeenoo mari-nafa mifa innaaruna ququsaki uriqararafa mariannoo.

<sup>5</sup> Yafee moo fannoo qini ufara iriseenoo quandafinoo faiqi aanaaqi maaqaairana اساسammasee aqoondikinafa mina faqa qini faqa miqi kai inoo qiqoondikiannoo.

*Yisuna mandaaqa saannanakinaana faiqi aanaaqi mandainainaki quqasainafa numoo mariannoo.*

*(Mak 9:42-48; Ruk 17:1-2)*

<sup>6</sup> Faiqí moo fannoo qinisaa atooqee mari kaqikaa faiqina mandoosana uqafiqainanoo mi faiqifa saamurinanoo, mi fasiqana mi mandoosana uqafiqeemari fasiqana mina numoo uriqaranoo mariannoo mandainainaki maridanoo. Faasai mi fasiqafa ooni firaatia qumareenoo narí anukaki ususeenoo nammariki aqufinoo narí kai narí arinoofau narí numoo oorudupinoo mariqini. Mi faiqi anaqina manda oosanna uqafiqainanoo mi numoofa firaafa mariannoo.

<sup>7</sup> Maa maqanasaa manda ainaina moomoo minaki mariannoo. Mi manda ainainna aukuaana aukuaana sia taikaannoo kaqi mariannoo, faiqí mara quqaidanoo. Minara numoo firaatia mari ifoo qidaqa qimudaqo qidaqa. Mandainaina oosana oonu rarisainafa mi fasiqanaki faqa firaana numoo tia mari ifoo qidaqa. Minara qinee qimudaqo qidaqa.

<sup>8</sup> Ani asauku fannoo fee, aiku fannoo fee ani ani rarisameeqeenoo manda oosanaki quqemarinnana mina ateeka aqua. Aiku asauku siainafa marira maqaki keeqafinana amana marinnaranoo. Aneenna aiku asaukuara amuqusinana kaqi manda oosana marasee mari inafa mifa naaruara marira idaki rafuseeqee aqusainafa sia amana marinnaranoo. Mandaikamminnanoo.

<sup>9</sup> Ani afu aaqoo fannoo fee ani rarisameeqee manda oosanaki quqaidanoo fee mina diqi aqua. Anee moodaa afu aaqoo faqa kaqi mariranaki keeqarafa amana marinnaranoo. Aiqama afu aaqooqara kaqi maridanoo ani rafuseeqee idaki aqusainana sia andeeqeenaranoo. Mandaikamminnanoo.

*Sipsipa aanaaqi auianoo mari quandara ufa.*

*(Ruk 15:3-7)*

<sup>10</sup> Innee aufariaqa. Sia uqanna faiqi aanaaqi moo fannoo maaqirafa akoo uqannaqaani. Innee mi oosannara eerairiaqa. Minara qimannimi-anaura. Innaaruna maqusai qangiroouqa maqasaaqaraa faiqi aanaaqi misa naadu naadu rakisinnimaqara qangiroouqa qini innaarunaindaraa qikoona oorisa kikiqidaqa nári faiqi aanaaqi maa maqanasaaqaraasa rakisinnimaqaranara Anutuna qimamidaqa mina oorisa maridaqa.

<sup>12</sup> Innee maqiana ufana nana irarane irifaree. Faiqí moo mina sipsipa moomoo marida moodaannai qisauku fasiqa arusee marufanoo misakiqari moodaa kai auianau. Misasaa rakisi maru fasiqafa aiqama sipsipa anusaa suqu quqaseenoo misakiqari moodaa auianoo marunara randarara finau. Qinee kuqaa ufee qida fee. Kuqaa, aiqama sipsipasaa rakisi mari fasiqausa miqifaranoo.

<sup>13</sup> Mi fasiqafa mi sipsipana paqurimaseenoo kaaqa minara asasiannoo. Moomoo sia auianoo marisara mana maniannoo.

<sup>14</sup> Miqi kai mandee qini innaarunai qikoofa faiqi aanaaqi moo kuridiranara akooqaidanoo. Aiqama uqanna kaqi naaruara mariranara innaarunai nikoofa aididanoo.

*Ani akaqaafasaa ani mandaikammamaqaina ufafa.*

<sup>15</sup> Ani aqoonafa ani mandaika mamaqainana anee mi finnai oonuree narí mandoosanara qimamia. Inneeqara kai mariaqa sia moo fannoo mariani. Mifa ani ufa irisainana doo anee aneenna aqoonnana kafa aqoondikina marinnaranoo.

<sup>16</sup> Mifa ani ufa sia irinana anee Mooseena sandufamau finana faiqí qaara fee moodaa fee nifiqeenana aqoonna finnai fua. Misa maasa faqa ani

mandainaina qafee fee qiaqeera, ani dadaaqiaqeera ani ufa anoonaikiani-feera.

<sup>17</sup> Mifa misa ufa faqa sia irinana amaana maqaki keeqeemariasa qimannimiaqa. Amaana maqaki keeqeemariasa ufa sia irifaqa aamina maqannaara foora mamaqaa sia mina faqa ufa qia, manda takisa maree maria fasiqausara foora fidiqaa mamaqa.

*Moo ainainara Anutunara innaaru qinanoo amiannoo.*

<sup>18</sup> Qinee anoona ufa inni qimannimidaqa. Innee maa maqanasaa moo ainainara iriseenana mandaikammiifoo qiafaqa qinee faqa innaarunai miqi kai iqa mandaikammiifoo qianauro. Innee amiqimmiifoo qiafaqa qinee faqa innaarunai miqi kai iqa amiqimmiifoo qianauro.

<sup>19</sup> Qinee kaifaa moo ufa qimannimidaqa. Qaara fasiqa maa maqanasaa maqasaaqaraa nana ainainaree moodaaqoo naundura quqasee iraifanoo innaarunai qini qikoofa mi ainainna nimiannoo.

<sup>20</sup> Yai fee qaaraqanda fee qaaramoo fee qini duquara iriseeqa suqiqa misa qambaana qeeqa faqa qumee maridaqa inniki marida dadaaqianauro.

*Mandainainira faiqiara quandara ufa.*

<sup>21</sup> Qimasoofanoo Peetooroofa anireenoo qinau. Oo karaambaiqa naquma kari fee qini qiqoonafa manda oosana qiminaqee mina akiaqara minnaisaanauree. Moodaa qisauku taikasee dinni oonu qaara marasee kari fee minnaisaanauree.

<sup>22</sup> Yisufa qimaminoo qinau. Sia moodaa qisauku taikasee dinni oonu qaara marasee kari fee qidaqa. Moodaa fasiqa aiku asauku taikasee moo fasiqa oonu moodaannai qisauku taikasee fasiqa aiku asauku miqumma kari aqoonnana manda oosana akiaqara minnaisaaneera qidaqa. Figaramasee moomoo kari minnaisaaneera qidaqa.

<sup>23</sup> Minara qinee moo ufa qimamianauro. Innaaruna maqusa maaqimminoo maridanoo. Firaa rakisirafa moo marinou. Mi rakisirafa nari dadaaqi maru fasiqausa suqusee ufaasu nimiafanna munnimmana andeeqaanau-ree qimasee suqinau.

<sup>24</sup> Suqusee ireemarufanoo misakiqari moo fannoo nari karaambaiqa munnimma moomoo figaramasee nariara firaa munnimma moomoo rafaafinau.

<sup>25</sup> Mi fasiqafa sia amana nari karaambaiqa amufanoo nari faiqi namu qimanniminou. Moosa mina anaqa faqa faiqi namufaqa nimisee innee minasaaqaraa feefauru mareeqee qimiaqa, mi munnimmana akiaqariani.

<sup>26</sup> Mi fasiqafa iriseenoo amuqusufanoo oorindari maqasaa rupaita mafufanoo qiki raqaidanoo iranou. Oo qini karaambaiqa, qiniara kasooinaqa qinee aiqama ani munnimma amianauro.

<sup>27</sup> Mina karaambaiqa iriseenoo amuqusufanoo mina aika tatuseenoo idukuseenoo quqaisanau.

<sup>28</sup> Mi dadaaqira fasiqafa raudamakufanoo maqusai ooqureenoo aqoonna dadaaqira fasiqa qafeenoo anukaki qumareenoo qinau. Qinee munnimma kaqikaana amiafannana kaqi kaqi mara qimia.

<sup>29-30</sup> Miqi qufanoo mina dadaaqimaru fasiqafa maqasaa aqufinoo reen-deenamandee qinau. Oo qiniara kasoo inaqa qinee ani munnimma amianauree qimasoofanoo mina aqoonafa afeekaikamaseenoo mi fasiqana karafusaki quqanau. Qini kaqikaa munnimma qiminaqa idukuane qinau.

<sup>31</sup> Karafusaki quqasoofaqa mina aqoonausa qafuofanoo nimuqusa kaaqa mandaikufaqa misa nari karaambaiqinnai oonuree aiqama mifa auqoo oosana oosanara qimamiqau.

<sup>32</sup> Karaambaiga fannoo iriseenoo mina dadaaqira fasiqa aaramaseenoo qimaminau. Anee manda dadaaqira fasiqa mariananoo. Anee qini reendeenamasee qima qimianaqa ani aika aiqama tatu aqiqa.

<sup>33</sup> Naqaa fee ifanee sia fee anee miqikai inana aneenna aqoonnanara amugusinanee. Qinee aniara miqunandee iaqaana.

<sup>34</sup> Miqi qimaseenoo aranaqoofanoo arira maqaki quqasee qinau. Misa miqoo ani ariisaifana kaifaa qini firaa munnimma qiminaqa idukuanaura.

<sup>35</sup> Yisufa mi ufana qimaseenoo nari faiqi namu maaqi qimasee qimanniminau. Innee faqa sia inneeqa niqoonausa inneeqa naundurannoo misa nikiqara mi aikana sia tatiqa aunifanoo qini innaarunai qikoofa faqa miqi kai inoo inni aika sia tatuannoo.

## 19

*Yisufa faiqi anaasee nariara nariara minnisaranara qimanniminau.  
(Mak 10:1-12)*

<sup>1</sup> Yisufa maa ufausa taikaseenoo Kariree maqa maaqa minniseenoo Yudeea maqa maaqai ooqu finoo Yooradanna nammari dinni afainni marinau.

<sup>2</sup> Miqoo oonu marufaqa faiqi anaasee moomoo afaqee oonu roofanoo misa aurirana taikannisanau.

<sup>3</sup> Farisai amaana ufa qimarusa misa miqoo anireeqa Yisuna ueeqasee amanammasee qafararee qimasee qimamiqa qiqau. Amanee faiqi fannoo oosana oosana ainainara qimaseenoo nari anaqa minnisaannoo fee, Mooseena sandufa rukiaseenoo fee miqiannoo fee.

<sup>4</sup> Yisufa iriseenoo qinau. Sia fee innee Mooseena akara asaanaridee. Oosana arooqooqari Anutufa oosana araseenoo misa auqinau. Faiqi faqa anaasee faqa oosanaraseenoo auqinau. Sia fee innee mi akaranara iridee.

<sup>5</sup> Anutufa minara maaqi qinau, qinee oosana arooqooqari faiqi faqa anaasee faqa auquafannanara faiqi nari anoona akoona minnisee nari anaqa faqa moodaanakikiannoo. Miqoo nariqa miqanda moodaa marifaranoo.

<sup>6</sup> Yisufa minara kaifaa qimanniminau. Miqanda sia qaaraqanda marifaqa moodaa amaqiara foora marifaranoo. Anutufa moodaanaki aquminafa sia uqanna faiqi idukuaqa.

<sup>7</sup> Farisai amaana ufa qimariasa mina iriseeqa qiqau. Mooseefa sandufa akara ruma quqaqoofa marida. Minnisara papiqa akara rumeeqee anaasee amisee aqiqa. Mooseefa miqi qimaqaifana Yisu anee naqi fee qidanee.

<sup>8</sup> Yisufa iriseenoo qinau. Inni irirana mandaikinara inni nimuqusa sia amaqi marifa afeekaikinoo amatooki marinara minara kai Mooseefa akooqee marufanoo inneeqa ninaaqara minnisaqee qinau. Indaaru kuradoo aukuana sia miqinoo marinau. Miqoo Anutufa miqandara apiqa mariaqee qinau.

<sup>9</sup> Qinee qimannimidaqa, faiqi yafee nari anaqa sia ummuarimari anaaseena andeeqara anaasee kaqi minniseenoo moo anaasee marainafa, mi fasiqafa qumuarammidanoo.

<sup>10</sup> Mina faiqi namu aniree qimamidaga qiqau. Faiqi anaasee miqiqa maridaqa amana faiqi nariqa kai maridaqa adeedaana mariaqaana. Maasa andeeqaidee sia fee andeeqaidee.

<sup>11</sup> Yisufa misa ufa iriseenoo qimanniminau. Faiqi aiqama maa inni ufa sia amana maraaqera. Anutufa miqianne qinausa misa kai adeedaana amana marifara, sia aiqama miqifaqa.

<sup>12</sup> Nifaandama itirausa misa maqookari kai nifaandama siaisa misa sia amana anaasee maraaqeera. Kaifaa akaqausa nifaandama itirausa faiqí kai nifaandama itinnimaqasoosa maridaqa. Misa faqa sia amana anaasee maraaqeera. Kaifaa anaasee siaisa moo, misa innaaruna maqusara kai irisee nariqa kai anaasee siaisa maridaqa. Andeeqasee marianauree qimasee Anutunara kai irisee miqidaqa. Misa faqa sia amana anaasee maraaqeera. Yafee mi sandufana amana marinafa mifa kai maraani.

*Yisufa faiqi aanaaqiuqa nifaaqooqa qinau.*

*(Mak 10:13-16; Ruk 18:15-17)*

<sup>13-14</sup> Misa faiqí anaasee, nári faiqí aanaaqiuqa moomoo nifiqee Yisufuqoo aniqau. Yisunara mina asauku misasaa munduseenoo innaaru qianifeera nifiqee aniqau. Yisuna faiqi namu faiqí anaasee nári faiqi aanaaqi farafara qiaafoo qimasee niqiqamasoofanoo Yisufa qinau. Saifaqa maree aniaqa. Sia rafaqafunnisaaga. Innaaruna maqusa miqirausaindi maridanoo.

<sup>15</sup> Miqi qimaseenoo narí asauku misasaa nikiaaga munduseenoo nifaaqooqa qimaseenoo findimeeqeenoo moosaa finau.

*Ainainafaqaa kumaaraa innaaruna aanara iranau.*

*(Mak 10:17-31; Ruk 18:18-30)*

<sup>16</sup> Faiqí moo fannoo Yisufinnai anireenoo qimamidanoo qinau. Qufasaa rakisirafa nana amiqira saika auqamamaqaananoo fee Anutufa innaarunai naaruara marirana qimiannoo fee.

<sup>17</sup> Yisufa iriseenoo qimaminau. Anee naqaa ifanee qiniara amiqira ainainara iraidanee. Moodaafa kai Anutufa mifa kai amiqirafa maridanoo. Sia moo amiqirafa maridanoo. Anee naaruara mariranaki keeqararee qidanee. Doo amana, anee Mooseena sandufa asaana rumasee mi mau kai fua.

<sup>18</sup> Miqi qimasoofanoo mi fasiqafa iraidanoo qinau. Nana sandufee maraanauree. Yisufa qimaminoo qinau. Innee sia kuqa naruaqa, sia faiqí anaasee ummuariaqa, sia ainaina ummuariaqa sia kootaki moosara unna ufa qiaqa.

<sup>19</sup> Aneenna anoona akoona nuqu uqeeraidana nimuqusa idaaqamman-nisaa. Anee aneennara amuqusianandee kai inana aqoonasara amuqusiani.

<sup>20</sup> Mi kumaaraafa iriseenoo qinau. Anee qianandee mi sandufausa doo aiqama maraqaunausa maridaqa. Nana saika fee moo faqa qinee auqamasaanoo fee Anutufa naaruara marirana qimiannoo fee.

<sup>21</sup> Yisufa iriseenoo qimaminau. Anee innaarunai atisaa kai mariananoo. Anee aiqama maraannee qimaseenana aneenna qumiasana aiqama mara mareenana moo atinai nimiseenana feefauru maraseenana kudifasiqauqa nimisainanoo ani qumiasana ani afeesara innaarunai mariannoo. Miqinana doo ania, qini faqa fua.

<sup>22</sup> Mi kumaaraafa mi ufana iriseenoo oori akooqamaseenoo finau. Narí ainaina moomoo marunara minara oonumafi iriseenoo oori akooqamaseenoo finau.

<sup>23</sup> Mifa fifufanoo Yisufa narí faiqi namu maaqi qimasee qimanniminau. Kuqaa ufa anoona ufa qinee qimannimidaqa. Faiqí moo fannoo ainaina faqaafa innaaruna maqa maaqaki keeqaneera anuqinnara mammaqamminnanoo.

<sup>24</sup> Qinee kafa qianauree. Amanee qoosa fannoo uka aamarai keeqaannoo fee. Sia amana fuannoo titiqiannoo. Doo miqi kai masee ainaina faqaa fasiqa innaaruna kooqiki keeqarara anuquannoo.



<sup>25</sup> Mina faiqi namu mi ufana iriqa tautiqa qiqa. Ani ufa miqinoo marinoo fee, yafee moo fannoo amana innaarunnai ooru fuannoo fee sia amana fuannoo.

<sup>26</sup> Yisufa quandafinoo misa nári nindafamasee qimanniminau. Faiqiki maa ainainnafa sia amana maridanoo. Anutufa aiqama ainaina amana marifa maridanoo.

<sup>27</sup> Peetooroofa iriseenoo qimaminoo qinau. Maasa qiqa. Maasa aiqama ainaina quqasaunasa ani faqa fidaqa. Minara Anutufa nana ainainee maasa qimiannoo fee.

<sup>28</sup> Yisufa iriseenoo misa qimanniminau. Qinee kuqaa anoona ufa inni qimannimidaqa. Fuka maqa maqa Anutufa kasooqagee auqusainaqa qinee faiqi nimaaku qini firaa kaqa qara ufirira qarisaa, qaari ufiqisee minasaa ooqu mari finaqa faiqi aanaaseesaa rakisi marianaqa innee qini faqa fimariasa innee qisaukuqara taikasee qikunni ooqu qaara marasee nári ufirira qarisaa qini faqa ooqu marififaranoo. Innee miqooqari Isaraee maqanna qikunni ooqu qaara marasee oosana Yakooboona faiqi namu atikiqari kambiqarasa misa niku nisaukusaa rakisifaranoo.

<sup>29</sup> Yafee moo fannoo qini duquara iriseenoo narí maqa faqa narí akaqaafasaa faqa narí asooqmaaka faqa narí anoona akoona faqa narí faiqi faqa narí saqamainaina faqa aiqama minnisainaqa sia mina akiaqara kai amiana. Fifau faqa amiana innaarunai naaruara marirana faqa amiana.

<sup>30</sup> Moomoosa maqee uriqararasa mariasa misa innaarunnai ooruree ureeqarasa marifaranoo. Moomoosa maqee ureeqarasa mariasa misa innaarunai ooruree uriqararasa marifaranoo.

## 20

*Ainaina faqaafa afaaramaseenoo ainainira faiquqa nimu quandara ufana.*

<sup>1</sup> Minara Yisufa qimanniminau. Anufufa innaarunai mariasa maqi qimasee rakisinnisaidanoo maqoo uriqararasa miqoo ureeqarasa marifaranoo kafa maqoo ureeqarasa miqoo uriqararasa marifaranoo. Qinee mina rakisira oosana ainaina faqaa fasiqa kikiqa usana. Iriqa. Faiqi ainaina faqaafa moo fannoo faiqi uainna qaqama ummaqimaru fasiqafa moo fannoo narí uainna qaqama akuqanoo marufanoo iqaqoofanoo raudamafinoo maqusai qumureenoo narí uainna qaqama diqi marusara randanau. Moodaa suanisaa ainainimaru fasiqausara ufaasu ainainimariasara randanau. (Mi aukuanna misa oosana maqimminoo marinau. Qaqama akuqamafufanoo mi ainainna akoofa kananaana maqusai oonureenoo akaqausa qimanniminau. Innee qini qaqama tiqi qimifaqa maqee faasaanara kai eendi marinaqa moodaa faasaanara mi munnimmana kai nimiana.)

<sup>2</sup> Mi fasiqafa paqurimandeenoo ainainira fasiqauqa faqa ufaasu ainainimarunana akiaqara mi munnimmanara ufa qimariqau. Ufa qiqiseeqa andeeqaseeqa doo narí ainaini marunnai niqiqoofaqa fiqau. Misa moodaa faasana ainainiuna akiaqara moodaa munnimma deenariasee qimarusa minara andeeqaseeqa ainaini fiqau. Kananaana saarisufa namu faqa ainaini fimariqau.

<sup>3</sup> Suani kaqikaqoo urureenoo keekoqufanoo ainaina faqaa fasiqa fannoo maqusai kafa oonureenoo nindafoofaqa faiqi moomoosa kai ooqu faaqee iqau.

<sup>4</sup> Nindafamaseenoo qimanniminau. Innee faqa qini uainna ququsaki fifaqa fafaa eenainaqa inni ainainirana akiaqara kai nimianauro. Qimannimisoofaqa eedoo qimasee fiqau.

<sup>5</sup> Suani qambaanaí ainaina faqaafa kaifaa maqusai oonureenoo akaqausa qimannimisoofaqa misa faqa ainainirannai fiqau. Suani afu muqunni mara ubeekoofanoo kafaa oonureenoo kaifaa miqi kai masee akaqausa qimannimisoofaqa misa faqa fiqau.

<sup>6</sup> Eenoofanoo mi fasiqafa kafaa maqusai oonuree nindafoofaqa faiqí akaqausa kaqi oofuqaqee marufanoo nindafeenoo qinau. Naqaa fee ifaqee innee kaqi kai maa faasaana mariafanoo, doo eeneenoommi.

<sup>7</sup> Misa iriseeqa qiqau. Faiqí moo fannoo sia qifaqa maasa mareeqa kaqi maridaqa. Miqi qimamufanoo mifa misa faqa narí ainainai nifiqee finau.

<sup>8</sup> Eendufanoo mi fasiqafa narí rakisira fasiqa aaramaseenoo qinau. Anee maqee ainainiasa nifiqee miniseenana ainainiaana akiaqara feefauru nimia. Inaaqianna fimariasas misa indaaruu nimia. Misa nifunni fimariasas misa ninaaqianna nimia. Kaifaa suani qambaanaikifaqa fuasa misa ninaaqianna nimia. Suani keekoofifaqa fuasa misa ninaaqianna nimia. Maqee iqaqifaqa fuasa misa ninaaqianna uqanna nimiaqee qimasoofofanoo miqimminau.

<sup>9</sup> Eeneemaru inaaqianna fuasa misa aniroofanoo deenariasas munnimma moodaa moodaa niminau. Miqi kai masee aiqamausa niminau.

<sup>10</sup> Maqee iqaqoo fimarusas mina qafamasee misa náriaras firaqoo marararas qiqau. Misa aniroofanoo rakisirafas moodaa deenariasas munnimma kai niminau.

<sup>11</sup> Misa maraseeqa noori runiqa naundaufa naundaufa qidaqiqau.

<sup>12</sup> Maasa maqee iqaqifaqa oonu maridaqa ainaini marunanoo suani dari marifaqa kadaapiridaqa qidaqa. Minaras maasa munnimma moomoo qimia. Eenee marifaqa fuasa misa ainaina imariasas amana oonu dupimasee nimia.

<sup>13</sup> Ainaina faqaafa iriseenoo qimanniminau. Qini qiqoondiuga sia qinee furufaramannisaidas nimidaqa. Andeeqasee nimidaqa. Faasais kananaana innee faqa qinee faqa andeeqaqauanaqa innee moodaa deenariasee qiana kai doo mina kai nimidaqa.

<sup>14</sup> Doo innee mina kai maraqa, inneeqaindi uqanna doo maree fuaqa. Qinee indaaruu maqee iqaqais fuasas faqa inaaqianas eeneemaris fuasas faqa qeeqa kai irisee amana amana kai nimiqauna.

<sup>15</sup> Munnimma qinindi uqanna marifaqa nimidaqa. Sia moonaindifau. Qeeqa kai iriseeqa amana afaaramma nimaqaanaura. Innee qini afaariranas minaree inni nikoo qaidanoo fee.

<sup>16</sup> Yisufas minaras narí faiqis namu qimanniminau. Miqi kai masee Anutunas ququsakis indaaruu fimariasas misa náris ainainiranas akiaqaras marasee ureeqarasaras fooqiaras marifaranoo. Ninaaqianna fimariasas miqi kai masee náris akiaqaras mareefaranoo misa uriqararasaras foora marifaranoo. Aiqa-mausas amana amana kai mareefaranoo.

*Yisufas qaaramookufanoo narí kuquaninnanaras qimanniminau.*

*(Mak 10:32-34; Ruk 18:31-34)*

<sup>17</sup> Yisufas Yeerusaree maqusais oorufinau. Ooru fidanoo narí faiqis namu qisaukuqaras taikasee qikunni ooqu qaaras marasee faiqis namu faqa ooru finau. Faiqí anaasee aana ititafufanoo Yisufas narí faiqis namu nifiqeenoo faiqí anaasee irifoo qimaseenoo aanafaiqaras fidanoo narí faiqis namu qimanniminau.

<sup>18</sup> Maaqi qimasee qimanniminau. Innee iriaqa. Maasa Yeerusareenni ooru fidaqa, ooruraananoo faiqí moo fannoo munnimmara mamareenoo qiniara uqeeqasainaqa amaana maqasaa rakisirausa faqa Mooseena sandufa irimariasa faqa qini qumareefaranoo. Misa qini qumareeqee kuqiranaki quqaqimaqeeefaranoo.

<sup>19</sup> Misa qini qumareeqee Roomma maqannaasa kiapafa faqa narí sundiauqa faqa qini mara nimifara. Misa qiniara naanaidara qidaqa uteeti qidaqa qiniara amarau qidaqa raitasaa qainna ateka rumbeeqoo samunnannai amiqimandee daridaqa qifaaqa radiqisaifanoo fidika qumuannoo. Miqimmaseeqa misa qini mara maree aunirira saqarisaa quqaseeqa pirimma darusaifaqa kuquanaura. Kuqiranaki qaaramoo faasaana mariqa doo findi fuanaura.

*Yameesa Yoohaneesa ninoofa Yisuna irammirinau.*

*(Mak 10:35-45)*

<sup>20</sup> Seebeedina amaakuqara Yameesa Yoohaneesa miqanda ninoofa Yisuna faqa fimarufanoo miqoo anireenoo asauridanoo reendeenidanoo kaqikaa ainainara qianeera qinau.

<sup>21</sup> Yisufa iriseenoo qinau. Nana ainainee ani amianauree qimasoofanoo mi anaaseefa qinau. Amanee anee firaa karaambaiqaikinana qini faiqiqara mareeqeenana aneenna aaqa moo fannoo dinni moo fannoo dinni quqasainaqa mi qanda ani faqa karaambaiqaikiqa marifaqa mi qanda nuqu uqeeranoo mariani.

Miqi qimasoofanoo Yisufa maaqi qimaseenoo narí qimaminau.

<sup>22</sup> Anee iraannanara mi oosannara siammiri mariananoo minarammiridaqa.

Miqi qimaseenoo mi fasiqaqanda maaqi qimasee irammirinau. Qinee manda nammari naannanara qiqa inneeqara faqa amanee namasee inneeqara qini faqa nipatara aupureefaree.

Mi qanda iriseeqa qiqa. Eedoo maa qanda amana naanaura.

<sup>23</sup> Yisufa iriseenoo qimanniminau. Kuqaa inneeqara qinee naanna nammarina neefaranoo minara qinee iridaqa. Qini daaqa quqannimaqee fandinnanara sia qini saika sia qinindi, qini qikoofa mifa kai mi ainainna faqaafa maridanoo. Kasooqaqee qinee innaarunai karaambaiqaikianaa ya fasiqanaree qini qikoofa qini daaqa marianee qinafa mifa kai qini daaqa mariannoo. Ooqai qini qikoofa narí kai irisee qimaqoosa kai misa kai qini daaqa quqannimaqaannoo.

<sup>24</sup> Qisaukuqara taikasee fasiqa kaqi marusa mi ufana irufanoo miqandara niranaqanau.

<sup>25</sup> Yisufa minara iriseenoo aiqama naarama quqaseenoo qimanniminau. Anaamuru mariasa narí karaambaiqauqa narí aanoonai kaiqeesa rakisinnimaqasaifaqa narí uriqararausa amiqimmasee misa uriaaqarama nimaqaidaqa. Narí faiqí firaafa ufa nimisaifaqa sia auqaafanoo naridanoo. Ufa nimifaqa misa kaqi ainaina auqemariasa. Anaamuru mariasa miqimida maridaqa.

<sup>26</sup> Inniki sia miqinoo marianifeera qidaqa. Yafasiqa fee inni karaambaiqaikiraree qinafa mifa inni ainainira faiqi kamambinoo mariannoo.

<sup>27</sup> Yafasiqa fee inni uriqararafa mariraree qinafa mifa inni dadaaqira saika maree marinafa mariani.

<sup>28</sup> Innee qini daanna raaqa innee qini qiqaqaaqa. Qinee faiqí nimaaku firaasa maridaqa, sia faiqí anaasee qini ainainamma qisaaqerau qumidau. Qinee inni ureeqarausa inni ainainamma nimaqararee qimasee qumiqa.

Qeeqa kuqiranannai moomoosa aaqarana akiaqara idukiraree qimasee minara faqa qumiqa. Minara innee narinni narinni qini daanna raaqa.

*Yisufa qaaraqanda nifu qimbaraqanda andeeqannisanau.*  
(Mak 10:46-52; Ruk 18:35-43)

<sup>29</sup> Misa Yeerikoo maqusakiqari findifufaqa Yeerusareenni ooru fimaru-fanoo faiqí anaasee moomoosa mina faqa fimariqau.

<sup>30</sup> Aana afainni qaara fasiqaqara nifu dimbaraqanda ooqu faaqee marufanoo. Yisufa moomoosa faqa mi aatata fimarufaqa miqanda misa nikufa iriseeqa Yisunara faqa rumasee nameera qiqau. Oo, Dafidina ati marianafa maasa mandaikiqa marida maasara ani amuqusinana dadaaqia.

<sup>31</sup> Miqi qimasee faqa rumasee nameera qufaqa faiqí anaasee aiqama miqanda aanoo imasee nimambaina qimasee qaoo qiqau. Nimambaina qimasoofaqa miqanda siammiriqau firaqoo uqanna nameera qiqau. Oo Dafidina amaaku faiqí firaafa maasara ani amuqusinana dadaaqia.

<sup>32</sup> Yisufa misa maruqoo ooru kasoomafinoo iramma nimaqanau. Naqi fee inniqara mannisaanauree.

<sup>33</sup> Qimasoofaqa miqanda qiqau. Faiqí firaafa anee maaqanda qifu maqannimia.

<sup>34</sup> Miqi qimasoofanoo Yisuna kaaqa amuqusufanoo asauku nifusaa mundinau. Mikari kai misa nifu maqasoofaqa miqanda Yisuna faqa fiqau.

## 21

*Yisufa doonkisa Yeerusaree maqusai ooru finau.*  
(Mak 11:1-11; Ruk 19:28-40; Yoh 12:12-19)

<sup>1</sup> Misa Yeerusaree maqusa adeedi ramasoofanoo kaqikaa maqusa moo auqu Beetapaisa mi maqusafa aaqanasaa maridanoo, mi aaqanna auqu Oorifa aaqana, miqoo oorureenoo narí faiqinamukiqari qaaraqanda naaramaseenoo qimannimianau.

<sup>2</sup> Inneeqara kaqikaa maqusaki oonureeqa muqutinai mi maqusanaki doonki maridanoo, narí aanaaqindiri maridanoo oonureeqara miqanda ninukaki sanda rumbaqoona idukuseeqa miqanda nifiqeeqa aniaqa.

<sup>3-4</sup> Faiqí moo fannoo inni irainaqa maaqi qimasee qimamiaqa. Karaambaiqa maa doonkiqanda maraannee qifaqa maaqanda maraidaqa. Miqi qimasee qimamifanoo mifa maree fuagee qiannoo. Mi ufana qufanoo ooqeenaa tamummaqara fasiqa ufa anoona kambiaanifeera miqi qinau.

<sup>5</sup> Mi tamummaqara fasiqafa ooqai Yisufa sia marukamuqoo maaqi qimasee papiqaki akara rinau.

Sioonna maqusanaasa maa ufana qimannimiaqa. Inni karaambaiqa innee iannai uridanoommi. Reendenamasee doonkisa uridanoommi doonki aanaaqi akoonasaa ooqu marifinoo uridanoommi.

Tamummaqara fasiqa akara miqimminoo maridanoo.

<sup>6</sup> Yisuna faiqiqara Yisufa qimaqoo doonkina narí faiqi faqa nifiqee Yisufinnai fiqau.

<sup>7</sup> Nifiqee munusoofaqa nári qamunna doonki aanaaqi ataufakaaqa ufiqisoofanoo Yisufa minasaa ooqumarifufanoo Yeerusareenni ooru finau.

<sup>8</sup> Faiqí anaasee nári karaambaiqa miqi mandaida anianinna oosana marasee misa qamunna qumareeqa aatata ufiqimarufaqa akaqausa saqari asaana amanee namufaqaana ateeka ufiqí maree fiqau. Doonki fannoo mi mau fuanifeera miqiqau.

<sup>9</sup> Faiqí anaasee moomoo indaaruu fufanoo aanaaqiana anufanoo mifa qambaanambinau. Misa aiqama Yisunara fifi faaqariqa kaanina mareeqa

maaqi qimasee idi ramamaqaqau. Anee Dafidina ati marianafa Anutufa ani amiqi amiqimaisaani. Anutufa qufanoo animarifa Anutufa ani amiqi amiqiani. Innaarunai marinausa faqa ani amiqi amiqiaqa. Miqimmama-reenoo Yeerusaree maqusaki Yisufa ooru keeqanau.

<sup>10-11</sup> Yisufa Yeerusaree maqusai ooruroofaqa faiqi anaasee mi maqannaasa tutuqida qiqau. Maana yafee qufaqa mina faqa ooru fusa qiqau, ooqeenaa akara tamummaqara fasiqa maanara qin角度 maana mifa maridanoo. Mina auqu Yisufa Nasareetee maqusaindaraa fasiqa maridanoo. Nasareetee maqusai Kariree maqa maaqaki marifa maridanoo.

*Amaana maqaki keeqafinoo mandainainauqa niqiqanau.*

*(Mak 11:15-19; Ruk 19:45-48; Yoh 2:13-22)*

<sup>12</sup> Yisufa Yeerusareenni oorureenoo Yeerusaree firaa amaana maqaki keeqanau. Keeqafufanoo aiqamai aiquqin角度. Ainaina nimidaqa feefauru maree marusa faqa munnimma nimidaqa ainaina maree marusa faqa Yisufa nindafa masee aiqama rapatutu meegeenoo nifaqasoofaqa fiqau. Kaqi munnimma qumareeqee amaana maqasaa munnimma kafaa nimimarusa Yisufa misa nindafamaseenoo misa qainda munnimma namufaqa teeqimma quqanau. Anutuna qaindasaa tatufira nakipuruna mini nimisaida munnimma maree marusa faqa misa ainaina faqa teeqimma quqanau. <sup>13</sup> Miqidanoo maaqi qimasee qimanniminage, ooqeenaa ufa maa amaana maqanara Anutufa maaqi qimasee akara rumaqoofa maridanoo. Qini maaqa faiqi anaasee qiniara innaaruqira maqa marianiffee qimaqoofa maridanoo. Anutufa miqi qimaqoofaqa innee ummuarira maaqa aannandaafanoo innaaru qira maaqa mara quandeeqee ummuarira maqaikamandaafanoo.

<sup>14</sup> Yisufa amaana maqaki kaqi marufaqa nifu dimbarausa faqa naununu apirirausa faqa Yisufa maruqoo aniree marufanoo nifu maqanniseenoo niku andeeqannimageenoo imarinage.

<sup>15</sup> Miqi marufaqa faiqiuqaindi anikeeqafufaqa Yisunara maaqi qimasee idi raqau. Dafidina ati Anutu anee amiqi amiqimmanda.

<sup>16</sup> Amaana maqasaa rakisi marusa misa Yisuna qafoofofanoo, faiqi anaasee amiqi amiqimmanniseenoo faiqiuqaindi idi ramamaqoofanoo minara irufanoo niranaqanau. Niranaqoofaqa Yisuna qimamida qiqau. Anee maa idina iridanee, sia fee iridanee. Miqi qufanoo Yisufa iriseenoo nariqa qimanniminage. Eeo qinee iridaqa, ooqeenaa akara ufa sia fee innee faqa iridee. Mifa maaqi qin角度.

Anee faiqi aanaaqiuqa nari nimariasa faqa sakasee mariasa faqa nari nooqi qari anoona nimooqira ufa uridanoo.

Sia fee innee mi ufana iridee.

<sup>17</sup> Mifa miqi qimaseenoo misa faqa Yeerusaree maqusa faqa minniseenoo Beetani maqusai ooqu faiqanau.

*Yisufa faafisa fooqaa saqari aqufanoo aadanusinage.*

*(Mak 11:12-14,20-24)*

<sup>18</sup> Iqaqoofanoo aatata ooqurandee kafaa Yeerusaree maqusai urimarfanoo aararanage.

<sup>19</sup> Aararoofanoo aana afainni saqari misa nee maria saqari faafisa fooqaana qafamaseenoo qaqamara randoofanoo sia marinage, amanee kai marinage. Qafamaseenoo fifau saqari maaqi qimasee aqin角度. Naaru naaru siamma anisaa qaqama iraani. Miqi qufanoo mikari kai mi saqarifa aadanusinage.

<sup>20</sup> Mina faiqinamu mina qafamasoofanoo naaquqoofaqa qiqau. Naqi fee mandee kaqi kaqi mandee aadanusinoo fee.

<sup>21</sup> Yisufa minara iriseenoo qimanniminau. Qinee anoona ufa inni qimannimidaqa. Innee Anutunasaa irirana rusiseeqa minara moodaa irirafa marinaqa innee sia oonumafi irifanoo sia qaara irirafa marinanoo, maa faafisana qunnandee kai iqa innee faqa miqi kai ifaranoo firaa ainaina faqa innee miqifaranoo. Maa firaa aaqana oorifa aaqanara faqa qifanoo uqeerakinanoo ooruku nammariki aqufuannoo.

<sup>22</sup> Kaifaa anee nanainainaree Anutunara iraidanee anee aneenna irirana Anutunasaa rusisainafa marinana anee moo ainainara innaaru qinanoo mifa mi ainainna kai ani amiannoo.

*Yisunara yafee ani aqiqaenoo fee qimasee irammirinau.  
(Mak 11:27-33; Ruk 20:1-8)*

<sup>23</sup> Miqi qimannimiseenoo mifa Yeerusareenni ooru finau. Oorureenoo amaana maqaki kafa kafa keeqanau. Keeqafinoo faiqi anaasee qimannimimarufanoo amaana maqasaa rakisimarusa faqa Yuda maqannaasa faiqi firasa faqa anireeqa maaqi qimasee quandasee Yisuna irammiriqau. Ya fasiqa fee aniara qifanee maasa ainaina maa amaana maqanakinaa teeqi taqi maqi nanee. Yafee ani dadaaqifanee anee faiqi anaasee faqa andeeqannimaqaidanee.

<sup>24</sup> Misa miqi qimasoofanoo Yisufa nariqa qimanniminau. Qinee inni moodaa ufa iranaqa innee mina oosana qimaqimifaqa qinee faqa innee qini iraanara qini diqiqoo oosana inni qimannimianaaura.

<sup>25</sup> Yisufa maaqi qimasee irammannimaqanau. Yoohaneefa nammari nimimarufa faiqi anaasee moomoo rumannimaqarana Anutuna ufamau fee rumannimaqeenoo fee faiqi moo ufamau fee rumannimaqeenoo fee innee minara nanee fee qidee.

Misa minara quandaufafaqa Yisunara iriandoo qimasee naundaindari nari qimami nari qimami qiqau. Maasa Yoohaneena nammari nimiranara Anutuna ufamau fimaru fee qifanoo Yisufa maasara nanaree innee mina iriaqaanna sia iriqau. Miqi qiandoora.

<sup>26</sup> Kafa maasa Yoohaneena nammari nimimari fasiqanara faiqi ufamau fimaru fee qianaqa faiqi anaasee afeeka ufa maasa qimiqa darifoora, Yoohaneenara Anutuna kuqaa tamummaqara fasiqee qimariasa mariafaqa maasa darifoora.

<sup>27</sup> Misa miqi qimaseeqa quandasee akooqoo Yisuna qimamiqa qiqau. Sia maasa ani irarufa iridaqa. Yisufa minara iriseenoo qimanniminau. Qinee iraunannara sia innee kooroomasee qini qimaqimiafaqa qinee faqa innee iraanara qini diqiqoonara sia kooroomasee inni qimannimianaauranoo.

*Faiqi moo mina amaakuqandara quandarufa.*

<sup>28-29</sup> Yisufa maa ufana kafa faiqi firasa faqa amaana maqasaa rakisimarusa faqa quandasee qimanniminau. Qinee moo ufa inni qimannimianaqa innee irisee mi oosanna qini qimaqimiaqa. Faiqi moo marinau, mina amaaku qaraqanda mariqau. Mi fasiqafa nari amaaku indaaruaqa faiqi qimaminau. Qini uainna qaqama afuqaki aqufinana ainainia qimasoofanoo indaaruaqa faiqi fannoo qaoo qimaseenoo minnisee mariufanoo kafa oonumafi iriseenoo doo ainainai finau.

<sup>30</sup> Mina akoofa qufanoo qaoo qufanoo quandaufanoo inaaqianaa faiqi qimaminau. Anee fua, ainainai fua. Miqi qufanoo mifa eedoo kai qimasee aanai oonureenoo oonumafi iriseenoo minnisanau.

<sup>31</sup> Mi fasiqaqanda indaruqaa fee inaaqianaa fee nári nikoona ufa aindusinoo fee qifaqa qinee irianaara.

Misa iriseeqa qiqau. Indaruqaafa mifa narí akoona ufa aindusinau innaaqianaafa sia aindusinau.

Yisufa minara iriseenoo maaqi qimasee misara akooqoo qimanniminau. Miqi kaimmaseeqa kaaqa faiqí maraqanua anaaseesa faqa ummuarira takisa munnimma maree mariasa faqa misauqa Anutuna ufara eedoo qimasaidaqa inni indaaru kamannisee Anutuna ququsaki keeqaidaqa.

<sup>32</sup> Yoohaneefa nammari nimimarufa inniara amaana maqasaa rakisir- ausara inniqa mandainaina ninaaqiannai quqasee nimeesuqusee noori Anutufinnai noori ubeekaaqa. Yoohaneefa miqi qimaseenoo inni qimannimisoofaqa innee siamma iriafanoo ummuarira takisa munnimma maree mariasa faqa kaaqa faiqí maraqanua anaaseesa faqa misa kaimma Yoohaneena ufa irisee Anutufinnai quandafiqa andeeqasee fiqau. Kaifaa innee amaana maqasaa rakisirausa misa andeeqasee fuana nikooqai faqa Anutufinnai noori ubeekaranara qaoo qimasee mina ufara nikooqai faqa inneeqa qimaqaamau kai fimariafanoo.

*Uainna qaqamasaa ufaasu rakisimariasa quandara ufa.  
(Mak 12:1-12; Ruk 20:9-19)*

<sup>33</sup> Yisufa mi ufana qimannimiseenoo kafaa moo ufa quandafufanoo maaqi qimasee qimanniminau.

(Yisufa nariqa munnimma maree maru saikanara irisee uainna sanda ummaqirana kikiqa ususeenoo narí arifandinnanara qimanniminau. Maqoo maasa sia uainna saikara iridaqa. Maasa munnimma maree maria saikafa koofi kai marinara Yisuna uainna kikiqira ufara maasa quandasee koofi kikiqa usanaura.)

Yisufa qimanniminoo qinau. Iriaqa, faiqí moo fannoo ainainafaqaafa ququsa auquseenoo koofi asumu ummaquseenoo nári oosana maraseenoo koofi qambaana qainda afeeka meeraqoo sandaaqai auquseenoo minni maridanoo ummuarira fasiqara kaasau aandau ainainara rakisiaqeera qainda auqinau. Koofi nammaruqi maria difaani firaana faqa auqinau. Koofi innoqafufanoo mina akoofa rakisira fasiqausa qufaasu niminoo qinau. Innee qini koofisaa rakisiqisee marifaqa qinee qambaana oosusaanaqa innee dindanai rafarisee nimiseeqa ooni maraaqa dindanai rafarisee nimiseeqa ooni mara qini qimaqaqa qinee moosaa fuanaree qimasee moosaa finau.

<sup>34</sup> Aiqama koofi anoona mafufanoo ainaina akoofa nianaindari narí ainainira faiqiuqa niqiqeenoo qinau. Innee ooquree qini oosukinaa koofi qini oondaraana tiqisee maree mini qimiaqa.

<sup>35</sup> Mina ainainira faiqiuqa ooquroofaqa ququsasaa rakisimarusa mandoosana marasee misa nariqau. Moo saamu samu ariqau moo ooni samu ariqau moo kuqa ariqau.

<sup>36</sup> Ainaina akoofa minara iriseenoo moomoo niqiqamasee qimanniminau. Innee ooqu qini oondaraa koofi itiqimaree mini qimiaqa qufaqa misa ooquroofaqa kaifaa narinau.

<sup>37-38</sup> Koofi akoofa naqi fee masee qianaqee qini koofi mareefaree minara irusianoo. Inaaqiana uqanna narí amaaku uqannara iriseenoo qimaminau. Anee ooqu maree mini qimia. Misa aniara rufiaaqeera qimasoo fanoo mina amaaku ooqu roofaqa ququsasaa rakisimarufa faqa mina aiku asauku faqa mina amaaku qafamasee qiqau. Maafa maa koofina akoona amaaku

anireenoo marai mina faqa kuqarusaa, fafaa mifa maa maqana maraan-  
doora mina arusee maasa kai maraanaura.

<sup>39</sup> Misa miqi qimaseeqa mi faiqina qumareeqa rariseeqa aqoosai  
munusee kuqamma ariqau. Yisufa narí arifandinanara qidanoo koofi  
akoona amaakuara qinoo.

<sup>40</sup> Yisufa mi ufana qimannimiseenoo amaana maqasaa rakisirausa iram-  
mirinoo qinau. Ququsa akoofa miqoo ooqurainna kari naqi fee masee  
ainainira rakisirausara iannoo fee.

<sup>41</sup> Misa minara iriseeqa qiqau. Mifa qumureenoo mi fasiqausa rairai  
qimannimiaqeenoo aanoo imannimaqeenoo kuqannaruannoo. Kafaa  
randaseenoo moo amiqira fasiqa mara quqasainanoo mifa ququsasaa  
andeeqasee rakisiannoo. Qaqama ireenoo akuqainna kari, ququsa akoofa  
narí oosaqaraanara narí qinoo maramaree mini qimia qinanoo tiqisee  
mara maree munu amiannoo.

<sup>42</sup> Misa miqi qimasoofofanoo Yisufa mina iriseenoo misa narí arifandin-  
nanara iriseenoo kafaa quandaseenoo nariqa qimanniminou. Ooqeenaa  
akara maaqi qimasee qimaqoofa marida.

Faandaamura auqi maria fasiqausa sabeena moo marasee qafamasee  
mandaikira fee qimasee minnisaqau, moo faandaamura auqimarusa  
mi sabeenna kai mara maree amiqira fee qimaseeqa faandaamura  
afeekaikamma umaraaninnana rakiqau. Boo qafaqa, Anutufa  
amiqira ainaina auquseenoo.

Ooqeenaa akara miqimminoo maridanoo sia fee innee asaana ridee. Doo  
aunidee.

<sup>43</sup> Miqi kai inoo Anutufa narí ququsa inni Isaraee maqannaakinaana  
mara maree moo maqannaaki quqasaifaqa mi maqannaasa amiqimmasee  
Anutuna ufamau fifaranoo. [ <sup>44</sup> Maa ufana 44 qusa kamu sia ooqeenaa  
papiqaki marunara sia maaqoo akara riqa.]

<sup>45-46</sup> Amaana maqasaa rakisimarusa faqa Farisai amaana ufa irimarusa  
faqa iriseeqa maasara quandaiddanoommifoo qimaseeqa niranagee maru-  
faqa Yisunara rumbara ufa qimariqau. Faiqi anaasee moomoosa mina aaqa  
marufaqa misa minara Anutuna tamummaqara fasiqa maridanoo maasa  
minara rumbaanaqa faiqi anaasee maasa diqiqa tutuqi foora. Miqi qimasee  
minnisee sia Yisuna rumbaqa.

## 22

*Faiqi uriqararafa narí amaaku amundara qoomaqa quandara ufa.*  
(Ruk 14:15-24)

<sup>1</sup> Yisufa kafaa faiqi anaasee qimanniminou. Quandara ufa kai maaqi  
qimasee qimanniminou.

<sup>2</sup> Anutufa narí ququsakinaasara maaqi qimasee rakisidanoo. Firaa  
karaambaifa moo kikiqa usuanaura. Mi firaa karaambaifaqa mina amaaku  
amundararee qimasee firaa qoomaqa suqanau.

<sup>3</sup> Suqaseenoo narí faiqi namu niqiqeenoo qinau. Maqusa maqusa  
fifainiqa eenda qimannimunausa nifiqee minisaifaqa narana naqa. Qi-  
masoofaqa fifainiqa. Faiqi oonu naaramasoofaqa misa qaoo qimasee  
minnisaqau.

<sup>4</sup> Karaambaifa fannoo mina iriseenoo kafaa akaqausa niqiqeenoo qinau.  
Eenda qimannimunausa innee oonu nifiqaaqa. Narana faqa oosana oosana  
aandau faqa oonidakinaana faqa doo aiqaaqa. Kaqi kaqi iaqa. Doo aiqama  
deedaqinoo maridanoo.



<sup>5</sup> Qimannimunausa maqusa maqusa mariasa qimannimisoofaqa iriseeqa naanaidara qimasee minnisaqau. Moo fannoo narí ainainnai finau. Moo fannoo narí burimakau ququsa auqiraree qimasee finau. Moo fannoo narí situaqai finau.

<sup>6</sup> Moo maqusanaasa mina faiqinamu saamu samu nariqau, manda oosana nimiqau, kuqa nariqau.

<sup>7</sup> Karaambaiqa fannoo minara iriseenoo narí faiqi namu maaqi qimasee qimanniminau. Innee findifuaqa, maqusa maqusa qini faiqi namu nari-mariasa aiqama naru taikasee misa maaqa idaraaqa miqi qufaqa misa miqimmiqau.

<sup>8</sup> Miqimmasee aniroofanoo karaambaiqa qimanniminau. Amundarana qoomaqa deedaqinoo marida. Faiqí anaasee qinee indaaruu naaraunaqa misa oosana sia andeeqanoo marifaqa sia ania.

<sup>9</sup> Doo innee kaifaa fuaqa. Aana kindooraki mariasa faqa aana fimariasa faqa uiqaana mariasa eenda sia qimannimunausa kai nifiqee aniaqa.

<sup>10</sup> Mina faiqi namu minara iriseeqa faiqiara randarara fifainiqau. Amiqi-rausa faqa mandaikirausa faqa paqurinausa misa nifiqee aniaqa. Miqi qufaqa misa fiqau. Miqi kai iqa karaambaiqa maqusai faiqí anaasee qumbiaqa mariqau. (Mi aukuanna amundara qoomaqa sakaseenoo amundara qamunna kooqikinaana maraseenoo nimufaqa afisusee keeqaf-ufaqa neemariqau.)

<sup>11</sup> Faiqí anaasee mi qoomaqanaki ooqu marifufanoo karaambaiqa fannoo anireenoo faiqí anaasee nimandanoo fidanoo oonu qafoofanoo moo fannoo sia karaambaiqa qamunna afisirafa kooqisaa amu qamunna sia afisirafa kaqi ooqu marinau.

<sup>12</sup> Oonurama qafeenoo qinau. Qini qiqaondi, naqi fee ifanee sia qinee qamunna kooqiki qamunna amunnana sia afis inanee. Naqi fee ifanee sia amundara qamunna afis inanee. Nanaree fifau ooqu marinanee. Miqi qufanoo mi fasiqafa kaqi kasoofinai, sia ufa qinau.

<sup>13</sup> Minara karaambaiqa fannoo qafamaseenoo aranaqoofanoo quandafinoo narí faiqi namu qimanniminau. Innee sanda qumaree maana aiku asauku rumbeeqee aqoosai asukunai aquaqa. Aqoosai minni asukunai aqusaifanoo minni oqumaridanoo iki raqaidanoo afai riqidanoo aupuraidanoo mariani. Aiqaama aqoosai mariasa miqi kaimmidaqa.

<sup>14</sup> Yisufa mi ufana maaqi qimasee rafaqaqafinoo qinau. Anutufa moomoo naaramasaifaqa. Misa aniraifanoo Anutufa misakinaana moodaa kai moodaa kai nariara maraidanoo. Moomoosa sia amanaikidaqa.

*Takisa munnimma kaamanna nimira ufa.  
(Mak 12:13-17; Ruk 20:20-26)*

<sup>15</sup> Yisufa mi ufana faiqí anaasee qimannimisoofaqa Farisai amaana ufa irimarusa nári faiqi namu naaramaseeqa suqu quqaseenoo Yisuna rumbara ufa maaqi qimasee oonumafi irimariqau. Maasa irarufara fuseemmasee umaraanaura, oosana oosana ufara mina irammirifanoo mifa moo kaqikaa ufa manda ufa qinaqa doo miqoo tautumandee rumbaanauree qiqa.

<sup>16</sup> Miqi qimaseeqa misa nári faiqi namu faqa Eeroodeena aqoondi mariasa faqa moodaanaki Yisufinnai oonu reeqa unna qimasee amiqira aqoondiara foora mafufaqa noori quqasee reendenamaseeqa maaqi qimasee irammiriqau. Oo ufasaa rakisirafa, anee andeeqara ufa qimarianafa, sia unnufa qimarianafa anee sia moonara amiqira fee qimasee amiqira

ufa qimamianafa, sia moonara mandaikira fee qimasee mandufa qimamianafa, aiqamaqara anoona ufa kai qimannimimarianafa andeeqarafa mariananoo.

<sup>17</sup> Maasa iraanana anee iriseenana mina oosana maasa qimaqimia. Maasa maqee maqee Roomma maqannaa kaamanna takisa munnimma amimarunausa maridaqa. Maasa miqidaqa Mooseena sandufa rukiadee sia fee rukiadee.

<sup>18</sup> Misa Yisuna ufa iriseeqa mina rumbaaneera qufanoo Yisufa narí faasai misa mandoosana iriseenoo maaqi qimasee niqinoo qinau. Innee qaara ufa qimariasa mariafanoo mandaiki mariasa mariafanoo. Faiqí anaasee innee naamua qimasee quandaifi mandoosana maree mariasa mariafanoo. Innee nanaree fifau qini qifusaa ititadee qinee inni nindafaida.

<sup>19</sup> Inneeqa takisa munnimma mini qini qimifaqa qafaa. Miqi qima-soofaqa misa takisa munnimma marasee amiqau.

<sup>20</sup> Misa takisa munnimma amufanoo Yisufa mi munnimmana maraseenoo amiqi maseenoo aiqumaseenoo qinau. Maanasaa yana oori amanee maridanoo fee. Yana auqu fee mina amana ameemaanai akara rinoo maridanoo fee qufaqa misa qiqau.

<sup>21</sup> Roomma maqannaa rakisirafa mina auqu Sisaa mina amana faqa mina auqu faqa maridanoo. Miqi qufanoo Yisufa qimanniminou. Doo Sisaana auqu minasaa akara rinoo marinara minaindi uqanna maridanoo doo narí ainaina doo narí amiaqa amisee quandafiqa Anutuna ainaina doo mina faqa narí amiaqa.

<sup>22</sup> Miqi qufaqa misa tautumaseeqa mi ufana oosanara randasee quqasee fiqau.

*Kuqiranakiqari findifuanninanara iraqau.*

*(Mak 12:18-27; Ruk 20:27-40)*

<sup>23</sup> Mi faasaana Sadikai amaana ufa irimarusa anireeqa Yisuna iram-miriqau. Misa maaqi qimasee qimarusa. Faiqí kuqidanoo sia minakiqari findifidanoo, akundamasaafanoo doo minaki taikaidanoo. Sadikai amaana ufa irimarusa miqiga marunara maaqi qimasee Yisuna irammiriqau.

<sup>24</sup> Oo maasa uqannifiqara fasiqa. Mooseefa maaqi qimasee faiqara akara rinou. Faiqí moo fannoo faiqi sia maqarai kuqinanoo mina akaqa fannoo mina anaqa maraannoo. Maraseenoo minasaa faiqi maqasainafa findifinoo indaaruaqa akoona qumiasana maraseenoo mina maqa maaqaki fuannoo. Mooseefa miqimmasee maasara akara rumaqoona maridanoo anee minara irinaqa maasa moo ufa ani qimamianauro.

<sup>25</sup> Faiqí moo fannoo qisauku dinni taikasee dinni oonu qaara marasee faiqi namu maqasoofanoo indaaruaqafa innooqafinoo aanaaseesaa amundasoo fanoo sia faiqi maqarai kuqinau. Kuqufufanoo mina aanaaqianaafa mi anaaseena kai kafa maranau.

<sup>26</sup> Mifa faqa mi anaaseena maraseenoo sia faiqi maqarai kuqinau. Kuqufufanoo misa ninaaqianaafa mi anaaseena kai maraseenoo sia faiqi maqarai kuqinau. Miqi kai inoo fiufufanoo faiqí qisauku dinni aiqama taikasee dinni oonu qaara maraseenoo mi anaaseenasaa sia faiqi maqarai kuqinau.

<sup>27</sup> Kuqufanoo mi anaaseefa faqa kuqinau.

<sup>28</sup> Aiqaqa fasiqa anaasee kuqiranakiqari findifira aukuaana findifinanoo mi fasiqausa faqa mi anaaseefa faqa findifinanoo yana aanaaqee marianoo fee. Qisauku dinni taikasee dinni oonu qaara marasee mi anaaseena maroosa mariqau. Yana aanaaqee mi anaaseefa mariannoo fee.

<sup>29</sup> Yisufa mi ufana iriseenoo niqidanoo qimanniminau. Innee Sadikai amaana ufa irimariasa aaqee mariafanoo. Innee ooqeenaa tamummaqaraura akarakinaa ufa faqa Anutuna afeeka faqa sia irisaidaqa aaqee mariafanoo.

<sup>30</sup> Aiqama findifandinna aukwana findifiqa faiqí afaaqa faqa anaasee afaaqa faqa taikaannoo aiqamaqara amanamana kai qangiroora foora kai afeeka marifaranoo. Qangiroouqa sia faiqí faqa anaasee faqara foora marifaranoo mookiraura idaaqiraura maridaqa faiqí anaasee kuqufiqa innaarunai oorureeqa qangiroora foora mafiqa sia amana narí maree narí maree ifaranoo.

(Ooqai Abarahaafa faqa Isakeefa faqa Yakooboofa faqa maa maqanasaa maru kamuqoo Anutuna ufamau fimarunara Anutufa nariara minamusara Anutusee qinau. Minamusa kuqufiqa findifiqa doo Anutuna faqa innaarunai ooru mariqau. Innaarunai Anutuna faqa kisaagasaa marikufanoo Anutuna tamummaqara fasiqa moo fannoo Anutuna ufa minamusara quna iriseenoo akara rinoo qinau. Qinee minamusa Anutusa maridaqee qinau.)

<sup>31</sup> Yisufa mi tamummaqarana aufakiana iriseenoo Sadikai amaana ufa qimariasa kaifaa maaqi qimaseenoo qimanniminoo qinau. Innee aqamasee kuqiranakiqari sia findifiraree qiasa. Minara Anutufa inni qimannimiqoona sia fee innee mi akarana asaana rida fee.

<sup>32</sup> Mifa kuqufusa findifi mina faqa marianara maaqi qinau. Qinee Abarahaana faqa Isakeena faqa Yakooboona faqa misa Anutusa qinee marunasa maridaqa. Anutufa sia ooqai misa maaqoo maru kamuqoo misa Anutusa mariafannaqee qinau. Ooqai kuqufusa doo findifiqa Anutuna faqa maqee marianara mi ufana misa Anutusa marunasa maridaqee qinau. Minara Abarahaana faqa Isakeena faqa Yakooboona faqa sia misara kuqiga mariaafoo qiaqa. Kaqi Anutuna faqa innaarunai maridammiafoo qiaqa. Anutufa sia kuqiraura Anutufa maridanoo. Kaqi mariasa misa Anutufa maridanoo. Innee minara sia fee asaana rumasee irida fee.

<sup>33</sup> Minara faiqí moomoosa iriseeqa mi ufanara anoona ufa fee qima-soofanoo naaquanau.

*Aiqama sandufakiqari uriqarara sandufa kooroo inau.  
(Mak 12:28-34; Ruk 10:25-28)*

<sup>34</sup> Yisufa Sadikai amaana ufa irimarusa ufa arusoofaqa Farisai amaana ufa irimarusa minara iriseeqa minara ufa suquseeqa anireeqa Yisuna irammiriane qiqau.

<sup>35</sup> Misakiqari sandufa oosana irimaru fasiqafa anireenoo Yisuna amanammasee qafaanee qimasee ufa quqanau.

<sup>36</sup> Faiqí uqannifiqee marianna fasiqafa, Mooseena sandufa oosana oosana maridanoo. Nana sandufafee aiqama sandufa narusee urinaaqaranoo maridanoo fee.

<sup>37</sup> Yisufa iriseenoo qinau. Uriqarara ufa maaqaamminoo maridanoo. Inni faakana Anutufa innee minara inneeqa nimuqusa nimana irirana mudukannoo minara nidinaqa minara ruaqa.

<sup>38</sup> Mi ufafa aiqamufausa urinaaqaranoo maridanoo.

<sup>39</sup> Mina aanaaqiana mina fooqaafa maaqimminoo maridanoo. Innee inneeqa nipatasaa amiqimmasee rakisidaqa rimariafanoo doo innee miqi kai iqa niqoonausara faqa rakisidaqa ruaqanani.

<sup>40</sup> Mi ufaqandasaa aiqama ufa oosana oosana mi qandasaa mundidanoo. Ooqai Mooseena sandufa faqa Anutuna tamummaqaraura ufa faqa mi qandasaa faakana fooqaafa maridanoo mi qandasaa mundinoo maridanoo.

*Asauku mundirafa Dafidina ati marunara qimanniminau.*  
(Mak 12:35-37; Ruk 20:41-44)

<sup>41</sup> Farisai amaana ufa irimarusa miqoo suqıqa marufanoo, Yisufa misa nıkiaaqa maa ufana qınau.

<sup>42</sup> Ooqai asauku mundiranara innee minara nanee fee qıda fee. Yana ati fee qıdee. Miqi qımasoofaqa misa qıqau.

<sup>43</sup> Dafidina ati fee qıdaqa qufanoo Yisufa iriseenoo quandafınoo misa qımannıminoo qınau. Innee kuqaa Dafidinara Anutuna tamummaqara fasiqa fee qımarıafanoo Anutuna maraquna fannoo Dafidina aakufufanoo maaqi qımasee akara rınau.

<sup>44</sup> Anutufa maaqi qımasee qını karaambaiqa qımaminau. Anee qını Anutusa qısauku uqannai qını daaqa ooqumarıfi marinaqa qınee ani namuqaauqa naru taıkaseeqa ani aramandunna quqasaanana maria. Miqi qımasee Dafıdifa akara rınau.

<sup>45</sup> Yisufa mi ufana qımannımıseenoo kaifaa maaqi qımasee irammırınau, Dafıdifa Anutuna asauku mundiranara qını karaambaiqa fee qunara naqımmasee asauku mundirafa moodaanaki Dafidina karaambaiqa faqa mina ati faqa mariannoo. Dafıdifa andeeqaidanoo fee innee fee andeeqaidaqee aıqamaqara innee andeeqaidée.

<sup>46</sup> Yisufa mi ufana qımannımufaqa sia mi ufana ati raqeeqee narı qımamıqau. Miqooqarı nisaurusee sia kaifaa moo ufa Yısunara irammırıqau.

## 23

*Mooseena sandufa akoofasauqa mandoosanara eerairiaqee qınau.*  
(Mak 12:38-39; Ruk 11:43,46; 20:45-46)

<sup>1</sup> Miqi qukari Yisufa narı faıqi namufaqa faıqı anaasee moomoo faqa maaqi qımasee qımannımınau.

<sup>2-3</sup> Mooseena sandufa akoofasauqa faqa Farisai amaana ufa qımarusa faqa Mooseena sandufa qımannımırınara qutaaqama nımaqarusa marıda. Innee minara misa ufa amıqımandee irıseeqa mi mau kai andeeqasee fıdaqa misa iandee kai sia iaqa. Misa nookıqarı faıqı anaasee aana quqannıfıqıdaqa quandafı moomau fımarıana mi mau innee sia fuaqa.

<sup>4</sup> Farisai amaana ufa qımarıasa faqa Mooseena sandufa akoofasauqa faqa misa amusufa moomoo fıraa qumaarara fooqıara arapeeda arueeqeenoo faıqı anaasee nımidanoo narıara sia kaqıkaaqqoo narı nisauku amukannoo dadaaqıdaqa misa iandee innee sia miqi iaqa.

(Mi aukuanıa Isaraee maqannaasa Mooseena sandufamau fıdaqa qısaaqamara foora ususeeqa minaki Mooseena sandufa papıqasaa akara rumasee ummauruara foora ususee nuaqee imarıqau. Narıqa qamunna atısa faqa faakasaa peepeenaana auquandee masee usuqırausa nımarıqau. Kaqıqeesa faqa aıqamausa faqa mıqımandee nımarıqau. Farisai amaana ufa qımarusa fıraatıa auqusee qıqafaaqee qımasee qısaaqamasaa faqa qamunnasaa faqa fıraatıa auqu uqırausa nımarıqau. Miqi marunara Yısufa maaqi qımasee nıqınoo qınau.)

<sup>5</sup> Mısa faıqı aıqamausa nıfusaa aıqama ainaina auqaidanoo fıfau tasımıramandıda auqıdaqa. Qısaaqama fıraana ususee Mooseena sandufa akara minaki usuqırausa nıdaqa qamunna kısaaqamaseeqa faıqı nıfusaa tasımıramandıda fıdaqa.

<sup>6</sup> Faıqı qoomaqa sakasee nıdaqa Mooseena sandufa akoofasauqa faqa Farisai amaana ufa qımarıasa faqa misa amıqıra qoo kai ooqu marıfıdaqa

naidaqa. Amaana maqaki faqa amiqira qoo kai faiqí nifusaa ooqu maridaqa faiqí anaasee qiqafaaqee qimasee miqimmidaqa.

<sup>7</sup> Faiqí anaasee suqidaqa makeeti marunakina narí anufaqa uqeera qafeeqa, Oo maasa faiqí firaafa anee fee anidanee miqi qufanoo narí fifau sumoo summidanoo. Misa aatata fidaqa maqusa maqusa nimarufaqa faiqí misa nindafeeqa, oo maasa ufasaa rakisirafa misa miqi qunara kaaqa nidufaqa asammidaqa. Misa iandee innee sia miqi iaqa.

<sup>8</sup> Faiqí anaasee inniara maasa uqannifiqara fasiqa fee qifaqa qaoo qimasee qiaqa. Innisaimbaqa amanamana kai maridee qiaqa ooreeqarausa nikaqaafasaa kai maridee qiaqa. Anutufa kai innisaimbaqa uqannifiqara fasiqa maridanoo fee qiaqa.

<sup>9</sup> Miqi kai iqa sia maqasaaqaraasara qikoo fee qimasee nimandaqa. Innaarunai Anutunara innisaimbaqa aiqamausa qikoo fee kai qiaqa. Miqiaqa innee amanaka kaimmifaranoo.

<sup>10</sup> Inni saimbaqaki sia moonara karaambaiqee qiaqa minara minnisaaqa. Inni karaambaiqa moodaa Anutuna asauku mundirafa mifa kai maridanoo.

<sup>11</sup> Moo fannoo inniki uriqararafa marinafa narí kai eedoo qimaseenoo misa dadaaqira ainainira fasiqa mariannoo.

<sup>12</sup> Faiqí anaasee náriara uriqararausee qimariasa Anutufa misa farindamaki saamuriqa nisauriranaki quqaannoo. Faiqí anaasee nariara oorudupirausee qimariasa misa faakanaikamma nimaqaannoo.

*Mooseena sandufa akoofasauqa aaraikira ufa oosanara niqinau.  
(Mak 12:40; Ruk 11:39-42,44,52; 20:47)*

<sup>13</sup> Yisufa kaifaa misa qimannimino qinau. Innee Farisai amaana ufa qimariasa faqa innee Mooseena sandufa akoofasauqa faqa inni narirafa firaafa marinara qinee oonumafi iriqa qimudaqo qidaqa. Innee faiqí amaana ufa qimannimisaidaga maqandanai inneeqa kaqi ummuari mariasa. Faiqí anaasee akaqausa innaaruna ququsaki keeqarariafaqa innee rafaafunnimaqaida innee faqa sia keeqeefaranoo.

<sup>15</sup> Inni narirana firaafa marinara minara qinee firaqoo qimudaqo qidaqa. Innee amaana ufa qimannimisaidaga maqandanai mandainaina oosana oosana maree mariana. Innee mandoosana maree mariasa. Innee maqusa maqusa faiqiara randaidaqa inni ufa iriaqaainnana mina paqurimasee inneeqa ufa oosana qimamisai fanoo irinoo mi fasiqana mandoosana inni mandoosana uraaqaranoo maridanoo.

<sup>16</sup> Nifu dimbarausa maasa aana quqannifiqee marunausee qimasee innee faqa nifu dimbarausa kai mariafanoo. Inni narirana firaafa marinara inniara firaqoo qimudaqo qidaqa. Innee maaqi qimasee aaqamasee qimariasa. Faiqí moo fannoo narí amana Yeerusaree amaana maqasaa qimasee aqiaqamasee moo ainaina auqararee qinafa mifa fifau ufa fee qimasee, siamma auqaannoo. Innee minara aaqee mariafanoo. Faiqí moo fannoo narí amana amaana maqaki koora marinanaki aqiaqamasee moo ainaina auqararee qinafa koora uriqarara ainaina marifaqee qimasee kaqi auqaannoo, sia minnisaannoo. Minara faqa innee aaqee maqi qimariasa.

<sup>17</sup> Innee nifu qimbarausa maridaqa furufari mariafanoo. Innee amaana maqakinaa koorara uriqarara ainainee qimariafa aaqee mariafanoo. Koora fee amaana maqa fee uriqararafa maridanoo fee. Amaana maqa naaquqara amaana maqa marinara fifau koora minaki marifa naaquqarafa maridanoo. Anee amaana maqasaa qimasee aneenna amana aqiqainafa kaqi auqa naaquqarafa amaana maqa maridanoo.

<sup>18</sup> Innee kaifaa maaqi qimasee aaqamasee qimariasa. Faiqi moo fannoo amaana maqakinaa qaindasaa qimasee nari amana aqiqamasee moo ainainara auqararee qinafa kaqi fifau dapi qainda fee qimasee sia auqaannoo. Faiqi moo fannoo amaana maqakinaa qaindasaa quqeemarinanaki nari amana aqiqamasee moo ainaina auqararee qinafa kuqaa mi ainainna auqaannoo. Innee miqi qidaqa aqee mariafanoo.

<sup>19</sup> Innee nifu dimbarausa naaqoo nifu furufarirausa miqi qimariafanoo. Qini ufa iriaqa. Nana ainainee uriqararafa maridanoo fee qainda fee minasaa Anutuna amianinna ainaina quqeemaria fee uriqararafa maridanoo fee. Innee qaindasaa Anutuna amida quqee mari ainainara uriqarara fee qimariana aqee mariafanoo. Qainda naaquqara ainaina marinara minasaa quqee mari ainainafa faqa naaquqaidanoo. Minara qainda uriqararafa maridanoo. Anee amaana maqakinaa qaindasaa aneenna amana aqiqamasee moo ainaina auqararee qinanoo mifa kuqaa ani afaaqa rumbasaannoo. Innee aqaada sia rumbaidanoo fee qimariafanoo.

<sup>20</sup> Faiqi moo fannoo amaana maqakinaa qaindasaa nari amana aqiqainafa sia fifau qaindara kai qidanoo. Aiqama ainaina qaindasaa marinnanara faqa minara faqa qidanoo.

<sup>21</sup> Faiqi moo fannoo Yeerusaree amaana maqaki nari amana aqiqainafa sia fifau amaana maqara kaifau qidanoofau. Mi amaana maqanaki marifa Anutunara faqa qidanoo.

<sup>22</sup> Faiqi moo fannoo innaarunai nari amana aqiqeemarinafa sia innaarunaira kai qidanoo. Anutuna maqusa maridanoo. Miqoo Anutufa karaambaiqa qaari ufiqiraqoo ooqu marifi maridanoo naaquqara maqusa maridanoo, sia fifau maqusa Anutufa nari mari maqusafa maridanoo.

<sup>23</sup> Innee Mooseena sandufa akoofasauqa faqa Farisai amaana ufa qimariasa faqa inni Anutufa narirana firanara qinee qimudao qimanni-maqaidaqa. Innee faiqi anaasee uqannifiqaidaqa kafa quandafi maqandani mareemariasa. Innee inneeqa qafuqakinaana oosana oosana adifaaira ainaina, kaqikaa fifau ainaina maqee maqee raineeqee ati Anutuna amimariasa, innee mi kaqikaa ainainnara fifau munari minarida, firaa ainaina Mooseena sandufakinaa anoona ainaina innee minnisaidaqa. Andeeqara oosanara faqa faiqi anaaseera nimudao qira oosana faqa anoona ufa kai qira oosanara faqa mi firaa akooqooqaraa ainainnana innee minnisaidaqa. Innee mi firaa ainainnatia namufaqa iaqaana, kaqikaa ainaina namufaqa iaqaana.

<sup>24</sup> Innee nifu dimbarausa nisauku qumaree aana uqannifiqaidee qimariasa, innee faqa nifu dimbarausa mariafanoo. Innee kaqikaa fifau ainainara fifau munari minaridaqa nammariki nunuka fooqaafa marifaqa naandoo qimasee mara aquseeqa kaifaa quandafifaqa firaa ainaina akooqoo ainaina goosara foora firaa aandau tia sia irirai kaqi nambiqee mariasa.

<sup>25</sup> Farisai amaana ufa qimariasa faqa Mooseena sandufa akoofasauqa faqa inni Anutuna narirana firaa marifaqa minara qinee inniara qimudao qidaqa. Inni marirana kaafara foora maridanoo, innee kaafara foora adisaa kai findaukarausa aunduraki madaapee usirausa mariafanoo. Innee faiqi nariranannai misa ainaina maree mariafanoo. Innee inneeqa fanandiranannai minannai inneeqara kaaqa moomoo ainaina afaqa usimarianara inni naunduraki madaapee usirausa mariafanoo.

<sup>26</sup> Farisai amaana ufa qimariasa nifu dimbarausa kai mariafanoo. Innee naaree kaafa aunduraira foora findaukamasee mariaqaana. Miqi

qimasaifaqau aiqama kaafa aundura faqa adisaa faqa findaukarausa mari-aqaana. Innee sia miqiafaqa.

<sup>27</sup> Farisai amaana ufa qimariasa faqa Mooseena sandufa akoofasauqa faqa inni narirana firaafa marifaqa qinee inniara qimudaqo qidaqa. Innee faiqi madikara fooqaana mariafanoo aunirira saqariara fooqaana apatasaa amiqira qumisa akusaafaqa faiqi misa mina qafamasee boo amiqira fee qidaqa. Innee miqi mariafanoo faiqi nifusaa amiqirausa mariafanoo inni naundura madikaki faiqi putaainoo nimudaani fannoo mandaikinoo maridanoo, kudi makirana oosana oosana inniki maridanoo.

<sup>28</sup> Innee miqirausa mariafaqa faiqi inni niqafamasee maasauqa andeeqarausa maridammiafoo qidaqa inneeqa naundurari sia qafee mariafanoo, naunduraki putaainoo maridanoo, maqandanai maree maria oosana faqa ufa rukiarana oosana faqa doo afai raqaramminoo maridanoo.

*Mooseena sandufa akoofasauqa naruaninnanara koorooinau.  
(Ruk 11:47-51)*

<sup>29</sup> Farisai amaana ufa qimariasa faqa papiqa akara rimariasa faqa inni narirana firaafa maridanoo minara qinee inniara qimudaqo qidaqa. Inni nikeeku nikaaku nisaifaqausa Anutuna tamummaqara fasiqauqa narusee nikundaqau. Kaifaa innee misa faiqi namu quandaifafaqa misa madikamaqoosa rukiseeqa qumisa qumaree saqarisaa fee oonisaa fee maqee maqee akusee amiqimariafanoo. Innee akidaqa maaqi qimasee qimariafanoo.

<sup>30</sup> Maasa qikeeku qikaaku maru aukwana maridaqau sia maasa tamummaqara fasiqa naruafanaiqini misa fidika sia mariqini.

<sup>31</sup> Oo innee miqi qidaqa inneeqa nikeeku nikaaku Anutuna tamummaqara faiqi nariusaa misa faiqinamu maridee qimariafanoo.

<sup>32</sup> Doo amana, inneeqa nikeeku nikaaku naanna raaqanani. Misa maroo mandainaina innee firaanaika masaaqanani.

<sup>33</sup> Innee sakani faiqi namu mariafanoo ukadiqa faiqi namu mariafanoo Anutufa inni idaki aqiraree qinoo. Innee naqi fee masee umbaqaki fifaree. Sia amana miqifaranoo.

<sup>34-35</sup> Yisufa kafa Farisai amaana ufa qimarusa qimanniminau. Qinee tamummaqara fasiqauqa faqa Anutuna ufa irimariasa faqa Anutuna ufa uqannifiqemariasa faqa qinee marunannai mariasa innee iannai niqigaanaura. Innee misa nindafamaseeqa akaqausa aunirira saqarisaa narifaranoo. Akaqausa innee inni amaana maqaki raitasaa qainna atekasaida rumbeeqoo samunannai nitaufakaqa nariisaifanoo fidika radiqinoo qumuannoo. Akaqausa maqusa maqusa nifaqasaifaqa sandeefaranoo misa fidika faqa inni nikeeku nikaaku narusa misa fidika faqa inniki marianifeera, ooqai indaaru Abeerana fidika fifau kaqinni adianau. Miqooqari anidanoo moomoosa fidika fifausaqa adianoo ani ifanoo Seekariaafa Barakiana amaaku Yeerusaree amaana maqaki Anutuna naaquqara oosirana dinni marufanoo dinni qainda marufanoo, mi qambaanna fifau aru-soofanoo kuqinau. Mi kamusaqa fidika moomoo fifau adianoo maridanoo.

<sup>36</sup> Mi fidikafa inniki kai mariannoo inni nikeeku nikaaku nisaifaqausa misa maru kamuqoo numoo fifau faiqi nariu numoofa innee maa kamu saqa mariasaki mi numoofa inniki qumaara ramafuannoo.

*Yisufa Yeerusaree maqannaasara amuqusimarinau.  
(Ruk 13:34-35)*

<sup>37</sup> Oo Yeerusaree Yeerusaree firaa maqusa aniki mariasa Anutuna tamum-maqara fasiqauqa narusa mariafanoo. Anutufa faiqí faiqi niqiqoosa ooni saamu narimarusa. Moomoo kari sia asaanarida qinee kookooraanara fooqiara qiqoosa qairisee Yeerusareenni faiqi namu mafi sakaanee runaqa misa rukiee mariasa.

<sup>38</sup> Doo mina akiaqara kasooqagee inniqa maqusa faqa amaana maqa faqa sia faiqí mari maqa maaqafa naakundu maqa maaqafa mariannoo.

<sup>39</sup> Innee qini ufa iriaqa. Doo sia kafaa qini qiqafeefaranoo. Innee naaru kasooqagee qiniara, Oo amiqirafa Anutunakinaafa maasaki qumidanoo fee qifaranoo. Mi aukuanna kai kafaa innee qini qiqafeefaranoo.

## 24

*Yisufa Yeerusaree amaana maqa rapee ianinnanara qimanniminau.*  
(Mak 13:1-2; Ruk 21:5-6)

<sup>1</sup> Yisufa Yeerusareenni naaquqara amaana maqakiqari raudamakufanoo moosaa fimarufaqa mina faiqi namu Yeerusaree amaana maqa ooni maqa minakinaa amiqira usakara usakaqoona oosana oosana uqafiqee mariqau.

<sup>2</sup> Yisufa misa ufa iriseenoo quandafinoo qimanniminau. Innee maa ooninannai afeeka usakara usakaqoona qafaidee, innee qini ufa iriaqa. Kaqikaaqoo sia uqanna maa ooniuqa aaku aaku irafa maqee marindee iannoo sia moodaa kaqi mariannoo aiqama qumbaqi aquseefaranoo. Miqi qimasee quqasee moosaa nifiqee finau.

*Kasooqagee kambiqaaninna deedeepa oosanara qimanniminau.*  
(Mak 13:3-13; Ruk 21:7-19)

<sup>3</sup> Yisufa Oorifa aaqanasaa ooru ooqu marifufaqa mina faiqi namu oorureeqa nariara marufaqa ooru irammiriqau. Anee faasai amaana maqara qiannana yairee fee miqiannoo fee. Maasa anee qumira aukuanana nana ainainee qafamasee fee oo Yisufa qumira aukuanana doo adeedi reenoo fee qianauree. Maasa maa aukuanana naqi fee inaqee maasa miqoo qafee fee maa marunna aukuanafa taikaannoo fee qianauree.

<sup>4-5</sup> Yisufa iriseenoo maaqi qimasee qimanniminau. Innee rufiaaqa moo fannoo unna ufa inni qimannimisee kaqi runna mara quqaani. Moomoosa anireeqa unna qimasee maasa asauku mundirausa maridee qifaranoo. Faiqí anaasee moomoosa misa ufa iriseeqa eedoo qimaseeqa fifaqa rarisameeqee kaqitinai ubeekkeefaranoo.

<sup>6</sup> Innee nianaindaraa rakira ufa irifaranoo adeedi rainnaqoo rakirana tutuqirana innee irifaranoo. Mi ufana iriseeqa siamma qiniara qumira aukuanana doo aiqaree maqi qiaqa. Rakirafa kuqaa maqusa maqusa kambiaanifeera qidaqa. Maa marira aukuanafa sia dauni taikaannoo kaqikaaqoo kisaacaqasaa mariannoo.

<sup>7</sup> Maqusa maqusa firaa maqusa faqa kaqikaa maqusa faqa findifinaqa narari narari ifaranoo. Maqusa maqusa aandaroo naruannoo maqusa maqusa maqa kasiannoo.

<sup>8</sup> Mi ainainausa mandaukuana oorisa kai mariannoo kasooqagee firaafa mariannoo.

<sup>9</sup> Mina aanaaqiana faiqí anaasee maqusa maqusa inniara Yisuna faiqi namu fee qimasaida fidiagaamma nimaqeeefaranoo. Aiqama maa maqa maaqanaki mariasa inni nidafirana nimisee inni kuqannarifaranoo.

<sup>10</sup> Moomoosa mina qafamasee rufiasee qini Yisusaki mariasa quqasee minniseefaranoo. Moomoosa nari ueeqee nari ueeqee qifaranoo nari akooqee nari akooqee ifaranoo.



<sup>11</sup> Faiqí moomoo misa nariara Anutuna tamummaqara fasiqa fee qimari-asa misa findifiqa faiqí anaasee qumareeqee kaqitinai ubeekēefaranoo.

<sup>12</sup> Aiqama ainaina qumuarirana oosana oosana deedeepirana oosana oosana kambiqafinoo qumbiqeenoo maqa maaqa amana kai mariannoo. Miqi kai inoo moomoosa nariara nariara amuqusirana minniseeqa quanda-finaqa narí ueeqee narí ueeqee ifaranoo.

<sup>13</sup> Yafa uqannee narí akoona faiqí uqanna mi manda aukuanna aiqama ainaina kambiqainanaki finnaaqara maseenoo fifi inanoo taikara kooqi uqanna raquramisainafa mina akoofa Anutufa qumareeqeenoo asumu mariranaki quqaannoo.

<sup>14</sup> Maa amiqira fasaasa ufana qini innaaruna ququsa ufa maqusa maqusa faiqí anaasee aiqama qimannimisaiifaqa misa aiqama irisaifanoo mi ka-muqoo taikara aukuana aniannoo.

*Kaaqa fidiqaa imari manda ainainara Yeerusaree amaana maqaki kam-biqaaninnanara aaquqimannimaqanau.*

*(Mak 13:14-23; Ruk 21:20-24)*

<sup>15-16</sup> Misa kaaqa fidiqaa imaria manda ainaina qumareeqeeqa Yeerusa-ree naaquqara amaana maqakina quqasaifaqa Anutuna tamummaqara fasiqa auqu Danieerafa mifa minara akara rinau. Innee mina asaana rumasee amiqimmasee iriaqa. Misa mi mandainainna quqasaifaqa in-nee Yuda maqa maaqaki mariasa quqasee sandamaqaraasamasee aaqana aaqana daraaniaqa.

<sup>17</sup> Faiqí maqusasaa mariasa sia nári maaqaki keeqafinaqa nári ainaina mareefaranoo náriara kai quqasee sandeefaranoo.

<sup>18</sup> Afuqaki mariasa sia nári uqainara randasee maraaqa. Kaqi quqasee sandaaqa.

<sup>19</sup> Nimuaqu uqafaqaa anaaseeuqa faiqí aanaaqi faqaasa faqa misa mi aukuanna mandaikammifaranoo. Naqimmasee amiqimmasee sandeefa-ree.

<sup>20</sup> Innee maaqi qimasee innaaru qiaqa. Oo Anutufa sia mi sandara aukuanafa amaanasaa kambiqaani. Aaku aukuana faqa sia kambiqaani.

<sup>21</sup> Yisufa mi aukuannara qimannimino qinau. Mi manda aukuanafa aninna aukuana aupurarana inaakufa kambiqaannoo. Ooqai aupurara aukuana faqa kasooqagee aupurara aukuana faqa sia mi manda aupu-rarana amana mariannoo, ooreeqanoo mariannoo mifa uriqaranoo fi-raaqoo rafaqafusee mariannoo.

<sup>22</sup> Doo Anutufa mi manda aupurara aukuanna doo qusa mariannoo fee qinau. Sia qusaikinanoo faiqí anaasee sia amana kaqi marifara, aiqama kuqifara. Anutufa narí qutaaqamaqoosara narí ufamau fimariasara irinoo, misa sia kuquaqeera qusa kamu ramannisaannoo.

<sup>23</sup> Mi aukuanna faiqí moo fannoo inniara mai qafaqa Anutuna asauku mundirafa miqinni mari mirinni mari fee qinana siamma iriaqa, mina unnaqiannoo.

<sup>24</sup> Mi aukuanna unna nisauku mundiraua faqa unnaqi maria tamum-maqira fasiqausa faqa moomoo kambiqeefaranoo. Misauqaindi aninna aukuana misa qaini qainiqira ainaina mookira ainaina naaquqara ainaina auqamasee uqannifiqasainaga Anutuna qutaaqamasee mina ufamau fi-mariasara nikaru qimasaana qinindi kiaqeera miqifaranoo.

<sup>25</sup> Yisufa mi aukuannara mi unna fasiqausara maaqi qimasee narí faiqi namu qimannimino. Innee mi aukuannara oonumafi iriaqa, eerairiaqa rufiaqa. Doo maqee kamu doo kooroomma nimaqaunnana iriaqa.

<sup>26</sup> Faiqí moo fannoo maaqi qimaseenoo ani qimaminoo. Asauku mundirafa aadana maqusa maridanoo, qinana siamma oonu qafaaqa minni-masaaqa, unna qidanoo. Faiqí moo fannoo asauku mundirafa maaqoo kukeeqanoo mari ifoo qinana sia uqanna oonu qafa. Anee minara unna qiifoo qia.

<sup>27</sup> Qinee faiqí nimaaku sia kukeeqasee qumuanaura. Aakuusaara foora aiqamai innaarufa rakeemamaree fifaininanoo qinee faiqí nimaaku miqirafa tautumasee kaifaa qumuanaura, aiqama qiqaafaqeer.

<sup>28</sup> Aandau kuqinoo maridanoo afundifaqa meemoonauqa sia minniseefara kuqaa uqanna dauni uqanna qumureeqa mi andauna naidaqa.

(Qini ufa irimariasa maqusa maqusa yatinai fee marifaree sia qiniara randeefaranoo. Qinee qumidaqa misa marifandinaqoo qeeqa kai irisee tautumasee akooqoo qumuree misa uqeeraanaura.)

*Faiqí nimaaku innaarunaindari qumuaninnanara qimanniminou.*

*(Mak 13:24-27; Ruk 21:25-28)*

<sup>29</sup> Nimoosau maasau ira aukuaana mi aukuaana taikasainanoo suani qimbafinanoo asukuna aruannoo. Quqoona faqa asukuna aruamaqaannoo. Fasau aiqama innaarunaindari kakasammifaranoo. Fasau faqa quqoona faqa maruqoo ooqeenaa marirafa rapikamafuannoo.

<sup>30</sup> Mi kamu qoo qinee qumuanura kari innaarunai moo kira ainaina uqannifiqara ainaina quqasaanaqa mina naaree qafaifaqa qumuanaura. Faiqí anaasee aiqama maqasaa fasiqa anaasee aiqama qafamaseeqa nisaurusee ikifaafau qimarifaranoo. Mikari qinee asuruki qeeqa kaaqa qarananamu faqa qeeqa afeeka firaana faqa qumuanura faiqí anaasee maqusa maqusa aiqama qini qiqaqamasee qiniara rufiasee ikiraqeeffaranoo.

<sup>31</sup> Mikari qinee ukeena firaa qoo fuaqaanaqa qini qangiroouqa daraanifara, aiqama maa maqa maaqana afaaqasasa qini qiku qisauku qinee qutaqama nimaqaafanausa suqeeqeeqa moodaa saqa qinee marianannai suqu quqeeffaranoo.

*Saqari amanee ammuni quandara ufa.*

*(Mak 13:28-31; Ruk 21:29-33)*

<sup>32</sup> Yisufa kaifaa minara qimanniminoo qinau. Innee faafisa ammuni marina qafaaqa sia kaqinni ammunidanoo, narí aukuaana narana aukuaana ammunidanoo.

<sup>33</sup> Aiqaama ainaina qinee qimannimiqaunandee faafisa fooqaafa aiqama ainaina kambiqainaqa doo qinee kaifaa qumira aukuaana adeedi afaisaam-mifoo qiaqa.

<sup>34</sup> Maqee maria fasiqa anaaseesa akaqausa kaqi maridaqa aiqama ainaina qinee qimannimifannandee kai inoo kambiqaanoo.

<sup>35</sup> Innaaruna faqa innaarunakinaa ainaina faqa maqa faqa maqasaaqaraa ainaina faqa aiqama taikafuannoo. Qini dookinaafa sia taikarana amana naaru naaru anoona uqanna mariannoo miqi kaimminoo mariannoo.

*Sia moo fannoo mifa qumuaninna faasaanara iridanoo.*

*(Mak 13:32-37; Ruk 17:26-30,34-36)*

<sup>36</sup> Qinee qumira aukuanee qinee qumira faasaanee sia uqanna faiqí moo fannoo irimariafanoo. Innaarunai qangiroouqa faqa Anutuna amaaku qinee faqa siamma iridaqa, qini qikoofa narí kaimma qinee qumira aukuanara iridanoo.

<sup>37</sup> Qinee faiqí nimaaku qumira aukuaana Noona aukuaana fooqaasa marianaaura.

<sup>38</sup> Nammari samu naruna ataufakai mina maariqoo faiqí anaasee goomaqandauru uqi mariqau. Miqida faiqí anaasee naramundee naramundee ida mariqau. Misa miqimmamaree fubaqa Nooana firaa sipaki keeqeemaru faasaana misa miqikaimmariqau.

<sup>39</sup> Misa mana mana idaqa amiqi amiqidaqa marufanoo nammari radiqinoo ooqi misa fatikaneenoo ooqufinau. Qinee qumuanna aukuana miqimifaranoo. Mana mana imarifaqa kaqi qinee tautummannimaqaanaura.

<sup>40</sup> Mikari moodaa afuqaki qaara fasiqa ainainimarifaranoo qinee tautummannimaqasee moo qumaree innaarunai ooru fuanaura moo quqasaanaura.

<sup>41</sup> Qaara anaasee sana qaindi rimarifaqa qinee tautummannimaqasee moo qumaree innaarunai ooru fuanaura moo quqasaanaura.

<sup>42</sup> Minara qinee inni qimannimidaqa. Deedaqida mariaqa. Sia kaqi mariaqa. Qinee inni karaambaiqa qumira aukuanara sia irimariafanoo. Minara innee deedaqiaqeera qidaqa.

<sup>43</sup> Ummuari mari fasiqafa maaqa kooqi atuaseenoo ainaina ummuaramammaree fidanoo. Maaqa akoofa mifa ummuarira aukuana iriseenoofau rakisini. Sia irisaifanoo tautummamaqasee doo ummuaramammaree fifinoo.

<sup>44</sup> Innee minara iriseeqa rakisida mariaqa. Innee qiniara faiqí nimaaku sia qumirammifoo qimasee manoo manaa imarifaqa qinee tautumasee qumuanaura.

*Andeeqasee ainainasaa rakisimari fasiqanara quandara ufa.*

*(Ruk 12:41-48)*

<sup>45</sup> Ainaini mariasasaa rakisirafa amiqira fasiqa oosana maaqimminoo maridanoo. Mina firaa minara qinoo. Anee qini ainainira faiqiuqasaa rakisida narana ainaina andeeqasee amiqimmasee nimisee rakisida mariaqa qinee moosaa fuanaura.

<sup>46</sup> Mi ainainira fasiqausasaa rakisirafa narí firaana ufamau andeeqasee fimarinanoo mina firaa ani paqurinanoo sia mina afusaa asauruannoo asasiannoo.

<sup>47</sup> Iriaqa qinee anoona qimamidaqa mi fasiqana firaa minna andeeqarana qafamaseenoo, narí aiqama ainainasaa rakisira saika minna amiannoo.

<sup>48-49</sup> Ainaini mariasasaa rakisirafa moo manda fasiqa narí firaa moosaa finanoo mifa minara sia dauni aniannoo fee qimasee narí ainainira faiqí namu sia amiqimmasee narana niminoo, misa narinoo misa kaukaata qimannimaqaidanoo quandaqandoo naríara goomaqanduquseenoo faiqí akaqausa naaramaseenoo misauqa faqa namafinoo afeeka nammari moomoo misa saimbaqa namafidanoo furufaramma qafeenoo.

<sup>50</sup> Miqi marinanoo sia rakisida marinna aukuana minna firaa tautummannimaqaseenoo anirama qafeenoo arusee ateeka atekamma aqusaannoo.

<sup>51</sup> Mi manda ainainira fasiqafa qaaraiki mariasa namufaqa mandainainaki mariannoo. Mifa miqoo misa faqa maridanoo ikifaafau qidaqa nifai riqidaqa marifaranoo. Qinee Yisusa qumira aukuana miqimminoo mariannoo. Tautummannimaqaanaura.

## 25

*Qisaukuqara taikasee maanaaqauqa misara quandara ufa.*

(Yisufa maru aukuana maanaqa moo amundararee qimasee kaqi aqoonnanaikammaqoo fasiqafa minna áqoonafa narí maqusai kaqi marufanoo mi fasiqafa narí akoona maqusai nariara maaqa usaka taikaseenoo

narí aqoonnana maqusai tautumannimaqararee qimasee oonureenoo narí anaafa afigeenoo doo narí maaqai afigee finau. Misa oosana miqinoo marunara Yisufa iriseenoo maa ufana qimanniminau.)

<sup>1</sup> Qinee qumuanna aukuna anirainanoo innaaruna ququsa maaqimminoo mariannoo. Qisaukuqara taikasee maanaafa mariqau. Misa nári rambi uqirausa maqusasaa asukuna rakisi marufanoo amundara fasiqa anufaqa misa faqa firaa maqaki narana naani qimasee afeesimariqau.

<sup>2-3</sup> Moodaannai qisaukunamu furufari marusa maridaqa nári rambi kai uqusee marida afeesimariqau.

<sup>4</sup> Moodaannai qisaukunamu irirana faqaasa rambi faqa minaki adiee maria nammarina faqa uqusee maridaqa afeesimariqau.

<sup>5</sup> Amundara fasiqa sia dauni ani marufaqa, afeesimarufanoo nifuki aunduarufaqa mandaiki mariqau.

<sup>6</sup> Eenda amuqusaikufanoo faiqi moo fannoo fifi qimaseenoo qimanniminau. Doo amundarafa ani ifoo.

<sup>7</sup> Doo deedaqiaqee qufaqa, mi manaqausa findifufaqa qooma quumbeegee rambisaa muqurusoofanoo qanau.

<sup>8</sup> Rambi nammari siaisa quandaqiaqa nammari faqaasara innaaru qiqau. Maasa faqa adia qimia, maasa qooma qimbafifaqa nammari sia marifaqa.

<sup>9</sup> Nammari faqaasa misa qaoo qimasee qiqau. Sia amana inni adia nimianaura inni adia nimiseeqa maasa faqa randaanoora innee sandeeqa sutuaqai oonu feefauriaqa. Miqi qufaqa misa eedoo qimasee sutuaqai nammariara fiqau.

<sup>10</sup> Misa fufanoo amundara fasiqa irirana faqaasa maruqoo anireenoo ai misa nifiqeenoo firaa maqaki keeqaqau. Keeqafufaqa misa kooqi ititaseeqa narana neemariqau.

<sup>11</sup> Neemarufaqa furufari maru manaqausa anireeqa naaraqau. Oo karaambaiqa kooqi atuasainaqa maasa faqa keeqafi naanaura.

<sup>12</sup> Miqi qufanoo mifa iriseenoo qimanniminau. Sia qinee inniara iridaqa innee yai mariaasee, doo see fuaqa doo kooqi ititaseeqa.

<sup>13</sup> Yisufa maanaqauqa kikiqa qususeenoo narí faiqi namu qimanniminau. Innee sia qinee qumira aukuanara irimariafanoo sia deedaqifoora. Minara inni qimannimidaqa innee iridaqa qiniara rakisiaqa.

*Qaaramoo ainainira fasiqauqa misa quandara ufa.*

*(Ruk 19:11-27)*

<sup>14</sup> Mi ufana taikaseenoo Yisufa innaaruna ququsara moo ufa kikiqa usinoo qinau. Innaaruna ququsa maaqimminoo maridanoo. Ainaina faqaafa moo atinai fuani qimaseenoo narí ainainira fasiqauqa suquseenoo ufaasu narí ainaina faqa maqa maaqa faqa misasaa quqaseenoo rakisiaqee qinau.

<sup>15</sup> Moo fasiqa narí ainainirana amana moodaannai qisauku koondaa amanee firaana aminau. Moo fasiqa narí ainainirana amana qaaraqanda koondaa amanee oorudupirana aminau. Moo fasiqa oorudupimasee narí ainainirana amana moodaa koondaa amanee amiseenoo qimanniminau. Innee maa munnimmana qumareeqa minannai inneeqa ainainirana uqeeraaqanani. Kasooqagee aniraanaqa mina anoona munnimma faqa mina ati munnimma faqa qimianne qimasee moo saa finau.

<sup>16</sup> Moodaannai qisauku koondaa amanee qumaroofa minannai aiqama ainainirana nimisaidanoo nimimarufanoo dinni qisauku amanee mi ainainiranasaa aniranau. Moodaanakikufanoo qisukuqara amanee marasee marinau.

<sup>17</sup> Qaara koondaa amanee maroofa miqi kai inoo kafaa qaara faqa qaara faqa aniranau.

<sup>18</sup> Moodaa koondaa amanee maroofa mifa siamma ainaininau. Mifa madika indufuseenoo munnimma minaki quqasee kukeeqasanau sia furufarianifeera idaaqinoo marianifeera kukeeqanau.

<sup>19</sup> Naaru kasooqaqee misa rakisirafa anireenoo naaramaseenoo munnimma oosana oosanara irammirinau.

<sup>20</sup> Moodaannai qisauku koondaa maroofa anireenoo narí rakisirana maaqi qimasee qimaminau. Oo qini rakisirafa anee moodaannai qisauku koondaa kai qimunnana. Minannai ainainammasaunanoo dinni qisauku faqa mina ati munnimma faqa aniraifaqa doo qisaukuqara animmami-daqa.

<sup>21</sup> Mina rakisirafa minara iriseenoo doo qimaseenoo irinau. Iriseenoo maaqi qimasee narí ainainira fasiqa qimaminau. Oo anee amiqira fasiqa oori runuseenana ainaini marianafa andeeqara fasiqa uqanna, anee kaqikaa ainainasaa faqa andeeqasee rakisimarianafa mariananoo. Minara qinee firaa ainaina aiqama ainainasaa rakisirana anisaa kai quqaanaura. Sia anee kaqi ainainira faiqifau marinnandia. Anee qini faiqiara foora marinnaranoo. Anee faqa qinee faqa moodaanaki asasirausa marianaura.

<sup>22</sup> Miqi qimasoofanoo qaara koondaa amanee maroofa anireenoo narí rakisirana maaqi qimasee qimaminau. Oo rakisirafa anee qaara amanee qimunaqa minannai ainainammasaunanoo qaara faqa qaara faqaikamafi-faqa, doo animmamiqa.

<sup>23</sup> Narí rakisirafa mina ufa iriseenoo qimaminau. Oo anee faqa amiqira fasiqa oori runusee ainaini marianafa andeeqara fasiqa uqanna, anee kaqikaa ainainasaa faqa andeeqasee rakisi marianafa mariananoo. Minara qinee firaa ainaina aiqama ainainasaa rakisirana anisaa kai quqaanaura. Sia anee kaqi ainainira fasiqafau marinnandia. Anee qini faiqiara foora marinnaranoo.

<sup>24</sup> Miqi qimasoofanoo moodaa koondaa amanee maroofa anireenoo narí rakisirana maaqi qimasee qimaminau. Oo rakisirafa qinee ani oosana iridaqa. Kaaqa anee munnimmara rimarianaqa qinee qafamaqaunausa.

<sup>25</sup> Qinee ani koondaa amaneennai ainainammasaanoo ani munnimma furufariandoo qimasee minara rufiasee madika indufuseeqa minaki quqaqaunanoo mariina doo mina kai anamiqa.

<sup>26</sup> Mina rakisirafa mina ufa iriseenoo raiqasee qimaminau. Anee manda fasiqa uqanna mariananoo, kudi uqanna aarara marianafa mariananoo. Anee qiniara kaaqa munnimmara rimariana fee q inanee.

<sup>27</sup> Anee qini oosana miqinoo marinana anee qini munnimma naqaa fee ifanee qini munnimma beenaki quqaqaana. Anee beenaki quqa-sainanoofau qini munnimma faqa ati munnimma faqa marinaqau qeeqa marani. Anee madikaki kai akundoonnanara kudi uqanna mariananoo.

<sup>28</sup> Rakisirafa miqi qimaseenoo ainainimaru fasiqa namusa qimannim-inau. Innee mina moodaa koondaa amanee mareeqee qisaukuqara ma-reemari fasiqana mina amiaqa.

<sup>29</sup> Moo fannoo ainaina uaqee innana moo faqa amifanoo rairaa inoo mariani. Ainaina siainnana sia akaqa ainaina amifara, minaki ooda marinnana mina rafia maraifanoo kaqi mariani.

<sup>30</sup> Doo maa manda kudi fasiqana rarisameeqeenoo madaanai asukunaki aqusaqa. Mi asukunanaki maridanoo ikiraqaidanoo afai riqidanoo mari-ani.

*Taikara faasaana ufa irira faasaana mi ufana.*

<sup>31</sup> Qinee faiqí nimaaku qumuanna kari qeeqa rakisira afeeka namufaqa qeeqa qangiroo namufaqa maa maqanasaa qumuanaura. Qumureeqa ufaqira qaari amiqira qaari ufiqisee eekara ariranasaa ooqu marifinaqa maqasaaqaraasa ufa irisee andeeqannimaqaanaura.

<sup>32</sup> Qinee ooqumari fuañaqa maqusa maqusa aiqama suqeeqee qeeqa doorisaa quqasee nindafeeqa qeeqa iriranannai inni rainannimaqaanaura. Qinee sipsipasaa rakisirausa fooqaasa marida. Misa sipsipa raineeqee aaduma quqaidaqa mimmi raineeqee aaduma quqaidaqa. Qinee qumuanna aukuanna qinee miqianaura.

<sup>33</sup> Qinee sipsipa fooqaasa raineeqee qisauku uqannai quqaanaura. Mimmi fooqaasa qisaaqai raineeqee quqaanaura.

<sup>34</sup> Rainannimaqaseeqa qinee firaa karaambaíqa quandafinaqa qisauku uqannaindaraasa maaqi qimasee qimannimianaura. Qini qikoona amaakummara mariasa aniaqa anireeqa aiqaree mina amiqira ququsaki keeqafi mariaqa. Ooqai maa maqa maaqafa sia marufanoo mi ququsana inniara quqaqoofa maridanoo.

<sup>35</sup> Qini daararofaqa narana qimusa mariafanoo. Qini nammariara didimarufaqa nammari qimusa mariafanoo. Qinee aanaamuru fooqaasa mariafana innee qini aqoondikiusa mariafanoo.

<sup>36</sup> Qinee kaqisamu mariafana innee qamunna qimusa mariafanoo. Qinee aurimariafana innee aniree qini qiqafee sukudaakutiqa, qimudao qimaqimaqeeusa mariafanoo. Qinee karafusaki mariafana innee qini undara anireeqa aiaaee qimaqimaqoosa mariafanoo. Qinee minara iriseeqa inniara Anutuna amiqira ququsaki fuagee qidaqa.

<sup>37</sup> Miqi qianaqa misa qisauku uqannaindaraasa maaqi qimasee ufa qini qimaqimifaranoo. Oo karaambaíqa mina anee fee yairee fee ani aararee marufaqee narana amiqiafana. Nammariara aidufaqa yairee fee ani amiqiafana. Maasa sia ani qafaqiafana.

<sup>38</sup> Yairee fee anee aanaamuru fooqaafa marunaqee ani aqoondikiqiafana. Yakari fee kaqisamu marunaqa qamunna ani amiafannanara qidanee.

<sup>39</sup> Yairee fee aurimarunaqee maasa oonu ani qafaqiafana. Yakari fee anee karafusaki marunaqee maasa oonu ani qafaqiafana. Anee qinaqa maasa iriaqa.

<sup>40</sup> Qinee misa ufa iriseeqa quandafiqá kooroo qimannimianaura, maa qini qikaqaafasauqa misaki ureeqarausa innee misa amiqimmanimaqaidaqa qini faqa amiqimmaqimaqee marusa mariafanoo minara amiqira ququsaki keeqaaqeeera qimannimidaqa.

<sup>41</sup> Qinee misa qimannimiseeqa quandafinaqa qisaaqaindaraasa maaqi qimasee qimannianaura. Innee Anutuna aqira ufa innisaa marisa innee idaki aqufuaqa. Anutufa Sadannanara faqa narí manda qangiroouqa faqa afaannauqa faqa ida aqufuanifeera auquqoofa maridanoo naaru naaru qeemari idafa sia qimbeemari idafa, innee minaki aqufuaqa.

<sup>42</sup> Qini daararee marufana naranara qaoo qimasee sia qimusa mariafanoo. Qini nammariara didufaqa qaoo qimasee sia qimusa mariafanoo.

<sup>43</sup> Qinee aanaamuru fooqaasa mariafana innee qini aqoondikiranara qaoo qusa mariafanoo. Qinee kaqisamu mariafana, qaoo qimasee sia qini qamunanda qimusa mariafanoo. Qinee aurida mariafana innee sia oonu qini qifafoosa mariafanoo.

<sup>44</sup> Qinee miqi qimasee misa qimannimianaqa misa quandasee maaqi qimasee qini qimaqimifaranoo. Oo karaambaíqa yakari fee naranara

aararanoo fee inau nammariara aidinoo fee inau. Yairee fee anaamuru fooqaafa marunaqee kaqi samu marinee inau. Yairee fee aurimarinee inau. Yairee fee anee karafusaki marinee inau. Anee yakari fee miqunaqee maasa sia amiqi amiqiafana. Anee qinaqa maasa irianaaura.

<sup>45</sup> Qinee misa ufa iriseeqa maaqi qimasee kooroommasee qimannimi-anaura. Maa qini qikaqaafasauqa misaki ureeqarausa sia innee amiqim-mannimaqaidaga qaoo qunara mi fasannai qini faqa sia amiqimmaqi-maqoonara, qaoo qunara minara qinee inniara idaki fuagee qidaqa.

<sup>46</sup> Miqi qimasaina misa naaru naaru nariranaki keeqafina marifaranoo. Andeeqee mariasa misa naaru naaru mariranaki keeqafi marifaranoo.

## 26

*Yisuna ariraree qimasee ufa tipundaariqau.*

*(Mak 14:1-2; Ruk 22:1-2; Yoh 11:45-53)*

<sup>1</sup> Yisufa maa ufana oosana oosana qimannimi taikaseenoo maaqi qimasee nari faiqinamu qimanniminau.

<sup>2</sup> Qaara faasaana taikainanoo maasa Yeerusaree maqusai ooruree ainnaaqarara qoomaqa sakasee naanaura. Anutufa maasa qifaqnausa qikeeku qikaaku Isipa maqa maaqai marufanoo sia narinau ainnaaqaramasee Isipa maqannaasa kai narinau. Minara maasa Yeerusaree maqusai ooruree afaarurumaanaanaura. Miqoo faiqi moo fannoo qini uqeeqainaqa aunirira saqarisaa pirimmannoo qini darifaranoo.

<sup>3</sup> Yisufa mi ufana nari faiqi namu qimannimimarufaqa amaana maqasaa rakisimarusa faqa Yuda maqanna faiqi firaasa faqa moo atinai Kaiafasana maaqaki ufa suqidaqa Yisuna arira ufa suqidaqa qimmiriqau.

<sup>4</sup> Ireeda qumee kai Yisuna qumaree ariraree qimmirimariqau.

<sup>5</sup> Maaqoo Yeerusaree maqusai ainnaaqara qoomaqa suqa neemarinnana qambaana sia Yisuna qumaraanaura. Faiqi anaasee moomoo suqiqa mariasa qiqaqamaseeqa ufa firaana qidaqa tutu qifoora.

*Anaasee moo fannoo Yisuna fadameena adiamaganau.*

*(Mak 14:3-9; Yoh 12:1-8)*

<sup>6</sup> Mikari Yisufa Beetani maqusai Simoona amarafa karoora arimarufanoo Yisufa taikaisoona mina faqa naidanoo mina maaqaki marinau.

<sup>7</sup> Maridanoo Yisufa misauqa faqa narana neemarufanoo anaasee moo fannoo mifa maru maqanaki keeqafinoo fira munnimma aqimaru fadameena idaaqira taqukinaana amiqira afundimaruna Yisufa narana nee marufanoo akiaqa amoondunna kaqi adiamaganau.

<sup>8</sup> Yisuna faiqi namu mina qafeeqa tautufanoo niranaqoofaqa qiqa. Maa fifau faafau ira anaaseefa naqi fee ifanee fifaunni rairaa inanee.

<sup>9</sup> Naqi fee ifanee munnimma fainausa nimiseenana mina akiaqara fira munnimma maraseenana kudi fasiqa anaaseeuqa nimiaqaana.

<sup>10</sup> Yisufa misa ufa iriseenoo quandafinoo nari faiqi namu qaoo qimanni-maqaidanoo qinau. Nanaree mi anaaseenara qaoo qida fee. Qifaaqa idaaqa uqannamma qimaqaanifeera adiaqimaqeenoo.

<sup>11</sup> Inniki kudi fasiqa anaaseeuqa naaru naaru marifandia. Innee amana moomoo kari misa amiqi amiqifaranoo qinee sia kisaagasaa inniki mari-anaura, kaqikaa qoo fuanaura minara mifa qini adiaqimaqeenoo.

<sup>12</sup> Qini qifaaqa madikaki fuaninnanara minara mifa maasa faiqi kuqirana oosana mareenoo qini qifaaqa kuquaninnanara deedaqidanoo fadameena adiaqimaqeenoo.

<sup>13</sup> Mi anaaseenara Yisufa kaifaa qimanniminau. Naaru naaru maqusa maqusa maaqa maaqa maa qinee marunna kamuqooqaraa ufa, amiqira ufa, faiqí anaasee qimannimidaqa maa anaaseenara fadameena adiaqi-maqoona sia aunifara mina faqa qimannimifaranoo. Minara faqa qimannimidaqa sia faafaa qiaqa, sia qaoo qiaqa.

*Yudasifa munnimmara rumammareenoo Yisuna uqeeqararee qinau.  
(Mak 14:10-11; Ruk 22:3-6)*

<sup>14</sup> Yudasi Keerioota maqusaindaraafa, Yisuna faiqi namuki marufa, mi fasannai amaana maqasaa rakisi marusunnai oorureenoo irammirinoo qinau.

<sup>15</sup> Innee naqi fee mandee feefauru qimifaqee Yisunara ueeqaanaaree. Irammirisoofaqa misa ooni amiqau. Moodaa fasiqa aiku asauku taikasee moo fasiqa asaukuqara taikasee miqi mandee ooni amiqau.

<sup>16</sup> Miqooqari faasaambaasaana Yudasifa Yisuna qumee misa nisaukuki quqaanifeera apuree marinau. Fiqu faiqu fidanoo apuranoo nimarinau.

*Ainnaaqarara qoomaqa sakasee naqau.  
(Mak 14:12-21; Ruk 22:7-14,21-23; Yoh 13:21-30)*

<sup>17</sup> Yuda maqannaasa misa aiqama Yeerusaree maqusai suqumaree Anutuna qangiroo misa nikeeku nikaaku ainnaaqarara qoomaqa afaarurumasaida qaaramoo faasaana mi feemuna neemariqau. Ooruku siai feemuara fooqaana neemariqau. Mi indaaru faasaana Yisuna faiqi namu Yisufuqoo anireeqa irammiriqau. Ya maqanaki fee maasa Anutuna qangiroo ainaaqaroo afaarurira naranna ooruku siai feemu suqaanaaree.

<sup>18</sup> Yisufa iriseenoo qimanniminau. Innee Yeerusaree maqusai oorureeqa muqutinai moo fasiqa oonu paqurimasee maaqi qimasee qimamiaqa. Ufasaa rakisira fasiqa ani maaqaki ainnaaqarara qoomaqa suqasee naannoo. Narí aukuana adeediraifanoo ani maaqaki narí faiqinamu faqa narana naanee qinoo. Miqi qimasee qimamifanoo narí maaqa inni nimiani.

<sup>19</sup> Mina faiqi namu iriseeqa miqimmiqau, miqoo ooru qoomaqirara deeda iqau.

<sup>20</sup> Mi eendanaki Yisufa faqa narí faiqi namufaqa mi maqanaki ooqu marifufaqa eendaki narana neemariqau.

<sup>21</sup> Misa neemarufanoo Yisufa maaqi qimasee qimanniminau. Qinee anoona ufa inni qimannimidaqa innikiqari faiqi moo fannoo qini ueeqaaninafa maridanoo.

<sup>22</sup> Misa minara irisoofanoo suara naakinu. Suara naakufaqa moodaa moodaa Yisuna irammiriqa qiqau. Moo fannoo Yisu qinee fee mi ufana qifee. Moo fannoo miqi qinoo qinee fee qifee. Miqi qimasee aiqamausa Yisuna irammiriqau.

<sup>23</sup> Yisufa iriseenoo kaifaa nariqa qimanniminau. Innikiqari moo fannoo maa difaaninakina asauku aqusee mara neemarifa qini ueeqaannoo.

<sup>24</sup> Tamummaqara fasiqauqa akara fannoo qiniara faiqí nimaakuara doo kuquani fee qinoo maridanoo. Kuqaa qinee kaqikaa qoo kuquanaura ueeqasainaqa kuquanaura. Qini ueeqaaninna fasiqafa kuqaa maaqi qimasee nariara iriannoo. Nanaree qini qinoofa qini maqaqisoofaqee maridee. Qini numoo firaafa maridanoo fee qiannoo.

<sup>25</sup> Miqi qimasoofanoo Yudasifa Yisunara irammirinoo qinau. Oo qini qafee faqaafa qiniaree ueeqee maqi qidanee qimasoofanoo Yisufa qinau. Aneenna kai qiananoo.



*Yisufa aafaqa oosana arasee noo ufafa.*

*(Mak 14:22-26; Ruk 22:14-20; 1Kor 11:23-25)*

<sup>26</sup> Misa nee marufanoo Yisufa feemu maraseenoo Anutunara dufi dufi qimaseenoo ruqiruqi maseenoo nari faiqi namu niminoo qinau. Maana marasee naaqa. Maana qini qifaaqa qimaqi kikiqusira feemu maridanoo.

<sup>27</sup> Nimiseenoo uainna nammari mara mareenoo miqooqaraasa maqee maqee neemaru nammarina Yisufa mi uainna kaafana uainna minaki qumbiqarana maraseenoo Anutunara dufi dufi qimaseenoo nari faiqi namu niminoo qinau. Innee aiqama maanaki marasee naaqa.

<sup>28</sup> Maa uainnafa qini fidika kikiqusira uainna nammari maridanoo. Qini fidikannai uqanna Anutufa moomoosa numoo aununnisaanifeera maa qini fidika raannoo. Maana qini fidika fannoo Anutuna nariara faqa faiqi aanaaseera faqa noori runiranaki marunara fukasaa moodaanaki kira ufa mapukueeqeenoo doo rafaagafusai fidikafa maridanoo.

<sup>29</sup> Innee iriaqa. Qinee anoona ufa uqanna inni qimannimidaqa. Sia maa marunna aukuaana maa uainnana kaifaa naanaura. Kasooqaquee qini qikoona ququsaki innaarunai innee faqa qinee faqa moodaanaki maridaqa fuka uainnara fooru ququfiqa naanaura.

<sup>30</sup> Yisufa miqi qimasee qimannimisoofaqa misa namaseeqa Anutunara idi ramaseeqa raudamakufaqa asukunai Oorifa aaqanai ooru fiqau.

*Yisufa Peetooroofa qaoo qianinnanara qinau.*

*(Mak 14:27-31; Ruk 22:31-34; Yoh 13:36-38)*

<sup>31</sup> Miqoo ooru maridanoo Yisufa nari faiqi namu qimanniminu. Fafaa eendaki qini qumaraifandinanara innee rufiasee quqasee sandeefaranoo. Anutuna tamummaqara fasiqa ooqai minara maqi qimaqoofa maridanoo. Anutufa sipsipa rakisirana arinaqa sipsipa aiqama quqasee furufarifaranoo qimaqoofa maridanoo.

<sup>32</sup> Yisufa minara kaifaa qimanniminu. Qinee kuqiranakiqari findimeeqee Kariree maqusai inni nifunni fuanaura. Innee qini qinaaqiana oonuraifaqa miqoo inni nindafaanaura.

<sup>33</sup> Yisufa innee quqasee furufarifandia maqi qimaqoona Peetooroofa minara iriseenoo qinau. Qinee sia sandaanaura. Misa aiqama quqasee sandaifaqa qinee sia sandaanaura, ani faqa apamma fuanaura.

<sup>34</sup> Yisufa mi ufana iriseenoo qimaminu. Fafaa eendaki kookooraana sia ufa qinana anee qaaramookinana irafana qiniara sia qinee mina qafaidee qinnaranoo. Miqi qinanoo kookooraana ufa qiannoo.

<sup>35</sup> Peetooroofa minara iriseenoo qinau. Qaoo, sia qinee aniara sia qafaidee qianaura ani faqa kuquanaura. Yisuna faiqi namufaqa misa aiqama miqi kai qiqau.

*Yisufa Keetaseemane saqamaki innaaru qinau.*

*(Mak 14:32-42; Ruk 22:39-46)*

<sup>36</sup> Miqooqari Yisufa nindiqeenoo saqamai asukunaki finau. Mi saqamana auqu Keetaseemane saqama marinu. Miqoo mifa nari faiqi namuara ooqumarifi rakisiaqee qimaseenoo nariara kaqikaa qoo finoo nariara innaaru qiraree qinau.

<sup>37</sup> Qimaseenoo mifa Peetooroona faqa Seebeedina amaakuqara Yameesa Yoohaneesa minamusa faqa kaqikaa qoo saqamaki nifiqamaree fidanoo nari kuquaninnanara irimarufanoo aundura mandaikimarufanoo akoo akaa imarufanoo miqi marinu.

<sup>38</sup> Miqidanoo minamusa qimanniminu. Innee maaqoo saqama qambaanai marida nifu maqaidaqa qinisaa faqa rakisi qimaqaaqa. Qini qikoofa

qini minniqisaaninnanara firaa qoo qimuqusimarifaqa, mi qimuqusirafa daruannoo fee qidaqa.

<sup>39</sup> Miqi qimaseenoo mifa kaqikaa qoo nariara oonu oorindari mi saqamanaki maqasaa aqufufanoo innaaru qinoo qinau. Oo qini qikoofa amanee anee sia qini minniqisainaqee sia kuqunauree. Sia qeeqa didiranara iridaqa ani aidiranara dididanoo, anee qinaqa kuqunaura.

<sup>40</sup> Miqi qimasee innaaru qimaseenoo doo findifinoo qaaramoo namu maruqoo anireenoo nindafoofanoo misa nisuku kaaqa faiqaqau. Ani nindafamaseenoo Peetooroona aaramaseenoo qinau. Peetooroo anee sia fee kaqikaa qoo qiniara rakisinanee.

<sup>41</sup> Rakisidana innaaru qidana maria sia kaqi maria. Aneenna iriranannai kai qini dadaaqi marianafa, aneenna uqanna sia amanaiki mariananoo miqi marifana kudoosaapee marianaqa qafaidaqa.

<sup>42</sup> Miqi qimaseenoo Yisufa kaifaa kaqikaa qoo oonureenoo innaaru qinoo qinau. Oo qini qikoofa anee amanee sia kuquna nammarina qiminnaree anee sia minniqisainaqee sia kuqunauree. Sia qeeqa iriranannaifau qidau anee qinandee, qinaqa miqimmiqa kuqunaura.

<sup>43</sup> Miqi qimaseenoo kaifaa nari faiqi namu unnai oonu nindafoofaqa misa kafaa nisuku faiqee mariqau. Misa nifuki aunduari marufaqa faiqaqee mariqau.

<sup>44</sup> Nindafamaseenoo ani quandakufanoo kafaa oonureenoo kafaa qaaramookinoo innaaru qinau. Indaaru qundee kai kaifaa miqi kai inoo innaaru qinau.

<sup>45</sup> Innaaru qimaseenoo findimeeqeenoo nari faiqi namu maruqoo anireenoo nindafeenoo qimannimainau. Innee faiqaqee maridee idooaidee. Qini mareeqee manda oosana maree mariasa nisaukuki quqaaninna eendirafa doo anireenoo.

<sup>46</sup> Doo findifi qafaaqa. Qini ueeqee mari fasiqafa doo ani maridanoo.

*Misa Yisuna qumaraqau.*

*(Mak 14:43-50; Ruk 22:47-53; Yoh 18:3-12)*

<sup>47</sup> Mikari kai mi ufana qimarufanoo eendufanoo asukunai nari faiqi namuqari faiqi moo auqu Yudasifa aninau. Faiqi moomoo mina saimbaqa duru feefa saamu faaqaana indaaii maree aniraqau. Yuda maqannaasa faiqi fraasa rakisirausa niqiqoofaqa Yudasina faqa aniraqau.

<sup>48</sup> Faasai Yudasifa qimannimiseenoo innee asukunai aaqee foora qinee oonuree amooqaanaqa qafeeqa innee mina kai qumaraqau.

<sup>49</sup> Doo maqeeufanoo Yisufuqoo oonu reenoo oo qini qafee faqaafee qimaseenoo Yudasifa Yisuna amooqanau.

<sup>50</sup> Miqi marufanoo Yisufa maaqi qimasee qimaminau. Oo qini qiqoondi anee nanaree aninanee. Miqi qimasoofofaqa faiqi Yudasina faqa anusa aniree doo Yisuna amiqimmasee rakisisimma qumaraqau.

<sup>51</sup> Qumaree marufanoo Yisuna faiqi namuqari moo fannoo nariqa rakira kisaqa paipana moo qumareenoo nariraree qimaseenoo moo fasiqa aqoo dindanai aiqama ateeka aqinau. Amaana maqasaa rakisirana ainainira faiqi mina aqoo ateekanau.

<sup>52</sup> Yisufa mina qafamaseenoo qinau. Doo rakira paipana quqaa. Aiqama rakira ainainannai narimariasa minannai kai nari narifaranoo. Minara rakira paipana quqaa saina qini kai daruqa.

<sup>53</sup> Qinee qeeqa qikoonara iraananoo qangiroouqa nukudara foora qiminaqa dadaaqifaqa sia kuqunaura. Anee minara sia fee iridanee. Doo aneenna rakira paipana quqasaa.

<sup>54</sup> Qini qikoofa narí qangiroouqa qiminaqa dadaaqifaqa naqi fee masee qinee kuquananoo Anutuna tamummaqara fasiqa ufa kambiqaanoo fee.

<sup>55</sup> Yisufa miqi qimasee narí faiqara qaoo qimaseenoo quandafinoo narí qumaree marusa qimanniminoo qinau. Qinee maqee maqee inni amaana maqaki qimannimi mariafannaqoo innee mikari miqoo qini qumaraaqaana. Maqee eendaki innee qumee kai duru saamu namufaqa qini qumaree mariafanoo. Qinee qumuari maruna fasiqausara maqi marunaqa innee asukunaki qini qumaree mariafanoo.

<sup>56</sup> Misa mi oosana oosana ainainna Yisunara amisoofanoo ooqeenaa Anutuna tamummaqara fasiqauqa ufa anoona kambiqanau. Yudasina faqa anusa Yisuna qumaroofaqa mina faiqi namu aiqama mina qafamasee quqasee daraaniqa sandaqau.

*Kaiafasana maaqaki misauqa Yisuna iree mariqau.*

*(Mak 14:53-65; Ruk 22:54-55,63-71; Yoh 18:13-14,19-24)*

<sup>57</sup> Sandamafufaqa Yisuna qumaree marusa kaqi qumareeqa Kaiafasana maqusai maree fiqau. Kaiafasafa amaana maqasaa rakisirafa firaafa marunnai maree fiqau. Yuda maqannaasa faiqi firaasa misa faqa Kaiafasana maaqaki faasai suqimaruqoo miqoo maree fiqau.

<sup>58</sup> Misa Yisuna afiqee fimarufanoo Peetooroofa ninaaqianna rufieenoo asukunai nifaaqmee nifaaqmee inoo finau. Misa Kaiafasana maaqaki Yisuna afiqee keeqafufanoo Peetooroofa naambeeqai aadumasaa sundi-auga saimbaqa ooqumarifi maridanoo Yisunara iridanoo imarinau. Misa arifaree naqi fee ifaree rumbeefaree, miqi qidanoo nindafee marinau.

<sup>59</sup> Miqi marufaqa amaana maqasaa rakisimarusa firaasauqa faqa Yuda maqanna kasoorauga faqa miqoo suqiqa marida unna ufara randee mariqau. Miqidaqa qiqau. Ya fasiqa fee moo ufa oosana arasainagee mina maree fee munu kiapana qimamifanoo fee aruannoo fee.

(Mooseena sandufa maaqi qimaqoofa, moodaa fasiqa fannoo qinnufafa sia anoonaikiannoo. Qaara fasiqa fannoo kikiqamafi qinafa mifa anoonaikiannoo. Misa minara iriseeqa faiqi qaaraqanda mi ufana qifaqa Yisuna ariraree qiqau.)

<sup>60</sup> Faiqi moomoosa maridaqa unna ufa oosana oosana qimariqau. Miqidaqa Yisuna ufara randee mariqau.

<sup>61</sup> Randee marufanoo qaara fasiqa moodaa ufa andeeqaqau. Miqanda maaqi qimasee qimannimi qau. Yisufa maaqi qimasee qufaqa maaqanda iriqiafana. Qinee Anutuna amaana maqa Yeerusaree naaquqara amaana maqa aiqama rambairi aqusee qaaramoo faasaana amana qinee kaifaa usakaanauree qufaqa iriafannaqanda maridaqa.

<sup>62</sup> Amaana maqasaa aanaiqikirausa misa uriqararafa mi ufana iriseenoo findifinoo Yisuna aaramaseenoo irammirinau. Anee miqanda ufa iridanee. Miqanda kuqaa fee qida fee.

<sup>63</sup> Miqi qimasoofanoo Yisufa kaqi kasooinoo marinau. Amaana maqasaa aanaiqikirausa misa uriqararafa Yisuna qafamaseenoo narí afusaa qimaminoo qinau. Kuqaa maaqanda Anutuna afusaa marunausa marida. Anee anoona ufa kai qini qimaqimia. Kuqaa fee anee Anutuna asauku mundirafa uqannee maridanee, Anutuna amaaku uqannee maridanee.

<sup>64</sup> Miqi qimasoofanoo Yisufa qinau. Anee qiniara qiannana, qini ufa iria, maa maqee innee qini qiqafee mariafanoo. Kasooqagee sia maa qirausau marianau qiqafeefarau. Uriqararana Anutuna asauku uqannai mina aaqa ooqumarifi marianauree, mari inaqa kasooqagee asurukina qumuanaura. Innee miqimaseeqa qini faiqi nimaaku qiqafeefaranoo.

<sup>65-66</sup> Amaana maqasaa rakisimarusa firaafa Yisufa miqi qufanoo irufanoo niranaqee marusa oosana maraseenoo narí qamunna parara qinoo anaqi aquseenoo aiqama suqiqa marusa darara qimasee qimanniminoo qinau. Doo innee aiqamausa mina manda ufa iridee. Nariara Anutuna amaaku fee qinoo iridee. Sia maasa kafa arira ufara randaanaura. Doo aneenna qimannimianaqa innee minara nanee fee qidaqee. Misa aiqamausa doo kuquaniffee ufa kai qima afeekaikiqau.

<sup>67</sup> Misa mi ufana qimaseeqa Yisuna oorinni anireeqa niqaara fidiamaqau. Fidiamaqaseeqa asukunakiqari misa nisauku samu oori aridaqa qiqau.

<sup>68</sup> Anee tamummaqara fasiqa mari inana aneenna kai tamummaqasee qinaqa iria, yafee ani arinoo fee.

*Peetooroofa Yisunara qaoo ufa.*

*(Mak 14:66-72; Ruk 22:56-62; Yoh 18:15-18,25-27)*

<sup>69</sup> Amaana maqasaa rakisimarusa uriqararafa Kaiafasafa narí maaqa ainainirafa firaafa marunara ainainira maanaaqauqa akaqausa nifiqa quqasoofaqa ainainimariqau. Peetooroofa aadumai sukinni ooqufaaqee-ufanoo ainainira maanaqa moo fannoo Peetooroona paqurimaseenoo qimaminoo qinau. Anee faqa mi kariree fasiqana Yisuna faqa nimarianafa mariananoo.

<sup>70-71</sup> Miqi qufanoo, Peetooroofa iriseenoo aiqamausa nifusaa mi manaaqana qimaminoo qinau. Sia ani ufa oosana iridaqa. Qinee sia mina faqa nunausee qimaseenoo naambeeqai ququsa kooqi marunnai ooquroofanoo maanaqa moo fannoo kooqisaa rakisimarufa qafeenoo miqoo marusa qimanniminau. Maa fasiqafa Yisuna Nasareeteendaraana faqa marifaqa qafee marunafa.

<sup>72</sup> Peetooroofa mi ufana iriseenoo kaukaata qimasee qaoo qinoo qinau. Sia qinee mi fasiqanara iridaqa.

<sup>73</sup> Kafa kaqikaa qoo marikamasoofaqa faiqí miqoo marusa anireeqa Peetooroona qimamiqa qiqau. Kuqaa anee mi fasiqana faiqi namuki mariananoo. Anee faqa mifa faqa kuqaa moodaa ufa qimariaqanda mariafanoo.

<sup>74</sup> Peetooroofa mi ufana iriseenoo kaukaata qimaseenoo darara qimaseenoo niqinoo qinau. Sia uqanna qinee mi fasiqanara iridaqa. Nanaree unna qida fee. Miqi qimasoofanoo kookooraana ufa qinau.

<sup>75</sup> Kookooraana ufa qimasoofanoo Peetooroofa Yisufa ufa qimamunara irinau. Yisufa qinoo. Qaaramoo kari ani irafana anee qiniara sia fee qinanoo kookooraana ufa qiannoo. Peetooroofa mi ufanara oonumafi iriseenoo oo doo Yisuna ufa qiniara qifa anoona koorooinoo, qimaseenoo raudamakufanoo asauruseenoo firaqoo ikiraqa mareenoo finau.

## 27

*Yisuna afiqammaree Piratoofunnai fiqau.*

*(Mak 15:1; Ruk 23:1-2; Yoh 18:28-32)*

<sup>1</sup> Mi eendanaki iqaqoofaqa amaana maqasaa aanaiqikirausa misa uriqararaura faqa Yuda maqannaa faiqí firaasa faqa suqusee Yisuna arira ufa qiqau.

<sup>2</sup> Arira ufa andeeqaseeqa unna qimasee fifau sainanda qumarasee Yisuna asauku rumbamaree Roomma maqannaa kiapafa Piratoofa marunnai afiqee fiqau. (Firaqoo mandoosana maraidanoo uriaqee marufa maru-faqara foora sainandannai rumbamaree afiqee kiapafinnai fiqau.)

*Yudasifa narí ataakiroo ufana.*  
(NiFa 1:18-19)

<sup>3</sup> Piratoo finnai maree firari marufanoo Yudasifa Yisufa kuquaninna-nara irufanoo narí afaaqakina akooqoofanoo Yisuna akiqara munnimma amaana maqasaa rakisimarusa faqa faiqí firaasa faqa marunnai Yudasifa moodaa fasiqa aiku asauku taikasee moo fasiqa asauquqara taikasee ooni mareenoo kafaa nimiraree qimaseenoo qinau.

<sup>4</sup> Oo qinee furufaramaseeqa. Andeeqara fasiqara asakadiki sia ikairi marinara kuquanifeera qinee dapikamandeeqa oosana arannanara. Minara qinee kafaa inni munnimma nimidaqa. Miqi qufaqa misa qiqau. Anee kai qianaqa maasa amiqa, aneenna kai minara iria.

<sup>5</sup> Miqi qufanoo Yudasina aundura dapikufanoo munnimma mareenoo amaana maqakina aranaiqi teeqimmaquseenoo sandanau. Sandeeufanoo moosaa narí sanda anukaki ataakireenoo doo kuqinau.

<sup>6</sup> Amaana maqasaa rakisimarusa Yudasina munnimma maraseeqa minaramma ufa qimariqau. Maasa maa munnimmana sia amaana maqaki quqaanaura, Mooseena sandufa miqimminoo maridanoo, fidika munnimma marifaqa.

<sup>7</sup> Misa minara ufa qiqi andeeqaseeqa mi munnimmana qumareeqee nammari sakasee nee maru qafeena auqimaru fasiqana kaqikaa maqa maaqa minaindi feefauriqau. Amisee náriara mi maqana maraseeqa misa moo maqannaasa maasaki kuqifaqa mi maqanaki nikundaanee qimasee maraqau.

<sup>8</sup> Minara miqimasooqooqari mi maqanara fidika maqa fee qimariqau.

<sup>9-10</sup> Miqimaseeqa ooqeenaa tamummaqara fasiqa moo mina auqu Yeereemaia mina ooqeenaa ufa anoona kafaa maqee kambiqanau. Mifa maaqi qimasee akara rinoo qinau.

Isaraee maqannaasa faiqí akiqara munnimma maraseeqa qafee auqimaru fasiqana maqa maaqa feefaurumasee mareefara. Moo fasiqa taikasee moo fasiqa asauquqara taikasee aqusee mareefara. Qinee Anutuna ufa irisee maraunaqa misa miqiqau. Yeereemaiaafa ooqai akara rumaqoo ufafa miqinoo marufaqa sia irirai misa mi mau kai fidaqa mi maqana maraqau.

*Piratoofa Yisuna iroo ufafa.*  
(Mak 15:2-5; Ruk 23:3-5; Yoh 18:33-38)

<sup>11</sup> Misausai maree fiqau. Yisufa Piratoona koota maqaki kikiqinoo marufanoo Piratoofa anireenoo Yisuna irammirinoo qinau. Anee kuqaa Yuda maqanna karaambaiqa fee maridane. Miqi qufanoo Yisufa anee qiannana qinee miqimmiqa maridaqee qinau.

<sup>12</sup> Amaana maqasaa aanaiqikirausa misa uriqararaura faqa Yuda maqanna faiqí firaasa faqa minara iriseeqa Yisunara ufa oosana oosana qidaqa kiapana qimami mariqau. Miqi qimarufanoo sia Yisufa ufa qimarinau, kaqi kasoo inoo marinau.

<sup>13</sup> Piratoofa minara mina qafamaseenoo qimaminau. Misa oosana oosana ufa aniara qimariafana anee naqi fee imarifanee sia ufa qidane.

<sup>14</sup> Miqi qimarufanoo Yisufa sia uqanna misa ufa itairiseenoo rukianau. Ufa sia qinau kaqi kasoo inoo marufanoo kiapafa qafeenoo aaquqoofanoo qafanau.

*Piratoofa innee Yisuna aruaqee qu ufafa.*  
(Mak 15:6-15; Ruk 23:13-25; Yoh 18:39-19:16)

<sup>15</sup> Mi kamusaqa kiapausa faiqí anaasee Anutuna qangiroo ainnaaqarara goomaqa neemarufanoo karafusa fasiqa moo idukusoofaqa minara faqa asasiaqeera. Kiapausa oosana mi oosanna maqee maqee miqimmimariqau.

<sup>16</sup> Mikari faiqí moo fannoo karafusaki marinau. Mina auqu Barabasifa. Sia kai fifaufau mina karafusa quqaqau. Faiqí akooqooqaraafa auqufaqaafa marufa karafusinau.

<sup>17</sup> Piratoofa minara faqa iriseenoo Yuda maqannaasa miqoo suqíqa marusa naaramasoofofa suqumaree moodaaqoo aniroofanoo qimanniminoo qinau. Qinee maa kari Barabasinee idukunauree, Yisuna inni karaambaigee idukuanauree.

<sup>18</sup> Yuda maqannaasa uriqararausa Yisunara sia anoona marunara fifau mina afairiqa nimarusa marunara Piratoofa misa miqi qimaruna iridanoo Yisunara idukuanees qinau.

<sup>19</sup> Piratoofa ufa irira maqaki ooqumarifi marufanoo narí anaafa fannoo narí maaqakiqari pasa akara rumaseenoo moo fasiqasaa quqasoofanoo minisoofanoo Piratoofa asaana rumaseenoo qafanau. Narí anaafa fannoo qinoo. Sia Yisuna arua. Asauku raqandaamasee ireeda maria. Qaina daaquqara qaina qini qifunnareenoo. Mi andeeqara fasiqanara qainammaqaunanoo daunduraki mandaiki marifaqa. Sia anee mina aruanee qimasee akara rinau.

<sup>20</sup> Amaana maqasaa aanaiqikirausa faqa Yuda maqannaai faiqí firaasa faqa Piratoofa Yisuna idukiraree quna iriseeqa quandaufafa faiqí anaasee fukifaaki qíqa Piratoona qimamiaqeera qíqau. Barabasina kai idukuani Yisufa kuquani.

<sup>21</sup> Piratoofa kaifaa faiqí anaasee aiqama irammirinoo qinau. Miqandakina yanee qinee idukuanauree. Miqi qimasoofofa misa aiqama qíqau. Barabasina kai idukua.

<sup>22</sup> Piratoofa minara iriseenoo kaifaa qimanniminoo qinau. Qinee Barabasina idukiqa asauku mundirana Yisunara nanee fee qianauree. Qimasoofofa misa aiqamausa aunirira saqarisaa aruanee qíqau.

<sup>23</sup> Piratoofa kaifaa misa irammirinoo qinau. Nana mandainainee marinagee qinee aruanauree qimasoofofa misa aiqamausa darara qimasee qíqau. Aunirira saqarisaa arua.

<sup>24</sup> Misa ufa firaqoo qidaqa tutuqimarufanoo Piratoofa misa sia qini ufa iriafaqammu qimaseenoo qafee maraseenoo nammari saka uqeera mareenoo misa nifusaa quqaseenoo asauku nammari uqinoo qinau. Maa fasiqana aruannanara doo qisauku nammari uqíqa. Mina fidika sia qini qisakadiki mariani. Doo innikina mariannoo doo.

<sup>25</sup> Miqi qimasoofofa faiqí anaasee moodaa kari faafa quqasee qimamiqau. Doo mina fidika maasaki faqa maasa faiqí namuki faqa mariannoo.

<sup>26</sup> Piratoofa minara iriseenoo Barabasina idukueeqeenoo niminoo Yisuna mareeqeenoo narí sundiauqa nimufaqa misa miqoo nariqa maqusasaa quqasee raitasaa qainna rumbeeqoo samuna ataufakaaqa aru ummooqukamaseeqa doo afigee aunirira saqarisaa ariraree qimasee deedaqíqau.

*Sundiauqa Yisuna amukafaqaa qa fee afisuamaqau.*

*(Mak 15:16-20; Yoh 19:2-3)*

<sup>27-29</sup> Piratoona sundiauqa miqoo naambeeqai Yisuna ariiseeqa kafaani randee kiapana maaqaki munuseeqa aiqama sundiauqa niqoonausa naaroofofa moodaaqoo anireeqa maridaqa Yisuna qamunna raipaqusee moo

qamunna Roomma maqannaa sundia qamunna taatuqee qamunna afisua-maqasee saatonanda fooqaana maraseeqa saaeemma qumaree Roomma maqannaa rakisirana qafeera foora saaeemma qumaree Yisuna akiaqasaa aranaiqi afisu amaqoofanoo akiaqa tapooqaanifeera miqiqau. Afisu amaqaseeqa Roomma karaambaiqa qunaana fooqaana Yisuna asauku uqannai quqamaqaseeqa noorindari fataafimafufaqa atasataasa qidaqa qiqau. Oo Yuda maqannaa karaambaiqa. Maasa uriqararafa.

<sup>30</sup> Miqi qimaseeqa firaqoo atasataasa qidaqa misa niqaara fidamaqaseeqa mina qunaana asaukuki naana rafia qumaree akiaqakinai ariqau.

<sup>31</sup> Atasataasa qiqi amaqaseeqa mina taikaseeqa taatuqee qamunna kaifaa raipaquseeqa kafaa nari qamunna afisu amaqaseeqa aunirara saqarisaa arifandinaqoo afiqee fiqau.

*Yisuna aunirira saqarisaa ariqau.*

*(Mak 15:21-32; Ruk 23:26-43; Yoh 19:17-27)*

<sup>32</sup> Afiqammaree aanai fidaqa sundiauqa Sireenee maqusanaindaraa fasiqa mina auqu Simoonaa amarana moo Simoonaa aanai paqurufaqa misa nari oosana mareeqa nari faaqaana uqafiqaseeqa Yisuna aunirira saqari aku amaqeeqa afeekaikamasee qiqau. Maree maasa faqa ania. Miqi qufanoo misa faaqaanara rufiamareenoo Yisuna aunirira saqari akumaree finau.

<sup>33</sup> Yisuna afiqee fifuufaqa Koorookata maqa maaqaki ooru fiqau. Koorookata mi ufana oosana faiqi akiaqa amudaani aaqana maridanoo.

<sup>34-35</sup> Sundiauqa miqoo oorureeqa misa uainna nammariki sukaqeeamaru saqari anoona afaqa iri quqaanifeera uainna nammariki adiaaseeqa Yisunara maana marasee naannee qufanoo Yisufa afaurusaa kai quqaseenoo qumboomasee qafeenoo minniseenoo sia noofaqa misa mina qumarasee aunirira saqarisaa rummamaqasee pirimma aruatukarasee uqeera rakiqaseeqa mina qamunnanda faasai raipaqau quqaqoonaa qumaree kaatara foora sararamandeeqa doo nariara nariara mi qamunnausa maraqau.

<sup>36</sup> Qamunna mara taikaseeqa misa ooqu marifufaqa rakisimariqau.

<sup>37</sup> Misa Yisuna arira ufa raufiqira saqarisaa akara rumaseeqa Yisuna akiaqai aunirira saqarisaa quqaseeqa pirimmannai ariqau. Maaqi qimasee akara riqau. Maa fasiqafa Yuda maqannaa karaambaiqa maridanoo fee qinau.

<sup>38</sup> Moo qumuarimaru fasiqana Yisuna dinni atinni nari aunirira saqarisaa pirimmannoo aruseeqa uqeera rakiqaqau. Kafaa moo qumuari maruna nari aunirira saqarisaa Yisuna dinni atinai pirimmannoo aruseeqa uqeera rakiqaqau.

<sup>39</sup> Faiqi anaasee mina aaqa fiqaree aiqaree imarusa misa Yisuna murufi qafaidaqa atasataasa idaqa qufoonaridaqa qiqau. Anee fee amaana maqa moodaa faasaana rapeemasee qaaramoo faasaana kafaa usakararee qimariana fee.

<sup>40</sup> Anee kuqaa fee Anutuna amaaku maridane. Mina amaaku maridana aneenna kai tatuakinana quminaqa maasa aniara kuqaa Anutuna amaaku fee qianaara.

<sup>41</sup> Amaana maqasaa aanaiqikirausa uriqarararusa faqa Mooseena sandufa akoofasauqa faqa Yuda maqannaa faiqi firaasa faqa misauqa faqa miqi kai masee atasataasidaqa qufoonaridaqa qiqau.

<sup>42</sup> Maafa faiqí anaasee mareeqee Anutuna asumu mariranaki mara quqannisaannee qimarifa nariara sia amanaikino. Kuqaa fee anee Isaraee maqanna karaambaiqee maridane. Kuqaa miqinana anee karaambaiqa maridana maqee maqasaa tatuaki aqufinaqa maasa aniara kuqaa karaambaiqee qiana.ura.

<sup>43</sup> Mifa nariara Anutuna amaaku fee qimarifa Anutunasaa afaaqa quqarafa marifanoo Anutufa minara iridanoo fee sia fee iridanoo fee. Iridanoofau qumureenoo mina dadaaqinoofau asumu mariranaki quqani.

<sup>44</sup> Qumuari maru fasiqaqanda dinni dinni nári aunirira saqarisaa maruqanda miqi kai qimaseeqa Yisuna ataasa ataasa qimamaqee mariqau.

*Yisufa kuqu ufa.*

*(Mak 15:33-41; Ruk 23:44-49; Yoh 19:28-30)*

<sup>45</sup> Mi faasaanna kai asukuna firaafa aiqama maqa maaqa ititanni-maqanau. Suani afu urureenoo uriufanoo mina akiaga amummaqa qambaana ururoofanoo asukuna arunnimaqanau. Suani muqunni qubeekoofanoo asukuna taikoofanoo suani fannoo kafa kaaqa qanau.

<sup>46</sup> Suani afu muqunni qubeekoofanoo asukuna kaqi marufanoo Yisufa fira kari faaqarino qinau nari ufakiqari qinau. Eeri eri rama sabakatani. Mina oosana maaqimminoo maridanoo. Qini Anutu, qini Anutu, naqi fee ifanee anee qiniara minniseenane.

<sup>47-48</sup> Miqi qufaqa faiqí anaasee mi saqa marusa Eeriaana aaraidanoommi maqi qimasoofofano moo fannoo paadura au fooqaana ateekamareenoo maara maaqanufasiqausa manda uainna nammariki raaraamaseenoo aika maraseenoo qundaqiseenoo minaki rutaquseenoo mara muru Yisuna ooki aakuamaqanau. Qumbifiqamma naanifeera afaurusaa quqasoofanoo qumbifiqamma nanau.

<sup>49</sup> Miqi marufaqa akaqausa qiqau. Saa. Eeriaafa qumureenoo dadaaqianoo fee. Kaqi kasooiqa marida qafaqa.

<sup>50</sup> Mikari Yisufa fira kari faaqa quqaseenoo kuquqaraasinu.

<sup>51</sup> Mifa kuqufanoo aqee kai Yeerusaree amaana maqakina ititaqoo qamunnafa naaquqara maqasaa ititaqoo qamunnafa mirindari aiqama raaqumareenoo muqufi aqinau. Firaafa maqa kasinau, fira ooniuga afo afaainu.

<sup>52</sup> Faiqí madika faqa oo raqanau. Oo raqasoofanoo ooqai kuqusa Anutuna ufa irimaru fasiqa anaaseesa maqee kuqiranakiqari findifumafi miqoo mariqau.

<sup>53</sup> Yisuna kuqiranakiqari findifufaqa mi kuqirausa akooqoo Yeerusaree maqusai oonuroofaqa faiqí anaasee moomoosa nindafaqau.

<sup>54</sup> Maara maaqanu fasiqausa Yisunasaa rakisidaqa ooqumari fufaqa rakisiusa asukuna qoofaqa maqa kasufaqa qafamasoofaqa nimuqusufaqa kaaqa rufiaqau. Rufeemarufaqa qiqau. Oo kuqaa uqanna maafa Anutuna amaaku uqanna mariifa kuqino.

<sup>55</sup> Yisufa aunirara saqarisaa marufaqa Kariree maqa maaqaindaraa anaaseeuqa ururee Yisunara dadaaqianne qimasee uru anaaseesa nianai uru kikiqiga marida qafee mariqau.

<sup>56</sup> Misakiqari Yisuna anoona amaraqanda mariqau, moo amarafa Makadara maqusaindaraafa faqa moo amarafa qaara kumaaraqara Yooseefaasa Yameesasa ninoofa faqa (Maa Yooseefaafa sia Yisuna akoofau mina amarafa kumaaraa marinau) moo anaasee Seebeedina anaqa faqa mi anaaseesa faqa miqoo ani kikiqiga maridaqa Yisuna kuqirana qafee mariqau.



*Yisuna ooni aamaraki akundoo ufafa.*  
(Mak 15:42-47; Ruk 23:50-56; Yoh 19:38-42)

(Yisuna aukuana narí maqannaasa maaqimmasee madika indufusaida kuqufusa nikundee mariqau. Misa ooni fraana kasaqa aamara auquseeqa minaki keeqafufaqa dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>57</sup> Mi eenonnai Aramatia maqusanaafa Yooseefaana amarana mifa faiqí fraaafa ainaina faqaafa. Mifa Yisuna ufa irira faiqi kammafinoo kukeeqanoo marufa marinau.

<sup>58</sup> Mifa Piratoona oopisai oonureenoo Yisuna iriara oonureenoo Piratoona irammirinau. Amanee Yisuna iri qinee marasee fee akundaanauree qufanoo Piratoofa irinoo narí maara maaqanu fasiqausa qimanniminoo qinau. Innee maa fasiqana Yisuna iri mara amifanoo akundaani.

<sup>59</sup> Yooseefaana amarafa iriseenoo oorureenoo Yisuna iri auniriranasaa aruqoona tatuseenoo fuka qamunnasaa kukuqinau.

<sup>60</sup> Kukuqamaseenoo Yuda maqannaasa oosana mareenoo narí ooni aamarakina quqanau. Yooseefaana nariara kuquana misa qini iri minaki akundamaqisaaqera ooni aamara auquqoonaki Yisuna iri minaki quqanau. Quqaseenoo firaa ooni quanda quandammeeqee aamarasaa ititaqau.

<sup>61</sup> Miqi marufaqa aanaaseeqara oonaamara adeedi ooqu marida qafee mariqau. Miqanda nuqu moodaa nuqufafaqaqanda Mariana amaraqanda kai maruqanda mariqau. Miqanda madikee marufaqa ooqumarida qafee-ufaqa eendufaqa maqusai fiqau.

*Firisuaiqauqa Yisuna madikasaa rakisiu ufafa.*

<sup>62</sup> Yuda maqannaasa narana ainaina deedaqamaqoo faasaana taikoofaqa mi eenonnai amaana maqasaa aanaiqikirausa uriqararausa faqa Farisai amaana ufa irimarusa faqa suqufufaqa rumbarausa Piratoo finnai narí oopisai oorureeqa irammiriqa qiqau.

<sup>63</sup> Oo amiqirafa mi unna fasiqafa kaqi maridanoo qaaramoo faasaana mariqa findifuaqee qinoo.

<sup>64</sup> Amanee aneenna maara fasiqausa niqiqainaqa ooni aamarasaa qaaramoo faasaana rakisiaqa. Mina faiqi namu ani qummuarammeeqee quqaseeqa unna qifoora. Doo findimmeeqee Anutufinnai fiifoo qimasee faiqí anaasee unna qimasee qimannimi foora. Indaarunnaqimarifa marifaqa minara Yisuna faiqi namu kafa unnufa qifanoo mi ufafa firaafaikiandooraa. Minara ani qimamidaqa misa rakisiaqera.

<sup>65</sup> Piratoofa minara iriseenoo quandaqanoo aanoomasee qimanniminau. Innee qini Roomma maqanna rakisimaria maara fasiqausa maraaqa. Misa kai amiqimmasee rakisiaqa.

<sup>66</sup> Miqi qufaqa amaana maqasaa aanaiqikirausa ooni aamara maruqoo oonureeqa qima ainaina qumaree ooni kooqisaa faqa kooqi afainni faqa atukaraseeqa ititaqau. Moo fannoo mi ooni kooqina mara aquqaiifaqa qafaanee qíqa mi qimana quqaqau. Miqimaseeqa maara fasiqausa miqoo quqasee amaana maqasaa aanaiqikirausa doo nimaqa fiqau.

## 28

*Yisufa kuqiranakiqari findifu ufafa.*

*(Mak 16:1-10; Ruk 24:1-12; Yoh 20:1-10)*

<sup>1</sup> Nariqa amaana faasaana saririqa taikoofanoo iqaqoo kananaana amaanasaa eendai qaara anaaseeqanda moodaa nuqu faqaaqanda Mariana amaraqanda miqanda sia Yisuna anooqanda moo fannoo Makadana maqusaindaraafa moo fannoo moo maqusaindaraafa miqanda Yisuna akundoo ooni aamara qafaanee qimasee fiqau.

<sup>2</sup> Oonuree qafooofanoo miqoo kai maqa firaafa kasufanoo innaarunaindari Anutuna qangiroo moo fannoo qumureenoo ooni kooqi ititaqoona quanda quandammeeqeenoo kaqini quqaseenoo narí minasaa ooqu marifi marinau.

<sup>3</sup> Mina oori afiri aakuasaa idauru miqirafa marinau. Mina qamunna kaaqa eekara kaaqa qarafa marinau.

<sup>4</sup> Maara fasiqausa rakisiusa Anutuna qangiroo qafeeqa kaaqa rufiseeqa aiqama naindiri roofaqa noorindari maqasaa kuqiara foora mambiqau.

<sup>5</sup> Maqasaa noorindari faiqaqeeufanoo qangiroo fannoo anaasee oonuroosa maaqi qimasee qimannimino qinau. Innee sia rufia rufiaqiqa. Innee Yisuna aunirira saqarisaa pirimmannoo aruqaanara randaidaqa qinee iridaqa.

<sup>6</sup> Kaqi maridanoo inni qimannimi undeemmino maridanoo. Sia maaqoo maridanoo. Doo kuqiranakiqari findifino doo finoo. Innee mai anireeqa mifa mariiqoo qafaaqa. Sia maridanoo.

<sup>7</sup> Innee qafamaseeqa sandee oonu mina faiqinamu maaqi qimaseeqa qimannimiaqa. Yisufa kuqiranakiqari findifino doo Kariree maqa maaqai inni noorinni fidanoo innee miqoo qafeefaranoo miqoo mariannoo. Doo mi ufana kai inni qimannimiqa doo fuaqa.

<sup>8</sup> Anaaseeqanda qangiroo qafeeqa mina ufa iriseeqa kaaqa naaquqanau. Yisunara kuqiranakiqari findifu ufana irufanoo naundurari asasinoo naaquqoofaqa mi anaaseeqanda mina faiqi namu ufa qimannimianee qimasee fidaqa.

<sup>9</sup> Yisufa aanai mi anaaseeqanda tautummannimaqasee kikiqino marida nimandanau. Miqi qimasee qimannimisoofaqa misa naaquqoofaqa mina aiku qumaree noorindari maqasaa faifufaqa qimudaqoo qidaqa amooqira ufa qimamiqau.

<sup>10</sup> Miqi marufanoo Yisufa maaqi qimasee qimanniminau. Innee sia rufiaqa. Sandee oonu qini faiqi namu qimannimifaqa Kariree maqusai ooru fiqa miqoo qiqafeefaranoo.

*Yisuna madikasaa rakisiusa findifunara qumeeraqau.*

<sup>11</sup> Mi anaaseesa Yisuna ufa iriseeqa fiqau. Misa fimarufaqa maara fasiqausa ooni aamaraki rakisimarusa misa faqa rufiseeqa kuqiara foora iqa mariusa findimeeqee Yeerusaree maqusai oorureeqa amaana maqasaa aanaiqikirausa aiqama ufa qimannimiqa. Qangiroora ooni kooqi ititarana rafaqaanara qimannimiqa.

<sup>12</sup> Amaana maqasaa aanaiqikirausa misa Yuda maqannaai faiqi firaasa faqa suqufufaqa minara ufa qimasee iriqau. Ufa qiqi andeeqaseeqa misa mi maara fasiqausa naaramaseeqa munnimma firaatia uqanna nimiseeqa maaqi qimasee qimannimiqa.

<sup>13</sup> Faiqi anaasee inniara Yisunara irifaqa innee maaqi qimasee qimannimiaqa. Maasa eendakina kaaqa faiqaqeeunaqa Yisuna faiqi namu

anireeqa ooni kooqi atuaseeqa Yisuna iri qaindusu mareeqa doo kukeeqa-maseeqa. Miqi mandaafaqa iqaqai faqa amaaqa kai qafeeqa.

<sup>14</sup> Miqi qimasee qimannimiaqa. Kiapafa firaafa Piratoofa mifa irisainaqa maasa oonureeqa andeeqaanaura sia mifa inni naruannoo.

<sup>15</sup> Mi maara fasiqausa misa eedoo qimaseeqa munnimma mara maree miqi qimasee faiqi anaasee qimannimi maree fiqau. Yuda maqannaa faiqi anaasee mi ufana kai Yisunara qimariqau.

*Yisufa nari faiqi namu nifusaa kooroo inau.*

*(Mak 16:14-18; Ruk 24:36-49; Yoh 20:19-23; NiFa 1:6-8)*

<sup>16</sup> Yisuna faiqi namu qisaukuqara taikasee qikunni ooqu moodaa marasee Kariree maqa maaqai fiqau. Yisufa kaqi maridanoo mi aaqannara qimannimi qoonara mi aaqannasaa ooru fiqau.

<sup>17</sup> Miqoo oorureeqa Yisuna qafeeqa reendeenamasee amooqira ufa qimamiqau. Moodaa moodaa qaara irirana iri mariqau. Miffee, yafee, afaanna fee.

<sup>18</sup> Mina faiqi namu miqoo ooru miqiqa marufanoo Yisufa adeedi anireenoo maaqi qimasee qimanniminou. Innaaruna faqa maqa faqa fira uriqararana Anutufa qini qiminoo. Moo fannoo sia qini uriqarafa mariannoo. Doo qinee kai.

<sup>19</sup> Innee minara irisee maqusa maqusa aiqama daraani mafiqa qimannimifaqa misa faqa qini qiku qisauku kammafi mariaqeera. Misa qini qiku qisauku kammafi marifaqa innee misa nammari auqamannimaqaaqa. Nammari auqamannimaqaseeqa maaqi qimasee qiaqa. Akoona faqa amaaku faqa Anutuna naaquqara andeeqara maraquna faqa misa nuqusaa nammari auqamannimaqaidaqa. Innee Yisuna aiku asauku kammafuanara minara mapuku nimaqaanifeera nammari auqamannimaqaidaqa. Doo miqi qiaqa.

<sup>20</sup> Aiqaama ufa qimannimifannana misa faqa mi ufana aiqamausa uqanna qimannimifaqa iriseeqa mi ufana qumaraqeera, mi ufanamau kai fuaqa. Innee maqusa maqusa fifaqa qinee faqa qumee inni faqa fuanaura. Innee miqi marifaqa qinee qumee kai inni faqa nuanaura. Sia inni mininnisaanaura kasoo innaaruna faqa maqa faqa taikara aukwana inniqa saimbaqa moodaanaki kianaura.

## **MAREEKOOFA**

### **Yisuna amiqira fasaasa ufa Mareekoofa akara rinau.**

*Yoohaneefa nammari nimimarufa Yisuna aana afisufa.*  
(*Mat 3:1-2; Ruk 3:1-18; Yoh 1:19-28*)

<sup>1</sup> Maa akarafa asauku mundirana Yisunara Anutuna amaakuara amiqira fasaasa ufa qidanoo.

<sup>2</sup> Anutuna ooqeenaa tamummaqara fasiqa auqu Eesaiaafa Yoohaneefa nammari nimarunara maaqi qimaseenoo akara rinau. Iriaga qinee qini ufa maree marinana qini Anutusa qisauku mundirana ani oorinni aqiqaananoo fidanoo ani aana afisuannoo.

<sup>3</sup> Aadana maqa maaqakiqari moo fannoo maaqi qimasee fi fi qinoo faaqaridanoo faiqi anaasee qimamidanoo. Innee karaambaiga fuaninna aana afisuaqa, andeqara qoo kai karaambaiga nuani.

<sup>4</sup> Mi tamummaqara fasiqana ufamau kai maaqimasee oosana araqu. Yoohaneefa nammari nimi marufa aadana maqa maaqakiqari findifinoo faiqi anaasee nammari rumannimaqaidanoo maa ufana qimanniminou. Inneeqa mandainainakiqari quandaki nammari marasaifanoo Anutufa inni mandainaina akiaqara mininniseenoo sia naruannoo.

<sup>5</sup> Yudeea maqa maaqaki marusa faqa Yeerusaree maqusaki marusa faqa mi saqa marusa moomoosa Yoohaneefa marunnai Yooradanna nammari afainni marunnai ooqu reeqa nari mandainainara kooroomasoofanoo Yoohaneefa Yooradana nammari mara quqasee keeqamannimaqasee uqerasoofaqa findifiqa miqooqari fifainiqa.

<sup>6</sup> Yoohaneefa sia amiqira qamunna afisinau tamummaqara fasiqa naanna ramasee aadaika aadaikirafa, kameera asausinnai auqira qamunna afisusee aandau apatannai auqira pikapa qamunna rafaafuseenoo marinou. (Kameera qoosa fooqaa ira aandau maridanoo.) Yoohaneena narana naafaa oofaafana nariqa minara pandaaga oofaafanee qimaruna faqa ookasaasa anoona faqa kai nee marinou.

<sup>7</sup> Yoohaneefa maaqi qimasee faiqi anaasee qimanniminoo qinau. Qini qinaaqiannai kambiqaaninnafa qini firaaqoo uriqararafa mariannoo. Qinee Yoohaneesa kasooqaqee kambiqaaninna fasiqana mina kaaqa ureeqarausa maridaqa. Naqimasee fee qinee mina dadaaqianauree ureeqara ainainira fasiqauqakiqari ureeqararausa maridaqa sia amana mina dadaaqianauree.

<sup>8</sup> Qinee nammarinna kai rumannima qaidaqa mifa naaquqara maraqunannai inni ruma nimaqaannoo.

*Yisufa nammari maroofa. Sadanafa Yisuna amanufa.*  
(*Mat 3:13-4:11; Ruk 3:21-22; 4:1-13*)

<sup>9</sup> Yoohaneefa miqimmasee kaqikaqoo marikufanoo Yisufa Kariree maqa maaqakiqari Nasareete maqusaindari Yoohaneefa maruqoo ooquroofanoo Yooradana nammari Yisuna nammari tupamamaqanau.

<sup>10</sup> Yisufa nammariqari findifinoo qafuofanoo innaaruna rakeemafufanoo Anutuna maraquna fannoo nakipurunara foora Yisunasaa qumu quqanau.

<sup>11</sup> Quqamafufanoo innaarunaindaraa ufa moo maaqi qimasee Yisunara qinau. Anee qiqaindi uqanna qimuqusira qimaaku marianafa qinee aniara amiqimasee qiqaara raidanoo. <sup>12</sup> Doo miqooqari uqanna Anutuna

maraquna fannoo Yisuna aqigeenoo aadana maqa maaqaki kaasau maqa maaqaki sia faiqi marunnai nianai fuannee qufanoo finau.

<sup>13</sup> Mifa miqoo oonu maridanoo qaara fasiqa niku nisauku faasaana marisoofanoo Sadannafa anireenoo manda oosana maraaniffee qimaseenoo amanamasee qafosianoo. Kaasau aandaufa miqoo marufanoo Yisufa marikufanoo aararofanoo kudoosaapoofaqa qangiroouqa qumureeqa dadaaqiqau.

*Yisufa aaqee eera siammaa faiqi namu nifiqanau.*  
(*Mat 4:12-22; Ruk 4:14-15; 5:1-11*)

<sup>14</sup> Yuda maqannaasa karaambaiqa Eeroodeefa Yoohaneena nammari nimimaruna karafusaki rumbasoofanoo miqooqari Yisufa Kariree maqa maaqaki oonuree faiqi anaasee Anutuna amiqira fasaasa ufa qimannimida maaqi qimasee qimannimi marinau.

<sup>15</sup> Andeeqara kamu doo ani maridanoo Anutuna rakisira ququsa doo adeedi ranoo maridanoo. Innee inneeqa mandainainakiqari quandakinaqa amiqira fasaasa ufa irisee inni irirana minasaa rusiaqa.

<sup>16</sup> Moo kari Yisufa nammari farumma firaana Kariree maqa maaqaki maru nammarina afaimau fidanoo noodaanna mi nammarinaki maree maru fasiqaqanda nari qisafasaasa nindafanau. Miqanda nari oosana maraidaqa firaa pateeuqa nammariki aqusaida noodaannauqa rumafi marufaqa maree mariqau. Moo fasiqa auqu Simoonafa marinau, mina akaqa mina faqa maruna auqu Andurufa marinau.

<sup>17-18</sup> Yisufa miqanda nindafamasee qimanniminoo qinau, inneeqara qini faqa aniraifaqa faiqi anaasee noodaannara foora mareeqee Anutuna ququsaki quqefaranoo fee qufaqa miqanda nari pateeuqa miqoo quqasee Yisuna faqa fiqau.

<sup>19</sup> Yisufa miqooqari kaqikaqoo nammari afaiqara fidanoo qaaraqanda qisafasaasa paqurinau, miqanda Seebeedina amaakuqara mariqau. Miqanda nuqu Yameesana faqa nari akaqa Yoohaneesandiri mariqau. Sia nammari nimimaru Yoohaneefa marinau, mina amarafa marinau. Miqanda nari kanuqaki ooqu maridaqa fafaa eendaki nari pateeuqa nammariki aqusee noodaanna maraane qidaqa deedaqi mariqau.

<sup>20</sup> Yisufa miqanda niqafamasee naarooqafa nari nikoona Seebeedina faqa nari ainainimarusu faqa quqanniseeqara Yisuna fi afaqee fiqau.

*Yisufa faiqi aundurai afaanna afaqanau.*  
(*Ruk 4:31-37*)

<sup>21</sup> Minamusa Yisuna faqa fi fiufaqa Kapeeranaumma maqusai oonu raqau. Yuda maqannaasa amaana saririqa sabatee qimarunasaa Yisufa nariqa amaana maaqaki keeqafinoo faiqi anaasee amaana ufara naakapanau.

<sup>22</sup> Mina ufa irimarusu firaqoo naaquqanau. Sia Mooseena sand-ufa akoofasauqara foora qimanniminu, nari Anutufara foora qiman- nisooofanoo naaquqanau.

<sup>23-24</sup> Yisufa qimannimi marufanoo faiqi moo aundurai faafasaqa marufa amaana maqaki keeqafi faqa quqasee Yisuna qimaminu, Yisu anee Nasaretee maqusanaafa anee nanaree maasa soodaqidanee, anee maasa daru taikararee anidanee, qinee aniara iridaqa anee Anutuna naaquqara ufa maree marianafa mariananoo.

<sup>25-26</sup> Yisufa mina aundurakinaa afaanna amambaina qimasee qimaminu anee ufaseenana mi fasiqanakiqari rafudamaki fua, qufanoo mi

faafasaaqafa mi fasiqana qumaree udamudami firaagoo masee fira kari aqnaakinakiqari faaqa quqaseenoo rafudamaki sandanau.

<sup>27</sup> Faiqí anaasee mina qafamasoofanoo naaquqoofaqa narí qimami narí qimamiqa qiqau. Maa fasiqafa Yisufa nanee maridanoo, nana fuka naakaparufa qinoo fee. Maa fasiqafa narí Anutufara foora narí afeeka ufannai kaasau afaannauqa qimannimifaqa eedoo kai qimasee rafudamaki fiqa.

<sup>28</sup> Miqunara Kariree maqa maaqaki Yisuna aufakiana fannoo kaqi kaqi ufanoo aiqamai daraaninai.

*Yisufa oosana oosana aurirana taikannisanau.*

*(Mat 8:14-17; Ruk 4:38-41)*

<sup>29</sup> Misa mi amaana maqanakiqari rafudamakufaqa Simoonasa Andurusa maaqaki fiqau. Yameesa Yoohaneesa misa faqa fiqau. Yoohaneefa nammari nimimaruna amarafa Yisuna aiku asaukukirafa marufa misa faqa finau.

<sup>30</sup> Simoonaa airaamaku anaasee aidafi marufanoo afaaqa ididi marufanoo faiqaqee marinai. Yisufa maaqaki keeqafufaqa mi anaaseenara Yisuna qimamiqau.

<sup>31</sup> Yisufa iriseenoo mifa marunnai oonureenoo asauku qumareenoo uqeroofanoo mina afaaqa ididiufa taikoofanoo aaqee findifinoo narana ainaina niminai.

<sup>32</sup> Eeneemarufanoo suani keeqoofanoo miqoo marusa nári faiqí anaasee auri marusa faqa fueena faafasaaqa marusa faqa aiqama nifiqee

<sup>33</sup> Yisufinnai minisoofanoo aiqama mi maqusanaki marusa mi maqanaasa ani mara uqusee miqoo suqi mariqau.

<sup>34</sup> Yisufa moomoo aurirana oosana oosana aurirana andeeqanniseenoo faafasaaqa marusa moomoosa miqimma quqannimufaqa rafudamaki sandaqau. Misakina faafasaaqauqa Yisufa Anutuna amaaku marunara irisee kooroo iandoo qimasoofanoo Yisufa misa ufara qaoo qufaqa sia ufa qirai kaqi rafudamakidaqa sandaqau.

*Yisufa Kariree maqa maaqaki nimirinai.*

*(Ruk 4:42-44)*

<sup>35</sup> Mi eendanaki faiqee kananaana uqanna eendai Yisufa findifinoo maaqakiqari raudamakinoo maqusai oqureenoo oqiqaree faiqí sia maru maqa maaqanai oonu maridanoo Anutunara innaaru qimarinai.

<sup>36-38</sup> Simoonafa faqa mina aqoondiuqa faqa randaqa nida Yisuna paqurimasee qimamiqa qiqau, aiqamausa aniara randaidaqee qufanoo Yisufa qinai, maasa maa maqa maaqanaki maqusa maqusa moo maqusai fua-nauranoo. Anutufa misauqaki faqa qimannimianee qimasee diqiqaisa maridaqa.

<sup>39</sup> Miqi qimaseenoo Yisufa Kariree maqa maaqaki oonuree aniree idanoo nári amaana maaqakiaqa keeqafida qimannimidanoo naundurai faafasaaqa marusa niqiqee marufaqa rafudamakida fimariqau.

*Yisufa karoora arimaru fasiqana ruukaisanau.*

*(Mat 8:1-4; Ruk 5:12-16)*

<sup>40</sup> Manda namuana karoora ari maru fasiqafa moo fannoo Yisuna oorini aqoori saunara fufanoo firaagoo innaaru qinoo qinai. Oo karaambaiqa anee aidinana qini karoora darimarina rukaqisaina taikaani. (Mi aukuanna misa mi auriranara firaagoo rufisee mina narimarusaa naadumasaa nianasaa quqee mariqau.)

41-42 Yisufa mi fasiqana qafoofanoo amuqusa mandaikufanoo asauku uqeerasee mina afaaqasaa munduseenoo qinau, eeo qini dididanoo doo rukafua qufanoo doo miqoo uqanna aaqee miqi qimarufanoo karoora ruka taikanau.

43-44 Ruka taikafufanoo Yisufa amambaina qimasee qimaminau, aniki kai taikafuani, sia moo fasiqa qimamia. Anee andeeqasee amaana maaqaki mari aanaiqikirana uqafiqasainanoo ani afaaqa karoora arimarina aiqumumaseenoo aniara anukanoo mariaanoo qiannoo. Miqi qinana anee karoora nári marisa taikaransa aandau tatufirana Mooseena sandufamau fidana Anutuna tatufirana suqa amia. Suqamisainaqa aiqamausa ani karoora rukarana qafamasee sia aniara eerairiaqeera. Miqi qimasee Yisufa mi fasiqana aiqoofanoo finau.

45 Mi fasiqafa karoora taikafufa sia Yisuna ufa irisee umee ranau miqooqari fidanoo aiqamai qimanniminoos finau. Firaqoo qimannimi marufaqa moomoosa umbiqoofanoo Yisufa aadumai marufaqa faiqi anaasee moomoosa mifunnai fimariqau.

## 2

*Yisufa aiku asauku pipisaaqa usirana andeeqaisanau.  
(Mat 9:1-8; Ruk 5:17-26)*

1-2 Qaaraqanda fee qaaramoo faasaanee aiqaroofanoo Yisufa nári maqusai Kapeeranaumma maqusai anireenoo nári maaqaki keeqafufaqa faiqi anaasee minara iriseeqa mi maqanaki moomoo keeqee qumbiqafufanoo kooqiki faqa naambeeqai faqa qumbiqafufufanoo Yisufa maaqaki maridanoo Anutuna ufa qimannimi marinau.

3 Qimannimimarufaqa faiqi qaara faqa qaara faqa moo fasiqa aiku asauku kuqirana qaindusumaree mina ainaina faqa aniree Yisuna uqafiqaanee rufaqa faiqi ititafufaqa keeqarara anuqusia misa maaqamau akaramafiqa.

4 Yisuna akiaqa amummaqa nári eefeeda maaqa asaana rapeemandeeqa mi fasiqana nári qainda namufaqa minaki upeekasee quiqa quiqa ufanoo meemai Yisuna aqa quqaqau.

5 Misa irirafa firaqoo Yisunasaa atooqoonara Yisufa qafamasee aiku asauku kuqirana qimaminoo qinau. Qini qimaaku ani mandainaina akiaqa minnaisaidaqa.

6 Mooseena sandufa akoofasauqa miqoo ooqumarifi irufanoo nikoqoofaqa nári naunduraki oonu mafi iriqa qiqau.

7 Maa fasiqafa naqifeemasee unna qimasee paasoosidanoo Anutuna amaaqa maqaidanoo fee mi ufana qidanoo fee. Sia faiqi moo fannoo amana faiqi mandainaina taikannisaanoo Anutufa kai amana miqiannoo.

8 Miqi qimasoofanoo Yisufa aaqee uqanna misa naundurakinaana iriseenoo quandaki qimanniminau. Innee naqi fee qifaqee inneeqa naaqookinaana mi mandufana qidee.

9-10 Qinee maa fasiqanara mandainaina numoo minnaisaidee qunnana innee qiniara sia amanaikiaanoo fee qidee, qinee faiqi nimaaku maa maqanasaa maridaqa faiqi mandainaina taikarana qini afeeka marinara kooroomma nimaqaanaura maa fira afeeka ainainannai kooroomma nimaqaanaura qinee maa fasiqanara aneenna qaindasaaqari findifinana mi qaindanara maree amaaqa fua qianaqa qinee mandainaina taikannisaana afeeka qafeefara. Miqi qimannimiseenoo quandaki mi aiku asauku kuqirana qimaminoo qinau.

11 Ani qimamidaqa anee findifinana aneenna qainda mara maree amaaqa doo fua.

12 Miqi qimasoofanoo aiqamausa nifusaaqari mi fasiqafa findifinoo narí qainda mara qumareenoo doo amaaqa kaqi kaqi finau. Misa qafamasoofanoo firaaqoo naaquqoofaqa Anutuna amooqidaqa qiqau. Maasa sia uqanna maaqira ainaina qafaunausa maridaqa.

*Yisufa Reefina afiqanau.*  
(Mat 9:9-13; Ruk 5:27-32)

13 Yisufa kafaa anirandee Kariree firaa farumma maruqoo fufaqa faiqí anaasee moomoo mina afaqee oonuroofanoo Anutuna ufa qimannimamarinau.

14 Mifa mi saqa oonuree aniree idanoo faiqí moo narí maqannaasa takisa munnimma mareeqeenoo Roomma maqanna nimimaruna paqurinau. Mi fasiqana auqu Reefifa mina akoofa Arafaiusafa marinau. Reefifa narí oopisaki ooqumarifi marufanoo Yisufa mina qafamasee aniree qimaminoo qinau. Anee qini faqa fua qufanoo, Reefifa iriseenoo aaqee findifinoo Yisuna faqa finau.

15 Yisufa marikinoo moo kari Reefina maaqaki keeqafi narana nee marufanoo manda oosana maree marusa faqa takisa munnimma maree marusa faqa Yisuna faqa nimarusa misakiqari akaqausa Yisufa narí faiqinamu faqa Reefina maaqaki ooqu marifi narana nee mariqau.

16 Mooseena sandufa akoofasauqa Farisai amaana ufa qimarusa anirama qafamaseeqa Yisufa manda oosana maree mariasa faqa takisa munnimma maree mariasa faqa naidanoo fee qimasee Yisuna faiqí namu umee irammiriqa qiqau. Naqaa fee qifanoo fee takisa munnimma maree mariasa faqa manda oosana maree mariasa faqa narana naidanoo fee asaurirana sia fee marifanoo.

17 Miqi qufanoo Yisufa misa ufa irisee qimanniminu. Faiqí anaasee amiqimasee mariafaqa sia tutaqausiannai fidaqa, aurimariasa kai tutaqa finnai fidaqa. Sia qinee andeeqaraura naararara qumuafanausa maridaqa, faiqí anaasee innee manda oosana maree mariasee qimasee nifaqee mariasa misara Anutufinnai ubeekaaqera naaraaqeera qinee qumuafanausa maridaqa.

*Narana auramasee innaaru qufa.*  
(Mat 9:14-17; Ruk 5:33-39)

18 Moo kari Yoohaneefa nammari nimimaruna aiku asauku faqa Farisai amaana ufa qimarusa niku nisauku faqa Anutufa maasa ufa irianifee qimasee narana marufaqa mina minniseeqa naararee marufaqa innaaru saika kai qimariqau. Akaqausa Yisufunnai oonuree irammiriqau, naqi fee qifaqee ani aiku asauku sia misa naanna raida Yoohaneena aiku asauku faqa Farisai amaana ufa qimariasa niku nisauku faqa narana sia narai naararee marifaqa innaaru qidaqa, ani aiku asauku nanaree sia miqidee qufanoo

19 Yisufa qimanniminoo qinau, nimundara qoomaqa sakasee naidaqa suqimariasa naararee maridee miqidee. Oo sia uqanna miqifara. Amundara fasiqa miqoo maridaqa asasira faasaana marifaqa narana naida maridaqa.

20 Kasooqaqee moo aukwana misa amundara fasiqa qini misakinaana rumbamaree munu darusaifaqa mikari qini qiku qisauku narana minniseeqa naarara maridaqa innaaruqifaranoo.



<sup>21</sup> (Yisufa Farisai amaana ufa qimarusa faqa Yoohaneena nammari mareemarusu faqa misara ooqeenaa Mooseena sandufa nári niku nisauku qimannimi marunakinara kikiqususee qamunnara faqa uainna nammari-ara faqa mina kikiqammusinau. Kafaa narí qumu fuka ufana narí faqa ni-marusa qimannimunara fuka uainna faqa fuka qamunna faqa kikiqusinoo maaqi qimasee qimanniminau.)

Sia faiqí moo fannoo fuka qamunna ati ateekeerana marasee nauraa qamunnasaa ititaanee qimasee akunuannoo. Miqinanoo fuka qamunna ati fannoo ooqeenaa qamunna afauqaaqarafa rakeeinoo firaqoo anaqiannoo.

<sup>22</sup> Yafee faiqí moo fannoo nauraa tunda taqu maraseenoo fee fuka nammari adiaannoo fee. Sia miqiannoo. Ruqia finanoo aiqama nammari qumiqaraandooru. Fuka taqu andasee fuka nammari minaki adiasainanoo mina amana mariannoo.

(Yisufa maqasaa maru aukuanna misa uainna nammari tatisee aandau apatannai auqira taquki adiasee kisaagasaa maaqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammarifa marinau. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

*Sabatasaa sakuma ruqoosa noofa.*

*(Mat 12:1-8; Ruk 6:1-5)*

<sup>23-24</sup> Yisufa moo faasaana Saririqasaa Yuda maqannaasa amaana faasaana narí faiqi namufaqa maqusamau nidanoo sakuma ummaquqoo ququsanaki fidanoo mina faiqi namu fi sakuma rasau fu maree naqafufanoo Farisai amaana ufa qimarusa nindafamasee Yisuna qimamiqau. Ani faiqi namu Mooseena sandufa, Saririqa sandufa rukiidaqa sakuma ruqoosaidaqa ainainidaqa.

<sup>25-26</sup> Yisufa mina iriseenoo quandafi maaqi qimasee qimanniminau. Innee Dafidina oosana sia fee innee asaana ridee. Ooqai Saurooofa mina arirufanoo sandeenoo aararee marufanoo Anutuna amaana maqaki Nooba maqusai marunaki keeqafinoo Anutuna amimaru feemuna marasee namasee akaqana marasee narí faiqi namufaqa nimufaqa naqau. Mooseena sandufa rukiasee nanau, aanaiqikirausa kai nee maria feemuna marufanoo sandufa rukiasee kaqiqeefa nanau. Mi aukuanna Abiatarafa aanaiqikirausa uriqararafa marinau. Innee moomoo kari mina asaana rimariafa mina oosana innee sia fee minara iridee.

<sup>27</sup> Anutufa narinaindari faiqí dadaaqi mari ainainee qimasee Saririqa amaana faasaana auqeeqeenoo faiqí niminau. Sia kaqinaindari Saririqa amaana faasaanara irisee faiqí auqeeqeenoo amaana faasaana aminau.

<sup>28</sup> Minara qinee faiqí nimaaku amaana faasaana faqa mina sandufausa faqa uriqararausa marunausa maridaqa qinee misara naaqee qunaqa naidaqa miqi marifanoo sia numoo mariannoo.

### 3

*Yisufa asauku sufrana andeeqoofa.*

*(Mat 12:9-14; Ruk 6:6-11)*

<sup>1</sup> Yisufa moo faasaana kafaa mi amaana maqanaki keeqafi qafoofanoo faiqí moo asauku sufrafa faiqí anaasee moomoo namufaqa keeqafi marinau.

<sup>2</sup> Akaqa fasiqa anaasee Yisunara ufa qianee qimasee amaarusidaqa asauku sufrana faqa Yisuna faqa amiqimasee ninda fee mariqau. Yisufa

Saririqasaa fee faiqí asauku sufirana andeeqaannoo fee Mooseena sandufa rukiaannoo fee qidaqa qafee mariqau.

<sup>3-4</sup> Yisufa amaana maqaki faiqí anaasee amaana ufa qimannimidanoo asauku sufirana aaramasee qinau anee mai aniree aiqamausa nifusaa kikiqia qimaseenoo quandaki faiqí anaasee irammirinoo qinau. Mooseena sandufa Saririqa faasaana sandufa fannoo maasara naqi fee qidanoo maasa minasaa faiqí anaasee dadaaqafee ianauree kuridianauree maasa faiqí marirana asumufee marannimianauree kuridi taikannimaqaanauree miqi qufaqa misa sia ufa qiqau kaqi kasoomafiqau.

<sup>5</sup> Yisufa mina qafamasee raiqara oori maraseenoo faiqí anaasee aiqama munu ninda fee mini ninda fee maseenoo misa aaqarana afeeka irirana nindafa masoofanoo misara amuqusinau. Amuqusufanoo mi asauku sufira fasiqana qimaminoo qinau aneenna asauku ratutaa qufanoo asauku ratutasoofanoo mina asauku amiqinau.

<sup>6</sup> Farisai amaana ufa qimarusa minaki marusa qafamaseeqa amaana maqakiqari rauda makufaqa Eeroodeena ufa irimarusa faqa suqufufaqa Yisuna arira ufa qimariqau.

*Yisufa kanuqakiqari aiqama maqannaasa ufa qimanniminau.*

<sup>7-8</sup> Miqooqari Yisufa Kariree farumma firaa farumma tia marunnai ooqu-fufaqa faiqí anaasee moomoosa afaqa maree ooqu fiqau. Akaqausa Kariree maqa maaqakiqari aniqau, akaqausa Yudeea maqa maaqakiqari aniqau akaqausa Yeerusaree maqusakiqari aniqau akaqausa Idumeea maqa maaqakiqari aniqau akaqausa Yooradana nammari dinni afainni marusa aniqau, akaqausa Tiree maqusakiqari faqa Sidoonna maqusakiqari faqa misaqa marusa faqa aniqau. Doo mi fasiqa anaaseesa moomoosufanna tatufufaqa Yisufa imaru ainainausara iriseeqa qafararee qimasee ani suqiqau. Faiqí anaasee moomoosa Yisuna auqaidaqa radamuaqaammi-mariqau.

<sup>9-10</sup> Yisufa misakinaana moomoo aurimarusa andeeqannisee marunara faiqí anaasee aiqama oosana oosana aurirana maraqanusa nisaukukoo Yisuna auqaananoo maasa aurirana taikaanifee qimasaida Yisuna auqaidaqa radamuaqaa imariqau. Yisufa minara iriseenoo narí faiqinamu qimanniminau innee kanuqa rarisama daaqa nammariqi quqaaqa misa qini radamifaqa kanuaki akaraanaqa sia radamuaqa qufaqa misa miqimmigau.

<sup>11-12</sup> Faiqí anaasee faafasaaga naunduraki marusa Yisuna qafamasoofaqa naunduraki maru faafasaaga faasai misa Yisuna qafamaseeqa faaqa quqasee koorooiqa qiqau. Anee Anutuna amaaku mariana fee qufanoo Yisufa nimambaina qimasee qaoo qinoo qinau sia innee afaannauqa qiniara kooroo iaqa.

*Yisufa qikuni ooqu qaara marasee fasiqa narí faiqi namukiaqera maranau.*

*(Mat 10:1-4; Ruk 6:12-16)*

<sup>13-14</sup> Mi fasannai Yisufa amuaqu namusa oorureenoo narí aiku asauku marianee qimarusa naara masoofaqa aniroofanoo Yisufa misakinaana qisaukuqara faqa qiku ooqu qaara marasee nuqu reenoo qini faqa mari-aaqee qimasee nuqu reenoo niqiqoo fasiqausee qimasee qimanniminoo qinau, qinee inniara rusandeesamumasee mareeqa qinee inni niqqaanaqa maqusa maqusa nidaqa qimannimiaqa.

<sup>15</sup> Faiqí anaasee faafasaaga naunduraki marina aqiqqee marunna afeekana nimianaqa aqiqqefaranoo.

16-17 Maanamusa Yisufa rusandeesamumandee maranau.

Simoonu Yisufa moo auqundanau Peetooroonee qimasee rusandeesamumandee mina faqa narí faiqi namuki quqanau.

Seebeedina amaakuqara Yameesafa faqa narí akaqa Yoohaneena faqa miqanda Yisufa moo nuquranau Booaneeraqeesafa mi nuquna oosana innaarunai qimarina fooqaaqandee qimasee miqanda faqa rusadeesamumasee narí faiqi namuki quqanau.

18 Andurufa faqa

Firipifa faqa

Baratooroomeeufa faqa

Mataioofa faqa

Toomasifa faqa

moo Yameesafa Arafaiusana amaaku maruna faqa

Tadeeusafa faqa

moo Simoonafa nári kaamannaikiaqera qimarufa.

19 Yudasifa Keerioota maqusaindaraafa Yisunara kasooqagee uqeeqaaninafa mina faqa misauqa faqa mareeqeenoo narí faiqi namuki quqanau.

*Beeraseeburanannai afaanna aqiqaidee qiqau.*

*(Mat 12:22-32; Ruk 11:14-23, 12:10)*

20 Miqooqari Yisufa narí maaqai Kapeeranaumma maqusai maaqaki keeqafufaqa faiqi anaasee moomoo uqanna maaqaki ani umbiqafufanoo narana naani quna minniseenoo narí faiqi namufaqa sia nanau.

21 Faiqi anaasee Yisunara doo furufara mandeaafoo qufaqa mina atiuqa niranuqoofofaqa Yisuna oonu rarisee anirara deedaqiqau.

22 Mooseena sandufa akoofasauqa akaqausa Yeerusaree maqusaindari gumusa Yisunara maaqi qimasee qimariqau. Mifa afaannauqa uriqararafa Beeraseeburafa mina aundurái marifa maridanoo fee qiqau. Akaqausa Yisunara afaanna uriqararausa afeeka amimariafanoo minannai afaannauqa niqiqaidanoo fee qimariqau.

23 Yisufa minara iriseenoo faiqi anaasee naaramma quqasoofaqa aniroofanoo moo ainaina kikiqa ususeenoo quandara ufa kai qimannimino qinau. Naqimasee Sadannafa quandaki Sadannana aqiqaannoo fee sia amanaikianoo.

24 Moo maqannaasa narinni narinni rakiqa rakeekaa iqa doo mi maqannaasa taikee kuridifaranoo.

25 Moodaa oosana moodaa maaqaki mariasa rakuakiqa doo misa faqa taikeefaranoo.

26 Sadannafa narí ququsakinaasa faqa miqikai inoo rakuakinanoo sia amana kisaqasaa mariannoo moodaa moodaa inoo taikaannoo.

27 Ummuarimari fasiqafa naqimandee afeeka fasiqa maaqa rapeemaseenoo mina ainaina ummuariannoo fee sia amanaikiannoo. Mi ummuari mari fasiqafa anireenoo sanda qumareenoo mi afeeka fasiqana rumba quqaseeno miqoo mina maaqaki keeqafi mina ainaina ummuariannoo. Qinee Anutuna afeekannai Sadannana rumba quqaseeqa mina afaannauqa faiqi nauduraki mariasa niqiqaidaqa.

30 Misa Yisunara afaanna mina aundurái maridanoo mifoo qimarunara mi ufana qinau.

28 Maa ainainara kai iriaqa sia aunuaqa. Faiqi anaasee oosana oosana mandainaina faqa oosana oosana manda ufa qirana faqa moomoo kari qimariana faqa Anutufa minauqa akiaqara amana mininnisaannoo.

<sup>29</sup> Moo fannoo Anutuna naaquqara maraqunara manda ufa qinanoo Anutufa mina akiaqara sia uqanna minnaisaannoo mi ufana qimarifa naaru naaru fimaria idanaki aaqarana marasaifanoo sia uqanna Anutufa minnaisaannoo.

*Anutuna ufamau fimariasa qini ainaina maridaqa.*  
(Mat 12:46-50; Ruk 8:19-21)

<sup>31</sup> Yisufa miqida maaqaki ufa qimannimimarufanoo mina akaqaafasaa mina anoona saimbaqa naambeeqai ani kikiqiqa maridaqa Yisuna qimami-aneerufanoo sia amanaikufaqa faiqi moo aqiqee oonu Yisuna qimaminanoo aniani fee qiqau.

<sup>32-35</sup> Maaqaki Yisuna fiq fiqiuqa ooqu mariqa marusa mi ufana irisee qimamiqau ani anoofa faqa ani akaqaafasaa faqa madaana maridaqa ani aareeaa maqi qufanoo Yisufa iriseenoo miqoo marusa irammirinoo qinau. Yafee qini qinoo fee yafee qini qikaqaafasaa fee qimaseenoo nari faqa marusa munu ninda fee mini ninda fee maseenoo qinau. Qafaqa, maaqoo qini qinausa qini qikaqaafasaa maridaqa, qini qikoona iriranamau fimariasa misa kai qini qikaqaafasaa qini dauna qikaqa qini qinausa maridaqa.

## 4

*Qaqama aaqee mari ufafa.*  
(Mat 13:1-9; Ruk 8:4-8)

<sup>1</sup> Yisufa kaifaa Kariree nammari afainni ooqu maridanoo Anutuna ufa miqoo suqi marusa qimannimi marinau. Faiqi anaasee moomoo mina ufa iriraree qimasee aiqama anireeqa Yisuna ititasoonara mifa kanuqaki akaramafufanoo nammariki afiqa quqaqoofanoo munu kasoomasee maridanoo minakiqari nammari afaisaa faiqi anaasee marusa Anutuna fasaasa ufa qimannimimarinau.

<sup>2</sup> Yisufa sia akooqoo qimanniminu, quandara ufakiqari qimannimidanoo maaqi qimasee qimanniminu.

<sup>3</sup> Innee amiqimmasee iriaqa faiqi moo fannoo maasa Yuda maqannaasa oosana mareenoo maqa rumaseenoo raisa fooqaana ummaqirara mina qaqama marasee minaki aaqasoofanoo ururanau.

<sup>4</sup> Mifa miqoo aaqaidanoo akaqa qaqama fannoo aatata niku ree mariaqoo faqa aqufufaqa ufiniuqa aniree mina kai namasaqau.

<sup>5-6</sup> Akaqa qaqama ooni meemai maqaki marufanoo minasaa maqa oodaa marunasaa aaqasoofaqa sia moomoo maqa marunara maqa tootooqi marunara dauni ururamafi marufanoo suani firaafa qoofanoo mina atuka sia meemai keeqoonara suani arufanoo aadanusinau.

<sup>7</sup> Aaqasoofanoo akaqa qaqama amuka faqaafa marunaki aaqamakinoo aqufinoo kambiqafufanoo amuka faqaa ainaina fannoo mina arusaifanoo mandaकिनoo marida sia qaqama ireenoo.

<sup>8</sup> Akaqa qaqama fannoo amiqira maqasaa aqufufanoo maqakiqari urureenoo kambiqafinoo doo qaqama ireenoo, akaqafa oodaa ireenoo akaqafa amiqimasee ireenoo akaqafa fiqaramasee ireenoo.

<sup>9</sup> Yisufa mi ufana qimannimidanoo maaqi qinau. Innee naaqoofaqaasa kai maa ufana qimannimunnana iriaqa.

*Yisufa quandarufa qimanniminu.*  
(Mat 13:10-17; Ruk 8:9-10)

<sup>10</sup> Qimannisoofaqa fufaqa Yisufa naríara marufaqa akaqausa mina faiqi namu qisauku qara taikasee qikunni ooqu qaara mararausa faqa aniree quandara ufa oosanara iroofanoo qimanniminoo qinau.

<sup>11</sup> Anutufa narí ququsakinaa qumee irirana qimannimiannee qimaisaifaqa qimannimidaqa akaqausa aqoosai mariasa quandara ufa kai qimannimunaqa iridaqa.

<sup>12</sup> Tamummaqara fasiqauqa misara maaqi qimasee akara riqau. Misa maqee maqee qafaidaqa sia qafeefaranoo.

Misa iriqaraasamasee siamma irifaranoo. Misa irifau Anutufinnai ubeekama fifanoofau misa mandainaina akiaqara minninnisani.

Minara qinee Yisusa quandara ufa kai qimannimidaqa.

*Qaqama aaqara ufa oosana koorooufa.*

*(Mat 13:18-23; Ruk 8:11-15)*

<sup>13</sup> Yisufa narí faiqi namufaqa faiqí akaqausa faqa qaqama aaqaranara irammirufanoo maaqi qimaseenoo akooqoo kooroomasee qimanniminoo. Innee sia fee mi quandara ufana oosana iridee. Innee sia mina iriqa naqi fee mandee aiqama quandara ufa irifaree.

<sup>14</sup> Qaqama aaqee mari fasiqafa Anutuna ufa qaqamara foora aaqaidanoo.

<sup>15</sup> Moo kari akaqa ufa faiqí naunduraki aanasaara foora aaqasaafanoo irifanoo Sadannafa ufiniara foora mina aaqee uqanna aakueeqee aqidanoo.

<sup>16-17</sup> Akaqa fasiqa anaasee naunduraki ooni maqasaara foora qaqama fannoo aqufidanoora foora mi ufana irisee asasamasee marasaafanoo sia meemai anoona ooqu finara sia kisaaqasaa maridanoo, mi ufana saara ummaara fee, arirane, kambiqafifaqa dauni minnisaidaqa.

<sup>18-19</sup> Akaqa fasiqa anaasee amuka faqaa ainainaki aaqee maria qaqamara fooqaana maridaqa. Misa Anutuna ufa iriseeqa maaqoo maria ummaara kadaapirirafa faqa munnimmara rimariafa faqa oosana oosana ainainara rimariafa faqa mi ufausa kai Anutuna ufa radamusaifanoo sia qaqama iraidanoo.

<sup>20</sup> Akaqa fasiqa anaasee amiqira maqasaa aaqee maria fara foora maridaqa, misa Anutuna ufa irisee maraanara qaqammara foora iraidanoo akaqafa oodaa iraidanoo akaqafa amiqimasee iraidanoo akaqafa fiqaramasee iraidanoo.

*Qooma qumbirana quandarana kikiqa usirafa.*

*(Ruk 8:16-18)*

<sup>21</sup> Yisufa kaqi qimannimidanoo qinau. Faiqí moo fannoo qooma qumbimaree difaani ameemaanai sia minni quqaidanoo beeta ameemaanai sia minni quqaidanoo akooqoo quqaqaiifanoo kaaqa qaanifeera.

<sup>22</sup> Miqikaimmasee kasooqaqee aiqama kukeeqee mari ainaina oosana oosana Anutufa mareeqee akooqoo quqaannoo aiqama rafaafa fimari ainaina faqa akooqoo quqaannoo.

<sup>23</sup> Innee naaqoo faqaasa iriaqa.

<sup>24</sup> Yisufa kafa maaqi qimasee qimanniminoo, innee naaqoo irimari ufa nara amiqimandee rakisiaqa. Anee nana ufa fee faiqí anaasee niminanoo Anutufa mi ufanannai kai aninna rafaqafu amaqaannoo sia aneenna qinnana amana kaifau ani rafaqafu amaqaannoo fau fiqaramasee ani rafaqafuamaqaannoo.

<sup>25</sup> Faiqí moo ainaina uqaqee marinnana moo faqa Anutufa amiannoo. Faiqí moo fannoo ainaina siainnana kaqikaa ainaina marinnana Anutufa mara marainanoo kaqi samu uqanna mariannoo.

*Qaqama narí kai kambiqarana kikiqa usirafa.*

<sup>26</sup> Yisufa kaifaa qimanniminoos qinau. Anutuna ququsa maqasaa fasiqa anaaseeki sia akooqoo kambiqaidanoos kukeeqanoos mari ifa kambiqeenoo akooroo idanoos, mifa faiqí moo fannoo narí afuqaki qaqama aaqaidanoora foora kambiqaidanoos.

<sup>27</sup> Mi fasiqafa qaqama aaqasee eendaki faiqeenoo faasaana narí ainainai oonuree aniree miqí marifanoos doo qaqama aaqaqaiifa doo kambiqafinoos. Mi fasiqafa sia kambiqarana oosana irifanoos narí kai doo kambiqafinoos.

<sup>28</sup> Maqa fannoo naamma amifanoos kambiqafinoos qaqama iraidanoos. In-daaru ummaqusainanoos radiqifinoos afumu kambiqafinoos doo urureenoo afufeenaarinoo doo qaqama ireenoo qaqama anoona kambiqaidanoos.

<sup>29</sup> Qaqama akuqamafifanoos mi fasiqafa paipana qumaree ateeka maree munu maqaki quqaidanoos.

*Qumini qaqamara foora radiqifinoos firaafaikidanoos.*

*(Mat 13:31-32, 34; Ruk 13:18-19)*

<sup>30</sup> Yisufa kaqí qimannimidanoos moo quandara ufa qimannimidanoos irammirinoos qinau. Anutuna maqasaa ququsakina faiqí anaasee mariasa nanara fooree maridee. Nana quandara ufannai fee kooroo ianauree.

<sup>31-32</sup> Qinee maaqí qimasee qimannimianaura, qumini qaqama fooqaana kaqikaana faiqí moo fannoo mina maramareenoo ummaqusainanoos kambiqafinoos firaas tia saqariara foora aiqama aakaaqakinaa andanda uriqararafa maridanoos. Mina asaana firaanaikinanoo ufini aniree mina asaana auqaanai aanaamu usakaidaqa.

<sup>33</sup> Yisufa narí ufa oosana oosana quandara ufakiqari faiqí anaasee nári irirana amana kai qimanniminau.

<sup>34</sup> Sia sia quandara ufakiqari qimanniminau quandara ufakiqari kai qimannimi marinau. Mifa narí faiqí namufaqa naaduma marunnai minni mi quandara ufana oosana kooroommanniminau, maqee maqee miqimmi marinau.

*Yisufa ufannai ufai amakaura taikanau.*

*(Mat 8:23-27; Ruk 8:22-25)*

<sup>35</sup> Mi faasaana eenoofanoos Yisufa narí faiqí namu qimanniminoos qinau. Doo anifaqa sipaki akaramafinaqa Kariree farummaki fitaqamareeqa muqafainni nianai fuaqa.

<sup>36</sup> Misa eedoo qimasee faiqí anaasee minnisee Yisufa ooqu marunaki akaramafufaqa Yisuna afiqee farumaki fiqau, akaqausa mariqa kanuqaki misa saimbaqa fiqau.

<sup>37</sup> Misa faruma qambaanai fimarufanoos ufai firaafa uqinoos nammari amakaurufanoos sipaki nammari teeqinoos qumbiqararinau.

<sup>38</sup> Yisufa kanuqa atinni akiaqa qunusaa rumasee faiqaqeeufaqa mina faiqí namu rufiasee aniree afaurida qiqau ufasaa rakisirafa findifua maasa kaqí kaaqoo nammari ukuqnaidaqa kuqirarammidaqa anee sia fee maasara iridanees.

<sup>39</sup> Yisufa findifinoos ufaira doo saa qimasee nammariara amakaura doo taikaa qufanoos ufai uqirafa taikkeenoo nammari amakaurirafa taikafinoos doo firaaqoo dai qimafinau.

<sup>40-41</sup> Dai qimafufanoos Yisufa quandakinoo narí faiqí namu niqidanoos qimanniminoos qinau Innee nanaree rufiaidee. Innee qini saqarikirafa siaisee maridee qufaqa misa firaaqoo rufiasee naaquqoofaqa narí qimami narí qimami qiqau. Maa fasiqafa nanee, sia faiqí faqa afaannauqa faqa kai

mina ufara eedoo qidaqa, ufai faqa nammari faqa mina ufara eedoo kai qidaqa.

## 5

*Faiqí aunduraindaraa afaannauqa kuara aundurái keeqaqau.*  
(Mat 8:28-34; Ruk 8:26-39)

<sup>1</sup> Doo miqooqari kanuqa fannoo Kariree farummaki fifufanoo nammari dinnafai nianai Keerasa maqannaasa maqa maaqa munu raquru aminau.

<sup>2</sup> Yisufa kanuqakiqari maqasaa aqufufanoo faiqí moo faafasaaqa aunduraki marufa Yisufinnai aniranau.

<sup>3-5</sup> Mi fasiqana maqannaasa faiqí iri mara maraida ooni aamarai akundee mariqau. Mi fasiqafa mi ooni aamaranaki faiqee marufa marinau. Moomoo kari misa mina qumareeqa sainandannai mina aiku asauku rumba quqasoo fanoo afeekaikamandeenoo asaukusaaqaraa sainanda rakeemma aquseenoo aiku rumba qoo sainanda turi mandee mina rakeemma aqusoofaqa sia amana mina qumaree mariqau. Mina afeeka uriqaranoo marunara misa sia amanaikiqa minnisoo fanoo faiqí madikamaqoonakiqa faqa aaqana aaqanakiqa faqa faaqa quqanoo nidanoo oonisamu qumaraidanoo narí afaaqa atekaanoonufa marinau.

<sup>6-7</sup> Yisufa kanuqakiqari aniroofanoo mi fasiqafa ooni aamaraki nianaindari Yisuna qafamaseenoo sandee anireenoo Yisuna oorinni aqoori saunara finoo oorindari firaa kari faaqa quqaseenoo Yisuna aaramaseenoo qinau. Oo Yisufa anee firaaqoo uriqarara Anutuna amaaku mariananoo. Anee nanaree maasa soodaa qidane. Qinee afeekaikamandee ani qimamidaqa. Anee Anutunara irisee sia qini darua.

<sup>8</sup> Mi fasiqafa sia fifau miqi qinau. Yisufa mina aundurakinaa afaannara anee manda afaanna maa fasiqana aundurakiqari rafudamaki fua qunara mi fasiqafa miqi qinau.

<sup>9</sup> Yisufa mina ufa iriseenoo irammirinau ani auqu yafee qufanoo mi fasiqana aunduraindari afaanna fannoo qinau. Maasa moomoosa qusidaqa marunnanara maasa duqu qusirausee qidaqa.

<sup>10-13</sup> Miqi qimasoo fanoo afaannauqa faqaa fasiqa fannoo narí aundurakinaa afaannauqara kafaa kafaa Yisuna qimaminau. Sia maa maqa maaqanakiqari misa niqiqaa. Miqi qimaseenoo Yisuna qimamimarufanoo. Mi nammarina afainni ameemai adeedi kuara moomoo andanda neemariqau. Mi fasiqana aundurakimari afaannauqa kuarauqara Yisunara afeekaikiqa qiqau maasa diqiqannee qimasee diqiqainaga kuarauqa naunduraki fua qufanoo Yisufa doo fuagee qufaqa mi afaannausa mi fasiqana aundurakiqari rafudamakufaqa kuarauqa naunduraki keeqaqau. Kuarauqa naunduraki keeqoofaqa mi ameemaindari sandamaqaraasufaqa farummaki bururu qufaqa aiqama kuqu taikaqau. Mi kuarausa tu tauseenna (2,000) kuara mariqau ooni saqari auqiqa mariqau nukudara foora mariqau.

<sup>14-15</sup> Mi kuarasasaa rakisi maru fasiqausa mi kuarausa nindafamasee quqasee sandamaqaraasamasee maqusai marusa faqa uiqaana maaqakiqa marusa faqa qimannimi qau. Qimannimisoofaqa aiqama qafararee qimasee aniree qafoofanoo moomoo afaanna aundurái mariu fasiqafa andeeqasee qamunna afisusee irirana marasee miqoo ooqumari fi marufaqa ani qafoofanoo naaquqee naindiri ranau.

<sup>16-17</sup> Faasai mariusa Yisufa afaanna niqiqoona faqa kuara nammariki aqufunara faqa qafoosa misa maqusaindari aniroosa aiqama ainainara

qimannimisoofaqa misa iriseeqa Yisunara rufiaseeqa mifinnai ooquee kafaa kafaa irammiridaqa qiqau maasa maqa maaqakiqari amanee anee finnaree qiqau.

<sup>18</sup> Yisufa eedoo qimasee kanuaki akareemarufanoo afaanna aundurari mariu fasiqafa Yisunara afeekaikamaseenoo irammirinoo qinau amanee qinee ani faqa funauree qimasee fuki faaki qinau.

<sup>19</sup> Yisufa irisee qaoo qimasee qimaminoo qinau. Anee aneenna maaqai anirandee oonureenana aneenna anoona akoona atiuqa qinee karaambaqa ani firaqoo dadaaqunnaara faqa firaqoo aniara amuqusunnaara faqa qimannimia.

<sup>20</sup> Miqi qimasoofofanoo anirandee nari maqa maaqai oonuree qisaukuqara taikasee maqusanasee qimarusa aiqama qimannimimaree fiqum fiqum qidanoo Yisufa dadaaqunnaara qimanniminoo nimarinau. Aiqamausa mi ufana irimarusa firaqoo naaquqoofaqa naindiri roofaqa oo kuqaa fee miqinoo fee qiqau.

*Kisaaqandaikimaru aanaaseena andeeqanau. Yisufa qufanoo Iairusana araamuna findifinau.*

*(Mat 9:18-26; Ruk 8:40-56)*

<sup>21</sup> Yisufa miqooqari kanuqaki akaramafufanoo nammari taqamaree dindanai kafaannai finau. Miqoo oonuroofaqa faiqi anaasee moomoosa Yisuna ani mara ititasaqau.

<sup>22</sup> Mi maqusanaki amaana maqasaa rakisimaru fasiqafa mina auqu Iairusafa anireenoo Yisuna oorini maqasaa aqufufanoo afeekaikamandee fuki faaki qinoo irammirinau.

<sup>23-24</sup> Qini qiraamuna kaqikaa qiraamuna aurimarifaqa amanee anee anireenana aneenna asauku minasaa quqasainanoo findifuani kuquandooro qufanoo Yisufa mina faqa findifi finau. Fimarufaqa moomoosa titiqimafufaqa fidanoo misa rusadeesamumandee fimarinau.

<sup>25-26</sup> Miqoo misaki anaasee moo marinau. Qisaukuqara taikasee qikuni ooqu qaara marasee aukuaana kisaaqandaikimaru anaaseefa marinau, mifa moomoo tutaqausunnai fimarufanoo sia andeeqoofanoo firaa teeroo quqaranaki marinau. Mi anaaseefa tutaqausunnai nari munnimma maqee maqee aqii taikasoofofanoo sia mina aurirafa taikanau maqee maqee firaaainkinau.

<sup>27-29</sup> Mi anaaseefa Yisuna afeekara iriseenoo faiqi aanaaseekiaqa qumee mina aanaaqiannai oonuree maaqi qimasee irinau, qinee oonuree mina qamunna kai auqamasanaanoo mina afeeka fannoo qini aurirana taikaqisaannoo.

Miqi qimasee faiqi anaasee titiqimafufanoo aanaaqianaindari misakiaqa rusandeesamu mandeenoo ani mina qamunna ati kai auqamasoofofanoo nari aundurakiqari fidika reereeuqa taikanau, nari aurirafa taikaranara nari irinau.

<sup>30-31</sup> Yisufa nari faiqi andeeqara afeeka narisaaqari funara iriseenoo faiqi anaasee qambaana qandafi irammirinau yafee qini qamunna auqeenoo fee qufaqa nari faiqi namu qimamiqa qiqau, moomoosa ani ititafuanakina nanaree anee yafee qini qamunna auqee maqi qidanee moomoosa ititafuanaki fimarinanoo.

<sup>32</sup> Yisufa sia misa ufa irinau kaqi randee marinau.

<sup>33</sup> Mi anaaseefa nari aurirafa taikoonara iriseenoo aindirireenoo aaquqoofanoo Yisuna aikuki oorindari ani kummaramafufanoo aiqama anoona ufa kai qimaminau.



34-35 Yisufa iriseenoo qimaminoo qinau Oo qini qiraamuna aneenna irirana qinisaa rusimarianafa mifa kai ani andeeqeenoo doo asooaranaki fua ani aurirafa doo taikeenoo.

Miqi qimarufanoo Iairusana maaqaki marusa aniree Iairusana qi-mamiqau sia ufasaa rakisirana kadaapi arua doo ani araamuna kuqufinoo.

36-37 Yisufa sia misa ufa irinau. Iairusana qimaminoo qinau, Sia rufiaa, qinisaa kai aneenna irirana mundua qimasoofaqa aiqama mina faqa aniusa aiqama Iairusana maaqaki keeqararufanoo Yisufa qaoo qimaseenoo nari faqa Peetooroona faqa Yameesafa faqa mina akaqa Yoohaneefa faqa doo minamusa kai Iairusana faqa nifiqamareenoo Iairusana maaqaki ooru fiqau.

38-39 Misa Iairusana maaqai oonuroofanoo Yisufa faiqi anaasee iki-faafau qirana faqa faaqa fuisee qirana faqa munari minari qirana faqa nindafamaseenoo maaqaki keeqafinoo qimanniminoo qinau. Nanaree munari minari ida fee qikiraqaidee maa faiqifa sia kuqinoo maridanoo faiqaqee idanoo.

40 Misa minara irisee Yisunara naanaidara qimasee uteeti qufanoo Yisufa aiqama niqiqamaseenoo faiqi anaukoo faqa mina aiku asauku qaaramoo faqa maanaaqa kuqiraqoo nifiqee keeqanau.

41-42 Yisufa mi kuqira manaaqana asauku qumareenoo nari ufakiqari kaqikaa manaaqa qinee ani qimamidaqa doo findi fua qimasoofanoo mifa aaqee findifinoo doo ninau. Minaki marusa mina qafamasoofanoo naaquqeenoo naindiri ranau. Mi manaaqafa qisaukuqara taikasee qikunni ooqu qaara aukuaana marasoo maanaaqafa marunara naaquqanau.

43 Yisufa afeekaikamasee qimanniminou innee maa manaaqana andeeqaqaunnufana umeeraaqee qimasee quandaki maanaaqara qinau maa manaaqana narana amifanoo naani qimasoofaqa miqimmiqau.

## 6

*Yisufa nari maqusai Nasareeteenni namummaqanau.  
(Mat 13:53-58; Ruk 4:16-30)*

<sup>1</sup> Yisufa mi manaaqana mara findifummaseenoo miqooqari findifinoo nari maqusai Nasareetinni finau, nari faiqi namufaqa mina faqa fiqau.

<sup>2</sup> Nasareete maqusai Yuda maqanna marunara nariqa amaana Saririqasaa amaana maqaki keeqafufanoo Yisufa Anutuna ufa qimannimi marufaqa misa irisee tautumasee qiqau. Maafa maa amiqira iriranna yai fee mareenoo fee, yafee maa irirana aminoo fee naqimasee faiqi sia auquaqa ira ainaina auqidanoo fee.

<sup>3</sup> Maasaki kamundaa mariifa mifa kai maridanoo, mina anoofa Mariafa maridanoo maaqooqaraa anaasee faiqi maridanoo, mina akaqaafasaauga Yameesana amarafa faqa Yooseesa faqa Yudasina amarafa faqa Simoona amarafa faqa maaqooqaraasa marifanoo Yisufa misakinaafa maridanoo. Mina asooqmaaka faqa maaqookai maridaqa. Misa minara miqi qimasee nikoo fee qiqau.

<sup>4</sup> Yisufa mina iriseenoo maaqi qimasee qimanniminou. Tamummaqara fasiqa moo fannoo maqusa maqusa fidanoo qimanniminaqa misa iriseeqa mina ufara kuqaa fee qifaranoo nari maqannaasa faqa nari ainaina faqa nari moodaa fasiqa anaasee faiqi faqa mina ufa siamma irifaranoo.

<sup>5-6</sup> Yisufa nari maqannaasara miqimmidammia maqi qimasee sia amana moo fasiqa anaasee mandaikirausa andeeqannimaqararee qinau.

Qaaramoo aurusasaa kai asauku quqasoofaqa findifiqau. Nari maqannaasa nari irirana sia minasaa mundunara irisee firaqoo tautinau.

*Yisufa nari faiqi namu niqiqoofaqa qimannimiqa.*  
(Mat 10:5-15; Ruk 9:1-6)

Yisufa miqoo nari maqusai Nasareeteendari dinni dinni fiqumma marusa misa qimannimimarinau.

<sup>7-9</sup> Qimannimiseenoo nari faiqi namu naarama quqaseenoo manda afaanna faiqi anaasee naundurari marusa misa niqiqara afeeka nimiseenoo qaaraqanda qapamandee qaaraqanda qapamandeenoo qimanniminoo qinai, Sia moo ainaina maree fuaqa saunu kai qara maree fuaqa, feemu faqa uqa faqa munnimma faqa sia maree fuaqa, niku aanaamu afisumareeqa siuta moodaa afisumaree sia aabaa moo maraqa.

<sup>10</sup> Innee maqusa maqusa fidaqa moo maqusaki oonu raifanoo mara quqainna maqanaki quqasaina sia namummaqaqa nuaqa minaki kai faiqaida nuaqa, minaqari moo maqusa fiqa fuaqa.

<sup>11-12</sup> Innee moo maqusai fifaqa misa sia inni mara quqeeqa sia inni ufa irifaqa innee fidaqa kookoomma afaqa ninaamarasee fuaqa. Innee miqiqa Anutuna naruaninnanara misa aaquqima nimaqeeffaranoo. Yisufa miqi qimaseenoo niqiqoofaqa maqusa maqusa fidaqa faiqi anaaseera nari mandainainara nimeesuquaqeera qimannimiqa fiqau.

<sup>13</sup> Qimannimidaqa moomoosa naunduraki afaanna faafasaaqa marusa niqiqamannimi marufaqa rafudamakida fimariqau. Miqiqa fidaqa aurusa nikiaaqa sauna fadameenara fooqaana adiasoofaqa findifi mariqau.

*Eeroodeefa Yoohanee nammari nimimaruna akiqa tuqinai.*  
(Mat 14:1-12; Ruk 9:7-9)

<sup>14-15</sup> Yisuna aufakiana ufa fannoo aiqama atinai daraanimambunara Eeroodeefa mi ufana faqa iriseenoo tautinai. Akaqausa Yisunara Yoohaneefa nammari nimimarufa kuqiranakiqari findifinoo fira ainaina auqemari fee qufaqa akaqausa Yisunara Eeriaafa ooqeenaa tamummaqara fasiqa mifa kaifaa kambiqanoo maridanoo fee qufaqa akaqausa ooqeenaa tamummaqara fasiqa fooqaafa kambiqanoo maridanoo fee qiqau.

<sup>16</sup> Eeroodeefa mi ufausa iriseenoo nari qinai, Qinee ooqai Yoohaneena nammari nimimaruna anuka atekasaafanafa mifa kai kuqiranakiqari anida qinoo.

<sup>17</sup> Ooqai Eeroodeefa nari kai qimannimufaqa sundiauqa Yoohaneena nammari nimimaruna rumbamaree karabusa maaqaki quqaseeqa fira sainanda qumareeqa rumba quqasoofanoo marinai. Eeroodeefa sia fifau Yoohaneena mareeqee rumbaranaki quqanai.

<sup>18</sup> Yoohaneefa nammari nimimarufa maqee maqee anaasee qummuarunasaara aqunara rumba quqanai. Eeroodeefa nari akaqa Firipina anaqa Eeroodia nammarina kaqi nari afaaqi faqa marufanoo qummuarunara Yoohaneefa qimaminoo qinai Anee aneenna akaqa anaqa Eeroodia nammarina qummuaramminana maraanoo Anutuna ufa rukiasee miqiananoo.

<sup>19</sup> Eeroodia nammarifa Yoohaneena ufa irisoo fanoo afaaqai kaqi ati qanoo marufanoo maridanoo mina ariranara randee marufanoo Eeroodeefa qaoo qufanoo sia arinai.

<sup>20</sup> Eeroodeefa Yoohaneenara irirana andeeqara qikairi siai fasiqa fee qimasee minara rufiseenoo karafusaki seenoo ititasoo fanoo sia Eeroodia

nammarifa arinau. Eeroodeefa maqee maqee Yoohaneena faqa ufa qira-nara aidi marufanoo maqee maqee Yoohaneena aaramasee ufa qimami-marinau. Yoohaneena ufa fannoo Eeroodeefa maqee maqee Yoohaneena faqa ufa qufanoo Yoohaneena ufa fannoo Eeroodeena raquramufanoo aqu ufafa afaaqai ati qanoo marunara siamma irimarinau kaqi maqee maqee Yoohaneena karabusaki marunna aaramasaida ufa narí qimami narí qimami qimariqau.

<sup>21</sup> Doo anaasee Eeroodia nammarifa rakisinoo fifiufanoo aruaninna faasaana paqurinau. Mi fasaanna faiqí Eeroodeefa Eeroodia nammarina afaaqi narí anoofa narí maqoo faasaannara iriseenoo qoomaqa firaana suqaseeno kaamanna uriqararawsa faqa sundiauqa uriqararawsa faqa Kariree maqa maaqaki faiqí firaasa faqa naaramasoofaqa anireeqa nee mariqau.

<sup>22-25</sup> Misa nee marufanoo anaasee Eeroodia nammarina araamuna fannoo anireenoo misa noorinni idi amiqirana raidanoo aqoori raqee marinau. Aqoori raqee marufaqa misa irufanoo adiafaa qufanoo Eeroodeefa qoomaqa nimiufa mi manaaqana aaramasee aiqamausa nifusaa qimaminau, ani amiqira idi akiaqara nana ainainee qinaqee amianauree qinau. Sia kai ufa kai qinau narí amana naaree aqiqamaseenoo qimaminau, Anee nana ainainaree aididanoo fee anee qinaqa mi ainainna ani amianaura. Anee Kariree maqa maaqa dinni rakisianee qinaqa qinee qambaana oosusee dinni ani amianana anee misasaa rakisia qufanoo narí anoofinai oonureenoo qinau, nanaree qimamianauree qufanoo mina anoofa maqee Yoohaneefa nammari nimi marifa kuquanifee qimasee Eeroodeenara qikaru qiandoo qimaseenoo akiaqa tupumma maree minisaifaqa geeqa qifunoo mina qafamasee kuqaa kuqiifoo qianauree qimasee narí araamuna qimaminau. Yoohaneefa nammari nimimarina mina anuka ateeska maree mina akiaqa mini qimiaqera kai qia qufanoo mina araamuna fannoo anirandeenoo sandee oonureenoo Eeroodeena qimaminoo afeekaikamandee qimaminau anee maqee uqanna Yoohaneefa nammari nimimarina anuka tuqusee fidika maaqamau iandoora qimasee saqari difaaniki akiaqa quqasee mini qimianne qufanoo Eeroodeefa firaqqoo uqanna akooqamafinau.

<sup>26-28</sup> Akoqqoofanoo sia amana qaoo qinau. Aiqamausa nifusaa narí amana aqiqamasoonara asauruseenoo narí sundia moo aqiqoofanoo karafusa marunaki oonureenoo Yoohaneena anuka ateeskaseenoo saqari difaaniki mina akiaqa quqaseenoo maree mini Eeroodia nammarina araamuna amufanoo mifa mareeqeenoo narí anoona aminau.

<sup>29</sup> Yoohaneefa nammari nimimaruna faiqí namu mifa kuqunara irisee ani mina iri maree munu akundaqau.

*Yisufa feemu namufaqa noodaanna faqa nimufa.*

*(Mat 14:13-21; Ruk 9:10-17; Yoh 6:1-14)*

<sup>30</sup> Yisufa narí faiqí namu niqiqoofaqa maqusa maqusa nidaqa qiman-nimunara faqa auqoonara faqa Yisuna mini qimamiqau.

<sup>31-32</sup> Qimamimarufaqa faiqí anaasee moomoosa aniree qumbiqafunara narana narafa sia amanaikufanoo Yisufa narí faiqí namu maaqi qimasee qimanniminu. Aniaqa innisaimbaqa faiqí sia mariannai oonuree idooaqa. Miqi qimaseenoo narí faiqí namufaqa nammari afainni ooquree kanuqaki akaramafufaqa nammari amuaqumau fiqau.

<sup>33</sup> Faiqí anaasee moomoosa nindafamaseeqa oo Yisufammi maqi qimasee narí maqusaki narí maqusakiqari oonu maree ani mareeufaqa Yisuna

kanuqa fannoo munu maqanamu raquru amufanoo nindafoofaqa faiqí anaasee moomoosa faasai afainni qusi mariqau.

<sup>34</sup> Yisufa kanuqakiqari maqasaa aqufinoo faiqí anaasee moomoo nindafamasoofanoo firaqoo amugusufanoo qinau. Oo maqoo mariasa sipsipa aandaurofoora rakisirafa siaisa mariafanoo fee qimaseenoo Anutuna ufa oosana oosana ainainara qimanniminau.

<sup>35-38</sup> Eenoofaqa Yisuna faiqi namu Yisuna qimamiqau, doo eendidanoo anee niqiqainaqa kaqikaa maqusakiaqa narana feefauriaqa maqoo faiqí siaiqoo maridanoo fee qufanoo Yisufa qinau inneeqa kai narana nimaqa qufaqa misa qiqau, maasa sia amanaikianauro maasa moomoo ooni mareeqa oonu moomoo feemu feefaurumasee minisee nimianaqa naifanoo sia amanaikiannoo, maasa sia amanaikidaqa qufanoo Yisufa qinau. Inni feemu naqummee maridanoo oonu qafaaqa qufaqa misa oonu qafamaseeqa aniree qimamiqau, maasa feemu moodaanai qisaukunamu, noodaanna qaaraqanda faqa maridanoo fee qufanoo.

<sup>39-40</sup> Yisufa qimanniminoo qinau. Innee faiqí aanaaseera qifaqa misa raina rainamaqinaqa naadu naadu ruumbaku finaqa qusau rasonookamasee ooqumari maree fuafa qufaqa faiqí anaasee eedoo qimasee ruumbakiranakiqari padimambufaqa ooqu marifiqau. Akaqa ruumbakiranakiqari wan handareeta mariqau akaqa ruumbakiranakiqari qaara fasiqa niku nisauku taikasee qisaukuqara taikasee fasiqa anaasee mariqau.

<sup>41-42</sup> Ooqu marifufanoo Yisufa mi moodaannai qisauku feemuna qumaree noodaannaqara faqa qumaree sandaaqai oori uqeerasee Anutunara dufi dufi qimaseenoo mi feemuna ruqi ruqi mandeenoo narí faiqi namu nisaukuki quqasoofaqa faiqí anaasee ooqu mariranakiaqa nima maree fimariqau. Yisufa miqikai inoo noodaanna faqa ruqi ruqi mannimufaqa mina faqa nima maree fufaqa noofanoo nimuaqufaqa akaqana kaqi quqaaqau.

<sup>43</sup> Yisuna faiqi namu mina ataraasa qumaree qisaukuqara taikasee qikunni ooqu qaara marasee uqa qumbiqaqau.

<sup>44</sup> Mi naranna nee marusa faifa tauseenna fasiqa mariqau, anaasee faqa faiqiuqaindi faqa mariqau. Ooni saqari auqusee moomoo uqanna mariunara faifa tauseenna fee qinoo maridanoo.

*Yisufa nammari amuaqumau finau.*

*(Mat 14:22-23; Yoh 6:15-21)*

<sup>45</sup> Yisuna faiqi namu narana ataraasa mara maroofanoo Yisufa narí faiqi namuara afeekaikamandee fuki faaki qinoo niqiqoofaqa misa mina afunni kanuqaki akaramafi Beetasaida maqusai nammari dinni afainni fiqau.

<sup>46</sup> Misa fimarufanoo Yisufa faiqí anaasee niqiqamasoofaqa fufanoo mifa narí faiqi namu nimanda maseenoo naríara amuaqunamusaa ooru maridanoo Anutunara innaaru qimarinau.

<sup>47-49</sup> Eendufanoo Yisuna faiqi namu kanuqaki nammari qambaana ni-marufanoo Yisufa naríara maqasaa maridanoo misa nindafoofanoo ufaifannoo misa noorindari anidanoo kanuqa mara furufarimarufaqa purannai puridaqa kadaapindi mariqau. Inaaqiana kookooraana ufaqi maru kamuqoo Yisufa misunnai fidanoo nammari amuaqumau aiku ramasee finau. Mifa kanuqakinaasa finnaaqareera foora fimarufaqa Yisuna faiqi namu afaanna fee qimasee rufisee faaqariqau.

<sup>50-51</sup> Misa faaqarumasoofanoo Yisufa qimanniminoo qinau. Sia maparaa iaqa nifaaqa quqasee kasooiaqa qineemma anidaqa. Yisufa miqi qimaseenoo misa faqa kanuqaki akaramafufanoo misaki ooqumari fufanoo

ufai fannoo taikafinau. Taikafufaqa Yisuna faiqi namu maparaa iqa naundura faqa furufariqau.

<sup>52</sup> Yisufa moodaanai qisauku feemu ruqi ruqi mandee nimufaqa noofanoo amanaikunara mina faiqi namu sia mina anoonara andeeqasee irusa maridaqa nammari amuaqumau anunara faqa sia iriqau.

*Yisufa Keeneesareeta maqusanaasa aurirana taikannisanau.*  
(Mat 14:34-36)

<sup>53-55</sup> Misa miqooqari kanuqaki nammari amuaqumau fiqa munu maqa raquramufaqa fitaqa mareeqa mafi kanuqa qususeeqa doo Keeneesareeta maqa maaqammifoo qimaseeqa kanuqakiqari aqufiqa maqasaa oorufufaqa misaqa marusa miqooqaraasa Yisufammifoo qimaseeqa sandeeqa maqusa maqusa qimannimufaqa nariqa aurimarusu qaarisa rumba maraidaqa yatinnai fee Yisufa fuannoo fee qimasaida aurimariasa qaarisa rumba maraidaqa Yisuna oorinni mini quqee mariqau.

<sup>56</sup> Yisufa ya maqusanai fee ya taunnaki fee ya ainaini marunaki fee finau nari aurimarusu nifiqa maraidaqa mifa funnai munu makeetaki firaa saqa marunaki quqasee Yisunara nari nimuqusa ookiqari firaaqoo qimamiqau. Maasa sia kadaapi amirara qimamidaqa aurimariasa ani qamunna ati kai auqamasaida findififara qidaqee qufanoo Yisufa eedoo qufaqa mina qamunna auqee marusa amiqi mandee findifi mariqau.

## 7

*Yisufa Farisai amaana ufa qimarusa niqinau.*  
(Mat 15:1-9)

<sup>1-2</sup> Farisai amaana ufa qimarusa faqa Mooseena sandufa akoofasauqa faqa faiqi anaasee narana nararee qimasaida nisauku nammari uqidaqa miqi fee maaqi fee qimasaidaqa fifau sandufa oosana oosana quqee mariasa mariqau. Misa Yeerusaree maqusaindari qumuree ani mara Yisuna uqufufaqa nindafoofaqa Yisuna faiqi namu narana neemariqau sia Farisai amaana ufa qimarusa nisauku nammari uqirainni kaqi nee mariqau.

<sup>3</sup> Farisai amaana ufa irimarusu faqa Yuda maqannaa aiqamausa faqa nari ninaaku nitaatoosa naanna raidaqa aiqama kari nisaaqusaida narana nee mariqau, sia nisaaqusee sia narana nee mariqau.

<sup>4</sup> Makeetaki maree maru ainaina nammari uqusee suqasee nee mariqau, misa sia minara kaifau miqi qimariqau oosana oosana ainainara miqi qimariqau. Misa kaafauqa faqa susufinauqa faqa disauqa faqa faiqara qaari faqa nisauku faqa miqimasee maaqimasee nammari uquaqee qimarufaqa miqiga fidaqa akeekamasaida miqi mariqau.

<sup>5-6</sup> Farisai amaana ufa qimarusa faqa Mooseena sandufa akoofasauqa faqa kaaqa firaaqoo minauqara fuki faaki qimarusa marunaki Yisuna faiqi namu sia nisaauqirai kaqi narana noofaqa qafamasee Yisuna aqiqa qiqa. Naqee fee qifaqee ani faiqi namu maasa qikeeku qikaaku oosana minnisee sia nisaauqirai kaqi narana naida fee qufanoo Yisufa qimannimino qinau. Ooqeenaa tamummaqara fasiqa Esaiiafa andeeqasee inniara tamummaqaseenoo inniara manda qaara irirana maree mariasee qinau.

Mifa inniara maaqi qimasee Anutuna ufa akara rinau. Maa fasiqa anaaseesa nifauru fannoo kai unnaqimasee qini duqu uqeeree mariasa, nimusa kaqinni ubeekaraura mariafanoo.

<sup>7</sup> Misa faiqí qimaria sandufana qumaree unnaqimasee Anutuna sandu-fammifoo qimasee faiqí anaasee naamuqaqidaqa. Miqi qimasaidaqa Anutunara innaaru qifanoo siammiriannoo.

<sup>8</sup> Yisufa mi tamummaqara fasiqana ufa qimannimiseenoo narí maaqi qimasee qimanniminou. Innee Anutuna ufa mafi quqaseeqa faiqí aaquqira ufamau kai fimariasa mariafanoo.

<sup>9</sup> Innee inneeqa kaaqa iriqaraasamandee iriranannai inneeqa faiqí faiqí ufa faiqí anaasee qimannimianee qimaseeqa Anutuna ufa mareeqee ninaaqiannai quqaseeqa.

<sup>10</sup> Mooseefa Anutuna ufa qimannimidanoo maaqi qimasee qimanniminou. Inneeqa ninaukoora اساسamandee amiqida misa nuqu uqeeraaqa. Faiqí moo fannoo narí anoona akoonara manda ufa qinnana mi fasiqana kuqammarusaqa.

<sup>11-13</sup> Innee minara maqee maaqi qimasee aqee mariafanoo faiqí moo fannoo narí anoona akoono dadaaqimarina nimianauree qimasee kafa oonu mafi irisee sia nimidanoo amaana maqaki quqasee Anutuna amidee qimaria fasiqanara sia aqaida andeeqaidde qimariafanoo. Miqidaga Anutuna ufa mafi quqaseeqa inneeqa ufa kai uqeeree mariafanoo. Doo innee Farisai amaana ufa qimariasa miqira aqara ainaina moomoo uqeeree mariafanoo.

*Faiqí naunduraindaraafa faiqí putaa idanoo.  
(Mat 15:10-20)*

<sup>14</sup> Yisufa miqi qimaseenoo Farisai amaana ufa qimarusa niqiseenoo miqoo faiqí anaasee moomoo marusa kafa naaramaseenoo aniaqee qufaqa aniroofanoo qimanniminoo qinau. Innee aiqamausa qini ufa irisee amiqimmasee iriaraasiaga.

<sup>15</sup> Sia moo ainaina fannoo faiqí anaasee ooki namasainanoo mifa maaqinaki putaamma amaqaannoo faiqí anaasee naunduraindari urimari manda ufafa mifa faiqí putaamma nimaqaidanoo.

<sup>16</sup> Innee naaqoo faqaasa kai naaqoo iriani.

<sup>17</sup> Doo miqooqari Yisufa narí faiqi namu faqa faiqí anaasee mininiseenoo maaqaki keeqafufaqa mina faiqi namu ooruree mi ufana qimannimunna oosanara iraqau.

<sup>18-19</sup> Iroofanoo Yisufa qimanniminou. Inni irirafa faiqí anaasee irirafa oorudupiraua mariafanoo. Sia fee innee mi ufa oosanna iri fee sia moo ainaina ooki quqasaanoo aundurai ooqufi marifa sia mifa faiqí putaamma nimaqaannoo, sia aunduraki ooqureenoo amuqusakifau keeqaidanoofau sia miqidanoo aranandaki ooqureenoo umiqaraidanoo. Mi ufana qunannai Yisufa aiqama naranara idaaqira fee kai qinau.

<sup>20</sup> Yisufa minara kafa narí faiqi namu qimannimidanoo qinau. Faiqí narí naundurakiqari urimari manda ufafa kai faiqí putaamma nimaqaidanoo.

<sup>21-23</sup> Faiqí aunduraki amuqusa ookiqari manda irirafa kambiqaidanoo faiqí rarisameeqeenoo mandainaina mararanaki quqannisaidanoo, mifa kai rarisameeqeenoo aaqaranaki faqa ainaina ummuariranaki faqa faiqí kuqa nariranaki faqa faiqí anaasee narí ummuari narí ummuariranaki faqa moosa ainainara rirana faqa oosana oosana mandoosana faqa nári nikaruqirana faqa nári nifaaqa kooroo irana faqa nariara nariara rairai qirana faqa nariara nariara munuqi miniqirana faqa narí afaaqa amooqirana faqa furufarira oosana faqa mifauqaindi faiqí naundurakiqari ururee marifa mifauqa kai faiqí anaasee putaamma nimaqaidanoo.

*Yisufa aamina maqannaa anaasee araamuna findifufa.*

*(Mat 15:21-28)*

<sup>24-25</sup> Yisufa mi maqa maaqana minniseenoo moo maqa maaqa Tiree maqa maaqaki oonureenoo moo maqaki faiqí anaasee maqee maqee qinee funnanai anunannai ititee mariafaqa sia qiqafaagee qimasee qumee ireeda keeqanau. Sia mifa amana kukeeqaranaki marinau. Anaasee moo fannoo narí araamuna aundurái qooqeenaa faafasaaqa marufanoo Yisufa ani marunara iriseenoo aniree Yisuna amuqusa ookiqari dadaaqiranara dadaaqinanoo findifuanifeera mina aikuki maqasaa rumafinau.

<sup>26</sup> Mi anaaseefa Siria maqa maaqakiqari Fooeenisia maqusaki kambiqarafa aanaamuru anaasee marufa anireenoo Yisunara qini qiraamuna aunduraki mari qooqeenaa faafasaaqa aqiqainanoo rafudamaki fuani fee qufanoo Yisufa qimaminoo qin角度.

<sup>27</sup> Maasa Isaraee maqannaa Anutuna faiqi namuara foora mariasa misa naaree narana nimirafa andeeqanoo maridanoo. Faiqiuqaindi narana marasee fainiuqa aqu niminafa sia andeeqanoo maridanoo fee qufanoo mi anaaseefa qin角度.

<sup>28</sup> Oo maa fasiqa faiqiuqaindi naidaqa ataraasa fainiuqa aniree neemariasa maridaqa. Kuqaa qinee aanaamuru fainiara foora maridaqa ataraasara kai qinee innaaru qidaqa.

<sup>29-30</sup> Miqi qufanoo Yisufa qimaminoo qin角度 anee mi ufana qiannana akiqara doo ani maaqai fua. Doo ani faiqi aunduraindari doo faafasaaqa rafudamaki finoo qufanoo mi anaaseefa narí maaqai oonuree qafuofanoo doo mina araamuna qaarisa faiqagee marufanoo kuqaa faafasaaqa rafudamaki fifin角度.

*Yisufa aaqoo aunirana andeeqanau.*

<sup>31-32</sup> Miqooqari Yisufa Tiree maqa maaqaki minniseenoo Sidoona maqsai keeqafi fiqummakufanoo Kariree farumma afainni ooqu ranau. Ooqu fidanoo qisaukuqara taikasee maqusa misaqa marusa finnaaqareenoo fimaruufaqa akaqausa faiqí moo aaqoo aunirana ufa qirara mammaqi maruna afixamaree mini Yisufa maruqoo mini quqasee aranaiqi qimamiqau. Anee maa fasiqanasaa aneenna asauku mundusainanoo andeeqaani.

<sup>33-34</sup> Miqi qimasoofanoo Yisufa mi fasiqana mareeqeenoo faiqí anaasee moomoo marunara iriseenoo kaqi atin角度 quqaseenoo narí asauku amuka faiqí aaqoo aamarai upeekaseenoo qaqaara fidiseenoo mi fasiqana amaakiri asaukunnai auqamaseenoo oori innaarunai uqeeraseenoo nupi nupi qimaseenoo narí ufakiqari qimaminoo qin角度 eefafata maasa ufakiqari doo ruiqaannee qin角度.

<sup>35</sup> Miqi qimasoofanoo aagee kai mina aaqoo ititarafa ruqiafufanoo mina amaakiri rumbarafa idukufufanoo andeeqasee ufa qin角度.

<sup>36</sup> Ufa qimasoofanoo Yisufa aiqamausa aranaiqi qimanniminoo qin角度, sia maanara moosa qimannimiaqa qin角度. Yisufa kafaa kafaa qaoo qimarufaqa misa moo faqa moo faqa qimannimiqa fimariqau.

<sup>37</sup> Aiqamausa mi fasiqana andeeqoonara irufanoo naaquqamasoofaqa maaqi qiqau. Doo qafaqa mifa amiqimandee idaaqamandee aiqama ainaina oosana oosana aurirana andeeqaidanoo. Mifa naaqoo auni mariasa faqa andeeqannisaidanoo ufa sia qiasa faqa ufa qirana nimidanoo.

## 8

*Yisufa kaifaa feemu ruisee nimufa.*

*(Mat 15:32-39)*

<sup>1</sup> Yisufa Kariree nammari afainni kaqikaagoo ooqu marikufaqa faiqí anaasee suqumaree miqoo ani Yisufa maruqoo usufufanoo ufa qimannimimarufanoo qaaramoo faasaanaikufanoo misa narana taikafufanoo Yisufa narí faiqi namu naarama qimanniminoo qinau.

<sup>2</sup> Qinee maa fasiqa anaaseesara qimuqusammidaqa qaaramoo faasaana qini faqa mariafanoo maqee doo narana misaindi sia maridanoo.

<sup>3-5</sup> Qinee sia narana nimirai kaqi niqikaanaqa fidaqa aanai kudoosaapee foora, akaqausa nianaindari ani maridaqa qufaqa mina faiqi namu irammiriqa qiqau. Maa aadana maqa maaqanaki maridaqa yai fee narana paqurimandee maa moomoo fasiqa anaaseesa nimana nimianauree qufanoo Yisufa irammirinoo qinau inni feemu naqumme maridanoo fee qufaqa misa moodaannai qisauku dinni ani qaara marasee feemu maridanoo fee qiqau.

<sup>6-7</sup> Yisufa faiqí aanaaseera maqasaa aiqama ooqu mariaqee qufaqa aiqama ooqu marifufanoo mi feemuna dinni qisauku taikaseenoo dinni ani qaaraqanda marasee feemu (7) maraseenoo Anutunara dufi dufi qimaseenoo ruqi ruqi maseenoo narí faiqi namu nisaukuki quqasoofaqa aiqama fasiqa anaasee amana kai nimimaree fiqau. Noodaanna kaqikaanauqa akaqana marasee dufi dufi qimaseenoo mina faqa narí faiqi namu nimisoofaqa nimiqau.

<sup>8</sup> Aiqamausa neeneesoofanoo nimuaqumminau. Foo tauseenna (4,000) fasiqa anaasee nukudara foora miqoo mariusa nimuaqu inau.

<sup>9-10</sup> Misa namammaree soona ataraasa Yisuna faiqi namu dinni taikasee dinni ani qaaraqanda (7) marasee uqa rumasoofanoo Yisufa faiqí anaasee niqiqoofaqa daraanimambufanoo Yisufa narí faiqi namufaqa sipaki akaramafufanoo nammari amuaqumau moo maqa maaqai Daramanuta maqa maaqai finau.

*Innaarunai firaa ainaina uqaqifiqaanee qirufa.*

*(Mat 16:1-4)*

<sup>11</sup> Miqoo Farisai amaana ufa qimarusa Yisuna faqa raiqara ufa oosana araqaau. Misa Yisuna ufaanara foora fufusee aruanifeera qimasee Yisunara faiqí sia auqaaqaa ira ainaina auqamasainaqa maasa aniara kuqaa Anutuna faiqiffee qianaara.

<sup>12</sup> Miqi qimasoofanoo Yisufa narí aundurari qimiridanoo qinau. Akasaa yairee fee inni manda oosana taikaannoo fee, qimaseenoo akooqoo qimanniminoo qinau, nanaree maqee mariasa mookira ainainara maqee maqee findifinaqa qafaanee qida fee, doo qinee qimannimidaqa sia qinee miqimandee Anutuna afeekara kooroomasee uqannifiqaanauranoo.

*Ooruku anoona kikiqa usiranara rufiaaqa.*

*(Mat 16:5-12)*

<sup>13-14</sup> Miqi qimasee Yisufa kanuqaki akaramafinoo Kariree nammari amuaqumau dinni afainai fidaqa kaqi kaaqoo nammari qambaana oonuree mina faiqi namu aafaqara aunusoonara moodaa feemu kai marufaqa aiaaee qiqau.

<sup>15-16</sup> Yisufa naranara aiaaee qunara iriseenoo moo ainaina kikiqa ususeenoo qimanniminou, Innee amiqimmasee aufariaqa, Farisai amaana ufa qimariasa faqa Eeroodeena faqa minauqa feemu ooruku ati qaranara rufieeqa aufariaqee qufaqa mina faiqi namu iriseeqa tautumasee narí qimami narí qimamiqa qiqau maasa aafaqa sia maree anunnanara mi ufanara Yisufa qidaqinoo fee qiqau.



<sup>17</sup> Yisufa faasai misa ufa iriseenoo qimanniminoo qinau. Innee nanaree aafaqa sia marinara narí qimami narí qimami qidee Innee sia fee iridaqee. Inni irirafa kaqi fee ummaara raidanoo fee

<sup>18</sup> Innee nifu faqaasa sia fee qafaidee, innee naaqoo faqaasa sia fee iridee.

<sup>19</sup> Qinee moodaannai qisauku (5) feemu ruqi ruqimmasee faifa tauseenna (5,000) fasiqa anaasee nimiafannanara sia fee innee naaqooki oonumafi iridee, innee mikari naqumma uqee ataraasa uqariqee iqau, qufaqa misa qiqau qisaukuqara taikasee qikunni ooqu qaara marasee (12) uqa riqiafana.

<sup>20</sup> Miqi qimasoofanoo Yisufa kafaa irammirinoo qinau kafaa qinee dinni taikasee dinni ani qaara marasee (7) feemu ruqi ruqimmasee maqi tauseena fasiqa (4,000) sia kasoo fasiqa moomoo fasiqa uqanna nimaafanaqa naqumma uqee mina ataraasa riqee iqau qufaqa misa qiqau dinni taikasee dinni ani qaara marasee (7) uqa riqiafana.

<sup>21</sup> Miqi qimasoofanoo Yisufa qimanniminoo qinau. Innee mina qafamasee sia fee qini afeekara iridee. Moodaa feemu marifa doo mina mandee nimiana amanaikammiannoo.

*Beetasaida maqannaa Yisufa afu maqaisanau.*

<sup>22-25</sup> Misa Beetasaida maqusai aniroofaqa faiqí moo afu dimbarana afiqee anireeqa Yisuna aaramaseeqa qiqau, amanee afu dimbarana auqainanoo fee afu maqaannoo fee qufanoo Yisufa mi afu dimbara fasiqana asauku qumareenoo rarisameeqeenoo maqusa aqoosai quqaseenoo aqaara afuki fidiseenoo asaukuqara minasaa rusiseenoo irammiridanoo qinau, anee akaqa ainaina qafaidanee qufanoo mi fasiqafa oori uqeeraseenoo qinau faiqí qini qifusaa saqariara foora nidaqee qufanoo Yisufa kafaa narí asaukuqara mina afusaa quqasoofanoo mi fasiqafa afu maqasoofanoo mina afu amiqufanoo aiqama ainaina amiqimasee qafanau.

<sup>26</sup> Yisufa qimaminau doo aneenna maqai fua sia maqusai faiqí anaasee moomoo mariaqoo fua kaqinni andandandanai fua qufanoo doo finau.

*Peetooroofa Yisunara Anutuna asauku mundira fee qinau.*

*(Mat 16:13-20; Ruk 9:18-21)*

<sup>27-28</sup> Yisufa narí faiqí namu faqa miqooqari Seesareea Firipi maqusa, mina maqa maaqaki maru maqusanakiaqa finau. Aanai fidanoo narí faiqí namu iranau, innee iriaqa faiqí anaasee qiniara ya fasiqanee fee qidee qufaqa misa qiqau akaqausa aniara Yoohaneefa nammari nimi mari fee qidaqa akaqausa aniara ooqeenaa tamummaqara fasiqa Eeriaa fee qidaqa, akaqausa aniara ooqeenaa tamummaqarausakiqari moo fannoo kuqiranakiqari findifinoo maridanoo fee qidaqa.

<sup>29</sup> Miqi qufanoo Yisufa náriara qinau innee qiniara nanee fee qidee qufanoo Peetooroofa qinau anee Anutuna asauku mundirafa mariananoo.

<sup>30</sup> Miqi qufanoo Yisufa afeekaikamandee qimanniminau. Doo kuqaa uqanna qiananoo. Sia innee minara qiniara akaqausa qimannimiaqa, umeendaqa.

*Yisufa narí kuquaninnanara qimanniminau.*

*(Mat 16:21-28; Ruk 9:22-27)*

<sup>31</sup> Miqi quqooqari narí kuquaninnanara oosana arasee narí faiqí namu qimannimidanoo maaqi qinau. Qinee faiqí nimaaku firaa aupurarana maraanaura. Faiqí firaasa aanaiqikirausa uriqarararusa faqa Mooseena sandufa akoofasauqa faqa misa qini minniqisee nikooqaannoo. Misa qini kuqa darusaifanoo qaaramoo faasaana aiqarainanoo Anutufa mara qini findifumaqisaannoo.

<sup>32-33</sup> Yisufa akooqoo uqanna narí kuqiranara qimannimunara Peetooroofa irufanoo akooqoonara Yisuna mareeqee aaduma quqaseenoo qaoo qunara Yisufa quandaki narí faiqinamu nindafamaseenoo Peetooroona aqinoo qinau. Oo Peetooroo anee Sadannafa anee see fua, ani irirafa faiqindi maridanoo sia Anutunaindi.

<sup>34</sup> Miqi qimaseenoo narí faiqinamu faqa naarama quqaseenoo qimanniminoo qinau, moo fannoo qini faqa fuani qinafa narí maaqoo mariranara minniseenoo qini ufa saara qini daanna ramasee eedoo qimasee kuqiranaki fuannoo.

<sup>35</sup> Moo fannoo narí marirana amiqimasee rakisianee qinafa mifa narí marirana kakasiannoo moo fannoo qini saara qini amiqira fasaasa ufa saara kuqarinafa mifa narí marirana asumu maraannoo.

<sup>36</sup> Moo fannoo aiqama maqa maaqa rakisiranatia kammafinanoo nariara minakinaa aiqama ainaina maraseenoo narí aunduraindaraana kuridiranaki finoo nana ureeqara fasiqa mariannoo sia uriqararafa mariannoo.

<sup>37</sup> Faiqí anaasee kuquffaqa nana maqasaa taikaaninna ainaina Anutuna amisee naundurakinaana kuridiranakinaana mareeqee asumu marirana qinaku qinaku fee sia amana kaifaa maraannoo.

<sup>38</sup> Faiqí anaasee moo fannoo maa maqee maria manda aukuanasaa qiniara faqa qini ufara faqa faiqí nifusaa asaurusee nikooqainausa qinee faiqí nimaaku qeeqa qikoona areenarana namufaqa naaquqara andeeqara qangiroouqa faqa innaarunaindari qumureeqa mi fasiqa anaasesara faqa qisaurusee qikooqaannoo.

## 9

<sup>1</sup> Yisufa kaqi qimannimidanoo maa ufana faqa qimanniminoo qinau, innee iriaqa innee maaqoo mariasakiqari akaqausa sia kuqirai kaqi marina kamuqoo Anutuna ququsa afeekaikamandee qumirana innee mina qafeefaranoo. Sia taikara faasaanara qidaqa kaqi kasaqaqaindari qumiranara qidaqa.

*Aaqanasaa Yisufa innaaruna afiri maranau.*  
(Mat 17:1-13; Ruk 9:28-36)

<sup>2</sup> Doo miqooqari dinni qisauku taikasee dinni ani moodaa marasee afuru faiqeenoo doo findimeeqeenoo Yisufa Peetooroona faqa Yameesana faqa Yoohaneena faqa doo minamusa faqa aaqana kisaqaqasaa nifiqamaree oorureenoo aadumasaa sia faiqí maruqoo oorureenoo miqoo misa nifusaa Yisuna afaaqa qamunna moo kammafinau.

<sup>3</sup> Mina qamunna aiqama dupuqa aruaqufufanoo aiqama eekara aruaqufufanoo nifu faqa daroo daraa inau. Sia maqasaaqaraa fasiqa amana qamunna miqimandeeqa nammari uqusaifanoo eekara arinoo dupuqara maqi aruaquannoo.

<sup>4</sup> Eeriaasa faqa Mooseesa faqa oqai tamummaqara fasiqaqanda maridaqa kuqiga ooru fuqanda miqoo aaqanasaa Yisuna faiqinamu nifusaa kooroomafufaqa Yisuna faqa ufa qimarufaqa Yisuna faiqinamu nindafaqau.

<sup>5-7</sup> Nindafaidaga firaqoo maparaaida rufiaidaqa ufa qiranara randee marufanoo Peetooroofa Yisuna aaramaseenoo qinau Oo ufasaa rakisira maasa maaqoo marunanoo amiqimminoo amanee maasa maaqoo uqiqaana maqa qaaramoo auquanauree, aniara moo Mooseenara moo Eerianara moo usakaanauree. Rufiaqa rufiaqidanoo ufa qiranara randoosia miqi qinau. Miqi qimasoofanoo asuru fannoo anireenoo aiqama misa

dukunimaqasoofanoo asurukiqari ufa moo kambiqeenoo maaqi qinau. Maafa qini qimuqusira qimaaku marifa, innee mina ufa kai iriaqa.

<sup>8</sup> Yisuna faiqinamu mi ufana iriseeqa kaqi kaqi miqoo munu randee mini randee ufanoo, sia faiqí miqoo marufanoo Yisufa kai miqoo misa faqa marinau.

<sup>9</sup> Mi ainainafa taikoofaqa misa Yisuna saimbaqa mi aqannasaaqari ooqu fimarufanoo Yisufa maaqi qimasee afeekaikamandee qimannimianau. Innee meerai aqanasaa qafaanara ooquree sia uqanna qimannimiaqa. Qinee faiqí nimaaku kuqiranakiqari findi fuannaqoo miqoo kai qimannimi-aqa.

<sup>10-11</sup> Mi faiqinamusa eedoo qimasee sia qimannimiqa, Yisufa kuqiranakiqari findifuaninnara minara kai narí qimami narí qimami umee kai qimariqa. Misa miqi qidaqa Yisuna iramiriqa qiqau, Mooseena sandufa akoofasauqa minakiqari maaqi qidaqa. Faiqí moo fannoo Eeriaafarafoo qira fasiqa mifa naaree findifumafinanoo miqooqari Anutuna asauku mundirafa kambiqaanoo fee qidaqa. Misa miqi qidaqa nanee fee qidee miqi qidee qufanoo Yisufa maaqi qimasee qimanniminoo qinau.

<sup>12-13</sup> Kuqaa Eeriaafara maqi kambiqafinoo asauku mundirausa qinee aniannanara deedaqinoo. Doo qinee inni qimannimidaqa. Doo Eeriaafara maqi moo auqu Yoohaneefa nammari nimirufa doo ooqai kambiqafi marufaqa faiqí anaasee akaqausa sia irirai tamummaqarausa ufamau fiqa nári manda nidiranakoo mareeqee mina kuqarusaqau. Qinee kfaa innimma irammirianaaura tamummaqara fasiqauqa nanaree misa faiqí nimaakuara aupurarana firaana amiseeqa mareeqee aquseefaree.

*Yisufa kumaaraa aundurái afaanna aqiqanau.*

*(Mat 17:14-21; Ruk 9:37-43)*

<sup>14</sup> Misa miqi qimammaree aqanasaaqari ooqu fiufaqa Yisuna faiqi namu akaqausa sia ooru fusa maruqoo ooqu paqurimasee faiqí anaasee moomoosa suqimarufaqa ooqu nindafaqau. Mooseena sandufasaa rakisi-marusa akaqausa miqoo faqa maridaqa Yisuna faiqi namu faqa ufa rainee mariqau.

<sup>15</sup> Faiqí anaasee Yisuna qafamasee tautumasee sandee mifunnai oonureeqa amandaqau.

<sup>16-17</sup> Yisufa anireenoo narí faiqi namu qimanniminoo qinau, nana ufaree innee Mooseena sandufasaa rakisi mariasa faqa ufa rainaidee qufanoo faiqí moo fannoo faiqí aanaaseekiqari Yisuna qimaminau. Qinee qeeqa qimaaku afigee anee ianannai anidaqa. Manda afaanna fannoo mina aunduraki keeqafi marifanoo siamma ufa qidanoo.

<sup>18</sup> Mi afaannafa mi faiqina arifanoo maqasaa kuqaki kuqaki aqufifanoo aiku asauku pipisaaqa qusufifanoo amaaqini datimambifanoo ookiqari qaqaara kai aniraidanoo. Qinee ani faiqi namu maaqoo mariasara afaanna afaqaqee qunaqa misa miqiafanoo sia amanaikifaqa ani qimamidaqa.

<sup>19-20</sup> Yisufa iriseenoo aiqama faiqí anaasee qimannimianau. Inni firaqoo uqanna sia irirana qinisaa rusimarifanoo qinee kisaqasaa fee inni manda furufarira ummaara dadaaqiqa nuanauree. Mi kumaaraana afigamaree mai aniaqa qufaqa misa mi kumaaraana afigee munusoofanoo minakinaa afaanna fannoo Yisuna qafamaseenoo mi kumaaraana mareeqeenoo fuseenasana aaku amaqaaseenoo maqasaa rutuku quqasoofanoo mi kumaaraafa maqasaa aqufinoo quanda qaandi marufanoo qaqaara ookiqari ururama teeqinau.

<sup>21</sup> Yisufa mina akoona irammirinoo qinau maafa kisaagasaa maaqinoo mari fee qufanoo mina akoofa qinau Eeo faiqi aanaaqisaaqari miqi marinau.

<sup>22</sup> Moomoo kari mi afaannafa mina kuqaruane qimaseenoo idaki fee nammariki fee kaqi mara aqi marufa maridanoo. Anee amanaikinana maasara amuqusinana dadaaqa.

<sup>23</sup> Yisufa iriseenoo qinau sia qiniara amanaikiannee qia aneenna kai qinisaa irirana rusiranara kai iria. Faiqi Anutunasaa irirana rusimarifa aiqama ainaina amanaikammiannoo.

<sup>24-26</sup> Mi kumaaraana akoofa mina iriseenoo faaqa quqaseenoo Yisuna qimaminoo qinau eeo qinee anisaa irirana rusimarunausa maridaqa sia amanaikidaqa anee dadaaqa qufanoo Yisufa faiqi anaasee dindari dindari ani usufufanoo nindafeenoo misa qini ititaqimaqeefoo qimaseenoo mi kumaaraana aundurakinaa afaanna amambaina qimamiseenoo qinau. Qinee ani qimamidaqa mi kumaaraana aundurakiqari rafudamaki sandamafinana sia uqanna kafaani keeqaa qufanoo mi afaannafa faaqa quqaseenoo firaa fuseena sana mi kumaaraana aaku amaqaseenoo maqasaa rutuku quqaseenoo doo raudamaki sandamafufanoo mi kumaaraafa kuqiara foora maqasaa rumafufanoo aiku asauku pipisaaqa qususeenoo kuqiara foora mambinau. Miqi mambufaqa faiqi ani qafee doo kuqiifoo qiqa.

<sup>27</sup> Miqi qufanoo Yisufa mina asauku qumaroofanoo doo findi finau.

<sup>28-29</sup> Miqooqari Yisufa moo maqaki keeqafufaqa mina faiqi namu kukeeqasee aniree irammiriqa qiqa. Maasa nanaree mi kumaaraana aundurakinaa afaanna aqiqrara anuqi fee qufanoo Yisufa qinau Anutunara innaaruqirafa kai miqira afaannauqa niqiqaina fifaranoo sia moo ainainannai niqieefaranoo.

*Yisufa narí kuquaninnanara qimanniminau.*

*(Mat 17:22-23; Ruk 9:43-45)*

<sup>30-31</sup> Misa mi maqusanaindari quqasee Kariree maqa maaqaki narí faiqi namu faqa faiqi anaasee sia iriaqee qimasee narí faiqi namu oosana oosana ufa qimannimiani qimaseenoo fidanoo Kariree maqa maaqakiaqa fidanoo qimanniminoo finau. Mifa maaqi qimasee qimanniminau. Faiqi misa qini faiqi nimaaku qumareeqee faiqi nisaukuki quqaqisaifaqa misa qini kuqa darusaifanoo qaaramoo faasaana aiqarainanoo Anutufa kuqiranakiqari qini mara findifumaqisaannoo.

<sup>32</sup> Mina faiqi namu mi ufana iriseeqa sia mina oosanara iriqau irammirirana faqa sia irammiriqau rufisee kaqi mariqau.

*Yisuna faiqi namu yafee maasaki uriqararafa maridanoo fee.*

*(Mat 18:1-5; Ruk 9:46-48)*

<sup>33-34</sup> Misa Kapeeranaumma maqusai anireeqa maaqaki keeqafufanoo Yisufa narí faiqi namu irammirinoo qinau. Maasa aanai animarunaqa innee nana raiqara ufee qifee misa nisaurusee sia qimamiqau. Misa narikiqari yafee uriqararafa mariannoo qimasee minara raiqeeqa nisaurusee sia Yisuna ufa qimamiqau.

<sup>35</sup> Yisufa ooqu marifinoo narí faiqi namu aiqama naaramasee mai aniaqee qimasee maaqi qimasee qimanniminau. Faiqi moo fannoo maqasaa mariasaki uriqararafaikinafa mifa narí kai ureeqaranaki fuannoo mifa aiqamausa dadaaqidanoo amiqira saika faqa nikooqemari saikana faqa dadaaqiannoo.

<sup>36</sup> Yisufa miqi qimaseenoo faiqi aanaaqi moodaa mareeqee misa noorinni kikiqamaseenoo asaukunnai mina kaqaramma qumareenoo qimanniminoonoo qinau.

<sup>37</sup> Faiqi anaasee moo fannoo maaqira kaqikaa faiqi qini ufara irisee oonu asasamasee aqoondikinafa sia irirainni qini Yisusa faqa qigoondikidanoo. Yafee moo fannoo qini oonu qifiqainafa sia qini kai qifiqaannoo qini diqiqaana faqa oonu afiqaidanoo.

*Moo fannoo Yisuna auqusaa afaanna aqiqanau.*  
(Ruk 9:49-50)

<sup>38</sup> Yoohaneefa Yisuna qimaminoo qinau, Oo ufasaa rakisirafa faiqi moo fannoo moosaa manda faafasaaqa naundurari mariasa ani auqusaa qimasee niqiqeemaru qafaqiafana, mifa sia maasaki nimarufa marunara qaoo qiqiafana.

<sup>39</sup> Yisufa mina iriseenoo maaqi qinau sia minara qaoo qia. Mifa qini duqusaa moo firaa ainaina auqamaseenoo sia amana quandaki qini diqiannoo.

<sup>40</sup> Maasa aana ititee mariasa maasa namuqaa maridaqa. Sia maasa aana ititee mariasa sia namuqaa maridaqa maasa qifeeqaree mariasa maridaqa minara sia mi fasiqanara qaoo qia.

<sup>41</sup> Innee maa ufana iriaqa Innee nammariara nidinaqa innaaru qifanoo faiqi moo fannoo inniara asauku mundirana faiqi namu mariafanoo fee qimaseenoo nammari inni nimiranoo Anutufa mina akiaqara mi fasiqana innaarunai quqamaqaannoo.

*Kaqa runna mareeqee quqarafa mina akiaqara uriqararafa.*  
(Mat 18:6-9; Ruk 17:1-2)

<sup>42</sup> Miqi qimaseenoo Yisufa mi kaqikaa faiqina faasai misa noorinni kikiqunara kafa qimanniminoonoo qinau, maaqira kaqikaa faiqi irirana qinisaa rusimarinafa moo fannoo mina mandoosana uqafiqaainafa mi fasiqafa Anutuna firaa aqurararana ameemaanai mariannoo. Misa miqinna fasiqana qumaree firaa oonitia anukaki quqasee rumbasee afeeqa amifanoo ooruku nammariki aqufinoo kuqinoo oonu dupira arirafa mariannoo. Kaqikaa faiqi qinisaaqaraa irirana moosaa ubeekee marinafa firaa arirafa mariannoo.

<sup>43</sup> Aninna asauku fannoo anirarisameeqeenoo mandoosanaki ubeekee marina mina ateeka aqua. Moodaa asauku faqaafa naaru asumu mariranaki firafa amana maridanoo. Aiqama asauqara faqaafa naaru naaru sia qimbeemari idanaki firafa mandaikirafa maridanoo. [ <sup>44</sup> Miqoo naaru naaru kadiaru sia kuqidanoo kaqi maridanoo ida faqa sia dimbee marifa kaqi qaida mariannoo.]

<sup>45</sup> Aninna aiku fannoo ani rarisameeqeenoo mandoosanaki ubeekainana mi aikuna ateeka aqua. Anee moodaa aiku faqaafa naaru asumu mariranaki firafa amana maria. Aiqama aikuqara faqaafa idaki aqufirafa sia andeeqanoo mariani. [ <sup>46</sup> Mi idanaki faiqi neemaria kadiarusa sia kuqidaqa ida fannoo faqa sia qimbaidanoo.]

<sup>47</sup> Aninna afu aaqoo fannoo ani mareeqee Anutuna ufamau franakiqari kaqinni ubeekee marina mina imbasaa. Anee moodaa afu aaqoo faqaafa Anutuna ququsaki keeqarana amana maria. Qaara afu aaqoo faqaafa idaki aqufirafa sia andeeqanoo mariani.

<sup>48</sup> Miqoo faiqi neemaria kadiarusa naaru naaru sia kuqidaqa ida faqa naaru naaru sia dimbaida kaqi qaida maridanoo.

<sup>49</sup> Anutufa ida qumareenoo nimanamandee qafarana ooruku anoonara foora aiqama qusasaa adia nimaqainaqa Anutuna ufasaa mapukufi mariqeera nimanianoo.

<sup>50</sup> Ooruku amiqira ainaina maridanoo mina adiafaa irafa taikafinanoo naqimmasee adiafaairana maraannoo fee sia amanaikiannoo. Innee inneeqa naunduraki narinni narinni ooruku faqaasara foora maridaqa narinni narinni asoaranaki mariaqa.

## 10

*Faiqí anaasee nariara nariara minnisarana qaoo qirafa.*

*(Mat 19:1-12; Ruk 16:18)*

<sup>1</sup> Yisufa mariu maqusana minniseenoo Yudeeaa maqa maaqaki ooqu finau. Yooradanna nammari taqamareenoo dinni afainni fufaqa faiqí anaasee moomoosa mifa maruqoo aniroofanoo narí oosana maraseenoo ooqu marifinoo Anutuna fasaasa ufa qimannimimarinau.

<sup>2</sup> Farisai amaana ufa qimarusa akaqausa Yisufa maruqoo aniree ufaanara foora fufusee Yisunara minaki aruanifeera maaqi qimasee narikai narí qimami narí qimami qiqau, Maasa faiqí narí anaqa minnisarana irammirifanoo Yisufa minara aaqara ufa qinaqa mina ummarasee aruanaura. Miqi qimasee akooqoo Yisuna qimamiqau, Oo Yisu maasa Mooseena sandufa faiqí moo fannoo narí anaqa minnisaranara eedoo qidanoo fee sia fee eedoo qidanoo.

<sup>3-4</sup> Miqi qufanoo Yisufa iriseenoo irara ufa kai qimanniminoo qinau Mooseefa minara nana aaquqira ufa qimanniminoo fee qufaqa misa qiqau, Mooseefa nári ninaaqmaaka aqiqara papiqa akara rumeeqee nimiseeqa niqiaaqee qidanoo.

<sup>5</sup> Yisufa mina iriseenoo maaqi qimasee qimanniminoo Mooseefa inni irirafa mandaikinara inni nimuqusa sia amaqi marifa ooni miqirafa amatooki marunara iriseenoo akoo akaa maseenoo inniara inneeqa ninaaqmaaka minnisaaqee qinau.

<sup>6-8</sup> Ooqai indaaru Anutufa aiqama ainaina auqu quqaqoo aukwana sia miqinoo marinau. Miqoo akee faqaana faqa afaamu faqaana faqa auqu quqanau, miqi maqoonara kai faiqí aiqama narí anoofa akoona minniseenoo narí aanaaqasaa atooqafinanoo moodaafaikamambi marifaranoo minara sia kafa misa qaaraikamambi marifaranoo moodaafaikamambi marifaranoo.

<sup>9</sup> Miqinoo marinara Anutufa atooqaqoo ainaina sia uqanna faiqí ra-keeiaqa.

<sup>10</sup> Yisufa maaqaki keeqafufaqa mina faiqi namu aniree anaasee minnisaranara qunara iroofanoo mifa qimanniminoo qinau.

<sup>11</sup> Faiqí moo fannoo narí anaqa minnisee moo anaasee marainafa mi indaaruqaa anaaseena mandaikammamaqeenoo narí mi fasiqafa ummuariranaki mariannoo.

<sup>12</sup> Miqi kai inoo anaasee moo fannoo narí afaaqi minnisee moo fasiqa marainafa ummuarirana mareenoo miqiannoo.

*Yisufa faiqiuqaindi nifaaqooqa qinau.*

*(Mat 19:13-15; Ruk 18:15-17)*

<sup>13</sup> Faiqí anaasee akaqausa nári faiqi aanaaqiuqa nifiqee Yisufa narí asaku faiqi nikaqasaa quqasee nifaaqooqa nimianifeera nifiqee aniroofaqa Yisuna faiqi namu misa farafara qifoo qimasee niqiqau.

<sup>14</sup> Yisufa miquna qafamaseenoo narí faiqi namu aanoommasee qiman-niminau. Saina faiqi aanaaqiuqa qinee marunannai aniaqa. Sia misara qaoo qiaqa Anutuna ququsa miqirausaindi marinara sia qaoo qiaqa.

<sup>15</sup> Innee maa ainainnara kai irisee sia aunuaqa, faiqi anaasee moo fannoo sia kaqikaa faiqi naanna ramasee Anutuna ququsa marainafa naaru naaru mariranaki sia uqanna keeqeefaranoo.

<sup>16</sup> Yisufa miqi qimasee narí faiqi namu qimannimiseenoo faiqi aanaaqiuqa oonumafi aripimma qumareenoo aiqamausasaa asauku quqaseenoo nifaaqooqa qinau.

*Ainaina faqaa kumaaraa Yisuna faqa ufa qinau.  
(Mat 19:16-30; Ruk 18:18-30)*

<sup>17</sup> Yisufa moosaa fidanoo aanai fimarufanoo faiqi moo fannoo afaqanoo fifiufanoo aanai oonu Yisuna paqurimandeenoo mina oorinni oonu aqoori saunara fufanoo qimaminau Oo amiqira andeeqara ufasaa rakisirafa nana kadaapi fee Anutuna rumamaqaananoo fee naaru marirana qimiannoo fee.

<sup>18</sup> Miqi qufanoo Yisufa qinau anee nanaree qiniara amiqira fee qidanee. Sia moo andeeqarafa maridanoo Anutufa kai andeeqarafa maridanoo.

<sup>19</sup> Anee Mooseena sandufa irimariananoo mi sandufafa maaqi qidanoo sia anee faiqi anaasee moodaa faqa kuqarua sia anaasee ummuaria sia ainaina ummuaria sia siaasinnai oonu moonara unnufa qia, sia moosa ainainara amuqusinana unnaqimasee maraa, aneenna anoofa akoonara amiqimasee ufa qimasee misa nuqu uqeeraa.

<sup>20</sup> Miqi qimasoofanoo mi fasiqafa Yisuna qimaminoo qinau, Oo ufasaa rakisirafa qinee ooqai faiqisaa mi ufana iriisee mi mau fimarunausa maridaqa.

<sup>21-22</sup> Mi fasiqafa miqi qufanoo Yisufa minara aidufanoo andeeqasee mi fasiqana oori qafamasee qinau. Anee moodaa ainainara kai sia auqaananoo. Anee aneenna ainaina aiqama marasee faiqi akaqausa nimisee minasaa munnimma maraseenana kudi fasiqausa nimisainanoo ani qumiasana ani afeesara innaarunai mariannoo, miqinana doo ania, doo qini faqa aniree fua qufanoo mi fasiqafa mina iriseenoo narí moomoo ainaina marunara amuqusufanoo oori runusee finau.

<sup>23</sup> Mifa fufanoo Yisufa quandakinoo narí faiqi namu qimanniminoo qinau, ainaina moomoo faqaasa Anutuna ququsaki keeqaranara anuqifaranoo.

<sup>24</sup> Yisuna faiqi namu ainaina faqaasa innaarunai fifaranoo fee qiqiusa mi ufana iriseeqa tautufanoo Yisufa kafa qimanniminoo qinau. Oo qini faiqi namu Anutuna ququsaki keeqaranara kadaapiri mariafa maridanoo.

<sup>25</sup> Kameera qoosa fooqaa aandau uka amarai keeqarara anuquanoo, ainaina faqaasa Anutuna ququsaki keeqaranara fiqaramasee anuqaa mareefaranoo. <sup>26</sup> Yisuna faiqi namu mina irisee firaaqoo tautumafu-faqa naaquqoofaqa narí qimami narí qimamiqau, Ainaina faqaasa sia innaarunai fifaqa yafee asumu mariranaki fuannoo fee sia moo fannoo amanaikiannoo.

<sup>27</sup> Yisufa mina iriseenoo andeeqasee misa noori qafamaseenoo qimanniminoo qinau. Mi ainainna sia faiqi amanaikimari ainainafa maridanoo Anutufa kai amana aiqama ainaina amanaiki marifa maridanoo.

<sup>28</sup> Peetooroofa mina iriseenoo Yisuna qimaminau. Qafa, maasa aiqama ainaina quqaseeqa kaqi samu uqanna ani faqa fidaqa qufanoo Yisufa narí qimaminoo qinau.

<sup>29-30</sup> Kuqaa qiananoo, qinee maa ainainnara faqa qimannimidaqa moo fannoo qiniara faqa qini amiqira fasaasufara faqa narí maaqa fee narí akaqaafasaa fee narí asookinee narí anoonee narí akoonee narí faiqi namu fee narí maqa maaqa fee minauqa minnisainafa mifa maqee maria kamuqoo moomoo maraannoo. Maaqauqa faqa akaqaafasauqa faqa asoommaaka faqa anausa faqa faiqi namu faqa maqa maaqa faqa moomoo fiqaramasee firaaqoo maraannoo, qini ufasaara arirana faqa maraannoo. Maqee kamu miqimasee maraannoo naaru anianinna kamuqoo naaru asumu marirana faqa maraannoo.

<sup>31</sup> Maqee maria kamuqoo moomoo uriqararaisa kasooqagee innaarunai ureeqaraisa marifaranoo. Maqee maria kamuqoo moomoo ureeqaraisa misa kasooqagee innaarunai uriqararaisa kifaranoo.

*Yisufa kaiqaa narí kuquaninnanara qimanniminou.*

*(Mat 20:17-19; Ruk 18:31-34)*

<sup>32</sup> Yisufa narí faiqi namu faqa Yeerusareenni ooru fidanoo indaaru fufaqa mina faiqi namu mina aanaaqiana ooru fidaqa Yeerusareenni faiqi firaasa Yisuna ariraree qimaru ufana nári iriaqeeida rufia rufiammiqa ooru fimariqau. Faiqi anaasee namufaqa ooru fusa misa faqa nimukee marufaqa ooru fiqau. Ooru fidanoo narí faiqi namu qisaukuqara taikasee qikunni ooqu qaara mararaisa naaduma mara quqasee nariki kambiqaaninna oosannara narí kuquaninnanara qimanniminoo qinau.

<sup>33</sup> Innee iriaqa maasa Yeerusaree maqusa ooru raanaqa faiqi misa faiqi nimaaku qini qumarqeeqaa amaana maqasaa aanaiqikirausa uriqararaisa faqa Mooseena sandufa akoofasauqa faqa misauqa nisaukuki qini quqeeqaranoo. Misauqa qiniara ufa qimaseeqa kuqiranaki qini mara quqaseeqa miqooqari mareeqee aanaamuru nisaukuki quqeeqaranoo.

<sup>34</sup> Anaamuru qini mara quqaseeqa ataasa ataasa qima qimaqaidaqa niqaara qini qifaaqai fidisaida qini qummairi qima qasaida, uiaqa samu qumaree qini firaaqoo qini qifaaqa ateekeese kuqa darifaranoo. Qaaramoo faasaana aiqarainanoo Anutufa qini mara findi fuannoo.

*Seebeedina amaakuqara innaarunai uriqarara qiqau.*

*(Mat 20:20-28)*

<sup>35-37</sup> Seebeedina amaakuqara Yameesasa Yoohaneesa Yisufa maruqoo anireeqa qiqau. Oo ufasaa rakisirafa moodaa ainaina maasa aniara qimannee qianauree qufanoo Yisufa nana ainainee qufaqa misa qiqau, anee aneenna areenarana innaaruna ququsaki keeqafina aneenna qaarisaa ooqumari finaqa maaqanda ani aaqa moo fannoo dinni moo fannoo dinni amanee ani aaqa uqanna ani afaaqasaa aqoondi kammafi fee maaqanda faqa uriqararaisaikiqa marianauree, qufanoo Yisufa qimanniminoo qinau.

<sup>38</sup> Innee inneeqa iraa ainainara sia irimariafanoo fifau faafaummi mariafanoo. Qinee manda nammari naannana innee faqa amanee neefaree. Qinee kuqira nammari ruanaqa innee faqee amanee rifaree qufaqa miqanda qiqau amana maaqanda ruanauree qufanoo

<sup>39</sup> Yisufa qinau Inneeqara kuqaa qini manda kuqira nammari neefaranoo, qini kuqira nammari rumaqimaqee fandinnana inneeqara faqa rifaranoo.

<sup>40</sup> Qini daaqa uqanna qini qifaaqasaa qiqoondi innaaruna ququsaki dinni dinni ooqu marirafa sia qinindi, Anutufa akaqausaree qimasee deedaqamaqoosa mifa kai misa nimiannoo.

<sup>41</sup> Yameesasa Yoohaneesa mi ufana ooru Yisunara iroonara akaqausa qisaukuqara fasiqa mina iriseeqa miqandara aanoo iqau.



<sup>42</sup> Yisufa mina iriseenoo aiqamausa naarama narí unnai quqaseenoo qimannimainau, innee maa maqasaaqaraasa oosana irimariafanoo faiqí misara uriqararausee qimariasa nári aanoonnai faiqí anaasee kaiqeesara rakisi nimaqee mariasa. Misa uriqararausee ureeqararausee amiqimmasee misa uriaaqarama nimaqaidaga.

<sup>43</sup> Misa oosana miqimminoo maridanoo Inniki sia miqinoo mariannoo, Inniki moo fannoo uriqararafaikiraree qimarifa mifa aiqamausa dadaaqidanoo amiqira saika faqa nikooqeemari saikana faqa dadaaqamannimaqee marifa mariannoo.

<sup>44</sup> Innikiqari moo fannoo narí kai indaaru nikiqaikiane qinafa mifa narí kai eedoo qimasee aiqamausa dadaaqira karabusa saiki marifara foora aiqamausa dadaaqidanoo miqi marifa mariannoo.

<sup>45</sup> Innee qini qiqafaaga, qinee faiqí nimaaku sia faiqí anaasee qini ainaina maqimaqaqeeru qumuafanausau maridaqau, qinee faiqí anaasee moomoosa ainainamma nimaqaseeqa misa Anutuna nariranakiqari feefauriraree qimasee qeeqa marirana misara kuqiranaki quqarara qumidaqa.

*Yeerikoo maqannaa afu qimbarana andeeqanau.*  
(*Mat 20:29-34; Ruk 18:35-43*)

<sup>46</sup> Yeerikoo maqusa Yooradanna nammari dinni afainni afaasasaa maridanoo. Yisufa Yeerusaree maqusai ooru fidanoo fiquakufanoo Yeerikoo maqusai aniranau. Miqooqari findifi narí faiqi namufaqa faiqí anaasee moomoosa faqa ooru fida maqusa atinni aanasaa ooru qafuofanoo aanai faiqí moo afu qimbarana mina auqu Baratimaeusafa Timaeusana amaaku fannoo nári oosana marasee miqimarusa aanasaa maridanoo faiqí anaasee fiqaree aiqaree imarusara narana maree maria munnimara innaaru qimarufa marinau.

<sup>47-50</sup> Mi afu imbara fasiqafa Yisunara Nasareeteendaraa fasiqa animari-ifoo qufanoo kafa kafa faqa quqasaida nammeera maaqi qimasaida nammeera qimarinau. Oo Yisufa Dafidina ati marianafa anee qiniara irinanoo amuqusinana dadaaqia qufaqa moomoosa mina aqiqa qiqau doo ufasaa farafara qia qufanoo mi fasiqafa misa quna irinoo sia minnisana misa aqurareeqee firaqoo ambufuamufanoo firaqoo faqa quqaidanoo maaqi qinau, Oo Yisufa Dafidina ati marianafa anee qiniara irinanoo amuqusinana dadaaqia. Yisufa mina iriseenoo aanasaa kasoomambinoo qinau aaraifanoo aniani qufaqa misa qimamiqa qiqau. Doo asasia Yisufa ania anianne qidanoo qufanoo afu qimbarafa mina iriseenoo narí qamunna akuqoona mi saqanna afaqimma aquseenoo doo findi finoo Yisufinnai finau.

<sup>51-52</sup> Oonuroofanoo Yisufa irammirino qinau. Anee qiniara naqi-maqisaanifee fee q inanee qufanoo afu qimbarafa qinau. Oo ufasaa rakisirafa anee kaifaa qifu maqa qisaanneera qidaqa qufanoo Yisufa qimaminoo qinau. Doo fua ani aundura qinisaa rusirafa doo ani andeeqamaqano maridanoo. Miqi qufanoo doo aaqee uqanna mi fasiqana afu qimbarafa maqafufanoo doo Yisuna faqa aanai finau.

## 11

*Yisufa doonkisa Yeerusaree maqusai ooru finau.*  
(*Mat 21:1-11; Ruk 19:28-40; Yoh 12:12-19*)

<sup>1</sup> Yisufa narí faiqi namufaqa faiqí anaasee faqa Yeerusaree maqusa aaqa ooruree qaara kaqikaa maqusa nuqu Beetapaisa faqa Beetani faqa mi

maqusa qanda naaqa ooruree Oorifa aaqana aaqa ooru raqau. Oorureenoo narí faiqí namukinaana qaaraqanda Yisufa narí niqiqeenoo indaaruu fuaqee qimasee qimanniminau.

<sup>2</sup> Inneeqara fimaria maqusafa marinaki oonureeqa fuka doonki akoona afaandama itirana saqarisaa sandannai anukaki qususee saqarisaa qusuqaafanoo marina paqurifaranoo. Sia faiqí moo fannoo mina ataufakasaa ooqu marifi fia kaqi maridanoo, innee mina sanda idukusee mi doonkina maree aniaqa.

<sup>3</sup> Faiqí moo fannoo inniqarara naqi fee ida fee miqida fee qifaqa inneeqara maaqi qimasee qimamiaqa, maasa uriqararafa maa doonkina saika maridanoo taikasainanoo aaqee uqanna muqu nimianoo fee qifaqa ani maraidaqa.

<sup>4-5</sup> Yisufa miqi qimasee qimannimufaqa miqanda oonuree qafoofanoo doonki akoona afaandama itirana paquriqau, mifa maqusasaa moo maaqa kooqiki mari saqarinasaa qusuqoofanoo marinau. Miqanda oonu qafee iduki marufanoo akaqausa maqusasaa marusa aniree qiqau,

<sup>6</sup> Naqiraree maraidee qufaqa miqanda Yisuna ufa kai qimannimufaqa doo maree fuaqee qiqau.

<sup>7</sup> Miqanda mi doonkina mara maree Yisufuqoo miniseeqa nári oosana marasee nári qamunna mina ataufakaaqa ufiqisoofanoo Yisufa minasaa ooqu marifinoo Yeerusareenni ooru finau.

<sup>8-9</sup> Faiqí anaasee moomoosa Yisuna qafamaseeqa nári karaambaiqa imaru oosanna mareeqa nári siuta raipaqueeqee aanasaa ufiqimarufaqa akaqausa saqari asaana amanee namufaqaana dinni dinni anaadookina saqari ateekeeqee aanasaa ufiqisoofanoo mi mau doonki fannoo finau. Fimarufaqa moomoosa inaaqiannai faqa oorinni faqa fidaqa maaqi qimasee faaqaridaqa asasidaqa qiqau Anutuna firaqoo amooqiaqa.

<sup>10</sup> Maasa qikoona Dafidina ququsaki marianinna karaambaiqana Anutufa amiqi amiqiani. Karaambaiqa Anutuna auqusaa Yisufa uridanoo. Anutuna firaqoo amooqiaqa.

<sup>11</sup> Miqi qidaqa afiaqa ooru fiufaqa Yeerusaree taunnaki keeqafufanoo Yisufa misa amaana maqa firaanaki keeqafufanoo aiqama ainaina aiqumiiseenoo doo rafudamakufanoo doo eendidanoommifoo qimaseenoo narí faiqi namu qisaukuqara taikasee qikunni ooqu qaara marasee nifiqama-reenoo kafa Beetani maqusai ooqu finau.

*Yisufa faafisa fooqaa saqari aqinau.*

*(Mat 21:18-19)*

<sup>12-13</sup> Misa faiqee iqaqoofaqa Beetani maqusaindari Yisufa Yeerusareenni ooru fidanoo aararoofanoo Yisufa qafoofanoo faafisa fooqaa ira saqari nianai marufanoo qaqama iranoo fee marinoo sia fee marinoo qimaseenoo aaqa oonuree qafoofanoo amanee kai marufanoo qaqama iree maru akuwana sia marunara sia iranau.

<sup>14</sup> Yisufa mina qafamaseenoo mi faafisana aqinau anee maqee maaqooqari naaru naaru anisaaqaraana sia faiqí moo fannoo ani qaqama naannoo. Miqi qu ufana Yisuna faiqi namu iriqau.

*Yisufa amaana maqaki makeeti marusa niqiqanau.*

*(Mat 21:13-17; Ruk 19:45-48; Yoh 2:13-22)*

<sup>15</sup> Misa kafa Yeerusaree maqusai ooru keeqafufanoo Yisufa misa amaana maqa fiqumma ququsa auquqoonaki keeqafufanoo minaki faiqí ummuari maru makeeti marusa ooru rapatutummeeqeenoo nifaqasoofaqa rafudamaki fifainiqau. Minaki marusa faiqí anaasee kaqi

munnimma marasaida amaana maqakinaa munnimma faiqí anaasee nimi-saidaqa minasaa qaraana ati munnimma ookaa mandee ummuaramasee maraaneera miqi mariqau. Yisufa misa qaindauqa faqa misa munnimma minasaa quqaqoonauqa faqa aiqama ooru qumaree teeqi taaqimaseenoo nakipuruna faiqí anaasee bisinisaiki marusa faqa misa oqumari maru siaqausa faqa mareeqee teeqi taaqi maqinau.

<sup>16</sup> Akaqausa ummaara maree mariasa amaana maqa fiqú fiqú auqira ququsa firuqiaki fimarusa faqa qaoo qufaqa minaki sia fiqau.

<sup>17</sup> Miqimmaseenoo Yisufa quandakinoo miqoo marusa maaqi qimasee qimanniminoo qináu. Ooqeenaa tamummaqara fasiqauqa akaraki Anutufa maa maqanara maaqi qimasee qimaqoofa maridanoo. Qinee faiqí anaasee qini maaqara innaaru qira maqa fee qiaqee qidaqa. Anutufa miqi qimaqoofaqa qinee mimau maaqi qidaqa, innee maqee mariasa maa amaana maqana qumareeqa ummuari mariasa kukeeqara maqaikammi mariafanoo.

<sup>18</sup> Amaana maqakina aanaiqikirausa uriqarararusa faqa Mooseena sandufa iriqaraasi marusa faqa Yisufa miqi qunara aanoomasee iriseeqa Yisuna kuqarira aanara randee mariqau. Faiqí anaasee muduka uqanna moomoosa Yisuna ufa irufanoo naaquqoonara aanaiqikirausa Yisunara rufiee marunara ariranara randaqau.

<sup>19</sup> Mi eenaaniannai Yisufa Yeerusaree maqusasaaqari narí faiqi namu nifiqee moosaa finau.

*Faafisa fooqaaira saqari aadanusináu.*  
(Mat 21:20-22)

<sup>20</sup> Faiqee iqaqoofaqa fidaqa misa kafaa mi faafisana fooqaaira saqari aaqa fidaqa qafoofanoo ammuqundari aiqama muqufi oosana amisee aiqama aadanusinoo marináu.

<sup>21-22</sup> Peetooroofa mina qafamasee tautumasee Yisufa mi saqarina aqunara iriseenoo Yisuna aaramaseenoo qimaminoo qináu. Oo ufasaa rakisirafa anee qafaa anee aqisaananoo doo kuqinoo marinoo qufanoo Yisufa narí faiqi namu qimanniminoo qináu.

<sup>23</sup> Innee maa ufana irisee sia aunuaqa inni irirafa Anutunasaa rusinoo marinaqa innee qifandinna ainainara kuqaa kambiqaanoo fee qiqa sia naunduraki qaara irirana iridaqa innee maa amuaqunamunara rafauruaki ooruku nammariqi aqufua qifanoo Anutufa kuqaa aniara miqiannoo.

<sup>24</sup> Minara qinee inni maa ufana faqa qimannimidaqa innee moo ainainara innaaru qidaqa inni irirafa doo mareera foora miqiunoo qimasee irirana Anutunasaa rusisaifanoo aiqama innaaru qimariana Anutufa inni nimiannoo.

<sup>25-26</sup> Innee inneeqa mandoosana Anutunara minniqisaannee innaaru qidaqa inni mandaikamannimaqaasa misa ummaara aniki marina minnisee aunusaifanoo inni innaarunai nikoofa inni manda oosana akiqara faqa mininnisaani. [Inni niqoonausa inni mandaikamma nimaqaiifaqa inni mina irisee sia mina minnisee kaqi irimaree fifanoo Anutufa faqa innindi faqa miqi kaimmiannoo.]

*Yisunara yafee qifanee afeekaikidanee qiqau.*  
(Mat 21:23-27; Ruk 20:1-8)

<sup>27</sup> Yisufa kafaa narí faiqi namu faqa Yeerusareenni oorureenoo firaa amaana maqa fiqú fiqúra ququsaki keeqafinoo nimarufaqa minakinaana aanaiqikirausa uriqarararusa faqa Mooseena sandufa akoofasauqa faqa aniree irammiriqa qiqau.

<sup>28</sup> Oo Yisu anee maa maqanaki bisinisaiki mariasa nifaqasaana fuanara anee uriqarara fee maridanee miqidanee. Yafee aniara qifanee maanaki mariasa nifaqeenee qufanoo Yisufa nári qimanniminoo qináu.

<sup>29</sup> Qinee faqa inniara modaa ufa iramannimaqaanaura. Innee qimaqimifaqa qiniara iraaufana faqa qimannimianauranoo.

<sup>30</sup> Yoohaneefa nammari nimimarufa yafee minara nammari nimianee qufanoo nimimarináu, Anutu fee faiqí fee qufanoo nimimarináu.

<sup>31</sup> Yisufa miqi qimasoofaqa narinni narinni raiqara ufa nári qimami nári qimami qiqau. Maasa naqi fee qianauree. Maasa Yoohaneenara Anutufa qimamiifoo qiananoo mifa maasara nanaree innee Yoohaneena ufara Anutuna ufa fee qimasee mi mau fuaqaana miqidee qiandoora.

<sup>32-33</sup> Maasa Yoohaneenara faiqí kai qimamiaafoo qianaqa faiqí anaasee kaqigeesa maasa darifoorá misa Yoohaneenara Anutuna tamummaqara fasiqee qimariafa marifaqee qimasee Yisuna qimamiqa qiqau, maasa sia ani ufa anoona irida fee qiqau. Miqi qimasoofanoo Yisufa kafa nári qimannimináu, Doo amana innee qinindiara sia qimaqimiafaqa qinee faqa innee qiniara yafee qimaminoo fee qianara sia qimannimianaura.

## 12

*Ainainasaa manda rakisira rakisunara quandara ufa.*

*(Mat 21:33-46; Ruk 20:9-19)*

<sup>1</sup> Yisufa miqi qimaseenoo quandara ufakiqari qimanniminoo qináu.

(Yisufa Yuda maqannaasa mandoosana qimanniminnaree qimasee nári munnimma maree marianara uainna qaqaamara qimannimináu. Maasakina sia uainna qaqaama maridanoo koofi kai marinara mina kikiqusuanaura.)

Faiqí moo fannoo koofi asumu ummaquseenoo ququsa auqu ititaseenoo koofi nammari uqimaria difaaninai firaana auquseenoo kisaqa qainda auquseenoo aufarira fasiqa fannoo mi qaindanasaa akaramafifanoo maridanoo rakisida aufaridanoo. Mi saikafa taikaifanoo ququsa akoofa moo maqusai niannai firaree qimaseenoo akaqa fasiqauqasaa nári koofi ququsa niqiqamaseenoo maaqi qimasee qimannimináu. Innee qini koofi ququsa rakisidaqa qaqaama irainna aukwana innee akaqana inneeqara mareeqa qini koofi akausa akaqana qimiaqee qimasee doo quqasee moosaa fináu.

<sup>2-3</sup> Koofi qaqaama tiqi maru aukwana aniroofanoo koofi akoofa nári ainainira faiqi nianaindari aqiqoofanoo anireenoo koofi ququsasaa rakisi marusa qimannimináu. Innee uriqararana oondaraa koofi qaqaama diqisee qimia qufaqa misa mandoosana marasee mina qumaree saamu samu ari ariiseeqa aqiqoofanoo kafaannai anirandee kaqisamu fináu.

<sup>4</sup> Kaqi samu oonuroofanoo afuqakoona qafamasee moo ainainira fasiqa aqiqoofanoo kafa anináu. Aniroofaqa mina faqa miqi kai mandee ariisee saamu qumaree akiaqa rukamusee mina afaaqasaa asaurirana mara amufanoo anirandee maree nári akoofinnai fináu.

<sup>5</sup> Oonuroofanoo qafeenoo moo aqiqoofanoo aniroofaqa mina kuqamariqau. Ququsa akoofa mina iriseenoo akaqausa kafa niqiqanáu. Aniroofaqa akaqausa kaakadi nariqau akaqausa kuqa nariqau.

<sup>6</sup> Mi fasiqana ainainira faiqiuqa doo taikasoofanoo nári amaaku uqanna doo moodaa nári amuqusimarufa mifa kai kaqi marináu. Ququsa akoofa maaqi qináu misa qini qimaakuara iriseeqa rufisee koofi amifaranoo qimaseenoo mina aqiqanáu.

7-8 Mina amaaku fannoo oonuroofaqa koofisaa rakisi marusa mina qafamasee maaqi qimasee narí qimami narí qimami qiqau, maafa ququsa akoona amaaku maridanoo doo aniaqa anifaqa arusaananoo maa ququsafa maasaindi kai mariani qimasee mina amaaku qumareeqa kuqaruseeqa rafuseeqee ququsa aqoosai aqusaqau.

<sup>9</sup> Yisufa kaqi qimannimidanoo qinau, mi ququsana akoofa aniree naqi fee iannoo fee mifa aniree mi manda fasiqausa kuqa naruseenoo andeeqara fasiqauqasaa mi ququsana mara quqasee kafaa anirandee fuannoo.

<sup>10</sup> Innee maaqoo mariasa tamummaqara fasiqauqa akara sia fee innee asaana ridee misa maaqi qimasee qiniara qidaqa sabeena kikiqususeeqa maaqi qimasee akara riqau.

Faandaamura auqimaria fasiqausa sabeena moo marasee qafamasee manda saqari fee qimasee aqusoofanoo Anutufa mina kai urin-naagarara fee qimasee faakanaikinoo maridanoo.

<sup>11</sup> Karaambaiqa minnisoo sabeena marasee faakanaikinau. Oo amiqira faakana maridanoo.

<sup>12</sup> Yuda maqannaasa Yisuna mi ufana iriseeqa oo maasara quandaidaqinoo manda koofi ququsasaa rakisirausara maasara qidaqinoo qimasee aanoommasee Yisufa mifa maasara amiqira sabeena aqusoosa maridee qidaqinoo, qimasee Yisuna rumbara ufa qidaqa faiqi anaaseera rufiasee Yisuna minnisee moosaa fiqau.

*Takisa munnimmaro iroofanoo qimanniminau.*

*(Mat 22:15-22; Ruk 20:20-26)*

<sup>13</sup> Farisai amaana ufa qimarusa akaqausa faqa Eeroodeena ufa irimarusa akaqausa faqa aniree irarufara fusee ianee qimasee qimamiqa qiqau.

<sup>14</sup> Oo ufasaa rakisirafa maasa aniara andeeqara ufa qimarianna fasiqa fee qidaqa sia anee faiqi ufara eerairamasee misiannai fimarianafa, anee sia faiqi nindafamaseenana miqimmiafaqee maaqimmiafaqee qimarianafa mariananoo anee Anutuna anoona ufamau firanara paasoosimarianafa mariananoo. Doo anee maasa qimaqimia maasa Roomma maqanna uriqararana takisa munnimma aukuana aukuana amidaqa. Mooseena sandufamau fee fidee miqidee, aaqaidee miqidee. Maasa aquanauree sia fee aquanauree qufanoo Yisufa misa akaru qira oosana qafamaseenoo qimanniminoo qinau,

<sup>15-17</sup> Innee nanaree qini fusee irara idee siruaa munnimma moo marasaifaqa qafaa qufaqa misa siruaa munnimma moo maree mini uqafiqaqau. Mifa qafamaseenoo qinau, yana oori amana faqa yana auqu amana faqee maa munnimmanasaa akara rinoo maridanoo fee qufaqa misa qiqau. Roomma maqanna uriqararanaindi maridanoo fee qufanoo Yisufa qinau, doo amana qiafanoo mina auqu faqa mina oori faqa maa munnimmanasaa maridanoo sia moo naindi maridanoo naríndi uqanna akoooroidanoo minara doo naríndi maridanoo doo mifa qimiaqee qinaqa mina amiaqa Anutunaindi faqa doo narí Anutuna faqa amiaqa qufaqa misa mina iriseeqa kuqaa qimaseeqa firaqoo Yisunara naaquqee marinau.

*Kuqiranakiqari findifranara iroofanoo qimanniminau.*

*(Mat 22:23-33; Ruk 20:27-40)*

<sup>18</sup> Sadikai amaana ufa qimarusa akaqausa Yisufinnai aniraqau. Sadikai amaana ufa qimarusa faiqi anaasee kuqufiqa sia findi fifandiafoo putaam-mifandiafoo qimarusa mariqau. Miqi qimarunara misauqa akaqausa Yisufinnai aniree irammirida qiqau,

<sup>19</sup> Oo ufasaa rakisirafa Mooseefa maa sandufana akara rinoo qinau, faiqí moo fannoo anaasee maraseenoo sia faiqí maqarai kuqufinanoo mina akaqa fannoo mi anaaseena maraseenoo faiqí maqasainanoo findifinoo indaaru akoofa kuquna qumiasana saqamasaa rakisiannoo.

<sup>20</sup> Moo aukuana moo fasiqa faiqí namu qisauku dinni taikasee dinni ani qaara marasee mariqau. Nifasaafa anaasee marasee sia faiqí maqarai kuqinau.

<sup>21</sup> Kuqufufanoo mina aanaaqianaafa mi anaaseena marasee mifa faqa sia faiqí maqarai kuqinau. Miqanda ninaaqianaafa kafa mi anaaseena marasee miqikai inoo sia faiqí maqarai kuqinau.

<sup>22</sup> Kafa miqooqaraasa mina marasaida kuqi kuqi taikafufanoo doo mi anaaseefa faqa doo kuqinau.

<sup>23</sup> Doo kuqiraua findifandinna aukuana mi faasaannasaa aiqama dinni taikasee dinni ani qaara marasee mi anaaseena afaammaaka maridaqa yanaindikee iannoo fee qufanoo.

<sup>24</sup> Yisufa maaqi qimasee qimannimainu. Innee firaaqoo aqee mariasa inneeqa aqee mariana oosana iridee sia fee iridee. Innee maanara aqee mariafanoo, tamummaqarausa akarakinaa ufa faqa Anutuna afeeka faqa sia irimarianara aqee mariafanoo.

<sup>25</sup> Faiqí anaasee findifandinna aukuanna sia misa faiqí anaasee naanna ramasee narí maree narí maree mandee marifaranoo. Faiqí afaaqa faqa anaasee afaaqa faqa taikaseenoo qangiroora foora mambiqa idaaqiraua marifaranoo.

<sup>26</sup> Kuqiraua findifiranara sia fee innee Mooseena sandufa asaana rumasee iridee. Mooseefa ooqai sipsipasaa rakisi maru aukuan-nai moo ainaina minaki qafuofanoo ida fannoo sasamimiki qeemaru-fanoo qafamaseenoo ooruroofanoo Anutufa minakiqari ooqai kuqusara Mooseena qimaminoo qinau.

Qinee Anutusa maridaqa Abarahaamana faqa Isakeena faqa Yakooboona faqa Anutusa maridaqa.

Akarakinaa ufa ooqai kuqufusara miqi qinoo marinara sia fee innee amiqimandee asaana ridee.

<sup>27</sup> Mi ufana oosana maaqimminoo maridanoo Abarahaamafa faqa Isakeena faqa Yakooboona faqa ooqai kuqufusara Anutufa mi ufanannoo misa naunduraindaraanara sia taikee maqi kaqi maridaqa qini faqa mariaafoo qidanoo, qinee misa Anutusa maridee qidanoo. Naqimasee kaaqa taikafuusa misa Anutusa maridee qiannoo fee. Sia amana miqi qiannoo. Kaqi mariasa Anutusa maridee qidanoo. Minara innee Sadikai amaana ufa qimariasa firaaqoo uqanna aaqaidaqa kuqimariasara kaaqa taikambiaafoo sia findifidammia maqi qimariafanoo.

*Sanda ufakinaana uriqarara sanda ufa qara kooroo inau.*

*(Mat 22:34-40; Ruk 10:25-28)*

<sup>28</sup> Mooseena sandufa uqannifiqee marifa moo fannoo Yisufa Sadikai amaana ufa qimariasa faqa ufaqi marufanoo Mooseena sandufa akoofasa fannoo faasai irinau. Yisufa Sadikai amaana ufa qimarusa narí ufan-nai misa ufa amiqimasee rafaafusoonara qafamaseenoo oo amiqira fee qimaseenoo narí faqa moo ufa Yisuna qimamianauree qimaseenoo qimaminau. Oo Yisu Mooseena sandufa moomoo kinaana nana sanda ufee uriqaranoo maridanoo fee qufanoo Yisufa qinau,

<sup>29</sup> Maa ufafa aiqamausa urinnaaqararafa maridanoo. Isaraee maqannaasa iriaqa Karaambaiqa maasa Anutufa moodaa Karaambaiqa nariara maridanoo.

<sup>30</sup> Innee faiqi faiqi inneeqa karaambaiqa inneeqa Anutunara inneeqa nimuqusa nimana nitukura irirana afeeka mudukannoo Anutunara nidaqa ruaqa. Mi ufafa uriqararafa maridanoo.

<sup>31</sup> Mina aanaaqianaafa maaqimminoo maridanoo. Anee aneenna aqoonnanara aninna afaaqara foora aidindee aidiani. Sia sandufa moo miqanda uriqaranoo maridanoo miqanda kai.

<sup>32</sup> Mi fasiqafa Mooseena sandufa akoofasa fannoo Yisuna mi ufana iriseenoo qinau. Oo ufasaa rakisirafa amiqimandee andeeqasee qiananoo anee qianandee kuqaa karaambaiqa mifa kai Anutufa maridanoo, sia moo Anutufa maridanoo mifa kai maridanoo.

<sup>33</sup> Minara nari amuqusa aiqamannai faqa nari irirana aiqamannai faqa nari afeeka aiqamannai faqa Anutunara aidiani, nari aqoonnanara faqa nari afaaqara foora aidindee aidiani. Mi ufa qandannai finanoo uriqararafa mariannoo, tatufira aandau qaindasaa Anutuna suqamirafa faqa oosana oosana ainaina amimariafa faqa oorudupirafa mariannoo.

<sup>34</sup> Yisufa mi fasiqana ufa iriseenoo oo irirana faqaa fasiqa fee qimasee qimaminoo qinau. Anee Anutuna ququsa adeedirana atisaa mariananoo. Miqooqari Yisunara naaquqoofaqa sia moo ufa iraqau.

*Naqimaseenoo fee asauku mundirafa Dafidina amaaku faqa mina karaambaiqa faqa mariannoo fee.*

*(Mat 22:41-46; Ruk 20:41-44)*

<sup>35</sup> Yisufa Yeerusaree firaa amaana maqaki faiqi anaasee amaana ufa qimannimidanoo moo ainainara irammirinoo qinau. Mooseena sandufa akoofasauqa asauku mundiranara Dafidina ati maridanoo fee qimariafaqa qinee minara, naqimandee Dafidina ati mariannoo fee qidaqa.

<sup>36</sup> Anutuna naaquqara andeeqara maraquna fannoo Dafidina dadaaqufanoo maaqi qimasee akara rinau.

Firaa karaambaiqa fannoo qini karaambaiqara maaqi qimasee qimaminau. Anee maaqoo qini Anutusa qini daaqa qini qisauku uqannai ooqu marifinaqa ani namuqaauqa narueeqee ani aramandunnai quqaanaura.

<sup>37</sup> Dafidifa mi akaranaki asauku mundiranara qini karaambaiqee qinau, naqi fee masee Dafidina karaambaiqa faqa mina ati faqa aiqamaqara moodaa karinoo mariannoo fee. Innee minara irida naqi fee qidee.

*Yisufa sandufa akoofasauqa oosana kooroomandee niqinau.*

*(Mat 23:1-36; Ruk 20:45-47)*

<sup>38</sup> Faiqi anaasee moomoo uqanna aniree اساسandee Yisuna ufa iriqau. Yisufa ufa qimannimidanoo maaqi qimasee moo ufa qimanniminau. Innee Mooseena sandufa akoofasauqa misa mandoosanara aufariaqa. Misa kisaqa gamunna afisuseeqa maqusamau fee makeetaki fee nimarifaqa faiqi anaasee amiqimandee nimandaranara randaqa nidaqa kisaqa qamunna afisuqirau nidaqa.

<sup>39</sup> Misa amaana maqaki keeqafidaqa naadumasaa amiqira siaqasaa ooqumari mariasa maridaqa, oomaqaki faqa amiqira qoo kai ooqumari mariasa maridaqa.

<sup>40</sup> Misa adeedaana anaaseeuqara faiqi siaisa mariafaqee qimasaida misa maaqa maqusa saqama noopundu maqa aiqama ummuaramasee umarasee quandakiqa faiqi nifusaa faiqi qiqaqafee qimasee kisaqasaa

innaaru qimariasa maridaqa. Mina akiaqara misa narirafa naaru fiqaramasee mariannoo.

*Adeedaana anaasee narí kaqikaa munnimma Anutunara quqanau.*

*(Ruk 21:1-4)*

<sup>41-42</sup> Yeerusaree firaa amaana maqakinaa difaani moo marufaqa faiqí anaasee minaki Anutuna amidee qimasaida munnimma minaki aqí mariqau. Yisufa mi difaanina aaga ooqumarifi rakisi marufaqa faiqí anaasee minaki munnimma moomoo aqí mariqau. Ainaina faqaasa aniree nári munnimma moomoo minaki aqíqau, miqoo adeedaana anaasee moo ainaina siaifa kudi anaasee fannoo anireenoo narí munnimma qaaraqanda idaqara munnimma ataaqana fooqaana mi difaaninaki aqinau. Mi munnimmaqanda fannoo moodaa tooeaa amana kai oodaa uqanna marinau.

<sup>43-44</sup> Yisufa narí faiqi namu naarama moodaaqoo quqasee qimannimino qinau. Qinee mi kudi anaaseenara qimannimianauna, mifa aiqamausa urinnaaqaramasee munnimma aqinoo. Akaqausa nári moomoo munnimmakinaana ati ati aqia, maa kudi anaaseefa ainaina siaifa marifa narí aiqama munnimma narana aina feefaurianee qi munnimmana faqa aiqama aqinoo. Minara qinee mi anaaseenara firaaqoo aiqamausa naruseenoo aqinoo qidaqa.

## 13

*Yeerusaree amaana maqa rapee ianinnanara qinau.*

*(Mat 24:1-2; Ruk 21:5-6)*

<sup>1</sup> Yisufa amaana maqakiqari rafudamaki fufanoo mina faiqi namukiqari moo fannoo Yisuna qimaminoo qinau. Oo ufasaa rakisirafa maa maqana qafaa, amiqira ooninnai auquqaa maqafa maridanoo.

<sup>2</sup> Yisufa irisee qimaminoo qinau. Innee maa firaa amiqira maqana usakarana qafaidee, kasooqagee aiqama rapeepaamma furufaramambuannoo sia moo ooni narí amuaaqa narí amuaaqa maqee marindee inoo mariannoo.

*Yisuna ufa irimarusara nikooqaranara qinau.*

*(Mat 24:3-14; Ruk 21:7-19)*

<sup>3</sup> Yisufa Yeerusaree firaa amaana maqakiqari raudamaki Oorifa aqana amaana maqa adeedi marufanoo miqoo ooru ooqu marinau. Ooqu marifufaqa mina faiqi namukiqari Peetooroofa faqa Yameesafa faqa Yoohaneefa faqa Andurufa faqa minamusa qumee kukeeqaku narí maruqoo aniree qimamiqau.

<sup>4-5</sup> Oo Yisu anee amaana maqa rapee ianinnanara anee qiannana yairee fee amaana maqa rapeepaa iannoo fee nana ainaina kambiqafina qafee fee oo doo mina rapeeia aukuanafa adeedi ree maqi qianauree qufanoo Yisufa minara naamuaqira ufa oosana arasee qimanniminau. Innee aufarida mariaqa, sia moo fannoo inni nikaruqiani.

<sup>6</sup> Moomoosa aniree náriara unnaqimasee moo fannoo qinee asauku mundirausee qifanoo moo fannoo anireenoo qinee asauku mundirausee qimasee moomoosa misa nikaruqifaranoo.

<sup>7</sup> Innee rakira daambeenda adeedi iriqa nianai marinara ufa kai iriqa sia munari minari furufari iqa. Miqira ainaina kuqaa kambiqaannoo, kambiqafinaqa sia taikara aukwana aiqaree maqi qiaqa.

<sup>8</sup> Moo maqannaasa nianindari aniree moo maqannaasa faqa rakifaranoo, moo karaambaiqa fannoo adeediqari ani mara moo karaambaiqa



aruannoo. Maqa kasirafa aiqamai mariannoo aandaroo faqa mariannoo. Mi ainainausa manda marira aurirana oorisa kai mariannoo anaasee faiqi maqarara innaamunai aupuraandeemmiannoo.

<sup>9</sup> Innee qini ufa irimariasa augarida mariaqa, faiqí misa poorisa ufa qimannimifaqa inni rumbeeqee kootaki quqeefaranoo. Misa inni mareeqee amaana maqaki quqasee saamusamu narifaranoo. Innee qini amiqira fasaasa ufa qimannimiaqeera qini ufasaara karaambaiquqa faqa faiqí fraasa rakisirausa faqa nifusaa innee kikiqifaranoo.

<sup>10</sup> Qini amiqira fasaasa ufa aiqama maqannaasaki naaree kooroo inoo marinannoo taikarafa inaaqianna kambiqaanoo.

<sup>11</sup> Misa inni rumbasee mareeqee kootaki quqasainaqa innee sia naqi fee qianau naqi fee qianau naaree qiaqa. Koota kambiqafina Anutufa qimannimu ufana mina kai qimannimiaqa. Ani ookinaa ufa sia anindi mariannoo Anutuna naaquqara maraquina fannoo narí ufa inni niminaqa mina kai qifaranoo.

<sup>12</sup> Faiqí misa nári nikaqaafasaauqa mareeqee kuqiranaki quqeefaranoo. Faiqí misa nári niku nisauku faqa mareeqee kuqiranaki quqeefaranoo faiquqaindi quandakiqa nári ninausa nikausa mareeqee kuqiranaki quqeefaranoo.

<sup>13</sup> Aiqama maqannaasa inniara Yisunaindi fee qimasee fidiqaa manniqaqeefaranoo. Innee minaki maridaqa fidaqa qini uaqee ida fifi inafa kuqira fee Yisufa qumira aukuanee paqurinafa asumu marirana maraannoo.

*Yeerusaree maqusai narirafa kambiqaaninnanara qinau.  
(Mat 24:15-28; Ruk 21:20-24)*

<sup>14</sup> Kasooqagee innee naaquqara fidiqaaaimari mandainaina qafeefaranoo mifa sia mariaqaa iraqoo Yeerusaree amaana maqaki kikiqinoo marina qafeefaranoo. Innee maa ufana asaana rimariasa mi ufana oosana amiqimandee iriaqa. Mi naaquqara mandainainafa kikiqa mambinaqa innee Yudeeaa maqa maaqaki mariasa quqasee aqana aqana sandamafuqa.

<sup>15</sup> Mi kamuqoo faiqí moo fannoo maaqa kooqi oorisa mariinafa mi ainainafa kambiqafinana sia aneenna ainaina maaqaki maraannee qia doo miqooqari afiaki sandaa.

<sup>16</sup> Faiqí moo fannoo afuqaki mariinana sia maaqai aniree aneenna qamunna aakuqa maraannee qia doo miqooqari kai quqasee ququsa rakeemandee sandaa.

<sup>17</sup> Mi manda aukuanne nimuaqu uqa faqaa aanaaseeuqa faqa faiqi aanaaqi faqaasa faqa mandaiki marifaranoo sandaranara anuqifaranoo.

<sup>18</sup> Innee maaqi qimasee innaaru qiaqa Oo Anutu sia mi manda aukuanafa suara aukuanne kambiqaanne qiaqa sandaranara anuqi foora.

<sup>19</sup> Mi manda aukuanafa anirainafa aiqamausa aupuraranaki firaanaki marifaranoo. Ooqai indaaru Anutufa aiqama ainaina auqunakiqari kaqigaa aupurarafa oosana oosana marinau, maqee faqa miqikai idannoo kaqigaa aupurarafa maridanoo. Kasooqagee firaafa uqanna kambiqaanoo. Mifa taikainna kari sia miqirafa kambiqaanoo.

<sup>20</sup> Mi manda aupurara aukuanne Anutufa qusandaannoo, sia qusarainannoo aiqama kuqu taikee foora. Anutufa narí rusandeesamumasee maroosara iriseenoo mi aukuanne qusaramannisaannoo.

<sup>21</sup> Mi manda aukuanne faiqí moo fannoo inniara mai qafaaqa, asauku mundirafa mai marinoo moo fannoo asauku mundirafa muanni marinoo qinnana sia mi fasiqana ufa iriaqa mina unnaqidannoo.

<sup>22</sup> Unnaqimaria asauku mundirausa faqa unnaqi maria tamummaqara fasiqausa faqa miqira aukuna moomoo kambiqeefaranoo. Misa Anutuna rusandeesamumandee maraqoo fasiqa anaaseesa nikaru qiani qimaseenoo naaquqara ainaina faqa sia faiqi amanaikimari ainaina faqa auqusaifanoo kambiqaanoo. Mi ainainannai nikaruqiani qimasaifanoo sia amanaikianoo.

<sup>23</sup> Qinee inniqa qini faiqi namu mi ainainna sia kambiooqoo qimannimiqi minara augarida kai mariaqa.

*Yisufa narí innaarunaindari qumuaninnanara qimannimianau.*

*(Mat 24:29-31; Ruk 21:25-28)*

<sup>24-25</sup> Mi manda aupurara aukuanafa taikafinoo asukuna fannoo suani aruannoo aiqamai asukuna kai arufuannoo quqoona faqa sia kafa kaaqa qaannoo fasauqa faqa inaarunaindari aiqama kapikeefaranoo. Innaarunai fasau faqa quqoona faqa nimari aanafa dapikammafuannoo.

<sup>26</sup> Miqoo qinee faiqi nimaaku asuruki kooroo ianara, qinee firaa afeeka namuqaq firaa areenarana namuqaq minaki kooroo ianara.

<sup>27</sup> Mikari qinee qeeqa qangiroouqa niqqaanaqa misa aiqama maqa maqa ati atinni oonuree aniree mandeeqa Anutuna rusandeesamumandee maroosa maramaree qinee marianannai nifiqee anifaranoo.

*Narí qummuarinnanara saqari ammuni kikiqa usinau.*

*(Mat 24:32-35; Ruk 21:29-33)*

<sup>28</sup> Yisufa kaqi qimannimidanoo narí faiqi namu qimanniminoo qinau. Innee faafisa fooqaa ira saqari qafamasee mina oosana iriaqa, mi saqarifa ammuni mambinaqa innee minara saika aukane qifaranoo.

<sup>29</sup> Innee miqi kai masee mi oosana oosana ainainnara qunafa kambiqainaqa taikara aukuna adeedi afaisaammi maqi qiaqa.

<sup>30</sup> Innee maana faqa irisee sia aunuaqa maa ainainnausara aiqama qunafa maa maqee maria fasiqa anaaseesa akaqausa kaqi maria kamuqoo kambiqaanoo.

<sup>31</sup> Innaaruna faqa maqa faqa aiqama fatikamafi aqusaannoo qini dookinaa ufa fannoo kai naaru naaru sia taikaannoo, kaqi mariannoo.

*Narí qummuarinnanara afu maqaida rakisianee qinau.*

*(Mat 24:36-44)*

<sup>32</sup> Mi taikara aukuanafa anianinnanara sia moo fannoo iridanoo mi faasaannara faqa suani yaqoo kamuqoo marinanoo fee kambiqaanoo fee, innaarunaindaraa qangiroouqa faqa qinee Anutuna amaaku faqa siamma iridaqa qini qikoofa narí kai mina iridanoo. Innee mi faasaannara sia irimariafanoo.

<sup>33</sup> Innee minara augaridaqa rakisidaqa qafaaqa.

<sup>34</sup> Mi faasaanna faiqi moora foora ainaina faqaafara foora mariannoo. Mi fasiqafa narí ainainirana oosana oosana narí ainainira faiqiuqa aadu aadu nisaukuki quqaseenoo eendaki augarira fasiqa qimaminoo anee aiqama ainainasaa amiqimasee rakisida qinee moosaa fidaqa qimasee finau.

<sup>35</sup> Innee miqikai mandee amiqimandee augarida mariaqa. Inni uriqararafa kaiqaa anianinnanara sia iri mariafanoo mifa eendaki anianoo fee eenda amuqusai fee maqee kaari maqarana namuqaqee aniraannoo fee suani maqee ururainanoo fee aniraannoo fee.

<sup>36</sup> Mifa tautummamaqasee ainainimarinna kamuqoo faiqaqee innanaki qumurainana mandaikamminnaranoo.

<sup>37</sup> Minara maqee qinee inni qimannimidaqa aiqamausa qimannimidaqa innee aiqamausara augariaqee qidaqa qinee qumiranara rakisida mariaqa.

## 14

*Yisuna ariraree qimasee tipundaarimaria.*

*(Mat 26:1-5; Ruk 22:1-2; Yoh 11:45-53)*

<sup>1</sup> Yuda maqannaasa firaa qoomaqa suqarara qaaraqanda ainnaaqarara qoomaqana faqa ooruku siai feemu qoomaqana faqa suqarafa adeedi ramafinau. Qaara faasaana kaqi mariqa qaaramookufanoo qoomaqa suqarafa qusaramafufaqa suqaqau. Mi qoomaqafa adeedi ramafufaqa aanaiqikirausa uriqararawsa faqa Mooseena sandufa akoofasauqa faqa suqufufaqa maasa naqimasee qumee faiqí anaasee sia irifaqee Yisuna umarasee aruanauree qiqau.

<sup>2</sup> Misa qiqau maasa sia qoomaqaki Yisuna aruanaura faiqí anaasee aanoo mandee maasa faqa dari foora.

*Afundimaru fadameena Yisuna akiaqa adianau.*

*(Mat 26:6-13; Yoh 12:1-8)*

<sup>3</sup> Yisufa Beetani maqusai Yeerusaree maqusa adeedi marufaqa manda namuana karoora arimaru fasiqana maaqaki marinau. Mi fasiqana auqu Simoona amarafa marinau. Yisufa mina karoora rukasoofanoo amiqimasee marinau. Yisufa mi maqanaki narana nee marufanoo anaasee moo mi maqanaki keeqanau. Mifa amiqira afundi maru fadameenna, moo sanda minauqu narada mina atuka rarakusee fadameena tatiqoofa afundimaruna firaa munnimma aqimaria fadameenna mi sandana anoona kai kaaqa amiqirafa maruna mina idaaqira ooninnai andina fooqaana auquqoonaki maru fadameenna uqirafa Yisufa maru maqanaki keeqafinoo mi fadameena taquna oosaa raudaseenoo mi fadameennana Yisuna akiaqa amoondunnaaqa adianau.

<sup>4-5</sup> Faiqí anaasee akaqausa miqoo mariusa mi anaaseena qafamasee aanoommasee narí qimami narí qimami qiqau, nanaree maa fadameenna amiqira afundi marinna fifau rairaa inoo fee. Mifa mi fadameenna mareeqee moo fasiqa amiseenooofau tiri handareeta munnimma maraseenooofau kudi fasiqa anaasee nimini. Miqi qimasee afeekaikamandee mi anaaseena aqiqau.

<sup>6</sup> Yisufa mi ufana iriseenoo qinau, See innee minnisaaqa, nanaree innee fifau mi anaaseena aqidee. Mifa amiqira idaaqira ainaina adia qimaqeenoo.

<sup>7</sup> Kudi fasiqa anaasee naaru naaru inniki moomoo marifaranoo, innee inneeqa kai oonu mafi irisee mi kudi fasiqa anaaseesa dadaaqiaqa, qinee sia kisaagasaa marianaura.

<sup>8</sup> Maa anaaseefa kaqikaqoo narí amanasaa qini dadaaqinoo. Mifa mi fadameenna qini qikundarana oorisa qini irisaa adiaqimaqeenoo.

<sup>9</sup> Maa ainainnara qimannimianaqa iriaqa sia aunuaqa, maa amiqira fasaasa ufana faiqí anaasee aiqama maa maqana afaaqasasa fidaqa qimannimidaqa maa anaaseefa maqee fadameenna qini adia qimaqainara qimannimifaqa sia maa anaaseenara aunifaranoo.

*Yudasifa Yisuna ueeqaaninna munnimmana maranau.*

*(Mat 26:14-16; Ruk 22:3-6)*

<sup>10</sup> Yisuna faiqi namu qisaukuqara taikasee qikunni ooqu qaara marasee faiqi namu misakiqari moo fannoo mina auqu Yudasifa Isakarioota maqusaindaraafa Yisuna mareeqee misa nisaukuki quqararee qimaseenoo raudamaki aanaiqikirausa uriqararawsunnai qumee kukeeqaki finau.

<sup>11</sup> Misa Yudasina ufa iriseeqa اساسامasee munnimma amiraree qufanoo Yudasifa miqooqari Yisuna ueeqaaninna faasaanara rakisinau.

*Yisufa narí faiqi namukinaana ueeqaaninnanara qumee kai qimannimisee rafaqqafinau.*

*(Mat 26:17-25; Ruk 22:7-14, 21-23; Yoh 13:21-30)*

<sup>12</sup> Yuda maqannaasa ooruku siai feemu qoomaqa aniroofaqa misa ainnaaqarara sipsipa aanaaqiuqa aruaninna faasaanasaa Yisuna faiqi namu aniree Yisuna irammiriqau, Maasa yamaqanaki yatinai fee ainnaaqarara qoomaqa deedaqianauree qufanoo Yisufa maaqi qimasee naamuaqinau

<sup>13-14</sup> Innee Yeerusaree maqusai oorureeqa qafaifanoo faiqí moo fannoo qafeeki nammari qumbiqasee aku maree finaqa mina faqa finaqa mifa keeqainna maqanaki mina faqa mi maqanaki keeqaqa. Keeqafiqa mi maqana akoona maaqi qimasee irammiriqau, Ufasaa rakisirafa aniara maaqi qinoo, moo rumma qinee faqa qeeqa faiqi namu faqa ainnaaqarara qoomaqa naanna rummafa yai fee maridanoo fee qifanoo qinaqamma iriaqa.

<sup>15</sup> Mi fasiqafa firaa rumma maaqa meeraqoo maru rummana firaa rummana narana quqee maru qaindafa faqa ooqumari maru siaqausa faqa deedaqira rumma inni uqannifiqaannoo. Innee minaki aiqama ainaina maasara deedaqamma qimaqaaqa qufaqa miqanda

<sup>16</sup> Yeerusaree maqusai ooruree Yisuna ufa anoona kai kambiqafufaqa mimau kai fiqau.

<sup>17-18</sup> Mi eenonnai Yisufa narí faiqi namu faqa qisaukuqara taikasee qikunni ooqu qaara marasee faiqi namu faqa ooru keeqafi nee mariqau. Nee marufanoo Yisufa maaqi qimasee narí faiqi namu qimanniminu, Qinee maa ainainnara qimannimianauranoo, innikiqari moo fannoo qiniara ueeqaaninafa qini faqa naidanoo.

<sup>19</sup> Mina faiqi namu mina irisoofanoo misa naundura furufarufaqa naadu naadu Yisuna irammiri mariqau, moo fannoo qinoo anee qiniaree q inanee qinee fee qifee moo fannoo moo fannoo miqi kai qimariqau.

<sup>20</sup> Yisufa misa irarufa iriseenoo qinau, Innikiqari qisauku taikasee qikunni ooqu qaara mararausakiqari maa qini difaanikinaana asauku aqusee feemu marasee nee marifa mifa kai qiniara ueeqaannoo.

<sup>21</sup> Qinee faiqí nimaaku tamummaqarausa akara ufamau qinee kuquanaura qini ueeqaaninna fasiqana numoo firaafa mariannoo. Mi fasiqafa sia kambiqainanoofau amana marini.

*Yisufa aafaqa neemariana oosana aranau.*

*(Mat 26:26-30; Ruk 22:15-20; 1Kor 11:23-25)*

<sup>22</sup> Misa ooqumarifi nee marufanoo Yisufa nariqa maqee maqee neemaru feemuna moo marasee dufi dufi qimaseenoo ruqi ruqi maseenoo narí faiqi namu niminoo maaqi qimanniminu. Innee maana marasee naaqa, qini qimaqi kikiqusira feemu maridanoo.

<sup>23</sup> Miqi qimaseenoo kaafa moo maqee maqee nee maru uainna nammarina maruna maraseenoo minara Anutunara dufi dufi qimaseenoo narí faiqi namu nimufaqa aiqamausa mina qumaree minakinaana naqau. Yisufa narí faiqi namu mi uainna nammarina nimidanoo maaqi qimasee qimanniminu,

<sup>24</sup> Maafa qini fidika kikiqusira nammarifa moomoosa adia nimaqeefan-dinafa maridanoo, qini fidika maafa Anutuna faqa faiqí anaasee faqa moodaanakikira ufa mapukunnimaqaaninafa maa fidikafa maridanoo.

<sup>25</sup> Qinee qimannimidaqa sia kafaa uainna maaqoo maqasaa naanauranoo Anutuna ququsaki innaarunai ooru fidaqa fuka uainna amiqirana naanauranoo.

<sup>26</sup> Miqi qimaseeqa misa moo amaana idi ramaseeqa maaqakiqari raudamaki asukunaki fiqa Oorifa aaqana ameemaanai ooru mariqau.

*Peetooroofa Yisunara sia qafaidee qianinnanara kooroo inau.*  
(*Mat 26:31-35; Ruk 22:31-34; Yoh 13:36-38*)

<sup>27</sup> Misa miqoo oonuroofanoo Yisufa qimanniminoo qinau. Tamummaqaraura akara ufa fannoo maaqi qimasee qiniara qidanoo, Anutufa sipsipa rakisirana arusaifaqa mina sipasipauqaindi miqooqari quqasee daraanifaranoo.

(Minara inni qimannimidaqa innee qini quqaqisee aiqama sandamafifaranoo.)

<sup>28</sup> Qinee kuqiranakiqari findifiqa inni noorinni Kariree maqa maaqai fuaauranoo.

<sup>29-30</sup> Peetooroofa Yisuna ufa iriseenoo qinau, Qinee sia uqanna ani minnisaanaura. Aiqaumasa ani minnisaifaqa qinee sia minnisaanauree qufanoo Yisufa nari qimaminoo qinau. Oo Peetooroo anee iria, Fafaa eendaki irafana anee qaaramoo kari qiniara siamma iri fee qinnaranoo. Miqi mandainanoo kookooraana qaara kari ufa qiannoo.

<sup>31</sup> Peetooroofa mina iriseenoo Yisuna afeekaikamandee qimaminoo qinau, Qinee sia uqanna aniara sia iridee qianauree ani faqa kuqanaura. Miqi qimasooafaqa aiqama Yisuna faiqi namu miqikai qiqaau.

*Yisufa nari kuquaninnanara ummaara arufanoo saqamaki innaaru qinau.*  
(*Mat 26:36-46; Ruk 22:39-46*)

<sup>32-33</sup> Miqooqari misa Keeseemane maqa maaqaki Oorifa aaqana ameemaanai marunaki asukunaki aniroofanoo Yisufa nari faiqi namu qimanniminoo qinau. Innee maaqoo ooqu marifi marifaqa qinee saqamaki oorureeqa innaaru qianauree qimaseenoo minamusara innee kaqi maaqoo marifaqa maa namusa kai qini faqa ooru fuaqa. Miqi qimaseenoo mifa Peetooroona faqa Yameesana faqa Yoohaneena faqa nifiqeenoo saqamai ooru fidanoo nari afaaqasaa quqeeffandinna ainainara irimarufanoo firaqqoo amuqusimarufanoo aundura fifau faafau ufanoo minamusa qimanniminoo qinau.

<sup>34</sup> Qini qimuqusaki qimuqusirafa firaqqoo maridanoo mi qimuqusirafa daruannoo fee qidaqa innee maaqoo maridaqa rakisifaqa.

<sup>35</sup> Miqi qimasee Yisufa kaqikaqqoo oonureenoo nari kai maqasaa aqufino nari afaaqai anianinna aupuraranara sia keeqaaniffee qimasee maa innaaruna qinau.

<sup>36</sup> Oo qini qikoofa qini qikoofa, anee aiqama ainaina amanaikimarianafa mariananoo, qinee manda nammari naannanara anee qinisaaqaraana mareeqee kaqinni aqusa. Sia qeeqa didiranara iria, aneenna aidinna ainaina kai qifaaqai quqaa.

<sup>37-38</sup> Yisufa miqi qimasee innaaru qimaseenoo kafaannai aniree nari faiqi namu qaaramoo marunnai aniree nindafoofaqa misa nisuku kaaqa faiqaqeeiqau. Yisufa Peetooroona moo auqu Simoona auqamasee qimaminanoo Simoona anee faiqaqee idanee anee sia fee amana qusasaa kai afu tautasee rakisinnaree. Innee aumaridaqa innaaru qida mariaqa innee miqidaqa sia nimaniranaki aqufifaranoo, inni irirafa kai afeeka marifaqa inneeqa uqanna kudoosaapee mariafanoo.

<sup>39-40</sup> Yisufa miqi qimasee qimannimiseenoo kafaa anirandeenoo indaaru gundee kai inoo innaaru qinau. Innaaru qimaseenoo oonu nindafoofaqa mina faiqi namu kafaa nisuku faiqaqeeiqau misa nifu fannoo ummaara-reenoo sia findi fuaqaa ufaqa findifi Yisuna kafaa qafamaseeqa nári faiqaranara nisaurusee ufara randaqau.

<sup>41</sup> Yisufa kafaa oonu innaaru qimasee anireenoo narí faiqi namu qimanniminoo qinau. Innee kaqi fee faiqaidee kaqi fee idooaidee. Doo saa doo aupurara aukwana doo anireenoo, doo qafaaqa manda oosana maree mariasa nisaukuki ueeqaaninna fasiqafa qini mara quqaannoo.

<sup>42</sup> Doo findi fifaqa fua. Doo qafaaqa qini ueeqee mari fasiqafa doo anidanoo.

*Misa Yisuna qumaraqau.*

*(Mat 26:47-56; Ruk 22:47-53; Yoh 18:3-12)*

<sup>43</sup> Yisufa kaqi misa faqa ufa qimarufanoo Yisuna faiqi namuqi qari qisaukuqara taikasee qikunni ooqu qaara mararanakiqari mina auqu Yudasifa aniranau. Amaana maqa aanaiqikirausa uriqarararusa faqa Mooseena sandufa akoofasauqa faqa Yuda maqannaasa faiqí firaasa faqa maqusai kaqi maridaqa faiqí moomoo Yudasina faqa niqiqoofaqa rakira duru saamu qumareeqa Yudasina faqa asukunaki aniqau.

<sup>44</sup> Faasai Yudasifa qimanniminoo, asukunaki innee aaqee foora qinee oonureeqa mi fasiqana amooqaanamma qafaaqa, mee innee randeemaria fasiqana amooqaanaura. Innee mina rumbamaree amiqimandee rakisisee maree fuaqa.

<sup>45</sup> Yudasifa anireenoo Yisufinnai oonureenoo oo ufasaa rakisira fee qimasee amooqanau.

<sup>46</sup> Amooqoofaqa mina faqa anusa mina qafamaseeqa qumarasee rumbamaree amiqimmasee rakisi qumara maree maree fiqau.

<sup>47</sup> Faiqí moo fannoo miqoo kikiqinoo mariufa mina qafamaseenoo narí rakira paipana qumareenoo nariraree qimaseenoo moo fasiqa aanaiqikirausa uriqararana ainainira faiqi aaqoo ateeka aqusanau. Yisufa qimanniminoo qinau.

<sup>48</sup> Innee qiniara mandaikamma nimaqee mari fasiqa fee qimasee duru saamu indaaiqa aniree qini qumaraidee.

<sup>49</sup> Faasaambaasaana moomoo kari akooqoo amaana maqaki keeqaidaqa faiqí anaasee ufa qimannimimarunausa maridaqa naqaa innee miqoo qini qumaraaqaana mariaasee. Tamummaqara fasiqauqa akara anoona doo mimau kambiqaaani. Doo qini qumaree fuaqa.

<sup>50</sup> Yisuna faiqi namu mina qafamasee quandaki miqooqari sandama qaraasa mambiqau.

<sup>51-52</sup> Misa Yisuna mara maree fufanoo moo kumaaraa fannoo qamunna kai narí afaqa ititaseenoo misa ninaaqiana fimarufaqa misa mina qafamasee mina faqa rumbaane qimasee qumarararufanoo mi kumaaraafa mafi narí qamunna rakeemma aquseenoo kaqisamu sandamaqaraasamminau.

*Misa Yisuna ufa suqiranaki quqasee iraqau.*

*(Mat 26:57-68; Ruk 22:54-55, 63-71; Yoh 18:13-14,19-24)*

<sup>53</sup> Misa Yisuna mara mareeqa aanaiqikirausa uriqararana maqaki quqaqau. Mi maqanaki aanaiqikirausa uriqarararusa faqa Mooseena sandufa akoofasauqa faqa Yuda maqanna faiqí firaasa faqa minaki faasai eendaki suqiqa mariqau.

<sup>54</sup> Peetooroofa misa ninaaqiana nianasaa qumee oonureenoo aanaiqiki-rausa uriqararana maaqa naambeeqai ooru keeqafinoo rakisimaru fasiqausa faqa ida aaqa ooqu marifi qaani marinau.

<sup>55</sup> Aanaiqikirausa uriqararansa maaqaki maridaqa Yisuna kuqaruaneera mina ummaarara randoosia sia paquriqau.

(Mooseena sandufa maaqi qimaqoofa, moodaa fasiqa fannoo qinnufafa sia anoonaikiannoo. Qaara fasiqa fannoo kikiqamafi qinafa mifa anoonaikiannoo. Misa minara iriseeqa faiqi qaaraqanda mi ufana qifaqa Yisuna ariraree qiqau.)

<sup>56</sup> Moomoosa aniree Yisunara unnufa qufanoo sia misa ufa fannoo moodaa karinoo marinau. Misa ufa fannoo naadu naadu qufanoo sia amanaikinoo marinau.

<sup>57-59</sup> Miqoo akaqausa findi fufaqa Yisunara unnufa maaqi qimasee qiqau, mifa maaqi qimasee qifaqa maasa iriqa qinee firaa amaana maqa faiqi usakaqoona aiqama rapeepamma aquseeqa qaaramoo faasaana aiqarainaga sia faiqi nisaukunnai usakaqaairana usakasaanauree qifaqa iriqa qufaqa misauqa faqa sia amana amana kai mi ufana qiqau.

<sup>60-62</sup> Misa miqi qimasoofanoo aanaiqikirausa misa uriqararafa aiqamausa nifusaa findifinoo Yisuna iranau. Misa ufa oosana oosana aniara qiafana ani ufa sia fee maridanoo fee qinaqa iriaqa qufanoo Yisufa sia ufa qinau, kaqi kasooinoo marinau, Miqi masoofanoo aanaiqikirausa misa uriqararafa qimaminau, anee kuqaa fee Anutuna asauku mundirafa maridane, anee kuqaa Anutuna amaaku amooqimaria fee maridane qufanoo Yisufa qinau eero qinee mina amaaku marinausa maridaqa, kasooqagee innee qini faiqi nimaaku qiqafeefaranoo, qinee uriqararana Anutuna aaqa asauku uqannai ooqufaaqee mariana qiqafeefaranoo mari inaga kasooqagee innaarunaindari asuru namufaqa qumuanaga mikamuqoo faqa innee qini qiqafeefaranoo.

<sup>63-64</sup> Aanaiqikirausa uriqararafa mina iriseenoo aanoommaseenoo nari qamunna parara qima quqaseenoo qinau, maasa fifau faiqi ufara randaidaqa, doo mina manda ufa iriafanoo innee minara naqi fee qidee qufaqa misa aiqama qiqau mifa manda oosana fiqararafa maridanoo nariara Anutuna amaaku fee qidanoo, kuqiranaki kai fuani.

<sup>65</sup> Miqi qimasooafa akaqausa Yisuna niqaara fida amaqaaseeqa qamunnannai afu ruumbamaqaaseeqa nisaukusamu oori aruseeqa iraqau, mina yafee ani arinoo fee qinaqa iria. Miqi qimasooafa minasaa rakisimaru maara fasiqausa mina mara mareeqa nisaukusamu oori ariqau.

*Peetooroofa Yisuna sia qafaidee qinau.*

*(Mat 26:69-75; Ruk 22:56-62; Yoh 18:15-18, 25-27)*

<sup>66-67</sup> Misa maaqaki Yisuna arira ufa qimarufanoo Peetooroofa maaqa kooqinni sundiauqa faqa idaki ooqufaaqee ufanoo aanaiqikirausa uriqararana ainainimaru manaaqafa aniree Peetooroona miqoo ida qaani marufanoo qafamaseenoo mi manaaqafa mina oori aiqumumaseenoo qimaminoo qinau anee Nasareeteendaraafa Yisuna faqa nuanafa mariananoo.

<sup>68</sup> Peetooroofa mina iriseenoo qaoo qinoo qinau, qinee sia minara iridaqa sia anee qiannufana oosana iridaqee qimaseenoo findufumakufanoo mi maaqana ququsa kooqi marunnai fufanoo kookooraana ufa qinau.

<sup>69-70</sup> Ufa qufanoo mi ainainira manaaqafa Peetooroona kafa ooqu qafamaseenoo miqoo marusa qimanniminau Innee maana qafaqa Yisuna faqa nimarifa maridanoo fee qufanoo Peetooroofa kaifaa qaoo

qinau. Kaqikaagoo marikufaqa miqoo mi fasiqausa marusa Peetooroona afeekaikamasee qimamiqa qiqau. Anee Yisuna faiqi namu marianafa mariananoo, anee naqi fee mandee qaoo qidanee, ani ufa fannoo ani kooroomamaqaifaqa iridaqa, anee Yisuna maqannaafa Kariree maqanna marianafa mariananoo.

<sup>71-72</sup> Peetooroofa mina irisee narí amana aqiqamasee qinau, qinee sia anoona ufa qimamiananoo Anutufa daruani. Qinee anee qiannanara sia uqanna minara iridaqee qufanoo miqi quqoo kai kookooraana kafaa ufa qinau. Peetooroofa mina ufa irisoo fanoo aagoo ruqianau Yisufa maqi qimaqoo ufanara oonumafi irinau. Fafaa eendaki anee qaaramoo kari qiniara sia fee qinanoo kookooraana qaara kari ufaqiannoo. Peetooroofa mina iriseenoo asauruseenoo ikiraqamaree quqasee finau.

## 15

*Misa Yisuna qumaree munu Piratoona ufaki quqaqau.*

*(Mat 27:1-2, 11-14; Ruk 23:1-5; Yoh 18:28-38)*

(Ooqai Mooseena sandufa fannoo sia asukunai ufa oosana oosana qinufafa sia anoona kambigaannoo fee qimaqoofa marufaqa misa mina rukiaseeqa asukunai ufa qiqau.)

<sup>1</sup> Iqaqoo kananaana aanaiqikirausa misa uriqararausa faqa Yuda maqannaasa faiqi firaasa faqa Mooseena sandufa akoofasauqa faqa aiqama uriqararausa faqa maasa asukunai qunufafa sia anoonaikidanoo fee qimaseeqa iqaqoofaqa Yisuna kaqi kaqi ufa suquseeqa nariqa Yisuna arifandinna ufana kaifaa andeeqaseeqa. Misa ufa andeeqaseeqa Yisuna mara maree sainandannai rumbamareeqa afiqa mareeqa Roomma maqanna kiapana Piratoona amiqau.

<sup>2</sup> Amisoo fanoo Piratoofa Yisuna irammirinau. Anee kuqaa fee Yuda maqanna karaambaiqa fee maridanee qufanoo Yisufa qinau anee qianandeemmiqa maridaqa.

<sup>3</sup> Aanaiqikirausa uriqararausa aniree moomoo unnufa Yisunara qimariqau.

<sup>4-5</sup> Piratoofa mina iriseenoo Yisuna kafaa irammirinoo qinoo, misa moomoo mandainainara aniara qidaqa, ani ufa sia fee marifanee anee sia fee qinnaree qufanoo Yisufa sia ufa qufanoo Piratoona aaquqanau.

*Misa Yisuna Piratoona kootaki quqaqau.*

*(Mat 27:15-26; Ruk 23:13-25; Yoh 18:39-19:16)*

<sup>6-7</sup> Aukuana aukuaana aiqama aukuaana Piratoofa ainnaaqarara qoomaqa saara moo adiafaaira ainaina Yuda maqannaasa nimianauree qimasee rumbaranakinaana moo iduku niminau. Nári nidimaruna uqanna idukuniminau.

<sup>8</sup> Mi aukuanna Yisuna ufa irimaria faasaana faiqi anaasee moomoo Piratoona oopisaki aniree qiqau. Anee ooqai aukuaana aukuanasaa faiqi moo idukusee qimariannana maqee maa aukuanna faqa moo idukusee qimia. Karafusa marina moo iduku qimianee qimasaida farafara imariqau.

<sup>9</sup> Piratoofa qinau, Amanee qinee Yuda maqanna karaambaiqa Yisuna iduku nimianauree qinau.

<sup>10</sup> Piratoofa aanaiqikirausa uriqararausa sia anoona marunara fifau rairai qidaqa Yisuna mareeqee Piratoona amunara irinau. Minara kai Piratoona amanee qinee Yisuna iduku nimianauree qinau.

<sup>11</sup> Aanaiqikirausa minara iriseeqa faiqi anaasee fuki faaki qufaqa misa Barabasinara iduku nimiannee qiqau. Mi aukuanna faiqi moo auqu



Barabasifa karabusaki marinau. Mifa akaqausa saimbaqa rakiranaki faiqí moo kuqannarusoofofa karafusaki quqau.

<sup>12-15</sup> Misa Barabasinara qufanoo Piratoofa kafa aqamausa qimannimino qinau. Yuda maqannaasa karaambaiqa qimariana minara naqi fee ianauree qufaqa misa moomoosa kafa faaqa quqasee qimamiqa qiqau, pirimmannai aunirira saqarisaa aruannee qufanoo Piratoofa misa irammirino qinau mifa nana manda oosana maraifagee aruanauree qufaqa misa firaqoo uqanna faaqa quqasee qiqau, pirimmannai aunirira saqarisaa aruaqee qufanoo Piratoofa faiqí anaasee moomoosa nidirana nimianee qimaseenoo Barabasina iduku nimiseenoo Piratoofa narí maara fasiqauqa nimisee maasa Roomma maqannaasa oosana marasee raitasaa qainna rumbeeqoo samu mina ataufakaqa aru umooqumasee afiqama-reeqa muru aun irina saqarisaa pirimmannoo aruaqee qinau.

*Amuka faqaa qafee auqusee afisumaaqau.*

*(Mat 27:27-31; Yoh 19:2-3)*

<sup>16-18</sup> Piratoofa miqi qimasoofofa sundiauqa iriseeqa Yisuna afiqama-reeqa koota maqakiqari rafudamakufaqa miqoo Piratoona fira amiqira maqa naambeeqai raitasaa qainna rumbeeqoo samuna Yisuna ataufakaqa aru umooqumaseeqa ataasa ataasa naaree qimasee fafaa aunirira saqarisaa aruanauree qimasee kiapana fira maaqa naambeeqai munusee aqama sundiauqa naaramasoofofa anireeqa qamunna moo maara fasiqa misa qamunna taatuqee arirana afisumaqasee amuka faqaa sanda saatu- nanda fooqaana mara maree karaambaiqa qafee fee qimasee Yisuna akiaqa aranaiqi afisumaqasee nisauku niqinaqa quqasee kiapana amandee mar- iandee mandee amandamasee qimamiqau, Oo Yuda maqanna karaam- baiqa sia dauni kuqinnaranoo kisaqasaa marinnaranoo.

<sup>19</sup> Miqi qidaqa sasamimi atekarasamu qumaree mina akiaqa rupeemma amidaqa firaqoo ataasa ataasidaqa mina afaaqai niqaara fidiamaqasee mina oorinni niqoori saunarafufaqa ataasa ataasa qimariqau.

<sup>20</sup> Misa ataasa ataasa qirana taikafufaqa misa saasaakoona arira qa- munna raipaqusee narí qamunna afisumaqasee aunirira saqarisaa firim- mannai arifandinnaqoo afiqee fiqau.

*Misa Yisuna afiqee Koorookata aaqanai fiqau.*

*(Mat 27:32-44; Ruk 23:26-43; Yoh 19:17-27)*

<sup>21</sup> Maqusai ari iseeqa Yisuna doo afiqee fimarufanoo kudoosaapeenoo narí aunirira saqari sia amanaikufaqa maara fasiqauqa faiqí moo narí maaqaindari aniroona aanai paqurimasee mina auqu Simoona amarafa. Sia Yisuna faiqi namukinaafau mina amarafa moo fannoo mifa Sireenee maqusaindaraafa Areekasandeerana faqa Rufusana faqa nikoofa marinau. Sundiauqa minara Yisuna aunirira saqari aku maree fua qimasee ariraru- fanoo mifa misa faaqaanara rufisee aku maree finau.

<sup>22</sup> Miqimasee misa Yisuna afiqa maree fifi ufaqa Koorookata amuaquna- musaa afiqee fiqau. Mi maqa maaqana auqu faiqí nikiqa amudaani fee qiqau.

<sup>23</sup> Yisuna miqoo munu quqasee uainna nammari marasee moo marasinna minaki quqasee minara naanneera fuki faaki qufanoo qaoo qimasee sia nanau.

(Mi marasinnana nári ufakiqari meerafee qimariqau. Mi marasinnafa namasinaqa sia afaqa aidafuanifeera amufanoo aidafirana maraane qimaseenoo sia mi marasinna nanau.)

<sup>24</sup> Marasinnara qaoo qimasoo faqa misa mina qumaree aunirira saqarisaa rummamaqasee pirimmannai aruseeqa uqeereeqeeqa rakiaraqau. Rakiaseeqa mina qamunnaufa faasai raipaqu quqaqoona mara maree kaatara foora sararamandee yafee maraannoo yafee maraannoo qimasaida maraqau.

<sup>25</sup> Suani maqee ururoofaqa naina kirooka aunirira saqarisaa ariqau.

<sup>26</sup> Yisuna arira oosana raufiqira saqarisaa akara rumasee aunirira saqari akiaqai aiqama qafaqeeera atukaraqau. Maaqi masee akara rinau. Maa fasiqafa Yuda maqannaasa karaambaiqa maridanoommi qimasee akararinau.

<sup>27</sup> Maara fasiqauqa karafusakinaana faiqi mandaikamannimaqee maruqanda ruumba quqaqoona minaqiqari mara maree Yisuna aqa minisee nariqa auniriranasaa arusee Yisunaindi qambaana rakiqasee miqanda aunirirana dinni dinni rakiqau. [<sup>28</sup> Miqimasoo fanoo ooqeenaa tamummaqara fasiqauqa akara anoona kambiqanau, misa qiqau, misa mina mareeqee manda oosana maree mariasaki quqee fanoo.]

<sup>29</sup> Yisufa aunirira saqarisaa dirinoo marufaqa faiqi anaasee moomoosa fiqaree aiqaree idaqa qufoonaridaqa ataasa ataasa qimasee manda ufa qida qiqau, anee maasa firaa amaana maqa rapeemasee qaaramoo faasaana kafa usakeennaree.

<sup>30-31</sup> Amana maqee aneenna kai tatuakinana maqasaa aqufinana asumu maria qimaru faqa aanaiqikirausa uriqararaura faqa Mooseena sandufa akoofasauqa faqa ataasa ataasa qidaqa nari qimami nari qimami qiqau, Mifa moomoosa asumu marirana nimirarimarifa nariara sia asumu mariannoo.

<sup>32</sup> Doo maqee Anutuna asauku mundirafa maasa Isaraee maqannaasa karaambaiqa auniriranasaaqari tatuaki aqufinaqa maasa irirana minasaa rusisee kuqaa Anutuna amaaku fee qianaara. Manda fasiqaqara dinni dinni nari saqarisaa aruaqanda miqanda faqa Yisunara ataasa ataasa qimariqau.

### *Yisufa kuqinau.*

*(Mat 27:45-56; Ruk 23:44-49; Yoh 19:28-30)*

<sup>33</sup> Suani qambaana akiaqa amummaqa ururoofanoo mi maqa maaqana aiqamai asukuna rafaqafinai. Suani afu safasasaa mundufanoo asukuna taikafufanoo kafa suani qanau.

<sup>34-36</sup> Asukuna taikararimarufanoo Yisufa faqa rumasee Eeburu ufakiqari qinai Eeri Eeri rama sabakatani maasa ufakiqari qini Anutu qini Anutu, naqaa fee ifanee qini minni qiseenee qimasoo faqa akaqa fasiqa anaasee miqoo marusa mandirira iriseeqa qiqau, Doo iriaqa mifa Eeriana aaraidaqinoo qufanoo faiqi moo fannoo Yisuna aunirira saqari atukaki sandee oonureenoo paadura au fooqaana maraseenoo maara fasiqauqa nari maqee maqee neemaru uainna nammarinaki raaramaseenoo aika maraseenoo minasaa rutaquseenoo Yisuna nammari naanifee qimasee uqeereeqee Yisuna afaurusaa quqasoofanoo qumbifiqamma namasoo fanoo amu fasiqafa qinai, Doo maasa rakisaa, Eeriaafa anireenoo aunirira saqarisaaqaraana tatuannoo fee sia fee tatuannoo.

<sup>37</sup> Yisufa mi nammarina qumbifiqamma namaseenoo firaa kari faqa rumaseenoo doo kuquaraasinai.

<sup>38</sup> Kuqufanoo aqee kai Yeerusaree firaa amaana maqakinaa qamunna dirirafa ammuqundari qambaana kai raaqumaree muqufi aqusanau. Mi qamunnafa naquqara maaqasaa ititara qamunna marinai. Minaki faiqi

sia keeqeemaria maqa marinau. Aukuana aukuana Anutuna aanaiqiki-rausa uriqararafa kai minaki sipsipa anaqa fidika mara maree mi maqanaki raaraa imarinau. Doo maqee qamunna anaqinoo marifaqa faiqi anaasee Anutuna aqa fimaria aana ititee marifa doo maqee atuanoo maridanoo.

<sup>39</sup> Maara fasiqauqa uriqararafa aunirira saqarisaa rakisimarufa Yisufa faaqaruna faqa kuquna faqa qafamaseenoo aaquqoofanoo qinau, kuqaa maa fasiqafa Anutuna amaaku maridanoo.

<sup>40</sup> Yisufa aunirira saqarisaa marufaqa anaasee akaqausa miqoo maridaqa nianasaa maridaqa rakisi mariqau. Misakiqari Saromeefa faqa Mariana amarafa Makadara maqusaindari anufa faqa, Mariana moo amarana faqa mifa kumaaraa Yameesa Yooseesa ninoofa marufa marinau.

<sup>41</sup> Mi anaaseenamusa Kariree maqusaindari Yisuna dadaaqimarusa mina faqa afaqaga aniusa mariqau. Sia misa kai, moomoo anaaseeuqa faqa Yisuna faqa Yeerusaree maqusai aniroosa ani marida aunirira saqarisaa rakisi mariqau.

*Yisuna ooni aamarai akundaqau.*

*(Mat 27:57-61; Ruk 23:50-56; Yoh 19:38-42)*

(Yisuna aukuana nari maqannaasa maaqimmasee madika indufusaida kuqufusa nikundee mariqau. Misa ooni firaana kasaqa aamara auquseeqa minaki keeqafufaqa dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>42</sup> Yisufa kuqufufanoo suani dupufanoo Arimateea maqusaindaraafa mina auqu Yooseefaana amarafa aniranau.

<sup>43-45</sup> Mi fasiqafa Yuda maqanna ufa suqiranaki keeqeemarufa marinau, aiqamausa minara kaaqa andeeqara fasiqa fee qimarufa marinau, maqee maqee Anutuna ququsa innaarunaindari maqasaa kambigaaaninnanara rakisi marufa marinau. Yisufa kuqu faasaana sabata deedaqira faasaanee qimarunasaa Yooseefaafa Yisuna iri duna sabata faasaana aunirira saqarisaa kaqi dirinoo mariandoo qimaseenoo anireenoo paasoosamasee Piratoona maaqaki kaqi keeqa finoo Yisuna iriara qufanoo Piratoofa Yisufa dauni kuqunara tautumasee maara fasiqauqa misa uriqararana aaramaseenoo iranau. Yisufa kisaagasaa fee kuqinoo fee qimaseenoo mi sundiana ufa iriseenoo Yooseefaana doo maraannee qufanoo

<sup>46</sup> Yooseefaafa raudamaki qamunna firaana moo feefaurumamaree oonuree Yisuna iri saqarisaaqaraana tatu quqaseenoo qamunnasaa kukuqa mandee aku mareenoo ooni aamara auquqoo madikanaki Yisuna iri quqaseenoo ooni firaana quanda quandammeeqeenoo ooni aamarasaa ititanau.

<sup>47</sup> Mariana amarafa Makadara maqusaindaraa anaaseefa faqa Mariana moo amarafa faqa Yooseesana anoofa miqoo rakisida iri quqaranara qafee mariqau.

## 16

*Anaaseeuqa madikaki oonu qafaqau.*

*(Mat 28:1-8; Ruk 24:1-12; Yoh 20:1-10)*

<sup>1</sup> Yisuna iri kaqi ooni aamaraki marufaqa Mariana amarafa Makadara maqusaindaraafa faqa Mariana moo amarafa Yameesana anoofa faqa

moo anaasee Saromeesa faqa Sabata faasaana aiqaroofaqa kuqimariasa akunnimaqee maria marasinna feefaurumamaree Yisuna irisaa akuanee qimasee mi eendanaki deedaqiqau.

<sup>2</sup> Kananaana iqaqoofanoo suani maqee ururoofaqa mi anaaseesa Yisuna akundoo ooni aamaranaki fiqau.

<sup>3-4</sup> Aanai fidaqa misa narí qimami narí qimami qiqau, firaa oonitia fannoo ooni aamara ititanoo marifaqa yafee dadaaqinaqee umbaqi quqasee fee marasinna aku amaqqeefaree qimasee oonu qafooofanoo ooni faasai quanda quandammeeqee mafi aquqoofanoo marinau.

<sup>5</sup> Misa ooni qafamasee ooni aamaraki keeqafi qafooofanoo asauku uqannai kumaaraa moo fannoo qamunna eekara arirana afisusee ooqu marifufaqa qafamasee tautumasee kaaqa rufiaqau.

<sup>6-7</sup> Tautumasee rufioofanoo mi kumaaraafa qimannimino qinau sia tautumasee rufiaqa. Innee Yisu Nasareete maqusaindaraana aunirira saqarisaa pirimmannai aruanara randee mariafanoo, mifa sia maaqoo maridanoo findi finoo maridanoo. Doo qafaqa, maaqoo misa mina iri quqeeaa. Doo fuaqa maa ufana narí faiqi namufaqa Peetoorona faqa qimannimiaqa. Yisufa inni noorinni Kariree maqa maaqai finoo, innee miqoo oonureeqa narí qundee kai iqa mina qafeefaranoo.

<sup>8</sup> Mi anaaseeuqa mina iriseeqa ooni aamarakiqari rafudamakufaqa sandamaqaraasammiaqau. Kaaqa rufiarana faqa naindiri roofaqa sandaqau. Misa maqusai oonureeqa kaaqa rufiasee sia moosa qimannimiaqau.

<sup>9</sup> Yuda maqannaasa Saririqara amaanasaa fee qimasee amaanasara indaaruaqa faasaanee qimariqau. Mi indaaruaqa faasaana sandoo anaasee namusa anu faasaanasaa Mariafa Makadara maqusaindaraafa naaree Yisufa findifuna qafanau. Ooqai Yisufa kaqi maru kamuqoo faafasaaqa narí anoona amarana mi Mariana aunduraki faafasaaqa qisauku dinni taikasee dinni ani qaara marasee marufanoo Yisufa kaqi maruqoo mina aunduraindaraa faafasaaqa niqiqoofaqa rafudamaki sandamafiqau. Yisufa mi anaaseena afusaa narí kuqiranakiqari findifuna indaaruu kooroo inau.

<sup>10</sup> Yisufa mi anaaseena afusaa kooroomambunara Yisuna aiku asauku oonu maaqi qimasee qimanniminau,

<sup>11</sup> Yisufa kuqiranakiqari findifinoo marifaqa qinee qafeeqee qufaqa misa kaqi minara soofaridaqa ikiraqee maruqoo marufaqa mi anaaseenara unna qiifoo qiqau.

*Yisufa kuqiranakiqari findifinoo narí faiqi namukiqari qaaraqanda kooroo inau.*

*(Ruk 24:13-35)*

<sup>12-13</sup> Yisufa kafaa moo oosana maraseenoo narí faiqi namukina qaaraqanda nifusaa kooroo inau. Miqanda Yeerusaree maqusaindari moo maqusa kaqikaa maqusai fimarufanoo Yisufa aanai nifusaa kooroomambufaqa miqanda oonurandee aniree Yisuna aiku asauku qimannimufaqa unna fee qiqau.

*Yisufa narí faiqinamuki kooroo inau.*

*(Mat 28:16-20; Ruk 24:36-49; Yoh 20:19-23; NiFa 1:6-8)*

<sup>14</sup> Yisufa mina inaaqiana narí faiqi namu qisaukuqara taikasee qikunni ooqu moodaa mararusa narana nee marufanoo kooroo inau. Kooroomafinoo misa mina qafee marusa unna fee qunara niqinoo qinau, inni irirafa ufa rukiee marisa mariafanoo sia qiqafee mariasa ufara innee irimari-afanoo.

<sup>15</sup> Yisufa miqi qimasee qimannimiseenoo kafaa maaqi qimasee qimanniminiau. Innee maa maqa maaqana afaaqasasa aiqama maqannaai iannai uqanna oonureeqa qini amiqira fasaasa ufa qimannimiaqa

<sup>16</sup> Qinisaa irirana rusimariasa irirana rusidaqa nammari maree mariasa misa innaarunai naaru marira asumu mareefaranoo. Qinisaa sia irirana rusimariasa misa nariranaki fifaranoo.

<sup>17</sup> Qinisaa irirana rusimariasa maa afeeka ainainna misaki marinaqa qafeefaranoo, misa faiqi naundurakinaa faafasaqa qini duqusaa niqiqee-faranoo misa moo maqannaasa ufa sia nári iri marianakiqari qifaranoo.

<sup>18</sup> Faiqi kuqannarimari sakanifa uqaqanimisainaqa sia mandaikifaranoo. Misa ufaaqa namasee sia kuqifaranoo. Misa nári nisauku aurimariasasaa rusisaifaqa findi fifaranoo.

*Yisufa innaarunai ooru fu ufafa.*

*(Ruk 24:50-53; NiFa 1:9-11)*

<sup>19</sup> Yisufa narí faiqi namu faqa ufa qiqisoofanoo Anutufa mina uqeereeqeenoo innaarunai narí aaqa asauku uqannai quqasoofanoo miqoo ooqu marinau.

<sup>20</sup> Yisufa innaarunai ooru fufaqa mina faiqi namu aiqamai fifainidaqa Yisuna amiqira fasaasa ufa qimannimiqa niqau. Misa miqi marufanoo Karaambaiqa qumee dadaaqufanoo faiqi anaasee misa ufara kuqaa fee qiaqeera faiqi sia auqaaqaa ira afeeka nimufaqa auqoofanoo anoona kambiqee marinau.

## RUKA

### Yisuna amiqira fasaasa ufa Rukaafa akara rinau.

#### *Rukaafa akara oosana aranau.*

<sup>1-2</sup> Oo maa fasiqa Tiiofirusa maasaki Yisunasaagari kambiqoo ainainara moomoo fasiqauqa amanamasee akara riqau, Yisufa kambiqooqooqari minara qimannimimarusu misa qimannimufaqa akara riqau.

<sup>3</sup> Oo Tiiofirusa qinee Rukaasa Yisufa kambiqooqooqari mifa niniunara randoorandaamasee amiqimasee iriseeqa qinee faqa padimasee akara ruanauree qimaseeqa akara rummamaqaidaqa.

<sup>4</sup> Anee kuqaa anoona ufa tia irianneera akara rumamaqaidaqa.

#### *Yoohanee nammari nimi maruna maqaaninna ufafa.*

<sup>5</sup> Mi ufana oosana maaqimminoo marinau, Eeroodeefa Yudeeaa maqa maaqaki karaambaiqa maru kamuqoo Yisufa kambiqanau, mi aukuanu Yeerusaree amaana maqasaa rakisirafa moo mina auqu Seekariafa marinau. Amaana maqasaa rakisi marusa faiqi oosana oosanakiqari mariqau, nuqufaqaasa mariqau, Seekariafa Abiaana oosanakiqari marinau. Mina anaqa Aarona akeeku akaaku mina auqu Eerisabeeta nammarifa marinau.

<sup>6</sup> Mi qafaqiganda Seekariafa Eerisabeetasa andeeqasee Anutuna ufamau fimaruqanda mariqau. Aiqaama karaambaiqa Anutuna aaquqira ufa faqa naamuqira ufa faqa mi mau fimaruqanda mariqau.

<sup>7</sup> Eerisabeeta nammarifa aafanaasee marunara miqanda asooqaqeeqa faiqi siaqiganda mariqau.

<sup>8</sup> Moo kari nari saika faasaana Seekariafa Yeerusaree amaana maqaki keeqafinoo nari amaana maqasaa rakisira saika Anutuna afusaa mina saika qimari fee qimarufanoo maree marinau. Amaana maqasaa rakisi marusa misakiqari yafee amiqira unda imari nammariina amaana maqaki suqee maria qaindanasaa suqaannoo fee qimasee masisa rutukiara fooramasee Seekariafa uqannifiqasoo fanoo findifinoo mi amiqira undana imaru nammariina idu qumbiaramasoo fanoo qeemarufaqa mikari faiqi anaasee moomoo amaana maqa naambee qai maqusai suqufufaqa innaaru qimariqau. Amiqira unda imari nammariina qumbiaramasaa fanoo qaidanoo mina muna fannoo faiqi anaasee innaaru qimariifa mi ida munnara foora ooru fidanoo Anutuna aiki ambuidanoo misa innaaru kooroidanoo.

<sup>9-11</sup> Seekariafa mi nammariina idu qumbi marufaqa faiqi anaasee madaana innaaru qimarufanoo Seekariafa nariara amaana maqaki marifanoo mi nammariifa qeemaru qaindana aaqa Karaambaiqa Anutuna qangiroo moo fannoo miqoo kai kambiqafufanoo Seekariafa miqoo marufanoo qafanau.

<sup>12-13</sup> Seekariafa mina qafeenoo tautinoo rufianau. Tataqanoo marufanoo mi qangiroofa Seekariafa qimaminoo qinau. Seekariafa sia rufiaa, Anutufa ani innaaru qirana irinoo ani anaqa Eerisabeetana dadaaqinanoo ani amaaku maqaannoo, Maqasainana anee mina auqu Yoohaneenee qia.

<sup>14</sup> Mi faiqina maqasainaqa ani faqa moomoosa asafaranoo.

<sup>15</sup> Anutufa minara amiqira fasiqa auqufaqa fee qiannoo, uainna nammari fee afeeka nammari fee sia naannoo mina maqainnaqooqari Anutuna naaquqara marauna fannoo aakufi mariannoo.

<sup>16</sup> Mifa Isaraee maqannaa moomoosa Anutuna ufa minnisee kaqirunna fi-mariasa kafaa naarameeqee nariqa karaambaiqa Anutuna aramandunnai quqaannoo.

<sup>17</sup> Mifa Anutuna ufa marasee qimannimimarifa mifa maqasaa fasiqa uriqararafa afeeka Anutuna tamummaqara fasiqa ooqai maruna Eeriaana fooqaafa afeeka mariannoo. Mifa faiqi nikausamara faiqi minnisee furufari mariasa quandakina nári faiqi namuara nimuqusinaqa moodaanaki kifaranoo. Ufa rukiee mariasa faqa mareeqeenoo andeeqee mariasa mariranaki quqaannoo. Miqi marifanoo mi fasiqafa faiqí anaasee mareeqee karaambaiqa qumiranaki amanaikianno.

<sup>18</sup> Mi qangiroofa miqi qufanoo Seekariana aaquqoofanoo mi qangiroona qimaminoo qinau, naqimasee mi ainainafa kambiqaanoo fee, Sia amana, qinee nauraiqi maridaqa, qini qinaaqa faqa asooqa maridanoo.

<sup>19</sup> Mi qangiroofa mina ufa iriseenoo quandafi qimaminoo qinau, Qinee Kabarieera maridaqa Anutuna afusaa kiki iqa marausa maridaqa. Mifa kai qini diqaiifaqa maa amiqira ufana ani faiqí asumu faiqi aanaaqi maqemaria faasaana kambiqaanoo fee qunana sia iriananoo.

<sup>20</sup> Anee qini ufa sia iriannana akiaqara ani ufa akia finana mariinana maa qimamunna ainainafa kooroomafinanoo ani ufa rakeeianno.

<sup>21</sup> Seekariafa faqa qangiroo faqa Yeerusaree amaana maqaki mi ufana narí qimami narí qimamidaqa marufaqa faiqí anaasee maqusai Seekarianara kisaagasaa afeesida marusia qiqau nanaree kisaagasaa amaana maaqaki maridanoo fee qimarufanoo Seekariafa amaana maqakiqari raudeenoo qimannimirara oo raqoofanoo sia amanufanoo asaukunoo qimanniminu.

<sup>22</sup> Faiqí anaasee mina ufa akiafuna qafamasee oo amaana maqaki Anutuna kooroo irana moo qafeenoo fee qiqau.

<sup>23</sup> Miqooqari Seekariafa amaana maqaki ainainirana taikasoofanoo moo fannoo mina amaaqaki aniroofanoo Seekariafa doo amaaqa finau.

<sup>24</sup> Miqoo marufanoo mina anaqa Eerisabeeta nammarifa amuaqu uqaikufanoo moodaannai qisauku quqoonasaa maaqaki kai marinau.

<sup>25</sup> Eerisabeeta nammarifa qinau, doo maqee Anutufa faiqí anaasee nifusaa qinee kisaagasaa marunna sia faiqi maqaunna qisaurirana taikaqiseenoo.

*Kabarieerafa Yisuna maqaaninnanara kooroo inau.*

<sup>26</sup> Eerisabeeta nammarifa amuaqu uqaikinoo marufanoo dinni taikasee dinni ani moodaa quqoona aiqaroofanoo Anutufa narí qangiroo moo auqu Kabarieerana aqiqoofanoo Kariree maqa maaqaki kaqikaa maqusa Nasareetee maqusai ooqufinau.

<sup>27</sup> Mifa maanaqa uqanna ufa qimamiraree qimaseenoo ooqufinau. Mi manaqana auqu Mariafa. Yooseefaafa karaambaiqa Dafidina ati maraanifeera utaaqama amaqaqoofanoo maru manaqana Mariana qimamiraree qimasee ooqufinau.

<sup>28</sup> Mi qangiroofa Mariafa maruqoo anireenoo amandeenoo qinau. Asoorafa aniki mariani, karaambaiqa ani faqa kukeeqanoo maridanoo dadaaqidanoo doo firaaqoo ani amiqi amiqinoo.

<sup>29</sup> Mariafa mina ufa iriseenoo tautinoo mina ufa anoonara firaaqoo randanau.

<sup>30</sup> Miqufanoo qangiroo fannoo qimaminoo qinau, Oo Maria sia rufiaa doo Anutufa narí afaarirana anisaa quqeenoo.

<sup>31</sup> Anee amuaqu uqaikinana akoonaiqi maqaseenana mina auqu Yisunee qinnaranoo.

<sup>32-33</sup> Mifa uriqararafaikinaqa misa minara firaaqoo uriqarara Anutuna amaaku fee qifaranoo. Karaambaiqa Anutufa Yisuna mareeqeenoo mina akeeku akaaku Dafidina aanna ramasee uriqarara karaambaiqaikianoo. Yakooboona atiuqa Isaraee maqannaasa naaru naaru misa karaambaiqaikianoo, naaru naaru sia taikaannoo miqinoo mariannoo.

<sup>34</sup> Mariafa mi qangiroona ufa iriseenoo qinau, Qinee maanaaqa uqanna maridaqa naqimasee anee qianandee faiqi maqaanauree.

<sup>35</sup> Qangiroo fannoo iriseenoo qimaminoo qinau, Anutuna naaquqara andeeqara maraquna fannoo ani aakufinanoo Anutuna afeeka anisaa mariannoo, minara misa mi naaquqara faiqi anaaqinara Anutuna amaaku fee qifaranoo.

<sup>36-37</sup> Maria aneenna ati Eerisabeetanara iria asooqa faiqi maqarana sia amana marifa doo maqee dinni taikasee dinni ani moodaa quqoona aundurai amuaqu uqaikinoo maridanoo, minara ririmma miqinoo Anutufa sia moodaa ainaina sia amanaikiannoo doo aniara faqa qunnana amanaikiannoo.

<sup>38</sup> Mariafa qangiroo ufa iriseenoo qimaminoo qinau. Qinee Anutuna ufamau fimarunausa maridaqa anee qianna ainainafa amana qiniki kambiqaannoo, miqi qufanoo qangiroo fannoo quqasee finau.

*Mariafa Eerisabeeta nammarifa marunnai fu ufafa.*

<sup>39</sup> Mariafa miqoo kaqikaqoo marinoo unnaaqa mammareenoo Nasareetee maqusaindari Yudeeaa maqamaaqai Seekariana maqusai kisaaqasaa faiqanoo fifiufanoo oorureenoo

<sup>40</sup> Seekariana maaqaki keeqafinoo Eerisabeeta nammarina amandanau.

<sup>41</sup> Eerisabeeta nammarifa Mariana amandarana irufanoo mina arandanakinaa faiqi fannoo kasinau. Kasufanoo Anutuna naaquqara maraquna fannoo Eerisabeetana aakufufanoo nari Mariana amuaqu uqaikianinnana sia irufanoo maraquna fannoo mina qimamufanoo firaaqoo Mariana qimaminoo qinau.

<sup>42</sup> Aiqama aanaaseekina Anutuna firaaqoo amiqi amiqi ianinafa mariananoo, anee maqeenaa faiqi anaaqina Anutufa amiqi amiqi ianinafa mariannoo.

<sup>43</sup> Oo qini karaambaiqa anoofa uriqararafa nanaree anee qini qi qafarara aninane qinee oorudupirauusa maridaqa.

<sup>44</sup> Anee qini qimandaananoo qini faiqi qiranandakiqari asasinoo kooripoo inoo.

<sup>45</sup> Karaambaiqa ani qimamu ufana irisee kuqaa fee qimasee iriannana akiaqara mifa ani amiqi amiqiannoo.

*Mariana اساسira ufa.*

<sup>46-47</sup> Mariafa mi ufana iriseenoo اساسmaseenoo qinau, Qini qimuqusa karaambaiqa amooqidanoo, qini daunduraindari Anutunara اساسidanoo innaarunai asumu marirana qimimarifammi.

<sup>48-49</sup> Qinee oorudupimasee mina ufa irimarunausa marunanoo kaqi qiniara irinoo, firaa afeeka faqaa Anutufa firaa ainaina qiniki qinara, maaqooqari aiqama maqasaa fasiqa anaasee qiniara amiqi amiqi qifaranoo.



Mifa naaquqara andeeqara auqu faqaafa maridanoo, mina ufara rufiee mariasa nifauarana nimidanoo.

<sup>50</sup> Magee mariasa faqa miqoo kambiqainausa faqa naaru kambiqainausa faqa nifauarana nimiannoo.

<sup>51</sup> Narí amudaanaiqimari asaukuna uqeeraseenoo aanoo

imaria fasiqa anaaseesa nári firannaira irimariasa raurukamasanau.

<sup>52</sup> Mifa uriqaree maria karaambaigausa qumara muqufi quqaseenoo uree-qarausa qumaree uqeeranau.

<sup>53</sup> Mifa naararee mariasa amiqira narana ainaina nimuaqu manni-maqaseenoo moomoo narana faqaasa kaqisamu fuageera niqiqanau.

<sup>54</sup> Mifa maasa Isaraee maqanna nikeeku nikaaku ufa qimannimuna anoonaikamma nimaqanau,

Mifa narí ainainira faiqi Isaraee maqannaasa dadaaqinau.

<sup>55</sup> Abarahaamanara faqa iriseenoo amuqusufanoo dadaaqinoo mina aiku asauku faqa naaru naaru dadaaqiannoo.

<sup>56</sup> Mariafa mi ufana qimaseenoo qima taikaseenoo qaarammoo quqoona miqoo Eerisabeeta nammarina faqa marinoo quqasee narí maqusai Nasa-reeteenni finau.

*Nammari nimimaru Yoohaneena maqoo ufafa.*

<sup>57</sup> Mariafa narí maqusai fufanoo Eerisabeeta nammarifa marikinoon innaamunai oonureenoo akoonaiqi maqanau.

<sup>58</sup> Maqasoofanoo mina maqusanaasa faqa mina ainaina faqa iriseeqa oo Anutufa maa asooqana amiqi amiqi inoo fee qimasee mina faqa asasiqau.

<sup>59</sup> Maqasoofanoo mi faiqifa moodaa amaana marasoofaqa misa anireeqa Yuda maqannaasa oosana mareeqa nári fainanduidaqa nipata aukuannee qimasee mi faiqi anaaqina apata aukusee narí akoona amaranaikiraree qimasee aniusufiqau.

<sup>60</sup> Miqi qufanoo mina anoofa Eerisabeeta nammarifa qinau, sia narí akoona amaranaikiaqa mina auqu Yoohaneefa mariannoo.

<sup>61-63</sup> Misa iriseeqa qiqa, Oo ani atiuqaki sia mi nuqufa maridanoo, naqimasee fee mina auqu raanauree qimaseeqa faiqi aanaaqi akoona Seekariana ufa akiarana nisaukunoo iramirufanoo Seekariafa papiqa faqa kirifi faqa asaukunoo qimiaqee qufaqa amufanoo maa faiqina auqu Yoohaneefa mariannoo fee qimasee akara rinau. Akara rumasoofaqa aiqamausa qafamasee tautiqau.

<sup>64-65</sup> Miqimaseenoo Seekariana ufa akiarafa rakeeinau. Rakeemafufanoo Anutuna amooqira ufa aiqamausa nifusaa qimarufaqa aiqamausa qafamasee rufieeqa niqoonausa qimannimufanoo miqooqari aiqamai Yudeeaa aaqana maqa maaqaki daraaninai.

<sup>66</sup> Aiqama mi ufana irusa mi faiqi anaaqinara innooqafinoo nana firaa saikey maraanno fee qimasee randaqau, karaambaigafa afeeka minaki akooqoo marifaqa qafaidaqa.

*Seekariana maraquna aakufufanoo ufa qimanniminai.*

<sup>67</sup> Seekariana ufa rakeemafufanoo Anutuna naaquqara maraquna fanoo mina aakufufanoo tamummaqaseenoo ufa qinai.

<sup>68</sup> Isaraee maqanna Anutufa anireenoo narí faiqi anaasee idukunnisainara minara karaambaigara dufi dufi qianaara.

<sup>69</sup> Mifa amudaanai qimasee asumu maraaninnana narí ainainira faiqi Dafidina atikiqari uqeereeqeenoo.

<sup>70</sup> Minara ooqai narí naaquqara tamummaqara fasiqauqannai maasa maa ainainnara qimanniminai.

71 Mifa maasa namuqaasaa ititannimaqasee aiqama maasara fidiaga imariasa afeeka rafaaga fuannoo.

72-75 Mifa narí qimaqoo ufanara irianauree qeeqa naaquqara moodaanaki kira ufa iriseeqa mimau dadaaqianauree qinau.

Mifa oori runusee Abarahaamana qimaminau, minaki mifa maasa namuqaa nisaukukinaana mareeqee paasoosiranaki quqaqisainaqa maasa kaqi marianna kamuqoo mina naaquqara andeqara fasiqa anaasee mariannanara qimaminau.

76 Oo qini faiqi aanaaqi misa aniara firaa uriqarara Anutuna tamummaqara fasiqa fee qifaranoo.

Anee karaambaiqa afunni fidana mina aana afisinnaranoo.

77-79 Anutufa maasara amuqusi marifa nifauee marifa maridanoo maasa innaarunai marira asumu mararafa doo suani qamannimaqeenoo foora inoo maridanoo innaarunaindari maasa kuqiranakiqara foora asukunaki

mariasasaa qaannoo maasa asoora aatata niku raannanara qaannoo.

Qini faiqi minara anee karaambaiqa faiqi anaasee qimannimia, nariqa mandainaina ikairi karaambaiqinnai maree aniraifanoo mininisaannoo, minannai Anutufa innaarunai asumu marirana nimianoo, Seekariafa doo mi tamummaqara ufana taikanau.

80 Seekariasaa Eerisabeeta nammarisa faiqi aanaaqi fannoo innooqeenoo uriqarara maraquna faqaafa findifinai, Isaraee maqanna nifusaa kikiqiranara deedaqidanoo kumaarasaa kaasau maqa maaqaki kai marinai.

## 2

### *Yisufa kambiqoo ufafa.*

*(Mat 1:18-25)*

(Mi aukuanna Roomma maqannaasa aiqama aanaamuru rafaafusee misa kai maaqanna maaqanna kaqikaa kiapausaikammafi rakisi nimaqee mariqau, aiqama kaqikaa kiapausa uriqarara kiapafa Roomma maqusai maridanoo miqooqari mifa aiqamai rakisi nimaqee marinai.)

<sup>1</sup> Mi aukuanna mi uriqarara kiapana auqu Aukustusafa marufaqa mina asauku ameemaanai aiqama aanaamuru mariqau, Aukustusafa narí asauku ameemaanai marusara nariqa nikaaku nikaaku maqusaki suqufiqa Roomma maqanna kiapana papiqaki nuqu akararuane qufaqa miqimiqau.

<sup>2</sup> Roomma maqannaasa indaaru nuqu maroo kari Kiriniusafa Siria maqa maaqaki kaqikaa kiapafa marinai.

<sup>3</sup> Aiqama maqannaasa Aukustusana ufa iriseeqa andeqasee nariqa nikaaku nikaaku maqusai nuqu maraaqera suqi mariqau.

<sup>4</sup> Yooseefaafa ooqeenaa Isaraee maqanna karaambaiqa Dafidina ati marufa Kariree maqa maaqakiqari kaqikaa maqusa Nasaretee marufa miqooqari Yudeeaa maqa maaqaki kaqikaa maqusa Beetareeqeemma maqusai Dafidifa mariu maqusanaki auqu maraanifeera ooqu finai.

<sup>5</sup> Mariafa Yooseefaana utaaqama ama qarafa amuaqu uqafaqa maridanoo Yooseefaana faqa ooqufinai.

<sup>6</sup> Miqanda ooqu Beetareeqeemma maqusai ooquroofanoo Mariafa innaamunai firafa kambiqoofanoo narí ooqa faiqi akoonaiqi maaqimaseenoo maqanau.

7 Miqanda Beetareeqeemma maqusai ooquree faiqara maaqara ran-doosia faiqí anaasee moomoo suqufufaqa aiqamaki qumbiqafunara buri-makau faiqee maru maqana qafamaseenoo Mariafa nari faiqi minaki maqanau, maqaseenoo suara aruandoo qimaseenoo qamunna kisaaga anaqiranannai kukuqammeeqeenoo burimakau difaaniki faiqamaqanau.

*Qangiroouqa sipsipasaa rakisimarusaa kooroomannimiqau.*

8-9 Mi eendanaki faiqí akaqausa maqusa dinni atinai nariqa sipsipasaa rakisida marufanoo karaambaiga qangiroo misa maruqoo kooroomafu-fanoo karaambaiga kaaqa qarafa qoomara foora misa maruqoo rupannoo ufaqa firaaqoo rufioofanoo mi qangiroofa qimanniminoo qinau.

10 Sia rufiaaga, amiqira fasaasa ufa aiqama maqa maaqakinaasa firaa-asasira ufatia qimannimirara qumidaqa.

11 Maqee eendaki, inni innaarunai mareefandinnana asumu maraaninafa Anutuna asauku mundirafa karaambaiga fannoo Dafidina maqusaki kambiqeenoo.

12 Maaqimasee paquriqa mifammifoo qiaqa, burimakau faiqeemaria maqanaki faiqi aanaaqi mina anoofa qamunna kisaaga anaqiranannai kukuqammeeqeenoo burimakau narana amimaru difaaniki faiqama amaqaqafanoo innee oonuree qafeefaranoo.

13 Miqi qufaqa innaarunaindaraa qangiroo moomoosa uqanna tautumasee kooroomafufaqa Anutunara asasira idi raidaqa maaqi qiqau.

14 Innaarunai sandaaqaindaraa Anutuna amooqirana amia, maqasaaqaraasakiqari Anutufa aidimarisaki naundura asooarafa misaki mariani.

15-18 Qangiroouqa mi idina ramaseeqa innaarunai oorufufaqa sipsipasaa rakisirausa nari qimami nari qimamiqa qiqau, doo maree Beetareeqeemma maqusai oonuree karaambaiga fannoo qimannimi ainainara qafaa, qimasee sandee oonuree Yooseefaana faqa Mariana faqa faiqi aanaaqi burimakauqa difaaniki faiqaqee maruna faqa paquriqau, paqurimasee Yooseefaasa Mariasa qangiroo maa faiqinara qimannimu ufana qimannim-ufaqa akaqausa mi ufana ati irimarusa irufanoo naaquqanau.

19 Mariafa mi ufana iriseenoo aundura quqaseenoo minara firaaqoo iridanoo randanau.

20 Sipsipasaa rakisirausa anirandee fidaqa nariqa irunara faqa qafoonara faqa qangiroo ufamau fiqa paqurunara faqa asasira idi raqau.

*Yisuna fainanduqu ufafa.*

21 Dinni taikasee dinni ani qaaramoo faasaana aiqarofaqa Yuda maqannaasa nari fainanduqira oosana marasee akoonaiqi aanaaqi afaaqa ati auku aqusee auqu raqau. Misa Yisuna faqa miqiraree qimasee miqimasee auqu rararee qiqau, sia kaqi auqu raqau, Mariafa kaqi marukamuqoo qangiroo fannoo qimamu auquna Yisunee qiqau.

*Amaana maqaki Yisuna asai neeqa aandau tatufunaqau.*

22 Ooqai Mooseena sandufa akara maaqi qimasee qimarinau. Aiqaama anaasee faiqi maqasee innaamuna unda taqafufaqa amaana maqai ooruraida Anutuna aandau tatufirana suqa amiaqee qiqau. Aiqaama ooqa faiqi akoonaiqiuqara faqa karaambaiga utaaqama amaqasee amaana maqaki muru amiaqee qinau.

23-24 Mariana afaaqai innaamuna unda taikafufanoo Yooseefaasa Mariasa Anutuna sandufamau fidaqa Anutuna aandau tatufirana sia amanaiqifaqa kudi fasiqauqa tatufirana qaara nakipuruna maramaree Yeerusaree

amaana maqaki ooruree Mariana tatufirana suqamisee mikari kai faiqi aanaaqi Anutuna amiraree qimasee ooruree keeqaqau.

<sup>25</sup> Moo nauraiqi auqu Simeeoonafa mi aukuanna Yeerusaree maqusai amaana maqaki ainainimarufa maridanoo kaaqa Anutuna ufara rimarufa Isaraee maqannaa asumu maraaninnanara afeesara marinau.

<sup>26</sup> Anutuna naaquqara maraquna fannoo mina aakufufanoo qimaminau. Anee karaambaiqa Anutuna asauku mundirafa kambiqainana anee qafamaseenana kuqinnaranoo, sia kaqi kuqinnaranoo.

<sup>27</sup> Moo faasaana mi maraqunafa Simeeoonafa aakapooфанoo amaana maqaki keeqanau, mikari kai Yooseefaasa Mariasa Yisuna rafusu maree amaana maqaki keeqafiqa Mooseena ufamau firaree qimasee keeqaqau.

<sup>28</sup> Keeqafufanoo Simeeoonafa anireenoo mi faiqina rafususeenoo Anutunara asasira ufa qinoo qinau.

<sup>29</sup> Oo karaambaiqa maqee anee qimaqimunna ufafa anoona kambiqeenoo maqee amana qinee ani ainainira faiqi marunausa asooaranaki kuquanaura.

<sup>30-31</sup> Maqee qini qifu fannoo maqasaqaraasa asumu maraaninnana qafeenoo maasa asumu maraaninnana anee aiqama maqannaa qafaaqeera deedaqiannana qini qifu doo qafeenoo.

<sup>32</sup> Mifa ani maqannaa Isaraee maqannaasa ani areenarana nimianinafa maridanoo, qoomara foora qeenoo aanaamuru ani aana uqannifiqaaninafa marifaqa qeeqa qifunnai qafeeqa.

<sup>33</sup> Yisuna anaukoo Simeeoonafa ufa iriseeqa tautiqa narí qafee narí qafee iqau.

<sup>34-35</sup> Simeeoonafa Yisuna afaaqooqa qira ufa qimamiseenoo quandaki mina anoona Mariana qimaminoo qinau.

Anutufa maa faiqi anaqina narí kambiqaaninna ainaina uqannifiqaanifeera uqeereeqeenoo quqeenoo.

Moomoo Isaraee maqannaasa mina qafamasee nikooqaiifaqa maaniki aqu fifaranoo kaifaa moomoosa mina qafamasee findifiqa asumu marirana mareefaranoo.

Akaqausa mina qafamasee nikoo qaiifaqa minara aqira ufa qimasaifanoo doo minannai nári naunduraindaraa manda irirana kooroo iannoo.

<sup>36-37</sup> Mi faasaana anaasee asooqa moo mina auqu Anaa nammarifa Yakooboona amaaku Aseerana atikiqari kambiqarana Fanueerana araamuna marinau. Mifa maanaaqasaaqari faiqí marasee dinni taikasee dinni ani qaaraqanda marasee aukuana marinoo mina afaaqi kuqufufanoo miqooqari aukuana qaara faqa qaara faqa fasiqa arusee moo fasiqa qaara faqa qaara faqa moomoo aukuana adeedaana marinau. Mifa amaana maqakiqari sia raudee finau, eendaki faasaana minaki kai maridanoo Anutuna amooqira ufa qimamidanoo aarara maridanoo innaaru qimarinau.

<sup>38</sup> Simeeoonafa Mariana qimamimarufanoo Anaa nammarifa anireenoo Yisunara Anutunai dufi dufi qimasee doo miqooqari mi faiqi anaqina Anutufa asumu marirana nimianinafa ani maridanoo fee qimasee aiqama Yeerusaree maqannaasaki akaqausa Anutuna asumu marirana afeesimariasa qimanniminoo ninau.

*Nasareetee kaifaa ani mariqau.*

<sup>39</sup> Yooseefaasa Mariasa Yeerusaree amaana maqaki aiqama Karaambaiqa sandufa taikasee Kariree maqa maaqai nári maqusa Nasareetee maqusai anirandee fiqau.

<sup>40</sup> Miqoo marufanoo Yisufa innooqeenoo narí nidanoo amudaani afeekaikufanoo Anutuna amiqi amiqirafa minasaa marufanoo irirana fiqararafa marinau.

*Yisufa amaana maqaki marufaqa randaqau.*

<sup>41</sup> Ooqai Isaraee maqannaasa Isipa maqasaa mandainainaki marufanoo Anutufa narí qangiroo moo aqigoofanoo Isaraee maqanna ainnaaqareenoo Isipa maqanna ooga faiqi aigama naru taikanau. Isaraee maqannaasa minara irisee miqooqari aukuaana aukuaana ainnaaqarara qoomaqa sakasaidaqa neemariqau. Aukuana aukuaana Yisuna anoofa akoofauqa Yeerusaree maqusai ooruree ainnaaqarara qoomaqa sakasee neemariqau.

<sup>42</sup> Yisufa (12) qisaukuqara taikasee qikunni ooqu qaara marasee aukuaana marasoofaqa mina anaukoo Isaraee maqannaasa oosana marararee qimasee mina faqa afiqeeqa Yeerusaree maqusai ooru fiqau.

<sup>43</sup> Misa miqoo ooruree moomoo afuru faiqaidaqa qoomaqa sakasee neemariqau. Qoomaqa taikaseeqa miqanda Yooseefaasa Mariasa narí aqoonausa faqa Yisunara doo fifoo qimasee findimaqee nariqa maqusai fiqau. Yisufa Yeerusaree maqusai kaqi mariufanoo amaana maqaki kafa keeqanau.

<sup>44</sup> Yisuna anaukoo moodaa faasaana fimarufanoo eenoofaqa nári ainainaki faqa niqoonausaki faqa Yisunara randee mariqau.

<sup>45</sup> Randoosia sia marufaqa kafa anirandee Yeerusaree maqusai randaree qimasee ooru fiqau.

<sup>46</sup> Qaara faasaana miqoo randaqa niniufaqa qaaramoo faasaana amaana maqaki keeqafi paquriqau, mifa Yuda maqannaasa amaana ufa akoofasauqa faqa minaki maridanoo misa ufa iriseenoo quandafi oosana oosana ufara misasaa irammiri marinau.

<sup>47</sup> Irammiri marufaqa miqoo marusa oo irirana fiqararafammifoo qimasee rufiaqau.

<sup>48</sup> Mina anaukoo qafeeqa tautiqa qiqau, maaqanda qimaaku anee nanaree maaqanda mandaikamma qimaqeenanee ani akoosandiri qimuqusimarifaqa aniara randaqa niniifaqa paquriqa.

<sup>49</sup> Yisufa iriseenoo qinau, oo inneeqara sia fee iridee qinee naqimasee moosaa marianauree sia amana, qinee qeeqa qikoona maaqaki kai marianausa maridaqa. Inneeqara minara iriaqaana.

<sup>50</sup> Miqi qufaqa miqanda sia mi ufana oosana iriqau.

<sup>51</sup> Miqooqari Yisufa narí anaukoo faqa Nasareete maqusai ooqu maridanoo narí anoona akoona ufa ameemaanai marufanoo mina anoofa Mariafa mi ufausa aundurái kai iridanoo marinau.

<sup>52</sup> Yisufa miqoo marufanoo mina irirafa faqa amudaani faqa innooqee marufanoo Anutufa faqa faiqi anaasee faqa Yisunara nidi marinau.

### 3

*Nammari nimimaru Yoohaneefa Anutuna ufa qimanniminau.*

*(Mat 3:1-12; Mak 1:1-8; Yoh 1:19-28)*

<sup>1</sup> Tibeeriusafa Roomma maqannaasa firaa kiapafa (15) qisaukuqara taikasee qikunni ooqu moodaannai qiku taikasee aukuaana maru kamuqoo mi fasannai Yudeeaa maqannaasa kaqikaa kiapafa qaara auqu faqaafa marinau, Poontiusafa moo auqu Piratoofa marinau, Mi fasannai Kariree maqannaasa kaqikaa kiapafa Eeroodeefa marinau, Itureea maqannaasa

faqa Tarakoonitisa maqannaasa faqa misa kaqikaa kiapafa Firipina amaraafa Eeroodeena akaqa marinau, Abireenee maqannaasa kaqikaa kiapafa Risanasafa marinau.

<sup>2</sup> Yeerusaree maqusai Anutuna aanaiqikiraqanda Annasafa faqa Kaiasafa faqa mariqau. Mi aukuanne Seekariana amaaku Yoohaneefa kaasau aadana maqa maqaki marufanoo Anutuna ufa fannoo Yoohaneena aakufufanoo findifinoo Yooradanna nammari afaigara marusaki oonuree aniree idanoo Anutuna ufa faiqi anaasee qimanniminoonidanoon qinau.

<sup>3</sup> Inneeqa manda marirana minnisee Anutufinnai ubeekaifaqa nammari ruma nimaqaanaura miqi masaifanoo Anutufa inni mandainaina minnisee sia naruannoo.

<sup>4</sup> Yoohaneefa nauraa tamummaqara fasiqa akara rumaqoona ufamau finoo miqi marinau, mi tamummaqara fasiqafa maqi qimasee akara rinau. Kaasau maqa maqakiqari faiqi moo maqi qimasee nammeera qidanoo faiqi anaasee qimannidanoo karaambaiqa anianinna aanna afisuaqa mina aana eendaandirana andeeqaa.

<sup>5</sup> Arumukiranaki maqa apauru quqaina qumbiqaani amuaqunamu faqa aaqana faqa apaurinanoon afaasaikiani.

<sup>6</sup> Eendaandira aana aiqama andeeqaa mandaikiranaki anukamasaina raununukaani miqimasaifaqa aiqama anaamuru Anutufa asumu maraaninnana qafeefaranoo.

<sup>7</sup> Miqi qimasee tamummaqara fasiqa ooqai qimasee akararinau. Faiqi anaasee moomoosa uqanna Yoohanee finnai Yooradana nammari marunnai ooqureeqa nammari mararara ooqu fiqau. Yoohaneefa rumanimaqararee qimaseenoo misa nikaruqiranara irisee qimannimidanoon qinau, Innee ukadiqa faiqinamuara foora Anutufa nariranara rufiasee inneeqa manda oosanakiqari kambaaramasee asukaki qinee marunnaqoo aniree fee unna qimasee nammari marararee qidee. Anutuna aanoo irana innisaa aqufuaninafa yafee inni aaquqima nimaqaifaqee minakiqari sandee qinee unnaqoo aniree nammari nimirarunnana mandaaqaidee.

<sup>8</sup> Innee maasa Abarahaamana atiuga marunausa maridee qimasaida Anutufa asumu marirana kaqi qimianifee qimariafanoo, aaqaida miqi qimariafanoo. Inneeqa mandoosana minnisee andeeqara oosana maraifaqa qafeeqa inniara kuqaa naundura quandarausee qimasee amiqira saqari qaqamara foora iraidaqee qianauna. Innee fifau Abarahaamana ati fee qimariasaa, mifa fifau ainaina maridanoo, iriaqa Anutufa amana qifanoo maa fifau ooniugasaqari faiqikammafi Abarahaamana atiugasaa amana ootupaqa mariannoo. Innee Abarahaamara ati fee qimariana fifau ufa kai qimariafanoo.

<sup>9</sup> Anutufa saasunara foora ateekeerana doo rauqisee maridanoo, sia naundura quandaunusa Anutufa narirafa qusandaannoo aiqamausa saqariara foora sia amiqira qaqama irai fanoo ateeke idaki aquannoo.

<sup>10</sup> Faiqi anaasee Yoohaneena aaquqira ufa iriseeqa qiqau.

<sup>11</sup> Oo Yoohanee maasa ani ufara naqi fee ianauree qufanoo Yoohaneefa qimanniminoon qinau, qaara siuta faqaafa siuta siaina moo amia narana faqaafa rainasee narana siaina amia.

<sup>12</sup> Roomma maqanna takisa munnimma maree mariasaa faqa Yoohaneefa marunnai anireeqa iramiriqau, oo ufasaa rakisirafa maasa naqi fee ianauree qufanoo Yoohaneefa qinau.

<sup>13</sup> Innee andeeqasee takisa munnimma kai maraaqa sia qummuarirana ootupamasee maraaqa.

<sup>14</sup> Miqi qimasee qimannimisoofaqa Roomma maqanna sundiaūqa aniree iramiriqau, maasa faqa naqi fee ianauree anee maasara nanee fee qinnaree qufanoo Yoohaneefa qinau, Innee sia aanoo iranannai moosa munnimma qummuariaqa, sia unnufannai kootamasee moosa munnimma aina qummuariaqa. Inneeqa saika akiqara feefauru marasee sia minara manda ufa qimasee ninunu ruaqa. Minara amana fee qimasee nifaaqa quqaaqa.

<sup>15</sup> Faiqí anaasee moomoosa Isaraee maqannaasa Yoohaneenara iriseeqa qiqau, oqai Anutuna tamummaqara fasiqauqa Anutuna asauku mundi-rafa kambiqaanoommifoo qimaqoofa mifee qimasee misa naundura uqeeraqau.

<sup>16</sup> Yoohaneefa minara iriseenoo qimannimino qinau, qinee fifau nammarinnai inni rumannimaqaidaqa, moo fannoo firaqoo qini uriqararafa aniannoo, naqimasee fee qinee mina dadaaqianauree. Qinee fifau ainainara foora marianaura, mifa kaaqa uridaqaaqaramasee uriqararafa mariannoo. Mifa Anutuna maraqunannai faqa idannai faqa rumanni-maqaanoo.

<sup>17</sup> Maraqunannai rumannimaqarafa faqa kudimakirana qaaninna idannai rumannimaqarafa faqa minara oofaafana anoona faqa aanaaqmaara faqa kikiqa usidanoo. Mifa faiqí anaasee oofaafanara foora asaukunoo utitiqa maseenoo aanaaqmaara fuaqa aquseenoo anoona mara maaqaki qugeenoo aanaaqmaara ida firaafa sia dimbeemari idanaki araannoo.

<sup>18</sup> Yoohaneefa amiqira fasaasa ufa faiqí anaasee qimannimidanoo oosana oosana ufannai misa fuki faaki qimarinau, Anutuna ufamau fuaqera qimannimarinou.

<sup>19-20</sup> Kariree maqa maaqaki kaqikaa kiapafa Eeroodeefa narí akaqa anaqa mina auqu Eeroodiasa nammarina ummuara maraseenoo oosana oosana mandainaina faqa maree marinou. Yoohaneefa Eeroodiasa nammarina maroonara qaoo qufanoo Eeroodeefa narí mandainaina oosana fannoo uriqaroonara Yoohaneena rumberanaki quqanau.

*Yoohaneefa Yisuna nammari rumamaqanau.*  
(Mat 3:13-17; Mak 1:9-11)

<sup>21-22</sup> Yoohaneefa kaqi maru aukuaana faiqí anaasee moomoosa nammari mareesoofanoo Yisufa faqa aniroofanoo Yoohaneefa mina faqa nammariki mara keeqaseenoo Yisufa nammarikiqari findifinoo innaaru qimarufanoo innaaruna rakeemafufanoo Anutuna naaquqara andeeqara maraquna fannoo nakipurunaika mafinoo Yisunasaa aqufufanoo innaarunaindari ufa moo kambiqeenoo qinau. Anee qini qimuqusimarianna qimaakufa mariananoo firaqoo aniara dididanoo.

*Yisuna akeeku akaaku nuqu.*  
(Mat 1:1-17)

<sup>23</sup> Yisufa (30) qini qiku qisauku taikasee moo fasiqa asaukuqara taikasee aukuaana maraseenoo narí saika oosana aranau. Aiqama fasiqa anaasee sia mina oosana irirai minara Yooseefaana amaaku fee qimariqau. Yooseefaafa Eerina amaaku marinou.

<sup>24-26</sup> Eerifa Matatana amaaku marinou.  
Matatafa Reefina amaaku marinou.  
Reefifa Meerakina amaaku marinou.  
Meerakifa Yanaina amaaku marinou.  
Yanaifa moo Yooseefaana amaaku marinou.  
Yooseefaafa Matataiasana amaaku marinou.  
Matataiasafa Amoosana amaaku marinou.

Amoosafa Naqummana amaaku marinau.  
 Naqummafa Eesirina amaaku marinau.  
 Eesirifa Nakaina amaaku marinau.  
 Nakaifa Maatana amaaku marinau.  
 Maatafa moo Matataiasana amaaku marinau.  
 Matataiasafa Seemeena amaaku marinau.  
 Seemeenafa Yooseekana amaaku marinau.  
 Yooseekafa Yoodana amaaku marinau.  
 Yoodafa Yooannana amaaku marinau.  
<sup>27</sup> Yooannafa Reesana amaaku marinau.  
 Reesafa Seerubabeerana amaaku marinau.  
 Seerubabeerafa Seearatieerana amaaku marinau.  
 Seearatieerafa Neerina amaaku marinau.  
<sup>28</sup> Neerifa Meerakina amaaku marinau.  
 Meerakifa Adina amaaku marinau.  
 Adifa Koosamana amaaku marinau.  
 Koosamafa Eeramadamana amaaku marinau.  
<sup>29</sup> Eeramadamafa Yoosuna amarana amaaku marinau.  
 Yoosuafa Eerieeseerana amaaku marinau.  
 Eerieeseerafa Yoorimana amaaku marinau.  
 Yoorimafa Matatana amarana amaaku marinau.  
 Matatafa Reefina amarana amaaku marinau.  
 Reefifa Simeeona amarana amaaku marinau.  
<sup>30</sup> Simeeonafa Yudana amarana amaaku marinau.  
 Yudafa Yooseefaana amarana amaaku marinau.  
 Yooseefaafa Yoonamana amaaku marinau.  
 Yoonamafa Eeriakimana amaaku marinau.  
<sup>31</sup> Eeriakimafa Meereena amaaku marinau.  
 Meereenafa Meennana amaaku marinau. Meennafa moo Matatana  
 amaaku marinau.  
 Matatafa Natannana amaaku marinau.  
 Natannafa Dafidina amaaku marinau.  
<sup>32</sup> Dafidifa Yeeseena amaaku marinau.  
 Yeeseefa Oobeedana amaaku marinau.  
 Oobeedafa Booasina amaaku marinau.  
 Booasifa Seeraana amarana amaaku marinau.  
 Seeraafa Naasoona amaaku marinau.  
 Naasoofa Aminadabana amaaku marinau.  
 Aminadabafa Adimina amaaku marinau.  
<sup>33</sup> Adiminafa Aranina amaaku marinau.  
 Aranifa Qeesaroonana amaaku marinau.  
 Qeesaroonafa Peereesana amaaku marinau.  
 Peereesafa Yudana amaaku marinau.  
<sup>34</sup> Yudafa Yakooboona amaaku marinau.  
 Yakooboofa Isakeena amaaku marinau.  
 Isakeefa Abarahaamana amaaku marinau.  
 Abarahaamafa Teeraana amaaku marinau.  
 Teeraafa Naqoorana amaaku marinau.  
 Naqoorafa Seerukana amaaku marinau.  
<sup>35</sup> Seerukafa Reeuna amaaku marinau.  
 Reeufa Peereekana amaaku marinau.  
 Peereekanafa Eebeerana amaaku marinau.  
 Eebeerafa Seeraana amaaku marinau.  
 Seeraafa Kainnana amarana amaaku marinau.  
<sup>36</sup> Kainnafa Arafadana amaaku marinau.  
 Arafadafa Seemana amaaku marinau.  
 Seemanafa Nooana amaaku marinau.  
 Nooafa Rameekana amarana amaaku marinau.  
 Rameekafa Meetuseerana amaaku marinau.  
<sup>37</sup> Meetuseerafa Eenookana amaaku marinau.  
 Eenookafa Yareedana amaaku marinau.



Yareedafa Maqarareena amaaku marinau.

Maqarareefa moo Kainnana amaaku marinau.

Kainnafa Eenoosana amaaku marinau.

<sup>38</sup> Eenoosafa Seetana amaaku marinau. Seetafa Adamana amaaku marinau.

Adamafa Anutuna amaaku marinau.

(Anutufa narí kambiqarafa marinau.)

## 4

### *Sadannafa Yisuna amanufa.*

*(Mat 4:1-11; Mak 1:12-13)*

<sup>1</sup> Yoohaneefa Yisuna nammariki tupamasoofanoo findifufanoo Anutuna andeeqara naaquqara maraquna Yisunaki qumbiqafufanoo mi maraqunafa Yisuna rarisameeqeenoo kaasau aadana maqa maaqaki quqasoofanoo miqoo afaannauqa firaafa qaara fasiqa niku nisauku taikasee faasaana Yisunara mandainainaki aqaranaki fuanifee qimaseenoo maara maqaseenoo amanamasee qafosianoo.

<sup>2</sup> Qaara fasiqa niku nisauku taikasee faasaana mikari Yisufa narana sia nanau, mi moomoo faasaanafa aiqarroofanoo Yisuna firaqoo aararanau.

<sup>3</sup> Firaqoo aararroofanoo afaannauqa firaafa mina qafamasee Yisuna qimaminoo qinau. Anee kuqaa Anutuna amaaku maridana mee aaqa mari onisara qinaqa feemu kammafinana naa.

<sup>4</sup> Yisufa iriseenoo qimaminau, Anutuna akarakinaa ufa maaqi qinoo maridanoo faiqí sia narana kai namasee amana mariannoo. Anutuna ufamau fimariafa mifa kai naranara foora maridanoo, qinee sia ani ufamau fiqa ooniara qiananoo feemu kiannoo.

<sup>5</sup> Miqi qufanoo afaannauqa firaafa Yisuna uqeeraseenoo maa maqa maaqanasaaqaraana aiqama karaambaiqauqa faqa misa ququsakinaasa faqa dauni uqafiqaseenoo qimaminoo qinau.

<sup>6</sup> Maa aiqama afeeka ainaina faqaasa maqasaa faqa misa fira qumiasana faqa Anutufa qini qimiqaifanoo qinindi maridanoo, qeeqa kai irisee moo fasiqa amana amianaaura.

<sup>7</sup> Anee qini doorinni aqoori saunarafi deendeenamafi qini Anutusara foora qimooqinaqa maa aiqama adiafaa ira qumiasana aiqama ani amianaaura.

<sup>8</sup> Yisufa mina ufa iriseenoo kaifaa qimaminoo qinau, Anutuna akarakinaa ufa maaqi qidanoo, anee karaambaiqa aneenna Anutuna kai amooqimasee mina ainaina kaimmamaqaa. Minara irisee sia ani ufamau fuaaura.

<sup>9</sup> Miqi qufanoo afaannauqa firaafa kafa Yisuna qumareeqeenoo Yeerusaree fira amaana maqa ataufakai faakana kisaqa atisaa quqaseenoo qimaminoo qinau, anee Anutuna amaaku maridana maaqooqari rafusaki meemai maqasaa aqufua sia mina amaaku maridana sia aqufua.

<sup>10</sup> Anutuna akarakinaa ufa fannoo minara maaqi qidanoo Anutufa narí qangiroomuqa niqiqainaqa anisaa rakisifaranoo.

<sup>11</sup> Kafa moo akarakai maaqi qidanoo misa nári nisaukunoo qumaraifana sia onisaa anee aiku rupaurinanoo aidafuannoo.

<sup>12</sup> Yisufa qafeenoo iriseenoo afaannauqa firaana qimaminoo qinau, Anutuna akarakinaa ufa fannoo minara maaqi qidanoo anee sia karaambaiqa aneenna Anutuna amanamasee qafaannee qidanoo. Minara irisee sia maaqooqari aqufuaaura.

<sup>13</sup> Afaannauqa firaafa aiqama karidanoo Yisuna akari maqaseenoo, Yisuna mafi quqaseenoo minnaisseenoo doo finau.

*Yisufa Anutuna ufa qimannimirana oosana aranau.*  
(*Mat 4:12-17; Mak 1:14-15*)

<sup>14</sup> Yisufa Kariree maqa maaqai kafaa aniroofanoo Anutuna naaquqara maraquna fannoo mina faqa afeekaikamasee maridanoo dadaaqunara, mina aufakiana fannoo Kariree maqa maaqaki aiqamai daraaninau.

<sup>15</sup> Yisufa misa amaana maqakiaqa maqusa maqusa fiq fiq inoo nidanoo qimannimimarufaqa aiqamausa mina amooqi mariqau.

*Nasareetee amaana maqaki amaana ufa qimanniminau.*  
(*Mat 13:53-58; Mak 6:1-6*)

<sup>16-17</sup> Yisufa Kariree maqa maaqaki niniufanoo Nasareetee maqusai narí aanaaqisaa mariu maqusanaki oonureenoo Isaraee maqannaasa amaana Saririqasaa narí oosana maraseenoo amaana maqaki keeqanau. Keeqafinoo Anutuna ufa asaanariraree qimaseenoo findifufaqa misa Anutuna tamummaqara fasiqa Eesaiaana nauraa akara amifanoo airiseenoo maa ufana paqurimasee asaanarinau.

(Ooqai misa papiqa akara rumasee qaara aikasaa kukuqa maqoona Yisufa duku dukumasee minaki maa ufana paqurimasee asaana rinau.)

<sup>18-19</sup> Karaambaiqa maraquna fannoo qini daakinoo maridanoo, mifa kudi fasiqauqa amiqira fasaasa ufa qimannimiannee qimasee asauku qinisaa mundinau,

rumbaqa mariasa idukuaki fuaqeera qini diqiqanau,  
nifu dimbarausa faqa nifu maqannisaaneera faqa qini diqiqanau,  
moo maqannaasa ani mara moo maqannaasa aupurarana nimimariana minakinaana idukuaneera faqa qini diqiqanau,  
karaambaiqa narí maqannaasa mandainainakinaasa maraaninna aukua-nara qimannimirara qini diqiqaifaqa ani maridaqa.

<sup>20</sup> Yisufa mi ufana asaana rumasee papiqa qaara aikannoo kukuqamasee rakisi maru fasiqana amiseenoo ufa qimannimirara qimasee ooqu marinau, mi amaana maqanaki Nasareetee maqusai marusa aiqamausa nifu Yisuna kai tataqa fiqau.

<sup>21</sup> Yisufa maqee asaana rumasee qimannimi ufanasaqaraana qimanniminoo qinau, maa ufana akarakinaana asaana rumasee qimannimimaruna mina anoona doo maqee uqanna kambiqeenoo.

<sup>22</sup> Misa mina adiafaaira ufausa iriseeqa tautumasee narí qimami narí qimami qiqa, maafa Yoosefaana amaaku kai maridanoo fee qimasee nikooqanau.

<sup>23</sup> Yisufa irisee qimanniminoo qinau, innee ooqeenaasa naamuaqira ufa qimaqimiqa maaqi qifaranoo oo tutaqafa anee aneenna aurirana aneenna marasinnanai kai aneenna aurirana taikaa kafaa qiniara maaqi qifaranoo anee Kapeeranaumma maqusai oosana oosana ainaina faiqí sia amanaiki mari ainaina auqaananara maasa iridaqa maqee aneenna maqusaki maasa qifusaa mi ainainna auqaa.

<sup>24</sup> Qinee minara maaqi qimasee inni qimannimidaqa, Anutuna tamummaqara fasiqauqa sia moo fannoo narí maqusanaasa nifusaa uriqarara fasiqa mariannoo moo maqusanaasa minara uriqarara fasiqa fee qimasee mina ufa irifaranoo.

<sup>25</sup> Innee qini ufa iriaqa ooqai Eeriaafa maru aukuana qaaramoo aukuana faqa (6) qisauku dinni taikasee dinni ani moodaa marasee quqoona faqa aaku sia uqanna rufanoo aandaroo firaafa aiqamai narí marinau,

<sup>26</sup> Mi aukuanna Isaraee maqannaadeedaana anaasee moomoo marufanoo sia misa dadaaqinau Sidoona maqa maaqaki Sareefata maqusaki maru aanaamuru adeedaana anaaseena kai Anutufa Eeriaana aqifoofanoo dadaaqinau,

<sup>27</sup> Anutuna tamummaqara fasiqa Eerisaafa maru aukuana narí maqannaasa Isaraee maqa maaqaki karoora narí marusa moomoo mariqau, Eerisaafa sia misa karoora taikannisanau, aanaamurua Siria maqusanaasa uriqararana auqu Naamana mina karoora kai taikamaqanau. Innee qiniara sia tamummaqara fasiqa fee qimariafanoo qiniara nikooqee mariafanoo qinee faqa miqi kai iqa qeeqa maqusanaasa inni sia amana dadaaqiana.

<sup>28-30</sup> Misa Nasareete maqusai amaana maqaki marusa mi ufana iriseeqa aanoomasee Yisuna rarismammaree Nasareete maru aqanasaa afaqqeeqa rarisaaqaa ooruree ameemai aquaneerufanoo kuquani fee qima-soofanoo Yisufa misa qambaana kaqi fiqareenoo narí saikai finau.

*Kapeeranaumma maqusai faiqi aundurakinaa afaanna aqiqanau.*

*(Mak 1:21-28)*

<sup>31</sup> Yisufa Kariree maqa maaqaki Kapeeranauma maqusai oqureenoo Saririqasaa amaana maqaki faiqi anaasee Anutunara naamuaqinau.

<sup>32</sup> Mina ufa irimariasaa mina ufara naaquqanau, mifa narí Anutufara foora maridanoo qimannimufaqa doo tautiqa minara nidinau.

<sup>33</sup> Qimannimi marufanoo mi amaana maqanaki faiqi moo kaasau afaanna aunduraki marufa Yisuna ufa irisee firaa kari faaqa rumasee qimaminoo qinau.

<sup>34</sup> Oo Yisufa Nasareete maqusanaafa anee nanaree maasa soodaa qidannee, maasa daru taikararee anidannee qinee aniara iridaqa anee Anutuna naaquqara ufa maree marianafa mariananoo.

<sup>35</sup> Yisufa iriseenoo amambaina qimaseenoo qinau, anee ufaseenana mi fasiqana aundurakiqari raudamaki see fua, miqi qufanoo mi afaannafa aiqamausa nifusaa mi fasiqana maqasaa mafi aqusee sandeenoo sia aupurarana aminau.

<sup>36</sup> Aiqamausa mina qafeeqa tautumasee narí qimami narí qimami qiqa qiqa, maa fasiqana ufa nana ufa fee maridanoo narí Anutufara foora afeekufannai kaasau afaanna qimannimifaqa eedoo kai qimasee raudee sandaafanoo naaquqaidanoo.

<sup>37</sup> Miqooqari mi ufana munuqi miniqi ufanoo aiqamai daraaninau.

*Yisufa oosana oosana aurirana andeeqannisanau.*

*(Mat 8:14-17; Mak 1:29-34)*

<sup>38</sup> Yisufa amaana maqakiqari raudamaki Simoona maaqaki keeqanau. (Simoonafa Yisuna ufa irira fasiqa mina faqa nimarufa marinau.) Simoona mina airaamaku anaasee auri marufanoo afaqa firaaqoo ididimarufaqa minara Yisuna qimamiqau.

<sup>39</sup> Mifa iriseenoo mina qaari aaqa oonureenoo mi auriranara qaoo qufanoo taikoofanoo mi anaaseefa aaqee findifinoo narana deedaqamasee niminau.

<sup>40</sup> Suani afu keeqoofanoo asooaa asooaa imarufaqa mi maqusaanaasa nariqa niqoondiqa aurira fasiqa anaaseeqa maraida minisee marufanoo Yisufa asauku aiqamausa nifaaqai quqasoofanoo aurirafa taikanau.

<sup>41</sup> Afaannauqa faqa niqiqee marufaqa moomoosa naunduraindari raudamaki faaqana faqa sandaidaqa qiqa, anee Anutuna amaaku mariananoo fee qufanoo Yisufa miqooqari qaoo qinoo sia ufa qiaqee qinau, mi afaannausa Yisuna Anutuna asauku mundirafa marunara irimarusa

marunara, minara mifa misa nimambaina qinau, innee ufaseeqa qufaqa misa sandamafiqau.

*Yisufa Yudeeaa maqa maaqai qimanniminoo ninau.  
(Mak 1:35-39)*

<sup>42</sup> Mi eendanaki Yisufa faiqee iqaqoofanoo kananaana mi maqusanakiqari findimaqee faiqí sia marunnai Anutu finnai innaaru qirara finau, faiqí anaasee findifi minara yai fee finoo fee qimasee randamaree oonu paqurimasee sia moosaa fuannee qufanoo Yisufa qimanniminoo qinau.

<sup>43</sup> Qinee Anutuna innaaruna ququsakinaa fasaasa ufa sia maaqoo kai qimannimirara, Anutufa qiniara aiqamai qimannimianne qimasee diqiqamaqoosa maridaqa.

<sup>44</sup> Miqi qimaseenoo mifa Yudeeaa maqa maaqai oqureenoo aiqama maqusakiaqa fifainidanoo Anutuna ququsara qimannimi marinau.

## 5

*Yisufa narí indaaruaa faiqi namu nifiqanau.  
(Mat 4:18-22; Mak 1:16-20)*

<sup>1</sup> Moo kari Yisufa Keenesareeta farumma afainni kikiqinoo maridanoo Anutuna ufa qimannimi marufaqa faiqí anaasee moomoosa aniree irirara narí futeeqee narí futeeqee imariqau,

<sup>2-3</sup> Noodaanna reemaru fasiqaqanda nariqa noodaanna reemaru kanuqaqanda mafi nammari afainni quqasee nariqa pateeuqa mareeqa moosaa oonu maridaqa akuni mariqau, Yisufa faiqí anaasee moomoosa niqafaidanoo kanuqa qafamaseenoo Simoonaindiki akaramafinoo qimamufaqa kaqi kaaqoo afeeqoofanoo nammari amuaqusaa oonuroofanoo Yisufa minaki oqumarifinoo faiqí anaasee aiqamausa mina oorinni ani usufufanoo naamua qimarinau.

<sup>4</sup> Ufa qimannimi taikaseenoo Yisufa Simoona qimaminoo qinau, kanuqa maree farummaki oonuree pateeuqa ramasee noodaanna umbaqa.

<sup>5</sup> Miqi qufanoo Simoonafa qinoo akasaa maasa uriqararafa, maasa maqee eendaki nammari patee moomoo kari ramasee sia uqanna moodaa noodaanna mareeqa anee qiannanara kaifaa raanaura.

<sup>6</sup> Misa nariqa pateeuqa nammari ramasoofanoo noodaanna moomoo mi pateeuqanaki umbiqafinoo pateeuqa rakeekaa inau.

<sup>7</sup> Miqufaqa misa qafeeqa moo kanuqaki marusara nisauku aqufaqa misa aniree dadaaqiqa noodaanna mareeqee kanuqaki umbiqasoofanoo kanuqaqara faqa nammari ukuqnaaqaa imariqau.

<sup>8</sup> Simoona moo auqu Peetooroofa mina qafamasee Yisunara rufieenoo mina oorinni aqoori saunarafinoo qinau, oo karaambaiqa sia qini faqa maria qinee mandainaina maree marunausa maridaqa.

<sup>9</sup> Yoohaneefa faqa Yameesafa faqa miqanda Seebeedeena amaakuqara miqanda Simoona dadaaqidaqa noodaanna reemaruqanda maridaqa noodaanna moomoo ramasoona qafooofanoo naaquqanau.

<sup>10</sup> Naaquqoofanoo Yisufa Simoona qimaminau, anee sia rufiaa maaqooqari anee sia noodaanna reemarinnaanoo anee faiqí anaasee kai Anutuna ququsaki pateeuqakiara foora mara quqee marinnaranoo.

<sup>11</sup> Miqooqari misa nariqa kanuqa rarisameeqee afainni quqasee nariqa noodaanna saika maree maruna aiqama ainaina minnisee Yisuna faqa fiqau.

*Yisufa karoora arimaru fasiqana andeeqanau.*  
(Mat 8:1-4; Mak 1:40-45)

<sup>12</sup> Moo kari Yisufa moo maqusai marufanoo karoora aiqama afaaqai arimaru fasiqafa moo fannoo anireenoo maqasaa aqufinoo irammirinoo qinau, oo maa fasiqa ani aidirafa qinana amana anee qini karoora rukaqi-mageennaranoo.

<sup>13</sup> Yisufa iriseenoo narí asauku uqeerasee minasaa munduseenoo qinau, Eeo qini irirafa ani dadaaqiraree qidaqa, doo rukafinana maria qufanoo aagee kai mina karoora rukafinau.

<sup>14</sup> Yisufa mi fasiqana amambaina qimaseenoo qinau, anee sia maa ainainnara moonaa qimamia andeeqasee amaana maqaki aanaiqikirana aaga oonu rainanoo mifa ani afaaqa aiqumaseenoo aniara anukanoo mariaanoo qiannoo, miqi qinana anee karoora narimarisa taikarasa aandau tatufirana Mooseena sandufamau fidana Anutuna suqamia, miqimasaínaqa aiqamausa ani anukarana qafamasee sia aniara eerairifaranoo.

<sup>15</sup> Minara Yisuna afeeka aufakiana sia taikanau, firaqoo fifainufaqa faiqí anaasee moomoosa suqu maree Yisufunnai anireeqa mina ufa irufanoo misa aurirafa taikaanifeera aniqau.

<sup>16</sup> Yisufa moodaakari moodaakari faiqí sia maruqoo oonureenoo Anutunara kisaacaqasaa innaaru qimarinau.

*Yisufa aiku asauku pipisaaqa usirana andeeqanau.*  
(Mat 9:1-8; Mak 2:1-12)

<sup>17</sup> Moo faasaana Yisuna moo maaqaki maridanoo faiqí anaasee Anutunara naamuaqida marufanoo Farisai amaana ufa qimarusa faqa Mooseena sandufasaa rakisirasa faqa mi maqanaki ooqu marifiqa irimariqau, Kariree maqa maaqakiqari faqa Yudeeaa maqa maaqakiqari faqa Yeerusa-ree maqusaindari faqa moomoosa ani maridaqa iri mariqau. Aurirana taikara afeeka karaambaiqa Anutufinnaindari Yisunasaa marufanoo aurusa andeeqannimaqee marinau.

<sup>18-19</sup> Yisufa maaqaki qimannimi marufaqa faiqí anaasee akaqausa narí niqoonnana aiku asauku pipisaaqa qusirana qaindusu maree aniree maaqaki keeqafi Yisuna aaga quqararee qimasee qafuofanoo faiqí anaasee moomoosa ititafufaqa sia amanaikiqa, quandaki naammaraaqa akaramafufaqa namudi rainasee mi fasiqana narí qaindasaa quqasee sanda quiqa quiqa ufanoo maaqaki faiqí anaasee qambaana Yisuna aaga quqaaqau.

<sup>20</sup> Yisufa misa irirana narisaa firaqoo mundunara iriseenoo mi pipisaaqa qusira fasiqana qimaminoo qinau, qini qiqaondi ani mandainaina numoo doo minnaisaidaqa.

<sup>21</sup> Miqi qufaqa Mooseena sandufa akoofasauqa faqa Farisai amaana ufa qimarusa faqa nariqa naunduraindari kai qidaqa qiqau, maa fifau fasiqafa unnaqi masaidanoo narí ufannoo Anutuna amaaqa maqaidanoo faiqí sia amana moonaa mandainaina numoo taikarana amana maridanoo Anutufa kai amana miqiannoo.

<sup>22</sup> Yisufa misa naunduraindaraa ufa iriseenoo qimanniminoo qinau, innee naqi fee qifagee mi mandirirana inneeqa naunduraki iridee.

<sup>23-24</sup> Qinee maa fasiqanara ani mandainaina numoo minnaisaidee qunnana innee qiniara sia amanaikiaanoo fee qidee qinee faiqí nimaaku maa maqanasaa maridaqa faiqí aaqarana akiaqara mininnisara afeeka faqaasa marunausa marinara maa firaqa afeeka ainainannai kooroomma nimaqaanaura qinee maa fasiqanara aneenaa qaindasaaqari findifinana mi qaindana maree amaaqa fua qiananoo miqinaqa qini mandainaina

numoo minnaisara afeeka qafeefara. Miqi qimannimiseenoo quandaki mi aiku asauku kuqirana qimaminoo qinau. Doo findifi aneenna qaari mareenana amaaqa fua.

<sup>25</sup> Miqi qufanoo mi fasiqafa findifinoo aiqamausa nifusaa narí faiqee maru qaarina mareenoo Anutunara dufi dufi qimammareenoo amaaqa finau.

<sup>26</sup> Aiqamausa minaki marusa mina qafamasee firaagoo tautiqa maaqi qimasee Anutuna asasiqau, maqee faasaana maasa maa fasiqana qafaunanoo nifaaga qumooqukinoo.

*Yisufa Reefina afiqanau.*

*(Mat 9:9-13; Mak 2:13-17)*

<sup>27-28</sup> Miqooqari Yisufa raudamaki moosaa fidanoo Roomma maqannaa kiapana takisa munnimma maree maru kuskusafa mina auqu Reefina amarafa narí oopisaki marufanoo Yisufa mina qafamaseenoo qimaminoo qinau, aniree qini faqa fua qufanoo Reefifa findifinoo aiqama ainaina minniseenoo mina faqa finau.

<sup>29</sup> Moo kari Reefifa Yisuna narana suuqamiraree qimaseenoo Yisuna faqa narí aqoonausa takisa munnimma maree marusa faqa faiqi anaasee akaqausa faqa naaramasoofaqa mina maaqaki anireeqa fira qoomaqa sakasee nee mariqau.

<sup>30</sup> Neemarufanoo Farisai amaana ufa qimarusa faqa nári niqoonausa Mooseena sandufa akoofasauqa faqa Yisuna faiqi namu niqiqa qiqau, innee nanaree ummuara takisa munnimma maree mariasa faqa manda oosana maree mariasa faqa narana nammari naidee, nisauruqa.

<sup>31</sup> Yisufa mina iriseenoo qimannimino qinau, amiqimaria fasiqa anaaseesa sia tutaqafinnai fidaqa, aurimariasa kai tutaqafinnai fidaqa.

<sup>32</sup> Qinee sia amiqimaria fasiqa aanaaseesara nariqa mandainaina minnisee Anutufinnai ubeekaaqeera qumu maridaqa, innee manda fasiqa anaasee fee qimasee nifaqee mariasa misara kai Anutufinnai ubeekaaqeera naarararee qimasee qinee qumuafanausa maridaqa.

*Naararee maru innaaruqira oosanara iraqau.*

*(Mat 9:14-17; Mak 2:18-22)*

<sup>33</sup> Akaqausa Yisuna qimamiqa qiqau, Yoohaneefa nammari nimimaruna ufa irimariasa moomoo kari narana maridanoo mina minnisee naarara innaaru qidaqa, Farisai amaana ufa qimariasa misa ufa irimariasa faqa miqidaqa ani ufa irimariasa sia uqanna miqidaqa, narana nammari naida maridaqa.

<sup>34</sup> Yisufa iriseenoo qimanniminu, maanaaqa amundara qoomaqaaki suqimaria fasiqa anaaseesara naarara mariaqee qifaqa sia ani ufa irifaranoo amundara fasiqa marinara qoomaqa sakasee neefaranoo.

<sup>35</sup> Misa mi anaaseena afaaqi qini rumbamaree munu darusaifaqa mikari kuqaa nimuqusa mandaikinaqa narana minnisee naarara innaaru qifaranoo. (Yisufa narí kuqaninnanara maanaaqa amundarana afaaqi kikiqa usinau. Yisufa narí kuqinanoo mina faiqi namu nimuqusa mandaikinaqa naarara maridaqa innaaru qifaranoo fee qinau.)

<sup>36</sup> Yisufa moo quandara ufa qimanniminu, faiqi nauraa siuta akunirara sia amana fuka qamunnasaaqaraa ati anaqisee minasaa akunuannoo miqinanoo nauraa qamunna faqa fuka qamunna faqa mandaikiandoora, mina nauraa qamunna maridanoo minnisaa. (Nauraa qamunnara Yisufa Mooseena sandufara mina kikiqa ususee qimanniminu. Fuka qamunnara narí fuka ufara qinau.)

<sup>37</sup> (Yisufa maqasaa maru aukwana misa uainna nammari tatisee aandau apatannai auqira taquki adiasee kisaagasaa maqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammariifa marinau. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

Yisufa minara iriseenoo quandara ufa moo qimanniminu, faiqi fuka nammari sia amana nauraa taquki adiaannoo, rukamufinanoo aiqama nammari rairaa iandoora.

<sup>38</sup> Fuka nammari fuka taquki adiaannoo amanaikiannoo.

<sup>39</sup> Faiqi nauraa uainna nammari namasee sia amana fuka uainna nammari naannoo. (Yisufa faiqi aanaaseera Mooseena sandufa ooqeenaa uainnara foora mina akoofasa mariafaqa qini ufa fuka uainnara foora marifaqa nikooqeeferanoo.) Ooqeenana adiafaairafa uriqaranoo maridanoo fuka adiafaairafa oorudupinoo maridanoo.

## 6

*Amaanasaa sakuma ruqoosoo ufa.*

*(Mat 12:1-8; Mak 2:23-28)*

<sup>1</sup> Moo kari Yuda maqannaasa Saririqa amaanasaa Yisufa nari faiqi namufaqa maqusamau nidanoo sakuma ummaqiranaki fimarufaqa mina faiqi namu sakuma ruqoosasee rafarisaidaqa neemariqau.

<sup>2-4</sup> Farisai amaana ufa irimarusa maridaqa niqafeeqa niqidaqa qimannimi qau, innee nanaree Mooseena sandufa rukiadee maasa amaana Saririqasaa ainainidee qufanoo Yisufa qimanniminoo qinau. Innee sia fee karaambaqa Dafidina oosana iridee mifa aararoofanoo Mooseena sandufa rukiasee Anutuna naaquqara amaana maqaki keeqafinoo Anutuna amaqee maru feemuna mara namaseenoo nari faiqi namufaqa akaqana maree muqu niminu, Mooseena sandufaki mi feemunara kaqiqeesa sia naaqee qidanoo aanaiqikirausa kai naaqee qu feemufa marinau.

<sup>5</sup> Yisufa misa qimanniminoo qinau, qinee faiqi nimaaku uqanna amaana faasaana faqa mina sandufauqa faqa mina uriqarararusa maridaqa. Qinee qeeqa faiqi namuara sakuma ruqoosa naaqee qiana amana misa neefaranoo.

*Yisufa asauku pipisaaqa usirana amaanasaa andeeqoo ufafa.*

*(Mat 12:9-14; Mak 3:1-6)*

<sup>6</sup> Moo kari Isaraee maqannaasa Saririqa amaanasaa faasaana moo maqusai amaana maqaki keeqafi Anutuna ufa qimannimi marufanoo faiqi moo asauku uqannai asauku karaaduqarafa faiqi anaasee faqa maridanoo Yisuna ufa irimarinau.

<sup>7</sup> Mooseena sandufasaa rakisirausa faqa Farisai amaana ufa qimariasa faqa misa faqa maridaqa Yisuna arirara aiqumi mariqau, mi fasiqana asauku karaaduqarana andeeqasainaqa Mooseena sandufa rukiasee saikidanoo fee qimasee uneemaana qimasee mina rumbarara qimarufanoo.

<sup>8</sup> Yisufa misa naundurakinaa manda irirana iriseenoo mi asauku karaaduqarana aaramaseenoo qinau, anee findifi mai aniree aiqamausa nifusaa kikiqia qufanoo miqimminau.

<sup>9</sup> Kikiqa mafufanoo Yisufa misa qimanniminu, qinee moodaa ainainara inni irammirianaaura, innisaimbaqa sandufa Saririqa amaana naci fee qidanoo, maasara faiqi dadaaqiaqee qidanoo fee faiqi kuridiaqee qidanoo fee,

maasa faiqí mariaqeera asumu mara nimaqaanauree faiqí sia mariaqeera naru taikannimaqaanauree.

<sup>10</sup> Miqi qimasee Yisufa aiqamausa nifuki nifuki idanoo mi fasiqana asauku karaaduqarana qimaminoo qinau, anee aneenna asauku uqua qufanoo mi fasiqafa miqufanoo mina asauku amiqinau.

<sup>11</sup> Amiqufanoo farisai amaana ufa qimarusa faqa Mooseena sandufa iri-marusa faqa firaaqoo aanoo qimasee Yisuna uneemaana qimasee ariranara randaqau.

*Yisufa qikunni ooqu qaara marasee fasiqa nifiqanau.*  
(Mat 10:1-4; Mak 3:13-19)

<sup>12</sup> Mi fasannai Yisufa innaaru qirara amuaqu namusa ooruree mi eendanaki innaaru saika imarufanoo iqaqanau.

<sup>13</sup> Iqaqoofanoo misaki rusandeesamumasee (12) qisaukuqara taikasee qikunni ooqu qaara marasee fasiqa nifiqaseenoo misa nuqu niqiqara fasiqauqee qinau.

<sup>14</sup> Misa nuqu moo Simoonafa moo auqu Peetooroofa faqa mina akaqa Andurufa faqa Yameesafa faqa Yoohaneefa faqa Firipifa faqa Baratooroomee-ufa faqa,

<sup>15</sup> Mataioofa faqa Toomasifa faqa moo Yameesafa Arafaiusana amaaku faqa Simoonaa amarafa kaaqa nári kaamannara rimarufa faqa Yudasina amarafa Yameesana amaaku faqa moo Yudasifa

<sup>16</sup> Keerioota maqusaindaraafa kasooqaqee Yisuna uqeeqaaninafa faqa mariqau.

*Faiqí anaasee moomoosa Yisuna afaaqee fiqau.*  
(Mat 4:23-25)

<sup>17</sup> Yisufa misa nifiqa quqaseenoo niqiqara fasiqauqee qimaseenoo mina ufa irimarusa moomoosa faqa amuaqu namusaaqari qumureenoo afaasai marufaqa faiqí anaasee moomoosa ani mariqau.

<sup>18</sup> Yisuna ufa iriananoo aurirafa taikaanifee qimasee Yudeeaa maqa maaqaindari faqa Yeerusaree maqusaindari faqa Tíree maqusaindari faqa Sidoona maqusaindari faqa moomoosa aniree usufufanoo Yisufa ufa qimannimidanoo aurirana taikannisee marinau. Faafasaaga naundurái marusauqa aniroofanoo afaqa niseemarinau.

<sup>19</sup> Anutuna afeeka fannoo Yisuna afaaqaindari fidanoo faiqí anaasee andeeqannisee marufaqa aiqamausa nisaukunnai Yisuna afaaqaa auqama-soofanoo aurirafa taikanau.

*Yisufa asasirana oosana uqannifiqanau.*  
(Mat 5:1-12)

<sup>20</sup> Yisufa narí faiqi namu nindafamasee qimanniminoo qinau.

Innee kudimariasaa Anutufa firaa asasirana inni nimidanoo Anutuna innaaruna ququsa innindi maridanoommi.

<sup>21</sup> Innee maqee aandaroo narí marisa Anutufa asasirana inni nimidanoo Anutufa inni nimuaquirana nimiannoommi.

Innee maqee ikiraqee mariasaa Anutufa firaa asasirana nimidanoo, Anutufa naanaidara qirana inni nimiannoo.

<sup>22</sup> Faiqí akaqausa faiqí nimaaku uqanna qinisaara inniara fidiqaa iqa nifeeqeeqa aasaandaana ufa faqa oosana oosana manda ufauqa faqa inni qima nimifanoo Anutufa firaa asasirana inni nimiannoommi.



<sup>23</sup> Misa miqimmannimiqaifaqa innee minara اساسammaseeqa idi raidaqa nasuriaqa, mina akiaqara innaarunai firaa qumiasana innindi afeedi-ranaki maridanoommi, maasa qikeeku qikaaku ooqai maru tamummaqara fasiqara mi manda oosanna nimiiusa maqee faqa miqi kai iqa inni faqa nimifaranoo.

*Yisufa noori runira oosanara qinau.*

<sup>24</sup> Innee maqee qumiasana faqaasa mariasa inni aupurarafa firaafa mariannoo, innee adiafaaira marirafa doo aiqaraannoo.

<sup>25</sup> Innee maqee nimuaqu imariasas inni aupurarafa firaafa mariannoo, inni aandaroo naruannoo, innee maqee naanaidara qimariasas inni aupurarafa firaafa mariannoo, innee noori runirafa faqa qikifaafau qirafa faqa mariannoo.

<sup>26</sup> Faiqi anaasee aiqamausa inni amiqi amiqira ufa qimannimi mariasa faqa nimooqi mariasa faqa inni aupurarana firaana Anutufa nimiannoo ooqai maasa qikeeku qikaaku unnaqira tamummaqara fasiqauqara miqi kai idaga nimooqimarufanoo Anutufa aupurarana niminau.

*Yisufa inneeqa namuqaara nimuqusinaqa ruaqa.  
(Mat 5:38-48; 7:12)*

<sup>27</sup> Innee qini ufa irimariasas qimannimidaqa innee inneeqa namuqaara nimuqusi marinaqa misara ruaqa, inniara nikooqee mariasa amiqimmasee misara amiqi amiqimmannimaqaqa.

<sup>28</sup> Inni niquraree mariasa misa nimooqira ufa qimannimiaqa inni mandaikamma nimaqee mariasara Anutufa idaaqamanisaanifeera innaaru qiaqa.

<sup>29</sup> Moo fannoo ani aapaasa arinana dinni faqa quandasainanoo aruani, faiqi moo fannoo ani saketa maree finana siuta faqa mina amia,

<sup>30</sup> Faiqi moo fannoo nana ainainaree ani iramirinana anee mina amia, moo fannoo ani ainaina ummuaramamaree finana sia kafaa oonu maraa.

<sup>31</sup> Anee nana oosanaree aididanoo fee faiqi anaasee ani amifaree, anee amiqira oosana kai qimiaqee qimariananoo. Doo anee naaree misa ani amira aidira oosana kai faiqi anaasee maqee maqee kaqi nimia.

<sup>32</sup> Faiqi anaasee aniara aidimariasas kai nidinanoo nanaree fifau Anutunara mina akiaqara qini qimiannoo fee, sia ani amiannoo manda oosana maree mariasa naanna reemariananoo misa miqimmidaga nariara nariara nididanoo.

<sup>33</sup> Ani amiqi amiqi imariasas kai amiqi amiqinanoo Anutufa mina akiaqara sia ani amiannoo, manda oosana maree mariasa naanna reemariananoo misa miqi kai idaga nariara nariara amiqi amiqidaqa.

<sup>34</sup> Ani amimariasas kai ainaina niminanoo Anutufa mina akiaqara sia ani amiannoo, anee miqinana sia manda oosana maree mariasa urinnaqa reennaranoo misa kasooqagee mina akiaqara mina amana kai qimiaqee qimasee niminnaranoo.

<sup>35</sup> Innee sia misa naanna raaqa, inneeqa namuqaara nimuqusi marinaqa misa amiqimmannimaqaqa ufaasu ainainara innaaru qimariasas nimiseeqa sia mina akiaqara nifu maqaqa innee miqidaqa firaa uriqarara Anutuna faiqi namu marifaranoo mina akiaqara firaa qumiasana Anutufa inni nimaqaannoo. Anutufa miqi marifa manda oosana maree mariasa faqa minara auni mariasa faqa amiqi amiqimmannimaqee marifadanoo, innee mina aanna raaqa.

<sup>36</sup> Inni nikoofa aiqamausara amuqusi marifanoo nifauaidanoo innee faqa miqi kai iqa faiqi aanaaseera nimuqusinaqa nifauaqa.

*Yisufa nimuqusiranara faqa afaariranara faqa qinau.*  
(Mat 7:1-5)

<sup>37</sup> Innee niqoonausa sia niqurara ufa nimiaqa miqifanoo Anutufa inni faqa sia niquraraannoo, inneeqa niqoonausa kaukaata sia qimanni-maqaaga miqifanoo Anutufa inniara faqa sia kaukaata qiannoo, innee inneeqa niqoonausa inni mandaikamma nimaqee mariana minnisaifanoo Anutufa innindi faqa minnisaannoo.

<sup>38</sup> Innee faiqí anaasee kaqi nimifanoo Anutufa inni faqa kaqi nimiannoo, mifa firaqoo qumbiqasee rairaamasee inni nimiannoo, innee faiqí anaasee niminnandee kai maseenoo Anutufa inni faqa nimiannoo. Anee faiqí anaasee nimira oosana Anutufa qafamasee mi nimira oosanamau kai inni nimiannoo.

<sup>39</sup> Yisufa quandara ufa moo maaqi qimasee faiqí anaasee qimanniminai, afu dimbarafa sia amana aqoonnana afu dimbarana asaadakinoo aana fuannoo, afigee fuani innana aiqamaqara madikaki aqufifaranoo.

<sup>40</sup> Akara maqaki keeqeemari kumaaraafa sia amana narí uqafiqee marina uraqaaraannoo, akara maaqaki keeqarafa taikaseenoo mikari narí uqafiqeemari fasiqana amanasaa mariannoo.

<sup>41</sup> Yisufa kaqi qimannimidanoo qinau, anee nanaree aneenna akaqaafasaa afuki mari saqari araifa marifanee ufa qidanee. Mee ani afuki muduka saqari akatia marinara anee sia iridanee.

<sup>42</sup> Anee naqimasee aneenna akaqaafasaa mai anirainaqa mee ani afuki saqari arai marina maraquanauree qidanee, ani afuki muduka saqari akatia maridanoo anee nikaru qimarianafa aneenna afuki naaree fira saqari akatia marina maraquseenana andeeqasee afu maqeenana aneenna akaqaafasaa afuki kaqikaa saqari arai marina mara aqua. (Innee sia moo fannoo manda ainaina marainaqa aquraraqa maqasaa fasiqa anaasee aiqamausa innisaimbaqaindi fira saqari akatiara foora maridanoo.)

*Yisufa andeeqara oosanara saqari qaqaama kikiqa usinau.*  
(Mat 7:16-20; 12:33-35)

<sup>43</sup> Amiqira saqari fannoo sia manda qaqaama iraannoo, kafa mina dinni manda saqari fannoo sia amiqira qaqaama iraannoo.

<sup>44</sup> Saqari qaqaama fannoo saqari oosanara koorooinana anee irinnaranoo aiqama saqari qaqaama irafinoo oosanara kooroidanoo. Anee naqi fee masee reereeroondaana sandasaqaraana faafisa qaqaama tiqinnaree sia minasaa iraannoo. Kaifaa naqi fee masee kaakuna sandasaa kamukamuna qaqaama tiqinnaree sia minasaa iraannoo. <sup>45</sup> Faiqí faqa saqari faqa moodaa karidaqa amiqira fasiqa fannoo narí amuqusakinaa amiqira afeediranakiqari amiqira ufa qimannimiannoo, manda fasiqa fannoo narí mandamuqusa afeediranakinaana manda ufa qimannimiannoo, faiqí narí amuqusakimari ainainara kai ufa qidanoo.

*Yisufa narí ufamau fimarusara maaqa kikiqa usinau.*  
(Mat 7:24-27)

<sup>46-47</sup> Innee nanaree qini Yisunara karaambaiqee karaambaiqee qidaqa qini ufa sia irida fee, faiqí moo fannoo qinee marunannai anireenoo qini ufa irimarifa mina oosana maaqimminoo marida.

<sup>48</sup> Mi fasiqafa maaqa akoona fooqaafa maridanoo, mi fasiqafa maqa amiqimasee meemaqoo indufuseenoo faakana oonisaa munduseenoo minasaa maaqa afeekaikamasee usakanau, nammari auginoo mi maaqana arufanoo sia kasinau, faakana amiqimasee afeekaikinoo marinau.

<sup>49</sup> Faiqí moo fannoo qini ufa iriseenoo mimau sia finafa moo maqa akoofara maqi maridanoo mi furufarira fasiqafa aanda maqasaa maqa usakeenoo sia faakana afeekaikinau, nammari aulinoo mi maqana arufanoo rafauraki maqasaa aqulinoo firaqoo kurusinau.

## 7

*Saideena ainainira faiqi Yisufa andeeqanau.*

*(Mat 8:5-13)*

<sup>1</sup> Yisufa mi ufausa aiqama faiqí anaasee qimannimiseenoo findimaqee Kapeeranaumma maqusai finau.

<sup>2</sup> Ooquroofanoo Roomma maqannaa sundiauqa uriqararana ainainira fasiqa kaaqa aidi maru fasiqafa kuqira aurira aurimarinau.

<sup>3</sup> Sundia uriqararafa Yisufa anunara iriseenoo Yuda maqannaa uriqararasa niqiqeenoo qinau.

<sup>4-5</sup> Innee oonuree Yisuna iramiriaqa mifa amanee mai aniree qini ainainira fasiqa andeeqaannoo fee qufaqa misa Yisufinnai oonuree reen-deenamasee fuki faaki qiqau, maasa diqiqafasiqa Roomma maqannaa fasiqa kaaqa maasa Yuda maqannaara rimarifa amaana maqa maasa usakaqimufa ani dadaaqirana amana marifa amanee dadaaqinnaree.

<sup>6-7</sup> Yisufa misa ufa iriseenoo eedoo qimaseenoo misa faqa sundia maaqai finau, aatata fiifufanoo maaqa adeedi ramasoofanoo mi fasiqafa narí aqoondiqa niqiqeenoo qinau, innee oonuree maaqi qimasee Yisuna qimamiaqa, oo uriqararafa anee fifau aiku rurina mai ani mariananoo, nanaree anee firaa uriqararafa mai aniree qini manda maaqaki keeqafinaqa qisauruanoora, qinee ani afusaa firanara faqa sia amanaikidaqa qinee oorudupiraua maridaqa.

<sup>8</sup> Qini uriqarara sundiauqa moomoosa mariafaqa qinee misa nimeemaanai maridaqa misa ufamau fidaqa, qini qimeemaanai moomoo sundiauqa faqa mariafaqa qinee moonara fuannee qunanoo fidanoo moonara anianne qunanoo anidanoo qeeqa ainainira fasiqara maa ainainna auqaa qunanoo auqaidanoo, anee Yisufa uriqararafa mariananoo anee miqooqari kai aurirafa taikaannee qinanoo qini ainainira fasiqa fannoo findifuani.

<sup>9</sup> Misa mi ufana Yisuna qimamufanoo tautumaseenoo faiqí anaasee moomoosa mina faqa anusa quandaki qimanniminau. Maa Roomma maqannaa fasiqafa firaqoo qini saqarikidanoo Isaraee maqannaa qeeqa maqannaasa maqusa maqusa nidaqa sia miqira amiqira fasiqa qafeeqa, aanaamuru maridanoommi.

<sup>10</sup> Miqi qufaqa misauqaindi niqiqoosa anirandee nariqa uriqararana maaqaki keeqafi qafoofanoo mi fasiqana ainainira fasiqa findifinoo amiqimasee marinau.

*Yisufa adeedaana anaasee amaaku kuqiranakinaana mara findifinau.*

<sup>11-12</sup> Marikino Yisufa moo maqusai mina auqu Nainna maqusai narí faiqi namufaqa faiqí anaasee moomoosa mina faqa finau, maqusa naambeeqai oonuree qafoofaqa mi maqusaanaasa faiqí kuqirana qaindusu maree akundarara ikifaafauna faqa aniqau, adeedaana anaasee amaaku moodaa marufa kuqufufaqa faiqí anaasee moomoosa faqa mina anoofa faqa akundarara maree anufanoo Yisufa niqafoofanoo firaqoo amugusufanoo mina anoona qimaminoo qinau. Sia ikiraqaaqee qimaseenoo asaukunoo oonu mi qaindana auqoofaqa maree aniusa kasoomafufanoo Yisufa kuqira kumaaraa qimaminau.

13 Oo maa kumaaraa qinee ani qimamidaqa doo findifua qufanoo mi kuqira kumaaraafa rutaqinoo findifinoo ufa qinau.

14-16 Yisufa mina afiqamareenoo narí anoofinnai munaisoofaqa faiqí anaasee firaqoo naaquqoofaqa Anutuna amooqidaqa qiqau. Uriqarara tamummaqara fasiqa doo maasaki akoogoo kooroomafinoo maridanoo fee qufaqa akaqausa maaqi qiqau. Anutufa doo narí maqannaasa ooqai qimaqoo dadaaqianinafa doo ani maridanoo.

17 Mi ufana Yisuna aufakiana fannoo miqooqari Yudeeaa maqa maaqaki mariasaki faqa mina atiqara mariasaki faqa fifaininau.

*Nammari nimimaru Yoohaneena faiqi namu Yisuna irammiriqau.*

*(Mat 11:2-19)*

18 Yoohaneefa nammari nimimaruna faiqi namu Yisuna naaquqara aufakiana Yoohaneena qimamufanoo iriseenoo narí ainainira faiqi qaaraqanda naaramasee qimanniminoo qinau.

19 Inneeqara karaambaiqinnai oonuree maaqi qimasee iramiriqa Qinee anianinnanara qiafanafa anee mifee maridane moonaree rakisiaauree, miqi qimasee qimannimisee niqiqoofaqa miqanda Yisufinnai oonuree iramiriqa qiqau.

20-21 Yoohaneefa nammari nimimarufa maasa diqiqaiifaqa ani iraidaqa mifa asauku mundirafa aniannoommifoo qimaqoofa anee mifee maridane moonaree maasa rakisiaauree qufanoo, Yisufa mikari faiqí anaasee moomoosa aurimarusa faqa oosana oosana teeroo maree marusa faqa faafasaaqa naundurairi marusa faqa nifu dimbarausa faqa andeeqanniseenoo Yoohaneena faiqiqara qimanniminoo qinau.

22 Inneeqara Yoohaneefinnai anirandee oonuree maqee maaqoo qafaida maria ainaina qinee Yisusa auqaunannara qimamiaqa, nifu dimbarausa maqanniseeqa niku eendirausa andeeqannisaunaqa nidaqa karoora nari-marisa rukanniseeqa naaqoo aunirausa ruiqanniseeqa kuqirausa findifumanniseeqa, kudi fasiqa anaaseeuqa amiqira fasaasa ufa innaarunaira qimannimiqa mi ainainausara oonuree aiqama Yoohaneena qimamifanoo mifa qiniara iriannoo, ooqai aniraree qimaqoosa doo misamma ani maridaqa.

23 Maa ufana faqa qimamiaqa, qiniara sia qaara irira irimariasaa Anutufa asairana nimiannoo.

24 Miqi qufaqa miqanda irisee fufanoo Yisufa faiqí anaasee moomoosa miqoo mariusa qimanniminoo qinau, Yoohaneefa nammari nimimarufa kaasau aadana maqa maaqanaki marufaqa innee mina ufa iriraree qimasee nana ainaina qafararee fee qimasee ooqu fi fee iqau, fifau andanda ufai fannoo kasimarina qafararee fee qimasee ooqu fi fee iqau. Yoohaneefa sia miqimarifa marinau.

25 Innee nana qafararee fee qimasee ooqu fi fee iqau, faiqí moo amiqira qamunna afisimarina qafararee fee qimasee ooqu fi fee iqau. Yoohaneefa sia miqimarifa, amiqira qamunna afisimariasaa sia kaasau maqa maaqaki maridaqa uriqarara karaambaiqa maaqaki maridaqa.

26 Innee Anutuna tamummaqara fasiqa qafararee fee qimasee ooqu fiqau. Eoo innee tamummaqara fasiqa ooqu qafaqau, sia kaqi tamummaqara fasiqafau ooqu qafaqau, tamummaqara fasiqauqa uriqararafa marunara oonu qafaqau.

27 Ooqeenna akaraki Yoohaneenara maaqi qimasee akara rinoo maridanoo.

Iriaqa, qinee qini ufa qimannimianinafa ani oorinni aqiqaananoo ani oorinni fidanoo ani aana afisuannoo.

<sup>28</sup> Yoohaneenara miqi qimaqoofaqa qinee Yisusa minara maaqi qidaqa maa maqanasaa kambiqoosakiqari mifa uriqaranoo marifa maridanoo, mina dinni innaaruna ququsaki mariasa ureeqarausa misa Yoohaneena uriqararausa maridaqa.

<sup>29</sup> Faiqi anaasee kaiqeesa faqa ummuarimari takisa munnimmana maree mariasa faqa Yisuna ufa Yoohaneenara quna amiqimasee iriqau, misa ooqai Anutuna andeeqara ufamau fidaqa, Yoohaneefinnai nammari maree marusa maridaqa Yisuna ufa amiqimasee iriqau.

<sup>30</sup> Farisai amaana ufa qimariasa faqa Mooseena sandufasaa rakisirausa faqa misara Anutufa andeeqara aana naamua qufaqa misa rukiasee sia Yoohaneena nammari maroosa maridaqa Yisuna ufa faqa sia iriqau.

<sup>31-32</sup> Yisufa misara iriseenoo maaqi qimasee faiqi anaasee qimannimino qinau, maa fasannai mariasa nana fooqaasee maridee, misa faiqiuqa maqusa qambaana sararida mariasa fooqaasa maridaqa misa maaqi qimasee nari aqi nari aqidaqa maasa asasira idi raunaqa innee sia dadaaqi idi ree mariafanoo maasa quandaki qiki anai fakiki raunaqa innee mina faqa sia dadaaqiafanoo innee furufari mariasa mariafanoo.

<sup>33</sup> Yoohaneefa nammari nimimarufa anireenoo uainna nammari sia nanau narana uqanna faqa sia nanau. Ookasaasa anoona faqa pandaqa oofaafana faqa kai noofaqa innee minara qafamasee afaanna aundurai keeqafifanoo miqidanoommifoo qiqau.

<sup>34</sup> Qinee faiqi nimaaku uqanna aniree uainna nammari faqa narana faqa naunaqa innee qiniara maa fasiqana qafaa kaaqa narana nammari namufaqa neemarifa maridanoo, ummuarimaria takisa munnimma maree mariasa faqa maasa qikooqafaqa niqiqee mariasa faqa niqoondiki marifa maridanoo qiniara miqi mari fee qimariafanoo.

<sup>35</sup> Irirana faqaasa irira ufa kai qimariafaqa innee ufa qaara ufa qimariasa marianara innee irirana siaisa mariafanoo.

### *Yisuna aikusaa fadameena adianau.*

<sup>36</sup> Farisai amaana ufa irimarufa moo fannoo narana suqaseenoo Yisuna aaramasee aniree qini maaqaki narana naannee qufanoo Yisufa eedoo qimaseenoo mina maaqaki keeqafinoo ooqu marifinoo narana neemarinau. (Mi aukunna mi maqusaanaasa narana quqee maru qaindana qambaana marufaqa misa mina fiqumma taatata afuru faiqagee idaqa narana nee mariqau. Niku uquseeqa faiqagee nee mariqau.)

<sup>37</sup> Mi maqusanakiqari moo anaasee kisaagasaa mandainaina maree marufa Yisufa Farisai amaana ufa irimaruna maaqaki narana neemarinaki marufanoo mi anaaseefa minara iriseenoo amiqira afundimaru fadameenna idaaqira taquki maruna mareenoo minaki anireenoo Yisuna aanaaqiannai anireenoo mifa aiku uquqoonnai kikiqinau.

<sup>38</sup> Kikiqammafinoo qikiraqee marufanoo mina aukunu fannoo Yisuna aikusaa aqufufanoo nari akiaqa asausi kisaaqannai mina aikusaqarara aukunu rukaseenoo mina aiku amooqaseenoo afundi maru fadameena mi taqunakinaana mina aikusaa adianau.

<sup>39</sup> Farisai amaana ufa irimarufa Yisuna aaroofa mina qafamaseenoo nari aundurai kai Yisunara maaqi qimasee qimmirinai, maa fasiqafa kuqaa Anutuna tamummaqara fasiqa maridanoofau maa anaaseefa mina aiku amooqainara iriqini, mifa kisaagasaa manda oosana maree marunara iriseenoofau qaoo qini.

<sup>40</sup> Yisufa mina irirana iriseenoo mina aaramasee qimaminoo qinau, Simoonafa qinee moo ainainara ani qimamidaqa, Simoonafa iriseenoo qinau, eeo ufasaa rakisirafa doo qinaqa iria qufanoo Yisufa qinau, faiqí moo fannoo moomoo munnimma faqaafa maridanoo maqee maqee ufaasu munnimma akaqausa nimisaidanoo mina akiaqara faqa aabaa faqa maree marifa marinau. Mi fasiqafa faiqí qaaraqanda ufaasu munnimma niminau.

<sup>41</sup> Moo fasiqa 500 munnimma moomoo aminau, kafaa moo fasiqa 50 munnimma oodaa kai aminau, nimufaqa maraqa niniufaqa aukuana aiqaramafufaqa kaifaa mi munnimmana narí amiraree qimasee sia amanaikufanoo mi munnimmana akoofa iriseenoo miqandara amuqusu-fanoo mina akiaqara sia maranau minnisanau.

<sup>42</sup> Simoonafa anee miqandara nanee fee qidanee miqandakiqari yafee firaqoo mi munnimmana akoonara aidiannoo fee firaa munnimma aabaa maroo fee kaqikaa munnimma aabaa maroo fee.

<sup>43</sup> Simoonafa mina iriseenoo Yisuna qimaminoo qinau, abee firaa munnimma aabaa maroofa mifa kai minara aidiannoo fee qufanoo Yisufa qinau, anee andeeqasee qiananoo qimaseenoo quandafi mi manda anaaseefinnai oori ubeekamaseenoo qinau, Simoonafa anee maa anaaseena qafaidanee, qinee anoona ufa ani qimamidaqa maa anaaseena firaa mandainaina akiaqara doo minnisaunannara koorooidanoo firaqoo qiniara aidimarifanoo amiqi amiqimmaqimaqaidanoo kaqikaa aaqarana akiaqara minni aisainafa minni aisainanoo mi kaqikaa aaqara fasiqafa kaqikaa qoo minni aisainna fasiqanara aidiannoo.

<sup>44</sup> Qinee ani maaqaki aniraunnana anee sia maasa oosana mareenana nammarinnai qiku nammari uquananoo, maa anaaseefa narí aukununnai qini qiku nammari uquseenoo narí akiaqa asausi kisaqaannai rukeenoo.

<sup>45</sup> Qinee ani maaqaki aniraunnana anee sia maasa oosana mareenana qimooqaananoo maa anaaseefa aniree qini qiku qimooqaifa maridanoo.

<sup>46</sup> Qinee aniraunnana anee sia maasa oosana mareenana makaqa anoona qikiaqaki adiaananoo maa anaaseefa amiqira afundimaru makaqa anoona qini qikusaa adiaifanoo qikusaa adiaqimaqeenoo.

<sup>47</sup> Ani kaqikaa mandainaina akiaqara sia rukaananoo sia qiniara aidinana sia amiqi amiqimma qimaqaananoo maa anaaseena firaa mandainaina tia rukaunanoo firaqoo qiniara aidifanoo amiqi amiqimmaqimaqaidanoo.

<sup>48</sup> Yisufa miqi qimaseenoo quandafi mi anaaseena qimaminoo qinau, Oo anaasee ani mandainaina akiaqara arirana doo qinee minni aiseeqa qufaqa akaqausa miqoo mariusa nariqa naundurari qimiriqau.

<sup>49</sup> Maana yafasiqa fee nariara faiqí mandainaina akiaqara arirana minnisee marunaasee qidanoo fee.

<sup>50</sup> Yisufa mi anaaseena kafaa qimaminoo qinau, oo maa anaasee anee aneenna aunduraindari qinisaa rusimarianafa mifa kai ani innaarunai marira asumu aminoo doo asoaranaki fua.

## 8

### *Anaaseeuqa Yisuna dadaaqiqau.*

<sup>1</sup> Kaqikaqoo marikinoo Yisufa kaqikaa maqusakiaqa faqa firaa maqusakiaqa faqa oonuree aniree inoo nidanoo Anutuna innaaruna ququsara amiqira fasaasa ufa qimanniminoo ninau. Mina faiqi namu qisaukuqara taikasee qikunooqu qaara marasee fasiqa faqa anaasee akaqausa faqa mina faqa fiqau.

<sup>2</sup> Sia fifau aanaaseeuqa mina faqa fiqau. Yisufa aurirana taikannisooa faqa faafasaaqa faqaasa maraqunnisoo anaaseesa kai mina faqa fidaqa nariqa narana faqa munnimma faqa minannai Yisuna faqa mina faiqi namufaqa fidaqa dadaaqimariqau.

<sup>3</sup> Mi anaaseesa nuqu Yisuna anoona amarafa Mariafa Makadara maqusaindaraafa Yisufa mina aundurakinaana dinni qisauku taikasee dinni ani qaaraqanda faafasaaqa nifaqoofa faqa moo anaasee Eeroodeena maaqasaa rakisirana Tusaana anaqa mina auqu Yooanna nammarifa faqa moo anaasee Susaana nammarifa faqa moomoo aanaaseeuqa mina faqa fiqau.

*Qaqama aaqee maruna kikiqa usirana.*  
(*Mat 13:1-9; Mak 4:1-9*)

<sup>4</sup> Yisufa fimarufaqa faiqi anaasee aiqamaindari moomoosa ani usufufanoo Yisufa quandara ufa qimannimino qinau.

<sup>5</sup> Innee amiqimasee iriaqa faiqi moo fannoo maasa Yuda maqannaasa oosana mareenoo maqa rumaseenoo raisa fooqaana ummaqirara mina qaqama marasee minaki aqasoofanoo ururanau. Mifa miqoo aqaidanoo akaqa qaqama fannoo aatata niku ree mariaqoo faqa aqufufaqa ufiniuqa aniree mina kai namasaqau. <sup>6</sup> Akaqafa ooni amuaaqa maqa oodaa marunasaa aqufufanoo kambiqeenoo dauni aadanusinai, maqa afeekasaa nammari siainasaa kambiqeenoo aadanusinai.

<sup>7</sup> Akaqafa reereeroondaana marunaki aqufufanoo reereeroondaana namufaqa kambiqoofanoo reereeroondaana fannoo rafaqafu fufanoo aadanusinai.

<sup>8</sup> Akaqafa amiqira maqasaa aqufinoo firaafa kambiqeenoo qaqama moomoo uqanna iranau, Yisufa kafa qimannimino qinau, naaqoo faqaasa amiqimasee qini ufa iriaqa.

(Mi aukuanna mi maqannaasa kaqikaa ainaina qaqama raisa fooqaana neemariqau, mina auqu uita, misa maqa rumasee nisaukunoo mi qaqa mana afaqa qumaraida aqasoofanoo kambiqee marinai, qaqama irafufaqa atekamaree munusee aindirumasee feemu uqusaidaqa neemariqau. Misaindi uita, raisa fooqaafa maasaindi sakuma maridanoo.)

*Yisufa quandara ufa faiqi anaasee qimanniminai.*  
(*Mat 13:10-17; Mak 4:10-12*)

<sup>9</sup> Yisufa faiqi anaasee qimannimufaqa mina faiqi namu nariqa kai iramiriqa qiqau, sakuma fooqaana qaqamara quandara ufa qimannimianana mina oosana maasa sia iridaqa qimaqiminaqa iria.

<sup>10</sup> Yisufa iriseenoo qinau, Anutuna ququsakinaa qumee irirana Anutufa inniara qimannimianee qinau, faiqi anaasee sia kooroomasee qimannimia quandasee qimanniminaga nifu qafamasee sia paqurifara naaqoonnai irisee sia naundurai quqefara.

*Qaqama aaqee maru ufana oosana kooroo inai.*  
(*Mat 13:18-23; Mak 4:13-20*)

<sup>11</sup> Raisa fooqaana qaqamasaa quandara ufa oosana maaqimminoo maridanoo, raisa fooqaana qaqama Anutuna ufa maridanoo.

<sup>12</sup> Raisa qaqama niku reemariaqoo aqufifa maaqimmidanoo, Anutuna ufa irisaaqano manda afaana fannoo misa naunduraindaraana ufiniarafoo ani namammaree fifaqa qini saqarikirana faqa asumu marinasaa faqa ititaanifeera.

<sup>13</sup> Raisa qaḡama ooni amuaaḡa maḡasaa aḡufifa maaḡimmidanoo, faiḡí anaasee akaḡausa Anutuna ufa irisee sia naundurái meemaḡoo iriaraasi-daḡa aḡḡee kai irisee nimanamasee qafara aukwana kambiqafifaḡa misa minnisaiḡaḡa.

<sup>14</sup> Raisa qaḡama amuka faḡaa ainainaki aḡufifa maaḡimmidanoo, faiḡí anaasee akaḡausa Anutuna ufa iriseeḡa maḡasaa adiafaaimari ainainara faḡa oosana oosana ḡumiasana faḡa munnimma maree mariana faḡa ummaara narimari ainaina faḡa amuka faḡaa ainainara foora minasaa kukuḡammafinoo radamifanoo adusa qaḡama iraidanoo.

<sup>15</sup> Raisa qaḡama amiḡira maḡasaa aḡufifa maaḡimmidanoo, faiḡí anaasee akaḡausa Anutuna ufa irisee ḡumareeḡa nári amiḡira nimuḡusaki ufa irisee eedoo ḡiranaki ḡuḡasee minaki maḡeeiafanoo mariifa qaḡama iraidanoo. Faiḡí moo fannoo Anutuna ufa iriseenoo faiḡí anaasee ḡiman-nimidanoo narí marirana faḡa kooroo imarifa qaḡama iraidanoo.

*Yisufa quandara ufa ḡooma kikiḡa usinau.*  
(Mak 4:21-25)

<sup>16-17</sup> Yisufa kafaḡa ḡimannimidanoo ḡinau, faiḡí moo fannoo ḡooma ḡumbiseenoo sia difaaninnai rafaḡa fuannoo, sia beeta ameemaanai ḡuḡaidanoo, faiḡí anaasee mina maaḡaki keeḡafiḡa amiḡimasee qafaḡḡee ḡimasee ḡaindasaa diridanoo. Kasooḡḡee faḡa aiḡama kukeeḡara ainaina Anutufa kooroo iannoo aiḡama rafaḡafira ainaina faḡa Anutufa paḡurimasee mareeḡee akooḡoo ḡuḡaannoo.

<sup>18</sup> Innee Anutuna ufa irimariasaa amiḡimasee irisee maraaḡa aiḡama kaḡikaa irirainaina faḡaasa Anutufa moo faḡa nimiannoo, irirainaina siaisa ati marina Anutufa rafiḡa mara marainaḡa kaḡi marifaranoo. Innee minara Anutuna ufa iriseeḡa rakisi ḡumaraaḡa.

*Yisufa narí anoona uḡanna kikiḡammusinau.*  
(Mat 12:46-50; Mak 3:31-35)

<sup>19</sup> Yisufa miḡoo faiḡí anaasee ḡimannimarufaḡa mina anoofa faḡa mina ainaina faḡa aniree Yisuna faḡa ufa ḡiraree ḡimasee qafuofanoo faiḡí anaasee moomoo maaḡaki umbiqafufaḡa sia amana keeḡaḡau.

<sup>20</sup> Faiḡí moo fannoo mina qafamasee Yisuna ḡimaminau, ani anoofa faḡa ani akaḡaafasaaufa faḡa misa ani faḡa ufa ḡiraree ḡimasee madaanai kikiḡiḡa maridammia.

<sup>21</sup> Yisufa mina iriseenoo aiḡamausa ḡimanniminau, Anutuna ufa irisee eedoo ḡimasee mi mau fimariasaa misa ḡini ḡinaukoo ḡikaḡaafasaa uḡanna mariafanoo.

*Yisufa nammari faḡa ufai faḡa qaoo ḡufanoo kasoomminau.*  
(Mat 8:23-27; Mak 4:35-41)

<sup>22</sup> Moo kari Yisufa narí faiḡi namufaḡa nammari afainni noodaanna reemaru kanuḡanaki akaramafinoo ḡimanniminau, innisaimbaḡa maa nammarina muḡu afainai nianai fuanaura miḡi qufaḡa misauḡa aikannai furufanoo kanuḡa fannoo finau.

<sup>23</sup> Misa fimarufanoo Yisufa kanuḡaki faiḡaḡee marinau, faiḡaḡee marufanoo ufai firaafa uḡufanoo nammari amakaurinoo nammari fannoo kanuḡaki ḡumbiḡeenoo ukuḡnaaḡaa ufaḡa rufiee mariḡau.

<sup>24</sup> Yisuna faiḡi namu Yisufinnai oonuree afauriḡa ḡiḡau, oo uriḡararafa, uriḡararafa, maasa doo ukuḡnaidaḡa kuḡirammidaḡee ḡufanoo Yisufa findifinoo ufaira faḡa nammariara faḡa qaoo ḡufanoo kasooinoo firaḡoo dai ḡimafinau.



<sup>25</sup> Miqi qimaseenoo Yisufa quandafi narí faiqi namu niqinoo qinau, innee qini saqarikirana yai fee quqee fee sia marifaqa rufiee mariafanoo qufaqa misa aiqamausa naaquqoofaqa rufiidaqa narí qimami narí qimami qidaqa qiqau. Maana yafasiqa fee maridanoo mifa ufaira faqa nammari amakauriranara faqa qimannimifaqa mina ufa irisee eedoo qimasee kasoomafia.

*Faiqí aundurakinaa afaannauqa kuaraki fiqau.*  
(Mat 8:28-34; Mak 5:1-20)

<sup>26</sup> Misa miqooqari kanuqaki nammari amuaqumau fifiufaqa muqafainai nianai Keerasa maqannaasa maruqoo oonuraquraminau, mi maqannaasa Kariree maqa maaqa dinni atinai mariqau.

<sup>27</sup> Yisufa kanuqakiqari maqasaa aqufufanoo faiqí moo fannoo faafasaaqa mina aundurai marufa aniranau, mi fasiqafa kisaqasaa kaqisamu ni-marinau, sia narí maaqai marufa faiqí madikai marufa aniranau.

<sup>28-29</sup> Faiqí anaasee moomoo kari sainnadannai mi fasiqana aiku asauku rumbasoofanoo faafasaaqa fannoo mi fasiqana afeekaikufanoo mi sainnandana rakeemasoofanoo sandeenoo kaasau aadana maqa maaqai fimarinau. Mi fasiqafa Yisuna qafamasoofanoo faafasaaqa afaanna mina aundurai marufa faaqarinau. Yisufa mi faafasaaqana aqiqaaninnanara iriseenoo faaqa rumasee Yisuna oorinni maqasaa aqufinoo aranaiqi qimaminau, Yisu anee firaqoo uriqarara Anutuna amaaku mariananoo anee nanaree maasa soodaa idanee, qinee firaqoo ani iraidaqa, sia qini ambufuqa.

<sup>30</sup> Yisufa mi faafasaaqana iramirinoo qinau, ani auqu yafee qufanoo mi faafasaaqafa qinau, maasa moomoosa maa fasiqana aundurai marunausa marunnanara maasa duqu qusirausee qidaqa.

<sup>31-33</sup> Miqi qimasee Yisuna aranaiqi iramiriqa qiqau, anee sia maasa idaki niqiqaa qimasee qafoofofanoo ameemai kuarauqa andanda naidaqa marufaqa Yisunara afeekaikiqa qiqau amanee maasa kuarauqa naundurai keeqaanauree qufanoo Yisufa doo fuqee qufaqa mi fasiqana aundurakiqari raudamaki kuarauqa naunduraki keeqafufaqa mi kuarauqa tautumaki ameemaindari sandaqa nammari afainni ooquree rafusaki nammariki aqufiqa ukuqnamafiqa kuqu taikaqau.

<sup>34</sup> Kuarasaa rakisimarusa mina qafeeqa sandee ooruree maqusai marusa faqa uiqaana maaqakiaqa marusa faqa qimannimiqa fiqau.

<sup>35</sup> Faiqí anaasee moomoosa maasa faqa qafararee qimasee Yisufinnai nammari afainni sandee ooqu fiqau, ooquree qafoofofanoo faafasaaqauqa aundurakiqari fifu fasiqafa irirana maraseenoo qamunna rumbaseenoo Yisuna aikuki ooqufaaqee marufaqa qafoofofanoo naaquqanau.

<sup>36-37</sup> Keerakeeseenee maqannaasa maqusauqakiqari moomoosa suqumaree aniroofanoo Yisufa faafasaaqauqa niqiqoofaqa qafeeusa misauqa qimannimufaqa iriseeqa firaqoo naaquqoofaqa Yisuna ireeda kai ireeda kai fuki faaki qida irammiriqa qiqau, amanee anee maaqooqari moosaa finnaree qufanoo Yisufa kanuqaki akaramafinoo mootinai finau.

<sup>38-39</sup> Yisufa firarufanoo faafasaaqa aundurai mariu fasiqafa Yisuna aranaiqi irammirinoo qinau, amanee qinee ani faqa fuanauree qimasee fuki faaki qufanoo Yisufa mina aqiqeenoo qinau, aneenna maaqai oonuree Anutufa ani andeeqainara misa qimannimia miqi qufanoo mi fasiqafa narí maqusai oonureenoo Yisufa mina andeeqoonara aiqamai qimanniminoo ninau.

*Kisaaqandaikimaru anaaseefa Yisuna qamunna auqanau.*  
(Mat 9:18-26; Mak 5:21-43)

<sup>40-42</sup> Yisufa anirandee kafaannai oonuroofaqa faiqí anaasee moomoosa minara rakisida mariusa اساسammasee Yisuna afiqaqau, Yisufa kanuqak-iqari maqai aqufufanoo miqoo amaana maqasaa rakisirafa mina auqu Iairusafa anireenoo Yisuna aikuki maqasaa aqufinoo aranaiqi iramirinoo qinau, amanee anee qini maaqai aniree dadaaqia, qini qiraamuna moodaa qisaukuqara taikasee qikunni ooqu qaara aukwana kai marasaifa kuqirari-danoo. Yisufa eedoo qimasee fimarufaqa faiqí anaasee moomoosa fidaqa narí afeeqee narí afeeqee idaqa Yisuna faqa fiqau.

<sup>43</sup> Anaasee moo fannoo qisauku taikasee qikunni ooqu qaaraqanda aukwana kisaqandaiki marufa tutaqausa moomoosa feefauru masaida mareemaru marasinna amufanoo sia taikanau, miqi marufanoo mina munnimma taikafufanoo kaqi marinau.

<sup>44</sup> Yisufa faiqí anaasee namufaqa fimarufanoo mi anaaseefa Yisuna aanaaqiannai moomoosa ititafunakiaqa aniree qumee kai mina qamunna ati qumee auqamasoofanoo mina kisaqandaikirafa aaqee uqanna taikanau.

<sup>45</sup> Yisufa irammirinoo qinau, yafee qini duqeenoo fee qufaqa aiqamausa qaoo qufanoo Peetooroofa qinau, uriqararafa faiqí anaasee moomoosa ani afeeqaidammia qufanoo Yisufa kafa qinau,

<sup>46</sup> Moo fannoo qini duqai fanoo faiqí andeeqara afeeka qinikiqari fifaqa iriqammunani qinau.

<sup>47</sup> Miqi qufanoo mi anaaseefa oo doo qini qiqafeenoommifoo qimaseenoo aindiri aindiri ufanoo Yisuna aikuki maqasaa aqufinoo aiqamausa nifusaa narí auriranara faqa mina qamunna auqoonara faqa aurirafa aaqee kai taikoonara faqa kooroo inau.

<sup>48</sup> Yisufa mina ufa iriseenoo qinau, oo qini qiraamuna anee irirana qinisaa rusiannanara ani aurirafa taikeenoo, doo asooaranaki fua.

*Yisufa Iairusana aramuna andeeqanau.*

<sup>49</sup> Yisufa miqi qimasee mi anaaseena qimamimarufanoo amaana maqasaa rakisirana maaqaindari faiqí moo fannoo anireenoo Iairusana qimaminau, anee Yisuna sia kadaapi amia, ani aramuna doo kuqufinoo.

<sup>50</sup> Yisufa mina iriseenoo Yairusana qimaminau Iairusa anee sia rufiaa, qinisaa kai ani irirana mundinanoo ani aramuna amanaikiannoo.

<sup>51</sup> Yisufa Yairusana maaqai oonureenoo aiqamausa keeqararufanoo qaoo qimaseenoo Peetooroona faqa Yoohaneena faqa Yameesana faqa mi manaaqana anoona akoona faqa minamusa kai nifiqeenoo maaqaki keeqanau.

<sup>52-53</sup> Keeqafufanoo niqafoofaqa mi maqanaki moomoosa maridaqa iki-faafau qimarufanoo Yisufa qimanniminau, Sia ikiraqaaqa maanaqa sia kuqinoo faiqaqee maridanoo qufaqa aiqamausa mi manaaqanara kuqaa kuqinoo fee qimasee Yisunara naanaidaraqiga uteeti qiqau.

<sup>54</sup> Yisufa mi manaaqafa rinoo marunnai oonureenoo mina asauku qumareenoo qimaminau, qini qiraamuna findi fua.

<sup>55</sup> Miqi qufanoo aunduraindaraafa oonurandee ani keeqafufanoo aaqee uqanna findifufanoo Yisufa mina anaukoo qimanniminoo qinau, narana ani aramuna amiaqee qufaqa amufanoo nanau.

<sup>56</sup> Mina anaukoo firaaqoo naaquqoofanoo Yisufa qimanniminau. Sia uqanna maa ainainnara moonna qimamiaqa, kukeeqaaqa.

## 9

*Yisufa narí faiqi namu niqiqoofaqa innaarunaira qimannimi qau.  
(Mat 10:5-15; Mak 6:7-13)*

<sup>1</sup> Yisufa narí faiqi namu (12) qisaukuqara taikasee qikunni ooqu qaara marasee naarama moodaaqoo quqaseenoo Anutuna afeeka faafasaaqa afaqara afeeka faqa aurirana oosana oosana taikara afeeka faqa niminau.

<sup>2-3</sup> Nimiseenoo maaqanna maaqanna niqiqamaseenoo qimanniminau, innee Anutuna innaaruna ququsara faiqi anaasee qimannimidaqa misa aurirana taika nimaqaaqa, innee sia moo ainaina maree fuaqa saunu faqa aakauqa faqa narana faqa munnimma faqa aabaa qamunna faqa sia maree fuaqa kaqi fuaqa.

<sup>4</sup> Maqusaki oonuraifaqa moo fannoo aqoondi kamannisainaqa mina maaqaki kai mariiqa minakiqari kai fuaqa.

<sup>5</sup> Yamaqusanaasee inniara qaoo qifaqa Anutufa naruaninnanara aaquqi-mannimaqasee kookoomma afaqa ninaamarasee fuaqa.

<sup>6</sup> Yisuna faiqi namu maqusa maqusa fidaqa amiqira fasaasa ufa faiqi anaasee qimannimisaidaqa aiqamai aurusa faqa taikannisee mariqau.

*Eeroodeefa Yisunara Yoohaneefee qinau.*

*(Mat 14:1-12; Mak 6:14-29)*

<sup>7</sup> Eeroodeefa Kariree maqa maaqaki uriqarara kiapafa mi ainainnara iriseenoo firaqoo randeenoo furufarinau. Akaqausa qiqau, Yoohaneefa nammari nimimarufa Eeroodeefa arusoofa kuqiranakiqari findifinoo mi naaquqara ainainna auqaidanoommi maqi qufanoo Eeroodeefa mi ufana iriseenoo randanau.

<sup>8</sup> Ooqeenaa tamummaqara fasiqauqakiqari Eeriaa fee moo fannoo fee kafaa findi finoo fee akaqausa qufanoo Eeroodeefa qinau,

<sup>9</sup> Yoohaneefa nammari nimimaruna akiaqa qinee atekasaafananoo kuqinoo maridanoo. Maa fasiqafa Yisuna oosana oosana ainainnara iridaqa mina yafee maridanoo. Miqi qimaseenoo Eeroodeefa Yisuna qafarara randanau.

*Yisufa noodaanna faqa feemu faqa moomoosa niminau.*

*(Mat 14:13-21; Mak 6:30-44; Yoh 6:1-14)*

<sup>10</sup> Yisuna faiqi namu maqusa maqusa niniufaqa anireeqa nariqa nidaqa auqoo ainainnara Yisuna qimamiqau. Yisufa misa nifiqeenoo faiqi sia marunnai Beetasaida maqusa aaqa fiqau.

<sup>11</sup> Faiqi anaasee moomoosa iriseeqa afaqee minni oonu paquriqau. Yisufa misa naaramaseenoo Anutuna innaaruna ququsara qimannimiseenoo misaki aurusa andeeqannisanau.

<sup>12</sup> Eenoofaqa Yisuna faiqi namu qisaukuqara taikasee qikunni ooqu qaaraqanda marasee aniree Yisuna qimamidaqa qiqau, anee faiqi anaasee niqiqainaqa maqusa maqusa uiqaana maqakiaqa fifainidaqa narana feefaurumasee naqa, maana faiqi sia mariasaqa maridaqa.

<sup>13</sup> Miqi qufanoo Yisufa qimanniminau, inneeqa kai narana nimifaqa naqa, qufaqa misa qiqau, Maasa feemu moodaannai qisauku faqa noodaanna qaaraqanda faqa maqeeidaqa, faiqi anaasee moomoosa uqanna maridaqa amanee maasa situaqai oonuree narana moomoo feeraurianau-ree.

<sup>14-15</sup> Miqi qufanoo Yisufa narí faiqi namu qimannimino, innee faiqi anaasee qimannimifaqa raina raina mafi qaara faqa qaara faqa fasiqa niku nisauku taikasee qisaukuqara faqa (50) moosaqa ooqu mariaqa kafaa qaara faqa qaara faqa fasiqa niku nisauku taikasee qisaukuqara faqa (50) moosaqa ooqu mariaqa miqi kai mafi ooqumari maree fuaqa qufaqa mina faiqi namu qimannimufaqa faiqi anaasee miqi mafi ooqumari maree fiqau.

Misakiqari faiqí kai (5,000) faifa tauseenna mariqau, ooni saqari auqíqa mariqau.

<sup>16</sup> Ooqu mari fufanoo Yisufa feemu moodaannai qisauku faqa noodaanna qaaraqanda faqa qumareenoo innaarunai oori uqeereseenoo Anutufinnai dufi dufi qimasee asaukunoo feemu faqa noodaanna faqa ruqi ruqimasee narí faiqi namusaa soofaqa misa qumareeqa faiqí anaasee nimiqau.

<sup>17</sup> Nimufaqa noofanoo nimuaqufaqa ataraasa minnisooafa Yisuna faiqi namu minauqa suqusee uqaki rufanoo qisaukuqara taikasee qikunni ooqu qaaraqanda (12) uqa qumbiqanau.

*Peetooroofa Yisunara Anutuna asauku mundiranara qinau. Yisufa narí kuquaninnanara qimanniminau.*

*(Mat 16:13-28; Mak 8:27-9:1)*

<sup>18-19</sup> Moo kari Yisufa naríara oonuree innaaru qimarufaqa mina faiqi namu oonuroofanoo irammirinoo qinau, faiqí anaasee qiniara nana fasiqa fee qidee qufaqa misa qíqau, akaqausa Yoohaneefa nammari nimimarufa kuqiranakiqari findifinoo fee qidaqa, akaqausa aniara ooqai kuqufufa Eeriaafa findifinoo fee qidaqa, akaqausa Anutuna ooqeenaa tamummaqara fasiqauqakiqari moo fannoo kuqiranakiqari findi finoo fee qidaqa.

<sup>20-22</sup> Yisufa mina iriseenoo irammirinoo qinau misa miqi qiafaqa innee qiniara nanee fee qidee qufanoo Peetooroofa qinau, anee Anutuna asauku mundirafa mariananoommi qufanoo Yisufa aranaiqi qimanniminau innee mi ufana sia moo fasiqa qimamiaqa qinee faiqí nimaaku uqanna marunasa marianaqa faiqí firaasa faqa Anutuna aanaiqikirausa uriqararasa faqa Mooseena sandufasaa rakisirausa faqa firaa aupurarana qimiseeqa qiniara nikooqamasee kuqa darusaifaqa qaaramoo faasaana aiqarainanoo Anutufa qini mara findifu masee kaqi marirana qimiannoo.

<sup>23</sup> Yisufa quandaki aiqamausa qimannimidanoo qinau, faiqí moo fannoo qini faqa firaree qimasee qini ufamau finafa narí marirana minniseenoo faasaambaasaana qini ufasaara kuqa dariranara amanaikidee qinafa qini faqa fidanoora foora qini ufamau fuannoo.

<sup>24</sup> Qinee minara maaqi qimasee qimannimidaqa. Faiqí moo fannoo qinisaara kuqiranara amuqusi marinanoo narí marirana afeedi inafa mifa narí marirana kakasiannoo. Moo fannoo qiniara narí marirana maaqoo minnisainafa narí marirana asumu maraannoo.

<sup>25</sup> Faiqí moo fannoo maa maqanasaa uriqarara faikamafinoo aiqama ainaina maqee idanoo mari inafa marikinoo kuqinoo narí aunduraindaraana kuridiranaki finanoo mi qumiasanafa fifau kadaapirumasee maroofa mariannoo.

<sup>26</sup> Faiqí anaasee moo fannoo qiniara faqa qini ufara faqa faiqí nifusaa asaurusee akooqainafa marinaqa qinee faiqí nimaaku naaru inaarunaindari qeeqa areenarana faqa qeeqa qikoona areenarana faqa naaquqara andeeqara qangiroouqa faqa misa areenarana faqa minauqa namufaqa qumureeqa mi fasiqa anaasesara faqa qisaurusee qikooqaannoo.

<sup>27</sup> Innee maa ainainnara faqa iriaqa innee maqee mariasakiqari akaqausa sia kuqirai kaqimarifanoo Anutuna innaarunaindaraa ququsa qafeefaranoo.

*Aaqanasaa Yisufa innaaruna afiri maranau.*

*(Mat 17:1-8; Mak 9:2-8)*

<sup>28</sup> Yisufa mi ufana qimannimiseenoo dinni qisauku taikasee dinni ani qaaramoo faasaana aiqaroorofanoo Yisufa Peetooroona faqa Yoohaneena

faqa Yameesana faqa nifiqeenoo moo aaqanai innaaru qirara ooru fiqau. Yisufa naríara innaaru qimarufaqa mina faiqi namu kaqi faiqaqee ufanoo.

<sup>29-31</sup> Yisufa miqoo innaaru qidanoo moo oori afiri maroofanoo mina gamunna kaaqa eekara rinoo nifu daroodaraa inau. Qaara fasiqa tautumaki kooroomafufaqa Yisuna faqa ufa qimariqau. Miqanda Mooseesa Eeriaasa oqai kuquqanda tautumaki miqoo maqasaa misa nifusaa innaaruna arenaranaki kooroomafiqa Yisufa qusasaa Anutuna ufamau finoo Yeerusaree maqusai kuquaninnanara Yisuna faqa ufa qimariqau.

<sup>32</sup> Peetooroofa narí faqa maruqanda faqa faiqaqee mariufanoo findifiqa Yisuna kaaqa qarana faqa mi fasiqaqanda faqa niqa fee mariqau.

<sup>33</sup> Mi fasiqaqanda Yisuna aisee firarufanoo Peetooroofa narí oosana sia irirai Yisuna qimaminoo qinau. Ufasaa rakisirafa, maasa maaqoo marunanoo amiqidanoo. Maasa qaaramoo uiqaana maaqa maaqoo usakaanaura, aniara moo Mooseenara moo Eeriaanara moo usakaanaura.

<sup>34-35</sup> Peetooroofa kaqi ufa qimarufanoo oonamu fannoo anireenoo misa ititannimaqasoofaqa rufiaqau. Rufioofanoo oonamukiqari ufa moo maaqi qinau. Maana qini qimaaku maridanoo qinee rusandeesamumasee maraafanafa, innee mina ufa kai iriaqa.

<sup>36</sup> Mi ufafa taikafufanoo misa qafoofanoo Yisufa naríara kai miqoo marinou. Miqooqari Yisuna faiqi namu miqoo mariusa mi ainainna qafoonara sia uqanna kooroo iqau. Kaaqa umeeraqau.

*Yisufa kumaaraa aundurái afaanna maruna aqiqa nau.*

*(Mat 17:14-18; Mak 9:14-27)*

<sup>37-38</sup> Faiqee iqaqoofaqa minamusa aaqanasaaqari ooquroofaqa faiqi anaasee moomoosa Yisuna ani paqurimasoofofanoo misakiqari faiqi moo fannoo faaqa rumasee Yisuna qimaminoo qinau. Ufasaa rakisirafa qinee qeeqa qimuqusannai ani irammiridaqa anee anireenana qini qimaaku moodaa kai maqaqaunnana qafaa.

<sup>39-40</sup> Faafasaaqa moo fannoo maqee maqee faaqa rumasee mina aakufifanoo rafuseeqee maqasaa aqusaifanoo teendaarooni marifanoo ookiqari qaqaara faka fakidanoo, maqee maqee miqidanoo sia adooaidanoo. Qinee ani faiqi namu maaqoo mariasasaa qeeqa qimuqusannai irammirunaqa amaniafanoo sia amana afaqee.

<sup>41-42</sup> Yisufa iriseenoo qimaminou, innee qini ufara sia anoonee qimariasa kaqi runna fimariasa mariafanoo. Qinee kisaagasaa fee inni faqa marianauree kisaagasaa fee inni ummaarara foora akuaqee ianauree. Miqi qimasee mi fasiqana qimaminou, aneenna amaaku maree mai ania qufanoo mi kumaaraafa ani marufanoo faafasaaqa fannoo mina arurutukueeqeenoo maqasaa aqusoofanoo teendaarooninoo qaqaara faka fakinau. Yisufa mi faafasaaqana amambaina qufanoo fifufanoo Yisufa mi faiqina andeeqaseenoo narí akoona kafaa aminou.

<sup>43</sup> Faiqi anaasee mina qafamasee Anutuna naaquqara afeeka qafamasee rufiaqau.

*Yisufa narí kuquaninnanara kafaa qimanniminou.*

*(Mat 17:22-23; Mak 9:30-32,44-45)*

<sup>44-45</sup> Faiqi anaasee Yisufa auqoo ainainara naaquqoofaqa narí qimami narí qimami masoofofanoo, Yisufa quandaki narí faiqi namu qimanniminoo qinau, innee maa qimannimianaqa sia aunuaqa amiqimasee iriaqa. Qinee

faiqí nimaaku uqanna Anutufa qini mareeqee faiqí faiqi nisaukuki quqaqi-sainaqa darifaranoo fee qufaqa sia mi ufana oosana iriqau, Anutufa misa irirana ititasoofaqa sia iriqau, Yisuna irammirianeerusia minnisaqau.

*Yisuna faiqi namuki yafee uriqararafa maridanoo fee qiqau.*

*(Mat 18:1-5; Mak 9:33-37)*

<sup>46</sup> Moo kari Yisuna faiqi namu maasakiqari yafee uriqararafa maridanoo qimasee narinni narinni ufa rainaqau.

<sup>47-48</sup> Yisufa narikai misa ufa iriseenoo akooqoofanoo faiqi aanaaqi moo maraseenoo narí aqa kikiqamasee mina kikiqa ususeenoo narí faiqi namu qimanniminau. Yafee moo fannoo qiniara irisee maa kaqikaa faiqina oonudupirana oonu asasammasee amiqi amiqimma aisainafa qini uqanna qiqoondikidanoo, kafaa yafee moo fannoo qini oonu asasammasee qiqoondikinafa qini diqiqoona Anutuna aqoondikidanoo. Innikiqari oorudupirafa mifa inni uriqararafa maridanoo.

*Moo fannoo Yisuna auqusa faafasaaqa aqiqanau.*

*(Mak 9:38-40)*

<sup>49</sup> Yoohaneefa mi ufana akiaqara Yisuna qimaminoo qinau. Oo maasa uriqararafa, innau moo fasiqa fannoo moosaa ani auqunnai manda faafasaaqa faiqí aundurakinaana aqiqee marufaqa maasa qafamasee qaoo qiqiafana, mifa sia maasa faqa nimarunara qaoo qiqiafana.

<sup>50</sup> Yisufa mina iriseenoo qimaminau sia minara qaoo qiaqa, sia namuqaa maridanoofau miqini maasa qiqoondi maridanoo miqidanoo.

*Moo Samaria maqannaasa Yisunara moosa fuannee qiqau.*

<sup>51</sup> Yisufa Kariree maqa maaqaki niniufanoo innaarunnai oorufuaninna aukwana adeedi roofanoo Yeerusareenni oori quandanau.

<sup>52</sup> Samaria maqa maaqaki faiqanoo fidanoo faiqí akaqausa niqiqoofaqa indaaru Samaria moo maqusaki faiqaaninnanara deedaqiaqeera qimannimirara niqiqanau.

<sup>53</sup> Oonuree mi maqusaanaasa qimannimufaqa misa qiqau maasa namuqaa maqusai Yeerusaree maqusai fidanoo fee qimasee qaoo sia maaqoo faiqaannee qiqau.

<sup>54-56</sup> Mina faiqiqara Yameesasa Yoohaneesa miqanda minara iriseeqa niranaqoofaqa Yisuna qimamiqau, Karaambaiqa amanee maasa innaarunaindaraa idara qinanoo qumuree misa qama taikaannoo fee qufanoo Yisufa quandaki miqanda nimambaina qimasee qaoo qimaseenoo aiqareenoo moo maqusai finau.

*Yisufa nariara qinau, qinee qinaamu siaisee qinau.*

*(Mat 8:19-22)*

<sup>57</sup> Misa aanai fimarufanoo faiqí moo fannoo Yisuna qimaminoo qinau. Anee yai fee maqusa maqusa finaqa qinee ani faqa fuanaura.

<sup>58-60</sup> Yisufa iriseenoo qimaminoo qinau. Kaasau fainiuqa oonaamarai faiqaasa maridaqa ufiniuqa faqa ninaamu faqaasa maridaqa, qinee faiqí nimaaku yai fee qeeqa qikiaqa rumasee fee faiqaanauree, faiqara maqa siaisa maridaqa, qini faqa finnaree. Miqi qimasee qimamiseenoo Yisufa fidanoo moo fasiqa aaranau, anee aniree qini faqa fuannee qufanoo mi fasiqafa qinoo qini qikoofa kuqirarammi marifaqa mifa kuqufinaqa akundamasee ani faqa fuanaura amanee qinee miqianauree qufanoo Yisufa qinau. Saina naaruara kuqiranaki fifandinausa kai nariqa kuqinausa nikundaaqa. Anee Anutuna ququsaki keeqara ufa faiqí anaasee qimanniminanua.

<sup>61</sup> Faiqí moo fannoo Yisuna qimaminau uriqararafa qinee ani faqa firaridaqa qeeqa maqusai naaree oonuree qeeqa qikaqaafasaa nimanda masee anianauree qufanoo Yisufa qimaminau.

<sup>62</sup> Faiqí moo fannoo saunu qumareenoo nandi aumuru arumaree munu kasaagái quqeemarifa miqimaria fasiqausa sia amana innaaruna ququsa saika amana mareefaranoo.

## 10

*Yisufa narí fuaninna maqusa maqusanai niqiqoofaqa fiqau.*

<sup>1-2</sup> Marikinoo Yisufa faiqí moomoosa rusandeesamumaseenoo qaara kai qaara kai niqiqeenoo maaqanna maaqanna Yisufa narí fuaninnannai indaaru fuaqeera niqiqamaseenoo qimanniminnau afuqakinaa nandi aiqi marianara foora tatafinoo rairainoo maridanoo moomoo fasiqa anaasee maridaqa aiqum innaarunai quqeemariasa oodaa maridaqa. Innee suana akoofinnai innaaru qifanoo aiqifandinausa niminaqa dadaaqiqa suana aiqum qeera.

<sup>3</sup> Doo fuaqa, qinee qini sipsipa aanaaqi kaaqa reendeenimariasa kaasau faini qambaanaí inni niqiqaidaqa.

<sup>4</sup> Innee afunee uqa aakaquqa fee niku aanaamu fee sia maree fuaqa, aanaí fidaqa faiqí sia nimandaqa. Innee maqusai oonuree faiqí moona maaqaki keeqarara maaqi qiaqa Anutuna asooarafa maa maqanaki mariani.

<sup>5-6</sup> Asooaranara rimari fasiqafa minaki marinana ani afaaqooqa qirana minasaa mariani, sia asooaranara rimari fasiqafa minaki marinana anee afaaqooqa qira ufa qimamiannana kafa maraa.

<sup>7</sup> Innee maqusa maqusa fidaqa yaqoo maaqaki fee keeqafiqa minaki maridaqa mifa niminna narana nammarina kaqi naaqa. Innee inniqa saika imari fasiqana kadaapirirana akiaqara amimariafanoo, doo innee faqa saika fasiqauqa mariafanoo, misa narana nimifaqa kaqi naaqa inni kadaapirirana akiaqara maridanoo. Sia aiqama maaqakiaqa keeqafida naqa nuaqa, moodaa maaqaki kai mariaqa.

<sup>8-9</sup> Innee maqusa maqusa oonuraifaqa misa inni niqoondikidaqa narana nammari nimifaqa kaqi naaqa, namasee mi maqusanakina aurinausa andeeqannimaqasee maaqi qimasee qimannimiaqa. Anutuna innaaruna ququsa fannoo inni rafusu quqarirara adeedi ranoo maridanoo.

<sup>10</sup> Innee moo maqusaki oonuraifaqa misa sia inni amiqi amiqimanni-maqaiifaqa innee maqusa qambaanaí maridaqa maaqi qimasee qimannimiaqa.

<sup>11</sup> Inni maqusa kookoomma fannoo maasa qifaaqai atooqafifaqa maasa rukeeqee inniqa nifaaqai aqiqa, maa ufana amiqimasee iriaqa Anutuna innaaruna ququsa fannoo inni naaqa ani marifaqa minnisaafanoo.

<sup>12</sup> Qini faiqí namu qinee Yisusa inni qimannimidaqa kasooqagee Anutufa faiqí anaasee ufa irira faasaana anirainanoo innee kookoomma nimaqaqoosa Anutufa sia rauqi nimaqaannoo Soodooma maqusanaasa manda oosana maree maruna akiaqara Anutufa kaqikaqoo rauqi nimaqaannoo kookoomma akunnimaqaasa sia rauqi nimaqaannoo, kuqa naruannoo.

*Yisufa qaara maqusanaasa niqiqanau.*

*(Mat 11:20-24)*

<sup>13-14</sup> Oo Koorasinna maqannaasa maqusa maaqa namufaqa qinee inniara qimudao qidaqa inni narirafa firaafa mariannoo. Beetasida maqannaasa maqusa maaqa namufaqa inni narirafa faqa firaafa mariannoo. Tiree

maqusanaasa faqa Sidoona maqusanaasa faqa aanaamuru aamina mariasa qinee mi maqusaqandaki faiqí sia amanaikimari ainaina moo misaki auqaanaqau misa dauni dauni iriseeqau misa doona danda kookoomma afaqa nariqa nifaaqai akusee ikifaafau qifau nariqa manda oosana minisee dauni quandasee qini ufamau fini. Koorosinna maqusanaasa faqa Beetasaida maqusanaasa faqa inniki moomoo naaquqemari ainaina auqaafannaqa sia inneeqa manda oosana minnisaqau. Firaa ufa irira aukwana anirainanoo Anutufa Tiree maqusanaasa faqa Sidoona maqusanaasa faqa naridanoo kaqikaaqoo nifauaannoo. Innee Koorosinna maqusanaasa faqa Beetasaida maqusanaasa faqa sia nifauaannoo firaaqoo inni naruannoo.

<sup>15</sup> Kapeeranaumma maqusanaasa inniara faqa qianaara inneeqa nifaaqara mara maree urimariana inni maqusara faqa unnaqimasee innaaruna maqusa fooqaa fee qimariafanoo mina akiqara Anutufa inni maqusa namufaqa mindari rarisameeqeenoo idaki aqumisaannoo.

<sup>16</sup> Yisufa quandafi narí faiqi namu qimannimino qinau. Ya fasiqa anaasee fee inni ufa irianinafa qini ufa uqanna iriannoo. Ya fasiqa anaasee fee inni ufa rukiainafa qini futeeqaannoo, ya fasiqa anaasee fee qini ufa sia irinafa qini diqiqaina Anutuna futeeqaannoo.

*Sia afaannauqara asasiaqa innaarunai fifandinnanara asasiaqa.*

<sup>17-19</sup> Yisufa niqiqoo fasiqausa maqusa maqusa niniufaqa anireeqa firaaqoo asasamasee Yisuna qimamiqau. Oo karaambaiga firaa ainaina faafasaaqa maasa ani auqu ramasee niqifaunaqa doo faiqí naunduraindari raudamaki sandeea. Yisufa irisee qimannimino eeo qinee Sadanna qafeeqa mifa innaarunaindari aakuusaara foora maqasaa aqufinau. Innee iriaqa qinee afeeka inni nimunaqa sakanisaa fee farukasaa fee niku ramasaifanoo sia ukaga nimiannoo inni namuqaa Sadannana oosana oosana afeeka fannoo sia inni naruannoo.

<sup>20</sup> Doo miqinoo marifaqa maa anoona ainaina qimannimidaga, faafasaaqa inni ufa irisee eedoo qimarianara sia minara asasiaqa maa ainainnara asasiaqa, inni nuqu innaaruna ququsaki mari papiqanaki akararinoo maridanoo, minara kai asasiaqa.

*Irirana faqaasa ititannimaqasee kaiqeesa kooroo inau.*

*(Mat 11:25-27; 13:16-17)*

<sup>21</sup> Yisufa mi ufana qimannimisoofanoo Anutuna naaquqara maraquna fannoo Yisuna asasirana amufanoo Anutunara maaqi qimasee innaaru qinau. Oo qini qikoofa innaaruna faqa maa maqana faqa karaambaiga dufi dufi anee qinee maqee maqee qimannimunnufana irirana faqaasa nifusaa rafaafunniseenana irirana siaisa qini faiqi namu kooroomannimaqee mariananoo. Eeo qini qikoofa aneenna aidirafa miqimminoo maridanoo.

<sup>22-23</sup> Yisufa kaqi innaaru qidanoo narí akoona qimaminu, qini qikoofa aiqama ainaina qini kai qimiqaifa maridanoo, faiqí moo fannoo sia ani amaakura amiqimasee iridanoo anee qini qikoofa kai amiqimasee qiniara irimariananoo kafaa faiqí moo fannoo sia qini qikoonara iridanoo amaaku fannoo kai aniara iridanoo qinee qeeqakai irisee quqannifiqee marunausa faqa aniara irifarannoo. Miqi qidanoo innaaru qimasee quandafi narí faiqi namu umeenni qimannimino. Inni aiqama amiqira ainaina faiqí sia amanaikimari ainainauqa uqannifiqaunaqa qafamasaa fanoo inni asasirafa firaafa maridanoo.

<sup>24</sup> Qinee inni qimannimidaga ooqai tamummaqara fasiqauqa faqa karaambaigauqa faqa innee maqee qafeemaria ainainausa faiqí sia



amanaikimaria ainainausa faqa qafaaqaa imarufaqa sia qafaqau, misa innee maqee qini ufa irimaria ufausa iriaqaa imarufaqa sia iriqau.

*Aiqama sandufauqa uriqararanara qimanniminau.*

<sup>25-26</sup> Yisufa miqi qimarufanoo Mooseena sandufa akoofasa fannoo anireenoo Yisuna akari maqararee qimasee qimaminoo qinau. Ufasaa rakisirafa qinee nana saika fee marasee naaru naaru mariranaki fuanauree qufanoo Yisufa qimaminau, ooqai tamummaqara fasiqauqa akarakinaa ufa anee asaana rumasee nana ufa fee irinane.

<sup>27</sup> Mi fasiqafa iriseenoo Yisuna qimaminau, maa ufana asaana riqa, innee inneeqa nimuqusa nimana afeeka faqa irirana faqa mi tiana aiqaman-nai iriranannai faqa karaambaiqa Anutunara nidimarinaqa nimuqusiani. Kafaa maaqi qimasee moo asaana riqa anee aneenna aqoonausara aninna afaaqara foora misara aidinoo amuqusiani.

<sup>28</sup> Yisufa mi ufana iriseenoo mi fasiqana qimaminau, doo ani ufa anoona maridanoo mi ufamau kai fidana naaru naaru marirana paqurinnaranoo.

<sup>29-30</sup> Mi ufana Yisuna qimamufa mi fasiqana Mooseena sandufa akoofasa asaurirana amiseenoo nariara andeeqaranaki marianauree qimaseenoo nari amoo qimaseenoo Yisuna kafaa irammirinau. Yafee qini qiqaonafa maridanoo fee qufanoo Yisufa qimaminau faiqi moo fannoo Yeerusareen-dari Yeerikoo maqusai ooqu fimarufanoo ummuarimaria fasiqausa aanai mina paqurimasee doo aru quqasee mina afaaqaa ainaina maree fifufanoo kuqiara foora miqoo rinoo marinau.

<sup>31</sup> Mi faasaana amaana maqasaa aanaiqikirafa mi aatata ooqu fidanoo aru quqaqoo fasiqana qafeenoo dinni aana afaindaqa fiqa ranau.

<sup>32</sup> Miqi kai inoo amaana maqaki ainainimarifa moo Reefina ati fannoo mi aatata ooqu fidanoo ooqurama qafamasee dinni aana afaindanai ooqiaaqaree finau.

<sup>33-34</sup> Mina aanaaqiana faiqi moo fannoo Isaraee maqannaasa namuqaa marufa Samaria maqannaafa mi aatata ooqu fidanoo aru quqaqoo fasiqana misa namuqaa Isaraee maqannaana qafamaseenoo firaqoo amuqusufanoo uainna nammari faqa fadameena faqa mina afaaqaa ateekaranaki akuseenoo banisannai rumbaseenoo mi fasiqana rausee-geenoo nari doonkisa qaqaseenoo afiqeenoo maqusai oonureenoo pasin-diaqa maaqaki quqaseenoo minaki maridanoo rakisi marinau.

<sup>35</sup> Faiqee iqaqoofanoo mi fasiqafa maaqasaa rakisirana qaaraqanda munnimma amiseenoo qimaminau anee maa munnimmana maraseenana maanasaa rakisimarinanoo munnimma sia amanaikinaqa anireeqa moo faqa ani amianauree qimaseenoo quqasee finau.

<sup>36-37</sup> Yisufa mi ufana Reefina ati maru fasiqana qimamiseenoo iram-mirinau yafee aru fasiqana aqoonafa maridanoo fee qufanoo Reefina ati fannoo qinau, minara amuqusimari fasiqafa kai, qufanoo Yisufa qinau doo anee faqa fidana miqikai ia.

*Maratafa moomoo narana suqeenoo oonu auqee ani auqee kaukaata qinau.*

<sup>38</sup> Miqooqari Yisufa nari faiqi namu faqa fidanoo moo maqusai oonuroofanoo anaasee moo mina auqu Maratafa Yisuna afiqeenoo nari maaqaki munuseenoo amiqi amiqimamaqanau.

<sup>39</sup> Maratana anasaafa Yisuna anoona amarafa Mariafa mifa faqa maridanoo Yisufa Anutuna ufa qimannimimarufanoo Mariafa Yisuna aqa ooqufaaqeeidanoo mina ufa irimarinau.

40-41 Yisufa faqa mina faiqi namufaqa marunara Maratafa naríara narana sugeenoo deedaqinoo imarufanoo aundura dapikufanoo Yisuna qimaminau karaambaiqa qini qinasaafa aiqama saika kadaapi qini kai qiminoo sia fee minara iridanee, qimaminanoo aniree dadaaqiani qufanoo Yisufa qimaminau oo Marata, Marata, ani oosana oosana narana sugaranara amuqusimarifanoo aundura dapiki marifana aaqee mariananoo.

42 Anee moodaa narana suqaaqaana mifa amanaikinoo maridanoo ani anasaafa Mariafa andeeqara ainaina mareenoo Anutuna ufa reendeena-mafinoo iridanoo, qinee sia mi ainainna minasaqaraana rafiaanaura.

## 11

*Yisufa innaaru firaana uqannifiqanau.*  
(Mat 6:9-13; 7:7-11)

1-2 Moo kari Yisufa moo atinai maridanoo innaaru qimarufanoo mina faiqi namuqiari moo fannoo oonureenoo qimaminau, Karaambaiqa Yoohaneefa nammari nimi marufa narí faiqi namu innaaru qira oosana uqannifiqoondee inana anee faqa maasa uqannifiqaa qufanoo Yisufa eedoo qimasee qinau, innee innaaru qirara maaqi qimasee qiaqanani.

Qipoo ani auqu naaquqarafa uriqararafa mariani,  
Ani innaarunai ququsa maa maqanasaa kambiqaaani

3-4 Maasa maqee maqee naanna narana qimia.

Aiqamausa manda oosana maasa nimiafaqa mina akiaqara mininnisaidaqa  
minara anee maasa naanna ramasee mina amana kai maasa manda  
ainaina akiaqara minni qisaa,

Anee sia maasa mareeqeenana afeeka nimaniranaki quqannisaa.

5-6 Miqi qimaseenoo Yisufa kafa narí faiqi namu qimanniminu faiqi moo fannoo eenda amuqusai narí aqoonde maaqai oonuree qimamiannoo, Oo qini qiqoonde anee qaaramoo feemu qiminaqa qinee maree munu qeeqa qiqoonde amia, mifa nianaindari ani marifanoo qini narana sia marifaqa.

7 Miqi qinanoo mina aqoonde fannoo maaqi qiannoo Oo naqimasee findi fuaauree faiqi anaasee namufaqa faiqaqee idaqa kooqi ititanoo maridanoo.

8 Mi fasiqafa naqi fee iannoo narana amiranara akooqaidanoo mina aqoonde marianinnara faqa sia amana findifi mara amiannoo. Anee faqa ani aqoonde marinana sia asaurinnaranoo fuki faaki qimarinnanoo ani fuki faaki qirana taikaanifeera findifi mara amiannoo.

9 Qinee minara irisee inni qimannimidaqa innee faqa miqikai iqa Anutunara innaaru qifanoo innee sarauinna ainaina inni nimiannoo, innee Anutufinnai randeeqa anoona paqurifara innee Anutuna kooqi arifanoo atuasee nimiannoo.

10 Aiqa innaaru qimariasa mareefaranoo randee mariasa paqurifaranoo kooqisaa kukusimariasa kukusifanoo atuaannoo.

11 Qinee faiqi nikausa inni qimannimidaqa inneeqa nimaaku noodaanara qifaqa manda sakani nimifaree, sia nimifara noodaanna nimifara.

12 Misa kookooraana auruara qifaqa innee faruka nimifaree sia nimifara.

13 Innee manda oosana maree mariasa marifanoo inneeqa faiqi namu innaaru qifaqa amiqira ainaina kai nimimariafanoo. Innaarunai nikoofa amiqirafa uqanna maridanoo minara innaaru qimarinausa minara firaaqoo amiqirana amana kai narí naaquqara andeeqara maraquna nimiannoo.

*Beeraseeburanannai afaanna aqiqarana oosana qimannimianau.*  
(Mat 12:22-30; Mak 3:20-27)

<sup>14-15</sup> Moo kari Yisufa faiqí aundurakinaa faafasaaqa aqiqarara imarufanoo, mi faafasaaqafa mi faiqina ufa rafaafufanoo sia ufa qimarinau. Yisufa faafasaaqa aqiqamasoofanoo mi fasiqafa ufa qinau. Faiqí anaasee mina qafamasee naaquqoofaqa rufiasee akaqausa Yisuna aqidaqa qiqau, afaannauqa uriqararafa mina auqu Beeraseeburafa afeeka Yisuna amifanoo quandaki faafasaaqa nifaqaidanoo.

<sup>16</sup> Akaqausa mina ueeqararee qimasee qiqau Yisunara faiqí sia amanaikimari ainaina auqusainaqa maasa aniara kuqaa Anutufinaindari qumu fee qianauna.

<sup>17-18</sup> Yisufa faasai misa naundurakinaa irirana iriseenoo narí afaannauqa afeekannai faafasaaqa aqiqoonara akooqoofanoo niqinoo qinau. Moo maqannaasa nariqa maqannaasa faqa oonu rakee ani rakeemafi rakidaqa sia kisaagasaa marifara, dauni kuqifaranoo. Moodaa maqaki mariasa faqa oonu rakee ani rakee iqa qusasaa moodaa moodaa makidaqa furufarifaranoo. Sadannana ququsakinaasa miqikai iqa oonu rakee ani rakeemafiqa naqimasee afeekaikifaree. Innee qiniara afaannauqa uriqararana mina auqu Beeraseeburanannai faafasaaqa aqiqeenoo fee qimasaida unna qimariafanoo.

<sup>19</sup> Qinee minannai faafasaaqa nifaqaanaqa innee yanee auqu ramsaidadaqa faafasaaqa nifaqaidee, innee sia Beeraseeburana auqu ramasee miqi mariafanoo innee andeeqasee Anutuna auqu ramasee afaanna nifaqee marifanoo. Miqi marianara inniqa faafasaaqa nifaqee mariafa inni ufa fannoo qini diqira ufa qimariana ateekaidanoo.

<sup>20</sup> Qinee sia Beeraseeburana afeekannaifau faafasaaqa nifaqaidau Anutuna naaquqara afeekannai nifaqee marunausa marunannara akooqoo maridanoo. Miqi marunannara Anutuna ququsa inniki doo animarinara kooroo idanoo.

<sup>21-22</sup> Afeeka fasiqa Sadannafa amudaanaiqi marifa duru saamu deedaqamasee marifanoo mina aiqama ainaina amiqinoo mariannoo, sia moo fannoo ummuariannoo. Afeeka fasiqa Sadannana uriqararafa uqanna qinee Yisusa anireeqa mi fasiqana radamuseeqa mina faakana duru saamu ainaina mareeqeeqa qeeqa qiku qisauku nimianauranoo.

<sup>23</sup> Faiqí moo fannoo sia qini qiqoondi marinafa qini namuqaa maridanoo sia qini dadaaqida oonu suqu ani suqu imarifa, mareeqaida aquraaruki marifa maridanoo.

*Afaanna narí aqoonausa nifiqeenoo narí marunaki keeqarana kikiqa usinoo marida.*

(Mat 12:43-45)

<sup>24-26</sup> Yisufa kaqi qimannimidanoo qinau. Manda faafasaaqa faiqí aundurakiqari maaqakiqariara foora raudee aadana maqa maaqa oombura maqa maaqaki aakaqaki oonuree aniree inoo nidanoo adoaranara randaisianoo maaqi qimasee oonumafi irinoo qinau sainaqa qinee qeeqa quqasee aniafanna fasiqana aunduraki kafa fua, qimaseenoo oonuree qafooofanoo mi fasiqana aunduraki maaqara foora damuninoo maridanoo andeeqanoo marufanoo qafamasee oooo qimasee kafa oonurandee ani aqoonna faafasaaqauqa aiqamausa misa mandainaina uriqararaura kai dinni qisauku taikasee dinni ani qaraqanda marasee (7) nifiqamareenoo mi fasiqana aunduraki keeqafi mariqau. Marufanoo ooqai moodaa faafasaaqa marufanoo mi fasiqafa kaqikaqoo mandainainaki marinau, maqee firaaqoo mandaikuqanna inoo maridanoo.

*Anutuna ufamau fimariasa anoona asasirausa maridaqa.*

<sup>27</sup> Yisufa mi ufana qimannimufanoo anaasee moo fannoo faiqí anaasee gambaanaindari findifi qimaminoo qinau. Ani maqaseenoo naamma amimari anaaseefa aniara amiqira qimaaku fee qimaseenoo firaqoo asasira anaasee maridanoo.

<sup>28</sup> Miqi qufanoo Yisufa quandafi mi ufana qaoo qinoo qinau, abee Anutuna ufa irisee mi mau fimariasa misa kai firaqoo asasirausa maridaqa.

*Yisufa narí kuquaninnanara Yoonnaana kikiqa usinau.  
(Mat 12:38-42)*

<sup>29</sup> Faiqí anaasee moomoosa Yisuna rafusu quqarumafufanoo Yisufa kaqi qimanniminoo qinau, Maa maqee aukuaana maria fasiqa anaaseesa firaqoo manda oosana maree mariasa misa Anutufinnaindari qiniara faiqí sia amanaikimari ainaina auquanaqa kuqaa Anutufinaindari anifeeqianaaura fifau miqi qimariasa misa mi irirafa manda oosana nimidanoo.

<sup>30</sup> Sia innaarunai kooroo ira ainaina fuka uqannifiqaanaura nauraafa Yoonaanaindi mifa kai kaqi maridanoo, Yoonaaafa ooqai Nineefee maqusanaasa Anutuna ufa kooroomanniminou, miqi kai iqa qinee faiqí nimaaku uqanna maqee mariasa Anutuna ufa kooroomma nimaqaanaura.

<sup>31</sup> Kasooqaqee naaru Anutufa faiqí anaasee ufa irira faasaanasaa Seebaa maqannaasa uriqarara anaasee fannoo findifi maa maqee mariasa inni niquraraannoo. Mi anaaseefa nianaindari Sooroomoonnana irirana faqaa ufa iriraree qimasee aninau. Doo maqee faasaana qinee Sooroomoonnana uriqararaisa animaridaqa innee sia qini ufa irimariafanoo minasaara mi anaaseefa inni niquraraannoo.

<sup>32</sup> Kasooqaqee naaru Anutufa faiqí anaasee ufa irira faasaanasaa Nineefee maqusanaasa findifi maqee mariasa inni niqurareefaranoo, misa ooqai Yoonaanakiqari Anutuna ufa iriseeqa nariqa manda ainaina maqasaa quqasee Anutuna afusaa reendenammiqau. Maqee qinee Yoonnaana uriqararaisa animarunaqa innee sia qini ufa irimariafanoo minasaara Nineefee maqusanaasa inni niqura reefaranoo.

*Yisufa rambiara quandara ufa kafaa qimanniminou.  
(Mat 5:15; 6:22-23)*

<sup>33</sup> Yisufa kaqi qimannimidanoo qinau, faiqí moo fannoo qooma qumbisee difaaninnai sia rafaqaquannoo akooqoo quqasainanoo kaaqa qeemarinaqa faiqí anaasee maaqaki keeqafi amiqimasee qafaqee qimasee akooqoo quqaidanoo.

<sup>34</sup> Anee paapaaira oosana faqaafa mariananoo afu aundura kaaqa qarafa marifa mariananoo. Anee tatamaqira oosana faqaafa mariananoo afu aundura asukuna arinoo maridanoo.

<sup>35-36</sup> Inneeqa kai minara rakisiaqa inni nifu naundura kaaqa qarana tatamaqira oosana fannoo rafaqaquandoora, inni nifu naunduraki tatamaqira oosana kaqikaafa faqa sia marinaqa inni naunduraki marifa faqa innee nimaria oosana faqa kaaqa areenaannoo.

*Yisufa Farisai amaana ufa qimarusa niqiqanau.  
(Mat 23:1-36; Mak 12:38-40)*

<sup>37</sup> Yisufa ufa qimannimi taikasooфанoo Farisai amaana ufa qimarufa Yisunara aniree qini maaqaki oonuree narana naannee qufanoo eedoo qimasee mina maaqaki mina faqa oonuree ooqu marifi narana nanau.

<sup>38</sup> Farisai amaana ufa qimarufa Yisuna oosana qafamasee tautinoo qinau, maa fasiqafa sia maasa oosana mareenoo asaaquirai naidanoo kaqi naidanoo ufa rukiee marifa maridanoo.

<sup>39</sup> Karaambaiqa narí kai mina irirana iriseenoo qimaminoo qinau, Qini ufa iria, innee Farisai amaana qimariasa inni marirana pirita kaafa fooqaafa mariafaqa adisaa kai findaukee mariafanoo aunduraki faiqí narirana faqa mandainaina oosana oosana faqa ikairi faqa inni naundura qumbiqanoo maridanoo.

<sup>40</sup> Innee furufari mariafanoo innee Anutunara pirita kaafa adi kai auqimariffee fee qidee aundura sia auqiffee fee qidee mifa aundura faqa auqusee qafee marifa maridanoo

<sup>41</sup> Innee inneeqa naundura anukamasaifanoo inni nifaaqa aiqama anukanoo mariannoo.

<sup>42</sup> Oo Farisai amaana ufamau fimariasa inni narirafa firaafa mariannoo, innee inneeqara maasa Anutuna ufamau fidaqa afuqakinaana oosana oosana adiafaaira ainaina rainasee akaqana Anutuna amidaqee qimasee quandaki andeeqara marirana faqa Anutunara riranara faqa minnisee mariasa mariafanoo.

<sup>43</sup> Oo Farisai amaana ufa qimariasa inni narirafa firaafa mariannoo inni mandoosana maaqimminoo maridanoo. Innee amaana maqaki keeqaidaqa noorisaa ooqu mariranara firaqoo rimariasa mariafanoo, innee makeetakiyaqa fimariafaqa faiqí anaasee inni nooriara rufiasee amiqimasee nimandaranara rimariasa mariafanoo.

<sup>44</sup> Inni nariranara irifanoo naaquqaani, innee faiqí madika sia qafosara foora mariafanoo faiqí sia qafarai kaqi mi mau fidaqa inniara amiqira fasiqafee qimasaidaqa inni naunduraki putaa iranara sia irimariasa.

<sup>45</sup> Yisufa miqi qufanoo Mooseena sandufa akoofasa moo fannoo qimaminoo qinau, Oo ufasaa rakisirafa anee mi ufanannai maasa faqa mandaikamma qimaqaananoo.

<sup>46</sup> Yisufa iriseenoo mina faqa qimaminoo, innee Mooseena sandufasaa rakisirausa inni narirafa faqa firaafa maridanoo naaquqaani. Innee inneeqa faiqí faiqi maqasaa sanda ufana oosana oosanannai niqoonausa ummaara narimari ummaarana faiqí anaasee nifaariki nimisee sia kaqikaqoo dadaaqidaqa inneeqa nisauku amuka faqa sia quqasee minannai ummaara kaqikaqoo dadaaqi mariasa mariafanoo.

<sup>47</sup> Inneeqa nariranara irifanoo naaquqaani, inni nikausa Anutuna tamummaqara fasiqauqa kuqa narusee nikundee marufaqa, innee misa faiqi namu oonuree inni nikausamara nariusu madikasaa amiqira ooni fee saqari fee taatuqee andanda faqa ummaqi mariasa mariafanoo.

<sup>48</sup> Innee inneeqa nikausa mandoosanara amiqira oosanee qimasee miqi mariafanoo misa tamummaqara fasiqauqa narusoofa innee misa madikai amiqi amiqimariasa mariafanoo.

<sup>49</sup> Anutufa minara iriseenoo narí iriranannai maa ufana qinau, qini tamummaqara fasiqauqa faqa qini ufa mara nimimariasa faqa Isaraee maqannaasa mariannai niqiqaiifaqa misa akaqausa kuqa narusee akaqausa aupurarana nimifaranoo.

<sup>50</sup> Ooqai Abeerana ariranasaaqari nariqa aniifaqa Seekariana ariranasaa naaquqara amaana maqaki tatufira qainda dinni naaquqara oosirafa dinni qambaana Seekariana ariqau.

<sup>51</sup> Mi aiqama kuqannarirana akiaqara qinee aiqama mareeqee maqee mariasasaa quqaanaura.

<sup>52</sup> Innee Mooseena sandufa akoofasauqa inni narirafa firaafa marinara naaquqaani, innee innaarunai fimaria irirafa kooqi kiqara foora inneeqa rafaqafusee sia atuasee keeqeefaranoo faiqí anaasee mi kooqinaki keeqarara imariafaqa innee rafaqafi mariasa mariafanoo.

<sup>53</sup> Yisufa mi maqusana minnisoofaqa Mooseena sandufa akoofasauqa faqa Farisai amaana ufa qimariasa faqa Yisuna ariraree qimasee oosana oosana ufannai ufaanara foora fufi mariqau.

<sup>54</sup> Misa aranaiqi oosana oosana ainainara irammiriana aaqainaqa rumbaanauree qimariqau.

## 12

*Yisufa aaquqira ufa faqa pooduqara ufa faqa qimannimainau.*

*(Mat 10:26-27)*

<sup>1</sup> Mikari faiqí anaasee moomoosa uqanna Yisufinnai ani suqufufaqa narisaa narisaa faqa niku ree mariqau. Yisufa ufa qimannimiraree qimaseenoo narí faiqí namu naaree qimanniminoos qinau. Innee Farisai amaana ufa qimariasa misa atiqeemari ooruku anoonara foora rufieeqa eerairiaqa misa ooruku maaqimmidanoo misa faiqí anaasee amaana ufa qimannimisaida nariqa maqandanai mandainaina maraidaqa misa miqimaria ooruku anoonara foora innee eerairiaqee qidaqa.

<sup>2</sup> Aiqama rafaqafira ainaina kasooqaaqee Anutufa aiquusaina akooqoo mariannoo aiqama kukeeqara ainaina faqa kasooqaaqee kooroomafinoo akooqoo mariannoo. Farisai amaana ufa qimariasa qaaraikirana faqa kooroo iannoo.

<sup>3</sup> Inni faqa qimannimidaqa innee asukunaki faiqí anaasee qimannimira ufa kasooqaaqee Anutufa aiquamausa nifusaa faasaana kooroo inaqa irifaranoos. Nana ufa fee maqaki moona aaqooki qimaminna ufana maaqa ataufakaqara foora miqooqari fi fi qimasee aiquamausa qimannimifaranoo.

*Sia nifaaqa arimariasara rufiaaqee ufafa.*

*(Mat 10:28-31)*

<sup>4</sup> Qini qiqoondiuqa inni qimannimidaqa inni nipata kai kuqa narusee miqooqari moo mandainaina sia amana niminausara misara sia innee rufiaaqa.

<sup>5</sup> Innee rufieefandinnanara qimannimiana qini ufa iriaqa, Anutunara innee rufiaaqa. Mifa amana inni nipata naruseenoo naunduraindaraa nimana faqa amana mareeqeenoo idaki aqirana amanaiki marifa, eeo qinee minara qimannimidaqa minara kai innee rufiaaqa.

<sup>6</sup> Kaqikaa ufini ririmma fifau ainaina sia feefauru imariafa maridanoo, mi fifau ainainnara Anutufa sia moodaa aunidanoo aiquamausara iridanoo rakisidanoo.

<sup>7</sup> Inni nikiaqa asaasi faqa Anutufa aiquamara iridanoo nisaana rumaqaisa mariafanoo ufini faqa inni nikiaqa asaasi faqa fifau ainaina marifanoo rakisidanoo innee firaatia anoona ainaina mariafanoo inni feefauru uriqaranoo maridanoo amiqimasee innisaa rakisiannoo, minara sia rufiaqiaqa.

*Yisunara faiqí nifusaa kooroo imariasara qinau.*

*(Mat 10:32-33; 12:32; 10:19-20)*

<sup>8</sup> Qinee maanara faqa inni qimannimidaqa yafasiqa anaasee fee moo fannoo faiqí anaasee nifusaa paasoosamasee nariara qinee Yisunaindi fee qinafa qinee faiqí nimaaku mi fasiqa anaaseesara Anutuna qangiroouqa nifusaa misara faqa qinindi fee qianaura.

<sup>9</sup> Yafasiqa anaasee fee moo fannoo faiqí anaasee nifusaa asaurusee sia qinee Yisunaindi fee qinafa qinee faiqí nimaaku mi fasiqa anaaseenara Anutuna qangiroouqa nifusaa minara faqa sia qinindi fee qianauro.

<sup>10</sup> Faiqí anaasee moo fannoo faiqí nimaaku qini manda ufa qimaqiminafa qinee mi ufana akiaqara minnaisaanauro. Faiqí anaasee moo fannoo Anutuna naaquqara maraqunara manda ufa qinafa Anutufa sia mina minnaisaannoo.

<sup>11-12</sup> Kasooqagee misa qini ufasaara inni qini ufa irimariasa rumba-maree amaana maaqaki fee siaasinnai fee nariqa uriqarara finnai fee munusaifaqa inni ufa iriraree qifaqa inneeqa nifaaqa ititara ufara faqa qimannimira ufara faqa sia randaafa. Anutuna naaquqara maraquna fannoo qimanniminna ufana miqoo kai inni naakapaannoo.

*Yisufa maaqoo ainaina afeediranara qaoo qinau.*

<sup>13</sup> Faiqí moo fannoo faiqí anaasee qambaanaindari findifinoo Yisuna qimaminoo qinau, Oo ufasaa rakisirafa maaqanda qikoofa narí ainaina maaqandasaa quqasee kuqifanoo qini qifasaafa nariara maraidanoo anee qini qifasaana qimaminanoo andeeqasee raina qimiani.

<sup>14</sup> Yisufa mina ufa iriseenoo qimaminau, oo maa fasiqa yafee qiniara siaasa saika maraanee qinaqee qinee inniqara ainaina rainaanauree.

<sup>15</sup> Miqi qimaseenoo quandafi faiqí anaasee minara qimanniminoo qinau, innee aiqama ainainara fanandiranara eerairiaqa. Faiqi anoona marirafa sia qumiasanasaa mundinoo maridanoommi.

<sup>16</sup> Yisufa kaqi qimannimidanoo maa ufana quandara ufa qimanniminau. Faiqí moo fannoo moomoo ququsa faqaafa narana amiqimasee moomoo kambiqanau, mi fasiqafa mina qafamaseenoo narí kai qimirinoo qinau.

<sup>17</sup> Qini narana moomoo uqanna marifaqa yai fee quqaanauree qimasee qimmiriseenoo qinau.

<sup>18</sup> Qinee maaqianauro, narana unaku quqasee afeedimaria maaqafa kaqikaafa marifaqa qinee mina rapeemasee fraana usakaanaura.

<sup>19</sup> Usakaseeqa qeeqa narana faqa qumiasana faqa minaki quqaseeqa qeeqaraa maaqi qianauro, Oo qinee maqee amiqiranaki maridaqa, qini amiqira ainaina moomoo aukuana amanaikinoo maridanoo, qinee narana nammari namasee amiqimasee aufadaranaki marianauro.

<sup>20</sup> Miqi qufanoo Anutufa mi fasiqanara maaqi qinau, anee furufari marianafa maqee eendaki anee kuqinanoo ani marirafa taikaannoo. Miqooqari yafee ani firaa qumiasana maraannoo fee.

<sup>21</sup> Yisufa mi ufana rafaafafinoo qinau, maqasaa moomoo ainaina suqi-mariasa innaarunai naaru naaru marirana siaisa mi fasiqana aanna raida moomoo ainaina fifau suqidaqa furufaridaqa.

*Qamunnara naranara sia indee indee ida maria.*

*(Mat 6:25-34)*

<sup>22</sup> Yisufa narí faiqi namu kaqi qimannimidanoo qinau, qinee faasai qimannimunna ufanara irisee maaqi qidaqa innee kaqi marira naranara sia nimuqusiani inneeqa nifaaqai afisimaria qamunnanara faqa sia nimuqusiani.

<sup>23</sup> Inni marirafa uriqarara ainaina maridanoo narana oorudupirafa maridanoo. Inni nifaaqa uriqarara ainaina maridanoo qamunna oorudupirafa maridanoo.

<sup>24</sup> Kaammeesa qafaaqa mifa sia narana asumu ummaqidanoo sia narana aiqifa sia maaqa usakasee minaki afeedifa, Anutufa kai narana misa nimidanoo. Innee sia ufiniara foorau mariafanoo uriqarara ainaina mariafanoo inni faqa nimiannoo.

<sup>25</sup> Innikiqari moo fannoo narí kuqiranara amuqusiranannai amanee narí marirana firarisamasee kisaagasaa mariannoo fee, sia amanaikinaranoo.

<sup>26</sup> Innee mi kaqikaa ainainnara sia amanaikiqa nanaree naranara qamunnara nimuqusidanoo fee.

<sup>27</sup> Innee nandaki kaasau taatuqee tamookeena qafamasee minara iriaqa, mifa sia ainainidanoo sia narí qamunna akunusee afisidanoo qinee minara qimannimidaqa ooqai karaambaiqa Dafidina amaaku Sooroomoonafa kaaqa ainaina faqa munnimma faqa moomoo maree marufa sia tamookeena amanasaa marinau mina qamunna amiqirafa uqanna sia tamookeena qamunnara foora idaaqirafa marinau, oorudupirafa marinau.

<sup>28</sup> Kaasau usau Anutufa kai misa qamunnara foora nimidanoo maqee kasidanoo duna atekasee ida areemaria ainainafa maridanoo. Anutufa misa nimidanoo sia fee firaa ainaina tia inni faqa nimiannoo fee, nimianoo. Innee Anutuna mandaagarafa kaqikaafa kai maridanoo, fifau narana qamunnara nimuqusi mariafanoo.

<sup>29</sup> Minara irisee maasa nana narana fee nammari fee maqee maqee naanauree qimasee minara sia nimuqusiani.

<sup>30</sup> Maa maqanasaa Anutuna ufa sia irimariasaa misa mi ainainausara kai maqee maqee randaidaqa, inni nikoofa inni narana qamunna ainainara faasai iridanoo nimiannoo.

<sup>31</sup> Innee Anutuna ququsakinaa marirana irirana niqiniandamasee mi mau firanara naaree irifanoo Anutufa inni marira ainaina nimiannoo.

*Oosana oosana qumiasana innaarunai kai afeedira ufa.*

*(Mat 6:19-21)*

<sup>32</sup> Oo innee qini faiqi namu, innee qini aandau aanaaqi firimariasara foora mariafanoo sia rufiaaqa inni innaarunai nikoofa اساسamasee innaaruna ququsa inni nimiraree qidanoo.

<sup>33</sup> Innee inneeqa qumiasana moosa nimisee feefauru maraseeqa kudi fasiqa anaasee nimiseeqa, mi andeeqaranannai innee sia afauqqaaninna munnimmara foora maraseeqa afeediaqa inneeqa aiqama qumiasana innaarunai kai afeediaqa, miqoo sia oorudupiannoo sia ummuara fasiqa fannoo maraannoo sia qooqoosa aukuanno.

<sup>34</sup> Inni qumiasana mariqoo kai miqoo kai inni nimuqusa ubeekanoo mariannoo. Innaarunai kai qumiasana afeediaqa.

*Yisufa qumiranara aambeembeesidaqa maria.*

<sup>35</sup> Innee deedaqiqa mariaqeera qimannimidaqa, inneeqa qamunna atukarasee nooiqandamaseera foora qooma qumbinoo maridanoora foora deedaqiqa mariaqa.

<sup>36</sup> Innee ainaina faqaana ainainira faiqiara foora deedaqiqa mariaqa. Misa uriqararafa amundara qoomaqara fifinoo mindari oonurandee aninannara rakisida marifara, mifa anireenoo kooqi arinaqa dauni atusaifanoo keeqaannoo, innee misa naanna ramasee deedaqiqa mariaqa.

<sup>37</sup> Amiqimasee afeesimariasaa اساسifaranoo misa uriqararafa anireenoo amiqimasee ainaini mariasee qimaseenoo narí qamunanda atukaramaseenoo narana suqaseenoo rakiqa nimiannoo.

<sup>38</sup> Misa uriqararafa eenda amuqusai fee iqaqarooka fee anirainaa amiqimasee rakisi inausa firaaqoo اساسifaranoo.



<sup>39</sup> Innee maa ufana faqa iriaqa, maaqa akoofa ummuarira fasiqa aninannara iriseenofau rakisinoofau sia kooqi rakeemasee ainaina maraiqini.

<sup>40</sup> Qinee inni faqa qimannimidaqa, innee faqa deedaqiga mariaqa, qinee faiqi nimaaku innee sia qiniara aniannoo fee qimarifandinna kamuqoo aniraanaura.

*Qinee rainarara qumuafanausa maridaqa.*  
(Mat 24:45-51)

<sup>41</sup> Yisufa miqi qufanoo Peetooroofa qinau. Oo karaambaiqa anee mi quandara ufana aiqamausaree qidanee maasara kai fee qidanee.

<sup>42</sup> Karaambaiqa fannoo iriseenoo ainainimaru fasiqana kikiqusinoo qimaminau, ainaina faqaana ainainira faiqi irirana faqaafa andeeqasee rakisimarifa marinau.

<sup>43</sup> Ainaina faqaafa mi andeeqara ainainira fasiqanara qimaminau anee qini maaqakinaa ainainasaa rakisisee ainainira faiqiuqa narana aandau andeeqasee nimianne qimaseenoo moosaa finau.

<sup>44</sup> Mi ainainira fasiqafa narí uriqararafa anianinna kamuqoo andeeqasee maridanoo firaqoo asasiannoo. Qinee Yisusa qimannimiana iriaqa, mi ainainna faqaafa narí amiqira ainainira fasiqa andeeqarana qafamasee amiqira fasiqa fee qimaseenoo narí aiqama ainainatiasaa rakisiranaikammama qaannoo.

<sup>45-46</sup> Moo kari ainaina faqaafa narí ainainira fasiqara qini ainainasaa rakisi marinaqa namummaqarara fuanee qimasee fifanoo mi ainainira fasiqafa quandaki narana faqa afeeka nammari faqa neeneeseenoo furufarinoo narí aqoonna ainainira fasiqa anaaseeuqa narinoo furufarinoo nimiranoo mina uriqararafa sia aniannoommifoo qimaru kamuqoo sia irirai mana mana imarinanoo anirama qafeenoo ufa rukiee mariasa narí mariandeemaseenoo mina ateeqa ateeqamasaannoo.

<sup>47</sup> Ainainira faiqi fannoo narí uriqararana ufa iriseenoo sia findifinoo mina ufamau finafa miqinna fasiqana saamu samu amudaani tureeraumasaannoo.

<sup>48</sup> Ainainira faiqi moo fannoo narí uriqararana ufa sia irirai aruaninna manda ainaina marainanoo mina arirafa aufadarafa mariannoo, maqasaa fasiqauqa moomoo ainaina amimari fasiqanara minasaaqari moomoo ainaina mareefaranoo, Anutufa faqa miqikai iannoo, maqasaa fasiqauqa uriqarara ainaina amimari fasiqanara minasaaqari uriqarara ainaina aabaa faqa mareefaranoo, Anutufa faqa miqikai iannoo.

*Qinee rainarara qumuafanausa maridaqa.*  
(Mat 10:34-36)

<sup>49</sup> Yisufa faiqi anaasee qimannimidanoo qinau. Qinee maa maqanasaa mariasaki idara foora ufa raieeqa namuqaakirana oosana araanaree qimasee qumiqiafana, doo faasai ida arasaanoo qaida mariaqaana.

<sup>50</sup> Qinee kuqira manda nammariara foora marasee naanaura, mina afeesara marunanoo qifaaqa rumbanoo maridanoo.

<sup>51</sup> Innee qiniara tinoorimarianaki maa asooarana mara maree maqasaa fasiqa anaasee nimianne fee qida fee, sia uqanna miqianaura, qinee maqasaa fasiqa anaasee ufa rainarana nimirara qumidaqa.

<sup>52</sup> Maaqooqari qini ufasaara moodaa maaqaki moodaanai qisauku marin-  
ausa rainaki qaarammoo dinni fiqa namuqaakifara qaaraqanda miqikai  
iqa dinni fiqa namuqaakifara.

<sup>53</sup> Qini ufasaara nikausa nári faiqi namu namuqaakamma nimaqeeefara kafaa dinni kumaaraauqa nári nikausa namuqaakamma nimaqeeefaranoo. Ninausa nári niraamuqmaaka namuqaakamma nimaqeeefara kafaa dinni fuka anaaseeuqa nári ninausa namuqaakamma nimaqeeefaranoo. Anaaseeuqa nariqa ninaakuqmaaka faqa rainafi namuqaakamma nimaqeeefara kafaa dinni fuka anaaseeuqa nári ninaakuqmaaka anaaseeuqa namuqaakamma nimaqeeefaranoo.

*Innee qinee kambiquauna kamunara sia irimariafanoo.*  
(Mat 16:2-3)

<sup>54</sup> Yisufa faiqi anaasee qimannimidanoo qinau, innee aaku qoonnamu suani keeqemari qaannaindari urinaqa qafeeqa oo aaku ruannoo fee qifanoo doo aaku ruannoo.

<sup>55</sup> Maarosa ookeesa ufai uqifaqa innee minara aiqaiqimari aukuannee qimariafanoo doo kuqaa qimariafanoo.

<sup>56</sup> Innee mandaikirausa qaara irirana maree mariasa, innee innaaruna faqa maqa faqa qafamasee andeeqasee kambiquaaninna ainainara andeeqasee iri mariafanoo, maqee qinee qumimarunna kamuqoora nanaree sia iridee qida fee.

*Ani kootai afiqee fimari fasiqana faqa dauni mina faqa moodaa ufa qia.*  
(Mat 5:25-26)

<sup>57</sup> Innee sia inneeqa kai andeeqara ufa irisee mi mau fuafanoo nanaree miqidee.

<sup>58</sup> Faiqi moo fannoo ani afiqeenoo kootai finana anee aanai fidana mi ufana aanai taikaaqee qia, sia miqinanoo mi fasiqafa ani afiqeenoo siaasa aminanoo mifa mareeqeenoo foorisa aminanoo mifa mareeqeenoo rumbaranaki quqaannoo.

<sup>59</sup> Anee minaki marinanoo ani mandainaina akiaqara taikafinana mikari kai raudeennaranoo. (Innee minara irisee qinee qumu marunna kamuqoo inneeqa mandainainara qini faqa ufa qidaqa mi ufana andeeqa taikaaqa, sia miqiqa Anutufinnai fifaranoo.)<sup>12</sup> | 59 | RUKA

## 13

*Innee sia quandafi Anutufinnai ubeekaaqa kuridifara.*

<sup>1</sup> Mi fasannai faiqi anaasee akaqausa anireeqa Yisuna qimamiqa qiqau, akaqa Kariree maqannaasa Anutuna tatufira aandau suqa amimarufanoo Piratoofa narí sundiauqa niqiqoofaqa anireeqa misa naru taikaqau. Miqimasoofanoo aandau fidika faqa faiqi fidika faqa moodaanaki quminau.

<sup>2</sup> Yisufa mi ufana iriseenoo qimanniminoo qinau, innee mi Kariree maqannaasa akaqausa kuquanara nári maqannaasa urinnaaqaramasee manda oosana maroona akiaqara kuqiaa maqi fee qida fee.

<sup>3</sup> Sia minarau kuqiaa, qinee minara inni qimannimidaqa, Innee faqa inneeqa manda oosana minnisee Anutufinnai ubeekaaqa, sia miqiqa innee faqa miqi kai iqa kuqifaranoo.

<sup>4</sup> Qinee Yeerusaree maqusanaasara faqa qimannimidaqa, miqoo ooni maqa kisaqa Sirooamma ooni maqa fee qimariana fannoo rapeemaki aqufinoo faiqi (18) qisaukuqara taikasee qikunni ooqu dinni taikasee dinni ani qaaramoo marasee fasiqa kuqa narinau. Innee mi fasiqausara Yeerusaree mariasa nári niqoonausa manda oosana urinnaaqaramasee maroona akiaqara kuqiaa maqi fee qida fee.

<sup>5</sup> Sia minarau kuqiaa, Qinee inni qimannimidaqa, innee sia inneeqa manda oosana minnisee Anutufinnai ubeekeeqa innee faqa miqi kai ifaranoo.

*Faafisa fooqaa saqariara quandara ufa qinau.*

(Anutufa sia manda oosana akiaqara aaqee uqanna naridanoo, kisaaqasaa naaraidanoo mai andeeqara aatata aniaqee qidanoo, sia irifanoo miqoo naruannoo.)

<sup>6</sup> Yisufa kafaa maa quandara ufana qimanniminoo qinau, faiqí moo fannoo narí afuqaki faafisara foora qaqama tiqisaidaqa neemaria saqarifa marinau, moo faasaana mi fasiqafa mina qaqama tiqi nararee qimasee oonuree qafoofanoo sia qaqama iroofanoo oori runuseenoo narí ainainira fasiqa qimaminoo qinau,

<sup>7</sup> Qinee qaarammoo aukuaana maa saqarina qafaunanoo sia qaqama ireenoo mifa fifau maqa ainoo naidanoo doo ateka aqua qufanoo mi ainainira fasiqafa qinau.

<sup>8</sup> Saina kaqi marinaqa moodaa aukuaana qinee mina atukaki oora indufusee madaapee quqasee miqoo qafaanee qinau.

<sup>9</sup> Sia irinaqa mikari kai ateka aquanaura.

*Ataufaka anidira anaasee Yisufa andeeqaisanau.*

<sup>10-11</sup> Moo Saririqa Yuda maqannaasa amaana qimaru faasaana Yisufa ufa suqira maqaki keeqafi Anutuna ufa qimannimimarufanoo moo anaasee fannoo faafasaaqa mina aunduraki marufanoo (18) qisaukuqara taikasee qiku dinni taikasee dinni oonu qaaramoo marasee aukuaana kummaranoo kai marufa ataufaka rakisirara sia amanaikimarufa miqoo amaana maqaki ani marinau.

<sup>12</sup> Yisufa mi anaaseena qafamasee aaramaseenoo qimaminoo qinau. Oo maa anaasee doo aneenna teeroo quqaranakiqari amiqina maria.

<sup>13</sup> Miqi qimaseenoo Yisufa narí asauku minasaa quqasoofanoo aaqee kai ataufaka rakisufanoo findifinoo Anutunara dufi dufi qimarinau.

<sup>14</sup> Amaana maqasaa rakisi marufa mina qafamaseenoo Yisufa amaanasaa mi anaaseena andeeqoonara aanoommaseenoo faiqí anaasee qimanniminoo. Mooseena sandufaki maasara 6 faasaana ainainiaqee qinau, doo innee mikari kai aniree inneeqa aurirana taikaaqa, maasa amaanasaa sia aurirana taikaaqa.

<sup>15</sup> Miqi qufanoo karaambaiqa fannoo quandafi qimaminoo qinau, innee unna qimasaidaqa qaaraiki mariasa, amaanasaa innee inneeqa mimmi burimakau sipsipa ainaina nifiqaidaqa nammariinni muqusee mariafaqa nammari naidaqa.

<sup>16</sup> Maa anaaseefa Abarahaamana ati marifanoo Sadannafa kisaaqasaa (18) aukuaana karabusaki quqaqaiqanoo aupuraranaki marina, burimakau mimmi sipsipa uriqarara ainaina fee maridanoo fee mina kai amaanasaa idukirafa andeeqanoo maridanoo fee.

<sup>17</sup> Miqi qufaqa Yisuna aqi marusa mi ufana iriseeqa nisauri marufaqa faiqí anaasee kaiqeesa Yisufa oosana oosana amiqira ainaina auqoonara asasimariqau.

*Qumini fooqaa saqari qaqama quandara ufa.*

(*Mat 13:31-32; Mak 4:30-32*)

<sup>18</sup> Yisufa faiqí anaasee qimanniminoo qinau, Anutuna maqasaa ququsaki faiqí anaasee mariasa nana ainaina fooqaa fee maridanoo fee, qinee minara nana kikiqee usanauree.

<sup>19</sup> Qinee maaqi qimasee mina kikiqusuanaura. Mifa qumini qaqama fooqaafa mariannoo, faiqí moo fannoo qaqama mara mareenoo narí ququsaki ummaqusainanoo firaafa saqariara foora kambiqafinanoo ufiniuqa mina asaanasaa ninaamu usakeefaranoo. Anutuna ququsaki keeqafuasa miqidaqa mi saqarina fooqaana auqaanai idooaidaqa.

*Ooruku anoona ati qeemarina quandara ufa.*  
(Mat 13:33)

<sup>20</sup> Yisufa kafaa qimanniminoo qinau, qinee Anutuna innaaruna ququsaki keeqafuasa nana ainaina kikiqa usuanauree, misa ooruku anoona fooqaasa maridanoo.

<sup>21</sup> Anaasee moo fannoo sana qaindi anasee ooruku anoona minaki adiasainanoo aiqamai amiqimmasee ati qaanno.

*Innee tiqeera kooqiki keeqaaqa.*  
(Mat 7:13-14,21-23)

<sup>22</sup> Yisufa Yeerusaree maqusai oorufidanoo kaqikaa maqusauqakiaqa Anutuna ufa qimanniminoo oorufinau.

<sup>23</sup> Ooru fimarufanoo faiqí moo fannoo irammirinoo qinau, Oo uriqararafa faiqí anaasee moodaa kai moodaa kai innaarunai asumu mariranaki keeqeefaree, qufanoo Yisufa qimaminau.

<sup>24</sup> Anee tiqeera kooqiki afeekaikamasee amanammasee keeqaa, qinee minara qimannimidaqa iriaqa, faiqí anaasee moomoo amanidaqa sia amana keeqeefaranoo.

<sup>25</sup> Mi maqana akoofa findifinoo kooqi atukarasainaqa misa madaanaindari kooqi aridaqa maaqi qifaranoo, kooqi atuaqisainaqa keeqaane qifanoo maaqa akoofa maaqi qimasee qimannimiannoo.

<sup>26</sup> Innee yaindaraasee qinee inniara sia iridaqa qinaqa misa maaqi qifara, anee maasa maqusai Anutuna ufa qimannimimarianafa mariananoo maasa ani faqa narana nammari nee marinausa maridaqa maasara irimarianafa mariananoo.

<sup>27</sup> Maaqa akoofa mina iriseenoo kafaa qimannimiannoo, innee yaindaraasee maridee, innee manda oosana maree mariasa mariafanoo innee qini daaqa mariaqooqari moosaa fifuaqa. Yisufa mi ufanannai innaaruna kooqi kikiqa usinoo kafaa maa ufana miqoo marusa qimanniminou.

<sup>28</sup> Qinee inniara maqee mariasara qidaqa kasooqaqee innee Abara-haamana faqa Isakeena faqa Yakooboona faqa Anutuna tamummaqara fasiqauqa aiqamausa faqa Anutuna innaaruna ququsaki marifaqa innee maqee qini faqa narana nammari nee marinausa agoosai maridaqa niqafamasee innee firaqoo nifai sandurinaqa ikiraqeeefaranoo.

<sup>29</sup> Faiqí anaasee suani oosanaindari faqa amuqundari faqa dinni dinni ataaqeedari faqa aniree Anutuna innaaruna ququsaki ooqu marifi moodaanaki mina qoomaqa sakasee neefaranoo.

<sup>30</sup> Mikari maqee maqasaa inaaqianna mariasa mikari misa uriqararause marifaranoo, maqee aukwana uriqaraqa marinausa mikari ureeqararause marifaranoo.

*Yisufa Eeroodeenara kaasau faini fee qinau.*

<sup>31</sup> Mikari Farisai amaana ufa qimarusa Yisufinnai aniree qimamiqa qiqau, anee maqooqari findimmaqee moosaa fua, karaambaiqa Eeroodeefa ani kuqa ariraree qinoommi.

<sup>32</sup> Yisufa iriseenoo qinau. Eeroodeefa faiqí nikaruqimasaida ueeqasaida narimarifa maridanoo innee maaqi qimasee qiniara qimamiqa, qinee

maqee faqa duna faqa faiqi anaasee naunduraki faafasaaqa nifaqeeqa aurinausa andeeqannisee ianaura, moona qeeqa saika taikaanaura, miqi qimasee Eeroodeena qimamiaqa.

<sup>33</sup> Maqee fi fi inaqa duna faqa fi fi iqa Yeerusaree maqusai ooru-raanaura Anutuna tamummaqara fasiqauqa aiqama Yeerusaree maqusaki kai narusee marufaqa kuqi mariqau, qinee nanaree minakiqari radukaki moosaa kuquanauree sia amana, qinee faqa Yeerusaree maqusaki kai onuraanaqa misa narundee kai masee qini faqa darifaranoo.

*Yisufa Yeerusaree maqannaasara qimudaoo qinau.*  
(Mat 23:37-39)

<sup>34</sup> Oo Yeerusaree, Yeerusaree innee Anutuna tamummaqara fasiqauqa kuqa narusee mifa niqiqoosa oonisamu qumaree narimariasa. Qinee moomoo kari ani faiqi anaasee marasee kookooraanara foora sakarara imarunaqa innee qaoo qiafanoo.

<sup>35</sup> Doo qusasaa inni maqusa faqa amaana maqa faqa faiqi anaasee sia marifanoo naakundu mariannoo, qinee kuqaa inni qimannimidaqa innee maqooqari sia kafaa qini qiqafeefaranoo kasooqagee innee qiniara maafa karaambaiqa aqiqaiфанoo anidanoo fee Anutufa mina amiqi amiqianinafa qimasaidaqa mikari kai qini qiqafeefaranoo.

## 14

*Yisufa autura arimaru fasiqana sabbatasaa andeeqanau.*

<sup>1</sup> Yuda maqannaasa amaana faasaana moo Saririqa Farisai amaana ufa qimarusa misa uriqararana maaqaki Yisufa mina faqa narana naree qimasee keeqafufaqa aqoonna Farisai amaana ufa qimarusa Yisuna qumarararee qimasee amiqimasee apuree mariqau.

<sup>2</sup> Yisufa mi maqanaki ooqu marifufanoo aurimaru fasiqafa afaaqa autura ari maru fasiqafa Yisuna oorinni marinau.

<sup>3</sup> Yisufa mina qafamasee miqoo marusa Farisai amaana ufa qimarusa faqa Mooseena sandufa akoofasauqa miqoo marusa faqa irammirinoo qinau, Qinee inni iraidaqa Mooseena sandufa fannoo inni amaanasaa faasaana faiqi aurinausa andeeqaranara eedoo qidanoo fee, qaoo qidanoo fee.

<sup>4</sup> Misa mi ufana iriseeqa sia ufa qiqau, kaqi Yisuna kai tataqaaqaa mariqau, miqiga marufanoo Yisufa mi aurira fasiqana qumareenoo mina aurirana taika amaqaseenoo aqiqoofanoo mifa fufanoo quandafi miqoo marusa qimanniminau.

<sup>5</sup> Yafee moo fannoo innikiqari mina amaaku fee burimakau fee madikaki aqufinoo marinanoo amaanasammifoo qimasee sia fee qumbaqiannoo fee. Sia uqanna amaana irisee minnisee fara kaqi minakinaana qumbaqifaranoo. Doo qinee faqa maa aurira fasiqana madikakinaanara foora amaanasaa qumbaqiara maqi idaqa sia aqaqidaqa.

<sup>6</sup> Misa Yisuna ufa irisee kuqaammifoo qimasee ufa qirara irusia sia ufa qiqau.

*Sia amiqira qoo naaree ooqumaria.*

<sup>7</sup> Mi Farisai amaana qimarufa narana firaqoo suqaseenoo moomoosa naarooqaaqaa mina maaqaki ani keeqafufaqa amiqiraqoo ooqu mariranara randee marufanoo Yisufa niqafamasee misa aiqamausara qinau ufa see qini ufa iriaqa qimaseenoo akooqoo ufa maaqi qimasee qimanniminau.

<sup>8</sup> Faiqí moo fannoo amundara qoomaqa suqasee ani aarainana oonu reenana sia aaqee oonuree amiqiraqoo kai ooqu maria.

<sup>9</sup> Ani uriqararafa anirainanoo qoomaqa akoofa ani qafeenoo aqiqamasee uriqarara fasiqara miqoo ooqu mariannee qinana anee asauriranaki maridana mandaikiraqoo kai ooqu marinnaranoo.

<sup>10</sup> Innee sia amiqira qoora randaqa, faiqí moo fannoo inni naarainaga maaqimmiaga, Innee mina qoomaqaki keeqafiqa kaiqeesa ooqumari mari-aqoo kai ooqumariaqa, Qoomaqa akoofa anirama ani qafeenoo aniaara oo qini qiqaondi mai ururee amiqiraqoo ooqumaria, Miqi qinana anee aiqamausa nifusaa uriqararafaikinana asasinnaranoo.

<sup>11</sup> Nariqa kai qinee uriqararausee qimariasa Anutufa nisauriranaki quqaannoo, nariqa kai qinee ureeqararausee qimariasa Anutufa misa uriqararanaki quqaannoo.

<sup>12</sup> Miqi qimasee Yisufa quandaki mina aaroo fasiqana qimaminoo qinau, anee qoomaqa suqaseenana sia aneenna aqoondiuga faqa akaqaafasaa faqa aneenna ainaina faqa aneenna ainainafaqaa aqoondiuga faqa misauqa sia naaraa. Anee misa naarainaga misa faqa miqi kai iqa ani faqa aaramasee amana kai amifaranoo.

<sup>13</sup> Anee qoomaqa suqaseenana kudi fasiqauqa faqa niku nisauku mandaikirausa faqa arirutiga nimariasa faqa nifu dimbarausa faqa misauqa kai naarama quqasainanoo Anutufa mina akiaqara inni amiqi amiqi iannoo.

<sup>14</sup> Misa sia amana kafaa mina akiaqara ani amifaranoo minara kasoogaqee Anutufa amiqira oosana mareemaria fasiqa anaaseesa kuqiranakiqari mara findifu maseenoo mikari mina akiaqara ani faqa amianoo.

*Qoomaqa sakararee qimasee mandaikirausa naara.*

*(Mat 22:1-10)*

<sup>15</sup> Faiqí moo fannoo mi qoomaqanaki maridanoo Yisuna ufa iriseenoo qimaminau, Anutuna innaaruna ququsaki keeqafi minaki narana nee mariasa firaqoo asasifaranoo.

<sup>16</sup> Yisufa mina ufa iriseenoo kafaa quandara ufa qimaminau, faiqí moo fannoo qoomaqa firaana suqarara deedaqamaseenoo faiqí anaasee moomoosa naaranau.

<sup>17</sup> Suqaidanoo narí ainainira faiqi aqiqaenoo anee fiqum fiqum idana faiqí anaasee qinee naaraunau nifiqee minisainaga qoomaqa naaqa doo aiqama ainaina deedaqinoo maridanoo.

<sup>18</sup> Mina ainainira faiqi fannoo qimanniminoo nufanoo moo fannoo qinau, Qinee maqa doo feefaurumaqaqee idaqa mina qafarara fidaqa sia amana fuanaura.

<sup>19</sup> Miqi qufanoo moo fannoo qinau, qinee qisaukuqara (10) purimakau ummaara rarisee marina feefaurumaqaqee idaqa mina amanamasee qafarara fidaqa sia amana fuanaura.

<sup>20</sup> Miqi qufanoo moo fannoo qinau, qinee maqee kai anaasee amunda qimiqaafaqa sia amana fuanaree qufanoo ainainira faiqi fannoo misa ufa iriseenoo narí firaafinnai oonuree qimaminau. Mifa iriseenoo firaqoo aanoommaseenoo qimaminau.

<sup>21</sup> Anee dauni dauni sandeenana firaa aatata faqa kaqikaa aatata faqa maqusa qambaana faqa oonureenana kudi fasiqa anaasee faqa mataam-mataakiqa nimariasa faqa nifu dimbarausa faqa arirutiga nimariasa faqa mandaikirausa aiqama nifiqee qini qoomaqai ania qufanoo mina ainainira

faiqi fannoo miqimminau. Misa nifiqee mini quqaseenoo narí firaafinnai oonureenoo qimaminau.

<sup>22</sup> Doo ani ufamau fiqa nifiqamaree mini quqasaunanoo narana moomoo maridanoo faiqí anaasee sia amanaikidammia qufanoo qoomaqa akoofa qinau.

<sup>23</sup> Doo findimmaqee oonuree nianai afuqakiaqa mariasa nifiqamaree qini qoomaqa amana kai minisainaqa naaqanani.

<sup>24</sup> Innau, eenda naarauna sia aniasa sia uqanna qini narana kaqikaaqoo nifaurusaa quqeeffaranoo.

*Yisuna ufara kuqiraree qimarusa kai mina faiqi namu kifaranoo.  
(Mat 10:37-38)*

<sup>25</sup> Yisufa moosaa fimarufaqa faiqí anaasee moomoosa mina faqa fidaqa maasa faqa Yisuna faiqi namukiraree qufanoo Yisufa quandafi qimannimminau.

<sup>26</sup> Faiqí moo fannoo qini faqa firaree qinna fasiqafa narí anoona akoona faqa faiqi anaasee faqa narí akaqaafasaa faqa asoommaaka faqa nariara faqa fidiqaa maseenoora foomaseenoo qini faqa aniani.

<sup>27</sup> Faiqí moo fannoo qini ufasaara sia eedoo qimasee narí aunirira saqari akumareenoora foora sia eedoo qimasee qini ufasaara kuqiranaki finafa sia mifa amana qini faiqi namuki keeqaannoo.

<sup>28</sup> Faiqí moo fannoo maaqa usakararee qimaseenoo maaqa usakara ainainauqara naaree amiqimasee irinanoo sia amanaikina sia usakaani.

<sup>29</sup> Mifa maaqa atuna faqa faakana faqa kai rakiqasainanoo aiqama ainaina sia amanaikina mina aqoonausa qafamasee naanaidara qimasee maaqi qifoora.

<sup>30</sup> Maa fasiqafa maaqa usakarana oosana araseenoo mafi taikarana sia amanaikinoo.

<sup>31-32</sup> Namuqaa karaambaiqa moo fannoo narí rakira fasiqauqa moomoosa faqa aniree nariranara iriseenoo maaqoo qaraa karaambaiqa fannoo mina moomoo rakira fasiqauqara iriseenoo narindi oodaa marinara irinoo amanaikkee ianauree sia amanaikkee ianauree sia amanaikinaga narirara imari karaambaiqana faqa ooqumari fi ufa qimasee reendeeniananoo asoofara mariani.

<sup>33</sup> Miqi qimaseenoo Yisufa minara qimannimminau, miqi kai masee innee faqa qini faqa firanara amiqimasee iriaraasamaseeqa inneeqa aiqama ainaina minniseeqa qini faqa aniaqa. Sia miqiqqa sia amana qini faiqi namukifaranoo.

*Innee inneeqa ainaina minniseeqa qini faiqi namukiaqa.  
(Mat 5:13; Mak 9:50)*

<sup>34</sup> Miqi qimaseenoo Yisufa kafaa maa ufana qimannimminau, innee ooruku indee mariana sia adiafaa inaqa naqi fee masee kafaa adiafaairana quqeeennaree, sia amanaikinnaranoo.

<sup>35</sup> Sia adiafaa inna ooruku andanda atukaki teeqimasainanoo mi andandafa faqa mandaikammianoo. Innee kaqinni aquaqaana. Mandainaina maridanoo. Innee qini faqa fifandinausa sia amiqimasee mi kadaapi oosanna irirainni kaqi firarianara qaoo qidaqa kasaqai kudoosaapee marifanoo maaqa usakaaninafa maaqa faakana rakiqasainaqa sia amanaiki foora, innee ooruku adiafaa siaina aanna ree foora kaqinni aqua noora. Innee naaqoofaqaasa mi ufana iriaqa.

## 15

*Manda oosana maree marusa suqusee Yisuna ufa iriqau.  
(Mat 18:12-14)*

<sup>1</sup> Moo kari ummuarira takisa munnimma maree marusa faqa Yuda maqannaasa nikooqee marufaqa nifaqasoosa faqa Yisufunnai anireeqa mina ufa iriraree qimasee mina aaqa ani usimariqau.

<sup>2</sup> Farisai amaana ufa qimarusa faqa Mooseena sandufa akoofasauqa faqa misa niqafamasee noori runusee muquriqa maridaqa naundaufa naundaufa qidaqa qiqau. Maa fasiqafa Yisufa maasa nifaqasoosa aniraafanoo misa faqa amiqi amiqi idanoo, sia miqikai idanoo misa faqa narana naidanoo miqidanoo.

<sup>3</sup> Yisufa misa ufa iriseenoo quandara ufa moo maaqi qimasee qimannim-inau.

<sup>4</sup> Faiqi moo fannoo moodaannai qisauku fasiqa namu niku nisauku taikasee (100) sipsipa rakisi marinanoo moodaafa kai auia mafinanoo naqi fee iannoo, mi fasiqafa aiqama sipsipa kaqi quqaseenoo moodaara randaannoo.

<sup>5-6</sup> Randanoo nini inoo paqurimaseenoo اساسamaseenoo rafusu akumareenoo mini maqusai quqaseenoo nari aqoonausa naaramasee qimannimiannoo, aniree qini faqa asasiaqee qiannoo. Aiqama sipsipasaa rakisimari fasiqausa miqifaranoo.

<sup>7</sup> Innaarunai mariasa mi fasiqana aanna reefaranoo moomoo (99) andeeqara fasiqa anaaseera sia اساسifaranoo moodaafa furufaridanoo mandainaina maranoo nini inafa quandaki Anutufinnai ubeekainnanara minara firaqoo اساسifaranoo.

<sup>8</sup> Moo anaasee fannoo qisaukuqara taikasee siruaa munnimma firaana maqee inanoo moodaafa maaqaki furufaramafinanoo mi anaaseefa naqi fee iannoo, mi anaaseefa qooma qumbisee damuna maraseenoo maaqaki aiqamai damunidanoo aiqama atinai amiqimasee randanoo ni ni inanoo paqurimaseenoo maraannoo.

<sup>9</sup> Maraseenoo nari aqoonausa faqa aqoondiqa faqa naaramaseenoo qimannimiannoo. Innee aniree qini faqa asasiaqa, qini siruaa munnimma furufaramambina doo paquriqa.

<sup>10</sup> Qinee qimannimidaqa, Anutuna qangiroouqa mi anaaseena aanna reefaranoo moodaafa mandainaina maranoo ni ni inafa quandaki Anutufinnai ubeekainaqa minara firaqoo اساسifaranoo.

*Auianoo nu kumaaraana quandara ufa.*

<sup>11</sup> Yisufa kaqi qimannimidanoo qinau. Faiqi moo fannoo qaara faiqi faqaafa marinau, inaaqiannaafa nari akoona qimaminoo qinau.

<sup>12</sup> Oo qipoo kuqiraridane aneenna aiqama ainaina rainasee maaqanda qiminnaree doo maqee kai rainasee qiminaqa maree fuannee qufanoo mina akoofa eedoo qimaseenoo nari aiqama ainaina rainasee miqanda niminau.

<sup>13</sup> Nimisoofanoo indaaruaafa kaqi maqee inau inaaqiannaafa narindi makeeta maseenoo munnimma kai mara mareenoo doo quqaseenoo niana maqusai oonu reenoo furufariranaki maridanoo nari munnimma aiqama fifaunni aqu taikanau.

<sup>14</sup> Aqu taikasoofanoo mi aukuanna aandaroo firaafa mi maqa maaqanaki aiqamatinau nari marufanoo mi fasiqana munnimma faqa narana faqa sia marufanoo aararee marinau.



<sup>15</sup> Mifa mi maqusanakinaa fasiqasaa atooqafufanoo mi fasiqafa mina aqiqeenoo anee qini kuarauqasaa rakisiannee qimasee narana sia amufanoo aararee marufanoo mi kuarausasaa rakisidanoo kuarauqa kunda nimidanoo nariara faqa nararee qimasee irufanoo sia Yuda maqannaasa nee marunee qimasee asauruseenoo minniseenoo aarara marinau.

<sup>16</sup> Miqi marufanoo mi fasiqana irirafa kambiqoofanoo narí kai qimirinoo qinau.

<sup>17</sup> Oo qini qikoona ainainira faiqiuqa misa nariqa nimana kai narana neemariafaqa qinee maaqoo daarara maridaqa kuqiraridaqa.

<sup>18</sup> Qinee findifi qeeqa qikoofinnai oonureeqa maaqi qimasee qimaminaura oo qipoo qinee Anutuna ufa faqa ani ufa faqa rukiee marunasa maridaqa.

<sup>19</sup> Qinee sia amana ani amaakuara foora marianaura, amanee ani ainainira faiqi kammafi marianauree.

<sup>20</sup> Miqi qimaseenoo mi fasiqafa findifinoo aanai aqufufanoo narí akoofinnai finau, aanai meeagooni marufanoo mina akoofa maqusasaqari mara meeqa qafamaseenoo amugusufanoo sandeenoo oonu mara narí amaaku aripimma qumareenoo amooqanau.

<sup>21</sup> Miqufanoo mina amaaku fannoo maaqi qimasee narí akoona qimamidanoo reendeeninai. Qinee Anutuna ufa faqa ani ufa faqa rukiee marunasa maridaqa sia maqee amana ani amaaku marianaura.

<sup>22</sup> Mina akoofa quandafi narí ainainira faiqiuqa naaramaseenoo qimaniminoo qinau, sia ainainira fasiqa qamunna ainaina amia, qini qimaaku marianifeera qamunna ainaina kai amia, dauni dauni amiqira qamunna mara mareeqa mini afisumaqaqa, rinna faqa asaukuki upeekasee aiku anaamu faqa afisumaqaqa.

<sup>23</sup> Miqimaseeqa oonu amiqira burimakau aanaaqi ainoo faqaana arusee deedaqamasee qoomaqa suqaaqa.

<sup>24</sup> Qini faiqi maafa kuqi noora foora mafifa kaqi maridanoo anireenoo auiganoo mariifa anireenoo. Miqi qufaqa qoomaqa sakasee neemariqau.

<sup>25</sup> Miqi marufanoo indaruqaa amaaku fannoo suanai mariufa maqusa naambeeqai anireenoo piriipunna ufa faqa idi faqa irinoo narí akoona ainainira faiqi moo aaramasee irammirinai.

<sup>26</sup> Mina naqi fee qidaqia qufanoo mifa qimaminai.

<sup>27</sup> Ani akaqa fannoo narí akoona maaqaki aniraifanoo ani akoofa minara qini faiqi doo andeeqasee ani maridanoo fee qimasee purimakau aanaaqi amiqirana aruseenoo suqasee afaaru ridanoo.

<sup>28</sup> Indaruqaa amaaku fannoo mi ufana iriseenoo aanoommaseenoo marufaqa aarofanoo ititinai. Ititammaseenoo marufanoo mina akoofa qumureenoo aaranau, aniree maaqaki keeqaa qufanoo mifa qinau.

<sup>29</sup> Iria qinee moomoo aukwana karabusara foora ani ainaini marunasa maridaqa sia moodaa kari ani ufa rukiaunasa, anee miqi marunana nana ainainee qiminanee sia burimakau aanaaqi amiqira ainaina aruseenana sia fifau mimmi aanaaqi qimianaqa arusee qeeqa qiqoondiuqa faqa qoomaqa sakasee naunasa.

<sup>30</sup> Ani manda faiqi fannoo ani aiqama ainaina mara mareenoo munu dapi maraqanua anaaseesasaa aqu taikaseenoo, aniraifana anee purimakau aanaaqi amiqirana arusee suqasee amiananoo.

<sup>31</sup> Miqi qufanoo mina akoofa qimaminoo qinau, oo qini faiqi anee aiqama kari qini faqa mariananoo aiqama ainaina anindi maridanoo anee aneenna ainainaki ainaini mariananoo.

<sup>32</sup> Ani akaqa fannoo kuqi noora foora inoo mariifa kaqi maridanoo auiganoo mariifa aniraifaqa minara maqee maasa qoomaqa sakasee asasiidaqa naunanoo amanaikinoo. Yisufa miqi qimaseenoo kafaa maaqi qimasee qimanniminou. Doo maa ufana anoona faasai qunnana maaqimminoo maridanoo. Innaarunai mariasa mi kumaaraana akoona aanna ree-faranoo. Moomoo andeeqara fasiqa aanaaseera sia asasiifaranoo, moodaafa mandainaina maranoo ni ni inoo quandaki Anutufinnai ubeekainnanara asasiifaranoo.

## 16

### *Irirana faqaa manda ainainira faiqi mina quandara ufa.*

<sup>1</sup> Yisufa nari faiqi namu qimanniminoo qinau, faiqi moo fannoo ainaina faqaafa nari ainainasaa rakisianinnana moo mareeqee quqasoofaqa misa mi fasiqana ainaina faqaana qimamiqau.

<sup>2</sup> Ainainasaa rakisirafa ani munnimma fifau rairaa idanoo fee qufanoo ainaina faqaafa mi fasiqana aareenoo anee munnimma aqi marianana amiqi masee papiqasaa akara rumasee qiminaqa qafamasee ani aqiqaanaura anee sia kafaa ainainasaa rakisinnaranoo.

<sup>3</sup> Miqi qufanoo mina ainainasaa rakisi marufa nari kai qimirinoo qinau, qini uriqararafa qini diqiqrarara qimarifaqa nana ainainee ianauree qinee afeeka siaisa maridaqa madika indufirana sia amanaikidaqa kudi fasiqa maridaqa qiqaonausiannai narana innaaru qiranara qisauridaqa sia amana mi oosanna maraanaura.

<sup>4</sup> Doo iridaqa qini qiqaondi moomoosaikiaqeera maa saikana taikasee misiannai firara maaqimmianaura.

<sup>5</sup> Qinee qeeqa uriqararana faqa bisinisaikida marusara moo deedeepianauree qimaseenoo maaqimminau.

<sup>6-7</sup> Mifa moo fasiqa aaramasee irammirinou, anee qini uriqararana ufaasu munnimma naqummee maqee idanee qufanoo mifa qinau, qinee moodaannai qisauku fasiqa niku nisauku taikasee (100) firaa tinna oorifa fadameena (sauna anoona fooqaana) mina akiaqara sia amiqiafana, kaqi maqee idaqa, miqi qufanoo ainainasaa rakisirafa qimaminou, anee qaara fasiqa niku nisauku taikasee qini qisaukuqara taikasee (50) munnimma kai qiminaqa ani munnimma akiaqara taikeenoo fee qimasee bukaki ateekaanauree qimaseenoo kafaa moona aaramasee irammirinoo qinau, anee qini uriqararana ufaasu munnimma naqummee maqee idanee qufanoo mifa qinau, qinee moodaannai qisauku fasiqa niku nisauku taikasee (100) raisa beeka akiaqara sia amiqiafana kaqi maqee idaqa, miqi qufanoo ainainasaa rakisirafa qimaminou, anee qaara faqa qaara faqa fasiqa niku nisauku taikasee (80) akiaqara kai qiminaqa ani munnimma akiaqara taikeenoo fee qimasee bukaki ateekaanauree qinau, miqunannai mi fasiqafa nari firana akaru qiranannai misa aqoondikinou.

<sup>8</sup> Ainaina faqaafa mina unnaqira oosana qafamaseenoo oo irirana faqaa fee qinau, minara Yisufa qimannimidanoo qinau, maa maqanasaaqaraa fasiqa aanaaseeuqa nariqa munnimma ainaina maree mariana irirana faqaasa mariafanoo Anutuna ufa qoomasaa andeeqasee nimariasa irirana oorudupiraua sia misa irirana amanasaa maridaqa.

<sup>9</sup> Qinee inni qimannimidaqa, maa maqanasaaqaraasa nari afeeka iriranannai kaaqa afeekaikamasee maaqoo mariranara iridaqa munnimma

aina afeedidaqa. Innee faqa misa naanna ramasee kaaqa afeekaikamasee naaru marira afeedira ainainakiara munari minari masee inneeqa maaqooqaraa manda munnimmannai sarau imariasa dadaaqa innaarunai asumu mariranaki moomoo ainaina afeediaqa.

<sup>10</sup> Yafee moo fannoo kaqikaa fifau ainainasaa amiqimasee rakisinafa firaa ainainatiasaa faqa amiqimmasee rakisiannoo, yafee moo fannoo kaqikaa ainainara unnaqi marifa firaa ainainatiara faqa unna qiannoo.

<sup>11</sup> Anee maa maqanasaqaraa munnimma qumiasana furufaramasee rakisinanoo naqi fee masee innaarunai finanoo Anutufa innaarunai mari firaa qumiasana munnimma anisaa quqasee rakisiannee qiannoo fee.

<sup>12</sup> Anee moona ainaina furufara masee rakisinanoo yafee anindi amisee rakisiannee qiannoo fee.

<sup>13</sup> Ainainira fasiqa moo fannoo sia amana qaara rakisiraqanda moodaa kari ainainamma nimaqaannoo, sia amana. Mifa indaarugaanara akooqaannoo moo rakisiriranara aidiannoo. Mifa moo rakisiranasaa atooqeenoo inaaqianaana minnisannoo, miqi kai iqa innee faqa Anutunara faqa maqasaa qumiasanara faqa moodaanaki sia amana ainainamma nimaqeenaranoo.

*Farisai amaana ufa qimarusa munnimmara runara niqinau.  
(Mat 11:12-13; 5:31-32; Mak 10:11-12)*

<sup>14</sup> Farisai amaana ufa qimarusa mi ufana iriseeqa misa kaaqa munnimmara rimarusa maridaqa Yisunara uteeti qimariqau.

<sup>15</sup> Yisufa iriseenoo qimanniminu, innee inneeqa kai maqasaa fasiqauqa nifusaa andeeqarausee qimariasa mariafanoo, Anutufa inni naunduraki qafee marifa maqasaa fasiqauqa amiqira ainainee qimarianara Anutufa mandainainee qidanoo.

<sup>16</sup> Mooseena sandufa faqa tamummaqara fasiqauqa akarakinaa ufa faqa oosana arooqooqari misa ufa afeeka fannoo aiqamausa rafaqafusee fi fi inoo Yoohaneefa nammari nimiru aukuanna mini raquramiqoo taikanau. Miqooqari innaaruna ququsakinaana Anutuna amiqira fasaasaa ufa fannoo kai misa qimanniminoo fifaini marifaqa aiqamausa innaaruna ququsaki nimudaana qimasaida keeqararidaqa.

<sup>17</sup> Innaaruna faqa maqa faqa tautumaki taikarafa amana mariannoo, Mooseena sandufa faqa tamummaqara fasiqauqa ufa faqa kaqikaa ati kai sia amana taikaannoo afeeka mariannoo.

<sup>18</sup> Faiqi moo fannoo nari anaqa minnisee moo anaasee marainafa qummuarimari fasiqafa mariannoo, faiqi moo fannoo minnisainna aanaaseena marainafa mifa faqa qummuarimari fasiqafa mariannoo.

*Ainainafaqaafa faqa ainaina siaifasiqafa faqa miqandara quandara ufa.*

<sup>19</sup> Yisufa Farisai amaana ufa qimarusa oosana kaaqa munnimmara qamunna amiqiranara rimarusa marunara iriseenoo maa ufana qimanniminoo qinau, faiqi moo fannoo ainaina fiqararafa maridanoo moomoo munnimma aqimaria qamunnana kai afisimarifa maridanoo, aiqama kari amiqiranaki kai marinau.

<sup>20</sup> Kudi fasiqa moo fannoo mina auqu Rasarusana amarafa afaqa namuana aanaaqi maqee maqee ainaina faqaana kooqiki ani raidanoo mina narana ataraasa tidaamarai aqufuna suqu nararee qimasee ani maridanoo mandainainaki marufanoo fainiuqa anireeqa mina namuana umboomasoofanoo marinoo kuqinau.

21 Mi kudi fasiqafa kuqufufaqa qangiroouqa mina afiqa maree in-naarunai Abarahaamana aaqa quqasoofanoo firaa qoomaqa sakasee neemarinau.

22-23 Ainaina faqaa fasiqa faqa kuqufufaqa akundamasoofanoo idaki finau. (Mi idana auqu Aadeesaa ida fee qidaqa, kuqimariasa maqa maaqa taikara aukuanara afeesimaria idafa maridanoo fee qidaqa.) Ainaina faqaafa firaa aupuraranaki maridanoo afu murufi maqaseenoo nianai Abarahaamana faqa Rasarusana amarana faqa amiqiranaki oqufaaqee marufanoo niqafanau.

24 Niqafamasee nammeera qimaseenoo qinau, oo qini qikoofa Abara-haama anee Rasarusana qimaminanoo nari asauku amukannai nam-mariki raaraamasee maree muqu qini qimaakiri qifaurusaa quqasainanoo asooaani qinee idaki firaa aupuraranaki maridaqa.

25-26 Abarahaamafa iriseenoo qimaminau, oo qini qimaaku anee maqasaa marunna kamuqoo amiqira ainainaki marunanoo Rasarusafa mandainainaki marinau, maqee Rasarusafa maaqoo اساسiranaki marinana anee aupuraranaki mariananoo, innisaimbaqa qambaanai maani firaafa maridanoo, maaqoo marinausa sia amana minni fifaranoo mindari faqa sia amana mai anifaranoo.

27-28 Ainaina faqaafa Abarahaamana ufa iriseenoo qimaminau, qinee fifimasee ani qimamidaqa, amanee anee Rasarusana aqiqainanoo qini qikoona maaqai oorureenoo qini qikaqaafasaaauqa moodaanai qisauku (5) maridammia, misa aaquqimannimaqainaqa sia maa aupurara maqusanaki aniaqa.

29 Abarahaamafa iriseenoo qimaminau, Mooseena akara faqa tamum-maqara fasiqauqa akara faqa ani akaqaafasaaauqa aaquqima nimiqaiddanoo misa minaki kai iriaqa.

30 Ainaina faqaafa mi ufana iriseenoo Abarahaamana qimaminau, oo qini qikoofa Abarahaama, mi akarafa sia amanaikidanoo moo fannoo kuqi-ranakiqari findifinoo qimanniminaqa misa nariqa manda oosana minnisee sia maa aupurara maqusanaki anifaranoo.

31 Abarahaamafa qinau, ani akaqaafasaaauqa Mooseena faqa tamum-maqara fasiqauqa ufa faqa sia iriqa kuqiranakiqari findi finna fasiqana ufa faqa sia irifaranoo.

## 17

*Faiqi aanaaqi Yisuna ufamau fimarina mareeqee kaqi runna ubeekee mariana mi ufana.*

*(Mat 18:6-7, 21-22; Mak 9:42)*

1-2 Moo kari Yisufa nari faiqi namu maaqi qimasee qimanniminau. Faiqi anaasee mandoosanaki mara quqannimaqee fandinausa kuqaa uqanna kambiqeefaranoo mi manda oosanna uqeerainna fasiqana arirafa firaqqoo uqanna mariifoo qidaqa qimudao qidaqa. Ooruku nammariki faiqi rafusu aqirafa firaa oonisanda rumbaseeqa anukaki ususee minaki aqirafa kaqikaa aupurara mariannoo, mi fasiqafa qini ufa irimari kaqikaa faiqina afigasee manda aana uqafiqainafa mina arirafa firaafa uqanna mariannoo.

3 Minara innee amiqimasee inneeqa mariranasaa rakisiaqa. Ani akaqa fannoo manda oosana marainana anee qaoo qinanoo mifa aundura quandaasee andeeqaraqoo finana anee mina manda oosanara sia kafa aqia.

<sup>4</sup> Mifa dinni taikasee dinni ani qaraqanda (7) kari ani mandaikam-mamaqasee quandakinoo aniara qini mandainaina minnisaannee qinana eedoo qimasee minnisaa.

*Maasa anisaa naundura mundirana afeekaikiaqa.*

<sup>5</sup> Yisufa niqiqoo fasiqausa minara Yisuna qimamiqa qiqau, oo karaambaiqa maasa daundurannai anisaa mundirana firaanaikamaqisaa qufanoo karaambaiqa fannoo maaqi qinau.

<sup>6</sup> Innee qinisaa mundirana sia maridanoora foora maridanoo kaqikaa ainaina maqana qaqama miqirafa kaqikaafa kai marinaqau, innee minannai firaa ainaina auqini. Innee firaa saqari keefaadiara foora aneenna kai rafauru akinana ooruku nammariki aqufi kambiqaanee qifanoo mifa eedoo qimasee miqini. Innee qinisaa mundirana siara foora maridanoo sia amanaikifaranoo.

*Innee inneeqara maasa ainainira faiqi fee qiaqa.*

<sup>7</sup> Yisufa nari miqoo qaraasa oosanara iriseenoo ufa qimannimidanoo qinau, Innikiqari moo fannoo mina ainainira fasiqa fannoo ani afuqai ainainiinoo fee firimaria aandausaa fee rakisiinanoo fee eendimarinanoo anirainana anee sia minara kaqi kaqi aniree aneenna narana naannee qinnaranoo.

<sup>8</sup> Maaqi qinnaranoo, anee narana suqarara afisimaria qamunnana afisusee qini narana suqasainaqa qinee narana faqa nammari faqa namasaanana anee inaaqianna suqasee aneennara naa.

<sup>9</sup> Ani ainainira faiqi fannoo ani ufamau finana anee sia minara dufi dufi qinnaranoo mi fasiqafa faqa dufi dufi qira ufara sia randaannoo nari feefauru saikee qinnaranoo.

<sup>10</sup> Innee faqa miqikai iqa mina aanna raaqa, aiqama qinee Yisusa qimannimunna ufana afaqaqa fi fi iqa mafi taikasee sia qini dufi dufi qira ufara randaqa, maaqi qiaqa maasa fifau ainainira fasiqauqa maridaqa feefauru mararara foora ainaini marunausa maridaqa.

*Qisaukuqara taikasee (10) karoora nari marusa ufa.*

<sup>11-13</sup> Yisufa Yeerusaree maqusai firara Kariree maqa maaqa dinni marufanoo Samaria maqa maaqa dinni marufanoo Yisufa qambaanai fidanoo moo maqusaki firaree qimasai fimarufanoo karoora narimaru fasiqausa qisaukuqara taikasee (10) karoora nari mariasa naannareeqa naadumasaqa kikiqammafiqa nammeera qimasee Yisuna qimamiqa qiqau, oo Yisu maasa uriqararafa anee maasara amudaqaani.

<sup>14-16</sup> Yisufa misa niqafamasee qimanniminu, innee amaana maaqaki Anutuna aanaiqiki mariasa inneeqa nifaaqa ooruree uqannifiqaiifaqa inni nifaaqa aikuqummaseenoo inniara anukausee qifaranoo, miqi qinaqa innee aiqamausa nifusaa anukaqa maridee qifaranoo. Miqi qufaqa misa eedoo qimasee aanai fimarufanoo misa karoora taikafufaqa nariqa nifaaqa qafamaseeqa fufanoo moodaafa quandaki firaqoo Anutunara dufi dufi qimammaree anireenoo Yisuna aikuki maqasaa aqufufanoo Yisunara dufi dufi qimamaqanau, mi fasiqafa Yuda maqanna namuqaa, Samaria maqanna marinau.

<sup>17-18</sup> Yisufa mi fasiqana اساسirana iriseenoo miqoo marusa qimanniminu. Qisaukuqara fasiqa karoora nari marisa rukanniseeqa, dinni taikasee dinni ani qaara faqa qaara faqa marasee fasiqauqa yai fee fiaa, sia fee misa faqa aniree Anutunara dufi dufi qifaree sia Yuda maqannaasa ania Samaria maqannaafa kai aniree dufi dufi qidanoo.

<sup>19</sup> Miqi qimasee Yisufa mi fasiqana qimaminau, doo findifi fua, anee qini saqarikiannanannai kai amiqiananoo.

*Anutuna ququsa sia akooqoo marina.*  
(Mat 24:23-28, 37-41)

<sup>20-21</sup> Farisai amaana ufa qimarusa Yisuna iramiriqa qiqau, Anutuna ququsa yairee fee maqasaa kambiqafinoo faiqi aanaaseesaa Anutufa rakisiannoo fee qufanoo Yisufa qimanniminau, Anutuna ququsa fannoo sia akooqoo ainainara foora kambiqaanoo, sia moo fannoo maaqi qiannoo doo qafaa maaqoo kambiqeenoo doo qafaa meeqai kambiqeenoo Anutuna ququsa fannoo inni naundurari mari ainainafa maridanoo.

<sup>22</sup> Miqoo Yisufa nari faiqi namu qimanniminau, kasooqagee innee qinee anianna faasaanasaa qafaaqaa idaqa sia qafeefaranoo.

<sup>23</sup> Akaqausa qini ququsa kambiqaaninnanara maaqi qifaranoo, meerai qafaa miqoo maridanoo, maaminni qafaa minni maridanoo misa miqi qifaqa siamma oonu qafaaqa.

<sup>24</sup> Qini ququsa sia qumee kambiqaanoo aakuasaa uqinanoo innaaruna aiqama atinai kaaqa qamaquannoo, qinee faiqi nimaaku qumuanna faasaana aakuasaa aanna ramasee qumuanaga tautumaki aiqamai daraaninaqa qiqafeefara.

<sup>25</sup> Maqee mariasa firaa aupurarana qimisee diqiqeefaranoo.

<sup>26</sup> Qinee faiqi nimaaku qumuanna faasaanafa Nooana aukuanara fooqaafa mariannoo.

<sup>27</sup> Mi aukuanna faiqi anaasee idoo faakoo idaqa maanaqa amundaيداqa narana nammari naidaqa mana mana imarufanoo Nooafa nari sipa firanaki keeqafufanoo nammari fannoo tautumannimaqaseenoo faiqi anaasee aiqama naru taikanau.

<sup>28-29</sup> Qinee qumuanna faasaana Rootana aukuanara foora mariannoo, mi aukuanna faiqi anaasee aiqamausa sia Rootana ufa iriqau narana nammari naidaqa makeetidaqa feefauru narami narami idaqa maaqa usakeeqa suana ummaqiqa mana mana idaqa marufanoo Rootafa Soodooma maqusakiqari findimaqee sandoofanoo innaarunaindari idauru fasafasimarufa qumureenoo aiqama naru taikanau.

<sup>30</sup> Qinee faiqi nimaaku qumira faasaana maqasaa fasiqa anaasee mi furufara irirana maree marifaqa tautumasee qumuanaura.

<sup>31</sup> Mi faasaana akaqausa nariqa kooqiki mariinausa sia naamuki keeqafi ainaina indaaifaranoo, miqi kaimmasee akaqausa anaadonna mariinausa sia maqusai aniree nari ainaina mareefaranoo.

<sup>32</sup> Rootana anaqa fannoo asumu marirannai sandanoo fidanoo oonu kasoo mafinoo quandafi aanaaqiannai afu maqaidanoo kuqinai.

<sup>33</sup> Yafee moo fannoo nari mariranara amuqusinafa mina marirafa taikaannoo, yafee moo fannoo nari marirana minnisainafa mina marirana maraannoo.

<sup>34</sup> Qinee qimannimidaqa, mi eendanaki faiqi qaraqanda moodaanaki faiqagee marifaqa qinee tautumasee moo innaarunai uqeerasee moo minnisaanaura.

<sup>35</sup> Anaasee qaraqanda sana aindi anee marifanoo tautumasee moo mareenoo moo minnisaannoo. [ <sup>36</sup> Faiqi qaraqanda anaadooki marifaqa tautumasee moo mareenoo moo minnisaannoo.]

<sup>37</sup> Yisuna faiqi namu mina ufa iriseeqa iramiriqa qiqau, yatinai fee anee qianna ainainafa kambiqaanoo fee qufanoo Yisufa quandara ufa

qimanniminau, aandau kuqinoo mariqoo kai quqaumu moomoosa minaki usidaqa.

(Qini ufa irimariasia yai yai fee maridaqa sia qiniara randeefaranoo. Qinee qumiqa innee marifandinnaqoo irisee akooqoo tautumasee qumuree inni uqeeraanaura.)

## 18

### *Anaasee maqee maqee siaasa qimamimaru quandara ufana.*

<sup>1</sup> Yisufa narí faiqí namuara sia nikoo nikaa masee innaaru qiranara minnisaaqee maqee maqee afeekaikamasee innaaru qiaqeeera quandara ufa qimanniminau.

<sup>2</sup> Moo maqusaki siaasa marinau, mifa manda fasiqa maridanoo sia Anutunara aaquqamasee andeeqara siaasa saika maranau, sia faiqí anaaseera amuqusa imarinau.

<sup>3</sup> Mi maqusanaki kai adeedaana anaasee moo marinau, mina afaaqi kuqufufa naríara kadaapiriranaki marinau, mifa maqee maqee siaasinnai oonuraidanoo sandanainai qimarinau, oo siaasa anee dadaaqinana qini mandaikamaqimaqee mariasara qaoo qia.

<sup>4</sup> Siaasa fannoo kisaagasaa mi adeedaana anaaseena ufa irinoo fidanoo narí kai qimirinoo qinau, Qinee sia Anutunara rufiqaunausa faiqí anaaseera sia qimuqusimarisa maridaqa.

<sup>5</sup> Maa anaaseefa narí ainaina ummuari mariafanoo narí ainainara qini daruaqaamminoo saina dadaaqiananoo taikaani.

<sup>6</sup> Karaambaiqa Yisufa mi manda fasiqanara narí faiqí namu qimanniminoo qinau, Innee mi manda siaasana ufa irida fee.

<sup>7</sup> Anutufa sia miqi marifa, amiqirafa maridanoo mifa narí faiqí anaasee eendaki faasaana misa ikiraqarana iriseenoo sia anuquannoo qinee qimannimida dauni dauni dadaaqiannoo.

<sup>8</sup> Minara sia innaaruqiranara nikoo nikaa masee minnisaaqa, afeekaikamasee innaaru qiaqa, qinee faiqí nimaaku kafaa qumuree qafaanaqa faiqí anaasee Anutuna saqarikidaqa innaaru kaqi fee ida marifaree sia fee ida marifaree.

### *Narí amooqimaruna faqa narí reendeenimarufa faqa miqandufa.*

<sup>9</sup> Faiqí anaasee akaqausa náriara andeeqarausee qimasaidaqa niqoonausara mandaikirausee qimasaidaqa fidiqaa imarianara Yisufa niqafamasee maa quandara ufana qimanniminau.

<sup>10</sup> Faiqí qaaraqanda Yeerusaree maqusai naaquqara amaana maaqaki innaaru qiraree qimasee keeqaqau, moo fannoo Farisai amaana ufa qimarufa moo fannoo qummuarira takisa munnimma maree marufa miqanda keeqaqau.

<sup>11-12</sup> Farisai amaana ufa qimarufa innaaru qiraree qimaseenoo narí kai narí amoo qidanoo qinau, oo Anutuna qinee sia ainainara rimarunausa maridaqa sia unna ufa qunausa sia anaasee qummuarunausa sia aiqamausa naanna raunausa maridaqa. Oo dufi dufi sia maa umuarira takisa munnimma maree marina aanna raunausa maridaqa, aiqama amaana aundurái qaara faasaana narana minnisee daarara innaaru qimarunausa maridaqa qeeqa munnimma aiqama rainasee dinni qisauku taikasee dinni ani qaara faqa qaara faqa (9) munnimma qeeqaraa maridaqa moodaa munnimma ani amidaqa, oo Anutu dufi dufi qinee miqi marunausa maridaqa.

<sup>13</sup> Ummuarira takisa munnimma maree marufa innaaru qirara firaqoo asauridanoo aadumasaa kikiqammafinoo sia innaarunai oori uqeereenoo kummaramafinoo narí aaqaranara aiaaee qidanoo asauku rootee rootee kidanoo narí aaqaranara asauruseenoo qinau, oo Anutufa qinee aaqee marunausa maridaqa anee qiniara amugusia.

<sup>14</sup> Yisufa mi fasiqaqandara narí faiqi namu qimanniminoo qinau, ummuarira takisa munnimma maree maruna mandainaina Anutufa taika aisoofoo andeeqasee finau, Farisai amaana ufa qimarufa sia andeeqanau kaqi finau, nariara uriqararausee qimariasaa Anutufa asauriranaki quqaannoo, nariara ureeqararausee qimariasaa Anutufa uriqararanaikama nimaqaannoo.

*Yisufa faiqi aanaaqiuqa nifaaqooqa qinau.*

*(Mat 19:13-15; Mak 10:13-16)*

<sup>15</sup> Faiqí anaasee akaqausa nariqa faiqi namu nifiqamaree Yisufinnai munusaana misa nifaaqai narí asauku quqasee nifaaqooqa qimannimaqaanifeera nifiqee aniqau. Aniroofaqa Yisuna faiqi namu misa farafara qifoo qimasee niqiqau.

<sup>16</sup> Yisufa misa niqira ufa iriseenoo qaoo qimasee faiqiuqaindi naaraifaqa mai aniaqee qimasee narí ufa irimariasaa qimanniminoo, faiqi aanaaqiuqa sia rafaqa fuaqa, saifaqa mai aniaqa Anutuna ququsa miqirausaindi maridanoo.

<sup>17</sup> Innee maanara kai irisee sia aunuaqa yafee moo fannoo sia kaqikaa faiqi naanna ramasee Anutuna ququsa marainafa sia uqanna minaki keeqaannoo, faiqi aanaaqi naanna ramasee Anutuna ququsa marainausa misa kai minaki keeqefaranoo.

*Qumiasana faqaafa naaru mariranara iranau.*

*(Mat 19:16-30; Mak 10:17-31)*

<sup>18-19</sup> Moo kari Yuda maqannaasa uriqararausa qiqari moo fannoo Yisuna irammirinoo qinau, Oo ufasaa rakisirafa andeeqarafa nana saikee auqamaqaqaannoo fee Anutufa naaru naaru marirana qimiannoo fee qufanoo Yisufa qinau, anee nanaree qiniara andeeqara fee qidaneesaa sia moo fannoo andeeqarafa maridanoo Anutufa kai andeeqarafa maridanoo.

<sup>20</sup> Anee sandufa akara irimariananoo mimau finana maaqimmia anee sia anaasee ummuaria, anee sia faiqí anaasee kuqannarua anee sia ainaina ummuaria anee sia unna ufa qia aneenna anoona akoonara aidimarinana miqanda nuqu uqeeraidana amiqimasee rakisinnimaqaa qufanoo mi fasiqafa iriseenoo qinau.

<sup>21</sup> Qinee mi ufausa kumaaraasaqari aiqama mi ufamau fuafanausa maridaqa.

<sup>22</sup> Yisufa iriseenoo qimaminau, moodaa ainaina kai anee sia amanaikianano anee aneenna qumiasana moomoo marina makeetamasee munnimma maraseenana kudi fasiqa aanaaseeuqa nimisainanoo ani qumiasana ani afeesara innaarunai mariani, miqimaseenana anee qini faqa ania.

<sup>23</sup> Qufanoo mi fasiqafa iriseenoo mina qumiasana moomoo marunara firaqoo oori runusee finau.

<sup>24</sup> Yisufa mina oori runirana qafamaseenoo qimanniminoo, qumiasana moomoo faqaasa Anutuna ququsaki keeqarara firaqoo anuqidaqa.

<sup>25</sup> Qoosa fannoo ukaamaraki ruqiqaki firafa sia amanaikiannoo, qumiasana moomoo faqaafa innaaruna ququsaki firara miqi kai inoo sia amanaikiannoo.



26-27 Miqoo marusa mi ufana irisee tautumasee Yisuna iramiriqa qiqau, anee qianandee ainaina faqaasa sia innaarunai fifaqa yafee moo fanoo innaarunai asumu mariranaki amana keeqaannoo fee sia moo fanoo amanaikiannoo, qufanoo Yisufa qinau, maqasaa fasiqa anaasee sia amanaikimaria ainaina Anutufa amanaiki marifa maridanoo.

28 Peetooroofa iriseenoo Yisuna qimaminau, maasa qeeqa maqusaina minnisee ani faqa nidaqa anee maasara naqi fee qidane.

29-30 Yisufa qimanniminau, qinee maa ufana ani qimamidaqa, moo fanoo nari maaqa fee nari anaqa fee akaqaafasaa fee nari anoona akoonee nari faiqi namu fee Anutuna ququsa saikaramamaree minnisainafa mifa maqee maria kamuqoo aabaa faqa maraannoo kasooqagee anianinna aukwana naaru asumu marirana maraannoo.

*Yisufa nari kuquaninnanara qimanniminau.*

*(Mat 20:17-19; Mak 10:32-34)*

31 Yisufa nari faiqi namu nifiqamaree aadumai oonureenoo qimanniminau, Innee iriaqa innisaimbaqa Yeerusareenni ooru fidaqa, miqoo marianaqa ooqai mariu tamummaqara fasiqauqa faiqi nimaaku qiniara akara rumaqoo ufafa anoonaikiannoo.

32 Qini maqannaasa qini mareeqee aanaamuru nisaukuki quqaqisaifaqa qiniara ataasa ufa faqa manda ufa faqa qidaqa niqaara fidi qimaqee-faranoo.

33 Misa qini uaiqa samu firaaqoo qifaaqa atekaseeqa munu kuqa darifaranoo, darusaifanoo qaarammoo faasaana aiqarainanoo Anutufa qini mara findifuma qimaqaannoo.

34 Yisuna faiqi namu mi ufana iriseeqa sia minara iriqau. Mi ufana anoona Anutufa kukeeqama nimaqaqaiifaqa sia iriqau.

*Afu qimbarana Yisufa afu maqaisanau.*

*(Mat 20:29-34; Mak 10:46-52)*

35 Yisufa faiqi anaasee moomoosa faqa Yeerikoo maqusaki firaree qimaseenoo aanasaa fimarufanoo naambeeqi aana afainni faiqi moo afu qimbarafa ooqufaaqee maridanoo faiqi anaasee fiqaree aiqaree imarufanoo narana mara nee maru munnimmanara innaaru qimarufa marinau.

36 Mifa faiqi anaasee moomoosa fiqaree marufanoo niku ai iriseenoo iramirinoo qinau, maana nana ainainee kambiqaidanoo fee qufaqa misa qiqau.

37 Yisufa Nasareetee maqusaindaraafa doo aiqaraidanoommifoo qufanoo mi fasiqafa iriseenoo faqa rumasee qinau.

38 Oo Yisu Dafidina ati marianafa anee qiniara amuqusinana qini dadaaqa.

39 Faiqi anaasee indaaru fusa mina faaqarirana irisee mina aqiqa qiqau, anee ufasaa qufanoo mifa firaaqoo fi fi qimasee qinau, oo Dafidina ati marianafa anee qiniara amuqusinana dadaaqa qufanoo.

40 Yisufa kasoomafino mi fasiqana maree mai aniaqee qufaqa afiqamaree mini Yisuna aaqa quqasoofanoo Yisufa iramirinau,

41 Anee qiniara naqimma aisaanauree qidane qufanoo mi fasiqafa qinau. Oo uriqararafa anee qini qifu maqaqisaanneera qidaqa qufanoo

42 Yisufa qimaminau, doo aneenna afu irirana qinisaa rusiananannoo amiqianano.

43 Miqi qimarufanoo aaqee kai mi fasiqana afu amiqimafufanoo Yisuna faqa fidanoo Anutunara dufi dufi qimammaree finau. Faiqi anaasee

moomoosa Yisuna faqa fiiusa mina qafamasee misa faqa Anutuna amooqi-mamaqau.

## 19

### *Sakiusana ufa.*

<sup>1-2</sup> Yisufa Yeerikoo maqusamau figaree marufanoo faiqí moo ummuarira takisa munnimma maree marusa uriqararafa firaa qumiasana faqaafa mina auqu Sakiusafa Yeerikoo maqusaki marinau.

<sup>3-4</sup> Mifa Yisuna qafarara kikiqufanoo sia amanaikinau, qusa fasiqa maridanoo faiqí anaasee ititafunara sia qafaanauree qimaseenoo faiqí anaasee finnaaqareenoo sandeenoo Yisufa fuaninna aannai oonureenoo saqariki akaramafinoo rakisi marinau. <sup>5</sup> Yisufa saqari atukaki oonureenoo murufi afu maqaseenoo Sakiusana qafamasee qimaminoo qinau, Sakiusa dauni dauni qumurainaqa maqee ani maaqaki oonuree ani faqa marianaura.

<sup>6</sup> Sakiusafa maqai qumureenoo firaqoo اساسamaseenoo Yisuna afigeenoo narí maaqai munusoofanoo marinau.

<sup>7</sup> Yisufa mina maaqaki marufaqa faiqí anaasee aiqamausa noori runusee ninunuridaqa qiqau, maa fasiqafa manda oosana mareemari fasiqana maaqaki keeqafinoo adooaidanoo.

<sup>8</sup> Sakiusafa narí maaqaki maridanoo findifinoo karaambaiga Yisuna qimaminau Oo uriqararafa qini ufa iria, qinee qeeqa aiqama qumiasana qambaana rainasee dinni kudi fasiqa anaasee nimianaura, qinee faiqí anaasee nikaru qimasee misa munnimma ummuarira takisa maraafannana akiaqara kafa nimisee aabaa qaara faqa qaara faqa kari nimianaura.

<sup>9</sup> Yisufa irisee qimaminau, maqee faasaana naaru naaru asumu marirafa ani maaqaki ani maridanoo anee faqa Abarahaamana ati mariananoo.

<sup>10</sup> Qinee faiqí nimaaku miqiga auigaqa nuasara randasee nifiqa quqasee asumu marirana nimiraree qimasee qumu maridaqa.

### *Yisufa ainainira munnimma kikiqa usuqoofa.*

*(Mat 25:14-30)*

<sup>11</sup> Sakiusana maaqaki mariiusa Yisufa Sakiusana qimamu ufana iriseeqa mina faqa Yeerusaree maqusai ooru fidaqa maaqi qimasee unna qimasee qiqau. Anutuna innaaruna ququsa maqee uqanna maqasaa Yeeruserree maqusai kambiqaannoo fee qimarufanoo Yisufa misa aaqara irirana iriseenoo qimanniminau.

<sup>12-13</sup> Faiqí moo fannoo uriqararafa maridanoo niana maqusai firaa karaambaiga marinnai oonuraananoo ooru dupira karaambaiga qafee qiminaqa qeeqa ququsakinaasa rakisinnimaqaanee qimaseenoo firaridanoo narí ainainira faiqiuqa qisaukuqara taikasee (10) naaramasee koora munnimma naadu naadu nimiseenoo qimanniminau, qinee oonu mariana kamuqoo innee maa munnimmanannai ainaini marifaqa anireeqa maraanaura.

<sup>14-16</sup> Mi fasiqafa fufaqa mina maqannaasa minara fidaqaa imarusa faiqí moo aqiqeeqa anee inaaqiana oonuree firaa karaambaiga qimamia mifa maasa rakisi qimaqaranara maasa qikooqaidanoo, miqi qimasee qimamiseenoo oonurandee ani marifanoo mi uriqarara fasiqafa karaambaiga qafee mara mareenoo oonurandee anireenoo narí ainainira faiqiuqa munnimma nimusa naaramaseenoo qimanniminau, innee mai anireeqa qini munnimmanai saikiaanara qima qimiaqa qufanoo indaaruaqafa anireenoo qimaminau. Anee moodaa koora munnimma qimunaqa qinee

minannai ainaina maseeqa qisaukuqara taikasee munnimma mareeqa doo amidaqa maraa.

<sup>17</sup> Miqi qufanoo mina uriqararafa qimaminau. Oo amiqirafa anee amiqira ainainimarianafa mariananoo anee kaqikaa ainaina amiqimasee rakisiannana akiaqara qinee qisaukuqara taikasee maqusa ani amianana misasaa rakisinnaranoo.

<sup>18-19</sup> Mifa fufanoo mina aanaaqiannaafa anireenoo uriqararana qimaminau, oo uriqararafa anee moodaa munnimma qimunaqa qinee minannai ainainamasee moodaannai qisauku munnimma mareeqa doo aninna amidaqa maraa, qufanoo mina uriqararafa qinai, anee aneenna saika akiaqara moodaannai qisauku maqusai rakisinnaranoo.

<sup>20</sup> Ainainira faiqi moo fannoo anireenoo uriqararana qimaminau. Oo uriqararafa anee moodaa munnimma qimunnana kaqi maridanoo qinee mina kai aninna amidaqa qinee qamunnasaa sakasee raqandaamma kukeeqaqaunnana aninna amidaqa qinee sia minannai ainainiqa anee afeeka fasiqa marianaqa aniara rufieeqa kaqi quqaqaunnana.

<sup>21</sup> Anee sia aneenna ainaina maree marianafa anee sia ummaqira ainaina aiqimarianafa moosaindi ummuari marianafa.

<sup>22-24</sup> Miqi qufanoo mina uriqararafa qimaminau, anee mandainainimariananna fasiqafa mariananoo, qinee aninna ufasamu aninna aruanaura, anee qiniara afeeka fasiqa fee qimarianausa qinee moosaindi ummuari marunausa moosa ummaquqaana aiqi marunausa maridaqa anee miqi qimarianafa nanaree sia qini munnimma mareeqee beenaki quqeenanee anee miqimasaanaqa qinee aniree qeeqa munnimma faqa mina ati faqa maraunaiqini qimasee uriqarara fasiqa fannoo miqoo marusa qimanniminai, innee mina moodaa munnimma mara maree qisaukuqara taikasee munnimma maqeeina munu amiaqa qufaqa misa qiqa.

<sup>25</sup> Oo uriqararafa mifa moomoo faqaafa maridanoo qufanoo mifa qinai.

<sup>26</sup> Qinee anoona ufa qimannimiana iriaqa, aiqama ainaina moomoo faqaasa moo faqa ootupama nimifara, ainaina siainaindi oodaa maqeeina rafiqeefaranoo.

<sup>27</sup> Maqee qiniara fidiqaa imariasa qiniara sia mifa maasa rakisirafa marianifee qimariasa mareeqee qini qifusaa quqasee kuqa naruqa.

(Maa ufana Yisufa nariara quandasee qimaqoofa maridanoo, nari uriqarara karaambaiqa kasooqaqee marianinnanara mi ufana qinai. Yisufa sia aaqee uqanna Isaraee maqannaasa uriqararafaikiannoo kasooqaqee innaarunaindari qumureenoo maasa saiki marunnana qafamaseenoo mina akiaqara maasa qimiseenoo quandafi minara fidiqaa imariasa naru taikaannoo.)

*Yisufa doonkisa Yeerusareenni ooru finau.*

*(Mat 21:1-11; Mak 11:1-11; Yoh 12:12-19)*

<sup>28</sup> Yisufa mi ufana qimannimiseenoo nariara moomoosa noorinni indaaru Yeerusaree maqusai ooru finau.

<sup>29</sup> Beetapaisa maqusa faqa Beetani maqusa faqa mi maqusa qanda moodaaqoo maruqanda Yeerusaree aqa mariqau, Yisufa ooru fidanoo mi maqusa qanda adeedi ramaseenoo nari faiqi namuqiari qaaraqanda naaramasee qimanniminai.

<sup>30</sup> Inneeqa noorinni mari maqusanaki oorureeqa maqusai firuqiaki oorureeqa doonki aanaaqi asaandaru quqaqaana, faiqi sia minasaa ooqu mariana paqurimasee mina iduku maree muqu qimiaqa.

<sup>31</sup> Faiqí moo fannoo inniqarara nanaree idukidee qinaqa maaqi qimasee qimamiaqa, maasa uriqararafa minasaa ainainirara qidanoo.

<sup>32-33</sup> Miqi qufaqa miqanda oorureeqa Yisuna ufamau kai fiqa paqurimasee iduki marufanoo mi doonkina akausa niqafamasee irammiriqa qiqau, inneeqara naqiraree idukidee qufaqa miqanda qiqau.

<sup>34</sup> Maasa uriqararafa minasaa ainainirara qifaqa idukidaqa qimasee idukumaree Yisufinnai munuseeqa nariqa qamunna minasaa ufiqisee

<sup>35</sup> Yisuna dadaaqufanoo minasaa oogu marifinoo Yeerusaree maqusai ooru finau.

<sup>36</sup> Aatata ooru fimarufaqa faiqí anaasee karaambaiqa miqi mandaida afigee marundeemasee nariqa siuta raipagusaida aatata ufiqisoofanoo doonki fannoo mi mau ooru finau.

<sup>37</sup> Yeerusaree maqusa adeedi ramaseenoo Oorifa aaganai ooru fimari-aqooqari Yisuna faiqi namu faqa faiqí anaasee moomoosa faqa Yisufa aiqama ainaina firaa ainaina auqee marufaqa qafeeusa firaqoo kaanina mareeqa Anutuna amooqidaqa minara dufi dufi qidaqa qiqau.

<sup>38</sup> Karaambaiqa ufara animari uriqararana Anutufa amiqi amiqi iani. Innaarunai asooarafa mariani. Anutuna amooqirafa faqa mariani.

<sup>39</sup> Farisai amaana ufa qimarusa faiqí aanaaseekiaqa fidaqa faiqí anaasee amooqira ufa iriseeqa Yisuna qimamiqa qiqau. Ufasaa rakisirafa aneenna faiqi namuara qaoo qinaqa ufa saaqa qufanoo

<sup>40</sup> Yisufa qimannimainau, Qinee qaoo qianaqa tamummaqara fasiqauqa akara misa miqifandiafoo qimaqoona misa ufa taikainanoo maa aatata mari oonisaa faiqiara foora kaanina mareefaranoo.

*Yisufa Yeerusaree maqusara qimudaoo qinau.*

<sup>41</sup> Yisufa Yeerusaree maqusa adeedi ramaseenoo mi maqusanara faqa faiqí anaasee minaki mariasara faqa ikiraqanau.

<sup>42</sup> Misa kuridifandinanara iriseenoo ikiraqeenoo qinau, Oo Yeerusaree anee maqee asooaranaki marinna oosanara iriaqaana, doo maqee anee sia amana qafeennaranoo.

<sup>43</sup> Qusasaa ani namuqaa anireeqa maara maqaseeqa ani aana kooqi ititaseeqa ani faandaamurasaa saqari kuradamaseeqa minasaa akara mafiqaa maqusai aqufifaranoo.

<sup>44</sup> Misa ani maqusa faqa faiqí anaasee faqa aiqama naru taikaseeqa ooni maqa moomoo marina rapeepaamaseefaranoo, sia moo ooni narisaa narisaa mariannoo. Qinee marunna kamuqoo Anutuna inni asumu marirana nimiraree qifaqa innee sia irirai mana mana imarianara inni narirafa kambiqaanoo.

*Yisufa amaana maqaki feefaurimarusu niqiqanau.*

*(Mat 21:12-17; Mak 11:15-19; Yoh 2:13-22)*

<sup>45</sup> Yisufa Yeerusaree maqusaki oorureenoo misa naaquqara amaana maqaki keeqafinoo minaki ummuarira bisinisa auqee marusa rapatutum-meeqee quqaseenoo qimannimainau.

<sup>46</sup> Anutuna tamummaqara fasiqauqa ooqeenaa akaraki maa maqanara maaqi qimaqoofa maridanoo. Anutufa qinau maa maqafa qini maaqa maridanoo, qinee minara innaaruqira maaqa mariannoo fee qidaqa. Anutufa miqi qimaqoofaqa qinee mi mau fidaqa maaqi qidaqa, innee mi amaana maqana qumareeqa ummuarimaria fasiqausa kukeeqara maqaikamaqaafanoo maridanoo. Miqi qimaseenoo Yisufa niqiqanau.

<sup>47</sup> Miqooqari Yisufa maqee maqee mi amaana maqanaki faiqí anaasee naamua qinau.

<sup>48</sup> Miqi marufaqa mi amaana maqanaki aanaiqikirausa faqa Mooseena sandufa akoofasauqa faqa faiqi firaasauqa faqa Yisuna kuqarira aanara randoofanoo sia amanaikufaqa, faiqi anaasee aiqamausa maqee maqee Yisuna ufasaa kai naundura quqaseeqa moodaa ufa sia irianoo qimasee kaaqa irimariqau.

## 20

*Rakisirausa Yisuna iraqau, yafee qifanee maaq inanee.*  
(*Mat 21:23-27; Mak 11:27-33*)

<sup>1</sup> Moo kari Yisufa faiqi anaasee mi amaana maqanaki Anutuna amiqira fasaasa ufa faiqi aanaaseeuqa qimannimarufaqa amaana maqasaa aanaiqikirausa misa uriqararaura faqa Mooseena sandufa akoofasauqa faqa suqumaree Yisufinnai aniree iramiriqa qiqau.

<sup>2</sup> Anee maa maqanaki bisinisaika imariasa nifaqaannana faqa aiqama oosana oosana ainaina auqimariannana faqa yana ufaree miqidanee yafee miqiannee qinoo fee.

<sup>3-5</sup> Yisufa misa ufa iriseenoo qimannimino qinau, Qinee faqa innisaa moo ufara irammirianaaura, Yoohaneefa nammari nimianifeera aqiqarana yaindari fee aninoo fee Anutufinnaindari fee aninoo fee maqasaa fasiqakiqari fee aninoo fee qufaqa misa narinni narinni ufa raineeqa qiqau, maasa Anutufinnaindari fee qifanoo Yisufa maaqi qiannoo innee nanaree sia mina ufa iri fee qiannoo.

<sup>6</sup> Maasa Yoohaneenara maqasaa fasiqakiqari fee qianaqa faiqi anaasee Anutuna tamummaqara fasiqa fee qimasee oonisamu maasa kuqa darifoora.

<sup>7</sup> Misa miqi qimasee qumee maqandanai qi qiseeqa quandafi akooqoo Yisuna qimamiqa qiqau, Yoohaneena aqiqoo fasiqanara maasa sia iridaqee qiqau.

<sup>8</sup> Yisufa iriseenoo mina akiaqara qimanniminu, qinee yana ufasaa maa ainainna auqaidee minara faqa sia inni qimannimianaaura.

*Yisufa mandainainira faiqi kikiqammusinau.*  
(*Mat 21:33-36; Mak 12:1-12*)

(Yisuna aukwana nari maqannaasa munnimma saika maraaqee qimasee uainna sanda ummaquseeqa mina qaqaama tiqisee anoona tatisaidaqa minasaa munnimma maree mariqau. Mi oosannara maasa sia iridaqa koofi oosana maasa iridaqa. Mina aanna ramaseeqa koofisaa maasa munnimma maraيداqa. Maa ufana Yisufa uainna kikiqusuqoona mifa maasaki sia marinara maasa minara koofi fee qidaqa.)

<sup>9</sup> Miqoo Yisufa faiqi anaasee quandara ufa moo maaqi qimasee qimanniminu. Faiqi moo fannoo koofi asumu moomoo ummaquseenoo marikufaqa nari maqannaasa akaqausa ufaasu nimisee qimanniminu. Innee qini koofisaa rakisiqisee marifaqa qinee qambaana oosusee inni dinni qeeqaraa dinni maraanaura. Mi ququsana akoofa miqi qimannimiseenoo doo nianai oonureenoo kisaacaqasaa marinau.

<sup>10</sup> Koofi qaqaama akuqee maru kamuqoo mi ququsana akoofa nianaindari ainainira faiqi moo aqiqeenoo qinau, anee oonuree qini koofi qaqaamasaa rakisimariasara qinaqa qiqa oosaaqaraana qimaqaifana maree ania mini qimia qimasee aqiqoofanoo oonuroofaqa mi ququsanasaa rakisimarusa mandoosana maraseeqa mi ainainira fasiqana qumareeqa unnaana samu ariisee aqiqoofanoo kaqisamu anirandee finau.

<sup>11</sup> Ququsa akoofa mina qafamaseenoo kafaa moo fasiqa aqiqoofanoo oonuroofaqa ququsasaa rakisimarusa miqi kai iqa mina faqa ari iseeqa mandaikammamaqasee asaurirana amiseeqa aqiqoofanoo kaqisamu anirandee finau.

<sup>12</sup> Ququsa akoofa mina qafamaseenoo kafaa ainainira faiqi moo aqiqoofanoo oonu roofaqa misa mina faqa ariiseeqa rarisama aqiqau.

<sup>13</sup> Ququsa akoofa mina qafamasee anunurumaseenoo qinau, qinee naqi fee ianauree, qinee qeeqa didira qimaaku aqigaananoo oonu rainaqa minara rufiasee koofi qaqama amifaranoo.

<sup>14</sup> Miqi qimaseenoo narí amaaku aqiqoofanoo oonu roofaqa misa qafamasee narí qimami narí qimami qiqau, maafa ququsa akoona amaaku maridanoo, doo maree mina kuqa arusaananoo maa ququsafa innisaimbaqaindi mariani.

<sup>15</sup> Miqi qimaseeqa misa mina rafuseeqee aqoosai aquseeqa kuqa ariqau, Yisufa mi ufana qimannimiseenoo kafaa qimannimino qinau, mina amaaku arusaifanoo mi ququsana akoofa naqaa fee iannoo.

<sup>16</sup> Mifa sia kaqi mariannoo oonu reenoo mi fasiqausa kuqa naruseenoo amiqira fasiqauqaindi mi ququsana nimiannoo. Faiqí anaasee mi ufana irufanoo naquqoofaqa qiqau, oo mi mandoosannafa sia kambiquaani.

<sup>17-18</sup> Yisufa iriseenoo misa niqafamaseenoo qinau, tamummaqara fasiqauqaindi ufa akara maaqi qinoo maridanoo, minoosanara randasee qafaaqa mi mandoosannara kai qidanoo, mifa maaqi qidanoo. Faandaa-mura auqi mariasa sabeena moo marasee qafamasee manda sabeena fee qimasee aqusoofanoo Anutufa mi sabeennana quandaki amiqira afeeka faakana fee qimaseenoo uriqarara faakanaikinoo marianifeera rakianau. Mi tamummaqara fasiqafa qiniara miqi qimaqoofaqa qinee minara maaqi qidaqa yafee moo fannoo mi sabeennanasaa turuqaki aqufinafa mi sabeennafa mi fasiqana atekaa teeka masainanoo kuquannoo. Mi sabeena samufa moonasaa aqufinoo kuqa arusainanoo kookoomaikamafuannoo.

*Sisaafa takisa munnimmara innaaru qinana kaqi amia.  
(Mat 22:15-22; Mak 12:13-17)*

<sup>19</sup> Mooseena sandufa irimarusa faqa amaana maqasaa aanaiqikirausa faqa Yisufa maasara mi ufana qidanoo fee qimasee miqoo kai qumaree rumberaree qimasee faiqí anaaseera rufiasee kaqi kasoomafiqa mina qumararanara rakisi mariqau.

<sup>20</sup> Rakisidaqa faiqí akaqausa feefauru nimiseeqa qimannimiqau, innee oonuree amiqira fasiqauqara foora oosana oosana ufara iriifanoo aaqara ufa qinaqa maasa ruumbeegee Roomma maqannaa kiapana asaukuki quqaanaura.

<sup>21</sup> Miqi qufaqa mi fasiqausa oonuree Yisuna maaqi qimasee qimamiqau, Oo ufasaa rakisirafa ani ufara iridaqa ani naamuaqira ufa andeeqasaidana qima nimimarianafa mariananoo anee sia faiqí nifaqa niqafamasee oosana oosana ufa qimarianafa, anee Anutuna aanai fimaria ufana anoona kai qimarianafa mariananoo.

<sup>22</sup> Anee maa ainainnara qimaqimia maasa maqee maqee takisa munnimma Roomma maqannaa uriqararana amidaqa, maasa Mooseena sandufa rukiidaqee miqidee qufanoo,

<sup>23</sup> Yisufa misa ueeqaranara iriseenoo qimanniminau.

<sup>24</sup> Innee maasa siruaa munnimma moo mara uqaqifiqaaqa qufaqa uqafiqaqau, Yisufa qafamasee qinau, ya fasiqana oori amanee maanasaa

maridanoo fee yana auqu fee maanasaa akara rinoo maridanoo fee qufaqa misa qiqau.

<sup>25</sup> Roomma maqannaa uriqararanaindi fee qufanoo Yisufa qinau, faiqí moo fannoo sia moonaa ainainasaa narí auqu akara ridanoo ainaina faqaafa narí ainainasaa narí auqu kai quqaidanoo maa munnimmana Roomma maqannaa karaambaiqaindi maridanoo mina amana faqa mina auqu faqa maanasaa maridanoo doo mifa qimianne qinaqa innee naríndi narí kai amiaqa kaifaa Anutunaindi faqa narí kai amiaqa.

<sup>26</sup> Misa mina ufa irufanoo naaquqoofaqa kaqi kasoomafiqau, sia miqoo faiqí nifusaa ufannai kai ueeqasee qumarararee qiqau.

*Yisufa kuqiranakiqari findifinausara qangiroora maqi marifara.*

*(Mat 22:23-33; Mak 12:18-27)*

<sup>27</sup> Sadikai amaana ufa qimarusa faiqí kuqiranakiqari sia findifaranoo fee qimarusa mariqau. Miqíqa marunara misakiqari akaqausa Yisufinnai anireeqa ueeqararee qimasee iramiriqa qiqau.

<sup>28</sup> Oo ufasaa rakisirafa Mooseena sandufa fannoo maqi qimasee maasa qimaqimidanoo. Faiqí moo fannoo sia faiqi maqarai kuqifanoo mina akaqa fannoo mina anaqa maraseenoo faiqi maqasainanoo indaaruaqaa fasiqa qumiasana maraannoo.

<sup>29-30</sup> Mooseefa miqi qimaqoofaqa minara maasa ani iridaqa. Moodaa fasiqa faiqi namu dinni qisauku taikasee dinni oonu qaaraqanda (7) mariqau, indaaruaqaa anaasee marasee sia faiqi maqarai kuqufufanoo mina aanaqiannaafa mi anaaseena maraseenoo doo mifa faqa sia faiqi maqarai kuqinai.

<sup>31</sup> Mina aanaqiannaafa miqikaimasee mi anaaseena maraseenoo kuqinai.

<sup>32</sup> Miqooqari mi oosanausa aiqamausa mi anaaseenasaa sia faiqi maqarai kuqutaikaqau, inaaqiannaafa uqanna mi anaaseena faqa kuqinai.

<sup>33</sup> Oo Yisu faiqí anaasee kuqiranakiqari findifandinna faasaana mi anaaseefa ya fasiqana anaqa fee mariannoo fee, mi oosanausa aiqama mi anaaseena kai maraqau.

<sup>34</sup> Yisufa iriseenoo qimannimainau, maqee mariaqoo maa aukuanna kai faiqí anaasee narí maree narí maree idaqau.

<sup>35</sup> Anutufa faiqí anaasee qini faqa innaarunai amanaiki mariasee qimari-asa kuqiranakiqari mara findifu mannimaqasee innarunai quqasaifaqa sia kuqifaranoo naaru marifandinausa marinara sia narí maree narí maree ifaranoo.

<sup>36</sup> Misa faiqí nifaaqa faqa anaasee nifaaqa faqa taikaseenoo qangiroora fooqaasa indaaqirausa maridaqa kuqiranakiqari findifi mariasa marianara Anutuna amaakuqmara maridaqa.

<sup>37</sup> Mooseefa faqa akooqoo faiqí anaasee kuqiranakiqari findifi marirana qimannimainau, ooqai Mooseefa kaasau maqa maqaki marufanoo sasamimiki ida qee marufanoo Mooseefa oonu qafamasoofanoo Anutufa minakiqari ooqai kuqusara Mooseena qimaminai, Qinee Abarahaamana faqa Isakeena faqa Yakooboona faqa misa Anutusa maridaqee qufanoo Mooseefa mi ufana iriseenoo kasooqagee akara rinai.

<sup>38</sup> Anutufa sia kaaqa kuqi mariasa nikoofau maridanoofau Anutufa kaqi mariasa faqa kuqiranakiqari findifi mina faqa mariasa nikoofa maridanoo. Anutufa kuqufusara faqa kaqi mariasara faqa kaqi mariaafoo qidanoo. Minara Anutufa Abarahaamana faqa Isakeena faqa Yakooboona faqa nikoo

fee qidanoo minamusa ooqai kuqusa kuqiranakiqari findifi qini faqa mari-  
aafoo qimasee mi ufana qinau. Qinee Yisusa minara inni qimannimidaqa,  
kuqiranakiqari sia sia findifidammia, findifidaqa.

<sup>39</sup> Mooseena sandufa akoofasauqa akaqausa mi ufana iriseeqa Yisuna  
amooqiga qiqau, Oo ufasaa rakisirafa amiqira ufa qiananoo.

<sup>40</sup> Misa kafaa miqooqari Yisuna irammiriranara rufiasee kaqi kasooiqau.

*Naqimasee Dafidifa narí atiara qini karaambaiqee qiannoo.*

*(Mat 22:41-46; Mak 12:35-37)*

<sup>41</sup> Kasoomafufanoo Yisufa misasaa ufa moora iramirinoo qinau. Tamum-  
maqara fasiqauqa akara fannoo Anutuna asauku mundiranara kasooqaece  
kambiqaafinoo Dafidina atikiqari kambiqaanoo fee qidanoo mifa naqi fee  
masee andeeqaannoo fee.

<sup>42</sup> Dafidifa narí idi papiqaki minara maaqi qimasee akara rinau.  
Karaambaiqa Anutufa qini karaambaiqa maaqi qimasee qimaminau. Anee  
aniree qini daaqa qini qisauku uqannai ooqumaria.

<sup>43</sup> Maaqoo marinaqa qinee ani namuqaa mareeqee ani aramandunnai  
quqasaanana anee misasaa rakisia.

<sup>44</sup> Dafidifa mi idi papiqanaki Anutuna asauku mundiranara qini karaam-  
baiqee qidanoo minara iriseeqa iraidaqa, Anutuna asauku mundirafa naqi  
fee masee Dafidina karaambaiqa faqa mina ati faqa aiqamaqara moodaa  
kari noo mariannoo fee.

*Yisufa Mooseena sanda akoofasauqara qaaraiki mariasee qinau.*

*(Mat 23:1-36; Mak 12:38-40)*

<sup>45</sup> Yisufa mi ufana qimannimimarufaqa faiqí anaasee moomoo iri maru-  
fanoo Yisufa misa nifusaa quandaafinoo narí faiqí namu qimanniminu,

<sup>46</sup> Innee Mooseena sandufa akoofasauqara rakisi marifaqa aniraifaqa  
misa oosanara aufaridaqa eerairiaqa misa qamunna amiqirana kisaqa  
afisusee faiqí nifumau nasuridaqa aatata fee faiqí suqiranaki fee faiqí  
anaasee misa reendeenamasee nimandaranara rimariasa maridaqa, misa  
amaana maqaki fee qoomaqanduqiranaki fee faiqí anaasee noorisaa kai  
oogu marifi nári nifaaqa mara maree urimariasa maridaqa.

<sup>47</sup> Misa faiqí anaasee nifusaa kisaqasaa innaaru qidaqa maqandanai  
adeedaana anaasee saqama fee maqa fee maaqa fee ummuari mariasa  
mariafanoo mina akiaqara narirafa fiqaramasee mariannoo.

## 21

*Adeedaana anaasee ataaqana munnimma aqinau.*

*(Mak 12:41-44)*

<sup>1-3</sup> Yisufa Yeerusaree firaa amaana maqaki maridanoo nindafoofaqa  
faiqí anaasee Anutuna ataaka munnimma quqee mariqau. Ainaina  
moomoo faqaasa firaa munnimma aqimarufanoo qafee marufanoo mis-  
akiqari adeedaana anaasee moo fannoo ainaina siaifa kudi uqanna mar-  
ufa anireenoo ida qarana ataaqana munnimma qaaraqanda kaqikaana  
aqusoofanoo Yisufa qafamaseenoo narí faiqí namu qimanniminoo qinau,  
Oo innee qafaaqa, maa kudi adeedaana anaaseefa aiqamausa urinnaaqara  
maseenoo mi anaaseefa aqinooi.

<sup>4</sup> Ainaina faqaasa nári munnimma moomoo marunakinaana qumaree  
aqiqa, maa adeedaana anaaseefa kaaqa kudi uqanna marifa narí narana  
feeraurira munnimma aiqama uqanna moodaa marina doo aqinoo miqi-  
nara qinee urinnaaqaramasee aqinoommifoo qidaqa.



*Yeerusaree maqusa furufarianinnanara Yisufa qinau.*  
(*Mat 24:1-2; Mak 13:1-2*)

<sup>5</sup> Yisufa narí faiqi namu faqa Yeerusaree firaa amaana maaqaki nimiru-faqa misa aiqama ainaina firaa ainaina Anutuna amimaru ainainausa faqa amiqira ooninnai usakaqoona minauqa qafaqa nidaqa narí qimami narí qimami qimariqau.

<sup>6</sup> Miqi qimarufanoo Yisufa qimanniminoo qinau, Innee maa amiqira ainainausa qafaidee, moo aukwana anirainanoo moomoosa anireeqa maa oonisa aaku aaku irana aiqama rapeemmeeqee maqasaa kai aqifaranoo sia moo ooni moonasaa aakinoo maqee marindee inoo mariannoo, aiqama maqasaa kaimmaqufuannoo.

*Taikaaninna aukuanara Yisufa qimanniminu.*  
(*Mat 24:3-14; Mak 13:3-13*)

<sup>7-9</sup> Miqi qufaqa Yisuna faiqi namu irammiriqa qiqau, Oo ufasaa rakisirafa yairee fee mi ainainafa kambiqaanoo fee, nana ainainee mi aukuanna kooroo ira ainaina qafamasee fee oo mi ainainna kambiqaanoo fee qianauree.

Miqi qufanoo Yisufa qimanniminoo qinau. Innee amiqimandee aiquci-aqa, moo fannoo nikaru qiandoo qimasee minasaa rakisiaqa. Moomoosa anireeqa qinee asaku mundirausa Yisusee qifaranoo, akaqausa doo Anutuna aukwana ani mariifoo qifaranoo. Innee mina irisee sia mi mau fuaga. Innee firaa rakiranara faqa maqusa maqa maaqa furufarirana faqa qafamasee sia minara rufiaaqa sia minara iriaqa sia doo maqa taikarafa anireefoo qiaqa, miqira ainaina mi oosana oosanafa naaree kambiqaaninnanara siamma rufiaaqa.

<sup>10-11</sup> Moo maqannaasa findifi moo maqanna faqa rakifaranoo, moo karaambaiga findifi moo karaambaiga faqa rakuannoo maqa kasirafa firafa moomoo naaquqarafa kambiqaanoo aandaroo aurirana oosana oosana maqa afaaqasasa kambiqaanoo naaquqara ainaina faqa maqa taikaaninna ainaina kudifaanara maqi asurukiqari kooroo iannoo.

<sup>12-13</sup> Misa inni naaree qini ufasaara rumbbeegee aupuraranaki quqee-faranoo. Misa qini ufasaara inni mareeqee firaa uriqararausa nifusaa faqa kaqikaa uriqararausa nifusaa faqa quqasaifaqa mikari inni ufa qimannimimari aukwana mariannoo.

<sup>14</sup> Misa miqifaqa innee maaqi qiaqa oo maqee misa faqa amiqira fasaasa ufa Yisunara qimannimianauree qiaqa. Misa inni mara maree uriqararausa nifusaa quqasaifaqa sia innee minara oonumafi irisee firaaqoo naqi fee qianau naqi fee qianau qiaqa.

<sup>15</sup> Mikari qinee qeeqa kai qumee dadaaqianaqa innee irirana faqaasa ufara foora qimannimifaqa inni namuqaakiqari moo fannoo sia amana inni ufa rukiasee qaoo qifara.

<sup>16</sup> Mi aukuanna qini ufasaara inniqa ninausa nikausee inniqa nikaqaafasaa fee inni ati fee inni niqoondi fee misa inni uneemaana qimasee mareeqee kuqiranaki quqannimaqeeffaranoo.

<sup>17-18</sup> Qiniara aiqamausa inni fidiqaa mannimaqeeffaranoo. Miqi mari-faqa minaki fimarifanoo inni nikiaga asausi sia moodaa fannoo kakasianoo Anutufa inni nifaaqasaa faqa rakisianoo.

<sup>19</sup> Innee mi mandainainaki maridaqa sia aquraranara rufiasee qini duqu minnisaaqa, kaqi finnanannai kai inni marirana afeedifaranoo.

*Rakira fasiqauqa Yeerusaree maqusa fuseemasaiifaqa aaqana aaqana akareefara.*

*(Mat 24:15-21; Mak 13:14-19)*

<sup>20-21</sup> Innee moo maqanna rakira fasiqauqa moomoosa anireeqa Yeerusa-ree maqusa puseemafifaqa innee irirana maaqi qiaqa oo maqee Yeerusaree maqusa taikarafa anireenoo fee qimasee Yudeeaa maqa maaqaki mari-asa aaqanaaqana akareeqa sandeefaranoo, maqusai marinausa qafeeqa quqasee sandeefaranoo, ainainai finausa sia kafaa maqusai anifaranoo, doo mindari kai sandeefaranoo.

<sup>22</sup> Anutuna ooqeenaa tamummaqara fasiqauqa ufa anoona kambiqaanifeera Anutufa narimari aukuaana kambiqanoo maridanoo fee qiaqa.

<sup>23</sup> Mi aukuanna nimuaqu uqafaqaa anaaseeuqa naaquqaranaki mandainainaki marifaranoo, sandaranara anuqifaranoo faiqi aanaaqifaqaa anaaseeuqa miqikaimasee naaquqaranaki kadaapiriranaki marifaranoo. Anutuna aranaqarafa maa maqa maaqanaki marianara naaquqarafa aupurarafa firaaqoo mariannoo.

<sup>24</sup> Moo maqannaasa sundiauqa anireeqa maa maqannaasa aseeman-nai naruseeqa akaqausa rumbeeqee aiqama maqa maaqai quqasaifaqa daraanimambifaqa Anutunara sia irimariasa aniree Yeerusaree maqusa maqee maqee nikunoo radamuseefaranoo Anutufa qumee eedoo qira aukuaana kai miqifaranoo Anutufa taikaannee qinaqa doo miqoo taikeefara-noo.

*Yisufa nari qumuaninnanara oosana kooroo inau.*

*(Mat 24:29-31; Mak 13:24-27)*

<sup>25-26</sup> Mi aukuanna suanafusaa faqa quqoona fasau nifusaa faqa maqa taikara ainaina kudifaanna kooroo irafa kooroomma nimaqasaanaqa qafeefaranoo. Mi aukuanna maqasaa fasiqa anaasee aiqama maqannaasa ooruku nammari ufa qiranara faqa firaa nammari amakauriranara faqa irisee rufiseeqa maa maqa maaqana afaaqasasa kambiqaaninna aupuraranara faqa afeesidaqa rufiaqa rufiaqa idaqa kuquaqaa imarina marifara. Quqoona fasau mariqoo ooqai mari marirafa furufaramambinoo moo kamaakinaqa mina qafaifanoo maqasaa kambiqaaninna mandainainara afeesidaqa rufiaqa rufiaqa idaqa nari nimuqusa kuqifaqa kuqifaranoo.

<sup>27-28</sup> Mi ainainausa oosana arasee kooroomambinaqa innee findifiqa ninuka uqeerasee qafaqa inni innaarunai asumu marirafa adeedi ramafuannoo. Mikari qinee faiqi nimaaku innaarunaindari asuruki firaa afeeka faqa firaa areenarana faqa kooroomambi qumuanaura.

*Yisufa nari qumuaninnanara faafisa kikiqa usinau.*

*(Mat 24:32-35; Mak 13:28-31)*

<sup>29-30</sup> Yisufa mi ufana qimaseenoo maa quandara ufana qimanniminou, innee faafisa faqa aiqama saqari faqa ammuni faqa qafeeqa oo doo aukuanai aniree maqi qimariafanoo.

<sup>31</sup> Innee miqikai iqa maa qimannimuna ainainafa kooroo mambinaqa maaqi qiaqa, oo Anutuna innaaruna ququsa adeedi ramafiifoo qiaqa.

<sup>32-33</sup> Doo innee maa ufana faqa iriaqa maaqoo mariasa kaqi marifanoo mi aiqama ainainausa kambiqeefaranoo. Maqa faqa innaaruna faqa doo aiqama taikafuannoo qiqa dookinna ufa sia taikaannoo kaqi mariannoo.

*Yisufa nari qumuaninnanara indee indeida mariaqee qinau.*

<sup>34</sup> Innee minara irisee inneeqa mariranara rakisiaqa. Inni aaquqiman-nimaqaidaqa. Sia maqee maqee qoomaqamasaida naidaqa sia nammari

namasee furufariaqa sia maaqoo maria ummaarana faqa minara kai mammaree fimarifaqa qinee innaarunaindari qumira aukwana tautuma nimaqaanafaara.

<sup>35</sup> Mi faasaana maa maqa maqana afaaqasasa maria fasiqa anaaseesa tautuma nimaqaanaqa ufaanara foora naruanauranoo.

<sup>36</sup> Innee maqee maqee augarida maridaqa innaaru qimasaida mariaqa. Innee inneeqa afeeka afeekaikamasee qimannimunna mandainainausaki afeekaikamandee fiqaree qini faiqi nimaaku qifusaa amiqimandee kikiqi-aqeera innaaru qiaqeera qidaqa.

<sup>37</sup> Mi fasannai Yisufa faasaambaasaana firaa amaana maqaki faiqi anaasee minaki qimannimiiseenoo eenoofanoo rafudamakufanoo Oorifa aaganasaa akara mafufanoo miqoo faiqanau.

<sup>38</sup> Aiqaama kananaana faiqi anaasee aiqama suqumaree firaa amaana maqaki Yisuna ufa irianee qimasaida keegee mariqau.

## 22

*Yudasifa Yisuna ueeqaaninna munnimmana maranau.*

*(Mat 26:1-5; Mak 14:1-2; Yoh 11:45-53)*

<sup>1</sup> Yisufa miqi marufanoo qoomaqa Yuda maqannaasa firaa qoomaqa ainnaaqarara qoomaqa adeedi ranau. Mi qoomaqaana auqu moo sia ooruku qai feemuna qoomaqa nee imariqau. (Mi qoomaqaanaki moomoo fasiqa anaasee aukwana aukwana suqumareeqa Yeerusareenni mi qoomaqaana suqa nee mariqau.)

<sup>2</sup> Amaana maqasaa aanaiqikirausa misa uriqarararusa faqa Mooseena sandufa akoofasauqa faqa Yisuna kuqa ariranara qumee randee marufaqa faiqi anaasee Yisunara amiqira fasiqee qufaqa minara rufieeqa sia ariqau.

*Yudasifa munnimmaru qufiqamareenoo Yisuna ueeqararee qinai.*

*(Mat 26:14-16; Mak 14:10-11)*

<sup>3-5</sup> Misa miqida randee marufanoo Yudasifa Keerioota maqusaindaraafa Yisuna faiqi namukina qisaukuqara taikasee qikunni ooqu qaara marasee misaki marufa, mina aunduraki kai Sadannafa keeqafufanoo qumee oonureenoo amaana maqasaa aanaiqikirausa uriqarararusa faqa amaana maqasaa rakisirarusa faqa qumee suqinai. Yisuna ueeqa nimianinnanara moodaanaki ufa qimannimimarufaqa uneemaana munnimma amifandinanara qimamiqau.

<sup>6</sup> Yudasifa eedoo qimaseenoo miqooqari faiqi anaasee nifusaa qumee ramaseenoo kukeeqaseenoo Yisuna misa nisaukuki quqararee qimasee ueeqarara randanau.

*Ainnaaqarara qoomaqa deedaqiqau.*

*(Mat 26:17-25; Mak 14:12-21; Yoh 13:21-30)*

<sup>7-8</sup> Sia ooruku qai feemuna neemaru faasaana ainnaaqarara qoomaqa sipsipa aanaqi aru faasaanasaa Yisufa Peetooroona faqa Yoohaneena faqa niqiqamasee qimannimino qinai. Innee qara Yeerusaree maqusai ooruree maasara faqa ainnaaqarara qoomaqa deedaqifaqa ooru naanau.

<sup>9-12</sup> Miqi qufaqa miqanda qiqau yai fee ya maqanaki fee maqanda deedaqianauree qufanoo Yisufa qinai, doo amiqimasee iriaqa, innee qara Yeerusaree maqusaki ooruree fidaqa qafaifanoo faiqi moo fannoo nammari qafee maree keeqainnanaki keeqafi mi maqana akoona maaqi qimasee qimamia ufasaa rakisirafa aniara maaqi qinoo, moo rumma qinee faqa qini faiqinamu faqa ainnaaqarara qoomaqa naanna rummafa yai fee

maridanoo fee qifanoo qinamma iriaqa. Miqi qimasee qimamifanoo mina sandaaqai moo rummaki uqannifiqainaqa minaki deedaqamasai faqa innisaimbaqa fafaa eendaki minaki naanaura.

<sup>13</sup> Miqanda iriseeqa Yeerusaree maqusai oorureeqa Yisufa qimaqoondée kai mi fasiqana faqa maaqa akoona faqa nindafamaseeqa Yisufa qundee kai maseeqa aiqama ainaina deedaqamaqaafanoo.

*Yisufa aafaqa oosana aranau.*

*(Mat 26:26-30; Mak 14:22-26; 1Kor 11:23-25)*

<sup>14</sup> Doo eendufaqa Yisufa narí faiqi namu faqa keeqafufaqa qainda firaana fiqumma oogu marifiqau. (Nári oosana marasee aiqamausa qainda fiqumma fufaqa nisaataa saunu areefufaqa ainnaaqarara aafaqa naqau.)

<sup>15</sup> Misa miqi mambufanoo Yisufa narí faiqi namu maaqi qimasee qimannimianau. Maa ainaaqarara qoomaqaana inni faqa narara firaqoo dididanoo aupurarana oorisa maridaqa.

<sup>16</sup> Qinee sia maqee inni faqa kafa naanaura, Anutuna innaaruna ququsa kambiqafinaqa maa ainaaqarara qoomaqaana anoona oosana uqanna kambiqafinaqa miqoo kafa naanaura.

<sup>17-18</sup> Miqi qimaseenoo Yisufa fira kaafa maraseenoo nariqa maqee maqee neemaru uainna nammarina umbiqarana narí faiqi namu niminoo qinau, Maana maraseeqa namataikaqa qinee anoona ufa qimannimidaqa, qinee sia kafa maqee inni faqa naanaura, Anutuna ququsa kambiqafinaqa mikari miqoo innaarunai naanaura.

<sup>19</sup> Miqi qimaseenoo feemu moo maraseenoo Anutunara dufi dufi qimaseenoo ruqi ruqi maseenoo narí faiqi namu niminoo qinau. Maa feemufa qini qifaqa kikiqusira feemufa maridanoo kuqiranaki inniara quqannimaqaanaura. Innee maqee maqee naidaqa qiniara naaqoo iridaqa naqa.

<sup>20</sup> Namasoofanoo Yisufa miqi kai inoo uainna adiarafafisa maraseenoo narí faiqi namu nimiseenoo qinau. Maa nafisanakinaa nammarini qini fidika maridanoo. Anutunara inniara noori runiranaki marunara narí fuka moodaanaki kira ufa quqaidanoo, qini fidika inni adiannimaqaranaki maridanoo.

<sup>21</sup> Yisufa kafa qimanniminoo qinau innee doo qafaqa maa qaindana fiqumma iranaki inni qiniara ueeqee marifa maridanoo.

<sup>22</sup> Anutunara oqai qumau kai qinee faiqi nimaaku kuqanaura, qini ueeqeemari fasiqafa fira numoo minasaa aqufuannoo.

<sup>23</sup> Yisufa miqi qimasoo faqa mina faiqi namu narí iree narí iree qiqau yafee miqiannoo yafee miqiannoo, qiqau.

*Yisuna faiqi namuqari yafee maasa uriqararafa mariannoo fee qiqau.*

<sup>24-25</sup> Miqidaqa maaqi qiqau, yafee maasaki uriqararafa mariannoo fee mi ufana qidaqa raiqara ufa qiqau, miqi qimarufanoo Yisufa qimanniminoo qinau, maa maqanasaaqarara karaambaiqauqa nari maqannaasa urinaaqara maseenoo fifau nariara faiqi anaasee dadaaqi marunaasee qidanoo.

<sup>26</sup> Innee, qini faiqi namuki sia mi oosana mariannoo, inni uriqararafa innaaqianaafara foora mariannoo, inni karaambaiqa fannoo inni ainainira faiqara foora mariannoo.

<sup>27</sup> Yafee uriqaranoo maridanoo fee, qoomaqaki oqumarifi neemari fasiqa fee, narana raiqasee nimimari fasiqa fee uriqaranoo maridanoo fee. Narana raiqasee nimimarifa mifa kai uriqarara fasiqa maridanoo,

doo qinee narana nammari rakiqasee nimimarunausa maridaqa sia inni rafaqaqafu nimaqasee uriqararaisai kidaqa inni ainainira faiqiara maqi maridaqa inni dadaaqidaqa. Doo innee qini daanna raaqa.

<sup>28</sup> Innee qini faiqi namu qini moomoo ummaara kadaapirirana dadaaqi mariasa mariafanoo.

<sup>29</sup> Doo mina akiaqara qini qikoofa qiniara uriqarara karaambaiqee qimarindee kai iqa qinee faqa inniara qinee qeeqa karaambaiqa ququsaki keeqafinaqa narana faqa nammari faqa inniara qini saimbaqa neefandi-afoo qidaqa.

<sup>30</sup> Miqoo innee qini faiqi namu Isaraee maqanna ufa irira qaindasaa ooqu marifi qisaukuqara taikasee qikunni ooqu qaara marasee Yakooboona faiqi namu atikiqari kambiqaraisa Isaraee maqannaasa misasaa innee andeeqeeffaranoo.

*Peetooroofa Yisunara qaoo qianinnanara kooroo inau.*

*(Mat 26:31-35; Mak 14:27-31; Yoh 13:36-38)*

<sup>31</sup> Miqi qimaseenoo Yisufa Simoona moo auqa Peetooroona qimaminoo qinau. Simoona anee qini ufa iria, Sadannafa aniara sandanainai qidanoo ani mareeqeenoo nari manda ququsaki quqararee qidanoo ani rarisamasee amanamasee qafaidanoo.

<sup>32</sup> Oo Simoona qinee aniara innaaru qimaseeqa anee qini saqarikirafa sia taikaani. Anee kaqirunna oonureenana oonu quandakinana aneenna akaqaafasaaauqa pooduamannisaa, qufanoo Peetooroofa qinau.

<sup>33-34</sup> Oo karaambaiqa anee rumberanaki fee kuqiranaki fee finaqa qinee faqa minaki fuanauree qufanoo Yisufa qimaminoo qinau Oo Peetooroo qinee anoonufa ani qimamidaqa fafaa eendamuqusai anee qaaramoo kari qiniara asaurusee sia qiniara Yisusara iridee qinanoo doo miqoo kai kookooraana ufa qiannoo.

*Misa rakira paipana mara maree Oorifa aaqanasaa ooru fiqau.*

<sup>35-36</sup> Yisufa miqi qimaseenoo quandafufanoo aiqama qimanniminoo qinau, Ooqai qinee inni niqiqamasaafanaqa innee munnimma fee rusaka fee niku aanaamu fee sia maree fiqau, innee mikari moo ainainara sarau fee iqau qufaqa misa qiqau, Oo sia moodaa ainainara sarauqimariafanausa maridaqee qufanoo Yisufa qimanniminoo qinau, munnimma pausa marina mina maqee maraqa rusaka marina mina maqee maraqa, rakira paipana siainafa nari asausi faqaa siuta moonaa amisee mina akiaqara rakira paipana maraqa.

<sup>37</sup> Qinee maa ufana faqa qimannimidaqa. Anutuna tamummaqara fasiqauqa qiniara akara rumaqoofa doo maqee kambiqaidanoo. Doo maa akarafa faqa kambiqaanoo. Misa qiniara maaqi qidaqa misa mina mara maree manda oosana maree mariasa namufaqa aruannee qidaqa.

<sup>38</sup> Miqi qimasooafaqa Yisuna faiqi namu maaqi qimasee qimamiqau, Oo karaambaiqa qafaa, rakira paipana qaaraqanda maaqoo maridanoo fee qufanoo Yisufa qinau doo ufa quqasee uqeeraqa.

*Yisufa innaaru qidaqa.*

*(Mat 26:36-46; Mak 14:32-42)*

<sup>39</sup> Yisufa miqi qimaseenoo doo nari faiqi namu faqa findifinoo nari maqee maqee fimaruqoo Oorifa aaqanasaa ooru finau.

<sup>40</sup> Oorureenoo nari faiqi namu maaqi qimasee qimanniminoo, innee maaqoo maridaqa innaaru qidaqa sia manda nimaniranaki keeqaaqa.

<sup>41-42</sup> Miqi qimaseenoo mifa fiqareenoo aambaaka aqinoora foora naríara fiqaree Anutunara aqoori saunara finoo narí kuqirafa adeedi roofanoo minara innaaru qinoo qinau, Oo qini qikoofa anee eedoo qinaqa qinee manda nammari naannana mara aqusainaqa sia naa, sia qeeqa iriranamau fuanaura, aninna iriranamau kai fuanaura. [ <sup>43-44</sup> Miqi qimaseenoo Yisufa afeekaikamandee innaaru qimasoofanoo tooqaamu fannoo fidikara foora aqinaaqa anireenoo maqai aqufufanoo kuquaqaamminau. Aqufufanoo innaarunaindari qangiroo moo fannoo akooqoo qumureenoo afeeka amufanoo afeekaikinau.]

<sup>45-46</sup> Yisufa miqi qimasee innaaru qimaseenoo findifinoo narí faiqi namu qaaramoo marunnai oonu nindafoofaqa nimudaani rumafufaqa nisuku kaaqa faiqaqee mariqau. Yisufa oonu nindafamaseenoo qimanniminoo qinau, Innee naqaa fee ifaqee faiqaidee findi fiqa innaaru qiaqa, manda nimaniranaki aqufifaara.

*Yisuna umaroo ufafa.*

*(Mat 26:47-56; Mak 14:43-50; Yoh 18:3-11)*

<sup>47-50</sup> Yisufa miqi qimaseenoo narí faiqi namu qimannimimarufanoo misaikiqari Yudasifa faiqí moomoo asukunai nifiqeenoo anireenoo Yisuna amooqara rufanoo Yisufa qimaminau, Yudasi qini faiqí nimaakuara qimooqaranannai fee ueeqaidanee qufaqa Yisuna faiqi namu Yisuna qumararufanoo qafamasee Oo karaambaiqa maasa rakira paipanannoo naruanaree qimasoofanoo misaikiqari moo fannoo Yisufa qu ufana sia irirai rakira paipana qumareenoo moona akiqa aagamakufanoo asauku uqannai aqoo ateeka aqinau. Mi fasiqafa amaana maqaki aanaiqikirausa uriqararana uqanna ainainimaruna aqoo ateeka aqinau.

<sup>51</sup> Ateekasoofanoo Yisufa qafamaseenoo qinau, Doo amana, doo saa qimasee mi fasiqana aqoo auqamasoofanoo andeeqamma amaqanau.

<sup>52-53</sup> Andeeqaseenoo Yisufa quandakinoo, aanaiqikirausa uriqarararusa faqa amaana maqasaa uriqarararusa faqa misa poorisauqa faqa faiqí firaasa faqa aiqama Yudasina faqa anusa aiqama qimanniminoo qinau, nanaree innee rakira paipana saamu indaammamareeqa manda oosana mareemari fasiqanara foora qiniara qumararara anidee, qinee faasaambaasaana inni faqa firaama anaana maqaki marunau marunaqa innee sia miqoo qumararai. Doo maqee eendaki innindi faqa asukunaki nimari afaanau-saindi faqa maa eendafa innindi mandoosana maraaninafa maridanoo.

*Peetooroofa Yisunara qaoo qu ufafa.*

*(Mat 26:57-58, 69-75; Mak 14:53-54, 66-72; Yoh 18:12-18, 25-27)*

<sup>54-55</sup> Miqi qimasoofaqa misa mina qumareeqa afaqa maree aanaiqikirausa uriqararana maqaki quqaqau. Misa Yisuna maree fufanoo Peetooroofa rufisee inaaqiana nifaamme nifaammee inoo fifufanoo Yisuna quqoo maqana naambeeqai faiqí akaqausa idarasee aani marufanoo mifa minaki oonuree aaninau.

<sup>56</sup> Aani marufanoo mi maqanaki ainainimaru manaaqafa aniree andeeqasee Peetooroona oori qafamaseenoo oo maafa Yisuna faqa nimarifammi qimaseenoo quandafinoo miqoo marusa qimanniminau, maa fasiqafa Yisuna faqa marifa maridanoo mina faqa qumaraaqa.

<sup>57</sup> Peetooroofa iriseenoo qaoo qinoo qinau, Oo maa manaqa sia qinee minara iridaqa.

<sup>58-60</sup> Kaqikaqoo marikufanoo faiqí moo fannoo qafamaseenoo qinau anee Yisuna faiqinamuki mariana fee qufanoo Peetooroofa qaoo qimaseenoo qinau. Oo maa fasiqa qinee sia minakinaasau maridau qufanoo

kaifaa marikufanoo faiqí moo fannoo anireenoo afeekaikamandeenoo qinau. Maa fasiqafa kuqaa Yisuna faqa marifa, Kariree maqanna moodaa maqannaafa maridanoo fee qufanoo Peetooroofa qimaminoo qinau, Oo maa fasiqa sia ani ufa anoonara iridaqa. Miqi qimarufanoo kai kookooraana ufa qinau.

<sup>61-62</sup> Ufa qufanoo Yisufa narí maruqooqari maaqakiqari quandafi Peetooroona qafuufanoo Yisuna narí Peetooroonara anee maqee eendaki qaaramoo kari qiniara sia iridee qinanoo kookooraana ufa qiannoo qimaqoona kookooraana ufa qufanoo Peetooroofa iriseenoo firaqoo asauruseenoo rauda makufannoo aundurái sukaqoofanoo firaqoo ikiraqa maree finau.

*Yisuna umaroosa ataasa imariqau.*  
(*Mat 26:67-68; Mak 14:65*)

<sup>63-65</sup> Mi eendanaki Yisunasaa rakisi marusa ataasa qimasaida ari mariqau. Aridaqa qamunna qumaree mina afusaa ititasee ariqa qiqau, yafee ani aridanoo fee qiqau. Misa oosana oosana manda ufa faqa qimamaqee mariqau.

*Yuda maqanna uriqararawsa Yisuna ufa iriqau.*  
(*Mat 26:59-66; Mak 14:55-64; Yoh 18:19-24*)

<sup>66-68</sup> Iqaqoo kananaana Yuda maqannaasa uriqararawsa faqa aanaiqiki-rausa uriqararawsa faqa Mooseena sandufa akoofasauqa faqa moodaanaki suqufufaqa Yisuna mareeqee misa suqiranaki quqaseeqa irammiriqa qiqau, anee maasa qimaqimia, kuqaa anee Anutuna asauku mundira fee maridane qufanoo mifa qinau qinee qimannimianaqa sia innee qini ufa irifara qinee faqa moo ufara inni iranaqa sia qimaqimifaranoo.

<sup>69</sup> Doo maqee maaqooqari qinee faiqí nimaaku uriqarara Anutuna asauku uqannai mina aqa ooqu marifi marianauree qufaqa misa aiqamausa qiqau.

<sup>70-71</sup> Doo kuqaa fee anee Anutuna amaaku fee maridane qufanoo Yisufa qinau Innee qimariandee qimarunausee qufaqa misa qiqau, doo maqee maaqooqari sia maa fasiqana manda ufa irimarusara randaanaura, doo maqee uqanna narí ookinaa manda ufa maasa daaqooki keeqaifaqa iriqa.

## 23

*Misa Yisuna afiqee Piratoona kootaki quqaqau.*  
(*Mat 27:1-2, 11-14; Mak 15:1-5; Yoh 18:28-38*)

<sup>1-2</sup> Miqi qimasoofaqa misa aiqama findifiqa Yisuna afiqeeqa Roomma maqanna kiapafa Piratoofunnai afiqee munusee Yisuna arira ufa maaqi qimasee qimamiqau, Maa fasiqafa faiqí anaasee kaqi runna mara quqee marifa Roomma maqanna karaambaiqa takisa munnimma sia aquaqee qimarifa nariara unnaqimaseenoo Anutuna asauku mundirafa qeeqaraa karaambaiqa maridee qimarifaqa irisee afiqee anidaqa.

<sup>3</sup> Piratoofa misa ufa iriseenoo quandafi Yisuna qafamaseenoo irammiri-noo qinau, Kuqaa fee anee maa maqannaasa karaambaiqa maridane qufanoo Yisufa qinau, anee doo qimariananoo.

<sup>4</sup> Piratoofa mina iriseenoo kafa aanaiqikirausa misa uriqararawsa faqa faiqí anaasee moomoosa faqa qimanniminoo qinau. Qinee maa fasiqanaki qafauna sia mina ummaara marifaqa iridaqa.

<sup>5</sup> Yuda maqannaasa mina iriseeqa afeekaikamasee Piratoona qimamiqa qiqau, mifa qimannimu ufanannai rakirana uqeeraidanoo, mifa Kariree

maqa maaqaindari oosana arasee mindari anufa aiqama Yudeeaa maqa maaqaki miqimmamaree aniufa maqee maasaki Yeerusaree maqusai anireenoo miqikai idanoo.

*Misa Yisuna afiqee Eeroodeena kootaki quqaqau.*

<sup>6-7</sup> Piratoofa mina iriseenoo qinau, kuqaa fee maa fasiqafa Kariree maqanna fee anidanoo fee qufaqa misa eedoo qufanoo Piratoofa oo Eeroodeena ququsakiqari ani maridanoo qimaseenoo Eeroodeefa maa kari Yeerusareenni animarinoo qimaseenoo Yisuna aqiqoofanoo mina sundiauqa afiqee Eeroodeefunnai fiqau.

<sup>8</sup> Eeroodeefa Yisuna qafamase asasinau. Ooqai kisaaqasaa Yisuna au-fakiana kai iriufa kisaaqasaa mina qafaaneerufa, saina kasooqagee sia faiqi amanaikimari ainaina qini qifusaa auqainaqa qinee faqa qafaa, qimasee Yisuna qafamasee asasinau.

<sup>9-10</sup> Yisufa oonuroofanoo Eeroodeefa oosana oosana ainainara iroofanoo sia ufa qinau, kaqi marinau. Amaana maqasaa aanaiqikirausa faqa Mooseena sandufa akoofasauqa faqa Eeroodeena aqa anireeqa unna ufa afeekaikamandee Yisunara Eeroodeena qimamiqau.

<sup>11</sup> Eeroodeefa faqa nari sundiauqa faqa ataasa ataasa qimasee mandufa qimamaqau. Misa ataasa ataasa qimamaqaidaqa karaambaiqa qamunna afisuamaqasee afiqee Piratoofinnai kafaa anirandee finau.

<sup>12</sup> Ooqai Piratoosa Eeroodeesa namuqaaqara mariuqanda mikari Yisuna aqiqoofanoo Eeroodeefinnai fu kamuqoo miqanda naraqoondi naraqoondi kiqau.

*Misa kafaa Yisuna Piratoona kootaki quqaqau.*

*(Mat 27:15-26; Mak 15:6-15; Yoh 18:39-19:16)*

<sup>13-14</sup> Yisuna kaifaa afiqee anirandeeqa Piratoofinnai oonuroofanoo Piratoofa aanaiqikirausa uriqarararusa faqa faiqi firaasa faqa faiqi anaasee moomoosa faqa naarama quqaseenoo qimanniminau, innee maa fasiqana afiqee qinee unannai aniana, faiqi anaasee kaqirunna mara ubeekee marifagee qimasee afiqee anianara qimannimidaqa, qinee inni nifusaa oosana oosana ainainara irammirunanoo manda oosana oosanara qiana sia paquriqa.

<sup>15-16</sup> Eeroodeefa faqa iramasee qafaifanoo sia mandainaina minaki marifanoo kaifaa aqifaifanoo aninoo, qinee faqa minara maa fasiqanara sia moo numoo minaki maridanoo fee qidaqa, minara qinee sundiauqara akumbau akumbau auqira uaiqa samu qumaree amiqimma firaqoo ari ari isaifaqa idukuane qidaqa. [ <sup>17</sup> Piratoofa nari oosana mareenoo ainnaaqarara qoomaqaki aiqama aukuana karabusaki moo maruna iduku nimiseenoo kafaa maa aukuanna Yisunara miqi kai ianauree qimasee mi ufana qinau.]

<sup>18</sup> Faiqi anaasee minara iriseeqa aiqamausa faqa rumasee qiqau. Mina kuqaruqa, Barabasina kai iduku qimia.

<sup>19</sup> Barabasifa Yeerusaree maqusaki rakirana uqeeroonara faiqi kuqa narunara faqa karabusa mariufa marinau, minara idukuagee qiqau.

<sup>20-21</sup> Piratoofa Yisuna idukuageera faiqi anaasee kafaa naarofaqa misa irisee faqa quqasee qiqau. Mi fasiqana aunirira saqari saa arua, aunirira saqari marinna fuani.

<sup>22</sup> Piratoofa kafaa qaaramoo kinoo qimanniminau. Maa fasiqafa nana manda oosana mareenoo fee. Qinee sia kuqira ainaina minaki paquriqa,



23-25 Qinee akumbau akumbau auqira uaiyaq samu firaagoo arusee idukuanauree qufaqa faiqi anaasee firaagoo faaqa quqasee qiqau. Yisuna aunirira saqarisaa pirimmannai aruannee qimarufanoo misa ufa fannoo Piratoona rafaqafusoofofanoo Yisuna aruaqera eedoo qimaseenoo Barabasina idukinau. Barabasifa rakiranara faqa faiqi narunara faqa rumberanaki maruna idukinoo Yisuna mareeqee misa nari iriranamau fuagee qimasee nari sundiauqa nimufaqa doo arirara, maree fiqau.

*Yisuna afigee Koorookata aaqanai fimarufaqa aanaaseeuqa ikiraqoofa.*  
(*Mat 27:32-44; Mak 15:21-32; Yoh 19:17-27*)

26 Misa arirara maree fidaqa faiqi moo auqu Simoona amarafa mifanaindari ani marufa Sireenee maqusaindaraafa mindari Yeerusaree maqusa aatata animarufaqa sundiauqa paquri mandee mina aranaiqi qumareeqa Yisuna aunirira saqari aku amaqoofanoo Yisuna aanaaqiana maree finau. Sia amana mi fasiqafa qaoo qiannoo misa faaqaana qafeenoo kuqiranara rufiasee aruaqaufanoo kaqi eedoo qimasee doo maranau.

(Yisuna faiqi namukiqari Peetooroofa marufa mina moo auqu Simoonafa sia mifau Yisuna aunirirana aku maranau, mina amarafa moo fasiqa fannoo Sireenee maqusaindaraafa aku maranau.)

27-28 Sundiauqa Yisuna afiga maree fimarufanoo Yeerusareendaraa aanaaseeuqa Yisuna ufa irimarusa moomoosa mina aanaaqiana oobiqasee ikifaaqa quqasee ikiraqaaqa fimarifaqa. Miqi mamaree fimarufanoo Yisufa quandafi ninda fee kasoomambinoo qimanniminu. Sia qiniara ikiraqaaqa inneeqara faqa inneeqa faiqi namuara faqa ikiraqaaqa.

29 Kasooqagee naaru anianinna aukuanafa innisaa firaa narirafa aupurara mariannoo. Faiqi siaisa amiqirafa marifaranoo. Faiqi aanaaqi siaisa sia naamma nimimariasa misa amiqimasee aufadamasee sandeefaranoo fee qifaranoo, faiqi faqaasa qumaara reeqa manda kuqira kuqifaranoo.

30 Mi firaa narirafa kambiqafinaqa aaqana ameemaanai oonuree aaqana qimamiqa anee maasa rafaqafusainaqa kuqufuananoo sia maa mandainainafa daruani fee qifandinausa.

31 Innee iriaqa, Roomma maqannaasa maqee qinee sia aqee marunausa, fuka saqariara maqi marunausa, maaqi mandee darusaifaqa kasooqagee Yuda maqannaasa manda oosana aaqarafa firaatia marinara inaakuna manda narirafa Roomma maqannaasa inni narifaranoo, minara qinee qimannimidaqa innee inneeqara kai ikiraqaaqa.

32 Sundiauqa mandainaina maree maruqanda qaaraqanda Yisuna faqa moodaakari nariraree qimasee miqanda Yisuna faqa nifiqee fiqau.

33 Nifiqee fiufuqa kaqikaa amuaqu namusaa faiqi nimudaani fee qimaruoqoo munuseeqa Yisuna pirimmannai aunirira saqarisaa aruseeqa uqeereeqeeqa kuradaqau, faiqi manda oosana maree maruqanda asauku uqannai aakaarinni moo nari auniriranasaa arusee uqeereeqee kuradaqau. Asaaqaitinnai moo miqikaimasee nari auniriranasaa ariqau. 34 Misa Yisuna arimarufanoo Yisufa innaaru qinoo qinau, Oo qini qikoofa misa mandainaina qini qimimariana minninnisaa sia mina akiqara ia, misa nari imarianara sia iridaqa. Sundiauqa Yisuna aruseeqa kaatara foora sararamaseeqa mina qamunna raina rainiisee maraqau.

*Misa Yisuna ataasa ataasa qiqau.*

35 Miqi marufaqa faiqi anaasee kikiqiga mafufaqa qafaidaqa misa uriqararansa Yisuna ataasa ataasa nari qimami nari qimami qiqau, Oo maa fasiqafa faiqi anaasee asumu nimimari fee qimarifa maana mifee

doo maqee aneennaraa asumu marainna qafa. Mifa Anutuna asauku mundirafa rusandeesamu mandee maroofa maridanoofau doo maqee nariara asumu maraiqini.

<sup>36-37</sup> Sundiauga faqa ataasa ataasa qimamaqasee Yisuna uainna nammari amianee qimasee qiqau, anee kuqaa Yuda maqannaa karaambaiqa maridana minasaagari asumu maria.

<sup>38</sup> Yisuna aunirira saqarisaa akiaqai akara moo akara rinoo marinau, maaqi qimasee akara rinoo marinau, maa fasiqafa Yuda maqannaa karaambaiqa maridanoo.

*Qumuarimaru fasiqafa Yisuna faqa innaarunai fuaninna ufana qinau.*

<sup>39-41</sup> Manda ainaina maree maruqanda nari auniriranasaa Yisuna aaga maridaqa moo fannoo maaqi qimasee Yisuna aqinau, kuqaa fee anee Anutuna asauku mundira fee maridanee doo amana anee aneenna faqa maaqanda faqa mara aqumisainaqa asumu maria, qufanoo moo fannoo nari aunirira saqarisaaqari mina aqinoo qinau. Qusasaa anee faqa mifa faqa Anutuna afusaa kikiqifara anee sia fee Anutunara rufaidanee mi manda ufana q inanee doo maasa namu Roomma maqannaa moodaa ufa ameemaana maridaqa, maqee kuquanaura. Maaqanda kuqirafa andeeqanoo maridanoo, anindiri qeeqa ummaarara kuquanaura maa fasiqafa mandainaina siaifa kuquannoo.

<sup>42-43</sup> Miqi qimaseenoo mi fasiqafa quandaki Yisuna qimaminoo qinau, Oo Yisu, anee aneenna ququsaki karaambaiqaikinana sia qiniara aunua, iria, qufanoo Yisufa qimaminoo qinau, Doo ani qimamidaqa maqee faasaana anee qini faqa innaarunai marinnaranoo.

*Yisuna kuqira ufa.*

*(Mat 27:45-56; Mak 15:33-41; Yoh 19:28-30)*

<sup>44</sup> Suani qambaana akiaqa amummaqa suani qarafa taikafufanoo aiqama maqa maaqai asukuna arufanoo suani afu fannoo amannauna arufufanoo asukuna taikafufanoo suanifannoo kafa qanau.

<sup>45</sup> Asukuna kaqi marufanoo Yeerusaree naaquqara amaana maqaki ititara qamunna firaafa qambaana nari kai anaqinau.

<sup>46</sup> Yisufa faqa miqoo kai firaa kari faaqa quqasee qinoo qinau, Oo qipoo qeeqa qimana ani asaukuki quqeeqa qimasee doo kaaqa kuqinau.

<sup>47</sup> Sundiauga rakisirafa miqoo maridanoo mi aiqama ainaina qafamaseenoo Anutuna amooqidanoo qinau, Oo maa fasiqafa amiqira fasiqa mariifa kuqinoo.

<sup>48</sup> Faiqi anaasee moomoosa ani qafaida mariusa Yisufa kuquna qafamaseeqa anirandee nimaqai fidaqa nimuqusi marufaqa ikifaafau iqa fidaqa mandaikammigau.

<sup>49</sup> Moomoosa Yisunara amiqi mandee irimarusa faqa aanaaseeuqa Kariree maqa maaqaindari Yisuna faqa anusa faqa sia dauni fifainiqau kaqi marida nianai marida qafee mariqau.

*Yisuna akundoo ufafa.*

*(Mat 27:57-61; Mak 15:42-47; Yoh 19:38-42)*

<sup>50</sup> Faiqi moo Arimatea maqusaindaraafa Yeerusareenni animarufa mina auqu Yooseefaafa, sia Yisuna akoofau, mina amarafa.

<sup>51-53</sup> Mifa amiqira fasiqa kaaqa andeeqara fasiqa, Anutuna ququsa innaarunaindari maqasaa kambiqaaninnanara afeesara marufa marinau. Mifa Yuda maqannaa ufa suqiranaki keeqemarufa Yisuna arirara qufanoo

qaoo qimarufa marinau. Yisufa kuqufanoo mi fasiqafa andeeqasee Pira-toona oopisaki keeqafinoo irammirino qinau, amanee qinee Yisuna iri mara quqaanauree qufanoo Piratoofa irisee eedoo qinau.

(Yisuna aukuana nari maqannaasa maaqimase madika indufusaida kuqufusa nikundee mariqau. Misa ooni firaana kasaaga aamara auquseeqa minaki keeqafufaqa dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqi kai imariqau; Sia moodaa karifau nikundee mariqau. Moo kari moo kari nikundee mariqau.)

Piratoofa eedoo qufanoo nari akoona amarafa oonuree Yisuna iri aunirira saqarisaaqaraana maraseenoo qamunnannai kukuqamaseenoo mara maree ooni aamara indufirafa fuka marunaki sia moo minaki akundarafa marunaki minaki Yisuna iri quqanau.

<sup>54</sup> Mooseena sandufa faiqi aunirira saqarisaa dirirara amaana faasaanara qaoo qinoo marunara mi eenonnai nariqa amaana faasaana adeedi ranoo marufanoo dauni dauni Yisuna iri mareeqeenoo ooni aamaraki quqanau.

<sup>55-56</sup> Karireendaraa aanaaseeuqa Yisuna faqa anusa Yooseefaana amarana faqa ooni aamaraki quqemarufaqa qafamaseeqa oonurandee aniree nari oosana mareeqa nari marasinna fadameena oosana oosana Yisuna irisaa aku amaqarara anirandee oonu deedaqiqau. Saririqasaa misa Mooseena sandufamau fiqa nari amaana fee qimasee adooaqau.

## 24

*Yisufa findimaqee fifufaqa fifau madikakai qafoo ufafa.  
(Mat 28:1-10; Mak 16:1-8; Yoh 20:1-10)*

<sup>1</sup> Mi anaaseesa nari maqannaasa amaana faasaana Saririqa adooamaseeqa faiqee duna kananaana maasa amaanasaa kananaana eendai mi fadameenna marasinna ainaina deedaqamaqoona mareeqa Yisuna akundoo oonina aamaraki keeqarara fiqau.

<sup>2-5</sup> Oonureeqa qafooofanoo nari kai ooni firaatia kooqisaa ititaqoofa quanda quandammeeqee kaqinni quqaqoofaqa qafamaseeqa kaqi keeqafi Yisuna iriara randoosia qafooofanoo sia marufaqa kaqi kikiqiga maridaqa naqi fee ianaura naqi fee ianuree qidaqa tautu masee qafooofanoo qaara fasiqa kaaqa areenee maru qamunna afisira qanda misa naaqa kambiqafiqa kikiqiqau. Kikiqamafufaqa nindafeeqa qifu qafaano qimaseeqa ninuka tuqu naumoo amisoofaqa mi faiqiqanda qimannimiqa qiqau, innee nanaree findifimari fasiqanara kuqirausakiaqa randaidee.

<sup>6-7</sup> Mifa sia maqoo maridanoo, mifa findifinoo doo mifa finoo maridanoo. Mifa ooqai Kariree maqa maaqaki maridanoo inni qimannimimarufaqa innee iriusa sia fee iridee minara randaidee. Mifa maaqi qimasee inni qimanniminu, qinee faiqi nimaaku qini mareeqee manda fasiqa nisaukuki quqee faranoo. Quqasaifaqa aunirira saqarisaa pirimmannai darusaifanoo qaaramoo faasaana inanoo Anutufa qini uqera qisaannoo fee qufaqa innee sia irusee.

<sup>8-9</sup> Miqi qimasee qimannimufaqa misa Yisuna ufara iriseeqa oonurandee maqusai anireeqa Yisuna faiqi namu qisaukuqara taikasee qikunni ooqu moodaa marasee marusa faqa faiqi anaasee akaqausa faqa mi ainaina ooni aamaraki oonu qafoonara qimannimiqa.

<sup>10-11</sup> Mi anaaseesa nuqu Mariana amarafa Makadara maqusaindaraafa faqa, Yooannafa faqa Mariana amarafa moo Yameesana anoofa faqa

akaqausa mi ainainausara Yisuna faiqi namu qimannimufaqa furufarufa maasa qimaqimiaafoo qimasee sia amiqimasee iriqau.

<sup>12</sup> Peetooroofa misa ufa iriseenoo findimeeqee quqasee sandeenoo ooni aamaraki kummaramafufanoo mara meera qafoofanoo Yisuna iri kukuqu qamunnafa kai minaki marufanoo qafamaseenoo oonurandee aatata narí amaaqai fidanoo minauqaindiara irinoo finau.

*Eemausa maqusai fimaru aanaki Yisufa paqurinau.*

*(Mak 16:12-13)*

<sup>13-14</sup> Mi faasaannakai Yisuna faiqi namukiqari Yeerusareendari Eemausa maqusai fidaqara Yisuna arusoofanoo sia madikaki marunara narí qimami narí qimami qiqa fiqau.

<sup>15-16</sup> Miqi qiqa fidaqa narí qimami narí qimami qimarufanoo Yisufa narí uqanna anireenoo miqanda faqa fimarufaqa miqanda qafamasee sia naaqoo irinau.

<sup>17-20</sup> Yisufa qimanniminoo qinau, inneeqara aatata fidaqa nanaree narí qimami narí qimami qiqa fidee qufaqa miqanda irisee kasoomambufaqa noori runusee moo fannoo Kareeopasafa Yisuna qimaminoo qinau, maa eenda ufana Yeerusaree maqusai ufa firaafa kambiqaina anee kai fee sia irinee qufanoo Yisufa qinau, nana ainainee kambiqeenoo fee qufaqa miqanda qiqa Yisuna Nasaretee maqusaindaraana arunara maaqanda qidaqa. Mi fasiqafa Anutuna tamummaqara fasiqa marufaqa Anutufa faqa faiqi anaasee faqa mina ufara faqa mifa auqoo ainainara faqa uriqararafa afeeka fee qimarufa marufaqa maasa aanaiqikirausa uriqararaura faqa maasa faiqi firaasa faqa Roomma maqannaara aruaqee qufaqa aunirira saqarisaa pirimmannai ariqau.

<sup>21</sup> Mi fasiqafa maasa Israee maqanna karaambaiqa Roomma maqanna nisaukukinaana maasa qumaraaninna fee qidaqa اساسmariafannana marufaqa kuqa ariqau, Maqee faasaanaqari mifa kuquqoo qaaramookifaqa maridaqa.

<sup>22-24</sup> Maasakiqari anaasee akaqausa narí akundoo ooni aamaranai oonu qafaafanoo sia mina iri mari qafeeqa nifu pisipasa mandoofaqa qangiroo kai qafaafanoo qimanniminoo qinoo Yisufa kuqiranaki findifinoo qiafaqa maasakiqari akaqausa ooni aamarai oonu qafaifanoo anaasee indee kai inoo Yisuna kai sia qafeeqa.

<sup>25</sup> Yisufa miqi quna iriseenoo kafa miqanda maaqi qimasee qimanniminu. Oo furufarira qanda mariafanoo Innee sia dauni Anutuna tamummaqara fasiqa ufa iri mariafanoo kaaqa inneeqara anuqi mariafanoo.

<sup>26-27</sup> Anutuna tamummaqara fasiqauqa asauku mundiranara mi oosana oosana aupurararana marasee miqooqari narí areenaranaki keeqaannoo fee qimaqoofanoo naqimasee fee sia kambiqarara, kambiqaannoo. Miqi qimaseenoo Yisufa Mooseena sandufa akarakinaanasaa oosana araseenoo tamummaqara fasiqa aiqama akarakinaana nariara akara rumaqoonara miqanda qimanniminoo aatata fimarinau.

<sup>28</sup> Miqinoo ufa qinoo fiufufanoo Eemausa maqusa adeedi ramaseenoo Yisufa kaqi finoora foora ufaqa miqanda rafaqa fidaqa qiqa.

<sup>29</sup> Doo suani keeqaifanoo asukunaikidanoo anee maasa faqa ani maria qufanoo Yisufa eedoo qimasee misa faqa oonu marinau.

<sup>30-31</sup> Miqanda narana deedaqi isee ooqu marifi naaneerufanoo Yisufa feemu maraseenoo Anutunara dufi dufi qimaseenoo ruqi ruqi maseenoo nimufaqa misa irirafa misa nifu faqa kambiqoofaqa oo Yisufammifoo qufanoo Yisufa doo miqooqari taikafinau.

<sup>32</sup> Taikafufaqa miqanda narí qimami narí qimamiqa qiqau maaqanda aanai ani marunanoo mifa maaqanda faqa anidanoo akarakinaana maaqanda qimaqimimarifanoo maaqanda daundurairi idara foora qamafi qimbafi imarifaqa maaqanda sia minara iriqau.

<sup>33</sup> Miqi qimaseenoo miqanda aagee quqasee Yeerusareenni kafaa fiqau.

<sup>34-35</sup> Oonureeqa miqanda Yisuna faiqi namu qisaukuqara taikasee qikunni ooqu moodaa marasee marusa akaqausa namufaqa moodaqqoo marunaki miqanda oonureeqa mina faiqi namu qimannimiqa qiqau. Doo karaambaiga kuqiranakiqari findifinoo Simoonafa doo qafeenoo qufaqa miqanda nariqa aanai fi paquri funara faqa feemu marasee ruqi ruqi mandee nimufanoo nifu faqa naaqoo faqa irunara narí qimannimiqa.

*Yisufa narí faiqi namu kooroomannimaqanau.*

*(Mat 28:16-20; Mak 16:14-18; Yoh 20:19-23; NiFa 1:6-8)*

<sup>36-37</sup> Miqanda narí qafonara qimannimarufanoo karaambaiga narí uqanna tautumannimaqasee nifusaa kikiqamambinoo qinai, innikina asooarafa mariani qufaqa aiqamausa tautumandee afaannee qimasee firaqqoo rufiaqau.

<sup>38-39</sup> Yisufa nindafamaseenoo qimanniminai. Naqi fee ifaqee qaara irirafa inni naaqoosaa rinoo fee qini qisauku faqa qiku faqa pirimma daruqoona qafaqa qinee qeeqa uqanna maridaqa. Innee aniree qini duqamasee qafaqa qimaqi faqa qimudaani faqa kaqi maridanoo afaanna fannoo sia miqirafa maridanoo.

<sup>40-43</sup> Miqi qimasooafaqa firaqqoo اساسamasee oo doo kuqaa narimmifoo qimasee kafaa afaannasaqari ani maridanoo fee qimasaida quqasaida rufiee mariqau. Miqi marufanoo Yisufa uqannifiqararee qimaseenoo irammirinoo qinai inni narana moo marinaqa qimifaqa naa qufaqa misa noodaanna aafaqa mareeqee amufanoo aiqamausa nifusaa qumaree nanau.

<sup>44</sup> Namaseenoo maqi qimasee qimanniminai qinee inni faqa kaqi maridaqa maa dariranara kuqiranara findifiranara qimannimiaafanausa maridaqa. Mooseena sandufa faqa tamummaqara fasiqauqa ufa faqa Dafidina idi akaraki faqa qiniara akara rumaqqoo ufafa naqimasee sia kambiqararee doo mina anoona kambiqarana qafaafanoo.

<sup>45-47</sup> Miqi qimasee Yisufa misa tamummaqara fasiqa ooqeenaa akara iriaqeera misa irirana quandaseenoo qimanniminoo qinai maaqimminoo akara oosana maridanoo, Anutuna asauku mundirafa aupurarana maraseenoo qaaramoo faasaana marinoo kuqiranakiqari findifinoo miqooqari Yisuna ufa irimariasa faiqi anaasee fuki faaki qimasee qimannimimarifaqa narí mandainainara nikooqamaseeqa Anutufinnai quandaki narí mandainaina akiaqara asauku mundirana auquara qimamifanoo minninnisaani, miqiqa ufa qimannimirafa faqa mandainaina minnisarafa faqa Yeerusaree maqusai oosana araseenoo aiqama maqa maaqai qimannimirafa daraanianno.

<sup>48</sup> Innee qini qiqoondiuqa mi ainainausa qafee marusa mariafanoo.

<sup>49</sup> Qini qikoofa Anutufa narí maraquna afeeka nimimari maraquna inni nimiraree qimasoonaa qeeqa kai oorureeqa niqigaanaqa qumuree inni afeekaikamma nimaqaannoo. Innee sia Yeerusaree maqusa minnisaaqa maaqqoo kai marifanoo naakufinaqa fifainiaqa.

*Yisufa innaarunai ooru fu ufafa.*

*(Mak 16:19-20; NiFa 1:9-11)*

<sup>50-51</sup> Yisufa narí faiqi namu faqa narí aqoondiuqa faqa Yeerusaree maqusaindari nifiqeenoo Beetani maqusa amummaqa oonureenoo narí asaukuqara uqeeraseenoo nifaaqooqa qimannimaqaidanoo narí faiqi namu minniseenoo uqeerakinoo innaarunai ooru finau.

<sup>52-53</sup> Miqoo marusa mina qafamasee Anutuna amooqimasee quandaki nimuqusaki asasirafa qumbiqafuqa Yeerusareenni kafaa oonu maridaqa faasaambaasaana naaquqara amaana maqaki keeqafidaqa Anutunara dufi dufi qimamaqee mariqau.

## YOOHANE

### Amiqira Fasaasa Ufa Yoohaneefa Akararinau.

*Naaru naaru marira ufa.*

<sup>1</sup> Ooqai maa maqa maaqafa sia marunakinai Anutuna afeeka ufara foora Yisufa marinau. Mi afeeka ufara foora Yisufa Anutuna faqa marinau. Mi afeeka ufafa Anutufa kai marinau.

<sup>2</sup> Oosana aroonakina mi ufafara foora Yisufa Anutuna faqa marufa marinau.

<sup>3</sup> Mi ufanannai Yisunannai aiqama ainaina kambiqaqoofanoo maridanoo. Sia moo ainaina sia minannai kambiqanau. Aiqama ainaina mina Yisunannai kai kambiqanau.

<sup>4</sup> Aiqama kambiqoo ainaina mina Yisunasaqaraa marirana maraseenoo doo maridanoo. Mi marirafa maa maqanasaqaraa fasiqa anaasee naundururai qoomara foora aurau rimarifa maridanoo.

<sup>5</sup> Mi aurau rirafa asukunaki qaidanoo. Mi aurau rira qoomana asukuna fannoo sia amana qumaree rafaafa fuannoo.

<sup>6</sup> Anutufa qumee dadaqufanoo maqasaa fasiqa moo nammari nimimaru Yoohaneefa kambiqafufanoo Anutufa qini saikaki fuannee qufanoo nari saikaki ani marinau.

<sup>7</sup> Yoohaneefa kooroo irafa animarinau. Mi qoomana Yisunara kooroo irara aninai. Aiqama fasiqa anaasee mina ufa irisee Yisunara kuqaa anoonee qiaqeera aninai.

<sup>8</sup> Mifa Yoohaneefa sia mi qoomafau marinau. Kaqi mi qoomanara kooroo ianifeera animarinau.

<sup>9</sup> Anutuna ufa fannoo Yisufa anoona aurau rirafa marinau. Mi aurau rirafa faiqi aiqamausa naunduraki qeemarufa maridanoo maqasaa faiqi aanaaqi kammafinoo maa maqa maaqanaki quminai.

<sup>10</sup> Mifa maa maqa maaqanaki ani marinau. Anutufa mi ufana Yisunannai maa maqa maaqanakinana fasiqa anaasee auqu quqasoofanoo misaki akooqoo qumu marufaqa sia minara iriqau.

<sup>11</sup> Mifa nari auqu maqa maaqanaki aniroofaqa mina maqannaasa minaki mariasa mina mareeqee aqusee minnisaga.

<sup>12</sup> Akaqausa اساسammasee maroosa Anutuna ufa Yisufa misara innee Anutuna faiqi kamambi mariaqee qira ufa niminai. Minara kuqaa Anutunee qimasee naundura amimarusana mina faiqi kamambi mariaqee qira ufa niminai.

<sup>13</sup> Anutuna faiqi miqimariasana kambiqafi mariasa sia maa maqa maaqanaki mariasakiqari kambiqaga. Sia faiqi faiqi imariandeefau mafi kambiqaga. Sia faiqi nari iriranannaifau Anutuna faiqi kammafi kambiqaga. Anutuna iriranannai kai kambiqafufaqa mina faiqi namuqiaga.

<sup>14</sup> Mi ufafa Anutuna anoona ufa Yisufa faiqi faiqi kamambinoo maasaki qumu marinai. Qumumarufaqa mina afeeka eeraarirana maasa mina faiqi namu kuqaa qafaqa. Mifa nari akoona amaaku moodaa marunara nari akonasaqaraa afeeka eeraarirana faqa kaqi afaarirana faqa kuqaa anoona ufa qirana faqa maraseenoo qumbiqanoo maruna qafaqa.

<sup>15</sup> Yoohaneefa nammari nimimaru minara Yisunara kooroo inai. Mifa maqi qimasee faiqi anaasee qimanniminoo qinai. Ooqai qinee qimannimiqia. Moo fannoo qini qinaaqianna aniannoo. Qinee kambiqaafannaqoo

mifa ooqai mariufa marifaqa qini uriqarara fee qiafanafa maana Yisufa mifa maridanoo. Yoohaneefa miqi qimaseenoo minara qimanniminau.

<sup>16</sup> Yisufa maaqoo qumu maridanoo narisaaqarara amiqi amiqirana amuaaqa amuaaqa moomoo maasa aiqamausa qimufaqa mareemariqi-afana.

<sup>17</sup> Anutufa Mooseenannai narí sandufa narí amusufa maasa qiminau. Asauku mundirana Yisunannai narí kaqi asasamandee nimirufa faqa kuqaa anoona ufa qirana faqa maasa qiminau.

<sup>18</sup> Sia moo fannoo Anutuna qafee marufa marinau. Narí amaaku moodaa narí akoona amuqusa uqanna mifa kai narí akoona faqa marida qafamaseenoo maa maqanasaa maasa qimannimirara quminau.

*Yoohaneefa nammari nimimaru ufafa.*

*(Mat 3:1-12; Mak 1:1-8; Ruk 3:1-18)*

<sup>19</sup> Yoohaneefa Yisunara kooroo qu ufafa maaqimasee animarinau. Yuda maqannaasa amaana maqa aanaiqikirausa faqa amaana maqaki dapi saika maree marusa misara Reefina aiku asauku fee qimarusa misa faqa Yeerusa-reenni suqufufaqa ufa qimaseeqa faiqi akaqausa nifeeqasee niqiqoofaqa Yoohaneenara irarara ooqufiqau. Yoohaneefa nammari nimimarufunnai Yooradanna nammarinni ooqureeqa maaqi qimasee iraqau.

Oo Yoohanee, Anutuna tamummaqara fasiqauqa kambiqaaninna tamummaqara fasiqanara akara rumaqoofa anee maana miffee yafee.

<sup>20</sup> Yoohaneefa misa ufa iriseenoo sia kaqi ufa qinau akooqoo kooroo qimasee qimanniminau. Qinee sia asauku mundirausau maridau.

<sup>21</sup> Misa minara iriseeqa kafaa iraqau. Anee Eeriaafee maridanee. Maasa qimaqimia. Miqi qufanoo Yoohaneefa qinau sia qinee misau. Miqi qufaqa misa iraqau. Anee mi tamummaqara fasiqanara akara rumaqoo fee maridanee.

Miqi qufanoo Yoohaneefa sia fee qinau.

<sup>22</sup> Sia fee qimasoofaqa misa quandaki qiqau. Maasa niqiquaasa nana ufa fee aniara qimannimianauree. Anee yafee. Anee aneennara naqi fee qidanee.

<sup>23</sup> Yoohaneefa misa ufa iriseenoo maaqi qimaseenoo qimanniminau. Anutuna tamummaqara fasiqa Eesaiaafa ooqai maaqi qimasee qiniara akara rinau. Qinee karaambaiqara nammeera qimasee qimannimira fasiqausa mari-daqa.

Kaasau maqa maaqakiqari maaqi qimasee nammeeraqidaqa. Innee karaambaiqa anianinna aanna andeeqaseeqa afisuaqa.

<sup>24</sup> Yeerusareendari niqiqoosa misa Farisai amaana ufa qimarusa misa mina iriseeqa kafaa irammiriqau.

<sup>25</sup> Oo Yoohanee, anee sia asauku mundirafa maridana. Anee sia Eeriafa maridana sia anee mi tamummaqara fasiqafa maridana. Anee sia misa maridana naqi fee idanee nammariki keeqannimaqaidanee.

<sup>26</sup> Yoohaneefa misa ufa iriseenoo maaqi qimasee qimanniminau. Qinee nammariki faiqi anaasee keeqannimaqaidaqa. Inni qambaana mo fanoo maridanoo innee minara sia irimariafanoo.

<sup>27</sup> Mifa qini qinaaqianna anianinafa qini uriqararafa mariannoo. Naqi-masee fee qinee mina dadaaqianauree. Qinee kuqaa ooreeqararausa uqanna maridaqa.

<sup>28</sup> Yoohaneefa Yooradanna nammariki Beetani maqusai dinni afainni nammariki keeqannimaqee marufaqa misa aniree miqi qimasee iree mariqau.



*Anutufa auiqaaninna sipsipa anaaqina ufa.*

<sup>29</sup> Iqaqoofanoo kananaana Yisufa Yoohaneefunnai ooqu fimarufanoo Yoohaneefa qafeenoo narí faqa marusa maaqi qimasee qimannimino qinau. Innee qafaaga maa fasiqafa Anutufa nifaeemari aandau aanaaqi narí qaindasaa kuquaninna aandaufa maasa aiqamausa maa maqanasaqaraasa mandainaina minannai maraquqiseenoo Anutufa darira ufa ateeqaqisaaninafa maridanoo.

<sup>30</sup> Eenda qinee minara maaqi qunafa maafa qinee sia mariafanna kamuqoo marunara qini uriqararafa maridanoo qini qinaaqianna kambiqafi aniraannoo qunafa maana mifa maridanoo.

<sup>31</sup> Qinee minara sia irimariafanausa maridaqa. Isaraee maqannaa nifusaa kooroo qiaqeera nammari auqamannimaqaqa anidaqa.

<sup>32</sup> Yoohaneefa maaqi qimasee Yisunara qinau. Qinee Anutuna maraquna qafaunanoo mifa nakipurunaika mafinoo innaarunaindari qumureenoo Yisunasaa quqeenoo.

<sup>33</sup> Qinee qeeqa kai asauku mundiranara sia amana mifee qianaara. Maa saikanara diqiqoofa Anutufa maaqi qimasee qimaqiminu. Anee faiqí moo qafainanoo qini maraquna fannoo akooqoo minasaa mundufinnanara minara faiqí anaasee qini naaquqara maraqunannai rumannimaqaanina fee qinnaranoo.

<sup>34</sup> Maafa Anutufa rusandeesamu masee maroofa narí amaaku uqanna maridanoo. Qinee qeeqa qifunnai qafeeqa inni kooroomannimaqaidaqa.

*Yisufa indaaru ooqasaa nifiqoo faiqi namusa.*

<sup>35</sup> Kananaana iqaqoofanoo Yoohaneefa nammari afainni narí ufa irimaru fasiqa qanda faqa marufanoo Yisufa aiqaranau.

<sup>36</sup> Aiqaarofanoo Yoohaneefa amiqi mandee aiqumumaseenoo qinau. Innee maana qafaaga Anutuna aandau aanaaqiara foora qaindasaa maasara kuquaninafa aiqaqaidanoo.

<sup>37</sup> Yoohaneena ufa irimaruqanda mi ufana irisee Yisuna doo afaqee fiqau.

<sup>38</sup> Afaqee fimarufanoo Yisufa quandafi nindafeenoo qinau. Inneeqara nanaree qini qifaqee anidee qufaqa miqanda qiqau. Ufasaa rakisira anee yai fee maridane.

<sup>39</sup> Yisufa iriseenoo qimannimino doo aniree qafaaga qufaqa miqanda mina faqa oonu mina maaqa qafamasee eenaanianna oonu qafamaseeqa mina faqa kaqi kaaqoo mariqau.

<sup>40</sup> Mi fasiqaqanda Yisuna maaqa oonu qafamasee mina faqa maruqanda miqandakiqari moo fannoo Andurufa marinau. Mifa Simoona moo auqu Peetooroona akaqa marinau.

<sup>41</sup> Andurufa narafasaana Simoona moo auqu Peetooroona kaqi kaqi paqurimaseenoo qimaminoo qinau. Maasa Anutuna asauku mundira fasiqa kambiqaannoo fee qimaqoofa doo maasa paquriqa qimaseenoo mina afiqammaree Yisufinnai finau.

<sup>42</sup> Oonuroofanoo Yisufa Simoona aiqumumaseenoo qinau. Anee Yoohaneena amaaku Simoonafa mariananoo. Qinee aniara Keefasane qianuree qinau. Mi auqu oosanna ooni fee qinoo maridanoo.

*Yisufa Firipina faqa Natanaeerana faqa naaroo ufafa.*

<sup>43</sup> Moo kananaana Yisufa Kariree maqamaaqai fuaneera aanai Firipina paqurimandeenoo qimaminoo qinau. Doo Firipi qini faqa doo aniannee qinau.

<sup>44</sup> Firipifa faqa Andurufa faqa Peetooroona faqa Beetasaida maqusaindari moodaa maqusanaasa mariqau.

<sup>45</sup> Firipifa Natanaeeranara randasee paqurimaseenoo qimaminau. Mooseefa Anutuna sandufasaa faqa tamummaqara fasiqausa faqa kambiqaaninna fasiqanara ooqai akara rumaqoona maasa paquriqa. Mifa Yisufa Yooseefaana amaaku Nasareetee maqusaindaraafa maridanoo.

<sup>46</sup> Natanaeerafa qinau, Akasaa naqimasee amiqira ainaina Nasareetee maqusaindari kambiqaararee, sia kambiqaannoo. Miqi qufanoo Firipifa qinau aniree doo oonu qafa.

<sup>47</sup> Firipifa mina afiqeenoo oonu roofanoo Yisufa Natanaeerana qafamaseenoo qimaminoo qinau. Oo maafa Isaraee maqannaa faiqi uqanna anidanoo. Sia qunna ufa minaki marifa andeeqarafa kai marifa maridanoo.

<sup>48</sup> Natanaeerafa minara iriseenoo tautumaseenoo maaqi qimasee Yisuna qimaminau, anee naqi fee masee qiniara iridanee. Yisufa iriseenoo maaqi qimasee qimaminau. Natanaeera faasai Firipifa sia ani paquriqoo anee anenna maqusai anenna faafisa atukaki nianai marianaqa qinee ani aundurakinaa oosana faasai qafeeqa.

<sup>49</sup> Natanaeerafa iriseenoo tautumakufanoo qinau. Ufasaa rakisirafa anee Anutuna amaaku marianafa. Anee Isaraee maqannaa karaambaiqa marianafa mariananoo.

<sup>50</sup> Miqi qimasoofanoo Yisufa qinau. Qinee faasai faafisa atukaki mariana qafaunannara minara qunnnanara anee minaree qiniara Anutuna amaaku fee qidanee. Qini ufa iria. Maqee kaqikaagoo uqafiqaaunana qafaananoo. Kasooqagee anoona firaagoo uqannifiqaanaura.

<sup>51</sup> Miqi qimasee mina faqa marusa qimanniminoo qinau. Qinee anoona ufa qimannimidaqa kasooqagee innee innaarunai kudimanda rakee inaqa qafaifanoo qangiroouqa faiqi nimaaku qini qimummaqa ooraini qumaini imarifaqa nindafeefaranoo.

## 2

### *Kannaana maqusai faiqi faqa anaasee faqa nimundoo ufafa.*

<sup>1-2</sup> Qaara faasaana aiqarroofanoo Kanna maqusai Kariree maqa maaqaki moo maqusaki maanaqa amundarafa marinau. Yisuna anoofa Mariafa mi qoomaqanaki dadaaqidanoo marinau. Qoomaqa suqoosa Yisuna faqa nari faiqi namu faqa naarooafa fiqau.

<sup>3</sup> Mi maqannaasa oosana maaqimminoo maridanoo. Maanaqa nimundararee qimasaidaqa narana faqa uainna nammari nari maqee maqee nee maria nammarifa faqa namammaree munusaida nimundee mariqau. Mi qoomaqanaki uainna nammari namammaree kasaqa munu taikasoofanoo Mariafa nari amaaku Yisuna qimaminoo qinau. Qini qi-maaku doo uainna nammari taikanoo maridanoo.

<sup>4</sup> Yisufa mi ufana iriseenoo nari afeeka kooroomma nimaqaaninnanara iriseenoo qimaminoo qinau. Oo qinnaqeefoo nanaree anee qini iridanee. Kasooqagee qinee firaa ainaina oosana oosana faiqi sia auqee mariana auqanaura anee maqee kasaqai qimariananoo.

<sup>5</sup> Yisuna anoofa mina iriseenoo quandafinoo qoomaqa dadaaqimaru fasiqausa mara quqaqoosa maaqi qimasee Yisunara qimanniminau. Nana ainainaree maafa qinaqa mifa qinandee kai iaqa.

<sup>6</sup> Mi maqanaki ooni qafee firaafauqa dinni qisauku taikasee dinni ani moodaa marasee marinau. Yuda maqannaasa nári imarudeemasee minakina nammari marasee nisaaqumasaida narana neemariqau. Aiqama ooni qafee tintaramma miqirafa firaafauqa marinau. Nammari moomoo saka adiee marusauqa mariqau.

<sup>7</sup> Yisufa qoomaqa suqara faiqiuqa mara quqaqoosa qimannimino qinau. Innee nammari sakasee maa ooni qafeesaki adiee marifanoo afaisaa kai uruani. Yisufa miqi qimasoofaqa misa aiqama mi ooni qafeesaki saka adioofanoo afaisaa qumbiqau.

<sup>8</sup> Saka adia qumbiqasoofanoo Yisufa qimannimino qinau. Innee minakinaana sakamaree qoomaqaasaa rakisimarina amifanoo namasee qafaani.

<sup>9</sup> Miqi qimasoofaqa misa miqimmiqau. Qoomaqaasaa rakisirafa mi nammarifa uainnaikamafuna oosana siamma irinau. Qoomaqa suqeemaru ainainira fasiqausa misa kai iriqau. Qoomaqaasaa rakisirafa namasee qafooofanoo amundoo aanaaseena afaaqi aaramaseenoo qinau.

<sup>10</sup> Aiqama qoomaqa suqee mariasa amiqira uainna naaree indaaru nimiafaqa naidaqa. Neeneesaafaqa inaaqianna manda uainna nimidaqa. Anee sia miqiananoo amiqira uainna uqanna kai inaaqianna nimiananoo.

<sup>11</sup> Miqinoo Kariree maqa maaqaki Kannaana maqusai Yisufa narí saika oosana araseenoo faiqí sia auqoo ainaina amiqira oosana auqamasoofaqa faiqí anaasee qafaqau. Mifa mikari narí afeeka firaana uqannifiqoofaqa mina ufa irimaru fasiqausa Yisunara kuqaa Anutuna amiqira afeeka uqannifiqee mari fee qiqau.

<sup>12</sup> Miqooqari Yisufa narí anoona faqa narí akaqaafasaa faqa narí ufa irimarusaa faqa Kapeeranaumma maqusai ooqu fiqau. Miqoo ooquree qaaramoo faasaana kaqi marinau.

*Yisufa Yeerusaree naaquqara amaana maqaki keeqoo ufafa.*

*(Mat 21:12-13; Mak 11:15-17; Ruk 19:45-46)*

(Ooqai Anutuna qangiroo moo fannoo Isaraee maqannaasa ainnaaqareenoo Isipa maqannaasa ooqa faiqiuqa kuqa narufaqa Isaraee maqannaasa quqasee sandaqau.)

<sup>13</sup> Isaraee maqannaasa mi ainnaaqarara qoomaqaana suqarara deedaqufanoo Yisufa minni Yeerusaree maqusai ooru finau.

<sup>14</sup> Oorureenoo Yisufa naaquqara amaana maqaki keeqafinoo oonurama nindafoofaqa faiqí mi naambeeqanai marida Anutuna tatufirana suqararee qidaqa burimakau sipsipa nakipuruna narinni narinni feefaurimariqau. Miqidaqa fira munnimma maraidaqa qummuaraikammi mariqau. Faiqí anaasee kaamanna munnimma mara maree munu nimufaqa misa naaquqara maqakinaa munnimma nári nimimariqau. Mina faqa amaana maqasaa rakisirausa nári faqa qummuaraikammi mariqau.

<sup>15</sup> Yisufa anirama nindafeenoo sanda kukuqamma qumareenoo mi samuna burimakau sipsipa faiqí naru nifaqaauafaqa quqasee sandaqau. Munnimma kukuqimaru qaindausa ani qumareenoo teeqi maqusoofanoo mi munnimmausa maqandanandanamminau.

<sup>16</sup> Mina miqimaseeno nakipuruna feefauru maree marusa maaqi qimasee qimanniminau. Maa ufinisa maanakinaana maanakiqari kai doo maree fifuafa, sia mariaqa. Qini qikoona maqa maa maqafa maridanoo. Innee sia mina marasee dapi feefaurira maqa fee qiaqa.

<sup>17</sup> Miqi qimasoofaqa Yisuna faqa nimarusaa ooqeenaa Anutuna tamummaqara fasiqauqa akarakinaa ufara oonumafi irisee qiqau. Ani maaqara qiqa didirafa idara foora qaidanoo fee qiqau. Yisuna faiqi namu minara

iriqa maaqi qiqau. Ooqeenaa ufa anoona doo maqee Yisunaki kam-biqeenoo fee qiqau.

<sup>18</sup> Yisufa aandauga amaana maqa naambeeqaindaraana niqiqama-soofaqa Yuda maqannaasa uriqararauasa quandafi Yisuna aqidaqa qiqau. Anee kuqaa karaambaiqa maridana faiqi sia amana augeemaria ainaina firaa ainaina moo uqaqifiqainaqa maasa kuqaa aniara karaambaiqammi-foo qianaara.

<sup>19</sup> Yisufa mi ufana iriseenoo qinau. Amana, innee maa amaana maqana rapeemasaiqa qinee qaaramoo faasaana kafaa uqeera kuradaanaara.

<sup>20</sup> Yuda maqannaasa uriqararauasa minara iriseeqa qiqau. Akasaa maa maqana ooninnai auqimariafa firaafa maridanoo. Maasa qikeeku qikaaku (46) qaara fasiqa niku nisauku taikasee dinni taikasee dinni ani moodaa marasee aukwana aundurai maa afeeka maqana auquqoofa maridanoo. Anee naqimasee qaaramoo faasaana uqeera kuradarara qidanee.

<sup>21</sup> Yisufa sia naaquqara maqara irinau. Nari afaaqara Anutuna naaquqara maqa fee qufaqa misa sia iriqau.

<sup>22</sup> Yisuna faiqi namu faqa sia aqee mi ufana oosana iriqau. Kasooqagee Yisufa kuqiranakiqari findifufaqa miqoo Yisuna ufa irisee miqoo anoonara oonumafi iriqau. Miqoo faqa misa tamummaqara fasiqa akarara faqa Yisunara faqa kuqaa fee qiqau.

### *Yisufa aiqama fasiqa naundurai nindafoo ufafa.*

<sup>23</sup> Mi fasannai ainnaaqarara qoomaqa kamuqoo Yisufa Yeerusareenni marufaqa moomoosa mina sia faiqi amana augeemaria ainaina qafamasee kuqaa Anutuna asauku mundira fee qimariqau. Maa fasiqafa Anutuna afeeka eeraarirana kooroo imarifa maridanoo fee qimariqau.

<sup>24</sup> Yisufa minara irinoo sia misaki paasoosamandee afaaqa quqanau. Mifa faiqi naunduraki irufanoo sia amanaikufanoo.

<sup>25</sup> Sia moo fannoo faiqi naundurakinaana qimamiqau. Nari kai amiqi-mandee aiqamausa naundura mandirirana niqafamaseenoo misaki sia afaaqa quqanau.

## 3

### *Yisufa Nikoodeemusanandiri ufaqa ufafa.*

<sup>1</sup> Farisai amaana ufa qimarusaki faiqi moo auqu Nikoodeemusafa Yuda maqannaasa uriqararafa moo fannoo marinau.

<sup>2</sup> Mi fasiqafa moo eenda asukunaki kukeeqakufanoo Yisufa maruqoo anireenoo qimaminoo qinau. Oo ufasaa rakisirafa anee Anutufinaindari anianafa ufasaa rakisirafa marianaqa maasa minara iridaqa. Sia fifau fasiqa narikai qinanoo faiqi teeroo ainaina aqee taikaannoo, anee ianandee qiananoo taikaannoo. Anutufinaindari anianafa mariannanara mi afeeka ainaina auqimarianaqa maasa iridaqa. Anee nanufa fee maasa qimaqiminnaree.

<sup>3</sup> Yisufa iriseenoo nari qimaminoo qinau. Qinee anoona ufa ani qimaminaura. Faiqi Anutufinaindari kafaa fukasaa aanaaqi aanaaqi kamafinausa kai Anutuna ququsaki keeqeefaranoo. Kaqi marinausa sia amana fifaranoo.

<sup>4</sup> Nikoodeemusafa mi ufana iriseenoo kafaa Yisuna irammirinoo qinau. Naqimasee faiqi firaafa kafaa aanaaqi kamambinoo fee, nari anoona aranandaki keeqafinanoo fee kafaa maqaannoo fee. Yisu sia amana, sia minara qimariananoo.

<sup>5</sup> Yisufa iriseenoo qimaminoo qinau. Qinee anoona ufa ani qimamidaqa. Faiqí kaqimarinausa sia uqanna Anutuna ququsaki keeqeefaranoo. Anaasee aranandaki kambiqainausa quandafi Anutuna maraqunannai faqa fukasaa aanaaqi kamafinausa kai Anutuna ququsaki keeqeefaranoo.

<sup>6</sup> Faiqí nimaqifaqaasa quandaki nimaqifaqaasa maqeeefaranoo. Anutuna maraquna fannoo quandaki maraquna faqaasa Anutunara irirana faqaasa maqaannoo.

<sup>7</sup> Qinee aniara kafaa fukasaa aanaaqikinana kambiqaannee qunana sia anee minara irisee tautia.

<sup>8</sup> Ufai oosana iria. Yaindari anidanoo fee. Yai fee fidanoo fee. Narí iriranamau fifana anee ufa kai irimariananoo. Anutuna maraqunannai faiqí moo fukasaa aanaaqi kirausa miqi kai idaqa. Anee sia mina oosana qafeennaranoo.

<sup>9</sup> Nikoodeemusafa mi ufana iriseenoo Yisuna qimaminau. Naqimasee maa ainainnafa anee qianandee iannoo fee. Sia qinee minara iridaqa.

<sup>10</sup> Yisufa iriseenoo maaqi qimasee narí qimaminau. Anee Isaraee maqanna rakisirafa fraafa moo fannoo marianafa mariananoo anee naqimaseenee maa ufana oosana sia iridane.

<sup>11-13</sup> Qinee kaifaa anoona ufa ani qimamidaqa. Maasa irunna ufana kai ani qimamidaqa. Maasa qafee marunna ainainara kai inni qiman-nimiafaqa innikina moo fannoo sia maasa ufa irimariafanoo. Sia moo fannoo innaarunai ooru fimarias maridaqa. Qinee faiqí nimaaku kai innaarunaindari qumuafanausa mindaraa ainainara irida maridaqa. Qinee maa maqanasaaqaraa ainainara ani qimamianana sia irinana naqimasee innaarunai ainainara qimamianana irinnaree.

<sup>14-15</sup> Yisufa kafaa Nikoodeemusana qimamidanoo qinau. Ooqai aadana maqa maaqaki sakaniuqaindi Isaraee maqannaasa moomoo ukaqan-nimisoofaqa kuqimariqau. Mooseefa mina qafamasee koopaa saunu naaree auquseenoo mina aanaaqianna minannai kai sakani auquseenoo mi saununasaa kukukukuqamaseenoo doo uqeerasoofaqa kuqirarimarusu mina qafamaseeqa sia kuqiqau findifiqau. Qini faiqí nimaaku miqi kai masee qini darusee aunirira saqarisaa uqeera quqeefaranoo. Qinee miqoo airiqa marianaqa aiqamausa qini qiqafamasee irirana qinisaa rusirausa Anutufa narí naaru marirana nimiannoo.

<sup>16</sup> Anutufa maa maqanasaa mariasara amuqusa firaqoo qunara narí amaaku moodaa uqanna amiqirana maqasaaqaraasa nimuna mina saqarikinausa sia kuridiranaki fifaranoo Anutuna naaru mariranaki fuageera narí amaaku niminau.

<sup>17</sup> Anutufa sia maa maqanasaaqaraa fasiqa anaasee narí ufa firaanaki mara aquanifeerau narí amaaku maa maqanasaa quqannisanau. Mifa faiqí anaasee nariranakinaana qumbaqqeeqee naaru asumu mariranaki quqannisaanifeera Yisuna quqanau.

<sup>18</sup> Maqasaa fasiqa anaasee Anutuna faiqi namukinausa mina saqarikinausa Anutuna narirafa sia misasaa maridanoo. Sia Anutuna faiqi namukinausa sia mina saqarikinausa doo ooqai Anutuna narirafa misasaa maridanoo. Misa Anutuna moodaa faiqiara sia misa nári irirana minasaa rusirai Anutuna narirafa minarakai doo misasaa maridanoo.

<sup>19</sup> Anutuna narira oosana maqimminoo maridanoo. Anutuna kaaqa qara qoomara foora Yisufa maa maqanasaa doo ani maridanoo. Faiqí nári oosana mandainaina maree marifanoo minara irinoo kaaqa qara qoomara Yisunara akooqai fanoo asukunara ridanoo.

<sup>20</sup> Faiqí moo fannoo mandainaina maree marifa mifa kaaqa qaranara fidiqaa imarifa sia faasaana kooroo iannoo. Narí manda oosana kooroo qianoo qimasee asukunaki kaqi maridanoo.

<sup>21</sup> Yafa yafee moo fannoo anoona oosana marainafa mifa suanisaa qooma mariqoo aninafa narí Anutuna ufamau fimari oosanna akooqoo kooroo ianifeera akoosaqa anidanoo.

*Yisufa Yoohaneena nammari nimimaruna faqa ufaqu ufafa.*

<sup>22</sup> Mi aukuannai Yisufa narí faiqí namufaqa Yudeeaa maqa maaqaki ooquree marikinoo Yisufa qufaqa mina faiqí namu faiqí anaasee nammari keeqamannimaqee mariqau.

<sup>23</sup> Yoohaneefa nammari nimimarufa mifa faqa mi aukuanna moosaa faiqí anaasee nammari keeqamannimaqee marinau. Mifa Saarimma maqusa aaqa Aeenona nammari keeqamannimaqee marinau. Miqoo nammari moomoo mandinoo marunara faiqí anaasee moomoo suqiqa marufanoo Yoohaneefa nammari auqamannimaqee marinau.

<sup>24</sup> Yoohaneefa mi kamuqoo kaqi maru kamuqoo nammari keeqamannimaqee marinau. Eeroodeefa sia karabusaki quqoo kamuqoo miqi marinau.

<sup>25</sup> Yoohaneena faiqí namu faqa Yuda maqannaa fasiqa moo fannoo faqa Yuda maqannaa nammari keeqannimaqee maru oosannara ufa rainaqau.

<sup>26</sup> Miqidaqa Yoohanee funnai oonuree qimamiqa qiqau. Oo ufasaa rakisirafa. Ooqai anee Yooradanna nammari dinni afainni qimannimuna fasiqafa Yisufa doo Yeerusareendari qumureenoo faiqí anaasee nammari auqamannimaqee marifaqa minni faiqí anaasee moomoo fidaqa.

<sup>27</sup> Yoohaneefa mina iriseenoo maaqi qimasee qimanniminu. Sia moo fannoo kaqi iannoo. Anutufa aminafa kai miqiannoo.

<sup>28</sup> Innee mi fasiqanara qini ufa qiafannanara irimariusa mariafanoo. Qinee minara maaqi qiafanafa. Qinee sia asauku mundirausa maridaqa. Qinee mina oorinni aniafanausa kai maridaqa.

<sup>29</sup> Aqoondi fannoo amundara fasiqa aaqa maridanoo mina ufa iriseenoo asaidanoo. Narí aqoondi anaasee maree marinara asaidanoo. Qinee Yoohaneesa Yisunara iriseeqa asaidaqa. Mifa amundara fasiqara foora marifaqa qinee mina aqoondiara foora maridaqa mina ufa iriseeqa qini asasirafa firaafa maridanoo.

<sup>30</sup> Mifa maqee maa fasannai uriqararafaikamambi mariannoo. Qinee geeqa ooru dupirausaikamafi marianaura.

*Innaarunaidari qumu fasiqana ufa.*

(Yoohaneefa nammari nimimarufa mi ufana Yisunara qimasoofanoo maa papiqana akara rimarufa mina amarafa Yisuna faiqi namukinaa moo Yoohaneefa narí amarana ufa iriseenoo akara rumaseenoo kafa narí ufa Yisunara maaqi qimasee akara rinoo qinau.)

<sup>31</sup> Mirindari qumifa mifa aiqamausa uriqararafa maridanoo. Maa maqanasaa qaraafa maa maqanasaa qaraanara kai qidanoo. Innaarunaidari qumifa mifa aiqamausa uriqararafa maridanoo.

<sup>32</sup> Yisufa innaarunaidari qumifa minni maridanoo mindaraa ainainara narí afu qafainara narí aaqoo irinara qimannimimarifaqa sia irimari-afanoo.

<sup>33</sup> Mi ainainna qimannimina irisee kuqaa anoonee qimasee marainna fasiqa aanaaseesa Anutunara kuqaa fee qimariasa maridaqa.

<sup>34</sup> Anutufa innaarunaidari aqiqamasaiqa Anutuna ookinaa ufa kai qimannimidanoo Anutufa narí maraquna muduka amiqai-afanoo miqidanoo.

<sup>35</sup> Yisuna akoofa Anutufa narí amaakuara amuqusifanoo minara ridanoo aiqama ainaina mina aramandunnai quqaidanoo.

<sup>36</sup> Anutuna amaaku ufa irisee mara mina saqarikinafa doo mifa Anutuna naaru marirana marasee minaki maridanoo. Anutuna amaaku ufa irisee rukiainafa Anutuna firaaqoo aanooqirafa minasaa naaru mariannoo.

## 4

### *Yisufa Samaria maqannaa anaasee faqa ufaqu ufafa.*

<sup>1</sup> Faiqí anaasee moomoosa Yisufunnai fimariafanoo nammariki keeqamannimaqee marinau.

<sup>2-3</sup> Yisufa sia narifau keeqamannimaqee marinau. Mina faiqi namu mina ufasaa kai keeqamannimaqee mariqau. Yisufunnai moomoosa fimarfanoo Yoohanee funnai moodaa moodaa kai fimariqau. Farisai amaana ufa qimarusa mi ufana iriseeqa munuqi miniqira ufa uqeeraaqaa ufanoo Yisufa iriseenoo Yudeeaa maqa maaqa mminniseenoo Kariree maqa maaqaki kafaa finau.

<sup>4</sup> Yudeeaa maqa maaqa minnisee Kariree maqa maaqaki fidanoo Samaria maqa maaqa namuqaa maruna qambaanaai oonuranau.

<sup>5</sup> Miqoo fidanoo Yisufa moo maqusa auqu Sikara mi maqusana paqurinau. Ooqai Yakooboofa miqoo maridanoo nammari sia marufanoo madika indufuseenoo minakinaa nammari neeneeufanoo narí amaaku Yooseefaana amu nammarifa marinau. Meemai uqanna indufu maree nammari paqurinau. Sikara maqusa mi nammari madikana aqaq marinau.

<sup>6</sup> Yisufa kisaaga aatata fifi isoofanoo amudaani rufanoo miqoo Yakoo-boona nammari madika paqurimaseenoo mina afainni ooqu marinau. Suani qambaanaikufanoo madika afainni ooqu marinau.

<sup>7</sup> Yisufa ooqu marifi marufanoo Samaria anaasee moo fannoo Yakoo-boona madikaki nammari sakarara ooqu finau. Ooquree nammari madikaki sakeemarufanoo Yisufa innaaruqinoo qinau. Maa anaasee anee nammari qini qimina naa.

<sup>8-9</sup> Yisuna faiqi namu narana feefauriraree qimasee maqusai oorufufanoo Yisufa naríara mi nammarina afainni ooqufaaqee marida qafoofanoo mi anaaseefa nammari sakararee qimasee quminau. Qumuroofanoo Yisufa nammariara qufanoo mi samaria maqannaa anaaseefa tautinoo qinau.

<sup>10</sup> Akasaa Yuda maqannaafammia. Sia Yuda maqannaasa Samaria maqannaasa kaafa piritaki naidammia. Qinee Samaria maqannaa maridaqammu. Anee naqi fee qidanee nammariara qiniara innaaru qidanee. Yisufa minara iriseenoo maaqi qimasee narí qimaminau. Anee Anutuna nimira ainainara faqa qiniara faqa irimarinafa maridanau qiniara irinaqau naaru marira nammari ani amini.

<sup>11</sup> Mi anaaseefa mi ufana iriseenoo kafaa qimaminoo qinau. Oo maa fasiqa ani nammarianandaana faqa nammari rarisara sanda faqa sia maridanoo. Maa madikafa meemai kisaagasaa maridanoo. Anee qianandee yaindaraanee naaru marira nammari mareennaree.

<sup>12</sup> Maasa qisaifaqafa Yakooboofa ooqai maa madikana maasa indufu qisoona marifaqa maasa sakaidaqa. Narí faqa narí faiqi namu faqa narí sipsipauqa faqa maa madikanakinaa nammari neeneeusa mariqau. Anee aneennaraa Yakooboona uriqararausee qidanee.

<sup>13</sup> Yisufa mi ufana iriseenoo kafaa qimaminoo qinau. Aiqausa maa madikanakinaa nammari nasaifanoo kaifaa kaifaa sakaida neemari-faranoo. Qinee nimianna nammarina naifandinausa sia kaifaa nammari-ara nidiannoo.

<sup>14</sup> Qinee nimianna nammarina namasainafa mina aunduraindari naaru marira nammari maqee maqee uridanoo naaru marirana amiannoo.

<sup>15</sup> Mi anaaseefa mi ufana iriseenoo Yisuna qimaminoo qinau. Maa fasiqa maqee kai mi nammarina qimina namasaanoo taikafinaqa sia maqee maqee qumu nammari saka, ireeda maria.

<sup>16</sup> Yisufa mi ufana iriseenoo maaqi qimasee mi anaaseena qimaminau. Anee ooru aneenna afaaqi afiqee qumua.

<sup>17</sup> Miqi qufanoo mi anaaseefa qinau, qinee faiqi siaisa maridaqa.

<sup>18</sup> Miqi qufanoo Yisufa kafa qimaminoo qinau. Oo doo anee ooqai moodannai qisauku fasiqa maroonafa mariananoo. Maqee maraqaanna fasiqafa sia ani afaaqifau maridanoo moonaa afaaqi maridanoo. Anee kuqaa anoona ufa kai qimaqimiananoo.

<sup>19</sup> Mi anaaseefa mi ufana iriseenoo tautumaseenoo qinau Boo anee Anutuna tamummaqara fasiqa mariananoo qinee qafaidaqa.

<sup>20</sup> Maasa Samaria maqannaasa maa aqannasaa Anutunara innaaru qidaqa amooqidaqa. Innee Yuda maqannaasa Yeerusareenniara Anutuna amooqimaria maqusa fee qidaqa.

<sup>21-22</sup> Mi anaaseefa miqi qufanoo Yisufa qimaminoo qinau. Innee Samaria maqannaasa fifau amooqi mariafanoo sia minara irimariafanoo. Maasa Yuda maqannaasa Anutuna amooqimarianara irimarunausa maridaqa. Anutufa Yuda maqannaannai aiqama aanaamuru Anutuna nariranaki-naana uqeereeqeenoo nari aqoondikiranaki quqannisaannoo. Oo maa anaasee amiqimasee qini ufa iria. Qusasaa anira aukuaana faiqi anaasee sia maa aqannasaa fee Yeerusareenni fee Anutunara innaaru qifaranoo, fifau aiqamatinai qini qikoona amooqifaranoo.

<sup>23</sup> Qusasaa anira aukuaana doo maqee animaridanoo, faiqi anaasee kuqaa anoona Anutuna amooqimariasaa kuqaa nari maraqauna namufaqa kuqaa anoona ufa namufaqa amooqifaranoo. Anutufa miqiasara kai nariara qimooqidammiafoo qimaseenoo aididanoo.

<sup>24</sup> Anutufa maraqauna oosana faqaafa maridanoo. Minara Anutuna amooqimariasaa nari maraqaunannai faqa nari nimuqusa ookiqari faqa Anutuna amooqifaranoo.

<sup>25</sup> Yisufa mi ufana mi anaaseena qimamufanoo mi anaaseefa quandafinoo Yisuna maaqi qimasee qimaminau. Anutuna asauku mundirafa mifa qumureenoo aiqama ainainara maasa qimaqiminaqa irianaura, qinee iridaqa.

<sup>26</sup> Miqi qufanoo Yisufa qinau. Qinee misa maridaqa. Qinee ani faqa ufa qimarunausa misa maridaqa.

<sup>27</sup> Yisufa miqi qimarufanoo doo mina faiqi namu Sikara maqusaindari qumuraqau. Qumuree qafoofanoo Yisufa Samaria anaasee faqa ufa qimarufaqa tautumaseeqa qumee kai qafee mariqau. Misa Yisunara nanaree randaidanee mina faqa ufa qidanee qianeerusia minnisqaau.

<sup>28</sup> Yisuna faiqi namu maqusaindari qumufanoo mi anaaseefa nari namariana miqoo quqaseenoo kaqisamu maqusai ooruree nari maqannaakaqausa qimanniminoo qinau.

<sup>29</sup> Innee qumuraifaqa muqusaanaqa qafaqa. Ooqai aiqama ainaina qinee maree mariafanna ainainara kooroo ifaqa irunna fasiqafa Anutuna asauku mundira fee maridanoo fee. Doo mai qumuree qafaqa.

<sup>30</sup> Misa mina irisee doo nari maqusaindari ooqu Yisuna qafararee qimasee ooqu fiqau.



<sup>31-32</sup> Mi anaaseefa maqusai oorufufaqa Yisuna faiqi namu Yisuna qimamiqau ufasaa rakisira doo narana naa qufanoo mifa nariqa qimannim-inau. Qini narana moo maridanoo innee minara sia irimariafanoo.

<sup>33-34</sup> Miqi qufaqa misa nari qimami nari qimami qiqau. Moo fannoo narana mina aminoo fee qufanoo Yisufa qinau. Qini narana narafa qini diqiqoonna Anutuna ufamau firafa maridanoo. Mina saika taikarafa qini narana maridanoo.

<sup>35</sup> Innee maaqi qimariafanoo. Quqoona qaara faqa qaara faqa aiqarainaga suana aiqunauree qidaqa. Qinee minara maaqi qidaqa. Innee oonu afuqaki qafaqa doo maqee narana anaa maridanoo. Aiqira aukwana doo ani maridanoo.

(Yisufa miqooqaraa fasiqa anaasee Anutuna ufa qimannimifaqa iri-fandinnanara aiqirana kikiqusinoo maridanoo.)

<sup>36</sup> Yisufa minara kaifaa nari faiqinamu qimannimino qinau. Faiqi moo fannoo narana aiqimarifa mifa mina akiqara maraidanoo. Naranara foora faiqi anaasee suqueeqeenoo innaarunai quqasainaga naaruara marirana maraageera. Misa naaruara marirana marasaifanoo ummaqimarifa faqa aiqimarifa faqa moodaanaki asasifaranoo.

<sup>37</sup> Maasa ufaiqari maaqi qidaqa. Moo fannoo ummaqidanoo moo fannoo aiqidanoo.

<sup>38</sup> Qinee Yisusa inniara faiqi anaasee aiqaaqera foora innaarunaanai ubeekaaqera niqiqeeqa. Mi afuqanaki innee sia mina ummaqimari-afanoo. Akaqa fasiqa anaasee Anutuna naaru marira asumu mi afuqanaki ummaqoofofaqa innee kaqi unakusee misa kadaapisaa innee fifau faiqi anaasee mareeqee naaru mariranaki quqannisaafaqa fifau feefauru mareefaranoo.

<sup>39</sup> Yisufa nari faiqi namu faqa ufa qimarufanoo mi Samaria anaaseefa nari maqusai oorureenoo aqoonausa maaqi qimasee Yisunara qimannim-inau. Mifa qinee ooqai maraafanna ainainara qimaqimifaqa iriqa. Miqi qufaqa mi maqannaasa moomoosa Yisunara kuqaa Anutuna asauku mundira fee qiqau.

<sup>40</sup> Miqi qimasee ooqureeqa Yisunara maasa faqa ani marianneera afeekaika mandee fuki faaki qimasoofanoo Yisufa misa faqa qaara faasaana marinou.

<sup>41-42</sup> Miqoo moomoosa Yisuna ookinaa ufa iriseeqa kuqaa anoonee qimasee quandafufaqa mi anaaseena qimamiqa qiqau. Doo maqee maasa sia ani ufara kaifau anoonee qifarau. Nari ookinaa ufa iriseeqa minara kuqaa aiqama maa maqa maqanakinaasa mandaindakinaana mareeqee asumu mariranaki quqannisaanina fee qidaqa.

*Yisufa uriqarara fasiqa faiqi andeeqaisoo ufafa.*

<sup>43</sup> Yisufa Sikaa maqanna faqa qaara faasaana marinoo quqaseenoo Kariree maqa maaqai nari maqa maaqai finau.

<sup>44</sup> Yisufa nari maqa maaqara maaqi qinau. Tamummaqara fasiqa maqusa maqusa fidanoo faiqi anaasee minara aaquqaifanoo mina ufa iriaqaifaranoo. Nari mina maqusanaasa nikoo nikaa masee sia minufa irifaranoo.

<sup>45</sup> Yisufa Kariree maqa maaqai oonuroofaqa miqooqaraasa qafamaseeqa asidaqamma minufa iriqau. Kariree maqannaasa akaqausa faqa Yeerusaree maqusai oorureeqa ainaaqarara qoomaqaki miqoo Yisuna qafamaqoosa faiqi sia auqaaqaa ira ainaina auqusoofaqa qafamaseeqa oorurandee qumu marufanoo Yisufa Kariree maqa maaqai qumuroofaqa

asasamasee uru afiqee muquseeqa faiqí anaasee amiqimaseeqa minufa iriqau.

<sup>46</sup> Yisufa Kariree maqa maaqakinaa kaqikaa maqusa auqu Kannaana maqusai oogai nári uainna nammari taikafufanoo nammarinnai auqu maqusanaki oonuranau. Mi maqusanaki faiqí firaafa uriqararafa moo marinau. Mina amaaku kuqira aurira auridanoo Kapeeranaumma maqusai maridanoo kuqirari marinau.

<sup>47</sup> Mi fasiqafa Yisunara Yudeeaa maqa maaqaindari Kariree maqa maaqaki animarunara iriseenoo miqoo oonureenoo Yisuna irammirinoo qinai. Oo ufasaa rakisirafa amanee anee qini faqa Kapeeranaumma maqusai oonuree qini qimaaku kuqira aurira aurimarina andeeqaqisaa.

<sup>48</sup> Yisufa mina iriseenoo maaqi qimaseenoo narí qimaminai. Inniki sia moo fannoo qiniara kaqi kuqaa fee qimasee qinikina irifaranoo. Innee firaa ainaina faiqí sia amana auqaaqaa ira ainaina auqamasaanaqa qafeeqa kai qinikina irifaranoo.

<sup>49</sup> Mi uriqarara fasiqafa minara iriseenoo qinai. Oo qini karaambaiqa qini faiqi kuqirarammidanoo doo qini faqa ania.

<sup>50-51</sup> Yisufa iriseenoo maaqi qimasee qimaminoo qinai. Doo findifi fua ani maqusai doo ani amaaku findifuannoo. Mi fasiqafa mi ufana iriseenoo doo kuqaa fee qimasee doo quqaseenoo quandakufanoo aatata fidanoo qafuofaqa mi uriqarara fasiqana saika faiqiuqa aanai ani paqurimandee qimamiqa qiqau. Doo ani amaaku findifinoo, sia kuquannoo.

<sup>52</sup> Mina akoofa mina iriseenoo findifuna oosanara irammirufaqa misa qiqau. Eenda suani qambaana mariifanoo miqinni qumifanoo doo ani faiqi afaaqa doo asooeenoo.

<sup>53</sup> Mina akoofa Yisunara oonumafi iriseenoo qinai. Oo mi kamu qoo kai ani faiqi findifuannoo fee qifaqa irunna qoo kai doo findifinoo. Doo mi uriqarara fasiqafa narí faiqi anaasee faqa narí aiku asauku faqa Yisunara kuqaa Anutuna amaaku fee qimasee kuqaa mina saqarikiqau.

<sup>54</sup> Doo Yisufa qaara kari Yudeeaa maqa maaqaindari anireenoo Kariree maqasaa qaara ainaina firaa ainaina kooroomasoofaqa qafaqau.

## 5

### *Yisufa farumma afainni faiqí moo andeeqaisoo ufafa.*

<sup>1</sup> Yisufa Kariree maqamaaqai kaqikaaqoo marinoo doo miqooqari findi-maqeenoo Yuda maqannaasa amaanara qoomaqirafa firaafa kambiqaanin-nanara qufanoo Yisufa irisee minni ooru finai.

<sup>2</sup> Yeerusaree maqusa faandaamura kooqi sipsipa kooqi fee qimarufa marinai. Mi kooqina aqa nammari farumma firaafa marinai. Mi farummana afainni aana fiqum imarunnai qaindaira moodaanai qisauku qaindaira marinai. Mi farummana auqu Beetasata farummee qimariqau.

<sup>3</sup> Mi qaindairana ameemaanai auqaanai aurirana oosana oosana maree marusa misa mina ameemaanai ooqumari maree mi farummana afaiqara fiqummambi mariqau. [<sup>4</sup> Karaambaiqa qangiroo moo fannoo inaarunaindari narí kai iriseenoo moodaa kari moodaa kari aqufufanoo mi nammarina auqeesoofanoo indaaruu mi nammarinaki keeqoofa mifa keeqafufanoo narí aurirana taikasee fimarinau. Miqi marunara misa aurimarusa moomoosa Beetasata nammari afainni rakisida mariqau.]

<sup>5</sup> Faiqí moo kisaqasaa aurimarufa misaki marinai. Moo fasiqa aiku asauku taikasee moo fasiqa asaukuqara taikasee dinni aiku taikasee dinni onu qaaramoo marasee (38) aukuna dinee uqee marufa marinai.

<sup>6</sup> Yisufa mi fasiqana qafoofanoo maqasaa faiqaqee ufanoo Oo kisaqaasaa aurimari fee qimaseenoo mi fasiqana maaqi qimasee irammirinau. Anee findifirara aididanoo fee.

<sup>7</sup> Mi dinee fasiqafa mina iriseenoo maaqi qimasee qimaminau. Oo rakisirafa, Anutuna qangiroo maa nammarina auqamasaiifaqa yafee qini mareeqee minaki quqaannoo fee qinee anuqi marunaqa moo fannoo kai kaqi kaqi aqufida taikasaida fidaqa.

<sup>8</sup> Yisufa mina iriseenoo quandaki qimaminoo qin角度. Doo findi finana aneenna qaari raqandaamamareena doo fua.

<sup>9</sup> Doo mi fasiqafa aaqee uqanna doo mikari kai doo findi finoo narí qaari maramaree finau. Mi faasaana Yisufa andeeqasoo faasaana Yuda maqannaasa Saririqa misa amaana faasaana marinau.

<sup>10</sup> Yuda maqannaasa uriqararawsa mi fasiqana aurimaruna qafamasee aqiqa qiqau. Maana amaana faasaana maridanoo maasa sandufa rukieenana aneenna qaari aakai maqeenana nanaree sandufa rukiaidane.

<sup>11</sup> Mi fasiqafa qin角度, qini andeeqaqisaifa aneenna qaari raqandaamamaree fuannee qifaqa qeeqa qaari daakai maqa maree fidaqa.

<sup>12-13</sup> Misa mina iriseeqa irammiriqau. Yafee aniara aneenna qaari raqandaainana fuannee qifanee mi fasiqafa sia Yisuna auqu irin角度. Faiqí anaasee moomoo marufanoo misaki kukeeqafufanoo mi fasiqafa sia amiqimasee qafan角度.

<sup>14</sup> Kasooqaqee marikinoo amaana maqaki mi fasiqana paqurimandee Yisufa maaqi qimaseenoo qimaminau. Doo fee maqee qafeene Doo findifuananoo doo maqee aneenna mandainaina minnimasaa. Sia miqinanoo kafa mandainaina firaafa uqanna anisaa aqufuannoo.

<sup>15</sup> Mi fasiqafa mina iriseenoo oonuree Yuda maqanna rakisirausa paqurimaseenoo qimanniminoo qin角度. Yisufa kai qini amiqi mandaifaqa findi fiqa.

<sup>16</sup> Rakisirausa mina iriseeqa doo miqooqari Yisuna arira ufa qimariqau. Yuda maqanna amaana faasaana andeeqaisoonara arirariqau.

<sup>17</sup> Yisufa mina iriseenoo rakisirausa maaqi qimasee qimanniminau. Qini qikoofa sia moo faasaana minnisaidanoo aiqama faasaana ainainidanoo. Qinee faqa miqikaimmianauranoo.

<sup>18</sup> Yuda maqannaasa mi ufana iriseeqa doo kuqa ariraree qiqau. Misa Yisunara amaana faasaana sandufa rukiasaiifaqee qimariqau. Sia minara kai mifa Anutunara narí akoo fee qunara minara faqa arirariqau. Mifa Anutunara qini qikoo fee qunara misa nanaree maqasaa fasiqa fannoo unna qidana Anutuna amanakai maridee qidane qimasee arirariqau.

*Anutufa narí amaaku Yisuna aiqama ainaina afeeka amu ufafa.*

<sup>19</sup> Yisufa kafa qimanniminau. Qinee kuqaa anoona ufa inni qimannimidaqa. Qinee sia moo ainaina qeeqaraa auqaidaqa qeeqa qikoona qafamasee mifa indeekai idaqa. Akoofa moo ainaina auqaifanoo amaaku miqikaimmidanoo.

<sup>20</sup> Qini qikoofa narí amaaku qiniara kaaqa amuqusifanoo minara qiniara ridanoo narí aiqama ainaina auqaina qini faqa kai uqaqifiqaidanoo. Maqee maa fasiqafa firaa teeroo maraidanoo aukwana aukwana apatara aupuree marifanoo qini qikoofa dadaaqifaqa andeeqasauna innee mina qafee fee. Kasooqaqee qini qikoofa firaa ainaina dadaaqinaqa auqaanaqa qafee tautifanoo naaquqeenoo nimudaani faqa kai qumooqukamasaannoo.

<sup>21</sup> Qini qikoofa kuqira fasiqauqa findifumannisaidanoo. Qinee faqa miqikai iqa qeeqa didiranannoo kai kaqi marirana akaqausa nimiana.

<sup>22</sup> Qini qikoofa sia maa maqanasaaqaraasa mandufa irisee andeeqannisaannoo. Narí amaaku qini qimiqaifaqa qeeqa qikoona Anutuna iriramau misa manda ufa andeeqannisaanaura.

<sup>23</sup> Aiqaumausa qini qikoona Anutunara naaquqaanifeera miqinau. Qiniara naaquqaindee kai iqa qini qikoonara naaquqaanifeera miqinau. Faiqí moo fannoo moona amaaku sia mina aqoondikinafa mina akoona faqa miqikai inana miqanda qisakoosa sia niqoondikinnaranoo.

<sup>24</sup> Yisufa Yuda maqannaa rakisirausa kaqi qimannimidanoo qinau. Qinee kuqaa anoona ufa inni qimannimidaqa faiqí moo fannoo qini ufa irisee qini diqiqamaqoona saqarikinafa mifa doo naaru mariranaki maridanoo. Miqinna fasiqafa sia Anutuna arirufaki mariannoo. Anutuna narirana doo maa maqee aiqaqaareenoo kaqi mariranaki doo keeqanoo maridanoo.

<sup>25</sup> Qinee anoona ufa inni qimannimidaqa. Moo aukuaana doo adeedi ranoo marida doo animaridanoo maa maqanasaa kaqi maridaqa Anutuna nariranaki mariusa kuqufusa Anutuna amaaku qinaqa iriseeqa doo narirafa ainaaqarainaqa kaqi mariranaki keeqeefaranoo.

<sup>26</sup> Kaqi marira oosana qini qikoonaki kai marifanoo faiqí anaasee nimidanoo. Miqikai inoo naramaaku qini faqa kai kaqi marira nimira oosana doo qini qimiqaaisa maridaqa.

<sup>27</sup> Mifa Anutufa narí amaakuara faiqí nimaaku fee qimasee faiqí anaasee mandainaina andeeqannisarana narí amaaku qinisaa quqaqaisa maridaqa.

<sup>28</sup> Innee qini mi ufana irisee sia tautiaqa. Kasooqaqee moo aukuaana anirainaqa aiqama madikaki kuqirausa mariasa misa faqa Anutuna amaaku qini ufa iriseeqa madikakiqari findi fifaranoo.

<sup>29</sup> Akaqausa andeeqara oosana maree marusa findifi kaqi mariranaki fifaranoo. Akaqausa manda oosana maree mariusa misa findi fiqa Anutuna ufa firaanaki aqufifaranoo.

*Yisuna oosana alooroou ufafa.*

<sup>30</sup> Yisufa kaqi qimannimidanoo qinau. Sia qeeqaraa moo ainainianaura. Anutufa dadaaqinaqa faiqí anaasee ufa irisee andeeqannisaanaura. Sia qeeqa iriranamau afeekaikamandee fidaqa. Qini qikoofa qini diqiqamaqaimau kai fidaqa.

<sup>31</sup> Qinee qeeqaraa ufa qimannimianaqa siamma irifaranoo narikai qidaqinoo unna qidaqiifoo qifaranoo.

<sup>32-33</sup> Anutufa qini dadaaqimarifa maridanoo mifa anoona ufa kai qiniara qimarifa maridanoo, sia qeeqa kai qianaura mifa dadaaqiannoo. Innee Yuda maqannaa rakisirausa ufa anoona iriannee qimasee faiqí niqiqaiifaqa Yoohaneefa nammari nimimarifunnai ooquree iriqau.

<sup>34</sup> Qinee sia maqasaa fasiqa moo qini dadaaqiranara randaidaqa Yoohaneenara qidaqa. Innee naaru mariranaki fuagee qimasee maa ufana qimannimidaqa.

<sup>35</sup> Yoohaneefa nammari nimimarifa qoomara fooqaana marinoo kaaqa qaidanoo rupannoo inau. Innee mina kaaqa qaranaki qusasaa kai keeqaifiqa asasida mariqau.

<sup>36</sup> Yoohaneefa nammari nimimaruna ufa anoona maru fanoo qinindi minaindi arusee uriqaranoo maridanoo. Qinee aniree faiqí sia amana auqaqaa ira ainaina qini qikoofa qimuna auqaqa fimarunna ainainna fannoo qini duqu firaqoo uqeeraannoo. Uqeerainaqa qafamasee qiniara Anutufinaindari qumu fee qifaranoo.

<sup>37</sup> Sia qinee auqee marunafa kai qini duqu uqeeraidanoo. Qini qikoofa qini diqiqamaqaiifa mifa faqa qiniara ufa qidanoo dadaaqidanoo. Innee

Yuda maqannaa uriqararawsa ooqaindari sia mina ufa irimariafanoo. Innee sia mina afiri qafaanara sia uqanna mina iriranamau firanara irimariafanoo.

<sup>38</sup> Innee qini qikoofa diqiqoonara sia mina irimariafanoo minara inniki sia mina ufa maridanoo.

<sup>39</sup> Innee Mooseena sandufa faqa Anutuna tamummaqara fasiqauqa akarakinaa ufa asaana ridaqa naaru marira aanara randaidaqa mi sandufafa kai qiniara qimannimimarifaqa sia irimariafanoo.

<sup>40</sup> Innee minara iridaqa sia qinee unnannai aniree naaru marirana maree mariafanoo.

<sup>41</sup> Yisufa Yuda maqannaa rakisirawsa kaqi qimannimidanoo qinau. Qinee sia inni naanna raida faiqi qimooqiaqee qirainainara randaidaqa.

<sup>42</sup> Qinee inni irirana amiqimasee iridaqa niqafauna inni naundura nimuqusaki Anutunara rirafa sia maridanoo

<sup>43</sup> Qini qikoofa Anutufa qini diqiqoofaqa qumu marunaqa sia innee qiniara irisee اساسمasee qifiqee animariafanoo. Moo fannoo kasooqaaqee nari manda aidiranafaqaafa anirainaqa innee mina اساسمasee onu afiqee anifaranoo.

<sup>44</sup> Innee kaqa naramooqirana naramooqiranara ridaqa Anutuna amooqiranara sia rimariafanoo.

<sup>45</sup> Innee qiniaree quandafinoo Anutufinnai maasa darira ufa qiannoofee fee qidee sia qianaara. Mooseefa mifa kai inniara nimaarusirufa qiannoo. Innee maasa minasaa kai mundimariasee qimariafanoo.

<sup>46</sup> Innee Mooseena sandufa fifau asaana rimariafanoo mina ufa iridaqau qiniara irini, qiniara akara rumaqoofa maridanoo.

<sup>47</sup> Innee mina ufa ririmma sia irimariafanoo naqimasee qini ufa irifaree. Sia amana irifaranoo.

## 6

*Yisufa faifa tauseenna fasiqa narana nimu ufafa.*

*(Mat 14:13-21; Mak 6:30-44; Ruk 9:10-17)*

<sup>1</sup> Yisufa Yuda maqannaa rakisirawsa mi ufana qimannimiseenoo miqooqari Kariree firaa farumma dinni afainni finau. Mi farummana auqu moo marinau, Tibeeriasa farummee qiqau.

<sup>2</sup> Faiqi anaasee Yisufa amiqi amiqiunara aurimarusa findifunara iriseeqa moomoosa uqanna afaqee fiqau.

<sup>3</sup> Yisufa nammari afainni kaqikaa amuaqunamusaa nari faiqi namu faqa ooruree ooqumarinau.

(Ooqai Isaraee maqannaa nikaaku Isipa maqannaa karafusaki marufanoo Mooseefa qufaqa sipsipa aanaaqiuqa arusee mina fidikauqa tatiiseeqa nari kooqimau raaramasoofofanoo Anutuna qangiroo fannoo narirara anireenoo fidika qafamasee ainaaqareenno Isipa maqannaasa kai ooqa faiqiuqa narinau. Miqooqari Isaraee maqannaasa oosana arasee Anutuna qangiroo ainaaqaroo qoomaqana sakasaida neemariqau.)

<sup>4</sup> Mi ainaaqarara qoomaqana Yeerusaree maqusai qusasaa kambiqararee qimarufanoo mi fasannai Yisufa Kariree nammari afainni marinau.

<sup>5-6</sup> Yisufa nindafoofaqa faiqi anaasee moomoo nari marunnai amuaqunamusaa urimarufanoo nindafeenoo Firipina irammirinoo qinau. Yisufa faasai Firipifa ianinnanara iriseenoo Firipina kaqi amanamasee qafarara maaqi qimasee iranau. Firipi faiqi anaasee moomoo nianaindari uri mariafaqa yai fee misa narana feefauru mandee nimianauree.

<sup>7</sup> Firipifa mi ufana iriseenoo maaqi qimasee qimaminoo qinau. Faiqí anaasee muduka moomoo mariafaqa moomoo ooni maramaree oonu feemu moomoo feefauru mamaree minisaifanoo sia misa nimana marianoo. Moodaa moodaakai namasee naarara fifaranoo.

<sup>8</sup> Yisuna faiqi namukiqari moo mina auqu Andurufa, Simoona moo auqu Peetooroona akaqa marufa mifa mina iriseenoo qinau.

<sup>9</sup> Kumaaraa moo kaqikaafa mai maridanoo narí sakuma feemu moodaanai qisauku faqa noodaanna qaaraqanda faqa uaqee idanoo. Amanee mina mareennaree. Oodaa sia amanaikiannoo.

<sup>10</sup> Yisufa mina iriseenoo qinau. Innee faiqí anaasee qimannimifaqa qusau rasooqnookamasee ooqumariaqa. Qusau moomoo misaqa marinau. Faiqí anaasee mina iriseeqa aiqama ooqumariqau. Faifa tauseenna fasiqa mariqau. Ooni saqarimma auqiqa mariqau.

<sup>11</sup> Ooqu marifufanoo Yisufa mi kumaaraana sakuma feemu qumareenoo Anutunara dufi dufi qimaseenoo doo ruqi ruqimmeeqeenoo faiqí anaasee nimirau. Noodaanna qaara faqa miqikaimasee nimirau. Nimisoofaqa namasoofanoo aiqama nimuaqu inau.

<sup>12</sup> Aiqama nimuaqumasoofofanoo Yisufa narí faiqi namu qimanniminoo qinau. Ataraasa mareeqee uqa ruaqa sia kaqikaana rairaaiani.

<sup>13</sup> Misa irisee eedoo qimasee ataraasa rumasee asaana rumasee qisaukuqara taikasee qikunni ooqu qaaraqanda marasee uqa qumbiqanoo marinau. Mi ataraasana moodaanai qisauku sakuma feemusaaqaraana uqariqau.

<sup>14</sup> Mi fasiqa anaaseesa mina qafoofanoo sia faiqí undeeufanoo naaquqanau. Naaquqamasoofofaqa qiqau ooqai tamummaqara fasiqauqa moo tamummaqara fasiqa kambiqaaninnanara akara rumaqoofa doo maana narimma animaridanoo.

<sup>15</sup> Yisufa misa irirana iriseenoo misa afeekaikamasee qini qumareeqee maa maqana saaqaaraa karaambaiqaika maqimaqee foora qimasee quqaseenoo doo naríara quqasee aqanai ooruree miqoo marinau.

*Yisufa nammari amuaqumau fu ufafa.*

*(Mat 14:22-23; Mak 6:45-52)*

<sup>16-17</sup> Yisufa aqanai fufaqa mi eendanaki sia kafa qumunara mina faiqi namu Kariree nammari afainni ooqureeqa sipaki akaramafiqa nammari dinni afainai Kapeeranaumma maqusai nammari amuaqumau fitaqararee qiqau.

<sup>18-19</sup> Misa kanuqaki fidaqa aikannai nammari ruakairisaidaqa fimarufaqa qaara maqusa fiaaqarana amanasaa kaiqaaqoo kisaagasaa oonuroofanoo ufai firaafa uqinoo nammari faqa misa kanuqa faqa amakaurinai. Amakaurufaqa qafoofanoo Yisufa naríara misunnai kanuqaqa animarinai nammari amuaqumau aiku ramasaida aninai. Misa mina qafamasee tautumasee kaaqa naaquqoofaqa rufiaqau.

<sup>20</sup> Rufioofanoo Yisufa nindafeenoo qinau. Sia rufiaqa, qinee maridaqa.

<sup>21</sup> Misa Yisuna mareeqee sipaki quqasee firaree qu maqusanai aqee kai dauni oonuraqau.

*Faiqí anaasee Yisunara randoo ufafa.*

<sup>22</sup> Yisufa nimu feemuna noosa nimuqoo kai faiqaqau. Kananaana iqaqoofaqa findifi sipara randoosia moodaakai miqoo maruna.

<sup>23-24</sup> Yisuna faiqinamu moo kanuqaki fufaqa Yisunara sia misa faqa fiifoo qimasee Tibeeriasa maqusai maqee maqee nimiru kanuqausa aniroofaqa

doo minauqaki akaramafufaqa Kapeeranaumma maqusai Yisunara randarara minauqaki fiqau.

*Yisufa nariara naaru naaru naranara maqi mariranara qimaqoo ufafa.*

<sup>25</sup> Misa Kariree nammari fitagee muqu afainai oonureeqa Yisuna paqurimasee maaqi qiqau. Oo ufasaa rakisirafa anee yairee fee mai anireenee.

<sup>26</sup> Yisufa iriseenoo quandaki qimanniminoos qinau. Qinee kuqaa anoona ufa inni qimannimidaqa. Qinee qeeqa afeeka uqannifiqaunnaara innee sia minara kai irisee qiniara randaidaqa. Innee feemu namasaafanoo nimuaquinoos maqee qumiqaraaninna ainainara innee minara kai qiniara randee mariafanoo. Yisufa kaifaa quandafufanoos qimanniminoos qinau.

<sup>27</sup> Innee sia dauni putaa ira naranara ainainiaqa. Naaru marirana nimira naranara minara ainainiaqa. Qinee maa naranna qinee faiqi nimaaku inni nimianauro. Qini qikoofa Anutufa qiniara aidimarifanoos nari aiqama ainaina qini daaku qimaqasaina inni amana mi naaru marira naranna nimianauro.

<sup>28</sup> Misa minara iriseeqa Yisuna irammiriqa qiqau. Nanee qimasee Anutuna ainainianauree.

<sup>29</sup> Yisufa iriseenoo maaqi qimasee qimanniminou. Innee maaqimasee Anutuna ainainamaisaqa. Nari aqiqainna fasiqana mina saqarikiqa minasaa naundura rusiaqa. Anutuna ainainirafa miqimminoo maridanoos.

<sup>30</sup> Misa mi ufana iriseeqa kaifaa irammiriqa qiqau. Anee nana moo ainaina firaa ainaina auqainaqa maasa qafamasee aniara kuqaa Anutuna asauku mundira fee qianauree anee nana ainainee auqinnaree.

<sup>31</sup> Maasa qisaifaqausa aadana maqa maaqaki pupusamuara foora aqufuna narana neemariqau. Mooseena akara minara maaqi qinau. Innaarunaidaraa feemu narana mifa niminou maqi qinau.

<sup>32</sup> Miqi qimasoofoanoos Yisufa kafaa qimanniminoos qinau. Mooseefa maru aukuanne pupusamuara maqi ira narana sia mifau nimimarinou. Anutufa innaarunaindari nimimarinou. Sia anoona narana nimimarinou. Doo maa aukuanne qinee qumu marunnaqoo qinisaaqari anoona naranara foora inni nimidanoos.

<sup>33</sup> Anutufa nimunnaranna innaarunaindari qumu maridanoos maa maqanasaa mariasa naaruara marirana nimidanoos.

<sup>34</sup> Mi fasiqa anaaseesa iriseeqa qiqau mi feemuna naaru naaru maasa qiminaqa naa.

<sup>35</sup> Yisufa kaifaa qimanniminou. Qinee kaqi marira nimira narana marunauro maridaqa. Faiqi moo fannoo qinee marunannai anireenoo qini saqarikinafa mifa sia kafaa naranara foora aararaannoo sia kafaa nammariara foora aidiannoo.

<sup>36</sup> Faasai inni qimannimundee kai innee imariafanoo innee qini qiqafaidaqa sia anoonee qimasee qinisaa naundura rusimariafanoo.

<sup>37</sup> Qini qikoofa eedoo qira irirana niminauro misa qinee unnannai nari naundura ubeekama qimaqee faranoos. Miqi mariasa qinee ianannai animariasa sia niqigaanaqa fifaranoos.

<sup>38</sup> Qinee qeeqa qikoona iriranamou innaarunaindari sia qinee qeeqa qumiqa, qipageena ufara mina ainainirara qumiqa minara qinee sia moona aqiqaananoos fuannoo.

<sup>39</sup> Mina ainaina auqarafa maaqinoos marina qini qiminou. Aiqaama qini qikoofa qini qutaqaama qimaqaqaisa kai sia moo fannoo kaqinni fuannoo. Aiqaama uqanna taikara faasaana qinee misa uqeereeqee qeeqa naaru mariranaki quqaanau.

<sup>40</sup> Qini qikoofa maanara ridanoo. Mina amaaku qiqafee mariasa minasaa irirana rusimariasa mi kamuqoo kai naaru marirana mareefaranoo. Taikara faasaana qinee misa uqeereeqee naaru mariranaki quqannisaanaura.

<sup>41</sup> Yuda maqannaasa uriqararausa mi fasiqa anaaseesaki mariasa misa Yisuna ufa irisee mifa nariara innaarunaindari qumuafanausa maridee qidanoo. Miqi qimasee dapi dapi ufa qimariqau.

<sup>42</sup> Misa maaqi qiqau maafa Yisufa Yooseefaana amaaku maridanoo. Mina anausa akausara maasa iridaqa. Naqi fee qidanoo fee nariara innaarunaindaraasee qidanoo fee. Akooqooqaraafa maridanoo.

<sup>43</sup> Yisufa iriseenoo qinau sia innee narinni narinni qiniara manda ufa qiaqa.

<sup>44</sup> Sia faiqi moo fannoo kaqi qinee ianannai anifaranoo. Qini qikoofa rarisameeqee quqainna fasiqa aanaaseesa misa kai qini naundura ubeekama qimaqee faranoo. Misa miqifaqa taikara faasaana misa uqeereeqee naaru mariranaki quqannisaanaura.

<sup>45</sup> Ooqai tamummaqara fasiqa maaqi qimasee akara riqau. Anutufa aiqamausa naamuaqira ufa qimannimiannoo. Qinee mi ufana iridaqa maaqi qimasee inni qimannimidaqa. Aiqamausa qini qikoona ufa iriseeqa mina aamua qira ufa irimariasa qinee ianannai anidaqa.

<sup>46</sup> Sia moo fannoo qini qikoona qafeenoo. Anutufinaindari qumufa kai mifa kai qini qikoona qafeenoo.

<sup>47</sup> Qinee anoona ufa uqanna qimannimidaqa faiqi moo fannoo irirana qinisaa rusimarinafa naaru marirana doo mareenoo.

<sup>48</sup> Qinee kaqi marira feemuara foora marunausa maridaqa.

<sup>49</sup> Ooqai inni nikaaku Mooseena faqa kaasau maqa maaqakina namaru aukuanna innaarunaindaraa feemu minauqa manna fee qimariqau. Mi feemufa ufaasu marifandinna feemuna namasaida kisaagasaa moomoo aukuana mariufaqa kaqi kuqimariqau.

<sup>50</sup> Maa qinee kaqi marira feemuara foora maridee qimarunausa faiqi namasee sia kuqifandinna feemusa maridaqa.

<sup>51</sup> Qinee kaqi marira feemu innaarunaindari qumu marunausa maridaqa. Faiqi anaasee moo fannoo qinee amianna feemuna namasainafa naaru naaru mariannoo. Qinee nimianna feemufa qini qimaqi maridanoo. Maa maqa maaqana afaagasasa mariasa kaqi mariaqeera nimidaqa.

<sup>52</sup> Yisufa miqi qimasoo faqa Yuda maqannaasa nari afumau nari afumau aanoo qidaqa qiqau. Naqimasee maa fasiqafa nari amaqi maasa qiminaqa naanauree qidaqinoo fee.

<sup>53</sup> Yisufa iriseenoo qimannimino qinau. Qinee kuqaa anoona ufa qimannimidaqa. Innee qini faiqi nimaaku qimaqi fidika sia naifanoo sia kaqi marirafa inniki mariannoo.

<sup>54</sup> Moo fasiqa anaasee fannoo qini qimaqi faqa qini fidika faqa namasainafa naaru marirana doo mareenoo, marainara taikara faasaana mina uqeeraanaura.

<sup>55</sup> Qini qimaqi narana uqanna maridanoo qini fidika nammari uqanna maridanoo.

<sup>56</sup> Faiqi anaasee moo fannoo qini qimaqi fidika neemarifa qiniki maridanoo qinee minaki faqa maridaqa.

<sup>57</sup> Qini qikoofa Anutufa kaqi marira oosana faqaafa qini diqiqoo faqa maaqoo maridaqa minasaaqaraa marirana maraidaqa. Miqi kai inoo qini namasainafa qinisaaqaraa marirana maraannoo.



<sup>58</sup> Doo qinee innaarunaindaraa naranara foora maridaqa. Sia inni nisaifaqausa neemaru naranausara foora maridaqa. Misa mina namasee mariiqa aiqama faiqí faiqi oosanamau fiqa kuqimariqau. Maa naranna namaseeqa naaru naaru kaqi marifaranoo.

<sup>59</sup> Yisufa mi ufana Kapeeranaumma maqusai ufa suqira maqaki qimanniminai.

*Naaru naaru mariranaki fifandinna ufausa akiaqa.*

<sup>60</sup> Yisuna faiqi namu akaqausa mi ufana iriseeqa qiqau. Oo yafee maa ufana amana iriannoo fee. Irisee sia auqaqaa ira ufa maridanoo.

<sup>61</sup> Misa miqi qimasee noori runusee randoofanoo Yisufa narí kai iriseenoo qimanniminoo qinau. Innee qini amiqira afeeka ufara rufisee qini minnisararee qidee.

<sup>62</sup> Qinee kafaa uqeeree qumuafannannai ooru fuaqa innee mina qafamasee naqi fee ifaree. Mikari qini ufara kuqaa anoonee qimasee firaqoo rufieefaranoo.

<sup>63</sup> Amaqiara qunnana amaqi fifau ainaina maridanoo sia mina naaqee qiqa maraquna fannoo kai anoona maridanoo mifa kaqi marirana nimidanoo. Qinee qeeqa dookinaa ufa qimannimimarunafa mifa maraquna maridanoo kaqi marirana anoona maridanoo.

<sup>64</sup> Doo qinee akooqoo kooroomasee qimannimunaqa innee akaqausa siamma irimariafanoo. Yisufa narí faiqi namu oosana faasai irinau. Misaki akaqausa mina ufa sia irusa faasai Yisufa nindafanau. Misaki moodaa fannoo ueeqaaninnana faasai qafanau.

<sup>65</sup> Yisufa minara maa ufana atiki kafaa qimanniminai. Qinee minara faasai qunnana sia amana moo fannoo narí kai qinee ianannai aniannoo. Qini qikoofa dadaaqinanoo kai qinee ianannai aniannoo.

<sup>66</sup> Miqi qimasoofaqa Yisuna faiqi namu moomoo Yisuna minnisee sia kafaa mina faqa firara qiqau.

<sup>67</sup> Yisufa miquna nindafamasee quandafi narí faiqi namu (12) qisaukuqara taikasee qikunoo ooqu qaara marasee faiqi namu maqi qimasee qimanniminoo qinau. Innee faqa misa naanna reefaree qini minniqiseeqa fifaree.

<sup>68</sup> Simoona moo auqu Peetooroofa mina iriseenoo Yisuna qimaminoo qinau. Oo karaambaiqa ani minnisee yanasaa fee atooqaanauree. Naaru marirana nimira ufa anee kai marananuananoo.

<sup>69</sup> Doo maqee maasa aniara kuqaa anoonee qidaqa aniara Anutufinaindari naaquqarafa mariifoo qidaqa.

<sup>70</sup> Yisufa iriseenoo kafaa qimanniminoo qinau qinee qeeqa kai qisaukuqara taikasee qikuqara marasee fasiqa naarauna qini faqa nimariafanoo. Moo fannoo inniki afaanna maridanoo.

<sup>71</sup> Yisufa afaannee quna Yudasina nari qumee qimirinau. Yudasifa Keerioota maqusanaafa moo fasiqa Simoona amaaku marinau. Yudasifa Yisuna (12) qisaukuqara taikasee qikunni ooqu qaara marasee faiqinamu misaki marufa marinau. Kasooqaqee mi fasiqafa Yisuna uqeeqasainaqa aunirira saqarisaa arifandinanara Yisufa minara oonu mafi iriseenoo afaanna fee qinau.

## 7

*Yisufa narí ainaina faqa ufaqu ufafa.*

<sup>1</sup> Miqoogari Yisufa Kariree maqa maaqaki nimirinai. Sia Yudeeaa maqa maaqai finai. Yuda maqannaasa miqoo mina arira ufa qimarunara sia finai.

(Ooqai Isaraee maqannaasa Isipa maqusaindari qaara fasiqa niku nisauku taikasee aukuaana nifuru faiqaqa uqiqaana maaqaki fimarufanoo Anutufa innaarunai maridanoo nari afeekannai Isaraee maqannaasa maqasaaqaraasa qumee dadaaqidanoo aandau narana nimimarufaqa naqafimariqau. Kaasau maqa maaqai nini iusa oonu randee nari maqasaa Isaraee maqasaa animaridaqa aukuaana aukuaana Yeerusareenni suqufidaqa uqiqaanarasaida faiqeeunara iriseeqa minara afaarurumanaida nari naambeeqa nari naambeeqa uqiqaana maqa usakasaida dinni qisauku taikasee dinni ani qaara marasaida (7) faasaana minaki faiqaida qoomaqa sakasaida namasaida minara susu imariqau.)

<sup>2</sup> Yuda maqannaasa qoomaqa firaafa uqiqaana maqa qoomaqa adeedi roofaqa Yisuna akaqaafasaa Yisuna qimamiqa qiqau.

<sup>3</sup> Maa Kariree maqa maaqa minniseenana Yudeeaa maqa maaqaki fua. Oonurainaga miqoo ani ufa irimariasa firaa ainaina auqee mariannana misa faqa uqannifiqaa.

<sup>4</sup> Faiqi moo fannoo nari auqu uqeeraanee qimasee sia moo ainaina auqee mariana kukeeqaidanoo aiqama ainaina kooroomasainaga aiqamausa mina qafaqa, anee faqa miqiaqaana. [<sup>5</sup> Yisuna akaqaafasaa sia Yisunara irimariqau. Fifau maqasaa fasiqa fee qimariqau.]

<sup>6-7</sup> Yisufa iriseenoo qimannimino qinau. Qini anoona aukuaana sia adeedi ranoo maridanoo. Innee faiqi faiqi aiqama faasaanara maasa aukuanee qimariasa mariafanoo. Maa maqa maaqanasaaqaraasa sia inniara fidiqaaidanoo. Qiniara kai fidiqaaidanoo. Qinee maqee maqee misa manda ainainara kooroomannimaqaunaqa minara kai qiniara fidiqaamaqimaqee mariafanoo.

<sup>8</sup> Yisufa nari akaqaafasaa kaqi qimanniminai. Innee kai Yeerusareenni ooru fuaqa. Qinee sia mi qoomaqanara inni naanna ree akooqoo ooru fuanauara qini anoona aukuaana sia qusa raidanoo.

<sup>9</sup> Yisufa miqi qimaseenoo miqoo Kariree maqa maaqaki kaqi marinai.

*Yisufa uiqaana maqaki qoomaqa neemaru ufafa.*

<sup>10</sup> Mina akaqaafasaa Yeerusaree qoomaqai ooru fufanoo Yisufa inaaqianna qumee moo aatata ooru finai.

<sup>11</sup> Yeerusaree maqusa qoomaqaki Yuda maqanna rakisirausa Yisunara randoosia nari qimami nari qimami qidaqa qiqau. Mifa yai fee marino fee.

<sup>12</sup> Qimasooafaqa faiqi anaasee Yisuna aufakiana qumee nari qimami nari qimami qimariqau. Akaqausa Yisunara amiqira fasiqee qimariqau. Akaqausa faiqi anaasee nikaru qimari fee qimariqau.

<sup>13</sup> Sia moo fannoo Yisunara akooqoo qimariqau. Nari Yuda maqanna uriqararausara rufiasee qumee kai qimariqau.

<sup>14</sup> Qoomaqa taikarara imarufanoo Yisufa Yeerusaree amaana maqaki keeqafino faiqi anaasee ufa qimanniminai.

<sup>15</sup> Yuda maqanna faiqi firaasa mina qafamasee firaqoo tautiqa qiqau. Maa fasiqafa sia sukuraki keeqeemarifa. Naqi fee mandeenoo firaa irirana iridanoo fee.

<sup>16</sup> Yisufa minara iriseenoo aiqamausa qimannimino qinau. Qinee qimannimira ufa sia qeeqaindi maridanoo qini diqiqoofa Anutufa mina ufa qimannimidaqa.

<sup>17</sup> Qini ufa Anutunaindi fee qinee qeeqa fee qidee. Faiqí moo fannoo Anutuna iriranamau firarimarifa qini ufara Anutufa fee qiannoo.

<sup>18</sup> Faiqí moo fannoo narí ufa kai qidanoo narí auqu kai uqeeraidanoo. Faiqí moo fannoo narí aqiqainna fasiqana auqu uqeerararee qimarifa mifa kuqaa ufa qidanoo, sia nikaruqirafa minaki maridanoo.

<sup>19</sup> Mooseefa sandufa akara rumaqoona inni nimufaqa innee mina qumaree mi mau fimarunausee qimasaidaqa fifau qidaqa inniki moo fannoo sia mi mau fimariafanoo. Innee moo mau fidaqa qini kuqa darirara qimariafanoo.

<sup>20</sup> Yisufa miqi qimasooafaqa misa aiqama maaqi qimasee narí qimamiqau. Ani aunduraki afaanna marifana anee miqi qimariananoo. Yafee moo fannoo ani kuqaruannoo fee sia moo fannoo.

<sup>21</sup> Miqi qimasooafanoo Yisufa maaqi qimasee nári qimannimainau. Qinee faiqí sia auqaaqaa ira ainainna moodaa auqaunaqa innee aiqama tauti-afanoo.

<sup>22</sup> Mooseefa faiqi aanaaqiuqa nipata aukimarunara fainanduqu nisaagee qimarinau, innee minara irisee maasa amaana Saririqasaa miqimari-afanoo. Sia Mooseefau mi oosanna aranau. Narí akeeku akaakundi mareenoo miqi qinai.

<sup>23</sup> Innee Mooseena sandufa rukiaanoo qimasee faiqi aanaaqiuqa maasa amaana Saririqasaa fainanduqidaqa nipata aukimariafanoo innee amaana Saririqasaa kaqi faiqi nipata aukidaqa nanaree Saririqasaa aurimari fasiqana idaaqamasaunnaara innee aanoo qida fee.

<sup>24</sup> Innee fifau dapi iriranasaa faiqí ufa nimimarifanoo mina minnisaaqa. Kuqaa anoona iriranannai kai faiqí andeeqaaqa.

*Faiqí anaasee Yisunara asauku mundira fee qimasee iroo ufafa.*

<sup>25</sup> Yeerusaree maqusanaasa Yisuna qafamasee mina ufa iriqa maaqi qiqau. Maana misa kuqariraree qidaqa.

<sup>26</sup> Qafaa mifa faiqí qambaana faiqí nifusaa kikiqamambi ufa qimannim-imarifaqa sia misa mina qumaraannee qidaqa. Abee maasa uriqararause faqa minara kuqaa Anutuna asauku mundirafee fee qidee.

<sup>27</sup> Anutuna asauku mundirana oosana maasa siamma irianaara. Kaqi tautumannimaqaannoo. Maasa maa fasiqana oosana iridaqa, Nasareteen-daraafa maridanoo.

<sup>28</sup> Yisufa firaa amaana maqaki faiqí anaasee qimannimidanoo mi ufana iriseenoo maaqi qimasee firaaqoo qimannimainau. Kuqaa fee innee qiniara iridee. Qinee yaindaraasee marunaqee innee kuqaa qiniara irida fee. Sia qinee qeeqa kai animaridaqa qini diqifaifa mifa kuqaa anoona maridanoo. Innee kuqaa minara sia irimariafanoo.

<sup>29</sup> Qinee minara iridaqa qinee mindari qumuafanausa mifa qini diqiqoofaqa qumumaridaqa.

<sup>30</sup> Yuda maqannaa uriqararause mi ufana irisee qumarararee qimasooa minnisaaqau. Yisuna kuqira aukuaana sia adeedi roofanoo Anutufa qumee misa ititannisoona minnisaaqau.

<sup>31</sup> Faiqí anaasee moomoosa Yisuna kuqaa Anutuna asauku mundira fee qiqau. Misa maaqi qimasee narí qimami narí qimami qidaqa qiqau. Asauku mundirafa anireenoo naqi fee mandeenoo maa fasiqana uraaqarainanoo fee moomoo faiqí dadaaqimari firaa ainainna uqan-nifiqaannoo fee. Sia amana. Doo maana mifa uqanna maridanoo.

*Amaana maqasaa rakisimarusa nári frisuaiqauqa Yisuna rumbaaqeera niqiqoo ufafa.*

<sup>32</sup> Faiqí anaasee miqi qimasee narí qimami narí qimami qimarufaqa Farisai amaana ufa qimarusa iriseeqa tautumasee amaana maqasaa rakisimarusunnaai oonuree qimannimiqa qiqau. Qimannimisoofaqa misa amaana maqasaa rakisimaru poorisaua qimannimiqa. Innee ooru Yisuna rumbasee maree aniaqa.

<sup>33</sup> Misa oonuroofanoo Yisufa maaqi qimasee faiqí anaasee qimannimarinau. Qinee qusasaa inni faqa mariana. Quqaseeqa qusasaa qini diqifoofinnai fuanaura.

<sup>34</sup> Innee qiniara randee sia paqurifaranoo qinee fuanannai sia innee amana fifaranoo.

<sup>35</sup> Yuda maqanna uriqararaua mi ufana iriseeqa narí qimami narí qimami qiqau. Mifa yai fee finaqa maasa sia amana fuanaree. Mifa aanaamuru Kirisa maqanna mariannai fee fuannoo fee. Yuda maqannaasa miqoo mariasa faqa maridaqa Kirisa maqannaasa narí ufa qimannimiraree fidanoo fee qida qinoo fee.

<sup>36</sup> Mifa qinoo innee qiniara randasee sia paqurifaranoo. Qinee fuanannai innee sia fifaranoo. Mina ufoosana sia maasa iridaqa.

*Arumufaqa nammariara maqi qumirarakai imarina mina ufa.*

<sup>37-38</sup> Uqiqaana maqa qoomaqa taikara faasaana uriqarara faasaanee qiqau. Mi faasaana Yisufa findifinoo faiqí anaasee firaa kari qimannimarinau. Yafasiqa anaasee fee nammariara aididanoo fee qinee iannaqoo nammari uqanna ani naa Anutuna tamummaqara fasiqa moo ooqai maaqi qimasee akara rinau. Kaqi marirana nimira nammari misa nimuqusa ookiqari ururee fuannoo fee qinau. Yafasiqa anaasee fee qiniara kuqaa anoonee qinafa misa nimuqusa ookiqari mi nammarifa ururee fuannoo.

<sup>39</sup> Yisufa nammariara quna Anutuna maraqunara nammari kikiqa usinau. Kasooqagee Yisunara kuqaa Anutuna faiqi fee qifandinausa misa mi maraqunna mareefaranoo. Mi aukuanna Yisufa kaqi maru aukuanna sia maraquna nimirafa marinau. Yisufa kuqiranakiqari findifinoo afaqa areenainanoo miqoo narí afeeka maraquna nimiannoo fee qinau.

*Faiqí anaasee mina Yisunara ufa rainoo ufafa.*

<sup>40</sup> Faiqí anaasee Yisuna ufa iriseeqa qiqau. Maafa Anutuna tamummaqara fasiqa kambigaannoo fee qufa maafa mifa maridanoo.

<sup>41</sup> Akaqausa minara maafa Anutuna asauku mundira fee qiqau. Akaqausa maaqi qimasee furufaramasee qiqau. Anutuna asauku mundirafa sia Kariree maqusakiqari kambigaannoo.

<sup>42</sup> Tamummaqara fasiqa akara minara Anutuna asauku mundirafa Dafidina ati mariannoo. Dafidina ooqeenaa maqusaki Beetareeqemma miqoo kambigaannoo fee qiqau.

<sup>43</sup> Faiqí anaasee misa rainafufaqa akaqausa moo ufa qufaqa akaqausa moo ufa qufaqa qimariqau.

<sup>44</sup> Akaqausa doo Yisuna qumarasee rumbaannee qimasee sia qumaree rumbaqa.

*Yuda maqanna faiqí firaasa Yisunara sia Anutuna faiqi fee qu ufafa.*

<sup>45</sup> Amaana maqasaa rakisira poorisauqa Yisuna ufa kaqi irisee amaana maqasaa rakisirausa faqa Farisai amaana ufa qimariasa faqa maruqoo oonuroofaqa iridaqa qiqau. Naqaa fee ifaqee sia rumbasee maree anidee.

<sup>46</sup> Poorisauqa qiqau, sia moo fasiqa ufa fannoo maa fasiqana aanna raidanoo.

<sup>47-48</sup> Farisai amaana ufa qimarusa mina iriseeqa niqidaqa qiqau. Doo mi fasiqafa inni faqa nikaruqinoo fee. Maasa uriqararausakiqari moo fannoo mina ufa irinoo fee. Farisai amaana ufa qimarifa moo fannoo irinoo fee. Sia uqanna iria. Maasa Mooseena sandufa irimarunausa maridaqa.

<sup>49</sup> Maaqooqaraasa kaqiqee fasiqa anaasee Mooseena sandufa sia irianara Yisunara anoonee qidaqa. Anutuna aqira ufa misasaa maridanoo.

<sup>50</sup> Nikoodeemusafa mifa faqa misaki marinau. Mifa ooqai qumee Yisufinnai fimarufa marinau.

<sup>51</sup> Mifa misa Yisuna aqira ufa iriseenoo Yisuna saaroo qinau. Mooseena sandufa maaqimminoo maridanoo. Sia fifau faiqí moo arirafa maridanoo. Mina ufa naaree irisee mina mandainaina marinaqa minara qimasee aruananoo amana mariannoo qinau.

<sup>52</sup> Misa mi ufana iriseeqa Nikoodeemusana aqidaqa qiqau. Anee faqa Kariree maqannaa fee maridane. Anee tamummaqara fasiqauqa akarauqakiaqa asaandarumasee iria. Sia moo tamummaqarafa Kariree maqasaa kambiqannoo. Miqi qimasee aiqama daraani mambufanoo Yisufa amaana maqakiqari raudamakufanoo Oorifa aaganai oorufinau.

## 8

### *Anaasee moo fannoo ummuarimaruna paquru ufafa.*

[<sup>1-2</sup> Oorifa aaganai kaqimma ooru faiqeenoo iqaqoofanoo Yisufa Yeerusa-ree firaa amaana maqaki kaifaa ooquree keeqafufaqa faiqí anaasee moomoosa suqufufaqa mina fiqumma marufanoo ooqumarifi Anutuna ufa qimannimarinau.

<sup>3</sup> Mooseena sandufa akoofasauqa faqa Farisai amaana ufa qimarusa faqa anaasee moo fasiqa qummuari marufaqa aqee oonu qafamasee qumaree doo maree aniqau. Yisufa maruqoo mini quqaseeqa maaqi qimasee qimamiqau.

<sup>4</sup> Oo ufasaa rakisira maa anaaseefa qummuari marifaqa maasa qafamasee qumaree anidaqa.

<sup>5</sup> Mooseena sandufa miqiasara oonisamu kai nariqa nini iqa kuqa narusaqee qinoo maridanoo. Anee minara nana ufee qidanee.

<sup>6</sup> Misa mi ufanannai puteera foora fufidaqa qiqau. Yisufa aruanifeera qimasaida miqi marufanoo Yisufa nari iriseenoo fifau kummaramafufanoo asaukunoo maqa akara rinau.

<sup>7</sup> Mifa maqa fifau akara rimarufaqa misa fuki faaki qidaqa mi anaaseena oonisamu aruanauree sia fee aruanauree ritidaqa ireemariqau. Kaqikaaqoo marikinoo Yisufa findifi qimanniminau. Yafee inniki moo fannoo numoo siainafa mifa kai oonisamu indaaru aunaa atufinoo maa anaaseena aruannoo fee.

<sup>8-9</sup> Yisufa miqi qimaseenoo kafaa kummaramafinoo maqa akara rimarufaqa doo misa moodaa kai qaara kai idaqa nari aqaranara nisaurusee findimeeqaida doo fifainimariqau. Faiqí firaasa naaree fufaqa kafaa miqoo oorudupirausa fufaqa kumaaraa inaaqianna doo fifiqau. Misa fifufanoo mi anaaseefa kai miqoo kikiqinoo marinau.

<sup>10</sup> Yisufa findifinoo mi anaaseena irammirinau, misa yai fee fifee. Sia fee moo fannoo ani kuqira ufa amianinafa maridanoo fee. Aiqama fifee.

<sup>11</sup> Mi anaaseefa qinau. Oo rakisira sia kuqira ufa moo fannoo qimimarifa maridanoo. Yisufa iriseenoo qinau. Doo qinee faqa sia kuqira ufa ani amiana. Doo fua, sia kafaa manda oosana maraa.]

*Yisufa maa maqa maaqanaki qoomara foora qu ufafa.*

<sup>12</sup> Moo kari Yisufa Yeerusaree amaana maqaki faiqí anaasee maaqi qimasee qimanniminau. Qinee maqasaaqaraasa qooma maridaqa. Yafasiqa aanaaseesa qini faqa finausa misa kaqi marira qooma mareefaranoo sia uqanna asukunaki fifaranoo.

<sup>13</sup> Farisai amaana ufa qimarusa mina iriseeqa qimamiqa qiqau. Anee aneennara kai ufa qidana aneenna auqu uqeeree mariananoo. Miqianna ufafa sia anoonaidanoo. Fifau ufa kai qimariananoo.

<sup>14</sup> Yisufa mina iriseenoo qinau. Kuqaa qinee qeeqaraa ufa qidaqa. Qinee miqi qidaqa anoona ufa kai qidaqa. Qinee qeeqa kambiqafi aniafannanara iridaqa qeeqa fuannanara iridaqa. Innee sia qinee kambiqaaafannanara irimariafanoo.

<sup>15</sup> Innee faiqí faiqi ufa irisee dapi iriranannai faiqí anaasee rainannimaqee mariafanoo. Sia qinee moo fasiqa aanaaseera rainannimaqee marunausa maridaqa.

<sup>16</sup> Qinee akaqausara rainannimaqaidaqau andeeqasee rainannisaunaiqini. Sia qeeqaraafau maridaqau ufa nimidaqau. Qeeqa qikoofa qini diqiqamaqoona faqa maridaqa dadaaqi marifaqa ufa qimannimidaqa.

<sup>17</sup> Inni sandufa akara ufa moo maaqimminoo maridanoo. Qaara fasiqa moo ainaina nári nifunnai qafamasee munu kooroo qimasaiifaqa aiqamausa minara anoona ufa fee qifaranoo.

<sup>18</sup> Qinee qeeqaraa ufa qidaqa qini qikoofa qini diqiqoofa mifa faqa qini dadaaqifaqa anoona ufa tia qimannimidaqa.

<sup>19</sup> Miqi qimasooifaqa Farisai amaana ufa qimarusa maaqi qimasee irammiriqau. Ani akoofa yai fee maridanoo ani dadaaqidanoo fee qufanoo Yisufa qinau. Innee qiniara faqa qini qikoonara faqa sia irimariafanoo. Innee qiniara irifau qini qikoonara faqa irini. Innee sia maaqandara irimariafanoo.

<sup>20</sup> Yisufa maa ufausa Yeerusaree fraa amaana maqaki qimannimarinau. Mi amaana maqanaki oosirafa moo marinau. Amaana maqaki quqee maru munnimma difaanifa minaki marufanoo mi oosiranaki Yisufa maridanoo mi ufausa qimanniminau. Misa Yisuna qumaraanee qimasee sia qumaraqau. Sia mina kuqira aukwana adeedi ranoo marunara Anutufa qumee rafaqafusoofaqa sia qumaraqau.

*Yisufa qinau, qinee fuanannai innee sia fifaranoo qimaqoo ufafa.*

<sup>21</sup> Moo kari Yisufa maaqi qimasee Yuda maqanna uriqararaura qimanniminau. Qinee moosaa fuaqa qiniara randainaisia inneeqa mandainainaki kuqifaranoo. Qinee fuannaqoo innee sia amana fifaranoo.

<sup>22</sup> Yuda maqannaasa uriqararaura mi ufana iriseeqa narí qimami narí qimami qiqau. Mifa maasara sia narí innai fuaqeera qidaqinoo. Maasa sia mina ufa iridaqa. Mifa narí fee narí aruannoo fee miqi qidanoo fee.

<sup>23</sup> Yisufa iriseenoo qimanniminau. Innee mindaraasa mariafanoo qinee mirindaraasa maridaqa. Innee maa maqanasaaqaraasa mariafanoo qinee sia maa maqanasaaqaraasau maridau.

<sup>24</sup> Qinee minara qunnana innee inneeqa mandainainaki kuqifaranoo. Innee sia qinee marunannara anoonee qimariafanoo minara kuqaa innee inneeqa mandainainaki kuridifaranoo.

<sup>25</sup> Misa uriqararaura mina iriseeqa qiqau. Anee yafee maridane qufanoo Yisufa qinau. Indaru qimannimianausa misa kai maridaqa.

<sup>26</sup> Qinee moomoo ainainara inniara qimannimiana. Qini diqiqamaqoofa mifa anoona ufa kai qimarifa mifinaindaraana kai inni maa maqanasaa mariaasa qimannimidaqa.

27 Yisufa narí akoona aufakiana qimannimimarufaqa siamma iri-mariqau. Minara Yisufa kaifaa maaqi qimasee qimanniminau.

28 Kasooqagee innee qini faiqi nimaaku uqeereeqee aunirira saqarisaa quqaqisaseeqa mikamuqoo qinee mariaafannanara irifaranoo. Qini qikoofa qimaqimiqoo ufana kai inni qimannimidaqa. Mikari innee minara faqa amiqimasee irifaranoo.

29 Qini diqiqoofa qini faqa maridanoo. Qinee mina aidira oosanamau kai fidaqa minara sia minniqisaifaqau qeeqaraafau maridaqau. Mifa qini faqa maridanoo.

30 Faiqi anaasee moomoosa mi ufana iriseeqa Oo kuqaa mifa Anutuna asauku mundira fee qimasee minasaa mundiqau.

*Rumbarausara faqa idukirausara faqa qimaqoo ufafa.*

31 Yisufa minara iriseenoo qimanniminau. Innee qini ufa qiman-nimunnana irisee mi mau maqee maqee fifaqa kuqaa qini faiqi namu marifaranoo.

32 Innee kuqaa anoona ufa kai irifaranoo. Anoona ufa fannoo inniqa mandainainakiqari inni idukuannoo.

33 Misa mi ufana iriseeqa qiqau. Maasa Abarahaamana ati maridaqa, sia moona rumbaranaki maridaqa. Nanaree anee maasara idukuagee qidanee.

34 Miqi qufanoo Yisufa kafaa qimanniminoo qinau. Qinee kuqaa anoona ufa inni qimannimidaqa. Faiqi moo fannoo mandoosana maree marifa mi manda oosanafa mina rumbaqaifa maridanoo.

35 Faiqi moo fannoo moona ainaina iinoo oosana oosana ainaina narindira foora iinoo. Kasooqagee doo ainaini taikaseenoo mi aiqama ainainna narí amiseenoo doo kaqisamu fuannoo. Mi ainainna faqaana faiqi fannoo sia amana taikaannoo kaqi narí akoona amaaku mariannoo kaqi narí akoona amaaqa maqa finoo mina qumiasana maraseenoo sia ainainira faiqi naanna reenoo taikaannoo, kaqi miqoo mariannoo.

36 Qinee Anutuna amaaku maridaqa. Qinee inniqa manda oosanakiqari idukusaanaqa innee kuqaa idukiqa marifaranoo.

37 Innee Abarahaamana ati mariafaqa qinee minara iridaqa sia innee mina aanna reemariafaqa, qini ufa sia marararee qidaqa qini dariraree qimariafanoo. Abarahaamafa sia miqi marufa minara innee sia Abarahaamana faiqi namu uqanna mariafanoo.

38 Qini qikoofa qini uqaqifiqoona kai inni qimannimidaqa. Innee mina minniseeqa inneeqa nikoona moo Sadannana ufa irimariafanoo.

39 Misa mi ufana iriseeqa maaqi qiqau. Maasa qikoofa Abarahaamafa maridanoo. Yisufa minara qinau. Innee Abarahaamana faiqi namu maridaqau mina ufamau fini.

40 Qinee qeeqa qikoonasaqarara ufa kai inni qimannimimarunaqa innee quandafiqqa qini darirara qimariafanoo Abarahaamafa sia mi oosanna maranau.

41 Innee inneeqa nikoona uqanna oosana maridaqa miqi mariafanoo. Misa mi ufana iriseeqa qiqau. Maasa sia qummuara faiqifau maridaqau. Maasa moodaa fasiqa faiqi Anutufa narí uqanna maasa qikoofa maridanoo.

42 Yisufa misa ufa iriseenoo maaqi qimasee qimanniminau. Anutufa inni nikoofa marinaqau kuqaa innee qiniara rini. Qinee Anutufinaindari maaqoo qumumaridaqa. Qinee sia qeeqafau qumiqau mifa diqiqoofaqa qumiqiafana.

43 Innee naqaa fee ifaqee sia qini ufa oosana iridee. Innee qini ufa iriafanoo nikooqaidanoo miqidaqa sia irimariafanoo.

<sup>44</sup> Afaanna nikoofa Sadannafa maridanoo. Innee mina faiqi namu maridaqa mina aanna ree mariafanoo. Ooqaindari faiqi kuqannarimarufa maridanoo. Sia anoonufakifau mapukinoo maridanoofau. Anoonu ufa sia uqanna minaki marifa maridanoo. Mifa unna ufa qinoo nari oosanamau kai fidanoo. Mifa unna ufa qimarifa maridanoo unna ufa qimariasa nikoofa maridanoo.

<sup>45</sup> Qinee kuqaa anoona ufa kai qimannimi marunnaara innee sia irimariafanoo.

<sup>46</sup> Qini manda oosana moodaa maridanoo fee sia fee maridanoo. Innee qafee qiqa qimaqimiaqa. Qinee kuqaa anoona ufa kai inni qimannimunaqa naqi fee ifaqee innee sia minara anoonee qidee.

<sup>47</sup> Anutufa dadaaqifaqa mina faiqi namu araamuqmaakaiki mariasa kai Anutuna ufa irifaranoo. Innee sia Anutunaindaraasau mariafanooofau sia qini ufa irimariafanoo.

*Yisufa Abarahaamanara qimannimu ufafa.*

<sup>48</sup> Yuda maqannaa uriqararausa Yisuna ufa iriseeqa aqiqa qiqau. Anee manda Samaria maqannaa mariananoo afaanna moo ani aunduraki marifa mariananoo. Maasa kuqaa fee qidee, sia fee.

<sup>49</sup> Yisufa iriseenoo qinau. Afaanna sia qiniki maridanoo. Qinee qeeqa qikoona auqu uqeeraidaqa innee qini duqu maqasaa quqemariafanoo.

<sup>50</sup> Qinee sia qeeqa duqu uqeeraranara randaidaqa. Moo fannoo qini duqu uqeerarafa maridanoo. Innee qini duqu maqasaa quqemariafanoo Anutufa kai qini dadaaqinoo inni rafaqa fuannoo.

<sup>51</sup> Yafasiqa anaasee fee qini dookinaa ufa irisee marainafa mifa sia kuquannoo naaru mariannoo.

<sup>52</sup> Yuda maqannaa uriqararausa mi ufana iriseeqa qiqau. Doo maasa ani oosana iriseeqa anee kuqaa afaanna faqaafa mariananoo, Abarahaamafa maasa qikoofa doo ooqai kuqinau. Anutuna tamummaqara fasiqauqa doo kuqiqau. Anee naqi fee masee maa ufana qidanee qini ufa irimariasa sia kuqifaree qidanee.

<sup>53</sup> Maasa qikoofa Abarahaamafa kuqinau. Anee mina uriqarara fee maridanee qidanee. Anutuna tamummaqara fasiqauqa maqasaa fasiqauqa kuqufufana anee aneennaraa naqira fasiqee maridee qidanee.

<sup>54</sup> Miqi qimasooфанoo Yisufa qimanniminu. Qinee qeeqa duqu fifau uqeerasaana sia anoonaikiannoo, fifau mariannoo. Qini qikoofa Anutufa qini duqu uqeeraidanoo dadaaqidanoo, innee unna qimasee minara maasa Anutunee qimariafanoo.

<sup>55</sup> Innee ooqaindari sia mina auqu irimariafanoo. Qinee mina auqu iridaqa. Qinee minara sia iridau inni naanna reemarunausa unna ufa qimarunausee qini. Qinee qeeqa qikoonara iridaqa mina ufamau fimarunausa maridaqa.

<sup>56</sup> Inni nikoofa Abarahaamafa ooqai kaqi maridanoo qinee magee marunnaara kaaqa qafaaqaa imarufa marinau. Doo qiqafamaseenoo asasinu.

<sup>57</sup> Yuda maqannaa uriqararausa mi ufana iriseeqa maaqi qiqau. Anee kumaaraa mariananoo. Anee naqimasee Abarahaamana qafanee inau, ooqai mariufa maridanoo.

<sup>58</sup> Yisufa minara maaqi qimasee qimanniminoo qinau. Abarahaamafa sia kambiqoo aukuanu qinee maa marunausa mikamuqoo mariqiafana.

<sup>59</sup> Yuda maqannaasa mina iriseeqa oo maa fasiqafa nariara Yaawee fee qidaqinoo qimasee aanoomasee oonisamu qumaree aruaneerufanoo mifa kukeeqakinoo amaana maqakiqari raudamaki moosaa finau.



## 9

*Yisufa innaamunaindari afu qimbarana afu maqaisoo ufafa.*

<sup>1</sup> Yisufa aatata fidanoo moo fasiqa mina anoofa innaamunai afu dimbarana maqaqoona qafanau.

(Mi aukuanu nifu niku mandaikirausauqa mai mariandee sia amana ainainamasee naaqa imariqau. Faasaana kaqi marida narana feefaurira munnimara ireemarufaqa nimimarufaqa marasaida neemariqau misa nuqu iramasaida neemariasee qiqa.)

<sup>2</sup> Yisuna faiqinamu mi afu qimbarana qafamasee Yisuna irammiriqa qiqa. Oo ufasaa rakisirafa maa fasiqafa yana mandainainasaa fee maaqinoo afu dimbanoo maridanoo fee. Narí akoona anoona mandainainasaa fee narindisaa fee miqinoo maridanoo fee.

<sup>3</sup> Yisufa iriseenoo qimannimino qinai. Sia narí anoona akoonasaa qaraanau, sia narindisaafau afu dimbanoo maridanoofau. Anutuna afeeka kasirana qinikiqari kooroo ianifeera mina afu dimbanoo maridanoo.

<sup>4</sup> Qini diqiqoofa qini qimiqa ainainirana sia amana asukunaki auqaanura maasa faasaana auqaanura. Doo kaqikaqoo eendinaqa sia miqoo faiqi moo fannoo auqaanoo.

<sup>5</sup> Qinee maa maqa maaqanaki maridaqa misa qooma maridaqa, kaaqa qamannimaqaanura.

<sup>6</sup> Miqi qimasee Yisufa maqasaa aqaara fidaquseenoo asaukukoo doon- aikamaseenoo afu dimbara fasiqa afusaa akuseenoo qimaminoo qinai.

<sup>7</sup> Doo fua. Doo oonu Sirooamma farummaki aneenna oori afuakai ruquanee qinai. Sirooamma farumma auqu oosana niqiqamaqai farumma fee qinoo marinau. Mi afu qimbara fasiqafa eedoo qimasee oonu narí oori afuakai ruqufanoo afu aiqamaqara amiqimasee qoofanoo oonu quandakufanoo sandee kafa aninau.

<sup>8</sup> Mi fasiqana aqoonausa mina qafamasee moomoosa mina qafeemarusu mina qafamasee qiqa. Maa fasiqafa maaqoo maridanoo narana munnimara ireemari fasiqa fee mifee.

<sup>9</sup> Akaqausa doo mifa kai fee qiqa, akaqausa moo fannoo mina fooqaa fee qiqa. Mi fasiqafa narí irisee qinai. Qinee qifu dimbarausa maaqoo marunausa maridaqa.

<sup>10</sup> Misa mina iriseeqa iraqau. Naqimasee afu maqeenee qufanoo mifa qinai.

<sup>11</sup> Faiqi moo mina auqu Yisufa qaqaara fidiseenoo doon- aikamaseenoo qini qifuki akuseenoo doo fua Sirooamma farummaki oori nammari uqa qufaqa miqi qifaqa nammari uqusaunanoo doo qifu maqeenoo.

<sup>12</sup> Miqi qimaasoofaqa misa qiqa. Miqimasai fa yai fee finoo fee qufanoo mifa sia qinee irida fee qinai.

*Farisai amaana qimarusa Yisufa afu qimbarana afu maqaisoonara randoo ufafa.*

<sup>13</sup> Miqi qimasooofaqa misa mi fasiqana afiqeeqa Farisai amaana ufa qimarusa uqannifiqanau.

<sup>14</sup> Mi faasaana Yisufa mi fasiqana afu maqoo faasaana misa amaana Saririqa marunara Farisai amaana ufa qimarusa marunnai afiqee fiqa.

<sup>15</sup> Farisai amaana ufa qimarusa mi fasiqana afu maqoonara iroofanoo qinai. Mifa doona qini qifusaa akusaifaqa doori nammari uqunanoo qifu maqeenoo.

<sup>16</sup> Farisai amaana ufa qimariasa akaqausa Yisunara maaqi qiqa. Maa fasiqana afu maqai fa sia Anutunaindarifau amaanasaa ainainimarifa

manda fasiqa maridanoo. Akaqausa mina iriseeqa qiqau. Naqimasee mandainaina maree marinafa maa firaa ainainna amiqira ainaina auqararee sia amana fee qimasee mi ufanannai rainaqau.

<sup>17</sup> Miqi qimasee Farisai amaana ufa qimarusa afu dimbarana irammiriqa qiqau. Anee mi fasiqana ani afu maqainaree qidanee. Anee minara nana ufee qidanee. Afu dimbarafa mina iriseenoo qinau. Mifa Anutuna tamummaqara fasiqa maridanoo fee qinau.

<sup>18-20</sup> Yuda maqannaasa uriqararausa mina iriseeqa maaqi qiqau. Maana sia afu dimbarafau moo fasiqa maridanoo qimaseeqa misa mina anoona akoona naaramasee irammiriqa qiqau. Maa fasiqafa inniqara faiqi fee. Kuqaa fee anee mina maqoonna kari afu dimbaranee maqanau. Naqimasee maqee afu maqeenoo fee qufaqa mina anoofa akoofa uriqararausa amaana maqaki keeqeemariana qaoo qimaqiseefoo qimasee rufieeqa qimannimiqa qiqau. Maa fasiqafa maasa qimaaku maridanoo maasa minara iridaqa. Ooqai aanaaqisaa innaamunai miqirana maqaafanafa maridanoo maasa minara faqa iridaqa.

<sup>21</sup> Mina afu maqainara yafasiqa fee mina afu maqeenoo fee siamma iridaqa faiqi maridanoo irammirifanoo qimannimiannoo.

<sup>22</sup> Yuda maqannaasa uriqararausa Yisunara faasa maaqi qimariqau. Faiqi moo fannoo Yisunara Anutuna asauku mundira fee qinnana maasa amaana maqakiqari aqiqaananoo raudamaki aqoosai finoo sia kaifaa keeqaannoo.

<sup>23</sup> Mi ufanara afu dimbarana anoofa akoofa doo faiqimmifoo nari iraaqee qiqau. Misara rufisee miqi qiqau.

<sup>24</sup> Yuda maqannaasa uriqararausa mina iriseeqa afu dimbarana kafa aaramasee qiqau. Anee Anutuna afusaa kuqaa anoona ufa kai maasa qimannimia. Ani afu maqaifa mifa mandainaina maree marifa maridanoo.

<sup>25</sup> Afu dimbarafa mina iriseenoo qimanniminou. Mi fasiqafa mandainaina maree mari fee sia qinee mina oosana iridaqa. Moodaa ainainara kai qinee iridaqa qinee qifu dimbarausa mariafanausa maqee qini qifu maqee marifaqa maridaqa minara kai qinee amiqimasee iridaqa.

<sup>26</sup> Misa mina iriseeqa kaifaa irammiriqa qiqau. Mi fasiqafa nana ainainee auqu amifanoo ani afu maqeenoo fee.

<sup>27</sup> Afu qimbarafa niqinoo qinau. Doo faasai qimannimisaunaqa sia irimariafanoo. Nanaree innee kaifaa qiana irifaree innee faqee mina faiqinamukifaree.

<sup>28</sup> Misa mina iriseeqa aanoomasee mina aqiqa qiqau. Anee mi fasiqana ufa irimarianafa mariananoo. Maasa Mooseena ufa irimarunausa maridaqa.

<sup>29</sup> Anutufa Mooseenannai maasa qimaqimufaqa maasa iridaqa. Mi fasiqafa Yisunara maasa sia mina oosana iridaqa.

<sup>30</sup> Afu dimbarafa mina iriseenoo niqinoo qinau. Innee moo irirana maree mariafanoo mifa qini qifu maqaqisaifaqa innee nanaree mi fasiqanara yaindari fee anidanoo fee qidee.

<sup>31</sup> Anutufa sia manda oosana maree mariasa dadaqidanoo. Faiqi anaasee minara rimariasa mina ufa irimariasa misa kai Anutufa dadaqidanoo.

<sup>32</sup> Ooqai oosana aroo aukuannasaqari sia faiqi moo fannoo afu dimbarana nifu maqannisanau, maqee kai.

<sup>33</sup> Maa fasiqafa sia Anutufnaindari aninaqau naqimandee maa firaa ainainna auqararee, siamma amanaikiannoo.

<sup>34</sup> Yuda maqanna uriqararawsa mina iriseeqa qimamiqa qiqau. Anee mandainainaki kambiqoonafa mandoosanaki findifuanafa doo see fifuane qimaseeqa misa amaana maqakiqari aqiqoofanoo raudamaki finau, sia kafaa anianifeera doo atekaqau.

*Faiqí naundura nifu qimbaranara Yisufa qimaqoo ufafa.*

<sup>35</sup> Misa afu qimbarana aqiqoonara Yisufa iriseenoo paqurimasee iramirinau. Anee faiqí nimaakuara Anutuna asauku mundira fee fee qidanee minasaa irirana rusidanee.

<sup>36</sup> Mi fasiqafa Yisuna sia qafoofa maridanoo maaqi qinau. Doo mina uqaqifiqainaqa minara anoonee qimasee minasaa atooqaanaura.

<sup>37</sup> Yisufa qinau doo anee qafaananoo doo mina faqa ufa qimariananoo.

<sup>38</sup> Mi fasiqafa mina iriseenoo qinau. Oo Karaambaiga aniara kuqaa Anutuna amaaku fee qidaqa qeeqa qimuqusa irirana aniki rusidaqa qimuqusannoo ani amooqimamaqaidaqa. Miqi qimaseenoo mi fasiqafa Yisuna oorinni maqasaa kummaramafinoo amooqinau.

<sup>39</sup> Yisufa mina qafamasee miqoo marusa qimanniminoo qinau. Qinee maa maqanasaaqarasaa rainannimaqarara qumuafanausa maridaqa. Qinee nifu dimbarawsa maqaaneera qumuafanausa nifu maqarawsa dimbaaneera qumuafanausa maridaqa.

<sup>40</sup> Farisai amaana ufa irimarusa miqoo marusa mina iriseeqa iramiriqa qiqau anee maasara faqee nifu dimbarausee qidanee.

<sup>41</sup> Yisufa qinau. Inni nifu dimbanoo marinaqau inni numoo sia marini innee unna qimasee maasa qifu kaqi marifaqee qimarianara inni numoo kaqi maridanoo nifu dimbarausara foora mariafanoo.

## 10

(Yuda maqannaasa firi maru aandaufa sipsipa marinau. Misa akaqana arusaida neemarufa marinau. Moomoo rakisidaqa asaasi aukusidaqa minannai qamunnaina auqimariqau. Sipsipa reendenimarufa sia aanoo imarufa marinau. Anee mina asaasi aukidanee mina kuqarinanoo fee sia ufa qiannoo kaqi muqurinoo mariannoo. Mi aukuanna sipsipasaa rakisimarufa nifunni fufaqa aiqama sipsipa mina afaqee fiqau. Isaraee maqannaasa sipsipa kaqi miqidaqa. Misasaa rakisimarifa indaaruu fifaqa sipsipauqa mina aanaaqianna fidaqa.

Sipsipasaa rakisirafa ooni moomoo marasee aaku aaku maseenoo ququsa auqusee eendaki sipsipa minaki quqasee kooqisaa narí faiqaidanoo. Kaasau faini fee qummuarimari fasiqa fee arunaandooraa rakisidanoo. Sipsipa nikoofa nuqu ramaqaisa kai maridaqa. Kananaana findifinoo nuqu raifaqa kai anireeqa andandara randaidaqa.

Sipsipa rakisimariasa narí sipsipara ridaqa rakisidaqa narí sipsipasaara kuqifaranoo. Sipsipauqa faqa narí rakisimariasa ufa iridaqa minara ridaqa. Akaqausa moodaanaki ooni ququsa auqusee minaki narí sipsipa aiqama eendaki quqasaafanoo faiqí moo fannoo kooqisaa rakisidanoo. Kananaana iqaqaifanoo sipsipasaa rakisirafa moo fannoo aniraifanoo kooqisaa rakisirafa atusaifanoo sipsipa akoofa narí sipsipa nuqu ramaifaqa narí sipsipauqa kai iriqa raudamaki andanda narara fidaqa.)

*Sipsipa faiqee mariana mina kikiqusira ufa.*

<sup>1</sup> Yisufa kafaa miqooqarasaa qimannimidanoo sipsipara qinoo faiqiara qinau. Qinee anoona ufa qimannimidaqa. Faiqí moo fannoo sia sipsipa ququsa kooqiki keeqeemarifa kaqinaindari ququsasaa akareemarifa mifa qummuarimari fasiqafa mariannoo.

<sup>2</sup> Sipsipa kooqiki keegee marifa mifa sipsipasaa rakisimarifa maridanoo.

<sup>3</sup> Sipsipa nikoofa moo fannoo anirainanoo kooqisaa rakisirafa kooqi atuasaifanoo sipsipa akoofa narí sipsipa nuqu ramasee naarainaqa mina ufa iriseeqa raudamaki narí faqa nifiqainaqa andanda narara fifaranoo.

<sup>4</sup> Sipsipauqa nári rakisimarina ufa iriqa raudee qumuraifanoo mifa indaaru fifaqa misa mina aanaaqianna fidaqa.

<sup>5</sup> Sipsipa sia moo fasiqa afaqee fifaranoo mina ufa irisee moo fannoo fee qimasee sandeefaranoo.

<sup>6</sup> Yisufa mi quandara ufana qimannimufaqa siamma iriqau.

*Yisufa amiqira sipsipasaa rakisirafa mi ufafa.*

<sup>7</sup> Minara iriseenoo kafaa kooroomasee qimanniminoo qinau. Qinee kuqaa anoona ufa qimannimidaqa qinee qeeqa kai sipsipa kooqi maridaqa.

<sup>8</sup> Ooqai qini doorini indaaru anusa qummuari maru fasiqausa kai animariqau. Sipsipauqa sia misa ufa iriqau.

<sup>9</sup> Qinee Anutuna ququsa kooqi maridaqa yafasiqa aanaasefee kooqisaarfoo qinisaa keegee marinafa Anutufa mi fasiqanaaseesa kuqiranakinaana marasee innaaruna asumu mariranaki quqaannoo. Mi fasiqanaaseesa Anutuna ququsaki sipsipara foora keegee raudeeida narana neemarifaranoo.

<sup>10</sup> Qummuarimari fasiqafa qummuaramasaina taikaanifeera fifau faafau qummuarianifeera faqa kuqannaruanifeera faqa kuridi nimaqaanifeera faqa aniannoo. Qinee faiqí anaasee asumu marirana nimianeera anidaqa. Sia kaqi dapi mariranarau qidau. Asumu marirana amiqirana moo faqa moo faqa rairairana nimirara mina kai nimiraree qimasee qumidaqa.

<sup>11</sup> Qinee sipsipasaa amiqimasee rakisimarunausa maridaqa. Sipsipasaa amiqimasee rakisimarifa narí sipsipasaara kuquannoo.

<sup>12</sup> Feefauruara ainainimarifa sia miqiannoo kaasau faini anirainanoo rufiasee sandaannoo. Sandamafinanoo kaasau faini anireenoo sipsipa qumarainaqa daraanifaranoo.

<sup>13</sup> Feefauruara ainainimarifa sia sipsipara amuqusiannoo feefauruara kai rakisidanoo.

<sup>14</sup> Qinee sipsipasaa amiqira rakisirausa maridaqa. Qini qikoofa qiniara iridanoo. Qinee miqi kai iqa qeeqa qikoonara faqa iridaqa.

<sup>15</sup> Miqi kai iqa qeeqa sipsipara iridaqa misa faqa qiniara faqa iridaqa. Qinee qeeqa sipsipasaara amana kuquanauree qidaqa.

<sup>16</sup> Sia maqooqaraasa kai qini ququsaki mariaqeera. Qini ququsa fannoo moomoo maqusanaasaki faqa maridanoo. Minakinaasauqa faqa nifiqa quqaanaura. Misa faqa qini ufa irisee eedoo qifaranoo. Miqoo moodaanaki marifaranoo moodaa rakisirafa misasaa mariannoo.

<sup>17</sup> Qeeqa sipsipara qimuqusina qeeqa marirana misa nimaqa maqaseeqa kuqirinaki quqasee kaifaa qeeqa marirana minakiqari maraanaura. Qinee miqiraree qunnanara qini qikoofa qiniara ridanoo asasidanoo.

<sup>18</sup> Sia moo fannoo narí afeekannai qini marirana maraannoo. Qinee qeeqakai qeeqaraa irisee qeeqa marirana kuqiranaki quqaanaura. Qini qikoofa qinaqa qeeqa marirana kuqiranaki quqararee qimasee quqaanaura. Quqasee kafaa marararee qimasee maraanauranoo. Qini qikoofa miqi qimasee ufa qimaqimifaqa iridaqa.

<sup>19-20</sup> Yuda maqannaasa miqooqaraasa Yisuna mi ufana iriseeqa rainaf-ufaqa akaqausa qiqau. Maa fasiqana audurai afaanna maridanoo, marifanoo dapi dapi ufa qidanoo, nanaree innee mina ufa iridee.

<sup>21</sup> Miqi qimasoofaqa akaqausa misa qimannimiqa qiqau. Akasaa afaanna aunduraki marinafa sia maa fasiqafa indeemasee ufa qiannoo. Afaanna fannoo amanee afu dimbarana maqaiseenoo fee sia amanaikiannoo.

*Yuda maqannaasa Yisuna minnisoo ufafa.*

<sup>22</sup> Mookari Yuda maqannaasa Yeerusaree maqusai suqufufaqa amaana maqara qoomaqammasaida neemariqau. (Ooqai namuqaa amaana maqaki mini madaapee quqasoofaqa mina anukamaquseeqa doo miqooqari aukuaana aukuaana anukara qoomaqaqee qimasaida sakasaida neemariqau.) Suara aukuaana mi qoomaqana imariqau Yeerusaree maqusai.

<sup>23-24</sup> Yisufa Yeerusaree maqusai oorureenoo amaana maqa atisaa tida auquqoonasaa aakuara rufiasee minaki nimarinau. (Faiqi anaasee moomoo aaku suarara rufiaseeqa minaki kai mariqau.) Amaana maqa atimau tidasaa kisaqa firaqoo marinau. Yisufa Sooroomona amarana maqa atimau tidasaa nimarufaqa Yuda maqanna uriqararasa ititaseeqa irammiriqa qiqau. Anee sia quandaqaandia, amiqimandee akooroomasee maasa qimaqimia, kuqaa fee Anutuna asauku mundira fee maridane.

<sup>25</sup> Yisufa maqi qimasee qimanniminu. Doo qimannimuna siamma irimariafanoo. Qinee moomoo qeeqa qikoofinaindaraa ainaina auquseeqa minannoo inni uqannifiqaunasa maridaqa.

<sup>26</sup> Innee sia qinee firimarunna aandau sipsipauqau mariafanoo mi nara sia qiniara anoonee qimariafanoo.

<sup>27</sup> Qini sipsipauqa qini ufa iridaqa qinee misara faqa iridaqa, misa minara aiqama qini faqa fidaqa.

<sup>28</sup> Qinee naaru naaru marirana nimidaqa sia kuqifaranoo. Sia amana moo fannoo qini qisaukukinaana rafieefaranoo.

<sup>29</sup> Qini qikoofa qini sipsipauqa qimufa aiqamausa uriqararafa maridanoo, sia moo fannoo mina asaukukinaana rafieefaranoo.

<sup>30</sup> Qini qikoofa faqa qinee faqa moodaa marunnanara sia amana rafieefaranoo.

<sup>31</sup> Yuda maqannaasa mi ufana iriseeqa aanoomasee oonisamu qumaree Yisuna arirarufanoo qinau.

<sup>32</sup> Qinee moomoo amiqira ainaina auqaidaqa qini qikoofa qimu ainaina auqaidaqa innee nana amiqira ainainara irisee fee minasaara oonisamu qini darirara qidee.

<sup>33</sup> Yuda maqanna uriqararasa mina iriseeqa kafa aranaiqi qimamiqa qiqau. Sia amiqira dadaqira ainaina auqaananarau ariraridau. Aneenaraa Anutuna mandaikammamaqaidana anee aneennaraa maqasaa fasiqa marianafa anee Anutufaikina mariannanara ariraridaqa.

<sup>34</sup> Yisufa mina iriseenoo qinau. Inni sandufa akaraki Anutufa qinau. Innee faiqi faiqi Anutunaikammida mariafanoo.

<sup>35</sup> Sandufa andeeqanoo maridanoo naaru naaru sia aaqee mariafanoo, innisaimbaqa minara iridaqa. Anutufa nari ufa misasaa quqaseenoo misara Anutu fee qinau.

<sup>36</sup> Anutufa qini maraseenoo maa maqa maaqanaki diqiqamaqoonaki maridaqa. Qinee qeeqaraa Anutuna amaaku fee qunnanara naqimasee fee minannai Anutuna mandaikamma amaqaanauree sia amanaikiannoo.

<sup>37</sup> Qinee qini qikoofa auqamaqai ainaina auqaanaqa qafamasee kuqaa anoonammifoo qiaqaana. Qini qikoofa sia auqamaqai ainainna auqaanaqa qafamasee unnammifoo qiaqaana.

<sup>38</sup> Innee qeeqaraa ufa qunnanara unna fee qimasaida qinee faiqí sia auqaaqaa ira ainainna auqaanaqa qafamasee qiniara kuqaa anoona fee qimasee kuqaa mina akoofa minaki marinara miqidanoo fee qiaqaana kaifaa mifa faqa nariki marinara miqidanoo fee qiaqaana.

<sup>39</sup> Yisufa miqi qimasoofaqa misa qumaraaneerufanoo kaqimbinau.

<sup>40</sup> Yisufa Yooradanna nammarinni ooqureenoo ooqitaqa mareenoo ooqai Yoohaneefa maridanoo nammari nimiuqoo miqoo ooqu marinau.

<sup>41</sup> Faiqí anaasee moomoosa suqufufaqa Yisufa maruqoo maridaqa narí qimami narí qimami maaqi qiqau. Yoohaneefa nammari nimimarufa sia moo ainaina firaa ainaina auqanau. Yoohaneefa maa fasiqanara qufa doo aiqamainaina anoonaikidanoo.

<sup>42</sup> Miqoo faiqí anaasee moomoosa Yisunara kuqaa Anutuna faiqi fee qimasee mina saqarikiqau.

## 11

### *Rasarusafa kuqu ufafa.*

<sup>1</sup> Faiqí moo auqu Rasarusafa mifa Beetani maqusaindaraafa aurida marinau. Rasarusafa narí asookiqanda Mariana amarana faqa Maratana faqa misa Beetani maqusaindaraasa mariqau.

<sup>2</sup> Mariafa maafa kasooqaqee amiqira afundimaru fadameena Yisuna aikusaa adiaseenoo narí akiaqa asaasi kisaqaannai rukaaninafa maana mi Mariafa maridanoo. Sia Yisuna anoofau mina amarafa marinau.

<sup>3</sup> Mi Mariana afasaafa Rasarusafa kuqira aurira maroofaqa mina asookiqanda qafamaseeqa faiqí moo aiqeeqa anee Yisuna ooqu afiqee uruannee qufanoo ooqu finau. Mifa maaqi qinau ani afaaqasaa aqoondi Rasarusafa kuqira aurirana maraidanoo.

<sup>4</sup> Yisufa mi ufana iriseenoo narí faiqi namu qimanniminau. Rasarusafa aurida maridanoo. Sia kuqiranaki firarau Rasarusafa mi aurirana maraidanoofau mina auriranannai Anutufa narí amaaku qini duqu uqeeraanifeera mi aurirana maraidanoo.

<sup>5</sup> Yisufa miqanda qisanasaasa faqa misa nisookinara faqa kaaqa misara rimarinau. Yisuna afaaqasaa aqoondi marunara rimarinau.

<sup>6</sup> Rasarusana auriranara iriseenoo sia dauni finau qaara afuru faiqanau.

<sup>7</sup> Qaara afuru faiqee iqaqoofanoo narí faiqi namu qimanniminau. Uqeeraifaqa innisaimbaqa kafa qumurandee Yudeea maqa maaqi Rasarusafa aurida qina ooru qafa.

<sup>8</sup> Miqi qufaqa misa tautumandee maaqi qiqau, Oo ufasaa rakisirafa innau kai Yuda maqannaa uriqararausa oonisamu ani arirara qufana kafa fee miqoo fidanee.

<sup>9</sup> Yisufa iriseenoo qinau, iqaqaifanoo kai suani urureenoo kaaqa qaidanoo. Faiqí miqi mariqoo nidaqa sia saamuridaqa. Misa maa maqanasaa kaaqa qarafa marifaqa qafaida sia saamuridaqa.

<sup>10</sup> Faiqí moo fannoo asukunai nidanoo oonisaa aikuamaki saamuridanoo, sia kaaqa qarafa minaki marinara miqidanoo Anutufa qi faasaana ooru fiqa sia saamuruanaura kaaqa qeemarina ooru fuanaura.

<sup>11</sup> Yisufa maaqi qimasee qimanniminau. Rasarusafa maasa qiqoondi doo faiqaqee ifaqa qinee oorureeqa afaurianaura.

<sup>12</sup> Mina faiqi namu mina iriseeqa qiqau. Oo karaambaiqa mifa fifau faiqaqee idanoo findifuannoo amiqirafa.

<sup>13</sup> Yisufa kuqiranara faiqeefoo qimasoofaqa misa sia iriqau.

<sup>14</sup> Minara Yisufa kooroo qimasee qinau. Rasarusafa doo kuquaraasinoo maridanoo.

<sup>15</sup> Dufi dufi sia qinee miqoo maridaqa inniara iridaqa kasooqaqee Anutuna afeeka qafeeqa kuqaa qiniara Anutuna amaaku fee qifaranoo doo uqeeraifaqa fua Rasarusafinnai.

<sup>16</sup> Toomasina auqu qaara auqu marinau. Moo auqu Toomasifa moo auqu Qaaraqanda maqara fee qimariqau. Toomasifa Yisufa Yudeeaa maqa maaqai ooru firanara iriseenoo qinau. Doo uqeeraifaqa maasa ufasaa rakisirana faqa Yeerusareenni oorureeqa moodaanaki kuquanauree qimasooafaq misa aiqama Yisuna faqa Yooradanna nammarindari ooru fiqau.

*Yisufa kuqiranakiqari findifirana faqa kaqi marirana faqa faqaafa maridanoo mi ufafa.*

<sup>17</sup> Nari Yisufa iriseenoo Beetani maqusai ooruroofaqa qimamiqau Rasarusafa doo innau kuqufufaqa akundamaqaafanoo qaara faqa qaara faqa eenda madikaki faiqaqee idanoo.

<sup>18</sup> Beetani maqusa Yeerusaree aaqa uqanna maridanoo. (Beetani maqusa Ubandeenara foora marida Yeerusaree maqusa Faarumaqaira foora marinau.)

<sup>19</sup> Yeerusaree adeedi marunara moomoo mindaraasa qumuree Maratasa Mariasa dadaaqi ikifaafau qida rooipee mariqau. Nari nifasaafa Rasarusafa kuqunara ikiraqee mariqau.

<sup>20</sup> Maratafa Yisufa ani qu ufana iriseenoo raudamakufanoo oonu afigaidanoo minara qimamirara fufanoo Mariafa kaqi maaqaki marinau.

<sup>21</sup> Maratafa Yisuna qafamasee qimaminoo qinau, Oo Karaambaifaq anee anirainanoofau sia qini qifasaafa kuqiqini. Qaara faqa qaara faqa faasaana doo kuqufifaqa akundamasee maridaqa.

<sup>22</sup> Miqinoo marifaqa maridaqa, aneenna kai maqee nana ainainaree Anutufinnai nana ainainaree innaaru qinanoo ani amiannoo.

<sup>23</sup> Maratafa nari asookifa kuqunara iridanoo miqi qimasee qimaminau. Yisufa irisee qimaminoo qinau, Anutufa ani afasaana kaifaa mara findifumaiseenoo kaqi marirana amiannoo.

<sup>24</sup> Maratafa mina iriseenoo qinau maa maqa maaqafa taikara faasaana Anutufa qini qisookina uqeerasee kaqi marirana amiannoo qinee minara iridaqa.

<sup>25</sup> Yisufa qimaminau, kuqiranakiqari mara findifirafa qiniki maridanoo. Kaqi marirana marirafa qiniki maridanoo. Yafasiqa anaasee fee qini saqarikinoo kuqinoo kaqi mariannoo kuqiranakiqari findifirafa qiniki marinara kaqi mariannoo.

<sup>26</sup> Yafasiqa anaasee fee kaqi maridanoo qini saqarikinoo naaru sia kuquannoo kaqi marirana marirafa qiniki marinara naaru naaru sia kuquannoo. Marata anee minara kuqaa fee qidanee.

<sup>27</sup> Maratafa iriseenoo qinau, eeo karaambaifaq anee ooqai maa maqa maaqanaki qumuanera asaku mundirafa Anutuna amaaku uqanna marianafa marianaqa qinee minara kuqaa iridaqa.

*Yisufa ikiraqoo ufafa.*

<sup>28</sup> Maratafa miqi qimaseenoo quandaki maqusai oonureenoo qumee kai Mariana aaramasee qimaminau. Ufasaa rakisirafa anidanoo ani aaraidanoo.

<sup>29</sup> Mariafa mi ufana iriseenoo kaqi kaqi findimeeqee kaqi unnaqufanoo oonu afigarara finau.

<sup>30</sup> Yisufa sia maqusai aninau. Aanai Maratafa paquruqoo miqoo kai kaqi marinau.

<sup>31</sup> Mariafa raudamaki kaqi unnaqufanoo fufaqa Yuda maqannaasaa mina faqa mariusa mina qafamasee minara madikai ikiraqarara fidanoommifoo qimasee afaqee fiqau.

<sup>32</sup> Mariafa Yisufa marunnai oonu qafeenoo oorindari maqasaa aqufinoo ufa qimaminau. Oo karaambaiqa anee animariananoofau sia qini qifasaafa kuqiqini.

<sup>33</sup> Yisufa Mariana ikiraqarana qafoofanoo amuqusufanoo Yeerusaree maqannaasa faqa ikiraqoona qafoofanoo amuqusinoo mina aunduraki mandaikinau.

<sup>34</sup> Miqimasee Yisufa irammirinoo qinau. Innee yai fee Rasarusana akundee fee qufaqa misa qiqau Karaambaiqa doo mai aniree qafa.

<sup>35</sup> Miqi qufanoo Yisufa faqa ikiraqanau.

<sup>36</sup> Yeerusaree maqusanaasa miqoo mariusa mina ikiraqarana qafeeqa qiqau. Oo qafa mifa minara kaaqa rimarifa ikiraqaidanoo.

<sup>37</sup> Miqi qufaqa akaqausa niqira ufa qiqau. Mifa nifu dimbarausa amiqimannisee marifa nanaree Rasarusana qaoo qinanoo sia kuquaqaana.

*Yisufa Rasarusana kuqiranakinaana uqereroo ufafa.*

<sup>38</sup> Yisufa narí kai misa miqi qu ufanara akooqoofanoo narí aunduraki mandaikufanoo mi ufanara aiaaee qimaseenoo madikai oonuranau. Rasarusana iri ooni aamaraki quqasee ooni firaatia qumaree ititaqoofanoo marinau.

<sup>39</sup> Yisufa qimanniminoo qinau. Innee maa oonina rafaqaameeqeeqa quanda quandamma aquaqa. Miqi qimasooafa Maratafa Rasarusana auna qinau, Oo karaambaiqa mifa qaara faqa qaara faqa afuru faififa marifaqa afunda mandaikammimarifaqa.

<sup>40</sup> Yisufa iriseenoo qimaminau. Qinee faasai qimamunnana anee qini saqarikinana anee Anutuna afeeka eeraarirana qafeennaranoo.

<sup>41</sup> Misa mina iriseeqa ooni firaatia afeeqeeqee mafi quqasoofanoo Yisufa narí oori uqereseenoo Anutunara akooqoo innaaru qinoo qinau, Oo qini qikoofa dufi dufi anee qini ufa irimarianafa mariananoo.

<sup>42</sup> Anee maqee maqee qini innaaru qirana irimarianafa marianaqa. Maaqoo mariasa iriaqeera innaaru qidaqa. Maaqoo mariasa anee qini diqiqamaqoonnana iriaqeera innaaru qidaqa.

<sup>43</sup> Yisufa miqi qimaseenoo innaaru qimaseenoo firaa kari kuqirana aareenoo qinau. Rasarusa minaqari rauda.

<sup>44</sup> Miqi qimasooofanoo qamunna afaqa kukuqamaqoofa kaqi marufanoo Rasarusafa findifinoo raudee qumuranau. Mina akiaqa faqa qamunna rumbaqoonarirandee qumuranau. Yisufa qimanniminoo qinau. Doo qamunna idukusaifanoo fuani, qimasooafa miqimandoofanoo andeeqa-soofanoo finau.

*Yisuna arirara tipundaaru ufafa.*

*(Mat 26:1-5; Mak 14:1-2; Ruk 22:1-2)*

<sup>45</sup> Yeerusaree maqusanaasa moomoosa Rasarusanara ikiraqeeusa misa Yisufa Rasarusana findifumasoonaa qafeeqa kuqaa Anutuna faiqi fee qimasee minasaa mundiqa mariqau.

<sup>46</sup> Misakiqari akaqausa Farisai amaana ufa qimarusa nimaqaqi Yeerusa-reenni ooruree Yisufa Rasarusana findifunara niranaqarufa qimannim-iqau.



<sup>47</sup> Misa mina iriseeqa Farisai amaana ufa qimarusa faqa amaana maqasaa rakisimarusa faqa aiqama faiqí firaasa rakisirausa faqa moodaa qoo suqufi ufa qidaqa qiqau. Maasa naqi fee masee mina Yisuna rafaafuanauree. Maa fasiqafa Yisufa moomoo fira aainaina naaquqara aainaina auqaidanoo.

<sup>48</sup> Maasa mina afauaidaqa faiqí anaasee maasa minnisee minasaa kai atooqeefoora. Miqifanoo Roomma maqanna sundiauga anireeqa maasa faiqí anaasee faqa daru taikaidaqa maasa naaquqara amaana maqa faqa rapeepamma aqifaranoo. Miqifaqa maasa Yuda maqanna kuridianaura.

<sup>49</sup> Misakina uriqararana auqu Kaiafasafa mifa qimannimino qinau. Inniki moo fannoo sia irirana faisa mariafanoo.

<sup>50</sup> Faiqí anaasee maasa aiqama kuquanoora moodaa fannoo aiqamausara kuqifaqa amana maasa amiqimandee mariana. [ <sup>51-52</sup> Kaiafasafa sia narí kaifau mi ufana qimanniminu. Anutufa qimamunara kai mi ufana qimanniminu. Kaiafasafa Yisunara Yuda maqannaasa nikiqara kuquanoo Anutuna faiqi namu mina ufa irimarinausara faqa moodaa iriranasaa mariaqeera kuquanno fee qinau.]

<sup>53</sup> Doo mi faasaannasaqari Yuda maqanna uriqararusa Yisuna arira ufa oosarasee deedaqiqau.

<sup>54</sup> Yisufa mina iriseenoo miqooqari sia Yudeeaa maqa maaqaki akooqoo nimirau. Maqusa moo auqu Eefaraimma maqusai narí faiqi namufaqa ooqu marinau. Eefaraimma aadana maqa maaqa atisaa marinau.

<sup>55</sup> Yisufa Eefaraimma maqa maaqaki marufanoo Yuda maqanna qoomaqa fira qoomaqa ainnaaqarara qoomaqa adeedi ranau. Aukuana aukuna Yuda maqanna oosana ainnaaqarara qoomaqa adeedi ramafu-faqa faiqí anaasee aiqama suqumaree miqoo Yeerusaree maqusai ooruraidaqa nári mandainaina findaukee mariqau. Aukuana aukuna miqi-mariqau.

<sup>57</sup> Amaana maqasaa rakisimarusa faqa Farisai amaana ufa qimarusa faqa Yisunara faiqí anaasee qimannimiqa. Innee ninnabaqa Yisuna paqurimasee dadi oonurandee mini qimaqimifaqa maasa mina qumaraanaura.

<sup>56</sup> Faiqí anaasee fira amaana maqaki Yeerusareenni suqufufaqa Yisunara randaidaqa maaqi qimasee narí qimami narí qimami qiqau. Yisufa fira qoomaqa anifeeraanno sia fee aniraanno. Innee minara nana irree iridee.

## 12

*Beetani maqusai anaasee moo fannoo Yisuna aikusaa amiqira afundimaru fadameena adia amaqoo ufafa.*

*(Mat 26:6-13; Mak 14:3-9)*

<sup>1</sup> Mi ainnaaqarara qoomaqa Yeerusaree maqusai adeedi reenoo dinni qisauku taikasee dinni ani moodaa faasaana aiqaqainano mi qoomaqa kambiqarara imarufanoo Yisufa Beetani maqusai oonuranau. Yisufa Rasarusana kuqiranakinaana findifu maqusanaki aniranau.

<sup>2</sup> Yisufa aniroofaqa (Rasarusana mara findifunara iriseeqa mina akiaqara qoomaqa firaana suqasee naida amiqau.) Maratafa qoomaqa sakeeqaida nimirufanoo Rasarusafa Yisuna faqa oqumarifi narana nanau.

(Misa oosana maaqimminoo marinau. Misa qaindasaa fifandirifiqa nisaataa saunarasaida niku uqusaida neemarus marida miqimandee neemariqau.)

<sup>3</sup> Neemarufanoo Rasarusana asookifa Mariafa Yisuna anoona amarafa fadameena taqu firaana firaa feefauru aqusaida mareemaruna qumareenoo amiqira afundimaru fadameena mina auqu narada fadameena Yisuna aikumau adia amaqanau. Adia amaqaseenoo narí akiqa asausi kisaqa qumareenoo minannai utitiqanau. Miqimasoofanoo afunda firaafa misa maru maqanaki qumbiqanau.

<sup>4</sup> Yisuna faiqi namuqiari moo fannoo mina auqu Yudasifa Keerioota maqannaafa Yisuna ueeqaaninna fasiqafa marinau. Mi fasiqafa Yudasifa amiqira afundimaru fadameena moomoo qafamaseenoo maaqi qinau.

<sup>5</sup> Maa fadameenna firaa feefauru mareemaria fadameenafa. Nanaree fifau adieenee. Saina marinana qumiasana faqaana amiseenana moomoo munnimma 300 maraqaana. Maraseenana kudi fasiqa anaaseeuqa kaqi nimiaqaana. (Mi aukuanu Yuda maqannaasa Mooseena ufa qainusidaqa kudi fasiqauqa aiqama ainaina dadaaqiqa nimimariqau.)

<sup>6</sup> Yudasifa sia kudi fasiqara irimarufa kaqi fifau ufa marunara miqi qinau. Mifa ummuarimarufa marinau Yisuna faiqi namu pausakinaana kaqi ummuarimarufa mifa maridanoo miqi qinau.

<sup>7</sup> Yisufa mina iriseenoo narí maaqi qimasee qimaminau. Marianara sia miqi qia. Saina miqiani. Afundi fadameenna ataa kaqi marina qinee kuqananoo qini qifaaqai akuqimaqaani.

<sup>8</sup> Anee kudi fasiqa anaaseeuqara qianandee. Kudi fasiqa anaaseeuqa naaru naaru inniki marifaranoo. Qinee sia kisaqasaa marianaura qusasaa taikaanaura. Saina fadameena adiaqimaqaani.

*Rasarusana arirara tipundaaru ufafa.*

<sup>9</sup> Yisufa Beetani maqusai animarufaqa Yeerusaree maqusaindari moomoosa qafarara ooqu fiqau. Kuqiranakiqari findifuna Rasarusana faqa qafararee qimasee ooqu fiqau.

<sup>10-11</sup> Faiqi anaasee moomoosa Yeerusareendari Yisunasaa atooqaidaqa moomoo ooqu fiqau. Miqiufaqa amaana maqasaa rakisimarusa oomasee qiqau. Rasarusafa kuqiranakiqari findifunara irisee misa Yisunasaa atooqarara ooqu fimarifaqa saina Rasarusana faqa aruanauree qimasee deedaqiqau.

*Yisufa Karaambaiqa iundee toonkisa Yeerusaree maqusai keeqoo ufafa.  
(Mat 21:1-11; Mak 11:1-11; Ruk 19:28-40)*

<sup>12</sup> Faiqi anaasee ainnaaqarara oomaqara maqusa maqusaindari Yeerusaree maqusai suqusee mariusa Yisufa aanai urufaqa afiqarara moomoosa ooqu fiqau.

<sup>13</sup> Ooqu afiqarara ooqu fidaqa koopeena amanee fooqaana moomoo ateamaree ooqu fiqau. (Misa nariqa qimiriga Yisunara maaqi qiqau. Ooqai Anutuna asaku mundirafa kambiqanoo marifa uridanoo. Mifa maasa qiga karaambaiqaikirara uridanoo.) Misa ooqu fidaqa maaqi qimasee firaa kari faaqariqau. Anutuna amooqia mina auqu uqeeraa. Anutufa qufanoo kambiqarafa uridanoo, Anutufa mina amiqi amiqiani, Anutufa Isaraee maqanna Karaambaiqa amiqi amiqiani.

<sup>14</sup> Yisufa doonki moo maqee innooqee marunnasaa paqurimasee minasaa akaramafi ooqumari finoo Yeerusareenni ooru finau. Miqiuna ooqai tamummaqara fasiqa akara rumaqoomau ooru finau.

<sup>15</sup> Yeerusaree maqusa moo auqu Sioona maqusee qimarinau. Minara ooqeenaa tamummaqara fasiqafa maaqi qimasee akara rinau. Innee Sioona maqusanaasa sia rufiaqa. Inni karaambaiqa innee iannai uridanoommi, doonkisa ooqu marifi uridanoo.

<sup>16</sup> Yisuna faiqi namu faiqí anaasee qambaana Yisuna faqa ooru fiqau. Misa tamummaqara fasiqa akara iridaqa anoonara sia iridaqa fiqau. Kasooqagee Yisufa kuqiranakiqari findifufaqa misa oonumafi iriseeqa qiqau. Maasa ooga akara rumaqoomau Yisuna faqa Yeerusareenni ooru fiqafana.

<sup>17</sup> Yisufa Rasarusana aarofanoo findifuna qafeusa Yeerusaree maqusaki suqiga marusa Rasarusanara qimannimiqau.

<sup>18</sup> Faiqí anaasee moomoo mi ufana iriseeqa maaqi qiqau. Firaa ainaina auqemarina ooqu afiqamaree uruaqee qimasee ooqu afiqee uriqau.

<sup>19</sup> Farisai amaana ufa qimarusa oomasee maaqi qiqau. Qafaa doo maasa kadiqaidaqa faiqí anaasee minnikai quandaidaqa.

*Kirisa maqannaasa Yisuna qafararee qu ufafa.*

<sup>20</sup> Yeerusareenni ainaaqarara qoomaqara suqimarusaki Kirisa maqannaasa nianai nári maqusaindari anusa faqa miqoo Yuda maqannaasa faqa animariqau. Misa faqa Anutuna qoomaqa sakasee namasee Anutuna amooqiraree qimasee animariqau.

<sup>21</sup> Kirisa maqannaasa aniree Firipina irammiriqa qiqau. Oo maa fasiqa, Yisuna qafararee qidaqa amanee maasa qifiqee finaqa qafaanauree. Firipifa Beetasaida maqusaindari Kariree maqa maaqakinaafa marufa.

<sup>22</sup> Firipifa Anduruna paqurimasee misandiri Yisufuqoo oonuree Kirisa maqannaasara qimamiqau.

<sup>23</sup> Yisufa misara iriseenoo qimanniminoo qinau. Anutufa faiqí nimaaku qini duqu firaaqoo uqeerara aukuaana doo animaridanoo. Sia maa maqee imariasa imariandee fau maseenoo qini duqu uqeerainanoo areenaanoo.

<sup>24</sup> Qinee anoona ufa inni qimannimidaqa. Nandi asumu naríara kaqi maridanoo aaduma maridanoo. (Yisufa narí kuqiranara qidanoo nandi asumu kikiqa usinau.) Mifa maqaki ummaqusaifanoo putaa inanoo moomoo kambiqaanoo sia nariraa mariannoo.

<sup>25</sup> Yafasiqa anaasee fee maaqoo narí mariranara rimarifa nandi asumuara foora sia kafaa kambiqaanoo mifa narí marirana kukupaanoo. Yafasiqa anaasee fee maaqoo maa maqanasaa narí mariranara akooqainafa maqaki ummaqusainganoo narí marirana afeediiseenoo naaru marirana maraanoo.

<sup>26</sup> Innee Kirisa maqannaasa qimannimia. Yafasiqa anaasee fee qini ainainira faiqikiraree qimaseenoo aufadeemarifa mifa narí maaqoo marirana quqasee qini faqa finafa qinee fuannannai mifa faqa miqoo oonu marida qini dadaaqiannoo. Yafasiqa anaasee fee qini duqu uqeerainanoo mina auqu faqa qini qikoofa uqeerainanoo.

*Yisufa narí kuquaninna ufana qimannimu ufafa.*

<sup>27</sup> Yisufa Yeerusareenni oorufidanoo narí aqa marusa qimanniminu. Maqee qini daundura fifau faafau inoo marifaqa nana ufee qianauree. Qinee naqimasee qeeqa qikoonara qiana qini kuqiranara qaoo qiannoo fee. Qinee firaa aupurarana marasee maa marunandee fuka kuqanauree qimasee qumuafanausa maridaqa doo qusasaa maridaqa naqimasee qaoo qiraree sia qaoo qianauree.

<sup>28</sup> Miqi qimasee narí aqa marusa qimannimiseenoo Yisufa quandaqinoo narí akoonara Anutunara innaaru qinoo qinau. Oo qipoo, aneenna auqu amooqirana uqeeraa. Miqi qimasooqanoo Anutuna ufa inaarunaindari quminoo qinau. Doo qinee qeeqa duqu amooqirana uqeeraree doo kafaa uqeeranauree qinau.

<sup>29</sup> Miqi qimasoofaqa faiqí anaasee moomoo Yisuna faqa Yeerusareenni ooru fimarusa mi ufana iriseeqa qiqau. Innaarunai qiifoo qufaqa akaqausa qiqau. Qangiroo moo fannoo mina faqa ufa qidanoommi.

<sup>30</sup> Yisufa misa ufa iriseenoo qimanniminoo qinau. Sia qiniarau qidaqinoo inniara qidaqinoo.

<sup>31</sup> Doo maqee Anutufa maa maqa maaqanakinaasa qini darifandinna-nara narí aanooqira ufa nimiannoo. Doo maqee maa maqa maaqanaki uriqararafa Sadannafa taikaannoo.

<sup>32</sup> Qini daruseeqa auniriranasaa quqaseeqa maqaki rakiqasee uqeer-aqisaifaqa maqasaa aiqamatinaindaraasa suqu moodaaqoo qeeqa daaqa quqaanaura.

<sup>33</sup> Miqimasee Yisufa narí kuquaninna oosana qimanniminau.

<sup>34</sup> Qimannimufaqa misa qiqau. Maasa sanda akarakinaa ufa asauku mundiranara naaru naaru mariannoo fee qidaqa. Anee faiqí nimaaku aunirira saqarisaa kuqiraree qimariannana, naqi fee qidane miqi qidane. Faiqí nimaakuara anee qianafa yafee mifa maridanoo fee.

<sup>35</sup> Miqi qimasoofanoo Yisufa mina iriseenoo qinau. Kaaqa qarafa inniki qusasaa mariannoo. Kaaqa qarafa mariqoo mi kaaqa qaranasaa kai mariaqa. Miqimmasee marifanoo asukuna fannoo sia rafaqafuannoo. Asukunaki nimarifa sia aana qafaidanoo kaqimbidanoo.

<sup>36</sup> Kaaqa qarafa mariqoo innee minara riqa anoonee qimasee mi mau fuaqa miqiqqa innee kaaqa qaranafaqaasa mariaqa.

*Yuda maqannaa faiqí firaasa Yisunara sia Anutuna faiqi fee qu ufafa.*

Miqi qinoo qimannimiseenoo nariara moosaa finau. Miqoo oonu kukee-qanau.

<sup>37</sup> Yisufa oosana oosana firaa ainaina faiqí anaasee nifusaa augeemarinau. Sia misa minara oonumafi iriqau.

<sup>38</sup> Ooqai Anutuna tamummaqara fasiqa moo auqu Eesaia mifa misa oosanara akara rumaqoofa maridanoo. Mifa maaqi qimasee akara rinau. Oo karaambaiqa, yafee moo fannoo maasa ufa irinoofeeinau sia moo fannoo. Karaambaiqa narí afeeka yau yausee uqannifiqoofaqee anoonee qidee. Sia moo fannoo kuqaa fee qinau.

<sup>39</sup> Miqi qimasee ooqai akara rumaqoofa marufaqa umimmaqidaqa sia Yisunara anoonee qiqau. Eesaiaafa misara kaifaa maaqi qimasee akara rumaqoofa maridanoo.

<sup>40</sup> Anutufa misa nifu dimbaqaifaqa maridaqa. Mifa misa nitikura ititaquqaifaqa mariaqeera. Misa nifu sia qafaqeera misa naaqoo sia iriaqeera. Qinee unnannai faqa sia quandaqifaqa sia amiqiman-nisaaqeera.

<sup>41</sup> Eesaiaafa sia fifaufau maa ufana qimasee akara rumaqoofau maridanoo. Mifa ooqaindari Yisufa sia kambiqooqoo afu pisipasamafinoo Yisuna afeeka eeraarirana qafaidanoo akara rimarufa maridanoo.

<sup>42</sup> Kuqaa moomoosa Anutuna tamummaqaraura ufamau fidaqa Yisunara sia iriqau. Miqidaqa Yuda maqannaa uriqararaura akaqausa moomoosa Anutuna tamummaqaraura ufamau fidaqa Yisunara sia iriqau. Miqidaqa Yuda maqannaa uriqararaura akaqausa kukeeqasee Yisunara iri mariqau. Farisai amaana ufa qimarusa amaana maqakiqari maasa diqiqamasaiifaqa sia kaifaa keeqaanauroo qimasaida qumeeree mariqau.

<sup>43</sup> Misa sia Anutuna afusaa eedoo qiranara rimariqau. Faiqí nifusaa eedoo qiranara kai kaaqa rimarunara Yisunara kukeeqee mariqau.

*Taikara aukuana Yisuna ufa fannoo faiqí anaasee rainanimaqara ufa qimariannoo.*

<sup>44</sup> Yisufa kafaa moo kari faiqí anaasee qimanniminoo qinau. Yafasiqa anaasee qini saqarikidanoo fee. Mifa sia qini kai, qini diqiqamaqoona mina faqa saqarikidanoo.

<sup>45</sup> Yafasiqa anaasee fee qini qiqafaidanoo fee mifa qini diqiqamaqoona mina faqa qafaidanoo.

<sup>46</sup> Qinee kaaqa qarausaa maa maqa maaqanaki animaridaqa. Qiniki mariasa sia asukunaki mariaqeera animaridaqa.

<sup>47</sup> Yafee moo fannoo qini ufa irisee sia auqainnana sia qinee qeeqa ufa amianauro. Sia qinee doori runira ufa nimiraree qimasee qumuafanausa maridaqa. Qinee faiqí anaasee Anutuna nifairiranakinaana qumarasee asumu marirana nimianeera qumuafanausa maridaqa.

<sup>48</sup> Yafee moo fannoo qini minnisainafa qinee ufa qimarunnana minnisainafa sia qeeqa ufa mina amianauro. Kasoo taikara faasaana Anutufa qini dookinaa ufa maqee qimannimimarunnana maraseenoo minannoo naruannoo.

<sup>49</sup> Qinee sia qeeqa iriranannai ufa qimannimidaqa qini diqiqamaqoona qini qikoona uqaqifiqoo ainaina kai qimannimidaqa uqannifiqaidafa.

<sup>50</sup> Qinee qeeqa qikoona ufa iridaqa mina ufa fannoo kai naaru naaru marirana nimidanoo. Qinee minara iridaqa qeeqa qikoona ufa kai qimannimidaqa.

## 13

*Yisufa narí faiqi namu niku namari uqu ufafa.*

<sup>1</sup> Anutuna ainnaaqarara qoomaqa adeedi ramafufanoo Yisufa maa maqana quqasee doo narí akoofinai firafa adeedi reemarufanoo minara Yisufa irimarinau. Maa maqa maaqanakinaasa narisaa atooqeemariasara amuqusufanoo ridanoo kaqi misara aidimarufanoo fidanoo kasaaqai munu kuqinau.

<sup>2</sup> Yisufa narana eendaki sakasaida narí faiqi namufaqa neemarinau. Yudasifa Keerioota maqusaindaraafa indaaruga Simoona amarana amaaku mifa Yisuna faiqi namufaqa miqoo marufa faasai Sadannafa mina dadaaqufanoo Yisunara ueeqararee qidanoo deedaqimarinau.

<sup>3</sup> Anutufa aiqama afeeka innaaruna faqa maqa faqa Yisuna aramandunnai quqaqoofanoo marufanoo Yisufa mina irida marinau. Narí Anutufinaindari qumufa iridanoo marinau. Narí kaifaa Anutufinnai ooru firafa adeedi ranoo marufanoo minara faqa irida marinau.

<sup>4-5</sup> Yisufa narí faiqi namufaqa narana namaseenoo findifinoo narí siuta raipaqusee taura qumareenoo narí aranandauqanna rumbaseenoo difaani maraseenoo nammari minaki adiasenoo narí faiqi namu niku nammaruqusaidanoo taurannai rukannimaqeemarinau.

(Yisufa maru aukuana mina maqannaa oosana maaqimminoo marinau. Faiqí moo fannoo moo maqusaindari narí aqoondi qafararee qimasee ani mina maaqaki keeqafinanoo maaqa akoofa mi fasiqana qafeenoo narí ainainira fasiqa ureeqarana aaramasee qimaminoo anee maa fasiqana aiku nammaruquseenana taura qumaree rukasainanoo ooqumariani. Mi oosanna niku nammaruqira saika sia uriqararaisa maree mariqau ureeqaraisa faaqa fasiqa fooqaasa miqimariqau.)

<sup>6</sup> Yisufa Simoona moo auqu Peetooroona aiku nammaruqirarufanoo Simoona moo auqu Peetooroofa qinau. Oo Karaambaiqa kuqaa fee anee

qini qiku nammaruqiraree qidanee. Sia miqia, anee uriqararafa mari-ananoo.

<sup>7</sup> Yisufa qinau, Eeo nammari uquanaura anee maqee sia qini oosana irimariananoo kasooqagee irinnaranoo.

<sup>8</sup> Peetooroofa qinau, anee maasa uriqararafa mariananoo naaru naaru sia uqanna qini manda qiku nammaruqaa.

Yisufa mina iriseenoo qinau. Qinee ani aiku sia nammari uquanana maaqooqari anee sia qini faiqikinnaranoo.

<sup>9</sup> Simoona moo auqu Peetooroofa mi ufana iriseenoo qinau. Oo karaambaiqa sia qiku kai nammaruqaa qisauku faqa qikiaqa faqa aiqama nammari uqaa.

<sup>10</sup> Yisufa mina iriseenoo qinau. Faiqi nammari auqemariasa aiqama nifaaqa amiqinoo maridanoo niku kai doona kookoomma akinoo maridanoo. Innee aiqama amiqiaqaa mariafanoo moodaa fannoo mandaikinoo marifaqa qafaidaqa.

<sup>11</sup> Yisufa faasai nari ueeqee maruna qafaidanoo miqi qinau. Inni nifaaqa aiqama nammari uqinoo maridanoo. Moodaa fannoo kai sia nammari auqara fee qinau. Nari ueeqaaninnanara iriseenoo miqi qinau.

<sup>12</sup> Yisufa nari faiqi namu niku nammari uquseenoo kafaa nari siuta afisumaree kafaa misa faqa oqumari finoo qimannimino qinau. Qinee inni niku nammari uqunannara iridee sia fee iridee.

<sup>13</sup> Doo maqee mina nammari uqunanna oosana kooroo ianaura. Innee qiniara ufasaa rakisira fee karaambaiqee qimariafanoo. Doo mina kuqaa qimariafanoo qinee miqirausa maridaqa.

<sup>14</sup> Qinee inni ufasaa rakisirausa inni karaambaiqa maridaqa ureeqarausa saika mareemariana misa naanna raidaqa inni niku nammari uqidaqa innee miqi kai iqa qini daanna reeqa ureeqara fasiqa anaaseera foora nari dadaaqaqaa.

<sup>15</sup> Qinee uqannifiqaunnana qafeeqa qinee unandee kai iaqanani.

<sup>16</sup> Qinee kuqaa anoona ufa inni qimannimidaqa. Ainainira fasiqa fannoo sia nari rakisirana uriqararafa maridanoo. Ufa maree fimari fasiqafa sia aqiqeemarina uraaqararafa maridanoo.

<sup>17</sup> Innee maqee maa ufana anoona naaqooki irimariafanoo. Innee maa ufana irisee auqaifanoo asarafa mariannoo.

<sup>18</sup> Yisufa kaifaa nari faiqi namu maaqi qimasee qimanniminau. Anutuna tamummaqara fasiqauqa ooqeenaa akara oosana maaqimminoo maridanoo.

Innikiqari moodaa fannoo qini narana qini faqa neemarifa mifa qini namuqaakinoo aranaiqi daruannoo.

Maa akarana oosana inniki kambiqaanoo, sia inni aiqamara qidaqa. Qinee oonu mareeqee qeeqaindika maqaunausa mariafanoo moodaa fannoo kai.

<sup>19</sup> Qinee maqeesaa qimannimidaqa sia kambiqai kamuqoo qimannimidaqa. Kambiqainaga innee qiniara irifaranoo. Qinee qeeqaraa ufa qunausa doo misaki maridaqa.

<sup>20</sup> Qinee anoona ufa kuqaa qimannimidaqa. Faiqi anaasee moo fannoo qinee inni niqiqamaqaanausa niqoondikinafa qini faqa qi qoondikidanoo. Faiqi anaasee moo fannoo qini qi qoondikamma qimaqainafa qini diqiqamaqoona faqa kai aqoondikidanoo.

*Yisufa nari uqeeqee fandinna ufana kooroo u ufafa.  
(Mat 26:20-25; Mak 14:17-21; Ruk 22:21-23)*

<sup>21</sup> Yisufa minara qimanniminsoofanoo narí aunduraki oonumafi irufanoo amuqusufanoo kafa kooroomasee qimanniminau. Qinee anoona ufa qimannimidaqa innikiqari moo fannoo qiniara ueeqaannoo.

<sup>22</sup> Yisuna faiqi namu mi ufana iriseeqa tautumakufaqa narí qafee narí qafee idaqa randaqau.

<sup>23</sup> Yisuna afaaqasaa aqoondi fannoo mina aaqa ooqumarifi marinau.

<sup>24</sup> Simoona moo auqu Peetooroofa mi fasiqana auqamaseenoo qinau anee karaambaiqa irammirisee iria. Yafasiqanaree qidanoo fee yafee ani ueeqaannoo fee.

<sup>25</sup> Miqi qufanoo mi fasiqafa Yisuna aaqa firambaqafufanoo maqandanai irammirinai Karaambaiqa yafee ani ueeqaannoo fee.

<sup>26</sup> Yisufa qinau, qinee feemu rakeemandeeqa sauna anoona fooqaanaki raaraamandee amianana qafa. Mifa kai qini ueeqaannoo. Miqi qimasee Yisufa feemu rakeemaseenoo sauna anoona fooqaanaki raaraameeqeenoo Yudasifa Keerioota maqannaa Simoona amarana amaaku aminau.

<sup>27</sup> Yudasifa mi feemuna qumarasee namasoofanoo doo Sadannafa mina aundurai keeqanau. Miqufanoo Yisufa Yudasina qimaminoo qinau. Doo anee anenna inna ainaina doo dauni dauni ia.

<sup>28</sup> Miqoo marusa sia Yisuna ufa oosana iriqau.

<sup>29</sup> Yudasifa Yisuna faiqi namu munnimmasaa rakisimarufa marufanoo Yisufa aqiqoofaqa misa narana aina fi fi maraanifeera aqiqee maqi qiqau. Kudi fasiqauqa munnimma nimiannoo fee qiqau.

<sup>30</sup> Yudasifa mi feemuna mara namaseenoo findimeeqeenoo aaqee kai eendaki raudamaki finau.

*Yisufa fuka aaquqira ufa qimannimu ufafa.*

<sup>31</sup> Yudasifa fufanoo Yisufa kaifaa narí faiqi namu qimanniminoo qinau. Doo maqee faiqi nimaaku qini amiqi amiqira afeeka eeraarirafa doo kooroo inoo maridanoo.

<sup>32</sup> Anutuna afeeka eeraarirafa qinisaa kooroo inoo maridanoo, Anutufa narí uqanna quandaki qini qifaaqa firaqoo areenaannoo, qusasaa maqee uqanna miqiannoo.

<sup>33</sup> Qini faiqi namu sia kisaaqasaa inniki mariana. Yuda maqannaa qimannimifannandee kai inni qimannimidaqa. Innee qiniara randee sia paqurifaranoo. Qinee fuannaqoo sia innee amana fifaranao.

<sup>34</sup> Doo maqee qinee fuka aaquqira ufa qimannimidaqa. Innee nariara nariara nimuqusidaqa nariara nariara ruaqa. Qinee inniara qimuqusufaqa inniara rimariqia innee faqa qini daanna raaqa nariara nariara ruaqa.

<sup>35</sup> Innee nariara nariara rimarifaqa aiqamausa inni nindafeeqa inniara boo Yisuna faiqi namu miqidammiafoo qiaqa.

*Yisufa Peetooroofa nariara qaoo qianinna ufana kooroo ufafa.*

*(Mat 26:31-35; Mak 14:27-31; Ruk 22:31-34)*

<sup>36</sup> Yisufa miqi qimasoofanoo Simoona moo auqu Peetooroofa irammirino qinau, Oo Karaambaiqa anee yai fee fina qee maasa sia ani faqa fuanauree.

Yisufa iriseenoo qinau, Qinee maqee fuanannai anee sia amana qini faqa finnarano, kasooqaqee anee qini faqa finnarano.

<sup>37</sup> Simoona moo auqu Peetooroofa iriseenoo qimaminau, Karaambaiqa anee naqi naqee qinee sia ani faqa fuanauree. Qinee aniara kuqanaurano.

<sup>38</sup> Yisufa mi ufana iriseenoo qimaminoo qinau, Kuqaa fee anee maqee qiniara kuqinnaree, qinee anoona ufa ani qimamidaqa fafaa eendaki kookooraana sia ufa qinnakamuqoo anee kuqiranara rufiaseenana qaaramoo kari qiniara sia qafaunausee qinanoo kookooraana ufa qiannoo.

## 14

*Yisufa nariara nari akoofa marinnai fimaria aanausa qinee maridee qu ufafa.*

<sup>1</sup> Yisufa miqi qimaseenoo aiqama qimanniminoo qinau. Innee sia nimukee marinaqa maparaaiqa. Innee Anutuna saqariki mariafanoo doo qini faqa saqarikiqa.

<sup>2</sup> Qini qikoona innaaruna maqusaki moomoo maqa nari aaqa nari aaqa maridanoo. Qinee maindari ooruree innee ooru fifandinna maqana auqirara ooru fidaqa. Minara qinee kuqaa anoona ufa kai inni qimannimidaqa. Sia anoona marinaqau sia qimannimunaiqini. Kuqaa anoona marifaqa qimannimidaqa.

<sup>3</sup> Qinee innaarunai oorureeqa innee ooru fifandinna maqusana deedaqamasee qumu nifiqee minni murunnisaanura. Innee qini faqa mariaqeera miqianaura.

<sup>4</sup> Innee qinee marunnannai fimaria aanara irimariafanoo.

<sup>5</sup> Toomasifa mi ufana iriseenoo qinau, Anee fimariannanara maasa sia iridaqa. Naqimasee fee mi aannara irianauree.

<sup>6</sup> Yisufa iriseenoo maaqi qimaseenoo qimaminoo qinau, qinee mi aanausa maridaqa. Qinee kuqaa anoona ufa maridaqa. Naaru naaru marirafa qiniki maridanoo qinee misa maridaqa. Sia moo fannoo kaqi qini qikoofinnai fidanoo qinimau kai fifaranoo.

<sup>7</sup> Innee qiniara irifau qini qikoonara faqa irini. Maqee mariaqooqari qini qikoonara iriqa qini qikoona qafee mariafanoo.

<sup>8</sup> Firipifa mi ufana iriseenoo Yisuna qimaminoo qinau, Oo karaambaiqa aneenna akoona uqaqifiqainaga qafamasee doo fee qianaura.

<sup>9</sup> Yisufa mina iriseenoo akooqoofanoo raigaseenoo qinau. Firipi qinee kisaagasaa inni faqa mariafanausa marunana anee sia irirana irimariananoo. Yafasiqa anaasee fee qini qiqaafainafa doo qini qikoona qafaidanoo. Anee nanaree qiniara aneenna akoona uqaqifiqaannee q inanee.

<sup>10</sup> Firipi anee sia fee qini ufara anoonee qidanee. Qinee qipaqaenaki faqa maridaqa mifa qiniki faqa maridanoo sia fee anee mi ufana iridanee. Yisufa kafaa nari faiqi namu aiqama qimanniminoo qinau. Qinee inni ufa qimannimimarunafa sia qeeqa daundurakinaana qimannimidaqa. Qini qikoofa qiniki marifa nari irirana iriseenoo qifaqa nari qimau kai fidaqa qimannimidaqa.

<sup>11</sup> Innee maa ufana irisee anoonee qiaqa. Qinee qeeqa qikoonaki maridaqa mifa qiniki faqa maridanoo. Innee qini ufara sia fee qimasee qinee auqaannainaina faiqi sia auqaqaa ira ainaina nifunnoo qafamasee Anutufa mina faqa maridanoo fee qiaqa.

<sup>12</sup> Qinee anoona ufa qimannimidaqa faiqi anaasee moo fannoo qini saqarikinafa qinee ianandee iannoo. Qinee qeeqa qikoofinnai fuannanara qini saqarikinafa sia qini daanna kai raannoo qini saika uraaqaranoo mariannoo. Mina oosana maaqimminoo maridanoo.

<sup>13</sup> Innee innaaru qidaqa qini duqusaa qimasee innaaru qifaqa nimianaura. Sia moo ainaina sia nimianaura innaaru qifaqa nimianaura. Qini qikoona afaqa areenarafa qinisaaqari faqa arenaanifeera nimianauura.



14 Innee qini duqusaa qimasee innaaru qifaqa qinee mi ainainna miqi-mannisaanuranoo.

*Yisufa naaquqara maraquna nimiraree qu ufafa.*

15 Yisufa narí faiqi namu kaqi qimannimidanoo qinau. Innee qiniara riqa qinee qimannimifannufana andeeqasee qumareefaranoo. Sia qiniara riqa sia qinee qiafannufana qumareefaranoo.

16 Qinee inni minnisee ooru fiqa qeeqa qikoona irammiriananoo Anutuna dadaaqira afeeka maraquna nimiannoo. Mifa kuqaa anoona ufa qiroosana maraquna qumu mariannoo, mi maraqunafa naaru naaru inni faqa mariannoo.

17 Maa maqanasaa mariasa sia qini Yisusa mandaagee marinausa sia amana mi maraqunna mareefaranoo. Misa sia mina qafaidaqa sia minara irimariafanoo minara sia mareefaranoo. Mifa inni faqa mapukusee maridanoo kuqaa inni naundurari anoona mariannoo. Mifa inni faqa marifaqa innee mi maraqunna oosana irimariafanoo.

18 Qinee sia inni mininnisaanaura qinee oorureeqa Anutuna maraquna aqiqaananoo qumuree inni faqa marida dadaaqiannoo.

19 Kaqikaagoo maa maqanasaaqaraa irirana faqaasa sia qini qiqafeefaranoo. Innee kai qini qiqafeefaranoo. Qinee kaqi marirausa maridaqa minara innee kaqi marirana mareefaranoo.

20 Qinee qeeqa qikoonaki maridaqa kafa innee qiniki mariafanoo qinee inniki maridaqa. Anutuna maraquna qumuaninna faasaana mi faasaana mi ufana oosana amiqimandee irifaranoo.

21 Yafasiqa anaasee fee qinee qimannimifanna ufana irisee maree marifandinausa misa kai qiniara rifandinausa marifara. Qiniara rimarina fasiqa anaaseesara qini qikoofa misara faqa ruannoo qinee faqa mi fasiqa anaaseesara ruanaura qeeqaindi anoona afeeka uqannifiqaanaura.

22 Yudasina amarafa Yisuna irammirinoo qinau, Oo Karaambaiqa naqimaseenane anee maasa qifusaa kai kooroo innaree maa maqa maqanasaaqaraa irirana faqaasa nifusaa kukeeqararee qidanee.

23 Yisufa iriseenoo qinau. Yafasiqa anaasee fee qiniara rimarinafa qini ufa maree mari fasiqa anaaseefa mifa qiniara rimarifa mariannoo. Miqinna fasiqa anaaseena qini qikoofa Anutufa minara faqa ruannoo. Mifa faqa qinee faqa mi fasiqa anaaseesa innannai oonuree umee mina faqa marianaura, miqimaseeqa maasa inni nifusaa kai koorooianaura. Maqasaaqaraa irirana faqaasa nifusaa kukeeqaanaura.

24 Yafasiqa aanaaseesee sia qiniara rinausa misa qini ufa sia irifara. Qinee qimannimira ufa innee irimariafanoo, sia qinindi maridanoo, qini qikoofa qini diqiqamaqainaindi minaindi maridanoo.

25 Qinee maa ufausa inni faqa kaqi maridaqa qimannimidaqa.

26 Inni fuka dadaaqirafa naaquqara maraquna qini qikoofa kasooqagee nimianinnafa mifa aiqama ainainara qimannimiannoo. Qinee faqa aiqama ufa qimannimifannana mifa minara inni naaqoo auqainaqa oonumafi irifaranoo.

27 Qinee naundura asooarana inni nimidaqa. Qinee qiniki mari naundura asooarana inni nimidaqa. Maa maqanasaa mariasa sia misa naanna ramasee inni nimidau. Amiqimandee qeeqa asooarana nimianaura. Sia inni naundura rapikiani sia rufiaqa rufiaqiqa.

28 Qinee maqee maaqooqari kafa ooru fuanaura oorureeqa marikiqa oorurandee qumureeqa inni faqa marianaura. Sia qinee ooru fuannanara innee minara rufiaqa. Innee kuqaa qiniara ridau qinee qeeqa qikoofinnai

fuannanara susummaqimaqani. Qini qikoofa qini uriqararafa maridanoo minara susummaqimaqani.

<sup>29</sup> Qinee maqee sia kambiqauna kamuqoo aiqama ainainara qimannimidaqa. Kambiqaafinaqa innee qiniara iriaqeera qimannimidaqa.

<sup>30</sup> Qinee sia amana inni faqa kisaagasaa ufa qianauro. Maa maqanasaa rakisirafa Sadannafa doo anidanoo qini afeeka fannoo mina afeeka uraaqaranoo maridanoo.

<sup>31</sup> Maa maqanasaaqaraasa qinee qeeqa qikoonara rimarunnana minara iriaqeera mina ufamau andeeqasee fidaqa qinee qeeqa kai irisee Sadanna asauku ameemaanai oonuree kuqanaura. Miqi qimaseenoo Yisufa nari faiqi namuara doo uqeeraifaqa maaqooqari moosaa fuanee qimasee uqeereenoo moosaa finau.

## 15

*Yisufa nariara qinee uainna sanda anoonanda maridee qu ufafa.*

<sup>1</sup> Yisufa fidanoo maa ufana nari faiqi namu qimannimianau. Qinee saunara foora qinee marunna saqarisa maridaqa. Qini qikoofa sauna saqamasaa rakisimarifa maridanoo.

<sup>2</sup> Qini qikoofa Anutufa mi sauna saqarina sia irainanoo ateeka idaraanoo. Ireemari oosanna amiqimandee iraani fee qimasee anukamasaidanoo amiqimasee rakisidanoo.

<sup>3</sup> Qinee qimannimimarunnufana innee irisee maraifanoo doo inni mandainaina rukannisaifaqa anukaraqoo mariafanoo.

<sup>4</sup> Innee saqari asanara foora qinisaa ariqa mariaqa. Innee sia qinisaa ariqa maridaqa sia qini amiqira marira nirana mareefaranoo.

<sup>5</sup> Qinee saqari anoona maridaqa. Innee asaana miqirausa mariafanoo sia anoonasaa arufinafa sia sauna iraanoo. Qiniki marinausa qinee faqa misaki mariananoo saunara foora moomoo ireefaranoo. Innee inneeqaraa marinausa kudi marifaranoo qini faqa marinausa sauna amiqimasee ireemarifaranoo. Innee minara iriseeqa amiqimasee qinisaa atooqaiifaqa qinee faqa inniki marianauro.

<sup>6</sup> Faiqi moo fannoo sia qiniki marinafa sauna asaana miqirafa aadanusidanoo marinanoo saunasaa rakisimarifa asaana qafamasee aadanusinausa aiqama ateekasee suqeeqeenoo idaki aqusainanoo qamataikaannoo.

<sup>7</sup> Innee qiniki marirara kai idaqa marifaqa qinee qimannimunna ufafa inniki marirara kai imarinaqa innee nana ainainaree qiniara irifaqa nimianauro.

<sup>8</sup> Innee andeeqara marirana qaqqammara foora moomoo irifaqoo minannai qini qikoona amiqira afeeka eeraarira areenarana kooroomanni-maqaannoo. Miqiuqanna iqa qini faiqinamuka mafifaranoo.

<sup>9</sup> Qini qikoofa qiniara firaqoo ridanoo qinee faqa miqikai iqa inniara firaqoo ridaqa doo sia innee moo fannoo minakiqari aiaki fuaqa. Kaqi kai qini didiranaki mariaqa.

<sup>10</sup> Innee qinee qimannimuna ufana irisee qumareeqa qini didiranaki marifaranoo. Qinee miqikaimasee qeeqa qikoona ufa iriseeqa qumareeqa mina aidiranaki maridaqa.

<sup>11</sup> Qinee sia kaqi qimannimidaqa qini susuirafa inniki marianifeera inni susuirafa anoonaikianifeera qimannimidaqa.

<sup>12</sup> Qinee ufa moo aaquqira ufa qimannianauro iriaqa Innee qini daanna ramasee nariara nariara ridaqa nidiani.

<sup>13</sup> Faiqí moo fannoo narí aqoondi amaaqa maqasee kuqinna fasiqafa mina aidirafa aiqama nidirana arusee uriqaramaqaraasa uqanna inoo mariannoo.

<sup>14</sup> Maqee maqee qini aaquqira ufa irisee mi mau fimariasa misa kai qini qiçoondiuga maridaqa.

<sup>15</sup> Qinee sia maaqooqari inniara qini ainainira faiqí fee qianaara. Rakisirafa narí fuaninnanara faqa auqaaninnanara faqa maraaninnanara faqa sia ainainira faiqiuqa qimannimidanoo miqimmianauree maaqimmianuree qidanoo narí kai. Ainainiaqee ufa kai qimannimidanoo. Qinee sia fifau saikira faiqí fee qidaqa inniara qini qiçoondi fee qimasaidaqa qinee qini qikoofa auqaaninna saika ufanara aiqama inni kooroomannimidaqa.

<sup>16</sup> Sia innee qini rusandeesamumandee qini qumaraafanoo. Qinee naaree inniara rusandeesamumandee inni qumareeqa. Inni marirafa nirafa qini daanna ramasee mariaqeera qinindikiaqeera qimasee inni mareeqa. Mi marira oosanafa sia putaa iannoo afeeka kai mariannoo. Innee minara irisee nana sarauimari ainainaree qini qikoofinnai innaaru qimasee qini duqusaa innaaru qimasaifanoo nimiannoo.

<sup>17</sup> Doo qeeqa aaquqira ufa maaqi qimasee qimannimidaqa. Innee nariara nariara ridaqa nidaqa.

*Maa maqanasaaqaraasa Yisuna ufa irimarinausa fidiqaammannaqee fandinnanara qimaqoo ufafa.*

<sup>18</sup> Maa maqanasaaqaraasa inniara fidiqaammifaranoo maanara iriaqa indaaru qini Yisusara fidiqaaiasa mariafanoo innindi inaaqianna fidiqaairafa mariannoo.

<sup>19</sup> Innee qini faiqí namu maa maqa maaqanasaaqaraasa faqa moodaa irirana faqaasa marifaqau misa inniara maasaindi fee qimaseefau inniara rini. Qinee inni maa maqa maaqanakinaasa rusandeesamumasee qumaraqaunausa mariafaqa maqee sia misaindi marianara minara kaukaata qimannimaqaidaqa.

<sup>20</sup> Maa ufana qimannimunnana kaifaa iriaqa ainainira fasiqa sia narí rakisirana uriqararafa maridanoo. Misa qini inni rakisirana dariqa quandaki inni faqa qini ufa irimariasa faqa narifaranoo, misa qini ufa iriqa quandaki inni ufa faqa irifaranoo.

<sup>21</sup> Innee qinindi marianara oosana oosana mandainaina maa maqanasaaqaraasa inni nimifaranoo. Misa sia qini diqiqoonara Anutunara iridaqa miqifaranoo.

<sup>22</sup> Qinee maa maqanasaaqaraasa mandainainara sia kooroomma ni-maqaananoo fau sia misa manda numoo mariqini. Doo qinee misa mandoosanara kooroomasee misa qimannimiqauna iridaqa Anutuna narira ufa ameemaanai maridaqa sia amana unnufannai mina ititeefaranoo, narirafa kaqi naruannoo.

<sup>23</sup> Faiqí moo fannoo qiniara fidiqaammidanoo qini qikoonara faqa fidiqaammidanoo.

<sup>24</sup> Qinee misa nifusaa faiqí sia auqaqaa ira ainaina auqaafannana sia maqasaa fasiqa moo fannoo mi ainainna auqoofanoo anoona kambiqanau. Qinee sia miqimaseeqa mi ainainna auqaananoofau misa numoo sia mariqini. Qinee oosana oosana ainaina auqaunaqa misa sia amiqimasee maaqanda qisakoosara irirai maaqandara fidiqaamma qimaqaidaqa.

<sup>25</sup> Mooseena sandufa ooqai misara akara rumaqoofa maridanoo. Mifa maaqi qimasee akara rinau.

Misa kaqi fifau miqidaqa qiniara fidiqaaida marifara.

Anutuna ufa miqinoo maridanoo naqimasee moosaa fifaree. Minara misa qiniara fidiaqaaidaqa.

<sup>26</sup> Yisufa kaqi narí faiqi namu qimannimidanoo qinau. Qinee ooru fuananoo fuka dadaaqirafa qumuannoo. Mifa kuqaa anoona ufa qira oosana maraquna mariannoo qini qikoofinaindaraafa mariannoo. Qinee qeeqa qikoofinaindaraana aqiqaananoo qumureenoo mifa qiniara qimannimiannoo.

<sup>27</sup> Mifa inni naakinaqa innee faqa qiniara ufa qifaranoo. Innee oosanakiqari qini faqa niniaasa maridaqa qiniara ufa qifaranoo.

## 16

<sup>1</sup> Innee aanai fiqa niku rupauraki saamuriqa qini minnisee foora minara naamua qimarunausa maridaqa.

<sup>2</sup> Kasooqaqee faiqi misa nariqa amaana maqakiqarifee ufa suqira maqakiqarifee aanoommasee inni niqiqeefaranoo. Kasooqaqee nariqa aqa-masee kuqaa Anutuna dadaaqidee qiga inni kuqa narifaranoo.

<sup>3</sup> Misa qini qikoona Anutunara faqa qiniara faqa sia iridaqa miqifaranoo.

<sup>4</sup> Maqee maa kamuqoo qinee marunnaqoo maa ainainnausara qimannimariana irimarifanoo kasooqaqee kambiqainaqa inneeqa naaqoonnai oonumafi iriaqeera qidaqa. Qinee indaaruu sia qimannimiqa qinee inni faqa kaqi maridaqara qiga sia qimannimifanausa qinee qusasaa firaridaqa qimannimidaqa.

*Naaquqara maraquna fannoo qumureenoo auqaaninna ainainara kooroo qimaqoo ufafa.*

<sup>5</sup> Maqee qini qikoofa qini diqiqamaqoonnai ooru firaridaqa innikiqari moo fannoo sia qini iraidanoo anee yai fee fidanee miqidanee.

<sup>6</sup> Doo qinee firara inni qimannimunaqa inni naundura qumaara raifaqa noori runusee mariafanoo.

<sup>7</sup> Qinee anoona ufa qimannimidaqa qinee ooru fuanaga innee amiqiranaki mariaqeera ooru fuanaura. Qinee sia ooru fuananoo fuka dadaaqirafa sia qumuree inni dadaaqiannoo. Qinee ooruree fuka dadaaqirana aqiqaananoo qumu inni faqa maridanoo dadaaqiannoo.

<sup>8</sup> Fuka dadaaqirafa qumu maridanoo inni maqasaaqaraasa irirana aqaaidanoo fee qiannoo inni andeeqaranara faqa manda oosanara faqa Anutuna narira ufa nimianinnanara faqa aqee mariafanoommifoo qimasee qimannimiannoo.

<sup>9</sup> Maqasaa fasiqauqa qiniara sia irifaqee qidaqa minara nári manda oosanara amiqira oosana fee qimasaidaqa aqaaidaqa.

<sup>10</sup> Qinee qeeqa qikoofinai ooru firaridaqa maqasaaqaraasa sia kaifaa qini qiqafeefaranoo, minara fuka dadaaqirafa maqasaaqaraasa andeeqara oosanara aqee mariafanoo fee qiannoo.

<sup>11</sup> Maa maqanasaaqaraa rakisirana aakaaqaindaraa fasiqa doo Anutuna arira ufa doo mi manda fasiqanasaa maridanoo. Minara Anutuna narira ufa fannoo maa maqanasaaqaraa fasiqa anaaseesaa faqa maridanoo minara faqa misa sia andeeqasee iridaqa aqaaidaqa.

<sup>12</sup> Qinee moomoo ainainara qimannimianaqa qumaara rainaqa siamma irifaranoo.

<sup>13</sup> Miqimarianara kuqaa anoona ufa qira maraquna fannoo qumureenoo inni mareeqeenoo anoona ufa mariranaki mara quqaannoo. Sia mi maraqunafa narí kai ufa qimannimiannoo qini dookinaana kai irinoo inni

qimannimiannoo. Mifa kasooqagee kambiqaaninna ainainara tamum-maqasee iriseenoo inni qimannimiannoo.

<sup>14</sup> Mifa qini irira ufa mareeqee inni niminaqa minannai qini Yisuna asasirana qimimarifaranoo.

<sup>15</sup> Qini qikoona Anutuna ainaina aiqama qinindi kai maridanoo. Minara qinee inni maana qimannimiqa kafaa qimannimidaqa. Qinee qeeqa irirana marasee anoona ufa qira maraquna qimamiananoo mifa quandaki inni qimannimiannoo.

*Noori runira ufa faqa asasira ufa faqa qimaqoo ufafa.*

<sup>16</sup> Yisufa narí faiqinamu kaqi qimannimidanoo qinau. Kaqikaaqoo innee sia qini qiqafeefaranoo kaqikaaqoo marikiqa kaifaa qini qiqafeefaranoo.

<sup>17</sup> Yisuna faiqi namu mina irisee akaqausa maaqi qiqa. Maa ufana nanaree qidanoo fee. Mifa nariara kaqikaa qoo sia qini qiqafeefaranoo fee qidanoo. Kaifaa kaqikaaqoo marikiqa qini qiqafeefaranoo fee qidanoo. Kaifaa nariara qeeqa qikoofinai firaree qidaqee qidaqinoo.

<sup>18</sup> Mifa kaqikaa qoo fee qidaqinoo mi ufana oosanara maasa randaidaqa. Maasa sia mina ufa oosanara iridaqa naqi fee qidaqinoo fee.

<sup>19</sup> Yisufa misa randaranara irisee maaqi qimasee qimanniminou. Qinee qiqa. Kaqikaaqoo sia qini qiqafeefaranoo. Kaqikaaqoo marikiqa qini qiqafeefaranoo. Innee minaree narí qimami narí qimami qidee.

<sup>20</sup> Qinee anoona ufa qimannimianaura. Qinee kuquanna kamuqoo innee ikifaafau qifaranoo. Innee miqimariafaqa maqasaaqaraasa qiniara sia irimariasa susuifaranoo. Innee noori runusee marifaranoo qinee kuqiranakiqari findi fuanaqa kafaa mi noori runirana minnisee quandakinaqa asasifaranoo.

<sup>21</sup> Anaasee moo fannoo amuaqu uqafaqa maridanoo oori runusee maridanoo, doo aupurarafa aidafirafa minaki marinara miqidanoo. Miqidanoo mariifanoo faiqi maqasaifanoo doo aupurarafa faqa aidafirafa faqa taikeefoo qimaseenoo doo qini faiqi kambiqaifaqee qimasee aidafiranaa aunusee asasidanoo.

<sup>22</sup> Innee mina aanna reefaranoo. Maqee kamuqoo noori runusee marifaranoo. Kasooqagee qini qiqaqamasaiifanoo miqoo inni nimuqusaki asasirafa firaqoo qumbiqanoo mariannoo. Mi asasirana sia moo fannoo mareemaria asasirafa mariannoo. Afeeka asasirafa amiqirafa kaqi mariannoo.

<sup>23</sup> Qinee kuqiranakiqari findifiqa qeeqa qikoofinnai ooru marianaqa innee sia kafaa qiniara moo ainainara irammirifaranoo. Qinee anoona ufa qimannimidaqa. Innee qiniara faiqi namu maridee qimasee qini qikoona irammirifanoo irafandinna ainaina oosana oosana nimiannoo.

<sup>24</sup> Maa maria kamu sia moo ainainara qiniara aqoondi fee qimasee Anutufinnai innaaru qimariananoo. Irammiriaqa. Irammirifanoo nimiani. Innee asasirafa anoonaikianifeera Anutufa nimiannoo.

*Yisuna ufa irimariasa maa maqanaasa marirana uriqararanara qimaqoo ufafa.*

<sup>25</sup> Qinee kukeeqara ufannai inni qimannimi mariafannana. Qusasaa sia qinee kukeeqaanaura kooroomandee qeeqa qikoona Anutunara akooqoo qimannimianaura.

<sup>26</sup> Mi faasaanna anirainaqa qini duqusaa Anutunara innaaru qifaranoo. Innee innaaru qifaqa qinee sia qeeqa qikoona afusaa oonuree mi ainainara inni fifau dadaqianaura.

<sup>27</sup> Qini qikoofa narí kai inniara aidimarifanoo irafandinna ainaina eedoo qimasee nimmiannoo. Innee qiniara nidimarinaqa Anutuna faiqi fee qifanoo inniara faqa Anutufa aididanoo irafandinna ainaina nimiannoo.

<sup>28</sup> Qinee qeeqa qikoofinaindari maqasaa qumuafanausa maridaqa doo maqasaa taikeeqa qeeqa qikoofinai ooru fuanaura.

<sup>29</sup> Yisuna faiqi namu mi ufana iriseeqa qiqau. Doo iria, doo maqee maasa kooroomasee qimaqimimariananoo.

<sup>30</sup> Doo maqee maasa aniara aiqama ainaina irimariana fee qidaqa. Anee ufa qiananoo moo fannoo sia ani dadaaqimarifana aneennaraa kai qimannimimarianaqa maasa minara irisee kuqaa aniara Anutufinaindari qumi fee qidaqa.

<sup>31</sup> Yisufa mi ufana iriseenoo kafaa qimanniminau. Doo innee maqee fee iriqaraasidee.

<sup>32</sup> Doo moo aukwana adeedi ranoo maridanoo misa kai inni mara fufufamma nimaqeeffaranoo. Innee inneeqa maaqa maaqa daraanimambifaqa qinee qeeqakai marianaaura. Sia qinee kaaqa qeeqaraa maridaqa. Qini qikoofa qini faqa maridanoo.

<sup>33</sup> Innee qinisaa atooaqa marifandinannannai asoaranaki marifaranoo. Maa maqanasaaqaraa irirana mareemariasa aupurarana oosana oosana nimianinnanara maa ufana qimannimidaqa. Sia rufiaqa rufiaqiaqa doo qinee maa maqanasaaqarasa doo rafaqaqafuseeqa, minara kaqi paasoosiaqa.

## 17

*Yisufa narí faiqi namuara Anutunara rakisinnimaqaannee qu ufafa.*

<sup>1</sup> Yisufa mi ufausa narí faiqi namu qimanniminau. Qimannimiseenoo oori innaarunai uqeeraseenoo narí akoona Anutuna innaaruqinoo qinau. Oo qipoo doo qini kuqira aukwana adeedi ranoo maridanoo. Anee aneenna amaaku qini qifaaqa areenarana qimia. Qinee kafaa quandaki kaifaa aninna amianeera qimia.

<sup>2</sup> Oo Anutu, anee aiqamausa rakisianneera afeeka eeraarira maraquina qiniki quqaqaananoo. Anee faiqi anaasee qumee rarisameeqaidana qimimarianana qinee misa naaru naaru marirana nimianeera mi afeekana qimiqaananoo maridanoo.

<sup>3</sup> Naaru naaru marirafa maqimminoo maridanoo. Maqasaa fasiqa anaasee misa ani moodaa kuqaa Anutunara irisee mi iriranamau firafa kafaa qini Yisusa ani asauku mundirausara anee diqiqoonausara miqikaimasee irisee mi iriranamau firafa, mifa kai naaru naaru marirafa maridanoo.

<sup>4</sup> Qinee maa maqanasaaqaraasa doo ani afaqa areenarana uqan-nifiqeeqa. Anee ainainirana qimiannana doo qinee taikaseeqa.

<sup>5</sup> Oo qipoo qini mareeqeenana aneenna marianaqoo mara quqaqisee qifaaqa areenarana qimia. Ooqai oosana aroo aukwana maa maqa maaqafa sia marunaki qifaaqa areenarana qimunnana mina kai kafaa qimia.

<sup>6</sup> Anee maa fasiqausa qini faiqi namu maqasaaqaraa sakinaana qimimarianaqa aniara kooroomannimiqa. Misa anindi maridaqa. Anee misa qimimarianafa mariananoo. Misa ani ufa irisee eedoo qimariasa maridaqa.

<sup>7</sup> Doo maqee misa qini aiqama ainaina anisaaqaraana doo iriqa.

<sup>8</sup> Anee qimunna ufana qimannimunaqa irisee doo mareea. Qinee anikiqari qumuafannanara faqa misa kuqaa fee qidaqa. Anee qini diqiqoonnanara faqa anoonee qidaqa.

<sup>9</sup> Qinee anee ianannai misara dadaaqianeera innaaru qidaqa, sia kaqi qeesa maqasaaqaraasarau innaaru qidaqau. Anee qimianausara kai anindi maridaqara innaaru qidaqa.

<sup>10</sup> Oo qipoo qini aiqama ainaina anindi maridanoo. Kafaa ani aiqama ainaina qinindi maridanoo. Qini qifaaqa areenarafa qini faiqi namusaaqari kooroo idanoo.

<sup>11</sup> Doo maqee qinee anee mariannaqoo ooru firaridaqa doo qinee maa maqanasaa taikasee minni ooru fuanauranoo. Misa kaqi maa maqanasaa marifaranoo. Oo naaquqara qikoofa. Ani auqu afeeka eeraarirana misasaa ititannimaqaani. Anee mi auquna afeeka eeraarirana qini qimunafa mifa misasaa ititaani. Ititannimaqasanaqa maaqanda daanna ramasee moodaanakikiqa mariaqeera.

<sup>12</sup> Ani auqu afeeka eeraarirana qimiannana minannai maa kamuqoo misa faqa maridaqa amiqimandee qeeqa faiqi namu rakisidaqa marunaqa maridaqa. Qinee misa ititannimaqeeqa, sia moo fannoo dapikiaqeera. Maaniki fimari fasiqafa Yudasifa mifa kai dapikinoo maridanoo. Sia kaqi dapikinoo, ani ooqeenaa akara anoona kooroo ianifeera dapikinoo.

<sup>13</sup> Doo qinee anee ianannai ooru firaridaqa. Qinee maaqoo kaqi marunnaqoo ufa oosana oosana qimannimidaqa qimannimianaqa misa nimuqusakina asasirafa qumbiqanoo marianifeera qimannimidaqa.

<sup>14</sup> Qinee ani aufakiana qeeqa faiqi namu qimannimunaqa qimannimifaqa maa maqanasaaqaraasa akaqausa sia qini ufa irimariasaa misa iriseeqa qini faiqi namu fidiqaamma nimaqaidafa. Qini faiqi namu ani ufa irisee maqasaaqaraasakinaa iriranara nikooqaidanoo innaarunaindaraa irirana marasaafaqa maqasaaqaraasa minara misa fidiqaamma nimaqaidanoo. Misa qini daanna raidafa sia maaqooqaraasau maridau.

<sup>15</sup> Oo qipoo qinee aniara sia qini faiqinamu mareeqee moosaa quqaanneera qidaqa. Maaqoo maqasaa mariaqoo kai rakisianeera qimamidaqa, aakaaqaindaraa fasiqa fannoo misa qumaraandoora qimamidaqa.

<sup>16</sup> Qinee sia maa maqanasaaqaraasaindi maridaqa, misa faqa qini daanna reeqa sia maa maqanasaa qaraasaindiara foora maridaqa.

<sup>17</sup> Oo qipoo aneenna anoona ufannai misa mareeqee aneenaindikia. Ani ufa fannoo andeeqara ufa anoona maridanoo.

<sup>18</sup> Anee qini maqasaa diqiqoonnana qinee faqa miqikai iqa quandaki misa maaqanna maaqanna niqiqaidafa.

<sup>19</sup> Qinee misaroo qiqa qeeqa qifaaqa ani amidaqa. Misa faqa nári marirana nirana kuqaa anindi fee qiaqeera miqidaqa anindi mariaqeera miqidaqa.

<sup>20</sup> Sia qinee qeeqa faiqi namu maa mariasara kaifau innaaru qidau, maaqanna maaqanna aiqamai misa ufa irisee qiniara irifandinausa misara faqa innaaru qidaqa.

<sup>21</sup> Anee faqa qinee faqa moodaanaki marunandee misa faqa maaqanda faqa moodaanaki mariaqeera innaaru qidaqa.

<sup>22</sup> Maa maqanasaaqaraasa mina qafamaseeqa qiniara oo kuqaa innaarunaindaraa fee qiaqeera. Anee qifaaqa areenara eeraarirana qimianana qinee mina maramaree misa faqa nimunaqa misa anindiri qisakoosa daanna reeqa moodaanaki mariaqeera.

<sup>23</sup> Qinee misaki marianneera anee qiniki maria, miqimasainaqa kuqaa uqanna moodaanaki mariaqa. Miqimasaanaqa maa maqanasaaqaraasa niqafamasee Oo kuqaa Anutufa Yisuna aqiqanau foo qiaqeera, narí amaaku

Yisunara faqa mina faiqi namuara faqa amanamana kai amuqusinoo aididanoommifoo qiaqeera.

<sup>24</sup> Yisufa kaqi narí akoonara innaaru qidanoo qinau. Oo qipoo, maa qini faiqi namu anee qimunausa kasooqagee qini faqa mariaqoo kai mariaqeera didifaqa innaaru qidaqa. Ooqai maa maqa maaqana sia maru aukuanna anee qiniara aidunara anee qifaaqa areenara eeraarirana qimunnana qini faiqi namu kasooqagee mari iqa oorureeqa qafaaqeera innaaru qidaqa.

<sup>25</sup> Oo andeeqara qikoofa maa maqanasaaqaraasa ani ufa sia irimariasa sia aniara iridaqa. Qinee kai aniara iridaqa maa qini faiqi namu anee qini diqiqamaqoonnanara misa iridaqa.

<sup>26</sup> Anee qiniara amuqusidana aidimarina qini faiqi namu naundurai faqa marianifeera qimasee aniara maqee kooroo qimasaida qimannimi-aafanausa maqee kafaa kafaa qimannimianaura. Maqee qinee faqa misa naundurai marianinnanara innaaru qidaqa.

## 18

*Yisuna qumaroo ufafa.*

*(Mat 26:47-56; Mak 14:43-50; Ruk 22:47-53)*

<sup>1</sup> Yisufa miqi qimasee innaaru qimaseenoo narí faiqi namu asukunai Yeerusaree maqusaindari nifiqeenoo Kidaroono noopundu fitaqeenoo dinni afainni saqamakina auqaana andanda ummaqiranaki idooararee qimasee narí faiqi namu faqa oonu marinau.

<sup>2-3</sup> Ooqai moomoo kari Yisufa Yeerusaree maqusaindari fimaruqoo fiqau. Yudasifa minni fimarunara irimarufa maridanoo Yisuna ueeqaaninafa mi saqamanara faqa irimarufa miqoo finoo fee qimasee sundiauqa faqa amaana maqasaa rakisimaria firisuaiqauqa faqa Yudasifa eendaki nifiqee finau. Misa uriqararawsa faqa, Farisai amaana ufa qimarusa faqa niqiqoofaqa saamu faaqaana indaaqqa asukuna marufaqa qooma qumaroofanoo Yudasifa mi saqamanaki Yisuna qumaraaqee qimaseenoo nifiqee finau.

<sup>4</sup> Yisufa aiqama ainaina nariki kambiqaaninnanara irimarufa marufaqa misa oonuroofanoo Yisufa misa noorinni anireenoo iranau. Innee yafasiqanaree randaidee, qufaqa misa qiqau.

<sup>5</sup> Yisuna Nasaretee maqannaanara randaidaqa qufanoo Yisufa qinau. Maa qinee misa maridaqa. Yudasifa Yisuna ueeqaaninafa misaki kikiqinoo marinau.

<sup>6</sup> Yisufa miqi qimasee nariara kooroomasoonara misa tautumasee rufiseeqa ninaaqianaindari oonurandeeqa maqasaa aqufiqau.

<sup>7</sup> Yisufa kafaa irammirinoo qinau, innee yanaree randaidee qufaqa misa qiqau Yisuna Nasaretee maqannaanara randaidaqa.

<sup>8</sup> Miqi qufanoo Yisufa kafaa qinau doo qinee kooroo iqa maana misa maridaqa. Innee qiniara kai randeeafanoo, maa qini faiqi namu mariasa minnisaiqaqa fuaqa.

<sup>9</sup> Yisufa narí innaaru qimaru ufafa anoona kambiqaanifeera mi ufana qimanniminu. Mifa maaqi qimasee faasasaa innaaru qinau. Oo qipoo aiqamausa anee qimimarinausa sia misakiqari moo fannoo furufarianifeera. Faasasaa mi innaarunna qinau doo maqee mina anoona kambiqaina misa minnisee qini kai maraaqee qinau.

<sup>10</sup> Simoono moo auqu Peetooroofa misa saamu faaqaana qafamaseenoo darifoo qimaseenoo mifa narí rakira paipana kisaqa qumareenoo amaana



maqasaa rakisirana ainainira faiqi aaqamasee asauku uqannai aaqoo aiqama atufu aqinau. Mi ainainira fasiqana auqu Marakusafa marinau.

<sup>11</sup> Yisufa mina qafeenoo Peetooroona qimaminoo qinau. Saa, aneenna paipana narí aanaamuki upeekaa. Qini qikoofa manda nammari naannee qimaqoosa anee qiniara sia naannee fee qidanee. Qinee naanaura.

*Yisufa Annasana oorini kikiqu ufafa.*

<sup>12</sup> Yisufa miqi qimasoofaqa Roomma maqannaasundiaufa faqa misa uriqararafa faqa Yuda maqannaas firusaiqauqa faqa anireeqa Yisuna qumareeqa sandannai asauku rumbasee afiqeeqa.

<sup>13</sup> Kaiafasana maaqaki quqaqau. Kaiafasafa mi aukuanai amaana maqasaa Anutuna aanaiqiki marusa uriqararafa marinau. Annasafa Kaiafasana airaamaku mina maaqaki marunaki munu minaki quqasoofanoo Annasafa ufa indaaruu irinau.

<sup>14</sup> Ooqai Kaiafasafa narikai tamummaqaseenoo Yuda maqannaasa qimanniminoos qinau Yuda maqannaasa maasakina moodaa fannoo maasa aiqamausa misa nikiqara kuqinaqa amiqianauree qinau. Mina maaqaki Yisuna quqasoofanoo Annasafa naaree mina ufa irinau.

*Peetooroofa Yisunara sia qinee qafaidee qu ufafa.*

*(Mat 26:69-70; Mak 14:66-68; Ruk 22:55-57)*

<sup>15</sup> Misa Yisuna rumbamaree fufanoos Simoona moo auqu Peetooroofa faqa Yisuna faiqi namuqi qari faiqi moo fannoo faqa misa ninaaqiana nifaqee fiqau.

<sup>16</sup> Misa Yisuna afiqee amaana maqasaa aanaiqikirana maaqaki keeqoofanoos nifaqee anu fasiqafa amaana maqasaa aanaiqikirana aqoondi maridanoos kaqi mi maaqanaki keeqanau. Misa Yisuna afiqee mi maqanaki munuseeqa mi sandana idukuseeqa kaqi quqasoofanoos marinau. Peetooroofa maqusai kooqi afainni aqoosai marinau. Nifaqee anu fasiqafa kafa raudamakinoo kooqisaa rakisimaru manaaqana qimamufanoos kooqi atuasoofanoos Peetooroofa faqa keeqanau. Keeqafufanoos maaqa kooqi adeedi ooru maridanoos qafeemarinau.

<sup>17</sup> Maqusa kooqisaa rakisiu manaaqafa Peetooroona qafamaseenoo irammirinoos qinau. Anee Yisuna aqoondi fee qufanoos Peetooroofa qaoo qimasee sia fee qinau.

<sup>18</sup> Suara narufaqa ainainimaru fasiqausa faqa firusaiqauqa faqa Kaiafasana maaqa kooqinni maqusa saqanna idarasee fiqumma ida tookusiqa marufanoos Peetooroofa misaki oonu keeqafinoos ida qaani marinau.

*Annasafa Yisuna irammiru ufafa.*

*(Mat 26:59-66; Mak 14:55-64; Ruk 22:66-71)*

<sup>19</sup> Amaana maqasaa Anutuna aanaiqiki marusa uriqararafa Annasafa mifa Yisuna faiqi namuara faqa Yisufa faiqi anaasee qimannimira ufausara faqa mi ufanaramma Annasafa maaqaki Yisuna iree marinau.

<sup>20</sup> Yisufa mina ufa iriseenoo maaqi qimasee Annasana qimaminau. Qinee faiqi anaasee moomoo suqimaruqoo kai ufa qimannimimariqia. Suqira maaqaki fee naaquqara amaana maqaki fee faiqi anaasee moodaaqoo suqiraqoo fee miqoo kai qinee naamuaqira ufa aiqama ufa qimannimimariqia. Sia qinee moo ufa kukeeqaranaki qimannimi qiafana. (Innee aaqamasee qini kukeeqaranaki irama qimaqee mariafanoo.)

<sup>21</sup> Annasa anee nanaree qini iraidanee. Qini ufa irimarias irammirinaqa qimamiaqa. Misa qini ufa oosana iridaqa.

<sup>22</sup> Miqi qimasoofanoo poorisa moo fannoo asaukusamu Yisuna oori arinoo qinau. Anee nanaree amaana maqasaa rakisirana miqi qimasee qimamidanee.

<sup>23-24</sup> Miqi qimasoofanoo Yisufa qimaminoo qinau. Qinee aaqara ufa moo qianana maaqoo mariasa aiqama kooroomasee qimannimia. Qinee andeeqara ufa qunнанara nanaree qini daridanee. Miqi qimasoofanoo Annasafa qinau, innee maana kafaa rumbamaree Kaiafasafinnai afiqee fuaqa. Kaiafasafa amaana maqasaa Anutuna aanaiqikirafa marufaqa mifa maruqoo moo maaqaki minni Yisuna afiqee fiqau.

*Peetooroofa kaifaa Yisunara sia qinee qafaidee qu ufafa.*

*(Mat 26:71-75; Mak 14:69-72; Ruk 22:58-62)*

<sup>25</sup> Peetooroofa naambeeqai kaqi ida qaanimarufanoo faiqi moo fannoo mina iramirinau. Anee Yisuna faiqi namuqiari marianafee kuqaa fee. Miqi qufanoo Peetooroofa sia fee qinau.

<sup>26</sup> Amaana maqasaa aanaiqikirana ainainira faiqi Peetooroofa Marakusana aaqoo ateekeona mina ati fannoo Peetooroona qafamaseenoo qimaminou. Faasai anee saqamai Yisuna faqa marianaqa ani qafaunasa.

<sup>27</sup> Peetooroofa mina iriseenoo kafaa qaoo kai qinau. Qaoo qimasoofanoo kookooraana ufa qinau.

*Yisufa Piratoona oorinni kikiqu ufafa.*

*(Mat 27:1-2, 11-14; Mak 15:1-5; Ruk 23:1-5)*

<sup>28</sup> Kananaana iqaqoofanoo saarisufa namufaqa misa Yisuna Kaiafasana maaqakinaana afiqee Roomma maqanna kiapana maaqaki munu quqaqau. Yuda maqannaasaa sia kiapana maaqaki keeqaqau. Duna iqaqainaqa maasa Anutuna qangiroo ainnaaqarara qoomaqa naannaqoo fee qimasee kiapafa moo maqannaafa marufaqa afaqasaaqaraa aisoora maasa qifaaqasaa aqufinaqa qifaaqa mandaikinaqa sia naannoo qimasee rufee sia mina maaqaki keeqaqau, kaqi naambeeqai madaana kai mariqau.

<sup>29</sup> Roomma maqanna kiapafa Piratoofa misa nindafeenoo rauda mafufanoo Yisunara irammirinau. Innee nanaree fee qimasaidee maa fasiqanara ufa qidee.

<sup>30</sup> Yuda maqannaasa iriseeqa qiqau, mifa sia manda oosana marainaqau sia maree mini ani amiaqini.

<sup>31</sup> Miqi qufanoo Piratoofa qimanniminoo qinau, innee inneeqa kai inneeqa sandufamau mina maramaree fuaqa. Yuda maqannaasa mina iriseeqa qiqau, maasa sandufa fannoo maaqinna fasiqausa kuqannaruqee qinoo maridanoo. Aunirira saqarisaa faiqi nariranara innee Roomma maqannaasa maasara qaoo qimasaidaqa inneeqa kai miqi mariafanoo. Minara maasa Yisuna Piratoo anisaa quqaidaqa.

<sup>32</sup> Indaaru Yisufa nari kuqiranara nari faiqi namu qimannimuna mina anoona maqee kambiqeenoo.

<sup>33</sup> Piratoofa misa ufa iriseenoo nari koota maqaki kaifaa keeqeenoo Yisunara mai uruane qimasoofanoo Yisufa Piratoona koota maqaki keeqafufanoo Piratoofa Yisuna irammirinau. Kuqaa fee anee Yuda maqannaasa Karaambaiqee maridanee.

<sup>34</sup> Yisufa iriseenoo qimaminoo qinau. Anee aneenna kai fee mi ufana qidanee moo fannoo ani qimamifanee qidanee.

<sup>35</sup> Piratoofa minara Yisuna qimaminoo qinau. Anee qiniara Yuda maqannaasa fee qimaqimidanee. Sia qinee inni oosana iridaqa. Ani maqannaasa

Anutuna aanaiqikirausa uriqararausa misa kai qini maaqaki quqasaafana maridanoo. Anee nana mandoosana maraanaqee miqi fee.

<sup>36</sup> Yisufa qinau, qini ququsa sia maa maqa maaqanasaaraqaraa ququsa maridanoo. Qini ququsa maa maqanasaa marinaqau qini faiqinamu rakifaqau qini mareeqeefau idukuqisani. Sia qini ququsa maa maqanasaaraqaraafa maridanoo.

<sup>37</sup> Piratoofa mina iriseenoo kafaa Yisuna irammirinoo qinau, Kuqaa fee anee karaambaiqa moo maridane. Yisufa mina irisee maaqi qinau. Anee qianandee kuqaa qinee Karaambaiqa maridaqa. Kuqaa anoona ufa kai qimannimirara qinee maa maqanasaa kambiqafi maridaqa. Kuqaa anoona ufara randeemia fasiqa anaaseesa misa qini ufa iridaqa.

<sup>38</sup> Piratoofa mina iriseenoo maaqi qinau, kuqaa anoona ufa qirafa mifa nanee maridanoo. Miqi qimaseenoo Piraatoofa raudamakufanoo Yuda maqannaasa naaramasee maaqi qimasee qimanniminau. Maa fasiqanaki sia arira ainaina moo marifaqa iridaqa.

*Piratoofa Yisuna arifandinna ufana eedoo qu ufafa.*

*(Mat 27:15-31; Mak 15:6-20; Ruk 23:13-25)*

<sup>39-40</sup> Piratoofa kaqi qimannimidanoo qinau. Aukuana aukuana Anutuna qangiroo ainnaaqarara qoomaqa faasaana qini rumbaranaki mariasa aukuana aukuana moodaakai moodaakai karabusakinaana iduku nimirunausa maridaqa. Maa aukuana Yuda maqanna karaambaiqa idukunnimianauree qufaqa firaa kari faaqarumasee qimamiqa qiqau, sia maana idukua. Barabasina kai idukua. Barabasifa faiqi narinoo rakinoo imarifa karabusaki maridanoo. Mina kai idukua.

(Roomma maqannaasa faiqi narirana oosana maaqimminoo marinau. Sanda moomoo saamu atisaa qusi iqoona marufanoo mi sandana atinni arooqa aandau amudaani rukamirana raiqaranauqa qususee rumbaqoosamuna mi samunannai aiqamausa rumboosa narimaruna. Misamuna naaree Yisuna ari isoofanoo inaaqianna Piratoofa nari maaqaki mara quqasee mina ufara iranau.)<sup>18</sup> | 39-40 | YOOHANEE

## 19

<sup>1</sup> Piratoofa Yuda maqannaasa ufa irisee Yisuna mareeqee nari sundia niminoo qimanniminau. Innee saamu atisaa sanda qusiranannai afaaqa turii umooqukamasaaqa qufaqa eedoo qimasee miqoo kai miqiqau.

<sup>2</sup> Afaaqa turii qumooqukamaseeqa saatunanda fooqaana aukuseeqa saaeemma qumaree kukuqamasee Yisuna karaambaiqa qafee fee qimasee afisuamaqau. Qafee afisusee misa saasaakoona arira qamunna sundia qamunna fee qimasee afisuamaqau.

<sup>3</sup> Sundiauqa nariqa sundia qamunna afisuamaqaseeqa anireeqa ataasa ataasa qimamaqee maaqi qiqau. Yuda maqanna karaambaiqa afeeka anee mariana sia dauni kuqua miqidaqa ataasa ataasa qimariqau. Miqi qimasee misa nisaukusamu oori ariqau.

<sup>4</sup> Misa miqi isoofanoo Piratoofa raudamakufanoo nari naambeeqi Yuda maqanna moomoo marunnai qumureenoo qinau. Qinee Yisuna mareeqee inni nifusaa quqaanaura. Kuqira ainaina sia moo minaki marifaqa qinee qafaidaqa.

<sup>5</sup> Miqi qimasoofanoo Yisufa saatunanda qafee afisirafa saasaakoona arira qamunanda rumberafa raudamaki misa nifusaa kikiqinau. Piratoofa aiqama naaramasee qimanniminau. Innee qafaaqa. Doo mi fasiqafa maridanoo.

<sup>6</sup> Amaana maqasaa Anutuna aanaiqikirausa uriqarararusa faqa misa poorisauqa faqa Yisuna qafamasee firaakari faaqariqa qiqau, aunirira saqarisaa pirimma aruaqee qidaqa moomoo kari qimariqau. Piratoofa mina iriseenoo maaqi qimasee qimannimainau. Doo inneeqa kai mara maree aunirira saqarisaa pirimmannai aruaqa. Qinee mina qafaunanoo sia moo numoo minaki marifaqa qafaidaqa.

<sup>7</sup> Yuda maqannaasa Piratoona ufa iriseeqa maaqi qimasee qimamiqau. Maasa sandufa maaqinna fasiqafa kuquannoo fee qidaqa. Mifa nariara Anutuna amaaku fee qimarifa marifaqa mina akiaqara arusaifanoo kuquannoo.

<sup>8</sup> Piratoofa Yisunara Anutuna amaaku maridanoommi qimaseenoo firaqoo rufianau.

<sup>9</sup> Mifa kaifaa Yisuna afiqeenoo nari maaqaki oorureenoo irammirinau. Anee yaindari anuna fee qimaseenoo iroofanoo Yisufa sia ufa qimaminau.

<sup>10</sup> Piratoofa mina qafamasee Yisuna kaifaa qimaminoo qinau. Anee sia fee qini qimaqiminnaree. Firimmannai aunirira saqarisaa arira aanoo qinindi maridanoo. Ani idukira aanoo irafa qinindi maridanoo. Anee sia fee minara iridane.

<sup>11</sup> Yisufa mina iriseenoo maaqi qimasee Piratoona qimaminau. Anee qiniara aanoo iannana sia aneennafau, Anutufa qinara kai maqee ani ufa ameemaanai quqaqisaifaqa maridaqa. Qinee minara maaqi qidaqa, qini qumareeqee ani asaukuki quqemariasa misa numoo firaafa maridanoo anindi kaqikaafa.

<sup>12</sup> Piratoofa Yisuna ufa iriseenoo firaqoo mina aunduraki Yisuna idukiraree qimasee irinau. Yuda maqannaasa mina iriseeqa firaqoo faaqarumasee qiqau. Anee maa fasiqana idukinaqa maasa aniara Roomma maqanna karaambaiqinnai oonureeqa qimamianaaura. Faiqi moo fannoo nariara karaambaiqee qimarifa Roomma maqanna karaambaiqa namuqaa mariannoo.

<sup>13</sup> Piratoofa misa ufa iriseenoo Yisuna afiqee madaanai ufa irimaru qaindanasaa ooqumarifinoo ufa irimaru qaindana aaqa ooni ausirirafa moomoo maruqoo qumu ooqumarifi ufa irimarinau. Yuda maqannaasa minara Kabatee qimariqau. Maasa ufakiqari ooni padirane qidaqa.

<sup>14</sup> Duna Anutuna qangiroo ainnaaqarara qoomaqa suqarafa mariannoo. Maqee suani qambaana marufanoo Piratoofa ufa irira qaindasaa ooqumarifi Yuda maqanna qimannimainau. Doo maafa inni karaambaiqa maaqoo maridanoo.

<sup>15</sup> Misa irisee faaqa quqasee kuqariraree kai qiqau. Aunirira saqarisaa firimmannai ariraree qiqau. Piratoofa mina iriseenoo Yisuna ariraree qusa qimannimino qinau. Innee kuqaa inneeqa karaambaiqa aunirira saqarisaa pirimmannai ariraree fee qidee. Miqi qufaqa amaana maqasaa Anutuna aanaiqikirausa uriqarararusa Piratoona ufa irisee faaqa quqasee qiqau, maa fasiqafa sia maasa karaambaiqa maridanoo. Maasa karaambaiqa Roomma maqanna karaambaiqa moodaa maridanoo mina auqu Sisaafa.

<sup>16</sup> Piratoofa mina iriseenoo Yuda maqannaasa nisaukuki Yisuna quqanau. Inneeqa maree munusaifaqa sundiauqa aunirira saqarisaa pirimmannai aruaqa. Miqi qimasooafaqa misa Yisuna maree fiqau.

*Misa Yisuna pirimmannai aunirira saqarisaa aru ufafa.*

*(Mat 27:32-44; Mak 15:21-32; Ruk 23:26-43)*

<sup>17</sup> Yisufa Yeerusaree maqusaindari nari aunirira saqari akumaree firimarinau.

18 Fifiufanoo Eeburu ufakiqari faiqí nikiaga amudaani fee qimaru amuaqunamusaa Koorookata amuaqunamusaa ooruree aunirira saqari maqai rumasee minasaa Yisuna mara airisee firimmannai Yisuna narí aunirira saqarisaa aruqapiriqau. Aruseeqa faiqí qaaraqanda mandainaina maraqaanuqanda miqanda faqa nári aunirira saqarisaa dinni dinni naruqapiriqau. Naruseeqa uqeereeqeega maqa aamara auquqoonaki rak-iqau. Qaaraqanda dinni dinni Yisuna qambaanai rak-iqau.

19 Piratoofa moo raufiqira saqarisaa ufa akara rumeeqeenoo narí rakira fasiqa moo amufanoo oorureenoo Yisuna akiaqa aunirira saqarisaa pirimmannai arinau. Mina akara oosana maaqimminoo marinau.

Maa fasiqafa Yisufa Nasareeteendaraafa Yuda maqannaasa karaambaiqa maridanoo.

20 Yisuna aru maqa maaqafa Yeerusaree aaqa adeedi marufaqa faiqí anaasee moomoo mina akara qafaida asaana rimariqau. Mi akarafa Yuda maqannaasa ufa moo auqu Eeburu ufakiqari faqa Roomma maqannaasa ufa moo auqu Ratinna ufakiqari faqa Kirisa maqannaasa ufakiqari faqa akara rinoo marufaqa asaana rimariqau.

21 Yuda maqannaasa amaana maqasaa Anutuna aanaiqikirausa uriqarar-  
rausa mi akarana asaana rumasee Piratoona maqusai oorureeqa maaqi qimasee aaqara ufa qimamiqau, saa sia Yuda maqannaasa karaambaiqa fee qimasee akara rua. Kaqi narí kai Yuda maqannaasa karaambaiqee qimari fee qimasee akara ruaqaana.

22 Piratoofa irisee maaqi qimasee kaukaataqimasee qimanniminou. Qinee akara runafa doo saina mifa kai mariani.

23-24 Roomma maqannaasa sundia qaara faqa qaara faqa Yisuna aunirira saqarisaa aruseeqa mina qamunna anaqi anaqi iseeqa nimana kai rainaqau. Yuda maqannaasa kisaaga qamunna moodaa afisirana sia afu aina marufa marufaqa kaqi uqara foora amiqimasee auqirafa marufaqa sundiauqa mina qafeeqa doo amiqirafa marifaqa sia anaqia, kaqi kaatara foora sararamasee uriqarainafa maraani. Miqi qimasoo fanoo ooqeenaa tamummaqararusa akara anoona mikari kambiqanau. Mi ooqeenaa akarafa minara maaqi qimaqoofa.

Misa qini qamunna raina rainamasee náriara náriara mareefaranoo. Kisaaga qamunna moodaa mina sararamasee mareefaranoo.

25 Yisufa aunirira saqarisaa kuqirarifanoo mina aunirira saqari atukaki mina anoofa faqa narí auna qini qinoona faqa moo anaasee Karoopasana anaaga Mariana amarafa Mariafa faqa moo anaasee Makadara maqusaindaraa Mariana amarafa Mariafa faqa minamusa miqoo kikiqiga mariqau. (Qaaramoo anaasee Mariana amarausa kikiqiga mariqau.)

26 Mirindari Yisufa qafoo fanoo narí Yisuna faiqi namukiqari narí afaagasaa aqoondi faqa qaaramoo anaasee mina anoona amarausa faqa kikiqiga mariqau. Yisufa kuqiraridanoo narí anoona qafamaseenoo qimaminoo qinau. Oo qinnaqeefoo maa fasiqafa Yoohaneefa ani amaaku mariannoo qinee kuquananoo anisaa rakisiani.

27 Miqi qimaseenoo Yisufa quandakinoo narí afaagasaa aqoondi maaqi qimasee qimaminou. Maafa ani anoofaikinoo marinana qinee kuquanana anee minasaa rakisia. Doo miqooqari mi fasiqafa Yisuna anoona aqeenoo narí maaqaki soofanoo marinau.

*Yisufa kuqu ufafa.*

*(Mat 27:45-56; Mak 15:33-41; Ruk 23:44-49)*

<sup>28</sup> Yisufa nariara irufanoo aiqama ainaina doo maqee anoonaikufanoo moodaa ooqeenaa akara nammariara qimaqoofa mifa kai sia anoona kambiqaifaqee qimasee minara maaqi qinau.

<sup>29-30</sup> Qinee nammariara didimarifaqee qufanoo miqoo uainna nammari taqu sundiauqa misa manda uainna nammari sukaqee maru nammari ifa miqoo maruna faiqi moo fannoo eeqaufooqaana ateeekasee minaki raaramasee qisoopa saqari asaana undaqiseenoo minasaa rutaqueeqee mara muru Yisuna afaurusaa mundusoofanoo qumbifiqia namaseenoo qinau. Doo qini ainainirafa taikeenoo qimasee aunirira saqarisaa anuka rooraiqinoo doo kuquqaraasinau.

*Faaqaana atoofesaqaanda Yisuna aqaasanaki raquramu ufafa.*

<sup>31</sup> Kuqufufanoo Yuda maqannaasa uriqararausa Piratoofa nari maaqi marunnai oonuree maaqi qimasee qimamiqau. Duna sabata naaquqara sabata mariannoo. Maqee kai aunirira saqarisaa mariasa niku itairisaana dauni kuquffifaqa nikundamasee duna amiqimandee sabata maraanaura.

<sup>32</sup> Piratoofa eedoo qufaqa sundiauqa oonureeqa Yisuna aaqa dinni marunna aiku itairisee moo dinni maruna Yisuna faqa kuquna aiku itairisaqau.

<sup>33</sup> Yisuna aiku itairianee qimasee qafoofanoo doo kaaqa kuqinoo maru-faqa sia aiku itairiqau.

<sup>34</sup> Sundia moo fannoo faaqaana qumareenoo Yisuna aqaasanasaa raquraminau. Raquru amufanoo fidika faqa nammari faqa minakiqari aniranau.

<sup>35</sup> Aniroofanoo mi ainainna qafee marufa minara akara rinau. Mifa nari ufara kuqaa anoonee qidanoo innee faqa kuqaa anoonee qiaqeera akara rinau. Yoohaneefa afaqanoo nidanoo miqaa maaqaa imarufanoo qafeemarinau. (Yoohaneefa maa akarana akara rumaseenoo nari auqu sia kooroo iraree qimaseenoo maa akaranaki nariara Yisuna afaaqasaa aqoondi maridee qinau.)

<sup>36</sup> Maa ainainnausa Yisuna arunara ooqeenaa akara anoonaikianifeera kambiqanau. Mi ooqeenaa akarafa maaqi qimaqoofa maridanoo. Sia mina amudaani moo fannoo raqaannoo. Sia uqanna moodaa raqaannoo. Miqi qimaqoo ufafa anoonaikufaqa sia mina aiku raqaqau.

<sup>37</sup> Ooqeenaa akara moo maaqimminoo maridanoo. Faiqi moo fannoo faaqaanannai asauku mundirana raquramisainaqa faiqi anaasee kikiqamambinaqa qafeefaranoo. Mi ufafa faqa aunirira saqarisaa kambiqanau.

*Yisuna akundoo ufafa.*

*(Mat 27:57-61; Mak 15:42-47; Ruk 23:50-56)*

<sup>38</sup> Sundiauqa Yisuna raquramisooofanoo Yooseefaana amarafa Arimatea maqusaindaraafa Piratoona maaqai oonureenoo Yisuna iri aunirira saqarisaaqaraanara innaaru qinau. Mi Yooseefaafa Yisuna ufa irimarufa maridanoo nari aundurari kai iriseenoo sia faiqi nifusaa kooroo inau, kaqi marinau. Yuda maqannaasa uriqararausa irifoo qimasee rufiamaree kukeeqakufanoo Yisuna iriara Piratoofunnai nariara oonureenoo innaaru qinau. Amanee qiminaqa maree munu akundaanauree qinau. Miqi qufanoo Piratoofa eedoo qimaseenoo aqiqoofanoo Yooseefaafa Yisuna iri aunirira saqarisaaqaraana tatumareenoo finau.

<sup>39</sup> Nikoodeemusafa ooqai indaaru asukunaki Yisuna faqa ufa qiqiufa maridanoo mifa Yooseefaana dadaaqinau.

<sup>40</sup> Mifa faiqí akunnimaqasaida nikundee maru marasinna moomoo uqanna maraseenoo qamunnasaa adieeseenoo minannai Yisuna afaaqa kukuqiqau. Miqanda nári maqannaasa oosana maraseeqa kukuqamasee akundaqau.

<sup>41</sup> Yisuna aruqoo mina aaqa saqama marinau.

(Yisuna aukwana narí maqannaasa maaqimasee madika indufusaida kuqufusa nikundee mariqau. Misa ooni firaana kasaqa aamara auquseeqa minaki keeqafufaqa dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>42</sup> Mi saqamanaki ooni aamara fuka marunaki sia moo akundoonaki. Mi ooni aamarafa adeedi marufaqa duna maasa Yuda maqannaasa sabata naaquqarafa mariannoo qimasee kaqi kaqi ufaqa Yisuna iri ooni aamaraki munu akundaqau.

## 20

*Yisufa findimaqee fifufaqa fifau madikakai qafoo ufafa.*

*(Mat 28:1-8; Mak 16:1-8; Ruk 24:1-12)*

<sup>1</sup> Akundamasoofaqa mariiqa amaanasaa kananaana eendai Mariana amarafa Makadara maqusaindaraafa Yisuna ooni aamaraki akundamaqoona qafaanee qimasee finau. Oonuree qafoofofanoo mina aamaraki ititaqoo oonina firaana mareeqee kaqinni quqaqoofanoo marida qafanau.

<sup>2</sup> Mariafa mina qafamaseenoo anirandeenoo sandeenoo oonureenoo Simoona moo auqu Peetooroona faqa Yisuna afaaqasaa aqoondi qini faqa qimannimino qinau. Misa Karaambaiqa iri ooni aamarakinaana mara maree moosaa fifa. Sia maasa qafeeqa.

<sup>3</sup> Yisuna faiqi namuqi qari Peetooroofa faqa qinee Yoohaneesa faqa mina iriseeqa qafaanee qimasee sanda qiafana.

<sup>4</sup> Maaqanda sandaidaqa qinee Yoohaneesa kaaqa sandeeqa Yisuna madika kooqinni oonura qiafana.

<sup>5</sup> Qinee sia keeqa qiafana kaqi oonu maridaqa aamaraki qafeemari afana. Miqoo maridaqa Yisuna kukuqamaqoo qamunnana mina kai qafee mariqafana. <sup>6</sup> Simoona moo auqu Peetooroofa aidaaqareenoo kaqi oonamarai keeqanau. Mifa Yisuna kukuqamaqoo qamunna miqoo quqaqoona qafamaseenoo.

<sup>7</sup> Mina akiaqa rumba qoo qamunnana uturuqeeqeenoo aaduma kukuameeqee quqaqoofanoo marinau.

<sup>8</sup> Qinee Yoohaneesa Peetooroona aanaaqiana keeqafi qafamaseeqa doo kuqaa findifiifoo qiafana. [ <sup>9</sup> Yisufa kuqiranaki qari findifuaninna akaranara sia amiqimandee iri qiafana. Mana manammimari qiafana.]

<sup>10</sup> Maaqanda qafamasee doo nimaqa anirandee fi qiafana.

*Yisufa Makadara maqanna anaasee kooroomamaqoo ufafa.*

*(Mat 28:9-10; Mak 16:9-11)*

<sup>11-12</sup> Mariana amarafa Makadara maqusaindaraafa ninaaqiana kafa ooni aamara kooqinni oonu kikiqinoo marida ikiraqee marinau. Miqidanoo ooni aamaraki kummaramafi qafoofofanoo qaara qangirooqara eekara qamunna afisiraqanda moo fannoo Yisuna akiaqa maruqoo ooqufaaqee marufanoo moo fannoo Yisuna aiku maruqoo ooqufaaqee marufanoo nindafanau.

<sup>13</sup> Nindafoofaqa miqanda qiqau. Oo maa anaasee anee nanaree iki-raqaidanee. Mariana amarafa qinau. Misa qini karaambaiqa maraaraafaqa sia misa quqaqoona iridaqa ikiraqaidaqa.

<sup>14</sup> Mariana amarafa miqi qimaseenoo quandaki qafuofanoo Yisufa mina aanaaqiannai kikiqinoo marufanoo mifa sia Yisunee qinau.

<sup>15</sup> Yisufa maaqi qimasee Mariana amarana qimaminoo qinau, Oo maa anaasee anee nanaree ikiraqaidanee, yanaree randaidanee. Mariana amarafa Yisunara maa saqamanasaa rakisirafammifoo qimasee qimaminoo qinau, Oo maa fasiqa anee yai fee iri maanakinaana mara quqeenee. Anee qimaqiminaqa qinee mina maramaree fua.

<sup>16</sup> Yisufa mina iriseenoo mina auqu ramaseenoo qinau, Maria, qufanoo Mariana amarafa tautumma quandaki qafeenoo Oo ufasaa rakisirafee qinau. Eeburu maqannaasa ufakiqari qinau, Rabooni, maasa ufakiqari ufasaa rakisira fee qinau.

<sup>17</sup> Miqi qimasoofofanoo Yisufa qinau, sia qeeqa qikoofinnai ooru fiqa minara anee sia qini qifaaqa qumaraa. Anee oonuree qini qikaqaafasaaquqa qimannimia. Qinee qeeqa qikoofinnai faqa inni nikoofinnai faqa qeeqa Anutufinnai faqa inni Anutufinnai faqa ooru fidaqa.

<sup>18</sup> Mariana amarafa mina iriseenoo sandee oonureenoo mina faiqi namu maaqi qimisee qimanniminou. Doo qinee karaambaiqa qafaunanoo mifa mi ufana qini qimaqiminoo.

*Yisufa narí faiqi namu kooroomannimaqoo ufafa.  
(Mat 28:16-20; Mak 16:14-18; Ruk 24:36-49)*

<sup>19</sup> Mi faasaana mi eendanaki Yisuna faiqi namu maasa moo maaqaki keeqafufaqa Yuda maqannaasa doo Yisuna ariqa maasa faqa darifoo qimasee maasa misara rufiasee kooqi amiqimasee ititasee marufanoo Yisufa tautummannimaqeenoo maasa qambaana kooroomafinoo qimanniminoo qinau. Sia rufiaaqa asoarafa inniki mariani.

<sup>20-21</sup> Miqi qimaseenoo Yisufa narí asauku aqumusaa pirimma aruna kai fidika reemaruna uqannifiqeenoo aqaasanasaa faaqaana raquru amuna afaaqa ateekaqoona faqa uqannifiqoofaqa maasa qafamasee doo kuqiranakiqari findifuananoo fee qimasee kaaqamma asasiqiafana Yisufa kafa qimanniminoo qinau, inni sia maparaa iaqa asoarafa inniki mariani. Qini qikoofa maa maqanasaa qini diqiqamaqoosa qinee miqikai iqa innee maaqanna maaqanna qini ufa qimannimiaqeera inni faqa niqiqaidaqa.

<sup>22</sup> Miqi qimaseenoo Yisufa aidoo maasa fuaqaqimaqaseenoo qinau doo innee naaquqara Anutuna maraqauna maraqa.

<sup>23</sup> Innee faiqí mandainaina numoo mininnisaifanoo Anutufa faqa mininnisaannoo. Sia mininnisaifanoo Anutufa faqa sia mininnisaannoo.

*Yisufa Toomasina kooroomamaqoo ufafa.*

<sup>24</sup> Yisuna faiqi namuqiari Toomasifa mifa qaara qapirafa maqaqoofa marufa moosaa mi eendanaki maridanoo sia Yisufa tautumasee maasaki kooroo una sia mifa qafanau.

<sup>25</sup> Maasa Yisuna qafaafanausa Toomasina qimamiqaqiafana maasa Karaambaiqa qafaanausa maridaqa. Miqi qufanoo Toomasifa qinau, innee unna qimariafanoo qinee mina asaukusaaqaraa pirimma amaraki fidika reemarinaki auqama qafeeqa mina aqaasanasaqaraana faqa auqama qafeeqa kuqaa fee qianauna sia auqama qafeeqa unna fee qianauna.

<sup>26</sup> Mi amaanafa aiqaroofofanoo moo amaana eendaki maasa Yisuna faiqi namu faqa Toomasina faqa maaqaki keeqafi kooqi mundusee ititasee Yuda



maqannaasa maasa dari maqi qimasee mariqiafana. Marufanoo Yisufa kafaa maasaki kambiqanau. Anireenoo qinai, sia rufiaaqa asooarafa inniki mariani.

<sup>27</sup> Miqi qimaseenoo quandaki Toomasina qimaminoo qinai, aneenna asauku qini qisauku aqumusaa maaqoo quqasee pirimma aamara auqamma qafa. Aneenna asauku qini qiqaasanasa faqa quqasee auqama qafa, aneenna maparaairana taikaa, kuqaa fee kai qia.

<sup>28</sup> Toomasifa mina qafamaseenoo qinai. Qini karaambaiqa qini Anutufa.

<sup>29</sup> Yisufa kafaa Toomasina qimaminoo qinai. Anee qini qiqaafamaseenana kai qiniara kuqaa fee qidanee. Akaqausa sia qini qiqaafaidaqa qini ufara kuqaa fee qifanoo Anutuna اساسirafa misasaa mariannoo.

*Maapapiqanaki akara oosana kooroo qu ufafa.*

<sup>30</sup> Yisufa moomoo firaa ainaina nari faiqi namu nifusaa kooroomasoofaqa sia maa papiqanasaa akara riqa. Akaqana kai akara riqa.

<sup>31</sup> Maa ainainnausara akara rumaseeqa inneeqa Yisunara kuqaa asauku mundira fee qimasee Anutuna amaaku fee qimasee mi iriranannai mina auqunnai innee naaru naaru marirana maraaqera akara rumanni-maqeeqa.

## 21

*Yisufa nari faiqi namu qisauku dinni taikasee dinni qaaraqanda marasee misa nifusaa kooroomannimaqoo ufafa.*

<sup>1</sup> Inaaqiana moo kari Yisufa kooroomambufaqa maasa mina faiqi namu qafaqau. Tibeeriasa nammari mandirana afainni maaqimandee kooroomandee uqannifiqanau.

<sup>2</sup> Simoona moo auqu Peetooroofa faqa Toomasifa qaara qapirafa faqa Natanaerafa Kannaana maqusa Kariree maqa maaqaindaraafa qini qikoona Seebeedeena amaakuqara faqa moodaanaki mariqiafana.

<sup>3</sup> Marufanoo Simoona moo auqu Peetooroofa narilara qinee noodaanna pateeraanauree qufaqa maasa ani faqa fuanauree qimasee mina faqa fiqiafana. Maasa miqi qimasee kanuqaki akaramafi nammari qambaanaai oonuree pateeuqa quqasaida uqeerasaida qafeemarufanoo iqaqanau. Sia uqanna moodaa noodaanna uqarinai.

<sup>4-5</sup> Kananaana suani maqee ururoofanoo Yisufa nammari afainni kikiqinoo marufaqa maasa sia minara irisee Yisu fee qiqau. Yisufa maasa nammeera qimasee qimanniminai, Oo kumaarauqa noodaanna maraidee qufaqa maasa qiqau, sia uqanna moodaa maraidaqa.

<sup>6</sup> Yisufa iriseenoo maaqi qimasee qimanniminai, innee nisauku uqannai pateeuqa quqaseeqa noodaanna paqurifaranoo. Misa mina iriseeqa nariqa firaa pateeuqa nisaukuqannaindari aqusoofanoo noodaanna moomoo minaki qumbiqafufaqa rarisarara anuqimariqiafana.

<sup>7</sup> Yisuna afaaqasaa aqoondi qinee Yoohaneesa Peetooroona qimamiqa qiqaafana Karaambaiqa muqufa maasa qimaqimifa maridanoo. Simoona moo auqu Peetooroofa mina iriseenoo nari qamunna quqaqoona qumareenoo aranandaqanna rumbamareenoo nammariki ooqurama aquufanoo immapamamaree Yisufunnai finai.

<sup>8-9</sup> Maasa Yisuna faiqi namu kanuqaki kaqimariaafanausa pateeuqaki noodaanna qumbiqanoo marufaqa risaqa aniufaqa afainni anireeqa. Maasa sia nianai marufaqa aambaaka maaqooqari aqimariana amanasaa marufaqa miqoo oonureeqa maasa sipakiqari maqasaa aqufufaqa miqoo

idaraqoona qafaafannaqoo idarasee noodaanna suqaida feemu kaqi quqaqoofaqa qafaqiafana.

<sup>10</sup> Yisufa maasa qimanniminau, noodaanna maqee maree anianakinaana akaqana maree aniaqa.

<sup>11</sup> Simoona moo auqu Peetooroofa sipaki akaramafinoo noodaanna pateeuqa rarisama maqasaa quqanau. Quqasoofaqa maasa noodaanna asaana rumasee (153) moomoo uqanna firaafa kai marufanoo sia pateeuqa rakeeinau.

<sup>12</sup> Yisufa maasa narí faiqi namu naaranau, doo aniree narana naaqa. Maasa minara yafee qianneerusia. Doo karaambaiqa akooqoo maridanoo qimasee sia iraqau, kaqimbiqiafana.

<sup>13</sup> Maasa aniraafananoo Yisufa feemu faqa noodaanna faqa mareeqee niminau.

<sup>14</sup> Yisufa kuqiranakiqari findifuqooqari qaara kari maasa narí faiqi namu kooroomannimaqanau. Doo qaaramookufanoo noodaanna qumbaqira faasaanasaa fee qimasee kooroo inau.

*Yisufa Peetooroona faqa ufa qu ufafa.*

<sup>15</sup> Maasa miqoo namasaafananoo Yisufa Simoona moo auqu Peetooroona qimaminoo qinai, Simoona, Yoohaneena amarana amaaku, anee qiniara aneenna amuqusakiqari fee aididanoo fee qini faiqi namu qiniara nidimarina ani qiniara aidirafa urinnaaqaranoo fee maridanoo fee. Peetooroofa iriseenoo maaqi qimasee qimaminoo qinai, eeo Karaambaiqa qinee aniara dididanoo anee minara irimarinanoo. Yisufa iriseenoo kaifaa qimaminoo qinai, anee qini faiqi namusaa asumu aandaura foora naranara foora nimia.

<sup>16</sup> Miqi qimaseenoo Yisufa kaifaa Simoona moo auqu Peetooroona qimaminoo qinai. Simoona Yoohaneena amarana amaaku, kuqaa fee anee qiniara aneenna amuqusakiqari fee aididanoo fee. Simoona moo auqu Peetooroofa qinai, Eeo Karaambaiqa aniara didimarifana anee minara irimariananoo. Miqi qimasooфанoo Yisufa qinai, anee qini ufa irimariasasaa sipsipara foora rakisinnimaqaa.

<sup>17</sup> Miqi qimasee Yisufa qaaramookufanoo Peetooroona irammirino qinai, Simoona Yoohaneena amarana amaaku kuqaa fee anee qiniara aidinoo fee. Peetooroofa Yisufa qaaramoo kari iroonara aundura rapikufanoo maaqi qimasee qimaminau, Oo Karaambaiqa anee aiqama ainainara irimarianafa qinee aniara didimarinara anee irimariananoo. Yisufa iriseenoo qinai, anee qini ufa irimariasasaa naranara foora nimia.

<sup>18</sup> Qinee anoona ufa kai ani qimamidaqa. Anee kumaaraa maridana qamunanda anee rumbasee aneenna aidiranasaa nimariananoo, kasooqaqee anee nauraiqi quqainanoo faiqi moo fannoo ani asauku dinni dinni ratutasee rumbasee afiqee sia fuaqaannai ani akooqainnannai kuqinnanara afiqee fuannoo.

<sup>19</sup> Yisufa mi ufanannai Peetooroofa aunirira saqarisaa kuquaninnana Peetooroofa mi kuqiranaki afaaqa areenarana Anutuna amiannoo. Yisufa Peetooroona qimami taikaseenoo mifa findifi fidanoo Peetooroonara doo anee qini qinaaqianna aniannee qimasee indaaru Yisufa finau.

*Yisufa narí afaaqasaa aqoondi faqa ufa qu ufafa.*

<sup>20</sup> Peetooroofa Yisuna faqa fidanoo quandaki Yisuna afaaqasaa aqoondi qini Yoohaneesa qiqafanau. Ooqai Yudasifa ueeqoo eendanaki narana neemarufanoo Yisuna aaqa marufa ueeqaaninnanara iroo fasiqafa qinee Yoohaneesa mi fasiqafa Peetooroona aanaaqiana fimariafananoo.

<sup>21</sup> Peetooroona Yisuna iraidanoo qinau, Oo Karaambaiqa maa fasiqafa Yoohaneefa naqifeemasee kuquannoo fee.

<sup>22</sup> Yisufa qimaminoo qinau, Peetooroo sia mi fasiqana ainainirafa ani saikafau maridanoofau, qinindi maridanoo. Qinee mi fasiqanara sia dauni kuqua, kasooqagee qinee kafaa qumuanna aukwana ani paqurianauree qiananoofau miqimmiqini. Peetooroo sia ani saika maridanoo. Ani saika maafa maridanoo. Anee qini faqa fuannee qidaqa.

<sup>23</sup> Yisufa miqi qimasoofaqa mina faiqi namu maaqi qimasee qini Yooha-  
neenara nari qimami nari qimami aagamasee qiqau. Oo mi fasiqafa Yoohaneefa sia kuquannoo afeeka fee mariannoo. Yisufa sia minara sia kuquannoo fee qinau. Yisufa maaqi qinau, qinee mi fasiqanara kaqi mari-  
naqa qinee qumuanna aukwana qumu paquriananoofau miqimmiqini misaikana sia anindi, qinindi fee qinau.

<sup>24</sup> Mi fasiqafa maa ainainna ufana qidaqa akara rimarunausa maridaqa. Maasa mina ufara kuqaa fee qimasee iridaqa.

*Maa papiqanakinaa akara rafaafu ufafa.*

<sup>25</sup> Yisufa kuqaa moomoo ainaina auqinau, sia maa akaranakinaana kaifau auqinau. Maasa sia Yisufa auqoo ainaina aiqama akara riqa. Papiqa maa maqa maaqana qumbiqaandooro, oodaa kai akara riqa.

## **YISUFA NIQIQOO FASIQAUSA**

### **Yisufa narí faiqinamu Yuda maqasaaqari niqiqoofaqa daraanimafufaqa auqoo ainainafa.**

<sup>1</sup> Oo qini qifasaafa Teeofirusafa, Yisufa indaaruru narí saika oosana araseenoo miqooqari mina ufa oosana oosana faqa mifa auqu ainaina faqa Anutufa mareeqee innaarunai quqoonara faqa qinee indaaruuqaa papiqaki qinee Rukaasa akara rumamaqaafanafa maridanoo. Magee maanaki dinnatinnai fuka akara rumamaqaidafa.

<sup>2</sup> Anutufa Yisuna mareeqee innaarunai quqoo kamuqoo mi indaaruuqaa akarana taikaqiafana. Yisufa kaqi maridanoo Anutuna naaquqara maraqunnannai narí rusandeesamumasee maroo fasiqausa naamuaqira ufa oosana oosana qimanniminu.

<sup>3</sup> Yisufa narí kuqiranakiqari findifinoo miqooqari qaara fasiqa niku nisauku taikasee faasaana maridanoo narí faiqi namu maruqoo moomoo kari kooroomambinoo misa faqa ufa qidanoo Anutuna innaaruna ququsakinaa mariranara ufa qimannimimarinu. Miqimandeenoo narí kuqiranakiqari findifinoo akooqoo mariranara uqannifiqanau.

<sup>4</sup> Mi fasannai mi kamuqoo mina faiqi namu mina ufa irimarusu moodaanaki suqufufanoo Yisufa misa faqa maridanoo maaqi qimasee ufa qimanniminu. Qinee innaarunai ooru fuanaqa innee maa maqusana Yeerusaree maqusa sia quqasee fifainiaqa kaqi mariaqa. Qini qikoofa moo afeeka nimianinnanara qinee qimannimiafannana minara maaqoo kai marida rakisiaqa.

<sup>5</sup> Yoohaneefa nammari rumannimaqee marifa kaqi fifau nammari uqannaki moomoosa rumannimaqee marinu. Anutufa qusasaa anoona ainainaki narí naaquqara andeeqara maraqunnaki inni rumannimaqaano.

#### *Yisufa innaarunai ooru finau.*

<sup>6</sup> Yisuna afaaqasaa aqoondiufa mina faqa nimirusa misara niqiqoo fasiqausee qimariqau. (Yisufa maru aukuanna Roomma maqanna kaa-manna faqa sundiauqa faqa rakisinnimaqee marufanoo Yuda maqannaasa nikooqanau. Naqimasee Roomma maqanna niqiqamasee fee maasa qeeqa rakisianauree qimariqau.)

Minara Yisuna afaaqasaa aqoondiufa Yisuna faqa suqufiqa irammiriqa qiqau. Oo Karaambaiqa maa aukuannee yairee fee anee Roomma maqanna kaamanna aqiqamaseenee Isaraee maqanna maasa nári kaamanna qugeennaree.

<sup>7</sup> Yisufa mi ufana iriseenoo qimanniminoo qinuu. Oosana oosana ainaina naaru kambiqaaninna aukuannai sia innindifau maridanoo. Qini qikoofa narí afeeka rakisirana quqaseenoo, sia inniara iriaqee qinuu.

<sup>8</sup> Maanara kai iriaqee qinuu, qini qikoona naaquqara andeeqara maraquna fannoo qumuree inni naakufinaqa innee qini qiqafara fasiqauqa qiniara aiqamai qimannimimaree fifaranoo Yeerusaree maqusaki mariasa faqa Yudeeaa maqa maaqaki mariasaki faqa Samaria maqa maaqaki mariasaki faqa nianai aiqama atinnai mariasaki faqa qini qiqafara fasiqauqa qiniara kooroo ifaranoo.

<sup>9</sup> Yisufa miqi qimaseenoo misa nifusaa miqooqari Anutufa kukee-garanakiqari Yisuna akooqoo uqeerasoofanoo innaarunai oorufimaru-fanoo asuru fannoo qumu dukunimaseenoo misa nifusaa kai qumu afiqee ooru finau.

<sup>10</sup> Misa miqookai tataaqa marufanoo qaara fasiqa eekara qamunna afisiraqanda miqoo misaki dadi findifufaqaqara kikiqigau.

<sup>11</sup> Miqanda maaqi qimasee aiqamausa qimannimiqau. Oo Kariree maqannaasa Innee nanaree innaarunai noori uqeersee tataaqa maridee, innee fifau miqi mariafanoo. Anutufa Yisuna maqee inni nifusaa uqeereegreenoo innaarunai muru quqeenoo doo Yisufa maqee innaarunai ooru findee kai miqikai inoo kasooqagee kafaa qumuannoo.

*Mataiasafa Yudasina amana kambiqanau.*

<sup>12</sup> Miqanda miqi qimasooafa Yisuna faiqi namu quqasee Oorifa aqanasaqari Yeerusaree maqusai kafaa ooqu keeqaqau. Oorifa aqana sia nianai maridanoo.

(Moodaa kirometera maaqiraqoo maridanoo dinni Qufoorai miqiraqoo Yeerusaree maqusa maridanoo.)

<sup>13</sup> Misa kafaa Yeerusaree maqusaki keeqafiqa maqee maqee nariqa kai suqimaru maqanaki keeqaqau. Maarinni sandaaqai rummaki suqigau. Misa nuqu Peetooroofa faqa Yoohaneefa faqa nari afasaafa Yameesafa faqa Peetooroona akaqa Andurufa faqa Firipifa faqa Toomasifa faqa Baratooroomeeufa faqa Mataioofa faqa Yameesana amarafa Arafaeusana amaaku faqa Simoona amarafa moo misa minara nariqa kaamanaikiaqera sandanainai qimaru fee qimariqau. Mifa faqa moo Yudasina amarafa faqa mifa Yameesana amaaku.

<sup>14</sup> Minamusa anaasee namufaqa Yisuna anoona Mariana faqa Yisuna akaqaafasaa namufaqa maqee maqee suqufida moodaa naundurasa fidaqa innaaru qimarusa mariqau.

<sup>15</sup> Qaaramoo faasaana aiqaroofaqa Yisuna ufa irimarusa suqufufaqa ufa suqirara qigau. Misa nisaanarirafa maaqinoo maridanoo. Qisauku dinni taikasee dinni ani moodaa marasee fasiqa niku nisauku taikasee fasiqa anaasee suqimariqau. Misa suqimarufanoo Peetooroofa misakiqari findifinoo maaqi qimasee qimanniminau.

<sup>16</sup> Oo qini qiqoonausa. Ooqeenaa akara anoona maasaki doo anoonaikino Yudasifa sundia mareeqeenoo soofaqa Yisuna arunara anoonaikino. Ooqai naaquqara andeeqara maraquna fannoo Dafidina qimamifanoo Yudasinarara akara rumaqoofa doo maqee mina anoona maasaki kambiqeenoo.

<sup>17</sup> Yisufa Yudasina rusandeesamumandee maasa faqa ainainianifeera mareeqee maasaki quqasoofanoo marinau.

[<sup>18</sup> Yudasifa Yisuna qumaraseenoo Yuda maqannaasa nisaukuki quqasoofaqa misa mina akiaqara feefauru amiqau. Amufanoo mifa mi feefauruna mara mareenoo moo maqa feefaurumandeenoo miqoo saamurufanoo amuaqu radiqufanoo arana kukupamafufanoo kuqinau.]

<sup>19</sup> Yeerusaree maqannaasa minara iriseeqa mi maqanara fidika maqa maaqee qidaqa. Yeerusaree maqannaasa nari ufakiqari mi maqanara Akeeradama fee qidaqa.]

<sup>20</sup> Dafidifa nari idi papiqaki maaqi qimasee Yudasinarara ooqai Yudasifa sia kambiqooqoo maaqi qimasee akara rinau.

Mina maqa maaqa kaqi mariannoo

Moo fannoo sia amana minaki marinnaranoo.

Kafaa Dafidifa moosaa maaqi qimasee Yudasinarara akara rinau.

Moo fannoo mina amanasaa findifinafa mina amaaqa maqafi mariannoo.

<sup>21-22</sup> Peetooroofa Dafidina ooqeenaa ufa kikiqa ususeenoo maaqi qimasee nari aqoonausa miqoo suqiqa marusa qimannimidanoo qinau. Maasaki qisaukuqara taikasee qiku nooqu qaara marasee mariafanausa maridaqa. Yudasifa doo kuqinoo moo fannoo mina amaaqaki kambiqaa. Sia kai fifau fasiqa fannoo miqiannoo. Ooqai oosanaree Yoohanee nammari nimirufu marunaki maru fasiqafa miqooqari Yisuna faqa maasa faqa fiufufanoo Karaambaiqa Yisufa innaarunai ooru funa irufa mina qafoo fasiqafa kai Yudasina amaaqaki kambiqaanoo.

<sup>23</sup> Peetooroofa miqi qimasooafaqaa misa qaara fasiqa utaaqaqau. Miqanda nuqu Yooseefaana amarafa faqa Matiasafa faqa Yooseefaana amarafa moo auqu Barasabasifa kafa moo auqu Yustusafa marinau.

<sup>24-25</sup> Miqoo suqimarusa miqanda nuqurama quqaseeqa minee maraanau maanee maraanau qidaqa Anutunara maaqi qimasee innaaru qimariqau. Oo Karaambaiqa Yudasifa ani ufa irimariasaki mariifa doo nari manda nammari namaseenoo nari sanda arinoo maridanoo. Oo Karaambaiqa maasa qaaraqanda mareeqee quqaseeqa, anee miqandakinaana yafasiqa fee ani aididanoo fee Yudasina aikuki kambiqaanoo fee. Anee aiqama fasiqa naundurani irimarianafa minara maasa uqaqifiqa.

<sup>26</sup> Miqi qimasee innaaru qimaseeqa masisa quandeera foora ufanoo Matiasana uqannifiqanau. Uqannifiqasooafaqaa Matiasana mareeqee Yudasina aikukina mara quqaqau.

## 2

### *Anutuna naaquqara andeeqara maraquna qumuree naakinau.*

(Ooqai Sinai aqanasaa Anutufa Mooseena aamua qimaqoo suqirafa marinau. Yuda maqannaasa faqa Yuda maqanna aanaamuruki oonu marusa faqa aukwana aukwana mi fasannai suqira qoomaqammandaida Yeerusareenni suqu maree ururee neemariqau. Misa mi qoomaqanara aiqum quqara qoomaqa fee qiqau. Anutufa nari sandufa Sinai aqanasaa Mooseena amu ufanara faqa mi qoomaqana sakasee namaseeqa nari ufakiqari Peendeekoossee qimariqau.)

<sup>1</sup> Yisufa innaarunai oorufu kamuqoo mina faiqi namu moomoo Peendeekoosa qoomaqira faasaanasaa misa aiqama Yeerusaree maqusai moodaa maaqaki nariqa kai keeqafimariqau.

<sup>2</sup> Marufanoo kaqi kaqi ufanoo innaarunaindari firaa ufai uqidanoora foora qumureenoo mi maqanaki qumbiqaa aqinau.

<sup>3</sup> Uqimarufanoo idauru miqirafa qumureenoo raina rainamaki aiqama nikiiaaqa aqufufaqa qafaqau.

<sup>4</sup> Idauru miqirafa Yisuna ufa iri marusasaa aqufufanoo Anutuna naaquqara andeeqara maraquna naakufufaqa naundura qumbiqanoo marinau. Qumbiqafinoo Anutuna maraquna fannoo anoonaikufaqa moo maqanna ufa nari sia irimaru ufausa qimariqau.

<sup>5</sup> Mi fasannai Yuda maqannaasa kaaqa Anutunara rimarusa aanaamurunni daraaniqa mariusa oonurandee anireeqa Yeerusaree maqusai qoomaqa suqanarara qusimariqau. <sup>6</sup> Yeerusareenni suqimarusa ufai uqira ufa iriseeqa moomoosa Yisuna faiqi namu maruqoo suqiqa mariqau. Anaamurukiqari ani marusa Yisuna faiqi namu ufa iriseeqa akasaa qeeqa maqanna ufa qidee qimasoofanoo naaquqanau.

<sup>7</sup> Naaquqooafaqa randeeqa nari qimami nari qimami qiqau, Maa ufa qimaria fasiqausa Kariree maqannaasa kai maridaqa.

<sup>8</sup> Misa maasa ufakiqari andeeqasee kai qida qiafaqa iridaqa. Naqi fee mandee maasa ufa iridee, sia maasa maqusai mariaasa maasa ufauqa qidaqa. Maasa moomoo maqa maaqaindari anunausa maridaqa.

<sup>9</sup> Maasa akaqausa Paratia maqusaindari anunausa.

Akaqausa Meedia maqa maaqaindari anunausa.

Akaqausa Eeramma maqa maaqaindari anunausa.

Akaqausa Meesoopootamia maqa maaqaindari anunausa.

Akaqausa Yudeeaa maqa maaqaindari anunausa.

Akaqausa Kapadoosia maqa maaqaindari anunausa.

Akaqausa Poontiusa maqa maaqaindari anunausa.

Akaqausa Asia maqa maaqaindari anunausa.

<sup>10</sup> Akaqausa Firikia maqa maaqaindari anunausa.

Akaqausa Pamafiria maqa maaqaindari anunausa.

Akaqausa Isipa maqusaindari faqa,

Ribia maqa maqa Sireenee aqa mariasakiqari faqa aniqa.

Akaqausa Roomma maqusaindari anunausa.

<sup>11</sup> Yuda maqannaasa faqa aanaamuru Yuda amaana ufa irimariasa faqa anunausa. Akaqausa Kareetee maqa maaqaindari anunausa.

Akaqausa Arabia maqa maaqaindari aniqa.

Maasa moomoo maqusaindari daadu daadu ufa qimarunaua ani maridaqa nári ufakiqari andeeqasee qiafaqa iridaqa. Misa Anutuna firaau ainaina auqunara qiafaqa iridaqa.

<sup>12</sup> Misa aiqama naaquqeenoo naundura dapikufaqa narí qimami narí qimami qiqau. Maana nana oosanee kambiqaidanoo maaqidanoo fee. Maasa mina oosanara randaidaqa.

<sup>13</sup> Akaqausa Yisuna faiqinamuara naakada qiqau. Maa fasiqausa namari moomoo neeneesee furufarida fifau faafau aiqama maqanna ufa qidaqa sia misa ufa iriaqa.

*Peetooroofa findifinoo amiqimasee aiqamausa qimannimainau.*

<sup>14</sup> Peetooroofa mina iriseenoo Yisuna faiqi namusaimbaqa qisaukuqara taikasee qiku nooqu qaara marasee qirausasaimbaqa findifufanoo firaago nammeera qimasee maaqi qimasee suqiqa marusa qimannimainau. Qini maqanna Yuda maqannaasa innee aiqama Yeerusareenni ani mariasa qini ufa iriaqa. Qinee maqee qimannimianaqa amiqimandee iriaqa.

<sup>15</sup> Maa fasiqausa sia nammarifau namasee furufaridau. Innee qafaqa kananaana maridanoo suani maqee ururaidanoo. Minara sia amana nammarifau namaqaqee miqidafau ia.

<sup>16</sup> Maa amiqira fuka ainainafa kambiqaina Anutuna tamummaqara fasiqa Yooerafa ooqai akara rumaqoofa mina anoona doo maqee inni nifusaa kambiqeenoo. Yooerafa maaqi qimasee ooqai akara rumaqoofa.

<sup>17</sup> Anutufa qinau, Taikainna faasaana maa ainainna quqaanaua.

Qinee qeeqa maraquna faiqi aiqamausa nifaaqai nammariara foora teeqi-mannimaqaanaua.

Mi afeekanannai inni faiqinamu niraamuqmaaka naaru kambiqaaninna ainainara maqee qimasainanoo naaru kambiqaanoo.

Inni kumaarauqa faqa qaina anoona qaina qafeefaranoo.

Faiqi asooqa nauraasa qaina misa nifunni areefaranoo.

<sup>18</sup> Mi fasannai qinee Anutusa kaiqeesa ainainimariasa faiqi faqa aanaaseuqa faqa nifaaqasaa qini maraquna adiana nimaqasaanaqa misa tamummaqeeffaranoo.

19 Qinee mirinni innaarunai moo ainaina oosana oosana uqannifiqasaanaqa maqasaaqari qafeefaranoo.

Maa maqanasaa moo naaquqara firaa ainaina auqusaanaqa qafamasee qini afeeka oosana qafeefaranoo.

Fidika faqa ida faqa ida muna firaana faqa mariannoo.

20 Asukuna fannoo suani afu aruannoo.

Fidika andandirafa quqoona ititaannoo.

Karaambaiqa firaa kaaqa qara faasaana radiqisee qumuraannee qinna kamuqoo maa ainainnausa kambiqaanoo.

21 Mi fasannai yafa yafee Karaambaiqa auquara fifimasee aaree mariasa misa kai Karaambaiqa asumu mareefaranoo.

Yooerafa mi ufausa akara rumaqoofa maridanoo.

22 Peetooroofa Yooerana ufa qimannimiseenoo maaqi qimasee aiqamausa suqiqa marusa qimanniminou. Innee Isaraee maqanna fasigauqa aiqama qini ufa iriaqa. Anutufa Yisuna Nasareete maqannaana nari asaku mundirana inni nifusaa utaaqamaqoofa maridanoo. Anutufa dadaaqufanoo Yisufa faiqi inni qambaana maridanoo inni nifusaa afeeka ainaina faqa naaquqara ainaina faqa uqannifiqara ainainauqa faqa auqusoofanoo minannai innee Yisunara innaarunaindaraa fee qiaqera uqannifiqanau.

23 Anutufa faasai iriqaraasamaseenoo nari amaaku maqasaa mariasa nisaukuki quqasaanaqa misa mina arifaranoo fee qimaseenoo misa miqimasee maaqimmasee aruaqee qimasee nari qimiriqoomau kai fuageera qimaseenoo inni nisaukuki Yisuna quqasoofaqa sia irirai mifa aamua qimaqoomau kai fidaqa mina mara maree kuqammariqau. Innee mina qumaree manda oosana maree maru fasigausa nimisoofaqa misa qumareeqa aunirira saqarisaa pirimmannai arusoofanoo kuqinai.

24-25 Kuqufufanoo Anutufa sia minnisanau, kuqiranakinaana uqera quqanau, kuqira aupuraranakinaana rakeemaseenoo uqera quqanau. Kuqirana uriqararafa marunara kuqirafa sia amiqimasee amana kisaagasaa qumaraannoo Dafidifa minara maaqi qimasee akara rumasoofanoo maridanoo.

Karaambaiqa qini qifusaa faasaambaasaana marufaqa qafeemariqia.

Mifa qini daaqa qini qisauku uqannai marinara sia qinee rufiaanaura.

26 Qinee minara irunanoo qini ufa asasirafa kai maridanoo qeeqa daunduraki asasirafa qumbiqanoo maridanoo.

Qini qifaaqa faqa sia maparaa iannoo, Karaambaiqa afeesidanoo asasianoo.

27 Anee sia qini qimana kuqiranaki minniqiseennara qifaaqa quqaidaqa sia maparaa ianaura.

Aneenna naaquqara andeeqara fasiqa afaqa madikaki akundamasainana anee qaoo qinanoo mina maqi sia putaa iannoo.

28 Anee kaqi marira aana doo uqaqifiqeenaranoo.

Anee qini faqa mariranannai qini daunduraki asasirana qumbiqqa qiminnaranoo.

29 Peetooroofa Dafidina ufa qimannimiseenoo maaqi qimasee nari qimanniminou. Oo qini qiqaonau iriaqa. Dafidifa sia nariarau akara rinou, nari ati Yisunara akara rinou. Dafidifa maasa qikeeku qikaaku marifaqa minara innee amiqimasee iridaqa marianara qifaaqa quqasee amiqimasee maaqi qimasee qimannimianaura. Dafidifa kuqufufaqa akundaqau. Mina madika kaqi maridanoo maasa faqa.



<sup>30</sup> Dafidifa Anutuna tamummaqara fasiqa marufa marinau. Anutufa maaqi qima afeekaikamandee qimaminau. Qinee Anutusa, anatikiqari kasooqagee moo amiananoo Karaambaiqaikiannoo, ani aanna reenoo karaambaiqaikiannoo.

<sup>31</sup> Dafidifa Anutufa kasooqagee auquaninna ainainara iriseenoo narati asauku mundirafa kuqiranakiqari findifuaninnanara maaqi qimasee akara rinau.

Anutufa sia suqirausa marianaki minninnisaannoo.

Sia mina amaqi putaa iannoo.

<sup>32</sup> Anutufa Dafidina ufamau maa Yisuna kuqiranakinaana findifuma-saifaqa maasa maqee inni nifusaa kikiqimariasa mina qafeemarusu mari-daqa.

<sup>33</sup> Anutufa Yisuna uqeereeqeenoo narí aaga asauku uqannai quqaseenoo narí naaquqara maraquna ooqai utaaqa amamaqoona Yisuna amifanoo mifa kafaa quandakinoo maasa adiama qimaqaiifaqa maa maqee kam-bigeemari ainaina innisaimbaqa qafaidaqa.

<sup>34</sup> Dafidifa sia innaarunai ooru finau narí ati Yisufa ooru funara maaqi qimasee akara rinoo qinau.

Anutufa qini Karaambaiqa qini atiara maaqi qimasee qimaminoo qinau.

<sup>35</sup> Anee qini daaqa ooqu marifinaqa qinee ani namuqaa mareeqee ani aramandunnai quqasaanana anee rafaqafusaa.

<sup>36</sup> Minara innee aiqama Isaraee maqannaasa maa ainainnara aiqama amiqimasee iriaqeera qidaqa. Maa Yisuna innee aunirira saqarisaa aruna Anutufa mina kai mareeqeenoo Karaambaiqa asauku mundiranai kamandaifanoo maridanoo.

<sup>37</sup> Miqoo suqufi mariasa aiqamausa mi ufana iriseeqa Oo maasa firaqqoo aaqeeqa qimasoofoano naundura dapikufaqa Peetooroona faqa Yisuna faiqi namu faqa irammiriqa qiqau. Oo qiqqoonausa naqi fee maasa ianauree.

<sup>38</sup> Peetooroofa iriseenoo qimanniminoo qinau. Inni aiqamausa uqanna inneeqa mandainaina nimeesa uqusee Yisuna asauku mundiranaki kee-qafiqa nammari rumannimaqaaqa. Miqi mandaifanoo Anutufa inni mandainainara minninnisaannoo narí naaquqara andeeqara maraquna inni nimiannoo. Sia feefauru qirafa kaqi nimirafa maridanoo.

<sup>39</sup> Anutuna ooqai qima afeekaikamaqoonara narí maraquna inni faqa inni niku nisaukuara faqa anaamuru mariasa faqa aiqama Anutufa naarainaqa aniannee qinausa faqa narí maraquna nimianauroo qinau.

<sup>40</sup> Peetooroofa mi ufausa faqa ufa oosana oosana ufa faqa miqoo suqi-marusa aaquqima nimaqaidanoo qimanniminau. Maa maqee mariasa mandoosanara narirara qumuannoo inni faqa naruani rufiasee Yisuna saqarikiqa.

<sup>41</sup> Miqi qimasoofaqa mi suaninasaakai faiqi anaasee moomoosa Peetooroona ufara kuqaa anoonee qimasee Yisunaindi kamambi nammari maraqau. Qaaramoo tauseenna fasiqa anaasee mi suaninasaa kai nammari marasee Yisuna faiqi namuki atooqaaqau.

<sup>42</sup> Miqoo miqimandee nammari maroosa Yisuna afaaqasaa indaaruaqa faiqi namu ufa maqee maqee irisee mi mau fimariqau. Misa maqee maqee Yisuna faiqi namu faqa moodaanaki kamambi maridaqa moodaa maqaki nariqa narana suqaqoona namaseeqa Yisuna aafaqa namaseeqa raudamaki firaa amaana maqaki keeqa fidaqa Anutunara innaaru qi-mariqau.

*Yisuna faiqi namu amiqimasee moodaanaki mariranara qimariqau.*

<sup>43</sup> Yisuna afaaqasaa faiqi namu moo nuqu Yisufa niqiqoo fasiqausee qimariqau. Anutufa Yisufa niqiqoo fasiqausannai sia amana faiqí auqaaqaa ira ainaina naaquqara ainaina auqusoofaqa faiqí anaasee qafamasee Anutuna afeekara firaa ainainee qimaseeqa naaquqanau.

<sup>44</sup> Yisuna ufa irimarusa aiqamausa faasaambaasaana moodaanaki marida aqoondikai mariqau. Misa miqidaqa nári qumiasana narí ami narí ami imariqau.

<sup>45</sup> Misa maqa faqa nári ainaina oosana oosana faqa mootinai nimisee feefauru marasee nariki faiqí akaqausa ainaina siaisa marusa misa sarau imaru ainaina doo nimimariqau.

<sup>46-47</sup> Faasaambaasaana Yeerusaree naaquqara amaana maqaki keeqafida innaaru qimariqau. Nári maqakiaqa faqa maqee maqee suqufida narana neemariqau. Misa afaaramasee narana naida nimisee moodaanaki suqusee naidaqa Anutunara asasidaqa dufi dufi qidaqa aiqama faiqí anaasee amiqi amiqimannimaqaranara irisee asasimariqau. Maqee maqee faiqí anaasee akaqausa misa faqa Yisunara kuqaa anoonee qimariasaa Anutufa qumee misa mareeqee ooqeenasa faqa moodaanaki kamannimaqaidanoo.

### 3

*Peetooroosa Yoohaneesa aiku mandaikirana andeeqaisaqau.*

<sup>1</sup> Misa miqi marufanoo moo faasaana Peetooroosa Yoohaneesa Yeerusaree naaquqara amaana maqaki innaaru qirara ooru fiqau. Yeerusaree maqannaasa eeneemarufaqa amaana maqaki keeqafi innaaru qimariqau.

<sup>2</sup> Peetooroosa Yoohaneesa eeneemaru innaaru qiraree qimasee kooqiki ooru keeqafi faiqí moo qafaqau. Ooqai maqasoonakiqari aiku mandaikirafa sia ainainirana amana marufaqa naratiuqa aindusumaraidaqa maqee maqee amaana maqa kooqiki quqasee marufanoo miqoo maridanoo munnimmara innaaru qimarufaqa akaqausa moodaa moodaa amimariqau. Qimudao qusa qaaraqanda amisoofofanoo minannai naranaina feefaurumma neemarinau. Amaana maqa kooqiuqa moomoo marinau. Nuqufaqa kooqiuqa mariqau. Mi fasiqana quqee maru kooqinara amiqira kooqi fee qimariqau.

<sup>3</sup> Mi aiku mandaikirafa mi amiqira kooqinaki ooqu marifufanoo Peetooroosa Yoohaneesa minaki keeqafufanoo mi fasiqafa miqandara munnimmara qimiaqee qinau.

<sup>4-5</sup> Innaaru qufaqa miqanda mi fasiqana ooriki qafamaseeqa Peetooroofa qinau. Anee maqanda dooriki qiqaqaa qufanoo mifa ainaina qimidaqi-aafoo qimaseenoo miqanda nooriki nindafanau.

<sup>6</sup> Nindafamasoofofanoo Peetooroofa kafa qimaminoo qinau. Sia qinee munnimma marisa maridaqa. Qinee moodaa ainaina marisa mina kai ani amiana. Yisufa asauku mundirafa Nasaretee maqusaindaraafa qini qimuna mina ani amidaqa mina auqusaa ani qimamidaqa anee findimeeqee fua.

<sup>7</sup> Peetooroofa miqi qidanoo mi fasiqana asauku uqannai asauku qumareenoo dadaaqufanoo aaqee uqanna mina aiku faqa mina aiku aummeena faqa afeekaikufanoo rutaqinoo findifumakufanoo oonuree aniree inau.

<sup>8</sup> Miqimakufanoo Peetooroosa Yoohaneesa faqa amaana maqaki keeqaidanoo Anutunara susuqira idi raidanoo rafusaki rafusaki idanoo nidanoo keeqeemarinau.

9-10 Faiqí anaasee miqoo moomoosa mariusa mi fasiqana qafamaseeqa mina nirana faqa Anutunara susuqira idi rarana faqa qafamaseeqa qiqau, Oo amiqira kooqiki oqufaaqee munnimmara innaaru qimari fasiqafa doo findifinoo amiqimasee nidanoo. Miqi qimasee tautufanoo naaquqoofaqa mina andeeqara oosanara randaqau.

*Peetooroofa mi fasiqana andeeqaisoo oosanara qimanniminau.*

11 Mi fasiqafa Yoohaneesa Peetooroosa firaqoo dufi dufi qimaseenoo miqanda qumareenoo miqanda faqa maaqa tida atimau Sooroomoonaindi fee qimaru maqana atimau akaraqau. Faiqí anaasee moomoosa mina qafamasee sandeeqa oonu mi atimau rafusu uqarumasee mina qafeemarfanoo naaquqanau.

12 Peetooroofa moomoosa nindafamasee maaqi qimasee qimanniminau. Isaraee maqannaa fasiqauqa. Innee maa ainainna qafamasee nanaree tautiqa maasa tataqaidde. Innee maasara nariqa afeekannai fee nariqa andeeqaranannai fee maa fasiqana findifumaseeaafoo qidee. Oo sia uqanna.

13-16 Abarahaamana faqa Isakeena faqa Yakooboona faqa misa Anutufa maasa qikeeku qikaaku Anutufa maa fasiqana uqeereeqeenoo narí afaaqa areenarana narí ainainira faiqi Yisuna amifa maridanoo. Innee mina mareeqee maasa faiqí firaasa nimufaqa misa mareeqee Piratoona amufaqa innee miqoo aruaqee qiqau. Piratoofa idukiraree qufaqa innee afeekaikamasee aruaqee qiqau. Yisufa mifa aaduma amiqimandee andeeqarafa uqanna marufaqa innee faiqí narimarunara Piratoonara iduku qimiseenana Yisunara kaqi kuquaniffee qusa. Innee miqi qimasee asumu marira oosana faqaana arusaqau. Anutufa mina kuqiranakinaana uqeera quqasoonaa maasa qafeemaruusa maridaqa. Maa Yisuna auqu afeeka fannoo kai maa fasiqana afeeka amifanoo findifinoo nidanoo. Innee maqee qafeemaria ainaina Yisuna auqu faqa narí auqusaa irirana rusiranannai faqa kambiqeenoo. Yisunasaa irirana rusiranannai maa fasiqana andeeqasaifanoo aiqamausa nifusaa findimeeqee nidanoo.

17 Qini qiqoonausa innee faqa inni faiqí firaasa faqa sia irirana iriqa Yisuna ariqau.

18 Ooqai uqanna Anutufa narí tamummaqara fasiqauqa ufannai narí asauku mundiranara kasooqagee aupuraannoo fee qimaqoona doo inni nisaukuki quqasoofaqa mina ufa anoonaikiqa Yisuna ariqau.

19-20 Innee minara irisee inneeqa mandainainara nimeesuqusee Anutufinnai noori ubeekaifanoo inni mandainaina numoo rukannisainaqa innaarunaindaraa asoosana Karaambaiqa afusaaqaraana inni nimiannoo. Ooqai Anutufa inniara iriseenoo narí asauku mundirana Yisuna mareenoo kaifaa kasooqagee innee iannai aqiqainanoo qumuannoo.

21 Mifa Yisufa asauku mundirafa kaqi innaarunai mariannoo. Kasooqagee Anutufa aiqama ainaina fuka kambiqaaninna aukuannai mi kamuqoo Anutuna tamummaqara fasiqauqa ooqai qimaqoomau kai asauku mundirafa kafa qumuannoo.

22 Ooqai Moosefa maaqi qimasee qimaqoofa maridanoo. Karaambaiqa inni Anutufa inni tamummaqara fasiqa moo nimiannoo. Qini Mooseesa daanna reenoo innikiqari kai moo fannoo kambiqaannoo. Kambiqainaqa innee mina ufara eedoo kai qiaqa.

23 Innikiqari moo fannoo sia mi tamummaqara fasiqana ufa irifanoo faiqí anaaseekinaana qumaree kaqinni quqasee miqoo kuqaruannoo.

Peetooroofa Mooseena ufa miqi qimannimiseenoo nariara quandafinoo maaqi qinau.

<sup>24</sup> Ooqai Anutuna tamummaqara fasiqauqa moomoo marufaqa naaru kambiqaaninna ainainara tamummaqasee akara riqau. Misakinaana moo tamummaqara fasiqa Samueerafa faqa marufanoo, nari faqa naraanaaqiana kambiqoosa faqa moodaa kari ufa qunannai maa maqee kambiqeemari ainainara kooroo inau.

<sup>25</sup> Anutufa nari tamummaqaranauqannai maasa qikeeku qikaaku qima afeekaikirana oosana oosana nimiqoofa maridanoo. Sia misara kaifau quqanau. Maasa faqa naida qimidanoo. Anutufa maaqi qimaseenoo Abarahaamanasaa qima afeekaikinoo qinau.

Ani aiku asauku misannai maa maqa maaqanaki maamaqanasaaqaraasa misannai amiqi amiqimannisaanaura.

<sup>26</sup> Miqi qimasee Anutufa Abarahaamana faqa qimafeekaikunara irinoo nari ainainira faiqi Yisuna mara mareenoo inni maqanniminau. Aiqama maqasaaqaraasakina inniki naaree quqasee inneeqa mandainaina nimeesuquaqeera amiqi amiqirana faqa nimianifeera.

## 4

*Peetooroosa Yoohaneesa Kansoorauqa nifusaa kikiqamafufaqa mi ufa-nara irammiriqau.*

<sup>1</sup> Peetooroosa Yoohaneesa faiqi anaasee miqi qimasee Sooroomoona tida atinni firaa amaana maqaki maruna qimannimimarufaqa amaana maqasaa aanaiqikirausa faqa amaana maqa poorisauqa faqa Sadikai amaana ufa irimarusa faqa anireeqa irimariqau.

<sup>2-3</sup> Peetooroosa Yoohaneesa Yisufa kuqiranakiqari findifunara faqa faiqi anaasee faqa findifandinnanara faqa amiqimasee faiqi anaasee qimannimimarufaqa Yuda maqanna rakisirausa aniree iriseeqa tautumaseeqa qiqau, faiqi anaasee Yisuna kuqiranakiqari findifunara iriseeqa maasa dari foora qimaseeqa aanoomasee Peetooroosa Yoohaneesa ruumbeegee karabusa maqaki quqaqau. Eeneemarufaqa doo suani atisaa marufanoo duna ufa irianee qimasee mareeqee karafusaki quqaqau.

<sup>4</sup> Faiqi anaasee moomoosa sia rakisirausa ufara eedoo qiqau. Peetooroona ufa iriseeqa moomoosa uqanna Yisunasaa irirana ruisoosa minasaa atooqau. Faifa tauseenna nukudara foora ira fasiqa anaasee mikari minasaa atooqau.

<sup>5</sup> Faiqee iqaqoo kananaana Isaraee maqanna faiqi uriqararansa faqa faiqi firaasa faqa Mooseena sandufa akoofasauqa faqa Yeerusaree maqusaki ufa suqimaru maqanaki suqimariqau.

<sup>6</sup> Annasafa aanaiqikirausa uriqararafa faqa Kaiafasafa faqa Annasana aiku asauku faqa indaaruaa Yoohaneena amarana faqa Areakasanderafa faqa misa aiqama Yuda maqanna faiqi firaasa faqa miqoo suqimariqau.

<sup>7</sup> Misa miqanda Yisufa niqiqoo fasiqaqanda karafusakinaana mareeqee nari noorinni quqaqoofaqa aanoo imasee irammiridaqa qiqau. Inneeqara naqi mandaafanoo fee aiku mandaikirafa findifinoo fee. Nana afeekannai fee miqi fee, ya fasiqana ufa fee iri fee maaqi fee.

<sup>8</sup> Peetooroofa naaquqara marauna minaki qumbiqafunara findifinoo paasoosamandee maaqi qimasee misa qimanniminau. Oo maa fasiqausa faiqi firaasa faqa rakisirausa faqa qini ufa iriaqa.

<sup>9</sup> Innee maasa aiku mandaikirana dadaaqi findifumasaunnaara innee minaree maasa iraidee.

<sup>10</sup> Innee faqa Isaraee maqannaasa aiqama irifaqa mina oosana qiman-nimiana. Maa fasiqafa kisaagasaa aiku mandaikinoo marufa marifaqa magee amiqirafa inni nifusaa kikiqinoo maridanoo. Yisufa Anutuna asauku mundirafa Nasareeteendaraa fasiqa innee aunirira saqarisaa pir-immannai arusoofanoo Anutufa mina kuqiranakinaana uqeera quqasoofa mina auqu afeekannai maa fasiqafa findifinoo maridanoo.

<sup>11</sup> Tamummaqara fasiqa akara Yisunara maaqi qimasee akara rumaqoofa maridanoo.

Innee maaqa usakeemarusaa faakanara fidiqaamasee tatu aqusoofa Narí kai sabeena afeeka faakana fannoo findifinoo rakiqanoo maridanoo.

Tamummaqara fasiqa ufa miqimasee Yisunara akara rumaqoona innee sia irirai mi mau kai fidaqa mina arusoofanoo narí findifinoo maridanoo. (Mi aukuaana ooninnai kai usakee mariqau. Maasa sabeenannai maaqa usakee maruna marifaqa ooniara sabeena kikiqusidaqa.)

<sup>12</sup> Innaarunai firana Yisuna moodaa naríara minannai kai innaarunai firafa maridanoo. Anutufa sia moo fasiqa maa maqanasaa quqaseeno minannai innaarunai ooru fuagee qinau. Sia uqanna, Yisufa kai.

<sup>13</sup> Miqoo suqimarusaa faiqí fraasa Peetoroosa Yoohaneesa ufa irisooofanoo naaquqoofaqa tautumaseeqa qiqau maaqanda sia sukuraki keeqeemaruqanda kaqi maruqanda maridaqa kaaqa paasoosamandee ufa qimariaqanda maridaqa Yisuna faqa nimariaqanda miqidammia maqi qiqau.

<sup>14</sup> Faiqí aiku mandaikirafa miqoo Peetoroona faqa Yoohaneesa faqa amiqimasee kikiqinoo marufaqa faiqí ufa qimarusaa mina qafeeqa naqi fee qimasee qaoo qianau qimasee ufara randeemariqau.

<sup>15</sup> Mi rakisirausa suqimarusaa Peetoroosa Yoohaneesa niqiqamasoofaqa moosaa fufaqa nári miqoo maridaqa narinni narinni ufa qimariqau.

<sup>16</sup> Misa maaqi qiqau, Maasa maa fasiqaqandara naqimasee fee miqandara qaoo qianauree. Yeerusaree maqusanaasa faqa aanaamuru misaki ani mariasa faqa aiqama maa moo ainaina firaa ainaina auqunara iridaqa maasa faqa sia amana mi ufanara qaoo qianauree akooqoo marifaqa.

<sup>17</sup> Maasa miqanda sia kaqi idukuanauranoo aaquqimannimaqasee idukuanaura maasa miqanda naaramaseeqa qumeeraaqee qianauree maa ufana sia fifainianifeera qianauree maaqoo kai kaaqa taikaanifee qianauree.

<sup>18</sup> Miqi qimasee misa Yoohaneesa Peetoroosa naaramaseeqa qaoo qiqau. Sia uqanna Yisuna auquara faqa mina ufara faqa sia kafa kooroo qiaqa. Qumee uqanna raagee qiqau.

<sup>19</sup> Peetoroosa Yoohaneesa misa ufa iriseeqa qiqau. Innee inneeqa kai Anutuna afusaa andeeqara ainainara irimariasa mariafanoo. Maaqanda inni ufamau fee fuanauree mina ufamau fee fuanauree. Maasa inni ufamau sia fuanaura Anutuna ufamau fuanaura.

<sup>20</sup> Maasa Yisunara qafee marunna ainainara daaqoo iri marunna ainainara naqi fee masee kukeeqaanauree sia kukeeqaaqaa ira ainaina maridanoo.

<sup>21</sup> Miqi qimasooofaqa miqoo suqimaru rakisirausa afeekaikamandee qaoo qimasee idukiqu. Misa naqimandee miqanda nariraree, sia amana. Faiqí anaasee aiqama qafamaseeqa Anutunara asasidaqa idi reemariqau.

<sup>22</sup> Mi moo ainainna auqaisoo fasiqafa aiku mandaikirafa sia kumaaraafau qaara fasiqa niku nisauku taikasee aukuaana aiqaroofaqa andeeqaqau, faiqí fraana andeeqoonara asasidaqa minara idi reemariqau.

*Yisuna faiqi namu suqufiqa paasoosiranara Anutunai innaaru qimariqau.*

<sup>23</sup> Misa miqanda idukusoofaqa Peetooroosa Yoohaneesa nári niqoondun-nai Yisuna ufa irimarusa marunnai fidaqa faiqí firaasa faqa rakisirausa faqa misa qaoo qirufa oosana oosanara qimannimiqau.

<sup>24-26</sup> Miqoo marusa irisee aiqamausa moodaanaki Anutunara اساسامندee innaaru qiqa qiqau. Oo Karaambaiqa, Anee innaaruna faqa maqa faqa ooruku nammari faqa minaki mari ainaina oosana oosana faqa quqoonafa mariananoo. Anee aneenna naaquqara andeeqara maraqunannai aneenna ainainira faiqi Dafidinannai ani namuqaara qimannimiqoonnana Dafidifa ooqai minara maaqi qimasee akara rinau. Naqi fee qidee aanaamuru aanoo idee, Naqi fee qidee faiqí anaasee unnamaanna qidee, Maa maqanasaa karaambaiqauqa irirana deedaqidaqa. Rakisirausa suqufi Anutuna faqa narí asauku mundirana faqa kuridiraree qidaqa.

Dafidifa miqi qimasee ani Anutuna namuqaara akara rinau.

<sup>27</sup> Kuqaa maa maqusanai Yeerusareenni Eeroodeesa Piraatoosa aanaamuru faqa Isaraee maqanna faqa suqufifaqa Anutufa ani aaduma amiqira ainainira faiqi ani asauku mundirana ariraree qiqau.

<sup>28</sup> Anee ooqeenana aneenna afeekannai aneenna iriranannai kambiqaaninnanara qunafa misa sia irirai anee qimaqoonna ufamau kai deedaqamandee ariqau.

<sup>29</sup> Oo Karaambaiqa misa maasara sia faiqí anaasee aniara qimannimi- anee qia. Anee misa aaquqirufa maasa qimaqimimarifana anee faqa iriananoo. Anee maasa dadaaqinaqa maasa ani ainainira fasiqausa paasosamandee Yisunara faiqi anaasee qimannimianaqa iriaqeera.

<sup>30</sup> Oo Anutu aneenna asauku maasa qifaaqai quqaseenana aneenna naaquqara faiqi Yisuna auqunnai maasa naaquqara ainaina faqa faiqí aurinausa andeeqannisarana faqa auqusaanaqa qafamasee aniara anoonee qifaranoo.

<sup>31</sup> Misa miqi qimasee innaaru qimasoofofanoo misa maru maqafa faqa kasinau. Kasunakina Anutuna naaquqara maraquna fannoo miqoo marusa naunduraki qumbiqafunara paasosamandee Anutuna ufa faiqí anaasee qimannimimariqau.

*Yisuna ufa irimarusa nári ainaina narami narami imariqau.*

<sup>32</sup> Yisuna ufa irimarusa moodaa iriranasaa moodaa naundurasa mariqau. Sia moo fannoo moo ainainara qinindi fee qinau. Kaqi aiqama ainaina aiqamausaindi fee qinoo marinau.

<sup>33</sup> Yisuna afaagasaa aqoondi namu amiqimandee afeekaika uqanna-mandee Yisufa kuqiranakiqari findifuna aufakiana qimannimimariqau. Miqimarunara Anutufa dadaaqufaqa misa nariara nariara amiqi amiqi- daqa afaarimarufaqa faiqí anaasee misara amiqimariasee qidaqa eedoo qimariqau.

<sup>34-35</sup> Sia moo fannoo misaki narainaina sarauimarufa marinau. Faiqí akaqausa maqa fee maaqa fee moosa nimisee minasaa feefauru maraseeqa Yisufa niqiqoo fasiqausa nimufaqa misa miniseeqa raina rainamasee sarauimarusa nimana kai nimimariqau.

<sup>36</sup> Miqi marufanoo faiqí moo auqu Yoosefaafa Yisuna akoona amarafa mifa ooqeenaa fasiqa Yakooboona amaaku Reefina nianasaqaraa ati marinau. Mifa Sipurusa afumaki kambiqoofa marinau. Yisufa niqiqoo faiqi namusa mi fasiqanara moo auqu Baranabasi fee qimariqau. Mi auquna oosana faiqí anaasee pooduqara fasiqee qimariqau.

<sup>37</sup> Baranabasifa narí maqa moona amiseenoo minasaa feefauru maraseenoo Yisufa niqiqoo fasiqausa nimufaqa misa narana mareemaria munnimmana siaisa qumaree rainasee nimiqaau.

## 5

*Ananiasafa faqa Safiraa nammarifa faqa nári munnimmara unna qimasee kuqiqau.*

<sup>1-2</sup> Yisuna ufa iri marusakiqari faiqí moo auqu Ananiasafa marinau. Mina anaqa auqu Safiraa nammarifa marinau. Ananiasafa narí maqa moosa nimiseenoo feefauru minasaa maraseenoo naríara qumee dinni raina quqaseenoo dinni mareenoo Yisuna faiqi namu niqiqoosa nimida maqi qimasee unna ufa qinau, aiqama munnimma nimidaqee qinau. Narí aanaaqandira moodaa ufa qimasee miqi qinau.

<sup>3</sup> Anutufa dadaaqufanoo Peetooroofa faasai iriseenoo mi munnimmana qafamaseenoo qinau Ananiasa nanaree anee eedoo qiananoo fee Sadanafa ani amuqusa qumaraifanee unna ufa qidanee. Anee Anutuna naaquqara maraquna unna ufa qimamiananoo aneenna munnimma ati unna qimaseenana kukeeqasaannanara.

<sup>4</sup> Mi maqafa anindi maruna nimunanoo kafaa mi munnimmafa anindi kai maridanoo. Anee aneennara munnimma ati rafaafinanoo amana andeeqanoo maridanoo. Aneenna aqeenana anee unna ufa qimasee aiqama nimi fee qiannana, nanaree aneenna aunduraki mandainainara irinane. Anee sia faiqifau unna ufa qimannimiananoofau. Anutuna unna ufa qimamiananoo.

<sup>5</sup> Ananiasafa mi ufana irinoo doo miqookai tautumasee kuqinau. Moomoosa mi ufana iriqa kaaqa rufiaqau.

<sup>6</sup> Kumaarauqa mi maqanaki keeqafufaqa qamunannai Ananiasana iri kukuqamamaree mara maree maqaki akundaqau.

<sup>7</sup> Kaqikaqoo marinoo Ananiasana anaqa Safiraa nammarifa Peetooroofa maru maqanaki urureenoo sia narí afaaqi kuqunara irinai.

<sup>8</sup> Maqaki ururoofanoo Peetooroofa iramaseenoo qinau. Kuqaa fee ani maqasaa munnimma ani afaaqi aiqamee qiminoo fee. Miqi qufanoo Safiraa nammarifa mifa faqa kai unna qinoo qinau eeo aiqama uqanna inni niminoo.

<sup>9</sup> Peetooroofa mina iriseenoo qinau. Naqaa fee ifanee aneenna afaaqi faqa moodaa ufa qimasee fee unna qimasee Anutuna maraquna amanidane. Miqiannanara doo kumaarauqa uru maridaqa. Ani afaaqi doo maqee kuqufifaqa doo muqu akundamaseeqa anee faqa maqee kuqinaqa miqoo mina aaqa akundeefara.

<sup>10</sup> Miqi qimasoofanoo Safiraa nammarifa Peetooroona aikunni doo tautumasee kuqinau. Mi kumaaraasa miqoo urureeqa uru mina qafeeqa mara mareeqa narí afaaqi aaqa kai akundaqau.

<sup>11</sup> Miqimasoofaqa Yisuna faiqi namu faqa akaqausa namufaqa minara iriufanoo kaaqa naaquqee marinai.

*Yisuna faiqi namu faiqi anaasee amiqimannisaqau.*

<sup>12</sup> Yisuna afaaqasaa aqoondiqa niqiqoo fasiqausa misa moomoo ainaina mookira mookira ainaina faiqí dadaaqira ainaina kai auqimarufaqa misa qafeemariqau. Yisuna ufa irimarusa moodaaqoo naaquqara amaana maqa aaqa Sooroomoona tida atinni maqee maqee innaaru qirara suqimariqau. Sooroomoona tida atinni kisaqa marunara faiqí moomoo suqimariqau.

(Sooroomoonafa ooqai kuqufinau. Yeerusaree amaana maqakina mina auqu quqaqoo tida atinni kaqi marufaqa minaki keeqafi qusimariqau.)

<sup>13</sup> Yeerusaree maqusanaasa faiqí anaasee kaiqeesa Yisuna ufa iri-marusara amiqirausee qimasaidaqa Yuda maqanna uriqararausara rufiasaida maasa faqa dari maqi qimasee sia Yisuna ufa iri-marusunai misa maruqoo animariqau.

<sup>14</sup> Faiqí faqa anaasee faqa moomoosa faasaambaasaana Yisunasaa irirana rusisoosa sia uriqararausara rufiaqau nifaaqa quqaseeqa niqiqoo fasiqausasaa atooqafi nimariqau.

<sup>15</sup> Yisufa niqiqoo fasiqausa moomoo faiqí dadaaqira ainaina auqee marufaqa faiqí anaasee mina qafamasee nariqa maaqakiaqa faiqí aurusa faqa mandaikusa faqa dinee quqoosa faqa qaindusumaree aanasaa qaari qamunna ufiqiseeqa miqoo quqee mariqau. Miqimasoofanoo Peetooroofa aatata fimarufanoo mina amana fannoo misa mandaaqoofaqa aurirafa teeroo taikaani fee qimasee mini quqee mariqau. Peetooroofa moomoo andeeqannisaidanoo oonaqee anauqee maasaindi sia amanaikiandooraa qimasee aanasaa quqee mariqau.

<sup>16</sup> Faiqí anaasee Yeerusaree dinni dinni marufaqa nári auri marusa faqa fueenaiki marusa faqa nifiqaida niqiqoosa maruqoo quqasoofaqa aiqama uqanna idaaqamannisee mariqau.

*Amaana maqasaa rakisirausa Yisuna faiqi namu unnaanasamu nariqau.*

<sup>17</sup> Amaana maqasaa aanaiqikirafa uriqararafa Sadikai amaana ufa qimarufa narí aqoonausa faqa Yisufa niqiqoo fasiqausa auqu ainainara kaaqa rairaa qidaqa misa maaqi qiqau faiqí anaasee maasa minnisee misiannai atooqaidaga. Sainaga maasa misa rumbaanaura.

<sup>18</sup> Miqi qimaseeqa misa Yisuna faiqi namu niqiqoo fasiqausa mareeqee karabusaki quqaqau.

<sup>19</sup> Miqimasoofanoo eendakina Anutuna qangiroo moo fannoo qumureenoo ireeda karabusa kooqi atuaseenoo niqiqoo fasiqausa aiqama mareeqeenoo madaana qaqanau.

<sup>20</sup> Quqaseenoo maaqi qimasee qimanniminu. Innee fafaa iqaqainaqa naaquqara firaa amaana maqaki keeqafi kikiqiaqa. Miqi mambiqaa maa fuka mariranara Yisuna ufamau firanara faiqí anaasee naamuaiqimannimiqaa.

<sup>21</sup> Niqiqoo fasiqausa iriseeqa eedoo qimasee iqaqoofaqa amaana maqaki keeqafuafaqa faiqí anaasee Yisuna fasaasa qimannimiqau. Qimannimimarufanoo amaana maqasaa rakisirafa aanaiqiki marufa mifa faiqí firaasa kanasoorauqa faqa moomoo aiqama suqu quqaseenoo Yisuna faiqi namu karabusaki kaqi mariaa maqi qimasee amaana maqasaa rakisi maru poorisaua niqiqeenoo innee karabusakinaasa Yisuna faiqi namu niqiqoo fasiqauqa idukusee nifiqee uruqa.

<sup>22</sup> Poorisa karabusa maaqai ooquree randasee qafoofanoo sia mariqau. Ooqurandee kansoorauqa suqimarunaki keeqafinoo qimanniminu.

<sup>23</sup> Maasa karafusa maaqaki ooquree amiqimasee qafaunanoo kooqi amiqimandee mundinoo mariinoo kooqiki maria poorisaua faqa kikiqiaqa maridaqa rakisidaqa. Maasa kooqi atuasee qafaunanoo sia faiqí moo fannoo minaki maridanoo.

<sup>24</sup> Amaana maqa poorisauqa rakisirafa faqa aanaiqiki marusa faqa mina iriseeqa misara oonu mafi iriseeqa randaqau.



<sup>25</sup> Misa miqimasee randee marufanoo faiqí moo fannoo anireenoo qimanniminau. Innee iriaqa eenda karabusa maaqaki quqaasa misa amaana maqaki kikiqíqa maridaqa faiqí anaasee naamuaqira ufa qimannimidaqa.

<sup>26</sup> Miqi qimasoofofaa poorisa rakisirafa narí poorisauqa faqa amaana maqaki oonuree oonu ireeda kai niqíqoo fasiqauqa amaana maqakinaana nifiqee aniqau. Aranaiqi oonu misa nifiqee anianaqa faiqí anaasee minaki marusa oonisamu ainnasamu qumaree darifoo qimasee ireeda kai oonu nifiqee aniqau.

<sup>27</sup> Nifiqamaree mini suqímaru kansoorausa nifusaa kikiqamasaqau. Amaana maqasaa aanaiqiki marusa uriqararafa misa mara quqasee qimanniminau.

<sup>28</sup> Maasa amiqimandee andeeqasee inni qimannimunaqa sia mi fasiqafa Yisufa kuqunara qimannimiaqee qunaqa doo innee maasa ufa rukiaseeqa aiqama qimannimiafaqa. Innee Yeerusaree maqannaasa aiqama qimannimisaafaqa misa aiqamausa quandakiqa mi fasiqana aruana akiaqara mina numoo maasaki quqararee qimariafaqa.

<sup>29</sup> Peetooroofa mi ufana iriseenoo maaqi qimasee qimanniminau. Inni faiqí ufamau sia fuanaura. Maasa Anutuna ufamau kai fidaqa faiqí anaasee qimannimianaura.

<sup>30</sup> Innee Yisuna aunirira saqarisaa pirimmannai kuqarusoofofanoo maasa qikeeku qikaaku misa Anutufa mina kuqiranakinaana mara findifumasoofanoo maridanoo.

<sup>31</sup> Anutufa miqooqaraana mareeqeenoo narí aqa innaarunai quqasoofanoo maasa Isaraee maqanna rakisirana faqa asumu mareemarina faqa maridanoo. Anutufa Isaraee maqannaara nári mandainainara nimeesuqusee rukaaqeera miqinau.

<sup>32</sup> Anutuna ufa irisee mi mau fimariasa Anutufa narí naaquqara andeeqara maraquna kaqi misa nimidanoo. Mi naaquqara andeeqara maraqunna faqa maasa faqa Yisuna findifuna qafaafanausa maridaqa qimannimidaqa.

<sup>33-34</sup> Ufa suqímarusa faiqí firaasa misa Peetooroona ufa iriseeqa fira aanoommaseeqa naruaneera ufanoo misakiqari moo fannoo Mooseena sandufa akoofasa fasiqa mina auqu Kamarieerafa faiqí anaasee minara kaaqa irirana faqaa fee qimariqau. Mi fasiqafa ufa suqímarunakiqari findifinoo narirana qaoo qimaseenoo maasa nári kai ufa qianauree qimasee Yisuna faiqí namu niqíqoofofaqa moosaa fiqau.

<sup>35</sup> Misa fufanoo Kamarieerafa ufa suqímarusa maaqi qimasee qimanniminau.

Isaraee maqanna fasiqauqa innee iriaqa. Maa fasiqausa sia aqee narirariaqa iriseeqa miqoo andeeqaqa. Moomoo ufa rukiee mariasa maasaki mariusa marufaqa innee misa oosana irimarusa mariafanoo.

<sup>36</sup> Ooqai faiqí moo auqu Teeudasafa mifa naríara firaasee qimasoofofaa 400 (maqi handareeta) fasiqa moomoo fasiqa minasaa atooqaqau. Rakiranaki mi fasiqafa taikoofaqa mina aiku asauku miqooqari daraanimambufanoo taikanau.

<sup>37</sup> Miqooqari Roomma maqannaasa aiqamausa nuqu maroo aukuana faiqí moo auqu Yudasifa Yudasina amarafa Kariree maqannaafa mifa faiqí moomoo maraseenoo Roomma maqanna kaamannara qikooqaifaqee qimasee misakinaana rakeeianauree qimaseenoo, rakiranaki kuqufaqa mina aiku asauku miqooqari daraanimambiqau.

<sup>38</sup> Kafaa maqera inni qimannimidaqa. Sia maa fasiqausa naruaqa. Saifaqa kaqi mariaqa. Misa ufa misa marirafa misa nirafa fifau faiqi ufa marinoo nari kai taikaani.

<sup>39</sup> Anutuna ufa marinoo innisaimbaqa sia mina amana rafaqa fuanaura. Innee Anutuna faqa rakifoora.

<sup>40</sup> Misa aiqamausa Kamarieerana ufa iriseeqa mi maukaimbiqau. Misa Yisuna faiqi namu kafaa naarofaqa aniroofaqa Yisuna aufakiana qimannimiranara qaoo qimasee unnaana samu moomoo kari nariiseeqa idukusoofaqa fiqau.

<sup>41</sup> Yisufa niqiqoo fasiqausa nidafimarufaqa fidaqa sia noori runiqau asasammigau. Misa Yisuna aruandemasee maasa faqa daruafanoo Anutuna minannai maasa mareeqeenoo Yisuna amanakai mundusaifaqa minara maasa asasidaqa. Yisunasaara maasa daruafaqa asasidaqa.

<sup>42</sup> Miqooqari Yisufa niqiqoo fasiqausa sia taikееqa faasaambaasaana firaa amaana maqaki faqa maqakiaqa faqa Yisuna asaku mundirana Yisuna aufakina amiqira fasaasa ufa suqusaida qimannimimariqau.

## 6

*Dinni qisauku taikasee dinni qaaraqanda ani marasee fasiqa Yisuna faiqinamu dadaaqiqau.*

<sup>1</sup> Miqooqari kaqikaqoo kisaqasaa maridaqa faiqi anaasee moomoo uqanna Yisuna ufasaa atooqau. Misakiqari Kirisa ufa qimaru Yuda maqannaasa faqa nari Yuda maqannaasa faqa tinoo taanoo rida mariqau. Niqiqoo fasiqausa maqee maqee munnimma rainasee sarauimarusa nimidaqa Kirisa ufa irimarusa nari adeedaana anaaseeqa sia andeeqasee munnimma nimunara ufa qiqau. Maqee maqee munnimma rainasee nimunnara ufa qiqau.

<sup>2</sup> Qisaukuqara taikasee qikunni ooqu qaara marasee Yisufa niqiqoo fasiqausa ooqeenasa Yisuna ufa irimarusa aiqama suqusee qimannimiqi qiqau. Maasa Anutuna ufa qimannimira saika minnisee quandaki munnimma raina nimira saika mararafa sia andeeqanoo mariannoo.

<sup>3</sup> Oo maasa qiqoonausa inniki qisauku dinni taikasee dinni ani qaara marasee fasiqara randaqa. Irirana faqaasa, andeeqara fasiqausa Anutuna naaquqara maraquna qumbiqaraura kai mara mini qimifaqa maasa munnimma rainara saika misasaa quqaanaura.

<sup>4</sup> Maasa qeeqa Anutuna ufa nimirana faqa innaaru qirana faqa mi moodaa saikana maasaindi mariannoo.

<sup>5</sup> Aiqamausa mi ufana iriseeqa amiqira fee qimaseeqa nari rusesamumandeeqa qisauku dinni taikasee dinni qaara marasee fasiqa quqasaqau. Misa nuqu moo fasiqa auqu Satefeenafa firaaqoo Yisunasaa irirana rusimari fasiqafa naaquqara andeeqara maraquna qumbiqarafa marufa marinau. Moo fasiqa auqu Firipafa, moo fasiqa auqu Parookoorusafa, moo fasiqa auqu Nikanoorafa, moo fasiqa auqu Timoonafa moo fasiqa auqu Parameenasafa moo fasiqa auqu Nikoorausifa Antiooka maqusaindaraafa anaamuru fasiqa misaki animarufa marinau.

<sup>6</sup> Miqimandee fasiqa namu maree mini niqiqoo fasiqausa naqa mini quqasoofaqa misa innaaru qimasee nisauku nikiaqa quqaseeqa nifaaqooqa qimasooofaqa nariqa saika munnimma rainee maru saikanai fufaqa niqiqoo fasiqausa nari saika Anutuna ufa qimannimira saikai fiqau.

<sup>7</sup> Miqimandoofanoo doo Anutuna ufa aiqamai daraaninau. Yeerusaree maqusai Anutuna ufa irimarusa moomoo kamambiqa fimariqau. Amaana

maqasaa aanaiqikirausa faqa moomoo Yisuna ufara kuqaa anoonee qimasee minasaa atooqee mariqau.

*Sateefeenana rumboo ufana.*

<sup>8</sup> Sateefeenafa naaquqara andeeqara maraquna fannoo minaki qumbiqafunara Anutufa firaqoo dadaaqufanoo faiqí aanaaseeki oosana oosana amiqimannimaqara ainaina naaquqee maru ainaina faiqí aanaaseeki auqee marufaqa qafeemariqau.

<sup>9</sup> Yuda maqannaasa Yeerusaree maqusaki akaqausa aaduma suku-raki keeqeemariasa náriara maasa aufadara irirana faqaasee qimariqau. Misa akaqausa Yuda maqannaasa Sireenee maqa maaqaindari mi suku-ranaki keeqeemariqau akaqausa Areekasandiria maqusaindari ani keeqeemariqau. Akaqa Yuda maqannaasa kaiqeesa Sirisia maqusaindari anusa faqa akaqausa Asia maqannaindari anusa faqa moodaaqoo suqufufaqa Sateefeenana ufara qaoo qimasee ufa raineer mariqau.

<sup>10</sup> Anutuna maraquna fannoo Sateefeenana ufa irira dadaaqunara sia mina ufa rafaqaafirana amana.

<sup>11</sup> Mi aufadara irira fasiqausa mina qafamaseeqa minafasaasa qimaseeqa gumee firaa munnimma auqusee ummuarira fasiqausa nimiqa qiqau. Sateefeenara innee unna ufa oosana oosana uqeeraaqa qufaqa misa Sateefeenana unna qimasee maaqi qiqau. Mifa Mooseena sandufara faqa Anutuna ufara faqa qaoo qidaqa qifaqa maasa iridaqa.

<sup>12</sup> Miqunara faiqí anaasee faqa faiqí firaasa faqa Mooseena sandufa irimarusa faqa niranaqoofaqa aanoomasee Sateefeena oonu qumareeqa amaana maqa rakisirausa ufa suqimarunakina mini quqaqau.

<sup>13</sup> Quqasoofaqa unna ufa qimaru fasiqausa nifiqee aniroofaqa maaqi qimasee Sateefeenara unna qiqau. Maa fasiqafa maasa naaquqara amaana maqara faqa Mooseena sandufara faqa maqee maqee manda ufa qimarifa maridanoo.

<sup>14</sup> Mifa maaqi qufaqa maasa iriafanafa maridanoo. Mifa maaqi qinau. Maa Yisufa Nasareetee maqusaindaraafa maa amaana maqana rapeepaamma aqusee Mooseena sandufa oosana oosana maasa qimu ufana mareeqee aadumai quqasainaga maasa moomau fuanoo qidaqa.

<sup>15</sup> Aiqamausa suqiqamarunakiqari noori Sateefeena funnai kai ubeekamafi qafaqau. Mina oori aiki qangiroo ooriara foora kaaqa qeemarufaqa qafaqau.

## 7

*Sateefeenafa faiqí firaasa aiqamausa qimannimu ufafa.*

<sup>1</sup> Amaana maqasaa aanaiqikirafa uriqararafa Sateefeena iramma-mageenoo qinau. Maa ufana kuqaa anoonee qidaqia.

<sup>2-3</sup> Sateefeenafa misa aiqamausa qimanniminoos qinau. Oo qini qikausa qifasausa qini ufa iriaqa. Ooqai Abarahaamafa sia Qarana maqa maaqai oorufunaki kaqi Meesoopootamia maqusai marufanoo Anutufa kooroomambinoos qimaminau. Aneenna aiku asauku faqa aneenna maqa maaqa faqa minniseenana qinee aamua qianna maqanasaa fua.

<sup>4</sup> Abarahaamafa mina iriseenoo eedoo qimasee Karadeea maqa maaqa minniseenoo Qarana maqusai oorureenoo miqoo marinau. Abarahaamana akoofa miqoo kuqufufanoo Anutufa qufanoo Abarahaamafa maa maasa marunna maqa maaqanaki Yuda maqa maaqai aninau.

<sup>5</sup> Anutufa mi aukuanna sia maa maqa maaqana aminau. Sia kaqikaqoo faqa aminau. Kaqi kasooqaqee qima afeekaikamasee ani faqa ani aiku

asauku ani atiuqa nimianauree qinau. Qima afeekaikira aukwana Abara-haamana faiqi siaifa marufanoo mina aiku asaukuara qimaminau.

<sup>6</sup> Anutufa maaqi qimasee qimaminau. Ani aiku asauku aanaamuru maqusai karafusaki marifaranoo, (400) maqi handareeta aukwana kisaaga aukwana karafusaki marifaranoo. Mi anaamurusa firaa ummaara manda saika ani aiku asauku nimimarifaranoo.

<sup>7</sup> Miqi marifaqa qinee Anutusa mi anaamurusa naruauree qinau. Naruseeqa ani aiku asauku Isaraee maqannaasa nifleeqee maa maqa maaqanaki quqasaanaqa maridaqa maa maqa maaqanakiqari Isaraee maqa maaqakiqari qini Anutusa qimooqifaranoo.

<sup>8</sup> Miqooqari Anutufa nári fainanduqira oosana Abarahaamana uqafiqanau. Abarahaamafa minara irisooqoo Isakeena anoofa maqasoofanoo dinni qisauku taikasee dinni ani qaaramoo marasee faasaana aiqarofanoo mina akoofa mina fainanduqinau. Isakeefa faiqi kamafinoo Yakooboona maqaseenoo doo mina faqa fainanduqinau. Yakooboofa faiqi kamambinoo qisaukuqara taikasee qiku qaaraqanda ooqu maraseenoo faiqi namu maasa qikeeku maqaseenoo misa faqa fainanduqu nimaqanau.

<sup>9-10</sup> Yakooboona faiqi namu nári nikaqa Yoosefaanara rairai qima-maqasee qumaraseeqa rumbeeqeeqa Midianna maqanna nimiseeqa feefauru munnimma marasoofaqa Midianna maqannaasa afigamaree Isipi maqannaasa munnimmara muqu nimiqau. Miqoo Yoosefaafa karafusaki marufanoo Anutufa dadaaqunara aiqama kadaapirirana oosana oosanaki fidanoo andeeqasee fimarinau. Yoosefaafa Isipa maqanna karaambaiqa Faraona oorisa kikiqamafuafanoo Anutufa Yoosefaana irirana faqa mina afaaqa oori faqa amiqirana aminau. Faraofa Yoosefaanara andeeqara fasiqee qimasee mareeqeenoo nári maqa maaqa faqa Isipa maqa maaqa aiqama faqa nári aiqama ainainasaa minauqasaa Yoosefaanara anee rakisiannee qinau.

<sup>11</sup> Miqoo aandaroo firafa Isipa maqannaasa faqa Kannaana maqannaasa moo auqu Isaraee maqannaasa faqa narinau. Maasa qikeeku qikaaku naranara randee mariqau.

<sup>12</sup> Isipa maqusai sakuma moomoo marufanoo Yakooboofa Yoosefaana akoofa Yoosefaanara sia uqanna irirai naranara kai iriseenoo nári faiqi namu maasa qikeeku qikaaku niqiqoofaqa indaaru ooquree sakuma maraseeqa nári nikaqa Yoosefaana qafamasee sia mina ooriara iriqau.

<sup>13</sup> Innaaqianna ooqu fu kari Yoosefaafa nári afasausanamua nariara kooroomanniminu. Miqimasoofanoo Faraofa faqa Yoosefaana aiku asaukuara miqoo irinau.

<sup>14</sup> Isipa maqusaindari Yoosefaafa nári akoofa Kannaana maqa maaqaki maruna ufa quqasoofanoo aiqamausa Isipa maqusai ooqu fiqau. Qaaramoo fasiqa niku nisauku taikasee moo fasiqa qisaukuqara taikasee moodaanai qiku ooqu marasee fasiqa anaasee Isipa maqusai ooqu fiqau.

<sup>15</sup> Yakooboofa Isipa maqusai ooqu marinoo kaqikaqoo marikino kuqinau. Mina faiqi namu maasa qikeeku qikaaku miqoo mari maree fiqa kuqiqau.

<sup>16</sup> Misa kuqufiqa niqoonausa misa iri mara mareeqa nári maqa maaqa Kannaana maqa maaqai Seekeemma maqusa aaqa nikundee mariqau. Ooqai Abarahaamafa munnimmannai Qamoorana aiku asauku feefauru amiqoonaki mi maqa maaqanaki misa iri nikundee mariqau Sateefeenafa kaqi ufa suqunakiaqa ufa qimannimino ninau.

<sup>17</sup> Anutufa ooqai Abarahaamana Kannaana maqa amiraree qimasee qima afeekaikamasoofanoo doo mina aiku asauku amira aukwana adeedi roofanoo maasa qikeeku qikaaku Isipa maqasaa moomoo kamambiqā fimariqau.

<sup>18</sup> Misa miqīqa maridaqa moomoo marufanoo Isipa maqannaā karaambaiqa moo kambiqanau. Mifa Yooseefaafa aandaroo aukwana Isipa maqannaasa firaqoo dadaaqi marunara sia irimarufanoo Isipa maqannaā karaambaiqa kambiqanau.

<sup>19</sup> Mi fuka karaambaiqafa minauqu Faraofa maasa qikeeku qikaaku nikaru qimasee firaqoo mandaikamannimāqee marinau. Mi karaambaiqafa qufaqa maasa qikeeku qikaaku nāri faiqi aanaaqi maqasee maqakiqari aqusee marufaqa kuqi mariqau.

<sup>20-21</sup> Miqimaru aukwana Mooseefa kambiqanau. Mifa faiqi aanaaqi amiqirafa kambiqanau. Mina anaukoo qaaramoo quqoonasaa nāri maaqaki rakisiisee kaqinni andandai quqasoofanoo Faraona araamuna paqurimasee nariara maraseenoo nāri amaakuara foora f irinai.

<sup>22</sup> Firimarufaqa Isipa maqannaasa irirana aiqama qimamisoofanoo irinoo innoqafinoo irirana faqaafa maridanoo aiqama ainaina oosana oosana uqeeree marufa maridanoo afeeka ufa qimarufa marinai.

<sup>23</sup> Mooseefa qaara fasiqa niku nisauku aukwana maraseenoo faiqī firaafaikamafinoo nāri maqannaā Isaraee maqannaā miqoo Isipa maqannaā karabusaki marusa niqafaanee qimasee finau.

<sup>24</sup> Misaki nidanoo nindafoofanoo Isipa maqannaā moo fannoo Isaraee maqannaā nāri aqoonnana mandaikamma maqoofanoo Mooseefa nāri maqannaana dadaaqianee qimasee mi Isipa maqannaā fasiqana kuqamarinai.

<sup>25</sup> Isaraee maqannaasa qini qiqafamaseeqa oo Anutufa maa fasiqanannai maasa maqee Isipa maqannaā karabusaki mariasa idukuannoo fee qimasee qini Mooseesara nidianifeera. Sia Isaraee maqannaā mina iriqau. Mana manammimariqau.

<sup>26</sup> Faiqee iqaqoofanoo kananaana Mooseefa nāri maqannaā Isaraee maqannaā nindafaida qafoofanoo Isaraee maqannaā qaaraqanda moodaa maqannaqanda rakimariqau. Rakimarufanoo Mooseefa soodaa qianee qimaseenoo qinai. Inneeqara moodaa maqannaā mariafanoo nanaree rakidee.

<sup>27-28</sup> Isaraee maqannaā nāri aqoonnana arimarufa Mooseena afeeqaseenoo aqinoo qinai. Yafee aniara maasa karaambaiqa ufa irimari fee qinoo fee. Eenda anee Isipa maqannaā kuqaruanafa miqi kai inana qini faqa darinnaree.

<sup>29</sup> Mooseefa mi ufana iriseenoo doo kooroo qinoo maridanoo Faraofa mina akiaqara qini faqa daruandoo qimasee rufisee quqasee sandeenoo Midianna maqa maaqai nianai oonu kisaqasaa marikinoo anaasee marasee qaara faiqi maqanau.

<sup>30</sup> Miqoo oonu maridanoo qaara fasiqa niku nisauku taikasee aukwana moomoo aukwana aiqarroofanoo Mooseefa faiqī firaafa marufanoo Anutuna qangiuroo moo fannoo qumee sasamimiki idaqqee marunakiqari ufa kai Mooseena qimamufanoo irinai. Sinai aaqana aqa aadana maqa maaqai qee marinai.

<sup>31</sup> Mooseefa tautumasee mi idauruna qafanau. Aqa oonuroofanoo idauruqiari Anutufa ufa moo qimaminoo qinai.

<sup>32</sup> Oo Moosee qinee ani aanaakuna asaifaqana Abarahaamafa faqa Isakeefa faqa Yakooboofa faqa misa Anutusa maridaqa. Mooseefa Anutuna

ufa iriseenoo aindiri aindiri ufanoo qafarara faqa eeraira eerairinau. Miqi marufanoo Anutufa kafaa qimaminoo qinau.

<sup>33</sup> Aneenna aiku aanaamu uturuqu quqaa. Maa maqafa naaquqara maqa maaqa maridanoo. Ani aiku aanaamu maa maqana putaaidanoo.

<sup>34</sup> Anee qini Anutusa ufa iria. Qinee qini faiqi namu Isarae maqannaasa Isipa maqasaa mariasa misa mandainainaki mariana faqa misa aupurarana faqa qafamasee misa qikiraqarana iriseeqa qumu misa nifiqaannara irisee ani qimamidaqa. Doo findifi fua ani aqiqaidaqa Isipa maqusai kafaannai fua.

<sup>35</sup> Satefeenafa kaqi suqunakiaqa ufa qimanniminoo nidanoo qinau. Isaraee maqannaasa nari maqannaara Mooseenara akooqoofanoo nianai afeeqa qidaqa qiqau. Yafee aniara maasa Karaambaiqa ufa irimari fee qinoo fee qiqau. Anutufa nari qangiroo sasamimiki ida qeemaruna aqiqoofanoo mi Mooseena dadaaqufanoo nari maqannaasa Isipa maqanna nisa ukukiqari rafia qumaraseenoo moo maqasaa rakisinnimaqee marinau.

<sup>36</sup> Mifa nari maqanna Isipa maqa maaqakinaana amiqimasee nifiqeeqeenoo Sinai aadana maqa maaqaki finau. Nifiqee fidanoo Isipa maqa maaqaki faqa Taatuqee nammariki faqa aadana maqa maqasaa faqa moo kamaakira oosana oosana ainaina uqannifiqanoo fimarinau. Qaara fasiqa niku nisauku taikasee aukuaana kisaqasaa miqimminoo fimarinau.

<sup>37</sup> Maa Mooseefa Anutuna tamummaqara fasiqa kasooqaqee kambiqaaninnanara maaqi qinoo qimanniminu. Anutufa nari tamummaqara fasiqa moo inni nimiannoo. Mifa qinee Mooseesara foora inniqakiqari kambiqafi mariannoo, inni dadaaqiannoo.

<sup>38</sup> Maa fasiqafa Mooseefa aadana maqa maaqaki Isaraee maqannaasa oobiqasee fimarunaki Mooseefa misa saimbaqa fimarinau. Misa Sinai aqana aqa marufanoo misa faqa nimarinau. Qangiroo fannoo Mooseena faqa aqanasaa ufa qimarinau. Mooseefa kai Anutuna naaru marira ufa iriseenoo maasa qimaqimimarinau.

<sup>39</sup> Maasa qikeeku qikaaku Mooseena ufa sia iriqa ruki aquseeqa Mooseena mafi aqusee kafaa Isipa maqasaa fuaneera qimariqau.

<sup>40</sup> Mooseefa Sinai aqanasaa ooru marufaqa misa Mooseena afasaana Aaroonaa aaramaseeqa qiqau. Mi fasiqafa Mooseefa maasa qifiqee anifa yai fee finoo fee. Anee Anutuna fooqaira ainaina auqusainanoo mifa maasa indaaru fida aana uqannifiqaina fua.

<sup>41</sup> Aaroonafa misa ufa iriseenoo mi fasannai kai burimakau aanaqi koorannai auqusoofaqa minara maasa Anutu fee qimasee innaaru qimasee qoomaqamasee tatufirana suqamisee nari nisaukunoo auquqoonara asasamasee qoomaqa sakasee naqau.

<sup>42</sup> Anutufa mi manda oosanna qafeenoo misa marunnai ameesa uquseenoo qinau. Saina misa innaarunaindaraa fifau fasau ainara innaaru qiaqee qimasee mininnisanau. Miqi qimasoofanoo tamummaqara fasiqa ufa kooroo inau. Tamummaqara fasiqa maaqi qimasee akara rinau.

Oo Isaraee maqannaasa

Innee qaara fasiqa niku nisauku taikasee aukuaana kisaqasaa aadana maqasaa niniunara sia qiniarau innaaru qiqau. Unna innaaru qimariqau. Sia qiniarau tatufira andau suqaqau.

<sup>43</sup> Sia innee qini naaquqara uqiqaana maqa maree fimarunara irimari-afanoo. Innee moo unna anutuna minauqu Moorookanara unna qimasee irimaree fidaqa unna qimasee qini kikiqa usimariafanoo.

Innee inneeqa moo unna Anutuna minauqu Reefanna fee qimari-afanoo. Mina fasau innaarunai maridanoo mina amana inneeqa nisaukunoo auqufa maqasaa mari Reefanafa marifaqa innee minara innaaru qimariafanoo. Miqiana akiaqara qinee Anutusa doo inni futeegeegee Babiroonia maqa maaqa meemai misa nisaukuki quqaanaura.

Tamummaqara fasiqa ufa miqi qinoo maruna mina kooroo qinau.

<sup>44</sup> Satefeenafa ufa suqunaki kai qimanniminoo ninau. Ooqai maasa qikeeku qikaaku aadana maqasaa nidaqa Anutuna sandufa qimannimira uqiqaana maqa misaki marinau. Mi uqiqaana maqafa Anutufa Mooseena qimamundee kai mi uqiqaana maqana usakee mariqau.

<sup>45</sup> Mina maariqoo aukwana maasa qikeeku qikaaku taikafufaqa misa faiqi namu findifufaqa mi uqiqaana maqana kaqi maraqa nimariqau. Anutufa Yooswana dadaaqufanoo Isaraee maqannaa maasa qikeeku qikaaku faqa mi uqiqaana maqana faqa mareegee Kannaana maqa maaqai ooqueeqa naru nifaqaseeqa nári uqiqaana maqa miqoo usakaqau. Miqoo marikinoo Dafidifa kambiqafinoo karaambaiqaikinau.

<sup>46</sup> Anutufa Dafidina andeeqara oosana qafamaseenoo minara rufanoo Dafidifa Anutunara irammirinoo qinau. Oo Yakooboona Anutu, ani maaqa uqiqaana maqa kai maridanoo. Amanee qinee ani afeeka maaqa usakaqaanane minaki marinnaree.

<sup>47</sup> Anutufa sia Dafidinara qinau. Mina amaaku Sooroomoonara qufanoo mifa afeeka maqa usakanau.

<sup>48</sup> Innee aiqama iriaqa firaqoo uqanna uriqarara Anutufa maridanoo. Sia amana faiqi nisaukunoo usakara maqaki amana mariannoo. Tamummaqara fasiqa Anutuna ufa minara maaqi qimaqoofa maridanoo fee qinau.

<sup>49</sup> Innaarunai qini maaqa maridanoo qinee rakisinnimaqara maqusa maridanoo. Maqasaa innee mariafa qini qiku reemaru nafa kaqikaa ainaina fifau ainaina maridanoo.

Innee nana maqee qiniara usakeefaree. Qini qimana idooara maqusa yai fee maridanoo fee.

<sup>50</sup> Aiqama maaqa auqimaria ainaina geeqa kai auquafanausa maridaqa.

<sup>51</sup> Satefeenafa tamummaqara fasiqa ufa qimannimiseenoo niqidanoo qinau. Innee maaqoo suqimariasaa qini ufa iriaqa. Innee aamina fasiqa miqiraua mariafanoo ooni mariafanoo naaqoo auniraua sia Anutuna ufa irimariafanoo. Inneeqa nikeeku nikaaku ninaakusa miqiraua mariafanoo Anutuna maraquna fannoo inniki anirarimarifaqa inneeqa qaoo qimariasaa mariafanoo.

<sup>52</sup> Inni nikeeku naaku sia moodaa tamummaqara fasiqa sia mandaikamannimaqanau. Aiqama mandaikamannimaqee mariqau. Ooqai Anutuna andeeqara ainainira faiqi Yisunara kooroo imaru tamummaqara fasiqauqa faqa nári mariqau. Doo maqee faqa innee mina uqanna ueeqasee kuqa nári mariasaa mariafanoo.

<sup>53</sup> Innee Anutuna sandufa qangiroo asaukukinaana maree mariasaa sia minara irimariafanoo kaqirunna fimariafanoo.

*Faiqi firaasa Satefeenana ufa irisee oonisamu ariqau.*

<sup>54</sup> Miqi qimasoo faqa faiqi suqimarusa mina Satefeena ufa irufanoo minara nira naqeenoo nifai sandurinau.

<sup>55</sup> Anutuna naaquqara andeeqara maraquna Satefeena aaku funara oori uqeeraseenoo qafoo fanoo innaaruna rakeeufanoo Anutuna kaaqa qarana afaaqa areenarana akooqoo marufanoo qafanau. Yisufa Anutuna aaqa mina asauku uqannai kiiqiqinoo marufanoo qafanau.

<sup>56</sup> Sateefeena qafaidanoo naaramaseenoo qinau. Innee qafaaqa innaaruna rakeemambifaqa faiqi nimaaku Anutuna aaqa asauku uqannai kiiqiqinoo marifaqa qafaidaqa.

<sup>57-58</sup> Misa miqoo marusa aiqamausa mina iriseeqa irianoo qimasee firaakari faaqa rumaseeqa nisauku naaqoo aamara upeekaseeqa aiqamausa findimeeqee sandeeqa Sateefeena qumareeqa rarisammareeqa mina rafusu qumaree aqoosai aqiqau. Aqoosai aquseeqa faasai kootaki Sateefeena unna qimarusa misa kai oonisamu oonu qumaree ani qumaree ufaqa mi samuna mina arimariqau. Misa nari siuta qamunna nisauku rakisi qumaraandoo qimaseeqa raipaqueegee moo kumaaraa Sauroona aikusaa aqusee Sateefeena arimariqau.

<sup>59</sup> Misa oonisamu arimarufanoo Sateefeena karaambaiqara innaaru qimasee faaqa ridanoo qinau. Oo Karaambaiqa Yisufa qinee kuquanana anee qini qimana qumareeqee aneenna marianannai quqaa.

<sup>60</sup> Miqi qimaseenoo Sateefeena aqoorisaa oorindari kummaramafufanoo firaakari faaqa quqeenoo qinau. Oo karaambaiqa misa mandainaina qimiana sia misaki mi numoofa mariani, anee aunusaa. Doo miqi qidanoo kuqinau. Sauroofa misa qamunnasaa qummuarifoora rakisidanoo Sateefeena arunara eedoo qimasee marinau.

## 8

### *Sauroofa Yisuna ufa qimarusa narinoo ninau.*

<sup>1</sup> Mi faasaana kai oosana araseenoo Yeerusaree maqusaki amaanasaa rakisimarusu uriqararusa Yisuna ufa irimarusaki narunnifaqaairana uqeraqau. Yisuna afaaqasaa aqoondiuga qisaukuqara taikasee qikunni ooqu qaara mararusara niqiqoo fasiqausee qimariqau. Miqimandee fasiqa Yeerusareenni kaqi mariqau. Kaiqeesa moomoosa rufiasee miqooqari daraaniqau. Akaqausa Yudeeaa maqa maaqai fiqa akaqausa Samaria maqa maaqai sandaqau.

<sup>2</sup> Anutunara irimarusu andeeqararusa akaqausa Sateefeena iri ani mareeqa munu akundamaseeqa firaqoo uqanna ikiraqaseeqa soofari mariqau.

<sup>3</sup> Miqooqari Sauroofa oosana areenoo Yisuna ufa taikaani fee qimaseenoo Yisuna ufa irimarusu narirara aanoommasee manda ufa qidanoo rairai qimarinau. Miqidanoo maqusasaa oorureenoo aiqama maaqakiaqa keeqafidanoo Yisuna ufasaara nariraramasaidanoo nisauku qumaraidanoo maqamau rarisaidanoo munu karafusa maaqaki quqemarinau. Sia faiqi kai anaasee faqa qumaree rarisameeqaidanoo karafusa maqaki quqemarinau.

### *Firipifa Samaria maqa maaqaki Yisuna ufa qimannimimarinau.*

<sup>4</sup> Miqufaqa Yisuna ufa irimarusu mina irisee miqooqari quqasee moo maqusa moo maqusa daraaniqa mariqau. Miqunnai fidaqa Yisuna au-fakiana qimannimimariqau.

<sup>5</sup> Firipifa Yeerusaree maqusaindari sandoonaindari aanaamuru maqannaasaki ooqu finoo Samaria maqannaasa firaq maqusai ooqureenoo Anutuna asauku mundira fasiqara Yisunara qimanniminu.

<sup>6</sup> Samaria maqannaasa moomoosa Firipina ufa andeeqasee iriqau. Mifa moo ainaina faiqi dadaaqimari ainaina auqamasoofaqa mina qafamaseeqa amiqimmasee mina ufa irimariqau.



<sup>7</sup> Firipifa qufanoo afaannauqa faiqí naunduraki marusauqa faagaru-masee rafudamaki sandee mariqau. Kaqi niku nisauku uqiranauqa faqa ariruti marusa faqa andeeqannisee marinau.

<sup>8</sup> Miqimmasoofaqa Samaria maqannaasa firaqoo اساسimariqau.

<sup>9-10</sup> Mi maqusaanaana auqu moo Simoonaa amarafa mifa Samaria maqannaafa marinau. Mifa afunee ainaina faqaa fasiqa marinau. Moomoo aukuaana afuneennai narí maqannaasa uqannifiqasoofaqa misa mina qafamasoofanoo naaquqee marinau. Simoonafa miqimarunara nariara uriqararausee qimasoofaqa aiqama tia uqanna minara kuqaa irirana faqaa fee qimasee minara kaaqa rimariqau. Miqidaga mina maqannaasa minara Anutunaindaraa firaa afeekainainee qimariqau.

<sup>11</sup> Mifa kisaagasaa narí afuneennai narí maqanna unna qimasee qiman-nimisoofaqa kaaqa mina ufa irimariqau.

<sup>12</sup> Miqi marufanoo Firipifa qumureenoo Anutuna ququsara amiqira fasaasa ufa faqa Yisuna Anutuna asauku mundiranara qimannimufaqa faiqí anaasee iriseeqa kuqaa fee qimasee mina qumaraqau. Qumaroo fanoo nammari rumannimaqee marinau. Faiqí faqa anaasee faqa rumannimaqee marinau.

<sup>13</sup> Simoonafa narí faqa Yisunara iriseenoo kuqaa fee qimaseenoo nammari maranau. Nammari maraseenoo Simoonafa Firipina aaga maridanoo mina faqa oonuree aniree imarinau. Firipifa oosana oosana firaa ainaina faiqí sia auqaaqaa ira ainaina faiqí anaasee dadaaqimaria ainaina auqufanoo Simoonafa mina qafoo fanoo aaquqoo fanoo marinau.

<sup>14</sup> Yisuna afaagasaa aqoondiuga moo nuqu niqiqoo fasiqausa misa Yeerusaree maqusai maridaqa Samaria maqannaasara Anutuna ufara irida fee qimasee Peetooroona faqa Yoohaneena faqa niqiqamasoofaqa Yeerusaree maqusaindari Samaria maqannaasunnai ooqufiqau.

<sup>15</sup> Ooqureeqa Samaria maqanna Yisuna aufakiana fukasaa irimarusara innaaru qimariqau. Naaquqara andeeqara maraquna fannoo misa faqa naakuanifeera qimasee innaaru qimariqau.

<sup>16</sup> Samaria maqannaasa Karaambaiqa Yisuna auqusaa kai nammari maraseeqa sia naaquqara andeeqara maraquna maraqau. Minara naaquqara maraquna fannoo sia misaki marinau.

<sup>17</sup> Peetooroosa Yoohaneesa minara iriseeqa innaaru qimasee misa faiqí anaasee nikumu qumaree mapuku nimaqasoofanoo naaquqara andeeqara maraquna naakimarinau.

<sup>18-20</sup> Simoonafa afunee fasiqa fannoo miqanda oosana nindafamasee qinee faqa marasee miqianee qimaseenoo munnimma maraseenoo Peetooroosa Yoohaneesa nimianaqa naaquqara maraquna qimifaqa qeeqa maqanna miqimannisaanee qimasoofanoo Peetooroofa maaqi qimasee aqinoo qinau. Anee anee faqa aneenna munnimma namufaqa ida aqufua. Anee Anutuna kaqi nimira ainainara feefauru qiannanara minara aneenna munnimma namufaqa ida aqufua.

<sup>21</sup> Maasa funnaqoo anee sia maasa faqa moodaa runna fuananoo. Ani irirafa ani amuqusaki Anutufa qafaifanoo sia andeeqanoo maridanoo.

<sup>22</sup> Anee aneenna manda iriranaqari quandakinana Anutunara innaaru qinanoo maa ani maa manda irirana akiqara minnaisaani.

<sup>23</sup> Qinee ani aundurái oosana qafaidaqa tuka amaneera foora sukaqarafa maridanoo. Aninna mandainaina fannoo naaqanara foora ani rumbanoo maridanoo.

<sup>24</sup> Simoonafa mi ufana iriseenoo tautumaseenoo Peetooroosa Yoohaneesa minara qimannimino qinau. Oo innee qara amanee innee qara Anutunara

innaaru qifanoo sia mandainaina oosana oosana innee qiandee sia qinisaa kambiqaaani.

<sup>25</sup> Peetooroosa Yoohaneesa Karaambaiqa aufakiana qimannimiseenoo gumurandee Yeerusareenni kafaa ooru fiqau. Ooru fidaqara Samaria maqusa kaqikaa kaqikaa maqusakiaqa Yisuna amiqira fasaasa ufa qiman-nimimaree ooru fiqau.

*Firipifa Eetioopia maqannaa uriqararana Yisuna ufa qimaminau.*

<sup>26-27</sup> Anutuna qangiroo moo fannoo Firipina qimaminoo qinau. Anee doo deedaqia. Aana moo Yeerusaree maqusaindari aadana maqa maaqa aana fannoo qambaana fidanoo Kaasa maqusai ooqu fimari aana. Anee oonuree mi aannara randasee paquria. Doo uqeeraa qufanoo Firipifa mina iriseenoo deedaqi imaree doo miqoo finau. Firipifa fifufanoo mi aanna paqurimaseenoo Eetioopia maqusaindaraa fasiqa moo mi aannai fimarufanoo paqurinau. Mi Eetioopia maqusaanaa fasiqa dundugarirafa marinau. Nari maqannaa anaasee rakisirana uriqararana munnimma aina rakisimarufa uriqararafa marinau.

(Afaandama itirafa marinau. Ooqai uqanna anaasee rakisirausa uriqarar-  
rausa akaqausa nari ainaina dadaaqimarusa nifaandama itimariqau.  
Maqee sia mi oosanafa maridanoo. Ooqai uqanna marinau.)

<sup>28</sup> Eetioopia maqannaa anaasee rakisirana auqu Kandaseenammarifa marinau. Minasaa rakisimaru fasiqafa afaandama itirafa kaaqa Anutu-nara rimaru fasiqafa, mifa Yeerusaree maqusai nari qoosa rarisee maru karanaki Yeerusareenni ooru Anutunara innaaru qimaseenoo ooru ran-deenoo amaaqai qumimarufano Firipifa paqurinau.

<sup>29</sup> Naaquqara andeeqara maraquna fannoo Firipina qimaminoo qinau. Anee mina kara fimarigoo oonuraina qafaa. Eetioopia fasiqafa nari qoosa rarisee maru karanaki fidanoo ooqai tamummaqara fasiqa Eesaiaafa akara rumaqoona asaana rino fimarinau.

<sup>30</sup> Fimarufanoo Firipifa sandee oonureenoo mina kara asaukunnai qumareenoo mi karana uqirafa aakaariqara sandanoo fidanoo iriseenoo irammirinau. Oo maa fasiqa, anee asaana rimariannana oosana iridanee sia fee iridanee.

<sup>31</sup> Miqi qufanoo mi Eetioopia fasiqafa qinau. Moo fannoo kooroo inaqau irini siammiridaqa. Miqi qimasee Firipinara qini faqa uru ooqumariannee qimasoo fanoo Firipifa mina qoosa rarisee maru karanaki kaqi fimarufanoo akaramafufanoo mi fasiqana aqa ooqumarinau.

<sup>32</sup> Mi Eetioopia fasiqafa Eesaiaana maa akarana asaana rimarinau. Misa mina qumarēeqee sipsipa aandaura foora mareeqee ariranaki quqaqau.

Misa sipsipa aanaaqi asausi aukimarufanoo sia dudeepenoo faaqarimarifa maridanoo sipsipa aanaaqi qummaarumuara fooqaana ari maru-fanoo kai mumuqida marinau.

Anutuna sipsipa aanaaqi arimarufanoo mumuqida marinau. Sia moodaakari ufa qinoo faaqarinau.

<sup>33</sup> Misa firaqoo asaurirana amiqau. Mina andeeqara ufa siamma iriqau. Doo mifa nariara kuqufinau.

Mina anaiqi mina aiku asauku sia mariafa maridanoo sia minara ufa qifaranoo. Doo nari kai marufa doo kuqinau.

<sup>34-35</sup> Mi Eetioopia fasiqafa mi ufana asaana rumaseenoo Firipina iram-mirinau. Tamummaqara fasiqa fannoo kuqu ufana qimaruna nariaree qimarinau fee moonaree qimarinau fee, qinaqa iria qufanoo Firipifa

mi tamummaqara fasiqana ufasaa oosana araseenoo miqooqari finau. Miqooqari finoo Yisuna amiqira fasaasa ufa qimaminau.

<sup>36</sup> Doo miqi qida narí qimami narí qimami aatata ooqu fidanoo Firipina qimaminau. Doo maana nammari adeedi maridanoo. Amanee anee Yisuna auqusaa qini nammari keeqaqimaqeenaree. [ <sup>37</sup> Firipifa mi ufana iriseenoo qinau. Anee aneenna amugusa ookiqari Yisunara kuqaa anoonee qianaqa amana ani keeqamaqaanaura. Mi Eetioopia fasiqafa qinau. Qinee Anutuna asauku mundiranara Yisunara kuqaa Anutuna faiqiffee qidaqa. Anee kaqi keeqaqimaqaa.]

<sup>38</sup> Miqi qimasoofanoo qoosa rarisee maru karana daraiuaana qimamifanoo kara rafaafufusoofaqa Firipifa faqa mi Eetioopia fasiqafa uriqararafa faqa nammari qambaana ooqueenoo Firipifa mi fasiqana qumareeqeenoo nammari keeqamaqasaanau. Keeqamaqaseenoo asauku qumareenoo uqeerasanau.

<sup>39</sup> Miqanda nammariqari afainni uru akaramafufanoo Anutuna maraquna fannoo Firipina afigamaroofanoo sia miqoo mina faqa marinau. Mi eetioopia fasiqafa uriqararafa sia kafa Firipina qafanau, asasamandeenoo narí karaki akaramafufanoo doo amaaqa finau.

<sup>40</sup> Anutuna maraquna fannoo Firipina mareeqeenoo Asadooda maqusai munu quqasoofanoo miqooqari Yisuna amiqira fasaasa ufa qimanniminoo maqusa maqusa fifiufanoo Seesareea maqusai finau.

## 9

### *Sauroofa Damasakusa maqusai fimarufanoo kaaqa qarafa rafaafa finau.*

<sup>1</sup> Yisuna faiqi namu mina ufa qimannimiqa nimarufaqa minasaara Sauroofa firaqoo aanoo idanoo narirara rumbarara qidamarinau. Miqidanoo Sauroofa amaana maqasaa aanaiqikirausa misa uriqararana oonu qimanniminoo qinau.

<sup>2</sup> Anee papiqa akara rumaqiminaqa qinee Damasakusa maqusai ooruree Yuda maqanna ufa suqinnanaki keeqafi Yisuna aatata fimariasa paqurimasee sia faiqi kai faiqi faqa anaasee faqa rumbamaree Yeerusaree maqusai karafusaki muqu quqaanauree qimasoofanoo eedoo qimaseenoo mi eedoo qira papiqana akara rumaminau.

<sup>3</sup> Sauroofa Damasakusa maqusai mi papiqana uqirafa fidanoo narí sundia namufaqa fidanoo Damasakusa maqusa adeedi ramasoofanoo innaarunaindari kaaqa qarana amananda fannoo tautumma amaqaseenoo Sauroona fiqumafinau.

<sup>4</sup> Sauroofa kaaqa rufiaseenoo maqasaa aqufumafufanoo irufanoo innaarunaindaraa ufa moo qinau Sauroo Sauroo anee nanaree qini daridane.

<sup>5</sup> Miqi qufanoo Sauroofa maaqi qinau. Oo Karaambaiqa anee yafee maridane qufanoo maaqi qimasee qimaminau. Qinee Yisusa anee qini darimarianausa maridaqa.

<sup>6</sup> Doo maqasaaqari findifinana fua maqusaki ooru rainanoo miqoo moo fannoo maridanoo, mifa ani aanara aamua qinana fua.

<sup>7</sup> Sauroona faqa fusa sundiauqa Sauroofa maqasaa aqufufaqa qafamasee innaarunaindaraa ufa iriseeqa sia moo ainaina qafuofanoo naaquqoofaqa nimuqusamafufaqa sia ufa qiqau kaqi kasoomambiqau.

<sup>8</sup> Sauroofa maqasaaqari findifufanoo afu dimbafufanoo sia moo ainaina qafanau. Mina sundiauqa mina asauku qumaree rarisameeqee Damasakusa maqusai quqaqau.

<sup>9</sup> Sauroofa narí afu dimboonara faqa innaarunaindaraa ufa irunara faqa irufanoo aundura mandaikufanoo qaaramoo faasaana sia narana nanau sia nammari nanau sia afu maqanau.

<sup>10-11</sup> Damasakusa maqusai Yisuna ufa irimarufa moo fannoo marinau. Mina auqu Ananiasafa marinau. (Sia Yeerusaree maqanna Ananiasafau. Damasakusa maqusaindaraafa mina amarafa.) Mi fasannai qaina Ananiasana afunnaranau. Karaambaiqa fannoo mi qainnaki Ananiasana aarofanoo qin角度. Ananiasa qufanoo Ananiasafa qin角度 Oo Karaambaiqa maa qinee maridaqa qufanoo Karaambaiqa maaqi qimasee qimaminau. Ananiasa doo deedaqi fua. Anee andeeqara aatatee qimariana mi mau oonuree Yudasina maaqara randasee qafa. (Sia Yisuna ueeqoofau. Damasakusa maqusaindaraafa mina amarafa.) Mina maaqaki Tarasusa maqusaindaraafa Sauroofa maridanoo.

<sup>12</sup> Doo mifa qainamaseenoo maridanoo. Mifa ani Ananiasana qafeenoo maridanoo. Qainasaa qafaifana anee oonureenana mina akiaqasa asauku munduseenana mina afu maqarana amiananoo irisee innaaru qidanoo maridanoo.

<sup>13</sup> Ananiasafa mi ufana iriseenoo rufiaseenoo qin角度. Oo Karaambaiqa faiqi moomoosa mi fasiqanara qini qimaqimiafaqa iridaqa. Mifa Yeerusaree maqusai ani aiku asauku anufa irimariasana mandoosana maranoo nifa maridanoo.

<sup>14</sup> Mifa Yeerusaree amaana maaqa aanaiqikirausa misa uriqararana pa-piqa maramaree Damasakusa maqusai maasa aniara innaaru qimariasara rumbamaree Yeerusareenni ooqu fuanee qimasee urifa maridanoo.

<sup>15</sup> Karaambaiqa mina ufa iriseenoo Ananiasana qimaminoo qin角度. Sia anee minara rufiaa anee kaqi fua. Qinee mi fasiqanara rusandeesamumandee mareeqa. Mifa qini ainainira faiqi kamambi mariannoo. Mifa qini duqura qini daufakiana aanaamuru maqannaasa faqa narí karaambaiqauqa faqa Isaraee maqannaasa faqa qimanniminoo nuannoo.

<sup>16</sup> Qinee qeeqa oosana uqafiqaanaura. Qini ufasaara kasooqagee arirana faqa dinee faqa maraannoo.

<sup>17</sup> Ananiasafa mi ufana iriseenoo maaqa paqurimandee qafoofanoo Sauroofa minaki marufanoo keeqafin角度 asauku mina akiasaa munduseenoo qin角度. Sauroo qini qikaqaafasaa Karaambaiqa Yisufa narí uqanna anee aanai uridana anee qafaananoo mifa kai qini qimaqimifaqa anee ianannai anidaqa. Afu kafaa maqaaneera faqa naaquqara andeeqara maraquna aniki qumbiqaaninnanara faqa diqiqaiifaqa anidaqa.

<sup>18</sup> Ananiasafa miqi qimasoofofanoo Sauroona afusaa ititanoo mariufa saqari apata fooqaafa rafoomakufanoo maqai aqufufanoo doo mina afu maqanau. Afu maqafufanoo nammarikee qammamaqanau.

<sup>19</sup> Keeqamma amaqaasoofanoo Sauroofa narana namaseenoo doo afaaqa amiqufanoo Yisuna faiqi namu faqa qaaramoo faasaana Damasakusa maqusai maridanoo misa dadaaqin角度.

<sup>20</sup> (Damasakusa maqusanaasa misa moo unna Anutunara qimarusa mariqau.) Yuda maqanna akaqausa mi maqusanaki faqa mariqau. Minaki maridaqa naaduma amaana maqa usakasee minaki keeqafi Mooseena sandufa asaana rumasaidaqa anoona Anutunara innaaru qidaqa Yisunara sia iriqau. Sauroofa findifin角度 andeeqaseenoo Yuda maqanna amaana maqaki keeqafin角度 Yisunara kuqaa Anutuna amaaku fee qin角度 naamuaq-ufaqa iriqau.

<sup>21</sup> Irisoofanoo naaquqoofaqa qiqau. Maa fasiqafa Yeerusaree maqusaki Yisuna aiku asauku narinoonufa maridanoo, miqooqari aanaiqikirausa uriqararana papiqa akara rumasoofanoo mareenoo maasa maqusai urufa Yisuna ufa irimarusa rumbamaree Yeerusareenni muqu quqaannee qufa maa mi fasiqafa ani maridanoo Yisuna ufara uqeeraanauree qidaqinoo. Misa Sauroonara naqaa fee fanoo fee qaara iriranamau fidaqinoo qimasee misa mi ufana qiqau.

<sup>22</sup> Sauroofa faasaambaasaana andeeqaseenoo faiqí anaasee Yisunara qimannimidanoo narí irirana faqa maqee maqee firaanaikinau. Mifa Yisufa kuqaa Anutuna asauku mundirafa maridanoo fee qimaseenoo quandakinoo ooqeenaa tamummaqara fasiqauqa akarakinaana amiqimasee akooqoo kooroomasee uqannifiqoofaqa qafeeqa misa irirafa dapikufaqa misa qaara iriranamau fiqau.

<sup>23</sup> Sauroofa moomoo faasaana Yisuna ufa qimannimimarufaqa Yuda maqanna miqoo Damasakusa maqusanaasa misa Yisuna ufara nikooqeemarufaqa aanoomasee moodaanaki suqufiqa Sauroona arira ufa qiqau.

<sup>24</sup> Damasakusa maqusa ooni faandaamura firaafa ititanoo marinau. Kooqiki kai fimariqau. Yuda maqannaasa Sauroonara kooqiki rakisimariqau. Eendaki faqa faasaana faqa rakisimarufanoo miqoo oonuraina qumarasee aruanauree qidaqa rakisimariqau. Moo fannoo Sauroona aqoondi misa ufa irinoo Sauroona kooroo qimasee qimaminau.

(Mi maqusanasaa faandaamura fiqú fiqúinoo marufaqa mi faandaamurana afuqaindari maaqa mi faandaamuranasaa ruisaida usakee mariqau. Sauroona aqoondi maaqa faqa minaki marufanoo mi maqafa faandaamura atisaa kaqikaqoo ruqianoo marinau. Faiqí minaki keeqarana amana marinau. Aqoosaindari sia amana anifara. Afuqaindari amana fifara.)

<sup>25</sup> Sauroona aqoondiuga mina ufa irimarusa eendaki qumee Sauroona mareeqeeqa faandaamura afuqaki maru maqanakiqari meerai mi ruqiaranakiqari firaa afeeka uqaki rumaseeqa mi aamaranaki ruqieeqee maaminni quqaseeqa sanda quiqa quiqa ufanoo ooqufiufanoo maqasaa ooqureenoo uqeekekufanoo quqasee Yeerusareenni sandee fidanoo faiqanoo oorufiufanoo ooruranau.

*Sauroofa Yeerusaree maqusai ooru finau.*

<sup>26</sup> Yeerusareenni oorureenoo Yisuna aiku asauku marunaki oonu keeqafufanoo dadaaqineerufaqa misa mina qafeeqa maasa darimari fee qimasee rufiasee daraaniqau. Mifa Yisuna ufara doo irida fee qufaqa misa minara unna qimaseenoo maasa qumaraandoo qimasee rufiasee sandaqau.

<sup>27</sup> Baranabasifa anireenoo Sauroona dadaaqinoo aniqumareeqeenoo Yisuna afaaqasaa aqoondiuga niqiqoo fasiqausee qimarusaki quqanau. Baranabasifa Sauroonara aanai ooru fimarufanoo karaambaiqa Yisufa mina afusaa kooroo inoo qu ufana faqa qimanniminau. Sauroofa Damasakusa maqusaki Yisuna aufakiana afeekaikamandee andeeqasee qimannimuna minara faqa qimannimisoofaqa kuqaa fee qiqau.

<sup>28</sup> Miqooqari Sauroofa Yisuna faiqí namu faqa Yeerusaree maqusai marinau. Miqoo maridanoo paasoosamandeenoo Karaambaiqa aufakiana misaqa marusa qimanniminoo ninau.

<sup>29</sup> Kirisa maqannaasa ufa qimaru Yuda maqannaasa Mooseena sandufa qimarusu irirana faqaasa Yeerusareenni animarufanoo Sauroofa Yisunara misasaimbaqa narí qimami narí qimami qidaqa afeekaikimariqau.

<sup>30</sup> Miqidaqa misa aanoomasee Sauroona arirarufaqa Yisuna faiqi namu mina iriseeqa Sauroona mareeqee Seesareea maqusai quqasoofanoo doo miqooqari nariara Tarasusa maqusai nari maqusai finau.

<sup>31</sup> Doo miqooqari Yisuna ufa irimarusa Yudeeaa maqa maaqaki marusa faqa Kariree maqa maaqaki marusa faqa Samaria maqa maaqaki marusa faqa asoaranaki mariqau. Faiqi anaasee moomoosa Yisuna ufara eedooqimasee minasaa atooaqau. Anutuna naaquqara andeeqara maraqauna fannoo dadaaqunara misa nimana mapukinau. Misa aiqamausa Karaambaiqara naaquqoofaqa mina ufamau fimariqau.

*Peetooroofa Rida maqusaindaraa fasiqa aiku mandaikirana andeeqaisanau.*

<sup>32</sup> Mi aukuanna Peetooroofa aiqama atinnai Anutuna faiqi namu marusa fiq fiq nindafee marinau. Moo kari Rida maqusai Yisuna faiqi namu nindafarara ooqufinau.

<sup>33</sup> Miqoo faiqi moo auqu Aeeniasafa aiku asauku kaqi uqirafa doo miqoo naaruara faikaisee marufa marinau. Qisauku dinni taikasee dinni ani qaaramoo marasee aukuanana marinau.

<sup>34</sup> Peetooroofa mi fasiqana qafamaseenoo qimaminoo qinau. Aeeniasa Yisufa asauku mundirafa ani amiqimaisaidanoo. Doo anee findifinana qaari raqandaia. Miqi qimasoofanoo Aeeniasafa findifinoo qaari raqandaainau.

<sup>35</sup> Rida maqusanaasa faqa Saroona maqusanaasa faqa aiqamausa ani mina uqufufaqa qafamasee Oo qimasee quandaki Karaambaiqasaa kai atooqafiqau.

<sup>36</sup> Moo maqusa auqu Yoopa mi maqusafa Rida maqusa aaga maridanoo. Yoopa maqusai anaasee moo mina auqu Tabitaa nammarifa maridanoo. Yisuna ufa irimarufa marinau. Kirisa ufakiqari mi anaaseena auqu Doorakasa nammarifa marinau. Mi auquna oosana aandau fee qimariqau. Mi anaaseefa kaaqa kudi fasiqa anaasee afaarida nimimarufa aiqama kari maqee maqee misa nimimarufa marinau.

<sup>37</sup> Miqimarufa maridanoo aurirana marasee kuqinau. (Misa maaqaki tida moo maqasaa marinau kafa tida moo sandaaqai afeekaikirafa marufanoo minasaa faiqee mariqau. Ooninnai irirasu auquqoonasaa akaramafufaqa sandaaqai tida afeeka auquqoonnai ooru fiqau.) Tabitaa nammarifa kuqufufaqa aanaaseeuqa mina iri marasee nammari rumamaqasee sandaaqai tidasaa quqasee kasooqagee akundararee qimasee quqaqau.

<sup>38</sup> Yoopa maqusa faqa Rida maqusa faqa naraaqa naraaqa adeedi mariqau. Yoopa maqanna Yisuna aiku asauku Peetooroofa Rida maqusai qumumarufaqa iriseeqa qaara fasiqa niqiqoofaqa qiqau. Oo Peetooroo maasa unnanai kaqi kaqi qumua.

<sup>39</sup> Peetooroofa eedoo qimasee deedaqamamaree miqanda faqa ooqu finau. Yoopa maqusai ooquroofaqa mina afigee maaqaki mirinni sandaaqa tidasaa muruquqasoofanoo nindafamaseenoo adeedaana anaasee moomoosa ikiraqeeusa findufufaqa Peetooroona uqusee mi anaaseefa auqu nimu siutana faqa asausi faqaa siuta faqa auqu nimuna Peetooroona uqafiqaida ikiraqee mariqau.

<sup>40</sup> Peetooroofa mina iriiseenoo aiqama sufafaqa aqusoofaqa madaanai ooqufiqau. Ooqufufanoo Peetooroofa tidasaa aqoorisaunara fufanoo Anutunara innaaru qinau. Innaaru qiqiseenoo Tabitaa nammarina iri marutinai quandafinoo qinau. Tabitaa nammari doo anee findifua. Miqi

qimaseenoo Tabitaafa afu maqaseenoo Peetooroona qafamaseenoo rutaqinoo findifinau.

<sup>41</sup> Peetooroofa mina asaku qumareenoo dadaaƙi findifumasanau. Findifumasooƞano Peetooroofa Yisuna ufa irimarusa faqa adeedaana anaaseeuqa faqa naaramasee uqannifiqanau.

<sup>42</sup> Doorakasa nammarina findifumasoo ufana Yoopa maqusai aiqamai daraanufaqa iriqa moomoosa karaambaiqara kuqaa fee qimasee minasaa mundiqau.

<sup>43</sup> Peetooroofa moomoo faasaana Yoopa maqusai marinau. Peetooroona moo auqu Simoonafa marinau. Mifa Yoopa maqusai moo fasiqa nari amarana Simoona mina faqa marinau. Simoonafa sipsipa burimakau mimmi minamusa narusaidanoo nipata asukusaidanoo aurumma afeekaikamasaidanoo nimisaidanoo feefauru maree marinau.

## 10

### *Kooraneeriusafa qainamasee Peetooroonara qufaqa afiqaqau.*

<sup>1</sup> Mi aukuanna mi fasannai Seesareea maqusai faiqi moo uriqararafa mina auqu Kooraneeriusafa marinau. Mifa Roomma maqanna amini kiateenna marinau. Nari faqa nari sundiauqa faqa Itari maqanna sundia fee qimariqau.

<sup>2</sup> Kooraneeriusafa kaaqa Anutunara rimaru fasiqafa marinau nari faqa nari faiqi anaasee faqa Anutunara innaaru qimarusa mariqau. Mifa Yuda maqanna kudi fasiqauqa maqee maqee dadaaqidanoo narana ainaina nimirufafa marinau.

<sup>3-4</sup> Moo faasaana mariufanoo eenoofanoo Kooraneeriusana afu kai pisipasamandoofanoo Anutuna qangiroo moo amiqimandee qafanau. Qangiroo mifa maaqaki anireenoo auquramasee aaranau Kooraneeriusa qufanoo tautumandeenoo rufiaseenoo mina kai tataqafinoo qinai. Oo qini uriqararafa nanaree randaidanee. Qangiroo mina iriseenoo maaqi qimasee qimaminai. Anutufa ani innaaruqirana faqa anee kudi fasiqauqara qimudao qimariannanara faqa qafaidanoo iridanoo aniara aididanoo.

<sup>5-6</sup> Kooraneeriusa anee faiqi akaqausa niqiqainaqa Yoopa maqusai ooqu fuaqa faiqi moo ooqu afiqa. Mina auqu Simoona moo auqu Peetooroofa ooruku nammari afaiqaannai faiqi moo aandau apata aurimari fasiqana nari amarana Simoona faqa maridanoo.

<sup>7-8</sup> Qangiroo fannoo miqi qimasee qimamisee doo finai. Doo fufanoo Kooraneeriusafa mina ufamau finoo nari maaqai ainainimaru faiqiqanda faqa nari sundia moo faqa Anutuna ufa irimaruna nari ureeqarana naaramasee qangiroo qu ufana qimannimiseenoo Yoopa maqusai niqiqoofaqa Peetooroona afiqarara ooqu fiqau.

(Miqooqaraasa maaqa usakasaidaqa maaqa tida aaku aakummasee qaaramoo tida marinai. Maqasaa moo tida marinai, mina maariqoo moo tida marinai. Meeraqoo maaqa ataufakaaqa moo tida annuara maqi auquqoonasaa ooqumarifi asooarana faqa suara faqa mareemarufa marinai.)

<sup>9</sup> Kooraneeriusana sundia faqa ainainira faiqiqara faqa Yoopa maqusai fidaqa aanai fi faiqee fimarufanoo suani qambaanaikinai. Mikari Peetooroofa suani qambaana maaqa ataufakaaqa innaaru qianee qimasee oorufinai.

<sup>10</sup> Peetooroofa innaaru qimarufanoo aararofanoo misa narana suqee marufanoo afu pisipasamandoofanoo moo ainaina qafanai.

11-12 Innaaruna rakeemambufanoo seera firaana dinni dinni sanda qusuqoona mi seeranaki aandau sakani ufini oosana oosana minaki uqarumaseenoo innaarunaindari mi seera sandana quqa quqaufanoo.

13-14 Peetooroona aaqa qumuroofanoo innaarunaindaraa ufa moo maaqi qinoo qimaminau, Peetooroo findifina maa seeranakinaa aandausa narusee naa, qufanoo Peetooroofa qafamaseenoo qinau. Oo Karaambaiqa akasaa. Maasa Yuda maqannaasa sia neemaru ainainafa kai maridanoo. Sia anukarafauqa maridanoo. Sia qinee amana naanaura.

15 Miqi qimasoofanoo innaarunaindaraa ufa moo maaqi qimasee qimaminau. Anutufa anukamaqai ainainara sia sia anukara fee qia.

16 Maa ainainnara qaaramoo kari qufanoo sia irufanoo kafa qumu aiqama rarisameeqee innaarunai kafaannai quqanau.

17 Peetooroofa mi qainna oosanara randee marufanoo aundura mandaikinai. Randee marufanoo Kooraneeriusana faiqi namu Yoopa maqusai aniree Simoona maaqa paqurimasee kooqisaa aniree nammeera qiqau.

18-19 Simoona moo auqu Peetooroofa mai maridanoo fee qufanoo, Peetooroofa maaqa ataufakaaqa kaqi maridanoo qaina oosanara randeemarfanoo Anutuna maraquna fannoo qimaminau. Anee iria. Qaaramoo fasiqa aniara randaidaqa.

20 Anee findifi ooqi deedaqinana misa faqa fua. Sia oonumafi iria kaqi afaaqa quqasee fua. Qinee misa niqqaunaua ani afiqarara anidaqa.

21-22 Peetooroofa ooqueenoo qimanniminau. Innee qiniara randee mariasa maana misa maridaqa. Innee nanaree qiniara randaidee qufaqa misa qiqau, Roomma maqanna sundia kiateena maasa uriqararafa mina auqu Kooraneeriusafa maasa diqqaifaqa anidaqa. Mifa andeeqara fasiqa Anutuna amooqimarifa amiqira fasiqa maridanoo. Yuda maqannaasa aiqama kaaqa minara rimariafa maridanoo. Anutuna qangiroo moo fannoo aniara oonu afiqee narí maaqakiara anirainaqa ufa moo qimamianee qifaqa anidaqa.

23 Peetooroofa misa ufa iriseenoo mareeqee maaqaki quqasoofaqa faiqeenoo iqaqoofanoo Peetooroofa faqa Yoopa maqanna qaaramoo namu Yisuna ufa irimarusana Kooraneeriusana faiqi namu faqa fiqau.

24 Minamusa fifiufaqa aanai fifaiqee fifiufaqa Seesaree maqusa oonuraqau. Kooraneeriusafa narí atiuqa narí akaqaafasaa faqa narí maaqaki suqu quqasoofaqa maridaqa Peetooroona afeesimariqau.

25-26 Peetooroofa Kooraneeriusana kooqiki oonuree keeqararufanoo Kooraneeriusafa rafudamakufanoo mina aikuki qumi maree oorindari rumafinoo Anutufara maqi miqimaseenoo innaaru qiraree qufanoo Peetooroofa mina asauku qumaree uqeereenoo qinau, Doo findifua, qinee faqa sia Anutusa maridaqa faiqi faiqi maridaqa.

27 Peetooroofa Kooraneeriusana qimamidanoo maaqaki keeqanau. Keeqafi qafoofanoo faiqi anaasee aanaamuru moomoosa minaki mariqau. Minaki ooruree misa faqa maaqi qimasee qimanniminau.

28 Innee aiqamausa maasa Yuda maqannaasa oosana irimariafanoo. Maasa Yuda maqanna aanaamuru maaqaki sia uqanna keeqafi misa faqa aqoondiki mariasa. Maasa amaana ufa minara firaqoo qaoo qinoo maridanoo. Sia anukarausee qidaqa. Doo magee Anutufa qiniara sia moo aanaamuruara sia anukara fee qimasee rufiaa, kaqi aqoondi kiannee qidanoo.

29 Qinee mina ufa irisunnana anee qiniara aniannee qianaqa qinee sia inniara rufieeqa kaqi aniq. Anee nanaree qini daareenane.



<sup>30</sup> Kooraneeriusafa mina iriseenoo qinau. Innau qinee qeeqa maaqaki eeneemarufaqa innaaru qimariafananoo faiqí moo fannoo mina qamunna kaaqa areenara qamunna faqaafa qini qifusaa kikiqamambinoo qimaqiminu.

<sup>31</sup> Kooraneeriusa Anutufa ani innaaruqirana irinoo ani kudi fasiqauqa qimudao qimasee dadaaqimariannanara irinoo qafeenoo aniara aidi-danoo.

<sup>32</sup> Doo anee faiqí niqiqainaqa Yoopa maqusai fuaqa. Faiqí miqoo mina auqu uqanna Simoona moo auqu Peetooroofa maridanoo. Mifa narí amarana Simoona faqa aandau apata aurimari fasiqana faqa maridanoo, ooruku nammari afai qaannai mina maaqa maridanoo fee qinau.

<sup>33</sup> Qinee mi ufana iriseeqa aaqee uqanna aniara oonu afiqee aniaqee qiqa. Anee amiqimminana andeeqasee aniananoo. Doo maasa aiqama maa maqanaki ooqumarifi marunanoo doo Anutufa qiqaaidanoo. Karaambaiqa ani qimami ufana irianeera anidaqa.

*Peetooroofa Kooraneeriusana aiku asauku qimanniminu.*

<sup>34</sup> Kooraneeriusafa miqi qimasee Peetooroona qimamisoofanoo mifa maaqi qimasee misa qimanniminu. Doo qinee maqee maa ainainna oosnara iridaqa. Anutufa sia maasa Yuda maqannaasara kai aididanoo kuqaa aiqama maqannaasa amanamana kai iaqeeera aididanoo.

<sup>35</sup> Aiqausa Anutunara naaquqee marinaqa andeeqara oosana maraidaqa miqimarifandinausara qinindi fee qiannoo. Aiqa maqusanaasa amanamana kai iaqeeera qidanoo.

<sup>36</sup> Anutufa Isaraee maqanna amiqira fasaasa ufa asoora ufa asauku mundirana Yisunannai qimanniminu. Mifa aiqama maqanna Karaambaiqa.

<sup>37</sup> Yudeeaa maqa maaqai firaaqoo kambiqoo ainainara Yoohaneefa nammari nimimaru aukwana oosnaraseenoo kambiqanoo maridanoo. Kariree maqa maaqaki oosnaraseenoo miqooqari aiqama Yudeeaa maqa maaqakina fifaininu. Innee maaqoo mariasa minara Yisunara doo irimariafanoo.

<sup>38</sup> Anutufa narí naaquqara marauna Yisuna Nasaretee maqusaindaraanasa adiamaqasoofanoo Anutuna afeeka mareenoo aiqamai oonuree aniree inoo qimudao qinoo Sadannana auraarai mariusa qumareenoo aurimarusafaqa kaqi marusa faqa aiqausa idaaqamannisanu. Anutufa qumee mina faqa nidanoo dadaaqufanoo mi oosanna oosanna ainainna auqeeamarinu. Innee minara faqa doo irimariafanoo.

<sup>39</sup> Yuda maqanna maqusa faqa Yeerusaree maqusaki faqa Yisuna auqoo ainaina qinee faqa akaqausa faqa qifunnai qafaafanausa maridaqa. Misa mina mara maree pirimmannai aunirira saqarisaa ariqau.

<sup>40</sup> Qaaramoo faasaana aiqarooofanoo Anutufa kuqiranakinaana mina uqeeera findifinu. Findifinoo maasa qifusaa kooroomambinu.

<sup>41</sup> Sia aiqausa nifusaa kooroo inu. Anutufa maasa rusandeesamumandee maroosa maasa qifusaa kai kooroo inu. Anutufa kuqiranakiqari uqeerasoofaqa maasa mina faqa narana nammari naafanausa maridaqa.

<sup>42</sup> Mikamuqoo maaqi qimasee maasa naamuaqinoo qinau. Innee qiniara maana faiqí anaasee noori kandamasee qimannimiaqa. Anutufa qini Yisusara kaqi mariasa faqa kuqirausa faqa misa rainasee idaki fee innaarunai fee quqannisaanausee qinau. Minara faqa inni aiqausa maa maqee mariasa faqa qimannimidaqa.

<sup>43</sup> Peetooroofa mi ufana Kooraneeriusana aiku asauku qimannimiseenoo maaqi qinau. Anutuna tamummaqara fasiqausa aiqama Yisunara qidaqa akara rimariqau. Maaqi qimariqau. Aiqausa mina saqarikinausa Anutufa mina auqu afeekannai misa mandainaina numoo mininnisaannoo.

*Anutuna maraquna fannoo Kooraneeriusana aiku asauku naakinau.*

<sup>44</sup> Peetooroofa miqi qimarufanoo Anutuna naaquqara andeeqara maraquna fannoo innaarunaindari qumureenoo aiqausa Peetooroona ufa irimarusasaa rafaafu manimaqanau.

<sup>46</sup> Maraquna fannoo naakufufaqa dadaaqufaqa moo maqanna ufa sia irimaru ufausa qimariqau. Anutuna firaanaikiranara faqa firaqoo amooqimariqau.

<sup>45</sup> Yuda maqannaasa qaaramoonamu Peetooroona faqa Yoopa maqusaindari qumusa mi ainainna qafamaseeqa naaquqoofaqa qiqau. Oo Anutufa nari naaquqara maraquna aanaamuru faqa nimidanoo. Sia Yuda maqannaasa kai nimidanoo.

<sup>47</sup> Peetooroofa miquna nindafamaseenoo Yuda maqannaasa nari faqa anusa qimannimino qinau. Maa fasiqausa Anutuna naaquqara andeeqara maraquna doo mareea, maasa Yuda maqannaasa iafanandemmiifanoo. Yafasiqa fee moo fannoo nammari nimiranara qaoo qiannoo fee sia amana moo fannoo qaoo qiannoo. Doo nimia.

<sup>48</sup> Miqi qimasooafaqa Anutuna asauku mundirana Yisuna auqusa nammari maraqau. Miqimasoofanoo Kooraneeriusafa asacidanoo Peetooroonara kaqikaqoo marianne qufanoo eedoo qimaseenoo misa faqa qaaramoo faasaana marinau.

## 11

*Peetooroofa Kooraneeriusana qimamufanara nari aqoonausa Yeerusareenni ooru qimanniminau.*

(Isaraee maqannaasa aiqama Anutuna ufara maasaindi fee kai qimariqau. Anaamuru mariasara sia misaindi maridanoo fee qimariqau. Anaamuruara sia anukarafauqa marinara sia misa maaqaki keeqaa, sia misa narana naaqee qimariqau.)

<sup>1</sup> Yisufa niqiqoo fasiqausa Yeerusareenni marusa faqa Yisuna ufa irimarusu Yudeeaa maqa maaqai marusa faqa aanaamuru marusa misa faqa Anutuna ufa mareeaa maqi qiqau.

<sup>2</sup> Peetooroofa Seesareea maqusaindari Kooraneeriusana maqusaindari Yeerusareenni ooru fufaqa miqooqaraasa Yuda maqannaasa Yisuna ufa irimarusu Mooseena sandufara rimarusu misa aiqama Peetooroona aqidaqa qiqau.

<sup>3</sup> Anee aanaamuru maaqaki misa faqa mariaanafa misa faqa nee-neeanaafa animariananoo. Sia Yuda maqanna fainanduqirau faqa mariaananoo. Naqaa fee ifanee miqinane. Maasa Yuda maqannaasa sandufa rukieenana miqiananoo.

<sup>4</sup> Peetooroofa mina iriseenoo oosanaindari aiqama ainainara qimannimino qinau.

<sup>5-6</sup> Fira seera moo dinni atinai moo dinni atinai qaara faqa qaara faqa atinai sanda rumbanoo marufanoo innaarunaindari moo fannoo mi sandausa quaqee idanoo quqaqaa imarufanoo qini daaqa quqasoofaqa minakinaa ainaina amiqimasee qafaqafana.

7-9 Innaarunaindaraa ufa moo qimaqiminoo qinau. Peetooroo doo findifi arusee naa qufaqa qinee maaqi qiqa. Oo Karaambaiqa sia uqanna. Sia sia anukara aandau qinee moo neemariqia. Maqee maana sia naanau-ree qimasaunanoo innaarunaindaraafa qinoo, Anutufa maa ainainnara anukarafauqa maridanoo fee qimasaifana anee sia minara sia anukara fee qia.

10 Mi ainainnara qaaramoo kari qaoo qunanoo doo qumu rarisama innaarunai quqeenoo.

11 Miqi marunanoo kai Seesareea maqusaindari qaaramoo fasiqa niqiqaaasa aniree qinee marunna maqana kooqiki aniree qiniara randeeaa.

12 Anutuna maraquna fannoo qiniara kaqi rakeemasee misa faqa fuannee qinoo. Maa mariasa qikaqaafasaa qisauku dinni taikasee dinni ani moodaa marasee qini faqa Seesareea maqusai oogu fiqau. Maasa aiqama ooquree Kooraneeriusana maaqaki keeqaqau.

13 Keeqafufanoo Kooraneeriusafa Anutuna qangiroo qafoonara maasa qimaqiminou. Mi qangiroofa mina maaqaki kikiqamambi qimaminoo qinau. Kooraneeriusa anee faiqi akaqausa niqiqainaga Yoopa maqusai ooquree faiqi moo mina auqu uqanna Simoona moo auqu Peetooroo mina ooqu afiqee uruaqa.

14 Mifa urureenoo ufa qimannimisainaga anee faqa ani aiku asauku faqa innaaruna asumu marirana oosana irifaranoo fee qinau.

15 Mi qangiroofa fufanoo Kooraneeriusafa nari ainainira faiqiuqa aqiqoofaqa qini qifiqee Kooraneeriusana maaqaki quqaqisoofaqa qinee Peetooroosa ufa qimannimirara oosana arasaunanoo naaquqara andeeqara maraquna fannoo ooqai indaaruu maasa daakinoo mariufa maasa undee Kooraneeriusana maaqaki mariasa naakinou.

16 Miqi marufaqa qinee oonumafi iriseeqa Karaambaiqa maasa faqa maasaki maridanoo maasa qimaqiminoo qinau. Yoohaneefa nammariki keeqannimaqaidanoo kasooqaqee qinee maraqunaki keeqannimaqaanaua qufaqa iriafannana. Qinee mi ufana iriseeqa Kooraneeriusana maaqaki naakirana qafamaseeqa iriseeqa minara inni qimannimidaqa.

17 Maasa Yisuna asauku mundirana saqarikiafanoo Anutufa nari kaqi nimira ainaina nari naaquqara andeeqara maraquna maasa qiminou. Miqi kai masee Seesareea maqusai aanaamuru faqa kaqi niminoo. Qinee yausee maridee Anutunara qaoo qianauree. Sia amana.

18 Yeerusaree maqannaa Yisuna ufa irimarusa mi ufana iriseeqa doo ufa Peetooroona aqimaruna taikasee quandaki Anutunara asasidaqa qiqau. Oo Anutufa aanaamuru naundura quandarana faqa naaru naaru marirana faqa doo misa faqa niminoo. Sia maasa Yuda maqannaasaindi kaifau. Miqi qufanoo mi ufafa doo taikanau.

*Antiooka maqusaindaraasa Yisuna ufa irimarusa mi ufana.*

19 Mi ufa suqirana sia kambiqooqoo Sateefeenana arukari doo miqooqari Yisuna ufa irimarusa quqasee aanaamuru maqa maqa daraanimambiqau. Akaqausa Fooeenisia maqa maaqai fiqau. Akaqausa Antiooka maqusai fiqau. Akaqausa Sipurusa maqa maaqai fiqau. (Sipurusa ooruku nammari qambaana amuaqunamu maridanoo. Faiqi anaasee moomoo miqoo mariqau.) Miqimasee aanaamuru maqusa marufaqa Yuda maqanna misaki animarusa misakai Yisunara qimannimariqau.

<sup>20</sup> Akaqausa Sipurusa maqannaasa faqa Sireenee maqannaasa faqa Antiooka maqusai oonu maridaqa aanaamuru marusa asauku mundirana Yisuna amiqira fasaasa ufa aanaamuru qimannimimariqau.

<sup>21</sup> Karaambaiqa afeeka dadaaqunara Antiooka maqannaasa aanaamuru moomoosa uqanna Karaambaiqa ufara asasamasee iriqa aiqamausa minasaa kaimma atooqau.

<sup>22</sup> Antiooka maqanna ufa fannoo Yeerusareenni ooruroofaqa misa irisee Baranabasina aqifoofanoo Antiooka maqusai ooqu finau.

<sup>23</sup> Ooqureenoo niqafamaseenoo Anutufa mimaqusaanaasa dadaaqi-marunara ooqu niqafamaseenoo asasinoo qimannimidanoo qinau. Innee inneeqa nimuqusa ookiqari kuqaa karaambaiqasaa mundufuaqa naaru naaru miqookai noori runuseeqa fuaqa.

<sup>24</sup> Baranabasifa andeeqara fasiqa marinau. Naaquqara andeeqara maraquna minaki qumbiqarafa marufa. Yisunasaa kaaqa mundirafa marinau. Mi fasannai faiqi anaasee Antiooka maqusanaasa moomoo karaambaiqasaa atooqeemariqau.

<sup>25</sup> Baranabasifa Antiooka maqusaindari Tarasusa maqusai ooruree Sauroonara randarara finau.

<sup>26</sup> Paqurimaseenoo aqiweenoo Antiooka maqusai animaridaqara faiqi anaasee moomoo Anutuna fasaasa ufa qimannimimariqau. Moodaa aukwana miqoo maraqau. Antiooka maqannaasa miqooqari oosana araseeqa Yisuna ufa irimarusara fuka nuqu Kristiannee qimariqau. (Maasa ufakiqari asauku mundirana aiku asauku kamambiqa mariasee qimariqau.)

<sup>27</sup> Mi aukuanna Yeerusaree maqusaindari fuka tamummaqara fasiqauqa Antiooka maqusai ooqu fiqau.

<sup>28</sup> Miqoo maridaqa misakiqari moo fasiqa auqu Akabusafa findifinoo Anutuna maraqunannai maaqi qimasee qimanniminoo qinau. Kasooqagee aandaroo aiqama maqa maaqaki naruannoo. (Kasooqagee Karaudiusafa Roomma maqanna uriqarara kiapafa maru aukwana mi aandaroofa kambiqafinoo narinau.)

<sup>29-30</sup> Antiooka maqanna Yisuna aiku asauku nari niqoonausa Yudeeaa maqusai marusa aandaroo narunara dadaaqiaqeera qiqau. Aiqamausa nari nimana nimana kai munnimma qumaree Baranabasina faqa Sauroona faqa nimufaqa Yudeeaa maqa maaqai nimirara ooru fiqau.

## 12

### *Eeroodeefa Yameesana kuqaruseena Yoohaneena karabusaki quqanau.*

<sup>1</sup> Mi aukuannai mi fasannai Eeroodeefa Yudeeaa maqa maaqai faqa Kariree maqa maaqai faqa Peereea maqa maaqai faqa Samaria maqa maaqai faqa misa kiapafa firaafa Eeroodeefa maridanoo Yisuna ufa irimarusana narirana oosana arasee narimarinau.

<sup>2</sup> Eeroodeefa Yoohaneena afasaana Yameesana qumaree rumbaseenoo rakinoo nu paipanannai anuka ateeka aqinoo kuqammarinau. Yuda maqannaasa Yisuna ufara nikooqeemarusana miqunna qafamasee asasammiqau.

<sup>3</sup> Minara asasufanoo Eeroodeefa miqiaqoo fee qimasaida kafa miqianau-ree qimaseenoo Peetoorona faqa qumarararee qimarinau. Ooruku siai feemu qoomaqunaki Peetoorona maaqimasee qumaranau.

<sup>4</sup> Yameesana aruseenoo Eeroodeefa kafaa miqooqari ooruku siai feemu qoomaqunaki Peetooroona qumaraseenoo rumbeeqeenoo karafusa maqaki quqasoofaqa sundiauqa moomoo rakisimariqau. Qisaukuqara taikasee qiku dinni taikasee dinni ani moodaa marasee sundiauqa eendaki faqa faasaana faqa rakisimariqau. Ainnaaqarara qoomaqa taikafinaqa mina maariqoo aiqamausa nifusaa aruanauree qinau.

<sup>5</sup> Yisuna ufa irimarusa minara iriseeqa Anutunara maqee maqee firaqqoo Anutunara innaaru qimariqau. Peetooroona sia aruanifeera miqimariqau.

*Qangiroom eendaki qumureenoo Peetooroona karafusakinaana mareeqeenoo kaqinni quqanau.*

<sup>6</sup> Moo faasaana Eeroodeefa duna iqaqaranasaa faiqi nifusaa Peetooroona aqiqaseeqa faiqi nifusaa aruanauree qimasoofoo mi eendanakina Peetooroofa sandaandoo qimaseenoo firaq sainanda qaaraqandannai rumbaseenoo karabusa maqaki quqanau. Sundia qaaraqanda minasaa rakisimarufanoo Peetooroofa miqanda dinni dinni qambaana faiqanau. Moo fannoo Peetooroona dinni asauku namu faqa nari asauku namufaqa moo sainanda rumbanau. Kafaa dinni asauku namufaqa moo sundia asauku namufaqa moo sainandannai rumbanau. Akaqa sundiauqa kooqiki rakisimariqau.

<sup>7</sup> Mi eendana qambaana miqiqa marufanoo karafusa maaqaki qangiroom moo kikiqinoo marufannoo kaaqa qarafa firaafa qeemarufanoo qangiroom fannoo Peetooroona afaurinoo findifua qufanoo tautumma uqeera qafoofoo sainanda asaukuqarasaqarara sainanda nari kai idukuaki maqasaa aqufiqau.

<sup>8</sup> Aqufufanoo qimaminau, aneenna pikapa atukarasee aneenna aiku aanaamu upeekasee rumbasee aneenna asausi faqaa siuta afisumaree findifi doo qini faqa ania.

<sup>9</sup> Peetooroofa mina iriseenoo aiqama ainaina mifa undee undeemamaareenoo doo mina faqa maqasai raudanau. Peetooroofa qangiroom faqa fidanoo qainasaa miqidee qinau.

<sup>10</sup> Misa kooqi afaisaa rakisimaruqqoo qumureenoo quminnaaqareenoo doo miqoo madaana marusakiaqa qumureenoo doo miqoo firaq kooqi qainnannai ititara kooqiki madaana kooqiki qumuroofanoo narikai mi qainna kooqifa atuafufanoo miqanda maqasai raudamaki fiqau. Aatata ooqufidaqa kaqikaqqoo kisaqqasaa ooqufimarufanoo qangiroom fannoo mafi aisaseenoo tautumakinoo taikafufanoo Peetooroofa nariara kai kikiqinoo marinau.

<sup>11</sup> Doo nari kai kikiqinoo maridanoo nari aundurannai kai irinoo qinau. Doo qinee maqee oonumafi iridaqa sia qainau. Anutuna qangiroom fannoo qini mareeqee Eeroodeena asaukukinaana mareeqee karafusakinaana idukueeqeenoo madaana quqeenoo. Yuda maqannaasa qiniara kuqunifeera asasiaanakinaana mareeqee kaqinni quqaqiseenoo.

<sup>12-15</sup> Miqi qimaseenoo Peetooroofa nari marianinnanara iriseenoo Yooha-neena amarafa moo auqu Marakafa mina anoona Mariana amarana maaqai finau. Sia Yisuna anoofau mina anoona amarana mina maaqai finau. Yisuna ufa irimarusa moomoosa suqiqa marida Peetooroofa sia kuqunifeera innaaru qimarufanoo Peetooroofa madaana aniree asukunai kooqi arinau. Arimarufanoo ainaini maru manaqqafa mina auqu Roodanammarifa kooqi atuararee qimasee ooquroofanoo Peetooroofa faandaamura kooqiki aqoosaindari kooqi arinoo kooqi atuaanee qufanoo mi manaqqafa Peetooroona ufa kai iriseenoo firaqqoo asasamaseenoo sia

kooqi atuanau, kaqi quqasee sandeenoo faiqí marunnai sandee oorureenoo qimannimainau. Oo Peetooroofa madaanai kikiqinoo maridanoo fee qufaqa misa qiqau saa anee furufarida qira saa mifa karabusaki maridanoo.

Miqi qufanoo Rooda nammarifa asaidanoo kooripoo kooripoo qidanoo qimannimufaqa misa qiqau. Saa mina amana mina qangiroo maridanoo fee qiqau. (Ooqai mi kamuqoo Yuda maqannaasa nári faiqí anaasee faiqi namu mai marufanoo misa qangiroo innaarunaindaraasa rakisi nimaqee mariafaqee qimariqau.)

<sup>16</sup> Misa miqi qidaqa narí qimami narí qimami marufanoo Peetooroofa kaqi aqoosai maridanoo kooqi arimarinau. Miqidaqa qumu kooqi atuasee Peetooroona qafoofanoo kaaqa naaquqanau.

<sup>17</sup> Peetooroofa ururee asaukunna misa ufara qaoo qimaseenoo Anutufa narí karabusakinaana maroo ufana qimannimiseenoo moo Yameesana faqa narí aiku asauku Yisuna ufa irimarusa faqa qimannimiaqee qimasee uriqaree Eeroodeefa maaqoo paqurimasee daruandoo qimasee moosaa kukeeqarannai finau.

<sup>18</sup> Iqaqoofaqa kananaana Peetooroonasaa sundiauqa rakisiusa qafoofanoo sia marufaqa firaqoo tutuqida randee mariqau.

<sup>19</sup> Eeroodeefa minara iriseenoo randaqee qufaqa randaqanusia sia paquriqau. Eeroodeena aranaqoofanoo narí sundiauqa rakisiusa minara ireeseenoo aiqama misa naru taikanau. Miqooqari Eeroodeefa Yudeeaa maqa maaqaindari Seesareea maqusai ooqu marinau.

*Eeroodeefa kuqu ufana.*

<sup>20</sup> Tiree maqusanaasa faqa Sidoona maqusanaasa faqa mi maqusaqanda Eeroodeena ququsaki maridaqa Eeroodeena maqasaaqaraa narana marasaida neemariqau. Nári maqa mandaikunara miqi mariqau. Eeroodeefa mi maqusaqanda rairai qimannimaqee marufaqa misa naranara irisee maasa naranara fimarunna aana ititaandoo qimasee moodaanaki suqufufaqa Eeroodeena faqa asoora ufa qianee qimasee qumiqau. Ooqureeqa Eeroodeena maaqasaa rakisimaru fasiqana mina auqu Baratusa mina aqoondikamasee munnimmaina amisee anee maasara amiqira ufa kai ooquree qimami marinaqa maasa innaaqiana ooquree mina faqa ufa qianauree qimasee mina aanaaqiana ooqureeqa Eeroodeena faqa ufa qiqau.

<sup>21</sup> Ufa qu faasaana Eeroodeefa narí kiapausa qammunna amiqirana afisuseenoo amiqira siaqa kiapausaindi mina muqu quqasee minasaa marida ufa qimannimimarinau.

<sup>22</sup> Ufa qimannimisooafaqa mi maqusaanaaqanda fifau unna qidaqa amooqidaqa faaqa quqasaida qimariqau. Maa fasiqafa Eeroodeefa sia faiqí faiqifau moo anutufa maridanoo.

<sup>23</sup> Miqi qimarufanoo Anutuna qangiroo fannoo qumee Eeroodeena kuqammarusanau Eeroodeefa misa amooqira ufa irisee sia qaoo qimasee Anutuna amooqiaqee qira ufa sia qimannimuna akiaqara doo mina kuqammarinai. Mina aundurai qimi moomoo neeneesoofanoo kuqinai.

<sup>24</sup> Eeroodeefa kaqi maru aukuaana Yisuna ufa taikaanifee qimasaidanoo mina ufa irimariusa narinoo rumbeenoo imarinai. Anutuna ufa fannoo sia taikkeenoo sia kaqi maruqoo kai marinai. Firaqoo daraaninoo doo fifaininai.

<sup>25</sup> Baranabasifa faqa Sauroofa faqa Antiooka maqusanaasa Yisuna ufa irimarusa munnimma auqusoona muru Yeerusaree maqannaasa nimisee Yeerusaree maqusaindari kafa ururandee Antiooka maqusai kafa ooqu

fiqau. Miqanda moo kumaaraa qaara auqufaqaana moo auqu Yoohaneena amarafa moo auqu Maraka mi kumaaraana faqa afiqee Antiooka maqusai ooqu fiqau.

## 13

### *Baranabasisa Sauroosa Yisuna ufa qimannimirara niqiqoofaqa fiqau.*

<sup>1</sup> Antiooka maqusai Yisuna ufa irimarusaki Anutuna tamummaqara fasiqa akaqausa mariqau. Anutuna ufara qimannimirusa akaqausa mariqau. Misa nuqu Baranabasifa faqa Simeeonara dundugarira fee qimarufa faqa mariqau. Rukijsafa Sireenee maqusaindaraafa moo fannoo marinau. Manaenafa Eeroodeefa narí maaqaki firimarufa moo fannoo marinau. Sauroofa faqa marinau. <sup>2-3</sup> Mi namusa moodaanaki marufaqa maridaqa qusasaa narana minnisee naarara maridaqa Anutunara innaaru kai qida mariqau. Miqi marufanoo naaquqara andeeqara maraquna fannoo qimannimino qinau. Innee Baranabasina faqa Sauroona faqa mara quqasai naaduma quqasaifaqa miqanda naaduma qinee moo saika nimianauranoo qufaqa misa mi ufana irisee sia narana narai kaqi innaaru qimarigau. Innaaru qimasee Sauroona faqa Baranabasina faqa nisauku misasaa quqasee doo niqiqaqau.

### *Baranabasisa Sauroosa Sipurusa qafumaki fiqau.*

<sup>4</sup> Baranabasifa faqa Sauroofa faqa naaquqara maraquna fannoo niqiqoofaqa Seereusia maqusai ooquree sipaki akaramafufaqa Sipurusa maqa maaqai fiqau.

(Sipurusa maqannaasa aanaamuru naaduma ufa qimarusa mariqau. Yuda maqannaaka akaqausa misaki oonu mariqau. Baranabasifa mindaraa Yuda maqannaafa maridanoo narí maaqai finau.)

<sup>5</sup> Sipa fannoo Sipurusa maqusa moo auqu Saramisa maqusai munu quqasoofaqa miqanda sipakiqari maqasaa aqufufaqa Yuda maqannaaka miqoo marusa ufa suqira maqaki keeqafufaqa Anutuna fasaasa qira ufa miqoo Yuda maqannaasa qimannimimariqau. Mi kumaaraafa moo fannoo misa faqa fufa Yoohaneena amarafa moo auqu Marakafa mifa faqa dadaaqidanoo qimannimimarinau.

<sup>6</sup> Sipurusa maqa maaqa ooruku nammari fiqau fiqau inoo marufanoo firaa afuma marufaqa faiqi anaasee maqusa moomoo marinau. Sauroona faqa Baranabasi faqa, misa Saramisa maqusaindari maqamau fifufafa mi maqa maaqana dinni ati Paafosa mi maqusanai fiqau. Mi maqusanaki afunee fasiqa moo paquriqau Yuda maqannaafa marufa marinau. Mina auqu Barayisunee qimarigau. Mifa nariara tamummaqara fasiqa fee qimarufa unna qirafa marinau.

<sup>7-8</sup> Mi maqa maaqanaki maru kiapana auqu qaara auqu faqaafa marinau. Moo auqu Seerakiusafa moo auqu Paurusafa marufanoo uriqarara kiapafa marufanoo mi afunee fasiqafa mina aqoondi marinau. Mi kiapafa irirana faqaafa marufa mifa Baranabasina faqa Sauroona faqa naaramasee qinau. Aniree Anutuna ufa qifaqa iria qufanoo afunee fasiqa fannoo minasaa ititeemarinau. Kiapafa sia Yisunara irianifeera miqi marinau. Mi afunee fasiqana moo auqu Kirisa ufakiqari Eerimasa marinau.

<sup>9</sup> Sauroona moo auqu Pauroonee qimarigau. Pauroofa Eerimasana rafaqaqafirana qafamasoofanoo naaquqara maraquna fannoo aakufunanoo afunee fasiqa ooriki qafamaseenoo qimaminau.

<sup>10</sup> Anee Sadannana amaaku marianafa mariananoo anee aiqama ainaina andeeqara ainaina namuqaa marianafa mariananoo. Anee mandainaina nikaru qira ainaina aniki qumbiqanoo marifa mariananoo. Anee maqee maqee Anutuna kuqaa anoonufa qumareenana uiqaa iqammeeqeenana nimimarianna fasiqafa mariananoo.

<sup>11</sup> Doo maqee Anutuna asauku fannoo ani rafaafa fuannoo. Ani afuqara dimbafinana sia suani kaaqa qarana qafeennaranoo. Miqi qimasoofanoo afu aiqamaqara dimbanau asukuna arufufanoo miqoo miki makamminau. Yafee qini qisauku qumareenoo aana uqaqifiqaanoofee qinau.

<sup>12</sup> Kiapafa mi fasiqana afu dimbarana qafamaseenoo Karaambaiqa fasaasa ufa irisooofanoo aaquqoofanoo kuqaa anoona fee qimasee irinau.

*Baranabasisa Sauroosa Antiooka maqusa amarana maqusai fiqa Yisuna ufa qimannimiqau.*

<sup>13</sup> Pauroofa nari aqoonausa faqa Paatoosa maqusaindari maqamau ooruku nammari afainni oqureenoo sipaki akara mafufanoo nammari amuaqumau Pamafiria maqa maaqaki Peeraka maqusai mi sipanaki finau. Miqoo oonureenoo Yoohanee moo auqu Marakafa akooqoofanoo quqaseenoo Yeerusareenni anirandee kafa moo sipaki finau.

<sup>14</sup> Baranabasisa faqa Pauroosa faqa Peereeka maqusaindari Pisidia maqa maaqai moo Antiooka maru maqusai maqamau fiqau. Miqoo oonuree marikiqa Yuda maqanna misaki animarusa ufa suqira maqaki keeqafi ooqumariqau. Saririqasaa nari amaanasa keeqafi ooqu mariqau.

<sup>15</sup> Yuda maqanna amaana maqasaa rakisiraua Mooseena sandufa faqa tamummaqara fasiqauqa ufa faqa asaana rumaseeqa Baranabasina faqa Pauroona faqa qafamasee qimannimidaqa qiqau. Oo maasa qikaqaafasaa inneqara aamua qira ufa inniqaraki marinaqa faiqi anaasee qimannimi-faqa maasa iriaqa.

<sup>16</sup> Pauroofa findifinoo asaukunnai misa rafaafa finoo qinau. Doo qinee qimannimianaura. Miqi qimaseenoo findifi maaqi qimasee qimanniminau. Oo qini qiqoonausa Isaraee maqanna faqa aanaamuru mariasa faqa maa maqanaki Anutunara innaaru qimariasa qini ufa iriaqa.

<sup>17-18</sup> Isaraee maqannaasa Anutufa maasa qikeeku qikaaku rusandeesamu mandeenoo nari maqusa minnisee Isipa maqa maaqai oqureeqa faiqi asumu areeqa moomoosa kambiqaqau. Anutufa nari afeekannai nifiqeeqeenoo aadana maqasaa quqaseenoo qaara fasiqa niku nisauku taikasee aukuanasaa misa faiqi anaasee qummaara Anutuna arufanoo sia narinu, faiqiara maqi aakuseenoo rakisi nimaqemarinu.

<sup>19-20</sup> Miqooqari Kannaana maqa maaqaki marusa qisauku taikasee dinni ani qaara marasee maqannaasa naru taikaseenoo Isaraee maqanna mi maqana Anutufa nimisoofaqa 450 aukuaana kisaqasaa moomoo aukuaana minaki mariqau. Doo miqooqari faiqi anaasee rakisiaqeera Anutufa faiqi moomoo saika mafufaqa maridaqa rakisinnimaqee mariqau. Misa marikufanoo tamummaqara fasiqa Samueerafa kambiqanau. Siaasaiuqa fifu-faqa doo Samueeranasaa munu taikanau doo miqooqari tamummaqara fasiqauqa mariqau.

<sup>21</sup> Maasa qikeeku qikaaku moo karaambaiqaikamma sainaqa maasaki mariani fee qufanoo Anutufa Beesamina ati Sauroona amarana Kisana amaaku mina nimiru. Sauroona amarafa qaara fasiqa niku nisauku taikasee aukuaana rakisinnimaqee marinu.

<sup>22</sup> Anutufa mina mafi afeeqasee Dafidina karaambaiqaikinu. Karaambaiqaika maseenoo Anutufa maaqi qimasee Dafidinara qinau. Dafidifa



Yeeseena amaaku marifa qinee minara dididanoo. Mifa qini iriranamau fimarifa maridanoo naaru miqikai inoo qini iriramau fuannoo.

<sup>23</sup> Dafidina ati moo fannoo Yisuna Anutufa mareeqeenoo Isaraee maqanna asumu maree marianinnanara quqanau. Narí tamummaqara ufamau kai Yisuna quqanau.

<sup>24</sup> Yisufa aniree qimannimira aukwana adeedi roofanoo Yoohaneefa nammari nimimarufa aiqama Isaraee maqannaasa maaqi qimasee qimanniminau. Inneeqa mandainaina minnisee Anutunai ubeekamafiqa mina ufa irisee nammari marasee mariaqa.

<sup>25</sup> Yoohaneefa nammari nimimarufa mina saika aukwana taikaidanoo maaqi qimasee faiqi anaasee qimanniminau. Innee qiniara yafasiqanee fee qidaqee. Sia qinee innee afeesimaria fasiqausau maridau. Doo mifa qini qinaaqianna qusasaa aniraannoo. Mifa andeeqarafa mariannoo. Qinee mina ureeqarasa uqanna maridaqa, sia amana mina kaqikaqqoo dadaaqianaaura.

<sup>26</sup> Oo qini qiqaonasa Abarahaamana akeeku akaaku mariasa aanaa-murundari aniree innaaru qimariasa faqa Anutufa maasa qumaraaninna ufana qiqaqi quqeenoo.

<sup>27</sup> Yeerusaree maqusanaasa tamummaqara fasiqa ufa asaana rumasee sia mina oosana amiqimandee irisee Yisuna qafamasee sia maasa asumu qumaraaninna fee qimasee tamummaqara fasiqa ufamau Yisuna arirariqau.

<sup>28-29</sup> Misa mina arirufara randoosia Piratoofunnai afiqee munusoofanoo qufaqa ariqau. Aruseeqa tamummaqara fasiqa ufa undee undee kaimma taikaseeqa doo mina iri aunirira saqarisaa qaraana tatusee doo akundaqau.

<sup>30</sup> Qaaramoo suanisaa marinoo Anutufa mina kafa mara findifinau.

<sup>31</sup> Findifumasoo faqa faiqi anaasee moomoosa kaqi maru kamuqoora mina faqa Kariree maqa maaqaindari Yeerusareenni nidaqa qafamaqoosa findi funa qafamaseeqa mifa findifunara Isaraee maqanna qimannimidaqa kooroo idaqa.

<sup>32</sup> Maasa mi amiqira fasaasa ufana mai aniree inni qimannimirara anidaqa. Ooqai maasa qiikeeku qikaaku qima afeekaikamaqoona anoona kuqiranakinaana uqeera findi finannai maasa kooroomaqimino.

<sup>33</sup> Dafidina idi akara firaa kamu 2 Anutuna ufara maaqi qinau.

Anee qini qimaaku mariananoo

Maqee qinee ani akausaikidaqa.

<sup>34</sup> Kafa Anutufa Yisunara kuqiranakiqari findifuaninnanara faqa sia putaaianinnanara faqa maaqi qinau.

Qinee oosana oosana naaquqara amiqi amiqirana Dafidinasaa qima afeekaikamma qaafannana mina anisaa quqaanaura.

<sup>35</sup> Minara Anutufa kafa maaqi qidanoo.

Anee aneenna kaqa andeeqara fasiqa sia mina amaqi putaa irana amaqqeenaraano.

<sup>36</sup> Dafidifa narí maru aukwannai Anutuna ainainirafa marinoo doo kuqinau. Kuqufufaqa mina iri mareeqee narí akeeku akaaku marunaki akundaqau. Miqimasoo fanoo amaqi putaa inau.

<sup>37</sup> Moo fannoo kuqiranakinaana Anutufa mara findifumasainafa mina amaqi sia putaa iannoo. Dafidifa minara akara rumaqoofa maridanoo.

<sup>38-39</sup> Maa qini qikaqaafasaa Antiooka maqsai mariasa maa ufana amiqimandee iriaqa Innindi maridanoo. Inni numoo arirana minninnisarafa Yisufa maridanoo minara marifaqa maasa inni qimannimidaqa. Mooseena

sandufa sia faiqí anaasee amana nári mandainaina sandara foora rum-bannimaqaqoofa sia amana idukifaranoo. Aiqamatia Yisunara irirana rusiranannai kai minannai kai inni numoo akiaqa taikannisaannoo inni mandainaina sandara foora rumbarana idukunnisaannoo.

<sup>40</sup> Innee maqee amiqimandee rakisiaqa ooqai Anutuna tamummaqara fasiqa moo fannoo aaquqimannimaqaqoofa innisaa kambigaandoora. Mifa maaqi qimasee akara rumasee qinau.

<sup>41</sup> Innee iriaqa, inni kuqaa naruaninna ainainara qimannimiafaqa innee mafi uteeti qimasaidaqa amarau qimariasa. Mi ainainna inni nifusaa kambiqainaqa qafamasee tautumasee kuqifaranoo. Innee maria kamuqoo qinee moo ainaina firaa ainaina auqusaananoo moo fannoo minara qimanniminaqa innee minara unna fee qifaranoo.

(Pauroofa mi tamummaqara fasiqana ufannai aaquqimannimino qinau. Innee maqee ooqeenasa naana ramasee Anutuna ufara unna fee qifoora. Innee maqee aukwana Yisunara unna fee qifoora.)

<sup>42</sup> Pauroosa Baranabasisa Antiooka maqusai ufa suqira maqakiqari raudoofaqa faiqí anaasee maaqi qimasee qimannimiqa. Amanee innee qara kafaa oonurandee moo Saririqa kafaa aniree qimannimiaqa.

<sup>43-44</sup> Eedoo qimasee miqanda fufaqa Yuda maqanna faiqí anaasee moomoosa faqa aanaamuru Yuda maqanna amaana ufa irimarusaa misa faqa miqanda nifaqee fimariqa. Mi niqiqoo fasiqaqanda mi fasiqa anaaseesa fuki faaki qimasee qimannimiqa. Innee maqee maqee Anutuna kaqi nimiranaki mariaqee qimasee marikinoo moo Saririqasaa Yuda maqanna amaana maqaki keeqafufaqa mi maqusaanaasa aiqama Anutuna ufa iriraree qimasee keeqaqa.

<sup>45</sup> Yuda maqannaasa moomoo aanaamuru nindafamaseeqa misa naundururau kaukaataqirafa qumbiqafufaqa Pauroona ufa rukiaidaqa manda ufa sukufa kai qimariqa.

<sup>46</sup> Pauroosa Baranabasisa mina iriseeqa paasoosamandee ufa qimannimiqa. Anutufa narí ufara Yuda maqannaasa naaree qimannimiaqee qimaqoona doo inni qimannimiqaunaqa innee minara qaoo qimasee itite mariafanoo. Innee innee qara sia amana naaru naaru marirana maraanuree qidaqee miqidaqa itite mariafanoo. Innee miqianara inni minniseeqa quandaki aanaamuru qimannimiana.

<sup>47</sup> Karaambaiqa fannoo maasa maa ufana qimaqimifaqa mai anidaqa aanaamuru qimannimiana.

Qinee inni niqiqeeqa aanaamurukiaqa qoomaikiqee kaaqa qaranara qimannimia.

Aiqama aanaamuru maqa maaqaki mariasa innee misa innaarunai fimaria aannanara qimannimiaqee niqiqaidaqa.

<sup>48</sup> Miqoo aanaamuru marusa mi ufana iriseeqa asasammaseeqa karaambaiqa fasaasa ufara dufi dufi qidaqa amiqira ufa fee qimariqa. Misakina Anutufa rusandeesamumandoosa doo Yisuna saqarikiqa naaru mariranaki keeqaranara oosana araqa.

<sup>49</sup> Miqimasoo fanoo miqooqari misaqa dinni dinni marusakina doo karaambaiqa ufa fannoo daraninau.

<sup>50-51</sup> Yuda maqannaasa miquna qafamaseeqa aanoomaseeqa mi maqusanai faiqí firaasauqa faqa aanaamurukina Yuda maqanna amaana ufa irimaru anaasee uriqarararusa faqa nirana fundakusoofaqa Baranabasisa faqa Pauroona faqa mareeqee aqoosai aqusaqa. Aqusoofaqa miqanda

findifufaqa kookoomma afaqa qumareeqa misa ninaamu araseeqa quqasee Antiooka maqusaindari Ikooniumma maqusai fiqau.

<sup>52</sup> Miqanda fufaqa mi maqusaanaasa Antiooka maqusanaasa Yisuna ufa irimarusa naaquqara maraquna fannoo naakinoo qumbiqafufaqa asasi-mariqau.

## 14

### *Baranabasisa Sauroosa Ikooniumma maqusai fiqau.*

<sup>1</sup> Pauroosa Baranabasisa Ikooniumma maqusai oonuroofanoo Antiooka maqusai kambiqoo ainainafa mina amana kai Ikooniumma maqusai faqa kambiqanau. Miqanda Yuda maqannaama ana maqaki keeqaqau. Keeqafiqa amiqimasee qimannimunara Yuda maqannaasa faqa anaamuru marusa faqa moomoo uqanna Yisunasaa mundiqau.

<sup>2</sup> Yuda maqannaama akaqausa ufa rukiaseeqa anaamuru qimannimidaqa ueeqasoofaqa iriseeqa misa faqa Pauroosa Baranabasisa ufara manda ufa fee qimaseeqa ufa rukiaqau.

<sup>3</sup> Miqunara miqanda kisaaqasaa mi maqusanaki maridaqa paasosamandee karaambaiqa dadaaqunara afeeka nimufaqa faiqi sia auqaaqaa ira ainaina faiqi anaasee dadaaqi maru ainaina oosana oosana auqusoofaqa faiqi anaasee qafeeqa tautumasee qiqa. Oo kuqaa uqanna miqandakina karaambaiqa kaqi nimira ufa kuqaa anoona maridanoo fee qiqa.

<sup>4</sup> Mi maqusaanaasa qambaana rainaqau. Rainafiqa akaqafa Yuda maqannaasasaa atooqaaqau. Akaqafa niqiqoo fasiqausasaa atooqaaqau.

<sup>5-6</sup> Anaamuru ufa rukiee marusa faqa Yuda maqannaasa faqa nari faiqi firaa faqa moodaanaki suqufufaqa ufa qi qisee oonisamu Pauroosa Baranabasisa naruanee qufanoo moo fannoo aaquqimannimaqoofaqa miqanda mi ufana iriseeqa quqaseeqa rufiamareeqa Rikaoonia maqa maaqai sandaqau. Rikaoonia maqa maaqaki maqusauqa moomoo marufaqa qaara maqusa moodaaqoo maruqanda moo maqusa auqu Ristara, moo maqusa auqu Deerabee marufaqa doo miqanda Ristara maqusai naaree fiqau.

<sup>7</sup> Miqoo oonu maridaqa Ristara maqusaki faqa Deerabee maqusaki faqa misaqa maru maqusausakiaqa faqa amiqira fasaasa ufa misa faqa qimannimimariqau.

<sup>8</sup> Ristara maqusaki faiqi moo aiku mandaikirafa marinau. Maqookari mi kamuqooqari miqinoo marufa marinau, sia aana nufa.

<sup>9-10</sup> Mi fasiqafa Pauroona ufa kaaqa irimarufanoo Pauroofa oonurama qafanau. Qafamasee maaqi qimirinai. Maa fasiqana irirafa Yisunasaa rusinoo marifa amanaikirafa maridanoo amana findifuannoo qimaseenoo mi fasiqana oori qafamaseenoo firaa kari maaqi qimasee qimaminoo qinai. Anee findifua. Andeeqaseenana rutaqina findi fua. Miqi qufanoo mi fasiqafa rutaqi findifinoo doo maqusamau oonuree aniree inai.

<sup>11</sup> Faiqi anaasee mina qafamaseeqa faaqa fuisee qidaqa tutuqidaqa nari ufakiqari Rikaoonia ufakiqari maaqi qiqa. Anutuqanda faiqikamambi doo maasaki qumu maridaqa nidaqa, Yisufa niqiqoo fasiqaqandara Anutuqandee qiqa.

<sup>12</sup> Mi maqusaanaasa Anutufara maqi unnaqira anutuqanda nimana auquqoofa misaki mariqau. Moo fannoo ureeqarafa ufa akoofasa mina auqu Eerameesafa marinai. Mi maqusaanaasa aiku mandaikirafa findifirana qafamaseeqa Pauroosa Baranabasisara maasa anutuqanda qumu maridammia maqi qimasee Baranabasinara anee maasa uriqarara anutufa

ani auqu Seeusanee qiqau. Pauroonara anee ufa akoofasa maridana maasa ureeqara anutufa ani auqu Eerameesanee qiqau.

<sup>13-16</sup> Misa firaa Anutuna Seeusana amaana maqa mi maqusana naam-beeqai marinau. Mi amaana maqanasaa aanaiqikirafa Baranabasisa Pauroosa niqafamaseenoo tatufira aandau suqasee nimisee innaaru qi-aqee qimaseenoo burimakau akoonauqa rarisamammaree minisee mina anukaki kukuqamma quqasee rarisamammareeqa faandaamura kooqiki munusoofaqa faiqí anaasee aiqama suqusee aniroofanoo Baranabasisa Pauroosa misa tatufirana suqaqimidee qimasoofanoo nikooqoofanoo kakeenna qaoo qiqau. Kakeenna qaoo qufaqa sia irufaqa miqanda nári qamunna qumaree rakeemmaqusee faiqiki oonuree aniree faaqa quqasee qimannimiqa. Maaqanda faiqí faiqi maridaqa. Inni fooqaasa maridaqa, sia anutusa maridaqa. Maasa anoona Anutuna amiqira fasaasa ufa qimannimirara anidaqa. Innee maa maaqiana fifau dapi ainaina maridanoo mina minnisee quandakinaga kaqi marira Anutunara iriaqeera anidaqa. Mi kaqi marira Anutufa mifa kai innaaruna faqa maqa faqa ooruku nammari faqa minakimari ainaina oosana oosana faqa auqu quqanau. Ooqai mifa faiqí aanaaseera inneeqa manda iriramau kaqi fuaqee qimarinau.

<sup>17-18</sup> Mi kaqi marira Anutufa innaarunaindaraa aaku faqa narana oosana oosana narí aukuanasaa moo narana narí aukuanasaa moo narana nimimarifa maridanoo. Innee mina qafamaseeqa innee faqa maraseeqa minara kai asasimariafanoo. Mi ainainna miqimarianannai narí marina kooroomannimidanoo. Innee mina qafeeqa minara kai asasiaga. Faiqí anaasee mi ufana iriseeqa kaqikaaqoo indee indee qidaqa kafa kaqikaaqoo mara mara ridaqa tatufira aandau nimianeera qimariqa.

<sup>19</sup> Antiooka maqusa amarafa Pisidia maqa maaqaki moo Antiooka maqusa marinau. Mindaraa Yuda maqannaa akaqausa faqa Ikooniumma maqusaindari akaqausa faqa moodaanaki suqufufaqa Ristara maqusai oonureeqa miqooqaraasa faqa ufa qi qiseeqa Pauroona qumareeqa maqamau rarisaga fifufaqa faandaamura aqoosai aquseeqa oonisamu suqu qumaree misamuna Pauroona arimariqa.

<sup>20</sup> Doo kuqinoommifoo qimasee quqasee fufanoo Pauroofa Yisunara ufa qimannimimarufaqa Yisuna ufa irimarusa mina aaqa anifiq fiq mambufanoo Pauroofa narí kai misa qambaana findifinoo doo quqasee maqusai kafa keeqanau. Iqaqoofanoo kananaana Pauroosa Baranabasisa findimaqee Deerabeera maqusai fiqau.

*Baranabasisa Sauroosa oonurandeeqara Antiooka maqusa uqannai aniqau.*

<sup>21</sup> Miqoo Deerabeera maqusai oonu maridanoo amiqira fasaasa ufa qimannimi marufaqa moomoosa Yisuna aiku asauku kamambiqau. Deerabeera maqusaindari Pauroosa Baranabasisa oonurandee aniree kafa Ristara maqusai oonisamu aru maqusana kafa ani kaqikaaqoo marikiqa quqasee Ikooniumma maqusai kafa ooqu fiqau. Miqoo faqa kaqikaaqoo mariqa quqasee Pisidia maqa maaqaki moo Antiooka maqusai kafa fiqau.

<sup>22</sup> Mi maqusausakiaqa nidaqa Yisuna ufa irimarusa fuki faaki qimaseeqa qiqau. Innee Yisuna ufasaa mundufiqa kuqaa anoonaikiaqa. Maasa aiqama moomoo mandainainaki maraqa kadaapiriqa fifi iqa Anutuna ququsaki keeqaanauree qidaqa. Minara innee faqa sia minnisaaqa kaqikai fuaqa.

<sup>23</sup> Aiqa maqusakiaqa nidaqa Pauroosa Baranabasisa Yisuna ufa irimariasakinaana qumareeqaida rakisirausaiki mariqa. Quqasaida narana

minnisee innaarukai qiaqee qimasaida maqee nariqa fukasaa karaambaiqasaa irirana rusimariasara misara rakisiaqee qimasee quqaqau.

<sup>24</sup> Pauroosa Baranabasisa Pisidia maqa maaqaki oonuree aniree maseeqa Pamafiria maqa maaqai kafaa anirandee fiqau.

<sup>25</sup> Miqoo miqanda Peeraka maqusai Yisuna fasaasa ufa qimannimiseeqa ooruku nammarrinni Ataria maqusai ooqu fiqau.

<sup>26</sup> Ataria maqusaindari sipaki akaramafufaqa Antiooka maqusai kafaa fiqau. Ooqai indaaruu Antiooka maqusai oosana araqau. Miqoo Yisuna aiku asauku miqanda raineeqee Anutuna asaukuki quqasoofaqa Innee-qara karaambaiqa ufa maraqa nuaqee qimasoofofaqa mi saikana maraqa nimariqau.

<sup>27</sup> Baranabasisa Pauroosa Antiooka maqusai anireeqa Yisuna ufa iri marusa aiqama suqu quqaseenoo Anutufa miqandannai aiqama ainaina naamuaqinoo uqannifiqeenoo qimaseenoo Anutufa miqandannai aanaamuru kooqi atuasoofofaqa misa faqa Yisunara iridaqa.

<sup>28</sup> Miqi qimannimiseeqa miqoo Antiooka maqusai kisaagasaa mariqau.

## 15

*Pauroosa Baranabasisa Yeerusareenni ooruree Yisuna aiku asauku iram-mirirara ooruu fiqau.*

<sup>1</sup> Yudeeaa maqa maaqakinaasa Yisuna ufa irimarusa akaqausa Antiooka maqusai ooqureeqa Yisuna ufa irimarusara maaqi qimasee unna qidaqa naamua qiqau. Innee Yisuna ufamau kai fidaqa sia Mooseena sandamau fimariafanoo sia fainanduqirausa sia innaarunai asumu mareefaranoo fee qiqau.

<sup>2</sup> Pauroosa Baranabasisa mi Yudeea maqannaa fasiqausara qaoo qimasee mi ufanara firaqoo ufa qi qisee ufa rainaqau. Miqi qimaseeqa misa moodaa ufa qimaseeqa qiqau Pauroosa Baranabasisa akaqausa maaqooqaraasa saimbaqa Yeerusareenni ooruu fuaqa. Oorureeqa Yisuna afaagasaa aqoondiuqa qimannimifaqa maa ufanara naqaa naqaa fee qifaqa oorurandee qumuree qifaqa iria.

<sup>3</sup> Antiooka maqusanaasa Yisuna ufa irimarusa misa niqiqamasoofofaqa Yeerusareenni ooruu fidaqa ooriqaree Foeenisia maqa maaqai faqa Samaria maqa maaqai faqa Pauroosa Baranabasisa nariqa niniunara faqa aanaamuru moomoosa quandaki Anutufinnai ubeekoonara faqa qimannimiqa fimariqau. Yisuna ufa irimarusa minara iriseeqa firaqoo asasiqau.

<sup>4</sup> Yeerusareenni minamusa ooruroofaqa Yisuna ufa irimarusa miqoo marusa faqa nári faiqí firaasa faqa Yisuna afaagasaa aqoondiuqa minamusa ooqu nifiqeeqee quqasoofaqa maridaqa Baranabasisa Pauroosa nári niniuna oosana oosana aamina maqannaa moomoosa Yisunasaa atooqeeuna mi fasaasausa qimannimimariqau.

<sup>5</sup> Farisai amaana ufa qimarusa akaqausa Yisuna ufa irisee mina aiku asauku faqa miqoo Yeerusareenni mariqau. Misa faqa Baranabasisa faqa Pauroona faqa ufa irisee findifiqa maaqi qiqau. Anaamuru mariasa Yisuna ufara eedoo qidaqa sia kaqi mariaqa maasa Yuda maqannaa fainanduquseeqa Mooseena sandamau fidaqa innaaruna aana mareefaranoo.

<sup>6</sup> Yisuna faiqi namu niqiqoo fasiqausa moomoosa misa faiqí firaasa faqa minara iriseeqa moodaanaki suqufufaqa ufa qimariqau.

<sup>7</sup> Kisaagasaa mi ufana qida mariqau. Miqi marufanoo nindafoosia Peetooroofa findifi maaqi qimasee qimannimino mi ufana rafaqaqafinau. Qini qikaqaafasaa Anutufa sia maasa kaifau, aanaamuru faqa amiqira

fasaasa ufa irisee eedoo qiaqee qimaseenoo innikinaana qini qumareenoo, anee oosana areenana aanaamuru qimannimia qufaqa miqimmiqiafana.

<sup>8</sup> Anutufa faiqí aiqama nimuqusa naundura irimarifa maridanoo. Mifa aanaamuruara faqa eedoo qimaseenoo naaquqara maraquna maasa undee miqikai inoo misa faqa niminau.

<sup>9</sup> Sia maasa faqa misa faqa raineenoofau qinau, amanamana kai fee qimasee misa mandainaina numoo nariqa Yisuna saqarikiranannai minin-nisanau.

<sup>10</sup> Anutufa miqimmaqaifaqa innee nanaree firaa qumaara mareeqee fifau misa nifaariki quqaidee. Mooseena sandufa qaaraikinoo maridanoo amiqirafa faqa ummaara nimarifa faqa marinara maasa qikeeku qikaaku maasa faqa qumaara tafirana sia amanaiki mariafanausa maridaqa.

<sup>11</sup> Innee sia miqiaqa. Maasa Yisuna saqarikamasoofanoo Karaambaiqa Yisufa narí afaariranannai maasa utaaqeenoo. Anaamuru miqi kai masaafanoo doo misa faqa miqikaimminoo utaaqamannimaqeenoo.

<sup>12</sup> Peetooroofa miqi qimasooafaqa aiqama daimambi irimarufanoo Baranabasisa Pauroosa nári niniunara oosana oosana qimannimufaqa iriqau. Miqanda aanaamurukiaqa nimarufanoo Anutufa miqandannai faiqí sia auqaaqaa ira ainaina auqusoofaqa faiqí anaasee qafoonara mi ufana miqoo Yeerusareenni suqimariasaa qimannimimariqau.

<sup>13</sup> Baranabasisa Pauroosa ufa taikasooofanoo Yameesafa findifinoo ufa moo qimanniminau. Oo qini qikaqaafasaa qini ufa iriaqa.

<sup>14</sup> Anutufa aanaamuruara amuqusufanoo misakinaana akaqausa mareeqeenoo nariara narindikiaqeera maranau. Mi ainainna oosanara Peetooroofa faasai maasa doo qimaqiminoo.

<sup>15</sup> Doo miqunaki ooqai tamummaqara fasiqa akara kooroo inau. Minara maaqi qimaqoona.

<sup>16</sup> Qinee kasooqagee kafaa qumuanaree qinau.

Qumureeqa Dafidina aiku asauku maaqa rapeeiara maqi inoo marifaqa kafaa qumuree usakaanaura.

Mina maqusa urisinoo marifaqa mina faqa rukianaaura.

<sup>17</sup> Miqianaqa maaqanna maaqanna karaambaiqara randaaqeera.

Aiqama maqannaasa naaraanausa qini ufara anifaranoo.

<sup>18</sup> Qinee karaambaiqa ooqai maa ufausa kooroo qiafanausa maridaqa.

<sup>19</sup> Yameesafa mi tamummaqara ufana qimannimiseenoo nariara qinau. Qinee maa ainainnara irunafa maaqimminoo maridanoo. Anaamuru mariasa moo maqannaasa quandaki Anutufinnai ubeekemariasaa sia kadaapi fifau ruanaura.

<sup>20</sup> Sia misa miqifaqa maasa akara kai rumeeqee misa nimianaaura. Akaqa ufa maa ufausa kai uqannifiqaanaura. Faiqí moo fannoo narana maraseenoo moo unnaqira Anutunara innaaru qimasee aminana miqira narana sia naaqa. Faiqí anaasee narí ummuari narí ummuarinnanara sia mina maraaqa. Aandau moo anukaki ataakirarana fidika kaqi maaqinaki marinnana siamma naaqa. Fidika kaqinni tati aqusee amaqi kai naaqa, fidika sia mina naaqa. Doo miqi kai qimasee qimannimiaqa.

<sup>21</sup> Aiqaama maaqanna maaqanna mariasa aiqama Saririqa Yuda maqanna amaana maqakina Mooseena sandufa ooqaindari aukuaana aukuaana aanaamuru asaana rumasaidaqa qimannimimariafaqa Mooseena sandufa oosana oosana amana irifaranoo. Maasa miqi kai iqa anoona ainaina kai qimannimianaaura.

*Yisufa niqiqoo fasiqausa pasa akara rummeeqee maqusa maqusa ni-maqanau.*

<sup>22</sup> Yisuna ufa irimarusa aiqama Yeerusaree maqusakinaasa Yisuna faiqi namu niqiqoosa faqa faiqí firaasa faqa Yameesana ufa irisee eedoo qimaseeqa qiqau. Maasa qeeqakina akaqausa suqumareeqa Baranabasina faqa Pauroona faqa Antiooka maqusa niqiqaiifaqa ooqureeqa mi ufana qimannimiaqeera. Miqi qimaseeqa faiqí moo auqu Yudasifa mina moo auqu Barasabasi mina faqa Sirasina faqa mara quqaqau. Aiqamausa miqandara amiqira fasiqa andeeqaraqandee qimarusa mariqau. Misa miqanda mareeqee Sauroosa Baranabasisa nimiseeqa papiqa akara rumeeqee nimiqa.

<sup>23</sup> Mi papiqanaki ufa maaqimminoo marinau.

Innee Antiooka maqannaa faqa Siria maqannaa faqa Sirisia maqannaa faqa sia innee Yuda maqannaafau mariafanoo, aanaamuru mini maqaqoosa mariafanoo maasa Yisuna faiqi namu mifa niqiqoosa faqa faiqí firaasa faqa maasa inni nikaqaafasaa nifausamara inni nimandaidaqa.

<sup>24</sup> Maasakiqari faiqí akaqausa nári kai innee unnai ooqureeqa fainanduqira ufa faqa Yuda maqannaasa sandufa oosana oosana faqa qimannim-ufaqa iriseeqa qaara irirana maraqau. Sia maasa niqiqaaafanau ooqu fiqau. Nári iriranannai ooqu fiqau.

<sup>25</sup> Maasa minara iriseeqa moodaanaki suqufiqa ufa qimaseeqa Baranabasina faqa Pauroona faqa qaara fasiqa mara quqasaafaqa miqanda faqa innee iannai ooqufifaranoo. Minamusa inni ufa qimannimiaqeera.

<sup>26</sup> Baranabasisa Pauroosa sia kuqiranara rufieemariasa kai paasosamasee Karaambaifa Yisuna asauku mundirafa mina saika uqeeree mariasa maridaqa.

<sup>27</sup> Maasa indaaruaqa Yudasina amarana faqa Sirasina faqa innee iannai niqiqaanaqa ooqureeqa papiqakinaa ufa nookiqari qimannimifaqa iriaqa.

<sup>28</sup> Anutuna naaquqara maraquna fannoo maasa faqa moodaa karakaimmidanoo. Sia maasa moomoo sandufa innisaa quqaanaura. Maa qaaramoo sandufana kai innisaa quqaanaura. Maa qaaramoo fira ufa namuna kai inni nimianaura.

<sup>29</sup> Faiqí moo fannoo narana maraseenoo narí moo unnaqira anutunara dufi dufi qimaseenoo inni niminafa sia mina naaqa minnisaaqa. Innee aiqama aandau fidika sia naaqa. Ataakirara aandau sia mina amaqi naaqa. Faiqí anaasee narinni narinni ummuarirana sia maraaqa. Innee maa qinee qunnainaina sia mareeqa amiqiranaki marifaranoo. Doo maa ufana taikkeenoo.

<sup>30-31</sup> Yisuna faiqi namu Yeerusaree marusa mi akarana rumeeqee ufa maree marusa nimufaqa mareeqa Antiooka maqusai ooqu fiqau. Antiooka maqusai ooqureeqa Yisuna ufa irimarusa suquseeqa papiqakinaa ufa asaana rufaqa irufanoo amiqikaimminau. Mina iriseeqa firaqoo asasamaseeqa qiqau. Maa ufafa maasa pooduqara ufa maridanoo fee qiqau.

<sup>32</sup> Yisuna ufa irimarusa nariara nariara qikaqaafasaa fee kai qimariqau. Yudasina amarafa faqa Sirasafa faqa Anutuna tamummaqara fasiqaqara maruqanda. Miqanda kisaqaasaa nári nikaqaafasaa faqa maridaqa pooduqara ufa faqa qimannimimariqau.

<sup>33</sup> Yeerusareendari qumusa mariufaqa Antiooka maqannaa Yisuna ufa irimarusa susummasee nimandamasoofaqa Yeerusareenni kafaannai ooru fiqau.

<sup>35</sup> Pauroosa Baranabasisa miqanda sia Yeerusaree maqusai ooru fiqau kaqikaqoo kisaqaasaa Antiooka maqusai mariqau. Miqanda faqa akaqausa namufaqa karaambaiqa ufa oosana oosana ufa asaana rumasee naamua qimannimariqau.

*Pauroosa Baranabasisa rainakiqa naadu naadu fiqau.*

<sup>36</sup> Mariufanoo Pauroofa Baranabasina qimaminoo qinau. Doo findifinaqa anindiri ooqai niniaafannanakinai maaqanna maaqanna nidaqa niuqia.

<sup>37</sup> Baranabasifa eedoo qimaseenoo Yoohanee amarana moo auqu Maraka kafaa afigararee qimasoofanoo Pauroofa qaoo qinau.

<sup>38</sup> Ooqai maasa faqa finoo Pamafiria maqusaindari oonurandee anufa saina kaqi mariani. Sia maasa faqa aiqamai ninoo kasaqaaindari oonurandee anufa.

<sup>39</sup> Miqi qinoo Baranabasisandiri ufa rainaqau. Ufa rainasee rakeemaki naadu naadu fiqau. Baranabasifa Marakana afigamaree sipaki akaramafufanoo Sipurusa afumai nari maqa maaqai finau.

<sup>40</sup> Antiooka maqanna nikaqaafasaa marusa Pauroosa Sirasisa mara quqasee innaaru qimasee qiqau. Anutuna afaarirafa inneeqara Anutuna saika maree marifanoo inniqara rakisinnimaqaani.

<sup>41</sup> Qimasoofaqa miqanda Siria maqa maaqaki faqa Sirisia maqa maaqaki faqa oonuree aniree idaqa Yisuna ufa irimarus afeekaika mannimaqee mariqau.

## 16

*Pauroosa Sirasisa Timootina afigasee nimariqau.*

<sup>1</sup> Pauroosa miqooqari Deerabee maqusai faqa Ristara maqusai faqa finau. Mi maqusa qanda nari aqa nari aqa adeedi marinau. Miqoo Pauroofa Yisuna ufa irimaru kumaaraana moo paqurinau. Mina auqu Timootifa. Mina anoofa Yuda maqanna anaasee marinau mina akoofa Kirisa maqusaindaraafa aanaamuru marinau.

<sup>2</sup> Ristara maqusai nikaqaafasaa marusa faqa Ikooniumma maqusai nikaqaafasaa marusa faqa aiqama Timootinara amiqira kumaaraa fee qimariqau.

(Yuda maqannaasa aiqama Mooseena sandufamau fidaqa Isaraee maqanna fee qiaqera fainanduqimariqau. Miqunara fainandammuidee qimariqau.)

<sup>3</sup> Pauroofa Yisuna ufa maqusa maqusa qimannimiraree qimaseenoo Timooti anirainaqa innisaimbaqa fidaqa Yisuna ufa qimannimiqa fiq fiqia. Misaqa fiq fiqumma marusa Yuda maqannaasa aiqama Timootina akoonara aanaamurufee qida irimarus mariqau. Pauroofa Yuda maqannaasa Timootinara qaoo qifoo qimasee Yuda maqannaasa fainanduqamaqaseeqa afigee fimariqau.

<sup>4-5</sup> Misa maqusakiqa oonuree aniree maseeqa Yeerusareenni maru niqiqoo fasiqausa faqa faiqi firaasa faqa misa sandufa suquseeqa papiqasaa akara rumaqoona mi ufana qimannimidaqa qiqau. Innee sia Yuda maqannaasa sandufa oosana oosana irisee qumaara naruani. Yisuna faiqi namu niqiqamaqoo fasiqausa misa sandufauqa minamuna kai rakisi qumaraaqee qufaqa miqimmimariqau. Miqi marufanoo maqusa maqusa Yisuna ufa irimarus afeekaikamandee mapukusee mariqau. Faiqi moomoosa faasaambaasaana iriseeqa doo misasaa atooqau.

*Pauroofa qainasaa Maseedonia fasiqa ufa irinau.*



<sup>6</sup> Pauroosa Sirasasa miqooqari Firikia maqa maaqaki faqa Karatia maqa maaqaki faqa oonuree aniree idaqa qimannimimariqau. Miqooqari misa Asia maqa maaqai fuaneerufanoo naaquqara maraquna fannoo misa rafaafufusoofaqa oonurandaqau. Sia minaki qimannimianneera miqinai.

<sup>7-8</sup> Misa miqooqari Misia maqa maaqaindari oosirana fiaaqaree Bitinia maqa maaqa firaree qufanoo Yisuna maraquna fannoo rafaafufufaqa oorurandee Misia maqa maaqa qambaana ai aikatee Tarooasa maqusai ooruku nammari atinni mariqau.

<sup>9</sup> Misa miqoo Tarooasa maqusaki marufanoo Pauroona qaina afu naranau. Qainaki Maseedoonia maqanna fasiga qafanau. Mi fasigafa Pauroona fuki faaki qidaqa qainasaa aaramasee qinai. Anee mai Maseedoonia maqa maaqai aniree maasa dadaaqa.

<sup>10</sup> Miqi qufanoo Pauroofa maasa qimaqimufaqa maasa minara Anutufa maasa Maseedoonia maqa maaqai amiqira fasaasa ufa qimannimiaqera qidaqi qimasee doo deedaqiafannana.

*Firipi maqusai Ridia nammarifa Yisuna ufa irinai.*

<sup>11</sup> Maasa Tarooasa maqusaindari sipaki akaramafi andeeqasee Samootarakee maqusai oonuraafannana iqaqoofanoo kananaana Neeapoorisa maqusai Maseedoonia maqa maaqaki maru maqusana mi sipanaki fiqiafana.

<sup>12</sup> Miqoo maasa sipakiqari maqasaa aqufufaqa Firipi maqusai adeedi maru maqusai maqamau fiqiafana. Firipi maqusa Maseedoonia maqa maaqakinaa maqusauqa moomoo marinai. Aiqa maqusauqa aruseenoo Firipi maqusa mifa uriqarara maqusa firaafa marinai. Roomma maqanna kiapausa kaamanna fira taunna marinai. Roomma maqanna sundiauga kiapausa faiqi anaasee miqoo moomoo ani mariqau.

<sup>13</sup> Moomoo taunnakiaqa Yuda maqannaasa miqoo asaqi ani marusa nari amaana maqa usakee mariqau. Akaqa taunnakiaqa sia usakee mariqau. Saririqasaa Yuda maqannaasa raudamakufaqa nammari afainni ooqu ooqumarifufaqa miqoo nariara amaana qimasaidaqa ooqu randee maqusai urimariqau. Maasa Firipi maqusai ani marikammasee Yuda maqannaasa innaaru qirana oosana iriseeqa Saririqasaa Firipi maqusaindari raudamakiqa nammari afainni Yuda maqannaasara ooqu randaqiafana. Paqurimasee Yuda maqannaasa anaaseeuqa kai marufaqa misa faqa ooqu marifi ufa qimannimiqiafana.

<sup>14</sup> Mi anaaseesakiqari moo fannoo mina auqu Ridia nammarifa sia Yuda maqannaasa anaasee Tiatira maqannaasa anaasee marinai. Mifa qamunnasaa akimaru qumisana mi ainainiranaki maru anaaseefa maridanoo Yuda maqannaasa amaana ufa qimarufa marinai. Pannoon arira qumisa ainainiranaki marufa maridanoo fira munnimma aqimaru ainainasaa rakisimaru anaaseefa marinai. Mi anaaseefa Anutunara rimarufa marinai. Anutufa kukeeqasee dadaaqunara Pauroona ufa amiqimasee irinai.

<sup>15</sup> Mi anaaseefa faqa mina maaqaki akaqausa marusa faqa iriseeqa nammari maraqau. Nammari maraseenoo maaqi qimasee sandanainai qidanoo maasa qimaqiminai. Innee qiniara kuqa Karaambaiqa saqarikidanoo fee qimasee innee aiqamausa qini maaqaki ani amiqimasee mariaqee qufaqa doo maasa miqimmiaqiafana.

*Pauroosa Sirasisa maanaaqa aundurakinaa faafasaaqa aqiqanau.*

<sup>16</sup> Moo faasaana kafa innaaru qiraree qimasee nammari afainni ooqufimariafanano moo maanaaqa fannoo maasa aanai paqurinai. Mi

manaqafa faafasaaga aakimarufa marufanoo mi faafasaqafa dadaqufanoo mi manaqafa kasooqagee kambiqaaninna ainainara maqee maqee tamummaqaseenoo doo mifa quqoo kai mina anoona kambiqee marinau. Moomoosa mi manaqafa funnai oonureeqa qimamidaqa qiqau. Feefauru-masaifana maasaki kasooqagee kambiqaaninna ainainara akooroomasee qimanniminaqa mina akiqara feefauru amianauree qufaqa mi manaqanasaa rakisimarusa miqi qufaqa firaa munnimma auqu ramaasida maree mariqau.

<sup>17</sup> Maasa Pauroona faqa fufanoo mi manaqafa maasa faqa fimarinau. Fidanoo faafasaaga dadaqufanoo firaa kari faaqarumaseenoo maaqi qimasee nari tamummaqasee misaqanna marusa aiqamausa qimannimino. Maa fasiqa namusa firaa Anutuna uriqararana saika faiqi namu maridaqa innaarunai fimari aana uqannifiqarara ani mariasa maridaqa.

<sup>18</sup> Faasaambaasaana moomoo kari mi ufana qimanniminoo nimirinai. Miqi marufanoo Pauroofa qafuofanoo akooqoofanoo quandaki minakinaa faafasaaga qimaminoo qinai. Yisufa Anutuna asauku mundirafa qimaqimifaqa qimamidaqa anee maa manaqana aunduraindari rafudamaki fua.

Miqi qufanoo miqookai mi faafasaqafa raudamaki sandanau.

*Mi maqannaasa Pauroosa Sirasisa rumbaqa.*

<sup>19</sup> Mi manaqana rakisirausa mina qafamasee boo qimasee naqimasee maasa minasaqaraana munnimma firaa maraanauree. Miqi qimasee aanoomasee Pauroona faqa Sirasina faqa qumareeqa rarisammaree kiapana oopisaki quqau. Mi oopisafa sia kaqinni marinai, makeeta qambaana marufaqa misa Pauroosa Sirasisa rarisamasee mi oopisanaki quqasee aiqama kiapausa naaramasee unna qimasee qiqau.

<sup>20</sup> Maa fasiqa qanda Yuda maqannaqanda maasa taunnaki anireeqa mandainaina oosana oosana uqeeridaqa.

<sup>21</sup> Misa nari sandufa qimaqimifaqa kaqi runna kai ubeekamaqimaqidaqa. Maasa Roomma maqanna sandufa ameemaana maridaqa nanaree kaqi runna ubeekamaqimaqida fee.

<sup>22</sup> Faiqi anaasee aiqama minara kuqaa kuqaa qufaqa kiapausa iriseeqa niraqoofaqa Pauroosa Sirasisa qamunna uturuqusee miqanda mara quqasee sundiauqa qimannimufaqa unnana samu naruqee qufaqa amiqimandee firaaqoo nariqau.

<sup>23</sup> Naruseeqa karabusa maqaki quqasee minasaa rakisimaruna qimamiqau.

<sup>24</sup> Anee amiqimasee maqanda rumbaa qufanoo mifa karabusa qambaana oosiranaki quqaseenoo niku nisauku saqari mammaaqai quqasee rumbanau. (Miqanda quqasee sandaifanoo misasaa rakisiinafa mifa kuquanno. Karabusa rakisirafa nari kuqiranara rufiseenoo amiqimasee ummarasee rumbanau.)

<sup>25</sup> Eendamugusai Pauroosa Sirasisa nifaqa nidaqimaruqafa aupuridaqa sia mi aupurarannara iriqau kaqi innaaru qidaqa Anutunara amooqidaqa minasaa asasira idi reemarufaqa karabusauqaindi moomoosa irimariqau.

<sup>26</sup> Miqi marufanoo firaaqoo tautumafufanoo maqa inaakufa kasi kasinai. Mi maqafa kasinoo karabusa maqa faqa aiqama kasi kasimma quqasoofanoo karabusa kooquqa narikai atuafufanoo karabusa rumbeeqoo sainandausa faqa nari kai idukuakidanoo nari kai maqasaa aqufinai.

<sup>27-28</sup> Karabusa rakisirafa kaaqa kai tiqinoo mariufa tautinoo findifinoo qafuofanoo karabusa kooqi atuanoo marufanoo qafeenoo Oo aiqama

karabusa fasiqa doo sandamambi misa miqiana akiaqara firaasauqa qini darifooro saina qeeqa kai qeeqa darusee kuquanee qimaseenoo narí rakimaru paipana qumareenoo minannai narí raquru amianeerufanoo Pauroofa rumbara maqakiqari mina qafamaseenoo firaakari faaqa rumasee qimaminau. Sia anee aneenna asumu kuridia, maasa aiqama kaqi maridaqa.

<sup>29</sup> Karabusa rakisirafa mina iriseenoo qoomara nameeraqufaqa gooma qumbi amufanoo qumareenoo sandeenoo rumbara maqaki Pauroosa Sirasisa kuqaa anoonaufa qimariaqandee qimasee aaguqeenoo aindiriroofanoo miqanda nikukina ooqi mareenoo maqasaa aqufinau.

<sup>30</sup> Miqooqari findifinoo miqanda mi maqanakinaana nifiqeenoo madaanai oqureenoo irammirinoo qinau. Inneeqara qini naqimasaifaqee innaarunai asumu marianauree.

<sup>31</sup> Miqi qufaqa miqanda qiqau karaambaiqa Yisunasaa munduseenana doo minaki keeqaa. Miqinana innaarunai asumu marinnaranoo. Anee faqa ani maaqaki mariasa faqa miqinaqa miqiaqa.

<sup>32</sup> Miqi qimasee Karaambaiqa ufa oosana oosana mi fasiqana faqa mina maaqaki marusa faqa qimannimiqau.

<sup>33</sup> Karabusasaa rakisirafa miqanda ufa iri iseenoo mi eendamuqusanaki Pauroona faqa Sirasina faqa maramareenoo saamu nariiqoona nammarinai fidika auqeeseenoo narí faqa narí aiku asauku faqa aiqamausa amaana namhari maraqau.

<sup>34</sup> Miqooqari karabusa rakisirafa Pauroona faqa Sirasina faqa nifiqee narí maaqaki murusee narana nimisoofaqa naqau. Karabusasaa rakisimarufa narí aiku asauku faqa doo maqee Anutunaki keeqafuafanoo maasaki asasirafa uriqaranoo maridanoo fee qiqau.

<sup>35</sup> Iqaqoofanoo kananaana Roomma maqanna kiapafa poorisa niqiqoofaqa Innee oonuree qifanoo karabusasaa rakisirafa eenda rumbaqaiqanda idukisainaqa fuaqa.

<sup>36</sup> Karabusasaa rakisirafa mina iriseenoo Pauroona qimaminoo qinau. Maasa kiapausa ani faqa Sirasina faqa idukuqee qiafaqa doo inneeqara amanammi doo fuaqa. Kaqi ireeda kai amiqimasee fuaqa.

<sup>37</sup> Miqi qufanoo Pauroofa mina iriseenoo maaqi qimasee Poorisa qimanniminai. Maaqanda Roomma maqannaasa ququsaki marunausa maridaqa. Misa nariqa sandufa rukiaasa. Sia andeeqasee maaqanda fuanaura. Iria, kaqi fifau sia ufa iriranaki aiqamausa nifusaa maaqanda dariisee karabusaki maaqanda quqaannanara. Doo maqee fee misa maaqandara ireeda kukeeqaki qumee fuaqee qida fee, sia fuanaura. Misa nariqa kai akooqoo aniree maaqanda idukusaifaqa fuanaura.

<sup>38</sup> Poorisa mi ufana maree munu kiapausa qimannimufaqa iriseeqa Roomma maqanna ququsaki maruqandara iriseeqa Roomma maqanna fira kiapafa minara iriseenoo maasa daruandoo qimasee kaaqa ruflaqau.

<sup>39</sup> Rufiaseeqa misa karabusa maqaki oonureeqa Pauroosa Sirasisa qimudaoo qimasee reendenamasee nifeeqeenoo madaanai quqasee qimannimiqau. Doo inneeqara raudamakiqa Firipi maqusaindari moosaa fuaqa.

<sup>40</sup> Miqi qimasoofaqa Pauroosa Sirasisa eedoo qimasee raudamaki Ridia nammarina maaqaki keeqaqau. Miqoo misa Yisuna ufa irimarusa paqurimasee pooduqara ufa oosana oosana qimannimiseeqa doo quqasee moosaa fiqau.

## 17

### *Pauroosa Sirasisa Teesaroonika maqusai fiqau.*

<sup>1</sup> Pauroosa Sirasisa Firipi maqusaindari findifi fidaqa Amafipoorisa maqusa faqa Apooroonia maqusa faqa fi aikateeqa Teesaroonika maqusai onuraqau. Mi maqusanaki Yuda maqannaama ana maqa marinau.

<sup>2</sup> Pauroofa narosana mareenoo minaki keeqafinoo misa faqa ufa qinau. Tamummaqara fasiqauqa akarakinaana asaana rumaseenoo minakinaa ufa qimannimufaqa nari qimami nari qimami qimariqau. Qaaramoo Saririqasaa miqimarinau.

<sup>3</sup> Pauroofa tamummaqara ufakinaana qumareenoo asauku mundirafa aupuramasee kuqunara faqa Anutufa mina kafa mara findifunara faqa qimannimimarinau. Miqidanoo Pauroofa qimanniminoo qinau Maa fasiqafa Yisufa qinee qimannimunafa mifa kai oqai Anutuna asauku mundirafa maridanoo.

<sup>4</sup> Yuda maqannaama iriseeqa akaqausa Pauroofunnai fiqau. Kirisa maqannaama Anutunara rimarusa moomoosa iriseeqa misa faqa misasaa atooqau. Uriqarara anaaseeqa moomoosa faqa iriseeqa kuqaa fee qimasee misa faqa atooqau.

<sup>5-7</sup> Yuda maqannaama akaqausa nikooqee marusa rairai qimasee anaamuru moomoo nifiqaidanoommifoo qimasee manda fasiqauqa kudi fasiqauqa naaramasoofaqa moodaanaki suqufiqa taunna qambaanaa onuree aniree masee anoo firaana uqeraqau. Misa suqufufaqa Yasoonama maqa oonu upukamaseeqa Pauroosa Sirasisara maridammiafoo qimasee rapeemasee nindafoo faqa sia marufaqa Yasoonama faqa Yisuna ufa irimarusa akaqausa kai mi maqanakinaana paqurimasee maqamau rarisee kiapausunnai munuseeqa maqa qiqau. Nindafa maa fasiqausa aiqama maqusa maqusa mandufa uqeraqa niniaasa ifaqa maa maqusanaki faqa aniraafanoo Yasoonafa mareeqeenoo nari maqaki quqasaifaqa faiqeeqa. Misa maasa Roomma maqannaama karaambaiqa sandufa aiqama rukiaidaqa misa maasa Roomma maqannaama karaambaiqa minauqu Sisaana arusee nari karaambaiqa moo mina auqu Yisufa mina auqu uqeraidaqa miqidaqa.

<sup>8</sup> Miqi qimasooofaqa faiqi anaasee aiqamausa kiapausa faqa mi fuka karaambaiqafa kambiqafinanoo maasa Roomma maqannaama qeeqa karaambaiqa namufaqa daruandoo qimasee fraaqoo tautiqau.

<sup>9</sup> Kiapausa Yasoonama saimbaqa Yisuna ufa irimarusa faqa aiqama munnimara qufaqa nimisoofaqa idukiqau.

### *Pauroosa Sirasisa Beereea maqusai fiqau.*

<sup>10</sup> Yisuna ufa irimarusa marufanoo eendufaqa Pauroosa Sirasisa nifiqa quqasoofaqa asukunai Beereea maqusai fiqau. Mi maqusanai onureeqa Yuda maqannaama ana maqa maqaki keeqaqau.

<sup>11</sup> Beereea maqusanaama sia Teesaroonika maqannaama naanaa ree marusa misa irirana irimarusa mariqau. Misa faasaambaasaana afeekaikamandee karaambaiqa fasaama ufa iriqau. Misa tamummaqara fasiqauqa ufa akarakinaana randasee qafee mariqau Pauroona ufara kuqaa anoonee sia fee anoonee qimasee akarakinaa ufauqara randaqa.

<sup>12</sup> Miqidaqa Yuda maqannaama faqa Kirisa maqannaama faiqi firaama moomoo faqa Kirisa maqannaama anaaseeqa moomoo faqa misa aiqama Yisunara kuqaa anoonee qimasee irimariqau.

<sup>13-14</sup> Teesaroonikai maru Yuda maqannaama minara iriseeqa Beereea maqusai onuree faiqi anaasee aiqama nirana fundakusoofaqa Yisuna

ufa irimarusa faiqí firaasa nifasausaikirausa Pauroona umee aqiqoofanoo ooruku nammari afainni finau. Sirasifa faqa Timootifa faqa kaqi miqoo mariqau.

<sup>15</sup> Pauroona afiqee fusa Ateensa maqusai munu aiseeqa oonurandee anireeqa Sirasisa Timootisa qimannimiqa qiqau. Pauroofa inniqara naaraidanoo doo Ateensa maqusai fuaqa.

*Pauroofa Ateensa maqusai finau.*

<sup>16</sup> Pauroofa Ateensa maqusai Timootisa Siraasisa nifeesidanoo nindafoofaqa Ateensa maqusanaasa maqannai faqa ooninnai faqa saqarinnoo faqa oosana oosana ainaina nimana auqusee maasa Anutu fee qimasee innaaru qimariqau. Pauroofa mina qafamasoofanoo akooqanau.

<sup>17</sup> Firaqoo akooqoofanoo akooqeenoo apatufanoo Yuda maqanna amaana maqaki keeqafufanoo Yuda maqannaasa faqa aanaamuru minaki anikeeqeemarusu faqa Yisunara ufa qimarinau. Maqusa qambaana faqa faiqí anaasee faqa aiqamai ufa qinoo ninau.

<sup>18</sup> Ateensa maqusai irirana fiqararusa maqee maqee suqida marunaki suqimariqau. Oosana oosana sukuraki keeqeusa Ateensa maqusai maqee maqee suqimariqau. Eepikurianna sukura tisaauqa moo iriranamau fimariasa faqa Sitookika sukura tisaauqa misa moo iriranamau fimariasa faqa Pauroona ufa atikai iriseeqa noori uqeeraseeqa Pauroonara maqi qimasee uteeti qidaqa qiqau. Maa iriranna siai fasiqafa narí afaaqa fifau amooqida nana ufee qidanoo fee. Akaqausa maqi qiqau. Mifa aanaamuru Anutusara qidanoo. Pauroofa Yisufa kuqiranakiqari findifunara qiman-nimufaqa misa tautumasee dapi ufa qidaqa uteeti qimariqau.

<sup>19</sup> Misa miqi qimasee Pauroona afaqamaree firaa akara maqa mina auqu Areeopakusa mi maqanaki fiqau. Firaa irirana faqaasa kai minaki suqimarunaki afiqee fiqau. Minaki suquseeqa Pauroonara irammiriqa qiqau. Anee fuka ufa qimannimianaqa maasa mina irirara suqidaqa.

<sup>20</sup> Mi ufana qiannanaki maasa akaqainainara randaidaqa. [ <sup>21</sup> Ateensa maqusanaasa faqa aanaamuru animarusu faqa oosana oosana fuka irirana irianee qidaqa minara kai irimaree fimariqau. Misa minara Pauroona irammiri mariqau.]

<sup>22</sup> Pauroofa mina iriseenoo misa noorinni findifinoo qimanniminoo qinau. Oo innee Ateensa maqusanaasa qinee mai anidaqa inni oosana qafaidaqa iridaqa kaaqa innee Anutuna oosana oosana ainainannai ni-mana auquseeqa maasa Anutusee qimasaidaqa innaaru qiganuasa.

<sup>23</sup> Qinee inni maqusai oonuree aniree niniqa inneeqa aandau arusee tatufimari qaindausa qafeeqa. Innee moomoo Anutusara oosana oosana innaaru qimariasa mariafaqa qinee qafeeqa. Aiqama qaindauqasaa mi anutusa nuqu akara rinoo marifaqa qafeeqa. Mooqaindasaa akara kai rinoo marifaqa qafeeqa. Sia maasa irunna Anutunee qimasee akara kai rumaqaafaqa qafeeqa. Mee innee sia irimaria Anutuna minara innaaru qimarianara mina auqu oosana koorooianaura.

<sup>24</sup> Anutufa innaaruna faqa maqa faqa aundurakinaa ainaina marina minauqa auqu Anutufa maridanoo. Mifa innaaruna faqa maqa faqa auqufa mi ainainna karaambaiqa maridanoo. Sia faiqí nisaukunnai auqeeqee amaana maqaki quqaqaafau maridanoofau.

<sup>25</sup> Mifa narí kai naanna faqa marirana faqa faiqí faiqi nimimarifa maridanoo. Mifa nana ainainaree sarauimarifa marinaqee maasa qeeqa iriranannai kadaapirumeeqee amianauree, sia amana. Aiqama ainaina narí kai auquqoofa kai maridanoo.

<sup>26</sup> Mifa kai moodaa fasiqa auquqoonasaaqari kai aiqama maqannaa kambiaqa maridaqa. Mifa narikai oosana aroonakiqari aiqama aanaamuru quqannisagoosa kai maridaqa. Mifa qufaqa misa marirana oosumma nimaqoonakiaqa kai marimaree fimariafanoo.

<sup>27</sup> Sia fifau, ooqai Anutufa miqinau. Asukunaki maridaqa Anutunara mikimmakidaqa randaidaqa paqurinafa paquriagee qimaqoona miqimaqoona miqi mariafanoo. Sia Anutufa faiqi nianai marifa maridanoo. Faiqi naaqa maridanoo.

<sup>28</sup> Mina mariranaki kasiranaki maasa maridaqa. Inni ufasaa rakisirausa misa faqa minara maaqi qimariafanoo maasa faqa mina faiqi namu kai maridaqee qidaqa.

<sup>29</sup> Misa miqi qimaqoona qinee minara minakina ookaamasee qinee maaqi qidaqa. Maasa Anutuna faiqi namu maridaqa naqimasee maasa quandakina qeeqa qikoona amana koorannai siruaannai ooninnai mina ammeemmee rianauree. Sia andeeqanoo maridanoo.

<sup>30</sup> Ooqai faiqi misa Anutunara randaidaqa asukunakinai mikimaki anidaqa mariqau. Anutufa mi kamuqoora doo aunuseenoo sia misa furufarirana akiaqara narinau maqee maa kamuqoo aiqama aanaamuru nari mandainainakiqari quandakiqa Anutufinai ubeekaaqee qidanoo.

<sup>31</sup> Mifa aiqama maqannaasa moodaa faasaana ufa irisee nari andeeqaranannai andeeqannisaannoo. Doo mifa utaaqamaqaifanoo mi faasaanafa maridanoo. Ufa irimari fasiqafa faqa utaaqamaqaifa maridanoo. Mi ufana irimari fasiqana Anutufa kuqiranakinaana mara findifunannai kooroo inoo maridanoo.

<sup>32</sup> Irirana faqaasa suqimarusa kuqiranakiqari findifunara qimannimufaqa akaqausa naanaidara qimariqau. Akaqausa kafa moo kari irianee qiqau.

<sup>33</sup> Miqi qimasoofanoo Pauroofa raudamakinoo finau.

<sup>34</sup> Fufanoo faiqi akaqausa minasaa atooqafi mina ufa irimariqau. Moo fasiqa auqu Dionisiusafa ufa suqira maqa Areeoopakusa suqira maqaki keeqee marufa marinau. Anaasee moo auqu Damariasa nammariifa mifa faqa faiqi anaasee akaqausa misa faqa Pauroona ufara kuqaa fee qimasee minasaa atooqau.

## 18

### *Pauroofa Ateensa maqusaindari Koorinti maqusai finau.*

<sup>1</sup> Pauroofa Sirasina faqa Timootina faqa nifeesu sianoo Ateensa maqusa quqaseenoo Koorinti maqusai finau.

<sup>2</sup> Koorinti maqusai qiqoo adeedi marufanoo oonureenoo faiqi moo paqurinau. Mina auqu Akuiraafa marinau. Akuiraafa Poontiusa maqa maaqai kambiqoofa Itari maqa maaqai oonu marinau. (Itari maqa maaqaki Roomma maqasaa firaa kiapafa miqoo marufanoo mina maqusa marinau.) Itari maqa maaqai mariufanoo firaa kiapafa minauqu Karaudiusafa Yuda maqannaa aiqama asaquunnimaqasoofaqa quqasee daraaniqau. Akuiraafa Yuda maqannaa marufanoo asaqusoofanoo nari anaqa Pisisira nammari sandiri Koorinti maqusai finau.

<sup>3</sup> Oonu marufanoo Pauroofa mina paqurimaseenoo mina faqa maridanoo dadaaqidanoo burimakau apatannai uqiqaana maaqa usakee marinau. Akuiraasa Pauroosa mi ainainnirana akoofasaqara marida usakeemariqau.

<sup>4</sup> Pauroofa aiqama kari Saririqasaa Yuda maqanna ufa suqira maaqaki keeqafidanoo naamuaqira ufa Yisunara qimannimimarinau. Yuda maqanna faqa Kirisa maqanna faqa qimannimimarinau.

<sup>5</sup> Sirasisa Timootisa Maseedoonia maqusaindari aniroofanoo Pauroofa sia Saririqa kai aiqama faasaambaasaana Anutuna asauku mundirana Yisunara Yuda maqannaasa naamuaqima nimaqee marinau.

<sup>6</sup> Miqimarufanoo nikooqoofaqa Yuda maqanna Pauroona mandufa sukufa qimamaqau. Miqi qufanoo Pauroofa rutaqi findifinoo doo nari asaukunnai nari afaaqaindaraa kookoomma aisoora fatikeegee Yuda maqanna ninaamu aranau. Inneeamma dapikirana oosana araafanoo. Qinee amiqirannai inni mara ququnaqa inneeqa kai mandaatata fimarifanoo doo innindi kai, sia qinindifau maridanoo. Doo maqee maaqooqari doo qinee inni Yuda maqanna minnisee aanaamuru qimannimianaura.

<sup>7</sup> Pauroofa miqi qimaseenoo misa minniseenoo aanaamuru fasiqa maaqaki oonu marinau. Mi fasiqana auqu Titiusa moo auqu Yusatusafa maridanoo mina maaqa Yuda maqanna ufa suqira maaqa adeedi marufanoo Pauroofa minaki marinau. Titiusafa moo auqu Yusatusafa Anutunara innaaru qimaru fasiqafa aanaamuru maridanoo Yuda maqannaasa amaana ufa irifa maqee Yisuna ufa irimarufa marufanoo Pauroofa mina faqa oonu marinau.

<sup>8</sup> Yuda maqanna ufa suqira maqasaa rakisirafa minauqu Kirisipusafa maridanoo Yisuna ufara kuqaa fee qimarufa nari faiqi anaasee faqa Koorinti maqannaasa moomoosa faqa kuqaa fee qimasee nammari maraqau.

<sup>9</sup> Pauroofa moo eendaki faiqagee ufanoo qainasaa maaqimasee afunnaranau. Qainaki Anutufa Pauroona qimaminoo qinau. Pauroo sia anee maaqooqaraasara rufiaa. Anee kaqi ufa qida maria. Sia anee minnisaa.

<sup>10</sup> Qinee ani faqa kukeeqai maridaqa dadaaqidaqa. Maa Koorinti maqusanakina faiqi anaasee moomoo qinindi maridaqa qinee ani namuqaaki mariasa rafaqa funaqa sia misa aidafirana ani amifaranoo.

<sup>11</sup> Pauroofa mina iriseenoo afaqa quqasee miqoo marinau. Maridanoo Anutuna ufa qimannimimarinau. Miqidanoo aukwana moodaa maraseenoo moo aukwana qambaanasaa finoo taikanau.

<sup>12-13</sup> Pauroofa miqoo Koorinti maqusai kaqi marufanoo Kirisa maqasaa rakisimaru kiapafa taikafufanoo Roomma maqanna kiapafa firaafaikirafa moo fuka kiapafa aqiqoofanoo ooqeenana amaaqaki animarinau. Mi kiapana auqu Karioofa marinau. Miqoo maria Yuda maqannaasa Pauroona namuqaa fuka kiapafa animariqoo fee qimasee Pauroona qumaree rariseeqa fuka kiapafinai munuseeqa maaqi qimasee unna qimasee qimamiqau. Kiapa, maa fasiqafa maasara Roomma maqanna sandufa rukiaranaki maasa qifeeqaidanoo. Mifa maasara inneeqa naaruqaa oosana minniseeqa maqee qini fuka oosana qimannimunnana mi mau fidaqa Anutunara innaaru qiaqee qidanoo ufa rukiaranaki maasa qifeeqaidanoo.

<sup>14</sup> Miqi qufanoo Pauroofa ufa qianeerufanoo Karioofa Yuda maqannaasa maaqi qimasee qimanniminu. Maa ufana sia sandufa rukiarafa maridanoo sia moo mandainaina maraidanoo. Miqinoo marinaqau inni ufa andeeqaseefau irini.

<sup>15</sup> Maa ufana fifau ufa kai oosana oosana ufa faqa nuqu faqa inni sandufa kai maridanoo. Qinee miqira fifau ainaina sia qinee irianaura inneeqa kai.

<sup>16-17</sup> Miqi qimaseenoo kiapafa aanoomasee fukifaakiufaqa koota maqakiqari Yuda maqannaasa raudamakufaqa miqooqaraasa, Yuda maqanna amaana maqasaa rakisirana mina auqu Soosateeneesana qumara maree

mini kiapana kooqiki quqasee unnaanasamu firaqoo uqafiqaqau. Kar-iioofa mina qafoofanoo akooqoofanoo sia minara irinoo mana manam-minau.

*Pauroofa Koorinti maqusaindari Antiooka maqusai sipaki finau.*

<sup>18</sup> Miqooqari Pauroofa Koorinti maqusai faiqí firaasa nifasausaikirauisa misa saimbaqa kaqikaqoo kisaagasaa marinau. Koorinti maqusai kaqi maridanoo minniseenoo mina dinatinni Keenakareea maqusai oonu mi maqusanaki maridanoo Yuda maqannaa naanna raanee qimaseenoo moo ainainara qima afeekaikamandeenoo akiaqa maqanamu faqa indufu aquseenoo quqaseenoo sipaki akaramafufanoo Pisisira nammarina faqa Akuiraana faqa miqanda qisafaaqi faqa Siria maqa maaqai finau.

<sup>19-21</sup> Sipa fannoo ooruku nammari taqamareenoo Siria maqa maaqai fidanoo Efeesusa maqusai naaree oonuranau. Oonureenoo Pauroofa Yuda maqannaa ufa suqira maqaki keeqafufanoo Yisunara naamuaqimasoo faqa misa qiqau anee kisaagasaa maridana maasa qimaqimia qufanoo Pauroofa maaqi qimasee narí qimanniminau. Anutufa qiniara kafa aniannee qinnanara kafa oonurandee aniana. Miqi qimaseenoo Pisisira nammarina faqa Akuirana faqa miqoo Efeesusa maqusai quqanniseenoo sipaki akaramafufanoo Isaraee maqa maaqai Seesareea maqusai finau.

<sup>22</sup> Sipa fannoo Pauroona afeee Seesareea maqusai munaisoofanoo afi-uqakufanoo maqamau Yeerusareenni ooru finau. Oorureenoo narí Yisuna ufa irimariasa narí akaqaafasaakirauisa nindafeenoo kaqikaqoo misa faqa marinoo oorurandee Antiooka maqusai indaaru mariunnai kafa finau.

<sup>23</sup> Antiooka maqusai kaqikaqoo marinoo kafa findifinoo Karatia maqa maaqaki faqa Firikia maqa maaqaki faqa oonuree anireenoo Yisuna ufa irimarusa pooduqara ufa qimanniminoo nufaqa Yisuna ufara afeekaikiqau.

*Apooroosafa Efeesusa maqusai Yisuna ufa irimarusa dadaaqinai.*

<sup>24</sup> Yuda maqannaa fasiqa moo auqu Apooroosafa Areekasandiria maqusai kambiqoofa mi fasiqafa Efeesusa maqusai ani marinau. Mifa amiqimandee kaaqa ufa qimarufa. Mooseena sandufara faqa tamummaqara ufa akara faqa kaaqa mi ufausa amiqimandee irimarufa marinau.

<sup>25</sup> Yisuna ufa irimarusa mi fasiqana Yisuna ufa amiqimasee qimamisoofanoo irimarufa marinau. Mifa maqee maqee andeeqasee Yisunara faiqí anaasee qimannimidanoo kaaqa fuki faaki qimarufa marinau. Mifa ooqai Yoohaneefa nammari nimimaru nammarina maroofa Yisuna nammariara sia irinai.

<sup>26</sup> Apooroosafa mifa Efeesusa maqusai anireenoo Yuda maqannaa ufa suqira maqaki paasoosamanda qimannimimarufanoo Akuirafa faqa Pisisira nammarifa faqa mina ufa iriseeqa nári maaqaki mara quqaseeqa andeeqasee Anutuna aanara mariranara Apooroosana aamua qimariqau.

<sup>27</sup> Apooroosafa Kirisa maqa maaqai firaree qimasoo faqa Efeesusa maqusannaasa Yisuna ufa irimarusa mina akaqaafasaakirauisa dadaqira ufa pasaki maaqi qimasee akarariqau. Innee Kirisa maqannaasa innee amiqimasee maa fasiqana oonu afeeqee quqaaqa. Miqimasee akara rummamufanoo mareefinai. Kirisa maqa maaqai maridanoo Apooroosafa Yisuna ufa irimarusa firaqoo dadaaqinai moomoosa Anutufa kukeeqasee dadaaqufaqa Yisunara irisee minasaa mundimariqau. Miqirauisa Apooroosafa dadaaqimarinai.

<sup>28</sup> Yuda maqannaasa faqa akooqoo maqusa qambaana Apooroosafa oori runuseenoo Yuda maqannaasa Yisunara afeekaikamasee qimannim-ufaqa moomoosa Yisunara doo kuqaa anoonee qimariqau. Apooroosafa



Mooseena sandufakinaana tamummaqara fasiqa akarakinaana Anutuna asauku mundirafa kuqaa Yisufa marinara uqannifiqasoofaqa moomoosa iriqa kuqaa Yisufa Anutuna asauku mundira fee qimariqau. Apooroosafa mi maqusanaki maridanoo Yisuna ufa irimarusa pooduqamannimaqanau.

## 19

*Pauroofa Efeesusa maqusai Yisunara amiqimasee qimanniminau.*

<sup>1</sup> Apooroosafa Koorinti maqusai marufanoo Pauroofa Asia maqa maaqai anireenoo maqusa maqusa maqamau oonuree aniree Yisuna aufakiana qimanniminoo ninau. Miqidanoo Efeesusa firaa taunnakina ooqu finau. Ooqureenoo Yisuna ufa irimarusa akaqausa paqurimasee irammirinoo qinau.

<sup>2</sup> Innee indaaru Yisunasaa mundiqau, mikari naaquqara andeeqara maraquna maraqeeiqau. Misa mi ufana iriseeqa qiqau. Maasa sia naaquqara maraqunara iridaqa. Maridanoo fee sia fee maridanoo fee, sia maasa minara iridaqa.

<sup>3</sup> Pauroofa minara iriseenoo kaifaa irammirinoo qinau. Innee indaaru nana nammari fee maraqau. Qufaqa misa qiqau. Maasa Yoohaneefa nammari nimimaruna nammarina maraafanausa maridaqa.

<sup>4</sup> Pauroofa mina iriseenoo maaqi qimasee qimanniminau. Yoohaneena nammari fannoo nári mandainainasaaqari quandee marifa maridanoo. Yoohaneefa nammari nimimarufa kaqi maru aukuaana Isaraee maqannaasa maaqi qimasee qimanniminoo qinau. Qini qinaaqianna kambiqainna fasiqafa minasaa kuqaa mundufuaqa. Yoohaneefa miqi qinoo Yisunara qinau.

<sup>5</sup> Mi Efeesusa maqannaasa Pauroona mi ufana iriseeqa doo Karaambaiqa Yisuna nammari maraqau.

<sup>6</sup> Nammari marasoofanoo Pauroofa misasaa asauku mundusoofanoo naaquqara maraquna fannoo misa naakufufaqa aanaamuru ufa sia iri-maru ufana qimariqau. Misa Anutuna ufara faqa qimariqau.

<sup>7-8</sup> Miqi qimarusa qisauku taikasee qikunni ooqu qaara marasee Efeesusa maqanna ufa oosana qimarusa mariqau. Naaquqara maraquna fannoo misaki aqufufanoo Pauroofa maridanoo qaaramoo quqoonasaa Yuda maqannaasa Efeesusa maqusai ani misa faqa mariasa nári naaduma ufa suqira maqaki keeqafi paasoosamasee Anutuna ququsara naamuaqima nimaqee marinau.

<sup>9</sup> Akaqausa Pauroona ufa iriseeqa karaambaiqa Yisuna ufamau firanara nikooqoofaqa sukufa manda ufa kai aiqamatia qiqau. Pauroofa miqi quna iriseenoo Yisuna ufa irimarusa narí akaqaafasaakirausa nifiqama-reenoo misa Yuda maqannaasa rakeemma quqaseenoo raudamaku fanoo mi taunnanaki kai moo ufa suqira maqaki keeqanau, mi ufa suqira maqana akoofa minauqu Tiranusafa marinau. Aiqama faasaambaasaana Pauroofa mi ufa suqira maqanaki faiqí anaasee nifiqamareenoo minaki murusaidanoo Yisuna aufakiana narí qimami narí qimami qimariqau.

<sup>10</sup> Pauroofa miqimammaree fimarufanoo qaara aukuaana aiqaroonara Asia maqa maaqaki marusa Yuda maqanna faqa Asia maqanna faqa misaqa marusa faqa aiqama Karaambaiqa ufa iriqau.

*Faiqí naunduraki maru faafasaaqana aqiqoosakai nári isoofaqa quqasee sandaqau.*

<sup>11</sup> Anutufa Pauroonakinaana faiqí sia amana auqaaqaa ira ainaina faiqí nifaaqa andeeqee mariana naaquqara ainaina misa nifusaa auqusoofaqa qafeeqa Yisunara kuqaa anoona fee qiqau.

<sup>12</sup> Faiqí anaasee aurimarusa nikaqaafasaa Pauroona ankisa fee qamunna fee ani mara maree aurimarusa nimufanoo aurirafa taikée marinau, faafasaaqa naakirafa rafudamaki sandeemarinau.

<sup>13</sup> Yuda maqannaasa akaqausa misa faqa faafasaaqa naakimarusa niqiqeemarusu mariqau. Miqi qimasee aanoomasee Pauroona faqa Sirasina faqa qumareeqa rarisamamaree kiapana oopisaki quqaaqau. Mi oopisafa sia kaqinni marinau, makeeta qambaana marufaqa misa Pauroosa Sirasina rarisamasee mi oopisanaki quqasee aiqama kiapausa naaramasee unna qimasee qiqau. Moodaa fasiqa faiqinamu qisauku dinni taikasee dinni ani qaraqanda marasee faafasaaqa niqiqee marusa mariqau.

<sup>14-15</sup> Misa nikoona auqu Sikeefaafa marinau Yuda maqannaasa Anutuna aanaiqikirausa uriqararafa marinau. Mi fasiqana faiqí namu Pauroona oosana qafeeqa maasa faqa mina oosana amanamasee qafaanauree qimaseeqa, faiqí moo faafasaaqa aakimaruna oonuree auqamaseeqa qiqau. Anee Yisuna auqu Pauroofa qimannimarinu irisee anee raudamaki see fifua qufanoo faafasaaqa fannoo maaqi qimasee narí mi fasiqana aunduraindari misa qimanniminu. Ee, maa, qinee Yisunara iridaqa Pauroonara faqa iridaqa innee yau yausee maridee qinee sia inniara iridaqa.

<sup>16</sup> Miqi qimaseenoo faiqí narí aqoondiki maru fasiqana dadaaqufanoo findifinoo firaqoo uqanna misa narí narí iseenoo misa qamunna anaqi maroofaqa kaqisamu maaqakiqari rafudamaki quqasee sandaaqau.

<sup>17</sup> Efeesusa maqusa marusa faqa Yuda maqanna animarusa faqa mi ufana irisoofanoo kaaqa naaquqoofaqa Karaambaiqa Yisuna auqu firaqoo uqeraqau.

<sup>18</sup> Yisuna ufa irimarusa miquna iriseeqa Pauroofunnai suqumaree anireeqa nariqa mandainaina oosana oosana kooroo iqau.

<sup>19</sup> Yisuna ufa irimarusakiqari aukainaina mandainaina afunee ainaina maraqa nusauqa nariqa manda ufa akaraki quqaaqoona moodaanaki suquseeqa aiqamausa nifusaa firaqoo idaraqau. Idaqoo papiqana feefaurimaruna moodaanaki asaana rumasoofanoo maaqimminu. Fira munnimma tia (K50,000) aqimaruna ida raqau.

<sup>20</sup> Doo miqimasoofanoo Karaambaiqa ufa aiqama atinai daraanimambufanoo doo afeekaikamafinoo atukaramafinuu.

*Deemeetirusafa Efeesusa maqusai firaqoo tutuqirana uqeranau.*

<sup>21</sup> Mi ainainna taikasooofanoo mina maariqoo Pauroofa qinau. Qinee maaqooqari Maseedoonia maqa maaqai faqa Kirisa maqa maaqai faqa oonuree anireemaseeqa Yeerusareenni kafa ooru fuanaura. Miqoo ooru maridaqa Roomma maqusa oonu qafaanaura.

<sup>22</sup> Miqi qimaseenoo Pauroofa Timootina faqa Eerasatusana faqa niqiqoofaqa Maseedoonia maqa maaqai indaaru fiqau. Pauroofa Asia maqa maaqai kaqi mariufanoo ninaaqiana finau.

<sup>23</sup> Efeesusa maqusai kaqi marufanoo moo mandainaina Karaambaiqa ufamau fimarusaki kambiqanau. Mi aukuanna misa Yisuna ufara Karaambaiqa aana fee qimariqau.

<sup>24</sup> Asia maqannaasa narí moo unna anutunara anaasee anutufa marinau maqi qimariqau. Mi anaaseena auqu Arateemisa nammarifa marinau. Mi anaasee anutuna amana Efeesusa maqusa fira amaana maqaki marinau.

Ooninnai auqira amaana maqa firaatia amiqirafa uqanna marinau. Efeesusa maqusai faiqí moo auqu Deemeetirusafa maridanoo mi amaana maqana qafaidanoo mina amana kai siruaauqa maraseenoo idaki tasirisirimaseenoo moomoo kaqikaanauqa auqiiseenoo faiqí anaasee nimufaqa feefaurummasaidaqa maraidaqa nári maaqaki munu quqasaidaqa innaaru qimariqau. Deemeetirusafa siruaa auqimarusa uriqararafa marufaqa misa aiqama mi saikanannai munnimma maree mariqau.

<sup>25</sup> Deemeetirusafa siruaa auqimarusa naarama moodaanaki quqaseenoo qimanniminoo qinau.

Oo maa fasiqausa maasa saikasaqari munnimma kambiqaidanoo.

<sup>26</sup> Innee mi fasiqana Pauroonara iridaqa mina oosana irimariafanoo. Maasa qisaukunnaí auqimarunnanara sia Anutufa uqannee qidanoo. Mifa Efeesusa maa maqusanaki faqa Asia maqa maaqaki aiqamai faqa Yisunara qimannimifaqa misa kuqaa fee qimasee maasa Arateemisa nammarina minnisaidaqa.

<sup>27</sup> Miqidaqa maasa saika munnimma maree marunnana qusasaa mandaikiannoo. Maasa uriqarara anaasee anutuna Arateemisa nammarina amaana maqa faqa mandaikiannoo. Maasa anutufa Arateemisa nammarifa mifa faqa ureeqaannoo. Asia maqannaasa faqa aiqama maqannaasa faqa Arateemisa nammarinara innaaru qimariana doo taikeefaranoo.

<sup>28</sup> Faiqí anaasee mi ufana irisooфанoo niranaqoofaqa firaqoo faaqa fuisee qimaseeqa qiqau. Efeesusa maqannaa Arateemisa nammarifa firaatia uriqararafa maridanoofee qiqau.

<sup>29</sup> Mi ufafa aiqama atinnai daraanufaqa faiqí anaasee suqu fiqa dadaaqi-aqee qimasee Maseedooniandaraa qanda Pauroona aqoondiqara Kaiusana faqa Aristarakusana faqa Pauroona faqa Efeesusa maqusai animaruqanda qumareeqara rarisammaree sandeeqa firaa ufa suqira maqaki keeqafi minaki mi fasiqaqanda quqaqau.

<sup>30-31</sup> Pauroofa misa nindafamaseenoo minaki keeqaneerufaqa Yisuna ufa irimarusa mina rafaafufusaqau. Asia maqa maaqaki marusa uriqararaura Pauroona aqoondiuqa ufa moonasaa quqasoofanoo mini qimaminoo qinau anee sia minaki keeqaa, kuqinafaara.

<sup>32</sup> Faiqí anaasee moomoo uqanna firaa ufa suqimaru maqanaki keeqafufaqa firaqoo faaqa fuisee qimariqau. Akaqausa moo faaqariqau akaqausa moo ainaina faaqariqau. Muduka tia nanaree maasa fifau faaqarida fee qimasee siamma iriqau, kaqi fifau faaqarimariqau.

<sup>33-34</sup> Yuda maqannaasa Areekasandeeranara anee findifi qimannimianee qufaqa faiqí anaasee mina qafamaseeqa oo mifee manda fasiqa marifaqee minaree faaqa fuisee qiqi ifee. Areekasandeerafa findifinoo asaukunnoo ufa rafaafafinoo qaoo qimasoofofaqa misa aiqama mina qafamasee Yuda maqannaa moo anutunafaqaa fee qimasee faaqa rida qiqau. Efeesusa maqannaa Arateemisa nammarifa uriqarara Anutufa maridanoo. Misa mi ufana kai firaqoo faaqa fuisee qidaqa mari mariufaqa kisaqasaa uqanna faaqa quqaida mariqau.

<sup>35</sup> Efeesusa maqusa uriqararafa moo fannoo rafaafafinoo miqinoo fubaqa rafaafafuseenoo qimanniminou.

Efeesusa maqannaa fasiqauqa qini ufa iriaqa. Efeesusa maqusa Arateemisa nammarifa rakisimari maqusafa maridanoo. Sia moo fannoo minara qaoo qinoo maridanoo. Mina naaquqara ooni innaarunaindari aqufuna maasa mina faqa mina amaana maqa faqa rakisidaqa.

<sup>36</sup> Sia moo fannoo amana mi ainainnara qaoo qiannoo. Minara innee doo asooaaqa sia furufaramasee moo ainaina auqaaqa.

<sup>37</sup> Maa fasiqa qanda innee maramaree aniana sia moo amaana maqaki-naana qummuari mariaqanda sia maasa anaasee anutunara moo ufa qia. Nanaree fifau nifiqee ani fee.

<sup>38</sup> Deemeetiriusafa faqa narí moodaa saika faqaasa faqa moo fasiqa ufa amiraree qinanoo maasa ufa irira suqirafa maridanoo ufa andeeqee maria fasiqausa miqoo maridaqa misa miqookai nári ufa andeeqaaqa.

<sup>39</sup> Ufa andeeqee mariasa sia amanaikifanoo faiqí anaasee ufa suqirafa narí qaanaa kai ufa suquaqa.

<sup>40</sup> Roomma maqannaasa maa fifau tutuqirana iriseeqa maasa diqifaara, misa maasara iraifaqa nana ufa fee qimannimianuree sia ufa oosana maridanoo.

<sup>41</sup> Miqi qimaseenoo aiqamausa niqiqoofaqa fifainiqau.

## 20

### *Pauroofa Maseedoonia maqa maaqai faqa Akaia maqa maaqai faqa finau.*

<sup>1</sup> Eefeesusa maqusaki firaa tutuqirafa taikoofanoo Pauroofa Yisuna ufa irimarusa suqu quqaseenoo pooduqara ufa qimannimiseenoo niman-damaseenoo doo quqasee Maseedoonia maqa maaqai finau.

<sup>2</sup> Maseedoonia maqa maaqaki oonuree aniree idanoo Yisuna ufa iri-marusa pooduqara ufa maqee maqee qimannimimarinau. Miqoo qaraasa pooduqama nimaqaseenoo quqasee Kirisa maqa maaqai ooqueenoo miqooqari moo quqoona maranau.

<sup>3</sup> Pauroofa Kirisa maqa maaqaindari sipaki akaramafufanoo Asia maqa maaqai firaree qufaqa Yuda maqannaasa irisee mina arirarufanoo moo fannoo iriseenoo Pauroona qimamufanoo rufiaseenoo kafaa Maseedoonia maqa maaqakinai fiqummakufanoo Tarooasa maqusai firaree qinau.

<sup>4</sup> Soopateerafa Piriqusana amaaku Beereea maqusaindaraafa Pauroona faqa finau. Aristarakusafa faqa Seekundurafa faqa Maseedoonia maqan-naaqanda Pauroona faqa fiqau. Deerabee maqusaindaraafa Kaiusafa faqa finau. Tikikusafa faqa Tarooqimufafa faqa Asia maqannaqanda Timootifa faqa minamusa Pauroona faqa fiqau.

<sup>5</sup> Minamusa indaaru sipaki akaramafufaqa Tarooasa maqusai oonu marida maasara qifeesimariqau.

<sup>6</sup> Maasa Firipi maqusai ooruku siai feemu qoomaqamasee namammaree Tarooasa maqusai Pauroona faqa fiqiafana. Maasa moodaannai qisauku afuru sipaki faiqee fifiufaqa Tarooasa maqusai oonuree maasara qifeesi-marusa oonu paquriqiafana. Miqoo Tarooasa maqusai maasa aiqamausa qisauku dinni taikasee dinni oonu qaara marasee faasaana mariqiafana.

### *Pauroofa Tarooasa maqusai eendaki Yisuna ufa qimannimimarufanoo kumaaraa aqufinau.*

<sup>7-8</sup> Saririqa eendaki maasa faqa Yisuna ufa irimarusa aiqamausa faqa moo maaqaki suqufiqa Yisunara afaarurira narana naqau. Pauroofa kananaana fuanee qu eendanaki kisaqasaa qimannimimarinau. Mi maqanaki tida moo maqasaa marinoo kafaa tida moo sandaaqai auquqoofa maridanoo efeeda mirinni akinoo maridanoo. Mi maqanaki suqi-marunaki eendaki qooma moomoo qeemarinau.

<sup>9</sup> Faiqí anaasee sandaaqai tidasaa suqimarufanoo Pauroofa mi eenda amuqusanaki ufa kisaaqasaa qimarufanoo kumaaraa moo fannoo uinduaqa parangasaa akaramafinoo ooqufaaqeeida ufa irimarinau. Mi kumaaraana auqu Eeutikusafa marinau. Pauroofa kisaaqasaa ufa qimarufanoo Eeutikusafa afu aunduarufanoo kaaqa faifinoo sia ufa iridanoo uinduaqasaaqari aunduarumakufanoo saamurinoo maqasaa pautaqinoo aqufinau. Aqufufaqa misa ooqu mina uqeerasee qafoofanoo doo kaaqa kuqinoo marinau.

<sup>10</sup> Pauroofa ooqurama mi kumaaraana amuaaqa aakufufanoo oonumafi kaqaramma qumareenoo qinau sia qisee qufoo qiaqa kaqi maridanoo.

<sup>11-12</sup> Miqi qimasoofaqa misa qumurandee ooruree Yisunara afaaruruma naqau. Afaaruruma namasoofofanoo Pauroofa kafaa qimanniminoo fifufanoo iqaqoofanoo quqasee Asoosaa maqusai maqamau finau. Fufaqa misa mi kumaaraana doo kasi marufaqa afiqamaree maaqaki munu quqasoofanoo misa nifaaqa asasinoo amiqi amiqinau.

*Pauroofa Efeesusa maqusanaasa naaroofofaq aniroofanoo naamuaqinau.*

<sup>13</sup> Maasa Pauroona faqa nimarusa Pauroona mi maqusanai aiseeqa faasai sipaki akaramafifaqa Tarooasa maqusaindari Asoosaa maqusai nammari amuaqumau fiqakifaqa miqoo oonureeqa Pauroona afiqarara fiqummakufaqa fiqiafana. Pauroofa naríara faiqí anaasee qimannimisee kananaana maqamau Asoosaa maqusa oonuree inni faqa sipaki fuanauranoo maasara qimasoofaqa maasa miqiqau.

<sup>14</sup> Maasa sipa fannoo Asoosaa maqusai oonuroofaqa Pauroona fi afiqeeqa Mitireena maqusai fiqiafana.

<sup>15</sup> Miqooqari findimeeqee sipaki fifiufaqa kananaana Kioosa maqusai oonu raqiafana. Oonu miqoo mariqa quqaseeqa kafaa eendaki sipaki fifiufaqa kananaana Samoosa maqusai oonu raqiafana. Doo miqooqari fiqaree eendaki sipaki fifiufaqa kananaana Mireetusa maqusai oonu raqiafana.

<sup>16</sup> Pauroofa sia Asia maqa maaqai kisaaqasaa kasooiraree qinau. Sia Efeesusa maqusai kasooqianee qimasee fiqaree Yeerusareenni kaqi kaqi firaree qimasee miqoo Peendeekoosa qoomaqa nararee qimasee kaqi fiqarararee qinau.

*Pauroofa Efeesusa maqannaasa naamua qufa.*

<sup>17</sup> Sipa fannoo Mireetusa maqusai oonuroofanoo Pauroofa moo fasiqasaa ufa quqaseenoo anee maqamau oonuree Efeesusa maqusanaasa Yisuna ufa irimariasaa qini qikaqaafasaaakirausa rakisirausa mai qumu Mireetusa maqusai qumu irisaifaqa fuanauree qufanoo finau.

<sup>18-19</sup> Efeesusa maqusanaasa mi ufana iriseeqa Mireetusa maqusai ooquroofanoo Pauroofa maaqi qimasee qimanniminoo qinau.

Ooqai indaaruu qinee Asia maqa maaqai oosana arasaafannaqooqari innee qini oosana qafeemarusaa mariafanoo qinee reendeenamandee inniki Anutuna saika faiqi maridaqa inniki saikimariqiafana. Yuda maqannaasa misa qini qimaarusiranannai qikiraqarana faqa daukunu rarana faqa inniki saiki mariafannanara qini qimimariqau.

<sup>20</sup> Qinee inniqa maaqakiaqa faqa maqusa qambaana faqa Yisunara qimannimi mariafanausa maridaqa. Qimannimidaqa sia moo dadaaqira ufa qeeqa daundurui sia kaqi maridanoo aiqama qimannimiqiafana.

<sup>21</sup> Qinee Yuda maqannaasa faqa aanaamuru faqa amanamana kai doori runusee qimannimimariqiafana. Inneeqa mandainainara rufiasee quandakinaqa Anutufinnai noori ubeekamaseeqa Karaambaiqa Yisuna asauku

mundirana saqarikiaqa. Miqi qimasee aauqimannimaqee mariqiafana. Innee minara faqa irimariasa mariafanoo.

<sup>22</sup> Doo maqee qinee Yeerusareenni oorufidaqa nana ainainee qiniki kambigaannoo fee, sia qinee mina iridaqa.

<sup>23</sup> Qinee maqusa maqusa nimarunanoo naaquqara maraquna fannoo miqooqaraasa qimannimisoofaqa misa quandaki qini qimaqimufaqa. Anee Yeerusareenni ooru rainaqa rumbarana faqa qini qifaaqai ifitiqnarana faqa qimifaranoo fee qimarinau.

<sup>24</sup> Qinee minara iriseeqa qeeqa mariranara fifau ainainee qimaseeqa Karaambaiga Yisufa qimu saikanara mina taikarara kai kuqaa anoonee qidaqa qeeqa mariranara siamma iridaqa. Anutuna afaarira amiqira fasaasa ufa faiqi anaasee kooroomannimirana mina kai Yisufa qimu saikafa maridanoo.

<sup>25</sup> Qinee innikiaqa Anutuna ququsaki marira firaanara qimannimiqa niniaafanausa marida. Maqee sia innee kafaa qini doori qiqafeefaranoo.

<sup>26</sup> Doo qinee maqee maa suaninasaa doori runusee inni qimannimidaqa. Innikiqari moo fannoo Yisuna ufara dapikinafa narindikai mariannoo sia qinindi.

<sup>27</sup> Anutuna irirana aiqama uqanna qimannimiseeqa sia kaqikaana qeeqa qumareeqa aiqama nimiseeqa.

<sup>28</sup> Innee faiqi anaasee Yisuna ufa iri mariasasaa rakisimariasa mariafanoo. Innee asumu aandauro fooqana rakisimariasa mariafanoo Innee inneeqa marirana amiqimasee rakisiinaqa inneeqa asumu firira aandauro foora amiqimasee faiqi anaasee rakisiaqa. Anutuna naaquqara andeeqara maraquna fannoo inni nisaukuki rakisirana quqaranara amiqimasee rakisiaqa. Anutufa narí amaaku uqanna fidikannai maqee maa maqanasaa adiasenoo minannai Yisuna ufa irimariasa feefaurummaseenoo doo narindikinoo, innee mi asumu aandauna firidaqa reendeenamandee rakisiaqa.

<sup>29</sup> Qinee fuanaqa kaasau fainiara foora kaaqa afaidee mariasa aniree asumu aandauro sia rauqi nimaqeeefaranoo kaqi naruneeefaranoo.

<sup>30</sup> Inneeqa rakisirausakinaana akaqausa unnufa qimasee inneeqa nikaqaafasaa mareeqee kaqirunna ubeekeefaara.

<sup>31</sup> Innee amiqimasee mi ainainnara rakisiaqa. Qinee qaaramoo aukuaana faasaana eendaki daukunu reemarufaqa inni aiqama amiqimasee naamua qimariafanausa maridaqa.

<sup>32</sup> Doo qinee maqee Anutuna asaukuki mina afaarira ufaki mara inni quqeeqa. Mi ufana afeeka fannoo amana innisaa rakisinnimaqaidanoo afeekaikirana nimiseenoo inni mareeqeenoo Yisunaindikiqa mariasaki misa saimbaqa ookaamaseenoo Yisufa misa nimira saqama qumiasana mirinni innaarunai inni faqa misa faqa nimiannoo.

<sup>33</sup> Qinee inniki maridaqa sia qinee moona amiqira qamunnafee siruaa fee akaqainainafee sia qini qimuqusimarusa maridaqa.

<sup>34</sup> Qinee maa qeeqa qisaukunnai ainaina masaidaqa narana mareemaria munnimmana marasaidaqa qiqa faqa nusa rakisinnimaqaidafa maasa sia innindi maraqiafana. Innee minara amiqimasee irimarifanoo.

<sup>35</sup> Qinee unandee kadaapiriranannai mandaikimarusa amiqi amiqiafana Yisufa minara maqi qinau. Amiqira اساسيرافا sia ainaina maree mari-anakifau maridanoofau. Ainaina dadaaqirana nimiranaki anoona اساسيرافا minaki maridanoo. Innee sia aunuaqa moosa dadaaqirara kai iaqa.

<sup>36</sup> Pauroofa mi ufana qimanniminoo maqasaa niqoori saunaraaqee qufaqa aiqamausa miqimafufanoo Anutunara innaaru qinau.

<sup>37</sup> Innaaru qimasoofofa aiqamausa ikiraqeeqa Pauroona oonumafi kaqaramma qumareeqa amooqaqau.

<sup>38</sup> Pauroofa sia qini kafaa qiqafeefaree qunara firaqoo noori kandeeqa ikiraqaqau. Misa miqidaqa Pauroona afiqeeqeeqa sipaki quqaqau.

## 21

### *Pauroofa Mireetusa maqusaindari quqasee Yeerusareenni finau.*

<sup>1</sup> Pauroofa maasa faqa sipaki akaramafufaqa maasa Efeesusa maqannaasara nimudaoqidaqa nimandamaseeqa doo mafi rakeemma quqasee sipaki fiqiafana. Maasa andeeqasee fifiufaqa Koosa maqusai oonu kasoommasee miqoo faiqeeqa. Iqaqoofanoo kananaana kafaa fifiufaqa Roodeesa maqa maaqai oonuree kaqi fiqareeqa Patara maqusai fiqiafana.

<sup>2</sup> Patara maqusai maasa sipa moo paqurimasee Fooenisia fimaru sipana paqurimasee minaki akaramafi fiqau.

<sup>3-4</sup> Patara maqusaindari fifiufaqa Sipurusa afuma qafamaseeqa mina aikundanai fiaikateeqa andeeqasee Siria maqa maaqai fiqiafana. Siria maqa maaqai fidaqa misa maa ummaara ainainna Tiree maqusai quqaqee quna fidaqa doo mi Tiree maqusana paqurimasee miqoo kasooiqau. Miqoo sipa maree fu ummarana minakinaana mareeqee maqasaa quqemaru-faqa maasa Tiree maqusai Yisuna ufa irimarusara randasee paqurimasee amaana moodaa misa faqa mariqia. Misa faqa marufaqa miqooqaraasa maraquna fannoo qimannimufaqa Pauroonara sia Yeerusareenni ooru fuannee qimariqau.

<sup>5-6</sup> Doo misa faqa marikiqa findifi sipaki aniafanaqa faiqi anaasee faqa nari faiqi namufaqa moomosa aniree ooruku nammari afainni oondaanisaa niqoori saunarafufaqa innaaru qimasoofofa misa niman-damaseeqa sipaki akaramafufaqa misa nari maqusai ooru fiqau.

<sup>7</sup> Sipaki Tiree maqusaindari maasa Tooreemaisa maqusai oonu raqiafana. Miqoo oonuree Yisuna ufa irimarusa miqoo marusa niqafamasee moodaa faasaana misa faqa mariqiafana.

<sup>8</sup> Miqooqari sipaki fiqa kananaana Seesareea maqusai oonu raqiafana. Oonureeqa Firipina maaqa maru qaannai ooru mina faqa mariqiafana. Firipifa Yisuna fasaasa qimanniminoo nufa marinau. Ooqai Yeerusareenni marufaqa niqiqoo fasiqausaki maridanoo mina mareeqee quqasoofanoo qisauku dinni taikasee dinni ani qaara marasee marusaki maridanoo munnimmaina raina nimimarufaqa mariufa Firipifa marinau.

<sup>9</sup> Firipina araamuna qaara faqa qaara faqa maanaaqa mariqau. Anutuna maraquna fannoo mi manaqausa naakufufaqa Anutuna ufa faiqi anaasee qimannimirana akoofasaikiqa maridaqa qimannimimariqau.

<sup>10</sup> Maasa Firipina faqa qaaramoo faasaana mariafananoo Yudeeaa tamummaqara fasiqa moo fannoo mina auqu Akabusafa Yudeeaa maqa maaqaindari qumuranau.

<sup>11</sup> Mifa maasunnai anireenoo Pauroona pikapandauru ani qumareenoo minannai nari aiku asauku kukuqamma rumbaseenoo qinau. Anutuna naaquqara maraquna fannoo maaqi qimasee qidanoo. Maa pikapana akoofa Yeerusareenni ooru rainaqa maaqimmasee rumbeeqee aanaa-muru nimifaranoo.

<sup>12</sup> Maasa mi ufana iriseeqa maasa aiqama miqoo mariafanausa afeekaikamaseeqa sia uqanna Yeerusareenni oorufuani arifaranoo fee qiqiafana.

<sup>13</sup> Pauroofa mi ufana iriseenoo qinau. Innee nanaree miqimasee iki-raqaidee miqi qiafanoo qini qimuqusa mandaikamma qimaqaidee. Qinee Yeerusareenni ooru raanaqa Karaambaiqa Yisunara qini rumberana faqa qini darirana faqa doo qinee sia rufiidaqa minara deedaqamma uqirausa nidaqa.

<sup>14</sup> Pauroofa miqi qimasofaqa maasa qaooqirana minniseeqa maasa faqa Anutuna iriramau kai fidaqa sia ititaanaura sai kai fuaniffee qiqiafana.

<sup>15</sup> Maasa miqoo Seesareea maqusai kaqikaqoo mariqa maasa qeeqa ainaina deedaqamamaree Yeerusareenni maqamau ooru fiqiafana.

<sup>16</sup> Seesareea maqusaindari maasa qikaqaafasaa kirausa akaqausa maasa faqa ooru fiqau. Misa maasa ooruree marianna maqana uqaqifiqarara maasa faqa ooru fiqau. Maasa Masoona maaqaki marifaree qiqau. Masoonafa ooqai indaaru Yisuna ufa irimarufa marufaqa Sipurusa maqusaindaraafa marinou.

*Pauroofa Yeerusaree maqusai maridanoo Yameesana faqa ufa qinau.*

<sup>17</sup> Maasa Yeerusareenni ooruraafannanoo Yisuna aiku asauku qumu amiqi amiqimandee qumu qifiqee ooru fiqau.

<sup>18-19</sup> Maasa miqoo ooru faiqaafananoo iqaqoofanoo Pauroofa Yameesana qafarara finau. Yisuna ufa irimarusa aiqama miqoo marufanoo Pauroofa nimandamaseenoo nari aanaamuru maaqa maaqa nimarufanoo Anutufa nari Pauroonannai aiqama ainaina auqeeunara qimannimainau.

<sup>20</sup> Misa aiqamausa Pauroona ufa iriseeqa Anutunara aiqamausa dufi dufi qimasee asasiqau. Asamasee Pauroona qimamiqa qiqau. Oo maasa ati, maaqoo Yuda maqannaasa Yeerusareenni mariasa misa fasaasa ufa qimamianaura. Yuda maqannaasa moomoo tauseenna doo Yeerusareenniara ridaqa. Misa Mooseena sandufasaa kaaqa minara faqa Yisunara faqa ridaqa. (Yuda maqannaasa Mooseena sandufa iridaqa maasa fainanduqirane qidaqa.)

<sup>21-22</sup> Pauroo misa aniara maaqi qidaqa, anee aanaamuru maqusa maqusa nidana Yuda maqanna minakiaqa mariasauqa anee misara Mooseena sandufa minniseeqa maasa fainanduqirana minnisaaqee qimariannanara Yuda maqanna oosana minnisaaqee qidanoommifoo qidaqiafaqa maasa iridaqa. Aniara Yeerusareenni aniifoo qifaqa misa aniara iriseeqa aanoo qifaranoo.

<sup>23</sup> Minara iriseeqa maasa qimamiannaqoo kai fua. Maaqoo qaara faqa qaara faqa fasiqa maridaqa. Misa maasa Yuda maqanna oosana marasee doo qima afeekaikamasee nikiqa maqa namufaqa indufu aqiranara nisauku uqeeraseeqa Anutuna afusaa qima afeekaikamandee maridaqa.

<sup>24</sup> Misa firaa amaana maqaki keeqafi nari aanaamuru mandainaina nipatasaa marina rukaseenana anee misa faqa keeqafi aneenaindi faqa rukasainanoo Anutuna afusaa anukanoo marinnaranoo. Findaukamasee anee aneenna munnimma faqa misa munnimma faqa aqua. Aqusaifana anee minamusa faqa nari nikiqa asausi maqanamu faqa indufu aquaqa. Miqi masainaqa aiqamausa ani qafamaseeqa anee Mooseena sandufa rukiarana aniara qunara unna qiaafoo qiaqeera. Misa aniara kuqaa Mooseena sandufamau fimarifa maridanoo qiaqeera ani aruannee qinausa sia ani arifara.



<sup>25</sup> Yisuna ufa irimarusa uriqararawsa Yameesana maaqaki Pauroonara qimaseeqa maaqi qiqau. Maasa aanaamuruqa mariasa Yisuna aiku asauku kamambuasa pasa akara rumasee maaqi qimasee qimannimiqia. Innee narana moo unna anutunaree afaannaree misara dufi dufi qimariana mina minnisaaga. Aandau fidika faqa sia naaga. Ufaanaki arira aandau fidikana qusinoo marina mina faqa minnisaaga faiqi anaasee nari ummuari nari ummuarimariana faqa minnisaaga.

<sup>26</sup> Pauroofa misa ufa iriseenoo qaara faqa qaara faqa fasiqa namu nifiqamareenoo iqaqoofanoo kananaana amaana maqaki keeqafinoo misa saimbaqa Mooseena sandufa andeeqasee finoo aanaamuru mandainaina nari apatasaa maruna rukanau. Miqimaseenoo Pauroofa amaana maqaki keeqafinoo Anutuna aanaiqikirawsa qimanniminai. Qisauku moodaanai taikasee dinni ani qaaraqanda marasee faasaana maasa qifaaqasaa mandainaina anukee mariana. Mina maariqoo mina taikasaanaga mina maariqoo miqoo innee aanaiqikirawsa aandau aruseeqa Anutunara tatufirana suqafanoo maasa rukasaunnana taikaani.

*Pauroofa amaana maqaki Yeerusareenni marufaqa qumaree arirariqau.*

<sup>27</sup> Pauroofa mi fasiqa namusa faqa amaana maqaki dinni qisauku taikasee dinni ani qaara marasee faasaana amaana maqaki marinoo taikooqookari Asia maqasaa Yuda maqanna marusa amaana maqaki Pauroona qafamasee aiqamausa nirana fundakuseeqa faaqa fuisee qiqa Pauroona kari qufaqa aniqumaraseeqa qiqau.

<sup>28</sup> Isaraee maqanna fasiqauqa anidadaaqiaqa. Maa fasiqafa maaqa maaqa maqusa maqusa nidanoo unnaqi noo nifa maridanoo. Isaraee maqannaara manda ufa qimarifa, Mooseena sandufara qaoo qimarifa maa amaana maqanara faqa ufa manda qimarifa maridanoo. Doo mifa magee aanaamuru maree maa amaana maqanaki mini quqasaifanoo doo maa amaana maqafa putaa inoo maridanoo.

<sup>29</sup> Misa Efeesusaa maqanna aanaamuru fasiqa Tarooifimusana Pauroona faqa madaanai maqusai marufaqa qafamasee mina faqa amaana maqaki mari ifoo qimasee sia qafarainni faaqa rumasee Pauroona arirara qiqau.

<sup>30</sup> Mi ufafa amaana maqakiqari radiqifufanoo dinni dinni daraaninai. Aiqa dindari dindari moodaanaki anireeqa Pauroona amaana maqakiqari qumaree maqamau rarisameeqee kooqinni aqusoofaqa amaana maqasaa aanaiqikirawsa amaana maqaki mandaikiandoo qimasee kaqi kaqi ufaqa amaana maqa kooqi ititasaqau. Faiqi anaasee moomoosa usufufaqa Pauroona saamu uqafiqee mariqau. Kuqa aruanee qimasaida miqi mariqau.

<sup>31-32</sup> Moo fannoo sandee oonureenoo Roomma maqanna saideena qimaminoo qinau Yeerusaree maqannaasa aiqama suqiqa tinoorirafa firaafa maridanoo fee qimasoofanoo Saideena fannoo nari sundiauga namufaqa sandamaqaraasinoo misa usi marunakina aniramasoofaqa Pauroona ariuna minnisee nariara kai rakeeqau.

<sup>33-34</sup> Saideena fannoo Pauroofuqoo anireenoo ani mina qumaraseenoo nari sundiara qaara sainandannai rumbaanee qimaseenoo ariusa iramirinai. Maa fasiqafa nana ainaina mandainainee maraqafagee innee arii fee qufaqa moo fannoo moo ufa qufanoo moo fannoo moo ufa qufanoo Roomma maqanna Saideena dindari dindari ufa fifau faafau ufa kai qufanoo Saideena fannoo sia ufa anoona irinoo Pauroona mareenoo nari ququsaki munu quqasoofanoo marinai.

<sup>35-36</sup> Roomma maqannaasundiaufa Pauroona afigee fimarufaqa Yuda maqannaasa aanoomaseeqa Pauroona kooqi aaqa ooruroofaqa aruanneerufaqa sundiaufa mina aindusueeqeeqa uqereeqeeqa maarinni ququsa qambaana quqaaqau. Faiqi anaasee sandee fidaqa Pauroonara doo kuqarua kuqarua qimariqau.

*Pauroofa nari ufannai nari afaaqasaa ititanau.*

<sup>37-38</sup> Sundiaufa nari ququsaki quqaanneerufanoo Pauroofa Saideena irammirino qinau. Amanee faiqi anaasee qimannimianauree qufanoo Saideena fannoo tautumaseenoo qinau. Anee Kirisa maqannaasa ufa irimariana fee. Qinee ooqai aniara Isipa maqannaafa rakirana uqereseenoo 4,000 fasiqauqa Kaammanna faqa ufa raine marusa nifiqee munu aadana maqa maaqai faiqi sia marunnai uqoona fee maridane.

Miqi qufanoo Pauroofa qaoo qimasee qinau.

<sup>39</sup> Qinee Yuda maqannaas maridaqa. Qinee Sirisia maqa maaqaki Tarasusa maqusai uriqarara maqusai kambiqarasa maridaqa. Amanee qinee faiqi anaasee qimannimia.

<sup>40</sup> Saideena fannoo mina iriseenoo eedoo qufanoo Pauroofa kooqi irirasusaa akaramafufanoo asaukunnai misa ufa quna qaoo qimasoo faqa misa mina iriseeqa kasoomafufanoo Pauroofa nari Yuda maqannaasa ufakiqari qimannimino qinau.

## 22

<sup>1</sup> Pauroofa nari maqannaasa qimannidanoo nari afaaqasaa ititeenoo maaqi qimasee qimannimino. Oo maa fasiqausa qini qikaqaafasaa qini qikausamara. Innee qini ufa irisai faqa qeeqa irirana nimia.

<sup>2</sup> Qaara auqu, moo auqu Heeburu maqannaas ufa moo auqu Yuda maqannaas ufa marinau. Misa Pauroonara Heeburu maqannaas ufa nari ufa qidaqino fee qimasee aiqama dai qimafiqau. Miqimambufanoo Pauroofa qimannimino qinau.

<sup>3</sup> Qinee Yuda maqannaas fasiqa maridaqa Sirisia maqa maaqaki Tarasusa maqusai kambiqaa fanausa maridaqa. Ooqai qinee kumaaraasaa maridaqa maa maqusanaki Yeerusaree maqusaki Kamarieerana sukuraki kisaaqasaa mariaafanausa maridaqa. Qinee Kamarieerana sukuraki maridaqa maasa qikeeku qikaaku sandufa amiqimasee aiqama iriaraasiafanausa maridaqa. Innee maqee Anutunara afeekaikamandee minara rimariafaqa qinee maqee nindafaidafa. Qinee inni naanna reereea fanausa maridaqa.

<sup>4</sup> Ooqai Yisunasaa atooqeemarusakuqa kai nari mariafanausa maridaqa. Qinee faiqi faqa anaasee faqa rumbasee karabusaki aqimarifanausa maridaqa.

<sup>5</sup> Amaana maqasaa aanaiqikirausa misa uriqararafa mifa qini ufa anoona iridanoo. Amaana maqa kansoorauqa faqa qini ufara kuqaa fee qifaranoo. Misa kai pasa akara rumasee Damasakusa maqusai maria Yuda maqannaasa nimianne qufaqa qinee mi pasana maramaree Damasakusa maqusai ooru Yisuna ufa irimarusa rumbamaree nifiqee muqu Yeerusareenni quqaaneera ooru fuafanausa maridaqa.

*Pauroofa nari Yisuna qafoonara qimannimino.*

*(NiFa 9:1-19; 26:12-18)*

<sup>6-9</sup> Qinee mi pasana mara maree Damasakusa maqusa adeedi ramasaafananoo suani qambaana marufanoo innaarunaindari idauru kaaqa qarafa qumureenoo qini fiqumma aiqama rafaqaqafuqisoo faqa qinee maqasaa aqufiqiafana. Innaarunaindari ufa moo qufaqa iriqia. Sauroo

Sauroo anee nanaree qini dariraridanee qufaqa qinee Oo Karaambaiqa anee yafee qiafananoo mifa qinau. Qinee Yisusa Nasareeteendaraasa maridaqa. Anee darunausa maridaqa. Mina ufa fannoo miqi qimasee qini qimaqimufaqa qini faqa fimarusa kaaqa qarana qafaqau ufa sia iriqau.

<sup>10</sup> Qinee mina irammiriqa qiqiafana Oo Karaambaiqa qinee naqi fee ianauree qiafananoo Karaambaiqa innaarunaindari qinau. Anee findifinana Damasakusa maqusaki fua. Miqoo oonu rainanoo faiqi moo fannoo Anutufa qinara ani qimamiani.

<sup>11</sup> Kaaqa qarana fannoo qini qifu dimbasoofaqa qini faqa fusa qisauku qumaroofaqa Damasakusa maqusai fiqiafana.

<sup>12</sup> Damasakusa maqusaki faiqi moo auqu Ananiasa Mooseena sandufamau fimarufa Yuda maqanna miqoo marusa minara andeeqara fasiqa fee qimarufa.

<sup>13</sup> Mifa qinee mariafannaqoo anikikiqamambufanoo Oo Sauroo, qini qikaqa, anee afu maqaa, qufanoo kai qifu maqasee mina qafaqiafana.

<sup>14</sup> Maasa qikeeku qikaaku Anutufa aniara rusandeesamumandee aniara mina iriranamau fuanneera mina ainainira faiqi andeeqarana Yisuna qafaanneera mina Yisuna ufa irianeera qinoo.

<sup>15</sup> Pauroo anee Yisuna afunnai qafoonafa mariananoo minara afu qafoonanara aiqamausa qimannimia aaqoo irunnara aiqamausa qimannimia.

<sup>16</sup> Nanaree kaqi maridanee doo findifinana nammari maraa. Yisuna aaramasee irammirinanoo ani mandainaina rukaannoo.

<sup>17-18</sup> Ananiasafa miqi qimasoofaqa qinee Damasakusa maqusaindari maaqoo Yeerusareenni ani maridaqa amaana maqaki innaaru qimarifananoo qifu kai pisipasamandee Karaambaiqa akooqoo qimaqiminoo qinau. Doo kaqi kaqi maa Yeerusaree maqusaindari quqasee moosaa fua. Anee maaqooqaraasa qiniara qimanniminaqa sia irifaqa.

<sup>19</sup> Miqi qimaqoofaqa qinee maaqi qimamiqia. Oo Karaambaiqa qinee ani ufa irimarusa ufa suqira maaqakiaqa keeqafida rarismasee nariisee karabusaki quqee mariafanausa maridaqa. Maaqooqaraasa minara amiqimasee qini oosana iridaqa.

<sup>20</sup> Misa Seeteefeena arimarufaqa qinee faqa miqoo maridaqa dufiaree aridee qimasee arimaru fasiqausa qamunnasaa rakisi mariafanausa maridaqa.

<sup>21</sup> Karaambaiqa qini mi ufana iriseenoo qimaqiminoo qinau. Doo anee findifua maaqooqari aanaamuru nianai mariasaki ani aqiqaidaqa.

<sup>22</sup> Pauroofa Yeerusaree maqannaasa nari saamu uqafiqee marusa qimannimidanoo aanaamuru nuquroofaqa misa mina iriseeqa aanoomaseeqa fifau faafau ufa qiqa faaqa quqasee mi ufana qima rukiaqau. Misa maaqi qiqau doo maree munusee mina aru aquaqa. Mina marirafa sia amana maridanoo.

<sup>23</sup> Miqi qidaqa Yuda maqannaasa faaqa rumaseeqa niranaqoofaqa nari qamunna qumareeqa minannai rutatidaqa kookoomma afaqeeqee mina aanaamu raqau.

<sup>24</sup> Roomma maqanna kiateenna fannoo nari sundiauqa maaqi qimasee qimannimianu, innee maa fasiqana inneeqa ququsaki quqasee uaiqa samu ariisaifanoo nari mandainaina kooroo iani. Yuda maqanna faaqrana oosana kooroo iani.

(Roomma maqannaasa maqa maaqai kambiqoosa mi ququsanaki marunausee qimarunara sia moo sundia fee firisuaiqa fee amana kai rumbarana, arirana sia amana mina rumbeefaree arifaree. Moo maqannaasa Roomma maqannaasa rakisinnimaqee mariasa kaqi rumbeefaree

kaqi arifaree. Moo maqannaafa firaa feefaurumasee Roomma maqannaasa ququsaki keeqafifanoo mi sandufana mina afaaqasaa ititaannoo.)

<sup>25</sup> Sundiauga Pauroona rumbasoofanoo uiaqasamu arirara deedaq-ufanoo Pauroofa kuboora qimaminoo qinau Innee amanee Roomma maqanna ququsakinaa fasiqa arifaree, sia amana arifaree kootaki qini ufa sia amiqimasee rainasee iriafanoo kaqi fifau darirari mariafanoo.

<sup>26-27</sup> Kuboora fannoo iriseenoo Saideena oonu qimamidanoo qinau. Anee sia mi fasiqana arua. Roomma maqanna ququsakinaafa maridanoo, qufanoo, Saideena iriseenoo rufieenoo Pauroo finnai oonuree iranau. Kuqaa fee anee Roomma maqanna ququsakinaa fee maridane. Pauroofa eedoo qinau.

<sup>28</sup> Saideena kaifaa qinau. Qinee firaa munnimma aquseeqa Rooma maqanna ququsaki fuafanausa maridaqee qufanoo Pauroofa qinau. Sia qinee munnimma aquafanausa maridaqa qini qikoofa minaki marunara qinee Roomma maqanna ququsaki kambiqaarusa maridaqa.

<sup>29</sup> Sundiauga mi ufana iriseeqa nisauku raqandaa mamaraga. Saideena faqa mi ufana iriseenoo Oo qinee Roomma maqanna sandufa rukiasee sia ufa irirainni sainandannai rumbaafanausee qimasee qini uriqararafa minara irisee qini faqa daruandoo qimasee nariara rufianau.

*Pauroofa Yuda maqannaasa uriqararawsa nifusaa kikiqinau.*

<sup>30</sup> Saideena fannoo Yuda maqannaasa firaaqoo amosau maqaranara oosana irianee qimasee iqaqoofanoo kananaana Pauroona sainanda idukuseenoo amaana maqa aanaiqiki marusa uriqararawsa faqa misa kansoorauqa faqa naarama quqaseenoo Pauroona mareeqee misa noorinni quqanau.

## 23

<sup>1</sup> Saideena fannoo Pauroona mareeqeenoo misaki quqasoofanoo misa noori andeeqasee nindafamasee qimannimminau. Qini maqooqooqari sia mandainaina fannoo qini qumaraidanoo Anutuna afusaa maridaqa.

<sup>2</sup> Aanaiqikirausa misa uriqararafa Ananiasafa mina iriseenoo Pauroona aaga marusara nisaukusamu oori itairi amifanoo unna ufa taikaani qufanoo aaga mariufa oori rukaminau.

<sup>3</sup> Arufanoo Pauroofa Ananiasana kaffaa qimaminau. Anutufa ani faqa aruannoo anee qaaraiki marianafa mariananoo. Anee qini ufa iriseenana Mooseena sandufa qaannai qini qimani mariananoo Mooseena sandufa faiqi sia ufa irirai sia aruannee qimarifana anee Mooseena sandufa ammuqundari fidana mi fasiqanara qini daruannee qimariananoo.

<sup>4</sup> Pauroofa miqi qimasooofanoo Pauroona aaga marusa qiqau. Anee nanaree Anutuna aanaiqikirausa misa uriqararana manda ufa qimamidane qufanoo Pauroofa qinau.

<sup>5</sup> Oo qini qikaqaafasaa mifa aanaiqikirausa uriqararanara siamma iridaqa. Tamummaqara akara fannoo maqi qinoo maridanoo Innee sia inneeqa maqannaasa uriqararawsa manda ufa qimannimaqaaqa.

<sup>6</sup> Miqi qimasee qimannimidanoo miqoo suqiisa nindafaidanoo narikai oonumafi irinau, maa suqimariasa qaarasaa fimariasa nariara nariara rairai qimariaqanda, dinni mariasa Farisai amaana ufa qimariasa maridaqa dinni mariasa Sadikai amaana ufa qimariasa mariafanoo. Minara iriseenoo kaifaa firaa kari qimanniminoo qinau. Oo qini qikaqaafasaa qini qikoofa Farisai amaana ufa qimarufa marifaqa qinee faqa minaki

qidaqa. Faiqí moo kuqiranaki findifunara qinee minara kai maa kootanaki maridaqa.

<sup>7</sup> Miqi qimasoofaqa Farisai amaana ufa qimarusa faqa Sadikai amaana ufa qimarusa faqa ufa rainaqa.

<sup>8</sup> Sadikai amaana ufa qimarusa sia kuqiraua findifidammiafoo qimarusa qangiroora faqa sia maridanoo fee qimarusa faiqí nimana faqa sia maridanoo fee qimariqau. Farisai amaana ufa qimarusa mi ainainanamunara kuqaa maridanoo fee qimarusa mariqau.

<sup>9</sup> Misa Pauroofa Farisai amaana qunara iriseeqa suqidaqa miqoo kai firaqoo narí aqi narí aqimariqau. Farisai amaana ufa qimarusa sandufa akoofasauqa findifiqa afeekaikamandee maaqi qiqau. Maasa sia moo mandainaina maa fasiqa anasaa marifaqa paquriqa. Qangiroofee amanafee qimamifanoo fee maaqi qidanoo fee.

<sup>10</sup> Miqi qimasoofaqa Sadikai amaana ufa qimarusa faqa Farisai amaana ufa qimarusa faqa firaqoo ufa rainarafa kambiqanau. Miqi marufanoo Roomma maqanna Saideena fannoo narí sundiauga qimannimino, innee Pauroona mareeqee inneeqa ququsaki quqasaaqa, misa mina qambaana rammisiseefaara, qufaqa misa nári sundia ququsaki quqasee rakisimariqau.

<sup>11</sup> Miqi qimasoofanoo mi eendanaki Karaambaiqa qangiroo moo fannoo qumureenoo Pauroona oorisa akooqoo kikiqinoo maridanoo ufa qimaminoo qinau. Pauroo sia rufiaa, paasosia, anee maaqoo Yeerusareenni qiniara kooroo qianandee Roomma maqusai miqikai innaranoo. Qangiroo miqi qimaseenoo Pauroona qimamisoofanoo taikanau.

*Yuda maqanna akaqausa Pauroona arirara ueeqoo ufana.*

<sup>12</sup> Iqaqoo kananaana Yuda maqanna akaqausa Pauroona arira ufa narí qimami narí qimami suqiqau. Ufa andeeqaseeqa qima afeekaikamasee nammari faqa narana faqa auramasee Pauroona aruanee qiqau. Aruseeqa mikari kai narana nammari naanee qiqau.

<sup>13</sup> Qaara fasiqa niku nisauku taikasee Yuda maqanna fasiqauqa kai narana auramasee Pauroona ariraree qiqau.

<sup>14</sup> Auramaseeqa misa nári amaana maqa aanaiqikirausa faqa uriqaraura faqa unnai oonuree qimannimiqa qiqau. Maasa narana auramasee Pauroona aruseeqa innaaqiana narana naanaurano.

<sup>15</sup> Innee faqa kansoorauqa faqa Roomma maqanna Saideena maaqi qimasee uaqee iaqa anee Pauroona mara maree kansoorauqa maaqaki quqasainaqa maasa Yuda maqannaasa amiqimasee Pauroona oosana iri-anaura. Innee miqi qifanoo Saideena fannoo afiqee finaqa maasa aanai maara maqaseeqa Pauroona aruanaura.

<sup>16</sup> Miqi qimarufanoo Pauroona anauqi mina auna faiqi fannoo qumee iriseenoo sundia ququsaki keeqafinoo Pauroona qimaminau.

<sup>17-19</sup> Pauroofa narí arifandinna ufana iriseenoo kuboora qimaminau. Anee maa kumaaraana afiqamaree Saideeninnai munusainano ufa qimamiani. Miqi qufanoo kuboora fannoo afiqeenoo Saideenunnai munu quqaseenoo qinau Pauroofa qiniara maa kumaaraana afiqee munusainano moo ufa qimamianifee qifaqa afiqee anidaqa qufanoo Saideena fannoo mi kumaaraana afiqeenoo umeenni munuseenoo irammirinau. Nana ufaree anidane.

<sup>20</sup> Miqi qufanoo mi kumaaraafa qimaminau. Yuda maqannaasa duna Pauroonara amiqimandee mina ufa oosana iriraree qia. Misa aniara afiqee munu quqararammifoo qidaqa.

<sup>21</sup> Anee sia misa ufa iria, qaara fasiqa niku nisauku taikasee fasiqa aanai maara maqafiqa Pauroona arirara qia. Misa qima afeekaikamandeeqa doo narana auramaseeqa aruseeqa nararee qia. Doo misa maqee deedaqidaqa ani ufaramma afeesida maria.

<sup>22</sup> Saideena fannoo mina iriseenoo maaqi qimasee narí qimaminau. Anee maa ufana qini qimaqimiannanara sia moo qimamia saina anikikai mariani. Miqi qimaseenoo mi saideennafa mi kumaaraana aqiqanau.

*Roomma maqannaa sundia fannoo Pauroona Seesareea maqusai aqiqanau.*

<sup>23-25</sup> Aqiqamaseenoo Saideena fannoo quandakinoo qaara kubooraqanda mara quqaseenoo qimanniminau. Inneeqara maaqimandee sundiaüqa deedaqiaqa. Sundia maqamau fifandinausa qisaukuqara fasiqa niku nisauku taikasee fasiqa (200) minamusa deedaqiaqa. Qoosasaa akaramafi fifandinausa qaaramoo niku nisauku taikasee moo fasiqa asaukuqara taikasee fasiqa (70) faqa qoosauqa faqa deedaqiaqa. Qisaukuqara fasiqa niku nisauku taikasee (200) faqaana faqaasa maqamau fifandinausa faqa deedaqiaqa. Doo maqee eendakina doo Seesareea maqusai Pauroona afigee ooqu fuaqa. Qaaramoo qoosa deedaqiaqa Pauroofa fuaninnana. Innee andeeqasee maasa firaa kiapafa Feerisafa marinnai Seesareea maqusai Pauroona afigee fuaqa. Miqi qimasooafaqa misa mina iriseeqa deedaqiaqa.

<sup>26-28</sup> Miqi qimaseenoo Saideena fannoo Feerisana maaqi qimasee Pauroonara pasaki amaqanau. Oo maasa amiqira kiapafa Feerisafa, Qinee Karadiusasa moo duqu Risiasasa ani amandaidaqa. Yuda maqannaasa maa fasiqana qumaree ariraree qiafaqa qinee minara Roomma maqannaa ququsakinaa fee qimasee ooqu rafiaeeqee qeeqa sundiaüqa ququsaki quqeeqa.

<sup>29</sup> Qinee misa mina amoosau maqaana oosanara randeeqa misa kansoorakina quqasaunanoo sia rumberafa arira ainaina marifaqa Yuda maqannaa narí oosana maridanoo miqianannai kai mina arirara qidaqa.

<sup>30</sup> Misa qumee maara maqasee mina arirara qiafanoo moo fannoo qumee qimaqimifaqa anee ianannai aqiqaidaqa. Qinee mina amoosau maqaasara ani afusaa innee faqa mifa faqa andeeqaaqeeera qidaqa.

<sup>31</sup> Saideena fannoo mi ufana akara rumaseeqa sundiaüqa nimisoofaqa Pauroona afigeeqa qoosasaa akaramafufaqa mi eendanaki Antipatiriasa maqusai ooqu fiqau.

<sup>32</sup> Iqaqoofanoo kananaana nikumau fusa ooqurandee Yeerusareenni uriqau. Qoosasaa fusa Pauroona afigeeqa Seesareea maqusai ooqu fiqau.

<sup>33</sup> Misa Seesareea maqusai ooquree Saideena papiqanamu faqa Pauroona faqa firaa Kiapana amiqau.

<sup>34</sup> Firaa kiapafa mi papiqana asaana rumaseenoo Pauroona irammirinai anee yaindaraa fee qufanoo mifa qinau. Qinee Sirisia maqasaa kambiqaaafanausa maridaqa.

<sup>35</sup> Firaa Kiapafa mi ufana iriseenoo Pauroona qimaminau. Ani amoosau maqaasa qumuraifaqa ani ufa irianaura. Miqi qimaseenoo poorisa qimaminoo qinau. Maa fasiqana mareeqee Eeroodeena firaa maaqaki quqasaifanoo marinaqa eendaki faasaana rakisiaqa.

## 24

*Ananiasafa Seesareea maqusai ooquree Pauroona arirufa qinau.*

<sup>1</sup> Pauroofa moodaannai qisauku namu faasaana narí ufa afeesara marufanoo doo amaana maqa aanaiqikirausa misa uriqararafa Ananiasafa

Yuda maqannaa faiqí firaasa faqa moo fasiqa Roomma maqannaa sandufa faqa ufoosana faqa amiqimasee irimarufa mina auqu Teeraturusafa misa aiqamausa Seesareea maqusai Yeerusaree maqusaindari ooqu fiqau.

<sup>2</sup> Ooqureeqa firaafu kiapana afusaa Pauroona amoosau maqoo ufana qimamiqau. Misa Teeraturusana aaroofanoo firaafu kiapana afusaa kikiqamambinoo maaqi qimasee Pauroonara qinau.

Oo Feerisafa anee idaaqirafa amiqirafa uqanna mariananoo. Anee aneenna iriranannai maasa rakisimariannanara maasa amiqimandee maridaqa. Anee fuka sandufa moomoo quqaidana maasara amiqimasee mariaqeera miqimariananoo.

<sup>3</sup> Maasa maqee maqee ani irirana qumareeqa dufi dufi qidaqa.

<sup>4</sup> Qinee kisaagasaa ufa qiananoo ufa aukuana aiqaraandoorra qusasaa qidaqa. Amanee anee maasa ufa kaqikaana iria.

<sup>5</sup> Maa fasiqana manda oosana fannoo sabeena aada miqirafa maasa raquru qimimarifaqa fataidaqa. Pauroofa aiqama maqusa maqusa fidanoo Yuda maqannaasa nirana fundakinoo nidanoo. Nasaretee maqusanaa fasiqa irirana uriqararafa maridanoo.

<sup>6-7</sup> Sia minara kaifau, maa fasiqafa Pauroofa maasa naaquqara amaana maqa Yeerusareenni putaaifaqa maasa mina qumareeqa maasa sandufannai andeeqee marunanoo Roomma maqannaa Saideena fannoo firaafu aanoo iranannai maasa qisaukukinaana rafieenoo.

<sup>8</sup> Saideena fannoo mina auqu Risiasafa maasara ani afusaara mi kootana andeeqaaqee qifaqa qumu qimamidaqa. Anee maa fasiqana irammirinanoo mifa maasa ufa anoona qiannoo.

<sup>9</sup> Teeraturusafa miqi qufaqa Yuda maqannaasa aiqama kuqaa anoonee qiqau.

*Pauroofa Feerisana oorisaa narí afaagasaa ititanau.*

<sup>10</sup> Firaafu kiapafa Teeraturusana ufa iriseenoo doo Pauroona asaukunnaa aaranau. Doo anee findifi aneenna ufa qia qufanoo Pauroofa findifi Feerisana qimaminoo qinau.

Oo Feerisafa anee kisaagasaa qini maqannaa Yuda maqannaa ufa andeeqee marianafa mariannanara qinee dufi dufi ani afusaa qidaqa.

<sup>11</sup> Innaunni kai qinee Yeerusaree maqusai Anutunara innaaru qiraree qimasee ooru qiafana.

<sup>12</sup> Qinee amaana maqaki sia aanoo ufa moo qimannimiqiafana. Faiqí nirana sia qinee fundakiqiafana. Amaana maqaki fee nári faiqí suqunaki fee sia qinee Yuda maqannaasa nirana fundakunaqa misa qiqafeeaa.

<sup>13</sup> Misa maqee ani mariasa qini qimoosau maqee mariana sia mina anoona paqurimasee kooroo ifana irinnaranoo.

<sup>14</sup> Qinee moodaa ainainara kai kooroomasee ani qimamianaura. Qinee maa fuka aatatamau fidaqa minannaikai maasa qikeeku qikaaku Anutunara innaaru qidaqa. Mi aannara Yuda maqannaasa mi aannara kaqirunna fiaanoo qidaqa qini qimoosau maqaidaqa dariraridaqa. Qinee Mooseena sandufa akara aiqama iridaqa mi mau fidaqa tamummaqara fasiqauqa akara faqa iridaqa mi mau fidaqa.

<sup>15</sup> Maa Yuda maqannaasa faqa qinee faqa maasa moodaa irirana-mau fidaqa kasooqaaqee Anutufa aiqama fasiqauqa andeeqarausa faqa mandaikirausa faqa kuqiranakinaasa faqa mara findifumanniseenoo misa ufa iriannoo.

<sup>16</sup> Qinee Pauroosa Yuda maqannaasa naanna raida moodaa ainainara afeekaikidaqa, Anutuna afusaa faqa faiqí nifusaa faqa aiqama kari

mandoosana maraaqaa imarifaqa eerairidaqa sia mi mandoosanna um-maarafa qini daakuanifeera aufadara maraquna kai aiqamausa nifusaa qini daakuanifeera.

<sup>17-19</sup> Pauroofa Feerisana kaqi qimamidanoo qinau. Qinee moomoo anaa-muru maqusai niniifaqa moomoo aukuana maraseeqa qinee munnimma maramaree Yeerusaree maqusai ooruree qeeqa maqannaasa nimiraree qimasee aandau tatufirana sugasee Anutuna amiraree qimasee amaana maqaki keeqafi mariqiafana. Sia moomoosa faqa mariqia, sia aanoo iranaki mariqia amiqimasee mariafananoo Asia maqannaasa Yuda maqannaasa mi maqanaki qini qiqaqamaseeqa unnaqimasee maa manda oosanna uqeer-aqau. Misa kai mai qumureeqa ani afusaa qini qimoosau maqoo ufana qiaqaana.

<sup>20</sup> Qinee Yeerusaree maqannaasa kansoora nifusaa kikiqiafannana maa qumu mariasa maridaqa qini ufa iriqau. Misa qini manda oosana kooroo iaqaana.

<sup>21</sup> Qinee kansoorauqa nifusaa kikiqamafufaqa moodaa ufa kai qinee qiafanaqa misa qini darirariqau. Kuqiranakiqari findifandiafoo qiafan-nanara qini darirariqau.

<sup>22-23</sup> Feerisafa Yisuna aanara irimarufa maridanoo Pauroona ufa iriseenoo maaqi qimasee qimaminau. Anee kaqi marinanoo Saideena Risiasafa qumurainaga ani ufa andeeqaanaura. Miqi qimaseenoo mi kootana rafaaga finoo Poorisa qimaminoo qinau, Anee Pauroona afiqeeqee rumbaranaki quqasee rakisia. Mina qimaminoo qinau, Anee Pauroona rakisimarinaqa mina aqoondi fee akaqaafasaa fee kaqi anireeqa mina faqa ufa qiaqa narana amiaqa sia qaoo qia.

*Feerisafa faqa narí anaaga Durusira nammarifa faqa Pauroona ufa irufanoo naaquanau.*

<sup>24</sup> Feerisana anaaga mina auqu Durusi nammarifa Yuda maqannaasa anaasee marinau. Qaaramoo faasaana aiqaroofanoo Feerisafa narí aanaaqandiri anireenoo Pauroona aaramasee asauku mundirana Yisuna ufara iroofanoo amiqimandee qimaminau.

<sup>25</sup> Pauroofa faiqi anaasee aiqamausa andeeqasee niroosanara faqa mandoosana fannoo dindari oonu rarisee anirarisee ifaqa minniseeqa maasa qiqa qimanara iriseeqa mi mau kai firanara faqa oonumafi irisee minnisaaninnanara Anutuna koota fraafa marianinnanara faqa qimamimarufanoo Feerisafa narí mandoosana fraanara iriseenoo Anutunara rufi-ammaree qaoo qinau. Saina kaqimarinaqa saika sia marinaqa aniraanana qimaqimia.

<sup>26</sup> Feerisafa Pauroonara narí qumee kai qimirinoo qinau. Pauroofa munnimma qiminaqa idukuanauree qimaseenoo maqee maqee karabusakinaana aaramasaida ufaqimarufanoo Pauroofa sia amufanoo kaqi karabusaki marinau.

<sup>27</sup> Miqi marufanoo qaara aukuana aiqaroofanoo Roomma maqannaasa kiapafa Feerisanara anee moosaa finanoo moo kiapafa ani amaaqa maqaanoo. Feerisafa minara iriseenoo Yuda maqannaasa maaqoo qaraasa qiniara misa niqoondi fee qiaqeera Pauroona narí maaqa uqannakinaana mara maree karabusaki rumbaseenoo quqasee fufanoo fuka kiapafa Poorakiusafa moo auqu Feestusafa mifa anireenoo Pauroona rumbaranaki paqurinau.



## 25

*Fuka kiapafa Feestusafa kafaa Pauroona ufa irinau.*

<sup>1</sup> Fuka kiapafa Feestusafa qaaramoo eenda faigeenoo Seesareea maqusai oori quqarara ooru finau.

<sup>2-3</sup> Yeerusareenni ooru marufaqa amaana maqasaa aanaiqikirausa firaasa faqa Yuda maqannaasa faiqi firaasa faqa Pauroona ufa oosana amoosau maqeeunara qimamiqau. Miqi qimasee maaqi qimasee Feestusana qimamiqau, Oo maasa kiapafa amanee anee Pauroona mareeqee Yeerusareenni quqasainaqa ufa irianauree. Misa aanai maara maqasee aruanneera quandasee miqi qimasee qimamiqau.

<sup>4</sup> Feestusafa misa ufa iriseenoo qinau. Pauroofa Seesareea maqusai karabusaki maridanoo. Qinee qusasaa ooqu fuanaura.

<sup>5</sup> Inni faiqi firaasa qini faqa ooquraifaqa miqookai Pauroona nana mandoosana maraqainaqa misa qifaqa qinee irianauree.

<sup>6-7</sup> Feestusafa miqi qimaseenoo qisaukuqara taikasee afuru faigeenoo doo Seesareea maqusai kaifaa ururandee ooqu finau. Iqaqoofanoo kananaana ufa irimaruna maaqaki keeqafi nari qaindasaa ooqu marifinoo Pauroona aaroofanoo aniroofaqa Yeerusaree maqannaasa Pauroona fiq fiq mambufaqa mandufa uqanna oosana oosana Pauroonara qimasee sia mina anoona paquriqau.

<sup>8</sup> Misa taikoofanoo Pauroofa nari oosanara Feestusana qimaminau. Oo fira kiapafa qinee sia Yuda maqannaasa sandufa rukieeqa. Sia naaquqara amaana maqa putaa manniseeqa maasa Roomma maqanna fira Kiapana sandufa sia rukieeqa.

<sup>9</sup> Feestusafa mina iriseenoo nariara Yuda maqanna aqoondikianee qimaseenoo Pauroona irammirinoo qinau. Amanee anee Yeerusareenni oorureenana Yuda maqanna faqa qini qifusaa misa ani amoosau maqeeaanara andeeqeenaree.

<sup>10-11</sup> Pauroofa mina iriseenoo Feestusana qimaminau. Maa ufa irimaria maqafa sia anindi kai Roomma maqanna firaana ufa irira maqa maaqoo maridanoo mina sandufa maaqoo qidanoo maaqoo andeeqaaqana. Qinee sia Yuda maqanna mandaikamma nisaunasa maridaqa anee mi ufana amiqimasee irimarianoo. Qinee moo sandufa rukiaanaqau moo mandainaina auqeeqau sia qinee kuqiranara rufiaunaqini. Misa qini qimooosau maqara ufa oosana sia maridanoo sia moo fannoo qini mareeqee misa nisaukuki quqaannoo. Qinee Roomma maqusai mari kiapana firaana minauqu Sisaanasaa mina afusaa oonuree qianauree.

<sup>12</sup> Miqi qimasooofanoo Feestusafa quandaki nari ufa irimarusa faqa ufa qi qiseenoo Pauroona qimaminoo qinau. Anee Sisaana afusaa ufa andeeqararee qiananoo. Anee Sisaana afusaa ufa andeeqararee qiannanara, doo qinee aqiqaanana minni finnanoo.

*Karaambaiqa Akaripafa faqa Beeranisa nammarifa faqa Pauroona ufa iriqau.*

(Mi aukuaana Seesareea maqusaindari sipaki akaramafufaqa fifiufaqa Itari maqa maaqai Roomma maqusai fimariqau.)

<sup>13</sup> Ufa taikaseenoo Pauroofa karabusaki maridanoo sipa afeesara marinau. Marikufanoo moo kiapafa nari anasaasandiri fuka kiapana auqu Akaripaafa marufa aninau, mina anasaana auqu Beeranisa nammarifa marinau.

14 Miqanda ani marikufanoo Feestusafa Pauroona ufa oosana oosana qimaminoo qinau.

Indaaru mariu kiapafa Feerisafa maaqoo marufanoo moo fasiqa karabusa marufaqa karabusa rumbaqoofa kaqi maridanoo.

15 Qinee Yeerusareenni oonuraafanaqa amaana maqa aanaiqikirausa misa uriqararawsa faqa faiqí firaasa faqa mi fasiqanara mandufa oosana oosana qimaqimisee mina aruannee qiqau.

16 Qinee mina iriseeqa Roomma maqannaasa sanda sia miqinoo maridanoo. Narí amoosau maqainnanara sia fifau nimianaqa arifara. Maasa Roomma maqannaasa sandamau fidaqa miqanda moodaaqoo kikiqamambi ufa dinni dinni andeeqasee iriseeqa miqoo aaqarana marinaqa nimianaqa arifara sia marinaqa sia nimianauroonoo.

17-19 Misa mai Seesareea maqusai qumuraafaqa qinee sia furufariqa iqaqaiifaqa kananaana mi fasiqana karabusakinaana aaraafananoo aniroofaqa mina amoosau maqoosa findifiqa dapi dapi ufa qiqau. Qinee minara moo ainaina mandaikammannaqee foora irunanoo sia marifaqa. Misa nári amaana sandufara kai iridaqa maana amoosau maqaidaqa arirara qidaqa. Misa faiqí moo mina auqu Yisufa minara kuqinau maqi qiafanoo Pauroofa minara doo findifiifoo qifaqa mina saara mina arirara qidaqa.

20-21 Miqi qiafaqa qinee Pauroonara amanee ani faqa Yeerusareenni afigee murusaanaqa mi ufana qini qifusaa andeeqee faree qunanoo Pauroofa Sisaana afusaa iraree qimaseenoo maaqoo qinee rumbaranaki mariiqa kasooqaaqee Sisa finnai qeeqa ufa mina afusaa andeeqararee qifaqa eedoo qimasaunanoo kaqi karabusaki maridanoo.

22 Akaripaafa Feestusana ufa iriseenoo qinau amanee qinee mina ufa irianauree. Miqi qufanoo Feestusafa qinau, Oo amana duna kananaana iria.

23 Iqaqoofanoo kananaana Akaripa faqa narí anasaana Beeranisa nammarifa faqa aniree maqi qimasee miqooqaraasa faiqí firaasa faqa sundiaufa faqa nammari auqamasee nifaqa anukamasee amiqira ainaina nifaqa nifaqa iiseeqa aiqama aniree padi mafufanoo mi qambaana miqanda rafudamakufaqa ufa irimaru maqanaki keeqaqau. Keeqafufanoo Feestusafa sundia moo aqiqoofanoo Pauroona karabusa maqakinaana afigee mini quqanau.

24-25 Quqasoofanoo Feestusafa aiqama maaqi qimasee qimanniminau, Oo Karaambaiqa Akaripa innee aiqamausa maaqoo ani mariasa qini ufa iria. Maa fasiqanara ufa qidaqa. Yuda maqannaasa maaqooqaraasa faqa Yeerusaree mariasa faqa aiqama maa fasiqana amoosau maqee mariafanoo. Misa minara kuquanifeera firaqoo faaqa quqaida maridaqa. Qinee mina iriseeqa kuqannaruaninna ainainara randauna sia maridanoo narikai Roomma maqusanaa firaana mina auqu Sisaana auquraifaqa qinee doo amana fee qiqau.

26 Qinee mina aqiqeeqa nana ufa fee pasakina akara rumamiana maree fuannoo fee, sia marifaqa, randaunaisia. Qinee minara mina mareeqee inni nifusaa maaqoo quqeeqa Karaambaiqa Akaripa ani faqa afusaa quqasaanana anee mina ufa irisee qimaqiminaqa qinee mina ufa oosana irisee akara rumma firaa Kiapana Sisaana amaqaanaura.

27 Naqi fee mandee qinee fifau aqiqaanauree. Qinee Yuda maqannaasa Pauroona amoosau maqemaria ufana andeeqasee akooqoo papiqasaa akara rumasaananoo andeeqaannoo.

## 26

*Pauroofa Akaripana faqa Beeranisa nammarina faqa nifusaa ufa qinau.*

<sup>1</sup> Karaambaiqa Akaripaafa iriseenoo quandaki Pauroona qimaminau, Aneenna ufa qinaqa iria. Pauroofa mina iriseenoo asauku uqeeraseenoo maaqi qimasee narufa qinoonunara qinau.

<sup>2</sup> Oo Karaambaiqa Akaripa, ani afusaa ufa qiannanara dufi dufi qidaqa. Yuda maqannaasa qimoosau maqee maria ufana qimamianaara.

<sup>3</sup> Anee Yuda maqannaasa mariana faqa misa oosana oosana ufa qimariana faqa anee irimarianafa marianaqa qinee minara ani ufa qimamirara dufi dufi fee qidaqa. Amanee anee qini ufa iria. Aiqama Yuda maqannaasa qinee kumaaraasaaqari findifuafannana irimariafanoo.

<sup>4</sup> Qinee sia kaqi nimarunausau maridau qeeqa maqusaki faqa Yeerusaree maqusaki faqa mariafanausa marunaqa Yuda maqannaasa minara faqa iridaqa.

<sup>5</sup> Qinee Farisai amaana ufa qimariafanausa marunaqa Yuda maqannaasa misa minara iridaqa qumee raidaqa. Farisai amaana ufa qimariasaa misa kaaga Anutuna ufara afeekaikimariasaa maridaqa.

<sup>6-8</sup> Qinee naaru kasooqaqee kambiqaaninna ainainara irimaree fidaqa. Ooqai Anutufa maasa qikeeku qikaakusaa qimafeekaikunara qini maqannaasa eendaki faqa faasaana faqa Anutunara innaaru qidaqa maridaqa. Kasooqaqee kambiqaaninna ainainara Anutufa qimafeekaikunara maasa irimaree fidaqa. Mi ainainafa inaaqiana kambiqaaninnanara minara Yuda maqannaasa qini qimoosau maqaidaga. Mi ainainafa Anutufa kuqiranaki-naana mara findifira ainaina mina maridanoo. Yuda maqannaasa nanaree sia iridee unna fee qidee.

<sup>9</sup> Ooqai qinee faqa Yisuna Nasaretee maqusaindaraana auqu taikaanifee qimasee qaini qainiqa imariqiafana.

<sup>10</sup> Minara Yeerusaree maqusai ooruree aanaiqikirausa misa uriqararana ufa irisee Anutuna faiqi namu moomoo rumbannisee mariafanausa maridaqa. Miqimaqoosa akaqausa narufaqa qinee faqa dufi dufi amiqimmi-aafoo qiafanausa maridaqa.

<sup>11</sup> Qinee Yuda maqannaasa ufa suqira maaqaki keeqafufaqa Yisuna ufasaara narimariafanausa maridaqa. Misa qumareeqa Yisuna ufara minnisaaqee qimasee narimariqiafana. Qinee misa minara firaqoo aanoomaseeqa moo maqusai nianai fimariafanausa maridaqa.

*Pauroofa nari Yisuna ufa iru oosannara qimanniminau.*

*(NiFa 9:19; 22:6-16)*

<sup>12-13</sup> Qinee Yeerusareenni ooruree aanaiqikirausa misa uriqararana pasa mara mareeqa Damasakusa maqusai ooruree Yisuna ufa irimarusaa rumbarara ooruu fimariafananoo suani gambaanaa innaarunaindari idauru miqirafa suaniara foora firaatia qini faqa fusa aqama rafaqaqafusanau.

<sup>14</sup> Miqimasooafaqa maqasaa aqufuafananoo minakiqari ufa moo Heeburu ufakiqari maaqi qinau. Sauroo Sauroo anee nanaree qini darina nidanee. Qinee faaqaanannai ani kaqikaqoo ani afaaqai mundunara anee aneenna kai faaqaana aaru pooduqaani qiannana arumaraananoo firaqoo aidafidanoo.

<sup>15</sup> Qinee miqi qufaqa irammiriqa qiqiafana. Oo Karaambaiqa anee yafee qiafananoo mifa qinau.

Qinee Yisusa anee darunausa maridaqa.

<sup>16</sup> Doo anee findifinana fua. Qinee aniara qini ainainira faiqikianneera ani afusaa kooroo iqa. Anee maqee qafaannanara faqa kasooqaqee

kambiqaaninnanara faqa aiqamai qimannimianeera ani afusaa kooroo idaqa.

<sup>17</sup> Qinee Yuda maqannaasaki faqa aanaamuru maqannaasaki faqa ani aqiqaanaura. Misa ani arirarifaqa rafaqa fuanauranoo.

<sup>18</sup> Anee misa nifu maqannimaqeer foora asukunakinaana mareeqeenana kaaqa qaranaki quqannisaaneera, anee misa Sadannana rafaqafiranakinaana mareeqee Anutunaindi kianneera, misa qini saqarikiranannai misa numoo taikannisaananoo Anutufa narí rusandeesamu masainausaki quqasainaqa misa faqa minaki marifaranoo.

*Pauroofa narí qimannimu ufana oosannara Akaripana qimaminau.*

<sup>19</sup> Oo Karaambaiqa Akaripa qinee aanasaa qifu pisipasamandai innaarunaindaraa ainaina qafaafanna ainaina sia mi ufana rukiaafanau maridaqa.

<sup>20</sup> Indaaru Damasakusa maqusai oosana arasee Anutuna fasaasa ufa qimannimiqaafana. Miqooqari Yeerusaree maqusai faqa Yudeeaa maqa maaqai faqa aanaamuru marusa faqa qimannimidaqa maaqi qimasee qimannimiqa. Inneeqa manda nirana marirana nimeesuqusee quandakina Anutufinai ubeekamafifaqa Anutufinai marirana nirana marasainaqa kuqaa Anutuna aanai ubeekamafiaafoo qiaqeer.

<sup>21</sup> Minara kai qinee Yeerusaree naaquqara amaana maqaki marunaqa dariraridaqa.

<sup>22</sup> Anutufa qini dadaaqimarinaru maqee inni nifusaa kikiqia maridaqa uriqararau faqa ureeqarau faqa nifusaa Yisunara kooroomannimidaqa. Ooqai tamummaqara fasiqauqa faqa Mooseefa faqa qimarundee kaimmidaqa misa maaqimmiaqau. Anutuna asauku mundirafa Yisufa teeroo firaana mareufanoo kuqinoo mi kuqiranakiqari findifinoo findifirana indaaru nikamannisaannoo.

<sup>23</sup> Miqinnannai asauku mundirana Yuda maqanna faqa aanaamuru maqanna faqa maa anutuna ufa fannoo qoomara fooqaana doo innikina doo anireenoo. Misa miqi qimaqoona marifaqa qinee faqa minara kai qidaqa.

<sup>24</sup> Pauroofa miqi qimasee nariara ufa qimarufanoo Feestusafa quandakufanoo faqa quqaseenoo qimaminau. Akasaa doo anee furufaramminanoo. Ani irirana firaafa ani mandainainaki afeeqamifana aqufuananoo.

<sup>25</sup> Pauroofa mina iriseenoo maaqi qimasee qimaminau Oo Feestusa uriqararafa, qinee sia furufarau qidau miqidau. Noori runusee kuqaa anoonainaina qimaria ufana qidaqa.

<sup>26</sup> Oo Karaambaiqa Akaripa qinee ani afusaa paasoosamasee maa ainainnara kooroo idaqa anee sia sia irimarianafa mariananoo, irimarianafa mariananoo. Anee maa ainainna qafaidana oonumafi irimarianafa mariananoo. Sia kukeeqaranaki maa ainainnafa marifa akooqoo marifa maridanoo.

<sup>27</sup> Oo Karaambaiqa Akaripa anee tamummaqarau ufa irisee kuqaa anoona fee qidane anee miqi qimarianafa qinee iridaqa.

<sup>28</sup> Akaripaafa mi ufana iriseenoo Pauroona qimaminoo qinuu. Anee maa qusa ufanannoo qiniara Yisuna faiqiki quqee fee qidane.

<sup>29</sup> Pauroofa mina iriseenoo Akaripaana qimaminoo qinuu. Qusa ufa fee kisaqa ufa fee sia qinee minara iridaqa. Qinee aniara faqa maa qoo maridaqa qini ufa irimariasara faqa innaaru qidaqa aiqamausara qinee imarunandee iqa Yisuna saqari kiaqeer qidaqa, sainandannoo rumbaqaqarafa kai sia.

30-31 Pauroofa miqi qufaqa Akaripaafa faqa firaa kiapafa faqa Beeranisa nammarifa faqa findimeeqee raudamaki fiqau. Fidaqa narí qimami narí qimami maaqi qiqau. Maa fasiqafa sia karabusa ainaina qafeemarifa sia kuqannarira ainaina qafeemarifa maridanoo.

<sup>32</sup> Akaripaafa minara maaqi qinau Pauroofa narí sia Sisaana auqureenoo doo idukiqini, Sisaana auquramaseenoo saina minni fuani.

## 27

### *Pauroofa kaqi rumbaranaki maridanoo Roomma maqusai sipaki finau.*

(Itari firaa maqusa auqu Roomma. Miqoo kiapafa firaa marinau. Mina auqu Sisaafa Roomma maqanna kiapausa uriqararafa firaa marinau. Pauroofa Roomma maqusai Sisa finnai firaree qufanoo Feestusafa karabusaki quqasee minni fimaru sipanara afeesimarinau.)

<sup>1</sup> Sipa Itari maqusai fimaru sipafa moo fannoo aniroofano Feestusafa narí sundiauqara ufaqa misauqa Pauroona faqa karabusa akaqausa faqa mi sipanasaa quqanau. Saideena auqu Yuriusafa narí sundiauqa namu-faqa mi sipanaki Pauroona saimbaqa nifiqee finau. Mi saideenna aiku asaukura Augustoona ammi suqira fee qimariqau.

<sup>2</sup> Maasa Pauroona faqa fuanna sipafa Adaramitiuma maqusaindaraa sipa marinau. Mi sipafa narí qumaara ainaina deedaqamaseenoo Asia maqa maaqandanai firaree qufaqa doo maasa akaramafuafananoo qifiqee finau. Faiqí moo Aristarakusafa Maseedoonia maqa maaqaindaraafa Teesaroonika maqusaindaraafa doo maasa faqa finau.

<sup>3</sup> Fifiufaqa eendaki faqa fimariqau. Iqaqoofano Sidoona maqusai oonuraqau. Saideena Yuriusafa reendenidanoo Pauroona amiqimasee qimaminau. Anee Sidoona maqusai ani aqoondiqa marifana misa faqa oonu faiqainaga naranaina amifana sipaki akaramafi maree fua qufanoo doo miqimminau.

<sup>4</sup> Sidoona maqusai mariqa sipaki akaramafufaqa fufanoo ufai kaqinaindari anufanoo sipa sia andeeqasee fuaqaufaqa Sipurusa afuma qaannai ooru fiqumaki fiqiafana.

<sup>5</sup> Maasa Sirisia maqa maaqaikundanai fifiufaqa Risia maqa maaqaki firaa taunna auqu Miraa miqoo oonuraqiafana.

<sup>6</sup> Oonuroofano Saideena fannoo sipa moo paqurinau. Areekasandiria maqusaindaraa sipa Itari maqa maaqai fimaru sipafa marufanoo Saideena maasa aiqama mara quqasoofaqa fiqau.

<sup>7-8</sup> Miraa maqusaindari moomoo faasaana eendaki mi sipanaki anuqiqa fimariqau. Fidaqa Nidusa maqusa amummaqa oonuraafananoo ufai kaqinaindari aimaree anufaqa quandakufaqa ooruku nammari amuaqumau Kareetee afuma ooquree mina auqaana sia ufai uqunnai mindanai fiqiafana. Miqoo Saramoonee maqa Iroosa Oorikiraqoo fee qimaruqoo fiqumakufaqa anuquseeqa Raseea maqusa amummaqa oonuraqau. Oonuree firaa farumma qafamasee minaki kiateenna fannoo narí sipa maree minaki keeqafi marufanoo ufai faqa ooruku nammari faqa sia arinau. Miqunara mi farummana auqu mandaaqa farummee qiqau.

<sup>9</sup> Ufai fannoo kaqinaindari anufaqa maasa kisaagasaa miqoo maridaqa Itarinni fuane qe aukuana taikanau. Anutuna faqa moodaanaki qoomaqa suqaani qu aukuanafa doo ainnaaqaramafinoo sia amana fifaranoo. Pauroofa mina qafeenoo maaqi qimasee naamuaqinau.

<sup>10</sup> Oo maa fasiqausa maasa maaqooqari fuananoo mandaikammiannoo. Sipa faqa sipakinaa qumiasana faqa maasa faqa kuridi taikaanaura.

<sup>11</sup> Saideena fannoo sia Pauroona ufa irinau sipa akoona faqa kiateenna faqa misa ufa kai irinau.

<sup>12</sup> Misa maru farummafa sia kisaaqasaa qaaramoo quqoona amana marufagee qimasee saina maasa sipaki moo farumma Kareetee maqa maaqaindaraa farumma moo mina auqu Finisa miqoo amanamasee qafaanaura. Miqoo fuaninna farummafa amiqirafa marifaqa ufai sia ani marunnai amiqimasee mandaaqai kisaaqasaa mariannee qiqau. Aiqamausa eedoo qufaqa moodaa moodaa maramarariqau.

*Sipaki fimarufanoo ufai faqa aaku faqa narinau.*

<sup>13-14</sup> Misa Finisa farummaki fuane qufanoo ufai fannoo mitinai ubeekoofaqa misa asasamaseeqa ankaqa ooqu rarisameeqee sipaki quqasee Kareetee maqa mammaaqandanai fiqau. Misa fimarufanoo fimarunaindari ufai firaa tia uqanna maqamau aninau.

<sup>15</sup> Mi ufaifa sipa ooru arufaqa mara ubeekoofanoo sia amanaikufanoo quqaseeqa ufai namufaqa kaqi fiqau.

<sup>16-17</sup> Sipa fannoo kaqikaa maqanamuu mina auqu Kauda mina fiqumaru-faqa mina mandaaqa maridaqa kaqikaa kanuqa sandannai rarisee maruna kadaapi rumeeqee sipasaa amuaqundari fataafimamaqasee rumbaqaau. Misa sipa nammari kasi kasinoo qambaana afooiandoora qimasee sanda firaana qumaraida qambaana qambaana rumbee mariqau. Misa ufai fannoo fuafa aminanoo Ribia maqasaa aruandoo qimasee seera sandaaqai maruna idukueeqeeqa sipaki quqasee doo kaqi ufai namufaqa fiqau.

<sup>18-19</sup> Ufai firaafa uqinoo nammari amakaurufanoo sipa teeqi taafu-faqa rufisee sipa ummaara maridanoo ukuqnaandoo qimasee sipakinaa ummaara aiqama nammari aqusoofanoo sipa fannoo aufadanau. Iqaqoofanoo kananaana kai sipa ummaara raidanoo qimasee minakinaa ainaina oosana oosana aiqama mareeqee ooruku nammari aqusaqau.

<sup>20</sup> Moomoo eendaki faasaana sia suani fasau qafaqau minara misa firanara randoosia. Ufai firaafa uqanna uqimarufaqa maasa qeeqa marirafa doo taikeefoo qiafannana.

<sup>21-23</sup> Sipakinaasa moomoo eendaki faasaana sia narana neemariqau, naarara kai mariqau. Minara Pauroofa misa qambaana findifinoo qimannimino qinau. Innee qini ufa iriaqaana Kareetee maqusaki kai mariaqaana. Miqimaseefau sipakinaa ainaina firaa feefauru aqimariana sia aqunaiqini kaqi mariqini. Doo maqee qinee inni fuki faaki qidaqa doo paasoosiaqa. Sia inneeqa moodaa kuqifaranoo, sipa kai kuquannoo. Qinee Anutunaindi maridaqa mina ainainira faiqi maridaqa. Eenda eendaki Anutuna qangiroo moo fannoo qinee marunannai aniree qimaqiminoo qinau.

<sup>24</sup> Pauroo sia rufiaa, anee kuqaa Roomma maqanna firaa kiapana oorisa kikiqinnaranoo. Anutufa nari amiqira oosana uqeereeqeenoo aiqama sipakimariasaa ani aminoo, sia moo fannoo kuquannoo.

<sup>25</sup> Doo maa faiqisa sia nimuqusa tiakiaqa, paasoosiaqa. Anutufa qimaqimindee kai iannoo. Qinee mina irisee mina saqarikidaqa.

<sup>26</sup> Kaqikaa qoo ufai fannoo maasa sipa maramaree kaqikaa maqanamuu raquramiannoo.

<sup>27-28</sup> Maasa qisaukuqara taikasee qikunni ooqu qaara faqa qaara faqa eendaki faasaana Meediteeraneena ooruku nammari amuaqumau fimarufaqa booskurauqa oonumafi iri iseeqa eenda amuqusai Oo maasa moo maqa maaqa adeedi anireeqa qimaseeqa sanda kisaqa marasee ummaararoo ainaina mina atisaa qususee nammari aqusee qafaqau.

Nammari 120 amana meemai faruma difukunaki marufaqa qafaqau. Kafaa moosaa oonuree kafaa aquseeqa qafaqau. Nammari 90 amana kaqikaa faruma ausaanaikiranaki kai marinau.

<sup>29</sup> Booskurauqa mina qafamasee eendaki oonisaa aruani qimaseeqa sipa araqeemusaaqari qaara faqa qaara faqa qankaqa quqasoofanoo maqa qumarooafaqa misa iqaqaranara innaaru qimariqau.

<sup>30-32</sup> Booskurauqa maasa sipa oorinni qankaqa quqaidee unna qimasee kanuqa mareeqeeqa nammariki quqasee minaki aqufi quqasee sandaaneera imarufanoo Pauroofa qafamasee Saideena faqa sundiauqa faqa qimannimino qinau booskurauqa sia marifaqa innisaimbaqa aiqama kuquanauranoo. Booskurauqa kanuqaki quqasee fidamia qufanoo sundiauqa kanuqa sanda atekamufanoo kanuqa nammariki pautaqi aqufino kaqisamu finau.

<sup>33</sup> Iqaqarara kaarimaqoofanoo Pauroofa fuki faaki qidanoo qinau. Innee qisaukuqara taikasee qikunni ooqu qaara faqa qaara faqa eendaki faasaana sia nee mariasa mariafanoo. Kisaqa kamusaqa innee sia moodaa ainaina naafanoo.

<sup>34</sup> Qinee inni fuki faaki qidaqa doo narana marasee namasee sia kuqua. Sia inniki moo fannoo abandiakaannoo. Innee kaqi rumbaqa marifaranoo.

<sup>35-36</sup> Pauroofa miqi qimaseenoo feemu maraseenoo ruqi ruqimaseenoo innaaru qimaseenoo noofaqa tautumma qafeeqa amiqimmi ifoo qimaseeqa maasa faqa aiqamausa naqau.

<sup>37</sup> Maasa mi sipanaki marusa nisaanarirafa maaqimminoo marinau 276 fasiqa moomoo uqanna mariqau.

<sup>38</sup> Aiqama namasee nimuaqu mambufaqa raisa fooqaaira narana mina auqu uita misa mina mareeqee ooruku nammariki teeqimasoofanoo sipa aufadanau.

*Sipa fannoo Marata maqa munu raquru amufanoo sipa rakeekaa inau.*

<sup>39</sup> Iqaqoo kananaana maqa afaisaa maridaqa yamaqa maaqanai fee marida fee qida sia irimariqau. Booskurauqu qafoofanoo nammari muqufi raine maruqoo oonureeqa dinni kaqi ooqu fimarunna minniseeqa dinni farumma oonu mandi marunaki keeqararee qimasee amanamandee qafanee qiqau.

<sup>40</sup> Miqi qimasee ankaqa sanda atekasoofanoo aiqama nammariki aqufiqau. Sipa sitiaqa ainaina rafaqa fimaru sandana aukusoofanoo akaqausa mina ati qumarooofanoo seera sipa oorisa uqeerasoofanoo ufai fannoo mina arinoo rariseenoo oorindari finoo mi farummanaki keeqafiqa maqa raquramianee qiqau.

<sup>41</sup> Sipa fuaneera maseenoo aqaamakufanoo nukuda raquraminoo oorindari utusamafi kasooinoo marinau. Araqemu nammari fannoo firaqoo aridanoo rukakamumasanau.

<sup>42-44</sup> Sundiauqa karabusa fasiqauqara nammari amuaqumau fimariasa quqasee sandee maqi qimasee aiqama naru taikaaneerufanoo Saideena fannoo Pauroonara amuqusufanoo qaoo qimaseenoo qinau. Nammari amuaqumau fimariasa sipasaaqari nammariki aqufi nammari amuaqumau maqee fuaqa. Sia nammari amuaqumau fimariasa sipa rufadaairana ati aina qumareeqa minasaa ooqu marifi fuaqa. Doo maasa miqimandeeqa aiqamausa maqasaa fiqau.

<sup>1</sup> Maasa aiqama nammarikiqari afainni akaramafufaqa qafaafana aiqama amiqimandee mariqiafana. Miqooqaraasa iroofaqa mi maqana auqu Marata fee qiqau.

<sup>2</sup> Marata maqannaasa maasa amiqi amiqimaqisaqau. Aaku rufaqa suara darufaqa misa idaraseeqa mara quqaseeqa maasa qiqoondikiqau.

<sup>3</sup> Pauroofa ida asaida maramareenoo idaki aqusoofanoo sakani minaki kukeeqanoo mariufa asauku aakusee miqoo dirinoo marinau.

<sup>4</sup> Marata maqannaasa mina qafeeqa maaqi qimasee unna ufa qiqau, maa fasiqafa faiqi narimarifa marifanoo. Misa nimana fannoo mi sakanina aundurari keeqafifanoo nararidanoo. Ooruku nammariki sia kuqunara sakani fannoo mina aridanoo.

<sup>5</sup> Pauroofa asauku rutatufanoo sakani idaki aqufufanoo Pauroofa sia aurinau.

<sup>6</sup> Marata maqannaasa mina qafamasee qiqau kaqi kasooiqa maridaqa qafa mifa innooqaannoo fee maqasaa aqufinoo kuquannoo fee qimasee kisaagasaa fifau qafee mariqau.

<sup>7</sup> Pauroofa sia kuqufaqa misa minara moo anutu fee qiqau. Maasa sipa maqasaa raquru amuqoo karaambaiqa auqu Pubariusafa mina afuqa anaadoo aaqa raquraminau. Pubariusafa Marata maqannaasa karaambaiqa marinau. Mifa maasa qumu qifiqeenoo murusoofaqa qaaramoo faasaana mina faqa mariqiafana.

<sup>8</sup> Pubariusana akoofa aurinoo marinau. Mina aurirafa afaaqa idididanoo aratootooki marinau. Pauroofa minara iriseenoo mina maaqaki keeqafinoo innaaru qimaseenoo nari asauku mina afaaqasaa mundusoofanoo aurirafa taikanau.

<sup>9</sup> Miqimasooofaqa qafamaseeqa mi maqannaasa mi saqanna marusa nari aurirausauqa naakidaqa minisee marufanoo aurirana taikannisee marinau.

*Marata maqa maaqaindari moo sipaki Roomma maqusai fiqau.*

<sup>10-11</sup> Maasa qaaramoo quqoona Marata maqasaa mariqiafana maasa sipa moo mina auqu Moodaa Karira Anutuqanda maasa mina paquriqiafana. Areekasandiria maqannaasa sipa fannoo Itari fimaru sipafa ufaira rufiasee Marata maqasaa faasai ani kukeeqanoo marinau. Maasa mi sipanaki akaramafuafanaqa Marata maqannaasa narana faqa oosana oosana ainaina faqa aanasaa naaqee qimasee quqasoofaqa maasa mareeqa Itari maqa maaqai fiqiafana.

<sup>12</sup> Fifiufaqa Sisiri afuma firaannai oonuree firaa taunnaki Sirakusee maqusai raquramisee qaaramoo afuru miqoo faiqaqiafana.

<sup>13</sup> Doo miqooqari sipaki nammari amuaqumau fifiufaqa Itari maqa maaqa atisaa firaa taunna Reekiumma maqusai kasooiqaafana. Iqaqoo kananaana ufai maasa inaaqianaindari uqinoo seera fuaqoofanoo dadaaqufaqa kaqi kaqiufaqa qaara faasaana kai Puteeoori maqusai sipa kasooinau. Puteeoori maqusa Roomma maqusa Kaamanna maqusai marinau. Aiqaqa sipauqa Puteeoori maqusasaa munu afiqusee marufaqa maqamau Roomma maqusai fimariqau.

<sup>14</sup> Puteeoori maqusaki Yisuna ufa irimarusa paqurimasee misa faqa moodaa amaana mariqiafana. Doo miqooqari andeeqasee Roomma maqusa andeeqasee maqamau fiqiafana.

<sup>15</sup> Roomma maqusai Yisuna ufa irimarusa akaqausa marusa oooqai Pauroofa animarunara iriseeqa aanai kaqikaa maqusa Apiusana makeeta faqa qaaramoo pasindiaqa maqa maqusa faqa maruqoo Yisuna ufa irimarusa



gumu qifiqee Roomma maqusai ooru fiqau. Pauroofa misa nindafoofanoo amuqusaki idaaqufanoo Anutunara dufi dufi qimasee doo misa faqa Roomma maqusai oorufinau.

*Pauroofa Roomma maqusai kisaagasaa maru ufana.*

<sup>16</sup> Maasa Roomma maqusai ooruroofanoo Kiapafa Pauroonara aaduma moo maqaki marinanoo sundia kai rakisianifee qinau.

<sup>17</sup> Pauroofa mi maqanaki qaaramoo afuru faiqeenoo Roomma maqusai maru Yuda maqannaasa uriqararausa naaramasoofaqa suqumaree Pauroona maqaki aniroofanoo Pauroofa ufa qimanniminoo qinau.

Oo qini qikaqaafasaa, sia qinee moo ainaina qeeqa maqannaasaindi mareeqa sia maasa qeeqa qikeeku qikaaku sandufa rukiaafanausa maridaqa Yeerusaree maqannaasa qini rumbeeqeeqa Roomma maqannaasaimia.

<sup>18-19</sup> Kiapausa Seesareea maqusai qini mandainainara randoosia sia moo kuqira ainaina qiniki marinau. Minara misa qini idukuane qufaqa Yuda maqannaasafeekaikamandee aanoo ufaqa qinee quandaki Sisaana auqureeqa sia qeeqa maqannaasa ufa nimiraree qimaseefau maa ufana oosana areefau nariqa kai.

<sup>20</sup> Minara qinee inni qimannimianeera naaraida. Anutuna asaku mundirafa anianinnanara Israaee maqannaasa irimaree fidaqa minara kai qini qisauku maa sainandafa rumbanoo maridanoo.

<sup>21-22</sup> Yuda maqannaasauriqararausa mi ufana iriseeqa Pauroona qimamiqa qiqau. Maasa sia Yudeeaa maqannaasaufa moo aniara iriqa, sia moo fannoo pasa akara ruma aniara maasa qimaqeenoo. Sia moo fannoo mindari aniree aniara manda ufa qia. Maa fuka ufana Yisunara aiqama maqa maaqaki mariasa nikoo fee qidaqa, maasa minara ani ufa irianauree qidaqa.

<sup>23</sup> Miqi qimaseeqa moo suaniara utaaqamasoofanoo mi faasaannasaa Yuda maqannaasamoo aniree Pauroona maaqaki keeqafufanoo Pauroofa Anutuna ququsa ufara naamua qimarinau. Kananaana oosana araseenoo eendirana paqurinau. Pauroofa tamummaqara fasiqausa akarakinaa ufa faqa Mooseena sandufa faqa minakinaanannai Yisunara naamua qinau.

<sup>24</sup> Akaqausa Pauroona ufa irisee kuqaa anoonee qimasee iriqa. Akaqausa sia iriqa.

<sup>25</sup> Pauroofa mina qafamaseenoo qimanniminoo qinau. Anutuna naaquqara maraquna fannoo tamummaqara fasiqa Eesaiaana ooqai aakufinoo dadaaqufanoo inni nikeeku nikaaku naaru kambiqaaninna ainainara qimanniminau.

<sup>26</sup> Mifa maaqi qinau.

Eesaiaa anee oonureena Israaee maqannaasa maaqi qimasee qini ufa qimannimia. Innee kisaagasaa qini Anutusa ufa iridaqa sia ufa irifaranoo. Innee kisaagasaa qini ufa nifunnai qafee marifanoo sia mina anoona paqurifaranoo.

<sup>27</sup> Innee maa maqannaasa nitikura ummaarandanoo maridanoo ooni miqirafa maridanoo. Misa nariqa naaqoo nisaukunnai ititeemariasa maridaqa. Misa narikai nari nifu dimbeemariasa maridaqa. Misa nari nifunnai qafeefoora naaqoonnai irifoora nitikurannai oonumafi irifoora. Misa qini Anutu finnai quandeefoora, qinee misa amiqiman-nisaannoora.

<sup>28-29</sup> Pauroofa miqimasee qimannimiseenoo maa ufanannai rafaqafinoo qinau. Anutufa inniara maa ufana iriaqee qinau. Doo Anutuna

faiqí mareegee narí asumu mariranaki quqeemaru ufafa doo aanaamuru maaqa maaqai daraaninoo. Misa irifara innee sia irimariafanoo. Miqi qimasoofaqa Yuda maqannaasa Pauroona maaqakiqari raudamaki fidaqa narinni narinni ufa rainaqa fiqau.

<sup>30-31</sup> Pauroofa maru maqana ufaasu maqaki marinau maqee maqee munnimma aqusaida marinau. Qaara aukwana mi maqanaki mar-ufaqa moomoosa aniree marufanoo naarama quqasaidanoo Anutuna ququsara qimannidanoo Karaambaiqa Yisufa asauku mundiranara faqa paasosamasee naamua qimarinau. Sia moo fannoo qaoo qimarinau. Eedoo kai qimariqau.

## **ROOMMA**

### **Pauroofa Roomma maqannaA akaranimaqoo ufafa.**

<sup>1</sup> Qinee Pauroosa Anutuna asauku mundirana Yisufa mara firiqai faiqisa maridaqa mina ainaina dadaaqimaruna faiqisa maridaqa. Anutufa qini maqasaa fasiqa Anutufa faiqí aanaaseekinaana rusandeesamumasee narí amiqira fasaasa ufara qimannimianne qimaqoosa maridaqa.

<sup>2</sup> Mi amiqira fasaasa ufana naaru kambiqaaninnanara Anutufa ooqai uqanna narí tamummaqara fasiqauqa narí ookiqari qimannimisoofaqa quandafiqqa faiqí anaasee qimannimisee quandakiqa naaquqara akaraki quqaqoofa maridanoo.

<sup>3-4</sup> Mi amiqira fasaasa ufana narí amaaku narí asauku mundirana Yisunara maasa karaambaiqara qidanoo. Mifa Dafidinakiqari kambiqoonara maasa maqasaa fasiqee qidaqa. Anutufa narí firaa afeekannai kuqiranakinaana Yisuna mara findifumaseenoo minannai uqannifiqasoofaqa iriseeqa misa minara Anutuna amaaku innaarunaindaraafa naaquqarafee qidaqa.

<sup>5</sup> Yisuna minannai Anutufa qini amiqi amiqinoo qimannimira fasiqaikamambi maridana aiqama maqanna naarama minisee Yisuna amiqira fasaasa ufa qimannimisainaqa iriseeqa mi mau fiqa Yisuna auqu uqeeraaqeera qiniara qimaqoosa maridaqa.

<sup>6</sup> Aiqama maqannaasara qidaqa inni Roomma maqannaasara faqa qidaqa Anutufa inniara narí asauku mundirana Yisunaindi kiaqeera qimaqoofa maridanoo.

<sup>7</sup> Anutufa inni Roomma maqannaasara faqa naarameeqeenoo qini qiku qisauku kiaqeera qimaqoosa mariafaqa. Qinee Pauroosa minara iriseeqa inni akara rumannimaqaunafa maridanoo. Anutufa maasa qikoofa faqa narí asauku mundirana Yisuna maasa karaambaiqa faqa narí amiqi amiqira oosana faqa narí aundura asoarana faqa inni nimiani.

#### *Pauroofa Roomma maqannaasara Anutu finnai dufi dufi qidanoo.*

<sup>8</sup> Maa ufanannai inni qimannimiranara qianaara Anutuna asauku mundirana minannai qinee Pauroosa inni Roomma maqannaasara Anutu finnai dufi dufi qimamaqaidaqa. Aiqama maqannaasara innee Yisuna saqarikiranara irimarifaqa minara qinee Pauroosa innaaru qimamaqaidaqa dufi dufi qidaqa.

<sup>9</sup> Qinee aiqama kari maqee maqee inni Roomma maqannaasara iridaqa Anutufinnai maqee maqee innaaru qimarunnanara minara Anutufa iridanoo. Qinee qeeqa qimuqusa ookiqari qeeqa iriranannai Anutunara eedoo qira dadaaqira ainainiranakina maridaqa. Maridaqa narí amaaku amiqira fasaasa ufa faiqí anaasee qimannimidaqa. Qinee inniara Roomma maqannaai faiqí aanaaseera innaaru qidee qunanoo Anutufa kuqaa fee qiannoo.

<sup>10</sup> Qinee ooqaindari inni maqusai oonuree inni nindafarara irida marunnanara maqee Anutufa qini dadaaqinaqa inni maqusai oonu mariannanara minara faqa innaaru qidaqa.

<sup>11</sup> Qinee firaaqoo inni nindafarara qidaqa innaarunaindaraa amiqi amiqirana moo inni naida nimianaqa innee Anutunaki afeekaikamafi mariaqeera iridaqa.

<sup>12</sup> Qinee minara maaqi qidaqa qinee faqa innee faqa narí dadaaqi narí dadaaqirara innee Yisuna saqarikirana faqa qinee faqa Yisuna saqarikirana faqa narí dadaaqi narí dadaaqiaqa.

<sup>13</sup> Innee Roomma maqannaasa maa ufana iriaqa. Qinee inni maqusai moomoo kari firari mariafananoo moo ainaina rafaafinau. Qinee moomoo maqusanaasaki sia Yuda maqannaasaki nimariafanausa miqidaqa misakinaana oonu rarisameeqee Yisunaki quqemarunausa inniki faqa ooqaindari miqianee qidaqa.

<sup>14</sup> Aamina maqanna faqa irirana faqaasa faqa aikara foora daruqoofanoo maridanoo. Misa aiqama Yisunufa qimannimianaqa irifanoo mi aikana darirafa tatinoo qifaaqa aufadaannoo.

<sup>15</sup> Mi aikana tatiranara irisee qinee inni Roomma maqannaasa faqa Anutuna amiqira fasaasa ufa qimannimiraree qidaqa.

*Anutuna afeeka ufa asumu mariranaki quqannisee marifa.*

<sup>16</sup> Anutuna amiqira fasaasa ufa Anutufa faiqí mareeqee asumu mariranaki quqemari afeekafa maridanoo minannai Yuda maqanna naaree aanaamuru mariasa innaaqiana irisee mi mau finausa Anutufa asumu mareeqee quqaannoo. Minara qinee mi amiqira fasaasa ufanaki qeeqa daundura firaqoo mara quqaidaqa.

<sup>17</sup> Anutufa faiqí anaasee aqemariasa narí namuqaaki mariasa sia naruseenoo mareeqeenoo narí aqoondikidanoo narí amiqira fasaasa ufa minara kooroo idanoo. Maasa Yisuna saqarikirana mifa kai Anutunara aqoondikirana nimidanoo. Ooqeenaa tamummaqara fasiqauqa akara minara maaqi qinoo maridanoo. Faiqí anaasee Anutuna saqarikiranannai mina aqoondikinausa misa kai naaru naaru marirana mareefaranoo.

*Faiqí faiqi mandoosana fannoo Anutufa nariranaki quqannisaidanoo.*

<sup>18</sup> Faiqí anaasee mandainaina faqa kudimakirana faqa miqanda Anutuna anoona ufa rafaafifaqa sia irida maridaqa, minara Anutuna aanoo qirana narirafa inaarunaindari akooqoo misasaa qumu maridanoo.

<sup>19</sup> Maanara Anutufa misa naridanoo. Faiqí faiqi Anutunara irimari ainainafa akooqoo maridanoo. Anutufa narí kai uqannifiqasoofanoo marifaqa sia irimariafanoo.

<sup>20</sup> Ooqai Anutufa maa maqa maqana auquqooqari mina kukeeqarana idaaqirana faqa mina naaru naaru marira afeeka faqa innaarunaindaraa andeeqara marirana faqa narí auqu quqoo ainainaki akooqoo marufa maridanoo. Faiqí faiqi Anutufa auqu quqoo ainainaki qafamasee sia Anutunara irida fee qifaranoo. Miqi qimasaidaqa unna qimarifanoo Anutufa mi ufana sia iriannoo kaqi naruannoo.

<sup>21</sup> Misa Anutunara iridaqa sia minara dufi dufi qidaqa, kafa sia mina auqu uqeeraidaqa. Misa quandaki nári irirafa firaqoo furufariranaki kai maridaqa misa nitikura fifau maridanoo asukuna kai qumbiqanoo maridanoo.

<sup>22</sup> Misa náriara irirana faqaasee qimasaida unna qimasaidaqa furufariranaki maridaqa.

<sup>23</sup> Misa Anutuna naaru naaru marira areenarana mafi quqasee Anutuna innaaruqirana faqa amooqirana faqa mafi quqasee fifau faiqí faiqi amanauqirana faqa ufini amanauqirana faqa aandai amanauqirana faqa amuaqundari maqamau nimarina amanauqirana faqa marasee maasa Anutu fee qimasee minara innaaru qidaqa amooqidaqa.

<sup>24</sup> Faiqí misa nári furufarirafa miqinoo firaafa marifanoo Anutufa misa mareeqeenoo nariqa nimuqusimari mandainainaki quqasaifaqa faiqí narinni narinni ira ainainara nisaurira ainaina kai maraídaqa.

<sup>25</sup> Misa Anutuna anoona ufa mareeqee kaqinni quqaseeqa unna ufa mareeqee nifusaa quqasee minara kuqaa fee qídaqa. Naaru naaru amooqimaria Anutuna aiqama ainaina auqu quqoo Anutunara minnisee quandaki Anutufa auqu quqoo ainainara fifau ainainara innaaru qimasee maasa Anutu fee qimasee mi mau fídaqa.

<sup>26</sup> Anutufa faiqí anaasee nári manda niranara qafamasaifanoo akooqaifanoo kaqí minaki nifeeqaidanoo. Minara aanaaseeuqa faqa nári nifaaqmaaka minnisee andeeqara oosana minnisee narinni narinni oosana oosana manda marirana maraídaqa.

<sup>27</sup> Faiqí miqi kai iqa nári ninaaqmaaka faqa amiqira oosana minnisee nariara nariara ridaqa idara foora nitakuqidanoo. Faiqí misa narinni narinni nisaurira ainaina maraseeqa mina akiqara nári nifaaqasaa aurirana aidafirana marasee aupuraídaqa.

<sup>28-31</sup> Faiqí anaasee Anutuna anoona ufara nikooqaifanoo Anutufa misa mareeqeenoo mandainainakina sia fuaqaa ira mandainainakina quqasaifaqa minaki fídaqa. Miqianara maa manda ainaina oosana oosanafa qumbiqaidanoo, manda oosana faqa, kaaqa ainainara rimarina faqa nariara nariara fidiqaa imariana faqa nariara nariara rairai qirana faqa faiqí kuqannarirana faqa narí afumau narí afumau irafa faqa nári ueeqee narí ueeqee imariana faqa manda oosana oosana faqa nariara nariara munuqi miniqi imariana faqa misa Anutunara fidiqaa imariana faqa kaukaata qimariana faqa nári nifaaqa nimooqirana faqa nariara kai firaqoo ufaqí marina faqa maqee maqee mandoosanara randeemariana faqa nári ninaukoo ufa rukiee mariana faqa sia nári andeeqaramau firanara uriqararane qimariasaa, faqa nariqa qimannimira ufa rukiee mariana faqa sia nári nikaqaafasaa amuqusirana faqa mi manda ainainnausaki fimariasaa marídaqa.

<sup>32</sup> Anutufa minaki fimariasara kuqiranaki fimariaa maqi qida qifaqa irídaqa kaqí minaki fídaqa. Sia minakaifau miqidau fira manda oosana marasee akaqausa mi mandainainaki dadaaqimariasara misara faqa eedoo qimaseeqa asasídaqa.

## 2

### *Aiqamausa Anutufa narira ufa ameemaanai marídaqa.*

<sup>1</sup> Oo qini qiqoondi sia anee akaqausara aaqeeaafoo qinana anee faqa mi aaqarana maree marianafa mariananoo. Anee faqa naqimasee Anutuna arirana eerairinnaree, Anee akaqausara miqinana anee faqa mi manda oosanna kai maree mariananoo aninna qaoo qira ufa fannoo aninna aruannoo.

<sup>2</sup> Faiqí anaasee mi manda oosanna maree marifanoo Anutufa kai misara narira ufa qiannoo. Anutufa sia aaqaidanoo andeeqaidanoo misa narira ufa ameemaanai quqannisaannoo.

<sup>3</sup> Qini qiqoondi anee sia amana akaqausara qaoo qinnaranoo, anee qaoo qidee qidana aneenna faqa minaki fimarianafa mariananoo. Anee miqi mariannanara naqimandeenee Anutuna ariranara eerairinnaree, sia amana eerairinnaranoo.

<sup>4</sup> Inniara Anutufa aneenna mandainainakiqari mifinnai ubeekeefandinanara reendeenamasee rakisidanoo maridanoo. Innee minara Anutufa reendeenira oosana marainara innee minara furufarira oosana fee fee

qimaseeqee kaqi mi mandoosannaki marida fee. Anutufa inniara reen-deenira oosana fannoo sia furufarira oosanafau maridanoofau. Inneeqa mandainaina minnisee quandaki narinnai ubeekaaqee qimari oosanafa maridanoo innee sia fee minara iridaqee.

<sup>5</sup> Inni naaqooki ooni ititanoo marifaqara foora sia ufa irimariafanoo. Miqianara Anutuna andeeqara ufa faqa mandainaina akiaqara narira ufa faqa kooroo inna faasaana mikari inniqa mandainaina fannoo inniqa narira ufa firaaqoo uriqaramafuannoo.

<sup>6</sup> Mi faasaana Anutufa aiqama fasiqa anaasee nári maree mariana akiaqara kai nimiannoo.

<sup>7-8</sup> Akaqa fasiqa anaasee amiqira oosana kai maraqa nidaqa innaarunai areenarana faqa innaarunai nuqu uqeerarana faqa naaru naaru mariranara faqa randaidaqa. Miqi mariasa Anutufa naaru marirana nimiannoo. Akaqausa nári nifaqara kai ridaqa andeeqarana futeeqaidaqa aaqaranaki kai fidaqa. Misasaa Anutufa narí aanoo qirana faqa narí aranaqarana faqa nammariara foora adiannimaqaannoo.

<sup>9-10</sup> Nidafirana faqa aupuranara faqa Anutufa aiqama mandoosana maree mariasa misa nimiannoo. Yuda maqannaasa naaree nimiseenoo innaaqiana aanaamuruqa nimiannoo. Anutufa miqi kai inoo aiqama andeeqara oosana maree mariasa nimooqirana faqa nuqu uqeerarana faqa nimuqusaki asoarana faqa nimiannoo. Yuda maqannaasa naaree nimisee innaaqianna aanaamuru mariasa nimiannoo.

<sup>11</sup> Miqimasee Anutufa aiqama maqannaara amana amana kai nári maree mariana akiaqara nimimarifa maridanoo nimiannoo.

<sup>12</sup> Anutufa narí sandufa Mooseena qimamufanoo mifa quandasee Yuda maqannaasa qimannimisooafaq misa mi sandufana qumarasee marusa maridaqa, misa mandoosana maraifanoo Anutufa Mooseena sandufannai misa qumaree naruannoo. Anaamuru mariasa Anutufa Mooseena amu sanda ufana sia mina ameemaanai maridaqa kaqinni maridaqa, misa mandainaina oosana minni kaqinni marinannai naruannoo.

<sup>13</sup> Sia Mooseena sandufa naaqoonnai irimariana sia minau Anutufa narafusaa andeeqaranaki faiqí anaasee quqaidanoofau, mi sandufana marasee imariana andeeqasee auqee marianannai kai Anutufa narí andeeqaranaki quqannisaannoo.

<sup>14-15</sup> Misa Yuda maqannaasa Mooseena sandufa maree mariasa maridaqa aanaamuru mariasa Mooseena sandufa siaisa mariasa maridaqa misa nári iriranannai Mooseena sandufara sia irirai kaqi mi mau fidaqa, doo Anutuna ufamau fimariasa maridaqa. Mi oosanafa Anutuna sandufa naunduraki akara rinoo marifaqara foora kooroo ifaqa miqidaqa. Anaamuru mariasa Anutuna ufa sia irimariasa nariqa kai moo oosana manda oosanee qimasee moo oosana amiqira oosanee qimasee qimariafa mifa kai Anutuna sandufa ooqai kukeeqasee quqaqoofa naundurakiqari kooroo idanoo.

<sup>16</sup> Kasooqaqee anianinna faasaana Anutufa narí asauku mundirana Yisunannai faiqí anaasee aiqama naunduraki kukeeqarana kooroomaseenoo rainannimaqaannoo, Qinee Pauroosa Anutuna amiqira fasaasufa faiqí anaasee qimannimiqa nidaqa minara qimannimidaqa.

*Yuda maqannaasa Mooseena sandufa afeekaikidaqa.*

<sup>17-20</sup> Innee Yuda maqannaara qidaqa anee Yuda maqanna mariananoo anee Mooseena sandufa saqariki marianafa mariananoo, anee Anutunara fifau iridee qimasee firaaqoo ufa qidana aneenna auqu uqeeree marianafa mariananoo, anee Anutuna andeeqara aanara irimarianafa mariananoo.

Anee Mooseena sandufakinaana amiqira aanara faqa manda aanara faqa rainasee irimarianafa mariananoo, anee aneennara nifu dimbarausa aana uqannifiqee marunausee qimarianafa mariananoo anee aneennara asukunaki mariasa misa qooma maridee qimarianafa mariananoo, anee aneennara furufarirausa irirana nimimarunausa qimarianafa mariananoo faiquqaindi amiqira aana uqannifiqee marunausee qimarianafa mariananoo. Anee Mooseena sandufa minakiqari aiqama irirana faqa anoona ufara faqa qinee irida fee qimarianafa mariananoo.

<sup>21</sup> Doo qinee aniara qianaara, anee uqannifiqee marianafa mariananoo, nanaree sia aneennara faqa mina mareenee. Anee misara sia ummuariqee qimaseenana doo aneenna ummuari marianafa mariananoo.

<sup>22</sup> Anee misara sia faiqí anaasee narí ummuari narí ummuari iaqee qidana, anee faqa sia fee ummuaridane. Ooninnai saqarinnai unna qira Anutunara foora mina amana auqimarianara fidiqaa imariananoo fee anee fee mi unnaqira anutuna amaana maqakina keeqafida minakinaa amiqira ainainara fifau ainainee qimaseenane kaqi maraidane.

<sup>23</sup> Anee aneennara Anutuna sandufa qumaree marunausee qidana aneenna auqu firaqoo uqeere marinafa, aneefee Anutuna ufa rukiaseenane asaurirana amidane.

<sup>24</sup> Ooqeenaa tamummaqarausa akarakina inniara maaqi qidanoo. Anaamuru inni Yuda maqanna mandosana qafamasee quandaki Anutunara manda ufa qidaqa.

<sup>25</sup> Innee Yuda maqannaasa inneeqara fainanduqirausee qidaqa miqianara Anutuna faiqi namufee qimariafanoo. Qinee Pauroosa minara maa ufana qidaqa. Innee miqi mariasa Mooseena sandufamau amiqimandee fidaqa inni fainanduqirafa amiqira ainaina mariannoo, mina ufa rukiaseeqa fifau nipata aukirafa, sia Anutuna faiqi namu mariafanoo aamina aanaamuru foora marifaranoo.

<sup>26</sup> Aamina aanaamuru mariasa sia Yuda maqannaasa fainanduqimarusa misa nári kai sia irirai Mooseena sandufamau andeeqaramau fimarifanoo Anutuna mina qafamaseenoo Yuda maqannaara foora mariaafoo qiannoo.

<sup>27</sup> Anaamuru mariasa sia Yuda maqannaasa fainanduqimarusa misa andeeqaseeqa Anutuna ufamau fifaqa innee Yuda maqanna fainanduqimarusa Mooseena sandufa inni ufakiqari akara rirana rukiasaifanoo aanaamuru aamina maqanna nári andeeqarafa inni Yuda maqannaasa mariranara mandainainee qiannoo.

<sup>28</sup> Yafee Yuda maqanna uqanna Anutuna aiku asauku uqanna maridanoo fee, apatasaa kooroo irafa mifee anoona maridanoo fee. Anutuna ufamau fimariasa mi fee anoona maridanoo fee.

<sup>29</sup> Sia apatasaafau anoona maridanoo naundura nimuqusakiqari Anutuna ufamau fimariasa misa anoona maridanoo fainanduqirausara foora maridaqa. Sia Mooseena sandufa irirana irirafa mifau Anutuna aiku asauku kamannimaqaidanoofau. Anutuna maraquna naundurái saikisa misa kai Yuda maqanna uqannara foora Anutuna aiku asauku maridaqa. Miqifandinna fasiqausa sia faiqí nimooqiranafau maraidau, Anutuna amooqiranara ridaqa randasee maridaqa.

### 3

<sup>1</sup> Qinee minara irammirisee qimannimianaara Yuda maqannaasa aanaamuru urinnaaqaraqa maridee kaqi fifau fee miqiqa marida fee. Misa fainanduqirausa misee aanaamuru urinnaaqaraidee kaqi fifau fee miqi qida fee.

<sup>2</sup> Oo sia fifau miqi qidaqa misa uriqararafa firaafa maridanoo. Doo qinee oosandarasee maaqi qimasee qimannimianauro, Anutufa narí ufa Yuda maqannaasasaa quqaqoofanoo marinau.

<sup>3</sup> Akaqausa sia narisaa quqaqoonara irisee andeeqaramau fiqa rukiaasee kaqi runnambiqau. Anutufa misa furufarirana qafamaseenoo qinee faqa misa qima afeekaikamma nimiafanna ufana qinee faqa misa naanna reeqa rukiaanauree qianauree.

<sup>4</sup> Qinee Pauroosa minara maaqi qidaqa. Oo sia uqanna Anutufa mi mandoosanna maraannoo anoona ufa kai qimarifa maridanoo. Faiqi anaasee unnufa kai qimariasa kai mariafanoo sia Anutufa miqiannoo andeeqasee anoona kai qiannoo. Ooqeenaa akara Anutunara maaqi qinoo maridanoo.

Ani ookinaa ufara aiqamausa anoona ufa fee qifaranoo. Misa ani ufara amanamandee irifanoo anoonaikammianoo.

Dafidina akarakinaa ufa Anutunara miqimminoo maridanoo.

<sup>5</sup> Misa faiqi faiqi unna qimasee maaqi qimasee Anutuna andeeqararafa qidaqa. Maasa faiqi faiqi qiqa aaqarafa quandaki Anutuna andeeqarana mara maree kooroomeeqeenoo uqeerainaga maasa qeeqa aaqararafa amiqira ainainee qianauree. Miqooqari maasa maaqi qianauro mandainaina akiaqara maasa Anutufa darinaqa maasa maaqi qianauro Anutufa aaqaidanoo daridanoo fee qianauro.

<sup>6</sup> Qinee Pauroosa minara maaqi qidaqa. Oo sia uqanna Anutufa aaqaidanoo. Anutufa sia uqanna aaqaidanoo, narí andeeqararafa marinara maasa andeeqaqisaannoo mina andeeqararafa sia marinanoofau sia amana maasa aiqama maqannaasa ufa iriseenoo andeeqaisaiqini.

<sup>7</sup> Misa faiqi faiqi unna qimasee maaqi qimasee Anutuna anoona ufara qidaqa, maasa qiqa unna ufa fannoo Anutuna anoona ufa kooroomafi uqeerainanoo qiqa unna ufa amiqirafa maridanoo nanaree Anutufa qiqa unna ufa akiaqara qiqa daruannoo fee.

<sup>8</sup> Qinee mi manda ufanara eedoo qaanaqau maaqi qiaqini, Doo aniaqa maasa manda marirana uqeeraseeqa minannai amiqira marirana kambiqasaanee qiqa. Mi manda ufana uqeereemaria fasiqausa Anutufa misa mara mareenoo nári nariranaki quqaannoo. Sia aaqaidanoo miqidanoo, andeeqaidanoo miqidanoo. Mi aaqara ufana qimariasa qini Pauroosara faqa unna qimasee Pauroofa maasara manda marirana uqeerasee minannai amiqira marirana kambiqaanifeera qimasee minannai qini diqidaqa aaqee mariafanoo.

*Aiqamausa nári mandainaina ameemaanai maridaqa.*

<sup>9</sup> Doo qinee kafa Pauroosa minara maaqi qimasee iraidaqa, Anutufa maasa Yuda maqannaasee, aanaamuru mariasee, uriqaraida fee qidanoo amana amana kai fee maridee qidanoo. Qinee Pauroosa oo sia moo uriqarara fee qidanoo doo qinee faasai qimannimiqa sia moo fannoo uriqararafa mariaafoo qidaqa aanaamuru faqa maasa Yuda maqannaasa faqa nári mandainaina ameemaanai ureeqaqa mariaafoo qidaqa.

<sup>10-11</sup> Ooqeenaa tamummaqara fasiqausa akara minara maaqi qinoo maridanoo.

Aiqama maa maqa maaqanaki mariasakiqari moodaa fasiqa sia uqanna andeeqararafa maridanoo, aiqamausa miqirausa kai maridaqa. Misakiqari sia moodaa fasiqa Anutuna aanara randaidanoo.



- 12 Aiqama fasiqa anaasee uqanna Anutuna afusaaqari quandaki kaqi runnamma ubeekamasee aaqaranaki fimariafanoo. Sia moodaa fannoo amiqira oosana maridaqa sia uqanna.
- 13 Misa noo aamara faiqi madikara foora oo raqanoo marifaqa faiqi kurididaqa. Misa ufa fannoo sakani ukaqa nimiranara foora inoo maridanoo faiqi kuqannaruaqaa ufa kai qimariasaa.
- 14 Misa nooki qari sukufa kai qidaqa niquraree mariasaa.
- 15 Misa dauni faiqi kuqannarirana aupurarana nimimariasaa.
- 16 Miqi mariasaa fimariaqoo kai faaqa fuisee qirana faqa aiqama ainaina kuridi kaaridiga turi taariga fidaqa.
- 17-18 Misa sia asoora aana qafeeqa sia Anutunara naaquqaranara irimariasaa maridaqa.

Ooqeenaa tamummaqara fasiqauqa akara Yuda maqannaara faqa aanaa muru mariasara faqa amana amana kai miqi mariasee qimaqoofa maridanoo.

19 Mooseena sandufakina mina ameemaanai mariasara qidanoo qimarifaqa maasa minara iridaqa. Faiqi anaasee aiqama maa maqannaasa nariara andeeqarausee qimaria ufana oosana oosanauqa aruseeqa aqamausa mareeqee Anutuna narira ufa ameemaanai quqaaqera Mooseena sandufa ani maridanoo.

20 Sia faiqi anaasee moo fannoo Mooseena sandufannai andeeqara fasiqaikamambi Anutuna afusaa mariannoo. Sia minarau Mooseena sandufa ani maridanoofau. Faiqi anaasee maasa aaqee marunaasee qiaqera Mooseena sandufa ani maridanoo.

*Anutuna afusaa andeeqasee marirafa kooroo inoo maridanoo.*

21 Doo maqee kamuqoo Anutuna afusaa andeeqafi marira oosana doo kooroo inoo maridanoo. Sia Mooseena sandufarau qidau, aaduma moo ufara qidaqa. Mooseena sandufa faqa tamummaqaraua ufa faqa doo minara kooroomasee maaqimminoo maridanoo.

22-23 Faiqi anaasee nari Anutuna asauku mundirana saqarikiranannai Anutufa mareeqee nari afusaa andeeqaranaki quqaidanoo. Aiqamausa asauku mundirana Yisuna ufa irisee minasaa rusimariasaa miqi qimariasaa aiqama maqannaasa Anutufa mareeqee nari afusaa andeeqaranaki quqaidanoo sia raina rainiannoo.

24 Aiqama maqannaafasiqa anaasee aaqoonara Anutuna innaaruna asumu mariranasaqari nianai mariafanoo minara Anutufa nari afaariranakiqari kaqi nimira ainaina nari asauku mundirana Yisunannai misa mareeqeenoo nari afusaa andeeqaranaki quqanniseenoo nari mandainainakinaana idukunnisanau.

25 Anutufa Yisunannai faiqi anaasee mandainaina akiaqara mininisaaninafa kambiqaanifee qimasee Yisuna aqiqamasee nimufaqa aunirira saqarisaa ariqau. Mi fasiqa anaaseesa nariqa Anutuna andeeqaranaki sia amanaikiqa Yisuna saqarikidaqa. Minaki keeqaranannai Anutufa misa mandainaina taikannisaidanoo. Anutufa nari andeeqara oosana kooroo ianifeera qimaseenoo nari asauku mundirana aunirira saqarisaa quqaseenoo minannai faiqi anaasee mandainaina akiaqara nari maranau. Ooqai maru aukwana Anutufa faiqi anaasee sia mandainainara nari marinau kisaqaasaa kasoo inoo marida nifauee marinau.

<sup>26</sup> Maqee mari aukuana dauni ufa qimasee andeeqannisaidanoo narí andeeqarana kooroo ianifeera faiqí anaasee mareeqee narí afusaa innaaruna andeeqaranaki quqaidanoo. Anutufa Yisuna mareeqeenoo aunirira saqarisaa aruseenoo minannai maasa mandainaina taikaqisanau. Miqiranannai Anutufa qaara ainaina kooroo idanoo, narí andeeqarana faqa Yisuna ufasaa irirana rusisee mi mau fimariasa mareeqee narí afusaa andeeqaranaki quqannisarana faqa kooroo idanoo.

<sup>27</sup> Yuda maqannaasa Mooseena sandufamau fidaqa náriara andeeqaraura maridee qimasee nári nipatara nimooqida maridaqa. Sia sandufa miqinoo maridanoo Anutuna ufasaa irirana mundinoo marifa narí mina mandaaqee marinafa mifa kai andeeqarafa maridanoo. Mifa kai Anutuna innaaruna andeeqaranaki quqaqisaidanoo.

<sup>28</sup> Minara maasa maaqi qidaqa Yisuna saqarikiranannai kai Anutuna innaaruna andeeqaranaki keeqafi mariannoo, sia Mooseena sandufamau finnanannai innaaruna andeeqaranaki keeqefaranoo.

<sup>29</sup> Anutufa Yuda maqannaasa Anutufa kai fee maridanoo, aanaamuru mariasa Anutufa faqa maridanoo fee. Doo Yuda maqannaasa faqa aanaamuru aiqamausa faqa Anutufa maridanoo.

<sup>30</sup> Anutufa moodaa maridanoo, moodaamau fimarifa maridanoo. Yuda maqannaasa Yisuna saqarikiranannai Anutufa mareeqeenoo narí afusaa andeeqaranaki quqannisaannoo aanaamuru faqa narí afusaa andeeqaranaki quqannisaannoo anaamuru mariasa faqa miqi kai masee Yisuna saqarikinnannai narí andeeqaranaki quqaannoo.

<sup>31</sup> Miqunannai maasa Yisuna saqarikidaqa sia minannai Mooseena sandufa mareeqee aqidaqa, sia miqidaqa maasa minannai Mooseena sandufa uqeraidaqa mi mau fidaqa, minara mi sandufana anoona paquridaqa.

## 4

### *Abarahaamafa Anutunasaa narí irirana rusinau.*

<sup>1-3</sup> Innee Roomma maqannaasaki Yuda maqannaasa akaqausa maridaqa. Maasa Yuda maqannaasa qikeeku qikaaku Abarahaamafa naqaafeinau. Mifa andeeqara mariranannai fee Anutuna afusaa andeeqarafa maridanoofeeinau. Sia minannaifau miqinau Abarahaamafa miqinoo maridanoofau Anutuna afusaa narí andeeqaranara asasini. Sia amana narí asasirafa marinau, Mooseena akarakinaa ufa minara maaqi qinoo maridanoo.

Anutufa Abarahaamanara qinau anee moomoosa nikausaikina marinnaranoo.

Miqi qunara Abarahaamafa iriseenoo oo kuqaa kambiqannoo fee qimasee narí irirana Anutuna mi ufanasaa rusiseenoo afaaqa quqasee kisaaqasaa rakisi marinau. Anutufa mina qafamaseenoo Abarahaamanara oo Abarahaamafa qini ufasaa ani irirana rusimarianafa mariananoo andeeqarafa mariananoo fee qinau, minara Abarahaamafa sia narí andeeqaranara narasasirafa marinau.

<sup>4-5</sup> Faiqí moo fannoo moo fasiqa ainainama isainanoo ainaina akoofa mina feefauru amiannoo. Aminanoo sia kaqi fifau qimiifoo qiannoo, narí mina ainaina kadaapirina akiaqara aminoo. Faiqí moo fannoo sia narí kadaapirinasaa andeeqarana maraidanoo kaqi narí irirana Anutuna ufasaa mundimarina Anutufa miqi mari fasiqana kaqi mareeqeenoo narí afusaa andeeqaranaki quqaidanoo. Anutufa faiqí faiqi aaqee mariasara

andeeqarausee qimarifa maridanoo faiqí aanaaseeuqa sia nariqa kadaapirifa, kaqi mi ufanasaa nári irirana ruisainna fasiqa anaaseesa Anutufa nári andeeqaranaki mara quqannisaannoo.

<sup>6</sup> Anutufa aagee maru fasiqa anaaseesa sia narinau, misara andeeqara fasiqa anaaseera foora kaqi mareeqee nári andeeqaranaki quqanau. Dafidifa minara maaqi qimasee akara rinau.

<sup>7</sup> Anutufa mandainaina akiaqara mininnisoo fasiqa anaaseesa firaqqoo asasiqa. Nári mandainaina Anutufa rafaqqafusoonara asasiqa.

<sup>8</sup> Anutufa nári mandainaina akiaqara sia irisee naruannoo, mina akiaqara aunusee sia kafa minara ufa qiannoo. Miqira fasiqa anaaseeuqa minara irisee asasiqa. Doo Dafidifa miqimmasee akara rinau.

<sup>9</sup> Dafidifa mi اساسا Yuda maqannaasara kai fee fee qinau. Sia miqinoo maridanoo. Anaamuru mariasa faqa اساسيفandia maqi qinau. Qinee Pauroosa faasai Mooseena akarakinaana Abarahaamanara qunafa maaqimminoo maridanoo. Abarahaamafa Anutuna ufa irisee nári irirana minasaa ruisoonara Anutufa minara kai irisee mina mareeqeenoo nári andeeqaranaki quqanau.

<sup>10-11</sup> Yairee fee Anutufa nári andeeqaranaki quqanoo fee inau. Abarahaamana fainanduqu soqqoo fee miqinau sia fainanduquqqoo fee miqinau. Sia fainanduqira qoo mi fasannai mareeqee quqanau. Abarahaamafa Anutuna ufasaa nári irirana ruisoonara Anutufa mareeqeenoo nári andeeqaranaki quqaseenoo mina kooroo ianifeera Abarahaamanara fainanduquannee qufanoo miqinau. Miqi kai inoo Abarahaamafa aiqama Anutuna ufasaa irirana rusiranannai Anutuna andeeqaranaki keeqee marusa nikoofaikinoo marinau. Miqi kai inoo sia fainanduqiraua nári irirana Anutuna ufasaa rusisoosa Abarahaamafa misa nikoofaikinau.

<sup>12</sup> Sia fainanduqiraua faqa fainanduqiraua faqa nikoofaikinoo marinau. Fainanduqiraua Yuda maqannaasa sia minara irisee Anutuna andeeqaranaki keeqaidaqa, misa nári nikeeku nikaaku Abarahaamafa mariundee kai iqa sia nári fainanduqiranara iriseeqa nári irirana Anutuna ufasaa rusisoosa Anutuna andeeqaranaki keeqefaranoo. Abarahaamafa sia fainanduqiraqqoo nári irirana Anutuna ufasaa rusinau. Maqee fainanduqirafa mifa mariundeemiaqa.

*Abarahaamafa nári irirana Anutuna saa ruisoonara qima afeekaikirana maranau.*

<sup>13</sup> Anutufa maa maqa maaqanara Abarahaamafa nári aiku asauku saimbaqa maqa maaqa fee qinoo qimafeekaikinau. Sia Abarahaamafa Anutuna sandufamau andeeqasee finoofau mina akiaqara maqa maaqara qima afeekaikirana maranqofauinau. Mifa Anutufa ufasaa nári irirana ruisoonara minara kai Anutufa mina mareeqeenoo nári afusaa andeeqaranaki quqaseenoo maqara qimafeekaikinau.

<sup>14</sup> Anutufa nári nimianinna ainaina Kannaana maqa maaqa faqa asumu marirana faqa nári sandufamau kadaapirumasee fimariasa kai nimanooofau faiqí nári irirafa mina ufasaa mundirafa fifau kamambuannoo Anutuna ufa qima afeekaikira ufa faqa fifau maridanoo sia dadaaqqiannoo.

<sup>15</sup> Sandufa fannoo Anutuna aranaqarana mareeqeenoo faiqisaa quqaidanoo. Sandufa marinnaqqoo kai sandufa rukiarafa mariannoo. Sandufa sia marinnaqqoo mina rukiarafa faqa sia miqqoo mariannoo.

<sup>16</sup> Qinee Pauroosa Abarahaamanara kafa qidaqa. Anutufa nimianinna ainainara Kannaana maqa maaqa faqa asumu marirana faqa qima afeekaikirafa Abarahaamafa Anutuna ufasaa irirana ruisoonara minasaa

mundinoo maridanoo. Miqunara Anutufa nimianinna ainaina maa maqana faqa asuma marifandinnana faqa Abarahaamana narí aiku asauku faqa misasaa oonu aruakinausa faqa kaqi nimira ainainara foora marianoo. Sia Anutuna ufaki kadaapirumasee fimariasaindi kai mi ainainausa marifaranoo Abarahaamana aanna ree mariasa, Anutuna ufasaa kaqi irirana rusimariasa misaindi faqa mi ainainausa mariannoo. Maasa Anutuna ufasaa rusimariasa nikoofa Abarahaamafa maridanoo. Maasa mina aanna ree mariasa kai mina aiku asauku maridaqa.

<sup>17</sup> Anutuna ooqeenaa akara minara faqa maaqi qinoo maridanoo. Qinee ani Abarahaamana mareeqeeqa moomoo maqannaasa nikoofaikianeera quqeeqa.

Doo maasa mi ufana iriseeqa maaqimmidaqa, Abarahaamafa narí irirana rusisoo Anutufa narí qimafeekaikunara anoonee qidanoo. Mi Anutufa kuqirausakinaana mareeqee kaqi mariranaki quqee marifa maridanoo mina ufa fannoo qufanoo sia maru ainainafa kambiganau.

<sup>18</sup> Abarahaamafa nauraiqi kuqiara foora inoo marufanoo Anutufa moomoo maqanna nikoofaikianeera qimamufanoo Abarahaamafa mina ufasaa irirana rusiseenoo sia asasiaqaa iraqoo asasammaseenoo afeesinau. Minara mifa kuqaa moomoo maqanna nikoofaikamambinau.

Ooqeenaa akara minara maaqimminoo maridanoo. Anisaa aniaruakinausa moomoo marifaranoo.

<sup>19</sup> Anutufa mi ufana Abarahaamana qimamu aukuna kuqirana adeedi ramasee wan handeereeta aukuna adeedi ramasee marinoo narí anaqa Saraqana faqa faiqi maqara aukuna ooqai uqanna taikafufanoo marunara amiqimasee iriseenoo, Anutufa faiqi aanaaqiara qimamunara iriseenoo sia Anutuna ufa afaimma quqanau, kaqi mina irirafa mina ufasaa irirana rusisee kuqaa kambigaannoo fee qimaseenoo marinau.

<sup>20</sup> Abarahaamafa narí Anutunasaa narí irirana rusiqoofa sia quqasee finau, sia mifa Anutuna ufara qaara aundura irinau. Abarahaamafa narí irirana Anutunasaa rusisoofanoo quandakinoo Abarahaamana afeeka amufanoo faiqi kambigaaninnanara Anutunara asasinou.

<sup>21-22</sup> Anutufa qimamu ufanara Abarahaamafa afeekaikamandeenoo Anutunara kuqaa afeeka maridanoo qimiannoo fee qimasee asasinou. Anutufa Abarahaamana mi irirana qafamaseenoo doo minara Abarahaamana mareeqeenoo andeeqara fasiqa fee qinau, Abarahaamafa narí irirana Anutunasaa rusisonara minara andeeqarafee qinau.

<sup>23-24</sup> Andeeqara fee qu ufafa sia Abarahaamanara kaifau miqi qimasee akara rinau, maasara faqa akara rinau. Maasa Karaambaiqa Yisufa kuqiranakinaana uqeeroonasaa irirana rusimarinou maasara faqa akara rinau. Maasa Anutufa mareeqeenoo andeeqara fasiqa anaasee kianinausa maasarammakara rinau.

<sup>25</sup> Anutufa Yisuna mareeqeenoo maasa aaqee marunnanara faiqi nisaukuki nimisoofaqa kuqariqau. Maasa Anutuna afusaa andeeqaraura mariaqee qimasee kuqiranakinaana Yisuna uqeeranau.

## 5

### *Anutuna afusaa andeeqaranaki marirafa.*

<sup>1</sup> Maasa qeeqa irirana Anutunasaa rusiseeqa marianara doo maqee sia Anutuna aranaqaranaki aanoo iranaki maridaqa Anutufa narí andeeqaranaki quqaqisooafaqa minara doo maqee mina asoaranaki amiqiranaki maridaqa. Anutuna asauku mundirana maasa karaambaiqa Yisufa minanai kai mi asoaranaki maridaqa.

<sup>2</sup> Yisufa maasara kuqiranannai faqa maasa qeeqa Yisuna ufasaa irirana rusisaunnanannai faqa Yisufa maasa mareeqee Anutuna kaqi afaariranaki quqasaifaqa maasa maqee minaki kikiqiqa maridaqa. Minaki maridaqa, kasooqagee innaarunai areenarana naida qimiannoo minara iridaqa asasi-daqa afeesidaqa susuidaqa.

<sup>3</sup> Sia minara kai asasi-daqa maqee marianaki ummaara oosana oosanakina maridaqa minaki faqa asasi-daqa. Mandainaina ummaara darinaqa mi ummaarafa sia amiqimasee daruannoo minasaaqari afeeka marasee sia dauni Anutuna ufamau firarana kudoosaapaanau.

<sup>4</sup> Maasa oosana oosana ummaarakina sia umooqukida kaqi fimarianano Anutufa mina qiqaqamaseenoo eedoo qiannoo. Mina eedoo qira ufa fannoo quandaki maasa qifeeqarainaga maasa Anutuna nari areenarana qimianinnanara اساسamasee afeesidaqa maridaqa.

<sup>5</sup> Mi اساسirana afeesirafa sia qisaurirana qimiannoo Anutufa nari naaquqara marauna kaqi qimimarifa maridanoo. Anutufa nari naaquqara maraunannai maasa naunduraki nammariara foora nari aidirana maasa naunduraki adiaqimaqeenoo nari areenarana naida qimiannoo.

<sup>6</sup> Ooqai maasa Anutuna andeeqaranara sia amanaikiqa oorudupiqa mariafanano Anutuna andeeqara aukuanasaa Yisufa maasa mandoosana maree mariafanausara maasara kuqunnimaqanau.

<sup>7</sup> Faiqi moo fannoo sia moo fasiqara qimudaoo qimasee mina amaaqa maqasee fifau kuquannoo, abee sia fee faiqi moo fannoo moo fasiqara amiqira fasiqara qimudaoo qimasee mina amaaqa maqasee kuquannoo fee.

<sup>8</sup> Yisufa sia maasara amiqirausee qimaseenoo maasa qimaaga maqaseenoo kuqinuu. Maasa qeeqa mandainainaki kaqi mariafanano asauku mundirafa maasara kuqunnimaqanau. Miqunannai Anutufa nari kaaqa maasara amuqisirana aidirana kooroomaseenoo maasa uqaqifiqanau.

<sup>9</sup> Asauku mundirafa maasa mandainaina nariara mareenoo kuqinoo nari fidika teeqinoo maasa mandainaina akiaqara taikoonannoo Anutufa minannai maasa daundurakinaana mareeqee nari andeeqaranaki innaaruna mara quqaqisanau. Anutufa mina kuqiranara irisee taikara faasaana nari aranaqaranakinaana kuqaa uqanna asumu mareeqeenoo quqaqisaannoo.

<sup>10</sup> Maasa Anutuna namuqaa marufanoo mifa nari amaaku maasa mandainaina arirana maroonara iriseenoo mina kuqiranannai aqoondi kamma quqaqisaifaqa maridaqa. Asauku mundirafa kuqunannai Anutuna aqoondi kamambi maridaqa kafa Yisuna kaqi mariranannai mifa taikara aukuaana Anutuna aranaqaranakinaana kuqaa uqanna maasa mina aqoondiuga mareeqee asumu mariranaki quqaqisaannoo.

<sup>11</sup> Sia mina kai, Anutufa maasa aqoondi kamma qimaqoonara irisee Anutunara dufi dufi qidaqa asasi-daqa. Anutuna asauku mundirafa Yisufa maasa karaambaqa minannai maasa Anutuna aqoondi kiqa asasi-daqa.

*Adamanasaaqaraafa kuqirafa Yisunasaaqaraafa findifirafa.*

<sup>12</sup> Ooqai indaaru moodaa fasiqasaaqaraafa Adamanasaaqaraafa maa maqa maaqanaki aaqarafa aninau. Doo mi aaqarana akiaqara kuqirafa moodaa kari ani marinau. Moodaa fasiqa Adamanasaaqari aiqama maa maqana afaaqasasa maria fasiqa anaaseesa mifa aaqoona akiaqara misasaa faqa kuqirafa rafaqa finoo marufa maridanoo.

<sup>13</sup> Aiqaumasa aaqoonara rafaqafinoo maridanoo Mooseena sandufa sia ani marukamuqoo aaqarafa doo ani marufa maridanoo. Mi aukuaana mi

fasannai sandufa akara rirana sia marunara Anutufa sia misa rukiaranara irinau.

<sup>14</sup> Indaarugaa fasiqa Adamana saaqari mi kamusaqa kuqirafa aniufanoo mini Mooseena raquraminau. Mi kamusaqa misa aaqarana Anutufa sia irinau, kuqirafa kaqi kai aiqama maqannaa kaqi kai rafaqaqafunnimaqanoo marinau. Sia aiqamausa Adamana aanna ramasee Anutuna ookinaa ufa rukiaqau. Nariki moo aaqarafa kaqi marunara kuqirafa kaqi kai rafaqaqafunnimaqanoo marinau. Adamafa kasooqaqee kambiqaanina fasiqana Yisuna kikiqusirafa marinau.

<sup>15</sup> Miqanda sia amana amana kai maridaqa Anutuna kaqi nimira ainaina Yisufa sia Adamana aaqarafara foora maridanoo, mifa aaduma maridanoo. Dinni kuqaa faiqi moomoosa mi moodaa fasiqana Adamana aaqaranaki kuqiqau. Mina dinni Anutuna kaqi afaarirafa Adamana aaqarana uraaqaranoo maridanoo. Anutuna kaqi nimira naaru marirafa moomoosa nimufa moodaa fasiqannai afaaramandee naaru marirana nimufa mifa faqa Adamana aaqarana uraaqararafa maridanoo. Mi moodaa fasiqafa Anutuna asauku mundirafa Yisufa maridanoo.

<sup>16</sup> Anutufa afaaramandee naaru marirana nimianinnafa moodaa fasiqa Adamana mina aaqarana uraaqaranoo maridanoo. Mi ooreeqarana faqa mi uriqarafa faqa miqanda rainarafa maaqimminoo maridanoo, dinni mi moodaa fasiqana nari moodaa kari aaqamasoona akiaqara Anutufa nimaarusira ufa quqaqoofa maridanoo mina dinni faiqi anaasee moomoosaki aaqarafa kambiqafi marufanoo Anutufa sia minara narinau, kaqi nari afaarinoo nimino qinau, doo andeeqarausa mariafanoo nimaarusira ufa doo taikeenoo fee qinau.

<sup>17</sup> Qinee kuqaa anoona ufa qimannimiana. Kuqaa moodaa fasiqa faiqi Adamana mina aaqarana akiaqara kuqirafa kambiqeenoo aiqama maa maqa maaqana afaaqasasa mariasa kuqirafa oosana araseenoo manda rakisira rakisinnimaqaidanoo marifa maridanoo. Mi ufana dinni kuqaa moodaa fasiqasaaqaraa ainainirafa asauku mundirafa Yisufa mina ainainirafa Adamana uraaqaranoo maridanoo. Faiqi anaasee Anutuna rairaaira afaarirana faqa mina kaqi nimira andeeqarana faqa maree mariasa misa Yisufa asauku mundiranannai sia Adamana kuqiranaki marifaranoo innaarunai kaqi mariranaki afeekaikirausa marifaranoo.

<sup>18</sup> Dinni moodaa fasiqa Adamana oosana maaqimminoo maridanoo, mi moodaa fasiqana aaqaranasaa faiqi anaasee aiqamausa kuqira ufa ameemaanai maridaqa. Mina dinni miqi kai masee moo fasiqa Yisuna moodaa kari andeeqaina akiaqara kuqira ufakinaana idukueeqeenoo kaqi mariranaki quqaidanoo.

<sup>19</sup> Dinni moodaa fasiqa ufa rukiarana akiaqara faiqi anaasee moomoo aaqaranaki aqufiqau. Mina dinni miqi kai masee moodaa fasiqa Yisufa Anutuna ufamau firana akiaqara moomoo fasiqa anaasee Anutuna andeeqarausaikiqa marifaranoo. Minara qinee Pauroosa qiqa, (Yisufa ooqeenaa Adamana kikiqusirafa marinau maqi qidaqa.)

(Mooseefa sia kambiqoo kamuqoo mina sandufa sia marufanoo faiqi anaasee nari mandainainara mana mana imariqau.)

<sup>20</sup> Anutufa nari sandufa nimaarusira ufa Mooseenasaa nimufaqa nari mandainainara irufanoo firaanaikinau, miqinoo firaanaikianifeera Anutufa aminau. Faiqi anaasee mandainaina firaqoo ooru fimarufanoo Anutuna afaarirafa mina aakaarinni ooraqareenoo ooriqaranoo marinau.

<sup>21</sup> Dinni aaqarafa kuqiranannai aiqama maasa rafaqa fidanoo mina dinni miqi kai masee Anutuna afaarirafa Yisuna andeeqaranannai maasa

rakisiqimaqaidanoo qifigeeqeenoo innaaruna asumu mariranaki quqaqi-saidanoo. Anutuna asauku mundirana maasa karaambaiqa Yisunannai qifigeeqee quqaidanoo.

## 6

### *Mandainainakiqari kuqiara foorammidaqa.*

<sup>1</sup> Anutufa narí afaarirana maasa qimunara minara naqi fee qianau-ree. Maasa maaqi qimasee aaqamasee qianauree, maasa mandainaina aaqaranaki kaqi mariananoo Anutufa mina minnisaina afaarirafa firanaakee iannoo fee qianauree.

<sup>2</sup> Oo sia uqanna maasa miqi qianauree Yisufa aunirira saqarisaa kuqinau, maasa mina faqa kuqiira foora iqa marunnaara maqee maria mandainainakiqari kuqiira foora iqa maridaqa. Naqimasee maqee mari mandainainaki fuauree doo kuqiara foora iqa maridaqa.

<sup>3</sup> Innee maa ainainnara amiqimasee iridee sia fee iridee. Maasa Asauku mundirana Yisuna auqusaa nammari maraafannaqoo maasa Yisuna saimbaqa narí kuqiranaki keeqeeqa nammari mina kikiqa ususeeqa mareeqa.

<sup>4-5</sup> Maasa nammari maraafannanannai maasa Yisuna namufaqa qikundeera foora iqa narí kuqirana naida qimidanoora foora qinoo, mina akoofa narí kaaqa areenara afeekannai narí asauku mundirana kuqiranakinaana mara findifuna, maasa miqi kai masee maasa fuka mariranaki mariaqera qinoo maasa kuqiranakiqari foora findifumaqisanau. Maasa Yisuna faqa kuqiqa moodaanaki kammidaqa miqikaimasee mina faqa findi fiqa mina moodaa kaqi mariranaki marianauree.

<sup>6</sup> Maasa maa ainainna iridaqa, maasa manda marira nirana ameemaanai maridaqa. Doo maasa minakiqari idukuaniifeera Anutufa maasa mareeqeenoo asauku mundirana faqa aunirira saqarisaa kuqannarinau. Maasa sia kaifaa ooqeenaa marirana maraqa nuqaqerau miqinau.

<sup>7</sup> Miqinoo marifaqa maasa minara maaqi qidaqa, faiqí moo fannoo kuqinanoo mina manda marira nirana mina afaaqasaaqaraafa idukuannoo sia kafa amana minaki nuannoo. Maasa Yisunasaimbaqa kuquafannanara miqi qidaqa.

<sup>8</sup> Maasa Yisuna faqa kuqiranaki keeqaafanausee qidaqa maasa mina faqa findifi mariraree qidaqa.

<sup>9</sup> Maasa asauku mundiranara doo kuqiranakiqari findifinoo sia kafa kuquannoo miqunara kuqirana afeeka sia kaifaa rafaqaqafuannoo fee qidaqa.

<sup>10</sup> Mina kuqirafa mandainaina akiqara arirafa moodaa kari kuqunara sia kaifaa maa maqanasaaqaraa mandainaina fannoo mina rafaqaqafuannoo. Doo maasa mandainaina mina rafaqaqafirana faqa, kuqirana faqa doo taikkeenoo. Doo maqee findififa mina marirafa Anutuna faqa maridanoo.

<sup>11</sup> Innee mi irirana marasee maaqimandee iriaqa. Maasa mandainainaki maridaqa kuqufiqa doo sia minaki maridaqa maasa faqa kuqiransa maridaqa doo maqee asauku mundirana Yisuna faqa kuqiranakiqari findi fiqa mina faqa Anutuna kaqi mariranaki maridaqee qidaqa.

<sup>12</sup> Minara maqee manda marira nirana fannoo sia maasa qifaaqa rakisiqimaqaannoo, qaoo qiaqa. Sia maasa faiqí faiqi manda nidiranamau fuaqa.

<sup>13</sup> Manda oosana moo inni qumarainaqa sia inniqa nifaaqa minakina eedoo qimasee quqaaqa. Sia miqiaqa maaqiaqa, innee kuqiranakiqari fin-difi mariasara foora aiqama nifaaqa eedoo qimasee Anutuna aramandunnai rumafifanoo mina inni nifaaqa mareeqeenoo narí andeeqara saikaki quqaanifeera mina aramandunnai inneeqa nifaaqa quqaaqa.

<sup>14</sup> Maqee innee sia Mooseena sandufa nimaarusira ufa ameemaanai mariafanoo innee Anutuna afaarirana ameemaanai mariafanoo minara mandainaina fannoo sia inni rafaqa fuannoo.

*Andeeqara oosanaki rumbaqa maridaqa.*

<sup>15</sup> Maasa sia Mooseena sandufa nimaarusira ufa ameemaanai maridaqa Anutuna mandainaina minnisara afaarirana ameemaanai maridaqara qiqa manda oosanaki kaqi qifaaqa quqasee maraanauree. Oo sia uqanna.

<sup>16</sup> Innee maanara iridaqa maasa Yuda maqannaa ooqeenaa oosana irimariafanoo, maasa akaqausa karafusara foora moo fasiqa qeeqa qifaaqa amisee mina ainaina auqamaisaidaqa. Yafasiqanee ainaina maisaanauree, mi fasiqana qeeqa qifaaqa mina aramandunnai quqasaanoo mifa qini rakisi qimaqainaqa mina ufara eedoo kai qianaura. Qinee manda oosanara faqa Anutuna ufa iriranara faqa miqandara qidaqa. Inneeqa nifaaqa mara maree manda oosana ameemaanai quqasaifanoo inni mareeqeenoo kuqiranaki quqannisaannoo, miqooqari mina dinni Anutunai ubeekamafi minufara eedoo qimasaifanoo mifa narí andeeqaranaki quqannisaannoo.

<sup>17-18</sup> Oo Anutunara dufi dufi qiaqa. Innee ooqai mandainaina ufa ameemaanai marusa mariafanoo maqee innee inneeqa aiqamausa naundurannai qinee Pauroosa qimannimuna naamuaqira anoona ufa ameemaanai mariafanoo minara innee manda rumbaranaki marufanoo Anutufa idukunnisoofaqa mina andeeqara rumbaranaki fuafanoo.

<sup>19</sup> Inneeqa faiqí faiqi sia afeeka irirana faqaasa mariasa mariafaqa qinee Pauroosa kaqi maa ufana inneeqa irimariana amana kai qimannimianaqa iriaqeera qimannimidaqa. Ooqai innee inneeqa nifaaqa faiqí faqa anaasee faqa nariara nariara fanandirana faqa oosana oosana mandainaina faqa moo faqa moo faqa aaku aakummafifaqa mariafanoo mina aramandunnai kai inneeqa nifaaqa quqasaafanoo doo maqee miqi kai iqa inneeqa nifaaqa aiqama andeeqara oosanamau fimariana aramandunnai quqasee maqeeidaqa naaquqara andeeqara mariranaki mariaqeera.

<sup>20</sup> Ooqai innee manda oosana rumbaranaki maridaqa sia andeeqara ummaara ameemaanai mariqau sia minara irimariafanoo.

<sup>21</sup> Mi manda ummarafa ooqai mariunara maqee nisauri mariafanoo. Innee mi mandainainaki maridaqa minakiqari nanee moo amiqira ainaina mareeusee. Maqee minara iriseeqa ooqai maraafannainainara nisaurirainaina maraqiafanoo qidaqa. Mi manda oosanamau fiifiufa kuqiranai kai ubeekke marinau.

<sup>22</sup> Doo maqee innee mandainainakiqari idukiqa mariafanoo Anutuna rumbaranaki keeqafi mariafanoo. Doo innee miqiunara inni marirafa aiqama doo minaindi kakai mafi mariinaqa taikara aukuna innaarunai marirana inni nimiannoo.

<sup>23</sup> Dinni manda oosana fannoo narí ainainimariasaa naarama quqaseenoo narí ainainirana akiaqara feefauru nimidanoo mi feefaurufa kuqirafa kai maridanoo. Kafaa mina dinni Anutuna kaqi nimira ainaina innaarunai naaru marirafa sia ainainirana akiaqara maridanoo, mina asaku mundirafa maasa karaambaiqa Yisufa mina faqa moodaanaki kiqa maridaqa mina namufaqa innaarunai naaru marirana kaqi nimirafa mariannoo.



## 7

*Mandoosanakiqari maqee Yisuna findifranaki maridaqa.*

<sup>1</sup> Oo qini qikaqaafasaa Roomma maqanna mariasa qinee Pauroosa maqee ufa qimannimirara innee amiqimasee irimaru ufana qimanni-anaura. Faiqi anaasee sandufa faqa Mooseena sandufa faqa faiqi anaasee kuqiqa mi sandufana sia irifaranoo. Kaqi maru kamuqoo misa mina irisee mina ameemaanai maridaqa.

<sup>2</sup> Nimundara fasiqa anaaseera foora sanda ufa ameemaanai maridaqa. Mi anaaseena afaaqi kaqi marinanoo mi anaaseefa narí afaaqindiri sanda ufa ameemaanai maridanoo narí afaaqisaa atooqanoo mariannoo, afaaqi kuqu finanoo mina anaqa fannoo kaqi fifau mariannoo sia sandufa ameemaanai mariannoo sia narí afaaqisaa atooaannoo.

<sup>3</sup> Mi anaaseena afaaqi kaqi marinanoo quandaki moo fasiqa marainanara qummuarimari anaasee fee qifaranoo. Mina afaaqi kuqufinanoo sandufasaaqaraafa doo idukinoo maridanoo, quandakinoo moo fasiqa marainnanara sia minara ummuarimari anaasee fee qifaranoo.

<sup>4</sup> Doo innee qini qikaqaafasaa innee faqa Mooseena sandufa ameemaanai mariasa doo innisaimbaqa qifaqa fannoo Yisuna saimbaqa kuqinau. Doo mi kuqiranakiqari mina Yisuna namufaqa findifiqa minaindikiqa Anutuna ainainiranaki andeeqasee anoona ainaina imarinakina mariaqeera mari-afanoo.

<sup>5</sup> Ooqai maasa qeeqa faiqi faiqi iriranamau manoo manaa iqa fimari-afananoo Mooseena sandufa anireenoo maasa manda oosana afaurammee-qee mara uqeera kikiqa maseenoo quandakinoo mareeqeenoo kuqirana ameemaanai quqaqisanau. Minara Mooseena sandufa nimaarusira ufa fannoo maasa karafusara foora rumbaqaqimanau.

<sup>6</sup> Doo maqee iriaqa, maasa Yisuna faqa kuqiara foora iqa maridaqa maasa karafusa rumbaqa marianasaaqari idukuaki maridaqa sia kafa oqeenaa mariranaki fuanaura. Maasa Mooseena sandufamau fuannana mifa maasa mandainaina mara uqeera quqaannoo minara mi mau sia fuanaura, fukamau Anutuna maraqauna aatata fuanaura.

*Sandufa fannoo paqurimma qimifaqa qeeqa mandainaina kaqi maridaqa.*

<sup>7</sup> Minara maasa Mooseena sandufara mandainainafee qianauree. Oo sia miqinoo maridanoo. Mooseena sandufa innee moosa ainainara sia nimuqusianifee qidanoo sia miqinoo marinaqa qinee moosa ainainara qimuqusimarina mina aaqee unoo qunara sia irini mana mana kaimmunaiqini. Minara Mooseena sandufakinaafa doo kooroomandee mandainainara qimaqimifaqa qisauriqa.

<sup>8</sup> Mooseena sandufa fannoo moosa ainainara sia nimuqusiaqee qinoo marifanoo qini manda irirafa irisee quandakinoo firaaqoo moosa ainainara amuqusidanoo. Minara sandufa sia maru kamuqoo mandoosanara oonumafi irirafa kuqinoo marufaqa mana mana imariafannana.

<sup>9-10</sup> Mooseena sandufa sia maru aukuana sia faiqi anaasee narufaqa sia kuqiara foora imariqau kaqi maridaqara foora imariqau. Mooseena sandufa nimaarusira ufa kambiqafufaqa misa naunduraki manda oosana uqeera niminoo narinau. Miqimandaifanoo Anutuna kaqi marira nimira ufa fannoo kuqirana kai niminoo.

<sup>11</sup> Misa naunduraki mari mandainaina fannoo misa narirara rakisinoo marifanoo Anutuna sandufa aniraifanoo mina qumareenoo minannai misa naru quqeenoo.

<sup>12</sup> Mooseena sandufa faqa Anutuna naamuaqira ufa faqa andeeqarafa naaquqarafa amiqirafa maridanoo.

<sup>13</sup> Amiqira ainaina fannoo fee misa kuqa narinoo fee qianauree. Oo sia miqinoo maridanoo. Misa naundurakinaa mandainaina fannoo kai amiqira ainaina mara mareenoo minannai misa narinoo. Miqi mandainanoo misa naundurakinaa anoona mandainaina akooqoo kooroo ianifeera miqinoo. Doo mi mandainainafa Mooseena sandufa saaqari innooqeenoo firaanaikinoo maridanoo.

*Maasa qiqa daunduraindaraa irirafa oonu rarisee ani rarisee idanoo.*

<sup>14</sup> Qinee Mooseena sandufara kuqaa innaarunaindaraa ainainee qidaqa. Qini daundurakinaa mandainaina fannoo ainainira fasiqara foora qini feefaurummeeqeenoo nararamandunna quqaqisaqaisa mina rumbara saikaki maridaqa.

<sup>15</sup> Qinee mi saikanaki maridaqa qeeqa auqee marunna saikoosanara faqa sia iridaqa. Qinee amiqira oosanara didimarina marararee qidaqa sia maraidaqa. Qinee dapi manda oosana fidiqaaira oosana kai maraidaqa.

<sup>16</sup> Qini irirafa qikooqemari mandoosanna maraidaqa Mooseena sandufa fannoo qiniara aaqee mariifoo qimasaifanoo qini irirafa faqa mina irirafa faqa moodaaqoo apinoo marifaqa. Oo Mooseena sandufara anoona mariifoo qidaqa.

<sup>17</sup> Miqidaqa sia qeeqa maraqunafau mi manda oosanna maraidau. Mandainaina fannoo qini daundurai marifa mifa qini qifeeqaraifaqa mi manda ainainna maraidaqa.

<sup>18</sup> Qeeqa daundurakinaafa amiqira oosanna maraanee qifaqa qini irirafa anuqidanoo sia amanaikidanoo. Mina iridaqa maaqi qidaqa qiqa faiqi faiqi qimuqusaki amiqiroosanna sia minaki marifanoo fee qidaqa.

<sup>19</sup> Amiqiroosanna auqararee qimasaidaqa miqooqari quandakifaqa qikooqemari mandoosanna kai auqaidaqa.

<sup>20</sup> Qinee qini qikooqemari mandainaina auqaananoo sia qeeqafau auqaidau qini daundurakinaa mandainaina fannoo mina auqaidanoo.

<sup>21</sup> Qinee amiqira ainaina iraree qunanoo mandainaina kai qini doorinni aniraifaqa mina kaimma auqaidaqa. Mi sandafa kai qini daundurai irirana qimidanoo.

<sup>22-23</sup> Qini qimuqusa ookina Anutuna sandufara asasidanoo qiqa qifaqaki mari manda ainaina mifa kai qini raineeqeenoo narí rumbaranaki quqaidanoo.

<sup>24</sup> Qiqa manda qifaqa fannoo qiqa daundura mareeqeenoo kuqiranaki quqaidanoo. Oo qinee nanaree kaaqa mandainainaki maridee firaqoo doori runidee. Qeeqa qifaqa qimana namufaqa kuqiranaki fuananoo yafee aniree minakinaana qini qimana mareeqee kaqi naaru mariranaki quqaqisaannoo fee.

<sup>25</sup> Oo dufi dufi Anutufa narí asauku mundirana Yisuna maasa karaambaiqannai qini mareeqeenoo naaru mariranaki quqaqisaannoo. Doo maqee qinee minara maaqi qidaqa. Qini marirafa maaqimminoo maridanoo qeeqa qimuqusa daundurakinaa irirafa Yisunannai kai Anutuna sandufamau fidaqa qeeqa faiqi faiqi manda nirana marirana mandainaina sandamau fidaqa.

## 8

*Anutuna maraquna fannoo maasa daunduraki dadaaqifaqa andeeqasee maridaqa.*

1-2 Maasa Anutuna asauku mundirana Yisuna faqa moodaanaki marifanoo Anutuna maraƣuna fannoo kaƣi marirana niminoo kuƣirana manda sanda faqa manda oosana faqa minaki marunnana idukuƣisaifaqa maridaqa. Minara maqee asauku mundirana Yisuna faqa moodaanaki mariasa sia Anutuna kuƣira ufa ameemaanai maridaqa.

3 Mooseena sandufa nimaarusira ufa sia amana maasa uqeereeqeenoo maasa faiqi faiqi maasa marirafa kudoosaapaunanoo minara sia maasa uqeeraqiseenoo. Mooseena sandufa kadiqoofanoo miqoo Anutufa moo oosanannai anoonaikinai. Mifa nari amaaku aqiqoonannai maasa faiqi faiqi naundurakinaa mandainaina arinai. Yisufa faiqi faiqi naundurakinaa manda ainaina maraƣuanifeera nari faiqi faiqi fooqaanaikamasee aqiqoofanoo quminai.

4 Maasakiqari akaqausa sia faiqi faiqi iriranamau fimariasa Anutuna maraƣuna sandufamau fimariasa maasara Anutufa qiqafeenoo sia maasa andeeqarafa Mooseena sandufa amana ooru maridanoo, ooreeqanoo maridanoo. Anutufa mina qafamaseenoo maasa andeeqarafa Mooseena sandufa amana kai ooru fuanifee qimasee nari amaaku aqiqoofanoo quminai.

5 Faiqi faiqi naundurakinaa manda iriranamau fimariasa nari naundurakinaa irirafa nariqa rafaqafunnisaifaqa mi mau fidaqa. Anutuna maraƣuna ufamau fimariasa maraƣuna aidimari ainainafa misa nitikuraki keeqafi rakisi qumaraifaqa mi mau fidaqa.

6 Faiqi faiqi nidimari manda ainainafa ani atikuraki rakisinana kuƣiranai ubeekanoo maridanoo kafa mina dinni Anutuna maraƣuna fannoo nari aidirafa ani atikuraki rakisinana mifa ani mareeqeenoo kaƣi marirana faqa asooaranaki faqa ubeekama amaqaannoo.

7 Faiqi faiqi manda nidirafa nitikuraki rakisimarisa Anutuna namuqaakammiqa maridaqa, sia Anutuna sandufamau fidaqa, fidaqau sia amanaikiaqini.

8 Nari faiqi faiqi iriranamau fimariasa sia amana Anutuna aidiramau fifaranoo.

9 Innee Roomma maqusai mariasa qini qikaqaafasaaƣa innee sia miqimariasa Anutuna maraƣuna fannoo innikina marifaqa innee sia faiqi iriranamau fimariasa mariafanoo innee maraƣuna ufamau fimariasa mariafanoo. Asauku mundirana maraƣuna siaifa sia minaindi maridanoo.

10 Asauku mundirafa inni naundurai namummaqainaqa mina maraƣuna fannoo inni nifaqa mandainaina fannoo narinoo marinnana sia minara iridanoo qafaidanoo Yisuna kuƣiranara iriseenoo kaƣi marirana inni ni mana kaƣi nimidanoo.

11 Anutuna maraƣuna fannoo Yisufa kuƣiranaƣinaana marafindifinai. Yisuna mara findifu maraƣunafa kai inni faiqi nifaqa kuƣiqa marifanoo kasooqanee mi kuƣirana uqeereeqeenoo kaƣi marirana nimiannoo, nari maraƣuna inniki marinnanannai miqiannoo.

12 Oo qini qikaqaafasaaƣa maasa moo ummaara ameemaanai maridaqa maasa faiqi faiqi manda nidirana ameemaanai sia maridaqa. Yisuna maraƣuna ummaara ameemaanai maridaqa.

13 Innee maqee faiqi faiqi iriranamau fiqa doo kuƣifaranoo. Anutuna maraƣuna ufa irisee minannai innee inneeqa manda oosana kuƣaruseeqa innee sia kuƣifaranoo kaƣi marifaranoo.

14 Anutuna maraƣuna fannoo nifiqee fimarisa Anutuna faiqi namu maridaqa.

<sup>15</sup> Anutufa narí nimimari maraqunafa sia inni manda rumbaranaki quqaseenoo rufiarana nimiannoo, mifa sia miqidanoo maaqimmiannoo inni mareeqeenoo inni Anutuna faiqi namu kammasainaqa mina afeekannai kai qifaaqa quqasee maasa Anutunara maasa qikoonee qidaqa.

<sup>16</sup> Anutuna maraquna fannoo aniree maasa qeeqa maraquna minasaa ootupamasaannanara maasa maraquna qimamida maaqi qidanoo innee Anutuna faiqi namu mariafanoo fee qidanoo.

<sup>17</sup> Anutufa narí faiqí aanaaseera amiqi amiqira ainaina afeeda maqi-maqaina maasa mina faiqi namu marianara minara maasa mifa innaarunai quqannimaqaqai qumiasana kasooqaqee maraanaura. Anutufa narí asauku mundirana amaqaqai qumiasana faqa maridanoo mifa mina faqa maasa mirinni innaarunai naida qimiannoo. Maqee maria aukwana asauku mundirana kuqira aupurarana dadaaqi maraananoo innaarunai mina kaaqa areenarana faqa naida qimiannoo.

*Maasa aupuraranaki maridaqa Yisuna kaaqa qarana afeesida maridaqa.*

<sup>18</sup> Maqee mari aukwana Yisuna kuqu aupurarana dadaaqi marainafa faqa maasa oosana oosana ummaara marainnana faqa kaqikaafa maridanoo, kasooqaqee innaarunai narí areenarana naida qimianinafa qafaananoo firaafa uqanna mariannoo sia maqee aupuraranara qianaura fifau ainainara foora maridanoo.

<sup>19</sup> Anutufa auqu quqoo ainainausa innaarunaindaraana faqa maqasaaqaraana faqa mi ainainausa aiqama moodaanaki kaaqa aupurarana maraيداqa Anutuna faiqi namu faiqí faiqi misa kuqiranakiqari findifiranara afeesidaqa. Misa kaaqa firaaqoo minara afeesida maridaqa. Maasa Anutuna faiqi namu saimbaqa putaa iranakiqari idukuqaqee qimasee kaaqa afeesidaqa.

<sup>20</sup> Innaarunai faqa maqasaa faqa mari ainainafa aiqama putaa inoo mandaikinoo rakeeinoo madaapeekammidanoo. Sia narí kai miqidanoo Anutufa narí qimaqoomau fidanoo miqidanoo. Anutufa minauqa faqa faiqí narira ufa ameemaanai quqaqoosa maridaqa madaapeekidaqa. Mi putaaaira marirafa qumaarandanoo maridanoo mina aufadara ufa faqa maridanoo maaqimminoo maridanoo.

<sup>21</sup> Aiqaama mari ainainafa narí putaa kiqari kasooqaqee idukufuanoo. Idukufinoo Anutuna faiqi namu nári idukiranaki faqa idaaqira areenaranaki faqa keeqafi moodaanaki marifaranoo.

<sup>22</sup> Oosanasaaqari aiqama Anutufa auquqoo ainainafa anaasee inaamunai aupuraida ikiraqee marianara foora maqee putaa irafa ummaarandanoo maridanoo.

<sup>23</sup> Sia auquqoo ainainafa kai aupuraidanoo maasa faqa qeeqa faiqí faiqi manda marira nirana aupurarana aupuraidaqa, kasooqaqee Anutufa firaa qumiasana maasa innaarunai qimiannoo, maqee oosana arasee nimira ainaina narí maraquna nimiqaosa maridaqa. Maasa Anutunara afeesidaqa aupuraidaqa mifa maasa aiqama qipatasaa marirana iriranakinaana idukusainaqa narí faiqi namu kamambiqa innaaruna ququsaki mariaqeera minara qeeqa faiqí faiqi manda marira nirana aupuraranara aupuraida afeesida maridaqa.

<sup>24</sup> Maasa Yisunasaa irirana rusiseeqa minara asasammasee afeesidaqa minannai innaaruna asumu marirana mareeqa. Asasamandee afeesimaria ainainafa anirainaqa qafamasee maasa sia afeesianaura. Sia moo fannoo narí qafeemari ainainara afeesidanoo, doo ani maridanoo.

<sup>25</sup> Maasa sia qafaa ainaina kambiqaanoommifoo qidaqa ubiqafi reen-deenamandee اساسامasee afeesidaqa.

<sup>26</sup> Miqikai inoo Anutuna maraḡuna fannoo anireenoo maasa Yisuna saḡarikiranara kudoosaapee mariasa dadaaqidanoo. Maasa nana innaaru fee qianauree qimasaidaqa nana ainaina kikiqususaidaqee innaaru qianauree qimarufanoo Anutuna maraḡuna fannoo maasa ooreeqara innaaru qirana qafeenoo innaarunai ooru maasara Anutunai firaqqoo dadaaqidanoo pisoopisoo mandee innaaru qidanoo, faiqi faiqi ufa sia amanaikifanoo ammaqasaidanoo firaqqoo Anutufinnai maasara innaaru qidanoo.

<sup>27</sup> Anutuna maraḡuna fannoo Anutuna faiqi aanaaseera Anutunnai firaqqoo pisoopisoo mandee innaaru qidanoo, sia fifau, Anutuna iriramau kai misara innaaru qidanoo. Anutufa faiqi nimuqusaki mari ainainara faasai qafee marifa marinara maraḡuna ireefandinna ainainara faqa faasai iridanoo moodaa irirana marinara maraḡuna maasara ireemari ainainara iridanoo.

<sup>28</sup> Maasa maa iriranna iridaqa faiqi faiqikinaana nari asumu mariaqeera qimasee nari rusandeesamumandee maroosa Anutunara nidimarisara Anutufa misasaa rakisidanoo oosana oosana ummaara mandainainna misasaa quqee marina misa dadaaqida fee qidanoo misasaa quqaidanoo.

<sup>29</sup> Anutufa faiqi faiqikinaana rusandeesamumandee maroosa sia fifau maranau. Misa nari amaaku Yisunaikamambi mifara foora mariaqeera misa rusandeesamumasee mareeqeenoo utaaqama nimaqasoofaqa mariqau. Miqimasainanoo Anutuna amaaku fannoo moomoosa maqasaaqaraasa mina akaqaafasaara foora maridaqa mifa misa ooqu faiqi nifasaafara foora mafinoo marianifeera utaaqamma amaqaanau.

<sup>30</sup> Anutufa nari maraqqoosa naaramasoofaqa aniroofanoo mareeqeenoo nari mariranaki quqanau. Anutufa sia fifau naarama quqanau, naaramasee nari afusaa andeeqaranaki quqanau, minaki quqaseenoo innaarunai kaaqa areenarana faqa naida niminau.

*Sia moo ainaina maasa Yisunasaaqaraana amana rakee iannoo.*

<sup>31</sup> Maasa maa ufana aiqama irisee Anutunara naqi fee qianauree. Anutufa maasa dadaaqimarifa marinanoo yafee maasa amana rafaqa fuannoo. Sia amana moo fannoo maasa amana rafaqa fuannoo.

<sup>32</sup> Anutufa sia nari amaakuara irinau kaqi maasara qimudaoo qimasee kuqiranaki quqanau. Mifa nari amaaku uqanna ririmma kaqi qiminau nana ainainee moo ainaina sia qimiannoo, aiqama ainaina kaqi afaarida qimiannoo.

<sup>33</sup> Yafee Anutufa rusandeesamumasee maroo fasiqa aanaaseera mandainainara qimammaree nifairiannoo fee sia moo fannoo miqiannoo Anutufa nari uqanna misara mandainaina siasee qidanoo.

<sup>34</sup> Yafee moo fannoo mina faiqi namu kuqira ufa nimiannoo fee. Sia moo fannoo amana miqiannoo. Anutuna asauku mundirafa Yisufa doo kuqufufanoo Anutufa kuqiranakinaana mara findifumasee kaqi mariranaki quqasaifanoo doo maqee Anutuna aaqa asauku uqannai maridanoo maasara Anutuna oorisa innaaru qidanoo.

<sup>35</sup> Yafee moo fannoo asauku mundirana amuqusiranakinaana maasa rakeemasee kaqinni quqaannoo fee. Sia uqanna moo fannoo amanaikiannoo. Amanee mandainaina oosana oosana fannoo mina amuqusiranakinaana rakee iannoo fee qimuqusimari ummaara fee amanee Yisuna amuqusiranakinaana rakee iannoo fee Yisuna ufasaara narirafa mifee amana rakee

iannoo fee. Aararee marinee amanee rakee iannoo fee kudikira fee rakee ianno fee ariranara deedaqirafa amanee rakee iannoo fee kuqirafa amanee mina amuqusiranakinaana rakee iannoo fee. Sia moo ainaina amana rakee iannoo.

<sup>36</sup> Tamummaqara fasiqa akaraki minara maaqi qidanoo.

Maasa Anutuna ufamau fimariasa faasaambaasaana aiqama kari Anutunasaara dariranara eerairidaqa. Anutuna ufa siaisa misa maasa kuqiranaki fimaria sipsipausara foora maasa maaqimma qidaqa, kuqa dariraridaqa.

<sup>37</sup> Tamummaqara fasiqauqa miqi qimaqoofaqa qinee Pauroosa mi aiqama aininausara qinee maaqi qidaqa. Sia moo manda ainaina fannoo Yisufa maasara amuqusiranakinaana ani mara rakee iannoo mi mandainaina oosanna oosannafa maasa darirari marifanoo mi dariranna sia rafaqaqafuannoo. Maasara amuqusimarifa asauku mundirafa maasa mareeqee uriqararanaki quqaqaisa maridaqa.

<sup>38</sup> Qinee Pauroosa maa ainainnara amiqimandee mapukusee iridaqa, sia moo innaarunaindaraa rakisira fee moo afeeka fee maqee mari ainaina fee kasooqagee kambiqaaninna ainaina fee kuqa darirane kaqi marirane.

<sup>39</sup> Innaarunai mari ainaina fee maa maqanasaa mari ainaina fee, Anutufa auqu quqaqoo ainainakiqari sia amana moo ainaina fannoo Anutuna amuqusiranakinaana ani qumaree rakee iannoo. Anutuna asauku mundirafa Yisufa maasa karaambaqa fannoo maasa mareeqeenoo minaki quqaqaisa maridaqa sia moo ainaina fannoo minakinaana ani qumaree rakee iannoo.

## 9

*Pauroofa Isaraee maqannaasara qimudaoo qidanoo naiki raqeenoo qimanimu ufafa.*

<sup>1</sup> Qinee Pauroosa anoona ufa kai qimannimidaqa. Qinee asauku mundiranaindi maridaqa sia unna ufa qimarunausa maridaqa. Qini daakirafa Anutuna naaquqara andeeqara maraquna fannoo mifa rakisimarifaqa sia qinee unna ufa qianaura. Qinee qeeqa maqannaasa Isaraee maqannaara qimannimianaaura.

<sup>2</sup> Misara firaqoo qimuqusimarifaqa qikiraqaidaqa qeeqa maqannaasa qeeqa moodaa qimaqi moodaa fidika rainarausara miqidaqa. Misa Yisunara sia fee qimasee arunara oonumafi iriqa ikiraqaidaqa.

<sup>3</sup> Misa Isaraee maqannaasa asauku mundiranasaaqaraana rakeemmiqa maridaqa. Anutuna narira ufa ameemaanai marianara qinee rakeemaseeqa minni misa nimaqa maqaanaqa misa aiqaree asauku mundiranasaa atooqafiqa naaru kaqi mariranaki mariaqaana.

<sup>4</sup> Misa Isaraee maqannaasa Anutufa aiqama maqannaasakinaana rursandeesamumandee Isaraee maqanna maroosa mariafanoo, Anutufa misa mareeqeenoo nari faiqinamukamasee nari areenarana raina nimiqoosa mariafanoo. Anutufa nari moodaanaki kira ufa oosana oosana moomoo nimiseenoo nari sandufa faqa Mooseenasaa quqasoona faqa nimirau, misa Anutuna amooqirafa anoonamau fimariasa, misa Anutuna qima afeekaikira ufa moomoo maree marusa.

<sup>5</sup> Misa ooqeenasa faiqi nuqufaqaasa Abarahaamana faqa Isakeena faqa Yakooboona faqa misauqa faiqi namu niku nisauku mariasa, misa asauku mundirafa mi maqannaasaki qumu kambiqafufaqa moodaa maqanna marusa maridaqa. Anutufa aiqamausara rakisidanoo, naaru naaru mina amooqiaqa. Kuqaa.

<sup>6</sup> Qinee Isaraee maqannaasara irisee sia Anutuna qima afeekaikira ufara kadiqee maqi qidaqa. Anutufa sia aiqama Isaraee maqannaasara rusandeesamumandee narí faiqi namu mariaqee qimasee maranau.

<sup>7</sup> Abarahaamana aiku asauku atiuqa faqa sia aiqama Anutuna aiku asaukukiqau. Minara qidaqa, Anutufa maaqi qimasee Abarahaamana qimaminau. Ani faiqi namukinaana Isakeena aiku asauku kai ani aiku asauku fee qianauna.

<sup>8</sup> Mi ufana Anutuna qimamira ufara qinee maaqi qidaqa. Abarahaamana dapi anaasee Qakaarana kaqi fifau maroona faiqi namu sia Abarahaamana aiku asauku fee qinoo maridanoo. Anutufa qima afeekaikiranannai maqoo faiqina mina aiku asaukuara Abarahaamana aiku asauku anoona uqannee qidaqa.

<sup>9</sup> Anutuna qima afeekaikira ufa maaqimminoo marinau. Qinee qeeqa andeeqara aukuaana aniree Saraqana dadaaqiananoo faiqi maqaannoo.

<sup>10</sup> Sia mifa kai, maana faqa Reebeekanara faqa qimannimianauna, Reebeekafa qaara faiqifaqaafa marinau, miqanda nikoofa maasa qikeeku qikaaku Isakeefa marinau.

<sup>11-12</sup> Reebeekafa faiqi maqaaninnaqanda mi faiqiqanda nuqu indaruqaa faiqi auqu Eesaufa mariannoo fee qinau. Mina innaaqianna maqaaninna faiqina auqu Yakooboonee qinau. Miqanda sia kambiqaraqoo Anutufa indaruqaa faiqira innaaqianaa faiqi mina ainainamma aisaaninna fee qimasee afaaqooqa qinau. Sia miqanda kambiqaaq maridaqau mandoosana fee amiqira oosana fee maraidammiafoo qimaseenoofau mi ufana quqanau. Anutufa moodaa maroo oosana Anutufa miqandara afaaqooqa quna sia nariqaaqara oosanasarau afaaqooqa qinau, narí irirana aidi-ranasaa munduanifeera indaruqaafa Eesaufa quandaki innaaqianaana mina ainaina maisaannoo fee qinau.

<sup>13</sup> Ooqeenaa akarakinaa ufa maaqimminoo minara maridanoo. Qinee Yakooboona dididanoo Eesaunara qikooqaidanoo fee qinau.

<sup>14-15</sup> Miqandara irisee Anutunara naqi fee qianauree Anutunara sia andeeqee maqi qianauree. Oo sia uqanna miqi qianauna andeeqanoo marifa Anutufa maaqi qimasee Mooseena qimaminau.

Qinee qeeqa iriranannai kai faiqi anaasee akaqausa narusee akaqausa nifuaanauna, qeeqa iriranannai kai akaqausara qimuqusianaqa marasee amiqi amiqianauna.

<sup>16</sup> Minara aiqama ainaina sia faiqi nidiranasaa mundinoo maridanoo. Anutuna amuqusiranasaa mundinoo maridanoo.

<sup>17</sup> Ooqeenaa akaraki Mooseefa Faraona maaqi qimasee qimaminau. Qinee Anutusa ani Faraona mareeqee Isipa maqanna karaambaiqi kianneera quqaqiafana, qinee Anutusa ani Faraofa qini ufa rukioonara ani kuqaruanauna. Minannai qinee qeeqa afeeka faqa qeeqa duqu faqa aiqama maqa maaqa afaaqasasa mariasa iriaqee qimasee ani quqaqiafana.

<sup>18</sup> Doo maqee maasa mi ufana iriseeqa Anutunara maaqi qidaqa. Anutufa narí kai irisee akaqausara amuqusifanoo amiqi amiqimmidanoo kafa Anutufa narí kai iriseenoo akaqausa ufa rukiara oosana nimidanoo.

*Anutufa maqa qafeera foora maasa auquqisanau.*

<sup>19</sup> Innee mina iriseeqa quandaki maaqi qimasee aqamasee qini qimaqimifaranoo. Ani ufa miqinoo marinaqa maasa mandoosana maraananoo naqimasee Anutufa maasara aaqee mariasee qiannoo fee.

Naqimasee maasa Anutufa auquqisoo mandoosanara iriseeqa rakeemaki amiqira oosanamau fuanauree.

<sup>20</sup> Qinee mina iriseeqa maaqi qimasee ani qimamianauro, Anutufa aniara aaqee mariaanoo qimasee afairirana anee yafee maridane qandaki narí qimaminnaree anee kaqikaafa mariananoo. Qafee auqiranara iria. Faiqí moo fannoo maqa maraseenoo qafee auqimarifanoo mi qafeefa sia quandakinoo mi fasiqanara aqidanoo anee nanaree qini maaqimmasee auqidane, sia qafee fannoo miqi qidanoo.

<sup>21</sup> Mi fasiqafa qafee auqimarifa narí iriranannai kai maqa qumaree turi iseenoo atakuseenoo mi maqana rainasee akaqana qumareenoo narí iriranannai kai amiqirana akara rirana auqidanoo kafa mina dinni ati quqaqoona raina qumareenoo narí iriranannai kai moo kaqi dapi qafee kai auqidanoo.

<sup>22</sup> Anutufa miqikai maseenoo maasa auquqimaqanau. Maasaki akaqausa manda qafeera foora maasa akaqausa auquqimaqaseenoo idaki fifandinausee qidanoo. Sia aaqee kai minara naruannoo naaru kasooqafee mina akiaqara naruannoo. Kisaqasaa narí aanoo irana rafaqafusee mari inanoo naaru naruannoo. Miqoo narí aanonnai faqa narí afeekannai faqa miqoo mandoosana maree mariasa kuridi nimaqaannoo.

<sup>23</sup> Kafa mina dinni amiqira qafeera foora kasooqafee maasa mina kaaqa areenarana mareefandinausa akaqausa auquqisanau, mina amuqusa maasa ubeekanoo marisa maasasaa kai mina idaaqira moomoo areenarafa kooroo ianifeera maasasaa nammariara foora narí areenarana adianni-maqanau.

<sup>24</sup> Doo maasa daaree mariasa doo misa kai doo maa maridaqa sia Yuda maqannaasakiqari kaifau, aanaamurukiqari faqa Anutufa daaree marisa maridaqa.

<sup>25</sup> Ooqai tamummaqara fasiqa moo auqu Qooseaafa mifa minara maaqi qimaqoofa.

Sia qeeqa maqannaasa naarama quqasee qini faiqi anaasee fee qianauro. Qini qikooqemari maqannaasara qinee quandaki misara qini didi-mariasee qianauro.

<sup>26</sup> Akaqausara innee sia qini faiqi namu fee qimaria maqusakinaasa doo qimaria maqusanaasara kai misara kaqi marira Anutuna faiqi namu fee qifaranoo.

Doo Qooseaana ufa miqinoo maridanoo.

<sup>27</sup> Isaiaafa Isaraee maqannaara maaqi qimasee akara rinau.

Isaraee maqannaasa nukuda moomoora foora iqa mariafanoo misakinaana Anutufa oodaa kai mareeqeenoo asumu mariranaki quqaannoo.

<sup>28</sup> Mi aukuanna mikari Anutufa dauni dauni mandainaina akiaqara marasee aiqama maqannaasa minannai naruannoo Anutufa faiqí aanaaseera kisaqasaa nifeesida mariranasaa doo taikeefoo qimasee aiqamausa tautumasee naruannoo. Minara Isaraee maqannaasa oodaa kai Anutuna saqarikamandainanoo oodaa kai asumu mariranaki mara quqaannoo.

<sup>29</sup> Isaiaafa kafa Isaraee maqannaara maaqi qimasee akara rinau.

Karaambaiqa uriqararafa sia maasa ati oodaa mara quqasainanoofau Soodooma maqusa faqa Koomoora

maqusa faqa naanna ramaseenoofau aiqama taikasani, daridanoo oodaa mafi quqasoosa qaaramoo maridaqa.



*Isaraee maqannaasa Yisunasaa faandi ooniara maqi farindamaki aqu fiqau.*

<sup>30</sup> Doo minara maasa naqi fee qianauree. Maana kai qianauree. Anaamuru mariasa sia Anutuna afusaa andeeqaranaki keeqararee qidaqa sia amani mariasa doo misa narí irirana Yisunasaa rusisee minannai mina andeeqaranaki keeqafi maridaqa.

<sup>31</sup> Misa miqiga marifanoo Anutufa rusandeesamumasee maroo fasiqanaaseesa Isaraee maqannaasaa misa Mooseena sandufakiaqa randasee mi iriranannai Anutuna andeeqaranaki fuauree qidaqa aana sia minaki marinara sia irirai munari minaridaqa aaqamaki kaqi runnambiqau.

<sup>32</sup> Naqi fee mandee sia paquriqau. Misa Anutufinnai firana narí kadaapiriranasaa kai mundinoo maridanoo sia saqarikirafa minasaa mundinoo maridanoo. Misa anoona aana Yisunamau fimarianara qaoo qimasee Yisunara oonisaara foora niku amaki saamuriqau.

<sup>33</sup> Ooqeenaa tamummaqara fasiqa akarauqa mi ooninara maaqi qiqau. Qinee Anutusa mi oonina Sioona maqusai quqaaanaqa faiqí anaasee mi ooninasaa niku rupaurifaranoo. Faandi ooni miqirana qinee mi oonina quqasaanaqa minasaa farindamaki saamurifaranoo. Moo fannoo narí irirana minasaa rusiqainafa sia kadooparaannoo.

Tamummaqarausa Yisunara miqimmasee ooqai akara riqau.

## 10

<sup>1</sup> Oo qini qikaqaafasaaauqa Roomma maqusai mariasa. Qeeqa qimuqusa ookiqari qeeqa maqannaasa Isaraee maqannaasara Yisufinnai aniree mina asumu marirana maraaqera firaqoo qimuqusidanoo. Qinee Pauroosa misara Anutufinnai firaqoo innaaru qidaqa.

<sup>2</sup> Misa Anutunara aidiranaki keeqaranara rirafa firaqoo marifaqa qinee nindafaunaqa sia anoona iriranamau fida Anutunara ridaqa, kaqi runnambidaqa.

<sup>3</sup> Misa Anutufa faiqí mareeqeenoo narí afusaa andeeqara oosanaki quqaranara sia irimariafaqa nariqa kai narí firoosana nariqa kai uqeerasee mi mau fidaqa, sia Anutuna andeeqaranaki fimaria oosana iriseeqa sia mina ameemaanai keeqaidaqa.

<sup>4</sup> Anutuna asauku mundirafa Mooseena sandufamau Anutuna andeeqaranaki amanimariana aru taikeenoo narí Yisunasaa naaqoo rusimariasa kai Anutuna andeeqaranaki keeqaidaqa.

*Asumu marira ufa sia nianai maridanoo, daaqa maridanoo.*

<sup>5</sup> Anutuna andeeqara oosanaki faiqí finara maaqi qimasee Mooseefa akara rinau. Faiqí moo fannoo aanaaqisaa findifunakiqari andeeqasee Mooseena sandufamau fidanoo sia moo kari aaqainafa amiqisaa finafa kuqinoo innaaruna asumu marirana maraannoo.

<sup>6-7</sup> Kafaa mina dinni asauku mundirana saqarikiranannai asumu marirafa maaqimminoo maridanoo. Mooseefa kafaa minara maaqi qidanoo. Innee Mooseena sandufamau fimariasa fifau firaqoo munari minari mariasa innaarunai asumu mariranaki firaree qimariasa. Innee innaarunai ooruree asauku mundiranara randasee paqurimasee afiqee qumu dadaaqianiffee qimariana fifau sia amanaikimari ainainara fifau kadaapirumasee maree mariafanoo. Asauku mundirafa doo qumu marinoo. Innee fifau maqa ameemaanai ooqu keeqafi asauku mundiranara paqurimandee afiqee murusaifanoo mifa dadaaqianiffee qimariafanoo fifau

sia amanaikimari ainainara fifau kadaapiri mariafanoo. Asauku mundirafa doo kuqiranakiqari findifinoo maridanoo.

<sup>8</sup> Akara fannoo maasa inni qimannimira ufara maaqi qidanoo. Anutuna qimannimira ufa inni naaqa maridanoo inni nifaurusaa maridanoo inni nimuqusaki maridanoo. Miqimmasee Mooseefa maasa faiqí anaasee qimannimimari ufanara Yisunasaa irirana mundiranara qidanoo.

<sup>9</sup> Maaqi qimasee qimannimidaqa, anee aneenna afaurunnai Yisufa kuqaa karaambaiqa maridanoo fee qimasee, aneenna amuqusa ookiqari kuqaa Anutufa Yisuna kuqiranakinaana uqeeranau maqi qimasainanoo Anutufa narí asumu mariranaki ani mara quqaannoo.

<sup>10</sup> Maasa qeeqa qimuqusannai Anutuna andeeqaranaki fidaqa qeeqa qifaurunnai mina kooroo iranannai Anutuna asumu mariranaki fidaqa.

<sup>11</sup> Tamummaqaraura ufa minara maaqi qidanoo. Anutunasaa irirana rusirafa sia mi rusiranarau kadooparaannoo.

<sup>12</sup> Mi ufana aiqamausara qidanoo Yuda maqanna faqa aanaamuru faqa sia rainarafa maridanoo Anutufa aiqamausa narí aaree mariasa dadaaqirafa maridanoo. Aiqamausa amana amana kai Anutufa narí aaree mariasa firaqqoo naundura marirana amiqi amiqimannimaqaannoo.

<sup>13</sup> Tamummaqara fasiqa akarakinaafa minara maaqi qidanoo. Aiqamausa karaambaiqa dadaaqianifeera aareemariasa misa Anutuna asumu mariranaki fifaranoo.

<sup>14</sup> Naqimasee faiqí anaasee karaambaiqara sia irirana minasaa rusimarinausa aareefaree sia amana aareefaranoo. Sia karaambaiqara irimariasa naqimandee fee irirana minasaa rusifaree. Moo fannoo oonu qimanniminaqa irifaranoo sia oonuree qimannimifaqa sia irifaranoo.

<sup>15</sup> Naqi fee maseenoo fee moo fannoo oonu qimannimiannoo fee moo afeeqaseega mina ati uageeifanoo amana oonu maridanoo qimannimiannoo. Tamummaqara fasiqa minara maaqi qimasee akara rumaqoofa maridanoo.

Amiqira fasaasa ufa maree animariasa anirafa amiqirafa maridanoo.

Tamummaqara fasiqa miqi qimaqoofa maridanoo.

<sup>16-17</sup> Misa amiqira fasaasa ufa mini qimannimisoo faqa sia aiqamausa iriqau akaqausa kai iriqau. Eesaiaafa minara maaqi qimasee akara rinau. Oo karaambaiqa maasa qimannimira ufa yausee iriaa, akaqausa moodaa kai iriaa. Eesaiaafa miqi qimasoo faqa qinee Pauroosa minara maaqi qidaqa. Faiqí anaasee sia fifau kaqi Yisuna saqarikidaqa, mina aufakiana naaree irisee miqoo Yisuna saqarikidaqa, Yisuna aufakiana sia fifau naaqooki kambiqaanoo, faiqí qimannimifanoo naaqooki kambiqafifaqa saqarikidaqa.

<sup>18</sup> Qinee Pauroosa minara iraidaqa Yuda maqannaasa ooqaindari sia fee Anutuna ufa irideeaa. Eeoo kuqaa misa iriaa, akarakinaafa misara maaqi qidanoo.

Misa ufa fannoo aiqama maqa afaaqasasa Yuda maqanna fimaruuqoo daraaninau. Misa ufa fannoo maqa dinni dinni ati munu raquraminau.

<sup>19</sup> Qinee Pauroosa kafa iraidaqa, Isaraee maqanna Anutuna ufa iriqee iqau sia fee iriqau. Mooseena ooqai akarakinaa ufa dauni qimaqimida maaqi qidanoo.

Qinee Anutusa qumee Isaraee maqannaasa naundurari saikiafanaqa fifau moo maqannaasara Anutuna ufa iridammiafoo qimasaidaqa rairai qimannimaqaidaqa. Qinee Anutusa qumee fuki faaki qunaqa furufarira maqannaasa qini ufa irisai faqa qini faiqi namu Yuda

maqannaasa mina qafamasee mi maqannaasara rairai qimasee doo mi rairai qiranannai nári faqa qini ufa irifaranoo.

<sup>20</sup> Mooseefa miqi qimasoofanoo Eesaiaafa aranaiqi kooroomasee mi furufarira maqannaasa aanaamuruara maaqi qinau.

Qinee eedoo qimasaunaqa sia qiniara randeemaria fasiqa anaaseesa qini Anutusa paquriqa. Sia qini daaree mariasa nifusaa qinee oonu kikiqiqa.

<sup>21</sup> Miqi qimaseenoo Isaraee maqannaasara maaqi qinau.

Qinee faasaambaasaana inni rafusira runaqa innee ufa rukieeqa kaqirunna fimaria maqannaasa maridaqa rafusiranara rufiee mariafanoo.

## 11

*Anutufa Isaraee maqannaasa asumu mariaqeera akaqausa kai maraannoo.*

<sup>1-2</sup> Qinee Pauroosa kafaa Isaraee maqannaara iridaqa, kuqaa fee Anutufa Isaraee maqannaasara qaoo qimasee mininnisanau. Oo sia uqanna minnisanau. Qinee Pauroosa Isaraee maqannaasa faqa maridaqa qinee Abarahaamana aiku asauku marunasa maridaqa, qinee Yakooboona amaaku Beesaminna ati maridaqa marunnaara Anutufa sia nári Isaraee maqannaara qaoo qimasee minnisanau. Ooqai oosannaseenoo maa maqa maaqanakina rusandeesamumandee maroosa mariafanoo. Ooqeenaa tamummaqaraua akarakinaana Eeriaafa Isaraee maqannaasara nifairidanoo niqidanoo afeekaikamandee Anutunara innaaru qinoo qinau.

<sup>3</sup> Oo karaambaqa Isaraee maqannaasa ani ufara minniseeqa furufariqa ani tamummaqara fasiqauqa kuqa naruseeqa ani aandau tatufira ooni qaindauqa rapeepamma aqiqa. Qinee Eeriaasa qeeqaraa kai ani ufamau fimarunaqa misa minara irisee qini faqa kuqa dariraree qimariafaqa ani qimamidaqa.

<sup>4</sup> Eeriaafa miqi qimasoofanoo Anutufa qimaminoo qinau, Oo sia aneennara kai qini ufamau fimarianafa mariananoo. Qinee qisauku dinni taikasee dinni oonu qaaraqanda tauseenna fasiqa anaasee moomoosa uqanna utaaqamaqaunasa maridaqa sia unna Anutuna Baaranara innaaru qimariasa qiniara kai innaaru qimariasa maridaqa.

<sup>5</sup> Eeriaana aukuaana miqinoo marinau maqee aukuaana Isaraee maqannaasaki miqimminoo maridanoo, Anutufa misakinaana akaqausa utaaqamasoofanoo nári amuqusiranannai utaaqamasoosa maridaqa.

<sup>6</sup> Minamusa Anutufa sia misa nirana marirana oosana qafamasee amiqira fee qimasee utaaqamannimaqanau, nári amuqusiranannai kai misa utaaqamannimaqanau. Anutufa faiqi utaaqamannimaqara oosana fannoo misa nimariana misa mariranasaa mundinoo marinanoofau sia anoona amuqusiranasa mundinoo marini, minasaa kai mundinoo maridanoo.

<sup>7</sup> Isaraee maqannaasara nanee fee qianauree, maaqi qianauree, Isaraee maqannaasakinaana akaqausa Anutufa utaaqama nimaqagoosa kai Anutufa naaroo ufana irisee mifinnai fiqau. Aiqama tia naaqooki ooni ititarausa maridaqa sia nári randee maru aanna paquriqau.

<sup>8</sup> Tamummaqara fasiqausa misara maaqi qiqau. Anutuna nimuqusaki faqa nitikuraki faqa ummaarararana nimisoofaqa mi kamuqooqari aunduaridaqa kudoosaapaida maridaqa nifu qafaida sia qafaidaqa, naaqooki faqa sia iridanoo.

<sup>9</sup> Dafidifa faqa maaqi qimasee misara akara rinau.

Misa qoomaqa sakasee ooqu marififanoo namuqaa anireeqa misa ititaannoo. Misa miqoo kuridiqa nári mandainaina akiaqara mareefara.

<sup>10</sup> Misa sia qafaqee qimasee Anutufa misa nifusaa ititaannoo. Nári ummaara fannoo aiqama kari nári nitaufakaaqa mariraika kai idanoo nitaufaka saaeemminoo maridanoo.

Miqimasee Dafidifa misara akararinau.

<sup>11</sup> Qinee Pauroosa Isaraee maqannaara maaqi qimasee iraidaqa, Yuda maqannaasa Yisunasaa farindamaki saamuriqa kuridiranaki taikaranaki aqufiqee iqau. Sia uqanna miqiqau. Isaraee maqannaasa aqoonara Anutuna asumu marirafa aanaamurusaa aqufinau, Yuda maqannaasa aanaamuruara rairaiqiaqeera miqinau.

<sup>12</sup> Yuda maqannaasa aqaranara Anutuna firaa amiqi amiqirana aanaamuru aiqama maqa afaaqasasa mariasa niminau. Yuda maqannaasaaqaraana aanaamuru amiqi amiqirana maraqau, kasooqaaqee taikara aukuna Yuda maqannaasa Anutufa aiqama mareeqeenoo aanaamuru nimuna akiaqara firaa amiqi amiqiranaki uriqararanaki Yuda maqannaasa quqaannoo.

*Anutufa Isaraee maqannaasa minniseenoo aanaamuru anireeqa Anutuna aqoondikiqau.*

<sup>13</sup> Qinee Pauroosa Yuda maqannaara inni qimannimiseeqa kafaa maqee inniara aanaamuru qimannimidaqa, Anutufa aanaamuru qimannimira-nara diqiqoosa maridaqa inniki ainainimarunnanara asasidaqa.

<sup>14</sup> Anaamuru qimannimi marunaqa Yuda maqannaasa inniara Anutuna ufara iridammiafoo qimasee rairai qimasee misa faqa irisee irirana mi ufanasaa rusiaqeera asasidaqa.

<sup>15</sup> Yuda maqannaasa Anutufa mininnisoofaqa aanaamuru aniree Anutuna aqoondikiqau. Kasooqaaqee Anutufa quandaki Yuda maqannaasa kafaa marainaqa kuqiranakiqari findifiara foora ifaranoo.

<sup>16</sup> Maasa Yuda maqannaasa Anutuna amira ainainara maaqi qidaqa. Innee feemu adiana kai raqeeqee Anutuna amifanoo mi feemufa aiqama minaindikakaimminoo mariannoo, kafaa innee saqari oosana amifanoo mi saqarifa minaindikai mariannoo.

<sup>17-18</sup> Doo qinee mi iriranamau fidaqa minara maaqi qidaqa. Oorifa saqari asumu saunara foora maridanoo. Asumu saqari ammuqu akaqafa raqanoo marifanoo kaasau oorifa saqari asaana raqeeqee minakina mini ookaamandee ummaqusainanoo minakiqari kambiqaanoo. Innee aanaamuruara kaasau oorifara foora mariafanoo. Yuda maqannaasa oorifa saqari asumu oosana maridaqa. Anutufa inni aanaamuru mariasa kaasau oorifa asaanara foora asumu oorifa minaki ookaamasaifanoo kambiqafi-faqa innee maqee Yuda maqannaasa akaqausa faqa misaindi oosana amiqi amiqiranasaqaraana animaree mariafanoo. Innee aanaamuru mariasa asumu oorifa ammuqu raqaranaki innee ookaairausa mariafanoo, sia misara raqara asaanara fidiqaa iaqa. Innee naqimaseeqee noori uqeeraseeqa inneeqara amiqirausee qidee innee ammuqu mariafanoo, sia ammuqu fannoo saqari oosana pooduqaidanoo, oosana fannoo ammuqu poonuqaidanoo, minara sia innee oosana mariasara Yuda maqannaasara fidiqaa iaqa.

<sup>19</sup> Innee minara irisee maaqi qifaranoo Anutufa maasa aanaamuara iriseenoo asumu saqari ammuqu raqafufanoo maasara kai iridanoo fee qifaranoo.

<sup>20</sup> Qinee Pauroosa minara maaqi qidaqa Innee doo kuqaa qiafanoo, Anutufa Isaraee maqannaasaa sia irirana mina ufasaa rusimarufanoo aadana asaanara foora raqanau, innee irirana mina ufasaa rusimarunara inni mareeqee minaki ookaa inau. Innee minara irisee sia noori uqeeraaqa, rufiaaqa.

<sup>21</sup> Anutufa mi saqarina naríndi Yuda maqannaasara sia amuqusinau sia Yisunara irisoonara kaqi atekaanau innee faqa rufiaaqa kaqinni faqa ateekaannoo, kaasaummia.

<sup>22</sup> Maanara amiqimasee iria sia aunuaqa Anutufa narí qaara oosana maaqimminoo maridanoo mina dinni kaaqa faiqí anaaseera amuqusirafa maridanoo kafaa mina dinni manda ainainara aanoo irafa maridanoo. Mifa mandainainaki saamurimariasara aanoo irafa kai maridanoo, innee kaqi mina afaariranaki maqee maqee fimarifanoo mifa inni nifauamaseenoo amiqi amiqiannoo, minnisaifanoo inni faqa Yuda maqannaara foora aadana asaanara foora inni rauda aqusaannoo.

<sup>23</sup> Yuda maqannaasa nariqa dapi nirana minnisee quandaki kafaa aniraifanoo Anutufa misa qumaree nári nimaqaqi kafaa ookaa iannoo, Anutufa mina faqa amanaikamiannoo.

<sup>24</sup> Asumu saqari asaana ateekeese narí amaaqakina ookaamandainanoo dauni ururaannoo, mi oosanafa sia kadaapirirafa maridanoo. Kaasau saqari asaana ateekeese asumu maraqa nua oosanaki ookaa inanoo sia dauni dauni kambigaannoo kadaapiruannoo. Minara irisee Anutufa Yuda maqannaasa oorifa saqari asaanara foora raqaqa mariasa amana mareeqee narí amaaqakina kaifaa ookaa inoo sia kadaapiruannoo. Innee aanaamuru mariasa kaasau oorifa saqariara foora mariafanoo asumu saqarikina innee ookaamaqaifaqa mariafanoo. Innee sia Anutufa kafaa Yuda maqannaasaa ookaa ianinnanara sia amanee qiaqa, doo Anutufa amana sia kadaapi maridanoo, kaqimma ookaa iannoo.

*Anutufa aanaamuru naaree marasee miqoo Yuda maqannaasaa naundura quandaannoo.*

<sup>25</sup> Oo qini qikaqaafasaa uqa moo kukeeqara ufa inniara iriaqeera qiman-nimianaura, innee maa ufana iriseeqa inneeqa noori uqeerarana mara maqaruseeqa miqooqari reendeenamandee marifaranoo. Mi anoona ufafa maaqimminoo maridanoo. Isaraee maqannaasaa naaqooki ooni ititarafa sia naaruara miqinoo mariannoo. Anutufa qinoo aanaamuru marinausakiqari qinee qeeqa qiafanausa misa kai Yisufinnai irirana ubeekaifaqa Yuda maqannaasaa naaqooki ooni ititarana tatusaanaqa misa faqa anifaranoo.

<sup>26</sup> Maaqimmasee aiqama Isaraee maqannaasaa Anutuna asumu marirana mareefaranoo. Tamummaqara fasiqauqa maa ufamau mareefaranoo. Asumu maree marifa Sioona maqusai moo auqu Yeerusaree mi maqusanaindari aniree asumu marirana nimiannoo. Mifa Yakooboona aiku asauku mina atiuqa mariasa mandainaina aiqama rukannisaannoo.

<sup>27</sup> Mikari qinee Anutusa Yuda maqannaasaa aqaqara mara aqun-niseeqa qinee Anutusa qeeqa moodaanakikirafa ufa Abarahaamana faqa Isakeena faqa Yakooboona faqa ufa qiafannana mikari mi ufana anoona doo anoonaikiannoo.

Tamummaqaraura ufa miqinoo marinara qinee Pauroosa maaqi qidaqa.

<sup>28</sup> Yuda maqannaasaa Yisuna amiqira fasaasa ufa minnisonara Anutuna ufaasu namuqaa kammiqa maridaqa. Sia fifau, inni aanaamuru mariasara

iriseenoo Anutufa miqimma nimaqasoofaqa miqidaqa. Anutufa Abarahaa- mana Isakeena Yakooboonara iriseenoo, aiqama aanaamurukinaana ru- sandeesamumandee maroonara iriseenoo misasaa aruakinausa misa amiqi amiqimma nimaqoonara iriseenoo Isaraee maqannaasara qini qiqoondi fee qidanoo.

<sup>29</sup> Anutufa narí rusandeesamumasee maree mariasara faqa narí amiqi amiqimma nimaqee mariasara faqa sia qaara iriranaikidanoo andee- qaidanoo sia kaaqa Isaraee maqannaana namuqaakinoo, ufaasu kai.

<sup>30</sup> Innee aanaamuru marusa ooqai ufa rukiee marusa mariafanoo doo maqee Yuda maqannaasa ufa rukioonara faqa innee mina ufa irunara Anutuna nifauarana maree mariasa mariafanoo.

<sup>31</sup> Miqi kaimmasee innee aanaamuru Anutuna nifauarana maree mari- afanoo Yuda maqannaasa faqa Anutuna nifauarana maraaqeera ufa rukiaranaki quqasoofaqa mariafanoo.

<sup>32</sup> Anutufa aiqama maqannaasa narí nifauara oosana uqannifiqaanifeera aiqama maqannaasa ufa rukiarana ameemaanai mara quqasoofaqa Anu- tuna nifauarana oosana qafaaqeera.

### *Pauroofa Anutuna amooqu ufafa.*

<sup>33</sup> Oo Anutuna irirafa ainaina faifa firaaqoo maridanoo. Mina irirafa faqa auqarafa faqa firaaqoo farummara foora meemai unaurinoo maridanoo. Mina naamuaqira ufa oosana yafee mina iriannoo fee, sia amanaikidaqa. Mina nirana yafee iriannoo fee.

<sup>34</sup> Tamummaqara fasiqauqa minara maaqi qiqau. Yafee karaambaiqa irirana faasai iriannoo fee yafee fuki faaki iannoo fee.

<sup>35</sup> Yafee moo ainainara qufiqeenoo qimianifee qimasee amiannoo fee. Sia moo fannoo amanaikiannoo.

Doo tamummaqara fasiqa ufa miqimminoo maridanoo qinee Pauroosa minara maaqi qidaqa.

<sup>36</sup> Naqimasee moo fannoo Anutuna moo ainaina amiannoo fee narí kai aiqama ainaina auqufa minaindi kai maridanoo. Aiqama ainaina minasaa garaafa kai afeekaikinoo maridanoo. Aiqama areenarafa naaru naaru Anutunaindi kai mariannoo. Kuqaa.

## 12

### *Pauroofa andeeqasee nirana mariranara naamuaqinau.*

<sup>1</sup> Oo qini qikaqaafasaaqaa, Anutufa inniara amuqusirana faqa amiqi amiqirana faqa firaaqoo marinara afeekaikamandee qeeqa qimuqusa ook- iqari inni qimannimidaqa innee inneeqa marirana nipata aandau tatufira- nara foora Anutuna amiaqa, Anutuna ufamau fidaqa mina aidira ainaina andeeqasee marirana mina mina amiaqa. Miqiqa inniqa Anutunara innaaru qirafa amooqirafa anonaikiannoo.

<sup>2</sup> Minara irisee maaqimmiqa sia maa maqa maaqanasaa mariasa naanna raaqa. Innee eedoo qifanoo Anutufa inni nitikura amiqimmasee firaaqoo quandanniseenoo naunduraki nirana faqa quandannisaannoo. Innee miqimmaseeqa Anutuna irirana faqa Anutuna aidirana faqa amiqira- nee qimariana faqa idaaqiraneeqa qimariana faqa amiqimandee irifaranoo.

<sup>3</sup> Qinee Pauroosa Anutufa afaarida nimimari ainainara irisee maaqi qidaqa. Innee sia inneeqara amiqirausee qimasee firaaqoo inneeqa nimooqiaqa innee andeeqasee reendeenamaseeqa inneeqa nimana kai irirana iriaqa. Aiqamausa náriara qidaqa Anutufa faiqí anaasee dadaaqira

nimirana irisee mina amana kai nariqa kai iriaqa, sia noori uqeerasee inneeqara firaqoo irirana faqaasee qiaqa.

<sup>4</sup> Maasa qipata moomoo ati ootupanoo maridanoo. Mi ootupara atisa naadu naadu ainaina quqee mariasa maridaqa.

<sup>5</sup> Maasa miqirausa maridaqa asauku mundiranasaa ootupaqa marunausa moomoosa naadu naadu nipata atiara foora mariasa moodaa qipatara foora mafiqa Yisunaindi maridaqa narisaa narisaa atooqa maridaqa narisaa narisaa mundiqa mariaqeera.

<sup>6</sup> Minara maasa aiqamausa irisee nariara nariara aadu aadu akoofasaiki marinna ainaina marasee minannai Anutufa nimuna akoofasaikirana amana kai minannai kai aiqamausa nari dadaaqi nari dadaaqiaqa. Anee Anutunaindaraa ufa irisee faiqi anaasee ufa qimannimi marianafa maridana, Anutufa nari saqarikirana amuna mina amana kai qimannimia.

<sup>7</sup> Anee dadaaqimarianafa akoofasa maridana doo misa dadaaqia. Anee ufa akoofasa maridana doo mina ati qimannimia.

<sup>8</sup> Anee reendeenamandee fuki faaki qirana akoofasa maridana doo miqimmia. Faiqi anaasee moo fannoo nari akaqa nimira ainaina akaqausa raina nimidanoo sia akoo akaa ida nimia, oori inaa inaa ida nimia. Anee faiqi anaasee rakisi marinafa maridana anee faqa eeraaramasee ainainia. Faiqi anaaseera qimudao qimasee dadaaqi mariasa sia nikoo nikaa mandeeqa miqia, اساسmandee oori inaa inaa idana dadaaqiaqa.

<sup>9</sup> Inniki nariara nariara nimuqusirafa inniqa nimuqusannai kai nariara nariara nimuqusiqa. Innee aiqama manda mariranara fidiqaamasee amiqira marirana kai rakisisimma qumaraaqa.

<sup>10</sup> Innee aiqama asauku mundirana mandaaqaa mariasa minara irisee nariara nariara qikaqaafasaa fee qimasee nariara nariara nifaaqasaa aqoondiara foora nariara nariara andeeqasee ridaqa asasiaqa. Inneeqa niqoonnana maasa uriqararane qimasee maqee maqee mina auqu kooroo qia.

<sup>11</sup> Innee inneeqa oosana oosana ainainiranaki maridaqa nimudaanai qimaseeqa kadaapiruaqa sia kudoosaapaaqa. Inniqa nimuqusaki karaambaiqara nidirafa qumbiqanoo marinaqa mina ainainammidee qidaqa اساسmandee mi kadaapina riqa fuaqa.

<sup>12</sup> Innee Yisufa qumuaninnanara afeesidaqa اساسidaqa kai mariaqa, maqee maria kadaapirira ummaarafa rafaqaqafinaqa naundura asoomasee kasooqaqee ubiqafiqa reendeenamasee kaqi kai minaki fuaqa, maqee maqee innee aiqamausara faqa aiqama ainainara faqa innaaru qimannisaqa.

<sup>13</sup> Innee niqoonausa Yisuna ufa irimariasa nana ainainaree sarau imariasa inneeqaindi misa faqa rainasee naida nimiaqa. Sia qafee marinna anaamurufa faqa anirainana amiqi amiqimandee maaqa aminanoo tootooqiranaki fuani.

<sup>14</sup> Faiqi anaasee akaqausa Yisuna ufasaara nari niqifaqa innee quandakinaqa sia minara iriaqa amiqi amiqira faqaqooqa kai qimannisaqa, sia niquraraqa amiqi amiqima nisaqa.

<sup>15</sup> Faiqi anaasee akaqausa اساسifaqa innee faqa dadaaqiqa اساسiaqa. Faiqi anaasee akaqausa ummaara narinaqa ikiraqaifaqa innee faqa dadaaqiqa ikiraqaqa.

<sup>16</sup> Aiqama narinni narinni maridaqa moodaanaki kiqa maridaqa aqoondikidaqa mariaqa. Sia innee inneeqara uriqararausee amiqirausee

qimasee noori uqeeraaqa. Kaqiqeese ooreeqararausa faqa aqoondi kiaqa. Sia misa ooreeqararausara noori runusee noori uqeeraaqa.

<sup>17</sup> Moo fasiqa anaasee fannoo ani mandaikammamaqainana sia anee mina akiaqara mina mandaikammamaqa, aiqama fasiqanaasee amiqira oosanee qimariana, mi oosanna amanamasee mi oosanamau kai fuaqa.

<sup>18</sup> Anee aiqama fasiqa anaasee faqa asoaranaki kai mariaqa, misa sia amanaikifana aneennakai kafaa kafaa amanida qafaa.

<sup>19</sup> Moo fannoo ani arinoo mandaikammamaqainana sia anee mina akiaqara arua, Taikara aukuana Anutuna aanoo irafa minasaa mariannoo fee qimasee miqoo minnisaa. Tamummaqara fasiqa akara minara maaqi qinoo maridanoo.

Karaambaiqa maaqi qinoo qinee mandainaina akiaqara nimianaura, ani arifaqa qeeqa kai mina akiaqara qianaura.

<sup>20</sup> Kafaa moo fannoo maaqi qinoo.

Ani namuqaa fannoo aararee marinana narana kaqi amia.

Nammariara mifa aidinana kaqi amia. Anee miqinana aneenna amiqira iriranannai asaurirana mina aminnarannoo.

Qinee Pauroosa minara mi tamummaqara fasiqana ufamau fuaqeera qimannimidaqa.

<sup>21</sup> Faiqi anaasee mandainaina fannoo sia inni rafaqa fuani, inneeqa amiqira oosanannai misa mandoosana rafaqafuaqa.

## 13

### *Aiqama uriqararausa Anutufa kai quqaqoosa maridaqa.*

<sup>1</sup> Aiqama kaamanauqa faqa uriqararausa faqa Anutufa kai quqaidanoo. Sia moo fannoo nari kambiqaidanoo, Anutufa eedoo qinara kai kambiqafi maridaqa. Minara irisee innee aiqamausa misa ufamau kai fuaqa.

<sup>2</sup> Faiqi anaasee moo fannoo kaamanauqa ufa rukiee marinafa Anutufa quqaqai fasiqausa ufa rukiee mariafa marinnarannoo. Anutufa quqaqoo fasiqausa ufa rukiainafa mi fasiqausa saaqaraa aanoo irana aneenna kai mareeqeena aneenna afaariki rusimariananoo.

<sup>3</sup> Manda oosana maree mariasa kai kaamanna rakisirausara rufiaqa, amiqira oosana mareemariasa sia misara rufiaqa. Anee kaamanna fasiqa fee uriqarara fee misa nifusaa mana mana kai iraree fee qidanee doo amana andeeqara oosana marasee miqia. Miqinannoo mifa amooqira ufa kai ani amiannoo.

<sup>4</sup> Kaamanna uriqararafa Anutuna saikira fasiqa maridanoo ani amiqimasee marianneera ainainidanoo, anee manda oosana mareenana minara rufiaa mina akiaqara ani arirasamu doo asaukuki uaqeeidanoo. Mifa mandoosana maree mariasasaa Anutuna aanoo irana mareeqeenoo misasaa quqemarifa maridanoo.

<sup>5</sup> Innee minara irisee uriqararausa ufara aiqama eedoo eedoo kai qiaqa, sia Anutuna aanoo iranara kai iriseeqa eedoo qiaqa, aneenna aakiranara andeeqanoo marifaqee qimasee eedoo qiaqa.

<sup>6</sup> Kaamanna fasiqauqee kansoorauqee uriqararausee, misa aiqama Anutuna ainainiranaki maridaqa faiqi anaasee andeeqannisaida maridaqa minara inneeqa takisa munnimma nimirana eedoo qimasee nimiaqa, minannoo ainainidammia.

<sup>7</sup> Inneeqa takisa munnimma aiqama aquaqa, kaqikaa takisa kansooraa takisa faqa kaamanna firaa takisa faqa aquaqa, aiqama uriqararausara amiqira fasiqee qimasee misa noorinni rufiaqa rufiaqa idaqa fuaqa.



*Nariara nariara amiqira oosana kai maraaqee qirufa.*

<sup>8</sup> Sia moona ummaara ameemaanai keeqana maria aufadaranaki kai maria. Moodaa ummaara ameemaanaki kai keeqaqa mariaqa. Nariara nariara nidimarinaqa mi moodaa ummaaranaki kai keeqaqa mariaqa. Faiqí anaasee moo fannoo narí aqoonna fasiqanaaseera amuqusinanoo Mooseena sandufa doo qumareenoo mi sandufana anoona paqurinoo kooroo idanoo.

<sup>9</sup> Mooseena sandufakinaafa akaqafa maaqimminoo maridanoo.

Sia faiqí anaasee narí ummuari narí ummuariaqa.

Faiqí faqa anaasee faqa faiqi faqa sia kuqannaruqa misa fidika sia ruqiaaqa.

Sia narí ainaina narí ainaina ummuariaqa.

Sia moona ainainara amuqusinana marara aaqoo iria. Mi sandufausa faqa akaqa sandufauqa faqa moodaa ufa fannoo mi sandufausa aiqama rafaafafinoo maridanoo mi moodaa ufafa maaqimminoo maridanoo.

Anee aneennara amuqusi marianandee maseenana mi amuqusirafa kai aqoonnanara amuqusiani. Mi ufafa aiqama sandufa aruseenoo mifa anoonaikidanoo.

<sup>10</sup> Faiqí anaasee moo fannoo aqoonna fasiqa anaaseera amuqusi mari-nafa naqimaseenoo moona mandaikammamaqaannoo fee, sia miqiannoo. Minara qinee qiga, aqoonnanara amuqusi marifa aiqama Mooseena sandufamau fimarifa maridanoo.

<sup>11</sup> Innee mi fasiqana aanna raqa. Doo maa aukuanna iqaqara aukuana maridanoo faiqaranakiqari findifira aukuana doo ani maridanoo. Ooqai innee inneeqa irirana Yisuna ufasaa rusisoofo doo ani aniifanoo doo inneeqa asumu marira aukuana doo adeedi ramasee ani maridanoo. Minara faiqaranakiqari findi fira aukuanee qidaqa.

<sup>12</sup> Doo asukuna taikararidanoo, iqaqarafa qusasaa aniannoo, maasa asukunaki nimariafanna manda oosanna oosanna mafi taikaseeqa faasaana amiqira oosana amiqira marirana duru feefara foora indamma qumaraaqa.

<sup>13</sup> Maasa faasaanasaa nidara foora aiqamausa nifusaa andeeqarau-saikakai mambi mariaqa. Sia mandainaina maraani qimasee moodaanaki suquaqa. Sia nammari namasee furufariaqa, sia faiqí faqa anaasee faqa narinni narinni ummuariaqa. Faiqí faqa anaasee faqa sia narí afaaqa narí afaaqa kooroo iaqa. Sia rakuqa, sia nariara nariara rairai qiaqa.

<sup>14</sup> Innee inneeqa faiqí faiqi manda iriranamau fidaqa fanandimariana minniseeqa mi aanausa oonu ititee ani ititeemma atukaraseeqa quandaiki Anutuna asauku mundirafa Yisufa maasa karaambaiqa mina andeeqaranaki fimariana mina qumareeqa mi duru saamunannai maasa faiqí faiqi manda marirana manda nirana faqa rakuqa.

## 14

*Unna Anutunara dufi dufi qimaria narana ufafa.*

<sup>1</sup> Qinee Pauroosa Roomma maqusanaasa Yisuna ufa irimarias qimannimidaga. Innikina oosana oosana fasiqa anaasee mariafanoo. Akaqausa afeekaikamasee Yisuna mandaqaqa maridaqa irirana minasaa kai mundusee fimarias maridaqa, akaqausa irirafa sia Yisunasaa mapukimarias mi fasiqausa irirafa oorudupirausa maridaqa. Innee sia amiqira irirana faqaasa kai mara maree inni suqiranaki quqaaqa irirana oorudupirausa faqa mareeqee kaqi moodaanaki quqaaqa. Sia misa moo

iriranara rairaiqiageera mareeqee quqaaqa. Misa faqa Yisuna ufa irimari-asa mariafaqa kaqi quqannisaaqa.

(Ooqai Pauroofa maru aukuanna aandau aruseeqa unna Anutunara tumunnai augira afaannara dufi dufi qimaseeqa makeetimariqau. Yisuna ufa irimarusa namasaifanoo unna Anutuna maraquna kafaa daakuandoo qimasee rufieemariqau.)

<sup>2</sup> Faiqi moo fannoo narí iriranannai sia minara iridanoo kai aiqama narana aandau naidanoo, sia Anutuna ufa rukiaida miqidanoo. Faiqi moo fannoo irirana oorudupirafa aandau namasee qeeqa irirana kuridianoo qimasee narana kai naidanoo.

<sup>3</sup> Innikina aiqama aandau narana neemarifa sia quandaki aandau sia nainnanara fidiqaamasee qinee qeeqaraa ani uriqararausee sia qia, Kafaa aandau sia nainnafa sia quandaki kaqi neemarinara qaoo qimannisaaqa.

<sup>4</sup> Innee aiqamausa Yisuna ainainimariasa mariafanoo. Innee naqi fee mandee moo fasiqa ainainirana aqifaree. Mi fasiqafa moo fasiqa Yisuna ainainirafa maridanoo, mina uriqararafa kai mina oosana irisee mara uqeereeqee narí andeeqarana amanakai kikiqammaisaannoo karaambaiqa fannoo amana mina dadaaqinanoo anonaikiannoo.

<sup>5</sup> Faiqi moo fannoo moo faasaanara uriqarara faasaanee qidanoo. Faiqi moo fannoo aiqama faasaanara amanamana kai fee qidanoo. Aiqamausa naadu naadu nári irirana mapukusee irisee doo mi mau fuaqa.

<sup>6</sup> Moo fannoo moo faasaanara uriqarara faasaanee qimarifa karaambaiqa auqu uqeeraidanoo miqi qidanoo. Moo fannoo aiqama aandau narana neemarifa karaambaiqa auqu uqeeraidee qidanoo miqidanoo, Anutunara dufi dufi qidee qida neemarifa miqidanoo. Akaqa ainaina sia neemari fasiqafa mifa faqa minannai Anutuna auqu uqeeraidee qidanoo miqidanoo, Anutunara dufi dufi qida sia neemarifa miqidanoo.

<sup>7-8</sup> Maasa qeeqa mariranaki maridaqa sia qeeqa qeeqa rakisida maridaqa, maasa kuqirana faqa sia qeeqa rakisidaqa karaambaiqa fannoo kai rakisidanoo, maasa kaqi maridaqa karaambaiqa ainainiranaki maridaqa maasa kuqiqa karaambaiqaindi maridaqa mifinnai fidaqa. Doo qinee minara kooroo idaqa maasa kaqi maridee kuqidee karaambaiqaindi maridaqa.

<sup>9</sup> Asaku mundirafa kuqirausa faqa kaqi mariasa faqa karaambaiqa marianifeera auniriranasaa kuqinoo minakiqari findifinau.

<sup>10</sup> Qinee Pauroosa minara irisee iridaqa. Anee yafee maridanee aqoonnana oosana qafamaseenee aqinane. Anee yafee maridanee aqoonnanara akooqaidanoo fee. Maasa aiqamausa Anutuna afusaa kikiqammafuananoo mifa maasa oosana qafammaseenoo raina qimaqaannoo, minara sia aqoonnana aqisee akooqaani, anee ureeqarafa mariananoo.

<sup>11</sup> Ooqeenaa tamummaqara fasiqausa minara maaqi qidaqa. Anutufa qinau. Qinee kaqi marira Anutusa uriqararausa marunnanara qini ufa amiqimasee iriaqa. Aiqamausa qini doorisaa noorindari aqufiqa qimooqifaranoo. Aiqamausa qiniara Anutu fee qifaranoo.

<sup>12</sup> Doo qinee Pauroosa minara maaqi qidaqa. Maasa aiqamausa qeeqa nirana, marirana, qirana Anutuna afusaa kooroo ianaura. Minara iridaqa aqoonnanara ireeda kai qiaqa.

*Ani akaqaafasaa fannoo anee imarianna ainainasaa farindamaki saamuruandoo qia.*

<sup>13</sup> Nariara nariara ireeda kai marida sia munuqi miniqi qidaqa sia aaqara ufa nariara nariara qiaqa, sia maasa miqiaqa, maaqiaqa, maasa Yisuna

ufa irimarunausakina maridaqa moo ainaina maraananoo qini qiqaonafa qiqaamaseenoo doo narí faqa mareenoo aaqaranaki aqufinaqa doo qinee mi ainainnara sia maraanaura rufiaanaura.

<sup>14</sup> Qinee Pauroosa Karaambaiqa Yisunasaa atooqa marunнанannai aiqama naranara anukara fee kai qimasee naidaqa. Faiqí anaasee moo fannoo moo ainainara sia anukara fee qinafa mina amuqusakinaafa mi ainainnara rufiaannoo.

<sup>15-16</sup> Anee moo narana amiqira naranee qimasee namasainanoo ani akaqaafasaa ani qafamaseenoo mifa faqa neenoo minasaa farindamakinoo moo mandainainaki aqufinana anee mina afaasuaa qiananoo mifa mandainaina numooki aqufinoo. Anee miqinana sia aneenna akaqaafasaara amuqusinana dadaaqiananoo. Asauku mundirafa akaqaafasaara minara faqa kuqinau anee nanaree fifau amiqira naranara neemarianannoo mandoosanaki quqeenanee. Anee miqinaqa faiqí anaasee ani oosana oosana naranara kaqi nifaqa quqasee neefandinanara mandoosanee qifaranoo.

<sup>17-18</sup> Anutuna ququsaki mariasa maasa nirana marirana sia narana nammarisaafau mundinoo maridanoofau. Anutuna naaquqara maraquna nimimari ainainausa andeeqarana faqa asooarana faqa asasirana faqa minamusasaa maasa marirana nirana mundinoo maridanoo. Faiqí anaasee moo fannoo asauku mundirana ainainidanoo narí akaqaafasaaugara amuqusi-marifanoo dadaaqinoo rakisinanoo Anutuna amooqirafa faqa faiqí faiqi eedoo qirana faqa maraannoo.

<sup>19</sup> Maasa minara irisee Yisuna aiku asaukuki nidaqa maasaki asooarana faqa narí afeekaiki narí afeekaikiqa Anutuna ufamau fuaqee qimasee mi mau fuaqa.

<sup>20</sup> Anutufa maasa moomoosa Yisuna moodaanaki quqaqoofaqa maasa sia mina kuridiqa furufariaqa. Aiqama narana amana nee mariafa maridanoo maasa moo amiqira narana namasaananoo maasa qikaqaafasaa moo fannoo qiqaamasee quandaki aaqaranaki aqufinanoo maasa mi naranna naunнанara aaqarafa maridanoo fee qianaaura.

<sup>21</sup> Andeeqasee nimariaanafa maaqimminoo maridanoo akaqa narana nammari fee namasaananoo qini qikaqaafasaa moo fannoo fee qini qiqaamaseenoo minasaa aiku amakinanoo kuridiranaki aqufuandooru mi narana nammarina narara rufiaanaura. Nana ainainasaa fee qini qikaqaafasaa aiku amaki kuridiranaki aqufuannoo fee qimasee mi ainainara rufiaanaura.

<sup>22</sup> Aninna irirafa narana nammariara sia faiqí aanaaseeki kooroomandee minasaa aanoo irafa raiqarafa kambigaani Anutusandiri kai kukeeqasee iriaqa. Faiqí moo fannoo narana nammari nainara mina aakirafa sia qaoo qinafa mifa amiqira fasiqa asasiranaki mariannoo.

<sup>23</sup> Kafaa mi fasiqafa moo ainaina namaseenoo oonumafi iridanoo Anutufa minara andeeqeefoo qiannoo fee sia andeeqeefoo qiannoo fee qimasee qaara aundura irirafa mi fasiqafa mi narana nammarina namasainnanara Anutufa aaqee maqi qiannoo, sia Yisuna saqarikiranara irisee neenoo irirana furufaramandee neenoo, miqinnanara Anutufa aaqeenoo fee qianoo. Maasa moo ainainana andeeqara fee mariannoo fee aaqara fee mariannoo qimasee qaara daundura irisee kaqi oonu qumarainafa aaqarafa maridanoo.

## 15

*Sia aneenna aidiramau fua.*

<sup>1</sup> Maasa Yisuna saqarikiranaki afeekaiki mariasa quandaki ureeqarusa gumaara dinni ati dadaaqa akumaraa, sia maasa qeeqa didiranamau kai fua.

<sup>2</sup> Maasa naadu naadu qeeqa qikaqaafasaa narí Yisuna saqarikirana dadaaqiananoo afeekaikiani. Sia aneennara iria, aneenna akaqaafasaa amiqa amiqianifeera minara irisee dadaaqa.

<sup>3</sup> Asauku mundirafa ririmma, sia narí aidiramau finoo, narí akoona Anutuna aidiramau finoo tamummaqara fasiqa minara maaqi qimasee akara rinau.

Faiqí anaasee Anutuna aqira ufa mandufa qimarifa qinisaa aqufinoo.

Tamummaqara fasiqa mi ufana qimasee akara rinau.

<sup>4</sup> Aiqama tamummaqara fasiqauqa akarakinaa ufa sia fifau akara riqau maasa naamuaqidee qimasee akara riqau, maasa mi akaranakinaa ufa dadaaqidaqa fuki faaki qirana faqa ubiqafi marirana faqa marasee miqandannai Yisunara اساسمasee afeesirana maraaqeera akara riqau.

<sup>5-6</sup> Anutufa ubiqafi marirana akoofa faqa dadaaqira fuki faaki qirana akoofa faqa maridanoo. Miqi mari Anutufa inni dadaaqinaqa innee asauku mundirana Yisuna aanna ramaseeqa innikina sia aanoo irafa mariannoo moodaa irirafa mariannoo. Moodaa irirafa innikina marinaqa aiqamausa moodaa ufa kai qimasee asauku mundirana maasa karaambaiqa Yisuna akoona Anutuna amooqiaqa.

*Anaamuru misa Isaraee maqanna faqa Anutunara dufi dufi qifaranoo.*

<sup>7-9</sup> Asauku mundirafa inni qumaronara irisee innee nariara nariara agoondikifaqa faiqí anaasee inni nindafamasee amiqira oosana maraidammiafoo qimaseeqa inni Anutuna amooqiaqeera. Anutufa narí qimaqoo ufamau fuanifee qimasee asauku mundirafa Yuda maqanna mara firira faiqira foora ainainammannimaqara faiqi kamambinoo marinou. Anutufa Abarahaamana aiku asauku faqa qima afeekaikamma soonara kambiqaanifeera qimasoo fanoo asauku mundirafa Yuda maqannaasa ainainammannimaqara faiqi kamambinou. Anaamuru mariasa anireeqa Anutufa misara amuqusufanoo nifauaranara faqa Anutuna auqu uqeerasee amooqiaqeera asauku mundirafa minara faqa Yuda maqannaasa ainainammannimaqara faiqi kinou. Tamummaqarusa akaraki naana minara maaqi qinou.

Qinee aanaamuru namufaqa maridaqa misa saimbaqa aniara dufi dufi qianauro.

Miqooqari anauqu uqeeraseeqa idi raida ani amooqianauro.

<sup>10</sup> Tamummaqarusa akarakinaafa moo maaqi qidanoo.

Innee aanaamuru mariasa Anutufa utaaqama nimaqee marisa Yuda maqannaasa saimbaqa dufi dufi qimasee asasiaqa.

<sup>11</sup> Moo tamummaqarafa maaqi qinou.

Aiqama aanaamuru mariasa karaambaiqa amooqiaqa.

Aiqama maqannaasa firaaqoo mina amooqiaqa.

<sup>12</sup> Kafa moo tamummaqarafa maaqi qinou.

Yeeseena atiki moo kambiqaanoo, mifa findifinoo aanaamuru rakisianoo, misa quandaki nári irirana minaki rusifaranoo.

Tamummaqarusa ufa Yisunara miqimmiqu.

<sup>13</sup> Anutufa maasa innaarunaira afeesirana oosanafaqaafa maridanoo, mifa kai innee mina saqarikiranannai aiqama اساسirana faqa asooarana faqa innikina qumbiqannimaqaannoo, Anutuna naaquqara andeeqara

maraquna afeeka fannoo inni dadaaqinanoo innaarunaira اساسمasee afeesirafa mi اساسirafa qumbiqeenoo teeqiannoo.

*Pauroofa afeeka ufa Roomma maqannaasa akara rumannimaqoonara qinau.*

<sup>14</sup> Oo qini qikaqaafasaa uqa qinee Pauroosa inni Roomma maqusai mari-asara qidaqa. Qinee inniara amiqirafa faqa irirana faqa qumbiqara usee qidaqa innee Roomma maqusanaasa amiqira irirana nari uqafiqee nari uqafiqee qimariasa amana mariafanoo.

<sup>15</sup> Innee miqi marifaqa qinee maa pasanakina sia reendeenamandee inni naaqoo auqeeqa oosana oosana ainainara inni naaqoo firaqoo auqeeqa.

<sup>16</sup> Anutufa amiqira ainainirana qini qiminu. Qinee asauku mundirana Yisuna saikaki quqaqisaifaqa maridaqa aanaamuru qimannimiranaki maridaqa.

(Mooseena uqiqaana maaqakina Anutuna aanaiqikira fasiqauqa sipsipa aanaaqi amiqirana kai faiqi aanaaseendi mara maree mini ooninnai auqira qaindasaa quqasee arusee aandau tatufirana Anutuna suqa amimariqau.)

Qinee aanaamuru faqa Anutuna faqa aanaiqikira usara foora marunnana maa akaranaki afeeka ufa inni nimiqa, kaqiqeesa marifaqau sia afeeka ufa qimannimini ireeda kai qimannimini inni aanaiqikira usa maridaqara afeeka ufa qimannimidaqa. Anutuna naaquqara andeeqara maraquna fannoo aanaamuru mariasara Anutunaindi fee qimasee misauqa marirana nirana Anutuna aidirana amana kai mariaqeera minara kai Anutunai aanaiqi kirausaikidaqa maridaqa.

<sup>17</sup> Qinee asauku mundirana Yisunasaa moodaanaki kamambi maridaqa maqasaa mi saikanaki marunanoo didimarifaqa اساسidaqa.

<sup>18-19</sup> Asauku mundirafa naaquqara maraquna qimifanoo dadaaqifaqa qeeqa ufannai faqa qeeqa kadaapiriranannai faqa sia faiqi maraaqaa ira ainainannai faqa minauqannai qinee aanaamuru Anutuna ufa qimannimimariafanaga iriqa mi mau fidaqa, asauku mundirafa dadaaqinara firaqoo qifaqa quqasee afeekaikamandee qimannimiana ura. Qinee miqidaqa amiqira fasaasa ufa asauku mundiranara aiqama ufatia qimannimiqa Yeerusaree maqusa dinni Iririkumma maqusa dinni mi qambaana saqanna mariasa aiqama usa qimannimimaree fifainidaqa.

<sup>20</sup> Asauku mundirana aufakiana sia irimariasa kai qimannimiqa, qeeqa ufa moona ufa amuaqa rusianoora saina sia irimariasa kai qimannimia, ooqai indaaru doo qinee mi iriramau fidaqa. Mi mau fidaqa tamummaqara fasiqa ufamau fidee qidaqa.

<sup>21</sup> Ooqai mi tamummaqara fasiqana ufa minara maaqi qinoo maridanoo. Sia minara qimannimusa mina qafeefaranoo. Sia irusa minara naaqoo irifaranoo.

*Pauroofa Roomma maqusai firaree qimasee qimaqoo ufafa.*

<sup>22-24</sup> Qinee Pauroosa moomoo kari inni Roomma maqusai fuaneerunanoo oosana oosana ainainirafa rafaqaqafufaqa doo maqee maa saqa saika taikasee moomoo aukwana innee iannai fuanee qimarunau sa doo maqee qusasa firaridaqa. Qinee Sipeena maqusai fidaqa inni Roomma maqusanaasa faqa namumma qeeqa inni faqa اساسمasee marikammasa anaqa innee Sipeena maqusai fuannana qiku auqirana dadaaqia qee qidaqa.

<sup>25</sup> Inni maqusai fuani qunau sa doo maqee Yeerusaree maqusai fuana ura oonureeqa oonurandee aiqareeqa inni maqusai fuana uranoo. Yeerusaree maqusai ooru fidaqa miqoo Anutuna ufa irimariasa dadaaqiana ura.

<sup>26</sup> Maseedoonia maqa maaqakinaasa faqa Kirisa maqa maaqaki-naasa faqa Yisuna ufa irimariasa nariqa munnimma aiqamausa ruaum-masaafaqa Yeerusareenni Anutuna ufa irimarusa ainaina naranara sarairausa mi munnimmana nimiraree qimasee qinisaa saafaqa maree ooru firarammidaga.

<sup>27</sup> Maseedoonia maqa maaqaki mariasa faqa Kirisa maqa maaqaki mariasa faqa nariqa kai ruaummasee Yeerusaree maqusanaasa nimiraree qidaqa, sia qineefau qiqau. Indaaruu Yuda maqannaasa nari innaarunai fira amiqira ufa Yisuna ufara aanaamuru naida nimisoonara mi aikana narinoo marina mi aikana tatiqa maqasaa amiqi amiqira ainainara munnimma nimifaranoo. Anaamuru mariasa miqiaqaana andeeqara oosana maridanoo.

<sup>28</sup> Qinee maaqooqaraasa suquseeqa nimira munnimma mareeqa Yeerusaree maqannaasa aiqama uqanna munnimma nimiseeqa oorurandeeqa inni Roomma maqanna faqa qumu maridaqa asasidaqa amiqidaqa mariana, doo marikiqa Sipeena maqa maaqaki oonuree misa faqa Yisunara qimannimianauranoo.

<sup>29</sup> Qinee inni Roomma maqanna iannai oonuree maa ainainnara iridaqa. Qinee asaku mundirana afaaqooqa qiranasaa fidaqa mina amiqi amiqirana inni nimiana.

<sup>30</sup> Oo qini qikaqaafasaa qinee Pauroosa afeekaikamasee inni qimannimidaqa. Innee qiniara Anutufinnai innaaru qiranannai qini dadaaqaqa, Inneeqa nimuqusa ookiqari afeekaikamandee qiniara innaaru qiaqa. Innee faqa qinee faqa asaku mundirafa Yisufa maasa karaambaiqa minasaa atooqafi marunasa maridaqa minara irisee qiniara innaaru qiaqa. Anutuna naaquqara andeeqara maraqa fannoo nariara nariara nimuqusirana maasa firaqoo qimuna innee minara faqa iriseeqa qiniara innaaru qiaqa.

<sup>31</sup> Qinee maindari Yeerusareenni ooruree misa nimiraree qia munnimmana nimianaqa Anutuna ufa irimariasa minara asasiqeeera innaaru qiaqa. Miqoo Yeerusareenni qinee marianaqa innee Anutunara innaaru qimaqimaqaqa Yeerusareenni mariasa Anutuna ufa sia irimariasa qini darirarammidammia. Innee misara innaaru qia qini sia daruaqee innaaru qiaqa.

<sup>32</sup> Qinee Yeerusaree maqusaindari amiqimandee oorurandee qumuraananoo Anutufa qinnanara inni Roomma maqannaasa faqa kaqikaqoo idooamaseeqa asammaseeqa aiqaree fuanaura.

<sup>33</sup> Anutufa maasa asoora oosana fannoo inni aiqama Roomma maqanna faqa mariani. Kuqaa.

## 16

### *Pauroofa nari aqoondiuga nimandaidanoo.*

<sup>1</sup> Oo qini qiqoondiuga Roomma maqusai mariasa anaasee moo fannoo Keenakaree maqusai Yisuna ufa irimariasa dadaaqimari anaaseefa maasa nisookifa mina auqu Fooeebee nammarifa qusasaa innee iannai Roomma maqusai fuannoo.

<sup>2</sup> Mifa andeeqara anaasee marinoo oonurainaqa innee Anutuna faiqi namu naanna ramasee karaambaiqa ufa irimari anaasee fee qimasee amiqimandee qumaree rakisidaqa mi anaaseefa moo ainaina ummaara moo bisinisa Roomma maqusai auqainaqa innee kaqi dadaaqaqa. Mi

anaaseefa moomoo fasiqa anaasee dadaaqirafa qini faqa dadaqira qiqoondi maridanoo.

<sup>3-4</sup> Inni Roomma maqusai maria fasiqa anaaseeqanda, anaasee auqu Pirisikaa nammarifa maridanoo afaaqi auqu Akuiraafa mi qafaqiqanda qini dadaaqirana nári kuqiranara paasoosamandee moomoo kari nimeekaranaki fidaqa qini dadaaqimariasa maridaqa, asauku mundirana Yisuna ainainirana dadaaqi mariaqanda maridaqa. Sia qini kai dadaaqimariaqanda aiqama aanaamuru Yisuna ufara suqufi qimariasa misa faqa dadaaqimariaqanda marianara misa faqa qinee faqa miqandara dufi dufi qidaqa. Qinee maa pasanaki mi qafaqisa nimandaída.

<sup>5</sup> Mi qafaqisa maqaki Yisuna ufara suqufi qimariasa amaana maqa sia marinara suqufida qimariasa misa faqa maa pasanaki nimandaídaqa. Qini qifaaqasaa qiqoondi auqu Eepaeneetusafa aiqama Asia maqannaakina indaaruru asauku mundirana aqoondikufa, qinee maa pasanaki mina faqa amandaídaqa.

<sup>6</sup> Moo anaasee auqu Maria nammarifa (sia Yisuna anoofau mina amarafa) firaqoo inni Roomma maqusanaasara kadaapirufa maridanoo qinee mina faqa amandaídaqa.

<sup>7</sup> Qini maqanna Yuda maqanna fasiqa anaasee qini faqa karabusaki maruqanda nuqu Andaroonikusafa faqa Iunia nammarifa faqa mi qafaqisa naaree Yisuna saqariki maruqanda maridaqa qinee innaaqianna. Yisufa niqiqoo fasiqausa amiqimandee miqandara iri mariqau. Qinee miqandara faqa maa pasanaki nimandaídaqa.

<sup>8</sup> Qini qifaaqasaa qiqoondi moo auqu Ampariatusafa mifa faqa maasa faqa karaambaiqa ufaki maasa faqa moodaanaki mariufa inni faqa marifaqina mina faqa maa akaranakiqari amandaídaqa.

<sup>9</sup> Asauku mundirana ainainiranakina maasa faqa moodaanaki mariufa. Urabanusana faqa inni faqa marina amandaídaqa, Qini qifaaqasaa qiqoondi moo auqu Sarakisafa inni faqa marina amandaídaqa.

<sup>10</sup> Apeeresana faqa amandaídaqa, mifa aukwana aukwana asauku mundiranasaa atooqafinoo mina ainainirana faakanaikirafa marifa. Aristooburusana faqa mina aiku asauku faqa nimandaídaqa.

<sup>11</sup> Qini qiqoonna Yuda maqanna Eeroodioonana mina faqa amandaídaqa. Narakisusana narí aiku asaukukiqari Yisuna ufa iri mariasa nimandaídaqa.

<sup>12</sup> Anaasee qaaraqanda asauku mundirana ainainiranaki maru aanaaseeqanda nuqu Tirifae nammarifa faqa Tirifoosa nammarifa faqa miqanda faqa nimandaídaqa. Anaasee moo qini qifaaqasaa qiqoondi Karaambaiqa saika firaqoo uqanna maree marifa mina auqu Peerasisa nammarina faqa amandaídaqa.

<sup>13</sup> Karaambaiqa saikaki mariasakiqari amiqirafa mina auqu Rufusafa mina anoofa faqa qinee faqa mina amaakuara foora marunnaara miqanda qisanoosara nimandaídaqa.

<sup>14</sup> Maa fasiqa namusa nuqu raanura. Asinakaritusafa faqa Fareekoonafa faqa Qeerameesafa faqa Pataroobasafa faqa Qeeramasafa faqa minamusa faqa aiqama Yisuna ufa irimariasa faqa misa nimandaídaqa.

<sup>15</sup> Firoorookusafa faqa Iuriafa faqa Neereeusafa narí asookisandiri faqa Oorimpasafa faqa aiqama Anutuna ufa irimariasa faqa misa faqa mariasa faqa nimandaídaqa.

<sup>16</sup> Innee suqidaqa nariara nariara nikaqafasaara foora narí sukukee narí sukukee iaqa. Aiqama maqusa maqusa asauku mundirana ufara suqufi qimariasa misa faqa inni Roomma maqanna nimanandaiaqa.

*Akaqausa rainee mariasa mi ufanara eerairiaqa.*

<sup>17</sup> Oo qini qikaqaafasaauqa qeeqa qimuqusa ookiqara afeekaikamandee inni qimannimidaqa. Akaqausa rainara ufa oosana areemarisara eerairiaqa. Misa Yisuna saqariki mariasa akaqausa kuridi nimaqaidafaq innee maroo andeeqara ufana ateekaidafaq, misara rufisee nianai mariafa.

<sup>18</sup> Miqi mariasa sia maasa karaambaiqa asauku mundirana ainainau idau, misa narí nidimari mandainainara kai randaida iridaqa. Misa narí nimanira ufannai faqa narí nifaurunnai kai susumma nimaqaranannai faqa amiqira fasiqa anaasee iriranara uneemaana qidaqa.

<sup>19</sup> Aiqama maqannaasa inni Roomma maqannaasara iridaqa innee Yisunasaa atooqa marianara irimariafaqa qinee faqa iridaqa asasidaqa. Qinee inniara oosana oosana amiqira oosana akoofasauqa mariaqee qidaqa, oosana oosana mandoosanara aaminaikiaqee qidaqa.

<sup>20</sup> Anutufa maasa asoarana oosana faqaafa qusasaa Sadannana inni niku ameemaanaira foora mareeqeenoo quqasee radamusaannoo. Karaambaiqa Yisuna afaarirafa inni faqa mariannoo.

<sup>21</sup> Maaqoo qini faqa mariasa narí nimanarana inni nimidaqa misa nuqu Timootifa qini moodaa ainainirana dadaaqi marifa inni nimanandaianoo Rukiufafa faqa Iasonafa faqa Soosipateerafa faqa misa aiqamausa qini maqanna Yuda maqanna mariasa misa faqa inni nimanandaiaqa.

<sup>22</sup> Qinee Teeratusausa Pauroona ookinaana iridaqa maa pasana akara rimarunausa maridaqa, maqee qinee faqa Yisuna ufa irimarunausa maridaqa inni nimanandaiaqa.

<sup>23</sup> Yisuna ufara suqufi qimariasa Kaiusana maaqaki maqee maqee suqidaqa, qinee Pauroosa faqa mina maaqaki marunano mi fasiqafa Kaiusafa inni Roomma maqannaasa nimanandaianoo. Qeeqa maqee marunna maqusanaasa munnimma kansooru munnimma rakisimarifa mina auqu Eerasatusafa faqa maasa qikaqaafasaa Kuaratusafa faqa inni nimanandaiaqa.

<sup>24</sup> Maasa karaambaiqa asauku mundirafa Yisufa mina afaarino kaqi nimira oosana inni aiqamausa faqa mariani.

*Ufati taikarufa.*

<sup>25</sup> Doo maasa Anutuna areenarana amia, Ooqai oosana aroonakiqari kukeeqara anoona ufa Isaraee maqannaasa faqa aanaamuru maqannaasa faqa Anutufa asumu mariranaki quqaaninna ufana kukeeqanoo mariufa maqee Yisunaki koorooinoo maridano. Mi kooroo ira ufafa inni Yisuna saqariki mariana minaki inni amana mapuku nimaqaannoo. Amiqira fasaasa ufa asauku mundirana Yisunara qinee qimannimiqa nunnana, inni Yisuna saqarikirana mi ufanasa mundino maridano. Amana Anutufa inni Yisunaki saqarikirana mapukusee quqannisaannoo.

<sup>26</sup> Ooqai mi kukeeqara anoona ufafa maqee naaru naaru marira Anutufa ufa qufano mi kukeeqara ufafa aiqamausakina akoosaqa kooroomafifano marifaqa qafaidafaq iridaqa. Anutufa ufa qufano Yisufa sia kambiqooqoo tamummara fasiqauqa Yisuna aufakiana kooroo iqau. Maqee faqa aiqama maqanna qimannimifaqa mi ufanasa irirafa rusififaqa iridaqa eedoo qimasee mi mau fuaqeera.



27 Moodaa mari Anutufa nari'ara aiqama ainainara irimarifa, mina asauku mundirana Yisunannai naaru naaru areenarafa minaindi mariani. Kuqaa.

## 1 KOORINTI

### Pauroofa Koorinti maqannaa akararumannimaqoo ufafa.

<sup>1</sup> Qinee Pauroosa maa pasana akara rumannimaqaidaga Anutufa narí iriranannai qini maqasaa fasiqa daaramaseenoo narí asaku mundirana Yisufa niqiqoo fasiqausaki qini quqaqoosa maridaqa maa pasana akara rumannimaqaidaga. Maasa qikaqaafasaa Soosateeneesafa maa pasanaki mifa faqa qinee faqa nianaindari inni nimandaiddaga.

<sup>2</sup> Innee Koorinti maqusai Anutuna ufara suqimariasa akara rumannimaqaidaga Anutufa inniara narí aiku asaku mariaqeera utaaqamaqaisa mariafanoo, innee mina asaku mundirana Yisunasaa atooqaanara Anutunaindi kammiqa mariafanoo, Anutufa narí faiqi namu mariaqeera narí innai fuqeera inni naareenoo, sia innee kai minaindi mariafanoo, aiqama maqanaa maasa karaambaiqa asaku mundirana Yisuna aaree mariasa misa faqa innee faqa minaindi mariafanoo. Yisufa misa faqa maasa faqa karaambaiqa maridanoo.

<sup>3</sup> Maasa qikoofa Anutufa faqa maasa karaambaiqa asaku mundirafa Yisufa faqa miqanda kaqi afaarirana faqa naundura asooarana faqa inni Koorinti maqannaasa nimiani.

*Pauroofa Roomma maqannaasara dufi dufi qidanoo.*

<sup>4</sup> Anutufa innee mina asaku mundirana Yisuna saqarikianara narí afaarirana inni niminoo.

<sup>5</sup> Innee Yisunaki marianara Anutufa oosana oosana amiqira ufa qirana faqa oosana oosana amiqira irirana faqa mi ainainaqanda moomoo nimunara qinee Pauroosa minara iriqa qeeqa Anutunara inniara maqee maqee dufi dufi qidaqa.

<sup>6-7</sup> Innee maasa karaambaiqa asaku mundirana Yisunara innaarunaindaraafa kooroo iranara afeesimariafanoo asaku mundirana amiqi amiqirana aufakiana inni naunduraki mapukusee marinara Anutufa moomoo narí dadaaqi narí dadaaqirana akoofasaikirana niminau.

<sup>8</sup> Anutufa maa mariaqooqari amiqimmandee rakisinoo fifi inaqaa sia kasaqai kuridifaranoo taikara aukuaana andeeqasee paqurifaranoo. Miqunara mikari maasa karaambaiqa asaku mundirana Yisufa qumira faasaana Anutufa maasa niuqummasee moo aagarana sia paquriannoo.

<sup>9</sup> Anutufa inniara narí amaaku narí asaku mundirana maasa karaambaiqa Yisuna faqa aqoondikiaqeera inni naaree marifa marinara sia inni nikaruqimasee kasaqai mininnisaannoo innee minasaa nifaaqa quqemariafa maridanoo.

*Pauroofa misaki raiqaranara aaqee mariafanoo fee qinau.*

<sup>10</sup> Qini qikaqaafasaa Koorinti maqannaa mariasa, maasa karaambaiqa asaku mundirafa Yisufa inni qimannimira saika qimunara irisee inni reendeenamandee kai qimannimidaqa, inneeqa sia raina rainida furufariqee qimasee moodaa ufa qimasee moodaanaki mariaqa kuqaa uqanna moodaanaki mariasa maridaqa moodaa irirana faqa moodaannai firana faqa mariaqa.

<sup>11</sup> Moo anaasee auqu Karooeena nammarifa mina aiku asaku innikina manda ainaina, raiqara ainaina qafamasee akooqoo qimaqimiafaqa iriqa.

<sup>12</sup> Misa akooqoo qimaqimiafaqa doo qinee akooqoo inni qimannimi-  
anaura. Inniki naadu naadu moona ufa iriqa moona ufa iriqa ufa  
moo qimariana qambaana raiqarafa aaqarafa maridanoo. Moo fannoo  
qinee Pauroona aiku asauku marunausee qiafanoo moo fannoo qinee  
Apooroosana aiku asauku marunausee qiafanoo moo fannoo Peetooroona  
aiku asauku marunausee qiafanoo moo fannoo asauku mundirana aiku  
asauku maridee qimasaida miqira raiqara ufa aaqarafa maridanoo.

<sup>13</sup> Qinee Pauroosa minara maaqi qidaqa asauku mundirafa narí apata  
aiku moodaa moodaa maqaisee maridee sia aukaakinoo marunara innee  
faqa sia rakeekaa iaqa. Qinee Pauroosee inniara aunirira saqarisaa kuqi  
fee qiqiafana. Sia kuquafannanara sia qini kikiqusuaqa. Innee nammari  
maraqau qini Pauroosa duqusaa fee nammari maroosee maridee. Asauku  
mundirana auqusaa qimasee nammari maroonara mina aiku asauku kai  
mariaqa.

<sup>14</sup> Qinee sia innikina nammari moomoo rumannimaqaqiafana minara  
Anutunara dufi dufi qidaqa.

<sup>15-16</sup> Qinee Kirisipusana faqa Kaiusana faqa nammari rumannimaqaafan-  
nana. Doo daaqoo irifaqa Sateefanasana faqa narí aiku asauku faqa ina-  
musa kai nammari keeqannimaqaqiafana. Akaqausa faqee nammari  
keeqannimaqaafanane doo maqee aunusee sia iridaqa, minara sia moo  
fannoo qiniara aiku asauku kammambi nammari mareeunoo qifaranoo.

<sup>17</sup> Asauku mundirafa sia qiniara nammari keeqannimaqaannee qi-  
masee diqiqeenoo amiqira fasaasa ufa qimannimiannee qimasee qini  
diqiqeenoo sia faiqí faiqi iriranamau qimannimiannee qinoofau qini  
diqiqeenooofau. Qinee faiqí faiqi iriranamau qimannimiqa asauku mundi-  
rafa auniriranasaa kuqu afeeka ufana ureeqanoo marina sia irifoora.

*Anutuna irirafa aadumamaumbidanoo, maqasaa fasiqa irirafa moomau  
fidanoo.*

<sup>18</sup> Asauku mundirafa aunirira saqarisaa kuqu ufana kuridiranaki fimari-  
asa irisee furufarira ufa fee qidaqa. Maasa asumu mariranaki fimariasa sia  
miqi qidaqa mi ufanara Anutuna afeeka mi ufanara kai mari ifoo qidaqa.

<sup>19</sup> Ooqai tamummaqara fasiqauqa minara maaqi qimasee akara riqau.  
Irirana faqaasa Anutunara sia irimaria irirana qinee qeeqa Anutusa  
kuridinnimaqaanaura. Aiqaama firaa irirana irimariasa aiqaama misa  
maa maqanasaaqarara irirana rukasaanuranoo.

Tamummaqaraura ufa oosana miqiminoo maridanoo.

<sup>20</sup> Qinee Pauroosa minara kafa maaqi qidaqa. Irirana faqaasa iriranara  
minara naqi fee qianauree. Uriqarara sukuraki keeqee mariasara naqi fee  
qianauree. Maa maqa maqanasaaqarara ufa akoofasauqa iriranara naqi  
fee qianauree. Misara maaqi qianauree, doo Anutufa ooqai uqannifiaqoofa  
koooro inoo maridanoo qimaqiminoo. Maa maqa maqanakinaasa irirafa  
Anutunara furufarirafa maridanoo.

<sup>21</sup> Anutufa narí firaa iriranaki maridanoo quandakinoo sia misa nári  
iriranannai qiniara iriaqee qimaseenoo faiqí auqu quqanau. Miqooqari  
maasara Yisuna aufakiana qimannimifaqa, misa minara furufarira ufa qi-  
mariafa, qimannimifaqa iriseeqa misa irirana minasaa rusimariasa asumu  
marirana Anutufa nimianifee qinau.

<sup>22</sup> Yuda maqannaasa faiqí sia amana auqaaqaa ira ainaina uqaqifiqa-  
sainaqa ani ufara kuqaa fee qiraree qimariasa. Anaamuru Kirisa maqan-  
naasa firaa iriranakinaa irirana qimaqimifaqa kuqaa fee qianauranoo.

<sup>23</sup> Maasa sia mi maqannaqanda naanna raidaqa, maasa asauku mundirafa aunirira saqarisaa kuqunara minara kai qimannimiafaqa Yuda maqannaasa mina irisee aanoo qiafaqa aanaamuru irisee furufarira ufee qimariafanoo.

<sup>24</sup> Anutufa utaaqamannimaqaisa mi ufana iriseeqa Yuda maqannaasak-iqari faqa aanaamurukiqari faqa mi ufanara asauku mundirana kuqirafa Anutuna firaa irirana faqa mina uriqarara afeeka faqa maridanoo fee qidaqa.

<sup>25</sup> Anee Anutuna irirana iriseenana minara furufarammi ifoo qinanoo Anutuna mi irirafa faiqí irirana urinaaqaranoo maridanoo. Anee Anutuna moo ainainara sia afeeka ainainammiifoo qinanoo Anutuna mi sia afeeka ainainafa faiqí afeeka urinaaqaranoo maridanoo.

<sup>26</sup> Oo Koorinti maqannaasa, maanara naaqooki iriaqa inni Anutufa naaroo aukuanana Yisuna saqariku aukuanafa innee mikari irirana faqaasa moomoosee mariqee iqau. Faiqí faiqí irirana faqaasa sia moomoo inniki mariqau. Faiqí faiqí afeeka faqaasa sia moomoo inniki mariqau, sia faiqí uriqararaura moomoo inniki mariqau.

<sup>27</sup> Anutufa faiqí faiqí irirana faqaasa nisauriranaki quqaannee qimasee misakiaga furufari mariasee qimariasa Anutufa mi furufarira fasiqa anaaseesara faqa nári irirana faqa qumareenoo minara qini amiqira irirana faqaasee qidanoo. Anutufa maqasaaqarara afeeka faqaasa nisauruaqee qimasee faiqí faiqí akaqausara sia afeekke qimariasa Anutufa mi sia afeeka fasiqa anaaseesa faqa nári irirana namufaqa qumareenoo minara qini afeeka faqaasee qináu.

<sup>28</sup> Anutufa faiqí faiqí uriqarara fasiqa anaasee fee qimariasa kurid-ianifeera misa nikooqee maria fasiqa anaaseese qimariasa faqa misa fidiqaa imaria fasiqa anaaseese qimariasa faqa nári irirana namufaqa misakinaana nariara rusandeesamumasee qumareenoo uriqarara ainainee qidanoo.

<sup>29</sup> Miqunara sia faiqí moo fannoo Anutuna oorisa nári irirana amooqian-noo.

<sup>30-31</sup> Anutufa inni mareeqeenoo asauku mundirana Yisunasaa atooqaseenoo asauku mundirana qumareenoo maasa irirane qimaseenoo maasa mareeqeenoo nári andeeqaranaki qiseenoo nári aiku asauku uqannaikamma qimaqeenoo maasa manda ainainakinaana idukuqisoofaqa marunnanara maasa tamummaqara fasiqa ufamau kai fuannanara minara maaqi qimasee mifa akararináu.

Faiqí moo fannoo nana ainainaree moo ainaina amooqianauree qimasee sia nári amooqirana uqeeraani karaambaiqara kai amooqiani.

## 2

### *Asauku mundirafa auniriranasaa kuqunara minara kai qimannimináu.*

<sup>1</sup> Oo qini qikaqaafasauqa qinee Pauroosa Koorinti maqusai oonuree Anutuna anoona ufa sia ooqai irirana faqaasa ufannai faqa sia uriqarara iriranannai faqa qimannimiqiafana.

<sup>2</sup> Qinee qeeqa maaqi qimasee qimiriga, qinee Koorinti maqannaasa qimannimidaqa qeeqa irirana aunusee asauku mundirana Yisunara kai qimannimianauree, mifa auniriranasaa kuqunara firaaqoo qimannimianauree qiga.

<sup>3-4</sup> Qinee minara iriseeqa innee iannai oonureeqa qeeqa ummooqukiranara iriseeqa maparaa idaqa daindiri ree marinaqa sia faiqí faiqí irirana

faqaasa ufa faqa naufakiana faqa Yisunara qimannimifannana. Qimannimi mariafananoo Anutuna maraquna afeeka fannoo amiqimasee qini ufa anoona uqannifiqanau.

<sup>5</sup> Innee minara iriqa inneeqa Yisuna saqarikirana sia irirana faqaasa iriranasaa fau mundinoo marinau. Anutuna afeekasaa mundinoo maridanoo.

*Anutuna maraquna fannoo Pauroona dadaaqufanoo qimanniminau.*

<sup>6</sup> Qinee sia faiqí irirana marasee aiqamausa qimannimidaqa, akaqausa Anutunara firaaqoo mapukusee irimariasa kuqaa qinee irira ufa misa qimannimidaqa. Sia maa maqanasaaqaraasa iriranau misa qimannimidau, sia maa maqanasaa rakisimari afeekausa iriranau qimannimidau doo misa afeeka taikaidanoo.

<sup>7</sup> Qinee qimannimi marunna irirafa Anutuna ooqai kukeeqara irirana innaarunai asumu nimimarina qimannimidaqa mi irirana faiqí sia nifu qafaafa. Maa maqa maaqafa sia maru kamuqoo Anutufa mi irirana utaaqamaseenoo minannai maasa narí areenaranaki innaaruna ququsaki keeqaaqeera utaaqanau. Qinee mi irirana misa qimannimidaqa.

<sup>8</sup> Ooqai maa maqa maaqanasaa rakisirausa sia mi irirana iriqau. Iriqau innaaruna areenaranakinaa karaambaiqa sia qumareefau aunirira saqarisaa arini.

<sup>9</sup> Ooqai tamummaqara fasiqa minara maaqi qimasee akara rinau. Faiqí sia qafee maru ainainnara sia iri maru ainainara sia faiqí moo fannoo minara kambiqaanoo fee qimaru ainainnara, miqira ainaina kai Anutufa deedaqammaseenoo nariara rimariasa kai nimiannoo.

<sup>10</sup> Qinee Pauroosa minara maaqi qidaqa. Maasa inni saimbaqa Roomma maqannaasa namufaqa Anutufa narí maraqunannai narí ooqai kukeeqara irirana qiminau. Anutuna maraquna fannoo aiqama ainainara randasee aiqumummasee qafaidanoo. Sia akooqoo ainaina kai qafaidanoo Anutufa naaru kambiqaaninna kukeeqara ainaina farumara foora unaurinoo marina mina faqa aiqumummasee irimarifa marunara Anutufa narí ooqai kukeeqaqoo irirana inni saimbaqa qiminau.

<sup>11</sup> Faiqí naundurakinaa maraquna fannoo mi fasiqana aundurakinaa irirana aiqama iridanoo. Miqi kai inoo Anutuna maraquna fannoo Anutuna aundurakinaa ainainara aiqama iridanoo.

<sup>12</sup> Inni saimbaqa sia maa maqa maaqanasaaqaraa maraquna maroosa maridaqa. Inni saimbaqa Anutufa niqiqoo maraquna maroosa maridaqa Anutufa minannai innaarunai asumu mareemariana faqa minasaaqaraa naundura adiafaairana faqa niminau.

<sup>13</sup> Qinee minara irisee maaqi qimasee qimannimidaqa, maasa sia faiqí irirana uqannifiqee maria iriranau qimannimidau, Anutuna maraquna maasa uqaqifiqoo ufana inni qimannimidaqa. Maasa innaarunaindaraa ainainara Anutuna maraquna maroo fasiqa anaaseesa qimannimidaqa mi ufana kai inni qimannimidaqa.

<sup>14</sup> Anutuna maraquna siai fasiqa anaaseesa sia amana Anutuna maraquna faiqí anaasee dadaaqimari afeekana nimimarina sia amana mareefaranoo. Misa mi ainainna qafamaseeqa sia minara iridaqa furufara ainainee qidaqa. Sia mina oosana iridaqa maraquna maree mariasa kai amana mina oosana aiqumummaseeqa irifaranoo.

<sup>15</sup> Maraquna maree maria fasiqanaaseesa innaarunaindaraa ufa aina aiqama raina raina masee irimarifaranoo. Maraquna siaisa kaiqeesa sia amana maraquna faqaasa maree mariana oosana irifaranoo.

<sup>16</sup> Ooqeenaa tamummaqara fasiqa minara maaqi qimasee akara rinau.

Yafee moo fannoo Karaambaiqa iriranakinaana iriannoo fee. Yafee moo fannoo Karaambaiqa aamuaqira ufa amana amiannoo fee, sia amana moo fannoo miqiannoo.

Tamummaqara fasiqa ufara qinee Pauroosa minara maqi qidaqa. Sia moo fannoo amana aamuaqira ufa Anutuna amiannoo mifa nimimarifa marinara. Maasa kai asauku mundirana irirana doo mareeqa.

### 3

#### *Aiqamausa Anutunaindi kai maridaqa.*

<sup>1</sup> Oo Koorinti maqannaasa qini qikaqaafasaa ooqai qinee inni maqusai mariaafanausa, innee sia maraquna faqaasara foora faiqi faiqi irirana-mau fimarufaqa qinee sia maraquna iriramau inni qimannimiqiafana. Inni irirafa maa maqa maaqanasaaqaraa irirafa inniki marinara Yisuna saqarikiranaki innee sia faiqiara foora mariafanoo faiqi aanaaqiara foora aamina mariafanoo.

<sup>2</sup> Innee sia faiqiara foora mariafanoo faiqi aanaaqiuqa irirana fooqaasa marufaqa qinee sia narana uqanna nimiqiafana naammara foora inni nimiqiafana, innee narana uqanna sia amanaikufaqa ninuqiqaafana. Doo maqee aukwana faqa sia amana innee narana naaqaa inoo maridanoo.

<sup>3</sup> Innee maa maqa maaqanasaaqaraasa naanna ree mariasa aqaaida miqimarifanoo, innee nariara nariara rairai qidaqa ufa raine marianan-nai maa maqa maaqanasaaqaraasa naanna ree mariana aaqarafa kooroo idanoo.

<sup>4</sup> Innikiqari Koorinti maqusanaa Yisuna ufara suqimariasakiqari moo fannoo qinee Pauroona aiku asauku marida mina ufamau fida fee qidanoo kafa moo fannoo qinee Apuroosana aiku asauku marida mina ufamau fidee qimasaida aqaaida miqi qimariafanoo sia fee mi oosanafa innikina maqasaaqaraasa naanna ree mariana kooroo idanoo fee. Doo kooroo idanoo.

<sup>5</sup> Apuroosa faqa Pauroosa faqa maaqanda uriqararaqandee maridee sia uriqararaqanda marisa maridaqa. Maaqanda fifau Anutuna ainainira fasiqaqara kai maridaqa, inni rarisameeqee Yisuna saqarikiranaki quqee mariaqanda kai maridaqa. Maaqanda karaambaiqa saika aadu aadu nimimarunnaqanda kai maridaqa.

<sup>6</sup> Qinee Koorinti maqusai inni iriranaki qaqqammara foora aaqasaafananoo Apuroosafa aniree nammariara foora adiasoofanoo Anutufa kambiqarana aminau.

<sup>7</sup> Aaqee mari fasiqafa faqa nammari adiee mari fasiqafa faqa kai fifau maridanoo, Anutufa kambiqarana amufa mifa anoona maridanoo.

<sup>8-9</sup> Aaqee mari fasiqana saika faqa nammari adiee mari fasiqana saika faqa amana amana kai maridanoo. Anutufa naadu naadu nari ainaini marina akiaqara feefauru kasooqaqee nimiannoo. Maaqanda moodaanaki Anutuna ainainiranaki maridaqa ainainidaqa innee afuqa qambaanai Anutuna ainainirafa mariafanoo. Qinee Pauroosa moo ainaina kikiqa usanaura, innee Koorinti maqannaasa Anutuna maaqa mariafanoo.

<sup>10</sup> Anutufa maaqa usakee maria iriranna qini qimusa maridaqa maaqa usakarana akoofasa qinee faakana faqa maaqa atuna faqa arusaunanoo moo fannoo asaanidanoo. Qinee andeeqasee maaqa atuna arusaunanoo moo fannoo sia fifau maaqa asaaniannoo andeeqee mari fasiqafa ireeda amiqimaseenoo kai maaqa asaaniannoo.

<sup>11</sup> Anutufa narí asauku mundirana Yisuna doo moodaa faakana narí maaqaki rakiqeenoo, sia amana moo faakana rakiarafa mariannoo doo mifa kai mariannoo.

<sup>12</sup> Oosana oosana maaqa usakee mariasara foora maridaqa akaqausa amiqimasee faiqí anaasee dadaaqidaqa mapuku nimaqaidaga, akaqausa sia amiqimasee mapuku nimaqaidaga moo fannoo koora fooqaa iranannai maaqa asaanimarifa amiqirafa maaqa asaanimarifa maridanoo, moo fannoo mina oorudupirana siruaannai maaqa asaanimarifa maridanoo. Moo fannoo mina oorudupirana firaa munnimma aqimaria ooninannai asaanimarifa maridanoo. Moo fannoo mina oorudupirana saqarinnai asaanimarifa maridanoo. Moo fannoo mina oorudupirana eefeedannai maaqa asaanimarifa maridanoo. Moo fannoo misa oorudupirafa fjaarunnai maaqa asaanimarifa maridanoo. Inni Koorinti maqanna Yisunara qimannimiqa maaqa atuna rakiqannimaqaannee qiafanausa mariafanoo maaqa asaana imariasara qunnana misa miqooqari innikina ookaamandee maaqa asaanara foora moo faqa moo faqa qidaqa.

<sup>13</sup> Asauku mundirafa qumuaninna aukuannai maaqa asaanira oosana aiqamausa nifusaa kooroo iannoo. Mi faasaannana Anutuna ida fannoo aiqama fasiqa ainainirana qamafinoo kooroo iannoo. Mi idafa aiqamausa ainainirana amanamandainanoo mina anoona kooroo iannoo.

<sup>14</sup> Faiqí moo fannoo maaqa atunasaa ookaamandee usakee marina ida sia gama taikasainanoo Anutufa mina qafamaseenoo mi fasiqanara amiqimandee usakee maqi qimasee feefauru amiannoo.

<sup>15</sup> Faiqí moo fannoo mandainainannai usakee marina, ida gama taikasainanoo sia feefauru amiannoo. Mi fasiqafa mifa kaqisamu innaarunai asumu mariranaki fuannoo maaqakiqari raudamakinoo idauru aanaaqi ainaina sia uqirafa kaqi sandaannoo.

<sup>16</sup> Innee maana iridee sia fee iridee innee Yisuna ufara suqimariasaa Anutuna amaana maqara foora mariafanoo, Anutuna maraquna fannoo narí maaqara foora inniki maridanoo.

<sup>17</sup> Moo fannoo Yisuna ufa suqimarinanaki misa raiqara ufee oosana oosana manda ufa niminaqa raindaanifanoo Anutuna maaqara foora rapee inanoo Anutufa mi fasiqana kuridisaannoo. Anutuna amaana maqa naaquqarafa anukarafa maridanoo innee misa mi maqafa mariafanoo.

<sup>18</sup> Sia moo fannoo narí narí akaru qiannoo. Inniki moo fannoo nariara maqasaa fasiqaki irirana faqasee qimarifa narí maqasaa irirana amoodanoo sia anoona irirana faifa, mi fasiqafa nariara ureeqafinoo reendeenamafinanoo miqoo amana anoona irirana oosana araannoo.

<sup>19</sup> Maqasaa fasiqauqa irirane qimariana Anutufa minara furufara qidammiafoo qidanoo. Ooqeenaa tamummaqara fasiqa minara maaqi qimasee akara rinau.

Anutufa irirana faqaasa qumaree nári firaa iriranaki ufaanakiara foora naridanoo.

<sup>20</sup> Tamummaqarafa moo fannoo minara maaqi qimasee akara rinau. Karaambaiqa firaa irirana faqaasa iriranara fifau ainaina maridanoo fee qidanoo.

<sup>21-23</sup> Innee Koorinti maqannaasa minara irisee sia moo fannoo faiqí irirafa afeekainainara irisee amooqiannoo. Innee Koorinti maqanna Yisuna ufara suqimariasaa kaaqa rakeekaamasee akaqausa Pauroosanaindifee qidaqa akaqausa Apuroosanaindi fee qidaqa akaqausa Peetooroonaindi fee qidaqa aqaaida miqi qimariafanoo. Innee sia misaindi mariafanoo misa innindi maridaqa. Aiqama maa ainainna inni dadaaqi mari ainainausa

maridanoo. Pauroona faqa Apooroosana faqa Peetooroona faqa maa maqa maaqafa faqa kaqi marirana faqa kuqirana faqa maqee mariana faqa naaru marinnana faqa aiqama maa ainainausa inni dadaaqi mari ainainausa maridaqa innee asauku mundiranaindi mariafanoo kafaa asauku mundirafa Anutunaindi maridanoo. Innee minara irisee fifau ammuqundari qidaqa Pauroonaindi fee Apooroosanaindi fee Peetooroonaindi fee qimariafanoo Anutunaindi maridammia.

## 4

### *Pauroofa nariara asauku mundirana ainainira fasiqee qinau.*

<sup>1</sup> Innee Koorinti maqannaasa maasara maaqi qiaqa. Asauku mundirafa Yisufa maasa mina ainainira faiqiuqa Anutuna ooqai kukeeqara anoona ufara rakisiaqee qimaqoosa maridaqa.

<sup>2</sup> Ainaina faqaafa narí ainainasaa rakisi mari fasiqanara akooqoo andeeqara fasiqa kai maraannoo. Narí ainainasaa amiqimasee rakisi marina kai narí ufa irimari faiqina kai mara quqaannoo. (Qinee Pauroosa Anutuna rakisira faiqiara foora maridaqa. Qinee inniki ainainidaqa qeeqa irirana qeeqa uriqararanasaa rusisee inniki ainaini mariqiafana.)

<sup>3</sup> Qinee inniki ainaini marunaqa innee qini ainainirana amanifaqa sia inni qimaniranara irianaufa uriqararafa Anutuna ufa kai irianaufa maqasaa fasiqa moo fannoo iriranannai qini ainainirana amanifaqa qeeqa uriqararana mina ufara kai irianaufa. Qinee qeeqa faqa qeeqa ainainiranara andeeqaida fee sia fee andeeqaida fee qimasee sia qeeqa iriranara irianaufa qini ainainirana andeeqee mari uriqararafa kai mina iriranara kai irianaufa.

<sup>4</sup> Innee qiniara qiafanoo qiaqa daakirafa sia ummaara darifaqa kaqimbidaqa. Qini daakirafa qini darinoo fee sia fee darinoo sia qiniara andeeqara ainainira fee qidanoofofa Karaambaiqa mifa kai qini saikara iridanoo ufa qiannoo.

<sup>5</sup> Innee minara irisee sia maasara kasaqaindari ufa qiaqa. Karaambaiqa innaarunaindari quminna faasaana kai taikara ufa qimannimirafa mariannoo. Mikari karaambaiqa sia ooqai akooqoo mariu irirana kukeeqara irirana oosana oosana irirana minakinaana uqeereeqeenoo aiqamausa nifusaa kooroomannimaqaannoo. Aiqama fasiqa anaasee naundurakinaa oosana auqeeqandannana deedaqirana akooqoo aiqamausa nifusaa mara quqasainaqa qafeefaranoo. Mikari aiqama fasiqa anaasee nári maqasaa andeeqara nirana marirana amana kai Anutuna amooqirana mareefaranoo. Mikari Anutufa maasa saika oosana aiqumumasee minara ufa qiannoo. Maasa mina ufamau fimariafanausa marunannara innee sia ufannai maasa saika kasaqaindari aruaqa.

<sup>6</sup> Oo qini qikaqaafasaa mariasa innee aiqamausa andeeqasee Anutuna akara ufamau fuqee qimasee Apooroosandiri maaqanda kikiqususee qimannimiaqeeera maaqanda qimannimiranara qiaqa. Anutuna ufa inni indaarunnikamma nimaqee mariasara sia moora amiqira fee qimasee moora manda fee qimasee rairaiqiaqa sia miqiaqa.

<sup>7</sup> Inniki akaqausa náriara uriqararausee qimariana unna qimariasariafanoo. Yafee mi uriqararana niminoo fee, Inniki mari ainainna aiqama Anutufa kai niminau. Innee minara iriaqa, naqaa fee qifaqee qeeqa kai maraafanausa firaqoo uriqaraqa maridee qidee. Anutufa kai aiqama ainaina niminau.



<sup>8</sup> Innee Koorinti maqannaasa unna qimasee aiqama ainaina maraafanau-see qimariafanoo, innee inneeqara unna qimasee ainaina faqaasee qimariafanoo, doo innee unna qimasee karaambaiqara foora mariafaqa maasa sia. Innee Koorinti maqannaasa karaambaiqa mariaqaana. Innee kuqaa karaambaiqa marifaqau maasa maqee mandainainaki marunnana taikaseefau inni faqa kuqaa karaambaiqaikiqa marini.

<sup>9</sup> Maasa Yisufa niqiqoo fasiqausa Anutufa ureeqarana nimiqaosammia maqi qimasee qeeqa kai oonu mafi iridaqa nimiqaifaqa maasa minaki maridaqa. Maasa namuqaa nisaukukiara foora marianaqa aiqamausa faiqi faqa qangiroo faqa nifusaa ataasa ataasa qidaqa darifandinausa miqirausa maasa maridaqa.

<sup>10</sup> Maasa niqiqoo fasiqausa asauku mundirana ufasaara furufarirausee qimariafaqa innee Koorinti maqanna Yisuna ufara suqimariasaa asauku mundirana ufakina innee inneeqara irirana faqaasee qimariafanoo. Maasa Yisuna ufa qimannimi marunausa kudoosaapeera foora unaqa innee nimudaanai qidaqa afeeka mariafanoo. Maasa faiqi nifusaa fidiqaa imariasara foora maridaqa innee misa nifusaa uriqararausa mariafanoo.

<sup>11</sup> Maasa Yisufa niqiqoo fasiqausa ooqai faqa maqee marunnana faqa daara raidanoo nammariara sia amanaikidanoo maasa manda qamunna rakeekaa irana afisidaqa, misa maqee maqee unnaanasamu oonisamu saamusamu maasa daridaqa maasa maaqa siaisa kaqi maqusamau faiqafa nidaqa.

<sup>12</sup> Maasa qeeqa kadaapiriranannai tooqaamu dariranana minannai ainainamasee naidaqa. Faiqi maasa diquraraafaqa maasa amiqi amiqimmannimaqaidaqa. Misa mandaikamma qimaqaafaqa maasa kaqi kai mina maraqa fidaqa.

<sup>13</sup> Misa mandufa maasara qiafaqa maasa amiqira ufa kai misa qimannimidaqa. Maasa maa maqa maaqanakinaasa madaapeera foora maridaqa ooqai miqifa aniusa maqee faqa aiqama maqannaasa madaapee aqi maria madikara foora marisa maridaqa.

<sup>14</sup> Qinee Pauroosa inni Koorinti maqusanaasa sia nisaurirana nimiaqeerami ufana qimannimisee akara ridaqa, qeeqa qimuqusa qeeqa faiqi namu mariafaqara foora naamua qidaqa.

<sup>15</sup> Innee asauku mundirana ufamau fidaqa inni ufasa rakisirausa fuki faaki qimariasaa nukudara foora mariafaqa qinee moodaa inni nikausara foora maridaqa. Ooqai indaaru qinee amiqira fasaasa ufa maree aniree inni Koorinti maqanna nimiafanaqa irisee asauku mundirana Yisuna ufamau fimariafaqa miqiafannanara inniqa nikausaikiqa maridaqa.

<sup>16</sup> Qinee minara irisee qeeqa qimuqusa ookiqari reendeenamandee inni qimannimidaqa innee inni nikausa qini daanna raaqa.

<sup>17</sup> Innee qini daanna raanee qimasee Timootina aqiqaananoo innee iannai fuannoo. Maaqanda karaambaiqa ainainiranaki maridaqa mifa qini qimuqusa andeeqara qimaakuara foora maridanoo. Mifa innee iannai oonuree qini fuka marirana asauku mundirana Yisunaki marira oosana qimannimiannoo. Aiqa maqusa maqusa nidaqa Yisuna ufa irimariasaa suqusaida naamuaqimaqaafannana Timootifa mi ufana inni naaqoo auqaannoo.

<sup>18</sup> Innikiqari akaqausa qini Pauroosara sia kafa mai aniree maasa qiqafaannoo qifoo qimasee noori uqeerarausa nimariafanoo.

<sup>19</sup> Karaambaiqa eedoo qinaqa innee iannai oonu nindafaanaura. Oonureeqa innikina noori uqeeree mariasa sia misa nariara firaa ufa qinna-

nara oonu qafaanaura misa auqi maria ainainna kai marinaqa qafaanaura. Anutuna afeeka misaki marinaqa auqemarinnana kai qafaanaura Anutuna afeeka sia misaki mari ifoo qidaqa.

<sup>20</sup> Anutuna innaarunai ququsaki fimariana maa maqanasaa marirana sia fifau ufasaa mundinoo maridanoo Anutuna afeeka dadaaqinoo auqiranasaa mundinoo maridanoo.

<sup>21</sup> Oo Koorinti maqannaasa Yisuna ufa irimariasaa aqemariana inneeqa kai iriaqa, unnaanasamuara foora uqirausee anianauree inniara qimuqusirana faqa reendeenirana faqa miqandee uqirausa anianauree. Inneeqa kai irisee inneeqa marirana andeeqasee mariaqa.

## 5

*Yisuna ufara suqimarunakina mandoosana kambiqanau.*

<sup>1</sup> Oo Koorinti maqannaasa Yisuna ufara suqimariasaa inni ufa moo iriqa firaa manda oosana inniki marifa aamina maqannaasa firaaqoo mandoosana maree mariasa faqa sia maree maria oosana mareenoo inniki Yisuna ufa irimariasaki moo fannoo nari anoona aqoonnana nari akoona anaaqa mareenoo.

<sup>2</sup> Mi ainainafa inniki marifaqa naqi fee mandee noori uqeerasee inneeqa nifaqa amooqidee minara innee nisauruqa, inni naunduraki soofaaraikinoo mariani, mi fasiqana inneeqakinaana naqiraree kaqi maridanoo, innee suqimarianakiqari mi fasiqana aqiqaqa.

<sup>3</sup> Qinee qeeqara qianaura kuqaa qinee moosaa nianai marida qini maraquna inni faqa maridanoo miqoo marifaqa karaambaiqa Yisuna auqusaa doo mandoosana marai fasiqana aqiqaqa ufa qiqa qinee inni faqa maridaqara foora doo aqiqaqa ufa qiqa.

<sup>4-5</sup> Innee moodaanaki suqimarifanoo qini maraquna faqa inni saimbaqa suquannoo, Karaambaiqa Yisuna afeeka miqoo maasa faqa marinaqa innee mi manda fasiqana mareeqee inni suqiranakiqari aqiqaifanoo mi aiqaranannai Sadannana amifanoo mina apata kuridinoo karaambaiqa quminna faasaana mina aundurakinaana kai asumu maraannoo.

<sup>6</sup> Oo Koorinti maqusanaasa innee inneeqara kaaqa andeeqarausee qimasaida inni noori uqeerara oosana sia andeeqanoo maridanoo. Innee maa ooqeenaa ufana iridaqa maaqimminoo maridanoo. Narana moodaa qoo suqu quqasainanoo kaqikaafa moodaa putaa inanoo aiqamafa minasaqaraana putaa iannoo.

<sup>7</sup> Inneeqakinaana mi manda fasiqana maraqusaifanoo aiqama andeeqanoo mariani. Miqoo innee amiqira naranara foora mariaqa. Mi manda fasiqana aiqaranara qidaqa ooqai Mooseena aukuana ainnaaqarara qoomaqa maruna kikiqususee sipsipa aanaaqi Anutuna suqa amisee nariqa ooruku fooqaa ira ainaina nariqa maaqakinaana aiqama doo maraquseeqa ainnaaqarara qoomaqa sakasee neemariqau. Doo maqee maria aukuana asaku mundirana aunirira saqarisaa sipsipa aanaaqiara foora doo kuqa arusee Anutuna amisaafanoo doo maasa mandoosana taikaqiseenoo maasa marirana faqa andeeqa qiseenoo maasa putaira oosana taikaqisaifanoo aidaaqareenoo minara maasa aidaaqarara qoomaqa deedaqinoo marifoo qidaqa.

(Isaraee maqannaasa ooqai ainnaaqarara qoomaki ooruku siai feemu kai neemariqau. Maasa ooruku moo maqee maridanoo misaindi moo marinau.)

<sup>8</sup> Doo maqee maasa ainnaaqarara qoomaqa foora suqufi naannana suqufi ooruku siai feemuara foora naanaura. Naranaki mari oorukufa

manda oosanara faqa faiqí anaasee narí ummuari narí ummuari imariana faqa kikiqusidanoo. Ooruku siai feemu kikiqusimariafa Yisuna ufamau fidaqa nisakadiki ikairi sia marirana faqa anoona ufa qimariana faqa minara qidanoo. Maasa putaaira oosana taikaqisoofaqa maqee amiqira naranara foora putaaira oosana faqa aaqara oosana faqa taikasee nisakadiki ikairi siaisa anoona ufa qimariasana naanna ramafi marianaaura.

<sup>9</sup> Qinee Pauroosa ooqai inni Koorinti maqannaasa Yisuna ufara suqimarusa pasa akara rumannimaqaafannana. Mi pasanaki inniara faiqí anaasee narí ummuari narí ummuari mariasa faqa sia aqoondikamma nimaqararee qimasee misara eerairiaqee qimasee akara rumannimaqaqifana.

<sup>10</sup> Innee akaqausa qini mi ufana irisee aaqaafanoo maqee qinee qiafannufana kafaa kooroo ianaura. Innee Koorinti maqusanaasaki sia Yisuna ufa irimariasana kai maridaqa aaminauqaindi faqa moomoosa maridaqa. Qinee sia inniara aamina fasiqa anaasee narí ummuari narí ummuariqanitaria fasiqa anaaseeuqa faqa kaaqa ainainara rimedia fasiqa anaaseesa faqa unna ufa qimasaida ummuari maria fasiqa anaaseeuqa faqa tumunnai auqi maria afaannara innaaru qimaria fasiqanaaseeuqa faqa sia mi aiqama ainainna maree mariasana eerairiaqee qíqa, innee eerairiani qinnana moomoosa maa maqa maaqanasana marianaara fasauki fee quqoonasana fee ooru atoofafoora.

<sup>11</sup> Sia qinee miqi qiqiafana maaqi qiqiafana. Inniki moo fannoo nariara Yisuna ufa irimarinafa inni nikaqaafasana maridee qinafa faiqí anaasee ummuari mari fee kaaqa ainainara rimari fee tumunnai auqira afaannara innaaru qimari fee mandufa qidanoo faiqí anaasee niqi mari fee nammari namasee furufari mari fee unna qimasaida ummuari mari fee miqira fasiqa aanaaseera Yisuna ufa iri marianaaki maria fasiqa anaaseesana eerairidaqa misa faqa sia ooqu marifi narana naaqa, misasaaqaraafa innisana aqufundoora.

<sup>12-13</sup> Yisuna ufa sia irimariasana aqoosana mariasana sia narira ufa qinee nimmianaaura mi saikafa sia qini saika maridanoo. Anutufa kai misa narira ufa nimiannoo. Inneeqa kai inneeqa nikaqaafasana kimariana Yisuna ufara suqimariasana aaqaifaqa ufa nimirafa innindi mariannoo. Ooqai tamummaqara fasiqa moo fannoo minara maaqi qimasee akara rinau. Inniqa suqiranakiqari mandoosana maree marina aaduma mara quqaqee qidanoo.

Qinee Pauroosa minara inniki mandoosana maree mari fasiqana aqiaqee qidaqa.

## 6

### *Yisuna ufa irimarusa kaqiqee siaasinnai fimariqau.*

<sup>1</sup> Innee Koorinti maqannaasa Yisuna ufa irimariasana inneeqa nikaqaafasana kimariana mara maree kaiqee siaasinnai mara maree fimariafanoo. Inneeqaqiqari aneenna akaqaafasana kimariannana faqa ufa raineenana, Yisunara sia irimarina siaasi finnai sia maree fua, sia uqanna miqiaqa aqaaida miqi mariafanoo. Anutuna ufa irimariasana kai mina andeeqaqana.

<sup>2</sup> Kasooqee Yisuna qumuaninna aukwana maqee mariaqoo Anutuna faiqi namu mi aukwana aiqama maa maqa maaqanakinasana siaasiuqa marifannoo sia fee minara innee iridee. Mi aukwana innee Yisuna ufa irimariasana aiqama maa maqa maaqanasaaqarasana aaqarasana oosana oosana aaqarasana andeeqanniseefannoo, doo maqee inni ufa suqiranaki

aaqarana marasaifaqa aiqama maa maqa maaqanasaaqaraasa andeeqan-nisee fandinausa mariafanoo inneeqa kai amana andeeqefaranoo.

<sup>3</sup> Mi aukuanna maasa siaasa maridaqa qangiroo ufa faqa irianauro, sia fee innee minara iridee. Doo maasa miqidaqa maqee marunna aukuana aaqarana marasaifaqa amana irianauro.

<sup>4</sup> Innee miqi mariana inniki moo mandufa kambiqafinaqa innee mina mareeqee aqoosai mariasa nimifaree.

<sup>5</sup> Nisauruqa, sia fee inni Yisuna ufara suqiranaki moodaa ufa andeeqarana akoofasa maridanoo fee, inniki maridanoo sia fee mi fasiqafa amana ufa rainee mariaqanda ufa andeeqaannoo fee maridanoo amana andeeqannisaannoo.

<sup>6</sup> Innee Yisuna ufara iri mariasa sia andeeqannisee mariafanoo, inneeqa nikaqaafasaa kimariasa mara maree sia Anutuna ufa iriasaki quqee mariafanoo aqaida miqi mariafanoo.

<sup>7</sup> Inniki koota ufa marinaqa kaqi siaasinnai maree fimariafa innee Yisuna ufamau fimariana minasaaqari aikatamaki kaqinni aqufuanara kooroo idanoo. Yisuna ufa irimarifa moo fanoo mandufa aminana kaqi iriaqaana Yisuna ufa moo fannoo irimarifa ani ainaina ummuarinnana kaqi minnisaaqaana.

<sup>8</sup> Inni sia andeeqasee maridaqa kaqi maree mariafanoo narinni narinni aagamannimaqee mariafanoo narinni narinni ainainamma ummuaramasaidaga siaasinnai maree fidaqa, innee kaiqeesa miqimannimaqee marifanoofau mifa faqa aaqarafa marini, inneeqa nikaqaafasaa kimariasa kai miqimannimaqee mariafanoo firaqoo aqaida miqimariafanoo.

*Mandoosana maree mariasa sia uqanna innaarunai fjaranoo.*

<sup>9-10</sup> Anutufa narí ququsaki naaru marirana sia mandoosana maree mariasa nimiannoo sia fee innee minara iridee. Innee sia inneeqa nikaruqimasee mandoosana maraqa nidaqa innaarunai firaree qiaqa. Dapi maraqa nua fasiqa anaaseesa faqa tumunnai auqira afaannara innaaru qimariasa faqa moonna afaaqi anaqa narí ummuari narí ummuari mariasa faqa faiqí anaasee aqoonna fasiqa anaasee aafeeqaidanoo mi oosanna maree mariasa faqa ainaina ummuari mariasa faqa kaaqa ainainara rimariasa faqa nammari namasaida maqee maqee furufari mariasa faqa manda ufa qimariasa faqa unna qimasaida ummuari mariasa faqa mi oosanausa maraqa nuasa faqa sia uqanna Anutuna innaaruna ququsaki keeqefaranoo.

<sup>11</sup> Koorinti maqannaasa innee akaqausa miqi marusa marufanoo inni mi manda ainainafa doo rukanoo maridanoo, nári nifaaqara Anutuna amidee qimariasa mariafanoo. Asauku mundirafa Yisufa maasa karaambaiqa minasaa rusiranannai faqa Anutuna naaquqara andeeqara maraqunannai faqa miqandannai innee Anutuna afusaa andeeqaranaki mariafanoo.

*Inni nifaaqa fannoo Anutuna amooqiranaki andeeqaranaki mariani.*

<sup>12</sup> Moo fannoo nariara maaqi qiannoo qinee amana maridaqa aiqama ainaina mandainainee qimariana faqa amana maraanauro, anee miqi qianaqa qinee minara maaqi qidaqa kuqaa anee aiqama ainaina mareenaranoo moomoo ainaina sia ani dadaaqiannoo ani kuridiannoo. Qinee qiaqa irirafa maaqi qimasee qimmiridaqa qinee akooqoo marida aiqama ainaina amana maraanauree qimmiridaqa qinee minara maaqi qianauro. Moo mandainaina fannoo qini mareeqee narí marinaki quqaqisaifanoo mi maraqunafa daakufuandoora rufiee sia mina maraanauro.

<sup>13</sup> Faiqí moo fannoo anaasee ummuarianeera qimasee mina kikiqa maaqi qimasee usuannoo narana fannoo aranaqumundi maridanoo. Kafaa arana fannoo naranaindi maridanoo. Mi ufana saaqari mifa unna qimasee maaqi qimasee ookaa iannoo, anaasee faiqindi marifaqa kaqi maraanauree qiannoo. Qinee Pauroosa minara maaqi qidaqa Anutufa narana faqa arananda faqa naríndi naríndi quqasoofa kasooqagee miqanda kuridianoo maasa faiqí qifaaqa sia ummuariranaindi maridanoo Karaambaiqaindi andeeqaranaindi maridanoo kafaa karaambaiqa maasa qipatasaa rakisiqimaqeenoo amiqimmaqimaqaidanoo andeeqara marirana nimirifa marinara andeeqara oosana kai maraaqa.

<sup>14</sup> Anutufa narí afeekannai maasa karaambaiqa kuqiranakinaana uqeera quqoofa mifa kai maasa qifaaqa faqa kuqiranakinaana uqeera quqaaninnanara inniqa nifaaqaki andeeqara oosana kai maraaqa.

<sup>15</sup> Inniqa nifaaqa asauku mundirana afaaqa atiuqa maridanoo. Amanee asauku mundirana afaaqa ati mareeqee dapi maraaqa nua aanaaseena afaaqasaa quqaanauree oo sia uqanna amana miqianaaura.

<sup>16</sup> Faiqí moo fannoo narí afaaqa mareenoo dapi maraaqa nua anaasee finnai finanoo mi fasiqana afaaqa fannoo mi anaaseena afaaqandiri moodaanaki atooqafuannoo. Oo innee sia minara irimariafanoo. Ooqeenaa akara minara maaqi qimasee akooqoo qidanoo  
Miqanda moodaa nifaaqaikamambi maruqanda marifaranoo.

<sup>17</sup> Qinee Pauroosa minara maaqi qidaqa moo fannoo karaambaiqasaa apamambi marinafa karaambaiqa amuqusandiri moodaanaki apainoo mariannoo.

<sup>18</sup> Faiqí anaasee narummuari narummuariranara eerairiaqa. Moo fannoo oosana oosana mandainaina marainafa mi manda ainainafa sia narí afaaqa mandaikammamaqaannoo. Faiqí moo fannoo moo anaasee ummuarinoo narí afaaqa uqanna mandaikamma maqaidanoo.

<sup>19</sup> Innee sia fee maanara iridee, innee doo irimariafaqa qimannimidaqa inni nifaaqa Anutuna naaquqara andeeqara maraquna amaana maqa miqirafa maridanoo. Anutufa narí maraquna innikina quqasoofanoo marinara innee inneeqa nifaaqa Anutuna amooqira mariranaki quqasaifanoo mariani. Inni nifaaqa sia innindi maridanoo.

<sup>20</sup> Anutunaindi mariafanoo. Mifa narí amaakunnai firaa feefaurumasee inni marasee nariara quqaqoosa mariafanoo minara innee inniqa nifaaqa Anutuna amooqira mariranaki quqasaifanoo mariani.

## 7

*Faiqí faqa anaasee faqa sia narí minnisee narí minnisee iaqa.*

<sup>1</sup> Innee Koorinti maqannaasa pasa akara rumasee oosana oosana ainaina qiniara iree mariafanoo. Maqee innee akaraki iree maria ufana qinee inniqa qimannimianaaura.

Inneeqa faiqí anaasee nimundaranara qiafaqa maaqi qimannimianaaura. Faiqí nariara adeedaana maridanoo andeeqarafa mariannoo.

<sup>2</sup> Kafaa mina atiki maaqi qianaaura. Faiqí anaasee narí ummuari narí ummuarirafa moomoo marinara aiqama fasiqauqa nári ninaaqa maraaqa, aiqama aanaaseeuqa nári nifaaqmaaka marasee andeeqasee mariaqa.

<sup>3</sup> Afaaqi fannoo narí anaqa aidimarina amiani miqikai inoo anaasee fannoo narí afaaqi aidimarina amiani. Aiqaqara nariara nariara nidimari ainainna narí ami narí ami iaqa.

<sup>4</sup> Anaasee fannoo sia narí afaaqa rakisirafa maridanoo narí afaaqi fannoo mina afaaqasaa rakisidanoo, miqi kai masee faiqí fannoo sia narí afaaqara rakisirafa maridanoo narí anaaga fannoo mina afaaqasaa rakisidanoo minara qinee qidaqa nariara nariara nidimari ainainna narami narami iaqa.

<sup>5</sup> Minara irisee sia innee nariara nariara qaoo qiaqa. Anutunara kisaagasaa amiqimasee innaaru qianne qimasee faiqí faqa anaasee faqa moodaaqooqara ufa qimaseenana naquma amaanee marasee akeeka masee aura masee maraanauree qimaseenana aadu aadu mambinana Anutunara kisaagasaa innaaru qiaqa. Innaaru qimaseenana kafa moodaanaki kiaqa kisaagasaa aadu aadu ina mariannanara Sadannafa nimanamandee qafaina sia afeeka marina eedoo qifoor minara kafa moodaanaki kiaqa.

<sup>6</sup> Faiqí nári ninaaga mararanara faqa anaasee nári nifaaqmaaka mararanara faqa qunnana sia aranaiqi afeekaikamandee qiqa kaqi qimannimidaqa marararee qimaseenana doo maraa.

<sup>7</sup> Qiqa irirafa maaqimminoo maridanoo. Aiqa mausa qini daanna ree adeedaana mariaqaana. Anutufa narí iriranana naadu naadu marirana nimifaqa maridaqa faiqí moo adeedaana marinanee, faiqí moo anaasee faqaafa marinanee Anutufa kai nimidanoo.

<sup>8</sup> Doo maqee maanaaga kumaaraa uruna mariasa faqa faiqí anaasee kuqufuafaqa adeedaana mariasa faqa inni qimannimidaqa innee qini daanna ree adeedaana mariqa amiqirafa marifaranoo.

<sup>9</sup> Innee sia adeedaana amanaikiqa doo amundaaga. Anaaseera faiqiarani aundurái idara foora atakuqinana doo sia amanaikinoo amundarafa idara foora atakuqirana uriqararafa maridanoo.

<sup>10</sup> Qinee nimundarausara naamuaqira ufa qimannimianauro sia qeeqaindifau karaambaigaindi qimannimianauro. Amundara anaasee moo fannoo sia amana narí afaaqi minnisarafa maridanoo.

<sup>11</sup> Minniseenoo adeedaana kai mariani. Adeedaana mari naisia quandaki narí afaaqi kai kaifaa maraannoo. Faiqí faqa miqikai inoo sia narí anaaga minnisaani.

<sup>12</sup> Doo adeedaana ufa qimaseeqa doo akaqausa qimannimianauro, sia karaambaiga ufafau qimannimianauro qeeqa ufa qimannimianauro. Faiqí moo fannoo Yisuna ufa irimarifa mina anaaga sia Yisuna ufa irimarifa maridanoo mi anaaseefa narí afaaqi faqa amiqimasee marinanoo sia mina afaaqi fannoo aqiqaannoo mina faqa mariannoo.

<sup>13</sup> Anaasee moo fannoo Yisuna ufa irimarinafa marinanoo mina afaaqi sia Yisuna ufa irinafa maridanoo kaqi narí anaaga faqa amiqimasee maridanoo mi anaaseefa sia narí afaaqi aqiqaannoo.

<sup>14</sup> Yisuna ufa irimari anaaseefa narí afaaqindiri moodaa fara maqi mafuanara mi anaaseefa narí afaaqi mareeqeenoo Anutuna aqoondikiranaki quqaidanoo miqidanoo. Kafa Yisuna ufa irimari fasiqafa narí aanaaqandiri moodaa fara foora mafuanara narí anaaga sia amaana ufa irimarina maramareenoo Anutuna aqoondikiranaki quqaidanoo miqidanoo. Sia miqinoo marinanoofau miqanda faiqi namu aamina maqannaara foora mariaqini, maqee Anutufa misa faqa aqoondi kiannoo.

<sup>15</sup> Faiqí fee anaasee fee sia Yisuna ufa irinafa narí kai minnisee finafa amana saina fuani, sanda moo fannoo sia inniara sia rakisissimma umaraaqee qidanoo. Anutufa inniara sia kaukaataqiranaki mariaqee qidanoo asoaranaki mariaqera naarameeqee narí ququsaki quqaqifaqa minara qimannimidaqa, saifanoo fuani marinoo mariani.

<sup>16</sup> Yisuna ufa irimari anaaseefa ani afaaqi ani faqa maridanoo mifa faqa innaaruna asumu marirana paquriannoo fee sia fee paquriannoo. Kafaa Yisuna ufa irimari fasiqafa ani anaqa ani faqa maridanoo mifa faqa innaaruna asumu marirana paquriannoo fee sia fee paquriannoo.

*Innee Yisuna ufa iriraree qimasee anukamuqooqari doo minaki kai mariaqa.*

<sup>17</sup> Qinee Pauroosa aiqama maqusa maqusa nidaqa maa ufana Yisuna ufara suqimariasa qimannimidaqa. Innee aiqamausa sia moo saika auqaaqa Karaambaiqa inniara mariaqee inna saikana kai maraaqa, Anutufa inni naarofaqa Yisuna ufa irirara anukamuqoo maroo saikana kai maraaqa sia moo kiaqa mi saikanaki kai mariaqa, sia maqee moo kiaqa.

<sup>18</sup> Yuda maqanna fasiqa fannoo Anutuna ufa irisee Yisufinnai anirainafa sia mini narí Yuda maqannaasa fainanduqirana sia asauruani saina kaqi mariani. Anaamuru fasiqa moo fannoo Yuda maqannaasa fainanduqirana siaifa Anutuna ufa irisee aninafa sia quandaki fainanduquani saina kaqi mariani.

<sup>19</sup> Fainanduqira fee sia fainanduqira fee mina fifau ainaina mariannoo. Anutuna naamuaqira ufamau eedoo qimasee finafa mifa anoona maridanoo.

<sup>20</sup> Aiqama fasiqa Anutufa naarofaqa eedoo qu kamuqoo maru marirafa mifa doo sai kaqi minaki mariani.

(Pauroona aukwana akaqausa faaqu fasiqausa nári ainainirana sia amanaikiqa ainaina faqaana karabusara foora ainaina maisee mariqau. Sia feefauru maree mariqau. Kadaapirumasee narana faqa maaqa faqa kai maree mariqau. Misa nuqu ainainira fasiqee qimariqau. Mi aukwana ainaina faqaasa akaqausa faqa faaqu fasiqauqa faqa Yisuna ufa iriqau. Pauroofa minara irisee maa ufana qimanniminau.)

<sup>21</sup> Anutufa ani aaroo kamuqoo anee moona ainainira fasiqa marunafa saina kaqi maria, sia quqasee moosaa fua kasooqagee idukirafa kambiqainana miqoo kai idukusainana fua.

<sup>22</sup> Faiqí moo fannoo ainainimarinafa marinanoo karaambaiqa aarainanoo mi ainainiranaki kaqi maria Karaambaiqa idukira fasiqara foora mariananoo. Miqikai masee asauku mundirafa idukira fasiqa aaraifanoo kaqi narí ainainiranaki mariani asauku mundirana ainainira fasiqara foora mina ainainiranaki mariananoo.

<sup>23</sup> Innee Yisuna ufa irimariasa Anutufa firaa feefauru aqusee inni maroonara irisee sia moo fasiqa ainainiranakiara foora keeqafinaqa mandosana ufa ameemaanai mariaqa kaqi idukiqa mariara maqi idaqa Anutuna ufamau fuaqanani.

<sup>24</sup> Oo qini qikaqaafasaa innee aiqama Yisuna ufa irirara anukamuqoo marirana minaki kai maridaqa Anutuna aqoondikiranaki maqee maqee mariaqa.

*Kumaaraa maanaqa adeedaana misa nimundaranara qidanoo.*

<sup>25</sup> Doo maqee anaasee siaisa faqa faiqí siaisa faqa qimamianaura. Qinee Karaambaiqa amuqusirana maree marunausa marunnanara qini ufa irisee minasaa munduaqa, sia qinee karaambaiqa ufara inni qimannimidaqa geeqa ufa qimannimidaqa.

<sup>26</sup> Innee Koorinti maqanna Yisuna ufa irimariasa innee maqee aukwana Yisuna ufasaara firaa mandainaina nariranaki mariafaqa minara irisee qimannimidaqa, aiqama fasiqa maqee maria mariranaki kai mariaqa.

<sup>27</sup> Ani anaaga maridanoo fee sia mina minnisaa, anee adeedaana maridanee sia aanaaseera randasee maraa.

<sup>28</sup> Anee anaasee maraseenana sia aaqaananoo. Maanaaga moo fannoo kumaaraa mareenoo sia aaqaannoo. Maqee maria deedeepira aukuaana Yisuna ufasaara faiqí anaasee faqaasa firaa ummaaraki mariafanoo minara irisee innee maqee Koorinti maqusai mari ummaarana sia maraaqee kaqi kasooiqa mariaqee qidaqa.

<sup>29</sup> Oo qini qikaqaafasaa qinee ufa qunnana anoona maaqimminoo maridanoo. Innee Koorinti maqusai ummaaraki marianara moomoo faasaana sia kaqi marifaranoo sia moomoo kari Anutuna ainainiranaki marifaranoo. Innee minara irisee anaasee faqaasa adeedaanara foora mariaqa kaqi kai ainainamamaree fuaqa.

<sup>30</sup> Innee iki raqee mariasa sia iki raqera maqi iaqa kaqi kai Anutuna ainainirana ainainiqa fuaqa. Innee naanaindara qimariasa sia naanaindara qidara maqi mariaqa kaqi kai Anutuna ainainirana ainainiqa fuaqa. Innee ainaina feefauri mariasa faqa sia anindiara foora mariani.

<sup>31</sup> Innee maqasaa ainaina feefauru nimisaida ainaina maree mariasa sia kaaqa minara afeekaikiqa, mana mana imariasara foora mariaqa. Maa maqa maaqafa maaqoo marinafa sia kisaagasaa mariannoo. Qusasaa taikaannoo.

<sup>32</sup> Innee ummaara siaisa mariaqera qimannimidaqa. Anaasee siaifa karaambaiqa ainainiranara kai irimaree fidanoo karaambaiqa eedoo qiranara kai irinoo fidanoo.

<sup>33-34</sup> Anaasee faqaafa maa maqanasaaqaraa ainainara kai irimaree fidanoo maqee maqee narí aanaaqara aidimari iriramau fidanoo, qaara irirana faqaafa maqasaaqaraa irirana faqa Karaambaiqa irirana faqa minaki maridanoo. Adeedaana aanaaseeuqa faqa maanaaqauqa faqa karaambaiqa saikara kai irimaree fidaqa. Misa nári naundura faqa nifaaqara faqa karaambaiqaindi fee kai qimasee karaambaiqa saikara kai iridaqa. Faiqifaqaa anaasee fannoo narí afaaqi aidimari iriramau fidanoo maqasaa ainainara kai iridanoo.

<sup>35</sup> Sia qinee sandannaifau inni rumbaidau. Maa manda deedeepa aukuaanara iridaqa. Inni dadaaqiraree qidaqa maa ufana qidaqa. Qinee inniara andeeqara aatata ufamau fuaqera kai qidaqa naakapaidaqa. Innee sia kaqikaana raina quqaqera muduka uqanna karaambaiqa saikaki mariaqera qimannimidaqa.

<sup>36</sup> Kumaaraa maanaaga utaaqaraqanda nimundaranara qaoo qimasee mi kumaaraafa kafa quandakinoo aanaaseera aidirafa afeekaikifanoo mi kumaaraafa doo maraanauree qimaseenoo doo amana maraannoo sia aqaaidanoofau miqidanoo.

<sup>37</sup> Faiqí moo fannoo Yisuna ufasaara nariranara irisee miqinafa sia moo fannoo qaoo qinoo kai narí uqanna sia qini utaaqa maqimaqarana maraanauree qinafa mina irirafa kuqaa afeekaikinafa narí aundurakiqari amiqimmandee qaoo qinafa sia mi manaaqana maraannoo andeeqaidanoo miqiannoo.

<sup>38</sup> Kumaaraa narí utaaqamamaqara manaaqana marainafa andeeqaidanoo miqiannoo. Moo kumaaraa fannoo mina narí utaaqamamaqara manaaqana sia marararee qifa mifa firaqoomma uriqareenoo.

<sup>39</sup> Anaaseeuqa nári nifaaqmaaka faqa kaqi marianara sia oonuree aniree iqanuqa. Nári nifaaqmaaka kuqufuafaqa miqoo nári nidimari fasiqana amana mareefara. Moodaa ainaina kai mariannoo, Yisuna ufa irimarinna anaaseefa Yisuna ufa irinnana kai maraannoo.



<sup>40</sup> Mi anaaseefa kaqi adeedaana maridanoo aufadaranaki mariannoo. Qinee mi ufana qunnana qeeqaindi qeeqa irirana maaqi qidaqa Anutuna maraƣuna fannoo dadaaqidanoo fee qidaqa.

## 8

*Unna tumunnai auqira afaannara dufi dufi qimasee narana aandaura qidanoo.*

<sup>1</sup> Innee Koorinti maqusanaa Yisuna ufara suqimariasa unnaqira afaanna naranara irafaqa inni minara qimannimianauro.

(Inni maqannaasa Yisuna ufa sia irimariasa misa tumunnai auqira afaanna amaana maqaki aandauro arusee suqasee unnaqira afaanna amaana maqaki qoomaqa naida tumunnai auqira afaannara dufi dufi qimasee animma amidaqee qimasee nári neemariafaqa innee akaqausa misa dadaaqidaqa mi oosannara qini iree mariafanoo. Innee Yisuna ufa irimariasa akaqausaki náriara maasa aaqaidaqa miqira aandauro naida fee qimari-afanoo, mi aandauro maasa daundurakinaana kuridiandoo qimasaidaqa qimiridaqa naida fee qimariafanoo. Akaqausa náriara maasa irirana faqaasa noori uqeerasee fifau tumunnai auqira afaanna marifaqa kaqi naanauree qimariafanoo.)

Qinee Pauroosa minara kuqaa fee qidaqa moo irirana minasaa ookaaidaqa maaqi qidaqa. Miqira irirafa narí aidirafa narí aundurái umbiqafinara oori uqeeraidanoo nasuridanoo narí kai narí kurididanoo. Moo irirafa amiqirafa maaqi qidanoo. Faiqí nariara nariara amuqusira irirafa mi irirafa sia kurididanoo faiqí anaasee nifeeqareenoo pooduqai-afanoo anoonaikidanoo.

<sup>2</sup> Moo fannoo nariara aiqama ainainara irimarunauree qimarifa sia anoonaikira irirana irimarifanoo Anutufa mi iriranara akooqaidanoo.

<sup>3</sup> Faiqí anaasee moo fannoo Anutunara aidimarifanoo Anutufa amiqimmandee misara iridanoo aididanoo.

<sup>4</sup> Yisuna ufa sia irimariasa tumunnai auqira afaannara innauro qimasee aandauro narana neemariafaqa innee Yisuna ufa irimariasa mi naranna naanara irafaqa qinee Pauroosa minara maaqi qidaqa. Tumunnai auqira afaanna oosana innisaimbaqa iridaqa mifa sia mari ainainna kikiqusirafa maridanoo fifau ainaina kai maridanoo. Maasa moodaa Anutufa marinara minara kai amiqimmandee iridaqa.

<sup>5</sup> Maa maqa maaqanaki faqa innaurunai faqa moomoo oosana oosana afaannee qimariafa maridanoo. Mi afaanausa misa uriqararaura faqa Karaambaiqauqa faqa unna qimasee maridammiafoo qidaqa.

<sup>6-7</sup> Sia maasa misauqara iridaqa maasa Yisuna ufa irimariasa Anutufa aiqamausa nikoofa moodaa kai marifaqee qidaqa, aiqama ainaina auququqoo fee qidaqa maasa mi Anutuna ainainammaisaranara maridaqa. Sia moo karaambaiqa maridanoo maasa karaambaiqa, asauku mundirafa Yisufa mifa kai marifaqee qidaqa. Minannai Anutufa sia maru ainainanna aiqama ainaina auququqoo maridanoo, maasa minasaaqarara mariranasaa maridaqa. Minara maasa aiqama narana amana naanura. Kaqi narana faqa fifau afaanna aandauro faqa aiqamaqara namasee mina neemariafa sia aaqarafa maridanoo. Moo ainaina aaqarafa maaqimminoo maridanoo. Aiqama Yisuna ufa irimariasa sia maa qunnanara iridaqa. Akaqausa ooqaindari sia Yisunara iru aukuanaindari mi fifau afaanna amaana maqanaki maqee maqee keeqafiqa narana namasee mi narannara mi afaannaindi fee qimariqau, kafa maqee faqa Yisuna ufa iridaqa sia

afaannara innaaru qidaqa kaqi keeqafi namasaidaqa unna qimasaida afaanna marifaqee qimasaidaqa kaqi mi narannara Anutuna namuqaandi fee qimasee boo Anutuna namuqaa aqoondikidaqa aaqaidee qimasaidaqa nári maraquna nári naakirafa ummaara nimifaqa maasa daunduraki putaairana qimifaqee qidaqa.

<sup>8</sup> Qinee Pauroosa minara maaqi qidaqa. Sia fifau narana fannoo maasa mareeqee Anutuna aqoondikiannoo. Maasa sia neeqa sia Anutuna oorudupianaura kaqi neeqa sia ooraqaqaraanaura. Narana fifau ainaina maridanoo maasa iridaqa.

<sup>9</sup> Innee afaanna amaana maqakinaa naranara mana mana imariasa minara eerairiaqa. Mi narannara akaqausa rufiee mariasa irirana oorudupimariasa ani mana mana iranasaqari arufarindamaki mandainainaki aqufifaara.

<sup>10</sup> Anee irirana afeeka faqaafa tumunnai auqira afaanna amaana maqaki keeqafi mana mana mandee narana nainanoo ani akaqaafasaa moo fannoo irirana amannaikimarifa fukasaa Yisuna ufa irimarifa ani qafamaseenoo afaanna amaana maqaki keeqafi narana nainanoo mina aundurakinaana akamummasainanoo mi fifau afaanna finnai kaifaa minni ubeekeno aqoondikiandoora.

<sup>11</sup> Oorudupimasee iri mari fasiqafa afaanna naranara rufiee mari fasiqafa maridanoo. Mi fasiqafa afaanna narana mana mana mamaree neemaria fasiqausa oosana qafamaseenoo narí faqa namaseenoo minasaa arufarindamaki kuridiranaki aqufidanoo. Fifau kuridiranaki aqufuannoo asauku mundirafa minara faqa kuqufammi.

<sup>12</sup> Innee mana mana irirana faqaasa inneeqa nikaqaafasaa oorudupira irirana arimariafanoo, miqi marianannai inneeqa nikaqaafasaa mandaikamma nimaqaidaqa, miqianannai asauku mundirana faqa mandaikammamaqee mariafanoo.

<sup>13</sup> Qinee Pauroosa minara maaqi qidaqa qinee afaannara dufi dufi qira narana aandau namasaanoo qini qikaqaafasaa qini qiqafeenoo minasaaqaraana mandainainaki aqufinaqa qinee naaru naaru sia uqanna afaanna aandau naanaura qini qikaqaafasaa sia aqufuaniffee qimasee sia naanaura.

## 9

### *Pauroofa narí kadaapisaaqaraa narana kai neemarinau.*

<sup>1</sup> Qinee Pauroosa kuqaa Yisufa diqiqoo fasiqausa maridaqa kuqaa qinee Yisuna maasa karaambaiqa qafaafanausa maridaqa qinee sia moona karabusaki maridaqa qinee qeeqa iriranannoo maa saikana maridaqa. Qinee Karaambaiqa saika inniki maraafannana mina anoona innee Yisuna ufa uqeeraafanoo.

<sup>2</sup> Akaqausa qini Pauroosara sia Yisufa aqiqoo fasiqafee qimariafaqa innee Koorinti maqusanaasa sia qiniara miqi qimariafanoo. Innee Karaambaiqa ufa irisee mi mau fimariafanoo mifa kai Yisufa qini diqiqoonara kooroidanoo.

<sup>3</sup> Faiqí anaasee akaqausa qini saikoosanara diqiafaqa maaqi qimasee qeeqasaa ititaidaqa misa qimannimidaqa.

<sup>4</sup> Qinee Yisuna ufa maqusa maqusa oonuree aniree idaqa Yisunara qimannimimarunnana akiaqara mi maqannaasa narana nammari kaqi qimifanoofau andeeqarafa mariqini.

<sup>5-6</sup> Yisuna niqiqoo fasiqausa Yisuna akaqaafasaa ufa faqa Peetooroona faqa nári ninaaqmaaka Yisuna ufa irimaria anaaseeuqa nindiamaree

misa faqa maqusa maqusa nidaqa. Yisuna ufa qimannimiafaqa neeqa kaqi narana nimiafaqa naidaqa. Qini Pauroosa miqifau andeeqaraqoo marini, sia miqidaqa Baranabasisandiri maaqanda kai fee ainainamma-saida naidee. Maaqanda qeeqa ainainammasaida feefauru marasaidaqa naidaqa Yisuna ufa qimannimiqanidaqa.

<sup>7</sup> Sundia moo fannoo fee ammi fee rakiranaki fidaqa ainainamandaida naidee sia fee. Sia uqanna miqidaqa. Uainna qaqamma ummaqimari fasiqafa narí naaree diqisee namaseenoo inaaqianna moosa nimidanoo. Sipsipasaa rakisimarifa narí kadaapiriranasaa mina naamma anoona naidanoo. Doo qinee faqa maqusa maqusa nidaqa Yisunara qimannimimarunnana narana nammari kaqi qimifanoofau qeeqa kadaapi akiaqara nani, sia miqidaqa.

<sup>8</sup> Sia qinee faiqí faiqí ufamau kai fidaqa Yisuna ufa qimannimimarunnana akiaqara narana narara qimannimidaqa.

<sup>9</sup> Mooseena sandufa miqinoo marifaqa qidaqa. Mifa maaqi qimasee akara rinoo maridanoo.

Inneeqa sakuma maqusasaa teeqimasee burimakau mareeqee miqoo quqa-saifanoo burimakau fannoo oonuree aniree idanoo aikunnai rafarimarinaqa sia mina oori arooriaqa, sia mina oori rumbaaqa, saifanoo akaqana naidanoo rafariani.

Qinee Pauroosa minara maaqi qidaqa. Anutufa burimakaura kai fee iridanoo fee miqi qinau, maasara faqee miqi qinau.

<sup>10</sup> Oo sia misarau miqi qinau, maasara irinoo miqi qinau. Ummaqimarifa faqa aiqi marifa faqa minakinaana nararee qidanoo ainainidanoo.

<sup>11</sup> Baranabasisandiri inni Koorinti maqusanaasa naunduraki innaarunaindaraa asumu ummaqusaafananoo kambiqaidanoo. Sia fee maqee mi kadaapirirana akiaqara maqasaa narana kaqi qimifaqee naanauree.

<sup>12</sup> Akaqausa inniki kaqikaqoo kadaapiri maruna akiaqara kaqi narana nimiafaqa naidaqa, maasa fiqaramasee inniki kadaapiri marunnana akiaqara inni narana marasee naunaiqini sia kaqi marasee naidaqa. Anutufa amanammifoo qifaqa maasa sia miqidaqa. Asauku mundirana Yisuna amiqira fasaasa ufa inni naundurai sia keeqaandoo qimasee daara rarana faqa kadaapirirana faqa oosana oosana saika auqee marunannara faqa qimannimiqiafana.

<sup>13</sup> Anutuna firaa amaana maqa Yeerusaree maqusa marinaki ainaini mariasa misa minakinaana nariqa narana maraidaqa. Faiqí anaasee sipsipa arusee aandau tatufu Anutuna amaana maqaki amimariana minaki ainainimariasa aanaiqiki mariasa náriara akaqana marasee naidaqa innee minara amiqimasee irimariafanoo.

<sup>14</sup> Karaambaiqa Yisufa miqi kai masee narí ufa qimannimi mariasara qimannimiqa fidaqa misakinaana narana marasee naaqee qinau.

<sup>15</sup> Mi andeeqara oosanafa marifaqa qinee sia miqiqa maa pasana akara runnana innee narana sia kaqi qimiaqee qidaqa akara rumannimaqaidaqa. Akaqausa qini maa ufanara fifau dapi ufammifoo qifoora sia inni narana marasee kaqi naanaura kuqiranaki fuanaura, qeeqa kadaapinnoo feefaurirafa amana. Miqi marifaqa Anutuna ufamau fiqaramasee funnanara qeeqa qimooqidaqa. Sia moo fannoo mi ainainniannanara qimooqirana aruannoo. Ainainamaseeqa feefaurumasee naanaura.

<sup>16</sup> Kuqaa qinee Pauroosa Yisuna amiqira fasaasa ufa oonuree aniree idaqa qimannimi marunausa maridaqa, sia miqiannanara qeeqa qimooqi-

daqa qeeqa duqu uqeeraanaura. Yisufa qimaqimunara miqidaqa. Sia miqianaqau mandainaina qambaana mariaqini.

<sup>17</sup> Qinee qeeqa kai qimannimira saika mareefau feefauruara qunaiqini. Anutufa daakapainara ainainidaqa mina akiaqara sia feefauruara innaaru qidaqa qimira saika marifaqa kaqi maraيداqa.

<sup>18</sup> Qeeqa saika akiaqara nana feefauru fee maraidee, Anutufa amana kadaapi akiaqara narana marasee naannee qifaqa qinee sia miqidaqa amiqira fasaasa ufa sia feefauruara irisee kaqi didifaqa qimannimunafa mifa qini feefaurirafa maridanoo. Kaqi qimamidaqa qeeqa andeeqara kadaapirirana akiaqara sia maraيدا kaqi qimannimira asasirafa mifa qini amiqira feefauru maridanoo.

<sup>19</sup> Qinee sia moo fasiqa ainaini marunausara foora maridaqa kaqi fasiqara foora maridaqa Yisufinnai moomoosa aniaqeera aiqamausa ainainira faiqi kammambi maridaqa.

<sup>20</sup> Qinee Yuda maqannaasaki Mooseena sandufa ameemaanai mariasaki ainainidaqa misa naanna ramafi misa marirana maraيداqa. Qinee sia Mooseena sandufa ameemaanai maridaqa, misa sandufa ameemaanai mariasa moomoosa Yisuna ufara aniaqeera qinee faqa mina ameemaanai maridara foora naaraidaqa.

<sup>21</sup> Miqi kai iqa aanaamuruki ainainidaqa aanaamuru moomoosa Yisuna ufara aniaqeera aanaamuara foora Yuda maqannaasa sandufara nianasaa tatiqa maridaqa qimannimidaqa. Miqunnanannai sia Anutuna sandufa rukiaida miqidaqa. Qinee asauku mundirana sandufa ameemaanai qinee kuqaa maridaqa.

<sup>22</sup> Qinee Yisuna ufara sia andeeqasee saqariki mariasaki ainainidaqa misa faqa moomoosa aniaqee qimasee misa naanna ramafi maridaqa. Qinee oosana oosana qaini qaini qiranannai faiqi anaasee maraane qimasee aiqama fasiqa anaasee naanna ramafiqa misa naaraidaqa.

<sup>23</sup> Qinee maa ainainniranaki maridaqa moomoo oosana oosana ummaara kaqi maraيداqa qinee faqa innee faqa mi amiqira fasaasa ufanasaqaraa naundurakina adiafaairana maraannanara miqidaqa.

<sup>24</sup> Inni maqusai Koorinti maqusai faiqi moomoosa suqufiqa nari amani nari amani sandeemariana maqee maqee kambiqee marifaqa qafeemari-afanoo. Sandee mariasaki moomoo sandaيداqa moodaa fannoo kai uri-naaqareenoo qafee maraيدanoo. Innee faqa misa naanna ramasee Yisuna aatata sandee fidaqa uriqarara qafee marararee qimasee sandaqa.

<sup>25</sup> Aiqaama sandee maria fasiqausa ooqaindari amanidaqa kaqiqoo afeekaikamandee mariiqa sandara aukuana anirainaqa kaqi sandeefaranoo. Misa sia mi kadaapiriranara iridaqa, uriqarara qafeeroo kai qimasaida kaqiqoo afeekaikamasee nimanida sandaيداqa. Misa dauni afauqagee mari qafeenara kisaagasaa kadaapiridaqa. Maasa misa naanna ramasee kisaagasaa kadaapiridaqa, sia afauqagee mari qafeenaranoofau idau miqidau, naaru naaru marira qafeeroo qidaqa kadaapiridaqa andeeqaidaqa.

<sup>26</sup> Minara iriseeqa sandeeqa taikee aniaqoo andeeqasee fidaqa. Qinee bookseena akoofasa fasiqara foora sia fifau faafau qisauku aqidaqa andeeqasee kai qisauku aqiara foora idaqa.

<sup>27</sup> Qeeqa qifaaqa qini ufa amiqimmandee iriaqeera firaqoo qeeqa qifaaqa dariara foora idaqa, qeeqa qimudaani faasasaa afeekaikidaqa. Qinee aiqamausa naaramasee aniree bookseenara foora amaniaqee qimaseeqa qeeqa faqa amianee qimasee oorudupiananoo Anutufa manda saikam-miaanoo qimasee diqiqaandoo qimasaidaqa faasasaa afeekaikidaqa.

## 10

### *Tumunnai auqira afaanna iriranara aaquqirafa.*

<sup>1</sup> Oo Koorinti maqusanaasa qini qikaqaafasaa uqa oqai Mooseefa Isipa maqusaindari maasa Yuda maqannaasa qikeeku qikaaku nifiqee nári maaqai fiqau. Qinee minara qimannimiana. Misa Isipa maqusaindari sandeemarufanoo namuqaa nári maaqi qimasee Anutufa qufanoo qoonnamu fannoo misa ninaaqiannai aiqamausa ititafufaqa amiqimasee aniree Taatuqee nammari taqamareeqa fiqau.

<sup>2</sup> Mi qoonnamunaki faqa mi nammarina Taatuqee nammari taqoonara amaana nammari kikiqusidanoo faqa Mooseefa mi nammarinaki misa aiqama ukuqnamaseenoo uqeeraseenoora foora masoofaqa aiqamausa Mooseenaindi kammambiqau.

<sup>3-4</sup> (Misa miqooqari kaasau maqa maaqaki fimarufanoo Anutufa aiqama kananaana kananaana narana maqasaa quqasoofaqa marasaidaqa neemariqau. Nammariara nidufanoo Anutufa Mooseenara qufanoo oonikiqari nammari qumufaqa naqau.) Qinee Pauroosa minara maaqi qidaqa. Misa aiqamausa innaarunaindaraana moodaa feemu naqau, aiqamausa innaarunaindaraa nammari moodaa naqau. Mi nammarifa innaarunaindaraa oonikiqariara foora qumimarufaqa naqau. Mi oonifa asauku mundirafa misa faqa kukeeqasee nimarufa marinau.

<sup>5</sup> Misa miqiga fidaqa sia minara irirai moomoosa uqanna mandoosana marasoofanoo Anutufa qufaqa misa kuqufanoo misa iri fannoo mi aadana maqa maaqanaki furufaramminau.

<sup>6-7</sup> Mi aiqama ainainausa maasa aaquqimaqimaqarafa maridanoo, maasa faqa mina irisee sia misa naanna raanaura, sia manda nidi mari ainainnara randaanauranoo sia misa naanna reeqa tumunnai auqira afaannara faqa innaaru qiana. Mooseena akara minara maaqi qimasee qidanoo. Faiqi anaasee oqumari fi narana neeneese nammari moomoo neeneese mandidi raanauree qimasee findi fiqa idi ree mariqau.

<sup>8</sup> Qinee Pauroosa miqunara qimannimiana maasa sia misa naanna ramasee faiqi anaasee nari ummuara nari ummuarianaura. Misa miqimarunara moodaa faasaana (tuenti tiri tauseena) nukudara foora teeqiqau moomoosa uqanna raurukaqau.

<sup>9</sup> Maasa sia misa naanna reeqa karaambaiqa amanamandee qafaanauranoo. Misa akaqausa miqimarunara sakani fannoo narimarufaqa kuqimariqau.

<sup>10</sup> Innee sia misa naanna reeqa Anutunara ninunuruqa. Misa miqi marunara kuqira qangiroo fannoo aniree moomoo narinau.

<sup>11</sup> Mi aiqama ainainausa akaqausa aaquqima nimaqaaqeeera misasaa kambiqanau. Maasa maqee mariasa aaquqimaqimaqaaqeeera Anutufa qumee dadaaqufaqa miqooqaraafa moo fannoo akararinau. Maasa taikara aukwana adeedi rainaqa marinara aaqaranara rufiaaqeeera aaquqidaqa.

<sup>12</sup> Faiqi moo fannoo nariara qeeqa afeekaikiranannai kikiqiga maridee qinafa rufiaa, anee Isaraee maqannaasa naanna ramasee aqufinafaara.

<sup>13</sup> Aiqama nimanirafa innisaa aqufinafa aiqama maqannaaki maqee maqee kambiqee mari ainainafa maridanoo. Anutufa minara iridanoo nari dadaaqira ufara kai iriannoo. Iridanoo firaa nimanirafa anireenoo inni urinaaqareenoo rafaqaqinafa anirainanoo Anutufa afeeka nimaqaaqeeera innee amana mi nimariranaki mari inaqa mina uriaaqaree faranoo. Anutufa ititaseenoo fimariaana uqafiqainana fi ruiqakinana finnananoo.

14 Oo qifaaqasaa qini qiçoondiuga tumunnai auqira afaannara in-naaruqiranara nianasaa rufiaaqa.

15 Innee Koorinti maqusanaasa ooqeenaasa irirana faqaasa mariafanoo. Inneeqa kai qini ufa irisee oonumafi rainasee iriaqa.

16 Maasa aafaqa naidaqa kaafakinaa nammariara Anutunara dufi dufi qimasaidaqa mi kaafanakinaana naidaqa asauku mundirana fidika naida fee qimasaidaqa maasa kaqikaa feemu faqa ruqi ruqimasee naidaqa maasa asauku mundirana amaqi naida qimifaqa naidee qidaqa mi feemuna naidaqa.

17 Moodaa feemu kai marina maasa moomoosa ruqi ruqimasee neemari-ianara moodaara foora maridaqa.

18 Qeeburu maqannaasa moo nuqu Isaraee maqannaasa nariqa aandau tatufira oosanara iriaqa. Faiqi anaasee moo fannoo aandau maramaree Anutuna aanaiqiki maru fasiqana amisoofanoo aandau tatufinoo nariara akaqana marasee neemarufanoo aandau akoofa nari aiku asauku faqa muduka nanau. Misa qiqau, maasa Anutuna tatufira qaindasaa qaraana naida qimifaqa naidaqa mina faqa moodaanaki maridee qimariqau.

19 Doo qini ufa oosana naqi fee inoo maridanoo fee doo maqee mi ufana koorooianaura. Inni maqusanaasa narana maraseeqa tumunnai auqira afaanna amidee qimasee tatufimariafanoo. Mi tumunannai auqimaria afaannana amana sia anoonau kaqi fifau tumu kai maridanoo. Mi narana tatufirafa faqa sia anoonau, kaqi narana kai maridanoo.

20 Sia Yisunara irimaria fasiqauqa mi fifau naranna marasee sia Anutu-nau amisee dufi dufi qidau, afaannauqa nimisee dufi dufi qidaqa miqidaqa. Innee Yisuna ufa irimariasa afaanna naida nimimaria naranara innee sia mina naaqeera qidaqa qikooqaidanoo.

21 Innee karaambaiqa aafaqa naidaqa Yisuna kaafakinaana nammari namasee sia amana quandakina afaannauqa kaafakinaa nammari neefaranoo, innee Yisuna aafaqa naidaqa karaambaiqa qaindasaaqaraa feemu namasee sia quandaki afaannauqa qaindasaaqaraa feemu neefaranoo.

22 Innee Yisuna aafaqa namasee quandaki afaannauqa aafaqa nama-saifanoo karaambaiqa Yisuna qafamaseenoo rairaiqiannoo. Innee Yisufa inniara rairaiqianiffee qimasaida fata fata idee miqidee, innee maasara karaambaiqa uraaqaraidee qida fee miqidee, sia amana karaambaiqa uriqareefaranoo firaa nariranaki aqufifoora.

23 Akaqausa minara maaqi qidaqa. Maasa amana aiqama oosana amiqirana faqa mandaikirana faqa minauqa maraanauree qiafaqa qinee Pauroosa minara maaqi qidaqa. Kuqaa aiqama nana ainaina amana maraanaura, sia aiqama ainaina amiqirafa maridanoo. Akaqausa maaqi qidaqa aiqama oosana amana maasa maraanauree qiafaqa qinee minara aiqama oosana sia faiqi anaasee dadaaqimaria oosanafa marifanoo fee qidaqa akaqana kuridirafa maridanoo.

24 Sia moo fannoo nari aidi mari ainainna nari iriranaki uriqaranoo mariani aqoonausa nidimari ainaina kai nari iriranaki uriqaranoo mariani.

25 Innee Koorinti maqusanaasa aandau maree makeetai fimariana akaqaandau arusee aukusee tumunnai auqira afaannara dufi dufi qimasee makeetaki quqasaafaqa feefauridaqa. Akaqaandau kaqi arusee auku quqasaafa feefauridaqa. Innee Yisuna ufa irimariasa makeetaki keeqafi inneeqa aandau marararee qimasee oonuree sia tumunnai auqira afaan-nara dufi dufi qinnanara iramasee eerairiaqa kaqi mana mana maraaqa.

Aninna karaambaiqa saqarikiananoo aninna aakirafa marina sia minara irisee eerairiaqa, kaqi maraaqa.

<sup>26</sup> Ooqeenaa tamummaqara fasiqauqa akara minara maaqi qinoo maridanoo.

Maa maqa maaqafa faqa minaki aiqama ainaina marifa faqa karaambaiqaindi kai maridanoo.

<sup>27</sup> Qinee Pauroosa minara aiqama ainaina kaqi naaqee qidaqa. Inni Koorinti maqusanaasaki Yisunara sia irimariasa moomoo maridaqa. Misakiqari moo fannoo aniara mai aniree qini faqa narana naannee qinana aidinana kaqi mina faqa oonuree mina faqa narana naa. Anee mi naranna aandauna naaneera aneenna aakiranara kaqi kaaqoo oonumafi irinana sia eerairia kaqi naa.

<sup>28</sup> Anee mi naranna naanee qinanoo moo fasiqa fannoo qimaminoo tumunnai auqira afaanara dufi dufi qira narana maridanoo qinana anee ani qimami fasiqana aakiranara irisee sia naa.

<sup>29</sup> Sia aninna aakiranarau qidau ani qimami fasiqana aakiranara qidaqa. Innikiqari moo fannoo maa qunnufana irisee maaqi qiannoo, nanaree qinee moonaa aakiranara iriananoo fee mifa qini ititaqimaqaannoo fee.

<sup>30</sup> Doo qinee qeeqa naranara Anutunara dufi dufi qimaseeqa nanaree moo fannoo aniree qini narana aandauna qaoo qiannoo fee.

<sup>31</sup> Qinee Pauroosa minara maaqi qidaqa Innee narana nammari aiqama ainaina neemarianara sia fee naanauree, naanauree, nana ainaina innaree, Anutuna amooqira ufa kambiqee marimau kai fuaqa.

<sup>32</sup> Inni marirafa kaqi mana manifaqa nindafamaseeqa Yuda maqannaasee aanaamuru fee Yisuna ufa iri mariasee inni niqafamasee noori runifaara. Innee minara irisee mi oosannara eerairiaqa.

<sup>33</sup> Innee qini daanna raaqa sia qinee qeeqa didirana qeeqa qifaaqa amiqi amiqiranara iridaqa aiqamausara iriseeqa misa nidiranamau fidaqa, aiqamausa innaaruna asumu maraaqeera miqidaqa.

## 11

*Amaana maqaki keeqee maru anaaseesa nikiaqa rumbarausa keeqee maria ufana.*

<sup>1</sup> Qinee asauku mundirana Yisuna aanna raidaqa innee miqikai iqa qini daanna raaqa.

<sup>2</sup> Oo Koorinti maqannaasa innee qiniara maqee maqee irisee Yisuna ufa irimariasa sandufa qinee qimamifanna ufamau fimarianara inni nimooqidaqa.

<sup>3</sup> Qinee maa moodaa ainainnara kai inniara iriaqeera qimannimidaqa, aiqama fasiqa nari ninaaqmaaka urinaaqararausa maridaqa kafa asauku mundirafa aiqama fasiqa urinaaqararafa maridanoo. Anutufa asauku mundirana uraaqararafa maridanoo.

(Pauroofa nari maqanna anaasee oosanara qimaqoofa sia maasaki maridanoo. Anaaseeuqa nariqa andeeqara oosana marasee nari nifaaqmaaka nimeemaanai oorudupi mambunara kooroo ianifeera qamunnannai nikiaqa rumbarausa amaana maqaki keeqee mariqau. Sia nikiaqa rumbasaidaga keeqee marusa nisaurirana mara nimimariqau. Ummuari mari anaaseena paqurimasee asaurirana maraanifee qimasaida akiqa maqa namufaqa indufu aqimariqau.)

<sup>4</sup> Qinee Pauroosa faiqi nari anaqa uraaqararanara irisee maaqi qidaqa. Faiqi moo fannoo akiqa rumbarafa amaana maqaki keeqafi aiqamausa

nifusaa innaaru qina fee Anutuna ufa qimannimina fee asauku mundirana asaurirana amiannoo.

<sup>5</sup> Anaasee moo fannoo amaana maqaki keeqafi Anutuna ufa qimanniminnoo fee innaaru qiannoo fee akiaqa sia rumberafa mi anaaseefa narí afaaqi asaurirana amidanoo ummuari mari anaaseena amanakai maridanoo, akiaqa maqa faqa indufira anaasee amana amana kai maridaqa. Saina akiaqa qamunnannoo rumbasee amaana maqaki keeqafinoo innaaru qiannoo fee Anutuna ufafee qimannimiannoo fee, andeeqanoo mariani.

<sup>6</sup> Anaasee moo fannoo sia akiaqa rumberafa amaana maqaki keeqaina see munusee akiaqa maqa faqa indufu aqusaa. Anaasee akiaqa maqa faqa indufirafa asaurinoo akiaqa qamunannai rumberafa amaana maqaki sia asaurirainni kaqi keeqaannoo.

<sup>8</sup> Indaaru Anutufa sia aanaaseesaa qaraana faiqí auqinau, faiqisaaqaraana anaasee auqinau.

<sup>9</sup> Anutufa sia anaasee dadaaqianifee qimasee faiqí auqinau, faiqiarara iriseenoo anaasee auqinau.

<sup>7</sup> Faiqí Anutuna amana faqa Anutuna areenarafa faqa minaki marifa marinara sia akiqa rumberafa amaana maqaki keeqaannoo. Anaasee faiqí areenarafa minaki marifa marinara akiqa rumberafa mariani.

<sup>10</sup> Qangirooma maasa qiqafaidammiaafoo qimasee nári nifaaqmaaka ureeqarusa marianara koorooianifeera nikiyaqa rumbera anaasee amaana maqaki keeqaqa.

<sup>11</sup> Maasa karaambaiqa ufamau fidaqa maa irirafa kai mariani, anaasee nariara aadumai marianinafa fifau mariani, faiqí miqikai masee aadumai marianinafa fifau mariani.

<sup>12-15</sup> Indaaru anaasee faiqisaaqari kambiqanau miqikai inoo miqooqari faiqí fannoo aanaaseeki qari kai kambiqaidanoo doo mi aiqama ainainaqanda Anutunaki qari kai kambiqanoo maridanoo. Faiqí fannoo akiqa asausi kisaqa marinaqa faiqí anaasee narí kai nariara nariara irisee mandainainee qimasee nisaurifaranoo. Anaasee kisaqa akiaqa asausifaqaanara sia miqidaqa amiqirane qidaqa mi anaaseefa minara firaqoo nasuridanoo. Anutufa anaasee kisaqa akiaqa asausi inni nikiyaqa paranna rafaqafuanifeera niminau. Inneeqa kai iriyaqa, anaasee sia akiaqa rumbera anaasee fannoo aiqamausa nifusaa amaana maqaki innaaru qirafa andeeqaidanoo fee sia fee andeeqaidanoo. Sia andeeqaidanoo. Innee minara irimariafanoo.

<sup>16</sup> Faiqí moo fannoo yafee ufa rainaani qimasainaqa maa ufana kai qimamianaura, maasa maaqooqaraasa faqa Anutuna ufara maqusa maqusa suqimariasaa faqa mi ufamau kai fidaqa sia moo oosana maraidaqa.

*Karaambaiqa aafaqa neemaria naamuaqirafa.*

<sup>17</sup> Innee Koorinti maqusanaasa Anutuna ufara suqidaqa sia amiqimandee suqimariafanoo mandainaina kai kambiqaidanoo, minara maa ufana sia nimooqidafau qimannimidaqau.

<sup>18</sup> Innee Anutuna ufara suqidaqa raina rainidaqa aanoqimariafaqa qi-maqimiafaqa qinee iriya akaqanara kuqaa fee qidaqa. [<sup>19</sup> Aaqarusa faqa andeeqarusa faqa moodaanaki marifanoo kuqaa rainarafa kambiqaanoo. Miqimasainanoo aqee mariasa faqa andeeqarusa faqa kooroo ifaranoo.]

(Pauroona akara rumannimu aukuaana Yisuna ufa irimarusa sia maqee maasa imarunandee aafaqa neemariqau, misa nári ainainirana taikasee



eendaki aafaqa nararee qimasee nári narana deedaqammamaree mara maree moodaa maqaki mini quqasee qoomaqa sakasee namasee inaaqianna feemu marasee ruqi ruqi masee uainna nammari misa maqee maqee neemaru nammarina namufaqa innaaru qimasee namasee fifaini mariqau. Faiqi anaasee oosana oosana suqiqau. Ainaina faqaasa faqa kudi fasiqa faqa oosana oosana ainaini mariasa faqa nariqa ainainirana taikasee eendaki aniree moodaanaki suqiqau. Akaqausa furufara maseeqa narana moomoo namataikasoonara ninnaaqiana anusa naararanau. Akaqausa uainna nammari moomoo neeneesee sipakiqa furufariqau, Pauroofa minara iriseenoo maaqi qimasee akara rumannimaqanau.)

<sup>20</sup> Innee Koorinti maqannaasa Karaambaiqa qoomaqa suqufi naani qimasee innee sia kuqaa suqufi mina nararee qimaseefau aniafanoofau furufaridaqa naidaqa moosaindi faqa neemariafanoo.

<sup>21</sup> Akaqausa nári maree ania naranna sia naida nimidaqa nariqa kai naafaqa akaqausa naarara maridaqa, akaqausa uainna nammari moomoo naida furufarida. Miqiafanoo mi qoomaqaafa sia karaambaiqaindi maridanoo.

<sup>22</sup> Innee maaqa siasee maqee maqee neemaria narana nammarina sia minaki naidee, innee Anutuna ufara suqimariasa fidiqaamma nimaqaidee miqidee, innee nara ainaina siaisa nisaurirana nimianee fee qidee miqidee. Innee minara irisee qiniara nana ufee qimaqimiannoo fee qidee. Abee nimoofee qianauree. Oo sia uqanna nimooqianauree.

<sup>23-24</sup> Ooqai qinee karaambaiqa ufa irisee qimannimiafanna sandufana maqee faqa kafa qimannimiafanna, karaambaiqa Yisufa Yudasifa ueeqoo eendanaki feemu asaukunnai qumareenoo Anutunara dufi dufi qimaseenoo, ruqi ruqi maseenoo maaqi qimasee narí faiqi namu qimannimianau. Maa feemufa qini qimaqi kikiqa usinoo maridanoo innimma kuqiranaki quqannimaqaanauree. Qinee kuquannanara aunifoora oonumafi iridaqa feemu maqee maqee naqafuaqa.

<sup>25</sup> Misa mi feemuna namaseeqa kaifaa miqoo narana namasoofanoo Yisufa uainna maru kaafana nariqa maqee maqee neemaru nammarina qumareenoo maaqi qimasee qimannimianau. Maa kaafanaki mari uainna qini fidika kikuqusinoo maridanoo. Anutufa maqasaa fasiqa anaaseera qini faqa moodaanaki kira ufa marifanoo qini fidika fannoo mi ufana mapukira fidika maridanoo. Innee mina naqa fidaqa qiniara irisaidaqa naqa fuaqa. Yisuna ufa miqiminoo marifaqa qinee Pauroosa minara maaqi qianauree.

<sup>26</sup> Maa maqee kamuqoo Karaambaiqa sia kafa qumi mari kamuqoo innee mina yakamuqoo fee maa feemuna faqa maa uainnana faqa naqa fidaqa innee Karaambaiqa kuqiranara kooroo idaqa.

<sup>27</sup> Qinee minara irisee maaqi qidaqa faiqi moo fannoo mina oosana furufarira fasiqa fannoo Karaambaiqa feemu fee mina kaafakinaa uainna fee furufara mandee namaseenoo karaambaiqa amaqi faqa fidika faqa mara maree furufara mamaqaidanoo naannoo.

<sup>28</sup> Aiqama fasiqa anaasee nariqa kai nári naundura marirana irirana aiqumqummasee oonumafi irirana iriseeqa feemu faqa kaafakinaa uainna faqa naqa.

<sup>29</sup> Karaambaiqa afaqa oosana sia irimarifa kaqi fifau feemu faqa uainna faqa neemarifa Anutufa aruaninna ufana narí naidanoo narí afaaqai mafi quqaidanoo.

<sup>30</sup> Innee Koorinti maqannaasa miqianara moomoosa aurimariafanoo kudoosaapee mariafanoo akaqausa doo kuqiqa maridaqa.

<sup>31</sup> Maasa indaaruu qeeqa daundura marirana qimanammandee andee-gasee naananoo faw sia Anutuna darira ufa ameemaanai marunaiqini.

<sup>32</sup> Maa maqanasaaraqaraasa Yisuna ufa sia irimariasaa kuridiranaki fidaqa maasa misa faqa fuanoora maqee kamuqoo karaambaiqa niuqummasee naridanoo.

<sup>33</sup> Qini qikaqaafasaa uqa maa ufana iriseeqa karaambaiqa qoomaqa naani qimaseeqa qinaaqiana aninausara nifeesamasai faqa aniraifaqa doo moodaa kari oonuree naaqa.

<sup>34</sup> Moo fannoo aararainafa aneenna maaqaki oonu namasee ania. Miqimandee moodaanaki keeqafifanoo Anutuna narira ufa fannoo sia innisaa mariani. Doo qina kai qimannimiqa qinee innee iannai fiqa akaqa ufa qimaqimuna andeeqaanura.

## 12

*Anutuna naaquqara andeeqara maraquna oosana oosana dadaaqiranara qimannimidanoo.*

<sup>1</sup> Doo maqee qinee Anutuna naaquqara andeeqara maraquna nimimari ainainnara qimannimiana nura. Qini qikaqaafasaa uqa qinee minara anoona ufa iriaqee qidaqa qimannimidaqa.

<sup>2</sup> Ooqai innee aamina maru kamuqoo manda fasiqa fannoo inni rarisameeqee sia ufa qimaru tumunannai auqira afaannunnai ubeekee marufaqa mina ufa ameemaanai fimariqau.

<sup>3</sup> Doo maqee innee maanara irimariafanoo Anutuna maraquna fannoo rakisimari fasiqafa sia amana Yisuna aqurarara ufa amiannoo kafaa mina dinni kai Yisufa karaambaiqa maridanoo fee qimariasaa Anutuna naaquqara andeeqara maraquna fannoo misa dadaaqinara miqi qidaqa.

<sup>4</sup> Oosana oosana innaarunaindaraa ainaina faiqi anaasee dadaaqiani-feera nimirafa marifanoo moodaa maraquna fannoo kai aiqama mi aiqama ainainna maqasaa fasiqa anaasee nimidanoo.

<sup>5</sup> Maasa Anutuna ainainirafa oosana oosana ainainirafa maridanoo moodaa karaambaiqa ainainammidaqa.

<sup>6</sup> Anutuna ufara suqimariasaa dadaaqirafa oosana oosana maridanoo moodaa Anutufa kai aiqama aadu aadu akoofasaikirana faiqi anaasee nimifaqa minannai quandaki nari dadaaqi nari dadaaqiaqeera.

<sup>7</sup> Anutufa Yisuna ufa irimariasaki aiqama fasiqa anaasee naadu naadu nari maraquna koorooianifee afeekana nimufaqa quandaki minannai nari dadaaqi nari dadaaqiaqeera nimidanoo.

<sup>8</sup> Anutuna maraquna fannoo moo fasiqa irirana faqaana ufa qimannimimarina amidanoo kafaa mi maraqunafa moo fasiqa aiqama ainainara irirana amidanoo.

<sup>9</sup> Mi moodaa maraqunafa kai Yisuna mandaaqarana moo fasiqa amidanoo, moo fasiqa mi maraqunafa faiqi anaasee aurirana taikannisara afeeka amidanoo.

<sup>10</sup> Anutuna maraquna fannoo faiqi sia amana auquaqa ira ainaina afeeka moo fasiqa amifanoo mi fasiqafa afeeka ainaina auqaidanoo, moo fasiqa Anutuna afeeka amifanoo Anutuna ufa afeekaikamandee qimannimidanoo. Mi maraqunafa moo fasiqa afeeka amifanoo maraquna nimimariasaa faqa moo unna qira maraquna nimimarina faqa mi fasiqafa kai rainasee nindafaidanoo. Mi maraqunafa moo fasiqa afeeka amifanoo aanaamura ufakiqari sia nari iri maru ufanakiqari amaana maqaki ufa qimannimidanoo. Mi maraqunafa kai faiqi moo afeekaikamma amifanoo

aanaamura ufakiqari narí sia iri mari ufanakiqari faiqí anaasee qiman-nimisaifanoo moo fasiqa fannoo sia mi ufana oosana irirainni maraƣuna fannoo kai mina qimamifanoo mifa indee kai idanoo mina oosana qiman-nimidanoo.

<sup>11</sup> Mi oosana oosana ainainna nimirifa moodaa maraƣuna kai maridanoo. Mifa narí kai narí aidiramau raina raina mandaída aadu aadu dadaaqira akoofasaikirana nimidanoo.

*Maasa Yisuna atiki marunausara qidanoo.*

<sup>12</sup> Asauku mundirana afaaƣa moodaara foora maridanoo mina atiuƣa moomoo maridaƣa afaaƣa sia rainanoo maridanoo moodaa maridanoo.

<sup>13</sup> Miqikai masee maasa aiƣama Yuda maƣannaasa faƣa aanaamuru moomoo maƣannaa mariasa faƣa karabusaki ainainimariasa faƣa iduki mariasa faƣa maasa aiƣama moodaa maraƣunannai nammari marasee moomoo atiuƣa moodaana apataika kai iƣa mariasa Yisuna apata marifanoo Anutufa moodaa maraƣuna nammariara foora nimifaƣa naunnana miqidaƣa.

<sup>14</sup> Faiqí moo adaka sia muduka maridanoo moomoo afaaƣa ootupanoo maridanoo.

<sup>15</sup> Mi fasiƣana aiku fannoo qinoo sia qinee asauku mariaƣaana minara qinee sia maa fasiƣana afaaƣau maridau. Qinee Pauroosa minara maaqi qíƣa kuƣaa aiku fannoo sia asauku kinoo sia mi ufana qinnanannai moona afaaƣaikianau kaqi mi fasiƣana afaaƣa mariannoo.

<sup>16</sup> Mi fasiƣana aaqoo fannoo qinoo qinee sia maa fasiƣana afu marunnana sia mina afaaƣau maridau. Qinee Pauroosa minara maaqi qidaƣa kaqi mi aaqoofa sia afukinoo sia mi ufana qinnanannai moona afaaƣai kiannoo kaqi mi fasiƣana afaaƣa mariannoo, sia sia miqiannoo.

<sup>17</sup> Mi fasiƣana aiƣama afaaƣa afu kai marinanoofau naqi fee mandee ufa iriannoo fee. Mina afaaƣa aaqoo kai marinanoofau naqi fee mandee udiraannoo fee.

<sup>18</sup> Anutufa kai narí iriseenoo narí aidiranannai faiqí afaaƣa aiƣama ainaina afaaƣa quƣaqoofa maridanoo.

<sup>19</sup> Aiƣama ainaina moodaa ainaina kai marinanoofau sia faiqí afaaƣa marini.

<sup>20</sup> Doo miqinoo moomoo afaaƣa atiuƣa moodaa afaaƣara foora ootupanoo maridanoo.

<sup>21</sup> Faiqí afaaƣaindaraa afu fannoo sia amana asaukuara anee fua sia qini dadaaqi marianna ainainafa mariananoo, sia qiannoo. Kafaa akiƣa fannoo sia aikuara anee fua sia qini dadaaqi marianna ainainafa mariananoo. Sia miqi qiannoo.

<sup>22</sup> Maasa qeeƣa qifaaƣa ati dauni nidafidanoo ummooƣuki mari atiuƣara fifau ainainee qiananoo sia marinaƣa naqi fee ianauree.

<sup>23</sup> Maasa qeeƣa qifaaƣa atiuƣa ureeƣara atiuƣee qimariana maasa misasaa firaqoo amiqimmandee misasaa rakisidaƣa. Nifu qafaafaƣa nisaurimaria atiuƣa maasa amiqimmandee rakisidaƣa ƣamunnannai ititaidaƣa.

<sup>24</sup> Nifu qafaafanoo nidi mari atisa sia amiqimmandee ititaidaƣa kai akooƣoo maridanoo. Anutufa kai narí iriranannai maasa qifaaƣasaa atiuƣa maaqimasee ootupanau, Ureeƣara atiuƣa uriƣarara rakisirana maraane qimasee ootupanau.

<sup>25</sup> Miqi marianara sia maasa qifaaƣa rainarafa maridanoo aiƣama aadu aadu qifaaƣa ati fannoo nariara nariara amanamana kai amuƣusidanoo narinni narinni rakisidanoo.

<sup>26</sup> Moodaa qifaaqa ati didafifanoo aiqama qifaaqa didafidanoo, kafaa mina dinni moodaa qifaaqa amooqifanoo aiqama qifaaqa asacidanoo.

<sup>27</sup> Qinee Pauroosa inni Koorinti maqannaara qidaqa innee Yisuna ufara suqimariasa aiqama asauku mundirana afaaqara foora mariafaqa aiqama mina afaaqasaa afaaq fannoo narí amaaqa narí amaaqaki kai mariafanoo.

<sup>28</sup> Innee Yisuna ufa iridaqa nuasa suqiranaki Anutufa miqikai inoo inni faiqí anaasee mareeqeenoo maaqimmasee quqannisoofoqa mariafanoo. Anutufa Yisufa niqiqoo fasiqausa inniki uriqarararsaikinuu, miqooqari misa ureeqararsa Anutuna ufa faiqí anaasee maqusa maqusa qimannimimarusa faqa inniki quqanau. Doo misa ureeqararsa ufasaa rakisirarsa maqusaki qimannimimarusa Anutufa inniki quqanau. Kafaa miqooqari faiqí anaasee oosana oosana ainainirarsa quqanau.

Akaqausa faiqí sia amana auqaaqaa ira ainaina auqimariasa quqanau.

Akaqausa aurirarsa andeeqee marusa quqanau.

Akaqausa faiqí anaasee narí dadaaqi narí dadaaqi marusa quqanau.

Akaqausa ufa suqirarsasaa amiqimmandee rakisirarsa quqanau.

Akaqausa aanaamuru ufakiqari narí sia irimaru ufanakiqari Yisuna ufa suqiranaki qimannimimarusa Anutufa quqanau.

<sup>29</sup> Innikiqari sia aiqamausa Yisufa niqiqoo fasiqausa mariafanoo, sia aiqamausa maqusa maqusa qimannimiqanusa maridaqa. Sia aiqamausa maqusai naamuaqira ufa qimannimimariasa maridaqa. Sia aiqamausa faiqí sia amana auqaaqaa ira ainaina auqimariasa maridaqa.

<sup>30</sup> Sia aiqamausa aurirana taikanniseemaria fasiqausa maridaqa. Sia aiqamausa aanaamuru ufakiqari nári sia irimaria ufanakiqari qimannimimariasa maridaqa. Mi anaamuru ufanakiqari nári sia irimariafanoo maraquna afeeka fannoo dadaaqifaqa mi ufana oosana sia aiqamausa irimariana kooroo ifaranoo.

<sup>31</sup> Innee inneeqa irirana Anutuna afeekannai narí nimira afeeka oosana oosana faqa akoofasaikirana oosana oosana faqa misauqakinaana uriqararana kai ummarararee qimasee afeekaikiaqa. Doo qinee mi firaa uriqarara oosana uqanna maaqoo kooroo ianaura.

## 13

### *Nariara nariara nimuqusira oosanara qidanoo.*

<sup>1</sup> Mi firaaqoo uriqarara oosana koorooirafa maaqimminoo maridanoo, faiqí anaasee aiqamausa nariara nariara uriqarara ainainee qimasee misara nimuqusirafa mifa mina maridanoo. Qinee qeeqa Anutuna maraquna afeekannai aanaamuru moomoo maqanna ufakiqari sia iria maria ufanakiqari faqa qangiroo ufakiqari faqa Yisuna ufara suqiranaki qimannimunanoo qeeqa qimuqusaki faiqí aanaaseera uriqarara ainainee qimasee misara nimuqusirafa sia marifaqa qeeqa kai qeeqa firaa ufatia fifau kammee kammee qidaqa.

<sup>2</sup> Anutuna maraquna fannoo oosana oosana afeeka qiminaqa qinee qeeqa kai Anutuna ufa amiqimasee qimannimianaqee qinee aiqama ainainara irisee aiqama kukeeqara ainainara irisee fee, qinee qeeqa Yisuna saqarikirafa afeeka marinaqee aaqana moo mafi moosaa quqaanauree, mi aiqama ainaina afeekafa qiqa daundurái afeekaikifanoo faiqí aanaaseera uriqarara ainainee qimasee misara qimuqusirafa sia marifaqa qinee sia maridara foora maridaqa.

<sup>3</sup> Qinee qeeqa aiqama ainainatia mareeqee ainaina siaisa kaqi nimiqee qeeqa qifaaqa faqa mareeqee idaki aquanauree miqidaqa faiqí aanaaseera

uriqarara ainainee qimasee misara qimuqusirafa sia qini daundurari mari-faqa mi ainainaqanda sia qini dadaaqianara miqidaqa.

<sup>4</sup> Faiqí aanaaseera uriqarara ainainee qimasee misara qimuqusirana qinee Pauroosa kooroo ianaura. Faiqí aanaaseera nimuqusirafa maaqim-minoo mariannoo, reendeenamandee ubiqafi misa ufa irirafa mariannoo, fifimmasee faiqí aanaaseera qimannimirafa mariannoo. Faiqí aanaaseera nimuqusirafa sia rairaiqirafa mariannoo, sia nariara oori uqeerasee mariannoo, sia narí amooqirafa mariannoo.

<sup>5</sup> Faiqí aanaaseera nimuqusirafa sia adi namufaqa marifa maridanoo sia nariara kai irimarifa maridanoo, sia dauni kaukaatufa qimarifa maridanoo, sia akaqausa mandaikammamaqaanara irimaree fimarifa maridanoo.

<sup>6</sup> Faiqí aanaaseera nimuqusirafa sia mandoosanara asaidanoo kuqaa anoona ufa qiranara asaidanoo.

<sup>7</sup> Faiqí aanaaseera nimuqusirafa sia minnisee finanoo akooqaidanoo, misa mina mandaikamma maqaafanoo kaqi kai irisee minni saidanoo, faiqí aanaaseera amiqira irirana irimaree fimarinafa faqa aqaainausakiara sia misara taikkee maqi qirafa faqa oosana oosana ainaina amiafanoo reendeenamambi ubiqafi kaqi mi manda oosanna fee amiqira oosana fee kaqi mara maree fimarifanoo amuqusirafa miqiminoo maridanoo.

<sup>8</sup> Faiqí aanaaseera nimuqusirafa naaru naaru marira ainaina maridanoo sia taikarafa maridanoo. Maqee kamuqoo Anutuna maraquna akaqausa naakifaqa amiqimasee qimannimirafa maqee maridanoo ufaasu ainaina kai maridanoo. Akaqausa sia nári irimaria ufana qimannimirafa maridanoo mifa faqa taikaannoo, amiqira irirafa maridanoo marinoo aiqaraanoo.

<sup>9</sup> Anutufa maqee qimimari irirafa faqa qimimarifaqa faiqí anaasee qimannimira ufa faqa maqee atisaa maridanoo.

<sup>10</sup> Kasooqagee Yisufa qumira aukwana firaafa anirainanoo maqee atisaa marirafa taikafuannoo.

<sup>11</sup> Qinee Pauroosa faiqí aanaaqi mariafanna kamuqoo qini ufa faqa qini didirafa faqa qini irirafa faqa faiqí aanaaqindi marinau, maqee faiqí kammambunanoo faiqí aanaaqi irirafa doo taikafinoo. Yisufa qumuaninna aukwana miqikai iannoo.

<sup>12</sup> (Pauroofa maru aukwana manda tanuka kai marinau. Mi manda tanukana kikiqusidanoo maa ufana qinau.) Maasa tanukaki qeeqa doori qafaidaqa sia amiqimmandee qeeqa qimana qafaidaqa. Maasa maqee qafee marunafa miqirana ati kai qafaidaqa, Yisufa quminna aukwana maasa mina faqa narí oori narí oori andeeqasee qafaanaura. Maqee marunna irirafa ati kai maridanoo, Yisufa quminna aukwana maasa irirafa anoona mariannoo. Miqoo maasa irirafa Anutufa maasara amiqimasee irindee kai inoo anoona irirafa maasaki faqa mariannoo.

<sup>13</sup> Doo maqee kamuqoo maa qaaramoo ainainna kai maridanoo. Yisunasaa irirana rusirana faqa naaru kambiqaaninnanara asasamandee afeesirana faqa faiqí aanaaseera faqa Anutunara faqa uriqarara ainainee qimasee misara nimuqusirana miñamufa kai maqee kamuqoo kaqi maridaqa misakiqari nimuqusirafa kai uriqararafa maridanoo.

## 14

*Kafaa amiqimmasee Anutuna maraquna dadaaqiranara qidanoo.*

<sup>1</sup> Faiqí aanaaseera nimuqusirafa uriqararafa maridanoo fee qidaqa minara inni Koorinti maqannaasa qimannimidaqa, Innee minara irisee

faiqí aanaaseera nimuqusirafa maraanauree qimaseeqa mina mararara kai kadaapiruaqa. Anutuna maraƣuna nimi mari afeeka oosana oosana faqa akoofasaikirana oosana oosana faqa, minauqa faqa innee inneeqa irirana ummarararee qimasee afeekaikiaqa. Miqidaqa faiqí anaasee Anutuna ufa qimannimira afeeka minara uriqarara fee qimasee firaqoo randasee maraqa.

<sup>2</sup> Faiqí moo fannoo narí sia irinna aanaamurusa ufakiqari qimannimimarifa sia faiqifau qimannimidanoofau Anutuna faqa ufa qidanoo. Faiqí sia mina ufa iridaqa moosa ufa marifaqa. Mifa Anutuna maraƣuna afeekannai kukeeqara anoona ufa qidanoo.

<sup>3</sup> Faiqí moo fannoo Anutuna maraƣuna fannoo dadaaqifanoo Anutuna ufa narí ufakiqari qimannimifanoo nimuqusaki mandaikisa mina ufa iriafanoo dadaaqirana faqa pooduqarana faqa amiqi amiqirana faqa maraídaqa.

<sup>4</sup> Moosa ufakiqari narí sia iri maria ufanakiqari qimannimimari fasiqafa narí kai narí dadaaqidanoo, Anutuna ufa nári ufakiqari qimannimimarifa aiqama Yisuna ufara suqimariasa dadaaqidanoo uqeraidanoo.

<sup>5</sup> Qinee inniara aanaamuru ufakiqari sia irianakiqari aiqamausa minakiqari ufa qiaqee qidaqa. Mi oosanna uriqararafa maaqimminoo maridanoo Anutuna ufa nári ufakiqari qimannimirafa Anutuna maraƣuna nimirifa qinee inniara minara firaqoo qiaqee qidaqa ridaqa. Anutuna ufa nári ufakiqari qimannimimarifa uriqararafa maridanoo, aanaamuru ufakiqari sia iria ufanakiqari qimarifa ureeqarafa maridanoo, mi moo ufanakiqari qimarinnana faiqí moo fannoo aniree nári ufakiqari mi ufana qimanniminanoo andeeqasee irifanoo amana mariannoo miqimasee Yisuna ufara suqimariasa dadaaqirana mareefaranoo.

<sup>6</sup> Oo qini qikaqaafasaa kasooqagee innee iannai oonureeqa aanaamuru ufakiqari qimannimisee naqimandee dadaaqianauree. Sia dadaaqirafa mariannoo. Anutuna maraƣuna fannoo aamuqaira ufa qimannimira fee, qimannimiranee, irira ufa fee Anutuna maraƣuna dadaaqira ufa qimannira fee naamuqaira ufa fee nári ufakiqari qimannimianaqa aiqamausa dadaaqirana mareefaranoo. Moosa ufakiqari sia dadaaqirana mareefaranoo.

<sup>7</sup> Fifau sia kasi mari ainainna ufireena faqa kookaanuru faqa piripunna faqa marifaqa sia minauqakiqari amiqimmandee fuaqaidaga minakiqari idi sia amiqimmandee fuaqafanoo idirainna fasiqa anaaseesa naqi fee mandee irifaree, sia irifara.

<sup>8</sup> Rakira karaambaiqa fannoo sia amiqimandee kaanina uqeraifaqa naqimandee rakirana aiqamausa uqereefaree, sia uqeeree faranoo.

<sup>9</sup> Innee miqikai iqa maraƣuna fannoo naakinaqa aanaamuru ufakiqari sia irianakiqari ufa qifaqa naqimasee ani ufa oosana irifaree sia uqanna irifaranoo. Ani ufa fannoo fifau ufaira foora uqidanoo.

<sup>10</sup> Maa maqa maaqanakina moomoosa ufa maridanoo aiqamausakina misa ufa anoona maridanoo.

<sup>11</sup> Anaamuru moo fannoo findifi nári ufakiqari qini qimaqimifaqa qinee siamma irianaara. Qinee mi fasiqanara aanaamuru fee qiana mifa qiniara aanaamuru fee qiannoo.

<sup>12</sup> Innee Koorinti maqannaasa kaaqa Anutuna maraƣuna fannoo nimirimari afeekanara kai firaqoo rimariasa mariafanoo. Mi afeeka iriranakiqari maanara kai afeekaikiaqa. Yisuna ufara suqimariasa misara dadaaqiqa firaqoo uqeeree maria ainainnara kai nidinaqa uqeraaqeera qidaqa.

<sup>13</sup> Faiqí moo fannoo maraqunannai aanaamuru ufakiqari qimannimidanoo narí faqa faiqí anaasee faqa sia irifanoo kafaa Anutunara innaaru qinanoo moo afeeka aminanoo sia irimaria ufanakiqari qimarina anoona irisee quandasee koorommasee kafaa nári ufakiqari qimanniminaqa doo iriaqeera.

<sup>14</sup> Maraquna fannoo dadaaqinaqa sia iria ufanakiqari innaaru qiananoo qini qimana fannoo kai kuqaa innaaru qiannoo qiqa irirafa sia innaaru qiannoo.

<sup>15</sup> Qinee minara naqi fee qianauree qinee maaqimmianauro, qinee qeeqa qimana faqa qeeqa iriranannai faqa innaaru qianauro. Qinee Anutunara idi raidaqa qeeqa qimanannai faqa qeeqa iriranannai faqa Anutunara idi raanauro.

<sup>16</sup> Innee Yisuna ufara suqimariasaa suqimarifanoo moo fannoo Anutuna maraquna fannoo aakinanoo narí amana fannoo kai aanaamuru ufakiqari innaaru qinanoo moo kaqiqee fasiqa fannoo ani marida iridanoo naqimasee mifa iriseenoo Anutunara mifa faqa eedoo qiannoo fee. Mifa sia uqanna amana ani ufa oosanara iriannoo.

<sup>17</sup> Ani Anutunara dufi dufi qira ufa amiqimmasee qinanoo moo fasiqa fannoo sia amiqimasee irinanoo ani ufa fannoo sia mina dadaaqiannoo.

<sup>18</sup> Qinee Pauroosa maanara Anutunara dufi dufi qidaqa, qinee firaqqoo moomoo kari inni fiqaramasee aanaamuru ufakiqari daadumai maridaqa innaaru qidaqa.

<sup>19</sup> Yisuna ufara suqimariasaki suqidaqa qinee sia miqidaqa. Misaki maridaqa nári ufakiqari misa naamuqaqanee qidaqa moodaannai qisauku ufa kai amana kai qusa qimannimiranara dididanoo. Moosa ufakiqari misa sia iri maria ufanakiqari kisaqaqasaa qimannimianaqa sia irifooraa qikooqaidanoo.

<sup>20</sup> Oo qini qikaqaafasaa sia inni irirafa faiqi aanaaqi iriranara foora mariani, faiqí firaasa iriranara foora mariani. Oosana oosana mandainainara minara kai inni irirafa faiqi aanaaqindiara foora nisakadiki qikairi siaisa mariaqa.

<sup>21</sup> Tamummaqara fasiqauqa minara maaqi qimasee akara riqau.

Karaambaiqa qinoo qinee maa maqannaasa qimannimianauro.

Qinee aanaamuru ufa qimariasaa niqiqaanaga qimannimifaranoo.

Qinee aanaamuru nifaurunnai qimannimianauro.

Qini qiku qisauku aiqama mi ufana irisee nikooqainaqa sia irifaranoo.

Taummaqara fasiqa ufa miqimminoo marifaqa qinee Pauroosa minara maaqi qidaqa.

<sup>22</sup> Qinee maraqunannai aanaamuru ufa qiranara maaqi qidaqa Yisunara sia irimariasaa irisee minara kuqaa fee qiaqee qimasee náriara Anutuna narira ufa ameemaanai marianara iriaqeera mi ufafa maridanoo. Yisunara doo irimariasara sia misarau maridanoo, doo misa iridaqa. Maraqunannai Anutuna ufa nári ufakiqari qimannimirafa Yisuna ufa irimariasaa iriaqee ainainna maridanoo, mina ufa sia irimarinausa sia mina irifaranoo mina anoonara randee faranoo.

<sup>23</sup> Yisuna ufara suqimariasaa aiqama suqusee maridaqa aiqamausa moodaa kari aanaamuru ufakiqari dapi dapi ufa qimarifanoo kaiqee fasiqa fee aamina fasiqa fee minaki ani keeqafiqa inniara furufari mariasee qimasee sandaannoo.

<sup>24</sup> Aiqamausa suqidaqa Anutuna ufa nári ufakiqari narí qimami narí qimami qimarifanoo kaqiqee fasiqa fee aamina fasiqa fee inniki keeqafinoo

irinoo narí mandoosanara aundurái oonumafi iriannoo. Narí irinnufafa narí raquru amiannoo.

<sup>25</sup> Narí mandirirafa aundurái kukeeqanoo marinafa aiqama kooroomambinanoo mifa anuka kummarammafinoo Anutuna amooqidanoo maaqi qiannoo kuqaa Anutufa maaqoo inni faqa maridanoo fee qiannoo.

*Yisunara suqiranaki andeeqaaqera qidanoo.*

<sup>26</sup> Oo qini qikaqaafasaaúqa, maa qinee qunna ufana anoona koorooianaura. Innee innaaru qiraree qimasee suqidaqa moo fannoo idi moo oosana araannoo moo fannoo naamuaqira ufa oosana araannoo, moo fannoo Anutunaindaraa ufa irisee qimannimiannoo moo fannoo aanaamuru ufakiqari qimannimisainanoo moo fasiqa maraquna fannoo dadaaqinanoo mi ufana anoona kooroomannimiannoo. Aiqaama ainaina Yisuna ufara suqimariasa dadaaqirafa kai mariani.

<sup>27</sup> Misa aanaamuru ufakiqari qimannimiani qimasee qaaraqanda kai fee qaaramoo kai findifinana moodaa moodaa fannoo kai qimannimiaqa, miqooqari moo fannoo misa ufa anoona nári ufakiqari kooroommasee qimannimiani.

<sup>28</sup> Yisuna ufara suqiranaki koorooimarinna fasiqafa sia marinana sia aanaamuru ufakiqari qimannimiani. Narí kai narí aundurakiqari Anutuna faqa ufa qinafa amana narí kai qiani.

<sup>29</sup> Qaaraqanda fee qaaramoo fee Anutufa ufa niminnana qifaqa aiqamausa suqimariasa irisee misa ufa raina rainammasee iriaqa.

<sup>30</sup> Inni ufa suqiranaki faiqí moo fannoo ooqu marinafa Anutunaindaraa ufa marasainanoo ufa qimanniminna fasiqafa ooqu marinanoo mifa findifi qimannimiannoo.

<sup>31</sup> Innee aiqama amana Anutuna ufa qimannimiaqa moodaa kai moodaa kai findifidaqa amana qimannimifaranoo. Miqimandaifaqa aiqamausa misa irirana iriseeqa dadaaqirana mareefaranoo.

<sup>32</sup> Maraquna fannoo inni naakifaqa Anutuna ufa qimannimirana dadaaqirana nimifaqa sia dapi dapi furufariaqa innee inneeqa kai inneeqa nifauru naundurasa rakisimariasa marianara amiqimasee rakisiaqa.

<sup>33</sup> Anutufa sia maasara dapi dapi furufariranaki mariaqera daarama quqeenoo asoaranaki andeeqasee mariaqera daarama narí ufa iriranaki quqeenoo. Anutuna ufara suqimariasa maaqanna maaqana moodaa oosana qimannimiafanaqa maree mariafaqa inni faqa qimannimidaqa.

<sup>34</sup> Yisuna ufara suqiranaki anaasee sia findifi ufa qimannimiaqa, kaqi ooqufaaqee mariaqa. Yuda maqannaasa sandufamau kai fiqa faiqí ufa ameemaanai kai mariaqa.

<sup>35</sup> Anaasee moo ainainara irararee qimaseenoo sia paamma qimasee iraannoo, kasooqageenoo maaqaki oonureenoo narí afaaqisaa iraannoo. Yisuna ufara suqiranaki anaasee findifi ufa qinafa asaurirafa mariannoo.

(Koorinti maqannaasa akaqausa Pauroona ufara sia anoona ufa fee qimasee nári iriranamau fimarufanoo Pauroofa minara maaqi qimasee qimanniminoo qinau.)

<sup>36</sup> Oo Koorinti maqannaasa Anutuna ufa fannoo innikiqari fee indaaru kambiqeenoo fee innee inneeqara maasa kai mareeunoo fee gidee.

<sup>37-38</sup> Innikiqari moo fasiqa fannoo nariara Anutuna tamummaqara fasiqausee qimaseenoo fee maraquna qimimari afeekana faqaasee qimaseenoo fee mi fasiqafa qinee Pauroosa akara rumannimunnufanara kuqaa Anutuna naamuaqira ufa fee qinafa anoona mariannoo. Qini maa



ufanara sia iridee qinafa innee minara unna qira fasiqa maridanoo fee qimasee mina ufa faqa sia iriaqa.

<sup>39</sup> Oo qini qikaqaafasaa Koorinti maqannaasa inneeqa Anutuna ufa faiqí anaasee qimannimiranara maraanauree qimasee afeekaikida mina mararara kai kadaapiruaqa, akaqausa sia irimaria ufanakiqari maraqunannai qimannimifaqa sia qaoo qiaqa.

<sup>40</sup> Innee ufa suqiranaki iriranamau kai andeeqasee maqee maqee fuaqa.

## 15

### *Yisufa kuqiranakiqari findifunara kooroidanoo.*

<sup>1</sup> Oo qini qikaqaafasaa ooqai qinee Pauroosa Yisuna amiqira fasaasa ufa qimannimifannana, innee mina irisee maqeeiafanoo inni irirafa minasaa rusisoofa mapukinoo marinara inni naaqoo auqaidaqa.

<sup>2</sup> Yisuna amiqira fasaasa ufa qimannimifannana, innee mina rakisi mapuku qumareeqa innaarunai asumu marirana maree mariafanoo. Abee innee indaaru kuqaa fee iriqee iqau unna qimasee iridee qifaara.

<sup>3</sup> Qinee sia qinee qeeqa ufa kaifau qimannimifannanau. Yisuna aiku asauku mariannaindari anu ufana firaqoo uriqarara ufa qimannimifannana. Mi ufana oosana maaqimminoo maridanoo. Asauku mundirafa tamummaqara fasiqauqa akarakinaa ufamau finoo maasa mandainainara kuquqimaqanau.

<sup>4</sup> Kuqufufaqa misa mina iri akundamasoofanoo qaaramoo faasaana marinoo tamummaqara fasiqa akarakinaa ufamau finoo kuqiranakiqari findifinau.

<sup>5</sup> Findifufanoo Peetooroona afusaa koorooinoo miqooqari qisaukuqara taikaseenoo qikunni ooqu qaraqanda mareenoo niqiqaaninna fasiqausa aiqama nifusaa koorooufaqa qafaqau.

<sup>6</sup> Qafamasoofanoo miqooqari narí ufa irimarusa faifa handareeta fasiqa anaasee moomoo uqanna nifusaa moodaa kari kai kooroo inau. Misauqak-iqari akaqausa asooqagee kuqufufaqa, moomoosa kaqi maridaqa.

<sup>7</sup> Miqooqari Yisufa Yameesana afusaa kooroomambinoo miqooqari niqiqaaninna fasiqausa nifusaa kooroomambinoo qimanniminau.

<sup>8</sup> Inaaqianna uqanna qini Pauroosa qifusaa faqa koorooinau. Qinee daaduma uqanna moo oosanakiqari amaneendaraasa eedadara foora mariafanausa maridaqa Yisufa qini qifusaa kambiqoofaqa qafaqiafana.

<sup>9</sup> Qinee Yisufa niqiqoo fasiqausakina ureeqarausa maridaqa. Qinee Anutuna ufara suqimariasa aupurarana nimiafanausa marunнанara naqi fee ifaqee misa qiniara Yisufa niqiqoo fasiqafee qida fee, sia qinee misa nimana maridaqa.

<sup>10</sup> Anutufa sia qini ureeqaranara irinoo kaqi narí afauaranannai qini mareeqeenoo narí niqiqoo fasiqausaki quqagiseenoo ufa qimannimiannee afeeka qimufanoo sia qiniki mandaikinau. Qinee aiqama niqiqoo fasiqausa urinaaqaramasee faiqí aanaaseeki maqusa maqusa kadaapiriqa, sia qeeqa kaifau miqidau Anutufa qimu afeekafa qiniki kasinara miqidaqa.

<sup>11</sup> Yisufa maasara kuqinoo findifunara qimannimunnufana akaqa niqiqoo fasiqausa nookinaanee iridee qini dookinaanee iridee, mi ufana kai maasa qimannimisaafanaqa minasaa inni irirafa rusinoo maridanoo.

### *Maasa kuqiranakinaana findifuannanara qidanoo.*

<sup>12</sup> Maasa asauku mundirafa kuqiranakiqari findifunara maasa qimannimifanaqa innikiqari akaqausa naqimasee kuqirausara sia findififaranoo fee qida fee.

<sup>13</sup> Kuqirausa kasooqaqee sia kuqiranakiqari findifirarifanoofau asauku mundirafa miqi kai inoofau sia findifu qini.

<sup>14</sup> Ooqai asauku mundirafa kuqiranakiqari sia findifinaqau maasa qimannimira ufafa sia marinaqau sia qimannimunaiqini, innee inneeqa irirana rusimari ainainafa sia mariqini.

<sup>15</sup> Kuqirausa kuqiranakiqari sia findififanoofau asauku mundirafa faqa sia findi fiqini. Anutunara asauku mundirana kuqiranakiqari uqeeree maqi qiafannanara kuqirausa kuqiranakiqari sia findififaqau maasa qimannimi-afanna ufanara unna ufa fee qini.

<sup>16</sup> Kuqirausa sia findi fifaqau asauku mundirafa faqa sia findifiqini.

<sup>17</sup> Asauku mundirafa kuqiranakiqari sia findifinaqau inniqa saqariki-rafa kai fifau ainainara foora sia mari ainainnaki faqa innee inneeqa mandainainaki kaqi auiamakifau furufarammiaqini.

<sup>18</sup> Kuqirausa kuqiranakiqari sia findififaqau moomoosa asauku mundiranasaa irirana ruisaida kuqimariasaa sia innaarunai fini auiamakifau furufariaqini.

<sup>19</sup> Maasa maaqoo marunna kamuqoora kai iriseefau asauku mundirana minasaa irirana rusidau, maasa mandainaina firaafa mariqini, aiqama maqannaasa maqa afaaqasasa mariasakiqari maasa dinee teeroo uriqaranoo mariqini.

<sup>20</sup> Anoona ufa maaqimminoo maridanoo. Doo kuqaa asauku mundirafa kuqiranakiqari findi finau, mina findifirafa maasa kuqirausa findifirana qima afeekaikidanoo mapukidanoo. Doo kuqaa maridanoo.

<sup>21</sup> Ooqai indaaruu moodaa fasiqannai kai kuqirana kambiqanau, miqi kai inoo moodaa fasiqannai kuqiranakiqari findifirafa kambiqanau.

<sup>22</sup> Maasa aiqama fasiqa anaasee Adamana faiqi namu marunnaara kuqidaqa, miqikai inoo asauku mundirana faiqi namu marianara Anutufa misa kuqiranakinaana uqeera quqaannoo.

<sup>23</sup> Sia dapi dapi Anutufa kuqiranaki uqeeraannoo andeeqaseenoo mara findifuannoo, asauku mundirana naaree doo mara findifumaqoofanoo maridanoo miqooqari mifa quminna aukwana mina aiku asauku mareeqee findifuma nimaqaannoo.

<sup>25</sup> Anutufa nari asauku mundirana mapuku amaqaaseenoo qimaminau. Anee aiqama ainainasaa rakisimaree fimarinaqa qinee Anutusa aiqama namuqaa afaannainaina mareeqeeqa ani asauku mundirana aramandunnai quqasaanana anee maqa mammaaqai radamusainaga kaifaa rakisianauranoo.

<sup>26</sup> Inaaqianna radamuaninna namuqaafa kuqirafa maridanoo mina faqa radamuannoo.

<sup>24</sup> Miqoo taikarafa kambiqaanoo Asauku mundirafa afaannauqa uriqararousa faqa misa faiqi firaasa faqa misa afeeka fasiqauqa aiqama mareeqeenoo nari aramandunnai quqaseenoo radamuseenoo nari ququsaki-naasa aiqamausa mareeqeenoo nari akoona amiannoo.

<sup>27</sup> Tamummaqara fasiqausa akarakinaafa minara maaqimminoo maridanoo. Anutufa aiqama ainaina mina aramandunnai kai quqaannoo fee qidanoo.

Tamummaqara fasiqa minara miqi qimasoofaqa qinee minara maqi qidaqa. Anutufa aiqama ainaina mina aramandunnai quqararee qidanoo sia nariarau mina aramandunnai quqararee qidaqinoofau.

<sup>28</sup> Anutufa aiqama ainaina mareeqeenoo asauku mundirana rakisirana ameemaanai quqasainanoo asauku mundirafa mina amaaku fanoo quandaki Anutuna aramandunnai nari keeqaannoo, aiqama ainaina

quqoona aramandunnai keeqafinanoo miqooqari Anutufa aiqama ainainatia uqanna uriqararafa mariannoo.

(Pauroofa maru aukuanna faiqí moo fannoo Yisuna ufa irimarufa sia nammari mararai kuqufufanoo moo fannoo qaara kari nammari maree marinau. Mifa nariara faqa kuqunara faqa maree marinau. Mi aukuanna mi oosannara Pauroofa qimannimirara maaqi qinau.)

<sup>29</sup> Inni Koorinti maqannaasaki kuqirausara nammari maree marusara misara naqi fee qianauree. Kuqirausa kuqiranaki sia findifuafaqa innee nanaree fifau misaree qimasaida fifau nammari maraidee. Innee yanee dadaaqidee miqidee.

<sup>30</sup> Maasara faqa iriaqa maasa Yisuna ufa saara aiqama faasaana moomoo kari aupurarana narirana eerairirana maraidaqa.

<sup>31</sup> Qini qikaqaafasaa, qinee aiqama faasaana kuqiranara aniraannoo qidaqa eerairidaqa. Qinee sia kaiqeesa maana kooroidaqa. Innee maasa karaambaqa asauku mundirana Yisunaki fimarianara nimoidaqa minara kai kooroomannimidaqa.

(Pauroona aukuana Roomma maqannaasa sia Yisuna ufa irimariasa nári oosana maraidaqa faiqí anaasee qafaifanoo adiafaa ianifee qimasee ooni faandamuraki faiqí faqa kaasau aandau faqa mara quqasoofaqa rakimariqau. Yisuna ufa irimaru ufafa taikaanifeera mara quqasoofanoo kaasau aandau naru neemarinau. Pauroofa minara iriseenoo Koorinti maqannaasa qimannimidanoo mina kikiqusimarinau. Koorinti maqusanaasa maa ufana qimanniminoo qinau.)

<sup>32</sup> Qinee Pauroosa Efeesusa maqusai kaasau aandauree foora maru-faqa misa faqa rakimariqiafana. Kuqirausa sia kuqiranakiqari findififaqau qinee maaqoo Efeesusa maqusai mi fasiqausa faqa rakidaqa nana ainainee maraanauree qimasee misa faqa rakiqiafana, fifau maaqoo maria fasiqaanaaseesa qiqafaqee qimasee fee rakiqiafana. Oo sia miqi qiafana. Kuqaa kuqiranakiqari findi fuanauree qidaqa miqi qiafana. Faiqí firaasa unna ufa moo minara maaqimminoo maridanoo. Duna maasa kuquannanara maqee narana nammari moomoo naa. Qinee Pauroosa minara maaqi qidaqa. Kuqirausa kuqiranakiqari sia findififaqau anoonammifooqini, findififaranoo unna qimariafanoo.

<sup>33</sup> Innee sia mi unna ufana iriaqa, Moo amaana ufa minara maaqi qidanoo, Mandoosana maree maria aqoondisa inni marirana putaamma nimaqeeffaranoo.

<sup>34</sup> Innee Koorinti maqannaasaki akaqausa kuqirausa sia findifi maria ufana qimariasa inni putaamma nimaqaiifaqa innee misa mandoosana maraseeqa furufarirana maree mariafanoo. Innee mina minnisee kafa andeeqara irirana marasee inneeqa mandoosana quqasee andeeqaramau fuaqa. Inneeqa nisauruaqa innikiqari akaqausa Anutuna afeekara sia amiqimasee iri marifanoo kaqi meeramau irirana irimariafanoo.

*Maasa kuqiranakiqari findifuanna qifaaqanara qidanoo.*

<sup>35</sup> Inniki moo fannoo kuqirausa findi franara maaqi qiannoo, kuqirausa doo putaamminoo maridanoo naqimasee fee findi fifaree, nana afaaqee findi fuannoo fee.

<sup>36</sup> Anee furufarimarianafa mi ufana qimariananoo. Anee nandi ummaqusainanoo sia aaqee kambiqannoo mifa putaa mambinanoo mina upaaqi fannoo inaaqiana kambiqannoo.

<sup>37</sup> Innee sakuma qaqama fee moo narana qaqama fee ummaqidaqa sia narana faqa amanee faqa ummaqi mariafanoo qaqama kai ummaqi

mariafanoo. Ummaqusaafanoo sia qaqama kai kambiqaidanoo narana anoona namufaqa amanee namufaqa kambiqaiifaqa qafee mariafanoo.

<sup>38</sup> Anutufa narí iriranannai aiqama aadu aadu qaqama nári aadu aadu kambiqaaninnana anoona namufaqa amanee namufaqa nimidanoo. Anutufa aiqama qaqama andeeqasee narí kai anoona amidanoo.

<sup>39</sup> Kasimari ainaina nimaqi miqi kai idanoo sia aiqama moodaa nimaqi faqaasa maridaqa. Faiqí moo nimaqi faqaasa maridaqa aandau moo nimaqi faqaasa maridaqa, ufini moo nimaqi faqaasa maridaqa, noodaanna moo nimaqi faqaasa maridaqa.

<sup>40</sup> Innaarunaindaraa nifaaqa faqaasa faqa maqasaaqaraa nifaaqa faqaasa faqa aaduma maridaqa. Innaarunaindaraa nifaaqa areenarafa moo maridanoo maqasaa qaraasa nifaaqa areenarafa moo maridanoo.

<sup>41</sup> Suani afu narí areenarafa aaduma moo maridanoo, quqoona narí areenarafa aaduma moo maridanoo, fasau narí areenarafa aaduma moo maridanoo, fasau misaki faqa aadu aadu areenarafa maridaqa.

<sup>42</sup> Kasooqaqee kuqirausa kuqiranakiqari findififanoo miqiminoo marianoo. Faiqí anaasee kuqufifanoo mina iri akundee mariafa maqasaaqaraafa maqa maridanoo. Kuqiranakiqari Anutufa uqeerasainanoo mi afaaqafa naaru naaru marira afaaqafa mariannoo.

<sup>43</sup> Nikundee mari nifaaqafa ummooqukidanoo mandaikidanoo, kasooqaqee kuqiranakiqari Anutufa uqeerasainanoo afu qafainanoo idaaqirafa amiqirafa afeeka mariannoo.

<sup>44</sup> Nikundee maria nifaaqafa maqasaaqaraa nifaaqa ufaasu marifa maridanoo. Anutufa uqeerasainanoo naaru marianinna innaarunai nifaaqa mariannoo. Maqasaa nifaaqa ufaasu nifaaqa maaqoo mariana amana kai marifa maridanoo. Mifa marinanoo innaaruna naaruara marira nifaaqa amana kai marifa kuqaa mariannoo.

<sup>45</sup> Tamummaqara fasiqauqa akara minara maaqimminoo maridanoo. Indaaruqaa fasiqa Adamafa kasimaruna auquqoofa marinau.

Qinee Pauroosa minara maaqi qidaqa. Adamana aanaaqiannaa fasiqa Yisufa maqee marirana faqa naaru marirana faqa nimimari maraqunafa maridanoo.

<sup>46</sup> Sia naaru marirafa naaru kambiqaidanoo maqasaaqaraafa naaree kambiqaidanoo, miqooqari kai naaru marirafa kambiqaidanoo.

<sup>47</sup> Indaaruqaa Adamafa maqasaaqaraa kookoomannai auqirafa marinau. Inaaqianna Adamafa Yisufa innaarunaindari quminau.

<sup>48</sup> Maqasaaqaraasa nári nikoona Adamana fooqaasa maqa nifaaqafaqaasa maridaqa. Innaarunai fimariasa innaarunaindaraa fasiqa Yisuna afaaqaikirausa marifaranoo.

<sup>49</sup> Maqee maasa maqannai auqira fasiqa afaaqafa afisiqa moodaa karammiqa maridaqa kasooqaqee maasa miqikai masee innaarunaindaraa fasiqa afaaqafa afisusee miqi kai iqa moodaa karakaimmianaura.

<sup>50</sup> Oo qini qikaqaafasaa qini Pauroosa ufa anoona maaqimminoo maridanoo. Faiqí nimaqi faqaasa faqa fidika faqaasa faqa sia Anutuna ququsaki keeqafifanoo naida nimiannoo. Ufaasu maqasaa ainaina faqa sia amana naaru marirana maraannoo.

<sup>51</sup> Innee amiqimmandee iriaqa, kukeeqara ufa qimannimianaura, maasa sia aiqama kuquanaura. Qusasaa uqanna Anutufa tautumaqimaqaseenoo maasa moo kamaakamma qimaqaannoo.

<sup>52</sup> Nifu tasunduna tasunduna kaqi kaqi idanoo miqirafa kai inaaqianna ufireena fannoo fuaqainanoo Anutufa maasa moo kamaakamma qi-maqaannoo. Mi ufireenna fuaqasainanoo kuqirausa minakiqari naaru marira nifaaqa faqaasa findififanoo maasa aiqama moo kamma qi-maqaannoo.

<sup>53</sup> Ufaasu maqasaa nifaaqa faqa sia kaqi ooru fifaranoo naaru marirana naaree afisumareeqa ooru fifaranoo. Kaqi mariasa kuqifandinausa misa afeeka nipata naaree afisumaree amana innaarunai ooru fifaranoo.

<sup>54</sup> Ufaasu maqasaagaraa nipata faqaasa kuqifandinausa naaru marira nifaaqa sia kuqimaria nifaaqana afisumareeqa doo miqoo ooqeenasa akara anoona kambiqaanoo. Misa maaqi qiqau.

Anutufa doo kuqirana aiqama nambiqama taikaseenoo mina uraaqaranoo maridanoo.

Kuqirana rafaqaqafirafa doo taikeenoo.

Kafaa moo akarakinaa ufa minara maaqi qidanoo.

<sup>55</sup> Oo kuqirafa maasa rafaqaqafimarianafa ani uriqarara afeeka yaifee maridanoo. Doo taikeenoo.

Oo kuqirafa ani aupurara afeeka maasa qimimarianafa yaifee maridanoo. Doo taikeenoo.

<sup>56</sup> Akara miqinoo marifaqa qinee Pauroosa minara maaqi qidaqa. Maasa aiqamausa mandoosana fannoo kai aupurara afeeka kuqirana amifanoo doo kuqirafa maasa daridanoo. Kafaa mandainaina fannoo mina narira afeeka Anutuna nimaarusira sandufakiqari kambiqaidanoo.

<sup>57</sup> Oo Anutufinnai dufi dufi qidaqa. Maasa inni saimbaqa karaambaiqa asaku mundirana Yisunannai kuqirana faqa mandainaina faqa maasa uriqaraqa maridaqa.

<sup>58</sup> Oo qini qikaqaafasaa doo minara iriseeqa sia kasi kasiaqa mapukuseeqa atukaraqa mariaqa. Karaambaiqa marirana nirana mariana maqee maqee minaki kai noori runusee mariaqa. Karaambaiqa marirana niranaki marianara aiqama saika naaru marira anoona marifa maridanoo karaambaiqa marirana nirana sia moo fannoo anoona siaifa maridanoo. Anoona marifa kai maridanoo.

## 16

*Anutuna ufa irimariasa sarauqinana dadaaqiranara qidanoo.*

<sup>1</sup> Oo Koorinti maqannaasa innee Yudeea maqa maaqaki Anutuna saika maree mariasa narana sarauqi marianara munnimma kaqi nimiranara qini irafaqa minara inni qimannimidaqa. Qinee Karatia maqa maaqaki Yisuna ufara suqimarusa qimannimifannaqoo miqoo kai fuaqa.

<sup>2</sup> Aiqaama amaana faasaanasaa aiqama fasiqa anaasee akaqa munnimma aaduma raina quqaqa. Nari ainainirana akiaqara munnimma firaana marainafa mina amana kai kaqikaana quqaani kaqikaana marainafa doo nari maraina amana kai kaqikaana quqaani, qambaana amana marainafa doo mina amana kai quqaani, innee aiqama amaanasaa amaanasaa miqikai idaga raina quqeesaifanoo innooqafinaqa qinee inni maqusai oonuraanna kari munnimma suqirana sia mariani doo faasai suqinoo mariani.

<sup>3</sup> Innee maqee andeeqara fasiqauqa mara quqasaifaqa qinee oonuraanaqa mi munnimmana faqa pasakina akara rumasaanaqa misa mi pasana faqa mi munnimmana faqa mareeqa Yeerusareenni muru kaqi nimiaqa.

<sup>4</sup> Innee qiniara faqa ooru fuannee qifaqa qini faqammooru fifaranoo.

*Pauroofa narí fuaninnanara tipundaaridanoo qimannimidanoo.*

<sup>5</sup> Qinee maaqooqari Maseedoonia maqa maaqakina oonuree aniree iqa ninii taikasee innee mariannai fuanaura.

<sup>6</sup> Inni maqusai oonureeqa kaqi kaaqoo kisaacaqasaa inni faqa marianau-ree, aukwana aiqaramafinaqa qambaanasaga suara aukwana qaaramoo quqoona inni faqa marianauree. Doo miqooqari moosaa fuanaura yaiffee fuanauuree maqee sia iridaqa.

<sup>7</sup> Karaambaiga eedoo qinnanara kaqikaqoo kisaacaqasaa inni faqa marianauree qidaqa. Miqoo inni fi inni nindafee firanara qidaqa.

<sup>8</sup> Qinee maqee Efeesusa maqusai kaqi marianauree. Yeerusareenni Yuda maqannaasa qoomaqa suqanee maru quqoonafa anirainaga qinee minasaa Efeesusa maqusaindari Maseedoonia maqa maaqaki ooruree minni oonuree aniree masee miqooqari innee iannai Koorinti maqusai fuanauuree qidaqa.

<sup>9</sup> Maqee Efeesusa maqusai maaqoo firaa saika anoona saika maridanoo, moomoosa qini ufa ititee mariasa mariafaqa saikidaqa.

<sup>10</sup> Qinee Timootinara qimannimianauree, mifa inni maqusai oonurainaga innee mina amiqi amiqimmasaifanoo afaqa quqaani, mifa qini daanna ree marifa karaambaiga ainainiranaki marifa maridanoo.

<sup>11</sup> Timootifa Yisuna ufa irimariasa qini qikaqaafasaauga saimbaqa mootinai aiqumaki mai aniraree qimasee inni maqusai naaree anireeno mai qinee minara rakisi marunnannai Efeesusa maqusai anianifeera qidaqa. Innee Timootinara kumaaraa fee qimaseeqa sia minara nikoo nikaa iaga amiqimmandee dadaaqifanoo asoaranakiqari findifino mai aniani.

<sup>12</sup> Doo maqee maasa qikaqa Apooroosanara qianauranoo. Qinee innee iannai qikaqaafasaauga faqa namummaqee fiqa anianneera qidaqa fuki faaki qunanoo sia fidanoo ititammasee kaqi maridanoo maqee sia fuanau-ree sia andeeqara aukuanee qidanoo. Kasooqagee andeeqara aukwana kambiqafinanoo fuanno.

*Pauroona taikarana ufa.*

<sup>13</sup> Inni Koorinti maqusanaasa maqee maa ufana qimannimianauree. Innee maqee maqee aufarida mariaqa, innee Yisuna saqarikiranaki minaki mapukufina kikiqammambuaqa innee maqee maqee paasoosida mariaqa, afeekaika mariaqa.

<sup>14</sup> Inneeqa maridaqa aiqama nirana marirana nimuqusi marinaqa narí dadaaqi narí dadaaqi qiqaanaqa.

<sup>15-16</sup> Innee Sateefanasana faiqi anaasee aiku asaukuara irimariafanoo, misa Akaia maqa maaqakiqari oosanarasee Yisuna saqarikusa mariasa maridaqa. Misa Anutuna ufa irimariasa ainainamma nisee mariasa maridaqa, narí faiqi anaasee faqa nári marirana minaki kai nifaaqa quqasee auqaidaqa. Oo qini qikaqaafasaauga inni qimannimidaqa. Miqinna fasiqana aanna reeqa mina ufamau fuaqa, akaqausa misa dadaaqimariasa misa ufamau faqa fuaqa.

<sup>17</sup> Mi fasiqafa Sateefanasafa faqa Fooratunatusafa faqa Akaikusafa faqa misa mai aniroofaqa nindafaida asasiqiafana, misara inni Koorinti maqusanaasa ani ani anireera foora qufaqa asasiqiafana.

<sup>18</sup> Misa inni asasirana nimimariandee kai iqa qini qimiqa. Miqira fasiqauqara aiqamausa iriaqaana.

<sup>19</sup> Asia maqa maaqaki Yisuna ufara suqimariasa misa inni nimandaidaqa. Maaqoo Akuirafa faqa narí anaqa Pisisikira nammarifa faqa nári maaqaki

Yisuna ufara suqimariasaa faqa inni firaqoo amiqimmandee Yisuna ufa irimariasara fooraa inni nimandaidaga.

<sup>20</sup> Maaqoo mariasa Yisuna ufa irimaria qikaqaafasaa ufa faqa inni nimandaidaga. Innee nariara nariara nikaqafasaa fee qimasee nari amooqee nari amooqee iaqa.

<sup>21</sup> Faiqi moo fannoo qini dookinaana iriseenoo maa pasana akara rinau, maa qusa ufana atisaa qeeqa qisaukunnai akara ruanaura. Qinee Pauroosa inni nimandaidaga.

<sup>22</sup> Karaambaiqara sia amuqusimarinafa aqurarara ufa minasaa mariannoo. Nari ufakiqari maranata, maasa ufakiqari maasa karaambaiqa qumuannee qidaqa.

<sup>23</sup> Karaambaiqa Yisufa nari afaarira oosana inni faqa nimiani.

<sup>24</sup> Maasa aiqamausa asauku mundirana Yisunaki mariasara irisee qini qimuqusirafa inniki mariani.

## 2 KOORINTI

### **Pauroofa Koorinti maqannaa inaaqiannaa ufa akara rumannimaqoo ufafa.**

<sup>1</sup> Anutufa qufaqa qinee Pauroosa asaku mundirana Yisufa niqiqoo fasiqausaikamambi marunausa maridaqa. Qinee qeeqa qikaqaafasaa Timootisandiri maa akarana rumannimaqeeqa. Innee Koorinti maqannaa Anutuna ufara sugimariasa faqa aiqama Akaia maqa maaqaki Anutuna ufa irimariasa faqa inni aiqama nimandaidaqa.

<sup>2</sup> Anutuna asaku mundirana maasa karaambaiqa Yisuna faqa nari akoona Anutuna faqa miqanda amiqi amiqira afaarirana faqa naundura asoarana faqa inniki mariani.

#### *Pauroofa Anutuna dufi dufi qimamaqaidanoo.*

<sup>3</sup> Asaku mundirana innisaimbaqa karaambaiqa Yisuna akoofa Anut- ufa minara maasa aiqamausa dufi dufi qimamaqaaqa, innisaimbaqara amuqusimari qikoofa innisaimbaqa qifaueemarifa maridanoo, aiqama dadaaqirafa mifinnaindari qumimarifa maridanoo innisaimbaqa mina kai dufi dufi qimamaqaaqa.

<sup>4</sup> Innisaimbaqa qeeqa daundura ummaaraki marunnana Anutufa mi um- maaranaki dadaaidanoo. Innisaimbaqa oosana oosana ummaaraki mari- asa Anutufa innisaimbaqara misa dadaaqiaqee qimaseenoo innisaimbaqa naaree dadaaqinau. Misa dadaaqidaqa Anutufa innisaimbaqa dadaaqirana qimuna mina kai maasa qumaree quandaki minannai dadaaqidaqa.

<sup>5</sup> Asaku mundirana moomoo aupuraranaki marufaqa maasa faqa mi- naki marunanoo aupurarana maasa faqa naida qiminoo. Miqi kai inoo asaku mundirafa nari dadaaqirana faqa firaaqoo maasa naida qimifaqa.

<sup>6</sup> Maasa Yisuna ufasaara aupurarana maraidaqa sia fifaufau maraidau, inni dadaaqirana faqa innaarunai asumu marirana maraaqeeru aupu- rarana maraidaqa. Asaku mundirafa maasa dadaaqifaqa maasa mi- nasaqaraana qumaree inni faqa dadaaqidaqa. Innee maasa maroo aupurarana maraseeqa minaki ubiqafiqa maraqa fuuqeeru dadaaqidaqa.

<sup>7</sup> Innee maasa aupurarana ati maroondoo kai iqa maasa Yisufinnaindaraa dadaaqirana ati faqa mareefaranoo. Maasa minara iriseeqa maasa irirafa innisaa mundinoo maridanoo sia minnisaananoo maqasaa aqufuanoo.

<sup>8</sup> Maasa Asia maqa maaqaki fiqum fiqum imariafananoo firaa aupurarana qimufaqa minara inni naaqoo auqaida qimannimidaqa. Mi aupurara firaaqoo ummaara qimufaqa maasa doo maqee kuqirarammidaqee qiafan- nana.

<sup>9</sup> Maasa misara kuqa darira ufa doo qima afeekaikiaafoo qunaqa sia daria. Mi qimaarusirafa sia fifau kambiqeenoo Anutufa qumee dadaaqunara miqimmasoofaqa sia qinee qeeqara afeeka fasiqafee qianaara qeeqa iriranara Anutunasaa kai munduanifee qimaseenoo qumee mi qimaarusiranara kambiqaanifee qufanoo kambiqanau, kuqiranakinaana uqeere marifa dadaaqufaqa minakiqari maridaqa.

<sup>10</sup> Mifa firaa qimeekaranakinaana maasa uqeereeqee qisaifaqa maridaqa kafa miqi kaimmiannoo. Mifa kafa maasa minakinaana uqeereeqeenoo quqaqisaifaqa sia rufiida minara irirafa minasaa rusinoo maridanoo.



11 Miqi marinara innee moomoosa maasara innaaru qifanoo Anutufa maasa amiqi amiqima qisainaqa moomoosa mina qafamasee quandaki Anutufinnai dufi dufi qifaranoo.

*Pauroofa Koorinti maqusai fuanee qimasee tipundaaramaseenoo minnisanau.*

12 Oo Koorinti maqannaasa maasa maqusa maqusa nidaqa inni faqa mari-afananoo qini daakirafa irirafa maaqimandee qimaqimidanoo. Maasa inni faqa mariafananoo sia faiqi irirafa maasa uqaqifiqanau. Anutufa dadaaqufaqa narikinaana akooqoo anoona ufa faqa noori runusee auqarafa faqa, Anutuna afaarira amiqi amiqira afeeka faqa mifauqa kai rakisiqimaqee marifaqa inni faqa maridaqa minara maasa irisee nasuridaqa.

13 Maasa innee asaana rimariana faqa irimariana faqa amana kai akara rumannimaqaidaqa.

14 Maqee innee akaqainaina innee sia amiqimmasee irimariafanoo. Mi ainainausara amiqimasee iriaqera dididanoo. Innee mi ainainausara amiqimasee iriseeqa, karaambaiqa Yisufa qumuaninna faasaannasaa maasa inniara nasurifandinnandee kai iqa innee maasara nasurifaranoo.

15 Qinee minara iriseeqa kuqaa kambiqannoommifoo qimasee qaara kari inni maqusai oonuree qaara kari idaaqamannisararee qimasee sia fiqa.

16 Qinee maindari Maseedoonia maqa maaqai fidaqa innee iannai fi ninda fee firaree qiqa kafaa mindari anidaqa ai nindafararee qimaseeqa sia fiqa sia nindafeeqa. Yudeea maqa maaqai ooru fidaqa inni dadaaqirana maraanauree qimaseeqa innee iannai sia fiqa.

17 Qinee firara qunnanara innee qiniara furufarirafee fee qidee, innee qiniara nari aidiramau kai fidanoofee fee qidee qinee innee iannai firara qunnanara innee qiniara qaaraiki marifee fee qidee.

18 Anutuna afusaa marida innee iannai firara sia qaara irirafa qiniki maridanoo.

19 Asauku mundirafa Yisufa Anutuna amaakuara Sirasifa faqa Timootifa faqa qinee Pauroosa faqa qimannimimarunnana sia mifa qaara irirana faqaafa maridanoo, mifa Yisufa maqasaa fasiqa maasara sia qaara ufa qimarifa eedoo kai qimarifa maridanoo.

20 Mifa kai Anutuna moomoo ufa maasara qima afeekaikamasee mapukirafa maridanoo. Minara faiqi anaasee Anutunara amooqida innaaru qidaqa asauku mundirana Yisunannai maasa Yisuna ufa irimariasaa aiqamausa eedoo qimasee inni dadaaqidaqa.

21-22 Anutufa nari uqanna inni saimbaqa asauku mundiranaki marinara dadaaqifaqa innisaimbaqa minara kuqaa anoonee qidaqa. Mifa innisaimbaqa nari saikaki mara quqararee qimaseenoo nari asauku innisaimbaqasaa munduseenoo utaaqamaseenoo narindi fee qimaseenoo nari naaquqara andeeqara maraquna maasa qimuqusa ooki quqaseenoo kasooqagee innaarunai nimira ainaina ati kai maqee uqannifiqaidanoo kasooqagee innaarunai anoona firaana nimiannoo.

23 Qinee Anutuna afusaa maridaqa mifa qini qimuqusaki irimarifa marifaqa sia unna qimasee maaqi qimasee qimannimianaura. Qinee Asia maqa maaqai oonuree aniree masee inni Koorinti maqannaasaki sia fiqa. Nisaurirana nimianoo qimasee qeeqa kai sia fiqa.

24 Maasa sia inniara miqimmasee maaqimmasee qiaqee qidaqa doo innee mapukusee Yisuna saqarikiranaki mariafanoo, innee sia nisaurirana maraaqera اساسiranaki mariaqera dadaaqidaqa.

## 2

*Pauroofa Koorinti maqannaasa noori runifoo qimasee sia finau.*

<sup>1</sup> Qeeqa irirana maaqi qimasee iriqa. Sia qinee nisaurirana nimiqa misiannai kaifaa fuannee qiqa.

<sup>2</sup> Qinee nisaurirana nimiananoo yafee quandafi asasirana qini qimiannoo fee sia moo fannoo asasirana qimiannoo qiqa ufasaara noori runimariasaa kai maridaqa aiqama noori runusee marifoora.

<sup>3</sup> Minara qinee mi pasana akara rumannimaqeeqa. Qinee qini asamma qisainausiannai oonureeqa noori runirana nimianoo qimasee pasa kai akara rumannimaqasaanaqa innee inneeqa aqara oosana andeeqasaifaqa qinee ooruraanaqa innee asasiranaki marifanoo innee qini qifaaqa faqa asafaranoo.

<sup>4</sup> Qini qimuqusa firaqoo uqanna inniara qimuqusifaqa ikiraqaidaqa akara rumannimaqeeqa, sia inni nifaaqa rumbaaniifeera akara rumannimaqeeqa qeeqa firaqoo inniara qimuqusinara iriaqera akara rumannimaqeeqa.

*Koorinti maqusai Yisuna ufara suqimariasaki moo fannoo firaqoo mandosana maroonara Pauroofa mina mandainaina numoo minnisaanee qinau.*

<sup>5</sup> Inni Yisuna ufa irimariasakiqari faiqi moo fannoo nari aqaranannai inniki moomoosa nifaaqa rumbarana niminau sia qifaaqa rumbarana qini qiminoo inni nifaaqa rumbarana nimiqaifaqa qinee nisaurirana firaana nimianoora minara sia nifaaqa ritianauranoo.

<sup>6-7</sup> Doo innee moomoosa aqaqamaqoo fasiqana Yisuna ufara suqiranakiqari aqiqamasoona arirafa doo amanaikamambinoo doo nari mandainaina minniseenoo doo innee mina mandainaina akiqara minni aisasee idaaqamamaqaaqa, innee sia miqifanoo firaqoo akooqainanoo Yisuna ufa minni uqannaseenoo kaasau uqaandoora.

<sup>8</sup> Inneeqa mi fasiqanara kuqaa nimuqusianara oonu qimamifanoo iriani.

<sup>9</sup> Minara kai qinee mi akarana rumannimaqeeqa. Qinee inniara naamua qunna ufana irifaree sia fee irifaree qimasee nimanamandee qafarara pasa akara rumannimaqeeqa.

<sup>10</sup> Innee Koorinti maqanaasa mi fasiqana mandainaina akiqara minnisee moodaanaki kifaqa qinee faqa mina mandainaina minnisee mina faqa moodaanaki kianaura. Innee moo mandainaina mandaikamma qimaqoonara qinee inni minniseeqa, mikari moo mandaikamma qimaqaaqau fee sia fee miqimma qimaqaaqau fee minara qinee asaku mundirana afusaa marunaua inniara irisee minninisaidaqa.

<sup>11</sup> Maasa Sadannana mandiriranara iridaqa mifa maasa uridaaqaraandoora mandainaina maraana akiqara minniseeqa kafa moodaanaki kiaqa.

*Pauroofa Tarooasa maqusai Titusanara oonu mafi iridanoo afeesimarinau.*

<sup>12</sup> Qinee Pauroosa Asia maqa maaqaki fiqum fiqum idaga Tarooasa maqusai oonureeqa asaku mundirana amiqira fasaasa ufa qimannimiraree qiafananoo Karaambaiqa faasai kooqi atuqeenoo maqi inoo maruafaqa mi maqusanaki saika amiqimasee firaqoo uqeraqiafana.

<sup>13</sup> Miqoo maridaqa maasa qikaqaafasaa Titusafa inni maqusaindari ani ifoo qimaseeqa randaidaqa sia paquriafannanara qimuqusa mandaikufaqa miqooqaraasa nimandamasee Maseedoonia maqa maaqaki minara randarara fiqiafana.

*Asauku mundiranannai maasa rakiranara foora uriqararawsa maridaqa.*

<sup>14</sup> Oo Anutunara dufi dufi qiaqa. Innisaimbaqa asauku mundirana faqa moodaanaki kamambi maridaqa minakiqari Anutufa nari narunakinaana Anutuna asumu firiara foora innisaimbaqa nifiqee asauku mundiranara kaanina mareeqa idireeqa maree maqusaira foora miniqaasa rakiranara foora uriqararawsa maridaqa. Miqooqari innisaimbaqa Anutufa mareeqeenoo asauku mundirana ufa amiqira afundara foora nimifaqa aiqama aanaamurunni daraaniqa qimannimiqa nidaqa.

(Ooqai Pauroona aukwana Roomma maqannaasa sundiauga faqa misa karaambaiqauqa faqa namuqaa maqusai oonureeqa misa naruseeqa misa ainaina faqa faiqi kaakadi narirawsa rumbamareeqa nariqa maqusai nifiqamaree fiqau. Nariqa maqusa adeedi oonureeqa padi mafufaqa nari indaaru fiqa rumbaqaosa ootupa ootupa rumbara rumbaseeqa nifiqee narirara maqusa qambaana narirara nifiqee fiqau. Rumbarawsa ninaaqiana afundi maru ainaina ida muquru mareeqa fimarufanoo mi afundafa misa qambaanamma afundi marinau. Mina anaaqiana sundia firaafa Karaambaiqa misa sufafaqa maree finau. Rumbaqaosa mi afundanara maasa kuqunna afundafa qidanoo fee qiqa. Sundiauga faqa kaiqeesa faqa mi afundiranara amiqira afunda fee qiqa.)

<sup>15</sup> Pauroofa minara iriseenoo Koorinti maqannaasa nariara maaqi qimasee qimanniminau. Maasa faiqi anaasee qambaana fidaqa asauku mundirana ufa amiqira afundara foora uqirawsa nidaqa akaqawsa mi ufana irimariasa asumu mariranaki fifaranoo, akaqawsa mi ufana sia irimariasa kuridiranaki fifaranoo.

<sup>16</sup> Kuridiranaki fifandinausa mi ufana mi afundirana udiramasee faiqi kuqa narimaria manda afundanafee qidaqa. Asumu mariranaki fifandinausa mi afundana udiramasee naaru marirana maree maria afundanee qidaqa. Minara irisee nana irirana faqaa fee maa saikana amanaikiannoo fee.

<sup>17</sup> Maasa amana mi saikana maraanaura. Akaqawsa Anutuna ufara fifau oorudupira ainanee qimasee minasaqaraana manda munnimma maraidaqa. Miqi qimariasa sia mi saikana amana mareefaranoo. Maasa sia misa naanna raidaqa. Anutufa maasa mi saikanaki diqiqoosa marunnanara mina afusaara foora maridaqa asauku mundirana ainainira faiqi maridaqa noori runusee faiqi anaasee qimannimidaqa.

### 3

*Pauroofa Koorinti maqannaasara nari papiqa akarara foora mariafanoo.*

(Ooqai Pauroona aukwana Yisuna ufara suqimaru fasiqafa mootinai suqimarunnai firarinoo fufaqa misa akara rumbeegee amufanoo mara maree moo atinai suqimarusunnai oonuree munu nimufaqa misa qafeeqa mina mareeqa nari suqimarunaki quqasoofanoo maridanoo misa faqa Yisuna ufara suqimariqau. Akaqawsa unna amaana ufa qimarusa nariqa kai unnaqira pasa akara rumammaree moo atinai fiqa mi pasanannai fifau narana maaqa ueeqasee maraqau. Pauroofa minara iriseenoo Koorinti maqannaasa maaqi qimasee qimanniminau.)

<sup>1</sup> Maasa sia geeqa qimooqidaqa anoona ufa kai qimannimidaqa. Maasa inne inannai fiqa sia akaqawsa naanna reeqa moona akara mara maree inni munu uqannifiqasee inni faqa suquanaura. Maasa inni maqusaindari moosaa fiqa sia inniara pasa akara rumaqimifaqa maree fuauree qianaaura.

<sup>2</sup> Innee Koorinti maqannaasa maasa akarara foora sia papiqasaa akara rinoo maasa qimuqusasaa akara riara foora iqa mariafanoo, aiqamausa asaana rumasee iriaqeera akara rinau akooqoo maridanoo.

<sup>3</sup> Asauku mundirafa narí uqanna mi pasana akara ruumbeegee maasa qisaukuki quqasaifaqa inni nimiqa. Sia Mooseefa maru kamuqoo iundee kai idaqa sia kirifinnai oonisaa akara rinoo maridanoo. Kaqi marira Anutufa narí maraqunannai faiqí faiqi maasa qimuqusasaa akara rinoo maridanoo.

<sup>4</sup> Maasa irirafa asauku mundiranasaaqari Anutunasaa mundinoo marinara mi ufana qiqa.

*Pauroofa maasara faqa Anutunara faqa moodaanakikira ufara qidanoo.*

<sup>5</sup> Sia maasaki moo afeeka marifaqa maasa maa saikana amana maridaqa, maasa afeeka Anutufinnaindari kai qumuree maasa uqeeraidanoo.

<sup>6</sup> Mifa mi ainainirana amanaikirana qimifaqa kai narí fuka moodaanaki kira ufa mi saikanaki maridaqa. Mina fuka moodaanaki kira ufa sia ni-maarusira ufa akara riranasaa mundinoo maridanoo. Anutuna naaquqara andeeqara maraquna faiqí naunduraki marina minasaa mundinoo maridanoo. Mooseena sandufa akararufa mifa kuqirana kai nimidanoo, Anutuna maraquna fannoo kaqi marirana nimidanoo.

<sup>7-8</sup> Ooqai Anutufa Sinai aaqanasaa narí sandufa Mooseena qimamidanoo qaara ooni marasee minasaa akara rumaminau. Akara rumamidanoo narí Anutuna kaaqa areenarana kooroomambufanoo Mooseena oori afiri faqa kaaqa qamafufaqa Isaraee maqannaasa mina oori qafoofanoo nifu daroo daraa ufaqa rufiaqau. Marinoo Mooseena ooriki kaaqa qarafa kasooqagee taikamaree muqufi taikanau. Ooqai Mooseena sandufa faiqí kuqirana nimimarifa kaaqa areenaranakina ani ufa marufanoo maqee kamu Anutuna naaquqara andeeqara maraquna fannoo kaqi marirana nimimarifa mina kaaqa areenarafa firaqoo uriqararafa maridanoo.

<sup>9</sup> Narira ufa ameemaanai quqemariafa firaa kaaqa areenaranaki ani ufa marinanoo Anutuna andeeqaranaki quqee marifa mina kaaqa areenarana amana kai fee mariannoo fee sia amana kai firaqoo uriqaranoo maridanoo.

<sup>10</sup> Maqee maasa Mooseena sandufara maaqi qidaqa. Maqee maria kaaqa areenara ainaina fannoo firaqoo daroo daraa idanoo doo nauraa areenarana rafaqaqafusaifanoo doo mifa aiqareenoo.

<sup>11</sup> Mooseena sandufa qusasaa maru ainainafa mina areenarafa firaafa marinanoo naaru naaru marira ainaina areenarafa firaqoo uriqaranoo maridanoo.

<sup>12-13</sup> Maasa mi naaru marirafa anianinnanara asasamandee afeesidaqa paasoosamandee Yisuna ufa qimannimidaqa. Maasa sia Mooseena aanna reeqa qamunna qummaree nikaqasaa afisusee oorissaa areenarana rafaqaqafidaqa. Mooseefa qamunna qumareenoo Isaraee maqannaara narí ooriki takukandaa rimarina mina taikee marina qafeefoo qimasee qamunna oori afisinau.

<sup>14</sup> Mi aukuanna Isaraee maqannaara irirafa doo ititanoo marufaqa sia Anutuna ufa oosana iriqau. Mi kamuqooqari ani ani ufaqa maqee kamuqoo kaqi mi qamunnafara foora misa irirafa ititanoo marifaqa ooqeenaa moodaanaki kira ufa asaana ridaqa sia mina oosana iridaqa. Faiqí asauku mundiranasaa atooqafinanoo kai miqoo kai mi qamunnana fooqaana rafaqaa iannoo.

<sup>15</sup> Isaraee maqanna doo maqee kai Mooseena sandufa asaana ruafanoo mi qamunnafa kai misa irirana ititannimaqaidanoo.

<sup>16</sup> Mi qamunnana rafaqaairafa tamummaqara fasiqa ufamau kai kambiqaidanoo. (Ooqai Mooseefa Isaraee maqannaasa Isipa maqusaindari nifiqamaree Sinai aaqana ameemaanai oonureenoo Anutuna uiqaana maqa usakanau. Mooseefa mi uiqaana maqana usakanau. Mooseefa mi uiqaana maqanaki keeqafinoo Anutuna faqa ufa qi qiufanoo rafudamafufanoo maqusai faiqí anaasee maruqoo misa faqa ufa qirara ufannoo ooriki qafooanoo oori takukandaari marinau. Ufa takaseenoo kaqinni fufanoo ooriki takukandaarirafa ireeda kai rukeemarinau. Faiqí anaasee mina rukarana qafee maqi qimasee qamunna oori akuamaqee marinau. Kaifaa uiqaana maqaki Anutuna faqa ufa qirara keeqafinoo rafaqaa imarinau.) Mi tamummaqara fasiqafa minara maaqi qinau.

Mooseefa kaqinni marufanoo qamunna oori rafaqaafinoo marinau. Anutuna uiqaana maqaki keeqeenoo karaambaifa innai oori ubeekeenoo mi qamunnana rafaqaa inau.

<sup>17</sup> Akara fannoo karaambaifara qidanoo Anutuna maraqunara karaambaigee qidanoo. Karaambaifa maraquna mariqoo sia ititarafa maridanoo idukirafa maridanoo.

<sup>18</sup> Doo maasa aiqamausa doorisaa qamunna rafaqaa irausara foora maridaqa karaambaifa kaaqa gareenarafa innisaimbaqa doorisaara foora kaaqa gameeqeenoo aiqamai daroo daraa idanoo. Innisaimbaqa miqimammaree fidaqa Anutuna maraquna fannoo innisaimbaqa karaambaifa fooqaanaikamma qimaqanoo fidanoo fimarifanoo innisaimbaqa areenarafa firaanaikinoo fidanoo. Karaambaifa Anutuna maraquna saika maridanoo.

## 4

### *Anutufa narí amiqira ufa maqannoo auqira fasiqaki quqanau.*

<sup>1</sup> Anutufa maasa mandoosana akiqara dariraru sianoo narí nifauarana qimisaiifanoo marinara maasa namu Yisuna aufakiana qimannimiranaki quqaqisaifaqa nidaqa sia nikoonikaa idaqa sia kudoosaapaidaqa.

<sup>2</sup> Maasa namu asukunaki nimaria oosana nisaurira oosana faqa doo mareeqee ninaaqiannai aqusee nimeesugusee sia unnamaanna qidaqa sia nikaruqiranaki nidaqa kaqi akoomau faiqí nifusaa nidaqa. Maasa Anutuna ufa qumaree sia munu eendi mini eendidaqa anoona ufa qirana kai uqeereeqee akooqoo nifusaa quqaidaqa. Maasa miqi kaimmaseeqa qeeqa nirana marirana Anutuna afusaara foora miqi kaimmaseeqa aiqama maqannaasa nifusaa andeeqaanaqa misa naakirafa qiqaqamasee sia qaoo qifarannoo.

<sup>3-4</sup> Maasa amiqira fasaasa ufa qimannimunaqa akaqausa sia iriasa innaaruna aanara randaidaqa auigeera foora iasa marianara naaqooki ooni ititanoo maridanoo. Mi naaqoonaki ooni ititarausa maa maqanasaa manda afaanna Sadannafa misa naaqoo nifu ititaqaifanoo Anutufara foora moodaa karirafa asaku mundirafa mina kaaqa areenarana amiqira fasaasa ufa qoomara foora aninaqa misara sia qafaqee qimasee naaqoo nifu ititeenoo.

<sup>5</sup> Maasa namu sia qeeqara qidaqa faiqí anaasee qimannimidaqa, maasa asaku mundirana karaambaifa Yisuna minara kai kooroomannimidaqa. Maasa namu Yisuna auqu uqeeraidaqa Yisunara inni qimannimidaqa inniki rumbara fasiqara foora ainaina mannisaidaqa.

<sup>6</sup> Ooqai indaaru Anutufa asukunakiqari kaaqa qaranara qaani fee qufa mi moodaa Anutufa kai narí areenarana maqee maasa qitikuraki qoomara foora qeenoo. Anutuna areenarafa narí asauku mundirana oorisa areenaidanoo mi areenarana aufakiana innisaimbaqa iriaqee qimasee Anutufa innisaimba maasa qitikuraki qoomara foora qaidanoo.

<sup>7</sup> Mi areenarana aufakiana firaa munnimma aqimari ainaina fara foora marifa maasaki fifau maqannai auqira qafeera foora maasaki quqaqai faqa sia faiqí faiqi ainainimariana amanasaa ainainidaqa, fiqararafa marunara ainainidaqa. Anutufa mi fiqaramasee ainainirana narindikai marinara akooroo ianifeera narí areenara aufakiana maasaki fifau maqannai auqimaria ainainaki quqanau.

<sup>8-9</sup> Maasa Yisunara qimannimimarunaqa minara nikooqee mariasa dindari dindari fuseidaqa sia amiqimandee ititaafanoo Anutufa sandara apootaana quqasaifaqa miqoo quqasee sandeeqa maasa yaiffee fuanau yaiffee fuanau qimasee sia kaaqa quqasee minniseeqa, misa maasa qifaqamaree fiqa sia Anutufa kuqaa minniqiseenoo. Misa daru quqasaafaqa sia kaaqa kuqifaqa.

<sup>10</sup> Yisuna arundee dari dari isoofaqa qini qifaaqa ufaanakuru moomoo marifaqa maraqa nidaqa maaqi qidaqa. Mi ufaana kurunnannai Yisuna marirana maasa qifaaqasaa aiqamausa nifusaa kooroo ianifeera mina kuqirafa faqa ufaanakuru fannoo maasa qifaaqasaa marina mina kuqirana akooroo ianifeera maridanoo.

<sup>11</sup> Maasa kaqi marunaqa Yisuna naaru marirana maasa faiqí faiqi qifaqasaa koorooianifeera mina ufasaara kuqiranaki maqee maqee fidaqa.

<sup>12</sup> Minara maasaki kuqirafa kasinara inni Koorinti maqanaaki naaru marirafa kasidanoo.

<sup>13</sup> Tamummaqara fasiqa minara maaqi qimasee akara rinau. Qinee qeeqa irirana Anutuna ufasaa rusisaafannanara qimannimi qiafana. Qinee Pauroosa mi mau fidaqa qinee minara maaqi qidaqa. Maasa faqa irirana rusirafa marinara qimannimidaqa.

<sup>14</sup> Maasa maana faqa iridaqa, karaambaifaqa Yisuna kuqiranakinaana uqeeroofa maasa innisaimbaqa Yisuna faqa uqeera narí oorisa quqaqisaannoo.

<sup>15</sup> Maa aiqama ainainausa inni dadaaqirafa kambiqaidanoo Anutuna afaarirafa moomoo fasiqa anaasee iannai fifaqa iriseeqa misa dufi Anutunara qirafa firaaqoo kambiqafinoo mina amooqirafa firaanaikiannoo.

*Maasa maqee uiqaana maqakiara foora maridaqa.*

<sup>16</sup> Maasa minara iriseeqa sia kudoosaapaidaqa minnisaidaqa. Maasa faiqí qifaaqa kuqaa qumidaqa doo kuqirannai ubeekaidaqa daunduraki naafa faasaambaasaana fukaikakai iqa maridaqa.

<sup>17</sup> Kuqaa maasa maqee marunnanaki ufaasu unmaara darirafa maridanoo doo mifa kai firaa areenarana naaru marira areenarana sia amaniqaairana doo kaaqa firaatia qimiannoo.

<sup>18</sup> Sia maasa maqee qafee marunna ainainasaa maasa irirafa mundidanoo, maasa sia qafee marunna ainainara kai iridaqa. Akooqoo qafee maria ainainafa qusasaa taikaidanoo, sia akooqoo qafee mari ainainafa naaru naaru mariannoo.

## 5

<sup>1</sup> Maasa maqee maa maqanasaa marunna qifaaqafa uiqaana maaqa miqirafa rapeemambinanoo Anutufa innaarunnai maaqara foora narí moo usakaannoo, naaru marira maqa usakaqisaannoo.

<sup>2</sup> Doo maqee kamuqoo maasa qifaaqa uiqaana maaqara foora afisinoo marifaqa maridaqa innaarunai mari maqana afisiranara firaqoo ridaqa ikiraqaidaqa.

<sup>3</sup> Innaarunai mari maqana afisiqa sia kaqisamu akooqoora foora mari-  
anaura.

<sup>4</sup> Maasa qeeqa uiqaana maaqakiara foora qeeqa qifaaqaki maridaqa maasa qeeqa ummaara ameemaanai maridaqa faaqaridaqa. Maasa sia qeeqa maqasaa qifaaqa minnisararee qidaqa, maaqoo marunna qifaaqafa kaqi marinaqa naaru marira qifaaqa mina amuaaqa afisunauree qidaqa. Miqimmasainanoo ufaasu marinna ainaina naaru mariranakina keeqeenoo kukeeqafuanifeera qidaqa.

<sup>5</sup> Anutufa kai maasa deedaqamaqiseenoo mi ainainna kambiqainaqa maasa deedaqamaseenoo innaarunai oosana oosana aiqama ainaina qimi-  
aninnana mina ati maqee maria kamuqoo narí maraquna qimidanoo.

<sup>6</sup> Maasa maqee maqee paasoosirafa maasaki qumbiqanoo maridanoo, maana maasa maqee iridaqa, maasa maa uiqaana maqanaki maqee mari-  
daqa sia karaambaiqa maaqaki mirinni maridaqa.

<sup>7</sup> Maasa maqee marunafa sia qafee marunna aanafa maridanoo kaqi  
Yisunasaa kaqi mundufi sia qafarai fidaqa.

<sup>8</sup> Paasoosirafa maasaki qumbiqanoo maridanoo maa uiqaana maqafa maasa qifaaqa minnisee karaambaiqa faqa narí maaqara faqa minni f  
irinara faqa minara kai iridaqa ridaqa.

<sup>9</sup> Maasa moo uriqarara ainainara dididanoo maaqoo maaqaki fee  
maridee, meerai maaqaki fee marianauree, mina aidiramau firanara  
firaqoo ridaqa.

<sup>10</sup> Asauku mundirafa ufa qiminna faasaana maasa aiqamausa mina  
afusaa kikiqianaura. Kikiqamambuananoo narí kai maasa maa maqanasaa  
marunnana akiaqara amiqira ainainee mandainainee mina akiaqara aadu  
aadu qimiannoo.

*Asauku mundiranannai maasa Anutuna faqa moodaanaki kidaqa.*

<sup>11</sup> Maasa karaambaiqara rufiaranara iridaqa faiqí anaasee aaquqiman-  
nimaqaidaqa. Anutufa maasa anoona mariranara akooqoo iridanoo innee  
Koorinti maqannaasa maasa anoona marirana faqa amiqimasee abee  
iridee sia fee iridee.

<sup>12</sup> Maasa sia maa ufanannai maasa nuqu uqeeraidaqa maasa innee  
maasara nifaaqa amiqianifeera qimannimidaqa. Akaqausa faiqí afaaqa  
qafeemarianara kai asasimariasa sia aundurakinaa ainaina asasimariasa  
misa maasa diqifaqa innee irisee mi ufanannai rafaqa fuaqa.

<sup>13</sup> Akaqausa maasara furufarirausa maridammiafoo qiafaqa, mi fur-  
ufariara foora qiranannai maasa Anutuna auqu uqeeraidaqa miqidaqa.  
Akaqausa maasara sia furufarirausa andeeqarausa maridammiafoo qi-  
afaqa mi andeeqaranannai inni dadaaqiqanidaqa.

<sup>14</sup> Asauku mundirana amuqusirafa maasa rakisi qimaqaidanoo. Maqee  
maasa maanara iridaqa moodaa fasiqa fannoo aiqama fasiqa anaaseera  
kuquqimaqanau, minara faqa maasa maaqi qidaqa aiqama fasiqa anaasee  
mandoosana mariranakiqari kuqiara foora iqa maridaqa.

<sup>15</sup> Mifa aiqamausara kuqunnimaqasoonara kaqi mariasa minara irisee  
sia náriaraa kai irisee mana mana ifaranoo minara iriseeqa mina ufamau  
fidaqa andeeqefaranoo. Misara irisee kuqunnimaqeenoo findifunara  
mina ufamau fidaqa andeeqasee marifaranoo.

16-17 Doo maqee maaqooqari maasa sia faiqí faiqi iriranannai faiqí aanaaseera irianauranoo maqee maaqooqari oosandaraseeqa misara qimuqusianauranoo. Ooqai maasa asauku mundiranara faqa faiqí faiqi iriranannai minara iriafannana doo maqee sia miqidaqa doo maqee minara uriqarara fee qidaqa. Faiqí anaasee moo fannoo asauku mundiranaki atooqanoo marinanoo Anutufa mi fasiqa anaaseena ooqeenaa manda irirana doo taikeenoo fuka irirana aqoonna fasiqa anaaseera amuqusirana niminoo. Doo minannai Anutufa faiqí anaasee fukaikamaqai faqa maridaqa.

18 Mi aiqama anainausa Anutufinaindari kai anidanoo, maasa namuqaak-igá mariafannana narí asauku mundiranannai maasa mareeqeenoo narí faqa moodaanaki quqeenoo kafa maasara innee quandaki faiqí anaasee oonu mareeqee qini faqa moodaanaki quqaqee qinoo.

19 Maasa qimannimira ufa maaqimminoo maridanoo Anutufa narí asauku mundiranannai aiqama maa maqa maaqana afaaqasasa mariasa oonu mareeqee narí aqoondikiranaki quqanau. Anutufa faiqí anaasee aaqarana sia qafaida sia irida mara quqannimiqa idanoo. Mifa narí moodaanaki kira ufa maasasaa quqaseenoo innee faiqí anaasee mareeqee qini faqa moodaanakikirana inni nimida fee qinoo.

20 Doo maqee maasa asauku mundirana aanaiqikirausara foora maridaqa maasasaqari Anutufa aiqamausara nameera qidanoo. Maasa asauku mundirana ufa inni Koorinti maqusanaasa fuki faaki qidaqa innee Anutunara eedoo qifanoo mifa inni namuqaakiranakiqari quandakinoo inni aqoondikamma nimaqaani.

21 Anutufa narí andeeqarana innisaimbaqa naida qimianifeera narí amaaku qimamiseenoo maasa mandainaina aiqama qumareeqeenoo minasaa quqasoofanoo mina akiqara kuqinoo taikannimaqanau. Asauku mundirafa mandoosana siaifa miqinai.

## 6

1 Qinee Pauroosa qini faqa maria namusa maasa Anutuna aanaiqiki-rausara foora maridaqa Anutuna faqa moodaanaki ainainidaqa inni Koorinti maqannaasa fuki faaki idaqa doo innee Anutuna kaaqa afaarira anoona doo maraafanoo sia quqasaifanoo maqasaa aqufi rairaaiani.

2 Anutufa minara maaqi qimasee tamummaqara fasiqa qimannimufaqa akara riqau.

Qinee qeeqa didira aukwana innee qiniara dadaaqianifee qinna nameeraqirana iriqa.

Qinee asumu marirana nimira aukwana inni ufa irisee dadaaqiqa.

Qinee Pauroosa minara maaqi qidaqa. Maa kamuqoo kai Anutuna dadaaqirana maree maria kamuqoo maridanoo. Maqee faasaana Anutufa innaaruna asumu nimifaqa mareemaria faasaanafa maridanoo.

3 Akaqausa maasa inniki saikiranara aqeeaafoo qifoora maasa qeeqa rakisidaqa inni niku nimaarusirafa mariandoo qimasee eerairidaqa.

4 Maasa qeeqa aiqama ainainaki maasa Anutuna ainainira faiqi namu marunnanara kooroo iaqera qimasee firaqoo reendenamandee ummaara faqa kadaapirirana faqa tooqaamu darirana faqa aupurarana oosana oosana maraidaqa.

5 Maasa maa namusa darirana faqa karabusaki rumbaqaqarana faqa moomoo fasiqa aanoomandee aniree dari dariisoona faqa maqee miqidaqa.



Maasa daararee marifaqa sia faiqarana mareeqa kisaqasaa kadaapiriri ifaqa nifaaqa ummooqukamandee maridaqa ainainidaqa.

<sup>6-7</sup> Maasa qisakadiki qikairi siaisa amiqimandee andeeqasee marunnanannai faqa maasa iriranannai faqa reendeenamasee ubiasee mariranannai faqa qimuqusifaqa dadaaqunнанannai faqa maasa qeeqara Anutuna ainainira faiqi marunnanara kooroidaqa. Maasa Anutuna naaquqara maraqunannai faqa maasa anoona ufa kai qimarunnanannai faqa Anutuna afeekannai faqa maasa qeeqara Anutuna ainainira faiqi marunnanara kooroidaqa. Andeeqara oosana nimirafa maasa duru saamuara foora marifaqa akaqausa maasa daruafaqa misamunannai qeeqasaa rukiqasee misa naruani qimasee misamunannai misa narirara foora idaqa.

<sup>8</sup> Akaqausa maasara amiqira ufa qidaqa akaqausa manda ufa qidaqa, akaqausa maasara sukufa qidaqa akaqausa qimooqidaqa akaqausa maasara unnufa qidammiafoo qimariafaqa maasa anoona ufa kai qidaqa.

<sup>9</sup> Faiqi anaasee maasara fifau fasiqee qimariafaqa akaqausa maasara Anutuna ufa maraqa nuasee qimasee amiqimmasee maasara iridaqa. Akaqausa maasara kuqirausara foora mariaa maqi qiafaqa innee qiqafaidee maasa kaqi maridaqa sia kuqiqa maridaqa. Misa daruafaqa maasa sia kuqidaqa kaqi maridaqa.

<sup>10</sup> Maasa maqee maqee qifaaqa kudoosaapanoo marifaqa Anutunara oonu mafi irisaidaqa maqee maqee asasidaqa. Maasa kudi fasiqara foora maridaqa moomoo fasiqa anaasee innaarunai ainaina faqaasaikamma nisaidaqa. Maasa maa maqanasaa ainaina siaisa maridaqa aiqama innaarunaindaraa ainaina maasaindi maridanoo. Mi aiqama ainainannoo maasa Anutuna amiqira ainainira faiqiuqaindi marunnanara akooroidaqa.

<sup>11</sup> Oo qini qiqoondiuga Koorinti maqusai mariasa. Maasa inni akooqoo kooroommasee inni qimannimiqa qimuqusa oo raqafimarufaqa qeeqa daunurakinaana nimuqusira irirana inni qimannimiqa.

<sup>12</sup> Maasa inniara sia qeeqa qimuqusa rafaqa fusee kaqikaqoo ummeereeqa akooqoo aiqama qimannimiqa innee inneeqa kai inneeqa nimuqusa mandaikammida rafaqafusee sia maasara nimuqusi mari-afanoo.

<sup>13</sup> Innee qini faiqinamuara foora mariafaqa maqee qimannimianaura. Innee maasa daanna reeqa innee maasara nimuqusinaqa akooqoo maasa faqa ufa qiaqa.

*Sia Anutuna ufara nikooqee mariasa namufaqa moodaanaki ainainiaqa.*

<sup>14</sup> Oo Koorinti maqusanaasa innee Yisuna ufa irimariasa faqa sia irimariasa faqa sia moodaanaki qaindusira saqariara foora ainainiaqa, sia amana amana kai inni faqa fifaranoo. Naqimmasee andeeqarana faqa aaqarafa faqa naqimandee moodaanaki qaindusu maree fifaree, sia amana. Naqimmasee kaaqa qarafa faqa asukuna faqa moodaanaki mariannoo, sia amana.

<sup>15</sup> Naqimmasee asaku mundirafa faqa kudi fasiqa Sadannafa faqa moodaa ufara eedoo qifaree sia amana, namuqaa maridanoo. Yisuna ufa irimarifa faqa sia Yisuna ufa irimarifa faqa naqimmasee fee moodaanaki kifaree.

<sup>16</sup> Naqimmasee Anutuna amaana maqaki mariasa faqa tumunnai auqira afaanna faqaasa faqa moodaanaki kifaree, sia amana. Maasa kaqi marira

Anutuna amaana maqara foora maridaqa. Anutufa minara maa anoonu-fana tamummaqara fasiqa qimamufanoo akara rinau.

Qinee geeqa maaqa misaki usakasee mariana. Qinee misa Anutusa marianaqa misa qini qiku qisauku marifaranoo.

17-18 Minara karaambaiqa maaqi qimasee qimannimidanoo.

Mandoosana maree mariasa faqa moodaa maqusaki maridaqa misa mandoosanara eerairiaqa.

Innee mandainaina maree mariasa mandoosanara rufiasee sia mina umaraaqa. Innee miqidaqa anukaranaki marifaqa qinee aiqama ainaina uriqarara karaambaiqa fannoo inniara qinindi fee qinaqa innee qini faiqinamu qini qiraamummaaka marifaranoo.

## 7

<sup>1</sup> Oo qini qiyoondiuqa, mi qimafeekaikira ufausa tamummaqarausannai qimaqoo ufausa maasara qinau. Minara irisee innisaimbaqa oosana oosana qikairi qifaaqasaaqaraanee daunuraindaraanee aiqama findaukamaqusee Anutunara rufiada daaquqee marinaqa andeeqasee anukaranaki mariaqa.

*Pauroofa Koorinti maqannaasara asasidanoo.*

<sup>2</sup> Oo Koorinti maqusanaasa qini qiyoondiuqa, innikinaana maasa siamma moo fasiqa mandaikamma amaqaafanausa, maasa sia moo fasiqa mandoosanaki quqaafanausa maasa sia moonna rafaafafu amaqaasee mooainaina umaraafanausa, innee minara nimuqusinaqa maasa umaraaqa.

<sup>3</sup> Qinee sia inni niqirara miqidaqa ooqai qimannimiafanandee kai qidaqa qimannimidaqa. Maasa inni Koorinti maqannaara kaaqa qimuqusidanoo nididanoo innisaimbaqa kaqi maridee innisaimbaqa Yisuna ufasaara kuqi fee inni faqa moodaanaki mariana.

<sup>4</sup> Qinee inniara kuqaa Yisuna ufa irimariasee qidaqa qinee inniara nimooqidaqa asasidaqa. Maasa oosana oosana ummaaraki maridaqa inniara iriseeqa paasosidaqa asasirafa qumbiqeenoo rairaidanoo.

(Pauroofa Koorinti maqannaasa akara ruma Titusana amufanoo munu nimisee oonurandee Pauroofinai aninau. Pauroofa Koorinti maqannaara qini akarakinnaa ufara nanee fee qiaafoo qimasee maa ufana akara rumanimaqanau.)

<sup>5</sup> Maasa Maseedoonia maqa maaqai oonu Titusafa inni maqusaindari aniranara afeesida maridaqa sia qifaaqa quqeeqa. Yisuna ufa qimannimi marunaqa moomoosa dindari dindari anireeqa aanooqidaqa kaukaata qimarufaqa geeqa daundurari rufiarafa marifaqa innee Koorinti maqannaasara maasa akarakinnaa ufara faqa maasara rufieefoo qifoora qinee rufiadaqa.

<sup>6</sup> Maasa miqi mariafananoo Titusafa inni maqusaindari mai aniree maasa paqurinau. Mifa anunannai qifaaqa rumboosa amiqimarufa Anutufa maasa qifaaqa amiqinau.

<sup>7</sup> Sia Titusafa anirafa kai maasa qifaaqa amiqinau. Mifa inni maqusai oonuroofaqa innee mina idaaqammamaqoonara qimaqimufaqa firaa dufi dufi qiqa qifaaqa asasinu. Titusafa inni Koorinti maqannaasara qini Pauroosara kaaqa qafaqaa imariasee qinau. Mifa inniara nari mandainainara kuqaa mandainainee qimasee noori runusee amiqira qoo fidaqa qiniara manda ufa qimariasara saaqee qimasee qini dadaaqidaqa. Doo mi ufana iriseeqa qinee Pauroosa firaaqoo inniara asasidaqa.

<sup>8</sup> Qinee moo akara rumannimaqaafanafa mi ufafa inni qumaroofaqa innee mina qafamasee innee noori runusee inniqa mandoosana minnisaaqau. Qinee iriseeqa sia inni noori runiranara qaara daundura iriqa. Qinee inni noori runiranara iriseeqa sia kisaagasaa qimudao qiqqa qusasaa kai qimudao qiqqa.

<sup>9</sup> Doo maqee qinee firaqoo asasiidaqa qeeqa akara rumma inni nimaafannana minarau asasiidau. Inni nifaaqa ummaara reemarifa inni mandainainakinaana mareeqeenoo amiqirannai ubeekainara minara qinee asasiidaqa. Inni nifaaqa ummaara rarana sia inni narinoo Anutufa mina mareenoo inni dadaaqinoo.

<sup>10</sup> Nifaaqa ummaara rarafa Anutufa minannai inni maramareenoo faiqi nimuqusakinaana mara quandeeqeenoo innaaruna asumu mariranaki quqeeemarifa mi nifaaqa ummaara rarafa amiqirafa maridanoo kai fifau maqasaa nifaaqa ummaara rarafa mifa kuqimariafa maridanoo.

<sup>11</sup> Qinee Pauroosa pasa akara rumasee inni mandoosanara akooroo qiafanaqa noori runiusa mariafanoo. Inni noori runirana Anutufa qumareenoo minannai oosana oosana amiqira oosanauqa inniki auqinau. Maqee innee sia furufari mariafanoo noori runusee amiqimandee fimariafanoo. Innee inneeqa andeeqaranara koorooianifeera kaqa andeeqasee fimariafanoo. Innee mandoosanara maqee firaqoo nikooqaidanoo. Qinee Pauroosa inniki mandoosana kikiqusunaga innee irisee qini Pauroosara faqa Anutunara faqa dari maqi qimasee dauni mi manda oosanna andeeqee mariafanoo. Innee qini akara maraseeqa qiniara noori runida mariafanoo maqee innee qiniara nimuqusidaqa qiniara amiqira irirana irimariafanoo. Innee firaqoo Anutunara faqa irimariafanoo. Maqee moo fannoo inniki mandoosana marinaqa innee kaqi kaqi oonu qaoo qimasee afiqee mariafanoo. Ooqai qinee minara qimannimiiafanaqa innee sia maroofanoo mi nifaaqa ummaarararafa inni nisakadiki sia ikairi marina kooroo idanoo.

<sup>12</sup> Qinee akaraki afeeka ufa rumaqaafannana sia inniki aagee mari fasiqanara qimasee akara riqiafana, sia nari mandaikammamaqoonara qimasee akarariqiafanoo. Qinee Anutuna afusaa maridaqa, maa ufanara akara riqqa, innee maasasaa atooarana faqa rirana faqa mina firaafa inni nifusaa akoorooianifeera akara riqqa.

<sup>13</sup> Minara maasa Titusana ufa irunanoo nifaaqa amiqimminoo. Sia maasa qifaaqa kaifau amiqinoofau Titusana afaqa faqa amiqikaimminoo. Innee Koorinti maqusanaasa idaaqamasoofanoo mina afaqa inniara amiqufaqa maasa qafamasee asasiqiafana.

<sup>14</sup> Qinee inniara firaqoo inni nuqu uqeereeqa Titusana qimamiamannana, innee miqoo kai mina amana kai mariafanoo. Titusafa nidafammaseenoo asasinoo. Maasa maqee maqee ooqai anoona ufa kai inni qimannimi mariqiafana. Miqi kai iqa inniara Titusana qimamiamannufafa doo anoonaikinoo.

<sup>15</sup> Titusafa inni maqusai oonuroofaqa innee inneeqa mandoosanara irisee Pauroofa ufa firaana qiandoo qimasee rufiaaqa rufiaaqa iranannai faqa naindiriraranannai faqa afieeqee inneeqa maqusai quqasee qini ufa minasaqaraana irisee eedoo qimasee maroonara Titusafa qafamaseenoo qimaqimidanoo inniara rirafa maqee maqee firaanaikidanoo.

<sup>16</sup> Doo maqee qinee Pauroosa mina iridaqa maaqi qidaqa. Qinee sia inniara maqee qaara daundura marifaqa qinee qeeqa qifaaqa firaqoo innisaa quqaidaqa asasiidaqa.

## 8

*Yisuna ufa irimariasa akaqausa dadaaqira oosanara qidanoo.*

<sup>1</sup> Oo Koorinti maqusai maasa qikaqaafasaa mariasa. Yisuna ufara suqi-mariasa Maseedoonia maqa maaqaki mariasa Anutuna amiqi amiqirafa misaki saikinara innee iriaqeera qimannimidaqa.

<sup>2</sup> Firaam ummaarararafa misa kadaapi rirana nimirana. Marufanoo mi kadaapirirafa Yisunasaa atooqee marusa firaqoo nimanamandee qafanau. Misa miqiga maridaqa minakiqari firaqoo اساسامندee nariqa munnimma afaaramandee Yudeea maqannaasa Anutuna ufara suqimarusa dadaaqi naida nimiqau. Misa nari kudikiranara siamma iriqau kaqi nimiqau.

<sup>3</sup> Qinee maa ainainnara amiqimandee iridaqa qimannimidaqa, misa nari munnimma marunna amanakai nimiqau sia mina amana kai nimiqau kai fiqarammasee aabaa faqa nimiqau.

<sup>4</sup> Misa nari iriranannai aniree aranaiqi afeekaikamasee maasa iram-miriqa qiqau. Amanee maasa faqa Yudeea maqa maaqaki Anutuna ufara suqimariasa naararee mariasa maasa munnimma nimiqee dadaaqianaree. Nariqa mi dadaaqiranara sia ummaara fee qiqau adiafaairana qimimarianara maasa nimianauree qiqau.

<sup>5</sup> Maasa mi ufana iriseeqa اساسامasee tautiqa oo sia mi amiqira irirafa kammbiqeefoo qunaqa misaki kambiqeenoo. Maseedooni maqannaasa nariqa naundura irirana faqa nari ainaina faqa karaambaiqa naaree amisee quandaki Anutuna iriranamau nari marirana maasa faqa qimiqau.

<sup>6</sup> Maseedoonia maqannaasa oosana miqinoo marinara innee Koorinti maqannaasa faqa miqiaqeera Titusana fuki faaki qiafanoo inni qimannimidanoo. Ooqai Titusafa inni faqa maridanoo Yudeea maqanna nimianinna munnimmanara oosana arasee qimanniminou. Doo maqee Titusafa mi nimuqusira saikana kaifaa uqeerarara fuki faaki qidaqa.

<sup>7</sup> Innee Koorinti maqannaasa oosana oosana ainaina moomoo faqaasa mariafanoo. Innee Anutuna saqarikirafa faqa Anutuna ufa qimannimirana faqa irirafa faqa oosana oosana dadaaqira saika eedoo qimasee kasida uqeeree mariana faqa maasara faqa nimuqusimariana faqa mi ainainausa innindi moomoo maridanoo. Doo maasa inniara Yudeea maqannaasa nimaqeera faqa qidaqa inni afaararifa minaki faqa moomoo mariani, mi nimuqusira saikafa mariannoo.

<sup>8</sup> Qinee Pauroosa sia naamuaqira ufa inni qimannimidaqa naakapara ufa inni qimannimidaqa. Anaamuru dadaaqiranara naakapidaqa minannai inniqa nikaqaafassara nimuqusirana nimanamandee qafaidaqa inni Koorinti maqannaasa nimuqusirafa Maseedoonia maqannaasa nimuqusirana amanafee maridanoo fee qimaseeqa nimanammandee qafaidaqa.

<sup>9</sup> Innee asauku mundirana Yisuna maasa karaambaiqa amuqusira dadaaqiranara amiqimandee irimariafanoo mifa innaarunai ainainafaqaafa uriqararafa marinoo inniara irisee maa maqanasaa qumu ainaina siaifara maqi mafinoo marinou. Yisufa nari ainaina siaifara maqi iranannai innaarunai ainaina faqaasa mariaqeera miqi marinou.

<sup>10</sup> Yudeea maqannaasa narana feefaurira munnimma nimiranara qinee Pauroosa qini irirafa minara maaqi qidanoo. Innee ooqai aiqaqoo aukuanna Yudeea maqannaasa munnimma nimiraree qimasee suququqoo munnimmana narana feefauru maraaqee qimasee suqu quqasee minisoona maqee kaifaa uqeerasaifanoo fifi inanoo taikaannoo. Innee aiqama

maqannaasakiqari innee naaree iriseeqa mi saikana oosana uqeeree mari-asa mariafanoo.

<sup>11</sup> Doo maqee findifiqa mi saikana auqaifanoo taikaani. Indaaru innee minara ufa suqusee nimudaanai qimasee ufa qiqa fifaana maqee miqi kai iqa nimudaanai qimasee munnimma nimirafa taikafuani sia kisaagasaa mariani. Innee aiqama munnimma nimiseeqa inneeqa kuridifaara, qinee sia minarau inni qimannimidau. Innee inni munnimma aabaa marina mina nimiaqa sia marinafa sia aquaqa.

<sup>12</sup> Inni munnimma amanaikinaqa nimisainanoo Anutufa narindiara foora dufi dufi qiannoo. Sia amanaikinana aqusainanoo Anutufa sia minara dufi dufi qiannoo. Sia amanaikinana sia aqua.

<sup>13-14</sup> Qinee sia moo maqannaasa aufadarana nimirara inni Koorinti maqanna ummaara firaana nimidaqa, sia miqidaqa. Maqee aukwana inni narana firaafa mari kamuqoo narana siaisa dadaaqaqa, kasooqaqee moo aukwana innee mandainainaki marifaqa misa inni dadaqifaranoo. Miqidaqa aiqama amana kai mariaqa.

<sup>15</sup> Ooqai tamummaqara fasiqauqa minara maaqi qimasee akara riqau, Ooqai maqasaa narana moomoo suqimaru fasiqausa sia rairaa iqau. Maqasaa narana oodaa suqimaru fasiqausa sia naararee marinau, nimana kai marinau.

*Pauroofa Titusana faqa nari aqoonausara faqa qidanoo.*

<sup>16</sup> Qinee Pauroosa Titusana oosana qafamasee Anutunara dufi dufi qidaqa, maasa daanna raidanoo firaqoo inni Koorinti maqusanaasa dadaaqiraree qidanoo.

<sup>17</sup> Maasa minara Koorinti maqusai inni maqusai fuannee qunanoo mifa sia kai eedoo kai qinoo nari iriranannai asasammaseenoo innee iannai kafa fuannoo.

<sup>18</sup> Maasa moo fasiqa faqa mina faqa aqiqaanauranoo mi moo fasiqafa aiqamai Yisuna amiqira fasaasa ufa qimanniminoonufa marunara Yisuna ufara suqimariasa minara amiqira fasiqafee qidaqa.

<sup>19</sup> Sia mifa kai, aiqama Yisuna ufara suqimariasa mi fasiqanara inni Yuda maqannaasa nimianinna narana feefaurira munnimmana utaaqammasee anee Koorinti maqannaasa munnimma faqa akaqa maqannaasa munnimma faqa mara maree Pauroona saimbaqa Yudeea maqannaasa muru nimia. Miqinnanannai maasa nimuqusira saika marasee karaambaiqa areenarana faqa maasa eedoo qimasee dadaaqirana faqa kooroomambuannoo.

<sup>20</sup> Akaqausa raiqara ufa qifoora maasa amiqimandee inni moomoo afaaramandee nimifandinna munnimmana maasa rakisianaura.

<sup>21</sup> Maasa irirafa minara maaqimminoo maridanoo. Maasa Karaambaiqa Anutuna afusaa faqa maqasaa fasiqa nifusaa faqa andeeqaramau fidaqa rakisianaura.

<sup>22</sup> Titusana faqa moo fasiqa faqa indaaru fuagee qiaqa maqee maasa qikaqa moo faqa miqandasaa mara quqaanaura miqanda faqa fuannoo, maasa moomoo kari mina amanamandee qafaunanoo amiqimarifa maqee maqee eedoo qimasee dadaaqimarifa maridanoo. Doo maqee mifa inni Koorinti maqannaasara irisee mina irirafa inniki mundinoo marinara firaqoo asasammasee inni faqa dadaaqiannoo.

<sup>23</sup> Titusafa qini faqa moodaanaki inniara dadaaqimarifa maridanoo. Maasa qikaqaafasaa Titusana faqa innee iannai fimariaqanda maridaqa Yisuna ufara suqimariasa miqanda utaaqamaqaaqanda maridaqa, asaku mundirana areenarana maree mariaqanda maridaqa.

<sup>24</sup> Minamusa oonu raifaqa innee misara nimuqusimarinaqa rakisinni-maqaqa. Miqinnanara Yisuna ufara maqusa maqusa suqimarinausa Pauroofa Koorinti maqusanaasa nimooqiranara anoona ufa fee qiaqeera.

## 9

*Pauroofa Koorinti maqannaara narana mareefandinna munnimmana suquaqee qimaqoofa maridanoo.*

<sup>1</sup> Anutuna ufa irimariasa Yudeea maqannaasa munnimma nimirara qianara innee doo irimariafanoo qinee fifau akara rumannimageeqa.

<sup>2</sup> Innee eedoo qimasee dadaaqimariasa mariafaqa qinee iridaqa, qinee inni nimooqimasee Maseedoonia maqannaasa qimannimiqa. Qinee inniara maaqi qimasee qimannimiqa, Kirisa maqa maaqaki mariasa Koorinti maqusanaasa misa naaree maa eenda aiqarai aukwana eedoo qimasee deedaqiqau. Qinee miqi qimasee Maseedoonia maqannaasa inni Koorinti maqannaasara qimannimifanaqa doo misa faqa mi ufana irisee maasa faqa dadaaqiraree qimasee findifia akaqa maqannaasa kai sia findi fia.

<sup>3</sup> Qinee inniara ufa qiafannana fifau ufa kai qianoora qeeqa qikaqaafasaauqa mareeqee inniki quqeeqa misa oonuree inni munnimma suqu moodaaqoo quqaqeeera qini ufa anoonaikianifeera inniki quqaqee qidaqa.

<sup>4</sup> Qinee faqa Maseedoonia maqannaakaqausa qini faqa inni Koorinti maqusai ooquraifaqa sia deedaqiranaki maasa ooquraana innee nisaurifaqa maasa faqa Maseedoonia maqannaasa qini faqa ooqu fifandinausa nisaurifoora qinee inniara qifaaqa quqasee inniara ufa qiqa.

<sup>5</sup> Qinee minara iriseeqa qeeqa qikaqaafasaauqa niqigamasaunaqa indaaru ooqureeqa inni nimifandinna munnimmara deedaqamandaifaqa qinee inaaqianna ooquraanaqa innee inneeqa iriranannai kai nimira oosana koorooiaqa sia qinee qimannimiana nimiaqa inniqa nidirafa kai qinaqa kaqi nimiaqa. Ooqeenaa irirafa maaqimminoo maridanoo.

<sup>6</sup> Moodaa asumu ummaqimarifa moodaa kai aiquanoo moomoo ummaqimarifa moomoo aiquanoo. Qinee Pauroosa minasaqari inni dadaaqira oosanara maaqi qidaqa.

<sup>7</sup> Innee minara irisee inneeqa iriranannai kai munnimma aquaqa, sia mina aqusee ufaqirafa mariani sia moonara daakapaifaqa aqi fee qia Anutufa asasammandee aqimari fasiqanara aididanoo minara asasammasee aquaqa.

<sup>8</sup> Inniqa nimana kai narana maraaqee munnimma Anutufa amana nimiannoo sia inni munnimma amana kaifau nimmiannoo aabaa faqa niminaqa minannai nana ainainaree dadaaqirafa kambiqaanoo fee innee faqa amana minannai dadaaqiaqa.

<sup>9</sup> Ooqai tamummaqara fasiqauqa minara maaqi qimasee akara ru-maqoofa maridanoo.

Amiqira fasiqauqaindi kudi fasiqauqa afaaridaqa nimidaqa.

Misa amiqi amiqirafa sia taikaannoo naaru naaru mariannoo.

<sup>10</sup> Anutufa inni Koorinti maqannaakaqa dadaaqammiannoo. Mifa asumu faqa neemaria narana faqa nimimarifa maridanoo inni nimana asumu inni nimisainaqa ummaqusaifanoo Anutufa kambiqarana nimiannoo innee afaaramandee moo maqannaakaqa narana dadaaqifanoo innee kafaa kafaa miqiaqee qimasee inni Anutufa irairairana nimiannoo.

<sup>11</sup> Anutufa maqee maqee narana ainaina moomoo niminaqa innee mina qafeeqa amana maqee maqee akaqausa dadaaqiaqa. Innee maasasaqari

dadaaqimaria maqannaasa inni dadaaqiranara quandaki Anutunara dufi dufi firaqoo qifaranoo.

<sup>12</sup> Inni dadaaqira saika fannoo sia Anutuna ufara sugimariasaa kai dadaaqidanoo Anutunara dufi dufi qirana faqa oondainni nammariara foora aqufidanoo.

<sup>13</sup> Inni dadaaqira ainainirafa innee Anutuna ufamau firana kooroo iannoo. Moomoosa mina qafammasee Anutuna amooqifaranoo misa inni afaaramasee naida nimirana qafammasee kafaa innee asauku mundirana fasaasa ufasaa atooqafi mundiqa marinnana faqa qafammasee sia ufa kai qimasee anoonee qimasee Anutuna amooqifaranoo.

<sup>14</sup> Innee dadaaqimariasaa inniara nidimarinaqa inni amiqi amiqiranara innaaru qifaranoo. Anutufa mookira afaarirana inni nimunara Anutufinnai inniara nidimarinaqa inni amiqi amiqiranara innaaru qifaranoo.

<sup>15</sup> Anutufa nari afaarinoo maasa qimunara mina uriqararafa aiqama ainaina arusee firaafa maridanoo minara maasa aiqamausa dufi dufi qimamaqaaqa.

## 10

### *Akaqausa Pauroona saikara ufa qufanoo ititoo ufafa.*

<sup>1-2</sup> Qinee Pauroosa maa ufana reendeenamandee qimannimidaqa. Akaqausa qiniara nianai maridanoo aanoo ufa kai qimari fee inni faqa maridanoo reendeenidanoo fee qidaqa. Qinee miqi qianara maaqi qidaqa. Qinee asauku mundirana amiqi amiqirana faqa ireeda marira oosana faqa mina afusaa maridaqa reendeenamasee qimannimidaqa qinee innee iannai oonuraanaqa sia qini qirana fundakuaqa maasara maqasaaqarara irirana irisee qimariaafoo qimariasaa amana aanoomannimaqaanaura, sia sia amana mariannoo, amana mariannoo.

<sup>3</sup> Kuqaa maasa maa maqa maaqanaki maridaqa sia minakinaa irirana marasee rakiara foora idaqa.

<sup>4</sup> Maasa rakimaria duru saamu sia maa maqa maaqanakinaa duru saamuara qidau. Maasa Anutuna afeeka ufa marina minannai duru saamuara foora rakidaqa. Minannai maasa Sadannana faandaamura rapeepamma aqidaqa.

<sup>5</sup> Maasa mi duru saamunnannai unnufa qimariana doo kuqaridaqa. Minannai faqa Anutunara kooroo ira ufara qaoo qimasee noori uqeerasee maasa minara uriqararausee qimariasaa minannai misa faqa naridanoo. Maasa mi unna ufana qimariasaa uriqaranoo marina Anutuna duru saamuara foora qumareeqa ooru rarisameeqee maqasaa muqufi rudammiqi quqaidaqa. Maasa qeeqa qitikurakinaa mandirirana aiqama oosana oosana mandirirana rakiranannai naruseeqa aiqama oonu qumaree ani qumareemeeqee karaambaiqa asauku mundirana aramandunnai quqasainanaqa qeeqa qitikurakinaa irirana mina ufamau fuageera.

<sup>6</sup> Innee Koorinti maqusanaasa miqirausa mariafanoo maasa inni mareeqee asauku mundirana aramandunnai quqasoofaqa mina iriranaki fimariafanoo innee minakiqari kaqi runnai fifaqa qini qirana fundakusaifaqa maasa inni nariara foorammasee rarisameeqee quqasaanaura, sia misa qiandee reendeena kai ianaura aanoommasee qianaura.

<sup>7</sup> Innee faiqi nifusaa akooqoo ainaina faiqi nipata kai qafamasee eedoo qimariasaa aqee mariasaa mariafanoo sia naunduraki qafee mariasaa mariafanoo. Inniki moo fannoo asauku mundirana ainainira fasiqee qimarifa

sia nariara kai miqi marunausee qiannoo maasara nipata mandaikirausee qimariana maasa faqa asauku mundirana ainainira fasiqa maridaqa.

<sup>8</sup> Asauku mundirafa maasara qinee niqifaafanna fasiqausee qimasee mi uriqarara afeekana qimufaqa minara firaaqoo ufa qufaqa innee irisee qiniara firaaqoo nari amooqimari fee qiafaqa iriseeqa sia minara qisauridaqa, sia qini afeeka inni rakeemma aqirafa maridanoo inni dadaaqirafa pooduqammannisarafa maridanoo.

<sup>9</sup> Qinee sia qeeqa pasannai inni rufiarana nimiraree qidaqa.

<sup>10</sup> Akaqausa maaqi qifaranoo Pauroofa nari akara riranaki afeekaikamandee qimaqimidanoo, nari uqanna anireenoo reendeenidanoo nari ufa faqa fifau mariannoo.

<sup>11</sup> Miqi qimariasaa maa ufana iriaqa, maasa nianai maridaqa akaraki qianna ufafa faqa naaqaqari marida qimariannufafa faqa amanamana kai mariannoo.

<sup>12</sup> Miqi qimaria fasiqausa nariara uriqararausee qidaqa miqi qimari-afanoo. Maasa sia miqi qimariasasaa qeeqa qimaniana. Misa furufari mariasaa maridaqa. Misa nanasaa fee nari amani nari amani idee nari iriranannai kai nariqa uriqarara ainainee qimasee minannai kai nari nimanidaqa. Sia Yisuna iriranannai nari amani nari amanidaqa.

<sup>13</sup> Maasa qeeqara qiana maasa qeeqa qimooqira oosirana sia fiaikataanaura miqooqari kai oorurandanoo mariannoo. Qinee sia akaqausa naanna ree moona oosiranaki mariasara qeeqa qimooqianauroonoo qiqa qoosuki marinausara kai qeeqa qimooqiana. Anutufa maasa saika maree marunna oosirana nari kai quqaqafanoo maridanoo minaki kai maridaqa innee faqa minaki kai mariafanoo.

<sup>14</sup> Innee minaki marianara iriseeqa inniki oonureeqa sia finnaaqaraidaqa. Maasa asauku mundirana amiqira fasaasa ufa mara mareeqa sia mi oosirana fiaikateeqa minaki kai maridaqa innisaimbaqa mariqiafana.

<sup>15</sup> Maasa Anutufa qimu oosiranaki kai inniki ainainidaqa, akaqausa fiaikatammasee ainainidaqa maasa sia misa fuaqoo fidaqa qeeqa ainainiranara qeeqa qimooqidaqa. Maasa Anutufa qimu oosiranaki maqee maqee miqoo kai minaki kai ainainidaqa maasa inniara maaqi qidaqa, Koorinti maqannaasa Anutunasaa atoarafa firaanaikinoo maasa saika mi oosiranaki firaanaikiannoo.

<sup>16</sup> Inniki ainainirana taikasee miqooqari kai inni finnaaqareeqa moo atinai moo fannoo sia ainainimarinaki oonuree minaki amiqira fasaasa ufa qimannimiana. Miqimmasee sia qinee akaqausa naanna reeqa misa moosaa afuqaki ainainamasee nari nimooqidaqa. Qinee sia miqianauroonoo qeeqara fukasaa moo afuqakiara foora ainainianauroonoo.

<sup>17</sup> Ooqeenaa tamummaqara fasiqauqa minara maaqi qimasee akara riqau.

Faiqi moo fannoo sia nari amooqirafa mariani.

Karaambaiqa auquqoo ainainara kai amooqiaqa.

<sup>18</sup> Qinee Pauroosa minara maaqi qidaqa. Karaambaiqa fannoo moo fasiqara amiqira fee qinafa kai amiqira fasiqa mariannoo, nari kai nariara amiqira fasiqee qinafa sia anoona marina fifau mariannoo.

## 11

*Pauroofa unna amaana ufa qimariasara aaquqima nimaqaidanoo.*



<sup>1</sup> Inni Koorinti maqusanaasa qinee Pauroosa furufaramandee qimannimianaqa irisee sia minnisaaqa kaqi minara irisee sia minnisaaqa kaqi minara irisee mariaqa.

<sup>2</sup> Qinee inni Koorinti maqannaasara qeeqa qiraamunara foora maree-qeeqa asauku mundirana utaaqama amaqaqaunanoo minaindikiqa mariaqeer minara rairaiqidaqa. Innee andeeqara maanaaqara foommafiqa mina faqa mariaqa. Maqasaa qaraa rairaiqiranau nimidau. Anutunaindaraa rairaiqirana nimidaqa.

<sup>3</sup> Ooqai sakani fannoo nari kaaqa irira unnufannai Eeuana akaru qundee kai inni irirafa faqa iandoora. Asauku mundiranasaa kai inni irirafa amiqimandee andeeqasee mundinoo mari inanoo kaqi runna fifoora minara qinee inniara rufiidaqa.

<sup>4</sup> Ooqai indaaruu maasa Yisunara qimannimiafanaqa. Miqooqari maasa fuafanaqa akaqausa innee unnai oonurandee inniki aniree inni unna amaana ufa qimannimiqa. Akaqausa dapi fasiqauqa anireeqa Yisunara moomau qimannimufaqa innee aaqamaseeqa اساسammasee misa mara quqaseeqa misa manda ufamau fimariafanoo. Misa maraquna faqa misa unna fasaasa ufa faqa sia maasa qiafannamau qimannimiafaqa nariara moomau qimannimiafaqa innee kaqi maraafanoo.

<sup>5</sup> Mi unnaqira fasiqausa nariara Yisufa niqiqoo fasiqausa uriqararausee qidaqa. Qinee Pauroosa sia misa ureeqarasau maridau misa uriqararausa maridaqa.

<sup>6</sup> Misa ufa akoofasauqa mariafaqa sia qinee amiqimandee misa naanna raunasa mammaqidaqa kasooqatee ufa qimannimidaqa, iriranara amiqimandee iriseeqa misa oorinaaqaramasee qimannimiqiafana. Maasa aiqama kari oosana oosana ufannai maasa amiqira irirana akooqoo kooroommasee qimannimiqiafana.

<sup>7</sup> Qinee sia unnaqi maria fasiqausa naanna reeqa qinee Anutuna amiqira fasaasa ufa inni qimannimidaqa kaqi kaaqoo mina akiaqara munnimma moodaa faqa sia uqanna maraqiafana. Innee Anutuna afusaa uriqararausa mariaqee qimasee qinee reendeenamafiqa oorudupi mafifaqa qeeqa ainainiranannai qeeqa narana ainaina mara naidaqa sia inni narana mareeqa. Qinee aaqaidee miqi mari qiafana.

<sup>8</sup> Qinee inniki ainaini marunaqa moo maqannaasa Yisuna ufara suqimariasa misa nari narana marara munnimma qimiafaqa qeeqa narainaina minannai maraqiafana. Qinee inni dadaaqidaqa misa munnimma umuariara foora maraqiafana.

<sup>9</sup> Qinee inniki mariafanna kamuqoo qeeqa narana munnimma sia marufaqa sia inni munnimma moodaa marasee narana mara naqiafana. Qini qikaqaafasaaqa Maseedoonia maqannaasa nariqa munnimma mareeqee qini qimana kai qimufaqa marasee narana mara nee mariqiafana. Ooqai miqi mariafannana kafa maqee maqoo marunnaqooqari sia innindi maraanaura. Innee aaqarana marasaifaqa naqimmasee fee inni aaqara ufannai andeeqannisaanauree inni narana munnimma qimunara irisee qisauranoora. Qinee Pauroosa minara inni qimannimidaqa.

<sup>10</sup> Qinee asauku mundirana anoona ufa oorisa maridaqa qima afeekaikira ufa qimannimidaqa sia uqanna inni narana ainaina maraanauranoo aiqama Kirisa maqa maaqaki mariasa narana ainaina sia uqanna maraanauranoo, sia moo fannoo qini ufa aruannoo.

<sup>11</sup> Qinee nanaree maa ufana inni qimannimidee. Qinee inniara qimuqusirana siasee maridee maa ufana qimannimidee. Qinee inniara qimuqusimarunnana Anutufa doo iridanoo.

<sup>12</sup> Ooqai iafanandee kai iqa maqee sia inni narana munnimma maraanaura. Unnaqira niqiqoo fasiqausa inniki ani mariasa inni narana munnimma maraidaqa náriara Pauroona ainaini marina aana raidee qimasee maasa faqa niqiqoo fasiqausa maridee qifoora sia qinee misa naanna ramasee inni narana munnimma maraanaura. Sia qinee nári nifaaga mara maree urimaria oosana dadaaqianaura.

<sup>13</sup> Mi fasiqausa sia kuqaa niqiqoo fasiqausau maridau misa nikaru qira niqiqoo fasiqausa maridaqa, nariqa ainainiranara unna ufa qimasee asauku mundirafa anoona niqiqoo fasiqausara foora quandakiqa misa nimammana usufiqa nikaru qidaqa.

<sup>14</sup> Sia minara tautiaqa, Sadannafa faqa miqi kai imarifa maridanoo, mina aanandaidaqa miqidaqa, mifa kaaqa qara qangiroo nimammana usufinoo marifa marifaqa misa mina aannandaidaqa miqidaqa.

<sup>15</sup> Sadannana ainaini maria fasiqausa andeeqara fasiqauqa nimammana usufiqa ainainirafa sia firaa ainaina, náriindi maridanoo. Kasooqagee taikara aukuna andeeqasee mi manda oosanna amana kai mareefaranoo.

*Pauroofa Yisuna ufasaara aupurarana maree marunara kooroo inau.*

<sup>16</sup> Qinee kafaa inni qimannimidaqa sia moo fannoo qiniara furufarira fasiqee qiannoo. Inniki unna ufa qimaria fasiqausa furufarirauisa firaaqoo nári nuqu uqeeraidaqa nári nimooqimariasa maridaqa. Innee qiniara furufarira fasiqee qifaqa qinee faqa furufaramasee misa naanna raanaura.

<sup>17</sup> Karaambaiqa sia maasara miqiaqee qifaqa qinee kaqikaqoo furufaramasee misa naannaree qeeqa qimooqianaqa innee mi unna qimaria fasiqausa ufa iriandee iqa qini ufa faqa iriaqeera.

<sup>18</sup> Moomoo unna ufa qimariasa faiqí faiqi irirana marasee nári nuqu uqeeraidaqa nári nimooqidaqa. Doo qinee faqa miqimmianaura.

<sup>19</sup> Innee Koorinti maqannaasa inni irirafa firaaqoo marisa mariafanoo furufarira fasiqauqa ufa qimariasa innee asasammasee misa marasee misa ufa irimariafanoo.

<sup>20</sup> Misa inni nikaruqimasee inni ainaina ummuari mariasa maridaqa, misa innikinaa uriqarausara foora maridaqa inniara miqiaqa maaqiaqa qimariafaqa misa ufaanara foora fufusee inni rarisameeqee minaki mara aridaqa. Misa náriara uriqararausee qidaqa inniara ureeqarausee qidaqa. Misa nisaukusamu inni noori rukamidaqa. Misa miqi mandee inni nimiafaqa innee aaqamasee kaqi misa mareeqee inneeqa ufa suqiranaki quqasee innee misa ufa amiqimmasee irimariafanoo.

<sup>21</sup> Qinee Pauroosa innikina mariafannaqoo misa oosana maraaqaana qinee qisauridaqa qimannimidaqa qinee maparaa imarunauisa sia misa oosana maraqaafana. Inniki unnaqira niqiqoo fasiqausa nariqa nuqu uqeerasee nári nimooqidaqa qinee misa furufarirana amana kai qeeqa furufariannana qimooqianaqa iriaqa.

<sup>22</sup> Misa náriara sia Kirisa maqannaasa ufa kai qidaqa maasa qikeeku qikaaku Heeburu ufa qimarunausee qiafaqa qinee faqa miqi kai qimarunauisa maridaqa. Misa náriara Isaraee maqannaasa Anutuna utaaqa maqoosa maridee qiafaqa qinee faqa misa kai maridaqa. Misa náriara Abarahaamana aiku asauku Anutuna qima afeekaikira ainaina maraanausee qiafaqa, qinee faqa misa kai maridaqa.

<sup>23</sup> Misa náriara asauku mundirana aiku asauku maridee qiafaqa qinee faqa furufarira fasiqara foora qidaqa qinee misaki misa uriqararausa maridaqa. Qini asauku mundirana mi ainainnara irunnana misaindi ooraqaranoo maridanoo. Qinee Yisuna ufa saara karabusaki misa urinnaaqaramasee moomoo kari rumbeeqa. Raitasamunnai qifaaqa ateekeeufa moomoo kari misa narirana urinnaaqaramasee qini qifaaqa ateeqaqau. Qinee kuqirara madikakiqari moomoo kari misa narirana urinnaaqaramasee findi fiqa.

<sup>24</sup> Moodaannai qisaukunamu kari Yuda maqannaasa raitasamu dari-mariqau, moodaa fasiqa aiku asauku taikasee moo fasiqa qisaukuqara faqa moodaannai qiku faqa dinni qiku eera kai muqu quqasee kari minannai dariqau. Sia moodaannai miqimandee dariqau, moodaannai qisauku amanasaa miqimandee daru qimaqaqau.

<sup>25</sup> Roomma maqannaasa faqa qaaramoo kari miqi uqannamandee dariqau. Moodaa kari misa oonisamu misa daru qimaqaqau. Qaaramoo kari ooruku nammariki sipaki moo maqusai Yisuna ufa qimannimirara fidaqa sipa fannoo mandaikufaqa ooruku nammariki ukunnaqa mariqifana sia kuqiqiafana. Moo kari miqi mambufaqa eendaki faqa faasaana faqa ooruku nammari qambaana qimmapiqafana.

<sup>26</sup> Qinee Yisuna ufa qimannimiqa nimariafanaqa moomoo aukwana maqusa maqusa nuafannanakina qinee moomoo kari qimeeke mariqifana nammari aufunaki faqa nipuraraa fasiqauqaki faqa Yuda maqannaasaki faqa aanaamuru mariasaki faqa firaa taunaki faqa kaasau maqa maaqa oombura maqa maaqaki faqa ooruku nammari firaa farumaki faqa qikaru qimaru aqoondisa faqa misauqakina moomookari kuqirara qimeekeqa.

<sup>27</sup> Qinee minaki fidaqa kadaapirirana faqa tooqaamu darirana faqa maraيداqa moomoo kari sia faiqeeqa, qinee daararee marufaqa nammariara didimarufaqa nimariqiafana, qinee moomoo kari qini maaqa faqa narana faqa qamunna faqa sia marufaqa kaqi qisukunni faiqaqa nimariqiafana.

<sup>28</sup> Moomoo ainaina ummaara maraqa nuafannana kiqari moodaa ainainara kai qianaura. Maqusa maqusa Yisuna ufara suqimarianara kai qinee oonumafi iriqa nidaqa.

<sup>29</sup> Moo fannoo misakiqari ummooqukinoo kudoosaapaifaqa qinee faqa mina aanna raidaqa kudoosaapaidaqa. Moo fannoo misakiqari mandainainaki aqufifaqa qini daundura faqa rapikifaqa mi ummaarana maraيداqa.

<sup>30</sup> Qinee qeeqa qimooqiqa qeeqa ummooqukiranara qimooqianaura.

<sup>31</sup> Anutufa maasa karaambaiqa Yisuna akoofa naaru naaru mina auqu amiqi amiqirafa kai mariani, mifa kai qiniara sia unnaqi mari fee qidanoo, iridanoo.

<sup>32</sup> Ooqai qinee Damasakusa maqusai mariafananoo misa karaambaiqa mina auqu Areetasafa narí ureeqarana aqiqoofanoo narí sundia namufaqa maqusa kooqiki ititafufaqa qini qumaraanee qimasee maqusa kooqikiaga rakisimariqau.

<sup>33</sup> Qini qigoondiuga minara irisee kaqitinai qini mareeqee firaa pateeuqaki rumasee sanda minasaa qususee faandaamura meerai marufaqa miriqoo qambaanaqari kaqikaa kooqi auqiranakiqari qini ruqiaeeqeeqa quiqa quiqa qufaqa maqasaa aqufufaqa quqasee sandaqiafana.

## 12

### *Pauroona afu pisipasamandee uqafiqoo ufafa.*

<sup>1</sup> Qinee qeeqara qimooqianafa sia anoonai kiannoo, kaqi fifau qeeqa qimooqianaura. Karaambaiqa qifu pisipasamandeenoo kukeeqara ainaina kooroomma qimunara qimannimianauranoo.

(Anutufa Pauroona uqeereenoo innaarunai quqasoofanoo innaaruna ququsakinaa ainaina qafoonara narí auqu kukeeqasee Koorinti maqannaasa qimannimidanoo moo fasiqa fee qidanoo.)

<sup>2</sup> Ooqai qinee Yisuna ufa irimaru fasiqanara iriqia. Karaambaiqa Anutufa kaqi kai mina uqeereeqeenoo qaara innaaruna ooraagareenoo qaaramoo kiranaki Anutufa marunaki quqanau. Mifa kuqaa fee afiqa miqoo quqanoo fee inau kai afu pisipasamaseenoo mina amana mara uqeereeqeenoo innaarunai quqanau fee inau. Qinee sia iridaqa Anutufa kai iridanoo.

<sup>3</sup> Qinee kafaa qimannimiqa mi fasiqana uqeereeqeenoo innaarunaki moo auqu Paradisee minaki quqanau. Kuqaa fee miqinoo fee afu kai fee pisipasinoo fee Anutufa kai iridanoo.

<sup>4</sup> Mi fasiqana miqoo quqasoofanoo maridanoo oosana oosana ainainara irinau sia faiqí ufa amana qimari ainaina irinau naaquqara ainainara Anutufa qaoo qinau sia faiqí minara qimannimianne qinau. Sia faiqí qira ainainara irinau.

<sup>5</sup> Miqinna fasiqanara qinee amooqianaura sia qeeqara qimooqianaura qeeqa ummooqukiannanara qimooqianauranoo.

<sup>6</sup> Qinee qeeqa qimooqifau sia furufarirafa mariqini kuqaa anoona ufa kai mariqini. Qinee sia qeeqara qeeqa qimooqianaura. Faiqí anaasee qini dooki qiqafamasee qini dookinaa ufa irisee nariqa kai qiniara iriaqa. Qinee qeeqa duqu uqeeraranannai misa fifau qini duqu firaaqoo uqeeree foora.

<sup>7</sup> Qinee amiqira ainaina naaquqara amiqira ainaina qafaafannanara qiqa duquara firaaqoo uqeeraifaqa aaqaranaki fuanoo Anutufa Sadannanara kaqikaqoo eedoo qufanoo qifaagasaa moo aupurarana qimiqoofanoo maqee maqee darimariafaqa sia qeeqa duqu uqeereeqa kaqi qumee kai andeeqasee marianifee qimasaida darimarifaqa maridaqa qidaqa.

<sup>8</sup> Qinee qaaramoo kari karaambaiqinnai innaaru qiqa anee maa aurirana maraquqisaannee qiafananoo mifa qaoo qimasee qinau. Qeeqa kaqi nimira dadaaqirana amiafanafa doo mifa kai doo ani amana mariannoo, qiqa afeeka fannoo kudoosaapee mariasaki amiqi mandee kambiqaidanoo.

<sup>9</sup> Qinee Pauroosa mina iriseeqa maaqi qidaqa qinee qeeqa kudoosaapee marunnanara اساسammasee amooqidaqa. Asauku mundirana afeeka fannoo qini rafaqa fuanifeera qeeqa ummooqukiannanara amooqidaqa.

<sup>10</sup> Asauku mundirana ufasaara mandufa faqa kudoosaaparana faqa kadaapirirana faqa, Yisuna ufasaara darirana faqa tinoo taanoo rirana faqa tinaakurirana faqa qiminaqa mareeqa doo amana amiqira fee qianaura. Qinee qeeqa kudoosaapee marunna kamuqoo mi kamuqoo kai afeekaiki-daqa.

### *Pauroofa narí urinaaqarara ufa qimaqoofa.*

<sup>11</sup> Qinee inniki ani maria fasiqausa unnaqira niqiqoo fasiqausa naanaraqa maridaqa furufarira fasiqara foora maa ufana qimannimidaqa. Inneeqa kai inni oosana fannoo qini mara furufariranaki quqaqisaidanoo. Innee Koorinti maqannaasa qiniara Yisuna anoona ufa qimaqimi mari fasiqa fee qiaqaana. Innee inniki ani maria unnaqira niqiqoo fasiqausara fifau unna qidaqa uriqararausee qimariafaqa misa qiniara ureeqara fasiqee

qidaqa. Kuqaa qinee kaqi fifau fasiqa maridau qinee sia misa ureeqarausa marunaiqini, misa urinaaqararausa maridaqa.

<sup>12</sup> Qinee kuqaa Yisufa diqiqoo fasiqausa maridaqa aiqama ainaina kooroomannimaqee mariafanaqa qafee mariqau. Innee sia irufaqa qinee kaqi reendenamandee uqannifiqee mariqiafana. Faiqi sia amana auqaaqaira ainaina faqa naaquqee maru ainaina faqa Anutunara faqa kooroomannimaqee maru ainainna faqa reendenamandee uqannifiqaafannana. Minannai kai qinee niqiaafanna fasiqausa marunannara kooroomma nimaqaqiafana.

<sup>13</sup> Qinee maqusa maqusa Yisuna ufara suqimarusa faqa inni saimbaqa faqa amana amana kai inniki maridaqa qimannimiafannana. Sia misa amiqimannimaqasee inni mandaikamma nimaqasee qimariqiafana. Moodaa ainaina kai inniki moo kiquafanafa mifa kai qeeqa narana munnimma sia amanaikufaqa qinee sia inni narana munnimma iramirisee mareeqa. Mi moodaa ainainnara kai iridaqa qinee aqeeffee miqi fee qidaqa. Innee moo ainaina akiaqara minni qisaaqa.

<sup>14</sup> Qinee ooqai inni maqusai qaara kari fuafanausa kafa maqee qaaramoo kifaqa doo qusasaa fuanauranoo, fidaqa sia inni narana munnimma ainaina maraanaura. Faiqi aanaaqiuqa sia nari ninaukoo narana munnimma ainaina nimidaqa, misa kai nari faiqi namu nimidaqa qinee inni nikausara foora maridaqa qeeqa narana munnimma aiqama faqa qeeqa marirana faqa inni asasammandee nimirammidaqa.

<sup>15</sup> Qinee inni nikausara foora maridaqa firaqoo inniara qimuqusufaqa innee qini faiqara foora quandakina firaqoo qiniara faqa nimuqusiqaana. Qinee kai inniara firaqoo qimuqusidanoo.

<sup>16</sup> Innee maa ufanara eedoo qifaranoo. Qinee inniki maridaqa sia narana munnimma mi ummaarana inni nimiqiafana. Innikiqari moo fannoo qiniara maaqi qiannoo Pauroofa nikaruqimasee unnufanai maasa mara quqasoofaqa maasa mina ufaanakiara foora arufuananoo maasa narana munnimma maraandoo qifoora.

<sup>17</sup> Doo qinee naqifeemmasee fee inni miqi qiqiafana. Qinee maindari qeeqa ufa maraqa nuasa niqiaafanaqa sia inni maqusai ooqureeqa sia qini duqusaafau inni munnimma narana mara mareeqau muru qimifau.

<sup>18</sup> Qinee Titusana iraafricanoo eedoo qimasee innee unna finau, moo fasiqa Yisuna ufa irimarufa qini qikaqaafasaa mina faqa aqiaafananoo Titusana faqa finau. Innee minara Titusafa maasa qikaru qimaseenoo fee maasa ainaina mareefoo qida fee. Sia fee qinee Pauroosa faqa Titusafa faqa moodaa irirana maraseqara moodaamau fimarunannara irida fee.

<sup>19</sup> Innee mi ufana iriseeqa qiniara maaqi qifaranoo. Pauroofa narisaa faqa nari faqa marinausa faqa misasaa faqa ititaidanoo miqidanoo fee qifaranoo. Maasa sia miqianaura, asauku mundirafa maasara qundee kaimmidaqa. Qini qifaaqasaa qiqoondiuqa maasa Anutuna afusaa maridaqa aiqama ainaina auqee maria ainaina inni dadaaqidee qidaqa auqaidaqa.

<sup>20</sup> Qinee inni maqusai oonureeqa moo ainainara rufiaanaura. Inni marirafa sia amiqirafa oorudupirafa mariandoora qinee qidaqa. Koorinti maqannaasa innee qiniara mookamaseenoo qiga qimiifoo qifoora anee sia reendenamandee maasa qimaqiminnaranoo aanoommasee maasa qimaqimiifoo, qifoora. Qinee inni maqusai oonureeqa maa ainainausara rufiaidaqa, ufa rainarafa aanooqirafa mariandoora nariara nariara rairaiqifoora nariara nariara idara foora qeefoora, kaaqa ainainara rimariasa

narifoora, nariara nariara mandufa qifoora munuqi miniqira ufa qifoora nari nuqu uqeerasee nimooqifoora dapi dapi qifoora.

<sup>21</sup> Qinee innee unnai oonu raananoo Anutufa qini mareeqeenoo qisauri-ranaki quqaannoo. Qinee inni mandoosanaki oorureeqa inni nifusaa iki-raqasee soofaariara foora iqa qisauruanoora. Inniki moomoosa ooqaindari mandoosana marasee sia minara oonumafi irisee nisaurusee minnisaga. Akaqausa faiqi faqa anaasee faqa nari ummuari nari ummuarirana minannai furufaridaqa akaqausa faiqi anaasee dapi maraqanua fasiqa anaaseesa faqa akaqausa ufa rukiassee nari mandoosana manda iriranamau fimariasa mariafaqa sia minara oonumafi irisee nisaurusee minnisaga.

## 13

### *Pauroofa ufa taikeenoo atisaa aaquqira ufa qimaqoona.*

<sup>1</sup> Doo maqee qaaramoo kifaqa inni Koorinti maqanna nindafarara fuanaura. Qinee oonuraanaqa moodaa fasiqa aniree inniki mandoosanara qinnana siamma irianaura tamummaqara fasiqa akara ufamau fiqa qaara fasiqafee qaaramoo fasiqafee mi mandainaina qafee marianara kooroo qifaqa qinee minara anoonee qimasee ufa qianaura.

<sup>2</sup> Qinee ooqai indaaru innee unnai fiqiafana inaaqiana kafaa fiqa maa ainainara qimannimiqiafana, maqee moosaa marunannaindari kafaa mi ufana kai qimannimianaura. Maqee oonureeqa sia qiaafannandee ireeda qimannimianura, maqee sia moo fannoo qinee ufannai nariara foora qiananoo rufiaki sandaannoo.

<sup>3</sup> Innee qiniara randee mariafanoo. Asauku mundirafa Pauroonasaqari kuqaa fee ufa qidanoo fee unna qidanoo fee qiniara qimariafanoo. Qinee innee iannai oonuraana kari asauku mundirafa qinisaaqari qimannimianura firaqoo qimannimiannoo. Asauku mundirafa inni ufa iridanoo sia kudoosaapaannoo nari afeeka inni uqannifiqaannoo.

<sup>4</sup> Mifa kudoosaaparanaki aunirira saqarisaa kuqufa marifa Anutuna afeekannai findufumafinoo mi afeekaikiranaki maridanoo. Maasa Yisuna faqa moodaanaki maridaqa kudoosaapaqa maridaqa maasa inni Koorinti maqannaasaki oonuree ufa qidaqa maasa Anutuna afeekannai asauku mundirana faqa kuqiranakiqari findifidaqara foora afeekaikamandee maridaqa qimannimianaura.

<sup>5</sup> Inneeqa kai inneeqa marirana nimanamandee qafaqa, kuqaa fee Yisuna mandaaqara oosanamau fidee. Asauku mundirafa inni naunduraki marifaqa innee minara iridee sia fee iridee innee kaaqa uqanna kadiqaqa maridee.

<sup>6</sup> Maasa innee iannai oonuraanaqa innee maasa sia kadiqaqa maridee qifaranoo.

<sup>7</sup> Maasa inniara Anutunara innaaru qidaqa sia inniara mandoosanaki aqufuaqee qidaqa. Sia maasa saika inniki anoonaikianifee qimasaidau innaaruqidaqau, inniara andeeqaramau fuaqee kai qimasee innaaru qimannisaidaga. Maasa kadiqarana amana, inni andeeqaranara kai iridaqa.

<sup>8</sup> Sia maasa amana Anutuna anoona ufa ititaanaura mina dadaaqirana kai amanaikirafa maridanoo.

<sup>9</sup> Maasa qeeqa kudoosaapaida inneeqa afeekaikifaqa maasa mina qafamasee asasianaura. Innee amiqimandee andeeqarusaikamambi mari-aqeeru innaaru qidaqa.

<sup>10</sup> Karaambaiqa afeeka uriqararana qimuna, sia inni rapeepamma aqira uriqararana qiminau, inni pooduqarana qiminau. Qinee innee iannai

oonureeqa karaambaiqa uriqararana qimuna mara maree aanoomandee inni ufa sia nimianoo qimasee moo atinai marunaqooqari maa akarana rumannimaqaanaqa inneeqa kai andeeqasee marifaqamma oonu nindafa.

<sup>11</sup> Qini qikaqaafasaa doo magee akara taikaanaura. Innee kaaqa andeeqaranara afeekaikamasee marararee qimariasa mariafanoo, qini ufa qunnana amiqimasee iriaqa, sia nariara nariara rairaiqiqa, moodaanaki maridaqa asooaranaki mariaqa. Faiqi aanaaseera nimuqusirana nimimari Anutufa faqa naundura asooarana nimimari Anutufa faqa inni faqa mariani.

<sup>12</sup> Anutuna ufa irimaria fasiqa anaaseesa aiqama inni nimandaidaqa.

<sup>13</sup> Asauku mundirafa Yisufa maasa karaambaiqa mina اساسامasee dadaaqira oosana faqa Anutufa faiqi aanaaseera nimuqusirana faqa naaquqara andeeqara maraquna moodaanaki kirana faqa inni aiqamausaki faqa mariani.

## KARATIA

### Karatia maqusanaasa Pauroofa akara rumannimufa maridanoo.

<sup>1</sup> Qinee Pauroosa Yisufa diqiqoo fasiqausa maridaqa maa pasana akara rumannimaqaidaqa. Sia faiqí faiqí moo fannoo qini mareeqee Yisufa niqiqoo saikanaki quqaqoosa maridaqa, sia Anutufa moo fasiqara qufanoo qini mara quqanau. Anutuna asauku mundirafa Yisufa faqa narí akoona Anutuna faqa Yisuna kuqiranakinaana uqeera quqoofa miqandakai qini rafaafusee mara quqaqoosa maridaqa maa saikanara qidaqa.

<sup>2</sup> Maaqoo maria nikaqaafasaasa dadaaqida inni Karatia maqannaasa nimandaídaqa, Karatia maqa maaqaki Yisuna ufara suqimariasa inni nimandaídaqa.

<sup>3</sup> Maasa aiqamausa qikoofa Anutufa faqa mina asauku mundirafa Yisufa maasa Karaambaiqa faqa Anutuna idaaqira amiqi amiqirana faqa naundura asoarana faqa inni nimiani.

<sup>4</sup> Maasa qikoofa Anutufa qufanoo asauku mundirafa iriseenoo eedoo qimaseenoo mi mau finau maqee kamuqoo marunna mandainaina afeekaikiranakinaana maasa idukuqeera narafaqa maasa mandainaina akiaqara aunirira saqarisaa paasosamasee quqanau.

<sup>5</sup> Anutuna areenarana faqa amooqirufa faqa naaru naaru amimariani, doo miqiani.

*Sia moo amiqira fasaasa ufa maridanoo moodaa kai.*

<sup>6</sup> Oo Karatia maqannaasa qinee inni oosanara tautummiqa. Innee dauni aqee uqanna Anutuna minnisaafaqa qinee minara iriseeqa tautiqa, mifa narasauku mundirana idaaqirana kaqi nimirannai inni naarama quqasoofaqa innee aqee uqanna quqasee sandeeqa moo amiqira fasaasa ufara fooro randoofaqa iriseeqa tautiqa.

<sup>7</sup> Sia moo amiqira fasaasa ufa maridanoo moodaa kai maridanoo, faiqí anaasee akaqausa asauku mundirana amiqira fasaasa ufa qumaree mareeqee kaqinni ubeekkeqa minannai furufarirana inni nimimariafanoo.

<sup>8</sup> Indaaru maasa Yisuna amiqira fasaasa ufa inni qimannimifannana doo maqee maasee moo fannoo fee innaarunaindaraa qangiroo moo fannoo fee moo fuka aqee maria fasaasa ufana qimannimufaqqee Anutuna aqurarara ufa misasaa mariannoo.

<sup>9</sup> Maasa ooqai qimannimifannanasaa kafa maqee qimannimidaqa, moo fannoo maasa ooqai qimannimifannana moosaa qimasee qimanniminafa mifa Anutuna aqurarara ufa ameemaanai mariannoo.

<sup>10</sup> Faiqí nifusaa qeeqa qimoofee qida fee nasurida fee miqi qidaqee oo sia uqanna qinee miqianaura. Anutuna kuqaa eedoo qira ufara qinee randaídaqa. Qinee faiqí nifusaa fifau nasuridaqa miqi qidafau sia asauku mundirana ainainiranaki marini maqee maqee qini darirara kai qiafaqa moo ainainiranaki funaiqini.

*Pauroofa Yisufa niqiqoo fasiqausaikammafi oosana aroo ufafa.*

<sup>11</sup> Oo qini qikaqaafasaauqa qinee maa ainainnara qimannimianaura. Qinee qimannimianna fasaasa ufana sia faiqí auquqoofa maridanoo.

<sup>12</sup> Sia faiqikinaana qinee mareeqa, sia moo fannoo qimaqimifaqa iriqa asauku mundirafa Yisufa narí uqanna kooroomambi qimaqiminau.



13-14 Qinee ooqai kumaaraa mariafana Yuda maqannaama amaana ufa amiqimandee firaqoo qimariqiafana. Qinee Yuda maqannaama amaana ufara qeeqa qikiaqauqa urinnaaqaramasee mi ainainna qiqiafana. Qinee misa urinnaaarammasee firaqoo maasa qikeeku qikaaku oosana maraqiafana. Qinee minaki fidaqa Anutuna ufara faqa Yisuna ufara faqa suqimarusa sia nifauqiafana afeekaikamandee misa mandaikamma nimaqiafana. Qinee minara amiqimandee taikaanee qidaqa mandaikamma nimaqiafana.

15 Anutufa sia qini mandoosanara irinoo narí idaaqira amiqi amiqira mariranaki marinoo qini qinoofa sia qini maqoo kamuqoo narí ainainira saikaki marianifeera ooqai indaaru qini daarama mi saikanaki quqaqisoofofa kisaqasaa sia iriqiafana, mana mana kai qiqiafana.

16-17 Anutufa qiniara narí amiqira fasaasa ufa aanaamuru qimannimiannee qimaseenoo Damasakusa maqusai fimariafanna aanasaa narí amaaku qini uqaqifiqanau. Uqaqifiqasoofofa sia moo fasiqunnai oonureeqa Yisuna aufakiana iriqia, narí amaaku uqaqifiqaanee qimaseenoo sia Yisufa niqiqoo fasiqusakina ooqai marusakina Yeerusareenni sia ooruree iraaqanaqa qimaqimiqau. Sia qinee miqi qiafana qinee andeeqasee quandaki Arabia maqa maaqai oonu marikiqa oonu randeeqa anireeqa kafa Damasakusa maqusai fiqiafana.

18 Yisufa indaaru kooroommaqooqooqari qaaramoo aukuaana aiqarammafufaqa Yeerusaree maqusai ooruree Peetooroo funnai mina qafamasee aqoondikianauree qimaseeqa mina faqa qaara amaana maraqiafana.

19 Mi kamuqoo sia Yisufa niqiqoo fasiqausa nindafaqiafana misakiqari Yisuna akaqa Yameesana mina kai qafaqiafana.

20 Qinee maa akaranakinaa ufa anoona kai qidaqa sia unna ufa qidaqa. Faiqí sia Yisuna fasaasa ufa qimaqimiqau, Yisufa narí kai qimaqiminai. Anutuna afusaa maridaqa anoona ufa kai qidaqa.

21 Qinee Yeerusareenni qaara amaana maraseeqa Siria maqa maaqaki faqa Sirisia maqa maaqaki faqa oonu kisaqasaa mariqiafana.

22 Mi aukuaana mi kamuqoo Yudeea maqa maaqaki maridaqa Yisuna ufara suqimarusa sia qini qiqafaqau.

23 Akaqausa qiniara qimannimunara irimarusa kai mariqau. Misa maaqimandee qiniara qimannimiqau. Maasa mandaikamma qimiqeemaru fasiqafa doo maqee quandaki narí naru taikee maru ufana qimannimidanoo.

24 Misa mi ufana iriseeqa Anutufinnai qiniara dufi dufi qimariqau.

## 2

### *Pauroofa niqiqoo fasiqausaki sia qinee oorudupirausee qidanoo.*

1 Qinee Pauroosa Siria maqa maaqaki faqa Sirisia maqa maaqaki faqa kisaqasaa qisaukuqara taikasee qikunni qaara faqa qaara faqa ooqu marasee aukuaana maraseeqa Baranabasina faqa Titusana faqa nifiqamaareeqa Yeerusareenni ooru fiqiafana.

2 Anutufa narí maraqunannai kukeeqasee qimaqimunara ooru fiqiafana. Miqoo ooruree Yisuna ufara suqimarusa misa uriqararusa faqa kai ufa qidaqa, aanaamuru Yisunara qimannimiafannufana oosana oosana qimannimiqiafana. Misa sia irifaqa qini saika ooqai faqa maqee faqa sia amiqimandee qini dooki iriranaki qaoo qifoora minara qinee qimannimiqa.

<sup>3</sup> Qini qiqoondi Titusafa aanaamuru Kirisa maqusaindari qini faqa Yeerusaree maqusai ooru marufaqa Yuda maqannaasa Yisuna ufa irimarusu minara maasa sia Yuda maqanna naanna ramasee Titusana fainanduquaneera qiqau, kaqi mana mana imariqau.

<sup>4</sup> Faiqi akaqausa Yuda maqanna unna qimasee Yisuna ufara suqimarunaasee qimasee maasaki umee ani keeqafufaqa Titusana qafammasee mina fainanduquaqee qufaqa maasa qaoo qiqiafana. Misa nipuraraa fasiqara foora kukeeqasee maasaki ani keeqee mariqau. Maasa Yuda maqannaasa faqa aanaamuru faqa asauku mundirana Yisunaki marunara sia nariara nariara rufieeqa amiqi mandee moodaanaki Mooseena sandufakiqari idukiara foora marunara nipuraraa fasiqara foora minaki ani keeqafufaqa maasa mareeqee Mooseena sandufaki rumberanakiara foora kafaa quqaaneera nipuraqau.

<sup>5</sup> Maasa sia misa ufara eedoo qiqiafana. Inni aanaamuru mariasara iriseeqa sia eedoo qimasee Titusana fainanduqiqiafana. Yisuna amiqira fasaasa ufa anoona ufara kai innee aanaamuru mapukusee maraaqee qimasee sia misa ufa fainanduqirufa iriqiafana.

<sup>6</sup> Qinee Pauroosa Yeerusareenni ufa qimarunaki maridaqa Yisuna ufara suqimarusakai maridaqa faiqi misara uriqararaasee qimarusa faqa ufa qimarufaqa iriafanaqa sia moomau fiqau qinee fimariafannamau mi mau kai fiqau. Qinee faiqi misara uriqararaasee qiqa, Anutufa sia faiqi nifaaqa qafamaseenoo uriqararaasee ureeqaraasee qidanoo minara qinee sia uriqararaasee qiqa sia ureeqaraasee qiqa amana amana kai mariaa maqi qimasee qeeqa aanaamuru faiqi aanaaseeki saika maree marunana kooroomasee paasoosamandee kaqi qimannimiqiafana. Qimannimifanaqa uriqararaasee qimariasia sia qaoo qimasee moosaa fiaanoo qiqau.

<sup>7</sup> Misa qiniara maqi qiqau, ooqai Yisuna amiqira fasaasa ufa Yuda maqannaasa qimannimirafa Peetooroonasaa Anutufa quqanau, doo maqee kamuqoo mifa aanaamuru mi ufanakai qimannimirafa qini Pauroonasaa quqee maqi qimasee maanara faqa irimariqau.

<sup>8</sup> Anutuna afeeka fannoo kai Peetooroona mara quqa amufanoo Yuda maqannaasaki fidanoo qimanniminu, miqi kai inoo Anutuna afeeka fannoo qini Pauroosa mareeqeenoo aanaamurukina mara quqasoofaqa fuafannaqa minara faqa irimariqau.

<sup>9-10</sup> Yisuna ufa irimariasia uriqararausara foora mariasaa Yameesafa faqa Peetooroona faqa Yoohaneefa faqa qini ufa iriseeqa maqi qiqau. Oo kuqaa Anutufa ani mareeqeenoo kuqaa aanaamuruki quqeenoo, anee aanaamuruki ainaininaqa maasa Yuda maqannaasaki ainainianauree qimasee qini faqa Baranabasina faqa nisauku ruqunnaseeqa doo fuaqee qimasee moodaa ufa kai maqi kai qimasee qimaqimiqau. Inneeqara Pauroosa faqa Baranabasina faqa Yudea maqa maqaki maria kudi fasiqausara Yisuna ufa irimariasia maqee maqee iridaqa dadaaqaqa. Miqi qufaqa qinee iriseeqa maqi qiqiafana, qinee minara kai afeekaikianauranoo fee qiqa. Mi ufa suqirana Yeerusareenni maridaqa qimaqimiqau.

*Pauroofa Antiooka maqusai maridanoo Peetooroona aqinau.*

<sup>11</sup> Doo miqooqari moo aukwana ai randoofaqa Peetooroofa Antiooka maqusai qinee mariafannaqoo aniroofaqa qinee aiqamausa nifusaa Peetooroona afusaa aqiqiafana, akooqoo mifa aaqamasoonara afusaa aqiqiafana.

<sup>12</sup> Yuda maqannaasa nári sandufa qíqa aanaamuru mariasa faqa sia moodaanaki misa saimbaqa narana naanauree qíqau. Peetooroofa Antiooka maqusai maridanoo misa Yuda maqannaasa sandufa rukiaseenoo miqooqaraa aanaamuru Yisuna ufa irimariasee qimaseenoo maqee maqee misa saimbaqa moodaaqoo ooqu marifidanoo narana nee marinau. Miqinoo marufanoo Yameesafa Yeerusaree maqusai maridanoo akaqa Yuda maqannaasa niqíqoofaqa Antiooka maqusai ooqu fiqau. Misa ooquroofanoo Peetooroofa nindafamaseenoo rufiamareenoo aadumai nianasaa oonu ooqu marifufanoo qimmirinoo qinau. Maa fuka Yuda maqannaasa Yeerusareendari qumuraasa qiniara sia fainanduqirausa faqa narana naidanoommifoo qifoo qimasee rakeemasee aadumai ooqu marifinoo nári narana nanau. Yuda maqannaasa Yisuna ufa irimarusa misakiqari akaqausa aanaamuru marusara maaqi qíqau.

<sup>13</sup> Yuda maqannaasa qikaqaafasaaqaa Peetooroona faqa miqoo marusa Peetooroona oosana qafamasee misa faqa miqi kai iqa Yeerusareendari qumusara rufiamareeqa Peetooroofa ooqu marutinaí ooqu marifiqa nári narana naqau. Misa sandeeqa Baranabasina faqa firarisameeqee nári manda maparaa iranaki quqasoofanoo aadumai ooqu marifi nanau.

<sup>14</sup> Qinee misa miqiu oosanna qafamaseeqa maaqi qíqiafana, misa sia amiqira fasaasa ufa anoona ufamau andeeqasee fidaqa eendaandammida miqi mariafanoo, miqi qimasee Peetooroona aiqamausa nifusaa afusaa aqíqiafana, anee Yuda maqannaafa mariananoo aanaamuru oosana marasee aanaamuru faqa moodaanaki mariananoo, anee nanaree maqee aanaamuruara asaurusee rakeemasee aadumasaa ooqu marinanee. Anee miqiannana aanaamuruara sia fee amanaikinanee miqinanee. Anee aanaamuru mareeqeenana Yuda maqannaasaki quqasainaga innaarunai firana amanaikidee miqidanee.

*Yuda maqannaasa faqa aanaamuru faqa Yisunasaaqaraana asumu mareefaranoo.*

<sup>15</sup> Qinee miqi qimasee Peetooroona aqisee maaqi qimasee aiqamausa qimannimiqa. Kuqaa maasa Yuda maqannaaki kambiqaraura maridaqa. Maasa sia aanaamuru mariasa, misa Anutuna ufara sia irirai mana mana imariasa.

<sup>16</sup> Sia maasa Mooseena sandufasaaqari firanannai Anutuna innaarunai firana amanaikiranaki keeqaanaura, asauku mundirana Yisunasaa rusiranannai kai Anutuna innaarunai firana amanaikiranaki keeqaanaura. Sia faiqí moo fannoo Yuda maqannaasa sandufannai Anutuna innaarunai amanaikiranaki keeqaannoo.

<sup>17</sup> Maasa Yuda maqannaasa Anutuna innaarunai amanaikiranaki keeqararee qimasee asauku mundiranasaa atooqafiqa quandakiqa boo aanaamuru mariasa naanna ramafiqa mandoosana maree marunausee qianauroo. Maasa miqidaqa asauku mundira fee maasa mareeqee mandainainaki quqeenoo fee qianauree.

<sup>18</sup> Oo sia uqanna miqinoo maridanoo. Qinee Pauroosa Mooseena sandufannai Anutuna innaarunai amanaikiranaki keeqaranara qaoo qimarunausa maridaqa, qinee maqee quandaki minara eedoo qíqa Mooseena sandufa rukiaanaura.

<sup>19-20</sup> Mooseena sandufara qinee maaqi qianauro doo mifa qini aaqarana qimaqiminoo darusaifaqa kuqíqa maridee qidaqa. Qinee Anutuna saikara findifi minaki mariaqeera qini darusaifaqa kuqíara foora iqa maridaqa. Asauku mundirafa auniriranasaa kuqinoo qinee faqa minandiri kuqíara

foora iqa maridaqa doo maqee sia qeeqaraa kasida maridaqa, asauku mundirafa qini daundurairi marinara kasida maridaqa. Qinee maa maqee kasira marirafa Anutuna amaaku maqee maqee saqarikidaqa maridaqa, mifa qiniara amuqusinoo narí marirana quqanau.

<sup>21</sup> Qinee Anutuna idaaqira kaqi nimirana qimifaqa sia qaoo qimasee minnisaanaura, faiqí moo fannoo Mooseena sandufasaaqari Anutuna innaarunai amanaikiranaki keeqainanara asauku mundirafa fifau kuqinau maqi qidaqa.

### 3

*Nimaarusiranara faqa Yisunasaa rusiranara faqa Pauroofa mi ufa qandara qidanoo.*

<sup>1-2</sup> Oo Karatia maqannasa innee furufari mariasa yafee inni mandirirana naakunimaqeenoo fee Yisunasaa rusirana afainoo fee. Qinee Pauroosa inni Karatia maqannaasa nifusaa asauku mundirafa aunirira saqarisaa kuqunara amiqimasee kooroomasee inni nifusaa qimannimifanaqa inni nifusaa kuqinoora fooqaana innee amiqimasee irimariafanoo, doo maa moodaa ainainara kai irammirianaqa qimaqimiaqa, innee Mooseena sandufa maraqa nuana minannai fee Anutuna maraqa maraqaqee iqa, Yisuna amiqira fasaasa ufa irisee irirana minasaa rusiranannai fee Anutuna maraqa maraqaqee iqa, minasaa irirana rusiranannai kai maraqa.

<sup>3</sup> Innee naqiaqooqari fee firaa furufariranaki fi fee, innee Anutuna maraqa naakusee minannai oosana arasee andeeqasee fidaqa kafa maqee mariaqooqari nanaree innee mina afaimma quqasee faiqí faiqi iriranamau maqee maaqooqari fidee.

<sup>4</sup> Indaaruu Anutuna maraqa inni naakufufaqa amiqira oosana inniki kambiqafinau doo maqee innee minara fifau ainainee fee qidaqee. Sia fee innee minara iriafanoo nimuqusidanoo fee.

<sup>5</sup> Anutufa narí maraqa afaaramasee inni maqee maqee nimidanoo faiqí sia auquaqaa ira ainaina auqimarifaqa innee qafee mariafanoo. Innee Mooseena sandufamau fimarianara Anutufa narí maraqa inni nimidanoo fee amiqira fasaasa ufa iriqa irirana minasaa rusimarianara Anutufa narí maraqa inni nimidanoo fee. Minannai kai narí maraqa inni nimidanoo.

<sup>6</sup> Oosana aroo ufafa irirana rusimarianara maaqi qidanoo Abarahaamana auqu ramasee mina kikiqusinoo maaqi qidanoo. Ooqai Anutufa Abarahaamana nauraiqi marufanoo qimaminau.

Abarahaama anee faiqi siaifa mariananoo anee moomoo maqusanaasa nikoofa marinnaranoo.

Abarahaamafa mina iriseenoo oo kuqaa kambiqaanoo qimaseenoo narí irirana Anutuna ufasaa rusisee afaqa quqasee marinau. Anutufa Abarahaamafa narí irirana Anutunasaa rusisoona qafamaseenoo minara maaqi qinau. Oo doo Abarahaamafa qini Anutufa innaarunai firana amana kai mari fasiqafa maridanoofee qinau.

<sup>7</sup> Qinee Pauroosa minara maaqi qidaqa innee Karatia maqannaasa amiqimandee maana iriaqa. Kuqaa Yuda maqannaasa Abarahaamana maqasaaqaraa ati mina moodaa maqannaasa mariafanoo Anutufa Abarahaamana atiara moosee qidanoo maaqi qidanoo. Abarahaamana aanna reemariasa Anutuna ufasaa irirana rusimariasa misa kai Abarahaamana aiku asauku anoona uqanna maridaqa.

<sup>8</sup> Anutufa ooqai indaaru aanaamuru maqannaara nári irirana Anutunasaa rusinausa Anutuna innaarunai firana amana keeqeefandiafoo qimasee akara rumaqoofa maaqi qinau.

Anutufa ani Abarahaamanasaagari aruruki akinanoo aiqama maa maqa maaqana afaaqasasa mariasa amiqi amiqimma nimaqaannoo fee qimaqoofa maridanoo.

<sup>9</sup> Anutufa qufanoo Abarahaamafa mi ufana nariara irisee doo kuqaa fee qunara Anutufa Abarahaamana amiqi amiqinau. Doo maqee aukwana miqi kai iqa aiqama irirana Anutunasaa rusimariasa Abarahaamanasaagaraa amiqi amiqirana Anutufa raina nimidanoo.

<sup>10</sup> Aiqama maqannaasa Mooseena sandufamau fidaqa minannai Anutuna innaarunai firana amanaikidaqa keeqaanauree qimariasa aaqamaki Anutuna niqurararufa nimaarusirufa ameemaanai maridaqa.

<sup>11</sup> Tamummaqara fasiqauqa akara minara maaqi qinoo maridanoo, Anutunasaa irirana rusimarianannai Anutuna innaarunai firana amanaikiranaki keeqeemariasa misa kai maqee oosana arasee naaru marirana mareefaranoo.

Maasa mina irisee maa ufanara kooroo ifoo qidaqa sia faiqi moo fannoo Mooseena sandufa mararanannai Anutuna innaarunai amanaikiranaki keeqaannoo.

<sup>12</sup> Mooseena sandufa sia Anutuna saqarikirafa minasaa mundinoo maridanoo. Mooseena sandufa fannoo faiqi minasaa kaaqa andeeqasee firafa minasaa mundinoo maridanoo. Tamummaqarausa akara minara maaqi qidanoo,

Mooseena sandufamau kaaqa andeeqasee fimarifa kai naaru mariranaki keeqaannoo fee qimasoofaqa maasa sia amanaikidaqa sia keeqaanaura.

<sup>13</sup> Asauku mundirafa Mooseena sandufamau fimariasa Anutuna niqurararufa ameemaanai rumbaqa marunara iriseenoo asauku mundirafa narí kai Anutuna niqurara ufaikamambinoo maasa daaqa qumureenoo minaki rumbaqa marusa idukuqisanau. Tamummaqara fasiqauqa akara minara maaqimminoo maridanoo.

Saqarisaa dirifi kuqimariasa aiqamausa Anutuna niqurararufa ameemaanai mariasa maridaqee qidanoo.

<sup>14</sup> Asauku mundirafa saqarisaa dirifi kuqinau. Anutufa ooqai Abarahaamanasaagaraa amiqi amiqirana aanaamuru mariasa nimianiffee qimasoofanoo asauku mundirafa saqarisaa dirifi kuqinau. Asauku mundirana Yisunannai aanaamuru mariasa Anutufa Abarahaamanasaa qima afeekaikira amiqi amiqirana misa faqa raina mareefaranoo. Maasa faqa qeeqa Yisuna saqarikiranannai Anutufa narí maraquna nimiraree quna faqa maraanaura.

*Nimaarusira ufara faqa qima afeekaikira ufara faqa Pauroofa qidanoo.*

<sup>15</sup> Oo qini qikaqaafasaa uqa maasaki mari ainaina kikiqususee qianauroonoo. Faiqi qaaraqanda moo ainainara qimasee qima afeekaikamasee mi ainainna papiqasaa akara rumasee nariqara nuqu minasaa akara rumasee sia amana mi ufana minniseefara, mi mau kai fifaranoo.

<sup>16</sup> Miqi kaimmasee Anutufa narí qima afeekaikira ufa Abarahaamanasaa faqa mina atisaa faqa quqaseenoo akara rinau. Ooqeenaa akara fannoo sia narí atiuqa moomoo fasiqa anaaseera qidanoo. Mifa maaqi qidanoo, ani ati kaimma qima afeekaikirana amianauree qidanoo asauku mundiranara moodaara qinau.

<sup>17</sup> Qinee Pauroosa minara maaqi qidaqa Anutufa Abarahaamana narufa amiseenoo doo qinee mi mau kai fuanaureeqimasee qimafeekaikinau. Miqooqari (430 aukuana) aukuana moomoo uqanna aiqara mafufanoo Mooseena sandufa fannoo kasooqagee innaaqiana kambiqafinoo sia amana Abarahaamana qimamu ufana rafaqafuannoo kaqi mariannoo.

<sup>18</sup> Anutufa Abarahaamanara Kanna maqa maaqakinaa saqama namufaqa faiqi namufaqa aiku asauku namufaqa amiraree qimasee Anutufa mi maqa maaqa saqamana Abarahaamafa narí sandufamau funara sia irirai oqai narí qima afeekaikammaqoo iriranasaa narí afaarinoo aminau.

<sup>19</sup> Maasa minara irisee Anutufa naqiraree sandufa Mooseena aminoo fee inau. Mooseenakiqari fifiufanoo Anutufa qima afeekaikira ufa qimamufa Abarahaamana ati anoona uqanna kambiqaaninanaki Mooseena sandufa taikaannoo. Mi qambaana kamusaqanna aaqarana kooroomma nimaqaanifeera Anutufa mi sandufana quqanau. Anutuna qangiroouqa mina sandufa Mooseena amufanoo Mooseefa Anutuna faqa maqasaa fasiqa faqa aanaiqikinoo maridanoo maqasaa narí aqoonausa niminau.

<sup>20</sup> Anutufa sandufa quqeemarufa faqa faiqi anaasee mi ufamau fimariasa faqa marianara aanaiqikirafa Mooseefa mina qambaana maridanoo. Abarahaamana qima afeekaikirana amuaukuanafa sia miqinoo maridanoo. Abarahaamafa sandufamau firafa sia marunara aanaiqikirafa faqa sia marinau. Anutufa naríara qima afeekaikira ufannoo Abarahaamana qimaminau. Maasa minara uriqarara oosanee qidaqa.

*Nimaarusira ufa oosanara kooroo idanoo.*

<sup>21</sup> Maasa minara iridaqa Mooseena sandufa fannoo Anutuna ufara qima afeekaikirufa Abarahaamana amunafa rafaqafidanoo fee qianauree. Sia amana rafaqa fuannoo. Mooseena sandufa oosana maaqimminoo maridanoo. Faiqi anaasee Mooseena sandufamau fidaqa mina akiaqara sia amana naaru marirana mareefara. Miqira sandufa Anutufa sia niminau. Nimaqau mi sandufana mareefau innaarunai fini.

<sup>22</sup> Ooqeenaa akara fannoo aiqama maqannaasara narí mandoosana afeeka ameemaanai kuridiranaki maridaqee qidanoo. Qinee Pauroosa minara maaqi qidaqa Yisunasaa irirana rusimariasa Anutufa narí qima afeekaikamandee maqee oosana arasee naaru marirana nimiannoo fee qidaqa, mi nimirafa asauku mundirana Yisunasaa rusimarianasaa mundinoo maridanoo. Aiqama ainaina narí mandoosana afeeka ameemaanai marianara Yisunasaa irirana rusimarianannoo kai aikaquannoo.

<sup>23</sup> Yisuna saqarikira aukuana sia maruqoo Mooseena sandufa fannoo mina afeesidanoo maasa karabusara foora rumbaseenoo maramareenoo Yisuna saqarikira aukuana kooroomambufanoo minaki quqaqisanau.

<sup>24</sup> Asauku mundirafa qumuaninna aukuannasaa Mooseena sandufa fannoo maasa uqannifiqara fasiqara foora marinoo maasa Yisuna saqarikiranannai Anutuna finnai innaarunai firana amanaikiranaki keeqaaqeeera maasa nifiqamaree asauku mundirana aaqa munu qisanau.

<sup>25</sup> Doo maqee Yisunasaa rusirafa ani maridanoo oqai uqaqifiqee marufa Mooseena sandufa sia maqee rakisi nimaqaidanoo.

<sup>26-27</sup> Innee aiqama Yisuna saqarikiranannai asauku mundiranaki keeqafi marianara Anutuna amaaku kamambi marianara innee inneeqa nammari maroonannai innee asauku mundirana andeeqara marirana qamunnara foora akumaree minaki fuaqa.

<sup>28</sup> Doo minakiqari sia Yuda maqannaasa faqa aanaamuru faqa naaduma moo kiqa maridaqa sia karabusa ainaini mariasa faqa idukirausa faqa moo

kiqa mariafanoo sia faiqí faqa anaasee faqa mookiqa mariafanoo amana amana kai mariafanoo. Innee aiqama asauku mundirana Yisuna faqa moodaanaki maridaqa aiqamausa amana amana kai moodaa mariafanoo.

<sup>29</sup> Innee asauku mundiranaindi marianara Abarahaamana ati mari-afanoo. Abarahaamana atiuqa marianara Anutufa Abarahaamana amiqi amiqirana qima afeekaikuna mi amiqi amiqira ainainna kasooqagee in-naarunai inni faqa nimiannoo.

## 4

(Ooqai Pauroofa maru aukuaana ainaina faqaasa faqa pisinisa faqaasa faqa munnimmara ainainimariasa faqa kudiuqa faqa mariqau. Ainaina faqaasa faqa pisinisa faqaasa faqa nári ainainirana moomoo marifaqa sia amanaikifaqa akaqa fasiqauqa nifiqee nári ainainiranaki quqasee mina akiaqara munnimma nimimariqau. Moo oosana faqa misaki marinau. Kudi fasiqauqa akaqausa kaaqa kudiki mariasa naararee marifaqa maria-nara ainaina faqaasiannai oonuree iraifanoo ainaina faqaafa ainaina siaina karabusara foora ira saikiranaki quqaseenoo sia feefauru aminau. Kaqi narana faqa faiqarana faqa mina ainainirana akiaqara amiseenoo feefauru uqanna sia aminau. Misa minara karabusa saika imarusee qimariqau. Mi karabusa saikanaki maru fasiqana ati mina ainaina kafaa mi fasiqana idukiraree qimaseenoo munnimma firaatia aqusee idukumaree fimariqau.)

<sup>1</sup> Mi ufanasaa ootupammasee maa ufana ainainafaqaafa faqa narí amaakuara faqa qimannimianaura. Faiqí moo fannoo kuqufinanoo mina faiqi mina aiqama ainaina maraanoo. Mina akoofa kaqi maru kamuqoo mina faiqi sia innooqanoo marufanoo kaqi narí akoona ainainira faiqiara foora maridanoo. Narí akoofa narí amaakuara narí ainainira faiqiara foora marifanoo saika ummaqirana dadaaqi marinara narana aandau amidanoo. Narí akoona aiqama ainaina maraaninafa maridanoo kaqi fifau ainainira faiqiara foora narí akoona faqa maridanoo.

<sup>2</sup> Mina faiqi kumaaraa marifaqa mina akoona ainainira faiqiuqa mi faiqina faqa mina akoona ainaina faqa rakisiqa fifi ifaqa mina akoofa doo innooqee maqi qimasaifanoo mi faiqifa ainainasaa rakisidanoo.

<sup>3-5</sup> Miqi kai iqa maasa sia innooqeera fooqaa ira kamuqoo maasa maa maqa maaqanasaaqaraa irira sandufa ameemaanai mariqiafana. Anutufa maa aukuanara andeeqara aukuanee qimaseenoo narí amaaku aqiqanau. Aqiqamaseenoo maasa Mooseena sandufa ameemaanai mina rumbaranaki mariusa minakiqari feefauru aquseenoo idukusoofaqa findifiqa Anutuna amaaku kamambi mariaqeera Yisufa maa maqa maaqanasaaqaraa anaasee aranandaki rumafufanoo maqasoofanoo Mooseena sandufa ameemaanai maa maqanasaa kambiqafi marinau.

<sup>6</sup> Anutufa inniara mina amaaku fee qiaqeera qimaseenoo narí amaaku maraquna inni nimuqusaki aqiqoofanoo keeqafi maridanoo, mi maraqunafa inni dadaaqifaqa innee faiqi aanaaqiara fooqaana Anutunara qini qikoo fee qimariafanoo.

<sup>7</sup> Miqinara innee sia maqee fifau ainainira faiqi marifaranoo, innee faiqí faqa anaasee faqa kuqaa Anutuna faiqi araamuqmaakaikammafi mariafanoo. Doo marifanoo narí amaaku amianinnana innaarunai mari saqamana mareefandinausa mariafanoo. Anutufa narí kai qifaqa innee mina amaaku araamuqmaaka mina innaarunai mareefandinausa mari-afanoo.

*Pauroofa Karatia maqannaasara kaaqammirimarinau.*

<sup>8</sup> Ooqai innee Karatia maqa maaqaki marusa sia Anutuna aaga oonuree amiqimasee irimariqau afaanna ainaina sia Anutunaki maru ainaina innee mina rumbaranaki mariusa mariqau.

<sup>9</sup> Doo maqee uganna Anutunara irimariafanoo, Anutufa faqa doo inniara faqa iridanoo. Doo nanaree innee miqooqari kafaa quandaki kafaa manda umooqukira kuquagaaira maqasaa irirana innai faqa inniqa nauraa manda sandufa innai faqa quandee fee. Innee Anutuna faiqikiranakiqari quandaki fifau maqasaa irirana rumbaranaki fidee miqidaqee. Saina Yisunasaa rusirafa kai mariaqaana.

<sup>10</sup> Innee Karatia maqannaasa kaaqa Yuda maqannaasa oosana oosana sabata faasaanara rimariasa mariafanoo aqaaida miqi mariafanoo. Kaaqa inni moo quqoonara naaquqai faqa Anutunara iri maria quqoona fee qimasaida minara kai irimariasa mariafanoo. Aukuanara faqa qambaana saqannara faqa kaaqa minara ridaqa minannai innaaruna aana maraanau-ree qidaqa aqee mariasa mariafanoo.

<sup>11</sup> Qinee Pauroosa inniki marunasa inniara rufiidaqa. Inniki ainaini-afanafa fifaunni maqasaa rairaa idanoommi maqi qidaqa.

<sup>12</sup> Oo qini qikaqaafasaa mariasa inniara afeekaikamandee qimannimi-daqa. Qinee Pauroosa Yuda maqannaasa mariaafanasa maridaqa misa oosana faqa Mooseena sandufa faqa minnisee aanaamuru naanna ramasee Yisuna saqarikammasee mina ameemaanai maridaqa. Innee faqa miqi kai iqa qini daanna reeqa Mooseena faqa Yuda maqannaasa faqa sandufa minnisee Yisuna kai saqarikaqa.

<sup>13</sup> Qinee aqee indaaru amiqira fasaasa ufa inni qimannimifanna oosana irimariafanoo, qinee aurida mariafannanara inni maqa maaqaki kisaagasaa maridaqa qimannimiqaafana.

<sup>14</sup> Qinee aurufanaqa qiqafee sia qiniara nikooqoofaqa qini mandaika-maqisasee minniqisaqau. Qini aurirafa firaaqoo inni narufaqa minniqisaa-neerusia sia minniqisaqau. Idaqa kai maqisee marufaqa mariqiafana. Innee qiniara Anutuna qangiroora foora mari ifoo qimasee qini qumaraqau. Innee asaku mundirana Yisuna qumarondeemmiqa qini qumarasee amiqi amiqimmaqisaqau.

<sup>15</sup> Mi fasannai innee firaaqoo qiniara asasimariqau, maqee naqi fee ifaqee sia miqidee. Inni ooqai mariranara maaqi qidaqa innee firaaqoo qiniara qimudao qimasee qini dadaaqianee qimasee inneeqa firaa uriqarara ainaina kaqi qimuqini inneeqa nifu faqa pitaqimeeqee kaqi qini qimuqini.

<sup>16</sup> Doo maqee Yisuna anoona ufa qimannimunnannai fee qini namuqaa kamambi maridee. Oo sia miqifanoo andeeqaannoo.

<sup>17</sup> Akaqa fasiqa anaasee aqee mariasa inni faqa ani maridaqa moo unna ufa qimannimi mariasa inniara unna qimasee firaaqoo ridaqa amiqi amiqidaqa ueeqaidaqa sia amiqira iriranarau miqidaqau, misa inni mara mareeqa qini Pauroosasaa qaraana rakee iageera miqidaqa, misa irirafa innee iannai ubeekanoo marifaqa inni iriranara nari iannai ubeekamasee misa ufa iriaqeera miqidaqa.

<sup>18</sup> Akaqausa inni rarisamaseeqa inneeqa irirana misasaa atooqara oosanafa qaaraikamminoo maridanoo. Moo mandoosana moo amiqira oosana maaqimminoo maridanoo. Misa inni rarisamasee misa manda oosana maraaqee qira oosanafa mandoosana maridanoo. Misa inni rarisamasee amiqira oosana maraaqee qira oosanafa amiqira oosanafa maridanoo. Ooqai qinee Pauroosa inni faqa mariafanaqa inni irirafa qinisaa atooqafi innee qiniara ridaqa mariusa mariafanoo maqee nianai



marunaqa innee qiniara minnisee unna ufa qimariasara kai misara kai rimariafanoo.

<sup>19</sup> Qini faiqi namu qini qimuqusimaria faiqi namusa mariafanoo. Anaasee moo fannoo faiqi aanaaqi maqaidanoo aupuraidanoo maqaidanoo. Qinee miqikaimmasee amiqira fasaasa ufa inni qimannimisee asaku mundirana andeeqara oosana marirana nirana inniki kambiqaanifeera inniara aupuraidaqa qimannimidaqa.

<sup>20</sup> Oo qinee maqee nianai maridaqa inni faqa mariaqaana nianai maridaqa inniara amiqira irirana iriaqaana kaaqa inniara daunduraki umaara raidanoo.

*Pauroofa Abarahaamana aanaaqagara kikiqusufa.*

<sup>21</sup> Innee indaaru Mooseena sandufakiqari idukufi Yisuna ufasaa atooqafi mariaasa maqee Mooseena sandufa ummaara ameemaanai munari minari kafaa keeqararee qimariasara mariafanoo. Innee sia fee mi sandufana iridaqee minaki kaifaa keeqaidee.

<sup>22</sup> Mifa maaqi qidanoo, Abarahaamafa qaara faiqi maqoofa maridanoo, moo indaaruaqa faiqi anoofa ainainira anaasee rumbarafa marinau, moo faiqi inaaqiannaana anoofa idukira anaasee Abarahaamana anaqa uqanna marinau.

<sup>23</sup> Abarahaamana amaaku Isamaeerafa rumbara anaasee faiqi marinau, faiqi anaasee imarundee inoo kai faiqi maqanau. Idukira anaasee Saraqana faiqi aadumasaa kambiqanau Anutufa qima afeekaikamasoofanoo Saraqafa qaafa anaasee asooqa maridanoo Abarahaamana faiqi maqanau.

<sup>24</sup> Mi anaasee qanda qaara irirana kikiqammusiqa maridaqa. Moo Qakaarafa Sinai aaqanasaa kambiqara anaasee marifa marifaqa mina faiqi namu Mooseena sandufa ameemaanai rumbaranaki kambiqaraura maridaqa.

<sup>25</sup> Qakaarafa Arabia maqa maaqaki mari aaqanna kikiqammusinoo maridanoo maqee maria Yeerusaree maqusa kikiqa faqa usinoo maridanoo mi maqusana faqa mi maqusanaki maria fasiqa anaaseesa faqa rumbaranaki Mooseena sandufa nimaarusira rumbaranaki maridaqa.

<sup>26</sup> Abarahaamana moo anaasee Saraqafa sia rumbara ainainira anaasee, sia Mooseena sandufa rumbaranaki marifa idukira anaasee marifa maasa Yisunasaa rusimariasara ninoofa uqanna maridanoo. Mifa innaarunai fuka Yeerusaree maqusara foora Yisunasaa rusimariasara firaa maqusa misa ninoofa uqanna maridanoo.

<sup>27</sup> Ooqeenaa akarakinnaa idi fannoo Saraqanara maaqi qidanoo, Innee faiqi siai anaaseesa asasiaqa, faiqi siai anaaseeuqa sia aupurarana faaqarimariasara, doo maqee innee asasiranara kai faaqaruqa. Afaaqi minnisai asooqa adeedaana, nifaaqi faqaasa uraaqaramasee moomoo faiqi maqaannoo.

(Abarahaamafa Isamaeerana anoona mifinnai oori ukeekeenoo nari anaqa uqanna Saraqanara mafi ameesuqusoofanoo mariufanoo mifa faqa asooqanamuki Abarahaamana faiqi uqanna Isakeena maqanau. Minara faiqi minnisainna anaaseefa faiqi moomoo maqeenooraa foora firaaqoo asiannoo fee qinau.)

<sup>28</sup> Qinee Pauroosa minara maaqi qidaqa. Saraqana amaaku Isakeefa Anutuna qima afeekaikira ufasaa kambiqanoo marinau, doo maqee innee qini qikaqaafasaauqa miqi kaimmasee Anutuna ufasaa mina faiqi namu kammambiqara mariafanoo.

<sup>29</sup> Mi aukuanna Isakeena aukuana faiqí anaasee undee mandoofanoo kambiqoofa Isamaerafa quandakinoo Anutuna maraqunannai kambiqoona Isakeena mandaikammamaqanau, doo maqee faqa mi oosanafa miqikaimminoo maridanoo. Mooseena sandufa ameemaanai mariasa inni aana ititaidaqa.

<sup>30</sup> Ooqeenaa tamummaqara akara fannoo minara maaqi qidanoo, Rumbara anaasee faqa narí faiqi faqa aqiqamasaina moosaa fifuani. Rumbara anaasee amaaku Isamaerafa idukira anaasee amaaku Isakeena faqa sia mina akoona ainaina moodaanaki maraani.

<sup>31</sup> Doo minara qini qikaqaafasaauqa inniqasaimbaqa sia rumbara anaasee faiqi namu maridaqa idukira anaasee faiqi namu maridaqa, Yisuna idukiranaki maridaqa.

## 5

### *Pauroofa idukiranaki mariasara amiqimasee rakisi qumaraaqee qufa.*

<sup>1</sup> Asauku mundirafa Mooseena sandufakinaana idukueeqee narí idukiranaki quqaqaiifaqa maasa minaki maridaqa, doo minara iriseeqa idukira fasiqara foora doo minaki mapukusee maridaqa sia kafaa sandufa oosana oosana rumbaranaki firaree qiaqa.

<sup>2</sup> Innee maana iriaqa qinee Pauroosa qimannimidaqa, indaaruu innee asauku mundirana saqarikiqau. Kafaa maqee moo fannoo inniara Yuda maqannaasa fainanduquseeqa Yisunasaa ookaamambiqa innaarunai fuagee qinaqa innee miqifanoo Yisufa sia amana inni dadaaqiannoo fifau ainainara foora mifa maridanoo.

<sup>3</sup> Qinee kafaa qimannimianaura afeekaikammasee qimannimianaura moo fannoo inniara Yuda maqannaasa fainanduquagee qinaqa fainanduquseeqa Mooseena sandufa ameemaanai doo minaki oonuraafanoo sia Yisuna namufaqa fuaqa mi mau kai fuaqa.

<sup>4</sup> Mooseena sandufannai Anutuna innarunai amanaikiranaki firaree qimariasa doo Yisunasaaqaraana doo inneeqa atekaseeqa mariafanoo Anutuna kaqi afaarinoo nimiranasaaqaraana aqoosai mariafanoo.

<sup>5</sup> Maasa sia miqidaqa sia sandufasaa ookaaidaqa, maasa irirafa Anutunasaa kai mundaqa maridaqa mifa narí kai maasa mareeqeenoo narí innaaruna amanaikiranaki quqaqiseenoo fee qimasee irirana minasaa kai rusisee maridaqa. Inniqasaimbaqa Yisuna saqariki marunanoo Anutuna maraquna fannoo minasaaqari maasa dadaaqifaqa maasa Anutuna innaarunai keeqaannanara اساساندهه afeesidaqa.

<sup>6</sup> Maasa asauku mundirana Yisuna faqa moodaanaki maridaqa Yuda maqannaasa fainanduqirana faqa sia fainanduqirana faqa miqanda fifau ainaina maridaqa. Anoona ainaina maaqimminoo maridanoo. Nariara nariara uriqarara ainainee qimasee nariara nariara amuqusirafa inni Yisunasaa rusirana akooroo imarifa mi ainainafa anoona uqanna maridanoo.

<sup>7</sup> Oo Karatia maqa maaqaki mariasa innee amiqimasee mi mau fimarusa mariafanoo, nanaree innee maqee anoona ufa minnisee mandoosana maree fee.

<sup>8</sup> Anutufa inni naarammeeqee Yisunaki quqee marifa mifau inni mareeqee kaqi runna quqeenooofau.

<sup>9</sup> Faiqí moo fannoo adudu fooqaafa inni qambaanai moodaa mari ifa mifa kai aiqamausa radiqifnnoo inni nifaaqai sukaqamannimaqaiifaqa aiqamausa kaqirunna firaridaqa.

<sup>10</sup> Qinee Pauroosa inni Karatia maqa maaqaki mariasara andeeqara aatata firanara iridaqa, maridaqa. Maasa inni faqa karaambaiqasaa atooqa marirafa qini qifaaqa quqarana qimidanoo, inniara sia moo iriranamau fifaranoo fee qidaqa inni mara moo aatata ubeekee mari fasiqausara qinee sia iridaqa, Anutufa misa naruannoo fee qidaqa.

<sup>11</sup> Oo qini qikaqaafasaa uqa qeeqara qimannimianauranoo qinee Yuda maqannaasa fainanduqira ufa asaku mundiranasaa ookaammasee minannai innaarunai firaree qimariana mi ufana maqusa maqusa qinee qimannimi marianaqau misa sia maqee maqee qini darimariaqini. Fainanduqira ufa Yisunasaa ookaairafa anoona marinoofau qinee asaku mundirana aunirira saqarisaa arunara qimannimianaqau sia daruqini. Yisunasaa mundirunara kai qimannimimarunaqa iridaqa darimariafanoo.

(Misa mi aukuanna faina kafaqianda uqidee qimasaida Yuda maqannaasa maasa Anutuna faiqi namu fee qimariqau. Nifaandama itirausara inni nianasaa naadumasaa mariaqee qimariqau. Pauroofa minara irisee maa ufana qimanniminou.)

<sup>12</sup> Inni Karatia maqannaasa mareeqee moo aatata quqemariasara qidaqa misa nari fainanduqiranara kai qidaqa nari nifaandama itirana faqa minaki ookaammaseeqa doo naadumasaaqanna maridaqa sia aaqaranaki inni fuki faaki qima quqaqeeera.

<sup>13</sup> Oo qini qikaqaafasaa uqa inniara qinee qianaara. Innee inneeqa mandainaina rumbaranaki mariafanoo Anutufa minakinaana inni naarameeqeenoo Yisuna idukiranaki quqeenoo. Doo innee minaki maridaqa inni nifaaqa manda nidimari ainainafa sia quandakinoo innisaa rakisidanoo inni nikaruqiranannai minni ubeekamannimaqaani. Sia miqiaqa maaqiaqa inneeqa nariara nariara rirafa nimudaoo qirafa inni nifiqeeqeenoo nariara nariara dadaaqiranaki quqaani.

<sup>14</sup> Mooseena sandufa aiqamatia maa moodaa ufanaki anoona kambiqaidanoo, mi ufafa maaqimminoo maridanoo. Innee inneeqa niqoonausara inniqa nifaaqara foora nidinaqa dadaaqiaqa.

<sup>15</sup> Innee aandaara foora nari aidafrana nari aidafrana nari ukaqami nari ukaqami irana nari ami nari ami idaqa rufiaqa qusaasa innee narinni narinni naru taikasefaara, minara nariara nariara nidiranara qidaqa.

*Pauroofa maqasaaqaraa irirana faqa maraquna irirana faqa miqandara qimaqoo ufafa.*

<sup>16</sup> Qinee Pauroosa minara inni qimannimidaqa. Sia innee inniqa maqasaa irirannai ubeekaaqa. Anutuna maraquna fannoo inni naakinoo marifa maqee maqee inni naaqooki amiqira oosana maraaqeeera qimaseenoo mandoosanara aaquqidanoo. Innee mi ufamau fiqa sia uqanna inneeqa maqasaa iriranamau fifaranoo.

<sup>17</sup> Maqasaa fasiqa anaasee maqasaa irirafa faqa Anutuna maraquna aidimari ainainafa faqa maasa naunduraki nari maqauruamaqee nari maqauruamaqee idaqa miqanda namuqaa marianara innee firaree qimariqoo sia amana fifaranoo. Minara innee Anutuna maraquna ufamau fuaqa.

<sup>18</sup> Anutuna maraquna fannoo inni rakisifaqa innee sia Mooseena sandufa ameemaanai mariafanoo.

<sup>19-21</sup> Faiqi faiqi maqasaa irirana oosana kaqi akooqoo maridanoo. Mina oosana maaqimmasee kooroidanoo, faiqi anaasee nari ummuari nari ummuarirana faqa adi namuqaqira oosana oosana faqa irirana siaisa furufarida kaqi mandainaina maraqanuana faqa saqarinnai unnaqira Anutuna amana auqusee irirana mina amimariana faqa aukainaina ufaqa

afaannainaina maraqanuana faqa, faiqí anaasee namuqaa kirana faqa rakirana faqa rairaiqirana faqa qusufa qimasee aanooqirana faqa, aiqama ainaina náriara kai fatusimariana faqa, naadu naadu rakeekaammasee nariqa kai naadu naadu suqimariana faqa, nariara nariara rairai qimariana faqa nammari namasee furufarirana faqa, misa suqufifaqa oosana oosana mandoosana uqeeree mariana faqa oosana oosana mandoosana maraidaqa. Qinee ooqai aaquqima nimaqaafanausa kafaa maqee faqa aaquqimannimaqaidaqa, mi oosanna maree mariasa sia uqanna Anutuna ququsaki keeqeefaranoo.

<sup>22-23</sup> Anutuna maraquna fannoo sia miqi maria mandoosanakina uqannifiqaidanoo. Innee mina ufamau fifanoo inni mareeqee amiqira saqari qaqammara foora ireefaranoo. Maa amiqira oosanausa ireefaranoo, nariara nariara uriqarara ainaina maridee qimasee nariara nariara rirana faqa Anutunara asasirana faqa naunduraki asooarana faqa faiqí aanaaseera reendenira irirana faqa amiqimandee dadaaqi mariana faqa afaarirana faqa amiqira ainaina afaarirana faqa sia minnisee firafa miqookai marida auqainna ainaina auqaida marirana faqa fisoofisoommasee ufa qirana faqa narí mandoosanara akooqamasee andeeqasee fimarina faqa Anutuna maraquna fannoo mi ainainausa kai uqannifiqaidanoo, sia moo sandufa fannoo mi amiqira ainainausara qaoo qiannoo.

<sup>24</sup> Asauku mundirana Yisunaindi mariasa misa nariqa faiqí faiqi irirana marirana faqa nári maqasaa irirana faqa aunirira saqarisaa Yisuna namu-faqa kuqa kai aru quqee mariasa maridaqa.

<sup>25</sup> Anutuna maraquna fannoo maqee oosana arasee naaru marirana qimimarifa marinara mifa kai maasa marirana nirana rakisiani.

<sup>26</sup> Sia maasa qeeqara doori uqeeraseeqa amiqirausee qimasee qeeqa qimooqia sia nariara nariara sukufa qia sia nariara nariara rairai qiaqa.

## 6

### *Pauroofa narí dadaaqi narí dadaaqiaqee qimaqoo ufafa.*

<sup>1</sup> Qini qikaqaafasaauqa inniki moo fannoo mandainainaki aqufinaqa qafeeqa Anutuna oosanara irimariasa mina mareeqee andeeqaranaki quqaaqa, sia aanoomasee miqi iaqa reendenamandee miqi iaqa anee mi fasiqana dadaaqidana aneenna marirana faqa rakisia, anee faqa minaki aqufinafaara.

<sup>2</sup> Innee narí ummaara narí ummaara dadaaqiaqa, miqiqa innee asauku mundirana sandufamau kaqa andeeqasee fimariafanoo.

<sup>3</sup> Faiqí moo fannoo ureeqarafa nariara uriqararausee qimasee sia qinee oorudupirausa dadaaqianauranoo fee qimarifa narí kai narí akaruqidanoo miqi qidanoo.

<sup>4</sup> Aiqama fasiqa anaasee nariqa kai nári marirana nirana nári kai amanamasee qafaaqa, sia moo naindisaa amanamasee qafaaqa narikai narí marirana auqarana amiqirafa marinanoo narí kai qafamasee asasiannoo.

<sup>5</sup> Aiqamausa nári umaara nári kai marasee quandaki aqoonausa faqa dadaaqiaqa.

<sup>6</sup> Akaqa fasiqauqa Yisuna ufa inni qimannimifaqa innee misa ufa irimariana akiqara quandaki narana munnimma, maaqa, ainaina naida nimiaqa. Miqidaqa innee misa ummaara dadaaqifaranoo.

<sup>7</sup> Innee sia inneeqa nikaru qiaqa, sia innee amana Anutuna afusaa ititasee furufariranaki quqeefaranoo, mifa maasa oosanara iridanoo. Anee narana asumu ummaqinana mina kai unakinnaranoo, anee nana mandoosana

niminana anee mina kai mareennaranoo. <sup>8</sup>Faiqí moo fannoo narí faiqí faiqí manda nidiranannai manda maqaki ummaquseenoo minakinaana kuqirana kai unakuannoo. Mifa Anutuna maraḡuna oosana marasee Anutuna afuḡaki ummaquseenoo minakinaana naaru marirana kai unakuannoo.

<sup>9</sup>Minara iriseeḡa amiḡira mariranara sia kudoosaapeeḡa minnisaḡa maasa sia minniseeḡa kaḡi mi mau fidaḡa kasooḡaḡee unnakirana paquriana.

<sup>10</sup>Minara irisee maana qimannimidaḡa maasa aiḡamausa amiḡira dadaaḡirana dadaaḡiaḡa sia moodaakari kai, maḡee maḡee dadaaḡirafa kambiaḡafinana dadaaḡiaḡa. Aiḡamausa dadaaḡidana niḡoonausa Yisuna saḡariki mariasa firaaḡoo dadaaḡiaḡa.

*Pauroofa taikara aaquḡirufa faḡa nimandara ufa faḡa qimaḡoo ufafa.*

<sup>11</sup>Doo ḡinee Pauroosa moo fasiḡa ḡimami marunanoo mifa akara ridanoo doo maḡee ḡeeḡa kai kirifi ḡumaree ati rafaḡaḡifira ufa ḡeeḡa kai firaaḡoo akara ridaḡa.

<sup>12</sup>Inniki nipatasaa akooḡoo mari ainainara kai darara ḡimasee ni-mooḡimariasa nariḡa nimooḡiaḡee ḡimasaidaḡa inni fainanduḡiranara sandanainai ḡida miḡiaḡee ḡimariasa maridaḡa. Misa sia kuḡaa anoon-ainainau auḡaidau fainanduḡuaḡee ḡidau, misa asauku mundirana aunirira saḡarisaa arunara ḡimannimiafaḡa mina akiḡara Yuda maḡannaasa darifoo ḡimasee fainanduḡira oosana Yisuna kuḡiranasaa ootupama-saifaḡa Yuda maḡannaasa niranaḡarafa asooaifanoo sia daruaḡeera.

<sup>13</sup>Misa inniara Yuda maḡannaafainanduḡira oosana maraaḡee ḡimariasa narí sia Mooseena sandufamau fimariasa misa inni Karatia maḡannaara fainanduḡira oosanara eedoo ḡianara kai narí nimooḡiaḡeera ḡimasaidaḡa inni fuki faaki ḡidaḡa.

<sup>14</sup>ḡinee ḡeeḡara ḡidaḡa ḡinee maasa karaambaiḡa, asauku mundirafa, Yisufa aunirira saḡarisaa kuḡunara minara kai ḡinee uḡeerasee amooḡianauranoo. Mi auniriranasaa kuḡunannai maa maḡa maaḡanasaḡaraa ainaina kuḡinoo mari ifoo ḡidaḡa sia kasidanoo minannai faḡa ḡinee faḡa kuḡiara foora ḡimarunausa marunanoo maa maḡa maaḡanakinaa mandainaina sia ḡini ḡumaraidanoo.

<sup>15</sup>Fainanduḡira fee, sia fainanduḡira fee, sia mifa anoona ainaina maridanoo. Anoona ainaina faiḡí anaasee kuḡaa naundurakinaafa fukaikamambinaḡa andeeḡasee marirafa mifamma anoona maridanoo.

<sup>16</sup>Innee mi iriranamau fimariasa ḡimannimianauro Anutufa naundurairasooarana faḡa Anutufa aidira nifauarana inniki faḡa aiḡama Anutuna faiḡí anaasee maḡasaa mariasaki faḡa mariani.

<sup>17</sup>ḡini Pauroosa rafaḡaḡifira ufa maaḡimminoo maridanoo. Sia moo fannoo kafaḡa ḡiniara Yisuna ufara sia andeeḡasee ḡimannimimari fee ḡifaranoo. ḡinee kuḡaa uḡanna Yisuna karabusa ainainira fasiḡa maridaḡa Yisuna ufa andeeḡasee ḡimannimiafannana akiaḡara ḡini darufa ḡifaḡasaa ḡufaanakuru aanaḡi marifa mifa ḡiniara kuḡaa Yisunaindi fee ḡimasee akooroidanoo. Misa ḡini darusaafaḡa mi ufaanakurunara Yisuna akarara foora maridanoo, aiḡamausa ḡini ḡiaḡafamasee Yisunaindi fee ḡiaḡeera.

<sup>18</sup>Maasa karaambaiḡa asauku mundirana Yisuna afaarirafa inniki mariani. Kuḡaa.

## EEFEESUSA

### Efeesusa maqusanaasa Pauroofa akara rumannimaqoo ufafa.

<sup>1</sup> Qinee Pauroosa Anutuna iriranannai asauku mundirana Yisunaindi maridaqa, mifa diqiqoo fasiqausa maridaqa. Anutuna maqasaa fasiqa anaasee Efeesusa maqusai mariasa asauku mundirana Yisuna ufamau andeeqasee maqee maqee fimariasa inni maa akarana rumannimaqaidaqa.

<sup>2</sup> Maasa qikoofa Anutufa faqa maasa karaambaiqa asauku mundirafa Yisufa faqa narí afaarirana faqa narí asooarana faqa inni nimiani.

*Pauroofa asauku mundiranaki mariasa innaarunai amiqi amiqirana mararufa.*

<sup>3</sup> Maasa dufi dufi qirana maasa qikoona Anutuna faqa maasa karaambaiqa Yisuna faqa nimiaqa. Maasa asauku mundiranaki keeqafufanoo mina akoofa Anutufa amiqi amiqirana maasa Yisuna namufaqa qiminau. Mifa innaarunaindaraa amiqira dadaaqirana qimaqaifanoo miqoo innaarunai maridanoo, minara maasa dufi dufi qimamaqaidaqa.

<sup>4</sup> Ooqai maa maqa maaqana sia auqu kamuqoo faiqí faqa sia maru kamuqoo Anutufa moomoosa kambiaqa marifandinausa kinaana maasa rusandeesamumandee marararee qimaqoosa maraqaisa maridaqa. Narí asauku mundirana Yisunannai maasa maraqoosa sia aaqarausa mariqeerera noori kandamasee andeeqarausa mariaqee qimasee maasa rusandeesamumasee maraqoosa maridaqa.

<sup>5</sup> Sia faiqí maru kamuqoo Anutufa narí aidiranannai maasara maaqimminau, qeeqa qisauku mundiranannai misa qini faiqi namu qiraamuqmaakai kammambifaqa qeeqa unnannai misa mara quqaanauree qinau. Anutuna aidirafa fuaninnana miqiminoo maridanoo.

<sup>6</sup> Anutufa narí kaaqa qara areenara afaarirana narí amuqusira amaaku kaqi nimimari ainainnara foora kaqi nimirau. Minara maasa qimuqusa ookiqari idaaqira ainaina uqannee qiaqeerera kaqi nimirau.

<sup>7</sup> Anutufa narí asauku mundirana kuqiranannai maasa mandainainakinaana idukuqiseenoo maasa mandoosana akiaqara minniqisainafa marianaura. Maasa minara irisee Anutuna firaa afaariranara akooqoo uqanna marifaqa qafamasee irisee naqimasee maraanauree minara rufiaida furufaridaqa.

<sup>8-9</sup> Anutufa narí irirana firana faqa qafeemariana faqa maraseenoo minannai ooqai marararee qimaqoona maraseenoo narí kukeeqara irirana asauku mundiranannai aiqama qimaqoo ainaina anonaikianifeera qimasee mina maa kamuqoo kooroomasee narí faiqi namu araamuqmaakai kiranara maasa qimaqiminau.

<sup>10</sup> Anutufa narí kai irinoo andeeqara aukuanee qimasee narí ooqai kambigaaninna ainainara qimarufa taikaannoo minara qimarufa maaqimmiannoo Anutufa aiqama ainainna auquqoo ainainafa innaarunai mari ainaina faqa maaqoo mari ainaina faqa oonu maree ani mareeqeenoo moodaanaki quqaseenoo asauku mundirafa misa nikiagasaa mariannoo.

<sup>11</sup> Anutufa mi aiqama ainainna narí ooqai fuanee qimaqoomau fidanoo miqidanoo. Anutufa narí ooqai fuanee qimaqoomau fidanoo maasa narí aiku asauku mariaqee qimasee faiqí aanaaseeki rusandeesamumandee maasa maranau. Sia kaqi miqinau, asauku mundiranannai kai mina aiku

asauku mariafanausa maridaqa. Ooqai indaaru oosana aroo aukuanna mi irirana maraqoomau fidanoo asauku mundiranannai maasa maraidanoo.

<sup>12</sup> Maasa asauku mundirana irirana naaree indaaru irisee minara afeesimariasa maasa Anutuna kaaqa areenaranara dufi dufi qidaqa.

<sup>13</sup> Innee Efeesusu maqannaasa faqa miqikai iqa mariafanoo. Amiqira fasaasa ufa innaaruna asumu marirana nimi maria ufana innee iriseeqa kuqaa anoonufee qufanoo Anutufa narí naaquqara maraquna nimiani qimasoofoa inni niminoo minannai nariara utaaqanau.

<sup>14</sup> Anutuna maraquna nimirafa Anutufa innaarunai qimianinna ainainnara qima afeekaikamma utaaqamaqoofa maridanoo, mifa Anutufa kuqaa mandainaina akiaqara rumberanakinaana idukirana qimiannoo fee qimarifa maridanoo, maasa minara irisee Anutuna kuqaa areenaranara dufi dufi qidaqa.

*Pauroofa Efeesusu maqannaasara innaaru qidanoo.*

<sup>15-16</sup> Qinee Pauroosa minara iriseeqa innee Efeesusu maqannaasa Karaambaiqa Yisuna saqarikiranara irisee faiqí aanaaseera Anutuna ufa irimariasara ridaqa dadaaqidaqa minara iriseeqa iriafannaqooqari qinee Pauroosa inniara Anutufinnai dufi dufi qidaqa. Qinee maqee maqee inniara innaaru qidaqa, maasa karaambaiqa asauku mundirana Yisuna kaaqa areenarana akoofa

<sup>17</sup> Anutufa narí maraquna inni niminanoo mifa irirana faqa Anutuna oosana faqa kooroomannimaqainaqa innee minara iriaqeera innaaru qidaqa.

<sup>18</sup> Anutufa inni naaramasee narí areenaranara afeesiaqee qimarianara innee iriaqee qimasee inniara innaaru qimasaanaqa inni nifu nitikura quandasainaqa areenarana nimianinnanara afeesiaqeera innaaru qidaqa. Naaquqara amiqi amiqirafa idaaqirafa moomoo uqanna narí maqasaa fasiqa anaasee innaarunai nimirara qima afeekaikidanoo nimiannoo minauqara faqa inniara iriaqeera innaaru qidaqa.

<sup>19-20</sup> Maasaki mina ufasaa irirana rusimariaqooqari Anutuna afeeka fannoo maasaki ainaini marinara faqa innee iriaqeera qinee Pauroosa inniara innaaru qidaqa. Anutufa asauku mundirana kuqiranakinaana uqeerasee innaarunai narí aaqa narí asauku uqannai ooqumaruqoo firaa afeeka faqa maasaki ainainimarifa faqa amana amana kai moodaa firaa afeeka maridanoo.

<sup>21</sup> Miqoo innaarunai asauku mundirafa aiqama ainainasaa uriqaramafi rakisidanoo, aiqama innaarunai uriqararaisa faqa faiqí firasaa faqa afeekafaqaasa faqa karaambaiqauqa faqa misauqa faqa urinaaqaramafi rakisidanoo. Mifa aiqama afeeka nuqu faqaasa maa maqa maaqanaki mariasa faqa innaarunai mariasa faqa urinaaqaramafi rakisidanoo.

<sup>22</sup> Anutufa aiqama ainaina mareeqeenoo asauku mundirana aramandunnai quqaseenoo mina mareeqeenoo Yisuna ufara suqimariasa nikiqasaa quqasaifanoo aiqama ainaina uriqarara karaambaiqa maridanoo.

<sup>23</sup> Yisuna ufara suqimariasa Yisuna adakara foora maridaqa, aiqamaimariainainafa qumbiqeemarifa narí adakaki Yisuna ufara suqimariasaki firaaqoo maridanoo.

## 2

*Ooqai kuqiranaki ubeekoofaqa maqee asumu mariranaki ubeekaqa mariidaqa.*

1-2 Qinee Pauroosa sia Yuda maqannaara qidaqa innee aanaamuru mariasara qidaqa, ooqai inniqa ufa rukiarana faqa aaqarana faqa miqiuinna akiaqara kuqiranaki mariusa mariqau, mi aukuanma maa maqa maaqana mandoosanamau kai fimariqau. Anutuna ufa rukiee mariasa maqee rakisi mari afaannafa Anutuna innaaruna meerai marifanoo mina ameemaanai marina, mina ufara eedoo kai qimarusa mariqau.

3 Maasa faqa aiqamausa aanaamuru Anutuna ufa rukiee mariasa naanna ramasee maasa qeeqa faiqi faiqi mandiriranamau fidaqa qeeqa qifaaqa irirana afaariqa kaqi qeeqa manda didiramau kai fiqiafana. Maasa Yuda maqannaasa aanaamuru naanna ramasee qeeqa qifaaqa afaaramasee mina akiaqara Anutuna aranaqaranaki firaridaqa.

4-5 Anutufa mina qafamaseenoo maasara amuqusirana faqa nifauarafa faqa firaatia marifanoo asauku mundirana saimbaqa maasa faqa kuqiranakinaana uqeera qiseenoo sia moo ainaina, Anutuna afaarirafa kai innaaruna asumu mariranaki quqanniseenoo.

6 Anutufa maasa asauku mundirana Yisunasaa atooarana qafamaseenoo mina namufaqa kuqiranakinaana uqeeraqiseenoo Yisuna namufaqa Anutuna innaaruna mariasasaa rakisi nimaqaaqee qifaqa miqoo rakisirausaikaq mariana.

7 Sia Anutufa fifau miqinau, nari fira afaarirana faqa, maasa asauku mundirana Yisunaki keeqarana qafamaseenoo nari fira aadirana amuqusirana faqa naaru kambiqainausa uqannifiqarara miqinau.

8 Sia moo ainainannai Anutufa nari afaariranannai kai inni innaarunai asumu mariranaki quqannisaidanoo, innee Yisuna saqarikiranannai afaaramma nimaqaidanoo. Inni asumu nimirafa sia innee andeeqasee fimarianasaafau mundidanoofau, sia innee amiqira oosana marasaida kadaapiridee qimarianasaafau mundidanoofau, Anutuna kaqi nimiranasaa kai innaarunai asumu marirana maasa qimirana uqeereenoo.

9 Sia maasa qeeqa kadaapiriranannai innaaruna asumu maraanaura minara sia fifau maasa qeeqa qimooqira ufa mariannoo.

10 Anutufa maasa auqufa maridanoo sia fifau maasa auqinau, maasa asauku mundirana Yisunasaa atooqaranasaqari andeeqasee nirana marirana mariaqee qimasee maasa auqinau. Doo ooqai mi andeeqara nirana marirana maasara deedaqammaqoofa maridanoo.

*Yuda maqannaasa faqa aanaamuru faqa asauku mundiranaki moodaanaki maridaqa.*

11 Yuda maqannaasa ooqaindari nariara kai Yuda maqannaasa fainanduqirau Anutunaindi maridee qimasaida inni aanaamuruara sia maasa fainanduqirau marunnanara aqoosai mariasa maridee qimariqau. Misa fifau nari fainanduqiranara qidaqa miqi qimariqau. Innee aanaamuru mariasa innee ooqai mariunara iriaqa.

12 Innee Efeesusa maqusanaasa asauku mundiranasaqari naaduma nianasaa mariusa mariafanoo, innee aanaamuru Anutufa maqasaqaraasaki sia rusandeesamumandee nariara maroosa mariafanoo, aanaamuru nianasaa mariusa mariafanoo. Anutufa Yuda maqannaasa faqa moodaanakikira ufa oosana oosana qima afeekaikiranasa mundiq mariusa mariafaqa innee aanaamuru sia minaki marusa naaduma nianasaa marusa mariafanoo. Innee Efeesusa maqusanaasa maa maqa maaqanaki maridaqa sia Anutunara faqa moo ainainara faqa irimariqau kaqi furufara kaimmiqaniqau, Anutuna siaisa mariqau.



<sup>13</sup> Doo maqee innee asauku mundirana Yisunasaa atooqaana akiaqara inni ooqaindari nianai mariusa maqee Anutufa inni rarisameeqeenoo adeedi quqeenoo, asauku mundirafa aunirira saqarisaa kuqunannai kai miqinoo.

<sup>14</sup> Anaamuru faqa Yuda maqannaasa faqa namuqaara foora niana niana rakee iqa mariaasa asauku mundirafa nari kai mareeqee moodaanaki quqaseenoo asoarana maasa qiminou. Yuda maqannaasa faqa aanaamuru faqa namuqaakiqa marufanoo qambaana faandamura ititanoo maruna asauku mundirafa nari afaaqannai faandaamura rakee mandoofaqa moodaanaki kiqau.

<sup>15</sup> Mooseena sandufakina oosanoosana ainainara nimaarusirana mifa faandaamurara foora Yuda maqannaasa faqa aanaamuru faqa aiqamaqara rakeemaqoofaqa mariqau. Asauku mundirafa doo mina ruka taikasoofaqa mi atiqanda oonu maree ani maree asauku mundirana faqa moodaanaki kiqa asoaranaki maridaqa.

<sup>16</sup> Asauku mundirafa nari aunirira saqarisaa kuqunannai Yuda maqannaasa faqa aanaamuru faqa nariara nariara fidiqaa imaruna aru taikanau, nari aunirira saqarisaa kuqunannai Yuda maqannaasa faqa aanaamuru faqa rakimaruna taikaseenoo Yisufa mareeqeenoo mafi moodaanaki quqaseenoo mareeqeenoo Anutuna aanooqirana taikaseenoo nari akoona Anutunaki asoaranaki quqanau.

<sup>17</sup> Miqi marunara asauku mundirafa nari amiqira asoara fasaasa ufa maree qumureenoo innee Anutunasaaqari nianai maria anaamurusa faqa Yuda maqannaasa Anutuna aaqa mariasa faqa qimanniminou.

<sup>18</sup> Maasa aiqamaqara Yuda maqannaasa faqa aanaamuru faqa asauku mundiranannai kai amana maasa moodaa maraqunaki anireeqa maasa qikoona Anutuna afusaa kikiqianauro.

<sup>19</sup> Ooqai innee moo maqannaara foora aanaamuruura foora mariasa mariafanoo doo maqee sia miqiqa mariafanoo innee doo maqee Anutuna aiku asauku mariasa Yuda maqannaasaki moodaa maqannaasa kammambi innee mariafanoo.

<sup>20</sup> Doo maqee sia Yuda maqannaasa kai, innee faqa maaqara foora usakafifanoo asauku mundirafa Yisufa nari uqanna faakana miqirafa marinanoo Yisufa niqiqoo fasiqausa faqa Anutuna tamummaqara fasiqauqa faqa maaqa atunara foora marifanoo innee faqa maaqa asaanara foora misasaa faqa Yisunasaa faqa atukaramambiqa mariafanoo.

<sup>21</sup> Yisufa uqanna faakanara foora maridanoo aiqama maaqa asaana afapita qumarasaifaqa afeekaikiqa mariafanoo karaambaiqa naaquqara amaana maqara foora usakaidanoo fimaree aimaree innooqaidanoo.

<sup>22</sup> Innee aanaamuru asauku mundirana saqariki mariasa faqa aiqamausa Yisunaki mariasa faqa Anutufa inni qumareeqeenoo maaqara foora usakaseenoo nari maraqunannai mi maqanaki inniki mari maqafa maridanoo.

### 3

#### *Pauroofa nari aanaamuruki saikiranara qidanoo.*

<sup>1</sup> Qinee Pauroosa minara iriseeqa inni Efeesusa maqannara Anutufinnai innaaru qidaqa. Qinee inni aanaamuruura qimannimunnana akiaqara asauku mundirana Yisuna rumberanara foora Roomma maqannaasa rumberanaki marunau maridaqa inniara innaaru qidaqa.

<sup>2</sup> Anutufa narí afaariranannai inni aanaamuru dadaaqiaqee qimasee qimunara innee amiqimmandee minara irimariafanoo.

<sup>3-4</sup> Anutufa Yisunara ooqaindari kukeeqanoo marunara maqee aukwana qini kooroomaqimaqeenoo. Qinee maa pasanaki kaqikaagoo minara inni qimannimiqa, innee mina asaana rumaseeqa iriqa qiniara asaku mundirana kukeeqara irirana amiqimmandee iridanoommifoo qifaranoo.

<sup>5</sup> Ooqai narí kukeeqara irirana Anutufa sia kooroo inau, doo maqee narí maraqunannai amiqira niqiqoo fasiqausa faqa tamummaqara fasiqauqasaa faqa qimanniminoo.

<sup>6</sup> Mina kukeeqara ufa maqimminoo maridanoo. Yuda maqannaasa Anutuna amiqi amiqiranaki maridaqa, Yisuna amiqira fasaasa ufa fannoo inni aanaamuru faqa oonu mareeqeenoo Yuda maqannaamiqi amiqiranaki quqannisaidanoo. Innee aanaamuru mariasa maqee Yuda maqannaasa saimbaqa moodaa nifaaqara fooro maridaqa asaku mundirana Yisunakiqari Yuda maqannaasa qima afeekaikammaqoofa innee aanaamuru misa saimbaqa minaki marida maree mariafanoo.

<sup>7</sup> Anutufa narí afeekannai naakaparana akoofasaikirana moo qimufaqa qinee minannai Yisuna amiqira fasaasa ufa saikira faiqikiqa maridaqa.

<sup>8</sup> Qinee Anutuna aiku asaku maqasaa fasiqaki oorudupirausa marunanoo Anutufa sia minara irinoo kaqi mi naakaparana qiminoo diqiqamaqimaqeenoo asaku mundirana, innaarunai nimira amiqi amiqira ainaina moomoo ainaina sia amana asaana rirana amana mi ufanara aanaamuru qimannimiranaki qini quqaqisaifaqa maridaqa.

<sup>9</sup> Anutuna ooqai kukeeqara irirafa maqee kooroommasee faiqi anaasee amiqimmandee iriaqera faqa qini minaki faqa quqaqisaifaqa maridaqa. Anutufa aiqama ainaina auquqoofanoo marufa miqooqari moomoo aukwana narí kukeeqara irirana Yisunara kisaaqasaa rafaqaqafuqoofanoo marinau.

<sup>10</sup> Maqee aukwana kooroo ianifeera qimasee Yisuna ufara suqimariasa misannai Anutufa narí irirana quandaqaandidanoo uqannifiqaiifaqa qafaidaqa mina amiqi amiqiranara innaarunai ameemaanai mariasa misa uriqararausa faqa rakisirausa faqa maqee uqannifiqaanifeera Yisuna kooroo idanoo.

<sup>11</sup> Anutufa narí naaru naaru mariranaki maridanoo mi ainainna auquanaree qimaqoona maqee auqinau, narí asaku mundirana Yisunannai mi ainainna, narí ufara suqimariasakina narí irirana kooroo ianifeera auqinau.

<sup>12</sup> Maasa Yisunasaa atooqa marianannai faqa maasa mina saqarikiranannai faqa sia maasa nisaurida rufiaanaura, paasoosamasee Anutuna afusaa fuannanara mi eedoo qirafa maasaindi maridanoo.

<sup>13</sup> Qinee Pauroosa minara irisee inni afeekaikamandaيدا qimannimidaqa. Qinee Yisuna ufa qimannimunaqa misa minara fifau qini karabusaki quqeeqa. Inni Efeesusa maqannaasa qinee karabusaki marunna aupuraranara iriseeqa sia Yisuna ufa minniseeqa kudoosaapaqa, innee minara maqi qiaqa Pauroona karabusaki marirana maasa Efeesusa maqusanaasa amiqimaqimaqaidanoo fee qimasee asasiaqa.

*Innee nariara nariara nimuqusiranaki mariaqera qidanoo.*

<sup>14</sup> Qinee minara iriqa maasa qikoona Anutunara iriseeqa qiqoori saunarafiqa kummara mafi inniara qeeqa qimuqusannoo innaaru qidaqa.

<sup>15</sup> Innaarunai mariasa faqa maqasaa mariasa faqa aiqamatia Anutunasaqaraana nariqa nuqu uqanna maridaqa.

16-18 Mi Anutunara inniara innaaru qidaqa, asauku mundirana innee saqarikiranannai mifa anireenoo inni naunduraki maaqakiara foora ani keeqaanifeera. Mifa narí maraqunannai narí areenarana firaanakiqari inni naunduraki afeeka niminaqa mapukusee mariaqa. Qinee inniara maaqi qidaqa innaaru qidaqa, innee inneeqa atukara foora faqa faakanara foora faqa nariara nariara nimuqusiranaki mapukusaqa, innee Efeesusa maqannaasa faqa Anutuna aiku asauku moo maqanna mariasa saimbaqa afeeka marinaqa minannai asauku mundirana inniara amuqusinoo aidi-rana firaana iriaqeera innaaru qidaqa. Mifa inniara amuqusinoo aidi-rana mina kisaagasaa aidi-rana faqa mina qusa kamu faqa mina meerai sandaaqaira faqa mina meemai farumara foora marirana faqa mina firaatiara iriaqeera qinee innaaru qidaqa.

<sup>19</sup> Eeoo innee mina inniara amuqusirana firaanara iriaqeera innaaru qidaqa, sia amana moo fannoo firaqoo iriannoo, firaafa maridanoo, mina amuqusirana firaafa maridanoo, innee mina amuqusirana firaana iriseeqa Anutuna umbiqarafa innikina umbiqaanifeera inniara innaaru qidaqa.

<sup>20</sup> Anutuna afeeka fannoo maasaki saikiranannai naunduraki amiqi amiqirana nimiannoo, mina naunduraki dadaaqirafa maasa sia amana minara iramasee qimianne qianaara sia amana maasa minara irianaara fira ainainatia maridanoo.

<sup>21</sup> Yisuna ufara suqimariasa nariqa asauku mundiranasaa atooaranannai Anutuna amooqirafa maqee kamuqoo faqa naaru naaru faqa mariani.

## 4

### *Maasa Yisuna adaka atiara foora maridaqa.*

<sup>1</sup> Qinee Pauroosa karaambaiqa Yisuna ainaini marunnana akiaqara Roomma maqanna karabusaki maridaqa. Qinee karabusaki maridaqa inniara afeekaikamandee qimannimidaqa. Anutufa inni naaramasoofaqa innee asauku mundirana saqariki maru kamuqooqari inneeqa nirana mariranara andeeqasee marianifee qimasee inni naarama minaki quqeenoo. Inneeqa marirafa mina amanakai marianifeera qinee qeeqa qimuqusa ookiqari afeekaikamandee qimannimidaqa.

<sup>2</sup> Sia Anutufa quqaqoo andeeqarana minnisee moomau fuaqa, innee maqee maqee sia urinaaqaraqa oorudupimasee mariaqa, sia aanooiaqa, ireeda kai pisoopisoomandee mariaqa sia faiqí aanaaseera qusa ufa qimasee aanooiaqa kisaagasaa ireeda kai idaaqammannimaqaqa. Innee faiqí aanaaseera nimuqusinanoo nidimarinaqa mifa kooroo ianifee qimasee narinni narinni dadaaqifanoo mifa kooroo iani.

<sup>3</sup> Anutuna maraquna fannoo inni moodaanaki mara quqasaifaqa mari-afanoo innikina asoarafa inni moodaanaki afapita qumaraifaqa mari-afanoo innee mina moodaanaki marirana amiqimasee rakisiaqa, rakee iani.

<sup>4</sup> Maasa Yisuna ufa irimariasa moodaa nifaaqara foora maridaqa, Anutuna maraquna faqa moodaa maridanoo Anutufa moodaa ainainara afeesiranaki inni rarisama quqeenoo.

<sup>5-6</sup> Karaambaiqa moodaa kai maridanoo, Yisuna saqarikirafa moodaa kai maridanoo, amaana nammari moodaa Yisuna auqusaa kai rumanni-maqarafa maridanoo maasa aiqama maqa maaqakinaasa nikoofa Anutufa moodaa kai maridanoo, aiqamausa karaambaiqa mifa kai maridanoo mifa narí ufara suqimariasa aiqama naunduraki maridanoo aiqamausakiaqa ainainidanoo.

<sup>7</sup> Asauku mundirafa nimira dadaaqira afeeka maasa aiqamausa qiminau narí moomoo dadaaqiranakinaana qiminau. Moo dadaaqira afeeka moo fasiqa aminau, moo dadaaqira afeeka moo fasiqa anaasee niminau. Nimisoofaqa minannai Yisuna saika maraaqeera niminau.

<sup>8</sup> Ooqeenaa tamummaqara fasiqa asauku mundirafa dadaaqira afeeka qimianinnanara maaqi qimasee akara rinau.

Mifa rakira karaambaiqara foora maridanoo namuqaa maqusaki ititasee misa narusee faiqí moomoo karabusa rumbasee misa ainaina faqa indaa mamaree nifiqamaree meerai narí maqusai oorureenoo narí maqannaasa qimannimifaqa mina amooqiafanoo ainaina raina niminau.

<sup>9</sup> Mi tamummaqara fasiqana ufa kooroo irafa Yisunara maaqimminoo maridanoo.

<sup>10</sup> Mifa narí maqusai meerai ooru funara maaqi qidanoo, mifa naaree meemai maqa ameemaanai ooqureenoo miqooqari mifa kai innaaruna maarini aiqama innaaruna maarinni oorureenoo narí marirana narí auqu amana kai marianifeera aiqama atinai narí irirana narí auqu amana kai quqasanau.

<sup>11</sup> Mifa kaqi nimira dadaaqira afeeka faiqí anaasee niminau, mi dadaaqira afeekafa ainainirana akoofasaikiagee qimasee akaqausee niqiqoo fasiqausa akoofasaikirana niminau, akaqausa faiqí anaasee qimannimirana akoofasaikirana niminau, akaqausa aamina maqannaasa qimannirana akoofasaikirana faqa paatoo saika akoofasaikirana faqa ufasaa rakisirana akoofasaikirana faqa niminau.

<sup>12</sup> Anutufa sia fifaufau mi dadaaqira afeekana niminau, faiqí anaasee Yisuna ufara suqimariasa Yisuna afaaqara foora afeekaikamasee mariaqeera mi dadaaqira afeekana oosana oosana maasa qiminoo qinau, innee maa dadaaqira afeekana marasee minannai qini ufara suqimariasa afeekaikamannisaagee qinau.

<sup>13</sup> Maasa miqimamaree fidaqa maasa kasooqagee moodaanaki kianaura. Anutuna amaakuara irirana faqaa irirana minasaa rusirana faqa miqianannai mi moodaanaki kirafa amana kambiqannoo, mikari maasa faiqí firaasa iriranara foora maraauranoo maraseeqa asauku mundirana firaa irirana amana kai ooru mundufuanauranoo.

<sup>14</sup> Mikari maasa sia faiqí aanaaqiara foora aiqama oosana oosana amaana ufa iriseeqa munari minari ianaura unna ufa qimaria fasiqausa nári nikaruqira finnai akaqausa aaqaranaki rarisama quqaidaqa maasa misa ufa iriseeqa sia ufaira foora aiqama saqari udammí udammianaura.

<sup>15</sup> Maasa sia miqiaqa, maaqiaqa, nariara nariara qimudao qimasee ridaqa minaki maridaqa nariara nariara sia unnufa qiaqa, anoona ufa kai qidaqa maasa miqianannai faiqí aanaaqiara foora asauku mundirana maasa qikiaqa amanakai innooqamaree ooru mundufuanaura.

<sup>16</sup> Asauku mundirafa narí ufa ameemaanai mariasa rakisimarifaqa misa minara maasa qikiaqa fee qidaqa. Faiqí afaaqaa sia moodaa ainaina maridanoo oosana oosana afaaqaa ati fannoo aadu aadu ainaina akoofasaikirana moodaanaki ootupamafifanoo moodaa fasiqa maridanoo. Asauku mundirafa maasa qikiaqa marifa maasa rakisimarifaqa maasa faqa miqi kai iqa faiqí afaaqaa fooqaana aadu aadu akoofasaikirausa moodaanaki ootupanoo marifaqa maasa qikiaqa Yisunasaa atooqa maridaqa mina afaaqaiqiqa maridaqa. Maasaki aiqamausa naadu naadu nariqa saikirana andeeqasee maridaqa sia nariara nariara nikooqaani nariara nariara rinnannai moodaanaki innooqafinoo amiqimmandee kambiqafi fuannoo.

*Asauku mundiranaki mariasa asukunakinaa oosana taikafinanoo kaaqa qarafa aniani.*

<sup>17</sup> Miqi marianara qinee Pauroosa Karaambaiga augusaa inni qimannimidaqa afeekaikamandee kafaa kafaa qimannimidaqa, sia Anutunara aamina maqannaasa naanna raaga. Misa irirafa fifau faafaumminoo maridanoo. Innee andeeqasee mariaqa.

<sup>18</sup> Misa nitikurakinaa irirafa asukunaki maridanoo Anutufa nimirari marirana sia misa kaqikaagoo maraidaqa aanaamuruara foora sia maraidaqa, misa kaaqa irirana siaisa furufari mariasa nari qimaqaamau kai fimariasa, minara kai asukunaki maridaqa.

<sup>19</sup> Misa nisaurirana taikaransa maridaqa nari nifaaqa marirana mandoosanai kai ubeekaidaqa oosana oosana nisaurimaria ainainna sia nisauridaqa fanandidaqa kaqi umaraidaqa.

<sup>20-21</sup> Innee Efeesusa maqannaasa miqira mandoosana sia asauku mundirana saaqaraana iriafanoo, innee minara irisee Yisuna aiku asauku kambiqafufaqa andeeqara irirana faqaasa inni mina anoona ufa inni qimannimiafaqa irimariafanoo.

<sup>22</sup> Minara innee inneeqa ooqeenaa marirana nirana fatika aqusaaga inni ooqeenaa marirafa inniqa mareeqeenoo inniqa manda nikaruqira nidiranaki quqasoofaqa miqoo innee inneeqa kai kuridimariafanoo.

<sup>23</sup> Inni nimugusaki manda nidira nidimarina faqa nitikura mandirira irimariana faqa taikasee innaarunaindaraana fuka amiqirafa kai mariani.

<sup>24</sup> Inni innaarunaindaraa fuka marirafa Anutuna nari miqirafa maridanoo, mina anoona ufaki andeeqasee marirana faqa Anutuna ufa ameemaanai marirana faqa mina amooqirana faqa mi fuka marirafa anoona maridanoo, innee mi marirana kai qamunnara foora afisusee minaki maraqa nuaqa.

<sup>25</sup> Doo minara maaqooqari sia unna ufa kafaa mariani, taikaani, aiqama narinni narinni anoona ufa kai nari qimami nari qimami qiaqa, maasa aiqamausa moodaa nifaaqara foora kai marunnanara narindi narindi marunnanara unna ufa sia qiaqa anoona ufa kai qiaqa.

<sup>26-27</sup> Ani aanooirafa kambiqafinoo sia ani rarisameeqee mandainainaki quqaani, anee aanoo qinana doo mi faasaanasaa mi suanina keeqarana namufaqa taikaseena faiqaa sia kisaagasaa aanoida maria, dauni taikaa, Sadannafa minaki keekafinoo mandainaina uqeeraandoo.

<sup>28</sup> Ainaina ummuari mari fasiqafa ummuarirana taikaani, taikasee quandaki andeeqasee nari ainainamasee nari narana namasee kudi fasiqauqa faqa naida niminaqa naqa.

<sup>29</sup> Sia putaa ainaina afunda ainainara ufa qiaqa, faiqi anaasee pooduqamannimaqaida dadaaqimaria ufana kai qimasaifaqa misa iriseeqa amiqirana adiafaairana mareefaranoo.

<sup>30</sup> Manda ufa qinanoo Anutuna naaquqara maraquina fannoo iriseenoo akooqaanoo. Anutuna maraquina fannoo inni faqa marifa Anutuna akarara foora narindi fee qidanoo inniki akara rinoo maridanoo. Mi maraquina akarafa maaqi qimasee inniara qima afeekaikidanoo kasooqaqee Anutufa qinanoo Yisufa qumuree inniara qinindi fee qimasee maraannoo.

<sup>31</sup> Doo maqee aukwana aiqama sukaqara ufa faqa qusufa qimasee darara qirafa faqa naunduraki mari aanooirafa faqa fatika aquaqa. Nariara nariara firaa kari nameera ufasaa niqimariafa faqa aquraree mariannana faqa sia kafaa mariani naundurakinaa nariara nariara fidiqaa ira irirafa faqa taikaani.

<sup>32</sup> Sia miqiaqa, maaqiaqa, nariara nariara ireeda kai nimuqusa reen-deenirafa faqa dadaaqirafa faqa mariani, narinni narinni mandainaina minnisaqa. Maasa oosana oosana ainainannai Anutuna mandaikamma amaqaafanausa marifanoo Anutufa asauku mundiranannai maasa darirana minniqisanau. Doo innee minara iriseega mina amana kai doo inniqa niqoonausa mandaikamma nimaqarana narí minnisee narí minnisee iaqa.

## 5

### *Anutufa maasara rirana ammeemmeerიაqa kaaqa qarana maraaqa.*

<sup>1-2</sup> Innee Efeesusa maqusanaasara Anutuna amuqusira aiku asauku marianara mina ammeemmeerიაqa asauku mundirafa maasara rinoo amuqusinoo narí marirana maasa qimaqa maqasee kuqiranaki quqa-soofanoo tatufira aanda u suqara fara foora Anutuna aikiambu inau, innee faqa miqi kai iqa asauku mundirafa maasara rirana ameeemmeerida nariara nariara ruaqa. Inni nariara nariara rirafa maqee maqee inniqa marirana rakisinnimaqaani.

<sup>3</sup> Innee Anutuna maqasaa aiku asauku marianara inniki faiqí anaasee narí ummuari narí ummuari maria ufana faqa ikairi irirana faqa ainainara faqa aanaaseera faqa kaaqa fanandi mariana faqa sia mi oosanna maraaqa minara ufa qimariafa faqa doo taikaaqa.

<sup>4</sup> Ikairi putaa ufa faqa furufarira ufa faqa uteeti qimasee naanaindara qimaria ufana faqa aiqama sia andeeqara ufa sia inniki amanaikinoo maridanoo Anutuna maqasaa aiku asauku mariafanoo. Innee sia miqaa miqaa iaqa, maaqiaqa innee maqee maqee Anutunara dufi dufi qirafa kai inniki mariani.

<sup>5</sup> Innee maa moodaa ainainnara kai amiqimmandee iriaqa, faiqí anaasee narí ummuari narí ummuari mariasa faqa ikairi faqaasa faqa kaaqa ainainara rimarias faqa miqaa qiyanuasauqa, asauku mundirana ququsaki faqa Anutuna ququsaki faqa sia uqanna kaqikaaqoo mareefaranoo. Kaaqa ainainara rimaria oosana mifa moo unna anutunara innaaru qimaria fara foora mina ufa iri maria fara foora maridanoo.

<sup>6</sup> Minara moo fannoo mi oosana oosana manda ainainnara aufadamasee ufa qimasee narí furufarira ufannai inni nikaruqimasee mandainainaki fuagee qinaqa sia uqanna innee mina iriaqa.

<sup>7</sup> Maqee maqee Anutufa mi manda oosannara kai qaoo qimarifaqa sia irianannai kai Anutuna aanoo qirafa misasaa aqufidanoo. Minara qinee inni qimannimidaqa miqinna fasiqa anaaseesa sia misa faqa mariaqa, nianasaa rufiasee mariaqa. Minara qinee maaqi qimasee qimannimidaqa.

<sup>8</sup> Ooqai innee Efeesusa maqusanaasa faqa asukunaki mariusa mariafanoo doo maqee karaambaiqa Anutuna faiqí anaasee aiku asauku kamambi mariafanoo kaaqa qarana fooqaasa mariafanoo, doo minara iriseega kaaqa qaranaki mariasara foora ida mariaqa.

<sup>9</sup> Kaaqa qarafa qafuqakinaa ainaina amiqi amiqifanoo kambiqaidanoo Anutuna kaaqa qaranaki mariasa miqi kai iqa kaaqa qaranaki maridaqa misaki amiqirana faqa andeeqarana faqa anoona ufa qirana faqa misaki kambiqaidanoo.

<sup>10</sup> Innee karaambaiqa aidi mari mariranara randasee maraaqa.

<sup>12</sup> Asukunaki mariasa kukeeqaranaki maridaqa oosana oosana manda nisauri maria ainainna maraifaqa maasa misara qisauruanoo qimasee sia misa oosanara kaqikaaqoo ufa qianaara.

<sup>11</sup> Minara innee furufarira marirana maree mariasara faqa asukunakinaa oosana maree mariasara faqa rufiasee innee nianasaa mariaqa innee misa manda asukuna mareeqee aiqamausa nifusaa kaaqa qara qoo quqasaifaqa mi manda asukunaki mariasa nisaurirana marasee minnisaaqeera.

<sup>13</sup> Mi manda ainainausa mareeqee aiqamausa nifusaa kaaqa qara qoo quqasaifanoo mi manda ainainausa oosana uqanna kaaqa kooroomambuannoo.

<sup>14</sup> Aiqama ainaina asukunakinaana mareeqe kaaqa qara qoo aiqamausa nifusaa quqasaifanoo mi ainainausa faqa kaaqa qaranaikiannoo. Minara maasa idi moo maaqi qinoo maridanoo.

Anee faiqee marianafa findi fua.

Kuqiranakiqari findi finanoo

asauku mundirafa suaniara foora anisaa qaani.

<sup>15</sup> Mi ufafa miqinoo marinara innee Efeesusa maqannaasa inneeqa mariranasaa amiqimmandee rakisiaqa. Sia aamina fasiqara foora mariaqa irirana faqaasara foora mariaqa.

<sup>16</sup> Maa kamuqoo manda marira kamu marinara sia fifau suani afu afeesimarina kaqinni aiqaraani, aiqama faasaanara ainainira faasaanee qiaqa.

<sup>17</sup> Minara innee sia furufariaqa Karaambaiqa inniara fuaqee qinaqa fifandinnanara faqa auqee fandinnanara faqa ooqai iridanoo innee mi iriranara randasee paqurimandee mi mau afeekaikamandee fidaqa qafaqa.

<sup>18</sup> Innee nammari namasee furufarirana sia maraaqa mifa inni kuridimarifa maridanoo Anutuna maraquna fannoo kai inni naakufinoo naundururai qumbiqafinaqa mariaqa.

<sup>19</sup> Innee narí qimami narí qimamidaqa Anutunara amooqirafa inni naundururai qumbiqafina maridaqa Dafidina idi faqa amaana idi faqa Anutunara rara idi faqa mi idinannai narí qimami narí qimami qiaqa.

<sup>20</sup> Maasa karaambaiqa asauku mundirana Yisuna auqusaa maqee maqee aiqama ainainara maasa qikoona Anutunara dufi dufi qiaqa.

### *Faiqí aanaaseera qidanoo.*

<sup>21</sup> Innee asauku mundiranara naaqqee marinara nariara nariara ureeqafi maridaqa reendeena mandee mariaqa.

<sup>22</sup> Innee aanaaseeuqa faiqí ninaaqmaaka qimannimidaqa, innee faqa karaambaiqa aramandunnai maridaqara foora inneeqa nifaaqmaaka ufa ameemaanai miqimandee mariaqa.

<sup>23</sup> Asauku mundirafa narí ufara suqimariasaa innaaruna asumu nimirifa maridanoo, misa uriqararafa maridanoo, anaasee nifaaqmaaka miqikai iqa nári ninaaqmaaka uriqara mafi marianara inneeqa nifaaqmaaka nimeemaanai ureeqaqa mariaqa.

<sup>24</sup> Asauku mundirana ufara suqimariasaa eedoo qimasee mina aramandunnai ooqu mari fidaqa mariandee kai iqa aanaaseeuqa nári nifaaqmaaka aiqama ufa ameemaanai mariaqa.

<sup>25</sup> Faiqí inni faqa qimannimidaqa innee aanaaseeuqa nifaaqmaaka inni qimannimidaqa, innee faqa asauku mundirana aanna raaqa, Yisufa narí ufara suqimariasaa narí aanaaqara foora misara kaaqa amuqusufanoo misa naaru mariaqeera qimasee narí marirana misara kuqiranaki paasoosamandee quqanau. Innee inneeqa ninaaqmakara miqi kai iqa uriqarara ainainee qimasee nimuqusinaqa ruaqa.

<sup>26-27</sup> Fuka anaasee narí afaaqinnai fuanee qimaseenoo afaqa anukamaseenoo amiqira siara qamunna afisumareenoo narí afaqa akumbau fee

namuana fee qikairi fee sia marifanoo andeeqa mareenoo narí afaaqinnai fidanoo. Asauku mundirafa narí ufara suqimariasara fuka anaaseera foora nammariara foora ruma nimaqaseenoo andeeqara amiqiranaki faqa nifaaqa idaaqiranaki faqa mareeqeenoo narinnai amiqiranaki quqaani fee qimaseenoo maasa narí ufannai nammariara foora ruma qimaqasaidanoo nariara kai mara quqeenoo, minara Yisufa narí ufara suqimariasara amugusufanoo narí marirana misara kuqiranaki quqanau maqi qidaqa.

<sup>28</sup> Faiqí nári ninaaqmaakara miqi kai mandee nári nifaaqara foora nimuqusiani, narí aanaaqara uriqarara ainainee qimasee amuqusimariafa narí kai nariara faqa uriqarara ainainee qidanoo amuqusidanoo.

<sup>29-30</sup> Sia moo fannoo narí afaaqara akooqaidanoo amiqimmandee rakisidanoo narana amidanoo asauku mundirafa Yisufa narí ufa suqimariasara narí afaaqafee qimaseenoo rakisidanoo, innee faqa miqikai iqa inneeqa ninaaqmaakara qini qifaaqa fee qimasee amiqimasee rakisiaqa.

<sup>31</sup> Ooqeenaa tamummaqara fasiqauqa akara mina maaqimminoo maridanoo,

Anutufa qunara faiqí moo fannoo narí anoofa akoona minniseenoo narí aanaaqasaa atooqafinoo miqanda moodaa kara mafifaranoo.

<sup>32</sup> Mi ufana maa ainainnara kikiqusidanoo anoona amiqirafa maridanoo asauku mundirafa faqa narí ufara suqimariasara faqa faiqí narí aanaaqara faqara foora inoo maridanoo moodaa kara mafuannoo.

<sup>33</sup> Mi ufana inni faiqiara faqa qidanoo aiqama fasiqa nári ninaaqmaakara nári nifaaqara foora nári nimuqusiani, anaasee faqa nári nifaaqmaaka ufa ameemaanai eedoo qimasee mariaqa.

## 6

### *Faiqiuqaindiara faqa nári ninaukoora faqa qidanoo.*

<sup>1</sup> Faiqiuqaindi inniara qidaqa, inneeqa ninausa nikausa ufara eedoo kai qiqa. Innee Yisuna ufara suqimariasaki marianara andeeqarafa mifa maridanoo.

<sup>2</sup> Mooseena sandufara innee irimariafanoo minakinaafa aaquqira ufa qisaukuqara taikasee maridanoo. Minakinaana moo sandufa maasa mi mau fuanoo Anutufa moo ainaina maaqoo maa maqanasaa maasa qimirara qima afeekaikammaqoofa maaqimminoo maridanoo, inniqa ninausa nikausara naaquqaina misa ufamau fuaqa.

<sup>3</sup> Fifanoo Anutufa inniara kisaagasaa inneeqa maqa maaqaki maridaqa amiqiranaki mariaqee qimasee maasara qimafeekaikinau. Maasa mi ufanara uriqarara ufee qidaqa. Doo innee faiqiuaindi mi mau fuaqa.

<sup>4</sup> Faiqi nikausamara inni qimannimidaqa sia inneeqa faiqi fifau nirana fundakifaqa aanoo iaqa, sia miqiaqa, maaqiaqa, Yisuna ufamau inni faiqiuqa andeeqee andeeqasaifaqa Yisuna ufasaa innooqaaqa.

### *Ainainimariasara faqa misa uriqararawsa faqa misara qidanoo.*

<sup>5</sup> Qinee Pauroosa innee moosa ainainimariasara qimannimidaqa. Inneeqa feefauru marara saikaki keeqafinaqa amiqimasee mina ainainammaisaaqa. Sia nifaaqa quqasee mana mana iaqa. Innee naaquqee marinaqa ainaina akoona anainammaisaaqa, innee asauku mundirana ainainidee qidaqa maqasaa ainaina akoona amiqimasee nimuqusannai ainainammaisaaqa.

<sup>6</sup> Sia misa eedoo qira ufara kai irisee misa nifusaa kai ainainiaqa, inneeqa nimuqusannai Anutuna ufamau asauku mundirana ainainidara foora amiqimasee ainainamannimaqaaqa.



<sup>7</sup> Sia fifau faiqí ainainamaiseera fooriaqa, karaambaiqa ainainammidee qimasee amiqimasee ainainamaisaa.

<sup>8</sup> Innee miqidaqa maanara iriaqa, Karaambaiqa aiqama fasiqa amana amana kai nimidanoo moosa rumbara saikaki mariasee narí ainainira saikaki mariasee narí amiqira ainainirana akiaqara amana amana kai innaarunai nimiannoo.

<sup>9</sup> Qinee ainainimariasara innee inneeqa ainaina akoona amiqimasee ainainammaisaa qee qimaseeqa innee ainaina akausa faqa qimannimidaqa innee faqa miqikai mandee inniqa ainainimariasasaa amiqimmandee rakisiyaqa, amiqimasee ainainiaqee qimasee aanoo irana faqa narirari mariana faqa taikaaqa. Innee faqa maanara iriaqa, innee faqa inni ainainimariasaa faqa moodaa rakisirafa innaarunai marifa, sia mifa ainainimariasara ureeqarausee qimasee kafaqa quandaki rakisi nimaqee mariasara uriqararausee qimasee qaara irirana maraidanoo, moodaa irirana marasee amana amana kai rakisi nimaqaidanoo.

*Roomma maqannaa sundiara foora afaaqa ititamareena Sadannana faqa rakuqa.*

<sup>10</sup> Maa ufana taikara ufa maaqimminoo maridanoo, innee karaambaiqa faqa maridaqa moodaanaki nimarifaqa mina firaa afeekannai inni faqa moodaanakikirana firaqoo afeekaikamma mapukuqa.

<sup>11</sup> Sadannafa oosana oosana narí manda nikaru qiranannai inni naruannoo, innee minara rufiasee Anutufa niminna saqari duru saamunannai inneeqa nifaaqa ititaaqa.

<sup>12</sup> Maasa Yisuna ufa irimariasaa sia faiqí faqa rakidaqa maasa meerai Anutuna innaaruna ameemaanai maria manda afaanausa faqa rakidaqa, maa asukunaki maria kamuqoo mirindari rakimariasaa faqa misa uriqararausa faqa misa faiqí firaasa faqa meeraindari maasa daruafaqa maasa misa faqa rakidaqa.

<sup>13</sup> Innee minara iriseeqa Anutufa niminna duru saamu saqarina qumareeqa deedaqida mariaqa. Sadannafa mi manda faasaana narirara anirainaaqa innee amanaikiqa mariafanoo narí faqa aruafaqaammasee miqoo kai eeraaramasee ititaqa mariaqa, sia amana ainnaaqaraani.

<sup>14</sup> Minara qimannimidaqa. Innee findifi deedaqida mariaqa Sadannafa inni mandoosana nimisee naruandoora. Roomma maqannaa sundia nifaaqa rafaafimariana kikiqusussee inniara qianauranoo. Inneeqa fausanda niranagumuki rumbee maria fara foora mifa inni anoona ufa kai qirafa mifa mariannoo. Inni nimuqusasaa ititee maria afeeka ainainara foora inni andeeqara oosana mariannoo.

<sup>15</sup> Inni niku ititee mariafa niku aanaamuara foora mifa Anutufa faqa mari asoora amiqira fasaasa ufa maqee maqee aamina maqannaa qimannimira mifa inni niku aanaamuara foora ititarafa mariannoo. Mi andeeqara oosannausa marasaifanoo Sadannafa sia amana inni naruani.

<sup>16</sup> Inniqa saqari ukeeqirira fara foora Yisuna saqarikirafa maridanoo. Innee Roomma maqannaa sundiara foora maqee maqee mi saqarina ukeeqirisee maraqa nifanoo Sadannafa narí feefa ida muquru qumaree inniara oosana oosana furufarira irirana minannai inni nifaaqa naqusee nariraree qimasee aqusainaaqa innee Yisuna saqarikiranannai mina mafi ruki aquaqa.

<sup>17</sup> Roomma maqannaa sundiauqa rakiranaki fidaqa qafee nikiaaqa afisusee nikiaqa rukamifoora afisimariqau. Inneeqa nikiaqaki ititee maria qafeenara foora Anutufa innaarunai asumu marirana nimufa maridanoo.

Sadannafa inni kuridiranaki maqee maqee mara quqararinaqa innee mi qafeena afisusee asumu mariaqa. Roomma maqanna sundiauqa rakira paipana dinni dinni afaifaqaannai faiqí ateekeeqa raquru nimiqa imariqau. Inni raiqara paipana aseema fooqaafa marina Anutuna ufa maridanoo mina marauna fannoo mi ufana nimu ufafa maridanoo. Sadannafa inni faqa rakiqa mi samuna qumaree mina aruqa.

<sup>18</sup> Innee mi ainainausa maridaqa innaaru qidaqa maqee maqee Anutuna dadaaqiranara faqa innaaru qiaqa. Anutuna marauna afeekannai maqee maqee eendaki faqa faasaana faqa Anutuna maqasaa fasiqa anaaseera Anutufa amiqi amiqimma nimaqaanifeera innaaruqiaqa. Sia kudoosaa-paaqa afeekaikamandee innaaruqiaqa.

<sup>19</sup> Qini Pauroosara faqa innaaru qiaqa Anutufa oosana qimasainaqa qinee faiqí anaasee Yisunara qimannimianauree qimasee paasoosamandee qimannimianauree, Yisuna amiqira fasaasa ufa ooqai kukeeqanoo marifa maqee aukwana Anutufa faiqí anaasee kooroomannimaqeenoo.

<sup>20</sup> Qinee Pauroosa mi amiqira fasaasa ufana aanaiqikirausa maridaqa. Kuqaa Roomma maqanna karabusaki maridaqa kuqaa aanaiqikirausa maridaqa. Anutufa qiniara paasoosamandee faiqí anaasee qimannimiannee qifaqa innee qiniara innaaru qifaqa paasoosamandee qimannimianauree.

*Pauroona akara taikara akara.*

<sup>21</sup> Qinee Tikikusana aqigaananoo qini daufakiana inni qimannimianoo. Mifa maasa qimuqusi mari qikaqaafasaafa maridanoo, karaambaqa saikaki amiqi amiqira ainainimarifa maridanoo. Mifa qini fasaasa ufa inni qimanniminaqa innee qini mariranara iriaqeera.

<sup>22</sup> Mina qimannimianifeera aqigaanaura inni nimuqusa pooduqaanifeera aqigaanauranoo.

<sup>23</sup> Maasa qikoofa Anutufa faqa maasa karaambaqa asauku mundirana Yisuna faqa naunduraki asoarana faqa nariara nariara uriqarara ainainee qimasee nimuqusirana faqa Yisuna saqarikirana faqa inni aiqama qini qikaqaafasaauqa nimiani.

<sup>24</sup> Innee aiqamausa maasa karaambaqa asauku mundirana Yisunara sia taikee maria rirana rimariasa, Anutuna afaarirafa inni faqa mariani.

## FIRIPI Firipi maqusanaasa Pauroofa akara rumannimaqoofa.

<sup>1</sup> Qinee Pauroosa Timootisandiri asauku mundirana Yisuna rumbara ainainira fasiqaqara maridaqa maa akarana rumannimaqeeqa. Innee Firipi maqusai maria Anutuna aiku asauku maria fasiqa anaaseesa innee faqa innee ufa suqimariana rakisirausa faqa inni niqoonausa inni dadaaqa mariasa faqa, innee aiqamausa inneeqa irirana asauku mundirana Yisunasaa rusimariasa, inni akara rumannimaqaidaga.

<sup>2</sup> Maasa qikoofa Anutufa faqa mina asauku mundirafa maasa karaambaifa Yisufa faqa nari afaarirana faqa nari naunduraki asoarana faqa nimiani.

*Pauroofa Firipi maqannaasara innaaru qu ufafa.*

<sup>3-4</sup> Qinee inni Firipi maqannaasara daaqoo irifaqa Anutufinnai dufi dufi qimasee اساسmasee inniara innaaru qidaqa.

<sup>5</sup> Ooqai indaaru inni maqusai anireeqa Yisuna amiqira fasaasa ufa qimannimafanaqa amiqimmandee dadaqammamaree ani marufaqa nindafaafannanara inniara daaqoo iriseeqa Anutunara اساسmamaqaidaga.

<sup>6</sup> Qinee maa ainainnara amiqimasee iridaqa Anutufa inniki amiqira saika uqeeroofa kaqi inniki mi saikana kai uqeeranoo fifi inoo taikara aukwana asauku mundirafa Yisufa quminna faasaanna miqoo kai taikaannoo.

<sup>7</sup> Anutufa nari saika Yisunara qimannimira saika adiafaa imari saikana qimufaqa innee aiqama minaki marida dadaaqa marusa mariafanoo, minara inniara اساسirafa andeeqarafa kai maridanoo. Ooqai sia qinee karabusaki mariafanna kamu qoo qinee Yisuna aufakiana faiqi anaasee kaqi nidaqa qimannimiseeqa naunduraki mapuku nisasee mariqiafana, akaqausa minasaa ootupeeqa aqaranaki quqasoofaqa qinee oonuree mina atekaafanaqa innee faqa dadaaqa marusa mariqau. Doo maqee faqa Roomma maqanna karabusaki maridaqa innee faiqi anaasee mapukunnisee mariana qini dadaaqa mariasa marianara inniara Anutufinnai اساسirafa andeeqanoo maridanoo.

<sup>8</sup> Anutufa iridanoo qinee kuqaa anoona ufa inni qimannimidaqa. Inniara qini qimudao qirafa firaafa marina asauku mundirana Yisuna amuqusa ookiqari kambiqara qimudao qirafa maridanoo.

<sup>9</sup> Innee amiqira oosana kai irisee maraaqee qidaqa maqi qimasee inniara Anutufinnai innaaru qidaqa, Oo Anutu Firipi maqusanaasa nariara nariara rirafa maqee maqee innooqaidanoo kambiqaanu mina sia aaqara irirafa anoona irirafa faqa rainasee akoofasaikira irirana faqa maasaki innooqeenoo uqannifiqainaqa uriqarara aana kai umaree fuaqera qidaqa.

<sup>10-11</sup> Anutufa miqinoo inni dadaaqinaqa asauku mundirafa qumira faasaanasaa innee ikairi siaisa, ufa siaisa maridaqa asauku mundirafa nimira amiqira anoonaikira marirafa inniki marifanoo aiqamausa mina qafammasee Anutunara dufi dufi qimasee amooqifaranoo.

*Pauroofa kuqirane kaqi marirane asauku mundiranaindi marianauree qinau.*

<sup>12</sup> Qinee Pauroosa Yisuna ufa maqusa maqusa qimannimi marunnana akiaqara karabusa rumbasaafaqa maridaqa. Nariqa qini rumbaqaafanoo Yisuna ufa aru rafaqa firaree qimasee qinee rumbaqa maruna sia misa Yisuna ufa rafaqa fia, qini rumbaranannai misa sia irirai mina muru pooduqaafanoo.

<sup>13</sup> Qinee Roomma maqusai firaa uriqarara kiapana maaqa amiqira maaqa aqa rumbara maqaki maridaqa mi firaa maqanasaa rakisi maria sundiauqa faqa rumkatasaa faqa qinisaa faqa rakisimaria poorisaua faqa aiqama maqoo mariasa faqa qinee asauku mundirana ainainira faiqi mina ufasaara rumbaqa marunnanara irimarusa maridaqa sia qinee moo mandoosana maraafannanara iridaqa.

<sup>14</sup> Qini qikaqaafasauqa, maqusa maqusa Yisuna ufa irimariasa qinee karabusaki marunnanara iriseeqa misa paasoosirafa firaaqoo innooqama-ree fidaqa faiqi anaasee Yisunara qimannimidaqa sia rufiidaqa.

<sup>15</sup> Misakiqari akaqausa nariara nariara rairaiqidaqa raiqidaqa asauku mundirana auqu uqeeraidaqa, akaqausa moomoosa sia miqidaqa amiqira irirana iridaqa qimannimidaqa.

<sup>16</sup> Miqi mariasa nimuqusa ookiqari qini Pauroosara ridaqa Yisunara amiqimaseeqa faiqi anaasee qimannimidaqa. Akaqausa Yisuna ufara kaukaata qidaqa mareeqee kaqirunna ubeekaidaqa, Anutufa qiniara anee minasaa ititaanee qifaqa ititaidaqa, qini dadaaqi mariasa miqi marunansa marunnanara irisee amiqimmandee qiniara ridaqa dadaaqidaqa.

<sup>17</sup> Akaqausa rairaiqidaqa qimannimi mariasa sia nimuqusa ookiqarifau asauku mundirana saikara qimannimidau nariara nari nuqu uqeeraree qimasee miqi qidaqa. Misa Yisunara miqi qimasee qimannimifaqa Roomma maqannaasa mina irisee kafa kafa qini karabusaki amiqimma daruaqeera miqi qidaqa.

<sup>18</sup> Qinee misa oosanara iridaqa sia firaaqoo misa oosanara oonumafi iridaqa. Qinee minara maaqi qidaqa. Akaqausa amiqira irirana marasee asauku mundiranara kooroo iafaqa asasidaqa, akaqausa aqara irirana marasee asauku mundiranara qimannimifaqa minara faqa asasidaqa, misa oosana oosana iriranannai asauku mundiranara kooroo ida fee qidaqamma asasidaqa. Sia qinee maqee kai asasianaura naaru naaru asasianaura.

<sup>19</sup> Inni innaaru qirafa faqa asauku mundirana Yisuna marauna faqa Roomma maqannaasa qumee dadaaqinaqa nari karabusakinaana qini iduku qimaqeefaranoo, qinee minara iriseeqa maqee maqee asasidaqa.

<sup>20</sup> Qeeqa qimuqusa ookinaa didira irirafa maaqimminoo maridanoo. Qinee qeeqa saika Anutufa qimu saikana sia kudoosaapee minnisaanauranoo aiqama aukwana faqa maqee Roomma maqannaasa karabusaki marunnanara faqa qiniki qini paasoosirafa qumbiqafinaqa qeeqa Roomma maqannaasa darifaqa kuqiranannai fee qeeqa kaqi mariranannai fee qeeqa marirana aiqamannai asauku mundirana auqu uqeerarana qiniki marianifeera dididanoo.

<sup>21</sup> Kaqi marirafa nana ainainee maridanoo fee, qini marirafa asauku mundiranara kooroo imarifa kai maridanoo, Roomma maqannaasa darifaqa kuqiqa amiqiranaki uriqararanaki marianauranoo fee qimasee minara dididanoo.

<sup>22</sup> Qinee minara iridaqa kafa maaqi qidaqa qinee sia darifaqa kaqi maridaqa amiqira anoona saika amana maraanauree qimasee minara faqa dididanoo.

<sup>23</sup> Qaara irirafa qini daundurai maridanoo dinni dinni oonurarisee ani rarisee imariafaqa maridaqa. Roomma maqannaasa qini kuqa kai darifaqa qinee maa marirana minnisee asauku mundirafa marinnai firara firaqoo dididanoo amiqira ainaina maridanoo.

<sup>24</sup> Misa sia qini darifaqa kaqi marida qinee inni Firipi maqannaasa dadaaqirana uriqarara ainaina mariannoo.

<sup>25</sup> Qinee minara iridaqa kaqi marianauree qidaqa. Qinee inni faqa maridaqa inni dadaaqianaqa inneeqa saqarikiranaki nidaqa inneeqa saqarikirana firaanaikidaqa inni اساسirafa faqa firaanaikianifeera kaqi maridaqa dadaaqianaura.

<sup>26</sup> Qinee Pauroosa karabusaki maridaqa innee qiniara irisee اساسidaqa nasunasu rida mariaqa. Misa qini karabusakinaana idukifaqa innee iannai fuaanaqa qini qiqaqamasee asauku mundirana Yisunaki fidaqa qiniara fiqaramasee اساسidaqa qimooqifaranoo.

<sup>27</sup> Misa qini darifaree idukifaree inni irirana moodaa maqimminoo mariani, innikina narinni narinni rirafa asauku mundirana amiqira fasaasa ufa irimariasaa misa naanna ramafi mariaqa. Innee miqidaqa marifaqa qinee inni oonu nindafaanauree sia fee oonu nindafaanauree miqidaqa inni amiqira oosana nianaindari irianaura, inni irirafa Yisuna amiqira fasaasa ufa saqarikirana faqa mi mau firana faqa minara kai iridaqa aiqama innee moodaa irirana faqa moodaa firanamau faqa moodaanaki ruumbakiqa maridaqa rakimariasaa naanna ramasee mapukiqa marifaqa irianaura.

<sup>28</sup> Yisuna ufara namuqaaki mariasara sia rufiaaqa, paasoosiaqa. Innee sia rufiaifaqa misa nári kuridifandinanara irifaranoo. Inni innaarunai asumu marifandinanara faqa irifaranoo. Anutufa narí kai uqannifiqaannoo.

<sup>29</sup> Anutufa inni firaqoo adiafaairanaki quqanniseenoo asauku mundirana ainainiranaki quqannisaiifaqa innee minaki maridaqa sia inni irirana minasaa rusiranara kaifau inni niminoofau mina ufasaara nidafirana maree fandinanara faqa inni niminoo.

<sup>30</sup> Doo maqee innee Firipi maqannaasa qini Pauroosa rakimariasaa naanna ramasee dadaaqiaqa. Ooqai innee qini qiqafoonakinaa rakirafara foora faqa maqee kaqi mari rakirafara foora faqa innee minara qiqaqamasee irimariafaqa amana maqee dadaaqiaqeera qimannimidaqa.

## 2

### *Asauku mundirana reendeenirana ammeemmeriaqa.*

<sup>1</sup> Innee asauku mundiranaki nimariafanoo inni pooduqara afeekaikirana nimidanoo fee. Asauku mundirafa inniara rirana naunduraki amiqi amiqirana nimidanoo, innee Anutuna maraquna faqa moodaanaki maridaqa quandafi nariara nariara rirana naunduraki amiqi amiqirana nimidanoo, innee Anutuna maraquna faqa moodaanaki maridaqa quandafi nariara nariara idaaqidaaqida mariafanoo. Innee nariara nariara nimuqusi marifaqa idaaqidaaqida mariafanoo.

<sup>2</sup> Qinee inni fuki faaki qidaqa afeekaikidaqa innee maaqimasaiifaqa qinee amiqimasee inniara asianaura. Innee moodaa irirana maraqa, innee moodaa nidirana narí ami narí ami iaqa. Innee moodaa amiqira irirana faqa maraquna faqa maraqa.

<sup>3</sup> Sia moo ainaina qimianifee qimasee aundurái oonu mafi irisee aqoonnana oonu dadaaqiaqa. Sia manda fifau nifaaqa mara maree ooru firafa maraanifee qimasee aundurái oonumafi irisee aqoonnana dadaaqiaqa,

innee sia miqiaqa, maaqiaqa, narinni narinni reendeenida mariaqa. Sia anee moosara mandaikira fee qimasee aneennara amiqira fee qia. Maqee maqee aqoonausara qini uriqararausee qimasee qinee misa ureeqarausa maridee qiaqa.

<sup>4</sup> Sia innee inneeqa ainainara kai irimaree fuaqa, niqoonausa faqa amiqiranaki mariaqeera minara faqa iri maree fuaqa.

<sup>5</sup> Innee inniqa nariara nariara irirafa asauku mundirana Yisunaindi miqirafa reendeenirafa amiqirafa marindee kai iaqa. Mina irirafa maaqimminoo marinau.

<sup>6</sup> Mifa ooqaindari Anutufara foora marufa maridanoo. Sia nari afeekannai rakirara maqi mandee Anutuna amana ooru fuaauree qinau.

<sup>7</sup> Nari kai iriseenoo nari uriqararana minniseenoo ureeqara ainainira faiqi irirana marasee marinau.

Mifa faiqira fooqaana mambinoo faiqi afaaqaki maa maqanasaa kooroomafinoo marinau.

<sup>8</sup> Mifa reendeenirafa marinoo Anutuna ufara eedoo qimammaree finoo doo kuqiranara faqa eedoo qimasee kuqinau, manda kuqirana aunirira saqarisaa kuqinau.

<sup>9</sup> Anutufa mina qafooфанoo afaqa asasinoo aidufanoo mina akiaqara kuqiranakinaana uqeereeqeenoo innaaruna maarinni uriqararanaki quqaseenoo aiqama nuqu uriqarara auqu faqaana quqanau.

<sup>10-11</sup> Aiqamausa uqanna innaarunaindaraasa faqa maqasaaqaraasa faqa maqa ameemaaindaraasa kuqirausa faqa Yisuna auquara naaquqainaqa reendeenamasee niqoori saunaraiqa aiqamausa akooqoo asauku mundirana Yisunara maasa karaambaiqee qimasee mina akoona Anutuna amooqifaranoo.

Minara qinee Pauroosa inni Firipi maqannaasa qimannimidaqa inni irirafa asauku mundirana Yisuna aanna kai reeqa nariara nariara fifim-maseeqa idaaqiaqa.

*Innee aaqee mariasaki maridaqa andeeqarausa mariaqeera qinau.*

<sup>12</sup> Oo qini qiqoondiuqa Firipi maqannaasa qinee ooqai inni faqa mari-afanaqa innee qini ufa irisee eedoo kai imariqau. Doo qinee maqee innikiqari nianai maridaqa innee qini ufa irisee eedoo qinafa uriqarara ainaina mariannoo innee innaaruna asumu marirana doo marasee mari-afanoo aqamakiki saamuranoo qimasee ruflaqa ruflaqa irirana faqa naindiri naindirirana faqa mara maree fidaqa anonaikirana mareefara.

<sup>13</sup> Anutufa minara irisee inni naunduraki mina ufara eedoo qira aidirana faqa mi mau fira afeeka faqa inni naunduraki kambiqaanifeera maqee maqee ainainidanoo.

<sup>14-16</sup> Innee maa maqa maaqanaki eendaandirausa faqa aaqee mariasa faqa qambaana mariafanoo Anutuna andeeqara faiqi namu qikai siaisa anukarausa mariaqeera qidaqa innee aiqama ainainirana idaqqa sia nikoo nika idaqqa ninunuridaqa raiqaaqa, miqidaqa sia Anutuna andeeqara faiqi namu marifaranoo. Kaqi eedoo qimasee kadaapirirana maraaqa. Innee mi eendaandira fasiqa anaaseesaki maridaqa inni andeeqara nirana marirana fasau innaarunaki eendaki qeemarindee idaqqa kaqa qaida maridaqa naaru naaru marira fasaasa ufa qimannimiaqa. Innee miqida marifanoo asauku mundirafa qumuaninna faasaana qinee inniara qini saika anonaiki ifoo qimasee asasianaura qini kadaapi faqa tooqaamu faqa sia fifau irairainoo mariannoo anonaikinaqa asasianaura.

<sup>17</sup> Innee Yisunasaa irirana rusimariafa Anutuna tatufira aandau miqirafa maridanoo. Roomma maqannaasa qini qusasaa darusaifanoo qini fidika fannoo inni tatufira andausaara foora adia finoo aiqamaqara moodaanaki Anutuna amaqaifanoo eedoo qimasee asasammasee maraannoo. Misa darifandinnanara qinee maqee asasammidaqa qinee asasammasee qeeqa nasurirana inni faqa naida nimianauranoo.

<sup>18</sup> Innee faqa miqi kai iqa asasiqa qini asasirana dadaaqaqa.

*Pauroofa Timootinara faqa Eepafarooditusanara faqa qidanoo.*

<sup>19</sup> Qinee qusasaa Timootina aqiqaananoo innee Firipi maqanna iannai fuaniffee qidaqa karaambaifa Yisufa dadaaqinaqa aqiqaanaura. Mifa innee iannai oonuree aniree qimaqiminanoo inni ufa fannoo qini daunduray pooduqama qimaqaannoo.

<sup>20</sup> Timootifa kai qini daanna reenoo moodaa irirana inniara iridanoo amiqimasee inniara amuqusidanoo.

<sup>21</sup> Maaqanna maaqanna moodaa modaa Yisuna saikara iridaqa. Aiqamatia sia asaku mundirana Yisuna saikara iridaqa nariqa ainainiranara kai iridaqa.

<sup>22</sup> Timootifa nari ainainiranara nari amiqira oosana kooroo ifaqa innee minara irimariafanoo mifa faqa qinee faqa nariqa qisakoosara foora maridaqa moodaanaki Yisuna amiqira fasaasa ufa saikaki marunasa maridaqa.

<sup>23-24</sup> Roomma maqannaasa qiniara naqi fee ifaree qinee minara iriseeqa innee iannai Timootina aqiqaananoo fuannoo. Qini qiqa irirafa karaambaifasaa mundinoo maridanoo mifa dadaqinaqa qini idukusaifaqa qinee faqa innee iannai fuanauranoo.

<sup>25</sup> Maa akara rirana Eepafarooditusanasaa rumasaananoo maree innee iannai fuannoo mi fasiqafa qini daaqa ainainida dadaaqidanoo rakiranara foora dadaaqimarifa ooqai innee ooqai qini dadaaqira munnimma minasaa quqasee aqiqoofanoo mai anireenoo mai qini faqa ani maridanoo amiqimasee qini dadaaqidanoo.

<sup>26</sup> Mifa firaaqoo inniara ridanoo inni nindafaqaa idanoo innee mifa anunara aiaaee qunara mifa irufanoo amuqusunara innee iannai kaifaa fuannoo.

<sup>27</sup> Kuqaa mifa firaaqoo aurinoo kuqirara amekamaseenoo Anutufa minara amuqusufanoo dadaaqufanoo findifinay, sia minara kaifau amuqusinay, qini Pauroosara faqa amuqusufanoo Eepafarooditusana firaa auriranakinaana mara findifinoo firaa ikiraqarana sia qiminay.

<sup>28</sup> Minara qinee innee iannai firaaqoo aqiqararee qidaqa, innee mina qafamasee asasiaqeera aqiqaidafa innee miqifanoo qini ikiraqarafa faqa taikaannoo.

<sup>29</sup> Innee mina qafamaseeqa karaambaifaki maru qikaqaafasaa fee qimasee asasammasee mina amiqi amiqiaqa, innee miqirausara aiqama naaquqamasee dadaaqaqa.

<sup>30</sup> Qinee asaku mundirana saikaki marufaqa Roomma maqanna Poorisauqa qini qumareeqa rumberanaki quqaqisaafaqa innee nianai marida sia amana dadaaqufanoo Eepafarooditusafa qini daadaaqiraree qimasee nari marunara paasoosamandeenoo kuqirana ameekeenoo, minara qinee miqirausara naaquqamasee dadaaqaqee qidaqa.

### 3

*Anoona andeeqaranara qidanoo.*

<sup>1</sup> Qini ufa taikarafa maaqimminoo maridanoo. Oo qini qikaqaafasaa uqa Karaambaiqa اساسرانا فیراانا inni nimiani. Ooqai qinee akara rumanni-maqaafanna ufanara sia rufaidaqa mi ufafa inni ititannimaqee mari ufana kafa qimannimidaqa minara maaqi qianaara.

<sup>2</sup> Innee mandoosana maree mariasara eerairida aufariaga misa kaasau fainiara foora maridaqa misa Yuda maqanna oosana marida fainanduqiranara afeekaiki mariasa maridaqa. Misa fainanduqirana nariqa faina kafaqianda uqiranara anoona ainainee qimasaidaqa miqidaqa aqaqidaqa miqidaqa, maasa kai anoona faina kafaqianda uqimarunausara foora maree marunausa maridaqa.

<sup>3</sup> Maasa Anutuna maraqunannai Anutunara innaaru qidaqa minannai kai maasa asauku mundirana Yisunaki marunannara اساسیداقا, maasa sia misa naanna ramasee nifaagasaa akooqoo mari ainainnara anoonee qidaqa.

<sup>4</sup> Akaqausa akooqoo faiqi nifusaa mari ainainnasaa mundusee minaki nifaaga quqaida aqaqidaqa. Qini akooqoo qifaagasaa amooqira ainaina moomoo maridanoo qinee minara fifau ainainee qidaqa minasaa mundu-fiqa qifaaga quqarafa sia mariannoo.

<sup>5</sup> Qini akooqoo qifaagasaa amooqira ainaina maaqimminoo maridanoo qini Pauroosa maqooqooqari qisauku dinni ani qaara marasee qaaramooku faasaana marasoofaqa qini faina kafaqianduqi mariqau. Qinee Isaraee maqanna kambiqarusa maridaqa Yakooboona amaaku Beensamina ati maridaqa, Qeeburu maqannaasa uqanna mara maqarusa maridaqa.

<sup>6</sup> Qinee firaaqoo Yuda maqannaasa sandufamau fimariafanausa marunannara firaaqoo sandanainai qimasee Yisuna ufara suqimarusa nariqimariafanausa maridaqa. Mooseena sandufannai Anutuna andeeqarana amanaikirafa sia amanaikiannoo. Mooseena sandufannai andeeqarana marararee qimarusakiqari qinee misa uriqararusa Farisai amaana ufa qimarunausa mariafannana.

<sup>7</sup> Ooqai qinee Yuda maqanna Anutufinnai firaree qimaru ainainausara uriqarara ainaina anoona ainainee qimariqafana doo maqee asauku mundiranara irisee mi aiqama ainainausara aqarafa fifau ainainee qidaqa.

<sup>8-9</sup> Sia mi ainainausara kai miqi qidaqa aiqama ainainara kaaqa fifau sia mari ainainee qimasee quandaki anoona ainaina tia firaaqoo ainaina, asauku mundirana Yisuna maasa karaambaiqara irimariana minara kai anoona ainaina fee qimasee minakai qumareeqa. Minara maraannee qimasee aiqama ainaina doo aquseeqa asauku mundirana maraani qimaseeqa mina faqa moodaanaki marianauree qimaseeqa aiqama ainainara fifau madaapee ainainee qimasee aquseeqa quandaki Yisuna qumareeqa. Doo maqee qinee sia qeeqa andeeqarana maraqa nidaqa sia Mooseena sandufannai mi andeeqarana maraqa nidaqa. Qinee maqee moo andeeqarana asauku mundirana saqarikiannannai Anutufa andeeqarana qimuna mina kai maqee maraqa nidaqa. Mi andeeqarafa Anutunaindari anifa Yisuna saqarikiranasa mundinoo marifa marifaqa maraqa nidaqa.

<sup>10</sup> Qinee sia moo ainainara irianauree qidaqa, asauku mundiranara faqa Anutufa mifa kuqiranakiqari findifu afeekanara faqa iriraree qidaqa.

<sup>11</sup> Yisufa kuqiranaki keeqafinoo minakiqari findifufaqa qinee faqa kuqiranakiqari findifiqa naaru mariranaki fuanee qimasee maqee kamuqoo Yisuna aupurarana faqa mifa kuqu aidafirana faqa qinee faqa qeeqa qifaagasaa maraidaqa.



*Pauroofa innaarunai feefauru marararee qimaseenoo sandaidanoora foora qinau.*

<sup>12</sup> Yisuna aupurarana faqa kuqu aidafirana faqa qeeqa qifaaqasaa maree marunnana qinee sia minannai amanaikiqa sia minannai kaaqa andeeqaidaga. Qinee maqee maqee andeeqarana marararee qimasee sandaidara maqi qiara maqi idaga. Asauku mundirafa Yisufa qiniara andeeqarafa marianifee qimaseenoo qini qumareeqeenoo naríndi kammaqaifaqa maridaqa.

<sup>13</sup> Oo qini qikaqaafasaaauqa qinee sia anonaikamandee maridaqee qidaqa, sia amana miqianaura. Qinee maa moodaa ainainna kaimmidaga qinee aiqaree inaaqiannai mari ainainara qeeqa aaqeeaaafanna ainainnara aunumasee doorinni mari ainainna andeeqara oosana marirana kai qifu munduseeqa qumarararee qimasee fidaqa sandaidaga.

<sup>14</sup> Qinee narí amani narí amanira sandaranara foora taikaranasaa kai doori munduseeqa mi runna kai andeeqasee fidaqa miqoo feefauru marararee qimasaida sandaidaga qini feefauru mararafa maaqimminoo maridanoo. Anutufa narí asauku mundirana Yisunannai maasa daarama sandaranara foora quqaqiseenoo maqoo narí andeeqara mariranaki faqa naaru marirana faqa mariaqeera qifaqa mina mararara kai sandaidara foora masee fidaqa.

<sup>15</sup> Maasa aiqamausa Yisuna ufa akoofasaikirausa mi irirana kai maraqa nuqa. Innikiqari akaqausa moo irirafa marinanoo Anutufa inni minara qimannimiannoo.

<sup>16</sup> Saina miqinoo mariani innisaimbaqa sia moo ufa irisee mi mau fuanaura maasa ooqai fuafannamau kai fuanaura.

<sup>17</sup> Oo qini qikaqaafasaaauqa innee aiqamausa qini kai qifaqee qini qimeemmeeriga, maasa inniara iriga andeeqara aana uqannifiqaafanaqa doo maqee innee akaqausa innikiqari mi mau fimariasa niqafamasee innee faqa nifaqee mi mau fuaqa.

<sup>18</sup> Qinee Pauroosa maa ufana ooqai moomoo kari inni qimannimiafanaqa doo maqee daukunu ree marifaqa inni qimannimidaqa, moomoosa asauku mundirana kuqirana mandaqasee andeeqara oosana marasee fimarufaqa doo maqee quandaki mandoosana maridaqa minannai asauku mundirafa aunirira saqarisaa kuqirana namuqaa kiqa mina kuqirana namuqaa kammamaqaidaga.

<sup>19</sup> Miqi mariasa maaqiqa fifi iqa idaki kai fifaranoo, nariqa aqee maria nidirafa mifa misa Anutufara foora maridanoo, misa nisauri maria ainainnara kai amooqimasee noori uqeeraida nasuridaqa, misa maa maqanasaaqaraa ainainara kai iri mariasa maridaqa.

<sup>20</sup> Innisaimbaqa sia miqirausa maridaqa maasa moo maqannaasara foora maridaqa innaaruna maqusanaasa marunnnanara maasa karaambaiga asauku mundirana Yisuna maasa asumu marirana qimimarifaqa innaarunaindari qumuaninnanara asasammasee afeesida maridaqa.

<sup>21</sup> Mifa miqoo maasa ummooqukira maqasaaqaraa qifaaqa mareeqeenoo quandaseenoo narí kaaqa areenara afaqa fooqaanaikammianoo. Mifa aiqama ainaina mareeqeenoo narí aramandunnai quqara afeekannai maasa maqasaa qifaaqa mara quandaqisaannoo.

## 4

*Pauroofa amiqira oosanara naamuaqidanoo.*

<sup>1</sup> Oo qini qikaqaafasaa Firipi maqannaasa firaqoo inniara qini qimuqusi-faqa inniara daundurannoo oonu mafi iridaqa inniara dididanoo. Innee

firaqoo asasirana qimi mariasa mariafaqa innee qini moodaa fidikara foora marida qini asasirana qimimariafanoo. Minara inni qimannimidaqa Yisufa innaarunaindari qumuaninnanara asammasee afeesida mariaqeera faasai qimannimiqa inni marifa miqimandee karaambaiqaki mapukusee mariaqa.

<sup>2</sup> Oo aanaaseeqara Eeuoodiasa nammarifa faqa Sindikeesa nammarifa faqa inneeqara maqee maqee rairaiqirana minniseeqa anenna annannaasandiriara foora maridaqara karaambaiqaki amiqi amiqimasee moodaanaki mariaqa.

<sup>3</sup> Oo qini Firipi maqanna qifaaqasaa qiqaondi moodaanaki qini qifaaqasaa ainaini marianafa ani faqa qimamidaqa anee mi anaaseeqanda andeeqasaifaqa moodaanaki mariaqeera. Miqanda ooqai Yisuna fasaasa ufa maqusa maqusa nidaqa qini dadaaqidaqa qimannimi maruqanda maridaqarammia anee miqanda andeeqannisaa. Miqanda faqa Kareemeen-dana faqa aiqamausa qini faqa moodaanaki ainainimariasaa faqa misauqa aiqamausa nuqu Anutuna naaru mariranaki fimariana bukaki misauqa nuqu maridanoo.

<sup>4</sup> Innee Karaambaiqaki marianara maqee maqee asasida kai mariaqa, kafaa qimannimidaqa, asasiaqa.

<sup>5</sup> Innee aiqamausa sia ramoo ramaaiqa ireeda kai nirana marirana aiqamausa nimiaqa. Karaambaiqa qusasaa qumuannoommi.

<sup>6</sup> Inneeqa oosana oosana sarauqira ainainara sia oonumafi irifanoo nimuqusiani, innee Anutunara innaaru qidaqa miqoo kai inneeqa sarauqi maria oosana oosana ainainara innaaruqiaqa. Innaaru qidaqa Anutunara dufi dufi qirana namufaqa innaaru qiaqa.

<sup>7</sup> Innee miqifanoo Anutuna aundura asooarafa firaa ainaina tia maridanoo faiqi faiqi irirafa sia mina amana maridanoo, mi asooarafa inni nimuqusa faqa irirana faqa asaku mundirana Yisunakina mariafanoo miqoo inni rakisinnimaqaannoo.

<sup>8</sup> Oo qini qikaqaafasaa ufa qini taikara ufa maqimminoo maridanoo, inni iriranara qimannimidaqa, innee inneeqa kai amiqira ainainara irirafa faqa uriqarara ainaina faiqi amooqimaria ainainara irirafa faqa minauqara kai maqee maqee naaqoo nitikuraki inni irirafa qumbiqaani. Kuqaa qimaria ufana faqa naaquqara amiqira ainaina faqa andeeqarana faqa anukara ainaina irirana faqa idaaqira ainainara irirana faqa amiqira oosana ainaina Anutufa amana iriaqaa ira ainaina faqa mi ainainausara kai nitikuraki qumbiqaanoo mariani.

<sup>9</sup> Innee qini Pauroosasaqaraa amiqira oosana qafeeusa mariafanoo minauqa maqee maqee qinee iafanandee kai iaqa. Qini ufakinaana faqa qinee iafanandee inafa mi mau kai fimarifanoo Anutufa naundura asooarana nimirifa inni faqa nuani.

*Pauroofa Firipi maqannaasa munnimma amunara dufi dufi qidanoo.*

<sup>10</sup> Qinee Pauroosa karaambaiqaki fidaqa maqee maqee firaaqoo inniara oonumafi iridaqa asisida maridaqa. Innee Firipi maqusanaasa ooqai narana feefaurira munnimma dadaaqiga qimiqa. Doo miqoo kisaqasaa marikiqa doo maqee kafaa qiniara iridaqa dadaaqi mariafanoo. Innee sia qiniara kaaqa aunusee mana mana imariafaqa minara qidaqa inneeqa maqusaindari nianaindari dadaaqirana sia amana maree animariafaqa minara innee sia qini dadaaqusa mariaasa maqee kaifaa dadaaqimariafanoo.

<sup>11</sup> Sia qinee qeeqa daunduraki inniara minniqiseeaafoo qimasee iki-raqaidaqa, qeeqa marunnanaki marunnanara doo marida fee qimasee qifaaqa quqaidaqa doo mi ainainnara akoofasaikammidaqa.

<sup>12</sup> Qinee sarauqiranaki marunnanara doo akoofasaikammiga maridaqa, rairaa irinaki marunnanara faqa akoofasaikammiga maridaqa. Qinee mi oosanna iridaqa doo irimarunausa maridaqa, qinee yai yai fee yaqoo aukuanee qimuaqu qumbiqanoo fee maridanoo fee daararee maridee, rairaa iranaki fee maridee sarauqiranaki fee maridee mi aiqama ainainausaki maridaqa sia munari minari idaqa doo qifaaqa quqasee mariranara akoofasaikammiga maridaqa.

<sup>13</sup> Asauku mundirafa narí afeeka qimufaqa minannai amiqirane mandaikirane kaqi maraيداqa.

<sup>14</sup> Innee Firipi maqannaasa qini dadaaqianara dufi dufi qidaqa.

<sup>15</sup> Ooqai indaaruu inni maqa maaqa Maseedoonia minnisee amiqira fasaasa ufa maqusa maqusa qimannimiqa niniufaqa innee Firipi maqanna Yisuna ufara suqimarusa kai sia moo maqannaasa inneeqa kai dadaaqiusa mariafanoo. Inneeqa kai narana munnimma qimufaqa minannai qeeqa narana aina maraseeqa namasaida ainainiqiafana.

<sup>16</sup> Qinee Teesaroonika maqusai mariafanaqa innee moomoo kari qinee mandainainaki mariafanaqa innee dadaaqidaqa narana maree maria munnimmana qimaqee mariqau.

<sup>17</sup> Qinee sia narana maree maria munnimma moo faqa moo faqa maraanauree qidaqa maa ufana qimannimidaqa, qinee inni nuquara afeedira ainaina innaarunai nimaqaanifee qidaqa maaqoo munnimma qimianara qidaqa.

<sup>18</sup> Eepafarooditusafa inni maqusaindari inni maqannaafa maqee qunnana inneeqa narana maree maria munnimmana minasaa soofanoo mini qimifaqa doo aiqama maraunnanara inni qimannimidaqa doo qini qimana kai maridanoo fiqaramasee faqa maridanoo. Mi munnimmana qimaqaafa tatufira aandau Anutuna suqa ami mariafara foora amiqira afunda aikiambu imarifara foora Anutufa اساسammasee maree mari ainainna maridanoo.

<sup>19</sup> Sia meerai kai inni afeedamma nimaqaannoo maaqoo faqa innee sarauqi maria ainainna inni nimana kai nimiannoo, narí innaarunai mari gumiasana moomoo marina narí asauku mundirana Yisunaki marina innee sarauqi maria narana ainainna inni nimana kai nimiannoo.

<sup>20</sup> Maasa Anutufa maasa qikoofa mina amooqirafa naaru naaru mariani. Kuqaa.

*Pauroofa nimandaidanoo.*

<sup>21</sup> Anutuna faiqi namu mina ufa irimariasaa asauku mundirana Yisunaindi mariasaa Firipi maqannaasa inni aiqamausa nimandaidafa. Yisuna ufa iri maria qikaqaafasasaa qini faqa mariasaa inni nimandaidafa.

<sup>22</sup> Maaqoo Anutuna ufa irimariasaa aiqamausa inni Firipi maqannaasa nimandaidafa, Roomma maqannaasa uriqarara fasiqa Sisaana maaqaki ainainimariasaa misakiqari akaqausa Yisuna ufa irimariasaa misa faqa inni firaqoo nimandaidafa.

<sup>23</sup> Asauku mundirana Yisuna maasa karaambaiqa afaarirafa inniki aiqamausaki mariani.

## **KOOROOSEE** **Kooroosee maqusanaasa Pauroofa akara** **rumannimaqoofa.**

<sup>1-2</sup> Innee Kooroosee maqannaakiqari akaqausa Anutuna faiqinamu mari-afanoo innee faqa maasa faqa asauku mundiranaki maridaqa mina ufa iridaqa moodaa fidikara foora maridaqa asauku mundiranasaa atooqar- rousa mariafanoo qinee Pauroosa qeeqa qikaqaafasaa Timootinandiri inni Kooroosee maqanna nimaandaqaa.

Anutufa qufanoo asauku mundirana Yisufa diqiqamaqai faqa faiqí faiqi maridaqa inni nimaandaqaa. Maasa qikoofa Anutufa narí amaaku maasara afaarinau mi afaarirana faqa inni naundura asooarana faqa inni nimianifeera qimannimidaqa.

### *Pauroofa Kooroosee maqannaasara dufi dufi qidanoo.*

<sup>3</sup> Maaqanda inniara innaaru qidaqa maqee maqee maasa karaambaiqa Yisuna asauku mundirana akoona maa maqanasaaqari innaaru qunafa Anutuna afusaa inniara dufi dufi qidaqa innaaru qimannisaidaa.

<sup>4</sup> Maaqanda innee Kooroosee maqanaa akaqausa Anutuna asauku mundiranasaa atooqaaqaa marianara iriseeqa innee Anutuna ufa irimaria fasiqa anaaseesa aiqamausara nidimarifaqa dadaaqi marianara minara faqa iriseeqa Anutuna dufi dufi qimamaqaidaa.

<sup>5</sup> Anutuna anoona ufa amiqira fasaasa ufa faiqí moo fannoo indaaru inni maqusai qimannimufaqa mi ufana naaru kambiqaaninna oosanara irimariafanoo. Innee naaru marefandinna ainaina Anutufa innaarunai quqasee afeedidanoo. Innee mina innaarunai marararee qimasee اساس- masee afeesidaqa Yisuna saqarikidaqa mina aidimariafanoo.

<sup>6</sup> Innee indaaru Anutufa narí amaaku maasara afaarinoo arunara innee mi afaariranara iriseeqa kai mi fasaasa ufana aiqama maqa maaqai daraanidanoo naundurakinaa amiqi amiqirana faiqí aanaaseeki kam- biqaidanoo.

<sup>7</sup> Eepafaraasafa maasa moodaa saikimarifa asauku mundirana amiqira saikimarifa qini qimanasaa inniki fimarufa maridanoo mifa kai mi fasaasa ufana inni Kooroosee maqannaasa qimannimufaqa iriqa.

<sup>8</sup> Mifa inniara Anutuna maraquna fannoo aiqamausara aidirana inni nimufanoo qimaqimifaqa iriqa.

### *Pauroofa Kooroosee maqannaasara Anutuna iriranamau fuaqeera qiman- nimidanoo.*

<sup>9</sup> Maasa indaaru mi ufana iriseeqa miqooqari inniara innaaru qi- daqa. Maasa inniara Anutuna iriranamau fifandinnanara inni naundurai qumbiqaanifeera innaaru qidaqa. Anutuna maraquna fannoo nimi irirana faqa iriranamau fira irirana faqa inni naundurai qumbiqaanifeera minara faqa innaaru qimannisaidaa.

<sup>10</sup> Innee miqi marifaqa Karaambaiqa undee kai imarifaranoo mifa maqee maqee inni marirafa amiqira marira maridaqa amiqisaa kambiqaaqeera Anutuna irirafa faqa firaaqoo inniki kambiqaanoo.

<sup>11</sup> Anutuna idaaqira eeraarirafa minasaaqari aninna afeekafa aiqama inni faqa afeeka niminaqa innee oosana oosana mandainaina um- maara fannoo innisaa kambiqainaqa ubiqafi reendeenidaqa اساس- masee maraaqeera.

<sup>12</sup> Anutufa narí areenara maqusaki innaarunai narí nimianinna ainaina afeedimarina quqaseenoo innee ooru marasee miqoo mariaqeera inni mandainaina doo afaqaseenoo innee minara faqa iriseeqa innaarunai nikoonaara asasammasee dufi dufi qimamaqaqa.

<sup>13</sup> Maasa manda marira asukunaki marunanoo maasa rafaqafuqisaifaqa marunanoo Anutufa qumareeqeenoo narí faiqi uqanna ququsaki quqanni-saifaqa amiqiranaki maridaqa.

<sup>14</sup> Mi faiqinannai uqanna maasa mandainaina numoo minniqiseenoo minakinaana mara idukuqiseenoo.

*Yisufa Anutunara mudukatia kooroomannimainau.*

<sup>15</sup> Anutufa kukeeqarafa marifanoo asauku mundirafa mina amaaku mina amammaana ususeenoo maridanoo narí akoona oori afiri marasee mina nirana mina marirana mina marauna maasaki doo andeeqasee narí akoonara kooroo idanoo. Mi asauku mundirafa aiqama ainaina Anutufa auquqoona urinaaqararafa maridanoo.

<sup>16</sup> Mina asauku mundiranasaa Anutufa aiqama ainaina innaarunai marina faqa maqasaa marina faqa akooqoo maria ainainausa faqa kukeeqara ainainauqa faqa Anutuna amiqira qangiroouqa faqa misa namuqaa afaanauqa faqa nári rakisirausa faqa nári uriqararausa faqa nári faiqí firaasa faqa mi aiqama ainainausa asauku mundiranannai Anutufa auquseenoo mina aummooki mara quqanau. Mina amooqimasee minaindikiaqeera Anutufa minannai auqusee narí aminau.

<sup>17</sup> Asauku mundirafa sia maqee kaifau marida ooqai marufa maa maqanasaa ainaina sia maruqoo marufa marinau. Doo maqa faqa minasaa mari ainainausa faqa innaaruna faqa minakinaa ainainauqa faqa asauku mundiranaki kai ookaamambida maridanoo.

<sup>18</sup> Asauku mundirafa narí ufa irimariasasaa rakisidanoo qimannimidanoo. Mifa misara narí adakee qidanoo nariara misa nikiaqafee qidanoo rakisinnimaqaidanoo. Mifa aiqama ainaina uriqararafaikirara kuqirausa findifimari aana afisufa maridanoo narí mina ufa iri mariasara narí adakee qimarisara misa kafa minasaqaraana aiqama kaqi marira kasirana maraidaqa minara aiqama ainaina uriqararafa maridanoo.

<sup>19</sup> Anutufa narí kai narí amaakuara asasamaseenoo qini daanna ramafi urinaaqaramafi mariannee qufanoo maridanoo.

<sup>20</sup> Anutufa qufanoo narí amaaku fannoo aiqama ainaina maqasaa qaraana faqa innaarunaindaraana faqa maramareenoo narí akoona aqa munu moodaaqoo quqasoofanoo aqoondikamma nimaqanau. Narí amaaku asauku mundirafa narí fidika adioonannai asooarana quqasoofaqa moodaanaki kiqa maridaqa. Miqunara asauku mundirafa aiqama ainaina uriqararafa maridanoo.

<sup>21</sup> Ooqai indaaru innee Anutuna namuqaakama amaqaqau. Inni oosana fannoo manda marira marufanoo inni irirafa manda irirana kai irimarunara Anutufa inni futee aquseenoo namuqaakamma nimaqanau.

<sup>22</sup> Innee minni marufanoo Anutufa maqee inni mareeqeenoo narí aqa quqaseenoo moodaanaki kinau. Narí amaaku narí afaqa uqanna kuqiranannai kai inni moodaanaki aqoondikamma nimaqanau. Anutufa sia fifaufau miqinai. Inni marirafa nirafa amiqira marira andeeqara nira nuaqeera miqinai. Yisufa inni mareeqeenoo Anutuna afusaa kooroomasainaqa inniki sia moo nifasaasa ufa marianifeera nuqu siaisa mariaqeera minara Anutufa inni aqoondikamma nimaqanau.

<sup>23</sup> Ooqai indaaruu Yisuna amiqira fasaasa ufa iriseeqa naaquqarana taikaseeqa innaarunai firara اساسida maridaqa. Miqida mi nimuqusa idaaqirana sia kaifaa rufiarana maraaqa. Inni irirafa maqee maqee Yisuna mapukusee mina faakanara maqi masee mudiqa mari iaqa. Mi amiqira fasaasa ufana aiqama maqa maaqai qimannimisoofaqa qinee Pauroosa mina rumbara faiqi maridaqa mina saika faiqi maridaqa.

*Pauroofa nariara Yisuna aiku asuaku ainainamannisee mari fee qidanoo.*

<sup>24</sup> Qinee Yisuna aufakiana qimannimunnana minara qinee Roomma maqanna rumbaranaki maridaqa, innisaara faqa rumbaqa maridaqa. Qinee sia minara doori runidaqa, doori quqasee اساسida maridaqa. Yisufa nari aiku oosana mariasara aunirira saqarisaa aupurarana maranau. Mina aupuraranaki qinee faqa keeqeqa ookaamambiqa rumbaqa maridaqa aupuraidaqa Yisunaindi fee qimasee kaqi اساسidaqa.

<sup>25</sup> Yisufa nari aiku oosana mariasara Anutuna adakara foora mariaafoo qida nuqu raidanoo. Anutufa qufaqa qinee Pauroosa mi nidaka saikirana saikimaruna fasiqausa maridaqa inni dadaaqaqeeera aiqama maqannai ooqai Anutuna ufa kukeeqara ufa amiqimmandee kooroo iaqeeera mi saikanaki Anutufa qini quqaqisaifaqa maridaqa.

<sup>26-27</sup> Anutuna ufa kukeeqara ufa maaqi qinoo maridanoo. Anutuna asauku mundirafa Yisufa inni faiqi faiqi naundurai maridanoo. Mina oosana maaqimminoo maridanoo kasooqaqee innee faqa innaarunai ooruree Anutuna ainaina adiafaa ira ainaina mina uriqararana afaaqa areenarana kaaqa qarana mareefaranoo. Anutuna kukeeqara ufa doo miqinoo maridanoo. Mifa mi ufanara maaqi qinoo. Maa qini amiqira kukeeqara ufa uriqarara kukeeqara ufa aiqama maqannaasa iriaqeeera qini qiku qisauku mariasa kooroomannisaanauree qinoo. Anutuna asauku mundirafa faiqi faiqi naundurai mariranara faqa innaarunai mina faqa ooru mariranara faqa mi ufaqandara ooqaindari kukeeqeeuna maqee kamuqoo doo kooroomasee nari aiku asauku qimanniminoo.

<sup>28</sup> Maasa maa namusa asauku mundiranara aiqamausa qimannidaqa. Maasa aiqama fasiqa anaasee aaquqimannimaqaidaqa naamuaqidaqa amiqira iriranannai asauku mundiranasaa atooqemariasaa sia faiqi aanaaqiara foora iaqeeera faiqi firaasara foora mafiqa Yisunaki mapukusee mariaqeeera qimannimidaqa.

<sup>29</sup> Maa namusakiqari qinee Pauroosa firaqoo kadaapiridaqa qimudaanaiqidaqa fuki faaki qidaqa qimannimidaqa. Sia qeeqa afeekannaifau miqidaqau Yisuna afeekannai miqidaqa faiqi firaasara foora mariaqeeera miqidaqa.

## 2

<sup>1</sup> Qinee Pauroosa inniara kadaapi rimarunnana iriaqeeera inni qimannimidaqa sia inni Kooroosee maqannaara kaifau kadaapiridaqau Raoodisee maqusanaasa akaqausa Yisuna ufa irimariasaa faqa innee aiqama sia qini doori qiqafee mariasaa inniara kadaapiridaqa.

<sup>2</sup> Minara inni nimuqusa sia iani paasosammasee mariaqeeera innee moodaanaki kammafi nariara nariara ridaqa innee Anutuna ufa amiqimasee iriseeqa innee nifaqa quqasee Anutunaki mapukuaqeeera inniara kadaapi ridaqa. Innee amiqimasee Anutuna afeeka kukeeqara ufa uqeerasee iriaqeeera. Mi kukeeqara afeeka ufafa asauku mundirafa nari uqanna maridanoo.

<sup>3</sup> Asauku mundirafa Anutufinnai fimaria irira kooqiara foora maridanoo. Anutuna aiqama irirafa oosana oosana adiafaaira irirafa anoona qira irirafa firaa qumiasanara foora Yisunaki mandaaqanoo maridanoo. Sia maa maqanasaqaraa munnimma ainaina mararara iranau qidau innaarunai fimaria irirana faqa maaqoo nariara nariara nimuqusira nidiranara minara kai qidaqa. Innee faqa mina maraaqeera kadaapiridaqa.

<sup>4</sup> Kuqaa anoona afeeka irirana asauku mundiranasaa maridanoo. Qinee minara irisee maa ufana inni qimannimidaqa. Innee rakisidaqa qafaqaqaa sia moo fannoo innaarunai fimaria aanara unna qimaseenoo inni nikaru qiandoora mifa amiqimasee naakapainaqa kuqaammifoo qimasee fifoora qimannimidaqa.

<sup>5</sup> Qinee kaqi maaqoo maridaqa inni mariranara اساساننماقيداقا. Inni marirana amiqira marira maridaqa ufa qaindusi mariasa mariafanoo اساساننماقيداقا inni irirafa asauku mundiranasaa amiqimasee mapukinoo marinara اساساننماقيداقا. Qinee Pauroosa nianai marunanoo qini maraquna fannoo inni faqa maridanoo. Qinee inni faqa maridaqara foora qinee maqee maqee inniara iridaqa rakisinnimaqidaqa.

*Asauku mundirafa aiqama ainaina tia uriqararafa uqanna maridanoo.*

<sup>6</sup> Inni Kooroosee maqannaasa akaqausa Anutuna asauku mundirana Yisunara maasa karaambaiqee qimasee umaraafanoo doo innee maqee minasaa mundaqa maridaqa nuaqa.

<sup>7</sup> Innee saqari atukara foora mapukusee Yisunaki mariaqa, sia rafauraki aqufuaqa afeekaikamasee aaku aakumafi Yisuna faakanasaa mundaqa mariaqa. Maasa qimannimifannamau kai inni irirafa Yisunaki maqee maqee afeekaikiaqa. Inni irirafa maqee maqee Anutunara dufi dufi qimarifanoo inni naundurari qumbiqafi irairaaiani. Innee miqi kai iqa Yisunasaa mundaqa maridaqa nuaqa.

<sup>8</sup> Innee amiqimasee eerairiaqa faiqi moo fannoo unna ufa qira iriranannai inni rarisameeqee nari aiku oosanaki quqaandoora. Miqira fasiqa mina ufa fannoo irirana faqaa fasiqara foora ufa qiannoo. Mi ufafa faiqi anaasee nikaru qira ufa oosana siai ufafa fifau maqasaa ufa afaanna manika fannoo innaaruna faqa maqa faqa rakisidaqee qimari ufana. Sia asauku mundiranasaa oosana areemari ufafa maridanoo. Miqira ufara amiqimasee eerairiaqa.

<sup>9</sup> Sia asauku mundirafa fifau afaannafau maridanoofau. Anutuna aiqama afeeka marira irirafa muduka tia uqanna Yisunaki maqasaa qumu marinau.

<sup>10</sup> Innee minasaa maridaqa sia Yisuna marirana kai maree mariafanoo Anutuna marirafa minaki marina mina faqa maree mariafanoo. Afaannauqa rakisirausa uriqararausa mariafanoo faiqi moo fannoo misara anoonee qinaqa sia misara iridaqa rufiaaqa Yisufa kai misoo maasoo uriqararafa maridanoo misa faqa maasa faqa uriqaranoo maridanoo rakisinnimaqaidanoo.

<sup>11</sup> Yuda maqannaasa fainanduqirana oosana aanaaqi faiqi akoonaiqi fainanduqu nimaqasee misara Isaraee maqannaasaki maridaqa Anutuna faiqinamukiaqeera qimarusa maridaqa. Qinee Pauroosa mi oosanna kikiqa usidaqa maaqi qianaara. Innee Kooroosee maqannaasa asauku mundirana ufa irisee sia faiqi moo nisaukukoo innee fainanduqusee minaindikiaqeera qidaqa. Asauku mundirafa inni faiqi faiqi marirana manda marirana nirana aiqama uqanna nari maraqusoofaqa minaindikiaqa mariafanoo.

Asauku mundirafa maa manda maqanasaaqaraa nifaaqa qikairi faqa uturuqu aqiara foora masoofaqa doo mina turuqiara foora yanannai asauku mundiranaindi kammambi mariafanoo.

(Yuda maqannaasa oosana maaqimminoo maridanoo. Faiqí moo fanoo misa amaana maqaki keeqararee qimaseenoo anirainaqa misa mina qumaree nammari keeqammamaqaidaga. Keeqammamaqaidaga maaqi qidaqa. Maa fasiqafa kuqiranara foora keeqafinoo kuqiarafuora mafinoo findifinoo. Doo miqooqari amaana maqaki maqee maqee fidaqa.)

<sup>12</sup> Qinee Pauroosa minara inni Kooroosee maqannaasara maaqi qidaqa Yisufa aunirira saqarisaa kuqufufaqa inneeqa nifaaqa namufaqa kuqirana ameeraameeriqá Yisufa kuqiranakiqari findifufaqa innee faqa kuqirana ameeraa meeriranaki qari findifiqa fuka marirana mara maree findifi mariafanoo. Inni irirafa Yisunasaa mundunara mi ainainna kambiqafi maridanoo.

<sup>13</sup> Anutufa narí ufa Isaraee maqannaasa Mooseena sandufa qiman-niminou. Innee nianai maridaqa sia Anutuna ufa irimariafanoo innee faiqí faiqi mariafanoo manda iriramau fimariafanoo. Innee inneeqa irirana Yisunasaa mundusoofanoo Anutufa minara inniara narí amaakusaimbaqa kuqiqau maqi qidanoo kaifaa inniara narí amaakusaimbaqa kuqiranakiqari findi fiqa minasaa mundufiqa marifaranoo fee qimaseenoo maasa maqasaa mandainaina taikaqiseenoo sia naruanauree qinuu.

<sup>14</sup> Anutuna aaquqira ufa papiqaki marifaqa maasa mina irisee rukiasaida kaqi fimariafanoo Anutufa maasa darira ufa sia maasasaa qinuu. Asauku mundirafa aunirira saqarisaa kuqirari marufanoo Anutufa maasa darira ufa oosana oosana qimaseenoo mara mareenoo Yisuna afaaqai munuseenoo aunirira saqarisaa pirimmannai aru atukaranau. Miqunara Anutufa maasara ufa siasee qidanoo Mooseena sandufa nimaarusirafa fannoo sia amana inni naruannoo fee qidanoo.

<sup>15</sup> Anutuna asauku mundirafa kuqufinoo mi kuqiranannai afaannauqa rakisirausa uriqarararusa misa aiqama misa afeeka qumooqkamaseenoo aiqamausa nifusaa nisaurirana nimiseenoo ufoonaridanoo narí amooqimaseenoo maridanoo.

<sup>16</sup> Faiqí akaqausa inni Kooroosee maqannaasa maaqi qimasee qimannimifaqa siammiriaqa. Misa maaqi qifaqa. Innee Mooseena sandufa maree akaqa narana nammari siamma naaqa. Innee aukwana idooaranara sia irimariafanoo fuka quqoona idooaranara faqa sia irimariafanoo Yuda maqannaasa amaanasaa idooarana mina faqa sia irimariafanoo mandaikammi mariafanoo sia Yisuna aiku oosanki andeeqasee mariafanoo. Misa mi ufanannai inni rafaqa fifaqa siamma iriaqa.

<sup>17</sup> Mi ainainnausa fifau nimanirafa maridanoo sia kuqaa anoonau. Sia moo ainaina kikiqa usuaqa. Asauku mundirafa mifa kuqaa anoona uqanna maridanoo innee mina faqa moodaanaki ootupamafi mariafanoo miqoo kai mariaqa.

<sup>18</sup> Faiqí akaqausa qummaararara ufannai inni rafaqa firaree qifaqa sia mi ufana iriaqa. Misa fifau inniara unna qimasee maasa daanna reeqa kaaqa nisaunaasauriqa nuaqee qiqa misa inniara unna qimaseeqa qangiroouqara nimooqiaqee qidaqa miqi qifaranoo. Misa qainamasee náriara Anutuna ufa iriseeqee qimasee inni rafaqafifara. Miqira fasiqauqa fifau nári nifaaqa nimooqi mariasa maridaqa. Misa nári manda marirana fannoo nári uqannifiqee marifaqa miqimariafanoo.

<sup>19</sup> Misa asauku mundirana minniseeqa nári aatata nifiqee firaree qidaqa mi ufanannai inni rafaqafifaranoo. Asauku mundirafa maasa qikiqa



maridanoo mina adaka maasa maridaqa. Mifa maasa rakisina amiqimasee moodaanaki maridaqa narí dadaaqa narí dadaaqidaqa Anutuna ufasaa innooqafi afeekaikidaqa. Mi fasiqausa nári qummaarannai inni rafaafimariasa maasa qikiaqa Yisuna minniseeqa nári aatata fidaqa mi ufanannai inni rafaafidaqa.

*Maasa asauku mundirana namufaqa kuqifa mina namufaqa findifqa.*

<sup>20</sup> Innee Yisuna aiku oosana mariasa mifa kuqufaqa innee faqa inneeqa irirana namufaqa kuqiarafu mafi mariafanoo. Doo innee nanaree afaanauqa karaambaiqauqa misa ufa irisee rufiaidee kuqira fasiqa fannoo sia mi ainainausara iridanoo doo taikanoo maridanoo doo innee minara iriseeqa faiqí faiqí sandufa oosana oosanannai rafaafifaqa sia ooqai undee iqa eedoo qimasee mi mau fuaqa.

<sup>21</sup> Misa maa unnufanannai inni rafaafidaqa. Innee akaqa narana namari sia naaqa innaarunai fira aana ititeefoora. Innee akaqa narainaina sia uqanna nifaurusaa quqaqee qidaqa. Akaqa ainaina sia auqaaqa mi manda ainainafa inni naakuandooree qidaqa. Innee miqira unna sandufa sia iriaqa.

<sup>22</sup> Fifau maqasaaqaraa fasiqa sandufa inni naakapidaqa. Maasa mi naranna namasaanoo sia niranandaki kasooiannoo kaqi aiqaraannoo sia innaaruna aana faqa ititaannoo kaqi aiqaraannoo.

<sup>23</sup> Innee mi fasiqausa sandufa iriseeqa unna qimasee irirana faqaasee qifaranoo. Misa maa ufana uqeeraidaqa. Innee qangiroouqa nimooqiqa qidaqa innee inneeqa nifaaqa fira aupurarana nimisee minannoo innaarunai fuaqee qidaqa unna qimariafanoo. Mi unna fasiqausa mi naamuaqira ufana sia amana maasa daundurakinaa manda nidirana rafaafa fuannoo, Yisuna saqarikirafa kai amana mina rafaafa fuannoo.

### 3

<sup>1</sup> Asauku mundirafa kuqiranakiqari findifufaqa innee mina faqa findifqa minara iridaqa inneeqa marira irirana innaarunai asauku mundirafa marinnai ubeekaida mariaqa. Miqoo Anutufa asauku mundirana fira afeeka amufanoo mina aaqa maridanoo.

<sup>2</sup> Minara inneeqa irirana mirinni mari ainainasaa rusisee iridaqa maqoo maqasaa manda ainainara sia iriaqa.

<sup>3</sup> Innee kuqirana aannareeqa sia mandainainara iriaqa kuqira foora iqa mariaqa.

<sup>4</sup> Inni marirafa Yisunasaa mundinoo marifanoo minaindi fannoo Anutunasaa mundinoo maridanoo. Asauku mundirafa innee maa maqanasaa anoona marirafa faqa marianara mifa narí kooroomasainaqa innee mina namufaqa ooru raifanoo narí afeeka kaaqa qara areenarana naida nimianoo.

*Ooqeenaa marirana faqa fuka marirana faqa doo maqee mi ufafa kooroo inoo.*

<sup>5</sup> Inneeqa maa maqanasaaqaraa nifaaqa ainaina adiafaairana arusaifanoo sia inni kaifaa mandoosana uqannifqaani faiqí fannoo anaasee qummuarimariana faqa anaasee fannoo faiqí qummuarimarina taikaani. Inneeqa nifaaqa sia kooroo iaqa. Innee sia inneeqa mandoosana maraidaqa maanaqa anaaseera indee indee qiqanuqa adiafaa qiqqa nuaqa doo mi iriraua taikafuani. Oosana oosana mandainaina marararee qimariafa mifa faqa taikafuani. Innee aiqama ainainara nimukee marina mi irirafa

taikaani. Anutuna minniseeqa moo Anutunara foora innaaru qidee qimari-asa faqa ainainara rimariasa faqa moodaanaki unna aatata fimariafanoo.

<sup>6</sup> Mi ainainausa moomoo maree mariasa Anutuna ufa rukiaida miqidaqa.

<sup>7</sup> Innee misa faqa mi mandirirana maree marusa mariafanoo.

<sup>8-9</sup> Doo maqee afaimma quqaaqa. Maa ainainausa faqa afaimma quqaaqa. Aanoogirana faqa kaukaataqirana faqa aqoonausa nifasaasa qirana faqa aqoonausa niquramaara rirana faqa maqee maqee faiqi fannoo aanaaseera amarauqirana faqa anaasee fannoo faiqira amarauqirana faqa unna ufa qimasaida nari afasaasa nari afasaasa qira ufa faqa mi ufausa aiqama afaimma quqaaqa.

<sup>10</sup> Mi manda irirausa ooqeenaa irirana marirana afaimma quqasee fuka andeeqara marirana marasee gammunnara foora afisuaqa. Mi fuka marirana Anutufa auqusee nimuna Anutufa kaifaa aiqama kari fukara foora kai mannimidanoo. Miqinanoo maasa marirafa mina amanaikinaqa maasa minara amiqimasee iriaqeera miqidanoo.

<sup>11</sup> Fuka mi andeeqara marirana maree mariasa nariara uriqararausee ureeqarausee qimiranara sia minara iridaqa, Yuda maqannaafee aanaa-muru fee fainanduqirausee sia fainanduqirausee irirana faqaasee fuka aamina maqanna fee anoona akoona faqaa fee faiqi faiqi fee fuka andeeqara marirana maree mariasa sia mi ufausara iridaqa. Asauku mundiranara kai kuqaa anoona maridanoo fee qidaqa.

<sup>12</sup> Innee Asauku mundiranara karaambaiqee qimariasa. Anutufa innee rusandeesamumaseenoo nari andeeqara marira iriranaki quqanniseenoo inniara rakisidanoo amuqusidanoo. Anutufa miqimarinaqa innee maa reendeenira marira ufana kaqi maraqa. Nariara nariara qimudaoo qiaqa. Ufa qirana faqa nirana faqa ireeda kai qimannimiaqa. Fisoo fisoo imariasa naannaraqa mariaqa. Reendeenamafi ubiqasee mariasa naannaraqa mariaqa.

<sup>13</sup> Faiqi anaasee inni ritifaqa kaqi irisee nimaqaaqa. Asauku mundirafa inni mandainaina doo mininnisanau. Innikiqari nariara nariara ufa qiraree qimasee asauku mundirana aanna reeqa nariara nariara ufa qirana minnisee aunusaa.

<sup>14</sup> Mi andeeqara aiqama ainainna nariqa kai sia amanaikifanoo nariara nariara nimuqusinafa mifa mi aiqama amiqira ainainausa uriqararafa maridanoo moodaanaki suqu quqaseenoo adiafaa irana nimidanoo.

<sup>15</sup> Innee asauku mundiranaki mariasa moodaara foora marianara nariara nariara farafara qirana minnisee asauku mundirana asooarafa inni naundurairakisimarinaqa moodaanaki kiqa mariaqa. Innee miqiaqee qimaseenoo Anutufa inni rusandeesamumasee mareeqee asauku mundiranaki quqanau. Doo Anutunara faqa maqee maqee dufi dufi qiaqa.

<sup>16</sup> Asauku mundirafa nimu ufana innee iriseeqa maqee maqee eedoo qidaqa mi mau kai fimarifanoo inni naunduraki mi adiafaairafa qumbiqaani. Innee mi mariranasaa fidaqa iriranannai kai nari andeeqee nari andeeqee iaqa. Firaa iriranannai aiqamausa nari aaquqimamaqaina nari aaquqimamaqaina iaqa. Anutuna maraquna fannoo amaana idi nimuna mi idina maqee maqee raqa nuaqa. Idi roona auqu Dafidifa mina idi faqa ooqeenasaa amaana idi faqa mi idisa maqee maqee raqa nuaqa. Raqa nidaqa Anutunara asasidaqa dufi dufi qidaqa mi idi namusa raqa nuaqa.

<sup>17</sup> Innee inneeqara karaambaiqa Yisuna faiqi namu maridee qimasaidaqa mina aannandaidee qidaqa ufa qimariana ainainimariana andeeqasee mina kai afaqaaqa. Innee karaambaiqa Yisuna maa maqanasaa

koorooirausa maridaqa mifa innandee innandee kai idaqa mariaqa aiqama ainaina narí qinnaqoo kai fidaqa ufa qinana auqeenana qafeeqa mina aanna raidee qiaqa. Sia noori runusee miqiaqa inneeqa nikoona Anutuna asasamamaqaidaqa susummamaqaaqa. Anutuna asauku mundirana minannai Anutufa aana ruqiqasaifaqa asasirana Anutuna amiaqa.

*Faiqí anaasee, faiqi naakaparufa.*

<sup>18</sup> Faiqí ninaaqmaaka innee inneeqa nifaaqmaaka ooreeqa mariaqa. Karaambaiqa niraamummaaka mina ufa irimaria anaaseesa nári nifaammaaka ooreeqa maridaqa andeeqasee karaambaiqa aatata fidaqa miqimariafanoo.

<sup>19</sup> Anaasee nifaaqmaaka innee inneeqa ninaaqmaakara ridaqa nimuqusi marinaqa sia afeeka rakisira rakisinnimaqaaqa sia sukufa qimannimaqaaqa.

<sup>20</sup> Faiqiuqa inniqa ninausa nikausa ufa qinnana aiqama kari sia rukiaaqa eedoo kai qiaqa. Karaambaiqa faiqi namu inneeqa ninausa nikausa ufara eedoo qidaqa andeeqasee karaambaiqa aatata fidaqa miqi mariafanoo.

<sup>21</sup> Innee ninausa nikausa inneeqa faiqi namu sia maqee maqee nifairida niqiaqa. Miqifaqa misa quandaifi inniara firaqoo fidiqaaifaranoo.

<sup>22</sup> Innee ainainira faiqiuqa mariasa innaarunai inni rakisirafa maridanoo inni saika oosana qafaidanoo. Innee maa maqanasaaqarara rakisirausara faqa iriaqa aiqama kari misa ufara faqa eedoo qiaqa. Sia nári niqafainnaqoo kai andeeqasee ainainiaqa, kaqiqoo kaqiqoo faqa amiqimasee ainainiqa fuaqa. Miqi kai iqa sia faiqí anaasee nifusaa, inni nimooqiranara kai irisee ainainiqa. Innee inneeqa nimuqusa ookiqari karaambaiqara naaquqainaqa minara irisee amiqimasee ainainiqa fuaqa.

<sup>23</sup> Inneeqa rakisirana ainainirana inneeqa nidiranannai kai auqaida mariaqa mi ainainna idaqa sia maqasaa fasiqa ainainiraneeqa qiaqa.

<sup>24</sup> Kasooaqee maasa innaarunai ooruraananoo minni maasa qeeqa kadaapiriri unnana akiaqara Karaambaiqa fannoo narí ooqai qimaqoo ufanasaqa kai feefauru nimiannoo. Kaifaa innisaimbaqa aiqama rakisirausa ainainidaqa asasammasee auqaaqa. Asauku mundirafa mifa anoona rakisirafa maridanoo mina saikakaimmifoo qimasee sanaasamasee amiqimasee auqaaqa.

<sup>25</sup> Innee oosana oosana ainainidaqa mandainainira ainainifanoo Anutufa inni ufa nimiannoo. Sia inniara kaqi fifau saika faiqi fee qimasee minninnisaannoo. Inni mandainainirana niqafamaseenoo mina amana kai ufa nimiannoo.

## 4

*Pauroofa naakaparufa qimannimidanoo.*

<sup>1</sup> Innee faiqisaa rakisirausa inni ainainira fasiqauqa innee andeeqasee amana amana kai misasaa rakisinnisaqa. Innee faiqisaa rakisirausa maa ufana iriaqa, inni rakisirafa innaarunai marifa inneeqa ainainira faiqi mandaikamma nimaqaifanoo inni faqa ufa nimiannoo.

<sup>2</sup> Innee Kooroosee maqannaa asauku mundirana Yisuna aiku oosanaki mariasa innee inneeqa ainainidaqa Anutuna ufamau fimarianara minara Anutuna maqee maqee innaaru qimamaqaaqa. Sia nifaurunnai kai unna innaaru qiaqa amiqimasee naundurannai innaaru qiaqa. Innaaru qidaqa maqee maqee Anutunara dufi dufi qimamaqaaqa.

<sup>3</sup> Innee innaaru qidaqa mai qini Pauroosa saimbaqa maaqoo rumbaqa qini faqa mariasara faqa innaaru qimannisaqa. Ooqai asauku

mundirafa kukeeqanoo marufanoo maqee kari akooroo inoo marifanoo Anutufa maasa dadaaqinaqa mina ufa aiqamai kooroomannimaqaannee qimaseeqa minara faqa innaaruqiaqa. Doo qinee maqee Roomma maqanna rumbaranaki fifau maridaqa. Asauku mundiranara maqusa maqusa qimannimiananara Roomma maqannaasa sia maasa amaana ufafau qifoo qimaseeqa qini rumbaranaki quqaqaafaqa maridaqa. Innee minara iriseeqa qiniara faqa innaaruqimaqisaqa.

<sup>4</sup> Ooqai tamummaqara fasiqauqa Anutuna asauku mundiranara sia amiqimasee irimariqau ati kai irimarufanoo maqee kamuqoo doo kambiqeenoo kooroo inoo maridanoo. Anutufa qiniara aiqama maqusa maqusa qimannimianne qifaqa minara innee qiniara innaaru qimaqisee marifaqa qinee miqimannisa.

<sup>5</sup> Innee Kooroosee maqanna Yisuna aiku oosana mariasa innee Yisuna ufara nikoo nikaa imariasa faqa moodaa maqusaki mariafanoo. Innee misa nifusaa reendenamasee irirana faqaasa naanna ramasee nuaqa. Innee misa faqa maridaqa innee sia fifau nifaurunnai kai ufa qiaqa, Yisunara qimannimiraree qidaqa deedaqammaqaifanoo mariani, irifaqa dauni qimannimiaqa.

<sup>6</sup> Innee Yisuna ufa irimariasa sia misa rauqisee qimannimiaqa, kasoqaqee fifimmasee adiafaaira ufa qimanniminaqa irifaranoo. Innee miqimarifaqa faiqi anaasee inni irifaqa andeeqasee anoona ufa kai qimannimiaqa.

*Pauroofa Kooroosee maqanna nimandoo ufafa.*

<sup>7</sup> Qini Pauroosa Tikikusafa qini daufakiana inni qimannimiannoo Tikikusanara qini dididanoo mifa karaambaigaindi maridanoo mina ainainira faiqi maridanoo amiqimaseenoo maasa dadaaqidanoo.

<sup>8</sup> Qinee Tikikusana maindari aqigaananoo maasa daufakiana qimannimianoo inni nifeeqaranoo mariannoo.

<sup>9</sup> Qinee Ooneesimusana faqa Tikikusana faqa miqanda innee mariannai niqigaanaura. Ooneesimusafa mifa Kooroosee maqanna maridanoo mifa faqa maasa qikaqaafasaa amiqirafa marifanoo maasa minara faqa nididanoo. Miqanda maaqoo oosana oosana ainaina kooroosirana inni qimannimifaranoo.

<sup>10</sup> Aristarakusafa mifa faqa mai qini faqa Roomma maqanna rumbaranaki maridanoo nimandaidanoo. Baranabasina akaqaafasaa uqanna Marikoofa mai marifa mifa faqa inni nimandaidanoo. Qinee moo akaraki Marikoonara qimannimiananara mifa oonurainaqa innee mina amiqimasee rakisi aisaqa.

<sup>11</sup> Yusatusafa mifa faqa mai maridanoo mina auqu moo Yisuna auqu amaranaikirafa mifa faqa inni nimandaidanoo. Yuda maqanna amaana ufa irimarusu misakiqari Yusatusafa faqa Marikoofa faqa Aristarakusafa faqa mi namusa kai qini faqa moodaa karida ainainimariasa maridaqa maa maqanasaa Anutuna ququsa firaafaikianifeera mi namusa kai maasa dadaaqidaqa. Misa miqi mariafaqa qinee rumbaranaki marunanoo qimuqusa isooaidanoo.

<sup>12</sup> Eepafaraasafa inni Kooroosee maqannaafa mai maridanoo inni nimandaidanoo. Mifa faqa asauku mundirana Yisuna ainainira faiqi maridanoo, mifa inni Kooroosee maqannaasara andeeqasee Anutuna ufa nimandakusee irisee mi mau andeeqasee fuaqeera afeekaikamasee innaaru qidanoo. Innee kooroosee maqannaasa faiqi firaasara maqi mafi amiqimasee Yisuna aiku oosanaki ooqumarifi afeekaikiqa mariaqeera innaaru

qidanoo. Innee miqiaqeera Eepafaraasafa inniara maqee maqee afeekaikamasee innaaru qidanoo.

<sup>13</sup> Qinee Pauroosa mi fasiqana Eepafaraasana kadaapirirana qafaidaqa qimannimidaqa. Sia inni Kooroosee maqannaara kaifau qidanoofau, Raodiseea maqannaa faqa Qieerapoorisa maqannaa faqara innaaru qimannisaidanoo.

<sup>14</sup> Rukaafa tutaqa saikimarifa maasa nidimarifa maridanoo mifa faqa inni nimandaaidanoo. Deemasafa mifa faqa inni nimandaaidanoo.

<sup>15</sup> Innee maa akarana iriseeqa quandafi Yisuna ufa irimariasa Raodiseea maqannaa faqa nimandaaqa. Yisuna ufa irimariasa faiqí moo auqu Nimafana maaqaki suqimariasa mi nimandarufana mareeqeeqa misa faqa nimifaqa iriaqa.

<sup>16</sup> Maa akara ufana innee Kooroosee maqannaa nimaqeeqa. Innee mina asaana rumaseeqa iriseeqa faiqí moo fannoo mina mara mareenoo munu Raodiseea maqannaa Yisuna ufa irimariasa qambaana asaana rinaqa iriaqa irisee mee nári Raodiseea maqannaa nimu akarufana kaifaa mi fasiqafa misaindi mareenoo anireenoo inniqa maqannaaki asaana rinaqa misa nimaqaunna ufana faqa iriaqa.

<sup>17</sup> Arakipusafa karaambaifaqa ufa irimarifa maridanoo. Innee afeekaikamasee qimamia. Anee sia qumooqukidana aunduaría. Afeekaikamasee auqa. Innee miqi qimaseeqa Arakipusana qimamiaqa.

<sup>18</sup> Faiqí moo fannoo ufa qunnana akararumasaiifaqa qeeqa Pauroosa kaqi qeeqa duqu kai akara ridaqa maa akarana rafaqaqafidaqa. Qinee inni nimandaídaqa. Qinee Roomma maqanna karabusaki kaqi marunnanara innee maqee maqee innaaru qimaqisaqa. Anutufa narí marirana inni niminaqa innee amiqi amiqiaqeera nimiannoo mina maraaqa.

## **1 TEESARONIKA**

### **Teesaroonika Maqannaana Indaaru Nimu Akarafa.**

<sup>1</sup> Innee Teesaroonika maqannaasa Anutunaki mariasa karaambaiqa Yisuna asauku mundiranaki faqa mariasa, innee Teesaroonika maqannaasa Yisuna ufara suqimariasa qinee Pauroosa faqa Sirasifa faqa Timotifa faqa inni nimandaidaga, akara rumannimaqaidaga. Anutuna kaqi nimira afaarirana faqa asoarana nari aundura faqa inni faqa mariani.

*Pauroofa Teesaroonika maqannaasa Anutuna ufamau fimarunara ni-mooqidanoo.*

<sup>2</sup> Maasa maaqoo marunna namusa inniara iriseeqa maqee maqee Anutufinnai dufi dufi qidaqa, maqee maqee inniara innaaru qimannimaqaidaga.

<sup>3</sup> Maasa inniara maqee maqee maasa qikoona Anutuna aaqoo auqaidaga. Innee Yisuna saqarikidaqa miqianara Anutuna ufirira ainainirana maqee maqee imariafanoo. Innee Anutunara faqa faiqi aanaaseera faqa nimuqusa imarinara Anutufinnai kadaapiri mariafanoo. Innee Yisunara اساسمasee afeesira irirafa karaambaiqa asauku mundirana Yisunaki atukaramasee marianara minauqara faqa maasa irisee Anutuna aaqoo auqaida inniara innaaru qimannimaqaidaga.

<sup>4</sup> Teesaroonika maqusanaasa qini qikaqaafasaa Anutufa inniara amuqusimarifa inni rusandeesamumasee maroonara maasa iridaqa.

<sup>5</sup> Maasa Yisuna aufakiana sia noonnai kaifau inni qimannimidau, Anutuna afeekannai faqa mina naaquqara andeeqara maraqunannai faqa qeeqa faqa mi iriranamau fidaqa minannai faqa inni qimannimianana minara Anutufa inni rusandeesamunara iridaqa kuqaa fee qidaqa. Maasa inni faqa Teesaroonika maqusai mariafana qiqafuosa maridaqa inni dadaaqirara andeeqaseeqa mariafanausa maridaqa innee minara imariafanoo.

<sup>6</sup> Innee maasa andeeqarana qafamasee karaambaiqa faqa maasa faqa andeeqarana ameeraameerirana faqa maasa faqa andeeqarana ameeraameeri mariafanoo, inni maqannaasa Yisuna ufa irunara mina akiaqara inni aupurarana firaaqoo nimufaqa innee sia minara iriqau naaquqara maraquna nimimaru اساسمasee karaambaiqa ufa kai maroosa.

<sup>7</sup> Innee Teesaroonika maqannaasa miqiga aiqama aanaamuru Yisuna ufa irimarusa inneeqa andeeqara oosana uqannifiqoonara innee Maseedoonia maqa maaqakina marusa faqa Kirisa maqa maaqakina marusa faqa uqannifiqoosa mariafanoo.

<sup>8</sup> Sia mi maqa maaqa qanda kaifau karaambaiqa ufa iriqau, aiqama maqa maaqai innee Teesaroonika maqannaasa Anutuna ufa irufa, mi ufafa aiqamai daraaninoo fifaininau. Maasa fifau inniara mi maqannaasa fiq fiq idaga qimannimiqa nimariafanaqa misa ooqai iriseeqa qimaqimiqa.

<sup>9</sup> Ooqai maasa inni Teesaroonika maqusai oonuraafanaqa innee maasa اساسمantee oonu qifiqasee amiqimasee maasa ufa irunara faasai mi anaamurusa irimariqau. Innee inneeqa dapi saqari Anutunara foora innaaru qimaruna minnisee quandaki kuqaa anoona kasi mari Anutufinnai ubeekaranara faqa faasai mi anaamurusa iriseeqa minara aiqamausa qimannimimariqau.

<sup>10</sup> Innee mifunnai ubeekamafi mina amaaku innaarunaindari qumirana afeesu afeesirafa kaqi afeesida marunara faasai aanaamuru minara faqa irimariqau. Anutuna amaaku Yisufa kuqiranakinaana mara findifufa, maasa Anutufa kasooqagee naruaninnanakinaana Yisufa maasa asumu qumaree marifa innee mifa qumuaninnanara afeesida marunara aiqama aanaamuru faasaimma irisee qimaqimiafanoo.

## 2

*Pauroofa Teesaroonika maqusai maridanoo narí ainaini marunara qimanniminau.*

<sup>1</sup> Oo Teesaroonika maqannaasa qini qikaqaafasaauga. Maasa namu inni maqusai fuafannakari sia kadiqamannisaiqafana, innee minara irimariafanoo.

<sup>2</sup> Maasa namu Teesaroonika maqusai fuaneera Firipi maqusai oonuraafanaqa mandaikamma nimaqeeqa manda ufa qimunara irimariafanoo. Maasa inni maqusai oonuraafanaqa moomoosa aanooqima nimaqoofaqa oonumafi iriafananoo Anutufa paasoosirana nimufaqa mina ufa inni Teesaroonika maqannaasa qimannimiqafana.

<sup>3</sup> Maasa qimannimirafa faqa sia aaqaranasaa mundinoo maridanoo sia maasa mandainaina maraannanasaa mundinoo maridanoo, sia maasa ufa akaruqiranasaa mundinoo maridanoo.

<sup>4</sup> Anutufa maasa nimanamasee inni qimannimiranara eedoo qimasee narí amiqira fasaasa ufa maasasaa quqasainaqa maasa maqee maqee Anutuna aidiramau kai inni qimannimidaqa. Anutufa maasa firana amanamasee qafeemarifa marifaqa minara irisee andeeqasee qimannimidaqa. Sia faiqi maasa ufa irisee eedoo qiaqeerau qimannimidau. Anutufa irisee eedoo qianinnamau kai inni qimannimidaqa.

<sup>5</sup> Maasa Anutuna afusaa maridaqa sia nimooqira ufannaifau inni qimannimiqafana. Maasa Yisuna ufa qimannimidaqa sia maqandanai oosana oosana ainaina ummuariraree qimasee Yisuna ufa firaaqoo qimannimifanausa, andeeqeemariafanausa innee minara faqa irimariafanoo.

<sup>6</sup> Maasa inni faqa maridaqa inni fee akaqausee sia misa nimooqira ufara randaqafana.

<sup>7</sup> Kuqaa maasa asaku mundirafa niqiqoo fasiqausa maqasaa fasiqauqa maridaqa, maasa minara irisee sia inniara qimooqiranee, ainainee qimiagee qimariqafana. Ninausa faiqi aanaaqi ireeda rakisi mariandee maasa miqikai mandee ireeda kai inni faqa maridaqa qimannimifanausa sia inni moo ainaina maraqafana.

<sup>8</sup> Maasa inni Teesaroonika maqannaasara firaaqoo nimuqusimarunara sia Anutunaindaraa amiqira fasaasa ufa kai naida nimiqa, maasa qeeqa dariranara sia rufiqarai irirana faqa qimuqusa faqa kaqi marirana faqa nimiaqaaida mariqafana.

<sup>9</sup> Oo qini qikaqaafasaa maasa inni maqusai inni faqa mariafanaqa innee maasa oosana qafamasee irimariafanoo. Maasa narana maree maria saikana kadaapiriqa tooqaamu maraafana qafaqau. Maasa Anutufinnaindaraa amiqira fasaasa ufa qimannimiqa fifi inaqa innisaa oonu munduanaqa innee maasa naranara mamaraida miqidammiafoo qifoora faasaana faqa eendaki faqa qeeqa kai narana maree maria ainainirana kadaapiri mariafanaqa qafaqau.

<sup>10</sup> Maasa innee Teesaroonika maqanna faqa mariafanna kamuqoo sia Anutufa kai maasa marirana qafanau, innee faqa qiqafoofanoo. Maasa

inni Yisunara rimarusa faqa maridaqa maasa anukarana faqa andeeqarana faqa pisoopisooirana faqa sia aaqarana faqa mariafanaqa qiqafee marusa maridaqa.

<sup>11</sup> Faiqi nikausa amiqimmandee faiqi rakisidaqa maasa miqi kai iqa inni rakisimariqiafana.

<sup>12</sup> Maasa innee mandainaina maroofaqa reendeenamma ni-mageeaafanausa maridaqa. Anutufa inni naaraidanoo kasooqafee innaarunai ooruree narí areenarana faqa narí ququsara faqa mina faqa marasee narí faqa mariaqee qidanoo. Maasa inniara minara iriseeqa innee maqee mariaqooqari Anutuna aDIRAMAU kai fuaqa, minara fuki faaki qimariqiafana.

<sup>13</sup> Anutuna aufakiana maasasaa quqasoona inni qimannimiafaqa innee irisee umaraqau. Innee minara sia faiqí ufafee qimariqau. Anutuna ufafee qimasee umaraqau. Miquna qafamasee maasa Anutunara dufi dufi qidaqa. Kuqaa Anutuna ufa maridanoo innee mina ufa irimariasakina saikidanoo.

<sup>14</sup> Ooqai Yuda maqannaasa nári niqoonausa asauku mundirana Yisuna ufa irimarusa irisoonaa akiaqara kadaapirirana nidafrana nimiqau. Innee Teesaroonika maqannaasa faqa asauku mundirana Yisuna ufa irisoofofaqa inniqa niqoonausa nikooqoofaqa miqi undee kai iqa nidafrana aupurarana inni nimiqau.

<sup>15</sup> Yuda maqannaasa ooqai Anutuna tamummaqara fasiqauqa kuqa nariqau, kafaa maa kamuqoo karaambaiqa Yisuna kuqamma arusaqau. Doo kafaa maqee maasa mandaikamma qimaqaidaqa. Misa Anutuna afusaa firaqoo mandaikidaqa misa kaaqa faiqí narimariasaa maridaqa.

<sup>16</sup> Maasa Anutuna ufa faiqí asumu marararufa aanaamuru qimannimimarunaqa misa nikooqai faqa maasa rafaqafirara amanidaqa. Miqidaqa Yuda maqannaasa aaqarafa doo firaafa uriqaranoo maridanoo, doo maqee mandainaina akiaqara Anutuna aranaqarafa doo misasaa aqufinoo maridanoo.

*Pauroofa kaifaa Teesaroonika maqusai fuaneerusia minnisanau.*

<sup>17</sup> Anutufa misara miqi qimarifaqa qinee Pauroosa maasa qeeqara maqi qidaqa. Yuda maqanna nifaqasaifaqa qusasaa maasa nianai rakeeiqa maridaqa, qifaaqa kai nianai rakeeiqa maridanoo. Maasa irirafa inniki marifaqa fuaneera firaqoo amanunanoo sia amanaikifaqa kaqi maridaqa.

<sup>18</sup> Qinee Pauroosa faqa qini faqa mariasa Teesaroonika maqusai innee iannai fuaneera amanunanoo sia ifaqa qinee qeeqa kai moomoo kari amanunanoo Sadannafa qini faqa ititaifaqa minniseeqa kaqi Ateensa maqusai maridaqa.

<sup>19</sup> Yisufa quminna aukwana innee Teesaroonika maqannaasa faqa aanaamuru qimanniminausa faqa innee inni andeeqaranannai marifaqa qinee inniara Yisuna afusaa qeeqa faiqiara foora inniara asasianauranoo.

<sup>20</sup> Maasa qeeqa qifaaqa amooqirana faqa asasirana faqa inniki marinara innee maqee marianara firaqoo iridaqa kumaaraa Timootina aqi qeeqa.

### 3

<sup>1-3</sup> Maasa inni Teesaroonika maqannaasara kisaagasaa munari minari firariafanaisia doo maqee minnisee rakeemasee Ateensa maqusai maasa namu kaqi maridaqa maasa qikaqa Timootifa maasa faqa Anutuna saikaki marifa amiqira fasaasa ufa asauku mundiranara qimannimi noonifa maasa mina aqi qeeqa innee iannai inni pooduaanifeera innee Yisuna saqarikirana dadaaqianifeera, akaqausa inni nidafrana nimifaqa sia quandaki fuaqeeera



Timootina innee iannai aqiqeeqa. Aqiqamasee maasa kaqi Ateensa maqusai maridaqa. Maasa Yisuna ufasaara narirafa marianinnanara Anutufa ooqai maasara minaki fuaqee qimaqoo ufafa maridanoo. Innee minara faqa irimariafanoo.

<sup>4</sup> Maasa Teesaronika maqusaki maridaqa inni qimannimiqa Yisuna ufa saara narirafa kambiqaanoo fee qiafannana doo mifa kambiqaidanoo innee minara faqa irimariafanoo.

<sup>5</sup> Qinee Pauroosa minara iriseeqa innee iannai Timootina aqiqeeqa. Qinee inni naufakiana sia uqanna iriqa kisaagasaa mariranara qikooqai faqa munari minariqa Timootina aqiqeeqa. Mifa oonureenoo Yisunasaa mundiranara irianifeera aqiqeeqa, Sadannafa inni nikarimaqasee qafaifanoo qini saika kadiqaanoo fee sia fee kadiqaanoo.

<sup>6</sup> Doo maqee Timootifa oonurandee anireenoo inni adiafaaira nau-fakiana qifaqa iriqa. Mifa innee Yisuna saqarikirana faqa nariara nariara nimuqusirana faqa qimaqiminoo. Mifa innee maasara maqee maqee irimariana faqa maasa inni niqafaagaairana amana amana kai innee maasa qiqafaaga imarianara Timootifa qimaqimifaqa iriqa. Ooqai maasa qifaaga rumbanoo marifaqa mariunasa.

<sup>7</sup> Innee Yisuna saqarikirafa kaqi marinara maqee iriseeqa qifaaga asasi-fanoo kadaapirirana faqa aupurarana faqa doo aufadeenoo.

<sup>8</sup> Inneeqa marirana mapukuseeqa karaambaiqa afusaa findifaqa maasa qifaaga amiqiannoo.

<sup>9</sup> Doo maqee maasa innee mapukusee marianara Anutuna afusaa dufi dufi qianaara. Maasa inniara Anutuna afusaa asasidaqa minara faqa dufi dufi qimamaqaida.

<sup>10</sup> Maasa faasaana eendaki inniara Anutufinnai innaaru qidaqa, Anutufa dadaaqinaqa inni noori nindafamasee inneeqa Anutuna ufamau firana andeeqa nimifaranoo.

<sup>11</sup> Maasa Anutufa maasa qikoofa nari uqanna, maasa karaambaiqa Yisufa faqa maasa aana afisusainaqa innee iannai fuaaura.

<sup>12</sup> Karaambaiqa fannoo innee nariara nariara rirana firaanaikamma nimaqaani, inni aqamausara nidirafa faqa maqee maqee firaanaikiani. Maasa inniara didirafa maqee maqee firaafaikidanoo. Innindi faqa miqi kai inoo maqee maqee firaafaikiani.

<sup>13</sup> Miqifanoo Anutufa inni nimuqusa mapukusee afeekaikamma nimi-annoo. Innisaimbaqa karaambaiqa Yisufa nari aiku asauku faqa kafaa qumureenoo inni mareeqeenoo andeeqarasa naaquqarasaikama nisainaqa maasa qikoona Anutuna afusaa kikiqifaranoo.

## 4

*Pauroofa Teesaronika maqanaasara Anutuna aidiramau fuaqera naakapaidanoo.*

<sup>1</sup> Oo Teesaronika maqannaasa qini qikaqaafasaa uqa qeeqa ufa maa ufana ati qimannimianaara. Maasa inni faqa mariafanna kamuqoo Anutuna aidiramau firanara qimannimianaafa mi mau fifusa doo maqee kaqi mi mau fimariafaqa qinee iridaqa. Karaambaiqa Yisufa qimaqimigoonara doo maqee inni fuki faaki qidaqa sia ooqai undee kai kaqikaqoo Anutuna iriranamau fuaqa, moo faqa moo faqa afeekaikamasee mi mau fuaqa.

<sup>2</sup> Inni faqa marianna kamuqoo Karaambaiqa Yisuna ufamau fuaqera naamuaqira ufa oosana oosana naakapaafannana innee irimariafanoo.

<sup>3</sup> Anutuna irirafa inniara maaqimminoo maridanoo inni andeeqara naaquqarafa marinaqa faiqí anaasee narí ummuari narí ummuarirafa sia inni rumbanoo mariani mandainainakiqari idukirausa naanna ramasee mariaqee qiaqa.

<sup>4</sup> Anutufa inniara maaqiaqee qidanoo. Innee aiqamausa inneeqa nifaaqara naaquqara uriqarara ainainee qimasee rakisidaqa andeeqara oosana marararee qidaqa narí ummuari narí ummuarirana taika uqanna fuani.

<sup>5</sup> Innee sia aamina maqannaasa sia Anutunara irimariasa naanna raaqa misa mandainaina fanandiranaki maridaqa innee sia misa naanna raaqa.

<sup>6</sup> Sia inniki moo fannoo miqinoo narí aqoonausee moo maqannaasee mandaikamma nimaqaani. Ooqai maasa inni qimannimifannana maqee kafaa aaquqimannimaqaidaga Karaambaiqa fannoo mi umuarira oosannara narirafa maridanoo.

<sup>7</sup> Anutufa sia maasara narí ummuari narí ummuariranaki mariaqeeera maasa daarama narí ququsaki quqeenoofo. Maasa kaaqa andeeqaranaki mariaqeeera maasa daarama quqanau.

<sup>8-9</sup> Faiqí fee anaasee fee moo fannoo maa qinee qunufana minnisainafa sia faiqí ufafau minniseefara Anutufa narí naaquqara andeeqara maraquna niminna ufana rukieefaranoo. Innee Teesaroonika maqannaasa Yisuna ufa irimariasa nariara nariara nidiranara innee irimariafaqa fifau qimannimidaqa. Anutufa narí kai narí aidi narí aidiranara qimannimifaqa irimariafanoo.

<sup>10</sup> Innee Teesaroonika maqusanaasa Yisuna ufa irimariasa Maseedoonia maqa maaqaki maria nikaqaafasaasa mi amiqira oosanna nimiqoosa mariafanoo. Sia maqee iandee kai kaqikaagoo nariara nariara nidiani moo faqa moo faqa firaaqoo nariara nariara nidiani.

<sup>11</sup> Maasa ooqai inni faqa maridaqa qimannimiaafanandee kai qidaqa kafaa qimannimidaqa. Maa ainainausasaa nimana mundusaafanoo miqoo kai fuaqa. Aiqamausa inneeqa ainainiranasaa inneeqa rakisiaqa, aiqamausa inneeqa narana inneeqa ainaina inneeqa kai maraaqa.

<sup>12</sup> Innee Yisuna ufa irimariasa miqi faqa mina ufara nikooqee mariasa inni nimooqiqa andeeqeeaafoo qifaranoo. Innee faqa miqidaqa sia moo ainainara sarauqinana moonasaa oonu mundua.

### *Yisufa kafaa qumuaninna ufafa.*

<sup>13</sup> Qini qikaqaafasaauqa anoona ufa siaisa kuqufiqa sia findifidammiafoo qimasee ikifaafau qimariana. Innee faqa misa naanna reefoo qimasee kuqirausara anoona ufa iriaqee qimasee inni qimannimidaqa.

<sup>14</sup> Maasa maaqi qidaqa inni qimannimidaqa. Yisufa kuqufinoo kafaa minakiqari findifinuu. Miqunara maasa maaqi qidaqa Yisuna saqariki mariasa kuqufifanoo Anutufa Yisuna mara findifundee kai inoo misa faqa marafindifumma nimaqaannoo. Yisufa qumuaninna aukuaana Yisuna faqa moodaanaki mariaqeeera Anutufa marafindifumma nimaqaannoo.

<sup>15</sup> Karaambaiqa naamuaqimaqoo ufafa maaqimminoo marifaqa qimannimidaqa. Karaambaiqa qumuaninna faasaanasaa maasa kaqi marianausa sia kuqirausa noorisaa ooru fuanauranoo.

<sup>16-17</sup> Mi faasaannasaa innaarunaindari Anutuna daambeenda firaaqoo ruannoo, qangirooqua uriqararafa ufa qiannoo, Anutuna ukeena fuaqaannoo doo miqoo innaarunaindari karaambaiqa narí uqanna qumuanoo. Qumurainaqa kuqirausa kaqi maru kamuqoo asauku mundirana saqarikida mariusa misa naaree kuqiranakiqari findififaqa doo miqoo

maasa mikari kaqi mariasa faqa kuqirausa faqa Anutufa moodaanaki afapita qumareenoo uqeerannisainaqa asurukina keeqakinaqa aanai ooru karaambaiqa paqurimasee mikari mina faqa naaru naaru marianaura.

<sup>18</sup> Miqiannanara innee faiqi anaasee faiqi kuqufuafaqa nifaaqa rumbee marifaqa ikiraqee mariana mi ufana qimannimifanoo nifaaqa aufadaani.

## 5

*Yisufa tautumasee qumuaninnanara faasaanara foora mariaqa.*

<sup>1-2</sup> Mi ainainna kambiqaaninna aukuanara maasa fifau akara rumasee qimannimianaaura, ooqai doo innee irimariafanoo maaqimminoo mariannoo, karaambaiqa qumuaninna kari ummuara fasiqara foora kukeeqakinoo qumuannoo.

<sup>3</sup> Faiqi anaasee maa aukuanara amiqiranaki asoaranaki maridee qimasee kaqi mana manida marifanoo doo miqoo kai rakeemasee firaa narirafa tautumannimaqaannoo. Sia moo amekamasaannoo, anaasee innaamunai fimariandee iannoo sia aupurarafa sia mariannoo, mariannoo.

<sup>4</sup> Innee Teesaronika maqannaasa qini qikaqaafasaauga, innee sia asukunakiara foora nimariasa mariafanoo. Yisufa qumira faasaana ummuarira fasiqara foora kambiqafi naqa innee sia tautumasee nisaurifaranoo.

<sup>5</sup> Innee aiqamausa kaaqa qaranaki nimariasa faasaanara foora nimariasa mariafanoo sia maasa innisaimbaqa eendakiara foora nimarunausa sia asukunakiara foora nimariasara foora maridaqa.

<sup>6</sup> Miqunara maasa innisaimbaqa sia faiqeemariasa naanna raaqa nifu maqasee mariaqa. Maasa innee faqa sia nammari neemariasa naanna ree furufariaqa kaqi amiqimasee marianaura.

<sup>7</sup> Eendaki faiqi anaasee faiqaidaqa eendaki nammari namasee furufaridaqa.

<sup>8</sup> Maasa sia miqimarunausa maridaqa kaaqa qaranaindi maridaqa maasa sia nammari namasee furufariqa nuaqaana kaqi mariaqaana. Maasa qeeqa Yisuna saqarikirana faqa qeeqa nariara nariara rirana faqa mi ainainaqandannai saqari kammandee ukee iriqa. Maasa asumu marianafa kasooqagee kambiqaaninnanara اساسidaqa rakisida maridaqa. Mi اساسira afeesiranara pateeuqara foora qikiaqaki afisusee rakiranakiara foora maria.

(Ooqai nikiaga itairirausa suani qikiaqaki daruandoo qimasee pateeuqa nariqa nikiaga itairiranasaa afisimariqau. Ooqai Yisuna aukuaana Roomma maqanna rakira fasiqauqa ainna qafee afisusee rakiranaki nimariqau. Aiqama ainaina samu sia qikiaqa daruani fee qimasee afisiqau.)

<sup>9</sup> Anutufa sia maasa rusandeesamumasee nari aranaqaranaki quqarareefau qinau. Asauku mundirana karaambaiqa Yisunannai asumu mariana maraagee qimaseenoo maasa rusandeesamumasee maranau.

<sup>10</sup> Mi asauku mundirafa minasaimbaqa maasara moodaanaki mariaqeera maasa darirana qimaaqa maqasee kuqufa findifinoo maridanoo nari kaifaa qumurainaqa kuqiqee kaqi maridee nari faqa mariaqeera maasa qimaaqa maqasee kuqinau.

<sup>11</sup> Innee mi irirana iriseeqa soofaari mariasa mi iriranannai nari dadaaqa nari dadaaqa nari amana nari amana mapukuaqa.

*Pauroofa ufa taikaidanoo nimandaidanoo.*

<sup>12</sup> Oo maasa qikaqaafasaa maasa qeeqa qimuqusa ookiqari inni qimannimidaqa. Inniki Anutuna ufa saiki maria fasiqausa Anutufa mareeqeenoo

mi saikanaki uqannisoosara qidaqa, misa inni naamuaqira ufa qimannimi-afafa amiqira fasiqafee qimasee naaquqamasee iriaqa.

<sup>13</sup> Misa nári amiqira saikara irisee firaqoo noosaa qiranara rufiada misara nidiaga. Innee nariara nariara nidimarinaqa asoaranaki mariaqa.

<sup>14</sup> Qinee inni naamuaqi maruna fasiqausa qimannimidaqa, inni kudi fasiqauqara afeekaikamasee naakapaifaqa misa ainainiaqa, rufiee maria fasiqa anaaseesa nimana mapukunimaqaqa, irirana ooreeqaraura innee dadaaqaqa, innee aiqamausa qambaana reendeenidaqa asoamasee qimannimiqa fuaqa.

<sup>15</sup> Innee maa ainainnara faqa rakisiaqa, moo fannoo ani mandaikamma-maqainana akiaqara sia narí mandaikammamaqa sia mi oosanafa mari-ani. Innee aiqama kari narinni narinni amiqira oosana kai narí ami narí amiaqa sia inneeqaki kai miqiaqa. Innee aiqama maqannaasaki maridaqa miqimannimaqaqa. Inneeqa irirana nimana mi amiqira oosannasaa kai quqaaqa.

<sup>16-18</sup> Innee aiqama kari Yisuna ufa irimariasa اساسida kai mariaqa, aiqama eendaki faasaana innaaru qiqa fuaqa. Aiqama ainaina tiaki Anutunara dufi dufi kai qiaqa. Innee mi ufamau fidaqa asauku mundirana Yisunaki fidaqa Anutufa inniara fuaqee qimaqoomau fifaranoo.

<sup>19</sup> Naaquqara andeeqara maraquna fannoo inni afeeka niminaqa sia mina rafaqafuaqa.

<sup>20</sup> Anutuna maraquna fannoo faiqí dadaaqinaqa sia nikoo nikaa iaqa, amiqimasee iriaqa.

<sup>21</sup> Innee aiqama amaana ufa sia kaqi iriaqa aiqama ufa aiqumumasee iriseeqa anoona ufa kai iriaqa.

<sup>22</sup> Oosana oosana mandainainara eerairiaqa.

<sup>23</sup> Anutufa maasa naundurairi asoarana nimimarifa inni mariranaki naaquqara andeeqara oosana firaqoo nimiani. Mifa kai inni aiqama marirana nipatasaa faqa nimana faqa maraquna faqa aaqarafa sia mariani anukarafa kai mari mari inanoo asauku mundirafa karaambaiaqa Yisufa miqiga marinnanaki qumuani.

<sup>24</sup> Innee inneeqa mandainainakiqari aniaqeera naaree marifa Yisufa sia akoo akaa imarifa maqee maqee dadaaqimarifa maridannoora anukara oosana nimiannoo.

<sup>25</sup> Oo Teesaroonika maqannaasa maasa qikaqaafasaa, innee maasara maqee maqee innaaru qiaqa.

<sup>26</sup> Innee aiqama inneeqa nikaqaafasaa nimandaidaqa moodaa fidikara foora nimandaqa.

<sup>27</sup> Qinee Pauroosa Karaambaiaqa ufa irisee inniara afeekaikida qimannimida innee maa papiqana maraseeqa minakinaa akara ufa aiqama Yisuna ufa irimariasa asaana rumasee qimannimiaqa.

<sup>28</sup> Asauku mundirana Karaambaiaqa Yisuna afaarirafa inniki mariani.

## 2 TEESARONIKA

### Teesaroonika Maqanna Inaaqianna Nimu Akarafa.

<sup>1</sup> Innee Teesaroonika maqannaasa Anutuna ufa irimariasa innee maasa qikoona Anutuna aiku asauku maqasaa fasiqa anaasee mariasa Anutuna asauku mundirana karaambaiqa Yisunaindi faqa mariasa qinee Pauroosa inni akara rumannimaqaidaqa, qaara fasiqa Sirasisa Timootisa faqa inni akara rumannimaqaidaqa.

<sup>2</sup> Innaarunai nikoona Anutuna faqa Anutuna asauku mundirana karaambaiqa Yisuna miqanda kaqi nári afaarirana faqa nári naundura asooarana faqa inni nimiani.

*Yisufa kafaa qumureenoo Anutuna ufa rukiee mariasa naruannoo.*

<sup>3</sup> Oo qini qikaqaafasaa uqa maasa inniara maqee maqee Anutufinai dufi dufi qimamaqaidaqa. Innee Yisuna saqarikirafa firaqoo kambiqainara iriseeqa sia minara dufi dufi qiana aaqaannoo. Inniara Anutufinnai dufi dufi qimarunafa andeeqaidanoo.

<sup>4</sup> Innee Teesaroonika maqusanaasa Yisuna ufa irimarianasaara narirana faqa oosana oosana aupurarana faqa kaqi maraqa fimariana faqa Yisuna ufa kaqi iriqa fimarianara faqa iriseeqa maaqanna maaqanna fidaqa inni amiqira oosana amaana maqaki keeqee mariasa qimannimidaqa qeeqa qimooqidaqa.

<sup>5</sup> Anutuna andeeqara narira ufa anoona kasooqagee maaqi qimasee kambiqaanoo, innee maqee Yisuna ufasaara aupurarana maraqa fimariana akiaqara kasooqagee maaqimminoo mariannoo. Mi aupurarafa Anutuna marira ququsaki keeqarana amanaikamma nimaqaannoo.

<sup>6</sup> Anutufa narí andeeqara oosana maraseenoo inni aupurararana nimimariasa mina akiaqara nári faqa aupurarana nimiannoo, innee mina ufasaara aupurarana mareemariasa asooarana nimidanoo maasa faqa nimiannoo.

<sup>7</sup> Karaambaiqa Yisufa innaarunaindari narí afeekafaqaa qangiroo namu-faqa ida aurunamu faqa koorooira faasaana asooarana maasa nimiseenoo aupurarana misa nimiannoo.

<sup>8</sup> Miqimmandee kooroomafinoo Yisufa Anutunara sia irimariasa faqa maasa karaambaiqa Yisuna amiqira fasaasa ufara nikoo nikaa imariasa narirana nimiannoo.

<sup>9</sup> Yisufa naaru naaru taikarana misa niminaqa naaru naaru karaambaiqa mariqooqari nianai naadumasaa maridaqa sia mina areenara afeeka qafeefaranoo.

<sup>10</sup> Mi faasaannasaa Yisufa maasa faqa aiqama narí aiku asauku amooqirana irirara qumuannoo, aiqama mina ufa irimariasa naaquqarana faqa mararara qumuannoo.

<sup>11</sup> Maasa mi ainainafa kambiqaaninnanara iriseeqa maqee maqee inni Teesaroonika maqusanaasara innaaru qidaqa Anutufa inni naundurari naakapaifaqa mina ufamau uqeerara aatata fimariafanoo minara qidaqa. Anutufa inni dadaaqinaqa inni marirafa nirafa uqeerara aana amana kai fuaqeerana innaaru qidaqa. Anutufa narí afeekannai innee Anutuna ufamau firanara amiqiranee qimariana anonaikiani, innee mina saqarikira saika faqa anonaikiani.

<sup>12</sup> Innee miqifaqa aiqamausa inni andeeqarana qafamasee Yisuna auqu areenarana amooqifanoo Yisufa quandafi inni nimooqiannoo, Anutufa faqa Anutuna asauku mundirafa karaambaiqa Yisuna faqa kaqi afaari-ranannai maa ainainafa mariannoo.

## 2

### *Manda fasiqa kambiqafinoo moomoosa nikaruqiannoo.*

<sup>1</sup> Doo maqee qinee Pauroosa Anutuna asauku mundirafa karaambaiqa Yisufa innaarunaindari kafaa qumiranara faqa maasa mina faqa moodaanaki suqu quqaranara faqa qimannimianaaura. Akaqausa minara doo qumi ifoo qiafaqa innee minara irisee furufariqa munari minari imariafanoo.

<sup>2</sup> Karaambaiqa qumira faasaanara doo aiqaqanau maqi qifaqa unna ufa qiaafoo qimasee sia dauni munuqi miniqira ufa irisee naundura dapikinaqa ninunuruqa. Yafee moo fannoo mi ufana qimanniminoo fee, faiqi moo fannoo aqara ufa tamummaqasee qimanniminoo fee, amaana ufa qimannimimari fasiqafa unna qimasee qimanniminoo fee, faiqi moo fannoo unna qimasee maasara pasaki akara rumasee qimaqimi ifoo qinoo fee.

<sup>3</sup> Innee sia moo fannoo nikaru qinna ufana iriaqa. Yisufa qumira faasaana sia kaqi aniannoo maa ainainausa naaree kambiqafifanoo qumuannoo. Taikara aukwana adeedi rainaqa aiqama atinaindari faiqi anaasee firaqoo Anutuna ufa rukiasee nariqa aatata fifaranoo. Mi aukwana maqasaa manda fasiqa fannoo idaki fuaninafa kambiqaanoo.

<sup>4</sup> Mi manda fasiqafa aiqama maaqanna maaqanna nariqa Anutunee qimaria ainainna faqa aiqama nariqa Anutunara innaaru qimamaqee mariana faqa kuqaa qimariana faqa unna qimariana faqa aiqama namuqaakama nimaqeenoo qaoo qiannoo.

<sup>5</sup> Qinee Pauroosa inni Teesaroonika maqusanaasa faqa maridaqa mi ainainausara inni qimannimifannana sia iridee auni fee.

<sup>6</sup> Mandoosana maree mari fasiqanara maqee mi manda fasiqafa faqa nari mandoosana faqa kambiqaaqaa idanoo moo ainainara innee minara irimarianara maqee kari rafaqaqafidanoo nari aukuanasaa mi manda fasiqafa kooroo iannoo.

<sup>7</sup> Mi manda fasiqana mandainaina fannoo doo maqee maqasaa fasiqa anaaseeki oosana arasee qumee saikidanoo sia maqee anoonaikiannoo minasaa rafaqaqafimari ainaina Anutufa uqeera marainanoo kooroo iannoo.

<sup>8</sup> Kooroo inanoo karaambaiqa Yisuna oosunda fannoo mi manda fasiqana kuqammaaruannoo nari areenarana kooroo iranannai faqa nari qumira faasaana mi fasiqana rakeekaamasainanoo taikaannoo.

<sup>9</sup> Mi manda oosana maree mari fasiqana oosana maaqimminoo mariannoo, mifa Sadannana firaa afeeka namufaqa anireenoo oosana oosana ainainna faiqi sia auqaqaa ira ainaina faqa unna qimasee nari auqu uqeere mari ainaina faqa naaquqara ainaina faqa uqeerasee anoonara foora uqannifiqaannoo.

<sup>10</sup> Mifa oosana oosana nikaruqira mandainaina uqannifiqainaqa naaru idaki taikeefandinausa minara kuqaa fee qimasee irifara, misa innaarunai asumu marira anoona ufara sia nidimarifaqa sia oonu irianara mina akiaqara taikeefaranoo.

<sup>11-12</sup> Minara Anutufa kuqaa anoona ufara sia iri mariasa mandainainara asasi mariasa naruaninnaqoo mareeqee quqararee qimaseenoo moo

maraquna aagara maraquna naakunnimaqainaga mi maraqunafa misa naundurai saikinaqa unna ufara kuqaa anoona ufee qifaranoo.

*Innee Anutuna areenaranaki mariaqera rusandeesamumaseenoo maranau.*

<sup>13</sup> Innee Teesaronika maqusanaasa sia miqimariasaa karaambaiqa inniara aidimarisa maasa doo inniara maqee maqee Anutufinnai dufi dufi qidaqammu. Anutufa nari maraquna afeekannai faqa innee anoona ufasaa mandaaqaranannai faqa inni Teesaronika maqusanaasa innaarunai asumu marirana faqa Anutuna nari faiqi anaasee kammafi mariaqera faqa oosana arooqooqari rusandeesamumasee inni maraanauree qimaqoofa maqee mareenoo.

<sup>14</sup> Sia fifau inni mareenoo maasa amiqira fasaasa ufa inni qimannimiafannana minannai innee Anutuna asauku mundirana karaambaiqa Yisuna areenarana raina nimiraree qimaseenoo inni maranau.

<sup>15</sup> Oo qini qikaqaafasaa qinee minara irisee qimannimidaqa maasa ooqai inni faqa maridaqa nookiqari qimannimiafanna anoona ufana faqa maqooqari pasaki akara rumannimiafannana mi anoona ufana faqa innee mi anoona ufanaki mapukufinaqa afeekaikamasee kikiqammafi nisaukuki uaqee iaqa. Sia moo unna ufa iriaqa.

<sup>16-17</sup> Anutuna asauku mundirafa karaambaiqa Yisufa faqa maasa qikoofa Anutufa maasara aidi marifa nari kaqi afaarira oosanaqari naaru naaru paasoosirana faqa naaru kambiqaaninna ainainara asasammasee afeesirana faqa nimuqanda miqanda fannoo inni afeeka niminaqa andeeqara nirana marirana ufaqirana maraaqa, inni nimuqusaki sia Yisuna ufamau firanara naaquqarafa mariani paasoosirana kai umbiqa nimiani.

### 3

*Pauroofa Teesaronika maqannaasara nariara innaaruqiaqee qinau.*

<sup>1</sup> Qinee ufa qimannimiseeqa maa ufanannai taikaanaura. Innee Teesaronika maqusanaasa maasara maaqi qimasee innaaru qiaqa. Maasa karaambaiqa ufa qimannimiafanaqa inniki anoona kambiqoondoo kai aiqama anaamurunni miqi kai mafino dauni daraaninoo anoonaikiani.

<sup>2</sup> Kafaa maaqi qimasee maasara innaaru qiaqa, Anutufa maasa manda fasiqauqa nisaukukinaana rafiqaanii sia aiqama maqannaasaa Yisuna ufa iridammia.

<sup>3</sup> Karaambaiqa fannoo sia miqi marifa amiqimmasee rakisimarifa afeeka mapukirana nimiseenoo aakaqaandaraa fasiqasaa ititannimaqaannoo.

<sup>4</sup> Karaambaiqa fannoo inniara maasa nimuna asooarana nimidanoo innee maqee faqa kasooqaqee faqa sia manda iriramau fifaranoo maasa qimannimira ufamau kai andeeqasee fifaranoo.

<sup>5</sup> Karaambaiqa fannoo Anutunara nidirana inni nimuqusaki quqaani. Anutuna ufamau nimandakufi maqee maqee firana Anutuna asauku mundirafa inni naunduraki quqaani.

*Kadaapi rumasee inneeqa narainaina maraaqee qu ufafa.*

<sup>6</sup> Oo maasa qikaqaafasaa maasa Anutuna asauku mundirana karaambaiqa Yisuna auqu ramasee inni naaquqama nimaqaidaqa, inniki kudoosaapee mariasa innee sia misa naaqa mariaqa rufiasee nianai mariaqa misa sia maasa naamuqira ufamau fimariasaa maridaqammia.

<sup>7</sup> Innee maasa oosana qafeeusa mariafanoo, maasa inni faqa maridaqa sia kudoosaaparausa mariqiafana innee maasa oosanamau kai fuaqaana innee minara irimariafanoo.

<sup>8</sup> Maasa inni faqa maridaqa sia moona narana maaqa marirana kaqi maree mariqau, feefaurumasaidaqa maree mariqiafana. Maasa inni narainaina kaqi naanoo qimasee eendaki faqa faasaana faqa kadaapi rimariafana tooqaamu darusoofaqa mi narainainna akiaqara imariqau.

<sup>9</sup> Maasa inniara iriseeqa miqi qiiafana, innee mi oosanna qafamasee mi mau kai fuaqeera kadaapiriqiafana, innee narainaina kaqi qimifanoofau amana kai andeeqanoo mariqini, maasa Yisuna ufa qimannimiafannana akiaqara marini, innee maasa funnamau fuaqeera kadaapiriqiafana.

<sup>10</sup> Maasa inni faqa maridaqa maa ufana qimannimiafannana kafaa kafaa qimannimidaqa, faiqi moo fannoo sia ainainifa narana faqa sia naannoo.

<sup>11</sup> Maasa sia fifau inni qimannimidaqa inniki fooroopi mariasa marianara iriseeqa qimannimidaqa misa sia nariqa ainaina imariasa kaqi moosa ainaina deedeepi mariasa marianara iridaqa.

<sup>12</sup> Anutuna asauku mundirana karaambaiqa Yisuna auqu ramasee mi fasiqausa fooroopi mariasa naaquqama nimaqaidaqa misa andeeqara mariramau fidaqa nariqa narainaina kadaapirumasee maraaqa.

<sup>13</sup> Qini qikaqaafasaa innee andeeqasee nimariasa faqa qimannimidaqa. Innee inneeqa amiqira nira marira oosana maree mariana sia nikoo nikaamasee minnisaaqa kaqi kai fuaqa.

<sup>14</sup> Innee maa akarana asaana rimarifaqa akaqausa mi ufana rukiee mariasa marifaqa innee rufiasee nianai marifaqa misa nisaurirana maraaqa.

<sup>15</sup> Sia misa namuqaakama nimaqaaqa nikaqaafaasaara foora naaquqama nimaqaaqa.

*Pauroofa doo taikarufa qimaqoofa.*

<sup>16</sup> Karaambaiqa nari kai naundurari asoarana oosana marifa aiqama kari oosana oosana mariranaki inni faqa naundura asoarana nimiannoo. Karaambaiqa inni aiqamausa faqa mariani.

<sup>17</sup> Faiqi moo fannoo qini maa ufana akara rumasaifaqa qinee qeeqa qisaukunnai maaqi qimasee rafaqaqaidaqa. Qinee Pauroosa inni ni-mandaqidaqa. Innee maa akaranara moonaindi fee qifoori aiqama papiqa akara rumasee qeeqa qisaukunnai rafaqaqaidaqa.

<sup>18</sup> Anutuna asauku mundirana karaambaiqa Yisuna afaarirafa inniki mariani.



## 1 TIMOOTI

### Timootina indaarumamaqoo akarafa.

<sup>1</sup> Oo Timooti anee kumaaraa marianafa anee qini qimaakuara foora mariananoo. Qinee ooqai ani qimamafannana aninna irirafa qufana Yisufinnai quandoona Anutufa faqa narí asauku mundirafa Yisufa faqa maasa asumu maroofa maasa minasaa mundi marunafa mifa qini mara quqaqoosa minara asauku mundirafa Yisufa narí ainainianeera maqasaa fasiqa diqiqoosa maa papiqana qinee Pauroosa ani akara rumamaqeeqa.

<sup>2</sup> Oo Timooti maasa qikoofa Anutufa faqa maasa karaambaiqa asauku mundirafa Yisufa faqa ani dadaaqaqa, misa nariqa nifauarana ani amiaqa. Misa ani aundura asoarana faqa amiaqa.

*Pauroofa unna amaana ufa qimariasara Timootina aaquqimamaqoo ufafa.*

<sup>3</sup> Ooqai qinee Maseedoonia maaqa maqai fiqa aniara Efeesusu maqusaki mariannee qiafannana maqee faqa miqi kai iqa miqoo mariannee qidaqa. Efeesusu maqusaki mariasa akaqausa fuka unna amaana qimari ufana faiqi anaasee qimannimi mariasa mariafaqa minara anee qaoo qianneera miqoo mariannee qidaqa.

<sup>4</sup> Anee maaqi qimasee qaoo qia. Misa narí uriuqa minnisaaqa misa narí nikeeku nikaaku nifaqnausa nifasaasa qimammaree kisaagasaa fimariana minnisaaqa. Miqi qimaria ufafa ufa rainarana tinoorirana kai ugeeridanoo sia Anutuna marirafa nirafa maasaki marina dadaaqidanoo. Anutufa maasara maaqoo fuannaanna sia mi manda dapi ufanannai paqurianaura maasa narí irirana Yisunasaa rusiranannai kai fuanna aanna paqurianaura.

<sup>5</sup> Sia fifau mi unnana qimariasara qaoo qiannee qidaqa faiqi anaasee miqooqaraasa Yisunasaa rusirana sia unna qiaqa kuqaa kai qiaqa, kuqaa anoona uqannasaa mundusee fiqa narí nifaaqa qumaarararana siaisa aufadamasee nidaqa narí naunduraki ikairi siaisa nidaqa mi qaaramoo ainainakiqari faiqi aanaaseera nimuqusirana rirafa kambiqaidanoo.

<sup>6</sup> Faiqi anaasee akaqausa mi anoonna ainainakiqari quandakiqa fifau faafau qira ufa narí qimami narí qimami qianannai nariqa ninaakusamarara kaqi runna fimariafanoo.

<sup>7</sup> Mi unna amaanna qimariasara paasoosamandee narí faqa sia irimaria ainainnara faqa ufara faqa kaqi paasoosamasee kaqi qimannimidaqa kafaa naríara Anutuna sandufa qimannimi marunausee qidaqa aaqaidaqa.

<sup>8</sup> Anutuna sandufa Mooseenasaaqari qimannimu ufafa amiqira ainaina maridanoo. Faiqi anaasee mina andeeqasee irifanoo amiqira ainaina mariannoo.

<sup>9-10</sup> Maasa oosana oosana sandufara maaqi qimiridaqa. Sia amiqira fasiqa anaaseeruu maridau, ufa rukiee mariasara maridanoo Kaamanna ufa rukiee mariasa faqa Anutuna siaisa faqa Anutuna ufa rukiee mariasa faqa sia Anutunara irimariasara maqasaa ainainara kai irimariasara narí ninausa nikausa kuqa narimariasara faqa faiqi anaasee kuqa narí mariasa faqa faiqi anaasee narinni narinni qummuari mariasa faqa faiqi fannoo aqoonna fasiqa aafeeqara oosana faqa anaasee fannoo aqoonna anaasee aafeeqara oosana faqa faiqi aanaaqi qummuari mariasa faqa unna ufa qimariasara faqa siaasa ufa irimarinaki mafi narí kai raqaseenoo moonara

unna ufa qimariasa faqa aiqama anoona ufa rukiee mariasa faqa mi aiqama mandoosanna maraqa nuasara misara kai Anutufa narí sandufa misa qaoo qimaseenoo quqasoofanoo maridanoo. Misa nimaarusira sandufa quqasoofanoo maridanoo, sia mi aaqara oosanauqa maree mariasa kaifau nimaarusidanoofau oosana oosana ainaina Anutuna mapukira ufa rukiee mariasa faqa nimaarusidanoo.

<sup>11</sup> Mee Anutuna mapukira ufa qunnana mifa maasa Anutuna amiqirana mina areenarana kooroo idanoo. Mina amiqira fasaasa ufa amana kai mi ufafa maridanoo. Mi fasaasa ufana Anutufa qinisaa quqasee anee Timooti qimannimianne qu ufafa maridanoo.

*Pauroofa Yisunara narí mandoosanara afauoonara dufi dufi qu ufafa.*

<sup>12</sup> Qinee mi saikanaki nimariafananoo maasa karaambaiqa asauku mundirafa qini ainainirana amana kai qimunara dufi dufi qidaqa. Mifa qiniara mi ainainirana amanaikammi ifoo qimaseenoo mara quqaqaisa maridaqa minara faqa maasa karaambaiqa asauku mundirana Yisunara dufi dufi qidaqa.

<sup>13-14</sup> Ooqai indaaruu qinee Pauroosa Yisunara mandufa qimariafanausa mina ainainimaru fasiqausa naru nifaqaa iqa niniaafanausa Yisuna faqa aquraraafanausa maridaqa. Anutufa qiniara sia Yisunara iridanoo fee qimasee sia narí mandoosanara iridanoo fee qimaseenoo sia qini dari-noo, qini qifauamaseenoo narí afaarirana qinisaa nammariara foora adaseenoo minasaa qeeqa irirana Yisunasaa rusirana faqa faiqí aanaaseera qimuqusirana faqa qiminau. Maasa aiqamausa asauku mundirana Yisunaki keeqee mariasa mi nimimaria ainainnaqanda Yisunasaa irirana rusirana faqa faiqí aanaaseera qimuqusirana faqa mi qaara ainainnaqanda qiminau.

<sup>15-16</sup> Maa ufana anoona ufa maridanoo qumaree iri maria ufafa maridanoo asauku mundirafa Yisufa manda oosana maree mariasa asumu maraane qimasee quminau. Qinee Pauroosa mi mandoosanna uriqararaura mariafananoo Anutufa sia qini darinoo qifauanau. Asauku mundirafa Yisufa narí kasoomambi qini qifiqaranara firaana firaqqoo koorooianifeera mandoosana uriqararaura qini qifauanau. Miqimaseenoo Yisufa qini mareeqeenoo akooqqoo quqasoofaqa naaru kasooqagee Yisuna mandaqqasee naaru marirana maree mariasa qini kikiqususaidanoo qini mandoosana uriqaranoo maruna ririmma qifauamaseenoo minni qisanau. Innindi oorudupinoo maridanoo mina mandaqqasaifanoo kaqi inni faqa maraanauree qinau. Qinee minara irisee amooqira ufa maaqi qimasee qianaura.

<sup>17</sup> Naaru naaru mari karaambaiqafa sia kuquaninafa maasa sia mina qafee marunafa moodaa Anutufa sia moo fannoo marifa uriqararana faqa areenarana faqa naaru naaru minaindi mariannoo.

<sup>18</sup> Oo Timooti anee qini qimaakuara foora marianafa. Qinee maa ufana anisaa quqaidaqa. Ooqai tamummaqara fasiqauqa qimaqqoofa ani qimamira ufa mi mau fidanoo. Ani ainainirafa andeeqara rakiara foora imariannana qini ufa fannoo ani duru feefara foora inoo mariannoo.

<sup>19</sup> Amiqira rakirana rakidana ani Yisuna saqarikirana uaqeeia, afaaqa gumaara rarana siaina mina faqa uaqeeia. Faiqí akaqausa nári naaqqoo irirafa qimannimifaqa andeeqasee fidaqa misa nári Yisuna saqarikira irirana munu furufammaseeqa kurididaqa.

<sup>20</sup> Qaara fasiqa Qimeenaeusafa faqa Areekisandeerafa faqa miqandaqara miqi marufaqa qinee mareeqee Sadanna asaukuki quqaafanaqa misa Anutunara mandufa qirana taikaaqeera quqaqiafana.

## 2

*Pauroofa Yisuna ufara suqinnanaki maaqi qimasee innaaru qiaqee qinau.*

<sup>1-2</sup> Maa ainainna naaree ani aamuqimamisaanana anee faqa Yisuna ufara suqimariasa faqa suqidaqa innaaru qidaqa maaqimasee innaaru qiaqa. Maa maqanasaa faiqi aanaaseesaa rakisinnimaqee marisara misa amiqimasee rakisinnimaqaaqeera innaaru qiaqa. Innee kaqiqeesa reendeenamasee asoaranaki mariaqeera misara innaaruqiaqa. Anutuna ufamau fidaqa andeeqara mariranaki mariaqeera aupuraranaki sia mariaqeera misara innaaruqiaqa, innee maqee maqee aiqama fasiqauqara faqa maa maqanasaa firaaqoo uriqararausa faqa kaamanna uriqararausara faqa Anutuna afusaa Anutufa misa dadaaqianifeera innaaruna qiaqa. Misara faqa dufi dufi qirana qiaqeera qidaqa.

<sup>3-4</sup> Misara innaaru qirafa amiqira oosana maridanoo Anutufa maasa asumu maree marifa minara aididanoo. Mifa aiqama fasiqa anaasee asumu mariranaki ani mariaqeera qidanoo anoona ufamau fuaqeera qidanoo misara innaaruqira oosannara Anutufa aididanoo.

<sup>5-6</sup> Moodaa Anutufa kai maridanoo moodaa fannoo kai nari Anutuna faqa faiqi anaasee faqa mara moodaanakikamma nimaqaidanoo. Mi fasiqafa Anutuna asauku mundirafa Yisufa maridanoo faiqi anaasee oonu kafa marasee nariki quqaanifeera nari afaaqa kuqiranaki quqanau. Maasa mina qafamaseeqa maaqi qidaqa. Oo Anutuna nari aukwana maridanoo. Oo mifa kuqaa aiqama fasiqa aanaaseera asumu mariranaki mariaqeera miqidanoo.

<sup>7</sup> Minara faqa qini Pauroosa qeeqa maqusaindari diqiqamasoofaqa qinee aanaamuru aiqama uqannifiqaidaqa Yisunasaa irirana rusirana anoona ufa faqa qimannimidaqa. Qinee sia unna qidaqa anoona ufa kai qimannimidaqa.

<sup>8</sup> Yisuna ufara suqimarianaki faiqiara qinee maaqi qimasee naamuqidaqa. Aiqamai maria fasiqausa aanooqirana siaina, ufa rainarana siaina, nari nisauku anukarausa uqeerasee innaaru qimariasa nari marirana nari nirana minauqara Anutunaindi fee qiaqeera, aiqama fasiqara miqi mariasee innaaru qiaqeera qidaqa.

<sup>9</sup> Anaaseera qinee maaqi qidaqa. Aiqama nari nifaaqai mari siara qamunnana amiqimasee nari nifaaqa aanaamususee irirana faqaasaikamambi mariaqee qidaqa. Sia kaaqa firaaqoo oosana oosana ainaina nifaaqa auquaqa.

<sup>10</sup> Niqoonausa dadaaqirafa mifa inni nifaaqa auqirafara foora mariani. Anutuna ufa irimaria anaaseesa andeeqara oosana miqiminoo maridanoo.

<sup>11</sup> Yisuna ufara suqimaria maqanaki keeqaifaqa anaasee ufa siaina reendeenamandee Anutuna ufa iriaqa.

<sup>12</sup> Yisuna ufara suqimaria maqanaki aanaaseeuqa sia kikiqa mafiqqa Anutuna ufa qimannimiqa. Misa sia faiqi urinaaqaramafi mariaqa qinee mina qaoo qidaqa misa ufa siinausa mariaqee qidaqa Yisuna ufara suqimaria maqanaki miqiaqee qidaqa.

<sup>13</sup> Anutufa Adamana naaree auquseenoo doo mina inaaqianna Eeuna auqinau.

<sup>14</sup> Sadannafa sia faiqí akaruqináu, anaasee kai akaru qimasoofanoo Anutuna ufa rukianau.

<sup>15</sup> Doo maqee Anutufa sia aigama aanaaseeuqa mina akiqara naru taikaannoo faiqi maqaranasaa marifaranoo. Misa nári nifaaqa amiqim-mandee aanaamususee maridaqa Yisunasaa irirana rusiseeqa mariaqa faiqí aanaaseera amuqusamasee mariaqa qikairi siaisa anukarausa mariaqa. Miqidaga noori kandamasee maridaqa kaqi marifaranoo.

### 3

*Pauroofa Yisuna ufara suqimarinausaa rakisirausara naakapa-maqoofa.*

<sup>1</sup> Maa ufana anoona ufa kai qinee Pauroosa qimannimianaura. Faiqí moo fannoo Yisuna ufara suqimariasasaa rakisiraree qimarifa amiqira ainainammianoo.

<sup>2</sup> Yisuna ufara suqimariasasaa rakisimari papatarafa narí nirana marirana sia aqarafa mariannoo andeeqarafa marida andeeqasee rakisiannoo. Miqimarinna fasiqafa moodaa anaasee faqaafa kai mariannoo. Mifa oori runusee marifa mariannoo. Narí aakiranara iri marifa mariannoo. Narí qumiasana aina faqa marirana faqa andeeqasee quqee marifa. Mi fasiqafa Yisuna ufara suqimariasasaa rakisiranaiki mari fasiqafa aanaamuru maqee maqee mina maqusaki aniraafanoo amiqi amiqidanoo nifiqa narí maaqaki quqasaida narana firidanoo. Mi fasiqafa Anutuna akarakinaa ufa andeeqasee qimannimi marifa mi oosanausa maree marifa Yisuna ufara suqimariasasaa rakisirafa amanaikiannoo.

<sup>3</sup> Mifa sia nammari namasee furufaridanoo marifa faiqí anaasee sia nári marifa mariannoo. Mifa fifira oosanara reendeenira oosanara kai rimarifa mariannoo. Mi fasiqafa sia kaaqa munnimmara rimari fasiqafa mariannoo.

<sup>4</sup> Mifa narí faiqí aanaaseera amiqimasee rakisinnimaqee marifa maridanoo. Mi fasiqafa narí faiqí namuara qimannimifaqa eedoo qimasee reendeenamandee auqee marinausa mariaqa.

<sup>5</sup> Mi fasiqafa narí faiqí anaasee sia amiqimasee rakisinoo naqimaseenoo fee Yisuna ufara suqimaria maqanaki keeqee mariasasaa rakisiannoo fee.

<sup>6</sup> Yisuna ufara suqimariasasaa rakisiranaiki mari fasiqafa sia fukasaa Yisunasaa irirana rusimarina mara quqaa. Miqimari fasiqafa dauni narí oori uqeerasee narí afaaqa mara maree uridanoo amooqinoo dauni aqaranaki aqufuandoora. Ooqai Sadannafa innaarunai miqimarunara Anutufa ateekanau. Maa fuka fasiqafa Yisuna mandaaqarana miqi kai inoo Anutufa ateekaandoora.

<sup>7</sup> Yisuna ufara suqimariasasaa rakisiranaiki mari fasiqanara Yisuna ufara sia irimariasasaa faqa minara amiqira fasiqee qimariafa mariannoo. Miqi qimaria fasiqafa sia Sadannana namufaqa moodaa madikaki aqufinoo asauruannoo. Doo Yisuna ufara suqimariasasaa rakisimaria fasiqausa oosana doo miqiminoo mariani.

*Pauroofa amaanusasaa rakisimarusaa dadaaqimariasara qináu.*

<sup>8</sup> Doo qinee Pauroosa amaana maqasaa rakisirausara qimasee doo maqee misa ooreeqara dadaaqirausara qianaura. Amaanusasaa rakisirausaa dadaaqimariasara misa marirana nirana andeeqasee noori runusee mariasasaa mariaqa. Misa faqa sia nammari namasee furufariaqa. Misa faqa sia kaaqa ainainara rimarinausa mariaqa.

<sup>9</sup> Misa akarakinaa Anutuna ufa qumareeqa mi mau fidaqa sia nifaaqa umaararaanifeera aufadaqa mariaqera mariaqa.

<sup>10</sup> Dadaaqimaria fasiqausa sia kaqi mareeqee dadaaqiranaki quqarafa mariaqa. Misa amanamasee qafeenana kai mareeqee dadaaqira saikaki quqaa.

<sup>11</sup> Dadaaqi maria fasiqausa ninaaqmaaka faqa marirana nirana andeeqasee maridaqa sia munuqi miniqi qimariasa marifaranoo. Mi anaaseesa noori runusee maridaqa anoona ufa kai qimariasa mariaqa.

<sup>12</sup> Yisuna ufara suqimariasa amaanufasaa rakisirausa dadaaqimarifa moodaa anaasee faqaafa mariani nari faiqi anaasee amiqimmandee rakisi marifa mi saikanaki mariani.

<sup>13</sup> Amiqimasee kisaqasaa papatara saika auqaqa fimariasa aiqamausa nifusaa uriqararana maraidaqa miqidaqa, misa asauku mundirana Yisunasaa irirana rusirana atukarasee mapukirana maraidaqa.

*Anutuna kukeeqara ufa anoona Yisufa firaafa maridanoo.*

<sup>14</sup> Qinee Pauroosa maa papiqana akara ridaqa qusasaa inni oonu ninda fararee qidaqa.

<sup>15</sup> Moo ainaina fannoo qini rafaqaqafimarifaqa maridaqa maa papiqanaki naafa inni Anutuna aiku asaukuki nirana marirana naamuaqiannoo. Anutuna ufara suqiranaki keeqee mariasa misa Anutuna amaana maqara foora maridaqa. Anutuna anoona ufa faakana maridaqa.

<sup>16</sup> Maasa Yisuna ufa irirana anoona ooqaindari kukeeqara ufa marifa Yisufa idaaqirafa firaafa maridanoo, sia amana moo fannoo minara qaoo qirafa.

Yisufa maqasaa fasiqa nifiri kammafinoo koorooinau. Anutuna maraquna fannoo minara andeeqarafa maridanoo fee qinau. Qangiroouqa mina qafaqau. Faiqi moomoosa maaqanna maaqanna minara qimannimiqa. Maa maqa maaqanaki marusa minara kuqaammifoo qiqa. Anutufa mina mareeqeenoo innaarunai quqaqoofanoo maridanoo.

## 4

*Pauroofa kasooqaqee aaqarufa kambiqaanoo fee qimaqoo ufafa.*

<sup>1</sup> Anutuna kaaqa andeeqara maraquna fannoo kasooqaqee kambiqaaninna aukuanara maaqi qimasee akooqoo firaqoo kooroidanoo. Mi kamuqoo akaqausa Yisunasaa irirana rusiranasaaqari rakeemaki unna qira afaanna ufa irifaranoo akaqausa afaanna uqanna ufamau fifaranoo.

<sup>2</sup> Unna qimaria fasiqausa kai mi unna ufausa faiqi anaasee Yisuna ufana suqimariasa qimannimiqa nifaranoo. Mi unna qira fasiqausa nari mandoosanara sia qumaara naridanoo nariqa naaqoo irirana doo ida fannoo narinoora foora inoo marifaqa sia ummaara narifaqa nisaurifara.

<sup>3</sup> Miqi maria fasiqausa unna qimasee anaasee mararanara mandoosanee qimasee akaqa naranara manda narana sia naaqee qifaranoo. Anutufa mi oosana oosana narannara faiqi anaasee naaqeera auqu quqaqoofa maridanoo. Mina ufa irimariasa mina anoona irimariasa dufi dufi qimasee naaqeera quqaqoofa.

<sup>4</sup> Anutuna aiqama auqu quqaqoo ainainna aiqama amiqirafa kai maridanoo sia amana moo naranara mandaikira fee qianaara. Aiqama ainaina innaaru qimasee dufi dufi qimasee naqa.

<sup>5</sup> Anutuna ufa faqa maasa innaaru qirana faqa mi naranna anukama-sainanoo amiqinoo mariannoo, Anutufa amiqiranees qianoo.

*Pauroofa Timootina aakapeenoo andeeqasee fuanee qu ufafa.*

<sup>6</sup> Oo Timooti anee asauku mundirafa Yisuna amiqira ainainira faiqi maridana mina ufa irimariasa ani akaqaafasaa ufa qini maa ufausa qimannimia. Yisunasaa mundira ufa faqa mina anoona ufa faqa ani ooqai mi ufanasa fidana innooqana marianafa mariananoo. Miqidana qini maa ufausa aneenna akaqaafasaa ufa qimannimia.

<sup>7</sup> Fifau uri qirana maa maqanasaaqaraa uriuqaki sia minaki aqufua nianai tatiaaqa, fifau ufa. Anee Anutuna dadaaqidana rakiranakiara foora mariananoo minara maqee maqee aununu rakisiara foommasee amanamasee qafamasee afeekaikia.

<sup>8</sup> Maa maqanasaaqaraa amudaani maqee maqee afeekaikamasee amanamasee qafarana kaqikaaqoo maa maqanasaa kai amana maridanoo aneenna aundurakinaana maqee maqee afeekaikamasee amanamasee qafarana firaqoo amiqirafa maridanoo, mifa maqee marirana faqa naaru marirana faqa amidanoo.

<sup>9</sup> Mi ufafa anoona ufa maridanoo minasaa mundimariafa maridanoo.

<sup>10</sup> Minara kai maasa kadaapirida nimudaanai qidaqa. Maasa qiqa qimuqusakinaa irirafa kaqi marira Anutunasaa mafi munduseeqa. Mifa aiqama fasiqa anaasee asumu maree marifa maridanoo, mina ufasaa rusimariasa kuqaa misa asumu maree marifa maridanoo.

<sup>11</sup> Mi ufausa amiqimasee faiqi anaasee naamuaqia.

<sup>12</sup> Oo Timooti anee kumaaraa mariananoo minara faiqi anaasee irisee sia ani ufa irifoora maa ufana ani qimamidaqa. Aneenna ufa faqa aneenna nirana faqa aneenna faiqi aanaaseera amuqusirana faqa aneenna Yisuna saqarikirana faqa aneenna andeeqasee marirana faqa amiqimasee andeeqasee akooqoo marinaqa qafeeqa faiqi anaasee Yisuna ufa irimariasa ani afaqaidaqa ani aanna raaqera.

<sup>13</sup> Oo Timooti qinee anee ianannai kasooqagee fuanaura. Anee qini qifeesidana maqee maqee faiqi anaasee aiqamausa nifusaa Anutuna akarakinaa ufa asaana rumasee mina oosana kooroomannimisee mi mau fuagee qimasee fuki faaki qia.

<sup>14-15</sup> Ooqai Yisuna ufara suqimarusasaa rakisirausa ani sindimeera foora quqamaqeeqa nisauku ani afaaqai quqasee ani afaaqooqa qiqa Anutuna maraquna fannoo afeeka moo amuna afeekaikamasee amanamasee qafamasainaqa aiqamausa aniki doo maridanoo fee qiqa.

<sup>16</sup> Aneenna nirana mariranasaa faqa aneenna faiqi anaasee ufa qimannimirasaa faqa rakisia. Qinee qimamunna ufamau andeeqasee finana ani nirafa marirafa andeeqasee marinana anee aneenna faqa ani ufa irimariasa faqa asumu mareennaranoo.

## 5

*Pauroofa Timootina aakapeenoo faiqi anaasee fraasa adeedaana anaaseeuqa faqa andeeqannisaannee qu ufafa.*

<sup>1-2</sup> Oo Timooti anee Yisuna ufa irimariasa faqa maridana sia faiqi fraasa ufa arua. Faiqi fraasa ani akausara foora marifana reendeenamandee ufa qimannimia. Kumaaraa ufa faqa aneenna akaqaafasaa foora kai ufa qimannimia anaasee fraasa faqa aneenna anasara foora amiqimasee kai ufa qimannimia. Maanaaqa aanaaseeuqa faqa aneenna asooqmaakara foora andeeqaseenana kai misa faqa ufa qia.

<sup>3</sup> Adeedaana aanaaseeuqa misasaa rakisi mariasa sia marifana anee Yisuna ufara suqimariasa qimanniminaqa miqira adeedaanauqasaa andeeqara rakisira rakisinnimaqaaqa.

<sup>4</sup> Adeedaana aanaaseeuqa marifanoo nári ninaiqimara faqa faiqi nam-  
ufaqa marifana anee qimanniminaqa misa quandafi nári ninausa nitaa-  
toosamara amiqimmandee rakisinnimaqaaqa. Anee miqidana maana faqa  
qimannimia, misa Anutuna ufamau fidaqa indaarugaa ainaina mifa mar-  
iannoo. Misasaa dadaaqamannisaidaqa nári ninaukoo kadaapi akiaqara  
nimimariafanoo. Anutufa faqa mi oosannara aqaara raidanoo.

<sup>5</sup> Adeedaana anaasee moo fannoo maridanoo minasaa rakisirafa  
moo fannoo sia marifa mifa kaaqa adeedaana uqanna maridanoo.  
Miqira adeedaana narí irirafa Anutunasaa mundirafa maridanoo eendaki  
faasaana Anutunara dufi dufi qidanoo maridanoo minara kai dadaaqian-  
nee qidanoo innaaru qidanoo.

<sup>6</sup> Adeedaana aanaaseeuqa oosana moo aaqaidaqa maridaqa nariqa nidi-  
mari ainainnara kai qiganuasauqa maridaqa misa doo kuqiqa maridaqa  
miqiqa nidaqa.

<sup>7</sup> Anee mi adeedaana anaasesara qimanniminaqa andeeqasee mariaqa  
munuqi miniqi qiçani foora.

<sup>8</sup> Mi ufana aiçamausa qimannimia. Maa ufana faqa qimannimia. Moo  
fannoo Yisuna ufa irimarifa narí aiku asauku faqa narí afaaqasaa aiku  
asauku faqa narana faqa qamunnaina faqa sia rakisinoosia dadaaqinannai  
narí miqinnannai Yisufa saqarikirana narí ateekeenoo aamina fasiqa  
mandosana finnaaqaramasee mareenoo miqidanoo.

<sup>9</sup> Oo Timooti ani Yisuna ufara suqimariasasaa rakisirausa mariasa mari-  
dana adeedaana anaasee asooqauqa misa náriara naaduma aanaaseesaa  
rakisiranaikiqa mariaqa. Sia kaqiçee adeedaanauqa mi saikanaki mara  
quqaa, qaara moo fasiqa niku nisauku taikasee aukuaana (60) maraqaasa  
adeedaanaikida asooqaqee mariasa kai mi saikanaki quqasaina maria.  
Moodaa fasiqasaa amundoo adeedaanafa kai minaki mariani.

<sup>10</sup> Mi anaaseefa ooçai afaari marufa marinnana mifa kai minaki mariani  
narí faiqi namu amiqimasee firimaru aanaaseefa marufa mifa kai mariani,  
aanaamuru dapi aanaamuru amiqimmandee rakisimarufa faqa Anutuna  
ufa maçusa maçusa nida qimannimimarusaa faqa narana maqa nimimar-  
ufa oosana oosana mandainainaki aqufimarusaa dadaaqimarufa, oosana  
oosana amiqira ainaina eedoo qimasaida auqee marufa miqi maru anaasee  
asooçausa kai rakisirausaikiaqa.

(Mi asooqa adeedaanausa saika Timootina aukuaana maqimminoo  
marinau. Misa fuka anaasee nári nifaaqmaaka faiqi namu rakisiaqeera  
qimannimidaqa naakapee mariçau. Aaqamaki kaçirunna fusa andee-  
qeçeenoo Anutuna aanai ubeekke mariçau. Mandainainaki aqufusa  
andeeqasee Anutuna ufa naakapee mariçau.)

<sup>11</sup> Oo Timooti sia kumaaraa adeedaana anaasee maramaree anaasee  
rakisiranaikia. Kumaaraa anaasee kaifaa faiçiara riqa asauku mundirana  
saika nimina minnisee foora.

<sup>12</sup> Misa asauku mundirana saikaki marianauree qima afeekaikamasoona  
ateekkefoora.

<sup>13</sup> Kumaaraa adeedaana anaasee moomoo suanisaa maqakiaqa fifau  
nimariafanoo ainainira aukuaana ainnaaqaree marisa mariafanoo. Misa  
miqiqa nidaqa manda uriçarara irirana marasee unnufa munuqi miniqi  
qiqa nidaqa sia qiçaa ufa qiqa nidaqa.

<sup>14</sup> Oo Timooti qinee Pauroosa kumaaraa adeedaana aanaaseera maqi  
qidaqa, misa andeeqasee mariaqeera. Misa kaifaa moo fasiqa marasee  
faiqi minasaa maçasee nariqa faiçisaa rakisida andeeqasee mariaqa. Misa

miqi marifanoo maasa namuqaa Yisuna ufara nikooqee marisa maasaki randasee sia mandoosana paqurimasee mandufa uqeeraaqa.

<sup>15</sup> Akaqa adeedaana aanaaseeuqa Anutuna ufakiqari rakeemaki Sadanana afaqee doo fia.

<sup>16-18</sup> Yisuna ufara suqimariasaa misa rakisirausa akaqa adeedaana anaasee naunannaasa siaisasaa rakisifaranoo, akaqa adeedaana aanaaseera naunannaasa faqaasasaa sia rakisiraree qidaqa. Mi adeedaanausa nári naunannaasamara nifiqa quqasee rakisifaranoo. Miqifanoo Yisuna ufa suqimariasasaa rakisimaria rakisirausa sia mi umaarana maraaqera.

Doo adeedaana anaasee ufa taikasee kaifaa Yisuna ufara suqimariasara qianaara. Anutuna tamummaqara fasiqa ooqai marusa akaraki ainaini mariasara qidanoo purimakau kikiqusidanoo maaqi qidanoo.

Innee inneeqa purimakau mara maree raisa adi fooqaana narí aikunnai rafarimarinaqa sia naani fee qimasee oori aanaamususaifanoo kaqi nuannoo, innee sia miqiaqa akaqana naidanoo afaaqa asasiimarianoo rafariani fee qimariqau.

Mi tamummaqara fasiqausa akara minara kafaa maaqi qidanoo. Ainaini mari fasiqafa narí ainainimarina akiaqara feefauru maraannoo fee qidanoo.

Timooti Yisuna ufara suqimaria maqanaki keeqee mariasaa miqi kai iaqera qidaqa.

Yisuna ufara suqimariasasaa rakisirausa amiqimasee Anutuna saika uqeeree mariasaa Anutuna ufa kadaapi rumasee asaana rumasee fuki faaki imariasaa Yisuna ufara suqimariasaa sia amana kai feefauru nimia fiqaramasee aabaara faqa nimia.

<sup>19</sup> Faiqí moo fannoo Yisuna ufara suqimariasasaa rakisiranara anireenoo mi rakisiranara aaqaidanoommifoo qinaqa sia mi moodaa fasiqana ufa iriaqa, naríara qidaqinoo. Faiqí qaraqanda fee qaaramoo fee aniree minara qifaqa mina irisee andeeqaaqa.

<sup>20</sup> Yisuna ufara suqimaria maqanaki keeqee marifa manda oosana marainaqa aiqamausa nifusaa minara qaoo qidaqa ufa qiaqa. Miqima-saifaqa aiqamausa rufiasee sia miqifaranoo.

<sup>21</sup> Oo Timooti qinee Pauroosa Anutuna faqa asauku mundirana faqa naaquqara qangiroouqa faqa misauqa nifusaa qinee doori kandamaseeqa ufa ani qimamianaara. Qinee maqee maa papiqanakinaa ufa qimamunnana amiqimmandee mi mau kai fidana Yisuna ufara suqimariasasaa rakirausa nariqa saika amanakai feefauru nimisee andeeqasee nári aaqarana aiqamausa nifusaa koorooia. Sia moonara qiqaondifee qimasee mina aaqarana kukeeqaisaa, sia moonara aamoondi fee qimasee minaindi akooroo maisa. Aiqama misoo maasoo moodaanaki kammasee rakisinnimaqaa.

<sup>22</sup> Anee sia dauni faiqí moo mareeqee Yisuna ufara suqimariasasaa rakisira saikaki quqasee sindimeera foora quqamaqaa. Anee sia moosa mandainainaki aqufua, aninna marirafa aninna afaaqa anukarafa kai mariani.

<sup>23</sup> Timooti anee aranandaki maqee maqee aurimariananoo qinee minara irisee ani qimamidaqa, anee nammari uqanna kai maqee maqee neemariananoo anee sia mina kai naa, maasa maqee maqee neemariananoo uainna nammarina reendenimarina mina kaqikaqqoo namasainanoo aurirafa taikaani.



<sup>24</sup> Faiqí akaqausa misa mandainaina fannoo aiqamausa nifusaa akooqoo maridanoo. Miqira mandoosana fannoo nári nifusaa akooqoo misa rarisameeqeenoo mandainainaki quqaidanoo. Faiqí akaqausa mandoosana sia dauni qafeefara kasooqagee akooqoo kambiqainaqa qafeefaranoo.

<sup>25</sup> Miqi kai inoo amiqira oosana fannoo aiqamausa faiqí nifusaa akooqoo maridanoo. Kukeeqara amiqira oosana faqa sia kisaqasaa kukeeqanoo mariannoo kasooqagee mifa faqa akooqoo mariannoo.

## 6

<sup>1</sup> Faiqí moo fannoo Anutuna auquara faqa maasa naamuaqira ufara faqa mandainainee qifooraa maa ufana ani qimamianana anee Yisuna ufara suqimaria maqanaki keeqee marisa qimannimia. Ainainafaqaasa maa maqanasaa feefauruaree qimasaida ainaini mariasa anee maaqi qimasee misa naamuaqia, misa aiqama amiqimasee naaquqama nimaqainaqa nári rakisirausa ainainamannimaqaaqa.

<sup>2</sup> Akaqausa ainainafaqaasa misa faqa Yisuna ufa iri mariasa mariafaqa innee misa ainainira faiqi mariasa sia misara faqa moodaa irirana maree marunausee qimasee mandufa nimiaqa. Innee minara iriseeqa andeeqasee fiqaramasee misa ainainamannisaqa. Innee misasaaqaraa narana qamunnaina maree mariafanoo misara faqa Yisuna ufa irimariasee qimasee maasa misara didimariasee qimasee amiqimasee misa ainainamannisaqa. Oo Timooti anee mi ufausa Yisuna ufara suqimaria maqanaki keeqee mariasa naamuaqimasee fuki faaki qia.

### *Pauroofa unna amaanufa qimariasara aaquqimannimaqoo ufafa.*

<sup>3</sup> Faiqí moo fannoo maa qinee qunna ufana moo mau kaqirunna fidanoo karaambaiga asauku mundirana Yisuna anoona ufara qaoo qidanoo Anutuna mapukira ufa siaifa maridanoo kaqirunna ubeekaidanoo, miqi qimari fasiqafa sia moo ainaina qafaidanoo kaqi narí afaaqa kai amooqidanoo miqidanoo.

<sup>4</sup> Miqi qimari fasiqafa narí manda iriranana kaaqa kaqikaa ufa oosana oosana ufara fifau rainaidanoo tino taanoo ridanoo. Miqira oosana fannoo faiqí aanaaseekina nariara nariara rairaiqirafa uqeeraidanoo ufa rukiarana faqa naraqí naraqira ufa faqa nariara nariara mandirirana irimariana faqa maqee maqee tinoori maria ufa rainee mariana faqa uqeeraidanoo.

<sup>5</sup> Faiqí akaqausa aagee mariasa nári nifaurunnoo unna qidaqa. Misa Anutuna ufamau fidaqa firaa munnimma aina maa maqanasaa marararee qimariasaa. Miqi qimariasaa anoona ufa siaisa, irirafa taikaraura mi ufana qidaqa.

<sup>6</sup> Doo kuqaa Anutuna ufa fannoo faiqí ainaina faqaasara foora mannisaidanoo. Faiqí moo fannoo kaiqeeffa Anutuna ufa maree marifa quandaki narí maqee maree mari ainainnara doo qini qimana fee qimari fasiqafa ainainafaqaa fara foora maridanoo. Miqi qimarunara Anutuna ufa fannoo ainainafaqaa faikammamaqeeera foora idanoo.

<sup>7</sup> Maasa maa maqa maaqanaki faiqi aanaaqisaa nanee maree aniqiafana kaqi samu aniqiafana. Maasa maa maqa maaqanasaaqari fiqa nanee maree fuanauree, kaqi samumbuanaura.

<sup>8</sup> Maasa qamunna faqa narana faqa maasa qimana kai doo maridanoo, doo fee qimasee nifaaqa quqaaqa.

<sup>9</sup> Moomoo ainaina munnimmara randeemariasa manda nimaniranaki aqufidaqa. Nári moomoo ainainara munnimmara rimariafa nariqa furufariranara nidimarifa mifa mareegeenoo nári ufaanaki nári naridaqa.

<sup>10</sup> Munnimmara rimariafa mandainaina oosana oosana mandainaina oosana areemarifa maridanoo. Akaqausa ooqai Anutuna ufa irimarusa munnimmara ridaqa Yisuna ufa minnisee nariqa ummaara oosana oosana marasaafanoo mi ummaarafa nári nimuqusa radamidanoo.

*Pauroofa Timootinara amudaanai qimasee andeeqaramau fuannee qu ufafa.*

<sup>11</sup> Oo Timooti anee Anutuna ufa irimarianafa mariananoo, anee munnimma ainainara randee maria iriranamau fimariasara faqa mi manda ainainausara faqa eerairiaqa. Innee nimudaanai qimasee andeeqaranara faqa Anutufara foora irirana faqa Yisunasaa mundirana faqa faiqí anaaseera nimuqusirana faqa kisaqasaa Anutuna aanara afeekaikirana faqa faiqí anaasee ireeda reendeenamandee kai qimannimirana faqa mi ainainausara nimudaanai qimasee maraaqa.

<sup>12</sup> Timooti anee Yisuna ufamau fidana narí amani narí amaniara foora amudaanai qimasee rakiranakiara foora urinaaqareenana naaru naaru marirana marasainanoo anindi mariani, mi andeeqara marira niranara Anutufa ani aarameeqee minaki quqeenoo. Ooqai anee Yisunasaa mundufunafa anee moomoosa nifusaa amiqimmandee Yisunara kooroounafa mariananoo mikari Anutufa mi amanirana ani amufa mariananoo.

<sup>13-14</sup> Oo Timooti aiqama ainaina aidoo nimimarina Anutuna afusaa faqa, Piratoona oorisaa kooroounafa asauku mundirana Yisuna afusaa faqa qinee aaquqimasee qimamidaqa. Yisuna ufa asaana rumaseenana aiqama eedoo qimasee maraa, mi mau finana ani nirafa marirafa anukarafa sia aaqarafa mariani. Miqi kai ina fifi inana karaambaiqa Yisufa narí qumira aukwana paquria.

<sup>15</sup> Anutufa amiqirafa moodaa rakisirafa aiqama uriqararausa urinaaqararafa aiqama karaambaiqauqa karaambaiqa mifa narí kai irisee andeeqara aukuanee qimaseenoo mi aukuanna kai Yisuna aqiqainanoo mai kafaa kooroomannimaqaannoo.

<sup>16</sup> Anutufa mifa kai sia faiqí undee irafa aaduma marifa, mifa kai sia faiqí amana qafaqaaira kaaqa qaranaki marifa, sia moo fannoo mina qafaida sia moo fannoo amana qafaannoo. Mina auqu uqeerarana faqa naaru naaru afeeka marirana faqa minaindi kai maridanoo. Kuqaa.

<sup>17</sup> Oo Timooti anee ainainafaqaasa maaqi qimasee qimannimia. Innee ainainafaqaasa sia inneeqa nifaaqa nimooqiaqa. Sia innee taikeemaria munnimmanasaa inneeqa irirana munduaqa. Inni Anutunasaa kai inneeqa irirana munduaqa. Mifa aiqama ainaina afaaramasee maasa qiqaara raanifee ainaina qimimarinasaa kai inneeqa irirana munduaqa.

<sup>18</sup> Oo Timooti anee ainainafaqaasa mi ufana qimannimisee maa ufana faqa qimannimia. Sia moomoo munnimma ainaina mararara kai iriaqa. Innee faiqí anaasee dadaaqiqa amiqira dadaaqirana dadaaqiqa mi dadaaqirana nimimariananaki aniki ainaina moomoora foora mariannoo. Innee afaariaqa inneeqa ainaina naida nimiaqa.

<sup>19</sup> Innee miqiaqa moomoo innaarunai qumiasana moomoo suqusee marasee naaru kambiqainna aukwana inni faakanaikiannoo. Miqoo innee kuqaa amiqira marirana marasee marifaranoo.

<sup>20</sup> Oo Timooti qinee moomoo fasiqa anaasee ani asaukuki quqasaanana anee amiqimasee afapita qumaraa. Dapi ufa Anutuna andeeqarufa sia

minaki mari ufafa furufarira ufa raiqara ufa faqa akaqausa moo aaqara ufara unna qimasee irirana faqaasa ufa fee qidaqa mi ufausara aiqama anee faqa misa faqa eerairiaqa.

<sup>21</sup> Akaqausa mi unna irirana faqaasa ufara doo iridaqee qinausa Yisuna ufasaa fimariaqooqari quqasee auiaidaqa. Doo.

Anutuna afaarirafa inni aiqamausaki mariani.

## 2 TIMOOTI

### Timootina inaaqianna rumamaqoo akarafa.

<sup>1</sup> Anutuna ufasaa asauku mundirana Yisufa narí ufara diqigoosa maqasaa fasiqa Pauroosa maridaqa. Yisufa naaru naaru marirana qima afeekaikammandee qimiraree qimaqoona mifa nariki asauku mundirana Yisunaki maridanoo maasa minaki oonu maridaqa mi naaru marirana maraanaura.

<sup>2</sup> Oo Timooti anee qini qifaaqasaa qimaakuara foora marianafa qinee maa akarana ani rumamaqaidaqa. Maasa aiqamausa faqa aiqama ainaina faqa nikoofa Anutufa faqa maasa karaambaiga asauku mundirafa Yisufa faqa narí afaarirana faqa amuqusifanoo nifauarana faqa aundurari asoarana faqa ani amiani.

*Pauroofa Timootinara dufi dufi qidanoo pooduamamaqanau.*

<sup>3</sup> Qini qikeeku qikaaku sia moo ainaina rafaqafinau Anutuna sandufamau amiqimasee fidaqa maqee maqee Anutunara innaaru qimariqau. Qinee faqa miqi kai masee misa naanna ramasee maqee maqee innaaru qidaqa aniara Timootinara dufi dufi qidaqa. Oo Timooti ani anoofa Eeunisa nammarifa faqa ani ataatoofa Rooisa nammarifa faqa miqanda noori kandamasee Yisunasaa amiqimasee mundaqa mariqau. Maqee anee faqa miqanda naanna ramasee mi oosanna kai maree mariana qinee iridaqa qafaidaqa. Mi irirafa kaqi aniki marifaqa qinee iridaqa.

<sup>4</sup> Qinee ani quqasee fuafannana qiniara anee ikiraqoonnana qinee minara iridaqa qinee faqa aniara didimarifaqa kasooqaqee ani qafamaseeqa firaqoo asasianaurannoo.

<sup>5</sup> Qinee aniara firaqoo eendaki faqa faasaana faqa innaaru qimaqaidaqa aniara dufi dufi qidaqa.

<sup>6</sup> Minara qinee maana qimamidaqa ooqai qinee sindimeera foora ani quqamaqaafanano Anutufa ani amu afaaqooqana anee amiqimasee rakisiinana kuqua.

<sup>7</sup> Anutuna maraquna maasa qimufa sia maparaairana rufiarana qimidanoo, mina maraquna fannoo afeekaikirana faqa faiqi aanaaseera amuqusirana faqa qeeqa daundurari qimanasaa andeeqasee rakisirana faqa maasa qimidanoo.

<sup>8</sup> Minara irisee maasa karaambaigara sia asaurua. Qinee Pauroosa minasaara karabusaki marunnaana faqa sia asaurua kaqi paasoosamasee qimannimia. Anee faqa miqi kai inana Anutufa afeeka amiqaina anee faqa Yisuna amiqira fasaasa ufara kaqi aupuraranaki keeqaa.

<sup>9-10</sup> Anutufa maasa asumu mareenoo maasa daaramasee mai anianne qimasee qini faiqi anaasee uqanna mariafaqee qidanoo. Sia maasa oosana moo ainaina amiqirana qafeenoofau maasa asumu mareenoofau. Narí irirana narí afaarirana minannai kai miqinoo. Ooqai maa maqa maqana faqa innaaruna faqa sia maru aukuanna narí mi afaarirana maasara narí asauku mundirana Yisunasaa quqaqoofanoo maqee maa aukuanna maasa asumu maree marifa asauku mundirafa Yisufa maa maqanasaa kooroomafinoo mi afaarirana maasa faiqi faiqi qiminou. Asauku mundirafa Yisufa kuqirana aru taikaseenoo narí amiqira fasaasa ufannai kaqi marirana faqa naaru naaru marirana faqa koorooinoo marifaqa maridaqa.

11-12 Qinee sia fifau oosana oosana aupurarana karabusaki maridaqau maraidau, Anutufa diqiqoofaqa maa maqanasaa qinee mina ufa faiqí anaasee naamua qidaqa Yisuna amiqira fasaasa ufa kooroomannimidaga qimannimunnana aupurarana qeeqa qifaaqasaa maraidaga. Sia qinee minara qisauridaqa. Qinee qeeqa irirana irira fasiqasaa mundusauna maridanoo, qinee minara maana amiqimasee iridaqa, Yisufa narí afaaqooqa qimuna sia kadiqaannoo mifa amiqimasee dadaaqinoo fifi inoo narí qumira aukwana paquriannoo.

13 Oo Timooti qini kuqaa anoona ufauqa anee karaambaiqa ufara foora mina afaqamaree fua. Maasa asauku mundirana Yisunaki keeqafi marifanoo mifa Anutuna saqarikirana faqa faiqí aanaaseera nimuqusirana faqa maasa qimidanoo anee minaki maria.

14 Anutufa oosana oosana amiqira irirana anisaa quqaqoona mina naaquqara maraquna fannoo aniki marina mi afeekanannai mi oosana oosana irirana amiqimasee rakisia.

15 Oo Timooti anee maanara irimariananoo. Misa qini Roomma maqananaa ruumbeegee karabusaki quqasoofaqa aiqama Asia maqa maaqakina qini qiqoondiuqa qini minnisee quqasee sandamafiqau. Fikeerusafa faqa Qeeramookeeneesafa faqa miqanda faqa quqasee sandaqau.

16-17 Ooneesifoorusafa mifa kai sia qinee karabusaki mariafannanara asaurinau. Roomma maqusai firaa taunna marufanoo qini sia dauni paqurinau anireenoo qiniara fiqú faiqu fumandee randaseenoo paqurimandee moomoo kari qini dadaaqimarinau. Qinee karaambaiqara mi fasiqana aiku asaukuara amiqi amiqi mannisaannee qidaqa.

18 Qinee karaambaiqara narí qumira faasaanasaa mi fasiqanara afauaanee qidaqa innaaru qidaqa. Qinee Efeesusa maqusai mariafananoo mi fasiqafa Ooneesifoorusafa firaqoo qini dadaaqiufa marifana anee Timooti anee minara irimariananoo.

## 2

*Pauroofa Timootinara anee Yisuna amiqira sundiara maqi mariannee qinau.*

1 Anutuna afaarirana dadaaqirana asauku mundirana Yisunaki marianainafa marinaqa maasa minaki mariananoo maasaindi mariannoo. Oo Timooti mi afaarirana maraseenana minasaa mapukina maria.

2 Qinee moomoo fasiqa anaasee nifusaa ufa nimiafannana anee faqa mina irimariananoo. Mi ufausa maramareenana andeeqara fasiqauqasaa quqasainaqa misa qumareeqa quandafi niqoonausa faiqí anaasee qiman-nimiaqeera.

3 Anee faqa asauku mundirana Yisuna rakira faiqiara foora maridana aupuraidana anee faqa kadaapirina fua. Timooti anee rakira fasiqa oosana iria.

4 Sundiauqa rakiranaki fidaqa sia kaiqeesa maria marirana maridaqa nariqa aiqama ainaina minniseeqa doo rakira ainainara kai noori faqa irirana minni kai ubeekamasee nári karaambaiqa afusaa afeekaikamaseenoo rakirara kai iridaqa. Timooti anee faqa Anutuna saikaki fidana misa naanna raa.

5 Kafaa sandee maria fasiqausa oosana irimariana sia ufamau sandeenana taikara qoo oonu kasoofafinana sia feefauru mareennaranoo Timooti anee faqa mi ufamau sandeera foora amanamasee qafa.

6 Sia moo fannoo fukasaa narana unakusee naannoo. Narana ummaqi mari fasiqafa mifa kai indaaru unakusee naannoo mina kadaapirirana

akiaqa mariannoo. Anee faqa Anutuna saikaki kadaapirina fifi inana naaru unakuseena suqaseenana neera foora innaranoo.

<sup>7</sup> Anee mi ufana qunnana irisainanoo karaambaiqa fannoo dadaaqinana mi oosanna irinnaranoo.

<sup>8</sup> Aneenna aaqooki asauku mundirana Yisunara iria, mifa Dafidina ati kuqiranakiqari findifufa maridanoo. Mina amiqira fasaasa ufa qinee qimannimi marunnana mina koorooidanoo.

<sup>9</sup> Qinee mi amiqira fasaasa ufana qimannimunnana aupuraidaqa. Misa qiniara mandoosana maree mari fee qimaseeqa qini qumareeqa sainandannai rumba quqeeqa. Kuqaa qinee sainandannai rumbaqa marida Anutuna ufa fannoo sia rumbanoo maridanoo kaqi idukinoo maridanoo.

<sup>10</sup> Qinee minara iriseeqa, Anutufa rusandeesamumasee mareefandinna fasiqa anaaseesara irisee misa Yisunara iriaqera oosana oosana mandainaina aiqama ainaina maraidaqa. Misa faqa asumu mariaqera faqa naaru areenarana maraaqera faqa mandainaina kaqi qeeqa qipatasaa maraidaqa. Mi asumu marirana faqa naaru areenarana faqa asauku mundirana Yisunaki kai maridanoo.

<sup>11</sup> Maa ufafa kuqaa maridanoo. Maasa Yisuna faqa kuqiqa mina faqa findifuanauranoo.

<sup>12</sup> Maasa mina faqa afeekaikamande fifi inaga maasa kasooqagee mina faqa rakisiraua mariana. Maasa minara qaoo qiananoo mifa maasara faqa qaoo qiannoo.

<sup>13</sup> Maasa mina akaru qiananoo mifa kai amana kai andeeqasee mariannoo. Mifa sia amana nari oosana minnisee maasa mandoosanamau fuannoo, andeeqarafa kai maridanoo.

*Pauroofa Timootina aakapanau, amiqimasee ainainianne qinau.*

<sup>14</sup> Timooti mi ufausa ani Yisuna ufara suqimaria maqanaki keeqee mariasa qimannimidana maa ufana faqa Anutuna afusaa oori kandamasee aaquqimannimaqa. Misa sia kai fifau ufara tinoo taanoo riqa rairaiqiqa. Mi oosanafa sia anoonaikidanoo faiqi anaasee kuridi mariafa mi oosanafa maridanoo

<sup>15</sup> Anee aneennara Anutuna afusaa anee afeekaikamandee maridana saika maree mariananoo Anutufa aniara maqi qianifeera oo maa fasiqafa amiqimmandee qini saika uqeeraidanoo qini anoona ufa amiqimasee andeeqasee qimannimimarifa sia nari saikara oonumafi irinoo asauruani-feera.

<sup>16</sup> Akaqausa ooqai Yisuna ufaki mariusa oosana oosana fifau faafau ufa uqeeree mariafaqa anee minara eerairia. Anutuna andeeqarufa sia minaki mari ufana dapi ufa nari qimami nari qimamira fee qinnufana faqa furufarira ufara faqa anee minara rufiasee nianasaa fua. Mi ufafa faiqi anaasee Anutufinnaindaraana mareeqee kaqirunna ubeekemarifa maridanoo.

<sup>17-18</sup> Mi dapi ufana qimannimimariasa ufa fannoo fidika namuanara foora firaaqoo amaqi naidanoo firaaqoo qaidanoo mi dapi ufana miqi qifanoo firaanaikiandora. Miqira ufa qimariasa nuqu Qimeenaiusafa faqa Fireetusafa faqa miqanda anoona ufa qimaria aana minnisee unna qimasee aiqamausa kuqiranakiqari findifirafa ooqai taikanoo maridanoo fee qidaqa. Miqira ufannai Yisuna ufamau fimariasa akaqausa nikuaman-nimiafaqa saamuridaqa.

<sup>19</sup> Misa miqira ufa fannoo sia amana Anutuna ufa aruannoo, faakanara foora arufinoo sia kasiannoo. Mi faakannasaa maa ufana akara rinoo maridanoo Karaambaiqa nari faiqi anaaseera iridanoo. Ya faiqi anaasee fee

nariara karaambaiqaindi fee qinafa mifa mandoosana ameesuquseenoo andeeqara oosana maraannoo. Anutuna ufa faakanara foora marina oosana miqi mminoo maridanoo.

<sup>20</sup> Ainaina faqaasa maaqaki qafee disa kaafaina piritaina oosana oosana maridanoo. Akaqana siruaannai auqirafa maridanoo akaqafa koorannai auqirafa maridanoo akaqafa saqarinnai auqirafa maridanoo akaqafa maqannai auqirafa maridanoo. Akaqana amiqira difaaniki narana saka faiqi nimimariafa maridanoo. Akaqausa mandaikirafa kai madaapeenni marifa maridanoo.

<sup>21</sup> Faiqi moo fannoo madaapeenni mari difaanifara foora marifa nari anukamasainanoo ainaina saka neemaria difaanifara foora amiqirafa mariannoo. Miqinanoo mina akoofa mareeqee amiqira saikaki quqaannoo.

<sup>22</sup> Nimuqusa anukarusa maqee maqee karaambaiqa aaraidaqa dadaaqiannee qidaqa anee misa faqa misa naanna raidana kumaaraa mandainainara nidiranara eerairiaqa andeeqaranara afeekaikamasee afaqaqa, Yisunasaa irirana rusirana faqa faiqi aanaaseera nimuqusirana faqa naunduraki asoarana faqa afeekaikamasee afaqaqa.

<sup>23</sup> Furufarira ufa, dapi ufa rainarafa minauqara eerairiaqa. Miqi qimariasa aiqama kari aanooqiranaki aqufidaqa.

<sup>24</sup> Anutuna ainainira fasiqa fannoo sia ufa rainainnanaki keeqaani. Mifa aiqamausara reendenamandee ireeda kai qimannimiani mifa amiqimasee ireeda kai fifimmasee Anutuna ufa naamuaqiani.

<sup>25</sup> Mifa ireeda kai mina ufara qaoo qimariasa andeeqannimaqaani. Mifa miqinanoo abee Anutufa dadaaqiannoo fee misa quandaki anoona ufai ubeekfeefaranoo fee.

<sup>26</sup> Sadannafa nari ufaanaki mara arinoo nari iriranamau quqasoofaqa fimarufaqa misa anoona ufasaa ubeekaifanoo nari irirafa kambiqafinaqa Sadannana ufaanakiqari aruruduku fifaranoo.

### 3

#### *Pauroofa taikara aukuanara Timootina qimaminau.*

<sup>1</sup> Oo Timooti anee maa ufana aaqoo iria. Taikara aukuana manda aukuana afeeka aukuana mariannoo.

<sup>2</sup> Mi aukuanna mi kamuqoo faiqi nariara kai irifaranoo kaaqa ainainara rimarifaranoo, nariara firaqoo ufa qimarifaranoo, firaqoo nariara nari nimooqimarifaranoo, misa mandufa faiqi anaasee qimannimi marifaranoo, misa nari ninausa nikausa ufa rukieefaranoo, misa nimira ainainara sia dufi dufi qifaranoo kai mareefaranoo, sia Anutunara irifaranoo mana mana kaimmifaranoo.

<sup>3-4</sup> Sia faiqi anaasee reendenama nimaqeeefaranoo. Sia faiqi anaasee nifaueefaranoo. Misa moosara munuqi miniqifaranoo. Kaaqa faiqi narimarisa kaasau fainiara foora kaaqa faiqi narimarifaranoo. Misa andeeqarausara fidiqaammifaranoo. Misa kaaqa faiqiara ueeqee mariasa misa irirana siaisa kaqi minaki rakeemasee fimariasa misa kaaqa nari nimooqiqa nari nuqu uqeere mariasa. Misa niqaara ree mari ainainnara kai riqa Anutunara sia rifaranoo.

<sup>5</sup> Misa amaana ufa sia irifaranoo nipatakai qumareefaranoo, anoona amuqusakinaana sia qumareefaranoo. Timooti anee miqi mariasara eerairamandee nianai maria.

<sup>6</sup> Misakiqari akaqa fasiqauqa nariqa unna amaana ufa qianeera furufari maria anaaseesa mandoosana maree maru anaaseesa maaqaki onureeqa unna amaana ufa qimannimiseenoo misa afapita qumareenoo

misa firaafaikinoo marifaqa mi irirana siai anaaseesa nári oosana oosana mandainaina nidudusaa aruqaafanoo innee doo mi mau kai fuaqee qifaqa mi mau kai fidaqa.

<sup>7</sup> Miqimari anaaseesa Anutuna ufa anoonara maqee maqee oosana oosana amaana ufaki randaídaqa sia anoona paqurídaqa.

<sup>8</sup> Ooqai Mooseefa Isipa maqusai Faraona asaukukinaana Isaraee maqannaasa idukumaree fuaneera qufanoo Faraona afunee fasiqaqanda nuqu Yaneesafa faqa Yambareesafa faqa miqanda Mooseena itita amaqaqau. Maa maqee maria unna amaana ufana qimariasa misa miqanda naanna raidaqa, Anutuna anoona ufa ititáídaqa. Misa Anutuna anoona iriranara kadiqáídaqa oorudupídaqa misa mi irirafa kuqiara foora inoo maridanoo sia kasidanoo.

<sup>9</sup> Ooqai Mooseena aukwana Yaneesasa Yambareesasa miqanda furufarirana aiqamausa qafamasee misa ufa minniqaqau. Maa maqee maria unna amaana ufana qimariasa aiqama sia misa ufa irifara, misa furufarirafa akooqoo marifaqa minniseefara akaqausa kai irifaranoo.

*Pauroofa taikara naamuaqira ufa Timootina qimaminau.*

<sup>10</sup> Oo Timooti anee sia miqi marianafa anee qini naamuaqira ufamau kai fimarianafa qini oosana maree marianafa qinee fimarunnaqoo kai anee fimariananoo qinee Yisuna anoona ufamau fimariafannana anee qiqafoonafa mariananoo Anutuna saikasaara daruafaqa sia rakeemasee minniseeqa reendeenamandee kaqi miqoo marunana anee qiqafaananoo. Qinee faiqi aanaaseera qimuqusi mariafannana anee mina faqa qiqafoonafa mariananoo. Qinee kisaqasaa Anutuna aanara afeekaikirana anee qafaananoo.

<sup>11</sup> Qinee Anutuna ufasaara darirana faqa aupurarana faqa mareemarunana anee qafaananoo. Qinee Antiooka maqusa faqa Ikooniumma maqusa faqa Ristara maqusa faqa mi maqusanakiaqa fimariafanaqa misa dariqa fimarufaqa firaqoo aupuraqa fimariqiafana. Anee minara faqa irimariananoo. Karaambaiqa fannoo mi ainainnakinaana qini asumu mara quqasoofaqa marídaqa.

<sup>12</sup> Aiqama maqasaa qaraasa asauku mundiranasaa irirana rusiseeqa miqooqari Anutuna andeeqara oosana maraifaqa narirana aupurarana mareefaranoo.

<sup>13</sup> Mandoosana maree mariasa faqa unnaqi maria fasiqausa faqa nári mandoosana maraqa fidaqa ootupaqa fidaqa miqiqqa fifi ifaqa firaanaikifaranoo. Misa akaqausa nikaru qiafaqa kafa misa quandaki nári faqa nikaru qifaranoo.

<sup>14</sup> Oo Timooti anee sia misa naanna reemariananoo. Qinee Anutuna anoona ufa ani aamuaqiafannana amiqimmandee qumaroonnana mi mau kai amiqimasee fua. Anee yanasaqari fee Anutunaindaraa ufa irira oosana mareenanee. Doo miqikaimmasee mi fasiqafa indee kai inana naaru naaru miqi kai ia.

<sup>15</sup> Oo Timooti anee aanaaqisaa Anutuna naaquqara akarakinaa ufa irimarianafa mariananoo anee minara faqa iria sia aunua. Mi naaquqara akararufafa asumu marira irirana ani amiannoo. Mi asumu marirafa asauku mundiranaki maridanoo.

<sup>16-17</sup> Anutufa qimannimufaqa akara rumaqoo ufafa maridanoo Anutuna ufa qimannimaria fasiqausa mina qumaraifanoo minakinaa ufa fannoo nári naamuaqiannoo nári aaqaranara qaoo qiannoo, nári eendaandirana



andeeqaannoo nári andeeqasee firana naamuaqiannoo. Miqi qimasee Anutuna ufa qimannimimaria fasiqausa andeeqasee amanaikinaqa Anutuna saika oosana oosana uqeeraaqa.

## 4

*Pauroofa faiqí anaasee qimannimira oosanara Timootina qimaminau.*

<sup>1</sup> Oo Timooti qinee Pauroosa Anutuna afusaa faqa asauku mundirana kuqirausa faqa kaqi mariasa faqa aaquqimannimaqee marina afusaa faqa doori kandamasee ani faqa aaquqimamaqaidafa. Yisufa kaifaa kooroomafi aiqamausa rakisianinnanara iriseeqa ani aaquqimamaqaidafa.

<sup>2</sup> Anee Yisuna amiqira fasaasa ufara faiqí anaasee qimannimia, narí qanaa fee kaqiqoo fee sandanainai qimasee qimannimia, anee misa iriaqaa iaqee qimasee qimanniminaqa misa iriaqa anee mandoosana maree mariasara qaoo qia, anee faiqí aanaaseera nifeeqaraidana poodua. Anee ubiqafi sanaasamasee faiqí anaasee qimannimia.

<sup>3</sup> Qusasaa sia anoona ufa naamuaqirana irifaranoo misa nári manda nidimari ainainna kai afaqee fidaqa nári naaqookinaa manda irirana naamuaqimariasaa misauqa kai moomoo nifiqasee innee mi manda irirausa kai qimaqimiaqee qifaranoo.

<sup>4</sup> Misa anoona ufara nimeesugusee kai fifau uriara kai naaqoo rammatini imariasaa.

<sup>5</sup> Timooti misa miqimarifana anee aneenna kasoomambi ubiqafinana misa ani ariranees aupuranees amimarifana kaqi kai fua. Amiqira fasaasa ufa naamuaqira saika maqee maqee marana fua, anee aneenna aiqama saikaki maridana Anutuna ainainira faiqí maridaqee qimasaidana marana fua.

<sup>6</sup> Oo Timooti anee iria doo qini fidika ruqiqa qimaqee fandinnafa doo ani maridanoo. Doo qusasaa misa qini darifaqa qinee maa mariranakiqari doo taikasee fifuanauranoo.

<sup>7</sup> Doo qinee amiqira rakiranakiara foora rakumaree uriqaramafiara foora mafiqa. Doo narí amani narí amanira sandaranaki qimudaanaiqimaseeqa sandaqa aniifaqa doo taikarana paquriqa. Qinee Anutuna ufa faqa marirana faqa andeeqasee qumaree sandeeqa taikarana aniree paquriqa.

<sup>8</sup> Doo maqee sandaidda uriqareemariasaa feefauru qiniara deedaqinoo maridanoo. Karaambaiqa andeeqasee ufa nimimarifa qumira faasaana andeeqemariasaa qafee qini qikiaaqa afisuannoo. Mikari sia qini kai qimiannoo, moomoosa minara nidimarisa mina koorooiranara afeesidaqa nidimarifaqa afeesimariasaa misa faqa nimiannoo.

*Pauroofa Timootina qimaminau, qini qamunna papiqa maree mini qimia.*

<sup>9</sup> Oo Timooti anee kaqi kaqi mindari aniree qiqaafaa.

<sup>10</sup> Deemasafa maa maqa maaqanakinaa ainainara kaaqa ridanoo qini minniqiseenoo doo Teesaronika maqusai finoo Kareeseenasaafa doo Karatia maqa maaqai finoo, Titusafa Daramatia maqa maaqai finoo.

<sup>11</sup> Rukaafa sia rumberanaki marifa kaqi marifa mifa kai qini faqa maridanoo. Anee Marikoona afigee minisainanoo Anutuna saika qini dadaaqiani.

<sup>12</sup> Tikikusafa qini faqa marina qinee doo aqiqaunanoo Efeesusa maqusai finoo.

<sup>13</sup> Qini suara qamunna Tarooasa maqusai faiqí moo auqu Karapoosana maaqaki quqaqaafannana anee aninana aimaree ania. Qini papiqauqa faqa qini akara papiqa faqa aimaree mini qimia.

<sup>14-15</sup> Areesandeerafa mifa qainna faqa koopaa faqa auqimarifa mifa narí mandoosana mareenoo qini firaqoo mandaikamaqimaqeenoo, mifa firaqoo maasa qimannimira ufara akooqaidanoo anee faqa firaqoo minara eerairia. Anutufa miqimarina akiaqara arirana mina amiannoo.

<sup>16</sup> Qinee Roomma maqannaa kootaki indaaru kamu mariafananoo sia moo fannoo qini dadaaqinuu aiqamausa qini quqaqisee sandamafufaqa qeeqaraa kai kooti mariqiafana. Qinee Anutunara sia mina akiaqara nimianne qidaqa.

<sup>17</sup> Misa fufanoo Karaambaiqa kai qumee qini pooduqee marufaqa qinee kootaki kikiqamafi Yisuna ufa aiqama amiqimasee aanaamuru aiqama qimannimifanaqa iriqau. Miqimasaafananoo Anutufa kaasau aandau ookinaanara foora qini rafieenoora foora inau.

<sup>18</sup> Karaambaiqa fannoo oosana oosana mandainainakinaana qini mareeqeenoo narí innaaruna ququsaki amiqimasee quqaqisaannoo. Mina areenarafa naaru naaru mariani, kuqaa.

*Pauroofa nimandoo ufafa.*

<sup>19</sup> Anee Pisisikira nammarifa faqa narí afaaqi Akuiraana faqa nimandaa, Oonesifoorusafa faqa narí faiqi anaasee faqa nimandaa.

<sup>20</sup> Erasatusafa Koorinti maqusai miqoo kasooinoo marinuu Tarooifimusafa aurimarufaqa Mireetusa maqusaki quqaqiafana.

<sup>21</sup> Suara aukuana aniannoo anee naaree amanamasee qafeenana ania. Eeuburusafa faqa Pudeenasafa faqa Rinusafa faqa Karaudiafa faqa maaqoo maria qikaqaafasaasa faqa aiqamausa Timooti ani amandaidaqa.

<sup>22</sup> Karaambaiqa maraquna fannoo ani faqa mariani Anutuna afaarirafa inni aiqamausa faqa mariani.

## TITUSA

### Pauroofa Titusana akara rumamaqoo ufafa.

<sup>1</sup> Qinee maqasaa fasiqa Pauroosa Anutuna ainainirannai diqigoosa mari-daqa. Asauku mundirana Yisuna ufa anindiri irimarunausa maridaqa Titusa animma akara rumamaqaidaqa.

Rusandeesamumasee Anutufa qini qumareeqeenoo narisaa mundimari-asara mapuku nimaqaaneera qifaqa ufa nimidaqa. Anutufa qiniara misa mareeqee Yisuna kuqaa anoona firaa iriranaki mara quqaannee qifaqa miqidaqa.

<sup>2</sup> Mi kuqaa irirafa naaru naaru mariranaki fifandinanasaa mundinoo mari irirafa maridanoo. Anutufa sia unna qimarifa anoona ufa qimarifa naaru marirana maasa qimiraree qinau. Ooqai maa maqa maqafa sia maru kamuqoo mi kamuqoo kasooqagee maasa qimiraree qima afeekaik-inau.

<sup>3</sup> Mifa ooqai naaru marirana kasooqagee qimiraree qunara doo maqee maa fasannai andeeqara aukuannee qimaqoofa mina anoona Yisufa maa fasannai doo kooroo inoo maridanoo. Anutufa maasa mandainainakinaana qumaree marifa firaaqoo qimaqimina mi ufana qimannimidaqa.

<sup>4</sup> Titusa qinee ani qimamifannana anee aneenna irirana Yisunaki quqoonafa mariannanara qinee aniara qini qimaaku fee qidaqa anindiri Yisuna iriranamau fimarunnanaki keeqee marunnanara maa akarana ani rumamaqaidaqa. Yisufa asauku mundirafa maasa asumu maree marifa maridanoo. Mifa faqa mina akoofa Anutufa faqa nari afaarirana faqa nari asoarana faqa ani aaku amaqaani.

#### *Pauroofa Titusana ainainianeera oosana aakapanau.*

<sup>5</sup> Qinee ufaasu Kareetee afumaki ani Titusana mafi aiseeqa fiqa. Anindiri miqoo maridaqa moomoo ainaina sia andeeqaranaki ani mafi aiseeqa anee mina andeeqaa. Anee maqusa maqusa Yisuna ufa irimariasasaa rakisirausa paqurimasee misa rakisirausaikia. Miqianneera faqa ani mafi quqeeqa.

<sup>6</sup> Qinee Pauroosa aamuqira ufa indaaru qimamifannana Titusa anee sia aunua doo miqoo kai fua. Qinee maaqi qimasee qimamifannana anee faqa maa ufana qimanniminaqa misa iriseeqa maraaqa. Yisuna ufa irimariasasaa rakisirausa sia moo aaqarafa misaki mariani. Andeeqarausa kai mariaqa, moodaa anaasee faqaafa mariannoo. Mina faiqi namu Yisuna ufa irimarinausa mariaqa sia kaukaata qimarinausa mariaqa, sia ufa rukiee marinausa mariaqa.

<sup>7</sup> Yisuna ufa irimariasasaa rakisirausa Anutuna ainainiranasaa rakisir-  
ausa marianara sia moo aaqarafa misaki mariaqeera qidaqa. Misa sia  
aanooqirausa mariaqa. Sia qusasaa rakimarinausa mariaqa. Sia nammari  
namasee furufari mariaasa mariaqa, sia dauni rakirana uqeerarausa mari-  
aqa, sia ainaina munnimmara kaaqa nimuqusirausa mariaqa.

<sup>8</sup> Yisuna ufa irimariasasaa rakisirausa afaarimariasaa faqa kasimariasaa  
faqa mi marirana marinausa kai mariaqa. Misa andeeqaranara kai  
rimariasaa mariaqa. Misa nari naundura faqa nimanara faqa irimarinausa  
mariaqa. Misa andeeqarausa faqa anukarausa faqa nari marirana andee-  
qasee marifaqa mariaqa.

<sup>9</sup> Yisuna ufa irimariasasaa rakisirausa misa amiqimasee Anutuna ufa  
anindiri qimannimifannana irisee qumaree marinausa mariaqa. Misa

Anutuna anoona ufannai pooduqainaqa akaqausa aaqara ufa qinausa iriseeqa quandafi andeeqasee nári manda oosanara qimannimiaqa.

<sup>10</sup> Titusa anee saiki marianna maqusanakinaa fasiqa anaasee moomoosa Yisuna ufa irisee quandakifaqa noori rumbara andaama aanna ree mariasa marifaqa maaqanda ufa rukiasee moomoosa faqa nifiqeeqeenoo kaqirunna ubeekaidaqa nariqa mandoosanara qimannimiaqee qidaqa. Yuda maqanaasa kaaqa miqi mariasa maridaqa nári ufakiqari Yisuna ufasaa munduseeqa quandaki nári faqa akaqausa faqa nifiqamaree kaaqa kaqirunna ubeekie mariasa maridaqa.

<sup>11</sup> Misa ufa taikaani fee qidaqa. Misa faiqi narí anaqa faqa narí faiqi namufaqa mareeqeeqa munnimmara kai iriseeqa nisauruaqaana oosana oosana mandainainaki quqemariasa maridaqa.

<sup>12</sup> Moo Kareete maqanna fasiqa fannoo nariqa ufa qidanoo akara rimaru fasiqa fannoo oqai kuqufa maaqi qimasee narí maqannaasara qimasee akara rinau. Kareete maqannaasa maqee maqee unna ufa qimariasa maridaqa, kaaqa mandoosana maraidaqa fainiara fooro imariasa maridaqa. Kudiki mariasa kaaqa narana moomoo neemariasa maridaqa.

<sup>13</sup> Qinee Pauroosa minara maaqi qidaqa. Mi fasiqafa narí maqannaasara doo kuqaa miqi mariasee qinau. Titusa anee faqa minara irisee kooroomasee rakeemasee nimambaina qimasee aranaiqi qimannimia. Miqi qimasainaqa Kareete maqannaasa sia kaqirunna fuaqa Anutunasaa saqarikirafa afeekaikamafi maridaqa anoona ufasaaqari quandaki unna ufa qimariasa naakapaifaqa sia misa naakaparana iriaqeera.

<sup>14</sup> Yuda maqanna uri ufa faqa anoona ufa minnisee mariasa sanda ufa faqa sia iriaqeera nimambaina qimasee qimannimianneera qimamidaqa unna ufa minnisaqeera.

<sup>15</sup> Qikairi siaisa aiqama ainaina qafamaseenoo minakinaa manda oosana sia irirai minakinaa amiqira oosana kai qafamasee minara asaidanoo. Nári maraquina kuqiraua nári marirana irirana putaa irausa anoona ufara sia fee qimasee aiqama ainainara mandaikinoo maridanoo fee qidaqa. Misa náriara maasa Anutunara iridaqee qimariasa.

<sup>16</sup> Amiqi mariasa anirarisameeqee mandaki quqemariasa misa nári nookiqari maasa Anutunara iridee qimasaidaqa quandaki nári auqee maria ainainafa moomau fimarifaqa maasa qafamasee unna qidammiafoo qidaqa. Faiqi anaaseera fidiqaaimariasa ufa rukiee mariasa mi manda fasiqausa maridaqa. Amiqira saikara sia amanaiki mariasa maridaqa.

## 2

### *Pauroofa faiqi anaasee firaasa naakapaqee ufa qimanniminau.*

<sup>1</sup> Titusa doo misara qiqa maqee aniara qianaara. Anee Anutuna ufa amana kai qimannimidana mina marirana amana kai Kareete maqanna fasiqa anaasee qimannimia.

<sup>2</sup> Faiqi firaasa maaqi qimasee qimannimia. Irirana faqaasa mariaqa, noori kandamasee mariaqa nári naundura nimanara oonumafi irimarinausa mariaqa. Nári Yisuna saqarikiranasaa mundufi mariaqa. Nariara nariara uriqarara ainainee qimasee nimuqusirafa mariani. Sia tipuqi mariasa naanna ramasee mariaqa reendeenamandee ubiqasee mariasa naanna raqa mariaqa.

<sup>3-5</sup> Anaasee firaasa faqa miqi kai masee maaqi qimasee qimannimianaqa, misa marirana anukara anaasee kammambiqa mariaqa, misa moosara nifai sanduri mariana sia miqiaqa, sia manda nammarrinnai nidudusaa

aruqa. Misa fuka aanaaseeuqa amiqira oosana uqannifiqasee naakapa-masaifaqa misa nári nifaaqiara ruaqeera nári faiqi namuara faqa ruaqeera. Misa nári naundura nimanara iridaqa mariaqeera. Misa anukara anaasee mariaqeera misa amiqimmandee nári nifaaqi faiqi namu qumiasana ainainasaa rakisirausa mariaqeera. Misa afaaridaqa amiqi marinausa mariaqa. Misa nári nifaaqmaaka ufara eedoo qimarinausa mariaqeera Titusa anee qimannimia. Misa miqíqa marifanoo akaqausa ani nindafeeqa sia Anutuna ufara mandainainee qiaqeera.

<sup>6</sup> Titusa anee miqi kai mandee kumaaraa faqa maa ufana qimanniminaqa, misa faqa nári naundura nimuqusa amiqimasee mariaqa.

<sup>7</sup> Anee aneennara faqa aiqama ainaina amiqimmandee marinaqa misa ani qafeeqa miqimandee mariaqa. Anee kuqaa uqanna oori runusee maridana misa naakapamasee qimannimia.

<sup>8</sup> Anee mapukirufa kai qimanniminaqa sia quandafi aniara fifau faafau ufa qiifoo qifaranoo. Anee mapukira ufa qimanniminaqa aniara nikooqee mariasa ani namuqaa faqa kaukaataqira ufa qianneera mina oosanara randeeqa nisaurifaranoo.

<sup>9</sup> Doo aniara qiqa maqee feefauruara ainaini mariasara qianauro. Feefauruara ainainimaria fasiqausa anee maaqi qimasee qimannimia. Misa nári rakisirausa ufara sia rukiaaqa eedoo kai qiaqa. Nári rakisirausa asasiaqee ainainakaimmiaqa. Misa nári rakisiruasa ufa sia ati raqannimiaqa.

<sup>10-11</sup> Misa sia nári rakisirausa ainaina qummuariaqa. Maqee maqee amiqira oosana kai maree mariaqa ainainira faiqiuqa andeeqasee marifanoo misasaa rakisirafa misaki afaaqa quqasee mariani. Ainaini maria faiqisa miqimandee amiqimmandee maridaqa aiqamausa Anutunara maasa innaarunai asumu marirana nimimarifa mina naakaparanara amiqiraneer qimasee maasa faqa marararee qiaqa. Miqinoo marinara maa kamuqoo Anutuna afaarirana kooroomminoo maridanoo. Minannai aiqama maqannaasa innaarunai asumu marirana nimirafa doo kooroomminoo maridanoo.

<sup>12</sup> Anutuna afaarirafa maanara daakapaidanoo. Oosana oosana ainaina sia Anutufinnai ubeekanoo mari ainainnara minnisaaqee qidanoo. Maa maqanasaaqaraa ainainara kaaqa rimariana nimuqusirana doo quqaaqee qidanoo. Maasa maa maqanasaa marunnaqoo qeeqa qimanara qeeqa daundurara iriseeqa aiqama ainaina sia maraa qee qidanoo. Anutuna afaarirafa maa maqanasaa marunnaqoo maasa nirana marirana kuqaa kai qiaqee qidanoo. Maasa maa maqanasaa maridaqa Anutuna fooqaa marirana qiaqee qidanoo.

<sup>13</sup> Maasa miqíqa fifi iqa Yisuna innaarunaindari koorooira faasaanara asasammasee maaqoo afeesida mariaqee qidanoo. Mi faasaanna maasa Anutufa, maasa mandainaina numoo arusee innaaruna asumu marirana nimianinafa, Yisufa, Anutuna asauku mundirafa, firaa kaaqa qaranakiqari, quriqararanakiqari koorooiannoo.

<sup>14</sup> Mifa maasa kuqirana nariara maraseenoo maasa sia maraaqeera maasa kuqiranaki mifa keeqanau. Sia fifaufau kuqinau. Maasa qeeqa mandainainakinaana mareeqeenoo maqee kamuqoo narí kaaqa qara andeeqara fasiqa anaasee kammannimaqaaneera kuqinau. Maasa minaindikuqanna iaqeera, maqee maria kamuqoo amiqira ainaina kai maasa aruqarara rimariasaiamma fuageera kuqinau.

<sup>15</sup> Titusa anee mi ainainna maqee qinee qunna ainainna faiqí anaasee naakapaa. Anutufa ani qimaminara sia rufiaa. Afeekaikamasee qiman-

nimia. Aneenna afeekaikamambinana fuki faaki qidana amiqira oosana andeeqara oosana maraaqeera qimannimia akaqausa mandoosana mareefoora qaoo qia. Aniara manda faiqi fee kaqikaa faiqi fee qifoora, Anutuna ufasaa afeekaikamafinana andeeqasee qimanniminaqa sia miqiaqa.

### 3

#### *Pauroofa Yisuna ufa irimarusa andeeqara mariranara naakapanau.*

<sup>1</sup> Titusa anee maa ainainnara faqa maqee maqee Kareetee maqannaasa naaqoo auqaina iriaqa. Misa kaamanna rakisirausara maasa uriqararausee qimasee eedoo kai qiaqa. Aiqama misa amiqira ainainiranara qifaqa kasi kasi kai iaqa.

<sup>2</sup> Maa ainainnara faqa qimannimia. Misa sia mandufa moonara qiaqa. Misa reendenira oosana faqa aqoondikira oosana faqa kai maraqa nuaqa. Misa aiqama fasiqa aanaaseera reendenamandee kai aiqama ainaina iaqa.

<sup>3</sup> Ooqai maasa faqa misa naanna raidaqa, furufariaafanausa maridaqa, ufa rukiee mariafanausa maridaqa, maasa kaqiruna ubeekeeafanausa maridaqa, maasa faqa daundurakina qidudusaa arirafa qiqa qifaqa rumbeeusa idukuqoosa maridaqa, maa maqanasaa amiqi amiqira ainaina fannoo maasa rumbeeusa maasa faqa aiqama aukuana qifai sandurifaafanausa maridaqa, moonna ainaina qafaafananoo qimuqusidanoo qimukeeusa maridaqa, maasa faqa moosa nindafaafananoo fidiqaamma nimaqee mariafanausa maridaqa, misa faqa maasa qifafoofanoo miqikai inoo fidiqaamma qimaqeemariqau.

<sup>4</sup> Anutuna maasa asumu maraaninafa narí afaarirana faqa narí amuqusiranannai faqa akooroomaseenoo miqoo mifa maasa unnaqira manda ainainakinaana mareeqeenoo kaqinni quqannisanau, manda ququsaki mariafannana.

<sup>5</sup> Sia maasa amiqira saikafau Anutufa qafamaseenoo mina akiaqarau maasa asumu maranau narí amuqusiranannai kai maasa asumu maranau. Kaifaa aanaaqi aanaaqi kammafirana mifa nammariara foora maasa findaukamannisanau. Minannai Anutufa maasa asumu maranau.

<sup>6</sup> Anutuna naaquqara andeeqara maraqa fannoo Yisunannai maasa asumu maraaninnanasaqari maasa unnannai anidanoo firaaqoo maasa daakuqimaqaidanoo.

<sup>7</sup> Miqunara Yisuna afaariranannai kai maasa Anutuna afusaa andeeqaraisaikiqa maridaqa naaru naaru marirana maridaqa, asasidaqa afeesidaqa maridaqa.

<sup>8</sup> Mi ufana anoona ufa kai qimamidana aninna irirafa minasaa rusimari ufafa maridanoo. Titusa qinee Pauroosa maa ufana faqa ani qimamianana anee Anutuna ufa irimariasa qimannimia. Misa sia fifau faafau ufa kai ida mariaqa. Misa aiqama kari andeeqara ainainiranaki maridaqa auqaqeera qimanniminaqa maqee maqee minaki kai mariaqa. Mi ainainirafa aiqama fasiqa anaasee dadaaqi marifa maridanoo, anee mina uqeerasee afeekaikia.

<sup>9</sup> Anee Anutuna ufa nimidana narafumau narafumau qinnanaki sia minaki aqufua. Saina aaduma mariani. Moo fannoo narí akeeku akaaku oosana oosana ufa qinafa sia anee minaki aqufuani, anee kaqinni maria. Mooseena sandufasaara tinoo taanoo riqa rakinausakina minaki faqa anee sia aqufua. Maa ainainna auqemarinakina sia anoona faina fifau dapi ainaina auqee marinnanaki sia minaki aqufua.

<sup>10</sup> Anutuna ufa qimariasakiqari moo fannoo mandoosanara sandanainai qimarinnana qaara kari kai aaquqira ufa qimamia. Kafaa fee qinana doo mina ameesa uqamaqaa.

<sup>11</sup> Miqi mari fasiqana irirafa furufarirafa maridanoo. Mina mandoosana fannoo mina aaqarana kooroidanoo nari faqa nari aaqaranara faqa iridanoo.

*Pauroona akara ati rafaafira ufa.*

<sup>12</sup> Qinee Pauroosa Arateemasana fee Tikikusana fee anee mariannaqoo niqqaana ani saikasaa oonu rakisifana anee Nikoopoorisa maqusai kaqi kaqi fua. Suara uqi mari aukwana qinee Nikoopoorisa maqusa oonu marianauree qidaqa. Anee amanaikinana miqoo oonuree qini paquria.

<sup>13</sup> Anee Kareetee maqa maaqai kaqi maridana Seenaasifa irirana akoofasa marufa faqa Apoorosifa faqa nari finnannai fifana anee faqa miqanda dadaqia. Moo ainainara miqanda sarauqifana kaqi mara nimisee dadaqinaqa amiqimasee fuaqa.

<sup>14</sup> Maasa niqoondi Kareetee maqannaauqa sia nisauku raqandaamasee mariaqeera naamuaqiaqa. Misa maqee maqee maqasaa anoona ainainirana kasi kasida niqoonausa faqa dadaqi marinanaki maridaqa nari anoona ainaina auqee marianaki faqa maridaqa akaqausa niqoonausa naida nimiaqeera qimannimia. Miqimasainaqa misa saika sia fifau irairai-iani anoona kai kambiqani.

<sup>15</sup> Aiqamausa qini faqa maria fasiqausa ani Titusana amandaidaqa. Yisunasa mundimariasa anee marianannai mariasa maasara rimariasa anee misa faqa nimandaa.

Anutuna kaqi nimirafa innisaa faqa mariani.

## **FIREEMOONA**

### **Fireemoonna Pauroofa akara rumeeqee**

### **Fireemoona amaqoo pasafa maridanoo.**

(Fireemoonafa ainaina faqaafa Yisuna ufa irimarufa marinau. Mifa nári miqooqaraasa oosana maraseena faiqí akaqa kudi fasiqauqa feefaurumasee narí ainainiranaki quqaqoosa mariqau. Misakiqari moo fanoo mina auqu Ooneesimusafa mariufanoo moo deedeepamaseenoo darifoo qimaseenoo quqasee Roomma maqusai sandanau. Pauroofa karabusaki Roomma maqusai marunnai finau. Oonuroofanoo Pauroofa mina paqurimandeenoo Yisuna fasaasa ufa qimamufanoo irisoofofanoo Pauroofa pasa akara rumamisee aqiqoofanoo kafaannai Fireemoonafa narí uriqararafa marunnai finau. Pauroofa Ooneesimusana dadaaqidanoo maaqi Fireemoona akara rumamaqanau.)

<sup>1-2</sup> Oo Fireemoona qinee Pauroosa Yisuna saika ufasaara Roomma maqanna karabusaki marunausa maridaqa Timootifa maasa qikaqa sia rumberanaki marifa kaqi marifa qini dadaaqifaqa ani Fireemoona pasa akara rumamaqaidaqa.

Maasa qiqoondi moodaa ainainiranaki marianafa Fireemoona ani faqa Yisuna ufara ani maaqaki suqi mariasa faqa maasa qisookifa Afiaa nammarifa faqa maasa Yisuna ufasaara moodaa rakiranara fooraki marifa Arakipusafa faqa inni aiqamausa akara rumannimaqaidaqa.

<sup>3</sup> Anutufa maasa qikoofa faqa karaambaiqa asauku mundirafa Yisufa faqa Anutuna afaarirana faqa narí naundura asoarana faqa inniki nimi-ani.

*Pauroofa Fireemoona andeeqara oosanara amooqidanoo asasidanoo.*

<sup>4</sup> Oo Fireemoona qini qikaqa qinee aiqama kari aniara Anutufinnai innaaru qidaqa dufi dufi qidaqa.

<sup>5</sup> Anee karaambaiqa Yisuna saqarikiranara faqa Anutuna ufa iri mariasara aidimariannanara faqa maqee maqee iridaqa aniara dufi dufi qidaqa.

<sup>6</sup> Qinee aniara maaqi qimasee innaaru qidaqa. Maasa asauku mundirana faqa moodaa aanna fimariasa amiqi amiqirafa firaafa maridanoo, anee maqee maqee akaqausa faqa Yisuna ufa naida nimiseenana anee maqee maqee mi amiqi amiqirana anoonara irianeera aniara innaaru qidaqa.

<sup>7</sup> Oo qini qiqoondi qinee ani oosanara iriqa, anee Anutuna ufa irimari- asara amuqusimarifana amiqi amiqidana asasirana nimimariannanara qinee minara iriseeqa qinee faqa asasirana firaana faqa pooduqarana faqa mareeqa.

*Pauroofa Ooneesimusanara qimudao qimaseenoo Fireemoona akara aminau.*

<sup>8-9</sup> Asauku mundiranaki maaqanda maridaqa qinee ani afasausa mari- daqa paasoosammasee aniara andeeqara oosana maraanneera qimamianee qidaqa sia miqianaura nariara nariara rirafa didimarifaqa kaqimma iraanaura. Qinee Pauroosa asauku mundirana Yisuna aanaiqikirausa mina ufa akiqara Roomma maqannaasa rumberanaki marunausa sia qimamianaura kaqimma Ooneesimusanara iraanaura.

<sup>10</sup> Qinee maaqoo rumberanaki marunanoo ani ainainira faiqi Ooneesimusafa aniroofaqa Yisuna aufakiana qimamunanoo Yisuna saqarikifaqa



qinee minara qini qimaaku fee qimaseeqa mina akausee qidaqa. Mi fasiqanara aniara iraanaura.

<sup>11</sup> Mina auqu Ooneesimusafa mi auquna oosana maaqi qinoo maridanoo amiqimasee ainainira fee qinoo maridanoo. Ani ainainiranaki sia ainainifa doo maqee qini ainainiranaki narí auqu oosana uqeereenoo kaaqa ainainidanoo ani ainainiranaki faqa kaaqa ainainiannoo.

<sup>12</sup> Doo qinee maqee anee ianannai aqiqeeqa narí faqa qeeqa qimuqusa namufaqa aqiquaanoo finoo.

<sup>13</sup> Anee Fireemoonafa maaqoo maridanau qini aqoondiuga aniraifanau narana aina dadaaqini. Anee sia mariannanara Ooneesimusana rafaqa fuanee runaisia anee ianannai aqiquaidaqa.

<sup>14</sup> Sia qinee mina rafaqaqafiranannai ani dadaaqirana oonu rarisaanaura anee aneenna kai iriseenana Ooneesimusana aqiquainanoo oonurandee qinee unnannai aniani. Anee eedoo qina kai kafa maraanaura sia eedoo qinaqa kaqi marianaura.

<sup>15</sup> Nanaree Ooneesimusafa ani saikakiqari quqasee sandanau fee. Anutufa qumeenni fuki faaki qufanoo fee ani saikakiqari aqamasee quqasee maaqoo Roomma maqusai anireenoo irirana mara maree anirandeenoo naaruara amiqimasee ani faqa marianifeera Anutufa qumee mina aundururai kai saikinoofeeinai.

<sup>16</sup> Sia maaqooqari fifau ainainiranaki marifa mariannoo maasa qifaaqasaa qikaqa qimuqusimarifa asauku mundiranaki marifa mariannoo. Qinee minara uriqarara ainaina firaafee qidaqa. Doo maqee ani ainainirana faqa ani karaambaiqaki mari akaqaafasaafa faqa marinara ani uriqarara ainaina firaa ainaina mariannoo.

<sup>17</sup> Oo Fireemoona anee qiniara ani faqa moodaannaana fimarunausee qinana qiniara foora Ooneesimusana oonu mareeqee kafa aneenna saikaki quqaa.

<sup>18</sup> Indaaru mifa ani mandaikammamaqeenoo fee mifa ani munnimma mareenoo fee mina akiaqara qinee mina amianaura.

<sup>19</sup> Qinee qeeqa qisaukunnai maa akarana ridaqa qimamidaqa qinee Pauroosa mi munnimmana akiaqara ani amianaura. Qinee fifau ani qimamida anee irimariananoo. Qinee marunnanara anee mariananoo. (Anee ooqai idaki fimarunaqa qinee ani mareeqee kaqi asumu mariranaki mara quqa amaqaafanausa maridaqa.)

<sup>20</sup> Oo qini qikaqaafasaa karaambaiqara irisee amiqi amiqimmaqimaqa, anee asauku mundiranaki marianna qikaqaafasaana aanna ramasee Ooneesimusana kaifaa mareeqee aneenna saikaki quqaa.

<sup>21</sup> Qinee maa pasana akara ridaqa aniara sia qinee iraunna ainainna kai qimiannoo fee qidaqa moo faqa moo faqa qimiannoo fee qidaqa.

<sup>22</sup> Anee maa pasanakinaa ufa irisee Ooneesimusana kafa quqaidana maaqa deedaqia, qusasaa Anutufa inni innaaru qirana irisee qini iduku-sainaqa anee innannai fuanaura.

*Pauroofa ati rafaqaqafira ufa.*

<sup>23-24</sup> Eepafaraasafa asauku mundirana Yisuna ufa akiaqara qini faqa Roomma maqannaasa rumberanaki marifa mifa faqa inni nimandaidanoo qini faqa moodaannaana ainaini mariasa Mareekoofa faqa Aristarakusafa faqa Deemasafa faqa Rukaafa faqa misauqa faqa inni nimandaidaga.

<sup>25</sup> Asauku mundirafa Yisufa karaambaiqa mifa kaqi afaarirafa inni aiqamausaki mariani.

## HEEBURU MAQANNAASA

### Heeburu maqannaasa moo maqusai marusa Yisuna ufa irimarusa qimannimira ufa qimaqoona.

*Anutufa narí amaakunnai misa qimanniminai.*

<sup>1</sup> Ooqai Anutufa narí marunara moomoo kari moomoo oosanannai faqa narí tamummaqara fasiqauqannai faqa maasa Isaraee maqanna qikeeku qikaaku narí marunara naamua qimannimimarinai.

<sup>2</sup> Maa maqee inaaqianna kamu narí amaakunnai maasa qimaqiminoo. Minannai kai Anutufa maqa faqa innaaruna faqa minakinaa ainainauqa faqa auquseenoo narí amaaku aiqamausakinaana marasee rusandeesamumasee amianauree quna taikara aukwana aiqama ainaina saqama anindi kammiannoo fee qimaqoofa maridanoo.

<sup>3</sup> Mifa narí akoona Anutunasaqarara areenarana firaqoo rupan-nooidanoo mifa Anutuna oori afiri amudaani narí akoofara foora mina amanakai uqanna maridanoo, narí afeekufannai innaaruna faqa maqa faqa aiqama ainaina uqeera afeekaikamaqoofanoo maridanoo. Mifa Anutuna amaaku fannoo faiqí faiqi mandainaina maqasaa qumu anukama rukaseenoo narí akoona aqa innaarunai aiqama ainaina uriqararana asauku uqannai ooru ooqumarinai.

*Yisufa Anutuna amaaku uqanna qangiroo urinnaaqararafa maridanoo.*

<sup>4</sup> Anutufa qangiroo firaa nuqu ramaseenoo, narí amaaku auqu firaa auqu misa uriqarara auqu ranau. Mina amana kai narí amaaku qangiroo firaqoo urinnaaqararafa maridanoo.

<sup>5</sup> Anutufa maaqi qimasee narí amaakuara qinau.

Anee qini qimaaku mariananoo.

Maqee qinee ani akausaikiqa maridaqa.

Anutufa sia qangiroora mi ufana qinau narí amaakuara kai miqi qinau. Anutufa narí amaakuara moo ufa maaqi qimasee qinau.

Qinee mina akausa marianaara.

Mifa qini qimaaku uqanna mariannoo.

Sia qangiroorau miqi qinoofau narí amaaku Yisunara kai miqi qinau.

<sup>6-7</sup> Anutufa narí ooqa faiqi maa maqa maaqanaki quqarara maaqi qinau. Qini qangiroouqa aiqama mina amooqifandia foo qinau.

Anutufa qangiroouqara maaqi qinau.

Anutufa narí qangiroouqara ufaira foora auquqaiqaq maridaqa.

Mifa narí ainainira faiqi idauru miqirana qangiroouqa auqusaiqaq maridaqa.

<sup>8</sup> Anutufa qangiroouqara miqiaqee qinau narí amaakuara maaqi qinau. Oo Anutu ani ufa irira qaari naaru naaru mariannoo.

Andeeqarana namuqaq ani ququsaki mariasa rakisida marianafa mariannoo.

<sup>9</sup> Anee andeeqara oosana rimarianafa mariananoo. Anee mandainainara fidiqaa imarianafa mariananoo.

Minara kai ani Anutufa ani aqoonausakinaana rusandeesamumasee maraseenoo firaanaikamandoofa maridana asasimariananoo.

<sup>10</sup> Anutufa kafa narí amaakuara maaqi qinau.

Anee karaambaiqa mariananoo oosana aroo aukuana maa maqa maaqana oosana arasee auqunafa mariananoo.

Anee aneenna asaukunnai innaaruna faqa minaki mari ainainna faqa auqunafa marianafa mariananoo.

<sup>11</sup> Mi ainainausa doo taikafuannoo aneenna kai kaqi marinnaranoo mi ainainausa ooqai mariu qamunnara foora ooqeenafaikamafinoo afauqaqaannoo.

<sup>12</sup> Aiqaama qamunna fuka mari ifanoo nauraanaikidanoo faiqi mina raqandaamma quqasee fuka akidaqa. Maa maqa maaqana faqa innaaruna faqa anee auquqoonafa miqi kai inoo qamunnara foora nauraanaikinana raqandaama quqasee fuka mareennaranoo.

Anee sia qamunnara foora sia nauraanaikinnaranoo anee naaru naaru marianandee kai ina marinnaranoo.

<sup>13</sup> Anutufa narí amaakuara kafa maaqi qinau.

Anee maaqoo qiqa daqa qisauku uqannai ooqumari finaqa ani namuqaa narusee oonumafi ani aramandunnai quqaanaura.

Sia qangiroora miqi qinau. Narí amaakuara kai miqi qinau.

<sup>14</sup> Qangiroouqa naqi fee iqa maridee. Misa aiqama marauna kai maridaqa Anutuna ainainira ainaina maridaqa. Mifa innaarunaindari niqiqainaqa faiqi anaasee innaarunai fifandinausa dadaaqaqeeera niqiqaidanoo.

## 2

### *Asumu maree fandinna ufana amiqimmandee rakisi qumaraaqa.*

<sup>1</sup> Minara maasa anoona ufa irimariafannufana qumareeqa amiqimma rakisi qumaraanuranoo. Sia miqifanoo maasa nammariara foora aufinoo maasa maree fuandoora.

<sup>2</sup> Ooqai qangiroo qimannimu ufafa kuqaa anoonaike marinou. Qangiroouqa ririmma innaarunai ureeqarousa maridaqa faiqi moo fannoo misa ufa irisee rukiasoofanoo Anutufa mina akiqara narinou.

<sup>3</sup> Magee innaarunai firaafa uriqararafa maasaki ani maridanoo. Mifa maasa qumareeqee asumu marirana qimiraree qidanoo. Maasa mi fira ainainnara iriseeqa minniseeqa naqi fee mandee Anutunara rufiasee yaiffee fuanauree. Sia amana, kaqi darirafa kai firaafa mariannoo. Karaambaiqa narí uqanna oosana arasee narí innaarunaindaraa asumu qimiranara narí faiqi namu qimannimisoofaqa irisee quandaki maasa qimaqimiafaqa kuqaa fee qimasee iridaqa.

<sup>4</sup> Maasa sia misa ufa kai irisee kuqaa fee qidaqa Anutufa misa ufa dadaaqammasoofaqa faiqi sia amana auqaaqaa ira ainainna fira ainaina oosana oosana faiqi anaasee dadaaqimaru ainainna auqusoofaqa maasa mina qafeeqa kuqaa fee qidaqa. Anutufa narí iriranannai kai narí maraqunannai kai oosana oosana fasiqa anaasee dadaaqira akoofasaikirana faiqi anaasee nimirou. Miqunnannai faqa maasa innaarunaindaraa asumu marirana qimianinnanara kuqaa fee qidaqa.

### *Maasa asumu qimimaruna oosanara qu ufafa.*

<sup>5</sup> Maasa naaru fuka anianinna maqa maaqanara qidaqa. Anutufa sia qangiroora innee minasaa rakisiaqee qinau. Faiqi faiqi maaqoo qaraasa kai minara rakisiaqee qinau.

<sup>6</sup> Ooqeenaa tamummaqarousa akara minara maaqi qidanoo. Oo Anutu, faiqi nanee mariafanee anee misara iridanee, kaqi fifau fasiqara minaree ani amuqusidanoo fee.

<sup>7</sup> Anee faiqí auqeeqeenana qangiroo ameemaanai qusa aukwana qusa kamu quqaananoo.

Anee kaaqa qarana faqa uriqararana faqa Karaambaiqara foora marirana nimiananoo.

Maa maqanasaa ainaina aiqama uqanna uriqararanaikirana Anutufa nimi-ananoo.

Tamummaqara fasiqa ufa miqi qimaqoofa maridanoo.

<sup>8</sup> Mi tamummaqara fasiqana ufa maaqi qidanoo.

Anutufa maa maqanasaaqaraa fasiqara innee aiqama ainaina uriqararansa mariaqee qinau.

Sia akaqa ainainara kaifau qinoofau. Aiqama ainainara qinoo. Maasa maqee qafaidaqa sia maqasaa fasiqa faiqifau aiqama ainainara uriqaraidaqau.

<sup>9</sup> Maasa quandaki Yisuna kai qafaidaqa. Anutuna afaariranannai kai Yisufa naaru asumu marirana qimiraree qimaseenoo maasa faiqí faiqi kuqirana narí faqa maraani qimaseenoo qangiroo nimeemaanai qusakamuqoo qumu maridanoo kuqunnimaqanau. Maqee mifa kaaqa qara qafee faqaafa, kuqaa firaqoo uriqararafa maridanoo. Mifa kuquna faqa aupuroona faqa mina akiaqara innaarunai firaafa maridanoo.

<sup>10</sup> Anutufa aiqama ainaina auqufa rakisinoo fimarifa maridanoo. Mifa aupurarana aidafirana Yisuna afaaqasaa quqoofa sia manda oosanau quqanau. Amiqira oosana andeeqara oosana mareenoo miqinau. Anutufa Yisunara andeeqara anoona marianifeera quandafinoo faiqí narí uriqararana naida nimianifeera aunirira saqarisaa aupurarana Anutufa aminau. Narí Yisufa mifa kai faiqí faiqi innaarunai asumu mariaqeera aana afisufa maridanoo.

<sup>11</sup> Yisufa faiqí faiqi maraseenoo narí mandainaina findaukamaseenoo anukaranaki quqannisee marifa maridanoo. Mifa faqa ninukamaqaisa faqa moodaa nikoona faqaasa marianara Yisufa misara sia asauridanoo qini qikaqaafasaa fee qidanoo.

<sup>12</sup> Yisufa minara maaqi qimaqoofa akaraki maridanoo.

Oo Anutu aniara qeeqa qikaqaafasaa qimannimianaura.

Qinee faiqí suquseeqa misa nifusaa ani amooqianaura.

<sup>13</sup> Kafaa moo akaraki maaqi qidanoo.

Qinee qeeqa irirana Anutunasaa rusianaura.

Kafaa moo akaraki maaqi qidanoo.

Doo qinee maaqoo maridaqa Anutufa qimu faiqi anaaqisa misa saimbaqa maridaqa.

Akarakinaa ufa miqiminoo maridanoo.

<sup>14</sup> Yisufa maqasaa fasiqa anaaseera narí faiqi aanaaqi fee qidanoo. Mi faiqi anaaqisa nimaqi faqaasa fidika faqaasa maa maqanasaaqaraasara Yisufa qidanoo. Yisufa narí uqanna qumureenoo faiqi aanaaqi Mariana aranandaki maasa faiqí faiqi fidika qimaqi mareenoo innooqanau. Mifa sia fifaufau miqinau. Narí kuqiranannai kuqirana rakisirana Sadannana rafaafuseenoo maasa qimaqi faqa fidika faqa maranau.

<sup>15</sup> Yisufa kuqirana rakisirafa Sadannana rafaafuseenoo aanaaqisaaqari kuqiranara rufisee rumbaqa maria fasiqa anaaseesa idukunnisaaneera kuqunnimaqanau.

<sup>16</sup> Sia Yisufa qangiroouqa dadaaqidanoo. Faiqí faiqi dadaaqidanoo mifa akooqoo maridanoo. Moo akara fannoo minara maaqi qidanoo. Mifa Abarahaamana aiku asaku dadaaqimarifa maridanoo.

<sup>17</sup> Yisufa narí akaqaafasaa uqa maa maqanasaqaraaasa dadaaqianee qimasee amiqimmandee misara maqi qiara mambiqa amiqimmandee misa aanaiqikianeera miqinau. Sia fifau Anutuna ainainira aanaiqikirafa mariannoo maqee maqee narí akaqaafasaa nifau ee marianinafa oori runusee miqoo kai marianinna aanaiqikira uriqararafa mariannoo. Anutufa faiqi anaasee mandainaina minnisaanifeera Yisufa miqinau.

<sup>18</sup> Indaaru Yisufa aupurarana aidafirana Sadannafa nimanamandee qafarana faqa doo amanamandee qafamaseenoo uriqaroo fa maridanoo. Maqee minara maasa amiqimmandee dadaaqidanoo mifa doo mina oosana qafoofa irufa maridanoo.

### 3

#### *Yisufa Mooseena uraaqararafa maridanoo.*

<sup>1</sup> Qini qikaqaafasaa innisaimbaqa Karaambaiqa aiku oosana marunausa maridaqa innee faqa qinee faqa Anutufa daarama quqasaifaqa ani mariasa maridaqa. Innee Yisuna qafaqa qafaidaqa oonumafi iriaqa Anutufa aqiqamaqoofa maridanoo. Maasa qimarunna amaana ufana aanaiqikira uriqararafa marianifeera aqiqamaqoofa maridanoo.

<sup>2</sup> Ooqai Mooseefa Anutuna aiku asauku Isaraee maqannaasaki aiqama ainaina auqee maruna miqoo kai maridanoo oori runusee andeeqanoo kai marinau. Yisufa miqikai maseenoo narí asauku mundusee aqiqoofa Anutunara iriseenoo mina ainainirana andeeqaidanoo aidimarufanoo marinau.

<sup>3</sup> Faiqi misa fuka maaqa qafamasee sia maaqa amooqidaqa faiqi maaqa usakai fasiqana kai amooqidaqa. Miqikai iqa, sia Mooseena amooqiaqa. Mifa fifau maaqa maridanoo Yisuna kai amiqimasee firaqoo amooqiaqa. Mifa maaqa usakee marifa anoona uqanna maridanoo.

<sup>4</sup> Sia maaqa moo fifau kambiqaidanoo. Aiqama maaqa usakeemarifa kai usakaidanoo. Anutufa mifa aiqama ainaina auqee marifa marifanoo Yisufa Anutuna ameemaanai maaqa usakee marifa marinara Mooseena uraaqaranoo maridanoo.

<sup>5</sup> Mooseefa Anutuna aiku asauku Isaraee maqannaasaki maqee maqee miqoo kai maridanoo oori runuseenoo andeeqanoo kai marinau. Mifa Anutuna ainainira faiqi maridanoo. Anutufa qimannimianinna ainainara faiqi anaasee qimannimimarufaqa irimariqau.

<sup>6</sup> Yisufa sia kaqi ainainira faiqi maridanoo. Isaraee maqanaasa nikoofa amaaku uqanna maridanoo. Mifa Anutuna aiku asauku maqasaa mariasa rakisinnimaqee marifa miqoo kai mi saikanaki marifa andeeqasee misasaa rakisimarifa maridanoo. Maasa naaru naaru Yisuna saqarikidaqa minara asasidaqa paasoosidaqa miqidaqa maasa Anutuna faiqi namu mina aiku oosana marunausa maridaqa sia miqidaqa sia mina aiku asauku marunaiqini.

#### *Anutuna ufa irimariasa idooaranara naakapaidanoo.*

<sup>7-8</sup> Anutuna naaquqara andeeqara maraquna fannoo maaqi qidanoo. Innee maqee Anutuna ufa iriaqa inni saimbaqa Isaraee maqanna nin-  
ausa nikausa ooqai aadana maqa maaqaki fidaqa ititammasee ufa rukioondee innee siammiaqa. Misa Sinai aadana maqasaa Masaa maqasaa faqa Meeribaa maqasaa faqa nammari sia marunara Anutuna amanamandee qafaida naundaufa naundaufa qiqau.

<sup>9</sup> Minara Anutufa maaqi qinau.

Inni nikausa ninaakusa qini qimanammasee qafararee qimasaida munari minari idaqa qini qimaniqau.

Qaara fasiqa aiku asaku taikasee aukuana aiqama amiqira ainaina quqan-nifiqaafanaqa qafeeqa mina minniseeqa quandaki moo ainaina kai mareemariqau.

<sup>10</sup> Qinee minara iriseeqa qafamaseeqa maa Isaraee maqannaara qiranaqaidanoo.

Qinee maaqi qimasee niqidaqa.

Misa irirafa fifau faafau qidanoo aaqaidanoo.

Misa kisaagasaa qini faqa anidaqa sia qini oosana qafeeusa.

<sup>11</sup> Qinee minara iranaqaifaqa maaqi qimasee qimafeekaikiqiafana.

Sia uqanna misa qini faqa anusufiqa adooefaranoo.

Anutuna ufa miqiminoo marifaqa qinee minara maaqi qidaqa.

<sup>12</sup> Qini qikaqaafasaaqau, innee amiqimandee rakisiaqa. Moo fannoo narí mandiriranannai faqa narí ufa rukiee marinannai faqa narí amuqusaki marinara kaqi marira Anutuna nimeesa uqamaqeefoora.

<sup>13</sup> Maa aukuanasaaqau innisaimbaqa kaqikai maridaqa maa ainainnara rakisiaqa, faasaambaasaana narí pooduqe narí pooduqe imariana. Innikina moo fannoo narí mandoosana fannoo rarisameeqee Anutuna ufara sia irianaki quqaandoora eerairiaqa.

<sup>14</sup> Maasa indaaru paasoosamandee Yisuna qumareeqa. Mageendari maqeesaa paasoosamasee Yisuna qumareeqa mina kai afaqaqa fifi inaga taikainna aukuana qumarainaqa maasa mina faqa moodaanaki ainaini marunausara maqi mafiqa mina qumaraanaura.

<sup>15</sup> Anutuna akara maaqi qidanoo,

Innee maqee Anutuna ufa iridee sia fee iridee iriqa sia ooqai undee iaqa.

Ooqai inni saimbaqa ninausa nikausa aadana maqa maaqaki Anutuna ufa irisee aanoo qidaqa mandufa qima rukiasee naaqoo siaisa mari-undee sia maqee innee miqiaqa.

Anutuna akara miqiminoo marifaqa qinee minara maaqi qidaqa.

<sup>16</sup> Yau yausee Anutuna ufa irisee ufa rukiasee nimeesa uqiqa. Mooseefa Isipa maqanaindari nifiqee anusa misa kai miqiaqa.

<sup>17</sup> Yausaree qaara fasiqa niku nisauku taikasee aukuana Anutufa aanoomannimaqaannoo fee inau. Faiqi anaasee ufa rukiasee mandoosana maree marusa aadana maqasaa oonuree kuqu taikoosara misara kai aanoo qinau.

<sup>18</sup> Anutufa misara maaqi qinau,

Qini faqa anusufinausa sia uqanna qini faqa adooefaranoo.

Anutufa miqi qimasooafaqa qinee minara maaqi qidaqa. Mifa yausaree miqi qinoo fee. Mifa narufa iriseenoo rukiee marusara miqi qinau.

<sup>19</sup> Maqee maasa mina qafamasee maaqi qidaqa. Sia naundura nimuqusa Anutuna ufasaa rusunara minara misa sia fuka maqa maaqaki Kannaa maqa maaqaki adooaranaki fiqa. Kaqi aadana maqa maaqaki kuqiaqa.

## 4

<sup>1</sup> Maqee maa aukuanna Anutufa maaqi qimasee qima afeekaikamma maasara qinau, Amana innee qinisaimbaqa qini amiqira adooqaranaki ani keeqafiqa qinisaimbaqa qidooaqee qinau. Doo innisaimbaqa Anutufa aniaqee qimaqoo ufafa taikaandoora doo kaqi mariqoo amiqimasee rakisi qumaraaqa, sia keeqaannoo qimasee minara rufiaqa maasaki moo

mandainaina fannoo maasa qumarainaqa maasa sia mina adooaranaki keeqaanoora.

<sup>2</sup> Ooqai inni saimbaqa Isaraee maqanna ninausa nikausa Anutuna ufa iriqau. Maasa maqee doo irimmaseeqa amiqira fasaasa ufa maridanoo. Indaaru misa mi ufana iriseeqa aqummasaqau. Misa mi ufana naaqoonnai iriseeqa sia naundura nimuqusanai mi ufana qumaraqau. Sia minara kuqaa fee qimasee minasaa irirana rusiqau.

<sup>3</sup> Maasa mi fasaasa ufana Anutufa qimafeekaikunara kuqaa fee qimasee minasaa rusiqqa marunnanara maasa kuqaa Anutuna faqa keeqaidaqa mina adooaranaki adooaida adooaanaura. Mifa minara maaqi qimasee akaraki qinau.

Qinee Anutusa maaqi qimasee aanoo qima afeekaiki afannana.

Naaru naaru misa sia uqanna qini idooaranaki qini faqa keeqafi idooeefaranoo.

Anutuna ufa miqiminoo maridanoo qinee minara maaqi qidaqa. Ooqai oosana aroo aukuana Anutufa kuqaa aiqama ainaina doo auqu taikasee adooamasee nari adooarana faqa quqannimaqasoofaqa irirana rukiasee sia keeqee sia iriqau. Anutufa minara iriseenoo sia kaqi fuagee qinau, kaqi mifa maridanoo sia uqanna amana misa keeqeefaranoo kaqi kai qafa.

<sup>4</sup> Akarakinaa ufa moo qisauku taikasee dinni ani qaara marasee faasaanara maaqi qidanoo.

Anutufa nari kadaapirirana oosana oosana mi faasaana quqasee adooanau.

<sup>5</sup> Akarakinaa ufa moo idooaranara Anutufa maaqi qinau.

Misa naaru naaru qinee maqa maaqa nimiannanaki, idooarana nimiananaki sia qini faqa keeqafi idooeefaranoo.

Anutuna ufa miqinoo marifaqa qinee minara maaqi qidaqa.

<sup>6</sup> Indaaru marusa misa Anutuna amiqira fasaasa ufa irisee sia mina idooaranaki keeqaqau. Nariqa ufa sia irunnannai sia idooaranaki keeqaqau. Akaqausa Anutuna faqa keeqeefandinausa marianara moo keeqaaninna faasaana quqasee maqee kamuqoo fee qinau.

<sup>7</sup> Indaaru aukuanasaqari mi kamuqoo sia Anutuna ufa iriqau. Dafidifa kambiqoo aukuannai Anutufa Dafidina qimamufanoo maaqi qimasee akara rinau.

Maqee maa faasaana innee Anutuna ufa iriseeqa sia ititiaqa sia mana mana irirana iriaqa.

Dafidifa mi ufana akara rinau.

<sup>8</sup> Yoosuafa Isaraee maqannaasa nifleeqeenoo Yooradanna nammari taqamareenoo nari fuka maqaki idooaranaki quqannisanau. Anutufa sia mi idooaranarau qinau, moora qinau, Yoosuafa Anutuna adooaranaki quqannisainanoofau Anutufa sia moo faasaanara qini.

<sup>9</sup> Mi moo faasaanafa kaqi maridanoo, Anutuna ufa irimaria fasiqa anaaseesa maqasaaqaraasa minaki keeqeefaranoo. Ooqai indaaru Anutufa aiqama ainaina auquseenoo qisauku dinni ani qaara maraseenoo amiqimasee idooanau. Mina fooqaa idooarafa kaqi marinaki Anutuna ufa iri maria fasiqanaaseesa keeqeefaranoo.

<sup>10</sup> Faiqi anaasee moo fannoo Anutufa mariqoo keeqafinoo idooainafa mi fasiqa anaaseesa nari ummaara afaimma quqaseenoo amiqimma adooeefaranoo. Anutufa nari kadaapirirana minniseenoo idoo oondee mi fasiqa anaaseesa faqa miqikai iqa nari kadaapirirana afaimma quqaseeqa amiqimasee adooeeqa Anutufa undee ifaranoo.

<sup>11</sup> Minara maasa sia ufa rukiasee manoo manaa iqanuaqa nimudaanai qimasee Anutuna faqa narí adooeemarinaki keeqaaqa. Sia moo fannoo maasaki ufa rukiasee innisaimbaqa Isaraee maqanna ninausa nikausa naanna ree kaqinni aqufuaqa.

<sup>12</sup> Anutuna ufa sia fifau ainaina maridanoo, afu maqee marifa kasimarifa maridanoo. Aseema miqirafa kaaqa dinni dinni firaaqoo raiqarafa naundurari ateekeemarifa maridanoo. Faiqí nimana faqa maraquna faqa moodaanaki marinaki miqoo faqa fimarifa. Nimudaani aqumu faqa akikimana faqa ruqiasee miqoo faqa fimarifa maridanoo. Faiqí naunduraki faqa nimuqusaki faqa nidimarina faqa oonumafi irimariana faqa minauqa faqa qafeenoo rainee marifa maridanoo.

<sup>13</sup> Sia Anutuna afusaa moo ainaina kukeeqarana amana, sia amana miqiannoo. Aiqama ainaina faiqí anaasee Anutufa auquqoo ainainausa kai marinara narí afusaa akoosaqa akooqoo uqanna maridanoo. Maasa mi Anutuna afusaa qeeqa marunnanara andeeqaranara faqa aaqaranara faqa ufa qianaura.

*Aiqama aanaiqikirausakiqari Yisufa firaaqoo uriqararafa.*

<sup>14</sup> Maasa aanaiqiki maria fasiqausa uriqararafa Anutufa narí mariqoo uqanna keeqafi maridanoo. Mi fasiqafa Yisufa Anutuna amaaku marinara maasa Anutuna amaana ufa qumaraunnana amiqimasee qumaraaqee qidaqa.

<sup>15</sup> Maasa aanaiqiki maria fasiqausa uriqararafa maasa daunduraki ummaaree marifaqa maasa kudoosaapee marunnana sia sia qafee marifa maridanoofau, qafee marifa maridanoo. Sadannafa aiqama ainaina amanamasai fanoo sia mina qumaraifa qafamaqai fa kai maridanoo, minara kai maasara qimudao qimasee amuqusidanoo.

<sup>16</sup> Minara maasa mifa daruaninnanara faqa sia rufia rufiaqiqa paasoosamasee mifa mari qaarinasaa oonu reera foora nári nifauenoo amuqusianinnanara faqa qimianne qiaqa. Miqoo kaqi nimirafa kaqi dadaaqirafa miqoo maridanoo. Maasa miqoo oonuraananoo Anutuna afauarafa amuqusirafa maasara mariannoo. Maasa ummaara faqa sa-rauqirana faqa darinnanara mifa dadaaqiannoo.

## 5

<sup>1</sup> Maasa Heeburu maqannaasa faiqí misa aanaiqiki maru fasiqausa uriqararanara randasee paqurimmeqee faiqí anaaseesaaroo qianifeera Anutuna ainainiranaki quqaidaqa. Miqooqari mi fasiqafa faiqí anaasee mandainaina rukasainanoo Anutufa sia naruaninnanara iriseenoo maqee maqee amirainaina faqa aandau aruseenoo Anutuna tatufu suqa amirana faqa amidanoo.

<sup>2</sup> Mi aanaiqikira fasiqafa faiqí faiqi maridanoo narí faqa amanna marinara faiqí anaasee furufammasee aqee marianara amuqusinanoo amana dadaaqiannoo.

<sup>3</sup> Mi aanaiqikira fasiqafa mifa faqa faiqí kai maridanoo aqee marifa marinara, sia faiqí anaaseera kai aandau arusee tatufidanoo narí mandainainara faqa rukaanifeera nariara faqa Anutuna tatufuamidanoo.

<sup>4</sup> Sia faiqí moo fannoo naríara uriqarara saikaki keeqaanauree qimasee naríara aanaiqiki mariasa uriqararafa maridanoo. Anutufa qifa kai aanaiqiki mariasa uriqararafa maridanoo. Mooseena afasaafa Aaroonafa ooqai miqi kai inau. Anutufa Aaroonaa aaroonafanoo aanaiqikinau.



<sup>5</sup> Yisufa asauku mundirafa miqi kai masee sia narí kai nariara uriqarara aanaiqikinau. Anutufa qunara kai miqinau. Mifa maaqi qimasee qimaminau.

Anee qini qimaaku mariananoo.

Maqee faasaana qinee ani akausaikammiqa maridaqa.

<sup>6</sup> Miqi qimasee Anutufa kafaa maaqi qinau.

Anee naaru naaru marinafa aanaiqikirafa mariananoo.

Anee Meerakiseedeekana atiara foora marianafa mifara foora naaru naaru marinnaranoo.

(Ooqai Meerakiseedeekafa Sareema maqusanaasa Anutuna faqa faiqi anaasee faqa aanaiqikirafa marinau.)

<sup>7</sup> Yisufa maa maqanasaa Keetaseemane saqamaki maridanoo aunirira saqarisaa kuquaninnanara Anutunara innaaru qidanoo qaoo qimirinau. Innaaru qidanoo firaqoo faqa rumaseenoo ikiraqaseenoo kuquaninnanara qaoo qimirinoo innaaru qinau. Anutufa mina reendeenirana qafamaseenoo mina aundura Anutufinnai ubeekaranara iriseenoo mina innaaruqirana iriseenoo dadaaqinau.

<sup>8</sup> Yisufa nariara sia Anutuna amaaku fee qimasee mana maninau. Oosana oosana aupuraranannai Anutuna ufara aqee kai eedoo qira oosana irinau.

<sup>9</sup> Mifa aupuraranakiqari amiqiranaikamambinoo quandafi narí ufara eedoo qimarusa naaru naaru marirana oosantaraseenoo niminau.

<sup>10</sup> Miqimasoofanoo Anutufa minara maaqi qinau.

Anee aanaiqiki mariasa uriqararafa marianafa mariananoo. Anee Meerakiseedeekana fooqaafaikamambinana marinnaranoo.

*Innee faiqi irirana maraaqaana faiqi aanaaqiara maqi qimariafanoo.*

<sup>11</sup> Anutuna ufa narí amaakuara miqiminoo marifaqa qinee maa ufana inni qimannimidaqa. Maa ainainna afeeka ainaina maridanoo oosana oosana ainaina faqa inni qimannimianee qimasaunaga innee anuqimariasa mariafanoo.

<sup>12</sup> Innee faqa maqee faiqi uqannifiqaaqaana. Innee Anutuna akarakinaa ufa oosana ainaina faqa sia amiqimasee iri mariafanoo. Innee moosa qimannimiaqaqoo sia amanaiki mariafaqa moosa inni qimannimidaqa. Innee ooqai narana uqanna naaqaana mariafanoo innee naamma naidara maqi kaimmimariafanoo sia innooqarausara foora mariafanoo.

<sup>13</sup> Naamma neemariasa faiqi aanaaqi kai mariafanoo sia anoona ainaina manda ainainara rainasee iriaqaamminoo maridanoo.

<sup>14</sup> Narana uqanna faiqi anaasee narana maridanoo. Misa doo akoofasa mariafanoo nimaakirisaa quqasee qafaidaqa mandaikinnana qafeeqa amiqirana qafeeqa miqidaqa akoofasa maridaqa. Innee faqa miqiaqaana. Qinee narana kikiqusidaqa amaana ufa qimannimira oosana miqiminoo maridanoo. Akoofasa fannoo iriseenoo rainaidanoo amiqiranara iridanoo mandaikiranara minnisaidanoo. Faiqi aanaaqi fooqaa fasiqa mifa mandaikiranana faqa amiqirana faqa kaqi naannoo.

## 6

*Anutuna ufara irimariasa kaqi runna firanara aaquqimannimaqara ufa.*

<sup>1-3</sup> Maasa sia maqee marunnaqoo oosanki kai maria, maqee doori mundusaannaqoo qambaanaira foora fua. Yisuna ufaki oosana ainaina aanaaqi kimarunnana inaaqiannai mafi quqasee doo maqee oorisa fua-naura. Maasa qeeqa fifau aaqara oosana kadaapiriranannai innaarunai firaree qimarunnana mina minniseeqa Anutunasaa mundufuafannana doo

maasa minara irimarunafa maridanoo. Nammari nimirana faqa asauku nikaafa mundusee nifaaqooqa qirana faqa kuqiranakiqari findifirana faqa naaru naaru idaki fimariana faqa doo irimariafanoo. Sia kafa kafa aanaaqiara foora naamma kai naidara foora ooqai iri maru ainainara kai kaifaa kaifaa minara kai iriaqa. Anutufa dadaaqimarinaga maasa noorisaa findifinaqa indaarura foora fidaqa maqee maqee Anutuna ufakinaana fuka iriseeqa mi mau fuanaura.

<sup>4</sup> Anutuna ufamau fimariasa quandaki kaqinni aqufiqa naqi fee mandee aupuramasee quandakinaqa kafa fifaree. Sia amana miqifara. Misa ooqai Anutuna qoomasaa fimariasa, misa innaarunaindaraa narana naidara foora imariasa maridaqa Anutuna naaquqara andeeqara maraquna mareemariasa.

<sup>5</sup> Misa Anutuna ufa amanamandee qafamasee amiqira ainainara irimariafa maridanoo. Kasooqagee Yisufa kafa qumuaninna aukuanaki kambiqaaninna afeeka atiara irimariasa maridaqa.

<sup>6</sup> Misa mi ainainausara nikooqaifaqa kaqirunna fidaqa sia amana misa kafa aupuramasee quandakinaqa kafa Anutuna aanai ubeekeefaranoo. Misa miqimariasa Anutuna amaaku kafa aunirira saqarisaa quqasee pirimma aridaqa miqidaqa aiqamausa nifusaa asaurirana amidaqa miqimariafanoo.

<sup>7</sup> Anutufa maqa dadaaqidanoo aaku quqasaifanoo ridanoo maqasaa ainaini mariasa dadaaqidanoo narana minakiqari kambiqaifaqa neemariafanoo. Miqi kai masee faiqi anaasee Anutuna ufamau fimariasa misa Anutufa misa amiqi amiqiannoo.

<sup>8</sup> Nimmuru faqa mandainaina amuka faqa mi maqanasaa kambiqafinanoo Anutufa qafamaseenoo fifau maqa maridanoo, qusasaa qinee mi maqana aquraraseeqa idakikai aquanauree qinau. Anutuna ufa minnisee mariasa miqi kai masee ida kai qamataikeefaranoo.

<sup>9</sup> Maasa qiqoondi maasa inniara iridaqa, innee sia mina ufa minnisee mariasa mariafanoo. Innee Anutuna saqarikidaqa innaarunai asumu maree mariasa mariafanoo minakinaa amiqi amiqirana uriqararana innindi miqoo nifeedamma nimaqaqaifanoo maridanoo.

<sup>10</sup> Anutufa sia qaaraiki marifa maridanoo, andeeqasee amana amana kai nimirifa maridanoo. Mifa sia innee kadaapirinnana akiaqara aunuanoo, iridanoo. Innee Anutunara nidinara quandaki inneeqa niqoonausa Yisuna ufa irimariasara amiqimaseenoo nimuqusinaqa kaqi dadaaqifanoo Anutufa minara faqa sia aunidanoo, iridanoo mina akiaqara inni nimianoo.

<sup>11</sup> Maasa inniara maaqiaqeera inniara ridaqa. Inni Anutunara nidirafa asarafa kasirafa miqiqa fifi inaqa taikainna aukuaana kai mafi taikaqa. Innee miqifanoo inni naundurakinaa nidirafa kuqaa anonaikiannoo.

<sup>12</sup> Maasa innee kudoosaapee foora qikooqaidanoo. Akaqausa nari irirana Yisunasaa rusiranannai faqa ubiqasee reendenamasee marirana niranannai faqa ooqai Anutufa qima afeekaikammasee nimira naundura gumiasana doo maree mariafanoo. Maasa inniara misa naanna ramasee maridaqa naundura gumiasana maraageera qidaqa.

*Anutufa qima afeekaikamaqoo ufafa afeeka naaruara marianinnufafa.*

<sup>13</sup> Ooqai Anutufa Abarahaamanasaa qima afeekaikammaqoona asauku uqeeraseenoo kuqaa miqianauree qimaqoona. Sia mina uriqararafa marunara nari asauku uqeeraseenoo yana auqu fee raanauree qusia nari auqu kai ramafeekaikinau.

<sup>14</sup> Mifa maaqi qimasee Abarahaamana qimaminoo qinau. Qinee qima afeekaikammasee kuqaa amiqi amiqianaura. Ani aiku asauku akeeku akaaku faiqi maqannimaqai faqa moomoo kambiqafi maa maqanasaa amanaikiqa marifaranoo.

<sup>15</sup> Anutufa miqi qimasoofanoo Abarahaamafa mi ufana anoonara kisaagasaa reendeenamasee afeesida marufanoo kasooqagee uqanna Anutufa qimamu ainainafa koorooinau.

<sup>16</sup> Faiqi moo fannoo qima afeekaikianee qimaseenoo asauku innaarunai uqeeraseenoo nariara urinaaqarara auqu ramaseenoo qima afeekaika maseenoo doo ufa qimaqoofa taikaidanoo.

<sup>17</sup> Inaqaqianna kambiqee mariasaki Anutuna qima afeekaikira marirana anoona mareefandinausa sia qini Anutusara qeeqa qima afeekaikiranara minnisee maqi qiaqera misa qiniara kuqaa uqannee qimasee qiaqera kooroomasee sia kai fifau qimafeekaikinai, nari auqu faqa ramaseenoo qimafeekaikinai.

<sup>18</sup> Doo minara iriseeqa qaara ainaina, afeeka ainaina innikina kaqi mariannoo sia taikaannoo. Mi ainaina qanda moo ainaina Anutuna qima afeekaikirafa maridanoo. Moo ainaina Anutuna asauku uqeerarafa maridanoo. Mi ainaina qandara Anutufa sia amana unna qirafa mariannoo. Maasa Anutuna saqarikidaqa mina asumu mariranaki mariasa Anutufa maasa aranaiqi fuki faaki qidanoo maasa daikisaa marianinna innaarunai mariranara asasidaqa afeesidaqa mariaqera qidanoo.

<sup>19</sup> Maasa Yisunara asasira afeesirafa maasa qimuqusa sandara foora rakisiquumarainaqa mapukufi marifara. Yisunara asasira afeesirafa afeeka sandara foora sia rakeirafa amiqirafa maridanoo. Maasa maa maqanasaa maqoo marunnaqooqari mi sandafa firafa Anutuna naaquqara amaana maqaki firaa ititara qammunna tapooqaidanoo Anutufa innaarunai mariqoo kukeeqara maqaki miqoo dinni ati rumbanoo maridanoo dinni ati maasa maqasaa rumbanoo maridanoo maasa atukaramma qimaqaidanoo.

<sup>20</sup> Yisufa miqoo maasasaa roo qimasee maasa doorinni indaaru ooru fufa maridanoo. Mifa miqoo aanaiqikirafa firaa uriqararafa naaru naaru marifa Meerakiseedeekana aanna rarafa maridanoo maasa kaqi dadaaqidanoo.

## 7

### *Ooqai aanaiqiki maru fasiqa Meerakiseedeekanara qira ufa.*

<sup>1</sup> Meerakiseedeekafa Sareema maqanna karaambaiqa marinai. Innaarunai uriqarara Anutuna karaambaiqa aanaiqikirafa faqa marinai.

(Indaaru namuqaa karaambaiqa moomoo qumuree Soodooma maqannaasa faqa Koomoora maqannaasa faqa misaqa marusa naruseeqa misa ainaina sipsipa burimakau faiqi anaasee aiqama rumbaidaqa Rootana faqa rumbamaree nifiqee fiqau. Abarahaamafa minara iriseenoo nari ainaini marusa nifiqeenoo nifaqeeufanoo aanai oorumara naru nifaqaaqamma-mareenoo oonu paqurimaseenoo naru taikeenoo maindaraasa rumbee ooru fusa faqa misa ainaina burimakau sipsipaina Rootana faqa mareenoo oorurandee quminai.)

Qumimarufanoo aanai Meerakiseedeekafa Abarahaamana paqurimandeenoo afaaqooqa qinau.

<sup>2</sup> Qimasoofanoo Abarahaamafa rakiranaki maraqoo ainaina raineeqeenoo kaqikaana Anutuna amidee qimaseenoo mina aanaiqikirana Meerakiseedeekafa marufanoo aminai, Anutunara dufi dufi qida fee qimasee Meerakiseedeekana kaqikaana aminai. Meerakiseedeekana auqu oosana

andeeqara karaambaiqee qiqau. Mina maqusa auqu Sareema maqusa mi auquna oosana asoora maqusafee qiqau. Minara mi fasiqafa andeeqarana faqa asoarana faqa karaambaiqa marinau.

<sup>3</sup> Meerakiseedeekana aanaakuna akoona anoona misa oosana sia maasa minara iridaqa, sia akara rumaqoo maridanoo. Mina maqoo aukwana faqa sia iridaqa mina kuqira aukwana faqa sia iridaqa. Miqinoo marifaqa maasa Yuda maqannaasa oosana marasee minara Anutuna amaakummi maqi qidaqa naaru naaru marufa maridanoo fee maasa qidaqa. Mifa naaru naaru Anutuna aanaiqikirafa marufa maridanoo fee qidaqa.

<sup>4</sup> Doo Meerakiseedeekana qafaqa, faiqi uriqararafa faiqi firaafa marufanoo Abarahaamafa maasa qiikeku qikaaku fannoo rakiranaki maroo ainainna mina aminau. Abarahaamana uriqararafa marunara miqinoo rainaminau.

<sup>5</sup> Anutufa minara iriseenoo Reefina aiku asauku mareeqeenoo Isaraee maqanna faqa Anutunara faqa aanaiqikiranaki quqaseenoo maaqi qimasee qimanniminau. Innee inneeqa nikaqaafasaa Isaraee maqanna qimannimifaqa aukwana aukwana nari narana ainaina kaqikaana raina nimiaqee qinai. Reefina aiku asauku Isaraee maqannaasa aanaiqiki-marusa Abarahaamana aiku asauku maridaqa. Nari niqoonausa Isaraee maqannaasa misa faqa Abarahaamana aiku asauku kai maridaqa nari narana ainaina rainasee kaqikaana Reefina aiku asauku nimiqau.

<sup>6</sup> Abarahaamafa Anutufa qima afeekaikamaqoo ufana irimarufa marufanoo uriqararafa marufanoo. Meerakiseedeekafa Anutuna aanaiqikirafa sia Reefina ati marufa maridanoo Abarahaamana uriqararafa maridanoo mina afaaqooqa qinai. Miqi qufanoo rakiranaki maraqoo ainaina kaqikaana raineeqee mina faqa aminau.

<sup>7</sup> Nifaaqooqa qimaria fasiqausa sia manda fasiqa fannoo nifaaqooqa qidanoo. Faiqi uriqararafa auqu faqaafa akooqoo marifa mifa kai nifaaqooqa qidanoo, ureeqarusa nifaaqooqa qimannimaqaidaqa. Minara Meerakiseedeekafa Abarahaamana uriqararafa marinai.

<sup>8</sup> Abarahaamana amaaku moo mina auqu Reefifa marinai. Reefina aiku asauku aanaiqikirausa faiqi faiqi misa faqa kuqimariasaa maridaqa niqoonausa narana ainaina nimufaqa maraqau. Meerakiseedeekafa sia kuqirafa akarakinaa ufa marinara minara naaru naaru maru fee qimarufa maridanoo Abarahaamana narana ainaina amufanoo maranai.

<sup>9</sup> Indaaru Abarahaamafa nari narana ainaina kaqikaana rainasee Meerakiseedeekana aminai.

<sup>10</sup> Reefifa mi kamuqoo sia kambiqanau nari akoona aranandaki maridanoo nari akoona faqa qumee Meerakiseedeekana aminai. Doo maqee aukwana Meerakiseedeekana amu fasiqana Reefina aiku asauku quandaki nari niqoonausunnai narana ainaina maraidaqa.

<sup>11</sup> Mooseena sandufa faqa Anutuna sandufa faqa miqandufa moodaa ufa marinai. Mi ufafa Reefina aiku asaukusaa aanaiqiki marusakina moodaanaki kusinoo maridanoo aiqama sandufa fannoo misaaqari Isaraee maqannaasaki amanaikinai. Reefina aiku asauku aanaiqikira oosana fannoo faiqi anaasee Anutuna afusaa kaaqa andeeqara anukarana niminoofau sia moo aanaiqikirafa inaaqianna Meerakiseedeekana fooqaafa kambiqaiqini. Sia Aarona aiku asauku Reefina aiku asaukukiqari fuka moo quqeenoo Meerakiseedeekana mina aannaree marina naaru naaru marirana Yisuna kai quqanai.

<sup>12</sup> Anutufa ooqeenaa aanaiqikirausa Reefina aiku asauku minniseenoo fuka aanaiqikirana quqararee qidanoo ooqeenaa sandufara Mooseena

sandufara faqa sia amanaikiannoo, fuka sandufa mina amaaqaki quqasee miqoo kai fuka aanaiqikirana quqaannoo.

<sup>13-14</sup> Maasa karaambaiga Yisunara fuka aanaiqikiranara qidanoo fuka karaambaigee qidanoo. Mooseefa Reefina aiku asaukuara qufaqa aanaiqikiqau. Yisufa sia Reefina ati marinau. Yudana ati marinau. Yudana aiku asaku moo fannoo sia aanaiqikira ainainiranaki mariqau, sia uqanna mariqau. Mooseefa faqa sia Yudana aiku asaukuara moora qufanoo misaikana maraqau sia uqanna qinau.

*Fuka aanaiqikirafa Meerakiseedeekana fooqaafa doo ani maridanoo.*

<sup>15</sup> Doo fuka aanaiqikirafa kooroo irana namufaqa fuka sandufa faqa aanaiqikirausa oosana faqa mariannoo. Mifa akooqoo kooroo inoo maridanoo. Mi fuka aanaiqikirafa Meerakiseedeekana fooqaafa animaridanoo.

<sup>16</sup> Isaraee maqannaa sandufa fannoo Reefina aiku asaukuara qufaqa aanaiqikiqau. Yisufa sia faiqi faiqi sandufa ameemaanaifau maridanoofau aanaiqikinau. Mifa naaru marifa sia taikarafa, mi afeekafa kai mina afeeqasoofanoo fuka aanaiqikinau.

<sup>17</sup> Tamummaqara akara fannoo minara maaqi qidanoo. Anee aanaiqikirafa naaru naaru marinafa marinnaranoo, Meerakiseedeekana fooqaafa marinnaranoo.

Mi tamummaqara ufafa miqiminoo maridanoo.

<sup>18</sup> Indaaruga sandufa oosana doo mafi Anutufa quqeenoo mina afeeka fannoo sia amanaikifanoo kai fifau marunara mafi quqanau.

<sup>19</sup> Mooseena sandufa fannoo moona kaaqa amiqira andeeqarana Anutuna afusaa sia amiaqaufanoo mi sandufana mafi quqanau. Quqaseenoo doo maqee fuka ainaina firaqoo uriqarara ainaina Yisunara اساسira afeesirana maree mini quqasoofaqa minannai kai Anutuna aaqa uqanna fuanaura.

<sup>20</sup> Doo kafa Anutufa fuka aanaiqikiranara qimafeekaikinau. Ooqeenaa aanaiqikirausara sia miqinoo qimafeekaikinau.

<sup>21</sup> Qimafeekaikira ufasaa Yisufa aanaiqikirafa kambiqanau. Miqimma afeekaikiranara Anutufa maaqi qimasee qinau.

Qinee karaambaiga Anutusa qima afeekaikira ufa doo quqeeqa.

Sia qinee qeeqa iriranannai moosaa fuanaura.

Anee naaru naaru aanaiqikirafa marinnaranoo.

<sup>22</sup> Mi qima afeekaikira ufafa Yisuna mareeqeenoo sia ooqeenaa Anutuna faqa faiqi faqa moodaanaki qima afeekaikiranaki quqanau, aaduma uriqarara moodaanakikira ufa rakisirafaikamambi marinau.

<sup>23</sup> Yisunara moo irirafa kaqi maridanoo. Indaaruga aanaiqikira fasiqauqa moomoo mariqau. Misakina kuqufimarufanoo moo fannoo kai aanaiqiki mariqau.

<sup>24</sup> Yisufa sia misa naanna ree kuquannoo sia mina aanaiqikirafa moonasaa mariannoo, nari naaru naaru marinara nariki kai naaru naaru mariannoo.

<sup>25</sup> Doo minara maqee faqa naaru faqa minannai Anutufa mariqoo fimarinausa Yisufa amana mareeqee nari akoona aaqa quqaannoo. Mifa naaru naaru marinara mifa nari akoona aaqa quqaseenoo naaru naaru misara nari akoona faqa ufa qinoo dadaaqiannoo.

<sup>26</sup> Yisufa mifa maasa aanaiqikira uriqararafa maridanoo. Maasa mandainaina oosana oosana manda ainaina akiaqara amana kai Yisufa maridanoo. Mifa andeeqarana naaquqarafa maridanoo. Minaki sia

moo aaqarafa mandaikirafa maridanoo. Mina manda maqasaa mari-asakinaana aadumasaa Anutufa quqararee qimaseenoo mareeqeenoo innaarunai uqeera uriqararanaki quqaqafanoo maridanoo.

<sup>27</sup> Yisufa maqasaa fasiqa aanaiqikirausa uriqarararusa naanna sia raidanoo. Misa maqee maqee faasaambaasaana aandau tatufirana nári mandainaina taikaanifeera tatufirana suqee mariqau. Naríndi naaree tatusaida quandafi faiqí anaasee mandainaina numoo taikaanifeera aukwana aukwana tatufusee Anutuna ami mariqau. Yisufa sia misa naanna raidanoo, Mifa moodaa kari uqanna narí afaaqa Anutuna aru aminau. Doo sia kafaa kafaa Anutuna aru amiannoo, doo moodaa kari aru aminoo aiqamausa numoo taikanau.

<sup>28</sup> Mooseena sandufa fannoo fifau faiqí faiqí mareeqeenoo aanaiqikirausa uriqarararusa quqanau. Anutuna qima afeekaikirafa narí auqu ramasee qima afeekaikirafa Mooseena sandufa naaree ani marifanoo Anutuna mi qimafeekaikirufafa Mooseena sandufa rafaafuamaqeenoo Anutuna amaaku uqanna mareeqeenoo aanaiqikira uriqararanaki quqanau, naaru naaru andeeqarafa marianinnana quqanau.

## 8

### *Yisufa maasa aanaiqikirausaki uriqararafa maridanoo.*

<sup>1</sup> Maasa maa ufana akiaqa maaqimminoo maridanoo. Maasa aanaiqikira uriqararafa innaaruna uriqararana Anutufa mariqoo mina aaqa mina asauku uqannai maridanoo.

<sup>2</sup> Mifa sia Mooseena aanna raidanoo sia faiqí usakaqaa uqiqaana maaqakifau ainainidanoofau. Anutufa usakaqoo maqana uqannakina ainainidanoo. Mi maqanaki innaarunai Anutufa mari oosiranaki aanaiqikirausa uriqararana ainainirana maraidanoo.

<sup>3</sup> Aiqama aanaiqikira uriqarararusa maqee maqee narana aandau aru-saida Anutuna tatufu amidaqa. Mooseefa mi ainainiranaki misa quqanau. Doo maasa aanaiqikira uriqararafa Yisufa mifa faqa Anutuna tatufirana amirafa mariannoo.

<sup>4</sup> Yisufa maa maqanasaa marinanoofau sia aanaiqikirafa mariqini. Maaqoo moomoo aanaiqikirausa aandau Anutuna aandau tatufida suqa amidaqa. Mooseena sandufamau fidaqa miqidaqa.

<sup>5</sup> Mi aanaiqisa ainainirafa sia anoona maridaqa fifau amananda kai maridanoo. Innaarunai mari ainaina fifau amananda kai maridanoo. Mooseefa Sinai maqa maaqaki uqiqaana maaqa usakararee qufanoo Anutufa maaqi qimasee qimaminoo qinau. Qinee aaqanasaa uqafiqanna maqana amana kai andeeqasee usakaa.

<sup>6</sup> Indaaruu maru aanaiqikirausa miqiqqa marufanoo Anutufa maqee Yisuna firaqoo uriqarara aanaiqikira ainainiranaki quqanau. Anutufa faqa faiqí faqa moodaanakikirafa Yisunaindi uriqararafa maridanoo, Mooseena moodaanakikira ufa sandufamau firanasaa mundinoo marunara ureeqararafa maridanoo. Yisunaindi uriqarara qima afeekaikiranasa mundinoo marunara uriqararafa maridanoo.

<sup>7</sup> Indaaruu moodaanakikirafa anoonaikinanoofau Anutufa sia moo mara quqaiqini.

<sup>8</sup> Anutufa Israaee maqannaara maaqi qimasee akaraki niqira ufa qinau. Qinee karaambaiqa maaqi qidaqa, Doo qusasaa qinee fuka moodaanakikira ufa Israaee maqanna faqa Yudana aiku asauku faqa qianaara.

<sup>9</sup> Ooqai misa nikaaku nikaaku faqa moodaanaki kira ufa quqaafannana. Sia miqifau ianaurau, moo kammianaara.

Mi aukunnai misa Isaraee maqanna nisauku qumaree Isipa maqasaqari nifiqee fimariafanaqa misa qini moodaanaki kira ufara nikooqoofaqa qini minni qisaqau. Minara misa qini qimaqimufaqa qinee minniseeqa sia iriqiafana.

<sup>10</sup> Doo maqee ooqeenaa moodaanaki kira ufa minnisee Isaraee maqanna faqa fuka moodaanaki kira ufa maaqi qimasee quqaidaqa. Qini fuka moodaanaki kira ufa maaqimminoo maridanoo.

Qinee karaambaiqa qidaqa. Qinee qusasaa qeeqa sandufa misa nitikuraki quqaanaura, quqaseeqa misa nimuqusasaa akara rumaqaanaqa sia aunuaqera. Qinee misa Anutusa marianaura misa qini faiqi namu marifaranoo.

<sup>11</sup> Sia moo fannoo nari aqoonnanara fuki faaki qiannoo. Sia moo fannoo nari aqoonnanara Anutunara iriannee qiannoo. Misa aiqamausa uriqararawsa faqa ureeqarawsa faqa qiniara irifaranoo.

<sup>12</sup> Qinee misa aqaainnanara nifauaanaura. Qinee misa numoora siammiri-anaura auuanaura.

<sup>13</sup> Anutufa mi fuka moodaanaki kiranara qidanoo indaaruaanara ooqeenaa fee qidanoo. Ooqeenaa ainaina minnisaifa doo afauqaqeenoo qusasaa taikafuannoo.

## 9

*Ooqeenaa amaana maqara faqa fuka amaana maqa Yisunara qinoo maridanoo.*

(Ooqai indaaruu Anutufa nari faqa maqasaqaraasa faqa moodaanaki kira ufa Mooseena sandufaki quqaqoofanoo marinoo maqee Yisunasaa fuka moodaanaki kira ufa quqaqaifanoo maridanoo.)

<sup>1</sup> Indaaruaqa moodaanaki kira ufa maru kamuqoo Anutunara innaaruqira sandufa oosana oosana marinau. Faiqi nisaukunnai auqara uqiqaana maqa Anutunara amooqimaria maaqafa faqa marinau.

<sup>2</sup> Mikamuqoo misa uqiqaana maqa usakaseeqa mina aundurari oosuseeqa, dinni oosirafa faiqi aanaiqikirausa keeqeemaru maqafa kooqi maqa naaquqara fee qiqau. Qoomauqa faqa Anutuna uqafiqee maru feemu faqa minasaa quqeemaru qainda faqa minaki marinau. Dinni oosirafa fiqaramasee naaquqara maqa faiqi minaki sia keeqee mariqau.

<sup>3</sup> Firaqa gamunna mi oosiranasaa ititanoo marinau. Mina dinni kooqi maqa marinau. Mina dinnatinai kukeeqaranaki firaqoo naaquqara oosirafa mi atinai marinau.

<sup>4</sup> Kooraa auqimaru qaindafa minaki marinau. Minasaa amiqundimaru ainainna suqee marufa marinau. Moodaanaki kira bookisa minaki faqa marinau. Mifa kooraa qannunnai rafaqaqafirafa marinau. Mi bookisanaki kooraa auqimaru qafeefa marinau. Mi qafee auduranaki manna fee qimaru ainainafa innaarunaindaraa feemu quqasoofanoo Isaraee maqannaasa aadana maqa maaqaki maridaqa naararoofaqa randasee neemaru feemufa marinau. Ooqai Aaroonafa faqa Isaraee maqannaasa faiqi firaasa faqa nari saunu uqiqaana maqaki quqasoofanoo Aaroonaa saunusaa kai auqmara ururamafinoo misaindisaa sia ururanau. Mi saunufa faqa moodaanaki kira bookisaki quqasoofanoo marinau. Mooseefa Sinai aqaanasaa Anutuna moodaanaki kira ufa qaara oonisaa akara rinau. Mi akara rira ooniqanda faqa mi bookisanaki faqa quqasoofanoo marinau. Mi aiqama ainainausa moodaanaki kira bookisa moo auqu Anutufa nifauara bookisaki mariqau.

<sup>5</sup> Mi bookisana afusaa dinni dinni Anutuna qangiroo nimanagara maridanoo Anutuna areenarana kooroimaru qangirooqanda mariqau.

Miqanda niqoosaqara dinni dinni mi qaindana dinni dinni rafaafafinoo marinau. Mi qambaannasaa Anutufa faiqí anaasee mandainainara ni-faueenoo minniseenoo imariqoo ititaidaqa. Doo maqee sia mi ainainausara qianaaura.

<sup>6</sup> Aanaiqikirausa maaqimasee ooqeenaa uqiqaana maqaki ainaini mariqau. Aanaiqiki marusa kooqi maqaki faasaambaasaana keeqafi nári ainainimariqau.

<sup>7</sup> Aanaiqikirausa uriqararafa firaqoo naaquqara maqa aunduraki aukuana aukuana moodaa kari kai mi naaquqara maqanaki keeqee marinau. Aiqaama aukuana aukuana miqikaimma moodaa faasaana kai keeqee marinau. Mifa aandau fidika mara maree minaki Anutuna ami marinau. Narí numoora faqa faiqí anaasee numoora faqa mina akiaqara mi fidikana ami marinau. Mandainaina sia irirai marainnana akiaqara naruandoo qimasee miqi marinau.

<sup>8</sup> Maaqira ainainana kai Anutuna naaquqara maraquna fannoo maasa moo ufa qimaqimidanoo. Minara maaqi qidanoo, kooqi maqa mifa mariannoo. Mee firaqoo naaquqara oosirannai sia miqoo faiqí fimariaqoo sia miqoo aana maridanoo fee qidanoo.

<sup>9</sup> Mi kooqi maqafa maa maqee maria kamuqoora kikiqa usidanoo, mina amananda maridanoo, maaqimminoo maridanoo. Anutuna ami maria ainainafa faqa aandau tatufusee ami mariafa faqa sia amana ami mari fasiqana amuqusa findaukamasainanoo anoonaikiannoo.

<sup>10</sup> Anutuna ami maria ainainna faqa aandau tatufusee ami mariafa faqa mi namusa naranara faqa nammariara faqa nammarinnai findaukarana oosana oosana faqa qidaqa. Nipatasaaqarara ainaina mi ainainafa ufaasu maridanoo. Anutufa fuka ainaina quqaranara minara afeesidanoo ufaasu maridanoo.

<sup>11</sup> Asauku mundirafa doo ani maridanoo. Innarunai marira ainaina asumu faqa doo ani maridanoo. Mi amiqira ainainausa aanaiqikirafa uriqararafa asauku mundirafa doo ani maridanoo. Mooseena ainainimaru uqiqaana maaqafa ureeqaradfa marinau, maqee asauku mundirafa fuka firaanoona uqiqaana maqaki innarunai ainaini marifa uriqararafa anoona uqanna ani maridanoo. Sia faiqí nisaukunnai auqi maria amaana maqafa maridanoo sia maa maqa maaqanasaaqarara ainainau maridanoofau.

<sup>12</sup> Asauku mundirafa innaruna kooqi maqaki ooru keeqakufanoo firaqoo naaquqaranaki ooru keeqafinoo sia mimmi fidikafau burimakau aanaaqi fidikafau mandainaina akiaqara Anutuna amisee keeqanau. Narí kai narí fidika qumareenoo miqoo Anutufa maruqoo maasara aranaqarafa taikaanifeera amiseenoo minannai kai naaru asumu marirana maasa qimiannee qimasee maranau.

<sup>13</sup> Mooseena uqiqaana maqakinaa sandufara aandau fidikara maaqi qidanoo. Faiqí anaasee mandainaina maraasara ikairifaqaasee qimasee mimmi fidika faqa burimakau akoona fidika faqa ikairi faqaasa akunni-maqaidaqa mi idanasaa danda faqa misa nifaaqasasa akusoofanoo Anutufa misara anukarausara maqi qirausa maridammiafoo qidanoo.

<sup>14</sup> Fifau aandau fidika fannoo ririmma faiqí ikairi findaukaidanoo Anutuna asauku mundirana fidikara naqi fee qianauree. Mifa naaru naaru marira maraquna fannoo dadaaqifanoo narí uqanna anoona tatufirana amiranara foora Anutuna aminau. Mina fidika fannoo sia maasa ikairi kai findaukaannoo. Maasa qimana maraquna faqa mina faqa findaukaidanoo maasa mandoosana maree mariana faqa maasa kuqiranaki rarisama quqee



mariana faqa Yisuna fidika fannoo mina faqa findaukaidanoo. Miqi mandainaqa maasa amana kaqi marira Anutuna ainainamminaura.

<sup>15</sup> Miqimandaifanoo asauku mundirafa Anutufa faqa faiqi faqa moodaanaki kira ufa fuka ufa qima andeegeegenoo quqaidanoo. Anutufa nuqu rainausa misa aniree maraaqeera. Naaru naaru afeedimari amiqira qumiasana saqama ainainara kasooqaqee innaarunai maraaqeera qidanoo. Indaaruga moodaanaki kira aukwana sia amana mi amiqira afeedira qumiasana saqamana maree mariqau. Misa mi aukwana kaqi nari mandainaina fannoo faiqi nifaaqa rumbanoo marinau. Maqee asauku mundirana kuqirafa doo mi rumberana nimirara idukinau.

<sup>16</sup> Faiqi moo fannoo afaaqooqa qinafa faiqi mifa kuqinanoo mina afaaqooqa qirafa anoona kooroo iannoo.

<sup>17</sup> Mi fasiqafa kaqi marinanoo mi ufafa kaqi miqinoo mariannoo kuqinanoo kai koorooiannoo.

<sup>18</sup> Minara Mooseena moodaanaki kira ufa fannoo aandau kuqufanoo miqimandoofanoo doo mi ufana anoona koorooinau.

<sup>19</sup> Mooseefa indaaruga moodaanaki kira ufa mina sandufa oosana oosana faiqi anaasee qimannimiseenoo burimakau mimmi fidika nammari namufaqa mareenoo naneeka amanee faqa taatuqee arira sipsip asausi faqa qumareenoo fidikaki raaraamma qumareenoo sandufa bukamau faqa faiqi anaasee nifaaqasasa faqa akuseenoo maaqi qimasee qimanniminai.

<sup>20</sup> Maa andauna kuqina fidika fannoo inni faqa Anutuna faqa moodaanaki kirana mapuku nimaqaidanoo, Anutufa inniara maa moodaanaki kira ufamau fuagee qidanoo.

<sup>21</sup> Miqikai inoo Mooseefa uqiqaana maqa afaaqasasa fidika mi aandau fidikana akinai. Akuseenoo maaqakina Anutufinnai innaaru qimaria ainainnasaa faqa aiqama akinai.

<sup>22</sup> Miqidanoo Mooseena sandufamau aandau fidikannai kai aiqama ainaina anukee marinai. Faiqi mandainaina faqa fidika teeqiranannai mi manda ainaina anukee marinai.

*Asauku mundirafa kuquna maasa mandainaina maraqqunnisanau.*

<sup>23</sup> Uqiqaana maaqaki auqee maru ainainafa innaarunai maru ainaina fooqaafa mina amananda maqasaa marinai. Anutufa minara kai iriseenoo qufaqa misa aandau fidikannai aiqama ainaina anukee mariqau. Anoona ainaina innarunai maru anoona ainaina findaukarana sia aandau fidika amana maridanoo, moo uriqarara ainaina marasee arirafa kai amana maridanoo. Asauku mundirana arirafa mifa kai amana mariannoo.

<sup>24</sup> Asauku mundirafa uqiqaana maqa faiqi nisaukunnai auqamaqoonaki innaarunai marina fooqaanaki miqiranaki sia keeqanau, mi maqanaki naaquqara oosiranaki sia keeqanau. Mifa andeeqasee innaaruna maqa maaqaki Anutufa maruqoo uqanna keeqafinoo kooroomafinoo maridanoo maasa dadaaqidanoo.

<sup>25</sup> Yuda maqanna aanaiqikirausa misa uriqararafa aandau fidika mara mareenoo naaquqara oosiranaki keeqee marinai, aukwana aukwana keeqee marinai. Asauku mundirafa sia moomoo kari nari afaaq Anutuna aru aminai.

<sup>26</sup> Miqiga moomoo kari arifanoofau maqa maaqa oosana aroonakiqari aupuraida marini. Ooqeenaa aukwana taikarara adeedirama fufanoo maqee aukwana kai asauku mundirafa moodaa kari kai kooroo mafinoo nari afaaq Anutuna aru amiseenoo minannai maasa mandainaina rukanisanau.

<sup>27</sup> Aiqamausa moodaa kari kuquannana amana kai Yisufa moodaa kari kuqinau, aiqamausa moodaa kari kai kuqufiqa miqooqari Anutuna faqa ufa qiranaki fifaranoo.

<sup>28</sup> Yisufa mi mau kai finoo moomoosa numoo maraqqunnisaanifeera nari afaaqa tatufirafara foora moodaannai Anutuna aru aminau. Mifa kafaa koorooiannoo. Sia kafaa numoo undarau qumuannoofau. Nari afeesara mariasara qumuree mareeqee asumu mariranaki quqannisarara qumuannoo.

## 10

<sup>1</sup> Yuda maqanna Mooseena sandufa faqa uiqaana maqa ainaina faqa innaarunai mari ainainna mina amananda kai maridanoo siara foora inoo maridanoo. Naaru kambiqaaninna ainaina amananda oorudupirana amananda kai maridanoo. Mooseena uiqaana maqaki Mooseena sandufamau fidaqa moodaa tatufira oosana kai aukwana aukwana aandau kai suqa amu mariqau. Doo miqidaqa naqimasee mi sandufana Anutufinnai ani mariasa anoonaikamma nimaqaannoo fee, sia amana.

<sup>2</sup> Mooseena sandufasaa Anutunara amooqiqa innaaru qimariasa kuqaa anukamma nimaqasainaqau misa nari numoora nisaurirana taikaseefau marini, aandau maqee maqee qaindasaa tatufi mariafa faqa sia marini.

<sup>3</sup> Aukwana aukwana aandau tatufirafa mifa faiqi anaasee nari numoora naaqoo auqai faqa maqee maqee aandau tatufidaqa.

<sup>4</sup> Burimakau fidika faqa mimmi fidika faqa mifa sia amana uqanna faiqi anaasee mandainaina numoo maraqqunnisaannoo.

<sup>5</sup> Miqi marunara asaku mundirafa maa maqanasaa qumiraree qimasee maaqi qimasee Anutuna qimaminau.

Anee aandau arusee qaindasaa tatufiranara,  
akooqaidanoo,

Anee faiqi qifaqa deedaqamma qimaqainanoo.

<sup>6</sup> Anee aandau arusee qaindasaa muduka tatufiranara akooqaidanoo, numoo maraqquninna aandau suqaranara akooqaidanoo  
Yisufa miqi qimasee Anutuna qimaminau.

<sup>7</sup> Minara Yisufa maaqi qimasee kaifaa Anutuna qimaminau.

Oo Anutu doo qinee maaqoo maridaqa.

Aneenna iriranannai kai qiniara ia.

Mooseena sandufaki qiniara akara rinau. Doo mi mau kai qiniara ia. Yisufa miqi qinoo.

<sup>8</sup> Yisufa miqi qimaqoonara qinee inni maaqi qimasee qimannimiana. Yisuna indaruqaa ufa maaqimminoo maridanoo.

Oo Anutu anee aandau arusee suqa amiranara akooqaidanoo sia maraqaaidana, faiqi numoo rukaranara aandau qaindasaa tatufiranara akooqaidanoo.

Yisufa mi andausa tatufimarunara irinoo sandufamau fidaqa miqimari-aafoo qimaseenoo kaqi Anutufa minara akoo akaa imarunara qinau.

<sup>9</sup> Yisuna inaaqianna ufa maaqi qidanoo,

Oo, Anutu, doo qinee maaqoo maridaqa.

Aneenna iriranannai kai qiniara ia.

Asaku mundirafa mi ufamau fidanoo. Ooqai aandau tatufimaruna mara aqu taikaseenoo fuka nari amaqi fidika mina amaaqaki quqaseenoo maasara kuqu qimaqanau.

<sup>10</sup> Yisufa asauku mundirafa Anutuna aidiramau kai fidanoo narí afaaqa aandaara foora Anutuna moodaa kari kai aru aminau. Miqunara kai maasa numoo ikairi findaukama qumaqanau.

<sup>11</sup> Yuda maqannaa aanaiqikirausa faasaambaasaana aigama faasaana moomoo aandau tatufimariqau. Moo faasaana tatufuna miqikai imariqau, moomoo aandau tatufimaruna faiqí numoo rukarana amana sia maruna fifau kadaapirida tatufimariqau.

<sup>12</sup> Asauku mundirafa sia miqinau. Mifa moodaa kari kai moodaa amira aminau. Naaru naaru faiqí numoo taikaaninnana akiaqara aru aminau. Aru amiseenoo innaarunai Anutuna aaqa mina asauku uqannai ooru oogumarinoo maridanoo.

<sup>13</sup> Miqoo maridanoo Yisufa Anutunara narí namuqaa mareeqee araman-dunnai quqaaninnanara afeesida maridanoo.

<sup>14</sup> Moodaa kari aru amiranannai Yisufa mandainaina oogai faqa maqee faqa rukannimaqee mariasa naaru naaru kuqaa andeeqarana niminau.

<sup>15</sup> Anutuna naaquqara andeeqara maraquna fannoo asauku mundirana dadaaqida maaqi qidanoo.

<sup>16</sup> Qinee misa faqa moodaanaki kira ufa maaqi qidaqa.

Mi faasaannafa qinee qeeqa qifaaqa aru amianna faasaanna aiqarainafa qeeqa sandufa misa nimuqusaki quqasaanaqa misa mi mau kai fida mariaqeera.

Misa nitikuraki faqa akara rumasaanaqa sia uqanna aunuaqeera.

<sup>17</sup> Miqi qimaseenoo Anutuna maraquna fannoo maaqi qidanoo.

Qinee maaqooqari sia kafa misa aaqarana faqa misa mandainaina ikairi faqa siamma irianaura aunuuqannamma nimaqasaanaura.

<sup>18</sup> Maasa mi ufana irisee minara maaqi. Anutufa maasa mandainaina minnisainna kamuqoo fifau aandau arusaida tatufi mariafa doo taikeenoo.

*Maasa Anutuna aaqa aniaqeera qidanoo.*

<sup>19</sup> Qini qikaqaafasaa Yisufa kuqinoo narí fidika adioonannai maasa sia rufidaqa kaqi mana mana nifaaqa quqasee Anutuna naaquqara oosiranaki keeqaanaura.

<sup>20</sup> Mifa fuka aana maasara afisinoo. Kaqi marira aana Anutunasaa ititara qamunna anaqiseenoo afisinoo, narí afaaqara qamunna kikiqa usidanoo.

<sup>21</sup> Maasa aanaiqikirafa firaafa mifa Anutuna maaqasaa rakisirafa maridanoo.

<sup>22</sup> Doo maasa minara iriseeqa Anutuna aaqa adeedi aniaqa. Kuqaa aneenna amuqusakiqari Anutunara ridana doo Anutuna aaqa adeedi aniaqa. Aneenna irirana mapukusee minasaa rusirafa doo adeedi ania. Ooqeenaa mandainaina ani aakirana afaimma quqaseenana anukarafa ania. Aneenna afaqa amiqira nammarrinnaira foora findaukamasee Anutuna aaqa adeedi ania.

<sup>23</sup> Maasa innaarunai mariranara asasidaqa afeesidaqa kooroo idaqa. Maasa mi asasira afeesirana amiqimmandee qumaraaqa. Anutufa narí qima afeekaikira ufa sia minnisaannoo mifa qumaraannoo minara amiqimmandee rakisi qumaraaqa.

<sup>24</sup> Maasa nariara nariara uriqarara ainainee qimasee nimuqusirafa marianinnanara fuki faaki qimasee nisaukukoo dadaaqira dadaaqirafa

kambiqaani. Narí amiqi amiqirana faqa fuki faaki qimasee narí dadaaqi narí dadaaqaqa.

<sup>25</sup> Akaqausa amaana maqaki maqee suqiranara nikooqaidanoo. Innee sia miqiaqa maqee maqee suquaqa. Karaambaiqa qumira faasaanara qusararanara irisee narí fuki faaki narí fuki faaki qimasee Anutuna ufara suquaqa.

<sup>26</sup> Maasa Anutuna anoona ufa iridaqa kaqi iridaqa mandainaina maraqa fifi inaqa moo amiqira ainaina Anutuna amimarinafa sia mi numoona rukaannoo naaru naaru mariannoo.

<sup>27</sup> Miqinna fasiqafa naaru kambiqaaninna ufa iriranara rufiasee afeesianno. Mikari mi fasiqafa ufa qirana iriseenoo firaa idaqeemari idanaki qamataikaannoo. Miqimasee Anutuna ufara sia fee qimariasaa aiqamausa minaki aupureefaranoo.

<sup>28</sup> Mooseena sandufa maru kamuqoo faiqi moo fannoo mi sandufana ameesuqirafa qaara fasiqee qaaramoo fasiqee qafamasee ufa qufanoo sia mina afauee mariqau. Doo mifa kuqimarinau.

<sup>29</sup> Faiqi moo fannoo Anutuna amaakuara akooqainafa mina arirafa firaaqoo fiqaranoo mariannoo. Mi fasiqafa Anutuna moodaanaki kira ufa fidikara narí mi fasiqana numoo rukasainnanara qikoo fee qinafa faqa Anutuna afaari mari maraqunara faqa mandufa qinafa, mi fasiqana arirafa sia Mooseena aanna raannoo, fiqaranoo mariannoo.

<sup>30</sup> Maasa Anutunara faqa mina ufara faqa iridaqa mifa maaqi qinau. Faiqi mandainaina akiaqara narirafa qinindi maridanoo fee qinau. Mifa kaifaa maaqi qinau. Karaambaiqa narí aiku asauku ufa irisee mandoosana marinanoo naruannoo sia marina sia naruannoo.

<sup>31</sup> Mifa miqi qidanoo qinee minara maaqi qidaqa, kaqi marira Anutuna asaukuki aqufinafa firaa narirafa kaaqa naaquqee marifa maridanoo.

<sup>32</sup> Indaaru innee Anutuna ufa iru aukuanna mi aukuannara maqee inni naaqoo auqaidaqa. Mi fasannai Anutunara اساسirafa qoomara foora kaaqa qamannimaqoofaqa qafamasee kadaapi rumasee nidafimarufaqa Anutuna ufamau fifiufaqa sia kudoosaapaqau.

<sup>33</sup> Akaqa faasaana faiqi anaasee aiqamausa nifusaa ataasa ataasa inni qimannimaqee mandaikamma nimaqaqau. Moo kari faiqi anaasee Yisuna ufa irimariasaa narí mariafaqa innee faqa misa ummaara dadaaqaqa akooqoo oonuree misa nisaukunnai dadaaqaqa amiqimma nimaqaqau.

<sup>34</sup> Innee karabusaki mariasa dadaaqidaqa narana munu nimirannai misa aupurarana inne faqa maree mariafanoo. Faiqi anaasee aniree aanoomasee inni maaqakinaa ainaina aiqama animaree fifuafaqa sia innee minara noori runuafanoo, innee asasa kai mandee mariafanoo. Innee inneeqa maa maqanasaaqaraa qumiasanara fifau oorudupira ainainee qimasee innaarunai uriqarara naaru marira ainainara maridanoo fee qimasee sia ikiraqaafanoo, innee اساسimariafanoo.

<sup>35-36</sup> Doo maqee faqa inneeqa paasoosirana sia quqaqa. Mifa marifanoo mina feefauru naaru marirana nimiannoo ubiqafi marirafa inniki mariani. Innee sia ubiqafinaqa sia amana Anutuna iriranamau fifaranoo, sia mina qima afeekaikira marira innaaruna qumiasana mareefaranoo.

<sup>37</sup> Anutuna akara ubiqafi mariranara maaqi qidanoo.

Kaqikaaqoo qumirafa qusasaa qumuannoo.

Sia kisaagasaa fifau mariannoo doo qumuannoo.

<sup>38</sup> Qini qiku qisauku andeeqaraisa mariasa maqee maqee qinisaa irirana rusisee mariqa fifi inaqa mi mariranara kai qini didiannoo.

Misa minara nikooqee marinausa misara qini faqa qikooqaannoo.

Anutuna akara maasara miqi qinoo maridanoo.

<sup>39</sup> Faiqí akaqausa Anutufinnai fuani qimasee fifi ifaqa aanai oonuree maparaamaki oonurandee quandaki ida aqufidaqa. Maasa sia misa naanna raidaqa. Maasa amiqimmandeedqa Anutuna mandaaqaifanoo doo Anutufa maasa asumu maraannoo.

## 11

*Anutunasaa irirana rusimarunara qimaqoo ufafa.*

<sup>1</sup> Anutunasaa irirana rusimarinausa misa innaarunai kambiqaaninna ainainara asasamandee afeesidaqa. Misa minara kuqaa anoona maridanoo innaarunai maraanauree qida afeesida maridaqa. Misa sia qafeemari ainainnara anoonee qidaqa nifaaqa quqasee afeesidaqa.

<sup>2</sup> Ooqa marusa miqimmi mariqau. Misa Anutunasaa irirana rusiranannai Anutuna eedoo qirafa misaki marinau.

<sup>3</sup> Ooqai Anutufa narí ufannai maqa faqa innaaruna faqa auqusoofanoo maridanoo. Maasa Anutunasaa irirana rusiranannai mi ufanara kuqaa anoonee qidaqa. Mifa sia akooqoo maru ainainna qumareenoo maqee qafee marunna ainaina auqinau.

<sup>4</sup> Kainafa Anutuna tatufirana suqa amiraree qimaseenoo ureeqarana suqa aminau. Abeerafa Anutunasaa irirana rusi marunanoo narí afasaana Kainana tatufirana uraaqaranau. Abeerafa Anutuna saqariki marunara Anutufa Abeeranara andeeqara fasiqafee qimaseenoo mifa amu ainainara asasinu. Abeerafa ooqai kuqinoo maridanoo mina ufa fannoo kaqi maasa qimaqimidanoo. Innee faqa miqikai mandee Anutuna saqarikiaqa. Miqi qidanoo Abeerafa naamua qidanoo.

<sup>5</sup> Faiqí moo auqu Eenookafa Anutuna saqarikiranannai kai sia kuqufufanoo kaqi marufanoo Anutufa mara muru narí unnai quqanau. Misa miqooqaraasa Eenookana iriara randoosia minnisaaqau. Anutufa kaqimma afiqa quqanau. Anutuna akarakinaa ufa Eenookanara maaqi qinoo maridanoo. Eenookafa andeeqara fasiqa marunara qini qiqaara ree marifaqa asasidaqa.

<sup>6</sup> Sia faiqí moo fannoo dapi marirana niranannai Anutuna asisirana maraannoo, minara narí Anutunasaa irirana rusiranannai kai mina asisirana maraannoo. Faiqí anaasee moo fannoo faasa Anutunara kuqaa maridanoommifoo qimarinafa, Anutufa narí andeeqara oosanara randeemarisa amiqira ainaina innaarunai nimiannoommifoo qimarinafa mi ufaqanda qimaria fasiqa aanaaseesa kai Anutufinnai fifaranoo.

<sup>7</sup> Anutufa kasooqaqee kambiqaaninna ainainara Noofa sia qafee marunara aaquqimasooofanoo Noofa narí irirana Anutunasaa rusimarunara irisee eedoo qimaseenoo firaa sipa auquseenoo narí faqa narí aiku asauku faqa minakimma asumu marinau. Auquseenoo Noofa minannai aiqamausa maa maqanasaaqaraasa aiqama niqiseenoo rafaafun-nimaqanau. Noofa Anutuna mandaaqaranannai kai Anutufunnaindaraa andeeqarana maraseenoo asumu marinau.

<sup>8</sup> Abarahaamafa faqa Anutunasaa irirana rusi marufa marinau. Anutufa Abarahaamana aaramaseenoo qimaminu. Anee anirainaga fuka maqa maaqa anindi kianinnana uqafiqaanaura, anee miqoo fua. Miqi qufanoo Abarahaamafa iriseenoo narí irirana Anutunasaa rusiranannai eedoo qimasee narí maqa maaqa minnisee sia qafee maru maqa maaqanaki kaqimbinu.

<sup>9</sup> Abarahaamafa miqooqari aanaamuruara foora Anutufa qima afeekaikammaqoo maqa maaqanaki oonu marinau, Anutunasaa irirana

rusiranannai kai miqinau. Narí maaqa uqanna ooqai maruna maaqa uqannaki marinau. Mi maqa maaqana minnisee fuka maqasaa narí faqa Yakooboona faqa Isakeena faqa uqiqaana maaqaki kai marusa mariqau. Aandau apatannai auqira uqiqaana maqaki mariqau. Miqanda faqa Anutuna qima afeekaikirana maree marusa mariqau. Miqanda faqa Anutuna qima afeekaikira ufa irisee mariqau.

<sup>10</sup> Anutufa amiqira maqusa naaruara marira maaqa tuna rakiqasee auqusee amiraree qufanoo Abarahaamafa uqiqaana maaqaki maridanoo afeesida marinau.

<sup>11</sup> Abarahaamafa narí anaqa Saraqanandiri asooqa nauaraiqi mariqau. Saraqana faiqi maqara kamu doo taikafufaqa faiqi siaiqanda mariqau. Mi kamuqoo Anutunasaa irirana rusimarunannai kai ooqa faiqi Isakeena maqau. Ooqai Anutuna mandaqee marunnannai kai faiqi maqau. Ooqai Anutufa faiqi amianauree qufaqa iriseeqa eedoo qimaseeqa nifaqa quqasee kisaqasaa mariuna maqau.

<sup>12</sup> Abarahaamafa kuqinoora foora inoo marufaqa mina faiqi namu kambiqeeqa fasau nukuda miqiraua kambiqau.

<sup>13</sup> Abarahaamafa narí faiqi namu moomoosa faqa Anutuna mandaqaranaki mariufaqa kuqiu. Misa sia Anutuna qima afeekaikirana anoona qafaqa. Nianaindaria foora naaqoo kai irisee asasammasee kasooqee kuqiu. Nariara oo maasa maa maqanasaa aanaamuruara foora iqa mariafaqa asaqiraafaikiqa maridaqee qiu.

<sup>14</sup> Miqira ufa qimariaa moo maqara náriara mararara randaidaqa kooroo idaqa miqi qidaqa.

<sup>15</sup> Misa irirafa sia nári ooqeenaa maqa maaqai ubeekaidaqa. Miqinaqau kafa miqoo fuaqini.

<sup>16</sup> Misa uriqarara maqara innaarunai maqara randaidaqa ani asaquirafa foora maridaqa. Miqi marunara maasa Anutu fee qimasoofoano sia mifa asaurinau. Faasai innaaruna maqusa miqimariana akiaqara nimirara deedaqino maridanoo.

<sup>17</sup> Anutufa Abarahaamana amanamandee qafaanee qufanoo Abarahaamafa Anutunasaa irirana rusirafa marunara Anutuna ufa iriseenoo eedoo kai qimaseenoo narí moodaa faiqi narí amuqusuqanna Isakeena kaqi rumbaseenoo qaindasaa quqasee arirarufanoo qaoo qinau. Anutufa faiqi ani aiku asaku moo amiraree qima afeekaikamaqoonara Abarahaamana amuna. Sia minara Abarahaamafa amuqusufanoo narí amaaku rafaqa finau. Kaqi eedoo kai qimasee narí faiqi afeeenoo arirarinau.

<sup>18</sup> Anutufa ooqai Abarahaamana qimamu ufafa maaqimminoo maridanoo. Ani amaaku Isakeenasaaqari ani aruakinausa moomoo qinee qima afeekaikiranara kambiqeefaranoo.

<sup>19</sup> Abarahaamafa sia minara iriseenoo narí faiqira amuqusinau. Mifa kuqufinanoo Anutufa uqeeraannommifoo qimaseenoo Anutuna ufamau arirarinau. Doo kuqaa Abarahaamafa narí faiqi Isakeena kuqiranakinanara foora maranau.

<sup>20</sup> Abarahaamana amaaku Isakeefa innooqafino Anutuna ufa iriseenoo mina saqariki marunara quandaki Yakooboosa Eesausa naaru kambiqaaninnanara amiqi amiqira ainainara nifaqooqa qimannimaqanau.

<sup>21</sup> Isakeena amaaku Yakooboofa innooqeenoo Anutuna saqariki marunara quandaki Isipa maqa maaqaki kisaqasaa marinoo kuqiraridanoo narí amaaku Yoosefaana faiqigara nifaqooqa qimannimaqanau. Narí saunusaa aqini munduseenoo Anutunara innaaru qinau.

22 Yakooboona amaaku Yooseefaafa faqa Anutuna saqariki marunara kuqiraridanoo Isaraee maqannasa Isipa maqasaaqari moosaa fifandinna-nara qimannimidanoo qimanniminau. Moosaa fiqa qini qimudaani faqa maree fuaqa.

23 Mooseena anaukoo misa faqa Anutuna saqariki marusa maridaqa sia Faraonara rufiasee mina ufa rukiasee Mooseena maqasee kaaqa idaaqira faiqi anaqimmifoo qimasee qaaramoo quqoonasaa kukeeqaqoofanoo marinoo nammari afainni kukeeqasoofanoo Faraona araamuna paquri-maseenoo narí faiqiara foora firinau.

24 Mooseefa faqa innooqeenoo Anutuna mandaaqara fasiqa marinau. Minara mifa faiqi kammambinoo Faraona araamuna faiqikiranara akooqoofanoo Isipa maqusanaasa minnisanau.

25 Mifa Faraona maaqaki mariasa narí oosana oosana adiafaaira irira ainainee qimarunara mandainainee qimasee minnisee Anutuna faiqi namu Isaraee maqannaasa faqa aupuraanauree qimasee misa faqa finau.

26 Mooseena afu fannoo innaarunai qumiasana ainainasaa afu munduseenoo minara kai rimarufa marufanoo Isipa maqannaasa munnimma ainaina oosana oosana minnimmasanau. Mooseefa Isipa maqannaasa faqa narí aqara adiafaairanaki keeqarara akooqoofanoo misa minnisee asauku mundirana kasooqaqee kambiqaaninnanara irisee mi aupuraranaki keeqeera maqi mafinau Isararee maqannaasa misa aupuraranaki dadaaqinoo keeqanau.

27-28 Mooseefa Anutuna mandaaqarafa marunara naneeka fooqaa saqari amanee maramaree sipsipa fidikaki raaraamma qumaree maaqa kooqi-mau akusoofanoo qangiroouqa faiqi narimarufa qumureenoo mina qafamaseenoo Isaraee maqannaafa faiqi nifauamaseenoo sia narinau. Isipa maqannaafa faiqiuqa kai narinau. Mooseefa narí Anutuna mandaaqaranannai minara iriseenoo ainnaaqarara oosana kuradanau. Mooseefa Anutuna mandaaqarafa maridanoo miqinau. Minara kai Mooseefa Faraona aanooqiranara sia rufianau paasoosamandee Isaraee maqannaafa Isipa maqasaa marusakinaana nifiqee finau. Nifiqee fimarufaqa misa dapi ufa qimarufanoo Mooseefa kafaa oonurandee aniranara qaoo qimasee nifiqee fimarinau, Anutufa mina oorinni akooqoo maridanoora foora qufanoo andeeqasee nifiqee fimarinau.

29 Isaraee maqannaasa Anutuna mandaaqaranannai Taatuqee nammari fannoo qambaana raineenoo aadanusufufaqa aadana maqasaara foora taqaqau. Isipa maqannaasa misa naruannee qimasee misa ninaaqiana nammari qambaana aadana maqasaa oonu roofanoo nammari fannoo oonu maree ani maree maseenoo aiqama narutaikanau.

30 Isaraee maqannaafa Anutuna mandaaqaranannai Yeerikoo maqusa ooni faandaamura rakeemasee ooru rameeqaqee aqufiqa nariqau. Misa qisauku dinni taikasee dinni ani qaara marasee faasaana mi faandaamurana fiq fiq masoofanoo mi faandaamurana rapeemasoofaqa oorureeqa aqufiqa nariqau.

31 Yeerikoo maqusaindaraa anaasee dapi maraqanu aanaaseefa mina auqu Raqaba nammari mifa faqa Anutuna mandaaqaranannai sia narí maqannaasa faqa kuqinau. Mi anaaseefa Isaraee maqannaafa nipuraraa fasiqaqara amiqimmandee narana aina niminoo narí maaqa ataufakaaqa kukeeqannisanau. Maanara mi anaaseefa narana aina niminoo, narí maqannaasa naridaqa qini faqa dari maqi qimasee kukeeqannisanau.

Minara mi anaaseefa sia Anutuna ufa rukiee marusa faqa kuqinau. Kaqi asumu marinau.

<sup>32</sup> Moomoosara sia qianauna akara kisaacaqikiandooru. Akaqausa maaqi-masee mariafaqa Kideeoonafa faqa Barakafa faqa Samasoonafa faqa Yeefataafa faqa Dafidifa faqa Samueerafa faqa Anutuna tamummaqara fasiqauqa moomoosa faqa misara minniseeqa misa ufara sia ufa qianauna.

<sup>33</sup> Anutuna saqarikiranannai akaqausa akaqa maqannaasa maqusa maqusa naru taikaseeqa uriqaraqa mariqau. Akaqausa Anutuna saqarikiranannai kai andeeqara qoo fiqa Anutuna qima afeekaikira asumu marirana faqa innaarunaindaraa qumiasana kuqiqa ooru maraqau. Faiqi akaqausa kaasau kusinara foora firaafa mina auqu raioona misa marunaki namuqaauqa naruani fee qimasee rafuseeqee maramaaqinni raioona marunaki aqufufanoo Anutufa mi andauna oori rafaqafusoofaqa sia nariqau. Misa mi kaasau kusinara auqu raioonee qimariqau.

<sup>34</sup> Faiqi akaqausa Anutuna ufa iri mariasa namuqaa nisaukuki soofaqa misa mareeqee ida firaana arasee minaki aqunnisoofaqa misa Anutuna saqarikiranannoo mi idana imbasee sia kuqiqa. Namuqaa fannoo aseemannai akaqausa naruanerufaqa Anutuna saqarikiranannai quqasee sandaqau.

Faiqi akaqausa sia afeekaikusa Anutuna saqarikiranannai afeekaikamasee moomoo maqanna rakira fasiqauqa aiqama naru taikasee nariaraa kaqi mariqau.

<sup>35</sup> Anaasee akaqausa nari faiqi namu kuqufufaqa Anutuna saqarikiranannai Anutuna tamummaqara fasiqauqa mara findifumasooofaqa mariqau. Faiqi akaqausara namuqaa innee Anutunara minnisaifaqa maasa sia inni naruanaura, sia inni ataasa ataasa qimasaida nifaqa rakee ianauranoo fee qufaqa Anutuna saqarikiqa mina minnisaranara qaoo qufaqa ataasa ataasa idaqa narimariqau. Kuqu fasiqausa maaqi qiqau Anutufa maasa qumareeqeenoo uriqarara mariranaki quqaanifeera marida saina kuqua.

<sup>36</sup> Faiqi akaqausa Anutuna ufamau fimariasa minasaara ataasa ataasa ufa qimaruna maree mariqau. Mandoosana maree mariasa akaqausa qumaraseeqa nari sanda qainnainaina atisa rumbaqaoo sandasamu kaifaa kaifaa naridaqa nifaqa ateekaateekamma ummooquki mariqau. Akaqausa sainandannai rumbamaree karabusaki quqeemariqau.

<sup>37</sup> Misa akaqausa Anutuna ufasaara maramaree oonisamu kuqa nariqau. Misa akaqausa qumaree keedainnai qambaana tuqu raqauqa. Misa akaqausa qumaree aseemannai nari mariqau. Anutuna ufamau fimarusa minasaara narimariafaqa akaqausa rufiasee nari maaqa minnisee qamunnara randeeqa mimmi apata fee sipsipa apata fee minauqa afisusaidaqa munnimma ainaina siaisa nariranara rufiasee kaqi dapi nariqau. Faiqi anaasee fifau narusaida mandoosana mandoosana nimirariqau.

<sup>38</sup> Maa maqanasaaqaraa irirana faqaasa marirafa mandaikamminoo maridanoo oorudupinoo maridanoo Anutuna ufa irimarusa narunnifaqaa ufaqa misa sandoosa misa irirafa urinaaqaranoo maridanoo. Innaarunai fifandinnanara urinaaqaraqa mariasa maridaqa. Minara misa kukeeqaqa nidaqa manda maqa maaqaki aqana maqa maaqaki ooni amaraki maqa amaraki keeqafi rafudamaki iqa nidaqa maaqooqaraasa nariranara rufiidaqa.

<sup>39</sup> Mi fasiqa anaaseesa moodaanaki suqufi maridara foora iqa maridaqa ufa qidaqa. Misa aiqamausa Anutuna saqariki marianannai nuqufaqaasaa



maridaqa, misa maa maqanasaa maridaqa sia Anutuna qima afeekaikira ainaina afeeka ainaina mareeqa.

<sup>40</sup> Anutufa maasara moo firaa irirana iridanoo. Indaarugaasa maasa qifeesammidaqa. Sia misa náriara anonaikifaranoo. Misa faqa maasa faqa moodaa kari innaarunai mareefandia maqi qidanoo.

## 12

### *Innee nifu Yisunasaa mundusee miqoo kai fuaqa.*

<sup>1</sup> Indaaruu marusa Anutuna saqarikiusauqaindi maqee maasa qiqa faidaqara foora maridaqa. Maasa maa marirana misa nifusaa narí amani narí amani iqa maridanoo sandeera foora idaqa. Maasa indaarugaasa nifusaa narí amani narí amanidaqa sandaidaqa moomoosa nifu qiqa faranara iriseeqa qinee uriqararaisai kianee qimasee aiqama ainaina qumaararai ainainnara foora maasa mandainaina amiqimasee maasa rakisi qumaree marina afaieeqee maqasaa quqasee doo oori runusee doo oori munduqaannana kai raquramisee doo miqoo kai sanda maqaraasammasee fua.

<sup>2</sup> Oosana arooqooqari fifi inaqa maasa saqarikirafa Yisufa kai maridanoo minasaa kai nifu mundusee fua. Yisufa maa maqanasaa maridanoo aunirira saqarisaa arirara qufanoo sia rufiasee minnisana. Sia uqanna minnisana. Kasooqaqee kuqiranakiqari findifi innaarunai ququsaki Anutuna aaqa marianinnanara iriseenoo mi asasiranra iriseenoo aunirira saqarisaa kuqiranara asauriranara siamma irinau fifau ainainee qimasee kaqi finau. Doo minara maqee Anutufa mariqoo mina aaqa asaukuqannai ooqumarifi maridanoo.

<sup>3</sup> Doo maasa Yisuna aupuraranara iriaqa. Moomoo manda fasiqa anaasee Yisunara fidiqaa imarufanoo sia kaukaata qinau kaqi mi umaarana mara maree fimarinau. Maasa mi oosannara iriseeqa sia nifaaqa kudoosaapamasee Yisuna aanai ubeekaranara minnisaaqa.

<sup>4</sup> Mandainaina fannoo maasa maqee maqee darimarifaqa mina faqa quandaki rakuqaammidaqa. Mi rakirafa sia inni fidika ruqieenoo kaqi mariafanoo kaqi fuaqa, sia minara kudoosaapaaqa.

<sup>5</sup> Anutufa inni narí faiqi namuara pooduara ufa qimannimusa aunidee sia fee aunidee. Anutuna akaraki minara maqi qimaseenoo anoonufa akara ridanoo.

Qini qimaaku, Anutufa ummaara oosana oosanannai ariara foora ani inana sia minara rufiaa amiqimasee iria. Ani oosana uqafiqaidanoo amiqiraqoo fuanneera miqidanoo. Mifa aniara qaoo qinana sia anee minara kudoosaapaa sia oori runua.

<sup>6</sup> Karaambaiqa fannoo mina amuqusi marisa kai naridanoora foora idanoo. Nariara qini faiqi fee qisa kai naridanoora foora idanoo.

Akarakinaa ufa miqiminoo marifaqa qinee minara maqi qidaqa.

<sup>7</sup> Aneenna aidafira ummaarara qini qikoofa Anutufa dariara maqi qidanoo fee qia. Aneenna aidafirana aupuraranannai Anutunara mina amaaku daridanoo fee qia. Aiqaama faiqi nikausa aikannai qumaree nári faiqi namu mandoosana akiaqara naridaqa. Aiqaamausa nári faiqi namu mandoosana akiaqara naridaqa.

<sup>8</sup> Innee Anutuna fiqi namu faqa sia arirana mareenana sia mina faiqi marinnaranoo, dapi faiqi marinnaranoo.

<sup>9</sup> Maa maqanasaa maasa qikoofa aikannai qumarasee mandoosana aki-aqara darifaqa maasa minara rufiidaqa mina aaqa maridaqa. Innaarunai qikoofa miqi kai masee dariara foora inaqa firaqoo mina aaqa maridaqa naaru naaru marianaara.

<sup>10</sup> Maa maqanasaaqaraa qikausa nári iriranannai maasa andeeqa qi-maqaidaqa aikannai qumaree daridaqa. Anutufa maasa andeeqara oosana maraaqera oosana oosana ummaarannai maasa dariara foora idanoo. Mifa nári andeeqarana naida qimiraree qidanoo maasa daridanoo.

<sup>11</sup> Anutufa maasa ummaarannai dariara maqi ifaqa maasa sia minara asasidaqa doori runidaqa doo maasa miqoo qeeqa mandainaina akiqara darirana taikasee andeeqasee marirana asoosana maraidaqa asasidaqa.

*Oosana oosana naakaparafa faqa aaquqirafa faqa mari ufafa.*

<sup>12</sup> Innee nisauku kudoosaapaifaqa raqandaamasee mariasa nisauku uqusee afeekaikiaqa. Aiku aqoori qumooquki mariannana indindi mariannana minnisee mapukufinana aiku ramaseenana kikiqia.

<sup>13</sup> Innee andeeqara aatata kai fifanoo aiku arinafa unufuannoo. Unufinana andeeqasee finnaranoo. Anee manda aatata afiqee finanoo anaiku firaqoo mandaikiannoo. Anee andeeqara qoo afiqee finanoo ani aiku aidafimarifa taikafinanoo andeeqasee anee finnaranoo.

<sup>14</sup> Innee aiqamausa mariasa namufaqa amiqimmandee asoosananaki marirana amaniaqa. Inni mariranakina amiqirafa andeeqarafa kai mariaqa. Sia miqiga karaambaiqa sia qafeefaranoo.

<sup>15</sup> Innee amiqimmandee rakisia, innee Anutuna afaariranaki fuanakiqari quandaki kaqinni ubeekee foora. Innee amiqimmandee rakisiaqa sia moo fannoo inniki saakunananda inniki kambiqafinoo aiqamausa sukaqarana nimiani.

<sup>16</sup> Innee rakisiaqa. Sia inniki moo fannoo Esauna aanna raaqa. Mifa andeeqarana minnisee Anutuna ufa rukiasee moodaa naranannai kai afasaafa nári qumiasana nári akaqa doo aminau.

<sup>17</sup> Amiseenoo miqoo kasooqaqee aupuranau. Aupureenoo nári akoo finnai anireenoo afaaqooqara qufanoo mina akoofa qinau. Sia, doo ani akaqa amiqa qufanoo Eesaufa ikiraqoofanoo aukunu qumimarufanoo randoo randoo sianoo sia paqurinau, doo taikambinau. Innee sia Eesauna aanna raaqa sia andeeqarana minnisaqa.

<sup>18</sup> Maqee aukuna innee sia Isaraee maqannaasa naanna raidaqa. Maa maqanasaa Sinai aaqana ameemaanai Anutuna ufa iriqau. Innee innaarunai mari Sinai aaqanara foora maridaqa Anutuna afusaa kikiqiga mariafanoo. Ooqai Isaraee maqannaasa Sinai aaqana ameemaanai anireeqa sia ufa kai nifu qafoonu mi aaqannasaa ida firaafa qoofaqa qafoonu oonamu namufaqa aakuusaa namufaqa asukuna namufaqa rafaafufafaqa aiqamausa qafamaseeqa rufiaqau.

<sup>19</sup> Miqunakina ukeena qunaki faiqi ufa moo iriqau. Iriqa rufiasee qiqau. Maasa sia moo kaqikaa ufa irianaara, maasa daaquqaiifaqa rufieeqa.

<sup>20</sup> Mi ufana qidanoo maaqi qinau. Faiqi moo fannoo fee aandau fee maa aaqanna auqamasaiifaqa oonisamu qumaree kuqamma arusaqa. Misa mi ufana irufanoo kaaqa naaquqoofaqa maparaaiqau.

<sup>21</sup> Mooseefa faqa Sinai aaqanasaa kambiqoo ainainna qafamasoofanoo kaaqa aaquqoofanoo aindiri aindirufanoo qinau. Qinee faqa qafaunanoo kaaqa daaquqeenoo daindiri reenoo.

<sup>22</sup> Mi aukuanna Israaee maqannaasa mi naaquqara ainainna nifu qafamasoofanoo nifaaqa ramasoofaqa rufiaqau. Maqee innee sia miqiranaki aniifaqa ani maridaqa. Innee Sioona aaqana uqanna kaqi marira Anutuna maqusaki ani mariafanoo. Innaarunai marira Yeerusaree maqusa qangiroo moomoo andandara foora marianaki innee ani mariafanoo.

<sup>23</sup> Innee Anutuna ooqa faiqi innaarunai bukaki akara rirausa kai kaaqa firaqoo suqimarianaki asasimarianaki ani mariafanoo. Innee Anutufiqoo ari mariafanoo. Mifa aiqamausa ufa irisee andeeqannisee marifa maridanoo. Andeeqara fasiqa kuqufusa innaarunai ooruree anoonaikamambiqa innee misa nimana namufaqa andeeqaranaki asasiranaki ani mariafanoo.

<sup>24</sup> Ooqai Kainafa narí akaqa Abeerana arufanoo mina fidika teeqinau. Abeerana fidika fannoo Anutunara qini fidika akiqara anee qiannee qidanoo. Maqee innee Yisuna fidika Abeerana ooriqararana teeqiraqoo ani mariafanoo. Yisuna fidika fannoo Anutunara maasa numoo akiqara minniqisaannee qidanoo uriqaranoo maridanoo. Innee maqee fuka moodaanaki kira ufa quqee marianaki Yisunaki ani mariafanoo.

<sup>25</sup> Minara innee Yisuna ufa sia sia iriaqa. Amiqimmandee rakisimaree iriaqa. Ooqai Mooseefa maa maqanasaaqaraafa qimannimimarufaqa sia iridaqa kuqimariqau. Maqee innaarunaindaraa fasiqa ufa rukiaanafa anee yaifee finnaree mina ariranakiqari rukiasee naqi fee innaree.

<sup>26</sup> Ooqai Mooseefa maru aukuana Anutufa qufanoo Sinai aaqanasaa maqa kasinau. Anutufa minara maaqi qimafeekaikinau. Qinee ooqai maqa kasiafannana, kafa qinee sia maqa kai kasianaura. Innaaruna faqa kasianauroo.

<sup>27</sup> Miqunnara maasa maaqi qidaqa iridaqa Anutufa narí aiqama ainaina auqu quqaqoona kafa aiqama kasimmaseenoo doo mara aqu taikaannoo. Sia kasimari ainainafa mifa kai kaqi mariannoo.

<sup>28</sup> Doo maasa sia kasira ququsaki maridaqa minara maasa susuia. Maasa minara quandakiqa Anutuna aidiranamau kai narí amooqia. Oori kandamasee rufiaqa rufiaqa qiranannai narí amooqia.

<sup>29</sup> Maasa Anutufa sia fifau ainaina maridanoo. Ida qamataikannimaqee marifa maridanoo, minara aaqara oosanara rufiaqa, ani faqa ida qamataikaandooro.

## 13

### *Anutuna aidiramau fira naakaparufa.*

<sup>1</sup> Innee asauku mundiranaki marianara nariara nariara moodaa fasiqa anaasee faiqiara foora uriqarara ainainee qimasee sia fifau noonnoo kai nimuqusi marinaqa nariara nariara ruaqa asaukunoo auqaidana nariara nariara ruaqa. Miqi kai ida sia taikaqa.

<sup>2</sup> Anaamuru sia oori qafainna maqannaana amiqi mandee narana amiqa maaqa amiaqa. Akaqausa miqidaqa sia irirai qangiroo amiqi amiqiqau.

<sup>3</sup> Innee karabusaki mariasara misa faqa karabusaki maridara foora amiqimmandee rakisinnimaqaaqa. Asauku mundirana ufasaara aupuree mariasa sia aunuaqa. Innee misa faqa moodaanaki aupuraranara foora nimuqusi marinaqa rakisinnimaqaaqa.

<sup>4</sup> Innee aiqamausa faiqi anaasee nimundaranara uriqarara ainainee qiaqa. Faiqi aneesee aqumummasainafa sia moonaindi quandaki qumaraa. Aiqamausa inneeqa nammari kai neeqa andeeqasee mariaqa. Faiqi anaasee dapi narí maree narí maree qiqa nuasa faqa qummuariqa nuasa faqa Anutufa ufa iriseenoo naruannoo.

<sup>5</sup> Inni irirafa marirafa munnimma ainainara sia kaaqa rida mariaqa, maqee maree maria ainainnara doo amana maridee qimasee afaaqa quqasee maria. Anutufa minara maaqi qinau.

Qinee sia inni minnisee moosaa fuanaura. Inni faqa naaru marianauree qinau minara afaaqa quqasee maria.

<sup>6</sup> Maasa mi ufana iriseeqa paasoosamaseeqa maridaqa maaqi qianaura. Karaambaiqa maasa dadaaqimarifa maridanoo Minara maasa sia rufiaanaura, Naqimasee maa maqanasaa qaraasa maasa darifaree. Sia amana darifaranoo.

<sup>7</sup> Ooqai indaaruu Anutuna ufa qimannimusara sia aunuaqa. Misa amiqi mariranara faqa misa kuqiranara faqa misa Anutuna saqarikiranara faqa iriseeqa misa nimeeraameera kai ida mariaqa.

<sup>8</sup> Yisufa asauku mundirafa sia minaki oosana oosana irirafa marifa. Eenda faqa maqee faqa naaru naaru faqa amanamana kai andeeqara irira oosana marifa maridanoo. Innee faqa miqiaqa.

<sup>9</sup> Akaqausa Anutuna ufara oosana oosana irirana uqeeridaqa. Innee sia misa naanna reeqa oonuree anireeaiqa. Anutuna afaariranara mi irirafa kai inni nimana mapuku nimaqainaqa mariaqa, mifa andeeqarafa amiqirafa maridanoo. Oosana oosana sandufa moo narana neeqa moo narana sia neeqa mi ufana qimaqoonannai sia inneeqa nimana mapukusee marifaranoo, mi ufana maroosa sia mi ufafa misa nimana mapuku nimaqanau, sia misa dadaaqinau minara innee Anutuna afaariranara iriaqa.

<sup>10</sup> Ooqai Yuda maqanna aanaiqikirausa Anutuna uqiqaana maqa rakisimarusu Anutuna ufamau fidaqa qaindasaa qaraa aandau tatufirana suqee maruna akaqana marasee naqau. Maasa aandau tatufi maria qaindara foora moo maridanoo. Ooqeenaa uqiqaana maqakinaasa sia amana minasaqaraana marasee nooqini.

<sup>11</sup> Ooqeenaa uqiqaana maqaki moodaa faasaana moodaanaki kira faasaanasaa misa uriqararafa aandau fidika mareenoo firaa naaquqara maaqaki oonureenoo qaindasaa teeqimaseenoo raudamaki mi andauna apata amudaani amaqi aiqama sia naqau, mara mareeqa faiqi naambeeqai munu ida aree mariqau.

<sup>12</sup> Mina amanakai Yisufa Yeerusaree maqusa naambeeqai kuqinau. Nari fidikannai faiqi anaasee mandainaina findaukama nisaanifeera miqinau.

<sup>13</sup> Maasa faqa Yisuna dadaaqiqa ooqeenaa maaqa naambeeqaira foora Yisufa mariqoo mina asaurirana dadaaqi maraanauranoo.

<sup>14</sup> Maasa kasooqagee uqanna maa maqanasaa sia maridanoo. Maasa kasooqagee kambiqaaninna maqusara innaarunaindaraanara rakisidaqa.

<sup>15</sup> Doo minara maqee maasa maa maqanasaa maridaqa Yisunannai Anutuna dufi dufi qimamaqaidaqa. Maasa aandau tatufirana fooqaafa dufi dufi qirafa maridanoo. Maasa Anutunara kuqaa anoonnee qimaria noonakiqari minara dufi dufi qirafa maqee maqee kambiqaidanoo.

<sup>16</sup> Maa ainainna faqa sia aunuaqa, nari amiqi nari amiqiaqa, inneeqa ainaina innee iriranannoo kai raineeqee niqoonausa nari ami nari amiaqa. Anutufa miqira ainainara amiqira tatufira andaura foora maridanoo fee qidanoo qaqaara raidanoo.

<sup>17</sup> Innee inneeqa uriqararausa qinnandee kai iaqa. Misa Anutuna saika maraidaqa inni nimanara maqee maqee rakisidaqa. Anutufa kasooqagee misa innisaa rakisiranara iraanoo. Innee misa ufara eedoo qifaqa misa اساسammasee mi ainainnammifaranoo. Innee misa ufa rukiaifaqa misa

nifaaga qumooqukidaqa nikoo nikaa ifaranoo. Misa nikoo nikaa idaqa sia inni dadaaqifaranoo.

<sup>18</sup> Innee maasara maqee maqee innaaru qiaqa. Maasa qimana sia moo ainainara iridaqa andeeqaraqoo kai firanara ridaqa inni qimannimidaqa. Innee minara maasara faqa innaaru qiaqa.

<sup>19</sup> Qinee qeeqara faqa inni qimannimidaqa. Innee qiniara faqa innaaru qifanoo Anutufa qini dadaa qinaqa innee innannai kaqi kaqi fua.

*Anutufa amiqi amiqimma nimaqaaninnufana.*

<sup>20</sup> Naaru naaru moodaanaki kirana Yisufa asauku mundirafa kuqiranannai mina fidikannai doo mapukuseenoo maridanoo. Anutufa mina kuqiranakinaana uqeereeqeenoo faiqi anaasee rakisirana firaanaikamaqaifanoo maridanoo. Nari kuqiranannai faiqi aanaaseesaa rakisirafa maridanoo.

<sup>21</sup> Anutufa asoarana faqaafa innee mina iriranamau fifandinna oosana akoofasaikirana inni nimaqa fuaqera. Anutufa asauku mundiranannai maasa faqa mareeqeenoo nari aidira oosanki nari iriranamau firanaki quqannisaani. Aiqama amooqirafa faqa kaaqa areenarafa faqa asauku mundiranaindi naaru naaru mariannoo. Kuqaa.

*Ati ufa.*

<sup>22</sup> Oo qini qikaqaafasaa innee maa ufana amiqimasee asaana ruaqa. Dadaaqira ufa maridanoo sia kisaqa akara riqa minara qimannimidaqa.

<sup>23</sup> Qinee maa ainainnara faqa qimannimidaqa. Maasa qikaqa Timootifa doo Roomma maqanna karabusaki Yisuna ufasaara rumbaqaofa idukinoo maridanoo. Mifa dauni dauni mai anirainaga afiqee innee marinnaqoo oonureeqa maaqanda inni niqafaanaura.

<sup>24</sup> Innee maasa qimandarana inni uriqararausa faqa aiqama Anutuna ufa irimariasa faqa qimannimiaqa. Itari maqannaasa maaqooqaraasaki mariasa inni nikaqaafasaa mariasa inni nimandaidaga.

<sup>25</sup> Anutuna afaarirafa inni faqa mariani.

## YAMEESA Yameesafa daraanimariasa akara rumannimaqanau.

<sup>1</sup> Anutuna aiku asauku maaqa maaqa daraaniqa mariasa qinee Yameesasa inni nimandaidaqa. Qinee Anutuna eedoo qira rumbara saikara foora marunna fasiqausa maridaqa. Asauku mundirana Yisuna maasa karaambaiga mina faqa eedoo qira rumbara ainainira fasiqara foora maridaqa nimandaidaqa.

*Nimanira ainaina faqa iriranara innaaruqirana faqa mi ufana qimaqoona.*

<sup>2-3</sup> Qini qikaqaafasaauaqa oosana oosana ummaara ainaina nimanamasee qafarafa innisaa aqufinaqa sia minara maparaaiaqa dufi dufi qimasee Anutufa sia minannai daridanoo, afeekaikamma qimaqaidanoo qimidanoo fee qimasee asasiaqa. Mi nimanira ainainafa inni firaaqoo narinaqa inni Anutuna saqarikirafa kaqi kai marinanoo inni mi saqarikirafa mifa inniki sabeenara foora afeekaikamasee mariaqeera mariannoo.

<sup>4</sup> Innee miqiga maridaqa Anutuna ufamau kisaagasaa fimarifanoo inni marirafa nirafa muduka kaqi mariaqa sia kaqikaaqo sia amanaikiaqa kaqi amana kai muduka marianifeera miqiga mariaqa.

<sup>5</sup> Inniki akaqausa irirafa sia amanaikinausa Anutunai innaaru qifanoo nimiani. Anutufa paapaa imarifa amiqimasee irirana kaqi nimirifa maridanoo.

<sup>6</sup> Innee iriranara innaaru qidaqa sia oonumafi qaara irira iriaqa, oonumafi qaara irira irimariasa ufaira foora uqimariafanoo.

<sup>7-8</sup> Miqinna fasiqausa sia karaambaigaindaraana aundurai dadaaqirana mareefaranoo misa yaiffee fuanau yaiffee fuanau qinausa sia moo ainaina mareefaranoo.

*Ainaina faqaasara faqa kudifasiqauqara faqa qimaqoo ufafa.*

<sup>9</sup> Innee Yisuna ufara suqimariasaki Anutuna saqariki mariafanoo innikinaana kudi fasiqauqa nisaurimariasa Anutufa inni mara uqeerasee innarunai fuaqee qimaqainara noori uqeerasee asasiaqa. Inniki ainaina faqaasa kookuna qaamara foora ufai fuaqa aqusainaqa taikafifaranoo.

<sup>10-11</sup> Suani qeenoo firaaqoo aiqaiqinanoo kookuna aadanusinanoo afufeenaarirana kakasinanoo afu qafainanoo amiqi amiqirafa taikafuanoo. Miqi kai inoo ainaina faqaasa oonauqee ani auqee idaqa miqidaqa doo taikeefaranoo. Miqunara Anutufa ainaina faqaasa sandaaqaindaraana mareeqee maqasaa quqasainaqa misa faqa kudifasiqauqa faqa asasiaqa.

*Nimaniranaki andeeqasee kaqikai fimariasara qimaqoo ufafa.*

<sup>12</sup> Faiqi akaqausa nimanamasee qafee mari ainainafa kisaagasaa nimirifaqa Anutuna faqa kaqikai fidaqa miqimaria fasiqa anaaseesa amiqiranaki mariasa mariadaqa. Miqinna fasiqa anaaseesa mi nimanirana taikasaifanoo Anutufa ooqai qima afeekaikira feefauru naaru marirana nimiannoo nari Anutunara rimariasa kai nimiannoo.

<sup>13</sup> Nimanira ainaina fannoo faiqi anaasee moo nifaaqasaa aqufinanoo sia Anutunaindari maa mandainainafa aniannoo fee qimasee oonumafi iriannoo. Mandainaina fannoo sia amana Anutuna amanamasee qafaannoo Anutufa faqa sia moo mandainainannai nimanamasee qafaannoo, sia miqidanoo.

<sup>14</sup> Faiqí anaasee nári mandainainara nidirafa nári rarisameeqeenoo nári ufaanaki naridanoo.

<sup>15</sup> Nári mi manda nidirafa innooqeenoo radiqififanoo mandoosana kambiqaidanoo. Mandoosana kambiqeenoo innoqafinoo kuqiranaki aqufidanoo.

<sup>16-17</sup> Oo qini qikaqaafasaa maa maqa maaqanaki mariasa, sia Sadannafa nikaru qinnana iriaqa. Aiqama amiqira nimira ainaina idaaqirana kaqi nimira afeeka ainaina innaarunaindari qumidanoo. Anutufa innaarunaindaraa qoomauqaindi auquqoofauqa mindari mi amiqira ainainausa qumidanoo. Anutufa sia suani quqoonara foora oonuree aniree ifa moodaamau kai fimarifa.

<sup>18</sup> Anutufa narí iriranannai kai narí anoona ufannai kai maasa narí fukasaa aanaaqi aanaaqikiranaki quqaqiseenoo maasa narí ufini aandau aiqama ainaina uriqararausai kamafi mariaqeera auquqisanau.

*Anutuna ufa sia naaqoo kai iriaqa nisaukunoo qumaraaqa.*

<sup>19</sup> Oo qini didimari qikaqaafasaa uqa maa ufana naaqoonoo iriaqa. Innee dauni moonufa irisee kasooqaqee aneenna ufa qiaqa, sia qusufa qimasee aanooqiaqa.

<sup>20</sup> Faiqí anaasee aanooqirafa sia Anutuna andeeqara oosana dadaaqi uqeeraidanoo.

<sup>21</sup> Innee inneeqa aiqama manda kudimakira oosana faqa manda nira oosana faqa fatika aqusee mariaqa. Innee inneeqa afeeka minnisee Anutuna aramandunnai madoodonaqa mariaqa, maridaqa Anutufa narí ufa inni nimuqusaki quqee marina maraqa. Mi ufananoo inni asumu maraannoo.

<sup>22</sup> Sia anutuna ufa naaqoo kai irisee minnisee oo qinee. Anutuna ufa irimarunausee qiaqa. Miqi qidaqa nariqa nikaru qidaqa. Naaqoo iriseeqa nisaukukoo qumaraaqa.

<sup>23-24</sup> Anutuna ufa irisee sia qumaree marifa tanukaki qafee mari fasiqafara foora maridanoo moodaannai qafamaseenoo quandaki oori kaqinni ubeekaidanoo narí oori qafai oosanara aunimarifa. Anutuna ufa irisee sia qumaree marifa miqirafa maridanoo.

<sup>25</sup> Anutuna idaaqira aaquqira ufa faiqí nifaaqa idukirafa maridanoo. Faiqí anaasee moo fannoo maqee maqee amiqimmandee minaki qafee marifa sia kaqi fifau irisee aunimarifa irisee qumaree marifa mi fasiqafa nana ainainee auqainanoo Anutufa dadaaqinoo amiqi amiqimmiannoo.

<sup>26</sup> Faiqí anaasee moo fannoo nariara Anutuna ufa irimarunausee qimasaidanoo sia narí afauruara amaakiriara oonumafi iridanoo kaqi oosana oosana mandufa urirara kai qimarifa mi fasiqafa Anutuna saqarikirafa sia maridanoo kaqi fifau marifa maridanoo narí afauru fannoo narí akaru qidanoo.

<sup>27</sup> Maasa qikoofa Anutufa maa qaaramoo ainainausa maraanara kuqaa anoona qini saqarikirausammiafoo qidanoo. Moo oosana fiaiqi faiqi rakisirana faqa moo oosana adeedaana anaaseeuqa nariqa aupuraranaki mariasa rakisirafa faqa moo oosana maa manda maqa maaqanakina mandoosana uqa qifaaqai aqufuandoo qimasee eerairinafa faqa mi ainainna namuna maree mariasara kuqaa anoona qini saqariki mariasee qidanoo.

## 2

*Qamunna afaaqainainara sia faiqí raina amana kai amiqi amiqia.*

<sup>1</sup> Qini qikaqaafasaa mariasa. Asauku mundirafa Yisufa maasa karaambaia Anutuna kaaqa qarana uriqararafa maridanoo. Innee mina ufa iridaqa sia faiqi amiqira nifaaqa qafainnanara amiqira qamunna qafainnanara rainasee amiqira fasiqa fee qimasee minara amiqi amiqia, kafaa sia moona afaaqara manda fasiqa fee qimasee minara akoo akaa iaqa.

<sup>2-4</sup> Innee amaana maqaki suqufi keeqaifanoo moo fasiqa ainaina faqaafa amiqira afaqa qamunna afisirafa asaukuki rinna marinafa keeqaannoo moo fasiqa qamunna anaqanaqirafa keeqaannoo, innee amiqira afaqa qamunna faqaanara amiqira fee qimasee amiqira qoo mara quqasaifanoo ooqu mariannoo manda afaqa qamunna faqaanara kaqi kikiannee qifanoo kaqi kikiqinoo mariannoo fee maqasaa fee ooqu mariannoo fee. Innee miqidaqa manda iriranannai faiqi rainee mariafanoo.

<sup>5</sup> Qini qikaqaafasaa mariasa qini ufa iriaqa. Anutufa ainaina siaisara rusandeesamu mandeenoo qafamaseenoo qumareeqeenoo nari saqariki mariasaki uriqararanaki mariaqeera nari innaaruna ququsa maraaqeera ainaina siaisa utaaqamannisaidanoo. Anutufa faasa nariara rimariasara niqafamasee qima afeekaikammasee innaaruna maqa maqa nimiraree qimaqoofa maridanoo.

<sup>6-7</sup> Anutufa miqimasee ainaina siaisa uqeeraifaqa inneeqa ufannai rainannimaqaidaqa unnaqimasee misara maqasaa ooqu mariaqee qimariafanoo. Yafa yafee inni Yisuna ufa irimariasaa mareeqee ufaki siaasinnai quqaida fee, ainaina faqaasa kai miqidaqa innee aaqaidaqa misara amiqira qoo ooqu mariaqee qimariafanoo. Anutufa inniara nari amaakundi fee qimaqoofa marifaqa ainaina faqaasa kai miqiasara manda fasiqee qidaqa Yisuna uriqararana aquraraidaqa fidiqaammamaqaidaqa.

<sup>8-9</sup> Anutuna ququsakinaa ufa maaqi qimasee akara rinoo maridanoo, inneeqa niqoonausara inniqa nifaaqara foora nidianinani. Innee mi ufanamau fidaqa andeeqasee fifaranoo. Innee faiqi nifaaqa qamunna qafamasee rainee mariana mandoosana mareemariafanoo miqimarianara Anutuna sandufa fannoo inni rafaqaafidanoo.

<sup>10</sup> Faiqi moo fannoo Anutuna sandufa aiqama qumaree marinafa moodaa kai aqaamasainafa mifa Mooseena sandufa rukiee marifa maridanoo.

<sup>11</sup> Anutufa qinau sia innee faiqi anaasee nari qummuari nari qummuari iaqanani. Mifa kai innee sia faiqi anaasee kuqa naruaqee qinau. Anee sia anaasee qummuarinana kafaa quandaki faiqi arinana Anutuna sandufa rukiee marianafa mariananoo.

<sup>12</sup> Anutuna sandufa sia faiqi rumbee marifa maridanoo faiqi iduki marifa maridanoo Anutufa mi sandufanasaa kasooqaqee inni ufa iriannoo minara mandainainakiqari idukira kasiqa naanna ramasee andeeqasee maridaqa ufa qiaqa.

<sup>13</sup> Innee inneeqa niqoonausara sia nimuqusirana nimifanoo Anutufa faqa inniara faqa sia amuqusirana nimiannoo. Nariqa niqoonausara nimuqusidaqa dadaaqimariasaa sia Anutuna ufara rufieefaranoo, amiqimasee marifaranoo.

*Yisuna saqarikirana fifau ufannoo faqa asaukunnoo qumararanannai faqa mifa rainaidanoo.*

<sup>14</sup> Qini qikaqaafasaa mariasa, faiqi anaasee moo fannoo nariara Yisuna saqariki marunausee qidanoo sia nari marirana akooroo idanoo mi fasiqana saqarikirafa fifau maridanoo. Miqi mandee saqarikinafa amanee naaru naaru marirana amiannoo fee, sia amana amiannoo.



15-16 Qinee minara iridaqa moo ainaina kikiqa usuanaura. Inni nikaqaafasaa fee nisooqmaakee kuqaa sarauqimariasara qidaqa misa innee innannai aniree naranaree qamunnaree innaaru qifaqa innee sia nimiqa fifau nifaurukoo kai maaqi qia Anutufa inni amiqi amiqiannoo innee oonu qamunna afisusaifanoo inni nifaaqa tootoo qinaqa narana suqasee naaqa. Miqira ufa sia anoona maridanoo fifau ufa maridanoo. Anee kaqi kasinana nipatasaa sarauqi maria ainainna andeeqasee nimiaqaana.

17 Yisuna saqarikirafa miqi kaimminoo maridanoo fifau afaurunnoo akaqaafasara anee oonu qammunna afisusee narana naa. Miqira ufa sia akaqaafasaa dadaaidanoo. Miqi kai inoo fifau afaurunnoo Yisuna saqarikidee qinafa sia asaukunno Anutuna ufa qumarasee inafa marinana ani Yisuna saqarikirafa kuqinoo maridanoo.

18 Faiqi anaasee moo fannoo minara qiannoo, anee Yisuna saqarikirana qumaree marianafa mariananoo qinee qisaukunna Anutuna ufa qumaree marunausa maridaqa. Qinee Yameesasa minara maaqi qidaqa. Qinee naqimasee ani Yisuna saqarikirana qafaanauree asaukunnoo qumararafa sia marinaqa sia qafaanaura. Qinee Yameesasa qeeqa Yisuna saqarikirana qisaukunna qumararana miqiqa inni uqannifiqaanaura.

19 Anee fee aneennaraa kai fee Anutufa moodaa mari fee qimasee mi iriranannai kai anee amiqiranaki maridee qidane. Oo amana innee afaannauqa ufa moodaamau aamasee qimariasaa mariafanoo. Afaannauqa faqa Anutunara moodaa mari fee qidaqa nariqa mandainaina akiaqara narifandinnanara iriafanoo naaquqaidanoo naindiri raidanoo.

20 Oo furufarira fasiqa anaasee asaukunna dadaaqi qumararafa sia maridanoo Yisuna saqarikirafa nari kai miqoo marida fifau ainainara foora maridanoo. Qinee mi oosannara kafa koorooianaura.

21 Maasa qifaqnafa Abarahaamafa naqimaseenoo fee Anutuna faqa moodaanaki kinau. Nari asaukunna nari faiqi Isakeena qumareeqeenoo qaindasaa tatufira aandau suqa amianeera quqoonannai Anutuna faqa moodaanaki kinau.

22 Sia fee innee iridee. Abarahaamafa nari Anutuna saqarikirana faqa nari asaukunna qumararana faqa miqandannoo nari dadaaqi nari dadaaqinuu. Nari asaukunna qumararafa nari saqarikirana dadaaqufanoo anoonaikinoo amiqinuu.

23 Minara akarakina kuqaa maaqi qinuu, Abarahaamafa Anutuna aamuaqira ufa irisee kuqaa fee qimasee saqarikufanoo Anutufa mina qafamaseenoo oo andeeqara fasiqa mareenoo qinuu. Miqi qimaseenoo Anutufa Abarahaamanara qini qiqaondi fee qinuu.

24 Doo innee Abarahaamana oosana qafamasee iriaqa, faiqi sia nari saqarikiranannai kaifau Anutuna faqa moodaanaki kidanoofau asaukunna qumararanannai faqa moodaanaki kidanoo.

25 Yeerikoo anaasee moo Raqaba nammarifa dapi nuaanaaseefa marinuu. Mifa miqi kai inoo nari asaukunna qumarasee iranannai Anutuna faqa moodaanaki kinuu. Mifa Anutunara irisee Yuda maqanna qaraqanda nipuraraa fasiqaqara nari maaqaki mara kukeeqaseenoo kafa mareeqeenoo moo aatata quqasoofaqa fiqau.

26 Maa ufausa ati minara maaqi qinoo maridanoo. Faiqi amana sia marinanoo apata kai doo iri maridanoo kuqinoo mariannoo. Anutuna saqarikirafa narilara maridanoo miqinoo maridanoo asaku qumarasee inafa sia marinara doo kuqinoo maridanoo.

### 3

#### *Maasa qifauru idati miqirafa minara qimaqoofa.*

<sup>1-2</sup> Qini qikaqaafasaa Yisuna ufara suqimariasakiqari innikiqari sia moomoosa ufasaa rakisirausaikiqa mariaqa. Maasa ufasaa rakisirausa afeeka ufa Anutufa kasooqaqee qimiannoo, kaqiqaesa oorudupinoo nimiannoo. Maasa aiqama aaqeemariasa maridaqa. Faiqí anaasee moo fannoo narí ookiqari sia aaqainafa doo mifa anoona paqurimaseenoo doo narí afaaqa ainaina marirana faqa andeeqasee rakisida mariannoo.

<sup>3-4</sup> Maasa qainnannai qoosa ooki aaku amaqaaseeqa mina uqirausa fidaqa quanda quanda imarifanoo aatata fidanoo. Sipa minara faqa iriaqa firaa ainaina tia maridanoo ooruku nammariki fidanoo ufai fraafa fuagee marifanoo fidanoo minaki mari kiateenafa kaqikaa sitiaqa quandee marifanoo fidanoo.

<sup>5</sup> Maasa qifauru ririmma kaqikaa ainaina maridanoo firaa ufa tia ririmma uqeeraidanoo. Kaqi idatiara foora firaa qusau nanda utauridanoo.

<sup>6</sup> Maasa qifauru idati miqirafa maridanoo narí mariqooqari aiqama mandainaina oosana oosana aiqama maasa qifaaqasasa daraanidanoo. Mi idatifa Sadanna idati qumbisee quandakinoo maasa aiqama marirana nirana qumbiqaraidanoo.

<sup>7</sup> Faiqí ooqai faqa maqee faqa amana kaasau ainaina oosana oosana aandaufee ufini fee noodaanna fee maqamau nimari ainainnee firifanoo reendeeniannoo.

<sup>8</sup> Nári nifauru kai faiqí ooqaindari sia reendenimariafa maridanoo. Sia amana faiqí rafaqaafirana amana maridanoo sukufa minaki qumbiqanoo maridanoo.

<sup>9</sup> Maasa minakiqari maasa qikoona maasa karaambaiqara minakiqari dufi dufi qidaqa kafa quandaki Anutufa narí amana kai maasa qiqaonausa auquqoosa niquraraidaqa.

<sup>10</sup> Dufi dufi qirafa faqa niqurararafa faqa moodaa dookiqari kaimma ururaidanoo. Oo qini qikaqaafasaa mariasa mi ainainafa sia andeeqanoo maridanoo.

<sup>11</sup> Maqakiqari ururee mari nammarifa sia moodaa amaraindari sukaqee marifa faqa amiqimarifa faqa ururaidanoo.

<sup>12</sup> Sia faafisa namufaqa keefaadi iraannoo. Sia kamukamuna sanda fannoo faafisa iraannoo. Sia ooruku nammari fannoo faqa nammari uqanna fabaqa iannoo. Maasa nifauru fannoo kai qaaraikidanoo.

(Maaqoo misa saqari sia marifaqa kaqi maaqooqarara saqari auquraidaqa. Faafisa maaqooqarasaaindi Yuda maqannaasaindi mina fooqaafa asumu faafis maridanoo. Keefaadiara oorifa saqari fee qimariqau. Kamukamunara kareepa fee qimariqau.)

#### *Sandaaqaindaraa irirana faqa maqasaaqarara irirana faqa mi irirannara qimaqoo ufafa.*

<sup>13</sup> Inniki moo fannoo nariara irirana faqaasee aiqama ufa oosanara irimarunaasee qimarifa doo mi fasiqafa narí amiqira mariranannai faqa amiqira qumararanannai faqa reendenirana namufaqa narí irirana namufaqa koorooianifeera.

<sup>14</sup> Anee aneenna amuqusa ookiqari sukaqarafa faqa rairaiqirafa faqa ainainara kaaqa rirafa faqa urinana anee unna qimariananoo sia aneenna iriranara uriqarar fee qia.

15 Mi irirafa sia innaarunainadari qumidanoo maa maqa maaqanasaaqaraafa maridanoo sia innaarunaindaraafa, afaannaindi maridanoo.

16 Rairaiqirafa faqa oonititee anititee irafa faqa mariqoo miqoo dapi marirafa faqa mandainaina oosana oosana faqa mariqoo maridanoo.

17 Innaarunaindaraa irirafa indaarugaafa sia ikairi faifa amiqirafa mifa naaree indaaruu doo mina miqooqari asooarana nimirafa faqa fisoo fisooirafa faqa aiqamausara aqoondikirana faqa miqimarifa faiqiara qimudao qirafa qumbiqanoo maridanoo mi innaarunaindaraa irirafa mifa amiqira narana unakuseenoo afaaridanoora foora amiqira oosana nimirifa mifa sia qaara ufa qirafa marifa. Mina marirana faqa sia qaaraikinoo maridanoo. Innaarunaindaraa irirafa miqiminoo maridanoo.

18 Asooemariasa nári amiqira marirana qaamara fooqiara asooaranaki ummaqusaafanoo minakiqari amiqimmandee andeeqarafa kambiqaidanoo.

## 4

*Innee ainainara qoofana qeemariafa sia Anutunasaagaraa irirafau maridanoo.*

<sup>1</sup> Inniki rakirafa faqa tinoorirafa faqa marifa yaindari fee kambiqaidanoo fee. Inniqa naundurakinaa amiqira ainainara rirana faqa mandainainara rirana faqa oosana oosana ainainara naunduraki qoofana qaidaqa raki-danoo.

<sup>2</sup> Innee akaqainainara rumammareeqa sia amana maraanaura moonaindi maridanoo qimasaidaqa faiqí narusee maraidaqa. Innee akaqainainara nimukee marifaqa sia amana maraanauree qimasee ufa rainaidaqa rakimariafanoo. Inneeqa rimaria amiqira ainainara Anutunara sia ireeqa sia maree mariafanoo.

<sup>3</sup> Innee Anutunara irafanoo inni manda iriranara iridammunoo qimaseenoo sia nimidanoo. Innee inneeqa nifaaqaroo qira nidirafa marifaqa mi nidiranasaa taikaanifeera Anutunara ireemariafanoo sia nimidanoo.

<sup>4</sup> Innee ummuari mari anaaseena aanna raidaqa innee maanara sia fee iridee, innee Anutuna aqoondi fee qimasaida maa maqa maaqanasaaqaraasa ainaina aqoondikidaqa Anutuna namuqaaki mariafanoo sia fee minara iridee. Faiqí anaasee moo fannoo maa maqa maaqanakinaa ainaina aqoondikiannee qimaseenoo minara kai inoo Anutuna namuqaakidanoo.

<sup>5</sup> Anutuna tamummaqara fasiqa akara moo maqi qimasee anoonufa qidanoo, Anutufa maasaki quqoo maraqunafa maasara naríndi kai fee qimaseenoo rairaiqidanoo fee qimaseenoo akara rinau.

<sup>6</sup> Sia rairaiqirana kai Anutufa sia qaara irirana iriaqeera minaindika kai iaqeera maqee maqee dadaaqirana qimidanoo. Anutuna akara minara kaifaa maqi qidanoo, Anutufa nári nuqu uqeeraida nári nimooqimariasa rafaafidanoo qaoo qidanoo kafa quandaki reendeeni mariasa afaari-mariana faqa fisoo fisoo imariana faqa nimidanoo.

<sup>7</sup> Innee mi ufana irisee inneeqa afeekaikirana minnisee Anutuna araman-dunnai oqumariaga. Miqi mambiqá Sadannana naakaparana rafaafu-fusee qaoo qifanoo sandaani.

<sup>8</sup> Anutufa marinnai aqa anifanoo mifa quandaki inni naaqa aniannoo. Innee mandoosana maree mariasa inneeqa ikairi nisaukusaa marina nammari uqaqa. Innee qaara ufa qimarisa inneeqa naundura anukaaga.

<sup>9</sup> Inneeqa naanaindara qirana minnisee ikiraqaaga innee inneeqa asasirana minniseeqa noori runuaqa, innee noori kandamasee ikiraqeeqa iki-faafau iaqa.

<sup>10</sup> Miqidaqa Anutuna afusa ureeqafifanoo Anutufa inni uqeeraani.

*Yisuna ufa irimariasa sia narí aquraree narí aquraree qiaqa.*

<sup>11</sup> Qini gikaqaafasaa sia narinni narinni naraquraree naraquraree qiaqa. Faiqí anaasee moo fannoo narí akaqaafasaa aqurarara ufa qinafa Anutuna sandufa aqidanoo mina uriqararafaika midanoo. Anee anutuna sandufa aqinana anee sia mi ufana ameemaanai marianafa anee mi ufana uriqararausee qimariananoo.

<sup>12</sup> Anutufa kai sandufa nimimarifa sandufa uriqararafa maridanoo. Mifa narí kai faiqí asumu araannoo fee narí kai naru taikaannoo fee. Innee yausee marida fee inneeqa nikaqaafasaa niqida fee urinaaqaraidee.

*Duna moona auqaaninna ainainnara sia inneeqa nimooqiaqa.*

<sup>13</sup> Innee maaqi qimariafanoo. Maqee fee duna fee qinee moo maqasaa oonureeqa bisinisamasee fee saikamasee fee firaa narana ummaquseeqa moo aukwana narana moomoo afuqai marinaqa mina akiqara munnimma moomoo maraanaura. Innee miqi qimariasa qini ufa iriaqa.

<sup>14</sup> Innee sia duna faasaana kambiqaaninnanara irimariafanoo. Innee narí nimooqidaqa sanapaaruna miqirausa maqa maqa ititai qafauna dauni rakee idanoo.

<sup>15</sup> Innee minara irisee duna moonara maaqi qiaqa Karaambaiqa irirafa miqinoo marinaqa maasa miqianauree maaqianauree qiaqaana. Mina irirafa sia miqinoo marinaqa sia mina maraanaura.

<sup>16</sup> Innee sia miqi qimariafanoo maaqi qimariafanoo innee inneeqa nifaaqa nimooqimariafanoo firaaqoo inneeqa nuqu uqeeree mariafanoo. Miqi maria ufafa aaqemariafa maridanoo.

<sup>17</sup> Doo qinee maqee andeeqara aana uqannifiqeeqa sia mi mau fiqa aaqefaranoo.

## 5

*Ainaina faqaasa aaquqimannimaqoo ufafa.*

<sup>1</sup> Doo innee kaaqa firaaqoo ainainafaqaasa qimannimidaqa qini ufa iriaqa. Innee dinee quqaida noori runimariafa qusasaa innisaa aqufuannoo aqufuaninnanara irisee ikiraqaaga, ikiraqeeqa ikifaafau iaqa.

<sup>2-3</sup> Inni moomoo ainaina doo putaamma taikkeenoo inni qamunna amiqirana doo qooqoosa qumura neenee taikaseenoo inni kooru munnimma moomoo faqa siuraa moomoo faqa doo taafi aiqama aru finoo mi taafi arirafa quandaki inni mandoosana kooroo inoo inni nimaqi ida kai qamataikaannoo. Innee maa maqee kamuqoo taikainna kamuqoo moomoo munnimma ainaina afeedi mariafanoo amuaaqa amuaaqa faqa rusimariafanoo.

<sup>4</sup> Inneeqa munnimmara nimuqusinaqa ainainira faiqiuqa feefauru sia andeeqasee nimimariafanoo. Misa minara faaqari mariafaqa innee sia fee minara iridee. Misa inniara feefaururara faaqarirafa mifa firaaqoo ooru fimarifanoo karaambaiqa Anutufa uriqararafa innaarunai mariqoo ooru fifanoo iridanoo.

<sup>5</sup> Innee maa maqanasaa maria kamuqoo aiqama ainainna amiqiranaki faqa narí nidimari ainaina moomoo maree marianaki faqa mariafanoo. Rakirafa anidanoo ani aqoonausa kuqa narimariafanoo innee inneeqa nifaaqa afeedidaqa narana moomoo naidaqa nainooki mariafanoo.

<sup>6</sup> Innee moomoo munnimma faqaasa innee andeeqara fasiqauqa unnu-fannai kootaki narira ufa nimiseeqa kuqa nárí mariafaqa misa sia amana qaoo qiafaqa innee kaqi naruafaqa kuqidaqa.

*Karaambaiqa kafaa qumiranara ubiqafi marida afeesara mariaqa.*

<sup>7</sup> Oo qini qikaqaafasaa Yisuna ufa irimariasa, karaambaiqa kafaa qumiranara ubiqafi kasoomambi marida afeesara mariaqa. Ququsa akoofa narana ummaquusee sia munari minari idanoo ubiqafi maridanoo moomoo narana ummaquqaina kambiqaranara ubiqafi afeesida maridanoo mifa aaku afeesara maridanoo aaku maqasaa quminanoo narana kambiqaanoo.

<sup>8</sup> Innee miqi kai iqa karaambaiqa qumuaninnanara afeesiaqa, mifa qusasaa qumuannoo minara inneeqa nimana mapukusee maridaqa ubiqafi afeesiaqa.

<sup>9</sup> Oo qini qikaqaafasaa sia nariara nariara munuqi miniqiaqa, miqifanoo Anutufa faqa inni faqa ufa nimiannoo. Maasa ufa andeeqaaninafa Anutufa adeediranoo maridanoo maasaki keeqarara deedaqida maridanoo. Minara nariara nariara sia munuqi miniqiaqa.

<sup>10</sup> Qini qikaqaafasaa innee ooqai Anutuna tamummaqara fasiqauqa oosana irimariafanoo. Miqoo mikamuqoo marusa oosana oosana narirana nimufaqa misa qafeeqa ubiqafiqa kasoomambi maraqau. Innee misa naanna raaqa narifaqa miqiaqa.

<sup>11</sup> Anutuna tamummaqara fasiqausa ubiqafi maroonara amiqira fasiqauqee qidaqa. Innee Yoobannara irimariafanoo, kisaqasaa ubiqafi mariunara mina aanna raaqa. Yoobanna aidafirafa taikoofanoo mina ainainira faiquqa faqa ufai faqa maqa kasirana faqa mina ainaina mara furufammasee taikaqoofanoo Anutufa quandaki firaqoo amiqi amiqi maisanau. Karaambaiqa Anutufa amuqusirana faqa nifauarana faqa qumbiqarafa marunara amiqi amiqi maisanau.

<sup>12</sup> Qini qikaqaafasaa qini ufa akiaqa maafa maridanoo. Sia inneeqa nimana niqiqaida ufa qiaqa sia innaarunai nisauku uqeerasaida ufa qiaqa sia moo ainaina kikiqususaida ufa qiaqa. Innee andeeqasee eedoo kai qiaqa andeeqasee qaoo kai qiaqa. Innee sia miqifanoo Anutuna ufa innisaa aqufuandoora.

<sup>13</sup> Innikiqari moo fannoo mandainainaki maridanoo fee Anutunara innaaruqiani. Moo fannoo asidanoo Anutuna amooqira idi raani.

<sup>14</sup> Innikiqari moo fannoo auridanoo aurimaria fasiqa anaaseesa amaana maqasaa rakisirausa naaraifaqa misa aniree mi fasiqa anaaseena auriranara innaaru qimasee sauna anoona fooqaana akiaqa amoondunna karaambaiqa auqusaa qimasee adieefaranoo.

<sup>15</sup> Misa naundura Yisunasaa mundusee innaaru qidaqa mi innaaruqirafa aurira fasiqa anaasee mara findifuannoo. Karaambaiqa fannoo marafindifidanoo mina aqarafa marinanoo karambaiqa minnisaannoo.

<sup>16</sup> Inni nariara nariara manda irira irimariannana akooroomaseenana nariara nariara amiqiaqa. Inni aurirana taikaanifeera nariara nariara innaaru qiaqa. Andeeqara fasiqa innaaruqirafa afeeka ainaina maridanoo.

<sup>17</sup> Eeriana oosana ririmma maasara foora faiqí faiqi Anutuna tamummaqara fasiqa fannoo, mifa afeekaikamandee aaku sia ruanifeera innaaru qimasoofanoo qaara faqa qaara faqa aukwana faqa moo ati faqa aaku sia rinau.

<sup>18</sup> Kafaa innaaru qimasoofanoo inaarunaindari aaku maqasaa qumufanoo narana kambiqanau.

19-20 Qini qikaqaafasaa innikiqari moo fannoo anoona ufara minnisee kaqirunna mandainainaki finanoo moo fannoo andeeqara fasiqa fannoo oonu mina qumareeqeenoo amiqira aanai ubeekainafa mi fasiqafa mandoosana marai fasiqana maraquna kuqiranakinaana uqeereeqeenoo kaqi mariraqoo quqaannoo. Mi andeeqara fasiqafa miqinannai moomoo mandoosana akiaqara faqa Anutuna afusaa rafaqafu aisaseenoo aminau.

## 1 PEETOOROO

### Peetooroofa indaaru akara rumannimu ufafa.

<sup>1</sup> Qinee Peetooroosa Anutuna asauku mundirafa Yisufa narí faiqi namuqiari maa maqanasaa diqiqamaqai fasiqausa maa ufana inni akara rumannimaqaidaqa.

Innee Anutufa inni rusandeesamumasee qumaroo fasiqa anaaseesa mariafanoo. Innee maaqooqari asaquakida Isaraee maqa maaqakiqari daraanimafusa Poontusa maqa maaqaki fusa faqa Karatia maqa maaqaki fusa faqa Kapadoosia maqasaa fusa faqa Asia maqasaa fusa faqa Pitinia maqa maaqaki fusa faqa inni aiqamausa maa akarana rumannimaqaidaqa.

<sup>2</sup> Maasa qikoofa Anutufa maqee maa kari narí ianinnanara iriseenoo inni rusandeesamumaqoosa mariafanoo. Sia fifaufau rusandeesamuinau.

Asauku mundirana Yisuna fidikannai findaukarausai kiaqeera faqa Yisuna ufara eedoo qimasee mi mau fuageera faqa Yisuna maraqunannai kaaqa andeeqara fasiqa anaasee kammafi mariaqeera inni rusandeesamumasee maranau. Anutuna afaarirafa faqa asooarana faqa inni naundurari qumbiqafinoo irairaamminoo mariani.

*Naaru kambiqaaninna ainainara asasammasee afeesiranara qidanoo.*

<sup>3</sup> Karaambaiqa Yisufa Anutuna asauku mundirana akoonara Anutunara maasa aiqamausa dufi dufi qimamaqaidaqa. Maasa aaqarana akiaqara nifauarafa firaafa marinara narí asauku mundirafa kuqiranakiqari findifinoo fukasaa aanaaqi kammafi marirana maasa paqurimma qiminau. Naaru kambiqaaninnanara maqee asasiqa doo mi marirafa maasa qumbiqaqimaqaidanoo.

<sup>4</sup> Amiqi amiqira ainaina Anutufa narí aiku asauku maasaree qimasee innaarunai rafaqafimari ainaina maasa mina marararee qidaqa maasa minasaa kai qifu mundusee fidaqa. Mi amiqi amiqira ainainausa Anutufa inniara innaarunai quqagaqee rakisidanoo sia putaa imariqoo sia nau-raanaiki mariqoo sia taikemariqoo maridanoo inniara rakisidanoo.

<sup>5</sup> Mi ainainausa innindi maridanoo Anutuna afeeka fannoo inneeqa Yisuna mandaaqaranannai inni faqa mara afeedamma nimaqee mariasa mi ainainausa innindi maridanoo. Innee taikainna aukwana innaarunai findifi ooru firanara afeesara mariafanoo Anutuna afeeka fannoo innisaa rakisidanoo.

<sup>6</sup> Maa maqee maria kamuqoo oosana oosana inni nimanirafa aupurarafa marianno (Anutufa qinanoo marianno) minara innee kaqi kaaqoo noori runiranaki marifaranoo. Mi nimanira ainainnausara iriseeqa asasiqa.

<sup>7</sup> Mi nimanira ainainausa inni Yisuna saqarikirana nimanidanoo anoon-aikinoo marianifeera kooroidanoo. Faiqi maa maqanasaa mariasa koora mifa inaaqianna kasooqagee taikemari ainainafa qumareeqa idaki quqasee tasirisiri masaida apaapu aiqama uqanna aiqaree marifanoo narí idaaqirafa kai suqufifaqa doo minara amiqiraneeqa qidaqa. Doo inniara Anutufa miqikai inoo nimaniranaki quqeemarinara inni Yisuna saqarikirafa sabeenara foora marianifeera inni idakiara foora nimanidanoo. Inni Yisuna saqarikirana mi nimaniranaki fiqa afeekaikiqa marinafa sia fifau koora munnimma inaaqianna taikemari ainainna kikiqa usirafau marianoofau kaaqa uqanna uriqarara ainaina mariannoo. Innee Yisuna saqarikirana afeekaikiqa marifanoo asauku mundirafa Yisufa innaarunaindari

koorooinna faasaana innee amooqira ufa faqa areenarafa faqa uqeerarana faqa mikari niminaqa mareefaranoo.

<sup>8</sup> Innee sia Yisuna qafoosa kaqi nimuqusi marifaqa minara ririaasa. Innee sia Yisuna qafoosa kaqi inneeqa irirafa minasaa rusimariasa marifanoo mina ufamau fiffaasa. Miqimarianara innee firaaqoo kaaqa areenarana namufaqa asasimariafanoo. Mi asasiranara faiqi sia amana minara ufa qifaranoo uriqararafa maridanoo.

<sup>9</sup> Sia fifau asasidaqa mariafanoo Innee inneeqa Yisuna saqarikirana anoona inni nimana qumareeqeenoo innaarunai asumu mariranaki quqaranara asasidaqa mariafanoo.

<sup>10</sup> Ooqai Anutuna tamummaqara fasiqauqa maa inni nimana asumu mariranaki mara quqaaninnanara irisee firaaqoo amiqimasee queeqaaeeqamasee randaqau. Misauqa kaqi tamummaqasee kasooqaqee Anutufa misa mandainaina minninnisee amiqi amiqira afeeka innaarunai mareefandinna ainaina kaqi nimianinnanara oonumafi irisee akara rumasee mi ufana anoonara randaqau.

<sup>11</sup> Misa Anutunara yairee fee miqiannoo fee naqimasai fanoo fee miqianoo fee ya fasiqanannai fee miqiannoo fee qimasee randaidaqa oonumafi iriqau. Asauku mundirana maraquna fannoo mi tamummaqara fasiqausa naakufufaqa maa maqee aukuanara faqa asauku mundirafa firaa aupurarana maraaninnanara faqa mina taikaranaki firaa areenarana maraaninnanara faqa akooroomasee akara riqau. Ooqai sia kambiqoo kamuqoo akara rumasoo fanoo maridanoo.

<sup>12</sup> Anutufa sia mi tamummaqara fasiqausa maru kamuqoorau qimanniminu. Maa maqee maria kamuqooru inniara qimannimufaqa irisee akara rumaqoofa maridanoo. Mi tamummaqara fasiqausa minara iridaqa ainainiqau. Misa maa maqee innee irimaria anoona ufanara minara qimasee akara riqau. Mi anoonufana tamummaqara fasiqauqa ooqai akara rumaqoofa doo maa maqee maria aukuanu amiqira fasaasa ufa Yisunara qimannimimariasa doo qimannimisaafaqa irimariafanoo. Anutuna naaquqara maraquna fannoo dadaaqifaqa inni maqusa maqusa mariasa daraanimambifaqa qimannimiafaqa irimariafanoo. Tamummaqara fasiqauqa ooqai akara rumaqoo anoona ufausa mina maqee irimariafanoo innaarunaindaraa qangiroouqa mi ufana misa iriafanoo iriaqaa kai imarifaqa firaaqoo Anutufa Yisuna maa maqanasaa arusee afitoonara randaidaqa. Maasa faqa maa maqanasaa marunausa faqa sia mi ainainana amana maridaqa.

*Yisuna ufamau fimariasa kaaqa andeeqasee mariaqa.*

<sup>13</sup> Inneeqa nitikurakinaa irirana deedaqammasee mariaqa. Asauku mundirafa Yisufa koorooinna aukuanu amiqi amiqirana nimiannoo. Inneeqa naundurari irirana mi amiqi amiqiranasaa munduqaraasamaseeqa maridaqa rakisidaqa augaridaqa mariaqa.

<sup>14-15</sup> Innee Anutuna ufara eedoo kai qimasee qumaraaqa. Ooqai innee aamina maru kamusaqa maridaqa manda nidimaru ainainna sia maqee kamu kafa minara mara ootupaaqa, innee aiqama marirana andeeqasee mariaqa, Anutufa inni naaree marifa kaaqa andeeqarafa maridanoo mifa indee kai iqa kaaqa andeeqa mariaqa.

<sup>16</sup> Ooqeenaa Anutuna tamummaqarausa ufa minara maaqimminoo maridanoo. Anutufa qinoo qinee kaaqa andeeqarausa maridaqara qiqa innee faqa miqi kai masee kaaqa andeeqarausaikida



mariaqa.

Tamummaqarusa ufa miqiminoo marufaqa akara rumaqoofa maridanoo.

<sup>17</sup> Anutufa faiqí anaasee aiqamausa irirana qafee marifa maridanoo. Sia manda irirana iriseenoo moo dadaaqammamaqeenoo moo firaqoo mandaikamamaqaidanoo nári maraana amana kai andeeqasee nimidanoo. Miqi mari Anutunara innaaru qidaqa maasa qikoo fee qidaqa maa mariqoo noori runusee maridaqa aaqaranara rufiidaqa mariaqa.

<sup>18</sup> Inni nikeeku nikaaku fifau faafau mandirirana maqeeuna minaki-naana inni idukusee mareeqee quqasainara mina akiaqara fira ainaina maridanoo innee irimariafanoo. Mi feefaurirafa sia koora siruaa miqirafa maridanoo mifa taikee marifa maridanoo.

<sup>19</sup> Inni idukirana akiaqara feefauru firaafa fiqararafa asauku mundirana fidika maridanoo. Sia teeroo namuana faina kaaqa amiqirana Anutuna aandau tatufimaruna fooqaana amiqirana mina kuqiranannai maasa idukinau. Maasa nikeeku nikaaku mandiriranakinaana idukinau.

<sup>20</sup> Ooqai indaaru Anutufa sia maa maqa maaqana auqiraqoo asauku mundirana kaqi utaaqama nimaqaqoofanoo marinoo maa maqee taikara kamu maasaki doo kooroo inoo maasara aunirira saqarisaa kuqufanoo

<sup>21</sup> Anutufa mina kuqiranakinaana uqeereeqeenoo areenaranaki quqanau. Innee minannai Yisunannai Anutunasaa mudiqa mariafanoo kafa minannai kai inneeqa irirana minasaa rusirana faqa naaru innaarunai kambiqaaninna ainainara nidirana faqa minasaa ootupanoo maridanoo.

<sup>22</sup> Maqee innee Anutuna anoona ufa irisee maraafanoo mi ufanannai inni ninukama findaukamaseenoo. Innee inneeqa niqoonausa mi ufana irimariasara kuqaa nimuqusidanoo nidimarifaqa minara kaifaa qinee qimannimidaqa inneeqa nimuqusa ookiqari noori kandamasee nariara nariara nimuqusidanoo nidiani.

<sup>23</sup> Anutuna akarakinaa ufa fannoo ooqai kaqi marufa maqee marifa naaru naaru kaqi marianinafa innee minannai kafa oorudupi mafi kafa fukasaa aanaaqi kammafi mariafanoo. Sia maaqoo kuqimaria nikoona faiqi namu mariafanoo, Anutuna kasimari akarakinaa ufannai naaru naaru marianinna nikoona faiqi kammafi fukasaa aanaaqi kammambi mariafanoo.

<sup>24</sup> Ooqeenaa tamummaqara fasiqa mina akara maaqimminoo marufa maridanoo.

Aiqama faiqí faiqi taatuqee andanda miqirausa mariafanoo, taatuqee andanda qusau aadanusifanoo afufeenaarirafa kakasidanoo. Faiqí areenarafa miqiminoo maridanoo.

<sup>25</sup> Anutuna karaambaiga ufa fannoo sia miqinoo maridanoo naaru naaru mariannoo.

Mi tamummaqara fasiqana ufa miqinoo marifaqa qinee Peetooroosa minara maaqi qidaqa.

Mi amiqira fasaasa ufafa naaru naaru marira ufa maridanoo mina qimannimariafaqa irimariafanoo. Tamummaqara fasiqana ufa miqiminoo maridanoo.

## 2

*Anutuna ufa naamma anoona miqirafa marinara mina naqafuaqa.*

<sup>1</sup> Innee minara iriseeqa inneeqa mandoosana aiqama fatika aqusaaqa. Unnaqira ufa faqa nikaru qimasee maree mariana faqa qaaraikimari ufana

faqa nariara nariara rairaiqimaria ufana faqa aasaandaana qimaria ufana faqa faiqí anaasee niqimaria ufana faqa mi ufausa sia maqee kamu inniki mariani.

<sup>2</sup> Fuka faiqi anaqiara foora naamma anoona kai naidanoo innee faqa miqikai iqa fuka faiqi aanaqiara foora Anutuna andeeqara ufa naamma anoonara fooqaana minara kai kaaqa ruaqa. Mina naqa fifi iqa innooqeera foora iqa asumu mariranaki oonuree marifaranoo.

<sup>3</sup> Miqiga karaambaiqinnai oonuree mina aaqa mariaqa. Innee karaambaiqa amiqi amiqirana doo namasee qafee mariafanoo adiafaa idanoo dadaaqirafa maridanoo.

<sup>4</sup> Faiqí faiqi misa Anutuna amaana maqa usakee maru faakanara foora Yisunara nikooqoofaqa auniriranasaa arusee minnisaqau. Minnisooфанoo Anutufa qafamaseenoo qinee ooqai maa faakannara qutaqamaqaafannana idaaqirafa maridanoo fee qimaseenoo maraseenoo amaana maqa usakararee qimaseenoo marasee kafa rakiqanau.

<sup>5</sup> Inneeqa eedoo qimasee Anutuna asaukuki inneeqa nifaaqa quqasaifanoo faakana namufaqa rakiqasee usakasainanoo faiqí naunduraki anoona amaana maqa kambiqaaani. Kambiqainaqa innee minaki Anutuna aanaiqi kirausaikamambi marifaranoo. Maridaqa Anutuna aidirana taturirana suqa amidara foora amiqira irirana marirana amooqirana amifaranoo. Asauku mundirana Yisunannai miqifaranoo.

<sup>6</sup> Ooqeenaa tamummaqara fasiqa moo fannoo faakanara maaqi qimasee akara rumaqoofa maridanoo.

Qinee Anutusa rusandeesamumasee utaaqamamaqaafanna faakana idaaqirana maraseeqa Isaraee maqasaa oosanarasee rakiqeeqa. Ya fasiqa anaasee fee irisee mina saqarikinafa sia kadiqaannoo anoonaikiannoo.

Tamummaqara fasiqa ufa miqinoo maridanoo.

<sup>7</sup> Innee Yisuna saqariki mariasa oo Anutuna faakana amiqira qoonda fee qinausa mariafanoo. Sia Yisuna saqariki mariasa Anutuna tamummaqara fasiqa inniara maaqi qidanoo.

Innee maaqa usakaidaqa manda faakanee qimasee mareeqee aqusoofanoo fiqumaree kafa amiqira faakana uriqararafai kammambi maridanoo.

<sup>8</sup> Ooqeenaa tamummaqara fasiqa akra moo maaqimminoo maridanoo.

Maa faakanasaa faiqí moomoosa niku qamaki saamurifaranoo Mi saqarifa misa niku amanniminaqa saamurifaranoo.

Tamummaqaraura ufa miqimminoo maridanoo. Minara moomoosa Anutuna ufa irisee sia maroonara niku amaki saamuriqau. Anutufa misara mi iriranasaa saamurifandiafoo qimaqoona miqiqau.

<sup>9</sup> Innee sia miqi mariasa mariafanoo. Innee Anutufa rusandeesamumasee maree marisa mariafanoo. Innee karaambaiqa Anutuna uriqararana aanaiqiki mariasa. Innee naaduma kaaqa andeeqara maqanna mariafanoo. Innee Anutuna narí maqannaasa mariafanoo. Mifa inni asukunakinaana naaramasee mareeqee narí idaaqira kaaqa qara andeeqaranaki inni quqasaifaqa mariafanoo. Sia fifau minaki mara quqeenoo innee Anutuna idaaqira afeeka ainaina imarianara aiqamausa nifusaa koorooiaqee qimaseenoo inni mara narí kaaqa qara andeeqaranaki quqaidanoo.

<sup>10</sup> Ooqai sia Anutuna maqannaasa marusa maqee minaindi mariafanoo. Ooqai innee Anutufa maasa qifauaranara qifauaranara qimudao qiranara

innee sia irimariafanoo maqee innee mina maraafanoo inni faqa kukeeqafinoo qumee maridanoo.

*Innee asaqiraafaira foora maridaqa sia mandoosana maraaqa.*

<sup>11</sup> Oo qini qiigoondiuga, qinee Peetooroosa qeeqa qimuqusa ookiqari naamua qidaqa. Innee Yisunara irimariasa maa maqa maaqanaki maridaqa aanaamuruara foora asaqiraafaira foora mariafanoo. Miqiga maridaqa maaqoo faiqi faiqi manda nidimari ainainafa inniara qini maraaqee qinaqa sia eedoo qimasee mina maraaqa. Mi manda ainainausa inni maraquina arimarifa maridanoo innee moo maqannaasara foora mariafanoo sia maraaqa.

<sup>12</sup> Innee aamina maqannaaki nidaqa maridaqa inneeqa nirana marirana amiqimasee nifaqa misa inniara mandoosana mareemariasee qimasee inni nindafeeqa oo amiqimasee mariasa qimasee misa faqa quandafi Anutuna amooqiga Yisufa innaarunaindari qumurainaqa amooqifaranoo.

<sup>13-14</sup> Qinee Peetooroosa maanara faqa qimannimidaqa. Maqasaa kaamanna firaa uriqararafa faqa maaqa maaqa uriqararausa faqa karaambaiqa Anutufa misa quqanau, mandoosana mareemariasa narifaqa iriqaqera faqa amiqira oosana maree marisa nimooqira ufa nimiaqera faqa mi uriqararausa karaambaiqa maqasaa quqanau. Innee inneeqara innaarunai karaambaiqa faiqi namu maridee qimasee aiqama maqasaa fasiqa anaaseesaa rakisi mariasa ureeqa maridaqa misa ufara eedoo kai qiaqa.

<sup>15</sup> Furufari mariasa inni Yisuna ufa irimariasa minara manda dapi ufa inni nimifaqa sia aanooqirana nariranannai rafaqafuaqa. Anutufa inniara inneeqa amiqira nira mariranannai mi furufarirana qiqanuasa ufa rafaqafuaqera qidanoo.

<sup>16</sup> Innee mandainainaki rumbara fasiqara foora sia nuaqa mandainainaiqari idukira fasiqara foora kaqi nifaaqa quqasee andeeqara oosanki asasida fuaqa. Sia inniqa mandoosana kaifaa maraaqee qimaseenoo unna qimasee faiqi anaasee nifusaa mafi rafaqafusee mandoosanaiqari idukirafara foora nuaqa. Anutuna rumbara fasiqa naanna ramasee kaqi nuaqa.

<sup>17</sup> Innee sia aiqamausara qini qimana fee qimasee furufariaqa, aiqamausa nari uriqararana amanasaa mina afusaa rufiaqa. Aiqama Yisuna ufa irimariasa niqoonausa Yisuna ufa irimariasara nimuqusinoo nidiyani. Innee Anutunara naaquqaani. Kaamanna firaa uriqararanara faqa naaquqaani.

*Innee Yisuna aanna ramaseeqa aupurarana nimifaqa kaqi maraaqa.*

<sup>18</sup> Qinee Peetooroosa kafaa qimannimidaqa. Innee maqasaa feefauruara ainaini mariasa inni rakisimariasa ufara eedoo qimaseeqa misa ureeqa maridaqa misara naaquqamasee andeeqaseeqa misa ufamau fuaqa. Sia reendeeni maria rakisirausara kai miqiaqa aanoo qimarinausara faqa miqi kai iaqa.

<sup>19</sup> Innee miqifanoo Anutuna eedoo qira ufa innisaa mariannoo. Inni rakisirausa fifau aanoomasee inni nariqee ummaara nimiqee ifaqa innee inneeqara Anutuna iriranamau fida fee qimasee reendeeniaqa. Reendeenifanoo Anutufa inni amiqi amiqimmannimaqaani.

<sup>20-21</sup> Innee mandoosana maraifanoo inni rakisirausa mina akiqara nariifaqa reendeenamasee maraifanoo Anutufa mi reendeenirana akiaqara sia

inni nimiannoo inniqa mandoosana akiaqara maridanoo. Innee amiqimasee marifanoo inni rakisirausa fifau narifaqa fifimmandee maraifanoo Anutufa inniara eedoo qiannoo. Fifau narirana fifimmandee marainnanara minara kai Anutufa inni naarameegeenoo narí ufa irimariasaki qugeenoo. Asauku mundirafa narí kai fifau aupurarana inniara maranau. Yisufa fifau aupurarana maranau. Doo innee mina afaqamareeqa mina aanna ramasee miqiaqa.

<sup>22</sup> Mifa sia moo mandoosana maranau. Sia moo unna ufa mina afaurusaa marinau.

<sup>23</sup> Misa aqurara ufa amufanoo sia mifa quandafi mina akiaqara nári niminau. Misa aupurarana mina apatasaa quqoofanoo sia mifa misa aanoo ufa niminau kaqi narí irirana Anutunasaa andeeqara ufa nimirunasaa narí irirana quqasee kuqinau.

<sup>24</sup> Asauku mundirafa narí kai maasa mandainaina aaqarana narí apatasaa mara quqaseenoo doo aunirira saqarisaa kuqirana maree finau. Maasa kuqirausara foora sia mandoosana maraaqera kuqinau, amiqira oosana kuqira foora iqa marida maraaqera kuqinau. Mina afaaqa ateeqaqoonannai maasa daundura uninoo maridanoo.

<sup>25</sup> Innee sipsipa aandauro foora furufariqa auiaqa nuafanoo doo maqee Anutufa inni nimanasaa rakisimari finnai inni aandauro foora rakisimari finnai quqasaifaqa mina afaqee fimariafanoo.

### 3

#### *Ninaaqmaakara qinoo nifaaqmaakara qinoo.*

<sup>1-3</sup> Qinee Peetooroosa ainaini mariasara nári rakisirausa ureeqa mariqee qunnana innee faiqí ninaaqmaka faqa miqi kai iqa inneeqa nifaaqmaakara eedoo qimasee ureeqarusaikamambi mariaqa. Innee miqifaqa inni nifaaqmaaka akaqausa Anutuna ufara sia fee qimariasaa maridaqa sia inni ufa fannoo misa dadaaqiannoo inni andeeqara marirafa kai uqannifiqaannoo. Innee inneeqa nifaaqmaaka faqa maridaqa andeeqara marirana marasee noori kandamasee marirana faqa marifaqa misa nári nifunnai inni andeeqarana qafeefaranoo. Sia afaaqa auqimari ainainnara irisee afaaqa amiqi amiqiaqa, akiaqaki afaaqa auqimariannana faqa afaaqa auqimaria oondana faqa siarara faqa qamunnara faqa sia minauqara irisee nifaaqa amiqi amiqiaqa.

<sup>4</sup> Inni nifaaqa amiqi amiqirafa inniqa nimuqusa ookiqari amiqira marira marirafa minannoo kai nifaaqa amiqi amiqiani. Inni nifaaqa mari inanoo asooqaqaaninafa maridanoo, fisoo fisoomasee kasooqaqee aqumurira oosana fannoo mifa sia asooqaqee mariafa maridanoo minannai kai mara nifaaqa auquaqa. Mi oosannafa Anutuna afusaa amiqira oonda uqanna maridanoo.

<sup>5</sup> Ooqai Anutuna ufa irimaru anaaseesa Anutufa innaarunai nimiraree quna minara asasammasee afeesidaqa maaqimasee nári nifaaqa auqimariqau. Misa nári nifaaqmaakara eedoo qimasee ureeqa maridaqa minannai nári nifaaqa auqidara foora imariqau.

<sup>6</sup> Saraqafa miqimaru anaaseefa marinau. Mifa narí afaaqi Abarahamaana ufara eedoo qimasee qini uriqarara fee qimarinau. Innee miqimandee amiqira oosana mareeqa sia oosana oosana ainainara rufieeqa Saraqana araamummaakai kamambiqa marifaranoo.

<sup>7</sup> Qinee Peetooroosa doo aanaaseeuqara qiqa doo maqee anaasee nifaaqmaqkara qianauro. Anutufa kaqi marirana kaqi nimidanoo aneenna anaqa faqa aneenna faqa mi mariranaki mariafanoo minara aneenna

aanaaqara amanna fee qimasee amandakusee mina faqa maria. Innee miqimasee inneeqa ninaaqmaaka faqa marifanoo moo ainaina fannoo sia innee Anutunara innaaru qirana ititaannoo.

*Andeeqara marira akiaqara mandufa aminana amiqira ufa kai naramia.*

<sup>8</sup> Mi ufana atisaa maaqimminoo marifaqa qimannimianaura. Innee Yisuna ufa irimariasa aiqama ainainara moodaa irirafa mariani aiqamausa moodaanaki kai nimuqusa quandaqa. Innee nariara nariara nikaqaafasaara fooru nimuqusidaqa aiqamausa nariara nariara ruaqa. Innee nariara nariara fifimmasee reendeenamasee miqidaqa nariara nariara qimudao qimasee nari dadaaqi nari dadaaqiaqa.

<sup>9</sup> Mandoosana aminana sia quandakinana kafaa mandoosana amia. Aqurararufa aminana sia kafaa quandafi nari aquraraa. Mi manda oosanna akiaqara quandaki amiqi amiqirana kai amia. Anutufa amiqi amiqirana kai nimiraree qimasee inni naarama nari ququsaki quqaseenoo innee miqi kai iqa amiqi amiqirana kai mandoosana nimimariasa nimiaqa.

<sup>10-11</sup> Ooqeenaa tamummaqara fasiqausa akara maaqimminoo maridanoo.

Faiqi moo fannoo maa maria mariranaki amiqiranaki اساسiranaki marianee qimaseenoo doo mi fasiqafa manda nirana taikaseenoo unnufa taikaseenoo manda marirana ameesa uquseenoo amiqira mariranai ubeekaannoo. Miqinna fasiqafa asoaranara randamareenoo afaqee fidanoo miqinoo fidanoo amiqirana paquriannoo.

<sup>12</sup> Maqasaa fasiqa moo fannoo andeeqasee fimarifanoo Anutufa nari afu minasaa quqaseenoo rakisidanoo mina innaaruqirana maqee maqee iridanoo mariannoo, mandoosana maree mariasara ameesuqunnisaidanoo.

Tamummaqaraura ufa miqiminoo maridanoo.

<sup>13</sup> Qinee Peetooroosa kaifaa qimannimidaqa. Anee amiqira mariranara minara rumammaree marainanoo ya fasiqa fee manda marirana ani amiannoo fee sia ani amiannoo.

<sup>14</sup> Faiqi moo fannoo ani andeeqarana akiaqara ani mandaikama-maqainanoo ani اساسirafa firaafa mariannoo. Innee sia faiqira rufiaqa sia aiqama ainainara amandirinoo aindiri raani.

<sup>15</sup> Innee maqee maqee inneeqa nimuqusaki asauku mundiranara naaquqainaqa mina mareeqee inneeqa karaambaiqaikiaqa. Akaqausa inni innaarunai ainainara اساسammasee afeesimarianara irifaqa innee faasai Yisuna saqarikiranara deedaqammaqainnana misa qimannimiaqa.

<sup>16</sup> Sia raiqasee qimannimia, ireeda nimandakusee qimannimia. Inni nisakadiki anukarafa kai mariani. Faiqi akaqausa inniara asauku mundirana afaqee mariasee qimasee mandufa nimiseeqa inni amiqi marirana nindafamasee nisaurifaranoo.

<sup>17</sup> Innee mandoosana maree marifaqa narifanoo amanaikammiannoo. Anutufa eedoo qinaqa amiqira oosana akiaqara fifau narifanoo uriqaraanoo.

<sup>18</sup> Asauku mundirafa nari uqanna inniara kuqinuu. Moodaa suanisaa moodaa kari kai aiqamausa mandoosanara kuqinuu. Inni nisauku qumareeqeenoo Anutufinnai quqaaneera amiqirafa maasa manda fasiqa anaaseera kuqunnimaqanau.

<sup>19</sup> Mifa asuku mundirafa mina afaqa kuqufufanoo mina amana fannoo findifinoo kaqi mariranaki finoo kafaa miqooqari ooqai kuqusa nimana rumbaranaki marunaki ooqureenoo Anutuna ufa qimanniminuu.

<sup>20</sup> Ooqai Nooafa sipa firaana auqidanoo nammari anianinnanara faiqí anaasee minara faqa qimannimimarufaqa siammirimariqau. Anutufa faiqí anaasee Nooana ufa iriseeqa mandoosana minniseeqa sipaki keeqaaqeera nifeesusia doo kooqi ititaseenoo nammarinna narinau. Nammari narusa nimana marunaki asauku mundirafa kuqiranakiqari findifinoo ooquree qimanniminu. Naru nammarifa dinni qisauku taikasee dinni ani qaaramoo marasee oodaa fasiqa anaasee asumu mara akoonnai quqanau.

<sup>21</sup> Nooafa sipaki asumu mariunara maasa faqa maqee kamuqoo mina amana kai amaana nammari marasee asumu mariaqee qidaqa. Sia fifau nammari maraanannai nifaaqaindaraa qikairi rukarafa anoona maridanoo. Nammari maree mariana anoona maaqimminoo maridanoo. Aneenna aakirana amuqusa ookiqari Anutunara kuqaa qima afeekaikirafa kamasee nimirafa mifa anoona maridanoo. Mifa kai kuqaa nammari maree mariafa maridanoo. Mifa kai Yisuna kuqiranakinaana findifunannai inni asumu marirana nimidanoo.

<sup>22</sup> Yisufa kuqiranakiqari findifinoo innaarunai oorufinoo Anutuna aaqa mina asauku uqannai ooqu marifufanoo Anutufa aiqama innaarunai nari qangiroouqa faqa Sadannana afaanauqa faqa misa oosana oosana afeekauqa faqa mareeqeenoo Yisuna aramandunnai quqaqoofanoo maridanoo.

## 4

### *Ooqeenaa mandoosana minniseeqa fuka marirana maree mariafanoo.*

<sup>1</sup> Asauku mundirafa afaaqasaa aupurarana nari apatasaa maranau. Innee miqiannee qimasee afeekaikamandee deedaqammasee mariaqa. Yisuna ufasaara nipatasaa nidafirana mareemariasaa miqooqari sia mandoosanna maree mariannai ubeekkeefaranoo nikooqaina amiqira aanai ubeekkeefaranoo.

<sup>2</sup> Nipatasaa nidafirana naruqooqari innee maa maqanasaa maridaqa inniqa nidira mandainaina fannoo sia inni mara quqaannoo, Anutuna irirafa kai inni mareeqee quqaani.

<sup>3</sup> Ooqai inni marirafa maaqimminoo marinau. Nari nifaaqa kooroo kooroo iranara faqa, faiqí anaasee nariara nariara kaaqa rirana faqa nammari namasee furufarimariana faqa faiqí anaasee suqufi manda oosana maree mariana faqa moomoosa suqufifaqa nammari neemariana faqa unnaqira anutunara innaaru qimasee mina auqusaa mandoosana maree mariana faqa innee minauqaki kai indaaru mariqau. Doo innee ooqaindari kisaaqasaa minaki kai mariusa mariafanoo doo saaqa amanaikiqa mariafanoo maqee sia minaki mariaqa.

<sup>4</sup> Ooqai innee faqa misa faqa mandoosana qambaana aqufiqa mariusa mariafanoo doo maqee sia misa faqa fuafaqa misa tautiqa aanooqiqa aasaandaana mandufa inni qimannimaqaidaqa.

<sup>5</sup> Kasooqagee misa faqa Anutuna afusaa nari mandoosanara kooroomasee mina aqiara mareefaranoo. Anutufa kaqi mariasara faqa kuqirausara faqa ufa iriseenoo rainaranara deedaqammasee maridanoo.

<sup>6</sup> Minara kai amiqira fasaasa ufa Yisufa kuqirausa qimannimisooafaqa iriqau. Mi kuqirausa kaqi maaqoo marufanoo Anutufa aiqama faiqí anaasee imariandee kai inoo rainannimaqasoofaqa kuqiqau. Mi kuqirausa nimana Anutufara foora naaru naaru mariranaki mariaqeera amiqira fasaasa ufa qimanniminu.

*Nariara nariara andeeqasee riqa inneeqa nimana kai dadaaqiaqa.*

<sup>7</sup> Doo aiqama ainaina taikarafa adeediranoo maridanoo. Innee maqee maqee Anutunara innaaru qiraree qimasee inneeqa nimanara irisaida kai fuuqa maqee maqee aifaridaqa mariaqa. Innee sia miqiga aqara oosana mareeqa naqimasee Anutunara innaaruqifaree. Sia amanaikifara.

<sup>8</sup> Aiqama amiqira ainaina urinaaqararafa maafa maridanoo, sia nifaurunoo kai unna qimasee nariara nariara ruaqa, nisaukunoo dadaaqirana faqa nimuqusannai faqa nariara nariara ruaqa. Nariara nariara nimuqusirafa moomoo manda oosana rafaafidanoo.

<sup>9</sup> Innee nari maaqaki nari maaqaki keeqafi narana suqasee naraaree naraareemasaida naa. Anaamuru faqa paqurimandee miqi kai iaqa. Sia aundura rumbee marinana miqia aundura idukinoo marinana miqia.

<sup>10</sup> Anutufa afaarinoo oosana oosana ainaina akoofasaikirana niminnana aqoonnana dadaaqianeera niminoo sia inneeqara kai maqeeiaqeera niminoo. Innee Anutufa nimimari ainainnasaa amiqira rakisiranara foora rakisidaqa naadu naadu niminna ainaina akoofasaikirana marasee minannai niqoonausa dadaaqiaqa.

<sup>11</sup> Amaana ufa qimannimimari fasiqafa Anutuna ufa kai qimannimiani. Faiqi dadaaqimariasa Anutufa nimimari afeekanannai afeekaikamasee niqoonausa dadaaqiaqa. Miqinanoo aiqama ainainiranaki asauku mundirana Yisunannai Anutuna amooqira ainaina kambiqafuannoo aiqama areenarafa faqa afeeka faqa naaru naaru marianinafa minaindi Yisunaindi kai maridanoo. Kuqaa.

*Yisuna ufamau franara akiaqara aupurarana mareefandinna oosanara qimaqoofa.*

<sup>12</sup> Oo qini qifaaqasaa qiqaondiuga, qinee Peetooroosa qimannimidaqa. Innee Yisuna ufara aupurarana maree mariasa sia tautiaqa nanee moo manda ainaina maasaki kambiqeenoo fee qimasee munari minari sia iaqa.

<sup>13</sup> Kaqi asasa kai iaqa. Maasa asauku mundirana aupurarana naida qimina maraidee kai qimasee asasiaqa. Miqifanoo innaarunaindari mina kaaqa areenarafa faqa kooroomambinaqa maasa asasirana qumbiqarausa marianaaura.

<sup>14</sup> Oo qini qifaaqasaa qiqaondiuga, qinee Peetooroosa qimannimidaqa. Innee Yisuna ufasaara aupurarana maree mariasa asasiaqa kaaqa areenarana maraquna Anutuna maraquna maasa naakinoo maridanoo fee qimasee asasiaqa.

<sup>15</sup> Yisuna auqusaara aupurarana nimifaqa asasiaqa, mandoosana akiqara aupurarana nimiranara eerairiaqa. Innee Yisuna ufa irimariasa innikiqari sia moo fannoo fidika ruqiasainanoo kuquani sandufa rukiarafa faqa sia mariani, ummuarirafa faqa sia mariani, moosa mandainainaki keeqaranara innikiqari moo fannoo sia uqanna mi mandoosanna marasee mina akiaqara aupurarana maraaqa.

<sup>16</sup> Innee Yisuna ufara aupurarana maraseeqa sia minara nisauruaqa, Yisuna auqu maasasaa marinara Anutunara dufi dufi qiaqa.

<sup>17</sup> Anutufa aiqamausa ufa irira aukwana doo ani maridanoo. Anutufa nari faiqi namu ufa naaree iriannoo. Iridanoo misa faqa aupurarana nimiannoo. Miqi qimasee niminanoo Anutuna ufara nikooqee marisa naqi fee iannoo fee firaaqoo uqanna misa ufa nimiannoo.

<sup>18</sup> Ooqeenaa tamummaqarausa akara minara maaqimminoo maridanoo. Andeeqara fasiqauqa nimeekamakida asumu mariranaki keeqaidaqa, Anutunara nikooqee marisa faqa mandoosana mareemariasa faqa naqi fee ifaree, firaaqoo mandaikifaranoo.

Tamummaqara fasiqa ufa miqi qimaqoofa maridanoo.

<sup>19</sup> Minara iriseeqa Anutuna iriranasaa aupurarana maree mariasa nári amiqira mariranannai nári nifaaqa nári auquqoo fasiqanasaa nári nifaaqa amiqimasee quqasee marifaranoo. Inni auqufa ooqai qima afeekaikammaqoofa marifanoo doo miqoo kai fuannoo sia rakeeiannoo.

## 5

*Yisuna ufara suqimariasasaa rakisirausa misa oosanara qimaqoo ufafa.*

<sup>1</sup> Minara inni amaana maqasaa rakisimariasaa qimannimidaqa. Qinee Peetooroosa amaana maqasaa rakisimarunausa maridaqa inni qimannimidaqa. Qinee asauku mundirana aupurarana qeeqa qifunnai qafaafanausa maridaqa, kasooqagee innaarunaindaraa kaaqa qarafa akooroo inaq qinee faqa akaqana marararee qidaqa inni qimannimidaqa.

<sup>2</sup> Innee amaana maqasaa rakisirausa faqa amiqira asumu aandau rakisidara foora mariaqa Anutufa innee faiqi aanaaseera asumu andaura foora rakisiaqee qidanoo. Sia nikoo nikaamasee rakisinnimaqaaqa Anutuna iriranamau kai اساسammasee rakisinnimaqaaqa. Sia feefauruara kai irisee mi rakisira saikana maraaqa naundurakinaana dadaaqianee qimasee maraaqa.

<sup>3</sup> Innee amaana maqasaa rakisimaria fasiqausa sia inneeqara uriqararausee qimasee fuki faaki qiaqa, innee fidaqa quanda fi ireeda kai faiqi anaasee nifiqee andeeqaramau kai fuaqa.

<sup>4</sup> Innee miqimasee faiqi anaasee rakisifanoo andaura foora rakisirafa firaafa Yisufa innaarunaindari akooroomafinoo kaaqa areenara qafee inni nikiqasaa quqasee nimiannoo sia areenarafa taikaaninafa naaru naaru kaqi marianinafa.

<sup>5</sup> Miqi kai iqa innee kumaaraauqa faqa inneeqa faiqi firaasa nimeemaanai miqi kai masee ureeqa mariaqa. Innee aiqamausa oorudupi oorudupimafinaqa qamunnara foora afisusee mariaqa. Tamummaqarausa akara minara maaqi qidanoo.

Anutufa faiqi anaasee nári nuqu uqeeree mariasa rafaafidanoo fifimariasaa adiafaairana faqa amiqirana faqa nimidanoo.

<sup>6</sup> Tamummaqara fasiqa ufa miqinoo marinara innee minara irisee Anutuna afeeka asauku ameemaanai ureeqa marifanoo narí aukuaana qumureenoo inni uqeera uriqararanaki quqannisaannoo.

<sup>7</sup> Mifa Anutufa inniara amuqusimarifanoo rakisidanoo. Minara inniqa aiqama ainainara naundurakinaa ummaara rufiarana nimukee marina naindiri ree mariana minauqa moodaanaki uqeereeqee Yisuna minasaa kai aqusaifanoo dadaaqiannoo.

<sup>8</sup> Innee inneeqa nimanara irisee aufarida mariaqa inni namuqaa Sadannafa kaasau fainiara foora fiq faiqu idanoo yanee nambiqaanau yanee nambiqaanau qidanoo.

<sup>9</sup> Aiqama maqa maaqaki inni niqoonausa Yisuna ufa irimariasaa moodaa karammida aupuree mariafanoo. Minara irisee innee inneeqa Yisuna saqarikamma mapukusee maridaqa Sadannafa aninaqa ititaidaqa mariaqa.

<sup>10</sup> Innee maaqoo maqasaa maridaqa kaqikaqoo nidafirafa mariannoo. Marifanoo kaqi afaarirana akoofa Anutufa inni naaraidanoo narí naaru naaru kaaqa areenarana asauku mundirana namufaqa narí namufaqa inni nimiannoo. Innee maaqoo marifanoo mifa kai inni anoonaikama



nimaqaannoo mifa kai naunduraki mapukirana nimiseenoo afeeka faqa afeeka maaqa atuna fooqaana nimiannoo.

<sup>11</sup> Aiqama afeeka rakisinnimaqarafa naaru naaru minaindi mariannoo. Kuqaa.

*Atisaa nimandoo ufafa.*

<sup>12</sup> Qini amiqira qikaqafasaa Sirafanusafa dadaaqifaqa maa kaqikaa akarana rumannimaqeeqa. Innee Yisuna ufaki mariafaqa qinee qimannimidaqa nifeeqaraidaqa, innee minaki maridaqa kuqaa Anutuna afaariranaki mariafanoo. Innee minaki mapukufi kikiqiaqa.

<sup>13</sup> Yisuna ufa irimariasaa Babiroonia maqusa mariasa faqa maridaqa Anutufa misa faqa rusandeesamumasee maroosa maa papiqanaki inni nimandaidafa. Qini qimaaku Marikoofa mifa faqa inni nimandaidanoo.

<sup>14</sup> Innee Yisuna ufa irimariasaa imariandee nari amooqee nari amooqee iaqa.

Innee asauku mundirana araamuqmaaka faiqinamu inni naunduraisooarafa mariani.

## 2 PEETOOROO

### Peetooroona inaaqianna akara.

<sup>1</sup> Qini Simoona moo duqu Peetooroosa qinee asauku mundirana Yisuna ainainira faiqi Yisufa maa maqanasaa diqiqamaqoo fasiqausa marunausa maa akarana inni rumannimaqaida. Maasa Anutufa maasa asumu maree marifa asauku mundirafa Yisufa narí andeeqaranannai amiqira oondara fooqaana narí saqarikirana maasa qiminau, inni faqa mi amiqira ainainna niminau.

<sup>2</sup> Innee Anutuna faqa Yisuna maasa karaambaiqara faqa iridaqa mi iriranannai Anutufa narí kaqi nimirana faqa narí asooarana faqa inniki qumbiqafinaqa mariaqa.

*Peetooroofa maasa oosana oosana andeeqara mariranara qimaqoofa.*

<sup>3</sup> Anutufa narí kaaqa qara amiqiranannai maasa daaree marina Yisunara irianara eedoo qinoo doo minannai narí innaarunaindaraa afeeka maasa qimanakai qimifaqa minannai Anutuna andeeqara marirana maa maqanasaa maraanaura.

<sup>4</sup> Mi innaarunaindaraa afeekanannai narí kaaqa idaaqira amiqi amiqirana narí qima afeekaikammaqoona maasa qiminau. Mifa qima afeekaikammaqoo kaaqa amiqira ainainannai maasa maa maqanasaa mariafanna mandainainara fanandirana faqa putaairana faqa qima afeekaikammaqoo afeekana mara mareeqa fi ruqiqaki fidaqa Anutuna aunduraindaraa irirana andeeqara mariranaki mariraree qidaqa miqidaqa.

<sup>5-6</sup> Innee innaarunaidaraa andeeqara marirana maridaqa minara kai innee inneeqa Yisuna mandaaqaranasaa minasaa afeekaikamasee inneeqa andeeqara marirana minasaa ootupaaqa. Ootupamaseeqa Anutuna ufa asaana rumasee amiqimasee irirana faqa minasaa afeekaikamasee ootupaaqa. Kafaa miqooqari innee inneeqa nimanara iriseeqa mina faqa afeekaikamasee ootupaaqa. Kafaa miqooqari noori kandamasee maridaqa ainainirana faqa afeekaikamasee mina faqa ootupaaqa. Kafaa miqooqari Anutuna aanna rarana faqa afeekaikamasee ootupaaqa.

<sup>7</sup> Kafaa miqooqari narí nikaqaafasaara foora nariara nariara aidirana mina faqa afeekaikamasee ootupaaqa. Kafaa miqooqari nariara nariara nimuqusirana mina faqa afeekaikamasee ootupaaqa.

<sup>8</sup> Mi amiqira ainainausara innee sarauqi mariafanoo. Innee mi ainainausa moo faqa moo faqa maree marifanoo mifauqa inni dadaaqifaqa innee karaambaiqa asauku mundirana Yisuna iriranaki maridaqa sia fifau marifaranoo sia kadiqarasa marifaranoo innee kasi kasidaqa anonaiki-mariasa marifaranoo.

<sup>9</sup> Faiqi moo fannoo mi amiqira ainainausa sia marainafa mina afu dimbarafa sia qafaidanoo narí mandainaina findaukamaisoonara aunuseenoo miqidanoo.

<sup>10</sup> Innee aiqamausa nifusaa maqee maqee moo faqa moo faqa afeekaikamasee Anutufa inni rusandeesamumasee maroonara kooroo iaqa.

<sup>11</sup> Innee mi amiqira ainainausa afeekaikamasee inni Yisuna saqarikirana ootupamasaifanoo maasa karaambaiqa asauku mundirafa asumu maree marifa Yisufa mina qafamaseenoo narí naaru marira ququsaki firaa qoo kooqi atu aquseenoo inni naarameeqee minaki quqaannoo.

12-13 Qinee minara iriseeqa maa ainainausara maqee maqee naaqoo auqemariana iriqa maraaqeeera. Innee sia aunimariafanoo irimariafanoo anoona ufasaa afeekaikamafi atooqafi irimariafaqa kaifaa qimannimidaqa. Qinee maaqoo sia kuqidaqa kaqi maridaqa inni kafaa kafaa naaqoo auqaranara andeeqanoo mari ifoo qidaqa.

14 Qinee maa maqanasaa kuqiga qipata qusasaa quqaanauree qidaqa iridaqa. Maasa karaambaiqa asauku mundirafa Yisufa akooqoo daamua qimaqooqoo kai qusasaa quqaanaura.

15 Qinee kaqi maridaqa afeekaikamasee qimannimidaqa kasooqagee kuqufuanaqa moo ainaina kambiqainaqa amiqimasee irisaida narimau fuaqeeera qimannimidaqa.

*Sia Peetooroofa uri ufafau qimanniminau. Qinee qeeqa qifukoo qafaafannanara qidaqee qinau.*

16 Sia maasa faiqi uri ufafau iriseefau asauku mundirana

17-18 Yisunara maa maqanasaa firaafa innaarunaindari qumunara qidafau maasa qeeqa qifunnai mina uriqararana qafaafannanara qimannimidaqa. Maasa qeeqa kai mina faqa naaquqara aqanasaa mariafananoo fira kaaqa qaranakiqari Anutuna ufa qumufaqa maasa iriqaifana, maafa qini didira qimaaku marifaqa qinee minara ridaqa اساسidaqa. Mi ufanannai Yisuna auqu firaanaikinoo kaaqa areenarana aakuamaqoofofa maasa miqoo marida qafeeqa iriqaifana.

19 Maqee maasa mina qafamaseeqa ooqeenaa tamummaqara fasiqauqa akarara kuqaa fee qimariafannana, maqee anoona qafamaseeqa doo kuqaa uqanna anoona fee qidaqa. Innee tamummaqara fasiqauqa ufa amiqimasee irifanoo naaqooki keeqainaqa amiqimandee marifaranoo. Misa ufa asukunaki qoomara foora kaaqa qaida maridanoo iqaqarana afeesiannoo duqudeeqiara foora Yisufa inni nimuqusaki kaaqa qaannoo.

20-21 Innee maa ainainna naaree iriaqa. Innee tamummaqara fasiqauqa ufa irimariana sia minakinaa moo ufa fannoo naríara aaduma anoona maridanoo. Si tamummaqara ufa moo fannoo faiqi iriranasaa kambiqanau. Naaquqara maraquna fannoo mi tamummaqara fasiqausa uqeereeqeenoo Anutuna iriranaki quqasoofaqa qafamasee nári maqanna qimannimisee akara rumaqoofofa maridanoo sia nári kai iriqa.

## 2

*Peetooroofa unna amaana ufa qifandinausara aaquqimaqoo ufafa.*

1 Ooqai Isaraee maqannaasaki unnaqira tamummaqara fasiqauqa aniree kaqiruna mara ubeekke mariqau. Maqee maa aukuanna misa undee kai iqa unnaqira amaana ufa qimanniminausa inniki kambiqeefaranoo. Mi fasiqausa Yisuna ufa iriusa rakeemaki kaqinni onuraasauqa maridaqa qumee faiqi kuridinnisee maria unna amaanufana inniki uqeereefaranoo. Yisufa narí kuqu fidikanannai misa kuqiranakinaana feefauru fasiqanara sia irirai nikooqainaqa nári kuridirana nári kai mareeqee nári nífaaqai quqeefaranoo.

2 Miqifaqa innikiqari akaqausa misa ufa iriseeqa mi manda fasiqausa naanna ramasee faiqi anaasee qummuarira oosana mandoosana mareefaranoo. Miqifaqa faiqi anaasee akaqausa misauqa niqafamaseeqa quandaki anoona aanara manda aana fee qifaranoo.

3 Unna qida uqannifiqemariasaa kaaqa ainainara rimariasaa maridaqa misa unnufa inni qimannimi marifaqa mi unnufanannai munnimma aina maree marifaranoo. Ooqaindari naaru kisaaqasaa misa ufa nimimarifa

kuqira ufa misasaa quqasaifanoo mi kuqirafa misara nifeesidanoo. Misa kuridi nimaqee marifa Anutufa sia faiqaidanoo afu maqasee deedaqinoo maridanoo.

<sup>4</sup> Ooqai innaarunaindaraa qangiroouqa akaqausa mandoosana marasoofanoo Anutufa sia nifauanau mareeqee idaki aguseenoo sainandannai rumbaqaosa ufa aukuanara afeesida kaqi maridaqa.

<sup>5</sup> Ooqai indaaruu maru fasiqausa mandoosana marasoofanoo Anutufa sia nifauanau nammari aufiranannai naruseenoo Nooana andeeqara oosana qimannimi maruna faqa narí faiqi namu dinni qisauku taikasee dinni ani qaaraqanda maraseenoo misa namufaqa asumu akoonnai quqanau.

<sup>6</sup> Soodooma maqusa faqa Koomoora maqusa faqa Anutufa idannai aiqamausa naru taikanau. Maasa aiqamausa mandoosana akiaqa qafamasee rufiaaqeera naru taikanau.

<sup>7</sup> Rootafa nariara andeeqarafa marinuu misa nariara nariara qummuarirana faqa ufa rukiarana faqa Rootafa qafamaseenoo akooqee marufanoo Anutufa mina kai asumu akoonnai mara quqanau.

<sup>8</sup> Mi andeeqara fasiqafa misa qambaana marida faasaambaasaana misa mandufa irinoo misa mandoosana qafee marufanoo amuqusa mandaiki marinuu.

<sup>9</sup> Qinee Peetooroosa minara irisee maaqi qidaqa Anutuna ufa irimaria fasiqausa oosana oosana nimaniranaki aqufifanoo Karaambaiqa misa mi nimaniranaki dadaqira oosana iridanoo dadaaqiannoo. Mandoosana maree mariasa narirana ameemaana quqaqai faqa maridaqa ufirira faasanara afeesida rakisira oosanara Anutufa iridanoo maridanoo.

<sup>10</sup> Anutuna ufara fidiqaammasee nári manda nipata manda nidiramau fimariasa misa narira oosanara faqa Anutufa firaaqoo iridanoo. Unnaqira amaana ufa uqannifiqee mariasa misa inniki paasoosida aanooqidaqa maridaqa. Innaarunai kaaqa qee mariasara faqa sia naaquqai faqa rufiidaqa mandufa kai qangiroouqa faqa nimidaqa.

<sup>11</sup> Mi qangiroosa afeeka mi manda fasiqausa afeeka urinaaqaranoo maridaqa mi fasiqausa ufa iriqa sia aanoomasee Anutuna afusaa oonuree misa nariranara qimamidaqa. Anutufa narí kai andeeqaannoo fee qimasee minnisaidaqa.

<sup>12</sup> Unna qira amaana ufa uqannifiqee mariasa nariqa kuara fuseena iriranamau fidaqa innaarunai mari ainainnara sia irimaria ainainnara mandufa qimasaida kaasau aandauro foora ufaanaki narifandinausa kambiqaida miqidaqa. Miqi mariasa Anutufa kaasau aandauro foora kaqi naruannoo.

<sup>13</sup> Misa kuridirana moomoosa nimifanoo Anutufa mina ati quandeeqee nariqa nimiannoo. Nári manda ainainnara nidimarina faasaanasaa kaimma asasamandee maraidaqa. Innee Yisuna ufa irimariasa qoomaqa inni faqa moodaanaki qoomaqanduqidaqa nári nikaruqira oosana maraidaqa inni andeeqee mariasa nisaurirana manduqarana nimidaqa kudimakidaqa miqidaqa.

<sup>14</sup> Unna qira amaana ufa uqannifiqee mariasa ummuari mari anaaseena mararee qimasaidaqa randaidaqa. Misa manda oosanara naararee marisa sia nimuaqu idanoo. Unna qira aana uqannifiqee mariasa misa furufari mariasa oonu rarisameeqee ufaana fainnai ubeekamasaifaqa ufaana aridaqa. Mi unnaqirana uqannifiqee mariasa naranara faqa ainainnara faqa fanandirana akoofasa maridaqa. Misa Anutuna niqurarara ufa ameemaana mariasa maridaqa.

<sup>15</sup> Unna qida amaana ufa uqannifiqee mariasa misa andeeqara aana minniseeqa fifau dapi fukasaa fidaqa. Ooqai Baraamafa Boosoorana amaaku mandoosanna maree maria munnimmanara rumammaraidanoo kaaqa ridanoo namuqaa ufa irisee Isaraee maqannaasa nupuka narua-neera doonkisa fimarinau.

<sup>16</sup> Mina doonki fannoo faiqiara maqi ufa qidanoo akoona furufarira oosana rafaqaqafimarinau. Minannai Anutufa Baraamana mandoosana qaoo qinau. Inniki unna qira amaana ufa uqannifiqee mariasa Baraamana aatata fidaqa miqidaqa.

<sup>17</sup> Unna qira amaana ufa uqannifiqee mariasa aadaturu nammari miqir-rausa maridaqa asuru miqirana ufai fannoo kaqinni sufafaa quqaidanoo. Anutufa firaa asukuna misa afeedama nimaqaidanoo.

<sup>18</sup> Mi manda fasiqausa nári nifaqa amooqimariana faqa furufari maria-nara faqa ufa qidaqa. Faiqí anaasee akaqausa nári mandoosanakiqari find-ifi aaqee kai aanai ubeekarariafaqa mi mandoosanna maree mariasa misa mareeqee nári ufaanaki mara naridaqa. Mi fasiqausa nári mandainainara nidiranannai ufaana fufuseeqa minaki mara naridaqa.

<sup>19</sup> Unna qira amaana ufa uqannifiqee mariasa aaqee kai andeeqara aanai ubeekke mariasara unna qida uneemaana qimasee maasa manda oosanaki-naana idukira oosana uqannifiqaanauree qimasaida nári kai faiqí kuridi maria oosana fannoo nári rumbannimaqaidanoo. Nana ainaina moo mandainaina fannoo faiqí afaqa rumbasainafa doo mi ainainafa kai mina rafaqaqafimari ainainafa maridanoo.

<sup>20</sup> Miqi mariasa akaqausa asaku mundirana, Yisufa asumu maree marifa maasa karaambaiqa, misa akaqausa minara irimarianannai minannai maa maqanasaa kuridira mandainaina rafaqaqafiranaakinaana idukunnisaidanoo andeeqara aanai ubeekkeqa kafa quandaki kafa manda ainainaki aqufinausa mi fasiqa anaaseesa indaaru mandainainaki ida afaisaa mariaasa maqee doo firaaqoo uqanna ida qambaanaki mandainainaki aqufuafanoo.

<sup>21</sup> Miqimari fasiqa anaaseesa andeeqara aana sia qafaifanoofau amana marini. Misa kaqikaaqoo qafamaseeqa innaarunaindaraa ufa rukiaidaqa kafa quandaki fimariafanoo firaaqoo mandaikidanoo.

<sup>22</sup> Misa ooqeenasa ufamau fidaqa faini narí fidirana kafa narí naidanoo, kuarara foora afaqa nammari uqusainanoo kafa oonu dikoomaki doona reere mareeno anidanoo misa miqimmidaqa.

### 3

*Peetooroofa Yisufa kafa qumuaninna ufana faqa maa maqa maaqana idaqaaninna ufana qimaqoofa.*

<sup>1-2</sup> Oo qini qifaaqasaa qiqoondiuqa qinee indaaru pasa akara rumasee inni nimaqaqiafana kaifaa maa maqee inaaqianna akara ruman-nimaqaidaga. Aiqama akaraqaraki amiqira ufa inni nitikuraki quqarara nikaru qimaria fasiqausara inni naaqoo auqeeqa ooqeenana naaquqara tamummaqara fasiqausa ufa qianaqa iriaqeer. Asumu maree marifa maasa karaambaiqa mina aaquqira ufa narí niqiqoo fasiqausannai inni qimannimu aaquqirufana iridaqa sia aunuaqa, irida mariaqa. Minara faqa inni naaqoo auqaida akara ridaqa.

<sup>3</sup> Innee maa indaaruqaa ainaina iriaqa, sia iriqa furufari foora. Taikara aukwana akaqausa nári mandainainara nidirana mara quqemarias miqimarias kambiqafiqa inniara ataasa atasaida maaqi qifaranoo.

<sup>4</sup> Yisufa kafa qumiraree fee qinoo fee. Yaqoo fee maridanoo fee sia kafa qumuannoo. Doo maasa qikeeku qikaaku doo kambiqafi kuqiquau. Oosana aroo aukuanasaaqari aiqama ainaina amana kai fidanoo.

<sup>5-6</sup> Qinee Peetooroosa minara maaqi qidaqa. Mi aaqara ufana qimari-asa maa ainainnara qikoomma irirara qaifaqee qidaqa unnaqimasaida sia iridaqa. Ooqai Anutufa maa maqa maaqana nammari aufiranannai kuridinau. Ooqai indaaru Anutufa qufanoo sia maru ainainnai maa maqa maaqana auqusoofanoo kambiqanau. Maa maqa maaqana nammariinnai auqusoofanoo nammariqari kambiqanau. Kafa miqooqari nammari aufiranannai maa maqa maaqana ooqeenana amiqimmandee kuridinau.

<sup>7</sup> Maa maria maqa maaqana faqa innaaruna faqa Anutufa narí ufannai afeedidanoo idannai qamataikaanifeera afeedidanoo. Innaaruna faqa maqa faqa manda oosana maree mariasa faqa Anutufa afeeda maqai faqa marida moodaa kari idaqama taikaannoo fee qidanoo. Minauqara faqa misa qikooqai faqee qimasee unnaqidaqa sia iridaqee qidaqa.

<sup>8</sup> Qini qiqoondiuga maa ainainna sia aunuaqa amiqimasee iriaqa. Karaambaiqa irirafa maaqimminoo maridanoo moodaa faasaana faqa moomoo aukuaana faqa (wan tauseenna aukuaana faqa) amanamana kai fee qinoo maridanoo. Akaqausa karaambaiqa ufa anoonara sia dauni kambaiqa qimaqaidanoo fee qidaqa noori runidaqa.

<sup>9</sup> Karaambaiqa sia anuqidanoo, maa maqa maaqanakinaa fasiqa anaasee moodaa nariranara akooqaidanoo misa aiqama nári mandainaina nimeesuqusee noori Anutufinnai ubeekamafi minni kai fuageera minara amiqimasee kisaagasaa aiqamausa nifeesidanoo. Kisaaga aukuanara faqa qusa aukuanara faqa amanamana kai fee qidanoo amiqimasee nifeesidanoo.

<sup>10</sup> Karaambaiqa kafa qumira faasaana qumuara fasiqara foora tautumasee kambiqannoo. Mi faasaannasaa innaaruna firaqoo darara qirana namu faqa doo taikafuannoo. Innaarunaki mari ainainausa quqoona faqa suani faqa fasau faqa aiqama ida qama taikafuannoo, maa maqa maaqana faqa minaki mari ainainafa faqa aiqama qama taikafuannoo.

<sup>11</sup> Miqinoo aiqama ainaina idaqama taikaaninnanara irisee innee minara nana oosana faqaasa marifaree fee qidee. Inneeqa rufiseeqa mariranara naaquqara andeeqara marirana maridaqa Anutuna ufamau fidaqa faiqí anaaseeki andeeqasee mariaqa.

<sup>12</sup> Innee Yisufa koorooianinna faasaanara afeesidaqa inneeqa andeeqara mariranannai mi faasaannara kaqi kaqi anianne qimariafanoo. Mi faasaanna innaaruna faqa innaarunai maria fasau namu faqa aiqama ida firaanannai tasirisirimma taikafuannoo.

<sup>13</sup> Anutufa fuka innaaruna faqa maqa faqa kuqaa auqu quqanni-maqaanauree qima afeekaikammaqoofa maridanoo. Mi fuka maqanasaa andeeqaraura kai mi fuka maqanasaa maridaqa nifaaga quqasee maasa maqusa uqannee qifaranoo. Maasa mi fuka maqusanara kai afeesida maridaqa.

<sup>14</sup> Qini qiqoondiuga innee mi faasaannara afeesida maridaqa Anutuna afusaa maridaqa nisakadiki qikairi siaisa mandainaina siaisa mariaqa innee faqa Anutuna faqa noori runirafa sia mi qambaanna mariani asoarana kai mariani.

<sup>15</sup> Anutufa maasa qikaqaafasaa Pauroona narí irirana amufanoo maa akarana rumaqoomau qinee faqa mi mau kai fidaqa. Mifa maaqimandee akara rinau. Karaambaiqa sia dauni qumi marina sia fifau kisaagasaa maridanoo, maasa nariranara akooqai fanoo maasa innaarunai asumu

marirana maraaqeera kisaaqasaa nifeesidanoo. Pauroofa qinnaqoo miqoo kai inni irirafa miqoo kai fuani.

<sup>16</sup> Pauroofa nari pasauqaki mi ufanara qidanoo miqi qimasee qiman-nimidanoo. Mina pasauqaki faiqi irisee sia dadi anoona iriaqaa ira afeeka ufa akaqafa maridanoo. Akaqausa irirana siaisa munuree miniree imariasa mi afeekufana iriqa mara saaeemmeeqee uqiqammeeqee kaqi runna ubeekaidaqa. Sia Pauroonaindi kaifau miqidau aiqama Anutuna ufa akarakinaana miqi kaimmidaqa nariqa kai nari kuridirana mara naakida miqidaqa.

<sup>17</sup> Qini qiqoondiuqa qinee mi ainainnara aaquqimannimaqaunaqa iri-mariafanoo. Minara augarida rakisida mariaqa. Ufa rukiee mariasa nari aqaranannai inni rarisameeqee kaqirunna quqaidaqa. Miqifaqa innee ooqai mariu mariranaki fiqa saamurifaara.

<sup>18</sup> Maasa Karaambaiqa maasa asumu maree marifa asauku mundirafa Yisufa mina amiqira marirana irirana minaki kai fidaqa maqee maqee innooqaaqa. Maqee faqa naaru naaru faqa mina amooqira ufa mariani. Kuqaa.

## 1 YOOHANE

### Yoohaneefa indaaruaa akara rumannimaqoo ufafa.

*Yoohaneefa Yisuna faqa nidanoo aikuqummaseenoo akara rumaqoo ufafa.*

<sup>1</sup> Qinee kaqi marira ufa anoonara Yisunara akara rumasee qimannimidaqa. Mi kaqi marira ufana Yisufa ooqai maa maqa maqafa sia marunakina marufa maridanoo qinee mi ufanara qimannimidaqa. Maasa mi ufana anoona qifunnai qafeeqa daaqoonnai iriqiafana. Maasa qifu qafamasee qisaukunnai akooqoo kaqi marirana anoona marufaqa auqamasee qafeeqa qimannimidaqa.

<sup>2-3</sup> Yisufa mi kaqi marira anoonafa kooroomafufaqa maasa mina qafeeqaramma inni qimannimidaqa. Mifa naaru naaru marirana anoona nari akoona Anutuna faqa marufa maasaki maa maqanasaa kooroomafunara minara inni qimannimidaqa. Maasa mina qafaafanna ainainara iriafanna ainainnara inni faqa qimannimidaqa. Maasa faqa mina akoona Anutufa faqa amaaku asauku mundirana faqa moodaanaki innisaimbaqa mariraree qimasee inni qimannimidaqa.

<sup>4</sup> Innee faqa maasa faqa innisaimbaqa naundurari asasirafa qumbiqaanifeera inni maa ufana akara rumannimaqaidaqa.

*Anutufa kaaqa qarafa maridanoo.*

<sup>5-6</sup> Anutuna amaaku ufa moo maasa qimaqimufaqa maasa mina akooroomasee inni qimannimidaqa. Mi ufana maaqi qinoo Anutufa kaaqa qarafa qoomara foora sia kaqikaa asukuna marifa maridanoo. Mi ufana qimaqiminou. Maasa qeeqara Anutuna faqa aqoondi fee qimasee quandaki asukunaki keeqafidaqa maasa ufa faqa marirana faqa unna qidaqa, sia anoonamau fidaqa.

<sup>7</sup> Maasa Anutuna aanna reeqa suanisaa rakeeiraqoo nunausa moodaanaki marunausa maridaqa nariara nariara aqoondi kammiqa maridaqa. Maasa Anutuna aanna reeqa kaaqa qara qoo fimarunanoo nari amaaku Yisuna fidika fannoo maasa aaqarana numoo aiqama findaukaidanoo.

<sup>8</sup> Maasa nariara sia mandainaina marifaqee qidaqa narakaru narakaru qidaqa Anutuna anoona ufa sia maasaki maridanoo unna ufa kai maasaki maridanoo.

<sup>9</sup> Maasa nari mandainaina oosana oosana Anutuna akooroomma nisainanoo mifa andeeqee marifa maridanoo andeeqa qimaqaannoo mifa maasa numoo taika qiseenoo maasa mandainaina aiqama anukama qisaannoo nari ufamau andeeqasee fimarifa maridanoo mi mau fuannoo.

<sup>10</sup> Anutufa maasa aiqamausara aqee mariasee kai qidanoo. Maasa nariara sia aqee marunausee qimariana Anutunara unna qimari fee qidaqa miqi qidaqa mina ufa anoona sia maasaki marifaqa miqi qidaqa.

## 2

*Yisufa maasa aaqarana andeeqarufa qimaqoo ufafa.*

<sup>1</sup> Qini faiqi namu sia innee aaqaaqeera maa ufana akara ridaqa. Yisufa asauku mundirafa andeeqarafa Anutuna afusaa maasufa dadaaqu fasiqafa



maridanoo faiqí faqa anaasee faqa moo fannoo aaqai fannoo Yisufa minara iriseenoo maasa qikoofinnai oonureenoo maasa aaqarana andeeqa taikaannoo.

<sup>2</sup> Anutuna asauku mundirafa mifa kai aandau tatufirafara foora maridanoo. Minannai maqasaa fasiqa anaasee mandainaina akiqara taikaniseenoo doo maasa Anutufinnai mafi qisaidanoo. Sia maasaindi kai aiqama anaamurundi minannai kai taikannisaaninafa maridanoo.

<sup>3</sup> Maasa Anutuna ufa iriseeqa mi mau fidaqa kuqaa Anutunara iridee qianaura.

<sup>4</sup> Faiqí faqa anaasee faqa moo fannoo Anutuna aqoondi fee qimasee sia Anutuna ufamau finafa mifa unna qimarifa sia anoona ufa minaki marifa maridanoo.

<sup>5</sup> Anutuna ufara eedoo qimasee mi mau finafa kuqaa Anutunara rimarifa mifa anoonaikinoo mariannoo. Maasa maaqi qimaseeqa maridaqa kuqaa Anutunaki maridee qianaura.

<sup>6</sup> Faiqí faqa anaasee faqa moo fannoo qinee kuqaa Anutunaki maridee qimasee mifa asauku mundirana aanna ranoo marinaqa kuqaa Anutunaki marifa maridanoo, sia asauku mundirana aanna rainafa unna qimarifa maridanoo.

### *Yoohaneefa fuka naakaparufa qimaqoofa.*

<sup>7</sup> Qini qifaaqasaa qigoondiuga. Maa ufana sia fuka ufa maridanoo innee oosanaindari iri maria ufafa maridanoo. Ooqeenaa ufa irimariafa maridanoo.

<sup>8</sup> Maa fuka ufafa ooqeenanasaa ootupamasee inni qimannimidaqa akara ridaqa. Maa fuka ufana anoona asauku mundiranaki kooroo inoo maridanoo inniki faqa koorooma nimaqaidanoo, doo asukuna afaqaidanoo fuka kaaqa qarafa qoomara foora inni qambaana qaidanoo.

<sup>9</sup> Mi fukufana maaqimminoo maridanoo. Moo fannoo nariara Yisuna kaaqa qaranaki maridee qidanoo quandafi nari akaqaafasaara fidaqaa inafa mifa sia kaaqa qaranaki maridanoo asukunaki kaqi maridanoo.

<sup>10</sup> Moo fannoo nari akaqaafasaara rinafa mifa faasaana miqiranasaa maridanoo, sia minaki aiku amaki aqufirafa mariannoo.

<sup>11</sup> Nari akaqaafasaara fidaqaa imaria fasiqa anaaseesa asukunakiara foora maridaqa, asukunaki nidaqa firannai anirannaira randaidaqa miki-makanidaqa asukuna fannoo misa nifusaa ititanoo marifaqa miqidaqa.

<sup>12</sup> Qini faiqi namu, qinee inniara akara ridaqa. Inni mandoosanara Anut-ufa nari asauku mundiranara iriseenoo doo inni mandoosana akiqara mininnisoonara qinee inni akara rumannimaqaidaqa.

<sup>13</sup> Innee faiqi firaasa indaaru Yisuna ufa irusa inni akara rumannimaqaidaqa. Innee Yisunara ooqai oosana arooqooqari marinara irimarias marifaqa minara inni akara rumannimaqaidaqa. Qinee inni kumaaraauqa faiqi namuara akara rumannimaqaidaqa. Innee aakaqaindaraa fasiqa uraaqaramafuanara inni akara rumannimidaqa.

<sup>14</sup> Qinee inni faiqi namu faqa akara rumannimaqaidaqa. Innee inneeqa nikoona Anutunara irimariafaqara akara rumannimaqaidaqa. Innee faiqi firaasa innee Yisunara oosana arooqooqari marinara irimarias marifaqa minara inni akara rumannimaqaidaqa. Qinee inni kumaaraauqa faqa akara rumannimaqaidaqa. Innee nimudaanai qimarias marifaqa Anutuna ufa inni mariranaki marifa maridanoo innee aakaqaindaraa fasiqa uraaqaramafuusa marianara inni akara rumannimaqaidaqa.

<sup>15</sup> Innee sia maa maqa maaqanasaqaraa mandirirana mariranara ruaqa. Minaki mari ainainnara faqa sia ruaqa. Innee maa maqa maaqanasaqaraa manda iriranara rimarifanoo Anutunara rirafa sia inniki mariannoo.

<sup>16</sup> Maa maqanasaqaraa mandainaina oosana maaqimminoo maridanoo. Maasa manda daundurakiqari oosana oosana ainainara randeemarunnana faqa maasa oosana oosana ainaina qafamasee marararee qimarunnana faqa maasa nifaqa amooqimariana faqa maa ainainausa aiqama sia maasa qikoofinaindari qumu mari ainainafa maridanoo aiqama maa maqanasaqaraa ainaina kai maridanoo.

<sup>17</sup> Maa maqa maaqanaki maria mandirirana marina ainainausa faqa faiqi nidimari mandainainausa faqa doo taikanoo qumidanoo kasooqagee firaaqoo taikaannoo. Faiqi fee anaasee fee moo fannoo Anutuna iriranamau fimarifa sia maa maqa maaqana namufaqa taikaanno, kaqi naaru naaru mariannoo.

*Asauku mundirana namuqaara qimaqoo ufafa.*

<sup>18</sup> Qini faiqi namu, taikara aukuaana adeediranoo maridanoo. Ooqai asauku mundirana namuqaa uriqararafa aniannoo fee qimasee qimanimiafannana doo maqee mina namuqaa moomoo kooroomafi maridaqa. Maasa mina qafeeqa taikara aukuaana adeediranoo maridanoo fee qidaqa.

<sup>19</sup> Mi namuqaasa maasaki mariusa rakeemaki namuqaakiqau. Misa maasaki maridaqa sia maasa irirana amiqimasee maroosa marusa. Misa kuqaa maasaindi maridau maasaki kaqi marini. Anutufa maasa dadaaqianee qimasee misa qumeenni niqiqoofaqa maasakiqari rakeemakufaqa fufanoo Anutufa minannoo misa mandoosana kooroo inau.

<sup>20</sup> Innee sia misa naanna ree mariasa mariafanoo asauku mundirafa kuqaa nari naaquqara andeeqara maraqunna inni naakunnimaqee mariafaqa mariafanoo innee Yisuna anoonufara irimariafanoo.

<sup>21</sup> Innee Yisuna anoona ufa sia irifaqau sia akara rini irimarianara akara rumannimaqaidaqa. Sia unna ufa moo fannoo anoona ufakiqari kambiqaidanoo. Innee minara faqa irimariasaa mariafanoo.

<sup>22</sup> Yafee unnufa qimarifa maridanoo Yisunara sia Anutuna asauku mundira fee qimarifa mifa unna ufa qidanoo asauku mundirana namuqaa maridanoo.

<sup>23</sup> Miqi qimarifa sia mina amaakuara kaifau qaoo qidanoofau mina akoona Anutunara faqa qaoo qimarifa maridanoo. Faiqi fee anaasee fee moo fannoo mina amaaku marainafa mina akoona Anutuna faqa maraannoo.

<sup>24</sup> Ooqai indaaru Yisuna ufa iriusa mifa inni naunduraki marinara amiqimasee rakisiaqa. Yisuna ufa irufa inni naunduraki marinaqa doo innee minannai amaaku faqa nari akoona faqa atukarasee miqandaki marifaranoo.

<sup>25</sup> Marifanoo asauku mundirafa nari uqanna moo ainaina maa ainainna naaru marirana qimiraree qinau.

<sup>26</sup> Akaqausa inni ueeqasee nikaru qimarifaqa maana minara qimannimidaqa akara rumannimaqaidaqa.

<sup>27</sup> Qinee inniara iridaqa asauku mundirafa nari ufa inni naakunnimaqoofanoo maridanoo. Mina ufa fannoo inniki maridanoo sia fifau moo fannoo aana inni uqannifiqaannoo. Mina ufa fannoo nari kai aiqama ainaina anoona ainaina faqa unna ainaina faqa rainasee qimannimidanoo sia moo unna qidanoo. Innee Yisuna ufa irisee eedoo kai qiaqa. Miqidaqa asauku mundiranaki kaqi mariaqeera qidaqa.

<sup>28</sup> Oo qini faiqinamu Yisunaki mariafanoo kaqi minaki kai mariaqa. Miqi marifanoo narí innaarunaindari quminaqa sia innee nisaurusee kukeeqaaqa kaqi nifaaqa quqasee qafaaqa.

<sup>29</sup> Innee asauku mundiranara irimariafanoo mifa andeeqeemarifa maridanoo. Innee maanara faqa doo iriaqa, faiqí fee anaasee fee moo fannoo andeeqara oosana marainafa mifa faqa Anutuna faiqiara foora maridanoo.

### 3

#### *Yoohaneefa maasa Anutuna faiqi namuara qimaqoo ufafa.*

<sup>1</sup> Innee qafaaqa maasa qikoofa Anutufa firaqoo maasara amuqusifanoo rimarifa maridanoo. Maasara firaqoo amuqusifanoo maasara narí faiqi namu fee qidanoo. Maa maqa maqanasaaqaraasa Anutunara sia irunnara mina faiqi namu maasara faqa sia iridaqa.

<sup>2</sup> Qini qifaaqasaa qiqoondiuga, maqee maria aukwana Anutuna faiqi namu maridaqa. Kasooqagee innaarunai mina faiqi namu maridaqa nana amiqira ainaina fee moo faqa ootupamma qimiannoo fee maasa sia minara iridaqa sia akooqoo maridanoo. Moodaa ainaina kai maasa iridaqa. Asauku mundirafa innaarunaindari kooroinaqa maasa mifara foora mariana. Maasa mina narí uqanna raquramisee qafamasee minara narí fooqaanaikammiana.

<sup>3</sup> Maqee maria kamuqoo asauku mundirana اساسammasee afeesara mariasa minara indee indee idaqa nariqa mandoosana findaukaqa fidaqa.

<sup>4</sup> Moo fannoo aaqee marifa Anutuna ufa rukiaidanoo aaqaidanoo. Qaqaqarana oosana oosana fannoo Anutuna ufa rukiara maridanoo.

<sup>5</sup> Asauku mundirafa sia fifau kooroinau, maasa aaqee marunnana mara aquaneera kooroinau, minaki sia aaqarafa maridanoo innee minara irimariafanoo.

<sup>6</sup> Minara maasa asauku mundiranaki mariasa sia kaqi mandainainaki nidaqa. Yafa yafee kaqi mandainainaki nida fee mifa asauku mundiranara sia irifa sia uqanna minara irimarifa maridanoo.

<sup>7</sup> Qini faiqinamu nikaru qimari fasiqafa anireenoo inni ueeqaandoo qimasee maana inni qimannimidaqa aufariaqee qidaqa andeeqara qoo nimariasa andeeqarasa maridaqa asauku mundirana aanna rarausaa andeeqarasa mariaqa.

<sup>8</sup> Yafa yafee mandaikiraqoo kaqi nimarifa mifa Sadannaindi maridanoo, Sadannafa nikaruqirafa maridanoo nikaruqiannoo. Ooqai oosana arooqooqari mandainainaki nimarifa Sadannafa maridanoo Anutufa narí amaaku maa ainainnara maa maqanasaa kooroinau, Sadannana mandainainirana arutaikaanifeera maa maqanasaa kooroinau.

<sup>9</sup> Yafa yafee Anutuna faiqi maridanoo fee sia mi fasiqafa mandaikiraqoo nidanoo. Anutuna oosana anoona uqanna minaki maridanoo, Anutufa mina akoofa marinara sia amana mandaikiraqoo fimariannoo.

<sup>10</sup> Doo qinee maqee Anutuna faiqi namufaqa Sadannana faiqi namufaqa akooroomasee qimannimidaqa. Faiqí anaasee moo fannoo sia andeeqara qoo nimarifa sia Anutuna faiqi maridanoo, narí akaqaafasara faqa sia uriqarara ainainee qimaseenoo minara sia amuqusimarifa mifa sia Anutuna faiqi maridanoo.

#### *Yoohaneefa maasara nariara nariara nimuqusiaqee qimaqoo ufafa.*

<sup>11</sup> Ooqai indaaru maa ufana innee irimarusa mariafanoo mi ufana oosana maqimminoo maridanoo maasa nariara nariara uriqarara ainainee qimasee nimuqusiani.

<sup>12</sup> Maasa sia Kaina aanna raa, mifa Sadannana faiqi maridanoo narí akaqa arinau. Kainafa nanaree narí akaqa arinoo fee inau. Narí auqoo ainaina mandaikufanoo, mina marirafa nirafa eendaandinoo marunara narí akaqa nirafa marirafa andeeqanoo marunara minasaara aanoomaseenoo arinau.

<sup>13</sup> Qini qikaqaafasaa uqa maa maqa maaqanakinaasa inniara fidi-aqaifaqa siamma innee minara tautiaqa. Kaina oosana maraifaqa misa inniara fidiqaammifaranoo.

<sup>14</sup> Maasa kuqirana minniseeqa kaqi mariranaki ani maridaqa. Maasa nariara nariara andeeqasee qimuqusunnanara minara maasa kaqi mariranaki animaridaqee qidaqa. Yafa yafee nariara nariara sia andeeqasee amuqusinafa kaqi kuqiranaki maridanoo sia anikeeqaidanoo.

<sup>15</sup> Yafee faiqi moo fannoo narí akaqaafasara fidiqaa imarinafa mifa doo kuqa narí marifa maridanoo. Innee maana iridaqa faiqi kuqa narí mariasa sia naaru marirafa misaki maridanoo.

<sup>16</sup> Maasa nariara nariara uriqarara ainainee qimasee nimuqusira oosana maaqimminoo maridanoo. Asauku mundirafa maasara amuqusidanoo narí marirana maasara aunirira saqarisaa quqasee kuqinau. Doo maasa faqa miqi kai iqa maasa qeeqa qikaqaafasaa Yisuna ufa irimariasa mina ufasaara kuqiranaki firariafaqa maasa misa rafaqafunnimaqasee kaqi mariaqee qimasee misa nimaqa maqasee kuquanaura.

<sup>17</sup> Moo fannoo ainaina narí amanasaa maqeeifa narí akaqaafasaa sarauqiranaki marina qafamasee qimudao qimasee amiraree qimasee narí amuqusirana amuqusinoo narí amuqusa muqufi rafaqafuseenoo sia dadaaqinoo, naqimasee miqinna fasiqafa Anutunara qini qimuqusaki maridanoommifoo qiannoo fee. Sia amana maridanoo.

<sup>18</sup> Qini faiqi namu, maasa nariara nariara uriqarara ainainee qimasee rirana sia afaurunnai kai qia. Asaukunai anoona ainaina kai narí ami narí ami iranannai kai mina anoona kooroo inoo kambiqanoo.

### *Yoohaneefa maasara Anutuna afusaa paasoosiaqee qimaqoo ufafa.*

<sup>19</sup> Maasa miqiannanannai kuqaa anoonasaa atooqa maridee qianaura. Maasa miqiannanara maaqoo nidaqa maridaqa Anutuna afusaa mirinni maridanoo maasa qiqaafainaqa paasoosianaura.

<sup>20</sup> Maasa aaqamasaanoo maasa qimuqusa darinanoo Anutufa qimuqusa uriqararafa maridanoo maasa aiqama ainainara irimarifa maasara amuqusinoo sia daruannoo.

<sup>21</sup> Maasa qimuqusirafa sia darinaqa Anutuna afusaa paasoosammi-  
anaura.

<sup>22</sup> Paasoosidaqa maasa nana ainainaree sarau ianna ainainnara innaaru qianoo Anutufa maasa qimiannoo. Maasa mina ufara qimuqusannoo eedoo qimasee Anutuna aidimari oosana maraidaqa iraanna ainainara qianoo mifa qimiannoo.

<sup>23</sup> Anutufa maa naakaparufana maasa qimaqiminou. Innee qini qimaaku Yisuna qini qisauku mundiranara inneeqa irirana minasaa rusisee quandaqi narí mina ufamau fiqa nariara nariara uriqarara ainainee qimasee nimuqusiaqee qinau.

<sup>24</sup> Yau yausee Anutuna naakapara ufamau fimarinausa misa Anutunaki marifanoo kafa Anutufa misaki maridanoo. Anutufa narí maraquna nimiqoona minara Anutufa maasa daunduraki maridanoo fee qidaqa.

## 4

*Unna maraqunara faqa kuqaa maraqunara faqa rainaaninnanara qimaqoo ufafa.*

<sup>1</sup> Qini qifaaqasaa qigoondiuga. Moomoosa náriara Anutuna maraquna maasaki marisee qimariana sia mina irisee aiqamausara kuqaammifoo qiaqa. Innee misa nimanamasee qafaaqa kuqaa Anutuna maraquna fee moona maraquna fee misaki maridanoo fee. Unna qimaria tamummaqarausa aiqamaí daraanammaqa marianara qimannimidaqa.

<sup>2</sup> Innee maaqimasee nimanamasee qafaaqa, kuqaa fee Anutuna maraquna misaki maridanoo fee. Ooqai maa maqa maaqafa sia maruqoo Anutufa innaarunai Yisunasaa asauku munduseenoo kasooqagee anee aiqama maqasaaqaraasa asumu mareena fee qimaseenoo mina qimaminau. Doo maqee inniki moo fannoo maa akooqooqaraanara Yisunara mifammifoo qinafa mifa Anutuna maraquna faqaafa mariannoo.

<sup>3</sup> Moo fannoo aqara ufa qinafa asauku mundiranara sia miqi marifa maqasaa fasiqa faiqi fee qinafa mi fasiqanaki sia Anutuna maraquna marifa maridanoo. Mi fasiqafa asauku mundirana namuqaa maridanoo. Ooqai maasa mi fasiqanara aniannoo mifoo qiafanaqa iriusa mariafanoo maqee doo kooroo mandee ani maridanoo.

<sup>4</sup> Qini faiqi namu innee Anutuna faiqi namu mariafanoo. Unna qira tamummaqara fasiqauqa innee misa urinaaqaramafi mariasa, inniki mari maraqunafa uriqaranoo maridanoo maa maqa maaqanakinaasa maraquna Sadannaindi ureeganoo maridanoo.

<sup>5</sup> Misa maa maqa maaqanakinaa iriranamau ufa qimariafaqa maa maqa maaqanakinaasa misa ufa iridaqa moodaa maqannaasa maridaqa.

<sup>6</sup> Maasa Anutunaindi maridaqa Anutunara irimari fasiqafa maasa ufa iridanoo. Yau yausee sia Anutunaindi mariasa misa sia maasa ufa iridaqa. Doo maasa miqimandee anoona maraquna faqa unna qira maraquna faqa rainasee iridaqa.

*Maasa nariara nariara nimuqusirana anoona Anutufa maridanoo.*

<sup>7</sup> Oo qini qigoondiuga, maasa andeeqasee nariara nariara uriqarara ainainee qimasee ruaqa. Nariara nariara nimuqusirafa Anutunasaqari animari ainainafa maridanoo. Nariara nariara andeeqara amuqusimarifa Anutuna faiqi maridanoo minara irimarifa maridanoo.

<sup>8</sup> Faiqi moo fannoo sia andeeqasee amuqusinafa sia Anutunara iridanoo. Nimuqusirana anoona uqanna Anutufa maridanoo.

<sup>9</sup> Anutufa narí amuqusira oosana maasa uqaqifiqeenoo. Mifa narí amaaku moodaa faiqi maa maqa maaqanaki aqiqamasoofanoo maasara kaqi marirana mina Yisunannai maraaqee qimasee aqiqoofanoo quminau.

<sup>10</sup> Andeeqara amuqusirana anoona maaqimminoo maridanoo. Sia maasa Anutunara uriqarara ainaina fee qimasee rimariqiafana. Anutufa naaree maasara amuqusufanoo narí amaaku aqiqeenoo minannai maasa mandainaina akiaqara dariraree quna mina mara aquanifeera aqiqoofanoo quminau.

<sup>11</sup> Qini qifaaqasaa qigoondiuga. Anutufa maasara miqimasee firaqoo amuqusunara maasa miqi kai iqa quandaki nariara nariara uriqarara ainainee qimasee qimuqusiani.

<sup>12</sup> Sia moo fannoo Anutuna qafoose maridaqa maasa nariara nariara riranannai Anutufa maasaki maridanoo mina amuqusirana anoona doo maasaki anoonaikinoo maridanoo.

<sup>13</sup> Maasa maaqi qimaseeqa Anutunara kuqaa maasaki marifaqa maasa minaki maridee qianauranoo. Mifa narí maraquna maasa qimunara maasa minaramma irianaaura.

<sup>14</sup> Maasa maa ainainna qafeeqa aiqama qimannimidaqa maasa qikoofa narí amaaku aqiqaenoo maa maqa maaqanasaaqaraasa mandainainaki mariasa qumareeqee uqeeraani fee qimasee aqiqanau.

<sup>15</sup> Ya fasiqa anaasee fee maa maqanasaaqari Yisunara kuqaa Anutuna faiqi fee qinafa Anutufa minaki maridanoo mifa faqa nariki maridanoo.

<sup>16</sup> Anutufa maasara amuqusirana maasa qeeqa minara iridaqa kuqaa fee qimasee minasaa mundidaqa. Anutufa nimuqusirana anoona marinara yafa yafee nariara nariara andeeqara amuqusiranaki marifa mifa Anutunaki faqa marifa maridanoo, kaifaa Anutufa minaki maridanoo.

<sup>17</sup> Anutuna amuqusirafa sia fifau maasaki anoonaikidanoo. Anutuna ufa irira faasaana sia narí afusaa rufiaaqeera paasoosiaqeera mina amuqusirafa maasaki anoonaikidanoo. Maaqoo maria kamuqoo maasa marirafa Yisunaindi miqirafa maridanoo nariara nariara andeeqara nimuqusiranaki anoonaikinoo maridanoo. Nariara nariara andeeqara nimuqusira oosana sia maparaairafa minaki maridanoo.

<sup>18</sup> Moonara rufiarafa sia kaqi kambiqaidanoo maasa manda ainaina akiqara daruandoo qimasaida rufiidaqa. Maasa maqasaa didimari fasiqanara sia rufiidaqa maasa didirafa rufiarana afaqasaifanoo didirafa kai maridanoo. Anutufa maasara amuqusimarifanoo maasara ridanoo. Maasa Anutunara rufiidaqa Anutufa maasara rimarina sia iridaqara miqidaqa, Anutufa maasa dari marifaqara foora minara rufiidaqa.

<sup>19</sup> Anutufa indaaru maasara amuqusunara maasa minara irisee kuqaa fee qimasee quandaki Anutunara faqa nariara nariara faqa uriqarara ainainee qimasee ridaqa nimuqusidaqa.

<sup>20</sup> Moo fannoo qinee Anutunara uriqarara ainainara rida fee qimasee quandaki narí akaqaafasaara fidiqaa inafa unna qirafa mariannoo. Mifa narí afu qafee marina narí akaqaafasaa ririmma sia amuqusidanoo minau Anutuna sia qafee marina naqimandee fifau amuqusiraree sia amana.

<sup>21</sup> Doo minara qinee qidaqa. Asauku mundirafa maa naakaparufana maasa qimaqimiqoona inni qimannimidaqa. Ya fasiqa anaasee fee Anutunara uriqarara ainainee qimasee rinafa mifa quandakinoo narí akaqaafasaara uriqarara ainainee qimasee faqa ruannoo.

## 5

### *Maa maqa maaqanasaaqaraa mandainaina uriqarara ufa.*

<sup>1</sup> Yafa yafee Yisunara Anutuna asauku mundira fee qinafa mifa Anutuna faiqi mariannoo. Moo fannoo akoonara rinafa mifa mi fasiqana faiqiara faqa ruannoo.

<sup>2</sup> Maasa maaqiannanara Anutuna faiqi namuara ridaqee qianaaura. Anutunara nimuqusinaqa mina ufamau andeeqasee fuannanara Anutuna faiqi namuara ridaqee qianaaura.

<sup>3</sup> Maasa Anutunara ruannana anoona maaqimminoo maridanoo. Mifa naakapainna ufara eedoo qimasee asaukunnai qumaraannanara doo mifa anoona maridanoo. Anutuna naakapara ufa sia firaa qumaara tia maridanoo aufadaidanoo.

<sup>4</sup> Maasa Anutuna faiqi namu maa maqa maaqanasaaqaraa mandainaina amana maasa mina uraaqaraanara. Maa ainainannai maasa maa maqa

maaḡanasaaḡaraa mandainaina uraaḡaraidaḡa, Yisuna saḡarikiranannai uraaḡaraidaḡa.

<sup>5</sup> Yafasiḡa anaasee fee maa maḡa maaḡanakinaa mandainaina uraaḡaraannoo fee. Akoḡḡooḡaraana Yisunara Anutuna amaaku fee qinafa mifa maa maḡanasaaḡaraa mandainaina uraaḡaranoo mariannoo.

*Yisunara Anutufa mina amaaku marunara kooroo ufa.*

<sup>6</sup> Maa Yisufa asauku mundirafa narí anoona aranandakiḡari fidika namarisaḡari kambiqanau sia nammari kaifau nammari namufaḡa fidika namufaḡa apirirafa kambiqanau.

<sup>7</sup> Anutuna maraḡuna fannoo kuḡaa anoona ufa imarufa maridanoo mina kooroo inau.

<sup>8</sup> Qaaramoo ainaina kooroo imarifa maridanoo. Mi qaaramoo namufa moodaa ainainara kai qidaḡa, mi namusa maraḡuna faḡa nammari faḡa fidika faḡa maridaḡa.

<sup>9</sup> Maaḡoo kootaki ufa qimariasa ufa iridaḡa kuḡaa fee qidaḡa. Faiḡí ufa marinanoo Anutuna ufa fannoo faiḡí ufa uriḡaranoo marinara mifa akoḡḡooḡaraana Yisunara qini qimaaku uḡannee qimaḡoofa marinara maasa minara kuḡaa anoonee qimasee irianaara.

<sup>10</sup> Yafa yafee Yisunara Anutuna amaaku fee qinafa narí aundurakinaafa faḡa dadaaḡinanoo kuḡaa anoonee qiannoo. Yafa yafee Yisunara sia Anutuna faiḡi fee qinafa mifa Anutunara unna qimari fasiḡafee qidanoo Anutufa narí amaakuara qu ufanara unna fee qidanoo miḡi qidanoo.

<sup>11</sup> Anutufa narí amaakuara qu ufafa maaḡimminoo maridanoo Anutufa naaru naaru kuḡaa marirana maasa qiminu, mi marirafa maasaindi mina amaakuki marifa maridanoo.

<sup>12</sup> Yafa yafee Anutuna amaaku qumarainafa doo mifa mi marirana namufaḡa qumareenoo. Yau yausee sia Anutuna amaaku qumarainausa sia mi marirana faḡa qumaraidaḡa.

*Sarau inna ainaina Anutuna innaaru qinanoo amiannoo.*

<sup>13</sup> Innee Anutuna amaakuara irirana rusimariasa innee doo naaru marirana doo maree fee qiaḡeera maa ufana akara rumannimaḡaidaḡa.

<sup>14</sup> Maasa Anutuna iriranasaa maaḡoo moo ainainara innaaru qinanoo kuḡaa maasa qimiannoo maasa iridaḡa, miḡiannanara maasa Anutuna afusaa sia rufiidaḡa paasoosamasee innaaru qidaḡa.

<sup>15</sup> Maasa Anutunara moo ainainara innaaru qinanoo mifa iriannoo. Maasa minara iridaḡa iraanna ainainna kuḡaa qimiannoo fee qidaḡa.

<sup>16</sup> Faiḡí moo fannoo moo mandoosana mareemarina sia andeeḡasee kuḡiranaki fimaria mandoosana marasainanoo mina akaḡaafasaa fannoo qafamaseenoo Anutunara innaaru qinanoo mina mandainaina ateeka rukaiseenoo narí marirana amiannoo. Qinee kuḡiranaki sia andeeḡasee fimaria mandoosannara qidaḡa. Andeeḡasee kuḡiranaki fimaria mandoosana maridanoo moo fannoo mi mandoosanna marinaḡa innee sia minara innaaru qiaḡa.

<sup>17</sup> Aiḡama aḡarafa mandoosana maridanoo akaḡausa moo mandoosana sia kuḡiranaki fimariafa maridanoo.

<sup>18</sup> Maasa maana iridaḡa sia Anutuna faiḡi namu mandoosana maḡee maḡee maraḡa fidaḡa. Anutuna amaaku ititasaifanoo manda fasiḡa fannoo sia amana mina mandaikamamaḡaannoo.

<sup>19</sup> Maasa maana iridaḡa maasa Anutuna ainaina maridaḡa. Maa maḡa maaḡanaki mariasa aiḡama manda fasiḡa aakaḡakinaa fasiḡa araman-dunnai maridaḡa.

<sup>20</sup> Maasa maanara iridaqa asauku mundirafa Anutuna amaaku uqanna maasa Anutunara iriaqeera mina irirana qiminau. Doo maqee maasa Anutuna amaaku asauku mundirana Yisunaki marianara moodaanaki kuqaa anoona Anutunaki maridee qidaqa. Miqiqa maasa anoona Anutunaki faqa anoona asumu mariranaki faqa maridaqee qidaqa.

<sup>21</sup> Qini faiqi namu unna qira Anutufara fooqaa qira ainainara nianasaa rufiaaqa, kuqaa Anutuna inni nimuqusakinaana mara amaaramaseenoo mina amaaqa maqaandoora minara rufiaaqa.



## 2 YOOHANE

### Yoohaneefa qambaana akara rumannimaqoo ufafa.

<sup>1-2</sup> Oo maa anaasee aneenna faiqi namufaqa qinee faiqí firaasa akara rumannimaqaidaqa. Qinee faqa Yisuna anoona ufa irimariasa saimbaqa ani aninna faiqi namuara faqa uriqarara ainainee qimasee qimuqusi-faqa ridaqa Anutuna kuqaa anoona ufa maqee maasa daundurari maridanoo naaru naaru marianinafa marifaqa minara maasa aniara uriqarara ainainee qimasee qimuqusidanoo.

<sup>3</sup> Maasa gikoofa Anutufa mina amaaku asauku mundirafa Yisufa faqa narí amuqusiranakiqari narí afaarirana faqa narí nifauarana faqa narí asoarana faqa innisaimbaqa qimiannoo.

*Anoonufara faqa naríara naríara nimuqusirana qimaqoo ufafa.*

<sup>4</sup> Oo maa anaasee ani faiqi namu akaqausa Anutuna naakaparufamau fimariafaqa qinee minara irunanoo qifaqa asasidanoo.

<sup>5</sup> Minara qinee ani afeekaikamasee qimamidaqa maasa aiqamausa Yisuna ufa irisee naríara naríara uriqarara ainainee qimasee nimuqusiramau kai fuaqa. Doo mi ufana ani qimamidaqa sia fuka aakaparufau, ooqai oosana irimarunnufana ani qimamidaqa.

<sup>6</sup> Mi nimuqusirana qinee qunandee mina oosana maaqimminoo maridanoo. Maasa aiqamausa Anutuna naakapara iriramau fuaqee qinau. Mi naakaparufafa ooqai oosanaindari irimariafa maaqi qidanoo, innee aiqamausa naríara naríara uriqarara ainainee qimasee nimuqusiranaki mariaqa.

<sup>7</sup> Moomoo nikaru qimariasa ueeqee mariasa maaqanna maaqanna daraaniga maridaqa. Misa Yisunara asauku mundiranara sia faiqí faiqi kambiqanau foo qidaqa. Miqi maria fasiqausa ueeqee mariasa maridaqa asauku mundirana namuqaa kammidaqa.

<sup>8</sup> Innee inneeqa nifaaqasaa rakisiaqa. Maasa ufa ooqai anoonaikimarifa sia maqee inniki taikaannoo aneenna maaqoo ainainirana akiaqara naaru innaarunai oorufinana amiqimasee maraanneera qimamidaqa.

<sup>9</sup> Faiqí moo fannoo asauku mundirana ufamau sia fimarifa fiaikatee fimarifa mifa sia Anutuna faiqi mariannoo. Asauku mundirana ufamau kai fimarianafa sia asauku mundirafa kai minaki maridanoo, mina akoofa faqa minaki maridanoo.

<sup>10</sup> Oo maa anaasee faiqí moo fannoo maa qinee qunnufana sia qimarinafa anirainana sia aneenna maaqaki mara quqaa. Sia minara amiqi amiqia.

<sup>11</sup> Anee miqimarinna fasiqana amiqi amiqirufa qinana doo mina mandoosana dadaaqidana miqimariananoo.

*Akara taikarufa qimaqoofa.*

<sup>12</sup> Qinee ufa oosana oosana ani qimamiraree qimaseeqa sia papiqasaa rirana amana marifaqa. Ani maqusai kasooqagee firara iridaqa. Minni oonureeqa dooqari ani qimamiseeqa narí qimami narí qimamimasee asafaranoo.

<sup>13</sup> Ani auna faiqi namu mai mariasa maa qini pasaki inni nimandaqidaqa.

### 3 YOOHANE

## Yoohaneefa inaaqianna akara rumannimaqoo ufafa.

<sup>1</sup> Oo Kaiusafa anindiri Yisuna anoona ufa qimarianaki marunnaara qinee faiqí firaasa aniara qimuqusimarifaqa maa akarana ani amaqaídaqa.

<sup>2</sup> Qini qifaaqasaa qiqoondi. Ani maraḡuna amiqiranaki doo maridanoo, ani afaaqa faqa aurirana dinee sia marianifeera aneenna aiqama ainaina faqa mina amana kai amiqiranaki marianifeera Anutunara innaaru qidaqa.

<sup>3</sup> Oo Kaiusafa ani akaqaafasaa mai anireeqa aniara Yisuna anoona ufamau maqee maqee fimarianaqa qimaqimiafaqa mina iriseeqa asasi-daqa. Kuqaa anoona maree mariannanara ani oosana koorooifaqa qinee qafeeqa.

<sup>4</sup> Qini faiqi namukammafi mariasa kuqaa anoona aatata fimarianara minara kai irisee firaasasirana qimidaqa. Sia moo ainaina mi asasirana amana kai maridanoo.

*Yoohaneefa Kaiusana oosanara amooqu ufafa.*

<sup>5</sup> Oo Kaiusafa qini qiqoondi, Yisuna ufa maqusa maqusa qimannimiḡanuusa ani maqusaí oonuraafana oosana oosana dadaaqirana amiqimasaida nimimariananoo. Anee sia moo maqanna fee qimasee minnisaanafa mariananoo.

<sup>6</sup> Anee dadaaqimarianausa misa ani aufakiana qimaqimiafaqa iridaqa. Misa aniara maasa maaqooḡaraasa amaana maaqaki keeqee mariasa nifusaa anee misara amuqusi mariannanara kooroo ida qiafaqa iridaqa. Anutufa afaarimarifa maridanoo anee faqa mina aanna reenana mi fasiḡausa dadaaqinana anee Anutuna ainainira faiqi amana kai maria.

<sup>7</sup> Yisuna ufa qimannimiḡanuusa innee sia misa niqafuosa moo maḡannaasa mariafanoo sia aamina maḡanna maqusa maqusa fidaqa misa munnimmaina marasaida naqa fimariḡau. Yisuna auḡusaa mina ufa kai maree fimariḡau, misa maasa Yisuna ufa irimariasaa faiḡara maaḡaina kai maraseeqa Anutuna ainainirausaika mafiqa nidaqa misaikana maraídaqa.

<sup>8</sup> Maasa Yisuna ufa irimarunausa misa kadaapiriranara iriseeqa misa miḡimasee anoona ufa saikimariasaa moodaanaki dadaaqiqa maasa saika faqee qimasee maraaqeera ani qimamidaqa.

*Yoohaneefa Diotareefeesana mandoosanara qimaqoo ufafa.*

<sup>9-10</sup> Qinee qusa akara riqa inni miḡooḡaraasa amaana maqaki keeqee mariasa nimiaqeera. Nimaḡaunanoo Diotareefeesafa narí kai nariara uriḡararausee qimarifa qini akarakinaa ufa sia irimarifa, kasooqaqee inniki qinee oonureeqa mina oosana inniki marina unna ufa mandufa maasara qimarina unnufa oosana oosana qimarina kooroo ianaura. Mifa sia minara kai idanoo Yisuna ufa qimannimiḡanuusa miḡoo oonuraafanoo sia misa dadaaqidanoo misa ititannimaḡaidanoo. Miḡooḡaraasa amaana maqaki keeqee mariasa quandaki misa dadaaqiraree qiafanoo misara faqa quḡasee doo fuagee qidanoo.

<sup>11</sup> Oo Kaiusa qini qifaaqasaa qiqoondi, anee manda ainaina qafamasee sia mina ammeemmeerria amiqira oosana qafamaseenana mina ammeemmeerina mina aanna rainanoo amana marianno. Andeeḡara oosana maree mariasa misa Anutunaindi maridaqa. Mandainaina maree mariasa misa sia Anutunara irimariasaa maridaqa.

<sup>12</sup> Inniki faiqi moo marifa mina auqu Deemeetariusafa minara aiqamausa kuqaa andeeqara fasiqa fee qidaqa. Anoonu ufa faqa mi fasiqanara andeeqara fasiqa fee qidanoo. Maasa kuqaa anoonu ufa kai qimaruna innee irimariasa mariafanoo sia mi fasiqanara unna qidaqa. Maasa minara amiqira fasiqa fee qidaqa.

*Akara atinni mafi taikarufa.*

<sup>13</sup> Qinee moomoo ufa ani qimamiani qimaseeqa sia amana papiqasaa akara riqa.

<sup>14</sup> Kaqikaagoo anee ianannai qinee firaree qidaqa. Oonureeqa amiqim-mandee nari qimami nari qimami qianauranoo.

<sup>15</sup> Yisuna asooarafa anifaqa mariani. Ani agoonduqa maaqoo qaraasa aiqamausa ani amandaidaqa. Maasa qiqoonduqa miqoo mariasa nuqu ramasee qimannimia. Maasa misa nimandaidaqa.

## YUDEESA Yudeesafa akara rumaqoo ufafa.

<sup>1</sup> Qinee Yudeesa maa pasana akara ridaqa. Qinee Yisuna ainainira faiqi Yameesana akaqa maridaqa. Qinee qeeqa qifasaanara Anutuna asauku mundirana Yisuna eedoo qimasee rumbara faiqiara foora ainaini marunna faiqisa maridaqa akara ridaqa.

<sup>2</sup> Anutufa naaramasee qinee unnannai aniaqee qufaqa eedoo qimariasa inni akara rumannimaqaidaqa. Innee Yisuna asauku mundirana mandaqee mariasa maa pasana akara rumannimaqaidaqa. Innee maasa qikoona Anutuna amuqusiranaki mariasa inni akara rumannimaqaidaqa. Anutuna nifauarafa faqa aundurakinaa asooarana faqa firaqoo inniara amuqusirana faqa firaqoo inni naunduraki maridanoo irairaaiani.

*Unna amaanufa qimannimariasara qimaqoo ufafa.*

<sup>3</sup> Oo qini qifaaqasaa qiqaondiuga. Anutufa maasa innaaruna asumu marirana moodaa qimiqaifaqa minaki quqaqisainara akara ruani qimaseeqa minniseeqa moo ufa akara ruanaura. Anutufa moodaa kari nimu ufana maasa qimuna mi ufana rakira ufara foora afeekaikamasee uqeera aindusuaqa minara inni afeekaikamandee akara rumannimaqaidaqa.

<sup>4</sup> Faiqi akaqausa Anutunara sia fee qimariasa qumee inniki keeqafiqa dapikidaqa. Misa Anutuna afaariranara kaqi nimiranara faqa iriseeqa quandakiqa mi ufana eendaandi iseeqa minannai faiqi aanaaseeki nari ummuari nari ummuari mariana faqa oosana oosana mandainaina faqa unna qimasee Yisunufa fee qimasaidaqa uqeeraseea. Misa maasa asauku mundirana Yisunara maasa uriqararana maasa karaambaiqara qaoo qidaqa rukiaidaqa. Ooqai tamummaqara fasiqauqa akarakinaa ufa misa fira mandainaina akiaqa arirana aqufuaqee qufaqa doo maqee aqufidaqa.

<sup>5</sup> Inni moo ainainara naaqoo auqaidaqa. Ooqai Anutufa Isaraee maqannaa Isipa maqusaindaraana rafiamareenoo aadana maqa maqaki quqanau. Quqasoofaqa akaqausa quandaki Anutuna ufa rukiasee kaqirunna ubeekaqau. Miqiufanoo Anutufa sia nifauanau kaqi narinau.

<sup>6</sup> Innee Anutuna qangiroouqara faqa sia fee iridee. Ooqai misa fira uriqaranaki marufaqa mina minnisee nari qimaqoomau akaqausa fufanoo Anutufa sia nifauanau kaqi qumaraseenoo sainandannai rumbeeqeenoo naaru rumbaranaki maqa ameemaanai asukunaki quqaqaiifaqa maridaqa muanni Anutuna ufa irira faasaanara afeesida maridaqa. Mi faasaannasaa narira ufa qimannimiannoo minara afeesidaqa.

<sup>7</sup> Innee Soodooma maqusa faqa Koomoora maqusa faqa misaqa maru maqusanaasa faqa innee iridee. Misa manda qangiroo naanna reeqa nari qimaqoomau fiqa faiqi anaasee nari ummuari nari ummuari iqa faiqi nari aqoonna fasiqa ummuariqa oosana oosana mandainaina faqa maroofanoo Anutufa aiqamausa mi oosanna qafeeqa rufiaaqee qimasee naaru marira idaki misa quqanau.

<sup>8</sup> Miqikai masee maa maqee inniki mandoosana uqeeree mariasa ooqeenaasa naanna raidaqa. Maqee inniki mariasa qainamaseeqa Anutuna ufammifoo qimasee mi mau fiqa aaqamaki nariqa naridaqa. Misa Anutuna aanooraa sia rufiidaqa mina ufa rukiaseeqa nari qimaqaa aatata fidaqa. Mi mandoosanna maree mariasa innaarunai amiqirausa marianara mandufa qimannimaqaidaqa.

<sup>9</sup> Anutuna amiqira qangiroouqa ririmma ooqai Mooseefa kuqufufanoo Sadannafa mina iri qumaraanee qufanoo amiqira qangiroouqakiqari uriqararafa moo fannoo mina auqu Mikaraafa mifa Sadanna faqa ufa rainanau. Ufa rainaidanoo sia inniki ani mariasa naanna ranau. Sia aqira ufa mandufa Sadannara qinau. Anutuna ufara iriseenoo kaqi maaqi qimasee reendenamasee qimaminau. Oo Sadanna Anutufa aniara qaoo qidanoo.

<sup>10</sup> Maa inniki mandoosana uqeeree mariasa sia amiqira qangiroo aanna raidaqa niranaqarufa oonumafi irisee kaqi qidaqa. Nári sia qafee maria ainainnara qimasaidaqa niqidaqa. Misa kaasau aandau aanna raidaqa. Misa nári irirana irisee aandau oosanamau fidaqa. Mi mau fimariafanoo nári mandoosana fannoo nári naridanoo.

<sup>11</sup> Misa narirafa firaqoo mariannoo. Minara irifanoo naaquqaani. Misa Kaina aatata fidaqa. Kainafa Anutuna ufa rukiee marufa maridanoo narí akaqa arinau. Misa kafa Baraamana manda aatata fidaqa minaki keeqararee qimaseeqa narí rarisee narí rarisee mamaree fidaqa. Baraamafa munnimmara rumammareenoo unna qimasee Isaraee maqannaasa rarisameeqee mandainainaki quqee marinau. Misa moo fasiqa ooqeenaa fasiqa Kooraana aanna raidee qimasee Mooseenasaaqari rakeemaku aadumarunna nariara moo karaambaiqee qimasee fufanoo Anutufa mina faqa mina aiku asaku mina faqa fusa faqa narinau. Maa inniki mandoosana uqeeree mariasa nariqa kai nári narirana mareeqee Anutuna nariranaki quqaseeqa minaki maridaqa.

<sup>12</sup> Innee Anutunara qoomaqa sakasee naidaqa neemarifaqa mee inniki mandoosana uqeeree mariasa nári mandainaina namufaqa anireeqa sia moosara oonumafi iridaqa nifaaqa quqaseeqa kaqi náriaraa kai firaqoo narana naidaqa.

Misa ufidaina aukwana aandaroo aukwana oonamuara foora aniraifaqa oo aaku asoora ainaina aniannoommifoo qimariafanoo kaqi aiqareenoo fifanoo ufai fannoo misa mareeqeenoo aqidanoo aaku sia marisa maridaqa, sia andeeqara oosana uqaqifiqeenoo aupurarana kai uqaqifiqeenoo. Mi fasiqausa sia qaamma irai saqari fara foora maridaqa, irai aukwana oosana rarakusee qafaafanoo aadana kai maridanoo sia nammari nammaridanoo.

<sup>13</sup> Mi fasiqausa mandainaina fannoo nammari qaqaarara foora nári mandainaina akooqoo mandinoo marifaqa sia nisauridaqa eekara arinoo akooqoo maridanoo. Misa mee sandee mari fasauna aanna raidaqa, sandammaree asukunaki munu qimbaidaqa. Anutufa mi fasiqausa maqa maqa miqi kai masee firaa asukunaki meemai afeedama nimaqaifanoo maridanoo.

<sup>14-15</sup> Ooqai Eenookafa mi manda fasiqausara tamummaqaseenoo akara rumaqoofa maridaqa. Adanasaaqari moodaannai qisauku oosana taikafufanoo dinni ani moodaa mareenoo qaaraikinoo Eenookafa kambiqanau. Mi Eenookafa maaqi qimasee tamummaqaseenoo akara rinau. Innee iriaqa Anutufa narí naaquqara andeeqara qangiroouqa moomoosa faqa qumureenoo aiqama maqasaa qaraasa suqusee ufa nimiannoo, mandoosana maree mariasa Anutunara sia irimariasa misa Anutuna ufa rukiassee mandainaina oosana oosana maree marianara Anutufa faqa narí qangiroouqa faqa narirara qumuannoo. Mi manda fasiqausa Anutunara mandufa oosana oosana qiranara Anutufa narirara qumuannoo. Doo Eenookana tamummaqara ufa miqiminoo maridanoo. Eenookafa misara miqi qimasooafaqa qinee maa inniki mandoosana uqeeree mariasara mi

mau fimariafaqa maaqi qidaqa.

<sup>16</sup> Mi fasiqausa maqee maqee aiqama ainainara naundaufa naundaufa qida maridaqa. Misa aiqama ainainara amiqira ainainara faqa sia maasa didifaqa mandainaina fee kai qidaqa. Misa nári mandoosanara nidirana aandi aususeeqa nariqa mi mau fidaqa. Misa firaaqoo nariara nariara ni-mooqimariasa maridaqa. Misa nári mandoosanara nidirannai ubeekarara faiqi akaqausa marasee nimooqaidaqa amiqi amiqidaqa misa maasa mandoosanamau fidaqa maasa duqu uqereefaree qidaqa miqidaqa.

*Aaquqimannimaqarufa faqa naakaparufa faqa qimaqoo ufafa.*

<sup>17</sup> Oo qini qiqoondiuqa karaambaiqa Yisufa asauku mundirana mina faiqi namu ufa qimannimiqoona sia aunuaqa.

<sup>18</sup> Misa maaqi qimasee inni qimannimiqau. Taikara aukwana anirainaqa faiqi moomoo kooroomafiqa nári mandoosanara nidiramau fidaqa inniara naanaidara qifaranoo.

<sup>19</sup> Mi fasiqausa faiqi qambaana anireeqa raine mariasa. Miqi mariasa sia Anutuna marauna naakirausa maridaqa nariqa faiqi faiqi nidiramau kai fimariasa maridaqa.

<sup>20</sup> Innee qini qiqoondiuqa sia miqimariasa mariafanoo. Innee Yisuna naaquqara ufaki mariasa mariafanoo maaqara foora auqiqa fifi inaqa minaki afeekaikiqa. Innee Anutuna naaquqara maraunannai maqee maqee innaaru qiaqa.

<sup>21</sup> Maasa karaambaiqa Yisufa asauku mundirafa narí nifauarana firaanakiqari maasa sia daruannoo naaru naaru marirana maasa qimianoo. Innee Yisuna qumiranara afeesidaqa Anutufa inniara nidimarinaki minaki kai mariaqa sia moosaa finana kuridia.

<sup>22-23</sup> Inniki faiqi akaqausa Yisuna mandaaqaranara marammara ridaqa qaara irirana maree mariasa, sia innee miqimariasa aanoomannimaqaaqa nifauamasaiqa mariaqa. Naaru marira idakinaana Yisuna ufannai kari qinaqa qumareeqee Anutuna afeeka ququsaki quqaqa. Akaqausa mandoosana maree mariasa faqa nifauarana faqa rufiara ufa faqa qimannimisee qumareeqee Anutuna ququsaki quqaqa. Innee miqi marifaqa misa mandoosana qafamasee sia minara ruaqa innee faqa minaki fifaara. Misa mandoosana ikairiara rufisee fidiqaa iaqa.

*Anutunara kai asasiaqee ufa qimaqoofa.*

<sup>24</sup> Anutufa innee mandainainaki aqufirarifanoo mifa amana inni ititanisainaqa sia aqufifaranoo. Mifa amana inni mareeqeenoo amiqimmandee ninukamasee asasirana inni nimisee narí afaqa areenaranaki naroorisaa amana quqaaninafa.

<sup>25</sup> Moodaa Anutufa maasa asumu maree marifa. Maasa karaambaiqa Yisufa ani asauku mundirafa minannai maasa amooqirana qimamidaqa afaqa areenarana faqa uriqararana faqa afeeka faqa aiqamausa aniara naaquqarana faqa anindi maridanoo fee qidaqa amooqidaqa. Ooqai indaaru anindi marinau maqee anindi maridanoo naaru naaru anindi mariani. Kuqaa.

## UQAFIQOO UFAFA

### Naaru kambiqaaninnainaina Yoohaneena uqafiqoo ufafa.

<sup>1</sup> Dauni kambiqaaninna ainainara Anutufa narí asauku mundirana Yisuna akooroommamufanoo mifa quandakinoo narí faiqi namu qiman-nimianifeera Yoohaneena kooroomma aminau. Asauku mundirafa maa ainainausara narí qangiroo aqiqoofanoo qumureenoo Yisuna ainainira faiqi Yoohaneena kooroomma aminau.

<sup>2</sup> Yoohaneefa aiqama ainaina qafeemaruna faqa irimaruna faqa qangiroo fannoo qimamuna aiqama maa papiqanaki kooroo inau. Maa ufana Yisufa asauku mundirafa narí akoona Anutuna anoona ufa Yoohaneena qimamufanoo akara rumaqoo ufafa maa akarafa maridanoo.

<sup>3</sup> Faiqi moo fannoo maa akarana asaana rinafa asasiannoo. Maa tamum-maqara ufana irisee eedoo qinausa misa asasifaranoo. Maa ufanakinaa ainaina koorooinausa qusasaa kambiqainara maa ufana asaana rimariasa faqa eedoo qimariasa faqa asasifaranoo.

*Qisauku dinni taikasee dinni ani qaara marasee maqusakinaasa amaana maqaki keeqee mariasa misa Yoohaneefa nimandoo ufafa.*

<sup>4</sup> Asia maqa maqaki mariasa amaana maqa qisauku dinni taikasee dinni ani qaara mararanaki keeqee mariasa qinee Yoohaneesa akara rumannimaqaidaqa.

Anutufa ooqai marufa maqee faqa kaqi marifa kasooqagee naaru faqa marianinafa narí afaarirana faqa narí asooarana faqa inni nimidanoo. Anutuna ufa irira qaari oorinni Anutuna maraquna namu qisauku dinni taikasee dinni qaara marasee mariasa miqi kai mandee Anutuna afaarirana faqa asooarana faqa inni nimidaqa.

<sup>5-6</sup> Yisufa asauku mundirafa andeeqasee kooroo imarifa Anutuna ooqa faiqi kuqiranakiqari findifufa maa maqa maaqanakinaasa karaambaigauqa uriqararafa marifa mifa faqa narí afaarirana faqa asooarana faqa inni nimidanoo. Mifa maasara amugusammidanoo. Mifa narí kuqiranannai maasa mandainainakinaana idukunniseenoo maasa qumareeqeenoo narí akoona Anutuna aanaiqikirausa mariaqee qimaseenoo quqaqisaifaqa maridaqa. Anutuna asauku mundirana Yisuna afaaqa arenarana faqa afeeka faqa firaaqoo minaindi marianifeera.

<sup>7</sup> Qafaqa, mifa Yisufa asuruki qumidanoo. Mina faaqaana raquramusa misa faqa kuqiranakiqari findifi qafeefaranoo. Maa maqa maaqanakinaa maqusa maqusa mariasa aiqama minara ikiraqeeqa soofaarifaranoo. Doo kuqaa uqanna miqifaranoo.

<sup>8</sup> Anutufa uriqararafa karaambaigaa ooqai marufa maqee faqa kaqi marifa naaru faqa kaqi marianinafa nariara maaqi qidanoo. Qinee oosana aroo aukwana mariafanausa naaru taikara aukwana faqa kaqi marianausa maridaqa.

*Yoohaneena afu pisipasamandoofanoo asauku mundirana Yisuna qafanau.*

<sup>9</sup> Yoohaneefa narí qafoo ainainna maaqi qimasee akara rinau. Qinee Yoohaneesa inni nifasausa nauraiqi maridaqa. Qinee innisaimbaqa Yisuna anoonufa qimannimunaqa nári unna Anutufa marifaqa kuqaa

qira Anutunara nikooqai faqa aupurarana faqa narirana faqa innisaim-baqa qimimariafaqa maridaqa. Qinee faqa innee faqa Yisuna ququsaki marunausa maridaqa, maasa mina teeroo quqaranaki maridaqa sia minara aupureeqa mina minniseeqa kaqi minaki doori runusee maraqa fidaqa, qinee Yoohaneesa Anutuna ufa faqa Yisuna koorooira anoonufa faqa qimannimifannanara Roomma maqannaasa qini karabusa rumbaranaki qisoofaqa maridaqa. Ooruku nammari qambaana Patamoosa afumaki Roomma maqanna karabusaki mariafananoo Yisufa oosana oosana ainaina kambiqaaninnanara qimaqiminau.

<sup>10</sup> Karaambaiqa qimaqoo faasaana karabusaki mariafananoo amaanasa Anutuna mara quna fannoo daakufufanoo inaaqianaindari fira ufireena miqirafa faiqira foora ufa qinau.

<sup>11</sup> Mi ufafa maaqi qimasee qimaqiminau. Yoohanee maqee uqafiqanna ainaina anee papiqaki akara rumasee dinni qisauku taikasee dinni ani qaara marasee maqusanaasa nari amaana maqakiaqa keeqee mariasa akara rumannimaqaa. Efeesusa maqusa amaana maqaki keeqee mariasa faqa Samirana maqusa amaana maqaki keeqee mariasa faqa Peerakamumma maqusa amaana maqaki keeqee mariasa faqa Tiatira maqusa amaana maqaki keeqee mariasa faqa Firadeerafia maqusa amaana maqaki keeqee mariasa faqa Raoodiseea maqusa amaana maqaki keeqee mariasa faqa miqimasee amaana maqanamuaara akara rumannimia.

<sup>12</sup> Mi ufana qimaqimisoofaqa qinee yafee inaaqiannaindari qimaqimidanoo fee qimasee quandaki qafaafananoo rambi kuradee mari ainainausa qisauku dinni taikasee dinni ani qaara marasee marufanoo rambi aiqamasaa marida qeemarinau.

<sup>13</sup> Mi rambisa qambainai faiqira foora kikiqinoo marufaqa qinee qafaqiafana. Mi fasiqana qamunna kisaqa karaambaiqa qamunna maqasaa qumumarufaqa qafaqiafana koora auqira raitanda karaambaiqaindi mina aradauqanna rumbanoo marinau.

<sup>14</sup> Mina akiqa asausi qafeeqa eekara asausiara foora kaaqa eekara arinoo marinau. Mina afu fannoo idauru miqirafa qeemarinau.

<sup>15</sup> Mina aiku fannoo anukara barasara foora tandi tandimarinau. Mina ufa fannoo oondainni nammariara foora aiqanaiqana imarinau.

<sup>16</sup> Mina asaukuqannai asaukuki qisauku dinni taikasee dinni ani qaara marasee fasaunamu uqee inau. Mina ookiqari qaseema miqirafa raiqarafa afaidara animarinau. Mina oori afiri suani qambaana ururee firaqoo qaindee imarinau.

<sup>17</sup> Qinee mina qafamasee kaaqa rufisee mina aramandunnai maqasaa aqufiqa kuqira foora iqa mariafananoo nari asauku uqannai qinisaa munduseenoo qimaqiminoo qinau. Oo maa fasiqa sia rufiaa. Qinee indaruqaasa faqa inaaqianaasa faqa maridaqa.

<sup>18</sup> Qinee ooqai kaqi mariafanausa maridaqa, qinee kuquafanausa maridaqa doo qiqafa kaqi marunausa maridaqa naaru naaru mariana. Qinee kuqiranara rakisirausa uriqararasa maridaqa mina kooqi kiqa uqeeiunausa maridaqa kuqiranaki mariasa mandoosana mareeusa misa mariaqoo faqa uriqararasa maridaqa mina kooqi kiqa faqa uqeeidaqa.

<sup>19</sup> Yoohanee anee qafa qafeemarianna ainainna irimarianna ainainna aiqama papiqaki akara rua. Maqee qafeemarianna ainainna faqa kasoqaqee kambiqaaninna ainainna faqa akara rua.

<sup>20</sup> Qini qisauku uqannai qisaukinaa fasau qisauku dinni taikasee dinni ani qaaraqanda marasee fasau mina kukeeqarana oosana maqimminoo



maridanoo. Qisauku dinni taikasee dinni ani qaaraqanda marasee amaana maqasaa rakisimaria Paatoosa fasau maridaqa. Qisauku dinni taikasee dinni ani qaara marasee rambi kuradee maria ainainna mina kukeeqarana oosana maaqimminoo maridanoo. Maqusa maqusa amaana maqa mifa maridanoo. Qisauku dinni taikasee dinni ani qaaraqanda marasee amaana maqara qidaqa.

## 2

*Efeesusa maqusanaasara ufa Yisufa Yoohaneenasaa qimaqoo ufafa maridanoo.*

<sup>1</sup> Yoohanee anee Efeesusa amaana maqasaa rakisimari paatoona maaqi qimasee akara rumasee qimamia.

<sup>2</sup> Oo Efeesusa maqanna Paatoo dinni taikasee dinni ani qaara marasee fasau nari asaukuki uqirafa ni fasiqafa ani qimamidanoo. Qisauku dinni taikasee dinni ani qaara marasee rambi kuradee mari ainainna qambaanai nimari fasiqafa Efeesusa amaana maqasaa rakisimari paatoo maaqi qimasee qimamidanoo. Qinee anee auqee marianna saikana iridaqa anee kadaapiri mariannanara iridaqa anee sia feefauruara irisaidana maqee maqee kadaapiri marianaqa iridaqa. Anee mandoosana maree mariasara akooqee mariannanara qinee minara faqa iridaqa eedoo qidaqa. Akaqausa nariara unna qimasee Yisufa diqiqoo fasiqausee qufana anee misa faqa amanamasee qafoonanoo misa unna qirana anee paqurunafa mariananoo.

<sup>3</sup> Anee reendeenamasee miqoo kai fimarianafa mariananoo. Anee qiniara oosana oosana kadaapirirana marasee sia minnisaananoo kaqi marana fimariananoo.

<sup>4</sup> Akaqa ainainara kai aniara aaqeefoo qidaqa. Anee ooqai indaaru unandee sia qiniara amuqusidanoo.

<sup>5</sup> Ooqai muruqoo amiqiranaki mariunafa doo miaqoo qumuananoo. Inneeqa oosana quandaki ooqai undee kai iaqaana. Sia miqifaqa qinee innee marinannai inni rambi mariqooqaraana maraanaqa innee doo imbeefara.

<sup>6</sup> Inniki moo oosanara qinee amiqira fee qidaqa. Nikooraita unna amaana ufara innee qini daanna raidaqa fidiqaammi mariafanoo. Nikooraita amaana ufa qimariasa aiqama faiqi faqa anaasee faqa moodaanaki maraqa nuafaqa innee misa ninda fee qini daanna ree fidiqaa imariasa mariafanoo.

<sup>7</sup> Anutuna maraquina fannoo amaana maqaki keeqee mariasa aiqamai qimannimidanoo. Naaqoo faqaasa mina ufa kai iriaqa. Mandainainaki afeekaikamasee rakiranara foora maraqa fifi inaqa uriqaree mariasa qinee misa qimannimianaqa misa Anutuna innaaruna ququsaki keeqafi innaarunai asumu marirana nimira saqari qaamma neefaranoo.

*Samirana maqusanaasara ufa Yisufa Yoohaneenasaa quqoo ufafa maridanoo.*

<sup>8</sup> Miqi qimaseenoo Efeesusa amaana maqa Paatoonara ufa qimaseenoo quandakufanoo Samirana amaana maqasa Paatoonara Yoohaneena qimaminau. Yoohanee anee Samirana amaana maqasaa rakisimari Paatoona maaqi qimasee akara rumamia. Ooqai indaaruqaafa faqa inaaqianaafa faqa ooqai kuqufa findifi kaqi marifa Yisufa maa ufana ani qimamidanoo.

<sup>9</sup> Qinee inni kadaapiriranara iridaqa innee maa maqanasaa ainaina siaisa kudi mariafanoo innaarunai ainaina faqaasa mariafanoo qinee iridaqa. Sadannana faiqi namu akaqausa nariara unna qimasee Yuda maqanna fee qimariasa inniara mandufa oosana oosana qimariana qinee iridaqa.

<sup>10</sup> Qini ufasaara kaqikaa qoo innee aupurarana mareefaranoo innee sia minara rufiaaqa. Innee iriaqa Sadannafa inni nimanamasee qafaaneera karabusaki akaqausa quqaannoo. Inni nidafirafa maa maqanasaa qusasaa mariannoo. Innee kaqi maraqa fifi inaqa kuqirana paqurinna aukwana qinee naaru marira qafee afisunnimaqaanaura.

<sup>11</sup> Anutuna maraquina fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa. Andeeqara oosana kaqi maraqa fifi inaqa Sadannana nimanirana uriqararusaiki mariasa inaaqianna kuqirafa sia misa naruannoo.

*Peerakamumma maqusanaasara ufa Yisufa Yoohaneenasaa quqoo ufafa maridanoo.*

<sup>12</sup> Yisufa miqi qimasee Samirana amaana maqa rakisiranara Yoohaneena qimamiseenoo quandakinoo Peerakamumma amaana maqasaa Paatoona maaqi qimasee qimaminau. Yoohanee anee Peerakamumma amaana maqasaa rakisimari Paatoona maaqi qimasee mina faqa akara rumamia. Qaseema dinni dinni raiqarafa ookiqari animari fasiqafa Yisufa maa ufana ani faqa qimamidanoo.

<sup>13</sup> Innee Peerakamumma maqusanaasa Sadannana amaana maqa mari-aqoo mariasa mariafanoo qinee iridaqa. Innee kuqaa qinisaa atooqee mariasa mariafanoo. Inni maqusai Sadannana amaana maqa mariqoo miqooqaraasa qini qiqaondi moo fasiqa qini Yisusara andeeqasee kooroo qimarina akiaqara mina auqu Antipasana kuqa arufaqa innee sia minara rufioosa kaqi kai qini saqariki mariasa mariafanoo.

<sup>14</sup> Akaqa ainainara kai inniara aaqaidammiafoo qidaqa. Inniki maqee Baraamafa ooqai mariu fasiqana aanna ree mariafanoo mi fasiqafa Baraamafa marufaqa inniki akaqausa mi oosanna maraidaqa. Ooqai Mooaba maqusanaasa karaambaiqa fannoo Barakafa Anutuna tamummaqara fasiqa moo auqu Baraamana munnimma amiseenoo anee naukarara ufa Isaraee maqanna nimisainaqa kuquaqa. Miqi qufanoo Anutufa Baraamanara qaoo qufanoo quandakinoo Barakana qimamufanoo Isaraee maqanaasa mindaraasa unna Anutuna oorisa naranara dufi dufi qimasee narana naidaqa mindaraa anaasee naafeeqee mariqau. Innee Peerakamumma amaana maqaki mariasa akaqausa Baraamana oosana maree mariafanoo.

<sup>15</sup> Miqi kai masee inniki Nikooraita amaana ufa irimariasa akaqausa mariafanoo.

<sup>16</sup> Innee inneeqa mandoosana kafa quandaqa. Sia quandaifaqa qinee innee mariaqoo anireeqa qeeqa dookiqari qaseemannai mi mandoosanna maree mariasa naruauranoo.

<sup>17</sup> Anutuna maraquina fannoo aiqama maqusa amaana maqaki keeqee mariasa qimannimidanoo naaqoo faqaasa iriaqa. Ooqai Isaraee maqanaasa aadana maqa maaqakinai nimarufaqa kananaana kananaana innaarunaindaraa feemu nimiaafanausa maridaqa. Maa maqee mariaqoo mandainaina faqa rakiraridaqa mina uriaaqararusa qinee kukeeqara feemu innaarunai misa nimianaura. Eekara oonisaa nari fuka nuqu akara rirana moodaa kai moodaa kai nimianaura. Mi fuka auquna sia moo fannoo misa oosana iriannoo nari kai mina oosana iriannoo. Doo mi ufana Yisufa Peerakamumma amaana maqasaa Paatoonara Yoohaneena qimaminau.

*Tiatira maqusanaasara ufa Yisufa Yoohaneenasaa quqoo ufafa maridanoo.*

18 Rambi kuradee maria saqarina qambaanai marifa Yisufa miqi qimaseenoo quandaki Yoohaneena kafa maaqi qimasee qimaminau. Yoohanee anee Tiatira amaana maqasaa Paatoona faqa maaqi qimasee akara rumamaqaa. Anutuna amaaku afu idara foora qeemarifa mina aiku faqa anukanoo mari barasara foora tandi tandi mari aikunannoo mandainaina radamimarifa Yisufa maa ufana inni qimannimidanoo.

19 Innee Tiatira maqusanaasa qini Yisusara nimuqusidanoo qinee iridaqa, innee maqee maqee iriqa kai fimarianara faqa qinee iridaqa, innee qiniara iriseeqa inneeqa maqannaasa dadaaqimariafanoo. Innee sia kadaapi dari maqi qimasee minnisee mariafanoo kaqi maraqa fimarianara minara faqa iridaqa. Ooqai innee qini saika oodaa maree mariqau, maqee kamu firaqoo maree mariafanoo qinee minara faqa iridaqa.

20 Qinee inni moodaa ainainara kai inni niqidaqa. Innee mi manda anaaseena Yeesebeera nammarinara saina kaqi marianifee qimariana. Mifa unna qimasee nariara Anutuna ufa maree marunausee qidanoo. Mi anaaseefa naakapaidanoo qini ufa irimariasa rarissimeeqeenoo faiqi faqa anaasee faqa nari ummuari nari ummuariranaki quqaidanoo. Moo unna anutunara innaaru qimasaida narana neemarianaki faqa quqaidanoo.

21 Qinee mi anaaseenara aneenna ummuariranakiqari quandaannee qimasee afeesunaisia maridaqa.

22 Minara mina mareeqee nari rarisaqanua fasiqausa saimbaqa manda qaarisaa quqasaanaura minaki maridaqa teeroo firaana maraida marifaranoo. Misa nari mandoosana sia aupuramasee quandaifaqa qinee dauni miqianaura.

23 Qinee mi anaaseena ufa irimariasa faqa kuqa narusaanaqa amaana maqaki keeqee mariasa qini oosana irifaranoo. Misa qiniara kukeeqara ainainara irimari fee qiaqera naruanauranoo. Qinee aiqamausa nari nisaukunna auqainnana akiaqara kai nimianaura.

24 Innee Tiatira maqusanaasa sia mi manda anaaseena oosanna maroosa mariafanoo. Mina oosana mareemariasa Sadannana meemaqoo kukeeqara irirana irimariasa nariara unna qimasee akoofasa fee qidaqa. Qinee sia ummaara moo faqa innisaa quqaanaura.

25 Maana kai qimannimidaqa. Inneeqa amiqira oosana uaqeeiana mina kai maramaree fuaqa, fifi inaqa qinee qumuanna aukuanna mina akiaqara maraqa.

26 Rakiranara foora iqa mandainaina uraaqarararee imariasa qini ufamau fimariasa mi mau fifi inaqa taikara aukuana paquriqa qini qikoofa afeeka qimuna quandaki misa nimianaura.

27-28 Niminaqa kasooqagee naaru misa moo maqannaasa urinaaqaramasee ainna faqaanannai misa qafeera foora rukamifaranoo. Qinee iqaqara duqudeeqi faqa nimianaura.

29 Anutuna maraqa fannoo amaana maqaki keeqee mariasa qimannimidanoo naaqoo faqaasa mi ufana iriqa.

### 3

*Saradisa maqusanaasara ufa Yisufa Yoohaneenasaa quqoo ufafa maridanoo.*

1 Yisufa miqi qimasee Tiatira amaana maqasaa rakisirana qimamiseenoo quandakinoo Saradisa amaana maqasaa Paatoonara Yoohaneena qimaminau. Yoohanee anee maa ufana akara rumeeqeenana Saradisa amaana maqasaa rakisira Paatoona amaqa. Anutuna maraqa dinni taikasee

dinni ani qaaramarasee maraquna qumaree marifa dinni taikasee dinni ani qaaraqanda fasau qumaree marifa Yisufa inni Saradisa maqusanaasa qimannimidaqa. Qinee innee auqemarianara iridaqa. Misa unna qimasee inniara kasimariasee qiafaqa qinee inniara kuqimariasee qidaqa.

<sup>2</sup> Innee minara iriseeqa tauti findifuaqa nimuqusa kaqikaagoo kasi-mariqoo kaaqa kuqifoora dauni findi fuaqa. Inneeqa Anutuna saika mareemariana Anutufa qafaidanoo mina afusaa sia anoonaidanoo minara qinee inniara tauti findifi fuaqee qidaqa.

<sup>3</sup> Innee ooqai qini ufa irimaria oosannara naaqoo irisee qini ufara faqa irisee eedoo qimasee mi mau fifanoo inneeqa mandoosana quandaqa. Innee sia faiqaranakiqari tauti findififaqa qinee ummuari mari fasiqafara foora tautumannimaqasee anireeqa naruanaura.

<sup>4</sup> Inniki Saradisa maqusanaasa akaqausa sia qikairi faisa maridaqa. Innee qikairi siaisa qini faqa nifaranoo. Inni amiqira marirana amana kai eekara qamunna afisunnimaqasaanaqa qini faqa fifaranoo.

<sup>5</sup> Mandainaina fannoo inni maqee maqee rafaqaqafimarifaqa mi manda ainainna uriqararausa inni naanna ramasee eekara qamunna afisunni-maqarara qidaqa inni nuqu faqa naaru kaqi marira papiqakinaana sia ateekaanaura kaqi marianifeera qidaqa. Qinee qeeqa qikoona oorisa faqa mina qangiroo misa noorisaa faqa innee qikairi siaisara qini faiqi namu fee qianaura.

<sup>6</sup> Anutuna maraquna fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa.

*Firadeerafia maqusanaasara ufa Yisufa Yoohaneenasaa quqoo ufafa maridanoo.*

<sup>7</sup> Yisufa miqi qimasee Saradisa amaana maqa Paatoona qimamiseenoo quandaki Firadeerafia amaana maqasaa rakisimarunara Yoohaneena qimaminoo qinau. Yoohanee anee maa ufana akara rumeeqeenana Firadeerafia amaana maqasaa rakisira Paatoona maaqi qimasee amaqa. Ooqai Dafidifa kooqi kiqa uaqeeuna qinee Yisusa maqee mina uaqeeidaqa ani qimamidaqa. Qinee naaquqara andeeqarausa kuqaa anoona oosana oosana mareemarunausa maa ufana inni qimannimidaqa. Qinee kiqannai kooqi ititasaana sia amana moo fannoo atuarana amana maridanoo, kaifaa qinee kooqi atusaananoo moo fannoo sia amana ititaannoo.

<sup>8</sup> Innee Firadeerafia maqusanaasara qinee inni aiqamausara amiqimasee iridaqa. Inni noorinni kooqi atuarana quqasaananoo moo fannoo sia amana mina ititaannoo. Inni afeeka kaqikaafa maridanoo innee qini naakapara ufamau fimariasa mariafanoo. Innee maqee maqee qiniara kai iridaqa mariasa mariafanoo.

<sup>9</sup> Iriaqa, Sadanna faiqi namu akaqausa mariasa nariara unna qimasee Yuda maqanna fee qimasee qimariasa qinee misa mareeqee inni niramandunnai quqasaanaura. Aiqamausa mina qafeeqa oo Yisufa inniara amuqusifanoo miqidanoo fee qiaqeera.

<sup>10</sup> Qinee inniara reendeenamandee mariaqee qiafanaqa innee miqi mariasa mariafanoo. Miqi mariana akiaqara firaa teeroo maqanna maqanna nimanamasee qafaanaura miqianna aukuanna qinee inni mareeqee kaqi atinnai quqasaana asumu marifaranoo.

<sup>11</sup> Qinee qusasaa qumuanaura. Innee uriqaraqa mariana amiqimandee rakisi qumaraaqa moo fannoo qumaraandoora.

<sup>12</sup> Maa maqanasaa mandainaina qambaanauri uriqararana qinee mina qumareeqee qeeqa qikoona amaana maqaki quqasaananoo mifa

faakanaikinoo mariannoo. Qinee mina afaagasaa qeeqa qikoona Anutuna auqu quqaanaura, qeeqa Anutuna firaa maqusa fuka Yeerusaree auqu faqa mina afaaqai quqaanaura. Mi maqusafa innaarunaindari qini Anutufinnainadari kasooqagee qumuannoo. Qinee qeeqa fuka duqu faqa mi fasiqana afaaqai quqaanaura.

<sup>13</sup> Anutuna maraquna fannoo aiqama maqusa amaana maqaki keegee mariasa qimannimidanoo. Naaqoo faqaasa mi ufana iriaqa.

*Raoodiseea maqusanaasara ufa Yisufa Yoohaneenasaa quqoo ufafa mari-danoo.*

<sup>14</sup> Yisufa miqi qimasee Firadeerafia amaana maqasaa Paatoonara Yooha-neena qimamiseenoo quandaki Raoodiseea amaana maqasaa rakisiranara qimaminoo qinau. Yoohanee anee Raoodiseea amaana maqa rakisira Paatoora faqa maaqi qimasee akara rumamia. Qinee mapukusee marunna fasiqausa Yisusa inni qimannimidaqa. Qinee naaru naaru kuqaa anoona ainaina kai qimarunausa inni qimannimidaqa. Anutufa aiqama ainaina auqimaruna oosana qinee marunausa inni qimannimidaqa.

<sup>15</sup> Qinee innee auqee maru ainainnara iridaqa. Innee sia suaru qiqa mari-afanoo innee sia idaidiqa mariafanoo Inni oosana amiqirafa marinaqau kaifaa minara faqa irini.

<sup>16</sup> Inni oosana suanisaa nammariara foora naunanoo ididi marifaqa fididaqa.

<sup>17</sup> Innee unna qimasee inneeqara aiqama ainaina oosana oosana faqaasee qimariafanoo. Inni nifaaqa rumbanoo marifaqa mandaikidaqa kudoosaapaqa maridaqa innee sia minara irimariafanoo. Innee kudi mariafanoo nifu qimbarausara foora mariafanoo kaqisamuara foora mari-afanoo.

<sup>18</sup> Qinee maaqi qimasee inni naamua qidaqa, innee qini kooru munnimara foora feefaurumaseeqa minannai naundurakinaa qumi-asana moomoo maraqa. Innee qinisaaqaraa andeeqarana feefaurumasee eekara qamunnara foora marasee inneeqa nisaurirana manda nifaaqasaa afisuaqa. Inneeqa nifu marasinna minniseeqa qini marasinnara foora feefaurumasee inneeqa nifusanara foora narimarinaki akusaifanoo inni nifu amiqiani.

<sup>19</sup> Qinee nimuqusi maria fasiqa anaaseera kai mandainainaki keeqaafaqa qaoo qimasee naridaqa. Innee minara irisee kuqaa noori runusee inneeqa marirana quandaqa.

<sup>20</sup> Iriaqa qinee Yisusa faiqi nimuqusa kooqi afaisaa kikiqammambiqaa kooqi atuaannee qimasee kukusidaqa. Faiqi moo fannoo qinee kukusian-nana irinoo nari kooqi atuqainaqa qinee mina amuqusa ooki keeqafiqa mina faqa naanaura mifa qini faqa naannoo.

<sup>21</sup> Qinee maa maqanasaa mandainainakiqari uriqararausa maridaqa qeeqa qikoosandiri nari rakisira qaarisaa ooqufaaqee idaga. Maa maqanasaa mandainainakiqari rakirara foora uriqarainafa mifa miqi kai inoo qinee rakisira qaarisaa innaaruna ququsaki qini faqa ooqufaaqee mariannoo.

<sup>22</sup> Anutuna maraquna fannoo aiqama maqusa amaana maqaki keegee mariasa qimannimidanoo. Naaqoo faqaasa mi ufana iriaqa.

## 4

*Innaarunai mariasa Anutuna amooqida asasimaria ufafa.*

<sup>1</sup> Qinee Yoohaneesa mi ufana irunanoo qifu pisipasifaqa moo ainaina qafeeqa. Innaarunai kooqiara foora atuanoo marifaqa qafeeqa. Minakiqari moo fannoo qimaqimifaqa iriqa mina ufa fannoo qufireena miqirana fuaqaidanoo miqidanoo qimaqiminoo anee mai ururainaqa kasooqagee kambiqaaninna ainainna uqafiqaanaura.

<sup>2</sup> Miqi qimasoofanoo Anutuna maraḡuna daakufufaqa kooqiki keeqaki innaarunai ooru fiqiafana. Ooruree qafaafananoo ufa irira qaari ufiqiranasaa moo fasiqa marufaqa qafaḡia. Mi fasiqafa Anutufa marinau. Mi qaarifa sia kaiqeesa qaari Anutuna narí rakisimari qaarina marinau.

<sup>3</sup> Mi fasiqafa Anutuna oori afiri pupu ooniara foora ooriki takunasoosa imarinau. Oondanda amiqirafa rakisimari qaarina ufiqirana fiqumma fiqumma inoo marinau.

<sup>4</sup> Mi qaarina ufiqirana atiqara moodaa fasiqa aiku asauku taikasee moo fasiqa asauku qaara faqa qaara faqa oonu marasee fasiqauqa nariqa rakisimari qaarinasaa fiqumma ooḡu mariqa mariḡau. Misa aiqama uriqararausa koorannai auqira qafee faqaasa eekara qamunna afisirausa nariqa qaarisa Anutuna fiqumma fiqumma mafi ooḡu marifi mariḡau.

<sup>5</sup> Anutuna rakisimari qaarina qambaanaindari aakuasaa faqa innaarunai qirana faqa darara qirana faqa ruruqirana faqa qaari qambaanaqari ururoofaqa qafaḡiafana Anutuna oorinni qisauku dinni taikasee dinni ani qaara marasee qoomanamu Anutuna oorinni qeemarufaqa qafaḡiafana. Mi qoomausa Anutuna maraḡunauqa marufaqa qafaḡiafana.

<sup>6</sup> Anutuna oorinni ooruku nammari miqirafa tanukara foora mandinoo marinau. Mi nammarinasaa sia kaqikaqoo dumuna qaisoora marinau amiqirafa uqanna marinau. Anutuna rakisira qaari dinni qaaraḡanda dinni qaaraḡanda aandaḡu marinau. Noorinni faqa nitaufakai faqa aiqama nifaaqasasa nifu moomoo marinau.

<sup>7</sup> Moo fannoo raioona kaasau pusina fooqaafa firaatia marinau moo aandaḡu burimakau aanaaqi miqirafa marinau moo aandaḡu faiḡi noorikira aandaḡu marinau moo aandaḡu quqaumu miqirafa aqoosa faqaafa marinau.

<sup>8</sup> Mi aandaḡu namusa qisauku dinni taikasee dinni ani moodaa marasee niqoosa faqasaa mariḡau. Mi namusa nifaaqasasa faqa naunduraki faqa nifu moomoo marinau. Mi namusa eendaki faqa faasaana faqa idi raida kai mariḡau. Misa maaqi qimasee idi ree mariḡau.

Anutufa karaambaiqa afeeka uriqararafa naaquqarafa naaquqarafa naaquqarafa.

Ooḡai marufa maqee marifa kasooqagee marianinafa maridanoo.

<sup>9</sup> Mi qaara faqa qaara faqa aandaḡu namusa qambaana Anutuna rakisinnimaqee maru qaarinasaa dinni dinni mariasa maqee maqee Anutunara idi ree marusa mariḡau. Misa qaari qambaana maruna Anutunara naaru naaru marianinnanara dufi dufi qira idi faqa mina auḡu uqeerara idi faqa mina areenaranara faqa idi ree marusa mariḡau.

<sup>10</sup> Mi andaunamusa idi ramasoofaqa fiqumma marusa moodaa fasiqa aiku asauku taikasee moo fasiqa oonu qaara faqa qaara faqa marasee uriqararausa narí koora auqira qafee uturuḡu quqasee noorindari maqasaa Anutuna oorinni kummarammafufaqa mina amooqimasee maaqi qimasee qimamiḡau.

<sup>11</sup> Oo Karaambaiqa Anutufa anee amiqirafa.

Anee amana areenarana faqa amooqirafa faqa afeeka faqa amana mareenaranoo.

Anee aiqama ainaina auḡunafa.

Aneenna iriranannai marirana faqa kasirana faqa nimunafa marianafa mariananoo.

## 5

*Rumbarauru papiqa faqa Anutufa aruaninna sipsipa anaaqira faqa qu ufafa.*

<sup>1</sup> Misa idi ramasoofaqa rakisinnimaqee maru qaarina qambaana marunna Anutuna asaukuki mifa papiqa kukuqirana asauku uqannai marufaqa qafaqiafana. Mi papiqana aunduraki faqa adisaa faqa akara marufaqa qafaqiafana. Sanda rumbarafa qisauku dinni taikaseenoo dinni ani qaara maraseenoo mi papiqana qambaana qambaana rumbanoo marufaqa qafaqiafana.

<sup>2</sup> Qinee miqoo qangiroo moo qafaqia amudaanai qimarufa afeeka qafamasaafananoo firaa kari nameera qinoo qinau. Yafee moo fannoo andeeqarafa marinafa maa sandausa rakeemaseenoo fee papiqa qairisee asaana ruannoo fee.

<sup>3</sup> Misa innaarunai faqa maqasaa faqa maqa ameemaanai kuqirausaki faqa randaafanoo sia moo fannoo amanaikinoo mi papiqana sanda rakeemaseenoo qairisee asaana ruaqaainoo marufaqa qafaqiafana.

<sup>4</sup> Qinee Yoohaneesa mi papiqana qafammasee ikiraqeeqa sia moo fannoo andeeqarausa amana mariafaqa qinee qafeeqa firaaqoo ikiraqiafana.

<sup>5</sup> Ikiraqee mariafananoo uriqararausakiqari moo fannoo qimaqiminoo qinau. Sia ikiraqaa afu qafaa Yakooboona faiqi namukiqari Yudana aiku asaukukiqari moo fannoo raionara foora aiqama mandainaina urinaaqararafa Dafidina ati firaa auqu faqaafa mifa amana mi sandausa rakeemasee qairisee asaana ruannoo.

<sup>6</sup> Miqi qimasoofaqa qinee qafaafananoo sipsipa aanaaqi fooqaafa Yisufa Anutuna qaarisaa kikiqinoo marufaqa qaara faqa qaara faqa aandau faqa moodaa fasiqa taikasee moo fasiqa qaara faqa qaara faqa marasee uriqarara fasiqauqa faqa Anutuna qaari atiara fiqumma qumma iqa marufaqa qafaafananoo. Sipsipa aanaaqi qambaana marinau. Mi sipsipa anaaqifa kuqufa kuqiranakiqari findifinoo marufaqa qafaqiafana mina aanai dinni qisauku taikasee dinni ani qaara marasee aanai kambiqanoo marufaqa qafaqiafana mina afu qisauku dinni taikasee dinni ani qaara marasee marufaqa mi afunamusa Anutuna maraquna namu aiqama maqa maaqai Anutufa niqiqoofaqa nimarusa nindafaqiafana.

<sup>7-8</sup> Mi sipsipa anaaqifa Yisufa qambaana qaarisaa Anutuna asauku uqannai uaqeeu papiqana marasoofaqa aandau namu faqa uriqararausa fiqumma marusa faqa aiqamausa mina aramandunnai noorindari aqufu-faqa idi moo fuka raqau. Idi raidaqa piripuna arimarufa dinni nisaukuki marinau koora auqimaru qafeesa dinni nisaukuki marinau amiqira afundi maru ainainausa mi qafeesaki marinau, maaqanna maaqanna Anutuna ufa irimariasa innaaruqirafa mi qafeesaki mi amiqafundi maru ainainausa kikiqa usinoo marinau.

<sup>9</sup> Misa fuka idi maaqi qimasee raqau.

Oo Yisufa sia moo fannoo amanaikiannoo anee aneenna andeeqaranannai kai aneenna akoona asaukukinaana papiqa marasee idukinnaranoo. Misa ani arusoofana aneenna kuqiranannai faiqi feefaurummeeqeenana Anutuna asaukuki quqanau.

<sup>10</sup> Aiqama kaqikaa maqannaa faqa firaa maqannaa faqa akaqausa aneenna fidikannai feefaurummeeqee Anutuna asaukuki aanaiqikiranaki

quqoonafa kasooqaqee miqooqari misa maa maqanasaa uriqararau-sai kifaranoo.

<sup>11</sup> Qinee Yoohaneesa mi idina roofaqa irisee uqeerafi nindafaafanaqa qangiroo moomoo nukudara foora kikiqiqa mariqau. Aandau namufaqa uriqararausa namufaqa Anutuna rakisira qaari fiqumma kikiqiqa marusa ninaaqiannai nukudara foora qangiroouqa moomoosa fiqumma kikiqiqa mambufaqa miqoo marusa aiqamausa idi moo raqau, firaa kari maaqi qimasee raqau.

<sup>12</sup> Oo sipsipa aanaaqi anee faiqi arunaki reendeenamasee keeqoonafa ani andeeqarafa kai amanaikinoo marinara

Anutufa uriqararana faqa ainaina moomoo faqa irirana firaa faqa afeeka faqa auqu uqeerarana faqa areenarana faqa ani amooqirana faqa ani Yisuna amiannoo.

<sup>13</sup> Misa mi idina ramasoofaqa kafa iriseeqa aiqama innaarunaindaraa ainaina faqa maqasaa ainaina faqa ooruku nammarikinaa ainaina faqa maqa ameemaanaindaraana faqa aiqamai Anutufa auquqoo ainainausa moodaanakikammambiqa maaqi qimasee idi raqau.

Qaarisaa ooqu marinoo marifa sipsipa aanaaqi faqa inniqara nimooqirana faqa nuqu uqeerarana faqa areenarana faqa afeeka faqa naaru naaru innindi marianifee qidaqa idi raidaqa.

<sup>14</sup> Misa miqi qimasee idi roofanoo qaara faqa qaara faqa aandau namu misa roo idina irisee kuqaa fee qufaqa miqoo uriqararausa marusa noorindari maqasaa rupaitamafufaqa Yisuna amooqimamaqau.

## 6

### *Papiqa rumberauru idukunara qu ufafa.*

<sup>1-2</sup> Miqi qimasoofanoo sipsipa aanaaqi fannoo mi papiqana kukuqirana gumareenoo moo sanda rumbaqaona idukinau. Idukusoofanoo Anutuna aqa qaara faqa qaara faqa aandau mariunakiqari moo mina ufa fannoo innaarunai miqirafa darara qimaseenoo qimaqiminu. Anee anianne qufaqa qinee Yoohaneesa miqoo oonuraafananoo qoosa moo eekara arirafa marinau. Faiqi minasaa ooqufaqaqee fasiqafa duru faqaafa marinau. Miqooqaraasa qafee afisuamaqasooqanoo maaqanna maaqanna rakiranannai nari aramandunnai quqararee qimasee finau.

<sup>3</sup> Mifa fufanoo sipsipa aanaaqi mi papiqana sanda moo rumberana idukinau. Idukusoofanoo Anutuna aqaqari aandau moo qiniara aniree qafaannee qinau.

<sup>4</sup> Qinee oonu qafaafananoo qoosa moo taatuqee arirafa animarinau. Miqooqaraasa qaseema firaa raqarana mi qoosanasaa maruna amisee qimamiqau. Anee ooqu maqasaqaraasaki maa qaseemanannai nirana fundakinaqa rakirana uqeera niminaqa nari ari nari ariqau.

<sup>5-6</sup> Mifa fufanoo mi papiqana rumberana sipsipa aanaaqi fannoo moo sanda idukinau. Idukusoofanoo Anutuna aqaqari aandau moo findifinoo qiniara anianne qufaqa oonu qafaafananoo qoosa moo runduqarirafa marinau. Mi qoosanasaa marufa sikeera uqusee marufanoo Anutuna aqaqari aandau moo ookiqari ufara foora mi fasiqana qimaminau. Aandaroo aukuna maridanoo moodaa faasaana saikiana amana kai raisa nimia. Raisa sia marinaqa kamaa miqi kaimmasee rainasee nimia. Misa fadameena faqa nammari faqa sia anee mina arua saina kaqi nimia, narana ainaina kai andaroo naruannoo.



<sup>7</sup> Miqi qimasoofanoo sipsipa aanaaqi mi papiqana rumberana moo iduku-soofanoo Anutuna aqaqari aanda moo fannoo qiniara aniree qafaanee qinau.

<sup>8</sup> Qinee Yoohaneesa irisee oonuraafananoo qoosa moo afaaqa eeqaku arirafa marinau. Mina ataufakaaqa maruna auqu Kuqirafa marinau. Faiqi nimana madikakinaasa faiqira fooqira mi fasiqana faqa fidanoo nari dadaaqi nari dadaaqi mariqau. Miqoo innaarunai marusa maaqi qimasee qimamiqau. Innee qoosa faqa faiqi faqa faiqi nimana madikakinaasa faqa maqasaa fasiqaki oquree duru feefannai faqa aandaroonnai faqa auri-ranannai faqa kaasau aandaunai faqa moomoo fasiqa anaasee maqusa maqusa mariasa narida mariaqa.

<sup>9</sup> Misa fufanoo sipsipa aanaaqi mi papiqanasaa rumberana moo sanda idukinau. Idukusoofaqa qinee miqoo aanda tatufimaru qaindana maru-faqa qafaqafana. Mi qaindana ameemaanai kuqirausa nimana moomoo marufaqa qafaqafana. Sia fifau kuqirausa mariqau. Maqasaa maridaqa Anutuna ufa andeeqasee faiqi anaasee qimannimunara mina akiaqara narusoosa kuqiga mariqau. Misa oosana Anutuna ufamau kai fimarunara minara narusoofanoo Anutufa misa nimana mareeqeenoo innaaruna qainda ameemaanai quqanau.

<sup>10</sup> Qinee Yoohaneesa qafeemariafanaqa firaakari mindari Anutunara nameera qiqau. Oo uriqarara karaambaiqa anee andeeqarafa naaquqarafa anoona ufa kai qimarianafa mariananoo. Yairee fee maqasaaqaraasa ufa iriseenee maasa daruana akiaqara nari narinnaree.

<sup>11</sup> Miqi qimasoofaqa innaarunai marusa eekara qamunna marasee aiqama nimisee qimannimiqa. Innee maana afisusee kafa miqoo kaqikaqoo idooaqa. Inni nikaqaafasaa maqasaaqaraasa inni naanna reeqa Anutuna ufasaara kuqifanoo Anutufa mikari inni ufa faqa misa ufa faqa iriannoo.

<sup>12</sup> Miqi qimasoofanoo sipsipa aanaaqi mi papiqana rumberana moo sanda idukinau. Idukusoofanoo maqa firaqoo uqanna kasinoo suani afu arusoofanoo runduqarira qamunnaikinoo marinau. Quqoona faqa aiqama taatuqee arinoo fidikandandinau.

<sup>13</sup> Fasau saqari qaamma miqirafa ufai uqifanoo adusa aiqama maqasaa kakasidanoo aiqama fasau maqasaa kakasinau.

<sup>14</sup> Innaaruna kudimanda fannoo papiqa fooqaana atindari raqandaamamaree mafi aiqama raqandaamma taikanau. Aaqana aaqana nari maruqooqari nari maruqooqari moosa minifi mafi quqaidanoo ooruku nammariki afumauqa faqa miqi kaimminau.

<sup>15-16</sup> Miqimarufa maqasaaqaraa karaambaiqauqa faqa uriqararausa faqa sundiaki kiateenauqa faqa ainaina faqaasa faqa nimudaanai qimarusa faqa faiqi aiqama karabusara fooqaana ainaini mariasa faqa kaiqeesa faqa aqanasaa maru ooni aamaranaki keeqafi kukeeqafiqa aqanara faqa onniara faqa nameera qimasee qiqau. Innee maasasaa aqufiqa maasa dariqa kukeeqaqimaqaaqa. Qaarisa oqumarinoo marina afusaara rufiidaqa ititaqimaqaa. Sipsipa aanaaqi aanooqiranasaa faqa ititaqimaqaa.

<sup>17</sup> Miqanda firaa aanooqira faasaana doo animaridanoo, sia moo fannoo amana misa nifusaa kikiqianoo.

## 7

*Isarae maqanna faiqi oosana oosanakiqara Anutuna akara niqinisaa quqarausara qu ufafa.*

1 Qinee Yoohaneesa mi ainainna qafammasaafanausa kafaa maa ainainna qafeeqa. Qangiroo qaara faqa qaara faqa safasa ati atisaa kikiqiqee maridaqa miqifa maridaqa ufai maqasaa maqee maqee uqimari ufaina maqa maaqa mandaikianiffee qimaseeqa ufai rafaafafiisee maridaqa. Miqifa mariafanoo sia ufai moo fannoo ooruku nammarisaa fee maqasaa fee saqarisaa fee sia fuaqeenoo.

2-3 Misa miqifa marufaqa qinee qangiroo moo qafaqiafana. Qangiroo moo fannoo suani oosana qaanaindari kaqi marira Anutuna akarainaina uqirafa anireenoo ufai rafaafafimaru qangiroosa naaramasee qimannimino qinau. Anutufa inniara ufainnai maqa faqa ooruku nammari faqa mandaikamma nimaqaannee qifaqa eekaa kaqikaa qoo kaqi marifaqa qinee Anutuna ainainira faiqiuqa niqinaaqa Anutuna akara rumasaanaqa miqoo maqa faqa ooruku nammari faqa saqariuqa faqa ufai quqasaifanoo firaqoo uqinoo mandaikamannimaqaani. Mi qangiroofa miqi qimasooafa Anutuna faiqi namu maqasaaqaraasa niqinaaqa akara rumasoofanoo moo fannoo asaana rumasee kooroomasee qimaqiminoo qinau.

4 Isaraeena aiku asaukukiqari aiqama moodaanaki quqaseenoo wan handareeta faqa footi maqi tauseenna faqa (144,000) fifau nukudara foorammiqa mariqau. Miqimasee marunaki mi namusa kai niqinaaqa akara rumannimaqaseenoo Anutunaindi marifanoo ufai fannoo sia naruanifeera rumannimaqanau.

5 Isaraee maqaanna faiqi namu niqinaaqa akara rumannimaqagaqoosa misa naadu naadu oosaa oosaa kai mariqau. Yudana aiku asaukukiqari (12,000) tueerufa tauseenna moomoo Anutuna akara niqinaaqa rumannimaqanau.

Reeubeenana aiku asaukukiqari (12,000) tueerufa tauseenna moomoo Anutuna akara niqinaaqa rumannimaqanau.

Kadana aiku asaukikiqari miqi kai maseenoo 12,000 rumannimaqanau.

6 Aseerana aiku asaukukiqari miqi kai masee 12,000 akara rumannimaqanau.

Napatarina atiuqa marusa miqi kai masee 12,000 akara rumannimaqanau.

Mannaseena aiku asauku marusa miqi kai masee 12,000 akara rumannimaqanau.

7 Simeeoonaa atiuqa marusa miqi kai masee 12,000 akara rumannimaqanau.

Reefina aiku asauku marusa miqi kai masee 12,000 akara rumannimaqanau.

Isakeena atiuqa marusa miqi kai masee 12,000 akara rumannimaqanau.

8 Seeburuna atiuqa marusa miqi kai masee 12,000 akara rumannimaqanau.

Yoosefaana aiku asauku marusa miqi kai masee 12,000 akara rumannimaqanau.

Beensaminna aiku asauku marusa miqi kai masee 12,000 akara rumannimaqanau.

Miqimasee mi qangiroofa Isaraeena aiku asaukukiqari moodaanaki mara ruqaumaseenoo 144,000 fifau nukudara foora Anutuna akara niqinaaqa akara rumannimaqanau.

*Aiqama aanaamuru Anutuna oorisa suqu ufafa.*

<sup>9</sup> Qinee Yoohaneesa mina qafamaseeqa quandaki qafaafana moo suqirafa marinau faiqí anaasee firaqoo qusimariqau. Sia faiqí moo fannoo nisaa-narirana amana moomoo uqanna mariqau. Misa aiqama fira maqannaasakiqari faqa kaqikaa maqannaasakiqari faqa aiqama fasiqa anaaseekiqari faqa aiqama ufakiqari faqa Anutuna qaari oorinni sipsipa aanaaqi oorisa aiqama ufa qimarusa kikiqammafiqau. Misa qamunna eekara afisirausa afaqaa saqari asaana uqirausa Anutuna oorisa kikiqiqau.

<sup>10</sup> Miqoo kikiqiqqa maridaqa maaqi qimasee Anutunara fira kari qimamiqa qiqau. Maasa Anutufa rakisira qaarisa oqumarifuanano sipsipa aanaaqi faqa anisaaqaraana kai maasa naaru marirana maridaqee qiqau.

<sup>11</sup> Miqi qimasoo faqa uriqararausa Anutuna rakisira qaari atimau fiq fiq iqa marusa faqa qaara faqa qaara faqa aanda marusa faqa maru faqa misa fiq fiq iqa maru qangiroosa misa kai maqasaa noorindari aqufu faqa Anutuna amooqiqqa qiqau.

<sup>12</sup> Kuqaa amooqirana faqa areenarana faqa irirana faqa dufi dufi qirana faqa auqu uqeerarana faqa uriqararana faqa afeeka faqa naaru naaru maasa Anutunaindi kai maridaqa. Kuqaa fee qiqau.

<sup>13</sup> Qaari fiq fiq qiqiranaqari uriqararusaqari moo fannoo quandaki qini Yoohaneesa irammirino qinau. Maa fasiqa anaaseesa yaindaraasee eekara qamunna afisirausa aiqama ufa qimarusaqari ani maridee qufaqa qinee qiqiafana.

<sup>14</sup> Sia qinee iridaqa anee qimaqimia qiafanano mifa kooroo qimasee qimaqiminau. Maa fasiqa anaaseesa Anutuna ufamau fimarusa minasaara narirana maree marusa minakiqari amiqimasee ani marusa maridaqa. Misa nári ikairi aanaaqi qamunna sipsipa aanaaqi Yisuna fidikaki nári qamunna nammaruqusee eekara arufifaqa afisusee maridaqa.

<sup>15</sup> Minara misa faasaana faqa eendaki faqa Anutuna naaquqara maqaki narí rakisinnimaqee maru qaarina oorisa kikiqammambi eendaki faqa faasaana faqa amooqidaqa. Qaarisa marifa Anutufa narí kai misa ititannimaqaanno.

<sup>16</sup> Ititannimaqaidanoo sia kafa misa naara raanno, sia nammariara nidianno, sia suani ididirafa nifaaqai naruanno.

<sup>17</sup> Sipsipa aanaaqi rakisira qaari qambaana marifa mifa misa rakisirafa marino misa nifiqee munusainaqa kaqi marira nammari maqakiqari radiqisee ururee mariqoo neefarano. Anutufa misa naukunu rukasaina misa ikiraqarafa taikaanno.

## 8

### *Papiqa moodaa sanda doo iduku ufafa.*

<sup>1</sup> Sipsipa aanaaqi fannoo mi papiqanasaa rumbara sanda inaaqianaana idukusoofano innaarunai qiqi ufa daiqimafino kaqikaqoo kasoomafinau.

<sup>2</sup> Ufa sia qirafa taikasoo faqa kafa qinee Yoohaneesa qafaafanano qangiroo Anutuna afusaa kikiqammambi marusa dinni qisauku taikasee dinni ani qaara marasee miqimandee qangiroo ukeena moodaa kai moodaa kai amana kai misa niminau.

<sup>3-4</sup> Nimisoofano qangiroo moo fannoo kooro auqimaru qafeena uqirafa anireeno Anutuna aanda tatufimaru qaindana oorisa kikiqammambinau. Faiqí anaasee innaaru qirafa mi qafeenaki maruna maree aniroo faqa misa amiqira afundimaru ainainna moomoo mi qafeenaki

innaaru qirana namufaqa quqasoofanoo Anutuna oorinni maru qain-danasaa koora auqimarunasaa idara qoonaki teeqimasoofofanoo idaqeenoo amiqira afundimaru ainainna faqa faiqí anaasee Anutuna ufamau fi-mariasa innaaruqirana faqa idaqoofanoo amiqira afunda fannoo Anutuna aikiambuinau.

<sup>5</sup> Qangiroo mi qafeena qumareenoo mi qaindanasaaqaraa ida auri maru qafeenaki afeeriqi quqaseenoo innaarunaindari maqasaa teeqimmaqinau. Teeqimmaqusoofanoo innaarunai qirana namufaqa aakuasaa uqirana namufaqa maqa kasirana namufaqa kambiqanau.

*Dinni ani qaaraqanda marasee ukeena fuaqoo ufafa.*

<sup>6</sup> Miqooqari qangiroo qisauku dinni taikasee dinni ani qaara marasee ufireena faqaasa fuaqarara deedaqiqau.

<sup>7</sup> Fuaqasoofanoo pupusamu faqa ida namufaqa fidika namufaqa moodaanakikirafa innaarunaindari maqasaa teeqinau. Teeqimasoofofanoo maa maqa maaqanaki qaaramooki oosuseenoo moodaaki idaqama taikanau, saqari faqa miqoo marinauqa moomoo qamataikanau. Aiqama andanda faqa miqoo marinauqa qamataikaseenoo qaaraqandaki kaqi marinau.

<sup>8</sup> Qamataikasoofofanoo doo mina inaaqianna qangiroo narí ufireena fuaqasoofanoo firaa aaqanara foora ida auri maruna rafaurinoo innaarunaindari ooruku nammariki aqufinau.

<sup>9</sup> Aqufufanoo ooruku nammari qaaramooki oosuseenoo qaaraqandaki kaqi marinoo moodaaki fidikaikamafinoo minakinaa noodaannaina kuqu taikafinoo sipauqa faqa qaara oosiranaki kaqi marinau, moodaa oosiranaki kuridifinau.

<sup>10-11</sup> Kuridifufanoo misa ninaaqiana qangiroo moo fannoo narí ufireena fuaqanau. Fuaqasoofanoo fasau firaafa mina auqu sukaqara fasau fee qiqau, mifa qoomara foora aurimaruna fuka nammariki maqasaa aqufufanoo qaaraqandaki quqaseenoo nammari amiqirafa, moodaaki faiqí anaasee mina namasoofanoo suka narufaqa moomoo kuqimariqau.

<sup>12</sup> Qinee Yoohaneesa mina qafamasaafananoo inaaqianna qangiroo moo fannoo narí ukeena fuaqanau. Fuaqasoofanoo suani afu qaaramooki oosuseenoo moodaaki amannauna arinoo qaaraqandaki kaqi mariqau. Quqoona faqa fasau faqa moodaanaki amannauna arinoo qaaraqandaki kaqi qee marinau. Suani faasaanasaqari dinni ati qeemarinau, dinni ati sia qeemarinau eendaki quqoona faqa miqi kai inau.

<sup>13</sup> Qinee mina qafamasaafananoo quqaumu sandaaqai qaqamaree fidanoo firaa kari faiqiara maqi ufa qufaqa iriqiafana. Mifa qinau mandosana naaquqarafa kambiqaanoo qangiroo qaaramoo namu ufireena fuaqeefindinausa misa fuaqaifindinna kamuqoo maqasaaqaraasa firaa mandainaina naaquqaranaki marifaranoo fee qinau.

## 9

<sup>1-2</sup> Quqaumu miqi qimasoofofanoo qangiroo moo fannoo narí ufireena fuaqanau. Fuaqasoofaqa qinee Yoohaneesa qafaafananoo fasau moo innaarunaindari maqasaa aqufufa findifufanoo moo fannoo maqa ameemaanai madika mina kooqi kiqa amufanoo mi fasaufa faiqiara foora findifinoo madika kooqi atuasoofofanoo idamuna moomoo firaa idamunara foora minakiqari ururanau. Urureenoo innaaruna faqa suani afu faqa aiqama ititafinau.

<sup>3</sup> Mi idamunnanakiqari pandaaga moomoo qumureenoo maqasaa aqufiqau. Misa farukara foora naruaqeeera Anutufa quqanau.

<sup>4</sup> Pandaaga kaaqa andanda saqari amanee neemarsa marufanoo Anutufa minara qaoo qimaseenoo faiqi kai naruaqee qufaqa miqimiqau. Sia aiqama fasiqa anaasee naruaqee qinai. Anutuna akara niqinaaqa marinausa sia naruaqee qinai.

<sup>5</sup> Mi pandaagausara faiqi kuqa nariranara qaoo qinai, kaqi aupurarana kai moodaannai qisauku quqoonasaa aupurarana firaana nimiaqee qinai. Mi pandaagausa narirafa faruka naruqoofanoora foora nidafi marinai.

<sup>6</sup> Moodaannai qisauku quqoonasaa pandaaga marinnakamuqoo faiqi anaasee kuqiranara randaida sia kuqifara aupuree marifanoo kuqirafa adeediramafinanoo doo miqoo taikasee fuannoo.

<sup>7</sup> Mi pandaagausa rakiranaki nimaru qoosausara foora mariqau. Misa nikiaga koora auqira qafeera foora marinai, misa noori faiqi noori fooqaasa mariqau.

<sup>8-9</sup> Misa nikiaga asausi misisaua nikiagara foora kisaagandauqa marinai, misa nifai raionara foora fira nifai kisaaga marinai. Misa nimuqusa rafaqafirafa qainnara foora marinai, misa niqoosa ufa fannoo faiqi moomoosa sandaafanoo maqa ririqindee qimarinai.

<sup>10</sup> Misa nimeesa ati fannoo farukara foora faiqi raquru nimimarinai. Doo minannai faiqi anaasee moodaannai qisauku quqoonasaa aupurarana nimifaranoo.

<sup>11</sup> Misa saideenna uriqararafa maqa ameemaanai madika rakisirafa uriqararafa maridanoo. Yuda maqannaasa ufakiqari moo nuqu Heeburu ufakiqari mina auqu Abadoonnee qimariqau. Kirisa ufakiqari Apoorioonee qimariqau. Mi auquna oosana aiqama ainaina kuridi marinee qimariqau.

<sup>12</sup> Doo miqinoo indaruqaa mandainaina taikanai. Qaaraqanda kaqi maridanoo.

<sup>13-14</sup> Pandaaga taikafufanoo qangiroo moo fannoo nari ufireena fuaqanau. Fuaqasoofaqa qinee Yoohaneesa iriafanano koora auqira qainda Anutuna afusaa marunakiqari ufa moo qufaqa iriqiafana. Mi ufafa koora auqira qainda aannai qaara faqa qaara faqa marunakiqari kambiqafinoo ufireena fuaqoo qangiroona qimaminoo qinai. Eufarateesa nammariki qangiroo qaara faqa qaara faqa faiqi kuridi maria qangiroo namusa rumbaqa mariasa idukunnisaa.

<sup>15</sup> Idukunnisoofaqa maqasaaqaraa fasiqa anaasee qaaramoosaa oosuseenoo qaaraqandaki kaqi quqasee moodaaki aiqama naru taikaqau dinni ati firaqoo kaqi quqanau. Anutufa ooqaindari misa deedaqamma nimufaqa mi aukuanai mi quqoona suaninasaa deedaqamma nimiqoosa nari rakira faiqiuqa faqa mi qangiroo namusa faiqi anaasee moomoo uqanna naru taikaqau.

<sup>16</sup> Mi qangiroo namu marsa rakira faiqiuqa tu handareta mirioona marufaqa nindafaqiafana (200,000,000). Fifau saqari amaneera foora moomoo uqanna qafaqiafana.

<sup>17</sup> Qinee Yoohaneesa qifu pisipasino marufaqa misa qoosauqa faqa misasaa mariasa faqa nindafaqiafana. Qoosasa mariasa nimuqusa ititarafa akaqafa taatuqee idauruara foora mariqau akaqafa dirindaasi arirafa mariqau akaqafa tumana ariraua mariqau. Misa qoosauqa nikiaga raiona akiaqa miqiraua mariqau, misa nookiari idauru namufaqa muna namufaqa nookiari urimarinai.

18-19 Misa qoosauqa nooki faqa nimeesaki faqa faiqí narira afeeka maridanoo. Misa nookiqari idauru namufaqa idamuna namufaqa maa maqana afaaqasasa mariasakiqari faiqí anaasee moomoo uqanna narutaikanau. Mi qoosausa nimeesa sakaniara foora faiqí ukaqannimidanoo faiqí aupurarana firaana maraidaqa.

20 Mi narimaru ainainausa maqasaaqaraa fasiqa anaasee moomoo naru taikasoo faqa kaqi mariasa mina qafamasee sia rufeeqa sia nári mandainaina minniseeqa Anutu finnai ubeekeeqa. Kaqi maqeeidaqa. Misa kaqi kai afaannauqara innaaru qimariqau. Misa koorannai siruaannai booroosannai ooninnai saqarinnai Anutunara foora sia faiqí qafeemaria ainainna sia ufa irimaria ainainna sia nimaria ainaina, nisaukukoo auqusaidaqa minara innaaru qimariqau.

21 Mi kaqimaria fasiqa anaaseesa sia narí ari narí arirana minniseeqa, sia aukainaina minniseeqa, sia faiqí anaasee qummuarirana minniseeqa, sia ainaina qumuarirana minniseeqa kaqi kai maridanoo.

## 10

### *Qangiroo moo papiqa kaqikaana rumbarana uqirafa quminau.*

1 Miqimarufaqa qinee nindafaafananoo qangiroo moo amudaanai qimarufa innaarunaindari quminau. Mina qamunna sia qafaqiafana qoonnamu qamunnara foora kai afisirafa marinau, mina akiqa oondanda fiqú inoo marinau, mina oori afiri suani afu miqirafa daroo daraa imarinau, mina aikuqara saqari aadana kikiqinoo marifaqa idaree mariandee imariqau.

2-3 Mina asaukuki papiqa kaqikaana asaana ruanifeera airiqoofanoo marinau. Mi qangiroofa qumureenoo asauku uqannai aiku ooruku nammarisaa ramaseenoo asaaqai aiku maqasaa ramaseenoo raioonara foora firaqoo faaqarufanoo innaarunai qirafa dinni qisauku taikasee dinni ani qaara marasoo fanoo innaarunai firaqoo darara qimasee faiqiara maqi ufa moo qimaminau.

4 Qinee Yoohaneesa innaarunai qira ufa irisee akara ruaneeriafananoo innaarunaindari qaoo qinoo qisauku dinni taikasee dinni ani qaraqanda marasee innaarunai qira ufa sia akara rua, amiqimasee kukeeqaa qufaqa kukeeqaqiafana.

5-6 Mi qangiroofa aiku ooruku nammariki faqa maqasaa faqa roofa asauku innaarunai uqeeraseenoo narí amana aqiqamaseenoo qinau. Anutufa naaru naaru marianafa innaaruna faqa maqa faqa ooruku nammari faqa quqoonafa minaki maru ainainausa auqunafa marianafa ani auqu ramasee maa ufana qidaqa. Sia moo kari faqa Anutufa nifeesida mariannoo.

7 Inaaqianna qangiroo narí ufireena fuaqasainanoo Anutufa narí ooqai kukeeqaqai doo quqaannoo, ooqai narí tamummaqara fasiqauqa amiqira ufa qimannimuna doo miqoo taikeenoo miqiannoo.

8-9 Miqi qimasoo fanoo innaarunaindaraa ufa faasai qimaqimufa kafa qimaqiminau. Anee qangiroo innai aiku ooruku nammariki faqa maqasaa faqa ramaqai finnai papiqa airirana maqeeina maraa qufaqa qinee Yoohaneesa mifunnai oonuree mi papiqana qimianne qiafananoo qimaqiminoo qinau. Doo maraseenana namasainanoo aranandaki ooquree aseundammiannoo, ookinaa ookasaasa anoonara foora adiafaammiannoo.

10 Miqi qimasoo faqa qinee mina asaukukinaa papiqa marasee namasaafananoo dooki ookasaasara foora adiafaainau, qiranandaki ooqureenoo aseundinau.

(Ookasaasa anoona naaru kambiqaaninna ainainara irirana adiafaa irafa maridanoo. Oosana oosana mandainaina aupurarana narirana kambiqaaninafa aseundirafa maridanoo.)

<sup>11</sup> Miqi masaafananoo qimaqiminoo qinau, anee Yoohaneefa anee kaifaa Anutuna ufa moomoosasa quqaa moomoo faiqí anaasee faqa moomoo maqusanaasa faqa moomoo ufa qimariasa faqa karaambaiquqa faqa amiqimasee Anutuna amiqira nifaaqooqa faqa manda nifaaqooqa faqa misa naaku nimaqainanoo misasaa kambiqaani.

## 11

### *Anutuna marirana qafamasee qu fasiqaqanda.*

<sup>1</sup> Miqi qimasoofanoo moo fannoo anireenoo nimanamaru kannapuna qiminoo qinau. Anee maana maree ooruree Yeerusareenni mari maqana Anutuna naaquqara amaana maqa faqa tatufira qainda faqa amanamasee qafamasee akara rua. Mi amaana maqanaki innaaru qimariasa Yisuna ufamau fimariasa minaindi marianara misa faqa nisaana rumasee akara rua.

<sup>2</sup> Amaana maqa naambeeqai sia amanamandee akara rua mina aamina maqannaasaindi aanaamurundi maridanoo. Misa qaara fasiqa niku nisauku taikasee quqoona faqa qaara quqoona faqa naaquqara maqusa Yeerusaree maqusa aniree nikunnai rafaqafuseefaranoo.

<sup>3</sup> Mi kamuqoo mi aukuanna qinee Anutusa qini ufa kooroo qimaria fasiqaqanda soofaara qamunna afisiraqanda niqiqanaqa qini ufa maqasaa mariasaki kooroo ifaranoo. Miqanda nuqu kooroo imariaqandee qinoo maridanoo.

<sup>4</sup> Miqanda aiqama maqa maqasaa karaambaiqa Yisuna oorisaqaara qooma miqiraqanda maridaqa.

<sup>5</sup> Faiqí akaqausa miqanda naruannee qimasaafanoo miqanda nookinaa ida fannoo naru taikaidanoo doo miqimasaifanoo miqanda naruanee qinausa kuqu taikeefaranoo.

<sup>6</sup> Anutufa mi kooroo ira fasiqaqanda afeeka niminaqa Anutuna ufa maqasaaqaraasa qimannimi marinna kamuqoo innaaruna ititasaifanoo aaku sia ruannoo. Mi kamuqoo Anutufa afeeka niminaqa aiqama nammari maa maqa maqana afaaqasasa mari nammari nári nidiranannai nári iriseeqa arusaifanoo fidikaika kaimmiannoo. Mi afeekanannai nári kai irisee maqa aukarasaifanoo mandainaina oosana oosana kambiqeenoo faiqí anaasee nipatasaa narinoo aupurarana nimiannoo.

<sup>7-9</sup> Mi koorooira fasiqaqanda Anutuna ufa maqasaa fasiqa aiqama qimannimi taikasaifanoo maqa ameemaanai madikasaa rakisirafa kaasau aandau fannoo madikakiqari ururee doo miqanda faqa rakuannoo. Rakidanoo miqanda kuqa narusainaqa miqanda iri Yeerusaree maqusa qambaana akooqoo marifaranoo. Ooqai miqoo kai mi maqusanaki karaambaiqa aunirira saqarisaa pirimmannai ariqau. Mi maqusana auqu Yeerusaree marinna. Mandoosana maree maru maqusana kikiqammusidaqa Soodooma faqa Isipa faqee qidaqa. Mi kooroo ira fasiqaqanda iri Yeerusaree maqusa qambaana marifaqa aiqama firaa maqannaasa faqa kaqikaa maqannaasa faqa aiqama aanaamuru mariasa faqa aiqama ufa qimariasa faqa miqanda iri qaaramoo faasaana faqa moo faasaana atisaa faqa miqanda iri qafaifanoo nikundarara qaoo qimasaifanoo kaqi mariannoo.

<sup>10</sup> Aiqama maqasaaqaraasa miqanda kuqiranara irisee asasammasee qoomaqa suqasee namasee susu imarifanoo ainaina narí ami narí amidaqa

miqandara maaqi qifaranoo miqandara maasa maqasaaqaraasa aupurarana qimimariaqanda doo kuqi qee qimasee asasifaranoo.

<sup>11</sup> Qaaramoo faasaana aiqaramafinanoo Anutufinnaindari kasimari aidoofa qumureenoo miqanda iriki keeqafinaqa kasiqa findififaqa aiqamausa miqanda niqafeeinausa nindafeeqa kaaqa rufieefaranoo.

<sup>12</sup> Mi tamummaqara fasiqaqanda findi fifaqa innaarunaindaraa ufa moo fannoo maaqi qimasee miqanda qimannimiannoo innee qara doo mai innaarunai uruaqa qifanoo asuru fannoo miqanda namuqaa aiqamausa nifusaa mara uqeereeqeenoo innaarunai quqaannoo.

<sup>13</sup> Miqanda muru quqasainanoo miqoo kai maqa firaqoo uqanna kasi-noo Yeerusaree maqusaki mari maqausa moomoo rambairinoo aqufuan-noo. Faiqi sefeena tauseenna (7,000) moomoo uqanna minaki kuqifaranoo. Moomoo uqanna nukudara foora faiqi anaasee kuqifaranoo, moomoo kaqi marifaranoo. Kaqi marinausa mina qafamaseeqa quandakiqa innaarunai mari Anutuna afeeka amooqifaranoo. (Qinee Yoohaneesa mi aiqama ainainna innaarunai maridaqa qafaafannana.)

<sup>14</sup> Doo indaruqaaqanda mandainaina doo aru taikeenoo, moodaa kai dauni aniraannoo.

*Ukeena fuaqammaree dinni taikasee dinni ani moodaa fuaqasee doo dinni ani qaaraikufa.*

<sup>15</sup> Qinee Yoohaneesa qifu pisipasamandoofaqa innaarunai maridaqa qafaafananoo qangiroo moo fannoo inaaqianaafa nari ukeena fuaqanau. Fuaqasoofanoo innaarunai mari ufafa maaqi qimasee firaa kari kooroo inau. Doo maqee maaqooqari maqasaa rakisira afeeka maasa karaambaiqa faqa nari asauku mundiranaindi faqa maridanoo mifa naaru naaru mina rakisida mariannoo.

<sup>16</sup> Mi ufana qima taikasooofanoo faiqi uriqararausa Anutuna ufa irira qaari fiq fiq iqa marusa noorindari maqasaa aqufufaqa Anutuna amooqiqa qiqau.

<sup>17</sup> Oo Karaambaiqa Anutu aiqamausa uriqararafa firaafa anee maridana ooqai marunafa maqee marianafa. Doo anee aneenna firaa afeeka kooroomasee maqasaaqaraasa rakisi nimaqee mariannanara maasa minara ani dufi dufi qimamaqaidaqa.

<sup>18</sup> Aniara nikooqee mari maqannaasa aniara aanooqirafa qumbiqarausa mariafana ani Anutuna aanooqira aukwana nimirafa doo ani maridanoo. Kuqirausa findifu masee mandufa nimira aukwana doo ani maridanoo.

Ani ainainira fasiqa tamummaqarausa misa kadaapirirana akiaqara nimira aukwana doo animaridanoo.

Aiqama fasiqa anaasee uriqararausa faqa kaiqeesa faqa ani ufara rufaida naaquqaida mi mau fimarisa faqa misa kadaapirirana amiqira akiaqara nimira aukwana doo animaridanoo.

Maa maqa maaqana mariasa kuridi mariasa misa kuridira aukwana doo animaridanoo.

<sup>19</sup> Miqi qimasee uriqararausa Anutuna amooqimasoofofaqa qinee quandaki qafaafananoo Anutuna amaana maqa innaarunai marufa kooqi at-uafufaqa qafaqiafana. Mi amaana maqanaki Anutuna faqa faiqi faqa moodaanakikira ufa bookisara foora auquqoofofaqa marufaqa qafaqiafana. Mi bookisanaki Anutuna ufa oonisaa akararirafa Mooseena ooqai amufa maru bookisana qafaqiafana. Qinee qafaafananoo aakuasaa uqinoo innaarunai qinoo maqa kasinoo firaa pupusamu aqufinau.



## 12

*Aareena fannoo anaasee faiqi nambiqarara qu ufafa.*

<sup>1</sup> Qinee Yoohaneesa miquna qafamaseeqa quandaki moo ainaina qafaqiafana. Innaarunai firaaqoo kooroo ira ainaina kikiqusirafa kambiqoofaqa qafaqiafana, anaasee moo fannoo suani afu miqira kurusa afisusee maru qafaqiafana aikuqara quqoonasaa ranoo marufaqa qafaqiafana mina aki-aqaki afisira qafeesaa qisaukuqara taikasee qiku ooqu qaaraqanda marasee fasaunamu mina qafeesaa qeemaru qafaqiafana.

<sup>2</sup> Mi anaaseefa amuaqu uqaikinoo marufa innaamunara aurinoo aupureenoo faaqa rinau.

<sup>3</sup> Faaga rimarufaqa qinee quandafi moo ainaina innaarunai mari ainainna kooroo ianinnana qafaqiafana. Qaareena qinaakuna qafaqiafana mina afaaqa aiqama taatuqee arinoo marinau mina akiaqa aambu-manamu qisauku dinni taikasee dinni ani qaara marasee akiaqafaqaafa marinau. Aiqama akiaqasaa qafee afisinoo marinau, mina akiaqaqa aanai qisaukuqara taikasee marinau.

<sup>4</sup> Mina ameesa fannoo innaarunaidaraa fasau moomoo nukudara foora rarisameeqeenoo maqai aqimarinau. Mi qaareenafa amuaqu uqaikira anaasee oorisa kikinoo maridanoo faiqi maqasainanoo nambiqarara rak-isidanoo.

<sup>5</sup> Mi anaaseefa akoonaiqi maqasoofanoo findifinoo qainna auqira samu qumareenoo aiqama aanaamurusaa rakisi nimaqaaninnana maqanau. Mi anaaseefa akoonaiqi maqasoofanoo Anutufa qaareena naandoo qimasee aranaiqi rafusueeqeenoo innaarunai nari ufa irira qaarisa quqasoofanoo marinau.

<sup>6</sup> Miqiufanoo mi anaaseefa quqasee qaareenara rufisee sandee aadana maqa maqaki Anutufa deedaqammaqoonaki oonu marinau. Qaaramoo aukwana faqa moo aukwana atisaa faqa Anutufa miqoo rakisinau.

<sup>7</sup> Qinee Yoohaneesa qafeemariafananoo rakirafa innaarunai kambiqanau. Dinni qangiroo karaambaiqa mina auqu Mikaraafa Anutuna qangiroo namufaqa dinni qaareena nari manda qangiroo namufaqa maridaqa innaarunai rakimariqau.

<sup>8-9</sup> Mikaraafa Anutuna qangiroo namufaqa afeekaikamasee qaareena rafaafuseenoo nari faqa nari qangiroo namufaqa rafuseeqeenoo innaarunaindari maqasaa aqusanau. Anutufa aniara sia maqqooqari maqqoo mariannee qifaqa ani maqasaa rafusueeqee aqida fee qimasee aqusanau. Mi qinaakuna qaareenafa ooqai sakani marufa aiqama maa maqanasaaqaraasa ueeqee marufa marinau. Mina auquara Afaanna firaafa Sadannee qinau.

<sup>10</sup> Mikaraafa Sadanna maqasaa aqusoofaqa qinee Yoohaneesa qifu pisi-pasamasoofaqa innaarunai maridara fooqaana qafaafananoo ufa moo firaa kari nameera qinau, Anutuna asumu maree mariafa doo animaridanoo. Doo maqee Anutufa nari Karaambaiqa afeeka kooroomaseenoo. Doo maqee mina asauku mundirafa nari aanoo doo uqannifiqeenoo. Doo maqee maasa qikaqaafasaaauqa maqasaaqaraasa nikaruqirafa eendaki faqa faasaana faqa Anutuna afusaa munuqi miniqi marifa Sadannafa innaarunakiqari aranaiqi futeeqa rafusueeqeenoo maqasaa doo aquseenoo.

<sup>11</sup> Maasa qikaqaafasaaauqa maqasaa fasiqauqa Anutuna sipsipa aanaaqi kuqu fidikanannai doo Sadannana uraaqareenoo nari Anutuna anoona ufara kuqunannai faqa mina uraaqareenoo misa mi ufanara nari mariranara sia anoonee qimasee kaqi kuqiraree qimariasa maridaqa.

<sup>12</sup> Ufa firaqoo kai qidanoo qinau. Innaarunaki mari ainainausa innee aiqama asasiaqa Sadannafa inniki marifa doo maqai aqufinoo. Innee maqasaa mariasa faqa ooruku nammariki mari ainainna faqa innee ru-fiaida mariaqa. Afaanna firaafa inniki ooqu finoo mina aanoo firaafa mariannoo narí qusasaa marianinnanara iriseenoo mina aanoo firaafa mariannoo fee qinoo.

<sup>13-14</sup> Qinee Yoohaneesa mi ufana iriseeqa quandaki qaareena maqasaa qafeeqa. Qaareena qinaakufa doo maqasaa aqufinoo maridano qafeenoo aanoomaseenoo quandaki faiqi maqoo anaaseena arunaaneera afaqanoo fufanoo Anutufa firaqa ququmu aqoosa qaaraaqanda amufanoo qaqaamareenoo aadana maqasaa Anutufa deedaqammaqoo maqanasaa aqufinoo asumu marinau. Qaaramoo aukwana faqa moo atikai marasoofanoo Anutufa rakisimarufanoo qaareena fannoo mi anaaseena ariranasaa Anutufa ititeemarinau.

<sup>15-16</sup> Qaareena fannoo mi anaaseena qafamasee aanoo qufanoo mina ookiqari nammari moomoo auginau. Nammari auginoo mi anaaseena mi samuna aruanifeera fufanoo maqa fannoo mi anaaseena soodaqinoo maqa oo raqafufanoo nammari minaki kai keeqanau.

<sup>17-18</sup> Qaareena fannoo mina qafuofanoo firaqoo uqanna aranaqoofanoo quandakinoo mi anaaseena ati aiku asaku marusa aiqama Anutuna aauqira sandufamau fimariasa Yisuna kooroo ira anoona ufamau fimariasa faqa naruanee qimasee fufa ooruku nammari afainni kikiqinoo marinau.

## 13

### *Maa maqanasaaqaraa kaasau aandauqara qu ufafa.*

<sup>1</sup> Qinee Yoohaneesa qifu pisipasamandoo innaarunai maridaqara foora qaareena ooruku nammari afainni kikiqinoo maruafaqa qafamasee akara rumaqaafanano. Mifa miqoo kikiqinoo marufanoo ooruku nammarikiqari kaasau aandau moo fannoo ururoofaqa qafaqiafana. Mi kaasau andauna aanai qisaukuqara taikasee marinau mina akiaqa dinni qisauku taikasee dinni ani qaara marasee akiaqafaqaafa marinau. Aiqaama aanaisaa karaambaiqa qafee afisinoo marinoo aiqama akiaqamau narí Anutunara fidiqaira manda nuquqa akararinoo marinau.

<sup>2</sup> Mi kaasau andaufa firaqa kusina fooqaatia faiqí narimarifa marinau. Mina aiku firaqa samaada aikuara foora marinau. Mina oo aamara raioona oo aamara fooqaafa marinau. Mifa ooruku nammarikiqari ururoofanoo qafamaseenoo qaareena fannoo narí afaaqai maru ainainna mi kaasau andauna ooruku nammarikinaana aminau. Narí rakisira qaari faqa aiqama maqannaasa rakisirana faqa mi kaasau andauna amisoofanoo rakisinnimaqanau.

<sup>3</sup> Mi kaasau andaufa marufanoo moo fannoo mina akiaqaki moo arufanoo kuqinoora fooqaana maseenoo aru afaaqana ateeqaqoofa unufufanoo kaifaa findifinoo nammarikiqari ururoofaqa qafaqiafana. Aiqaama maa maqana afaaqasasa mariasa mifa findifuna qafamasoofanoo naaquqoofaqa aiqama mina ufamau kaimbiqau.

<sup>4</sup> Qaareena fannoo firaqa uriqarara afeekana kaasau aandau amunara minara aqee maria fasiqa anaaseesa qaareenara innaaru qidaqa amooqi mariqau. Misa kaasau aandau oorinni faqa innaaru qimasee amooqiqa qiqau. Yafee maa kaasau andauna amana maridane. Sia uqanna. Yafee mina ariraramasee aruannoo fee, sia moo fannoo amana arifara.

<sup>5</sup> Mi manda kaasau aandaufa aiqamai rakisidanoo mandufa uqanna oosana oosana ufa qimarufanoo Anutufa sia qaoo qinau, qaara fasiqa niku nisauku taikasee moo fasiqa oonu qaara marasee quqoonasaa kaqi maridanoo mina kai qafee marinau.

<sup>6</sup> Mi kaasau aandaufa Anutuna faqa mina auqu faqa manda niqurarara niquraree marinau.

<sup>7</sup> Mifa Anutuna aiku asauku faqa rakinoo rafaafinau. Mifa kaqikaa maqanna faqa firaa maqanna faqa aiqama ufa qimariasa faqa aiqama maqusanaasa faqa rakisimarufanoo Anutufa sia qaoo qinau kaqi kai qafanau.

<sup>8</sup> Aiqama maa maqa maaqana afaaqasasa mariasa mi kaasau aandaunara Anutufara foora innaaru qimasee amooqifaranoo. Misa nari nuqu kaqi marifandinausa Yisuna bukaki akara rimariasa misa kai sia amooqifaranoo. Ooqai maa maqa maaqana sia maruqoo Anutuna sipsipa aanaaqi kuquna bukaki nuqu marisa kai sia kaasau aandau amooqifaranoo.

<sup>9</sup> Aiqama naaqoo faqaasa ufa iriaqa.

<sup>10</sup> Kasooqagee kaasau aandau Yisuna ufasaara naruaninausara Anutufa ooqai irinau. Kaasau aandau fannoo rumbaanausara faqa ooqai irinau. Mi narira aukuannai Anutuna ufa iri mariasa sia rufiasee minnisaaqa afeekaikamasee uaqee iaqa minasaa mundufi firana faqa kaqi kai fuaqa.

<sup>11</sup> Qinee Yoohaneesa mi kaasau andauna qafamaseeqa quandakufaqa moo kaasau aandau maqakiqari ururoona qafaqiafana. Mina aanai qaraqanda sipsipa aanaira foora ururanoo marinau. Mina ufa fannoo qaareena ufa qimarinau.

<sup>12</sup> Sipsipa aanaikirafa indaaruaqa kaasau aandau oorisa kikiqammambi mina afeeka firaatia maranau. Mifa aiqama maqa afaaqasasa mariasara indaaruaqa kaasau andauna amooqagee sia amooqifaqa narunaaree qinau. Mi indaaruaqa kuqiraramasee afaqa atekarafa qunufunara innaaru qida amooqagee qinau.

<sup>13</sup> Sipsipa aanaikirafa inaaqianna aandau fannoo aiqamausa nifusaa faiqi sia auqaaqaa ira ainaina auqinau, aiqamausa nifusaa innaarunaindari ida fannoo maqasaa aqu fuannee qufanoo aqufinau.

<sup>14</sup> Mifa indaaruaqa kaasau aandau oorisa faiqi sia auqaaqaa ira ainaina auqusoofanoo minannai maqasaqaraasa aiqama nikaruqinau. Miqidanoo mifa aiqama maqasaqaraasa qimannimino qinau, Innee afaqa ateka-soofanoo kuqiraramandee findifuna amana auquaqa.

<sup>15</sup> Misa auqusoofanoo sipsipa Anutufa uqeeqararee qimasee nari namuqaa qumee afeeka amufanoo aanaikira aandau fannoo unnaqimasee nari afeeka fee qimasee aidoo indaaruaqa kaasau aandau amana auquqoonaki aidoo fuqasoofanoo mina amana fannoo faiqiara foora ufa qinoo nariara sia innaaru qimasee amooqusa kuqa narinau.

<sup>16</sup> Sipsipa aanaikira aandau fannoo nariraruqaa aiqama maqannaasa kaiqeese faqa uriqararause faqa ainaina faqaasa faqa kudifasiqa faqa rumbee mariasa faqa idukimariasa faqa aiqama nari akara nari nisauku uqannai fee niqinaaqafee akara rumannisanau.

<sup>17</sup> Mi akarana sia marinausa sia ainaina nimisee mina akiaqara feefauru mareefaranoo, ainaina faqa sia amana munnimma aqusee mareefara. Mi akarana oosana kaasau aandau mina auqu nambaqa mariannoo.

<sup>18</sup> Irirana faqaasa maa ufana iriaqa. Irirana faqaasa mi nambaqana kaasau aandau nambaqa oosana irifaranoo. Mi nambaqafa faiqi auqu

kikiqammusidanoo. Mi nambaqafa maaqimminoo maridanoo. Sikisa handareeta faqa sikisti sikisa faqa maridanoo, (666).

## 14

### *Maqasaaqaraasa moomoosa fuka idiroofaqa qafaafanna ufafa.*

<sup>1</sup> Qinee mi ainainausa qafamaseeqa quandakufaqa qafaafananoo sipsipa aanaaqi kuqufa Yisufa Oorifa aaqanasaa moo auqu Sioona aaqana minasaa kikiqinoo marinau. Oorifa aaqana Yeerusaree maqusa aaqa maridanoo. Mina saimbaqa faiqí moomoo mariqau. Yisuna auqu faqa mina akoona auqu faqa niqinaaqa akara rirausa kai mariqau. Mi fasiqausa nisaa-naruafanaqa wan handareeta faqa footi maqi tauseenna faqa Yisuna faqa mariqau, (144,000). Faiqí ooni saqari uqanna auqufiqau.

<sup>2</sup> Qinee mina qafaidaqa innaarunaindaraa ufa moo iriqiafana. Firaa kari innaarunai qiara foora qinoo firaa oondaindari nammariara foora aqufidanoora foora qufaqa iriqiafana. Miqimarunakina innaarunaindari piripunna ariufaqa iriqiafana.

<sup>3</sup> Yisuna saimbaqa Oorifa aaqanasaa mariusa wan handareeta faqa footi maqi tauseenna faqa misa aiqama Anutuna qaari oorisa faqa qaara faqa qaara faqa aandau faqa uriqararausa faqa misauqa noorinni ubeekaqa. Noori ubeekaidaqa fuka idi moo raqau sia moo fannoo mi idina irifaranoo Yisuna faqa maru fasiqausa wan handareeta faqa footi maqi tauseenna faqa misa kai mi idina amana reefaranoo Yisuna fidikannoo feefaurirausa kai mi fasiqausa marufaqa qafaqiafana.

<sup>4</sup> Mi fasiqausa sia anaasee qummuari marusa amiqira maanaaqara foora andeeqarausa kai maridaqa. Misa sipsipa aanaaqi kuquna Yisuna faqa aiqamai fimarusa misa maqasaa fasiqa nandafiana neera fooridaqa misa Anutunaindi faqa Yisunaindi faqa maridaqa miqidaqa.

<sup>5</sup> Sia unna ufa misaki marusa sia aaqarafa misaki marusa.

### *Qaaramoo qangiroo qu ufafa.*

<sup>6</sup> Qinee Yoohaneesa miqimaruna qafamasee quandafi qafaafananoo qangiroo moo fannoo innaarunai sandaaqai qaqaamaree fufaqa qafaqiafana. Mifa amiqira fasaasa ufa naaru naaru marira ufa aiqama maa maqanasaaqaraasa firaa maqanaasa faqa kaqikaa maqannaasa faqa aiqama ufa qimariasa faqa aiqama maqannaasa faqa qimannimirara qaqaamaree finoo firaa kari qinau.

<sup>7</sup> Innee Anutunara rufisee mina afeeka uriqararanara amooqiaqa, doo mifa maqasaa mariasa ufa irirafa doo ani maridanoo. Mifa innaaruna faqa maqa faqa ooruku nammari faqa kaqi nammariuqa faqa minauqa auqufa maridanoo, mina oorisa kumaramafi amooqiaqa.

<sup>8</sup> Mi qangiroofa miqi qimasoofanoo qangiroo moo fannoo mina aanaaqianna qaqaamaree fidanoo Babiroonia maqusara anaasee kikiqa ususee qinau. Manda anaasee Babiroonia maqusa doo maqasaa aqufinoo maqusa naakundu kai saaeemaseenoo. Mi maqannaasa nári deedeepirana faiqí anaasee qummuarirana moomoo uainna nammariara foora aiqama maqannaasa nimufaqa namaseera foora aiqama maqannaasa nimufaqa namaseeqa furufarammidammia.

<sup>9-10</sup> Doo mi qangiroofa miqi qimasoofanoo mina aanaaqianna moo qangiroo fannoo qaqaamaree finoo firaa kari nameera qimasee aiqamausa qimanniminoo qinau. Kaasau aandau fee narí amana auqiranaree amooqidaqa innaaru qimariasa mina akara niqinaaqa faqa nisaukusaa

faqa akara rirausa misa Anutuna aanooqirana uainna nammariara foora nambiqeefaranoo. Anutuna aanooqiranara qidanoo ididimari uainnana kikiqa usidanoo. Sia nammari namufaqa uainna namufaqa asooarana nimifaranoo kaqi uainna kai ididi marina kai nári manda oosana akiaqara aanooqirana idara foora qeemarina nimiannoo. Aiqama kaasau aandau amooqimariasa faqa mina akara maree mariasa faqa misa aiqama Anutuna naaquqara andeeqara qangiroouqa noorisaa faqa sipsipa aanaaqi oorisa faqa firaa idaqee marinaki aupuraranaki fifaranoo.

<sup>11</sup> Misa aupuraranana nimimari mi idauru munafa naaru naaru ururaidanoo mariannoo. Faasaana faqa eendaki faqa sia asooarana mareefaranoo kaqi miqi kai minoo mariannoo. Kaasau aandau fee mina amana auqiranara innaaruqimariasee mina akara maree mariasee misa aiqama miqi kai mifarannoo.

<sup>12</sup> Mi aukuanai maqasaa Anutuna aiku asauku marianausa mi aupuraranaki reendeenamafi fifimafi marirana faqa Yisunasaa kaqi kai mundufi marirana faqa miqimandee mi aukuanai Yisuna ufamau fimariasa miqifa.

<sup>13</sup> Mi qangiroofa miqi qimasooafa qini qifu pisipasamasooafa qinee innaarunaira foora mariafananoo ufa moo qimaqiminai, Yoohanee anee maa ufana akara rua. Maa aukuanasaaqari karaambaiqaki keeqafiqakuqifandinausa misa asafifaranoo. Anutuna maraquna fannoo mi ufana irisee dadaaqinoo qinai. Eoo kuqaa nariqa kadaapi firana ririseeqakuqifa adooaidaqa asafifaranoo. Nári kadaapirirana anoona kuqiranaki fiqa doo maree fidaqa asafifaranoo.

*Anutufa maa maqa maaqanakinaasa nifiqaseenoo narí ufa irimariasa maraaninna ufafa.*

<sup>14</sup> Qinee Yoohaneesa mi ufana iriseeqa quandafi qafaafananoo eekara asurusaa faiqí moo fannoo faiqí nimaakuara fooqaana ooqufaaqee idanoo koora auqira qafee afisirafa asaukuki paipana afai raiqarana asaukuki uaqeefaqa qafaqiafana.

<sup>15</sup> Mi fasiqafa asurusaa ooqumarifi marufanoo Anutuna innaarunai naaquqara amaana maqakiqari qangiroo moo fannoo raudee qumuree mi fasiqana firaa kari aaramaseenoo qinai. Doo narana qanaa marida aneenna paipanannai atekasee maree ania. Doo maqasaa naranara foora akuqanoo maridanoo.

<sup>16</sup> Asurusaa marufa mina iriseenoo eedoo qimaseenoo doo narí paipana rauqimareenoo maqasaa aquseenoo narana atekasee maree urinai.

<sup>17</sup> Maroofanoo qangiroo moo fannoo Anutuna naaquqara amaana maqaki innaarunai marunakiqari raudamaki anireenoo narí asaukuki paipana afai raiqarana uqirafa raudoofaqa qafaqiafana.

<sup>18</sup> Anutuna tatufira qaindasaa rakisimarufa qumureenoo paipana uqirafa qumuna aaramasee qimaminai. Anee doo uainna tatimaria sandafa maqasaaqaraasa mandoosana doo akuqanoo maridanoo, atekamaree murusee misa fidika saunara foora tatia.

<sup>19</sup> Mina iriseenoo paipanafaqaafa narí paipana maqasaa uainna sanda ateka mareenoo Anutuna aanooqirana tatimarunaki maqusai murusee naambeeai qinai.

<sup>20</sup> Aqusoofaqa misa tatisoofanoo fidika kai nammariara foora aafinoo faiqí ninuka kai urururufanoo nianai uqanna maree finai.

## 15

*Maa maqafa taikainna aukuana dinni ani qaara marasee qangiroo aupurarana maree anifara.*

<sup>1</sup> Qinee innaarunai mariafana moo innaarunai koorooira ainaina naaquqara ainaina kambiqaoo qafaqiafana maaqimasee kambiqanau. Qisauku dinni taikasee dinni ani qaara marasee qangiroo namu nári nisaukuki Anutuna taikaranaki aupurarana uqirausa aniqau. Mi aupurarana maqasaagaraasa Anutuna ufa sia irimariasa nimisaifanoo Anutuna aranaqarafa taikaannoo.

<sup>2</sup> Qinee mina qafamasee quandaki ooruku nammariara foora tanuka minasaa maridanoora foora idauru namufaqa marufaqa qafaqiafana. Miqoo ooruku nammari afaisaa faiqí anaasee moomoo Anutuna ufa irimarusa usimariqau. Misa kaasau aandau akarara qaoo qimarusa misa kaasau aandau faqa mina amana auqirana faqa rakiara foora mina uriqararausa mariqau. Anutufa misa piripunna nimufaqa misa

<sup>3</sup> Anutuna ainainira faiqi Mooseena faqa sipsipa aanaaqi kuqufa faqa miqanda idi ree mariqau. Maaqi qimasee idi raqau.

Oo Karaambaiqa aiqama afeekafaqaa Anutufa,  
Anee aiqamausa rakisi marianna oosanafa faqa anee imarianna oosana faqa idaaqirafa firaafa maridanoo.

Anee aiqama maqusanaasa Karaambaiqa marianafa,  
Anee niniunafa andeeqarafa kuqaa marunafa marianafa.

<sup>4</sup> Oo Karaambaiqa yafasiqa fee sia aniara rufaidanoo.

Yafasiqa fee ani uriqararana sia koorooiannoo,  
Aneennaraa kai naaquqarafa mariananoo.

Ani andeeqara ainainirafa aiqamausa qafamasee minara aiqama maqanna aniree ani oorisaa aniree ani amooqifaranoo.

<sup>5</sup> Misa mi idina ramasoofaqa qinee Yoohaneesa qafaafananoo Anutuna amaana maqa innaarunai atuasoofaqa qafaafananoo minaki ooqai Mooseefa Anutuna uiqaana maqa usakaqoofa mina aundurái marufaqa qinee qafaqiafana.

<sup>6</sup> Dinni taikasee dinni ani qaara marasee qangiroouqa Anutufa faiqí anaasee nimianinna aupurarana uqirausa faasai nindafaafanausa misa Anutuna naaquqara amaana maqakiqari raudaqau. Misa qamunna anukarafa eekara arirafa marinau. Misa koora auqira raitanda naamma ameemaana rumbarausa animariqau.

<sup>7</sup> Ani marufanoo Anutuna aaqa aandau qaara faqa qaara faqa marunakiqari moo fannoo koora auqimaru qafeesa dinni taikasee dinni ani qaaraqanda marasee qafeesa naaru naaru marira Anutuna aanooqirafa qumbiqara qafeeuqa aiqama qangiroouqa nisaukuki moodaa moodaa quqasanau.

<sup>8</sup> Quqasoofanoo innaarunai amaana maqa idamuna qumbiqanau. Anutuna afeeka faqa Anutuna areenarana faqa minasaaqari idamuna fannoo mi amaana maqanaki qumbiqanau, sia keeqarana amana marinau. Nisauku dinni taikasee dinni ani qaara marasee qangiroo misa aupurarana taikasoofoanoo miqoo kai amana keeqaaqaainau.

## 16

*Naaru kambiqaaninna ainainna kukeeqarana koorooirafa Yisufa Yooha-neena koorooqimamufanoo akara rinau.*

<sup>1</sup> Amaana maqakinaa idamuna qafamaseeqa iriqiafana ufa moo innaarunai maru amaana maqakiqari ufa moo firaa qoo nameera qimaseenoo aupurarana maroo qangiroosa qimanniminau. Doo innee qisauku dinni taikasee dinni ani qaara marasee qafee Anutuna aanooqira qafee maraasa doo innaarunaindari maqasaa muqu teeqiaqa.

<sup>2</sup> Miqi qufanoo indaruqaa qangiroo narí qafee mara maree innaarunaindari maqasaa muqu teeqinau. Teeqimasoofaqa maqasaa fasiqí anaasee kaasau aandauna innaaru qimarusa mina akara maree marusa misa nifaaqasasa kaaga nidafidanoo afundidanoo eefeeda namuana fooqaafa moomoo narinau.

<sup>3</sup> Narusoofanoo kafaa mina aanaaqianna qangiroo moo fannoo narí qafee mareenoo muqu ooruku nammariki teeqimaqusoofanoo kuqira fasiqa fidikara foora kai mandifufanoo kuqira fasiqa fidikara foora maqufufanoo ooruku nammariki marida kasi maria ainainafa aiqama kuqu taikafinau.

<sup>4</sup> Kuqutaikafufanoo miqanda ninaaqiana moo qangiroo fannoo narí qafee mareenoo innaarunaindari nammari uqannaki muqu teeqimasoofoofanoo fidika kai qumbiqafinau.

<sup>5</sup> Qumbiqafufanoo nammarisaa rakisimaru qangiroo fannoo nameera qinau. Oo Anutufa naaquqarafa anukarafa ooqai marunafa maqee marianafa anee fidika naaqee qimasee nimiannanara andeeqarafa mariananoo.

<sup>6</sup> Misa maqasaa fasiqa Anutuna ufa irimaria fasiqanaaseesa faqa tamummaqara fasiqauqa faqa fidika ruqiee marianara anee fidika nimianaqa naidaqa. Nári oosanara saanara mina akiaqara fidika naidaqamiafo qinau.

<sup>7</sup> Miqimandoofanoo Anutuna tatufira qaindasaaqari ufa moo qinau. Oo Karaambaiqa Anutufa uriqararafa aninna narirafa kuqaa andeeqarafa kai marifa mariananoo.

<sup>8</sup> Mi namusa miqimasoofoofanoo inaaqianna moo qangiroo fannoo suanisaa narí qafeekinaana muqu teeqimasoofoofanoo suani fannoo firaaqoo ididinoo faiqí anaasee firaaqoo idara foora nitakuqinau.

<sup>9</sup> Nitakuqufaqa aanoomasee quandaki Anutuna auqu ramasee aquraraqau. Mi oosana oosana aupuraranna marasee mi oosannana akoona aqurarasee sia nári mandainaina minnisee Anutuna amooqigau. Kaqi maraqa fimariqau.

<sup>10-11</sup> Mi namusa miqi masoofoofanoo qangiroo moo fannoo narí qafeekinaana kaasau aandau qaarisaa teeqimasana. Teeqimandoofanoo asukuna fannoo kaasau aandau ququsakinaasa ititannimaqasoofaqa nipatara aupuraidaqa naridaqa nidafirana faqa namuanara faqa aupuraidaqa nifai riqidaqa innaarunai Anutuna aqurara ufa kai qidaqa kaqi furufammasee nári mandainaina kaqi mara maree fimariqau.

<sup>12</sup> Mi namusa miqimasoofoofanoo qangiroo moo fannoo narí qafeekinaana Eufarateesa nammariki teeqimaqusoofanoo mi nammarifa aiqama aadanusinau. Suani oosanaindaraa karaambaiqauqa nári rakira fasiqauqa faqa rakirammasee aniaqeera aadanusinau.

<sup>13</sup> Qinee Yoohaneesa mina qafaafananoo afaanna qaaramoo taka fooqaana mandaikirana qafaqiafana. Moo fannoo ooqai maru qaareena ookiqari ururanau moo fannoo indaruqaa kaasau aandauna ookiqari ururanau, moo fannoo unna qira tamummaqara fasiqa ookiqari ururanau.

<sup>14</sup> Mi qaaramoo takausa oosana oosana ainaina sia faiqí auqaaqaa ira ainaina auqemaru afaannausa faiqí rakisirausaikiqa mariqau. Mi qaaramoo afaanna namusa aiqama maqa maaqakina karaambaiqauqa

nári sundia namufaqa nifeeqee rakiranaki quqee mariasa mariqau. Misa Anutuna faqa rakirara masaifanoo Anutufa uriqararafa misa aiqama naru taikaannoo.

<sup>15</sup> Miqimarufanoo Yisufa miqoo qini qimaqiminoo qinau. Qini ufa iria, qinee ummuarira fasiqara foora ireeda kai innaarunaindari qumuanaura. Nifu maqee marusa faqa qamunna deedaqirausa faqa asasifaranoo, sia kaqisamu fiqa faiqí nifusaa faqa Anutuna afusaa faqa sia nisaurifaranoo.

<sup>16</sup> Yisufa miqi qimaqimisoofanoo mi taka namusa aiqama karaambaiqa faqa nári sundia namufaqa nifeeqeenoo Isaraee maqasaa quqasanau. Mi maqa maaqana auqu Heeburu ufakiqari moo auqu Isaraee maqannaasa ufakiqari Aramakeedoonaa maqa maaqee qimariqau.

<sup>17-18</sup> Miqoo suqu quqasoofanoo inaaqianna qangiroo fannoo narí qafeekinaana ufaisaa muqu teeqinau. Teeqimasooofanoo Anutuna qaarisaqari amaana maqaki marufa ufa moo firaa kari qinau. Doo taikeefoo qima-soofanoo aakuasaa uqinoo innaarunai qinoo oosana oosana ufa qinoo maqa naaquqarafa firaafa uqanna kasinau. Ooqai oosana arooqooqari sia maqa maaqimasee kasidanoo maana firaafa uqanna uriqararafa kasianoo.

<sup>19</sup> Yeerusaree maqusa qaaramoo kamu afoomakinoo aiqama maqusanaasa taunna faqa kuridiannoo. Mikari Anutufa Babiroonia maqusara sia auninau. Narí kaafakinaa aanoo qirana idaqee mari nammariara foora adiasee Babiroonia maqannaasa nimisoofaqa namasee kuqiqau.

<sup>20</sup> Aiqaama ooruku nammariiki mari afumausa aiqama nammariiki ukuqnama taikanau, aiqama aaqana faqa taikanau.

<sup>21</sup> Pupusamu innaarunaindari faiqisaa aqufinau firaa pupusamu moodaa moodaa fifiti kiroogaram qaara fasiqa niku nisauku taikasee moo fasiqa asaukuqara taikasee sikeera akara kamu aqufufaqa faiqí anaasee mi firaa pupusamuna qafamasee quandaki Anutuna aqurara ufa kai amiqau.

## 17

### *Firaaqoo ummuari maria anaaseesa ninoona aru ufafa.*

<sup>1</sup> Pupusamu taikafufanoo qafee teeqiusakiqari moo qangiroo fannoo qini daarenoo qinau, Yoohanee anee mai anirainaqa firaaqoo ummuari mari anaaseena kuridirana oosana uqafiqaa. Mi anaaseefa firaa taunna kikiqa usidanoo, moomoo nammari mina aaga maridanoo. Mi moomoo nammariina kikiqa usirafa maridanoo faiqí anaasee moomoo maqusanaasara qidanoo.

<sup>2</sup> Maa maqanasaaqaraa karaambaiqauqa mi manda anaaseena aafeeqee mariafa maridanoo aiqama maqannaasaa fasiqa anaasee faqa maa anaaseena ummuarirana uainna nammariara foora neeneesaidaqa furufaridaqa.

<sup>3</sup> Miqi qimasee qimaqimisoofanoo Anutuna maraquna fannoo daakufufanoo mi qangiroofa qini mareeqeenoo innaarunaindari maqasaa muqu aadana maqasaa quqaseenoo mi anaaseena uqaqifiqanau. Mi anaaseefa taatuqee aandau kaasau aandau ataufakaaqa ooqu faaqee marinau. Mi kaasau andauna afaaqasasa Anutunara fidiqaa ira auqu moomoo mina afaaqasasa akararinoo marinau. Mi andaufa dinni qisauku taikasee dinni ani qaara marasee akiqa faqaafa marinau, mina aanai qisaukuqara taikasee marinau.

<sup>4</sup> Mi anaaseena qamunna sia kaiqeesa afisimariana uriqararausa afisimaru qamunnanda saasaakoona arirana faqa taatuqee arirana faqa afisimarufa aiqama ainaina koorannai auqirana kai afaaqaa auqirafa marinau. Firaa feefauru aqimari ooninna pupu ooni fooqaana faqa maranoo ninau.



Mi anaaseena asaukuki kooro auqira kaafa uqusee marinau. Mi kaafanaki ikairifaqaa ainaina faqa faiqí anaasee narí ummuari narí ummuari-rana aiqama mi ainainafa mi anaaseenasaa aniqusirafa mi kaafanaki qumbiqanoo maridanoo. (Faiqí anaasee kikiqa usidanoo kuqaa qira Anutuna minniseeqa unna qira Anutuna amooqimarianara qidanoo.)

<sup>5</sup> Mi anaaseena aqinisaa mina auqu akara rinoo maridanoo auqu akooqoo maridanoo oosana kukeeqanoo maridanoo. Mina auqu maaqi qinoo maridanoo Firaa Babiroonia aiqamausa nári naumoosaa feefauru maree mariasa ninoofa faqa kaaqa aanaaseera rimariasa ninoofa faqa maridanoo.

<sup>6</sup> Qinee Yoohaneesa mina akara qafeeqa mi anaaseena oosana qafau-nanoo furufaramminoo marifaqa qafeeqa. Mifa Anutuna maqasaaqaraa faiqí anaasee fidika faqa Yisuna ufara afeekaiki mariasa fidika faqa uainna nammariara foora misa narusee misa fidika neeneeseenoora foora furufarinoo nimari anaaseefa. Qinee mina qafamasauanoo firaaqoo daaquqeenoo. Qangiroo fannoo miqiafananoo qiqafeenoo qinuu.

<sup>7</sup> Anee nanaree aaquqaidanoo fee qinee mi anaaseena faqa mi andauna faqa oosana kooroo qianamma iria.

<sup>8</sup> Anee kaasau andau qafaanafa ooqai marufa maqee sia maridanoo, mifa qusasaa maqa ameemaanai madikakiqari urureenoo taikaranaki fuannoo. Naaru naaru mariranaki fimariasa Anutuna bukaki nuqu akara rinoo maridanoo, ooqai maa maqafa sia maru kamuqoo mi bukanaki misa nuqu akara rumaqoofa maridanoo. Maa maqanasaa mariasa sia mi bukanaki nuqu akara rumaqoosa misa mi manda kaasau andauna qafeeqa kaaqa naaquqainaqa mina ufamau fifaranoo. Ooqai marinoo maqee sia maridanoo kafa kasooqaqee kooroo ianinnanara tautumasee mina ufamau fifaranoo.

<sup>9</sup> Maa ufana irirana faqaasa kai irifaranoo. Mi kaasau taatuqee andauna akiaqa dinni qisauku taikasee dinni ani qaara marasee akiaqafaqaafa maridanoo. Mi akiaqa namuna faqa dinni qisauku taikasee dinni ani qaara marasee aqana namu kikiqa usinoo maridanoo mi anaaseefa minauqasaa ooqufaaqee maridanoo, karaambaiqauqaindi faqa miqimasee namu maridaqa.

<sup>10</sup> Moodaannai qisauku karaambaiqa doo taikafiqau, moodaa kaqi rak- isidanoo maridanoo moo fannoo aniraannoo anirainanoo qusasaa taikaan- noo.

<sup>11</sup> Mi kaasau andau anaasee minasaa ooqumariufa ooqai marufa maqee sia maridanoo kasooqaqee kafa kambiqaanoo. Ooqai indaaru mifa dinni taikasee dinni ani qaaramarasee karaambaiqa marunaki mar- iufa taikafufanoo kaifaa kambiqafinoo dinni ani qaaramoo kinanoo mifa qusasaa kuridiranaki fuannoo.

<sup>12</sup> Manda kaasau andau aanai qisaukuqara taikarafa miqimandee kai kasooqaqee karaambaiqauqa maqasaa moodaa kari kambiqafi maridaqa faiqí anaasee rakisi nimaqee faranoo. Mi namusa nári afeeka manda kaasau andau naida amisafanoo mifa misa faqa qusasaa faiqí anaasee rakisi nimaqaannoo.

<sup>13</sup> Mi karaambaiqausa qisaukuqara taikarasa moodaa irirana mari- ranasaa maridaqa nári afeeka faqa nári uriqararana faqa mi manda kaasau andauna pooduqida amimarifaranoo.

<sup>14</sup> Mi karaambaiqausa sipsipa aanaaqi Yisuna aruannee qimasee mina faqa rakifara. Yisufa narí rusandeesamumasee naaramaqaisa afeekaika- mandee Yisuna faqa fimariasa misa saimbaqa mi karaambaiqausa naru taikae faranoo. Mifa Yisufa aiqama karaambaiqa maridanoo aiqama

uriqararausa urinaaqararafa maridanoo minara Yisufa quandaki misa faqa naru taikaannoo.

<sup>15</sup> Mi qangiroofa kafaa mi anaaseenara qimaqiminoo qinau. Mi anaaseefa nammari amuaqusaa oqumaruna anee qafaananoo. Mi nammarifa moomoosa maqusa mariasa moomoo fasiqa anaasee ufa oosana oosana qimariasa kikiqamusinoo mi nammarinasaa maridanoo.

<sup>16</sup> Mi qisaukuqarana taikasee aanai nimanasaa karaambaigauqa mariasa faqa manda kaasau aandau faqa mi umuari mari anaaseenara fidiqaam-midaqa mina aiqama ainaina marasaifanoo mifa kaqi samu mariannoo. Misa miqoo mina amaqi namasai fanoo doo idaqama taikafuannoo.

<sup>17</sup> Mi karaambaigausa sia nariqa kai miqifaranoo. Anutufa qumee fuki faaki qinaqa misa sia irirainni misa nári iriranammifoo qimasee nári afeeka manda kaasau aandau amifaranoo. Anutufa narí ufa anoonaikianinna aukuanara afeesidanoo miqiannoo.

<sup>18</sup> Mi anaaseena anee qafaanafa mifa aiqama maaqa maaqa karaambaigausa rakisi nimaqemari maqusafa maridanoo.

## 18

### *Babiroonia maqusa Anutufa naru taikoo ufafa.*

<sup>1</sup> Qinee Yoohaneesa mi ainainausa qafamasee moo qangiroo qafaqifafana. Anutufa narí afeeka firaana amufanoo innaarunaindari maqasaa qumuroofanoo mina areenarafa firaqoo aiqama maqa maaqasaa areeneenoo kaaqa qamaqinau.

<sup>2</sup> Mifa firaa kari maaqi qimasee nameera qinau. Mifa doo kuridinoo firaa Babiroonia maqusa doo aqufinoo kuridinoo. Mi nakundunaki afaannauqa faqa nimanauqaindi qikairi faqaasauqa faqa ufiniuqa afaanna ufini kai fidiqaa irafauqa kai maridanoo.

<sup>3</sup> Mi maqusaanaasa nári ummuarirana faiqí anaasee narí deedeepa narí deedeepirana uainna nammariara foora aanaamuru mariasa niminoo innee naaqee qimasoo faqa neeneeusa maridaqa. Maqasaaqaraasa aanaamuru karaambaigauqa Babiroonia faqa ummuaridaqa naafeeqeeusa maridaqa. Aiqama maaqa maaqa pisinisa uqeeree mariasa Babiroonia maqannaasa kaaqa ainaina moomoo irairaaimarinanoo minannai munnimma moomoo maree mariasa maridaqa.

<sup>4</sup> Mi qangiroofa miqi qimasoo fanoo innaarunaindaraa ufa qinee Yoohaneesa moo iriqiafana. Mifa maaqi qimasee Anutuna ufa irimariasa qimanniminoo qinau.

Oo qini qiku qisauku innee mi maqusanakiqari doo aniaqa. Innee sia misa mandoosanaki keeqaaqa miqiqa sia misa nariranaki faqa keeqaaqa.

<sup>5</sup> Mi maqusaanaasa mandainaina fannoo naramuaaqa naramuaaqa inoo oorufiifanoo meerai innaarunai ooru maridanoo. Anutufa misa mandoosana qafaidanoo iridanoo.

<sup>6</sup> Misa inni mandaikamma nimaqoondée kai innee quandaki nári nimiaqa. Misa inni mandaikamannimaqoona akiaqara innee quandaki qaaraikamandee nimiaqa. Misa manda nammari inni nimunara innee quandaki mi kaafanaki kai idaqainna nammarina firaqoo nimifaqa naqa.

<sup>7</sup> Babiroonia maqannaasa nári nifaaqa areenarana faqa nári moomoo amiqira ainaina faqa nariqa maraqau. Mi ainainna amana kai innee aupurarana faqa ikifaafau qirana faqa misa nimiaqa. Misa náriara uriqarausee qimariana sia maasa keekoopau maridau. Maasa sia ikifaafau

qianauree qimariana akiaqara aupurarana faqa ikifaafau qirana faqa nimiaqa.

<sup>8</sup> Misa miqi qimaria mandainaina akiaqara misa firaqoo nidafirana faqa namuana faqa aurirana faqa ikifaafau qirana faqa aandaroo narirana faqa aiqama ainaina moodaa kari misa nifaaqa quqasaaqa. Misa mi maqusafa ida qama taikaannoo. Karaambaiqa Anutufa misa ufa irimarifa afeeka uriqararafa marifa maridanoo.

<sup>9</sup> Mi qangiroofa Babiroonia maqusara kaqi qinoo qinau. Maa maqa maaqanasaaqaraa karaambaiqauqa Babiroonia maqusaindaraa mandainaina maree mariasa mi maqusana idaqainna idamuna qafamasee firaqoo ikiraqeeffaranoo.

<sup>10</sup> Misa mi maqusana aupurarana qafamasee rufiasee nianai tatiaga maridaqa maaqi qimasee faiqiara foora mi maqa maaqana qimamifaranoo. Oo mandainaina, Oo naaquqara ainaina maa firaa afeeka maqusa Babiroonia moodaa faasaana kai ani mandoosana akiaqara kuridi taikaananoo.

<sup>11</sup> Maqasaa pisinisa fasiqauqa faqa mi maqusanara ikiraqaida maaqi qifaranoo, sia mi maqannaasa kafaa maasa amiqira ainaina marasee feefauru qimifaranoo.

<sup>12</sup> Sia kafaa moo fannoo maasa koora faqa siruaa faqa firaa feefauru aqimaria oosana oosana ooniuqa faqa marasee feefauru qimifaranoo. Sia kafaa moo fannoo maasa amiqira qamunna oosana oosana saasaakoona arirana faqa fidika arirana faqa marasee feefauru qimifaranoo. Sia moo fannoo maasa amiqira saqari faqa eereefanta aanainnai auqimaria ainainna faqa firaa feefauru aqimaria saqarinannai auqimaria ainainna faqa booroosannai faqa qainnannai faqa amiqira ooninnai faqa auqimaria ainainna sia kafaa marasee feefauru qimifaranoo.

<sup>13</sup> Sia moo fannoo ooruku oosana oosana faqa amiqimasee afundimaru ainainna faqa makaqa nammari faqa fadameena faqa parauqa faqa raisa faqa burimakau faqa sipsipa faqa qoosa faqa qoosa rarisee mari karana faqa karabusa ainainira faiqi faqa faiqi nimana faqa sia moo fannoo kaifaa mi ainainausa marasee munnimma qimifaranoo.

<sup>14</sup> Pisinisa imaria fasiqausa Babiroonia maqusara maaqi qimasee qifaranoo. Babiroonia maqannaasa innee niqaararee marifaqa adiafaa imarifaqa maree maria ainainausa doo kukeeqafinoo, ani munnimma moomoo faqa ani adiafaairafa kaaqa qaranasaa marina doo taikkeenoo sia kafaa paqurinnaranoo.

<sup>15</sup> Pisinisaiki maria fasiqausa Babiroonia maqannaasa amiqira ainaina feefaurumasee minannai firaa munnimma maree marusa mi maqusana aupurarana qafamasee rufiasee nianai tatiaga marida ikiraqeesee soofaaramaseeqa maaqi qifaranoo.

<sup>16</sup> Oo maa firaa maqusa mandainaina naaquqarafa kambiqanoo maridanoo. Mi maqusafa aanaaseera foora saasaakoona arirana faqa fidika arirana faqa afisirafa koora auqimaria oondana faqa firaa feefauru aqimaria ooniuqa faqa afaaqa auqirafa doo maqee dadi taikafinoo.

<sup>17-18</sup> Miqi qimaseenoo mi qangiroofa sipa kiateenara maaqi qinau. Aiqa sipa kiateenauqa faqa nari pooskurauqa faqa nari pasindiauqa faqa aiqama ooruku nammari amuaqumau nidaqa ainaini marusa Babiroonia idamuna qafeeqa nianai tatieeqa ikiraqeeqa maaqi qifaranoo. Sia moo maqusa maa firaa maqusa auqu faqaafa miqirafa maridanoo.

<sup>19</sup> Miqi qimaseeqa kookooma afaqa qumaree nikiaqa amoondunna kukupamaseeqa maaqi qifaranoo. Oo mandainaina naaquqarafa firaa

maqusa auqu faqaafa kukeegeenoo. Aiqama sipaki nusa ooruku nammari amuaqumau nusa maa maqusanakinaasa ainaina moomoo nimisaida firaa munnimma maree marunasa doo dauni mi aiqama ainainafa qama taikeenoo.

<sup>20</sup> Mi qangiroofa miqi qimaseenoo quandakufanoo Anutuna aiku asauku Babiroonia maqusara qimannimainau. Innee innaarunai mariasa faqa Anutuna aiku asauku faqa Yisufa niqiqoo fasiqausa faqa Anutuna tamummaqara fasiqauqa faqa innee aiqama asasiaqa. Mi maqusafa inni nari ifa mina akiaqara Anutufa maqee mi maqusana arifanoo kuridinoo asasiaqa.

<sup>21</sup> Miqi qimasoofanoo qangiroo moo amudaanai qimarufa ooni firaatia minannai mi aukuanu maru fasiqanaaseesa sakuma andaana andaana rimariqau. Mi ooninna fooqaa tia rafusu qumareenoo ooruku namariki aranaiqi aqinoo qinai. Mi firaa maqusana auqu faqaana Babiroonia maqusa ooni aqunnana amana kai aqusainanoo kukeeqafinaqa sia kaifaa qafeefaranoo.

<sup>22</sup> Minaki piripunna arimariasa faqa kaqikaa ufireena fuaqee mariasa faqa firaa ufireena kookaanuru fuaqee mariasa faqa aiqama musika fuaqee mariasa faqa sia kaifaa mi maqusanaki qafeefaranoo. Oosana oosana ainaini mariasa misa kukusi mariafa sia kafa irifaranoo, qaindi afai faqa siammirifaranoo.

<sup>23</sup> Sia minaki qooma qaannoo sia kafa nimundarana tutuqirafa marianoo. Babiroonia maqusai pisinisa imarusa faqa aiqama maqanna pisinisa imarusa faqa urinaaqararusa mariqau. Inni aukainaina maraqa nuasa nariqa unnaqira aukainainannai aiqama maqannaasa nikaruqidaqa.

<sup>24</sup> Anutufa nari aiku asauku fidika faqa nari tamummaqara fasiqauqa fidika faqa aiqama maqasaa kuqimarusa faqa Babiroonia maqusaki paqurunara narirana nimiannoo.

## 19

<sup>1</sup> Mi qangiroofa Babiroonia maqusara ufa qimasooafa quandafi ufa firaana innaarunai qifu pisipasamasoonaki maridaqa iriqiafana. Mi ufafa faiqi moomoo suqiqa maridara foora qinoo maaqi qiqau. Anutuna amooqiaqa. Faiqi asumu maree mariana faqa kaaqa qarana faqa firaa afeeka faqa maasa Anutunaindi maridanoo.

<sup>2</sup> Mifa mi umuari mari anaaseefa maqasaaqaraasa putaamannimaqee marunna akiaqara Anutufa mina arinai. Miqunara mina ufa nimirafa kuqaa andeeqarafa maridanoo. Mi anaaseefa Anutuna ainainira fasiqauqa kuqa narunara Anutufa arinai.

<sup>3</sup> Misa kafa faaqariqa qiqau. Anutuna amooqiaqa. Mi maqusana, Babiroonia maqusa idamuna fannoo naaru naaru ooru fimariannoo.

<sup>4</sup> Miqi qimasooafa faiqi firaasa moodaa fasiqa faqa qaara faqa qaara faqa Anutuna qaari fiq fiq iqa marusa faqa aandau qaara faqa qaara faqa marusa faqa Anutuna oorisa noorindari maqasaa aqufidaqa Anutuna amooqidaqa qiqau, misa kuqaa qidaqa, Anutuna amooqiaqa.

### *Sipsipa aanaaqi Yisuna amundara qoomaqa ufa.*

<sup>5</sup> Miqi qimasoofanoo ufa moo Anutuna qaarisaqari qufaqa iriqiafana. Aiqama Anutuna ainainimarusa minara rufieemarus, kaqiqeesa faqa uriqararusa faqa aiqama maasa Anutunara amooqiaqa.

<sup>6</sup> Miqi qimasoofanoo ufa moo faiqi moomoosa suqidara foora firaa ondainni nammari aqufidanoora foora innaarunai qinoora foora miqira

ufa fannoo maaqi qinau. Innee aiqamausa Anutuna amooqiya. Karaambaiqa maasa uriqarara Anutufa afeeka uqanna mifa narí aiqamai rakisin-nimaqarana doo oosana araseenoo uriqaranoo maridanoo.

<sup>7-8</sup> Tatufirana aruaninna sipsipa anaaqifa Yisuna amundarafara foora doo animaridanoo, minara maasa susuiqa asasiaqa mina uriqararana amooqiya. Mina aanaaqara foora Anutufa fuka siara eekara arimaruna aminoo maa siarana iraanee qufanoo irasee deedaqinoo maridanoo. Mi eekara siarafa Anutuna maqasaa fasiqa anaasee andeeqara oosana kikiqamusinoo maridanoo.

<sup>9</sup> Mi ufana qimasoofanoo mi qangiroofa qini Yoohaneesa qimaqiminoo qinau. Yoohanee maa ufana akara rua. Maa ufausa Anutuna kuqaa anoona ufa maridanoo. Anutufa sipsipa aanaaqi amundara qoomaqara naaree marisa susuida asasimariasa maridaqa.

<sup>10</sup> Miqi qimasoofofa qini daaquqoofa mi qangiroona aikuki doorindari aqufumafi amooqianeeriafanoo mifa qaoo qimaseenoo qinau. Oo anee sia miqia. Aiqama Yisufa kooroo ira anoona ufa qumaree mariasa ani faqa ani akaqaafasaa faqa moodaa ainainimarunausa maridaqara anee sia qini qimooqia Anutuna kai amooqia. Yisufa narí maru aukuana narí anoona ufa kooroinau. Mi ufafa kai Yisufa sia kambiqoo aukuana tamummaqara fasiqauqa naakufufaqa qimannimufaqa akara riqau.

*Eekara qoosasa marufa narí andeeqaranannai aiqamausa uriqararafaik-inau.*

<sup>11</sup> Mi qangiroofa miqi qimasoofofa innaarunai marida qafaafananoo innaaruna rakeemambufaqa akooqoo mariqau. Qinee minaki qoosa moo eekara arirana qafaqafana. Mina ataufakaaqa Yisufa ooqufaaqee maridanoo mina auqu qaara auqu faqaafa. Moo auqu amiqirafa mapukusee miqoo kai mari fasiqanee qinau. Moo auqu kuqaa ufa qimari fasiqanee qiqau. Narí andeeqara iriranannai kai faiqí anaasee ufa rainannimaqaidanoo minannai kai mandoosana maree mariasa rakirana marannimidanoo.

<sup>12</sup> Mina afu idauru miqirafa qeemarinau. Mina akiaqasaa karaambaiqa qafee moomoo afisinoo marinau. Mi fasiqana auqu narí afaaqai akara rinoo maridanoo sia moo fannoo qafaidanoo narí kai qafaidanoo.

<sup>13</sup> Mina qamunna afisimarufa fidika aanaaqi marinau. Misa mina auquara Anutuna ufafee qimariqau.

<sup>14</sup> Mifa narí qoosasa aiqarroofanoo mina aanaaqianna Anutuna innaarunaindaraa rakira ammiuqa aiqama nári eekara qoosasa nariqa qamunna eekara qamunna anukara qamunna afisirausa mina aanaaqianna mina afafee fiqau.

<sup>15</sup> Mina ookiqari aseema raiqarafa ani marinau. Minannai aiqama maqanna rafaqafuannoo, qainna samu uqirafa nidanoo rakisinni-maqaannoo. Mifa uriqarara afeeka Anutuna aanooqirafa aranandaki idara foora aiqama maa maqanasaaqaraasa mina ufa sia irimariasa afapita qumareenoo moodaanaki afapita rapidau inanoo faiqí fidika fannoo sauna tatira fara foommiannoo.

<sup>16</sup> Mina qamunnasaa faqa mina aikusaa faqa mina auqu moo maaqi qimasee akara rirafa Karaambaiquaqa karaambaiqa uriqararausa uriqararafa maridanoo.

<sup>17</sup> Qinee Yoohaneesa mina qafamaseeqa quandaki qangiroo moo suanisaa kikiqinoo marina qafeeqa. Mifa aiqama ufini innaaruna ameemaanai ni-

mariasa firaa kari nameera qimasee qimanniminoo qinau. Innee suqufiqa Anutuna firaa qoomaqa sakasee naaqa.

<sup>18</sup> Innee suqufiqa karaambaiquqa faqa sundiauqa faqa misa kia-teenauqa faqa qoosauqa faqa minasaa akaraqa mariasa faqa aiqama fasiqa rumbée mariasa faqa iduki mariasa faqa kaiqeesa faqa uriqararawsa faqa Anutufa misa aiqama narusainaqa misa nimaqi anireeqa Anutufa qoomaqa sakaseenoo misa nimaqi aniree naaqa.

<sup>19</sup> Suanisaa maru qangiroofa miqi qimasoo faqa quanda fi firaa rakirana qafaqiafana. Manda kaasau aandau faqa maa maqa maaqanasaa karaambaiquqa faqa nári rakira sundiauqa moomoo faqa suqufi eekara qoosasaa marufa narí ammi sundia namufaqa naruannee qimasoo faqa rakirana uqeeraqau.

<sup>20</sup> Qoosasaa marufa manda kaasau aandau uraaqaramafinoo rumba quqaseenoo inaaqianna kaasau aandau namufaqa rumba quqanau. Mi inaaqianaa kaasau andauna moo auqu unna qira tamummaqara fasiqa. Mi unna qira tamummaqarafa indaaruaqa kaasau aandau oorisa faiqí sia auqaqaa ira ainaina auquqoofa mi ainainnannai mifa faiqí anaasee nikaru qufaqa akaqausa niqinaaqa faqa nisauku uqannai faqa manda kaasau aandau akara maraqau. Akaqausa mi kaasau andaunara innaaru qimariqau. Eekara qoosasaa nimarufa mifa kaasau aandau mareeqee unna qira tamummaqara fasiqa faqa kaqi kasi mariafaqa qumareeqee ida farumaki aqinau. Mi idafa firaqoo aurukandaa kandaa idanoo afunda mandaikammimarinau.

<sup>21</sup> Eekara qoosasaa nimarufa narí ookiqari ani maru qaseemafa kaasau aandau ammi sundiauqa faqa maa maqa maaqana karaambaiqa ammi sundiauqa faqa aiqama naru taikasoo faqa innaarunai ufiniuqa qumuree aiqama misa nimaqi noofanoo nimuaqufaqa minnisaqau.

## 20

### *Wan tauseenna aukwana Yisufa rakisiu ufafa.*

<sup>1</sup> Qinee Yoohaneesa miqimaruna qafamasee quandaki innaarunaindari qangiroo moo fannoo maqa ameemaanai kiqa faqa kisaqa sainanda faqa asaukuki uqirafa maqai quminau.

<sup>2-3</sup> Qumureenoo qaareena qumaranau. Mi qaareenna moo auqu ooqeenaa sakani moo auqu Sadannafa moo auqu afaanna. Mi qangiroofa qumareenoo sainandannai rumbaseenoo maqa ameemaanai madikaki afeeqa aquseenoo rookamandeenoo amusaraseenoo wan tauseenna aukwana minaki mariannee qimasee quqanau. Mi kamuqoo sia maa maqa maaqanasaaqaraasa nikaruqiannoo. Mi wan tauseenna aukwana taikasainanoo Anutufa kafa idukusainanoo kaqikaqoo kafa nikaruqiannoo.

<sup>4</sup> Qaareena rumbasoo faqa qaari moomoo innaarunai ufiqinoo maru qafaqiafana. Minasaa ooqu mariqa marusara Anutufa innee faiqí anaasee ufa iriaqee qinau. Qinee miquna qafeeqa quandakufaqa faiqí nimana moomoo qafaqiafana. Misa Yisuna anoona ufa faqa Anutuna ufa faqa koorounara narusa nimana marufaqa nindafaqiafana. Misa sia manda kaasau aandau fee mina amanaree innaaru qimarusa mariqau. Misa manda kaasau aandau akara niqinaaqa faqa nisaukusaa faqa qaoo qimarusa mariqau. Misa kuqiranakiqari findi fiqa asauku mundirana saimbaqa karaambaiqaika mambiqqa faiqí anaasee rakisifaranoo. Mi uan tauseenna aukwana minasaimbaqa rakisifaranoo qinee qafaqiafana.

<sup>5</sup> Akaqausa kasooqagee wan tauseenna aukwana aiqarammafufanoo Anutufa inaaqiannaasa mara findifuannoo.

<sup>6</sup> Indaaru findifiraua Anutufa firaa asasirana niminaqa asasifaranoo. Inaaqianna findi firafa moo auqu inaaqianna kuqirafa mariannoo. Sia indaaru findifiraua urinaaqareefaranoo. Indaaru findifiraua Anutunaindi faqa asaku mundirana aanaiqikiraua maridaqa wan tauseenna aukwana Yisuna faqa faiqi aanaaseesaa rakisifaranoo.

*Sadannana narí aiku asaku faqa idaki aquaninna ufafa.*

<sup>7-9</sup> Mi uan tauseenna aukwana aiqarainanoo Anutufa Sadanna narí rumbaranakinaana idukusainanoo raudamakinoo aiqama maqasaa mariasa kafa nikaruqiannoo. Nikaruqimaseenoo naarainaqa moomoosa uqanna anireeqa nukudara foora qumbiqa aquififanoo Anutufa aidimari maqusaana Yeerusaree maqusa faqa Anutunara rimaria fasiqa anaaseesa faqa aiqama firaaqoo rafusu quqarumasee nariraree qiannoo. Aiqama maqannaasa suqimarusa Kookana maqannaasa faqa Makookana maqannaasa faqee qimarifaranoo. Rakuane qimarufanoo innaarunaindari ida firafa qumureenoo aiqama naru taikasoo faqa qinee qafaqafana.

<sup>10</sup> Naru taikasoo fanoo Anutufa faiqi anaasee nikaru qimaru afaannana rafuseeqeenoo ida farumaki afunda manda marunaki aqinau. Sia narí kai, ooqai manda kaasau aandau faqa unna qira tamummaqara fasiqa faqa marunaki afaanna rafusu aqinau. Miqoo misa maridaqa faasaana faqa eendaki faqa aupurarana maraidaqa naaru naaru marifaranoo.

*Anutufa taikara faasaana ufa qianinna ufafa.*

<sup>11</sup> Qinee Yoohaneesa miqiqufaqa qafamaseeqa quandaki qafaafananoo firaa qaari ufiqirafa eekara arimarunasaa minasaa ooqumaru fasiqana faqa qafaqafana. Mifa kooroo mafufanoo innaaruna faqa maqa faqa mina afusaaqari doo taikkeenoo taikafinau.

<sup>12</sup> Qinee miqoo qafaafananoo kuqiraua aiqama kuqiranakiqari findi fiqa Anutuna qaari aaqa ufa qiraree qimasee kikiqiqa mariqau. Uriqararaua faqa oorudupiraua faqa amana amana kai Anutuna oorisa kikiqiqa. Innaarunai mariasa mi kuqiraua akara papiqa qairiseenoo nisaana riqau. Papiqa moo kaqi mariasa nuqu papiqa faqa qairisee qafanau. Anutufa mi papiqanakinaana misa manda marirana nirana auqarana qafamaseenoo ufa mina amana kai nimirau.

<sup>13</sup> Anutufa qufanoo ooruku nammari fannoo kuqiraua minaki marusa mareeqeenoo Anutuna afusaa quqasoofanoo kuqirana faqa maqa ameemaanai kuqirana faqa nariki maria kuqiraua mareeqee Anutuna afusaa quqaqau. Quqasoofanoo Anutufa aiqama nári mandainaina auqoona akiaqara ufa nimirau.

<sup>14</sup> Kuqiranaki mariasa faqa maqa ameemaanai kuqiranaki mariasa faqa aiqama mareeqeenoo ida farumaki aqinau. Mi ida farumanaki aqimarinara inaaqianna kuqiranee qinau.

<sup>15</sup> Aiqamausa asumu maraaninausa papiqaki nuqu marisa misa kaqi marifaranoo mi papiqanaki nuqu sia marinausa misa aiqama mareeqee kaqi kasi marufanoo ida farumaki aiqama aqinau.

## 21

*Fuka innaaruna faqa maqa faqa auquaninna ufafa.*

<sup>1</sup> Maa nauraa maqafa faqa innaaruna faqa ooruku nammari faqa doo taikanau. Taikafufanoo fuka innaaruna faqa maqa faqa ooqeenana amaaqa maqasoofaqa qafaqiafana.

<sup>2</sup> Qinee qafaafananoo Anutufa qufanoo fuka naaquqara maqusa fuka Yeerusaree innaarunaindari qumureenoo ooqeenaa Yeerusaree amaaqa maqafufaqa qafaqiafana. Fuka anaasee amundaranara foora afaaqa auqirafa fuka maqasaa quminau.

<sup>3</sup> Qumuroofanoo ufa moo fannoo Anutuna innaaruna qaarisaaqari maaqi qimasee firaa kari qin角度. Doo maqee Anutuna maqusa faiqiki qumu maridanoo. Mifa misa faqa marinaqa misa mina faiqi anaasee marifaranoo. Anutufa nari uqanna misa faqa marinoo misa Anutufa mariannoo.

<sup>4</sup> Mifa aiqamausa naukunu rukaannoo. Sia kafaa kuqirafa faqa ikifaafau qirafa faqa ikiraqarafa faqa nidaqirafa faqa sia kafaa mifauqa mariannoo. Mi ooqeenaa ainainafa doo taikafinoo.

<sup>5</sup> Mi ufafa taikoofanoo qaarisa marufa qini qimaqiminoo qin角度. Doo qinee maqee aiqama ainaina fuka kai auqu quqaanaura. Maa ufausa akara rua, kuqaa anoona ufa maridanoo minasaa mundimaria ufafa maridanoo.

<sup>6</sup> Kafaa qimaqiminoo qin角度. Doo aiqama ainaina taikkeenoo. Qinee oosana araafanausa maridaqa taikaaninna aukuana faqaasa maridaqa. Nammariara nidimarisaa fuka maqakiqari ururee mari nammarina, kaqi marira nammari asoofarafa sia feefaurirafa kaqi nimianauranoo.

<sup>7</sup> Mandainaina rafaafufusee uriaaqararawsa qinee maa ainainna nimiranaura. Qinee misa Anutusa marianausa misa qini qimaakumara marifaranoo.

<sup>8</sup> Maparaa imariasa faqa ueeqee mariasa faqa kaaqa ufa rukiee mariasa faqa faiqi anaasee kuqa narimariasa faqa kaaqa faiqi aanaaseera rimariasa faqa aukainaina maraqa nuasa faqa tumunnai faiqi nimana auqusaida minara rufiasaida innaaru qimariasa faqa aiqama oosana oosana unna ufa qimariasa faqa mi mandoosanna maraqa nuasa misa maqusai ida farumaki marifaranoo. Miqoo ida firaafa fasafasainoo mandundi marifa mariannoo. Mi idana auqu inaaqianna kuqirafa maridanoo.

### *Fuka Yeerusaree anianinna ufafa.*

<sup>9</sup> Miqi qimasee qimaqimisoofanoo qangiroomoo fannoo qisauku dinni taikasee dinni ani qaara marasee marusakiqari aupurarana maqasaa teeqimariasakiqari moo fannoo aniree qimaqiminoo qin角度. Yoohanee anee mai anirainaga auniriranasaa kuqu sipsipa anaqina mina anaqa amundarana ani uqafiqaanana qafa.

<sup>10</sup> Miqi qimasooofanoo Anutuna maraqa fannoo qini daakufufanoo qangiroomoo fannoo rafusueeqeenoo kisaqa aqaanasaa quqaqisanau. Miqooqari naaquqara maqusa fuka Yeerusaree maqusa innaarunaindari Anutufinnaindari qumuna uqaqifiqanau.

<sup>11</sup> Qumimarufanoo faqa qumu marinanoo faqa minakiqari Anutuna kaaqa areenarafa minakiqari takunasoosa imarinau. Mi fuka maqusafa pupu ooni tanukaidara foora qeemarinau.

<sup>12</sup> Mi fuka maqusana faandaamurafa ooninnai auquqoofa marinau kisaqa amatooki kamminoo marinau minaki qisauquqara taikasee qiku ooqu qaaraqanda marasee kooqi marinau, aiqama kooqisaa qangiroomoo fannoo rakisimarinau. Mi kooqisasaa Isaraeena aiku asauku marusa qisauquqara taikasee qikunni ooqu qaara marasee nuqu mi kooqisasaa akara rinoo marinau.



<sup>13</sup> Suani oosana ururee maruqaannai faandaamurasaa qaaramoo kooqi mi qaannai marinau. Suani keeqee maru qaannai qaaramoo kooqi marinau. Suani dinni ataaqee qaannai qaaramoo kooqi marinau. Suani dinni ataaqee qaannai qaaramoo kooqi faandaamurasaa marinau.

<sup>14</sup> Mi ooni faandaamurana oosanaki qisauku qara taikasee qikunni ooqu qaara marasee firaa ooniuga marinau. Mi oonisasaa sipsipa aanaaqi Yisuna aiku asauku qisaukuqara taikasee qikunni ooqu qaara marasee marusa nuqu mi oonisasaa akara rinoo marinau.

<sup>15</sup> Mi qangirooma qini qimaqimimaruna asaukuki ruraa kooraa auqimaruna uqusee mariunannai mi fuka maqusana faqa faandaamura faqa kooqiuga faqa amanamasee qafanau.

<sup>16</sup> Mi fuka maqusana ataaqeeni faqa mina sandaaqai faqa amana amana kai marinau. Aiqama tu tauseenna faqa maqi handareeta faqa (2,400 kilometer) mina kisaaga miqimaseenoo kisaaga uqanna mi maqusana ati faqa marinau.

<sup>17</sup> Mi fuka maqusa faandaamurafa faina maqa qufisara foora auqirafa marinau. Mi qangirooma faandaamura maqasaqari ammuqunni amanamasee qafamaseenoo sikisti metera amana maridanoo fee qinau. Kisaaga uqanna marinau.

<sup>18</sup> Mi faandaamurafa pupu ooninnai auqirafa marinau, mi maqusanaki maaqauqa koorannai karasakiara foora ruqiaki qafee marufa idaaqirafa uqanna marinau.

<sup>19</sup> Faandaamura oosanasaa firaa ooniuga marufa firaa feefauru aqusaida maree maria ooniuga mi firaa oonisasaa afaaga auqiigee mariqau. Faandaamura firaa ooniuga qisaukuqara taikasee qikunni ooqu qaaraqanda marara ooni mapukira ooni nifaaqa auqira ooniuga maridaqa, nuqu faqaa ooniuga mariqau.

Moo ooni afaaga moo auqirafa mina auqu yasapeera marinau. Mifa saqari amanee arirafa amananda tanukaida qeemarufa marinau.

Moo ooni afaaga auqirafa mina auqu akafata marinau. Mifa dirindaasi ariranasaa indiri ooni arirafa marinau.

Moo ooni auqu eemararada marinau. Mifa pupu ooni moo saqari amanee arirafa marinau.

<sup>20</sup> Moo ooni auqu saradoonikisa marinau. Mifa pupu ooni moo eekara faqa saapaani ooniarra foora irafa faqa marinau.

Moo ooni auqu kananeeriana marinau. Mifa taatuqee saapaani marinau.

Moo ooni auqu koosa marinau. Mifa pupu ooni moo tumana arirafa marinau.

Moo ooni auqu beerira marinau. Mifa arooqa ooni fooqaafa saqari amanee arirafa marinau.

Moo ooni auqu toopasa marinau. Mifa pupu ooni miqirafa tumana arirafa marinau.

Moo ooni auqu karaseedooni moo ooni marinau. Mifa pupu ooni miqirafa saqari amanee arirafa marinau.

Moo ooni auqu tookueesa marinau. Mifa ooni moo saqari amanee arirafa marinau.

Moo ooni auqu ameeetisa marinau. Mifa arooqa ooni miqirafa pannoona arirafa amananda qafee marufa marinau.

Faandaamura firaa ooniuga mapukira ooni fee qiqaq misa nuqu miqiminoo maridanoo. Qisaukuqara taikasee qikunni ooqu qaaraqanda marasee marinau.

<sup>21</sup> Fuka Yeerusaree maqusa qikunni ooqu qaara marasee kooqi marinau. Aiqama kooqi faandaamurasaa maaqa kooqiara foora auqinoo marinau. Ooni firaana qumaree minaki ititee maru oonisa feefauru aqimari oonisa fira ooniuga oonda firaana fooqaafa marufaqa qafaqiafana. Maqusa qambaana faqa naambeeqai faqa aiqama amiqira koorannai auqirafa amananda qafee marufa marinau.

<sup>22</sup> Qinee Yoohaneesa fuka maqusa Yeerusaree qafamaseeqa naaquqara amaana maqara randeeqa sia marifaqa qafeeqa. Amaana maqa mari-noofau fifau mariqini. Karaambaiqa Anutufa uriqararafa sipsipa aanaaqi Yisufa faqa miqoo akooqoo marunara amaana maqa sia marinau.

<sup>23</sup> Suani faqa quqoona faqa marinaqau qafani. Sia mari qafeeqa. Maridanoofau fifau mariqini Anutuna narí fira areenarafa firaqoo kaaqa qamaqinoo maridanoo, sipsipa aanaaqi mi maqusana qoomara foora maridanoo.

<sup>24</sup> Aiqama maa maqa maaqanasaaqaraasa mi maqusana kaaqa qaranasaa nifaranoo. Misa karaambaiqauqa nári amiqira ainainauqa mi maqusanaki munu quqeefaranoo.

<sup>25</sup> Mi maqusa kooqisa aiqama faasaana atuanoo kai mariannoo eendaki faqa sia ititeefaranoo, sia eenda mariannoo kaaqa qarafa kai mariannoo, minara kooqi sia ititaidaqa.

<sup>26</sup> Aiqama maqa maaqasaa mariasa misa amiqira ainaina faqa misa uriqarara ainaina faqa maree aniree mi maqusanaki fuka Yeerusaree maqusaki kai quqeefaranoo.

<sup>27</sup> Sia moo manda ainaina fannoo mi maqusanaki keeqaannoo. Sia moo asaurira ainaina auqee mari fee unna ufa qimari fee sia mi maqusanaki keeqeefaranoo. Sipsipa aanaaqi fannoo maqasaaqaraasa narí papiqaki nuqu akara rumaqaisa misa kai mi maqusanaki keeqeefaranoo.

## 22

### *Kaqi marira nammariara qimaqoo ufafa.*

<sup>1</sup> Mi qangiroofa fuka Yeerusaree maqusa uqaqifiqaseenoo nammari miqoo maruna uqaqifiqanau. Mi nammarifa Anutuna faqa sipsipa aanaaqi Yisuna faqa maru qaarinakiqari qumuree fuka maqusa qambaana ooqu fimarinau. Mi nammarina auqu kaqi marira nammari fee qiqau. Amiqira nammari sia dumuna maqa maru nammarifa mi nammarifa mookoofa amanee kai randaida qumidanoo.

<sup>2</sup> Mi nammarina dinni dinni afai saqari kambiqanoo maridanoo. Mi saqarisa aiqama quqoonasaa qaamma iraidanoo kai maridanoo. Mina amanee aiqama maqannaasa aurirana teeroo taikannisee marifa mi saqari amaneefa maridanoo.

<sup>3</sup> Moo ainainara Anutufa aqurarainna ainaina sia mi fuka maqusanaki mariannoo, doo taikafuannoo. Anutuna qaari faqa sipsipa aanaaqi qaari faqa mi fuka maqusanaki maridanoo mina aiku asauku mi maqusanaki mariasa mina amooqifaranoo.

<sup>4</sup> Misa mina oori qafeefaranoo misa niqinaaqa mina auqu akara rinoo mariannoo.

<sup>5</sup> Mi maqusanaki asukuna taikanoo maridanoo sia kafa mariannoo. Misa sia qoomara suaniara iridaqa fifau maridaqa, Karaambaiqa Anutufa misa qooma marinaqa miqooqaraasa karaambaiqara foora naaru naaru rakisi nimaqeeefaranoo.

### *Yisufa doo qumuaninna ufafa.*

<sup>6</sup> Mi qangiroofa mi ainainausa uqaqifiqaseenoo qimaqiminoo qinau. Mi ufausa aiqama qimamunafa kuqaa minasaa mundimariafa marifaqa qimamiqa. Karaambaiqa Anutufa narí maraquna tamummaqara fasiqauqa nimirifa narí qangiroo niqiqaiqa mina ainainira fasiqa aanaaseesa qusasaa kambiqaaninna ainainausa uqannifiqaanifeera mi ainainausa ani uqafiqeeqa.

<sup>7</sup> Yisufa inniara maqasaa mariasara maaqi qidanoo, qinee qusasaa kafa ooqu fuanaura. Maa papiqanakinna ufa irisee mi mau fimariasaa misa asasifaranoo.

<sup>8</sup> Qinee Yoohaneesa mi ainainna aiqama qafamasee iriseeqa daaquoofaqa uqaqifiqee mari qangiroona aikuki maqasaa aqufiqa amooqianeeriafananoo mifa qaoo qimasee qinau.

<sup>9</sup> Oo sia miqia Anutuna kai amooqia. Qinee ani faqa moodaa ainaini marunausa maridaqa ani afasausa tamummaqara fasiqauqa faqa moodaa ainaini marunausa maridaqa. Maa papiqanakinna ufamau fimariasaa misa faqa moodaa ainaini marunausa maridaqa. Sia qini qimooqia Anutuna kai amooqia.

<sup>10</sup> Mi qangiroofa kafa qimaqiminoo qinau. Yoohanee anee maa papiqanakinna ufa tamummaqara ufa maridanoo sia qumeeraa, qimannimia. Aiqa maa ainainausa qusasaa kambiqaannoo sia amana quandasee kaifaa kisaqasaa fuannoo, qusasaa doo kambiqaannoo.

<sup>11</sup> Anaaseera fanandirana, faiqira fanandirana, miqida nariara nariara rimariasaa saina miqidaqa mariaqa, mandoosana mandoosana maree mariasaa saina miqidaqa mariaqa. Amiqira oosana maree mariasaa saina miqidaqa mariaqa. Maparaammasee amiqira oosana firaqoo maree mariasaa saina miqidaqa mariaqa.

<sup>12</sup> Doo iriaqa Yisufa inniara qidanoo. Qinee qusasaa ooqufuanaura. Innee maree marianna akiaqara uqiraua doo ooqu fiqa muqu nimianauranoo.

<sup>13</sup> Qinee oosana aroonakiqari marunausa maridaqa. Qinee taikaaninna aukuanna faqaasa maridaqa.

<sup>14</sup> Nari qamunanda nammari uqusee anukara qamunna faqaasa misa kai amana fuka Yeerusaree maqusa kooqiki keeqa fiqa kaqi naaru marira saqari qaqamma amana diqisee neefaranoo. Miqimariasaa asasifaranoo.

<sup>15</sup> Mi maqusana aqoosai kaaqa ufa rukiee mariasaa faqa aukainaina maraqa nuasa faqa faiqi anaasee nariara nariara fanandi mariasaa faqa faiqi anaasee kuqa narí mariasaa faqa saqarinnai faiqi nimana auqusaida innaaru qimariasaa faqa unna oosana auqimariasaa faqa unna ufa qimariasaa faqa misa aiqama aqoosai marifaranoo.

<sup>16</sup> Qinee Yisufa maa ufausa amaana maqaki keeqee mariasaa qimannimaqee qimasee qeeqa qangiroo aqiqeeqa. Qinee Dafidina oosankiqari minati maridaqa. Qinee kananaana duqudeeqiara maqi kaaqa qeemarunausa maridaqa.

(Yisuna saqariki mariasaa aiqama mina aqoonausara foora mariafanoo misara Yoohaneefa moodaanaki sipsipa aanaaqi Yisuna anaaqa fee qidanoo maa papiqanaki qidanoo.)

<sup>17</sup> Anutuna maraquna faqa sipsipa aanaaqi Yisuna anaaqa faqa aiqamausara mai aniaqee qidaqa. Aiqa maa ufana irimariasaa innee faqa quandafi niqoonausa naaraqa aniaqee qiaqa. Yisufa naaru marira nammari nimianee qidanoo. Aiqa nammariara nidimarisaa doo aniree naqa. Sia feefaurifaranoo, nidimarinausa kaqi naqa.

*Taikara ufa.*

<sup>18</sup> Qinee Yoohaneesa aiqamausa maa papiqanakinaa tamummaqara ufa irimariasa doori kandamasee aaquqimannimaqaidaqa faiqí moo fannoo maa papiqanakinaa ufa moo narí ufa minasaa ootupamasee qinafa mina akiqara Anutufa maa papiqanakinaa aupurarana narirana mara mi fasiqana ariranasaa ootupainanoo firaanaikiannoo.

<sup>19</sup> Kafaa faiqí moo fannoo maa papiqanakinaa tamummaqara ufa ati rafaafinanoo minara mi fasiqafa naaru marira saqari qaqama neemariana Anutufa rafaafuannoo sia naannee qiannoo mina naaquqara fuka maqusaki keeqaranara faqa Anutufa rafaafusee qaoo qiannoo. Maa papiqanakinaa ufamau sia fuanara qaoo qiannoo.

<sup>20</sup> Qinee maa papiqanakinaa ufa qima afeekaikammannimi marunausa Yisusa maaqi qimasee qimannimidaqa kuqaa uqanna qinee qusasaa innee iannai kaifaa ooqu fuanaura. Qinee Yoohaneesa minara maaqi qidaqa. Oo karaambaiqa Yisu doo qumuannee qidaqa.

<sup>21</sup> Karaambaiqa Yisuna amiqira afaarirafa inni aiqamausaki mariani.